

Kotira Uva



The New Testament and portions of the Old Testament in the
North Tairora Language of Papua New Guinea

Kotira Uva**The New Testament and portions of the Old Testament in the****North Tairora Language of Papua New Guinea****Nupela Testamen na sampela hap Olpela Testamen long tokples****Tairora long Niugini**

copyright © 1979, 1994, 2005, 2008, 2009, 2012 Wycliffe Bible Translators, Inc.

Language: Tairora

Dialect: North Tairora

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-26

PDF generated using Haiola and XeLaTeX on 22 Feb 2024 from source files dated 13 Dec 2023

909b265f-c886-56ae-b943-fdc12fe46c5e

Contents

Okara	1
Katu Varora	64
Kaarantura	91
Iosuaa	118
Qiata Vaiintinavu	128
Ruti	138
1 Samueri	143
2 Samueri	188
1 King	227
2 King	271
Nehemia	312
Estaa	337
Ihi	348
Uva Maara Koqera	466
Aisaiaa	502
Ieremaiaa	512
Danieri	588
Iona	600
Matiu	603
Maaki	658
Ruki	693
Ioni	750
Kaiqa Varora	788
Romeni	838
1 Korinti	862
2 Korinti	887
Karesia	903
Epasaasi	912
Piripai	920
Korosi	926
1 Tesaronaika	932
2 Tesaronaika	937
1 Timoti	940
2 Timoti	947
Taiäasi	952
Pirimoni	955
Hiparu	957
Iemi	976
1 Pitaa	982
2 Pitaa	989
1 Ioni	993
2 Ioni	999
3 Ioni	1000
Iuti	1001
Qoqaiqama Kora	1003
Uva okara	1030

OKARA (Genesis – Stat)

Kotiva ekaa haika autu kora

¹ Tota hoqarero Kotiva naaruvavata vatawata autu kero vatora. ² Vatawano qumina vauvaro kia vo haikavanovata vauvaro konkira aru haikava nora namariqaa mantaaqa kovaro Kotira Maraquivano namari viraqaa vi ani vaura.

1 Enta

³ Kotiva mintima tiro: Aatitaane, tuvaro aatita vura. ⁴ Kotiva aatitora tavovaro koqe iro vauvaro aatitora vira voqaa vatero konkiraiqura voqaa vatora.

⁵ Kotiva aatitora autu nteharo, Ikarave, tivakero konkiraiqura autu nteharo, Entaqive, tura. Entamaqiro viviro aatita vuvaro vi entava hoqarenaa enta taiqa vura.

2 Enta

⁶⁻⁷ Vi entara tonavuvanovata mamanavuvanovata nora namariqaa hihipaa iro vauvaro Kotiva tiharo, Ruqema vira virini oriniraro nora namarivano miani vairaro avutana qaqi variarire, tiro. Minti tuvaro Kotiva tunte iro, tonavuvanovata mamanavuvanovata nora namariqaa hiro ruqema viro virini orini vauvaro, nora namarivano miani vauvaro avutana qaqi vauvaro ⁸ Kotiva qaqi vaura vira autu nteharo, Naaruvave, tura. Entamaqiro viviro aatita vuvaro vi entava taara enta taiqa vura.

3 Enta

⁹ Vira qararaa Kotiva tiharo, Nora namari miani vairava vohaanaini otiniraro aahara vatavano qovaraiqama viro variarire, tiro. Minti tuvaro Kotiva tunte iro, namarivano vohaanaini otinuvuro aahara vatavano qovaraiqaa viro vaura.

¹⁰ Kotiva aahara vata autu nteharo, Vatave, tivakero namarivano vohaanaini otu vaura autu nteharo, Nora namarive, tura. Kotiva tavovaro nai autu kero vato haikava koqe iro vaura.

¹¹ Mintuvaro Kotiva tiharo, Vatawano vairaro viraqihairo qampiqhaarira haikava qovarai qiarire. Vo ukau vo ukauvano tava iraariravavata, vo katari vo katarivano tava iraariravavata qovaraiqiarire, tuvaro Kotiva tunte iro, vi haikava vi haikava qovaraiqama viro vaura.

¹² Vataqihairo qampiqe vau haikava qovarama vura. Vo ukau vo ukauvano tava ireharo kia hampi tava iraraitiro, nai tavaqai iraqiro vi vauvaro, vo katari vo katarivanovata tava ireharo nai tavaqai iraqiro vi vaura. Mintiaqiro vi vauvaro Kotiva tavovaro koqe iro vaura.

¹³ Entamaqiro viviro aatita vuvaro vi entava taaramo enta taiqa vura.

4 Enta

¹⁴ Vira qararaa Kotiva tiharo, Naaruvaini ataa i vaina haikava, vo haika vo haikavano qovarama viraro hini haikavano entaqira itaarira haikava vairaro hini haikavano aatitainaraqaa itaarira haikava variarire. Vi haikava vi haikava vaharo kara uti entarave, kara qanti entarave, tora itaqiro viro vuru taiqaaina entarave, ihi taiqaaina entarave, numiqaqiro vuanarove.

¹⁵ Vi haikava vi haikava naaruvaini viri kanta itaqiro viharo vataini ataama nimitaarire, tuvaro Kotiva tunte iro, vi haikava ataa iharo vaura.

¹⁶ Kotiva ataama nimitaaina haikara nora haika taaraqanta autu kero vatora. Kuarivano aatitainaraqaa itaqiro vuarire tiro, autu kero vatero, toravano entaqira itaqiro vuarire tiro, autu kero vatora. Viva makauve, quhaive, opuve, vaahoqurave, vi haikaravata autu kero vatora.

¹⁷ Vataini ataama nimitaqii vuarire tiro, Kotiva ekaa vi haikara naaruvaini vatora. ¹⁸ Vi haikava vi haikava aatitainaraqavata entaqivata itaqiro vuarire tiro, naaruvaini ekaa vi haikara autu kero vatora.

Konkiraiqirava nariara vairaro aatitarirava nariara variarire tiro, Kotiva vi haikara vi haikara autu kero naaruvaini vatora. Kotiva tavovaro nai autu kero vato haikava koqe iro vaura.

¹⁹ Entamaqiro viviro aatita vuvaro vi entava erakaimaante enta taiqa vura.

5 Enta

²⁰ Vira qararaa Kotiva tiharo, Vo haika vo haika qaqi variqiro vuarira haikava nora namariqi qovaramavi mpiqaate. Vo uviri vo uvirivano ata vare vi aniba naaruvainivata mpiqaate, tiro.

²¹ Manti tivakero Kotiva nora aantauvahи nora namariqi ni vai haikara autu kero ekaa vi haikava namariqi qaqi variqiro vuaina haikarave, ekaa nana nana haika qakiaina haikarave, vo haika vo haika autu kero vatero, vo uviri vo uviri aroka vataaka autu kero vatora. Kotiva tavovaro nai autu kero vato haikava koqe iro vaura.

²² Kotiva vi haikara vi haikara koqema nimitero tiharo, Ne namariqi varia aantauka kuvuaramaqi vivaro airiqiharo namariqi mpiqaarire. Ne uvirivata kuvuaramaqi vivaro airiqiarire, tiro.

²³ Entamaqiro viviro aatita vuvaro vi entava kauquru enta taiqa vura.

6 Enta

²⁴ Vira qararaa Kotiva tiharo, Vataqaa vo aantau vo aantauvano qaqi variqiro viharo nuarire. Kuvu vate aantaurave, qaakau aantauve, toveqive, memaruve, ekaa aantauvahivano vo aantau vo aantauvano vataqaa nuarire, tiro. Manti tuvaro Kotiva tunte iro, vi haikava vi haikava qovarama viro vaura.

²⁵ Kotiva qaakau aantau, vo aantau vo aantau autu kero, kuvu vate aantaura, vo aantau vo aantauvata autu kero, memaruve toveqive vo haika vo haikavata autu kero vatora. Kotiva tavovaro nai autu kero vato haikava koqe iro vaura.

²⁶ Mintuvaro Kotiva tiharo, Kaiqe tentanavu voqaara vaiinti autu kaari vika nora namariqi vai havukaukave, naaruvaini ataqi ni vai uvirikave, vataini kuvu vai aantaukave, qaakau aantauve, ekaa vikaqaa raqikiate, tiro.

²⁷ Manti tivakero Kotiva vaiinti vira nai voqaara autu kora. Viva nai voqaara qoraintivata nahentivata autu kero vatora.

²⁸ Kotiva vitanta koqema nimitero tiharo, Netanta vainti kuvuaramaqi vimanta nitanta vainti airiqihava vata maata mpiqaate. Te nitanta noraiqama kaari netanta nora namariqi vai havukaukave, naaruvaini ata vare ni vai uvirikave, ekaa vataqaa vai aantaukave, netanta ekaa vikaqaa raqikiqi vuante, tiro.

²⁹ Kotiva minti tivakero qaiqaa tiharo, Ekaa ahaikavano iraaina tavarave, ekaa katari-vano iraaina tavarave, te vi haikara nitanta nimiariraro nitanta karama varianarove.

³⁰ Ekaa aantauvahи vataini vaikave, ekaa aantauvahи naaruvaini vaikave, ekaa memaruve toveqive vataini vaikave, vika ne karava vaireva, ekaa mare vaina haikavama varianarove, tiro. Manti tuvaro Kotiva tunte iro vaura.

³¹ Kotiva ekaa haika nai autu kero vato haikara tavovaro voqama kero koqe iro vaura. Entamaqiro viviro aatita vuvaro vi entava 6 enta taiqa vura.

2

¹ Mintima kero Kotiva naaruvavata vatavata autu taiqakero vatora.

7 Enta

² Kotiva 6 entara kaiqa varaqiro viviro, ekaa haika autu taiqa kero, viva 7 entaqaa kia kaiqa vararaitiro, auraara vaura.

³ Kotiva kaiqa varaqiro viviro, ekaa haika autu taiqa kero 7 entaqaa nora auraara vaurara tiro, viva vi entara 7 enta koqema amitero virara, Maa entava aahuva enta auraara entama varianarove, tura.

⁴ Naaruvavata vatavata autukero vato okarava mintima vaura.

Ideni vataini

NORAVANO KOTIVA naaruvavata vatavata autukero vato entara, ⁵ hoqarero Noravano Kotiva kia aaqu vara kovarora tiro, kia katarive ukauve qampiqovaro vata tuqantaa kaarirava kia vauvaro ⁶ vataqihainaa namarivanoqai qovarama viro ekaa vata maata putaiqama keharo vaura.

⁷ Mintima vauvaro Noravano Kotiva vata varakero vaiinti autu kero vatero, nai qaqi variqiro vuaina aihora vaiinti vira aqiana vuqaq kovaro viva qaqi variqiro vuarirava vaura.

⁸ Mintuvaro Noravano Kotiva nai autukero vato vaiintira vira vita varero kuari uruntonaini Ideni vataini nai ututo naahoraqivi kura.

⁹ Vi naahoraqivi Noravano Kotiva tuvaro koqe katari, vo katari vo katarivano qampiqero vauvaro vika tava vaireva, koqe katari tava, ne tavava vaura.

Naaho avuta viraqivi katari taaraqanta vaura. Katari vo qaqi variqi vi katariva vauvaro, katari vo koqe kaiqave qora kaiqave tave vai katariva vaura.

¹⁰ Ideni naahoqihairo namari vo otu viharo vi naahora putaiqama kareva otu viharo naahoqihairo namari viva raira viro 4navuqaa otu vura.

¹¹ Vi namariva raira viro hoqare vura autu vaireva, Pisoni Namarive tura. Vi namariva otu viharo Havila vataini virante airantemaqiro vura.

¹² Havila vataini *kori* ori vauvaro, koqe una u haikava vauvaro, *vaheheqi/yaataiqi* vau orivavata vaura. ¹³ Pisoni Namari vauvaro vira naantiara namari vo, Gihoni Namari vaura. Gihoni Namarivano Kusi vataini virante airantemaqiro otu vi vaura.

¹⁴ Taara namari mintimake vauvaro vo namari Taigarisi Namari vaura. Taigarisi Namarivano Asiria vataini kuari uri mantaraini otu vi vaura. Ekaanaini Iufaretisi Namarivano vaura.

¹⁵ Noravano Kotiva vaiinti vira vita varero nai naahoqi Ideni vataini vuru kero tiharo, *Maaqi vaihara kaiqa varehara koqema kera ti naahoqaa raqikiane*, tiro. ¹⁶ Minti tivakero Noravano Kotiva kempukaiqama kero vaiinti vira tiva amiro tiharo, *Ekaa katari tava irataainara homa hiqi kera nenanrave*.

¹⁷ *Katari vo, koqe kaiqavata qora kaiqavata tave vaira, vi katarira tava kia hiqikera naane. Are vira nama kairera, are qutuma vinarave, tura.*

¹⁸ Noravano Kotiva tiharo, *Vaiinti viva nariaraa vaivaro kiama koqe ivo. Kaiqe te vira kahaqiainaara nai voqaara vo autu amitaare, tura.*

¹⁹ Hoqarero Noravano Kotiva vata vara kero viraqohairo ekaa aantauvahi vataini ni vaika autu kero vatero, ekaa aantau naaruvinai ni vaikavata autu kero vatero, vika vika ntita varero vaiintivano vika nutu ntava taarire tiro, viva vaunaini vika vuru kovaro vaiinti viva ekaa vika nutu ntava tovaro vika nutuvano mintimakero vaura.

²⁰ Vaiinti viva vika nutu ntavaqiro viharo ekaa vataini kuvu vai aantaukave, qaakau aantauve, ekaa naaruvinai viri kanta ataqi ni vai uvirkave, viva ekaa vika vika nutu ntava tora. Adaamuvu mintiaqiro vuvaro kia vikaqihairo vovano nai vira voqaava vira kahaqiarirava vaura.

²¹ Kia vauvarora tiro, Noravano Kotiva vaiinti vira vaita kovaro viva vaita aavata vuvaro vaiinti vira aantera vonku nkaqu kero qaiqaa mati tinta tora. ²² Noravano Kotiva aantera vaiintiqihairo nkaqu tora viraqohairo nahenti autu kero nahenti vira vita varero vaiinti viva vaunaini vuru kovaro ²³ vaiinti viva vira vira tavero tiharo,

Hove, viva ti voqaarama vaivo.

Vira vuhaarivata ti vuhaarivata vohaama vaivo. Vira mativata ti mativata vohaama vaivo.

Viva ti vaiintiqaahairo vara kero vira autu kairara ti, te virara nahentive turo, tiro. Minti tivakero turama.

²⁴ Kotiva mintimakero autu amitairara tiro, vate maa entara vaiintivano nai noka qoka keru nai naatantiro tampama viraro vitanta vaatavano vohaa vaatama varianaro.

²⁵ Vaiintivano nai naatantiro vauvaro vitanta utavaaqa kia vaumanta toka vahatanta kia kaurihatanta vaura.

3

Vaiintivano Kotira uva raqa kora

¹ Noravano Kotiva ekaa aantau autukero vatoraqihairo memaruvano vogama kero ugerara uva ti vauva vahentia tiharo, Quqaae Kotiva nitanta qioqama teharo ekaa katari tava maa naahoraqi iratainara kia naate tirave? tiro.

² Minti tuvaro nahenti viva memaruaru tiharo, Tetanta ekaa katari tava maa naahoraqi iratainara homa nararave. ³ Naaho avutaini vai katarira vohaiqa vira tavaqaima Kotiva titantara tiharo, Kia naate, kia utu varatee. Netanta vi tavara utu vare nama kaivera, netanta qutuma vivarave, tirave, tiro.

⁴ Minti tuvaro memaruvano nahentiara tiharo, Aqao, netanta kiama qutu vivarave.

⁵ Netanta vira nama kaivaro nitanta avu aatovano kenko tirama netanta koqe kaiqavata qora kaiqavata ho tavehama Kotira nai voqaarama vaivarare. Kotiva virara iriharo nitantara kia naate tiva tairave, tiro.

⁶ Memaruvano minti tuvaro nahentivano vi katarira tavovaro koqe katari tava iratovaro kaiqe ekaa kaiqa ho tavaare tivakero katari vira tava hiqi kero nero. Neharoma hini nai vaativata amuvaroma vivavata nero. ⁷ Vitanta nama kovaro vitanta avu aatovano kenko tumanta náitanta vaata tavovaro toka vaumanta kaurihatanta oru maura raqake irake náitanta vaata naavumate vaura.

⁸ Vitanta vaiha iruvaro eronaini Noravano Kotiva vi naahoraqi tuvu ni vaumanta vitanta oru katari avutaini kukeqavitanta viraqi vauvaro ⁹ Noravano Kotiva vaiinti vira aarero tiharo, Are taraqie variaro? tiro.

¹⁰ Minti tuvaro vaiinti viva tiharo, Are naahoqi tuvu nihara kunkukai tianara irima te toka vahara tima, qetake maini ani kukeqavi vauro, tiro.

¹¹ Vaiinti viva minti tuvaro Kotiva tiharo, Tavave ai vaatara toka vaivo tivarae are kukeqa vuaro? Te qioqama tauna katari tavarae are nama kaaro? tiro.

¹² Minti tuvaro vaiinti viva tiharo, Are nahenti ti timiarava, vivama katari tava hiqi kero tivata timimanta nauro, tiro.

¹³ Minti tuvaro Noravano Kotiva nahentiara tiharo, Are nanae vara kaaro? tuvaro nahenti viva tiharo, Aqao, memaruvano tiriara una uva timantama te katari tava hiqike nauro, tiro. ¹⁴ Minti tuvaro Noravano Kotiva memaruara tiharo,

Are una uva tianara kaara are ekaa aantauvahiqihaira qoraiqama vinarave.

Vira kaara are konkoma kanta vaharama auhaqaahaira ninarave.

Mintimaqira niharama konkoma namaqira viharama qutu vinarave.

¹⁵ Are kuvuara iravavata nahentivano kuvuara iravavata vitanta navutaiqiba variqi vivarave. Naantiara nahentivano kuvuara iarirava vovano ai qiaata rukavu kairara are vira aiqaa ataa nkaqa kenarave, tiro.

¹⁶ Minti tivakero Kotiva nahentiara tiharo,

Are vainti taiqama viraro ai vogamakero aihavi vairara vainti taiqamavira variqira vinarave. Are vainti vatareve ihara aihavi vairarama vatenarave.

Ai antuqavano nina vaatiara vairaro viva ariqaa raqikiqiro vuarire, tiro.

¹⁷ Minti tivakero Kotiva Adaamurara tiharo, Are nena naata uva irihara te qioqama tauna katari tavara nama kaanara kaara vatavano qoraiqama vuanarove.

Are vataini variqira vina entara vukaari utiharama kara utu namaqira vinarave.

¹⁸ Nimiri vankukavano urikuma vi vairara are ahakaqi karavano qampiqainara namaqira vinarave.

¹⁹ Ari toqaavu nte vairara kara utu namaqira vivira, vuru qutu vira qaiqaa vataqira vinarave.

Te vataqohai ai autu taurara variaravave. Are qutu vira qaiqaa vataqama vinarave, tiro.

Kotiva minti tura.

²⁰ Nahenti viva ekaa vo vatanaa vo vatanaaka vika nova variarirava vaurara tiro, Adaamuua nai naata autu nteharo Evaarave, tura.

²¹ Noravano Kotiva aantau paha varakero viraqohairo utavaaqa autu kero Adaamuravata vira naatavata nonku nimitora.

Kotiva vaiinti nahenti vitanta naahoqihairo aaqaini nititama kora

²² Noravano Kotiva tiharo, Ho tavaane. Vaiintivano tinavu aanantama kero vaharo koqe kaiqavata qora kaiqavata tave vaiva vaivo. Hauri viva nai kauqu tutukero vo katari tava, qaqi variqi vi vai katari tavara hiqi kero nama kero ekaa enta qaqi variqiro vuantorave, tiro.

²³ Minti tivakero Noravano Kotiva vaiintiara tiharo, Te ai vataqohai autu taurava are aaqaini vahara vata autamaqira vuane, tivakero Ideni naahoqihairo atitama kovaro aaqaini vurama.

²⁴ Noravano Kotiva vaiinti nahenti vitanta nititama komanta aaqaini vuvaro Ideni naaho hini mantaraini kuari avu urunaini maimaraara raqikiate tiro, enseli kem-pukanavu mini komanta vaura. Qaqi variqi vi vai katari tavara hiqike nevorare ti, vinavuka mini maimaraara raqikiha vauvaro iha ito iqoka paipevavata tuquantaa taqantaa iharo aera aera iharo mini vaura.

4

Keniva Abelira aru kora

¹ Adaamuua nai naata Evaakantiro nuvaro Evaava vainti taiqama viro vuru qorainti vainti vatatero vira autu nteharo, Kenirave, tiro. Viva tiharo, Noravano Kotiva ti kahaqimanta te qorainti vainti vatatauro, tiro.

² Minti tivakero varikero qaiqaa vainti taiqama viro vuru vira qata Abelira vatatero. Abelira vira vatatovaro noruqama viro Abeliva viva sipisipiqa raqiki vauvaro vira vakaava Keniva naaho kaiqa vareharo vaura.

³ Mintiaqitanta viha Keniva nai naahoqihairo kara qantu varero vuru Nora Kotira amitero.

⁴ Amitovaro Abeliva nai sipisipi vovano hogare vatato naatira vonku aru kero vira teqa kero mati koqera varero vuru Kotira amitora. Vitanta mintimake Nora Kotira amitoro Noravano Kotiva Abelira quahama amitero, Abeliva sipisipi aru amitora

viravata quahama amitero,⁵ Keniravata, Keniva kara amitoravata, Noravano Kotiva kia quahama amitovaro vira kaara Kenira arara itovaro inaara viri aratero vaura.

⁶ Keniva inaara viri aratero vauvaro Noravano Kotiva Kenirara tiharo, Nana kaarae ai arara itaivara variaro? Nana kaarae are inaara viri aratera variaro? ⁷ Are koqe kaiqa varairera, te homa ai quahama amitararave. Are kia koqe kaiqa varairera, qora kaiqavano gentianavaara autute vaiharo ai ravaaqavu kaanarove. Qora kaiqavano ai ravaaqavu kaantorave tira, are kempukaiqama kera qora kaiqa aatara kaane, tiro.

⁸ Noravano Kotiva minti tuvaro Keniva kia vira uva iriraitiro, variro nai qatara tiharo, Varaiqetanta aaraini nuare, tivakero nai qata vita varero viro vuru Keniva nai qata Abelira ahakaqi aru kora.

⁹ Aru kovaroma Noravano Kotiva Kenira irero tiharo, Ai qatavano Abeliva tantoe vaivo? tiro. Minti tuvaroma Keniva tiharo, Te kiama vira tavauro. Kia te tenta qataqaa raqiki vauraukavauve, tiro.

¹⁰ Minti tuvaro Noravano Kotiva tiharo, Are nana haikae vara kaaro? Te tavauraro ai qata naarevano vataqaa nteharo tiriara nai vuntu kaane tivera, te are nena qata aru kaanara kaara¹¹ ai qoraiqama amitarerave. Are nena qata aru kaararo vira naarevano nteharo vataqai otiqetaira kaara vatavano kiama ho ai kahaqianarove.

¹² Are kara utu terava kiama koqema kero qampiqaanarove. Are kia vohaa vatainiqui vairaitira, are katu varera hampiqaama kera vo vata vo vatainivariqira vinarave, tiro.

¹³ Noravano Kotiva minti tuvaro Keniva tiharo, Oho, are noraiqama kera ti titianara kaara te kia ho qaqi vairarave.

¹⁴ Are maa vataraqahaира ti tititaaravera te kia ai avuqaa ho vairaiti, te katu vare vo vata vo vatainivampiqaamavи ni variariraro vo vaiintivano ti ranta kaarirava ti haruma kaanarove, tiro.

¹⁵ Keniva minti tuvaro Noravano Kotiva aqao tiro. Kiave, vovano ai aru kairera, te vaiinti 7navu aruke ariqaa vuntu karerave, tiro. Minti tivakero vovano Kenira ranta kero vira aru kaantorave tiro, Noravano Kotiva vira vaataqaa vuka voqara qara ntua tora.

¹⁶ Mintima kovaro Keniva Kotira avuqaahairo katu varero kuari avu uruntonaini, *Vi-Ania-Vatarave* tunaini vaireva vurama.

Kenira anku

¹⁷ Keniva nai naatantiro nuvaro vira naatavano vainti taiqama viro vuru qorainti vainti Enokira vatatora. Vatatoraro vi entara Keniva nora vatuka autu kero vaharo nai maaqu Enokira autu vara kero vi vatukaravata autu ntava teharo Enokive tura.

¹⁸ Enokiva noruqama viro qorainti vainti Iraatira vatatoraro Iraativa noruqama viro nai maaqu autu nteharo Mehuserirave tura. Mehuseriva Metuserira qova vauvaro Metuseriva Lamekira qova vaura.

¹⁹ Lamekiva noruqama viro nahenti taaraqanta vara tovaro avuhainaa nahenti autu Adaava vauvaro vira naantiara varato nahentira autu Silaava vaura.²⁰ Adaava qorainti vainti vatatova vira autu Iabaariva noruqama viro ekaa vaiinti nahenti seri naavuqi variqi viha purumakau kaiqave sipisipi kaiqave varoka, vika qova vaura.²¹ Iabaariva vauvaro vira qata lubaariva vaireva, ekaa vaiinti *aanumaara/noma* vuaqe vaukave, *kitaa* voqara ruquti vaukave, viva vika qova vaura.

²² Adaava vainti vatatotanta mintima vauvaro Silaava qorainti vainti vira autu Tubaari-Kenira vatatora. Tubaari-Keniva noruqama viro *aini* orivata *baraasi* orivata vara kero viraqohairo kaiqa varo haikara, vo haika vo haika autu kora. Tubaari-Keniva vauvaro vira aura autu>Namaava vaura.

²³ Lamekiva nai naatatantara mintima tiro:

Adao, Silaao, netanta ti uva iriate.

Te Lamekikave, netanta ti naatatanta iri vaiqe tiare.

Vaiinti vovano ti teqa kaira kaara te nai aru kauro.

Vi vaiintiva quvaaaraa vaintivano ti ruqutimanta te vira kaara nai aru kauro.

²⁴ Vaiinti vovano Kenira ranta kero aru kairera, vira kaara vaiinti 7navu aru keroma viraqaa vuntu taanarove.

Vaiinti vovano te vaiinti vo aru kaunara kaara ti Lamekika aru kairera, vira kaara vaiinti 77navu aru keroma tiqaa vuntu kaanarove, tura.

Setika Enosika anku

²⁵ Adaamuva qaiqaa nai naatantiro nuvaro vira naatavano vainti taiqama viro vuru qorainti vainti vatatero vira autu nteharo, Setirave, tivakero mintima tiro: Kotiva Keniva Abelira aru kairara iriharo qorainti vainti vo ti timivo, tura.

²⁶ Setiva noruqama viro qorainti vainti vo vatatero virara, Enosirave, tura.

Vi entaraqahaира vaiinti vika hoqaramake Nora Kotira aare vaura.

5*Adaamura anku okara*

¹ Adaamura anku okara vaireva, maantimama vairo: Kotiva vaiinti autu kareva iharo viva nai voqara autu kero vatora. ² Viva vaiinti nahenti vitanta autu kero vitanta quahama nimitero vitantara vaiintive nahentive tura.

³ Ho Adaamuva 130 ihi vara kero qorainti vainti vo vatato varo vi vaiintiva nai qora voqara vauvaro vira autu nteharo, Setirave, tura.

⁴ Setira vatato entaraqaahairo Adaamuva 800 ihi varaqiro viharo vo vainti vo vainti, qoraintivata nahentivata vataqiro vi vaura. ⁵ Adaamuva maa vataraaqaa 930 ihi qaqi variqiro viviro, vuru qutu vura.

⁶ Setiva 105 ihi vara kero viva qorainti vainti Enosira vatatora. ⁷ Viva Enosira vatato entaraqaahairo 807 ihi varaqiro viharo vo vainti vo vainti, qoraintivata nahentivata vataqiro vi vaura. ⁸ Setiva 912 ihi qaqi varaqiro viviro, vuru qutu vura.

⁹ Enosiva 90 ihi vara kero viva qorainti vainti Kenaanira vatatora.

¹⁰ Viva Kenaanira vatato entaraqaahairo 815 ihi varaqiro viharo vo vainti vo vainti, qoraintivata nahentivata vataqiro vi vaura.

¹¹ Enosiva 905 ihi qaqi variqiro viviro, vuru qutu vura.

¹² Kenaaniva 70 ihi vara kero viva qorainti vainti Mahararerira vatatora.

¹³ Viva Mahararerira vatato entaraqaahairo 840 ihi varaqiro viharo vo vainti vo vainti, qoraintivata nahentivata vataqiro vi vaura. ¹⁴ Kenaaniva 910 ihi qaqi varaqiro viviro, vuru qutu vura.

¹⁵ Mahararerira 65 ihi vara kero viva qorainti vainti Jaretira vatatora.

¹⁶ Viva Jaretira vatato entaraqaahairo 830 ihi varaqiro viharo vo vainti vo vainti, qoraintivata nahentivata vataqiro vi vaura. ¹⁷ Mahararerira 895 ihi qaqi variqiro viviro, vuru qutu vura.

¹⁸ Jaretiva 162 ihi vara kero qorainti vainti Enokira vatatora. ¹⁹ Viva Enokira vatato entaraqaahairo 800 ihi varaqiro viharo vo vainti vo vainti, qoraintivata nahentivata vataqiro vi vaura. ²⁰ Jaretiva 962 ihi qaqi variqiro viviro, vuru qutu vura.

²¹ Enokiva 65 ihi vara kero qorainti vainti Metuseraara vatatora. ²² Viva Metuseraara vatato entaraqaahairo 300 ihi varaqiro viharo vo vainti vo vainti, qoraintivata nahentivata vataqiro vi vaura. ²³ Enokiva 365 ihi qaqi variqiro vi vaura. ²⁴ Enokiva Kotira avuqaa koqema kero ni vauvaro Kotiva vira vita varovarora tiro, viva maa vataraaqahairo tuqaakuma vura.

²⁵ Metuseraava 187 ihi vara kero qorainti vainti Lamekira vatatora. ²⁶ Viva Lamekira vatato entaraqaahairo 782 ihi varaqiro viharo vo vainti vo vainti, qoraintivata nahentivata vataqiro vi vaura.

²⁷ Metuseraava 969 ihi qaqi variqiro viviro, vuru qutu vura.

²⁸ Lamekiva 182 ihi vara kero qorainti vainti vatatero ²⁹ vira autu nteharo, Noaarave, tivakero mintima tiro: Noravano Kotiva Adaamura atiharo maa vatava qoraiqamama vuuanarove tura kaara tenavu vukaari utiha kara utu namaqi vi vaunarave. Ho maa vaintiva noruqama viro tinavu kahaqairaro vuaqa ntairaqe tenavu vi kaiqara varaare, tura.

³⁰ Noaara vatato entaraqaahairo Lamekiva 595 ihi varaqiro viharo vo vainti vo vainti, qoraintivata nahentivata vataqiro vi vaura. ³¹ Lamekiva 777 ihi qaqi variqiro viviro vuru qutu vura.

³² Noaava 500 ihi vara kero Semiravata Haamuravata Iapetiravata vatatora.

*Vaiinti nahenti voqamake qora kaiqa vare vaura***6**

¹ Vaiinti nahenti maa vataraaqaa vaha vainti kuvuaramaqi vivi, airi nahenti vaintivata vatatomanta ² kempuka vaiintinavu tavomanta qaqi vaiintivano vatato nahenti vaintika koqe nahenti vaumanta vika nai vi nahentika varaataa umanta vare vaura.

³ Minti vauvaro Noravano Kotiva tiharo, Vaiintivano variqi vi vuru qutu vikama variavo. Vira kaara te tenta aiho vaiintiqi vuaqa kaarirava kiama ekaa enta vikaqi variqiro vuuanarove. Vika 120 ihiqai maa vataraaqaa qaqi variqi vuate, tura.

⁴ Vi entaravata naantiara entavata uritarake vau vaiintika maa vataraaqaa vaura. Kempuka vaiintinavu qaqi vaiinti vatato nahenti vaintika varate vaumanta vika vaintinavu vaireka, uritarake vau vaiintika vaha nora kaiqa vare vauvaro vika nutuvanovata uritara kero vaura.

⁵ Noravano Kotiva vaiharo tavomanta vaiinti nahenti vika maa vataraqaa variqi vi vauvaro vika qora kaiqavano uritara kero vauvaro vika avu aatoqi qora kaiqa vaaqu kaiqa varevaqai vaura.

⁶ Mintuvaro vira kaara Kotira muntukavano qoraiquvaro viva tiharo, Oho, kia te vaiinti autuke vataqaa vataataarave, ⁷ tivakero tiharo, Te vaiinti nahenti autuke vataurauka te vika vehi autu kaari vika kia maa vataraqaa variate. Vaiinti nahentive, aantauve, toveqive, memaruve, vataqaa ni vaikave, naaruvaini ata vare ni vaikave, te ekaa vika vehi autu karerave. Ti muntukavano qoraiqama ivo. Kia te vi haikara autuataarave, tiro.

⁸ Minti tivakero Noravano Kotiva Noaararaqai quaheharo vaura.

Noaava varo kaiqara

⁹ Noaara okara maantimama vairo: Noaava koqe vaiintivano vaiharo avuqavu ni vau vaiintivu vaumanta vaiinti nahenti viraqaa uva vateva kia vauvaro viva Kotira uva iriqiro vi vaura.

¹⁰ Viva qorainti vainti taaramonavu Semirave, Haamurave, Iapetirave, vatakero vatora.

¹¹ Vi entara Kotiva tavomanta maa vataraqaa vauka qoraiqama vi vauvaro qora kaiqa varevave, iqoka raqvavave, vi haikavaqai maa vataraqaa vaura.

¹² Kotiva tavomanta maa vataraqaa vau vaiinti nahentika qora aaraqaa nireka auti vaiha voqamake qoraiqama vi vauvaro ¹³ viva Noaarara mintima tiro: Vaiinti nahenti qora kaiqa vare variavaror tiro, iqoka raqi okaravaqaima vataini vaivo. Vira kaara te vainti nahenti namariqohai vehi autu karerave. Te vikavata vatawata vehi autu taiqa karerave. ¹⁴ Virara iriharama are *sipi* vo koqe katariqohair autuane. Viraqi vo kavaqaara vo kavaqaara autu kera vatera, *sipi* avutaqvata vahaqainivata vankora *iva/qume* taatau taane.

¹⁵ Maantima kerama autuane: *Sipi* hini hini mantaraini 130 *mita* autu tera, taurini hini hini mantaraini 22 *mita* avatama kera autu tera, viriniara 13 *mita* avatama kera autuane. ¹⁶ Mintima autu vuru taiqa kera *sipi* qiatawata autu taiqa kera, qiata vira muntuvi auvahianta kia ekaara tinta karaitira, inaaraqi hini *mita* qaqi kairaro ataa iarie. Avutaqi tainta vo autu tera, vira vuruvi tavaaran tainta vo autu tera, vira vuruvi ekaaraqaa tainta vo autu taane. *Sipi* vira hini taageni qenti vo aututaane.

¹⁷ Mintima kera *sipi* autu vuru taiqa kairage te huvura namariqohai ekaa qaqi variqi vi vai haikara vehi autu taiqa karerave. ¹⁸ Mintimakevata, te ainti vaiha vohaa uva tiva taatauke vatarerave. Arevata nena maaqunavuvata, nena naatavata, nena maaqu naatanavuvata, *sipi* viraqti origeteatae.

¹⁹ Vo aantau vo aantau qaqi variate tira, vikaqihaira nahe qora vohaiqa vohaiqa ntita varera vuru *sipi* viraqi vera kaane. ²⁰ Vo uviri vo uvirive, ekaa vo aantau vo aantauve, ekaa toveqive memaruve, nahe qoraqai ainti *sipi* qaiha kia qutu viraiti, qaqi variate. ²¹ Are nentananu karavata, ekaa aantauvahii karavata, qantukera varera vuru *sipi* viraqi vatairaro ninavu karavata, vika karavata, ho variarire, tiro. ²² Minti tuvaro Noaava Kotiva tunte ura.

7

Nora huvura namari

¹ Noravano Kotiva minti tivakero mintima tiro: Te tavaurara areqaima nena navunaa vaiintiqihair koqe vaiinti varianrarara tira, arevata nena vaiinti nahentivata *sipi* viraqi origete variate. ² Aantauvahiqihair ne ho ne aantauvahira nahe 7navu qora 7navu ntita vara vera *sipi* kaane. Qaiqaa aantauvahiqihair ne kia ho ne aantauvahira nahevata qoravata ntita vara vera *sipi* kaane.

³ Are vo uviri vo uviriqihairavata nahe 7navu qora 7navu ntita vara vera *sipi* kaane. Are mintima kehara ekaa aantauvahii vara vera *sipi* kairamanta vika kia qutiraiti, qaqi variqi vuate.

⁴ Maa entaraqaahai 7 entananu aitarairaqe te aaqu vara kaariraro aaquvano qaqiqai ntuvaqiro viharo 40 entara, entaqivata aatitainaraqaavata ntuvaqiro viharo vataini qaqi variqiro vi vai haikara te autuke vataurauka ekaa aru taiqa kaarire, tiro.

⁵ Minti tuvaro Noaava Noravano Kotiva tunte iro ekaa haika autu vuru taiqa kora. ⁶ Ho Noaava 600 ihi vara ko entara huvura namarivano ekaa maa vatara aqu ravaaqavu kora.

⁷ Noaavavata, vira maaqunavuvata, vira naatavanovata, vitanta maaqunavu naatavaravata, huvura namarivano haruantorave tivake, *sipi* viraqi origete vaura.

⁸ Qaqi aantauvata, kia naa aantauravata, vo uviri vo uvirivata, memaruvata toveqivata, ekaa vataini vau aantauvahika ⁹ qoravata nahevata Kotiva tunte iro Noaava *sipi* vika vara vera kovaro ¹⁰ enta 7navu aitarovaro huvura namarivano vataini qovarama vura.

¹¹ Noaava 600 ihi varako entara, 17 enta 2 toraqaa, vataqihairo nora namarivano kumpetaqiro uri vauvaro naaruva qantua vuvaro ¹² nora aauvano ntura. Nora aagu ntuaqiro viharo 40 enta, entaqivata aatitoraqaaavata nti vaura.

¹³ Aagu ntire u entara Noaava nai maaqunavu Semiravata Haamuravata Iapetiravata, Noaara naatavata, vitanta maaqunavu naatavaravata ntita varero *sipi* viraqi oriqtetora.

¹⁴ Vinavuka *sipi* oriqete vaumanta ekaa qaakau aantauvahive, ekaa kuvi vate aantauvahive, ekaa memaruve toveqive, ekaa aroka vataa uvirive, vika vika vinavuka hampata *sipi* oriqete vaura. ¹⁵⁻¹⁶ Kotiva Noaaraara tuntetmake ekaa qaqi variqi vi aantauvahika qoravata nahevata *sipi* viraqi oriqete vauvaro Noravano Kotiva naivan vika genti tinta nimitora.

¹⁷ Qenti tinta nimitovaro aauvano 40 entara ntuaqiro vi vauvaro huvura namarivano vataqihairo qaqiqai uriharo *sipi* vira auku varovaro namari turu kanta vaura. ¹⁸ Huvura namarivano qaqiqai kumpetaqiro uri vauvaro *sipivano* namari turu kanta vaharo vi ani vauvaro ¹⁹ huvura namarivano qaqiqai kumpetaqiro uriro ekaa vata maatavata nora ainqinavata nampiqama kora. ²⁰ Huvura namarivano qaqiqai kumpetaqiro uriro ekaa nora ainqinavata uri aatara kero oru viro, oru vogavata ⁷ *mitaqaa* oru ntero taigora.

²¹ Huvura namarivano mintimake vaumanta ekaa vataqaa qaqi variqi vi vau haikauka, uvirive, kuvi aantauvahive, qaakau aantauvahive, vaiinti nahentive, ekaa qutu vura.

²² Ahara vataqaa aiho vare vau haikauka ekaa qutu vura.

²³ Ekaa qaqi variqi vi vau haikauka, vaiinti nahentive, aantauvahive, uvirive, ekaa vi haikauka vi haikara Noravano Kotiva vehi autu taiqa komanta Noaavavata, vira hampata vaukavata, vikaqai *sipi* qaqi vaha koqemake vaura.

²⁴ Huvura namarivano 150 entara vaharo ekaa vata maata ravaaqavu kovaro namari virivanoqai vauvaro kia vata maata virivanovata vaura.

8

Huvura namarivano taiqa vura

¹ Noaavavata vira hampata vaukavata *sipi* viraqi vauvaro Kotiva qaiqaa vikara iriharo uvai varakovaro uvaivano uti vauvaro namarivano otini vaura.

² Huvuravano 40 entara kumpetaqiro uri vauvaro, viraqaaahairo naaruva tinta kovaro aagu ntua tanta vuvuro vataqihairo kumpetaqiro uri vau namarivavata taiqa vuvuro ³ namarivano oti vaiqi oti vaiqimaqiro viharo kauquru torara mintiaqiro vuvuro ⁴ 7 tora 17 entaqaa *sipi* vira Araraata Aiqinaqaa muntu kovaro vaura. ⁵ Viraqaaata vauvaro namarivano oti vaiqi oti vaiqimaqiro vi vauvaro 10 tora 1 entaqaa aiqina qoqaa qoqaa iro vaura.

⁶ Mintuvaro 40 entanavu aitarovaro Noaava vata aaharaiqainara ampeqamake tavareva *uintua* vo qantuakero ⁷ memora atitovaro vahaqaini oru viro qumina ata varero virante i vauvaro vatavano aaharaiqama vura.

⁸ Memoravano mintiaqiro viharo kia orurante anuvaro Noaava vata aaharaiqainara ampeqamake tavareva viva uviri vo mirura voqara atitovaro oru niharо tavovaro ⁹ namarivano qaqiqai vataqaa vauvaro vi uviriva utaarirava kia ho vauvaro viva orurantero qaiqaa anintero, Noaava *sipi* vauraqi oriqtareva uvaro Noaava nai kauqu tutukero vira utu varero *sipi* vara vera kora.

¹⁰ Viraqaaahairo 7 entanavu aitarovaro Noaava *sipi* qaiqaa vi uvirira atitovaro ¹¹ uviri viva oru niro eronaini orurantero *orivi* katari mare qaraaka raaqu varero anuvaro Noaava vira tavero kankomakero iruvuro huvura namarivano vataqaaahairo otinuvuro ¹² viraqaaahairo Noaava naavuqi ⁷ entanavu voqavata varikero, qaiqaa uviri vira atitovaro viro, kia qaiqaa orurantero aniraitiro, ekaara mini vura.

¹³ Noaava 601 ihi vara kovaro 1 ihi 1 entaqaa ekaa huvura namarivano otinuvuro vatavano aaharaiqama vuvuro Noaava *sipi* qaiqaa aquto haikara qaqini varakero viti viri tavovaro vata maata aaharaiqama vuvuro ¹⁴ 2 tora 27 entaqaa tavovaro vatavano anom kero aaharaiqama vura.

¹⁵ Vatavano aaharaiqama vuvuro Kotiva Noaaraara tiharo,

¹⁶ Arevata, ai naatavanovata, nitanta maaqunavuvata, vika naatanavuvata, nenavu *sipi* veva ntaate.

¹⁷ Ekaa aantauvahivata uvirivata ninavu hampata variaka vara veva kairamanta vika kuvi aramaqi viha ekaa vata maata mpiqaate, tiro.

¹⁸ Minto tumanta Noaavavata, vira naatavanovata, vitanta maaqunavuvata, vika naatanavuvata *sipi* veva ntomanta ¹⁹ ekaa aantauvahivata uvirivata *sipi* veva nai naantiara nai naantiara vahaqaini levante vura.

Noaava Kotira quahama amitora

²⁰ Noaava vevantero Nora Kotira quahama amitareva iharo vo ori vo ori varakero ofaa tainta aututero viraqaahairo ho Kotira amiaina uviri aantauraqihairo hini varakero arukero, taintaqaa Kotira kaintu iha quara amitero. ²¹ Iha quara amitovaro Noravano Kotiva vira tavero quahakero tiharо,

Te vaiinti okara iruramanta vika vainti naatikaahai qora kaiqa varevaqai vika avu aatoqi vaimanta variarave.

Mintiamantavata, kia te qaiqaa vaiintivano qora okara autira kaara maa vatarara tiararo qoraiqama vuanarove.

Kia te qaiqaa ekaa qaqi variqi vi vai haikara namariqohai vehi autu taiqa karerave.

²² Maa vatava variqiro viraro kara uti entavave, kara qanti entavave, vi entava vi entava homa varianarove. Antaaina entavave, totoqaaina entavave, nora kuari itaaina entavave, kia nora kuari itaaina entavave, entaqive aatitaainaraqaave, maa vatava vairaro vi entava vi entava variqiro vuanarove, tiro. Minti turama.

9

Kotiva Noaakantiro uva tiva taatautora

¹ Kotiva Noaaravata vira maaqunavuvata koqema nimiteharo tiharо,

Ne vainti vata kuvuaramaqi vimanta ni vaintivara airiqiha vata maata mpiqaate.

² Ekaa vataqaa vai aantauvahikave, ekaa naaruvaini ataqi ni vai uvirikave, ekaa namariqi vai havukaukave, vika ni naatu qeteha vaivarave. Te ekaa vi haikara nima nimuro.

³ Vi haikava vi haikava ekaa qaqi variqi vi haikauka ni karama vaivarave. Haaru enta te naaho maatara tiha, Ni karama varianarove, tiavaunarave. Ho vate te qaiqaama ni tiva nimuro, Ekaa qaqi vaina haikava ni karama varianarove.

⁴ Vohaa haikagai ni qioqama tauro. Matiqi naare vainara, viraqaima kia naate. Naareqaahairo ekaa haikavano qaqi variqiro vi vairara ti, te naare qioqama teha kia naate turo. (Kaiqa Varora 15:20)

⁵ Niqihairo vaiinti vo aru kairaro vira naarevano ntava viraro qutu virera, vira kaara uvama varianarove. Aantauvahivano vaiinti vo aru kairera, vira nai aru kaate.

⁶ Te vaiinti tenta voqaara autuke vataunarara ti, kia vaiinti aru kaate turo. Vaiinti vovano vo vaiinti aru kairera, vira kaara naivata arukevama varianarove.

⁷ Ne vaintivata kuvuaramaqi vimanta ni vaintivara airiqiha ekaa vata maata variate turo, tiro.

⁸ Kotiva minti tivakero viva Noaararavata vira maaqunavuaravata tiharо,

⁹ Te tiari iriate. Te nivata ne kuvuarama tekaravata irihama, maa uvara tiva taatauke vatarerave. ¹⁰ Sipiqlihai ekaa aantauvahive uvirive vevantaaka vikaravata irihama te minti turo. ¹¹ Te kia qaiqaa ekaa qaqi variqi vi haikara huvura namariqohai vehi autu taiqa karerave.

¹²⁻¹³ Ne vo haika taveha tiha, Ho quqaama Kotiva minti tivakero uva tiva taatau tairave, tiate ti, te tenta ontanta naaruvaini vataari vataini vaika vira viraqaqamake tavaave.

¹⁴ Te tonavuvata aaquvata varakaaina entara vi entara ontantavanovata vairaqe ¹⁵ te vira taveha, te vate nivata ekaa aantauvahivata vaiha uva tiva taunara iritarerave. Vi uvara iritehama te kia qaiqaa ekaa qaqi variqi vi haikara huvura namariqohai vehi autu karerave. ¹⁶ Ontantavano naaruvaini qovarama vuaina entara te vira taveha, te ekaa vataqaa qaqi variqi vi haikara hampata vaiha uva tiva taunara iritarerave. Te uva tiva taarirava qaqi variqiro vuanarove, tiro.

¹⁷ Minti tivakero Kotiva Noaarara tiharо, *Ontantavano vairamanta ekaa vataini qaqi variqi vika vira taveha, te uva tiva taatau tau nara iritevarave, tiro.* Kotiva minti turama.

Noaara maaqunavu

¹⁸ Sipiqlihai Noaara maaqunavu vevantonavuka nutu vaireva, Semivavata, Haamuavata, Iapetivavata vaura.

(Haamuva Kenaanira qova vaura.)

¹⁹ Noaara maaqu taaramonavuqihai ekaa vo vatanaa vo vatanaaka qovarama vi, oru vo vataini vo vataini vaura.

²⁰ Noaava naaho kaiqa vare vau vaiintiva vahiaro viva naane naahoqi *uaini* naaqunta ututora.

²¹ Viva *uaini* naaqunta ututova qampiqero mpeqaiqama vuvaro viva vira hiqi kero tati kovaro vi namariva nteria vuvaro *uaini* vira namakero vueraiqaa viro nai seri naavuqi oriqetero nai utavaaqa nonku tora ekaa viqu vaaquma kero vaita aavata vura.

²² Mintuvaro Kenaanira qova Haamuva oriqetero tavovaro vira qova tokavano vaite vauvaro viraqihairo vevantero vuru nai vakaatanta tiva nimiro.

²³ Haamuva vitanta tiva nimumanta Semika Iapetika vukai tavuna vo varetanta náitanta qova toka vainara tavaarorave ti, náitanta viri qaqlini taveha, tavuna tauvaqai-hai utu vare rahinimimaqi vi vuru nái qora aqu amitora.

²⁴ Ho Noaava vaitorajihairo himpuvaro vira avu aatovano koqema vuvaro vira maaqu vitihainaava kaiqa varorara iriro, vira kaara viva Haamura vaintivara qoraiqama vuate tiro, mintima tiro:

²⁵ Oho, kairaro Kotiva Haamura maaqu Kenaanira goraiqama amiteharo vira vara kairaro viva tutitarero nai vakaukavara kaiqa vaiintivano vaiharo vika paanaa haika vara nimitaarire, tiro.

²⁶ Noaava minti tivakero qaiqaa mintima tiro:

Te Semira Variqa Nora Kotira autu tuaherake vauro.

Kairaro Kenaaniva tutitarero Semira paanaa vainti variarie.

²⁷ Kairaro Kotiva Iapetira vaintivara kahaqiramanta vika airi variate.

Kairamanta Iapetira kuvuarama taikavata Semiva kuvuarama taikavata voharaaqi maateraqiha variqi vivaro, Kenaaniva Iapetira paanaa haika varaarire, tiro.
Noaava minti turama.

²⁸ Nora huvura namarivano taiqo entaraqaahairo Noaava 350 ihi voqavata varaqiro viviro, vuru qutu vura.

²⁹ Noaava maa vataraqaa 950 ihi qaqlini varaqiro viro vuru qutu vura.

10

Noaara maaqunavu vaintivara autu

¹ Noaara maaqunavu Semivavata Haamuvavata Iapetivavata nora huvura namarivano taiqo entaraqaahai vinavuka vaiha vo vainti vo vainti vatatora. Vinavuka vainti vatato okarava vaireva, maantimama vairo:

Iapetira vaintivara

² Iapetira maaqunavu vaireka, Gomevave, Menkokivave, Madaivave, Javaanivave, Tubaarivave, Mesekivave, Tiraasivave, vinavuka vaura.

³ Mintima vaumanta Gomera maaqunavu vaireka, Asakenaasivave, Ripaativave, Tonkamavave, vinavuka vaumanta ⁴ Javaanira maaqunavu vaireka, Elisaavave, Tasisi-vave, Kitimivave, Dodaanivave, vinavuka vaura.

⁵ Javaanira maaqunavu vaintivara hininavu nora namari auvahini otu vaumanta hininavu nora namari avutaqai vau vataraqaa otu vaiha vika vo anku vo anku vaiha vo uva vo uva ti vaura.

Haamura vaintivara

⁶ Haamura maaqunavu vaireka, Kusivave, Isipivave, Putivave, Kenaanivave vinavuka vaura. ⁷ Mintima vaumanta Kusira maaqunavu vaireka, Sebaavave, Havilaavave, Sapataavave, Ramaavave, Sapatekavave, vinavuka vaura. Mintima vaumanta Ramaara maaqtanta vaireka, Sebaavavata, Dedaanivavata vaura.

⁸ Kusira maaqu vo Nimirotiva noruqama viro nora vaiintivano vaiharo airi vainti nahentiqaa raqikiqiro vi vauvaro ⁹ Noravano Kotiva vira quahama amitovalo viva voqama kero qaakau aantauvahai ari vau vaiintiva vaura. Viva minti vau vaiintiva vauvarora tiro, vira autuvano uritara kero vaumanta vainti nahenti nái vaintiara tiha, Ike, Noravano Kotiva nivata quahama nimitaira nevata Nimirotira aanante qaakau aantauvahai arivera, tenavu virara koqeve tiataarave ti vaura.

¹⁰ Nimirotiva nora vaiintivano vaiharo tota taaramo vatuka, Babelive, Erekive, Akatave, vinavuraqaa raqiki vaura.

Taaramo vatuka vinavuva Sinaa vatainai vaura.

¹¹ Ho Nimirotiva Sinaa vata mini kero oru Asiria vatainai vaiharo qaiqaa vatuka vonavu Niniveve, Rehoboti-Irave, Karaave, ¹² Resenive, autu kora. Ninive hini vauvaro nora vatuka Karaa hini vauvaro Reseni vatukavano vintanta avutana vaura.

¹³ Maa vatanaaka Lidiave, Anaamive, Lehaapive, Napatuve, ¹⁴ Patarusive, Kasaluve, Kapatoritive, Isipiva ekaa vi vatanaaka qovama vaura. Kasalu vatanaakaqihai Pirisia vatanaaka qovaramavi vaura.

¹⁵ Kenaanira maaqu vo avuni vatatova Saidoniva Saidoni vatanaaka qova vauvaro vira maaqu vo Hitiva Hiti vatanaaka qova vaura.

¹⁶ Kenaaniva vitanta qova vahiaro maa vatanaaka vika qovavata vaura: Jebusive, Amove, Girigaasive, ¹⁷ Hivive, Akave, Sinive, ¹⁸ Avative, Semaave, Hamaative, Kenaaniva ekaa vi vatanaaka qova vaura.

Kenaanira vaintivara vo anku vo anku airiqamavi vonaini vonaini vura. ¹⁹ Vika vevara Saidoni vatukaihai vivi, vevara Gasa vatuka Geraa vatainai vura. Hini kuka vevara Saidoni vatukaihai vivi, vevara Sodomu vatukave, Gomora vatukave, Atamaa vatukave, Seboimu vatukave, vura. Hini kuka vevara Saidoni vatukaihai vivi, verara Lasu vatukaini vura.

²⁰ Haamura maaqunava kuvuarama tokia mintima vaura. Vika vo anku vo anku, vo vatainai vo vatainai vaiha, vo uva vo uva ti vaura.

Semira vaintivara

²¹ Semira Iapetira vakaava vahiaro viva Ebe vatanaaka vika qovama vaura.

²² Semira maaqunavu vaireka, Elaamuvave, Asuvave, Apakasaativave, Rutivave, Araamivave, vinavuka vaura.

²³ Araamira maaqunavu vaireka, Usivave, Huluvave, Getevave, Masivave, vinavuka vaura. ²⁴ Apakasaativa Seraara qova vauvaro Seraava Ebera qova vaura. ²⁵ Ebeva gorainti vainti taaraqanta vatatovaro vainti vovano vira autu Perekiva vaura. Perekiva qaqi vau entara vatainai vau vaiinti nahentika rairavi vaurara tiro, vira autu *Perekirave-Rairave* tura. Perekiva vauvaro vira qatavano Jokitaaniva vaura.

²⁶ Jokitaanira maaqunavu vaireka, Alamodaativave, Serepivave, Hasamaavetivave, Jeraavave, ²⁷ Hadoraamuvave, Usarivave, Dikalaavave, ²⁸ Obaalivave, Abimaelivave, Sebaavave, ²⁹ Ofiaavave, Havilaavave, Jobaapivave, vaura. Vika ekaa Jokitaanira maaqunavu vaura.

³⁰ Jokitaanira vaintivara vau vatava vaireva, Mesaqaahairo viviro, kuari uruntonaini verara Sefaa vatainai vuru taiqora.

³¹ Semira maaqunavu mintimake vaiha, vika vo anku vo anku vaiha, vo vatainai vo vatainai oru vaiha vo uva vo uva ti vaura.

³² Ekaa vi vatanaa vi vatanaaka vaireka, Noaara vaintivara vaiha vika rairavi vo vatainai vo vatainai vura. Nora huvura namarivano taiqo entaraqaahai ekaa vatanaaka maa vataraqa vauka Noaava kuvuarama tokia vaura.

11

Vohaa uvaqai hoqare ti vaurara tura

¹ Hoqare vatainai vauka kia vo uva vo uva tiraiti, vohaa uvaqai ti vaura.

² Vohaa uva tivaqti viha vika kuarivano uruntonaini vivi, Sinaa Uqitaini orunte naavu maaqa kaqate vaura. ³ Vika mini vaiha mintima ti: Kaiqenavu vata taatauke airi *briki* autuke ihaqohai haimike, maaahota variaina naavura, vo naavu vo naavu kaqaare, tivake, vika airi *briki* autuke, *iva/qume* varake *briki* vira taatau keha naavu kaqe vaura.

⁴ Vika mintiaqi viha qaiqaa tiha, Tenavu raumpirimavi vo vata vo vataqaa oru variarorave. Kaiqenavu maini vaiha naavu maaqa kaqate, nora naavu vo kaqa taariraro vira qiatavano nai naaro muntuka vairaro tinavu hutuvanovata uritarakero variarire, ti.

⁵ Minta tivake vi naavura kaqe vauvaro Noravano Kotiva naavu maaqavata nora naavuvata tavareva tuvuntero ⁶ tiharo, Vataini variaka vohaa vatanaaka vaiha vohaa uva ti vaiha nora kaiqa hoqarama taayo. Oho, vika mintiaqi vivera, vika nai varataatai i kaiqara, hampi kaiqa vo kaiqa vo kaiqa varaqi vivarave. ⁷ Kaiqe tenavu vika maaqiri tuqantaa kaari vika vo uva vo uva tihama qumimaqa iha kia nai uva nai uva ho iriate, tiro.

⁸ Minta tivakero Noravano Kotiva vika maaqiri hampiqama komanta vaiinti nahenti kia nai uva nai uva ho iriraiti, kaiqa vare vauravata qaqirake vo vatainai vo vatainai vi anima vura. Mintimakero Noravano Kotiva vika raumpirima kora.

⁹ Noravano Kotiva vatainai vauka vika maaqiri hampiqama korara ti, vi vatukara autu nteha, *Babelive - Hampiqama korave*, tura.

Semira anku

¹⁰ Semira ankuvano maantimama vairo: Nora huvura namarivano taiqovaro taara ihi aitarovaro Semira 100 ihi varakova gorainti vainti vo Apakasaatira vatatora. ¹¹ Semira Apakasaatira vattato entaraqaahairo viva 500 ihi varaqiro viharo vo vainti vo vainti, goraintivata nahentivata vataqiro viviro, vuru qutu vura.

¹² Apakasaativa 35 ihi varakero viva gorainti vainti vo Seraara vatatora.

¹³ Apakasaativa Seraara qova vau entaraqaahairo viva 403 ihi varaqiro viharo vo vainti vo vainti goraintivata nahentivata vataqiro viviro, vuru qutu vura.

¹⁴ Seraava 30 ihi varakero viva qorainti vainti vo Ebera vatatora. ¹⁵ Seraava Ebera vatato entaraqaahairo viva 403 ihi varaqiro viharo vo vainti, qoraintivata nahentivata vataqiro viviro, vuru qutu vura.

¹⁶ Ebева 34 ihi varakero viva qorainti vainti vo Perekira vatatora. ¹⁷ Ebева Perekira vatato entaraqaahairo viva 430 ihi varaqiro viharo vo vainti, qoraintivata nahentivata vataqiro viviro, vuru qutu vura. ¹⁸ Perekiva 30 ihi varakero viva qorainti vainti vo Reura vatatora.

¹⁹ Perekiva Reura vatato entaraqaahairo viva 209 ihi varaqiro viharo vo vainti, qoraintivata nahentivata vataqiro viviro, vuru qutu vura.

²⁰ Reuva 32 ihi varakero viva qorainti vainti vo Serukira vatatora. ²¹ Reuva Serukira vatato entaraqaahairo viva 207 ihi varaqiro viharo vo vainti, qoraintivata nahentivata vataqiro viviro, vuru qutu vura.

²² Serukiva 30 ihi varakero viva qorainti vainti vo Nehora vatatora. ²³ Serukiva Nehora vatato entaraqaahairo viva 200 ihi varaqiro viharo vo vainti, qoraintivata nahentivata vataqiro viviro, vuru qutu vura.

²⁴ Nehova 29 ihi varakero viva qorainti vainti vo Teraara vatatora. ²⁵ Nehova Teraara vatato entaraqaahairo viva 119 ihi varaqiro viharo vo vainti, qoraintivata nahentivata vataqiro viviro, vuru qutu vura.

²⁶ Teraava 70 ihi varako entaraqaahairo viva qorainti vainti vonavu Eparaamira, Nehora, Haraanira, vatatora.

²⁷ Teraara ankuvano maantimama vairo: Teraava Eparaamira, Nehora, Haraanira, vatatovaro Haraanira Rotira vatatora.

²⁸ Vira qova Teraava qaqi vau entara Haraaniva Uri vatuka Kaludia vataini nai vatatonaini vaharo qutu vura.

²⁹ Eparaamiva nahenti vo Saraira varatero vauvaro Nehova Haraanira raavura Mikaa varatero vaura. Haraanira raavura vo, Isakaava vaura.

³⁰ Saraiwa Eparaamira naatavano kia vainti vataraitiro, *naahiara/qururaiqama* viro vaura.

³¹ Teraava nai maaqu Eparaamiravata, nai maaqu Haraanira vainti Rotiravata, Eparaamira naata Sarairavata, vinavuka ntita varero Kaludia vata Uri vatuka mini kero, katu varero Kenaani vataini oru vairare tiro, mini viharo tavero qaqiraker Haraani vatukaini oruntero vaura.

³² Teraava 205 ihi varakero Haraani vatukaini qutu vura.

12

Kotiva Eparaamira kaamatora

¹ Noravano Kotiva Eparaamirara tiharo, Nena vatave, nena naavu maaqave, nena qora naavuqi variakave, maini kera katu varaireqe te qaraaka vata ai umiqaarirara are mini vuane.

² Are mintiraeqe te are vainti kuvuarenara airiqama amitaare. Te ai kojema amiteha ai autuvata noraiqama kaarirara are ekaa ,vo vatanaa vo vatanaaka, kojema nimitaane.

³ Vokika ai kojema amitaiqe te vika náiváta kojema nimirarerave.

Vokika ai qoraiqama amitaiqe te vika náiváta qoraiqama nimirarerave.

Naantiara are kuvuarama teraukaqihai te ekaa naato vataini vaika kojema nimirerave, tiro.

⁴ Minto tuvaro Eparaamiva Noravano Kotiva tunte iro viva 75 ihi varakova Haraani mini kero vurama. Viva vuvvaro Rotivavata vikantiro vurama.

⁵ Eparaamiva nai naata Sarairavata, nai qata maaqu Rotiravata, nai kaiqa vaiintinavata ntita varero Haraanini vaharo ekaa airaira vatora viravata katu varero Kenaani vataini vireva vura.

Mini oruntero ⁶ vi vataraqaa viharo Sekemi vatuka nora oqiva vaunaini More Oqivave tunaini oruntera. Vi entara Kenaani vatanaaka vi vataraqaa vauvaro ⁷ Noravano Kotiva Eparaamira avuqaa qovarama viro virara tiharo, Te maa vatara are kuvuarama terauka nimirerave, tiro. Minto tivakero Kotiva Eparaamira avuqaa qovarama vurara tiro, Eparaamiva orinavu varakero *ofaa* tainta autukero Nora Kotira autu tuahera kora.

⁸ Viraqaahairo Eparaamiva oru viro Beteli vatuka vira vuruvi kuari uruntonaini oruntero, mini nai seri naavu kaqa tero vaura. Beteli vatuka hini vauvaro Ai vatuka hini vauvaro viva tavaarana nai seri naavu kaqa tero vaura. Eparaamiva mini vaiharo Nora Kotira quahama amitareva *ofaa* tainta vo autukero Nora Kotira aarora. ⁹ Eparaamiva mini varikero qaiqaa katu varero voqi voqi variqiro viviro, Nekevi vataini vurama.

Eparaamiva Isipini vura

¹⁰ Vi entara karara aavoqu entava vauvaro Eparaamiva vaunaini kia karavata vauvarora tiro, viva Isipini vahuqa vaireva vura.

¹¹ Viva aaraini oru viharo tavovaro Isipi aumanto vauvaro Eparaamiva nai naata Sarairara tiharo, Are koqe viri vaata vataa nahentivano variaro. ¹² Isipi vatanaaka ai taveha ariara ti naatave tivake ai varareka iha ti harukevorave. ¹³ Are vi vatanaakara tiharo, Te vira auravanove, tiane. Manti tiramanta vika ariarao ti, kia ti haru karaiti, ti vehakuma timitaate, tiro. ¹⁴ Manti tivake vika Isipini yumanta Isipi vatanaaka tavovaro Saraiwa koqe viri vaata vataa nahentivano vaura. ¹⁵ Isipi vika nora vaiintinavu vi nahentira tave, nai avuhainaa vaiinti, Pero vaiinti tiva ami tiha, Virara koqe nahentive tivake, avuhainaa naavuqi vira vita vare vuru kora. ¹⁶ Avuhainaa vaiinti viva vi nahentirarao tiro, Eparaamira quahama amiteharo sipisipive, memeraave, purumakauve, donkive, kaiqa vaiintive, kaiqa nahentive, kamerive, vira amura.

¹⁷ Mintuvarovata, Noravano Kotiva Pero vaiinti Eparaamira naata kaara vo rovara vo rovara viraqaaavata vira navunaakaqaavata vatovaro ¹⁸ Pero vaiintivano Eparaamira aarama kero virara tiharo, Oho, are nana okarae tiqaa qovarama kaaro? Saraiwa ai naatavano vaivara are nanthiharae virara kia vutukera ti tiva timira iaro? ¹⁹ Nanthiharae are virara tiharo, Ti auravano vaivo, tiaramantae te vira varrao? Ho nena naata vita varera vuane, tiro.

²⁰ Avuhainaa vaiintivano minti tivakero nai kaiqa vaiintinavu nititomanta vika Eparaamira atitama kovaro Eparaamiva nai naatavata ekaa nai u haikaravata varero vurama.

13

¹ Atitama kovaro Eparaamira Isipi mini kero anirantero Nekevini vura. Viva nai naatavata ekaa viva nai u haikaravata varero vuvuvaro Rotivavata vikantiro vurama.

² Vi entara Eparaamira airi haika, purumakauve, sipisipive, memeraave, *kori* orive, *silvaa* orive, vatova vaura.

³ Eparaamira Nekevini varikero, viraqaahairo katu varero voqi voqi variqiro viro, qogqaraanaini Beteli maaqaini oruntora. Beteli vatuka hini vauvaro Ai vatuka hini vauvaro avutana haaru viva nai *seri* naavu kaqa tero vaiharo ⁴ *ofaa* tainta autu tonaini oruntero, mini vaiharo qaiqaa Nora Kotira autu tuahereharo vaura.

Eparaamika Rotika raira vura

⁵ Eparaamira mini vauvaro Rotivavata vikantiro vaiharo airi airaira sipisipive, memeraave, purumakauve, vatomanta vira kaiqa vaiintinavuvata airi vaura.

⁶ Rotika Eparaamika vohaa vaihatanta tavomanta vitanta sipisipive, memeraave, kara neva kia ho vaumanta ⁷ vira kaara vitanta sipisipigaave memeraaqaave raqiki vauka tirori vaura. (Vi entara Kenaani vatanaakkavata Peresi vatanaakkavata vi vataraqaa vaura.)

⁸ Vika tirori vauvaro Eparaamira Rotirara tiharo, Tetanta vohaa qata vakaa vaunarara ti, hauri tetanta tirorimaqi vuari titanta kaiqa vaiintinavuvata tirorivorave. ⁹ Ho tavaane. Airi vatama maini vaivo. Kaiqe rairavi te vo vataqaa variarirara are vo vataqaa variane. Are muani otu vairera, te maini variare. Are maini vairera, te muani otu variare. Are nena muntuka vaina vataru kaamatara variane, tiro.

¹⁰ Eparaamira minti tuvaro Rotiva muani vuavu tavovaro Iotani Namarivano tuvi vauvaro ugita vata koqeva viviro, muntu Soaa vataaini taiqora. Vi vatava vaireva, Ideni vata voqaarave, Isipi vata voqaarave, koqe vata vaura. (Vi entara Noravano Kotiva Sodomivata Gomoravata kia vehi autuko entara vi vatukatanta qaqi vauvaro koqe vatavano mini vaura.)

¹¹ Rotiva ekaa Iotani Uqitaini nai kaama tero kuari uruntonaini katu varero vaireva vura. Viva Eparaamira kero mini vura.

¹² Eparaamira Kenaanini vauvaro Rotiva muani ugita kanta otu nora vatukanavu vaunaini Sodomi aaqaini nai *seri* naavu maaqa kaqa tero vaura. ¹³ Sodomiqi vauka qora kaiqa vareha Nora Kotira uva, vo uva vo uva raqaqi vi vaura. ¹⁴ Rotiva Eparaamira mini kero vuvuvaro viraqaahairo Noravano Kotiva Eparaamirara tiharo,

Are maaqaa vahara ekaa vata maata vutu vuru aituqama kera tavaane.

¹⁵ Ekaa vutu vuru tavena vataru te vi vatara aivata are kuvuarama teraukavata nimiriraro vi vatava ni vatavanoma ekaa enta variqiro vuuanarove.

¹⁶ Te ai kahaqiaari are kuvuarama terauka nai airitahaama vaivarave. Vika vaireka, nai nuqa voqaara airitahaama vaivarave. Vaiintivano nuqa kia ho kaara ntintemake, ai vaintivaravata kia ho kaara ntivaravate.

¹⁷ Himpira oru nihara ekaa vi vatara tavaane. Vi vatava ai amiarira vatavama vaivo, tiro.

¹⁸ Kotiva minti tuvaro Eparaamiva katu varero Mamare Oqiva vaunaini Hebaroni vatukaini vaireve oruntero, nai seri naavu maaqa kaqatero Nora Kotira quahama ami tareva, *ofaa* tainta vo autu kora.

14

Eparaamiva Rotira ruaruama amitora

¹ Vi entara avuhainaai vaiinti 5navu:

Amarafeliva Sinaaqaa raqikuvave, Ariokiva Elasa vatukaqaa raqikuvave, Kedo-Laomeva Elami vatukaqaa raqikuvave, Titaamiva Goimu vatukaqaa raqikuvave, ² vinavuka avuhainaai vaiinti 5navu hampata raqireka vura.

Avuhainaai vaiinti 5navu nutu vaireve, Beraava Sodomi vatukaqaa raqikuvave, Birasaava Gomora vatukaqaa raqikuvave, Sinaapiva Atamaa vatukaqaa raqikuvave, Semebeva Seboimu vatukaqaa raqikuvave, vo avuhainaava Belaaqaa raqikuvave, vinavuka vaura. (Belaa vatuka vo autu Soaave tura.)

³ Avuhainaauka 5navu nái iqoka vaiinti ntita vare Sidimi Uqitakanta ruvaaqumavi vaiha vaqa ntihia vaura. (Maa entara Qutu vi Varuvava minima vairo.)

⁴ Tota King Kedo-Laomeva 12 ihiara variqiro viharo avuhainaaka 5navuqaa raqikiqiro vi vaura. Ho 12 ihi aitarovaro 13 ihiqaa avuhainaai vaiinti 5navu Kedo-Laomerara tiha, Tenavu kia qaiqaa ai vevaaraini vairerave, tura.

⁵ Vinavuka minti tuvaro ihi vo aitarovaro King Kedo-Laomeva nai tontinavu avuhainaai vaiinti 3navu naarama komanta vinavuka Kedo-Laomera kahaqireka vohaarraqi avitumavi nái iqoka vaiinti ntita vare oru Asateroti-Kanaimi vatainai vaiha Refaimi vatanaaka hampata raquqi viha vika naatarake, viraqaahai vinavuka Haamu vatukaini oru vaiha Susumi vatanaaka naatarake, viraqaahai vinavuka oru Kiriataimi uqitaini Emimi vatanaaka naatarake, ⁶ oru verara Seiru ainqinaini Hori vatanaaka naatara keha, vinavuka vika aru ntataqi vivi, aahara vata avuhaini Eli-Paraanini vuru kora.

⁷ Viraqaahai avuhainaauka 4 vinavuka orurante Kadesi vatuka, vo autu Eni-Misipative tunaini vaiha, Amareki vatanaaka ekaa naatarake, oru Hasasoni-Tema vatukaini vaiha Amo vatanaakavata naatara kora.

⁸ Mintiaqi yumanta avuhainaai vaiinti 5navu Sodomiqaa raqikuvave, Gomoraqaa raqikuvave, Atamaaqa raqikuvave, Seboimuqaa raqikuvave, Belaaqaa raqikuvave, vinavukavata nái iqoka vaiinti ntita vare Sidimi Uqitakanta ruvaaqumavi vaiha iqoka raqireka vaqa nti vaumanta ⁹ Kedo-Laomeva nai tonti 3navu vatamakero 5navu hampata raqireka vaqa nti vaura.

Ho avuhainaauka 4navuvano avuhainaauka 5navu hampata raquqi vi vaura. ¹⁰ Sidimi Uqita kanta airi *ruvu/mpumpi* vauvaro viraqi vankora *iva/qume* vauraqi Sodomi avuhainaara iqoka vaiinti, Gomora avuhainaara iqoka vaiintive, vika qetake ruqemake viha, vokuka *ruvuqi/mpumpipi* aqu yumanta, vokuka ruqemake ainqinaini vura.

¹¹ Mintumanta avuhainaai vaiinti 4navu vinavuka naataraqi viha, oru Sodomi vatukaqai haivata Gomora vatukaqihaiwata ekaa airairavata karavata raiqake vare vurama.

¹² Eparaamira qata vainti Rotiva Sodomi vatukaqai vaumanta vika viravata ravaaqavu vare, viva u haikaravata vare vura.

¹³ Ho mintuvaro vovano ruqema kero vuva vuru Eparaamira Hiparu vatanaai vaiinti Rotirara tiva amura. Vi entara Eparaamira nora oqiva vauraqi vauvaro Amo vatanaai vaiinti Mamareva oqiva qova vivavata, Mamarera qatatanta Esikolika Aneka vitantavata, Eparaamira tontiqamake vaura.

¹⁴ Vinavuka Eparaamira hampata vauvaro Eparaamiva Rotira ravaaqavuke rumpa varo uvira iriro viva 318 iqoka vaiinti nai vaunaini vauka naarama kero, avuhainaai vaiinti 4navu hampata raqireva vinavuka avataqiro viviro, Daani maaqaini oruntora.

¹⁵ Mini oruntovaro enta uvaro Eparaamiva nai iqoka vaiintinavu rairakeri taara vara autukero vatomanta vika entaqi navutaaka hampata raquqi vura. Eparaamiva nai iqoka vaiinti hampata vika aru ntataqi vivi, Hoba vatukaini Damasikusi *noti* mantaraini vuru kora.

¹⁶ Eparaamiva mintiaqiro viharo vika raiqia vare vu airairara qaiqaa varero, nai qata vainti Rotirara kuvantu kero vitero, Rotiva u haikaravata qaiqaa varero, nahenti vonavuvata kuvantu kero ntitero, vo vaiinti nahentinavuvata kuvantu kero ntita varero orurantero anura.

Merikisitekiva nai kauqu tuahera keharo Eparaamira koqema amitora

¹⁷ Eparaamiva King Kedo-Laomeravata avuhainaai vaiinti 3navuvata naatara kero orurantero aaraini ani vauvaro Sodomi vatanaakaqaa raqiku vaiintiva Eparaamira vita

kareva *Save Uqitainive, Avuhainaara Uqitainive* tunaini vuvaro¹⁸ Merikisitekiva vivavata Eparaamira vita kareva vura.

Merikisitekiva vaireva, viva Saremi vatuka avuhainaava nai virini kantaaqaini vai Variqara kaiqa vara amite vau vaiintiva vaura. Viva oru Eparaamira vita kero mparetivata *uainivata* vira amiro¹⁹ nai kauqu tuaherakero vira koqema amitero tiharo,

Nai virini kantaaqaini vai Variqava naaruvavata vatawata autukero vataiva, viva ai Eparaamira koqema amitaarie.

²⁰ Nai virini kantaaqaini vai Variqava ai kahaqiharo navutaaka ai kauquqi kaivara are vika naatara kaanarara ti, tenavu vira autu tuahere vauro, tiro.

Merikisitekiva minti tuvaro Eparaamiva navutaaka kauquqihairo vare anu airairara rairakero kauqurutanta vatoraqihairo vohaiqa Merikisitekira amuvaro varora.

²¹ Merikisitekiva vohaiqa varovaro Sodomi vatanaaka avuhainaa vaiintivano Eparaamirara tiharo, Are ti navunaaka kuvantu taarauka vikaqai tinta timiane. Navutaaka vika airaira varataara are vi haikara kia ti timiraitira, nena totaane, tiro.

²² Sodomi vatanaaka avuhainaa vaiintivano minti tuvaro Eparaamiva aqao tiro, Noravano Kotiva nai virini kantaaqaini vai Variqava, viva naaruvavata vatawata autukero vataivave. Te vira avuqaa vaiha te tenta kauqu aqiqaa aquukeha virara minti tunarave:

²³ Vika Sodomi vatanaaka airaira vare vuaraqihai kia te voqavata vararerave, tunarave. Te ni airaira varaarirara hauri are tiriara tiharo, Te Eparaamira airi airaira amuraro viva airi haika vataivo, tirorave. Virara irihama kia te ni airaira voqavata vararerave. ²⁴ Tenta vaiintinavu vaaka namakaa karara, vi kararaqai te niqihai varaanarave. Ti hampata vuaka, Anerave, Esikolirave, Mamarerave, vinavuka are nena airaira hini rairakera nimiramanta varaaate, tura.

Kotiva Eparaamira vataakero uva tiva taataukero vatora

15

¹ Vo entanavu aitarovaro Eparaamiva kia vaitaraitiro, qaqi vahiaro taira tave vauvaro Noravano Kotiva virara tiharo,

Kiamma qetehara variane. Vo haikavano ai aruantorave tiha, te kainke voqaara vaiha ai antua amitarerave. Te nora koqaama ai amirerave, tiro.

²-³ Minti tuvaro Eparaamiva tiharo, Mpo Noravauvo, are ekaa haikaqaa raqiki variaravama variaro. Are nana haikae ti timinarave? Te kia vainti vatatauro. Ti maaquvano kia vairera, te qutu vuuariraro ti kaiqa vaiinti Eliesevo Damasikusihainaava te iaina haikara varaanarove. Viva mintiantorave, tiro.

⁴ Eparaamiva minti tuvaro Noravano Kotiva tiharo, Vi vaiintiva kiamma are ina haikara varaanarove. Nina maaquvano vi haikara varaanarove, tiro. ⁵ Kotiva minti tiva kero Eparaamira vita varero vevantero tiharo, Virini tavaane. Ai vaintivara vaireka, opu makau voqaara airithahaama vaivarave. Are kia ho opu makau kaara ntinantema kera, nena vaintivaravata kia ho kaara ntinarave, tiro.

⁶ Kotiva minti tuvaro Eparaamiva kia vainti vataraitiro, naampaiqama vuva vahiaro Noravano Kotiva ti uvarara, quqaave, tura. Eparaamiva quqaave tiva kero Kotirara kempukaiqama kero iruvarora tiro, Kotiva tiharo, Te Eparaamirara avuqavu ni vai vaitintrave turo, tura.

⁷ Kotiva qaqaa Eparaamirara tiharo, Te Noravano Kotikave. Maa vatara te ai amiariraro ekaa enta ai vata variarire ti, te Uri vatuka Kaludia vataihai ai vita vare anuro, tiro.

⁸ Minti tuvaro Eparaamiva aqao tiro. Mpo Noravauvo, are ekaa haikaqaa raqiki variaravama variaro. Are vata ti timire ina okarara te nantiabee virara kankomake irirarave? tiro.

⁹ Minti tuvaro Noravano Kotiva tiharo, Are purumakau nahe vo, memeraa nahe vo, sipisipi qora vo, taaramo ihi varakeka vara viri timiane. Inaara uviri taaraqantavata vara viri timiane, tuvaro¹⁰ Eparaamiva Kotiva tunteema kero purumakauve memeraave sipisipive varero arukero kuhia kero avutaaqaa nkahi kero, hini hini naiqi naiqi vataqiro viro taiqa kero, uvirivata aru kero kia toqa karaitiro, qaqi vatora.

¹¹ Eparaamiva mintima kero vatovaro mati ne vau uvirika tuvu viraqaata utama vuare tuvaro viva memora vinavuka ruhaaqi vaura.

¹² Ruhaaqi vauvaro kuarivano aqvirevra otu vi vauvaro Eparaamiva vaita aavata vauvaro aatu ite vauvaro voqama kero qeteharo vauvaro¹³ Noravano Kotiva tairakaa, virara tiharo, Are kuvuarama terauka, vika naantiara vo vatanaaka vataini katu vare oru vaivarave. Vika mini oru vaimanta vi vatanaaka vika rumpa teha qoraiqama nimite vaimanta ai vaintivara vi vatanaaka paanaa kaiqa varevarave. Ai vaintivara vi vataraqaa

400 ihi variqi vi vaiqe¹⁴ viraqaahai te vi vatanaaka ntaihaiari ai vaintivara airi airaira vare, vi vatara ke orurante anivarave.

¹⁵ Are qaqi variqira vihara anomia kera naampaiqama vira qaqi qutu vinarave. ¹⁶ Ai vaintivara kiama vaaka orurante anivarave. Maa vatanaaka Amo vatanaaka qora kaiqa varaqi viha anomake qora kaiqa vare vaiqe te vi entara Amo vatanaaka ntaihama kaari ai vaintivara maini homa orurante anivarave. Ai vaintivara vo vatainai oru vaiha mini variqi vi vuru qutu vimanta, vika vaintivaravata qutu vimanta, vika naintivaravata qutu vimanta, vika naantiaraini vaika qaqi variqi vi entara vika vi vatara ke maini orurante anivarave, tiro.

¹⁷ Kotiva minti tuvaro kuarivano ruhunku vuvaro entama vuvaro Eparaamiva tavavarova ova ite vauvavata, taveqihairo muravano oru vi vauvavata, qovarama viro mati toqa kero vatoraqaa tavaarantuna aitare vaura.

¹⁸ Mintuvoro vi entaraqaa Noravano Kotiva Eparaamikantiro uva tiva taatautero tiharo, Isipi vataqaahairo vatavano viviro vuru lufaretisi Namari auvahini taiqaina vatara ai amirerave. ¹⁹ Kini vatanaakave, Kenisi vatanaakave, Kataamoni vatanaakave. ²⁰ Hiti vatanaakave, Peresi vatanaakave, Refaimi vatanaakave, ²¹ Amo vatanaakave, Kenaani vatanaakave, Girigaasi vatanaakave, Jebusi vatanaakave, vika vika vatavano ai vaintivara vatama varianarove, tura.

16

Hagaava Eparaamira vanti vata amitora

¹ Eparaamira naatavano Saraiva kia vira vanti vata amitaraitiro, qaqi vauvaro Saraira paanaa nahenti vo, Isipihainaa nahentira vira autu Hagaava vauvaro ² Saraiva Eparaamirara tiharo, Eparaamio, Noravano Kotiva kia ti kahaqivera kia te vanti vata amitauro. Are ti paanaa nahenti vikantira nihara vaitairaro viva hoe ti vanti vata timitaanarove, kiae ho vata timitaanarove? tiro.

Saraiva minti tuvaro Eparaamiva eo tura. ³ Vi entara Eparaamiva Kenaani vatainai 10 ihi varakero vauvaro Saraira nai paanaa nahenti Isipihainara Hagaara vita varero vuru Eparaamira amuvaro ⁴ Eparaamiva vira varatero vikantiro ni vauvaro Hagaava vanti taiqama vura. Hagaava nai vanti taiqama vurara iriro, nai mahuta tiharo Sarairara, Viva vehi nahentivanoma vaivo, tiro.

⁵ Minti ti vauvaro Saraira Eparaamirara tiharo, Oho, ai okara kaarama vi nahentiva tiriara qora uva ti vaivo. Te tentavano vi nahentira ai amuraro viva vanti taiqama viro viraqaahairo tiriara qora uva ti vaivo. Oho, Noravano Kotiva titanta uva iriharo ariqaa uva vatairage te hove tiataarave, tiro.

⁶ Saraira minti tuvaro Eparaamiva Saraira nai tiva amiro tiharo, Aqao, vi nahentiva ai kaiqa nahentima vaivo. Homa vi nahentira nana okara autu amitataa irera, autuane, tiro. Eparaamiva minti tuvaro Saraira oru Hagaara voqama kero qoraiqama amitaqiro vuvoraro tiro, Hagaava qetakero ruqemakero vura.

⁷ Hagaava ruqemakero aahara vatainai, Suri vatainai vi vau aarara ruvu namari tataaqaa oru vauvaro Noravano Kotiva atito *enseliva* vira tataaqaa qovarama viro ⁸ tiharo, Hagao, are Saraira paanaa nahentima variaro. Taihaira aniarava taini virevae iaro? tuvaro Hagaava nai tiva amiro tiharo, Te tenta nora nahenti aatu qetake ruqemake maini anuro, tiro.

⁹ Minti tuvaro *enseli* viva tiharo, Anirantera oru nena nora nahentivano vainanaini vira paanaa kaiqa varehara vira vevaaraini variane, tiro. ¹⁰ Minti tivakero *enseli* viva tiharo, Te ai kahaqiariraro ai vaintivara airithaa vaivaro kia vovanovata vika ho kaara ntuanarove.

¹¹ Are vanti taiqama vuarava qorainti vaintima vataatenarave.

Are qoraiqamavira ke ke tiana uvvara Noravano Kotiva irirara tira, are nena vanti autu ntavateharama virara *Isamairirave – Noravano Kotiva Irirave*, tiane.

¹² Ai vaintivano noruqama viro vaharo qaakau donki voqaa vaharo viva voqama kero raquarira vaiintiva vairamanta vo vaiinti vo vaiinti vira hampata raquqi vivarave.

Viva nai navunaaka hampata navutaiqamaqiro viharo varianarove, tiro.

¹³ *Enseli* viva Hagaarara vi uvvara tuvaro Hagaava nai aatoqi mintima keroma iriro, Ike, Kotiva ti tave vaivama vaivo. Quaae Kotiva ti tave vaira te vira taveha kia qutu viraiti, qaqi vauro? Virara irihama te Kotirara, Are ti tave variaravama variaro, turo, tiro.

¹⁴ Hagaava minti turara ti, maa entara vaiinti nahenti vi namarira autu nteha, *Belaiah-Roi-Qaqi Variqiro Vi Vaiva ti tave vaira vira namarive*, ti variara. Vi ruvu namariva vaireva, Kadesi vatuka hini vaivaro Bereti vatuka hini vaivaro avutaini vaira.

¹⁵ Hagaava variqiro viro vuru Eparaamira qorainti vanti vata amitovaro Eparaamiva vira autu nteharo, Isamairirave, tura.

¹⁶ Eparaamiva 86 ihi varako entara Hagaava vira Isamairira vata amitora.

17

Vaata toqake okarara qovarama kora

¹ Eparaamiva 99 ihi varakova vauvaro Noravano Kotiva Eparaamira avuqaa qovarama viro tiharo, Te Kotika ekaa kempuka vatauraukave. Are ti avuqaa avuqavuqama kera niraro kia ariqaa uva variarive. ² Are mintiaqira virage te ai vataake vaiha uva tiva taatauke vate ai vaintivara airiqama karerave, tiro.

³ Minto tuvaro Eparaamiva vataini hiqinti viro nai viri vataini vatero vauvaro ⁴ Kotiva tiharo, Te ai vataake vaiha maa uvare tiva taatauke vatarerave. Te tenta kauqu ariqaa aqukeha ariara mintima ti, Ququaama are vo vatanaa vo vatanaaka vika qovama vainarave.

⁵ Te ai autu Eparaamira qaqlini varake, qaraaka autu nteha ariara *Eparahaamivave - Airi Vatanaaka Vika Qovavema* turo. Are vo vatanaa vo vatanaaka vika qova vainarara ti, te minto turo.

⁶ Te ai vaintivara airiqama kaari vikaqihai vonavu avuhainaakama vaivarave. Ai vaintivara airiqamavi vaiha vo vatanaa vo vatanaakama vaivarave.

⁷ Te vate kauqu ariqaa aqukeha tiva taatau tauna uvare ariaravata ai vaintivararavata irihama kia vi uvare raqa karerave. Te ai Variqavanovata vairerave. ⁸ Maa entara are Kenaani vata maaqaa vo vatanaaka voqaara variaro. Ho te aivata ai vaintivaravata maa vataro nimiariraro vi vatava ni vata ekaa enta vairage te ni Variqavanovata vaiha niqaa raqikiqi virerave, tiro.

⁹ Kotiva minto tivakero vo uvavata Eparahaamirara mintima tiro: Te vate tiva taatau tauna uvare arevata naantiara ai vaintivara vaikavata virara eo tivake tenavu vi uvare iriqi virerave tiate. ¹⁰ Te vate tiva taatau tauna uvare arevata naantiara ai vaintivara vaikavata irihama ekaa qorainti vanti vaata toqa kaate.

¹¹ Are nena vaatavata toqa kairaro te uva tiva taatau taarirava kempukaiqama vuarire. ¹² Maa entaraqaahairo ne ekaa qorainti vanti vatafeka 8 enta vara kaimanta vi entaraqaahairo vika vaata toqa nimitaate. Ni hampata vaika, vika qorainti vaintivata vaata toqa kaate. Ne kaiqa vaiinti vo vataihai koqaama teka, vikavata vika qorainti vaintivata vaata toqa kaate.

¹³ Ne vaata toqake okarara mintimake iriqi viha, ne te uva tiva taatau taunarovata kia taurukaraiti, ekaa enta iriqi vivarave.

¹⁴ Qorainti vanti vo vira vaata kia toqa kaivera, vi vaintiva te tiva taatau tauna uvare raqa kaainara kaara te vi vaintirara kia ti vaintima vaivo tirerave, tiro.

¹⁵ Minto tivakero Kotiva qaiqaa Eparahaamirara tiharo, Nena naatara kia qaiqaa Sarairave tiane. Vi autura qaqlini varakeri virara *Seraarave - Avuhaina Vaiinti Raavurave*, tiane. ¹⁶ Te vira koqema amitaariraro viva airi vatanaaka vika nova vairamanta vira vanti vonavu avuhainaakama vaivarave, tiro.

¹⁷ Kotiva minto tuvaro Eparahaamiva vatakanta hiqinti viro nai virivata vataini kero vi uvare iriro nai aatoqi irikero tiharo, Ike, te naampaiqamavi 100 ihi vara kauraro Seraava kontaiqama viro 90 ihi varakaivo. Nantiakee tetanta ho vanti vatatararare? tivakero naarahama kero ¹⁸ viraqaahairo Kotira irero tiharo, Ti maaqu Isamairiva vaivo. Are hoe vira koqema amitaariraro viraqira are uva tiva terava vivavariare? tiro.

¹⁹ Eparahaamiva minto tuvaro Kotiva aqao tiro, Kiave. Ai naatavano Seraava qorainti vanti vata amitaarirara are virara *Aisaakirave - Naaraihirave* tiane. Te vate uva tiva taarirava viraqivata vira vaintivaraqivata ekaa entama qaqlini variqiro vuuanarove.

²⁰ Are Isamairirara tianara te iruro. Te viravata koqema amitaari viva kuvuara irauka airtahaa vaivarare. Isamairiva nora vaiinti 12navu qova vairage te naantiara vika vaintivara koqema nimitaari nora vatanaakama vaivarare. ²¹ Ho kia Isamairiraiqi te vate uva tiva taatau taurava vairaitiro, vi uvava Aisaakirajima varianarove. Maa entaraqaahairo ihi aitarairaro Seraava vanti taiqama viro vi vaintira vatataanarove, tiro. ²² Kotiva minto tivakero nai uva taiqa kero Eparahaamira mini kero vurama.

²³ Ho vohaa vi entaraqaahairo Eparahaamiva Kotiva tunte iro nai maaqu Isamairiravata ekaa qorainti vira naavuqi vaukavata vaata toqa kora. Ekaa vira kaiqa vaiinti vira vatukaini vatatokavata, niarahai monu aqukeha koqaamato vaiintikavata, viva ekaa vika vaatavata toqa nimitora.

²⁴ Vi entara Eparahaamiva 99 ihi varakova nai vaata toqa kero ²⁵ nai maaqu Isamairiva 13 ihi varakora ²⁶ vira vaatavata vohaa vi entaraqaa toqa amitora. ²⁷ Vohaa vi entaraqaa nai kaiqa vaiintivata vaata toqa nimitora.

18

Taaramonavu Eparahaamira tavora

¹ Eparahaamiva Mamarera Oqiva vauraqi vauvaro Noravano Kotiva vira avuqaa qovarama vura. Vi uvara okara maantimama vairo:

Kuarivano uriro qitataqaa noraiqama kero itoraaqaa Eparahaamiva aumaqaaraini nai seri naavu qentiana oquiviro vaharo viti tavomanta ² vaiinti taaramonavu vahaqaqaini himpita vaura.

Mini himpita vauvaro Eparahaamiva vinavuka tavero „qaqi qumina vaiintinavuve tivakero“ kantero oru vinavuka ntitakero vatakanta hicinti viro nai viri vataini vatero ³ tiharo, Ti vaiintinavuvauvo, kia qaqi aitare vuate. Te ni kaiqa vaiintima vauro. ⁴ Kaiqe te tiariraro vovano namari kaqa varero ni aiqu hiqama nimitairaro paru iramanta ne katari okara auraara vase ⁵ te kara nimiiri ne naivarao kempukaiqiramanta nenta aaraini vuate. Nenavu ti vatukaini aniamantama te mintimake ninavu quahama nimitarerave, tiro. Eparahaamiva minti tumanta vinavuka, eo mintiane, ti.

⁶ Tuvaro Eparahaamiva kantero naavuqi oriqetero nai naata Seraarara tiharo, Vaaka koqe *porusi* varakera mpareti untaane, tivakero ⁷ kantero oru nai purumakaunavuqi-hairo purumakau naati koqua vonku varakero nai kaiqa vaiinti amuvaro viva vaaka vira gerama tareva vura. ⁸ Ho kara ita uvuvaro Eparahaamiva kara vira varakero purumakau naama taapairavata qaqi vau naamaravata varakero vuru vinavuka aaqanto vatora. Vinavuka katari okara mini vauvaro Eparahaamiva naivano vinavuka kara nimumanta nora.

⁹ Vinavuka kara namake Eparahaamira ireha ti, Ai naata Seraava taraqie vaivo? tuvaro Eparahaamiva tiharo, Viva vitira *seri* naavuqima vaivo, tuvaro ¹⁰ vovano tiharo, Ihi varake vohaa qaramake vate aniaina entaraqaa te qaiqaa orurante anirerave. Vi entara ai naatavano Seraava qorainti vainti vatatero vikantiro varianarove, tiro.

Minti tuvaro Seraava Eparahaamira naantiaraini *seri* naavu qentiana himpi vaharo vi uvara irura.

¹¹ Seraaka Eparahaamika konta naampaiqama vutanta vaiha Seraava vainti vataarira entava haaru taiqa uvuvaro vaura. ¹² Seraava vi uvara iriro nai araraqihairo naaraihiharо nai irikero tiharo, Te tenta vaatinti konta naampaiqama vuro. Nantiabee te vainti vatake quaheha vairarave? tiro.

¹³ Seraava mintimakero nai aatoqi iruvaro Noravano Kotiva Eparahaamira irero tiharo, Nantivaroe Seraava naaraihiharо tiharo, Te kontaiqama vuro. Nantiabee te vainti ho vatararave, tivo? ¹⁴ Te Noravano Kotika ekaa kaiqa vare vauraukama vauro. Ho te vaaka tunantemake, ihi varake qaiqaa orurante aniariraro vi entaraqaa ai naatavano Seraava qorainti vainti vatatero vikantiro varianarove, tiro.

¹⁵ Minti tuvaro Seraava qeteharora tiro, viva aqao tiro, Kia te naaraihuro, tuvaro viva tiharo, Quqaama te turo. Are naaraihama iaro, tiro.

Eparahaamiva vinavuka vuru ni kora

¹⁶ Minti tivakero taaramonavu himpi Sodomi vatuka tavareka uvuvaro Eparahaamiva vinavuka aarana vuru kareva ntita varero vura.

¹⁷ Aaraini vi vauvaro Noravano Kotiva tiharo, Te Sodomi vatanaaka autu nimitare iaina okarara kukeqate Eparahaamira kia tiva amiarorave. ¹⁸ Eparahaamira vaintivara noraiqamavi kempuka vatanaakama vaivarave. Eparahaamiva kuvuarama tainaraqihai te ekaa vataini vaika koqema nimitarerave. ¹⁹ Eparahaamiva nai vaintivaravata ti uva iriqi vuate ti, te vira tenta kaama taunarave. Vira vaintivara avuqavuqamake nivera, te kauqu ainqiqa aqukeha Eparahaamirara tiva tauna uvara iriha minti minti irerave, tiro.

²⁰ Minti tivakero Noravano Kotiva Eparahaamirara tiharo, Sodomihainaakavata Gomoraihainaakavata vaaqu aaraqaa ni variavo tihamanta irunarave. Vika vaaqu kaiqavano uritarakero vaira kaara ²¹ te tenta otu vika tavarerave. Quqaae vika mintiavo, kiae mintiavo, te otu vika tavarera vuro, tiro. ²² Minti tumanta vaiinti votanta „enselitanta“ vira mini ke Sodomini vi vau aararaqaa uvuvaro Noravano Kotiva Eparahaamikantiro mini vaura.

²³ Viva mini vauvaro Eparahaamiva Noravano vaunaini oruntero vira irero tiharo, Quqaae are vaaqu vaiinti nahenti vehi autu kehara koqe nähentivata vika hampata vehi autu kenarave? ²⁴ Are tavairamanta mini vaiinti nahenti koqeka 50navu vaivera, are qaqiqai Sodomi vatukaqai variaka ekaa vehi autu kenarave? 50navu qaqi

variate tira, are kiae vi vatukara vehakuma amitenarave? ²⁵ Are vaiinti nahenti koqeka qora vaiinti nahenti hampata aru kerorave. Kia mintiane. Qora vaiinti nahenti kaara koqe vaiinti nahentivata aru kerorave. Are vataini variakaqaa raqikiharama are avuqvavu ko tiane, tiro.

²⁶ Eparahaamiva minti tuvaro Noravano Kotiva tiharo, Te tavaari vaiinti nahenti koqeka 50navu vaivera, te vikara irihama ekaa vi vatanaakavata vehakuma nimirerare, tiro.

²⁷ Noravano minti tuvaro Eparahaamiva tiharo, Oho, Noravauvu, te qumina vaiinti-vonomia vauro. Te ainti uva tivaqai vuarirava kia ho vaimanta te vo uva tiarirara are kia ti titiane. ²⁸ Kia anomake koqeka 50navu vaivera, 45navuqai vaivera, are vikara iriharama kiae vi vatanaaka vehi autu kenarave? tiro.

Minti tuvaro Noravano Kotiva tiharo, Te tavaari vaiinti nahenti koqeka 45navuqai vaivera, vikara irihama kiama te vi vatanaaka vehi autu karerare, tiro.

²⁹ Minti tuvaro Eparahaamiva qaiqaa tiharo, Vaiinti nahenti koqeka 40navuqai vaivera vo? Are nantie inarave? tuvaro Kotiva tiharo, Vaiinti nahenti koqeka 40navuqai vaivera, vikara iriha kiama te vi vatukara vehi autu karerare, tiro.

³⁰ Minti tuvaro Eparahaamiva tiharo, Noravauvu, kia ai arara itairara are ti titiane. Vaiinti nahenti koqeka 30navuqai vaivera vo? Are nantie inarave? tuvaro Kotiva tiharo, Vaiinti nahenti koqeka 30navuqai vaivera, te kia vi vatukara vehi autu karerare, tiro.

³¹ Minti tuvaro Eparahaamiva tiharo, Oho, are Noravano variaramanta te qumina vaiintivano ariara ti vauro. Vaiinti nahenti koqeka 20navuqai vaivera vo? Are nantie inarave? tuvaro Noravano tiharo, Te tavaari vaiinti nahenti koqeka 20navuqai vaivera, te kia vi vatukara vehi autu karerare, tiro.

³² Minti tuvaro Eparahaamiva tiharo, Noravauvu, kia ai arara itaarire. Te qaiqaa vohaiqaqai ai ireha tavarerare. Vaiinti nahenti koqeka 10navuqai vaivera vo? Are nantie inarave? tiro. Minti tuvaro Kotiva tiharo, Vaiinti nahenti koqeka 10navuqai vaivera, vikara iriha kiama te vi vatanaaka vehi autu karerare, tiro.

³³ Minti tiva taiqa kero Noravano Kotiva Eparahaamira mini kero vuvaro Eparahaamiva tuvurantero nai maaqaini vura.

19

Sodomi vatanaaka vaaqu kaiqa varora

¹ Enselitanta otu vuvaro entama vumanta vitanta Sodomi vatukaini otunte tavovaro Rotiva vaantaaavura qentiana oquiviro vaura. Rotiva mini vaiharo *enselitanta* tavero ² qaiqai qumina vaiintitantave tivakero, himpiro oru vitanta ntitakero uva manteharo nai viri vataini vatero ² tiharo, Ti vaiintitantao, te nitanta kaiqa vaiintima vauro. Netanta ani ti naavuqi vaitaate. Netanta nenta aiqu hiqamake vaite, hora toqaqi nentatanta vuate, tiro.

Rotiva minti tumanta vitanta aqao ti, Tetanta vahaqaqaini qaqqi qumina vatuka kanta vaitarerare, ti. ³ Minti tuvaro Rotiva kempukaiqama kero tumanta vitanta Rotira naavuqi oriqete vauvaro Rotiva kia noqavu mparetira untakero vitanta nimumanta nora.

⁴ Vitanta kara namake vaitarerare tumanta Sodomi vatukaqai vauka hihai hihai naampainavuve, qaraaka vaiintinavuve, aninte Rotira naavu vahaqaqaini ututumate vailha ⁵ Rotirara naverai tiha, Vaaka ania vaiintitanta taraqie variavo? Vitanta vara veva kairage vitanta hampata nuare, ti.

⁶ Minti ti vauvaro Rotiva vevantero genti tintatero tiharo, ⁷ Ti navunaataarito, eqaate. Kia vi kaiqara vaaqu kaiqa varaate. ⁸ Ho tavaate. Ti raavuratanata qaraaka varaatatanta variavo. Ne vitanta varemata nenta varaataa ina kaiqara varaate. Vaaka aniatanta kia utu varaate. Vi vaiintitanta ti naavuqi ani variamantara ti, te vitantaqaa raqikiariravama vaivo, tiro.

⁹ Rotiva minti tumantavata, vika tiha, Are vinuane. Are vo vatanaava maini ani vahuqa variaravave. Kia tinavu ravaaqavuane. Are kia tinavu vaaraqairera, tenavu aivata vogamake qoraiqama amitarerare, ti. Minti tivake vika Rotira venta qaqini ke oru genti rukavu kareka auti vaumanta ¹⁰ vaaka anu vaiintitanta vitanta nái kauqu tutuke Rotira raraun vera naavuqi ke genti tintate, ¹¹ viraqahai vitanta aaquakaa voqaara utu kovaro vi vatanaaka avu arukomanta vika nái avuara qumimaqa iha kia ho genti qantua kora.

Rotiva Sodomi mini kero vurama

¹² Vi vatanaaka kia ho genti qantua komanta vaiinti vitanta naavuqi vaiha Rotirara tiha, Ai navunaa vonavu maa vatukaraqi varie iavo? Ai airaamaquve, ai maaquve, ai raavurave, ai navunaakave vaivera, vika vaaka ntita varera maa vatukaraqihaira vuane.

¹³ Tentanta maa vatukara vehi autu taiqa karerave. Maa vatanaaka Noravano Kotiva ti uvara vogamake raqake variavaro vika vaaqu kaiqavano uritarakero vaira kaara Noravano titanta tititaimanta maa vatukara vehi autu taiqa karera tuvuro, ti.

¹⁴ Minti tuvaro Rotiva vevantero oru nai raavuratanta varare u vaiintitantara tiharo, Noravano Kotiva maa vatukara vehi autu taiqa kareva auti vaivo. Kante maaqihai vonaini vuate, tumanta vira airaamaqtanta Rotira uva kia iriraiti, virara virera uvaqaima ti vaivo tura.

¹⁵ Ho aatitare umanta *enselitanta* Rotira vihi tiha, Kantera nena naatavata nena raavuratantavata ntita varera vonaini vuane. Maa vatukava vehiqama viramanta nevata taiqa vivorave, ti.

¹⁶ Vitanta minti tuvaro Rotiva kia vaaka vitanta uva irireva auti vauvaro Noravano Kotiva Rotirara aaqurihama amitorara ti, vitanta Rotiravata vira naatavata vira raavuratantavata ntitavare vika kauqu utu raraau vare vuru vatuka aaqaini vaati ke.

¹⁷ Vitanta vika vita vuru aaqaini ke *enseli* vovano tiharo, Nivata vehi autu kaantorave. Kantema kiama antavi tavamaqi viraiti, kiama vona vona varika varikamaqi vuate. Niaraini vuruni aiqinainima kante vuate. Nevata maini uqitaini vahia taiqa vivorave, tiro.

¹⁸ Minti tuvaro Rotiva aqao tiro, Nora vaiintitantao, kia minti tiate. ¹⁹ Netanta ti nenta kaiqa vajinti koqema timiteha ti vehakuma timitaakama variavo. Oho, te kia ho ainqina vainaini virarave. Te aaraini vi variariraro qora haikavano tivata vehi autu kaantorave. ²⁰ Ho tavaate. Inaara vatuka vo vutuni vaivo. Netanta ti qaqi kaiqe te ruqemake viraqi oru ho variare, tiro.

²¹ Minti tuvaro *enseli* vovano tiharo, Hove. Te are tianante irerave. Te kia vi vatukara vehi autu karerave. ²² Ho kante vuane. Te kia vo haika qovarama karaiti, qaqi variarara are mini oru ntairae te maa vatukara vehi autu karerave, tura.

Rotiva vi vatukarara inaara vatukave turara ti, vajinti nahenti vi vatukarara *Sooave — Inaara Vatukave*, tura.

Sodomivata Gomoravata vehi autu kora

²³ Rotiva vi vauvaro kuari uruntovaro Soaa vatukaini oruntora. ²⁴ Viva Soaini oruntovaro vaaka Noravano Kotiva naaruvalihairo iha ito *salfara* vara kovaro aaqu ntintema kero Sodomi vatukaqaavata Gomora vatukaqaavata vi haikava hiqinti hiqinti i vaura.

²⁵ Mintiaqiro viharo vi vatukatanta vehi autukero, vi vatanaakavata vehi autukero, ekaa uqitaini qampiqe vau haikaravata ekaa naaho maatavata vehi autu taiqa kora.

²⁶ Mintiaqiro vi vauvaro Rotira naatavano aaraini viharo kaiqe tuqantaavi tavaare tivakero tuqantaa vuvaro vira vaatavano hore kuquviro katari aratora voqaara mini vaura.

²⁷ Vira qararaa Eparahaamiva toqaqi himpiro kantero hogare Nora Kotira hampata uva tunaini qaiqaa otuntero ²⁸ viavi Sodomi vatukavata Gomora vatukavata tavarare tuvaro uqita vi kantahairo iha muravanoqai uri vaura. Nora iha iteharo muravano auti vaintema kero, vi kantahairo nora muravano uri vi vaura.

²⁹ Kotiva uqitaini vau vatukara vehi autu kareva iharo Eparahaamirarao tiro, Rotira vehakuma kovaro Rotiva ho ruqema kero vurama.

Rotira raavuratanta qora kaiqa varora

³⁰ Rotiva qeteharo kia ho te Soaini vairarave tivakero, nai raavuratanta ntita varero Soaa mini kero verara oru ori onavuqi vaura.

³¹ Rotiva nai raavuratanta hampata viraqi vauvaro vo enta vira nakaava nai aurara tiharo, Oho, titanta qova naampaqama vuarirava aumaiqivo. Tetanta varaarira qorantika kia maa vataraqaa variamanta nantiakkee tetanta ho vainti vatararave? ³² Kaiqetanta *uaini* tentantata qora amiariraro nama kairaro vira avu aatovano hampi qirage tetanta vira hampata vaiteha vainti taiqama vuare, tiro.

³³ Minti tivake entaqi vitanta *uaini* nai qora amuvaro „vueraiqama vuvaro“, vira nakaava naane nai qokantiro vaitovaro vira qova kia virara kankomakero irura.

³⁴ Mintuvare vira qararaa vira nakaava nai aurara tiharo, Te enta entaqi vikanti vaitauro. Kaiqetanta qaiqaa *uaini* amiariraro nama kairaro vira avu aatovano hampi qirage arevata vikantira vaitaane. Tetanta mintiaqи vuariraro titanta qova titanta vainti taiqama kaarire, tiro.

³⁵ Minti tivake entaqi vitanta qaiqaa *uaini* nai qora amuvaro nama kovaro avu aato hampi quvaro vira auravano vikantiro vaitovaro vira qova kia virara kankomakero irura.

³⁶ Vira raavuratanta mintima kovaro Rotiva vitanta vainti taiqama kora. ³⁷ Vira nakaava vainti taiqama viro vuru qorainti vainti vatatero virara Moapirave tura.

Vi vaintiva noruqama viro ekaa Moapi vatanaaka qova vaura.

³⁸ Vira auravanovata vainti taiqama viro qorainti vanti vatatero virara Ben-Amirave tura. Vi vaintiva noruqama viro Amoni vatanaaka qova vaura.

20

Eparahaamiva Geraa vataini otu vaura

¹ Eparahaamiva Mamarera Oqiva vauraqi variro, viraqaahairo katu varero vevara vo vataini vura. Kadesi vatuka hini vauvaro Suri aahara vata hini vauvaro Eparahaamiva avutana otu vaura. Viva mini varikero viraqaahairo Geraa maaqaini oru vaura.

Viva mini oru vaiharo ² nai naatara, Viva ti aurave, tuvararo tiro, King Abimelekiva, Geraa vatukaqaa raqikuva Seraarara tiharo, Vira vita vare ti naavuqi vuru kaate, tumanta vita vuru kovaro ³ vo enta Abimelekiva entaqi vaiteharo taira tave vauvaro Kotiva virara tiharo, Are vi nahentira vara taanara kaara qutuma vinarave. Vi nahentira vora naatama vaivo, tiro.

⁴ Minti tuvaro Abimelekiva kia Seraakantiro nuvara tiro, viva Kotirara aqao tiro, Noravauvu, kia te virara irunarave. Are qumina tivata, ti navunaakkavata, vehi autu taiqa kerorave. ⁵ Eparahaamiva naivano vi nahentiraro tiharo vira ti aurave tivaro vi nahentiva naivata tiharo, Viva ti vakaavavave tirave. Vitanta minti tiaverama te kia qora kaiqa vararaiti, virara qaqi nahentive tima, vira vita vare tenta naavuqi vuru kaunarave, tiro.

⁶ Minti tuvaro Kotiva tiharo, Ho te irurarama are virara qaqi nahentive tivakera, vira vita varera nena naavuqi vuru kaunarave. Ariara ti uva raqa kerorave ti, te ai ravaqaqvavu kaurarama are kia vira varera iaro. ⁷ Ho nai naata qaiqaa nai amiane. Vi vaiintiva ti uva tiva nimi vai vaiintivama vaivo. Viva ti haarairaqe te ai vehakuma amitaararae are kia qutu viraitira, qaqi vinarave. Are kia vira naata nai qaiqaa amirera, vira kaara are nena navunaaka hampata qutu taiqama vinarave, tiro.

⁸ Minti tuvaro vira qararaa Abimelekiva vaaka toqaqi himpiro nai qiata vaiinti naarama kero, vi uvvara tiva nimumanta vika vogamake naatu itomanta vaura.

⁹ Mintuvaro Abimelekiva Eparahaamira aarama kero virara tiharo, Are nantivarae tinavu mintima timitaaro? Tenavu nana qora kaiqa vara amitaurarae are virara irihara mintima kera tinavu qoraiqama timitaararo Kotiva tinavuqaa nora uva vataivo? Are nena naatara kia minti tiataara vaivarama minti tiaro. ¹⁰ Are nana kaarae mintira iaro? tiro.

¹¹ Minti tuvaro Eparahaamiva nai tiva amiro tiharo, Oho, te mintimake irunarave. Maa vatanaaka kia Kotirara iriaka vika ti naata varareka iha ti harukevorave ti, te virara iriha ti aurave tunarave.

¹² Ho ti naatavano quqaama ti auravano vaivo. Viva ti qora raavurvavano vaharo viva kia ti nora raavur tanava vaimanta te vira vara tauraroma viva ti naataiqama vivo. ¹³ Kotiva ti qora maaqaihairo ti tititaimanta te vo vatanaaka vataini vi aniba te tenta naatara mintima ti, Are ti kahaqiharama vo vaiinti vo vaiinti tiva nimihara tiriara ti vakaavavemra tiane tunarave, tiro.

¹⁴ Minti tuvaro Abimelekiva Seraara Eparahaamira nai amiro viraqaahairo sipisipivata, purumakauvata, kaiqa vaiintivata kaiqa nahentivata amiro ¹⁵ virara tiharo, Ti vataqaima vutuni vuruni ai avuni vaivo. Are maini ta vataraqaa variataa irera, viraqaas oru variane, tiro.

¹⁶ Minti tivakero viva Seraarara tiharo, Te ai vakaara silvaa monu 1,000 amiariraro vi uvava taiqaarire. Virara irihama ekaa vaiinti nahenti ariara viva kia qora kaiqa varavirarave, tiro.

¹⁷ Minti tuvaro Eparahaamiva Abimelekirara iriharo Kotira aarama amitovaro Kotiva Abimelekiravata, vira naatavata, vira kaiqa nahentivata, koqema nimtomanta vinavuka ho qaiqaa vanti vatora.

¹⁸ Tota Eparahaamira naata Seraara kaara Noravano Kotiva ekaa vi nahentika kia vainti vataate tiro, kuvaikomanta vika *naahiaravi/qururaiqamavi* vaha kia vainti vatora.

21

Seraava Aisaakira vatatora

¹ Noravano Kotiva Seraarara viva vainti vataanarove turara tiro, viva Seraara koqema amitovaro ² Seraava vainti taiqama viro vuru Eparahaamira qorainti vanti vata amitora. Eparahaamiva naampaiqama vu entara vi vaintira vatatora.

Kotiva kaamato entaraqaa Seraava vi vaintira vatatora. ³ Vatatoro Eparahaamiva nai maaqu vira autu ntavateharo *Aisaakirave - Naaraihirave*, tiro.

⁴ Minti tuvaro Aisaakiva 8 enta varakovaro Eparahaamiva Kotiva tunte iro vira vaata toqa amitora. ⁵ Aisaakira vatato entara Eparahaamiva 100 ihi varakova vaura.

⁶ Seraava vainti vatatero tiharo, Kotiva ti koqema timitaimantara ti, te vainti vataate quaheha naaraihihama vauro. Vaiinti nahentu ti vaintiara irihama vikavata virara quaheha naaraihivarave, tiro.

⁷ Minti tivakero viva tiharo, Ike, tavave tota Eparahaamirara tiharo, Ai naatavano vainti naama amiaina nahentivama varianarove, tirave? Ho tavaate. Eparahaamiva naampaqama vimanta te vira vainti vata amitauro, tiro.

⁸ Minti tuvaro vainti viva noruqama viro naama qaqirako entaraqaa Eparahaamiva nai navunaaka hampata vainti vira quahama amiteharo nora kara nora.

Eparahaamiva Hagaara nai vaintintiro nititora

⁹ Ho vo enta Isipihainaa nahenti Hagaava Eparahaamira vata amito vaintiva, Isamairiva Seraara maaqu Aisaakira vataakero ruheharo vira memera ti vauvaro ¹⁰ Seraava vitanta tavero oru Eparahaamirara tiharo, Aqao, are kaiqa nahenti vira atitairaro viva nai maaquntiro vuarire. Vi nahentira maaquvano ti maaqu hampata vaharo naantiara ai airaira hini varaantorave. Ekaa vi haikava Aisaakirainima naantiara varianarove, tiro.

¹¹ Isamairivavata Eparahaamira maaqu vaurara tiro, Seraava minti tura kaara Eparahaamira muntukavano qoraiquivaro vaura.

¹² Mintima vauvaro Kotiva Eparahaamirara tiharo, Kia vitanta nokara ai muntukavano qoraiqrara variane. Te tota tenta kauqu ainqiqa aqukeha ariara tiha, Ai maaqu Aisaakiraqaahai ai vaintivara airitahaa qovarama vivarave tunarara tira, are Seraava tintema kera vira atitaane. ¹³ Ai kaiqa nahenti vira maaquvata ai maaqu vaimantara ti, te vira vaintivaravata airiqama kaari vikavata nora vatanakama vaivarave, tiro.

¹⁴ Kotiva minti tuvaro vira qararaa Eparahaamiva vaaka toqaqi himpiro karavata namari taquvata Hagaara amiro vira atitovaro Hagaava nai maaquntiro vura. Viva nai maaquntiro oru viviro, aahara vata, Besebaini oru mini vaharo vi ani vaura.

¹⁵ Mini vi aniharo namari nama taiqa kovaro Hagaava nai maaqu katari okara aumagaaraini kero ¹⁶ tiharo, Mpo, ti maaquvano qutu vuinara kia tavaataa ivo tivakero, vututogamakero oru oquviro vaharo iqi rateharo vairo.

¹⁷ Ho Kotiva vira maaquvano iqi rate vaura iruvaro Kotiva atito *enseliva* naaruvhairo Hagaarara naverai tiro tiharo, Hagaao, nana kaarae ai muntukavano qoraiqvvara variaro? Kia qetaane. Kotiva ai maaquvano iqi ratai uvara irivo. ¹⁸ Ho oru nena maaqu ravuku varaae. Naantiara te vira vaintivaraqaa nora vatanakama qovarama kararave, tiro.

¹⁹ *Enseli* viva minti tuvaro Kotiva Hagaara avu quantua kovaro Hagaava viti tavovaro vata quvitoraqi namarivano vauvaro viva namari taqu varero oru namari kaqa varero viri nai maaqu amuvaro nora.

²⁰ Kotiva vira maaqu koqema amitovaro viva noruqama viro aahara vata, Paraanini variqiro viharo kempuka vaiintivano vaharo koqema kero huru ari vau vaiintiva vaura.

²¹ Mini vauvaro vira nova Isipi vatanaa nahenti vo vira vara amuvaro Isamairiva vira varatero vaura.

Abimelekika Eparahaamika vohaa uva tiva taatau tora

²² Vi entara Abimelekiva nai iqoka vaiintiqaqaa raqiki vaura Pikorikantiro Eparahaamiva vaunaini oruntero tiharo, Te tavauraro Kotiva ai kahaqi vaivara are vo kaiqa vo kaiqa vare varianarave. ²³ Ho Kotira avuqaa vahara nena kauqu ainqiqa aqukeharama tiriavarata, ti vaintiaravata, ti naintiaravata, tiharo, Kia te vika una tiva nimirerave, tiane. Te tota kia ai qoraiqama amitaraiti, ai koqema amitaunarave. Are vo vatanakama maini maa vataraqaa vaharama tivata, ti navunaakavata, kia qoraiqama timitaraitira, tinavu koqema timitaqira vuane, tiro.

²⁴ Abimelekiva minti tuvaro Eparahaamiva nai kauqu ainqiqa aqukero tiharo, Ququaama te mintirerave, tiro.

²⁵ Minti tivakero Eparahaamiva tiharo, Ho te tiarirara iriane. Ai kaiqa vaiinti vonavu aninte tenavu namari kaqarerera quvitaunaraqaa tinavu kuvalike variarave, tiro. ²⁶ Minti tuvaro Abimelekiva tiharo, Oho, kia te virara irunrarave. Nai taukae mintiavoo? Are vaaka vi uvara ti tiva timiatarare, tiro.

²⁷ Minti tuvaro Eparahaamiva nai sipisipivata purumakauvata rairakero vonavu vuru Abimelekira amiro, viraqaaahai vitanta vohaa vaigha uva tiva taatau tora.

²⁸ Eparahaamiva sipisipi naati nahe 7navu rairakero voqaa vatovaro ²⁹ Abimelekiva Eparahaamira irero tiharo, Are nantivarae 7 vinavuka voqaa vataaro? tiro.

³⁰ Minti tuvaro Eparahaamiva tiharo, Are sipisipi maanavura varerama, te namari kaqarera quvitaunara tiharo, Quqaama Eparahaamiva vira quvitairave, tiane. Are minti tiraro vi uvava taiqaarire, tura.

³¹ Vitanta mini vaiha vohaa uva tiva taatauke vatorara ti, vaiinti nahenti vi namarira kaeq vaura autu nteha, *Beseba Namariive - Kauqu Aiqiqaa Aqukeha Tivato Namariivave*, tura.

³² Ho viraqaahairo Abimelekiva nai iqoka vaiintiqaqaa raqiki vaura Pikorikantiro anirantero Pirisia vataini vuvaro ³³ Eparahaamiva Besebaini vahiaro airi ihi variqiro vi vai katarira ututero, viraqaahairo Nora Kotira aarero tiharo, Kotiva ekaa enta qaqi variqiro vi vaivama vaivo, tura.

³⁴ Eparahaamiva Pirisia vataini vukaiqama kero variqiro vi vaura.

22

Kotiva Eparahaamira avateharo tavora

¹ Vo enta Kotiva Eparahaamira avatareva iharo virara tiharo, Eparahaamio, tuvaro Eparahaamiva tiharo, Te mainima vauro, tiro.

² Minti tuvaro Kotiva tiharo, Nena maaqu vohaiqa ai voqama kero muntuka vaimara, Aisaakira, vira vita varera Moraia vataini vuane. Mini oruntairage te ainqina vo ai umiqaarirara are nena vainti vita varera viraqaa vaarirera mini vaihara, ekaara kaintu iha quarake *ofaara* timitentema kera, nena maaqu mintima timitaane, tiro.

³ Minti tuvaro vira qararaa Eparahaamiva vaaka toqaqi himpiro ekaara kaintu iha quarake *ofaarara* iriharo iha teqakero nai donki tauvaqqaqaa vaari vatero viraqaa rumpatero nai kaiqa vaiintitanta ntita varero nai maaqu Aisaakiravata vita varero Kotiva tunaini vireva vura.

⁴ Vinavuka aaraini vivi, taaramo enta varake Eparahaamiva vuru tavovaro vuruni vi ainqinava vauvuro ⁵ Eparahaamiva nai kaiqa vaiintifantara tiharo, Netanta maini vaiha donkiqaa raqiki vaiqe te tenta maaqunti vururagaqaa oru vaiha Kotira quahama amite, tetanta orurante tuvirerave, ⁶ tivakero Eparahaamiva *ofaa* iha nai maaqu aqu amitero ihativata *qehavata/muhupavata* nai varero, naitanta qoka ainqinagaqaa virekatanta vuruma.

⁷ Aisaakiva aaraini viharo nai qora irero tiharo, Qao, tuvaro viva tiharo, Ho tirage iriavi, tuvaro Aisaakiva vira irero, Tetanta ihavata ihativata vare uri vauro. Sipisipi naati Kotira *ofaa* iha quara amitaainara tantoe vaivo? tiro.

⁸ Minti tuvaro Eparahaamiva nai maaquara tiharo, Kotiva naivanoma sipisipi naati timianarove, tiro. Minti tivaketanta qoka oru vi oruntora.

⁹ Vitanta Kotiva tunaini orunte Eparahaamiva ori varakero *ofaa* tainta autukero viraqaata iha raukutero nai maaqu rumpakero viraqaa vatero ¹⁰ *qehai/muhupa* vare vura varakero viraqohairo nai maaqu arukaare tuvaro ¹¹ naaruvalihairo Noravano Kotiva atito *enseliva* aarero tiharo, Eparahaamio, Eparahaamio, tuvaro viva tiharo, Te mainima vauro, tiro.

¹² Minti tuvaro *enseli* viva tiharo, Kia nena vainti aruane. Kia vira qoraiqama amitaane. Te tavaurara are nena maaqu kia qaqi tuataraitira, Kotira amireva auti varianarara ti, te ariari Kotiva uva iri vai vaiintivave turo, tiro.

¹³ *Enseli* viva minti tuvaro Eparahaamiva vuruvi tavovaro sipisipi qoravano nai *komu* katari kaaraqi rutaqutero uvavaro viva oru vira qaqini varakero kia nai maaqu arukero Kotira *ofaa* iha quara amitaraitiro, sipisipi vira arukero Kotira ekaara kaintu iha quara amitorovo sipisipivano Aisaakira vatuka varovaro Aisaakiva qaqi vaura.

¹⁴ Eparahaamiva vi vatara autu nteharo, Noravano Kotiva *Naima Timi Vaivama Vaivo*, tura. Eparahaamiva vi uvvara turara ti, maa entara vaiinti nahenti tiha, Noravano Kotiva nai ainqinagaqaa vahiaro tinavu timi vaivama vaivo, ti variara.

¹⁵ Eparahaamiva minti tuvaro Noravano Kotiva atito *enseliva* qaiqaa naaruvalihairo Eparahaamirara neveraitiharo, ¹⁶ Te tenta hutuqaa tiha, Tota te ai avateha tavarera ariara nena maaqu vohaiqa ti timiane turara are kia nena maaqu qaqi tuataraitira, ti timireva auti varianarara ti, ¹⁷ te ai koqema amitaari ai vaintivara opu makau voqaara airithaa vaivarave. Vika nora namari auvahini vaina nuqara voqaara airithaa vaivarave. Ai vaintivara mpeqa vaiha nai navutaaka naatarake vika vatuka vo vatuka vo vatuka varevarave. ¹⁸ Are ti uva irianarara tiro, are kuvuarama terava vovano ekaa vo vatanaa vo vatanaaka koqema nimitaanarove, tiro.

¹⁹ Minti tuvaro Eparahaamiva ¹⁴ nai maaquntiro, ururantero nai kaiqa vaiintitanta konaini otuntero oti vitantavata ntitake qaiqaa aniranre Besebaini oru vaura.

²⁰ Eparahaamiva mini vauvaro vovano anintero vira tiva amiro tiharo, Ai qata Nahora naata Mikaava qorainti vainti maantuma vatataivo:

²¹⁻²² Hogare Usira vatatero, viraqaahairo Busirave, Kemuerirave, Kesetirave, Hasorave, Piladaasirave, Jitilapirave, Betuelirave, vinavukama vatataivo. Vira vaintinavuqihairo Kemueriva noruqama viro qorainti vainti vo Araamira vatataivo.

²³ Betueliva noruqama viro nahenti vainti Rebekaara vatataivo. Nehora naatavano vi vaintinavuka 8navu vatataivaro ²⁴ vira qiariva Reumava qorainti vainti Tepaarave, Gahamurave, Tahasirave, Makaarave, vinavukama vatataivo, tuvaro Eparahaamiva irura.

23

Seraava qutu vura

¹⁻² Seraava airi ihi 127 ihi varakero Hebaroni vatuka Kenaani vataini vaiharo qutu vauvaro Eparahaamiva oru viva qutu vunaini vaiharo virara iq'i rata amitora.

³ Eparahaamiva nai naata vaata qaqi mini kero oru Hiti vatanaakara tiharo, ⁴ Te vo vatanaa vaiintivano maa vataraaqa ni hampata ani vauvo. Ne vata vo ti timiqe te ni koqaa nimi, vi vataraaqa te tenta naata vuru quntama taare, tiro.

⁵ Eparahaamiva minti tumanta Hiti vatanaaka vira nai tiva ami tiha, ⁶ Nora vaiintio, are tinavu hampata vahara kempuka vaiinti noravano varianarave. Tenavu tentanavu vaiinti nahenti qutuaka quute vaunara koqeraqi are homa nena naata viraqi quntama tenarave. Kiama tinavuqihairo vovano aqao tianarove. Tenavu ekaa hoveqaima tirarave, ti.

⁷ Vika minti tuvaro Eparahaamiva himpiro nai qjata vataini kero Hiti vatanaakara koqema iavo tivakero ⁸⁻⁹ tiharo, Ne tiriara homa nena naata maa vataraaqa quntenarave tiavera te tiari iriate. Sohaara maaqu Efaroniva vata vo vataivaro vira auvahini ori onavu vo vira autu Makapera ori onavuve tia vatava vaivo. Ne tiriara irihama ne hoe Efaronira iraivar viva vi vatara ti timiraqe te tenta navunaaka qutivaqe viraqi quntaare? Te vi vatara koqaa nora monu Efaronira amirerave, tiro.

¹⁰ Eparahaamiva minti tuvaro Hiti vatanaa vaiinti Efaroniva nai navunaaka hampata vatuka qentian oquvi vaumanta vira navunaaka vira aqanto vaiha vira uva iri vauvaro viva Eparahaamirara tiharo, ¹¹ Nora vaiintio, kiama vi vatarara koqaa timinarave. Vi vataravata vi vataraaqi vai onavuravata te ai qaqi amirerave. Te tenta navunaaka nivuqaa vahama vi vatara ai amuro. Homma nena naata viraqi quntenarave, tiro.

¹² Efaroniva minti tuvaro Eparahaamiva qajqaa nai qjata vataini kero ¹³ ekaa vaiinti nahenti ruvaaquma vuka vira uva iriate tiro viva Efaronirara tiharo, Ho ti uva iri vairaque tiare. Te vata koqaa ai amiarirara are varairaque te tenta naata vare vuru viraqi quntaare, tiro.

¹⁴ Minti tuvaro Efaroniva Eparahaamirara tiharo, ¹⁵ Ho kaiqe te ai tiva amiare. Vi vatara koqaa vaireva, 400 silvaa monuma vaivo. Arevata tevata vi koqaarara kia nora koqaave tirarave. Homma vi vatara varera nena naata viraqi quntaane, tiro.

¹⁶ Efaroniva minti tuvaro Eparahaamiva hove tivakero vi silvaa monu sikeriqaa hirikero avuqavu rairakero Efaroniva kaamato koqaara vaiinti nahenti nivuqaa vaharo vi koqaara Efaronira amura.

¹⁷ Mintima kero Eparahaamiva Efaronira vata Makapera vata varora. Vi vatava Mamarera Oqiva vaura yutu mantaraini vaura. Vatave ori onavuve vi vataraaqa vaukatarirave Eparahaamiva varomanta ¹⁸ vi entaraqa Hiti vatanaaka ruvaaqumavi vahia vi vatarara Eparahaamira vatave tura.

¹⁹ Eparahaamiva vi vatara varero viraqaahairo nai naata Seraara vaata varero vuru Makapera onavuqira Kenaani vataini quntama tora.

²⁰ Mintimake Hiti vatanaaka vatavata onavuvata Eparahaamira amuvaro viva viraqi nai naata quntama tora.

24

Aisaakira nahenti vara amura

¹ Eparahaamiva airi ihi varakero naampaiqama vuva vauvaro Noravano Kotiva vira koqema amito varoro tiro, ekaa Eparahaamira kaiqavano ho vaura.

²⁻³ Ho Eparahaamiva nai kaiqa vaiinti avuniqamake vaura vira aarora. Vi vaiintiva naampaiqama vuva ekaa Eparahaamira kaiqaaqa raqiki vauva vauvaro Eparahaamiva vira aarama kero tiharo, Noravano Kotiva naaruvaqaavata vataqaavata raqiki vaira avuqaa vaharama are ti uva irihama nena kauqu ti aiquqaa vatehara te mintirerave tiane. Ti maaqu nahenti vara amire iharama, kia maa vatanaa nahenti, Kenaani nahenti

vira vara amiane.⁴ Oru tinta maaqaihairs ti navunaa nahenti vo varera viri ti maaqu Aisaakira amiane, tiro.

⁵ Eparahaamiva minti tuvaro vira kaiqa vaiintivano vira irero tiharo, Vi nahentiva kia aniaataa iraro viva kia tintiro maini anirera, te hoe ai maaqu nai vita vare ai navunaaka inaini vuru kararave? tiro.

⁶⁻⁷ Minti tuvaro Eparahaamiva aqao tiro, Noravano Kotiva naaruvalini vai Variqava, viva tota vi vataraqaaahairo ti tititaimanta maini anuraukave. Viva nai kauqu ainqaa aqukero tiharo, Maa vataro ai vaintivarao nimirerave, turave. Minti turara tira, are kia ho ti maaqu mini vite vinarave. Are nena viraro Kotira *enseli* vovano ai avuni viharoma viva ai kahaqirara are homa vihairs ti maaquara irihara nahenti vo vita vareran aninrarave. ⁸ Vi nahentiva kia aintiro maini aniaataa irera, kiama te vate tuna uvava ai ravaaqavu kaanarove. Vi nahentiva kia maini aniaataa irera, are kiama ho ti maaqu mini vite vinarave, tiro.

⁹ Eparahaamiva minti tuvaro vira kaiqa vaiintivano nai kauqu ainqaa aqukero tiharo, Te are tinantemake mintirerave, tuvaro¹⁰ Eparahaamiva koqaa airaira nai kaiqa vaiinti amuvoro viva kameri kauqurutantaaqaa koqaa airaira rumpa varero viro, Nehora vatuka Mesopotemia vatainira oru vura.

¹¹ Vira kaiqa vaiintivano viviro, vi vatuvara aaqaini oruntovaro erovaro viva otu namari kaqe vaura tataaqa vailaro nai kamerinavu vara vataini vaitakero vauvaro nahenti namari tuvu kaqeva aumaiquvaro¹² viva Kotira arero tiharo, Noravauvu, are ti nora vaiinti Eparahaamira Variqavanoma variaro. Ta nahentirae te Aisaakira vara amirarave? Are Eparahaamirara quaheharama Aisaakira amina nahentira ti humiqaae.¹³ Te maini nahentti namari kaqe varianainima vaura.¹⁴ Nahenti vovano namari kaqareva anirage te virara namari kaqa timirage naare tiariraro viva ti timiharo ti kamerivata kaqa nimirera, ho te virara are Aisaakira kaama amitaana nahentirave tirarave. Nahenti vovano mintirera, te ariara ququaama are ti nora vaiinti Eparahaamirara quaheharama variaro tirarave, tiro.

¹⁵ Viva mintima kero Kotira aare vauvaro nahenti vo, vira autu Rebekaava namari kaqareva taqu aqua varero tuvuntora. Vi nahentiva Betuelira raavuravano vauvaro Betueliva Nehoravata, vira naata Mikaaravata, vitanta maaquvano vaura.

¹⁶ Rebekaava koqe vira vaata vataa varaatavano tuvuntero, tuvu namari kaqa varero tuvurante vuare tuvaro¹⁷ Eparahaamira kaiqa vaiintivano kantero oru vira vitakero virara tiharo, Are hoe nena taquqihairs namari tivata timirage naare? tiro.

¹⁸ Minti tuvaro nahenti viva tiharo, Nora vaintio, homa nenanrave, tivakero vaaka namari taqu vara vataini viavi tuata amite vauvaro Eparahaamira kaiqa vaiintivano namari vira nora.¹⁹ Viva namari ho novaro nahenti viva tiharo, Kairage namari qaiqaa otu kaqa vare vuru ai kamerinavuata nimiari naate, tiro.

²⁰ Minti tivakero viva vaaka nai namari taqu kaqatora vira kamerivano ne vau tanuraqi qihakero qaiqaa kantero otu namari kaqa varero vuru vira kamerinavu ekaa nimumanta ho nora.²¹ Niumumanta ne vauvaro Eparahaamira kaiqa vaiintivano kia uvavata tiraitiro, qaqi vira aituti vailaro tiharo, Maa nahentirae Noravano Kotiva Aisaakira amianarove? tiro.

²² Autiti vauvaro nahenti viva kamerinavu namari nimi taiqa kovaro Eparahaamira kaiqa vaiintivano nora monu aquke vau haikara, ainqiana ukute *ringira koriqohai* aututoravata, *koriqohai* aututora naahuhura taaraqantavata, urequkero vira amiro.

²³ Mintima kero amiro nahenti vira irero tiharo, Ai qora tarave? Te tenta kaiqa vaiintinavu vatamake hoe ai qora naavuqi oru vaitararave? tiro.

²⁴ Minti tuvaro nahenti viva tiharo, Ti qova Betuelivave. Viva Nehoka Mikaaka maaquvano vaivo.²⁵ Ai kamerinavu kara neva ho vaivaro nenavu vaitevavata homa ti qora naavuqi vaivo, tiro.

²⁶ Nahenti viva minti tuvaro Eparahaamira kaiqa vaiintivano nai viri vataini vatero Nora Kotira autu tuahera keharo tiharo,²⁷ Noravano Kotiva ti nora vainti Eparahaamira Variqavanoma vaivo. Viva nai kauqu ainqaa aqukeharo tivatai uvvara kia tauru karaitiro, viva vaaka Eparahaamira navunaaka ti humiqairara ti, te vira autu tuahera kauro, tiro.

²⁸ Eparahaamira kaiqa vaiintivano minti tuvaro vi varaatavava kantero nai nora naavuqi oruntero ekaa vi haikara qovaraiqura nai nora tiva amura.

²⁹⁻³⁰ Rebekaava nai nora tiva ami vauvaro vira vakaava Labaaniva tavovaro vira aura ainqiana *ringi* ukutova vauvaro vira kauquqi naahuhura nonkutoravata tavero Rebekaava vi vaiintirara nai nora tiva ami vau uvaravata iriro, viva kantero ruvu namari kaqe vaunaini vi vaiintira tavareva viro, tavovaro vi vaiintiva nai kamerinavu tataaqa mini himpitero vauvaro viva virara tiharo,³¹ Ti vaiintio, Noravano Kotiva

ai koqema amitaivarama aniaro. Varaiqetanta naavuni vuare. Te ainivata ai kaiqa vaiintinavuaravata naavu qerama vate, ai kameriaravata qerama vatauro, tiro.

³² Manti tuvaro Eparahaamira kaiqa vaiintivano vikantiro naavuni vumanta kamerivano airaira vare anu haikara vara qaqqini ke kara nimuvaro, Labaaniva namari kaqa varero Eparahaamira kaiqa vaiintiara tiharo, Are nena kaiqa vaiintinavu vatamake aiqu hiqama kaivaro paru iarire, tivakero ³³ karavata vira aqanto vatero, Ho naate, tiro.

Manti tuvaro Eparahaamira kaiqa vaiintivano aqao tiro, Kaiqe te tenta vakaaka naane ai tiva ami, viraqaahai kara naare, tuvaro Labaaniva tiharo, Ho tiraqe iriare, tiro.

³⁴ Manti tuvaro viva tiharo, Te Eparahaamira kaiqa vaiintima vauro. ³⁵ Noravano Kotiva ti nora vaiinti koqema amitaivarora tiro, viva vo airaira vo airaira ari airaira vataivama vaivo. Sipisipive, purumakauve, *silvaa* orive, *kori* orive, kaiqa vaiintive, kaiqa nahentive, kamerive, donkive, Kotiva ekaa vi haikara vi haikara amivaro vatairave.

³⁶ Ti nora vaiinti naatavano, Seraava kontaiqama viro qorainti vainti vata amitaivaro vi vaintiva noruqama viro vaivo. Ho vira maaqu viva ekaa Eparahaamiva iaina haikara varaariravama vaivo. ³⁷ Mintima vaivarora tiro, ti nora vaiintivano tiriara tiharo, Nena kauqu ainqaa aqukeharama tihara, Te ai uva avatarerave, tiane. Te Kenaani vatanaaka vatainima vauro. Kia Kenaani vatanaakaqjhaira ti maaqu nahenti vara amiane. ³⁸ Are oru tinta qora maaqaihairs ti maaqu nahenti vara viri amiane, tirave.

³⁹ Ti nora vaiintivano minti timanta te vira ireha tiha, Ai navunaa nahentivano kia maini aniaataa iraro kia tintiro maini anirera, te nantie irarave? turaro ⁴⁰ viva tinta tiva timiro tiharo, Noravano Kotiva vaimanta te vira avuqaa ni vauraukave. Vivama nai *enseli* vo atitairaro viva ai kahaqi vairara are homa ti navunaaka maaqaihairs nahenti vo ti maaqu vara viri aminarave. ⁴¹ Are ti navunaaka varianaini viramanta vika nahenti ai amiverave kia amiverave, te vate tura uvava kiama ho ai ravaaqavu kaanarove, tirave.

⁴² Manti timanta te vira mini kema maini ani ruvu namari kaqe varianaini vaiha te Kotira aareha mintima ti, Noravauvu, are ti nora vaiinti Eparahaamira Variqavano variaro. Ta nahentirae te Aisaakirara varaainarave? Are Eparahaamirara quahairera, Aisaakira amina nahentira ti humiqane. ⁴³ Te maini nahenti namari kaqe varianaini ani vauro. Varaata vovano namari kaqareva aniraqe te virara namari kaqa timiraqe naare tiariraro ⁴⁴ viva ti timiharo ti kamerivata namari nimirera, ho te vi nahentirara are Aisaakira kaama amitaana nahentirave tirarave. Nahenti vovano mintirera, te ariara quqaama are ti nora vaiinti Eparahaamirara quaheharama variaro tirarave, tunarave.

⁴⁵ Te mintimake Kotira aareha vi uvara kia taiqa kauraro Rebekaava nai namari taqu aqu varero ruvu namariqi otu kaqa varero urimanta te virara namari timiraqe naare turaro ⁴⁶ viva vaaka nai taqu vataini viavi kero tiriara ho naane tivakero ti kamerinavuvata namari kaqa nimitarerave timanta te namari nama kauraro viva ti kamerinavuvata namari kaqa nimimanta naarave.

⁴⁷ Viva mintimanta te vira ireha tiha, Ai qora tarave? turaro viva tiharo, Ti qora autu Betuelirave. Viva Nehoka Mikaaka maaquvano vaivo, timanta te viraqaahai vira aqiana *ringi* uku amite kauquqi naahuhura nonku amite, ⁴⁸ te tenta viri vataini ke Nora Kotira autu tuaherake tiha, Noravauvu, are ti nora vaiinti Eparahaamira Variqavano variaro. Are avuqavu aara ti humiqaramanta te tenta nora vaiinti qata nainti rantake vira maaqu homa nahenti vara amirarave, tunarave. Te mintimake Kotirara tunarave, tiro.

⁴⁹ Manti tivakero viva Labaanirara tiharo, Ho ne nantie ivarave? Ne ti nora vaiintiara quaheha vira quqaa kahaqama amitareka ivera, ti tiva timiqe iriare. Ne vi varaatara kia timiataas ivera, vutuke ti tiva timiqe te tenta varare iaina okarara ho iriare, tiro.

⁵⁰ Manti tumanta Labaanika Betuelika nai tiva ami tiha, Noravano Kotiva ai kahaqama amitairara ti, tetanta vo uva ai tiva amitaarorave. ⁵¹ Ho tavaane. Rebekaava maa vairove. Ho vira vita varera vuane. Noravano Kotiva ai umiqaintema kero, viva homa ai nora vaiinti vira maaqu naatavano varianarove, ti.

⁵² Vitanta minti tuvaro Eparahaamira kaiqa vaiintivano vitanta uva iriro nai viri vataini kero Nora Kotira autu tuaherakero ⁵³ vo airaira vo airaira utavaaqave, *kori* orive, *silvaa* orive, viraqohai aututo haikara *hankaarove/kukukakaarave* urequkero Rebekaara amiro, viraqaahairo nora monu aquko haikaravata, vira vakaaravata vira noravata nimiro, ⁵⁴ viraqaahairo viva nai kaiqa vaiintiaravata karavata namarivata namake viraqai vaitora.

Vira qararaa Eparahaamira kaiqa vaiintivano tiharo, Ho ti tititaiqe tenta nora vaiintivano vainaini vuare, tiro.

⁵⁵ Manti tumanta vira vakaava nai nokantiro aqao ti, Kairaro vi varaatava tinavu hampata vohaa *uikie* taara *uikie* vari kairara are vitakera vuane, ti.

⁵⁶ Vitanta minti tuvaro viva aqao tiro, Kia ti ravaaqavu kaate. Noravano Kotiva ti kahaqimantara ti, te vaaka virerave. Netanta ti tititaiqe te tenta nora vaiintivano vainaini vaaka vuare, tiro.

⁵⁷ Minti tumanta vitanta tiha, Kairaqe tetanta vi varaatara aaramake nai vira ireha tavaare,⁵⁸ tivake Rebekaara aaramake vira ireha tiha, Vate are hoe maakantira vinararave? tuvaro viva tiharo, Eo, te vate vikanti virerave, tiro.

⁵⁹ Minti tuvaro vitanta vi varaataravata viraqaa raqiku nahentiravata nititomanta vitanta Eparahaamira kaiqa vaiintivata vira kaiqa vaiintinavuvata hampata vurama.

⁶⁰ Vitanta Rebekaara atitehama mintima ti:

Tinavu aurao, kairamanta ai vaintivara airiqama vi variqi viha, vika voqavata airiqama vi variate.

Kairamanta ai vaintivara vika nái navutaaka naatarake vika vatuka vo vatuka vo vatuka varaate, ti.

⁶¹ Minti tumanta Rebekaava nai qaraaka kaiqa nahentinavu vataakero qerama varero, kameriqa vaarinte viraqaaahai Eparahaamira kaiqa vaiinti hampata vura. Mintima kero Eparahaamira kaiqa vaiintivano Rebekaara vitakero vurama.

⁶² Aisaakiva Be-Lahai-Roi namari kaeq vaura mini kero Nekevi vataini oru vauvaro ⁶³ erovaro aara nireva viharo vutu tavomanta kamerinavu ani vaura.

⁶⁴ Rebekaava vivavata ani vaiharo vutu tavovaro Aisaakiva vutuni ani vauvaro viraqaaahairo Rebekaava kameriqaahairo vaavintero Eparahaamira kaiqa vaiinti irero tiharo,⁶⁵ Ta vaiintivave vutura tinavu tivita kareva ani vaivo? tiro.

Minti tuvaro viva tiharo, Vi vaiintiva ti nora vaiinti vira maaquvanove, tiro. Minti tuvaro Rebekaava tiharo, Ti viri qoqaa variantorave, tivakero nai viri naavuma varero viro. ⁶⁶ Mintuma varero vuvuro Eparahaamira kaiqa vaiintivano nai nu uvura vuru Aisaakira tiva amura.

⁶⁷ Aisaakiva vi nahentira vita varero nai nora Seraara seri naavuqi vuru kero varatovaro Rebekaava vira naatavano vaura. Tota vira nova qutu vuvuro Aisaakira muntukavano qoraiquvaro variqiro viro, viraqaaahairo Rebekaarara antuqa aruvaro vira varatero vuvuro vira muntuka qihaaquvaro vaura.

25

Eparahaamiva Keturara varatora

¹ Seraava qutu vuvuro Eparahaamiva variqiro viro viraqaaahairo nahenti vo vira autu Keturara varatora.

² Eparahaamiva vi nahentira varatovaro viva qorainti vainti 6navu vatatora. Simiraanirave, Iokasaanirave, Mentaanirave, Midianirave, Isabaakirave, Suaarave, vinavuka vatatora.

³ Iokasaaniva noruqama viro Sebaaka Dedaanika qova vaura. Dedaaniva maa vatanaaka Asuve, Retusive, Reumive, vika qova vaura.

⁴ Midianira maaqunavu vaireka, Efaavave, Efevave, Hanokivave, Abidaavave, Eladaavave, vinavuka vaura. Ekaa vi vaintika Keturara naintinavuma vaura.

⁵⁻⁶ Eparahaamiva qaqi vau entara viva nai maaqu vo nahentiqaaahainaaka airaira raira nimiro vika nokavata raira nimiro, viraqaaahairo nai maaqu Aisaakiva vaunaihairo vika nititama komanta kuari avu urunaini niaraini vika nariara vaireka vuvuro, Aisaakivaqai nai qora Eparahaamira airaira varaarirava mini vaura.

Eparahaamiva qutu vura

⁷⁻⁸ Eparahaamiva airi ihi 175 ihi varakero viva anomia kero naampaiqama viro qutu vura. ⁹⁻¹⁰ Eparahaamiva qutu vumanta vira maaqtanta Aisaakika Isamairika ori onavu Makapera Onavuve turaqi náitanta qora quntama tora. Tota vi vatava vaireva, Efaronira Soaara maaqu Hiti vatavaa vuvuro, Eparahaamiva koqaa autukero vi vatara varero nai naata Seraara quntama toraqi Eparahaamiravata vira maaqtanta mini quntama tora.

¹¹ Eparahaamiva qutu vuvuro viraqaaahairo Kotiva Aisaakira koqema amitovalo Aisaakiva namari kaeq vaura, vira autu *Be-Lahai-Roi* Namari vaunaini variqiro vi vaura. (*Be-Lahai-Roi - Qaqi Variqiro Vi Vaiva ti tave vaira vira namarive*)

Isamairira anku

¹² Seraara kaiqa nahenti Hagaava Isipihainaa nahentivano Eparahaamira qorainti vainti vata amitovalo Isamairiva noruqama viro vainti vatato okarava maantimama vairo:

¹³ Isamairiva qorainti vainti hoqare vatatoka vika nutu maantimama vairo:

Nepaiotirave, Kedaarave, Atabelirave, Mipisaamirave,¹⁴ Misimaarave, Dumaarave, Masaarave,¹⁵ Hadaatirave, Temaarave, Jeturave, Napisirave, Kentemarave, vinavuka 12navu vaura.

¹⁶ Isamairira maaqu 12navuqihairo 12 ankunavu hoqarama tomanta vaura. Vira vainti nutuvata vira ankunavu autuvata vohaa qaramake vaura.

¹⁷ Isamairiva qaqi variqiro viro 137 ihi varakero vuru qutu vumanta vira quntama tora.¹⁸ Viva qutu vumanta vira vaintivara Havila vatainivata Suri vatainivata variqi vi vaura. Vi vatava vaireva, Asiria vataini vi vau aarara Isipi vata auvahini vaura. Isamairira vaintivara vika nariara vaiha Eparahaamira vaintivara vonavu navutaiqama nimite vaura.

Rebekaava vainti taaraqanta vatatora

¹⁹ Aisaakira uva maantimama vairo:

²⁰ Aisaakiva 40 ihi varakero viva Rebekaara varatero vaura. Rebekaava Betuelira raavuravano vauvaro Betueliva Araamihainaava Mesopotemia vataini vaura. Rebekaara vakaava Labaaniva vaura.

²¹ Rebekaava kia vainti vataraitiro, *naahiaru/ururaiqama* viro vauvaro Aisaakiva virara iriharo Nora Kotira aarovaro viva vira uva iruvorora tiro, Rebekaava vainti taiqama vura.

²² Viva vainti taiqama viro vaumanta vira vaintitanta auhaq'i vaiha nai vente nai vente iha vauvaro vitanta nova tiharo, Nantihae vitanta ti auhaq'hai minti variavo? tivakero viva oru Nora Kotira aarovaro²³ Noravano Kotiva virara tiharo,

Vainti taaraqantama ai auhaq'i variavo.

Vainti vovano vo vatanaaka qova vairaro vovano vo vatanaaka qovama varianarove.

Vovano kempukaiqama kero vaiharo vora aatara kaanarove.

Vira vakaava tuvitarero nai qata paanaa kaiqama varaanarove, tiro.

²⁴ Minti tuvaro Rebekaava variqiro viro, qorainti vainti taapitanta vatatora.²⁵ Viva avuni vainti vatora vaata vaireva naare vaataqai vauvaro kaukivano tuqarama kero viraqaa vauvarorar tiro, vira autu nteharo *Isorave - Kaukirave* tura.

²⁶ Vainti vovata vate vauvaro vi vaintiva auhaq'hairo aniharo nai vakaara aiq' ataa tote vaurara ti, vira autu nteha *Iekopirave - Aiqu Ataa Totairave** tura. Aisaakiva 60 ihi varako entara Rebekaava taapi vainti vitanta vatatora.

²⁷ Vira maaqtanta noruqamavi, Isova koqema kero aantau ari vau vaiintiva vauvaro Iekopiva tiremakero vatukaini vau vaiintiva vaura.²⁸ Isova aantau arukeharo viri nai qora ami vaurara tiro, Aisaakiva aantaura quaheharo Isorara antuqa aruvaro vauvaro Rebekaava Iekopirara antuqa aruvaro vaura.

²⁹ Vo enta Iekopiva naare *kohe/naavara* unte vauvaro vira vakaava Isova aantaura nunaihairo anintero³⁰ voqama kero karara antuqa aruvaro nai qata Iekopirara tiharo, Tota naare *kohe/naavara* unta taanara hini ti timiraqe naare. Ti nora hantuqama harivo, tiro. (Viva minti turara iriha vokuka vira vara autu nteha *Idomurave - Naarerave* tura.)

³¹ Isova minti tuvaro vira qatavano Iekopiva aqao tiro, Are hoqarenaava titanta qora airaira vareravama variaro. Are tuvitarairae te oritare ai avuni vaiha titanta qora airaira varaarirauka variare. Are mintimake tuvitarairera, te ai homa *kohe/naavara* amirarave, tiro.

³² Minti tuvaro Isova tiharo, Ho te mintirerave. Te narara vaiha qutu vuariraro te airaira varaarirava kiama ti ho kahaqianarove, tiro.

³³ Minti tuvaro Iekopiva tiharo, Aqao, are unahaa tirorave. Are kauqu aiqiqaa aqukehara minti tiane, tuvaro vira vakaava Isova nai kauqu aiqiqaa aqukero tiharo, Quqaama te tuvitare vairerave, tiro.

³⁴ Minti tuvaro Iekopiva *kohe/naavara* vonavu kureqihairo raaqukero mparetivatama kero amuvaro Isova nama kero namarivata nama kero himpiro vurama.

Mintuma kero vira vakaava Isova nai hoqarerero avuni vau auturara kia noraiqaakero iriraitiro, qaqira kero tuvitarero naantiarainiqama vura.

26

Kotiva Aisaakira quahama amitora

¹ Haaru Eparahaamiva vau entara karara qaavoqu entava qovarama vuntema kero, qaigaavata Aisaakiva vau entaraqaa karara qaavoqu entava qovarama vura. Mintuvaro Aisaakiva katu varero Geraa vatukaini Abimelekiva Pirisia vatanaaka avuhainaa vaiintivano vaunaini oru vaura.

* **25:26:** Vi vatanaaka una uva ti vau vaiintikara aiq' ataa tote variakave *ti vaura*.

² Viva mini oru vauvaro Noravano Kotiva Aisaakira avuqaa qovarama viro virara tiharo, Kia katu varera Isipini vuane. Te ariara variane tiaina vatara miniqaima variane.

³ Are maini variqira vi vairage te ainti vahama ai koqema amitaqi vuare. Te ekaa maa vatara aivata are kuvuarama teraukavata nimirerave. Te tenta kauqu aiqiqaa aqukeha ai qora Eparahaamiraqaa tiva taatau tauna uvava, vi uvava ariqvatama varianarove.

⁴ Te ai kahaqiari are kuvuarama terauka opu makau voqara airitahaama vaivarave. Te vika ekaa maa vatara nimirerave. Naantiara are kuvuarama terauqaqihai te ekaa vataini vaika koqema nimirarave. ⁵ Eparahaamiva ti uva iriqiro viharo te tiva tauna uvara iriqiro vurara ti, te aivata mintimake koqema amitaqi virerave, tiro. ⁶ Kotiva minti tuvarora tiro, Aisaakiva Geraa vataini variqiro vurama.

⁷ Aisaakiva mini variqiro viharo vi vatanaa vaiinti naatu qeteharora tiro, nai naata Rebekaarara ti aurave tura. Aisaakiva tiharo, Hauri te virara ti naatave tiari vi vatanaaka Rebekaarara koqe viri vaata vataa nahentive tivakeha vira varareka autiha ti harukevorave, tiro.

⁸ Minti tivakero Aisaakiva vi vataraqaa airi enta variqiro vuvuro Abimelekiva Pirisia vatanaaka avuhainaa vaiintivano nai naavuqi vahilo *uintuanahairo* vaavi kunaarima kero tavovaro Aisaakiva nai naata Rebekaara tote vauvaro ⁹ viva Aisaakira aarama kero tiharo, Vi nahentive quqama ai naatama vaivo. Nantiharae are virara ti aurave tiaro? tiro.

Minti tuvaro Aisaakiva vira nai tiva amiro tiharo, Oho, hauri vira varareka iha ti harukevorave tima, te virara ti aurave tunarave, tiro.

¹⁰ Minti tuvaro Abimelekiva tiharo, Oho, are nana okarara iriharae mintira iaro? Are minti tiararo maa vatanaa vaiinti vovano ai naatantiro nitirio, tenavu nora uvama varauraitiro, tiro. ¹¹ Abimelekiva minti tivakero viva nai navunaaka qioqama teharo vikara tiharo, Niqihairo vovano maa vaiintirae vira naatae utu varairera, vira kaara te tiari vira aruma kevarave, tiro.

¹² Minti tuvaro Aisaakiva mini variqiro viharo kara ututovaro Noravano Kotiva vira koqema amitovarora tiro, vira karavano qampiqeharo airi kara iratero vaura.

¹³ Mintuvoro Aisaakiva airi airaira vato vaiintivaa variqiro viro nora vaiintivano vaura.

¹⁴ Aisaakiva airi haika vatova vauvaro vira purumakauve, sipisipive airi vaumanta vira kaiqa vaiintinavu vira vaumontara ti, Pirisia vatanaaka viva vato haikara tavovaro muntuka nti vaumanta vaura.

¹⁵ Mintumanta vika orunte Aisaakira qoraiqama amitareka Pirisia vatanaaka vira qova Eparahaamiva qaqa vau entara vira kaiqa vaiintinavu namari kaqareka vata quvitora, ekaa vona vona rahirama kora.

¹⁶ Mintimake qoraiqama amitovalo Abimelekiva Aisaakirara tiharo, Tinavu vataqaa-haira katu varera vuane. Are maini kempukaiqama vira variqira vihara, tinavu haatara kerorave, tiro.

¹⁷ Abimelekiva minti tuvaro Aisaakiva katu varero otu Geraa Uqitaini nai *seri* naavu maaqa kaqatero mini variqiro vi vaura. ¹⁸ Haaru vira qova Eparahaamiva qaqa vau entara vira kaiqa vaiintinavu namariara quvitova vonaini vonaini vauvaro Eparahaamiva qutu vumanta viraqaaahai Pirisia vatanaaka ekaa vinavura ani rahirama kora. Ho Aisaakiva qaiqaa namari kagoraqi vata qaqini vaqita kovaro koqe namarivano ekaa viraqi qaiqaa vaura. Vira qova autu ntava tontema kero, viva qaiqaa vinavura vohaa qaramakero autu ntava tora.

¹⁹ Ho Aisaakira kaiqa vaiintinavu ugita kanta namariara quvike qaraaka ruvu namari rantake vira kaqaare tumanta ²⁰ Geraa vatanaaka nái sipisipiqa raqiki vauka orunte tiriorihi tihia, Aqao, maa namarira tinavu namarive, tuvaro Aisaakiva vi namarira autu nteharo, *Eseki-Namarive - Tiroria Namarirave*, tivakero qaqira kero oru vura.

²¹ Oru vumanta vira kaiqa vaiintinavu qaiqaa namariara quvike ruvu namari vo ranta komanta vi vatanaaka qaiqaa aninte vi namarirara tirori vauvaro Aisaakiva vi namarira autu nteharo *Sitinave - Navutaiqia-Namarirave*, tura.

²² Minti tivakero qaqira kero katu varero qaiqaa oru vonaini namariara quvikero ruvu namari vo ranta kero mini vaumanta kia vika qaiqaa aninte tiroriavarora tiro, Aisaakiva vi namarira autu nteharo *Rehobotive - Kia Mauqantaa Namarirave*, tivakero mintima tiro: Noravano Kotiva tenavu ho varaina vatara tinavu timivo. Tenavu homa maini vaiha koqemake variqi virarave, tura.

²³ Ho Aisaakiva Besebaini oru viro ²⁴ entaqi oru mini vauvaro Noravano Kotiva vira avuqaa qovarama viro virara tiharo, Te ai qora Eparahaamira Variqavanoma vauro. Te ainti variqi vuainarara tira, kia qetehara variane. Te tenta kaiqa vaiinti Eparahaamirarao ti, te ai koqema amiteha are kuvuarama teraukavata airiqama kararave, tiro.

²⁵ Minto tuvaro Aisaakiva mini vaiharo origohairo *ofaa* tainta vo autu kero Nora Kotira aareharo quahama amitora. Mintumanta vira kaiqa vaiintinavu qaiqaa vata quvike namari kaqera vo rantakora.

²⁶ Ho Aisaakiva mini vauvaro Abimelekiva Geraa vatkaihairo Aisaakira tavareva viharo vaiinti vo, Ahusaatira koqe avu aato ami vau vaiintiravata, vaiinti vo, nai iqoka vaiintinavuqaa raqiki vau vaiintira Pikoriravata ntitakero Aisaakiva vaunaini vura.

²⁷ Vinavuka mini oruntovaro Aisaakiva vinavukara tiharo, Nenavu ti navutaiqama timiteha tirira katu vareru vuane tiaka, nana kaarae ti tavareka maini aniavo? tiro.

²⁸⁻²⁹ Minto tumanta vinavuka tiha, Tenavu kankomake tavauraro Noravano Kotiva ai kahaqi vaivara variaro. Virara irihama tenavu tiha, Kaiqenavu vohaa vaiha uva vohaa tiva taatauke maateriqamake variare. Tenavu tota kia ai qoraiqama amitaraiti, maateriqamake ai atitama kaunarave. Virara iriharama are kia tintanavuvata qoraiqama timitaane. Tenavu tavauraro Noravano Kotiva ai koqema amitaivara variaro, ti.

³⁰ Vinavuka minti tuvaro Aisaakiva vinavuka nora kara unta nimotomanta vinavuka vira karavata namarivata nora. ³¹ Namake vaite vira qararaa vaaka toqaqi vika himpi vohaiqa vohaiqvano nai kauqu aiqiqaa aqueha maateriqi uvara tiva vate Aisaakira mini ke nai maaqaini anirante surama.

³² Vinavuka vumanta vohaa vi entaraqaa Aisaakira kaiqa vaiintinavu namariara vata quvike vuru Aisaakira tiva ami tiha, Tenavu koqe namari vo ranta kauro, ti. ³³ Vika minti tuvaro Aisaakiva vi namarira autu nteharo, *Siva Namarive - Kauqu Aiqaqaa Aquakaa Namarirave*, tura. Aisaakiva minti turara iriha, maa entaravata vaiinti nahenti vatuka vo autu nteha Be-Sivave ti variara.

Isova vo vatanaa nahenti taaraqanta varatora

³⁴ Isova 40 ihi varakero oru Hiti vatanaa nahenti varaatatanta varatero vaura. Vo nahenti Berira raavura Iutitiva vauvaro vo nahenti Elonira raavura Basemaattiva vaura.

³⁵ Isova vitanta vo vatanaa nahentitanta varatora kaara Aisaakika Rebekaaka muntuka qoraiqumanta vaura.

27

Aisaakiva Iekopira koqema amitora

¹ Aisaakiva naampaiqama vuvaro vira avu makuquqama vuvaro viva Isora nai maaqu avuhainaara aarama kero tiharo, Ti maaquo, tuvaro viva tiharo, Qao, te mainima vauro, tiro.

² Minto tuvaro Aisaakiva tiharo, Te naampaiqamama vuro. Te tenta qutuaina okarara kiama iruro. ³ Are huru veva varera oru ahakaqi nihara aantau aru kera viri untakera ⁴ ti voqama kero hantuqa harina karara untakera viri timirage naare. Are mintirage te kia qutiraiti, qaqi varainanto vi karara namake viraqaahai te tenta kauqu tuaherakeha ai koqema amitaare, tiro.

⁵ Aisaakiva nai maaqu Isorara minti ti vauvaro vira naata Rebekaava, vivavata vi uvvara irura. Ho Isova ahakaqi aantaura vuvaro ⁶ Rebekaava nai maaqu Iekopirara tiharo, Te aato vatanterha iruraro ai qova ai vakaara Isorara mintima tivo: ⁷ Aantau aru viri untakera hiakaa i vaina karara vara viri timirage namake, te kia qutiraiti qaqi varainanto Nora Kotira avuqaa vailha tenta kauqu tuaherakeha ai koqema amitaare, tirave. ⁸ Ai qova minti tirara ti, te tiarirara are te tianinante iane.

⁹ Are oruntera memeraa vairaqaqhira naati koqera taaraqanta aru varera viri timirage te ai qora antuqa vaina karara hiakaa inara unta amitaariranta ¹⁰ are varera vuru nena qora amiraro viva nama kero, viva kia qutiraitiro, qaqi vaina entara nai kauqu tuahera keharo ai koqema amitaarie, tiro.

¹¹ Vira nova Rebekaava minti tuvaro Iekopiva aqao tiro, Ti vakaava Isova kauki vaata vataava vaimanta te qaqi vaata vataukama vauvo. ¹² Hauri ti qova ti tivaata autama kero tavero, tiriara are unaqarama kerama anira iaro tiantorave. Vira kaara viva kia ti koqema timitaraitiro, ti qoraiqama timiteharo qora uvama ti tiva timitaanarove, tiro.

¹³ Iekopiva minti tuvaro vira nova tiharo, Ti maaquo, ai qova ariara qora uva tirera, vi uvvara kiama ariqaa varianarove, tigaama varianarove. Are te tianinantemra kera, oru memeraa naati taaraqanta ruqutu viri timiane, tiro.

¹⁴ Minto tuvaro nai nova tuntemra kero Iekopiva oru memeraa naati taaraqanta ruqutu varero viri nai nora amuvaro viva vira qora antuqa vau karara hiakaa ura unta amitora.

¹⁵ Unta amitero viraqaahairo Rebekaava oru nai naavuqihairo Isora utavaqa koqera varero muntu Iekopira nonku amitero ¹⁶ memeraa pahi varakero Iekopira kauquaavata

vaantaariqaavata naavuma amitero ¹⁷ hiakaa u kararavata mparetivata untatora amuvaro ¹⁸ Iekopiva vira varero nai qova vauraqi oruntero tiharo, Qao, tuvaro vira qova vo tivakero vira irero, Ti maaquo, nena autu ntaane, tiro.

¹⁹ Minti tuvaro Iekopiva nai qorara tiharo, Te Isoka, ai maaqu avuhainaukave. Te are tianantemake aantau aru unta vare anuro. Aantau unta amitaunara himpira vaavi vahara nerama, kauqu tuahera kehara ti koqema timitaane, tiro.

²⁰ Minti tuvaro Aisaakiva nai maaquara tiharo, Aqao, are vate uvaravama vaaka orurante anira iaro, tuvaro Iekopiva tiharo, Noravano Kotiva ai Variqavano ti kahaqimanta te vaaka aantau ranta kauro, tiro.

²¹ Minti tuvaro Aisaakiva Iekopirara tiharo, Are quqaae ti maaqu Isovae, vo vaintivanoe variaro? Are vainto aivaiqiraqe te ai vaata auteha tavaare, tiro.

²² Minti tuvaro Iekopiva nai qora aaqanto ori vaiquvaro vira qova vira vaata autama kero tavero tiharo, Uvama Iekopira uva vaivarovata, vaatama Isora vaata vaivo, tiro.

²³ Iekopira kauquvano Isora kauqu voqaara kauki kauqu vauvarora tiro, Aisaakiva kia Iekopira viraqaqama kero tavaraitiro, viva vira koqema amitareva iharo qaiqaa irero,

²⁴ Ho quqaae are ti maaqu Isovave, tuvaro Iekopiva tiharo, Te quqaa maa vikave, tiro.

²⁵ Minti tuvaro Aisaakiva tiharo, Ho ti maaquo, hini aantau unta taanara vara viri timirage namake kauqu tuaherake ai koqema amitaare, tiro. Aisaakiva minti tuvaro Iekopiva kara vare vuru amuvaro nama kovaro *uainivata* amuvaro nama kero ²⁶ viraqaahairo vira qova Aisaakiva virara tiharo, Anira ti moqa kaane, tiro.

²⁷ Minti tuvaro Iekopiva oru vira moqa kovaro Aisaakiva vira utavaaqa uhirama kero nai kauqu tuahera kero vira koqema amitareva mintima tiro:

Noravano Kotiva koqe vataqaa naaho ututaira koqema amitaivaro koqe unta intema kero, ti maaqu vaataqaahairovata koqema kero unta ivo.

²⁸ Kairaro Kotiva naaruvhahairo varavu vara kairaro ai naaho maatavano koqema kero qampiqairaro ai *uitivata uainivata* airi variarire.

²⁹ Kairamanta vo vatanaa vo vatanaaka ai paanaa kaiqa vara amiteha, ai vevaaraini variate.

Are noraiqama vira, nena qata vakaukavaraqaama raqikiqira vuane.

Kairamanta ai nora vira maaquvara vika ai aiquidaraini vailha ai autu tuahera kaate.

Kairaro vovano ai qoraiqama amitairava naivata qoraiqama vuarire. Vovano ai koqema amitainara naivata koqema amitaarire, tiro.

³⁰ Aisaakiva minti tivakeharo koqema amitovaro Iekopiva nai qora mini kero vuvaro vira vakaava Isova aantaura niniro anintero ³¹ aantau vira untakero varero nai qova vauraqi oruntero tiharo, Qao, himpira vaavi vahara maa aantaura aruke unta taunara hini namakeru kauqu tuaherakera ti koqema timiane, tiro.

³² Isovaa minti tuvaro vira qova Aisaakiva vira irero tiharo, Oho, are tavave? tuvaro Isova virara tiharo, Te ai maaqu Isoka avuhainaukave, tiro.

³³ Minti tuvaro Aisaakira aiqu kauqu voqama kero ntiri ntiri i vauvaro tiharo, Oho, tavave vaaka aantau aru unta viri timimanta nama kauro? Te vira aantau namakema vira koqema amitauro. Te vaaka kauqu tuaherake koqema amitauna uvvara kia ho qaiqaa tirarave. Vivaqaima vi uvvara varero koqema viro varianarove, tiro.

³⁴ Viva minti tuvaro Isovaa vira uva iriro, noraiqaakero mpo ike tivakero nai qorara tiharo, Mpo, qao, kauqu tuahera kehara tivata koqema timitaane, tiro.

³⁵ Minti tuvaro vira qova tiharo, Aqao, ai qatavano unaqaraama kaimanta te kauqu tuahera keha koqema amiteha ekaa vi uvvara tiva amuraro viva varero vivo, tiro.

³⁶ Vira qova minti tuvaro Isovaa tiharo, Oho, quqaa vira autu *Iekopivave - Una uva ti vaivave*. Viva taara tataama ti unaqaraiqama kairave. Hogareror avuni ti vatatai autura viva varairave. Vate are kauqu tuahera kera ti koqema timitareva iana uvaravata vivaqai varairo, tiro. Minti tivakero viva nai qorara mpo ike tiro, Qao, kiae voki uvaravata vaivo? Vokira vairera, are vi uvvara hoe ti tiva timinarave? tiro.

³⁷ Isovaa minti tuvaro Aisaakiva nai tiva amiro tiharo, Te vaaka vira tiva amunarara tiro, ai qatavano ariqama raqikianarove. Ekaa vira navunaaka vira paanaa kaiqama varevarave. Viva ututaarira karava koqema kero qampiqaanarove. Te ekaa vi uvvara minti tiva kaunarara ti, nana uva qaqi vainarae ai tiva amirarave? Kiama vo uvavata qaqi vaivo, tiro.

³⁸ Aisaakiva minti tuvaro Isovaa nai qorara tiharo, Mpo, qao, are koqema timiterava vohaiqae vaivo? Kauqu tuaherakera tivata koqema timitaane, tivakero noraiqaakero iq'i rateharo vaura.

³⁹ Minti tivakero iq'i rateharo vauvaro vira qova Aisaakiva vira tiva amiro tiharo:

Are kia koqe vata vainanaini variqira viraro mini aagu kia koqema kero ntirarama vainarave.

⁴⁰ Are iqoka paipe totehara raquqira viharama kara varenararave.

Mintiaqira viharama are nena qata kaiqa vara amitaqira vivira, viraqaahairo are vira kauquqihaira ruqemakera kuvantuvira nenaraa vainarave, tura.

Iekopiva getakero Labaaniva vaunaini vura

⁴¹ Vira qova kauqu tuahera kero Iekopira koqema amitora kaara Isora arara itovaro tiharo, Ti qova qutuarirava aumantoma vaivo. Viva qutu viraqe te virara iq'i rata amite, viraqaahai tenta qata aru karerave, tiro.

⁴² Ho Rebekaava Isova nai qata aru kaaina okarara iriro, viva Iekopira aarama kero virara tiharo, Ho iriane. Ai vakaava Isova ai aru kaaina entara virara vekaiqiharo vaivo. ⁴³ Ho are te tiainante iane. Kantera ti vakaava Labaaniva Haraanini vainaini oru vairaro ⁴⁴ ai vakaara araravano vaahama uvarire. ⁴⁵ Viva are vira autu amitaana okarara tauru kairage te vaiinti vo atitaariraro viva vuru ai tiva amiro ai vite aniarire. Mpo, ti maaqtanta netanta nai aruke nai aruke ivaque te vohaa entaqaa nitantara iq'i rata nimitaarorave, tiro.

⁴⁶ Rebekaava minti tivakero viva oru Aisaakirara tiharo, Isova Hiti vatanaa nahentitanta vara taira kaara ti popohaivo. Iekopivavata Hiti vatanaa nahenti varairera, vira kaara te kia qaqi variqi viraiti, vaakama qutu virarave, tiro.

28

Aisaakiva Iekopira Haraanini atitora

¹ Rebekaava minti tuvarora tiro, Aisaakiva Iekopira aarama kero vira uva mantero tiharo, Kia Kenaani vatanaa nahenti varaaane. ² Qaqira kera oru Mesopotemia vataini ai naaqua Betueliva vainaini oru nena naura Labaanira raavurama vo varaaane. ³ Kairaro Kotiva ekaa kempuka vataava ai koqema amitaira ai vaintivara airiqama vivara are nora vatanaaka qovama variane. ⁴ Kairaro Kotiva Eparahaamira koqema amitonema kero, viva aivata are kuvuarama teraukavata koqema nimirairaro maa vatava nini variarie. Are vate variana vatava vaireva, vo vatanaaka vatama vaivo. Kairaro Kotiva ai koqema amitairara are naantiara maa vataro, Kotiva Eparahaamira kaama amito vataro varaaane, tiro.

⁵ Minti tivakero Aisaakiva Iekopira atitovaro viva Mesopotemia vataini nai nauva Labaaniva vaunaini oru vaura. Betueliva Araamihainaava vauvaro vira maaqu Labaaniva Rebekaara vakaava vauvaro Rebekika Isoka nova vaura.

Isova nahenti vo varoro

⁶⁻⁷ Aisaakiva kauqu tuaherakero Iekopira koqema amitero, viraqaahairo viva Iekopirara kia Kenaani nahenti varaaane tivakero, virara Mesopotemia vataini nahenti varaarire tiro, vira atitama kovaro Iekopiva nai noka qoka tu uvvara iriharo Mesopotemia vataini nahenti varareva vura. Ho Isovavata vi uvvara iruvaro ⁸ vira aato kenko tuvaro tiharo, Oho, te vo vatanaa nahentitanta varataunara kaarama ti qova kia tirira quaheharo vaivo, tiro.

⁹ Minti tivakero Isova oru Eparahaamira maaqu Isamairira ankuqaahairo Maharaatira varatora. Maharaatativa Nebaiotira auravano vaura.

Iekopiva aaraini oru vaiteharo taira tavora

¹⁰ Iekopiva Beseba mini kero Haraanini vireva vurama.

¹¹ Viva aaraini vi vauvaro kuari avu aqu vuvaro entama vuvaro viva qaqi kanta vaitareva iharo ori vo turu ntuvu kero vaiteharo ¹² taira tavora. Viva taira tave vauvaro aika vukaivano vataihairo viviro naaruvaini vaumanta enselinavu aika vivau oru vi tuvi vaura.

¹³ Minti vauvaro Iekopira maraquravano tavovaro Noravano Kotiva vira tataaqa himpitero vaiharo tiharo, Te Noravano Kotika Eparahaamika Aisaakika Variqavanoma vaura, tiro.

Minti tivakero viva qaiqaa tiharo, *Are vaite variana vataro, maa vataro te aivata are kuvuarama teraukavata nimirerave.* ¹⁴ *Are kuvuarama terauka airitahaama vaivarave. Vika vona vona ekaa vata maatama vaivarave. Te ariaravata vikaravata irihama ekaa vataini vaika koqema nimirerave.*

¹⁵ *Te ainti vaiha ariqaa raqiki variarirara are oru ninirama qaiqaa maini orurante ani narave. Te ariara tunu wvara kia qaqira karaiti, te ainti vaiha maa uvvara tiva taunara ekaa autu taiqa karerave, tiro.*

¹⁶ Minti tuvaro Iekopiva vaitonaihairo himpiro nai aatoqihairo irikero tiharo, ¹⁷ Oho, te maa vataro aatu qete vauro. Nora Kotira naavu vatkama maini vaivo. Naaruvaini vi varia gentiva mainima vaivo, tiro.

¹⁸ Minti tivakero vira gararaa Iekopiva vaaka toqaqi himpiro turu ntuvu kero vaito orira varakero vaavi aratero ori viraqaa vahavera qihakero ¹⁹ vi vatara autu nteharo, *Betelive - Kotira Maaqave*, tura. (Haaru vaiinti nahenti vi vataraqaa vau vatukara autu nteha Lusive, tura.)

²⁰ Minti tivakero Iekopiva nai kauqu aiqiqaa aqukeharo Kotirara tiharo, Are tintira vaharama koqema kera tiqaa raqikihamara karave, utavaaqa nonkuainarave, ti timi vairage te niara aara oru nimina ²¹ orurante aitare tenta qora maaqaimi vuare. Are mintima kera koqema kera tiqaa raqikirera, te ariara are Noravano Kotiva ti Variqavano variaro rirerave. ²² Maa orira vataqii vaavi arataurava vainaraqaa vaiinti nahenti ruvaaqumavi vaiha ai autu tuahera kevarave. Are nana nana haikae ti timinaraqihai, te 9navu tenta tuate vohaiqa nina amirerave, tura.

29

Iekopiva Haraanini oru vaura

¹ Ho Iekopiva aaraini viviro, kuari avu urunaini Mesopotemia vataini oru ntora. ² Mini oru ntero tavovaro namari kaqe vauvaro vira tataaqa taaramonavuqaa sipisipi ruvaaqumavi vaiha namari nareka veka vaura.

Namari vira noqaa aquto oriva, nora ori maara nto oriva vaumontara ti, ³ vo enta vo enta vika kia vi orira vaaka qaqqini varakaraiti, vika nái kana vaiinti veka vaumanta vika ekaa ani ruvaaqumavi vaiha nora ori aqutora venta qaqqini keha, namari kaqake sipisipinavu nimi vaura.

⁴ Ho sipisipiqa raqikuka taaramonavu nai navunaaka veka vauvaro Iekopiva mini oru ntero tiharo, Ti qata vakaao, nenuvau taihai maini ani variavo? tumanta vinavuka tiha, Tenavu Haraanihaive, ti.

⁵ Minti tuvaro Iekopiva vinavuka irero, Nenavu vaiinti vo, Nehora nainti Labaanira tavaarave, kiae tavaarave? tumanta vinavuka tiha, Vira tavaunarave, ti.

⁶ Minti tuvaro Iekopiva vinavuka qaiqaa irero, Labaaniva qaqqie vaivo? tumanta vinavuka tiha, Eo, viva qaqqma vaivo. Ho tavaane. Vira raavuravano Reseriva vira sipisipi hampata maini ani vaivo, ti.

⁷ Minti tuvaro Iekopiva vinavukara tiharo, Ho tavaate. Kuarivano qaqqi qiatagaite vairara ti, ne sipisipi avutaci vita vuru keva vatemta varianarove. Ne namari kaqake sipisipi vika nimi, ntita vare anirante ukau vainaini vuru kaate, tiro. ⁸ Minti tumanta vinavuka aqao ti, Namari noqaa aquttaa oriva nora orima vaivo. Ekaa vo vaiinti voi vaiinti sipisipi aniqe tenavu ori vira venta qaqqini ke namari vika kaqa nimirerave, ti.

⁹ Vika minti tuvaro Iekopiva vinavuka hampata qaqqi uva ti vauvaro Reseriva nai qora sipisipi hampata oru ntora. Viva sipisipiqa raqiku nahentiva vaharora tiro, viva sipisipi hampata oru ntovaro ¹⁰ Iekopiva tavovaro vira naura Labaanira raavuravano Reseriva Labaanira sipisipi hampata vauvaro vira tavero quahakero oru nariaraa nora ori namari noqaa aqutora venta qaqqini kero nai naura sipisipinavu namari kaqakero nimura.

¹¹ Namari kaqa nimiro viraqahaairo Iekopiva oru Reserira moqakero virara iqí rata amitero ¹² tiharo, Te ai qora nauntivanove. Te Rebekaara maaquvanove, tuvaro Reseriva kantero vuru nai qora tiva amuvaro ¹³ Labaaniva vi uvvara iriro tiharo, Ike, viva ti aura maaquvanove, tivakero viva kantero oru Iekopira vitakero vira kukuqama kero vatero moqa kero, viraqahaairo vira vita varero vuru nai naavuqi kora.

Labaaniva nai naavuqi vira vuru kovaro Iekopiva ekaa vi uvvara vi uvvara Labaanira tiva amuvaro ¹⁴ Labaaniva tiharo, Quqaama are ti vohaa naarevano variaro. Tetanta vohaa vaintima vauro, tiro.

Iekopiva Reserira varareva Labaanira kaiqa vara amitora

Labaaniva minti tuvaro Iekopiva vikantiro vohaa tora vauvaro ¹⁵ viraqahaairo Labaaniva Iekopirara tiharo, Kia are tiriara te vira nauntive tivakehera ti kaiqa qaqqi vara timitaane. Are ti kaiqa vara timitenarara te nana koqaae ai amirarave? tiro.

¹⁶⁻¹⁷ Minti tuvaro Iekopiva tavomanta vira raavura taaraqanta vaura. Vira nakaara autu Riaava vauvaro vira avuvano kia koqe avu vaura. Vira auravano Reseriva koqe viri vaata vataava vauvaro ¹⁸ Iekopiva Reserirara antuqa aruvaro vaharo viva Labaanirara tiharo, Kaiqe te ai kaiqa varehama 7 ihi varake ai raavura naantiaaraara Reserira varaare, tiro.

¹⁹ Minti tuvaro Labaaniva nai tiva amiro tiharo, Hove. Vo ankuqihairo vovano vira varaantorave. Are homa maini ti kaiqa vara timitera, vira varenarave, tiro. ²⁰ Minti tuvaro Iekopiva Reserira varareva 7 ihiaara Labaanira kaiqa vara amitora.

Viva Reserirara antuqa aruvaro vira varaainarara iriharo tiharo, Te 7 ihi navu kaiqa varaarirava kia yukai entanavu vairaitiro, taaraiqama vaivo, tiro.

²¹ Manti tivakero 7 ihi navuara kaiqa varaqiro viro vuru taiqa kero, viraqaaahairo oru Labaanirara tiharo, Ho te ai kaiqa vara amitaqi vi, vuru taiqa kauro. Ho are tinta naata timirage varaare, tiro.

²² Manti tuvaro Labaaniva Iekopiva nahenti varaarire tiro, hihai hihairo vaiinti nahenti naarama ruvaaquma kero kara nimuvaro ²³ entama vuvaro Labaaniva kia nai raavura Reserira Iekopira amiraitiro, viva Riaara vitero vira amuvaro, Iekopiva virara Reserirave tivakero, vikantiro nai naavuqi vaitora. ²⁴ (Labaaniva nai kaiqa nahenti vo, Riaara amuvaro vi nahentiva Siripaava Riaara kaiqa nahenti vaura.)

²⁵ Labaaniva Riaara vuru Iekopira amuvaro Iekopiva vikantiro vaitero vira qararaa toqaqi himpiro tavovaro vira nakaava Riaava vira naata vaura. Ho vira kaara Iekopiva oru Labaanirara aqao tiro, Nantiharae ti mintima timitaaro? Te Reserira vararerai ai kaiqa vara amitaunarave. Nana kaarae are ti unaqarama timitaaro? tiro.

²⁶ Manti tuvaro Labaaniva tiharo, Aqao, tinavu okara mintima vairave. Tenavu kiama aura naane vaiinti amiraiti, nakaara naane vaiinti ami vaunarave. ²⁷ Vohaa *uiki* maa karara ne entava taiqa virage tenavu homa vira aura ai amirarave. Are vira varenarara irihara qaiqaa 7 ihi vonavuvata ti kaiqa vara timitenarave, tiro.

²⁸ Manti tuvaro Iekopiva eo tivakero vohaa *uiki* varakovaro Labaaniva nai raavura Reserira amuvaro Iekopiva vira varatero vaura. ²⁹ (Labaaniva nai kaiqa nahenti vo, Reserira amuvaro vi nahentiva Bilihaava Reserira kaiqa nahenti vaura.)

³⁰ Iekopiva Reserira varatero vaiharo virara vogama kero antuqa aruvaro Riaarara inaaraiqaqai antuqa aruvaro vaura. Iekopiva mini vaiharo 7 ihi vonavuvata Labaanira kaiqa vara amiteharo vaura.

Iekopira vaintinavu

³¹ Noravano Kotiva tavovaro Iekopiva Riaarara inaaraiqaqai antuqa aruvaro viraqaaahairo Kotiva Riaara kahaquvaro Riaava vainti taiqama viro vauvaro Reseriva *naahiaru/qururaiqama* viro vaura.

³² Riaava vainti taiqama viro qorainti vainti vo vatatero tiharo, Noravano Kotiva tavaivarao kia ti vaativano tiriara quahaira kaara viva ti kahaqama timitaivo. Vate maaqaahairo ti vaati hantuqavano tiriara varianarove, tivakero nai maaqu avuhainaarara *Rubenirave - Muntuka Maara Ntaira Tavairave*, tiro.

³³ Riaava qaiqaa vainti taiqama viro qorainti vainti vo vatatero tiharo, Ti vaativano kia tiriara quahaira kaara Noravano Kotiva qaiqaa maa vaintiravata ti timivo, tiro. Manti tivakero nai maaquara *Simionirave - Uva Iri Vairave*, tiro.

³⁴ Manti tivakero Riaava variro qaiqaa vainti taiqama viro qorainti vainti vo vatatero tiharo, Te tenta vaati taaramo vainti vata amitaunarara tiro, vira hantuqavano tiriara varianarove, tivakero virara *Rivairave - Vohaa Avitumavirave*, tiro.

³⁵ Manti tivakero Riaava qaiqaa vainti taiqama viro qorainti vainti vo vatatero tiharo, Vi vaintirara irihama te Nora Kotira autu tuahera karerave tivakero, viva vi vaintirara *Iutaarave - Vira Autu Tuahera Karerave*, tiro. Manti tivakero kia qaiqaa vainti vataraitiro, qaqi vaura.

30

¹ Riaava vi vaintinavuka vatatovaro Reseriva kia vainti vataraitiro, vira kaara nai nakaara nota amiteharo oru Iekopirara tiharo, Are kia vainti ti timirera, te qutu virerave, tuvaro ² Iekopira arara itovaro tiharo, Aqao, te kia Kotikavauve ai vainti ho amirarave. Vivama ai *naahiaru/qururaiqama* kaivarama are kia vainti vataaro, tiro.

³ Manti tuvaro Reseriva tiharo, Are ti kaiqa nahenti Bilihaakantira vaitairaro viva ti vainti vata timitaarire. Viva mintirage te vainti noka homa vairarave, tiro.

⁴ Manti tivakero viva nai kaiqa nahenti Bilihaara amuvaro Iekopiva vikantiro vaitovaro ⁵ Bilihaava vainti taiqama viro vuru qorainti vainti vata amitora. ⁶ Reseriva tiharo, Kotiva ti uva iriharo avuqavuma timitaivo. Te vira aarauraro viva ti uva iriharoma qorainti vainti ti timivo, tivakero vi vaintira autu nteharo *Daanirave - Uva Avuqavuma Timitairave*, tura.

⁷ Manti tuvaro Bilihaava qaiqaa variro vainti taiqama viro Iekopira qorainti vainti vo vata amitoro ⁸ Reseriva tiharo, Te tenta nakaakanti raquqi vivima vira aatara kauro, tivakero vi vaintira autu nteharo *Napataarirave - Te Raqunarave*, tura.

⁹ Manti tivakero vauvaro Riaava tavovaro viva qaiqaa vainti vataarirava kia vauvaro viva nai kaiqa nahenti Siripaava Iekopira amuvaro Iekopiva vikantiro vaitovaro ¹⁰ Siripaava qorainti vainti Iekopira vata amitoro ¹¹ Riaava tiharo, Ti koqema timitaimanta qaiqaa vainti varauro, tivakero vi vaintirara *Gaatirave - Koqe Haika Timirave*, tiro.

¹² Minti tuvaro Siripaava qaiqaa qorainti vainti Iekopira vata amitovaro ¹³ Riaava tiharo, Te voqamake quahema vauro. Vaiinti nahenti tiriara quahe vai nahentiravema tivarave, tivakero vi vaintirara Aserave – Quahaunarave, tura.

¹⁴ Ho uiti tege entava anintovaro Riaara maaqu Rubeniva mini oru vaiharo maura vo ranta kora. Nahenti vika vi maurara tiha, Vira namake vainti taiqama virarave, ti vau maurara ranta kero varero vuru nai nora Riaara amuvaro Reseriva vira tavero Riaarara tiharo, Ai maaquvano rantatai maurara tivata hini timiane, tiro.

¹⁵ Reseriva minti tuvaro Riaava aqao tiro, Are tigaahaira ti vaati varaanarara hove tiataara vaivara are kia minti tiraitira, are ti maaqu mauraravata ti naari variaro, tuvaro Reseriva tiharo, Are nena maaqu maura vira ti timirera, are homa Iekopikantira entaqi vaitenarave, tiro.

¹⁶ Minti tuvaro erovaro Iekopiva naaho kaiqa vara taiqakero anuvaro Riaava vira oru vitakero tiharo, Are vate entaqi tintira vaitenarave. Ti maaquvano maura varakero timiraqohai te Reserira koqama kaunaraa ti, te entaqi ainti vaitarerave, tiro. Minti tuvaro Iekopiva entaqi vikantiro vaitora.

¹⁷ Ho Kotiva Riaara uva iriro vira kahaquvaro Riaava vainti taiqama viro qorainti vainti vo Iekopira vata amitora. Riaara maaqu 6navu vaura. ¹⁸ Riaava vainti vatatero tiharo, Te tenta kaiqa nahenti tenta vaati amurarora tiro, Kotiva tiriara quaheharo qorainti vainti vovata ti timivo, tivakero virara Isakaarave – Koqaa Timirave, tura.

¹⁹ Riaava qaiqaa vainti taiqama viro vuru qorainti vainti vo Iekopira vata amitora. Mintumanta Riaara maaqu 6navu vaura. ²⁰ Riaava tiharo, Kotiva koqe haika ti timitarave. Te tenta vaati vira maaqu 6navu vata amitaunaraa tiro, viva tiriara quaheharo varianarove tivakero, virara Sebulunirave – Ti Vaativano Tintiro Varianarove, tiro. ²¹ Minti tivakero varikero vira naantiara Riaava nahenti vainti vatatero virara Dainaarave tura.

²² Minti tuvaro viraqaaahairo Kotiva Reserirara iritero, vira aaro uvvara iriro vira kahaqama amitovaro ²³ viva vainti taiqama viro qorainti vainti vatatero tiharo, Te kia vainti vataunara kaara kaurira haika varauanara Kotiva taiqa timitaivo, tivakero ²⁴ virara Iohepirave – Voqavata Timiarire, tiro. Minti tivakero viva tiharo, Kairaro Noravano Kotiva qaiqaa qorainti vainti voqavata ti timiarire, tiro turama.

Iekopira sipisipive memeraave airiqama vura

²⁵⁻²⁶ Reseriva Iohepira vatatovaro Iekopiva Labaanirara tiharo, Te airi ihiara ai hampata vaiha ai kaiqa vara amiteha nahenti varatema vaintivata vatatauro. Ho ti tititairaeq tenta naata vainti ntita vare tenta maaqaini vuare. Te nora kaiqa ai vara ami taunara virara kankomake irianarave, tiro.

²⁷ Minti tuvaro Labaaniva aqao tiro, Te tiarirara are iriane. Te hepi kaiqa varake tavaurara are maini variararo Noravano Kotiva ai koqema amiteharo tivata koqema timite vairave. ²⁸ Kia vuane. Are maini vairaqe te koqaavata ai amiare. Are nana koqaae varareva inara tiraqe ai amiare, tiro.

²⁹ Minti tuvaro Iekopiva tiharo, Te ai kaiqa vara amiteha ai sipisipive memeraaqaaave raqiki vauramanta vika airitahaa variarave. Are virara irianarave. ³⁰ Te kia maini anuna entara ai sipisipi memeraa taararaqaqi vaurave. Maa entara vika airitahaama variavo. Te maini vaurarora tiro, Noravano Kotiva aivata koqema amitairave. Vate maa entara te tenta vainti nahentiara iriha vika kaiqa vara nimitarerave, tiro.

³¹ Minti tuvaro Labaaniva tiharo, Ho maini variqira viraqe te nana nana koqaae ai amirarave? tiro.

Minti tuvaro Iekopiva virara tiharo, Kia vo koqaa ti timiane. Te vo uva ai tiva amiarirara are hove tirera, te maini vaiha ai sipisipi memeraaqaa raqikiqi virerave. ³² Are kairage te vate ai sipisipi qhai ekaa naati konkira rairake tuate, ai memeraaqihai ekaa kaakantaarinra rairake tuateha vikara tenta quarave tiare. Vikama ti koqaa vaivarave. ³³ Naantiara are ani ti konkira sipisipive kaakantaarinra memeraave aitutumake tavairaro viraqi vo vaata vataakavata vaivera, are homa tirira vira muara vara taanarave tinarave, tiro.

³⁴ Iekopiva minti tuvaro Labaaniva tiharo, Hove, are tianantema kero vi uvava varianarove, tiro. ³⁵ Labaaniva minti tivakero vohaa vi entaraqai viva kantero oru evaara nai sipisipi memeraa rairakero, memeraa kaakantaarinra qoravata nahevata nariaraa vatero, sipisipi konkiravata varakero nariaraa vatero nai maaqunavu vonaini nititama kero tiharo, „Iekopiva maaka varaantorave..“ ³⁶ Nenavu vika ntita vare taaramo enta niaraini oru vahama vikaqaata raqikiha variate, tumanta vika vuvaro Iekopiva maaqaini vaiharo hini sipisipi memeraaqaa raqikiharo vaura.

³⁷ Iekopiva vikaqaata raqikiharo oru vo qara vo qara u katari kaarara teqa kero varero, vika paha vona vona turikero vona vona qaqi kero ³⁸ varero vuru sipisipi memeraa

namari ne vaura voqi voqi aratora. Mintima kero viva memeraa mini ntita vuru komanta vika namari nareka ani³⁹ katari vira aratora avuqaa vaiha qaramaqi vi vaumanta viraqaahai vika naati vatareka vaakuvirive, qarantaurirave, kaakantaarirave, vate vaura.

⁴⁰ Iekopiva Labaanira sipisipiqa raqikiharo vikaqihairo nahe sipisipi rairakero nar- iara vatero, konkira sipisipi nai ura vika hampata komanta vika kuvuaramaqi viha Iekopirainiqama vura. Mintiaqi viha Iekopira sipisipi vika airiqama vura.

⁴¹ Iekopiva tavovaro memeraa nahe koqevo qora hampata nireva auti vauvaro viva vira vita varero katari aratora tataaqa qaraarire tiro, vita vuru kora. ⁴² Memeraa nahe kia kempuka vauka qora hampata nireka auti vauvaro Iekopiva vika qaqi kanta komanta qaramaqi vi vaurama.

Mintiaqi vuraqaahairo ugerara memeraavano Labaanirainiqama vuvaro koqe memeraa kempukavano Iekopirainiqama vura. ⁴³ Minturaqaahai Iekopira sipisipi memeraa airiqama vuvaro Iekopiva airi haika vato vaiintiva vaumanta vira kaiqa vaiintive, kaiqa nahentive, kamerive, donkive, airitahaa vaura.

31

Iekopiva kia Labaanira tiva amiraitiro vura

¹ Iekopiva vaharo irumanta Labaanira maaqunavu nuntu nauntu tiha, Oho, Iekopiva ekaa tinavu qova i haikarama varaivo. Iekopiva tinavu qova i haikara varairaqaahairo noraiqama vivo, ti. ² Manti tuvaro Iekopiva tavovaro Labaanivavata kia tota virara quaontema kero, virara quaheharo vaura.

³ Mintuvaro Noravano Kotiva Iekopirara tiharo, Ho are nena qora maaqaini anirantera vuane. Are mini viraqe te ai kahaqama amite ainti vairarave, tiro.

⁴ Kotiva minti tuvaro Iekopiva nai sipisipi memeraaqaa raqikiharo nai naatatanta Riaaka Reserika naarama kero⁵ vitantara tiharo, Nitanta qova kia tota quahaintema kero, tiriaha quaheharo vaivo. Ho Kotiva ti kahaqama timite vaimanta vaunarare. ⁶ Te nitanta qora koqemake kaiqa vara amitauraro⁷ viva unaqaraiqama keharo vo enta vo enta kia ti koqaa avuquavu timi vairave. Viva ti qoraiqama timitareva auti vaivarovata, Kotiva kia vira qaqi kaivaro viva kia ti qoraiqama timitaivo.

⁸ Viva tiriaha tiharo, Kaakantaarira memeraaqaima ai koqaa varianarove, tu entara vira memeraavano kaakantaarira vatatomanta te varaunarave. Viva qarantaurira memeraaqaima ai koqaa varianarove, tu entara vira memeraavano qarantaurira vatatomanta te varaunarave. ⁹ Mintima keharo Kotiva ti kahaqama timiteharo nitanta qora sipisipi memeraa ti timirave.

¹⁰ Qoravano nahe hampata nu entara te taira tavauramanta qora memeraa vaaku- virive, qarantaurirave, kaakantaarirave, vinavuka nahe hampata ni vaura. ¹¹ Ho te taira tave vauraro Kotiva atito *enseliva* tiriaha tiharo, Iekopio, tumanta te tiha, Vo, te mainima vauro, turaro¹² viva tiriaha tiharo, Ho tavaane. Qora memeraa vika vaakuvirive, qarantaurirave, kaakantaarirave, nahe hampatama ni variavo. Labaaniva ai qoraiqama amite vaira te tavaunarara ti, te ai memeraa airiqama karerave. ¹³ Haaru are Beteli vataini variaramanta te qovarama vura Variqauka te maa vikave. Vi entara are ori vo vataqi aratera vahavera viraqaata qihia kera nena kauqu aiqiqaa aqukehara tiriaha uva tiva taanarave. Ho te vate ariara, Maa vataro kera anirantera nena maaqaini vuanerama, tiro, tiro. Kotiva „*enseli noqihairo*“ minti tumanta te taira tavaunarave, tiro.

¹⁴ Iekopiva minti tumanta Reserika Riaaka Iekopirara tiha, Titanta qova ina haikaraqiqai kiama tetanta vo haikavata ho varauinarave. ¹⁵ Vo vatanaa nahenti qoraiqama nimitaintema kero, viva titantavata qoraiqama timitaivo. Ike, are titanta varehara amiana koqaara, ekaa vi koqaara naiqai nama kairave. ¹⁶ Kotiva vira airaira varakero ai amira, vira kia titanta qova nai iravauve. Vi airairava vaireva, titantainivata titanta vaintairavata airairama vaivo. Mintima vairara tira, are Kotiva ti uvvara avataane, ti.

¹⁷ Vitanta minti tuvaro Iekopiva nai naata vainti vika kameriqaa vaari vatero, ¹⁸ nai sipisipi memeraa avuni kero ruhaaqiqi viharo, Haraanini vaharo varato airairara, ekaa vi haikaravata rumpa varero, nai qova Aisaakiva Kenaani vataini vaunaini vireva vurama.

¹⁹ Vi entara Labaaniva vonaini nai sipisipi kauki toqa kareva vuvaro Reseriva virera iharo, oru nai qova ura oritanta, variqave tutanta, muara varero vura.

²⁰ Iekopiva vireva iharo kia Labaanira tiva amiraitiro, evaara²¹ oru nai u haikara varero ruqemakero vurama. Viva oru Iufaretisi Namari taqa varero verara Gileaati vatainiara vurama.

Labaaniva Iekopira avataqiro vurama

²² Iekopiva evaara vuvaro taaramo enta aitarovaro vovano Labaanira vuru tiva amuvaro ²³ Labaaniva nai navunaaka ntita varero 7 entara Iekopira avataqiro viviro, tavovaro Iekopiva verara Gileati vataini vauvaro ²⁴ entama vuvarora tiro, Labaaniva vaiteharo taira tavovaro Kotiva virara tiharo, Are raurihara kiama oru Iekopira antua uva tiva amitaane, tura.

²⁵ Ho Iekopiva nai *seri* naavu Gileati aiqinaini kaqatero vauvaro Labaanivavata nai navunaaka hampatta mini nái *seri* naavu kaqate vaura.

²⁶ Mintuvoro Labaaniva oruntero Iekopirara tiharo, Are nantivarae evaara viharama vaiintivano iqoka raqiharo nahenti raqia varaintema kera, ti raavururatanta ntita varera maini aniaro? ²⁷ Nantivarae are ti unaqaraiqama kera evaara aiqo aututera aniaro? Are ti tiva timira tenta maaqaini virerave tiaraitirio, te ariara kara unta amite, ihi tiva amite, ai quahama amiteha ai atitauraitirio. ²⁸ Are vireva ihara qaqi kairage te tenta raavururatantavata tenta naintinavuvata moqake kauqu nimi nititaari vuataara vaivara, are kia mintiraitira, kia avu aato vataava voqaara uve ntitakera anianarave. ²⁹ Te ho ai qoraiqama amitaare turarovata, ai qora Variqavano tairakaa ti tiva timiro tiharo, Are raurihara kiama oru Iekopirara antua uva tiva amitaane, tivera te virara irihama kia ai qoraiqama amitarerave. ³⁰ Te irurara are nena qora maaqaini vireva iharama ti maini kera iaro. Ho nantivarae are vireva ihara ti variqatanta muara varera aniaro? tiro.

³¹ Labaaniva minti tuvaro Iekopiva nai tiva amiro tiharo, Te ariara viva kempukaiqiharo nai raavururatanta tiqahaahiro ravaaqavu kaantorave ti, ai aatu qetakema maini evaara anuro. ³² Are tavairaro vovano ai variqatanta muara varava vairera, vi vaiintiva kia ho qaqi variqiro vuuanrove. Ekaa vaiinti nahenti nivuqaa vailhara vi haikara rantaqia vuane. Are tavairaro are ina haikava vairera, nena varaane, tiro. Iekopiva kia iruvaro Reseriva una variqa vitanta muara varovo vaura.

³³ Iekopiva minti tuvaro Labaaniva Iekopira *seri* naavuqi verantero tavovaro kia viraqi vauvaro Riaara *seri* naavuqivata vitanta kaiqa nahenti *seri* naavuqivata verantero tavovaro kia viraqi vauvaro Reserira *seri* naavuqi verantora.

³⁴ Reseriva una variqatanta varakero nai kameriqa oquivi vau taintaraqi kukeqatero, tainta vira nai *seri* naavuqi vuru vatero viraqaata oquivi vauvaro, Labaaniva viraqi oriqetero ekaa haikaq qumina rantehara tavovaro kia vauvaro ³⁵ Reseriva tiharo, Qao, are maaqi uriqetaaramanta te kia himpiraiti, ai avuqaa qaqi oquivi vaunara kaara kia ti titiane. Toravano ti harimanta te oquivi vauro, tiro. Minti tivakero oquivi vauvaro vira qova vi haikarara qumina rantaqiro viharo kia ho ranta kora.

³⁶ Labaaniva kia vi haikara ranta kovaro Iekopira arara itovaro Labaanirara tiharo, Te nana vaagu kaiqa vara kaunara kaarae are mintira iaro? Te nana uva raqa kaurarae are ti tivataqira aniaro?

³⁷ Are ekaa te una haikaraqi rantehara nana haikae ranta kaaro? Vi haikara nena navunaakkavata, ti navunaakkavata nivuqaa qovarama kaira tavaate. Vika titanta uva homa rairake avuqavu qivarave, tiro.

³⁸ Minti tivakero Iekopiva qaiqaavata tiharo, Oho, te ainti vaiha 20 ihi vara kaunarave. Te ai sipisipi memeraaqaa koqemake raqiki vauramanta vika kia hampiqamake naati vatorave. ³⁹ Qaakau vairivano ai sipisipi vonavu aruko entara, kia te ai umiqeha tiha kia ti kaarave tiraiti, te tenta unaraqohai vira vatukara iriha ai amunarave. Entaqive aatitoraqave vokuka ai sipisipi memeraa muara varaa entara, are tiqihaira koqaa naaruma kera varaanarave.

⁴⁰ Oho, te ai sipisipi memeraaqaa raqiki vauraro aatitairaqa quarivano voqama kero ti tatoqe vaivaro, entaqi iqravaravove toqavanove ti hari vaimanta kia ho vaite vaunarave.

⁴¹ Te mintiaqi viha 20 ihiara ai kaiqa vara amitaunarave. Te ai raavururatantara iriha 14 ihiara ai kaiqa vara amite, viraqaahai ai sipisipi memeraara 6 ihiara ai kaiqa vara amitaunarave. Are tiriara ti sipisipi memeraa airi varaantorave tira, votataa votataa are ti koqaa teqake varianarave.

⁴² Oho, ti kaivaqara Variqavano Eparahaamiraqaavata ti qora Aisaakiraqaavata raqiki vaiva kia ti kahqitirio, are ti vehi vaiinti voqaarama titiaraitirio. Te vukaari utuke kaiqa varauunara Kotiva iriharora tiro, viva entaqi ai atiharo tiriara kia virara antua uva tiane tivo, tiro.

⁴³ Iekopiva minti tuvaro Labaaniva vira nai tiva amiro tiharo, Ike, vi nahentitanta ti raavururatantama variavo. Maa vaintinavuka ti vaintima variavo. Maa sipisipi memerauka te uraukama variavo. Ekaa are tave variana haikava te una haikavama vaivo. Kia te tenta raavururatantavata tenta naintinavuvata nitirerave. ⁴⁴ Kaiqetanta vohaa uva tiva taatauke vatetanta maateraiqamavi qaqi variare. Tetanta vi uvara tauru kaarorave ti, kaiqe ori varake naiqaa naiqaa rukitaare, tiro.

⁴⁵ Labaaniva minti tuvaro Iekopiva nora ori vo varakero vataqi aratero ⁴⁶ nai navu-naakara, Nevata ori mpaqi vare maini rukitaate, tumanta vika orinavu mpaqi vare vuru vohaanaini rukite, viraqahai vika ori rukitora tataaqa vайha kara nora.

⁴⁷ Labaaniva nai Araami uvaqihairo vi orira autu nteharo, *Jega-Sahadutave* tuvaro Iekopiva nai Hiparu uvaqihairo vi orira autu nteharo *Galetive* tura.

⁴⁸ Minti tuvaro Labaaniva tiharo, Tetanta uva tiva taurava qaqi variqiro vuarire ti, tetanta maa orinavura ruki tauro, tura. Viva minti turara ti, vi oriranavura autu nteha *Galetive - Taurukerare* tura.

⁴⁹ Labaaniva minti tivakero viva qaiqaa tiharo, Maa entaraqahai tetanta kia vohaa vairaiti, raira vuariraro Noravano Kotiva titantaqaa raqiki vairaqe tetanta kia nai qoraiqama amite nai qoraiqama amitararave, tura. Labaaniva minti turara ti, vi orinavura vo autuvata nteha *Misipaave - Raqikiane* tura.

⁵⁰ Labaaniva minti tivakero viva qaiqaa tiharo, Are ti raavuratantae qoraiqama nimittairerave, are vo nahentie varairerave, are mintirera, te virara kia ho iriarirarovata, Kotiva titantaqaa raqiki vaiva, vivama virara ho iri tavaanarove, tiro.

⁵¹ Labaaniva minti tivakero viva vo uvavata tiharo, Tetanta maa orira arate maa orinavura mpaqi vare vuru ruki taurava titanta tavaaranava vaivo. ⁵² Tetanta uva tiva taatau taunara tauru kaorarave ti, maa orira arataunaravata vo orinavuvata ruvaaqumake vatauro. Te maihai kia maa orira aatarake ai oru qoraiqama amitarerave. Arevata vihairsa kia maa orira ai aatarra kera ani ti qoraiqama timitenarave. ⁵³ Kairaro Eparahaamika Nehoka Variqavano titantaqaa raqiki vairaqe tetanta kia nai qoraiqama amite nai qoraiqama amite irerave, tiro.

Labaaniva minti tuvaro Iekopiva nai kauqu aqiqaa aqukero tiharo, Ti qova Aisaakiva qete vai Variqara autuqaa te are uva tiva taanara iriqi virerave turo, tiro.

⁵⁴ Minti tivakero viva aqina vataini vahiaro nai *sipisipi*, vo arukero Kotira *ofaa* iha quara amitero, nai navunaaka naarama kero vika hampata kara nama kero mini vaitora. ⁵⁵ Vika mini vaite vira qararaa Labaaniva himpiro nai naintinavuvata nai raavuratantavata moqakero nai kauqu tuaherakero vika koqema nimitero, vika mini kero anirantero nai maaqaini vurama.

32

¹ Labaaniva nai maaqaini anirantero vuvaro Iekopiva aaraini viharo tavomanta Kotiva nitito *enselika* vira vita kareka ani vauvaro ² Iekopiva vika tavero tiharo, Ike, maini Kotira *seri* naavu maaqa kaqate varianainive, tivakero vi vatara autu nteharo, *Mahanaiminive*, tura.

Iekopiva Isora qaiqaa tavareva iharo qera i vaura

³ Iekopiva nai kaiqa vaiinti vonavu naane nititomanta vinavuka vira vakaava Isova Seiru vataini vaunaini vura. Vi vatava Idomu vata avutaini vaura. ⁴ Iekopiva nai kaiqa vaiinti vonavu nititareva iharo tiharo, Ne mini oruntema ti nora vaiinti Isorara maantimake tiriara tiate: Te Iekopika ai kaiqa vaiintivano Labaanikanti variqi vi, vate vihaima anuro. ⁵ Te purumakauve, donkive, sipisipive, memeraave, kaiqa vaiintive, kaiqa nahentive, vatauraukave. Are tiriara quahaane ti, te maa uvara vara kauro, tiate. Ne mintimake Isora tiva amiate, tivakero vika nititomanta vika vuru vi uvara Isora tiva ami ⁶ vihai orurante viri Iekopirara tiha, Tenavu ai vakaaka Isora vuru tiva amuraro viva ai vita kareva airi vaiinti 400 vaiinti hampata ani vaivo, ti.

⁷ Vinavuka minti tuvaro Iekopira voqama kero aatu itovaro viva ekaa nai vainti nahentitive, sipisipive, memeraave, purumakauve, kamerive, vikavata rairakero taaraqantaqaa vatero ⁸ tiharo, Isova maini ani hini vainti nahenti hampata raqrirera, ne hini vainti nahenti rugemake kantama vuate, tiro.

⁹ Minti tivakero viva Kotira aarero tiharo, Mpo, Kotio, are ti naaqura Eparahaamiravata ti qora Aisaakiravata vitanta Variqavano variaro. Noravaauvo, are tiriara, Nena maaqaini oru vairaqe te ai koqema amitaarirara are koqemakera variqira vuane, tianarave. ¹⁰ Oho, te kia koqe vaiinti vaurara are ti nena kaiqa vaiinti koqema timitera kia ti qaqlira kaanarave. Haaru te maihai Iotani Namari taqa vare vuavauna entara te kauruqai tuata vare vuavaunarave. Are ti kahaqiaravera te vihai anixa taara anku hampata anuro.

¹¹ Ti vakaara Isora kauguqihairo ti antuara timitaanerema te ai aarauro. Oho, viva anintero kia tiqai hariraitiro, viva ti vainti nahentivata ntaihama kaantorave ti, te qetehama vauro. ¹² Are haaru tiriara tihara, Te ai koqema amitaarirara are koqema kera vairamanta are kuvuarama teraukavata airiqamavi nora namari auvahini vai nuqara voqaara airitaha vaivarave tianarave, tiro.

¹³ Iekopiva minti tivakero vaitero vira qararaa himpiro nai quaranavuqihairo vonavu rairakero Isora maantimakero amitero: ¹⁴ Memeraa nahe 200, memeraa qora 20navu, sipisipi nahe 200, sipisipi qora 20navu, ¹⁵ kameri nahe nai naati vataakero 30navu, purumakau nahe 40navu, qora 10navu, donki nahe 20navu, qora 10navu rairakero amitora.

¹⁶ Mintima kero vo quara vo quara rairakero voqaa voqaa vatero, nai kaiqa vaiinti vo attero tiharo, Are naane maanavuka varera vuru Isora amiane, tivakero, qaiqaa kaiqa vaiinti vo attero tiharo, Are vira naantiara maanavuka varera vuru Isora amiane, tivakero qaiqaa kaiqa vaiinti vo attero tiharo, Are maanavuka varera vuru Isora amiane, tivakero minti tivaqiro viharo nai kaiqa vaiinti vohaiqa vohaiqa nititomanta ekaa vinavuka quara vare vuru Isora amireka vura.

¹⁷ Iekopiva vika nititeharo avuni atito vaintirara tiharo, Are viraro Isova ani ai vitakero ariara, Tara kaiqa vaiintivanove? Are taini virevae aniaro? Are tara quarae ruhaaqi varera ani variaro? tirara ¹⁸ are nai mintima tiva amiane, Ai kaiqa vaiinti Iekopiva irave. Iekopiva ti tititaimanta te vi haikara vare vuru vira nora vaiinti Isora amirerave. Iekopiva tinavu naantiaraini ani vaivo. Minti tivakerama Isora tiva amiane, tiro.

¹⁹ Minti tivakero Iekopiva vo vaiinti vo vaiinti nititero vikaravata tiharo, Nevata Isora oru vitake vohaa uvaqaima Isorara tiate. ²⁰ Ne kiama tauruke tiha, Ai kaiqa vaiinti Iekopiva tinavu naantiaraini ani vaivo, tiate, tiro. Iekopiva minti tivakero nai irikero tiharo, Te vo quara vo quara naane Isora amiariraro vira arara vaahaarire. Mintirage vira naantiara te oru vira vita kaariraro viva quqaae tiriara quahaanarove? tiro. ²¹ Minti tivakero Iekopiva quaranavu naane avuni vara kero nai kia viraitiro, mini vaura.

Iekopiva enseli vontiro raqura

²² Iekopiva mini vaharo vohaa vi entara entaqi himpiro nai naatatanavata, nai naata kaiqa nahentitantavata, nai maaqu 11navuvata, ntita varero Jaboku Namari taqa varero

²³ vika hini mantaraini ntita vuru kero, viraqaaqihairo viva orurantero ekaa nai airaira namari hini mantaraini vuru kaate tumanta vuru kovaro ²⁴viva nariaraa hini mantaraini vaura.

Iekopiva mini vauvaro „naaruvalihainaa“ vaiinti vovano oruntero Iekopira ravaqaqvatu teharo vikantiro raquqiro viviro aatita kora. ²⁵ Raquqiro viharo vi vaiintiva tavovaro viva kia ho Iekopira aatara kaarirava vauvaro viva vira onkerura vuhaari ntuvu kovaro Iekopira *auka/auika* vuhaari nkaqu vuvuro aiha vuvuro vaura. ²⁶ Mintuvaro vi vaiintiva Iekopirara tiharo, Ho aatitama vivo. Ti tutu kaane, tuvaro Iekopiva aqao tiro, Are nena kauqu tuaherakera ti koqema timitaireqe te ai tutu kaare, tiro.

²⁷ Minti tuvaro vaiinti viva Iekopirara tiharo, Ho nena autu ntaane, tuvaro Iekopiva tiharo, Te Iekopikave, tuvaro ²⁸ vaiinti viva tiharo, Kia qaiqaavata lekopirave tiane. Are Kotiravata vaiintivata raquqiro vihara aatara kaanarara ti, te ariara *Isarerirave - Kotikantiro Raqi Vaivave* tirerave, tiro.

²⁹ Minti tuvaro Iekopiva virara tiharo, Are nena autu ntaane, tuvaro viva aqao tiro, Nantiharae ti hutuara iraaro? tivakero kia nai autu vira tiva amiraitiro, nai kauqu tuaherakero Iekopira koqema amitero ³⁰ vuvuro Iekopiva tiharo, Te Kotira viri tave vauraro ti vehakuma timitaimanta kia te qutu viraiti qaqi vaunarara ti, te maa vatara autu nteha *Penierive - Kotira Virive* tiro, tiro.

³¹ Minti tivakero Iekopiva Penieri mini kero aaraini vi vauvaro kuari uruntovaro vira *auka/auika* ntuvu kora kaara aiha vuvuro rentuqaa rentuqaaamagiro vura. ³² Iekopira *auka/auika* ntuvu korara ti, maa entara Isarereri vatanaaka mati neha *auka/auika* tataaqa vai matira kia naara.

33

Iekopiva oru Isora vita kora

¹ Iekopiva aaraini oru viharo vutu tavovaro Isova 400 vaiinti hampata ani vauvaro Iekopiva nai vainti rairakero hininavu Riaara amiro, hininavu Reseriravata vira kaiqa nahentitantavata nimura.

² Viva avuni nai kaiqa nahentitantavata vitanta vaintivata vatero, vika naantiara Riaaravata vira vaintinavuvata vatero, vika naantiara vitini Reseriravata vira vainti Iohepiravata vatora.

³ Mintima kero Iekopiva naane avuni oruntero tori kauru araviro nai viri vataini kero himpiro, qaiqaa ori vaiqiro tori kauru araviro nai viri vataini kero himpiro, 7 tataa mintiaqiro viro, oru nai vakaara vita kora.

⁴ Iekopiva mintiaqiro vi vauvaro vira vakaava Isova kantero oru nai qata Iekopira vitakero vira kukuqama kero vira moqakero vatero, vitanta vohaatanta vaiha nai iq'i rata amite nai iq'i rata amite i vaura.

⁵ Mintiharo Isova vutu tavomanta Iekopira vainti nahenti vauvaro viva Iekopira irero, Vitira taukae ai hampata aniaka varia? tiro.

Isova minti tuvaro Iekopiva nai tiva amiro tiharo, Vika Kotiva tiriara quaheharo ti timi vainti nahentikave, tiro. ⁶ Minti tumanta Iekopira kaiqa nahentitanta nái vainti hampata aumanto aninte vatakanta hiqintivi vaiha nai viri vataini keha Isora uva mantomanta ⁷ vika naantiara Riaava nai vaintiaravata aninte vatakanta hiqintivi vaiha vikavata nái viri vataini ke vira uva mantomanta vika naantiara vitini Iohepika Reserika aninte vatakanta hiqintivi vaiha náitanta viri vataini keha vira uva mantora.

⁸ Vika vira uva mantovaro Isova Iekopira irero tiharo, Te aaraini aniba vo quara vo quara tavaunara vo? Vi quarauka tara quarave? tiro.

Minti tuvaro Iekopiva tiharo, Are ti quahama timitaane ti, te ai amitauna quaraukave, tiro. ⁹ Minti tuvaro Isova aqao tiro, Ti qatao, te airi haikama vatauro. Nena ina haikara qaqi tuataane, tiro.

¹⁰ Minti tuvaro Iekopiva tiharo, Aqao, are tiriara quahairera, are vi quarara varaane. Are ti vitakera ti quahama timitaanarara ti, te Kotira viri taveha quahaunantema ke, te ai virivata tavehama quahauro. ¹¹ Kotiva ti koqema timitaimanta te airi airaira vataunara tira, are te quara amitaainara homa varenarave, tiro. Minti tivakero kempukaiqaakero tuvarora tiro, Isova Iekopira quara varora. ¹² Mintima kero Isova tiharo, Varaiqetanta vuare. Te ainti aaraini virerave, tiro.

¹³ Minti tuvaro Iekopiva aqao tiro, Nora vaiintio, are naane viraqe te ai naantiara vuare. Ti vaintivara uquerava vainti variamanta ti sipisipve purumakauve nái naati hampata kia ho kantevarave. Tenavu vohaa entara vika vuanamake ruhaaqiqi vuarera, vika qutuma vivarave. Virara virara irihama te qakomake virerave. ¹⁴ Nora vaiintio, are naane avuni vi vairaqe te qakomake ai naantiara quara ruhaaqiqi viha tenta vaintaira hampata qakomake varika varikamaqi vivi, are vainanaini Seiru vataini oruntarerave, tiro.

¹⁵ Minti tuvaro Isova tiharo, Ho kaiqe te tenta vaiinti hininavu raira kaari vika ai hampata viha „ni antua nimitaate“, tuvaro lekopiva aqao tiro, Nantivarae mintiaro? Are tiriara quahairera, qaqi kairaqe te tentaraa vuare, tiro.

¹⁶ Minti tuvaro vohaa vi entara Isova nai kaiqa vaiinti hampata anirantero Seiru vataini vireva uvaro, ¹⁷ Iekopiva kia mini viraitiro, qakoma kero viviro vata vo, Sukotini oruntero mini vaiharo nai naavu vo kaqatero, nai quarara haraara naavu, vo naavu vo naavu kaqa nimitora. Iekopiva minturara ti, vi vatarara, *Sukotive – Haraara Naavuve*, tura.

¹⁸ Iekopiva Mesopotemia mini kero niara aaraini viviro, Kenaanini oruntero Sukotini varikero, viraqaahairo oru vatuka vo, Sekemi aaqaimi vaiharo nai seri naavu maaqa kaqatero vaura.

¹⁹ Viva mini vaiharo 100 silvaa monu aquakero vata vo varora. Sekemira qora Hamora ankuqaahairo vi vatara koqaama kero varero ²⁰ Kotira autu tuahera kareva, *ofaa* tainta vo autukero vira autu ntero, *El Elohe Israel – Kotiva Isareri Variqavano Vaivo* tura.

34

Vovano Iekopira raavura qoraiqama amitora

¹ Iekopiva Sekemini vauvaro Riaara raavuravano Dainaava vi vatanaa nahentinavu tavareva vuvuro ² Hamova Hivi vatanaaka qiata vaiinti vauvaro vira maaqu Sekemiva Dainaara tavero vira ravaqaqavu kero vikantiro muara niro.

³ Vikantiro nuvakero, viva virara koqe nahentive tivakero virara antuqa aruvuro Dainaava tiriara hantuqa haruarire tiro, virara qihaaqama kero uva tiharo „nai naavuqi vita vuru kero, ⁴ oru nai qora Hamorara tiharo, Are oru maa nahentira navunaaka hampata vaihara koqaa autukera vika nimiraqe te maa nahentira varaare, tiro.

⁵ Minti tuvaro Iekopiva nai raavura qoraiqama amitorara iriro, vira maaqunavu ahakaqi quaraqaa raqiki vauvarora tiro, viva qihaaqama kero vaiharo nai maaqunavu veka vaura. ⁶ Ho vika quaraqaa raqikunaihai anintovaro Sekemira qova Hamova anintero Iekopira vataakero uva tireva anura.

⁷ Hamova anintero Iekopira vataakero uva ti vaumanta Iekopira maaqunavu Sekemiva Dainaara qoraiqama amitorara iruvaro voqama kero vika arara itomanta vika tiha, Oho, Sekemiva Iekopira raavura kia mintimakero qoraiqama amitaataarave, ti vaura.

⁸ Hamova anintero Iekopirara tiharo, Ti maaqu Sekemira muntukavano ai raavurara vaivo. Are vira amiraro vira naata variarire. ⁹ Ne maini vaiha tinavu nahenti varaiqe

tenavu ni nahenti varaare. ¹⁰ Ne homa maini airi enta variqi vivarave. Maa vataraqaa ne homa nenta quaraqaa raqikivarave. Maini variqi viha koqaa kaiqa vareha vo vata vo vata koqaamake varaate, tiro.

¹¹ Minti tuvaro vira maaqu Sekemiva Dainaara qoraravata vira qata vakaukavaravata tiharo, Ne tiriara quaheha Dainaara ti timivera, te ne tivate koqaara ni nimirarave. ¹² Ne nora koqaa naarivera, te vi koqaara homa ni nimirarave. Mpo, vi nahentira ti timiate, tiro.

¹³ Sekemiva minti tumanta Iekopira maaqunavu nai aura nakaa qoraiqama amitora kaara vika arara itomanta unaqaraamake ugerara uva tiha, ¹⁴ Tenavu vaata toqa kaakama vauro. Vaiinti vovano kia nai vaata toqa kainara tenavu kiamma ho tentanavu aura Dainaara amirarave. ¹⁵ Ne qorainti nenta vaata toqa kaiqe, viraqaha tenavu niara tinavu voqaa variavo tivakeha ¹⁶ tentanavu raavura ni nimiha, ni raavura tenavu varaare. Ne mintiqe tenavu ni hampata variqi viha vohaa vatanaaka variare. ¹⁷ Ne kia tinavu uvava eo tivake nenta vaata kia toqa kaivera, tenavu Dainaara kia ni nimiraiti, tentanavu qaqi vita vare virerave, ti.

¹⁸ Iekopira maaqunavu minti tumanta Hamovavata vira maaqu Sekemivavata vi uvarara hove tura. ¹⁹ Sekemiva Iekopira raavurara muntuka vauvarora tiro, viva kia varikaraitiro, vaaka nai vaata toqa kora. Sekemira navunaaka virara nora vaiintive ti vaura.

²⁰ Hamova nai maaqu Sekemikantiro oru nái navunaaka vatuka vaantaavura qentiana ruvaaquamavi vaunaini orunte vikara tiha, ²¹ Vi vaiintika tinavuara quahehama variavo. Ne vika qaqi kaimanta maini ho vi amiate. Maini nora yata vaimantara ti, vikavata homa tinavu hampata vaivarave. Homu tenavu vika nahenti varaari vika tinavu nahenti varaate. ²² Vika vohaa uvaqai kempukaiqaake tiha, Ne qorainti tinavu aanante nenta vaata toqa kaate, tiavo. ²³ Kaiqenavu mintiakе tentanavu qorainti vaata toqakeha, vika nahenti varaqi viha vika airairavata quaravata varaare, ti.

²⁴ Hamoka Sekemika minti tumanta ekaa vi vatanaaka hove tivake ekaa qorainti vika vaata toqa kora.

²⁵ Qorainti vika nái vaata toqa kovaro taaramo enta aitarovaro vika qaqiqai aihavi vaumanta Dainaara vakaatanta, Simionika Rivaika iqoka paipе varetanta vika vatukaqi oruntomanta vi vatanaaka vitanta tave qaqima aniaovo tumanta, vitanta oru vatuka viraqi vi anixa ekaa qorainti aru taiqa kora.

²⁶ Simionika Rivaika oru Hamora nai maaqu Sekemira vataake aruke, Sekemira naavuqihai náitanta aura Dainaara vita vare vumanta ²⁷ Iekopira maaqu hininavu orunte nái aura nakaa qoraiqama amitora kaara vi vatukaraqihai vo airaira vo airaira varora.

²⁸ Vi vatanaaka sipisipive, purumakauve, donkive, vika vare, ekaa vatukaqi vau haikarave, aaqaini vau haikarave, ²⁹ ekaa vi vatanaaka vato airairara vare, ekaa vika nahentivata vaintivata, ekaa naavuqi vau haikaravata, vare vura.

³⁰ Mintuvaro Iekopiva Simionika Rivaika nitiharo vitantara tiharo, Netanta minti-hama nora uvama tiqaa vataavo. Maa vataraqaa variaka Kenaani vatanaakave Peresi vatanaakave tiriaria vaaqu vaiintivema tivarave. Tenavu kiamma airi vaiinti vauro. Ekaa vi vatanaaka avitumavi tinavu hampata raqireka autivera, vika homa tinavu vehi autu taiqa kevarave, tiro.

³¹ Iekopiva minti tumanta vitanta tiha, Aqao, hampi nario ni vai nahentira hampata nuantema kero, vi vaiintiva titanta aura hampata ni vairara are virarae hove tiaro? ti. Vitanta minti tura.

35

Iekopiva Beteli vataini anirantero vura

¹ Iekopiva „Sekemini“ vauvaro Kotiva virara tiharo, Himpira oru Betelini variane. Mini oru vahara *ofaa* tainta vo ti autu timitaane. Te Kotikave. Haaru are nena vakaara Isora aatu getakera aaraini vihara Betelini vaitaaramanta te ai avuqaa qovarama vunarave, tiro.

² Kotiva virara minti tuvaro Iekopiva nai vainti nahentiaravata, vira hampata vaukaravata, tiharo, Ne una variqa haika vataarave, nenta avu aatoqi qora kaiqa varera iritera qaqirake, namari tuttuke koqe utavaaqa nonkute ³ vare aniqenavu Betelini vuare. Te mini oru vahara Kotira *ofaa* tainta vo autu amitarerave. Haaru te nora maaraqi variavauraro Kotiva ti uva iriharo ti kahaqama timitorave. Te vo vataini vo vataini variavauraro Kotiva tintiro vaharo ti kahaqama timite vaurave, tiro.

⁴ Iekopiva minti tumanta vika nái una variqa haika vatorave, „hepi kaiqa varerara iriha, nái aatoqi ukuto *ringirave*, vi haikara vi haikara Iekopira amuvaro Iekopiva ekaa vi haikara varero muntu Sekemini oqiva okaraqi quntama tora. ⁵ Ho mintumake vika ekaa

aaraini vi vauvaro Kotiva mini vo vatuka vo vatukaqi vauka qetara haika nimimanta vi vatanaaka kia vika ntataqi viraiti, qaqi mini vaura.

⁶ Iekopiva ekaa nai navunaaka vataakero oru viro Lusi vatuka Kenaani vataini oruntora. Lusi vatuka vo autu Betelive tura. ⁷ Haaru Iekopiva nai vakaara aatu ruqemakero aaraini viharo mini vaitovaro Kotiva vira avuqaa qovarama vurara tiro, Iekopiva *ofaa* tainta vo autukero vira autu nteharo, *Eli Betelive - Kotiva Betelini Vaivo*, tura.

⁸ Vika mini vauvaro Rebekaara kaiqa nahenti Deboraava qutu vumanta vira Beteli oqiva okara muani muntu quntama tora. Vira quntama to vataro autu nteha, *Aloni-Bakuti-Iqi Rata Amito Oqivarave*, tura.

⁹ Iekopiva Mesopotemia vataihairo orurantero Kenaanini ani vauvaro Kotiva vira avuqaa qaiqaa qovarama viro vira koqema amitero ¹⁰ tiharo,

Ai autu Iekopirave. Vaiinti nahenti kia ariara qaiqaa Iekopirave tivarave.

Vika ariara Isarerirave tivarave, tiro.

Minti tivakero Kotiva vira qaraaka autu ntavateharo, Isarerirave, tura. ¹¹ Minti tivakero Kotiva qaiqaa tiharo,

Te Kotika ekaa kempuka vataukave.

Are kuvuaramaqira viramanta ai vaintivara airiqamaqi vuate.

Ariqihai vo vatanaa vo vatanaaka qovarama vivarave.

Ariqihai hininavu avuhainaa vaiinti qovarama vivarave.

¹² Te Eparahaamika Aisaakika nimuna vatara, vi vatara aivata amiariraro vi vatava aini vaiharo are kuvuarama terauka vika vatavatama varianarove, tiro.

¹³ Minti tivakero Kotiva tuvurantero naaruaini vuvuro ¹⁴ Iekopiva Kotiva vikantiro uva ti vaunaini nora ori varakero aratero, *ofaa* autu amitareva iharo, *uainivata* vaheravata viraqqaata qihia kero ¹⁵ Kotiva vikantiro uva tu vatara autu nteharo, *Betelive - Kotiva Vainainive*, tura.

Reseriva qutu vura

¹⁶ Vika Betelini variqi vi, viraqqaai katu vare Efaraata vatukaini vireka aaraini vi vauvaro Reseriva vainti vatareva iharo kia vaaka vataraitiro, ¹⁷ noraiqaakero ke ke ti vauvaro vira kahaqu nahentiva virara tiharo, Reserio, kia qetaane. ¹⁸ Are qorainti vaintima vataataaro, tuvaro Reseriva qutuarirava aumaiquvaro viva nai maaqu vira autu nteharo, *Benonirave - Ke Ke Tiha Vatataunarave*, tura. Minti tivakero Reseriva qutu vuvuro Iekopiva vi autura qaqla kero vo autu nteharo, *Benaminirave - Ti Kauqu Tanaraini Vairave*, tura.

¹⁹ Reseriva qutu vumanta vira vaata Efaraatainvi vau aarara auvahini quntama tora. Maa entara Efaraata vatuka vira vo autu nteha, Betarihemive, ti variara.

²⁰ Reserira quntama toraqa Iekopiva ori vo vaavi aratora. Maa entara vaiinti nahenti vi orira taveha, Reserira quntama toraqaave, ti variara.

²¹ Isareriva „vira vo autu Iekopiva“ qaiqaa katu varero oru Mikatari-Ede vatuka vututoqama kero nai seri naavu maaqa kaqa tero vaura. ²² Viva mini vauvaro vira maaqu Rubeniva nai qora naata, Bilihaara „Reserira kaiqa nahentintiro“ nuvaro vira qova vi uvura irura. (Okara 49:4)

Iekopira maaqu 12navu vaura. Vika nutu vaireva, maantimama vairo:

²³ Riaara maaqunavu: *Rubeniva* (Iekopira maaqu hogarenaara kara hunka)

Simioniva, Rivaiva, Iutaava, Isakaava,

Sebuluniva

²⁴ Reserira maaqtanta: *Iohepika Benaminika*

²⁵ Reserira kaiqa nahenti Bilihaara maaqtanta: *Daanika Napataarika*

²⁶ Riaara kaiqa nahenti Siripaaraqaa vatatoka: *Gaatika Aseka*

Iekopira maaqu 12navu mintimake vaura. Iekopiva Mesopotemia vataini vaiharo vi maaqunavuka vatautora.

Aisaakiva qutu vura

²⁷ Iekopiva vihairo nai qova Aisaakiva vaunaini Mamarera Oqiva vauraqi Hebaronini anintora.

Vi vatava Eparahaamika Aisaakika vau vatava vaura. ²⁸ Iekopiva mini ani vauvaro vira qova Aisaakiva 180 ihi varakero qutu vura. ²⁹ Viva anomia kero naampaiqama viro qutu vumanta vira maaqtanta Isoka Iekopika vira quntama tora.

¹ Isova vira vo autu *Idomuvave – Naarevave* tuva vauvaro vira anku maantima vaura:

² Isova Kenaani nahentinavu varatovaro nahenti vo, Adaava vauvaro vira qova Hitihainaava Eloniva vaura. Isora nahenti vo, Oholibaamava vaura. Oholibaamara qova Anaava vauvaro vira naaqua Hivihainaava Sibeoniva vaura. ³ Isora nahenti vo, Basemaativa vauvaro vira qova Isamairiva vaura. Basemaativa Nempaiotira auravano vaura.

⁴ Isora naata Adaava qorainti vainti Elifaasira vatatovaro, Basemaativa Ruelira vatatoaro, ⁵ Oholibaamava qorainti vainti taaramonavu Jeusirave, Jalaamurave, Koraarave vatatomanta vaura. Ho Isova Kenaani vatainai vau entara vi vaintinavuka vatatora.

⁶⁻⁷ Isoka Iekopika vohaaraqi vahia tavovaro vitanta sipisipive, memeraave, purumakauve, airitaha vauvaro vika kara neva kia ho vauvarora tiro, Isova nai naata vaintive, nai airairave, katu varero Kenaani kero veraini Seiru vatainai oru vaura.

⁸ Isora vira vara autu Idomuvave tuva mini vaurara ti, vi vataravata autu nteha Idomuve tura. ⁹ Isova Idomu vatanaaka qova Seiru vata aiqinaini vaumanta viva kuvuarama toka maantimake vaura:

¹⁰ Isora naata Adaava qorainti vainti Elifaasira vatatovaro Isora naata Basemaativa qorainti vainti Ruelira vatatora.

¹¹ Isora maaqu Elifaasira maaquvara vaireka, Temaanivave, Omaavave, Sepovave, Gataamuvave, Kenaasivave, vaura.

¹² Elifaasira naata vo, Timinaava qorainti vainti Amarekira vatatora.

¹³ Isora maaqu Ruelira maaquvara vaireka Nahaativave, Seraavave, Samaavave, Misaavave, vaura. Vika Isova naata Basemaatira naintinavu vaura.

¹⁴ Isora naata vo, Oholibaamava qorainti vainti Jeusarave, Jalaamurave, Koraarave, vatatora. Oholibaamava Anaara raavuravano vauvaro Anaava Sibeonira maaquvano vaura. ¹⁵⁻¹⁶ Isora naintinavu vo anku vo anku vika qokanavu vaura.

Isora maaqu hogarenaava Elifaasiva maa ankunavuka qova vaura: Temaanira, Omaara, Sepora, Kenaasira, Koraara, Gataamura, Amarekira. Vinavuka Isora naata Adaara naintinavu vaura.

¹⁷ Isora naata Basemaativa Kenaanini vahiaro qorainti vainti Ruelira vatatovaro Rueliva maa ankunavuka qova vaura: Nahaatira, Seraara, Samaara, Misaara.

¹⁸⁻¹⁹ Isora naata Oholibaamara maaqunavu anku vaireka, Jeusara, Jalaamura, Ko-raara. Oholibaamava Anaara raavuravano vaura. Ekaa vi ankunavuka vaireka, Isova kuvuarama toka vaura.

Seirura anku

²⁰⁻²¹ Horihaina vajinti Seiruva Idomu vatainai vahiaro qorainti vainti vonavu vatatomanta vinavuka maa ankunavuka qoka vaura: Lotaanira, Sobaalira, Sibeonira, Anaara, Disonira, Esera, Disaanira.

²² Seirura maaqu Lotaanira maaqtanta Horika Hemanuka vaura. Lotaanira auravano Timinaava vaura.

²³ Seirura maaqu Sobaalira maaqunavu vaireka, Alavaanivave, Manahaativave, Ebaalivave, Sepovave, Onaaamivave, vaura.

²⁴ Seirura maaqu Sibeonira maaqtanta vaireka, Aiaaka, Anaaka vaura. (Anaava noruqama viro nai qora Sibeonira donkinavuqaa raqikiharo aahara vatainai vi aniharo ahakaavi namarira qovarama kora.)

²⁵⁻²⁶ Anaava Disonira qova vauvaro Disonira maaqunavu vaireka, Hemudaanivave, Esabaanivave, Itaraanivave, Keraanivave, vaura. Anaara raavura Oholibaamava vaura.

²⁷ Esera maaqunavu vaireka, Bilihaanivave, Savaanivave, Akaanivave, vaura.

²⁸ Disaanira maaqtanta vaireka, Usika Araanika vaura.

²⁹⁻³⁰ Hori vatanaaka vika nora vajintinavu nutu vaireva, Lotaanirave, Sobaalirave, Sibeonirave, Anaarave, Disonirave, Eserave, Disaanirave, vaura. Vinavuka Seiru vatainai vaura.

Idomu vatanaaka avuhainauka vika nutu

³¹ Kia Isarer i vataanaaka avuhainaa vajinti vau entara Idomu vatanaaka avuhainaa vajintinavu vauvaro vinavuka nutu maantimama vairo: ³² Beora maaqu Belaava avuhainaa vajintiqama viro Idomu vatanaakaqaa raqiki vauvaro vira vatuva autu vaireva Dinihaaba vaura.

³³ Belaava qutu vuvaro Serara maaqu Jobaapiva Bosaraihainaava Belaara vatuva varero Idomu vatanaakaqaa raqikiharo vaura.

³⁴ Jobaapiva qutu vuvaro Temaanihainaava Husaamuva Jobaapira vatuva varero Idomu vatanaakaqaa raqikiharo vaura.

³⁵ Husaaniva qutu vuvaro Bedaatira maaqu Hadaativa Husaamura vatuka varero Idomu vatanaakaqaa raqikiharo vaura. Hadaativa oru Moapini raquqiro viharo Midiani vatanaaka naatara kora. Hadaativa vau vatukara autu vaireve Avitive tura.

³⁶ Hadaativa qutu vuvaro Masarekaihainaava Samaarava vira vatuka varero Idomu vatanaakaqaa raqikiharo vaura.

³⁷ Samaarava qutu vuvaro Soriva vira vatuka varero Idomu vatanaakaqaa raqikiharo vaura. Soriva Rehobotihainaava vauvaro vi vatukava Iufaretisi Namari hini mantaraini vaura.

³⁸ Soriva qutu vuvaro Akabora maaqu Baali-Hanaaniva vira vatuka varero Idomu vatanaakaqaa raqikiharo vaura.

³⁹ Baali-Hanaaniva qutu vuvaro Hadaativa vira vatuka varero Idomu vatanaakaqaa raqikiharo vaura. Hadaativa Pauhainaava valiharo nahenti vo Mehetabelira Mataretira raavura varatero vaura. Mataretiva Me-Sahaapira raavuravano vaura.

⁴⁰⁻⁴³ Isova Idomu vatanaaka anku maanavuka qova vaura: Timinaara, Alavaara, Jetetira, Oholibamara, Elaara, Pinonira, Kenaasira, Temaanira, Mimpasaara, Makadielira, Iraamura.

Vi ankuva vi ankuva vonaini vonaini vauvaro anku autuvanovata vika mini vau vatara autuvanovata vohaa autuqai vaura.

37

Iohepiva taira tavora

¹ Iekopiva nai qova vau vatara Kenaani vataini vaura.

² Iekopira maaqunavu uva vaireva, maantimama vairo: Iohepiva qaraaka vaiintivano 17 ihi varakova vahilo nai vakaukavara hampata sipisipive, memeraave, vikaqaa raqiki vaura. Iohepiva nai qora naatanta Bilihaaka Siripaaka maaqunavu hampata vi quararaqaa raqikiro viro, viragaahairo viva nai qora vuru tiva amiro tiharo, Ti vakaukavara qora kaiqama vare variavo, tiro.

³ Vira qova Iekopiva vira autu vo Isareriva, naampaiqama vu entara Iohepira vata amitorara tiro, viva ekaa nai maaqunavuqihairo Iohepirara voqama kero antuqa aruvaro vukai tavuna koqera autu kero vira amumanta ⁴ vira vakaukavara tavuna vira tave tiha, Oho, tinavu qora muntukavano Iohepiraraqai vaivo, tivake vira kaara vika Iohepira iri qoraiqama amiteha kia virara koqe uva tiraiti, vira toma amite vaura.

⁵ Vika minti vauvaro vo enta Iohepiva taira tavero viragaahairo taira vira tavora nai vakaukavara tiva nimumanta vira kaara vinavuka anomake Iohepira iri qoraiqama amite vaura.

⁶ Iohepiva vikara tiharo, Kaiqe te tenta taira tavaunara ni tiva nimiare. ⁷ Tenavu naahoqi *uiti* teqtaunara rumpe vauraro, te rumpa taurava vaavarama viro vaivar, nenavu rumpataava te rumpa taunara vira ututumate vaiha, vira ravenka amite variarave, tiro.

⁸ Iohepiva minti tumanta vira vakaukavara oho tiha, Are qora tairahaama tavaaro. Are taira vira tavaanarara iriharama, hauri are tihara, Te vikaqaa raqikirerave, tirovare, ti. Minti tivake vika Iohepiva taira tavora kaaravata, Iohepiva vikara tu uvvara kaaravata, vika anomake Iohepira iri qoraiqama amite vaura.

⁹ Mintuvaro Iohepiva qaiqaa taira vo tavero nai vakaukavarara tiharo, Te qaiqaa taira vovata tavauro. Te vaiha tavauramanta kuarivanovata, toravanovata, opu makau 11navuvanovata, ravenkavi vaiha ti quahama timitevarave, tirovare, tiro.

¹⁰ Iohepiva nai taira tavorara nai qoravata tiva amuvaro vira qova Iohepira atiharo tiharo, Oho, are qora tairahaama tavaaro. Virara irihara hauri are tihara, Ti novavata ti vakaukavaravata ti qovavata ravenkavi vaiha ti quahama timitevarave, tirovare, tiro.

¹¹ Minti tumanta Iohepira vakaukavara taira kaara arara itomanta Iohepira toma amite vauvarovata, vira qova vi uvvara qaqi iriqiro viharo aato tara iharo vaura.

Iohepira vakaukavara Iohepira vo vatanaaka nimihia koqaa varora

¹² Vo enta Iohepira vakaukavara vika nai qora sipisipi vita vare Sekemini oru vaiha sipisipiqa raqiki vauvaro ¹³ Iekopiva Iohepirara tiharo, Are nena vakaukavara Sekemini sipisipiqa raqiki varianaini vuane, tuvaro Iohepiva tiharo, Te mini virera geramate vauro, tiro.

¹⁴ Minti tuvaro vira qova tiharo, Ai vakaukavarave sipisipive hoe variavo, kiae ho variavo? Are vika oru tavera viri ti tiva timiane, tiro. Minti tivakero vira qova Iohepira atitovaro viva Hebaroni Uqitaini vura.

Iohepiva Sekemini oruntero ¹⁵ nai vakaukavarara qumina ranteharo vi ani vauvaro vo vaiintivano vira tavero tiharo, Nana haikarae rante variaro? tiro.

¹⁶ Minti tuvaro Iohepiva tiharo, Te tenta vakaukavara sipisipiqaqaa raqiki variakarama rante vauro. Are hoe vika variara tiva timinarave? tiro. ¹⁷ Minti tuvaro vaiinti viva tiharo, Vika vaakama maihai vuavo. Te iruramanta vika tiha, Dotaanini virerave, tiarave, tiro. Minti tuvaro Iohepiva nai vakaukavara avataqiro viro Dotaanini oruntero tavomanta vika mini vaura.

¹⁸ Iohepiva aumanto oruntomanta vira vakaukavara vira vutu tave vika vira arukerara nai tiva ami nai tiva amiha ¹⁹ tihā, Oho, taira tave vai vaiintiva ani vaivo.

²⁰ Kaiqenavu vira aruke namariara vata quvitaavaro aaharauqama viraqī vira vaata vaavi aqu kaare. Tenavu vira vaata viraqī aquke virara qaakau vairivano aru kaivo tiare. Tenavu mintiariraro viva taira tavairava quqaae varianarove, kiae quqaae varianarove? ti.

²¹ Vika hininavu minti tuvaro Rubeniva vika uva iriro vika Iohepira arukevorave tiro, vikara aqao tiro, Kaiqenavu kia vira arukaare. ²² Tenavu kia vira arukaraiti, namariara vata quvitaavaro aaharauqama viraqī vira qaqi vara vaavi aqukaare, tiro. Viva nai aatoqi iriro tiharo, Naantiara te vira ruaruamake qaqi vita vare nai qova inanaini vuru karerave, tiro.

²³ Ho vika vauvaro Iohepiva anintomanta vika vira ravaaqavuke vira tavuna koqera ravaqaake qaqini ke ²⁴ Iohepira vara muntu haaru namariara quvitovaro aaharauqama vuraqī vara vaavi aqukora.

²⁵ Mintumake vika kara nareka oquvi vaiha vutu tavomanta Isamairi vatanaaka Gileati vatukaihai ani vaura. Vi vatanaaka airi airaira koqe untavu haikarave, karaqaa hiakaa u haikara aatorave, vi haikara vi haikara vika nái kameriqaa rumpa vare Isipini vuru nimiha koqaa varareka ani vaura.

²⁶ Ani vauvaro Iutaava nai qata vakaukavarara tiharo, Tenavu tentanavu qata aruke vira arukaaina uvvara kukeqa kaainaraqaahairo kia tinavu kahaqaina haikava govaraqianarove. ²⁷ Kaiqe kia tentanavu kauquqohai Iohepira qoraiqama amitaraiti, Isamairi vatanaaka ani variakaqaa vira nimiha koqaa varaare. Tenavuvata vivavata vohaa naarema vauro, tumanta vira qata vakaukavara vi uvarara hove tumanta ²⁸ Midiani vatanaaka anintomanta Iohepira vakaukavara namariara quvitoraqi vira aqu kora qaqini vara vaarike, Iohepira Isamairi vatanaaka nimiha, silvaa monu 20navu varomanta vi vatanaaka Iohepira vira vare vuru Isipini kora.

²⁹ Vika Iohepira vita vare vuvuro Rubeniva oruntero namariara quvitoraqi tavovaro Iohepira viraqī kia vauvaro vira kaara vira muntukavano qoraiquivaro oho tivakero nai utavaaqa qunahi qaanahima kero ³⁰ nai qatanavuara tiharo, Te tavauraro Iohepiva kia viraqī vaivo. Mpo, te nantie irarave? tiro.

³¹ Minti tumanta vinavuka Iohepira tavuna qaqini ravaqaa kora vare, memeraa vo aruke Iohepira tavuna vira naareqī quntamake vare ³² anirante vuru nái qora umiqeha tiha, Tenavu maa haikara ranta kaunara are aitutiha tavaane. Iohepira tavunae vaivo, vo vainti tavunae vaivo? ti.

³³ Minti tuvaro vika qova Iohepira tavuna viraqaqama kero tavero tiharo, Oho, maa ti maaqu Iohepira tunavane. Qaakau vairi vovano vira aru kaivo. Quqaama qaakau vairi vovano ti maaqu Iohepira arukero ruqeama kaivo, tiro.

³⁴ Iekopiva minti tivakero nai utavaaqa qunahi qaanahima kero kovaara utavaaqa nonkutero airi enta variqiro viharo nai maaquara iqī rataqiro vi vaura. ³⁵ Vira maaqu raavura aninte vira muntuka kukuqama amitarare tuvarovata, Iekopiva kia vika tu uvvara irura. Viva aqao tiro, Te tenta maaquara qaqi iqī rataqī vivi, vuru qutu virerave, tivakero nai maaquara qaqi iqī rataqiro vi vaura.

³⁶ Mintuvaro Midiani vatanaaka vika vo autu Isamairi vatanaakave, vika Iohepira vita vare Isipini orunte Iohepira Potipaara amiha monu varora. Potipaava nora vaiintivano vaharo viva iqoka vaiintinavuqaa raqiki vaumanta vika Pero vaiinti avuhainaa naavuqaa raqiki vaura.

38

Iutaava vo vatanaa nahenti varora

¹ Vi entara Iutaava nai qata vakaukavara mini kero oru Adulaamu vatukaini vo vaiinti Hiraara vataakero vaura. ² Iutaava mini vaharo tavovaro Kenaani vatanaa nahenti Suaara raavuravano vauvaro Iutaava vi nahentira varatero vaura.

³ Iutaava vira varatero vauvaro vi nahentiva vainti taiqama viro vuru qorainti vainti vatatero vira autu nteharo Erurave tura. ⁴ Iutaara naatavano qaiqaa vainti taiqama viro qorainti vainti vo vatatero vira autu nteharo Onaanirave tura. ⁵ Iutaara naatavano qaiqaa

qorainti vainti vo vatatero vira autu nteharo Seraarave tura. Vira naatavano Kesipini vaharo Seraara vatatora.

⁶ Mintuvaro Eruva tota avuni vatato vaintiva noruqama vuvaro Iutaava vira nahenti vo vara amuvaro vi nahentira autu Temaara.

⁷ Ho Noravano Kotiva tavovaro Eruva qora kaiqaqai vare vauvaro vira kaara viva vira arukora.

⁸ Eruva qutu vuvaro Iutaava nai maaqu vo Onaanirara tiharo, Are nena vakaarara irihara vira naatantira vaitehara vainti kuvuarama amitaane, tiro.

⁹ Minti tuvaro Onaaniva nai iriro tiharo, Te tenta vakaara naatanti vaitaariraro viva vatataaina vaintiva kiama ti vainti varianarove. Vira kaara kia te tenta vakaara vainti vata amitarerave, tivakero vikantiro niharo nai nora qaqqini rauru kovaro vi nahentiva kia vainti taiqura.

¹⁰ Onaaniva mintura kaara Noravano Kotiva virara qora okarama autuaro tivakero viravata aru kora.

¹¹ Onaaniva qutu vuvaro Iutaava nai naaqutu Temaarara tiharo, Are nena qora naavuqi tentoqa variqira vi vairaro ti maaqu naantiaraava Seraava noruqama virara are vira varaaane, tiro. Iutaava nai maaqu naantiaraara nai vakaatanta aanantero qutu vuantorave tiro, Temaarara vi uvvara tuvaro Temaava nai qora naavuqi vaireva vurama.

¹² Temaava mini vuvaro airi enta aitarovaro Iutaara naata Suaara raavuravano qutu vuvaro Iutaava virara iqji rata amitero, viraqaahairo viva Timinaini nai sipisipi kauki toqe vaunaini vura. Iutaava mini vuvaro vira tonti Adulaamuhainaa vaiinti Hiraava vikantiro vura.

¹³ Iutaava mini vuvaro vovano Temaara vuru tiva amiro tiharo, Ai tonaqova nai sipisipi kauki toqareva Timinaini vireva vivo, ¹⁴ tuvaro Temaava nai kovaara utavaaqa nonkutora qaqqini vara kero, ti viri viraaqama kero tavaantorave tiro, nai viri naavuma tero, oru Enaimi vatuka qentiana oquiviro vaura. Vi vatukava Timinaini vi vau aararaqaa vaura. Temaava tavovaro Iutaara maaqu Seraava noruqama viro vauvaro kia Iutaava Temaara vira amura.

¹⁵ Temaava mini vaantaavura qentiana oquivi vauvaro Iutaava Timinaini viharoma Enainini oruntero vi nahentira tavovaro viva nai viri naavuma torara tiro, Iutaava virara aarana hampi ni vai nahentirave tura. ¹⁶ Iutaava kia kankomake iruvaro vi nahentiva vira naaqutuvano vauvaro Iutaava vi nahentiva aara auvahini oquiviro vaunaini oruntero tiharo, Kaiqe ai hampata nuare, tiro.

Iutaava minti tuvaro nahenti viva vira irero, Are ti hampata nuvakera nana haikae ti timinarave? tiro.

¹⁷ Minti tuvaro Iutaava tiharo, Te ainti nuvake vo vaiinti atitaariraro viva ti memeraa naati vo varero ai vuru amiarire, tiro.

Iutaava minti tuvaro nahenti viva tiharo, Are nena ina haikara vo haika ti vahuqa timiraqe te vira tuataarirara are memeraa naati ti timiraqe te nina vi haikara amiare, tiro.

¹⁸ Nahenti viva minti tuvaro Iutaava tiharo, Ho nana haikae ai vahuqa amiarirara tuatenarave? tiro.

Minti tuvaro nahenti viva tiharo, Nena *ringi* naaqunta vataakero vairavata, nena kauruvata, ti timiraqe te vahuqa tuataare, tuvaro Iutaava vi nahentira vi haikara amiro, vira hampata nuva kovaro nahenti viva vainti taiqama vura.

¹⁹ Temaava nai tonaqokantiro nuva kero, viraqaahairo viva nai maaqaini oruntero nai viri naavuma tora qaqqini vara kero, qaiqaa nai kovaara utavaaqa nonkutero vaura.

²⁰ Viva nai maaqaini vuvaro Iutaava nai vahuqa vi nahentira amuvaro tuato haikara varareva, iharo memeraa naati nai tonti Adulaamuhainaa vaiinti amiro tiharo, Are vi nahentira vara vuru amiane, tuvaro viva varero oruntero tavovaro vi nahentiva kia mini vaura. ²¹ Vi nahentiva kia mini vauvaro Iutaara tontivano vi vatanaaka irero tiharo, Aarana hampi ni vai nahentiva Enaimi aara auvahini vaiva tantoe vaivo? tiro.

Minti tumanta vi vatanaaka aqao ti, Aarana hampi ni vai nahentiva kia maini vaivo. Totavata kia maini vairave, ti.

²² Vi vatanaaka minti tuvaro vira tontivano anirantero vuru Iutaara tiva amiro tiharo, Te vi nahentira ranteha tavauraro kiama vaivo. Vi vatanaakavata tiha, Haaruvata kia minti nahentiva maini vairavema tiavo, tiro.

²³ Minti tuvaro Iutaava tiharo, Ho qaqqi kairaro vi nahentiva te vahuqa amuna haikara qaqqi tuataqiro vuarire. Hauri vi nahentira kaara vaiinti nahenti titanta naaraihama timitevorave. Te memeraa naati vira amitaurara, are oru qumina nihara kia vira ranta kaaro, tiro.

²⁴ Iutaava minti tuvaro taaramo tora aitarovaro vaiinti vovano Iutaara tiva amiro tiharo, Ai naaqutu Temaava hampi nuvakero vainti taiqama vivo, tuvaro Iutaara arara itovaro tiharo, Vi nahentira ihaqi aqu kaivarо tatoqa viro qutu vuarire, tiro.

²⁵ Minti tumanta vi nahentira ravaaqavu vare anuvaro Temaava nai tonaqova Iutaava vaunaini uva varakero mintima tiro: Maa haikara ti timiva, vivama ti vainti taiqama kaivo. Are maa *ringira* vira naaquntavata, kauruvata, viraqaqama kerae tavaaro, kiae viraqaqama kera tavaaro? tiro.

²⁶ Minti tuvaro Iutaava vi haikara viraqaqama kero tavero tiharo, Oho, kia maa nahentiraqaa uva vaivo. Tiqaama uva vaivo. Te qorahaama auturo. Te tenta maaqu Seraara vira amiataara vaimanta kia vira amunarave, tivakero Iutaava kia qaiqaavata vira hampata nura.

²⁷ Temaava variqiro vuvaro viva vainti vataarira entava anintovaro viva tavovaro vira auhaqi vainti taaraqanta vaura. ²⁸ Viva vainti vate vauvaro vira vainti vovano nai kauqu auhaqihairo tutu kovaro Temaara kahaqi vau nahentira vira tavero tiharo, Maa vaintira vira naanema vatataanarove, tivakero vira viraqaqama tavaare tiro, naare naaqunta vi vaintira kauquqaa rumpa tero.

²⁹ Mintuvaro qorainti vainti viva kia tuviraitiro, nai kauqu qaiqaa raqantaatero auhaqi vauvaro vira nova vo vainti naane avuni vatatora.

Vo vainti avuni vatatovarora tiro, Temaara kahaqu nahentira qorainti vainti virara tiharo, Ike, are nantivaree kia naantiara tuviraitira, avuni tuvu ntaaro? tiro. Minti tivakero vi vaintira autu nteharo, *Peresirave - Avuniqamavivave*, tuvaro ³⁰ viraqaahairo qorainti vainti vo vira kauquqi naare naaqunta rumpatora vatatovaro vira autu nteharo, *Siraarave - Naare „Naaquntarave“* tura.

39

Iohepiva Potipaara kaiqa vaiinti vaura

¹ Isamairi watanaka Iohepira vitavare Isipini oruntovaro vihainaa vaiinti vovano Potipaava vika monu nimiharo Iohepira varora. Potipaava nora autu vataa vaiintivano iqoka vaiintinavuqaa raqiki vaumanta vika Pero vaiinti avuhainaa naavuqaa maimaraara raqiki vaura.

² Ho Iohepiva Potipaara kaiqa vareharo vira naavuqi vauvaro Noravano Kotiva Iohepira kahaquvaro Iohepira kaiqavano koqe iro vaura. ³ Iohepiva koqe kaiqa vare vauvaro Potipaava tavovaro Noravano Kotiva Iohepira kahaquvarora tiro, Iohepira kaiqavano uritarakero koqe iro vauvaro ⁴ Potipaava Iohepirara quahakero vira noraiqama kero tiharo, Are ti naavuqi kaiqa vareharama ekaa te una haikaraqaa raqikiiane, tiro. ⁵ Potipaava minti tivakero Iohepira noraiqama kovaro Iohepiva ekaa vira kaiqaqaa raqiki vauvaro vi entaraqaahairo Noravano Kotiva Iohepirara iriharo Potipaara koqema amitovaro Potipaava kara ututovave, koqaa kaiqa varovave, koqe iro vaura.

⁶ Mintuvaro Potipaava Iohepirara tiharo, Are ekaa ti kaiqaqaa raqikiqira vuane, tuvaro Iohepira ekaa vira kaiqaqaa raqikiqiro vi vauvaro Potipaava kia nai kaiqara airi aato iriraitiro, Iohepirara homa vi kaiqara varaanarove tivakero viva qaqi vaiharo karaqai neharo vaura.

Ho Iohepiva koqe viri vaata vataa vaiintivano vaiharo Potipaara kaiqaqaa raqiki vauvaro ⁷ Potipaara naatavano Iohepira tavovaro muntuka ntuvaro virara avu autiharo Iohepirara tiharo, Anira tintira vaitaane, tiro.

⁸ Minti tuvaro Iohepiva aqao tiro, Te maa naavuraqi vaha vira kaiqaqaa raqiki vaurarora tiro, ti nora vainti Potipaava kia maa kaiqarara airi aato iri vairave. Viva ti noraiqama kaimanta te ekaa vira kaiqa haikaraqaa raqiki vauro. ⁹ Te vira voqantemake maaqi vaha vira kaiqaqaa raqiki vauro. Potipaava kia vo haika ti qioqama taivo. Are vira naatavano variararora tiro, viva ariaraqai iriharoma ti qioqama taivo. Vira kaara te qora kaiqa vareha Kotira uva raqa kaarorave, tiro. ¹⁰ Iohepiva minti tuvaro vi nahentira vo enta vo enta vira aare vauvaro Iohepiva kia vira uva iriraitiro, kia vira aaqanto oru vaura.

¹¹ Vo enta kia vi naavuraqi kaiqa vaiintie kaiqa nahentire vonavu vauvaro Iohepiva nariaraa naavuqi kaiqa varareva oriqetovaro ¹² Potipaara naatavano Iohepiva tavunauta ruvutora tuatero tiharo, Are tintira vaitaane, tuvaro Iohepiva nai tavunauta viqukero vi nahentira kauquqi kero vahaqaini veva ntero kantama vura.

¹³ Iohepiva kantama vuvaro vi nahentira tavovaro viva nai tavunauta vira kauquqi kero naavuqihairo kantama vuvaro ¹⁴ vira voqama kero arara itovaro naavuqi kaiqa varoka naarama kero vikara tiharo, Ho tavaate. Ti vaativano Hiparu watanaa vaiinti maa vita varero tinavu naavuqi viri kaiva, viva ti qoraiqama timitareva auti vaivo. Viva maaqi

uriqetero ti hampata nuare timanta te oi oi turaro¹⁵ viva te oi oi tunara iriro qetakero nai tavunauta maini keroma vahaqaqaini veva ntero kantama vivo, tiro.

¹⁶ Manti tivakero Iohepira tavunauta qaqi vatero nai vaati veka vauvaro Potipaava vira vaativano anuvaro¹⁷ viva tavunauta vira umiqeharo tiharo, Hiparu vatanaa kaiqa vaiinti vita viri kaarava, viva ti qoraiqama timitareva auti vaivo.¹⁸ Viva ani ti utu varaimanta te oi oi turaroma qetakero nai tavunauta maini kero veva ntero kantama vivo, tiro.

¹⁹ Vira naatavano una uva minti tuvaro nora vaiinti Potipaava nai naata uvara ququa uvave tivakero vira arara itovaro²⁰ oru Iohepira ravaaqavu varero karapuhiqi muntu kora. Pero vaiinti uva raqakoka vauraqi Iohepiravata karapuhiqama kovaro viraqia vaura.

²¹ Ho Noravano Kotiva vira kahaqama amite vauvarora tiro, karapuhu naavuqaa raqiku vaiintiva Iohepira koqema amite vaura.²² Viva Iohepirara quaheharo vira noraiqama kero ekaa karapuhu vaiintiqaa raqikiane tuvaro²³ Iohepiva vi kaiqara vare vauvaro Noravano Kotiva vira kahaquvaro Iohepira kaiqavano uritarakero vauvaro karapuhu naavuqaa raqiku vaiintiva kia Iohepira kaiqara airi aato iriraitiro, viva Iohepirara tiharo, Viva nai homa vaharo vi kaiqara varaanarove, tivakeharo vaura.

40

Iohepiva vo vaiintitanta taira tavora vira okara náitanta tiva nimura

¹⁻³ Iohepiva karapuhiqi variqiro vuvaro vo enta Isipi vatanaaka avuhainaa vaiinti Pero vaiintivano nai kaiqa vara amito vaiintika votanta vo uva kaara vitanta karapuhiqama kora. Vira kaiqa vaiinti vovano Pero vaiinti *uaini* ami vau vaiintiva vauvaro, vira kaiqa vaiinti vovano Pero vaiinti mpareti unte vau vaiintiva vaura. Pero vaiintivano vitanta karapuhiqama komanta vitantavata Iohepiva vauraqi otu vaura.

⁴ Pero vaiintiqaa maimaraara raqiku vaiintikaqaa raqikuva Iohepirara tiharo, Are qaraaka karapuhu vaiintitantaqaavata raqikiane, tuvaro Iohepiva vitantaqaavata raqiki vaura. Vitantaqaqaa raqiku vaumanta vitanta karapuhiqi variqiu vuvaroma airi enta aitaromanta⁵ Pero vaiinti *uaini* ami vauvavata, Pero vaiinti mpareti unte vauvavata, vitanta vohaa enta entaqi vaiteha taira tavora. Vovano vo taira tavovaro vovano vo taira tavora.

⁶ Vitanta taira tavovaro vira qararaa toqaqi Iohepiva vitanta vauraqi oruntero tavovaro vitanta muntukavano qoraiqumanta vaura.⁷ Mintumake vauvaro Iohepiva vitanta irero tiharo, Netanta nana kaarae notate variavo? tiro.

⁸ Minti tumanta vitanta tiha, Tetanta entaqi taira tavaunara kia vira okara iruro. Vovano taira okara titanta tiva timiarirava kia maini vaivo, tuvaro Iohepiva tiharo, Kotiva vaiinti kahagi vaivaro viva taira okara ho iri vairave. Netanta taira tavaara ti tiva timiqe iriare, tiro.

⁹ Iohepiva minti tuvaro Pero vaiinti *uaini* ami vau vaiintiva viva naane nai taira tavora Iohepira tiva amiro tiharo, Te vaiteha taira tavauraro ti tivuqaa *uaini* naaqunta vairave.¹⁰ Vi naaquntava qampiqeharo vaimanta vira kaqi taaramonavu variavaro kaqiqahairo tava irataivarо aquita vimanta¹¹ te tave vira hiqike tatike vi namarira *kaapuqi* vare vuru Pero vaiinti vira kauquqi amunarave, tiro.

¹² Minti tuvaro Iohepiva vira nai tiva amiro tiharo, Are taira tavaanara vira okara maantimama vaivo: Kaqi taaraqanta vohaiqa vaira tavaanara vira okara vaireva, taaramo entama vaivo.¹³ Taaramo entanavu aitarairaroma Pero vaiintivano qaiqaa ai aarama kairara, are vira kaiqa vareharama tota varaanantema kera, qaiqaama are vira kauquqi *kaapu* vara vuru amunarave.

¹⁴ Mpo, are mintimakera koqemavi vahara, tiriara tauru kerorave. Are tiriara iriteharama Pero vaiinti tiva amiraro viva ti karapuhiqihairo kuvantu kaarire.¹⁵ Haaru te Hiparu vatanaa vaiintivano tenta maaqaini variavauramanta ti muara vare maini viri korave. Te maini vaiha kia qora kaiqa vararaiti variavauraro, qumina ti karapuhiqama kaamanta vauro, tiro.

¹⁶ Iohepiva minti tuvaro Pero vaiinti mpareti unte vau vaiintiva iruvaro Iohepiva vo vaiinti taira okara koqemakero tuqantaakero tiva amuvaro, vivavata Iohepira tiva amiro tiharo, Tevata „entaqi“ taira vo tavaunarave. Te tanu taaramonavuqi mpareti ntuvake tenta qiatagaqaa aqvare anunarave.¹⁷ Ventaqqaa vai tanuraqi Pero vaiintiara unta tauna mparetira, vo mpareti vo mparetinavu vaimanta uvirinavu ani mpareti vira varake ne variarave, tiro.

¹⁸ Manti tuvaro Iohepiva vi vaiintira nai tiva amiro tiharo, Are taira tavaana okarava maantimama vaivo: Tanu taaramonavu vaira vira okara vaireva, taaramo entama vaivo.

¹⁹ Taaramo enta aitarairaro Pero vaiintivano karapuhiqihairo ai vita vuru kero, ai auntat eqakero ai vaata katariqaa hiritairaro uvirivano ani ai vaata mati nama kevarave, tiro.

²⁰ Iohepiva minti tuvaro taaramo entanavu aitarovaro Pero vaiintivano tiharo, Ti vatato entava qovarama vivo, tivakero vi entarara quaheharo nai nora vaiinti naarama kero kara nimiharo tumanta karapuhi naavuqihai vira *uaini* amu vaiintiravata, vira mpareti unte vau vaiintiravata, ntita vare nora vaiintinavu kara nonaini vuru kora.

²¹ Vuru kovaro viva vira *uaini* amu vaiintirara tiharo, Are qaiqaa qaqlima ti kaiqa varenarave, tuvaro vi vaiintiva qaiqaa *uaini kaapu* Pero vaiinti vira kauquqi amuvaro ²² Pero vaiintivano tumanta vira mpareti unte vau vaiintira aruke Iohepiva tuntemake, vira vaata katariqaa hiritora.

²³ Mintuvaro Pero vaiinti *uaini* amu vaiintiva qaiqaa Pero vaiinti kaiqa vareharo kia Iohepirara iriraitiro, virara tauru kora.

41

Pero vaiintivano taira tavora

¹ Iohepiva karapuhiqi qaqi variqiro vuvaro taara ihi aitarovaro Pero vaiintivano entaqi vaiteharo taira vo tavora. Vira tairavano maantimama vairo: Pero vaiintivano Nairi Namari hini mantaraini himpitero vaharo tavomanta ² purumakau 7navu koqe vaata vatauka nora hauntivano namariqihai vaarinte oru namari auvahianta vaiha ukau ne vaura.

³ Vira naantiara qaiqaa purumakau 7navu namariqihai vaarinte vaura. Vinavuka kia koqe vaata vatauka, vuhaariruqai aquvuka namariqihai vaarinte oru purumakau koqeka tataaqa himpite vahai ⁴ vika aruke nama kora. Mintuvaro Pero vaiintivano taira vira tavero vaitonaihairo himpura.

⁵ Ho viva qaiqaa vaita viro taira vovata tavora. Viva taira vo tavova maantimama vairo: Viva tavavarō *qantivi/kakuma* voqaava vauvaro vira veha vohaiqaaqahai nora koqeka 7navu irate mpeeqiqamavi vaura. ⁶ Mintuvaro vira naantiara vo *qantivi/kakuma* vira voqaava nora 7navu iratovaro kuarivano noraiqaakero ite vauvaro uvaivano utiharo vira tatoqa aqukovaro kia koqe tava iratora. ⁷ Kia koqe tava 7navu iratoka oru koqe tava 7navu iratoka nampiqama aqukora. Mintuvaro Pero vaiintivano vaitonaihairo qaiqaa himpuro tiharo, Oho, te tairama tavaura, tiro.

⁸ Minti tivakero vira qararaa toqagi Pero vaiintivano nai taira tavorara airi avu aato utiharo Isipi vatanaa vaiinti vo okara vo okara tavokavata, vaana kaiqa vare vau vaiintinavukavata, naarama kero viva nai taira tavora tiva nimumanta kia vikaqihairo vovano vira taira okara tiva amiarirava vaura.

⁹ Mintuvaro Pero vaiinti *uaini* ami vau vaiintiva oho tiro, Te vatemava uva irikauro. Vi uvvara haaru ai tiva amiataara vaimanta kia tiva amunarave. ¹⁰ Haaru ai arara itovara are tivata, ai mpareti unte vau vaiintiravata, karapuhiqama koramanta tetanta karapuhiqi variavaunarave. Ai naavuqaa raqiki varia vaiintinavukaaqaa raqiki vai vaiintira naavuqi are titanta karapuhiqama koramanta ¹¹ tetanta viraqai vahai vohaa enta entaqi vaiteha taira tavaunarave. Te vo taira tavauraro viva vo taira tavorave.

¹² Ho vi entara Hiparu vatanaa vaiinti vovanovata karapuhiqi vaurave. Vi vaiintiva haaru ai naavuqaa maimaraara raqiki varia vaiintikaqaa raqiki vai vaiintira kaiqa varorave. Viva titanta hampata karapuhiqi vaumanta tetanta tentatanta taira tavaunara vi vaiintira tiva amuraro viva ti taira okara kankomakero tinta tiva timiro, vo vaiinti nai taira okaravata kankoma kero tiva amurave. ¹³ Ho viva titanta tiva timuntema kera, are tiriara qaiqaa nena kaiqa varaane tivakera, vo vaiinti vira arukera katariqaa hiritaanarave, tiro.

¹⁴ Viva minti tuvaro Pero vaiintivano Iohepira vite aniate tumanta vokuka kante otu karapuhiqihai vira vitakovaro Iohepiva okau muqukero vo utavaaqa nonkutero oru Pero vaiinti avuqaa vaura.

¹⁵ Vira avuqaa oru vauvaro Pero vaiintivano virara tiharo, Te taira tave vira okarara vo vaiinti vo vaiinti irauramanta vika kia ho tiva timiarave. Vovano ariara taira okara ho tiva nimi vaivave timanta irunarave. Vi uvava quqaae vaivo, kiae quqaae vaivo? tiro.

¹⁶ Pero vaiintivano minti tuvaro Iohepiva aqao tiro, Te qaqi qumina vaiintivano kia ho aitiva amirarave. Kotiva ti kahaqiraqe te homa taira okara ai Pero vaiinti tiva amirarave, tiro.

¹⁷ Minti tuvaro Pero vaiintivano Iohepirara tiharo, Te taira tavehama, te Nairi Namari hini mantaraini himpitero vahai tavauramanta ¹⁸ purumakau 7navu koqe vaata vatauka nora hauntivano namariqihai vaarinte oru namari auvahianta vaiha ukau ne variarave.

¹⁹ Vira naantiara qaiqaa purumakau 7navu namariqihai vaarinte vaurave. Vika kia koqe vaata vatauka, vuhaariruqai aquvuka namariqihai vaarintaarave. Haaru te

Isipi vataini vaiha, kia vira voqaara vuhaari otaiqamavi purumakaura tavaunarave.
²⁰ Vuhaari otaiqamavua purumakauka oru koqe vaata vatauka nama taiqa kaarave.

²¹ Vika nama kaavaro kia vika vaatavano koqemakero nora vairaitiro, tota vaintema kero qora vaataqai vairave. Te mintimake taira tave, viraqaahai himpunarave.

²² Te himpi, qaigaa vaitavi taira votava tavaunarave. Te tavauraro *qantivi/kakuma* voquaava vaivaro vira vega vohaiqaahai nora koqeka 7navu irataarave.

²³ Mintimake irataavarro vira naantiara 7 vonavuvata irataavarro uvaivano utiharo vira tatoqa aqu kaimanta kia koqemake variarave. ²⁴ Ho kia koqeka 7navuvano oru koqeka 7navu nampiqama kaarave. Te taira mintimake tave, vi uvvara vaana kaiqa vare varia vaiintika tiva nimuramanta vika kia ho vi uvvara okara tinta tiva timiavo, tiro.

²⁵ Minti tuvaro Iohepiva Pero vaiintiara tiharo, Are taara taira tavaanara, vitanta okara vaireva, vohaa qaramakero vairave. Kotiva nai naantiara autireva i okarara ai tairakaa umiqqaivo.

²⁶ Are purumakau koqeka 7navu tavaanara, vira okara vaireva, koqe ihi 7navuma naantiara qovaraiqianarove. *Qantivi/Kakuma* voqaara nora koqera 7navu irataira, vira okaravata vaireva, vohaa qaramakero koqe ihi 7navuma naantiara qovaraiqianarove.

²⁷ Purumakau 7navu naantiara qovarama vuaka vuhaariru aquvuaka, vika okara vaireva, kia koqe ihi 7navuma naantiara qovaraiqianarove.

Qantivi/Kakuma voquaava kia koqera 7navu irataira uvaivano utiharo tatoqa kaira, vira okaravata vaireva, vohaa qaramakero kia koqe ihi 7navuma naantiara qovaraiqianarove.

²⁸ Te vaaka tunarave. Kotiva naantiara nai kaiqa autireva i okarara ai tairakaa umiqairave. ²⁹ Isipi vata maini karavano 7 ihiara koqema kero qampiqeharo varaqiro vuanarove. ³⁰ Ho koqe ihi 7navu taiqa viraro viraqaahai qaiqaa 7ihiara karavano kia vaira aavoqi entava qovarama viramanta koqe ihinavu vairara tauruma kevarave.

³¹ Vi entava anomakero gora enta variainarara ti, vaiinti nahenti airi kara variaina entarara tauru kevarave. ³² Kotiva uva tiva tero vaaka vi entara qovarama kareva auti vairara tira, are taira taaraqanta vohaa vaka tavaanarave, tiro.

³³ Iohepiva minti tivakero qaiqaa Pero vaiintiara tiharo, Virara iriharama are vaiinti vo, koqe avu aato vataara ranta kera, vira noraiqama kairaro viva ekaa Isipi vataqaa raqikiarire.

³⁴ Vi vaiintira noraiqama kera are vaiinti vonavuvata noraiqama kaira vinavuka vaiha ekaa kara qantu vare aniraqaahai vika *takisi* varaate. Vinavuka kara varehama vaiinti nahentiara nenta 4navu tuate vohaiqa tinavu timiate, tiate.

³⁵ Vinavuka ai Pero vaiinti autuqaama koqe ihinavu variqi viha, kara ruvaaqumake vo vatuka vo vatuka kara vate naavuraq'i vataivarо ³⁶ naantiara 7 ihiara karara aavoqiva anintaira karavano ho variarire. Vinavuka mintimake kara vataimanta Isipi vatanaaka kia narara vairaiti, ho kara varake neha variate, tiro.

³⁷ Iohepiva minti tuvaro Pero vaiintivanovata, vira nora vaiinti vonavuvata, vira uvvara koqe uvave tura. ³⁸ Pero vaiinti viva tiharo, Nantima vaina vaiintirae noraiqama kararave? Kotiva Iohepira avu aato koqema amitairara ti, qumina tenavu vo vaiinti noraiqama kaarorave, tiro.

³⁹ Minti tivakero Pero vaiintivano Iohepirara tiharo, Kotiva vi uvvara okara ai umiqairara tiro, vovano kiama ai voqaantema kero koqe avu aato vataava vaivo. ⁴⁰ Virara irihama te ai noraiqama kaarirara are ti avuhainaa naavuqaa raqiki vairamanta ekaa ti vaiinti nahenti ai uva iriqi vuate. Tentaqai ai avuni nora vaiinti vairerave, tiro.

Iohepiva noraiqama viro ekaa Isipiqa raqikura

⁴¹ Pero vaiinti viva minti tivakero qaiqaa Iohepirara tiharo, Vate te ai noraiqama kaarirara are ekaa Isipi vataqaa raqikiante, tiro.

⁴² Minti tivakero qaiqi vaiinti nahenti Iohepira noraiqama kairara iriate tiro, Pero vaiintivano nai vuqaqi nonkuto *ringira*, nai autuvano viraqaa vau *ringira*, rahunku kero Iohepira vuqaqi nonku amitero, koqe utavaaqa nonku amitero, *hankaaroro/kukukakaara koriqohai* aututora vira autaqi ruvu amitero, ⁴³ ohivata iqoka *kaariravata* Iohepira amuvaro Iohepiva Pero vaiinti naantiaraihainaava vaharo iqoka *kaariqi* vi vaumanta vaiinti vonavu Iohepira avuni kantamaqi viha tiha, Iohepiva ani vaivo. Ne ugaurivarо viva aniarire, ti vaura. Mintima kero Pero vaiintivano Iohepira noraiqama kovaro Iohepiva ekaa Isipi vataqaa raqiki vaura.

⁴⁴ Pero vaiintivano Iohepirara tiharo, Te avuhainauka ariara mintima turo: Are kia hove tirera, Isipi vataanaakaqhai kia ho vovano nai irikero vo kaiqa varaanarove, tiro.

⁴⁵ Minti tivakero viva Iohepira qaraaka autu ntava amitero virara *Sapenaati Paneaave* tivakero nahenti vo, Asenaatira vira amura. Asenaativa Potiperaara raavuravano

vauvaro Potiperaava kuariara tinavu variqave tivakeharo vira aare vau vaiintiva Oni vatukaqi vaura. Iohepiva ekaa Isipi vatain vi aniharo raqikiharo vaura.

⁴⁶ Iohepiva 30 ihi varakova Pero vainti Isipi vika avuhainaara kaiqa hogarama tero varaqiro vura. Iohepiva Pero vaiintivano vaura mini kero Isipini vi aniharo kaiqaqaa raqiki vaura.

⁴⁷ Ho 7 ihinavuara karavano koqema kero qampiqaqiro vu entara ⁴⁸ Iohepiva ekaa vi karara qantutora varero vuru vo vatuka vo vatukaqi vatora. Vo vatuka auvahini naaho ututora Iohepiva vi karara qantu keharo nai vi vatukara kara naavuqi vuru vatero, mintiaqiro viharo vo vatuka vo vatuka naavuqi kara qantu keharo vate vaura.

⁴⁹ Nora namari auvahini nuqavano airi vaintema kero, Iohepiva airi kara qantu varero vo naavu vo naavuqi mpiqakero vatovaro airi karavano voqavata vauvarora tiro, Iohepiva hini karaqai vukuqi qara ntuvu tero, hini kara kia vukuqi qara ntuvu taraitiro, qaqi naavuqi vatora.

⁵⁰ Karara aavoqu entava kia anu entara, Asenaativa Potiperaara raavuravano qorainti vainti taaraqanta Iohepiva vata amitovaro ⁵¹ Iohepiva nai maaqu avuni vatatora autu nteharo *Manaserave - Taurukaunarave*, tiro. Iohepiva tiharo, Kotiva ti kahaqimanta tinta vakaukavara ti qoraiqama timitora tauruke, tenta karapuhiqi vukai enta variavaunavata tauru kauro, tivakero ⁵² Iohepiva nai maaqu vira naantiara vatatora autu nteharo *Efaraimurave - Vainti Timirave*, tiro.

Iohepiva tiharo, Te *[Isipini]* vailha nora maaraqi variavauraro Kotiva vainti taaraqanta ti timivo, tura.

⁵³ Ho Isipini koqe ihi 7navu taiqovaro ⁵⁴ Iohepiva tuntema kero, karara aavoqu ihiva 7navu qovaraiqireva hogarama tora. Mintuvaro ekaa vo vatain vo vatain kara kia vauvaro Isipi vatainiqui karavano vaura.

⁵⁵ Karara aavoqu entava anintomanta Isipi vatanaaka Pero vaiintiara tiha, Mpo, kara tinavu timiane, tuvaro Pero vaiintivano vikara tiharo, Ne Iohepiva vainaini oruntema, viva tinante iate, tura.

⁵⁶ Ho karara aavoqua ekaa Isipini vi anuvaro Iohepiva vo naavuqi vo naavuqi kara qantu vuru vatora oru qenti qantuakero monu vareharo vi vatanaaka kara nimi vaura. Karara aavoqua ekaa Isipini qovaraiquvaro tiro, Iohepiva minti vaura. ⁵⁷ Vo vatain vo vatainivata kia kara vaumanta vo vatanaa vo vatanaaka Isipini Iohepiva vaunaini kara varareka ani vaura.

Iohepira vakaukavara kara varareka Isipini anura

42

¹ Kenaani vatainivata kia kara vauvaro Iekopiva iruvaro Isipini kara vauvaro viva nai maaqunavuara tiharo, Ne qumina maini vailha nai tave nai tave iha vaivorave. ² Isipini kara vaivo titamanta irunarare. Nenavu mini otunte monu aquehama kara vara viri tinavu timiqe tenavu kara vira nehamia kia qutu viraiti, qaqi variqi vuare, tiro.

³ Iekopiva minti tivakero Iohepira vakaukavara 10navu nititomanta vika kara koqaa ireka Isipini vura. ⁴ Vika vire uvaro Iekopiva kia Benaminira Iohepira qata atitaraitiro tiharo, Viravata atitaariraro vo haikavano vira qoraiqama amitaantorave, tura.

⁵ Kenaanini karara aavoqu entava anintomantara ti, yokukavata Iekopira maaqunavu hampata kara koqaa ireka Isipini vura.

⁶ Ho Iohepiva ekaa Isipiqa raqiki vauva vauharo vo vataihainaaka vo vataihainaaka monu vareharo vika kara nimi vaumanta, Iohepira vakaukavaravata viva vaunaini orunte vira avuqua hiqirivi kankakaavuvi vailha nai viri vatain ke vauvaro ⁷ Iohepiva nai vakaukavara vika viraqaqama kero tavero, viva kia vika viraqaqamakero tavaantemakero, vikara tamogaraqama kero irero tiharo, Ne taihai aniakave? tumanta vika tiha, Tenavu Kenaanhai kara koqaa irera anuraukave, ti.

⁸ Vika minti tivake kia Iohepira viraqaqamake tavaraiti vauvaro, Iohepivaqai nai vakaukavara viraqaqama kero tavero. ⁹ Vika kankakaavuvi vauvaro Iohepiva haaru nai taira tavora iritero vikara tiharo, Aqao, nenavu vo haika ampedqamake tavareka aniakave. Nenavu maini aninte tenavu kia koqemake maimaraara raqikiainara tavareka aniakave, tiro.

¹⁰ Iohepiva minti tumanta vika tiha, Nora vaiintio, tenavu kia mintirera anuraukavauve. Tenavu ai kaiqa vaiintinavu vailha kara koqaa irera anuraukave. ¹¹ Tenavu vairera, qata vakaukavara vauraro tinavu qova vohaiqavanoma vaivo. Kia tenavu maa vatanaaka ampeqirera anuraukavauve. Tenavu quqaa uvaqai tura vaiintikama anuro, ti.

¹² Vika minti tuvaro Iohepiva tiharo, Nenavu unahaama tiavo. Nenavu maini aninte tenavu kia koqemake maimaraara raqikiainaara tavareka aniakeave, tiro.

¹³ Iohepiva minti tumanta vika tiha, Tenavu tota vairera, qata vakaukavara 12navu vauraro tinavu qova vohaiqavano Kenaanini vaivo. Tinavu qata vovano qutu vuvaro tinavu qata vitihainaava tinavu qokantiro vaivo, ti.

¹⁴ Vika minti tuvaro Iohepiva aqao tiro, Te vaaka tunarave. Ne maini ampeqireka aniakeave. ¹⁵ Ho te maantimake ni avateha tavarerave. Te tenta kauqu aiqiqaa aquukeha Pero vaiinti autuqaa mintima turo: Ninavu qatavano kia maini anirera, nenavu kiama ho maihai vivarave.

¹⁶ Ninavuqihairo vovano oru ni qata vita varero maini aniarire. Viva vira vitareva virage te ni hininavu karapuhiqama taari nenavu maini vase te ni uvava ququaave unave tiare. Te tavaariraro ni uva una uva vairera, te niara maini ampeqireka aniakeave tirerave, tiro. ¹⁷ Iohepiva minti tivakero taaramo enta vika karapuhiqi komanta vaura.

¹⁸ Vika karapuhiqi taaramo enta vauvaro Iohepiva anintero vikara tiharo, Ho te Kotira aatu qeteha vauraukama vauro. Te vo uva tiari ne vi uvava irivera, te ni vehakuma nimirarerave.

¹⁹ Ne quqaa uva ti varia vaiintika vaivera, niqihairo vovano karapuhi maaqi vaira ne hininavu anirante kara vare vuru nenta navunaaka narara vaika nimi, ²⁰ viraqaahai nenta qata vita vare te iainanaini viri kaiqe tavaare. Te vira tave, niara quqaa uva ti variakave tivakehama ni vehakuma nimitaare, tumanta vika eo tenavu mintirerave tura.

²¹⁻²³ Iohepiva Isipi vatanaaka uvaqihairo ti vauvaro vovano vira uva tuqantaakero vira vakaukavara tiva nimi vaumantara ti, vika Iohepirara vo vatanaava vahilo kia tinavu uva ho irianarove tivake, vika nai uvaqihai nai tiva ami nai tiva ami iha tiha, Oho, haaru tenavu tentanavu qata vo qoraiqama amitaunara kaara Kotiva vate tinavuqaa nora maara vataivo. Haaru tinavu qatavano iqj rateharo tinavuara kia mintiate timanta tenavu kia vira uva iriraiti, kia vira aaqurihamma amitaunarave. Vira kaara vate nora maaravano tinavuqaa qovarama vivo, ti.

Vika hininavu minti tuvaro Rubeniva tiharo, Oho, vi entara te niara tiha, Kia vira qoraiqama amitaate, turamanta ne ti uva iriataara vaimanta kia iriarave. Ne vira arukaara kaarama vate tinavuqaa nora maara vaivo, tiro. Minti tumanta vika Iohepirara kiama tinavu uva ho irianarove tuvarovata, Iohepiva vika tu uvava ekaa irura.

²⁴ Iohepiva vika uva iruvaro vira muntukavano qoraiquvaro viva tuqantaaviro uve iqj ratakorovo, vira auntavano ho uva tiarirava vauvaro viva qaiqaa tuqantaa viro kauqu aave vateharo nai kaiga vaiintinavuara tiharo, Vi vaiintira karapuhiqi kaate, tumanta vika Simionira vikaqihai rumpa vare muntu karapuhiqi kora.

²⁵ Mintuvaro Iohepiva nai kaiga vaiintinavu evaara tiva nimiro tiharo, Ne kara vare vika utaqi mpiqa nimitate, vika monu nai utaqi qaiqaa ntua nimitaate. Vika aaraini viha kara neravata ntua nimitaate, tiro. Minti tumanta vira kaiga vaiintinavu Iohepiva tuntemake, kara ntua nimitora.

Iohepira vakaukavara nái maaqaini anirante vura

²⁶ Iohepira vakaukavara kara ntuvato utara vara vaari nái donki tauvaqaa rumpate nái maaqaini vireka vurama. ²⁷ Vika aaraini vauvaro entama vumanta kaiqe maini vaitaare tivake mini vauvaro, vovano nai utaqihairo kara oqikero nai donki amiare tivakero tavarovar viva karara aquko monuva nai uta noqaa qaqi vaura.

²⁸ Viraqo vauvaro viva nai qata vakaukavara naarama kero tiharo, Ho tavaate. Te karara aqu kaura monuva tinta utaqi qaqlima vaivo, tiro. Minti tumanta vika voqamake naatu itomanta qeteha aiqu kauqu ntiri ntiri iha tiha, Oho, Kotiva tinavuara nantiharoe mintivo? ti.

²⁹ Vika minti tivake oru vi, nái qova vaunaini Kenaanini orunte nái nu vakaakara Iekopira tiva ami tiha, ³⁰ Isipiqa raqiki vai vaiintiva tinavuara tamogaraiqama kero tiharo, Ne Isipi vatanaaka ampeqireka aniakeave, tirave. ³¹ Viva minti timanta tenavu tiha, Aqao, kia tenavu Isipi vatanaaka ampeqirera anuraukavauve. Tenavu quqaa uvaqai tura vaiintika anuraukave. ³² Tenavu qata vakaukavara 12navu vauraro tinavu qova vohaiqavano vaivo. Tinavu qata vovano qutu vurave. Tinavu qata vo, vitihainaava qaqlima qokantiro Kenaaninima vaivo, turaro ³³ vi vaiintira tiharo, Ne quqaa uva ti variaka vaivera, niqihai vonku maini karapuhiqi ke, ne hininavu anirante kara vare vuru nenta navunaaka narara vaika nimi, ³⁴ viraqaahai nenta qata vira vita vare te iainanaini viri kaiqe te vira tavaare.

Ho te vira tave, viraqaahai niara quqaa uva ti varia vaiintikave tivakeha, niara kia maini ampeqireka aniakeave tirarave. Minti tivakema te ni qata vakaara vo kuvantuke

ninta nimiari ne homa maini monu aquukeha kara varevarave, tirave. Isipiqaqaa raqiki vai vaiintiva tinavuara minti tirave, ti.

³⁵ Manti tivake vika nái kara ntuvato utara urequke tavovaro vika karara aquko monuva vo uta vo utaqi qaqi vaumanta vika nái qora vatamake voqamake qeteha vaura.

³⁶ Vika qova Iekopiva tiharo, Oho, ninavu okaraqaa ti vaintivara taiqama vivarave. Mpo, Iohepiva qutu vurave. Simioniva kiama vaivo. Ne Benaminiravata mini vita vuru kareka auti variavo. Oho, vo maara vo maaravano tiqaa qovaraiqi vaivo, tiro.

³⁷ Manti tuvaro Rubeniva nai gorara tiharo, Benaminira ti timirage tevano viraqaa raqikiqi vima, qaiqaa nina vita viri amiare. Te kia orurante nina vita viri amiarera, are homa ti maaqtanta aru kenarave, tiro.

³⁸ Manti tuvaro Iekopiva aqao tiro, Kia te tenta maaqu vitihainaara ai amiarirara vite vinarave. Vira vakaava qutu vuvaro vivaqaima qaqi vaivo. Ne vira vita vare vivaro qora haikavano viraqaa qovaraiqirera, vira kaara ti muntuka qoraiqirava ti erera kauki vatauka aruma kaanarove. Kiama ho ne vira vite vivarave, tiro.

43

Vika Isipini qaiqaa anirante vurama

¹ Iekopiva minti tuvaro karara aavoqu entava qaqiqai variqiro vumanta ² vika Isipihai vare anu karara nama taiqa kovaro vika qova vikara tiharo, Ne anirante oru qaiqaa kara koqama keha, inaara kara voqavata vare aniate, tiro.

³ Manti tuvaro Iutaava aqao tiro, Tenavu ai tiva amunarave. Isipiqaqaa raqiki vai vaiintiva tinavu titiharo minti tirave: Ne kia nenta qata vo vite anije te vira tavaarerera, ne kia ho te iainanaini qaiqaa ani kara varevarave, tirave. ⁴ Are Benaminiravata tinavu hampata kairage tenavu vira vataake Isipini kara vararerera vuare. ⁵ Nora vaiintivano minti tirave: Ni qata vovano kia ni hampata anirera, ne kia te iainanaini ho anivarave tirave. Are kia vira atitairera, tenavuvata kia ho mini virarave, tiro.

⁶ Manti tuvaro Iekopiva vira vo autu Isareriva tiharo, Ne vi vaiintira nenta qatara kia tiva amiaatarave. Oho, ne minti tiara kaara tiqii nora maarama qovaraiqivo, tiro.

⁷ Manti tumanta vika tiha, Aqao, vi vaiintiva vo uva vo uvvara tintanavuvata, tinavu hampata vaukaravata irairave. Viva tiharo, Ni qova qaqie vaivo? Ni qata vovano vairove? tirave. Manti tivera, tenavu vi uvvara vi uvvara nai tiva amunarave. Tenavu nai tiva amihia kia tenavu viva nenta qata maini vite aniate tiaina uvvara iriraiti, qaqi ti vauraro viva naivano vi uvvara tirave, ti.

⁸ Vika minti tuvaro vikaqihairo Iutaava nai qora Isarerirara tiharo, Are vi vaintira ti vataakeria atitairage tenavu vaaka vuare. Tenavu kia vaaka vuarera, tinavu vainti nahentivata arevata qutivarave. ⁹ Tevano vi vaintiraga koqemake raqikiariraro kia qora haikavano viraqaa qovaraiqiarire. Te vira kia nina qaiqaa vita viri amiarera, vira kaara vi uvava tiqaa ekaa entama varianarove. ¹⁰ Tenavu vaaka karara vuataarave. Tenavu vaaka vuraitirio, homa taara tataa oru vi orurante anuraitirio, tiro.

¹¹ Iutaava kempukaiqama kero minti tuvaro vika qova tiharo, Ne mini quqaa vireka ivera, ne maihai koqe airaira vare vuru vi vaiintira amivaro viva niara quahaarire. Koqe havaverave, hanive, karaqaa aataataarave, pinaati voqaarave, vi haikara vi haikara vare vuru amiate. ¹² Ninta utaqi ntuvataa monura nai qaiqaa vuru amihia, vo monuvata viraqaa tomaqake amiate. Vovano qumimaqa iharoe ni utaqi vi monura ntuvu tairave? ¹³ Nenta qatavata vita vare vaaka vuate. ¹⁴ Ne vi vaiintira avuqaa oru vaivaro Kotiva ekaa kempuka vataava ni aaqrurihama nimilitairaro vi vaiintiva ni qata vaka vovata Benaminiravata qaqi kaira ho ne vitanta ntita vare orurante aniate. Oho, ti vaintivara taiqavi kia vaivera, vika taiqama vivarave, tiro.

¹⁵ Manti tumanta vika vira ami airairara vare, monuvata taara tataa vare, ho Benaminiravata vita vare vaaka Isipini Iohepiva vaunaini oruntora.

¹⁶ Oruntovaro Iohepiva Benaminira tavero nai naavuqaa raqiku vaiintirara tiharo, Are maa vaiintinavuka ntita varera ti naavuqi vuru kera, memeraa vo arukera unta tairamanta vi vaiintinavuka ikaraqaa ti hampata kara naate, tuvaro ¹⁷ vira kaiqa vaiintivano Iohepiva tuntema kero, vira vakuakvara Iohepira naavuqi ntita vuru kora.

¹⁸ Vika ntita vuru Iohepira naavuqi kora kaara vika naatu itomanta tiha, Oho, tota tinavu utaqi monu ntuvataara kaarae viva tinavu maaqi vuru kaivo? Viva tinavu ravaaqavu kero rumpatero, tinavu donkivata varero, tinavuara ne ti qumina kaiqa vaiinti variate tianarove, ti.

¹⁹ Vika minti tivake oru naavu qentiana vaiha Iohepira kaiqa vaiintiara tiha, ²⁰ Nora vaiintio, tota hoqare tenavu maihai kara vare tentanavu maaqaini anirante ²¹ aaraini vuraro entama vimanta aarana vaitarera iha tavauraro tenavu karara aqu kauna monura

tintanavu utaqi qaqi ntuvu taava vairave. Vovano tinavuara muara varaavo tiantorave ti, tenavu qaiqaa vi monura vare anuro.²² Tenavu vo monuvata viraqaa tomaqake kara vararer aqiqaa vare anuro. Nai tavave tinavu utaqi monu vira ntuvatairave? ti.

²³ Vika minti tuvaro Iohepira kaiqa vaiintivano tiharo, Hove, kia qetaate. Nivata ni qora Variqavano, vivama vi monura ninavu utaqi ntuvatairave. Tema tota vi entara ni monu varauunarave, tivakero viva oru Simionira karapuhiqihairo kuvantukero vika vaunaini viri kora.

²⁴ Mintima kero Iohepira kaiqa vaiintivano vika ntita vuru Iohepira naavuqi kero, vikara nái aiqu hiqaaate tiro, namari kaqa nimiro, vika donkivata kara nimiro,²⁵ vikara tiharo, Ne ikaraqaa Iohepira vataake kara nevarave, tumantara ti, vika Iohepira amireka vare anu haikara qeramake vatora.

²⁶ Qerama vate vahaqaqaini vauvaro Iohepiva vihairo nai naavuqi oruntomanta vira qata vakaukavara nái vare anu haikara vare, naavuqi oriqete Iohepira amiha vataini kankakaamavi vailha nái viri vataini keha vaura.²⁷ Mintimake Iohepira avuqaa vauvaro Iohepiva vika irero, Nenavu hoe variavo? tivakero viva qaiqaa vika irero tiharo, Ho ni qova naampaiqama vivo tiava vo? Viva qaqie vaivo? tiro.

²⁸ Minti tumanta vika tiha, Ai kaiqa vaiinti tinavu qova, viva qaqi vahiaro homa vaivo, tivake vika qaiqaa kankakaamavi nái viri vataini keha vaura.

²⁹ Vika mintimake Iohepira avuqaa vauvaro Iohepiva vika aitutumaqiro viharo nai nora maaqu, Benaminira tavero vika irero tiharo, Ne nenta qata vitihainaarave tiava, maa vivae vaivo? tivakero Iohepiva Benaminirara tiharo, Ti maaquo, Kotiva ai koqema amitaarire turo, tivakero³⁰ nai qata qaiqaa tavorara tiro, Iohepiva iqi rataarirava aumaiquvaro viraqihairo viva kantero oru vo rumuqi nariaraa vahiaro nai qatara iqi ratora.

³¹ Nai qatara iqi rata kero viva nai viriqi auquru nunka kero, anirantero nai qata vakaukavara vauraqi oru vahiaro nai kaiqa vaiintinavuara tiharo, Ho kara raaquate, tiro.

³² Minti tivakero Iohepiva vo taintaqaan nariaraa oquivi vaumanta, Iohepira kaiqa vaiintinavu kara raaquke Iohepira ami, Iohepira qata vakaukavara vo taintaqaan oquivi vauka kara raaquke nimi, Isipi vaiinti vonavu vika nariaraa vo taintaqaan oquivi vaukavata kara raaquke nimura. Isipi vatanaaka tiha, Tenavu Hiparu vatanaa hampata kara naarorave ti, vika nariaraa vo taintaqaan kara ne vaura.

³³ Iohepira qata vakaukavara kara nareka uvaro Iohepiva vika rairakero mini mini oquivi viha kara naate tumanta, vika oquivi viha tavovaro vika vakaara avuhainaaraqaahairo oquiviro viro, muntu vitihainaaraqaa kora. Iohepiva mintimakero vika raira komanta vika tave, voqamake aato tara iha tiha, Nantiakeroe viva tinavu noka tinavu vatataa okarara irirave? ti.

³⁴ Vika minti tivake oquivi vaumanta Iohepira kaiqa vaiintinavu Iohepira taintaqaahai kara vare muntu vika nimiha, Benaminira amireka anomake amitora. Benaminira mintimake amumanta vika ekaa karavata namarivata namake quahae vaura.

44

Iohepiva qaiqaa vika avateharo tavora

¹ Vika kara novaro viraqaaahairo Iohepiva nai kaiqa vaiinti naavuqaa raqikura tiva amiro tiharo, Kara varera vika utaqi ntuvu mpiqakera nimitera, nái vare ani monuravata nái utaqi qaqi ntuvu nimitaane.² Mintima kera oru ti *silvaa kaapu* koqera varera muntu vika qata vitihainaara utaqi nái monu vataakera ntuvu amitaane, tiro. Minti tuvaro viva Iohepiva tunte ura.

³ Ho vira qararaa yaaka toqaqi vika nitomanta Iohepira qata vakaukavara nái donki hampata nái maaqaini vireka vurama.

⁴ Vika kia niaraiqamake aaraini vuvaro Iohepiva nai naavuqaa raqiku vaiintirara tiharo, Kantera vi vaiintinavuka avataqira vuane. Vika aqamoto oruntera vikara mintima tiane: Ti nora vaiintivano ni koqema nimitalmanta ne nantihae nai qoraiqama amitaavo?⁵ Ne nantihae ti nora vaiinti *kaapu* koqera muara vare aniamo? Viva vi *kaapuraqihairo* namari ne vairave. Viva vi *kaapuraqohairo* naantiara qovaraiqiaina haikara tave vairave. Ne mintihama qora kaiqama varaavo, tiane, tiro.

⁶ Iohepiva minti tivakero vira atitovaro vira kaiqa vaiintivano kantero vika oru ntitakero vi uvara tumanta⁷ vika aqao ti, Nantiharae are tinavuara minti tiaro? Tenavu kiama vira *kaapu* muara vare anuro.⁸ Tota tenavu Kenaanini orunte, tentanavu utaqihai monu ranta kaavaunara, vi monura qaqi nai amunaravave. Tenavu minturaukara ti, kiama ai nora vaiinti naavuqihai vo haikavata muara varaainarave.⁹ Are rantaqira

vihiava tavairaro tinavuqihairo vo vaiinti utaqi vi *kaapuva* vairera, vi vaiintira arukera tinavuvata rumpa tairaqe tenavu ai nora vaiinti vira qumina kaiqa vaiinti variare, ti.

¹⁰ Vika minti tuvaro Iohepira kaiqa vaiintivano tiharo, Hove. *Kaapu* muara varero anina vaiintira, viraqaima te rumpa kararave. Ne hininavu homa nenta maaqaini qaqi vivarave, tumanta ¹¹ vika ekaa nái uta vataini vaavi ke, no rumpatora qantuke vatovaro ¹² Iohepira kaiqa vaiintivano avuni vika vakaara utaqihairo aitutumaqiro viro, muntu vitihainaaraqaa kora. Viva vika qata Benaminira vitihainaara utaqihairo *kaapu* vira ranta kora.

¹³ Vika tavovaro nái qata utaqi *kaapuvano* vaumanta vika nái utavaaqa qunahi qaanahimake, vogamake geteha nái kara ntuvato utanavura vara vaari nái donkiqaa rumpate, anirante vatkaini burama.

¹⁴ Iohepiva nai naavuqi qaqi vauvaro Iutaava nai qata vakaukavarra hampata orunte vata kanta hiqintivi vauvaro ¹⁵ Iohepiva vikara tiharo, Ne nana okarae ti vara timitaavo? Ne kiae iriavo? Te hepi kaiqa vareha naantiara qovaraiqaina haikara tave vauraukama vauro, tiro.

¹⁶ Iohepiva minti tuvaro Iutaava tiharo, Oho, tenavu nana uvae tirarave? Nana uvae tenavu tiarirara are vi uvarara quqaave tivakehara tinavuara kia muara varaovo tinarave? Tenavu vaaqu kaiqa varauvara kaara Kotiva tinavu qora kaiqa qovarama kaivaro qoqaa vaivo. Ho tenavu maa entaraqaahai are rumpatena vaiintikama vairarave. Vira utaqihai *kaapu* rantakaa vaiintiva vivavata, tenavu vira vakaukavaravata, ai qumina kaiqa vaiinti vairerave, tiro.

¹⁷ Iutaava minti tuvaro Iohepiva aqao tiro, Kia te ni ekaa rumpa karaiti, vira utaqi ti *kaapu* rantakaa vaiintira, viraqai rumpa taariraro viva maini vahiaro ti qumina kaiqa vaiinti variare. Ne hini kiaka homa nenta qova vainaini qaqi vivarave, tiro.

¹⁸ Iohepiva minti tuvaro Iutaava Iohepira aumanto oruntero virara tiharo, Mpo, nora vaiintio, kairaqe te vo uva ai tiva amiare. Te minti tiarirara are nora autu vataava Pero vaiinti voqaava variarava kia ti titiane. ¹⁹ Are tota tinavuara tihara, Ni qova qaqqie vaivo? Ni qata vovano vairove? tiaramanta ²⁰ tenavu tiha, Tinavu qova naampaiqama viro qaqlima vaivo. Viva naampaiqama viva vahiaro qorainti vainti vo vatatairave. Vira nova vitanta vatataraqihairo vira vakaava qutu vuvaro vira qatavanoqai qaqi vaivar vira qora muntukavano virara voqama kero vairave.

²¹ Tenavu vi uvare ai tiva amurara are tihara, Vi vaintira vita vare aniqe tevata vira tavaare, tiaramanta ²² tenavu ariara tiha, Nora vaiintio, vi vaintiva kia ho nai qora mini kero anianarove. Viva nai qora mini kero anirera, vira qova vaakama qutu vuanarove, tunarave. ²³ Tenavu minti turara are tinavuara tihara, Ne kia nenta qata vira vita vare anivera, ne kia ho qaiqaa te iainanaini tuvu kara varevarare, tiaramanta ²⁴ tenavu qaiqaa tentanavu qova vainaini orunte are tiana uvare vira tiva amuraro ²⁵ viva tiharo, Anirante qaiqaa oru kara varaate timanta ²⁶ tenavu virara aqao ti, Kia tenavu tentanavu qata vita vare vuarera, tenavu kia ho vi vaiintiva vainanaini qaiqaa virerave. Tinavu qatavano kia virera, tenavuvata kiama virerave, tunarave.

²⁷ Tenavu minti turaro tinavu qova tinavuara tiharo, Ne iriarave. Ti naata vovano qorainti vainti taaraqanta vata timitarave. ²⁸ Vitantaqihairo vovano tigaahairo ekaara viro, kia qaiqaa oruntero anumanta te virara oho, qaakau vairivan vira arukero ruqeqlama kaivo tivake kia vira qaiqaa vata vuanarave. ²⁹ Ne maa vaintiravata vita vare vivaro vira haikavano viraqaa qovaraiqirera, vira kaara ti muntuka qoraiqirava ti erera kauki vatauka aruma kaanarove, tirave.

³⁰⁻³¹ Tinavu qova minti tirara ti, te kia vira maaqu vitihainaara vita vare qaiqaa anirante vuariraro ti qova tavairaro viva kia ti hampata vairera, viva vaakama qutu vuanarove. Vira maaqu vitihainaava qaqi vairara tiro, tinavu qova qaqi vaivo. Vira maaquvano qutu viraro vira qovavata kia qaqi vairaitiro, qutuma vuanarove. Tenavu kia vi vaintira vita vare vuarera, vira muntukavano qoraiqirava vira erera kauki vataara aruma kaanarove. ³² Te tenta qorara minti tunarave: Tevano viraqaa raqikiariraro kia qora haikavano viraqaa qovaraiqiarire. Te vira kia nina qaiqaa vita viri amiarera, vi uvava tigaa ekaa entama varianarove, tunarave. Te tenta qorara minti tunarave.

³³ Mpo, nora vaiintio, virara iriharama tigai rumpa tairaqe te tenta qata vira vatuva vare, maini ai qumina kaiqa vaiinti variariraro ti qata viva nai vakaukavarra hampata qaqi vuarire. ³⁴ Te kia vira vita vare vuarera, nantiakee te tenta qova vainaini ho virarave? Mpo, kia ti tititairaqe te tenta qova vainaini orunte vira muntukavano nai maaquara qoraiqinara tavaare, tiro. Iutaava minti tura.

45

Iohepiva nai okara qovarama kora

¹ Iutaava minti tuvaro Iohepira muntukavano voqama kero qoraiquvaro vaharo tavovaro nai kaiqa vaiintinavu nivuqaa iqi rataarirava aumaiquvaro viva ekaa vikara tiharo, Ne ekaa maaqihai revante vuate, tumanta ekaa revante vuvaro Iohepivaqai nai qata vakaukavarava hampata vaharo nai okarara vika tiva nimura.

² Iohepiva tiva nimiharo vogama kero iqi rate vaumanta Isipi vatanaaka viva iqi rate vaura irumanta ekaa Pero vaiinti naavuqi kaiqa vare vaukavata Iohepiva iqi rate vaura irura.

³ Iohepiva nai qata vakaukavarara tiharo, Te maa Iohepikave. Ti qova qaqqie vaivo? tiro. Minti tumanta vira vakaukavara vi uvvara iruvaro voqamake naatu itomantara ti, vika uva tiva kia vaura.

⁴ Mintuvaro Iohepiva vikara vainto aniate tumanta vika vainto anuvaro Iohepiva tiharo, Te ni qata Iohepikama vauro. Ne vo vatanaakaqti monuara keha varomanta vika ti tivita vare Isipi maini viri korave. ⁵ Ho vate ne kia ti aatu qetaraiti, kia ne nentara airi avu aato utiha tiha, Kia tenavu mintiataarave tiate. Kotiva airi vaiinti nahentiara kia qutu viraiti qaqqi variate tiro, viva ti naane ni nivuni vara komanta te aniaavaunarave. ⁶ Karara aavoqia ihiva taaraqanta aitaraivaro, 5 ihinavu qaqqima vaivo. Kauquru ihiara vaiinti nahenti kiama ho kara utuke qantuke varevarare.

⁷ Ho Kotiva nivata ni vaintivaravata ruaruama nimitaari kia qutu viraiti qaqqi variqi vuante tiro, viva ti naane maini tititairave. ⁸ Mintirara ti, te kia niara ti tititaamantama anunarave tiraiti, te Kotiva ti varakaimanta maini anunarave turo. Kotiva ti varakaiva vivama ti noraiqama kaimanta te Pero vaiinti vira kaiqa vaiinti avuniqamake vaha, ekaa Isipi vataqaa raqiki vauro.

⁹ Ne vaaka anirante vuru ti qora tiva amiha mintima tiate: Ai maaqu Iohepiva ariara mintima tivo. Kotiva ti noraiqama kaimanta te ekaa Isipi vataqaa raqiki vauro. Are kia mini varikera aniraitira, vaakama te unanaini aniane. ¹⁰ Are homa Isipi maini ani vahara vata vo Gosenini vainarave. Vi vatava ti aumantoma vaivo. Are, nena vaintivarave, nena naintivarave, nena sipsipive, memeraave, purumakauve, nena airaira vataanarave, ekaa vi haikara vi haikara katu vareru maini ani vairaqe ¹¹ te ariqaa raqikiare. Karara aavoqia ihiva 5navu qaqqima vaivo. Are kia maini anirera, arevata ai hampata variakavata veiqqama vivorave. Mintima ti qora tiva amiate, tiro.

¹² Iohepiva minti tivakero qaiqaa nai vakaukavarara tiharo, Nevata ti qata Benaminivavata ti tave variamanta te quqaa Iohepikama vauro. ¹³ Pero vaiintivano ti noraiqama kairaravata, ne ekaa haika maini Isipini vaha tavaaravata, vuru ti qora tiva amiate. Viraqqaahaima vira vaaka vita vare maini aniate, tiro.

¹⁴ Iohepiva minti tivakero oru nai qata Benaminira kukuqama amiteharo iqi rate vauvaro Benaminivavata nai vakaara Iohepirara iqi rata amite vaura. ¹⁵ Mintima kero Iohepiva nai vakaukavara vohaiqa vohaiqa moqakeharo kukuqama nimitora. Mintumanta vira naantiara Iohepira vakaukavara vira vataake uva ti vaura.

¹⁶ Mintuvaro Iohepira qata vakaukavara aninto vakaakava avuhainaa naavuqi vumanta Pero vaiintivano nai nora vaiintinavu vataakero vi uvvara iri quaheha vaura.

¹⁷ Pero vaiintivano Iohepirara tiharo, Nena qata vakaukavara mintima tiva nimiane: Ne nenta donkiqaa kara vara vaari rumpa vare anirante Kenaanini oruntema ¹⁸ nenta qorave, nenta vainti nahentive, ntita vare orurante maini ani vaise te koqe vata vo ni nimiari ne viraqaa koqemake variate, tiane.

¹⁹ Minta tivakera qaiqaa maa uvaravata vika tiva nimiane: Ne maihai ohinavuvata ohi vekanavuvata vare vuru kaimanta ni vainti nahentivata ni qovavata viraqai vaarinte vaha ho aniate. ²⁰ Nenta hini airaira mini kerara kiama noraiqaaake iriate. Maini Isipini koqe airaira vai haikava ni airairama varianarove tiane, tiro.

²¹ Pero vaiintivano tuntema kero Iohepiva nai qata vakaukavara ohinavuvata ohi vekanavuvata nimumanta vika anirante vurama. Vika vire uvvaro Iohepiva vika aaraini viha ne kararavata nimiro, ²² viva vika vohaiqa vohaiqa qaraaka utavaaqavata nimiro. Mintiharovata, Benaminira 300 silvaa monuvata qaraaka utavaaqaa 5navu vatama kero amura.

²³ Maa haikara Iohepiva nai qora amitora: Isipihainaa koqe airaira, vo airaira vo airaira vara vaari qora donki 10navuqaa rumpa tero, mparetive, vo kara vo karave, vira qova aaraini aniharo naainara nahe donki 10navuqaa rumpa amitora.

²⁴ Mintima kero Iohepiva nai qata vakaukavara nititomanta vire uvvaro viva vikara tiharo, Ne aaraini viha kiama nai ati nai ati iate, tivakero vika nititomanta vurama.

²⁵ Nititomanta Iohepira qata vakaukavara Isipi mini ke Kenaanini nái qova vaunaini orunte²⁶ vira tiva ami tiha, Iohepiva qaqlima vaivo. Viva Isipini vaiharo ekaa vi vataraaqa raqikiharoma vaivo, ti. Vika minti tuvaro Iekopiva voqamakero rantuma viro kia vika uvvara quqaave tiraitiro vaumanta,²⁷ viraqaahai vika Iohepiva ekaa uva vika tiva nimura nái qora Iekopira tiva amuvaro viva ohi vekanavu Iohepiva varakora tavero, viraqaahairo vira muntukavano koqe uvvaro viva quahakero²⁸ tiharo, Ne quqaama tiavo. Ti maaquvano Iohepiva qaqlima vaivo. Kaiqe te qaqlima variainanto vira tave, viraqaahai te qutuare, tiro.

46

Iekopiva Isipini katu varero vura

¹ Iekopiva minti tivakero viva ekaa nai u haikara katu varero Isipiniara vura. Viva aaraini viharo Besebaini oruntero nai qora Aisaakira Variqara *ofaa* vo iha quara amitora.

² Mintimakero entaqi Iekopiva vaiteharo taira tave vauvaro Kotiva vira aarero tiharo, Iekopio, Iekopio, tuvaro Iekopiva tiharo, Vo, te mainima vauro, tuvaro³ Kotiva virara tiharo, Te Kotikave. Te ai qora Variqavanoma vauro. Are Isipini vinarara kia qeta raitira, qaqlima mini vuane. Are Isipini oru vairaque te are kuvuarama terauka airiqama kaari vika nora vatanaakama vaivarave.⁴ Are Isipini vi vairaque te ai vataake mini virerave. Naantiara te Isipihai are kuvuarama terauka ntita vare qaiqaa maini vuru karerave. Are qutina entara ai maaqu Iohepiva ai vataakero varianarave, tiro.

⁵ Kotiva minti tuvaro Iekopiva Beseba mini kero vura. Vira maaqunavu Pero vaiintivano ohi vekanavu nimura varake, nái naata vaintivata nái qora lekopiravata, viraqa vika vaarike Isipini vurama.⁶ Vika Kenaanihai varato haikara, sipisipive purumakauve memeraave, voku airairavata varovaro Iekopiva ekaa nai kuvuarama toka hampata Isipini vura.⁷ Iekopiva ekaa nai maaqu raavurave, nai naintinavuve, ntita varero Isipini vura.

⁸ Iekopira hampata Isipiniara vu vaiinti nahentika nutu vaireva, maantimama vairo: Rubeniva (Iekopira maaqu avuhainaara)

⁹ Rubenira vira maaqunavu: Hanokira, Parura, Hesaronira, Kaamira.

¹⁰ Simioniva

Simionira maaqunavu: Jemuelira, Jaminira, Ohaatira, Jakinira, Sohaara, Saurira. (Kenaani vatanaa nahenti vovano Saurira vatatora.)

¹¹ Rivaiva

Rivaiva maaqunavu: Gesonira, Kohaatira, Meraarira.

¹² Iutaava

Iutaara maaqunavu: Erura, Onaanira, Seraara, Peresira, Siraara. (Eruka Onaanika Kenaanini vaiha qutu vura.) Peresira maaqutanta: Hesaronira, Hamurira.

¹³ Isakaava

Isakaara maaqunavu: Toraara, Puvara, Iopura, Simironira.

¹⁴ Sebuluniva

Sebulunira maaqunavu: Seretira, Elonira, Iarerira.

¹⁵ Rubeniva vo, Simioniva vo, Rivaiva vo, Iutaava vo, Isakaava vo, Sebuluniva vo, vinavuka Riaara maaqunavu vauvaro Riaava Mesopotemia vataini vaiharo vinavuka Iekopira vata amitora. Riaava nahenti vainti vovata Dainaara vatatora. (Riaara vaintivata naintivata vaireka, 33navu vaura.)

¹⁶ Gaativa

Gaatira maaqunavu: Sifionira, Hagira, Sunira, Esibonira, Erira, Arodira, Arelira.

¹⁷ Aseva

Asera maaqunavu: Imunaara, Isavaara, Isavira, Beriaara.

Asera raavura: Seraara.

Beriaara maaqutanta: Hebeka, Marakierika.

¹⁸ Vinavuka 16navu Siripaara vaintive naintive vaura. Siripaava Riaara kaiqa nahenti variarire tiro, Labaaniva Siripaara vira amura.

¹⁹ Iohepika Benaminika. Vitanta Iekopira naata Reserira maaqutanta vaura.

²⁰ Iohepira maaqutanta: Manaseka Efaramuka.

Iohepira naata Asenaativa vi vaintitanta vatatora. Asenaativa Potiperaara raavuravano vauvaro Potiperaava kuariara tinavu variqave tivakeharo vira aare vau vaiintiva Oni vatukagi vaura.

²¹ Benaminira maaqunavu: Belaara, Bekera, Asabelira, Geraara, Nemaanira, Ehira, Rosira, Mupimira, Hupimira, Atira.

²² Vi vaintinavuka 14navu Iekopika Reserika vaintive naintive vaura.

23 Daaniva.

Daanira maaqu Husimira.

24 Napataariva.

Napataarira maaqunavu: Jaselira, Gunira, Jesera, Siremira.

25 Vi vaintika 7navu Bilihaara vaintive naintive vaura. Bilihaava Reserira kaiqa nahenti variarire tiro, Labaaniva Bilihaara vira amura.

26 Iekopira vaintive naintive vira hampata Isipini vuka kaara ntireka, 66navu vaura. (Iekopira maaqunavu naatavara kia kaara ntumanta vikavata Isipini vura.)

27 Iekopivavata vira vaintive naintive Isipini vukavata, Iohepiravata, Iohepira maaqutanta Isipini vatatakavata, vika vika kaara ntireka, 70navu vaura.

Iekopiva nai vainti nahenti hampata Isipini oru ntora

28 Iekopiva Isipini oru viharo nai maaqu Iutaara attero tiharo, Are avuni oruntera Iohepira tiraro viva Gosenini ani tinavu tivita kaarire, tivakero Goseni vatainai oruntovaro

29 Iohepiva nai ohi kaari qeramatoraqi vaari ntero nai qora vita kareva Gosenini oru vura.

Iohepira vika vaunaini oruntero nai qora ravaaqavutero kukuqeharo vukaiqama kero nai qorara iqi rata amitovaro ³⁰ Iekopiva Iohepirara tiharo, Ho vate te tenta tivuqohai ai tavaurara are qaqi variaramantara ti, te qutirera qeramate vauro, tiro.

31 Iekopiva minti tuvaro Iohepira nai qata vakaukavaravata, nai qora vainti nahentinavu, tiva nimiro tiharo, Te oru Pero vaiintiara minti tirerave: Ti qata vakaukavarave, ti qora vainti nahentive, Kenaanini variakava vika te unanaini anintaavo.

32 Vinavuka sipisipive, memeraave, purumakauve vikaqaa raqiki variakave. Vika nai quaravata airairavata katu vare maini anintaavo, tirerave. ³³ Te minti tivake Pero vaiinti tiva amiariraro viraqaahairo viva ni irero tiharo, Ne nana kaiqa vare variakave? tiramanta ³⁴ ne mintima tiate: Tentanavu qoka aanante, tenavu vaintikaa vaiha sipisipive memeraave vikaqaa raqiki vi vauraukave, tiate. Ne minti tivaro Pero vaiintivano niara, Ne homa Gosenini nentaraa vaiha nenta quara vataake variqi vivarave, tianarove, tiro.

Isipi vatanaaka quaragaan raqiki varia vaiintika hampata kia voahaaraqi vairerave tura kaara Iohepira minti tura.

Iohepira qata vakaukavara Pero vaiinti oru tavora

47

1 Iohepira minti tivakero oruntero Pero vaiintiara tiharo, Ti qovavata ti qata vakaukavaravata Kenaani mini ke, nai quaravata airairavata ekaa varema maini Gosenini anintaavo, tivakero ² viraqaahairo nai qata vakaukvaraqaahairo 5navu ntitakero Pero vaiinti avuqaa vuru kovaro ³ Pero vaiintivano vinavuka irero tiharo, Ne nana kaiqa vare variakave? tumanta vinavuka tiha, Tenavu tentanavu qoka aanante quaragaan raqiki vauraukave, ti. ⁴ Minti tivake vinavuka tiha, Kenaani vatainivata kia kara vaivarao tinau quaravata kara neva kia vaivo. Hoe are tinavu qaqi kairae tenavu Gosenini variare? ti.

⁵ Vinavuka minti tuvaro Pero vaiinti viva Iohepirara tiharo, Ai qovavata ai qata vakaukavaravata are iananaini aniaivo. ⁶ Ho Isipi vatavano vika vatavatama varianarove. Are koqe vata vo vika nimira vika nai quara vataake mini variate. Vika kairamanta Gosenini variate. Are tavaira vikaqihai vokiaka purumakauqaa raqiki kaiqara anomake taveka vaivera, vika homa ti purumakauqavata raqikivarave, tiro.

⁷ Minti tuvaro Iohepira nai qora Iekopira vitero vuru Pero vaiinti avuqaa kovaro Iekopiva vira uva mantama amitovaro ⁸ Pero vaiintivano Iekopira irero tiharo, Are nanti nanti ihie vara kaaro? tiro.

⁹ Minti tuvaro Iekopiva Pero vaiintiara tiharo, Te maa vataragaan bona bona variqi niha 130 ihima vara kauro. Ti qovavata ti kaivaqavavata airi ihira variqi variaka variamanta te kia vika aanante airi ihi vairaiti, te vukaari utuqi viha variqi vunarave, tiro. ¹⁰ Minti tivakero Iekopiva nai kauqu tuahera kero Pero vaiintiara Kotiva ai koqema amitaarire tivakero vira mini kero vurama.

¹¹ Iohepira nai qoravata nai qata vakaukavaravata ntita varero Pero vaiintivano tuntema kero, koqe vata vaunaini vika muntu kora. Vi vatava ekaa Isipini vau vatara, vo vata vo vata naatara kero koqe vata vauvaro vi vatava vatuka vo, Ramesesi tataaqa vaura. ¹² Iohepira vika mini vuru kero nai qoravata, nai qata vakaukavaravata, ekaa vika vainti nahentivata, kara nimumanta vika ho neha mini vaura.

Iohepira kara raira keharo vo vatanaaka nimura

¹³ Vi entara karara aavoqua anomakero ekaa vatainai vauvaro Isipinivata Kenaaninivata kia kara vaumanta vi vatanaaka karara antuqa arura kaara kia vika kempuka vaumanta

¹⁴ vika oru Iohepiva vaunaihai monu aqukeha kara koqaamake varovaro Iohepiva vi monura vareharo vuru avuhainaa naavuqi vate vaura.

¹⁵ Isipi vatanaakavata Kenaani vatanaakavata kara vareha nái monu aquqi vivi, vuru taiqa kora. Mintumanta Isipi vatanaaka Iohepiva vaunaini orunte tiha, Mpo, kara qaqi tinavu timiane. Are kia tinavu kara timiraqe tenavu qutu vuarorave. Tinavu monu taitama vivo. Mpo, qaqi tinavu kahaqiane, ti vaura.

¹⁶ Vika minti ti vauvaro Iohepiva tiharo, Ni monu taiqa virera, nenta quara ti timihama kara varaaate, tumanta ¹⁷ vika nái ohive, sipisipive, memeraave, purumakauve, donkive, Iohepira amiha kara vare vaura.

¹⁸ Ho mintiaqi vuvaro vi ihiva aitarovaro vo ihi anintomanta Isipi vatanaaka qaqiaa Iohepiva vaunaini orunte tiha, Nora vaiintio, tenavu maa uvara kukeqa kaarorave. Tinavu monu taiqa vivaro ekaa tinavu quara vairi ariniqama vivo. Mpo, nana haikae ai amiha kara varaainarave? Tintanavu vaatave tintanavu vatave, vi haikavaqaima qaqi viavo. ¹⁹ Are kia tinavu kara timirera, tenavu qutuma virarave. Mpo, are tinavu kahaqiane. Tenavu tentanavu vata airante taiqa vuarorave. Are kara tinavu timihara tinavuvata, tinavu vatavata, varaaane. Tenavu rumpatai vaintira voqaara vailha Pero vaiinti kaiqa vara amitaariraro tinavu vatavano virainiqama vuarire. Mpo, karavata kuvukanaavata tinavu timiraqe tenavu kia qutiraiti, qaqi variqi viha utuke namaqi vuare, tura.

²⁰ Karara aavoqu ihiva qaqi vaumontara ti, Isipi vatanaaka minti tuvaro Iohepiva vika kara nimiharo vika vata varovaro vika vatavano Pero vaiintiniqama vura. ²¹ Mintuvaro Iohepiva ekaa Isipi vataihairo ekaa vi vatanaaka koqaama komanta vika Pero vaiinti paanaa kaiqa vara amitaqiu tuatora.

²² Iohepiva vika vata vareharo viva Isipi vatanaaka variqa kaiqa vara nimite vauka vata kia varora. Pero vaiintivano vika monu nimumanta kara varake ne vaurara ti, vika nái vata qaqi tuatora.

²³ Iohepiva vaiinti nahentiara tiharo, Ho te karaqohai nivata ni vatavata koqaama kauramanta nevata ni vatavanovata Pero vaiintiniqama vuavo. Ho maa kuvukanaara varema vuru vataqiqi utuate. ²⁴ Karavano qampiqero mpeqaiqira ne qantu vare rairake, 4navu nenta tuate, vohaiqa Pero vaiinti amiate. Ne vira tuateha namaqi vihamma, hini kuvu varake qaqaa utuqi vuate, tiro.

²⁵ Iohepiva minti tumanta vi vatanaaka tiha, Nora vaiintio, are kara tinavu timiaravera tenavu kia qutu viraiti, qaqi vauro. Mpo, are tinavu koqema timitera iaro. Tenavu Pero vaiinti paanaa kaiqa vara amitaqiu virerave, ti.

²⁶ Ho Iohepiva Isipi vatanaakara tiharo, Ne kara ututera rairake nenta 4navu tuate vohaiqa Pero vaiinti amiate, tivakero taatauto uvava maa entaravata qaqima vairo. Isipi vatanaaka nái variqa kaiqa vara nimite vauka vikaqai nái vata qaqi tuatovaro vika vatavano kia Pero vaiintini vaura.

²⁷ Ho Iekopivave vira vo autu Isareriva nai vainti nahenti hampata Isipini Goseni vatainai variqiro vi vaura. Vika vato haikava airiqama vumanta vika vaintivaravata airitahaa vaura.

²⁸ Iekopiva 17 ihinavu Isipini variqiro viro, 147 ihi varakero qutu vura. ²⁹ Viva qutu vuarira entava aumaiquivaro Isareriva nai maaku Iohepira aarama kero tiharo, Are nena kauqu ainqiqa aqukehara nena kauqu hini ti avuntaraqaa vateharama tirara, Kia ai Isipi vatainai quntama tarerave, tiane. ³⁰ Te qutu vuarirara are Isipiqihaira ti vaata varera vuru ti qoravata ti kaivaqgaravata quntama tonaini quntama taane, tuvaro Iohepiva tiharo, Are tianantemake te mintirerave, tiro.

³¹ Minti tuvaro vira qova tiharo, Nena kauqu ainqiqa aqukeharama te quqaa mintirerave tiane, tuvaro Iohepiva te quqaa mintirerave tuvaro viraqaaahairo Isareriva nai taintaqua vaiteharo Kotira autu tuahereharo vaura.

Iekopiva Iohepira maaqutanta koqema nimitora

48

¹ Iekopiva variqiro vuvaro vo enta vovano Iohepira tiva amiro tiharo, Ai qova rovara varairo, tuvaro Iohepiva nai maaqutanta Manaseravata, Efaramuravata, ntita varero Iekopiva vaunaini vura.

² Mini orunovaro vovano Iekopira tiva amiro tiharo, Ai maaku Iohepiva ai tavareva anintaivo, tuvaro Iekopiva vi uvara iriro inaaraiqa kempuka varero nai vaito tain-taraqaaahairo vaaviarama viro vahiaro ³ Iohepirara tiharo, Te haaru Kenaanini Lusi vatainai variavauraro Kotiva ekaa kempuka vataava ti tivuqaa qovarama viro ti koqema timitareva ⁴ tiharo, Te ai koqema amitaarirara are naantiara airi vainti vatafairamanta

are kuvuarama terauka airima vaivarave. Are kuvuarama tenaraqaahai vo vatanaa vo vatanaaka qovarama vivarave. Te maa vatara ai amiariraro vi vatava aivata are kuvuarama teraukavata vika vatavanoma variqiro vuanarove turave, tiro.

⁵ Iekopiva minti tivakero qaiqaa Iohepirara tiharo, Te kia Isipi maini anuna entara ai naatavano qorainti vainti taaraqanta ai vata amitairave. Te ai maaqu vitantara kia ti naaintive tiraiti, te vitantara ti maaqutantave tirerave. Rubenika Simionika ti maaqutanta variantemake, ai maaqutanta Manaseka Efaramuka ti maaqutantama vaivarave.

⁶ Naantiara ai maaqu vonavu qovarama vivera, kia te vikara ti maaquye tiraiti, te vikara ti naaintive tirarave. Naantiara vinavuka nái vakaatantaqaahai vata varevarave. ⁷ „Ai nova Reseriva kia vainti vonavuvata vataraitiro, vaaka qutuvira kaara te ai maaqutantara minti turo.“ Haaru tenavu Mesopotemia vataihai Kenaanini aninte, Efaraata vatuka aumanto anuraro ai nova Reseriva qutu vimanta te aara auvahini vira quntama kaunarave, tiro. (Efaraata vatuka autu vo Betarihemi.)

⁸ Iekopiva minti tivakero viva Iohepira maaqutanta tavero Iohepira irero tiharo, Maa tatantave? tuvaro ⁹ Iohepiva tiharo, Maa ti maaqutantave. Te Isipi maini vauraro Kotiva vitanta ti timirave, tuvaro lekopiva tiharo, Vitanta ntite aniraqe te vitanta koqema nimitaaina uvara tiva nimiare, tiro.

¹⁰ Iekopiva anoma kero naampaiqama vuvaro vira avuvano kia koqema kero tavavarora tiro, Iohepiva nai maaqutanta vainto ntita vuru kovaro vira qova vitanta moqakero kukuqama nimitora.

¹¹ Mintima kero Iekopiva Iohepirara tiharo, Ike, te haaru ai viri kia qaiqaa tavaainarave tiavauraro Kotiva ti qaqi kaimanta te ai viri tave, ai maaqutanta virivata tavauro, tiro.

¹² Minti tuvaro Iohepiva oru nai qora avuoqihairo nai maaqutanta ntitero nai qora avuqaa kankakaaviro nai viri vatainai kero, ¹³ viraqahaairo nai maaqu Manasera avuhainaara vitero Iekopira kauqu tanaraini kero, vira qata Efaramura Iekopira kauqu kaanaaqaini kora.

¹⁴ Mintuvarovata, Iekopiva nai kauqu tanara tutukero, kia vira vakaaraqaa vataraitiro, vira qata Efaramura qiatagaqaa vatero, hini kauqu kaanaaqta tutukero vira vakaara Manasera qiatagaqaa vatero, ¹⁵ viraqahaairo Iohepira koqema amitero tiharo,

Kairaro Eparahaamika Aisaakika kaiqa vara amito Variqava maa vaintitanta koqe nimitaarire.

Kairaro Kotiva tiqaa ekaa enta raqiki vaiva vitanta koqema nimitaarire.

¹⁶ Vo haika vo haikavano ti qoraiqama kaantorave tiro, ti ruaruama timitai enseliva, vivama ai maaqutanta koqema nimitaarire.

Kairamanta vaiinti nahenti maa vaintitantara iriha, ti naaqura Eparahaamira autuve, ti qora Aisaakira autuve, ti hutuve kia taurukaraiti, qaqi iriqi vuate.

Kairamanta vitanta kuvuarama teka airiqamavi, airitahaa variate, tiro.

¹⁷ Iekopiva minti tivakero nai kauqu tanara vira qata Efaramura qiatagaqaa vatovaro Iohepiva vira tavero kia quaharaitiro, nai qora kauqu tanara varakero vo vainti qiatagaqaa vatarare tiro, ¹⁸ nai qorara aqao tiro, Maa vaintira hogarenaarave. Are nena kauqu tanara vira qiatagaqaa vataane, tiro.

¹⁹ Minti tuvarovata, vira qova tiharo, Ti maaquo, te virara irunarave. Virara irunarave. Vira vakaara Manasera vaintivara vaireka, vikavata nora vatanaakama vaivarave. Mintirarovata, vira qata Efaramuva nai vakaaravata aatara kero nora vaintivano vairamata viva kuvuarama taariraukavata nora vatanaaka, vo vatanaa vo vatanaaka vaivarave, tiro.

²⁰ Iekopiva minti tivakero viva Iohepira maaqutanta koqema nimitero tiharo, Naantiara Isareru vatanaaka vonavu vo vainti koqema nimitareka iha vika nitanta nutu ntevarave. Vika mintima tivarave: Kairaro Kotiva ni koqema nimitaira ne Efaramuka Manaseka voqaantemake variate tivarave, tiro. Mintimakero Iekopiva vira qata Efaramura avuni vatero, vira vakaara naantiaraini vatora.

²¹ Iekopiva minti tivakero viva Iohepirara tiharo, Ho tavaane. Te qutu vuarirava aumantoma vaivo. Te qutu vuariraro Kotiva niqaa raqikiji viharo naantiara viva ni ntita varero anirantero ninta naagu taatoka vatainima vuru kaanarove. ²² Te Amo vatanaaka hampata tenta veva hurugohai raquqi viha vika naatarake varataavauna vataro, te vi vataro kia ai qata vakaukvara nimiraiti, aqaima amuro, tura.

Iekopiva ekaaraa uva nai maaqunavu tiva nimura

49

¹ Iekopiva minti tivakero ekaa nai maaqunavu naarama kero tiharo, Ne maini ani ruvaaquma vi vaise te naantiara niqaa qovaraiqaina haikarara ni tiva nimiare.

² Ne ti Iekopira maaqunavu ruvaaqumavi vaiha te tiaina uvvara iriate. Te ni qoka Isarerika tiaina uvvara iriate.

³ Rubenio, arema te hogare vatatauravave.

Te qaraaka vaiinti variavauna entara ai vatahama te ho vainti vataariraukave tiavaunaruave.

Arema avuni vatataurava vaiharama are nora vaiinti variararo ai kempukavata uritarakero vaivo.

⁴ Are vaireva, huvura namarivano ekaa haika raaqu varaintema kera varianararave.

Are hoqarenaa vaintivano vaiharavata, vo okara autuanara kaara are tuvitarairaro ai qata vovano ai vatuka varaanarove.

Are ti nena qoka naata vontira nuvakera ti nena qoka vaitauna taintara qoraiqama kaanarave, tiro. (35:22)

⁵ Minti tivakero Simionika Rivaikara tiharo, Vitanta qata vakaatantama variavo.

Vitanta nai avuilehavaaqohai airi vaiinti arukaatantama variavo. (34:25-26)

⁶ Vitanta kukeqavi vaiha uva tivaterara kia te quaheha vairarave.

Vitanta ruvaaqumavi vaiinti aruke uvarara tige kia te vitanta hampata vairerave.

Vitanta arara itomanta vaiinti arukorave.

Purumakau qora vika kia ho qaiqaa nuate ti, vitanta vika aiqo aururu teqa korave.

⁷ Oho, kairaro vitanta voqama kero arara itora kaara Kotiva vitanta qoraiqama nimitaariere.

Naantiara te vitanta kuvuarama teka raumpirima kaari vika Isareri vataini vona vona hampiara voqara vaivarave, tiro.

⁸ Iekopiva minti tivakero viva Iutaara tiharo,

Iutaao, ai qata vakaukavara ai autuma tuahera kevarave.

Are nena navutaaka naatarama kenarave. Ai qora maaqunavu ravenkavi ai quahama amitevarave.

⁹ Are qaraaka *raionivano* aantau arukero nama kero anirantero nai vauraqi aiqo kauqu tututero vaitaira voqaarama variaro. Ti haruantorave tiro, kia vaiinti vovano vira vauraqama kairave.

¹⁰ Iutaara ankuvano avuhainaa kauru totaqi vi vaivaro naantiara kauru qova tanava qovaraiqianarove.

Vi vaiintiva Iutaara ankuqhairo qovarama viramanta ekaa naato vatanaka vira uva iiriqi vivarave.

¹¹ „Iutaara vaintivara airi *uaini* naaho vateva variainarara tiro,“ viva nai donki *uaini* naaquaanta viraqaa kantaruma taanarove.

Naare *uaini* tava tatiike vate tanuraqi viva nai utavaaqaq hiqaanarove.

¹² Vira avuvano vankora *uaini* voqara vairaro, vira aaraivano naama hantaiqira voqarama varianarove, tiro.

¹³ Iekopiva minti tivakero Sebulunirara tiharo,

Sebulunira nora namari avuhianta vairamanta vo *sipi* vo *sipi* viva vainanaini otu koqemake vaivarave.

Sebulunira vatawano viviro, Saidoni vatuka aumanto vuru taiqaanarove, tiro.

¹⁴ Minti tivakero viva Isakaarara tiharo,

Kempuko donkivano airaira ntuvataa utatanta avutana vaite vaira voqara Isakaava vairave.

¹⁵ Viva tavairaro aana varaina vatukava koqe iro vairaro koqe vatavanovata mini vairaro viva qumina kaiqa vaiintivano vaiharo vukaari utiharo vo vaiinti kaiqa vara nimitaanarove, tiro.

¹⁶ Minti tivakero viva Daanirara tiharo,

Isareri hini anku vaintema kero, Daaniva nai navunaaka uva avuqavuqama nimitaanarove. (30:6)

¹⁷ Daaniva *quqahivano/quaihavano* aara auvahini vaintema kero varianarove.

Ohivano anivaro *quqahivano/quaihavano* vira aiqo nkaqa kaivarao ravuku vivaro vira tauvaqaqaa vaiva tauvaqaihairo umpaihavu virave. *Quqahivano/Quaihavano* nkaqa kaintemakero, viva „nai navutaaka ntaihaanarove,“ tiro.

¹⁸ Minti tivakero viva tiharo, Noravaauvo, te are tinavu ruaruama timiteni entara vekama vauro, tivakero ¹⁹ Gaatirara tiharo,

Gaativa vairamanta muara vaiintinavu vira arireka anivaro viva tuqantaaviro vika nai ntaihamaqiro vuanarove, tiro.

²⁰ Iekopiva minti tivakero Aserara tiharo,

Aseva koqe vataqaa vairaro vi vatarqaahairo koqe karavano qampiqaanarove.

Auvuhainaa vaiinti ne karava vira vataqaaahairo qampiqaanarove, tiro.

²¹ Viva Napataarirara tiharo,

Napataariva diaavano nai vuataa ivaro kantaintema kero viva kantama vuanarove. Diaa naati koqera voqaantemake vira vaintivara vaivarave, tiro.

²² Iekopiva minti tivakero Iohepirara tiharo,

Iohepiva naaquntavano airi tava irataira voqaara vairave.

Vi naaquntava ruvu namari tataaqa vaivarao vira kaqivano hohaa vaura oru vi vairave.

²³ Iohepira navutaaka huru veva vare vira qoraiqama amitareka vira aruqi vuvarovata, ²⁴ Iohepiva kempukaiqama kero nai huru tuatovaro vira kauquvano kia popohovaro vaurave.

Ti Iekopika Variqavano Iohepira kauqu kempukaiqama amitorave.

Tinavu Isareriqaa Raqiki Vaiva Mpeqavano Iohepira kauqu kempukaiqama amitorave.

²⁵ Ti ai qoka Variqavano ariqaa raqiki vairave.

Kotiva ekaa kempuka vataava ai koqema amite vairara tiro, aaqu nti vaivarao vataaqihairo koqe ruvu namari nte vairave.

Kotiva ai koqema amitaaira ai vaintivarave, ai purumakauve airi variate.

²⁶ Kotiva ai koqema amitairaro are kara vara ututerava koqema kero qampiqaaire.

Aiqinavano airi ihi varaintema kero, Kotiva ai koqema amitaarirava airi entama variarire.

Iohepiva nai qata vakaukavarraqihairo nora vaiintivano vairara tiro, te koqema amitaaina uvava, ekaa vi uvava Iohepira qiatqaqa variarire, tiro.

²⁷ Iekopiva minti tivakero Benaminirara tiharo,

Qaakau vairivano karara voqama kero antuqa arivaro nintema kero, Benaminiva ni vairave.

Viva toqaqvata erainainivata aantau aruke ne vairave, tiro.

²⁸ Isareri anku 12navu vairara tiro, Iekopiva minti minti tivakeharo nai maaqu vinavuka vohaiqa vohaiqa uva tiva nimiharo koqema nimitora.

Iekopiva qutu vura

²⁹ Iekopiva minti tivakero viva nai maaqunavuara qaiqaa tiharo, Te inaaraiqa varike gutu vi, tenta kaivaqaukvara hampata vairerave. Te qutu vuari ne ti vaata vare vuru ti kaivaqauka quntama to onavuraqi tivata quntama taate. Vi onavuva Hitihainaa vainti Efaronira vataaini vairave. ³⁰ Haaru Eparahaamiva nai naata quntareva iharo Efaronira koqaa amiharo vi onavura varorave. Vi onavuva Kenaani vataaini Mamarera Oqiva vainaini vairaro vira tataaqa Makapera vatavano mini vairave.

³¹ Eparahaamiravata vira naata Seraaravata viraqi quntama torave. Aisaakiravata vira naata Rebekaaravata viraqi quntama torave. Te tenta naata Riaaravata viraqi quntama taunarave. ³² Eparahaamiva Hiti vatanaaka monu nimiharo onavu viravata, vatavata varorave. Ho minima tivata quntama taate, tiro.

³³ Ho Iekopiva ekaa vi uvara nai maaqunavu tiva nimi taiqa kero, viraqahairo viva nai taintaqa vuру vaiteharo qutu vura.

50

Iekopirara iqj rata amitora

¹ Iekopiva qutu vuvaro vira maaqu Iohepiva nai qora vaataqaa aquviro vira moqa kero viraqar iqj rata amitora. ² Mintimakero Iohepiva nai kaiqa vaitintinavuara tiharo, Ti qora vaata nteru vuanstorave. Ne vira vaataqaa vo qara i haikara aqu amitaivaro kia nteraarire, tiro.

³ Minti tumanta vi kaiqara tavoka 40 enta kaiqa varaqi viha vira vaata kempukaiqama amitovaro kia nteru vura. Ho Isipi vatanaaka 70 entanavu variqi viha Iekopirara iqj rata amitora.

⁴ Iekopirara iqj rata amito entava taiqa vuvaro Iohepiva Pero vaitinti koqe avu aato ami vaukara tiharo, Ne maa uvara vare vuru Pero vaitinti tiva amiate, ⁵ Ti qova qutu vireva iharo tiriara tiharo, Nena kauqu aqiqaa aqukehara mintima tiane: Tenta qova qutu viraqe te nai kaivaqaukvara quntama tonaini vira vaata quntama tarerave, tiane, tirave. Vi vatava Kenaanini vairave. Are ti qaqi kairaqe te tenta qora mini vuru quntama te qaiqaa orurante aniare. Minti tivakema ne Pero vaitinti tiva amiate, tiro.

⁶ Iohepiva minti tumanta vika vuru Pero vaitinti tiva amuvaro viva Iohepirara tiharo, Nena kauqu aqiqaa aqukehara tinantema kera, nena qora vare vuru quntaaane, tiro.

⁷ Pero vaiintivano minti tuvaro Iohepiva nai qora quntareva vura. Viva vire umanta Pero vaiinti koqe avu aato ami vaukavata, Isipi vatanaaka nora vaiinti vonavuvata, Iohepira hampata vumanta ⁸ Iohepira qata vakaukavaravata, ekaa vira vainti nahentivata, vira hampata vurama. Vika vumanta vika vaintairave, sipisipive, memeraave, purumakauve, viqaqai Isipi vata Gosenini vaura. ⁹ Airi vaiinti iqoka *kaariqive*, ohi tauvaqaqaave, Iohepira hampata vura.

¹⁰ Vika oru vi, Ataati vatukaini *uiti* rapa qaqlini varake vaunaini oruntora. Vi vatukava Iotani Namari hini mantaraini vaumanta vika mini orunte voqamake iqi rate vauvaro Iohepiva 7 entanavu mini vaharo nai gorara iqi rata amitora.

¹¹ Vika mini vaiha noraiqaake iqi rate vaumanta Kenaani vatanaaka vika tave tiha, Ike, tavaate. Vika noraiqaake vo vaiintiara iqi rate variavo, tivake vi vatara autu nteha, *Aperi-Misaraamive - Isipi Vatanaaka Iqi Rataanainive*, tura.

¹² Iekopiva qutu vumanta vira maaqunavu viva tuntemake, ¹³ vira vaata vare vuru Kenaanini Makapera vatainai ori onauqji quntama tora. Eparahaamiva nai naata quntareva iharo Hitihainaa vaiinti vo Efaronira monu amiharo vi vatara varovaro vi vatava Mamarera Oqiva vaura tataaqa vaura.

¹⁴ Iohepiva nai qora quntama tero, viraqaahairo vivavata ekaa vira hampata anukavata anirante Isipini vura.

Iohepira vakaukavara qaiqaa Iohepira aatu qetora

¹⁵ Vika qova qutu vumanta Iohepira vakaukavara tiha, Tinavu qova qutu vivo. Oho, tota tenavu Iohepira qora okara autu amitaunara kaara viva virara iritairera, tinavu qoraigama timitaanarove, ti.

¹⁶ Vika minti tivake vo vaiinti atiteha tiha, Are Iohepirara mintima tiane. Tinavu qova qaqlini vau entara ¹⁷ viva ariara minti tirave, Ai vakaukavara ai qora okara autu amite uvira nunka nimitaane, turave. Mpo, are viva tuntema kera, vi uvira tinavu nunka timitaane. Tenavu ai qora Variqa vira kaiqa vaiintinavuma vauro, tiane, ti. Vika minti tuvaro viva Iohepira vuru tiva amuvaro Iohepiva vika uva iriharo iqi ratora.

¹⁸ Mintumanta vira vakaukavara náivano Iohepiva vaunaini orunte vira avuqaa vatainai kankakaamavi vaiha tiha, Ho tavaane, tenavu ai qumina kaiqa vaiintiqaima vauro, ti.

¹⁹ Vika minti tuvaro Iohepiva aqao tiro, Kia qeteha variate. Kia te Kotira vatuka vareha niqaa uva vatareravauve vauro.

²⁰ Haaru ne qora okara autu timitareka uvarovata, Kotiva vi kaiqara tuqantaakero ti koqemava timiteharo viva airi vaiinti nahenti kahaqama nimtomanta vika kia qutu viraiti, maa entara qaqlini variarave.

²¹ Ho virara irihama ne kia vo haika aatu qeteha variate. Te niqaavata ni vaintivarqaava vata koqemake raqikiqi virerave, tiro. Iohepiva minti tivakero koqe uva nai vakaukavara tiva nimumanta vika kia qetaraiti, koqemavi vaura.

Iohepiva qutu vura

²² Iohepiva nai qora vainti nahenti hampata Isipini variqiro viro, 110 ihi varakero qutu vurama. ²³ Iohepiva qaqlini vau entara viva nai maaqu Efaramira vaintivata, vira naintivata, tavora. Iohepiva Manasera maaqu Makiara, viravata taveharo quahama amitora.

²⁴ Ho Iohepiva naampaiqama viro vaharo nai qata vakaukavara naarama kero vikara tiharo, Te qutu vuarirava aumaiqivo. Te qutu vuariraro Kotiva niqaa raqikiqiro viharo ni ntita varero Isipiqihairo Kenaanini vuru kaanarove. Kotiva haaru nai kauqu aiqiqaa aqu keharo vi vatara Eparahaamira vo, Aisaakira vo, Iekopira vo, tiva nimiro tiharo, Te vi vatara ninavu nimirerave, turave, tiro.

²⁵ Minti tivakero viva Iekopira vainti nahentiara tiharo, Ne nenta kauqu aiqiqaa aqu keha tenavu mintirerave, tiate. Naantiara Kotiva ni ntita varero Kenaanini vire ina entara, tenavu ai vuhaarivata vare, mini vuru quntama tarerave tiate, tiro.

²⁶ Iohepiva minti tivakero viva 110 ihi varakova Isipini qutu vura. Viva qutu vumanta vira vaata nteru vuantorave ti, vo qara vo qara u haikara viraqaa aqu amite kempukaiqamake, viraqaahai *vokiseqi* vaati vatora.

KATU VARORA (Exodus - Kisim Bek)

Tenavu maa uvara iquqama kaunarara tiro, hini uva vaivaro hini uva kia vairo.

Isipi vika Isareri qoraiqama nimitora

¹ Iekopiva Isipiniara vumanta vira maaqunavu nái vaiinti nahentivata ntita vare vira vataake mini vura. Iekopira maaqunavu vira vataake vuka vika nutu vaireva:

² Rubenirave, Simionirave, Rivairave, Iutaarave, ³ Isakaarave, Sebulunirave, Benaminirave, ⁴ Daanirave, Napataarave, Gaatirave, Aserave, vika vaura. ⁵ Iekopira vaintinavuvata vira naintinavuvata vaireka, 70navu vaura. Iohepiva naane avuni Isipini otu vaura.

⁶ Iohepivavata vira qata vakaukavaravata Isipini variqi vi, vuru qutu vumanta vika navunaakavata Isipini variqi vi vuru qutu vura. ⁷ Vika qutu vumanta vika vaintivara Isareri vatanaaka vi vataraqaa variqi viha vainti kuvuaramaqi vumanta vika airiqamavi Isipini mpiqavi vaura.

⁸ Mintuvaro Pero vaiinti vovano Iohepirara kia iruva qovarama viro Isipiqaa raqikiqiro vi vaura. ⁹ Viva nai vaiinti nahentiara tiharo, Ho tavaate. Isareri vatanaaka airitahaama variavo. Vika voqavata airiqamaki viha tinavu haatara kevorave. ¹⁰ Naantiara iqoka raqi entava qovaraiqiramanta vika tinavu navutaaka hampata avitumavi tinavu hampata raquqi viha, maa vataraqaahai ruqemake vo vataini vivorave. Kaiqe tenavu vo aara ranta kaari vika kia voqavata airi qiate, tiro.

¹¹ Minto tumanta viraqaahai Isipi vatanaaka vo vaiintinavu noraiqamake vinavukara tihu, Nenavu Isareri maara ntaina kaiqara nimimanta vika nora toqaavu nte vaira tinavu kaiqa vara timitate, tumanta Isareri vika kaiqa vareha nora vatukatanta Pitomivata Ramesesivata autu nimitora. Pero vaiinti kara naavu variarire ti, vi vatukatanta autu amitora.

¹² Isipi vatanaaka voqavata Isareri qoraiqama nimite vaumantavata, Isareri vika voqavata airiqamaki vi vaura. Isareri vika qaqiqai airiqamaki vi vaura kaara Isipi vatanaaka vika naatu voqamake qeteha vaura. ¹³ Vika qete vaiha voqamake vihi vaahi tivaqiqi viha nora kaiqa, vo kaiqa vo kaiqa vika nimi vaura.

¹⁴ Isipi vika Isareriqaa kempukaiqamake raqiki vaumanta Isareri vika aaqatai vata taatauke naavu kaqera briki autukeve, naavu kaqe kaiqarave, naaho kaiqave vare vaura. Isareri vika nora kaiqa vare vaumanta Isipi vika kia vikara mpo ike tiva nimitaraiti, qaqiqai vihi vaahi ti vaura.

¹⁵ Vi entara Siparaaka Puaaka vainti vatare u nahentika kahaqi vau nahentitanta vauvaro Pero vaiintivano vitantara tiharo, ¹⁶ Netanta tavaimanta Hiparu vatanaa nahenti vainti vatare imanta netanta vika kahaqiba tavaivarao qorainti vainti vatataivera, vika aruma kaate. Nahenti vainti vata taivera, netanta vika qaqi kaimanta variate, tiro.

¹⁷ Minto tumanta vitanta Kotira aatu qeteha kia Pero vaiinti uva iriraiti, Hiparu nahenti vika qorainti vainti vatatora qaqi ke vaura. ¹⁸ Vitanta mintiaqi vuvaro Pero vaiintivano vitanta naarama kero irero, Netanta nantihae mintiavo? Nantihae netanta Hiparu nahenti vika qorainti vainti vatataara qaqi ke variavo? tiro.

¹⁹ Viva minto tumanta vitanta Pero vaiinti nai tiva ami tiha, Agao, Hiparu nahenti vika vaireka, kia Isipi nahenti voqaraa qakomake vainti vate variarave. Vika kempuka nahenti vaihara ti, vika vaaka vainti vatakaamanta naantiara tetanta ani vaunarave, ti.

²⁰⁻²¹ Vitanta Kotira aatu qeteha kia qorainti vainti arukaraiti vauvarora tiro, Kotiva vitanta kojema nimitoramanta vitanta náitontavata ho vainti vatatora. Ho mintimake Isareri vika vainti vataqiqi vivi, voqavata airiqamavi kempukaiqamake vaura.

²² Mintiaqi vi vauvaro Pero vaiintivano nai navunaa vaiinti nahenti tiva nimiro tiharo, Ne tavaimanta Hiparu qorainti vainti qaraaka vatakeva vaivera, vika ravaaqavu vare Nairi Namariqi muntu aqu kaate. Hiparu nahenti vainti vatakeva, vikaqaima qaqi kaate, tura.

2

Mosira vatatora

¹ Vi entara Rivaira ankuqiraa vainti vovano Rivaira vohaa ankuqiraa nahenti vo varatora. ² Vi nahentiva vainti taiqama viro vuru qorainti vainti vatatero tavovaro vi vaintiva voqaraa vainti vauvaro vira nova Pero vaiinti aatu qeteharo taaramo torara vainti vira kukeqa tora.

³ Taaramo tora aitarovaro kia ho vira qaiqaa kukeqa taarirava vauvaro vira nova iri tavokero tanu vo rutantu kero, vira ataaní kempuka *iva/qumeqohairo* taatau kero, vainti vira vaati viraqi vaita kero, tanu vira varero Nairi Namari qupu vauraqi muntu vatovaro ⁴ vira nakaava vutunto himpi vahiaro nai qata viraqaa raqiki vaura.

⁵ Mini vauvaro Pero vaiinti vira raavuruvano namari tuntireva Nairi Namari tuvunaini nai kaiqa nahentinavu hampata otuntero hini mantaraini vahiaro tavovaro tanuvano qupu vauraqi vauvaro, viva nai kaiqa nahenti tanu vira varaarire tiro, atitovaro viva otu tanu vira mpaqi varero vuru amura.

⁶ Vuru amuvaro Pero vaiinti raavuruvano tanu vira avu ravaqaakero tavovaro qorainti vainti naatiruvano viraqi vaura. Viraqi vahiaro iqí rate vauvaro vira tavero virara ike mpo tiva amitero tiharo, Mpo, maa vaintiva Hiparu vatanaa vaintiruma vaivo, tiro.

⁷ Viva minti tivakero vauvaro vainti vira nakaava oruntero Pero vaiinti vira raavurara tiharo, Hoe te Hiparu nahenti vo tiariraro viva vi vaintira naama ami vairara are viraqaa raqikiane? tiro.

⁸ Minti tuvaro viva tiharo, Ho mintiane. Oru nahenti vo vita varera aniane, tuvaro vira nakaava oru nai vi vaintira nora vita varero anuvaro ⁹ Pero vaiinti raavuruvano virara tiharo, Vainti naati maarauru vita varera naama ami vairage te virara iriha ai koqaa amiare, tuvaro vira nova nai vainti vira vitero naama ami vaura.

¹⁰ Ho vainti viva noruqama vuvaro nahenti viva vainti vira vitero Pero vaiinti raavuruvano vaunaini vuru kovaro viva virara nai maaqu variarire tiro, vira virikero vatora. Viva vainti vira autu nteharo, *Mosirave - Mpaqikaunarave*, tiro. Viva tiharo, Te vi vaintira namariqihai mpaqi kaunarave, tura.

Mosiva getakero Midiani vataini ruqemakero vura

¹¹ Ho Mosiva noruqamaviro vahiaro vo enta viva oru nai navunaaka kaiqa vare vaunaini oruntero tavomanta Isipi vaiintinavu vikaqaa raqiki vahia vihi vaahi ti vaumanta vika nora kaiqa vukaari utukeha vare vaura. Mosiva mini vahiaro tavovaro Isipi vaiinti vovano Hiparu vainti vo, vira navunaara ruquti vaura.

¹² Vira ruquti vauvaro Mosiva tuqantaa viro hini hini tavovaro kia vainti vovano vauvaro Mosiva oruntero Isipi vainti vira arukero, nuqa vauqita kero viraqi vira vaata kekua tora.

¹³ Ho vira qararaa qaiqaa oruntero tavomanta vira navunaaka Hiparu vaintitanta nai ari nai ari vauvaro Mosiva oruntero raqireva hoqaro vaintirara eqaane tiro, Are nantiharae nena navunaara Hiparu vaintintira raqi variaro? tiro.

¹⁴ Mosiva minti tuvaro vi vaintiva Mosira nai tiva amiro tiharo, Ae, tavave ai noraiqama kaivarae are tinavuqaa raqikihara tinavu uva avuqavuqireva auti variaro? Oho, are enta Isipi vainti vo aru kaanantema kera, tivata arukaare tirae auti variaro? tiro. Minti tuvaro Mosiva vi uvvara iruvaro vira vogama kero aatu itovaro nai iriro tiharo, Oho, vainti nahenti te Isipi vainti aru kauna uvvara iriavo, tiro.

¹⁵ Ho Pero vainti vivavata vi uvvara iriro vira kaara Mosira arukaare tuvaro Mosiva Isipiqihairo ruqemakero Midiani vataini variare tiro, mini oruntero namari kaqake nareka vata quvitora tataaqa oquiviro vaura.

¹⁶ Ho vainti vo Jetarova, viva vainti nahentiara Kotira aarama nimite vau vaintiva vaumanta vira raavura 7navu vaura. Mosiva mini vaumanta Jetarora raavura 7navu ante tiha, Kaiqe namari kaqake taanuqi qihia kaari tinavu qora sipisipivata memeraavata naate, tivake anintomanta ¹⁷ vainti vonavu vikavata sipisipiqaa raqikuka nahenti vika namariqahai nitite vauvaro Mosiva himpiro nahenti vika kahaqiharo namari kaqakero vika quara nimura.

¹⁸ Mintumanta nahenti vika anirante nai qova Jetarova vaunaini oruntevaro viva vika irero, Nantihae vate ne vaaka orurante aniaivo? ¹⁹ tumanta vika tiha, Sipisipiqaa raqikia vaintika namariqahai tinavu titite vauvaro, Isipi vatanaa vainti vovano tinavu ruaruama timiteharo namari kaqakero tinavu quara nimimantara ti, tenavu vaaka anuro, ti.

²⁰ Minti tuvaro viva nai raavura vika irero tiharo, Vi vaintiva tanto vaimantae neqai aniaivo? Vira aaraivarao maini ani tinavu hampata kara naarire, tiro.

²¹ Minti tumanta Mosira aarovaro mini vuvaro Jetarova virara tinavu hampata maini variane tuvaro Mosiva eo tuvaro Jetarova nai raavura vo, Siporara amuvaro varatero vaura. ²² Varatero vauvaro Siporara vainti taiqama viro qorainti vainti vatatovaro Mosiva vira autu nteharo, *Gesomurave - Vo Vatanäärave*, tiro. Viva tiharo, Te vo vatanaa vahia vo vatanaa vaintiqama vuro, tiro.

²³ Ho Mosiva vi vataraqaa airi ihiara vau entara Pero vaintivano Isipini qutu vura.

Mintumantavata, Isareri vika Isipini rumpatoka ke ke tivaqi viha tavave tinavu kahaqanarove ti vauvaro²⁴ Kotiva vika ke ke ti vaura iriro, nai kauqu ainqiqaa aqukeharo Eparahaamirave, Aisaakirave, Iekopirave, vinavukaqaa tivato uvvara iritero²⁵ Isareri vika rumpatora tavero vikara iriharo vaura.

3

Kotiva Mosira aarora

¹ Mosira airaaviva Jetarova Midianihaina vaiinti nahentiara iriharo Kotira aarama nimite vau vaiintiva vauvaro, vo enta Mosiva vira sipisipiqaavata memeraaqaavata raqiki vaharo viva vika ntita varero aahara vata hini auvahini viro, Horepi Aiqinaini orunctora.

Vi ainqinarara Kotira Aiqinave tunaini oruntero tavovaro² inaara katariqaa iha ite vauvaro Noravano Kotiva atito *enseliva* iha auru voqavaa qovarama viro vauvaro, Mosiva tavovaro ihavano kia katari vira tatoqa karaitiro, qaqi ite vaura.³ Qaqi ite vauvaro Mosiva vira tavero tiharo, Ike, aahuva ihave. Nantivaroe ihavano kia katari tatoqake vaivo? Kaire te aumantohai orunte tavaare, tiro.

⁴ Mosiva minti tuvaro Noravano Kotiva tavovaro Mosiva aumanto ani vauvaro viva katari avutaini vaharo Mosira aarerero tiharo, Mosio, Mosio, tuvaro Mosiva, Vo, te mainima vauvo, tiro.

⁵ Manti tuvaro Kotiva tiharo, *Kia voqavata aumanto aniane. Are te vauna vatara turuaraini varianarara tira,*⁶ *nena aiquqaa nonku taanara qaqini rahunku kera variane. Te ai kaivaqaukavara Variqavanoma vauro. Te Eparahaamirave, Aisaakirave, Iekopirave, vikaqaa raqiki vauraukave, tiro.*

Kotiva minti tuvaro Mosiva qeteharo vira viri tavaarorave tivakero nai viri naavuma tero vaura.

⁷ Mosiva mintima kero vauvaro Noravano Kotiva tiharo, Ti vaiinti nahenti Isipini variamanta Isipi vika qoraiqama nimite variara te tavaunrarave. Isipi vaiinti kaiqaqaa raqiki variaka ti vaiinti nahenti vihi vaahi ti variamanta vika nora maaraqi vahia ke ke ti varia uvara te irunrarave.

⁸ Virara irihama te Isipi vatanaaka kauquqihai vika ruaruama nimirerera tuvuraukave. Te vika ntita vare nora vata, koqe vata vainaini vuru karerave. Maa entara vo vatanaa vo vatanaaka Kenaanive, Hitive, Amove, Peresive, Hivive, Jebusive, vi vataraqaa variarare.

⁹ Te tenta vaiinti nahenti ke ke ti varia uvara iri, Isipi vatanaaka vika qoraiqama nimite variaravata tavaunrarave.¹⁰ Are ti vaiinti nahenti ntita varera Isipi kera aitarera vuane ti, te ai Pero vaiintivano vainanaini atitaarirara vuane, tiro.

¹¹ Manti tuvaro Mosiva aqao tiro, Te qumina vaiintima vauro. Kia te ho Pero vaiintivano

vainanaini orunte vira tiva ami, viraqaahai Isareri ntita vare Isipiqihai anirarave, tiro.¹² Manti tuvaro Kotiva tiharo, Te ainti vairerave. Are ti vaiinti nahenti Isipiqihaira ntita vira kera, vika hampata maa ainqinaraaqa ti hutu tuahera kenarare. Vi entarama te ai attituna okarara kankoma kera irira tihara, Ququaama Kotiva ti tititaivo tinarave, tiro.

¹³ Kotiva minti tuvaro Mosiva tiharo, Te Isareri vainaini orunte vikara tiha, Ni kaivaqaukavara Variqavano ti tititaimanta te ne ianaini anuro, tiari vika ti ireha, Ai atitai variqara autu ntaane, tivera, te vika nai nana uvae tiva nimirarave? tiro.

¹⁴ Manti tuvaro Kotiva Mosirara tiharo, Te Qaqi Variqi Vi Vauraukama vauro. *Are Isareri vikara mintima tiane: Qaqi Variqiro Vi Vaiva, vivama ti tititaivo tiane, tiro.*

¹⁵ Kotiva minti tivakero qaiqaa Mosirara tiharo, Maa uvarama Isareri vika tiva nimiane: Ni kaivaqaukavara Variqa Noravano Kotiva viva Eparahaamirave, Aisaakirave, Iekopirave, vikaqaa raqiki vaiva, vivama ti tititaimanta anuro, tiane. Ti hutu mintimama vaivo. Vaiinti nahenti maa entara variakavata, naantiara enta vaikavata, vika mintima keha ti hutu ntevarave.

¹⁶ Are oruntera Isareri vaiinti noranavu ruvaquma kera vikara mintima tiane: Ni kaivaqaukavara Variqa Noravano Kotiva viva Eparahaamirave, Aisaakirave, Iekopirave, vikaqaa raqiki vaiva, viva ti tivuqaa qovarama viro niara mintima tivo: Te ne varianaini otunte Isipi vatanaaka ni qoraiqama nimite variara tavaunrarave.

¹⁷ Isipi vatanaaka ni qoraiqama nimite variara kaara te ni tenta vaiinti nahenti ntita vare Isipiqihai koqe vata vainaini ni vuru karerave. Maa entara vo vatanaa vo vatanaaka Kenaanive, Hitive, Amove, Peresive, Hivive, Jebusive, vi vataraqaa variarave. Kotiva niara mintima tivo tiane.

¹⁸ Are minti tiramanta Isareri vaiinti noranavu ai uva irivarave. Are vi uvvara vika tiva nimira, vika ntita varera Pero vaiintivano vainaini oruntera virara mintima tiane: Noravano Kotiva Hiparu vatanaaka Variqavano tinavu avutana qovarama virave. Viva

mintirara tira, are tinavu qaqi kairaeq tenavu Isipi maini ke, taaramo entara aahara vatavau vivi, mini orunte vaiha tentanavu Variqa vira *ofaa* iha quara amitaare, tiane.

¹⁹ Ho Pero vaintivano tiaina okarara te iruro. Kia te tenta kempuka okara vira umiqaarerera, viva kiama ho niara vuate tianarove. ²⁰ Virara irihama te tenta kempukaqo-hai Isipi vika ntaihaari vika te varaaaina kaiqara aatu qete vaivaro, Pero vaintivano ni qaqi kaira vivarave.

²¹ Te ni kahaqiar Isipi vika ni koqema nimitaimanta ne kia qumina viraiti, vika nimi airairaravata vare vivarave. ²² Isareri nahentinavu vireka iha, vika oru Isipi nahenti nái tataaqi vaika utavaaqave, *kori orive, silvaa* orive aututaa haikara, vi haikara vi haikara timiate timanta nimimanta vare, vika vi airairara varake nái maaqu raavuraqaa aqu nimitaimanta vare vivarave. Mintima kehama vika Isipi ia haikara vare vivarave, tiro.

Aahuva kaiqa varaaaina kempukara Mosira amura

4

¹ Minti tuvaro Mosiva tiharo, Te orunte Isareri vika tiva nimiari vika ti uvava una uvave, kia ai uva irirerave, kia Noravano Kotiva ai avuqaa qovarama virave tivera, viraqaahai te nantie irarave? tiro.

² Mosiva minti tuvaro Noravano Kotiva tiharo, Ho are nena kauquqi nana haikae tuataaro? tuvaro viva tiharo, Te kauruma tuatauro, tiro.

³ Minti tuvaro Noravano Kotiva tiharo, Are vira vataqaa aqu kaane, tuvaro Mosiva kauru vira vataqaa aqu kovaro kauru viva memaru kuqu vura.

Memaru kuqu uvuvaro Mosiva qeta kero kantovaro ⁴ Noravano Kotiva Mosirara tiharo, Are ravenkavira vekaihairs vira utu varaane, tuvaro Mosiva ravenkaviro vekaihairs vira utu varovaro memaruvano qaiqaa kauru kuqu vura.

⁵ Mintuvaro Kotiva Mosirara tiharo, Isareri vika ariara tiha, Tinavu kaivaqaukavara Variqa Noravano Kotiva viva Eparahaamirave, Aisaakirave, Iekopirave, vikaqaa raqiki vaiva, ququaama viva ai avuqaa qovarama virave tiate, tira, are vika nivuqaa vahara nena kauru qaiqaa vataqaa aqukaane, tiro.

⁶ Noravano Kotiva minti tivakero viva qaiqaa Mosirara tiharo, Are nena kauqu vo varakera nena vukai tavunaq kukeqa taane, tuvaro Mosiva Kotiva tuntema kero nai kauqu kukeqa kero, viraqaahairo qaqini vara kero tavovaro vaata ne vau numuarava vira kauqu voqi voqi hantaiqiro vaura. ⁷ Mintuvaro Kotiva tiharo, Qaiqaa nena kauqu tavunaq kukeqa taane, tuvaro Mosiva Kotiva tuntema kero veta vatero qaqini vara kero tavovaro vira kauquvano hini vaata voqaantema kero, koqe kauqu vaura.

⁸ Mintuvaro Noravano Kotiva tiharo, Are mintima kehara aahuva kaiqa nora kaiqa avuni varairamanta vika kia virara noraiqaake iriha ai uvava quqaave tivera, are naantiara varena kaiqara tavehama vika ai uvava quqaave tivarave. ⁹ Vika kaiqa vitanta tave, viraqaahai kia ai uvava quqaave tivera, are otu Nairi Namariqihairs namari kaqa vareru vuru aahara vataqaa qihia kaane. Are mintiraro vi namariva naare kuqu viro vataqaa vairamanta vika vira tavehama ai uvava quqaave tivarave, tiro.

¹⁰ Noravano Kotiva minti tuvaro Mosiva tiharo, Oho, Noravauvu, haaruvata maa entaravata kia te vaiinti nahenti nivuqaa vaiha koqe uva ti vaura vaiintika vaunarave. Te uva tirare turaro ti novano maara nte vaimanta vaunarave, tiro.

¹¹ Minituvaro Noravano Kotiva tiharo, Vaiintivano vaivaro tavave vira no amivaro ho uva ti vairave? Tavave vira avu rampai kaivar viva ho tave vairave? Tavave vira avu qimpa kaivar kia ho tave vairave? Te Noravano Kotika vi kaiqara vi kaiqara vare vauraukave. ¹² Are virara irihara oru viraqe te vaiha ai kahaqiarirara are ho uva tinarave. Te tenta uva ai tiva amiarirara are vi uvarama tinarave, tiro.

¹³ Minituvaro Mosiva mpo tiro, Noravauvu, kia ti vara karaitira, vo vaiinti vara kairaro vi kaiqara varaaire, tiro.

¹⁴ Mosiva minti tuvaro Kotira arara itovaro viva tiharo, Ho ai vakaava Eroniva Rivaira ankuqiraavama vaivo. Viva koqema kero vaiinti nahenti nivuqaa vaharo uva tiva nimi vairara irunarave. Viva ai vita kareva aaraini ani vaivo. Viva ai ani tavero quahaanarove.

¹⁵ Are uva vira tiva amiraro viva ai kahaqiharo vi uvava tiarie. Te vaiha nitanta kahaqihai nitantara vi uvava tiate tirerave. ¹⁶ Eroniva ai kahaqiharoma vaiinti nahenti uva tiva nimianarove. Are ti Kotika uva Eronira tiva amiraro viva ti uva vira vaiinti nahenti tiva nimiqiro vuarire. ¹⁷ Are nena kauruvata varera vuane. Are viraqohairs aahuva kaiqa nora kaiqa varairamanta vaiinti nahenti ti mpeqa okara tavaate, tiro.

...Kotiva minti tuvaro Mosiva oru nai naata vaintivata ntita varero Midiani mini kero anirantero aaraini viharo Horepi Aiqinaini nai vakaara Eronira vita kero ekaa vi uvara vira tiva amura...

²⁹ Ho Mosika Eronika Isipini orunte, Isareri vika qiata vaiintinavu ruvaaquma kora. ³⁰ Vi ka ruvaaquma kero Eroniva Noravano Kotiva Mosirara tu uvara, ekaa vi uvara vika tiva nimuvaro Mosiva vika nivugaa vaharo aahuva kaiqa nora kaiqa varomanta vika ³¹ vi kaiqara tave tiha, Ququaama Kotiva ai varakaivara aniaro, tivake tiha, Ququaama Kotiva tuyuntlero Isipi vika tinavu qoraiqama timite variara tavaivo, tivake viraqaaahai vika nái viri vatainai ke, Kotira autu tuahere vaura.

5

Mosika Eronika Pero vaiinti tavora

¹ Ho viraqaaahai Mosika Eronika Pero vaiintivano vaunaini orunte virara tiha, Isareri watanakaqaa raqiki vai Variqava Noravano Kotiva mintima tivo: Are ti vaiinti nahenti qaqi kairamanta vika oru aahara vatainai vaiha ti quahama timiteha ti hutu tuahera kaate, tirave, ti.

² Minti tuvaro Pero vaiintivano aqao tiro, Tavave nitanta Variqa Noravano Kotiva vaivo? Nanarae te vira uva iriha ni Isareri kuvantu kaari vivarave? Kia te ni Variqa Nora Kotirara irunaranave. Te kiama ni Isareri kuvantu kaari vivarave, tiro.

³ Viva minti tumanta vitanta tiha, Tinavu Hiparu watanaka Variqavano tinavu avutana govarama virave. Are tinavu qaqi kairage tenavu aahara vatainai taaramo entara vivi, mini oru vaiha Nora Kotira *ofaa* iha quara amitaare. Tenavu kia mintiarera, Kotiva nora aiha viraarae tinavu timianarove, iqoka paipeqohairoe tinavu haruanarove, ti.

⁴ Vitanta minti tuvaro Pero vaiintivano Mosika Eronika tu uvara kia iriraitiro, vitantara tiharo, Oho, nantimanta netanta minti tihamanta vaiinti nahenti kia ti kaiqa vararaiti, qaqirake variavo? Netanta vika tiva nimimanta vika vaaka qaiqaa kaiqa varaate. ⁵ Ne Isareri ariqamaqi vi vaiha tinavu Isipi haatarake tinavu kaiqa qaqira kareka auti variavo, tura.

⁶ Vohaa vi entaraqai Pero vaiintivano Isipi vaiintinavuve, Isareri vaiintinavuve kaiqaqaa raqikukara tiharo, ⁷ Hoqare ne Isareri kaiqa vaiintiqaa raqikiha vika kahaqihha ahaka veha varakeha nimi variamanta, vika aqatai vata hampata taataukeha *briki* auti variarave. Ho vate maa entaraqaaahai ne qaqira kaimanta, vika náivano ahaka veha rantakeha varaate.

⁸ Vika vira varakeha tota airi *briki* autuante make, qaiqaavata vohaa qaramake autuate. Vika nanta muntuvike *briki* autivorave. Vika popohaimanta vaihara ti, vika qaqiqai tiriari tiha, Tinavu qaqi kairage tenavu oru tentanavu Variqa *ofaa* iha quara amitaare, ti variavo. ⁹ Ne kaiqaqaa raqiki variaka vaiha, nora kaiqa vika nimimanta vare vaivaro toqaavu nte vaira vika kia ho Mosiva una uva tinara iriate, tiro.

¹⁰ Pero vaiintivano minti tumanta Isipi vaiintinavuve, Isareri vaiintinavuve kaiqaqaa raqikuka vevante Isareri vika tiva nimi tiha, Pero vaiintivano mintima tivo: Kia nenavu qaiqaavata ahaka veha vare vuru Isareri kaiqa vaiinti nimiate. ¹¹ Kaimanta vika náivano voqiqi voqiqi niha ahaka veha rantakeha aqatai vata hampata taataukeha *briki* autuate. Vika mintiaqi viha kiama taaraqa autiraiti, tota airi *briki* autuante make, qaiqaavata vohaa qaramake autuate tivo, tiro.

¹² Minti tumanta Isareri vika ahaka veha rantaureka ekaa Isipi vatainai vi ani vaura. ¹³ Isipi vaiinti kaiqaqaa raqikuka vihi vaahi tivagi viha vikara tiha, Hoqare tenavu ahaka veha ni nimura ne minti mintimake *briki* autuarave. Ho vate maa entaravata ne vohaa qaramake airi autuate, ti.

¹⁴ Isipi vaiinti kaiqaqaa raqikuka minti tumanta Isareri vika kia airi *briki* autu karaiti, taaraqaqai autukora kaara Isipi vika oru Isareri vaiinti kaiqaqaa raqikuka qora kaavu numiqake vate tiha, Ni navunaaka airi *briki* tota autuante make, entavata vatevata autuataarave, ti.

¹⁵ Vika minti tumanta Isareri vaiinti kaiqaqaa raqikuka Pero vaiintivano vaunaini orunte nuntu naantu tiha, Are nantiharae tinavu nena kaiqa vaiinti mintima kera qoraiqama timitaaro? ¹⁶ Are kia tinavu ahaka veha timitaraitira, tinavuara *briki* autuate tianarave. Ho ahaka veha kia vaimanta tenavu kia ho airi *briki* autu kaunara kaara Isipi vaiinti kaiqaqaa raqiki variaka tinavu qora kaavu humiqake vataavo. Oho, kia tinavu okaravauve vaivo, ninta Isipi okarama vaivo, ti.

¹⁷ Minti tuvaro Pero vaiintivano aqao tiro, Ne popohara vaiintive. Ne mintiakara ti, ne tiriari tiha, Kairage tenavu tentanavu Variqa Nora Kotira *ofaa* iha quara amitaare, ti variavo. ¹⁸ Vaaka oru qaiqaa kaiqa varaate. Ne kiama ho tinavuqaaahai ahaka veha

varevarave. Ne nenta ahaka veha varakeha tota airi *briki* autintemake, maa entaravata vohaa qaramake airi autuate, tiro.

¹⁹ Pero vaiintivano tota autintemake maa entaravata airi autuate tura kaara Isareri vaiinti kaiqaaqaa raqikuka iruvaro Pero vaiintivano nora maara vikaqaa vatomanta vika Pero vaiinti mini ke ²⁰ tavomanta Mosika Eronika vika veka vaumanta vika vitantara tiha, ²¹ Oho, kairaro Noravano Kotiva nintatanta kaiqa kaara nitanta qoraiqama nimitaarire. Nitanta okara kaara Pero vaiintivanovata, Isipi vaiinti kaiqaaqaa raqiki variakavata, tinavu qoraiqama timite variavo. Vika tinavu aruke aarara netanta qovarama nimitaavo, tura.

Mosiva Kotira aareharo nuntu naantu tura

²² Vika minti tuvaro Mosiva qaiqaa anirantero Nora Kotira aarero tiharo, Noravaauvo, nantiharae are nora maara maa vataakaqaa vataaro? Oho, are mintirevae ti varakaanarare? ²³ Te oru Pero vaiinti ai uva tiva amuna entaraqaahairo viva Isareri vika qoraiqama nimite vaivo. Vika qoraiqama nimite vaivarra are nantiharae kia vika kahaqama nimitera iaro? tiro.

6

¹ Minti tuvaro Noravano Kotiva Mosirara tiharo, Te Pero vaiinti autu amitaaina okarara are vate vaihara tavenarave. Te tenta kempuka vira umiqariraro viva ni Isareri qaqi kairamanta vivarave. Te mintimake vira vahauru kaariraro Pero vaiintivano nai vataqihairo ni Isareri ntata kaarire, tiro.

²⁹ ... Minti tivakero Kotiva Mosirara tiharo, Te Noravano Kotikave. Are te ekaa ai tiva amiaina uvara Isipiqaqaa raqiki vaira Pero vaiinti tiva amiane, tiro.

³⁰ Minti tuvaro Mosiva agao tiro, Are irianarave. Kia te koqe uva ti vaura vaiintika vaunarara tiro, Pero vaiintivano kiama ti uva irianarove, tiro.

7

¹ Mosiva minti tuvarovata, Noravano Kotiva tiharo, Te ai kempukaiqama kaariraro Pero vaiintivano ariara variqavema tianarove. Ai vakaava Eroniva paropeti vaiintivano uva tinantema kero, ai uva Pero vaiinti tiva amianarove.

² Are te ekaa uva ai tiva amiainara Eronira tiva amiraro viva Pero vaiintiara Isareri qaqi kairamanta maa vataraqihai vuate tiarire. ³⁻⁴ Ho te Pero vaiinti avu aato kempukaiqama kaariraro viva kia nitanta uva ho irianarove. Are aahuva kaiqa, vo kaiqa vo kaiqa vira avuqaa qovarama kairarovata, viva kiama ai uva irianarove. Viva mintiaqiro virage, viragaahai te anomake Isipi vika ntaihamake, tenta vaiinti nahenti vo anku vo anku ntita vare vi vataraqihai aitare virerave.

⁵ Te tenta kauqu tutuke Isipi vika ntaihamake, viragaahai tenta vaiinti nahenti Isipiqaqai ntita vare vuru kaaina entara Isipi vika ti okara kankomake iri tave tiha, Quqaama viva Noravano Kotivave tivarave, tiro.

⁶ Viva minti tumanta Mosika Eronika Noravano Kotiva tunte ura. ⁷ Vitanta Pero vaiinti vataake uva tu entara Mosiva 80 ihi varakova vauvaro Eroniva vira vakaava 83 ihi varakova vaura.

Eronira kauruvano memaru kuqu vura

⁸ Noravano Kotiva Mosika Eronikara tiharo, ⁹ Pero vaiintivano nitantara aahuva kaiqa vo qovarama kaiqe tavaare tirara are Eronirara nena kauru vata kanta aquaane tiraro viva nai kauru vata kanta aqu kairaro vira kauruvano memaru kuqu vuarire, tiro.

¹⁰ Kotiva minti tumanta vitanta Noravano Kotiva tuntemake Pero vaiintivano vaunaini orunte, viragaahairo Eroniva Pero vaiinti avuqaavata, vira koqe avu aato ami vau vaiintika nivuqaavata, vaiharo nai kauru vata kanta aqu kovaro vira kauruvano memaru kuqu viro vaura.

¹¹ Mintuvaro Pero vaiintivano nai *vure/quaha* vaiintive, vo kaiqa vo kaiqa tavo vaiintikave, naarama komanta vika ani nai hepi kaiqa vareha ¹² vikavata nai kauru vata kanta aqu kovaro memaru kuqu vura. Mintuvaro Eronira memaruvano vika memaru ekkaa nampiqama kora.

¹³ Ho Noravano Kotiva Mosira tiva amuntemakero Pero vaiinti avu aatovano qaqiqai kempukaiqiro vauvaro viva kia vitanta uva iriraitiro vaura.

Namarivano naare kuqu vura

¹⁴ Mintuvaro Noravano Kotiva Mosirara tiharo, Pero vaiinti avu aatovano qaqiqai kempukaiqiro vaivarro viva kiama vaiinti nahenti qaqi kaira vivarave. ¹⁵ Ho hora toqaqi

Pero vaiintivano Nairi Namari vainaini otu virara arevata mini vuane. Tota ai kauruvano memaru kuquvira, viravata varera otu vira veka namari auvahini variane.

¹⁶ Are vira vita kera mintima tiva amiane: Noravano Kotiva Hiparu vatanaaka Variqavano ariara mintima tivo: Are ti vaiinti nahenti qaqi kairamanta vika oru aahara vatainai vaiha ti hutu tuahera kaate. Tota te vi uvara ai tiva amurara are iriataara vaivara kia irianarave, tiane.

¹⁷ Qaqaa Noravano Kotiva mintima tivo: Te vo kaiqa qovarama kaarirara are vi kaiqara taveharama tiriara quqaa viva Noravano Kotivave tinarave. Are minti tivakera Pero vaiinti qaqaa tiva amiane: Are tavairage te tuatauna kaururaqohai Nairi Namari ruqutu kaariraro Nairi Namariavano naare kuqu vuarire. ¹⁸ Te mintima kaariraro Nairi Namariqi varia havukauka qutu vivaro vi namariva unta i vairamanta Isipi vika kia ho vi namarira nevarave, tiane, tiro.

¹⁹ Minti tivakero Noravano Kotiva qaqaa Mosirara tiharo, Are Eronira mintima tiva amiane: Nena kauru tuua varera oru nora namariqaave, inaara namariqaave, aave vatairaro ekaa namarivano naare kuqu vuarire, tiane. Viva mintima kairaro ekaa namarivano Isipini naareqai kuquviro vairaro namari kaqake ne kurerave taqurave ekaa viraqi naare namarivanoqai variarire, tiro.

²⁰ Noravano Kotiva minti tumanta Mosika Eronika Kotiva tunte ura. Eroniva Pero vaiinti avuquaavata vira koqe avu aato ami vauka nivuqaavata vahiaro nai kauruqohairo Nairi Namariqaa aave vatovaro namarivano naareqama vuvaro ²¹ Nairi Namariqi vau havukauka qutu vuvaro vi namariva voqama kero unta umanta Isipi vika kia ho vi namarira kaqake novaro naare namarivanoqai Isipini ekaa vo namari vo namariqi vaura.

²² Eroniva mintima komanta Isipi *vure/quaha* vaiintinavu vikavata nai hepi kaiqa autu kovaro namarivano naare kuqu vura. Mintuvaro Pero vaiinti avu aatovano qaqiqai kempukaiqiro vauvaro viva Noravano Kotiva „Mosira“ tiva amuntema kero, kia Mosika Eronika tu uvara irura. ²³ Viva kia vi haikarara noraiqaakeri iriraitiro, qaqira kero nai avuhainaa naavuqi oru vaura.

²⁴ Nairi Namari kaqake neva kia vaura kaara Isipi vika namari kaqake nareka Nairi Namari auvahianta ora quijke namari kaqe vaura. ²⁵ Noravano Kotiva Nairi Namari ruqutu kovaro 7 entanavu aitarora.

8

Eqavoka airitahaa qovarama vura

¹ Viraqaaahairo Noravano Kotiva qaqaa Mosirara tiharo, Are Pero vaiintivano vainanaini qaqaa oruntera ti uva maantima kera vira tiva amiane: Noravano Kotiva ariara mintima tivo: Are ti vaiinti nahenti qaqi kairamanta vika oru vaiha ti hutu tuahera kaate.

² Are kia vika kuvantu kairera, te airi eqavoka qovarama kaari vika Isipini vaiha ni Isipi vatanaaka qoraiqama nimitevarave. ³ Nairi Namariqi eqavokavano airitahaa mpiqa viro, viraqihairo ai avuhainaa naavuqive, are vaite varianaraqive, are vaite variana taintaraqaave, mini mini vuanarove. Eqavokavano ai koqe avu aato ami varia vaiintika naavuqive, ai navunaaka naavuqive, kara unta ne varia hantarraqive, kara untareka tuqantaaavi varia tanuraqive ekaa mini mini vuanarove. ⁴ Eqavokavano arive, ai koqe avu aato ami variakave, ai navunaakave, ekaa vikaqaa ravuku nteharo varianarove, tiro.

⁵ Noravano Kotiva minti tivakero qaqaa Mosirara tiharo, Are Eronira mintima tiva amiane: Nena kauquqi kauru totenara tutukera nora namariqaavata inaara namariqaavata aave vataira namari viraqihai eqavoka airitahaa qovaramavi Isipi vataini vi aniate, tiro.

⁶ Kotiva minti tuvaro Eroniva Isipini nora namariqaave inaara namariqaave nai kauru aave vatomanta namariqihai eqavoka airitahaa qovaramavi Isipi vataqaa hihipaamavi vaura.

⁷ Mintumantavata, Isipi *vure/quaha* vaiinti vikavata nái hepi kaiqa vareha vikavata eqavoka qovarama komanta namariqihai vataini vaarintora.

⁸ Mosika Eronika eqavoka qovarama kovaro Pero vaiintivano vitanta naarama kero tiharo, Netanta Nora Kotira aaraivaro viva eqavoka tiqaaahairovata, ti vaiinti nahenti vikaqaaahairovata, vara qaqini kaarire. Netanta minti te nitanta navunaaka qaqi kaari vika Nora Kotira *ofaa* iha quara amitaate, tiro.

⁹ Minti tuvaro Mosiva Pero vaiintiara tiharo, Hove. Are vi entara kaama tairage te vi entaraqaa arive, ai koqe avu aato ami varia vaiintikave, ai navunaakave, vikara irihama

Kotira aarama nimitaari eqavoka ekaa taiqa vimanta Nairi Namariqiqai qaqi variate, tiro.
¹⁰ Mosiva minti tuvaro Pero vaiintivano tiharo, Hurama Kotira aarama timitaane, tiro.

Minti tuvaro Mosiva tiharo, Ho hora are tinantemake, te Kotira aarama amitaarirara viraqaahaira are Nora Kotirara vivaqaima Variqavano vaivo tinarave.

¹¹ Hura eqavokavano ai naavunive, ai koqe avu aato ami varia vaiintika naavuqive, ai vaiinti nahenti naavuqive, kia vairaiti, vika Nairi Namariqiqai vaivarave, tiro.

¹² Minti tivakero Mosika Eronika Pero vaiinti mini ke vevante vura. Mosiva Nora Kotira aareharo eqavoka qaqini varakaane tuvaro ¹³ Noravano Kotiva Mosiva tunte umanta eqavoka naavuqive, vahaqaainive, naahoqive vauka ekaa qutuvi taiqa vura. ¹⁴ Vika ekaa qutu vumanta Isipi vika eqavoka voqaa voqaa ruvaaqumake vatovaro ntereharo voqama kero unta i vaura.

¹⁵ Pero vaiintivano tavovaro eqavoka taiqa vuvaro viva nai avu aato kempukaiqama kero qaiqaa kia Mosika Eronika uva irireva auti vaura. Noravano Kotiva „Mosira“ tiva amuntema kero, Pero vaiintivano kia vitanta uva irura.

Aaquqa airitahaa qovarama vura

¹⁶ Ho Noravano Kotiva qaiqaa Mosirara tiharo, Are Eronirara mintima tiane: Nena kauruqohaira vataini konkoma rupitaitama kaane, tiane. Viva mintima kairaro Isipini konkomanava aaquqa kuqu vuarire, tiro.

¹⁷ Kotiva minti tuvaro Eroniva nai kauruqohairo vataini konkoma rupitaitama kovaro, viraqihairo aequqvavano qovarama viro vaiintiqaave, quaraqaave, hihipaa iro vaura. Ekaa Isipi vataini konkomanava aequqa kuqu vura.

¹⁸ Mintumanta *vure/quaha* vaiinti vikavata mintiare tivake, nái hepi kaiqa autuvarovata, kia qovaraiqura.

Ho aequqa airitahaa vaiintiqaave, quaraqaave, hihipaa iro vaumanta ¹⁹ *vure/quaha* vaiintinavu Pero vaiintiara tiha, Oho, Kotiva nai kempukaqohairo maa haikara qovarama kaivo, ti.

Minti tuvarovata, Pero vaiinti avu aatovano kempukaiquvaro viva Noravano Kotiva „Mosira“ tiva amuntema kero, kia vitanta uva iriraitiro vaura.

Vauvaari airitahaa qovarama vura

²⁰ Ho Noravano Kotiva qaiqaa Mosirara tiharo, Hura are vaaka toqaci himpira Pero vaiintivano Nairi Namarini tuvuainara otu vitakeru virara mintima tiane: Noravano Kotiva ariara mintima tivo: Are ti vaiinti nahenti qaqi kairamanta vika oru vahia ti hutu tuahera kaate. ²¹ Are kia vika nititarera, te vauvaari vara kaari vika ariqaave, ai koqe avu aato ami varia vaiintikaqaave, ai navunaakaqaave, hihipaamavi vaivarave. Vauvaari vika ni Isipi vatanaaka naavu maaqaqi mpinqavi, vatainivata hihipaamavi vaivarave. ²² Gosenini ti vaiinti nahenti varianaini, te mini qaqi vehakuma kaariraro kia vauvaarivano mini varianarove. Te mintiarirara are te Noravano Kotika maa vataraqaa variaina okarara kankomake irinarave. ²³ Te ai vaiinti nahenti qoraigama nimiteha, tenta vauvaari nahenti qaqi vehakuma nimitarerave. Hurama are te vi kaiqara varainara tenavarave. Are minti tivakero Pero vaiinti tiva amiane, tiro.

²⁴ Noravano Kotiva minti tivakero vira qararaa viva vi haikara qovarama komanta vauvaari vika qovaramavi, airitahaa Pero vaiinti naavuqive, vira koqe avu aato ami vau vaiintika naavuqive, mpinqavi ekaa Isipi vataqaa hihipaamavi vaiha vi vatara qoraigama kora. ²⁵ Mintuvaro Pero vaiintivano Mosika Eronika naarama kero vitantara tiharo, Netanta nenta navunaaka ntita vare, Isipi maini nenta Variqa *ofaa* iha quara amitaate, tiro.

²⁶ Minti tuvaro Mosiva aqao tiro, Kia tenavu maini vaiha Nora Kotira *ofaa* iha quara amitararave. Hauri tenavu mintiari vira kaara Isipi vika tinavuvara qorahaama autuavo tivake ori utuvare, tinavu ruqutuqi viha tinavu haru kevorave. ²⁷ Tenavu Kotiva tintemake, Isipi maini ke taaramo entara aahara vatavau vivi, mini orunte tentanavu Variqa Nora Kotira *ofaa* iha quara amitarerave, tiro.

²⁸ Minti tuvaro Pero vaiintivano tiharo, Hove, te ni qaqi kaari ne nenta Variqa Nora Kotirara iriha oru aahara vataini vaiha, nenta Variqa *ofaa* iha quara amitaate. Ne kia niaraini viraiti, aumanto oru vahama *ofaa* iha quaraate. Ho tiriaravata irihama nenta Variqa Nora Kotira aarama timitaivarо „vauvaari taiqa vuarire“, tiro.

²⁹ Minti tuvaro Mosiva nai tiva amiro tiharo, Te ai maini ke, vate vira te Nora Kotira aaraariraro viva tiraro vauvaarivano niqaahairo taiqa vuarire. Hurama vauvaari vika arive, ai koqe avu aato ami varia vaiintikave, ai navunaakave, vika niqaahai vivarave. Oho, are kiama qaiqaa titanta una tiva timitehara, Isareru vatanaaka ravaaqavu kaira vika kia Nora Kotira *ofaa* iha quara amitareka vuate, tiro.

³⁰ Minti tivakero Mosiva Pero vaiinti mini kero, Nora Kotira aarovaro ³¹ viva Mosiva tuntema kero vira uva irura. Vauvaari vika Pero vaiintive, vira koqe avu aato ami vau vaiintikave, vira navunaakave, mini ke vuvaro, kia qaiqaa vauvaari voqavanovata vaura. ³² Mintuvaro Pero vaiintivano nai avu aato kempukaiqama kero, kia Isareri qaqi komanta vura.

9

Kotiva tuvaro Isipi vatanaaka quara quiti vura

¹ Ho qaiqaa Noravano Kotiva Mosirara tiharo, Are Pero vaiintivano vainaini oruntera mintima tiane: Noravano Kotiva Hiparu vatanaaka Variqavano ariara mintima tivo: Are ti vaiinti nahenti qaqi kairamanta vika oru vaiha ti hutu tuahera kaate. ² Are kia vika kaira vivera, ³ te nora aiha viraara vara kaari ai ohive, donkive, kamerive, purumakauve, sipisipive, memeraave, ekaa qutu vivarave. ⁴ Te Isipi vika quaraqai qoraiqama nimite Isareri quara qaqi vehakuma nimitarerave. ⁵ Te Noravano Kotika hora mintirerave. Minti tivakera Pero vaiinti tiva amiane, tiro.

⁶ Ho vira qarara Noravano Kotiva tuntema komanta ekaa Isipi quara rovara vare qutu vumanta Isareri quaraqihairo kia voqavanovata qutu vura.

⁷ Mintuvaro Pero vaiintivano vi okarara nai navunaaka iromanta vika vira tiva ami tihā, Isareri quaraqihairo kia voqavanovata qutu vivo, ti. Minti tuvarovata, viva qaqqi nai avu aato kempukaiqiharo kia Isarerira vuate tura.

Isipi vatanaaka vaataqaa meqa/veqa qovarama vura

⁸ Ho Noravano Kotiva qaiqaa Mosika Eronikara tiharo, Netanta oru *briki unte/nute* varia naavuraqihai iha hanta varaate, tivakero Mosirara tiharo, Are Pero vaiinti avuqaa vaihara hanta vira virini aqu kaane. ⁹ Are mintima kairaro hanta viva konkoma voqaara ekaa Isipi vataini vi aniraro vaiintiqaavata quaraqaaavata veqavano qovarama viro nora numuara itaariire, tiro.

¹⁰ Minti tumanta vitanta oru *briki unte* vau naavuraqihai hanta vare, Pero vaiinti avuqaa oru vaura. Mosiva hanta virini aqu kovaro viraqaahairo vaiintiqaavata quaraqaaavata veqavano qovarama viro nora numuara itora.

¹¹ Mintumanta Pero vaiinti vira *vure/quaha* vaiinti vika Mosira avuqaa oru variare tuvaro veqavano vikaqaavata vaura kaara vika kia ho Mosira unaini oruntora.

Veqavano vikaqaavata ekaa Isipi vatanaakaqaavata vauvaro ¹² Noravano Kotiva Pero vaiinti avu aato kempukaiqama kovarora tiro, Noravano Kotiva Mosira tiva amuntema kero, Pero vaiintivano kia Mosika Eronika uva irura.

Taaruvano/Kaampuravano Isipi vatanaaka qoraiqama kora

¹³ Ho Noravano Kotiva qaiqaa Mosirara tiharo, Hura vaaka toqaqi himpira oru Pero vaiinti vita kera virara mintima tiane: Noravano Kotiva tinavu Hiparu vatanaaka Variqavano ariara mintima tivo: Are ti vaiinti nahenti qaqi kairamanta vika oru ti hutu tuahera kaate. ¹⁴ Are kia vikara vuate tirera, te aiyata, ai koqe avu aato ami varia vaiintikave, ai navunaakave, anomake ntaiharerave. Te mintiarirara are tiriara tihara, Mpo, kia vira voqaava vovanu vataini vaivo. Vivaqaima Variqavano vaivo, tinarare.

¹⁵ Oho, te tenta kauqu tutuke nora rovaraqhaini ntaihauraitirio, are nena navunaaka hampata haaruma taiqa uuaraitirio. ¹⁶ Are ti kempuka tavaira ekaa maa vataraqaa vaikavata ti hutuara iriate ti, te ai qaqi vehakuma amitaurara are qaqi varianarare. ¹⁷ Te ai mintima amite vauraravata, ai avu aatovano kempukaiqivara are kia ti vaiinti nahentiara ho vuate tiaro.

¹⁸ Vira kaara te hora maa kuari avuraqaa tiariraro *taaruvano/kaampuravano* noraiqaakero Isipi vataqaa ntuanarove. Haaru entavata maa entaravata kia minti *taaruvan/kaampurava* nti vairave. ¹⁹ Virara irihara are nena navunaaka tiva nimira vika nái quara ntita vare haraara naavuni vuru kaate. Vaiintive quarave vahaqaqaini vaivarō *taaruvano/kaampuravano* ntiharo vika ekaa aru taiqama kaanarove. Minti tivakera Pero vaiinti tiva amiane, tiro.

²⁰ Kotiva minti tuvaro Mosiva Pero vaiinti tiva amumanta Pero vaiinti vira koqe avu aato ami vau vaiintika hini kuka Noravano Kotiva tu uvvara iriha qeteha kante nái quaravata nai kaiqa vaiintivata ntita vare haraaraqī komanta ²¹ hini kuka kia Noravano Kotiva tu uvarara noraiqaake iriraiti, nái kaiqa vaiintivata quaravata vahaqaqaini komanta vaura.

²² Mintuvaro Noravano Kotiva Mosirara tiharo, Nena kauqu tutukera naaruvinai aave vatairaro *taaruvano/kaampuravano* Isipi vataqaa ntiharo vahaqaqaini vai haikara vaiintive, quarave, kara qampiqe vairave, ruqutu taiqa kaarire, tiro.

²³ Minti tuvaro Mosiva nai kauruqohairo naaruvinai aave vatovaro Noravano Kotiva tuvaro naaruuvavano karara ti vauvaro *taaruvano/kaampuravano* nti vauvaro aauquakaavano voqama kero airi tataa utiharo vata ari vaura. Noravano Kotiva tuvarora tiro, *taaruvano/kaampuravano* Isipi vataini nti vaura.

²⁴ *Taaruvano/Kaampuravano* nti vauvaro aauquakaavano qaiqaa qaiqaa uti vaura. Haaru entavata kia *taaruvano/kaampuravano* mintima keharo Isipi vataini ntumanta tavora.

²⁵ Ekaa vi vataraqaa *taaruvano/kaampura vano* ntiharo ekaa vahaqaini vau haikara vaiintive, quarave, karave, aru taiqa kora. *Taaruvano/Kaampuravano* ntiharo naahoqi kara qampiqora ekaa vataini ravantau vatero, ekaa katarivata hiqama kovaro kia marevata vaura. ²⁶ Mintuvaro Gosenini Isareru vataanaaka vaunaini kia mintura.

²⁷ Mintima kero nti vauvaro Pero vaiintivano Mosika Eronika naarama kero tiharo, Oho, vate te Kotira uva raqama kauro. Noravano Kotiva avuqavu kaiqa varaimanta te tenta navunaaka hampata qora kaiqama varauro. ²⁸ Mpo, *taaruvano/kaampuravano* nti vaivarao naaruuvavano karara ti vaivarao ti voqamakero haatu itaivo. Te ni nititaari homa vivarave. Te kia ni „Isareru“ qaiqaavata ravaaqavu karerave, tiro.

²⁹ Minti tuvaro Mosiva nai tiva amiro tiharo, Te vevante maa vatukara maini ke te tenta kauqu tutuke Nora Kotira aaraariraro viva tiraro naaruuvavano kia voqavata karara tiraro *taaruvanovata/kaampuravanovata* taiqa vuarire. Noravano Kotiva mintima kairara are Kotiva maa vataraqaa raqikainarara kankomakera irinarave. ³⁰ Ho te iruramanta arevata ai koqe avu aato ami varia vaiintikavata kia Nora Kotirara noraiqaake iriraiti, kia vira aatu qeteha variavo, tiro.

³¹ Vi entara *baalivano** mpeqaiqurara tiro, *taaruvano/kaampuravano* vira ravantau taiqa kero, utataari kuto naaquntara repa voqaara viravata ravantau taiqa kovaro, ³² uitivano qaqi ahora vauvarora tiro, kia vira ravantau kora.

³³ Ho Mosiva Pero vaiinti mini kero vevantero vatuka aaqaini vaharo nai kauqu naaruvinai tutukero Nora Kotira aarovaro aaqu tanta vuvaro *taaruvano/kaampuravano* tajovaro naaruuvavano kia uva tiraitiro, tirema vaura.

³⁴ Mintuvaro Pero vaiintivano tavovaro tirema vauvaro viva qaiqaa qora kaiqa varero. Vivavata vira koqe avu aato ami vau vaiintikavata nai avu aato kempukaiqamate vaura.

³⁵ Noravano Kotiva Mosira tiva amunteema kero, Pero vaiintivano kia Isareriaru vuate tura.

10

Kaintaaqavano qovarama vura

¹ Noravano Kotiva qaiqaa Mosirara tiharo, Pero vaiintivano vainaini vuane. Vivavata vira koqe avu aato ami varia vaiintikavata ti nora kaiqa, vo kaiqa vo kaiqa tavaate ti, te vika avu aato kempukaiqama nimitauramanta vika kia ai uva iriavo.

² Are naantiari nena vaintivata nena naintivata te Isipi vataanaaka ntaiheha nora kaiqa varaaínarara vika tiva nimiane ti, te nora kaiqa vika nivuqaa qovaramake vaunarave. Te Noravano Kotika variaina okarara nevata kankomakere iringat, te minti vaunarave, tiro.

³ Kotiva minti tuvaro Mosiva Eronikantiro Pero vaiintivano vaunaini oruntero virara tiharo, Noravano Kotiva tinavu Hiparu vataanaaka Variqavano ariara mintima tivo: Nanti nanti entae are ti uva kia iriraitira, kia ti vevaaraini vainerare? Are ti vaiinti nahenti qaqi kairamanta vika oru ti hutu tuahera kaate. ⁴ Are vikara kia vuate tirera, te hura kaintaaqa airitahaa maa vataraqaa qovarama karerave.

⁵ Vika airitahaa qovaramavi, vata maata hihipaama vivara are kia ho vata tavenarave. Vika vaiha *taaruvano/kaampuravano* kia qoraiqama kai naaho maatara namaqi viha taiqa kevarave. Vika naahovata, naahoqi vaina katarivata, ekaa nama taiqa kevarave.

⁶ Vika ai naavuqivata, ai koqe avu aato ami varia vaiintikavata naavuqivata, ni Isipi vataanaaka naavuqivata, oricete mpiqama kevarave. Haaru entavata maa entaravata ai naaqukave, ai kaivaqaukave, kaintaaqa airitahaa qovarama vuainara kia favorave, tiro.

Mosiva minti tivakero tuqantaa viro Pero vaiinti mini kero vuvaro ⁷ Pero vaiinti koqe avu aato ami vauka virara tiharo, Oho, vi vaiintiva airi enta vaharo tinavu qoraiqama timitaqa vuantorave. Are Isareru qaqi kairaa vika oru nai Variqa Nora Kotira autu tuahera kaate. Are kiae kankoma kera iriaro? Isipi vatavanu qoraiqama vivo, ti.

⁸ Vika minti tuvaro Pero vaiintivano Mosika Eronika qaiqaa naarama kero vitantara tiharo, Netanta nentatanta navunaaka ntita vare oru nenta Variqa Nora Kotira autu tuahera kaate, tiro. Minti tivakero vitanta irero tiharo, Netanta tauka taukae ntita vare vivarave? tiro.

* ^{9:31:} *Baali* vaireva, *raisi* voqaara vaira.

⁹ Minti tuvaro Mosiva nai tiva amiro tiharo, Tenavu Nora Kotira autu tuahera karera vuainarara ti, tenavu ekaa tentanavu vaiinti nahenti qaraakaukave, konta naampaise, maaqu raavurave, purumakauve, sipisipive, memeraave, ekaa ntita vare virerave, tiro.

¹⁰ Minti tuvaro Pero vaiintivano aqao tiro nai kauqu ainqaa aqukero tiharo, Te nitanta Variqa Nora Kotira autuqaa mintima turo: Kia te ni nahenti vaintiara vuate tirerave. Oho, te tavaura ne ekaa ruqemake vireka auti variavo. ¹¹ Ne nenta Variqa Nora Kotira autu tuahera kareka ivera, ne vaiintiqai mini vuate, tiro. Pero vaiintivano minti tumanta vira kaiqa vaiinti vonavu Mosika Eronika ventaqi vi, vitanta vahaqaini veva kora.

¹² Ho Noravano Kotiva qaiqaa Mosirara tiharo, Nena kauqu tutukera Isipi vataqaa aave vatairaro kaintaaqavano qovarama viro maa vataraqaa vi aniharo *taaruvano/kaampuravano* kia qoraiqama kai naaho maatara namaqi viharo taiqa kaarire, tiro.

¹³ Minti tuvaro Mosiva nai kauruqohairo Isipi vataqaa aave vatovaro Noravano Kotiva tuvaro uvaivano kuari urinaihairo vi entaraqavata entaqivata utuqiro vi vaumanta vira qararaa tqaqi kaintaaqa vika uvai vataake anura.

¹⁴ Vika airitahaa Isipini orunte ekaa vataqaa hihipaamavi vaura. Haaru enta kia vira voqara qovarama vurave. Naantiara entavata kia vira voqara qovaraiqianarove.

¹⁵ Kaintaaqa vika Isipi vataqaa hihipaamavi vauvaro vatavano konkiraqama vurarama turo. Kaintaaqa vika *taaruvano/kaampuravano* qaqi ko naaho maatarave, katari tavave, namaqi viha ekaa nama taiqa kovaro Isipini katari mareve, naaho mareve, kia voqavata vaura.

¹⁶ Mintuvaro Pero vaiintivano vaaka Mosika Eronika naarama kero tiharo, Oho, te nitanta Variqa Nora Kotira uvaivata nitanta uvaivata raqa kauro. ¹⁷ Netanta ti qora uva qaiqaa tauru timite, nenta Variqa Nora Kotira aaraivarо viva kaintaaqa taiqa kairaqe te kia qutiraiti, qaqi variare, tiro.

¹⁸ Minti tuvaro Mosiva Pero vaiinti mini kero Nora Kotira aarovaro ¹⁹ Noravano Kotiva uvai tuqantaa kovaro uvaivano kuari avu ruhunkinaihairo utiharo kaintaaqa vikavata varero vevara Naare Namariqi muntuvi kovaro kaintaaqa voqavanovata kia Isipi vataini qaiqaa vaura.

²⁰ Mintuvarovata Noravano Kotiva Pero vaiinti avu aato kempukaiqama amitovaro viva Isarerri vika kia qaqi komanta vura.

Konkiraiquva Isipi ravaaqavu kora

²¹ Ho Noravano Kotiva qaiqaa Mosirara tiharo, Nena kauqu naaruvaini tutu kairaro konkiraqiva Isipi vata maata anomakero ravaaqavu kairaro vaiintivano tupupauma kero vi aniharo nuarire, tiro.

²² Minti tuvaro Mosiva nai kauqu naaruvaini aave vatovaro konkiraquva taaramo entara variqiro viharo Isipi vata maata ravaaqavu kora. ²³ Mintumanta Isipi vika kia ho vo vaiintivata tavaraiti, kia ho nai naavuqihai vevantaraiti vauvaro, Isarerri vika vauvainiqai qaqi aatiteharo vaura.

²⁴ Mintuvaro Pero vaiintivano Mosika Eronika naarama kero vitantara tiharo, Netanta nenta navunaaka hampata oru nenta Variqa Nora Kotira autu tuahera kaate. Ni nahentivata vaintivata homa ni hampata vivarave. Nenta sipisipive, memeraave, purumakauve, vikaqai maini ke vuate, tiro.

²⁵ Minti tuvaro Mosiva aqao tiro, Tenavu kia vikavata ntita vare viraiti qaqi vuarera, tenavu kia ho Nora Kotira *ofaa* ekaara kaintu iha quara amitarerave. ²⁶ Tenavu kia quara voqavata maini karaiti, ekaa ntita vare virerave. Tenavu tentanavu quara vikaqihai hini aruke Nora Kotira *ofaa* iha quara amitarerave. Tenavu mini kia viraiti maini variarerera, tenavu vi quarara vi quarara arukaaina okarara kiama irirarave, tiro.

²⁷ Mosiva minti tuvaro Noravano Kotiva Pero vaiinti avu aato kempukaiqama amitovaro Pero vaiintivano Isarerri kia ho vivarave tiro.

²⁸ Pero vaiintivano Mosirara tiharo, Kia ti avuqaa variane. Vuane. Kia qaiqaa ti aaqanto ani variane. Are qaiqaa ti aaqanto ani vaina entara are qutuma vinarave, tiro.

²⁹ Pero vaiintivano minti tuvaro Mosiva nai tiva amiro tiharo, Ho are tinantemake, kiama te qaiqaa ai aaqanto ani vairerave, tiro.

Qorainti vainti avuhainaaka qutu virara tura

11

¹ Ho Noravano Kotiva qaiqaa Mosirara tiharo, Te qaiqaa vohaa tataa Pero vaiintivata Isipi vikavata ntaihamma kaariraro Pero vaiintivano ni qaqi kairamanta vuate. Vi entara viva ni nititeharo vuana vaina tiramanta ne ekaa vivarave, tura...

12

¹ Mosika Eronika Isipini vauvaro Noravano Kotiva vitantara tiharo, ² Ne Isareri maa torarama avuni vai toraravema tiate. Qaraaka ihi anintairaro vi toravama avuni varianarove. ³ Netanta ekaa Isarerira mintima tiate: Maa torara 10 entaqaa vaiintivano nai naata vaintiara iriharo memeraa naative, sipisipi naative, vohaiqa varaanarove. Ekaa Isareri vatanaa vainti vika nai naata vaintiara iriha mintima kehama varevarave.

⁴ Vaiintivano tavairaro kia vira vaintaira airi vaivera, viva homa nai aqanto vaina vaintira hampata memeraa naative, sipisipi naative, vohaiqa aruke nevarave. Ekaa vika mati namakeva ho vairera, vitanta homa vohaiqagai aruke nevarave.

⁵ Viva arukaaina sipisipie, memeraae vaireva, qora vohaa ihi varakaainara vairaro vira vaataqaa kia numuara variarire. ⁶ Ekaa Isareri vatanaaka nai sipisipi naaties, memeraa naaties, koqemake tuataqi vivi, vi torara 14 entaqaa vira aru kaate.

⁷ Vira aruke, vira naare kaqa vare, sipisipi naaties, memeraa naaties nareka i naavura gentiqaa aquataate. Qenti vira hini hini auvahitantavata, virinivata, naare aquataate. ⁸ Mintimake viraqaahai ne sipisipi naati virae, memeraa naati virae, qaqi ihaqaa untake, entaqi vailha vira naate. Ne vira nareka ihama naahara hunkavinaravata, mpareti kia taupatitira vainaravata, mati vira vataake naate.

⁹ Ne mati vira kia qaraaka naate. Kia mati vira namariqi arake naate. Kia vira arara tuvu qaqini varakaraaiti, qaqi vira kaintu ihaqaa untake naate. ¹⁰ Ne kiama hini mati qaqi kaate. Toqaqi hini qaqi vairera, vira varake ihaqira quara kaivarita ita vuarire. ¹¹ Ne aaraini vireka i utavaaqara nonkute, suvata nonkute, kauru guruvare viravata kauquqi tuate, viraqaahai vi karara vaaka naate. Ne vi entara te Nora Kotika ni Vehakuma Nimitaaina Kararama nevarave.

¹² Vi entara te entaqi Isipi vataini vi aniha ekaa avuni vatatera, qorainti vaintive, aantauvahui qora vaikave, aru taiqa karerave. Mintima keha te Noravano Kotika Isipi vika una variqanavu qoraiqama nimitarerave.

¹³ Ne qenti hini hini katariqaa naare aquatera vira tave, virara te ni Isareri naavuma vaivo tirerave. Te naare vira taveha, ni vehakuma nimiteha qaqi aitare oru Isipi vikaqai ntaiharerave. ¹⁴ Te Noravano Kotika ni vehakuma nimitaaina okarara irihama, ne vo ihi vo ihi vi entaraqaa qaqaa vi karara naate. Nevata ni vaintivaravata mintiaqi vuate.

Kia noqavu mparetira no entara

¹⁵ Minta tivakero Noravano Kotiva qaqaa tiharo, Ne 7 entara variqi viha taupatitira vataake untate mparetira kia naraiti, qaqi mparetigai naate. Ne hoqarennaa entaqaa nenta naavuqihai ekaa taupatitira qaqira muntu aquaivarao kia ni naavuqi variarire. Ne 7 entanavu variqi viha kia noqai mparetira viraqai naate. Niqihairo vovano taupatitira vataake untate mparetira namakairera, te vi vaitintirara kia ti navunaarave tirerave.

¹⁶ Hoqarennaa entaqaaavata ekaanaini 7 entaqaaavata ne ruvaaqumavi vайha ti hutu tuahera kaate. Vi entatantaaqaa kia vo kaiqavata vararaiti, karaqai untakeha naate. ¹⁷ Naantiara ne vo ihi vo ihi maa entaraqaa ruvaaqumavi vайha qaqi mpareti nehamma maa entara te ni Isipihai ntita vuru kaaina entarara iritaate. Nevata ni vaintivaravata vi entara vo ihi vo ihiara iriqi viha variate, tiro...

²¹ Kotiva minti tuvaro Mosiva Isareri vika nora vaiintinavu naarama kero vikara tiharo, Nenavu oru sipisipi naaties, memeraa naaties, kaamate vira aruke, nenta naata vaintiara irihama Kotiva vi entara ni Vehakuma Nimiteharo qaqi ori aatarakaaina karara geramataate.

²² Ne vi quarara aruke vira naare tanuqi kaqa vare, katari mare okuvera voqaa varake, naareqi quntamake naavu qenti hini hini auvahitantaqaa aqute, qenti virinivata aqute, viraqaahai naavuqi oru variate. Ne naavuqihai kia vevantaraiti, qaqi variqi vivi aatitake, toqaqi vevantaate.

²³ Entaqi Noravano Kotiva Isipi vataini vi aniharo Isipi vika qorainti vainti kara hunka aruqi viharo viva ne qentiqaa naare aquitera taveharo, ni vehakuma nimiteharo qaqi vitaraanarove. Kotiva qioqama tairaro Arukaaina *Enseliva* kia ni naavuqi origetero ni qorainti vainti kara hunka aru kaanarove.

²⁴ Nevata nenta kuvuarama tekavata ekaa vo ihi vo ihi maa okararama avataqi vuate.

²⁵ Naantiara Noravano Kotiva ni nimireva ina vataraqaa orunte, ne qaqiqaima vi karara namaqi vuate.

²⁶ Ni vaintivara niara ne nana karae ne variavo timanta ²⁷ ne vika tiva nimi tiha, Haaru Noravano Kotiva tinavu Isareri vehakuma timiteharo tinavu naavu qaqi ai aatarakero oru Isipi vika qorainti vainti kara hunka aru korave tiate, tiro.

Mosiva minti tumanta Isarerri vika vi uvara iri, viraqaaahai vika kankakaamavi vaiha Nora Kotira autu tuahera kora. ²⁸ Noravano Kotiva Mosika Eronika tiva nimuntemake, Isarerri vika mintura.

Qorainti vanti kara hunka qutu vura

²⁹ Vi entara enta avuta Noravano Kotiva Isipi vika qorainti vanti kara hunka avuhainaaka ekaa aru taiqa kora. Pero vaiinti vira vaintive, ekaa vo vanti vo vaintive, karapuhiqi vau vaiintika vika vanti kara hunkave, aantauvahi qora avuni vatatokave, ekaa aru taiqa kora.

³⁰ Aru taiqa komanta Pero vaiintivanove, vira koqe avu aato ami vau vaiintikave, ekaa Isipi vikave, entaqi vika himpi, nái qorainti vanti qutu vura kaara noraiqaake iqí rate vaura. Ekaa Isipi vika naavuqihairo kia qorainti vanti kara hunka voqavanovata qaqi vauvoro ekaa aru taiqa kora.

Isarerri vika katu vare vura

³¹ Ho vi entara entaqi Pero vaiintivano Mosika Eronika naarama kero vitantara tiharo, Netanta ekaa Isarerri hampata himpi, tinavu Isipi ke, katu vare vuate. Netanta tota tintemake, oru mini Nora Kotira autu tuahera kaate. ³² Netanta tintemake, nenta sipisipive, memeraave, purumakauve, ntita vare vuate. Ne vireka iha nenta Variqa aaraivaror viva tivata koqema timitaarire, tiro.

³³ Pero vaiintivano minti tumanta Isipi vikavata tiha, Oho, Isarerri vika kia vaaka vivera, tenavu ekaa qutuma virarave, tivakeha Isarerri vikara vihi vaahi tiha vaaka vuate ti vaura. ³⁴ Manti ti vaumanta Isarerri vika nái mpareti kia taupatitira vataake tuqantaatora kia untaraiti, qaraaka mpareti tanuqi qaqi vatora varake, tavunaqohai vira naavumake aqu vare vura.

³⁵ Mosiva tuntemake Isarerri vika oru Isipi vika naariha tiha, *Kori* origohai aututaa haikarave, *silvaa* origohai aututaa haikarave, utavaaqave, timiate tumata Isipi vika vi haikara vi haikara vika nimura.

³⁶ Noravano Kotiva Isarerri vika kahaqurara ti, Isipi vatanaaka vikara nora vaiinti nahentive tivakeha vika vi haikara vi haikara qaqi nimumanta vare vura.

Mintima keha Isarerri vika Isipi vatanaaka vato airairara varora.

³⁷ Isarerri vika himpi Ramesesi vatuka mini ke, vatavau vivi, Sukoti vatukaini oruntora. Vika vaiinti vaireka, 600,000 vaumanta vika nahentivata vaintivata airitahaa vaura.

³⁸ Vika nái sipisipive, memeraave, purumakauve, ruhaaqiqi viha vumanta airi vo vatanaakavata vika hampata vura. ³⁹ Isarerri vika aaraini viha nái mpareti vare vura untake nora... Isipi vatanaaka vikara vuana yaina tumantara ti, Isarerri vika kia ho mpareti taupatitira vataake untaraiti, vika aaraini viha vi mparetira qaqi untake nora.

⁴⁰ Isarerri vika Isipi vataini 430 ihinavu variqi vura. ⁴¹ Ho 430 ihi aitarovaro Noravano Kotiva vika kahaqumanta vika vi vataro ke, katu vare vurama...

13

Kotiva Isareriqaa raqikiqiro vura

¹⁷ ... Pero vaiintivano Isarerriara ho vuate tuvaro Kotiva Isarerri vika ntita varero kia Pirisia vataini qiqu aaraqaa viraitiro, viva vo aara, vukai aaraqaa vika ntita varero vura. Viva tiharo, Vika qiqu aaraqaa vimanta vo vatanaaka vika hampata raqireka auti vaivera, vika naatu qetake anirante qaiqaa Isipini vivorave, tivakero vika vukai aaraqaa ntita varero vura.

¹⁸ Kotiva Isarerri vika vo aaraqaa ntita varero aahara vataini viro, Naare Namari vaunainiara vumanta Isarerri vika nái auvihehavaavata vare vura.

¹⁹ Haaru Iohepiva qutu vireva iharo viva nai qata vakaukavarara Isarerira maaqunavuara tiharo, Kotiva naantiara ni kahaqira homa ne Isipihai katu vare vivarave. Vi entara ti vuhaarivata vare vuate, tivakero nai qata vakaukavarara tiharo, Nenavu kauqu aiqiqaa aqukeha tenavu mintirerave tiate, turara tiro, Mosiva vireva iharo viva oru Iohepira vuhaarivata varero Kenaanini quntareva vura. (Okara 50:25)

²⁰ Ho Isarerri vika Sukoti mini ke oru Etamini aahara vata auvahini nái seri naavu maaqa kaqate vaura.

²¹ Vika aatitoraqaa aaraini vi vauvaro Noravano Kotiva quromuravano vaavi vauraqi vauvaro vika avuni viharo aara numiqomanta vi vaura. Entaqi Noravano ihavano vaavi ite vauraqi vauvaro vika aara ataama nimite vaumanta vika aara ho taveha vi vaura. Kotiva mintima nimite vaumanta Isarerri vika aatitoraqaaavata entaqivata ho aaraini vi vaura.

²² Aatitoraqaa quromuravano kia vika qaqira karaitiro, qaqi viva avuni vaavi vauvaro entaqi ihavano kia vika qaqira kero viraitiro, viavi iteharo vika avuni vi vaura.

14

Isareri Naare Namari taqa vare vura

⁵ ... Isareri aaraini vi vaumanta vokuka Pero vaiinti tiva ami tiha, Vika rugemake vuavo, tumanta Pero vaiintivanovata vira koqe avu aato ami vau vaiintikavata tiha, Oho, tenavu kia vikara vuate tiataarave. Tenavu vikara vuate turamanta vika vuamanta tinavu kaiqa vara timiteka kia variavo, ti.

⁶ Minto tivake Pero vaiintivano tiharo, Ti iqoka *kaarinavu* gerama timitaate, tumanta gerama amitovaro viva nai iqoka vaiintinavuvata ntita varero vika avata varero vura.

⁷ Viva iqoka *kaari* 600vata varero, Isipini ekaa vo iqoka *kaarinavuvata* varora. Iqoka *kaari* vira varaqi nukavata vauvaro Pero vaiintivano vika hampata Isareri avataqiro vura.

⁸ Isareri vika rugemake aaraini viha quahake vi vauvaro, Noravano Kotiva Pero vaiinti avu aato kempukaiqama amitovaro viva nai iqoka vaiinti ntita varero vika avataqiro vura.

⁹ Isipi iqoka vaiinti vokuka iqoka *kaariqi* vi vaumanta vokuka ohi tauvaqaqaa oquvi vi vaumanta vokuka vatavaaura avataqi viha tavomanta Isareri vika Naare Namari auvahianta, Pi-Hahiroti vatukavata Baali-Sefoni vatukavata vaunaini, nái *seri* naavu maaqa kaqate vaura.

¹⁰ Isareri vika mini vaiha vutu tavovaro Pero vaiintivano nai iqoka vaiintinavu ntita varero ani vaumanta vika vogamake naatu itomanta oi aai ti vaiha Nora Kotira aare vaura. ¹¹ Vika Mosirara tiha, Oho, Isipini tinavu qunte vatava kia vaivarae are tinavu tivita varera maini aahara vatainai aniararamanta tenavu maini qutu virarare? ¹² Oho, quqaae tenavu Isipini vaiha ariara tinavu qaqi kairage tenavu Isipi vika kaiqa vara nimitaqi vuare tunarave? Oho, tenavu kia maini aniraiti, Isipi vika kaiqa vara nimitaqi vuataara vaimanta, tenavu qumina maini aahara vatainai vaiha qutu virarare, ti.

¹³ Vika minti tuvaro Mosiva vika nái tiva nimiro tiharo, Ne kia qetaate. Ne kempukaiqamake vaiha Noravano Kotiva vate ni ruaruama nimitaaaina okarara tavaate. Ne Isipi vatanaaka vate tave variaka kia qaiqaavata tavevarare. ¹⁴ Noravano Kotiva naivano ni kahaqiharo ni navutaaka hampata iqoka raquanarove. Ne kia iqoka raqiraiti, qaqima vaivarave, tiro.

¹⁵ Minto tuvaro Noravano Kotiva Mosirara tiharo, Nantiharae are ti haare variaro? Are Isarerira tiramanta vika himpi vuate. ¹⁶ Are nena kauru tutukera nora namariqaa aave vatairaro namari vira hini hini rairaviriro avutantuna aahara vata vairamanta Isareri vika mintuna vuate. ¹⁷ Te Isipi vika avu aato kempukaiqama *kaari* vika qaiqaa ni avataqi vuate. Pero vaiintivanove, vira iqoka vaiintinavuve, iqoka *kaarinavuve*, ohinavuve, mintimake aniqe te vika naatara kaariraro ti hutuvano uritara kero varianarove.

¹⁸ Isipi iqoka vaiinti vikavata namari taqareka ivaqe te tenta okara vika numiqarerave. Vate Isipi vika anomake te Noravano Kotika mpeqa okara autuainara tavevarare, tiro.

¹⁹ Kotiva minti tuvaro viva atito *enseliva*, Isareri iqoka vaiintinavu avuni vura qaqira kero orurantero Isareri vika tauvaqaini aitare vauvaro, quromuravano vaavi vauvavata vika avuni vunaihairo aitarero vika tauvaqaini ani vaavi vaura.

²⁰ Quromuravano viva Isareri hini Isipi hini avutana vaura. Mintiharo entaqi Isareri vika ataama nimiteharo, Isipi vika konkira aru nimitomanta vika kia ho favora. Mintuman-tara ti, Isipi vika Isareri hampata raqiva kia ho vaura.

²¹ Ho Mosiva nai kauqu tutukero nora namariqaa aave vatovaro entaqi Noravano Kotiva tuvaro uvaivano noraiqaakero utiharo namari venta ventamaqiro vuvaro aahara vatavano qovarama viro vauvaro namarivano rairaviro hini hini vaumanta ²² Isareri vika namari avutana aahara vata vaura vura. Namarivano hini hini vaavi vauvaro avutantuna aahara vata vauraqaa vika oritare vura.

²³ Mintumanta Isipi vika aninte tiha, Kaiqe tenavuvata mintuna vika avataqi vuare, tivake, Pero vaiinti ohinavuve, iqoka *kaarinavuve*, ohiqaa raqikukave, vikavata mintuna vura. ²⁴ Mintuvoro vira qararaa Noravano Kotiva quromuravano iha iteharo vaavi vauraqihairo tavomanta Isipi vika iqoka vaiintinavu mintuna vi vauvaro viva vika avu aato hampiqama kora. ²⁵ Viva vika mintuma kora kaara, vika iqoka *kaari* aiqunavu horaqi rupeqa vumanta vika vukaari utukeha vi vaura. Vika tiha, Oho, Noravano Kotiva Isareri vikarao tiro, tinavu hampata raqi vaivo. Kaiqenavu qaqirake anirante vuare, ti.

²⁶ Minti tuvaro Noravano Kotiva Mosirara tiharo, Nena kauqu qaiqaa tutukera namariqaa aave vatairaro namarivano anirantero viharo Isipivata, vika iqoka kaarivata, vika ohivata, ravaaqavu kaarire, tiro.

²⁷ Kotiva minti tuvaro Mosiva qaiqaa nai kauqu tutukero namariqaa aave vatovaro aatitareva ruvahama vuvaro namarivano anirantero qoqaraanaini vura. Isipi vika rugemake virare tuvaro Noravano Kotiva vika namariqohairo raqutu komanta vika namariqi qutu taiqa vura.

²⁸ Namarivano anirantero viharo vika iqoka kaarivata, iqoka kaariqaa raqiku vai-intikavata, ekaa Isipi vatanaaka iqoka vaiintinavuvata, ravaaqavu kora. Isipi vika Isareri avataqi vuare tuvaro namarivano vika raqutu komanta qutu taiqa vuvaro kia voqavanovata qaqi vaura. ²⁹ Isareri vikaqai qaqi aahara vatavaura vi vauvaro namarivano hini hini vaavi araviro vaumanta vika qaqi vitare vura.

³⁰ Vi entara Noravano Kotiva Isareri kahaqiharo Isipi kauquqihairo ruaruama komanta Isareri vika tavovaro Isipi qutu vulka vaatavano namari auvhianta vona vona vaura.

³¹ Isareri vika tavovaro Noravano Kotiva mpeqaiqama kero Isipi vika naatara komanta vika Nora Kotira aatu qeteha Kotira uvavata, vira kaiqa vaiinti Mosira uvavata irireka auti vaura.

15

Mosiva Kotira autu tuahereharo ihi tura

¹ Vi entara Mosiva Isareri hampata ihi tiharo Nora Kotirara mintima tiro:

Noravano Kotiva tinavu navutaaka kempukaiqama kero naatara kairara ti, te vira autu tuahera keha virara ihi tirerave. Kotiva vika ohivata ohi tauvaqaaqaa variakavata namariqi vara aqu kairave.

² Noravano Kotiva ti kempukaiqama timitaimantara ti te ihi ti vauro.

Vivama ti ruaruama timitaivo.

Vivama ti Variqavano vaimanta te vira autu tuahera karerave.

Viva ti qora Variqavano vaimanta te viva Noravano vainarara ihi tirerave.

³ Noravano Kotiva iqoka raqi vaiva taruvama vaivo.

Vira autuvano vaireva Noravano Kotivave.

⁴ Viva Isipi iqoka vaiintinavuvata vika iqoka kaarinavuvata namariqi vara aqu kairave.

Isipi vika iqoka vaiinti tarukavata Naare Namariqi aquvi qutu vuarave.

⁵ Varuva namari noravano vika ravaaqavu kairave. Orivano namariqi otinintemake, vikavata otinuarave.

⁶ Noravaavo, ai kauqu tanara nai mpeqa kauquma vaivo.

Noravaavo, are viraqohira nena navutaaka rukavu raakavumake varianarave.

⁷ Are Noravano mpeqaiqama kehra nina arireka iaka vara vataini aquke varianarave.

Ihavano ahaka tatoqa kaintema kero, ai arara ite vaiva vika tatoqa aqu kairave.

⁸ Are nena aiho vuaqa kaararo nora namarivano hini hini vaavi araviro vairave.

Vaantaavuravano vaavi vaintema kero, namarivano vaavi vairave.

Nora namari veva muntukaraqi vai vatava aaharaiqama viro kempukaiqama viro vairave.

⁹ Tinavu navutaaka tiha, Kaiqe tenavu vika avataqi vi, vika ravaaqavu kaare. Tenavu vika airaira raqiate vare, tentanavu antuqaaqaa vi haikara rairake vararerave. Tenavu tentanavu iqoka paipeqohai vika vehi autu taiqa karerave, tiarave.

¹⁰ Minti tiavaravata, are nena aiho vuaqa kaararo namarivano Isipi vika raqutu kairave.

Maara ntai oriva namariqi otinintemake, vikavata nora namariqi otinuarave.

¹¹ Noravaavo, ta variqavave ari voqaara kempukavano vaivo?

Areqaima kempukavano variaro.

Areqaima Noravano variaro.

Ai koqe okaravano uri aatarakero vaivo.

Are nora kaiqa, aahuva kaiqa vare variaramanta vaiinti nahenti ai kaiqa taveha qete variarave.

Kia vovano ai kaiqa voqaantemake varaariravama vaivo.

¹² Are nena kauqu tanara tutu kaararo vatavano ai navutaaka nampiqama kairave.

¹³ Are tinavu aaqurihamma timitehara tinavu kuvantu timitera tinavu tivita varera anianarave.

Are nena kempukaqohira tinavu tivita varera, nena takuqukera vainanaini tinavu vuru kenarave.

¹⁴ Naantiara vo vatanaa vo vatanaaka ai nora kaiqara iriha ai aatu qeteha aiqu kauqu ntiri ntiri iha vaivarave. Pirstia vatanaaka voqamake naatu ite vairamanta vaivarave.

¹⁵ Idomu avuhainaaka, vikavata naatu ite vairamanta vaivarave.

Moapi vatanaaka vika qiata vaiintinavuvata qeteha aiqu kauqu ntiri ntiri iha vaivarave.

Kenaani vatanaaka kia iqoka raquataa iramanta qaqlira keha vaivarave.

¹⁶ Ekaa vika ai okara taveha voqamake qeteha vaivarave.

Noravaauvo, vika ai mpega okara taveha voqamake qete vaiha qaqi himpiti vaiqe tenavu ai vaiinti nahenti vika vara mini ke, qaqi vitare virerave.

Tenavu are kuvantu timiterauka, vika vara mini ke qaqi vitare virerave.

¹⁷ Naantiara are tinavu tivita varera nena ainqaqaq vuru kenarave.

Noravaauvo, vi ainqinarara are tihara, Te maini vairerave, tiananaini, are nena kauquqohair aututaanara turuaraini tenavu vairerave.

¹⁸ Noravaauvo, are avuhainaava vahara ekaa entama raqiqiqira vinarave, tiro.

Minti tivakero Mosiva Isareri hampata ihi tura.

Miriaamiva ihi tura

¹⁹ Isareri vika nora namari taqa vare aahara vataaura vumanta Isipi vika iqoka kaarivata ohivata ohiqaa raqikukavata mintiare tuvaro Noravano Kotiva qaiqaa namari vira varakovaro namarivano vika raqutu komanta qutu vura.

²⁰ Mintuvaro Miriaamiva paropeti nahenti Eronira nakaava nai kauquqi *tamparini* tuatero rintatimaqiro viharo ihi ntavaqiro vumanta ekaa nahentivata vira avataaqi viha nái kauquqi *tamparini* tuataaqi viha ihi nte vauvaro ²¹ Miriaamiva vikara ihi maantimakero tiro:

Noravano Kotiva tinavu navutaaka naatara kairara ti, te vira autu tuaherakeha ihi tiva amite vauro.

Viva vika ohivata ohi tauvaqaqaa variakavata nora namariq vira aqu kairave, tiro. Miriaamiva minti tivakeharo nai kena nahenti hampata vaharo ihi tura.

Hunkavu namarira

²² Vika mintuvaro viraqaahairo Mosiva Isareri vika ntita varero Naare Namari mini kero taaramo enta Suri Aahara vataini viharo tavovaro kia vika ne namariva vaura.

²³ Kia vauvaro Mosiva vika ntita varero *Marainive - Hunkavinainive* tunaini oruntora. Vika mini vau namarira naare tuvaro namarivano voqama kero hunka vumantara ti, vika vi namarira kia ho nora. Vi namariva hunkavi namariva vaurara ti, mini autu nteha Hunkavinainive tura.

²⁴ Namarivano hunkavura kaara vaiinti nahenti Mosirara nuntu naantu tiha, Oho, tenavu nana namarie ho nararave, tuvaro ²⁵ Mosiva mpo ike tiharo Nora Kotira aarovaro Noravano Kotiva katari hanka vo vira umiqovaro Mosiva katari vira varero muntu namariq aqu kovaro viraqaahairo namarivano koqema viro ho neva vaura.

Isareri vika mini vauvaro Noravano Kotiva vikara nai uva maara iriha variqi vuate tiro, uva tiva nimiro, vika virara kempukaiqamake iriraravata avateharo vikara mintima tiro: ²⁶ Te Noravano Kotika variari ne ti uva irihi viha avuqavu kaiqa varaqi vivera, te niarao ti, Isipiqaa aihavira haika vataavaunara, vira kia niqavavata vatarerave. Te Noravano Kotika ne aihavira haika vare variaraqihai ni koqema nimite vauraukama vauro, tura.

²⁷ Ho Isareri vika aaraini vivi, Elimi vataini oruntora. Mini ruvu namari 12navu vauvaro *deti* katari vira tava ho neva 70navu vaumanta vika nái *seri* naavu maaqa namari vira tataaqa kaqate vaura.

Noravano Kotiva aahuva kara vika nimura

16

¹ Isareri vika Elimini varike viraqaahai himpi aaraini oru vivi, aahara vata vo Senini oruntora. Isareri vika Isipi mini ke vuvaro taara toravata 15 entavata aitaromanta vika Senini oruntora. Elimi vata hini vauvaro Sainai vata hini vauvaro Seni vatavano tavaarana vaura.

² Vika aahara vata mini vuvaro kara neva kia vaumanta vika Mosika Eronika vaunaini orunte nuntu naantu tiha vitantara mintima ti: ³ Oho, tenavu Isipini variavauna entara Noravano Kotiva tinavu harukaataarave. Tenavu Isipini variavauna entara, tenavu tentanavanu naataa u karara mative, vo karave, ho neha variavaunara. Netanta tinavu maini aahara vataini tivita viri kaamanta tenavu nararama vauro. Netanta mintiara kaara tenavu kia kara naraiti, qutuma virarave, ti.

⁴ Minti tuvaro Noravano Kotiva Mosira tiva amiro tiharo, Te naaruvhahai kara viavi tua kaari ne ho varake naate. Vo enta vo enta vaiinti nahenti vi kararama nuntuke

varevarave. Ne mintiaqi vi vaiqe te ne ti uva iri vaira avatamake tavarerave. ⁵ Ne kara nuntuqivi, ⁶ entaqaa ⁷ entaravata irihama, kara nerara taara tataa airiqamake nuntuke vataate, tiro.

⁶ Manti tumanta Mosika Eronika vaiinti nahenti ruvaaqumake tiva nimi tiha, Vate erainainima ne tiha, Ququaama Noravano Kotiva tinavu Isipihairo tivita varero maini viri kaimanta vauro, tivarave. ⁷ Ne nuntu naantu ti variara Noravano Kotiva irirara ti, ne toqaqima Nora Kotira mpeqa okara takuqi vaira tavevarave. Tetanta qaqi qumina vaiintitanta Kotira uva ni tiva nimi vaurauka vaunarara ti, ne kia titantara vauve nuntu naantu ti variavo, ne Kotirarama nuntu naantu ti variavo, ti.

⁸ Mosika Eronika minti tivake qaqa Mosiva tiharo, Noravano Kotiva ne nuntu naantu ti varia uvvara irirara tiro, viva erainainima ni mati nimira, ne ho varake naivaro viva toqaqi ni vo karavata nimiramanta ne ho varake nevarare. Ne nuntu naantu tiha kia titantaravauve minti ti variavo, ne Nora Kotirarama nuntu naantu ti variavo, tiro.

⁹ Mosiva minti tivakero Eronirara tiharo, Are vaiinti nahentiara mintima tiane: Noravano Kotiva ne virara nuntu naantu ti varia uvvara irirara ti, ne ruvaaqumavi vira avuqaa himpi variate, tiane, tiro.

¹⁰ Manti tuvoro Eroniva vaiinti nahenti qaqi tiva nimi vaumanta vika tuqantaavi aahara vata vaunaini vutu tavovaro vate vira tonavuqihairo Nora Kotira mpeqa okaravano takuqi vaiva qovarama vuvaro ¹¹ Noravano Kotiva Mosira tiva amiro tiharo, ¹² Isareri vika nuntu naantu ti varia uvvara te iruro. Are vikara mintima tiane: Vate enta ire iramanta ne mati varake ne, hura toqaqi vo karama nevarare. Ne mintimake viraqahai te Noravano Kotika ni Variqavano vaunarara kankomake irivarave, tiane, tiro.

¹³ Manti tumanta vi entara eronaini uviri muavu voqauka airitahaavano qovaramavi vika seri naavu maaqa kaqatonaini hihipaamavi vaura. Mintuvaro vira qararaa toqaqi varavuvano vika naavu maaqa tataqa vaura.

¹⁴ Ho varavuvano aaharauqama vumanta vaiinti nahenti tavovaro inaara katari hanka voqauka vo kanta vo kanta vaura. ¹⁵ Ho Isareri vika vevante vi haikara tave, vika nái uvaqihai tiha, *Manaave? - Nana Haikave?* tura.

Vika vi haikara kia tavorara minti tuvoro Mosiva vika tiva nimo tiharo, Vi haikava Noravano Kotiva ni nimitai karavama vaivo. ¹⁶ Noravano Kotiva niara tiharo, Ne vohaiqa vohaiqavano nuntuke varehama, nenta nentemake varaate. Nenta seri naavuqi variaka vikaravata irihama, vohaa kure vohaa kure mpiqakeha varaate tirave, tiro.

¹⁷ Mosiva minti tumanta Isareri vika vi karara nuntukeha varora. Hini vaiinti airi nuntuke varomanta hini vaiinti kia airi nuntuke varora.

¹⁸ Vika mintiaqi vivi tavomanta airiqamake *manaa* nuntuke varoka vika neva hoqai vauvaro kia airiqamake *manaa* nuntuke varoka vika nevavata vohaa qarama kero hoqai vaura. Vika vohaa entaqaa ne kararaqai nuntuke varora.

¹⁹ Vi karara nuntuke varovaro Mosiva tiharo, Ne kia qaqi kaivaro hini karavano hura qaqi variarire, tiro. ²⁰ Manti tumanta hini vaiinti nahenti kia Mosira uva iriraiti, vi karara hini qaqi vate, vira qararaa narare ti tavovaro iviruqavano vi kararaqai vauvaro vi karava nteterharo unta ura. Mintura kaara Mosiva vikara arara itovaro vaura.

²¹ Vo enta vo enta toqaqi vika vi karara nái ho nentemake nuntuke varovaro kuarivano uruntovaro hini qaqi ko karava ravitaviro taiqa vi vaura. ²² Vika vo enta vo enta nuntuqivi vivi, ⁶ entaqaa ⁷ entaravata iriha taara tataa nuntuke varora. Mintumanta vika qiaita vaiintinavu Mosiva unaini orunte vi uvvara tiva amura.

²³ Mosiva vikara tiharo, Noravano Kotiva tiharo, Hura ti entama varianarove. Vi entaraqaa ne qaqi auraarama variate, tirave. Noravano Kotiva minti tirara ti, ne vate untate karara nema, hura ne karara qaqi vataate, tiro.

²⁴ Mosiva minti tumanta vika ⁶ entaqaa vi karara hini namake, hini qaqi vate, vira qararaa tavovaro vi entaraqaa vi karava kia ntera viraitiro, qaqi vauvaro kia iviruqavanovata viraqvi vaura.

²⁵ Mintuvaro Mosiva vaiinti nahentiara tiharo, Maa entara tenavu auraara variaina entava vaimantara ti, ne enta nuntu vataa karara vate naate. Vate tenavu Nora Kotirara iriha auraara vairerave. Ne vate vevante tavaivaro kiama vi karava vataqaa varianarove. ²⁶ Ne vo *uiki* vo *uiki* ⁶ entanavuara variqi viha vi karara nuntuke varevarave. Auraara Enta ⁷ entaqaa vi karava kiama vataqaa varianarove, tiro.

²⁷ Mosiva minti tumanta ⁷ entaqaa hini vaiinti nahenti kaiqe vi karara nuntuke varaa tivake vevante tavovaro vi karava kia vaura.

²⁸ Mintuvaro Noravano Kotiva Mosirara tiharo, Oho, ne ti uva iriataarave. Taireve ne ti uva kia raqa karaiti, iriqi vivarave? ²⁹ Ne maa uvarama iritaate. Te Noravano Kotika niara vi entaraqaa auraara variate tunarara ti, te ⁶ entaqaa ni airi kara nimiari vi entaraqaa

ne kararavata, vira qararaa ne kararavata, nuntuke varevarave. Ne 7 entaqaa kia nenta naavuqihai vevantaraaiti, qaqi viraqi variate, tiro.

³⁰ Kotiva minti tumantara ti, vaiinti nahenti vi entaraqaa kia kaiqa varora.

³¹ Isareri kara virara *manaave* tura. *Manaavano* vaireva, inaara auru hanta auru voqara vauvaro vaiintivano vira nehoro tiharo, Maa karava *hani* hampata untataa visketira voqaarama vaivo, tura.

³² Mosiva tiharo, Noravano Kotiva tinavuara mintima tivo: Te Isipihai ni ntita vare vuru kauramanta ne aahara vataini variamanta te *manaa* ni nimunara, vi karara ne kuvuarama teka tavaate ti, vira nuntuke taqu voqi nonkuke qaqi vataate tivo, tiro.

³³ Mosiva minti tivakero viva Eronirara tiharo, Are taqu vo varakera *manaa* viraqi mpiqa kera, Nora Kotira avuqaa vatairaro vairamanta naantiara vai vaiinti nahentika vi karara tavaate, tiro. ³⁴ Mosiva minti tuvaro Noravano Kotiva Mosirara tuntea kero, Eroniva taqu voqi *manaa* mpiqa kero Kotiva uva tivakero taatauto *Vokisera* tataaqa vatovaro vaura. ³⁵ Isareri vika 40 ihinavuara aahara vataini variqi viha *manaaqai* namaqiqi vivi, viraqaahai vika Kenaani vataini oru vauvaro *manaavano* taiqa vura...

17

Oriqihairo namarivano qovarama vura

¹ Isareri vika Seni Ahara Vataini varike, viraqaahai qaiqaa aaraini vura. Vika aaraini vi vauvaro Noravano Kotiva vikara mini variate maini variate ti vaumanta vika vona vona variqi vi vaura. Ho vika Repintimi vataini orunte mini nái *seri* naavu maaqa kaqate tavovaro namari neva kia vaura.

² Kia vaumanta vika Mosiva unaini orunte qaiqaa nuntu naantu tiha, Oho, are tinavu namari timirage naare, ti vauvaro Mosiva aqao tiro, Ne nantihae ti titi variavo? Ne nantihae Nora Kotira avate variavo? tiro.

³ Minta tumanta vaiinti nahenti namariara voqamake naataa umanta vika Mosirara nuntu naantu tiha, Oho, are nantihares tinavu Isipihai tivita varera maini aniaro? Are tinavuara vika nái vaintivata nái quaravata kia namari naraiti qutu vuate tira, maini tinavu tivita varera viri kaaro? ti.

⁴ Vika minti tuvaro Mosiva Nora Kotirara mpo ike tiharo vira aarero, Te maa vatanaaka nantie irarave? Vika namari kaara ori utu vare ti haru kareka auti variavo, tiro.

⁵ Mosiva minti tuvaro Noravano Kotiva virara tiharo, Are Isareri qjata vaiinti hininavu ntita varera, vaiinti nahenti avuni vihara nena kauru, haaru viraqohaira Nairi Namari ruqutukonara varera, ⁶ oru Horepi Aiqinaqaa* nora ori vovano vainaini vairaqe te ai aqanqo mini variarirara are kauru viraqohaira ori vira ruqutu kairaro namarivano viraqihairo tuvi vairamanta vaiinti nahenti vira naate, tiro.

Minta tuvaro Mosiva Kotiva tunte iro Isareri qjata vaiinti nivuqaa vaharo ori vira ruqutu kovaro namarivano viraqihairo tuvi vaura.

⁷ Isareri vika nuntu naantu tiha Nora Kotira avateha, Viva tinavu kahaqianarove kiae kahaqianarove? turara ti, vaiinti nahenti vi vatara autu nteha *Masave - Nuntu Naantuve, Meribave - Avatorave* tura.

Amareki vatanaaka hampata raqura

⁸ Isareri vika Repintimini vaumanta Amareki vatanaaka orunte vika hampata raqi vaura. ⁹ Vika hampata raqi vauvaro Mosiva Iosuaarara tiharo, Hura are vaiinti vonavu ntita varera Amareki vatanaaka hampata raquane. Ne vika hampata raqi vaiqe te oru aqina voqaa himpite vaiha, Kotiva tirirara tuataqira vuane ti kaurura vira tenta kauquqi tuateha vairerave, tiro.

¹⁰ Minta tuvaro Iosuaava Mosiva tunte iro Amareki vatanaaka hampata oru raqi vaumanta Mosiva vo, Eroniva vo, Huriva vo, vinavuka aqinaqaa oru vaura. ¹¹ Mosiva viraqaa vaharo nai kauqu rantutatero vaumanta Isareri vika navutaaka naatarake vauvaro, viraqaahairo Mosira kauquvano vataini tuvi vumanta Amareki vatanaaka Isareri naatarake vaura.

¹² Mosira kauquvano qutu ntava vumanta Eronika Hurika nora ori vo mpaqi vare vuru vatovaro Mosiva viraqaa oqivi vaumanta Eronika Hurika vira hini hini himpite vaiha, Mosira kauquutanta rantutake tuate vaumanta qaiqaa Isareri iqoka vaiinti nai navutaaka naatarake vaura. Vitanta Mosira kauqu tuataqi vi vauvaro kuarivano ruhunku vura. ¹³ Mintima kero Iosuaava Amareki vatanaaka hampata raquqiro viharo vika naatara kora.

* ^{17:6:} Horepi Aiqina - vo autu: Sainai Aiqina

¹⁴ Ho Noravano Kotiva Mosirara tiharo, Ne Amareki vatanaaka naatara kaa uvvara tauru kevorave tira, are vi uvvara vukuqi qara ntuvu taane. Iosuaara vuru tiva amiane: Te naantiara Amareki vatanaaka ekaa vehi autu taiqa karerave, tiane, tiro.

¹⁵ Kotiva minti tuvaro Mosiva mini vaiharo *ofaa* tainta vo autukero tiharo, Noravano Kotiva *ti vutorama/qarareqama* vaivo. „Vi uvvara vutuke tirera: Noravano Kotiva ti kahaqi vaimanta te navutaaka naatarake vaunararave,“ tiro. ¹⁶ Mosiva tiharo, Te tenta kauqu tuaherake Nora Kotira aare vaunarara tiro, viva ti kahaqi vairave. Viva ekaa enta variqiro viharo Amareki vatanaaka qaqqai naataraqiro vuunarove, tura.

18

Mosira airaaviva vira oru tavora

⁵ ... Jetarova Mosira airaaviva, viva Mosira naatavata, vira maaqtantavata, ntita varero Mosira tavareva aahara vataini vura. Vi entara Mosiva Kotira ainqina tataaqa nai *seri* naavu maaqa kaqatero vauvaro ⁶ Jetarova uva vara kero Mosirara tiharo, Tenavu ai tavarera ani vauro, tiro.

⁷ Minti tuvaro Mosiva vi uvvara iriro nai airaavira vita kareva oruntero vira avuqaa kankakaa viro vira uva mantama kero, viraqaaahairo vira moqa kero, vita varero nai *seri* naavuqi vura.

⁸ Ho Mosiva vo uva vo uva Noravano Kotiva Isareri vika ruaruama nimiteharo Pero vaiintive, Isipi vatanaakave, qoraiqama nimitora, ekaa vi uvvara vi uvvara Jetarora nai airaavira tiva amura. Isareri vika Isipihai aaraini aniha nora maaraqi vauvaro Noravano Kotiva vika kahaqu uvaravata vira tiva amura.

⁹ Tiva amuvaro Jetarova vi uvvara iriro quaha kero ¹⁰ tiharo, Pero vaiintivanovata Isipi vatanaakavata ni rumpa taavaro Noravano Kotiva ni kuvantu kero ni ruaruama nimitemantia ne maini aniara virara irihama te Nora Kotira autu tuahera kauro. ¹¹ Isipi vika Isareri qoraiqama nimite vaura kaara Noravano Kotiva vika nái qoraiqama nimitairave. Kotiva mintirara ti, te kankomake iruraro viva ekaa vo variqa vo variqa naatara kero vivaqai avuni vai Variqavama vaivo, tiro.

¹² Jetarova Mosira airaaviva minti tivakero *ofaa* vo varero Kotira ekaara kaintu iha quara amitero, vo *ofaanavuvata* Kotira iha quara amitomanta, viraqaahai Eronivavata, Isareri nora vaiintinavuvata, aninte Mosira airaavira hampata kara neha Kotira autu tuahere vaura.

Ko igrate tiro, vaiinti vonavu noraiqama kora

¹³ Ho vira qararaa Mosiva vo uva vo uva irireva oru *ko* taintaqaa oquvi vaumanta vaiinti nahenti nái uva vare viva vaunaini vuvaro Mosiva toqaqihairo uva iriqiro viviro entama kora.

¹⁴ Mintuvuoro vira airaaviva vi kaiqara tavero Mosirara tiharo, Are nantiharae nenaraa vahara toqaqihairo uva iriqira vivira vuru entama kaaro? tiro.

¹⁵ Minti tuvaro Mosiva vira tiva amiro tiharo, Vaiinti nahenti Kotira antuqa vaina okarara irireka te vaunananini ani variavo. ¹⁶ Vika avutana tivorira uvavano qovarama vimanta vika te unanaini aniamanta te vikara Kotira uvavano mintimama vairave, Kotiva mintima tiva tairave, tivakeha vika uva avuqavuqama nimite vaunarave, tiro.

¹⁷ Minti tuvaro vira airaaviva tiharo, Are nenaraa mintiaqira vuvararo kiama koqe ivo. ¹⁸ Arevata, vaiinti nahenti are vainanaini ani vaikavata, vaakama popohama vivarave. Vi kaiqava nora kaiqa vaivarara tira, are nenaraa vi kaiqara varerorave. ¹⁹ Are iri vairaque te koqe avu aato ai amiariraro Kotivavata ai kahaqiarire. Are homa vaiinti nahentiarihara vika uva varera Kotira avuqaa vuru vatenarave. ²⁰ Are vaiinti nahenti kahaqiharama Kotiva uva tivataira vika tiva nimiane. Are vikara tihara, Minti mintima keha Kotira aaraqaa vihamma vi kaiqara varaqi vuate, tiane.

²¹ Are vi kaiqara nenaraa varerorave. Are avu aato vataa vaiinti vonavu kaama taira vikavata *ko* kaiqaqaa raqikiate. Vikaqihai hininavu 1,000 vaiinti nahentiqaa raqiki vaimanta, hini vaiintinavu 100navuqaa raqiki vaimanta, hini vaiintinavu 50navuqaa raqiki vaimanta, hini vaiintinavu 10 navuqaa raqikiate.

²² Vinavuka homa *iasi* kaiqa vareha inaara uva vainara avuqavu ivarave. Nora uva vairera, vika ariarama vi uvvara avuqavu iane tivarave. Mintimakeha vika ai kahaqi vaivarao ai kaiqavano vuaqa ntairara variane. ²³ Are te tiva amuna uvvara avatairaro Kotivavata ariara maantima kera kaiqa varaqira vuane ti uvvara irirera, ai kempukavano kia taiqa viramanta vaiinti nahentivata nái uva vaaka avuqavuqama kerara iriha, quahakeha nái maaqa vivarave, tiro.

²⁴ Jeterova minti tuvaro Mosiva nai airaaviva tuntema kero, vira uva avatora. ²⁵ Mosiva Isareri vikaqihairo avu aato vato vaiintika vonavu kaamatero vika noraiqama komanta vika 1,000navuve, 100navuve, 50navuve, 10navuve, vikaqaa raqiki vaura.

²⁶ Vika *iiasiqamavi* vaiha inaara uvavano qovarama vura avuqavuqama keha, nora uvavano qovarama vura virara Mosirara are vi uvara avuqavu qiane, ti vaura.

²⁷ Jeterova Mosira airaaviva Mosikantiro varikero nai maaqaini vireva uvaro Mosiva virara ho nena vuane tuvaro Jeterova anirantero vura.

19

Isareri Sainai Aiqina auvoqi oru vaura

¹ Isareri vika Isipi mini ke, taaramo tora avuhainaa entaqaa Sainai Ahara Vataini oruntora. ² Vika Repintimi mini ke Sainai Ahara Vataini oruntovaro Sainai Aiqaqavano vika avuni vaumanta vika nái seri naavu maaqa mini kaqate vaura.

³ Vika mini vauvaro Mosiva Kotira aarareva aiqinaqaa vaarintovaro Noravano Kotiva aiqinaqahairo Mosira aaramakero tiharo, Isareri Īekopira vaintivara mintima tiva nimiane:

⁴ Haaru ne tavomanta te Isipi vika goraiqama nimitavaununarave. Qutauvvuvano nai naati arokaqaa aaqu varaintemake, te ni Isareri Isipihai ntita vare tenta vaunanaini anunrarave.

⁵ Te ni hampata vaiha uva tiva taatau taainara ne vi uvara kia raqa karaiti, ekaa iriqi vivera, te ekaa vo vatanaa vo vatanaakaqihai niaraqaima tinta vaiinti nahenti variavo tirerave. Ekaa maa watava ti vataqai vaimantavata, ⁶ te niaraqai tenta kaama tauna vaiinti nahentikave tiari neqai ti kaiqa vara timitevarave. Ne koqe kaiqa varaqi viha ti vaiinti nahentima vaivarave. Minti tivakerama ti uva Isareri vika tiva nimiane, tiro.

⁷ Kotiva minti tuvaro Mosiva ururantero muntu Isareri nora vaiintinavu naarama kero Noravano Kotiva minti tivakera tiane tu uvvara tiva nimumanta ⁸ ekaa vaiinti nahenti vi uvara iri, vohaa uva vate tiha, Noravano Kotiva ti uvvara tenavu ekaa vi uvvara avatarerave, tuvaro Mosiva tuvurantero vika tu uvvara Nora Kotira vuru tiva amireva vura.

⁹ Vuvaro Noravano Kotiva Mosirara tiharo, Vaiinti nahenti te ainti tiaina uvvara iriha ti, Ququaama Noravano Kotiva Mosikantiro uva ti vaivo, tivake ariara, Ququaama viva Kotira uva ti vaivave tiate ti, te tonavuvano voqama kero taatau vinaraqí are vainanaini otu virerave, tiro.

Minti tuvaro Mosiva vaiinti nahenti tu uvvara Nora Kotira tiva amuvaro ¹⁰ Noravano Kotiva Mosirara tiharo, Are vaiinti nahenti varianaini otuntera vikara mintima tiva nimiane: Ne Kotira autu tuaherareka iha, vatevata huravata koqemake vaiha nenta avu aato muntuk hiqama keha variate. Ne nenta utavaaqavata hiqamake geramate Kotira veka vaivaro viva hora vira qararaa tuvuarire. ¹¹ Vi entaraqaa Noravano Kotiva Sainai Aiqaqahairo tuvu vaiinti nahenti niyuqaa varianarove. ¹² Vaiinti nahenti aiqinaqaa oru vivorave tira, are aiqina vira auvahianta vuka vatairamanta kia vuate. Are vaiinti nahenti qioqama tehera mintima tiane:

Ne kia aiqinaqaa oru vuate. Kiama vi aiqinara auvahianta utu varaaate, tiane.

Vaiinti vovano kia ai uva iriraitiro aiqina utu varairera, vira aruma kaate tiane.

¹³ Vi vaiintira kia nenta kauqugohai utu vararaiti, vevaqohae origohae vira arukaate. Vaiintivanoe aantauvahivanoe aiqina vira utu varairera, viva kiama ho qaqi varianarove. Viravata aruma kaate, tiane.

Ne mintimake uqitakanta vaiha, *aanumaara/noma* vuaqaina uvvara iri, viraqahai ne homa aiqinaini vivarave, tiane, tiro.

¹⁴ Kotiva minti tuvaro Mosiva ururantero otu vaiinti nahentiari tiharo, Ne Kotira autu tuahera kerara irihama geramateha variate, tumanta vaiinti nahenti nai utavaqa hiqama kovaro ¹⁵ Mosiva vikara tiharo, Ne kia nenta naata hampata niraiti, hora vira qararaa vira veka variate, tiro.

¹⁶ Mosiva minti tuvaro taaramo entaqaa toqaqi naaruvavano uva ti vauvaro aauqakaa-vano uti vauvaro voqama kero taatauvu tonavuva aiqinaqaa hihipaama viro vaumanta vaiinti nahenti iruvaro *aanumaara/noma* vuaqa kovaro noraiqamakero uva tumanta ekaa vaiinti nahenti nái seri naavuqí vauka naatu itomanta aiqu kauqu ntiri ntiri iha vaura.

¹⁷ Vika qete vauvaro Mosiva vika Kotira avuqaa oru variate tiro, vika ntita varero vumanta vika oru aiqina auvoqi himpite vaura. ¹⁸ Vika orunte tavovaro Noravano Kotiva iha ite vauraqí tuvuntero Sainai Aiqaqaa vauvaroraa tiro, iha muravano ekaa aiqinaqaa

hihipaama viro vaura. Nora ihavano ite vaivaro muravano veraini vi vaintema kero, iha muravano kumpetaqiro vi vauvaro, vaturavanovata vi aiqinara qaki qaki i vaura.

¹⁹ Minti vauvaro *aanumaara/noma* vuqa kovaro voqavata uva tivaqiro viharo noraiqaakero uva ti vauvaro, viraqaahairo Mosiva Kotira aareharo uva tuvaro Kotiva Mosira nai tiva amiharo naaruuvavano uva tuntema kero uva tura.

²⁰ Noravano Kotiva tuvu Sainai Aiqina noraqaa vaharo Mosira aarama kovaro Mosiva Kotiva unaini viro ainqina noraqaa oru vauvaro ²¹ Noravano Kotiva virara tiharo, Vaiinti nahenti airithaaqutu vivorave tira, are ururanteria vikara kia vuka arataanara vira aatarake maini ti tavareka uruate, tiane. ²² Vaiinti nahenti iriha ti kaiqa vara timite varia vaiintika, vikavata kia nái avu aato muntuka hiqama karaiti, kia te unanaini ho urivarave. Vika qaqi urivera, te vikavata ntaiharerave, tiro.

²³ Noravano Kotiva minti tuvaro Mosiva virara tiharo, Are nena qioqama tehara, Aiqina vira auvahianta vuka arataate, tianarara ti, kiama vaiinti nahenti vi ainqinaraqaa urivarave, tiro.

²⁴ Mosiva minti tuvaro Noravano Kotiva tiharo, Are ururanteria otu Eronira vita varera qaiqaa uruane. Ti kaiqa vara timite varia vaiintikavata, qaqi vaiinti nahentivata, vika vuka aatarake maini urivorave. Vika minti te vika ntaiharerave, tiro. ²⁵ Minti tuvaro Mosiva ururantero vi uvara muntu vaiinti nahenti tiva nimura.

20

Kotiva kauqurutanta uva tivatora

¹ Kotiva maa uvara mintima tiro: ² Te Noravano Kotika ni Variqavanoma vauro. Isipi vika ni rumpa tomanta ne qoraiqamavi vauraqihai tema ni kuvantuke ntita vare maini viri kaunarave.

³ Ne kia vo variqa autu tuaheraraiti, ti hutuqai tuahera kaate.

⁴ Naaruuvaini vai haikarave, vataini vai haikarave, namariqi vai haikarave, ne kia vi haikarava irihama vika *maraqura/varaha* autu keha tinavu variqave tivakeha vika nutu tuahera kaate.

⁵ Una variqa aututaa haikava vaimanta ne kia vi haikara avuqaa hiqintivi vaiha vika nutu tuahera kaate. Tema Noravano Kotika ni Variqavano vahara ti, kia te ni qaqi kaari ne una variqa autu tuahera kevarave. Vaiinti nahenti ti qoririmake una variqa autu tuahera kaivera, vira kaara te vi vaiinti nahentika ntaihamake, viraqaahai naantiara te vika vantivata, vika naintivata, vika naintivara vantivata, qoraiqama nimitarerave.

⁶ Vaiinti nahenti tiriara hantuqa vairamanta ti uva iriqi vivera, ti muntukavano vikara vairaqe te vikavata, vika vantivaravata, ekaa vika kuvuarama tekavata, kogema nimitaqi virerave.

⁷ Ne kia qumina kauqu aiqigaa aquakeha ti hutu ntaraiti, kia qumina ntaate. Vovano mintirera, vira kaara te Nora Kotika ni Variqavano viraqaa uva vatarerave.

⁸ Ekaa *uiki* ⁷ entaqaa Kotira entave tiate.

⁹ Ne 6 entanavu nenta kaiqa varaqi vivi, ¹⁰ viraqaahai ⁷ entaqaa ne tiriara irihama auraara variate. Vi entaraqaa kiama kaiqa varaaate. Nevata ni maaquev, ni raavurave, ni kaiqa vaiintive, ni kaiqa nahentive, ni quara vairive, vo vatanaaka ni hampata variakave, ekaa ne vika vikavata vi entaraqaa kia kaiqa varaaate.

¹¹ Te Noravano Kotika 6 entanavu kaiqa varaqi viha naaruuvave vatave nora namarive ekaa haikave autuke, vira qararaa ⁷ entaqaa te auraara variavaunarara ti, te Noravano Kotika vi entara koqema amiteha tinta entama varianarove tunarave.

¹² Nenta noka qoka koqe okaraqai autu nimitaate. Ne mintihama vukai enta te Noravano Kotika ni Variqavano nimiaina vataraqaa qaqi variqi vivarave.

¹³ Ne kia vaiintie nahentie aru kaate.

¹⁴ Ne kia vora naatae vora vaaties vira vataake nuate.

¹⁵ Ne kia muara autuate.

¹⁶ Ne kia una uva vo vaiintiqaae vo nahentiqaae vataate.

¹⁷ Ne kia vora naavue, vora naatae, vora kaiqa vaiintie, vora kaiqa nahentie, vora kaiqa purumakaue, donkie, vora airairae, virara muntuka ntiramanta variate, tiro. Kotiva vi uvvara tivatora.

Vaiinti nahenti Kotira aatu voqamake qetora

¹⁸ Isarerri vika mini vauvaro naaruuvavano karara karara ti vauvaro, aaquakaavano uti vauvaro, *aanumaara/noma* vuqe vauvaro, nora uva tivaqiro vuvaro, iha muravano aiqinaqaahairo veraini oru vi vaumanta vaiinti nahenti vi haikara vi haikara iri tave, vika voqamake qeteha aiqu kauqu ntiri ntiri i vaumanta vaura.

Vika vi haikara vi haikara aatu qeteha niara kanta vaiha¹⁹ Mosirara tiha, Oho, are nena vi uvvara tinauvu tiva timiraqe iriare. Kotiva naivano tinauvu uva tiva timirera, tenavu qutu vuarorave, ti.

²⁰ Vika minti tuvaro Mosiva vaiinti nahentiara tiharo, Kia qetaate. Kotiva ni avatamake tavareva tuvivo. Ne Kotira aatu qetaivera, ne kiama qora kaiqa varaqi vivarave, tiro.

²¹ Mosiva minti tumanta vaiinti nahenti qaqqiqai niara kanta vauvaro Mosiva Kotiva vaunaini vankora ari vau tonavuva vauraqi vura...

24

Kotiva nai uva tivatora kempukaiqama kora

¹ Noravano Kotiva Mosirara tiharo, Are te vauna ainqinaraqaa uruane. Are Eronira vo, Nadaapira vo, Abihura vo, nora vaiinti 70navuvata, ntita varera uruane. Are vika hampata uru niara kanta vataini hiqintivi vaiha ti hutu tuahera kaate.² Viraqaahaira are vika mini kera nenaqai ti Nora Kotika aaqanto uruane. Vo kiaka ai hampata ti aaqanto urivorave. Qaqi vaiinti nahentivata kiama ainqinaraqaa urivarave, tiro.

³ Minti tuvaro Mosiva muntu Noravano Kotiva tu uvarave, viva uva tivatorave, vaiinti nahenti tiva nimumanta vika vohaa no vate tiha, Noravano Kotiva tivatai uvvara, tenavu ekaa vi uvvara avataqi virerave, tuvaro⁴ viraqaahairo Mosiva Noravano Kotiva tu uvvara ekaa vi uvvara qara ntuvatora.

Mintumakero vira qaraaraa vaaka toqraqi viva himpiro *ofaa* tainta vo ainqina auvoqi autukero, Isareri vika anku 12navuara iriharo nora ori 12navu vara kero vataqi vaavi aratora.

⁵ Viraqaahairo Mosiva qaraaka vaiinti 12 navu nititomanta vinavuka *ofaa* taintaqaas *ofaa* vo Kotira ekaara kaintu iha quara amite, viraqaahai vinavuka qaraaka purumakau qoranavu aruke Kotiva Isareri vika hampata vohaa vaurara iriha purumakau vonavu Nora Kotira iha quara amitora.

⁶ Vinavuka purumakau qoranavu arukorajahairo Mosiva hini naare taqu vonavuqi kaqa vatero, hini naare *ofaa* taintaqaas rintatima kora.

⁷ Viraqaahairo viva Kotiva tivato uvvara qara ntuvato vukuraqihairo kaara ntuvu komanta vaiinti nahenti vi uvvara iri tiha, Noravano Kotiva tivatai uvvara tenavu ekaa vi uvvara avataqi virerave, ti.

⁸ Minti tuvaro Mosiva taquqi naare kaqa tora varakero vaiinti nahentiqaas rintatiharo tiharo, Ne Noravano Kotiva tivatai uvvara iri, virara tiha, Tenavu ekaa vi uvvara avataqi virerave, tiarave. Ho Noravano Kotiva tiva tai uvavavata, ne tivataa uvavavata, kempukaiqama vuarire ti, te maa naareraqohai vi uvvara kempukaiqama kauro, tiro...

Mosiva Sainai Ainqinaraqaa oru vaura

¹² Noravano Kotiva Mosirara tiharo, Are te iainanaini ainqina maaqaa uru vairaqe te tanuqi orira taaraqantaqaas tenta uva qara ntuvataunara ai amiare. Vaiinti nahenti ti uva, vo uva vo uva iriqi vuate ti, te vi uvvara ai amirerave, tiro.

¹³ Kotiva minti tuvaro Mosiva nai kaiqa kahaqi vau vaiintira Iosuaaravata vitakero Kotira ainqinaraqaa vura. ¹⁴ Viva vireva iharo Isareri nora vaiintinavuara tiharo, Ne maini vaha titanta veka vaise tetanta orurante tuvuure. Eronika Hurika ninavu hampata maini variavo. Vo vaiintivano voraqaa uva vatareva irera, viva homa vitanta inaini oru viramanta vitanta vi uvvara avuqavu iate, tiro.

¹⁵ Minti tivakero Mosiva ainqinaraqaa oru vuvaro tonavuvano ainqina viraqaa hihipaama viro vauvaro¹⁶⁻¹⁸ Sainai Ainqina viraqaa Nora Kotira mpeqa okaravano takuqi vauvaro vaura.

Isareri vika uqitaini vaha Kotira mpeqa okara takuqi vaura taveha tiha, Ike, vi haikava nora iha iteharo ataa i vaira voqarama vaivo, ti vaura.

Ho 6 entanavu tonavuvano ainqina viraqaa hihipaama viro vauvaro 7 entaqaa Noravano Kotiva tonavuqi vaiharo Mosira aarovaro Mosiva ainqina viraqaa oruntero 40 entara aatitoraqaa vataqivata mini variqiro vura.

25

Kotiva nai Seri Naavuara tura

¹ Mosiva Kotiva vaunaini oruntovaro Noravano Kotiva virara tiharo, ² Are Isareri vatanaa vaiinti nahentiara mintima tiane: Ne Kotirara irihama nenta airaira hini vira amiate, tiane. Nai taukae ti Kotika timiataa ivera, vika vohaiqa vohaiqvavano nái i haikara ai amivara are vara vataane...

⁸ Vika ekaa vi haikara ai amivara are tiramanta vika *Seri Naavu* vo kaqa timitaiqe te vika hampata variare. ⁹ Te ai umiqaaainantema kema, ne *Seri Naavu* vira kaqatema, naavu viraqi vate haikaravata autu kaate.

Kotiva nai uva tiva taatauto Vokiserara tura

¹⁰ *Seri Naavu* vira kaqa timite, viraqaahai ne koqe katari *akaasi* varake *vokise* vo autu timitaate. Vi *vokisera* vukai vaireva ¹¹⁰ *sentimita* vairaro vira hini hini ⁶⁶ *sentimita* vairaro vira virini miani ⁶⁶ *sentimita* variarire. ¹¹ Vi *vokisera* autuke viraqaahai *kori* ori *kakanairi/kavanairima* teraqhai *vokise* vira avutaqivata aaqainivata naavuma taate...

¹² Viraqaahai *vokise* aqu varera *kori* origohai *ringi* ⁴navu autuke, *vokise* aiqu vainanaini hini hini arutaate. ¹³ *Akaasi* katari vukaitanu humuquke, vitantavata *kori* origohai naavumate *ringi* hini hini vainaraqi nonkutaate. ¹⁴ Hini hini mantaraini katari vitanta *ringiqi* ruqiake vataimanta naantiara aaraini vireka iha *vokise* vira aqu vare vuute. ¹⁵ Katari vukai vitanta *ringiqi* veta ruqiake vatera kia qaqini varake vataraiti, *ringi* viraqi qaqi kaivarо variarire. ¹⁶ Naantiara tenta uva oritantaqaa qara ntua taainara ni nimiari ne ori vitanta *vokiseqi* vataate.

¹⁷ *Kori* origohai *vokise* vira avu maantimake autuate: vira vukai ¹¹⁰ *sentimita* vairaro vira hini hini ⁶⁶ *sentimita* variarire. Vi avuva vaireva, te vaiinti nahenti aaqurihama nimitaaina avuvama varianarove.

¹⁸ *Vokise* vira avuqaa hini hini vitini *kori* origohai *enseli* aroka vaira *maraqura/varaha* taaraqanta autuke vataate.

¹⁹ *Enseli* vovano *vokise* vira hini vitini vairaro vovano hini vitini variarire. Kia *vokise* avu nariara autuke maraqura haika nariara autuke vataraiti, ekaa vi haikara autireka iha *kori* ori kaintu varake viraqohai autu kaate.

²⁰ *Enseli* vitanta náitonta avuqaa náitonta aroka *rairake/ airake* *vokise* vira avu mantaqate, Kotiva aaqurihama nimitaainara avu vira viavi tave vaira autu taate.

²¹ Mintimake autu kaivarо are avu vira *vokise* noqaa aqutera, viraqaahira naantiara tenta uva qara ntua taainara ai amiarirara are *vokise* viraqi vataane.

²² Naantiara *enseli* maraquratanta hini vitini hini vitini vaivae te tuvu *vokise* avuqaa visha tenta uva ai tiva amiarirara, are Isarerি vika tiva niminarave, tiro.

Kotiva taintara tura

²³ Kotiva minti tivakero qaiqaa tiharo, Ne *akaasi* katari varake tainta vo autu kaate. Vira vukai ⁸⁸ *sentimita* vairaro vira hini hini ⁴⁴ *sentimita* vairaro vira virini miani ⁶⁶ *sentimita* variarire.

²⁴ Tainta vira autuke *kori* ori kakanairima teraqhai tainta vira naavuma taate... ²⁶ Tainta vira ho aqu vare viva variarire ti, ne *ringi* ⁴navu kaataraini aiquqaa arutaate.

²⁷⁻²⁸ Viraqaahai tainta vira aqu vare viva variarire ti, *akaasi* katari vukaitanta varake *ringiqi* ruqiake vataate. Katari vitanta *kori* ori kakanairima teraqhai naavuma taate.

²⁹ Tainta viraqaa varaina tanura, vo tanu vo tanu *kori* origohai autuke vate, *uaini* tanu vonavu *ofaa* rauru keravata *kori* origohai autukaate. ³⁰ Ti unta timite mparetira, vare vuru tainta viraqaa vataivaro ti tivuqaa vo enta vo enta qaqi variarire.

Kotiva ova itaaina kairiqarara tura

³¹ Tainta vira autuke viraqaahai ova nonku taivaro itaaina kairiqara *kori* origohai autu kaate... ³² Vi kairiqava vaireva, ⁷navuma voharaqaa varianarove. Avutaqaa kairiq vohaiqavano vairaro hini mantaraini kairiq taaramonavu vairaro hini mantaraini kairiq taaramonavu variarire...

³⁷ Kairiq vira autuke *raamu* ⁷navuvata autuke kairiq viraqaata vataivaro ti *Seri Naavu* avutaqaa vahiaro koqema kero ova iteharo ataa iarie, tiro...

31

⁸ ...Noravano Kotiva Sainai Aiqina qaa vahiaro Mosira ekaa uva tiva amiqiro viviro vuru taiqa kero, viraqaahairo viva nai uva tiva tora nai vuqaqohairo ori taaraqantaqaa qara ntuvatora Mosira amuvaro varero tuvura.

32

Purumakau maraqura/varaha kori origohairo aututora

¹ Mosiva Sainai Aiqinaqaa vaumantavaiinti nahenti tavovaro airi enta aitarovaro Mosiva kia tuviraitiro, vukaiqama kero miniqai vaumanta vika Eroniva unaini ruvaaqumavi visha virara tiha, Mosiva tinavu Isipihairo tivita varero maini viri kai vaiintiva, viva tainie vivo? Kiama tenavu iruro. Are variqa *maraqura/varaha* vo tinavu autu timitairaro viva tinavu variqavano vahiaro maihairo tinavu tivita varero vuarire, ti.

² Vika minti tuvaro Eroniva tiharo, Ne oru nenta naatave, maaqu raavurave, vika *kori* origohai nái aatoqi taaqimataarave, auntaqi ruvutaarave, vare viri timiate, tiro.

³ Minta tumanta ekaa vaiinti nahenti vi haikara rahunkuke Eronira vuru amuvaro ⁴ Eroniva vi haikara varakero vata quvi kero purumakau maraqua vo autukero vatoraqi viva *kori* vi haikara varatora ihaqohairo ravita kero qihia kovaro viraqi vi anima viro kempukaiqama vura.

Kempukaiqama vuvaro vi haikara vataqihairo mpaqi vaari kero vira humugu kero vatomanta vaiinti nahenti tiha, Ho iriate. Maa haikava tinavu variqavanoma vaivo. Vivama tinavu Isipihairo tivita varero maini viri kairave, tura.

⁵ Vika minti tuvaro Eroniva purumakau *maraqua/varaha* aututora vira avuni vaiharo *ofaa* tainta vo autu kero tiharo, Kaiqe tenavu hora ruvaaqumavi vaiha nora kara neha Nora Kotira autu tuahera kaare, tiro.

⁶ Minta tumanta vira qararaa vaiinti nahenti vaaka toqagi himpi ekaara kaintu iha quarake *ofaa*ratava, Kotira hampata vohaa tampamavi vai *ofaa*ratava iha quaratora. Vika mintiakae karavata kempuka *uainivata* namake, viraqaahai oru qora okara autiha hampi ruhe tutiqe vaura.

⁷ Mintuvaro Noravano Kotiva Sainai Aiqinaqaa vaiharo Mosirara tiharo, Ai vaiinti nahenti are Isipihaira vika ntita varera aniarauka, vika qora kaiqa vareha ti qoririma timite variarara tira, are vaaka ururanterea vika vainaini otu vuane.

⁸ Te vikara tinta uva iriqi vuate turamantava, vaakama vika ti uva qaqrakeha purumakau *maraqua/varaha* autuke, vi haikarara tinavu variqave tivakeha vira autu tuahera variavo. Vika vi haikara avuqaa kankakaamavi vaiha vira quahama amithea vi haikara *ofaa* iha quara amite tiha, Maa haikava tinavu variqavano Isipihairo tinavu tivita varero maini viri kairave, ti variavo.

⁹ Te tavauramanta maa vatanaaka ti uva qaqrakeha nái uvaqai avataqi vireka auti variarave. ¹⁰ Oho, ti voqamakero vikara tirara itaivo. Are ti maini kera viraqe te vi vatanaaka vehi autu taiqa kaare. Te vika mintimake, qaiqaa are kuvuarama teraukaqaahai nora vatanaaka qovarama karerave, tiro.

¹¹ Noravano Kotiva minti tuvaro Mosiva aqao tiro, Mpo, Noravauvo, are mpeqaiqama kera nena vaiinti nahenti Isipihaira ruuaruma kera ntita varera maini viri kaarauka variavara hauri are vikara arara itairara vehi autu kerorave. ¹² Are mintiramanta Isipi vika ariara mintima tivarave: Kotiva nai vaiinti nahenti vehi autu kareva Isipihairo vika ntita varero vetaini vuru kero vehi autu kaivo, tivarave. Virara iriharama kia vikara arara itairara qaqla kera kia nena vaiinti nahenti ntaihane.

¹³ Are nena kaiqa vaiintinavu Eparahaamirave, Aisaakirave, Iekopirave, vikara tiva taana uvvara iritaane. Are nena kauqu ainqiqa aqu kehara vinavukara tihara, Te nenavu kuvuarama teka noraiqama kaari vika vaireka, opu makau voqaara airitahaa vaivarave, tianarave. Are vikara tihara, Te ekaa maa vataro vika nimiariraro maa vatava vika vatama ekaa enta varianarove, tianarave. Are vi uvvara irihara kia nena vaiinti nahenti vika vehi autu kaane, tiro. ¹⁴ Mosiva minti tuvaro Noravano Kotiva te vika ntaiharama tu avu aatora qaqla kero, kia vika ntaihara.

¹⁵⁻¹⁶ Mintuvaro Mosiva ururantero Kotiva nai uva tivatora oritantaqaa qara ntuvatora varero vura. Kotiva ori vitantaqaa taara mantaraini qara ntua tovaro Mosiva vitanta varero ururantero vura.

¹⁷ Iosuaava Mosikantiro ururantero otu viharo irumanta vaiinti nahenti nora uva ti vauvaro viva Mosirara tiharo, Vaiinti nahenti *seri* naavu maaqa kaqataaraqihai raqi vahama ti variavo, tiro.

¹⁸ Iosuaava minti tuvaro Mosiva aqao tiro, Vi uvava vaireva, kia vora nti varia uvaravauve vaivo. Kia navutaaka naatara kaa uvaravauve vaivo. Vika ihi tihama oi aai ti variavo, tiro.

¹⁹ Mosiva minti tivakero *seri* naavu maaqa kaqatora aumanto otuntero tavovaro purumakau *maraqua/varaha* vaumanta vika ihi nte vauvaro vira kaara vira arara itora. Viva ainqina auvoqi otuntero oritanta vare tuvura vata kanta aqu kovaro tairi taarima vura.

²⁰ Viraqaahairo Mosiva oru vika purumakau autu tora vara kero ihaqi aqu kovaro ravita vuvaro vi haikara varakero rukoki raakokima kero namari vataakero tuqan-taakero, Isarerika vika vahaurukero naate tumanta vika vi namarira nora.

²¹ Vika vi namarira novaro Mosiva Eronirara tiharo, Vaiinti nahenti ariara nanti tiavarae are vika ntita varera vuaramanta vika noraiqaaque Kotira uva raqake gora kaiqa varavao? tiro.

²² Minti tuvaro Eroniva tiharo, Nora vaiintio, kia ti titiane. Are maa vaiinti nahentika okara tavaanarave. Vika qora kaiqa varareka vaaka auti variakave. ²³ Vika aninte tiriara

mintima tiavo: Mosiva tinavu Isipihairo tivita varero maini viri kai vaiintiva, viva tainie vivo? Kiama tenavu iruro. Are variqa *maraqura/varaha* vo tinavu autu timitairaro viva tinavu variqavano vahiharo maihairo tinavu tivita varero uvarire, tiamanta²⁴ te viraqaahai vikara mintima turo: Vaiinti nahenti *kori* oriqohai *vahehemate/vaataiqamate* haikara rahunkuke viri ti timiate, turamanta vi haikara viri ti timiamanta vare, te vi haikara ihaqira aqu kauraro ihaqihairo purumakau maraqrurahaavano qovarama vivo, tiro.

²⁵ Eroniva minti tuvaro Mosiva tavovaro viva kia vaiinti nahenti qioqama karaitiro, vika qaqi komanta vika nái varaataa u kaiqara qora kaiqaqai vare vaura kaara vika navutaaka vika tave naaraihama nimitevaqai vaura.

²⁶ Mosiva vatuka qentiana oru himpi vahiharo tiharo, Taukae Nora Kotira mantaraini vaika vika te iainanaini aniate, tumanta ekaa Rivaira anku vika vira aiquantakaa vura.

²⁷ Vika vuvaro Mosiva vikara tiharo, Noravano Kotiva Isarerri Variqavano mintima tivo: Ne vohaiqa vohaiqavano iqoka paipe tuata vare, vatukaqi vi anihama „purumakau *maraqura/varaha* autu tuahere variaka“ aru taiqa kaate. Ni qata vakaukavarave, ni tontive vaivera, vikavata ekaa aru taiqa kaate, tiro.

²⁸ Mosiva minti tumanta Rivaira ankuqihainaa vaiintinavu Mosiva tuntemake, vatukaqi vi anihia 3,000 vaiinti aru taiqa kora.

²⁹ Mintuvaro Mosiva vikara tiharo, Ne vate Noravano Kotiva ti uvvara iriha nenta maaquve, qata vakaukavarave, kia vehakuma nimitaraiti, vikavata aruqi vivi ekaa taiqa kaarara tiro, Kotiva ni koqema nimiteharo niara vika maa entaraqaahai ti kaiqa vaiinti vahia tinta kaiqa ho vara timitevarave, tivo, tiro.

³⁰ Mosiva minti tivakero vira qararaa vaiinti nahenti ruvaaquma kero vikara tiharo, Ne qora kaiqa varava uritara kero vaivo. Vate te qaiqaa Noravano Kotiva vainanaini ainqinaqaa oru virerave. Te mini oru vaiha ne qora kaiqa vare uvvara vira iraariraro viva ne qora kaiqa vare uvvara nunkae nimitaanarove, kiae nunka nimitaanarove? tiro.

³¹ Mosiva minti tivakero qaiqaa tuvurantero Noravano Kotiva vaunaini ainqinaqaa oruntero tiharo, Oho, vi vaiinti nahentika nai noraiqama kema qora kaiqa vara kaavo. Vika *kori* oriqohai una variqa autuke, virara tinavu variqave tivakeha vira autu tuahera kaarave.

³² Ho te vate ariara vika qora kaiqa varaa uvvara nunka nimitaane turo. Are kia mintirera, are nena vukuqi nena vaiinti nahenti nutu qara ntuvu taanaraqihairi ti hutuvata nunka kaane, tiro.

³³ Mosiva minti tuvaro Noravano Kotiva nai vira tiva amiro tiharo, Vaiinti nahenti ti uva raqa kaaka vika nutuqai tenta vukuqihai nunka karerave.

³⁴ Ho are ururantero vuane. Te ai tiva amuna vatarra minima vaiinti nahenti ntita varera vuane. Are vika ntita varera aaraini viraro ti *enseli* vovano ai avuni vuunarove. Vaiinti nahenti qora kaiqa varara kaara te vika ntaihaaina entava anintairafe vi entaraqaahai te vika ntaiharerave, tiro.

³⁵ Minti tivakero vo enta Noravano Kotiva nora rovara vara kero viraqohairo Eroniva aututo purumakau maraqrurahaavano autu tuaherakora kaara vika ntaihamma kora...

34

Kotiva qaiqaa uva maara qara ntuvu tora

¹ Noravano Kotiva Mosirara tiharo, Te tota oritanta ai amurara are muntu tairi kaanara vira voqaatanta qaiqaa teqta kera vara viri timiraqe te tota tuna uvvara qaiqaa viraqaa qara ntuvu taare. ² Hura toqaqi qerama varera te variainara Sainai Aiqina noraqaa uruntera ti tivita kaane. ³ Kiama vo vaiintivanovata ai vatakerou uruarire. Kiama vo vaiintivanovata ainqina umantou ani variarire. Sipisipive, purumakauve, vikavata kiama ainqinaqaa ani vaiha ukau naate, tiro.

⁴ Viva minti tuvaro Mosiva Noravano Kotiva tuntema kero, ori taaraqanta nkauru kero vatero vira qararaa vaaka toqaqi himpiro ori vitanta varero Kotiva tuntema kero, Sainai Aiqinaqaa vorama.

⁵ Mosiva noraqaa vaarintovaro Noravano Kotiva tonavuqi tuvuntero Mosira vitakero nai nora autu nteharo, Te Noravano Kotikave tura.

⁶ Minti tivakero Noravano Kotiva Mosira avuqaa aitareharo tiharo, Te Noravano Kotika vairera, te aqurihama nimite vaura Variqaukama vauro. Te kia vaaka arara ite vauraukama vauro. Ti muntukavano vaiinti nahentiara voqamakero vaimanta te kia vika vaaka qoririmake vaunarave.

⁷ Ti muntukavano airi *tauseni* vaiinti nahentiara vaimanta te vika qora kaiqa vare varia uvarave, vika ti qoririmake varia uvarave, vi uvvara vi uvvara nunka nimite vaunarave. Te

mintimake vahivata, vika noka qoka qora kaiqa varera kaara te vika vaintivata vika naintivata vika naintivara vaintivaravata ntaihama karerave, tura...

²⁸ Mosiva Nora Kotikantiro 40 enta entaqivata aatitoraqaaavata variqiro viharo kia namarivata karavata nora. Viva Kotiva uva maara tivatora oritantaqaa qara ntuva tora. Kotiva kempuka uva 10navu tivatora viva qara ntuva tora.

Mosiva Sainai Aiqinaqaahairo ururantero vura

²⁹ Ho Mosiva Sainai Aiqinaqaahairo ururantero oritantavata varero tuviharo kia tavovaro vira virivano ataa i vaigharo takuqi vaura. Viva Nora Kotikantiro uva tuvarora tiro, vira virivano mintiro vauvaro viva tuvuntomanta ³⁰ Eronivavata ekaa Isareri vikavata Mosira tavovaro vira virivano takuqi vaumanta vika qetake kia vira aumanto oru vura.

³¹ Mintuvarovata, Mosiva vika naarama komanta Eronivavata vaiinti nahenti vika nora vaiintinavuvata orurante Mosiva vaunaini aumanto vuvaro Mosiva vika hampata uva tura. ³² Vira naantiara Isareri vatanaa vaiinti nahenti ekaa Mosiva vaunaini aumanto vuvaro Mosiva Noravano Kotiva Sainai Aiqinaqaa vahiro uva maara tivatora vika tiva nimura.

³³ Mosiva uva tiva nimiqiro viro vuru taiqa kero viraqaahairo tavuna vara kero nai viri mantaqa tero vaura. ³⁴ Mosiva Kotira Seri Naavuqi Kotira aarareva vireva iharo tavuna vira qaqlini vara kero oru Kotira aarora. Viva Kotira aarama taiqa kero vevantero Kotira uva Isareri vaiinti nahenti tiva nimi vaura.

³⁵ Viva uva tiva nimireva umanta vaiinti nahenti tavovaro vira virivano ataa iharo takuqi vauvaro Mosiva qaiqaa tavunaqohairo nai viri naavuma tero variqiro viro, qaiqaa Nora Kotira aarareva iharo tavuna vira nai viri naavuma tora qaqlini varake vaura. Mosiva mintiaqiro vi vaura...

Mosiva Kotira Seri Naavu kaqa amite vaiintinavuka kaama tora

36

¹ Ho Noravano Kotiva Besaleliravata, Ohorapiravata, vo vaiintinavuvata, koqe avu aato nimumanta vika Kotira nai Seri Naavu ho kaqeka vaurara tiro, Mosiva vika vi kaiqara nimura. Mosiva vi vaiintinavukara Noravano Kotiva tinantemake, ekaa vi kaiqara varate, tura.

² Mosiva minti tivakero vi vaiintinavuka naarama kero vi kaiqara nimo Kotira Seri Naavu hoqarama taate tivakero ... ³ Isareri vaiinti nahenti vi naavura kaqerara iriha Mosira vo airaira vo airaira amuvaro viva vi haikara vi vaiintinavuka nimumanta vinavuka viraqohai Kotira Seri Naavu kaqareka hoqarama tora...

40

Kotira Seri Naavu kaqa vuru taiqa kora

¹⁶ ...Mosiva Noravano Kotiva tunte makero, Kotira Seri Naavu kaqa vuru taiqa kora. ¹⁷ Vohaa ihi aitarovaro avuhainaa enta 1 toraqa, vi entara Isipihai katu vare anu entaraqaa, Kotira Seri Naavu kaqa vuru taiqa kora.

¹⁸ Mosiva tumanta vika avuni katari naavu kaara aratera vataini vuqite, viraqaata naavu kaara vaavi arate, viraqaata katari taurini vate, viraqaata kiari hirite, ¹⁹ vira naantiara seri tavuna varake vi vaura aqutora. Noravano Kotiva tuntema kero, Mosiva tumanta vika vi kaiqara autukora.

²⁰ Seri Naavu kaqa taiqa kovaro Mosiva Kotiva nai uva qara ntuvato oritanta varero vuru Kotiva uva tivakero taatauto *Vokiseraqi* vaati vatero, viraqaahairo *ringiqi* vuqat katari hini hini ruqiatero, *Vokise* vira avuvata taatautero, ²¹⁻²³ viraqaahairo viva Kotiva uva tivakero taatauto *Vokisera* Seri Naavuqi vuru vatora.

Noravano Kotiva tuntema kero, Mosiva *Vokise* viva nariara variarire tiro, tavuna nora varakero hiritovaro kavaqaara autiro vaura. Kavaqaara vira hini mantaraini Mosiva tainta vo vatero, viraqaata Nora Kotira amito mparetira vuru vatora.

²⁴ Mosiva ova vate kairigara varero vuru tainta vira hini mantaraini vuru vatora.

²⁵ Mosiva viraqai Nora Kotira avuqaa vahiro ova 7navu qumpi tovaro iteharo vaura. Noravano Kotiva tuntema kero, Mosiva mintura.

²⁶ Viraqaahairo Mosiva *kori* tainta vo, koqe mura autuaina *ofaa* taintara, vira vuru kavaqaara tataaga vatero, ²⁷ muntavu haikara vuquru tovaro iteharo koqe unta i vaura. Noravano Kotiva tuntema kero, Mosiva mintura. ²⁸ Mosiva Seri Naavu qentiaqaa nora tavuna vo hiritovaro qenti vira mantaaqaa kora.

²⁹ Mintima kero Mosiva *ofoa* tainta vo, vahaqaini qentiana vatora. Vi taintaraqaa Mosiva ekaara kaintu iha quare *ofoaravata*, *uiti* auruvata Kotira iha quara amitora. Noravano Kotiva tuntema kero, Mosiva mintura.

³⁰ *Ofoa* tainta hini vauvaro Seri Naavyu hini vauvaro tavaarana Mosiva nora tanu vatero, viraqi namari kaqa varero vuru mpiqa kero vatora. ³¹⁻³² Mosika Eronikavata, Eronira maaqunavuvata, Kotira Seri Naavyu vireka ihave, vika Kotira *ofoa* iha quara amitareka ihave, vika nái aiqu kauqu naane vi tanuraqi hiqamakeha vaura. Noravano Kotiva tuntemake vika mintura.

³³ Seri Naavyu vahaqaini vatuka variarire tiro, Mosiva hohaa arakero avuta ntuvatero, tavuna varakero hohaa qentiana hiritora. Mosiva mintiaqiro viharo ekaa vi kaiqara vara taiqa kora.

Tonavuvano Kotira Seri Naavyuqaa tuvu vaura

³⁴ Ekaa vi kaiqara vara vuru taiqa kovaro viraqaahairo tonavuvano tuvu Seri Naavyu viraqaa hihipaa iro vaura. Noravano Kotiva tonavuqi vauvarora tiro, vira mpeqa okara takuqi vaiva Seri Naavyu viraqi mpiqaviro ataa iharo vaura. ³⁵ Mintimakero takuqi vauvarora tiro, Mosiva Seri Naavyu viraqi origetaarirava kia ho vaura.

³⁶ Tonavuvano Seri Naavyuqaa hihipaa iro vau entara Isareri vika miniqai variqi vi vaura. Viraqaahai vika tavovaro tonavuvano Seri Naavyu kero vumanta vi entara vika tonavu vira avataqi viha, nái seri naavyu maaqa rampai vare tonavu vira avataqi vi vaura.

³⁷ Tonavuvano Seri Naavyu qiataqaa vau entara Isareri vikavata kia viraiti, mini vaura.

³⁸ Ho aatitoraqaa vo enta vo enta vika tavovaro Noravano Kotiva tonavu viraqi vauva Seri Naavyu qiataqaa vaumanta entaqi vika tavovaro tonavu viraqi ihavano ite vaura. Isareri vika aahara vataini nuvaqi vu entara vika mintimake vi haikara tavora.

KAARANTURA (Numbers – Namba)

Tenavu maa uvvara iquqama kaunara tiro, hini uva vaivaro hini uva kia vairo.

10

Anumaara/Noma taaraqanta silvaa oriqohai autu kora

¹ Noravano Kotiva Mosira tiva ami haro mintima tiro:

² Vate are tiramanta silvaa ori vokinara varakema *hamaqohai* vira ruqutuke kakanairima kema, *viraqohai* *aanumaara/noma* taaraqantama autu kaate.

Are vaiinti nahenti ruvaaquma kareva ina entara, are tiramanta aanumaara vuaqa kaimanta are inanaini ani ruvaaquma vuate.

Qaiqaa ne katu vare vonaini vireka i entara, are tiramanta aanumaara vuaqa kaimanta are inanaini ani ruvaaquma vuate.

³ Vo vaka are tiramanta aanumaara taara vitanta vukaiqamake vuaqa kaimanta, ekaa vaiinti nahenti ani ti *Seri Naavu* qentiana ruvaaquma vuate.

⁴ Are tiraro aanumaara vohaiqqaqai vuaqa kairamanta ekaa ankuqihai qiata vaiinti navuqai ani ai hampata ruvaaquma vuate.

⁵ Are tiramanta aanumaara votataa votataa inaaraiqa vuaqa kairamanta, kuari avuuri mantaraini vai vaiinti nahentika vika naane himpi katu vare vuate.

⁶ *Sauti* mantaraini vai vaiinti nahentika vikavata himpi katu vare vuate tira, qaiqaavata votataa votataa inaaraiqa aanumaara vuaqaate.

Ne vonaini katu vare vi entara, mintimake aanumaara vuaqa kaate.

⁷ Are vaiinti nahenti ruvaaquma kareva ina entara, are tiramanta aanumaara vukaiqamake vuaqa kaate.

⁸ Eronira maaqunavu ti kaiqa vara timite variaka, vikaqaima aanumaara vira vuaqevarave.

Nevata, ni vaiinti nahenti naantiara qovaraiqikavata, te vate vi uvvara tiva taunara kia qaqira karaiti, qaqi iriqi vuate.

⁹ Naantiara ne nenta vataini vaimanta navutaaka ni hampata raqireka animanta, ne aanumaara vira vuagehama vaiinti vara himpima kaimanta navutaaka hampata raqireka vuate. Ne minti te Noravano Kotika ni Variqavano ni rruurama nimitaari vika kia ho ni naatara kevarave.

¹⁰ Ne quaheha ovata ne entarave, qaraaka tora itaaina entara vaiha ovata ne entarave, voki entara nora entave tivakeha ovata ne entarave, ne vi entara vi entaraqaa ekaara kaintu iha quare *ofaaravata*, ti hampata vohaa tampamavi vai *ofaaravata* ti timitehama, aanumaaravata vuaqa kaate.

Ne minti te niara irihama ni kahaqama nimirerave. Te Noravano Kotika ni Variqavanoma vauro, tiro.

Noravano Kotiva minti tura.

Isareri Sainai Aiqina mini ke vura

¹¹ Isareri vatanaaka Isipi mini ke vuvaro taara ihi aitarovaro 20 enta 2 toraqaa Kotira *Seri Naavu* vaavi vau quromurava vi naavuraqahairo virini ori vaiqiro vura.

¹² Ori vaiqiro vumanta Isareri vira tave, vika himpi *Sainai* qumina kanta vaura mini ke vura. Vuvaro vaavi vau quromurava viro, qumina vata Paraanive tunaini oru himpitero vaura.

¹³ Mini oru vuvaro Noravano Kotiva avuniqamakero Mosira uva tiva amuvaro Mosiva Isareriria minti mintimake vuate tumanta vika vira uva iriha vura.

¹⁴⁻¹⁶ Vika vo vatukaqi vo vatukaqi oru viha kia hampiara voqaara viraiti, Iutaara ankuvata, Isakaara ankuvata, Sebulunira ankuvata, vika naane avuni vi vaura. Vika rairavi, vonavu vonavu nai vutora nai vutora utu vareha vura. Aminadaapira maaqu Nasoniva Iutaara anku qjata vaiintivano vuvaro, Suara maaqu Netanieriva Isakaara anku qjata vaiintivano vuvaro, Helonira maaqu Eliaapiva Sebulunira anku qjata vaiintivano vaura.

¹⁷ Ho vi ankuka vi ankuka avuni vumanta Rivaira ankuqihai Gesonira ankuvata Meraarira ankuvata vika Kotira *Seri Naavu* rampaikе vatora vira aqu vare vura.

¹⁸⁻²⁰ Vika aqu vare vumanta vika naantiara Rubenira ankuvata Simionira ankuvata Gaatira ankuvata vura. Vika vonavu vonavu viha nai vutora nai vutora utu vareha vurama. Sedeura maaqu Elisuva ekaa vika qjata vaiintivano vuvaro, Surisadaira maaqu

Selumieriva Simionira anku qiata vaiintivano vauvaro, Duelira maaqu Eliasapiva Gaatira anku qiata vaiintivano vaura.

²¹ Ho vika vumanta vika naantiara Rivaira ankuqihai Kohaatira anku vinavuka Kotira Seri Naavuqihai Kotira kaiqara iriha vato haikara, vi haikara vi haikara vare vura. Vika vi haikara vi haikara vareha, vokuka Kotira Seri Naavu avuni vare vuru kaqatonaini vuru kora.

²²⁻²⁴ Mintumanta vika naantiara Efaraimura ankuvata, Manasera ankuvata, Benaminira ankuvata, vura. Vikavata viha nai vutora nai vutora utu vareha vurama. Amihutira maaqu Elisamaava Efaraimura anku qiata vaiintivano vauvaro, Pentaasura maaqu Gamelieriva Manasera anku qiata vaiintivano vauvaro, Gideonira maaqu Abidaaniva Benaminira anku qiata vaiintivano vaura.

²⁵ Ho vika vumanta vika naantiara ekaanaini Daanira ankuvata, „Asera ankuvata, Napataarira ankuvata,“ vura. Vikavata viha nai vutora nai vutora utu vareha vuvaro Amisadaira maaqu Ahieseva ekaa vika qiata vaiintivano vaura.

²⁶ Okaraanira maaqu Pagieriva Asera anku qiata vaiintivano vauvaro, ²⁷ Enaanira maaqu Ahiraava Napataarira anku qiata vaiintivano vaura.

²⁸ Vo enta vo enta Isarerri vika naavu rampaikke vireka u entara, vika mintima keha nai naantiara nai naantiara vi vaura.

²⁹ Ho Mosiva Jeterora maaqu nai aituara Hobaapira Midianihainaara tiva amiro tiharo, Vate tenavu himpi haaru Noravano Kotiva tinavuara tiharo, Vi vatara ni nimirerave tunaini virerave. Viva nai kauqu ainqaa aqukero tinavuara tiharo, Ne vi vataraqaa vайha koqemake variqi vivarave, turave. Noravano Kotiva minti turara ti, te ariara tinavu hampata anirage tenavu ai koqema amitaare, tiro.

³⁰ Mosiva minti tuvaro Hobaapiva tiharo, Aqao, kia te mini virerave. Te tenta maaqaini anirante oru tenta navunaka hampata vairerave, tiro.

³¹ Hobaapiva minti tuvaro Mosiva tiharo, Mpo, are kia tinavu kaane. Qumina vataini vaiinti nahenti *seri* naavu maaqa ho kaqake vai vatukara, are vi vatara vi vatara tavaanarave. Are tinavu vi aarara humiqaqira viraqe tenavu ho vuare. ³² Are tinavu hampata anirera, tenavu Noravano Kotiva ekaa koqe haika tinavu timireva iainara rairake hini aivata amiare, tiro. Mosiva minti tura.

Vaiinti nahenti himpi vi vatukara mini ke vura

³³ Ho vaiinti nahenti Nora Kotira ainqina, Sainai Ainqina mini ke vika taaramo entara aaraini vi vaura. Vika aaraini vi vaumanta Noravano Kotiva uva tiva taatauto *Vokisera* aqu vare vi vauka, vi vaiintinavuka avuni viha, vika *seri* naavu kaqe vatukara rantaqi vi vaura.

³⁴ Vika aaraini viha vonaini vonaini vi vauvaro Nora Kotira quromuravano vaavi himpitero vika vi vauraqaa vaura. Ekaa enta aatitoraqaa quromuravano mintima keharo vaura.

³⁵ Vika Kotira *Vokise* vare vire u entara, ekaa vi entaraqaa Mosiva tiharo,

Noravaavo, are himpira oru nena navutaaka ntaihehara vika raumpirima kairamanta qetake vuate. Are ai navutaiqi variaka ntaihaira vika qetake kantama vuate, tiro.

³⁶ Ho vika aaraini anikoka auraara vaireka, Kotira *Vokise* vataini vuru vato entara Mosiva qaiqaa Kotira aareharo tiharo, Noravaavo, are oruranteria tinavu Isarerri vo anku vo anku vaurauka hampata ani variane, tiro.

Mosiva vi entara vi entaraqaa minti tura.

11

Isarerri vika nuntu naantu tura

¹ Vi entara vaiinti nahenti tinavuqaa nora maaravanoma vaivo tivake nuntu naantu ti vauvaro Noravano Kotiva vika uva irura. Viva vika uva iruvaro vira kaara vira arara itovaro viva iha vara kovaro ihavano vika naavu maaqa kaqatova auvahihataa vaura ita taiqa kora.

² Mintumanta vaiinti nahenti tave, viraqaaahai Mosirara, Mpo, tinavu kahaqiane, tuvaro Mosiva Nora Kotira aarovoaro ihavano qimpa vura.

³ Mintumanta vika vi vatukara autu nteha tiha, *Taberave - Ihavano-Itako-Vatukarave*, tura. Noravano Kotiva varako ihava vika avutana iteharo qoraiqama nimitorara ti, vika minti tura.

Mosiva qiata vaiinti 70navu kaama tora

⁴ Airi vo vatanaaka Isareri hampata vulka, vo enta vo enta vohaa karaqai namaqai vuvaro popohomanta vika vo karavata naataa umanta vaura.

Isareri vikavata karara nuntu naantu tiha, Mpo, tinavu mativata naataa ivo. ⁵ Tenavu Isipini vaiha, airi havuka kia koqaa aqukaraiti, qumina varakeha naavaunarave. Tenavu mini vaiha naaqerave, *merenive*, qaniqanive, kempuka qaniqanive, vi karara vi karara qaqi qumina varakeha naavaunarave. ⁶ Vate maini vauraro tinavu kempuka taiqa vimanta kia karavata vatauro. *Manaaqai* vaivarao tinavu vi karara popohaivo, tura.

⁷ *Manaa* vaireve, hanta auru *kohe/naavara* tava voqaara vaura.

⁸ Vi entara entaqi varavuvano vatukaqi qovaraiquraqaa, *manaa* vano varavu hampata hiqintiro vaura. Toqaqi vainti nahenti vevante vi aniha *manaa* vira nunti vaura. Hini kuka vira nuntu vare vuru oriqohai rukokakima komanta, hini kuka kaavuqohai vira ruquut ruquutumake ataara ntuvake vate vaura.

Ataaraigama vumanta hini kuka vira kureqi arate vaumanta, hini kuka vira untake *bisiketi* voqaara autuke vaura. Vika mintimake vira neha tavovaro *orivi* vahaveraqohai untato mparetira voqaara vaura.

¹⁰ Ho mati kia vaura kaara ekaa vaiinti nahenti nái vaintivara hampata nái *seri* naavu maaqa qentiana vaiha voqamake iqí rate vauvaro Mosiva vika iqí ratora irura.

Mintuvaro Noravano Kotiva vikara voqama kero arara itovaro vauvaro vira kaara Mosira muntukavano qoraiquvaro ¹¹ Nora Kotira aareharo tiharo, Mpo, Noravaavo, nantivarae are ti qoraqama timitaaro? Nantivarae are tiriara kia quahaaro? Nantivarae are vaiinti nahentiqaa raqikia kaiqara ti vohaiqaaqaaqai vataaro?

¹² Kia te vika kuvuarama tauraukavauve. Kia te vika noka vaiha vika vata tauraukavauve. Mpo, nantivarae are tiriara tihara, Nahentivan vaintiqaa raqikiharo vira kaqa varero vuru vonaini kaintema kera, are maa vatanaaka ntita varera vuru tenta kauqu aiqiqaa aqukehama nimirerave tuna vataraqaa vuru kaane, tianarave?

¹³ Maa vaiinti nahentika qaqiqai rateha matiara ti naari variavo. Te taihiae airi mati varake vika nimiari neverave? ¹⁴ Te tentaraa kia ho maa vaiinti nahentikaqaa raqikiqiqi virarave. Vi maarara kia ho varaainarave.

¹⁵ Are mintima kera ti qoraqama timitaqi virera, are homa ti harukaiqe te qutuvi kia qaiqaa vukaari utiha vi maarara varaqi vuare, tiro.

¹⁶ Mosiva minti tuvaro Noravano Kotiva vira tiva amiro tiharo,

Are tavera vaiinti nahenti nivutaini qiata vaiinti koqe autu vatauka 70navu ntita kera aniane.

Are vika ntita varera ti *Seri* Naavuvano vainanaini viri kairamanta vika ai hampata mini himpite variate.

¹⁷ Ne mini ani vase te tuvunte ai hampata uva tirerave. Te tenta Maraqua ai amunantemake, vikavata tenta Maraqua nimirerave.

Te mintiariraro vika avu aato koqe iramanta vika homa ai kahaqihai vaiinti nahenti maara vikavata varevarave. Vika mintimake ai kahaqihai vaivara, are kia nenaraa vi maarara varenarave, tiro.

¹⁸ Noravano Kotiva minti tivakero qaiqaa Mosirara tiharo, Ho vate are vaiinti nahenti mintima tiva nimiane:

Ne hurara iriha, vate nenta avu aato muntuka hiqamake qeramateha variate. (Katu Varora 19:10)

Hurama ne mati neverave. Ne voqamake matiara antura ntuvavarro Noravano Kotiva virara irivo.

Viva irimanta ne tiha, Tenavu Isipini vaiha koqemake vaunarave, tiarave.

Ho iriate. Noravano Kotiva mati ni nimiramanta ne neverave.

¹⁹ Noravano Kotiva mati ni nimiramanta ne kiama vohaa entave, taara entave, kauquur entave, kauquurutanta entave, 20 entaqaaqie, neverave.

²⁰ Ne vohaa torarama mati namaqiqi viqata viqata tima, popohamavi, qaiqaa neha vuru vihivarvo, vurvuvano ni aiqi ntunahairovata tuvuanarave.

Noravano Kotiva ni hampata vaimantavata, ne mati kaara vira qoririma amitaarave. Ne nuntu naantu tiha, Nantihae tenavu Isipi ke maini anuro? tiarave. Ne minti tiara kaara vi haikava niqiqi qovaraiqianarove, tiane, tiro.

Kotiva Mosirara vaiinti nahenti minti tivakehara tiva nimiane, tiro.

²¹ Noravano Kotiva minti tuvaro Mosiva nai tiva amiro tiharo, Noravaavo, iriane. Te airi vaiinti nahenti 600,000navuqaa raqiki vaurarama are tiharo, Te homa vohaa torara vika mati nimirerave, tiro. Ho are taihairae mati vira rantakeria vika nimirevae tiro?

²² Ike, tenavu ekaa purumakauve sipisipive aruke nimiari vika nama taiqake, vika ho naurove tivarave? Ekaa havuka nora namariqiraara vika nimiariraro kia ho vikaqiqi varianarove, tiro.

²³ Minti tuvaro Noravano Kotiva Mosira nai tiva amiro tiharo, Are tiriarae vira kempukavano kia ho vaivo tiaro? Are inaaraqakaa varikerama tavenarave. Are vaihara tavairaro te tiarira haikava qovaraanarove kiae qovaraanarove, tiro.

²⁴ Noravano Kotiva minti tuvaro Mosiva iriro, vahaqaqini veva ntero Noravano Kotiva tu uvvara vaiinti nahenti tiva nimiro, viraqaahairo viva qiata vaiinti 70navu naarama kero, vikara *Seri* Naavu ututumate variate tiro.

²⁵ Minti tumanta vika ututumate vauvaro Noravano Kotiva vira naantiara quromuraqi tuyuntero Mosikantiro uva tivakero, viraqaahairo viva Mosira amu Maraqrarraqihairo voki kempukara varakero qiata vaiinti 70navu nimura. Mintiakero nimuvaro Maraqrura viva vikaqi vaumanta vikavata paropeti vaiinti uva tunttemake, uva ti vaura. Kia vo entavata vika minti tiraiti, vi entaraqai vika paropeti uva mintimake tura.

²⁶ Ho vinavuka paropeti uva ti vaumanta, qiata vaiinti votanta Eladaatika Medaatika kia qiata vaiinti vokuka Kotira *Seri* Naavuni ruvaaquma vunaini viraiti, vitanta qaqi vatukaini vauvarovata, Noravano u Maraqrurava vitantaqaavata tuvu vaumanta vitantavata vahai paropeti vaiintivano uva tunttemake, Kotira uva tiva qoqaiqi vaura.

²⁷ Vitanta minti ti vaumanta qaraaka vaiinti vovano kantero vuru Mosira tiva amiro tiharo, Eladaatika Medaatika vatukaini vahai paropeti vaiinti voqaantemake, uva ti variavo, tiro.

²⁸ Minti tuvaro Nunira maaqu Iosuaava, qaraaka vaiintivano vau entaraqaaahairo Mosira hampata vahai vira kaiqa kahaqamaqi ani vauva, Mosirara tiharo, Nora vaiintio, are vuru tira vitanta kia uva tiraiti, uve variate, tiro.

²⁹ Iosuaava minti tuvaro Mosiva aqao tiro, Vovano ti vatuka varaainara are virarae nora aato iriaro? Kia virara noraiqaakera iriane. Noravano Kotiva nai Maraqrura vaiinti nahenti nimira ekaa vikavata paropetivano Kotira uva qoqaiqama kaintemake tivera, te hovema tirarave, tiro.

³⁰ Mosiva mini vahai ekaa vi uvvara tiva taiqakero Isarerini qiata vaiintinavu hampata anirantero vatukaini vura.

Noravano Kotiva airi uviri varakovaro tuvura

³¹ Noravano Kotiva uvai vara kovaro uvaivano utiharo nora namariqaahairo airi uviri ventaqiro anura. Vika muuva voqaara vau uvirika ata vare, vata vauvau niha vatuka avutaqivata, vatuka aqaginivata, unutete vaura. Airitahaavano ekaa ho tave vata maatara, aru mpiqake unutete vaura.

³² Mintumanta vaiinti nahenti kuarigaavata entaqivata ni vahai uviri vira nuntuke vare vaura. Qaiqaa vira qararaavata qaqiqai nuntuke vare vaura. Vika vohaiqa vohaiqavano airi uviri varora maaravano vaireva, 1,000 kilo aatarakero vaura.

Vika uviri vira qumpihia keha vatukaqaa auruma tovaro kuarivano iteharo uviri mati vira aaharaqamake vaura.

³³ Ho vaiinti nahenti uviri vira qaqi ne vauvaro Noravano Kotiva vikara arara itovaro nora aihaviraara vara kovaro vikaqi tuvumanta vika vi aihaviraara vare airi vaiinti nahenti qutu vura.

³⁴ Airi vaiinti nahenti vi entara qutu vumanta mini quntama torara ti, vika vi vatara autu nteha tiha, *Kibaroti-Hataava – Voqamake-Mati-Naataa-Uka-Quntama- Taanainive*, tura.

³⁵ Ho Isarerini vika vi vatara ke, Haserotini orunte mini *seri* naavu maaqa kaqate vaura.

12

Miriaamika Eronika Mosirara qora uva tura

¹ Vi entara vika Haserotini vauvaro Mosira naata Sudani vatanaa nahentivano vaumanta Eronika Miriaamika Mosiva vi nahentira varorara iriha vitanta Mosirara pupiteha qora uva tura. (Katu Varora 2:21)

² Vitanta mintima ti: Noravano Kotiva Mosira noqaahairoqiae nai uva ti vairave? Kiave, viva titanta noqihairovata ti vairave, tura. Vitanta minti ti vauvaro Noravano Kotiva vitanta tu uvvara irura.

³ (Mosiva kia nai mahuta tiraitiro, viva nai autu vara muntuvi vatainiqaa keharo ni vauva vauvaro, kia maa vatarqaahaina vaiinti vovano Mosira voqaantemake kero, nai autu vara muntuviqama keharo vava vairave)

⁴ Mosiva mintima vau vaiintiva vaumanta Eronika Miriaamika virara pupiteha qora uva ti vauvaro vaakama Noravano Kotiva vinavukara tiharo, Ne taaramonavu vaakama ti *Seri* Naavu vainanaini aniate, tiro. Minti tumanta vinavuka himpi mini vura.

⁵ Vika mini oru vauvaro Noravano Kotiva quromuraqi tuyuntero nai *Seri* Naavu gentiqa himpitero vahai Eronika Miriaamika naarama kero tiharo, Netanta aniate,

tumanta vitanta vira aumanto ori vaiqura. ⁶ Ori vaiquvaro Noravano Kotiva vitanta tiva nimiro tiharo, *Ti uva iriate*.

Paropeti vaiinti vovano ni Isareri avutana vai entara, te tenta okara vira umiqare iha, tairakaa umiqeha uvavata tairakaqai vira tiva ami vaunarave.

⁷ Tenta kaiqa vaiinti Mosira tiva amire iha kia paropeti vainti tiva nimunantemake vira tiva amiraiti, vo qaramake vira tiva ami vaunarave. Te ekaa tenta kaiqa vira amitauraro viva vi kaiqara ho vare vairave.

⁸ Vaiintivano nai totintiro uva tintemake, te vira hampata uva ti vaunarave. Te vikanti uva tirera iha, kiama uva tuqantaake tiva amiraiti, ekaa uva vutukeqai vira tiva ami vaunarave. Minti ti vauraro viva ti hampata uva tiharo ti tave vairave.

Ho nantihae netanta kia qetaraiti, Mosirara pupiteha qora uva tiavo? Viva ti kaiqa vaiintima vaivo, tiro.

⁹ Nora Kotira arara itovaro minti tivakero vitanta noraiqama kero nitikero vatero tuvurantero vurama.

¹⁰ Kotira quromuravano Seri Naavu mini kero vuvaro vaakama vaata ne vau rovarava Miriaamiraqaa qovarama vuvaro vira vaatavano hantaiqama vura.

Mintima vauvaro Eroniva tuqantaa viro tavovaro vi rovarava Miriaamira vaataqaa ekaa raapama vura.

¹¹ Mintima vuvaro Eroniva Mosirara tiharo, Mpo, nora vaiintivauvo, tetanta kia koqe avu aato iriraiti, qora kaiqa varehama Kotira uva raqa kauro. Ho are titanta aaqurihamma timitera, qaqi kairage tentatanta qora okara varauara kaara kia vi maarara varaare.

¹² Oho, nai nora auhaqi qutu vi vaintira vatataivaro vira hini vaata nteravira voqaara vira viri vaata variantorave. Kia are Miriaamira qaqi kairaro mintimakero variarire, tiro.

¹³ Eroniva minti tuvaro Mosiva Nora Kotira aareharo tiharo, Mpo, Noravaauvo, are Miriaamira kahaqiraro viva qaiqaa ho variarire, tiro.

¹⁴ Mosiva Kotirara minti tuvaro Noravano Kotiva nai tiva amiro tiharo, Miriaamira vira qova vo uva kaara vira viriqi taara vihititirio, Miriaamiva vohaa *uikima* vahiaro kaurira haika varaitirio. Vira voqaantemra kero, Miriaamiva vohaa *uikiria* vatuka aaqaini variqi viro, qaiqaa vatukaqi uruarire, tiro.

¹⁵ Noravano Kotiva minti tumanta vohaa *uikiria* Miriaamira atitama kovaro viva vatuka aaqaini otu vaura. Viva vatuka aaqa mini vaumanta vaiinti nahenti kia katu vare viraati, vika Miriaamiva qaiqaa vatukaqi uruainara vira veka vaura.

¹⁶ Miriaamira veka vauvaro viva vatukaqi urumanta vika Haseroti mini ke oru aahara vata Paraanini *seri* naavu maaqa qaiqaa kaqateha vaura.

13

Kenaani vata oru ampeqamake tavora

¹ Noravano Kotiva Mosira tiva amiro tiharo, ² Te Kenaani vata vira ni Isareri nimirerave tunarara iriharama, are vaiinti vonavu nititaira vika oru vi vataraqaa vi aniba ampeqamake tavaate. Are 12 ankunavuqhairsi qjata vaiinti vohaiqa vohaiqa kaama tera nititaane, tiro.

³ Kotiva minti tuvaro Mosiva qumina vataini Paraanini vahiaro Noravano tunte iro qjata vaiinti vika nititomanta mini vura. ⁴ Qjata vaiinti vika nutu maantimama vairo:

Rubenira ankuqhainaava Sakura maaqu Samuaava,

⁵ Simionira ankuqhainaava Horira maaqu Sapaativa,

⁶ Iutaara ankuqhainaava Jefunera maaqu Kalepiva,

⁷ Isakaara ankuqhainaava Johepira maaqu Igaliva,

⁸ Efaramira ankuqhainaava Nunira maaqu Hoseaava,

⁹ Benaminira ankuqhainaava Rapura maaqu Palitiva,

¹⁰ Sebulunira ankuqhainaava Sodira maaqu Gadieriva,

¹¹ Manasera ankuqhainaava Susira maaqu Gadiva,

¹² Daanira ankuqhainaava Gemalira maaqu Amieliva,

¹³ Asera ankuqhainaava Maikerira maaqu Seturiva,

¹⁴ Napataarira ankuqhainaava Vopisira maaqu Nabaava,

¹⁵ Gaatira ankuqhainaava Makira maaqu Gueriva,

Vika vika nutu mintima vaura.

¹⁶ Mosiva qjata vaiinti vinavuka nititomanta vinavuka Kenaanini vi aniba ampeqama keha tavora. Mosiva Nunira maaqu Hoseaara vo autuvata ntava tero virara Iosuaarave tura.

¹⁷ Mosiva vinavuka nititareva iharo mintima tiro: Ne Nekevi vata vara maini kema veranto vuate.

¹⁸ Ne mini niha koqemake aitutumaqi vuate. Veranto vai vatava vaireva, nana vatae vaivo? Vi vatanaaka kempuka vatanaakae, ugerara vatanaakae variavo? Vika airie variavo, kiae airi variavo?

¹⁹ Vika vatavano koqe vatae vaivo, qora vatae vaivo? Vi vatanaaka qumina vatukanavuqie variavo, vaantaavura aututaa vatukanavuraoie variavo?

²⁰ Vi vataraqi kara koqema keroe qampiqe vaivo, kiae koqema kero qampiqe vaivo? Nantavatae vaivo, kiae nantavata vaivo? Vi haikara vi haikara rantakeha tavaate. Nenavu kia qetaraiti, vi vataraqahainaa katari tava vokira hiqi vare maini aniqe tenavuvata tavaare, tiro. *Uaini* tava hoqare mpeqaiqi entara Mosiva vi uvvara minti tiva kero vinavuka tiva nimura.

²¹ Mosiva vinavuka nititomanta vinavuka hoqaramake Seni qumina kanta ampeqama keha tavamaqi vivi, vo vatuka Rehoni aumanto oru ntora. Rehoniqaahairo aara vovano Hamaati vatukaini oruntora.

²² Viraqaahai vinavuka vata vo Nekevive tunaini orunte, vihai vatuka vo, Hebaronini vura. Vinavuka mini orunte tayomanta Anaaki vatanaaka vaintivara mini vaura. Haaru Anaaki vatanaaka vukai vuhaari vatauka vaumanta vika naintivara Ahimaanura ankuvata, Sesaira ankuvata, Tarimaira ankuvata, Hebaronini vaura. (Vi vatanaaka naane Hebaroni vatuka autu kovaro ihi 7navu aitaromanta Isipi vatanaaka Soani vatuka autu kora.)

²³⁻²⁴ Ho Mosiva nititoka vivi, Esikoli ugita kanta orunte, mini vahia *uaini* naaquntaqaahairo airi tava irato kaarara vohaiqa tegu kora. Vi kaararaqaa airi tava vohaaqraq iaratovaro voqama kero maara ntovarora tiro, vohaa vahintivano kia ho varaarirava vaumanta taaraqantavano vira rumpake aqu vare vura. Vinavuka mintimake *uaini* tava aqu varorara ti, Isarer vi vataro autu nteha *Esikolive - Kaara-vohaiqaqaa-airi-tavaritorave*, tura.

Vinavuka *uaini* tavavata, *fiki* katari tavavata, *pomigraneti* katari tavavatamake, vare vura.

²⁵⁻²⁶ Mosiva nititoka vi vataraqaa 40 entanavuara rantake tavamaqi vivi taiqake, vinavuka vihai orurante Mosivavata Eronivavata ekaa Isarerivata unaini anura. Vi entara ekaa vika Kadesi qumina vataini Paraanini vaumanta vinavuka vihai orurante nái nu vakaakara vika tiva nimiha, vi katari tavarava vare anuravata vika numiqora.

²⁷ Vinavuka Mosira tiva ami tiha, Are tinavu titihara oru vi vataro aitutumake tavaate tianara, tenavu oru tavaauraro karavano koqemakero mini qampiqaaaina vatavama vaivo. Ho tavaane. Tenavu vi vataraqahainaa kara vokira vare anuro.

²⁸ Vatavano koqe vata vaimantavata, vihainaaka kempuka vatanaaka variavaro vika vatukavano nora vatuka vaivarro vika vaantaavuravata kempuka vaantaavurama vaivo. Ike, tenavu tavauramanta Anaaki vatanaaka naintivara nái naaqu taatoka vuhaari voqaara vukai vuhaari vataukama mini variavo.

²⁹ Tenavu tavauramanta hini mantaraini Nekevi vataqaa Amareki vatanaaka variamanta, hini mantaraini verara ainqina vainaini Hiti vatanaakavata, Jebusi vatanaakavata, Amo vatanaakavata, variamanta, Kenaani vatanaaka hini kiaka nora namari Meditarenia Namari auvahini variamanta hini kiakama Iotani Namari auvahini variavo, ti.

³⁰ Minto tumanta Isareri vinavuka tu uvvara iri, qeteha Mosirara nuntu naantu ti vauvaro Mosiva nititokaqihairo vahinti vo vira autu Kalepiva vika uva mpampairatakero tiharo, Nana kaarae ne nantu ti variavo? Tinavu kempuka voqavata vaikave. Vate tenavu homa vika aru naatarake vika vata varaainarave, tiro.

³¹ Viva minti tumanta Kalepira hampata vuka kempukaiqamake tiha, Aqao, vi vatanaaka kempuka voqavata vaimanta variarara ti, tenavu kiama ho vika hampata raqirarave, ti.

³²⁻³³ Vinavuka minti tivakeha kia koqe uva vi vatarara tiraiti, maa uvaravata tiha, Tenavu vi vataraqaa niha tavauraro kia koqe vata vaivarro inaara karaqai vaimanta vahinti nahentti karara avoqihha variavo. Tenavu tavauramanta vahinti nahentti noraqora hauntivano mini variavo. Anaaki vatanaaka naintivara vukai vuhaari vataukama mini variavo. Tenavu vi vatanaaka tave vika nivuqaa kaintaaqa voqaara vauramanta vikavata tinavu tavaamanta tenavu kaintaaqa voqaarama vauro, ti. Vinavuka minti tuvaro vi uvava vi ani umanta ekaa Isareri vi uvvara irura.

¹ Mintumanta vaiinti nahenti vinavuka tu uvvara iri, vika entaqi voqamake oi aai ti vaiha iqi rataqi vivi aatita kora.

² Ekaa vika Mosika Eronikara nuntu nauntu tivaqi viha vitantara tiha, Mpo, koqemama tenavu Isipinie, maini aahara vatainie, variqi vi vuru qutu vuataarave. ³ Nantivaroe Noravano Kotiva tinavu tivita varero vi vataraqaa virevae auti vaivo? Vi vatanaaka raqiharina tinavu haruke, tinavu vaintive nahentive ravaqaqvavu kaimanta vika paanaa vaintima vaivarare. Tenavu Isipini qaiqaa anirante vuariraro koqe iataarave, ti.

⁴ Vika minti tivake nai tiva ami nai tiva amicha tiha, Aniqenavu qiatu vaiinti vo kaamate vira noraiqama kaariraro viva qaiqaa tinavu tivita varero Isipini anirantero vuarire, ti.

⁵ Vika minti ti vaura kaara Mosika Eronika vaiinti nahenti nivuqaa vatainu hiqintivi, naitanta viri vatainu ke vaura.

⁶ Mintumanta Nunira maaqu Iosuaavavata, Jefunera maaqu Kalepivavata, vitanta vi entara Kenaani vata ampeqama keha tavotanta, vika tu uvvara kaara muntuka qoraiqumanta vitanta naitonta utavaaqa qunahi qaanahimake, ⁷ vaiinti nahenti tiva nimi tiha, Tenavu vi vataro tavauraro koqe vatama vaivo.

⁸ Noravano Kotiva tinavuqua quahairera, viva homa tinavu tivita varero karavano koqemakero qampiqaaina vataraqaa vuru kaanarove.

⁹ Ne kiama vainti nahenti mini variakara qeteha Kotira uva ragaate. Tenavu kiama vukaari utiraiti, vika naatara kararave. Noravano Kotiva tinavu hampata vaimantara ti, vika una variqanavu kiama ho vika antua nimitevarave. Mintima vairara ti, kia vika naatu qetaate, ti.

¹⁰ Vitanta minti tumanta Isarerri vika kia Iosuaaka Kalepika tu uvarara quqaave tiraiti, vika tiha, Aniqe ori varake „Mosika Eronika“ ruqutu kaare, tivake vika ori varake vitanta ruqutuare tuvaro vate virave tiro vaakama Kotiva vaunaini voqama kero takuqi vau ovava Kotira Seri Naavuqaa ite vaumanta vika ova aatu qeteha kia vitanta ntaihora.

Mosiva Kotirara vaiinti nahenti aaqurihamu nimitaane tura

¹¹ Mintuvaro Noravano Kotiva Mosira tiva amiro tiharo, Maa vaiinti nahentika qaiqaa qaiqaa ti qoririmake variavo. Te aahuva kaiqa, nora kaiqa vika avutana vara kauraman-tavata, vika tiriara viva tinavu kia ho kahaqianarove ti variavo. ¹² Vira kaara kaiqe te qora aihaviraara vara kaariraro vika vehi autu taiqa kaarire. Te vika taiqake, viraqaahai ai Mosira kahaqiarirara are vo vatanaaka qova vairamanta vi vatanaaka kia maa vatanaaka voqara vairaiti, vika uri aatarake nai kempuka vatanaaka airitahaama vaivarare, tiro.

¹³ Noravano Kotiva minti tuvaro Mosiva aqao tiro, Mpo, Noravauvu, are nena kempukaqohaira maa vaiinti nahentika Isipihira ntita varera maini viri kaarava vahira are vika vehi autu kairera, Isipi vika virara iri, ¹⁴ viraqaahai vika maa vataraqaa variakavata tiva nimivarave. Maa vataraqaa variakaka kankomake iriavara are nena vaiinti nahenti hampata variaramanta ai vaiinti nahenti ai tave variarave. Maa vataraqaa variakaka iriavara are kuariqaa quromuravano vaavi vairaqi vahira tinavu avuni vihara, entaqi ihavano viavai ite vairaqi are tinavu avuni vi varianarave.

¹⁵ Are ekaa nena vaiinti nahenti vehi autu taiqa kairera, vo vatanaa vo vatanaaka ai nora kaiqaara iriaka, vika ariara mintima tivarave: ¹⁶ Noravano Kotiva nai kauqu aiqiqaa aquukeharo vi vataro tenta vaiinti nahenti nimirerave tivakerovata, viva vika ntita vareru qumina vatainu viharo vika ekaa vehi autu taiqa kaivo, tivarave. Vika minti tivorave.

¹⁷ Noravauvu, haaru are nena kauqu aiqiqaa aquukehara te mintirerave tiana uvvara iri-hara, nena kempuka tinavu humiqaaane. Haaru are nena minti tianarave: ¹⁸ Te Noravano Kotika kia vaaka arara ite vaikave. Te vaiinti nahentiera voqamake aaqurihamu nimite vauraukave. Te tenta uva ekaa enta avataqi vi vauraukave. Te ekaa vika vaaqu kaiqa vare variaravata, ti uva raqake variaravata, nunka nimite vauraukave. Mintihavata, te vika qora kaiqa varara kaara vika ntaihamu keha vika vaintivata, vika naintivaravata, vika naintivarava vaintivaravata, ntaihamu karerave, tianarave.

¹⁹ Mpo Noravauvu, are vaiinti nahentiera voqamake kera aaqurihamu nimite variaravara tira, are maa vaiinti nahentika qora kaiqa varaa uvvara nunka nimitaane. Vika Isipihai anu entaraqaahairo are qaiqaa qaiqaa vika qora kaiqa varo uvvara nunka nimitaanan-tema kera, maa entaravata vika uva nunka nimitaane turo, tiro.

²⁰ Mosiva minti tuvaro Noravano Kotiva nai tiva amiro tiharo, Hove, are tianantemake, te vika qora kaiqa varaa uvvara nunka nimirerave. ²¹ Te vika uva nunka nimiteha, vo uvavata tirerave. Te ekaa enta variqi vi vauraukave vauraro ti mpeqa okaravano ekaa vatainu takuqiharo mpeqa vairave. Mintiverama te kauqu aiqiqaa aquukeha maa uvvara kempukaiqamake mintima ti:

²² Maa vaiinti nahentikaqahairo kia voqavanovata te ni nimirera iaina vataraqaa vuanarove. Maa vaiinti nahentika Isipinivata qumina vatainivata vahira, ti takuqi vai

okararavata taveha, te nora kaiqa, vo kaiqa vo kaiqa varauvaravata tavaarave. Vika tavehavata, airi tataa ti uva raqakeha kia ti uva avate variarave.²³ Haaru te kauqu ainqaa aquakeha vika kaivaqaukavarara tiha, Ni vaintivara vi vatara nimirerave tuna vataraqaa maa vaiinti nahentika kia ho vivarave. Maa vaiinti nahentika ti qoririma timitaara kaara, kia voqavanovata mini ho vuuanarove.

²⁴ Ti kaiqa vaiinti Kalepira avu aatovano vo qarama kero vaivaro viva tinta hantuqa avate vairara ti, te vira vita vare viva vaaka aitutuma kero tavai vatara mini vuru karerave. Te vira mini vuru kaariraro viva mini vairaro vi vatava vira naintivara vatama varianarove.

²⁵ Maa entara Amareki vatanaakavata Kenaani vatanaakavata ugita kantama variavo. Virara irihama hora ne ekaa himpi katu vare anirante Naare Namari vainaini vi ani varia araraqaa vivi, qumina vo kanta oru variate, tiro.

Isareri vika nuntu nauntu tura kaara Kotiva vika qoraiqama nimitora

²⁶ Noravano Kotiva Mosika Eronika tiva nimiro tiharo,²⁷ Maa vaiinti nahentika qora kaiqa vare variaka, vika airi entama tirira nuntu nauntu ti variavaro ti popohaivo. Tairentae vika minti ti vai uvra qaqlira kevarare?²⁸ Ho netanta ti uva maa, vika tiva nimiante, Te Noravano ekaa enta variqi vi vauraukama te tenta kauqu ainqaa aquakeha niaria mintima turo: Ne nuntu nauntu tiha, Tenavu maini qumina kanta variqi vi vuru qutu virerave, tia uvra iruro. Ho ne nenta tiantemake, tevata ni mintima karerave.

²⁹ Ne qutivaro ni vaatavano aahara vata, vi kanta hampiara voqara varianarove. Ne tirirara nuntu nauntu ti vahia tirori variara kaara ne ekaa 20 ihiqahai voqavata varakeka kia ho vi vataraqaa vivarave.

³⁰ Haaru te tenta kauqu ainqaa aquakeha niara vi vataraqaa oru variate tunarave. Vate ne ekaa kia ho mini vivarave. Ho Kalepika Iosuaakaqai vi vataraqaa vivarave.

³¹ Ne tiha, Vi vatanaaka tinavu hampata raqihia tinavu haatarake tinavu vaintivara rumpatevarave, tiarave. Ho te vi vaintika ntita vare ne vi vatara qoririma kenaini vuru kaari vika vi vatara varema mini vaivarave.

³² Ne kia mini viraiti, ne qumina vata maini vahama qutu taiqa vivarave.

³³ Nahentivano nai vaati qaqlira kero vo vaiinti hampata nintemake, nevata ti qaqlirake kia ti uva iriavo. Vira kaara ni vaintivara 40 ihiara aahara vata maini vi anihia, nora maara variqi vimanta ne vika noka qoka ekaa qutu taiqa vivarave.

³⁴ Niqihai vaiinti vonavu 40 entanavu oru vi anihia vi vatara aitutumake tavaamanta viraqahai ne ti uva raqa keha kia vi vataraqaa virerave tiara kaara te kia niara 40 entanavuara tiraiti, te niara 40 ihiarama ne nora maara varaqi vivarave. Ne mintimake variqi vivaro ni aato kenko tiramanta ne mintima tivarave: Oho, Noravano kia tinavuara quaheharo nora maarama tinavu timi vaivo, tivarave.³⁵ Ne qora kaiqa vare variaka vahia ne vohaa avu aato vateha ti qoririma timitaara kaara ne ekaa vohaiqa vohaiqavano qumina vataini vahia qutu vivarave turo. Te Noravano Kotikama vi uvra tivatauro, tiro. Kotiva minti turama.

³⁶⁻³⁷ Mosiva vaiinti vonavu nititonanta vinavuka vi vatara aitutumake tavareka vunavuka, vinavuka orurante viri vaiinti nahentiara unahaa tiha, Vi vatara qora vatama vaivo, tumanta ekaa vaiinti nahenti vi uvra iri, Kotirara nuntu nauntu tura. Minti tura kaara Noravano qora rovara vara kovaro vi vaiintinavuka arukomanta vaaka qutu vura.

³⁸ Vaiinti 12navu vi vatara oru aitutumake tavokaqhah 10navu qutu vumanta Iosuaaka Kalepikaqai kia qutiraiti, qaqi koqemake vaura.

Isareri Kenaani vata varareka oru raqura

³⁹ Mosiva Noravano Kotiva tu uvra Isareri tiva nimumanta vika vi uvra iriha voqamake iqi ratora.

⁴⁰ Vika voqamake iqi ratake, vira qararaa toqaqi vika himpi vuru Mosira tiva ami tiha, Are iriane. Tenavu Noravano ti uvra raqake qora kaigama vara kauro. Ho vate tenavu Noravano tinavu timireva tivatai vataraqaa virerave, ti. Vika minti tivake himpi veraini Kenaani hampata raqireka vurama.

⁴¹ Igoka raqireka auti vauvaro Mosiva vikara aqao tiro, Nana kaarae ne Nora Kotira uva raqa keha kia vira uva irireka auti variavo? Ne mintivera, ne kia ho vi vatanaaka naatara kevarave.⁴² Qaqirake kia vuate. Noravano Kotiva kiama ni hampata vaivo. Hauri ne vimanta navutaaka ni naatara kevorave.

⁴³ Ne mini orunte Amarekivata Kenaanivata hampata raqivera, vika ni aruma kevarave. Ne Nora Kotira qoririmake vira uva kia avataqi vuara kaara viva kia ni hampata vairaitiro, kiama ni kahaqianarove, tiro.

⁴⁴ Mosiva minti tumanta vika kempukaiqamake vira uva kia iriraiti, tenavu navutaaka homa naatara kararave tivake, vika hampata raqireka veraini vuvaro Mosiva kia vika

hampata viraitiro, qaqi vatukaini vaura. Vika Nora Kotira Vokisevata kia vararaiti, qaqi vatukaini ke vura.

⁴⁵ Ho Isareri raqireka aaraini vi vaumanta vika navutaaka Amarekivata, Kenaanivata, veraihai uqitakanta tuvu Isareri hampata raqihai Isareri naatara kora. Vika Isareri aru ntataqi tuvi, muntu Homaa vatukaini kora...

16

Vaiinti vonavu Mosira uva kia irireka auti vaura

1-2 Vaiinti vonavu Mosira uva kia irireka auti vaura. Vi vaiintinavuka nutu:

Rivaira ankuqihairo Koraava. (Viva Isihaara maaquvano vauvaro vira kaivaqava Kohaativa vaura.)

Rubenira ankuqihai Dataaniva, Abiraamuva, Oniva. (Dataanika Abiraamuka Eli-apira maaqtantaa vauvaro Oniva Peretira maaquvano vaura.)

Erakaimante vaiinti vinavuka Isareri qiata vaiinti 250navu ntitake, kia Mosira vevaaraini vaireka auti vaura. Isareri vi vaiintinavuka kaama tomanta vinavuka vaiinti nahenti nivuqaa nora autu vatauka vaura.

³ Ho vinavuka Mosika Eronika vaunaini ani ruvaaqumavi vaiha vitantara oho ti, Netanta iriate. Tenavu ekaa Noravano kaama taikama vauro. Kia netantaqaivauve viva kaama taika variavo. Noravano Kotiva ekaa tinavu hampatavatama vaivo. Mintimanta nantihae netanta nentatanta autu tuahereha tinavuqaa raqiki variavo? Netanta mintia okarava kiama avuqavuqivo, tuvaro ⁴ Mosiva vika tu uvvara iriro, vatakanta hiqinti viro nai viri vataini kero Kotira aarer.

⁵ Kotira aarama kero viraqihairo himpiro Koraaravata vira hampata anukavata tiva nimiro tiharo, Ho iriate. Hura toqaqi Noravano Kotiva nai mantaraini vai vaiintira tinavu humiqaanarove. Viva nai kaama tai vaiintira, viraqaima qaqi kairaro vira *ofaa* tainta tataaga oru varianarove.

⁶ Ho Koraao, arevata, ai avataqi aniakavata, nenavu mintima iate: Hura toqaqi nenavu tanu vohaiqa vohaiqa vare, ⁷ vi tanuraqqi iha aurivata koqe mutta iaina haikaravata vate, tanu vira vare oru *ofaa* tainta tataaga Nora Kotira avuqaa himpive variate. Ne mintivaro viva tinavuqihairo vaiinti vo kaama tairaqe tenavu vi vaiintirara vivama Noravano Kotiva i vaiintivave tiare. Ike, ne Rivaira anku Kotiva ni nimi kaiqaraqai varaataara vaimanta ne vo kaiqavata varareka auti variavo, tiro.

⁸ Mosiva minti tivakero Koraara tiva amiro tiharo, Ne Rivaira anku iriate. ⁹ Ike, ne kiae Kotiva ni nimi kaiqarara noraiqaake iriavo? Kotiva tinavu Isareri Variqavano tinavu Isareriqihairo ni Rivaira ankuqai rairakero kaama tero niara tiharo, Vikaqai ti aumanto orunte, ti *Seri Naavuqai* kaiqa vareha, vaiinti nahenti nivuqavata himpi vaiha, vika kahaqama nimitatee, tirave.

¹⁰ Kotiva nivata, ekaa hinikia Rivaikavata, qaqi kaimanta neqai vi kaiqara vare variavaro ni nutuvuno noraiqiro vaivo. Ne vi kaiqara vareha hove tiataara vaimanta ne Kotira kaiqa vara amite vai vaiintira vira kaiqavata varareka auti variavo.

¹¹ Kotiva Eronira noraiqama kairara ti, ne kia Eroniraravauve nuntu nauntu ti variavo. Ne Nora Kotirarama nuntu nauntu ti variavo, tiro.

¹² Minti tivakero Mosiva Eliaapira maaqtantaa Dataaniravata, Abiraamuravata, naarmanta vitanta aqao ti, Kia tetanta virerave. ¹³ Are Isipini airi karavano koqemakero qampiqe vainaihairs tinavu tivita varera maini viri qumina aahara vatainai kaaramantara ti, vira kaara tenavu maini vaiha qutuma virarave. Oho, are mintimakera tinavu qoraiqama timitaarava vaharama qaiqaavata tinavuqaa raqikireva auti variaro. ¹⁴ Are tinavu tivita varera vo vata koqe vata vainaini vuru kaataarave. Tenavu airi naaho vateha *uaini* naahovata vataataara vaivara, are kia vo vata tinavu timira iaro. Are tinavu minta ireva auti variaro. Tetanta kia are inanaini virerave.

¹⁵ Vitanta minti tuvaro Mosiva vi uvvara iruvaro vira voqama kero arara itovaro viva Nora Kotirara tiharo, Are vika *ofaa* kia varaaane. Te vikaqaa raqihai kia vikaqihai *donki* voqa muara vararaiti, kia te vikaqihai vaiinti vovata qoraiqama amitaunarave, tiro.

¹⁶ Minti tivakero Mosiva Koraara tiva amiro tiharo, Hura toqaqima are 250 vaiinti ai avataqi ni variaka ntita varera, Kotira *Seri Naavu* vainaini aniane. Are vika hampata aniraroma Eronivavata aniarire. ¹⁷ Ne ekaa vohaiqa vohaiqavano iha vate tanuraqqi koqe mutta iainara viraqti vate, vare oru *ofaa* tainta tataaga variate, tiro.

¹⁸ Mosiva minti tumanta toqaqi vika ekaa nai tanu nai tanu vare, viraqti iha aurivata koqe mutta iainaravata vate, vare oru Mosika Eronika hampata Kotira *Seri Naavu* qentiqaa himpive vaura.

¹⁹ Vika vauvaro Koraava ekaa vaiinti nahentivata ruvaaquma komanta vika Kotira Seri Naavu qenti kanta vaiha Mosika Eronika taveha vaumanta vitantavata Kotira Seri Naavu gentiana himpite vaura. Mintimake ruvaaqumavi vauvaro vate virave tiro vaakama Noravano Kotiva viraqi vau ovava, voqama kero takuqi vau ovava ite vaumanta ekaa vaiinti nahenti ruvaaqumavi vauka vira tavora.

²⁰ Vika tave vauvaro Noravano Kotiva Mosika Eronikara tiharo, ²¹ Netanta vaiinti nahenti ke qaqini viniqe te ekaa vika vehi autu taiqa kaare, tiro.

²² Minta tumanta Mosika Eronika vaakama vataini higintivi naitanta viri vataini vate tiha, Mpo Kotio, areqaima Variqavano ekaa vaiinti nahenti maraquraqaa raqiki variaravama variaro. Vohaiqavano qora kaiqa vara kaira kaarae are ekaa vaiinti nahentia arara itaaro? ti.

²³ Vitanta minti tuvaro Noravano Kotiva Mosira tiva amiro tiharo, ²⁴ Are ekaa vaiinti nahenti tiva nimiramanta vika Koraara Dataanira Abiraamura vinavuka seri naavu ke niaranto orini variate, tiro.

²⁵ Kotiva minti tuvaro Mosiva himpiro Dataanika Abiraamuka vaunaini vumanta Isareri qita vaiintinavira avataqi vuvaro ²⁶ Mosiva vinavuka vaunaini oruntero ekaa vaiinti nahenti tiva nimiro tiharo, Maa vaiintinavuka qora vaiintinavu seri naavuqahaai niara kanta ori vaiqi variate. Mini vaiha ne kiama vinavuka i haikara vo haikavata utu varaaete. Hauri nevata vika aumanto vaiha vika qora kaiqa kaara qutivorave, ²⁷ tumanta vaiinti nahenti vi uvara iri, Koraara Dataanira Abiraamura vika seri naavu mini ke vumanta, Dataanika Abiraamuka naitanta seri naavuqahi vevante qentiana tuvu naitanta vainti nahentiaravata himpiti vaura.

²⁸ Mintimake vauvaro Mosiva vaiinti nahenti tiva nimiro tiharo, Kia te tenta han-tuqaqaa niqaa raqikiha vi kaiqara vi kaiqara vare vaunaravauve. Noravano Kotiva ti kaama tero ti tititaimanta te niqaa raqikiha vi kaiqara vi kaiqara vare vaunarave. Ne vaiha vo haika qovaraiqainara tave, viraqahaai ne kankomake Noravano ti kaama tairara irivarave.

²⁹ Ho tavaate. Kotiya kia maa vaiintinavuka ntaihamma karaitiro, vinavuka qaqi kairamanta variqi vi qako naampaiqamavi qutu vivera, ne tirira ho tiha, Kotiva kia vira kaama tero atitaivave, tivarave. ³⁰ Ho Noravano Kotiva ni vo qara i haikara numiqairaro vatavano qantuura viramanta maa vaiintinavuka qaqi variaika nai ia haikara hampata qutu vuaka varianaini vivera, ne vinavuka Kotira qoririma amiterara kankomake irivarave, tiro.

³¹ Mosiva uva tiva taiqa kovaro vaakama vatavano Dataanika Abiraamuka vauraqaa quantua viro nora no autiro vaura. ³² Vatavano mintima kero qantuura vuvaro Dataanika Abiraamuka naitanta vainti nahentiaravata, ekaa Koraara vainti nahentivata, ekaa nai u haikara hampata vataqi otigetovaro vatavano vika aqu ravaaqavu kora.

³³ Vika qaqi vauka vaiha mintimake nai u haikara hampata qutu vuaka varianaini vuvaro vatavano vika aqu ravaaqavu komanta vaiinti nahenti kia qaqaavata vika tavora.

³⁴ Vika vataqi otigeteha voqamake keke ti vaumanta ekaa Isareri vika aqamoto vauka tiha, Oho, kantama vuate. Hauri vatavano tinavuvata ravaaqavu kaantorave, tivake kantama vura. ³⁵ Vika kantama vuvaro Noravano Kotiva naaruvalihairo iha vara kovaro tuvuntero 250 vaiintinavu koqe munta ura iha quare vauka tatoqa taiqa kora.

Kotira ofaa tainta aqu amitora

³⁶ Ihavano vika tatoqa kovaro Noravano Kotiva Mosirara tiharo, ³⁷ Are Eronira maaqu Eleasaava ti kaiqa vara timite vai vaiintirara tiraro viva oru ihavano tatoqa kai vaiintinavuka ia tanura, ekaa vi tanura varakero ori vaigiro tanuqi vai iha aurira aqu aquama kaarire. Vi tanunavuka kia qumina tanu vairaiti, ti Nora Kotika kaiqara iriha kaamataa tanukama variarave.

³⁸ Vi tanunavura vare koqe munta i murara autireka ti *ofaa* tainta tataqa oru varia tanuva vairave. Tanunavu varake *hamaqohai* ruqutu kakanairimake vuru ti *ofaa* taintaqua aqu taatau taate. Nai qora kaiqa varaara kaara qutu vua vaiintika tanunavuqohai mintimanta Isareri vika ti tainta vira taveha, vikavata kia vohaa qaramake vinavuka qora kaiqa varentemake varaaete, tiro.

³⁹ Kotiva Mosirara minti tuvaro Mosiva Kotira kaiqa vara amite vau vaiintirara Eleasaara tiva amuvaro Eleasaava vi tanunavura varero vuru komanta vi tanura ruqutu kakanairimake kovaro Eleasaava *viraqohairo ofaa* taintaqua aqu taatau tora.

⁴⁰ Tainta viraqaa aqu taatautora taveha Isareri vika tiha, Hauri qumina vaiintivano kia Eronira ankuqihainaava koqe munta i murara iha quarareva Nora Kotira *ofaa* tainta tataqa vuanatorave. Qumina vaiintivano mintirera, Noravano Kotiva Koraaravata vira avataqi ni vaukavata qoraiqama nimitaintema kero, vi vaiintiravata qoraiqama

amitaanarove, tura. Isareri mintiate tiro, Noravano Kotiva Mosira tiva amuvaro Eleasaava ekaa haika Noravano tuntema kero autu kora.

Eroniva vaiinti nahentiara iriharo Kotira aarora

⁴¹ Vira qararaa ekaa vaiinti nahenti Mosika Eronikara nuntu nauntu tiha vitantara mintima ti: Netanta mintihama Kotira vaiinti nahenti hini kiaka arukaavo, ti.

⁴² Vika minti tivake ruvaagumavi vaiha Mosika Eronika nitihā tuqantaavi tavovaro Kotira Seri Naavu vaunaini vate virave tiro vaakama quromuravano Kotira Seri Naavu naavuma kovaro Noravano Kotiva viraqi vau ovava, voqama kero takuqi vau ovava qovarama viro ite vaura.

⁴³ Ite vaumanta Mosika Eronika oru naavu vira qentiana himpīte vauvaro ⁴⁴ Noravano Mosira tiva amiro tiharo, ⁴⁵ Netanta vinuate. Netanta vi vaiintika ke niaranto ori vaiqi vase te vika vehi autu taiqa kaare, tiro.

Minti tumanta vitanta vi uvvara iri vatainī hiqintivi nāitānta viri vatainī vate vaura.

⁴⁶ Mosiva Eronirara tiharo, Mpo, nena iha quare variana tanuravata, koqe mutta iaina haikaravata varera, oru *ofaa* taintaqahaiaha iha auri varakera tanu viraqi vatera, kantera vaiinti nahenti vainaini oruntera, vikara iriharo Kotira iha quara amitairaro viva vika qora kaiqa vare uvvara nunka nimitaarire. Nora Kotira vogama kero vikara arara itaivarō viva qora rovara vara kaivarō vika qoraiqama nimite vaivo, tiro.

⁴⁷ Mosiva minti tuvaro Eroniva Mosiva tunte iro, viraqi iha quarato tanura varero kantero vi vaiinti nahentika ruvaagumavi vaunaini vika nivutaini oruntero tavovaro qora rovaravano vikaqaa vaaka qovarama vura. Mintuvaro Kotira vika qora kaiqa vare uvvara nunka nimitaarire tiro, Eroniva koqe mutta u haikara iha auriqaa aqu aquma kovaro muravano oru vura.

⁴⁸ Mosiva tuntemakero Eroniva vaiinti nahenti vaaka qutu vukavata qaqi vaukavata nivutana himpi vauvaro vi rovarava taiqa vura. ⁴⁹ Tota Koraara hampata airi vaiinti nahenti qutu vuvvaro viraqahaairo vi rovarava Isareri vikaqī qovaramaviro 14,700 vaiinti nahenti aru kora.

⁵⁰ Ho Eroniva vaiinti nahenti nivutaini vauvaro vi rovarava taiqa vuvaro viva orurantero Mosiva Kotira Seri Naavu qentiana vaunaini anura.

17

Kotiva Eronira kaama torara tura

¹ Noravano Kotiva Mosirara tiharo, ²⁻³ Are Isareri tiva nimiramanta vika kauru 12navu ai amiate. Vohaa anku vohaa anku qiata vaiintiqahira kauru vohaiqa vohaiqa varera, vika nutu kauru viraqaa qara ntuva tera, Rivaira ankuqiraa kauruqaa Eronira autu qara ntuva taane.

⁴ Viraqahaairo vi kaurunavura varera, ti Kotika Seri Naavuqi oriqetera ti *Vokisevano* vainaini, te ni hampata mini vaiha uva ti vaunaini vuru vataane. ⁵ Mintiakera kauru vinavura vatairaro te kaama tauna vaiintira kauruqahaairo *maumau/aimau* arakero qampiqaaínara vika tavaate. Vika tave, viraqahaai te vi vaiintira kaama taunarara kankomake iri tavevarave. Isareri vo enta vo enta ariara nuntu nauntu ti vai uvvara te mintimake taiqa karerave, tiro.

⁶ Kotiva minti tuvaro Mosiva vi uvvara Isareri tiva nimumanta vika 12 ankuqihai qiata vaiinti vohaiqa vohaiqavano nái kauru vare, Eronira autu vato kaururavata vare, vira Mosira amuvaro ⁷ viva kauru vinavura varero Kotira Seri Naavuqi vira *Vokise tataaqa* vuru vatora.

⁸ Ho vira qararaa Mosiva Kotira Seri Naavuqi oriqetero tavovaro Rivaira ankuara iriharo amu kauruva, Eronira autu vau kaururaqaa *maumau/aimau* aratero *amoni* katari tava iratero mpeeqaiqiro vaura.

⁹ Ho mintuvaro Mosiva Kotira Seri Naavuqihairo ekaa kauru varero vahaqaini muttu Isareri numiqomanta vika tavora. Tavama komanta qiata vaiinti vika ani nai kauru nai kauru varora.

¹⁰ Ani varovaro Noravano Kotiva Mosirara tiharo, Eronira autu vaina kaurura qaiqa varera vuru ti Seri Naavuqi ti *Vokise* tataaqa vataane. Mintiakera vatairamanta ti uva raqe vaika vi kaururara iriha tiha, Hauri tenavu qaiqa nuntu nauntu tivaqī vuariraro Kotiva tinavu aru kaantorave, tivarave, tiro. ¹¹ Noravano Kotiva minti tuvaro Mosiva viva tunte ura.

¹² Isareri Mosirara tiha, Oho, tenavu ekaa qutuma virarave. Tenavu ekaa taiqa vuariraukama vauro. ¹³ Vaiinti vovano Kotira Seri Naavu tataaqa oru virera, Kotiva vira aruma kaanarove. Mpo, Kotiva tinavu ekaae arukaanarove? ti vaura.

20*Mosiva Kotira uva raqa kora*

¹ Avuhainaa toraqaa Isareri vaiinti nahenti qumina aahara vata Seni Vata Kadesini oru vaura. Mini vauvaro „Mosika Eronika nakaava“ Miriaamiva qutu vumanta quntama tora.

² Vi vataraqaa kia namarivata vaumanta vira kaara vaiinti nahenti Mosika Eronika vaunaini oru ruvaaqumavi vaiha ³ vitantara nuntu naantu tiha Mosira atiha tiha, Mpo, koqemama Kotira Seri Naavu tataaqa tentanavu navunaaka hampata tenavu qutu vuataarave. ⁴ Nana kaarae netanta tinavu tivita vare qumina aahara vatainai viri kaavo? Tenavu tentanavu quara vairi hampata maini qutu vuate tie, netanta tinavu tivita vare aniavo? ⁵ Netanta nantihae Isipihai tinavu tivita vare qora vata maini tenavu kia ho karavata utuke naainanaini viri kaavo? Kia maini *uitivata* koqe katari tavavata vaivaro, kia *uainivata pomegranetivata* vaivo. Mpo, tenavu namarivata naarirava kiama vaivo, ti.

⁶ Vika minti tumanta Mosika Eronika vi uvava iri, vaiinti nahenti mini ke, oru Kotira Seri Naavu gentiana vaiha, vatainai hiqintivi náitánta viri vatainai vate vaura. Vitanta mintimake vauvaro Noravano Kotiva viraqi vau ovava, voqama kero takuqi vauva qovarama viro ite vaura.

⁷ Noravano Kotiva Mosirara tiharo, ⁸ Oru ti *Vokise* tataaqa vai kaurura varera, arevata Eronivavata ekaa vaiinti nahenti vohaaraqaa ruvaaquma kera, vika nivuqaa vaihara nora ori vitini vairara uva tiraro namarivano viraqihairo tuvuarire. Are mintima kairaro vi oriraqihairo namari aquvi aquvi iharo tuviramanta vaiinti nahentivata vika purumakauvata sipisipivata vo quaravata vi namarira naate, tiro. ⁹ Noravano minti tuvaro Mosiva viva tunte iro oru vi kaurura varora.

¹⁰ Mosika Eronika ekaa vaiinti nahenti vi orira tataaqa ruvaaqumake, Mosiva vaiinti nahenti nitiharo tiharo, Ne Kotira qorrima amite variaka, iriate. Tetanta maa oriraqihiae namari ni kaqa nimiainarave? tiro.

¹¹ Minti tivakero „Mosiva kiama Kotiva tunte iro ori virara uva tiraitiro“, viva nai kauru tuahera kero taara tataama kauruqohairo vi orira ruqutiro.

Ruqutu kovaro ori viraqihairo nora namari aquvi aquvi iharo tuvimanata ekaa vaiinti nahentivata, ekaa purumakauvata sipisipivata vo quaravata vika vika, vi namarira nora.

¹² Mintuvaro Noravano Kotiva Mosika Eronika nitiharo tiharo, Vate maa entara netanta kia tiriara kempukaiqamake iriraiti, netanta Isareri vaiinti nahenti nivuqaa vaiha kia ti hutu tuaherakeha, ti mpeqa okara takuqi vaira vika numiqava. Netanta mintiara kaara kia netanta te nimirera tuna vataraqaa Isareri ntita vare vivarave, tiro. Kotiva minti tura.

¹³ Isareri vi namarira autu nteha, *Meribave – Nuntu Naunturave* tura. Vika mini vaiha Kotirara nuntu naantu tuvaro Noravano Kotiva nai takuqiro vai okarara vika numiqora.

Idomu avuhainaava Isareriera kia tinavu vataqaa aitare vuate tura

¹⁴ Isareri Kadesini vau entara Mosiva vaiinti vonavu nitomanta vinavuka Mosira uva vare Idomuni avuhainaa vaiintivano vaunaini vura. Mosiva mintima tiro:

Tenavu Isareri ai navunaakama maa uvava qara ntuva tauro. Airi maaravano tinavuqiqi qovaraiqimanta ani vaunarara are irianarave.

¹⁵ Haaru tinavu naaqukavara katu vare Isipini otu airi ihiara mini vaurave. Mini vaumanta vi entara Isipi vika tinavu naaqukavata, tinavuvata qoraiqama timite vaurave.

¹⁶ Mintumanta tenavu Nora Kotirara tinavu kahaqiane tiavauraro viva tenavu vira aarauna uvava iriro *enseli* vo varakovaro viva tuvuntero tinavu Isipiqihairo tivita vararer viri kaimanta vate tenavu Kadesi maini vauro. Vi vatava ai vata auvahini vaivo.

¹⁷ Tenavu ai ireha tiha, Hoe are tinavu qaqi kairage tenavu ai vata tavaaranava vitare vuuare? Tenavu tentanavu purumakauvata hampata kiama ni *uiti* naahoqive, *uaini* naahoqive, aiqu ntavaqiqi viraiti, ne namariara quvitaaraqiqi kia kaqake naraiti, tenavu qaqi nora aaraqaa avata vare vitare virarave, tiro.

¹⁸ Mosiva minti tivakero uva vara komanta Idomu vika nai tiva ami tiha, Aqao, ne kia tinavu vataqaa ho aitarevarave. Ne kia tinavu uva iriraiti anivera, tenavu ni hampata raquainarave, ti.

¹⁹ Tumanta Isareri vika nái tiva nimi tiha, Tenavu nora aaraqai avata vare virerave. Tenavu tentanavu quara vairi hampata ni namari naarerava, tenavu ni koqaa nimirarave. Tenavu ni vataqaa qaqi vitare vuairava, vivaqaima vaivo, ti.

²⁰ Isareri mintimake Idomu iromanta vika qaiqaa qaqqai kempukaiqaake tiha, Ne kia ho tinavu vataqaa aitare vivarave, tivake nái iqoka vaiinti airitahaa ntita vare Isareri hampata raqirera anura. ²¹ Idomu nái vatainai Isareri qioqama tomantara ti, Isareri qaqrake vo aaraqaa rante vura.

Eroniva qutu vura

²² Ekaa Isareri Kadesi mini ke vivi ²³ Horu Aiqinaqaa Idomu vata auvahini oruntovaro Noravano Kotiva Mosika Eronikara tiharo, ²⁴ Netanta Meribaini vaiha ti uva raqakaara kaara Eroniva kiama ho te Isareri nimirera tuna vataraqaa viraitiro, viva qutuma vuuanarove.

²⁵ Mosio, are Eroniravata vira maaqu Eleasaaravata ntita varera Horu Aiqinaqaa vuane. ²⁶ Vitanta mini vuru kerama Eroniva ti Kotika Naavuqi kaiqa vareharo nonkutai utavaaqara viqu kerama, vira maaqu Eleasaarama nonku amitaane. Eroniva vi ainqaraqaa qutu vuuanarove, tiro.

²⁷ Minti tuvaro Mosiva Noravano tunte iro Eronika Eleasaaka ntita varomanta ekaa Isareri tave vaumanta vinavuka ainqinaqaa vurama.

²⁸ Mosiva Eroniva Kotira kaiqa vara amiteharo nonkuto utavaaqara viraqaaahairo viqukeru, vira maaqu Eleasaara nonku amitovaro Eroniva ainqina viraqaa vaharo qutu vura. Qutu vumanta Mosika Eleasaaka „vira quntama te,“ ainqina ke tuvura.

²⁹ Tuvunte vitanta ekaa vaiinti nahenti tiva nimi tiha, Eroniva qutuma vivo, tumanta ekaa vaiinti nahenti vika virara iriha 30 entanavuara vaiha iqj rata amitora.

21

Isareri Kenaani hampata raqihā vika naatara kora

¹ Vi entara Kenaani vatanaaka avuhainaa vaiinti vovano viva Araati vatuka Nekevinia vaharo irumanta Isareri Atarimi aaraqaa ani vaura. Mintimake ani vauvaro avuhainaa vaiinti viva iriro nai iqoka vaiintivata ntita varero otu Isareri hampata raquqi viharo Isareri vokuka ravaaqavu varero vura.

² Mintumanta viraqaaahai Isareri nái kauqu ainqiqa aquukeha Nora Kotirara tiha, Are tinavu qaqi kairae tenavu vi vaiintika naatara kaareru, tenavu kia vika vatukanavuqihai vo haikavata vararaiti, ekaa vi vatukara vehi autu taiqa karerave, ti.

³ Vika minti tuvaro Noravano Kotiva vika uva iriro Isareri vika kahaqumanta vika Kenaani vatanaaka hampata raquqi viha vika naatara kora. Isareri Kenaani vatanaakavata, vika vatukavata ekaa vehi autu taiqa korara ti, vi vataru autu nteha *Homaave – Vehi autu taiqa korave tura*.

Baraasi oriqohai memaru aututora

⁴ Isareri Horu Aiqina mini ke, Idomuni vuarorave tivake vika vo aara, Naare Namarini vira inaara autu Akapa Namarini vu aararaqaa rante vura. Vika vi aararaqaa vi vauvaro vogama kero popohora.

⁵ Vika nuntu nauntu tiha Kotika Mosika nitihia tiha, Nana kaarae netanta tinavu Isipiqihai tivita vare, maini aahara vataini viri kaavo? Tenavu maini vaiha qutuma virarave. Karavata namarivata kia maini vaivo. Vo kara timi varianara virara tinavu vogamakero popohaivo, ti.

⁶ Isareri vika minti ti vauvaro Noravano vika nuntu nauntu ti vau uvvara iriro, vira kaara *quqahi/quaiha* varakomanta vika vaiinti nahenti nkaqe vaumanta airitaha qutu vura.

⁷ Mintumanta vaiinti nahenti Mosiva unaini aninte virara tiha, Mpo, tenavu Nora Kotiravata aivata qora uva tiva nimitauro. Are Kotira aarairaro viva *quqahi/quaiha* vika tinavuqihai vara kaarire, tuvaro ho Mosiva vaiinti nahentiari iriharo Kotira aarora.

⁸ Mintuvaro Noravano Kotiva Mosirara tiharo, Are *quqahi/quaiha maraqura/varaha* vo autu kera, katari aratera viraqaa vira hiritaane. Tau vaiinti nahentikae *quqahivano/quaihavano* nkaqa tairauka vira maraqura vuruvi tavaivera, vika kia qutiraiti, qaqi vaivarave, tiro.

⁹ Kotiva minti tuvaro ho Mosiva *quqahi/quaiha* maraqura *baraasi oriqohairo* autu kero, katariqaa hiritero. Mintiakero hiritomanta *quqahivano/quaihavano* nkaqato vaiinti nahentika vuruvi vira maraqura taveha, vika kia qutiraiti, qaqi vaura.

Isareri Horu Aiqina ke Moapi vataini oruntora

¹⁰ Isareri vika Horu Aiqina ke, vivi, Obotini oru naavu maaqa kaqate vaura. ¹¹ Obotini varike qaiqaa vihai katu vare oru haarua naavu nuqihii vaunaini Abarimini qaiqaa naavu maaqa kaqate vaura. Moapi vatavano vauvaro kuari avu uruntonaini Abarimivano aahara vataini vaura.

¹² Qaiqaa vika Abarimi ke, katu vare Sereti uqitaini naavu maaqa kaqate vaura.

¹³ Qaiqaa vika Sereti ke, katu vare Aanoni Namari hini mantaraini aahara vataini naavu maaqa kaqate vaura. Vi vatava aahara vatavano viviro, Amo vatanaaka vata

avutaini oruntora. Aanoni Namariyano o ntuvataantema kero, Moapi vatanaaka vata hini antuarero Amo vatanaaka vata hini antuarero vaura.

¹⁴ Vo vuku vira autu, Noravano Kotiva raqurave tu vukuraqi mintima tiro:

Wahepi vatukavano Sufaa vata mantaraini vaivaro uqita vatavanovata Aanoni Namariyano ¹⁵ viviro vatuka vo Aruni oruntero, Moapi vata auvahinivata oruntairave, tura.

¹⁶ Qaiqaa Isareri vika mini ke, katu vare, oru vo vata, Namariara Quvitonainive tunaini vura. Isareri mini vauvaro Noravano Kotiva Mosirara tiharo, Vaiinti nahenti naairaramanta ani ruvaaqumavi vaiqe te vika namari nimiare, tiro.

¹⁷ Tumanta vi entara Isareri maa ihira tiha:

Ruvu namarivauvo, nena qovarama vira vuane. Qovarama viraqe tenavu vira taveha quaheha ihi tiare.

¹⁸ Qiata vaiintivata nora vaiintivata vi ruvu namarira quvitaarave.

Qiata vaiinti kauruqohaivata, qaqi uruqi sua kauruqohaivata quvitaarave.

Kaiqenavu virara ihi tiare, tura.

Qaiqaa Isareri aahara vata ke, katu vare Matanaini vura. ¹⁹ Qaiqaa vika Matana ke, katu vare Naharieri ugitalini otu vaura. Qaiqaa vika katu vare oru veraini Bamoti vatainivura. ²⁰ Qaiqaa vika Bamoti ke, katu vare otu uqita vatainivura Moapi vata Pisiga Aiqlina vaunaini vura. Pisiga Aiqlinaahai vaiinti nahenti aahara vata maata vutu vuru taveva ho vaura.

Isareriraqiha Sihonika Okuka naatara kora

²¹ Isareri mini vaiha uva varakovaro Amo vatanaaka avuhainaa vaiintivano Sihoniva inaini vura. Vika mintima ti:

²² Hoe are tinavu qaqi kairage tenavu ai vata tavaarana vitare vuare? Tenavu tentanavu purumakau hampata kiama ni *uiti* naahoqive, *uaini* naahoqive, aiqu ntavaaqi viraiti, ne namariara quvitaaraqi kia kaqake naraiti, tenavu qaqi nora aaraqaa avata vare vitare virarave, ti.

²³ Vika minti tuvaro King Sihoniva Isareri vikara tiharo, Ne kia ho mintivarave, tivakero viva nai iqoka vaiinti ruvaaquma kero ntita varero oru Jahasi vatukaini aahara vatainivaiharo Isareri hampata iqoka raqua.

²⁴ Iqoka raqumanta Isareri vika kempukaiqamake raqicha airi Amo aru taiqa keha vika vatawata varora. Vika Amo vatanaaka vata varova vaireva, Aanoni Namariqaahairo hoqarama kero viviro vuru Jaboku Namari *noti* mantaraini vuru taiqora. Mini vo vatanaaka Amoni vatanaaka kempuka vatanaaka vaumantara ti, Isareri Amo vatanaaka vataqai vare, kia Amoni vatainivura. Amoni vata auvahini Amoni iqoka vaiinti airitaha vaumanta Isareri kia mini vura.

²⁵ Ho Isareri Hesaboni vatuka vare, hini vatukanavu vira tataaqa vauravata vare, ekaa Amo vatukavata vare, vi vatukara vi vatukaraqi oru vaura.

²⁶ Amohainaa King Sihoniva Hesaboni vatukaqi vaura. Haaru Sihoniva Moapi avuhainaa vaiinti vontiro raqiharо vira aatarakerо vira vata ekaa varora. Vi vatava viviro Aanoni Namariyano otu vunaini muntu taiqora.

²⁷ Haaru Sihoniva mintimakero Moapi vatanaaka naatara korara ti, ihi ti vau vaiintika maa ihira tura:

Ne Hesabonini vatukaqi ani vaiha qaiqaa vi vatukara autuate.

Sihonira vatukavano haaru koqema kero vauntemake, vi vatukara qaiqaa autuate.

²⁸ Ihavano iteharo ukau itakontemake, haaru Sihonira iqoka vaiinti Hesabonivatukaihai iqoka raquqi vivi, Aru vatuka Moapi vatainivura vehi autu taiqake, verara Aanoni Namari aruvunu vaukavata aru taiqa kora.

²⁹ Moapi vaiinti nahentivauvo, niara oho tiva nimitauro. Una variqa Kemosira autu tuahere variaka, mpo, ni vehi autu taiqama kaavo.

Ni una variqavano kia ni iqoka vaiinti kahaqiraitiro, viva ni navutaaka qaqi kaimanta vika ni iqoka vaiinti aru ntata kaarave.

Ni una variqavano Amohainaa King Sihonira qaqi kaivaro viva ni nahentinavu ravaaqavu kairave.

³⁰ Mintiaveravata, vate tenavu vika naatarama kauro. Tenavu iqoka raquqi vivi, Hesaboni vatukavata Diboni vatukavata vehi autu taiqake, qaiqaa raquqi vivi, Medeba vatuka aumanto vai vatukara Nofainivata vehi autu taiqa kaunarave, ti.

Minti tivake ihi tura.

³¹ Ho Isareri vika Amo vatukanavu vare mini vaura.

³² Mini vauvaro viraqaahairo Mosiva vaiinti vonavu Jase vatuka ampeqama keha tavaate tiro, vinavuka nititomanta oru tavora. Viraqaahai Isareri iqoka raqicha Jase

vatuka vare, vira tataaqa vau vatukaravata varora. Vika mintiakae vareha Amo vatanaaka vi vatukaraqi vauka aru ntata komanta vurama.

³³ Viraqaahai Isareri tuqantaavi Basaani vataini vu aarara avatare vura. Vika mini oruntovaro Basaanihainaa King Okuva nai iqoka vaiinti ntita varero tuvuntero Isareri hampata Edarei vatuka vaunaini raqura.

³⁴ Noravano Kotiva Mosirara tiharo, Ne kia King Okura aatu getaate. Te ni kahaqiai ne vira aatarake, vira vatavata varevarave. King Sihoniva Hesaboni vatukaqai vaharo Amo vatanaakaqaa raqiki vaira qoraiqama amitaantemake, ne viravata vohaa qarama amitaate, tiro.

³⁵ Noravano Kotiva minti tumanta Isareri viva tuntemake, King Okuravata, ekaa vira maaqunavuvata, ekaa vira iqoka vaiintinavuvata aru taiqa kora. Aru taiqake viraqaahai Isareri vika vatavata varora.

22

Moapi avuhainaa vaiintivano Balaamira aarora

¹ Isareri mini varike, vihai vika oru Moapi vataini vivi, Iotani Namari hini mantaraini ugita kanta vika naavu maaqa kaqate vaura. Vika ugita kanta vauvaro Ieriko vatukavano Iotani Namari hini mantaraini vuruniqama vaura.

² Isareri mini vauvaro Moapi avuhainaa vaiinti Sipora maaqu Balaakiva vaharo Isareri Amo vatanaaka aru taiqa korara iriro,³ vivavata Moapi vatanaakavata tavomanta Isareri airitahaa vaumanta ekaa vika Isareri naatu voqamake geteha vaura.

⁴ Ho vika qete vahai Midiani vatanaaka nora vaiintinavu tiva nimi tiha, Oho, purumakau qoravano vaaka ukau nama taiqa kaintemake, vi vatanaaka tenavu vataaina haikara ekaa vara taiqama kevarave, ti.

⁵ Minti tuvaro King Balaakiva vaiinti vo, Balaamiva aniarire tiro, vaiinti vonavu viva unaini vara kora. Vi entara Beora maaqu Balaamiva nai maaqa Petorini Iufaretisi Namari tataaqa vaura. Balaakiva vaiintinavu vara keharo Balaamirara mintima tiate tiro:

Mpo, vo vatanaaka Isipi ke, ekaa vata maata raapamake aniaaka, vika vate tinavu aumanto vahai tinavu vatavata varareka auti variavo.

⁶ Vika airitahaa variarara ti, tenavu kia ho vika naatara kararave. Mintimake variaverama te ai aarauro. Are maini anintera nena variqanavu naarairamanta vinavuka vi vatanaaka qoraiqama nimitaate. Are mintirage tenavu ho vika hampata raqiba vika naatarake tentanavu vataqaahai vika aru ntata kaari vuate.

Te irunarave. Are vaiinti nahentia vika kaimanta koqemake variate tiaramanta ai variqanavu vika koqema nimite variamanta variarave. Are tihara, Kaimanta vika qoraiqama vuate, tiaramanta ai variqanavu vika qoraiqama nimite variarave, tiro.

⁷ Balaakiva minti tumanta Moapihaiavata Midianihaiavata nora vaiintinavu vi uvava vare, Balaamiva unaini vura. Balaamiva Isareri qoraiqama nimitaaina uvara tiarire ti, vika vira koqaavata vare, viva unaini orunte King Balaakiva tu uvara vira tiva amura.

⁸ Vinavuka tiva amuvaro viva iriro, vinavukara tiharo, Ne entaqi ti naavuqiqi vaitaiqe te hora toqaqi Noravano Kotiva vonare tina uvara ni tiva nimiare, tumanta nora vaiinti vinavuka vira hampata mini vaitora.

⁹ Ho entaqi Kotiva Balaamiva unaini tuvuntero vira irero tiharo, Tau vaiintikae ai hampata variavo? Vika nana haika varareka aniaake variavo? tiro.

¹⁰ Kotiva minti tuvaro Balaamiva Kotirara tiharo, Balaakiva Moapi avuhainavaa vinavuka nititaimanta vinavuka viri ti mintima tiva timiavo: ¹¹ Mpo, vo vatanaaka Isipi ke, ekaa vata maata raapamavi aniaaka, vika vate tinavu aumanto vahai tinavu vatavata varareka auti variavo. Are anira, nena variqanavu naarairamanta vinavuka vi vatanaaka qoraiqama nimitaate. Are mintirage tenavu vika hampata raqiba, vika naatarake tentanhai vataihai vika aru ntata kaari vuate tiavo, tiro.

¹² Minti tuvaro Kotiva Balaamirara tiharo, Aqao, are kia vi vaiintinavuka hampata mini vuane. Te Isareri hampata vahai vika koqema nimite vaunarara tira, are kia ti aarehara vika qoraiqama nimitaane tiane, tiro.

¹³ Noravano Kotiva minti tuvaro Balaamiva toqaqi himpiro vuru Balaakiva nora vaiintinavu nititokara tiharo, Neqai anirante vuate. Noravano Kotiva ti qioqama taimantara ti, te kia ho ni hampata virarave, tiro.

¹⁴ Balaamiva minti tumanta vinavuka anirante Balaakiva unaini orunte vira tiva ami tiha, Tenavu Balaamirara tinavu hampata aniane turaro viva kia virerave tivakeroma mini vaiavo, ti.

¹⁵ Minti tuvaro Balaakiva qaiqaa qiaata vaiinti airitahaa nora autu vatauka, avuni nititoka vika nutuvata naatara koka naarama ruvaaquma kero¹⁶ viva vika nititomanta vika Balaamiva unaini orunte tiha,

Balaakiva ariara mintima tivo:

Are te iainanaini aniane. Are kia qaqi kairaro vo haikavano ai ravaaqavu kaarire.

¹⁷ Are te iainanaini aniraqe te homa ai airi haika amiarirara, are tirirara minti minti iane tiraqe te are tinantema kema iainarave.

Mpo, maini anintera nena variqanavu naarairamanta vinavuka maa vatanaaka goraiqama nimitaate, tiro.

¹⁸ Balaakiva minti tumanta vika vuru Balaamira tiva amuvaro Balaamiva vi uvvara iriro, Balaakiva nitito vaiintinavuka tiva nimiro tiharo, Balaakiva nai avuhainaa naavuqi ekaa silvaa orive *kori* orive vataira ti timirera, te kiama ho Nora Kotira tenta Variqa uva, nora uvae, inaara uvae, raqa kararave. ¹⁹ Mpo, tota vonavu untemake, nenavuvata vate entaqi ti naavuqi vaitaite te variariraro Noravano Kotiva tiriara vonare tirera, ni tiva nimiare, tiro.

²⁰ Minti tumanta vika mini vaitovaro entaqi Kotiva Balaamiva unaini tuvuntero vira tiva amiro tiharo, Vi vaiintinavuka ai vitareka aniarara tira, are homa vika hampata vinarave. Are vika hampata virama, te ariara tianantema iane. Kiama nena irikera vo haikavata autuane, tiro.

²¹ Noravano Kotiva Balaamirara minti tuvaro toqaqi Balaamiva himpiro nai donkiqaa tavuna vuqitero viraqaa vaarintero oquiviro Moapihainaa qiata vaiintinavu hampata surama.

Balaamiva nai donki atura

²² Balaamiva vura kaara Kotira arara itora. Balaamiva nai donkiqaa oquiviro vumanta vira kaiqa vaiinti taaraqantavata vira hampata vuvaro Noravano Kotiva atito *enseliva* aaraqaa himpitero vaiharo aara kuval kareva auti vaura.

²³ Mintuvaro donkivano tavovaro *enseli* viva iqoka paipe tuatero aaraqaa himpitero vuvaro donkivano vira tavero aaraqaa vura qaqla kero ahakaqi vura. Mini vuvaro Balaamiva donkivano aaraqaa qaqla vuvarire tiro, vira airi tataa ruquti vaura.

²⁴ Mintiakero donki ruquti vuvaro donkivano qaqla aaraqaa vuvaro *uaini* naaho taaraqanta vauraqi aaravano vitanta avutana vuvaro aara avuhainta ori ohaavano hini hini vuvaro aaravano muageqiro vuvaro *enseli* viva qaqla himpitero viraqaa vaura.

²⁵ Donkivano *enseli* vira tavero, oritarare tiro, ohaa tataaqa viharo Balaamira aiqu oriqaa ratatiaqa kovaro vira kaara Balaamiva qaqla donki vira airi tataa ruquti vaura.

²⁶ Mintiakero donki ruqutuvaro *enseli* viva qaqla oru Balaamira avuni inaaraqakaa ori vaiqiro anomaa muageqama vaunaini himpitero aara kuvalero vuvaro ²⁷ donkivano tavovaro viva kia vira vaaraqama amitaarira aarava vuvaro, donki viva aara viraqaa vaitatero vuvaro, Balaamira voqama kero arara itovaro viva nai kauruqohairo donki qaqla airi tataa ruqutura.

²⁸ Vira ruquti vuvaro Noravano Kotiva donki vira kahaquvaro donkivano vaiintivano uva tintema kero, Balaamirara tiharo, Te ai nantima kaurarae are taaramo tataa vaihara, ti haruaro? tiro.

²⁹ Donkivano minti tuvaro Balaamiva virara tiharo, Are ti varakeria kia avu aato vai vaiintira voqara autu timitaanara kaara te ai ruquti vauro. Te iqoka paipe vatauraitirio, ai aruma kauraitirio, tiro.

³⁰ Balaamiva minti tuvaro donkivano vira tiva amiro tiharo, Te ai donkivano vaurara are ekaa enta tiqaa oquivira variqira anira maa entara anintaaro. Te vate autuna okarara haaruvata mintunarave, kiae mintunarave? tuvaro Balaamiva tiharo, Aqao, kia are haaru mintianarave, tiro.

³¹ Minti tuvaro Noravano Balaamira avu quantua kovaro viva tavovaro Noravano atito *enseliva* iqoka paipe totero aaraqaa himpitero vaura.

Aaraqaa himpitero vuvaro Balaamiva qetakero vaakama vata kanta hiqintiviro nai viri vatainiqama kero vaura.

³² Mintimake vuvaro Noravano atito *enseliva* vira irero tiharo, Nana kaarae are nena donki taaramo tataa ruqutuaro? Are kia „Balaakiva inaini“ vuataara vaivarama aniaro. Vira kaara te ai aara kuvalkerera anuraukave. ³³ Ai donkivano ti taveroma taaramo tataa te unanaihairo tuqantaaviro vivo. Ai donkivano kia mintitirio, te vira vehakuma amiteha ai aruma kauraitirio, tiro.

³⁴ Noravano Kotiva atito *enseliva* minti tuvaro Balaamiva tiharo, Oho, te qora kaiqama vara kauro. Te kiama are ti aara kuval kareva tavauro. Vate te mini vuainarara are kia quahairera, te homa maihai anirante vuainarave, tiro.

³⁵ Balaamiva minti tuvaro *enseli* viva tiharo, Hove, are vika hampata vuane. Vika hampata viharama kiama are nena irikera vo uvavata tiraitira, te ai tiva amiaina uvara

viraqaima tiva nimiane, tiro. *Enselivano* minti tuvaro ho Balaamiva Balaakira qjata vaiintinavu hampata vurama.

Balaamiva Balaakiva vaunaini vura

³⁶ Balaamiva vinavuka hampata vuvaro Balaakiva Balaamiva anu uvvara iriro, viva oru Aanoni Namari tataaqqa Moapi vata auvahini vau vatukara mini Balaamira vita kareva vura. ³⁷ Balaakiva Balaamira vita kero virara tiharo, Mpo, te avuni vaiinti varake ari oru vite aniate tunarave. Are nantivarae vi entara kia aniaro? Are tiriara kia ho airi monu airaira ti timianarove tiraе mini variaro? tiro.

³⁸ Tuvaro Balaamiva vira tiva amiro tiharo, Ho tavaane, te vate anima ntauro. Ho nana uva Kotiva ti tiva timinara, vi uvvaraqai te ho ni tiva nimirerave. Kia te tenta irike vo uvavata ni tiva nimirerave, tiro.

³⁹ Ho minti tivakero Balaamiva Balaakikantiro vatuka vo Husotini oru vauvaro ⁴⁰ Balaakiva mini vaharo purumakauvata sipisipivata arukero hini mati Balaamiravata qjata vaiinti vira hampata anukavata unta nimura.

Balaamiva hoqarama kero paropeti uva tura

⁴¹ Ho vira qararaa vaaka toqaq Balaakiva Balaamira vita varero vuruni Bamoti-Baali vatukaaq vuru kovaro, Balaamiva mini vaharo vuavu tavovaro Isareri naavu maaqa kaqake vau vatukava hini qoqaa vaura.

23

¹ Balaamiva mini vaharo Balaakirara tiharo, Are maini *ofaa* tainta 7navu autu terama, purumakau qora 7navuvata, sipisipi qora 7navuvata, varera maini aniane, tuvaro ² Balaakiva Balaamiva tunte ura. Vitanta purumakauvata sipisipivata vohaiqa vohaiqa vare, ekaa *ofaa* tainta vohaiqa vohaiqaqaa vateha iha quarora.

³ Vitanta mintiakae *ofaa* iha quaratoravo Balaamiva Balaakirara tiharo, Are maini ihavano ekaa ita kaaina *ofaa* tataaqqa himpira vairage te vuruni vuare. Te mini vuvariraro Noravano te unanaini qovaraqianarove, kiae qovaraqianarove? Viva tiriara vonare tiraqe te vi uvvara ai tiva amirerave, tivakero ainqinaqaa vura.

⁴ Mini oruntovaro Kotiva Balaamiva vaunaini tuvuntero vikantiro vauvaro Balaamiva Kotirara tiharo, Te *ofaa* tainta 7navu autuke vate, purumakau qora vo vare, sipisipi qora vo vare, ekaa vi taintaraqaa vatema iha quara tauro, tiro.

⁵ Minti tuvaro Noravano vi uvvara iriro, Balaamira nai uva tiva amiro vira atitero tiharo, Are ururanteria Balaakiva inaini otuntera vi uvvara tiva amiane, tuvaro ⁶ viva ururantero otu tavovaro Balaakiva qjata vaiinti Moapihainaaka hampata iha quara tovaro ekaa itavu *ofaa* tataaqqa vaura.

⁷ Vinavuka mini vauvaro Balaamiva Kotiva vira tiva amu uvvara vika muntu tiva nimiro tiharo,

Moapi avuhainaa vaiinti Balaakiva Siriaihairo kuari avu uri ainqinaihairo ti tivita kaimanta te maini anuro.

Viva tiriara tiharo, Are anira nena variqanavu naarairamanta vinavuka Isareri qoraiqama nimitaate, tivo.

⁸ Viva minti timanta te nantiakée minti tirarave? Kotiva kia vikara, Ne qoraiqama vuate tirara ti, nantiakée te Kotirara vika qoraiqama nimitaane tirarave? Te minti tiarorave. Noravano Kotiva kia vikaaq qora uva vatairara ti, nantiakée te vi uvvara tirarave?

⁹ Te nora ori qjataqaa vahia vi vatanaaka viavi tave vauro. Te vururaqaaahai vika viavi aitutia tave vauro.

Te tavauramanta vi vatanaaka náiqai nuntuvi vo kanta variavo. Vika nariara tiha, Kia tenavu qumina vo vatanaa vo vatanaaka voqaara vauraukavauve ti variarave.

¹⁰ Iekopira vaintivara nuqa voqaara airi variarara ti, kia tenavu ho vika kaara ntirarave.

Ti qaqi kairage te Kotira vaiinti nahenti variqi vivi vuru qutintemake qutuare. Ti qaqi kairage te avuqavu ni varia vaiintika qutintemake, qutuare, tiro.

¹¹ Balaakiva vi uvvara iriro Balaamirara aqao tiro, Are nantivarae vi uvvara tiaro? Are tiramanta ai variqanavu ti navutaaka qoraiqama nimitaate ti, te ai maini vite anurarama, are kia minti tiraitira, are vika koqema nimitena uvvaraqai tiaro.

¹² Viva minti tuvaro Balaamiva vira tiva amiro tiharo, Te mpoma turo. Kia te ho vo uva tiraiti, Noravano Kotiva ti tiva timina uvvara, viraqai ho tirarave, tiro.

Balaamiva qaiqaavata paropeti uva tura

¹³ Balaamiva minti tuvaro Balaakiva virara tiharo, Aniqetanta bona vuare. Mini oru vahira are kia Isareri ekaa tavaraaitira, hininavuqai ho tavenarave. Ho mini vahira vikara qora uva tiva tairamanta vika qoraiqama vuate, tiro.

¹⁴ Balaakiva minti tivakero Balaamira vita varero Pisiga Aiqinaini Sofimi ugita kantave tunaini vuru kero, mini *ofaa* tainta 7navu autukero purumakau qora vo, sipisipi qora vo, varakero ekaa vohaiqa vohaiqa vi taintanavuraga vatero iha quarora.

¹⁵ Ho Balaakiva mintuvuaro Balaamiva virara tiharo, Are ihavano ekaa ita kaaina *ofaara* tataaqa vairage te vutuni oru Kotira vataake variare, tiro.

¹⁶ Balaamiva minti tivakero vuvaro Noravano Kotiva viva unaini tuvuntero vikantiro vaharo Balaamira uva tiva amiro tiharo, Are ururanter Balaakiva inaini otuntera vi uvvara tiva amiane, tiro.

¹⁷ Kotiva minti tuvaro Balaamiva ururantero otu tavovaro Balaakiva Moapihainaaka qiata vaiinti hampata iha quara tovaro ekaa itavu *ofaara* tataaqa vauvaro Balaamiva otuntovaro Balaakiva vira irero tiharo, Noravano Kotiva nana uvae ai tiva amivo? tiro.

¹⁸ Tuvaro Balaamiva maa uvarama tiro:

Sipora maaqu Balaakio, te maa uvvara tainara iriane. ¹⁹ Kotiva kia tinavu vaiinti aanantero una ti vaivama vaivo. Viva kia tinavu aanantero vo avu aato utira qaqrakero vo avu aato uti vairave.

Viva nai kauqu ainqaa aquukeharo te mintirerave tiva taira kia qaqlira karaitiro, viva quqaa auti vairave.

Viva te mintirerave ti uvava quqaa vi vau vairave.

²⁰ Kotiva nai Isareri koqema nimite vaimantara ti, te Kotirara vika koqema nimitaane tiariravaqaima vaivo. Kia te vo uvaqohai Kotira uva ho nunka kararave.

²¹ Te tauramanta naantiara Isareri vika koqemake vaivarao kia qora haikavanove, maara ntaaina haikavave, vika qoraiqama nimitevarave.

Noravano Kotiva vika Variqavano vaharo viva vika hampata vaimanta vika virara tiha, Viva tinavu avuhainaavama vaivo, ti variarave.

²² Kotiva vika Isipiqihairo ntita varero aniva, viva vika kempukaiqama kaimanta vika qaakau purumakauvano raqintemake, raqi variarave.

²³ Vika navutaaka vo qara vo qara i uhirave, hikaaqave, Isareri autu nimitaivera, vi haikava kia ho Isareri qoraiqama nimitaanarove.

Vo vatanaaka Isarerirara mintima tivarave: Ike, Kotiva nora kaiqa vareharo vika haqiqama nimite vaivo, tivarave.

²⁴ Isareri vika vaireka, kempuka *raioni* voqaa variarave.

Raionivano auraara vaireva, viva aantauvahi naane arukero rapepaama kero naare-vata mativata nero vira naantiara auraara vaintemake, Isareri nái navutaaka hampata raquqi viha vika aru taiqake „vira naantiara auraara vaivarave“, tiro.

²⁵ Minta tuvaro Balaakiva vi uvvara iriro Balaamirara tiharo, Aqao, are Isareri qoraiqama nimiteni uvvara kia tiataa irera, kia vika koqema nimiteni uvvara tiane, tiro.

²⁶ Minta tuvaro Balaamiva nai tiva amiro tiharo, Te vaaka ai tiva amunarave. Noravano Kotiva ti tiva timinantemake, te vi uvvaraqai tirarave. Kia te vo uvavata ho tirarave, tiro.

Balaamiva taaramo tataa paropeti uva tura

²⁷ Ho Balaakiva Balaamira tiva amiro tiharo, Are aniraqe te ai vita vare vonaini vuare. Are mini vairaro Kotiva ai qaqi kairara are Isarerirara qora uva tinarave kiae tinarave, tiro. ²⁸ Minta tiva kero Balaamira vita varero Peora Aiqina noraqaa vuru kora. Vi ainqaraqaahai ekaa aahara vata maata ho taveva vaura.

²⁹ Ho Balaakiva vira vita varero mini vuvaro Balaamiva tiharo, Are maini iha quare taintara 7navu autu terama, purumakau qora 7navuvata, sipisipi qora 7navuvata, varera amiane, ³⁰ tuvaro Balaakiva Balaamiva tunte iro viva purumakau qora vo, sipisipi qora vo, varakero ekaa *ofaa* taintaqua vohaiqa vohaiqa vatero iha quara tora.

24

¹ Balaamiva tavovaro Noravano Kotiva Isareri koqema nimitaari rava vauvarora tiro, viva kia qaqlira avuni untema kero, oru *vure/quaha* kaiqa vararaaitiro, viva tuqantaaviro ahara vataini vuavu tavora. ² Viva mini vuavu tavomanta Isareri vo anku vo anku nai *seri* naavu maaqa kaqate vauvaro viva mini vauvaro Kotira Maraqravano viraqaa tuvu ntovaro ³ viva paropeti uva mintima tiro:

Te Beora maaqu Balaamika maa uvvara tirerave.

Te naantiara qovaraiqaina haikara tave vauraukama uva tirerave.

⁴ Kotiva uva ti vaimanta te vira uva iri vaurauka, te vira uva tirerave.

Kotiva ekaa kempuka vataava, viva ti tairakaa vo haika humiqaivera te vi haikara tave, vataini hiqintivi vaiha vi haikara okara kankomake tavaunrarave.

⁵ Te Isareris *seri* naavu maaqa kaqataara tavauraro nai koqe iro vairave.

⁶ Te tavauraro vika *seri* naavu maaqavano vaireva, vata raavuravano viviro niaraini otu vira voqaara vairave.

Qaiqaa vika *seri* naavu maaqavano vaireva, vo naaho vo naahovano nora namari auvahianta vaira voqaara vairave.

Qaiqaa vika naavu maaqavano vaireva, Noravano koqe katari *alo* katari ututaira voqaara vairave.

Qaiqaa vika naavu maaqavano vaireva, *sidaa* katari naiqi naiqi namari auvahianta vaira voqaara vairave.

⁷ Airi aaquvano Isareris vataqaa ntiramanta vika vata koqeraqi nái kara utivarave.

Isareris auvhainaa vainti vovano King Agaakira aatarakero nora vaiintivano vaiharo arii vaiinti nahentiqaq raiqkianarove.

⁸ Kotiva vika Isipiqihairo ntia varero aniva, viva Isareris kempukaiqama kaimanta vika qaakau purumakauvano kempukaiqama kero raqintemake, vika iqoka raiqa nái navutaaka naatarake, vika veva huru kaavu rauhaantimake, vika vuhaarivata kinta kaantamake variarave.

⁹ Isareris kempukavano *raioni* voqaara vairave. *Raionivano* vaite vaivaro vaiintivano ti harukaantorave tiro kia vira vauraqama kaintemake, Isareris *raioni* vira voqaara variarave.

Vovano Kotirara Isareris koqema nimitaane tirera, Kotiva naivata koqema amitaanarove. Vovano Kotirara Isareris qoraiqama nimitaane tirera, Kotiva naivata qoraiqama amitaanarove, tiro.

¹⁰ Balaamiva minti tuvaro Balaakiva vi uvvara iruvaro arara itovaro nai kauqutanta ruqutukero Balaamirara tiharo, Oho, te ariara anintera tiramanta ti navutaaka qoraiqama vuate ti, te ai aauraura are anintera kia minti tiraitira, taaramo tataama nena Vaiqa aarehara vika koqema nimitaane tiaro.

¹¹ Ho vaaka nena maaqaini vuane. Avuni te kauqu aiqiqaa aquukeha airi monuvata airairavata ai amirera turaro ai Noravano ai aara tinta kaira kaara are kia ho vi haikara varenarave, tiro.

¹² Minti tuvaro Balaamiva vira nai tiva amiro tiharo, Ho iriane, Are ti tivitaate tira nititaana vaiintikara te vika minti tiva nimunarave:

¹³ Balaakiva ekaa nai naavuqi *silvaa* orive *kori* orive vataira ti timirera, te kiama ho Kotira uva raqake tenta irike vo haikavata autirarave. Te ekaa uva, Noravano tiane tina uvvara viraqai tirerave, tunarave. Te minti tivake are nititaana vaiintika tiva nimunarave.

¹⁴ Ho vate te tenta vaiinti nahenti vainaini anirante virerave. Are qaqi kairaqe te naantiara Isareris ai navunaaka qoraiqama nimite uvvara ai tiva ami vuare, tiro.

Balaamiva paropeti uva ekaara tura

¹⁵ Balaamiva minti tivakero qaiqaa paropeti uva tiharo mintima tiro:

Te Beora maaqu Balaamika maa uvvara tirerave.

Te naantiara qovaraiqiaina haikara tave vaurauka uva tirerave.

¹⁶ Kotiva uva ti vaimanta te vira uva iri vaurauka, te vira uva tirerave.

Kotiva ekaa kempuka vataava, viva ti tairakaa vo haika humiqaivera te vi haikara tave, vataini hiqintivi vaiha vi haikara okara kankomake tavaunrarave.

¹⁷ Te naantiara qovaraiqiaina haikara tavehama Isarerivata tave vauro.

Te tavauraro opu vovano noraiqaakero itaintema kero, Isareriqihairo auvhainaa vaiinti vovano qovarama vuuanarove.

Vi vaiintiva Isareris auvhainaaka kauru tuateharo kempuka vaiintivano vaiharo oru Moapi tiri vuhaari rukavu kero, viraqahaario oru Setira qiaa vuhaari rukavu kaanarove. (Vi uvvara vutuke tirera: Viva iqoka raquqi viharo Moapi vatanaakkavata, Seti vatanaakkavata naatara kaanarove.)

¹⁸ Viva nai navutaaka Idomu naatara kero vika vatavata varaanarove.

Isareris qaqiqai vika aruqi vivi, ¹⁹ naatara kaivaro kia voqavanovata qaqi variararove, tiro.

²⁰ Balaamiva minti tivakero viva taira tavontema kero, Amareki vatanaaka tavero, vikaravata paropeti uva tiharo mintima tiro:

Ekaa vo vatanaa vo vatanaakaqihai Amareki vatanaaka avuni vaiha kempuka vatanaaka variarave. Ho naantiara vika ekaara vehi autuvi taiqama vivarave, tiro.

²¹ Balaamiva minti tivakero viva qaiqaa taira tavontema kero, Kini vatanaaka tavero, vikaravata paropeti uva tiharo mintima tiro:

Memoravano aihaiqi vai oriraqaa naavu kaqakero vaintemake, ne Kini vatanaaka variamanta ni navutaaka kia ho ni ntaiheka variamanta variavo.

²² Ne mintiakre vaimantavata, naantiara Asiria vatanaaka ni Kini hampata raqih, ni hini kika aru vehi autu taiqake, ni hini kika rumpa vare vo vataini vuru kevarave, tiro.

²³ Balaamiva minti tivakero paropeti uva vo tiharo mintima tiro:

Naantiara vevara *noti* mantaraini *sipiqi* ni varia vatanaaka ruvaaquma vivarave.

²⁴ Vika ruvaaqumavi Saiparusihai airi *sipiqi* aninte, oru Asiriavata Ebevata hampata iqoka raqih vika naatara kevarave.

Vika naatarake vaimanta viraqaahai vo vatanaaka aninte vika náivata vehi autu taiqa kevarave, tiro.

²⁵ Balaamiva ekaa vi uvara tiva taiqa kero, anirantero nai maaqaini vuvaro Balaakivata nai maaqaini vurama.

25

Isareri una variqa Baalira quahama amitora

¹ Isareri vatanaaka Sitimi Uqitaini naavu maaqa kaqate vaumanta Moapi vatanaa nahenti Isareri vaiinti naaromanta vika hoqaramake Moapi nahenti hampata hampi qaramaqi ni vaura.

² Vi nahentika Isareri vaiinti naaromanta vika Moapi nái una variqa *ofaa* quahama nimite vaunaini oru vaiha, una variqa unta nimito karara neha vika quahama nimite vaura.

³ Isareri mintimake Moapi hampata voharaaqi vaiha Peora Aiqinaqaa una variqa Baalira quahama amite vauvaro vira kaara Nora Kotira arara ite vaura.

⁴ Noravano Kotiva Mosirara tiharo, Ne ekaa Isareri nenta qiata vaiinti hampi kaiqa varaka, ntita vare viri vaiinti nahenti nivuqaa arukaate. Ne mintima kaivarao kia qaiqaavata vaiinti nahenti ti tirara itaarike, tiro.

⁵ Noravano minti tuvaro Mosiva Isareri nora vaiintiara mintima tiro: Ne vohaiqa vohaiqavano ekaa nenta ankuqihai Peora Aiqinaqaa Baalira quahama amiteka arukaate, tiro.

⁶ Minti tivakero Mosivavata vaiinti nahentivata Kotira *seri* naavu qentiana rate vaiha tavovaro Isareri vaiinti vovano Midianihainaa nahenti vo vita varero nai *seri* naavuqi oriqetora.

⁷ Vite oriqetovaro vaiinti vo Finiaasivavata vitanta tavora. Finiaasiva Eleasaara maaquvano vauvaro Eleasaava Kotira kaiqa vara amito vaiintira Eronira maaquvano vaura.

Ho Finiaasiva vitanta tavero, vaiinti nahenti mini kero vaaka oru nai vaantaara varero ⁸⁻⁹ vitanta avata varero *seri* naavuqi oriqetero vaantaara viraqohairo vitanta vaataqi aru tampama tovaro vaantaaravano vaiinti aru varero otu nahentivata aru ruqiakomanta vitanta qutu vura.

Finiaasiva mintiakero vitanta aru kovaro qora rovaravano airi vaiinti nahenti ari vauva taiqa vura. Vi rovaravaro aruqiro viharo Isareri 24,000 arukora.

¹⁰ Finiaasiva vitanta aru kovaro Noravano Kotiva Mosirara tiharo, ¹¹ Finiaasiva tiriara noraiqaakero iriharoma, una variqa autu tuahereva niqi qovarama vuantorave tiro vitanta aru kaivarora tiro, ti tirara itaiva humpama vimanta te kia qaiqaa ni vehi autu taiqa karerave. ¹² Ho are Finiaasira mintima tiva amiane:

Te vira hampata maateraiqamake variaina uvvara tiva taariraro vi uvava ekaa entama varianarove.

¹³ Viva tiriara noraiqaakero iriharо una variqa autu tuahereva niqi qovarama vuantorave tiro vitanta arukairave. Viva mintima keharo te Isareri qora uva uva nunka nimitaaina arara ti Kotika autu timi tairara ti, vivavata, vira naintivaravata ti Kotika kaiqa ekaa entama vara timitaqi vivarave, tiro. Kotiva minti tura.

¹⁴ Isareri vaiintivano Midiani nahenti hampata vauvaro Finiaasiva aruko vaiintira autu Simirira. Simiriva Sarura maaquvano vauvaro Saruva qjata vaiinti Simionira vohaa ankuqiraava vaura.

¹⁵ Midiani vatanaa nahenti vira autu Kosibira. Vira qova Suriva Midiani anku vonavuqaa raqiki vauva vaura.

¹⁶ Noravano Kotiva Mosira tiva amiro tiharo, ¹⁷⁻¹⁸ Midiani vatanaaka Peora Aiqinaqaa vaha ni navutaiqihia niara una uva tiara kaaravata, Kosibira kaaravata, ne oru Midiani hampata iqoka raqih vika aru vehi autu taiqa kaate. Peora Aiqinaqaa una variqanavu quahama nimitaara kaara te Isareri qora rovaraqhahai ntaihauna entara, Finiaasiva Midiani nora vaiinti raavura Kosibira aru kaivo, tura.

26

Qaiqaa vaiinti nahenti kaara ntura

¹ Nora rovaravano Isareri ntaiho entava taiqovaro Noravano Kotiva Mosiravata, Eronira maaqu Eleasaaravata tiva nimiro tiharo,² Netanta ekaa Isareri vo anku vo anku ruvaqaumake vika ho iqoka raqi vaiintika 20 ihi varekave, vo ihivata varekave, vika nutu qara ntua taate, tiro.

³⁻⁴ Noravano Kotiva minti tumanta Mosika Eleasaaka viva tuntemake Iotani Namari vutu mantaraini Ieriko vauvaro Moapi ugita kanta vitanta vaiha ekaa mintima ihi varo vaiintika naarama komanta ruvaqauma vura...

⁵¹ Ho Mosika Eleasaaka ekaa vi vaiintika nutu qara ntua tovaro vika nutu vaireva, 601,730 nutu vaura...

⁶³ Iotani Namari vutu mantaraini Ieriko vauvaro Moapi ugita kanta Mosika Eleasaaka vaiha vi vaiintika vo anku vo anku ruvaqaumake vika nutu vukuqi qara ntuvatora.

⁶⁴ Haaru Mosika Eronika Sainai Aiqina auvoqi vaiha avuni hoqaramake Isareri vaiinti nutu vukuqi qara ntua toka, ekaa vi vaiintika qutu vuvaro kia voqavanovata vi entara vika hampata qaqi vaura.

⁶⁵ Haaru Noravano Kotiva vika tiva nimiro tiharo, Ne ekaa aahara vatainai variqi vi qutu vivarave tu uvava vaurara ti, vika ekaa qutu vumanta Jefunera maaqu Kalepivavata, Nunira maaqu Iosuaavavata, vitantaqai kia qutiraiti, qaqi vaura.

(14:26-35)

27

Kotiva Iosuaara noraiqama kovaro Mosira vatuka varora

¹² Noravano Mosira tiva amiro tiharo, Are Abarimi Aiqinqaqa vaarintera te Isareri nimirera iaina vatara vuavu tavaane. ¹³⁻¹⁴ Are tavama kera, vira naantiara are nina vakaava Eroniva qutintema kera qutinarave. Haaru Isareri aahara vata Senini vau entara, vika Meribaini nuntu naantu ti vaumanta netanta vika nivuqaa vaiha kia ti hutu tuaherake ti mpeqa okara takuqi vaira vika numiqaanara kaara are vi vataraqaa kia viraitira, nina vakaava Eroniva qutintema kera qutinarave, tiro. Meriba ruvu namarivano Kadesini aahara vata Senini vaura. (20:1-13)

¹⁵ Noravano Kotiva minti tuvaro Mosiva tiharo, ¹⁶ Noravaauvo, are Variqavano ekaa vaiinti nahenti maraquraqaa raqiki variaravama variaro. Mpo, are vo vaiinti noraiqama kairaro vi vaiintiva Isareriqaa raqikiarire. ¹⁷ Iqoka raqi entara vi vaiintiva vika ntita varero vi aniarire. Hauri sipisipi qova kia vaintemake, ai vaiinti nahenti hampi vaivorave, tiro.

¹⁸⁻¹⁹ Mosiva minti tuvaro Noravano Mosirara tiharo, Nunira maaqu Iosuaava, viva homa ti kaiqa varaarira vaiintivama vaivo. Are vira vita varera vuru Eleasaava ti kaiqa vara timite vai vaiintivavata, ekaa Isarerivata, varianaini kera, vika nivuqaa vahara nena kauqu vira qiataqaa vatera, vaiinti nahenti tiva nimira mintima tiane: Iosuaava ti vatuka varaariravama vaivo, tiane.

²⁰ Minti tivakera are vaiinti nahenti nivuqaa vahara nena varena kaiqara hini Iosuaara amira, vira noraiqama kairamanta ekaa vaiinti nahenti Iosuaava tina uvara iriha vira avataate.

²¹ Iosuaava ti hantuqa vaina okarara maantima kero irianarove: Iosuaava Eleasaava ti kaiqa vara timite vai vaiintiva vainanaini viraro Eleasaava *Urimi Tumimi** okara tave vaiva, viva vi haikaraqohairo ti hantuqa vaina okarara kankoma kero tavero, Iosuaava tiva amiraro viva iriarire. Iosuaava ni Isarerira minti minti iate tirama ne Isareri viva tintemate iate, tiro.

²² Noravano Kotiva minti tuvaro Mosiva Noravano tunte ura. Viva Iosuaara vita varero Eleasaava Kotira kaiqa vara amite vau vaiintivavata ekaa vaiinti nahentivata vaunaini vuru kovaro ²³ Iosuaava vika nivuqaa himpitero vauvaro Mosiva nai kauqu Iosuaara qiataqaa vatero vaiinti nahenti Iosuaarara tiva nimiro tiharo, Maa vaiintiva ti vatuka varaarira vaiintivama vaivo, tiro. Mosiva Noravano tiva amuntema kero tura.

31

Isareri Midiani hampata iqoka raqura

* ^{27:21:} *Urimi Tumimi* okara vaireva, Kotira kaiqa vara amite vau vaiintiva oritantae vo haikae vara kero viraqohairo Kotira muntukavano vau uvvara kankoma kero iri vaura. Vi okarara kia tenavu kankomake irunara.

¹ Noravano Kotiva Mosira tiva amiro tiharo, ² Are Midiani vatanaaka ni Isareri qoraiqama nimitora irihara vika nái qoraiqama nimitaane. Are vika qoraiqama nimitera viragaahaira ho are qutu vinararave.

³ Kotiva minti tuvaro Mosiva Isareri tiva nimo tiharo, Ne timanta niqihai iqoka vaiinti hini kiaka auvihehavaa vare oru Midiani hampata raqiha vika Nora Kotira qoraiqama amitorara irihama vika náivata qoraiqama nimitaate.

⁴ Ne Isareri 12 anku vohaiqa vohaiqaqihai 1,000 iqoka vaiinti kaamate vara kaimanta vika raqireka vuate, tiro.

⁵ Mosiva minti tumanta Isareri vika nái anku vohaiqa vohaiqaqihai 1,000 iqoka vaiinti kaamaqi vivi, 12,000 iqoka vaiinti ntita vatovaro ⁶ Mosiva vika iqoka raquate tiro nititora. Viva Kotira kaiqa vara amite vau vaiintira Eleasaara maaqu Finiaasira viravata atitovaro Finiaasiva vireva iharo Kotira Naauqiraa haika vonavu varero, *aanumaara/noma* vonavuvata, iqoka vaiintiara mini vuate maini aniate tiro vuage vau aanumaarara, vinavuvata varero vura.

⁷ Ho Noravano Kotiva Mosira tiva amuntemake, vika oru Midiani hampata raqiha Midiani vaiinti ekaa aru taiqa kora. ⁸Vika raqiha Midiani avuhainaa vaiinti kauqurunavu Evirave, Rekemirave, Surirave, Hururave, Rebaarave, aruke, Beora maaqu Balaamiravata aru kora.

⁹ Aru taiqake Isareri Midiani vika nahentive, vaintive, ekaa purumakauve, sipisipive, vika ekaa koqe airaira vatorave, ¹⁰ vi haikara vi haikara ekaa vare, viraqaahai Midiani vika naavu maaqavata vatukavata iha quara kora.

¹¹ Mintiakke vika nahentive, vaintive, purumakauve, sipisipive, ekaa vi haikara vi haikara vare ¹² Mosika, Eleasaaka, Isareri hampata vaunaini vuru kora. Vi entara vika uqita kanta vauvaro Ieriko vatukavano Iotani Namari hini mantara vuruni vaura.

Iqoka vaiinti orurante anura

¹³ Mosivavata Eleasaavavata ekaa Isareri nora vaiintinavuvata vatuka mini ke, oru nái iqoka vaiinti ntita kareka vumanta ¹⁴ 1,000 iqoka vaiintiqaave, 100 iqoka vaiintiqaave, raqiku *opisaaka* raqunaihai orurante anuvaro Mosiva vika nitura.

¹⁵ Viva vika nitiro tiharo, Ne nantihae nahenti kia arukaraiti, qaqi vika ntita vare aniamo? ¹⁶ Ne kankomake iri tavaarave. Nahenti vikama Balaamira uva avate vaura kaara tinavu vaiinti nahenti Peoraini vau entara Nora Kotira qaqrake una variqa quahama amitovaro vira kaara qora rovaravano Kotira vaiinti nahentiqi qovarama vurave.

¹⁷ Virara irihama ne ekaa qorainti vaintivata, ekaa nahenti qorainti hampata vaitekavata, aru taiqa kaate.

¹⁸ Mintiakke aruke, ekaa nahenti kia qorainti hampata nika, vikama nenta varataate. ¹⁹ Ne vaiinti arukekave, qutu vuaka utu varekave, ne kia vatukaini viraiti, ⁷ entananavu aqainima variate. Mini vaiha, taaramo entaqaaavata, ⁷ entaqaaavata, ne avu aato muntuka hiqe okarara iriha nentavata, ne iqokaqihai ntite ani nahentikavata, vi okarara avateha variate. Ne mintimake, ne Kotira avuqaa homa vaivarave. (19:11)

²⁰ Ne vi okarara avataivarne vate haikavavata Kotira avuqaa ho variarire. Ekaa ni utavaaqave, purumakau pahiqohai autu taarave, memeraa kaahiqohai autu taarave, katariqohai autu taarave, vi haikara vi haikara mintima keha hiqaate, tiro.

²¹ Mosiva minti tuvaro Kotira Naauqiqi kaiqa varo vaiintiva Eleasaava raquanaaihai anu vaiintikara tiharo, Noravano Kotiva Mosirara tivato uvvara ne avataqiqi vuate. Mintimama vaivo:

²²⁻²³ Ihavano kia ho ita kaainara, *kori* orive, *silvaa* orive, *aini* orive, *baraasi* orive, vo orive, vi orira vi orira ihaqi vataivarne ihavano qumina haika ori vataakero vainara ita kairaro orivanqai variarire. Ekaa voki haikara ihavano ita kaantorave ti, namariqi quntama kaivarohihiqamava.

²⁴ Ne mintiaqiqi viha ⁷ entaqaa nenta utavaaqave hiqamake, ne Kotira avuqaa ho hiqamavi vaika vaha ho vatukaiqiqi oriqetavarave, tiro.

Vika iqokaqihai vare anu haikara rairakora

²⁵ Eleasaava minti tuvaro qaiqaa Noravano Kotiva Mosira tiva amiro tiharo, ²⁶ Arevata, Eleasaavavata, vo anku vo anku qiaa vaiintivata, nenavu vaha iqokaqihai ntite aniaika, nahentive, vaintive, quara vairive, ekaa vika kaara ntuate. ²⁷ Nenavu ekaa vi haikara rairakre taaraqantaqaavate, voqaahainaara iqoka vaiinti raqireka vuaka nimi, voqaahainaara maaqaini variaka nimiate.

²⁸ Nenavu iqoka vaiinti nimiraqihai ti Nora Kotikara irihama *takisi* varaate. Nenavu 500 vainti nahenti rumpavare aniaqaiqihai vohaiqa ti timi, purumakauve, sipisipie, memeraae, donkie, 500 qihai vohaiqa vohaiqa varake, ti timitate.

²⁹ Ho ne vi *takisira* Eleasaara amivaro viva ti Kotikara iriharo tuataarire.

³⁰ Nenavu vaiinti nahenti maaqaini variaka nimireka iraqihaivata *takisi* varaate. Nenavu ekaa 50 vainti nahenti rumpa vare aniakaqihai vohaiqa vare, purumakae, sipisipie, memeraae, donkie, 50 qihai vohaiqa vohaiqa varake, vira Rivaira anku ti *seri* naavuqaa raqikiaka nimiate, tiro. ³¹ Noravano Kotiva minti tumanta Mosika Eleasaaka viva Mosira tiva amuntemake, vi haikara rairakora.

³² Iqoka vaiinti nai navutaaka hampata raquraqihai vare anu haikava vaireva, maantimama vairo:

Sipisipi 675,000

³³ purumakau 72,000

³⁴ donki 61,000

³⁵ varaata kia vaiinti hampata vaitoka 32,000.

³⁶ Vi haikara avutaqaa rairake, hini iqoka vaiinti iqoka raqireka vuka nimura:

337,500 sipisipi. ³⁷ (675 sipisipi Nora Kotira *takisi* amitora.)

³⁸ 36,000 purumakau. (72 purumakau Nora Kotira *takisi* amitora.)

³⁹ 30,500 donki. (61 donki Nora Kotira *takisi* amitora.)

⁴⁰ 16,000 varaata. (32 varaatanavu Nora Kotira *takisi* amitora.)

⁴¹ Mosiva vi haikara *takisi* amitora varakero Eleasaara Noravano tuntema kero amura.

⁴²⁻⁴⁶ Mosiva iqoka vaiinti raira nimuntema kero, vaiinti nahentivata raira nimura. Vaiinti nahenti vika 337,500 sipisipi vare, 36,000 purumakau vare, 30,500 donki vare, 16,000 varaatanavu varora.

⁴⁷ Mosiva vi haikara mintima kero rairakero ekaa 50 vainti nahenti rumpa vare anukaqihairo voqa vita varero, purumakau vo, sipisipi vo, donki vo, memeraae vo varero, Noravano Kotiva tunte iro, Rivaira anku Kotira *seri* naavuqaa raqiki vauka nimura.

⁴⁸ Mintiakero nimumanta *opisaa* vaiinti 1,000 iqoka vaiintiqaave, 100 iqoka vaiintiqa raqikukavata, Mosiva unaini orunte ⁴⁹ vira tiva ami tiha, Nora vaiintio, tenavu tentanavu iqoka vaiinti ekaa kaara ntuvake tavauramanta iqoka raqunaraqihairo kia voqavanovata qutu vivo.

⁵⁰ Mintiverama tenavu *kori* oriqohai aututaa haikara, irarave kaatavave aatoqi *vahe-hema/vaataiqama* taarave auntaqi ruvutarare, tenavu ekaa vi haikara vare anunara vira Kotira amitarerave. Noravano Kotiva kia navutaaka qaqi kaimanta tinavu qoraiqama timitaarara iriha, tenavu vi haikara vira amirerave, ti.

⁵¹ *Opisaa* vaiintinavu minti tumanta Mosika Eleasaaka *kori* oriqohai aututo haikara nimura varora. ⁵² *Kori* oriqohai aututo haikara vira maaravano vaireva, aumaqaa 200 kilo vaura.

⁵³ Qaqi iqoka vaiinti vika iqoka raqihai vi haikara vi haikara varora kia Mosika Eleasaaka nimiraiti, qaqi nái tuatora.

⁵⁴ Noravano Kotiva Isareriera iriharo vika kahaqiarire ti, Mosika Eleasaaka *opisaa* vaiintinavu nimu *kori* orira vare, Kotira *Seri* Naavuqiu vuru vatora.

32

Isarereri Iotani Namari kuari avu urinaini vaura

¹ Rubenira ankuvata Gaatira ankuvata airi purumakau vatovalo Jase vatainivata Gileaati vatainivata purumakauvano ho naaina ukauva vaura.

² Vi ukauva mini vaumanta vika Mosika Eleasaaka unainivata vaiinti nahenti qiaa vaiinti unainivata orunte vikara tiha, ³ Nora vatuka Atarotive, Dibonive, Jaseve, Nimrave, Hesabonive, Elealeve, Sipimaaeve, Nebove, Beonive, ⁴ vi vatukava vi vatukava mini vai vatara Noravano tinavu Isarereri kahaqimanta varaunarare. Mini purumakau ne ukauva ho vaimanta tinavu purumakau airitahaama variavo. ⁵ Ho nenavu tinavuqua quahaivera, vi vatara tinavu timiqa tenavu vi vatara vare viraqaa variare. Ne tinavu tivita vare Iotani Namari hini mantaraini vuru kaiqe mini varainarara kia tinavu hantuqavano vaivo. Tinavu kia mini vuataa ivo, ti.

⁶ Vika minti tuvaro Mosiva Rubenira ankuaravata Gaatira ankuaravata tiharo, Hauri ne nenta kena Isarereri kia kahaqiraiti, maini qaqi vaimanta vika vutu mantaraini oru vaiha iqoka raqivorave.

⁷ Ne maini vaimanta hauri ni kena Isarereri vika tinavu kempuka kia ho vaivo tivakeha mainiqai vaireka autiha, Iotani Namari vutu mantaraini Kotiva vi vatara vika nimireva tinaini kia vivorave. ⁸ Haaru ni qokavara minturave. Vi entara tenavu Kadesi-Baanea mini vaiha te vinavuka nititura vinavuka vi vatara ampeqamake tavareka vurave.

⁹ Vinavuka vi vatara viti viri tavamaqi viha Esikori Uqitakanta orunte, vihai qaiqaa orurante aninte, nai kena Isareri qetara uva tiva nimumanta vira kaara vika tinavu kempuka kia ho vaivo tivakeha kia vi vatara Noravano Kotiva nimireva tunaini vurave.

¹⁰ Vika mintuvaro vi entara Kotira arara itovaro viva nai kauqu aqiqaa aqukero tiharo,
¹¹ Vi vaiintika ekaa 20 ihiqaahai voqavata varakaaka Isipi ke anihā, kia tiriara kempukaiqamake iriqi viraiti, ti qoririma kaara, vira kaara kia ho vikaqihairo voqavanovata te kauqu aqiqaa aqukeha Eparahaamiravata Aisaakiravata Iekopiravata nimirera tuna vataraqaa oru vivarave. ¹² Taaraqantaqaima yi vataraqaa ho vivarave. Kenaasira ankuqiraara Jefunera maaqu Kalepivavata, Nunira maaqu Iosuaavavata, vitantaqai kia ti Nora Kotika qoririma karaiti, tiriara kempukaiqamake iriqi vuarara ti, vitantaqaima mini vivarave, turave.

¹³ Mintiakero Noravano Kotiva vaiinti nahenti nitiharo vikara tiharo, Ne 40 ihiara qumina aahara vatainiqai nuvaqi vivi, vuru qutu vivarave, tumantara ti, ekaa vi entara vau vaiinti nahentika qora kaiqa vira varoka, qumina aahara vataini nuvaqi vivi, vuru qutu taiqa vurave.

¹⁴ Mintimake vika qutu vumanta vate ne nenta qokavara vatuka vare, ne vika vaintivara vaiha vohaa qaramake qora kaiqaqai vare variavaro vira kaara Nora Kotira anomakero arara ite vairave.

¹⁵ Ne Rubenira ankuvata, Gaatira ankuvata, tuqantaavi kia Nora Kotira avataqi vivera, vira kaara viva tinavu Isareri ekaa qaiqaa qaqla kairae, tenavu qaiqaa qumina aahara vataini nuvaqi vivi, vuru qutu taiqama virarave. Tenavu mintimake qoraiqama vuarera, vira ni okara kaarama tenavu mintima vitarave, tiro.

¹⁶ Mosiva minti tumanta vika vi uvvara iri, vika Mosiva unaini orunte virara tiha, Hoe are tinavu qaqi kairae tenavu ohaa autuke sipisipi viraqiqi vate, tentanavu vatumta vantaavuravata autu taari tinavu vainti nahenti viraqiqi koqemake variate?

¹⁷ Tenavu mintimake vira naantiara tenavu qerama vare tenavu naane tentanavu kena Isareri avuni viha navutaaka hampata raqquq viha vika naatarake, viraqaaahai tentanavu kena Isareri ntita vare, vika nái vaiureka i vataraqaa vuru kaare. Tenavu ekaa vatumkanavu vantaavura autuke vate, ekaa haika tumaara maaramake avutaqiqi vataari maihainaauka kia tinavu vaiinti nahenti qoraiqama nimitaate.

¹⁸ Avuni tenavu tentanavu kena Isareri kahaqiar iekaa vika naane nái varare i vatara varaiqe, viraqaaahai tenavu orurante tentanavu maaqaini anirerave.

¹⁹ Tenavu Iotani Namari maini kuari avu uruntainaini vata varauunara ti, tenavu kia ho Iotani Namari hini mantaraini vaina vatara naarumake varauunara, ti.

²⁰ Vika minti tuvaro Mosiva vikara tiharo, Ne nenta tiantemake ququa mintireka ivera, ho ne Nora Kotira avuqaa iqoka raqireka qeramate variate. ²¹ Ekaa ni iqoka vaiinti vika Nora Kotira vevaaraini vaiha, Iotani Namari taqa vare oru hini mantaraini navutaaka hampata raqivaro Noravano Kotiva vika naataraka kaira navutaaka vata vira varaa.

²² Ne mintimake Noravano Kotiva kaiqa nimirara taiqake, ne nenta kena Isareri kahaqama nimitevavata taiqa virera, viraqaaahai ne homa orurante maini ani vaivarao kia niqaa uva varianarove. Ne mintivaro Noravano Kotiva Iotani Namari hini mantaraini kuari avu urunaini vai vatarara ninavu vataama vaivo tiarie.

²³ Oho, te tiari irlate. Ne nenta kauqu aqiqaa aqukeha tivate uvvara kia avataqi vivera, vira kaara ne Nora Kotira uva raqakavarne qora kaiqa vare uvava kia kukeqa viraitiro, qoqama varianarove.

²⁴ Ho ne vatumta vantaavuravate sipisipi ohaave autu kaate. Autuke viraqaaahai nenta kauqu qaiqaa aqukeha raqirerave tivatera irihama raqireka vuate, tiro.

²⁵ Mosiva minti tumanta Gaatira ankuvata Rubenira ankuvata virara tiha, Nora vaiintivauvo, tenavu ai kaiqa vaiinti vaiha ai uvaqai avataqi virerave.

²⁶ Tinavu nahentive vaintive, purumakauve, sipisipive, vika maini Gileati vatumkanavuq vaise ²⁷ ekaa tenavu vaiinti qerama vare, Nora Kotirara iriha oru raqirerave. Tenavu are tintemake, Iotani Namari taqa vare oru navutaaka hampata raqirerave, ti.

²⁸ Vika minti tuvaro Mosiva Kotira kaiqa vara amite vau vaiintira Eleasaaravata, Nunira maaqu Iosuaaravata, Isareri nora vaiinti vo anku vo ankuqaa raqikukavata, tiva nimiro tiharo, ²⁹ Ne irlate. Gaatira ankuqiraa vaiintivata, Rubenira ankuqiraa vaiintivata, vika Kotirara iriha, auvihehavava vare oru Iotani Namari taqa vare, ni kahaqiramanta ne navutaaka hampata raqiqi vika naatarake vi vatara varavera, ho ne Gileati vata vika nimivaro vi vatava vikaini variarire. ³⁰ Ho vika kia ni hampata Iotani Namari taqa vare ni kahaqamake raqireka vivera, ho vika ni aanante Kenaani vataqaima varevarave, tiro.

³¹ Mosiva minti tumanta Gaatira ankuvata Rubenira ankuvata nai tiva ami tiha, Hove, Noravano Kotiva tintemake tenavu mintirerave.

³² Tenavu Nora Kotirara iriha namari taqa vare Kenaani vataini oru vi vatanaaka hampata raqirerave. Tenavu iqoka raqu tainake, viraqaahai tenavu Iotani Namari maa mantaraini vai vataraqaa ani vairerave, ti.

³³ Vika minti tuvaro Mosiva ekaa Amo King Sihoriva u vataravata, Basaani King Okuva u vataravata, vi vataro aumanto vau vatukanavuravata, kaama tero, Gaatira ankuvata, Rubenira ankuvata, Manasera anku hininavuvata, vi vataro nimura.

³⁴ Mintuvaro Gaatira ankuvano haaru ori vaantaavura vau vatukanavura qaiqaa autu kora. Vika maa vatukanavura qaiqaa autu kora:

Diboni, Ataroti, Aroe,

³⁵ Ataroti-Sofaani, Jase, Jokubeha,

³⁶ Beti-Nimura, Beti-Haraani.

³⁷ Rubenira anku vika maa vatukanavura autu kora:

Hesaboni, Eleale, Kiriataimi,

³⁸ Nebo, Sipimaa, Baali-Meoni. Vika Baali-Meoni vatuka vo autu ntava tora.

Vika mintimake ekaa vatukanavu qaiqaa autuke, qaraaka autuvata ntava tora.

³⁹ Manasera maaqu Makira ankuvano Gileati vataini oruntero Amo vatanaaka hampata raqiharo vika aru ntata komanta vinuvaro vi ankuva vi vataraqaa vaurara tiro,

⁴⁰ Mosiva Gileati vata Makira anku amuvaro vi vatava vi ankura vata vaura.

⁴¹ Vaiinti vo Jairiva Manasera ankuqhainaava, viva nai navunaaka vokuka ntita varero oru vo vatukanavu hampata raqiharo vika naatara kero vi vatukanavura varero vinavura autu nteharo Jairura-Vatukanavuve tura.

⁴² Qaiqaa Nobaaa nai navunaaka ntita varero oru Kenati vatukavata, vira tataaga vau vatukanavuvata, raqiharo vinavura varero viva nai autuara iriharo Kenati vatuka vira autu nteharo Nobaa vatukave tura.

33

Isareri vo vata vo vataqi variqi vu nutura

¹ Mosika Eronika Isipi ke Isareri ntita vare qumina aahara vataini katu vare anixa voqi voqi naavu maaqa kaqateha vaura.

² Mintuvaro Noravano Kotiva tuvaro Mosiva Isareri naavu maaqa kaqate vaura, vira autu vohaiqa vohaiqa vukugqi qara ntuvatora. Vi vatukanavura autu maantimama vairo:

³⁻⁴ Haaru avuhainaa tora 15 entaqaa Isareri Isipiqihai katu vare Ramesesi mini ke anura. Noravano Kotiva Isareri vehakuma nimito entara vira qararaa Isipi vatanaaka nai qorainti vainti kara hunka qutu vuka qunte vaumanta Isareri kia Isipi naatu getaraiti, vika nivuqaa qoqaa katu vare vi vaura. Noravano Kotiva mintiakero nai kempuka numiqeharo Isipi vika una variqa vara muntuviqama komanta ⁵ Isareri Ramesesi ke, vika katu vare Sukotini oru naavu maaqa kaqate vaura. (Katu Varora 12:37)

⁶ Qaiqaa vika Sukoti ke, katu vare aahara vata auvhini Etamini oru naavu maaqa kaqate vaura.

(Katu Varora 13:20)

⁷ Qaiqaa vika Etami ke, vihai anirante Pi-Hahiroti vataini kuari avu uruntonaini Baali-Sefoni vata vira tataaga Mikadoli vatuka aumanto oru naavu maaqa kaqate vaura. (Katu Varora 14:2)

⁸ Qaiqaa vika Pi-Hahiroti ke, vihai Naare Namari taqa vare aahara vata Surini vura. Vika taaramo entara aahara vatavaura nuvaqi vi, Maraini oru naavu maaqa kaqate vaura. (Katu Varora 14:22; 15:22-23)

⁹ Qaiqaa vika Mara ke, katu vare oru Elimi vataini naavu maaqa kaqate vaura. Elimini ruvu namari 12navu vauvaro *deti* katari 70navuvata mini vaura. (Katu Varora 15:27) (*Deti* katarai vaireva, vira mare vakaavara mare voqaara vaivaro *deti* tava vira kara naarama vairo.)

¹⁰ Qaiqaa vika Elimi ke, vihai Naare Namari vaunaini orunte naavu maaqa kaqate vaura.

¹¹ Qaiqaa vika Naare Namari ke, aahara vata Sinive tunaini orunte naavu maaqa kaqate vaura. (Katu Varora 16:1)

¹² Qaiqaa vika aahara vata Sini ke, vihai katu vare oru Dopikaini naavu maaqa kaqate vaura.

¹³ Qaiqaa vika Dopika ke, oru Alusini naavu maaqa kaqate vaura.

¹⁴ Qaiqaa vika Alusi ke, oru Repintimini naavu maaqa kaqate vaura. Mini namari nevavata kia vaura. (Katu Varora 17:1)

¹⁵ Qaiqaa vika Repintimi ke, aahara vata Sainaini naavu maaqa kaqate vaura. (Katu Varora 19:1-2)

¹⁶ Qaiqaa vika Sainai ke, oru Kibaroti-Hataavaini naavu maaqa kaqate vaura. (11:34)

¹⁷ Qaiqaa vika Kibaroti-Hataava ke, oru Haserotini naavu maaqa kaqate vaura. (11:35)

¹⁸ Qaiqaa vika Haseroti ke, oru Ritimaini naavu maaqa kaqate vaura.

¹⁹ Qaiqaa vika Ritima ke, oru Rimoni-Peresini naavu maaqa kaqate vaura.

²⁰ Qaiqaa vika Rimoni-Peresi ke, orunte Lipinaini naavu maaqa kaqate vaura.

²¹ Qaiqaa vika Lipina ke, orunte Risaini naavu maaqa kaqate vaura.

²² Qaiqaa vika Risa ke, orunte Kehelataini naavu maaqa kaqate vaura.

²³ Qaiqaa vika Kehelata ke, Seferi Aiqina auvoqi orunte naavu maaqa kaqate vaura.

²⁴ Qaiqaa vika Seferi ke, Haradaini orunte naavu maaqa kaqate vaura.

²⁵ Qaiqaa vika Harada ke, Makihelotini orunte naavu maaqa kaqate vaura.

²⁶ Qaiqaa vika Makiheloti ke, Tahaatini orunte naavu maaqa kaqate vaura.

²⁷ Qaiqaa vika Tahaati ke, Teraini orunte naavu maaqa kaqate vaura.

²⁸ Qaiqaa vika Tera ke, Mitikaini orunte naavu maaqa kaqate vaura.

²⁹ Qaiqaa vika Mitika ke, Hasamonaini orunte naavu maaqa kaqate vaura.

³⁰ Qaiqaa vika Hasamonai ke, Moserotini orunte naavu maaqa kaqate vaura.

³¹ Qaiqaa vika Moseroti ke, Bene-Jakaanini orunte naavu maaqa kaqate vaura. (Lo 10:6)

³² Qaiqaa vika Bene-Jakaani ke, Horu-Hagitigatini orunte naavu maaqa kaqate vaura.

³³ Qaiqaa vika Horu-Hagitigati ke, Jotabataini orunte naavu maaqa kaqate vaura.

³⁴ Qaiqaa vika Jotabata ke, Abaronaini orunte naavu maaqa kaqate vaura.

³⁵ Qaiqaa vika Abarona ke, Esioni-Gebeni orunte naavu maaqa kaqate vaura. (Lo 2:8)

³⁶ Qaiqaa vika Esioni-Gebe ke, aahara vata Senini orunte Kadesini naavu maaqa kaqate vaura. (20:1)

³⁷ Qaiqaa vika Kadesi ke, Horu Aiqinaqaa Idomu vata auvahini orunte naavu maaqa kaqate vaura. (20:23)

³⁸⁻³⁹ Vika Isipiñihai katu vare vuvaro 40 ihi aitarovaro 5 tora avuhainaa entaqaa Eroniva qutu vura. Kotiva tuntema kero, Eroniva Kotira kaiqa vara amite vauva oru Horu Aiqinaqaa qutu vura. Viva 123 ihi varakero qutu vura. (20:25-28)

⁴⁰ Isareri vika mini vauvaro Araati avuhainaa vaiintivano Kenaani vata Nekevini vaiharo Isareri ani vau uvvara irura. (21:1)

⁴¹ Isareri Horu Aiqina ke, Salmonaini orunte naavu maaqa kaqate vaura. (21:4)

⁴² Qaiqaa vika Salmona ke, Punonini orunte naavu maaqa kaqate vaura.

⁴³ Qaiqaa vika Punoni ke, Obotini orunte naavu maaqa kaqate vaura. (21:10)

⁴⁴ Qaiqaa vika Oboti ke, Moapi vata auvahivano vaunaini, Iye-Abarimini orunte naavu maaqa kaqate vaura. (21:11)

⁴⁵ Qaiqaa vika Iye-Abarimi ke, Diboni-Gaatini orunte mini naavu maaqa kaqate vaura. (21:30)

⁴⁶ Qaiqaa vika Diboni-Gaati ke, Alamonu-Dipalaataimini orunte naavu maaqa kaqate vaura.

⁴⁷ Qaiqaa vika Alamonu-Dipalaataimini ke, Nebo Aiqina tataaqa Abarimi Aiqinaqaa orunte naavu maaqa kaqate vaura.

⁴⁸ Qaiqaa vika Abarimi Aiqina ke, Moapi vataaini vivi, Iotani Namari hini mantaraini ugita kanta naavu maaqa kaqate vaura. Vika ugita kanta vauvaro Ieriko vatukavano Iotani Namari hini mantara vuruni vaura. (22:1)

⁴⁹ Vika Moapi ugitaaini Iotani Namari tataaqa naavu maaqa kaqate vauvaro Beti-Jesimoti vatukavano hini mantaraini vauvaro Sitimi vatukavano hini mantaraini vaumanta Isareri vika avutana vaura. (25:1)

Noravano Kotiva vata raire okarara tura

⁵⁰⁻⁵¹ Vika mini vauvaro hini mantara vuruni Ieriko vauvaro vi entara Noravano Kotiva Mosiva Isareri tiva nimiarire tiro, maa uvvara Mosira tiva amiro tiharo: Ne Iotani Namari taqvare Kenaani vataaini orunte,⁵² ho vi vataraqaa varia vaiinti nahentika ekaama aru ntata kaimanta vuate. Vika una variqa maraqura *aini* oriqohaive ori tanaraqohaive aututaara vara rukavu raakavuma taiqake, vika una variqanavu quahama nimite varia vatukanavuravata qoraiqama kaate.

⁵³ Vi vatava ne i vatava variarire ti, te vira ni nimuro. Ne vi vataro oru vare mini variate.

⁵⁴ Ne satu arukeha vi vatara raira keha, ekaa vo anku vo anku nimiate. Airi varia ankuka nora vata rairake nimi, kia airi varia ankuka inaara vata nimiate.

⁵⁵ Ne kia vi vataraqaa varia vaiinti nahentika ekaa aru ntata karaiti, hini kiaka qaqi kaivera, vika auqu vai haikava ni avuqvata vaataqvata ranteqe vaintemake, qaiqaa qaiqaavata ni qoraiqama nimitevarave. ⁵⁶ Ne kia vika ekaa aru ntata kaivera,

te vika qoraiqama nimitarerera iritaainara, vira nintama qoraiqama nimitararave, tiro.
„Noravano Kotiva minti tivakero Mosirara Isarerer vi uvvara tiva nimiane tura,...

34

Mosiva qutu vura

¹ Mosiva Moapi uqita vata kero aiqina vo, vira nora autu Nebo, vira inaara autu Pisigave tunaini, noraqaa oru vaura. Vi aiqinava kuari urinaini vauvaro Iotani Namari hini mantaraini Ieriko vatuka vaura. Mosiva aiqina viraqaa himpite vauvaro Noravano Kotiva Isarerer nimirerave tu vatarata ekaa vira umiqora.

Viva Gileeati vataihairo Mosira umiqaqiro viviro, Daani vatukavano vaunaini vuru taigora. ² Ekaa vo anku vo anku Napataarira vatave, Efaramura vatave, Manasera vatave, Iutaara anku vatave, umiqaqiro viviro, Meditarenia Namari kuari avu aqu vinaini vau vataravata umiqora.

³ Noravano Kotiva Mosira nora vata, Iutaa uqitaini vau vatarata *sautini* vaura umiqero, airi *deti* katari vau vatukara Ierikovata qumiqero, viraqaaahairo hini *sauti* mantaraini Soaa vatukavata umiqora.

⁴ Noravano Kotiva Mosira ekaa vi vatarata umiqero virara tiharo, Te tenta kauqu aiqiqa aquukeha Eparahaamirave, Aisaakirave, lekopirave, vika naintivarave, vi vatarata nimirerave tiavaunare. Minti tunarara ti, vate te vi vatarama ai umiqauro. Te vate ai qaqi kaurara are avuqohaira vi vatarata tavaaro. Ho te kia ai qaqi kaarirara are mini vinarave, tiro.

⁵ Viva minti tuvaro Mosiva Nora Kotira kaiqa vaiintivano Moapini vaharo Noravano tiva amuntema kero, mini vaharo qutu vura.

⁶ Viva qutu vuvuro Noravano Kotiva naivano Moapi uqitakanta Mosira quntama tora. Vira quntama tova vauvaro vatuka vo, vira autu Beti-Peo, vutuni vaura. Vate kia vo vaiintivanovata Mosira quntama to vatarata kankomake iri tavaara.

⁷ Mosiva 120 ihi varakero qutu vura. Viva qutuarirava aumanto vauvaro viva kia anomaa naampaiqama viraitiro vauvaro, vira kempukavano qaqi vauvaro vira avuvanovata koge iro vaura. ⁸ Mosiva qutu vumanta Isarerer vika Moapi uqita kanta 30 entanavuara vaiha, Mosirara iqi rata amitaqiqi vura.

⁹ Isarerer vika Mosirara iqi rataqiqi vi, vuru taiqa kovaro Iosuaava Mosira vatuka varora. Haaru Mosiva nai vatuka varaarire tiro vira noraiqama korara tiro, Kotiva Nunira maaqu Iosuaara koqe avu aato amura. Mintumanta vaiinti nahenti Iosuaara uva iriha vika Noravano Kotiva Mosira tiva amu uva maarara avataqiqi vura.

¹⁰ Taara vaiintitanta vohaa vaiha uva tuntema kero, Noravano Kotiva Mosikantiro uva ti vaura. Minturara tiro, vi entaraqaaahairo kia paropeti vovano Mosira voqqaara qovarama viva vaira. ¹¹ Kia vokia paropetika Mosiva nora kaiqa varaintemake kaiqa varaara. Noravano Kotiva Mosira atitovaro viva aahuva vo qara vo qara u kaiqara Isipini vareharo Isipi avuhainaa vaiintivata, vira nora vaiintinavuvata, ekaa Isipi vatanaakkavata qoraiqama nimitora.

¹² Mosiva ekaa Isarerer nivuqaa vaharo nai nora kaiqa, aatu ite vai kaiqara autu nimitora. Vokia paropetika kia ho Mosiva kaiqa varaintemake varaara.

IOSUAA (Joshua - Josua)

Tenavu maa uvvara iquqama kaunaraara tiro, Hini 1 – 8 vaivaro 9 – 24 kia vairo.
Iosuaava Mosira vatuka varora.

¹ Nora Kotira kaiqa vaiinti Mosiva qaqi vau entara Nunira maaqu Iosuaava Mosira kahaqi vau vaiintiva vuara.

Ho Mosiva qutu vuvaro Noravano Kotiva Iosuaarara tiharo, ² Ti kaiqa vaiinti Mosiva qutu vimantara ti, te ni Isareri vata nimiaina entava anima ntaivo. Arevata ekaa Isarerivata Iotani Namari taqa vare, vi vataraqaa virara qera iha variate. ³ Te haaru Mosira tiva amunantemake, ne vi vataraqaa nenta aiqu ntavatera, ekaa vi vataro ni nimirerave.

⁴ Ni vata viva vaireva, maantimakero varianarove:

Ahara vata *sauti* mantaraihairo hoqaramatero viviro, Lebanoni ainqinavano *noti* mantaraini vainaini taiqaanarove.

Qaiqaa nora namari Iufaretisi Namari kuari urunaihairo vi vataro hoqaramatero viviro, Hiti vatanaaka vata vara maini kero viviro, Meditarenia Namari auvahini kuari ruhunkinaini vuru taiqaanarove.

⁵ Are qaqi variqira vina entara kia ho vovano iqoka raqiharo ai aatara kaanarove. Te kia ai qaqira karaiti, te Mosira vataake variqi vunantemake, ai vataake variqi virerave.

⁶ Haaru te tenta kauqu aqiqaa aqukeha ni kaivaqaukavarara vi vataro ni Isareri nimirerave tunarave. Arema maa vaiinti nahentika ntita varera vi vataraqaa vuru keravara tira, kia getaraitira, kempukaiqama kera variane.

⁷ Are kia getaraitira, kempukaiqama kera variqira vihara, ti kaiqa vaiinti Mosiva uva maara ai tiva amura, ekaa vi uvvara iriqira vuane. Are kia vi uvvara qaiqihairi inaara uva vogavata qaiqira karaitira, ekaa vi uvvara iriqira virera, are taini tainie vi anihara, koqema keraqaima variqira vinarave.

⁸ Vi uvvara Mosiva qara ntuvatai vukuraqihairi vo enta vo enta kaara ntuvaqira vuane. Atatifainaraqaavata entaqivata vi uvvara aatoqi iriqira vihara ekaa vi uvvara avataqira vuane. Are mintiaqira virera, are varena kaiqava koqe iro vairara are koqema kera variqira vinarave.

⁹ Te vaaka ariara kia getaraitira, kempukaiqama kehara variqira vuane, tunarave. Are taini tainie vi aniraqe te Noravano Kotika ai Variqavano ai vataake variainarara tira, are kia vo haika aatu qetairao ai muntukavano maara ntaaire, turo, tiro.

¹⁰ Kotiva minti tuvaro Iosuaava qiata vaiintinavuara tiharo, ¹¹ Nenavu *seri* naavu maaqa kaqa taanaini vi anihai vaiinti nahentiari karakaqa qeramake vataate. Taaramo enta aitaraira ne Iotani Namari taqa vare Noravano Kotiva ni Variqavano nimire ti vataro oru varevarave, tiate, tiro.

¹² Iosuaava minti tivakero viva Rubenira ankuaravata, Gaatira ankuaravata, Manasera anku hininavuaravata, tiharo, ¹³ Haaru Nora Kotira kaiqa vaiinti Mosiva niara tu uvvara ne qaiqaa iriate. Mosiva minti turave: Noravano Kotiva maa vataro ni nimiraro vi vataro nini varianarove, turave.

¹⁴ Mosiva minti turara ti, ni nahentive vaintive, ni quara vairive, Iotani Namari hini mantara maini vaimanta, ekaa ni iqoka vaiinti vikaqai auvihehavaa vaqa ntuvu vare, nái qata vakaukavara kahaqireka vika naane vutura hini mantaraini taqa vare vuate.

¹⁵ Vika mini oru vaiha nái qata vakaukavara kahaqamaqi vivaro Noravano Kotiva ekaa vi vataro nái vika nimireva ti vataro vikavata nimira varate. Viragaahai ne orurante, Iotani Namari maa mantaraini ani vaiha Nora Kotira kaiqa vaiinti Mosiva ninta nimu vataraqaa nenta ani variate, tiro.

¹⁶ Iosuaava minti tumanta vika vira nái tiva ami tiha, Are tinavu tiva timiana uvvara, tenavu ekaa vi uvvara avataqi virerave. Are taini tainie tinavu tititairae tenavu are tinantemake mini mini virerave.

¹⁷ Haaru tenavu Mosira uva koqemake iriqi vunantemake, vate tenavu ai uvavata koqemake iriqi virerave. Noravano Kotiva Mosira vataakero variqiro vuntema kero, viva qaiqaa ai vataakero variqiro vuuanarove.

¹⁸ Ta vaiintivave kia ai uva iriraitiro, ai uva raqa kaaina vaiintira, vi vaiintira tenavu tiani aruma kevarave. Are kia getaraitira, kempukaiqama kera variqira vuane, ti. „Qiata vaiinti vika minti tura..“

2

¹ Isareri vika Sitimi vataini vauvaro Iosuaava vaiinti taaraqanta Kenaani vata ampeqamake tavaate tiro, vitanta nititora. Viva vitantara tiharo, Netanta Kenaanini oru ampeqamake tavamaqi vivi, oru Ieriko vatukaini anomake ampeqamake tavaate, tiro. Minti tumanta vitanta Ierikoni orunte, hampi nariro ni vau nahentira, Rehaapira naavuqi oru vaitora.

² Ho Ieriko avuhainaava irumanta Isareri vaiinti taaraqanta Kenaani vataini ampeqireka aniaivo tuvaro ³viva uva vara kovaro Rehaapiva unaini vura. Viva vi nahentirara mintima tiro: Taara vaiinti Kenaanini ampeqireka ani ai naavuqi variavo. Nena naavuqhairsitanta vara veva kaane, tiro.

⁴⁻⁶ Ho vaaka Rehaapiva vitanta nai naavu qiata tanuqi kanta ntita vaari kero, repa kaqi vatoraqohairo vitanta vauvu tomanta vaura.

Avhainaa vaiintivano vitantara nena naavuqhairsitanta vara veva kaane, tuvaro Rehaapiva aqao tiro, Vitanta vaakama vuavo. Quqaama vitanta vaaka ti naavuqi ani variarave. Ho vitanta vihai ania okarara kia te irunarave. Eramanta vaantaavura qenti kia tintaaraqaa vitanta naane vevante otitare vuavo. Tainie nái vuavo? Vitanta kia tivata tiva timiavo. Ne vitanta vaaka rantakareka ivera, ne homa vitanta avataqi vivi, ravaaqavu kevarave, tiro.

⁷ Rehaapiva minti tumanta avuhainaava nititoka Ieriko ke, vitanta ravaaqavu kareka vuvuro Ieriko vaantaavura qenti tinta tora. Avuhainaava nititoka Isareri vaiintitantara qumina rantaqi vivi, Iotani Namari taqa vare vi ani vaunaini otunte tavomanta vitanta kia mini vaura.

⁸ Ho Isareri vaiintitanta entaqi naavu qiataqaa vaitareka uvuro Rehaapiva oru ntero ⁹vitantara tiharo, Noravano Kotiva maa vataro ni Isareri kaama nimitairara te irunarave. Ekaa tenavu maa vataraqaa vaurauka ni Isareri naatu voqamake qeteha vauro.

¹⁰ Ne Isareri Isipi ke anuvaro Noravano Kotiva ni avuni viharo Naare Namari ahariaqama nimitomanta ne ho anu uvura tihamanta irunarave. Iotani Namari hini mantaraini Amo vatanaaka avuhainaava vaiintitanta Sihonika Okuka ne Isareri vitanta arukoravata tihamanta irunarave.

¹¹ Tenavu vi uvura iri, voqamake qeteha vauraro tinavu kempukavata taiqa vimanta vauro. Oho, Noravano Kotiva ni Variqavano naaruvaqaavata, vataqaavata raqiki vaivama vaivo.

¹² Ho te nitanta koqema nimi taunarara irihama netanta Nora Kotira autuqaa mintima tiate: Are titanta koqema timitaanantemake, tetanta ai nina vaiinti nahentiaravata koqema nimitararave, tiate. Netanta vo haika ti humiqaiqe te vi haikara tave, nitanta uvura ququaave tiare.

¹³ Netanta kauqu aqiqaa aqukeha mintima tiate: Tenavu Isareri ai noka qokave, ai qata vakaukave, ai aura nakaukave, vika vaintivarave, kiama aru kaainarave, tiate, tiro.

¹⁴ Rehaapiva minti tumanta vitanta nái kauqu aqiqaa aqukeha tiha, Tetanta ai tiva amuna uvura raqa kaarer, homa Kotiva titanta arukaanarove. Are tetanta vare vauna kaiqara kia qovarama kairera, Noravano Kotiva maa vataro tinavu Isareri kauquqi kaaina entara tenavu kia ni qoraiqama nimitaraiti, koqema nimitararave, tura.

¹⁵ Rehaapira naavuvano Ieriko vatuka vaantaavuraqaa akukumate kaqa tova vauvaro Rehaapiva naaqaunta varakero *uintu anahairo* vitanta aaqaini vaati tutakora. ¹⁶ Viva tiharo, Ieriko avuhainaava nititaika nitanta ranta kevorare ti, netanta aqiqinaini oru kukeqavi variate. Vika taaramo entara nitantara ranteha tave qaqrake maini orurante animanta, netanta nenta navunaaka ianaini vuate, tiro.

¹⁷ Minti tumanta vitanta tiha, Tetanta kauqu aqiqaa aqukeha tiva tauna uvava qumi-naiqama vuantorave tira, ¹⁸ are maa uvura koqema kera avataane: Tenavu Isareri iqoka raqirera maini aniarirara are titanta tutakena *uintuaraqaa* naare naaqaunta rumpa tairage tenavu Isareri naaqaunta vira ho tavaare. Mintimatera are oru nena noka qokave, nena qata vakaukave, ekaa nena vaintivarave, ntita varera nena naavu maaqi viri kaira variate.

¹⁹ Mintiraro vovano naavu maaqihairo qaqrake vahaqaqaini veva ntero viramanta vira arukaivera, vira nai okarama varianarove. Kia titanta okaravauve varianarove. Isareri vika ai naavu maaqihai vaiinti vo qoraiqama kaivera, vi uvava titantaqima varianarove.

²⁰ Ho raurihara variane. Are tetanta ampeqi vauna uvura vora tiva amirera, tetanta ariara kauqu aqiqaa aqukeha tiva tauna uvava qumi-naiqama ianarove, ti.

²¹ Vitanta minti tuvaro Rehaapiva tiharo, Eo hove. Netanta tintema kero varianarove, tivakero vitanta nititama komanta vura. Vitanta uvuro viva naare naaqaunta varakero *uintuaraqaa* rumpa tovaro vaura.

²² Vitanta ainqinaini oru kukeqavi vaumanta Ieriko avuhainaava nititoka taaramo entara vitantara qumina rantaqivi vivi, qaqrake nai orurante anura.

²³ Vika anumanta viraqaahai ampeqireka anutanta ainqinaihai tuvunte, Iotani Namari taqa vare Iosuaava vaunaini orunte, vitanta ekaa náitántaqaa qovaraiqu uvra vira tiva amura.

²⁴ Vitanta vi uvra tiva taiqake qaiqaa tiha, Noravano Kotiva quqaama vi vatara tinavu Isareri kauquqi kaanarove. Vi vataraqaa variaka tinavu Isareri aatu voqamake qeteha variavo, tura.

3

Isareri Iotani Namari taqa vare vura

¹ Vira qararaa vaaka toqaqi Iosuaava ekaa Isareri hampata Sitimi mini ke, otunte Iotani Namari auvhahini nái seri naavu maaqa kaqate, Iotani Namari taqera veka vaura.

² Vika mini vauvaro taaramo enta aitaromanta viraqaahai Isareri qiata vaiintinavu vaiinti nahenti seri naavu maaqa kaqatoraqi vi anihā ³vika tiva nimi tiha, Ne tavaimanta Kotira kaiqa vara amite varia vaiintika, Rivaira anku ni Variqa Noravano Kotiva uva tiva taatauto *Vokisera* aqu vare avuni vimanta, ne nenta i haikaravata vare, vika naantiaraini vuate.

⁴ Ne kia mini uva aarara tavaakara ti, ne vika naantiaraini vimanta vikama vi aarara ni numiqate. Ne mini viha kia Kotiva uva tiva taatauto *Vokisera* aqvare vika aaqanto oru viraiti, ne 1 kilomitae vututoqamake anihā, vika naantiaraini vuate, ti.

⁵ Isareri qiata vaiintinavu minti tuvaro Iosuaavavata vaiinti nahentira tiharo, Hura Noravano Kotiva ni avutana nora kaiqa varaa inarara ti, vate ne nenta avu aato muntukaqihai Kotiraraqai iriqi viha tuekaamake variate, tiro.

⁶ Minti tivakero viva Kotira kaiqa vara amito vaiintikira tiharo, Ne naane Kotiva uva tiva taatauto *Vokisera* era aqu vare vaiinti nahenti avuni vuate, tumanta vika viva tunte ura.

⁷ Mintuvaro Noravano Kotiva Iosuaarara tiharo, Te vate nora kaiqa vara nimitaari Isareri vira tave, maa entaraqaaahai vika ariara nora vaiintive tivaqī vivarave. Haaru te Mosira hampata vaunantemake, vatevata te ai hampata varainara, viraravata vika kankomake irivarave.

⁸ Ho ti kaiqa vara timite variaka te uva tiva taatau tauna *Vokisera* aqu vare variaka mintima tiva nimiane: Ne vi *Vokisera* aqu vare otu Iotani Namari vainaini otunte, namari viraqī otu himpīte variate, tiro.

⁹ Noravano Kotiva minti tuvaro Iosuaava Isarerira tiharo, Ne vainto ani vaiha iri vaiqe te Noravano Kotiva ni Variqavano ti uvra ni tiva nimiare.

¹⁰ Vate ne Kotiva nora kaiqa varaa inarara tave, viraqaahai ne kankomake irivarō qaqi variqiro vi vai Variqava ni hampata vahilo viva quqaama Kenaani vataqaahairo ni navutaaka, Kenaani vatanaakave, Hiti vatanaakave, Hivi vatanaakave, Peresi vatanaakave, Girigaasi vatanaakave, Amo vatanaakave, Jebusi vatanaakave, aru ntatama kaanarove.

¹¹ Ho tavaate. Noravano Kotiva ekaa maa vataraqaa raqiki vaira, vira *Vokisevano* naane avuni Iotani Namari taqareva vuanarove. ¹² Ne Isareri 12 anku vohaiqa vohaiqaqihai vaiinti 12navu kaama taate.

¹³ Noravano Kotiva ekaa maa vataraqaa raqiki vaira *Vokise*, vira kaiqa vara amite variaka vira aqu vare ni nivuni Iotani Namariqī otunte, vika nái aiqu namariqī ntava taivaro namarivano kia tuvitare viraitiro, kumpetaqiro viharo vaavarama viro varianarove, tiro.

¹⁴ Iosuaava minti tumanta vaiinti nahenti nái seri naavu maaqa rampaikē vare Iotani Namari taqareva yumanta, Kotira kaiqa vara amite vauka avuni viha Kotiva uva tiva taatauto *Vokisera* aqu vare vura.

¹⁵ Kara qanti vau entava anintovaro Iotani Namari vana nora huvura tuvi vaura. Mintumantavata, Kotira kaiqa vara amite vauka Kotira *Vokise* aqu vare Iotani Namariqī otunte vika nái aiqu namariqī ntava tovaro ¹⁶ aruvuhairo tuvi vau namariva kia tuvitare viraitiro, kumpetaqiro viharo Saretanai vauka tataaqa vau vatukara Adaamuni vaavi araviro vaura.

Aruvhainavaa mintuvaro aateraini vitare vi vauva kia Qutuvi-Varuvava vaunaini oru viraitiro, aaharaiqama vura. Ieriko vatukavano vurunto vaumanta vaiinti nahenti Iotani Namari aahara vau taqa vare hini mantaraini oru vaura.

¹⁷ Kotira kaiqa vara amite vauka Kotira *Vokise* aqu vare, Iotani Namari avutaqaa, aaharaiqu vataraqaa himpīte vaumanta, ekaa Isareri taqa vare vivi, hini mantaraini oritare vura.

4

Ori 12navu mpaqi vuru vatora

¹ Ekaa Isareri Iotani Namari taqa vare vuvaro Noravano Kotiva Iosuaarara tiharo, ² Isareri anku 12navuqihira vaiinti vohaiqa vohaiqa kaamatera ³ vikara mintima tiane: Kotira kaiqa vara amite variaka Iotani Namari avutaqaa himpi variara viraqaaahai ne Isareri anku 12navuvara irihama, nora ori 12navu mpaqike aqu vare tenavu vaitarera iainanaini vuru vataate, tiane, tiro.

⁴ Minti tuvaro Iosuaava vaiinti 12navu kaamatoka naarama kero ⁵ vikara tiharo, Nenavu nenta Variqa Nora Kotira Vokisevano Iotani Namariqi vainaini otunte, vurun-toqamake nora ori vohaiqa vohaiqa mpaqike aqu vare uruate. Nenavu Isareri anku 12navuvara irihama ori 12navu aqu vare uruate.

⁶ Noravano Kotiva vate ni Isareri vara nimitai kaiqara naantiara ne tauru kevorave ti, vika ori 12navu vare vuru vohaaraqaa vatevarave. Naantiara ni vaintivara ori vira okarara iraimanta ⁷ ne mintima tiate: Haaru Nora Kotira Vokisevano Iotani Namari avutaqaa vauvaro namarivano aaharaiqama vurave, tiate. Naantiara Isareri vika ori vinavura taveha, maa entara qovaraiqirara kia tauru karaiti, qaqi iritevarave, tiro.

⁸ Iosuaava minti tumanta vika viva tunte ura. Noravano Kotiva Iosuaarara tuntemake, vika ou Iotani Namari avutaqaaahai ori 12navu mpaqike vare urura. Vika Isareri anku 12navuvara iriha nora ori vohaiqa vohaiqa aqu vare *seri* naavu maaqa kaqa tonaini vuru vatora.

⁹ Mintuvaro Iosuaava „tumanta“ vokuka vo ori 12navu varake, Kotira kaiqa vara amite vauka Kotira Vokise aque Iotani Namari avutaqaa himpite vaunaini ruvaaqumake vatora. Vi orinavuva vate maa entara qaqima vairo.

¹⁰ Nora Kotika Mosika ekaa uva Iosuara tiva amuntemake, Kotira kaiqa vara amite vauka Kotira Vokise aque Iotani Namari avutaqaa himpite vaumanta vaiinti nahenti vaaka namari taqa vare hini mantaraini oritarora.

¹¹ Vika ekaa hini mantaraini oritare vaumanta, viraqaaahai Kotira kaiqa vara amite vauka Nora Kotira Vokise aqu vare, oritare qaiqaa vaiinti nahenti avuni oru vaura.

¹² Mosiva tuntemake, iqoka vaiinti Rubenira ankuve, Gaatira ankuve, Manasera anku hinive, iqoka raqireka qerama vare, vika naane vaiinti nahenti avuni lotani Namari hini mantaraini oru vaura.

¹³ Nora Kotira avuqaa 40,000 iqoka vaiinti nái auvihehavaa vaqa ntuvu vare Ieriko tataaqa uqitakanta oru vaura.

¹⁴ Vi entara Noravano Kotiva vaiinti nahenti nivuqaa nora kaiqa vara nimitorara iriha, ekaa Isareri vika Iosuaarara nora vaiintive tura. Vika tota Mosirara nora vaiintive tuntemake, Iosuaava qaqi vau entara viraravata nora vaiintive ti vaura.

¹⁵ „Ho ekaa Isarerí Iotani Namari hini mantaraini oritarovaro,“ Noravano Kotiva Iosuaarara tiharo, ¹⁶ Ti kaiqa varu timiteha te uva tiva taatau tauna Vokisera aquteha variaka, are tiramanta vika Iotani Namari avutaqaaahai uruate, tiro.

¹⁷ Minti tuvaro Iosuaava vikara tiharo, Nenavu Iotani Namari avutaqaaahai uruate, tumanta ¹⁸ vika Iosuaava tuntemake qaqini vaarinte vuvaro, vaaka Iotani Namarivano qaiqaa huvura namarivano tuvi vauntema kero, tuvi vaura.

¹⁹ Avuhainaa tora 10 entaqa ekaa Isareri Iotani Namari taqa vare hini mantaraini orunte, Ieriko tataaqa Giligaali vatukaini oru nái *seri* naavu maaqa kaqate vaura. Giligaali Ieriko tataaqa kuari avu urinaini vaura.

²⁰ Vika nái *seri* naavu maaqa kaqate mini vauvaro Iosuaava vaiinti vonavu ori 12navu Iotani Namariqihai mpaqitora varakero, vohaaraqaa vaavi aratero ²¹ Isareriera tiharo, Naantiara ni naintivara nái qokavara ireha tiha, Nana haikara irihae maa orinavura vaavi aratorave? timanta ²² vika mintima tivarave: Haaru ekaa Isareri vaiinti nahenti Iotani Namari aaharaiqama vuraqaa taqa vare vu entarara irihama maa orinavura vaavi aratorave, tivarave.

²³ Vate Noravano Kotiva ni Variqavano Iotani Namari aaharaiqama nimitaimanta ne taqa vare maini aniarave. Vate ni mintima nimitaintema kero, haaruvata Noravano Kotiva tinavu Variqavano Naare Namari aaharaiqama timitaimanta tenavu Isareri vi namarira taqa vare anunarave.

²⁴ Noravano Kotiva minti minti irara ti, ekaa vataini variaka Nora Kotira kempukara kankomake irivarave. Ne vira aatu qeteha ekaa enta vira autu tuaheraqi vuate tiro, Nora Kotiva ni Variqavano ekaa vi kaiqara ni vara nimitairave, tiro. Iosuaava minti tura.

5

Isareri vika nái vaata toqa kora

¹ Amo vatanaa avuhainauka Iotani Namari hini mantaraini kuari avu ruhunkinaini vaukave, Kenaani avuhainauka Meditarenia Namari auvahini vaukave, vikavata iruvaro Noravano Kotiva Isareri namari ho taqa vare vuate tiro, Iotani Namari aaharaiqama nimitora. Vika vi uvira iruvaro voqama kero naatu itomanta vika iqoka raqi kempukava kia vaumanta vaura.

² Vi entara Noravano Kotiva Iosuaarara tiharo, Ne roqori ori vahiraqohai nenta Isareri qorainti vaata toqa kaate, tiro.

³ Minti tuvaro Noravano Kotiva tunte iro Iosuaava ori vahira vara komanta ekaa Isareri qorainti vika nái vaata toqa kora. Vika vi vataro autu nteha, *Gibeati-Haaraloti - Vaata Toqakaa Aiqinarave*, tura.

⁴⁻⁶ Haaru Isipini vau entara Isareri vika ekaa vaiintive, vika maaquvarave, vaata toqakoka vaura. Ho vika Isipi mini ke 40 ihiara aahara vatainvi ani vau entara, qorainti vainti mini vataatoka kia vaata toqa nimitora.

Vika Isipiqaiahai anu entara 40 ihi aitaromanta ho iqoka raqi vaiintika aahara vatainivariqi vivi, Nora Kotira uva raqakora kaara mini ekaa qutu vura.

Tota Noravano Kotiva nai kauqu ainqiqa aqukero vikara tiharo, Ne ti uva raqakaara kaara, te ni kaivaqaukaravarara tiha, Te karavano koqema kero qampiqaaina vataro ni Isareri nimirererave tuna uvava kiama niqiq varianarove, tura.

⁷ Noravano Kotiva minti tumanta vi vaintika variqi vi vuru qutu vumanta vika maaquvara noruqamavi kia vaata toqa koka vauvaroraro tiro, Iosuaava vikara tumanta vika vaata toqa nimitora.

⁸ Vika vaata toqa nimitova tavanta vuarire ti, ekaa Isareri vika nái seri naavu kaqatoraqi qaqi vaura.

⁹ Mintuvaro Noravano Kotiva Iosuaarara tiharo, Ne Isareri Isipini vau entara vi vatanaaka ni rumpa tomanta ne vika paanaa kaiqa vare vaura kaara kaurira haikavano niqaa vaurave. Ho yate te kaurira haika vira niqahai qaqlini varake taiqama kauro, tiro.

Noravano minti turara ti, vika vi vataro autu nteha, *Giligaalive – Qaqini-Vara-Korave* tura. Maa entaravata vainti nahenti vi vataro autu qaqi nte variara.

¹⁰ Ho avuhainaa tora 14 entaaqa Isareri vika Ieriko uqita kanta Giligaalini nái seri naavu maaqa kaqatonaini vaiha, haaru *enselivano* Isareri vika Qaqi Vehakuma Nimoto entarara iriha kara nora.

¹¹ Vira qararaa vika Kenaani vatainvi naahocq *baali* qampigora tegake vare, hini *baali* ihaqi untake ne, hini *baali* kia noqai mparetira untake nora. (*Baali* vaireva, *raisive* voqaarama vairo.)

Vi entaraqaa vika avuni hogaramake Kenaani vatainvi qampigo karara varake nora.

¹² Vika vi karara novaro vira qararaa *manaaavano* kia qaiqaa hiqintumanta vika kia vi karara qaiqaavata varake nora. Vi entaraqaaahai Isareri vika Kenaanini qampigo karara varakeha ne vaura.

Iqoka paipe tote vau vaiintira

¹³ Vo enta Iosuaava Ieriko tataaqa vahiro vuruvi tavovaro vainti vovano iqoka paipe nai kauquqi totero vira avuni himpitero vaura.

Mintuvaro Iosuaava raukuviro viva unaini oruntero virara tiharo, Are tinavu iqoka vaintivaneo variaro, tinavu navutaavae variaro? tiro.

¹⁴ Iosuaava minti tuvaro viva aqao tiro, Te kia ni iqoka vaintivauve vauro. Te kia ni navutaakavauve vauro. Te Nora Kotira iqoka vainti vika avuhainaukama vauro, tiro.

Minti tuvaro Iosuaava vatakanta hiqinti viro nai viri vatainvi kero vi vaintira quahama amiteharo tiharo, Mpo, nora vaintio, te ai kaiqa vaintima vauro. Te nana kaiqae ai vara amitararave? tiro.

¹⁵ Minti tuvaro Nora Kotira iqoka vainti vika avuhainavaa tiharo, Are te vauna vataro turuaraini himpi varianarara tira, nena aiquqaa nonku taanara qaqlini rahunku kera variane, tuvaro Iosuaava viva tunte ura.

6

Isareri Ieriko vatuka varora

¹ Ieriko vatukaqii vauka Isareri naatu qeteha ekaa vaantaavura qenti tinta tomanta vika avutuqaihai aqiqaini viva kia ho vaumanta aqaihai avutuqii uriqetevavata kia ho vaura.

² Ho Noravano Kotiva Iosuaarara tiharo, Iriane. Te Ieriko vatukavata, vira avuhainaa vaintivata, vira iqoka vaintinavuvata, ai kauquqi karerave. ³ Are nena iqoka vaintiaravata oru Ieriko auvahianta vohaa enta vohaa tataa vi vatukara virante airante ututumakeha vuate. Ne 6 entanavuarama mintiaqii vuate.

⁴ Ne mintiaqi vimanta ni avuni ti kaiqa vara timite variaka 7navu sipisipi qora komuqohai aututaa *aanumaarara/nomara* nái kauquqi tuata vare vi vaimanta vika naantiara ti *Vokise* aqu vareka vuate. Ne 6 entanavuara mintiaqi vivi, 7 entaqaa ne 7 tataa Ieriko virante airante i vaimanta ti kaiqa vara timite variaka ni avuni viha nái aanumaara vuqaqqi vuate.

⁵ Vika vuqaqqi vivi, ekaanaini vukaiqaake vuqaate. Vika vukaiqaake vuqe vaimanta ne vi uvara iri, ne ekaa noraiqaake naverai tivaro Ieriko ori vaantaavurvano rukavu raakavuma vuari. Mintiramanta ne kia varike viraiti, ne ekaa vaakama vi vatukaraqi oriqteta, tiro.

⁶ Minti tuvaro Numira maaqu Iosuaava Kotira kaiqa vara amite vau vaiintika naarama kero vikara tiharo, Ne Noravano Kotiva uva tiva taatauto *Vokisera* aqu vare vi vaimanta niqihai vaiinti 7navu aanumaara tuata vare ni avuni vuate, tiro.

⁷ Minti tivakero Iosuaava Isareri vika tiva nimiro tiharo, Ne vi vatukara aaqaini virante airante iate. Iqoka vaiinti vokiaka naane avuni nái auvihehavaa vare vimanta vika naantiara Nora Kotira *Vokise* aqu vare vuate, tiro.

⁸⁻⁹ Iosuaava minti tumanta viva tuntemake auvihehavaa varoka vokuka avuni vumanta vika naantiara Kotira kaiqa vara amite vauka aanumaara vuqaqqi vumanta, vinavuka naantiara Kotira *Vokise* aqu varoka vumanta, vika naantiara auvihehavaa varoka vokukavata vura.

Vika vatuka aaqaini virante airante i vaumanta aanumaara tuatoka nái aanumaara vuqe vaura.

¹⁰ Vika vuqe vauvaro Iosuaava ekaa Isareriara ne kia uvavata tiraiti, evaara vaiqe te niara naverai tiate tiari ne naverai tiate turara ti, vika kia uvavata tiraiti, evaara vatuka aaqaini virante airante i vaura.

¹¹ Vika Iosuaava tuntemake, Nora Kotira *Vokise* aqu vare, vohaa tataa Ieriko vatuka aaqaini virante airantemake, viraqaahai Isareri vika nái *seri* naavu maaqa kaqatonaini anirante oru entaqi vaura.

¹²⁻¹³ Mintuvaro vira qararaa Iosuaava vaaka toqaqi himpumanta qaiqaa Kotira kaiqa vara amite vaukavata, Isareri iqoka vaiintivata, avuni untemake, Ieriko aaqaini vohaa tataa virante airante ura.

Auvihehavaa varoka vokuka avuni vumanta vika naantiara Kotira kaiqa vara amite vauka 7navu aanumaara vuqaqqi vumanta, vika naantiara Nora Kotira *Vokise* aqu varoka vumanta, vika naantiara auvihehavaa varoka vokukavata vura. Vika vatuka aaqaini virante airante i vaumanta aanumaara tuatoka nái aanumaara vuqe vaura.

¹⁴ Ho vira qararaa taara entaqaa vika Ieriko aaqaini qaiqaa oru vohaa tataa virante airantemake, viraqaahai vika orurante nái *seri* naavu maaqa kaqatonaini oru vaura. Vika 6 entanavuara mintiaqi vura.

¹⁵ Mintiaqi vivi, 7 entaqaa vika aatitare uraqaq himpi oru avuni untemake, Ieriko aaqaini virante airante ura. Vi entara vika kia vohaa tataaqai virante airante iraiti, vika 7 tataa Ieriko aaqaini virante airante ura. ¹⁶ Vika 7 tataa virante airante i vaumanta Kotira kaiqa vara amite vauka nái *aanumaara/noma* vukaiqamake vuqe vauvaro Iosuaava vaiinti nahentiara tiharo, Ne ekaa naverai tiate. Noravano Kotiva vi vatukara vate nima nimivo.

¹⁷ Tenavu Ieriko vatukavata, ekaa viraqi vaina haikaravata, vehi autu taiqake *ofaa* voqaara vi vatukara Nora Kotira amirerave. Hampi nariro ni vai nahentiva Rehaapiva tinavu vaiintitanta ampeqamake tavareka vuatanta kukeqa tairara ti, tenavu viravata vira naavuqi variakavata vehakuma nimitarerave.

¹⁸ Ne ekaa haika vehi autuke, kia vo haikavata nenta varaa. Ne vo haika varaivera, vira kaara tinavu Isareriqaa nora maaravano qovaraiqiraro tenavu vehi autuvi taiqa vuariravama varianarove.

¹⁹ *Silvaave, korive, baraasive, ainive*, vi oriraqohai aututaa haikava, ekaa vi haikava Noravano Kotiva i haikavaqaima varianarove. Ne vi haikara vi haikara vare vuru Kotira monu vate varia naavuraqi vataate, tiro.

²⁰ Iosuaava minti tumanta Kotira kaiqa vara amite vauka nái aanumaara vuqa komanta ekaa Isareri vika noraiqaake naverai tuvaro Ieriko vaantaavurvano ruku raakurama vura. Mintumanta Isareri iqoka vaiinti vaaka vatuka avutaqi oriqtet, vi vatukara varora.

²¹ Vika nái iqoka paipeqohai vi vatukaraqi ekaa haika qaqi vauka aru taiqa kora. Ekaa vaiintive nahentive, naampai kontave, vaintive, purumakauve, sipisipive, donkive, ekaa aru taiqa kora.

²² Minti vauvaro Iosuaava haaru vaiintitanta ampeqamake tavotantara tiharo, Netanta kauqu ainqiqaa aqu keha tivataa uvvara iriha oru hampi nariro ni vai nahentiravata, vira naavuqi variakavata, ntita vare vahaqaqaini veva kaate, tiro.

²³ Minti tumanta vitanta oru Rehaapiravata, vira noka qokavata, vira qata vakaukavata, vira vaiinti nahenti vonavuvuata, vira kaiqa vaiinti nahentivata, ntita vare vahaqaqaini veva ke, vika ntita vare Isareris *seri* naavu maaqa kaqatora tataaqa muntu kora.

²⁴ Vikaqai vehakuma nimite, viraqaahai vika Ieriko vatuka iha tuta kovaro ihavano vi vatukaravata, viraqi vau haikaravata, ita taiga kora. *Silvaae, korive, baraaive, ainive, viraqohai* aututo haikaraqai vika vare Nora Kotira monu vato naavuraqi vuru vatora.

²⁵ Iosuaava taara vaiinti nititonanta vitanta Ierikoni ampeqamake tavareka vuvaro Rehaapiva vitanta kukega torara tiro, Iosuaava Rehaapiravata, vira navunaakavata, vehakuma nimitero kia vika arukora. (Rehaapiva kuvuarama taika maa entara Isareris vataaini qaqi variara.)

²⁶ Vi entara Iosuaava vaiinti nahenti kempukaiqama kero tiva nimiru tiharo, Vaiinti vovano maa vatukara Ieriko qaiqaa autu kairera, Noravano Kotiva vira qoraiqama amitaanarove.

Vi vaiintiva vi kaiqara hogaramatero ori vataqi ntava taina entara vira maaqu hogarenaava qutu vuuanarove.

Vi vaiintiva vaantaavura qenti vaaviarama kaina entara vira maaqu vitihainaava qutu vuuanarove, tiro. (1 King 16:34)

²⁷ Noravano Kotiva Iosuara hampata vauvarora tiro, Iosuaava nora kaiqa vare vau uvava vi vataraqaa vi ani vaura.

7

Akaaniva Kotira uva raqa kora

¹ Hoqarero avuni Noravano Kotiva Isareris kempukaiqama kero uva tiva nimiru tiharo, Ekaa Ierikoqi vai haikaraqihai kia vo haikavata nenta vararaiti, ekaa vi haikara vehi autu taiga kaate, tura. Viva minti tumantavata, Isareris vika vi uvvara raqakora. Isareris vainti vo Akaaniva Kotira uva raqakero vo haika varakora kaara Noravano Kotiva Isareris voqamakero arara itora.

Akaanira qova Kaamiva vauvaro

Kaamira qova Sapadiva vauvaro

Sapadira qova Seraava vauvaro

Seraara ankuvano Iutaara ankuqiraava vaura.

² Ho Iosuaava Ieriko vatukaini vahilo vatuka vo Ai vatukavano vai vatara ampeqamake tavaate tiro, vo vaiintinavu nititonanta vika vira ampeqamake tavareka vura. Ai vatukavano vauvaro vira aumanto Beti-Abeli vatukavano vauvaro vira hini mantaraini kuari ruhunkinaini Beteli vatukavano vira tataaqa vaura.

³ Ho vi vaintinavu Iosuaava tuntemake, oru niha tave, viri Iosuara tiva ami tiha, Kia airi vaiinti vi vatukaraqai variavo. Are qumina ekaa iqoka vaiinti mini vara kerorave. Are iqoka vaiinti 2,000e 3,000e nititaira vika oru Ai vatanaaka hampata raquate, ti.

⁴ Vinavuka minti tumanta Isareris 3,000 iqoka vaiinti mini raqireka oru vumanta Aihainaaka vaiinti kempukaiqamake vika hampata iqoka raqumanta, Isareris vika aiqu autute orurante anura.

⁵ Aihainaaka nai vatuka qentiaahai Isareris aru ntataqi vivi, nora oriqaahai naavu kake orira teqake vare vaunaini vuru kora. Aihainaaka onkaiqi vika aru ntataqi otu viha Isareris vainti 36navu arukora. Vira kaara Isareris aatu itovaro vika kempukavanovata taiga vura.

⁶ Mintuvaro Iosuaava nai utavaaqa qunahi qaannahima kero, oru Nora Kotira *Vokise* avuqaa vataaini hiqinti viro, mini variqiro viviro entama kora. Isareris nora vaiintivata hora varake nai qiataqaa aqute Iosuara hampata vataaini hiqintivi vaura.

⁷ Iosuaava Kotira aarero tiharo, Noravaavo, are ekaa haikaaqaa raqiki variaravama variaro. Mpo, nantivarae are tinavu Iotani Namari hini mantaraihaira tivita varera maa vataraaqa viri kaaro? Are tinavu Amo vatanaaka kauquqi kairamanta vika tinavu ekaa aru taiqa kaate tira, tinavu maini viri kaaro? Oho, tenavu Isareris kia Kenaanini aniraiti, Iotani Namari hini mantaraini mini variataarave.

⁸ Mpo, Noravaavo, Isareris iqoka vaiinti navutaaka aatu qetake aiqu autute anira kaara te nana uvae tiainarave? ⁹ Kenaani vatanaakavata, vo vatanaaka maini variakavata, vi uvvara iri, viraqaahai vika ani tinavu ututumate aru taiqama kevarave. Vika tinavu ai vaiinti nahenti aru taiqake ariara tiha, Isareris vika variqavano kia nai vaiinti nahenti

antua nimitaivo, tivarave. Hauri vika minti tivakeha ai nora autu vatainiqama kevorave, tiro.

¹⁰ Minti tuvaro Noravano Kotiva Iosuaarara tiharo, Himpuan. Nantiharae are vataini hiqintira variaro? ¹¹ Are iriane. Isareri qora okarama ti autu timitaavo. Te kempukaiqamake uva tiva taataute Isareriri tiha, Ierikoqi vaina haikaraqihai kia vo haikavata nentara vararaiti, ekaa haika vehi autu taiqa kaate turamantavata, vika te tuna uvvara raqake vo haika muara vare unahaa tiha, Ekaa vi haikara vehi autu taiqa kauro, tivakeha vika vi haikara varatora vuru nái ja haikara hampata vataarave.

¹² Mintiara kaara te vika vehi autu taiqa kaariravaqaima vaivo. Vika vehi autuvi taiqa viva vaira kaara vika kia ho nái navutaaka hampata kempukaiqamake raqiraiti, vika qetake aiqu autute aniarave. Ne kia te qioqama tauna haikara vehi autu taiqa kaivera, te kia qaiqaavata ni hampata vaiha ni kahaqamagi virarave.

¹³ Ho are oru vaiinti nahenti qerama tairaa vika hora tuekaamavi ti tivuqaa ho variate. Are vikara tihara, Noravano Kotiva ni Isareri Variqavano niara mintima tivo: Ne Isareri vaiinti nahentivauvo, te niara vo haika kia varaate tivake qioqama tauna haikara ne vi haikara kia vehi autu taiqa karaiti, qaqi vare iavo. Ne vi haikara varaara kia vara qaqini kaivera, ne kiama ho nenta navutaaka naatara kevarave.

¹⁴ Ho hora toqaqima ne nora anku, vo anku vo ankuvano te iainanaini aniate.

Ne mintiqe te niqihai vo anku kaamate vikara aniate tiari vi ankuka ti aumanto aniate.

Te vi ankukaqihai inaara anku vo kaamate aniate tiari vika aniate.

Te inaara anku vikaqihai vo naavuqi vo naavuqi variaka kaamate aniate tiari vika aniate.

Te vikaqihai vo naavuqi vaika kaamate aniate tiari vikaqihai vaiinti vohaiqa vohaiqvano aniate.

¹⁵ Ta vaiintivae te qioqama tauna haikara varainara ne vira rantaake, vira nai vainti nahenti hampata aruke, vikavata vira airairavata ihaqohai tatoqa kaate. Vi vaiintiva anomakero qora okara autiharo, Isareri kaurira haika nimivo. Viva mintiharo te Noravano Kotika tenta vaiinti nahenti hampata uva tiva taatau taunara raqa kaivo, tiro. ¹⁶ Noravano Kotiva minti tuvaro Iosuaava vaaka toqaqi himpiro Isareri nora anku, vo anku vo anku naarama komanta ani vauvaro „Noravano“ ekaa anku vikaqihairo Iutaara anku naane kaama tomanta vika ani avuni vaura.

¹⁷ Ani vauvaro „Noravano“, Iutaara ankuqihairo Seraara anku kaama tomanta vika ani avuni vauvaro Iosuaava tumanta Seraara ankuqihai vo naavu vo naavuqi vauka vika vohaiqa vohaiqvano ani vauvaro „Noravano“ Sapadira naavuqi vauka kaama tora.

¹⁸ Sapadira naavuqi vauka anuvaro Iosuaava tumanta vi naavuraqi vauka vohaiqa vohaiqvano anuvaro „Noravano“, vikaqihairo Akaanira kaama tora. Akaanira Kaamira maaquvano vauvaro Kaamira Sapadira maaquvano vauvaro Sapadira Siraara maaquvano Iutaara ankuqiraava vaura.

¹⁹ Ho Iosuaava Akaanirara tiharo, Ti vaiintio, vate are tinavu Isareri vatanaaka Variqa Nora Kotira avuqaa himpi vahira, kia una tiraitira, nena autina okarara qoqaa tiva qovarama kaane, tiro.

²⁰ Iosuaava minti tuvaro Akaanira vira tiva amiro tiharo, Oho, ququaama te Nora Kotira tinavu Isareri Variqa uva raqakehama qora okara autu kaunarave. Te vi uvvara ai tiva amirerave.

²¹ Tenavu iqoka raqihai Ieriko vatanaaka naatarake vika airaira, vo airaira vo airaira varauna entara, te tavauraro Babironi vatanaaka tavuna koqera aututaava vaivaro, silvaea monu 200vata vaivarao, kori vira maaranavo vohaa kilo vairave. Te vi haikara tavauraro ti muntuka ntimanta te ekaa vi haikara vare viri tenta seri naavuqi vata quvike, silvaea monu vevanto vate, ekaa vo haikavata viraqiq quntuma taunarave, tiro.

²² Akaanira minti tuvaro Iosuaava vaiinti vokuka nititonanta vika kante Akaanira seri naavuqi oru rantaake tavovaro viva tuntema kero, ekaa vi haikava viraqiq vaura.

²³ Vika ekaa vi haikara vare Iosuaava Isareri hampata vaunaini vuru Nora Kotira avuqaa vatakanta vatora.

²⁴ Ho Iosuaava ekaa Isareri hampata oru Akaanira ravaaqavuke vita vare, viva ekaa haika ura, silvaeave tavunave korive vare, vira maaqu raavurave, vira purumakauve donkive sipisipive vare, vira seri naavuvata ekaa vo airairavata vare, muntu Ako Uqitaini kora.

²⁵ Mini kovaro Iosuaava tiharo, Oho, nantivarae are mintihara tinavu Isareri qoqaiqama timitaaro? Are mintianara kaarama vate Noravano Kotiva ninavata qoraiqama amitaanarove, tumanta ekaa Isareri vika ori varake Akaanira nai vainti nahenti hampata aruke, vira nai airaira hampata ihaqohai tatoqa kora.

²⁶ Mintimake viraqaahai vika ori airitahaa nuntu ruvaantumake, Akaanira vaataqaa ntava tora. Vika ori nuntu ruvaaqumake ntavatova vate maa entara qaqlima vairo. Vaiinti nahenti vi vatara autu nteha *Ako Uqitainive - Nora Maara Nimito Uqitarave* ti variara.

Akaanira arukovaro Nora Kotira arara itova vaahama vura.

8

Isareri vika Aihainaaka naatara kora

¹ Noravano Kotiva Iosuaarara tiharo, Kia qetaraitira, kempukaiqama kera variane. Are Isareri iqoka vaiinti ekaa ntita varera oru Ai vatanaaka hampata raquane. Are vika hampata raqi vairaqe te Ai avuhainaaravata, vira vaiinti nahentivata, vatkavata, vatavata, ai amirerave.

² Are Ieriko avuhainaava vaiintivata Ierikohainaakavata vehi autu taiqa kaananterma kera, Ai avuhainaaravata Aihainaakavata vehi autu taiqa kaane. Ne homa ekaa vi vatanaaka quara vairive airairave varevarave. Ho iqoka raqireva ihara are avuni iqoka vaiinti vokiaka naane nititaira vika oru vatkuka vira tauvaqaini vaara autute variate, tiro.

³ Minti tumanta Iosuaavavata, Isareri iqoka vaiinti vikavata, Ai vatanaaka hampata iqoka raqireka qera i vaura.

Iosuaava nai iqoka vaiintiqihairo iqoka vaiinti tarauka 30,000 kaama tero vika entaqi varakero tiharo, ⁴ Ne oru vatkuka tauvaqaini aumanto vaara autute variate. Ne raqirara iriha geramate variate.

⁵ Ne mini oru vaiqe te tenta iqoka vaiinti hampata qogaa vatkaini virerave. Tenavu vatkuka aumanto oruntaari Aihainaava iqoka vaiinti tinavu harireka vatkuaqihai aaqaini aniqe tenavu tota unantemake, orurante aiqu autute anirerave.

⁶ Tenavu qaqi kaari vika tinavu haruqi aniqe tenavu raqu kuntamaqi aniali vika mintima tivarave: Tavaate. Tuvana Isareri qetake vuantemake, vatevata vika aiqu autute kante variavo, tivarave. Ho vika minti tivake nai vatkuka mini ke niaraiqamake animanta ⁷ ne kante vaara aiutu vare, vatkuaqiqi variaka naatara kaate. Noravano Kotiva ni Variqavano vi vatkara nima nimianarove.

⁸ Ne vi vatkara utu vare, Noravano Kotiva tintemake, vi vatkara iha quara kaate. Ho ne te tuna uvura iri varemata koqemake avataate, tiro.

⁹ Iosuaava minti tivakero nai iqoka vaiinti hini kuka nititomanta vika oru vaara autireka vura. Ai vatkavano hini vauvaro Beteli vatkavano hini vaumanta tavaarana kuari avu ruhunkinaini vika oru vaara autute vaura. Vika mini vauvaro Iosuaava vi entara entaqi Isareri naavu maaqa kaqatonaini vaura.

¹⁰ Ho vira qararaa vaaka toqaqi Iosuaava himpiro nai iqoka vaiinti naarama ruvaquma kero, vivavata Isareri nora vaiintivata iqoka vaiinti vika ntita vare avuni viha Ai vatkainiara vura.

¹¹ Iqoka vaiinti Iosuaara hampata vuka oru vi vatkara nora qentivano vaunaini orunte, vika Ai vatkuka *noti* mantaraini nai *seri* naavu maaqa kaqa tora. Vika mini vauvaro Ai vatkavano vauvaro ugita vatavano tavaarana vaura.

¹² Iosuaava 5,000 vaiinti nititomanta vika vaara autireka Ai vatkuka kuari avu ruhunki mantaraini vura. Ai vatkavano hini vauvaro Beteli vatkavano hini vaumanta vika tavaarana oru vaura. ¹³ Ho avuni vuka qera i vaumanta Ai vatkuka *noti* mantaraini nai *seri* naavu maaqa kaqatonaini vaukavata qera i vaura. Vi entara entaqi Iosuaava ugita kanta vaireva vura.

¹⁴ Ho vira qararaa Ai avuhainaava Isareri iqoka vaiinti vutu tavero, viva vaaka nai iqoka vaiinti ntita varero Isareri hampata raqireva Iotani ugita kanta vura. Viva avuni Isareri hampata mini raqi vaura.

Isareri iqoka vaiinti hini kuka vatkuka tauvaqaini vaara autute vauvaro, Ai avuhainaava kia vikara iriraitiro, viva nai iqoka vaiinti ntita varero vauvaro ¹⁵ Iosuaava nai iqoka vaiinti hampata unaqaraiqama kero aiqu aututero aahara vataini vireva auti vauvaro ¹⁶ Ai avuhainaava tavero vatkuaqiqi vauvaiintika ekaa naarama kero tiharo, Ne Isareri aru ntataqi vuote, tumanta vika Iosuaara avataqi vura. Iosuaava mintima kero vika kuntamaqiro vumanta Ai vika nai vatkuka mini ke vika ntata vare anura.

¹⁷ Ekaa Aihainaava vaiinti vika vatkuka ke, kia vaantaavura qentivata tintaraiti, Isareri ntata vare vura.

¹⁸ Mintuvaro Noravano Kotiva Iosuaarara tiharo, Nena vaantaara tuahera kera Ai vatkuka mantaraini aave vatehara variane. Vate te Ai vatkuka ai kauquqi kaainarara tira, are mintiane, tuvaro Iosuaava viva tunte iro, nai vaantaara Ai vatkuka mantaraini tuahera kero totero vaura.

¹⁹ Iosuaava mintumanta vira iqoka vaiinti vaara autute vauka vira tave, vaaka vaara aiti, vatukaqi oriqete viraqi vau vaiinti nahentika ntaihamake naavu maaqavau iha tutakovaro itora.

²⁰⁻²¹ Mintuvaro Iosuaava nai iqoka vaiinti hampata tavovaro Ai vatukaqihairo iha muravano veraini oru vi vaumanta, vika irumanta nai navunaaka vatukaqi oriqete naavu maaqavau iha qumpiarama tovaro ite vaura. Ite vaumanta vika tuqantaavi Ai iqoka vaiinti ntaihareka orurante qaiqaa anura.

Mintumanta Aihainaa iqoka vaiintivata tuqantaavi tavovaro iha muravano veraini oru vi vaumanta vika tavovaro vika ruqemake vi aarava kia vaura.

²² Isareri iqoka vaiinti vatuka avutaqi oriqetoka vevante Aihainaa iqoka vaiinti ntaihareka hihai anumanta, Isareri vokuka hihai anumanta Aihainaa iqoka vaiinti avutana vaumanta, Isareri vika ekaa aru taiqa kovaro kia Aihainaa iqoka vaiinti voqavanovata qaqi vauvaro kia voqavanovata ruqema kero vura.

²³ Isareri vika aru taiqake Ai avuhainaa vaiintiqai kia arukaraiti, vira vita vare Iosuaava vaunaini vuru kora.

²⁴ Aihainaa iqoka vaiinti vika Isareri aahara vataini ntataqiqi vumanta Isareri vika tuqantaavi Aihainaa iqoka vaiinti ekaa aru taiqa kovaro kia voqavanovata qaqi vaumanta, viraqaaahai Isareri vika Ai vatukaini orunte, viraqi vau vaiinti nahentikavata ekaa aru taiqa kora.

²⁵ Vi entara Isareri vika Ai vatukaqi vau vaiinti nahentika 12,000 ekaa arukora.

²⁶ Iosuaava nai vaantaara kia nanta muntuvi karaitiro, vira qaqi tuahera kero Ai vatuka aave vate vaumanta, Isareri vika viraqi vau vaiinti nahentika ekaa vehi autu taiqa kora.

²⁷ Noravano Kotiva Iosuaara tiva amuntemake, Isareri vika vi vatukaraqihai quara vairive vo airaira vo airairave nariara varora. ²⁸ Iosuaava Ai vika naavu maaqa ihaqohairo tatoqa taiqa kovaro kia vovanovata vi vatukara qaiqaa autu kora. Vate maa entara naavu kaqato oriva vo ori vo orivano kiri kairiro mini vairo.

²⁹ Iosuaava Ai avuhainaa vaiinti arukero vira vaata katariqaa hiritovaro mini variqiro viro entama kora. Entama vuvaro Iosuaava tumanta vira vaata viquke vare muntu vatuka qentiana aquke, ori airitahaa nuntu ruvaaqumake avuhainaa vaiinti vira vaataqaa ntawa tora. Vi orira ntavatova maa entaravata qaqlima mini vairo.

Noravano Kotiva qaiqaa Isareri hampata vaiharo nai uva tiva taatau tora

³⁰ Ho viraqaaahairo Iosuaava oru Ebaali Aiqinavano Isareri Variqa Nora Kotira *ofaa* tainta vo autu amitora. ³¹ Nora Kotira kaiqa vaiinti Mosiva tuntémakero, Iosuaava vi taintara aututora.

Haaru Mosiva vi uvvara tivakero vukuqi qara ntuvu tova mintima tiro:

Ne *ofaa* tainta autihama kiama *ainiqohai* toqate orira varake autiraiti, qaqi ori varake vira autuate, tura.

Iosuaava vi uvvara iriharo vi taintara aututomanta vika viraqaa *ofaa* vo, Nora Kotira kaintu iha quara amite, Nora Kotikanti vohaa vairara iriha *ofaa* vovata iha quara amitora.

³² Ho vi entara Isareri Iosuaara tave vauvaro viva Kotiva Mosiraqaa tivato uvvara qara ntuvatora varakero, vo ori tanuqiraqaa qaiqaa vi uvvara qara ntuvatora.

³³ Ekaa Isareri nora vaiintive, iqoka vaiintiqaa raqiki vaukave, *iasinavuve*, vo vatanaaka Isareri hampata vaukave, vika Noravano Kotiva uva tiva taatauto *Vokisera* tataaga hini hini himpi vaura. Vika himpi vaumanta Rivaira anku Kotira kaiqa vara amite vauka vi *Vokisera* aqu vare vika avuni himpite vaura.

Hini vaiinti nahenti himpi vaunaini Gerisimu Aiqinavano vika tauvaqaini vauvaro, hini vaiinti nahenti himpi vaunaini Ebaali Aiqinavano vika tauvaqaini vaura. Haaru Nora Kotira kaiqa vaiinti Mosiva Isareri tiva nimiro tiharo, Ne mintimake himpi vaiqe te kauqu aave vataariraro Kotiva ni koqema nimitaarire, tuntémakero vika himpite vaura.

³⁴ Vika himpi vauvaro Iosuaava Kotiva tivato uvvara Mosiva qara ntuvatora kaara nti vaumanta vika iri vaura. Iosuaava Kotiva vaiinti nahenti koqema nimitaaina uvavarave, vika qoraiqama nimitaaina uvavarave, Kotiva ekaa uva tivatora kaara ntuvu nimitora.

³⁵ Ho Iosuaava Mosiva qara ntuvato uvvara kaara ntiharo kia vo uvavata qaqira karaitiro, ekaa vi uvvara kaara nti vaumanta ekaa Isareri, vaiintive, nahentive, vainitive, vikavata vo vatanaaka Isareri hampata vaukavata, ekaa mini ruvaaqumavi vaiha vi uvvara irura.

QIATA VAIINTINAVU

(Judges - Hetman)

4

Deboraaka Baraakikara tura

¹ Ehutiva qutu vumanta Isareri vika qaiqaa Nora Kotira qora kaiqa vara amitora.
² Mintuvaro vira kaara Kotiva Jabinira qaqi kovaro viva vika naatara kora. Jabiniva Ke-naani avuhainaava vovano vaiharo Haso vatukaqaa raqiki vauvaro vira iqoka vaiintiqaas raqikuva Siseraava Haroseti-Hagoimi vatukaihainaava vaura.

³ Jabiniva iqoka *kaari ainiqohai* aututora 900 vatova viva Isareriqaa raqikiharo vika kia aaqrurihama nimitaraitiro, 20 ihiara qoraiqama nimiteharo vikaqaa nora maara vataqiro vura kaara Isareri vika Nora Kotirara tinavu kahaqiarire ti, vira aare vaura.

⁴ Vi entara Lapidotira naata paropeti nahenti Deboraava vaiharo Isareriqaa raqikiharo vika uva avuqavu i vaura.

⁵ Viva *deti* katari okara oquvi vaumanta Isareri viva unaini aninte nái uva viraqaa avuqavu i vaura. Vi katariva Ramaa vatukavata Beteli vatukavata avutana Efaraimu aqina vaunaini vaura.

⁶ Vo enta Deboraava Abinoamira maaqu Baraakira Napataari vataini Kedesi vatukaini vaura aaramakero virara tiharo, Tinavu Noravano Kotiva ariara mintima tivo: Oru Napataarika Sebulunika ankuqihairo 10,000 vaiinti ntita kera Tabo Aiqinaqaa vuru kaira variate. ⁷ Mini vuru kairamanta vase te Jabinira iqoka vaiintiqaas raqiki vaira Siseraara kuntama vare viri kaariraro viva ai hampata Kisoni Namari vainaini raquarire. Viva nai iqoka *kaarivata* nai iqoka vaiintivatama kero aniraqe te vika ai kauquqi vatarerave, tivo tiro.

⁸ Manti tuvaro Baraakiva vi uvvara iriro viva Deboraarara tiharo, Are tintira anirera, te virerave. Are kia tintira anirera, te kia virerave, tuvaro ⁹ Deboraava tiharo, Hove te ainti virerave. Are manti tianara kaara are iqoka aatarakera kiama are nena nora autu varenarave. Noravano Kotiva Siseraara nahenti kauquqima vataanarove, tivakero Deboraava Baraakikantiro Kedesi vatukaini vura.

¹⁰ Mini uvvaro Baraakiva Sebulunika Napataarika ankuqihairo 10,000 iqoka vaiinti naaramakero ntita varero raqireka uvvaro Deboraavavata vira hampata vura. ¹¹ Vi entara Hebeva Kini vataihainaava nai navunaaka kero, katu varero oru Kedesi vatuka auvahini, Sananimini ogiva okara nai *seri* naavu kaqa tora. Kini vatanaaka vaireka, Mosira aiatura Hobaapira naintivarava vaura.

¹² Ho Siseraava Baraakiva Tabo Aiqinaqaa vivo tu uvvara iriro, ¹³ viva iqoka *kaari ainiqohai* aututora 900 varero, ekaa nai iqoka vaiintivata naaramakero ntita varero Haroseti-Hagoimi kero, Kisoni Namari vainaini uvvaro ¹⁴ Deboraava Baraakirara tiharo, Ho iqoka raquane. Vate Noravano Kotiva ai avuni viharo viva Siseraara ai kauquqi kaanarove, tuvaro Baraakiva nai 10,000 iqoka vaiinti ntita varero Tabo Aiqina kero vura.

¹⁵ Baraakiva nai iqoka vaiinti hampata oruntero iqoka hoqarama tovaro Noravano vira navutaaka qetara haika nimo vika avu aato hampiqama komanta Siseraaravata ekaa vira iqoka *kaariqi* vaukavata vira iqoka vaiintivata vika vaaka ruqemake vi ani vaura. Siseraava paparuqiharo nai iqoka *kaari* mini kero vataqaa qeta kero uvvaro ¹⁶ Baraakiva iqoka vaiintivata iqoka *kaarivata* ntataqiro Haroseti-Hagoimini vuru komanta Baraakira iqoka vaiinti vika Siseraara iqoka vaiinti ekaa aru taiqa kovaro kia voqavanovata qaqi vaura.

¹⁷ Siseraava „vataqaa“ ruqemakero Jaelira *seri* naavu vainaini oruntora. Jaeliva Kinihainaara Hebera naatavano vauvaro vi entara King Jabiniva Hasora avuhainaava Hebera navunaaka hampata maateraiqiharo vaura.

¹⁸ Jaeliva tavovaro Siseraava anuvaro viva vira vitakareva veva ntero Siseraarara tiharo, Ti nora vaiintio, naavuqi uriqetaane. Kia getaraitira, ti *seri* naavuqi uriqetaane, tuvaro Siseraava viraqiqi oriqetovaro Jaeliva *paraanke* varakero vira kukeqa tovaro ¹⁹ Siseraava nahentiara tiharo, Ti namari naataa ivo. Namari ti timiraqe naare, tuvaro Jaeliva memerea naama vira amuvaro novaro Jaeliva qaiqaa vira vara kukeqa tora.

²⁰ Siseraava nahenti virara tiharo, Ho are *seri* naavu qentiana vaihara tavairaro vo vaiintivano anintero ai ireharo, Vovano viraqiqi vairove? tirera, are kiavema tiane, ²¹ tivakero vaata popohovaro viva vaita aavata vura.

Vaita aavata vuvaro Jaeliva *hamaavata seri* naavu *nirivata* varero, Siseraava vaitonaini evaara oruntero *hamaaqohairo niri* vira vuahaaraqaa ruqutu kovaro *nirivano* vuaharaqi otigetero qaqini otu vatavata qumputaata aru tovaro Siseraava qutu vura.

²² Ho Baraakiva Siseraara rantareva anuvaro Jaeliva vira vitakareva vevantero virara tiharo, Aniraqe te are vi vaiintirara rante varianara ai umiqaa, tuvaro Baraakiva vikan-tiro *seri* naavuqi oriqetero tavovaro Siseraava vataqaa qutu viro vauvaro vuahaaraqi *niri* arutova qaqi vaura.

²³ Vi entara Kotiva Isareri kahaqimanta vika Jabinira Kenaani ayuhainaa vaiinti aatara kora. ²⁴ Isareri vika qaiqaa qaiqaavata Jabinira hampata raquqi vivi, ekaara vira vehi autukora.

6

Kotiva vaiinti vo Gideonira kaiqa amura

¹ Qaiqaa Isareri vika Kotira uva raqake qora kaiqa vare vauvaro vira kaara Noravano Kotiva vika Midiani vatanaaka kauquqi komanta vi vatanaaka 7 ihinavu variqi viha Isareriqaa raqiki vaura.

² Midiani vika kempuka vogavata vaumanta vika Isareri qoraiqama nimitaqi vi vaumanta Isareri nora maara vare vaura. Mintura kaara Isareri vika qetake ainqinaini oru onavuqive, vonaini kia ho vika vaaka rantakenainive, kukeqavi vaura.

³ Isareri kara ututo entara vaakama Midiani vatanaakave, Amareki vatanaakave, kuari avu urunaihai yokukave, vika Isareri hampata raqireka ani ⁴ Isareri vataqaa nái *seri* naavu maaqa kaqate vi aniba, Isareri naaho maata qantuke vareha, vika naaho maata qoraiqama nimite vaura. Vika mintiaqi vivi, muntu Gasa vatuka auvahini vau naaho maataravata qoraiqama nimitora. Vika Isareri sipisipive, purumakauve, donkive, ekaa vare, kia vo haikavata qaqi kovaro Isareri kara nái nevavata kia vaumanta vaura.

⁵ Korika airitahaan variantemake, navutaaka airitahaan ani Isareri vatainai nái *seri* naavu maaqa kaqate vaura. Vika vaiintive, purumakauve, kamerive, airitaha vauvaro vika kaara ntiva kia ho vaura. Vika Isareri vatave, naaho maatave, qoraiqama nimite vaumanta ⁶ Isareri nora maara varaqi vivi, viraqaahai vika Kotira aareha tinavu kahaqiane tura.

⁷ Midiani vatanaaka Isareri vogamake qoraiqama nimite vaumanta Isareri vika Kotira aareha tinavu kahaqiane tuvaro ⁸ Kotiva paropeti vaiinti vo atitovaro vi vaiintiva Isareri vikara tiharo,

Noravano Kotiva ni Isareri Variqavano niara mintima tivo:

Haaru Isipi vatanaaka ni rumpa tomanta ne vika kaiqa vare vaumanta te vi vataraqaaahai ni ntita vare aniaavaunarave.

⁹ Te Isipi vatanaaka kauquqihai, vo vatanaaka ni hampata iqoka raquqi vi vauka kauquqihai, ni ruaruama nimitavaunarave. Vi entara ne navutaaka hampata iqoka raqi vaumanta te vika ni nivuqaa aru ntata kauramanta ne maa vataraqaa ani vaurave. Te maa vataro ni nimiha ¹⁰ mintima ti:

Te Noravano Kotika ni Variqavanoma vauro. Ne maa entara Amo vatanaaka vataqaa variqi viha, kia vika una variqanavu nutu tuahera kaate, tunarave. Te minti turamantavata, ne kia ti uva iriraiti, ne vika una variqanavu nutuqai tuaherake variarave, turave, tiro.

¹¹ Paropeti vaiinti viva minti tuvaro vo enta Nora Kotira *enselivano* vatuka vo Ofaraini otuntero, oqiva okaraini oquiviro vaura. Vi vatukaraqi vaiinti vo vira autu Ioaasiva viva Abiesera vohaa ankuvano vauvaro, vira maaqu Gideoniva *uiti* varakero rintati vaura.

Midiani vatanaaka vira tavevorave tiro, Gideoniva kia qoqaa vi kaiqara vararaitiro, viva *uaini* tava tati vaunaini oru vaharo *uiti* rintati vauvaro ¹² Nora Kotira *enselivano* qovarama viro Gideonirara tiharo, Are iqoka vaiinti taruvama variaro. Noravano Kotiva ai vataakero vaivo, tiro.

¹³ Viva minti tuvaro Gideoniva tiharo, Aqao, Noravano Kotiva tinavu hampata vaitirio, kiama vo haika vo haikavano tinavuqaa qovaraiqiharo nora maara tinavu timitirio. Tinavu qokavara tiha, Haaru Noravano nora kaiqa aahuva kaiqa vareharo Isipihairo tinavu kaivaqaukvara ntita vuru korave, tiamanta irunarave. Ho vate maa entara Noravano nora kaiqa vare vaiva tantoo vaivo? Mpo, viva tinavu qaqlira kero, Midiani vatanaaka kauquqi tinavu tuta kaivo, tiro.

¹⁴ Gideoniva minti tuvaro Noravano Kotiva virara tiharo, Are nena kempukaqohaira oru Midiani vatanaaka kauquqihai Isareri ruaruama nimitaane. Tema ai atitauro, tiro.

¹⁵ Minti tuvaro Gideoniva tiharo, Mpo, Noravauvu, te nantiabee oru Isareri ruaruama nimitararave? Manasera ankuqihai tinavu ankuvano anomakero ugerara ankuma vaivo. Te tenta qata vakauqaihai qaqi qumina vaiintima vauro, tiro.

¹⁶ Gideoniva minti tuvaro Noravano Kotiva virara tiharo, Te ai vataake variainarara tira, are voahaai vaiinti aatara kenantema kera, are ekaa Midiani vatanaaka naatara kenarave, tiro.

¹⁷ Minti tuvaro Gideoniva tiharo, Mpo, are quqaa tiriara quahairera, vo haika humiqairaqe te vi haikara tavehama ariara ququaama Noravano tiriara minti tivo tiare.

¹⁸ Ho kia vaaka viraitira, maini vairaqa te oru kara qerama vare viri ai amitaare, tiro.

Minti tuvaro Noravano Kotiva *enseli* vira noqihairo, tiharo, Te maini ai vekama vairarave, tiro.

¹⁹ Minti tuvaro Gideoniva nai naavuqi oriqetero memeraa naati unta kero, *vorusi* vira maara 10 kilo vaura varakero, viraqohairo kia noqavu mparetira untakero vatero, viraqaahairo viva memeraa mati untatora rutantuto utaraqi vatero, mati vira namarivata taveqi qihakero, ekaa vi karara varero Nora Kotira *enselivano* oqiva okaraini oquiviro vaunaini vuru vira amura.

²⁰ Vira amuvoro Nora Kotira *enseli* viva tiharo, Are mativata mparetivata nora ori maqaqa vatera, mati vira namari taveqihaira kara viraqaata raurutaane, tuvaro Gideoniva viva tunte ura.

²¹ Mintuvaro Nora Kotira *enseli* viva nai kauquqi tuato kaururahairo mativata mparetivata viti autama kovaro vaaka oriqaahairo ihavano aurumaviro mativata, mparetivata tatoqa taiqa aqukora. Mintima kovaro *enseli* vivavata Gideonira avuqaa-hairo *tuqaaka/uqaarama* vura.

²² Mintuvaro Gideoniva kankoma kero iriro tiharo, Te Nora Kotira *enseli* vataakema uva turo, tuvaro vira aatu itovaro tiharo, Ike, Noravauvu, are ekaa haikaqaa raqiki variaravama variaro. Oho, te ai *enseli* aaqanto vaiha vira viri tavauro, tuvaro ²³Noravano Kotiva virara tiharo, Ai muntukavano qihaaqirara variane. Kia qetaane. Are kiama qutu vinarave, tiro.

²⁴ Minti tuvaro Gideoniva vi vatukaraqaa Nora Kotirara iriharo *ofaa* tainta vo autukero vatero, vi taintara autu ntero tiharo, Noravano Kotiva *Muntuka Qihaaqamake Vaiva Vairave* tura. Vate maa entara vi taintava Abiesera anku vika vatuka Ofaraini qaqima vairo.

²⁵ Ho voahaai vi entara entaqi Noravano Kotiva Gideonirara tiharo, Are oru nena qora purumakau qora 7 ihi varakaira varaane. Ai qova una variqa Baalirara iriharo *ofaa* tainta autukero vataira, vira rampaikera, vira tataaqa una nahenti variqa Aseraara maraqaqra vai *pohira* nkaurutaara, vi *pohira* teqa kera, ²⁶ qoqaraara vi vatukaraqaa *ofaa* tainta vo, naitarama kera autukera vatera, viraqaahairo purumakau vira arukera *ofaa* tainta viraqaata kaintu iha quara timitaane. Aseraara *pohi*, vira ruvarikera viraqohaira purumakau vira iha quara timitaane, tiro.

²⁷ Noravano Kotiva minti tuvaro Gideoniva nai kaiqa vaiinti 7navu ntita varero oru Noravano tunte ura. Viva nai naavuqi vaukavata, vi vatukaraqai vokuka vaukavata, vika naatu geteharora tiro, viva kia vi kaiqara aatitoraqaa vararaitiro, entaqi varora.

²⁸ Entaqi vi kaiqara vara komanta vira qararaa vi vatukaraqihainaaka himpi oru tavaro una variqa Baalira *ofaa* taintavano kia vauvaro una variqa Aseraara *pohivanovata* kia vauvaro vi vatukaraqaa qaraaka *ofaa* taintavano vauvaro viraqaata purumakau qora iha quara tovaro ite vaura.

²⁹ Mintumanta vika vira tave, nai ire nai ireha tiha, Tavave maa haikara autu kaivo? tumanta vokuka tiha, Joasira maaqu Gideoniva vi kaiqara autu kaivo, ti. ³⁰ Minti tumanta vika Joaasirara tiha, Nena maaqu vita veva kaiqa teqenavu vira arukaare. Viva Baalira *ofaa* tainta rampai aqukero, Aseraara *pohivata* teqa aqu kaivo, ti.

³¹ Vika arara itomanta minti tuvaro Joasiva aqao tiro, Ne Baalira kahaqirekae antua uva ti variavo? Ne Baalira ruaruuma amitarekae aniaivo? Nai ta vaiintivae Baalira kahaqireva autiharo iqoka raqirera, vi vaiintiva toqaqi kia kuarivano urinaraqaa qutu vuuanarove. Baaliva quqaa variqavano vairera, ne vira qaqi kaivarao viva naivano nai *ofaa* tainta rampai kainara aru vuntu kaarire, tiro.

³² Ioaasiva minti tumanta vi entaraqaaahai vika Gideonirara qaraaka autu nteha tiha, *Ieru-Baalirave* tura. Vi autura maa uvaraqihai tirera: Qaqi kaivaro Baaliva nai aru vuntuarire, tura. Gideoniva Baalira *ofaa* tainta rampaikorara ti, vika minti tura.

³³ Vi entara Midiani vatanaakavata, Amareki vatanaakavata, vo vatanaa mini vaukavata, ekaa vika avitumavi vohaaraqai vaiha iqoka raqireka Iotani Namari taqa vare Isarerivatainai ani, Jeseriri Uqitaini nai *seri* naavu maqa kaqate vaura.

³⁴ Vika mini vauvaro Kotira Maraqravano ani Gideonira vataakero vauvaro Gideoniva *anumaara/noma* vuaqa keharo nai navunaaka Abiesera anku naarama kora. ³⁵ Viva vo vaiintinavu nititomanta vinavuka Manasera ankvano vaunaini vi aninha vaiinti

naaramake, viraqqaahai Asera ankuvata, Sebulunira ankuvata, Napataarira ankuvata, vaunaini vi anihā vaiinti naarama komanta, vika hihai hihai Gideoniva vaunaini anura.

³⁶ Mintuvaro Gideoniva Kotirara tiharo, Are tiriara tiharo, Te ai atitaarirara arema Isareri vatanaaka ruaruama nimitenarave, tiana uvara, te vi uvara avateha tavarerave.

³⁷ Tenavu *uiti* rintatunananaini te oru sipisipi kauki toqakaunara vataqaa vate „ani vaite“, hura toqaqi qaiqaa oru kauki vira tuantike tavarerave. Te tavaariraro varavuvano kauki vira putaiqama kairaro vira tataaqa vaina vatava qaqi aahara vairera, te kankomake virara iri, ariara tiha, Quqama viva ti kahaqiraqe te Isareri ruaruama nimirararave, tiro.

³⁸ Minti tivakero viva *sipisipi* kauki vuru vatero ani vaitero, vira qararaa toqaqi viva himpiro oru tavovaro *sipisipi* kauki viva Kotirara tuntema kero vaura. Gideoniva oru *sipisipi* kauki vira varakero tati kovaro varavu namarivano tanu vo mpiqa kora.

³⁹ Tanu vo mpiqa kovaro Gideoniva qaiqaa Kotirara tiharo, Mpo, kia ti titiane. Are ti qaqi kairaqe te vo uvavata tiare. Are ti qaqi kairaqe te qaiqaa *sipisipi* kaukiqohai are tiana uvara avateha tavaare. Qaiqaa vatevata are qaqi kairaro *sipisipi* kaukivano aahara vairaro varavuvano ekaa vata putaiqama kaarire, tiro.

⁴⁰ Minti tuvaro entaqi Kotiva Gideoniva tunte ura. *Sipisipi* kaukivanoqai aahara vauvaro ekaa vatavano putaiqama vura.

Gideoniva Midiani vatanaaka naatara kora

7

¹ Vo enta vaaka toqaqi Gideoniva, vira vo autu Ieru-Baaliva, vivavata vira aiquidaka vukavata oru Haroti Ruvu Namari tataaqa nái *seri* naavu maaqa kaqate vaura. Vika mini vaumanta Midiani vatanaaka muani More Aiqina auvoqi nái *seri* naavu maaqa kaqate vaura.

² Mini vauvaro Noravano Kotiva Gideonirara tiharo, Ai iqoka vaiinti airitaha variavo. Vika mintimake vaiqe te vika kahaqiaro Midiani vatanaaka naatara kaivera, te vika kahaqiainarara tauruke tiha, tenavu tentanavu kempukaqohai navutaaka naatara kauro, tivakeha nái mahutaqaima tivarave. ³ Vika minti tivorave tira, are vikara mintima tiane: Niqihai vonavu navutaaka naatu qetaivera, ne homa anirante nenta maaqaini viqe tenavu hini kiarirauka maini Gileatti Aiqinaqaa vairerave tiane, tiro.

Noravano Kotiva minti tuvaro Gideoniva viva tunte iro vika tiva nimumanta 22,000 vaiintinavu qaqrake nái maaqaini anirante vumanta 10,000 vaiintinavu kia viraiti, qaqi mini vaura.

⁴ Ho qaiqaa Noravano Kotiva Gideonirara tiharo, Ai iqoka vaiinti qaqqaima airitaha variavo. Are vika ntita varera namarivano tuvinaini otu vairaqe te vika raira amitaare. Te vo vaiintiara vira vitaane tiariraro are vira vitaane. Te vo vaiintiara vira atitairaro vuarire tiariraro are vira atitairaro vuarire, tiro.

⁵ Minti tuvaro Gideoniva nai iqoka vaiinti ekaa ntita varero namari tuvunaini otuntero vauvaro Noravano Kotiva qaiqaa tiharo, Vaiinti vonavu vairi aanante namari mpuike neka rairakerava vo kanta vatera, vokiaka tori kauru aravi vaiha namari neka vika rairakerava vo kanta vataane, tiro. ⁶ Minti tuvaro Gideoniva tavomanta 300 vaiintinavu nái kauquqi namari kaqake mpuike ne vaumanta ekaa hini kuka tori kauru aravi vaiha namari ne vaura.

⁷ Vika mintuvaro Noravano Kotiva Gideonirara tiharo, Ho namari maaqiriqohai mpuike naa vaiintika 300navuma variavo. Te vinavukaqohai ai ruaruama amitheha Midiani vatanaaka ai kauquqi karerave. Are ekaa vo vaiintinavu nenta maaqaini anirante vuote tiane, tiro. ⁸ Minti tuvaro Gideoniva ekaa Isareri vaiinti hini kuka nái maaqaini nittero, 300 vaiintinavuqai qaqi tuatero viva ekaa hini kuka ura karavata aannumaaravata varora. Ho Isareri *seri* naavu maaqa kaqatova vuruni vauvaro Midiani vatanaaka *seri* naavu maaqa kaqatova muani uqitaini vaura.

⁹ Mintima vauvaro vi entara entaqi Noravano Kotiva Gideonirara tiharo, Himpira otu Midiani *seri* naavu maaqa kaqa taanaini iqoka raquane. Te ai kahaqiarirara are homa vika naatara kenarave. ¹⁰ Are vika aatu qetehara kia vika hampata iqoka raqirera autirera, are nena kaiqa vaiinti Puraara vita varera Midiani *seri* naavu maaqa kaqa taanaini ot vahara, ¹¹ vika nai tiva ami nai tiva ami i vai uvara iriane. Are vika ti vai uvara iriraro ai muntukavano paru irara are kia qetaraitira iqoka homa raqinrarave, tiro. Minti tuvaro Gideoniva nai kaiqa vaiinti Puraara vita varero Midiani *seri* naavu maaqa kaqatora aaqaini otu vura.

¹² Midiani vatanaakave, Amareki vatanaakave, vo vatanaaka aahara vataqaa vaukave, vika korika airitaha vohaaraqai ukuvi aniantemake, Isareri vatainī ani vaiha, nái *seri*

naavu maaga uqitakanta vo kanta vo kanta kaqate vaumanta, vika *kamerivata* airitaha *nampisini* airi nuqa vaira voqaara vaura.

¹³ Ho Gideoniva mini otuntero ampeqiharo iruvaro vaiinti vovano nai taira tavorara nai kena vaiinti tiva ami vaura. Vi vaiintiva nai kena vaiintiara tiharo, Mpo, te taira tavauraro *baaliqohairo* untatai mparetiva, kamporivano koviri kaavirimaqiro tuviro tenavu Midiani vatanaaka *seri* naavu maaga kaqataunaraqi tuvu *seri* naavu vo paama tivakero ruqutu ravantava kaivaro vataina vairave, tiro.

¹⁴ Minti tuvaro vira kena vaiintivano tiharo, Oho, mpareti vira okaravano vaireva, viva Isareri vaiinti Joasira maaqu Gideonira iqoka paisepe. Vira okaravano kiama vo haikara vaivo. Kotiva ekaa tinavu Midiani vatanaakavata vo vatanaakavata Gideonira kauquqima kaanarove, tiro.

¹⁵ Vitanta minti tuvaro taira tavoravata vira okaravata Gideoniva iriro, viva tori kauru araviro Kotira autu tuahera kero, viraqahaaro oturantero Isareri *seri* naavu maaga kaqatonaini uruntero tiharo, Ho himpiqenavu vuare. Vate ququaama Noravano Kotiva tinavu hahiqirage tenavu Midiani vika naatarama kararave, tiro. ¹⁶ Minti tivakero viva nai iqoka vaiinti 300 navu taaramo ankuqaa rairakero vatero, *aanumaaravata/nomavata*, vataqohai aututo taveravata, vika vohaiqa vohaiqa nimura.

Ekaa taveqi viva ova iha ite vauravata vatero vika vohaiqa vohaiqa nimiro, ¹⁷ vika tiva nimiro tiharo, Ne ti tave vaiqe te vika *seri* naavu maaga kaqataara aaqaini otu ntaari nevata te iainante iate. ¹⁸ Te tenta iqoka vaiinti hampata aanumaara vuaqaari nevata aaqaini voqi voqi vaha nenta aanumaara vuaqake viraqaahai naverai tiha, Tenavu Nora Kotika Gideonika iqoka vaiintima vauro, tiate, tiro.

¹⁹ Minti tivakero Gideoniva nai anku 100 navu hampata viro vika *seri* naavu maaga kaqatora aaqaini otu ntora. Enta tavaaraiqireva umanta Midiani maimaraara raqiki vauka hininavu vaitareka vumanta, vika vatuka vo vaiintinavu maimaraara raqikireka ani vaumanta, Gideoniva nai iqoka vaiinti hampata otunte nái *aanumaara/noma* vuaqake, nái tave vare vura rukavu komanta ²⁰ vo ankutantavata vika voqaantemake, voqi voqi aaqaini vaha nái *aanumaara/noma* vuaqake, nái tave vare vuravata rukavu kora. Vika nái kauqu kaanaaqaini ova tuate, nái kauqu tanaraini *aanumaara/noma* tuate, naverai tiha, Tenavu Nora Kotika Gideonika iqoka vaiintima iqoka paipe tuateha vauro, ti vaura.

²¹ Minti tivakeha vika ekaa aaqaini himpite vaumanta vika navutaaka getakeha oi aai tivaqi viha aiqo autute kantama vura. ²² Gideonira iqoka vaiinti 300navu nái *aanumaara/noma* vuaqe vauvaro Noravano Kotiva vika navutaaka avu aato hampiqama komanta vika nái paipeqohai nai ari nai ari i vaura. Vika mintiaqi viha kantamaqi vivi, Saretanai tutaka tataaqa Beti-Sitaini vi, vihai Tabaati tataaqa Abeli-Mehola vatukaini oruntora.

²³ Vika getake aiqu autute kantama vuvoro Gideoniva uva vara komanta Isareri vaiinti Napataarira ankuve, Asera ankuve, ekaa Manasera ankuve, vika Midiani vatanaaka ntataqi viha aruqi vi vaura.

²⁴ Qaiqaa Gideoniva uva vara kovaro aiqinaini Efaraimura ankuvano vaunaini vura. Gideoniva vikara mintima tiro: Nevata Midiani vatanaaka hampata raqireka tuvuate. Ne naane avuni Iotani Namariqaavata, vo namari vo namariqaavata maimaraara raqikiqi vivi, Beti-Bara vatukaini otu ntaate. Midiani vatanaaka mini namari taqa vare vivorave, tiro. Minti tumanta vika vi namarinavuraqaa maimaraara raqiki vaura.

²⁵ Vika Midiani vatanaaka avuhainaa vaiinti Orepika Sepika ravaaqqavu kora. Vika Orepira ori vo vaunaini aruke, vi orira autu nteha *Orepira-Orive* tura. Vika Sepira *uaini* tati vauraqi aruke, *uaini* tatura vira autu nteha *Sepira-Uaini-Taturaqive* tura.

Viraqaahai vika Midiani vatanaaka qaqqiqi aru ntataqi vivi, viraqaahai vika Sepira qiatavata Orepira qiatavata vare, Gideoniva Iotani Namari vaunaini muttu amura.

13

Samsonira vatatora

¹ Qaiqaa Isareri vika Nora Kotira uva raqaqi vura kaara Noravano qaqi komanta Pirisia vatanaaka 40 ihiara vikaqaa raqiki vaura. ² Vi entara vaiinti vo, vira autu Manoaava, Sora vatukaqi vaura. Viva Daanira vohaa anku vauvaro vira naatavano qaqi *naahiaru/qururaiqama* viro kia vainti vataraitiro, vaura.

³ Noravano Kotiva attito *enseliva* vira avuqaa qovarama viro tiharo, Are *naahiaru/qururaiqama* vira kia vainti vataraitira variarava, are vainti taiqama vira qorainti vainti vatatenarave.

⁴ Virara irihara raurihara variane. Kia *uainive*, vo iha namarive, naane. Kotiva qioqama tai karara kia naane. ⁵ Ai maaquvano Kotiva kaama taina kaiqara varaarira

vaiintivama variainarara ti, vira vatatenat entaraqaahai kia vira qiata kauhi toqa kaate. Viva Pirisia kauquqihairo Isareru ruaruama nimitaina kaiqara hogarama taanarove, tiro.

⁶ Manti tuvaro nahenti viva vuru nai vaati tiva amiro tiharo, Kotiva atitai vaiintiva te unanaini anitairave. Vira virivano Kotira *enseli* vira voqaraa vaivaroti haatu itairave. Te kia virara taihairae aniaro? turaro viva kia nai autu ntava timivo.

⁷ Viva kia minti tiraitiro, tiriara tiharo, Are vainti taiqama vira qorainti vainti vatatenarave. Raurihara variane. Vira vatatenat entaraqaahairo ai maaguvano nai qaqi vaina entara Kotiva kaama taina kaiqara varaqiro vuainarara tira, are kia *uainive*, vo iha namarive, naane. Kotiva qioqama tai karara kia naane tirave, tiro.

⁸ Manti tuvaro Manoaava Nora Kotira aarero tiharo, Mpo, Noravauvo, qaqi kairaro are atitaana vaiintiva qaiqaa orurantero tetanta iainanaini tuvu titanta uva tiva timirage tetanta naantiara vatataaina vaintira koqemake raqiki variariraro noruqama vuarire, tiro.

⁹ Manti tuvaro Kotiva Manoaava tunte uvaro *enseli* viva orurantero nahentivano naahoqi vauraqi tuvura. Viva tuvuvaro vira vaativano kia vikantiro mini vaura.

¹⁰ Enselivano tuvu ntovaro nahentivano kantero nai vaati tiva amireva oruntero virara tiharo, Ike, viva tuvu vaivo. Ti avuqaa qovaramavi vaiintiva qaiqaa tuvu ntaivo, tiro.

¹¹ Manti tuvaro Manoaava himpiro nai naata avata varero, vi vaiintiva vaunaini oruntero vira irero tiharo, Are ti naatantira uva tiaravae variaro? tuvaro viva tiharo, Te maa vikave, tiro.

¹² Manti tuvaro Manoaava vira irero tiharo, Ho ai uvavano vivau vaina entara tetanta nana kaiqae vira umiqaqi virarave? Viva nana kaiqae varaqiro yuanarove? tiro.

¹³ Manti tuvaro Noravano atito *enseliva* nai tiva amiro tiharo, Ai naatavano te tiva tauna uvara iriqiro vuarire. ¹⁴ Viva *uainive* tava kia naare. Viva *uainive*, vo iha namarive, Kotiva qioqama tai kararave, kia naare. Viva ekaa uva te vira tiva amunara avataqiro vuarire, tiro.

¹⁵ Manti tuvaro Manoaava Noravano atito *enselirara* tiharo, Ho kia vuane. Are qaqi kairage tetanta memeraa naati vo ai una amiare, tiro.

¹⁶ Viva Noravano atito *enselira* vataakero uva ti vaurara kia kankomakero iruvaro *enselivano* virara tiharo, Te maini variarera, te kia ai kara narerave. Are vi karara qerama vatairera, Nora Kotira vi *ofaara* iha quara amitaane, tiro.

¹⁷ Manti tuvaro Manoaava Noravano atito *enselirara* tiharo, Ho nena autu ntairage tetanta are tiana uvava qovaraiqaina entara ai autu tuahera kaare, tuvaro ¹⁸ viva tiharo, Nantivarae ti hutuara iraaro? Ti hutu voqaraa autu vairara tira, are kia ho virara kankomakera irinarave, tiro.

¹⁹ Manti tuvaro Manoaava *ofaa* autireva iharo, memeraa naati vo varakero, *uiti* vonavuvata varero, Nora Kotira nora oriqaq iha quara amitora. Ho Manoaava nai naatantiro tave vauvaro Noravano Kotiva aahuva kaiqa vara nimitora.

²⁰ Vitanta tave vauvaro ihavano voqamakero iteharo auru vakaa vakaa i vauvaro Noravano atito *enseliva* ihaqira naaruvinu vura. Manoaava nai naatantiro vira tave, vitanta vataini hiqintivi naiftanta viri vataini ke vaura. ²¹ Manoaara aato kenko tuvaro irivuvaro vi vaiintiva Noravano atito *enseliva* vaura. Ho *enseli* viva kia qaiqaavata vitanta avuqaa qovarama vura.

²² Manoaava nai naatara tiharo, Oho, tetanta variqa vo tavaunara kaara qutuma virarave, tuvaro ²³ vira naatavano aqao tiro, Noravano Kotiva titanta arukareva itirio, viva tetanta *ofaa* iha quara amitaunara kia varero nai nora kaiqavata kiama titanta humiqaitirio. Viva kiama tiriara are qorainti vainti vatenarave titirio, tura.

²⁴ Ho nahenti viva variro qorainti vainti vatatero vira autu nteharo Samsonirave tura. Vi vaintiva norugama vuvuro Noravano Kotiva vira koqema amite vaura.

²⁵ Samsoniva Mahane-Daani vatukaqii vau entara Nora Kotira Maraquravano hogaramatero vira kempukaiqama amite vaura. Sora vatuka hini vauvaro Estaolira vatuka hini vauvaro Mahane-Daani tavaarana vaura.

14

Samsoniva Pirisia nahenti varatora

¹ Vo enta Samsoniva Timna vatukaini otuntero tavovaro Pirisia varaata vovano mini vaura.

² Ho Samsoniva oturantero nai noka qokara tiharo, Te Timnaini vaiha tavauraro Pirisia nahenti vovano vaivo. Netanta vira vite urige te vira varare, tiro.

³ Manti tumanta vira noka qoka aqao ti, Kiae are tinavu ankuqihairave, tinavu Isareriqihairave, nahenti vo varerava vaivo? Nantivarae are Pirisia vo vatanaakaqihaira nahenti varareva auti variaro? Vika qorainti vaata kia toqake variakave, ti.

Minti tuvarovata, Samsoniva nai qorara tiharo, Vi nahentirara ti hantuqa harivo. Are vira otu vite urirae te vira varaare, tura.

⁴ (Vira noka qoka kia iruvaro Noravano Kotiva Pirisia hampata iqoka qovaraiqiarire tiro, vi avu aatora Samsonira amura. Vi entara Pirisia vika Isareriqaa raqiki vaura.)

⁵ Ho Samsoniva nai noka qoka hampata Timnaini vura. Vinavuka Timna tataaqa uaini naaho vaunaini otuntovaro vaakama qaraaka *raioni* vovano Samsonira arukareva noraiqaakero uva tivaqiro anura.

⁶ Mintuvaro Nora Kotira Maraquravano Samsonira kempukaiqama kovaro viva qaqi nai kauquqohairo memeraa naati tavaara nkahi kaintemakero, *raioni* vira nkahi kora. Viva *raioni* arukero kia nai noka qoka tiva nimura.

⁷ Mintima kero Samsoniva otu vi nahentira hampata uva ti vauvaro vira antuqavano virara vaura.

⁸ Ho vo entanavu aitarovaro Samsoniva vi nahentira varareva vura. Viva mini viharo *raioni* arukora tavareva aara kero oru tavovaro airi *bivata hanivata raioni* vaataaqi vauvaro ⁹ viva nai kauquqohairo *hani* vaqtakero varer aaraini viharo *hani* vira namaqiro viro oru nai noka qoka qaiqaa ntitakero *hani* vitantavata nimura. Viva *hani* *raioni* vaataqihairo varatora kia vitanta tiva nimura.

¹⁰ Ho vira qova nahenti vira tavareva vuvaro Samsoniva qaraaka vaiinti nahenti varare u okarara avataqiro viharo nora kara vi vatanaaka mini unta nimura.

¹¹ Pirisia vika Samsonira tave, vika qaraaka vaiinti 30navu vira airuqiate ti, viva unaini varakora.

¹² Samsoniva vikara tiharo, Kaise te uva vo tuqantaake ni tiva nimiare. Tenavu 7 entara maa karara namaqi vi variari ne vi uvvara okara ho tiva timivera, te tavuna 30navuvata, utavaaqa 30navuvata ni nimirerave. ¹³ Ne kia ho vi uvvara okara ti tiva timivera, ne tavuna 30navuvata, utavaaqa 30navuvata ti timiate, tumanta vika tiha, Ho vi uvvara tuqantaakera tinavu tiva timiane. Are tiraqe iriare, ti.

¹⁴ Minti tuvaro viva tiharo,

Kara ne vai haikaraqihairo kara naa haikava qovaraiqivo.

Kempuka haikaiqihairo hiakaa i haikava qovaraiqivo, tiro.

Minti tumanta vika taaramo enta aato utuqi viha kia vi uvvara okara rantakora.

¹⁵ Ho 4 entaqaas vika Samsonira naatara tiha, Nena vaatiara uquerara uva tiraro viva vi uvvara okara ai tiva amiariре. Are kia mintirera, tenavu ai qora naavu iha umpiarama kaariraro ihavano aivata tatoqa kaarire. Netanta tinavu airaira muara vararekae tinavu haaraavo? ti.

¹⁶ Minti tuvaro Samsonira naatavano oru vira avuqaa iqj rateharo tiharo, Mpo, ai kia tiriara hantuqa harivo. Ai muntukavano kia tiriara vaivo. Are ti navunaaka uva tuqantaakera tiva nimira, kia tivata vi uvvara okara tiva timira iaro, tuvaro viva aqao tiro, Kia te vi uvvara okara tenta noka qokavata tiva nimunarave. Nana kaarae te ai tiva amiainararev? tura.

¹⁷ Ho 7 entara nora kara ne vauvaro vi nahentiva ekaa vi entara iqj rataqiro vuvaro ekaa 7 entaqaas Samsonira popohvaro nahenti viva virara qaiqaa qaiqaa nuntu nauntu tivaqiro vura kaara viva uva tuqantaakera tura okara vira tiva amura. Tiva amuvaro nahenti viva nai navunaaka Pirisia tiva nimura.

¹⁸ Mintuvaro 7 entaqaas kia kuarivano ruhunku vumanta vi vatukaraqi vau vaiintika oru Samsonirara tiha,

Nana hiakaa i haikava *hani* uri aatarakaivo?

Nana haikavano *raioni* kempuka uri aatarakaivo? tura.

Vika minti tuvaro Samsoniva tiharo, Ne kia ti purumakauqohai vata koraatirio, ne kiama ho vi uvvara okara ti tiva timiatirio, tiro.

¹⁹ Minti tuvaro Nora Kotira Maraquravano vira kempukaiqama kovaro viva Askeloni vatkaini oruntero, „Pirisia“ vaiinti 30navu arukero vika vaataqahairo utavaaqa qaqini varakero vi utavaaqa uva okara tiva amuka vuru nimura. Samsonira voqamakero arara ite vauvaro viva nai qora maaqaini oturantero urura.

²⁰ Samsoniva kia vi nahentira vararaitiro qaqrakero vumanta, vika vi nahentira „Pirisia“ vaiinti vo amura. Vi vaiintiva Samsoniva nahenti varo entara vira tataaqa himpite vau vaiintiva vaura.

15

¹ Ho naantiara vo enta *uiti* teqe vau entara Samsoniva qaraaka memeraa vo varero nai naata tavareva „Timnaini“ vura.

Viva mini otuntero nahenti vau *rumuraqi* virare tuvaro nahenti vira qova qioqama kero ² tiharo, Te ariara vira antuqavano kia virara vaivo tivake, vira vo vaiintima amuro.

Ho vira aura vo voqavata koqe viri vaata vataavama vaivo. Are homa vira varenarave, tiro.

³ Manti tuvaro Samsoniva tiharo, Oho, te ni Pirisia qoraiqama nimitarirava ho vaimantara ti, te ni qoraiqama nimitarerave, tiro.

⁴ Manti tivakero viva vevantero oru 300 qaakau vairi ravaaqavukero, vika taaraqanta taaraqanta veka nkuruqama tero, nkuruqama tairaqui ovaumpikero⁵ hampakuma tero, vairi víka ruhaaqi komanta, vika Pirisia *uiti* naaho ututoraqi vi ani vaura. Mintimakero Samsoniva vika *uiti* iha quara tatoqakora. Ihavano qaqi vau *uitirave*, teqake vato *uitirave*, vika *uaini* naahove, *orivi* ututorave, ekaa tatoqa kora.

⁶ Pirisia vira tave tiha, Oho, tavave mintima kaivo? tumanta vokuka tiha, Timni-hainaara airaamaqu Samsonivave. Vira airaaviva vira naata vo vaiinti amirave. Vi vaiintiva Samsoniva nahenti varai entara vira tataqa himpite vai vaiintivave, tumanta Pirisia vika oru Samsonira airaavira naavu iha umpiarate, vira raavuravata nai qokanti iha tatoqa kora.

⁷ Mintiuvoro Samsoniva vikara tiharo, Oho, ne mintiara kaara te kia qaqi vairaiti, ni qoraiqama nimitaqi vivi, ni ekaa qoraiqama nimitarerave, tiro.

⁸ Manti tivakero viva vaana viriviri uvaro vika ntaihemaqiro viviro airi arikora. Vika arukero viraqaahairo viva Etaamu ori onavuqi otu vaura.

Samsoniva raqiharo Pirisia naatara kora

⁹ Ho Pirisia vika oru Iutaa vataini nái seri naavu maaqa kaqate, vi vataraqaa vi anixa oru Lehi vatuka aumanto vumanta¹⁰ Iutaa vaiinti vikara aqao ti, Ne nantihae timavu harireka auti variavo? tumanta vika tiha, Tenavu Samsonira rumparera anuro. Viva tinavu qoraiqama timitaintemake, tenavu naivata qoraiqama amitarerave, tura.

¹¹ Manti tumanta Iutaa vaiinti 3,000 Samsoniva Etaamu ori onavuqi vaunaini otunte virara tiha, Oho, are kiae irianarave? Pirisia vika tinavuqaa raqiki variakama variavo. Ai okara kaara vika tinavuqaa maara voqavata vatevarave, tuvaro Samsoniva tiharo, Vika ti qoraiqama timitaamanta virara iriha te náivata qoraiqama nimitauro, tiro.

¹² Manti tumanta vika tiha, Tenavu ai rumpa vare Pirisia kauquqi vuru karera tuvuraukave, tuvaro Samsoniva tiharo, Ho ne kauqu aqiqaa aqukeha kia tenavu ai arukarerave tiate, tumanta¹³ vika tiha, Kia tenavu ai arukarerave. Tenavu ai qaqi rumpa vare Pirisia kauquqi vuru karerave, ti.

Vika minti tivake qaraaka naaquntaqohai vira rumpate ori onavuqihai vita vare vura.

¹⁴ Vika vivi, Lehi vatukaini oruntomanta Pirisia vika naveraitiha kantamaqi Samsoniva ani vaunaini anuvaro Nora Kotira Maraqravano vira kempukaiqama kovaro naaqunta tatoqavira vaaka hatoka kaintema kero, Samsoniva nai kauquqaa rumpataa naaquntara hatoka aqukora.

¹⁵ Vira kauquqihairo naaqunta hiqintuvaro Samsoniva tavovaro donki maatiri vuhaari, qaraaka mini vauvaro viva vira utu varero viraqohairo vaiinti aruqiro viharo 1,000 vaiinti arukora.

¹⁶ Samsoniva ihi tiharo,

Te donki maatiriqohai 1,000 vaiinti arukauro.

Te vika aruke vika vaata voqaa voqaa ruvaaqumake vatauro, tiro.

¹⁷ Manti tivakero donki maatiri vira vataini aqukero vi vataro autu ntero tiharo, *Ramaati Lehi - Maatiri Aiqinave*, tura.

¹⁸ Ho Samsonira voqamakero namari naataa uvaro Nora Kotira aarero tiharo, Mpo, are ti nena kaiqa vaiinti kempukaiqama kaaramanta te iqoka aatara kauro. Hauri ti namari naataas iraqe qutu vuari kia nái vaata toqakaaka ti vaata varevorave, tiro.

¹⁹ Manti tuvaro Kotiva Lehini vata tomavira nkahikovaro viraqohairo namarivano nte vaura. Samsoniva vi namarira novaro vira aunta paru uvaro vira kempuka qaiqaa ho vaura.

²⁰ Vika ruvu namari vira autu nteha *En Hakore - Aarovaro Qovaraiqu Namarirave* tura.

16

Samsoniva Gasa vatukaini otu vaura

¹ Vo enta Samsoniva „Pirisia“ vatuka vo Gasaini otuntero tavovaro hampi nariro ni vau nahentiva mini vauvaro viva vikantiro entaqi vaitareva vira naavuqi vura.

² Mintumanta Gasaqiqi vauka iruvaro Samsoniva viraqiqi vaumanta vika vaantaavura genti vaunaini vaara autute vira veka vaura. Vika tiha, Aatitairaro viva aniraqe tenavu vira arukaare, tivake evaara mini vaura.

³ Vauvaro Samsoniva kia naavuqi vukaiqaakero vairaitiro, viva enta tavaara himpiero oru vaantaavura qenti utu varero vira nkaqukora. Viva qentive hini hini vau posirave,

taurini kuvalito katarirave, nkaqukero nai kururuqaa aqu varero vuru inaara aiqina voqaa vatora. Vi aiqinara virivan Hebaroni mantaraini vaura.

Samsonika Delailaaka

⁴ Vira naantiara Samsoniva vo nahenti vira autu Delailaarara voqama kero antuqa aruvaro vaura. Vi nahentiva Soreki Uqitaini vaura.

⁵ Ho Pirisia avuhainaaka „Snavu vauka, viva unaini orunte tiha, Nana haikavanoe Samsonira kahaqi vaivaro vira kempukavano uritara kero vaivo? Nantiabee tenavu vira kempuka taiqa kararave? Are Samsonirara ugerara uva tiraro viva vi uvvara okara qoqaa tia tiva amirar irira tiva timiraqe tenavu vira aatarake rumpakaare. Are mintiraqe tenavu vohaiqa vohaiqavano 1,100 *silvaa* monu ai amiare, ti.

⁶ Minti tuvaro Delailaava Samsonirara tiharo, Nana haikavanoe ai kahaqi vaivaro ai kempukavano uritara kero vaivo? Nantiakeroe vovano ai rumpatairaro ai kempukavano kia variarie?

⁷ Minti tuvaro Samsoniva nai tiva amiro tiharo, Vika qaraaka hinta kia aaharaiqira viraqohairo Samsonira rumpatora.*

⁸ Ho Pirisia avuhainaaka hinta 7navu kia aaharaiqura Delailaara amuvaro viva viraqohairo Samsonira rumpatora.

⁹ Vo vaiintinavu *rumu* voqi kukeqavi vauvaro Delailaava naveraitiharo, Samsonio, veve, Pirisia ani variavo, tuvarovata, Samsoniva naaqunta tatoqavira hatoka kaintema kero, Samsoniva nai vaataqaa rumpataa hintara hatoka kora.

Mintima komanta, vika Samsonira kempuka okarara kia kankomake irura.

¹⁰ Delailaava Samsonirara tiharo, Mpo, are virera uva tihamara tiriara una uva tiaro. Mpo, nantiakeroe vovano ai ho rumpataanarove? Virara ti tiva timiraqe iriare, tiro.

¹¹ Minti tuvaro viva tiharo, Vika qaraaka naaqunta nora kia vo kaiqa varera viraqohai ti rumpataivera, ti kempuka kia vairaque te qaqi vaiinti voqara vairarave, tiro.

¹² Minti tuvaro Delailaava qaraaka naaqunta vonavu varakero vira rumpatora.

Vaiinti vonavu vo *rumu* voqi kukeqavi vauvaro viva naveraitiharo, Samsonio, veve, Pirisia ani variavo, tuvaro viva tavuna naaqunta hatoka kaintema kero nora naaqunta hatoka kora.

¹³ Delailaava Samsonirara tiharo, Are virera uva qaqqai tihara tiriara una uva ti variaro. Mpo, nantiakeroe vovano ai rumpataanarove? Virara ti tiva timiraqe iriare, tuvaro viva tiharo, Are ti qia kauhi vunta taunara 7navu varakera *paraanke* autua *maasiniraqi* vo naaqunta hampata taatautera, kairiqaqohaira ti kauhivata naaquntavata raqikikera rumpatairaro, ti kempuka kia vairaque te qaqi vaiinti voqarama vairarave, tiro.

¹⁴ Minti tivakero vauvaro Delailaava tavovaro viva vaite vauvaro viva vira qia kauhi vuntatoria varakero *paraanke* naaqunta hampata vira taataukero, kairiqaqohairo vira kauhivata naaquntavata raqikitero, viraqahairo naveraitiharo, Samsonio, veve, Pirisia ani variavo, tuvaro viva vaitonaihairo himpiro nai qia kauhi *maasiniquahairo* qaqini raraukora.

¹⁵ Viva mintima kovaro Delailaava virara aqao tiro, Are kukeqa taana uvvara kia tivata tiva timiaravara tira, are qumina tiriara tihara, Ti muntukavano ariara vaivo, tiaro. Are taaramo tataa kia nena kempuka okarara ti tiva timiraitira, qaqqai virera uva tihara tiriara una uva ti variaro, tiro.

¹⁶ Minti tivakero viva vo enta vi uvvaraqai tivaqiro vi vauvaro vira vogamakero popohovaro ¹⁷ viva ekaara vitini vira vutukero tiva amura. Viva tiharo, Ti vatatai entaraqaahai Kotira kaama amitaarara ti, vika kia ti qia kauhi toqakaarave. Vika ti qia kauhi muqukaivera, ti kempukavano taiqa viraque te qaqi vaiinti voqarama vairarave, tiro.

¹⁸ Minti tuvaro Delailaava tavovaro viva quqaa uva tuvaro viva uva varakovaro Pirisia avuhainauka vaunaini vura. Viva tiharo, Nenavu qaiqaavata maini aniate. Viva ekaa vi uvvara qoqaa ti tiva timivo, tumanta Pirisia avuhainauka *silvaa* monuvata vare anura.

¹⁹ Delailaava Samsonirara ani ti auvoqti vaitaane tuvaro viva mini vaita aavata vuvuro viva vaiinti vo aarovaro viva ani Samsonira qia kauhi 7navu vuntatoria toqakora. Nahenti viva mintima kero vira qoraiqama kovaro vira kempukavano taiqa vura.

²⁰ Mintuvaro nahenti viva naveraitiharo, Samsonio, veve, Pirisia ani variavo, tuvaro viva vaitonaihairo himpiro nai iriro tiharo, Kaiqe te tota unantemake tenta vaata

* **16:7:** Vi entara vi vatanaaka kia hinta tanaraqohai huru vuiraiti, vika purumakau mati aururuqohai hinta autuke vui vaura

qakiqakimake qaqi variare, tivakero viva kia iruvaro Noravano Kotiva vira qaqrakero kia vira hampata vaura.

²¹ Ho Pirisia vika vira ravaaqavuke vira avutanta vauruke vira vita vare Gasa vatukaini otunte mini *baraasi seniqohai* vira rumpatovaro viva karapuhiqi vaiharo *uitive baalive* rukavu nimite vaura.

²² Viva karapuhiqi vauvaro vira qiata kauhivano qaiqaa qampipe vaura.

Samsoniva qutu vura

²³ Pirisia avuhainauka nái una variqa Dagonira nora *ofaa* iha quara amitareka ruvaaquamavi vaiha tiha, Tinavu variqavano tinavu navutaara Samsonira tinavu kauquqi kaivo, ti.

Vinavuka minti tumanta ²⁴ vaiinti nahenti vikavata Samsonira tave tiha, Tinavu variqavano tinavu navutaara vira tinavu kauquqi kaivo. Vi vaiintiva tinavu naaho maata qoraiqamakero tinavu navunaakavata airitahaa arukaivama vaivo, ti.

²⁵ Vika minti tivake airi *uaini* namaqi viha naveraitiha, Samsonira aaraivarо viva uruntero tinavu quahama timitaarire, tumanta vokuka vira karapuhiqihai vita kovaro viva vika nivuqaa uru vaiharo ruhamaqiro vi vaura.

Ho vika Samsonira naavu naaqura taaraqanta vaunaini himpima tovaro ²⁶ Samsoniva vainti nankuavano vira kauqu toteharo vi ani vaurara tiharo, Are ti vita varera maa naavuraqi ori naaquratanta vainaini vuru kairae te vitanta auteha tavaare. Te vitantaqaa muntuvi vairerave, tura.

²⁷ Ho vaiinti nahenti airitahaa vi naavuraqi vaura. Pirisia avuhainauka 5navuvata viraqi vaumanta naavu qiatqaa 3,000 vaiinti nahenti vaiha Samsoniva vika quahama nimitora tave vaura.

²⁸ Mintuvaro Samsoniva Nora Kotira aarerо tiharo, Mpo Noravauvu, are ekaa haikaqaa raqiki variaravama variaro. Ho vate ti iri timitaane. Qaqi voqavata ti kempukaiqama timitarage te Pirisia ti tivutanta vaurukaaraqaa vuntu kaare, tiro.

²⁹ Minti tivakero Samsoniva nai kauqutanta ratuta kero naavu aque vau naaquratanta utu varareva kauqu tanaraqohairo naaqura vo utu varero kaanaaqaqohairo vo utu varero ³⁰ naveraitiro, Qaqi kairae te Pirisia hampata qutu vuare, tivakero viva ekaa nai kempukaqohairo naaquratanta venta aqukovaro naavuvano ekaa raputama vura.

Naavuvano raputama viharo Pirisia avuhainaukave, vaiinti nahenti naavuqi vaukave, vikaqaa hiqintura. Vi entara Samsoniva qutiharo airi vaiinti nahenti arukova viva qaqi vau entara arukokavata naatara kora.

³¹ Ho viraqaahairo vira qata vakaukavarave, vira qora naavuqi vaukave tuvunte, vira vaata vare tuvirante nai qora Manoaara quntama tonaini quntama tora. Sora vatuka hini vauvaro Estaoli vatuka hini vaumanta vika vira vaata tavaarana quntama tora.

RUTI (Ruth – Rut)

Naomira vaati vaintivara Moapini qutu vura

¹ Haaru, kia King Soruvave King Devitivave qovaraiqu entara, qiaata vaiinti vo vaiinti vo vaiintivano Isareriqaa hampiara voqaara raqiki vau entara, karara aavoqu entava qovaraiqua.

Vi entara Betarihemi vatuka Iutaa vataini vau vaiintiva nai nahentivata nai maaqutanta vatamakero Moapi vataini oru vahuqa vaireva vura. ² Vi vaiintira autu Elimerekira, vira naata autu Naomira, vira maaqutanta autu Maalonika Kilionika. Vinavuka Efaraatara ankuqihainaaka Betarihemi vatuka Iutaa vataini vaura ke, Moapi vataini vaireka, vuvaro ³ Elimerekiva mini variro vuru qutu vuvaro Naomiva tentoqa vaiharo nai maaqutanta hampata mini vaura.

⁴ Ho Naomiva Moapi mini vaumanta vira maaqutanta Moapihainaa nahentitanta Oripaaka Rutika varate vaura. Vitanta varate vauvaro 10 ihi aitaromanta ⁵ Maalonika Kilionika vitantavata qutu vura. Vira vaativanovata vira maaqutantavata qutu vuvaro Naomiva nariaraa mini vaura.

Rutiva kia Naomira tutakora

⁶ Ho Noravano Kotiva Iutaini nai vaiinti nahenti koqema nimitovaro vi vataraqaa kara koqema kero qampiqero mpeqaiquvaro Naomiva Moapini vaiharo vi uvare iriro, viva nai naaqututanta hampata Moapi vata mini kero nai maaqaini anirantero vuainarara geramatero vaura.

⁷ Naomiva nai naaqututanta hampata himpiro anirantero nai maaqa Iutaini vireva aaraini viharo ⁸ nai naaqututantara tiharo, Netanta aniranre nenta maaqaini nenta noka qoka hampata variate. Mpo, netanta tivata, qutu vuanavukavata, koqema timitaantema kero, Noravano Kotiva nintatanta koqema nimitaarire. ⁹ Ho Noravano Kotiva nitanta kahaqira netanta qaiqaa vaati varatetanta, qaiqaa koqemaketantama vaivarave, tiro.

Naomiva minti tivakero viva nai naaqutu vitanta moqakero kukuqama nimitero vuare tumanta vira naaqututanta voqamake iq'i ratora. ¹⁰ Vitanta iq'i rateha virara tiha, Mpo, kiave. Tetanta ainti ai navunaaka varianaini virerave, ti.

¹¹ Minti tuvaro Naomiva vitantara aqao tiro, Mpo ti raavuratantavaavo, netanta aniranre tanta vuate. Nana haikara irihae netanta ti hampata vireka auti variavo? Netanta tiriria viva qorainti votanta vatataira vitanta noruqamavi titanta varaate, tivakehae ti hampata vireka auti variavo?

¹² Te kontaiqamama vuro. Kiam ho te qaiqaa qorainti varaainarave. Ho netanta aniranre nentatanta maaqaini vuate. Te vate qorainti vare vo enta vaintitanta vatataarera, ¹³ netanta hoe vitanta veka vaimanta noruqama vivarave? Netanta kia vo qorainti vararaiti, vitanta veka hoe qaqi vaivarave? Kiave. Netanta kia ho mintivarare. Mpo, Noravano Kotiva ti qoraiqama timitaimanta nitanta vaati kia variamantara ti, te nitantara voqamake mpo turo.

¹⁴ Minti tumanta Rutika Oripaaka qaiqaa iq'i ratora. Viraqaahairo Oripaava nai tonanora Naomira moqakero ho vuro tivakero nai anirantero vuvaro Rutivaqai Naomikan-tiro vaireva, kia vira tuatora tutu karaitiro, qaqi tuatero vaura.

¹⁵ Vira qaqi tuatero vauvaro Naomiva Rutirara tiharo, Ho tavaane. Ai hanava nai navunaaka ianainivata, nai kaivaqaukavara variqanavu varianainivata vivo. Are vikantira aniranre vuane, tiro.

¹⁶ Minti tuvaro Rutiva tiharo, Are kia ti vihi tihara, Ti kera anirantera vuane, tiane. Ekaa are virera inanaini tevata mini virerave. Ekaa are vairera vainanaini tevatama vairerave. Ai navunaaka ti navunaakavatama vaivarave. Ai Variqavano, viva ti Variqavanovatama varianarove. ¹⁷ Are qutiramanta quntama teraqi tivata quntama tevarave. Mpo, ti okara kaara vo haikavano titanta raira kairera, Noravano Kotiva homa voqamakero ti qoraiqama timitaanarove. Qutira haikavanoqaima titanta ho raira kaanarove, tiro.

¹⁸ Minti tuvaro Naomiva tavovaro Rutiva vikantiro vuarirava kempukaiquvaro viva kia qaiqaavata virara vo uva tuvaro ¹⁹ Rutiva vikantiro Betariheminu oruntora.

Vitanta Betariheminu oruntora

Naomika Rutika Betariheminu oruntomanta ekaa vihainaaka vitanta tave ravuku vumanta nahentinavu Naomira tave tiha, Ike, viva Naomivave? tuvaro ²⁰ Naomiva tiharo, Mpo, ne kia tiriria Naomirave - Quahairave tiate. Noravano Kotiva ekaa kempuk

vataava ti qoraiqama timiteharo hunkavi haikara ti timitaira kaara ne ti hutu nteha *Hunkairave* tiate.

²¹ Te maa vatukara ke vuavauna entara te airi haika, vo haika vo haika vaative, vaintive, vataake vuavaunarave. Vate Noravano Kotiva ti tivita varero maini animantama te kia vo haikavata vatauro. Mintirara ti, ne nantihae tiriara *Naomirave - Quahairave* tiavo? Mpo, Noravano Kotiva ekaa kempuka vataava tiqaa uva vataimanta te qoraiqamavi vauraukama vauro, tiro.

²² Ho mintima kero vira muntuka qoraiquvaro Naomiva Moapi vata mini kero orurantero nai naaqutu Moapihainaa nahenti Rutikantiro anura.

Vitanta Betarihemini *baali** mpeqaiqura hoqaramate teqare u entaraqaa oruntora.

2

Rutiva Boaasira naahoqi kaiqa varora

¹ Ho Naomira vaati Elimerekira vohaa anku vaiinti vo vira autu Boaasiva vaura. Boaasiva nora autu vataa vaiintivano vaura.

² Mintima vauvaro vo enta Moapihainaa nahenti Rutiva Naomirara tiharo, Are ti qaqi kairaque te *baali* naahoqi kaiqa varaare. Kaiqa vaiinti vokika tiriara hove tivera, te vika naantiaraini viha, *baali* teqake vareha hini vatainu kera, nuntuke varaare, tiro.

Rutiva minti tuvaro Naomiva virara tiharo, Naaqutuo, ho mintiane, tuvaro ³ Rutiva *baali* naaho voqi oruntero kaiqa vaiinti nahenti vika naantiaraini viharo *baali* hiqintura nuntu keharo vare vaura. Viva vi kaiqara vare vaharo tavovaro vi naahova vira tonaqora vohaa anku Boaasiva u naahova vaura.

Boaasiva Rutira koqema amitora

⁴ Ho Rutiva vi naahoraqi kaiqa vare vauvaro Boaasiva naivano Betarihemini kero nai kaiqa vaiinti nahenti vaunaini anintero vika uva manteharo tiharo, Noravano Kotiva ni hampatta variarire, tumanta vika nái viraravata tiha, Noravano Kotiva ninavata koqema amitaarire, ti.

⁵ Mintimake uva mantovaro Boaasiva kaiqa vaiinti nahentiqaa raqiku vaiintira irero tiharo, Qaraaka nahenti vitira taihainaarave? ⁶ tuvaro viva Boaasira tiva amiro tiharo, Viva Moapi vatanaa nahentivano Naomikantiro Moapihairo anivave.

⁷ Viva kaiqa vaiinti nahentinavu naantiaraini *baali* hiqintira nuntu ruvaaqquare tivakero ti iraimanta te hove turaroma viva vi kaiqara vare vaivo. Viva toqaqihairo kaiqa varaqiro viviro, vohaa tataaqai haraara naavuqi auraara inaaraiqakaa varikeroma, qaiqaa kaiqa varaqiro ani vaivo, tiro.

⁸⁻⁹ Minti tuvaro Boaasiva Rutirara tiharo, Mpo, ti raavurvauvo, iriane. Are vo naahoqi kia *baali* nuntu ruvaqiraaitira, maaqihiraqaima nuntu ruvaauquane. Are ti kaiqa vaiintinavu *baali* teqeka tavehara oru ti kaiqa nahentinavu *baali* nuntu vainaini vika naantiaraini oru viharama kaiqa varaane. Te fenta kaiqa vaiintinavu tiva nimuramanta vika kiama ai qoraiqama amitevarave. Ai namari naataa irera, are homa oru vika kureqi namari kaqake vatera nenanrave, tiro.

¹⁰ Boaasiva minti tuvaro Rutiva tori kauru araviro nai viri vatainu kero Boaasirara tiharo, Mpo, te vo vatanaa nahenti vaurara are tiriara noraiqaakera iriaro. Nantivarae are mintima kera ti koqema timitaaro? tiro.

¹¹ Tuvaro Boaasiva vira tiva amiro tiharo, Ai vaativano qutu vuvara are nena tonanora koqema amitaana uvara tiamanta te ekaama vi uvara iruro. Te irurara are nena tonanora kia qaqira kairaitira, are nena noka qoka kera, nena maaqa kera, are kia tavaana vatanaka maaka hampata maini vaireva, anianarave.

¹² Are minti ianarara iriharo Noravano Kotiva ai koqema amitairaque te hove tiatarare. Are Isarerri Variqavano Noravano Kotiva inaini anira virara ti antua timitaane tianarara tiro, viva koqe koqaa voqavata ai amiraque te hove tiatarare, tiro.

¹³ Boaasiva minti tuvaro Rutiva tiharo, Mpo, are ti koqemama timitaaro. Te ai kaiqa nahenti vika vevaaraini vauraravata, are tiriara qihaaqama kera tiana uvava ti kempukaiqama timitaivo, tiro.

¹⁴ Tumanta ekaa vira kaiqa vaiinti nahenti ruvaaqumavi vaiha kara ne vauvaro Boaasiva Rutira tiva amiro tiharo, Are maini ani mpareti vo vara kera, *uainiqi* quntama kera naane, tiro.

Minti tuvaro Rutiva kaiqa vaiinti hampata oquiviro vauvaro Boaasiya *baali* ihaqaa haimitora vira amuvaro Rutiva vira varakero nora. Boaasiva airi *baali* vira amuvaro viva ho nero hini qaqi vatora.

* 1:22: *Baali* vaireva, *raisi* voqara vaira.

¹⁵⁻¹⁶ Ho Rutiva kara nama taiqa kero viva himpiro qaiqaa vi kaiqara varareva vuvaro Boaasiva nai kaiqa vaiinti tiva nimiyo tiharo, Ne kia Rutira qio tiraiti, vira qaqi kaivaroma viva ne *baali* rumpake vatera tataaqa vainara nuntu keharo varaarire. Ne *baali* rumpake vateraqihai vokinara rarauke vataini kaivarо viva viravata nuntu keharo varaarire, tiro.

¹⁷ Boaasiva nai kaiqa vaiintinavuara minti tuvaro Rutiva naahoqi *baali* nuntu ruvaaqi vauvaro kuari avu aqu vura. Mintuvaro viva *baali* ruvaaqumatora ruqutu kero auru vira varakero ntuvakero tavovaro vira maavarano 10 kilo aumanto vaura.

Rutiva nai kaiqa varo vakaakara Naomira vuru tiva amura

¹⁸ Rutiva *baali* auru varerato vatukaini vuru nai tonanora umiqero, kuariqaa neharo hini qaqi ko kararavata vareroto vuru nai tonanora amuvaro ¹⁹ Naomiva nai naaqutu Rutira irero tiharo, Are taihairae *baali* maa varaaro? Are ta vaiintira naahoqi kaiqa varaaravave? Vi vaiintiva ai tavero ai kahaqirara iriharo Noravano Kotiva vira kojema amitaarire, tiro.

Minti tuvaro Rutiva tiharo, Te vate vo vaiinti Boaasirave tia vaiintira naahoqi kaiqa varauraukave, tiro.

²⁰ Minti tuvaro Naomiva tiharo, Noravano Kotiva vi vaiintira kojema amitaarire. Noravano nai kauqu aqiqaa aqukeharo qutu vua vaiintikarave qaqi variakarave tivatai uvvara kia tauruke vairave, tiro.

Minti tivakero viva qaiqaa tiharo, Vi vaiintiva tinavu vohaa naareve. Tinavu Isareru okaravano vaireva, mintimakeha varia vaiintika tenavu tentoqa vauraukara iriha, tinavuqaa raqikikama variavo, tiro.

²¹ Naomiva minti tuvaro ho Rutiva vira tiva amiro tiharo, Boaasiva ti vo uvavata tiva timirave. Viva tiriara nai kaiqa nahenti hampata qaqi kaiqa varaqira vihara *baali* nuntu ruvaaqumagira viraro *baali* entavano taiqaarire tivo, tiro.

²² Minti tuvaro Naomiva Rutirara tiharo, Ho ti naaqutuvauvo, vira quqaama tivo. Are oru vo vaiinti naahoqi kaiqa vare vaira vira kaiqa vaiinti aqoraiqama amitevorave. Ho are Boaasira kaiqa nahenti hampataqai kaiqa varaaane, tiro.

²³ Minti tuvaro Rutiva Boaasira kaiqa nahenti hampata kaiqa varaqiro vuvaro *baalivata uitivata* teqo entava taiqa vura. Ekaa vi entara Rutiva nai tonanokantiro variqiro vi vaura.

3

Naomiva Rutira qorainti ranta amireva auti vaura

¹ Vo enta Naomiva Rutirara tiharo, Naaqutuo, te qorainti vo ranteke ai amiarirara are vira varatairaro viva ai varatero ariqaa raqikirara are kojema kera variane. ² Ho are iriane. Vaiinti vira Boaasira vira kaiqa nahenti hampata are kaiqa varaanara, vira tinavu vohaa naarema vaivo. Vate entaqi viva oru kaiqa vareharo *baali* mareve kaqive vara qaqini qaqini ianarove.

³ Ho are oru namari tuntukerama koqe mutta iaina vahaverara aqu varerama koqe utavaaqa nonku varerama viva kaiqa varainanaini vuane. Virama kia vira avuqaa qovarama viraitira, kukeqavi vahira tavairaroma viva karavata namarivata nama taiqa kaarire. ⁴ Nama taiqa kero viva vaitareva virarama are viva vaitareva vinanaini kojema kerama tavaane. Taverama are viva vinanaini orunterama viva vaitainanaini oru vira *paraanke* aquni ravaqaara kera, vira aqutataraini vaitaane. Are vira tataaqa vaitairaroma viva ariara nana uvae tinantemakera iane, tiro.

⁵ Naomiva minti tuvaro Rutiva tiharo, Hove. Te are tianantemake mintirerave, tiro. ⁶ Minti tivakero ho Rutiva Boaasiva *baali* mareve kaqive vara qaqini qaqini unaini oruntero Naomiva tiva amuntema kero mintura.

⁷ Boaasiva karavata namarivata nama taiqakovaro vira vaatavano koqe uvapo vira avu tauntovaro oru *baali* teqake vatoria tataaqa vaitora. Vaitovaro Rutiva qakoma kero viva vaitonaini oruntero qihaaqama kero *paraanke* ravaqaara kero Boaasira aqutataraini vaitora. ⁸ Vira aqutataraini vaite vauvaro Boaasiva enta tavaara vaitoraqihairo tuqantaa vuare tiro ravukuviro tavovaro vira aqutataraini nahenti vovano vaite vaura.

⁹ Vaite vauvaro tavero vira irero tiharo, Are tavave? tuvaro Rutiva virara tiharo, Te Rutikave. Te ai kaiqa nahenti vovanove. Are Elimerekira vohaa naarevano ti tentoqa nahentiqa raqiki varianarara tira, are ti varataane, tiro.

¹⁰ Minti tuvaro Boaasiva virara tiharo, Mpo, ti raavuravauvo, Noravano Kotiva ai kojema amitaarire. Are vate maantiana okarava viva nena tonanoravata kojema amitaanara aatarama kaivo. Are vira mintihara, vate ti voqavatama kojema timitera iaro. Qaraaka vaiinti, airi airaira vataakave, kia airi airaira vataakave, airitahaa variavaravata, are kia vikaqihira vo varareva autuanarave.

¹¹ Ho ekaa vatukaqi variaka tavaavara are koqe nahentivano varianarave. Mintimakera varianarara tira, kia qetaane. Te ekaa uva are tinantemake mintirerave. ¹² Are quaaama tiriara tihara, Are ti tonaqora vira vohaa naarevanoma variaro. Are homa tiqaa raqikinarave, tiaro. Ho vo vaiintivanovata vaivo. Vivama ti avuniqama kero vi kaiqaraqa raqikivama vaivo.

¹³ Vate are entaqi maini vairaque te hora toqaqi oru vi vaiintira avu aatoqi vainara rantake iriare. Viva ariqaa raqikireva irera, vira hove. Viva kia ariqaa raqikireva irera, te ariqaa raqikirerave. Te qaqi variqiro vi vai Variqara Nora Kotira autuqaa ariara te mintirerave turo. Ho are maini vaitera toqaqi vuane, tiro.

¹⁴ Minti tivakero Boaasiva Rutira tiva amiro tiharo, Hauri vaiinti nahenti are maini aninara tavevorave, tuvaro Rutiva qaiqaa Boaasira aiquidaraini vaitero vira qararaa vaiinti tavevorave tiro, kia aatitoraqi himpiro vura.

¹⁵ Viva vire uvapo Boaasiva Rutirara tiharo, Are nena tavuna aquataanara varera viri vatakanta vuqitaane, tuvaro Rutiva tavuna vira varero viri vuqitovaro Boaasiva baali tavuna viraqaa rauru amitora. Baali vira maaravano vaireva, 20 kilo vauvaro Boaasiva Rutira kahaqama kero baali quaku aqua amitoraro Rutiva aqua varero anirantero vatukaini vura.

Rutiva vi uvapo Naomira vuru tiva amura

¹⁶ Ho Rutiva naavuni oruntovaro vira tonanova tiharo, Naaqutuo, ho te tunantema kerae iaro? tuvaro Rutiva nai tonanora ekaa vi uvapo tiva amura. ¹⁷ Vi uvapo tiva taiqa kero viva qaiqaa tiharo, Boaasiva tiriara viva nai tonanova inaini qumina vuantorave tiro, viva baali raira timimantama vare anuro, tiro.

¹⁸ Minti tuvaro Naomiva tiharo, Naaqutuo, Boaasiva kiama qumina vairaitiro, viva vaakama vi haikara avuqavuma kaanarove. Virara iriharama are qihaaqamakera vahihara tavairaro vi haikava qovaraiqiarire, tiro.

4

Boaasiva Rutira varatora

¹ Ho Boaasiva vaantaaavura qenti vaunaini vaiinti nahenti ruvaaqumavi vaunaini oru oquvi vauvaro vihairo viva Rutirara tu vaiintiva Elimerekira vohaa naareqiraava vihairo anura.

Vi vaiintiva anuvaro Boaasiva virara tiharo, Ti vakao, ani maini oquvuane, tuvaro vi vaiintiva oru Boaasira tataaqa oquiviro vauvaro ² viraqahairo Boaasiva Betarihemihaina nora vaiinti 10 navuvata naarama kero, maini ani oquvuate tumanta vinavukavata ani mini oquvi vaura.

³ Vinavukavata ani mini oquvi vauvaro Boaasiva nai vohaa naareqiraarara tiharo, Naomiva Moapini vaira mini kero orurantero mainima ani vaharo vata vo, nimiharo monu varareva auti vaivo. Vi vatava Elimerekira titanta vakaara vatavano vairave.

⁴ Mintivera te ariara tiha, Arema Elimerekira qatavano avuniqamakera variavara tira, are naane homa vi vataro varenarara tinarave. Ai antuqavano vata virara vairera, are nora vaiinti maaqi variaka nivuqaa vahihara vi vataro koqaama kaane. Virara kia ai antuqavano vairera, ti tiva timirage te iriare. Te ai naantiaraini vi vataro varaainarara ho tirerave, tiro. Minti tuvaro vi vaiintiva tiharo, Ho te vi vataro vararerave, tiro.

⁵ Minti tuvaro Boaasiva vira tiva amiro tiharo, Hove. Are Naomira vata vira koqaama kera varairera, ho are tentoqa nahenti Moapihainaara Rutiravatama varenarare. Minti akera varairaroma vi vatava qutuvi vaiintira vira vaintivara vatavano variarire, tiro.

⁶ Boaasiva minti tuvaro vi vaiintiva tiharo, Vira quqaama tiaro. Te vi vataro avuniqamakera varairaukuma vauvo. Te vi vataro varairaroro naantiara vi vatava kia ti vaintinavu vata vairaitiro, vi nahentira vaintivara vatama varianarove. Virara irihama te qaqirake kia vi vataro vararerave. Are nenama vi vataro koqaa iane, tura.

⁷ Haaru Isareri vaiinti vika vatave, vo haikave, koqaamakera vare vau uvapo kempukaiqamakera vau okarava maantimama vairo: Vaiinti vovano vo haika vo vaiinti amireva iharo, viva nai su vo rahunku kero vo vaiinti vira amura. Viva vaiinti nahenti nivuqaa mintumanta vika tiha, Viva avuqavu koqaama autivo, ti vaura. Isareri vika mintimake nai airaira nimi vau uvapo kempukaiqamakera vaura.

⁸ Ho vi vaiintiva Boaasira tiva amiro tiharo, Are nenama vi vataro koqaamakera varaaane, tivakero viva nai su vo rahunku kero Boaasira amiro.

⁹ Amuvaro Boaasiva nora vaiintinavuvaravata vaiinti nahenti mini vaukaravata tiharo, Ne ekaa vaiha tavaamanta te Naomira vata koqaamakera varauvo. Hogare vi vatava Elimerekiravata vira maaqutanta Maalonika Kilionika vatavano vaurave. Ho vate te vi haikara ekaama koqaama kauraro vi haikava tiniqama vivo.

¹⁰ Te vinavuka ia haikara varehama, Maalonira tentoqa nahenti Moapihainaara Rutiravatama varauro. Te Rutira varaariraro Maalonira vatavano vaiрева, nai vira anku vika vatama varianarove. Mintiraro Maalonira autuvanovata kia nunka viraitiro, Betarihemi kansoru vika vukuqi qaqima varianarove. Ho ne ekaa vaiha tavaamanta vate te vi vatarave vi haikarave koqaamake varauro, tiro.

¹¹ Boaasiva minti tumanta nora vaiintinavuvata ekaa vaantaavura qenti vaunaini ruuaquamavi vaukavata tiha, Eo, tenavu maini vaiha ekaama vi haikara iri tavauro. Vate ai naavuqi aniaina nahentira Noravano Kotiva koqema amitairaro viva Reserika Riaaka Iekopira vainti vata amitontema kero, viva airi vaintima vataanarove. Mintirarama are Efaraataa ankuqihainaa nora vaiintivano vaharama, Betarihemi vatukaqi nora autu vataavama vainerarave. ¹² Noravano Kotiva nitanta airi vanti nimiramanta nitanta vaintivara airi vanti Iutaaka Tamaaka maaqu Peresira vaintivara voqaarama vaivarave, tura.

Rutiva Naomira nainti vo vatatora

¹³ Ho Boaasiva Rutira varatovaro Noravano Kotiva vitanta koqema nimitovaro Rutiva vanti taiqama viro qorainti vanti vo vatatora.

¹⁴ Vatatomanta Naomira kena nahentinavu virara tiha, Kaiqe tenavu Kotira autu tuahera kaare. Noravano Kotiva kia ariara tauru karaitiro, vainti vovano ariqaa raqikiarire tiro, viva vate qorainti vanti vo ai amivaro vi vaintiva ai naintivanoma vaivo. Vi vaintiva noruqamaviro Isareri vikaqihairo nora autu vataavama varianarove. ¹⁵ Ai naaqutuvano ariara voqama kero antuqa ari vaiva ai nainti vo vatataivo. Ai maaqu 7navu variatirio, vinavuka kia ai naaqutuvano ai kahaqintemake ai kahaqiatirio.

Ho ai naintivano qovarama virara tira, are qaraaka nahenti voqaarama vainerarave. Naantiara are kontaiqama viraro viva ariqaa koqema kero raqikianarove, tura.

¹⁶ Ho vinavuka minti tuvaro Naomiva vanti vira ravuku teharo viraqaa koqemakero raqiki vaura. ¹⁷ Mintumanta vatuka vihainaa nahentinavu tiha, Hove. Vi vaintiva Naomira maaqu voqaarama vaivo, tivake vanti vira autu nteha Obetirave tura.

Obetiva Iesira qova vauvaro Iesiva Devitira qova vaura.

Devitira kaivaqaukavara nutu

- ¹⁸ Peresiva Hesaronira qova vauvaro
- Hesaroniva Raamira qova vauvaro
- ¹⁹ Raamiva Aminadaapira qova vauvaro
- ²⁰ Aminadaapiva Naasonira qova vauvaro
- Naasoniva Saramonira qova vauvaro
- ²¹ Saramoniva Boaasira qova vauvaro
- Boaasiva Obetira qova vauvaro
- ²² Obetiva Iesira qova vauvaro
- Iesiva Devitira qova vaura.

1 SAMUERI (1 Samuel - 1 Samuel)

Elakanaava nai naata vaintiaravatama kero Silo vatukaini vura

¹ Efaramura ankuqi vau vaiintiva, Elakanaava Efaramu aiqinaini vau vatukara Ramaaqi vaura. Elakanaara anku okara maantima vaura:

Elakanaara qova Jerohaamuva vauvaro Jerohaamura qova Elihuva vauvaro Elihura qova Tohuva vauvaro Tohura qova Sufuva vaura.

² Elakanaava nahenti taaraqanta Hanaaka Peninaaka varatovaro Peninaava vainti vonavu vatatovaro Hanaava kia vanti vataraitiro, qaqi *naahiarama/qururaiqama* viro vaura.

³ Ho Elakanaava Noravano Kotiva ekaa kempuka vatai Variqara autu tuahereharo *ofaa* iha quara amitareva vo ihi vo ihi Ramaa mini kero Silo vatukaini vi vaura.

Elira maaqtanta Hopinika Finiaasika Siloqi Nora Kotira kaiqa vara amite vautanta vauvaro ⁴ Elakanaava oru vitanta unaini vaharo vitanta kaamato entaraqaa *ofaa* iha Kotira quara amite vaura.

Ho vi entaraqaa viva Kotira *ofaa* iha quara amitareva u matira viraqihairo hini mati raira keharo Peninaara, nai vaintiaravata vohaa tataa nimiro, ⁵ Hanaara vira taara tataa ami vaura. Elakanaava vo ihi vo ihi mintima keharo mati raira keharo vinavuka nimi vaura. Viva Hanaarara voqama kero antuqa aruvarora tiro, viva mati airiqama kero Hanaara ami vaura. Ho Noravano Kotiva Hanaara kia vanti amuvaro viva qaqi *naahiarama/qururaiqama* viro vaura.

⁶ Hanaava kia vanti vatora kaara vira qiariva virara uva virera tiva amitaqiro vuvuro Hanaara muntukavano qoraiquvaro vaura.

⁷ Vo ihi vo ihi vinavuka Silo vatukaini Nora Kotira naavuqi vi vau entara Peninaava mintima keharo Hanaara uva virera tiva amitaqiro vi vauvaro Hanaava Peninaava tu uvura kaara kia karavata naraitiro, qaqi variqiro viharo iqi rataqiro vi vaura.

⁸ Viva iqi rate vauvaro Elakanaava vira irero tiharo, Mpo, are nana kaarae iqi rateharo kia karavata naraitira variaro? Nana kaarae ai muntukavano qoraiqvvara variaro? Quqaama are kia vanti vataarava variaro. Mpo, are maaqu kauqurutanta vataataraitiro, kiae ai muntukavano tiriara avuni vaitirio? tiro. Elakanaava minti turama.

Hanaava nora maaraqi vaharo Nora Kotira aarora

⁹⁻¹⁰ Ho vo enta vinavuka Siloqi vaiha kara nama taiqa kovaro Hanaava himpiro oru Kotira Seri Naavu vaunaini vauvaro vira muntukavano voqamakero qoraiquvaro iqi rateharo Nora Kotira aare vaura.

Vi entara Kotira kaiqa vara amite vau vaiintiva, Eliva Nora Kotira Seri Naavu qentiana oquiviro vauvaro ¹¹ Hanaava Kotira aareharo nai kauqu aiqiqaa aqo kero tiharo, Noravaavo, are ekaa kempuka vataavama variaro. Mpo, te ai kaiqa nahentivano nora maaraqi vaunara taveharama kia tiriara tauru kaane. Mpo, are qorainti vanti vo ti timirera, te vira nina kaama amiteha nina amiariraro viva ai kaiqa vanti vaharo nai qaqi variqiro vuaina entara ai kaiqaqai varaqiro vuarire. Te qioqama taari vira qiaata kauhi kia toqa karaiti, vira okauvata kia muqu kevarave, tiro.

¹²⁻¹³ Hanaava vukaiqama kero Nora Kotira evaara aaramaqiro viharo kia uva tiraitiro, nai avu aatoqihairo Nora Kotira aare vaura. Viva mintima kero Nora Kotira aare vauvaro Eliva vitini vaharo tavovaro Hanaara novano qaki qaki i vauvaro nai aatoqihairo irikero tiharo. Viti nahentiva airi *uaini* namakero vueraiqamama vivo, tiro.

¹⁴ Minti tivakero virara tiharo, Taireve are vueraiqina okarara qaqira kenarave? Are maa naavuraqihairava vevantero viraro ai avu aatovano kanko iarie, tiro.

¹⁵ Eliva minti tuvaro Hanaava nai tiva amiro tiharo, Aqao, nora vauintio, kiama te biaave, *uainive*, neha vueraiquro. Tiqi nora maaravano vaivaroti muntukavanovata voqama kero qoraiqira kaara te ekaa vi maarara Nora Kotira tiva ami vauro. ¹⁶ Are kia tiriara qora nahentive tiane. Ti muntukavano voqama kero qoraiqimanta te Kotira aareha ekaa vi uvura vira tiva ami vaurara are ti taveharama minti tiaro, tiro.

¹⁷ Hanaava minti tuvaro Eliva virara tiharo, Mpo, ai muntukavano qihaaqirara vuane. Tinavu Isareru Variqavano are nana haikara vira irenara ai amianarove, tiro.

¹⁸ Eliva minti tuvaro Hanaava tiharo, Mpo, nora vauintio, are ti koqema timitaanara virara koqevema turo, tiva kero viraqaaqihairo oru kara novaro vira maaravano taiqa vuvuro vaura.

Samuerira vatatora

¹⁹ Ho vira qararaa toqagi vinavuka himpi oru Nora Kotira autu tuaherake, viraqaahai anirante nái maaqa Ramaini oru vaura.

Elakanaava nai naata Hanaakantiro nuvaro Noravano Kotiva Hanaava vira aaro uvara hoqama amitora.

²⁰ Mintuvaro Hanaava vainti taiqama viro qorainti vainti vatatero vira autu nteharo *Samuerirave - Kotiva irirave* tiro. Hanaava tiharo, Te Nora Kotira naaruraro viva ti qorainti vainti timivo, tiro.

²¹ Ho vi iihra Elakanaava nai Kotirara mintirerave tivatai uvarara iriharo, viva nai naata vaintiaravata qaiqaa Silo vatkaini oru *ofaa* Nora Kotira iha quara amitareva vuvaro ²² Hanaava kia mini viraitiro, viva Elakanaarara tiharo, Vaintiruvano naama qaqira kaaina entara te vira vita vare vuru Nora Kotira amiariraro viva nai qaqi variqiro vuaina entara Nora Kotira Naavu viraqi variarire, tiro.

²³ Minta tuvaro Elakanaava tiharo, Ho are nena avu aato utinara vira avataane. Are maini variqira viraro vaintivano naama qaqira kaarie. Are nena kauqu aiqiqaa aqukera tivataana uvvara Noravano Kotiva ai kahaqiraro vi uvava vivau variarire, tiro.

Minta tuvaro Hanaava maaqaini vaharo nai maaqu viraqaa raqikiqiro vuvaro ²⁴ viva naama qaqira kora. Ho Samueriva vainti naatiru vau entara vira nova vira vita varero vuru Nora Kotira amireva vura.

Viva vira vite vireva iharo, purumakau qora vo taaramo ihi varakoravata, *porihu/voruhi* uta noravata, memerea pahiqi *uaini* kaqatoravata, varero, Nora Kotira Naavuvano Silo vatkaini vaunaini, *vokuka hampatta*, vura.

²⁵ Mini orunte vinavuka purumakau vira aruke „Kotira *ofaa* iha quara amite“, viraqaahai Samuerira vita vare Eliva vaunaini vuru kora.

²⁶ Mintuvaro Hanaava Elirara tiharo, Nora vaiintio, are tiriara irie taaro, kiae iritaaro? Haaru te maini himpiti vaiha Nora Kotira aare vaunarave. ²⁷ Te Nora Kotira aareha tiha, Mpo, vainti ti timiane, tivake vira irauraro viva ti uva iriro vainti ti timirave. ²⁸ Viva mintirara ti, vate te vi vaintirura Nora Kotira nai amirerave. Vi vaintiva ekaa nai qaqi variqiro vuaina entara Nora Kotira kaiqaqai vara amitaqiro vuarire, tumanta vinavuka mini vaiha Nora Kotira quahama amiteha vira autu tuahera kora.

2

Hanaava Nora Kotira autu tuahera kora

¹ Ho Hanaava Nora Kotira aareharo mintima tiro:

Noravaavo, are ti koqema timitaanara virara te tenta muntukaqihai voqamake quaheha vauro.

Are ti kempuka timiaramanta te tenta navutaaka naaraihama nimite vauro.

Kotio, are ti kahaqama timitaaravera te quaheha vauro.

² Noravaavo, kia vovano ai aanantero takuqu kero vaiva vairave.

Kiama variqa vovanovata vairave.

Arema tinavu Variqavano vahara tinavu antua timite variaravama variaro.

³ Noravano Kotiva tinavu okara kankoma kero iri vaiva, viva tenavu nana nana qora kaiqave koqe kaiqave vare vaunara rairakero tave vairara ti, ne nenta nutu tuahera keha vo uva vo uva ti variaka, ne qaqirake kia nenta mahuta tiraiti, kia uvavata tiate.

⁴ Kempuka iqoka vaiinti huru kaavu Noravano Kotiva rauhaantima keharo, viva kia kempuka vatauka vika kempukaiqama nimite vairave.

⁵ Haaru airi kara ne variaka, vate vika kara neva kia vaimanta variarave.

Haaru karara qaavoqihā narara variaka, vate Kotiva vika airi kara nimimanta ho neha variarave.

Tota *naahiaru/qurura* vai nahentiva vate vainti 7navu nova vairave.

Airi vainti nova vate qumina nariaraa vaharo nai vainti vikara iqí rate vairave.

⁶ Noravano Kotiva vo kiaka arukeharo, vo kiaka qaqi kaimanta variarave.

Noravano Kotiva hini kiaka qutu vuaka varianaini keharo, hini kiaka qaiqaa qaqi vara himpima kaimanta variarave.

⁷ Noravano Kotiva hini kiaka vehiqama kaimanta variavaro, hini kiaka airi airaira nimimanta vate variarave. Viva hini kiaka nutu vatainiqama keharo, hini kiaka nutu tuaherake vairave.

⁸ Noravano Kotiva anomake vehiqamavi konkomaqi variaka vika vara himpima kero ntita varero vuru nora vaiinti vika hampata keharo nora autuvata vika nimi vairave.

Noravano Kotiva naivano maa vataro tuqa aratero viraqaata maa vataro autu kero vatairave.

⁹ Viva nai vaiinti nahentiqa koqema kero raqikiqiro viharo, qora kaiqa vare variaka konkira arinaini kaimanta uve variarave.

Vaiinti vovano nai kempukara noraiqaakero iri vairava vairaro vira kempukavano kia ho vira kahaqianarove.

¹⁰ Nora Kotira navutaiqama amitareka auti vaika, viva ekaa vika vehi autu kaanarove. Naaruuvavano karara tintemakero, vira uvavano vika vehi autu kaanarove.

Naantiara Noravano Kotiva ekaa maa vataragaq vaika *ko* tiharo vika koqe okarave qora okarave raira kaanarove. Noravano Kotiva nai noraiqama kaina vaiintira kempukaiqama amiteharo, nai kaama taina vaiintira kahaqi vairaro viva kempuka vaiinti varianarove, tiro.

¹¹ Hanaava Kotira aarama taiqa kero, Elakanaakantiro anirantero Ramaini vuvaro vira maaqu Samueriva Siloqi vauvaro Eliva viraqaa raqiki vauvaro viva Nora Kotira kaiqa vara amite vaura.

Elira maaqutanta qora kaiqa varora

¹² Elira maaqutanta Hopinka Finiaasika qora vaiintitanta vaura. Vitanta Kotira kaiqa vara amite vaura, Nora Kotirara kia noraiqaake iriqi viraiti vaura. ¹³ Vitanta Nora Kotira *ofaa* iha quara amite vau okarara kia naitaramake avate vaura.

Vitanta maantimake hampi kaiqa vare vaura: Vaiinti vovano Kotira *ofaa* amitareva umanta vitanta vira amito matira varake nora kureqi arate vaura. Viraqahai vitanta kaiqa vaiinti vo atitovaro viva *poku* taaramo viaru vaura varero, oru nora kure vira tataaqaa vaharo ¹⁴ *poku* viraqohairo kure viraqii vaati kero, nai nana matie *poku* viraqaa ranteqakero varero, kaiqa vaiinti viva vira vuru vitanta nimi vaura. Mintima keha vitanta Isareri vaiinti nahenti Siloqi Kotira *ofaa* amura hampigamake vaura.

¹⁵ Vaiintivano kaantavu varakero *ofaa* iha quarareva auti vauvaro vitanta kaiqa vaiintivano anintero tiharo, Kotira kaiqa vara amite variatantara irihara, are vaaka mati hinikira ti timirage te vare vuru vitanta nimiaire. Kureqi arataa matira kiama vitanta naataa ivo. Ne qaraaka mati ti timiqe te vare vuru vitanta nimiairi vitanta ihaqira untake naate, tiro.

¹⁶ *Ofaa* iha quarareva u vaiintiva tiharo, Aqao, qaqi kairaqe te *ofaa* iha quare okarara naitaramake avateha, kaantavu naane iha quara taarirara, viraqahai are mati varaaataa irera varaane, tuvaro vitanta kaiqa vaiintivano kempukaiqama kero tiharo, Kiave, are vaaka maa vira ti timiane. Are kia ti timirera, tentavano varaare, tivakeharo mati vira varero vuru vitanta nimi vaura.

¹⁷ Mintima keha Elira maaqu vitanta vaiinti nahenti Nora Kotira *ofaa* iha quara amitare i vaura qoraiqama nimite vauvaro Noravano Kotiva tavovaro vitanta okaravano anoma kero qoraiqiro vaura.

¹⁸ Ho vitanta mintimake kaiqa vare vauvarovata, Samueriva vaintiruvano mini vaharo Nora Kotira avuqaa koqe kaiqa varaqiro vi vaura. Kotira kaiqa vara amite vauka nonkute vau tavinara, *efotive* tura, vivavata nonku teharo kaiqa vare vaura.

¹⁹ Ekaa vo ihi vo ihiara vira nova yukai tavuna vira autu amite vaura. Vira noka qoka Nora Kotira *ofaa* iha quara amitareka iha, tavuna vira vareha vuru Samuerira ami vaura.

²⁰ Eliva vitanta koqema nimiteharo Elakanaara tiva amiro tiharo, Kairaro Noravano Kotiva ai naata kahaqiraro viva vainti vokikavata vatataira vika are Nora Kotira kaamatera amiana vaiintira vira vatuka varaate, tiro. Vo ihi vo ihi Eliva minti tiva nimite vaumanta vitanta anirante nái maaqaini vi vaura.

²¹ Ho Noravano Kotiva Hanaara koqema amitovaro Hanaava qorainti vainti taaramon-avu vatatero nahenti taaraqanta vatatora. Mintuvaro Samueriva Siloqi Kotira Naavuqi Kotira avuqaa variqiro viharo noruqama vura.

Elira maaqutanta

²² Eliva anomakero naampaiqama viro vaharo irumanta airi enta vira maaqutanta Isareri vaiinti nahenti qoraiqama nimite vaura. Vitanta qora kaiqa varaqi viha oru Kotira Seri Naavu qentiqaa raqiki vau nahentika hampata vaite vaura.

²³ Miti vaura kaara Eliva vitantara tiharo, Oho, netanta nantihae qora okara auti variavo? Airi vaiinti nahenti netanta qora okara auti variara ti tiva timiamanta irunarave. ²⁴ Ti maaqutantao, vi okarara qaqlira kaate. Nora Kotira vaiinti nahenti netanta qora okara auti varia uvvara tivaqi vi ani variavo.

²⁵ Vo vaiintivano nai kena vaiinti vo qora okara autu amitairera, Kotivama vira uva avuqavuqama amitaanarove. Vaiinti vovano Nora Kotira qora okara autu amitairera, tavave vitanta tavaarana vaharo vitanta uva avuqavu qianarove? tiro.

Noravano Kotiva vitanta arukaainarara tiro, vitanta avu aatovano kempukaiqumanta kia nái qova tu uvvara irura.

²⁶ Ho vi entara Samueriva noruqe vaumanta Noravano Kotivavata vaiinti nahentivata virara quaheha vaura.

Paropeti vaiinti vovano Elira vuru tiva amura

²⁷ Vo enta paropeti vaiinti vovano Eliva vaunaini oruntero tiharo, Noravano Kotiva ariara mintima tivo:

Haaru Isipini Pero vaiintivano ai kaivaqara Eroniravata, vira ankuvata, rumpataa entara, te vika kahaqirera tuvunte tenta mpeqa okara vika numiqaura vika tavaarave.

²⁸ Isareri vo anku vo anku variamanta te vikaqihai ai kaivaqara Eronira ankuqai kaamate, vikaraqai ti kaiqa vara timiteka vaivarave, tunarave.

Te vikaqaima qaqi kaari ti Kotika ofaa taintaqa iha quara timitaate, tunarave. Vikaqaima koqe unta iaina haikara iha quara timiteka vaivarave, tunarave. Vikaqaima ti Kotika avuqaa vahia efoti tavuna nonku teha ti kaiqa vara timitevarave, tunarave.

Te vikaqai tiva nimi tiha, Isareri vika ti ofaa taintaqa iha quara timiteraqahai ne homa hini mati varake neverarave, tunarave.

²⁹ Ho nantiharae are te tiva tauna uvvara qaqlira kera ti ofaa okara vehiqama kera iaro?

Are nena maaqtanta qaqlira kaaramanta vitanta Isareri vika ti ofaa iha quara timite variaraqihai koqe mati varakeha namaqi vi variavaro vitanta vaatavano noruqe vaivo.

Are vitanta qaqlira kehara, vitanta autu noraiqama kera, ti hutu vatainigama kaaro. Nantiharae are minti okarara auti variaro?

³⁰ Oho, te tiarirara iriane. Te Noravano Kotika ni Isareri Variqavano vauro. Haaru te ai kaivaqara Eronira nai vaintiaravata tiha, Vika homa ekaa enta ti kaiqa vara timitaqi vivarave, tunarave.

Ho ninavu qora okara kaarama te vate vo uva tirerave. Te mintima turo: Vaiintivano ti hutu noraiqama kainara tevata nai autu noraiqama karerave. Vaiintivano ti qoririma kainara tevata nai qoririma karerave, turo.

³¹ Ho iriane. Vo enta anintairage te vi entaraqaa ai anku qoraiqama nimiteha ekaa qaraaka vaiinti vikavata arukarerave. Ai ankuqihairo kiama vo vaintivano qaqlira variqiro viro vuru naampaiqianarove. ³² Te Isareri hini kika koqema nimitaari vika koqemake vaivara are vika tavehara taara nendarave. Vika koqemake variqi vivaro, ai ankuqihairo kiama vaiinti vovanovata variqiro viro vuru naampaiqama vuunarove.

³³ Ai ankuqihai kia qutiraiti, qaqlira vaika, vika nora maaraqi variqi vivaro vika muntuka qoraiqiramantha variqi vi vaiqe te navutaaka qaqlira kaari vika are kuvuarama terauka ekaama aru taiqa kevarave.

³⁴ Ai maaqtanta Hopinika Finiasika vitanta vohaa vakama qutu vivarave. Vitanta qutu vi entara, ai aato kenko tirara are ququaama vi uvava vivau vaivo tinarave.

³⁵ Naantiara te vo vaiinti noraiqama kaariraro vi vaiintiva ti muntukavano vaina kaiqarara noraiqaakero iriqiro viharo, koqema kero ti kaiqa vara timitaqiro vuunarove.

Te qaqlira kaari vira vainti vika te kaamate noraiqama kaarirauka kaiqa vara nimitaqi vuuate.

³⁶ Vi entara ai vainti vikaqihai tau vaiintikae qaqlira vaika, vika oru ti Kotika kaiqa vara timite varaina vaiintira vorara tiha, Mpo, karave monuve, timiraqe tenavu ho variare. Hoe are tinavu qaqlira kairaeq tenavu Kotira kaiqa vo vara amiteha, koqaa vare oru kara varaare, tivarave, tirave.

Noravano Kotiva minti tivakero ariara minti tivakera tiva amiane tivera te vi uvarama vate ai tiva amuro, tiro.

Paropeti vaiinti viva minti tura.

3

Noravano Kotiva Samuerira aarora

¹ Ho Samueriva quvaaraa vaintivano vaiharo Nora Kotira kaiqa vara amite vauvaro Eliva viraqaa raqlki vaura.

Vi entara Noravano Kotiva kia airi uva qoqaiqama kero Isareri vika tiva nimiraitiro vauvaro, airi ihi aitarora. Vohaa enta vohaa entaqai tairakaa viva uva vika tiva nimi vaura.

² Ho Eliva naampaiqama vuvuro aumakaa vira avuvano ekaara qimpa vire ura. Vo enta entaqi viva Kotira Naavu *rumu* vo nai vaite vauraqi vaite vauvaro ³ Samueriva Kotira Naavu viraqai Kotiva uva tiva taatauto *Vokisera* vato *rumuraqi* vaite vauvaro aumakaa aatitare uvaro Kotira Naavuqi ova qumpitova qaqlqai ite vaura.

⁴ Mintuvaro Noravano Kotiva Samuerira aareharo, Samuerio, tuvaro Samueriva, Vo, tiro. Te mainima vauro, tivakero ⁵ himpiro kantero oru Elirara tiharo, Are ti haaraaravera te anuro, tuvaro Eliva aqao tiro, Kiama te ai aarauro. Qaiqaa oru nena taintaqaa vaitaane, tuvaro viva anirantero oru nai taintaqaa vaitatero vaura.

⁶ Mintuvaro Noravano Kotiva qaiqaa vira aareharo, Samuerio, tuvaro viva himpiro qaiqaa Eliva unaini oruntero tiharo, Are ti haaraaravera te anuro, tiro. Minti tuvaro Eliva tiharo, Ti maaquo, te kiama ai aarauro. Qaiqaa oru nena taintaqaa vaitaane, tiro.

⁷ Noravano Kotiva kia haaruvata vikantiro uva turara tiro, Samueriva Nora Kotira uva vira kia viraqama kero iriraitiro vaura.

⁸ Ho taaramo tataa Noravano Kotiva Samuerira aarovalo Samueriva himpiro Eliva unaini oruntero tiharo, Are ti haaraaravera te anuro, tiro. Minti tuvaro Elira aatovano kenko tuvaro iruvaro Noravano Kotiva Samuerira aare vaura.

⁹ Mintuvaro Eliva Samuerira tiva amiro tiharo, Are qaiqaa nena taintaqaa oru yaite vairaro viva qaiqaa ai aarairera, are mintima tiane: Noravauvu, are tirage iriare. Te ai kaiqa vaiintivano irihama vauro, tiane, tuvaro Samueriva Eliva tunte iro oru taintaqaa qaiqaa vaitatero vaura.

¹⁰ Vaite vauvaro Noravano Kotiva anintero himpiro vahiaro vira avuni aaron tema kero qaiqaa aarero tiharo, Samuerio, Samuerio, tuvaro Samueriva tiharo, Noravauvu, are tirage iriare. Te ai kaiqa vaintivano irihama vauro, tiro.

¹¹ Minti tuvaro Noravano Kotiva vira tiva amiro tiharo,

Koqema kera iriane. Aumakaama te Isareri vika avutaini vo kaiqa qovarama kaari ekaa vi uvara irika voqamake ravuku vivarave. ¹² Vi entara te Elira ankuqi ekaa qora okara qovarama karerave tiva tauna uvava, ekaa vi uvava vivauma varianarove.

¹³ Te tota Elira tiva amunaratave: Elira maaqtanta qora kaiqa vare vahia ti Nora Kotika qoraiqama timite variavaro viva vitanta qora kaiqa vare variara iriharovata, kia vitanta qioqama kaira kaara, te viraqaa uva vataarirava kia taiqa viraitiro, ekaa entama varianarove.

¹⁴ Te kauqu aqiqaa aquikeha Elira ankuara mintima turo: Vika nana nana ofaave, ti iha quara timiteva kia ho vika qora kaiqa vare uvvara nunqa taiqa nimitaanarove. Vi uvava ekaa enta qaqiqai varianarove turo, tiro.

¹⁵ Samueriva vi uvvara iriro nai yaite vau taintaraqaa variqiro viro aatita kora. Toqaqira viva himpiro oru Nora Kotira naavu qentinavu qantuareharo Elira aatu qeteharo taira vogaraa tavora kia vira tiva amura.

¹⁶ Mintuvaro Eliva Samuerira aarero tiharo, Samuerio, ti maaquo, aniane, tuvaro Samueriva vo tivakero, Te maa virama anuro, tiro.

¹⁷ Minti tuvaro Eliva vira irero tiharo, Noravano Kotiva ariara nana uvae tivo? Are kiama vo uvavata kukeqa taane. Are vo uva kukeqa tairaro Kotiva ai anomia kero qoraiqama amitaantorave, tiro.

¹⁸ Minti tuvaro Samueriva kia vo uva kukeqa karaitiro, ekaa vi uvvara tiva amuvaro Eliva vi uvvara iriro tiharo, Viva nai Noravano Kotivave. Kairaro viva nana haika tiqaave ti ankuqaave autuataa iraro autuarire, tura.

¹⁹ Ho Samueriva noruqe vauvaro Noravano Kotiva vikantiro vahiaro vira kahaqama amite uvavarora tiro, Samueriva vaiinti nahenti vikara minti mintima vaina haikava qovaraiqianarove tuntema kero, vi haikava vi haikava qovaraiqi vaura.

²⁰ Mintumanta ekaa Isarerini vauka kankomake iruvaro Noravano Kotiva Samuerira quqaa kaama tovaro, viva Nora Kotira uva qovaraiqamake vau vaiintiva, paropeti vaiintivano vaura.

²¹ Tota Silo vatukaini qovarama viro nai uva Samuerira tiva amuntema kero, Noravano Kotiva qaiqaa qaiqaavata nai uva vira tiva ami vauvaro Samueriva vi uvvara Isareri vika tiva nimi vaumanta vika iri vaura.

4

Kotira Vokise Pirisia vatanaaka raqiate varora

¹ Vi entara Pirisia vatanaaka Isareri hampata iqoka raqireka umanta Isareri iqoka vaiinti vika Ebenesa vatuka aumanto nái seri naavu maaqa kaqa tomanta Pirisia vika Afeki vatuka aumamoto nái seri naavu maaqa kaqate vaura.

² Viraqahai Pirisia iqoka vaiinti vika Isareri hampata ani iqoka raqihai, Isareri naatara keha 4,000 vaiinti aru kora.

³ Mintumanta Isareri iqoka vaiinti hini kuka orurante nái seri naavu maaqa vaunaini anumanta Isareri qiaata vaiintinavu vikara tiha, Nana kaarae Noravano Kotiva Pirisia qaqi kaimanta vika tinavu haatara kaavo? Kaiqe tenavu vaiinti vonavu nititaari vika Siloqihai Noravano Kotiva uva tiva taatauto Vokisera vare aniate. Tenavu raqirera viha, vi Vokisera

aqu vare vuuariraro Noravano Kotiva tinavu hampata vairamanta tinavu navutaaka kia tinavu haatara kaate, ti.

⁴ Qiata vaiinti vika minti tivake vaiinti vonavu nititomanta Siloni orunte Noravano Kotiva ekaa kempuka vatai Variqava uva tiva taatauto *Vokisera* vira vare anura. Vi *Vokiseraqaa enseli maraqura/varaha* taaraqanta vauvaro vitanta avutana Noravano Kotiva oquiviro vau vatukava vaura.

Vika uva tiva taatauto *Vokisera* vare anuvaro Elira maaqtanta Hopinika Finiaasika *Vokise* viraqqa raqikiqi anumanta vare anura.

⁵ Vika Noravano Kotiva uva tiva taatauto *Vokisera* vare *seri* naavu maaqa kaqatonaini anintomanta Isareri vika ekaa quaheha noraiqaake naverai tuvarora tiro, vatavanovata qaki qaki i vaura.

⁶ Mintumanta Pirisia vika uva *nontanta/otata* iri tiha, Oho, Hiparu vatanaaka *seri* naavu maaqaqihai nana kaarae naveraiti variavo? tivake vaiha irumanta Nora Kotira *Vokisevano* vika *seri* naavu maaqa kaqatonaini ani vaura.

⁷ Mintumanta vika geteha tiha, Variqa vovano Isareri *seri* naavu maaqa kaqataaraqi ani vaivo. Oho, vate tenavu qoraiqama virarave. Haaru kia minti haikava tinavuqaa qovaraiqi vairave.

⁸ Mpo, tavave tinavu ruaruama timitairaro vika Variqa kempukavano kia tinavu qoraiqama timitaarire? Vi Variqava qora haika, vo qara vo qara i haikaraqohairo Isipi vika qoraiqama nimitaimanta vika airithaa aahara vataini qutu vuarave.

⁹ Ho Pirisia vatanaakao, kaiqe tenavu kempukaiqamake qorainti taruka raqintemake raquare. Kia mintiarera, tota vika tinavu paanaa kaiqa vara timitaantemake, tenavuvata vika nai paanaa kaiqa vara nimitaaronare. Ho aniqe kempukaiqamake vaiha qorainti taruka raqintemake raquare, ti.

¹⁰ Minti tivake Pirisia vika kempukaiqamake raquqi viha Isareri naatara komanta Isareri vika getake rugemake nai maaqa nai maaqaini vura. Vi entara Pirisia vika Isareri airithaa 30,000 vaiinti aru taiqa kora.

¹¹ Vika Elira maaqtanta Hopinika Finiaasika aruke, Nora Kotira vira *Vokisevata* raqiake vare vura.

¹² Mintuvaro vohaa vi entaraqai Benaminira ankuqihairo iqoka vaiinti vovano iqoka raqi vaura mini kero kantero Silo vatukaini oruntora. Vi vaiintiva nai utavaaqa qunahi qaanahima kero hora var aker qiaqaa aqutero kantero Siloni oruntovaro ¹³ Eliva mini aara auvhahini nai oquivi vau taintara aratoraaqaa oquiviro vahiaro Nora Kotira *Vokise* qaiqaa vare anirara noraiqaakero avu aato utiharo vira veka vaura.

Viva mini vauvaro iqoka vaiinti viva vatukaini anintero raqu vakaakara vaiinti nahenti tiva nimumanta ekaa vika ike mpo tiha noraiqaake oi aai ti vaura.

¹⁴⁻¹⁵ Ho Eliva airi ihi 98 ihi varakero anomakero naampaiqama vuvaro vira avuvanovata qimpa vuvaro viva aara auvhahini vahiaro uva *nontanta/otata* iriro tiharo, Nana kaarae noraiqaake oi aai ti variavo? tiro.

Eliva minti tuvaro iqoka vaiinti viva kantero oruntero Elira tiva amiro tiharo, ¹⁶ Te vate raquaraqihai ruqemakema maini anuro, tuvaro Eliva vira irero tiharo, Ti maaquvauvo, iqoka raqua uvava nantiakeroe vaivo? Tiraqe iriare, tuvaro ¹⁷ vi vaiintiva Elira tiva amiro tiharo, Pirisia vika raquqi viha tinavu haatarake tinavu iqoka vaiinti airithaa arikaamanta tenavu vika naatu getake rugemake vi anima vuro.

Vika ai maaqtanta Hopinika Finiaasika aruke, Kotira *Vokisevata* raqia vare vuavo, tiro.

¹⁸ Eliva Kotira *Vokise* vare vu uvara iriro, viva nai oquivi vau taintaraqahairo tauvaqaihairo umpaihavuviro Kotira Naavu qenti vaunaini higintura.

Viva anomna naampaiqama vuvaro vira vaatavano voqama kero norugama tovarora tiro, viva higintiro nai anu kinta kero qutu vura. Eliva 40 ihiara Isareri vikaqaa raqiki vaura.

¹⁹ Vi entara Elira naaqutu Finiaasira naatavano vainti taiqama vuvaro vainti vataarira entava aumaiquvaro vovano Pirisia vatanaaka Kotira *Vokise* vare vurave, vira vaati arukorave, vira tonaqova qutu vurave, ekaa vi uvara vira tiva amuvaro irura.

Viva vi uvara irira kaara vainti vataarira aihavirava vaaka hogarama tovaro viva voqamakero keke tivaqiro viro vuru vainti vatatora. ²⁰ Viva aumakaa qutu vire umanta vira kahaqama amito nahentika vira tiva amiha tiha, Kia qetaane. Are qorainti vaintima vatatera iaro, tuvarovata, vi nahentiva kia nai aato vika nimiraitiro, kia vika uvavata nai tiva nimiraitiro, ²¹ nai vainti vira autu ntavatero tiharo, *Ikabotirave - Kotira mpeqa okara takuqi* vaiva Isareri kero vivo, tura. Vika Kotira *Vokise* vare vurave, vira tonaqova nai maaquntiro qutu vurave virara iriharo vi autura ntava tora.

²² Viva tiharo, Vika Kotira *Vokise* Isarereri vataihai vare vuara kaara, Kotira mpeqa okara takuqi vaivavata Isareriqahairo ekaarama vinivo, tivakero qutu vura.

5

Kotira Vokise vare vura

¹ Pirisia iqoka vaiinti Kotiva uva tivakero taatauto *Vokisera* vare Ebenesa vatuka vara maini ke nái nora vatuka Asadotini orunte ² *Vokise* vira vare vuru nái una variqa Dagonira quahama amite vau naavuraqi vatora. Vika Dagonira *maraqura/varaha* oriqohai autuke vatora vira tataaqqa *Vokise* vira vatora.

³ Viraqi vatomanta vira qararaa toqaqi Asadotihainaaka nái una variqa naavuqi oriqete tavovaro Dagoniva hiqintiro nai viri vataini kero, Nora Kotira *Vokise* avuqaa vaura. Mintumanta vika Dagonira *maraqura/varaha* vara vaaviaramake qaiqaa nái vaunaini vatora.

⁴ Vika entaqi vaite qararaa toqaqi ani tavovaro Dagonira *maraquravano/varahavano* qaiqaa virianaihairo vata kanta hiqintiro Nora Kotira *Vokise* avuqaa vaura. Dagonira qiatawata kauquvata kintavi genti kanta nariara vauvaro vira vaatavanoqai qaqi vaura.

⁵ Mintura kaara vate maa entaravata Dagonira kaiqa vara amite variakave, vokiakave, vira qiatawata kauquvata qentiana hiqinti vainaini aiqu ntava taarorave ti, vika aiqu vaatinne vaarintemqa vi ani variara.

⁶ Ho Noravano Kotiva Asadoti vatukaqi vaukavata, vira aumanto vaukavata, qoraiqama nimitovaro *meqa/veqa* numuaravano vika vaataqaa qovarama viro ite vau-manta vika voqamake qete vaura.

⁷ Mintumanta Asadoti vatukaqi vauka vi haikara vi haikara qovaraiqura tave tiha, Isareri Variqavano tinavuvata, tinavu variqa Dagoniravata qoraiqama timiteharo nora maara tinavuqaa vate vaivo. Vira kaara Isareri Variqa vira *Vokisевано* kia maini variare, ti.

⁸ Vika minti tivake Pirisia avuhainaa vaiinti 5navu naarama komanta vika vinavuka ireha tiha, Isareri Variqa *Vokise* vira tenavu nantie irarave? tumanta vinavuka vika tiva nimi tiha, Ne vi *Vokisera* vare muntu Geti vatukaini vataate, tumanta vika vira vare Pirisia nái vatuka vo, Geti mini muntu vatora.

⁹ Geti mini muntu vatovarovata, Noravano Kotiva vi vatukaraqi vaukavata qoraiqama nimitomanta vika voqamake qete vaura. Noravano Kotiva *meqa/veqa* numuara vara kovaro ekaa vaiinti nahenti, qaraakaukave, konta naampaive, vika vaataqaa ite vaura.

¹⁰ Mintumanta Getihainaaka Kotira *Vokise* vira vara kovaro Pirisia vatanaaka vatuka vo Ekaronini vura. Mini oru ntomanta vi vatanaka noraiqaake oi aai tiha, Oho, vika tinavu ekaa aru taiqa karekama Isareri Variqa *Vokise* vira vare maini aniamo, ti.

¹¹ Manti tivake vika Pirisia avuhainaa vaiintinavu naaramake vikara tiha, Mpo, nenavu Isareri Variqa *Vokise* vara kaivaro anirantero nai maaqaini uvarire. Nenavu kia mintivera, viva tinavu tintanavu vaiinti nahenti hampata aru taiqama kaanarove, tura. Kotiva vika qoraiqama nimitomanta airi vaiinti nahenti qutu vura kaara vi vatanaka voqamake qete vaura.

¹² Vokuka kia qutiraiti, qaqi vauka vika vaataqaa meqa numuaravano qoraiqama kero ite vaumanta vika nái una variqanavuara ike mpo tiha, Tinavu kahaqiate, ti vaura.

6

Kotira Vokise vara kovaro qaiqaa anirantero Isarerini vura

¹ Nora Kotira *Vokisевано* Pirisia vataini vaharo ⁷ toranavu vara komanta ² vika una variqa kaiqa vara nimitokave, vure vaiinti vikave, naaramake vinavuka ireha tiha, Nora Kotira *Vokise* vira tenavu nantie irarave? Tenavu Isarerini qaiqaa vara kaariraro uvarire ti, nana haika hampatae vira vara kaariraro vuanarove?

³ Vika minti tumanta vinavuka tiha, Ne Isareri vika Variqa *Vokise* qaiqaa vara kareka iha, kiama qumina vara kaivaro uvarire. Ne vika Variqara irihama, *ofaa* hampata vara kaivaro viraroma viva ni qora okaravata nunka nimiteharo ni rovaravata taiqa kaarire. Mintihama ne kankomake iri tiha, Tota tenavu kia vira *Vokise* vara kaunara kaara Isareri Variqavano tinavu qoraiqama timite vairave tivarave.

⁴ Vinavuka minti tumanta vaiinti nahenti qaiqaa vinavuka ireha tiha, Tenavu *Vokise* vira hampata nana *ofaae* vara kaariraro vuanarove? tumanta vinavuka tiha, Vohaa garamake vai rovarava nivata, ni Pirisia avuhainaa vaiinti 5navuvata, arirara ti, ne *kori* oriqohai meqavano ni vaataqaa numuara ite vaira *maraqura/varaha* 5navu autuke, tuvura *maraqura/varaha* 5navuvata autu kaate.

⁵ Ne meqa numuara *maraqura/varaha* autuke, ni naahoqi tuvuravano kara qoraiqama nimitre vaira *maraqura/varaha* autuke, vira vara kaivaro Isarerri Variqa *Vokise* hampata vuarire.

Ne mintima keha Isarerri Variqa autu tuahera kaivaro, viva kia qaiqaa nintave, ni variqave, ni vatave, qoraiqama nimitaraitiro, ni vehakumae nimitaanarove, kiae mintianarove? ti.

⁶ Vinavuka minti tivake qaiqaa tiha, Isipi vatanaaka Pero vaiinti hampata nái avu aato kempukaiqamate Isarerri kia ho vivarave tiara kaara Isarerri Variqavano Isipi vika ntaihamma kaintema kero, hauri nivata ntaihaantorave. Isarerri Variqavano vika vogama kero qoraiqama nimitaira kaara ekaara vitini Isipi vika Isarerri qaqi kaamanta vuarave.

⁷ Ho iriate. Ne qaraaka ohi veka vo autuke, viraqaahai purumakau nahe taaraqanta kia rumpataivarvo kaiqa varainara vitanta naativano qaqi naama ne vainara rantake vare aniate. Ne purumakau vitanta vare vuru ohi veka viraqaahai kantaruma taate. Mintimake viraqaahai vitanta naati ntita vare vuru avutaqti kaate.

⁸ Ho Nora Kotira *Vokise* vara vaari ohi veka viraqi vataate. Vika Variqavano ni qora okara nunka nimitaariire ti, ne tuvuravata *meqavata/veqavata* *koriqohai* autute haikara varake vo *vokiseqi* vate, *vokise* vira vara vaari Kotira *Vokise* tataaqa vate, viraqaahai purumakau vitanta ruhaaqi kaimanta ohi veka vira raraau vare náitanta vuataa ina aararaqaa vuute.

⁹ Vitanta vi vaimanta ne aitutihā tavaate. Vitanta kia náitanta naatitanta avutaqti kenaini viraiti, qaqrake, Isarerri vatuka vo, Beti-Semesini vi varia aararaqaa vivera, ne ho mintima tivarave: Quqaama Isarerri Variqavanoma tinavuqi qora maara vara kaivaro tuvivo, tivarave. Ne tavaimanta vitanta ohi veka raraau vare kia mini vivera, ne mintimama tivarave: Kia Isarerri Variqavanovauve nora maara vara kaivaro tinavuqi qovaraiqivo. Nai quminama maaravano tinavuqi qovaraiqivo, tivarave, ti.

¹⁰ Vinavuka minti tumanta vika vinavuka uva tuntemake, purumakau nahe taaraqantaqaa qaraaka ohi veka aututora kantarumate, viraqaahai vika purumakau nahe vitanta naati ntita vare vuru náitanta avutaqti vaati ke,¹¹ viraqaahai vika Nora Kotira *Vokisevata*, *koriqohai* *meqavata/veqavata*, tuvuravata autuke vato *vokisera* viravata vara vaari ohi vekaqti vatora.

¹² Vika minti mintimake, viraqaahai purumakau vitanta ruhaaqi komanta vitanta ohi veka vira raraau vare viha, kia hampi vo aara vo aaraqaa viraiti, avuqavuqamake Beti-Semesi aaraqaa viha *mmm mmm* tivaqti vi vaura.

Vitanta aaraini vi vaumanta Pirisia avuhainaa vaiinti 5navuvano ohi veka vira ampeqamake vare vivi, Beti-Semesi aumanto oruntora.

¹³ Mini oruntomanta Beti-Semesihainaaka uqita kanta vaiha *uiti* ututora teqe vaiha vutu aaraini tavovaro Kotira *Vokisevano* mini vauvaro vika muntukaqhairo quahara haikavano qovaraiqumanta vaura.

¹⁴⁻¹⁵ Purumakau vitanta ohi veka raraau vare Beti-Semesihainaa vaiinti vo, Iosuaara naaho vaunaini nora ori tataaqa himpite vaumanta Rivaira ankuqihai vaiinti vonavu aninte, Nora Kotira *Vokisevata*, *koriqohai* aututo haikava vau *Vokiseravata* varake, ori viraqaa vaari vatora.

Ho vinavuka mintumanta vaiinti nahenti vika Nora Kotirara quahama amitareka, ohi veka vira rakavuke iha quarate, purumakau nahe vitanta aruke *ofaa* Nora Kotira ekaara kaintu iha quara amitora.

¹⁶ Vika mintumanta Pirisia vika avuhainaa vaiinti 5navu niaraini vaiha ampeqamake taveke, vohaa vi entaraqai vika anirante nái maaqa Ekaronini vura.

¹⁷ Pirisia vika Noravano Kotiva nái qora okara autura nunka nimitaariire ti, vika nái nora vatuka 5navu, Asadotive, Gaasave, Asakelonive, Getive, Ekaronive, vinavurara iriha *maraqura/varaha* 5navu aututora.

¹⁸ Pirisia avuhainaa vaiinti 5navu raqiki vau vatukara, vaantaavura ututorave, qaqi vau vatukarave, virara iriha, vika *kori oriqohai* tuvura *maraqura/varaha* aututora.

Nora Kotira *Vokise* varake vato oriva, Beti-Semesihainaa vaiinti Iosuaara naahoqi vaura. Vate maa entaravata nora ori viva qaqi mini vaimanta vaiinti nahenti vi orira taveha, vi entara qovaraiqura viraravata iriha variara.

¹⁹ Ho *Vokise* viva mini vaumanta Beti-Semesihainaa vaiinti vonavu tiha, Kaiqe *Vokise* avutaqti tavaata tivake, viraqi qantuake tavora kaara Noravano Kotiva vihainaa vaiinti 70navu arukora. Mintumanta vaiinti nahenti Noravano Kotiva vinavuka arukorara iriha, noraiqamake iqj ratora.

²⁰ Vika mpo ike ti, Nai tavave Noravano Kotiva nai vogama kero takuukero vai Variqara avuqaa ho himpi varianarove? Viva tinavuara arara itairera, kia vovanovata qaqi himpi varianarove. Oho, tenavu tainie *Vokise* vira vara kaariraro vuanarove? ti.

²¹ Minti tivake vika vaiinti vonavu nititomanta vinavuka Kiriati-Jearimi vatukaqi vaukara tiha, Pirisia vika Nora Kotira *Vokise* vara kaavaroo qaiqaa tenavu unanaini ani vaivo. Ho ne tuvu vira vare vuru nenta maaqaini vataate, tura.

7

¹ Vika minti tumanta Kiriati-Jearimihainaaka Nora Kotira *Vokise* vira ani vare Abinadaapira naavuvano inaara ainqinaaqaa vaunaini vuru vate, Abinadaapira maaqu Eleasaara kaamate tiha, Arema Kotira *Vokise* viraqaa raqikiane, ti.

² Vika minti tivake Nora Kotira *Vokise* vira Kiriati-Jearimini naavuqi vatovaro, *Vokise* viva 20 ihi varakero naavu viraqiqai vaumanta ekaa Isareri vika mpo ike tiha, Noravaauvo, kia tinavu qaqira karaitira, tinavu kahaqiane, ti vaura.

Samueriva Isareri vika vo uva tiva nimura

³ Ho Samueriva himpiro Isareri vika ekaa tiva nimiro tiharo, Ne quqaiqamake qora aara qaqrake, Nora Kotira uva qaiqaa iriqi vireka ivera, ne vo vatanaka una variqa vaterave, una variqa nahenti Astaaetera *maraqura/varaha* haikave, qaqrake, Nora Kotira vevaaraini vaiha, Kotira kaiqa vaiinti nahentiqai vaiha, vira autuqai tuaheraqi vuate. Ne mintivaro Kotiva Pirisia vatanaka kauquqihairo ni ruaruama nimitaare, tiro.

⁴ Samueriva minti tumanta Isareri vika viva tuntemake, una variqa *maraqura/varaha* Baaliravata Astaaeteravata vara qaqrake, Nora Kotira autuqai tuaheraqi vi vaura.

⁵ Vo enta Samueriva Isareri vika naarama kero tiharo, Ne Misipaa vatukaini ani ruvaaqumavi vaiqe te Nora Kotira ni aarama nimitaare, tiro.

⁶ Ho Isareri vika Misipaa vatukaini ani ruvaaqumavi vaiha namari kaqakeha kia naraiti, Nora Kotira *ofaa* amiteha namari vira qaqi vata kanta qihiae vaura. Vohaa vi entara vika karavata qioqamate kia naraiti, qaqi variqi vi, entama kora. Vika nái qora kaiqa varo uvaravata tiva qovarama keha tiha, Mpo, tenavu Nora Kotira uva raqakeha qora kaiqa vare vaunarave, ti vaura.

Samueriva Misipaa vatukaini vau entara viva Isareri vika qiata vaiinti vaharo vika uvavata iriharo avuqavuqama nimite vaura.

⁷ Ho Pirisia vika Isareri Misipaa vatukaini ruvaaqumavi vaurara iri, viraqaahai vika avuhainaa vaiinti 5navuvano nái iqoka vaiinti ntita vare oru Isareri hampata iqoka raqireka vumanta Isareri vika anura iri, voqamake gete vaura.

⁸ Vika Samuerirara tiha, Mpo, are tinavu Variqa Nora Kotira aaramaqira vihara kia taiqa karaitira, qaqqai aaramaqira vi vairaro viva Pirisia kauquqihairo tinavu ruaruama timitaare, ti.

⁹ Vika minti tuvaro Samueriva sipisipi naati vo varakero vira arukero Nora Kotira *ofaa* kainti iha quara amiteharo viva Isareri kahaqiarire tiro, vira aarovaro Noravano Kotiva Samueriva tu uvira iriro Isareri vatanaka kahaqama nimitora.

¹⁰ Samueriva Nora Kotira *ofaa* qaqi iha quara amite vaumanta Pirisia iqoka vaiintinavu aumanto aninte Isareri hampata raqireka auti vauvaro Noravano Kotiva tuvaro naaru-vaihairo naaruvuvano Pirisia iqoka vaiinti qiata vau takaa ti vaumanta vika avu aatovano hampiqi vaumanta qetake ruqeqaamake vi ani vaumanta Isareri vika naatara kora.

¹¹ Isareri vika Misipaa vara maini ke Pirisia iqoka vaiinti ntataqi viha airi vaiinti aruqi vivi, Beti-Kaa aumanto oruntora.

¹² Mintuvoro viraqaahairo Samueriva ori nora vo varakero, Misipaa vatuka hini Seni vatuka hini tavaarana ori vira vuru vaaviarama tero tiharo, Te maa orira autu ntehama, *Ebe-Nesaave - Kahaqama-Timitai-Orirave*, turo. Noravano Kotiva vate tinavu kahaqama timitairara irihama te minti turo, tura.

¹³ Ho Isareri vika Pirisia naatarako entaraqaahairo Noravano Kotiva Pirisia vika kuvi komanta, vika Samueriva vau entara kia qaiqaavata Isareri vataaimi iqoka raqireka ani vaura.

¹⁴ Haaru Pirisia vika iqoka raqihaa Ekaronivata Getivata, vi vatukatanta tavaarana vau vatukara vonavuvata varora qaiqaa Isareri nái nimumanta varora. Vi entara Isareri kia Kenaana vatanaka hampata raqiraiti, qaqi maateraiqihaa vaura.

¹⁵ Ho Samueriva nai qaqi vau entara Kotira kaiqa vara amiteharo Isareri vikaqaa raqikiqiro vi vaura.

¹⁶ Vo ihi vo ihi Samueriva Betelinive, Giligaalinive, Misipainive, vi aniharo Isareri vika uva iriharo avuqavuqama nimite vaura.

¹⁷ Viva mintima keharo anirantero nai maaqa Ramaini oru vaharo vika uvavata avuqavuqama nimite vaura. Viva mini vaharo Nora Kotira *ofaa* tainta vo autu amitora.

8

Avuhainaa vaiinti vo kaama timitaane tura

¹ Samueriva naampaiqama viro nai maaqutanta noraiqama komanta vitanta Isareriqaa raqikiqi vi vaura.

² Samuerira maaqu hoqarenaava Joeliva vauvaro vira qata Abiaava vaura. Vitanta Beseba vatukaini vaiha vaiinti nahenti uva avuqavuqama nimite vaura. ³ Vitanta kia náitanta qova koqe kaiqa varontemake vararaiti, vitanta monu varerara noraiqaaake iriha, qutaru monu naarumake vareha vika uva kia avuqavuqamake iriraiti, hampiqama keha iri nimite vaura.

⁴ Mintura kaara Isareri nora vaiintinavu Samueriva Ramaini vaunaini orunte ru-vaaqumavi ⁵ virara tiha, Ho are iriane. Are naampaiqama vuaramanta ai maaqutanta kia are koqe okara autuanantemake autiraiti, vitanta qora okarama auti variavo. Vira kaara are vaiinti vo noraiqama kairaro viva tinavu avuhainaa vaiintiqama viro vaiharo tinavuqaa raqikiarire. Ekaa vo vatanaa vo vatanaaka avuhainaa vaiinti vataantemake, tenavuvata vo vataare, ti.

⁶ Nora vaiinti vika minti tuvaro Samueriva vika avuhainaa vaiinti vo kaama timitaane tu uvarara kia quaharaitiro, vikara tiharo, Kaiqe te Nora Kotira aaraariraro viva vonare tirage ni tiva nimiae, tiro.

⁷ Minta tivakero viva Nora Kotira aarovaro Noravano Kotiva Samuerira tiva amiro tiharo, Ho are ekaa vika ti uvvara iriane. Vika kia arivauve qoririmake variavo. Vika ti Kotika vika avuhainaakama qoririmake variavo.

⁸ Oho, haaru Isipiqihai te Isareri vika ntita vare viri kauna entaraqaahai vika ti tauvaqa utu timitehama una variqa autuqai tuaheraqi aniavaro vate maa entava anintaivo. Ho vika ti qoraiqama timitaantemake, vohaa vikaqai aivata qoraiqama amite variavo.

⁹ Ho minti tiarara irihara are nái tiantema kera, are vaiinti vo noraiqama kairaro viva vika avuhainaa vaiintivano variarie, turo. Are mintima keravata, vikara raurihi variate tiane. Avuhainaa vaiintivano vikaqaa raqikiharo nana nana okara autuainarave, nana nana qora maara vikaqaa vataainarave, virara virara vutukera vika tiva nimiae, tiro.

¹⁰ Viva minti tuvaro Samueriva vika avuhainaa vaiintiara naarumatoka vaunaini oruntero, Noravano Kotiva tu uvvara ekaa vika tiva nimura.

¹¹ Viva tiharo, „Ne kia paparugama keha tiriara avuhainaa vaiinti vo noraiqama timitaane tiate. Ne kiae iriavo?“ Avuhainaa vaiinti vovano niqaa raqikiharo niara minti minti iatema tianarove: Viva ni maaquvara ntita vatairamanta vika vira iqoka vaiintiqamavi vaivarave. Vokika vika iqoka *kaariqi* ni vaimanta, vokika ohiiqa oquivi nivarave. „Vaiinti nahenti vinuate ti,“ vokika avuhainaara iqoka *kaariqi* avuni kantamaqi vivarave.

¹² Viva vokika noraiqama kaira vika 1,000 iqoka vaiintiqaa raqikimanta vokika 50navuqaa raqikivarave. Viva ni maaqu vokika ntita vataira vika avuhainaara naaho kaiqa vara amiteha vata quive, kara ututaivaro karavano mpeqaqinara qantu vare vira vira amitevarave. Vokika ntita vataira vika auvihehavaave, iqoka *kaarive*, autu amitevarave.

¹³ Viva ni raavura vokika ntita vataira vika avuhainaara koqe unta i vahaverara autu amiteha, vo kara vo karavata unta amitevarave.

¹⁴ Viva ni koqe vatave, *uaini* naahove, *orivi* naahove, niqahaairo varakero, nai kaiqa vaiinti vika nimianarove.

¹⁵ Ne *uitive*, *uaini* tavave, varake, 10navu vateraqihai rairake vohaiqa vira amivarave. Viva vi karara varakero raira kero nai qiata vaiintive, qaqi kaiqa vaiintive vika nimianarove.

¹⁶ Vira kaiqa vara amitaate tiro, avuhainaava viva ni kaiqa vaiintive, ni kaiqa nahentive, ni purumakauve donkive koqekaqaima varaanarove.

¹⁷ Viva ni sipisipi 10navuqihairo vohaiqama varaanarove. Ne vira paanaa kaiqa vara amitekama vaivarave.

¹⁸ Naantiara avuhainaa vaiinti viva niqaa vi maarara vataira vi entara ne mpo ike tivaqiqi viha nuntu nauntu tihama Kotirara tinavu kahaqiane tivarave. Ne nentama vi vaiintira noraiqama taavaro viva avuhainaa vaiintiqama virara ti, Noravano Kotiva vi entara kiama ní uva irianarove, tiro.

¹⁹ Samueriva minti tumantavata, vika kia vira uva iriraiti, vika kempukaiqamake tiha, Avuhainaa vaiinti vo tinavu noraiqama timitairaro viva tinavuqaa raqikiarire.

²⁰ Tenavu vo vatanaa vo vatanaaka variantemake variariraro tinavu avuhainaa vaiinti viva tinavuqaa raqiki vaiharo, tinavu tivita varero avuni viraqe tenavu navutaaka hampata iqoka raquare, ti.

²¹ Vika minti tuvaro Samueriva vika uva iriro vuru Nora Kotira tiva amuvaro
²² Noravano Kotiva vira tiva amiro tiharo, Hove. Are vika uva avatehara vika avuhainaa vaiinti vo kaama nimitaane, tiro.

Minti tuvaro Samueriva Isareri vika tiva nimiyo tiharo, Ne ekaa nenta maaqa nenta maaqaini oru vase naantiara te qaiqaa ni naaraare, tiro. Samueriva minti tura.

9

Soruva nai qora donkinavu rantareva vura

¹ Benaminira ankuqihainaa vaiinti vo vira autu Kisiva vaura. Kisiva airi haika vatova vauvaro vira autuvanovata nora autu vaura. Vira anku okaravano maantimama vairo:
 Kisira qova Abieliva vauvaro
 Abielira qova Serova vauvaro
 Serora qova Bekoraatativa vauvaro
 Bekoraatira qova Afiaava vaura.

² Kisira maaqu vo vira autu Soruva vaura. Soruva qaraaka vaiinti koqe viri vaata vataava vauvaro Isareri vikaqihai kia vovano Sorura voqaantema kero vukai vuhaantaari vataava vauvaro Soruva ekaa Isareri vikavata uri naatara kero vukai vaiintivano vaura.

³ Ho vo enta Kisira donki vonavu ruqemake vi anima vi kakakima vura.

Mintuvaro Kisiva nai maaqu Sorurara tiharo, Are kaiqa vaiinti vo vita varera vikantira oru donki vika ranta timitaane, tiro.

⁴ Minti tumanta vitanta himpi verara Efaraimunivata, vo vata Salisainivata rantaqi viha tavomanta donki vinavuka kia mini vaumanta vitanta Saliminivata oru tavomanta kia vaumanta viraqaaahai vitanta Benaminira ankuvano vau vataro minivata oru tavomanta kia vaura.

⁵ Titanta mintiaqi vi, Sufu vatuka vaunaini orunte, Soruva nai kaiqa vaiintiara tiharo, Ho aniqetanta qaqirake anirante maaqaini vuure. Hauri ti qova donki vikara kia noraiqama kero iriraitiro, titantara noraiqaa kero iriantorave, tiro.

⁶ Soruva minti tuvaro vira kaiqa vaiintivano virara tiharo, Ho iriane. Sufu vatukaqi Kotira uva tiva nimi vai vaiintiva vovano vairave. Ekaa viva ti vai uvava quqaaqai vairara ti, vaiinti nahenti vi vaiintira nora autu amiarave. Aniqe tetanta viva inaini oru vuariraro viva titantara donki vikara mini mainima variavo tainara iriare, tiro.

⁷ Viva minti tuvaro Soruva nai kaiqa vaiinti virara tiharo, Ho tetanta viva inaini oruntaarer, nana haikae vira amiararave? Titanta karavano taiqa vivaro qumina utaqaima vaivo. Tetanta vo haika vira amiarirava kiama vaivo, tiro.

⁸ Soruva minti tuvaro vira kaiqa vaiintivano tiharo, Te *silvaa* monu inaaraiqa ntua tauro. Te vira amiariraro viva donki vika ta mantarainie vairara titanta tiva timiarire, tiro.

⁹⁻¹¹ Minti tuvaro Soruva virara tiharo, Ho are koqema tiaro. Aniqetanta kukeqavi vai haikara tave vai vaiintira oru tavaare, tivake vitanta Kotira uva tiva nimi vau vaiintiva vaunaini vireka vura. Vi entara Isareri vatanaka paropeti vaiintiara viva kukeqavi vai haikara tave vai vaiintivama vaivo ti vaurara tiro, Soruva minti tura.

Ho vitanta vivi, vuruni vau vatukara umanto oruntomanta varaatanavu vatukaqihai namari kaqareka tuvumanta vitanta vinavuka ireha tiha, Kukeqavi vai haikara tave vai vaiintiva vatukaqi vairove kiae vaivo? ti.

¹² Minti tumanta varaata vika vitanta tiva nimi tiha, Eo, kukeqavi vai haikara tave vai vaiintiva vatukaqima vaivo. Vaiinti nahenti vururaga Kotira *ofaa* iha quara amiterara iriharo viva vate viqanama vatukaqi uruntaivo. Viva naanema nitanta avuni vivo. Netanta kante oru vira ranta kaate, ti.

¹³ Varaata vika minti tivake qaiqaa tiha, Netanta vatukaqi oriqete tavaivarava viva varianarove. Viva varikeroma vururaga vuanarove. Vururaga variaka kia vaaka kara naraiti, vira veka vaivarava viva vika inaini oruntero Kotira *ofaa* iha quara amiterara iriharo Kotirara koqeve tiramanta, viraqaaahai viva naarama taika vi karara nevarave. Netanta kante orunte homa vira tavevarave, ti.

¹⁴ Minti tumanta vitanta vaantaavura qentiana orunte tavovaro Samueriva nora vatukaqihairo vuruni vaiinti nahenti ruvaaqumavi vaunaini vuare tiro anura.

¹⁵ Soruva vi vatukaraqi anu entara vira naantiara toqagi Noravano Kotiva Samuerira tiva amiro tiharo, ¹⁶ Hura toqagi te Benaminira ankuqihai vaiinti vo atitaariraro are inanaini anianarove. Are vi vaiintira noraiqama tehara vira qiatqaa vahavera aqu amitairaro viva tinta vaiinti nahenti Isareri vika avuhainaa vaiintivano variarire. Te tavauramanta Pirisia vatanaka nora maara Isareri vika nimi variamanta vika ike mpo

ti varia uvara te irunarave. Ho vi vaiintiva Pirisia vika kauquqihairo Isareri ruaruama nimitaanarove, tiro.

¹⁷ Minti tuvaro vira qararaa Soruva Samuerira avuqaa qovarama vuvaro Noravano Kotiva Samuerirara tiharo, Ho tavaane. Te enta ai tiva amuna vaiintiva, maa vivama vaivo. Viva ekaa ti vaiinti nahentiqa raqikianarove, tiro.

¹⁸ Minti tuvaro Soruva nora vatuka qentiana Samuerira ranta kero irero tiharo, Kukeqavi vai haikara tave vai vaiintira naavu tainie vaivo? tiro.

¹⁹ Minti tuvaro Samueriva vira tiva amiro tiharo, Te maa vikama vauro. Are kantera ti tivuni oru vururaqaa ruvaaqumavi varianaini vahihara vate ti vataakera kara naane. Hura toqaqima are nana nana haikara irenara te ai tiva ami, viraqaaahai te ai atitaarirara vinarave, tiro.

²⁰ Minti tivakero viva qaiqaa tiharo, Te iruraro ni donkinavu kakakima vuavaru taaramo entama aitarairo. Ho kia vikara noraiqaa kera avu aato utuane. Vo vaiintinavu donki vika rantama kaavo. Ho iriane. Isareri vatanaaka ta vaiintirarae voqamakero antuqa arimanta variavo? Vika ariaravata ai qora ankuaravata antuqa arimanta variavo, tiro.

²¹ Viva minti tuvaro Soruva aqao tiro, Te Benaminira ankuqiraakama vauro. Isareri ankuqihai Benaminira anku taaraqavano tuvitarero vitini vairave. Vi ankuqihairo ti qora ankuvano ekaanaini vitini vairave. Mintivarama are nantivarae vi uvara tiriara tiaro? tiro.

²² Minti tuvaro Samueriva Soruravata vira kaiqa vaiintivata ntita varero vuruni vau naavuraqi origetero, nora *rumu* vauraqi oru vaura. Vi *rumuraqi* Samueriva vaiinti 30 navu naarama komanta kara nareka oquivi vuvaro Samueriva vika vauraqihairo oritarero avuni vau taintaraqaa Soruravata vira kaiqa vaiintivata oquivuate tumanta oqu vuvaro ²³ Samueriva kara unte vau vaiintira tiva amiro tiharo, Te mati ai amiha vira tinta mitimaane turara vataanara, are vira varera aniane, tiro.

²⁴ Minti tuvaro kara unte vau vaiintiva purumakau aiqu mati koqera varero vuru vi *rumuraqi* Sorura avuqaa vatovaro Samueriva Sorura tiva amiro tiharo, Are te naarama taura vaiintika hampata kara naane ti, te maa matira ariara iriha kaama taunarave. Ho vira naane, tuvaro Soruva vi entaraqaa Samuerikantiro vahihara kara vira nora.

²⁵ Kara namake vika Kotira *ofaa* iha quara amite vau vatukara mini ke ururante nora vatukaini vurama. Mini vuvaro entama vuvaro Samueriva nai naavu qiata tanuqi kanta taari vuqi amitovaro Soruva mini vaitora.

²⁶ Ho vira qararaa toqaqi Samueriva himpiro Sorura aarero tiharo, Ho himpuane. Te ai atitaarirara nena maaqaini vuanerama turo, tivakero viva Sorukantiro vahaqaini vevante vura.

²⁷ Vitanta vivi, nora vatuka aaqaini orunte, Samueriva Sorurara tiharo, Nena kaiqa vaiinti tiva amiraro viva naane avuni vuarire, tuvaro vira kaiqa vaiintivano avuni vuvaro Samueriva qaiqaa Sorurara tiharo, Are inaaraiqakaa tintira maini vairage te Kotiva ariara ti uvara ai tiva amiare, tiro.

10

¹ Minti tivakero Samueriva *orivi* vahavera taqu varakero vahavera vira Sorura qiatagaqaa aqu amitero vira moqa kero tiva amiro tiharo, Are Nora Kotira vaiinti nahenti, Isareri vikaqaa raqikihara vika avuhainaa vaiintivano variane tiro, Noravano Kotiva ai kaama tero ai noraiqama kaimantara ti, te ariqaa vahavera aqu amitauro.

Are Isareri vikaqaa raqikiharama navutaaka Isareri tataaqaa hini hini variaka kauquqihairo vika ruuaruma nimitaanee. Vo haikavano ariqaa qovaraiqainara te ari tiva amiriaro are tavairaro vi haikava ariqaa qovarama virara are mintima tiane: Quqaama Noravano Kotiva nai vaiinti nahentiqa raqikiarie tiro, ti kaama taivo tinarave.

Vi haikava maantima keroma qovaraiqianarove: ² Are ti maini kera vivira, Benamini vatainai Selsa vatukaini otu ntenarave. Are mini otuntera, Reserira ori onavuqi quntama tora tataaqaa tavairaa vahihara are tavaqantavano ariara mintima tivarave: Are donkinavuara rante varianara rantama kaavo. Ai qova kiama donki vikara noraiqaa kero iriraitiro, viva vate ariaraqaima noraiqama kero iriharo nantiabee tenta maaqu ranta kararave ti vaivo, tivarave.

³ Vitanta minti tivara are vitanta mini kera vivira nora ogiva vo, Tabo Oqivave tianaini oruntera are taaramo vaiintinavu tavenarave. Vinavuka *ofaa* vare Betelini Kotira amireka anivarave.

Vinavukaqihairo vovano memeraa naati taaramonavu varero aniraro, vovano mpareti taaramonavu varero aniraro, vovano *uaini* taqu varero anianarove.

⁴ Vinavuka ai uva manteha ariara, Mparetia taaraqanta varenarare? tivara are hove tivakera varaane. ⁵ Viraqaahaira, are Kotira ainqinave tianaini vatuka vo Gibe, Pirisia iqoka vaiinti seri naavu maaqa kaqate varianaini vuane. Are vi vatukara aumanto oruntera tavairamanta paropeti vaiinti vonavu *ofaa* taintavano vainaihai tuvivarare. Paropeti vika ihi nteha *kitaave kule leve*, ruqutih, *tamparini* tuateha rintatimaqi viha, *anumaara/noma* vuaqeha Kotira uva tiva qoqaiqama keha tuvivarare.

⁶ Vinavuka mintimiqi tuvivaro Nora Kotira Maraqravano ariqira tuvu vahiaro ai kempukaiqama kairara are paropeti vaiinti vika hampata vahiaro, arevata vika autintema kera mintinarare. Kotira Maraqravano ai avu aato qaraakaiqama kairara are vo qaramakera vaina vaiintiva vainerare.

⁷ Te vate tura haikava ariqaa qovaraiqirara, are kankoma kera Kotiva aintiro variainarara irinarare. Viraqaahaira are Kotiva ai nana nana kaiqa amiainara varaqira vuane.

⁸ Are avuni oruntera Giligaalini 7 entara ti veka mini vairaqe te mini ai ranta kaare. Te mini orunte Kotira *ofaa* vo, ekaara kaintu iha quara amite, viraqaahai Kotikanti vohaa variainarara irihama *ofaa* vo iha quara amitaare. Te ainti mini vaiha are nana nana haika autirera inara te ai tiva amiare, tiro.

⁹ Samueriva minti tuvaro Soruva vira mini kero vuare tuvaro Kotiva Sorura avu aato qaraakaiqama kovaro vohaa vi entara Samueriva tuntema kero, ekaa vi haikava Soruragaq qovaraiqura.

¹⁰ Soruva nai kaiqa vaiintintiro Gibeaini oruntomanta paropeti vaiinti vika vitanta anunaini anintovaro vaakama Kotira Maraqravano Sorura kempukaiqama kovaro Soruva paropeti vika hampata vahiaro vika uva tuntema kero, vivavata Kotira uva tiva qoqaiqamake vaura.

¹¹ Soruva minti ti vaumanta vaiinti nahenti tota Sorura tavoka tavovaro Soruva paropeti vika hampata Kotira uva tiva qoqaiqamake vaumanta vika nai ire nai ire iha tiha, Nana haikavanoe Kisira maaqu Soruragaq qovaraiqivo? Soruva vivavatae paropeti vaiintiqama vivo? ti.

¹² Vika minti tuvaro vihainaa vaiinti vovano aqao tiro, Te tavauramanta paropeti vaiinti maaka qoka vikavata kia paropeti vaiinti variarare, tura. (Sorurara *vivavata paropeti vaiintiqama vivo* tu uvava vi anumanta vika tavaavarvo vo vaiintivano kia nai qova varai kaiqara vararaitiro, qaraaka kaiqa vare vaumanta vika vi vaiintirara tiha, Ike tavaate. Vivavatae paropeti vaiintiqama vivo, ti vaura.)

¹³ Ho Soruva Kotira uva tiva qoqaiqama taiqa kero, viraqaahairo viva *ofaa* taintavano ainqinaaqaa vaunaini vura.

¹⁴ Soruva nai kaiqa vaiintintiro maaqaini anuvaro vira qova vovano vitanta irero tiharo, Ike, netanta taini vuanaahaie aniaivo? tuvaro Soruva tiharo, Tetanta donkinavu kakakima vuakara qumina ranteha tavauramanta kia variaverama tetanta Samuerira oru tavema anuro, tiro.

¹⁵ Minti tuvaro viva tiharo, Samueriva nitantara nana uvae tivo? tuvaro ¹⁶ Soruva vira tiva amiro tiharo, Samueriva titanta mintima tiva timiro tiharo, Vo vaiintinavu donki vika rantama kaavo tivo, tiro. Viva minti tiharovata, Samueriva nai avuhainaa vaiintiqama vuainarara kiama nai varaqora vira tiva amura.

Soruva avuhainaa vaiintiqama viro vaura

¹⁷ Samueriva Isareri vika ekaa naarama komanta vika Misipaa vatukaini ani Nora Kotira avuqaa ruvaquamavi vaura.

¹⁸ Vika ruvaquamavi vauvaro Samueriva vikara tiharo, Noravano Kotiva tinavu Isareri Variqavano mintima tivo:

Te Isipiqlihai ni Isareri ntita vare anunarare. Isipi vikavata vo vatanaakavata ni Isareri qoraiqama nimite variamanta te vika kauquqlihai ni ntita vare anunarare.

¹⁹ Ne qora okaraqive, vo maara vo maaraqive variamanta te ni Variqavano viraqihai ni ruuaruama nimite vaunarare.

Te minturamantavata, ne ti qoririma keha tiha, Are vaiinti vo noraiqama kairaro viva avuhainaa vaiinti vahiaro tinavuqaa raqikiqiro vuarire, ti variarare. Ho vatemata ne vo anku vo anku ruvaquamavi, ti Nora Kotika avuqaa himpite variate. Noravano Kotiva niara mintima tivo, tiro.

²⁰ Samueriva minti tivakero ekaa vo anku vo anku aumanto ani variate tuvaro Noravano Kotiva ekaa vi ankukaqihairo Benaminira ankuqai kaamatora.

²¹ Mintuvaro Samueriva Benaminira ankuqihairo inaara anku, vo anku vo anku naaromanta anuvaro Noravano Kotiva vi ankukaqihairo Matirira ankuqai kaamatora.

Qaiqaa Samueriva tumanta Matirira ankuvano anuvaro Noravano Kotiva vikaqihairo Kisira maaqu Soruraqai kaamatora. Ho vika Sorurara ranteha tavovaro kia viva mini vaura.

²² Vika Nora Kotira ireha tiha, Ike, vi vaiintiva tainie vaivo? tuvaro Noravano Kotiva vika tiva nimo tiharo, Ne vo haika vataara vira avutaqima Soruva kukeqaviro vaivo, tiro.

²³ Noravano Kotiva minti tumanta vika kante oru Sorura vita vare aninte tavovaro Soruva vukai vaiinti vaharorar tiro, viva vaiinti nahenti avutana himpiro ekaa mini vauka naatarakero vukai vaiinti vaura.

²⁴ Ho vira vita vare anuvaro Samueriva vaiinti nahenti tiva nimo tiharo, Noravano Kotiva kaama tai vaiintira ne tavaate. Kiama niqihairo vo vaiintivano Sorura voqaantema kero vaivo, tumanta ekaa vaiinti nahenti naveraitiha, Soruva tinavu avuhainaava vaiintivanaoma vaivo. Viva avuhainaava vaharo vukaiqamakero qaqi variqiro vuanarove, tura.

²⁵ Minti tuvaro Samueriva avuhainaava vaiintivano vaiinti nahentiqaa raqikiaina okarara vika tiva nimo, viraqaahairo viva vi uvvara vukuqi qara ntua tero, vuku vira vareru vuru Nora Kotira naavuqi vatero, viraqaahairo Samueriva vaiinti nahenti nititomata nai maaqa nai maaqaina vura.

²⁶ Soruvavata anirantero nai maaqa Gibeaini vura. Viva mini vireva uvaro Kotiva kempuka vaiinti vonavu avu aato vara himpuma komanta vikavata Sorura airuqama vare vura.

²⁷ Mintumantavata, qora vaiinti vonavu voqamake antua ti vauka tiha, Aqao, nantima keroe maa vaiintiva tinavu ho kahaqianarove? ti. Vika Sorurara iri qoraiqama amiteha, kia quahara haikavata vira amura.

Mintuvarovata, Soruva kia vikara vo uvavata tiraitiro, evaara vaura.

11

Soruva Amoni vatanaaka naatara kora

¹ Soruva nai maaqaina oru vauvaro vohaa tora aitarovaro King Nahaasiva Amoni vatanaava nai iqoka vaiinti ntita varero Gileaati vataini ani Jabesi vatuka ututumatero vaumanta vihainaaka Nahaasirara tiha, Mpo, are tinavu hampata vohaa uva tiva taatau tera tinavu qaqi kairae tenavu ai hampata vahai ai vevaaraini variare. ti.

² Vika minti tuvaro Nahaasiva tiharo, Te ni hampata uva tiva taatau taarira aarava vohaiqaqaima vaivo. Te ni Jabesi vatanaaka kauqu tanaraini vaina avura vauru qaqini kaari ekaa Isarereri vatanaaka kaurira haika varaa, tiro.

³ Minti tumanta Jabesi vatanaaka qiata vaiinti vika vi uvara iri, Nahaasirara tiha, Are 7 entanavuara vekaiqi vairaqe tenavu vaiinti nititari vika oru Isarerini vi anihia tiva nimimanta vika ani tinavu kahaqiate. Kia tinavu kahaqi vaiintika vaivera, homa are tinavuqaa raqikinarave, ti.

⁴ Minti tivake vika vaiinti vonavu nititomanta Isarerini vi anura. Vi vaiintika Sorura vatuka Gibeaini orunte Nahaasiva tu uvvara vihainaaka tiva nimumanta vika vi uvara iri qeteha noraiqaake iqi rate vaura.

⁵ Ho Soruva kaiqa varonaihairo kaiqa varo purumakauka ntita varero aniharo irumanta vaiinti nahenti iqi rate vauvaro viva anintero vika irero tiharo, Ne nana haikarae iqi rate variavo? tumanta vika Jabesihai anu vaiintika tu uvvara Sorura tiva amura.

⁶ Soruva vika tu uvvara iruvaro Kotira Maraqravano vira kempukaiqama kovaro Soruva voqamakero arara itovaro vaura.

⁷ Mintuvaro Soruva kaiqa purumakau taaraqanta arukero teqa taaqama kero vaiinti nimo tiharo, Maa varema vuru Isarereri vaiinti vika numiheha mintima tiate: Ta vaiintivae kia Soruva Samuerika kahaqihairo Amoni vatanaaka hampata raqirera, Soruva purumakau maa teqa taaqama kaintema kero, viravata teqa taaqama kaanarove tiate, tivakero vaiinti vika nititama komanta vika vi anihia vi uvvara tiva nimura. Isarereri vika vi uvvara iruvaro aatu itomata Nora Kotira aatu qeteha ekaa vika himpi anuvaro kia vaiinti vovanovata maaqaina vaura.

⁸ Vika hihai hihai Soruva vaunaini Besekini anuvaro viva tavomanta Iutaa vaiinti vaireka, 30,000 vaiinti vaumanta hini Isarereri vaiinti vaireka, 300,000 vaiinti vaura.

⁹ Soruva Jabesihainaa vaiintinavuara tiharo, Nenavu nenta navunaaka vuru tiva nimiate: Hura kuarivano qiatagaqaa uruntairae tenavu ani ni ruaruama nimirarerave tiate, tumanta vika vi uvvara vuru Jabesiqi vauka tiva nimumanta vika vi uvvara iruvaro vika muntukaqihairo quahara haikavano qovaraiqura.

¹⁰ Vika Nahaasira tiva ami tiha, Hura tenavu tentanavu auvihehavaa qaqirake ai vevaaraaini variarirara are tinavuqaa nana haika autirera irera, homa autinarave, ti.

¹¹ Vika minti tivake vauvaro Soruva nai iqoka vaiinti rairakero taaramo anku autukomanta vira qararaa kia anoma aatitoraqaa vika kante oru Amoni vika *seri* naavu maaqa kaqatonaini orunte, vika hampata raquqi viha vika aru ntataqi vi vauvaro kuarivano qiatagaqaa uruntomanta Amoni iqoka vaiinti vika vohaiqa vohaiqavano qetake rugemake vi anura.

¹² Mintumanta Isareri vika Samuerirara tiha, Tuvana vaiinti vonavu Sorurara hauri viva tinavuqaa raqikiantorave tiaka ntita viri kairage tenavu vika arukaare, tuvaro ¹³ Soruva aqao tiro, Vate Noravano Kotiva Isareri ruaruuma nimitairara ti, kia tenavu tentanavu navunaaka vikaqihai voqavata arukarerave, tiro.

¹⁴ Manti tuvaro Samueriva himpiro vaiinti nahentiara tiharo, Aniqe tenavu Giligaalini orunte mini vailha qaiqaavata Sorurara viva tinavu Isareri avuhainaa vaiintivano vaivo tiare, tiro.

¹⁵ Manti tumanta ekaa vika Giligaalini orunte Nora Kotira avuqaa uva tiva qovaramake tiha, Soruvama tinavu Isareri avuhainaa vaiintivano vaivo, tivake *ofaa* vo, Nora Kotira hampata vohaa vairara iriha Nora Kotira iha quara amitora. Mintimake Soruvavata ekaa Isareri vikavata voqamake quahora.

12

Samueriva Isareri vika uva tiva nimura

¹ Ho Isareri vika Giligaalini ruvaaqumavi vauvaro Samueriva himpiro vika tiva nimiro tiharo, Ne iriate. Ne tiriara mintiane tiantemake, te ni avuhainaa vainti vo nimuro.

² Viva ti vatuka varero avuhainaa vaiintivano vaiharo ni qjata vaiti variaranarove. Te naampaiqama vuraro ti qjataqi erera arataivarо ti maaqu vikavata ni hampata variavo. Te qraaka vaitiintakahai ni qjata vaitivano variqi anima vate naampaiqama vuro.

³ Ho vate te ni nivuqaama himpiti vauro. Te ni qoraiqama nimitauna uvava vairera, ne vate homa Nora Kotira avuqaavata, viva kaamatia vaitintira Sorura avuqaavata, tijaa uva vatevarave. Tara kaiqa purumakauve, donkive, te raqia varaunarave? Ta vaitintirae te unaqaraiqama keha viva i haikara muara varaunarave?

Ta vaitintirae te qoraiqama amiteha nora maara viraqaa vataunarave? Ta vaitintira kauquqihiae te qutaru monu varaunarave?

Te mintimake ni qora kaiqa vara nimitaurava vairera, ne ti tiva timiqe te homa vi uvara avuqauv qjainarave, tiro.

⁴ Manti tumanta vika Samuerirara aqao ti, Are kia tinavu unaqaraiqama kehara tinavu airaira voqavata varaanaravauve. Are kia tinavu qoraiqama timithera nora maara tinavuqaa vataanaravauve. Are kia vo vaiti qaqi kaararo viva qutaru monu ai amivara varaanaravauve, ti.

⁵ Vika minti tuvaro Samueriva vikara tiharo, Vate Noravano Kotivavata, viva kaamatia vaitintivava, vitanta tave variamanta ne tiriara tiha, Viva kia qora kaiqa voqavata tinavu vira qoraiqama timitairave tiavo, tumanta vika tiha, Eo ququaama tenavu Nora Kotira avuqaa vahama minti tiro, ti.

⁶ Vika minti tuvaro Samueriva qaiqaa vikara tiharo, Haaru Noravano Kotiva naivano Mosika Eronika kaama tero Isipiqihairo ni kaivaqaukavara ntita varero maini viri korave.

⁷ Ho ne himpi vaise te Nora Kotira avuqaa vailha niqaa uva vataare. Kaiqe te naane Noravano Kotiva ni kaivaqauka vikavata, nivata, koqe kaiqa vara nimitairara ni tiva nimiare.

⁸ Haaru Iekopiva nai vaintivara hampata Isipini otu variamanta Isipi vatanaaka vikaqaa nora maara vateha vika qoraiqama nimite variamanta, ni kaivaqaukavara Nora Kotirara ike mpo tiha tinavu kahaqiane ti variavaro Noravano Kotiva Mosika Eronika nititaimanta vitanta ni kaivaqaukavara ntita vare maini viri kaarave.

⁹ Vika maini ani vailha nai Variqa Nora Kotirara kia noraiqaake iriraiti variavaro vira kaara viva Hasohainaa iqoka vaitintiqaa raqiki vai vaitintira Siseraara qaqi kaivarо viva ani ni kaivaqaukavara hampata raqiharo vika naatara kairave. Vi entara Noravano Kotiva Pirisia vatanaakkavata, Moapi vatanaakkavata, qaqi kaimanta vikavata ani ni kaivaqaukavara hampata raquqi viha vika naatara kaarave.

¹⁰ Mintimanta vika Nora Kotira aareha nai qora okara tiva qovarama keha tiha, Noravauvu, tenavu una variqa Baalika Astaateka kaiqa vara nimiteha, ai uva raqake ai qaqirake tauvaqa utu amitaunarave. Mpo, vate are navutaaka kauquqihairo tinavu ruaruuma timitairave tenavu ai kaiqaqai vara amitaare tiarave.

¹¹ Vika minti tiavararo Noravano Kotiva Gideonira naane ni Isarerri nimirro, vira naantiara Baraakira nimirro, vira naantiara Jepataara nimirro, ekaara vitini ti Samuerikavata ni nimirave. Mintimanta tenavu ekaa vinavuka navutaaka kauquqihai ni ruaruuma nimitauramanta vi entara ne Isarerri ho variarave.

¹² Ne ho variqi ani, tavaavararo Amoni avuhainaava King Nahaasiva ni hampata iqoka raqireva auti vaimanta ne getake tiraria tiha, Are avuhainaa vaiinti vo kaama timitariraro vi vaiintiina tinavu raqikiharo „navutaaka naatara timitaarire tiarave.

Noravano Kotiva ni avuhainaava vaimantava, ne minti tiarave.

¹³ Ho ne avuhainaa vaiinti kaamataava maa virave. Ne virara iraavararo Noravano Kotiva maa virama ni nimivo.

¹⁴ Ne nenta avuhainaa vaiinti vira hampata Nora Kotira aatu qeteha variqi viha, vira autuqai tuaheraqi viha, vira uvavata kia raqa karaiti, viraqai avataqi vivera, ho Noravano Kotiva ni Variqavano ni koqema nimitaqiro vuuanarove.

¹⁵ Ne Nora Kotira uva kia iriraiti, viva uva vatainara viravata raqa kaivera, ho viva ni kaivaqaukavara qoraiqama nimitaintema kero, nivata qoraiqama nimitaanarove.

¹⁶ Ho ne maini himpiti vaivararo Noravano Kotiva nai kempuka kaiqa vo ni numiqairamanta ne nenta avuqohai vira tavaate.

¹⁷ Ne iriarave. Vate maa entara *uitivano* mpeqaiqi entava vaivararo kia aagu ntuaina entava vaivo. Ho vate te Nora Kotira aaraariraro viva tiraro naaruva uva tiraro aaqvata ntuarire. Ne vi haikara tave vaivararo ni aato kenko tiramanta ne mintima tivarare: Oho, tenavu avuhainaa vaiinti vo timiane tuna uvava Nora Kotira qoraiqama amitaivararo vira kaara tinavuqaa nora uvama vaivo, tivarave, tiro.

¹⁸ Minti tivakero Samueriva Nora Kotira aarovaro voahaa vi entaraqai Noravano Kotiva tuvaro naaruva uva tuvaro aaqvata ntura. Mintumanta vaiinti nahenti mini vauka tave, kauqu runkinkiri i vauha Nora Kotira aatuvala, Samuerira aatuvala voqamake qeteha vaura.

¹⁹ Vika Samuerirara ike mpo tiha, Are nena Variqa Nora Kotira aarairaro viva tinavu aaqrurahama timitariraqe tenavu kia qutu vuare. Mpo, tenavu qora kaiqa vo kaiqa vo kaiqa auti vaurauka vauha, avuhainaa vaiinti vo kaama timitaane tivakehama qora kaiqa voqavata auti vaunarave, ti.

²⁰ Vika minti tuvaro Samueriva vika tiva nimirro tihar, Kia getaate. Quqaama ne qora okara autu kaarave. Hauri vira kaara ne Nora Kotira tauvaqa utu amitevorave. Ne kia vira tauvaqa utu amitaraiti, ekaa nenta avu aato muntukaqihai vira kaiqa vara amitaqi vuute. ²¹ Kiama una variqa vika avataqi vuute. Una variqa vika qumina haikaqai vauhara ti, vika kia ho ni koqema nimitaraiti, vika kia ho navutaaka kauquqihai ni ruaruuma nimitievarave.

²² Noravano Kotiva nai antuqaqaa ni nai kaama taimanta ne vira vaiinti nahenti variarara tiro, viva nai nora autuara iriharo kiama ni qoririma kaanarove.

²³ Hauri te ni qaquirake kia ekaa enta niara iriha Nora Kotira aarama nimitaraiti, vira uva raqa kaarorave. Te ekaa entama niara iriha Nora Kotira aarama nimitaqi virerave. Koqe okarave, avuqavu ni okararave, te vi okarara vi okararavata ni numiqari ne koqemake variqi vuute.

²⁴ Noravano Kotiva niarao tiro nora kaiqa, vo kaiqa vo kaiqa ni vara nimitairara irihama, ne Nora Kotira aatu qetehama virara kempukaiqama keha iriqi viha, ne ekaa nenta avu aato muntukaqhai vira kaiqa vara amitaate.

²⁵ Ne rauriha variate. Ne qora kaiqa qaqqai varaqi vivera, Noravano Kotiva ni avuhainaa vaiinti viravata nivata vehi autu taiqama kaanarove, tiro. „Samueriva minti tivakero Isarerri vaiinti nahenti tiva nimura.“

13

Soruva Pirisia hampata iqoka raqra

¹ Soruva qaraaka vaiinti vauharo avuhainaa vaiintiqama viro Isareriqaa taara ihiara raqikiqiro viviro, ² viraqahaario viva Isarerri iqoka vaiinti ruvaaquma kero vikaqihairo 3,000 vaiinti ntita vatero, vokuka nititomanta anirante maaqaini vura.

Vika vuvaro Soruva iqoka vaiinti ntita vatokaqihairo viva 2,000 vaiintinavu ntita vatomanta nai hampata Mikimaasini Beteli aiqina vaunaini vauvaro, viva 1,000 vaiintinavu nititomanta vika nai maaqu Ionataanira hampata oru Benaminira anku vika vataini Benjaminive tunaini Gibea vatukaini oru vaura.

³ Vika mini vauvaro viraqahaario Ionataaniva nai iqoka vaiinti ntitero oru Pirisia iqoka vaiinti Geba vatukaiqai vauka hampata raquqi viharo vika naatara kora. Mintima komanta Pirisia hini kuka vi uvvara iri, Isarerri hampata iqoka raqireka auti vaura.

Mintuvaro Soruva vaiinti vonavu nittero tiharo, Nenavu ekaa Isareri vataini oru vi anihā *aanumaara/noma* vuqaqimanta iqoka vaiinti ani ti Soruka kahaqiate, tiro.

⁴ Minti tumanta vi vaiintinavuka vi anihā vaiinti nahenti tiva nimi tiha, Soruva raqiharo Pirisia vokiaka naatara kaira kaara Pirisia vika tinavu Isareri anomake navutaiqama timite variavo, ti. Minti tumanta vaiinti vika vi uvvara iri, Sorura hampata Giligaalini ani ruvaaquma vura.

⁵ Vi entara Pirisia iqoka vaiinti airitahaa ruvaaqumavi vaha Isareri ntaihareka auti vaura. Vika iqoka *kaari* 3,000 vaumanta, vika iqoka vaiinti 6,000vano ohiqaa oquivi vaumanta, qaqi iqoka vaiinti vika airitahaa nuqa voqaara vaura.

Ho Pirisia iqoka vaiinti vika oru Mikimaasini nái seri naavu maaqa kaqate vaura. Beti Abeni vatukavano vauvaro Mikimaasi vatukavano kuari avu urunto mantaraini vaura.

⁶ Ho Pirisia vika Isareri hampata iqoka raqi vaumanta Isareri vika tavovaro Pirisia vika kempukavano voqavata vaumanta Isareri vika qetake aiqu autute, vokuka oru ori on-avuqive, vata ntoma viraqive, kukeqavi vaumanta vokuka namariara vata quvitoraqive, airi nora ori vaunainive, *ruvuqive/mpumpiqive*, kukeqavi vaura.

⁷ Vokuka Iotani Namari taqa vare Gaatira anku vika vataini Gileaatini oru vura. Mintuvaro Soruva kia iqoka raqura mini viraitiro, viva nai iqoka vaiinti hampata Giligaali miniqai vaumanta vira iqoka vaiinti mini vaha aiqu kauqu ntiri ntiri i vaumanta vaura.

⁸ Samueriva tuntema kero, Soruva 7 entanavuara Giligaalini vaharo vira veka vauvaro viva kia oruntomanta Sorura iqoka vaiinti hini kuka qaqrake vi anima vura. (10:8)

⁹ Mintuvaro Soruva vika ekaa vivorave tivakero tiharo, Ne *ofaa* vo viri ti timige te vira Kotira kaintu iha quara amitaariraro viva tinavuara quaheharo tinavu kahaqiarire. Te *ofaa* vo, Kotiva Isareri hampata vohaa variaina *ofaaravata* iha quara amitaare, tiro.

Soruva minti tivakero viva kia Samuerira veka voqavata viraitiro, viva naivano *ofaa* vo, Kotira kaintu iha quara amitora.

¹⁰ Soruva *ofaa* vira iha quara taiqa kero tavovaro Samueriva anintora. Viva anintovaro Soruva vira uva mantareva vuvuro ¹¹ Samueriva Sorura atiro tiharo, Are nana haikae autu kaaro? tiro.

Minti tuvaro Soruva aqao tiro, Te tavauramanta ti iqoka vaiinti ti qaqrake raumpirima vireka auti variamanta, te are anirera tianara iri, ai veka vaurara are kia vaaka anintaaro. Mintivera te tavauramanta Pirisia vika Mikimaasini iqoka raqireka ruvaaquma vi variamantara ti, ¹² te mintimake iruro: Pirisia vika ani Giligaalini tinavu hampata raqireka auti variavo. Virara irihama te kia vaaka *ofaa* vo Nora Kotira iha quara amitaariraro hauri viva kia tinavu kahaqiantorave tivakema, te tentavano *ofaa* vo Nora Kotira kaintu iha quara amitauro, tiro.

¹³ Soruva minti tuvaro Samueriva virara tiharo, Are mintihara hampi kaiqama vara kaaro. Are mintiharama Noravano Kotiva ai Variqavano ai tiva ami uvvara kia iriraitira, vira uva raqama kaaro. Are koqema kera Nora Kotira uva avataaraitirio, viva are kuvuarama teraukara homa Isareriqaa ekaa enta raqikiqi vivarave titirio.

¹⁴ Vate are kiama vukaiqama kera Isareriqaa raqikiqira vinarave. Are viva tivatai uvvara raqa kaanara kaara, Noravano Kotiva ai qaqrira kero, vo vaiinti, nai uva koqema kero iriaina vaiintira rantakero, vi vaiintira noraiqama kairaro viva nai vaiinti nahentiqa raqikiarie, tiro.

¹⁵ Samueriva uva tiva taiqa kero Giligaali mini kero vo vataini vura. Soruvavata Giligaali mini kero Benaminini Gibea vatukaini oru nai iqoka vaiinti hampata vaireva, vura. Soruva mini oruntero nai iqoka vaiinti kaara ntua kero tavovaro 600navuqai vaura.

¹⁶ Ho Soruva nai maaqu Ionataanikantiro náitanta iqoka vaiinti hampata Benaminini Geba vatukaini oru vaumanta Pirisia iqoka vaiinti vika nái seri naavu maaqa kaqatoraqi Mikimaasini vaura.

¹⁷ Pirisia iqoka vaiinti vikaqihai taaramo anku autuke, Isareri hampata iqoka raqireka vura. Vo ankuvaro Ofaraini Suali mantaraini vuvuro, ¹⁸ vo ankuvaro Beti-Horoni vatukavano vau mantaraini vuvuro, vo ankuvaro ainqinanavu vaunaini vura. Ainqinanavu mini vauvaro muani aahara vata Qaakau-Vairi-Uqitainieve tuva vaura.

¹⁹ Vi entara Pirisia vika tiha, Hauri Hiparu vika iqoka paipeve, *aini* vaantaarave, vo auvihehavaave, autu kevorave, tivakeha vika Isareri qioqamate tiha, Kia ne mintima vaina haikara autuate, tura. Vika minti turara ti, Isareri vikaqihai kia ihaqira *aini* untake okarara ho tave vaiintika vaura.

²⁰ Kia vaumanta ekaa Isareri vika Pirisia vika unaini vumanta vihai vi kaiqara tave vauka vika vata kore haikarave, rorive, *saarepive*, ihaqira untake ruqutukeha nuvi ana nimiteha vikaqihai koqaa vare vaura.

²¹ Nora haika, vata kore haikarave, *pikive*, ihaqira untakeha ruqutu keha nuvi ana nimitora vira koqaa vaireva, 6 kinaa vaura. Inaara haika, rorive, *saarepive*, vo kaiqa varo haikarave, ihaqira untakeha ruqutu keha nuvi ana nimitora vira koqaa vaireva, 3 kinaa vaura.

²² Ho Isareri vikaqihai vi kaiqara tavoka kia vaurara ti, raqi vau entara Soruka Ionataanika vitantaqai iqoka paipewata vaantaaravata vatomanta ekaa Isareri iqoka vaiinti vika kia vi haikaravata vatora.

²³ Vi entara Pirisia vika nái iqoka vaiinti vokuka nititomanta vika oru Mikimaasini aara muaqena kuvaite raqikiha vaura.

14

Ionataaniva nora autu varora

¹ Vo entanavu aitarovaro Sorura maaqu Ionataaniva nai auvihehavaa vare ni vau vaiintirara tiharo, Aniqetanta uqita maa varake hini mantaraini oru Pirisia *seri* naavu maaqa kaqate varianaini oru ampeqihā tavaare, tiro.

Minti tivakero Ionataaniva mini vireva iharo kia nai qora Soruravata tiva amiraitiro, evaara vura.

² Vi entara Soruva Mikironi vatuka Gibeaini *pomigraneti* katari okara nai *seri* naavu kaaq toraqi vaumanta iqoka vaiinti 600navu vira hampata Mikironi mini vaura.

³ Vika hampata vaiinti vo Ahiaava Kotira kaiqa vara amite vau vaiintiva nai kaiqa varo tavunara, *eфtive* tura nonkutero vaura.

Ahiaava Ahitupira maaquvano vauvaro Ahitupiva nai qata Ikabotikantiro Finiaasira maaqtanta vauvaro Finiaasiya Elira maaquvano vaura.

Eliva qaqi vau entara viva Siloqi vauvaro Kotira kaiqa vara amite vau vaiintiva vaura.

Ho Ionataaniva vinumanta Sorura iqoka vaiinti vika Ionataaniva vura kia iri tavora.

⁴ Ionataaniva nai paanaa vaiintintiro Pirisia *seri* naavu maaqa kaqate vaunaini vireva oru viviro, aara muaqena vaunaini oruntero tavovaro aara hini mantaraini qora onkai Bosesi-Onkaivano vauvaro aara vutu mantaraini qora onkai vo Sene-Onkaivano vaura.

⁵ Onkai vovano *sauti* Mikimaasi mantaraini vauvaro onkai vovano *noti* Geba mantaraini vaura.

⁶ Ho vitanta orunte onkai hini mantaraini noraqaa himpi vaiha vutu tavomanta onkai voqaa Pirisia nái *seri* naavu maaqa kaqatova vauvaro Ionataaniva nai paanaa vaiinti tiharo, Ho amiraqetanta vutura hini mantaraini navutaaka Pirisia variianaini vuare.

Noravano Kotiva titanta kahaqianarove kiae kahaqianarove? Viva titanta kahaqirera, tetanta homa vika naatara kararave. Viva iqoka vaiinti airiqohairove, taaraiqaqohairove, homa vika kahaqiramanta navutaaka naatara kevarave, tiro.

⁷ Ho Ionataaniva minti tuvaro vira paanaa vaiintivano tiharo, Hove, are nana haika autireva irera, tevata ainti mintirerave, tiro.

⁸ Viva minti tuvaro Ionataaniva virara koqeve tivakero, Ho varaiqetanta qoqaa vuari vika titanta tavaate. ⁹ Vika titanta tave titantara tiha, Netanta mini vaiqe tenavu nitanta hampata mini oru raquare tivera, tetanta kia mini viraiti, vika veka maini variare.

¹⁰ Vika titantara tiha, Netanta tenavu unanaini uriqe raquare tivera, tetanta vika ianaini vuare. Vika minti tivera, tetanta kankomake iriariraro Noravano Kotiva vika titanta kauquqima kaanarove, tiro.

¹¹ Minti tivakero Ionataaniva nai paanaa vaiintintiro otuntero qaqi kanta qovarama vumanta Pirisia vika hini mantaraini vauka vutu vitanta tave naaraihamma nimiteha tiha, Ike tavaate. Hiparu vaiintitanta onavuqi kukeqavi varianaihai qaqi kanta ani variavo, ti.

¹² Minti tivake Pirisia iqoka vaiinti vika Ionataanira nai paanaa vaiintinti aareha tiha, Netanta maini vaarinte uriqe tenavu vo haika nitanta numiqaa, tuvaro Ionataaniva nai paanaa vaiinti tiharo, Are ti avataqira aniane. Vate tetanta iri tavauraro Noravano Kotiva vika tinavu Isareri kauquqima kaanarove, tiro.

¹³ Ho Ionataaniva qora onkai viraqira raumaumaqiro oru viviro, noraqaa vaarintovaro vira paanaa vaiinti vivavata vira naantiara oru vuvvaro Ionataaniva viharo Pirisia vika ruqutuqiro vi vaumanta vika vataini hiqinti hiqinti i vauvaro vira paanaa vaiinti viva vira naantiara oru viharo iqoka paipeqohairo vika ekaara aru aavata ke vaura.

¹⁴ Ionataaniva nai paanaa vaiintintiro hoqarero raqiharo 20 vaiintinavu arukoka vika vaatavano vohaa kantaqai hiqintiviro vaura.

¹⁵ Mintumanta Pirisia iqoka vaiinti *seri* naavu maaqa kaqatoraqi vaukavata, vona vona raqireka vukavata, voqamakero naatu itovaro aiq ukuu ntiri ntiri i vaumanta vaura. Naturavanovata uti vaiharo vata qaki qaki i vaura.

Mintima kero Kotiva vika qetara haika nimumanta vika voqamake qeteha, vika nái avu aatoqihai ruqemake vivaqai vaura.

¹⁶ Mintumanta Sorura iqoka vaiinti Benaminini Gibea vatukaini maimaraara raqiki vauka vaiha tavomanta Pirisia vika nái seri naavu maaqa kaqatora viraqihai oi aai tivaqi viha, hampiara voqaara kante vi ani vaumanta ¹⁷ vika tave vuru Sorura tiva amuvaro Soruva nai iqoka vaiintiara tiharo, Nenavu tinavu iqoka vaiinti kaara ntuvake tavaate. Taukae kia maini variavo? tumanta vika nái kanauka kaara ntuvaqi viha tavovaro Ionataaniva nai avihehavava vare vau vaiintikantiro kia vaura.

¹⁸ Vi entara Kotiva uva tiva taatauto *Vokiseva* Gibea vatukaini vaura. Mintuvaro Soruva Kotira kaiqa vara amite vau vaiintira Ahiaarara tiharo, Kotira *Vokise* varera maini anirage te Nora Kotira vira antuqavano vainara rantake tavaare, tiro.

¹⁹ Soruva minti tivakero Kotira kaiqa vara amite vau vaiintira Ahiaakantiro uva ti vaiharo irumanta Pirisia iqoka vaiinti vika nái seri naavu maaqa kaqatoraqihai voqavata oi aai ti vaiha, kante vi ani vauvaro viva Ahiaarara tiharo, Ho qaqaq kaane. Tenavu vaaka raqirera virerave, tiro.

²⁰ Soruva minti tiva kero nai iqoka vaiinti 600navu ntita varero Pirisia hampata raqireva oruntero tavomanta Pirisia vika anomake qete vauvaro vika avu aatovano hampiqama vumanta vika nái iqoka paipeqohai nai aruke nai aruke i vaura.

²¹ Ho Hiparu vaiinti vokuka haaru Pirisia iqoka vaiinti tontiqama keha vika seri naavu maaqa kaqatoraqi vauka, vikavata oru Soruva Ionataanika kahaqihai Isareri mantaraini vauha raqi vaura.

²² Isareri vaiinti vokuka Efaraimu ainqina vaunaini kukegavi vauka, vika irumanta Pirisia vika qetake ruqeqaamake vi vaumanta, vikavata aninte nái navunaaka kahaqihai Pirisia vika aru ntata kora. ²³ Vika aru ntataqi vivi, Beti-Aveni vatuka vara maini ke, voqavata ntata vare vuru niaraini kora.

„Mintima kero vi entara Noravano Kotiva Isareri vika ruaruama nimitora.„

Ionataaniva Sorura uva kia irura

²⁴ Vi entara Soruva iqoka raqireva iharo kempuka uva Isareri iqoka vaiinti tiva nimiro tiharo, Te vateqai tenta navutaaka návata qoraiqama nimirarerave. Virara iriha te qioqama taari ne karavata kia naraiti, qaqaq vaivaroma kuari avuvano ruhunku vuarire. Vaiinti vovanu ti uva raqa keharo kara nairera, Kotiva vi vaiintira qoraiqama amitairaro vaaquqama vuarire, tiro. Soruva minti tura kaara vika kara kia novaro voqama kero antuqa ntaihomanta vaura.

²⁵ Ho nora antuqavano vika ntaihomanta vika vivi oru nanta voqi tavovaro *bivano* nkuruto *haniva* airitahaavano vatakanta higintivi vaura. ²⁶ Mintumanta vika Soruva uva tivatora kaara qeteha *hani* vira kia varake nora.

²⁷ Ho Ionataaniva nai qova qioqamato uvvara kia iruvara tiro, viva nai kairiqa tuatoraqohairo *hani* vira ravakiri kero nero. Viva namakero viraqaahairo vaakama viva kempuka varora.

²⁸ Viva mintuvaro vo vaiintivano vira tiva amiro tiharo, Oho, nora antuqavano tinavu ekaa harimantama vauro. Ai qova tinavuara kara qioqama tero tiharo, Vate kara nairava vaaquqama vuunarove, tira kaara tenavu kia kara nauraro tinavu kempukavanano kia vaivo, tiro.

²⁹ Minta tuvaro Ionataaniva aqao tiro, Ti qova minti tiharo qorahaama tivo. Viva ekaa tinavu Isareri qoraiqama timitaivo. Ne ti tavaate. Te *hani* inaaraiga nama kema qaiqaa tenta kempuka varauro.

³⁰ Tinavu iqoka vaiinti vate navutaakaqihai raqiake varataa karara nama kaatirio, vika qaiqaa kempuka vare homa Pirisia vika kia taaraiqa aru karaiti, airima arukaatirio, tura.

³¹ Vohaa vi entara Isareri vika iqoka raqihai, Mikimaasiqihai hoqaramate Pirisia ntaihamaqi vivi, Aisaroni vatukaini oru ntora.* Mintumanta Isareri iqoka vaiintinavu antuqavano voqama kero ntaihovaro vika kempukavanovata kia ho vaura.

³² Ho kuari avu ruhunku vumanta Isareri vika kante oru nái navutaaka u haikara sipisipive purumakauve raqiake vare, vi vatukara mini vauha vi haikara aruke, kia naare ntava tati karaiti, naare vira hampata mati nora.

³³ Vika naare hampata mati ne vaumanta vokuka vuru Sorura tiva ami tiha, Oho, iriane. Iqoka vaiinti vika sipisipi mative, purumakau mative, naare hampatama ne variavo. Vika mintihama Noravano Kotiva qioqamato uvvara raqake variavo, ti.

Vika minti tuvaro Soruva nai iqoka vaiinti vikara tiharo, Oho, ne mintihama qorahaama autu kaavo, tivakero qaiqaa tiharo, Ho nora ori vo, tanuqinara venta vare viri maini vuqi timitaate, tiro.

* **14:31:** Mikimaasi - Aisaroni = Suwaira - Aiyura

³⁴ Minti tivakero viva tiharo, Ne ori vira naane vara viri timi, viraqaahai iqoka vaiinti tiva nimimanta vika purumakauve sipisipive vare aninte, ori viraqaata arukaivarao naarevano ekaara ntava taiqa viramanta mati vira varake untake naate. Hauri vika kia naitaramake arukaraiti, naare hampata mati vira neha Nora Kotira uva raqa kevorave, tiro. Minti tumanta enta viraqiqai iqoka vaiinti vika purumakauve sipisipive vara viri ori viraqaa naitaramake vateha aruke vaura.

³⁵ Vika aru taiqa kovaro viraqaahairo Soruva ori vira kaama tero tiharo, Maa oriva Nora Kotira *ofaa* taintama varianarove, tura. Vi taintava avuniqamakero Soruva autuko *ofaa* taintava vaura.

³⁶ Ho Soruva nai iqoka vaiinti vikara tiharo, Aniqenavu otu Pirisia hampata raquqi vivi aatita kaare. Tenavu otu vika ekaa aru taiqake, vika airaira varaare, tumanta vika tihā, Hove, aniqenavu are tinantemake mintiare, tuvarovata, Kotira kaiqa vara amite vau vaiintiva aqao tiro, Kaiqe tenavu Kotira naanē ireha tavaare, tiro.

³⁷ Viva minti tuvaro Soruva Kotira irero tiharo, Hoe tenavu otu Pirisia ntaihararave, kiae ntaihararave? Are hoe tinavu kahaqirae tenavu vika naatara kararave? tiro. Soruva minti tuvaro Kotiva vi entara kia vira uva nai tiva amura.

³⁸ Mintuvaro Soruva Isareri iqoka vaiinti taruka naarama kero tiharo, Oho, tavave qora kaiqa vara kaivaroe Noravano Kotiva kia ti uva tiva timivo? Nenavu aniqe tenavu vi vaiintira rantake qovarama kaare.

³⁹ Noravano Kotiva ekaa enta variqiro vi vaiva viva tinavu Isareri ruaruama timite vairā autuqaa te mintima turo: Vaiinti vovanu qora kaiqa autu kaiva qutuma vuuanarove. Ta vaiintivae vo vaiintivanoe, ti maaquvane, mintima kaiva vairera, vi vaiintiva qutuquaima vuuanarove, tuvaro kia vikaqihairo vovanovata uva tura.

⁴⁰ Vika kia uva tuvaro Soruva vikara tiharo, Ne ekaa oru vitiraqaa himpi vaiqe tetanta Ionataanika maini maaqaa himpi variariraro Kotiva vi uvava avuqavu iarie, tumanta vika hove tivake vika oru vogaa vaumanta Soruka Ionataanika vogaa vaura.

⁴¹ Viraqaahairo Soruva Nora Kotira aarero tiharo, Noravauvu, are tinavu Isareri Variqavanomana variaro. Mpo, are nana kaarae te ai aarauna uvara kia irira tinta tiva timiaro? Are *Urimi Tumimi* okaraqohair a nena kaiqa vara amite vai vaiintira umiqairaro viva vi vaiintira qovarama kaarie.

Vitiraqaa himpite variaka avutana vi vaiintiva vairera, are nena kaiqa vara amite vai vaiintira kahaqiraro viva *Urimi* ori utu varaarire. Titanta Ionataanikaqihairo vi vaiintiva vairera, are nena kaiqa vara amite vai vaiintira kahaqiraro viva vo ori, *Tumimi* ori utu varaarire, tiro.

Minti tuvaro Kotira kaiqa vara amite vau vaiintiva *Urimi Tumimi* okara autu keharo *Tumimi* ori utu varora. Mintumanta vika iruvaro vitini himpite vauka avutana kia vi vaiintiva vaura. [†]

⁴² Mintuvaro Soruva tiharo, Vohaa qarama kehara titanta Ionataanika avatehara tavaane, tuvaro Kotira kaiqa vara amite vau vaiintiva qaiqaa vi okarara autu kovaro *Tumimi* orivano Ionataanira qovarama kora.

⁴³ Mintuvaro Soruva Ionataanira irero tiharo, Oho, are nana haikae vara kaanarave? tuvaro Ionataaniva aqao tiro, Te *hani* inaaraiqa kairiqaqohai ravakirike naunarave. Qumina vi haikara kaarae ti harukaiqe qutuvirarave? tiro.

⁴⁴ Minti tuvaro Soruva tiharo, Eo, are vira kaara qutuma vinarave. Te ai qaqi kaarirara are kia qutu virera, Kotiva homa ti ruqutu kairae te qutu virarave, tiro.

⁴⁵ Soruva minti tumanta iqoka vaiinti vika Sorurara aqao ti, Eqaane. Ionataaniva Pirisia kauquqihairo tinavu Isareri ruaruama timitairave. Vivae qutu vuuanarove? Kiave. Noravano Kotiva ekaa enta qaqi variqiro vi vaira autuqama tenavu ariara kempukaiqamake tiha, Vate Kotiva Ionataanira kahaqivaro viva iqoka aatara kairara tiro, kia vovanovata vira qoraiqama amitaanarove. Kia vovanu inaaraiqvata vira qoraiqama amitaanarove, ti.

Vika minti tivakeha kempukaiqama keha Ionataanira ruaruama amitovalora tiro, kia vira arukora. ⁴⁶ Vika minti tuvaro Soruva qaqla kero kia qaiqaavata Pirisia vika aru ntatomanta vika nái maaqaini anirante vura.

Soruva iqoka raqura

⁴⁷ Soruva Isareri avuhainaa vaiinti vau entara viva nai iqoka vaiinti ntitero Isareri navutaaka hini hini vauka hampata raquqiro vi vaura. Moapive, Amonive, Idomuve, Pirisiave, Soba vatanaaka avuhainaa vaiintinavuve, viva vika hampata iqoka raquqiro

[†] **14:41:** *Urimi Tumimi* okara vaireva, Kotira kaiqa vara amite vau vaiintiva taara ori varakero viraqohairo Kotira muntukavano vai uvava kankoma kero iri vaura. Vi okarara kia tenavu kankomake irunara. (Kis 28:30)

vi vaura. Soruva nai vona vona iqoka raqiharo viva nai iqoka vaiinti hampata ekaa vi vatanaa vi vatanaaka naatara keharo vika qoraiqama nimite vaura.

⁴⁸ Soruva kempukaiqama kero raquqiro viharo Amareki vatanaakavata naatara kora. Viva mintiaqiro vumantara ti, Isareri vika hini hini vau vatanaaka qaqrake, kia qaiqaavata Isareri hampata raqireka anura.

⁴⁹ Sorura maaqu taaramonavu vaireka, Ionataaniva vo, Isaviva vo, Malikisuava vo, vaura.

Vira raavuratanta vaireka, Meraapiva vo, vira aura Mikaaliva vo, vaura.

⁵⁰ Sorura naata Ahinoamiva Ahimaasira raavuravano vaura.

Sorura iqoka vaiinti vika qiaa vaiinti Apineva vaura. Viva Nera maaquvano vauvaro Neva Sorura qora vira qatavano vaura.

⁵¹ Sorura qova Kisiva vo, Apinera qova Neva vo, vitanta Abielira maaqtanta vaura.

⁵² Soruva qaqi vau entara Pirisia vika qaqqai ansi Isareri hampata iqoka raquqi vi vaura.

Soruva tavovaro kempuka vaiintie, kia qete vau vaiintivae vauvaro viva vira aaramakero tiharo, Are anira ti iqoka vaiintinavu hampata variane, ti vaura.

15

Soruva Kotira uva raga kora

¹ Vo enta Samueriva Sorurara tiharo, Are avuhainaa vaiinti vahara Isareri vikaqaa raqikiane tiro, Noravano Kotiva ti tititaimanta te vahavera ariqaa aquteha ai kaama taurauka vaunarara tira, are vate Noravano Kotiva tivatai uvarama iriane.

² Noravano Kotiva ekaa kempuka vataava mintima tivo: Haaru Isareri vika kaivaqaukavara Isipi ke anumanta Amareki vika Isareri qoraiqama nimitorave. Ho vira kaara te vate Amareki vika náivata qoraiqama nimitarerave.

³ Are nena iqoka vaiinti ntita varera oru Amareki hampata raqiharama vika aru vehi autu taiqa kaane. Are vaiintive nahentive vaintive, purumakauve, sipisipive, memeraave, kamerive, donkive, ekaama aru taiqa kaane. Kiama voqavata qaqi kaira qaqi variate. Noravano Kotiva ariari mintima tivo, tiro.

⁴ Samueriva minti tuvaro Soruva vi uvvara iriro nai iqoka vaiinti naarama komanta vika Telemi vatukaini oru ruvaaquma vura. Iutaa iqoka vaiinti 10,000 vaumanta hini Isareri vika 200,000 vaura.

⁵ Ho Soruva vika ntita varero oru Amareki vatukaini oruntero, haaru namarivano aaharaugama vuraqii oru kukeqavi vaura.

⁶ Soruva viraqii vaharo Kini vatanaaka vaunaini uva varakero mintima tiro: Ne Amareki vatuka mini ke vonaini oru variate. Hauri tenavu Amareki ntaiheha nivata ntai-hama kaarorave. Tinavu kaivaqaukavara Isipi ke maini anu entara ni kaivaqaukavara vika koqema nimitorave. Virara irihama te kia ni ntaiharerave, tiro. Soruva minti tumanta Kini vika Soruva tuntemake Amareki vatuka mini ke vonaini vura.

⁷ Vika vuvvaro Soruva Amareki vika hampata raquqi viharo vika naatara kora. Viva Havila vataihairo raquqi viviro, Suri aahara vatainii oru ntora. Isipi vatavano vauvaro Suri vatavano kuari avu uruntonaini vaura.

⁸ Soruva Amareki vika King Agaakira kia aru karaitiro, qaqi ravaaqqavu tomanta Isareri vika Amareki vatanaaka ekaa aru taiqa kora.

⁹ Soruva nai iqoka vaiinti hampata ekaa vi vatanaaka aru taiqa keharo, King Agaakira qaqi vehakuma amitero, vika sipisipive purumakauve qoraiquka aru taiqakero, koqe sipisipive purumakauve kia arukaraitiro, qaqi vare vura.

Noravano Kotiva Sorura qoririma kora

¹⁰ Mintuvaro Noravano Kotiva Samuerira tiva amiro tiharo, ¹¹ Oho, te kia Sorura kaama taataarare. Te vira noraiqama kauraro viva Isareri avuhainaa vaiintivano vaharo viva kia ti uva avataraitiro, ti uva raqa kairave, tiro.

Minti tuvaro Samuerira muntukavano voqamakero qoraiquvaro viva vohaa vi entara entaqi Nora Kotira aaramaqiro viharo ike mpo tivaqiro viviro aatita kora.

¹² Ho vira qararaa toqaqi Samueriva himpiro Sorura rantareva vumanta vokuka vira tiva ami tihā, Soruva Kaameli vatukaini vivo. Viva raqiharo iqoka naatara kero nora autu varairara iriharo, ori vo kaamatero vaaviarama kero, viraqahairo Giligaalinima otu vivo, ti.

¹³ Minti tuvaro Samueriva Soruva vaunaini oruntovaro Soruva vira uva mantero tiharo, Samuerio, Noravano Kotiva ai koqema amitaarire. Ho Noravano Kotiva tintemake, te mintima kaunarave, tiro.

¹⁴ Viva minti tuvaro Samueriva virara aqao tiro, Oho, nantimantae purumakau *mmm mmm* ti variamanta sipisipi vika *mae mae* tihamanta te iri vauro? tiro.

¹⁵ Minti tuvaro Soruva nai tiva amiro tiharo, Iqoka vaiinti vika Amareki purumakauve sipisipive ekaa hini aru taiqa kaavo. Vika ai Variqa Nora Kotira *ofaa* iha quara amitareka iha, sipisipive purumakauve koqekaqai qaqi vare viri vataavvo, tiro.

¹⁶ Soruva minti tuvaro Samueriva Sorurara egaane tiro, Are vairaqe te Noravano Kotiva entaqi ti tiva timi uvara ai tiva amiare, tuvaro Soruva, Ho, tiva timiane, tiro.

¹⁷ Minti tuvaro Samueriva Sorurara tiharo, Haaru are nenara tihara, Te qumina vaiinti vauro tianarave. Vate maa entara are Isareri avuhainaa vaiintivano varianarave. Noravano Kotiva naivano ai kaama tairave.

¹⁸ Ho Noravano Kotiva ai atitero tiharo, Are oru Amareki hampata raquqira viharama, vi vatanaaka vaauq kaiqa vare variaka ekaama aru taiqa kaane, tirave.

¹⁹ Viva minti tivara are nantiharae Nora Kotira uva kia avataaro? Nana kaarae are kanteri oru Amareki vika ia haikara raqia varaaro? Are mintianara kaara Noravano Kotiva ariara vaauq kaiqama varaivo tivo, tiro.

²⁰ Samueriva minti tuvaro Soruva aqao tiro, Te Noravano Kotiva tiva timintemake, oru iqoka raqunarave. Te oru Amareki vika ekaa arukema King Agaakiraqai qaqi ravaaaqavu vare anunarave. ²¹ Ti iqoka vaiinti vikama purumakauve, sipisipive, koqekaqai kia arukaraiti, ai Variqa vira kaamate tiha, Kaiqenavu oru Giligaalini Nora Kotira *ofaa* iha quara amitaare, tiavo, tiro.

²² Soruva minti tuvaro Samueriva vira irama amitero tiharo, Noravano Kotiva nana okararae avuni antuqa arivo? *Ofaa* iha quara amite vai okararae avuni antuqa arivo, tenavu nai uva iri variaina okararae avuni antuqa arivo? Ho iriane.

Nora Kotira nai uva iriha avataqi vua okarava, vi okarava ekaa vo okara vo okara naatara kero avunigama kero vairave.

Viva avuni vaivarso kaintu iha quara amite vai ofaavave vo ofaa vira naantiaraini vairave.

²³ Nora Kotira uva raqake kia avataqi vua okarava vaireva, uhiakaa auti varia okarara voquaara vairave.

Kotira qaqrakke nariaraqai noraiqaake iri varia okarava vaireva, una variqara noraiqaake iri varia okarara voquaara vairave.

Are Nora Kotira uva qoririma kaanara kaara, viva aivata, „are kuvuarama terauka vikavata, qoririma kairia kia ho avuhainaa vaiinti kaiqa varaqi vivarave tirave,“ tiro.

²⁴ Samueriva minti tuvaro Soruva tiharo, Oho, quqaama te qora okarama autu kaunarave. Te Nora Kotira uva raqa kema ai uvavata raqa kaunarave. Te tenta iqoka vaiinti vika naatu qetake, vika tiantemake qora okara autu kaunarave. ²⁵ Mpo, are ti qora okara vira nunka kera tauru timitera, tintira anirage Nora Kotira autu tuahera kaare, tiro.

²⁶ Soruva minti tuvaro Samueriva aqao tiro, Kia te ainti virerave. Are Nora Kotira uva qoririma kaanara kaara, Noravano Kotiva ninavata qoririma keharo ariara viva kia Isareri avuhainaa vaiintivano varianarove tivo, tiro.

²⁷ Samueriva minti tiva kero tuqantaaviro vuare tuvaro Soruva virara vuantorave tiro, Samueriva nonkuto tavunara utu varovaro qunahi vura.

²⁸ Qunahi vuvaro Samueriva vira tavero Sorurara tiharo, Ho tavaane. Are ti tavuna qunahi kaanantema kero, Noravano Kotiva vate are Isareriqaa raqikiana kaiqara vira ariqaahairo varakero, vovano aivata uri aatarakero variaina vaiintira vi kaiqara amianarove.

²⁹ Isareri vika Variqavano takuqukero vaiva viva kia vo uva tivataira qaqlira kero vo uva ti vairave. Viva kia vaiintivano avu aato utintemakero vo kaiqa varareva tira qaqlirakero vo kaiqa vare vairavauve, tiro.

³⁰ Samueriva minti tuvaro Soruva vira tiva amiro tiharo, Mpo, quqaama te qora okara autuma kauro. Are hoe tintira anirage tetanta oru Isareri qiaata vaiintive, qaqi vaiinti nahentive, vika ruvaaqumavi varianaini vaiha Nora Kotira ai Variqa autu tuahera kaare.

Are mintirage te vika niyuqaa variariraro kia ti hutuvano vataini tuvi vuuarire, tiro.
³¹ Viva minti tuvaro ho Samueriva Sorukantiro vuvaro Soruva Nora Kotira autu tuahera kora.

³² Viragaahairo Samueriva tiharo, Ne Amareki avuhainaara King Agaakira vita vare aniate tumanta vira vite anura. Agaakiva nai iriro tiharo, Soruva ti qaqi vehakuma timitairara ti, vika kiama ti arukevarave, tivakero ani vaura.

³³ Mintuvaro Samueriva tiharo, Are nena iqoka paipeqohaira airi vaiinti aru taiqa kaaramanta vika nokavara vainti kaimaara variarave. Ho vohaa qaramakero, ai novavata vainti kaimaara varianarove, tivakero Samueriva Giligaalini Nora Kotira avuqaa

vaiharo Agaakira aru kero teqa taaqama kora. ³⁴ Viraqaahairo Samueriva anirantero Ramaini vuvaro Soruva nai maaqa Gibeaini vura.

³⁵ Vi entaraqaahairo Samueriva nai qaqi vau entara kia qaiqaavata Sorura oru tavaraitiro, viva Sorurara iruvaro vira muntuka qoraiquvaro virara mpo tiva amiteharo vaura. Noravano Kotiva Sorura noraiqama kovaro Isareri avuhainaava vairara iriro tiharo, Kia te vi vaiintira noraiqama kaataarave, tura.

16

Samueriva Devitira kaama tora

¹ Noravano Kotiva Samuerirara tiharo, Nanti nanti entarae are qaqqai Sorurara iq iqi rataqira vinarave? Te vira qorrima kauraro viva kiama Isareri avuhainaava vaiintivano variqiro vuanarove.

Are inaara taqu vara kera viraqi *orivi* vahavera qihia varera Betarihemini oruntera, Iesira maaqu voqaa vahavera vira.

² Minto tuvaro Samueriva tiharo, Oho, te mintima kaarerera, Soruva vi uvara iriro ti haruma kaanarove, tuvaro Noravano Kotiva vira tiva amiro tiharo, Kiave. Are qaraaka purumakau nahe vo varera, Betarihemiqi variakara tihara, Te maa purumakaura Nora Kotira *ofaa* iha quara amitarerava vare anuro, tiane.

³ Are mini *ofaa* autireva ihaba Iesira aarairaro vivavata aniarire. Viva mini ani vairaqe te are autina okarara ai tiva amiare. Te ai umiqaaaina vaiintira vira qiataqama are vahavera aqua amitehara vira kaama taane, tiro.

⁴ Ho Samueriva Noravano Kotiva tuntema kero, Betarihemini oruntomanta vihainaaka nora vaiintinavu aiqu kauqu ntiri ntiri i vaumanta vira vitake ireha tiha, Are vo haika kaarae aniaro, qaqqie aniaro? ti.

⁵ Minto tuvaro Samueriva tiharo, Te Nora Kotira *ofaa* iha quara amitarerama anuro. Ho ne nenta avu aato muntuka hiqe okarara iriha qerama vare aniqe *ofaa* iha quaraare, tivakero Iesira nai maaquaravata tiharo, Nenavuvata mintimake qerama vare *ofaa* autuainara mini vuate, tiro.

⁶ Minto tivakero Samueriva *ofaa* autireva unaini vaumanta vikavata anuvaro Samueriva Iesira maaqu hogarenaara Eliaapira tavero nai aatoqi iriro tiharo, Quqama viti vaiintira Noravano Kotiva kaama tali vaiintirave, tiro.

⁷ Minto tuvaro Noravano Kotiva virara aqao tiro, Are vukai vaiinti koqe viri vaata vataara tavehara, hauri are tiriara vira kaama tai vaiintirave tirorave. Te kia vaiintivano rairake tave variantemake, vaiinti rairake tave vauraukavauve. Ne qumina vaiinti viri vaatainiqai tave variarave. Te Noravano Kotika vaiinti avu aatoqive, muntukaqive, tave vauraukara ti, te Eliaapira qorrima kauro, tiro.

⁸ Minto tuvaro Iesiva nai maaqu vo Abinadaapira vita varero Samueriva unaini vuru kovaro Samueriva tiharo, Kiave. Noravano Kotiva kiama tali vaiintira kaama taivo, tiro.

⁹ Minto tuvaro Iesiva Samaara vita varero Samueriva unaini vuru kovaro viva tiharo, Aqao, Noravano Kotiva viravata kiama kaama taivo, tiro.

¹⁰ Samueriva minto tuvaro Iesiva nai maaqu 4navu mini vaukavata ntita varero Samueriva unaini vuru kovaro Samueriva tiharo, Aqao, Noravano Kotiva kiama vinavukaqihairo vo kaama taivo, tiro.

¹¹ Minto tivakero viva Iesira irero tiharo, Ho maa vinavukaqiae ai maaqunavu variavo? tuvaro Iesiva tiharo, Vinavuka qata vovanovata vaivo. Viva sipisipiqaama raqiki vaivo, tuvaro Samueriva tiharo, Vo vaiinti atitairaro oru vira vita varero aniarire. Vivavata maini ani vairaqe tenavu Nora Kotira *ofaa* iha quara amitarerave, tiro.

¹² Minto tuvaro vo vaiinti atitovaro oru vi vaiintira vita varero anura. Vi vaiintiva qaraaka vaiinti vauvaro vira virivano koqe iro vauvaro vira avuvano koqe avu vauvaro vira vaatavanovata koqe vaata vaura. Vi vaiintiva anuvaro Noravano Kotiva Samuerirara tiharo, Maa vi vaiintirave. Are himpira, vahavera vira qiataqaa aqua amitaane, tiro.

¹³ Minto tuvaro Samueriva *orivi* vahavera vare anura vira vara kero, vira vaukavvara nivuqaa Devitira qiataqaa vahavera aqua amitora. Mintuvaro Nora Kotira Maraqueravano vaaka tuvuntero Devitiraqaa vaiharo vira kempukaiqama amiteharo vi entaraqaahairo vikantiro variqiro vura.

Samueriva Devitira kaama tero, viraqaahairo viva anirantero nai maaqa Ramaini vura.

Devitira avuhainaava naavuqi oru vaura

¹⁴ Vi entara Nora Kotira Maraqueravano Sorura qaqla kovaro Noravano Kotiva qora maraqua vo vara kovaro Sorura qoraiqama amite vaura.

¹⁵ Mintumanta Sorura kaiqa vaiintinavu Sorurara tiha, Tavaane. Kotiva qora maraqua vo vara kaivararo ariqi tuviqetero vaiharo ai qoraiqama amite vaivo. ¹⁶ Are hove tirera,

tenavu oru vaiinti vovano koqemakero *musiki* ruqutu vainara rantake, vira vita vare anaire. Kotiva varakai maraqurava ai qoraiqama amitaina entara vi vaiintiva *musiki* ai ruqutu amitairaro ai avu aatovano koqema kero variarire, ti.

¹⁷ Vinavuka minti tuvaro Soruva tiharo, Ho mintiate. Nenavu oru koqema kero *musiki* ruqutu vaina vaiintira rantake, vira vite te iainanaini aniate, tiro.

¹⁸ Minti tuvaro vira kaiqa vaiinti vovano Sorurara tiharo, Te tavauraro Betarihemi Iesira maaqu vovano koqema kero *musiki* ruqutu vaivama vaivo. Vi vaiintiva kia nesutaaka naatu qete vaiva vaharo, uvavata koqema kero ti vairave. Viva koqe viri vaata vataava vairave. Noravano Kotiva vira hampata vaivo, tiro.

¹⁹ Minti tuvaro Soruva vi uvava iriro nai kaiqa vaiinti vonavu nititomanta oru Iesira tiva ami tiha, Soruva mintima tivo: Nena maaqu sipsipiqaa raqiki vaira Devitira atitairaro te iainanaini aniarire, tivo, ti.

²⁰ Vinavuka minti tuvaro Iesiva vika uva iriro viraqahauro viva donki vo varakero, vira tauvaqaaqaa mpareti uta taaraqantavata, *uaini* taquvata kantaruma tero, qaraaka memeraa vo varero Devitirara maa haikara varera vuru Sorura amiane tivakero vira atitovaro Soruva unaini vura.

²¹ Devitiva Soruva unaini oruntero vira kaiqa vaiinti vaura. Ho Sorura antuqavano voqama kero Devitirara vauvaro Soruva vira noraiqama kovaro Devitiva Sorura auvihehavaa aqu vare ni vauva vovano vaura.

²² Mintuvaro Soruva uva vara kero Iesirara tiharo, Te Devitirara quahe vauro. Are vira qaqui kairaro viva maini vaharo ti kaiqa varaarire, tiro.

²³ Ho Devitiva Sorukantiro vauvaro Kotiva qora maraqura varakova Sorura qoraiqama amite vau entara, Devitiva *musiki* varakero ruqutu amite vauvaro qora maraqura viva qaqqini vinuvavar Sorura avu aatovano koqema vuvuro vaura.

17

Golaiaativa vaiinti vo vara kaiqe te vira hampata raquare tura

¹ Pirisia vika airithaa iqoka raqireka Soko vatukaini ruvaaqumavi vaura.

Vi vatukava Iutaini vauvaro Asekaa vatuka yutuni vaumanta tavaarana Efesi-Damimi Uqitaini vika nai *seri* naavu maaqa airithaa kaqate vaura.

² Vika mintumanta Soruvavata, ekaa Isarerri iqoka vaiinti vikavata, ruvaaqumavi Elaa Uqitakanta nai *seri* naavu maaqa kaqate vaiha Pirisia hampata iqoka raqireka qera iha vaura. ³ Pirisia iqoka vaiinti vika ainqina voqaa vaumanta Isarerri iqoka vaiinti vika ainqina voqaa vauvaro tavaarana qumina ugita vaura. ⁴ Mintimake vauvaro vaiinti vo vira autu Golaiaativa Pirisia iqoka vaiinti vikaqihairo otuntero ugita kanta himpitero vaura. Vi vaiintiva Geti vatukaihainaava, nai vukai vuhaantaari vataava, ³ mita vau vaiintiva vaura.

⁵⁻⁶ Vi vaiintiva *baraasi* origohairo nai qiatave, vaatave, ainqunive, naavuma tero vaura. Viva naavumato haikara maaravano *50 kilo* vaura. ⁷ Vi vaiintiva nora vaantaara nai kururuqaa aqutero vauvaro vaantaara vira aqvavano nora qora vauvaro vira viaru *ainiqohai* autu tora maaravano *7 kilo* vaura. Vi vaiintiva mintimakero vauvaro vo vaiintivano vira kainke aqu varero vira avuni vi vaura.

⁸ Golaiaativa oru quminaini ugita kanta himpi vaharo Isarerriara naveraitiharo, Ne nana haika autirekae auvihehavaa tuateha qera i variavo? Ho ne Sorura paanaa kaiqa vare variaka iriate. Te Pirisia qoraintivanove. Niqihai vaiinti vo vara kaivaro vi vaiintiva ti hampata ani raquarire. ⁹ Vi vaiintiva ti haatara kero haru kairera, tenavu ni qumina kaiqa vaiinti vairarave. Te vi vaiintira aatarake vira arukaarera, ne tinavu qumina kaiqa vaiinti vaivarave, tiro.

¹⁰ Golaiaativa minti tivakero viva qaiqaa tiharo, Ho vate te ni Isarerri kempuka avateha tavarerave. Ne vaiinti vo ti timiqe te vira hampata iqoka raquare, tumanta ¹¹ Soruvavata ekaa Isarerivata vi uvara iri, oho oho tivakeha voqamake qeteha vaura.

Devitiva Isarerri iqoka vaiinti vaunaini vura

¹² Devitiva Iesira maaquvano vauvaro Iesiva Efaraatara ankuqiraava vaura. Viva Betarihemi Iutaa vatainai vaharo qorainti vainti ⁸navu vatatero variqiro viro King Soruva vau entara viva anomia naampaiqama viro vaura.

¹³ Vira maaqu avuni vataatoka taaramonavu iqoka raqireka Sorura aiquantakaa vura. Avuni vataatoka Eliaapiva vauvaro vira naantiara Abinadaapiva vauvaro vira naantiara Samaava vaura. ¹⁴ Iesira maaqunavuqihairo Devitiva ekaanaini vataatova vaumanta vira vakauka taaramonavu avuni vataatoka Sorura aiquantakaa vuvuro ¹⁵ Devitiva hini entanavu vinavuka hampata oru varikero, viraqahauro orurantero hini entanavu ani Betarihemi vaharo nai qora sipsipiqaa raqiki vaura.

¹⁶ Ho Golaiaatива тоqaqivata eronainivata 40 entara variqiro viharo Isarerira naveraitiharo, Ne vaiinti vo ti timiqe te vira hampata iqoka raquare, tivaqiro vi vaura.

¹⁷ Ho vo enta Iesiva nai maaqu Devitirara tiharo, Are te *uiti* ihaqi untake utaqi ntuvu taunara varera, mpareti 10navuvata varera, *seri* naavu maaqa kaqate varianaini vivira, vuru nena vakaukavara nimiane. ¹⁸ Sipisipi naama tatike aaharaiqama taara 10navuvata varera iqoka vaiintiqaqaa raqiki vai vaiintira vuru amiane. Ai vakaukavara hoe variavo, kiae ho variavo? Are vika virara iramakera irira, viri tivata tiva timiane. Are vihaira vo haikavata varera viri ti humiqiraqe te vi haikara tave, ariara ququaama mini vivave tirarave.

¹⁹ King Soruvavata, ai vakaukavaravata, ekaa Isarerivata, vika Elaa Uqitakanta vaiha Pirisia hampata iqoka raqi variavo, tiro.

²⁰ Vira qova minti tuvaro vira qararaa vaaka toqaqi Devitiva himpiro vo vaiintiara sipisipiqaqaa raqiki timitaane tivakero kara varero oru Iesiva tunte ura. Devitiva Isareri *seri* naavu maaqa kaqatonaini oruntero tavomanta Isareri vika iqoka raqunaini viha, iqoka ihi haampu tivaqi vi vaura.

²¹ Vika iqoka vatukaini oru vaiha vika hini mantaraini geramate vaumanta Pirisia vika hini mantaraini geramate vaura.

²² Mintuvaro Devitiva kara vare vura ekaa karaqaa raqiki vau vaiintira amiro, kantero iqoka raqireka qera i vaunaini oruntero nai vakaukavara uva mantero.

²³ Viva uva mante vauvaro Golaiaatива nai navunaaka mini kero oru qumina kanta vaiharo vo enta vo enta nai Isarerira ti vau uvara qaiqaa tuvaro Devitivavata vi uvatura irura.

²⁴ Viva minti tumanta Isareri vika Golaiaatira tave vira aatu qetake kanteha ²⁵ nai tiva ami nai tiva ami iha tiha, Oho, tavaate. Vi vaiintiva qaiqaa qaiqaavata antua aantua ti vaivo. King Soruva tiharo, Vira aru kaaina vaiintira te nora monu ami, airairavata ami, tenta raavuravata vi vaiintira ira amitarerave. Vi vaiintira qora naavuqi vaika kiama *takisi* aqivarave. Soruva minti tirave, ti vaura.

²⁶ Ho vika qeteha kante vauvaro Devitiva nai tataqaq vau vaiintika irero tiharo, Vo vaiintivanoo Pirisia vaiinti vira arukero tinavuqaa kaurira haika vatainara taiqa kairera, nana koqaae vira amivarave? Pirisia vaiinti viva qaqqi qumina vatanaavama vaivo. Viva tinavu Variqa qaqqi variqiro vi vaira, vira iqoka vaiintira antua aantua ti vaivo, tiro.

²⁷ Minti tumanta vika qaiqaa Devitira tiva ami tiha, Vira arukaaina vaiintira avuhainaa vaiintivanoo minti mintima keroma amianarove, ti.

²⁸ Minti tuvaro Eliaapiva Devitira vakaava hoqarenaava tavovaro Devitiva vika hampata uva ti vauvaro vira arara itovaro Devitirara tiharo, Are nantivarae maini ani variaro? Tavave ai vehi sipisipi aahara vatainai kaanaraqaa raqiki vaivo? Are hama hama ianarara te irunarave. Are qumina iqoka raqira tavareva aniaro, tiro.

²⁹ Minti tuvaro Devitiva nai vakaarara aqao tiro, Te vo haikara kankomake irirera maaka ire vauro. Kia te ho virara vika ireha tavaainarave? tiro.

³⁰ Minti tivakero viva tuqantaaviro yo vaiinti vohaa vi uvvaraqqi iramaqivumanta vikavata vohaa vi uvvaraqqi nai tiva ami vaura.

³¹ Minti ti vaumanta vaiinti vonavu Devitiva tu uvvara iri, vuru Sorura tiva amuvaro Soruva tiharo, Vira aaraivaro aniarire, tumanta Devitira aarovaro Soruva unaini oruntero ³² virara tiharo, Avuhainaa vaiintio, tenavu qumina Pirisia vaiinti vira aatu qetaarorave. Te oru vira hampata raqirerave, tiro.

³³ Minti tuvaro Soruva aqao tiro, Are kia ho Pirisia vaiinti hampata iqoka raqinarave. Are qaraaka vaiintivanoo variaro. Vi vaiintiva qaraaka vaiinti vai entaraqaahairo airi ihira iqoka raquqiro vi vai vaiintivama vaivo, tiro.

³⁴ Tuvaro Devitiva tiharo, Avuhainaa vaiintio, Te tenta qora sipisipiqaqaa maimaraara raqiki vauraukave. Te tavauraro *raionivanoe, beavanoe*, sipisipi naati aruke nareva ravaqaqvukero vare vumanta ³⁵ te vira avataqi vivi, vira ruqutuke sipisipi naati vira noqihai tenta qaqqi varaunarave.

Raionivanoe, beavanoe, tuqantaaviro ti harireva autimanta te vira aunta kauki tuate, vira ruqutuqvivi, vira arukaunara.

³⁶ Avuhainaa vaiintio, te *raionivata beavata* aru kaunara. Te vika arukaunantemake, homa te maa vaiintira qumina vatanaara, Pirisia vaiinti arukararave. Viva tinavu Variqavano qaqqi variqiro vi vaira, vira iqoka vaiintiara antua aantua ti vaivo.

³⁷ Noravano Kotiva *raionive beave* vikaqaahairovata ti ruaruuma timitarara tiro, viva homa Pirisia vaiinti viraqaahairovata ti ruaruuma timitaanarove, tiro.

Devitiva minti tuvaro Soruva tiharo, Hove. Are viraro Noravano Kotiva ai hampata vuarire, tiro.

³⁸ Soruva minti tivakero viva nai iqoka utavaaqa ,qaqi vatora, Devitira amura. Viva vira qiataqaa *baraasi* tovaqa aqu amitero, *baraasi siotivata* vira nonku amitero.

³⁹ Mintuvaro Devitiva Sorura iqoka paipe rumpatero oru virare tuvaro kia tota vi haikara nonkutovara tiro, kia ho vuarirava vauvaro viva tiharo, Kia te tota maa haikara nonkunarara ti, kia te ho vira nonkute iqoka raqirerave, tivakero vi haikara ekaa qaqini rahunku kora.

⁴⁰ Mintimakero viva nai sipisipiqaqaa raqiku kaururaqai tota varero oru inaara namari-vano tutuvaraqhairo ori kampori 5navu vara kero nai utaqi ntuvu tero, viraqaahairo ori vataaina naaquntara varero, Golaiaatira hampata raqireva vura.

Devitiva Golaiaatira aatara kora

⁴¹ Devitiva Golaiaatira hampata raqireva vuvaro Golaiaativa vira tavero vira aumanto anuvaro vira kainke vare vau vaiintira vira avuni ani vaura. Golaiaativa vaini vaini

⁴² aniharо tavovaro Devitira virivano koqe viri, qaraaka vaiinti viri vauvaro viva Devitira naaraihama amitero tiharo, Viva qaqi qaraaka vaiintive. Viva kiama ho tintiro raquananarove, tiro.

⁴³ Manti tivakero viva tiharo, Are tiriara vairivano vaivo tivakerae kairiqaqohaira ti harireva aniarо? tivakero nai variqa, vo variqa vo variqa naareharo vikara Devitira qoraiqama amitaate tiro.

⁴⁴ Manti tivakero viva Devitirara tiharo, Ho aniane. Are aniraqe te ai aruke ai vaata uvirivata qaakau vairivata nimiasi naate, tiro.

⁴⁵ Golaiativa minti tuvaro Devitiva nai tiva amiro tiharo, Are iqoka paiprevata, vaantaaravata, tuaterama ani ti hampata raqireva auti variaro. Are mintiaramanta te Noravano Kotiva ekaa kempuka vataira autuqaa ai hampata raqirera anuro. Variqavano tinavu Isareri iqoka vaiintiqaqaa raqiki vaira, are virara qora uva ti varianarave.

⁴⁶ Ho vatema Noravano Kotiva ti kauquqi ai kaanarove. Te vate ai aruke ai aunta teqa karerave. Vate tenavu Isareri ni Pirisia vaata uvirivata qaakau vairivata nimiasi nevarare. Tenavu mintiari ekaa vataini variaka iri tiha, Ququaama Isareri Variqavano vaivo, tivarave.

⁴⁷ Vate ekaa vaiinti maini ruvaaqumavi variaka, vika tavaivaro Noravano Kotiva kia iqoka paipreve, vaantaarave, virara noraiqaakero iriraitiro, viva nai kempukaqohairo homa nai vaiinti nahenti ruaruama nimitaanarove. Vate Noravano Kotiva ni naatara kero viva ni tinavu kauquqi kaanarove, tiro.

⁴⁸ Devitiva minti tuvaro Golaiaativa qaiqaa Devitiva vaunaini vireva auti vauvaro Devitiva kantero vira aumanto ori vaiqiro, ⁴⁹ aumanto oruntero nai utaqihairo ori vo urequ kero naaquntaqи vatero, pope popema kero aqu kovaro orivano Golaiaatira tiri vuhaariqи viqe tovaro viva virianalhairo vatakanta hiqintura.

⁵⁰ Devitiva kia iqoka paiprevata nai kauquqi tuataraitiro, viva ori vaati naaquntaqи vatero, pope popema kero aquko haikaraqohairo Golaiaatira arukero vira aatarakora.

⁵¹ Golaiaativa vatakanta hiqintuvaro Devitiva kantero oru vira tataqaqai himpiro vaharo Golaiaativa iqoka paipe ntuvatoria rara varero, viraqohairo Golaiaatira aunta teqa aqukora. Mintima komata Pirisia tavovaro vika iqoka vaiinti taruva avuni vauva qutu vumanta vika qetake tuqantaavi aiqu autute kantama vura.

⁵² Mintumanta Isarerivata Iutaavata vika naveraitivaqi viha, Pirisia vika aru ntataqи vivi, Geti vatufa aumanto oruntero. Hini kuka Pirisia aru ntataqи vivi, Ekaroni vatufa vaantaavura gentiana vuru kora. Vika Pirisia arikovaro vika vaatavano Saraimini vi vau aararaqaavata, Getinivata Ekaroninivata vi vau aararaqaavata vona vona vaura.

⁵³ Isareri vika Pirisia aru ntata vuru ke, orurante ani Pirisia *seri* naavu maaqa kaqatoraqihai ekaa haika varora.

⁵⁴ Devitiva Golaiaatira auvihehavaa varero vuru nai *seri* naavuqи vatero, vaiinti nahenti Ieruharemini variaka tavaate tiro, Golaiaatira qita teqakora varero Ieruharemini vuru kora.

Devitiva Sorura oru tavora

⁵⁵ Devitiva Golaiaatira hampata raqireva vuvaro Soruva nai iqoka vaiinti vika qita vaiinti Apinera irero tiharo, Apineo, viti vaiintira vira qora tarave? tuvaro Apineva tiharo, Avuhainaa vaiintio, kia te vira qora autu irunarave, tuvaro ⁵⁶ Soruva tiharo, Vo kiaka virara iramakera irira, viri ti tiva timiane, tiro.

⁵⁷ Ho Devitiva Golaiaatira arukero vira aunta teqa kero vira qita nai kauquqi tuata varero oruntero anuvaro, Apineva vira vita varero Soruva vaunaini viri kora.

⁵⁸ Mintuvaro Soruva Devitira irero tiharo, Ti vaiintio, ai qora tarave? tuvaro Devitiva tiharo, Ai kaiqa vaiinti Betariheminai vaira Iesirave, tura.

18

¹⁻² Soruva Devitikantiro uva tiva taiqa kero Devitira ravaaqavu tovaro kia nai maaqaini viraitiro, Sorukantiro mini vaura.

Mini vauvaro Sorura maaqu Ionataaniva Devitira tontiqama kero nariara antuqa arintema kero, Devitirara antuqa arivarо vaura.

³ Mintuvaro Ionataaniva nai kauku ainqiqaa aqukero Devitirara tiharо, Quqaama ti muntukavano ekaa entama ariara varianarove, tivakero ⁴ nai vukai utavaaqa nonku toravata, iqoka utavaaqavata viqukero Devitira amura. Viva iqoka paipeve, huruve, *retive*, ekaa vi haikara vi haikara Devitira amura.

⁵ Ho Devitiva Sorukantiro vauvaro Soruva Devitira atitovaro viva iqoka vaiinti ntita varero Pirisia hampata raqiharo iqoka aatarake vaura. Devitiva qaiqaa qaiqaavata minti vaurara tiro, Soruva vira noraiqama kovaro Devitiva iqoka vaiinti vika *opisaa* noravano vaumanta ekaa vaiinti nahentivata, Sorura *opisaa* ekaa vikavata, Devitira noraiqama korara quahe vaura.

Soruva Devitira toma amitora

⁶ Ho Devitiva Golaiaatira arukomanta Isareri iqoka vaiinti orurante ani vaumanta Isareri nahenti vika vo vatukaqihai aninte King Sorura vira quahama amitora. Vika ihi nteha quaha quahamaqi viha, *tamparinivata kitaavata ruqutuqi* viha ihi tivaqи vi vaura.

⁷ Vika ihi tivaqи viha tiha,

Soruva airi vaiinti aru kaivarо

Devitiva viravata uri aatarakerо nai airi vaiintima aru kaivo, ti.

⁸ Nahenti vika minti tivakeha ihi ti vauvaro Soruva vika tu iihirara kia quahora. Vira arara itovaro viva tiharо, Vika tiriara airi vaiinti arukaivo, tivake Devitirara viva uri aatarа kero nai airi vaiintima arukaivo, ti variavo. Oho, vika antuqavano Devitiva ti vatuka varerо avuhainaa vaiintivano variarire tie minti ti variavo? tiro.

⁹ Soruva minti tivakero vi entaraqaahairo vi haikarara noraiqaakero iriharo, Devitira toma amiteharо vira iri qoraiqama amite vaura.

¹⁰ Ho vira qararaa Soruva nai naavuqi vauvaro Noravano Kotiva qaqui kovaro qora maraquravano Soruraqi tuviqetovaro vaakama vira avu aatovano hampiqama vuvuro viva vuera ntai vaiintira vogaa naveraiti vaura.

Minti vauvaro Devitiva vo enta vo enta nai *musiki* ruquti vauntema kero, vi entaravata ruquti vauvaro Soruva vaantaara vara tuaterо nai iriro tiharо,¹¹ Kaiqe te vaantaara aqu kaariraro Devitira poruvaqaqa aru taatau taarire, tivakero vaantaara vira aqu kovaro Devitiva ruhiti vuvuro vaantaara viva qaqqini aru viro. Qaiqaa vovata aruvaro Devitiva ruhiti vuvuro qaqqini aruvura.

¹²Soruva tavovaro Noravano Kotiva vira qoririma kero Devitikantiro vaurara tiro, viva Devitira aatu qeteharo vaura.

¹³ Vira aatu qeteharo virara ti hampata variantorave tivakero, vira atiterо tiharо, Are 1,000 iqoka vaiintiqa raqikihara iqoka raquane, tuvaro Devitiva vika ntita varero navutaaka hampata oru raqi vaura.

¹⁴ Ho Noravano Kotiva Devitikantiro vauvarora tiro, viva navutaaka hampata vo tataa vo tataa raquqi viharо vika naatarake vaura.

¹⁵ Soruva tavovaro Devitiva mintima kero navutaaka naatarake vauvaro Soruva vira aatu voqama kero qetora. ¹⁶Ekaa Isarerivata Iutaavata tavovaro Devitiva koqema kero iqoka vaiinti ntita varero navutaaka naatarake vaurara ti, vika virara quahe vaura.

Devitiva Sorura raavura varatora

¹⁷ Ho Soruva Devitira arukaainarara nai iriro tiharо, Hauri te tenta Devitira arukaarо rave. Kaiqe te vira atitaariraro viva iqokaqи viramanta Pirisia vika vira arukaate, tivakero viva Devitirara tiharо, Are kia qetaraitira, Nora Kotirara irihara kempukaiqama kera iqoka raqirera, te tenta raavura avuniara Meraapira ai amirerave, tiro.

¹⁸ Minti tuvaro Devitiva aqao tiro, Te qumina vaiintima vauro. Ti qora ankuvanovata kia autu vataa ankuvano vaimanta, virara iriha te kia ho avuhainaa vaiinti raavura varaainarare, tiro.

¹⁹ Minti tuvaro Soruva kempukaiqaakero vo enta kaama tero tiharо, Vi entaraqaan are Meraapira varenarare, tuvaro vi entava anintovaro Soruva qaqrakero kia vira amiraitiro, Mehoraihainaa vaiinti Adarielira amura.

²⁰ Mintuvaro Sorura raavura vo Mikaaliva voqama kero Devitirara antuqa aruvaro vaumanta vokuka vi uvvara vuru Sorura tiva amuvaro Soruva vi uvvara iriro quahora.

²¹Soruva naiqai iriro tiharо, Hove, te Mikaaliraqohai Devitira mintama vararerave. Te vira Devitira amiariraro viva Mikaalirao tiro, oru iqoka raqiramanta Pirisia vika Devitira

arukaate, tiro. Mintimakero iriro Soruva qaiqaa Devitirara tiharo, Are ti raavura vo homa varenarave, tiro.

²² Soruva minti tivakero nai kaiqa vara amite vaukara tiharo, Nenavu tavaivaro Devitiva nariaraa vairamanta virara mintima tiate: Ho tavaane, avuhainaa vaiinti vivavata, vira kaiqa vaiinti vikavata ariara quaheha variavo. Homa are maa entara vira raavura varenarave tiate, tiro.

²³ Soruva minti tumanta vinavuka viva tuntemake Devitira tiva amuvaro viva aqao tiro, Te vehi vaiinti vailha kia monu airairavata vatauraro ti hutuvanovata kia vaimanta vaunarara ti, te kia avuhainaara raavura ho varaainarave, tiro.

²⁴ Devitiva minti tumanta Sorura kaiqa vaiintinavu vuru vi uvvara tiva amuvaro ²⁵ viva vinavukara tiharo, Nenavu vuru Devitira mintima tiva amiate: Avuhainaa vaiinti viva kia ariara nora koqaa autuane, tivo. Viva ariara tiharo, Are oru navutaaka Pirisia iqoka vaiinti 100navu arukera tiqaa vuntu kaane. Are vika arukera vika qake paha toqakera 100navu viri ti timiraqe te vira tave, virara ti raavura koqaa homa vaivo tirarave tivo, tiate, tiro. Soruva mintima kero Devitira arukerara nai aatoqi iri vaura.

²⁶⁻²⁷ Ho Sorura kaiqa vaiintinavu vi uvvara vuru Devitira tiva amuvaro Devitiva quahakero tiharo, Te homa vi koqaara autuke Sorura raavura varaainarave, tivakero Soruva kaamato entava kia aintoraaqa Devitiva vaakama nai iqoka vaiinti ntita varero oru iqoka raqiharo 200 Pirisia vaiinti arukero, vika paha toqakero vare anura Soruva avuqaa vailharo kaara ntuvakero vira amura. Mintuvaro Soruva Mikaalira vira amuvaro Devitiva vira varatero vaura.

²⁸ Soruva kankoma kero iruvaro Noravano Kotiva Devitira hampata vauvaro vira raavura Mikaalira munukavano Devitirara vaura. ²⁹ Mintuvaro Soruva voqavata Devitira aatu qeteharo, ekaa nai qaqi vau entara vira navutaiqama amite vaura.

³⁰ Ho Pirisia vika airi tataa Isareri hampata iqoka raqi vauvarovata, Devitiva vika naatarake vaura. Minturara ti, Devitiva Sorura iqoka vaiinti taruva avuniqama kero vaumanta vaiinti nahenti vira nora autu amura.

19

Soruva Devitira qoraiqama amite vaura

¹ Soruva Devitira arukaaina uvara nai maaqo Ionataaniravata, nai kaiqa vaiintinavu vata, tiva nimura.

Minti tuvaro Ionataaniva Devitirara voqamakero antuqa aruvarora tiro, ² viva oru Devitira rantakero virara tiharo, Ti qova ai arukareva auti vaivo. Mpo, raurihara variane. Hura toqaqira are vonaini oru kukeqavira variane. ³ Are kukeqavi vairaque te tenta qokanti mini ai tataqaq oru himpi vailha, te ariara vira tiva amiariraro viva vonare tirera, ai viri tiva amiare, tiro.

⁴ Minti tivakero vira qararaa toqaqi Ionataaniva nai qokantiro oru mini vailharo Devitirara Sorura tiva amiro tiharo, Are avuhainaa vaiintivano vailhara kiama nena kaiqa vaiinti Devitira qoraiqama amitaane. Devitiva kiama ai qoraiqama amitaraitiro, viva vo kaiqa vo kaiqa ai vara amiteharo ai koqema amite vaivama vaivo. ⁵ Haaru Devitiva nai qutuainararave nai qaqqi variainararave kia noraiqaakero iriraitiro, viva oru Golaatira arukairave. Devitiva mintivarо Noravano Kotiva tinavu Isareri kahaqama timiteharo tinavu navutaaka naatara kairave. Vi entara are nenavano vira taverava voqama kera quahaanarave. Mpo, Devitiva kia qora okara autiraitiro, koqe vaiinti vaivara, are qumina vira aru kareva auti variaro. Nana kaarae? Are qumina vira aru kairera, ai kaiqavano qora kaiqama varianarove, tiro.

⁶ Minti tuvaro Soruva Ionataaniva tu uvara iriro, Quqaama tiaro, tivakero nai aiqqaa kauqu aqu kero tiharo, Noravano Kotiva ekaa enta qaqqi variqiro vi vaira autuqaa te quqaama turo. Kiama te Devitira aru karerave, tiro.

⁷ Soruva minti tivakero „vuvuro“ Ionataaniva Devitira aaramakero Soruva tu uvara ekaa vi uvara vira tiva amiro, viraqaahairo vira vita varero Soruva unaini vuru kovaro Devitiva haaru King Sorukantiro vailharo kaiqa vara amitontema kero, qaiqaavata vara amite vaura.

⁸ Ho qaiqaa Pirisiavata Isarerivata iqoka raqi vaura. Devitiva nai iqoka vaiinti ntita varero oru kempukaiqama kero Pirisia ntaihamaqiro viharo vika naatara komantara ti, Pirisia vika qetake aiqo autute kantama vura.

⁹ Mintuvaro vo enta Soruva nai naauuqi oquvi vailharo nai kauquqi vaantaara totatero vauvaro Noravano Kotiva qora maraqura vo atitovaro viva Soruraqи tuviantero vauvaro Devitiva Sorukantiro vailharo *musiki* ruqutiharo vauvaro ¹⁰ Soruva tiharo, Kaiqe vaantaara aqu kaariraro vira porovaqaa aru taatau taarire, tivakero vira aqu kovaro Devitiva ruhiti vuvaro vaantaara viva qaqini aru vuvaro Devitiva ruqema kero vura.

¹¹ Ho vohaa vi entara entaqi Soruva nai kaiqa vaiinti vonavu nititero tiharo, Nenavu oru Devitira naavuqaa raqiki vaivarao aatita viramanta oru vira aru kaate, tiro. Minti tuvaro Devitira naata Mikaaliva Devitira tiva amiro tiharo, Ai arukevorave. Himpira maaqihaira ruqemakera vuane. Are kia vate entaqi virera, hura toqaqima ai arukevarave, tiro.

¹² Mikaaliva minti tiva kero naaqunta vara kero *uintuana* kantaruma tovaro Devitiva naaqaunta vira utu varero vataini viavi ntero ruqema kero viro.

¹³ Vuvaro Mikaaliva una variqa katariqohai aututo haikara vara kero Devitiva vaito taintaraqaa vaitakero, tavuna varakero viraqaata aqutero, memeraa kauhivata varakero vira qiataini ntuvu amitora.

¹⁴ Ho mintumanta Sorura kaiqa vaiintinavu ani Devitira ravaaqavu kaare tuvaro Mikaaliva vikara tiharo, Devitiva aiha vivaroma vaivo, tumanta ¹⁵ vika anirante vuru Sorura tiva amuvaro Soruva vikara tiharo, Ne anirante oru nenta avuqohai naavuqi Devitira tavaate. Ne vira tave, vira nai tainta hampata auku vare aniqe te vira aru kaare, tiro.

¹⁶ Minti tumanta vika anirante oru Devitira naavuqi oriqete tavovaro una variqa aututo haikava vira taintaqaa vauvaro vira qiataini memeraa kauqiqai vaura.

¹⁷ Ho Soruva Mikaalira irero tiharo, Nantivarae are ti unaqaraiqama kera ti navutaara qaqi kaararo ruqema kero vivo? tuvaro Mikaaliva nai tiva amiro tiharo, Aqao, Devitiva tiriara tiharo, Are kia ti kahaqirera, te ai aruma kararave, tivera te vira kahaqama amitauro, tura.

¹⁸ Ho Devitiva ruqema kero Ramaini Samueriva vaunaini oruntero, Soruva nai vira arukareva auti vau uvvara ekaa vi uvvara Samuerira tiva amiro, viraqaahairo viva vikantiro Naioti vatukaini oru vaura.

¹⁹ Mini vaumanta vokuka Sorura tiva ami tiha, Devitiva Naiotini Ramaa vatuka aumanto vaivo, ti.

²⁰ Minti tuvaro Soruva vaiinti vokuka nititero tiharo, Nenavu oru Devitira ravaaqavu vare aniate, tumanta vika mini orunte tavomanta paropeti vaiinti vika Kotira uva tiva qoqaiqamake vauvaro Samueriva vika qjata vaiinti vaharo mini himpiro vaura. Minti vauvaro Kotira Maraquravano Soruva nititokaqaavata tuvu vaharo kempukaiqama nititomanta vikavata Kotira uva tiva qoqaiqamake vaura.

²¹ Ho Soruva vi uvvara iriro, viva qaiqaa vokuka nititomanta vikavata orunte vohaa qaramake Kotira uva tiva qoqaiqamake vauvaro, Soruva qaiqaa vokukavata nititomanta vikavata orunte vohaa qaramake Kotira uva tiva qoqaiqamake vaura.

²² Vika mintuvoro Soruva nai himpiro Ramainiara vura. Viva nora ruvu namari vaura Sekuni oruntero vihainaa vaiinti irero tiharo, Samuerika Devitika tainie variavo? tumanta vika tiha, Vitanta Naiotini Ramaa aumantoma variavo, ti.

²³ Minti tuvaro Soruva aaraini vi vauvaro Kotira Maraquravano tuvu Soruraga vauvaro vivavata naveraitiharo Kotira uva qoqaiqamaqiro viharo Naiotini oruntora.

²⁴ Soruva nai utavaqa rahunkin qaqini kero vivavata Kotira uva tiva qoqaiqamake vau vaiintika tuntemakero, Samuerira aqanto vaharo vohaa vi entara entaqivata aatitoraqaaavata vataini toka vaharo uva ti vaura. Minti ti vaurara tiro, vi uvava vi ani vaumanta vaiinti nahenti tiha, Quqaae Soruvavata paropeti vaiintiqama vivo? tura.

20

Ionataaniva Devitira kahaqura

¹ Ho Devitiva Sorura aatu qetakero Naiotini vaura kero ruqema kero Ionataaniva vaunaini oruntero Ionataanira irero tiharo, Oho, Ionataanio, nana kaarae ai qova ti haru kareva auti vaivo? Kiama te ai qora qora okaravata autu amite vira qoraiqama amite vaunarave, tiro.

² Minti tuvaro Ionataaniva nai tiva amiro tiharo, Aqao, kiama ti qova ai arukareva auti vaivo. Viva ekaa nora haikave inaara haikave autireva iharo viva ti naane tiva timi vaivama vaivo. Viva ai arukareva itirio, viva kiama vi uvvara kukeqa karaitiro, ti tivama timitirio. Kiama viva ai arukareva auti vaivo, tiro.

³ Minti tuvaro Devitiva aqao tiro, Ai qova kankoma kero tavaivaro ai antuqavano tiriara vairave. Mintima vaivarora tiro, ai qova ti aru kaaina uvvara kia ai tiva amiraitiro, viva vi uvvara kukeqatero tiharo, Hauri te vi uvvara Ionataanira tiva amiariraro vira mutukavano qoraiqiantorave, tirave. Ho Noravano Kotiva ekaa enta qaqi variqiro vi vaira autuqaa te quqaama turo. Ai qova ti haru kaarirava aumantoma vaivo, tiro.

⁴ Minti tuvaro Ionataaniva Devitirara tiharo, Mpo, te nantiakee ai kahaqama amitararave? Are nana nana haikara ti autu timitaane tiraqe te ai autu amitarerave, tiro.

⁵ Ionataaniva minti tuvaro Devitiva tiharo, Hura Qaraaka Torara iriha kara neraqaa te oru ai qokanti vaiha kara naariravama vaivo. Are ti qaqi kairaque te kia mini viraiti, oru naahoqi kukeqavi variare. Te huravata moravata miniqai kukeqavi variqi viha entama karerave.

⁶ Ai qova kara neharo ai irero tiriara tainie vaivo tirera, are mintima tiane: Devitiva tiriara tiharo, Hoe te ti ankuvano Kotira *ofaa* iha quara amite entava qovaraiqinaini Betarihemini oru variainarave? tivera te hove tunarave. Minti tivakera nena qora tiva amiane.

⁷ Are minti tivakera nena qora tiva amiraro viva koqeve tirera, are te koqemake variainarara kankoma kera irinarave. Are tavairaro vira arara itairera, are viva ti qoraiqama timitaainarara kankoma kera irinarave.

⁸ Mpo, are Nora Kotira avuqaa vaihara tiriara tihara, Te ekaa enta ai tonti taruka vairerave tiva taanara iriharama, are ti nena kaiqa vaiinti koqema timitaane. Quqaa te ai qora qora okara amitaarirava vairera, are nenavano ti haru kaane. Hauri are nena qora kauquqi ti vuru kairaro ti harukaantorave tiro.

⁹ Devitiva minti tuvaro Ionataaniva aqao tiro, Kia mintima kera avu aato utuane. Oho, te tavaariraro ti qova ai qoraiqama amitareva irera, te vaakama ai vuru tiva amirarave, tiro.

¹⁰ Minti tuvaro Devitiva vira irero tiharo, Are tiriara nena qora tiva amiraro viva tiriara arara itairera, tavave vi uvvara ti viri tiva timianarove? tiro.

¹¹ Devitiva minti tuvaro Ionataaniva tiharo, Aniqetanta naahoqi oru vaiha uva tiare, tivaketanta naahoqi vura.

¹² Vitanta naahoqi orunte Ionataaniva Devitirara tiharo, Nora Kotira tinavu Isareru Variqa autuqaa te una tiarera, viva ti qoraiqama timitaarie. Huravata vira qararaavata te tenta qora ariara ireha tavarerave. Viva ariara quahairera, te are inanaini uva vara karerave.

¹³ Ti qova ai qoraiqama amiteharo ai aru kareva irera, te ai tivama amirarave. Te kia ai tiva amiraiti, kia ariara ruqemakera vuane tiarera, Noravano Kotiva anomia kero ti qoraiqama timitaarie. Mpo, Noravano Kotiva haaru ti qokantiro vaintema kero, antirovata vairera, te hove tiatarave.

¹⁴ Naantiara te qaqi variarera, are Nora Kotira avuqaa nena kauqu aqiqaa aqukera tiva tenantema kera, tiriara ike mpo tiva timitaane. Te qutu vuarera,¹⁵ are ti vaintivara kia qoraiqama nimitaraitira, ekaa enta ekaa entama vilka koqema nimitaqira vuane. Noravano Kotiva ekaa ai navutaaka aru taiga kairara, are vi entara kiama tetanta tivataina uvvara tauru kaane.¹⁶ Areve, ai vaintivarave, vi uvvara tauru kaivera, Noravano Kotiva ni qoraiqama nimitaarie, tiro.

¹⁷ Ionataaniva minti tivakero viva nariara antuqa arintema kero, Devitiraravata muntuka vateharora tiro, viva tiharo, Mpo, Devitio, quqaa ai muntukavano tiriara vairera, are qaiqaa nena kauqu aqiqaa aqu kehara virara ti tiva timiane, tiro.

¹⁸ Minti tivakero Ionataaniva Devitirara tiharo, Hura Qaraaka Torara kara ne entava varianarove. Hura ti qova kara nareka inaini vaiharo tavairaro ai virivano kia vairaro viva ariara, Tainie vaivo? tianarove.

¹⁹ Ho hora vira qararaa erainaini are tota kukeqavira variana oriva vainaini, qaiqaa mini oru kukeqavira ti veka variane.

²⁰ Are mini vairaque te veva vare, vo haika arireka intemake, taaramo tataa veva vi oriva vaavi vainaini arute,²¹ viraqaaahai tenta kaiqa vaiintiara oru veva rantakera nkaqu viri timiane tirerave. Te vira tiva ami tihia, Vevavano mainima vaivo. Vira vara viri timiane tiarera, are te iainanaini aniane. Noravano Kotiva ekaa enta qaqi variqiro vi vaira autuqaa te ququaama turo. Te minti tiarera, ti qova kiama ai qoraiqama amitaanarove. Are homa himpira aninarave.

²² Te tenta kaiqa vaiintiara, Vevavano vutunima vaivo tiarera, are himpira vonaini ruqemaka kera vuane. Are Noravano Kotivama ti titite vaivo tivakera vonaini vuane.²³ Ho tetanta Nora Kotira avuqaa vaiha uva tiva taatau taunarara ti, hauri tetanta vi uvvara tauru kaarorave, tiro.²⁴ Ionataaniva minti tuvaro Devitiva naahoqi oru kukeqaviro vaura.

Mini vauvaro vira qararaa King Soruva Qaraaka Torara kara nerara iriharo kara nareva unaini vura.²⁵ Viva naavuqi origetero nai mantaraini porovaa tataqa oquiviro vauvaro, Ionataaniva vira avuqaa nai mantaraini oquiviro vauvaro, Apineva Soruva tataqa oquiviro vauvaro Devitiva oquiviro vaunaini kia viva vauvaro qumina vatuka vaura.

²⁶ Soruva tavovaro Devitiva kia vauvaro viva kia uva tiraitiro, qaqi nai aatoqi iriro tiharo, Nantivaroe Devitiva kia vaivo? Vo haikavano Devitira qoraiqama amitaivaroe Kotira avuqaa kia takuquvi vairaitiroe, kia anivo? tiro.

²⁷ Ho vira qararaa vika qaiqaa ruvaaqumavi kara nareka iha tavovaro Devitiva oquivi vaunaini qaiqaa qumina vauvaro Soruva nai maaqu Ionataanirara tiharo, Oho, Iesira maaqu Devitiva nantiharoe entavata vatevata kia kara nareva anivo? tiro.

²⁸ Minti tuvaro Ionataaniva nai qora tiva amiro tiharo, Devitiva Betarihemini vire iharo ti maantima kero ti irairave: ²⁹ Ti qata vakauna Nora Kotira *ofaa* iha quara amitareka iavaro, ti vakaava vovano tirira uva vara kaivarо anivo. Are ti tontivano vairera, ti qaqi kairage te oru tenta qata vakaa tavaare, timanta te vira qaqi kauraro vivo. Devitiva mini vaiharoma kia antiro ani kara naivo, tiro.

³⁰ Minti tuvaro Sorura araravano Ionataanirara voqama kero itovaro virara tiharo, Oho, are hampi aaraqaahaina nahenti maaquvanove. Te tavaurara are lesira maaqu tontiqama kera vira mantaraini variaravave. Vira kaara are nena nokantira kaurira haikama varenarave.

³¹ Are kiae iriaro? Devitiva kia qutiraitiro, qaqi variqiro virera, are kiama ho avuhainaa vaiintigama vira Isarerigaa raqikinarave. Ho are vaaka vaiinti vokiaka nititaira oru Devitira vite anige te vira aru kaare, tiro.

³² Soruva minti tuvaro Ionataaniva aqao tiro, Devitiva nana qora okara autira kaarae are vira aru kareva auti variaro? tiro.

³³ Minti tuvaro Soruva Ionataanira arukaare tiro, nai vaantaara aqukovaro Ionataaniva ruhiit vuvaro kia vira arura. Ho Ionataanira aato kenko tuvaro iruvuro vira qova Devitira aru kaarira avu aatova kempukaiqiro vaura.

³⁴ Mintima kovaro Ionataanira voqamakero arara itovaro viva himpiro kia kara naraitiro, vevantero viro. Qaraaka Torara iriha qaiqaa kara nareka u entava vauvaro Ionataaniva kia vi karara naraitiro, nai qova Devitira qoraiqama amitaainara kaara vira muntukavano qoraiquvaro vaura.

³⁵ Vira qararaa toqaqi Ionataaniva himpiro vainti voru vita varero tota náitanta Devitiva tuntema kero, naahoqi vura.

³⁶ Ionataaniva vainti virauruaro tiharo, Te veva vutuni aampaaqi taarirara are oru rantaane. Ho kantera vuane, tuvaro vi vaintiruva kantero vuvaro Ionataaniva veva vo aruvaro vainti vira ori aatarakero aruvura.

³⁷ Vaintiruvano veva aruvunaini oruntuvaro Ionataaniva vira aarerо tiharo, Vevavano vutuntoqamama vaivo. Are voqavata ori vaiquane, tiro.

³⁸ Ionataaniva qaiqaa vi vaintirura aarerо tiharo, Kantera vuane. Kia qumina viraqaa variane, tiro. Ionataaniva minti tuvaro vainti viva veva oru nkaqu varero qaiqaa Ionataaniva unaini aniro.

³⁹ Vi vaintiruva Ionataaniva tu uvara okara kia kankoma kero iriraitiro vaumanta, Ionataanika Devitiva náitantaqai vira okara irura. ⁴⁰ Ho Ionataaniva huruvata vevavata vaintiru amiro tiharo, Varera vatukaini vuane, tiro.

⁴¹ Tuvaro vainti viva vuvaro Devitiva ori hini mantaraini kukeqavi vauraqihairo Ionataaniva vaunaini anintero vira avuqaa taaramo tataa tori kauru araviro nai viri vataini kero, viraqaahairo himpiro Ionataanira utu varero nai kukuqe nai kukuqe ihatanta iqи rate vaura. Devitiva Ionataanirara iqи ratova Ionataaniva virara iqи ratoravata uri aatara kora.

⁴² Ho Ionataaniva Devitirara tiharo, Ho ai muntukavano qihaaqirara vuane. Noravano Kotiva vaiharo tavaimanta tetanta vira autuqaa tiha, Tetanta ekaa enta kia navutaiqiraiti kogemake variari, tetanta kuvuarama taarirauka vikavata mintima variqi vivarave, tunarave, tiro.

Ionataaniva minti tivakero anirantero vatukaini vuvaro Devitiva vo vataini vura.

21

Devitiva Nopini vura

¹ Devitiva Sorura aatu qetakero Nopi vatukaini Kotira kaiqa vara amite vau valintira Ahimerekira tavareva oruntuvaro viva Devitira tavero aiqu kauqu ntiri ntiri i vauvaro vira irero tiharo, Oho, nantivarae are nenaraa aniaro? Nantimantae kia vaiinti vonavu ai hampata aniaro? tiro.

² Ahimerekira minti tuvaro Devitiva tiharo, Te avuhainaa vaiinti kaiqara irihama maini anuro. Avuhainaa vaiinti viva ti tititero tiharo, Kia vo vaiintivata tiva nimiraitira, evaara vi kaiqara varaane tivera, kia te virara ai tiva amirerave. Tenta iqoka vaiinti vikara vona ruvaaqumavi vaiha ti veka variate tunarave.

³ Devitiva minti tiva kero vi vaiintira irero tiharo, Are nana karae vataaro? Mpareti 5navu vatairera, ti timiane. Mpareti kia vatairera, vo kara timiane, tiro.

⁴ Devitiva minti tuvaro viva tiharo, Te kiama qaqi qumina mpareti vataraiti, Kotira amitaa mparetiraqaima vatauro. Ai iqoka vaiinti vika nái nahenti hampata kia vaiteka vaivera, are homa vi mparetira varera vika niminarave. tiro.

⁵ Minti tuvaro Devitiva tiharo, Vika kia nahenti hampata vaitaakave. Vo enta vo enta vika navutaaka hampata raqirara iriha, vika nái ia haikara hampata takuquvi variavo. Vate tinavuqi vo qara i kaiqava qovaraiqimantara ti, tenavu anomake takuquvima vauro, tiro.

⁶ Devitiva minti tuvaro kia vo kara vau varora tiro, viva Kotira amito mparetira avataiqura varakero Devitira amura.

(Vika mpareti Kotira Naavuqi vatora avataiqura vara qaqini ke qaiqaa qaraaka vate vaura.)

⁷ Vi entara Sorura kaiqa vaiinti vo, Idomu vatanaava Doekiva vo kaiqa Kotira vara amitaainarara iriharo mini vaiharo „tavovaro Ahimerekiva mpareti vira varakero Devitira amura.“ Doekiva Sorura purumakauqaa raqiki vau vaiintika qiata vaiintivanova.

⁸ Ho Devitiva Ahimerekira qaiqaa irero tiharo, Are vaantaarave iqoka paipeve vokira vaterae, kiae vataaro? Avuhainaa vaiintivanovo ti vihi vaahi ti vaimanta te kia tenta auvihehavaa vararaiti, qaqi qumina anuraukave, tiro.

⁹ Minti tuvaro Ahimerekiva vira tiva amiro tiharo, Pirisia vaiinti Golaiaatira, are Elaa Uqitakanta vahara aru kaana vaintinta, vira iqoka paipeqaima maaqi vaivo. Tenavu tavunaqohai vira apuqamake efoti utavaaqa vira tauvaqaini vatauro. Are vira varaataa 10 erera, homa varenararave. Kia vo auvihehavaavata maaqi vaivo, tiro.

Minti tuvaro Devitiva tiharo, Vira nai voqaraa paipeve. Vira ti timiane, tura.

¹⁰ Ho vohaa vi entara Devitiva Sorura aatu ruqemakero King Akisiva Geti vatanaakaqaa raqiki vauva vaunaini oru ntora.

¹¹ Oru ntovaro King Akisira kaiqa vaiinti vika Akisira tiva ami tiha, Ike, Devitiva maava Isarerri avuhainaa vaiintivanove? Nahenti vika virara ihi nteha maantimake ihi tiarave: Soruva airi vaiinti aru kaivaro

Devitiva viravata uri aatarakero
nai airi vaiintima aru kaivo, tiarave, ti.

¹² Vika minti tuvaro Devitiva vi uvvara iriro tiharo, Oho, „te vira navunaaka airi aru kaunara kaara,“ King Akisiva ti haru kaantorave, tiva kero vira aatu voqama kero qete vaura.

¹³ Devitiva qeteharo avuhainaa vaiinti avuquaavata vira kaiqa vaiinti nivuquaavata vaharo vuera vaiinti voqaantema kero vi ani vaura. Viva minti vaumanta avuhainaa vaiintivanovo nai kaiqa vaiinti hampata Devitira ravaaqavu karare tuvaro viva vuera vaiinti voqaantema kero, vaantaavura qentiqaa kakahiakara i vaharo qaqi kovaro auvaantuvano vira noqihairo nteharo okauvau tuvi vaura.

¹⁴ Devitiva mintima kero unaqaraiqi vauvaro Akisiva vira tavero nai kaiqa vaiintiara tiharo, Tavaate. Maava vueraiqama vivo. Nantihae ne vira vita vare te unanaini aniaivo?

¹⁵ Vueraiqama vuaka airitaha maa vataraqaa variamanta ne nantihae vuera vaiinti vovata ti naavuqi vite aniaivo? tiro. King Akisiva minti tiva kero Devitira qaqi kovaro vura.

22

Devitiva Adulaamu ori onavuqi vura

¹ Devitiva ruqemakero Geti vatuka mini kero Adulaamu vatuka aumanto aiqina vaunaini ori onavuqi oru vaura. Viva mini vaumanta vira vakaukavarave, vira navunaa vonavuve Devitiva mini vaivo tu uvvara iri, vikavata vira hampata mini otu vaura.

² Vaiinti vokuka vo maara vo maaraqi vaukave, airi *dinauqi* vaukave, vo haika kaara kia koqemake vaukave, vika vika 400vano Devitiva vaunaini oru vuvaro viva vika qiata vaiintiqama viro vaura.

³ Ho Devitiva mini varikero, viraqahaairo viva nai noka qoka ntita varero Misipaa vatuka Moapi vataini vura. Devitiva oruntero Moapi avuhainaa vaiintiara tiharo, Are qaqi kaira ti noka qoka ai hampata maini variqi vi vaiqe te vaiha tavaariraro Kotiva ti nana haikae autu timitaarire, tiro.

⁴ Devitiva minti tuvaro Moapi avuhainaa vaiinti viva hove tuvaro Devitiva nai noka qoka mini komanta vira hampata vauvaro Devitiva oru qaiqaa ori onavuqi kukeqa viro vaura. ⁵ Viva viraqi vauvaro paropeti vaiinti Gaativa Devitiva vaunaini oruntero virara

tiharo, Are kia qaiqaavata ori onavu maaqi variane. Himpira Iutaa vataaini vuane, tuvaro Devitiva viva tunte iro, Iutaini Heretive tu nantaraqi oru vaura.

Soruva Kotira kaiqa vara amitoka arukora

⁶ Ho vo enta Soruva Gibea vatukaini oru ainqinaqaa nora katari okara oquvi vaharo nai vaantaara kauquqi totatero vaura. Vira iqoka vaiinti vira ututumate vaumanta vaiinti vokuka Devitiva kukeqaviro vaurarava Sorura tiva amura.

⁷ Minti tiva amuvaro Soruva nai iqoka vaiintiara tiharo, Ne Benjaminira ankuqirauka koqemake iriate. Ne iri tiha, Devitiva noraiqama viro, viva qaqi naahovata *uaini* naahovata tinavu timianarove tiarave. Quqaae Devitiva ni vohaiqa vohaiqa noraiqama kaira ne 1,000 iqoka vaiintive, 100 iqoka vaiintiqaave, raqikivarare?

⁸ Ne virara virara irihae ti qoraiqama timite uvvara ti variavo? Oho, ne kia tiriara noraiqaake iriavo. Kia niqihairo vovanotu ti maaquvano Devitikantiro uva tiva taatau kairara ti tiva timirave. Kia niqihairo vovanovata ti tiva timiro tiharo, Ai maaquvano Devitira vihi ti vaivaro viva kukeqavi vaharo ai arukaina aarara rante vaivo tirave, tiro.

⁹ Soruva minti tuvaro vi entara Idomu vatanaa vaiinti Doeckiva Sorura iqoka vaiinti hampata himpi vaharo Sorurara tiharo, Te Nopini vahia tavauraro Devitiva Ahitupira maaqu Ahimerekiva vainaini oruntairave. ¹⁰ Ahimerekiva Devitirara iriharo Nora Kotira aarama amitero, viraqaahairo karavata Golaiaatira iqoka paiprevata Devitira amirave, tiro.

¹¹ Doeckiva minti tuvaro King Soruva vaiinti vokuka nititomanta vika Nopini orunte Ahimerekiravata, ekaa Ahimerekira anku Nopini vahia Kotira kaiqa vara amite vau vaiintikavata, ntita vare Soruva vaunaini anura.

¹² Vika ntita vare Soruva vaunaini viri kovaro Soruva Ahimerekirara tiharo, Te tiarirara iriane, tuvaro Ahimerekiva tiharo, Nora vaiintiava, ho tirage iriare, tiro.

¹³ Ahimerekiva minti tuvaro Soruva vira irero tiharo, Nana kaarae are Devitikantira ti qoraiqama timiteni uvvara tiva taatau taaro? Are Devitira karavata iqoka paiprevata amira, virara Nora Kotira aarama amitaanarave. Are minti tianara kaara vate Devitiva ti navataiqiharo ti haru kareva auti vaivo, tiro.

¹⁴ Soruva minti tuvaro Ahimerekiva aqao tiro, Ai iqoka vaiintiqihairo Devitiva avuni vaharo ariara kempukaiqa kero iri vaivama vaivo. Viva ai airaamaquvano vaharo ai iqoka vaiinti vokiaka qiata vaiintivan vaharo koqema kero ariqaa raqiki vaivama vaivo. Ekaa ai naavuqi variaka Devitiva koqe kaiqa varairara irihama vira nora autu ami variarave.

¹⁵ Quqaama te Kotira ireha Devitira uva tiva amiane tunarave. Te haaruvata vohaa enta vohaa enta mintunarave. Mpo, avuhainaa vaiintio, are kia tigaavata ti ankuqaavata uva vataane. Tenavu kiama ai qoraiqama amitaaina uvvara tiva taatau taunarave. Te kia iri tavauna haikarara are ti variaro, tiro.

¹⁶ Viva minti tuvaro King Soruva tiharo, Qaqira kaane. Kia te ai uva irirerave. Are nena anku hampata qutinarave, tiro.

¹⁷ King Soruva minti tivakero iqoka vaiintinavu vira tataaqa vahia viragaa maimaraara raqiki vauka tiva nimiro tiharo, Ne Nora Kotira kaiqa vara amite variaka, maaka aru kaate. Vika Devitiva ruqema kero vurara iri tavevata, kia ti viri tiva timiarave. Vika Devitira mantaraini varia vaiintikama variavo, tiro.

Soruva Nora Kotira kaiqa vara amite vauka aru kaate tumanta iqoka vaiinti vika aqao ti, Hauri tenavu Nora Kotira kaiqa vara amite variaka arukaarorave tivake kia vika arukataaa umanta qaqi vaura.

¹⁸ Mintuvaro Soruva Doeckira tiva amiro tiharo, Arema vika aru kaane, tuvaro Doeckiva Soruva tuntema kero, oru Kotira kaiqa vara amite vau vaiintika 85navu aru taiqa kora. Vi vaiintika efoti tavuna rumpateha Kotira kaiqa vara amitoka aru kora.

¹⁹ Doeckiva vika arukovaro viraqaahairo Soruva nai iqoka vaiinti nititomanta vika Kotira kaiqa vara amite vau vaiintika vaunaini Nopini orunte, vaiintive, nahentive, vaintive, naama ne vaukave, purumakauve, sipisipive, donkive, ekaa aru taiqa kora.

²⁰ Vika Nopihainaaka ekaa arukehavata, Ahimerekira maaqu vo Abiataaraqai kia arukor. Abiataava ruqema kero viro, Devitiva vaunaini oruntero, vira iqoka vaiinti hampata vohaaraqi vaura.

²¹ Soruva nai iqoka vaiintinavu nititomanta vika orunte Nora Kotira kaiqa vara amite vauka aruko uvvara Abiataava Devitira tiva amuvaro ²² Devitiva tiharo, Oho, te ai gokanti uva ti vauna entara Doeckivavata vairave. Ho te tiha, Quqaama vi entara Doeckiva titanta uva iriro, vuru Sorura tiva amivo, turo. Mpo, ti okara kaarama Soruva ai anku ekaa aru taiqa kaivo.

²³ Viva mintira kaara kiama qetaane. Soruva aivata tivata arukareva auti vaivo. Are ti hampata vairaqe te ariqaa raqiki variarirara are homa vainarave, tiro. Devitiva minti tura.

23

Devitiva Keiraqi vauka ruaruama nimitora

¹ Ho Devitiva mini vaumanta vokuka vuru Devitira tiva ami tiha, Pirisia vika Keiraqi variaka hampata iqoka raqi variavo. Keiraqihainaaka *uiti* qantu vare vuru vo naavu vo naavuqi vataara, vika iqoka raqihai vi karara vare variavo, ti.

² Devitiva vika tu uvvara iriro Nora Kotira irero tiharo, Hoe te otu Pirisia hampata raquainarave, kiae ho raquainarave? tuvaro Noravano Kotiva Devitira nai tiva amiro tiharo, Hove. Are otu Pirisia hampata raqihara, Keiraqi varia vaiinti nahentika ruaruama nimitaane, tiro.

³ Noravano Kotiva minti tumanta Devitira hampata vau vaiintika aqao ti, Vate tenavu maini Iutaini vahia Sorura aatu qeteha vauro. Oho, tenavu Keiraini otu Pirisia iqoka vaiinti hampata raquainarara voqamake qeteha vauro, ti.

⁴ Vika minti tuvaro Devitiva qaiqaa Nora Kotira irovvaro Noravano Kotiva Devitira nai tiva amiro tiharo, Ne himpi Keiraini otunte Pirisia vika ntaiaate. Te ni kahaqiaro ne vika homa naatara kevarave, tiro.

⁵ Noravano Kotiva hove tuvarora tiro, Devitiva nai iqoka vaiinti ntita varero Keiraini otu ntero Pirisia hampata raqiharo Keiraqi vauka ruaruama nimitora. Devitiva nai iqoka vaiinti hampata Pirisia vika airithaa aru kero vika purumakauvata varora.

⁶ Ahimerekira maaqu Abiataava Devitiva vaunaini ruqema kero vuva, vivavata Devitira vataakero Keiraini vura. Viva viharoma *efoti** tavunavata varero vura.

⁷ Ho Devitiva Keiraqi vaumanta vo vaiintinavu vuru Sorura tiva amuvaro Soruva tiharo, Ho Kotiva vira ti kauquqi kaanarove. Vaantaaavuravano vi vatukara ututumatero vaivarovaantaavura qentivanovata mini vairara tiro, Devitiva viraqi vaharo karapuhiqi voqaarama vaivo, tiro.

⁸ Minti tiva kero Soruva nai iqoka vaiinti naaramakero vika hampata Keiraini otu Devitiva nai vaiintinavu hampata vau vatukara ututuma tareva vura.

⁹ Mini vireva uvvaro Devitiva vi uvvara iriro Kotira kaiqa vara amite vau vaiintira Abiataarara tiharo, *Efoti* tavuna vare aniane, tuvaro ¹⁰ Abiataava vira vare anuvaro Devitiva Kotira aarero tiharo, Noravauvu, are tinavu Isareru Variqavanu variaramanta te ai kaiqa vaiintivanoma vauro. Mpo, te iruraro Soruva ti kaara maaqi variaka vehi autu kaaina avu aatora utiharo maini tuvivo. ¹¹ Keira vatuka maaqi varia vaiinti nahentika vika ti Sorura kauquqi kevarave, kiae kevarave? Soruva maini tuvuaina uvava quqaae vaivo? Noravauvu, are tinavu Isareru Variqavanu. Te ai iraaina uvvara ti tiva timiane, tuvaro Noravano Kotiva vira tiva amiro tiharo, Eo, viva tuvuanarove, tiro.

¹² Minti tuvaro Devitiva qaiqaa Nora Kotira irero tiharo, Keira vika ti tinta vaiintinavu hampata Sorura kauquqi vatevarave, kiae vatevarave? tuvaro Noravano Kotiva tiharo, Vika mintima ivarave, tiro.

¹³ Noravano Kotiva minti tuvaro Devitiva vi uvvara iriro vaaka nai iqoka vaiinti 600navu ekaa ntita varero Keira vatuka mini kero ruqema kero vona vona vura. Soruva Devitiva vu uvvara iriro, qaqlira kero kia Keiraini vura.

Devitiva ainqinaini oru vaura

¹⁴ Devitiva ruqema kero viro, Sifi vatuka hini mantaraini ainqinaini oru vaura. Mini nora orivanovata vaunaini vauvaro Devitiva koqema kero kukeqaviro vauvaro Soruva Devitira aru karare tiro, vo enta vo enta vira rante vauvaro Kotiva kia Sorura qaqlir kovaro Devitira ranta kora.

¹⁵ Ho vo enta Devitiva Sifi vatuka aumanto Horesive tunaini vaharo iruvvaro Soruva Devitira rantakero arukaare tiro, Sifi vatukaini vireva auti vaura. ¹⁶ Devitiva qihaaqira muntuka varaarire tiro, Ionataaniva oru virara tiharo, Kotiraraqai kempukaiqama kera iriqira vuane, tiro.

¹⁷ Minti tivakero viva tiharo, Mpo, are kia qetaane. Ti qova Soruva kiama ho ai ranta kero ai qoraiqama amitaanarove. Naantiara arema Isareru avuhainaa vaiintivano vairaqe te ai naantiaraini vairarave. Ti qovavata vi uvarara iri tavairave, tura.

¹⁸ Tivakero Nora Kotira avuqaa vitanta naitanta vohaana tampamavi vaire tu uvvara qaiqaa tiva taatau tora. Vitanta uva tiva taiqake Ionataaniva nai maaqaini uvvaro Devitiva Horesini vaura.

* **23:6:** *efoti* tavunavano vaireva: Kotira kaiqa vara amite vau vaiintika nonkute vau tavunava vaura.

¹⁹ Ho Sifihainaaka vokuka oru Soruva Gibea vatukaini vaunaini orunte virara tiha, Devitiva tinavu maaqa Iutaa *sauti* mantaraini Hakila Aiqina Horesinima kukeqaviro vaivo. ²⁰ Avuhainaaao, are tairentae mini aniataa irera, aniraqe tenavu vira ravaaqavuke ai amiare, ti.

²¹ Vika minti tuvaro Soruva vika tiva nimo tiharo, Hove. Ne tiriara noraiqaake iriarara tiro, Noravano Kotiva ni koqema nimitaariere. ²² Vo kiaka tiha, Devitiva avu aato vataa vaiintivano vaimantara ti, ne kia ho vira vaaka ranta kevarave, tiamanta irunarave. Ho ne anirante oru qaiqaavata kankomake viva vaina vatukara tave, vira tave vaiintikavata kankomake tavaate.

²³ Ho viva voqi voqi kukeqaviro varainara, ne viravata rantake tave, vaakama kante viri ti tiva timiqe te ni hampata orunte tavaare. Oho, viva vi mantaraini vairera, te homa vira ranta kararave. Viva kia mini vairera, te ekaa Iutaini vi aniba vira rantarerave, tiro.

²⁴ Soruva minti tumanta Sifihainaaka anirante vika naane nái maaqaini vura. Vika orunte tavovaro Devitiva nai iqoka vaiinti hampata Iutaa hini mantaraini Maoni Aahara Vatainai vaura.

²⁵ Devitiva mini vau uvvara Soruva iriro, nai iqoka vaiinti ntita varero vira rantareva vumanta vokuka Devitira vuru tiva amuvaro Devitiva Maonini orivano kirikairiro vaunaini oru vaura.

²⁶ Mini vauvaro Soruva nai iqoka vaiinti hampata vi ainqinara hini mantaraini Devitirara rante vauvaro Devitiva Sorura aatu qetakero ainqina hini mantaraini nai iqoka vaiinti hampata kantama vura.

Ho Soruva nai iqoka vaiinti hampata oru aumakaa Devitira nai iqoka vaiinti hampata ravaaqavu karare tuvaro ²⁷ vo vaiintivano anintero Sorura tiva amiro tiharo, Oho, Pirisia vika ai navunaaka hampata raqirekama aniaovo. Are kantera aniranterea vuane, tiro.

²⁸ Viva minti tuvaro Soruva vi uvvara iriro kia qaiqaa Devitira avataqiro viraitiro, anirantero Pirisia hampata raqirevaa vura. Soruva qaqrakerovo vi ainqinaraqaahairo vurara ti, maa entara vi ainqinara autu nteha, *Sela-Ha-Maklekotive – Qaqirakerovo-Vu-Orirave*, ti variara. ²⁹ Ho Devitiva mini vaura kero oru Eni-Gedi vataini vaiintivano koqemake kukeqavi vaunaini vura.

24

Devitiva kia King Sorura arukora

¹ Soruva Pirisia ntata vuru kero orurantero ani vaumanta vokuka Sorura tiva ami tiha, Devitiva Eni-Gedi Aahara Vatave tiananima vaivo, tura.

² Vika minti tuvaro Soruva Isarer iqoka vaiintiqihairo kempuka vaiinti 3,000navu kaama tero ntita varero Devitira nai vaiintivara hampata rantareva Qaakau-Memera-Onkaiive tura aumanto vura.

³ Soruva oruntovaro ori onavu vovano ainqina vira vevaqi aara aumanto vauvaro sipisipi ohaavata mini vaura. Ho Soruva raha tareva onavuqi oriqetero, viva Devitiva nai vaiinti hampata onavu tauvaqaini kukeqavi vaura kia tavora.

⁴ Ho viraqi vauka Sorura tave Devitirara tiha, Ho tavaane. Haaru Noravano Kotiva ariara minti tirave: Te ai navutaara ai kauquqi kaarirara are nana okara autuataa inara homa viraqaa autinarave, tirave. Vate vi entavama anintaivo. Ho vaaka vuane, tuvaro Devitiva qako qakomaqiro Soruva vaunaini oruntero, vira tavuna hini viti toqa varovaro Soruva kia virara iri tavora.

⁵ Devitiva Sorura tavuna toqa varero viraqaaahairo viva tiharo, Oho, te kia mintiataarave, tivakero ⁶ nai vaiintivara vaunaini oruntero vikara tiharo, Mpo, Noravano Kotiva kia ti qaqi kairage te tenta avuhainaa vaiinti qoraiqama amitaare. Viva avuhainaa vaiinti variarie tiro, Noravano Kotiva vira kaama tairara ti, hauri te viva kaama tai vaiintira qoraiqama amitaarorave, tiro.

⁷ Devitiva minti tivakero nai iqoka vaiinti nitiharo qioqama komanta kia Sorura arukora. Mintuvaro Soruva viraqihairo himpiro vevantero vura. ⁸ Viva vuvare Devitiva onavuqihairo Sorura naantiara vevantero vira aarer tiharo, Nora vaiinti ti avuhainaaao, tuvaro Soruva tuqantaa viro tavovaro Devitiva vira avuqaa kankakaama viro nai viri vatainiqama kora.

⁹ Viva Sorurara tiharo, Mpo, are nantiharae vo kiaka tiriara viva ai qoraiqama kareva auti vaivo tia uvvara iri variaro?

¹⁰ Ho tavaane. Vate are onavuqi variararo Noravano Kotiva ai ti kauquqi kaimanta ti iqoka vaiinti hini kiaka ti vihi tiha, Ho vira arukaane tiamantavata, te kia ai arukaraiti, qaqi vehakuma amitauro. Te tiha, Hauri te tenta nora vaiinti Noravano Kotiva kaama taira arukaarorave, tivake kia ai arukauro.

¹¹ Ti qo, te ai tavuna viti tenta kauquqi tuataunara tavaane. Te ai vaataqaahai vira toqa varevata, kia ai arukaunarave. Ho are kankoma kera iriane.

Te kia qora kaiqa ai autu amitaraiti, kia ai qoraiqama amitaunarave. Minti vauraravata, are quminama ti haru kareva rante variaro.

¹² Ho Noravano Kotiva naima titanta raira kero tavairaro ariqe qora okaravano vaivo, tigie qora okaravano vaivo tianarove. Are ti qoraiqama timitaanara kaara Noravano Kotiva naima tiqaa muntu kaarire. Hauri te tenta kauquqohai ai qoraiqama amitaarorave. ¹³ Maa uvara haaru tivatora iriane:

Qora vaiinti vikaqihairo vaaq
kaiqavano qovarama vi vairave, turave.

Te qora vaiinti vahavauve, ai qoraiqama amitararave. ¹⁴ Are tinavu Isareri avuhainaa vaiintivano ta vaiintira ravaaqavu karevae auti variaro? Are ti arukarevae ti avataqira ni variaro? Te nantima vauraukae vauro? Te vairera, qutuvu vairirave, qumina taruve, voqarama vauro.

¹⁵ Ho Noravano Kotiva naima titantaqihairo raira kero tavairaro tigie aiqie qora okaravano vaivo tianarove. Viva ti auta ntiharo viva tiriora kia viraqi qora okaravano vaivo tianarove. Viva minti tivakeharoma ti ai kauquqihairo ruaruuma timitaanarove, tiro.

¹⁶ Devitiva minti tuvaro Soruva vira irero tiharo, Mpo, Devitio, ti maaquo, aree tiriara minti ti variaro? tiva kero iqj rate vaura.

¹⁷ Viva Devitirara tiharo, Arema koqe vaiintivano variaramanta tema qora vaiintivano vauro. Are ti koqema timite variaramanta te ai qoraiqama amite vaunarave. ¹⁸ Mpo, vate are ti koqema timitaanarara tiaramanta te iruro. Quqaama, Noravano Kotiva ti ai kauquqi kaivara are kia ti haru karaitira, ti koqema timitaaro.

¹⁹ Te irunarave. Vo vaiintivano nai navutaara qoraiqama amitareva iharo, viva kiama ho vira qaqi kairaro vuunarove. Mpo, are ti koqema timitaanarara iriharoma Noravano Kotiva ai koqema amitaarire. ²⁰ Ho te vate kankomake iri tavaurara are naantiara Isareri avuhainaa vaiintiqama vira, vikaqaa koqema kera raqikiqira vi vairamanta vika koqemake variqi vivarave.

²¹ Are Nora Kotira autuqaa mintima iane: Naantiara avuhainaa vaiintivano vahara kiama ti anku vaiinti nahenti ntaihamma kaane. Hauri are vika arukairaro ti hutuvanovata vika nutuvanovata ekaara taiqa vuantorave, tiro.

²² Soruva minti tuvaro Devitiva Nora Kotira autuqaa te mintima ianarave tuvaro Soruva anirantero nai maaqaini vuvaro Devitiva nai iqoka vaiinti hampata anirantero nai kukeqavi vau aiqinaraqi vura.

25

Samueriva qutu vura

¹ Samueriva qutu vumanta ekaa Isareri vika ani ruvaaqumavi vahira virara iqj rata amitora. Vika virara iqj rata amite, nai maaqa Ramaini vira quntama tora. Ho vo entanavu aitarovaro Devitiva nai iqoka vaiintinavu ntita varero Paraani Aahara Vataini oru vaura.

Avikeriva Devitira kahaqura

²⁻³ Maoni vatukaihainaa vaiinti vo *Nabaarirave - Kia-Avu-Aato-Vataarave* tu vaiintiva vaura. Viva Kalepira vohaa ankuvano vauvaro vira vatavano Kaameli nora vatuka aumanto vaura. Nabaariva airi airaira vato valintiva vaharo sipisipi 3,000 vatero, memeraa 1,000 vatora.

Vira naata Avikeriva koqe avu aato vataava vauvaro vira viri vaatavanovata koqe iro vaura. Mintima vauvarovata, vira vaati Nabaariva voqama kero valinti niti vau valintiva vaharo nai airaira kampaiqama kero tuate vauva vaura.

⁴ Ho Devitiva aahara vataini valiharo iruvaro Nabaariva Kaameli vataini valiharo nai kaiqa valinti hampata sipisipi kaahi teqe vauvaro ⁵ Devitiva valinti 10navu nititero tiharo, Nenavu Kaamelini otunte ti hutu nteha Nabaarira uva mantama timitaate, tiro.

⁶ Minti tivakero viva tiharo, Nenavu vira tiva ami tih, Devitiva ariara mintima tivo: Arevata ai valinti nahentivata koqemake valiqe te hove tiataarave. ⁷ Ne maa entara sipisipi kaahi teqe variarara vokiaka tiamanta te irunarave. Ai sipisipiqa raqikia valintika maini Kaamelini tinavu hampata variamanta tenavu kia vika qoraiqama nimitaraiti, vika airaira kia voqavata muara varaunarave.

⁸ Are nena kaiqa valinti irairamanta vikavata vohaa uvaqaima tivarave. Ho virara irihara are te qaraaka valintinavu nititaurauka quahama nimitehara vinavukavata, ti nena maaqu Devitikavata, hoe kara vatenara tinavu timinarave? tiro, tiro.

Devitiva minti tiate tivakero vi vaiintinavuka nititomanta ⁹ vinavuka Nabaariva vaunaini otunte Devitiva tu uvvara Nabaarira tiva ami vira veka vaura.

¹⁰ Devitiva nitito vaiintika Nabaarira veka vauvaro viva vinavukara aqao tiro, Devitiva nai ta vaiintivave? Iesira maaqu viva ta vaiintivave? Kia te vira tavaunarare. Vate maa entara airi kaiqa vaiinti nái nora vaiinti aatu ruqemake vuavaro vivavata ruqema kero virave.

¹¹ Hauri te tenta kara, mparetive, namarive, mative, tenta kaiqa vaiinti nimirera iainara varake, kia tavauna vaiintika nai taihai aniaka qumina nimiarorave, tiro.

¹² Nabaariva minti tumanta Devitiva nitito vaiintika tuvurante vuru ekaa viva tu uvvara Devitira tiva amura.

¹³ Vira tiva amuvaro viva tiharo, Oho, ne ekaa iqoka paipe qera iate, tumanta vika Devitiva tuntemake, qerama tovaro Devitiva naivata iqoka paipe taaqeni rumpa varero nai iqoka vaiinti 400navu ntita varero viharo 200navu nái airairaqaanraqiati tiro mini kora.

¹⁴ Mintuvaro Nabaarira kaiqa vaiinti vovano vuru vira naata Avikerira tiva amiro tiharo, Devitiva aahara vataini vaharo nai vaiinti vokiaka nititaimanta vika tuvu tinavu nora vaiinti uva mantaavarro viva kia vika quahama nimiraitiro, vikara qora uvaqaima tivo.

¹⁵ Ho tenavu sipisipiqaanraqi vauna entara vi vaiintika kia tinavu qoraiqama timitaraiti, vika tinavu koqe okara autu timiteha kia tenavu una haikara vo haikava muara varaarave. ¹⁶ Tenavu mini vaisha entaqive, aatitairaqaae, sipisipiqaanraqi vauramanta Devitira vaiinti vika tinavuqaaanraqiha koqemake antua timite variarave.

¹⁷ Mpo, Avikerio, vatemata Devitiva nai iqoka vaiinti hampata tuvu tinavu nora vaiinti qoraiqama amitero, ekaa vira hampata vaurauka tinavuqata qoraiqama timitaanarove.

Viva mintiantorave tira, are koqema kera avu aato utukera vo aara ranta kairaro vi maaraava kia tinavuqaaanraqihaire. Nabaariva nai qora vaiintivano vaiharora tiro, viva kia tenavu tiaina uvvara ho irianarove, tiro.

¹⁸ Viva minti tuvaro Avikeriva vaakama mpareti 200navu vara vatero, memeraa pahiqi *uaini* kaqatora taaraqanta vara vatero, sipisipi 5navu untatoria vara vatero, *uiti* untatoria 20 kilo vaura vara vatero, *uaini* tava aaharaiqamake taatautora 100 navu vara vatero, *fiki* tava aaharaiqamake taatautora 200navu vara vatero, ekaa vi karara donkinavu tauvaqaaanraqi vara vaari vatora.

¹⁹ Vatero viraqaahairo nai kaiqa vaiinti tiva nimo tiharo, Nenavu vare avuni vi vaiqe te ninavu naantiaraini vuare, tiro. Minti tivakero Avikeriva kiama nai vaati Nabaarira tiva amiraitiro qaqi viro.

²⁰ Viva donkiqaa oquiviro Devitira rantareva aaraini viviro, ainqina muaqentuna oruntero tavovaro Devitiva nai iqoka vaiinti hampata vihairo tuvuvuvaro Avikeriva vika ntita kora.

²¹ Devitiva tuviharo nai aatoqi mintimama iriro: Te aahara vataini vaiha viva i haikara koqemake raqiki amiteha, kia tenavu vira airaira voqavata muara varaunarave. Te mintima amitaurarovata, vi valintiva ti qoraiqama timitaivo. Oho, te qumina viva i haikara raqiki amitaunarave.

²² Mintiverama te vate entaqiqai vi vaiintira nai kaiqa vaiinti hampata aru taiqa kaariraro toqaqi kia voqavanovata qaqi variarire. Te kia mintiarera, Kotiva homa ti qoraiqama timitaanarove, tiro.

²³ Devitiva minti tiva kero aaraini tuvi vauvaro Avikeriva Devitira tavero vaakama donkiqaaahairo vataini vaavintero Devitira avuqaa hiqintiviro vaura.

²⁴ Viva Devitira aiquqi vaharo virara tiharo, Mpo, nora vaiintio, are qaqi kairaque te ai kaiqa nahentivano uva tiare. Mpo, te tiarirara iriane. Are ekaa Nabaarira uva tiqaqaanraqi vataane. ²⁵ Viva qora vaiintivano vaivo. Are kia virara noraiqaa kera iriane. Viva nai autu *Nabaarira - Kia-Avu-Aato-Vataara* aanantero, kia avu aato vataava vaharo hampi kaiqaqai vare vaivama vaivo. Mpo, nora vaiintio, are nititaana vaiintika te kiama tavaunarave. Te vinavuka tavauraitiro, te vika kara nimuraaitiro.

²⁶ Hauri are Nabaarira qora okara kaara nai kaiqa vaiinti hampata vika aru taiqa kerorave tiro, Noravano Kotivama ai ravaaqqavu kaivo.

Ho te Nora Kotira avuqaavata ai avuqaavata vaiha mintima turo: Kotiva Nabaarira qoraiqama amitareva autintema kero, viva ai navutaakavata qoraiqama nimirairera, te hoe tirarave tiro, tiro.

²⁷ Avikeriva minti tiva kero Devitirara tiharo, Nora vaiintio, te vare uruna karara maa varakera nena iqoka vaiinti nimiane.

²⁸ Mpo, te ai kaiqa nahentivano ti vauna uvarara qora uvave tirera, are kia virara noraiqaa kera iriraitira, ti tauru timitaane. Te iri tavaurara are Nora Kotirara iriharama

iqoka raqi variaro. Are mintiararora tiro, Noravano Kotiva ai kaama tairarama are Isareri avuhainaa vaiintivano vainarave. Ai naintivaravata himpi avuhainaa vaiinti vahama Isareri vataanaakaqaa raqikivarave. Virara virara iriharama are qaqi vaina entara kia qaqi kairaro qora okaravano ariqaa qovaraiqiarire.

²⁹ Vo vaiintinavu ani ai arukareka ivera, Noravano Kotiva ai Variqavano ariqaa koqema kero raqikianarove. Vaiintivano nai i haikara koqe haikaqaa raqikintema kero, viva ariqaa raqikiqiro virara are ho vainarave. Vaiintivano ori naaquntauq i vatero aqukaintema kero, viva ainavutaaka vara aqukairamanta taiqa vivarave.

³⁰ Mpo, nora vaiintio, Noravano Kotiva nai ariqaa kauqu aqu kero ai koqema amitarerave ti uvara iriharo viva ai noraiqama kairara are tinavu Isareri avuhainaa vaiintivano vaina entara ³¹ are kia kauriraitira, ho are tihara, Te kia qumina uva kaara vaiinti vo arukaununarave. Vika ti qoraiqama timitaamanta te kia vika nai qoraiqama nimitaunrarave, tinarave.

Mpo, vi entara Noravano Kotiva mintima kero ai koqema amitarara, are vi entara kia tirira tauru karaitira, ti nena kaiqa nahentira iritaane, tiro.

³² Avikeriva minti tuvaro Devitiva virara tiharo, Ike, te Nora Kotira tinavu Isareri Variqara quahela vira autu tuahere vauro. Vivama ai attaivara are uru ti ranta kaaro.

³³ Ai avu aatovano koqe avu aato vaivara are minti tiharama ti ravaaqavu kaaramanta te vate kia Nabaarira qora okarara iriha tenta kauquqohai qumina vaiintinavu otu arukauro. Mpo, Kotiva ai koqema amitaarire.

³⁴ Noravano Kotiva ti ravaaqavu kaimanta te kia ai qoraiqama amitauro. Ho Noravano Kotiva ekaa enta qaqi variqiro vi vai Variqava vaimanta te vira autuqaa quqaa mintima turo: Huvio tiane. Are kia vaaka te unanaini uruaraitirio, hora toqaqi Nabaarira kaiqa vaiinti voqavanovata kiama qaqi waitirio, tiro.

³⁵ Devitiva minti tivakero Avikeriva ekaa kara vara vuru amura varero virara tiharo, Ho ai muntukavano paru irara maaqaini vuane. Are tianantemake, te mintirerave, tiro.

³⁶ Devitiva minti tuvaro Avikeriva ururantero Nabaarira naavuqi otuntero tavovaro viva nora kara qeramakero ne vaura. Quahelaro karavata *uainivata* neharo vueraiqama vuvaro Avikeriva vira uva tiva amirare tiro tavovaro viva vueraiqama vuvarora tiro, kia tiva amura.

³⁷ Ho vira qararaa toqaqi vira avu aatovano koqema vuvaro Avikeriva ekaa uva tiva amuvaro iruvaro vira muntukavano qoraiquivaro vira vaatavano qutu ntava vura. ³⁸ Ho Nabaariva 10 entanavu variqiro vuvaro Noravano Kotiva vira aru kovaro qutu vura.

³⁹ Nabaariva qutu vuvaro Devitiva viva qutu vurara iriro tiharo, Te Nora Kotirara voqamake quahela vira autu tuahere vauro. Nabaariva ti qoraiqama timitaai okarara iriharo Noravano Kotiva naima vira qoraiqama amitaivo. Viva ti nai kaiqa vaiinti qioqama taimanta te kia qora okara autunarave. Nabaariva nai qora okara autira kaara Noravano Kotiva vira arukaivo, tiro.

Devitiva minti tivakero viraqahaairo viva Avikerira varareva iharo uva varakovaro viva unaini vura.

⁴⁰ Devitiva nai kaiqa vaiinti vonavu nititonanta Kaamelini otunte Avikerira tiva ami tiha, Devitiva ai varareva tinavu tititaimanta tenavu ai vitarera tuvuro, ti.

⁴¹ Vika minti tuvaro Avikeriva vika tu uvvara iriro tori kauru araviro nai viri vataini vatero tiharo, Ho te vira kaiqa nahentima vauro. Te tenta nora vaiinti vira kaiqa vaiintinavu aiqu homa hiqama nimitararave, tiro.

⁴² Avikeriva minti tivakero vaakama nai kaiqa nahenti 5navu ntita varero nai donki tauvaqaaqa vaarintero Devitira vaiintinavu hampata Devitiva unaini oruntero vira varatero vaura.

⁴³ Devitira naata avuniava Ahinoamiva Jeseririhainaava vauvaro vira naantiara Avikeriravata varatora.

⁴⁴ Sorura raavura Mikaalivavata Devitira naatavano vauvarovata, Soruva vira vara kero Laisira maaqu Palitira amura. Palitiva Galimihainaava vaura.

26

Devitiva qaiqaa Sorura vehakuma amitora

¹ Soruva Gibeaini vaumanta Sifihainaa vaiinti yokuka orunte virara tiha, Devitiva ahara vata auvahini Hakila Aiqinainima kukeqaviro vaivo, ti.

² Vika minti tuvaro Soruva vaakama Isareri iqoka vaiinti taruka 3,000navu ntita varero Sifi Aahara Vataini Devitira rantareva ³ otu Hakila Aiqinavano vaunaini aara auvahini nai seri naavu maaqa kaqa tero vaura.

Mintuvaro Devitiva aahara vataini vaharo Soruva vira rantaqiro anu uvara iriro,⁴ vi uvara quaa uvae vaivo, una uvae vaivo tivakero, vaiinti vokuka ampeqamake tavaate tiro, vika nititomanta vika oru Sorura tave orurante ani Devitira tiva amuvaro⁵ Devitiva Soruva *seri* naavu maaqa kaqa tonaini viro.

Devitiva mini oru ntero tavomanta Soruka Apineka *seri* naavu maaqa kaqatora avutana vaite vaumanta iqoka vaiinti vika vitanta ututumate vaite vaura. Apineva Sorura iqoka vaiinti vika qjata vaiintivan vaura.

⁶ Ho Hiti vatanaa vaiinti Ahimerekivavata, Serura maaqu Abisaiva Ioaapira vakaava vivavata, Devitira hampata himpri vuavuro Devitiva vitanta irero tiharo, Nitantaqihairo tavave tintiro Sorura vatuqaqi vuanarove? tuvaro Abisaiva te ainti virerave tiro.

⁷ Ho vi entara entaqi Devitiva Abisaikantiro vatuqaqi oriqetero tavovaro Soruva vatuqa avutqaqai vaiteharo nai vaantaara aratova vira qjataini vaumanta Apinevavata iqoka vaiinti vonavuvata Sorura ututumate vaite vaura.

⁸ Vika mintimake vaite vuavuro Abisaiva Devitirara tiharo, Vatema Kotiva ai navutaara ai kauquqi vataivo. Are qaqi kairage te vira arukaare. Te nai vaantaara varake viraqohai kia taara tataa aquke ariraiti, vohaa tataa aquke vira aru vataqaa taatau taariraro viva qutu vuari, tiro.

⁹ Viva minti tuvaro Devitiva aqao tiro, Are kia vira qoraiqama amitaane. Noravano Kotiva naima Soruva avuhainaa vaiinti variarire tiro, vira kaama tairave. Vo vaiintivano Sorura qoraiqama amitairera, Noravano Kotiva vi vaiintira naivata qoraiqama amitaanarove, tiro.

¹⁰ Devitiva minti tivakero qaiqaavata tiharo, Noravano Kotiva ekaa enta qaqi variqiro vi vaira autuqaama te ai tiva amuro: Noravano Kotiva naima Sorura arukaanarove. Viva nai qutuaina entava anintairaroe cutuanarove, navutuaka iqoka raqihae vira arukevarave. ¹¹ Hauri te Noravano Kotiva kaamatai vaiintira arukaarorave. Noravano ti kahaqirage te kia mintiare. Kaiqetanta vira qjataini vaira vaantaaravata namari taquvataqai vare vuare, tiro.

¹² Devitiva minti tivakero Sorura qjataini vau haikaraqai varero Abisaikantiro vuvaro kia vo vaiintivanovata vitanta tave, vitanta autu okararavata tavora. Kia vovanovata vaitoraqihai himpura. Noravano Kotiva vika aavata vaita komanta vaita vura.

¹³ Ho Devitiva Sorura *seri* naavu maaqa uqitaini vaura mini kero oru vurunu niaraini vaharo¹⁴ Sorura iqoka vaiintinavuvata Apineravata naarerio tiharo, Apineo, vo tiane. Te aima aare vauro, tuvaro Apineva vo tivakero tiharo, Are ta vaiintivave? Are tavave avuhainaa vaiinti vauraqama kehara minti ti variaro? tiro.

¹⁵ Apineva minti tuvaro Devitiva virara tiharo, Quqaae are qorainti taruva variaro? Isarer iqoka vaiintiqihairo ta vaiintivave ai voqavaa vaivo? Ho are nantiharae kia koqema kera nena avuhainaa vaiintiqaa maimaraara raqikiavo. Oho, vira kaara ni ekaa aru kaataarave. Ne oru tavaate. Vaantaaravata namari taquvata avuhainaa vaiinti qjataini vaira, qaqqie vaivo, kiae vaivo? tiro.

¹⁶ Apineo, are kiama koqe kaiqa varaaro. Noravano Kotiva ekaa enta qaqi variqiro vi vaira autuqaa te mintima turo: Are nena iqoka vaiintinavu hampata vahira Noravano Kotiva kaamatai vaiintiraqaa kia koqemake maimaraara raqikiavo. Oho, vira kaara ni ekaa aru kaataarave. Ne oru tavaate. Vaantaaravata namari taquvata avuhainaa vaiinti qjataini vaira, qaqqie vaivo, kiae vaivo? tiro.

¹⁷ Devitiva minti tuvaro Soruva Devitira aunta viraqama kero iriro, vira aarerio tiharo, Devitio, ti maaquo, areve ti variaro? tuvaro Devitiva tiharo, Eo, ti nora vaiinti avuhainaaao, tema ti vauro, tiro.

¹⁸ Minti tivakero Devitiva tiharo, Nora vaiintio, te nana qora kaiqa vara amitaurarae are ti nena kaiqa vaiintiara rante variaro?

¹⁹ Avuhainaa vaiintio, te tiarirara iriane. Noravano Kotiva naie ai vihi tiharo tirira qoraiqama amitaane tivarae aniaro? Vi uvava quaa uva vairera, te *ofaa* vo Nora Kotira iha quara amitaariraro viva tirirara ike mpo tiva timiteharo aaqurihamma timitaarire. Qaqi vaiintie ariara ugerara uva tiha tirirara arukareva tiavarae aniaro? Vi uvava quaa uva vairera, Noravano Kotiva vi vaiintika qoraiqama nimitaarire.

Oho, vi vaiintika Kotiva tinavu Isarer iimitai vataraqahai ti tititama kaamanta te vo vatanaaka una variqanavu nutu tuherake varianaini oru vahira, kia ho Nora Kotira autu tuherake vauro.

²⁰ Avuhainaaao, te qumina haika, taru voqauka vaurara are nantiharae ti arukareva auti variaro? Vaiintivano ainqinaini uviri rantakero arukareva autintema kera, are ti harukareva auti variaro. Mpo, are kia qaqi kairage te Noravano Kotiva vainaihai niaraini oru vahira qutu vuare, tiro.

²¹ Devitiva minti tuvaro Soruva mpo tiro, Devitio, ti maaquo, tema qora okara ai autu amitauro. Are orurantero tuvuane. Vate are ho ti arukerava vaivaravata, ti vehakuma timitaanarara ti, te kiama qaiqaavata ai qoraiqama amitarerave. Kia avu aato vataa vaiintivano autintemake, te ai qoraiqama amitarera qora okara auturo, tiro.

²² Soruva minti tuvaro Devitiva vira tiva amiro tiharo, Avuhainao, ai vaantaaravano ti kauquqima vaivo. Are qaraaka vaiinti vo atitairaro vira uru varaarire.

²³ Nora Kotirara kempukaiqamake iriqi viha avuqavuqamake ni variaka viva vika koqema nimite vairave. Viva vate ti kauquqi ai vataimanta te tiha, Hauri te Noravano Kotiva kaama tai vaiintira qoraiqama amitaarorave tivake kia ai qoraiqama amitaunara.

²⁴ Ho vate ai vehakuma amiteha koqema amitaunantema kero, Noravano Kotiva tivata koqema timitaarire. Nana nana maaravano tiqi vainara viva taiqa timitarira, te hove tiataarave, tiro.

²⁵ Devitiva minti tuvaro Soruva tiharo, Mpo, Devitio, ti maaquo, Kotiva ai koqema amitaarire. Are ekaa haika vararerera irava koqe iro variarire, tuvaro Devitiva vuvaro Soruva anirantero nai maaqaini vura.

27

Devitiva Pirisia vataini vura

¹ Devitiva nai aatoqi iriro tiharo, Hauri te maini variariraro vo enta Soruva anintero ti harukaantorave. Kaiqe te ruqemake Pirisia vataini vuariraro viva kia ho ti haru kaarire. Te kia Isarerini vairaiti, vo vataini variariraro Soruva popohairaro kia qaiqaavata ti rantaarire, tiro.

² Minti tivakero Devitiva nai iqoka vaiinti 600navuvata ntita varero Maokira maaqu King Akisiva vaura Getini vura.

³ Devitiva nai iqoka vaiintivata, vika vainti nahentivata, ntita varero Getini oru vaura. Viva nai naatatanta hampata mini oru vaura. Vira naata vo Ahinoamiva Jeseririhainaava vuvaro, vira naata vo Nabaarira tentoqa Avikeriva Kaamelihainaava vaura.

⁴ Devitiva mini vauvaro Soruva iruvaro Devitiva ruqemakero Getini oru vauvaro viva kia qaiqaavata vira rantareva vura.

⁵ Ho Devitiva Getini vaiharo King Akisirara tiharo, Ai antuqavano tiriara vairera, are qaqi kairaqe te ai vatuka vovano niaraini vainanaini oru variare. Hauri tenavu ai vataake nora vatuka maaqi variarirara are vukaari utihara tinavuqaa raqikirorave, tiro.

⁶ Devitiva minti tuvaro Akisiva Devitiva tu uvara iriro Sikiraakive tu vatukara vira amura. Vira amurara ti, vate maa entaravata vi vatukava Iutaa avuhainaa vaiinti vika vatukavano vaira. ⁷ Devitiva Pirisiaini variqiro viharo vohaa ihi 4 tora vara kora.

⁸ Ho Devitiva Pirisiaini vaiharo nai iqoka vaiinti ntita varero oru Gesu vatanaakave, Gisi vatanaakave, Amareki vatanaakave, vika vika hampata raqi vaura.

Vi vatanaaka Isareri navutaaka vaiha Pirisia kahaqi vauka Suri Aahara Vataini ekaara maahota vaura. Isipivata Iutaavata hini hini vauvaro Suri Aahara Vatavano tavaaranava vaura.

⁹ Ho qaiqa qaiqaavata Devitiva nai iqoka vaiinti ntita varero oru vi vatanaa vi vatanaaka hampata raquqiro viharo, vaiintie nahentie kia vehakuma nimiraitiro, ekaa vika arukero vika sipisipive, purumakauve, donkive, kamerive, utavaaqave, ekaa varora. Viva mintima kero vika aru taiqakero orurantero King Akisiva vaunaini anura.

¹⁰ Vika Akisiva vaunaini anuvaro Akisiva Devitira irero, Vate are ta vatanaaka hampatae raquaro? tuvaro Devitiva vira unahaa tiharo, Ho vate te Iutaa Nekevi Aahara Vataini variaka hampatama raquro, tivakero, vo enta viva tiharo, Te vate ai navutaaka Nekevi Aahara Vataini Jerameliqi variaka hampatama raquro, tivakero, vo enta viva tiharo, Te vate ai navutaaka Nekevi Aahara Vataini Kiniqi variaka hampatama raquro, tiro. Devitiva minti tivaqiro viharo Akisirara una ti vaura.

¹¹ Devitiva nai aatoqi mintima iriro tiharo, Hauri vovano Getini oruntero te tenta iqoka vaiinti hampata autuaina uvara tiva nimiantorave tiro, oru raqiharo vaiintie nahentie kia vehakuma nimiraitiro, ekaa aru taiqake vaura. Devitiva Pirisiaini vau entara viva minti okarara autuqiro vi vaura.

¹² Akisiva Devitiva tu uvarara quqaa uvave tura. Viva nai iriro tiharo, Devitiva mintima keharo nai navunaaka hampata raqi vaira kaara Isareri virara vaaqu vaiintivana viva vauvo ti variarare. Vika minti ti variarara tiro, Devitiva nai qaqi variqiro vuainava entara ti tontivano vaiharo ti hantuqqaqaima avataqiro vuanarove, tura.

28

¹ Vi entara Pirisia vika nái iqoka vaiinti ruvaaqumake Isareri hampata raqireka auti vaura. Akisivavata raqireva qera i vaharo Devitirara tiharo, Are iriane. Te ai kahaqunantema kera, arevata nena iqoka vaiinti ntita varera ani tinavu Pirisia kahaqiane, tiro.

² Viva minti tuvaro Devitiva vira tiva amiro tiharo, Eo, te ai kaiqa vara amite vauraukave. Naantiara are te kaiqa varaaina okarara kankoma kera tavenarave, tiro. Devitiva minti tuvaro Akisiva tiharo, Koqeve. Te ai noraiqama kaarirara are ekaa entama tiqaa maimaraara raqikinarave, tura.

Soruva nahentivano vaana kaiqa vare vaunaini vura

³ Samueriva qutu vumanta Isareri virara iqí rata amite vira nai vatuka Ramaaqi quntama tora. Vi entara Soruva vaana kaiqa varokave, varante vau nahentikave, qioqama teharo Isareriqihairo vika nititama kora.

⁴ Ho Pirisia iqoka vaiinti Isareri hampata raqireka iha, vika ruvaaqumavi Sunemi vatuka hini mantaraini nái seri naavu maaqa kaqate vauvaro, Soruva Isareri iqoka vaiinti ruvaaquma komanta vika oru Giliboa Aiqinaini nái seri naavu maaqa kaqate vaura.

⁵ Mintuvaro Soruva Pirisia iqoka vaiinti vika tavomanta airithaa vauvaro vira voqama kero aatu itovaro qeteharo ⁶ Nora Kotira irero tiharo, Oho, te nantie irarave? tuvarovata, Noravano Kotiva kiama tairaqaave, *Urimi Tumimi* * oriqaave, paropeti vaiinti noqihairove, Sorura tiva amura.

⁷ Noravano Kotiva kia tiva amuvaro Soruva nai kaiqa vaiintiara tiharo, Ne oru varante vai nahentira rantake viri ti tiva timiqe te oru vira ireha tavaare, tumanta vika nai tiva ami tihā, Ento vatukainima vi kaiqara vare vai nahentiva vaivo, ti.

⁸ Minti tuvaro Soruva vovano ti viraqaqama kero tavaantorave tiro, avuhainaa utavaaqa qaqini varakero, qaqi utavaaqa nonku varero nai kaiqa vaiinti taaraqantavata ntita varero entaqi vi nahentira tavareva vura.

Soruva entaqi vi nahentiva unaini oruntero virara tiharo, Are vaana vo aarairaro viva naantiara nana haikavano tīqi qovaraqiainarara tiva timiare. Te qutuvi vaiintira vo autu ntaarirara are vira aarairaro vira maraquravano qovarama vuarire, tiro.

⁹ Soruva minti tuvaro nahenti viva tiharo, Eqaane. King Soruva qioqama tai uvara are irianarave? Soruva vaana kaiqa vare variakave, varante varia nahentikave, ekaa vika qioqama teharo Isareriqihairo nititama kairave. Nantiharae are tiriara viva hampi kaiqa varairaro Soruva arukaarire tiraē ti unahaa tiaro? tiro.

¹⁰ Vi nahentiva minti tuvaro Soruva tiharo, Noravano Kotiva ekaa enta qaqi variqiro vi vaira autuqaa te ariari mintima turo: Are te tianantemā kera autiraro kia vovano ai qoraiqama amitaanarove, tiro.

¹¹ Minti tuvaro nahenti viva Sorura irero tiharo, Are ta vaiintirarae tiraqe te vira aaraare? tuvaro Soruva tiharo, Samuerira aaraane, tiro.

¹² Tuvaro Samuerira aarovaro viva uruvaro nahenti viva voqama kero qeteharo noraigaakero naveraitiro Sorurara tiharo, Oho, nantiharae are ti unahaa tiaro? Are nena King Soruva vivave, tiro.

¹³ Nahenti viva minti tuvaro Soruva tiharo, Kia qetaane. Are nana haikae tave variaro? tuvaro nahenti viva tiharo, Oho, qutuvi vaiintira maraquravano vataqihairo uri vaira tave vauro, tiro.

¹⁴ Minti tuvaro Soruva nahenti vira irero tiharo, Viva nantimake vai vaiintirave? tuvaro nahenti viva tiharo, Naampaivano vukai tavuna nonku taiva uri vaivo, tuvaro Soruva kankoma kero iruvaro Samueriva uri vauvaro viraqaahairo Soruva tori kauru araviro nai viri vataini kero vaura.

¹⁵ Soruva mintima kero vauvaro Samueriva Sorurara tiharo, Te mini vaurara are nantiharae ti haaraaramanta ururo? tuvaro Soruva virara tiharo, Mpo, tīqi nora maaranavoma vaivo. Pirisia vika ti harireka auti variavaro Kotiva ti qaqira kaivo. Kotiva kia nai uva tiva qoqaiqamake varia vaiintikaqaave tairakaave, ti uva tiva timivo. Te nantie irarave? tivakema ai aarauro. Are vi uvara ti tiva timiane, tiro.

¹⁶ Soruva minti tuvaro Samueriva tiharo, Oho, nantiharae are tiriara minti tira iaro? Noravano Kotiva ai tauvaqa utu amitero ai qaqira kero ai navutaiqama amitairara tira, are qumina ti haaraaro.

* ^{28:6:} Urimi Tumimi okara vaireva, Kotira kaiqa vara amite vau vaiintiva taara ori varakero viraqohairo Kotira muntukavano vai uvara kankoma kero iri vaura. Vi okarara kia tenavu kankomake irunara. (Kis 28:30)

¹⁷ Noravano Kotiva haaru ti noqihairo ai mintima amitarerave ti uvvara ai tiva amirave. Noravano Kotivama ariara viva kia Isareriqaa raqikiqiro vuarire tiro, ai qaqira kero ai kena vaiinti Devitira kaama taivaro viva Isareriqaa raqikiariravama vaivo.

¹⁸ Haaru Noravano Kotiva Amareki vatanaakara arara itovaro ariara Amareki vilka vehi autu taiqa timitaane tivara are kia viva tunte ianarave. Vira kaarama vate Noravano Kotiva ai mintima amite vaivo.

¹⁹ Noravano Kotiva avata Isareri vikavata Pirisia kauquqi kaanarove. Hurama are nena maaqunavu hampata te vaunaini tuvu vaivarave. Noravano Kotiva Pirisia qaqi kairia vilka ni Isareri iqoka vaiinti naatara kevarave, tiro.

²⁰ Minto tuvaro Soruva Samueriva tu uvvara iruvaro voqama kero aatu itovaro viva vaaka vatakanta hiqinti viro vaura. Vi entara aatitoraqaaavata, entaqivata viva kia karavata nraitiro vaura kaara vira kempukavano kia vaura.

²¹ Nahenti viva Soruva vaunaini oruntero tavovaro Soruva voqama kero qete vauvaro viva tiharo, Nora vaiintio, iriane. Te ai aatu qeteha ariara ti harukaantorave ti, te are tianantemake autunarave. ²² Ho vate are ti uva irira, ti qaqi kairage te ai kara amiarirara naane. Are kara namakera kempukaiqama vira, anirantera vuane, tiro.

²³ Minto tuvaro Soruva aqao kia te kara narerave tumanta vira kaiqa vaiintitantavata nahenti vivavata vihi tuvaro Soruva vinavuka uva iriro himpiro kara nareva taintaqa oquiviro vaura.

²⁴ Mintuvaro vaakama vi nahentiva nai purumakau naati koqera arukero untatero vorusi varakero kia noqavu mparetira untero.

²⁵ Vi nahentiva kara unta kero varero vuru Soruravata vira kaiqa vaiintivata nimu manta nora. Namake vohaa vi entara entaqi vi nahentira mini ke nái anirante vura.

29

Pirisia Devitiva tinavu kahaqiantorave tura

¹ Ho Devitiva Getini Pirisia vataini vaumanta, Pirisia vilka nái iqoka vaiinti hihai hihai ruvaaqumake Afeki vatukaqi vaumanta Isareri vika Jeseriri aumanto ruvu namarivanu urunte vaunaini nái seri naavu maaqa kaqate vaura.

² Vaumanta Pirisia avuhainaa vaiinti Snavuvano voqaa 100 voqaa 100 iqoka vaiinti rairake vate, voqa 1,000 voqaa 1,000 iqoka vaiinti rairake vate, ntita vare iqoka raqireka vurama. Pirisia iqoka vaiinti naane avuni vumanta Devitiva nai iqoka vaiintivata King Akisira vatamake naantiaraini vura.

³ Pirisia iqoka vaiintiqaa raqikuka Devitira nai iqoka vaiintiaravata tave aqao ti, Nantihae Hiparu vatanaaka maini variavo? ti.

Vika minti tuvaro King Akisiva vika tiva nimiro tiharo, Maa Devitivave. Haaru viva Isareri avuhainara King Sorura kaiqa vaiintivano vairave. Viva Sorura qaqira kero tintiro ani vukai enta vaimanta te viraqi kia qora okara rantake tavaunarave, tiro.

⁴ Akisiva minti tumanta Pirisia iqoka vaiintiqaa raqiki vauka Akisira atiha virara tiha, Vira atitairaro anirantero are nai amiana vatukara mini vuarire. Are kia vira qaqi kairaro tinavu hampata vuarire. Tenavu iqoka raqi variariraro hauri viva tinavu navutaiqiharо tinavu mantaraini vainara qaqrakerо tinavu hampata raquantorave. Viva tinavu iqoka vaiinti vokiaka arukairera, King Soruva virara iriharo vi vaiintira qaiqaa quahama amitaananrove. Mintiantorave. ⁵ Nahenti vika Devitirara ihi tiha minti tiarave:

Soruva airi vaiinti aru kaivarо

Devitiva viravata uri aatarakero nai airi vaiinti aru kaivo, ti variarave, ti.

⁶ Vinavuka minti tuvaro Akisiva Devitira aaramakero tiharo, Noravano Kotiva ekaa enta qaqi variqiro vi vaira autuqaa te quqama ariara mintima turo: Are avuqavu vaiintivano varianarara ti, te ai aareha ani ti kahaqihara raquane turo. Are tintira ani variana entaraqaaahair kia qora okaravata autuanara tavaunarave. Mpo, avuhainaa vaiinti vokiaka ariara kia tinavu hampata aniane tiarara tira, ⁷ are anirantera muntuka qihaaqirara maaqaini oru variane. Hauri are vo okara autukaira vira kaara vinavuka ariara kia quahevorave, tiro.

⁸ Akisiva minti tuvaro Devitiva aqao tiro, Nora vaiintio, te ai kaiqa hoqaramake varauna entaraqaaahai te nana qora okara autu kaunarave? Mpo, nora vaiintio, nana kaarae te kia ho oru tenta avuhainaa vaiinti navutaa hampata raquainarave? tiro.

⁹ Minto tuvaro Akisiva Devitirara tiharo, Mpo, Devitio, te iri tavaurara are Kotira *enseli* voqaara tiriara kempukaiqama kera iriqira vuanarave. Mpo, Pirisia iqoka vaiintiqaa raqikiaka vinavuka ariara tiha, Viva kiama tinavu hampata raqinaini vuarire, tiavo. ¹⁰ Ho Devitio, hura toqaqi aatita virara nena iqoka vaiintivata ntita varera vuane, tiro.

¹¹ Minti tuvaro Devitiva nai iqoka vaiinti hampata vaaka toqaqi himpiro anirantero Pirisiaini vumanta Pirisia vika iqoka raqireka Jeseririni vurama.

30

Devitiva Amareki hampata iqoka raqua

¹ Devitiva nai iqoka vaiinti hampata anirantero aaraini taaramo entanavuara viharo nai vatuka Sikiraakini oruntero tavomanta Amareki ani Sikiraaki vatuka ihaqohai tatoqa kovaro ita vura. Amareki vika ani Iutaa vatanaaka Nekevi Aahara Vataini vauka hampata raqiqi vauka hampatavata raqua.

Vika Sikiraakiqi vauka naatarake vika vatukavata iha quarake, ² nahentive vaintive ekaa vi vatukaraq vauka kia arukaraiti, vika qaqi ravaaqavuke ntita vare vura.

³ Ho Devitiva nai iqoka vaiinti hampata Sikiraakini anintero tavovaro ihavano vatuka maata ekaa ita taiqa kora.

Amareki vika maaquve, raavurave, naatave, ekaa ravaaqavuke ntita vare vumantara ti, ⁴ Devitiva nai iqoka vaiinti hampata nái vanti nahentiara iqi rataqi vi vauvaro vika kempukavano taiqa vumanta vaura. ⁵ Amareki vika Devitira naatatanta, Jeseririhainaara Ahinoamiravata, Nabaarira tentoqa nahenti Avikeriravata, ravaaqavuke ntita vare vura.

⁶ Mintumanta Devitira iqoka vaiinti vika virara arara itemanta nuntu nauntu tiha, Oho, Devitira kaarama navutaka tinavu nahentivata vaintivata ravaaqavuke ntita vare vuavo, tivake nai tiva ami nai tiva ami tiha, Kaiqe ori varake Devitira arukaare, ti vauvaro Devitiva vika uva iruvaro vira muntuka voqamakero goraiquvaro viva nai Variqa Nora Kotirara noraiqaakero iriqiro vuvaro viva vira kempukaiqama amitora.

⁷ Devitiva Kotira kaiqa vara amite vau vaiintira Ahimerekira maaqu Abiataarara tiharo, Efoti tavuna vare anirage viraqohai Kotiva te nana kaiqa varaainara humiqaarire, tuvaro Abiataava vira vara viri amura.

⁸ Viri amuvaro Devitiva Nora Kotira irero tiharo, Hoe te vika ntataqi vuainarave, kiae mintirarave? Hoe te vika oru ravaaqavu kaainarave, tuvaro Noravano Kotiva Devitira tiva amiro tiharo, Are oru vika ntataqi vivira, nena vaintivata nahentivata ruaruuma nimitaane, tiro.

⁹⁻¹⁰ Minti tuvaro Devitiva nai iqoka vaiinti 600navu hampata oru Amareki vatanaaka ntataqiro vura. Vika vivi, Beso-Namari-Onkai vaunaini oruntomanta vira iqoka vaiinti hini kuka 200navu vika kempuka taiqomanta tiha, Mpo, tenavu kia ho namari taqa vare hini mantaraini onkai vainaini virarave, tuvaro Devitiva vika mini kero nai iqoka vaiinti 400navu hampataqai Amareki ntataqiro vura.

¹¹⁻¹² Devitira iqoka vaiinti Amarekiara rantaqi viha tavovaro Isipi vatanaa vaiinti vovano ahakaqi qoraigama viro vaumanta vika vira vita vare Devitiva vaunaini viri ke mparetivata, fíki aaharaigama toravata, uaini tava aaharaigama toravata namarivata amuvaro nora. Vi vaiintiva taaramo enta entaqivata aatitoraqaaavat vaiharo kia karavata namarivata novaro nora antuqa aruvaro vauva vi karara namakero kempuka varero ho vaura.

¹³ Viva qaiqaa kempuka varovaro Devitiva vira irero tiharo, Tavave ariqaa raqiki vai vaiintiva vaivo? Are taihainaavave? tuvaro viva tiharo, Te Isipi vatanaakave. Amareki vaiinti vovano ti rumpa varero viri kaimanta te vira qumina kaiqa vaiintiqamavi vauraukave. Te aihaviraara vare maini vauraro ti nora vaiinti viva ti qaqira kero vimanta te taaramo entanavu maini ahakaqi vauro.

¹⁴ Tenavu oru Nekevi Aahara Vataini variaka Kereti vatanaakave, Iutaa vatanaakave, Kalepi vatanaakave, vika hampata raquqi viha vika airairavata vare, Sikiraakini orunte vi vatukara ihaqohai tatoqa kaunarave, tiro.

¹⁵ Viva minti tuvaro Devitiva vi vaiintiva irero tiharo, Are hoe ti vita varera Amareki oru varianaini vinarave? tuvaro vi vaiintiva tiharo, Mpo, are Kotira autuqaa tiharo, Kia ai arukarerave, kia te ai nora vaiinti kauquqi karerave tirera, te homa ai vita vare virarave, tuvaro Devitiva te are tianantemake mintirerave tiro.

¹⁶ Minti tuvaro Isipi vaiinti viva Devitira vitero Amareki vaunaini oruntovaro Devitiva tavomanta Amareki vika vo kanta vo kanta vaiha Pirisia vataihaiive, Iutaa vataihaiive, airi karave airairave vare anura vara keha, nora kara ne vaura.

¹⁷ Minti vauvaro vira qararaa aatita vuvaro Devitiva nai iqoka vaiinti hampata iqoka hoqarama tero Amareki hampata raquqiro viviro entama kora. Vika Amareki airitahaar ukomanta 400navuqai nái kameriqa vaarinente ruqemake kantama vura.

¹⁸ Mintuvaro Devitiva nahentive vaintive, airairave, nai naatatantave, Amareki vika vare anu haikara ekaa nai varovaro ¹⁹ kia vo haikavata kakakima vuvaro nahentive, vaintive, ekaa vita varora.

²⁰ Devitiva ekaa Amareki vika ura purumakauvata sipisipivata varomanta vira iqoka vaiinti vika vi haikara nái nivuni ruhaaqiqi viha naveraitiha, Maa purumakaukave sipisipikave Devitira koqaama vaivo, tura.

²¹ Vika minti tivake vi haikara vare, iqoka vaiinti 200navu vika kempuka kia vaumanta kia Devitira hampata anuka konaini, Beso Namariqi oru ntora. Vi vaiintika vihai Devitiravata vira hampata anu vaiinti nahentikavata ntita kareka anuvaro Devitiva vika uva mantora.

²² Devitiva vika uva mantomanta vira hampata vuka qora vaiinti vonavu tiha, Vika kia tinavu hampata vuara kaara kiama tenavu raqihava varatauna airairara vika nimirerave. Vika homa nái naata vaintiqai ntitevarave, ti.

²³ Vika minti tuvaro Devitiva aqao tiro, Ti qata vakaa, Ne kia minti tiate. Noravano Kotiva naima maa airairara tinavu timivo. Viva tinavu koqema kero antua timitaimanta tenavu tinavu vatuka qoraiqamake vuaka naatara kauro.

²⁴ Ne ti varia uvarara kiama vovano koqe uvave tianarove. Tenavu vi haikara koqemake rairake ekaa vaiintivano vohaa qaramake varaare. Raquanaini vuakave, maini vaiha airairaqaqaa raqiki variakave, vika vika vohaa qaramake rairake varevarave, tiro.

²⁵ Devitiva vi entara minti tivakero uva kempukaiqama kero tiva torara ti, vi entaraqahai Isareri vika vi okarara avataqi ani, vate maa entaravata avate variara.

²⁶ Ho Devitiva Sikiraakini oruntero, viva airaira vare anura hini rairakero vara komanta vika vare Iutaa nora vaiintinavu vonaini vonaini vauka vuru nimura. Devitiva vika nimiro tiharo, Nora Kotira navutaaka ia airairara, ari airaira tenavu varema, rairake nivata qaqima nimuro, tiro.

²⁷ Devitiva vi airairara vara kero Beteliqi vaukave, Iutaa hini mantaraini vauvatukara Ramotiqi vaukave, Jatiqi vaukave, nimura.

²⁸ Aroequiv, Sipimotiqive, Esatemoaqive, ²⁹ Rakaalquiv, Jeramel i vatanaka Nekevi Ahara Vatainai vaukave, Kini vatanaka Nekevi Ahara Vatainai vaukave, ³⁰ Homaaqive, Borasaaniqive, Ataakiqive, ³¹ Hebaroniqive, ekaa mini mini vauka Devitiva raira kero nimitora.

Haaru Devitiva nai iqoka vaiinti hampata vo vatuka vo vatuka vi ani vaumanta vika vira kahaqama amitorara iriharo, viva vi airairara raira kero vikavata nimitora.

31

Soruravata vira maaqunavuvata arukora

¹ Ho Pirisia vika Isareri hampata Giliboa Aiqinaqaa raquqi viha airi Isareri ari komanta Isareri hini kuka qetake ruqemake vura.

² Qetake vumanta Pirisia vika Soruravata, vira maaqu taaramonavuvata, ntataqi vivi, Ionataanirave, Abinadaapirave, Malikisuarave, vinavuka arukora.

³ Pirisia vika Sorura avataqi viha vira hampata iqoka raquqi vuvaro iqokavano noraiqama vumanta Pirisia vokuka vevaqohai Sorura kaakahira arutovaro vira vaata qoraiqama vura.

⁴ Mintuvaro Soruva nai auvihehavaa vareharo ni vau vaiintira aarama kero virara tiharo, Ho are nena iqoka paipre varakera ti haru kaane. Hauri Pirisia una variqara iria vaiintika ani ti qoraiqama timitaqi vi, ti haru kevorave, tiro. Viva minti tuvarovata, vira auvihehavaa varo vaiintiva voqamakero qeteharo kia Soruva tunte ura. Mintuvaro Soruva naivano nai iqoka paipre tuatero viraqaa aqu vuvaro paiprevano vira raqonta kovaro qutu vura.

⁵ Viva qutu vuvaro vira auvihehavaa varo vaiintiva tavero, vivavata nai iqoka paipre viraqaa aqu viro Sorukantiro vohaa qutu vura. ⁶ Ho vohaa vi entaraqai Soruvavata, vira maaqu taaramonavuvata, vira auvihehavaa varo vaiintivavata, iqoka vaiinti viraqaa raqiki vaukavata qutu vura.

⁷ Mintumanta Isareri vatanaka ugita kanta vaukave, Iotani Namari hini mantaraini vaukave, vika tavomanta Isareri iqoka vaiinti qetake vumanta Soruvavata vira maaqunavuvata qutu vumanta, vikavata nái vatuka, vo vatuka vo vatuka mini ke getake vumanta Pirisia ani vika vatuka, vo vatuka vo vatukaqiqi vaura.

⁸ Vira qararaa Pirisia vika ani Isareri qutu vuka vaataqaahai utavaaqave, airairave, varareka ani tavomanta Sorura vaatavata vira maaqu taaramonavu vaatavata Giliboa Aiqinaqaa vaumanta ⁹ vika oru Sorura aunta teqake, vira iqoka utavaqaqaaqini varake, Sorura aruko uvara Pirisia vatainai viti viri tiva nimiate ti, vika vaiinti vonavu nititomanta vika oru nái una variqa naavu, vo naavu vo naavuqii vauha Pirisia vatanaka tiva nimura.

¹⁰ Ho vika Sorura iqoka utavaaqa vare vuru una variqa nahenti Astaatera naavuqi vate, vira vaata vare vuru vatuka vo Beti-Sani vaantaavuraqaa niriqohai arutovaro viraqaa vaura.

¹¹ Mintumanta Gileatti vataini Jabelihainaaka Pirisia vika Sorura vaata qoraiqama amitorara iri, ¹² vikaqihai vaiinti taruka vonavu entaqi nuvaqi ani, Beti-Sanini aninte vaantaavuraqaahai Sorura vaatavata, vira maaqunavu vaatavata viquke vare, anirante vuru Jabelini iha quara kora.

¹³ Vinavuka vaata iha quarake viragaahai vika vuhaari vare, Jabelini *tamarisive* tu katarira okaraini quntama tora. Vira quntama tomanta vi vatanaaka 7 enta variqi viha kara kia naraiti vaura.

2 SAMUERI (2 Samuel – 2 Samuel)

Devitiva Soruva qutu vurara irura

¹ Sorura arukovaro qutu vu entara Devitiva nai iqoka vaiinti hampata raqiharo Amareki vatanaaka naatara kero orurantero ani Sikiraakiqi taara enta vaura.

² Ho vira qararaa Sorura *seri* naavu maaqaqihairo vaiinti vovano nai utavaaqa nonkutora qunahi kero hora varakero nai qiataqaa aqu varero Devitiva vaunaini oruntero, Devitira nora autuara iriharo vira avuqaa vatainai kankakaa viro vaura.

³ Viva oruntuvaro Devitiva vira irero tiharo, Are taihairae aniaro? tuvaro viva tiharo, Te Isareri *seri* naavu maaqa mini ke, rugemake are iananaini anuro, ⁴ tuvaro Devitiva vira irero tiharo, Raqi okarara are ti tiva timiane, tuvaro viva tiharo, Isareri iqoka vaiinti vika raquaraqhai qetake vuamanta Pirisia vika Isareri iqoka vaiinti airima arukaavo. Soruravata vira maaqu Ionataaniravata aruma kaavo, tiro.

⁵ Viva minti tuvaro Devitiva vaiinti vira irero tiharo, Are nantimakerae Soruka Ionataanika qutu vuara tavaaro? tiro.

⁶ Devitiva minti tuvaro viva tiharo, Te Giliboa Aiqinaqaa vaiha tavauraro Soruva nai vaantaara tuatero muntuviro vaimanta Pirisia iqoka vaiinti vika iqoka *kaariqive*, ohi tauvaqqaave vaiha, Soruva vainaini auma auma ani variavaro ⁷ viva tugantaa viro ti tavero ti haaramanta te vo turaro ⁸ viva ti irero tiharo, Are taihainaavave? timanta te vira tiva ami tiha, Te Amareki vatanaakave, turaro ⁹ viva tiriara tiharo, Navutaaka ti qoraiqama timitaamanta te aumakaama qutu virarave. Mpo, are kantera ani ti haru kaane, timanta ¹⁰ te orunte tavauraro viva qutu vuarirava aumaiqimantara ti, te vira aru kauro.

Viraqahai te vira avuhainaa tovaqa vira qiataqahai viqu vare, vira kaantavavata rahunku vare anuro. Nora vaiintio, maa vi haikara te ai amirerave, tiro.

¹¹ Devitiva vi uvvara iruvaro vira muntukavano voqama kero qoraiquvaro viva nai utavaaqa qunahi qaannahima komanta vira iqoka vaiinti vikavata nái utavaaqa qunahi qaannahima kora.

¹² Navutaaka Soruravata, vira maaqu Ionataaniravata, Nora Kotira iqoka vaiintivata, ekaa Isareriaravata, arukorara iriha vika kara kia naraiti, iqi rataqi vivi, entama kora.

¹³ Devitiva qaraaka vaiinti uva vare anura vira irero tiharo, Are ta vatanaavave? tuvaro, Te Amareki vatanaaka Isarerini maahota vauraukave, ¹⁴ tuvaro Devitiya qaiqaavata vira irero, Nantiharae are kia qetaraitira, Noravano Kotiva kaama tai vaiintira arukaaro? tiro.

¹⁵⁻¹⁶ Devitiva minti tivakero nai iqoka vaiinti vo aaramakero tiharo, Vira aru kaane, tuvaro viva nai iqoka paipeqohairo vi vaiintira teqa kovaro qutu vura. Qutu uvavar Devitiva vira tavero tiharo, Huviqorave. Nena qora okara kaarama are qutu vuaro. Are nena noqihaire tiva qovarama kera tihara, Te Noravano Kotiva kaama tai vaiintira arukaunarave tianarave, tiro.

¹⁷ Minti tivakero Devitiva Soruravata vira maaqu Ionataaniraravata mpo ike tiharo maa ihira tivatero, ¹⁸ Iutaa vatanaakara ne maa ihira tivaqi vuate tura. Vi ihirara *Huru Ihive* tuvaro vira *Avuqavu Nua Vaiintika* vukuqi qara ntuvatora. Devitiva mintima kero ihi tiva tora:

¹⁹ Mpo Isarerivauvo, ni kempuka iqoka vaiintitanta arukaavaro vitanta vaatavano ainqinaqaa hiqintiro vairave.

²⁰ Vitanta qutu vua uvvara ne kiama Getini orunte tiva qovarama kaate.

Ne kia Asakeloniqi vo aaraqaa vaiha tiva qoqaiqama nimiate.

Hauri Pirisia vatanaa nahenti vi uvvara iriha quahevovare.

Hauri qumina vo vatanaa nahenti vi uvvara iriha quahevovare.

²¹ Mpo, Giliboa Aiqinao, ariqaaama tinavu kempuka iqoka vaiinti qutu vuamanta vika kainkevano ariqaa quminama vaivo.

Sorura kainkevanovata qumina vaivaro viva kiama ho qaiqaavata vhahvera aqukero hiritaanarove.

Mpo, Giliboa Aiqinao, vira kaara aaquvanove varavuvanove kia ariqaa hiqintirera, te hove tiataarave.

Karavanovata kia ariqaa qampiqairera, te viraravata hove tiataarave.

²² Ionataaniva veva ari vai huruva kia qaqinivata viraitiro, navutaaka vaataqiqai ari vairave.

Soruva tuatai iqoka paipeva kempuka vaiinti airitaha arikaivaro vika naarevano viraqaa vairave.

²³ Mpo, Soruo, Ionataanio, netanta qaqi varia entara vaiinti nahenti nitantara koqe vaiintitantave tivakeha nitantara muntuka vataarave.

Mpo, netanta qaqi varia entara voahaatanta variqi vi, qutireka iha voahaatanta qutu vuvarave.

Netanta kante variava memoravano ata varero kantaira viravata aatara kairave.

Nitanta kempukavano vaireva, *raioni* kempukavata aatara kairave.

²⁴ Isareri nahenti, ne Sorura iqi rata amitaate. Viva ni koqema nimitaimanta ne naare utavaaqave vo haikave nonkuteha, *kori* origohai aututaa haikaravata nenta vaataqaa *vahehemate/vaataiqamate* variarave.

²⁵ Mpo, tinavu iqoka vaiinti taruka, vika raquqi viha vuru qutuma vuavo. Mpo, Ionataaniravata aru kaavarvo vira vaatavano ainqinaqaama vaivo.

²⁶ Ionataanio, ti qata vakao, te ariara noraiqaake mpo ike turo.

Ti muntukavano voqama kero ariara vaivaro ai muntukavanovata voqama kero tiriara vairave.

Mpo, Ionataanio, ai muntukavano tiriara vaiva vaireva, nahentiara muntuka vataara viravata aatarake vairave.

²⁷ Mpo, tinavu iqoka vaiinti taruka raquqi viha vuru qutu vuavaro vika auvihehavaa-vanu quminama vaivo, tiro.

Minti tivakero Devitiva ihi tiva nimitora.

2

Devitiva avuhainaa vaiintiqama vura

¹ Soruka Ionataanika qutu vuvaro viraqaa hairo Devitiva Nora Kotira irero tiharo, Hoe te „Pirisia maini ke,“ katu vare Iutaa vatuka voqi oru variainarave kiae variainarave? tuvaro Noravano Kotiva ho mini vuane tuvaro Devitiva qaiqaa irero, Te oru ta vatukaraqie variainarave? tuvaro Noravano Kotiva Hebaroniqima oru variane tiro.

² Vi entara vira naata vovano Jesaririhainaava Ahinoamiva vauvaro, vovano Avikeriva Kaamelihaina vaiinti Nabaarira tentoqa varato nahentiva vaura. Ho Noravano Kotiva mini vuane tuvaro Devitiva nai naatatanta ntita varero oru Hebaroniqia vaura.

³ Devitiva vireva iharo viva nai iqoka vaiintinavuvata, vika naata vaintivata ntita varomanta vika hini kuka oru Hebaroniqia vaumanta hini kuka Hebaroni aumanto vau vatukara voqi voqi vaura.

⁴ Devitiva viraqi oru vaumanta Iutaa vaiinti Hebaroniqia aninte vika Devitirara timavu avuhainaa vaiinti variarire ti, Devitira qiatagaqa vahavera aqu amiteha vira kaamatora.

Gileati vataini Jabesihainaaka Sorura vaata vataqi quntama to uvvara vokuka Devitira tiva amuvaro ⁵ viva Jabesini uva varakero tiharo, Ne nenta King Sorura koqema amiteha vira quntama taarara iriharo, Noravano Kotiva nintavata koqema nimitaarire. ⁶ Mpo, Noravano Kotiva ni kia qaqlira karaitiro, niara noraiqaakero iriqiro viharo ni koqema nimitaqi virera, te heve tiataarave. Ne Sorura koqemake quntama taarara irihama tevata ninta koqema nimitarerave. ⁷ Soruva ni avuhainaa vaiintivano qutuma vivo. Ho Iutaa ankuvano ti kaamate noraiqama kaarara ti, ne virara iriha kempukaiqamake vailha ti vevaaraini variate, tiro. Devitiva minti tura.

Apineva Sorura maaqu Isi-Bosetira noraiqama kora

⁸ Nera maaqu Apineva Sorura iqoka vaiintiqaa raqiki vauva viva Sorura maaqu vo Isi-Bosetira vita varerio Iotani Namari taqa varero Mahanaimi vatukaini vura.

⁹ Viva mini vaharo Isi-Bosetira noraiqama kovaro viva Isareri vata, Gileative, Aseve, Jeseririve, Efaraimuve, Benaminive, ekaa vikaqaa raqiki vaura. ¹⁰ Isi-Bosetira 40 ihinavu varakova avuhainaa vaiintiqama viro Isareri vikaqaa taara ihiara raqikiqiro vura. Iutaa anku vikaqai Devitira vevaaraini vaura.

¹¹ Ho Devitiva Hebaroniqia vaharo 7 ihi 6 torara Iutaa vikaqaa raqiki vaura.

Isareri Iutaa hampata raqura

¹² Apineva Sorura maaqu Isi-Bosetira iqoka vaiintinavu ntita varero, Mahanaimi kero Gibeoni vatukaini vura.

¹³ Vika mini vi vauvaro Ioaapiva Devitira iqoka vaiinti ntita varero ani Gibeoni Varuva Namari vaunaini vika rantakora. (Ioaapira nova „Devitira nakaava, Seruava vaura.) Ho Isi-Bosetira iqoka vaiinti vika varuva namari hini mantaraini oquvi vaumanta Devitira iqoka vaiinti vika hini mantaraini oquvi vaura.

¹⁴ Mintimake vauvaro Apineva Ioaapirara tiharo, Are qaqi kairamanta ai qaraaka vaiintivata ti qaraaka vaiintivata iqoka avateha tavareka nai aatarake nai aatarake iate, tuvaro Ioaapiva virara hove tiro.

¹⁵ Manti tumanta Benaminira ankuqihai vaiinti 12 navuvano Isi-Bosetira iqoka vaiintinavu oru Devitira iqoka vaiinti 12 navu hampata raqi vaura. Devitira iqoka vaiinti vohaiqa vohaiqavano Isi-Bosetira iqoka vaiinti vohaiqa vohaiqavano hampata raqi vaura.

¹⁶ Vika raquqi viha vohaiqa vohaiqavano nai qjata nai qjata toteha iqoka paipeqohai nai taaqe nai taaqeni raqontake 24 vinavuka vohaa vaka hiqintivi qutu vura. Mintimake qutu vurara ti, vate vi vatukara autu nteha *Helakaati-Hasurimi - Iqoka Paipe Vatukave tiara*.

¹⁷ Ho vi entara taara anku vitantaqihairo nora iqokavano qovaraiqura. Devitira ankuvano Apineravata Isareri ankuvata naatara kora. ¹⁸ Seruiara maaqu taaramonavu Ioaapiva vo, Abisaiva vo, Asaheriva vo, mini vaura. *Diaavano* voqama kero kantaintema kero, Asaheriva voqama kero kante vau vaiintiva vaura.

¹⁹ Mintumanta Isareri vika ruqemake vi anima vuvuro Asaheriva himpiro viva kia vo vaiinti vo vaiinti aru ntataqi viraitiro, viva Apineraqai aruqiro vura.

²⁰ Mintuvaro Apineva antaviro tavovaro Asaheriva vira avataqiro anuvaro Apineva Asaherira irero tiharo, Asaherio, areve? tuvaro viva eo te maa vikave tiro.

²¹ Manti tuvaro Apineva tiharo, Are kia ti haruqira aniane. Oru vaiinti vo avataqira vihara vira ravaaqavu kera vira auvihehavaa varaane, tuvarovata, Asaheriva kia vira uva iriraitiro, viva Apineraqai avataqiro vi vaura.

²² Mintuvaro Apineva Asaherira qaiqaavata tiva amiro tiharo, Qaqira kaane. Kia ti avataqira aniane. Hauri te ai aruke ai vakaara Ioaapira avuqaa kaurira haika varaarorave, tiro.

²³ Apineva minti tuvaro Asaheriva kia viva tu uvvara iriraitiro, qaqiqai vira avataqiro vi vauvaro Apineva nai vaantaara moqaihairo aqukero Asaherira auhaqaa aru raqonta kovaro vaantaaravano tauvaqaini oruntovaro Asaheriva vataini hiqintiviro qutu vura. Viva qutu vumanta iqoka vaiinti vokuka Asaheriva qutu vunaini aninte himpi vaiha vira vaata tave vaura.

²⁴ Mintima komanta „Asaherira vakaakatanta“ Ioaapika Abisaika Apinera avataqi vivi, Amaa Aiqinagaan oruntovaro kuari ruhunku vura. Amaa Aiqinavano Gia vatuka tataaqa vauvaro mini Gibeoni Aahara vatainiara vu aarava vaura.

²⁵ Mini orunte Ioaapika Abisaika tavomanta Benaminira ankuqihai vonavu ani Apinera kahaqireka ruvaaqumavi vira naantiaraini ainqina noraqaa himpi vauvaro ²⁶ Apineva Ioaapira aareru tiharo, Tenavu ekaa entae nai ari nai ari iainarave? Are kiae iriaro? Tenavu mintiaqi vuainaraqihairo nora maaravanoma qovaraiqianarove. Tenavu qata vakaukavarama vauro. Are taireve nena iqoka vaiinti qioqiramanta vika kia tinavu aru vataaqi vuuate? tiro.

²⁷ Apineva minti tuvaro Ioaapiva nai tiva amiro tiharo, Oho, Kotiva ekaa enta qaqi variqiro vi vaira autuqaa te ariara tiha, Are kia minti tiaraitirio, ti iqoka vaiinti vika ni tinavu qata vakaukavara aru ntataqi vivi aatitama kaatirio, tiro.

²⁸ Ioaapiva minti tivakero nai iqoka vaiinti vikara kia qaiqaavata Isareri aru ntataqi vuute tiro, *aanumaara/noma* vuaqovaro iqoka viva taiqa vura.

²⁹ Mintuvaro Apineva nai iqoka vaiinti hampata Iotani ugita kanta entaqi otunte, Iotani Namari taqa vare toqaqvata qaqiqai vivi, nai vatuka Mahanaimini oru ntora.

³⁰ Ho Apineva nai iqoka vaiinti hampata vuvuro Ioaapiva nai iqoka vaiinti *untu/nutu* ruvaaquma kero kaara ntuva kero tavomanta Devitira iqoka vaiinti vikaqihai Asaherivavata, vaiinti 19 navuvata qutu vura.

³¹ Devitira iqoka vaiinti vika Apinera iqoka vaiinti Benaminira ankuqirauka 360 aru kora.

³² Vika Asaherira vaata vare Betarihemi nai qora quntama tonaini vuru quntama tora. Vira quntamate, entaqi Ioaapiva nai iqoka vaiinti hampata vivi, Hebaronini oru ntovaro aatita vura.

3

¹ Ho Devitira ankuqivata Sorura ankuqivata raqirava vukaiqama kero variqiro vi vaura. Devitira anku kempukavano voqavata kempukaiqamaqiro vuvuro, Sorura anku vika kempukavano tuvi vaigiro vaura.

Devitira maaqunavu

² Devitiva Hebaroniqi vaharo qorainti vainti 6 navu vatatora. Vika nutuvano maantimama vairo:

Vira maaqu hoqarenaava Aminoniva vaura. Aminonira nova Ahinoamiva Jeseriri-hainaava vaura.

³ Vira naantiara vira maaqu vo Kileapiva vaura. Vira nova Avikeriva Kaameli-hainaava Nabaarira tentoqavano vaura.

Vitanta naantiara vira maaqu vo Apasalomuva vaura. Apasalomura nova Makaava vaura. Makaara qova King Talimaiva Gesu vataqaa raqikiharo vaura.

⁴ Vinavuka naantiara vira maaqu vo Adoniaava vaura. Adoniaara nova Hagitiva vaura.

Vinavuka naantiara vira maaqu vo Sefatiaava vaura. Sefatiaara nova Abitaaliva vaura.

⁵ Vinavuka naantiara vira maaqu vo Itireamiva vaura. Itireamira nova Ekilaava vaura.

Ekaa vilka Hebaroniqi vatatomka vaura.

Apinera arukora

⁶ Sorura iqoka vaiintivata Devitira iqoka vaiintivata qaqqai raquqi vi vauvaro Apineva Sorura iqoka vaiintiqaa raqiki vauvaro vira kempukavano voqavata vauvaro viva vika nora vaiintivano vaura.

⁷ Vo enta Sorura maaqu Isi-Bosetiva Apineraqaa uva vateharo tiharo, Are nantivarae ti qora naata vontira vaitaaro? tura. Vi nahentira autu Risipaava viva Aiaara raavuravano vaura.

⁸ Viva minti tuvaro Apineva viva tu uvvara iruvaro voqama kero arara itovaro tiharo, Oho, te Iutaa vairi voqaara vaurarae are minti tiaro? Ai qova Soruva avuhainaa vaiintiqama vu entaraqaahai te kia vira qaqla karaiti, te viravata ekaa vira navunaakavata vira tontinavuvata koqemake kahaqi vaunarave. Te kiama Devitira qaqla kauraro ai qoraiqama amitairave. Te minturavarata, are nahentiqaan ntuva kera tiqaa uva vataaro.

⁹⁻¹⁰ Ho iriane. Noravano Kotiva nai kauqu aqiqaa aqukero Devitirara tiharo, Te Sorura ankuqiraaka qaqlake, ai noraiqama kaarirara are avuhainaa vaiinti vaihara ekaa Isareri vataqaave Iutaa vataqaave raqikiane, tirave. Oho, te kia Noravano Kotiva tintemake, Devitira kahaqiariraro avuhainaa vaiintiqama virera, Kotiva homa ti haru kairaqe qutu vuare, tiro.

¹¹ Apineva minti tuvaro Isi-Bosetiva viva tu uvarara voqama kero qeteharo kia vo uvavata nai tiva amura.

¹² Mintuvaro Apineva Devitiva Hebaronini vaunaini uva vara kero tiharo, Tavave ekaa maa vataraqaa raqikianarove? Ho are tintira vohaa uva tiva taatau tairage te ai kahaqiaro ekaa Isareri ai vaiinti nahenti variate, tiro.

¹³ Mintimma kero uva vara kovaro Devitiva Apinerara tiharo, Koqema tiaro. Are vo haika naane ti timirage viraqaahai tetanta uva tiva taatau taare. Are Sorura raavura Mikaalira viva vararer viri ti timiane. Kia mintirera, are kia ho te iainanaini aninarare, tiro.

¹⁴ Devitiva minti tivakero viraqaahairo viva Isi-Bosetiva unaani uva varakero mintimma tiro: Are ti naata Mikaalira tinta timiane. Te vi nahentira koqaa irera Pirisia vika vaata 100 navuqohai koqama taunarave, tiro.

¹⁵ Devitiva minti tuvaro Isi-Bosetiva vi uvvara iriro vokuka nititomanta orunte Mikaalira Laisira maaqu Palitiva varatora vitora. ¹⁶ Mikaalira vita vare vuvaro Palitiva iqiji rataqiro Mikaalira avataqiro viviro, Bahurimi vatukaini oru ntovaro Apineva kempukaiqama kero tiharo, Aniranterea nena maaqaini vuane, tuvaro Palitiva anirantero vura.

¹⁷ Ho Apineva Isareri nora vaiinti vaunaini oruntero vikara tiharo, Ne iriate. Airi entama ne Devitirara viva tinavu avuhainaa vaiintivano vairage tenavu hove tiataarave ti variarave. ¹⁸ Ho vate Devitiva ni avuhainaa vaiintiqama vuaina entava anintaivo. Noravano Kotiva tivatai uvvara ne iritaara iriate. Noravano Kotiva minti tirave: Te tenta kaiqa vaiinti Devitira noraiqama kaariraro viva ti vaiinti nahenti Isareri Pirisia kauquqihairovata, ekaa navutaaka kauquqihairovata ruaruama kaanarove, tirave, tiro.

¹⁹ Apineva minti tivakero viva oru Benaminira ankuvata vi uvvara tiva nimiro, viraqaahairo viva Benaminira ankuvata Isareri vikavata mintimake autireka u uvvara Devitira tiva amireva Hebaronini oruntora. ²⁰ Viva nai iqoka vaiinti 20 navu hampata Devitiva vaunaini Hebaronini oru ntovaro Devitiva nora kara unta kero vilka nimura.

²¹ Nimuvaro Apineva Devitirara tiharo, Are ti qaqla kairaqe te oru Isareri vaiinti nahenti ntita viri kaari vika ai hampata uva tiva taatauke ai vevaaraini vaivara are vikaqaavata raqikiane. Mintiharama are nena antuqaa Iutaavata Isareriqaaavata raqikiane, tiro.

Apineva minti tuvaro Devitiva hove tivakero vira maateraiqama amitero atitovaro anirantero vura.

²² Apineva Hebaroniqi ani vau entara Ioaapiva kia mini vairaitiro, viva Devitira iqoka vaiinti hampata vonaini raqireka vura. Ho Devitiva Apinera maateraiqama amitero atitovaro anirantero vuvaro Ioaapiva raqunaihairo navutaaka airaira airithaha varero orurantero Hebaroniqi anura.

²³ Viva anintero iruvaro Apineva King Devitikantiro ani vauvaro Devitiva vira maat- eraiqama amitero qaqi atitovaro vura.

²⁴ Ioaapiva vi uvvara iriro, viva avuhainaa vaiintivano vaunaini oruntero tiharo, Are nana okarae autuaro? Nantiharae are vira qaqi kaararo vivo?

²⁵ Are vira okara kankoma kera irianarave. Viva kia ai kahaqireva aniravauve. Viva ai unaqaraiqama kero, are nantima kera nira vainara ampeqamakero tavareva anivo, tiro.

²⁶ Ioaapiva minti tivakero Devitira kero, vaiinti vonavu nititomanta vika Siraa vatuka ruvu namari vaunaini orunte, Apinera vita vare anura. Ioaapiva autu okarara Devitiva kia irura.

²⁷ Ho Apinera vita vare Hebaronini anintovaro Ioaapiva unaqaraiqama kero Apinekan- tiro uva tirerave tivakero, vira vita varero vaantaavura qentiana oru vaharo nai *ehai/muhupa* tuatoraqohairo Apinera auha raqonta kovaro qutu vura. Mintimakero Ioaapiva nai qata Asaheriraqaa aru vuntu kora.

²⁸ Ioaapiva autu okarara Devitiva iriro tiharo, Oho, Noravano Kotiva tavaivarao kia ti okaraqaavata, ti anku okaraqaavatavauve Apineva qutivo. Ioaapira nai okaraqaaima vaivo, tiro.

„Noravano Kotiva Ioaapira anku qoraiqama nimitaarire tiro, Devitiva tiharo,“ ²⁹ Oho, Noravano Kotivama Ioaapiravata, vira qora vaiinti nahentivata, vika kuvuarama tekava, qoraiqama nimitaarire. Ioaapira ankuqihai vokika qora rovara varaimanta, vokika qora numuara varaimanta, vokika aiqu rarera viramanta kauru uruqi vimanta, navutaaka vokika arukaimanta vokika kara neva kia vaiqe te hove tirerave, tiro. Devitiva minti tura.

³⁰ Haaru Gibeonini raqu entara, Apineva Ioaapika Abisaika qata Asaherira arukorara iriharo, Ioaapiva Apinera arukero Asaheriraqaa vuntu kora.

³¹⁻³² Ho Devitiva minti tivakero viva Ioaapiravata vira iqoka vaiintivata tiva nimiro tiharo, Ne nenta utavaaqa sunahi qaanahimake, kovaara utavaaqa nonkute, avuni viha Apinerara ike mpo tiha iqi rata amitaate, tumanta Apinera vaata vare Hebaroniqi quntareka *kukuta/kirikera* autuke vare vi vauvaro King Devitiva vika naantiara vura. Apinera quntareka vata quvitora Devitiva aumanto oru vaharo noraiqama kero iqi rate vaumanta vaiinti nahenti vikavata virara iqi rata amite vaura.

³³ King Devitiva Apinerara iriharo mpoq iihira maantima tiro:

Mpo, kia avu aato vataa vaiintivano qutintema kero, Apineva qutivo. Nantivaroe viva mintio?

³⁴ Mpo, Apineo, vika kia ai aiqu kauqu *seniqohai* rumpake ai aru kaavo.

Qora vaiinti unaqaraiqama keha vaiinti arukaantema kero, ai arukaivo, tiro.

Devitiva vi iihira tiva taiqa komanta vaiinti nahentivano qaiqaa Apinera iqi rata amitora.

³⁵ Ho vaiinti nahenti vi entaraqaai Devitira vihi tiha kara naane tuvarovata, viva kempukaiqama kero tiharo, Te kia kara naraiti, variqi vuariraro kuari avuvano vitini tuvi vuarire. Te kia mintiarera, Kotiva ti harukaare, tiro.

³⁶ Devitiva vi uvvara tumanta vaiinti nahenti vika vira uva iri quahora. Kia vika vi uvvaraqaai quaharaiti, Devitiva ekaa koqe okara autira vika viraravata quahora.

³⁷ Ho vi entara Devitira vaiinti nahentivata, ekaa Isarereri vikavata, kankomake iri tavovaro King Devitiva kia eo tuvaro Ioaapiva nai irikero Nera maaqu Apinera arukora.

³⁸ Avuhainaa vaiintivano nai iqoka vaiinti noranavuara tiharo, Mpo, ne kiae kankomake iriavio? Vatema Isarereri vaiinti taruva nora vaiintivano qutu vivo.

³⁹ Oho, Kotiva ti kaama taimanta te avuhainaa vaiintiqamavi vauramantavata, „ti nakaara, Seruiera maaqtanta voqamake vaiinti ari varia vaiintitanta variavaro ti kempuka kia ho vaimanta vitanta nái varaataa i kaiqaraqai vare variarave. Noravano Kotiva naima Ioaapiva qora kaiqa varairara iriharo vira nai qoraiqama amitairaqe te hove tiatarare, tiro. Devitiva turama.

4

Isi-Bosetira arukora

¹ Ho Sorura maaqu Isi-Bosetiva iruvaro Apinera Hebaroniqi arukovaro viva voqama kero qetomanta ekaa Isarereri vikavata ravukuvi qete vaura.

²⁻³ Ho vi entara Isi-Bosetira iqoka vaiinti taaraqanta Baanaka Rekaapika iqoka vaiinti vonavuqaa raqiki vautanta, vitanta nái iqoka vaiinti ntita vare oru vo vatuka vo vatukaqai

navutaaka ntaihe vaura. Vitanta qova Berotihainaava Rimoniva Benaminira vohaa ankuvano vaura.

Haaru vo vatanaaka Beroti vatuka mini ke ruqemake Gitaimu vatukaini vumanta Benaminira anku vaiinti nahenti hini kuka oru Beroti viraqi vaura. Maa entaravata vika viraqi variarara ti, vi vatukava Benaminira vataqi vaivo tiara.

⁴Sorura maaqu Ionataaniva qorainti vainti vohaiqa vatatora vira autu Mefibosetira. Ho Mefibosetiva vainti naati 5 ihi varakero vaumanta Jeseririhainaaka Soruka Ionataanika aruko uvvara vara kovaro Mefibosetira raqiku nahentiva iriro, qeta kero viharo Mefibosetira ravukutora tutakovaro hiqintiro aiqu qoraiqama kovaro rarera vura.

⁵ Ho Rekaapika Baanaka Isi-Bosetira naavuni vireka vivi, kuariqaa oruntora.

Vitanta oruntovaro Isi-Bosetiva kuariqaa auraara vaharo nai vaito taintaraqaa vaite vauvaro ⁶⁻⁷ naavu qentiqaa raqiki vau nahentiva *uiti* rapa tutige vauvaro vira avu tauntovaro vaite vaumanta vitanta evaara naavuqi oriqete tavovaro Isi-Bosetiva nai taintaqaa vaitatero vaura. Viva vaite vaumanta vi vaiintitanta *ehaiqohai/muhupaqohai* vira arara raqonta kovaro qutu vura.

Kia vaiinti vovano vitanta tavomanta vitanta Isi-Bosetira aruke vira aunta teqake qiata vare, Iotani Uqitakanta entaqi vivi aatitake, ⁸aatitoraqaa Hebaroni vatukaini oruntora.

Vitanta Isi-Bosetira qiata vare vuru King Devitira umiqeha tiha, Maa tavaane. Ai navutaara Sorura maaqu Isi-Bosetira qiata, tetanta vare anuro. Avuhainao, Soruvavata vira vaintinavuvata ai qora kaiqa vara amitaarara iriharo, vate Noravano Kotiva ariqaa vuntu kaivo, ti.

⁹Vitanta minti tuvaro Devitiva náitanto tiva nimi tiharo, Noravano Kotiva ekaa enta qaqi variqiro vi vaiva, viva vo maara vo maaraqihairo ti ruaruama timitairave. Ho vira autuqama te maa uvarama nitanta tiva nimirerave:

¹⁰Te Sikiraakipi vauna entara vo vaiintivano kaiqe te Soruva quti uvvara Devitira vuru tiva amiariraro viva koqe uvave tivakero tiriara quahaarire, tivakero anirave. Viva ti tiva timimanta te kia vira uvara quaharaiti, te tenta iqoka vaiintiara turamanta vira ravaqaavuke aru kaarave. Te vira vakaaka iriha vi koqaara nai vi vaiintira amunarave.

¹¹Oho, te nitanta koqaa voqavata nimirerave. Kia qora okaravano viraqi vai vaiintiva nai naavuqi vaite vaimanta netanta quminama vira arukaavo. Oho, netanta vi vaiintira arukaara kaara te viraqaa nitanta aru vuntu kaari kia maa vataraqaa qaqi variqi vuate, tiro.

¹²Minti tivakero Devitiva nai iqoka vaiintiara tumanta vika Rekaapika Baanaka aruke vitanta aiqu kauqu teqake Hebaroni Namari varuva tataaqa vitanta vaata vuru hiritora.

Mintimake viraqaahai vika Isi-Bosetira qiata vare vuru Hebaroni vatukaini Apinera quntama toraqi quntama tora.

5

Devitiva avuhainaa vaiintiqama vura

¹ Vi entara ekaa Isareri anku vika Hebaroni vatukaini Devitiva vaunaini ani ruvaquamavi vaiha virara tiha, Tenavu ai vohaa naarema vauro. ² Haaru Soruva avuhainaaava vau entara, are nenavano tinavu Isareri iqoka vaiintiqaa raqikihara, vika ntita varera vi ani varianarave. Noravano Kotivavata ariara tiharo,

Sipisipi qova nai sipisipiqa raqikinan tema kera, arema ti vaiinti nahenti Isareriqaa raqikihara, vika avuhainaa vaiintivano vainarave, tirave, ti.

³Ekaa Isareri vika nora vaiintinavu ani Hebaronini King Devitira hampata vaiha minti tuvaro viva Nora Kotira avuqaa vaharo vika hampata vohaa uva tiva taatau komanta, vika vahavera vira qiatqaan aqu amite tiha, Arema tinavu Isareri avuhainaa vaiintivano variane, tivake vira kaama tora.

⁴ Devitiva 30 ihi varakova avuhainaa vaiintiqama viro, 40 ihinavuara vaiinti nahentiqaa raqikiqiro vura.

⁵ Devitiva Hebaronini vaharo 7 ihi 6 torara Iutaqaqa raqikiqiro viro, viraqaahairo viva Ieruharemipi oru vaharo 33 ihinavuara Isareriqaaavata, Iutaqaavata raqikiqiro vi vaura.

⁶ Vo enta King Devitiva nai iqoka vaiinti ntita varero Jebusi vatanaaka Ieruharemipi vauka ntaihareva vura. Viva mini vumanta Jebusi vika Devitirara tiha, Are kia ho tinavu haatara kera maaqi aninarave. Are maaqi anira aarava kia ho vaivo. Avu qimpa vikave, aiqu rarera vikave, vikama ai hampata raqiba ai kuvaikaivara are kia ho maaqi aninarave, ti.

⁷ Minti tuvarovata, Devitiva iqoka raqiharo kempuka vaantaavura ututumato vatukara, Saioni Kempuka Vatukave tura aatara kora. Vi vatukara maa entara *Devitira Vatukave* ti variara.

⁸ Jebusi vika avu qimpa vikave, aiqu rarera vikave, homa are vatukaqi vina aarara kuvaikevarave, tuvaro Devitiva nai iqoka vajiintiara tiharo, Namarivano vatukaqi otu vuarie ti, vata haqataa ntuna avataaqi vivi, vi vatukaraqi oriqete, kempuka vajiinti vika avu qimpa vuakave aiqu rarera vuakave ekaa aru vehi autukaate. Ti hantuqavano kia vikara voqavata vaivo, tiro.

Devitiva minti turara ti, maa entara vajiinti nahenti vi uvara iriha tiha, Avu qimpa vikave aiqu rarera vikave kia ho avuhainaara naavuqi vivarave, ti variara.

⁹ Ho Devitiva kempuka vatuka vira varero, viva viraqi oru vaiharo vi vatukara autu nteharo *Devitira Vatukave* tura.

Devitiva vi vatukaraqi vaiharo tumanta vika vatuka aaqaini vo naavu vo naavu kaqakora. Vika otiqete urunte uraqi vata ntava mpiqakeha, naavu maaqa kaqaqi vivi, vatuka vira ututuma tora.

¹⁰ Noravano Kotiva ekaa kempuka vatai Variqava Devitikantiro vauvarora tiro, vira kempukavano voqavata qaiqaa voqavata vaura.

¹¹ King Hiraamuva Taiaa vatukaqaa raqiki vauva vajiinti vonavu nititomanta vika katariqohai taintave qentive auti okarara tavokavata, ori teqakeha naavu kaeq okarara tavokavata, ntita vare *sidaa* katari koqeravata vare, Devitira avuhainaara naavu kaqa amitora. ¹² Devitiva kankoma kero iruvaro Noravano Kotiva nai vajiinti nahentiara iriharo, vira noraiqama kovaro viva avuhainaara vajiinti kempukavano Isareriqaa raqiki vaura.

Devitiva nahenti vonavuvata varatora

¹³ Devitiva Hebaroni mini kero katu varero Ieruharemini oru vau entara, viva qaiqaa nahenti vonavuvata varatora. Hini kuka vira naata avuhainaaka vaumanta hini kuka vira naantiaraihainaaka vaura. Ho Devitiva nahenti vika varatomanta vika qorainti vaintivata nahenti vaintivata vata amitora.

¹⁴ Ieruharemiqi qorainti vainti vatafoka nutu: Samuaara, Sobapira, Nataanira, Soromonura, ¹⁵ Ipihaara, Elisuara, Nefekira, Jafliara, ¹⁶ Elisamaara, Eliadaara, Elifeletira.

Devitiva Pirisia hampata raqura

¹⁷ Pirisia vika irumanta Isareri vika Devitira noraiqama komanta viraqaahai vika nái iqoka vajiinti ntita vare oru Devitira ravaaqavu kareka vuvaro Devitiva virara iriro, viva kempuka vaantaavura aututonaini otu vura.

¹⁸ Viva mini vumanta Pirisia vika ani Refaimi Uqitakanta vo kanta vo kanta ru-vaaqumavi vuvaro ¹⁹ Devitiva Nora Kotira irero tiharo, Te tenta iqoka vajiinti hampata oru vika hampata raquainarave kiae raquainarave? Are vika ti kauquqi kenarave, kiae kenarave? tuvaro Noravano Kotiva nai vira tiva amiro tiharo, Ho vika hampata oru raquane. Te vika ai kauquqi karerave, tiro.

²⁰ Minti tuvaro Devitiva oru Pirisia hampata raquqiro viro vika naatara kora. Viva vika naatara kero tiharo, Huvuravano ekaa haika vauqita varero vintema kero, Noravano Kotiva ti navutaka vauqita aqu kaivo, tura. Devitiva minti turara ti, vajiinti nahenti vi vatara autu nteha, *Baali-Perasinive - Noravano-Vika-Vauqita-Aqukairave* tura.

²¹ Pirisia rugemake viha nái una variqanavu mini ke vumanta Devitiva nai iqoka vajiinti hampata vi haikara aqu vare vura.

²² Ho vo enta Pirisia vika qaiqaa ani Refaimi uqitaini vo kanta vo kanta ruvaaquma vi vuvaro ²³ Devitiva qaiqaa Nora Kotira irovoro Noravano Kotiva nai tiva amiro tiharo, Homa ne vika hampata raqivarave. Ho ne raqireka viha, kiama vika avuqaa qoqaa viraiti, ne virante vika tauvaqaihai *balisami* katarinavu vainaihai aninte vika ntaihaate.

²⁴ Ne katarinavu vainaini orunrite vailha irivaroi katari *amutuqihairo/turuqihairo* vo qara i uvava qovaraiqianarove. Airi iqoka vajiinti aaraqaa vi variavaro vika aiqquaahairo pauta pauta tintema kero, vi uvava qovaraiqianarove. Ho ne vira iri, mintima tivarare: Noravano Kotiva tinavu avuni viharo Pirisia ntaihareva vi vaivo, tivakema ne himpi vaakama oru Pirisia vika ntaihaate, tiro.

²⁵ Noravano Kotiva tuntémakero Devitiva nai iqoka vajiinti hampata Geba vatukaihairo Pirisia aru ntataqiro viviro, Gese vatukaini vuru kora.

¹⁻² Kotiva uva tiva taatauto *Vokisera* Baala vatukaqihai varaate tiro, Devitiva raqua okarara kankomake tavo vaiintika 30,000 ruvaaquma kero vika ntita varero mini vura. Baala vatuka vira vo autu Kiriati-Jearimi Iutaini vaumanta haaru vi *Vokisera* mini vuru vatora. (1 Sam 7:1-2)

Noravano Kotiva ekaa kempuka vatai Variqava uva tiva taatauto *Vokiseva* vauvaro vi *Vokiseraga* enseli maraqua/varah a taaraqanta vauvaro vitanta avutana Noravano Kotiva oquviro vauvatukava vaura.

³ Ho Devitiva nai iqoka vaiinti hampata Baalaini Abinadaapira naavuvano inaara ainqaqa vaunaini orunte *Vokise* vira varake qaraaka ohi veka aututoraqa vara vaari vate anirante vura.

Vika aaraini vi vaumanta Abinadaapira maaqtantia Usaaka Ahioka vekavano avuqavu araqaa vuarire ti, viraqaa raqikiqi vi vaura.

⁴ Ahiova avuni vuvaro Kotiva uva tiva taatauto *Vokiseva* ohi veka viraqaa vaumanta purumakau taaraqantavano veka vira raraa vare vi vaura.

⁵ Rarau vare vi vaumanta Devitivavata ekaa Isarerivata ihi noraiqaake tiha, vo qara vo qara u *musikira*, *kitaave*, *kuleleve*, vo haikave ruqutiha, *tamarini* tuateha rintatimaqi viha, taquqi vo haika nonkute rintatimaqi viha, kure avutanta voqaara ruqutuqi viha, Nora Kotira autu tuaheraqi vi vaura.

⁶ Ho vika Nakonira vatukaini, *utti rirurumake/ritatimake* vare vaunaini oruntovaro, purumakautanta kuntavaai uvaro, Usaava *Vokisevano* hiqintuantorave tiro, nai kauqu tutukero *Vokise* vira utu varoro.

⁷ Usaava Noravano Kotiva qioqama teharo kia *Vokise* vira utu varaate turara kia noraiqaakero iriraitiro, *Vokise* vira utu varovaro vira kaara Kotira arara itovaro vaakama Usaara ruqutu kovaro viva Kotira *Vokise* tataaqa qutu vura.

⁸ Mintima kero Nora Kotira arara itovaro Usaara arukora kaara Devitira arara itovaro vaura. Vaiinti nahenti vi vataro autu nteha *Kotiva-Usaara-Arukainainive* tura. Vatevata vaiinti nahenti qaqqiqi vi autura nte variara.

⁹ Kotiva Usaara arukovaro Devitiva Nora Kotira aatu qetero tiharo, Mpo, nantiakkee te Noravano Kotiva uva tiva taatauto *Vokisera* tenta vaunananaini vara vuru vatararave? tiro.

¹⁰ Devitiva minti tivakero qaqla kero kia vi *Vokisera* nai vatuka Ieruharemini vare viraitiro, Ieruharemini vu aarara kero *Vokise* vira varero Geti vatukaihainaa vaiinti Obeti-Idomura naavuqi vuru vatora.

¹¹ Ho *Vokise* viva Obeti-Idomura naavuqi taaramo torara vauvaro Noravano Kotiva Obeti-Idomuravata vira naata vaintivata koqema nimitora.

¹² Mintumanta vokuka vuru King Devitira tiva ami tiha, Kotiva uva tiva taatauto *Vokiseva* Obeti-Idomukantiro vaivarora tiro, Noravano Kotiva vira naata vaintivata viva i haikaravata koqema amitaivo, tuvaro Devitiva iriro oru Obeti-Idomura naavuqihairo Kotiva uva tiva taatauto *Vokisera* varero vivavata, vaiinti nahentivata, voqamake quahaqi viha Ieruharemini vira vara vuru kora.

¹³ Obeti-Idomura naavuqihai vaiinti vonavu *Vokise* vira aqu vare, 6 tataa aiqut ntavaaqi vi, oru himpite vauvaro Devitiva purumakau qora vovata, naati purumakau vaata vauravata, arukero Kotira *ofaa* iha quara amitora.

¹⁴ Ho Devitiva *efoti* tavunaqai rumpatero vaiharo Nora Kotira autu tuaherareva noraiqaakero ihi nteharo ihi tivaqiro vi vaura. ¹⁵ Devitivavata ekaa Isarerivata Noravano Kotiva uva tiva taatauto *Vokisera* vare quaheda *aanumaara/noma* vuqaqqi viha noraiqaake naveraitivaqi Ieruharemini vura.

¹⁶ Vika *Vokise* vira vare Devitira vatuka Ieruharemiqi anuvaro Sorura raavura Mikaaliva *uintuanahairo* *Vokise* vare anu vaiinti nahentika tave vaura. Viva tavararo vira vaati King Devitiva Nora Kotira autu tuahereharo ihi nteharo ravukuvu ravukuvimaqi ani vauvaro viva nai avu aatoqihairo Devitiva qorahaa autivo tivakeharo nunurama amitora.

¹⁷ Ho vika Kotira *Vokise* vare, Devitiva *seri* naavu henuqama toraqi vuru vatovaro viraqaaahairo Devitiva ihavano ekaa kaintu itakaaina *ofaa* iha quara amitero, Kotiva Isareri hampata vohaa variaina *ofaaravata* iha quara amitora.

¹⁸ Devitiva *ofaa* iha quara tero viraqaaahairo viva nai kauqu tuahera kero Noravano Kotiva ekaa kempuka vataira autuqaa vaiinti nahenti koqema nimitora.

¹⁹ Viraqaaahairo Devitiva mini ruvaaqumavi vauka mparetivata, iha quarato matiravata, aurumato *uaini* tavaravata vohaiqa vohaiqa nimumanta vare, vika anirante nái maaqa nái maaqa vura.

²⁰ Vika vuvaro Devitiva nai naavuqi oru nai vainti nahenti uva mantareva vuvaro Sorura raavura Mikaaliva naavuqihairo vevantero Devitirara tiharo, Ho koqema iaro. Are Isareri avuhainaa vaiintivano vaharavata, vate are nena nora vaiinti vika kaiqa

nahenti nivuqaa toka voqaara vaihara, ravukuvi ravukuvi i variaro. Kia avu aato vataava kia kauriraitiro, nai vaata qohaama kaintemakera, are mintiaro, tiro.

²¹ Minti tuvaro Devitiva virara tiharo, Te Nora Kotirara noraiqaake irihama vira avuqaa ma ihi ntauro. Noravano Kotiva vaiinti vo nai vaiinti nahenti Isareriqaa raqikiarire tiro, ai qora qoririma kero kia vira ankuqihairo vaiinti vo kaama taraitiro, viva ti noraiqama kairave. Viva mintirara ti, te Nora Kotira avuqaa quaheha mintunatemake, naantiara qaiqaa qaiqaavata mintiaqi virerave.

²² Te mintiaqi viha tenta hutu voqavata vara muntuviqama karerave. Are tiriara nora kaurira haika vararo tiaramantavata, vate kaiqa nahentinavuara tiarauka, vika tiriara viva nora autu vataavama vaivo tivarave, tiro. ²³ Devitiva minti tuvaro Sorura raavura Mikaaliva qaqi vau entara *naahiar/qururaiqama* viro kia vainti vataraitiro vaura.

7

Nataaniva Devitira tiva amura

¹ Ho Noravano Kotiva Devitira kaha quvaro viva maateraiqiharo vaumanta vira navutaaka hini hini vauka kia iqoka raqireka anuvaro Devitiva nai avuhainaara naavuqi koqema kero vaura.

² Viva paropeti vaiinti Nataanirara tiharo, Mpo, te *sidaa* katariqohai kaqataa naavura koqeraqi vauraro Kotira *Vokisevano seri* naavuqi vaivaro kiama koqe ivo, tuvaro ³ Nataaniva virara tiharo, Noravano Kotiva aintiro vairara tira, are nana haika autirera irera, qaqima vi haikara autuane, tiro.

⁴ Nataaniva minti tuvarovata, vohaa vi entara entaqi Noravano Kotiva Nataanirara tiharo, ⁵ Are oru ti kaiqa vaiinti Devitirara Noravano Kotiva ariara mintima tivo tiane:

Devitio, kia te ai kaamate naavu vo kaqa timitafrage te viraqi variare tunaravauve.

⁶ Te Isipiqihai ni kaivaqaukavara Isareri ntita vare anuna entaraqaahai te seri naavuqi vona vona variqi viha, maa entaravata mintimaqi vi ani vaunarave.

⁷ Haaru te ni Isareri hampata vona vona niha vaiinti vonavu niqaa raqikiate ti, vinavuka noraiqama kaunarave. Ho kia te vikara tiha, Nantihae nenavu kia sidaa katariqohai ti naavu kaqa timitaavo? tunaravauve, tiro.

⁸ Noravano Kotiva minti tivakero qaiqaa Nataanirara tiharo, Are maa uvaravata ti kaiqa vaiinti Devitira tiva amiane:

Te Noravano Kotika ekaa kempuka vataukama vauro. Are ahakaqi sipisipiqa raqiki variana entara ti vaiinti nahenti Isareriqaa raqikiane ti, te vihai ai vitake kaama taunarave.

⁹ Are vona vona vi ani variaramanta te ainti vaiha ai navutaaka vara vatainiqamake vaurara are vika naatarake varianarave.

Ho vate maa entara te ai kahaqiarirara are nora vaiintivano vairaro ai autuvanovata uritarero, vo vatanaa vo vatanaaka nora vaiinti nutu voqarama varianarove.

¹⁰⁻¹¹ Vo vatanaaka kia qaiqaa qaiqaa niqaa vo maara vo maara vataimanta ne koqemake variate ti, te ni Isareri tenta vaiinti nahenti maa vatara ni nimunarave.

Haaru ne Kenaani maa vataraqaa ani variamanta te qjata vaiinti, vo vaiinti vo vaiinti ni Isareri kaama nimitauna entara, vi entara hini hini mantaraini varia vatanaaka ni qaiqiqaa qoraiqama nimitaqi vi variarave. Ho vate vika kiama qaiqaavata ni qoraiqama nimitaqi vivarave. Te ekaa ni navutaaka ravaaqavuke qioqama taari ne ho maateraiqihai variqi vivarave.

Ho vate te Noravano Kotika ai tiva ami tiha, Tema ariara iriha naavu vo* ai kaqa amitarerave, turo.

¹² Are qutu viramanta ai quntama taiqe te ai maaqunavuqihai vaiinti vo noraiqama kaariraro viva ai vatuka varero Isareriqaa raqikiqiro vuuanarove. Te vira kem-pukaiqama amitaariraro viva Isareriqaa koqemakero raqikiqiro vuuanarove.

¹³ Ho vi vaiintivama ti hutuara iriharo ti naavu kaqa timitaanarove. Te tiariraro vira ankuvano raqikiha vare kaiqava kia taiqa viraitiro, ekaa enta ekaa entama variqiro vuuanarove.

¹⁴ Te vira qoka variariraro viva ti maaqunavoma varianarove. Viva qora kaiqa vara kairera, vira maaqunavano qora kaiqa vara kaivarao nai qova vira ruqutiharo avuqavu intemake, tevata vira ruqutihua avuqavu qiainarave.

¹⁵ Te Sorura qaqirkake kia vira qaiqaavata koqema amitaurara are vira vatuka varaanarave. Ho kia te vi vaiintira mintima amitaraiti, vira qaqi koqema amitaqi virerave.

* **7:10-11:** Noravano Kotiva naavuara tiharo uva tuqantaakero Devitiva kuvuarama taariraukara tura.

¹⁶ Ai ankuvata, vika raqikiha vare kaiqavavata, kia taiqa vuanarove. Vika ti avuqaa ekaa enta avuhainaa vaiintiqamavi variqi vivarave.
Minti tivakera Devitira tiva amiane, tiro.

¹⁷ Noravano Kotiva minti tuvaro Nataaniva Noravano tu uvara iriro vuru ekaa vi uvara Devitira tiva amura.

Devitiva Kotirara koqeve tura

¹⁸ Ho King Devitiva Noravano tiva amu uvara iriro, viraqaaahairo viva himpiro oru Nora Kotira seri naavuqi vira avuqaa oquivi vahiaro vira aarerero tiharo,

Noravaauvo, are ekaa haikaqaa raqiki variaravama variaro. Ike, te tenta vainti nähenti hampata qumina vaiinti nahenti vauraravata, are tinavu koqema timitaanarave.

¹⁹ Mpo Noravaauvo, are ekaa haikaqaa raqiki variarava tinavu koqema timitaanarave. Are qaiqaavata tinavu koqema timitareva tiharo, Te are kuvuarama terauka minti minti irerave, tianarave. Mpo Noravaauvo, are ekaa haikaqaa raqiki variarava variaramanta te qumina vaiinti vauraravata, are nora haika autireva ianara ti humiqaaro.

²⁰ Mpo, are mintiaramanta te nena uvae ariara tirarave? Noravaauvo, are ekaa haikaqaa raqiki variaravama variaro. Are ti nena kaiqa vaiinti kankoma kera tavaanararave.

²¹ Are nena kauqu aiqiqaa aqukera tiva taana uvara irihara, nena antuqaqaa are nora haika vare variana okarara ti humiqaanarave.

²² Noravaauvo, are uritarakera ekaa haikaqaa raqiki variaravama variaro. Kiama vovano ai voqaara vaivarra areqai Variqavano variararo kia variqa vovanovata vaivo. Tenavu virara kankomake irunrarave.

²³ Kia vo vatanaaka tinavu Isareri ai vaiinti nahenti voqaara variavo. Haaru Isipi tinavu kaivaqaukavara rumpataamanta vika qoraiqamavi variavara are Isareri ti vaiinti nahenti variate tira, Isipiqaahira vika kuvantu kera ntitaanarave. Are nora kaiqa, vo kaiqa vo kaiqa vara nimitaaramanta vo vatanaa vo vatanaaka ai autuara iriha voqamake gete variarave. Ai vaiinti nahenti aaraini oru vi variavara are vika avuni vihara vo vatanaa vo vatanaaka näi una variqanavu hampata aru ntataqira vuaramanta tinavu kaivaqaukavara ani vika vata vararaave.

²⁴ Are tinavu Isareri nena vaiinti nahentiqama kaaramanta, tenavu ekaa enta mintimake variqi vuariraukama vauro. Noravaauvo, tenavu mintimake vaurara areqaima tinavu Variqavano variaramanta tenavu ai vaiinti nahentima vauro.

²⁵ Noravaauvo, Kotio, are nena kauqu aiqiqaa aqukehara, tiriavarava, te kuvuarama taariraukaravata, minti minti irerave tivataana uvavarra ekaa enta iritaane.

Are mintiaqira viramanta ²⁶ vaiinti nahenti ai kaiqa tave, ekaa enta ai nora autu tuahera kaate. Are mintiramanta vika tiha, Noravano Kotiva ekaa kempuka vataava viva Isareri Variqavanoma vaivo, tivarave. Vika minti timanta ti ankuqihainaakaqai ekaa enta Isareri avuhainaa vaiinti vaiha ai avuqaa koqemake variqi vivarave.

²⁷ Noravaauvo, are ekaa kempuka vataava tinavu Isareri Variqavano variaro. Are maa uvara qoqaiqama kera ti tiva timianarave: Te tiari are kuvuarama terauka ekaa enta Isareriqaa raqikiqi vivarave, tianarave. Are minti tiaravera, te ai kaiqa vaiintivano kia qetaraiti, ai aare vauro.

²⁸ Noravaauvo, are ekaa haikaqaa raqiki variarava areqaima Variqavano variaro. Are tiana uvava quqaa uvaqai vaivarra, nena kauqu aiqiqaa aqukehara koqe uva, vo uva vo uva ti tiva timianarave.

²⁹ Mpo, te ai aareha tiha, Te ai kaiqa vaiintivano kuvuarama taarirauka are koqema nimitaqira viramanta vika ekaa enta koqemake variqi vuate.

Noravaauvo, are ekaa haikaqaa raqiki variarava, nena kauqu aiqiqaa aqu kera tivataana uvavarra irihara, nena tianantema kera, te kuvuarama taarirauka koqema nimitaqira viramanta vika ekaa enta koqemake variqi vuaterama turo, tiro.

Devitiva minti tivakero Nora Kotira aarora.

Devitiva airi vatanaaka naatara kora

¹ Ho vo entanayu aitarovaro Devitiva nai iqoka vaiinti ntita varero oru Pirisia hampata iqoka raqiharо vika naatara kero vika nora vatuka Geti varora.

² Mintimakero viva oru Moapivata naatara kero vikara tiharo, Ne vata kanta naiqi naiqi vuru vaitaate, tumanta vika vata kanta naiqi naiqi vuru vaitate vauvaro, viva oru viharo naaquntaqohairo taara ankutanta avaqama kero nai iqoka vaiintiara ne maatanta arukaate tivakero, oru vo anku avaqama kero vi ankura qaqi vehakuma kaate tiro.

Mintima keharo Devitiva nai iqoka vaiintiara tumanta vika Moapi rairake taara anku aruke vohaa anku vehakuma nimitora. Moapi vatanaaka hini qaqi vauka Devitira vevaaraini vailha vira *takisi* ami vaura.

³ Ho qaiqaa Devitiva oru Soba vika avuhainaara King Rehopira maaqu Hadatesera hampata raqireva vura. Soba vatavano Siria vataini vaura.

Vi entara Hadateseva nai iqoka vaiinti ntita varero Iufaretisi Namari hini hini vau vataro qaiqaa varareva vuvaro Devitiva nai iqoka vaiinti hampata Isareriqihairo oru vika hampata iqoka raqiharo vika naatara kora.

⁴ Devitiva Hadatesera aataro kero vira iqoka vaiinti 20,000 ravaaqavu kero, vira iqoka *kaariqi* niha raquka 1,700vata ravaaqavu kora. Vira ohiqihairo Devitiva 100 navu nai varero, ekaa hini ohi kia qaiqaa niha raquate tiro, viva tumanta vika aiqu aururu teqa taaqama kora.

⁵ Siria vatanaaka Damasikusiqi vauka Hadatesera kainke hiri amitareka anuvaro Devitiva vika hampata raquqiro viharo 22,000 vaiinti aru taiqa kora.

⁶ Vika kia qaiqaa raquate tiro, Devitiva nai iqoka vaiinti Siria vataini voqi voqi komanta vikagaqaa raqiki vaura. Siria vika Devitira vevaaraini vailha vira *takisi* ami vaura. Noravano Kotiva Devitira kahaquvaro viva ekaa vona vona raquqi viharo iqoka aatarake vaura.

⁷ Hadatesera iqoka vaiinti tarauka kainke *koriqohai* aututova vauvarora tiro, Devitiva vi kainkenavura varero Ieruharemini vuru vatora.

⁸ Hadatesera vatukatanta Betave Berotaive vitantaqihairo King Devitiva *baraasi* ori airitahaa varora.

⁹ Hamaati vatukaihainaava King Toiva Devitiva ekaa Hadatesera iqoka vaiinti naatarako uvara iriro,¹⁰ viva nai maaqu Joraamura Devitiva vaunaini atitora.

Hadateseva airi tataa King Toira hampata raqi vauva vauvaro Devitiva vira aataro korara iriharo virara quaheharo huvi hauvi tiharo King Devitirara koqeve tiva amitaarire tiro, nai maaqu Joraamura atitovaro viva *kori* orive, *silvaa* orive, *baraasi* orive, aututo haikara varero Devitira vuru amura.

¹¹ Devitiva nai navutaaka voqi voqi vauka naatara keharo vika *korive silvaave* varatora Nora Kotira amite vauntema kero, viva Joraamuva vira amu haikaravata Nora Kotira amitora.

¹² Devitiva *korivata silvaavata* Idomuve, Moapive, Amonive, Pirisiave, Amarekive, vinavuraqihairo varora. Devitiva King Hadateseva u haikara varora, viravata Kotira amitora.

¹³ Vira naantiara Devitiva oru Hore Uqitakantave tunaini Idomu vatanaaka hampata raqiharo 18,000 vaiinti arukomanta vaiinti nahenti Devitiva raqu uvara iri, vira quahama amitovaro vira autuvano voqavata uritarero vaura.

¹⁴ Devitiva nai iqoka vaiinti Idomu vataqaa raqikiate tiro, vika vona vona Idomuni komanta Idomu vika Devitira vevaaraini vaura. Devitiva iqoka raqireva vona vona vuvaro Noravano Kotiva vira kahaquvaro viva iqoka aatarake vaura.

¹⁵ Devitiva ekaa Isareriqaa raqikharo vikaqaa koqemakero avuqavuqama kero raqik-iqiro vi vaura.

¹⁶ Devitira nakaara, Seruiara maaqu Ioaapiva Devitira iqoka vaiinti vika qiata vaiinti vauvaro,

Ahilutira maaqu Jehosafaativa King Devitiva varo kaiqara, vo kaiqa vo kaiqara vukuqi qara nti vau vaiintiva vauvaro,

¹⁷ Sadokika Ahimerekika Kotira kaiqa vara amite vau vaiintitanta vaura. Sadokiva Ahitupira maaquvano vauvaro Ahimerekiva Abiataara maaquvano vaura.

Seraaava avuhaina vailinti vira qara ntua amite vau vaiintiva vauvaro,

¹⁸ Jehoiadaara maaqu Benaaava Devitiraqaa maimaraara raqiki vau vaiintika Keretihainaakavata, Peletihainaakavata, qiata vaiintivan vaura.

Devitira maaqunavu vira koqe avu aato ami vau vaiintika vaura.

9

Devitiva Mefibosetira koqema amitora

¹ Ho Devitiva vaiinti vokuka irero tiharo, Sorura vainti vovano vairove kiae vaivo? Vovano vairera, ne ti tiva timige te Sorura maaqu Ionataaniva ti koqema timitaintemake, tevata nai koqema amitaare, tiro.

² Vi entara kaiqa vaiinti vo Sibaava, viva haaru Sorura naavuqi kaiqa varo vaiintiva vaura. Ho vika Sibaara aaramake tiha, Are oru avuhaina vailinti tavaane, tuvaro

viva avuhainaa vaiintivano vaunaini oruntovaro King Devitiva vira irero tiharo, Are Sibaavave? tuvaro viva, Eo te maa vikave, tiro.

³ Minti tuvaro avuhainaa vaiintivano Sibaara irero tiharo, Sorura vaintiqihairo vovano qaqie vaivo, kiae vaivo? Vovano vairera, te haaru Kotira avuqaa kauqu aiqiqaa aquke te vira koqema amitarerave tunantemake, te vate vira koqema amitarerave, tiro.

Minti tuvaro Sibaava Devitira tiva amiro, Ionataanira maaqu vovano qaqima vaivo. Vira aiquidanta rarera virave, tiro. (4:4)

⁴ Minti tuvaro avuhainaa vainti viva vira irero tiharo, Viva tainie vaivo? tuvaro, Viva vatuka vo Lodebai Amelira maaqu Maakirira naavuqima vaivo, tiro.

⁵ Minti tuvaro King Devitiva vokuka nititomanta vika oru Ionataanira maaqu Mefibose-tira Lodebaihai vita vare anura.

⁶ Vika vira vita vare anuvaro Ionataanira maaqu Sorura nainti Mefibosetiva Devitiva vaunaini oruntero viva Devitira nora autuara iriharo vira avuqaa vataini kankakaa viro vaura.

Mintuvaro Devitiva virara tiharo, Mefibosetio, tuvaro Mefibosetiva tiharo, Avuhainao, te ai kaiqa vaiintivanoma vauro, tiro.

⁷ Minti tivar Devitiva tiharo, Are kia getaane. Te ai qora Ionataanirara iriha, ai koqema amitarerave. Aia naaqua Soruva i vatarat te qaiqaa ai amirerave. Ekaa entama are ani ti naavuqi ti kara taintaqaa vahara kara naane, tiro.

⁸ Minti tuvaro Mefibosetiva qaiqaa Devitira avuqaa vataini kankakaa viro tiharo, Mpo, te qutuvi vairira voqaara qumina haikavano vauraravata, are mintima kera ti koqema timitaaro, tiro.

⁹ Viva minti tuvaro King Devitiva Sorura kaiqa vaiinti Sibaara aaramakero virara tiharo, Ai nora vaiinti Soruva nai vaintiaravata ia haikara, ekaa vi haikara vatema te Sorura nainti Mefibosetira nai amuro.

¹⁰ Are nena maaque kaiqa vaiintive vika hampata Mefibosetira naaho kaiqa vara amiteha, kara ututaivaro mpeqa vaira qantu vareha vuru vira amitaate. Ne mintivaro ai nora vaiinti Sorura naintivano koqema kero variqiro vuarire. Mefibosetiva nai viva ekaa enta ti kara taintaqaa vahara kara naanarove, tura. (Sibaara maaqu 15 navu vauvaro vira kaiqa vaiinti 20 navu vaura.)

¹¹ Devitiva minti tuvaro Sibaava virara tiharo, Avuhainao, te ai kaiqa vaiintivano ekaa haika are tianantemake autirerave, tura. Ho avuhainaa vaiinti maaqunavu nái qora naavuqi vahara kara ne vauntema kero, Mefibosetiva vivavata vika hampata kara ne vaura.

¹² Mefibosetira maaqu Mikaava quvaaaraa vaintivano vaura. Vi entara Sibaara vainti nahenti Mefibosetira kaiqa vaiinti nahentiqama vi, vira vataqaa kaiqa vara amite vaura.

¹³ Mefibosetiva aiquidanta rarera vuva Devitira naavuqi vo enta vo enta kara ne vaurara tiro, viva Ieruharemini oru vaura.

10

Devitiva Amonivata Siriavata naatara kora

¹ Ho vo enta King Nahaasiva Amoni avuhainaava qutu vuvaro vira maaqu Hanuniva nai qora vatuka varero avuhainaa vaiintiqama viro vaura.

² Viva avuhainaa vaiintiqama viro vauvaro Devitiva nai irikero tiharo, Hanunira qova Nahaasiva ti koqema timitonemake, tevata vira maaqu koqema amitarerave, tiva kero vaiinti vokuka nititomanta orunte Hanunira qova qutu vurara vira mpo ike tiva amitareka vura.

Ho Devitiva nititoka mini oruntomanta ³ Amonihainaaka nora vaiintinavu nái avuhainaa vaiintiara tiha, Hauri are tihara, Devitiva ai qova qutu virara iriharo ariara mpo ike tiharo maa vaiintika nititaimanta maini aniamo, tiororave. Aqao, Devitiva kia mintiraitiro, viva iqoka raqiharo maa vatukara varareva auti vaharo, maa vaiintika nititaimanta vika maa vatukara ampeqireka aniamo, ti.

⁴ Nora vaiintinavu minti tuvaro Hanuniva Devitiva nitito vaiintika ravaaqavu kero, vika okau hini mantaraini muqu nimitero hini mantaraini qaqi kero, vika vukai utavaaqa nonkutora tavaaranahairo raqaini toqa kero, ho nenta maaqaini vuate tivakero vika nititora.

⁵ Mintumanta vika vogamake kauriha kia nái maaqaini viraiti, Ieriko vatukaini ani vaura. Mini vauvaro Devitiva nai nitito vaiintika Hanuniva vika mintima nimito okarara iriro, uva vara kero vikara tiharo, Mpo, ne kia Ieruharemini vaaka aniraiti, Ierikoni vaivaroi ni okauvano qampiqairamanta maini aniate, tiro.

⁶ Ho Amoni vatanaaka aato kenko tumanta iruvaro Hanuniva autu okarara kaara Devitira voqama kero arara itovaro vika navutaiqiharo vaura. Mintumanta vika Siria vatanaaka iqoka vaiinti tinavu kainke hiri timitaate ti, koqaa autuke vika nimumanta Beti-Rehopive, Sobave, vi vatukatantaqihai 20,000 iqoka vaiinti vare, Topi vatukaqihai 12,000 iqoka vaiinti varovaro avuhainaa vaiintivano Makaa vatukaqaa raqikuva 1,000 iqoka vaiinti nimumanta varova.

⁷ Vika vonaihai iqoka raqireka henuqi vauvaro Devitiva vi uvvara iriro, viva Ioaapira atitovaro viva ekaa iqoka vaiinti ntita varero raqireva vura.

⁸ Ho Amoni vika nái nora vatuka Raba qenti tataqaq vaha qenti viraqaa maimaraara raqiki vaumanta Siria iqoka vaiintive, Topi iqoka vaiintive, Makaa iqoka vaiintive, vika qaqi qoqaa kanta vaiha Isareri hampata raqireka henuqha vaura.

⁹ Vika geramate vauvaro Ioaapiva tavomanta navutaaka taara vaara aututora. Vo vaaravano moqaihai vira arireka auti vaumanta, vo vaaravano avuhai vira arireka auti vaura.

Mintuvaro Ioaapiva Isareri iqoka vaiinti tarukaqai ntita varero viva nai vikaqaa raqikiharo qaqi kanta vau vaiintika, Siria iqoka vaiinti hampata raqireva viharo,¹⁰ nai vakaara Abisairara, Are iqoka vaiinti hini kiakaqaa raqikihara vika ntita varera Amoni iqoka vaiinti hampata raquane, tiro.

¹¹ Viva tiharo, Are raquqira vihara tavairaro Siria iqoka vaiinti vika ti tinta iqoka vaiinti hampata haatara kareka ivera, are nena iqoka vaiinti ntita varera vaakama ani ti kahaqiane. Te tavaari Amoni iqoka vaiinti ai iqoka vainti hampata raqihha ni naatara kareka ivera, te tenta iqoka vaiinti ntita vare ani ni kahaqirerave.

¹² Kaiqenavu kia qetaraiti, tentanavu vaiinti nahentiaravata, tinavu Varigavano vo vatuka vo vatuka timiraravata iriha, kempukaiqamake raquare. Noravano Kotiva vate nai varaataa i kaiqara varaarire, tiro.

¹³ Ioaapiva minti tivakero viva nai iqoka vaiinti ntita varero oru Siria iqoka vaiinti hampata raqi vaumanta Siria vika qetake ruqemake vura.

¹⁴ Mintumanta Amoni vika vutu tavomanta Siria qetake ruqemake vumanta, Amoni vikavata Abisaira aatu qetake, oru nái vaantaavura avutaqi kukeqavi vaura.

Ho vika mintuvaro Ioaapiva Amoni vatanaaka mini kero nai iqoka vaiinti ntita varero turvurantero Ieruharemini vurama.

¹⁵ Siria vika tavomanta Isareri vika naatarake Ieruharemini vumanta vika qaiqaa nái iqoka vaiinti naaramake *untu/nutu* ruvaaquma kora.

¹⁶ Ruvaaquma kovaro Hadateseva uva vara komanta Siria iqoka vaiinti vokuka Iufaretisi Namari kuari avu uruntonaini vauka, vikavata vira kainke hiri amitareka anura. Sobakiva Hadatesera iqoka vaiintiqaa raqikuva, viva vikaqaa raqiki vaumanta vika ani vatuka vo Helamuni iqoka raqireka henuqi vaura.

¹⁷ Vika mini henuqi vauvaro Devitiva vi uvvara iriro, viraqaahairo viva ekaa Isareri iqoka vaiinti nuntu ruvaaquma kero ntita varero otu Iotani Namari taqa varero Helamuniara vura. Mini vumanta Siria iqoka vaiinti vika vontaqaa vontaqaa naiqi naiqi vaha, Devitira iqoka vaiinti Isareri nivuqaa vaha vika hampata iqoka raqi vaura.

¹⁸ Ho Isareri vika kempukaiqama keha raqihha Siria iqoka vaiinti ntaihomanta vika anirante vura. Mintuvaro Devitiva vika aru ntataqi viharo Siria iqoka *kaariqi* vaha raqi vau vaiintika 700 arukero, qaqi vaha raquka 40,000 arukero, Siria iqoka vaiintiqaa raqikura, Sobakiravata arukovaro iqoka viraqi qutu vura.

¹⁹ Ho avuhainaa vaiinti vokuka King Hadatesera vevaaraini vauka vaha tavomanta Isareri vika iqoka aatara komanta vinavuka Isareri hampata maateraiqihha variare ti, iqoka qaqrakate Devitira vevaaraini vaura.

Vi entara Siria vika Isareri iqoka vaiinti aatu qetehara ti, kia qaiqaavata Amoni vatanaaka kainke hiri nimitora.

11

Devitiva Basebaara tavora

¹ Kuarivano kia koqema kero ite vai entava taiqoraqaa, vi entara vo ihi vo ihi avuhainaa vaiinti vika nái iqoka vaiinti ntita vareha navutaaka hampata raqi vaura.

Ho vi entava anintovaro Devitiva nai avuhainaa iqoka vaiinti Ioaapiravata, iqoka vaiinti taruka vonavuvata, nititonanta vika ekaa Isareri iqoka vaiinti ntita vare oru Amoni vatanaaka hampata raquqi viha vika naatarake oru Raba vatuka ututumate vaura. Vika mintimake iqoka viraqi vauvaro Devitiva nai kia mini viraitiro, Ieruharemini vaura.

² Devitiva Ieruharemini vaharo eronaini vaitakero himpiro oru avuhainaara naavu qiaata tanuqiraqaa niharo vutu tavovaro nahenti vovano namari tunti vaura. Vi nahentiva nai voqamakero koqe viri vaata vataava namari tunti vauvaro ³ Devitiva ta nahentivae

vaivo tivakero virara iriare tiro, vaiinti vo atitovaro viva oru tavero, orurantero Devitira viri tiva amiro tiharo, Vira Eliamira raavura Basebaarave. Vira vaati Hiti vatanaa vaiinti Uriaarave, tiro.

⁴ Minti tuvaro Devitiva vaiinti vonavu nititomanta vinavuka oru vira vita vare anura. Vi entara vi nahentira tora rovara aru entava taiqovaro viva vi vatanaaka okarara iriharo nai vaata hiqama kora.

Vira vite anuvaro Devitiva vikantiro vaitovaro viraqaahairo Basebaarava nai maaqaini anirantero vura. ⁵ Viva nai maaqaini vaharo vainti taiqaaviro Devitiraini uva varakero tiharo, Te vainti taiqama vuro. tiro.

⁶ Minti tuvaro Devitiva iriro viraqaahairo viva Ioaapiraini uva varakero tiharo, Hiti vatanaa vaiinti Uriaara atitairaro te iainanaini aniarire, tuvaro Ioaapiva vira atitovaro Devitiva unaini anura.

⁷ Devitiva unaini anintovaro Devitiva Uriaarara tiharo, Ioaapivavata vira iqoka vaiintinavuvata hove variavo? Vika navutaaka hoe naatarake variavo kiae ho naatarake variavo? tuvaro Uriaava vira tiva amuvaro ⁸ Devitiva tiharo, Ho are tiaramanta iruro. Ho nena maaqaini oru auraara variane, tuvaro Uriaava Devitira mini kero veva ntovaro Devitiva vo vaiintiara tiharo, Uriaara naavuqi oruntera, maa haikara koqe haika vuru amiane, tivakero vira atitovaro vura.

⁹ Atitovaro vuvarovata, Uriaava kia nai naavuqi viraitiro, viva qaqrakeri oru Devitira naavuqaa maimaraara raqiki vauka hampata avuhainaara genti tataaqa vaitora.

¹⁰ Vika hampata vaitovaro vaiinti vovano Devitira vuru tiva amiro tiharo, Uriaava kia nai naavuqi viraitiro, ai naavuqaa maimaraara raqiki varia vaiintika hampata vaitairave, tuvaro Devitiva oru Uriaara irero tiharo, Are niara aaraihaira aniaravave. Ho nantivarae are kia nena naavuqi oru vaitera iaro? tiro.

¹¹ Devitiva minti tuvaro Uriaava tiharo, Mpo, Isareri iqoka vaiintivata, Iutaa iqoka vaiintivata, Kotiva uva tiva taatauto *Vokisevavata*, kia koqe naavuqi vairaiti, qaqi *seri* naavuqiqai variavo. Ti nora vaiinti Ioaapivavata, vira iqoka vaiinti tarukavata, vika qumina ahakaqi vaite variavo. Te virara virara irihama hauri tenta naavuqi oru karavata namarivata ne, tenta naatanti vaitaarorave ti, te tenta kauqu aqiqaa aqukehama kia te mintirerave turo, tiro.

¹² Uriaava minti tuvaro Devitiva tiharo, Ho vate maini vairage te hura ai atitairirara are qaiqaa iqoka raquanaini vuane, tuvaro Uriaava Ieruharemini vaura.

¹³ Viva mini vauvaro Devitiva vira arareru ani ti hampata kara naane tuvaro Uriaava vikantiro karavata namarivata ne vauvaro Devitiva virara *uaini* voqavata naane tuvaro viva voqavata novaro vira avu aatovano vueraiqaa vuvuro vaura. Ho enta ire uvuro Uriaava kia nai naavuqi viraitiro, qaiqaa maimaraara vaiintinavu hampata vaitora.

¹⁴ Mintuvaro vira qararaa toqaqi Devitiva qara vo ntuvu kero Uriaara amiro tiharo, Maa qarara vuru Ioaapira amiane, tiro. ¹⁵ Devitiva maa uvura Ioaapira qara ntuvu amitero tiharo,

Are tavairaro nora iqokavano qovarama virara are Uriaara atitairaro viva iqoka vaiinti avuni vaharo raquerire.

Viva avuni raquqi virara are nena iqoka vaiinti vonavu hampata orurantera aniraro Uriaava nariaraa vairamanta navutaaka vira arukaate, tiro.

Devitiva uva qara ntuvu tova mintima vauvaro Uriaava vi qarara vuru Ioaapira amuvaro tavora.

¹⁶ Vi entara Ioaapiva nai iqoka vaiinti hampata Raba vatuka ututumatero vi vatanaaka hampata iqoka raqi vaura. Ioaapiva irumanta vira navutaaka, Amoni vatanaaka voqi vaiha kempukaiqamake iqoka raqi vauvaro ¹⁷ virara iriro viva Uriaara mini atitovaro yumantha Amoni vatanaaka vatuka aqiqaini vaatinte Ioaapira iqoka vaiinti hampata raquqi viha Devitira iqoka vaiinti taruka vonavu arukeha Hiti vatanaa vaiinti Uriaaravata arukora.

¹⁸ Vira arukovaro Devitiva vi entara iqoka raqu uvura iriarire tiro Ioaapiva vo vaiinti varakovaro vura.

¹⁹ Viva vi vaiintira varakareva iharo tiharo, Are ekaa iqoka raqi uvura avuhainaai vaiinti vuru tiva amiane. Are vuru tiva amiraro iriro ²⁰ vi uvura kaara vira arara itairera, viva maa uvarama tianarove: Nantihae ne vi vatukara aumanto raqireka vuavo? Ne iriarave. Ne vatuka aumanto vimanta navutaaka homa vaantaavuraqaa vaiha vevaqhah ni arivarave. ²¹ Haaru tavave Gideonira maaqu Abimelekira arukorave? Ne vi uvura kiae iritaavo? Abimelekiva iqoka raqiharo oru Tebesi vaantaavura aumanto vuvuro nahenti vovano vaantaavuraqaa vaiharo nora ori tuta kovaro vi oriva vira qiaa rukavu kovaro viva Tebesini vaiharo qutu vurave. Virara iriha ne nantihae vi vatukara aumanto vuavo?

tianarove. Devitiva minti tirera, are maa uvarama tiva amiane: Vika ai iqoka vaiinti taruka arukeha Hiti vatanaa vaiinti Uriaaravata aruma kaavo, tiane, tiro.

²² Ioaapiva minti tivakero vi vaiintira varakovaro viva Ioaapiva tuntema kero, Devitira vuru tiva amiro tiharo, ²³ Tinavu navutaaka vatukaqihai aaqaini vaatinte kempukaiqaake iqoka raquqi ani, tenavu vaunananini qokanta anintaamanta viraqaahai tenavu vika hampata kempukaiqaake raquqi viha, vika aru ntata vuru vaantaavura gentiana kauramanta ²⁴ viraqaahai vaantaavuraqaa huru tuate variaka vevaqohai ai iqoka vaiinti taruka vonavu aruke, Hiti vatanaa vaiinti Uriaaravata arukaavo, tiro.

²⁵ Minti tuvaro Devitiva vi uvara iriro, Ioaapiva varako vaiintirara tiharo, Mpo, Ioaapira muntuka kempukaiqama vuarire tira, are maa uvara vuru Ioaapira tiva amiane: Ai iqoka vaiintinavu qutu vuara kaara kia ai muntukavano qoraiqiarire. Iqoka raqi entara nai tava tavae qutu vivarave? Kia ho tinavuqihairo vovano virara irianarove. Ho qaiqaa Amoni vatanaaka hampata iqoka raquqi vihara vi vatukara vehi autu taiqa kaane tiane, tura.

²⁶ Ho Basebaava iruvaro vira vaati Uriaava qutu vuvaro viva virara iqi rata amitora.

²⁷ Viva iqi rata amito entava taiqovaro Devitiva vaiinti vonavu varakomanta vinavuka Basebaara oru vita vare King Devitira naavuqi anura. Vita vare anuvaro Devitiva vira varatero vuavaro Basebaava variqiro viro, vuru qorainti vainti vatatora.

Mintuvarovata, Noravano Kotiva Devitiva autu okarara kia quahora.

12

Nataaniva Devitira atura

¹ Noravano Kotiva paropeti vaiinti Nataanira atitovaro viva Devitiva vaunaini oruntero virara tiharo, Ho te tiarirara iriane. Vaiinti taaraqanta vatuka voqi variarave. Vaiinti vovano airi haika vataivaro vovano vehi vaiinti vairave.

² Airi haika vatai vaiintiva airi sipisipivata purumakauvata vataivaro ³ vehi vaiinti viva sipisipi naati nahe vohaiqaqai vatairave. Vehi vaiinti viva koqaa autukero sipisipivira varero viraqaata koqema kero raqiqiqiro vivaro sipisipi viva vira naavuqi vahiaro vira vaintinavu hampata variqiro viro noruqama vivaro vainti viva nai kara sipisipi vira amiharo, nai kaapuqi namarivated amivarone ne vairave. Sipisipi viva ami vainti vira auvoqi vaite vairave. Vi vaiintiva tiharo, Maa sipisipiva ti raavura voqaarama vaivo, tirave.

⁴ Ho mintima vavaro vo enta vaiinti vovano niara aaraqihairo airi haika vatai vaiintiranaavuqi anintaivaro airi haika vatai vaiintiva nai tonti vira kara amireva iharo, tenta sipisipi vo arukaarorave tiro, kia nai sipisipi vo aru karaitiro, viva oru vehi vaiinti vira sipisipi arukero nai tonti vaiinti *unta/nuta* amitairave, tiro.

⁵ Nataaniva minti tuvaro Devitiva vi uvara iruvaro arara itovaro tiharo, Oho, airi haika vatai vaiintiva qora okarama autu kaivo.

Noravano Kotiva ekaa enta qaqi variqiro vi vaira autuqaa te mintima turo: Te tiari vi vaiintira arukaate. ⁶ Vi vaiintiva kia vira aqurihama amitaraitiro, qora okara autira kaara viva nai sipisipi ⁴ navu vehi valinti vira amiarire, tiro.

⁷ Devitiva minti tuvaro Nataaniva virara tiharo, Arema vi vaiintiva variaro.

Noravano Kotiva tinavu Isarerri Variqavano ariara mintima tivo:

Haaru te ariara viva Isareriqaa raqiqiarire ti, ai kaamate Sorura kauquqihai ai ruuaruma amitaunarave.

⁸ Te mintimake Soruva i haikaravata vira naatanavuvata ai amunarave. Te ai noraiqama kaurara are Isareriqavata Iutaqaavata raqiki varianarave. Are ti naarihara voqavata timiane tiaraaitiro, te ai voqavatama amuraitiro.

⁹ Te mintimake ai kahaqi vaurara are nantivarae te Noravano Kotika tiva tauna uvara raqa kera qora okara autuaro? Vira arukaate tira, are Amoni vatanaaka kaaramanta vika Hiti vatanaa vaiinti, Uriaara aru kaavara are vira naata varera iaro.

¹⁰ Are mintihara te tivatauna uvara raqakehara ti qoraiqama timitaanara kaara iqoka paipevano are kuvuarama terauka aruqiro vuanarove.

¹¹ Te Noravano Kotika ariara mintima turo: Ai nina vaintivarraqihai te vo vaiinti himpima kaariraro viva ai noraiqaakero qoraiqama amitaanarove. Te ai naatanavu vo vaiinti amiariraro vi vaiintiva qoqaa vahiaro vika hampata nuuanarove.

¹² Are kukeqvira vahiaro qora okara autuanarave. Ho te qaqi kaariraro vi haikava qoqaa qovaraiqiramanta ekaa Isarerivata tavaate, Noravano Kotiva ariara mintima tivo, tiro.

¹³ Nataaniva minti tuvaro Devitiva tiharo, Mpo, te Nora Kotira uva raqa kehama qora okarama autu kauro, tiro.

Minti tuvaro Nataaniva tiharo, Ho Noravano Kotiva are qora okara autu kaana uvvara ai nunkama amitaivo. Viva ariara kiama qutu vuanarove, tivo. ¹⁴ Viva ariara minti tivaravata, are qora okara autu kaaramanta navutaaka virara iriha Nora Kotirara qora uva ti variarave. Vira kaara Basebaava ai vainti vatataiva qutuma vuanarove, tiro. ¹⁵ Minti tivakero Nataaniva nai maaqaini anirantero vura.

Devitira maaquvano qutu vura

Nataaniva minti tivakero nai maaqaini anirantero vuvaro Noravano Kotiva Uriaara naata Basebaava Devitira vata amito vaintira ruqutu kovaro viva nora aiha viraara varero.

¹⁶ Vitanta maaquvano nora aiha viraara varovaro Devitiva vi vaintiruva koqema vuarire tiro, Kotira aarora. Viva Kotira aaramaqiro viharo ekaa kara auramatero nai naavuqi oriqetero entaqi kia taintaqaqaa vaitaraitiro, viva qaqi vata kanta vaura.

¹⁷ Viva vo enta vo enta mintiaqiro vi vaumanta nora vaiintinavu vira naavuqi kaiqa vare vauka vira tataaqa ani vaiha tiha, Mpo, vata kantahairo himpira variane, tuvaro viva kia vinavuka tu uvvara iriraitiro, viva kia vinavuka hampata vaiharo karavata nora.

¹⁸ Mintiaqiro vuvaro 6 entanavu aitarovaro 7 entaqaa vaintiruvano qutu vura. Qutu vumanta Devitira kaiqa vaiintinavu vira aatu qeteha kia vi uvvara vira tiva amiraiti tiha, Vaintiruvano qaqi vai entara Devitiva kia tinavu uva irirave. Mpo, tenavu vira vaintiruvano qutu virara vira tiva amiariraro viva voqama kero mpo ike tiharo nai vaata qoraiqama kaantorave, ti.

¹⁹ Vinavuka minti ti vauvaro Devitiva tavomanta vinavuka evaara nai tiva ami nai tiva ami i vauvaro vira aato kenko tuvaro viva vaintiruvano qutu vurara iriro, vinavuka irero tiharo, Ti vaintiruvano qutue vivo? tumanta vinavuka tiha, Eo, viva qutuma vivo, ti.

²⁰ Vinavuka minti tuvaro Devitiva vataihairo himpiro oru namari tuntukero ueri vhahera nai vaataqaq aqukero qaraaka utavaaqa nonkutero nai qiaa qaahti ntuva kero viraqahaairo viva Nora Kotira naavuqi oruntero Kotira autu tuaherakero vevantero nai naavuqi oruntero kara vara timiate tumanta vara amuvoro nora.

²¹ Devitiva mintumanta vira kaiqa vaiintinavu ravukuvu Devitirara tiha, Are nantivarae minti minti iaro? Ai vaintiruvano qaqi vai entara are ekaa kara auramatera, virara iq'i rate varianarare. Ho vate viva qutu vivara viraqahaairo are kia qaiqaavata mintiraitira, himpira kara ne variaro, ti.

²² Minti tuvaro Devitiva vika tiva nimiro tiharo, Vaintiruvano qaqi vai entara te kara auramate, iq'i rate vaunarave. Te tiha, Te mintiariraro Noravano Kotiva tiriara mpo tiharo ti vaintiru qaqi kairaro variarire, tivakeha mintunarave.

²³ Ho vate vaintiruvano qutu vimantara ti, te qumina kara aurama teha variqi vuarorave. Te kara aurama taarirava kia ho vira kahaqiraro viva qaiqaa qaqi varianarove. Naantiara viva vinanaini tevata vuariraukama vauro. Viva kia ho orurantero te variainanaini anianarove, tiro.

²⁴ Devitiva minti tivakero oru nai naata Basebaara muntuka kuquqama amitora.

Soromonura vatatora

Devitiva qaiqaa nai naata Basebaakantiro nuvaro viva vainti taiqaaviro qorainti vainti vatatora vira autu nteharo Soromonurave tura.

²⁵ Nora Kotira muntukavano vi vaintirara vauvarora tiro, Devitiva paropeti vaiinti Nataanraini uva varakero tiharo, Vi vaintirura autu ntava tehara, *Jedidiahare - Kotira muntukavano vi vaintirara vaivo*, tiane, tura.

Devitiva raqiharo Raba vatuka varora

²⁶ Ho Ioaapiva nai iqoka vaiinti hampata Amoni vatanaaka vatuka avuni vaura Raba ututuma tero vi vatukara aataro kero varaarirava aumaiquvaro ²⁷ Ioaapiva Devitiva vau-naini uva varakero tiharo, Te Raba vatanaaka namari kaqe varia vatukara varaunarara ti, tenavu Raba vatukavata varaarirava aumaiqivo. ²⁸ Ho virara iriharama are ekaa hini Isarer iqoka vaiinti ntita varera ani nenavano iqoka raqihara Raba vatuka aatara kaane. Hauri vaiinti nahenti ti nora autu timiha Ioaapiva Raba vatuka aatara kero varaivo tivorave, tiro.

²⁹ Ioaapiva minti tuvaro Devitiva ekaa Isarer iqoka vaiinti ntita varero oru iqoka raqiharo Raba vatuka aatarakero varora.

³⁰ Varero viva Raba avuhainaa vaiinti qiatataqaahairo vira avuhainaa tovaqavata varora. Vi tovaqara kori origohai aututova vauvaro vira maavarano 35 kilo vaumanta viraqaqaa ori koqera, vo ori vo origohai taatau tova vaura. Ho Devitiva tovaqa vira varakero nai qiatataqaq aqu tora.

Devitiva vi vatukaraqihairo airi vo airaira vo airaira varero „Ieruharemini, vuru kora.

³¹ Devitiva vaiinti nahenti Raba vatukaqi vauka rumpatomanta vika vira vevaaraini vaiha, sove, *pikive*, rorive tuateha viraqohai kaiqa vareha, vika aaqatai vata varake taatauke ihaqohai haimike naavu kaqera, *briki* ori auti vaura.

Amoni vataini vo vatuka vo vatukaqi vauka Devitiva vikavata rumpatomanta vikavata vira kaiqa varora.

Mintumanta Devitiva ekaa nai iqoka vaiinti hampata Ieruharemini anirante vura.

13

Aminoniva Tamaara qora okara autu amitora

¹ Devitira maaqu vo Apasalomuva vauvaro vira aura Tamaava koqe viri vaata vataa nahentivano vaura. Viva varaatavano vauvaro Devitira maaqu vo Aminoniva Tamaarara voqama kero antuqa aruvaro vaura.

² Tamaava varaatavano vauvaro tiro, Aminoniva Tamaara aaqanto oru vuarirava kia ho vauvaro vira kaara viva Tamaarara avu aato utuqiro viharo aiha viraara varora.

³ Aminoniva mintimakero vauvaro vira tonti vo Jonadaapiva, Devitira vakaara Samaara maaquvano vaura. Jonadaapiva avu aato vataava ⁴ Aminonira irero tiharo, Mpo, te tavaurara are avuhainaara maaquvano vaiharavata. are vo enta vo enta uaa viri aratehara variaro. Nana kaarae are mintima kehara variaro? tuvaro Aminoniva virara tiharo, Mpo, te tenta vakaara Apasalomura aura Tamaarara hantuqa harimantama vauro, tiro.

⁵ Minti tuvaro Jonadaapiva virara tiharo, „Ho are iri vaiqe te ai tiva amiare. Are unahaa tihara ti aiha vivo tivakera oru nena taintaqaa vaitaane. Viraqaa vaitate vairaro ai qova ami ai tavairara, are virara mintima tiane: Mpo, are hoe ti aura Tamaara atitairaro viva ani maaqi vaiharo ti kara unta timiarire? Viva kara unta kero naima viri timiraqe naare, tiane, tiro.

⁶ Jonadaapiva minti tuvaro Aminoniva viva tunte iro unahaa ti aiha vivo tivakero, oru nai taintaqaa vaitatero vauvaro King Devitiva vira tavareva oruntuvaro Aminoniva virara tiharo, Mpo, are hoe ti aura Tamaara atitairaro viva maaqi ani vaiharo ti kara unta timiarire? Viva kara unta kero naivano viri ti timiraqe naare, tiro.

⁷ Aminoniva minti tuvaro Tamaava avuhainaara naavuqi vaunaini Devitiva uva varakero virara tiharo, Are oru nena vakaara Aminonira naavuqi vahihara vira kara unta amiane, tiro.

⁸ Minti tuvaro Tamaava nai vakaara naavuqi oruntero tavovaro viva nai taintaqaa vaitatero vaura. Vaite vauvaro Tamaava vorusi vara kero mpareti untareva tuqantaavi vauvaro Aminoniva vaiteharo vira tave vaura.

⁹ Ho Tamaava mpareti unta kero tanuqi raaqu varero Aminonira amuvaro viva kia vira nareva auti vaiharo tiharo, Ekaa kaiqa vaiinti naavu maaqihai vahaqaini vevantaate, tumanta vinavuka vira uva iri vahaqaini levante vura.

¹⁰ Vevante vauvaro Aminoniva Tamaarara tiharo, Ho kara untataanara varera ani te vaitauna taintara aumanto vahihara nena kauquqihair timiraqe naare, tiro. Minti tuvaro ho Tamaava kara vira varero Aminoniva vaunaini oruntero, ¹¹ vira amirare tuvaro, Aminoniva vira ravaaqavutero virara tiharo, Ti aurao, are tintira vaitaane, tiro.

¹² Viva minti tuvaro Tamaava aqao tiro, Mpo, ti vakao, Are kia qora okara autireva ihara ti rararuuanne. Tenavu Isareris kia minti okarara autunarare. Kia are mintihara kaurira haika ti timiane.

¹³ Mpo, are vi okarara autirera, te kauriha kiama ho vaiinti nahenti nivuqaa nirarave. Are mintirera, vokika ai autu vara muntuviqamake, ai vehiqama amitevarave. Mpo, kia vi okarara autuane. Are avuhainaara vaiinti iraane. Viva kiama ai qioqama taraitiro, ai qaqi kairara are ti varenarave, tiro.

¹⁴ Minti tuvaro Aminoniva kia Tamaara uva iriraitiro, viva kempukaiqama kero Tamaara raraukero vikantiro vaiteharo qora okara autu amitora.

¹⁵ Ho Aminoniva Tamaara qora okara autu amitero, viraqaaahairo kia qaiqaavata Tamaarara antuqa aruvaro vira nunurama amitora. Avuni Aminonira antuqavano Tamaarara voqavata vauvaro, qaiqaa vira naantiara vira antuqavano kia voqavata virara vauvaro vira tavareva uvaro avu naavu ravaaqavutero.

Viva Tamaara kempukaiqama kero atitero tiharo, Ho vaaka himpira vuane. Kia maini variane, tiro.

¹⁶ Aminoniva minti tuvaro Tamaava aqao tiro, Mpo, kia ti tititaane. Are ti tititairera, vi okarava nai qora okarama varianarove. Are vate ti qora okara autu timitaanara viravata uri aatara keroma varianarove, tiro.

Tamaava minti tuvarovata, Aminoniva kia vira uva iriraitiro,¹⁷ nai kaiqa vaiinti vo aaramakero tiharo, Vaaka vi nahentira maaqihaira vahaqaqaini vara veva kera qenti kairimiqama taane,¹⁸ tuvaro vira kaiqa vaiinti viva Tamaara vara veva vahaqaqaini kero qenti kairimiqama tora.

Tamaava avuhainaara raavuravanora tiro, viva nai kena varata avuhainaaka raavuranavu voqaantema kero, kia qorainti varo entara viva vo qara u tavunara kauqu vukai vaura nonkutero vaura.

¹⁹ Ho Tamaava Aminonira naavuqihairo vevantero hanta varakero nai qiataqaa aqutero, vi tavunara qunahi qaannahima kero, nai qjata kauquqohairo utu varero viharo noraiqakero iqi rataqiro vura.

²⁰ Rataqiro vuvaro Apasalomuva nai aura tavero vira irero tiharo, Are nana kaarae rate variaro? Ai vakaava Aminoniva ai hampata nuva kaivarae rate variaro? Mpo, ti auravauvo, kia rataane. Viva ai vakaava vovanoma vaivo. Viva ai qora okara autu amitaira kaara hauri ai muntukavano voqama kero qoraiqiantorave, tiro.

Viva minti tuvaro vi entaraqaahairo Tamaava Apasalomura naavuqi oru vikantiro vaura. Viva kia nai kena nhentihampata vairaitiro, nai vakaara naavuqi variqiro vuvaro vira muntukavano qoraiquvaro vaura.

²¹ King Devitiva Aminoniva autu okarara iruvaro vira voqama kero arara itovarovata, viva kia vira atiraitiro qaqi vaura. Aminoniva vira maaqu hoqarenaava vauvaror tiro, vira muntukavano virara vaura.

²² Aminoniva nai aura Tamaara qoraiqama amitora kaara Apasalomuva voqama kero Aminonira iri qoraiqama amiteharovata, viva kia vira atiraitiro, qaqi manamana vaura.

Apasalomuva Tamaaraqaa vuntu kora

²³ Ho taara ihi aitaromanta Apasalomura kaiqa vaiinti vika Baali-Hasoni vataini vailha vira sipisipi kaaki toqa amite vaura. Vi vatava Efaraimu vatuka aumanto vauvaro Apasalomuva ekaa avuhainaai vaiinti maaquvara mini ani ruvaaquate tiro, vika naaror.

²⁴ Apasalomuva King Devitiva unaini oruntero tiharo, Avuhinaao, ti kaiqa vaiintinavu ti sipisipi kaaki toqe variamtama te vika hampata nora kara narerave. Hoe te kara narera iainanaini are nena qjata vaiinti hampata aninarave? tiro.

²⁵ Tuvaro avuhainaai vaiinti viva aqao tiro, Ti maaquo, kia tenavu virerave. Tenavu airi vaiinti vuarera, are vukaari utiharama tinavuqaa raqikinrarave, tuvaro Apasalomuva avuhainaai vaiinti vuanamakero tuvarovata, viva kempukaiqama kero kia virerave tivakero Apasalomurara tiharo, Are nenaqai mini vuane, tiro.

²⁶ Minti tuvaro Apasalomuva tiharo, Ho are kia vuataa irera, are qaqi kairaro Aminoniva vuarire, tiro. Tuvaro avuhainaai vaiinti viva aqao tiro, Nanarae viva aintiro vuanarove? tuvaro ²⁷ Apasalomuva kempukaiqama kero tuvaro Devitiva hove tivakero Aminoniraravata nai maaqu vonavuaravata Apasalomura hampata vuate tumanta vura.

²⁸ Ho Apasalomuva Devitira mini kero anirantero Baali-Hasonini oruntero nai kaiqa vaiinti tiva nimiro tiharo, Kara ne entarama ne Aminonira aitutha tavaivarova viva airi *uaini* namakero vueraiqama virage te niara tiha, Vira arukaate, tiari ne vira aru kaate. Te minti tianara ne kia vira arukerara getaraiti, vaakama vira arukaate, tiro.

²⁹ Apasalomuva minti tumanta ovata no entaraqaai vira kaiqa vaiinti viva tuntemake Aminonira arukora. Vira arukomanta avuhainaara maaqu hini kuka vira tave qetake nái donkiqaa vaarinte ruqemake kantama vura.

³⁰ Vika ruqemake vumanta aaranahai hampi uva Devitiva unaini varake tiha, Apasalomuva ekaama ai maaqunavu arukaimanta qutu vua vo. Kiama voqavanovata qaqi vaivo, ³¹ tuvaro Devitiva vi uvava iriro himpiro nai utavaaqa qunahi qaannahima kero vatakanta hiqintiro vaumanta, vira kaiqa vaiinti vikavata nái utavaaqa qunahi qaannahimake vira tataaqi himpive vaura.

³² Mintiuvarto Devitira vakaara Samaara maaqu Jonadaapiva Devitirara aqao tiro, Avuhinaao, vika kiama ai maaqunavu ekaa arukaavo. Vika Aminoniraqaima arukaavo. Haaru Aminoniva Apasalomura aura Tamaara qora okara autu amitai entaraqaahairo Apasalomuva nai auraqaa vuntu kareva Aminonira arukaainarara qaqi iriqiro vi vairave.

³³ Avuhinaao, aaranahainaa uvarara kia ququaave tiane. Ekaa ai maaqu hininavu qaqi variavaro Aminoniva vohaiqavano qutu vivo. ³⁴ Apasalomuva qetakero ruqema kero vivo, tiro.

Ho Jonadaapiva minti tuvaro vaiinti vovano maimaraara raqiki vauva vutu tavomanta vatuka vira tauvagaqaini vau aararaqaa airi vaiinti aiqinaqaa tuvi vaura.

Vika Horonaimu vatukaihai aaraqaa tuvi vauvaro viva kantero vuru avuhainaai vaiinti tiva amuvaro ³⁵ Jonadaapiva Devitirara tiharo, Ho tavaane. Ai maaqu vikama tuvi variavo. Te vaaka ai tiva amunantemake, vika qaqima variavo, tiro.

³⁶ Viva tiva taiqa komanta vate viraqai Devitira maaqunavu uriqete iqi rate vaumanta Devitivavata vira kaiqa vaiinti noranavuvata vika hampata noraiqaake iqi ratora.

Apasalomuva getakero vura

³⁷⁻³⁸ Apasalomuva getakero nai nora vira qova Talimaiva vaunaini Gesu vatukaini ruqemakero vura. Gesu vatukavano Siria vatainai vauvaro Amihutira maaqu Talimaiva avuhainaa vaiintivano Gesu vatukaqaa raqiki vaura. Ho Apasalomuva Gesuni taaramo ihara vaura. Viva mini vauvaro King Devitiva nai maaqu Aminonirara airi enta iqi rataqiro vura.

³⁹ Ho viva virara iqi rata amito entava taiqa vuvaro Devitiva qaiqaa nai maaqu Apasalomura tavaataa uvaro vaura.

14

Apasalomuva qaiqaa orurantero anura

¹ Seruira maaqu Ioaapiva iri tavo varo King Devitiva Apasalomura tavaataa uvaro vaura.

² Mintuvaro Ioaapiva iruvaro avu aato vataa nahenti vovano Tekoa vatukaini vauvaro viva vira aarovaro anuvaro virara tiharo, Qutuvi vaiintirara mpo ike tiantema kera, are unaqaraiqama kera kovaara utavaaqa nonkutera, nena qiatavata kia qaahi ntiraitira, qutuvi vaiintirara vukaiqamake iqi rate vaika voqaantema kera variane.

³ Ho mintimakera vahara are avuhainaa vaiintivano vainaini oruntera te ai tiva amiainantema kera vira tiva amiane, tivakero Ioaapiva vi nahentira voku uvaravata tiva amura.

⁴ Ho Tekoaihainaa nahenti viva Ioaapiva tuntema kero, viva avuhainaa vaiintivano vaunaini oruntero vira nora autuara iriharo vira avuqaa vatainai hiqintiro nai vira vatainaiqama kero virara tiharo, Mpo, avuhainao, ti kahaqiane, tiro.

⁵ Minti tuvaro avuhainaa vaiinti viva vira irero tiharo, Aiqa nana maara vaivarae aniaro? tuvaro nahenti viva tiharo, Mpo, ti vaativano qutu vimanta te tentoqa nahentima vauro.

⁶ Haaru ti maaqu taaraqanta vo enta naahoqi vaiha vo haika kaara raqi variavaro kia vo vaiintivano vitanta antuaraarirava vaimanta vitanta raquqi vuaraqihairo vovano kempukaiqama kero nai qata arukairave.

⁷ Mintimanta ti vaati qata vakaa vika virara voqamake arara itaimanta vika ti titiha mintima ti: Nai qata arukai vaiintira tinavu timiraqe tenavu nai qataqaa aru vuntu kaare, tiavo.

Mpo, vika ti maaqu vovata arukaivera, iha auruvano qimpa vintemakero, ti vaati autuvano taiqairaro vira maaqvanovata taiqairaro kia ho vika qaiqaa kuvuarevarave, tiro.

⁸ Minti tuvaro avuhainaa vaiinti viva virara tiharo, Ho are aniranteria nena maaqaini virage te vi maarara ai avuqavuqama amitaariraro ai maaqvanho ho variarire, tiro.

⁹ Minti tuvaro nahenti viva tiharo, „Mpo, koqemave.“ Hauri are vi uvvara avuqavuqama timitairaro vovano vira kaara ariqaavata ai ankuqaavata uva vataantorave. Vo uvavano qovaraiqirera, vi uvava tigaavata ti qora ankuqaavata variarire, tiro.

¹⁰ Minti tuvaro avuhainaa vaiinti viva vira tiva amiro tiharo, Vo vaiintivano ariara aqao are kia mintiataarave tirera, ho are vira vita varera te iainanaini aniane. Are mintiraro viva kia ho vo maaravata qaiqaa ai amianarove, tiro.

¹¹ Tuvaro nahenti viva qaiqaa tiharo, Avuhainao, are nena Variqa Nora Kotira autuqaa qioqama tairamanta vika kia vakaara aruke nai qataqaa vuntu kaate. Hauri qora okaravano qaqqi variantorave, tiro.

Minti tuvaro King Devitiva tiharo, Noravano Kotiva ekaa enta qaqi variqiro vi vaira autuqaa te tiha, Vika kiama ho ai maaqu vo qarama amitevarave. Vika kiama vira qia kauki voqavata qoraiqama kevarave, tiro.

¹² Minti tuvaro nahenti viva virara tiharo, Are hoe ti qaqi kairae te uva voqavata tiare? tuvaro Devitiva tiharo, Ho tiane, tuvaro ¹³ nahenti viva kia qaiqaa una uva tiraitiro, vutukero Devitira tiva amiro tiharo, Are tivata ti maaqvavata aaqurihama timitehara, nena maaqu kia aaqurihama amitera iaro. Are vira atitaararo vivara kia qaiqaa vira aaraararo orurantero anivo. Vira kaara are nenama Kotira vaiinti nahenti qora okara autu nimite variararo. Are vate vaaka tiara uvava, vi uvava ai ninama utu varavvo.

¹⁴ Namarivano vatainai rauru vira kia ho qaiqaa nuntu varaintemake, tenavu qutu vuariraro kia ho vovano tinavu qaiqaa qaqi vara himpima kaanarove. „Kia ho vovano ai maaqu Aminonira qaqi vara himpima kaanarove.“

Mpo, Kotira niaraini vai vaiintiva vaivaro viva vi vaiintiva orurantero aniaina aarara rante vaivama vaivo. Kotiva kia vaiinti vo vaaka arukaraitiro, vi vaiintira aaqurihamaa amitareva auti vaivama vaivo.

¹⁵⁻¹⁶ Avuhainaao, vaiinti nahenti vika ti qoraiqama timitareka auti variamanta te vika aatu qeteha are iananaini anuro. Te ariara viva ti kahaqiaina aarara ranta timitaareti ti anuro.

Te tenta mintima iruro: Hauri vaiinti vovano ti tinta maaquntiro qoraiqama timitaice tetanta kia ho maa vataro Kotiva tinavu nai vaiinti nahenti timina vataraqaa variarorave. Ho kaiqe te avuhainaao vaiinti iraariraro viva vi vaiintika kauquqihairo titanta qaqini vara kaarire. Te mintima irikema are iananaini anuro.

¹⁷ Ho te vate maini ani vaurara are ti nora vaiinti ti avuhainaava vahara minti tiararo ti muntukavano paru imanta vauro. Avuhainaao, te tavaurara are Kotira *enseli* voqaara vaharama, koqe okarave qora okarave ho tuantikera tave variaravama variaro. Ho Noravano Kotiva ai Variqavano ai hampata variarire, tiro.

¹⁸ Nahenti viva minti tuvaro avuhainaao vaiintivano virara tiharo, Ho te vo uva ai iraariraro are quqaa uvaqai ti tiva timiane, tuvaro nahenti viva tiharo, Avuhainaao, vi uvara ti irairaqe te a tiva amiare, tiro.

¹⁹ Minti tuvaro Devitiva vira irero tiharo, Ioaapivae ai atitero ariara vi uvara minti tivakera tiane tivarae are aniaro? tuvaro nahenti viva tiharo, Mpo, avuhainaao, are ti nora vaiintivano varianarara irihama, te kia vi uvara kukeqa karaiti, vutuke ai tiva amirerave. Quqaama ai kaiqa vaiinti Ioaapivama ti titieharo tiriara vi uvara vira tiva amiane, tirave.

²⁰ Are Apasalomura uva qaiqaa irira, viraqaa vai maarara taiqa kaane tiro, Ioaapiva ti tititairave. Mpo, nora vaiintio, ai avu aatovano Kotira *enseli* avu aato voqaara vaivara, are ekaa haikavano maa vataraqaa qovaraiqi vai haikara kankoma kera iri tave variaravave, tiro.

²¹ Minti tivakero nahenti viva vuvaro avuhainaao vaiinti viva Ioaapira aaramakero virara tiharo, Ho iriane. Ai antuqavano vaintemake te mintirerave. Are oru qaraaka vaiinti Apasalomura vita varera maini aniane, tiro.

²² Ioaapiva vi uvara iriro viva avuhainaao vaiinti nora autuara iriharo vira avuqaa vataini kankakaama viro nai viri vatainigama kero tiharo, Mpo, avuhainaao, Kotiva ai kogema amitaare. Ti nora vaiintio, are te a kaiqa vaiintivano iraunarara hove tianarara ti, te vate tavaurara are tiriara quaheharama variaro, tiro.

²³ Ioaapiva minti tivakero himpiro Gesuni oruntero Apasalomura vita varero Ieruharemini anura.

²⁴ Vita varero anuvarovata, avuhainaao vaiinti viva tiharo, Apasalomuva nai naavuniqai vaharo kiama ti ani tavaarire, tuvaro Apasalomuva nai naavuniqai vaharo kia oru avuhainaao vaiinti tavora.

Devitiva Apasalomura uva taiqa kora

²⁵ Apasalomuva koqe viri vaataa vataa vaiintivano vauvaro kia vo vaaraquvanove, vo haikavanove, vira vaataqaa vaura. Isareriqi kia Apasalomura voqaa vaiinti vovano vaumantara ti, Isareriqi kia vira taveha voqavata quahe vaura.

²⁶ Vira qjata kaaki vukai vauvaro, kaaki viva voqavata maara ntora. Mintivaro viva vohaa ihiqi vohaa tataaqai nai qjata kaaki toqake vaura. Viva qjata kaaki toqa kora varake avuhainaara *sikeriqaa* hirike tavovaro vira maaravano 2 kilo vaura.

²⁷ Apasalomuva nahenti varatero viraqaa qorainti vainti taaramonavu vatatero nahenti vainti vohaiqa vataatora. Viva nai raavura autu nteharo Tamaarave tura. Tamaava noruqamaviro koqe viri vaataa nahentivano vaura.

²⁸ Apasalomuva taara ihiara Ieruharemiqi vaharovata, kia avuhainaao vaiinti oru tavora.

²⁹ Kia tavora kaara viva kaiqe te Ioaapira atitaariraro avuhainaao vaiintivano inanaini vuarire tivakero uva varakovarovata, Ioaapiva kia ani Apasalomura tavora.

Mintuvaro Apasalomuva qaiqaa uva vara kovaro Ioaapiva kia viva unaini aniaataa uvaro kia anura.

³⁰ Kia anuvaro viva nai kaiqa vaiintinavuara tiharo, Ti naaho tataaqama Ioaapira *baali* naaho vaivo. Ne oru vira *baali* naaho ihaqohai tatoqa kaate, tumanta vira kaiqa vaiinti vika oru Ioaapira *baali* naaho ihaqohai tatoqa kora.

³¹ Tatoqa kovaro Ioaapiva irumanta vira kaiqa vaiinti vika mintu uvara iriro, ho viva Apasalomura naavuqi oruntero viva vira irero tiharo, Nana kaarae ai kaiqa vaiinti ti naaho iha tatoqa kaavo? tiro.

³² Tuvaro Apasalomuva vira nai tiva amiro tiharo, Te uva varake ariara ani ti tavaane turara are kiama aniaro. Are ti uva varera avuhainaa vaiintivano vainaini vuane ti, ai aaraunarave. Ti uvavano maantimama vaivo: Ne nana kaarae Gesuhai oru ti qumina vita vare Ieruharemini viri kaarave? Ne ti Gesuni qaqi kaatirio, te mini koqemakema vauraitirio. Ho vate te avuhainaa vaiinti oru tavarerave. Te oru vira tavaariraro viva tiria tiharo, Ariqaama okara vaivo tirera, viva homa ti harukaanarove, tiro.

³³ Tuvaro ho Ioaapiva Apasalomuva tu uvara vuru avuhainaa vaiinti tiva amuvaro viva Apasalomura aarovaro anintero avuhainaa vaiinti avuqaa kankakaaviro nai viri vatainiqama kero vaura. Mintuvaro avuhainaa vaiinti viva Apasalomura moqa kora.

15

Apasalomuva kia King Devitira vevaaraini vaura

¹ Ho vo entanavu aitarovaro „nai autuvano noraiqama vuarire tiro,“ Apasalomuva iqoka *kaari* vo varero ohi vonavuvata varora. Viva aaraini vireva iharo vaiinti 50 navu nititomanta vika naane avuni kante vauvaro viva vika naantiaraini iqoka *kaariqi* vi vaura.

² Viva vo enta vo enta vaaka toqaqi himpiharo oru vatuka qenti aara auvhahini vaura. Viva qenti tataaqa vaiharo tavovaro vaiinti vovanu avuhainaa vaiintivano ti uva avuqavu qiarire tiro anuvaro, Apasalomuva vira aarama kero vira irero tiharo, Are taihainaavave? tuvaro vi vaintivira vira tiva amiro nai Isareriqi nana ankuqi vauraravata vira tiva amura.

³ Vira tiva amuvaro Apasalomuva vi vaiintiva maara varo okarara ranta kero iriro, virara mintima tiro: Ho iriane. Ai uvavano avuqavu vaivo. Mpoma turo, avuhainaa vaiintivano kiama vo vaiinti kaamatero vi uvara avuqavu qiane tivo, tiro.

⁴ Apasalomuva minti tivakero viva qaiqaa tiharo, Mpo, ti noraiqama kaiqe te tentavano vaiinti nahenti uva avuqavuqama nimitaataarave. Te mintimake variarera, maaravano vaiinti nahentiqaa vainaino te homa rairake avuqavuqamake vika uva uteta nimitararave, tiro. Minti tivakeharo Apasalomuva vo vaiinti vo vaiinti tiva nimi vaura.

⁵ Viva vaiharo tavovaro vaiinti vovanu ani vira avuqaa kankakaavireva auti vauvaro Apasalomuva vaaka nai kauqu tutukero vi vaiintira kukuqama amitora.

⁶ Ekaa Isareri vika avuhainaa vaiintivano tinavu maara avuqavuma timitaarire ti, ani vauka, Apasalomuva vikavata vohaa qarama nimite vaura. Viva minti vauvaro vika muntukavano voqavata Apasalomurara vaura.

⁷ Ho ihi 4 navu aitarovaro Apasalomuva King Devitirara tiharo, Are hoe ti qaqi kairaqe te Hebaronini orunte te tenta kauqu aqiqaa aqukeha Nora Kotirara tivatauna kaiqara vara amitaare?

⁸ Te Gesuni Siria vataini vaiha tenta kauqu aqiqaa aqukeha Nora Kotirara minti tunarave: Viva maihairo ti tivita varero Ieruharemini vuru kairera, te oru Hebaronini vaiha vira autu tuahera karerave, tunarave, tiro.

⁹ Minti tuvaro avuhainaa vaiintivano tiharo, Ho ai muntukavano paru irara vuane tuvaro Apasalomuva Hebaronini vura.

¹⁰ Viva Hebaronini vaiharo evaara vokuka nititomanta vika vira uva vare vuru ekaa Isareri anku tiva nimi tiha, Ne *aanumaara/noma* uva iri, naveraitiha mintima tiate: Apasalomuva Hebaronini vaiharo avuhainaa vaiintiqama vivo, tiate, tura.

¹¹ Apasalomuva Hebaronini vireva iharo viva Ieruharemhainaa vaiinti 200 ntita varero vura. Vika kia Apasalomuva autireva u okarara iri, qaqi vira hampata Hebaronini vura.

¹² Ho Apasalomuva mini oru vaiharo *ofaa* vonavu autiharo vaiinti vokuka vara komanta vika oru Gilo vatkaihai Ahitopelira vita vare anura. Ahitopelira King Devitira koqe avu aato ami vau vaiintiva nai vatkua Gilo kero Apasalomuva unaini anura. Ho King Devitira vara qaquinigama kareka auti vauka ani ani, Apasalomura hampata vohaaraqi avitumavi airiqamavi vaura.

Devitiva ruqemakero vura

¹³ Minti vauvaro vaiinti vovanu vuru King Devitira tiva amiro tiharo, Vate ekaa Isareri vika ai qaqrake Apasalomurara viva tinavu avuhainaa vaiintivano variarire, ti variavo, tiro.

¹⁴ Minti tuvaro Devitiva vaaka nai qiata vaiinti Ieruharemqi vauka naarama kero vikara tiharo, Aniqenavu vaaka ruqemake vuare. Hauri Apasalomuva tinavu ekaa aru taiqa kaantorave. Tenavu kia vaaka ruqemake vuarera, Apasalomuva nai iqoka vaiinti hampata anintero tinavu haatarakero, ekaa maa vatkaraqi varia vaiinti nahentikavata aru taiqa kaanarove, tiro.

¹⁵ Minti tumanta vika vira tiva ami tiha, Avuhainaao, are nana haika autireva irera, tenavu ai kaiqa vaiinti vira avatarerave, ¹⁶ tuvaro avuhainaava vaiintivano nai naavuqi vaukavata nai qjata vaiintinavuvata ntita kero Ieruharemi kero vura. Viva vireva iharo nai avuhainaara naavuqaa raqikiate tiro, nai naata naantiaraaka 10 navu mini kero vura.

¹⁷ Avuhainaava vaiintivano nai vaiinti nahenti hampata Ieruharemi ekaanaini vau naavuva vaunaini oruntero, mini himpitero vaumanta ¹⁸ vira iqoka vaiintive, Keretihainaakave, Peletihainaakave, vira ai aatare avuni vumanta iqoka vaiinti 600 navu Geti vatuukhai Devitira hampata anuka, vikavata vira ai aatare vura.

¹⁹ Vika aitare vi vauvaro avuhainaava Getihainaava vaiinti Itairara tiharo, Nantivarae are tinavu hampata vireva auti variaro? Are aniranteria King Apasalomukantira oru variane. Are vo vatanaa vaiintivano maini ani variaravave.

²⁰ Are tuvana maini aniarava kia vukaiqamakera varianarara ti, hauri te ai kem-pukaiqamake vite vuarirara are tinavu hampata qumina voqi voqi nirorave. Te tenta vuaina aarara kia kankomake iruro. Mpo, are nena navunaakavata ntita varera aniranteria vuane. Noravano Kotiva ai koqema amiteharo ekaa enta ariqaa raqikiqiro vuarire, tiro.

²¹ Minti tuvarovata, Itaiva Devitira tiva amiro tiharo, Noravano Kotiva ekaa enta ariqaa variqiro vi vaira autuqaa te ariara mintima turo: Ti nora vaiintio, are taini taini oru vairage te ai hampata oru vairerave. Vika ai arukaivera, homa tivata harukevarave, tiro.

²² Minti tuvaro Devitiva virara hove tiro, Aitarera avuni vuane, tuvaro Itaiva nai iqoka vaiinti vika vainti nahenti hampata avuni vura.

²³ Devitiva nai navunaaka hampata Ieruharemi kero aaraini vi vaumanta ekaa hini vaiinti nahenti mini vauka noraiqaaake iqi rata nimitora. Mintuvaro avuhainaava vaiintivano nai vaiinti nahenti vataakero Kidaroni Namari taqa varero qumina aahara vataini vireva vura.

²⁴ Vika vi vaumanta Kotira kaiqa vara amite vau vaiintiva Sadokiva Rivaira anku vokuka hampata aaraini vi vaura. Rivaira anku vika Kotiva uva tiva taatauto *Vokiser*a aqu vare, ekaa vaiinti nahenti Ieruharemi ke aitare vuate ti, *Vokise* vira aaraqaa vatora.

²⁵ Ho ekaa vaiinti nahenti Ieruharemi ke aitare vauvaro avuhainaava Sadokirara tiharo, Kotira *Vokise* varera aniranteria vatuukaini vuane. Noravano Kotiva tiriara quahairera, viva vo enta ti tivita varero aniraqe te vi *Vokiseravata*, seri naavu viva vaineravata, qaiqaa tavarerave. ²⁶ Viva kia tiriara quahairera, te hove tirarave. Viva nana haika tiqaa autuataa iraro homa autuanarave, tiro.

²⁷ Devitiva minti tivakero viva qaiqaa Sadokirara tiharo, Ho iriane. Are nena maaqu Ahimaasiravata, Abiataara maaqu Ionataaniravata, ntitakeria muntuka paru i vaira aniranteria vatuukaini vuate.

²⁸ Nenavu aniranteria Ieruharemini viqe te aahara vataini, namari taqa vare vi varianaini oru variare. Te mini ai veka variarirara are Ieruharemiqi qovaraiqaina haikara tavera, uva vura kaiqa te iriare, tiro.

²⁹ Ho Sadokika Abiataaka Kotira *Vokise* varetanta aniranteria Ieruharemini oru vaura.

³⁰ Vitanta vauvaro King Devitiva nai qjata naavuma tero kia suvata nonkiraitiro, iqi rataqiro Orivi Aiqinagaava oru vi vaura. Viva mintiaqiro vumanta ekaa vaiinti nahenti vira hampata vuka, vikavata nai qjata naavumate iqi rataqiqi vura.

³¹ Ho Devitiva oru vi vauvaro vovano vira tiva amiro tiharo, Ahitopeliva vaakama Apasalomuravata vira navunaakavata kahaqireva vivo, tuvaro Devitiva Kotira aarero tiharo, Mpo Noravaavo, are Ahitopeliva Apasalomura avu aato amiaina uvvara hampiqama kairaro qumimaqama variarie, tiro.

³² Minti tivakero Devitiva noraqaa vaarintero vaiinti nahenti Nora Kotira autu tua-herake vaunaini oruntero tavovaro Akaihainaava vaiinti Husaiva vira vitakareva viraqaa vaura.

Husaiva Devitirara mpo ike tiva amitareva nai utavaaqa qunahi qaanahima kero, hora varakero nai qjataqaa aqu varero, viraqaa vauvaro ³³ Devitiva vira tavero tiharo, Are tinavu hampata anirera, te vukaari uthama ariqaa raqikirarave. ³⁴ Are ti kahaqireva irera, are aniranteria vatuqaq oruntero Apasalomurara mintima tiane: Avuhainaao, haaru te ai qora koqe avu aato ami vauraukave. Ho vate te ai kaiqa vaiinti vairerave tiane. Are minti tiharama Ahitopeliva Apasalomura koqe avu aato aminara aatarra kenarave.

³⁵ Ho iriane. Kotira kaiqa vara amite varia vaiintitanta Sadokika Abiataaka vitanta Ieruharemini variavo. Are ekaa uva avuhainaara naavuqi vaihara irinara, vi uvvara vitanta tiva nimiane.

³⁶ Vitanta maaqu Ahimaasika Ionataanika náitonta qoka hampata minima variavo. Are nana uvae irinara vitanta vuru tiva nimira vitanta qaiqaa viri ti tiva timiate, tiro.

³⁷ Ho Husaiva Devitira tontivano viva tu uvvara iriro, viva tunte iro Ieruharemini vura. Viva Ieruharemini oruntovaro Apasalomuvavata mini oruntora.

16

Sibaava Devitira veka aaraini vaura

¹ Devitiva Husaira hampata uva tiva taiqa kero noragaahairo inaaraiqakaa otu viro tavovaro Mefibosetira kaiqa vaiinti Sibaava mini vaura.

Viva mpareti 200 varero, *uaini* tava haimike naavumatora 100 varero, *fiki* tava haimike naavumatora 100 varero, memeraa pahiqi *uaini* kaqake vatora viravata varero anura. Viva vi karara donki taaraqantaqaa vatero varero aaraini Devitira veka ani vaura.

² Devitiva vira tavero tiharo, Are nanarae maa haikara varera aniaro? tuvaro Sibaava vira tiva amiro tiharo, Taara donki vitantaqaa ai vainti nahenti oquivi vuaterama vare anuro. Mparetivata, katari tavavata, ai kaiqa vaiinti naaterama vare anuro. *Uaini* vira vika aaahara vataini nivarovaata popohaira naatera vare anuro, tiro.

³ Minti tuvaro avuhainaava vira irero tiharo, Ho Sorura nainti ai nora vaiinti Mefibosetiva tainie vaivo? tiro. Tuvaro Sibaava tiharo, Viva Ieruhareminima vaivo. Mefibosetiva nai iriro tiharo, Vate Isareri ti kaama taiqe te avuhainaa vaiinti vaiha ti naaqua Soruva intemake, te Isareriqaa raqikirerave, tivakero mini vaivo, tiro.

⁴ Minti tuvaro King Devitiva Sibaarara tiharo, Ho te vate ekaa Mefibosetiva i haikara ai nina amuro, tuvaro Sibaava virara tiharo, Mpo, avuhainao, te qaqi ai kaiqa vaiintima vauro. Ekaa enta te ai vara amitaaina kaiqrarara are quahairera, te hove tirerave, tura.

Simeiva Devitirara qora uva tura

⁵ King Devitiva nai navunaaka hampata viviro, Bahurimi vatukaini oruntovaro Sorura ankuqhainaa vaiinti vovano vatukaqihairo Devitirara qora uva tivaqiro tuvi vaura. Vi vaiintiva Geraara maaqu Simeiva vaura.

⁶ Vi entara airi iqoka vaiintive, Devitiraqaa maimaraara raqiki vaukave, vika hini hini vaiha ani vauvaro Devitiva vika avutaini vauvaro Simeiva kia vika naatu qetaraitiro, viva Devitira aumanto oruntero ori varakero Devitiravata, vira iqoka vaiintivata, ntaihe vaura.

⁷ Simeiva Devitira atiro tiharo, Are vaaqu vaiintivanove. Kia maini variane. Are airi vaiinti arukaararo vika naarevano ai kauquqaa vairave.

⁸ Are Sorura vara qaqini kera avuhainaa vaiintiqama vira, vira navunaaka airi aru kaanara kaara Noravano Kotiva ai nina qoraiqama amitaivo. Viva ai qaqira kero, ai maaqu Apasalomurara Isareri avuhainaa vaiintivano variarire tiro, vira noraiqama kero are raqikiana kaiqara vira amivo. Oho, are airi vaiinti arukaanara kaara are vate vaaquqama vuaro, tiro.

⁹ Tuvaro Seruiara maaqu Abisaiva Devitirara tiharo, Avuhainao, nantivarae are qora vairi maa qaqi kaararo ariara qora uva ti vaivo? Are ti qaqi kairae te oru vira anu mpehi kaare, tiro.

¹⁰ Tuvaro avuhainaava Abisairaravata vira qata Ioaapiraravata aqao tiro, Vira kia nitanta kaiqavauve. Noravano Kotiva vi uvvara tiane tivaroe, vi vaiintiva tiriara minti ti vaivo? Tenavu qumina vi vaiintirara evaara variane tiarorave, tiro.

¹¹ Devitiva minti tivakero viva Abisairavata, nai qiata vaiintiaravata tiharo, Ne tavaarave. Ti maaqu ti vohaa naarevano vaharovata, viva ti harukareva auti vairave. Ho maa vaiintiva Sorura vohaa naarevano vaharora tiro, viva ti harukaarirava voqavatama vaivo. Kia vira antuaraate. Noravano Kotiva virara minti tiane tivarora tiro, minti ti vaivo. Ne vira qaqi kaivarova viva qora uva vira tiarire.

¹² Mpo, vi vaiintiva tiriara qora uva ti vairavata, ti muntukavano qoraiqimanta vaunavarata Noravano tavairera, viva ti koqemae timitaanarove kiae ti koqema timitaanarove? tiro.

¹³ Devitiva minti tivakero nai iqoka vaiintinavu hampata aaraini oru vi vauvaro Simeiva aihaini taurihataa oru viharo qora uva tivaqiro viharo orivata vatavata Devitiraqaa aqu aquumaqiro vi vaura.

¹⁴ Ho Devitiva ekaa nai vaiinti nahenti hampata viviro, Iotani Namari vaunaini otuntovaro vika kempuka taiqomanta vika qaiqaa kempuka varaare ti, mini vaura.

Apasalomuva Ieruharemini vura

¹⁵ Vika mini vauvaro Apasalomuva Isareri iqoka vaiinti hampata Ieruharemini oruntovaro Ahitopelivavata vika hampata mini vaura.

¹⁶ Vika oruntovaro Devitira tonti Husaiva Apasalomuva vaunaini oruntero naveraiti haro, Avuhainaa vaiinti viva vukai enta qaqi variqiro vuarire. Vukai enta qaqi variqiro vuarire, tiro.

¹⁷ Minti tuvaro Apasalomuva Husaira irero tiharo, Are nantiharae kia nena tonti Devitikantira vuaro? Ai muntukavano virara vaira qaqirakerae aniaro? tiro.

¹⁸ Tuvaro Husaiva Apasalomurara tiharo, Aqao, Noravano Kotivavata, maa vaiinti nahentikavata, ekaa Isarerivata, kaamataa vaiintira, te vi vaiintira mantaraini vaiha vikanti variqiro virerave.

¹⁹ Te ta vaiintirae kaiqa vara amitararave? Te tenta nora vaiinti maaqu kaiqa vara amitarerave. Te ai qora Devitira kaiqa vara amitaunantemake, ai kaiqvata vara amitarerave, tiro. ²⁰ Husaiva minti tuvaro Apasalomuva tuqantaaviro Ahitopelirara tiharo, Are koqe avu aato ti timirage iriare. Tenavu nantie iainarave? tiro.

²¹ Tuvaro Ahitopeliva Apasalomura tiva amiro tiharo, Avuhainaara naavuqaa raqikiate tiro, ai qova nai naata naantieraaka 10 navu maini kairave. Are oru vinavuka hampata vaitairamata ekaa Isareri iri kaivarо vira kaara ai qova ai navutaiqiarire. Virara irihama Isareri vika kia qetarati, airivano ai mantaraini vaivarave, tiro.

²² Ahitopeliva minti tumanta vika avuhainaara naavu qiatqaap Apasalomura *seri* naavu kaqa amite, vira qora naata naantieraaka ntita vare, vika vohaiqa vohaiqa vi naavuraqи vuru kovaro Apasalomuva vika hampata vaitora.

²³ Devitiva Ahitopeliva vira avu aato amu uvarara koqe uvave tuntemakero, Apasalomuvavata viva tu uvarara koqe uvave tura. Kotira uvava koqe uvave tuntemake, Devitika Apasalomuka Ahitopeliva tu uvarara koqe uvave ti vaura.

17

Apasalomuva kia Ahitopelira uva irura

¹ Ho Ahitopeliva Apasalomurara tiharo, Kairage te 12,000 iqoka vaiinti ntita vare vate entaqi Devitira avataqi vuare. ² Vate vira popohairaro kia kempuka vairaro vairage te vate entaqi vira hampata oru iqoka raquariraro vira voqama kero aatu itaarire. Iqoka vaiinti vira hampata variaka vikavata qetake ruqemake vivaro avuhainaa vaiinti vivaqai vairage te viraqai arukaare.

³ Nahentivano orurantero ani nai vaati qaiqaa varataintemake, te Devitira iqoka vaiinti ntita vare are inanaini vuru kaari vika ai iqoka vaiinti variate, tiro.

⁴ Ahitopeliva koqe avu aato Apasalomura amumanta vivavata, Isareri nora vaiintinavavata, vi uvarara koqe uvave tura.

⁵ Minti tuvaro Apasalomuva tiharo, Kaiqenavu Akaihainaara Husairavata aaramake vira avu aatoqi vaina uvaravata iriare, tiro.

⁶ Vira aarovaro anuvaro Apasalomuva virara tiharo, Ho Ahitopeliva tinavuara ne minti minti iate tivo. Tenavu vira uva avataainarave, kiae avataainarave? Tenavu kia mintiara, tenavu nantie iainarave? Are tirage tenavu iriare, tiro.

⁷ Minti tuvaro Husaiva Apasalomura nai tiva amiro tiharo, Ho vate Ahitopeliva ti uvava kiama koqe uva vaivo. ⁸ Ai qova nai iqoka vaiinti hampata raqua okarara are kankomakera tavaanarave. Vika kempukaiqamake iqoka raqi variakave. Vaiintivano *bea* naati varaivarо vira nova voqamakero arara itaivarо ntaihaintemake, vika raqi variarave. Ai qova iqoka raqi varia okarara anomakero tave vaivara tiro, viva kia entaqi nai iqoka vaiinti hampata vaitaraitiro, ⁹ viva vonaini kukeqaviro vaite vairave. Vate entaqi viva onavuqie vonainie kukeqavi vaivo. Virara iriha hauri tenavu vate oru Devitira hampata raquarorave. Kaiqe varike vo enta vira hampata iqoka raqirera vuare. Tenavu vate vira hampata raquariraro viva ai iqoka vaiinti vonavu aru kairera, vaiinti nahenti vi uvava iriha mintima tivarave: Apasalomura iqoka vaiinti kia iqoka aatara kaavo, tivarave.

¹⁰ Quqaama ai iqoka vaiintinavu *raionivano* kempukaiqamake kero raqintemake raqi variakave. Vika mintihavata, vi uvava iri voqamake qeteha vaivarave. Ekaa Isareri kankomake tavaamanta ai qovavata vira iqoka vaiintivata, nai voqamake iqoka raqua vaiintika variarave.

¹¹ Virara irihama te maa uvara ai avu aato amirerave. Are ekaa Isareri iqoka vaiinti vo vatuka vo vatukaini variaka naarama kairamanta vika are inanaini ani ruvaaquma vuate. Vika nora namari auvahini vai nuqara voqara airtahaa ruvaaquma vivara, viraqaaahairia are vika ntita varera iqoka raqireva vuane.

¹² Devitiva taini tainie virera, tenavu oru vira rantake vira hampata iqoka raqirerave. Varavuvano hiqintiharo ekaa vata maata putaiqamake kaintemake, tenavu viravata vira iqoka vaiintivata ekaa aru kaari kia voqavanovata qaqi variarire.

¹³ Viva ruqemakero vo vatukaqi virera, ekaa Isareri vika naaqunta vateraqohai vi vatukara kantarumate rarau vare onkaiqi muntu aqu kaivaro kia ori voqavanovata viraqaa variarire, tiro.

¹⁴ Husaiva minti tumanta Apasalomuvavata Isareri vikavata tiha, Husaiva avu aato timiva avuni vaivaro Ahitopeliva avu aato timiva vira naantiaraini vaivo, tivake Husaiva tunte ura.

Ahitopeliva tu uvava avuni vauvarovata, Noravano Kotiva Apasalomuva taiqa vuarire tiro, viva vika avu aato hampiqama komanta vika Ahitopeliva tu uvara kia iriraiti, Husaiva tura avatora.

Devitiva ruqemakero vura

¹⁵ Ho Husaiva Kotira kaiqa vara amite vau vaiintitanta Sadokika Abiataaka tiva nimiro thiaro, Ahitopeliva Apasalomuravata Isareri nora vaiintivata avu aato nimimanta te kiave tivake vo avu aato nimunarave.

¹⁶ Ho netanta kante uva vara kaivaro Devitiva inaini viramanta virara mintima tiate: Ne kia aahara vatainai namari taqavare vi varianaini vaitaate. Vaakama Iotani Namari taqa vare hini mantaraini vuate. Ne kia mintimanta navutaaka ani ni ravaaqavuke arukevorave, tiate, tura.

¹⁷ Ho vi entara titanta tavezorave ti, Ionataanika Ahimaasika Ieruharemi vatuka aaqaini namari kaqe vaunaini Eni-Rogelive tunaini vaura. Kaiqa nahenti vovano vatukaqihairo vo haika vo haika qovaraiqura vuru vitanta tiva nimi vaumanta vitanta vi uvara vare vuru King Devitira tiva ami vaura.

¹⁸ Ho vitanta Ieruharemi aaqaini vauvaro quvaaaraa vaiinti vovano vitanta viraqaqamakero tavero vuru Apasalomura tiva amumanta vitanta kante Bahurimini vo vaiinti naavuqi vura. Vi vaiintira naavu naanteqaraini namari kaqareka vata quvitova vaumanta vitanta viraqii vaavinte kukeqavi vaura.

¹⁹ Vitanta viraqii vauvaro vira naatavano namariara quvito vatara vira noqaa avu aqutero, viraqaahairo vi vatarara qumina vatave tiate tiro, *uiti* auru vivau raumpirima kero vatora.

²⁰ Mintumanta Apasalomuva nitito vaiintika vitanta ravaaqavu kareka aninte vi naavuraqi origete nahenti vira ireha tiha, Tainie Ahimaasika Ionataanika variavo? tuvaro vi nahentiva thiaro, Ho vitanta vaakama namari taqa vare vuavo, tiro.

Nahenti viva minti tumanta vika qumina Ahimaasika Ionataanikara rantaqii vivi, kia ranta karaiti, anirante Ieruharemini vura.

²¹ Vika anirante vumanta Ahimaasika Ionataanika namariara vata quvitoraqihai vaarinte King Devitira vakaaka tiva amireka vura. Vitanta King Devitira tiva ami tiha, Ne vaaka namari taqa vare hini mantaraini vuate. Ahitopeliva Apasalomurara minti mintima kehara Devitira aruane tiro avu aato amirave, ti.

²² Vitanta minti tuvaro vaaka Devitiva nai vaiinti nahenti hampata himpiro Iotani Namari taqareva vura. Vika entaqi namari taqavare vi vauvaro atita vumanta ekaa hini mantaraini oru vaura.

²³ Ho Ahitopeliva tavovaro Apasalomuva kia vira uva avatovaro vira kaara viva oru nai donkiqaa vaarintero nai maaqaini oruntero ekaa nai u haikara tumaara maarama kero vatero, viraqaahairo viva nai aunta taaqikuma kero qutu vura. Viva qutu vumanta vira vaata vare vuru nai qora quntama tonaini quntama tora.

²⁴ Ho Devitiva Iotani Namari taqa varero nai vaiinti nahenti hampata Mahanaimi vatukaini oru vaura. Viva mini oru vauvaro Apasalomuva airi Isareri iqoka vaiinti ntita varero Devitira avataqiro viharo vivavata Iotani Namari taqa varero hini mantaraini vura.

²⁵ Ioaapiva Devitira iqoka vaiintiqaqaa raqiki vauvarora tiro, „Apasalomuva Amasaara noraiqama kovaro viva Ioaapira vatuka varero Isareri iqoka vaiintiqaqaa raqiki vaura. Amasaava Ietera maaquvano vauvaro Ieteva Isamairi vatanaava vaura. Amasaara nova Avikeriva vauvaro Avikeriva Nahaasira raavuravano vauvaro Avikerira nakaava Seruiava Ioaapira nova vaura.

²⁶ Apasalomuva nai iqoka vaiinti hampata Iotani Namari taqa vare oru Gileati vataini nái seri naavu maaqa kaqate vaura.

²⁷ Ho Devitiva Mahanaimini oruntomanta vaiinti taaramonavu, Sobiva, Makiva, Basilaiva, vinavuka oru vira vitakora. Sobiva Nahaasira maaqu Rabaihainaava vauvaro Raba vatukavano Amoni vataini vaura. Makiva Amielira maaqu Lodebaihainaava vaura. Basilaiva Rogelimihainaava vauvaro Rogelimi vatukavano Gileati vataini vaura.

²⁸⁻²⁹ Vinavuka tiha, Devitiva nai vaiinti nahenti hampata aahara vataini ani anikaaka popohaimanta namariaravata kararavata antuqa ntaihaimanta variavo, tivake vinavuka

tanuve, taveve, vaite haikarave, *uiti* auruve, *baali* auruve, *porihive/vorusive*, *uiti* untatovaro itavurave, naavarave, hantavakirave, *hanive*, purumakau naamave, purumakau naamava aaharaiqama torave, sipisipive, vi haikara vi haikara vare vuru vika nimura.

18

Apasalomura arukora

¹ King Devitiva nai iqoka vaiinti ruvaaquma kero vikaqaa raqikiate tiro, qiaata vaiinti kaama tero vikara ne vohaiqa vohaiqavano vo 1,000 vo 1,000 iqoka vaiintiqaa raqikiate tivakero, vokukara ne vohaiqa vohaiqavano vo 100 vo 100 iqoka vaiintiqaa raqikiate, tiro.

² Viraqaahairo Devitiva nai iqoka vaiinti taaramo varaaqaa raira kero, Ioaapira vo vara amiro, Ioaapira vakaara Abisaira vo vara amiro, Getihainaa vaiinti Itaira vo vara amura. Devitiva nai iqoka vaiinti vika tiva nimiro tiharo, Ne iqoka raqireka vije te tentavata ni hampata vuainarave, tiro.

³ Viva minti tumanta vika aqao ti, Are tinavu hampata raqinaini virorave. Tinavu navutaaka kempukaiqiba tinavu haatara kaiqe tenavu ruqemake kantama vuarera, vika kiama tinavuara noraiqaake irivarave. Vika tinavu iqoka vaiintiqihai hininavu aru taiqa kaivera, vika kiama vikaravata noraiqaake irivarave.

Are tinavu hampata viramanta vika ai aru kaivera, vira nai nora haikama varianarove. Vika tinavuqihai 10,000 aru kaivera, vira inaara haikaqaima varianarove.

Virara irihama tenavu ariara koqemama are maini variane, turo. Tenavu vaiintiarave vo haikarave aavoqiarera, are homa vaiinti vokika nititaira ani tinavu kahaqivarave, ti.

⁴ Vika minti tuvaro avuhainaava hove tiro, Ne tiantemake te mintirerave, tivakero viva vaantaavura qentiana himpitero vaumanta iqoka vaiinti vika vatukaqihai Devitira tuvi aatare aqainiara vura. Iqoka vaiinti 1,000 varavano tuvitare vuvaro 100 varavano vira naantiara tuvitare vuvaro mintiaqi mintiaqi vi, ekaa tuvitare vura.

⁵ Vika tuvitare vi vauvaro Devitiva kempukaiqama kero Ioaapira, Abisaira, Itaira tiva nimiro tiharo, Nenavu tiriarao ti, qaraaka vaiinti Apasalomura ravaaqavuke kia vira qoraiqama amitaate, tiro. Viva vinavukara minti tumanta ekaa iqoka vaiintivata viva Apasalomurara tu uvvara irura.

⁶ Ho Devitira iqoka vaiinti vika oru vivi, Efaraimu Nantave turaqi Isareru hampata raqura. ⁷ Devitira iqoka vaiinti raqiba Isareru iqoka vaiinti naatarake, anomake vika qoraiqama nimiteha 20,000 vaiinti aru taiqa kora.

⁸ Vika vi vataraqaa vona vona raqi vaumanta airi vaiinti aru ntata komanta nantaqi hampiqamavi vi aninha qutu vura. Nantaqi qutuvuka iqoka raqiba qutu vuka *nampaavata* uri aatara kora.

⁹ Ho Apasalomuva donkiqaa oquviro naive tiro viro, Devitira iqoka vaiinti vonavu tavamakero ravukuviro ruqemake vuare tuvaro, vira donkivano kaantuna vauraqi kantamaqi vuvaro Apasalomura qiatavano kaantuna kaaraqi paama tiro rutaqu vuvaro vira donkivanoqai kantama vuvaro Apasalomuva katari kaaraqaa hiriviro mporiri iro vaura.

¹⁰ Viva mini vauvaro iqoka vaiinti vovano vira tavero vuru Ioaapira tiva amiro tiharo, Te tavauraro Apasalomuva kaantuna kaaranama rutaqu viro vaivo, tiro.

¹¹ Viva minti tuvaro Ioaapiva vi vaiintirara tiharo, Quqaae are vira tavaaro? Ho nantivarae are kia vira arukaaro? Are vira aru kaaraitirio, te *silvaa* monu 10 navuvata, hoquka koqueravata, ai amuraitirio, tiro.

¹² Minti tuvaro vi vaiintiva Ioaapira nai tiva amiro tiharo, Oho, are *silvaa* monu 1,000 ti kauquqi vataqeravata, te kiama vi monuraro ti, avuhainaava vaiinti maaqu qoraiqama amitararave. Tenavu iruraro avuhainaava vaiintivano aivata, Abisairavata, Itairavata kempukaiqama kero tiva nimiro tiharo, Nenavu qaraaka vaiinti Apasalomura ravaaqavuke kia vira qoraiqama amitaate, tirave.

¹³ Te vira arukaariraro vi uvava kia kukeqa viraro avuhainaava valintivano tiqaa uva vatairara are kiama ti auta ntinarave, tiro.

¹⁴ Viva minti tuvaro Ioaapiva tiharo, Qaqira kaane. Kia ti ai uva iriataa ivo, tivakero Ioaapiva vaantaara taaramonavu varero Apasalomuva kaantuna kaaraqi rutaquvi vau-naini vuvaro Apasalomuva kia qutu viraitiro qaqi vauvaro, Ioaapiva vaantaaraqohairo Apasalomura muntuka raqonta kora.

¹⁵ Mintuma komanta Ioaapira auvihehavaa vare vau vaiintika 10 navuvano Apasalomura ututumate vira aru aavata kora.

¹⁶ Apasalomuva qutu vuvaro Devitira iqoka vaiinti raqira qaqlira kaate tiro, Ioaapiva nai iqoka vaiinti vorara *aanumaara/noma* vuaqaane tuvaro vuaqa komanta Devitira

iqoka vaiinti vika *aanumaara/noma* uva iri, kia qaiqaavata Isareri aru ntataqi viraiti, qaqrake orurante anura.

¹⁷ Vika Apasalomura vaata vare vuru nantaqi *ruvuqi/mpumpipi* aquke, airi ori varake Apasalomura vaataqaa aquqi vi, *ruvu/mpumpi* vira mpiqa kora.

Apasalomura arukomanta Isareri vika vi uvvara iri, qetake ruqemake nai maaqa nai maaqa vura.

¹⁸ Apasalomuva qaqi vau entara viva nora ori vo vukai vara kero Avuhainaara-Uqitainive tunaini vi orira vaavi aratero tiharo, Ti maaquvano vairarovauve, ti hutuvano qaqi variqiro viraro ti ankuvanovata kia taiqa vuanarove. Ho vaiinti nahenti ti hutu tauru kevorave ti, te maa orira arate virara *Apasalomura Orive* turo, tura. Apasalomuva minti tiva torara ti, maa entaravata vaiinti nahenti vi orira autu nteha Apasalomura Orive ti variara.

¹⁹ Ho Apasalomura aru kovaro Sadokira maaqu Ahimaasiva Ioaapirara tiharo, Are ti qaqi kairae te kante vivi, koqe vakaaka maa vuru avuhainaava vaiinti tiva ami tiha, Noravano Kotiva navutaka kauquqihairo ai ruaruama amitaivo, tiare, tiro.

²⁰ Viva minti tuvaro Ioaapiva aqao tiro, Are kiama vate vi uvvara vira vuru tiva amiane. Vo enta vira tiva amiane. Vate avuhainaara maaquvano qutu virara tira, are vi vakaakara vuru tiva amirorave, tiro.

²¹ Ioaapiva minti tivakero Sudani vataihainaava vaiinti vorara tiharo, Are kantera vate tavaana haikara vuru avuhainaava vaiinti tiva amiane, tuvaro vi vaiintiva Ioaapira nai qiatataini kinta amitero kantama vura.

²² Vi vaiintiva tuvaro Ahimaasiva qaiqaa Ioaapirara tiharo, Mpo, are ti qaqi kairae te Sudani vaiintivano vinaini vira avatavare avuhainaava vainaini vuare. Nana haikavano tiqaa qovaraiqainara virara kia te noraiqaake irirerave, tiro.

Minti tuvaro Ioaapiva vira tiva amiro tiharo, Ti vaiintio, nana haikarae are mini virevave? Devitiva are vuru tina uvvara iriharo kiama vo koqaa ai amianarove, tiro.

²³ Minti tuvarovata, Ahimaasiva qaiqaa tiharo, Nana haikavano tiqaa qovaraiqainara virara kia te noraiqaake irirerave, tuvaro Ioaapiva tiharo, Ho kantera mini vuane, tuvaro Ahimaasiva vo aara, Iotani uqitaini vura utu varero, viva naane oruntovaro Sudani vatanaa vaiintivano vira naantiara oruntora.

²⁴ Vi entara Devitiva vaantaavura gentiana oquivi vauvaro maimaraara raqiku vaiintiva vaantaavura qenti maariraqaa oru himpiro vaura. Ho vi vaiintiva viraqaa vaiharo vutu tavavarova vaiinti vohaiqavano kantamaqiro uri vaura.

²⁵ Viva vi vaiintira tavero, avuhainaara aarama kero tiva amuvaro avuhainaava vaiinti viva tiharo, Vaiinti vohaiqavano uri vairera, vira vakaaka koqe vakaakama varianarove, tuvaro maimaraara raqiki vauva tavavarova vi vaiintiva auma auma uri vaura.

²⁶ Uri vauvaro maimaraara raqiku vauva tavavarova vovanovata vira naantiara kante vauvaro, viva nai hana vaiinti vatuka qentiqaa raqikura aaramakero tiharo, Ho tavaane, vaiinti vovanovatama vira naantiara kante vaivo, tuvaro avuhainaava vaiinti viva tiharo, Ho vi vaiintivavata koqe vakaaka varero uri vaivo, tiro.

²⁷ Minti tuvaro maimaraara raqikuva tiharo, Avuni uri vaiintiva Sadokira maaqu Ahimaasiva kantaintema kero, kante vaivo, tuvaro avuhainaava tiharo, Ho vi vaiintiva koqe vaiintivanove. Viva koqe vakaaka varero uri vaivo, tiro.

²⁸ Minti tuvaro Ahimaasiva uruntero naveraitiro avuhainaava vaiinti uva mantama kero oru vira avugaa kankakaama viro nai viri vatainigama kero tiharo, Are Nora Kotira nena Variqa autu tuahera kaane. Avuhainaao, vika ai hampata raqihai ai qaqini vara kareka auti variaka kauquqihairo, Noravano Kotiva ai ruaruama amitaivo, tiro.

²⁹ Ahimaasiva minti tuvaro avuhainaava vira irero tiharo, Mpo, qaraaka vaiinti Apasalomuva hoe vaivo? tuvaro Ahimaasiva vira tiva amiro tiharo, Ioaapiva ti tititareva imanta te tavauramanta airi vaiinti ruvaaquamavi vaiha oi aai ti variamanta te uva *nontantaqai/otataqai* iruro, tiro.

³⁰ Viva minti tuvaro avuhainaava tiharo, Ho are vitiraqaa oru himpite vairaqaeve, tuvaro Ahimaasiva oru mini himpite vaura.

³¹ Mintuvaro Sudani vataihainaava vaiinti vivavata uruntero tiharo, Avuhainaao, te koqe vakaaka ai tiva amirera ururo. Vika ai hampata raqihai ai qaqini vara kareka auti variaka kauquqihairo, Noravano Kotiva ai ruaruama amitaivo, tiro.

³² Viva minti tuvaro avuhainaava vira irero tiharo, Qaraaka vaiinti Apasalomuva, viva hoe vaivo? tuvaro vi vaiintiva nai tiva amiro tiharo, Oho, avuhainaao, qaraaka vaiinti viva goraiqama vintemake, ekaa ai navutakave, ai qaqini vara kareka auti variakave, ekaa vika goraiqama vivera, te hove tiataarave, tiro.

³³ Minti tuvaro avuhainaava vi uvvara iruvaro vira muntukavano vogama kero qoraiquvaro viva vaantaavura qenti qiataqaa *rumu* voqi oriqete vaiharo iq'i rate vaura.

Viva mini viharo tiharo, Mpo, ti maaqu Apasalomuo. Ti maaquo, ti maaquo, Apasalomuo. Mpo, te ai vatuva vare qutu vuvarirara are qaqi variataarave. Mpo, Apasalomuo, ti maaquo, ti maaquo, tivaqiro *rumuqi* vura.

19

Ioaapiva Devitira atura

¹ Vokuka vuru Ioaapira tiva ami tiha, Devitiva Apasalomurara mpo ike tiharo virara iqii rate vaivo, tura.

² Vi entara ekaa Devitira iqoka vaiinti vika iqoka aatarakora virara quahaataara vaumanta vika iruvaro Devitiva nai maaquara iqii rate vaura kaara vika muntukavano qoraiqmanta vaura. ³ Iqokaqihai qetake vua vaiintika voqaantemake, vika kia voravata ntiraiti, evaara vatuvali vura.

⁴ Avuhainaa vaiinti viva nai viri naavuma tero naveraitiharo, Mpo, ti maaqu Apasalomuo. Mpo Apasalomuo, ti maaquo, ti vaura.

⁵ Viva minti ti vauvaro Ioaapiva avuhainaa vaiintivano vau naavuraqi oriqetero virara tiharo, Oho, vate are mintihara ekaa nena iqoka vaiinti kaurira haikama nimiaro. Vate ai iqoka vaiinti vika aive, ai maaqu raavurave, ai naatavarave, ai naata naantiaraakave, ruuaruma nimitaamanta ne kia qutiraiti, qaqi variarave.

⁶ Oho, te tavauraro ai muntukavano ai iri qoraiqama amitaakara vaivara, ariara muntuka vataaka vikara are iri qoraiqama nimite variaro.

Vate tenavu tavaurara are tenavu iqoka vaiintiqaqaa raqiki vauraukaravata, nena iqoka vaiinti vikaravata, kia noraiqaakera iri variaro. Tenavu ekaa qutu vuraro Apasalomuva qaqi vaitirio, are virara quaheharama variaraitirio.

⁷ Ho himpira vevantera otu nena iqoka vaiintiira koqe uva tiraro vika muntukavano koqema vuarire. Te Nora Kotira autuqaa mintima turo: Are kia mintirera, vate entaqi kia voqavanovata maini vairaiti, ekaa vika ai qaqirake vivaro nora maaravano ariqaq qovaraiqianarove. Vi maarava ekaa are naatika variana entaraqaaahairo qovaramaqiro anira, viravatama aatara kaanarove, tiro.

⁸ Ioaapiva minti tuvaro avuhainaa vaiinti viva himpiro vevantero oru vaantaavura gentiana oquvi vaumanta vira iqoka vaiinti virara iri, vikavata viva vaunaini oru ruvaqumavni vaura.

Devitiva anirantero Ieruharemini vura

Isareri iqoka vaiinti Apasalomura mantaraini vauka vika qetake ruqemake nai maaqua nai maaqa vura.

⁹ Mintumanta ekaa Isareri anku tiori vaiha nai ati nai ati vaiha tiha, Haaru King Devitiva navutaaka kauquqihairo tinavu qaqqini kuvantu kairave. Nai viva tinavu Pirisia kauquqihairo ruuaruma timitarave. Ho Apasalomura kaara viva vika qetakero tinavu vataihairo ruqema kero virave.

¹⁰ Viva vimanta tenavu Apasalomuva tinavu avuhainaava variarire ti, tenavu vira kaama tauraro viva iqoka raqi vaimanta vira arukaarave. Ho kaiqe tenavu qaiqaa Devitira iraalaro viva tinavuqaa raqikiariere, ti.

¹¹ Vika minti ti vauvaro King Devitiva Kotira kaiqa vara amito vaiintitanta Sadokika Abiataaka vaunaini uva varakero tiharo, Netanta Iutaa qiaa vaiinti vikara mintima tiate: Tiriara viva qaiqaa tinavu avuhainaa vaiintivano variarire ti, ekaa Isareri ti haare variavo. Ne naane ti haarataara vaimanta nantihae kia mintiavo? ¹² Ne ti qata vakaa ti vohaa naare variakara ti, hauri ne ekaara vitini ti haarevovare, tiate.

¹³ Netanta vikara minti tivake Amasaaraa mintima tiate: Are ti Devitika vohaa naarevanove. Vate te ai noraiqama kaarirara are Ioaapira vatuva varera ekaa iqoka vaiintiqaqaa raqikinarave. Te kia mintiarera, Kotiva homa ti ruqutu kairage qutu vuure, turo. Netanta minti tivakema Amasaaraa tiva amiate, tura.

¹⁴ Ho Iutaa vika Devitira uva iruvaro vika muntukaqihairo koqe umanta vika Devitiva vaunaini uva varake virara mintima ti: Mpo, koqemama arevata ai hampata variakavata Ieruharemini oturante urivarave, ti.

¹⁵ Devitiva vi uvvara varakora iriro viva tuvurantero Ieruhareminiara vireva vura. Viva aaraini nai vaiinti nahenti hampata viharo Iotani Namari kia taqaraitiro, qaqi mini vaura. Iutaa vika Devitira vitavare Iotani Namari taqavare Ieruharemini vuru kareka Giligaalini utontovaro ¹⁶ Sorura ankugihainaa vaiinti Geraara maaqu Simeiva Bahurimiqihairo tuvuntero kantero King Devitira vita kareva Iutaa vika hampata vumanta ¹⁷ Benaminira ankugihai 1,000 vaiinti Simeira hampata vura.

Haaru Sorura naavuqi kaiqa varova Sibaava nai maaqu 15 navuvata, nai kaiqa vaiinti 20 navuvata ntita varero kantero Iotani Namari taqa varero Devitiva vaunaini vura.

¹⁸ Vika namari taqa vare avuhainaa vaiinti vira vaiinti nahenti kahaqihai hini mantaraini ntita vare virike vaura. Avuhainaa vaiinti viva nana nana haika autu timitaate tura ekaa vi haikara vika vira autu amitora.

Devitiva Simeirara mpo ike tiva amitora

Ho Simeiva tuvuntero Devitira vita kareva Iotani Namari taqa varero oru avuhainaa vaiinti avuqaa vataini kankakaama viro vaiharo ¹⁹ virara tiharo, Mpo, nora vaiintio, are Ieruharemi kera tuvuana entara te qora okara ai autu amitaunara, virara irihara kia tiqaa uva vataane turo. Mpo, are kia virara qaqi iritaane. ²⁰ Avuhainaaao, te qora kaiqa autu amitaunara virara kankomake irunarave. Virara irihama te naane ekaa hini Isareri anku vikaqihai ai quahama amitheha vita karera tuvuro, tiro.

²¹ Viva minti tuvaro Seruira maaqu Abisaika tiharo, Oho, Simeiva Noravano Kotiva kaama tai vaiintirava vaauquqama vuarire tira kaara vira aru kaariravama vaivo, tiro.

²² Viva minti tuvaro Devitiva Seruira maaqtanta Abisaika Ioaapikara aqao tiro, Vira kia nitanta kaiqavauve. Netanta vi uvvara tiha ti navutaiqvovare. ²³ Vate te qaiqaa ekaa Isareri vika avuhainaa vaiintiqama vunarara ti, vate tenavu kia Isareri vaiinti vo arukaraiti, quaheha vairerave, tivakero viva nai kauqu aqiqaa aqukero Simeirara tiharo, Vika kiama ai arukevarave, tura.

Devitiva Mefibosetira koqema amitora

²⁴ Mefibosetiva Sorura nainti vivavata avuhainaa vaiinti vita kareva otu vura. Devitiva Ieruharemi kero vu entaraqaahairo Mefibosetiva kia nai aiqu hiqama karaitiro, kia nai okau toqa karaitiro, kia nai utavaaqavata hiqama karaitiro, qaqi variqiro vi vauvaro King Devitiva vihairo koqemakero oturantero urura.

²⁵ Ho Mefibosetiva Ieruharemi kero avuhainaa vaiinti vita kareva viva unaini otuntovaro avuhainaava vira irero tiharo, Mefibosetio, te Ieruharemiqihai ruqemake vuna entara nanthiharae are kia ti hampata vuanarave? tiro.

²⁶ Minti tuvaro Mefibosetiva nai tiva amiro tiharo, Mpo, ti nora vaiintio, ti aiqu rarera vikara ti, vi entara are Ieruharemi kera vuana entara te tenta kaiqa vaiintiara tiha, Ti donki vo qerama timitaqe te avuhainaa vaiinti hampata vuare turarovata, ti kaiqa vaiinti Sibaava ti unahaa autu kairave.

²⁷ Avuhainaaao, viva are iananaini oruntero una uva tiharo ti hutu vara muntuvi kairave. (16:2-4) Mpo, Nora vaiintio, are Kotira *enseli* voqara variaravave. Are nana haika tiqaa autuataaa irera, qaqlima autuane.

²⁸ Mpo, avuhainaaao, are ekaa ti naaqura Sorura ankugiraaka arukerava vaivaravata, are kia mintiraitira, tirriara mpo ike tihara ti qaqi kaaramanta te ai naavuqi ekaa enta kara ne vaunarave. Are mintianarara ti, te naantiara ariara vo haikavata ti timiarirava kia varianarove turo, tiro.

²⁹ Minti tuvaro avuhainaava tiharo, Hove. Kia virara voqavata tiane. Te nitanta Sibaakara mintima turo: Netanta Sorura vata vira rairake, hini vira amira hini are varaane turo, tiro.

³⁰ Minti tuvaro Mefibosetiva virara tiharo, Mpo, nora vaiintio, are qaqi kairaro Sibaavaqai ekaa vata vira varaarire. Kia te virara noraiqaake irirerave. Te vate are nena koqema kera orurantera anianara, virarama noraiqaake iruro, tura.

Devitiva Basalaira quahama amitora

³¹ Ho Basalaiva Gileatihainaava nai vatuka Rogelimi kero avuhainaa vaiinti hampata Iotani Namari taqa varero vira hini mantaraini viri kareva otu vura.

³² Basalaiva 80 ihi varakero naampaiqama vuva vaura. Viva airi monu vatovara tiro, avuhainaava Mahanaimini vau entara kara varero viri vira amura.

³³ Minturara tiro, avuhainaava Basalairara tiharo, Are ti hampata Ieruharemini oru vairaque te ariqaa koqemake raqikiare, tiro.

³⁴ Minti tuvaro Basalaiva nai tiva amiro tiharo, Nora vaiintio, te kiama airi ihi varike gutu vuainarara ti, qumina ainti Ieruharemini vuarorave. ³⁵ Te 80 ihi vara kauraukara ti, kia te koqe okarave qora okarave koqemake tave vaunarave. Te karave namarive neha tavauraro vi haikava kia hiakaa irave. Ti aatovano kia koqe imanta te kia ho vaiinti nahenti ihi taria runarave. Te mintimake vauraukara ti, qumina ainti vaiha ai maara amiarorave.

³⁶ Avuhainaaao, qumina are ti koqe okara autu timiterorave. Te qaqi ainti Iotani Namari taqa vare inaaraqakaa orunte ai mini vuru karerave. ³⁷ Ai vuru mini kaarirara are ti qaqi kairaque te tenta maaqaini anirante oru tenta nokaa qoka quntamataa vatkaraqi variqi vi, mini gutu vuare.

Ho ti maaqu Kimihaamuva maini vaivo. Avuhainaao, are vira qaqi kairaro viva aintiro vuarire. Are nana haikae vira autu amitareva irera, homa autinarave.

³⁸ Basalaiva minti tuvaro avuhainaava tiharo, Kimihaamuva homa tintiro vuanarove. Are vo haika tiriara vira autu amitaane tinara, ho te vi haikara vira autu amitarerave. Are nana haikaae ti iredara autu timitaane tinara, te vi haikaravata autu amitarerave, tiro.

³⁹ Minti tivakero avuhainaava nai navunaa vaiinti nahenti hampata Iotani Namari taqa varero hini mantaraini oruntero, Basalaiva moqa kero Kotiva vira koqema amitaarie tiro, Kotira aarama amitovaro Basalaiva nai maaqaini anirantero vuvaro ⁴⁰ viva namari taqa varero Giligaali vatukaini vuvaro Kimihaamuva Devitira hampata vura.

Ekaa Iutaa iqoka vaiintive, Isareri iqoka vaiinti hini kukave, vika avuhainaara vita vare Iotani Namari taqa vare hini mantaraini vura.

Isarerivata Iutaavata tironaarori vaura

⁴¹ Devitiva Giligaalini vaumanta ekaa Isareri vaiinti vika avuhainaaa vaiintivano vaunaini orunte virara tiha, Nora vaiintio, nana kaarae tinavu qata vakaa Iutaa vika naiqqa evaava aiyata, ai vaiinti nahentivata, ai iqoka vaiintivata, ntite aniamanta ne Iotani Namari taqa vare aniaivo? ti.

⁴² Isareri vika minti tumanta ekaa Iutaa vika nai tiva nimi tiha, Avuhainaaa vaiinti viva tinavu ankuqiraava vaimantara ti, tenavu minturo. Ho nana kaarae ni araravano tinavuara itaivo? Tenavu kiama avuhainaara kara nama karaiti, kia viva i haikara voqavata naarumake vararaiti, tenavu vira qaqi quminama vite anuro, ti.

⁴³ Minti tumanta Isareri vika Iutaa vikara aqao ti, Avuhainaaa vaiinti viva kia ni Iutaqaqaqai raqikiraitiro, tinavu Isareripaavata raqiki vaivama vaivo. Ne Iutaa vohaa ankuqai variamanta tenavu Isareri 10 ankunavu vaunarave. Tenavu Isareri airi anku vauraukara ti, tenavu naane avuhainaara vite aniaataarave. Nantihae ne Iutaa kuru ntuvake kia tinavu haarraraiti, neqai vira vite aniaivo? Avuni tenavu Isareri naane tiha, Kaiqenavu oru avuhainaaa vaiinti vite aniare, turamanta ne naane oru vira vite aniaivo, tumantavata, Iutaa vika voqavata kempuka uva tiha Isareri vika uva aatara kora.

20

Sebaava kia Devitira vevaaraini vaireva auti vaura

¹ Ho vi entara voqamakero antua aantua ti vau vaiintiva Sebaava Giligaalini vaura. Viva Bikirira maaqu Benaminira ankuqiraava vaura.

Viva *aanumaara/noma* vuaqakero naveraitiharo, Kia tenavu Devitira vevaaraini vairerave. Tenavu kia Devitira ankuvauve vauro. Kia tenavu Iesira maaqu Devitira avataqai virerave. Ne Isareri vaiintivar, aniqe tentanavu maaqaini anirante vuare, tiro.

² Minti tumanta Isareri vika Devitira qaqla mini ke Sebara hampata vura. Mintumanta Iutaa vikaqai Devitira vevaaraini vaiha vira avata vare Iotanihai Ieruharemini orunte vura.

³ Ho Devitiva nai avuhainaara naavuqi oruntero nai naata naantiaaka 10 navu nai naavuqaa raqikiate tiro konavuka ntita varero vuru vo naavuqi komanta vokuka vinavukaaqaa raqiki vaura. Devitiva ne vikaqaa koqemake raqikiate tivakero viva kia qaiqaavata vika hampata vaitomanta, vika tentoqa nahenti variantemake, variqi vivi, vuru qutu vura.

⁴ Avuhainaaa vaiinti viva Amasaarara tiharo, Are oru Iutaa iqoka vaiinti naarama kera *untu/nutu* ruvaaquma kera ntita varera, hurae morae are ekaa vika hampata te iainanaini aniate, ⁵ tuvaro Amasaava oru vika naarareva vuvaro avuhainaava kaamato entava qumina aitarovaro Amasaava kia vaaka oruntero anura. (19:13)

⁶ Kia vaaka oruntero anuvaro avuhainaava Abisairara tiharo, Apasalomuva nora maara tinavuqaa vataivarvo Bikirira maaqu Sebaava voqavata nora maarama tinavuqaa vataanarove. Mintiantorave tira, are ti iqoka vainti ntitakera Sebara avataqira vira, oru vira ravaaqavu kaane. Hauri viva nai iqoka vaiinti hampata kempukaiqamake vaantaavura aututaa vatukaraqi oru vairaqe tenavu kia ho vira ravaaqavu kaarorave, tiro.

⁷ Devitiva minti tuvaro Abisaivave, Ioaapira iqoka vaiintive, avuhainaaraqaa maimaraara raqikuka Keretihainaakave, Peletihainaakave, ekaa vo iqoka vaiintive, ntita varero Ieruharemi kero Sebara avata varero vura.

⁸ Vika oru vivi, Gibeonini nora orivanu vaunaini oruntero Amasaava vihairo ani vika ntitakora. Ioaapiva iqoka *sioti* nonkutero tavaaranra *reti* rumpatero *ehai/muhupa* nai utaqi ntuvatova Amasaara aaqanto oru vuvaro muhupavano utaqihairo qaqini oqi vuvaro Ioaapiva nai kauqu kaanaaqaqohairo vira varora.

⁹ Ioaapiva muhupa vira tota varero Amasaarara tiharo, Ti qata vakao, are hoe variaro? tivakero nai kauqu tanaraqohairo Amasaara okau utu varero unaqaraiqama kero vira moqa kareva autuvaro.

¹⁰ Amasaava Ioaapiva nai kauqu kaanaaqaini muhupa tuatora kia tavovaro Ioaapiva muhupa viraqohairo Amasaara arara raqontakero kuhia kovaro Amasaara ararautahaavano ekaa vatakanta ontontiaqa vuvaro Amasaava vaaka qutu vuvarora tiro, kia vira qaiqaavata raqontora.

Ioaapiva Amasaara arukero viraqahairo nai vakaara Abisaikantiro Sebaara qaiqaa avata varero vura.

¹¹ Ioaapiva Amasaara arukovaro Ioaapira iqoka vaiinti vovano oru Amasaara vaata tataaqa himpi vaiharo naveraitiharo, Ne Ioaapika Devitika mantaraini variaka, ne Ioaapira avataqi vuate, tiro.

¹² Minti tivakero tavovaro Amasaara vaatavano nai naareqi aara tavaaraqaa vaumanta ekaa iqoka vaiinti aniba vira vaata taveha vuvaro vi vaiintiva Amasaara vaata aaraqahairo raraa vuruvi ahakaqi kero tavunaqohairo vira aqu amitora.

¹³ Amasaara vaata aaraqahairo raraa vuruvi ahakaqi komanta viraqahai ekaa iqoka vaiinti vika Ioaapira hampata Sebaara avataqi vura.

¹⁴ Ho Sebaava viviro, Isareri vo anku vo anku vauka vara maini mainima kero, Abeli-Beti-Maka vatuka ekaanaini vitini vauraqi oruntomanta Bikirira anku vika ekaa ruvaaqumavi, vira hampata vatuka viraqi oriqetora.

¹⁵ Mintumanta Ioaapira iqoka vaiinti vika Sebaava Abeli-Beti-Makaqi vaivo tu uvara iri, vika oru vi vatukara ututuma tora. Vika vaantaavura tataaqa vata raukuke vaumanta hini vaiintinavu vaantaavura viva hiqintuarire ti, katari noraqohai vaantaavura rukavi vaura.

¹⁶ Vika minti vuvaro vi vatukaraqi vauva avu aato vataa nahenti vovano vaantaavura qiatagaahairo naveraitiharo, Ne Ioaapira tivarо aniraqe te vira vataake uva tiare, tiro.

¹⁷ Tuvaro Ioaapiva oru vuvaro nahenti viva vira irero tiharo, Are Ioaapivave? tuvaro viva, Eo, te maa vikave, tuvaro nahenti viva virara tiharo, Nora vaiintio, are koqema kera iri vairaque te uva vo ai tiva amiare, tuvaro Ioaapiva, Ho tirage iriare, tiro.

¹⁸ Minti tuvaro nahenti viva tiharo, Haaru vaiinti nahenti uva tivate tiha, Are vo uva okara kia ho irirera, are Abelini oru viramanta vi vatanaaka vira okara ai tiva amiate, tiamanta vaiinti vika tiantemake mini vi variarave.

¹⁹ Ho iriane. Tenavu Isareri vatanaaka maa vatukaraqi vaurauka kia raqi vauraukave. Tenavu avuhainaa vaiinti vevaaraini vauraukave. Ho nana kaarae are maa vatukara vehi autu taiqa kareva auti variaro? Are Noravano Kotiva tinavu kaama timitai haikara qoraiqama karevae auti variaro? tiro.

²⁰ Minti tuvaro Ioaapiva aqao tiro, Kia te ai vatuka vehi autu kareravauve. ²¹ Bikirira maaqu Sebaava, Efaraimu ainqinalhainaava King Devitira vevaaraini kia vairaitiro, vira navutaiqi vairave. Ne vi vaiintiraqai tinavu timiqe tenavu ni vatuka qaqi ke vuare, tiro. Viva minti tuvaro nahenti viva Ioaapira tiva amiro tiharo, Ho hora toqaqi tenavu vi vaiintira qita vaantavura maaqahai vara vaavi aqu amiare, tiro.

²² Minti tivakero nahenti viva oru vi vatukaraqi vau vaiinti nahentika koqe avu aato nimumanta viva tuntemake, vika Sebaara aunta tegake vira qita vara vaavi Ioaapira aqu amutora. Aqu amitoravo Ioaapiva *aanumaara/noma* vuqa komanta vira iqoka vaiinti *aanumaara/noma* uva iri, vi vatukara ke nai maaqa nai maaqa vuvaro Ioaapiva anirantero King Devitiva vaunaini Ieruharemini vura.

Devitira kaiqaqaa raqiki vauka vika nutu

²³ Ioaapiva ekaa Isareri iqoka vaiintiqa raqiki vaura.

Jehoiadaara maaqu Benayaava Devitiraaqaa maimaraara raqiki vauka Keretihainaakave, Peletihainaakave, vika noravano vaura.

²⁴ Adoniraamuva vaiinti vokuka ntita vatokaqaa raqiki vaumanta vika karapuhi kaiqa voqara, vo kaiqa vo kaiqa vare vaura.

Ahilutira maaqu Jehosafaativa King Devitiva varo kaiqarave, vo uvave, vukuqi qara nti vau vaiintiva vaura.

²⁵ Seavaava avuhainaa vaiinti vira qara ntua amite vau vaiintiva vaura.

Sadokika Abiataaka Kotira kaiqa vara amite vautanta vaura. ²⁶ Jairi vatukihainaava Iraava, vivavata Kotira kaiqa vara amite vau vaiintiva Devitira aqanto vaiharo vi kaiqara vare vaura.

¹ Devitiva avuhainaa vaiintivano vau entara karara nararaiqu entava qovarama viro taaramo ihiara variqiro vura. Mintuvaro Devitiva Nora Kotira irero tiharo, Nana kaarae maa haikava qovaraiqivo? tuvaro Noravano Kotiva vira tiva amiro tiharo, Maa haikara kaarave: King Soruva nai vaintivara hampata Gibeoni vatanaaka airithaa arukora kaara vikaqaa nora uvama vaivo, tiro.

² Noravano Kotiva minti tuvaro Devitiva Gibeoni vika naaromanta anura. Gibeoni vika kia Isareri vatanaaka vairaiti, vika Amo vatanaaka vo anku vaura. Ekaa hini Amo vatanaaka taiqa yumanta Gibeoni vikaqai qaqi vaura.

Haaru Isareri vika Nora Kotira autuqaa vohaa uva tiva taataute tiha, Kia tenavu Gibeoni goraiqama nimitarerave tura.
(Iosuua 9:20)

Minti tivatova vauvarovata, King Soruva Isareriaravata, Iutaaravata iriharo vikarao tiro, viva Gibeoni vatanaaka vehi autu taiqa kareva auti vaiharo vika airithaa aru taiqa kora.

³ Ho Devitiva Gibeoni vika naaramakero vikara tiharo, Te nana haikave ni autu nimitrarare? Tenavu qora okara ni autu nimitaunara iriha, te nantiabee vi uvira nunka kaari ne hove tivake, Nora Kotira aaraivar viva tinavu nai vaiinti nahenti qaiqaa koqema timitaarie? tiro.

⁴ Tumanta Gibeoni vika Devitira nai tiva ami tiha, Oho, tenavu Soruraqihaise, vira ankuqihaise, kori monuve silvaa monuve varaariraro, vi monuva kia ho tinavuqi vai maarara taiqa kaanarove. Tenavu vo vatanaaka vahihara ti, kia ho Isareri arukararave, tuvaro Devitiva vikara tiharo, Ho te ni nana haikae autu nimitrarare? tiro.

⁵ Tumanta vika vira nai tiva ami tiha, Soruva tinavu ankuqihairo kia vaiinti vogavanovata Isareri vataqaa variate tiro, viva tinavu Gibeoni vatanaaka qoraiqama timiteharo airithaa harukorave.

⁶ Virara irihama tenavu ariara mintima turo: Noravano Kotiva Sorura nai vatuka Gibeaqihairo kaama tairara tira, are vira ankuqihaire vaiinti 7 navu tinavu timirage tenavu vi vatukaraqi Nora Kotira avuqaa vinavuka aruke vika vaata katariqaa hiritaare, tuvaro Devitiva hove tiro, Te vinavuka ni nimirerave, tiro.

⁷ Devitiva Nora Kotira autuqaa Sorura maaqu Ionataanirara tivato uvara iriharo, Sorura nainti Ionataanira maaqu Mefibosetira qaqi vehakuma amitero, kia vira Gibeoni vatanaaka nimura.

⁸ Viva Risipaara maaqutanta, Amoniravata vo Mefibosetiravata nimiro, Meraapira maaqu 5 navuvata vika nimura. (Aiaara raavura Risipaava Sorura naata vovano vaura. Meraapiva Sorura raavuravano vauvaro vira vaati Adarieliva Mehoralihainaava Basalaira maaquvano vaura. Meraapiva Adarielira varatero qorainti vainti 5 navu vira vata amitora.)

⁹ Ho Devitiva vinavuka Gibeoni nimumanta vika vinavuka ntita vare ainqinaqaa vuru Nora Kotira avuqaa aruke katari aratorqaa vinavuka vaata hiritora. Mintima komanta 7 navu vohaa vaka qutu vura. *Baalivano impeqaiqura hoqaramate teqareka u entara vi vaiintinavuka arukora.*

¹⁰ Vinavuka arukovaro Aiaara raavura Risipaava memeraa kaukiqohai aututo tavunara varero, vinavuka vaata nora oriqaa vatonaini vuqitero mini vahihara vinavuka vaataqaa raqikiqiro vi vaura. Aatitorqaa viva mati ne vau uvirika ruhaaqiqiro viviro, entaqi qaakau aantauvhivanon nevorave tiro, vinavuka vaataqaa raqiki vaura. *Baali* teqo entaraqaahairo Risipaava mini variqiro vuvaro nora aauq ntuaina entava anintora.

¹¹ Ho Devitiva Risipaava autu okarara iriro, ¹² viraqaahairo viva oru Gileaati vataaini Jabesihainaakara Sorura vuhaarivata vira maaqu Ionataanira vuhaarivata timiate tiro vura.

(Haaru Pirisia vika Giliboa Ainqinaqaa Soruka Ionataanika aruke vitanta vaata Beti-Sani vatukaini vaiinti nahenti ruvaaqumavi vauraqaa hiritomanta Jabesihainaaka entaqi ani evaara vitanta vaata vare vura.)

¹³ Ho Devitiva Soruka Ionataanika vuhaari varero, vaiinti 7 navu aruke hiritoka vuhaarivata varoro. ¹⁴ Devitiva tumanta vika Benaminira ankuvano vau vataara Sela vatukaini Sorura qora Kisira quntama toraqi vuru vika vuhaarivata quntama tora. Vika avuhainaava ekaa uva tunttemake autukovaro Kotiva karara nararaiqura taiqa nimitora.

Isareri vika qaiqaa Pirisia hampata raqura

¹⁵ Ho Pirisia qaiqaa Isareri hampata raqura. Vi entara Devitiva nai iqoka vaiinti ntita varero Pirisia hampata raqiqiro vuvaro vira kempukavano kia ho vauvaro ¹⁶ Pirisia vaiinti vo Isibi-Benopiva kaiqe te Devitira arukaare tura.

Vi vaiintiva vukai vuhaantaari vataava vauvaro vira vaantaara maaravano 3 kilo uritarero vauvaro viva qaraaka iqoka paipewata rumpatova oru Devitira arukareva auti vauvaro¹⁷ Seruiara maaqu Abisaiva vi vaiintira tavero ani vira arukero Devitira ruaruuma amitora.

Mintumanta Devitira iqoka vaiinti nái kauqu aiqiqaa aqukeha tiha, Ho tenavu ai qioqama tauro. Tenavu iqoka raquaina entara are kiama ho tinavu hampata vinarave. Ova koqevoa tinavu ataama timitaintema kera, are tinavu Isareri ovavano varianarave. Navutaaka vi ovaru qimpa kevorave, tura.

¹⁸ Ho vo enta Isareri vika qaiqaa Pirisia hampata Gopi vataini raqura. Vi entara Husaihainaava Sebekaiwa oru vukai vuhaantaari vataaa vaiinti Saapira arukora.

¹⁹ Vo enta Isareri vika qaiqaavata Pirisia hampata Gopini iqoka raqi vauvaro Pirisia vo Getihainaava Golaiatativa, vivavata nora vaiintiruhaavano vauvaro vira vaantaara aquvano nora qora vaura. Mintimakero vauvarovata, Betarihemihainaa vaiinti Iaare-Oregimira maaqu Elihanaaniva Golaiatira vira arukora.

²⁰ Ho vo enta vika qaiqaa Getini iqoka raqi vauvaro Pirisia vovano nai vukai vuhaantaari vataava vaura. Vi vaiintira hini kauqu hini kauquqaa vuqa 6 navu vauvaro, vira aiqu hini hiniquaavata 6 navu vaura.

²¹ Ho vi vaiintiva oru vaharo Isarerira antua aantua ti vauvaro Devitira vakaara Samaara maaqu Ionataaniva vira arukora.

²² Vaiinti 4 navu vilka kaivaqaukavara Getihainaaka vikavata vukai vuhaantaari vataaka vaura. Ho Devitiva nai iqoka vaiinti hampata vilka arukora.

22

Devitiva ihi tura

¹ Noravano Kotiva navutaaka kauqu qihairovata Sorura kauquqihairovata Devitira ruaruuma amito entara Devitiva Nora Kotira autu tuahera keharo maa ihira tura:

² Nora orivano ti antua timitaintema kero, Noravano Kotiva ti antua timite vaivo.

Kempuka vaantaavura voqaarama viva ti ututumate vaimanta te ho vauro.

Viva navutaaka kauquqihairo ti ruaruuma timite vaivama vaivo.

³ Nora orivano ti antua timitaintema kero, ti Variqavano ti antua timite vaimantara ti, te vira vataake variari ti navutaaka kia ti qoraiqama timitevarave.

Kainkevano vaiinti antua amitaintema kero, viva tiqaa koqema kero raqiki vaimanta vaunarave.

Vira kempukavano navutaaka kauquqihairo ti ruaruuma timite vairave.

Kempuka vaantaavura avutaqi variaka ho variantemake, te viva inaini vaiha koqemake vauro.

Vogamake nái kena vaiinti ntaihe varia vaiintika ti harukaare tiavar, viva vilka kauquqihairo ti ruaruuma timite vaivo.

⁴ Te Nora Kotira aarauraro viva navutaaka kauquqihairo ti qaqini vara kairara ti, tenavu vira autu voqvata tuahera kaariravama vaivo.

⁵ Huvura namarivano kumpetaqiro tuvharo vaiinti raaqu varero muntuvi raqutu kareva auti vaintema kero, navutaaka ti arukeva aumaiqimanta vaunarave.

Huvura namarivano naaho maata qoraiqama kaintema kero, qora haika vo haika vo haikavano ti qoraiqama timitaimanta vaunarave.

⁶ Kunavano aantau arukareva kahe kahemaqiro vintema kero, qutira haikavano ti ravaaqqavu kareva auti vaimanta vaunarave.

Vaara vuitaiva aantau ravaaqqavu kareva intema kero, qutira haikavano qaiqaa qaiqaavata ti ravaaqqavu kareva auti vaimanta vaunarave.

⁷ Te qutu vuarirava mintimakero aumanto vaimanta te qoraiqamavi vaunaraqihai Nora Kotira aare vaunara.

Ti Variqavano ti kahaqiarire ti, te vira aarauraro viva nai naavuqihairo ti uva irira.

Te virara tiha, Mpo, Noravauvo, ti kahaqjane, turaro viva aato ti timiro ti uva irira.

⁸ Viva ti uva irivar, vira arara itaivar, vaturavano utivar, vatavano qaki qaki i vaivar, naaruva tuqvavalo voqama kero qakaa qakaa ilharo vaira.

⁹ Mintivar, vira aiqianahairo iha muravano oru vivaro vira noqihairo ihavano aitarero voqama kero iteharo tatoqaqiro vivaro vira noqihairo ihauruvano aitarero itaqiro vi vaira.

¹⁰ Viva naaruva qantua kero viraqihairo tuvivaro vira aiqu taraini vogama kero konkira ari tonavuva vaimanta¹¹ kempuka enselinavu vira vita kaavar, uviri aroka voqaa uvaivan vira vita varero tuvi vaivar,¹² viva konkira ariraqohairo nai viri vaata naavuma taivar, vankora tonavuvano vira ututuma taivar,¹³ viva inaini vogamakero

ataa iharo vaivaro *taaru/kaampura* ntivarо aequakaavano voqama kero utuqiro vi vaira.

¹⁴ Naaruvavano karara tintema kero, Noravano Kotiva uva tira. Nai virini vaiva uva timanta vatainai variaka vira uva iriara.

¹⁵ Vaiintivano veva aruqi vintema kero, viva aequakaa aquka aquka iharo navutaaka rumpirima kaimanta vi anima vuara.

¹⁶ Noravano Kotiva nai navutaaka nitiharo nai ainqanahairo aiho vuaqa kaivaro nora uvaavano utintema kero, vira aihovano nora namari raira kaivaro, namari veva muntukaraqi vai vatava qoqaa vaivaro vata tuqavanovata qoqaa vaira.

¹⁷ Noravano Kotiva naaruvaihairo nai kauqu tutukero varuva namariqihairo ti utu varero mpaqi vaari qaqnini kaira.

¹⁸ Ti iri qoraiqama timite variakave, ti navutaakave, vika kempukavano ti haatara kareva auti vaivaro Noravano Kotiva vika kauquqihairo ti ruaruama timitaira.

¹⁹ Te nora maaraqi vauraro ti kempukavano kia ho vai entara, navutaaka ti hampata iqoka raqireka anintaavaro Noravano Kotiva ti antua timiteharo ²⁰ ti tivita varero navutaaka kia ho harinaini, nahai kanta ti vuru kaira. Vira muntukavano tiriara vaivarora tiro, viva mintira.

²¹ Te avuqavuqamake kaiqa vare vaunarara tiro, Noravano Kotiva ti koqema timitaira.

Kia tiqaa uva vaivarora tiro, viva ti koqema timite vaira.

²² Te Noravano Kotiva tivatai uvara iriqi vi vaunara.

Kia te tenta Variqa tauvaqa utu amiteha qora kaiqa varaunara.

²³ Viva vo uva vo uva tiva vataira te iriqi viha, kia vira uva voqavata raqa kaunara.

²⁴ Kotiva tavaivaro kia vovano vo haika kaara tiqaa uva vataarirava vaira.

Viva tavaimanta te qora kaiqa varaarorave ti, tentaqaa koqemake raqiki vi vaunara.

²⁵ Noravano Kotiva te avuqavu ni vaunarara iriharo tiqaa koqema kero raqiki vaira. Viva tavaivaro kia vo uvavanovata tiqaa vaira.

²⁶ Noravaavo, te tavauraro ariara kempukaiqamakero iriqiro vi vai vaiintira, are nai viraravata noraqaa kera iriqira vi varianarave.

Kia viraqaa uva vai vaiintiva vaivara are kia vi vaiintiraqaa uva vatenarave.

²⁷ Takuqi vai okarara nai avu aatoqi iri vai vaiintiva vaivara, are nena takuqi vai okarara vira umiqe varianarave.

Nai avu aatoqi qora okarara iri vai vaiintiva vaivara are vira navutaiqama amite varianarave.

²⁸ Kia nai autu tuahere varia vaiinti nahentika variavara are vika kahaqi varianarave.

Vika nai nutuqai tuahere varia vaiinti nahentika variavara are vika nutu vatainiqamake varianarave.

²⁹ Noravaavo, are ti aara ataama timiteravama variaro.

Konkira ariva tiqaa vaivara, are vira vara qaqnini kera, koqema kera ti ataama timite varianarave.

³⁰ Are ti kempukaiqama timitairaqe te homa tenta navutaaka hampata iqoka raquqi virarave.

Are ti Variqavano ti kahaqiraqe te homa navutaaka ori vaantaavura aututeraqi vaatinte vika naatara kaainarave.

³¹ Kotiva vare vai kaiqava vaireva, ekaa vi kaiqava koqe kaiqama vairo.

Noravano Kotiva tivatai uvava quqaa uva vairara tiro, vaiintivano homa vi uvara iriharo viraqaa muntuvi varianaro.

Tinavu mantaqa timitaane ti vaika, viva kainke voqara vika antua nimitaanaro.

³² Noravano Kotiva viva Variqavano vaivaro kia variqa vovanovata vairo.

Vivaqaima nora ori voqara kempukavano valiharo tinavu antua timite vairo.

³³ Kotiva ti kempukaiqama kaimanta te aaraini vi vauraro viva tiqaa koqemakero raqiki vaimanta ni vaunara.

³⁴ Diaa aantauvano ainqinaini niharo kia kuntavaivaima varero kaavu ntiraitiro, koqema kero nintema kero, viva ti aiquanta kempukaiqama timitaimanta te onkaiqi niha kia kaavu ntiraiti, ho ni vaunara.

³⁵ Viva iqoka raqua okarara ti humiqe vaimanta te kempuka huru, *baraasi* ori qohai aututaa hurura ho hinta utuke aruainara.

³⁶ Noravaavo, are ti antua timitehara, ti ruaruama timite variaravave.

Are ti kahaqiaranmara ti, te vaiinti nahenti nivuqaa nora autu vataukama vauro.

³⁷ Are koqe aara ti autu timitaaravera te viraqaa nuraro ti aiquvano kia variri ntaimanta kaavu ntunarave.

³⁸ Te tenta navutaaka ntataqi viha vika vehi autu kaunara.

Te vika ntataqi viha kia tuqantaa taqantaa iraiti, kempukaiqamake ntataqi vivi, oru vika aru taiqa kaunara.

³⁹ Te vika ntaihe kauramanta vika ti aicutaraini hiqinti kia qaiqaavata himpuara.

⁴⁰ Are ti kempukaiqama timitaaramanta te tenta navutaaka hampata raquqi vivi vika naatara kaunara.

⁴¹ Are ti navutaaka qetara haika nimiaramanta vika ti aatu qetake te unanaihai kantama vuara.

Ti navutaiqi varia vaiintika te vika vehi autu taiqa kaunara.

⁴² Vika naveraitiha, Mpo, vovano tinavu kahaqiane tiavaravata, kia vovanovata vika kahaqira.

Vika Nora Kotira aaraavaro viva kia vo tiraitiro, kia vika kahaqama nimitaira.

⁴³ Vaiintivano vata rukokakima kero ataara ntua kaintemake, te vika rukokakimake qoraiqama nimitaunara.

Horavano aaraqaa vairaqqaa vi ntavate ai ntavate iantemake, te vika rukavu raakavuma kaunara.

⁴⁴ Noravauvu, vo kiaka tiriara viva tinavuqaa raqikiantorave ti, ani ti hampata iqoka raqi variakaqaahairaa ti ruaruama timitera, ti noraiqama kaaramanta te vo vatanaa vo vatanaakaqaa raqiki vaunara.

Te tota kia tavauna vatanaaka, vate te vikaqaa raqiki vauramanta

⁴⁵ vika ani ti aaqanto kankakaavi vaiha ti uva koqemake iri variara.

⁴⁶ Vika ti aatu qeteha aiqu kauqu ntiri ntiri i vaiha nai vaantaavura ututuma taa vatukara, vo vatuka vo vatuka qaqrake, ani ti vevaaraini variara.

⁴⁷ Iriate. Quqaama Noravano Kotiva qaqi variqiro vi vaivo. Nora orivano vaiinti antua amitaintema kero, viva ti antua timitaivama vaivo. Ne vira autu tuahera kaate.

Ti antua timitaira, ne vira autu noraiqama kaate.

Ti ruaruama timitaira, ne vira autu noraiqama kaate.

⁴⁸ Vivama ti kahaqama timite vaimanta te navutaaka naatarake vaunara.

Viva vo vatanaa vo vatanaaka ti vevaarainiqama kaimanta te vikaqaa raqiki vaunara.

⁴⁹ Viva navutaaka kauquqihairo ti ruaruama timite vaira.

Noravauvu, vokiaka iqoka raqiha ti haatara kaare tiavaravata, are vika kauquqihairo ti tivita qaqlini kaanarave.

Voqamake nai kena vaiinti ntaihe variaka ti aru kaare tiavara, are vika kauquqihairo ti ruaruama timitaanara.

⁵⁰ Noravauvu, are mintianarara ti, te vo vatanaa vo vatanaaka avutana vaiha ai autu tuahera karerave.

Te are kaiqa vara timitaanarara iriha ihi tivaqi viha ai autu tuahera karerave, turo.

⁵¹ Noravano Kotiva ti Devitika noraiqama kaimanta te avuhainaa vaiintivano vauraro viva ti kahaqimanta te qaiqaa qaiqaavata tenta navutaaka naatarake vaunara.

Te viva kaama taika vauraro vira muntukavano tiriara vaira.

Viva tintaravata, te kuyurama taariraukaravata ekaa enta muntuka vateharo variqiro vuanarove, tiro. Devitiva minti tivakero ihi tura.

23

Devitiva ekaara uva tura

¹ Devitiva ekaanaini maa uvvara tura: Te Isira maaqu Devitika mintima turo:

Tinavu kaivaqara Iekopira Variqavano ti kaama tero noraiqama kaimanta te avuhainaa vaiinti vauraro viva vaiinti nahenti nivuqaa ti nora autu timirave. Viva mintirara ti, te koqe ihi Isareriti ate ti, vo ihi vo ihi tivake qara ntua taunara.

² Nora Kotira Maraquravano nai uva ti noqaahairo ti vaivo. Vira uvavano ti noqi vaimanta te vi uvarama ti vauro.

³ Isareriti Variqavano viva tinavu Isareriti antua timite vai oriva vaharo tiriara tiharo, Avuhainaa vaiintivano ti Kotika aatu qeteharo ti vevaaraini vaharo avuquqavuqama kero vaiinti nahentiqaa raqiki vaiva vaireva, ⁴ vi vaiintiva kuarivano toqaqi uruntero koqemra kero ite vaivararo kia tonavuvanovata kuari avu mantaaqa kaira voqara vairamanta vaiinti nahenti virara quaheha vaivarave.

Aaquavano ntuvakero tanta vivaro varavuvano ahika mareqaahairo aera aera i vaira voqara vi vaiintiva vairamanta vaiinti nahenti virara quaheha vaivarave.

⁵ Kotiva ti hampata uva vo tiva taatau tairara tiro, viva kiama vi uvvara qaqlina kero vo uva tiraitiro, ekaa entama vi uvvara avataanarove.

Viva mintimakero ti anku kojema nimitaqiro vuanarove.

Viva ti kahaqiharo ti muntukavano vaina haikara vo haika vo haika ti timiraqe, te kojemake variqi vuare.

⁶ Ho te mintimake variqi vuarirauka vauramanta qora okara auti variaka auqu vai naaquntara teqake iha quara taavaro ita vintemake, vika taiqa vivarave.

Vaiintivano auqu vai naaquntara nutu ruvaaquma kareva iharo, kauqu ranteqa kaantorave tiro, viva vira kia kauquqohai utu vararaitiro, ⁷ *aini* kauruve, vaantaara aque, varero viraqohairo auqu naaqunta vohaaragaqaa rupikero ruvaaquma kero iha quara kaivarо ita taiqa virave, tiro.

Devitiva minti tura.

Devitira Iqoka Vaiinti Taruka nutu

⁸ Devitira Iqoka Vaiinti Taruka Taaramonavu nutu:

Vinavukaqihairo Iosepi-Basebetiva Takemoni ankuqiraava, avuni vaura. Vo enta viva vaantaara varero navutaaka 800 navu hampata raqiharo, vohaa vi entaraqai ekaa vika aru taiqa kora.

⁹ Viva vauvaro Ahohira ankuqihainaava vaiinti Dodora maaqu Eleasaava, viva taaramanuvuqihairo iqoka vaiinti taruva vovano vaura.

Vo enta Eleasaava Devitikantiro vaumanta Pirisia Isareri hampata raqireka anumanta Isareri vika naatu qetake rugemake vuvaro ¹⁰ Eleasaava nariaraa mini kem-pukaiqama kero vaharo Pirisia ntaihe vaura. Viva vukaiqaakero raquqi vuvaro vira kauquvano paama tivakero iqoka paipe aquqaa taatau vuvaro viva iqoka paipe tuta kaarirava kia ho vaura. Ho Noravano Kotiva vira kahaquvaro viva iqoka raquqiro vaharo Pirisia vika naatara kora.

Viva vika naatara komanta Isareri vika orurante Eleasaava unaini aninte tavovaro viva Pirisia vika aru taiqa komantara ti, vika navutaaka iqoka utavaaqa rahunkuke varevaqai vaura.

¹¹ Agira maaqu Haraaqihainaava Samaava, viva taaramo vaiinti vinavukaqihairo iqoka vaiinti taruva vovano vaura.

Vo enta Lehi vatukaini naavara naaho vaunaini Pirisia vika ruvaaqumavi vaumanta Isareri vika tave qetake vura.

¹² Mintuvaro Samaava kia qetaraitiro, viva naaho avutaaqaa himpi vaharo Pirisia vika vi karara varevorave tiro, kempukaiqama kero iqoka raqiharo vika airithaa arukora. Vi entara Noravano Kotiva Samaara kahaquvaro viva Pirisia airithaa naatara kora.

Devitira iqoka vaiinti taruka 30 navu

¹³ Ho Devitira iqoka vaiinti vokuka iqoka vaiinti tarukavata vaura. Vika vinavuka autu ntareka Iqoka Vaiinti Taruka 30 navuve tura. .

Vo enta, kara mpeqaiqura qantu entara, Pirisia iqoka vaiinti vonavu ani nái seri naavu maaqq Refaimi Uqitaini kaqate vauvaro Devitiva Adulaamu Onavuqi vaumanta Devitira Iqoka Vaiinti Taruka 30 navuqihai taaramonavu oru Devitira tavareka oruntora.

¹⁴ Vi entara Devitiva „Adulaamu Onavuqi“ kukeqa viharo vaunaini vaumanta Pirisia vokuka Betarihemi vatukaini vaura.

¹⁵ Mintuvaro Devitiva vogama kero namari naataa uvaro tiharo, Mpo, Betarihemi genti aumanto vai ruvu namarira ti vogama kero naataa ivo. Vovano kaqa varero viri ti timirera, te hove tiatarare, tiro.

¹⁶ Devitiva minti tumanta iqoka vaiinti taruka taaramonavu Devitiva namariara tu uvara iri, vinavuka himpi mini oru namari kaqareka vura. Pirisia vika Betarihemi qiaqia maimaraara raqiki vaumanta taaramo vaiinti vinavuka kia qetaraiti, oru Devitiva ruvu namarira tura kaqa vare viri vira amura.

Vira viri amuvaro viva vi namarira kia naraitiro, viva *ofaa* voqaara Nora Kotira qihia amitero ¹⁷ tiharo, Oho, Noravaavo, te maa namarira naarorave. Navutaaka vi vaiintinavuka arukerara kia noraiqaake iriraiti, maa namarira kaqa vare viri ti timiavo. Navutaaka vinavuka arukaatirio, vinavuka naarevano tigaama vaitirio.

Virara irihama te maa namarira vinavuka naare voqaara ntaira hauri naarorave, tivakero kia vi namarira nora. Ho Devitira iqoka vaiinti taruka taaramonavu kia nái qaqi variqi virara noraiqaake iriraiti, vinavuka mintura.

¹⁸ Abisaiva Iqoka Vaiinti Taruka 30 navuqihairo vika qita vaiintivano vaura. Abisaiva Ioaapira vakaava vauvaro vitanta nova Seruiava vaura.

Ho vo enta Abisaiva nai vaantaaraqohairo navutaaka 300 navu hampata raquqi viharo vika ekaa arukora. Viva minturara ti, taaramo iqoka vaiintinavu nora autu varontema kero, vivavata nora autu varora.

¹⁹ Vira nora autuvano voqavata uritarero vauvaro viva *Iqoka Vaiinti 30 navu* qihairo nora vaiintivano vauvarovata, vira autuvano kia *Iqoka Vaiinti Taruka Taaramonavu* nutu naatara kora.

²⁰ Ho Jehoiadaara maaqu Benaeaava Kapaselihainaava, vivavata iqoka vaiinti taruva kempukaiqama kero navutaaka hampata iqoka raqi vaura.

Vo enta viva Moapihaina iqoka vaiinti taruka taaraqanta aru kora.

Vo enta *taaru/kaampura* aaqu ntuva kovaro Benaeaava *ruvuqi/mpumpiqi* otiqetero *raioni* yo aru kora.

²¹ Qaiqaa vo enta viva Isipi vaiinti vo, nora vaiintiruhaa aru kora. Isipi vaiinti viva vaantaara tuatovaro Benaeaava kaavu varero vikantiro raqiharo Isipi vaiinti kauquqihairo vira vaantaara raqakero viraqohairo nai vira arukora.

²² Benaeaava mintima kero raqurara tiro, vira autuvano *Iqoka Vaiinti Taruka 30 navu* nutuqihairo nora autu vaura.

²³ Mintuvarovata, vira autuvano kia *Iqoka Vaiinti Taruka Taaramonavu* nutu naatara kora.

Devitiva vira noraiqama kovaro viva viraqaa maimaraara raqiki vau vaiintika qiata vaiintivano vaura.

²⁴ *Iqoka Vaiinti Taruka 30 navu* nutu:

Asaheriva (Ioaapira qatavano)

Elihanaaniva (Dodora maaqu Betarihemiainaava)

²⁵ Samaaka Erikaaka (vitanta Harotihainaataanta)

²⁶ Helesiva (Peletihainaava)

Iraava (Ikesira maaqu Tekoa vatukaihainaava)

²⁷ Abieseva (Anatothainaava)

Mebunaiva (Husaihainaava)

²⁸ Salamoniva (Ahohira ankuqihainaava)

Maharaiva (Netofi vatukaihainaava)

²⁹ Helepiwa (Baanara maaqu Netofi vatukaihainaava)

Itaiva (Ribaira maaqu Benamini vata Gibeavatukaihainaava)

³⁰ Benaeaava (Piratonihainaava)

Hidaiva (Gasa onkaihainaava)

³¹ Abi-Aliboniva (Arabaihainaava)

Asamavetiva (Bahurimihainaava)

³² Eliabava (Salibonihainaava)

Jasenira maaqunavu

Ionataaniva

³³ Samaava (Haraara ankuqihainaava)

Ahiamuva (vira qova Saraava Haraara ankuqihainaava)

³⁴ Elifeletiva (Ahasibaira maaqu Makaihainaava)

Eliamiva (Ahitopelira maaqu Gilohainaava)

³⁵ Hesarova (Kaamelihainaava)

Paraiva (Araapihainaava)

³⁶ Igaliva (Nataanira maaqu Sobaihainaava)

Baniva (Gaatihainaava)

³⁷ Selikiva (Amoni vataihainaava)

Naharaiva (Berotihainaava Ioaapira auvihehavaa varova)

³⁸ Iraava (Itaraa ankuqihainaava)

Garepiva (Itaraa ankuqihainaava)

³⁹ Uriava (Hitiqihainaava)

Vi vaiintika vaireka, 37 navu vaura.

24

Devitiva iqoka vaiinti kaara ntura

¹ Ho qaiqaa vo haika kaara Noravano Kotiva Isarerira voqama kero arara itovaro viva Devitiva vika qoraiqama nimitaarire tiro, virara tiharo, Are oru Isarer i vailintivata Iutaa vailintivata kaara ntuane, tiro.

² Minta tuvaro Devitiva nai iqoka vaiintiqaa raqikura Ioaapirara tiharo, Are nena iqoka vaiinti noranavu ntita varera, ekaa Isarer i vata maata Daani vatuka *notihairave*, Beseba vatuka *sautihairave*, mini mini vi anihara, ekaa Isareriqi varia ankuka vika iqoka vaiintive, vika ho iqoka raqi vaiintikave, nenavu vika vika nutu vukuqi qara ntuva timitaiqe te vika nanti nantimae variara iri tavaare, tiro.

³ Minta tuvaro Ioaapiva avuhainaa vaiintiara aqao tiro, Noravano Kotiva ai Variqavano viva ai iqoka vaiinti airiqama kaira vika nái airitahaa vaivara are nena avuqohair a vika tavairera, te hove tiataarave. Avuhainaaao, nantiharae are vika kaara ntireva auti variaro? „Kia mintiataarave,“ tiro.

⁴ Ioaapiva minti tuvaro avuhainaaava kia Ioaapira uva iriraitiro, kempukaiqama kero tumantara ti, Ioaapiva nai iqoka vaiinti noranavu vatumakero avuhainaara mini ke, Isarer iqoka vaiinti kaara ntireva vura.

⁵ Vika Ieruharemi ke otunte Iotani Namari taqa vare oru Aroe vatuka tataaqaa nái seri naavu maaqa kaqate vaiha, vaiinti nutu varora. Aroe vatukavano uqitaini vaumanta Gaatira ankuvano mini vaumanta vinavuka vika nutu vare viraqaahai verara Jase vatukaini vura.

⁶ Viraqaahai vika Gileaatini vi, Hiti vatanaaka vaunaini Kadesini vi, Daani vatukaini vi, virante otu Nora Namari auvahini vau vatukara Saidonini vura.

⁷ Ho Saidonihai vika sauti mantaraini Nora Namari auvahini vau vatukara, vaantauurvavano ututumato vatukara Taiaa vatukaini vi, Hivi vatanaakkavata Kenaani vatanaakkava vo vatuka vo vatukaqi vaunaini vi, ekaara Iutaa vatanaaka Nekevi Aahara Vatainai Beseba vatukaini vura.

⁸ Mintimake vinavuka 9 tora 20 enta Isarer iatainvi anihia, ekaa iqoka vaiinti nutu qara ntuaqivi vivi, qaiqaa Ieruharemini anirante vura.

⁹ Ioaapiva vuru avuhainaa vaiinti tiva amiro tiharo, Isarerini ho iqoka raqi vaiintika vaireka, 800,000 variamanta Iutaini ho iqoka raqi vaiintika vaireka, 500,000 variavo, tiro.

¹⁰ Ioaapiva minti tuvaro Devitiva vailharo iruvaro viva nai kempukaiqama keharo ekaa iqoka vaiinti kaara ntuate tu uvava kia koqe uva vauvaro viva oho tiro, Te kia Isarer iqoka vaiinti kaara ntuaarave, tivakero Nora Kotira ararer tiharо, Mpo, Noravauvu, te vi okarara autiha ai qoraiqama amitaunarave. Mpo, Noravauvu, te ariara mpo ike tihamava uvvara nunka timitaane, turo. Te kia avu aato vataa vaiinti voqaantemake, vi okarara autu kaunarave, tiro.

¹¹⁻¹² Minta tuvarovata, Noravano Kotiva paropeti vaiinti Gaatira tiva amiro tiharo, Devitiva qora okara autira kaara te vira qoraiqama amitarerave. Te maara taaramonavuqohai vira qoraiqama amitarerave. Te vira qoraiqama amitaainaa maarara taaramonavuqohai taaraqanta qaqrake, vohaiqaohai vira qoraiqama amitarerave. Viva nai antuqa vainara kaama tairaqe te vi maararaqohai vira qoraiqama amitarerave. Ho are vi uvvara vur u vira tiva amiane, tuvaro vira qararaa toqaqi Gaativa Noravano Kotiva tu uvvara vuru Devitira tiva amura.

¹³ Viva Devitirara tiharо, Noravano Kotiva ariara taaramo maaraqihair a vohaiqa kaama tairaro viraqohairo ai aruarire. Taaramo maara maantimama vaivo:

1. Te karara noraiqamake aavoqi entara qovarama kaariraro 7 ihinavuara ai vatainvi variqiro vuanarove.

2. Te navutaaka qaqi kaari vika ani taaramo torara ni hampata rakuqi viha ni aru ntata kaimanta ne vika naatu qetake ruqemake vi anivarave.

3. Te qora rovara qovarama kaariraro vi rovarava taaramo enta Isareriqi vi aniharo ai vaiinti nahenti ntaihaanarove.

Are koqema kera nena avu aatoqihair arikera ti tiva timiraqe te anirante ai uva vuru Nora Kotira tiva amiare, tiro.

¹⁴ Gaativa minti tuvaro Devitiva vi uvvara iriro tiharо, Mpo, ti muntukavano voqamakero qoraiqmantama vauro. Mpo, tenavu navutaaka kauquqi variarera, vika anomake tinavu qoraiqama timitevarave. Noravano Kotiva voqamakero tinavu aqurihamma timite vaiva vaimantara ti, vira qaqi kairaro viva nana haika tinavu autu timitareva iainara autuarire, tiro.

¹⁵ Devitiva minti tuvaro Noravano Kotiva qora rovara qovarama kovaro vi rovarava taaramo enta variqiro viharo ekaa Isarerini vi ani vaumanta Isarer iatainti nahenti 70,000 qutu vura.

¹⁶ Noravano Kotiva atito *enseliva* Ieruharemini oruntero, nai kauqu tututero Ieruharemipi vaauka vehi autu taiqa kareva auti vauvaro Noravano Kotiva vaiinti nahenti airitahaa qutu vurara iruvaro vira muntuka qoraiquvaro *enseliara* tiharо, Hove. Nena kauqu tututaanara qaqini vara kaane, tiro.

Minta tuvaro vi entara Noravano Kotiva atito *enseliva uit* nora vareha vuhaantaari aquke vau vatukaraqaa himpiro vaura. Vi vatava vaireva, Jebusi vatanaa vaiinti Araunaara vatavano vaura.

¹⁷ Ho Devitiva vaiinti nahenti aruke vau *enselira* tavero, viva Nora Kotirara tiharо, Mpo, tema ai uva raqa kauraukama vauro. Te maa vaiinti nahentika sipisipi qoka voqaara

vaiha qora okara autu kauramanta vika kia qora okara autuakave. Kia vika qoraiqama nimitaraitira, are tivata ti vainti nahentivata qoraiqama timitaane, tiro.

¹⁸ Devitiva minti tuvaro vohaa vi entara Gaativa oruntero Devitirara tiharo, Vururaqaa Jebusihainaa vaiinti Araunaava i vatava vaimanta mini *uiti* nora vareha vuhaantaari vuru ke varianainima vaivo. Ho are oru vi vataraqaa Nora Kotira *ofaa* tainta vo autu amitaane, tiro.

¹⁹ Gaativa minti tuvaro Devitiva Noravano Kotiva vira noqihairo tiva amuntema kero, mini vura.

²⁰ Viva oruntovaro Araunaava kaiqa varonaihairo vuavu tavovaro avuhainaa vaiinti vano nai nora vaiintinavu hampata viva vaunaini uri vauvaro viva vinavuka ntita kareva otuntero avuhainaa vainti avuqaa kankakaa viro nai viri vatainiqama kero ²¹ Devitira irero tiharo, Avuhainaaao, are nanarae ti tavareva uruaro? tiro.

Minti tuvaro Devitiva vira tiva amiro tiharo, Te are iana vataraqaa *uiti* vareha vuhaantaari vuru ke varia vataro koqaamake vararerama ururo. Nora aiha viraava vaiinti nahenti ntaihe vaiva taiqa vuarire ti, te vi vataraqaa Nora Kotira *ofaa* tainta autu amitarerave, tiro.

²² Minti tuvaro Araunaava Devitirara tiharo, Avuhainaaao, are vata maa varehara kia koqaama kera vararaitira, qaqi varaane. Are Nora Kotira iha quara amitareve ina haikaravata qaqi varaane.

Are homa purumakau maavata varera Nora Kotira *ofaa* iha quara amitenarave. *Uiti* ruquti varia katarirave, purumakau auntaqaa rumpataa katarirave, ekaa vira varera, viraqohira *ofaa* taintaqua Nora Kotira iha quara amitaane. ²³ Avuhainaaao, te Araunaaka ekaa vi haikara ai qaqima amuro, tiro.

Minti tiva kero viva qaiqaa tiharo, Mpo, Noravano Kotiva are virara *ofaa* iha quara amitenarara iriharo viva ai quahama amitaarie, tiro.

²⁴ Viva minti tuvaro avuhainaaava Araunaarara aqao tiro, Te ekaa vi haikara iriha ai koqaa amirerave. Te kia qaqi varataaina haikara Nora Kotira *ofaa* autu amitarerave. Te koqaama taainaraqohai Nora Kotira *ofaa* autu amitarerave. ²⁵ Minti tivakero Devitiva *silvaa* monu 50 navu aqukero vi vaintira vatavata purumakauvata varora.

²⁵ Devitiva Nora Kotira *ofaa* tainta vi vataraqaa aututero, ekaara kaintu iha quaraaina *ofaaravata*, Kotikantiro vohaa tampama viro variaina *ofaaravata*, Kotira iha quara amitora.

Mintuvaro Noravano Kotiva Isareri vika vira aaro uvara iruvaro vi rovarava Isareriqi-hairo taiqa vura.

1 King (1 Kings – 1 King)

Devitiva naampaiqama vura

¹ King Devitiva anomakero naampaiqama vuvaro vira vaatavano ante vaumanta vira totoqiarire ti, vira kaiqa vaiinti *paraanke* aqu amitovaro vira qaqqiqai ante vauvaro vaura.

² Mintumanta vira kaiqa vaiinti virara tiha, Avuhainao, are kairae tenavu varaata vo rantake vita viri kaariraro viva ai hampata vauharo ariqaa raqikiarire. Viva ainti vaiteharo ai vaata totoqama amitaarire, ti.

³ Minto tivake vika koqe viri vaata varaata vo rantareka ekaa Isareri vataini vi anihia Abisaakira Sunemihainaara rantake vita vare avuhainavaa vaunaini anura.

⁴ Abisaakiva nai koqe viri vaata vataaa nahentivano avuhainaa vaiintiqaa raqikiharo vira kahaqi vauvarovata, avuhainaa vaiintivano kia vira hampata nura.

Adoniaava avuhainaa vaiinti vaireva auti vaura

⁵⁻⁶ Adoniaava Devitika Hagitika maaquvano vaura. Apasalomura nova Apasalomura vatatovaro vira naantiara Hagitiva Adoniaara vatatora. Adoniaava koqe viri vaata vataaa vaiintivano vaura.

Viva quvaaraa vaintika vauharo vo okara vo okara auti vauvaro vira qova kia vira avuquavu iraitiro, qaqi kovaro variqiro viro noruqama vura.

Ho Adoniaava noruqamaviro tiharo, Te nora vaiintivanove. Te avuhainaa vaiinti vairerave, tiro. Minto tivakero viva ohinavuvata iqoka *kaari* vonavuvata varero aaraini vireva iharo vaiinti 50navu ntita komanta vika vira avuni kante vi vauvaro viva vika naantiaraini iqokakaariqi vi vaura.

⁷ Adoniaava nai avuhainaa vaiintiqama vuainarara iriharo Seruiara maaqu Ioaapiravata, Kotira kaiqa vara amite vau vaiintira Abiataaravata, tiva nimumanta vitanta vira uva iri homa are avuhainaa vaiintiqama vinarave, tura.

⁸ Vitanta minto tumantavata, vokuka kia virara hove tura. Kotira kaiqa vara amite vau vaiintiva Sadokivave, Jehoiadaara maaqu Benaeaavave, paropeti vaiinti Nataanivave, Simeika Reikave, vo vaiintinavu Devitiraaqaa maimaraara raqiki vaukave, ekaa vika kia Adoniaara uvara hove tura.

⁹ Vo enta Adoniaava Eni-Rogeli Ruvu Namari tataaqa Memaru-Orive tunaini oru vauharo sipisipive, purumakau qorave, purumakau naati koqe vaata vaurave, vira vira arukero Kotira *ofaa* iha quara amitora. Viva *ofaa* vira autireva iharo ekaa nai qata avuhainaaara maaqunavuve, ekaa avuhainaaara qjata vaiinti Iutaa vatanaakave, naareharovata,¹⁰ nai qata Soromonura, paropeti vaiinti Nataanira, Benaeaara, avuhainaraaqua maimaraara raqikuka, vika kia naaroraa.

¹¹ Adoniaava kia vika naarovaro Nataaniva Soromonura nova Basebaava unaini oruntero vira irero tiharo, Hagitira maaqu Adoniaava viva nai avuhainaa vaiintiqama vivaro King Devitiva kia virara irivo. Are virara irirae kiae iriaro? ¹² Ho kaiqe te koqe avu aato ai amiari vika kia aiyata ai maaqu Soromonuravata arukaate.

¹³ Are vaakama King Devitiva inaini oruntera virara mintima tiane: Avuhainao, are haaru nena kauqu aiqiqaa aquukehara tiriara tihara, Naantiara ai maaqu Soromonuva ti vatuka varero avuhainaa vaiintiqama vuanarove, tianarave. Ho nantivaroe Adoniaava vate avuhainaa vaiintiqama vivo? tiane. ¹⁴ Ho Basebaao, are oru King Devitira hampata uva ti vairage tevata viraqiqi origete ai uva vira tiva kempukaiqama kaare, tiro.

¹⁵ Nataaniva minto tuvaro Basebaava avuhainaa vaiinti tavareva viva vaito *rumuraqi* viro.

Avuhainaa vaiinti viva naampaiqama vuvaro Abisaakiva Sunemihainaara nahentivano viraqaa raqiki vauvaro¹⁶ Basebaava avuhainaa vaiinti aumanto oruntero vira avuquaa kankakaama viro vauvaro avuhainaa vaiintivano vira irero tiharo, Are nana haikarae aniaro? tiro.

¹⁷ Tuvaro ho Basebaava virara tiharo, Mpo, avuhainao, haaru are nena Variqa Nora Kotira autuqaa nena kauqu aiqiqaa aqu kehara tiriara minti tiva taanarave. Are tihara, Ai maaqu Soromonuva ti vatuka varero avuhainaa vaiintiqama viro ti avuhainaa taintaaqa oquviro varianarove, tianarave. ¹⁸ Are minto tiva taarava vaivarovata, vate Adoniaava avuhainaa vaiintiqama vivo. Are virara kiama iriaro.

¹⁹ Viva purumakau qorave, vaata vai purumakau naative, airi sipisipive, arukero Kotira iha quara amitaivo. Viva mintireva iharo ekaa ai maaqunavuve, Kotira kaiqa vara amite

vaira Abiataarave, iqoka vaiintiqaa raqiki vaira Ioaapirave, vi karara nare inaini vuate tiro, naareharo ai maaqu Soromonura kia aaraivo.

²⁰ Avuhainaao, iriane. Tavave ai vatuka varero avuhaina vaiinti variainarara ekaa Isareri vaiinti nahenti are vika tiva nimiane ti, ai veka vaiha ariqaa avu vate variavo.

²¹ Ho are vate kia vika tiva nimiraitira qutu virera, vika Soromonuka titanta taveha qorahaatantave tivakeha titanta haruma kevarave, tiro.

²² Basebaava vi uvara qaqi ti vauvaro Nataaniva avuhainaara naavuqi oruntomanta ²³ vira kaiqa vaiinti vira tave avuhaina vaiinti vuru tiva ami tiha, Paropeti vainti Nataaniva ai tavareva urivo, tuvaro viva hove tuvaro „Basebaava vi rumurraqihairo vevantovaro“ Nataaniva oriqetero avuhainaara aumanto oruntero vira avuqaa kankakaama viro nai viri vataini kero vaura.

²⁴ Viva kankakaamavi vaharo Devitira irero tiharo, Avuhainaao, quqaae are Adoniaarara tihara, Viva ti vatuka varero avuhainaava vaharo ti avuhaina taintaqaa oquiviro varianarove, tianarave?

²⁵ Vate maa entaraqaa Adoniaava vonaini oru airi purumakauve, sipisipive, vaata vai purumakaura naative, arukero Kotira *ofaa* iha quara amitaivo. Viva ai maaqunavuve, iqoka vaiintiqaa raqikiaka qiata vaiintive, Kotira kaiqa vara amitai vaiintira Abiataarave, naarama tero vira hampata kara naate timanta, vate vika mini Adoniaara hampata vaiha karavata namarivata nehama vika Adoniaarara quaheha tiha, King Adoniaava vukaiqama kero qaqi variqiro vuarire, ti variavo. ²⁶ Adoniaava Kotira kaiqa vara amitai vaiintira Sadokirave, Benaihaarave, Soromonurave, tive kia haaraivo.

²⁷ Avuhainaao, quqaae are tinavu nena kaiqa vaiintinavu kia tiva timiraitira, are Adoniaarara viva ti vatuka varero avuhaina vaiintiqama vuuanarove tianarave? tiro.

Devitiva Soromonura noraiqama kora

²⁸ Nataaniva minti tuvaro King Devitiva nai kaiqa vaiintiara tiharo, Ne Basebaara qaiqaa aaraivarou uruarire, tumanta vika vira aarovaro viva oru avuhainaara aaqanto himpiro vaura.

²⁹ Mini vauvaro avuhainaava virara tiharo, Noravano Kotiva ekaa enta variqiro vi vaiva, viva ekaa vo maara vo maaraqihairo ti ruaruama timite vaivave. Haaru te vira autuqaa tiha, ³⁰ Te Nora Kotira Isareri Variqa avuqaa tenta kauqu ainqaa aquke tiha, Naantiara ai maaqu Soromonuva ti vatuka varero avuhaina vaiintiqama vuuanarove, tunarave. Ho vate vi uvava vivauma varianarove, tiro.

³¹ Minti tuvaro Basebaava kankakaama viro nai viri vatainiqama kero King Devitirara tiharo, Mpo, ti nora vaiinti King Devitiv, are ekaa enta qaqi variqira vuane, tiro.

³² Minti tuvaro King Devitiva Jehoiadaara maaqu Benaihaaravata, Kotira kaiqa vara amito vaiintira Sadokiravata, paropeti vaiinti Nataaniravata naaromanta anuvaro ³³ viva vinavukara tiharo, Nenavu ti *opisiq* kaiqa vare varia vaiintika hampata otunte, ti maaqu Soromonura tiva amivaro viva ti donkiqaa oquivi vaira vira vita vare Gihonini Ruvu Namariavano vainaini vuute.

³⁴ Ne vira mini muntu kaimanta Sadokika Nataanika vahavera Soromonura qiataqaa aqu amiteha vira noraiqama kaivarо viva Isareri avuhaina vaiintivano variarire. Ne vira noraiqamake, *aanumaara/noma* vuaqeha naveraitiha mintima tiate: King Soromonuva vukai entama qaqi variqiro vuarire, tiate.

³⁵ Ne mintimake vira vita vare urivaro viva ti avuhaina taintaqaa uru oquiviro variarire. Te vira noraiqama kauraro viva ti vatuka varero avuhaina vaiintivano vaharo Isareripaavata Ituaqaavata raqikiarire, tiro.

³⁶ Devitiva minti tuvaro Benaiava virara tiharo, Koqeve. Kairaro Noravano Kotiva ai Variqavano ekaa vi haikara autiraro are tinantema kero qovaraiqiarire. ³⁷ Noravano Kotiva ai kahaqintema kero, viva Soromonura hampata vaharo viravata kahaqiarire. Noravano Kotiva Soromonura koqema amitairaro viva avuhaina vaiinti mpeqavano vaharo ai nora autuvata aatara kero nai nora autu vataava variarire, tura.

³⁸ Ho Sadokiva, Nataaniva, Benaiava, iqoka vaiinti avuhainaaraqaa maimaraara raqikuka Keretihainaakave, Pelethainaakave, vika Soromonura tuvaro viva King Devitira donkiqaa oquivi vaumanta vika vira vita vare Gihonini Ruvu Namari vaunaini otu vura.

³⁹ Mini vuvaro Sadokiva Nora Kotira *seri* naavuqihairo *orivi* vahavera sipisipi *komuqi* nonkutora vare vura qihia kero Soromonura qiataqaa aqu amitero vira noraiqama kora. Mintima komanta vika *aanumaara/noma* vuaqomanta ekaa vaiinti nahenti mini vauka naveraitiha, King Soromonuva vukaiqama kero qaqi variqiro vuarire, ti vaura.

⁴⁰ Ekaa vaiinti nahenti Soromonura avata vare Ieruharemimi viha voqavata quahaqi viha naveraitiha *aanumaara/noma* vuaqaqi vi vauvarora tiro, vatavano qaki qaki i vaura.

Adoniaava King Soromonura aatu qetora

⁴¹ Mintumanta Adoniaavavata viva naaro vaiintikavata kara nama taiqa kareka auti vaiha, noraiqaake naveraiti vau uvvara *nontanta/otata* irura.

Ioaapiva *aanumaara/ noma* vuaqora iriro tiharo, Nana haikavanoe Ieruharemini qovariqivo? tiro.

⁴² Ioaapiva qaqi uva ti vauvaro Kotira kaiqa vara amito vaiintira Abiataara maaqu Ionataaniva vika unaini oruntovaro Adoniaava virara tiharo, Maini aniane. Are koqe vaiintivano variararo ai vakaakavano koqe vakaakama varianarove, tiro.

⁴³ Minti tuvaro Ionataaniva aqao tiro, Te kiama koqe vakaaka vare anuro. Tinavu nora vaiinti King Devitiva nai Soromonura noraiqama kaivaro vivama avuhainaia vaiintiqama vivo.

⁴⁴ Devitiva Sadokiravata, Nataaniravata, Benaaiaravata, avuhainaaraqaa maimaraara raqikiakavata, nititaimanta vika Soromonura hampata vuavaro Soromonuva King Devitira donkiqaa oquiviro vimanta ⁴⁵ vika Gihonini Ruvu Namari vainaini vuamanta Sadokika, Nataanika, vahavera Soromonura qiatqaqqaa aqu amiteha vira noraiqama kaavaro viva avuhainaia vaiintiqama vivo.

Mintimanta vika turuvanava naveraitivaqi viha quaha quahamaqi Ieruharemini vuamanta vaiinti nahenti Ieruharemiqi variakavata noraiqaake naveraiti varia uva *nontanta/otatara* ne iriavo.

⁴⁶ Ho vate Soromonuva avuhainaia taintaqaa oquivi vaivo. ⁴⁷ Avuhainaara qiatu vaiinti vika oru King Devitira tave vira quahama amiteha virara mintima ti: Kotiva Soromonura koqema amitero kempukaiqama amitairaro viva avuhainaia vaiinti kempukavano vairaro Kotiva vira autu noraiqama kairaro vira nora autuvano ai nora autuvana ataura kaarire, tiavaro King Devitiva nai anu kimarama kero nai vaitai taintaraqaa vaiharo Nora Kotira autu tuahera kero ⁴⁸ tiharo, Aniqe tenavu tentanavu Isarerri Variqa Nora Kotira autu tuahera kaare. Vate ti maaqu vovano ti vatuka varero avuhainaia vaiintiqama vivaro Noravano Kotiva ti qaqi kaimanta „te kia qutiraiti“, tenta tivuqohai maa entara qovariqi haikara tavauro, tivo. Devitiva mintima tivo, tiro.

⁴⁹ Ionataaniva vi uvvara tumanta Adoniaara hampata kara ne vauka vi uvvara iruvaro autu itomanta vika himpi ruqemake vona vona vura.

⁵⁰ Adoniaava Soromonura aatu qetakero oru Nora Kotira *seri naavuqi ofaa* tainta hini hini kaantaraqaa aatotanta aututora totoro vaura.

⁵¹ Viva mini vuamanta vokuka King Soromonura vuru tiva ami tiha, Adoniaava ai aatu qetakero *ofaa* tainta aatotanta tote vaivo. Viva tiharo, Kairaro King Soromonuva Kotira autuqaa tiriara tiharo, Te kia vira arukarerave tiarire, ti vaivo, ti.

⁵² Minti tuvaro Soromonuva tiharo, Te tavaariraro viva kia qora okara vo autirera, te kia qaqi kaariraro vovano vira qoraiqama amitaanarove. Viva qora okara autirera, viva quutuma vuanarove, tiro.

⁵³ Minti tivakero King Soromonuva vokuka nititomanta vika oru *ofaa* taintaqaaahai Adoniaara vita vare anuvaro, viva King Soromonura avuqaa kankakaama viro vauvaro Soromonuva virara nena maaqaini vuane tura.

2

Devitiva Soromonurara ekaara uva tura

¹ Devitiva tavovaro viva nai qutuarirava aumaiquvaro viva nai maaqu Soromonura aaramakero maa uvvara vira tiva amura:

² Te aumakaama qutirarave. Qorainti taruva kempukaiqama kero himpiro vaintema kera, are kempukaiqama kera variqira vuane.

³ Are Nora Kotira nena Variqa uvaqai iriqira vuane. Are vira aaraqaqai nuane. Are kia vira no raqa karaitira, viva vo uva vo uva tivatora Mosiva qara ntuvatora iriqira vuane. Are mintiraro Noravano Kotiva ai kahaqirara are vona vona vairaro, ekaa are varena kaiqava koqema kero varianarove.

⁴ Are kia vira no raqa karaitira, vira uva iriqira virera, viva ti Devitikara tivatai uvvara kia tauru kaanarove. Haaru Noravano Kotiva tiriara tiharo, Are kuvuarama terauka ekaa enta kempukaiqamake ti tivataqi viha, ti tivuqaa avuqavuqamake nivera, te vikaqihai vo vaiinti vo vaiinti kaama taari vika Isareriqaa raqikiqii vivarave, tirave.

⁵ Ho Seruiara maaqu Ioaapiva ti qoraiqama timitairara are irianarave. Ioaapiva Isarerri iqoka vaiintiqaa raqiki variatanta Nera maaqu Apineravata, Ietera maaqu Amasaaravata arukairave. Viva kia raquraqihairo vitanta arukaraitiro, qaqi maateraiqamake varia entara viva vitanta arukaivaro vi uvava nai viraqama vaivo. (2 Sam 3:27; 2 Sam 20:10)

⁶ Are nena koqe avu aato avatehara, vira vaaqu kaiqara irihara, kiama vira qaqi kairaro naampaiqama viro qutuarie.

⁷ Gileatihainaara Basilaira maaqunavu qaqi kairamanta vinavuka ani ai vaintivara hampata oquvi vahama kara naate. Te ai vakaara Apasalomura aatu qetake vuna entara vinavuka ti koqema timitaarave. (2 Sam 17:27-29)

⁸ Are Benaminira ankuqihairo Bahurimihainaara Geraara maaqu Simeiraravata kia tauru kaane. Haaru te Mahanaimi vatukaini virera aaraini vi vauraro viva ti qora uva tiva timitero, Kotira aareharo tiriara goraiqama amitaane tirave. (2 Sam 16:5)

Te orurante anuraro Simeiva lotani Namariqi tuvuntero ti vita kaimanta te Nora Kotira avuqaa tenta ainqiqa kauqu aquke tiha, Te kia ai arukarerave, tunarave. (2 Sam 19:16-23)

⁹ Te minti tunarara tiro, vi vaiintiva maa entara qaqima vaivo. Hauri are vi vaiintirara kia viraqaa uva vaivo tirorave. Are koqe avu aato vataaravara tira, vo aara ranta kairamanta vi vaiintira arukaate, tura.

Devitiva qutu vura

¹⁰ Ho Devitiva qutu vumanta vika vira vaata vare Ieruharemiqi *Devitira Vatukave* tunaini vuru quntama tora.

¹¹ Devitiva avuhainaa vaiintiqama viro Isareriqaa 40 ihiara raqikiqiro vura. Viva Hebaroni vatukaini 7 ihiara Isareriqaa raqikiqiro viro, viraqaahairo viva oru Ieruharemini 33 ihiara vaharo Isareriqaa raqikiqiro vura.

¹² Devitiva qutu vuvaro vira maaqu Soromonuva nai qora vatuka varero avuhainaa vaiintiqama viro Isareriqaa raqiki vauvaro viva raqikuva kempukaiqama kero vaura.

Adoniaara arukora

¹³ Vo enta Hagitira maaqu Adoniaava Soromonuva nora Basebaara ani tavora.

Viva anuvaro Basebaava vira irero tiharo, Are maateraiqiharae aniaro? tuvaro Adoniaava tiharo, Eo, te maateraiqihama anuro, tiro.

¹⁴ Viva minti tivakero qaiqaa tiharo, Te ai hampata uva vo tirerave, tuvaro Basebaava, Ho tiraqe iriare, tiro.

¹⁵ Minti tuvaro Adoniaava tiharo, Are irianarave. Ekaa Isareri vika tiriara arema avuhainaa vaiintivano vainarave tiamanta te avuhainaa vaiintiqama vuare turaro, nai Nora Kotira antuqavano ti qata kaama taimanta te kia avuhainaa vaiinti vaunarave. ¹⁶ Ho te vohaa uvaqai a iirarerave. Are virara hovema tiane, tuvaro Basebaava, Ho are tiraqe iriare, tiro.

¹⁷ Minti tuvaro Adoniaava vira tiva amiro tiharo, Are oru King Soromonuva irairaro viva hove tiraqe te Sunemihainaa nahenti Abisaakira varaare. Viva are irena uvarara kiama kiave tiraitiro, eoma tianarove, tiro.

¹⁸ Adoniaava minti tuvaro Basebaava hove tiro, Te oru vira ireha tavaare, tivakero ¹⁹ Basebaava Adoniaarara iriharo King Soromonuva tavareva vura.

Ho avuhainaa vaiintivano tavovaro vira nova Basebaava uru vauvaro viva himpiro vira uva mantero nai anu kimaarama amitero, viraqaahairo qaiqaa nai avuhainaa taintaqaa oquviro, nai kaiqa vaiintiara tainta vo vara viri amitaate tumanta vara viri avuhainara vira kauqu tanaraini vatovaro vira nova viraqaa oquvi vaura.

²⁰ Ho Basebaava tiharo, Te inaara uva vo ai iraairara are virara hovema tiane, tuvaro King Soromonuva nai tiva amiro tiharo, Ti no, ho tiane. Te are ti irena uvarara kiama kiave tiraiti, eoma tirarave, tiro.

²¹ Minti tuvaro Basebaava tiharo, Are qaqi kairaro ai vakaava Adoniaava Abisaakira varaarie, tiro.

²² Minti tuvaro King Soromonuva nai norara tiharo, Oho, nantivarae are ti irehara Abisaakira Adoniaara amiane tiaro? Are mintima kera irehara tiriara, Kairaro Adoniaava ai vatuka varero avuhainaa vaiintiqama vuariре, ti variaro. Are irianarave. Viva ti vakaava vaimanta Ioaapika Abiataaka vira mantaraini vaiha vira kahaqireka auti variarave, tiro.

²³ King Soromonuva minti tivakero viva Nora Kotira autuqaa tiharo, Oho, Adoniaava vi uvara ti iraира kaara te tiari vira arukaate. Te kia mintiarera, Noravano Kotiva homa ti arukaanarove.

²⁴ Noravano Kotiva naima ti kahaqiharo kempukaiqama timitaimanta te tenta qora Devitiva vatuka vare avuhainaa vaiintiqama vunarave. Haaru Noravano Kotiva nai ainqiqa kauqu aqukero tiriara tiharo, Vivavata vira vaintivaravata avuhainaa vaiintiqamavi variqi vivarave, tirave. Oho, Noravano Kotiva ekaa enta ekaa enta qaqi variqiro vi vaira autuqaa te tiha, Adoniaava vatema qutu vuanarove turo, tiro.

²⁵ King Soromonuva minti tivakero viva Benaaarara tuvaro viva oru Adoniaara aru kora.

²⁶ King Soromonuva Kotira kaiqa vara amite vau vaiintira Abiataarara tiharo, Anirantera nena maaqa Anatotini vuane. Are qora okara autu kaanara kaara ai arukaarirava vaimantavata, vate te kia ai arukarerave. Haaru are ti qokantira vahara Nora Kotira Vokiseqaa raqiki variararo ti qova Devitiva airi maara varaivara arevata vikantira vi maarara varaanarave. Virara irihama te kia ai arukarerave, tiro.

²⁷ Minti tivakero Soromonuva Abiataara atitama kovaro Abiataava „Elira ankuqhainavaa, kia qaiqaavata Kotira kaiqa vara amitora. Mintuvaro haaru Noravano Kotiva Silo vatukaq Elirara tivato uvava vivau vaura. (1 Sam 2:27-36)

Ioaapira arukora

²⁸ Apasalomuva nai qora Devitira vatuka varareva auti vau entara Ioaapiva kia Apasalomura mantaraini vaura. Mintuvarovata, Adoniaava „nai qata Soromonura vatuka varareva auti vauvaro, Ioaapiva Adoniaara mantaraini vaura.

Ho Ioaapiva iruvoro vi haikava Adoniaaka Abiataakaqaa qovaraiquvaro viva qeta kero ruqema kero oru Nora Kotira seri naavuvano vaunaini Kotira ofaa tainta hini hini kaantaraqaa aatotanta aututora totoro vaura.

²⁹ Mini vaumanta vokuka King Soromonura vuru tiva ami tiha, Ioaapiva oru Nora Kotira seri naavuvano vainaini vaharo ofaa tainta totoro vaivo, tuvaro Soromonuva Benaihaarara oru Ioaapira aru kaane tiro.

³⁰ Minti tuvarovata, Ioaapiva tiharo, Kia te aqaineni veva ntaranema tivo, tiro.

Minti tuvarovata, Ioaapiva tiharo, Kia te aqaineni veva ntaranemava. Te maaqi vahia qutu virerave, tiro.

Ioaapiva minti tuvaro Benaiava viva tu uvvara varero anirantero vuru avuhainaa vaiinti tiva amuvaro ³¹ avuhainavaa Benaihaarara tiharo, Hove. Are viva nai tintema kera vira arukaane. Are vira aru kera, vira vaata varera vuru quntama taane. Ioaapiva kia qora okaravata autuatanta, qumina arukora kaara, vira vaaqu okaravano tigaavata ti qora ankuqaavata vairave. Vira arukairaro vira vaaqu okaravano kia qaiqaavata tinavuqaa variariere.

³² Oho, kairaro Noravano Kotiva Ioaapiva vaaqu kaiqa varairara iriharo, naivata aru vunu kaarie. Haaru Apineva Isareri iqoka vaiintiqaa raqiki vauva vauvaro Ioaapiva qumina vira arukorave. Amasaava Iutaa iqoka vaiintiqaa raqiki vauvaro Ioaapiva viravata qumina arukorave.

(2 Sam 3:27; 20:9-10)

Vitanta koqe vaiintitanta vauvaro vitanta koqe okara autuva Ioaapiva auturavata aatara korave. Mintuvaro Ioaapiva kia ti qora tiva amiraitiro, viva nai antuqaaqaa vi vaiintitanta arukorave.

³³ Oho, kairaro Noravano Kotiva Ioaapira vaaqu okarara iriharo, kia vira uva nunka amitiraro vi uvava ekaa enta Ioaapiraqaaavata, viva kuvuarama tairaukaqaavata, qaqi variqiro vuarie. Kairaro Noravano Kotiva ekaa enta Devitira ankuqirauka koqema nimiteharo vikaqihai avuhainaa valinti qovaraiqikavata koqema nimiteira vika maat-eraiqihai variqiro vuuate, tiro.

³⁴ Soromonuva minti tuvaro Benaiava vi uvvara iriro viva anirantero oru Ioaapira arukora. Vira arukomanta vira vaata vare vuru nai maaqa aahara vataini quntama tora.

³⁵ Avuhainavaa Benaiara noraiqama kovaro viva Ioaapira vatuka varero „Isareris iqoka vaiintiqaa raqiki vaura. Abiataara vatuka varaiarie tiro, avuhainavaa Kotira kaiqa vara amite vau vaiintira Sadokira noraiqama kora.

Simeira arukora

³⁶ Avuhainaa vaiinti viva Simeira aarovaro anuvaro virara tiharo, Are Ieruharemiq i vahara naavu vo kaqatera vi naavuraqima variane. Kiama Ieruharemi vatuka kera vonaini vuane.

³⁷ Are Ieruharemi maini kera Kidaroni Namari taqa varera vonaini virera, are vaakama qutu vinarave. Are mintirera, nena mintinara kaarama, qutuma vinarave, tiro.

³⁸ Minti tuvaro Simeira vira nai tiva amiro tiharo, Avuhainaa, are tiana uvava koqe uvama vaivo. Te are tianantemake mintirerave, tiro. Minti tivakero Simeira vukaiqama kero Ieruharemini variqiro vura.

³⁹ Ho taaramo ihi aitaromanta Simeira kaiqa vaiinti rumpatokaqihai votanta ruqemake oru Geti vatukaini Makaara maaqu King Akisira hampata mini vaura. Vitanta oru mini vaumanta vokuka Simeira tiva ami tiha, Ai kaiqa vaiintitanta Geti vatukainima oru variavo, ti.

⁴⁰ Minti tuvaro Simeiva nai donki geramatero viraqaa vaarintero oquvi vaharo „Ieruharemi kero“ Geti vatukaini King Akisiva vaunaini nai kaiqa vaiintitanta rantareva viro, oru vitanta ranta kero ntita varero Ieruharemini orurantero anura.

⁴¹ Mintuvaro Soromonuva Simeiva Ieruharemi kero Geti vatukaini viro orurantero ani uvava iriro, ⁴² viva Simeira aaramakero virara tiharo, Te haaru ariara tiha, Are Nora Kotira autuqaa tihara kia te Ieruharemi vatuka ke vona vuainarave tiane, tunarave. Te tiha, Are Ieruharemi vatuka kera vonaini virera, are vi entara qutuma vinarave, turara are tiriara tihara, Are tiana uvava koqe uvama vaivo. Te are tianantemake mintirerave, tianarave.

⁴³ Ho nantivarae are Nora Kotira autuqaa, Te mintirerave tivataana uvara kia iriraitira, te ai tiva amuna uvaravata raqa kaaro? ⁴⁴ Are ti qora Devitira qoraiqama amitaana uvara, ekaa vi uvara irianarave. Ho Noravano Kotiva nina vaaku okara kaara ai qoraiqama amitaanarove.

⁴⁵ Noravano Kotiva ai qoraiqama amiteharovata, viva ti kojema timiteharo ekaa enta Devitira ankuqirauka qaqi kaira vikama avuhainaava vaiintiqamavi variqi vivarave, tiro. ⁴⁶ King Soromonuva minti tuvaro „Simeiva vahaaqaini“ vevantovaro avuhainaava Beniaaara tuvaro viva vevantero Simeira arukora.

Ho mintuvaro King Soromonuva avuhainaava vaharo raqikuva kempukaiqama kero vaura.

3

Soromonuva Kotirara koqe avu aato timiane tura

¹ Isarerivata Isipivata maateraiqihä variate tiro, Soromonuva Isipi vika avuhainaara raavura varatero vaura. Viva vi nahentira vita varero vuru Devitira vatukave tunaini Ieruharemini kovaro vaura. Soromonuva nai avuhainaara naavu kaeq vau entaravata, Nora Kotira naavu kaeq vau entaravata, Ieruharemi vaantaavura auti vau entaravata, vi nahentira Devitira Vatukave tunaini vaura.

² Vi entara Nora Kotira naavu kia kaqa amitorara ti, vaiinti nahenti oru hampi vo ainqina vo ainqinaqaa Kotira *ofaa* iha quara amite vaura.

³ Soromonuva muntukavano Nora Kotirara vauvaro viva nai qova Devitiva kojema kera nuane tu uvira iriqiro viharovata, viva vaiinti nahenti aanantero, sipisipive, memeraave, purumakauve, varero hampi vo ainqina vo ainqinaqaa Kotira *ofaa* iha quara amite vaura.

⁴ Gibeoni vatukaini *ofaa* tainta vo vaumanta vaiinti nahenti virara avuni vai taintarave tuvaro Soromonuva vi taintaraqaa 1,000 aantauvahi Kotira *ofaa* iha quara amitora.

⁵ Vo enta Soromonuva Gibeonini oru vaharo entaqi vaiteharo taira tave vauvaro Noravano Kotiva qovarama viro virara tiharo, Nana nana haikara ai muntukavano vainarara are ti irairaqe te ai amiare, tiro.

⁶ Minti tuvaro Soromonuva tiharo, Ti qova Devitiva ai kaiqa vaiintivano vaharo viva kempukaiqama kero ai uva iriqiro viharo kojema kero avuqavuqama kero ai kaiqa vare vaivara are vira kojema amitaanarave. Are vira kojema amitaararo viva ti qorainti vainti vatataimanta te vira maaquvano vaiha tenta qora vatuka vare Isareriqaa raqiki vauro.

⁷ Ho ti Variqa Noravaavo, te qaraaka vaiintivano vaiinti nahentiqaa raqikiaina kaiqara kia kankomake tavaraiti vaurara, are ti qaqi kaaramanta te tenta qora vatuka varaunarave.

⁸ Are kaama taana vaiinti nahentika maini airitaha variavaro kia vovanovata vika ho kaara ntuarirava vaimanta te vi vaiinti nahentikaqaa raqiki vauro.

⁹ Ai vaiinti nahenti airi variarara tira, are ti koqe avu aato timirage te koqe okaravata qora okaravata ho rairake taveha, avuqavuqamake vikaqaa raqikiare. Ti avu aatovano kia ho vairera, te nantiakaa ai vaiinti nahenti nora vatanakaqaa ho raqikirarave? tiro.

¹⁰ Minti tuvaro Noravano Kotiva Soromonuva iro uvarara quaha kero ¹¹ virara tiharo, Are kia tiriara airi ihi timirage te yukaiqamake variare tiraitira, are kia airi airaira timiane tiraitira, are kia ti navutaaka aru taiqa timitaane tiraitira, are tiriara tihara, Koqe avu aato ti timirage te ai vaiinti nahentiqaa avuqavuqamake raqikiare, tianarara ti, ¹² te are tianantemake, koqe avu aato amiariraro ai avu aatovano uritarero variarire. Haaru koqe avu aato vataa vaiinti vovanovata kia mintimakero vaurare. Naantiara qovaraiqikaiqihairo kia vovanovata ai avu aato aataraa kaarirava varianarove.

¹³ Are ti iraana haikara ai ami, viraqahai te are kia ti irena haikaravata ai amirerave. Te airi airairave, nora autuve, ai amiarirara are qaqi variqira vina entara avuhainaava vaiintivano vairaro are vatera monuvave, airairavave, ai autuvanove, uri aatarakero vairaro avuhainaaka vonavu kia ho ai aanantamake vaivarare.

¹⁴ Ai qova Devitiva te uva tiva taunara iriqiro viharo ti aaraqaa koqema kero ni vairave. Are vira aananteria mintiaqira virera, te ai qaqi kaarirara are ari ihiara variqira vinarave, tiro.

¹⁵ Minti tuvaro Soromonuva vaitonaihairo himpiro tiharo, Ike, Kotiva tairakaama vi uvara ti tiva timivo, tivakero viva himpiro oru lerusaremimi Nora Kotira Vokise avuqaa vaharo *ofaa* vo, ekaa kaintu iha quara amitero, Kotikantiro vohaa variainarara iriharo *ofaa* vo iha quara amitero, viraqaahairo viva nai *kamaani* kaiqa vare vaukara iriharo kara *unta/nuta* nimura.

Soromonuva avuqavu ko tura

¹⁶ Vo enta hampi narira ni vau nahentitanta avuhainaava titanta uva avuqavuqama timitaarire tivake viva vaunaini oru vira avuqaa himpiti vaura.

¹⁷ Vitantaqihairo vovano tiharo, Nora vaintio, viti nahentivavata, tevata, vohaa naavuqima vaunarave. Te vikanti vohaaqa vaha vainti vatataunarave.

¹⁸ Te vainti vatatauraro taaramo enta aitaraivaro viti nahentiva, vivavata vainti vatatairave. Tetantaqai naavu viraqii vauraro kia vovanovata titanta hampata vairave.

¹⁹ Entaqi viti nahentiva aavata vaitaviro tugantaa virare tiro, nai vainti rakavu kaivarо quatu virave. ²⁰ Vira vainti quatu vivaro enta tavaarana viva himpiro ani te vaiteha tenta vainti kaqa taunara vita varero vuru nai vaitai taintaraqaa vatero, nai vainti quutuvira viri ti kaqa timitarave.

²¹ Ho vira qararaa toqaqi te himpi tenta vainti naama amirare ti, tavauraro vainti viva quatu vivo. Te vainti vira tuantike tavauraro kia te vatatauna vaintiva vaivo, tiro. Minti tuvaro vira kena nahentivano aqao tiro, Qaqi vai vaintira, vira ti vaintima vaivo. Qutu vi vaintir, ai vaintima vaivo, tiro.

²² Minti tuvaro hogareru tu nahentiva tiharo, Aqao, qutu vi vaintira, vira ai vaintima vaivo. Qaqi vai vaintira, vira ti vaintima vaivo, tiro. Minti tivakeha vitanta avuhainaava vainti avuqaa tiroi vaura.

²³ Vitanta tiroi vauvaro King Soromonuva tiharo, Maa nahentiva tiharo, Ti maaquvano qaqi vaivarо vira maaquvano qutu vivo, tivaro viti nahentiva aqao tiro, Vira maaquvano qutu vivaro ti maaquvano qaqi vaivo, tivo, tiro.

²⁴ Minti tivakero avuhainaava vaintivano nai kaiqa vainti vorara tiharo, Oru iqoka paipe vo varera vira timiane, tuvaro oru varero vira amuvaro viva ²⁵ tiharo, Are qaqi vai vaintira paipeqohaire teqakera, hini vo nahenti amira hini vo nahenti amiane, tiro.

²⁶ Soromonuva minti tuvaro nai vainti nova voqama kero vainti virara muntuka ntuvaro viva avuhainaarara tiharo, Mpo, avuhainaao, kia vira arukaane. Vi nahentira qaqi amiane, tiro.

Minti tuvaro vira kenava aqao tiro, Kia vainti vira titanta qaqi timiane. Are vira avuqaa nkahi kaane, tiro.

²⁷ Minti tuvaro Soromonuva tiharo, Kia vi vaintira arukaane. Nahentivano kia vira arukaane tiva, vivama vira novama vaivo. Vainti qaqi vaira vira amiane, tura.

²⁸ Ho Soromonuva minti tu uvava Isarerini vi anumanta vainti nahenti iri, Soromonura nora autu ami tihā, Kotiva Soromonura koqe avu aato amivarora tiro, viva *ko* avuqavuqama kero ti vaivo, tura.

4

Soromonura kaiqaqaa raqiki vauka nutu

¹ Ho King Soromonuva ekaa Isarerini vataqaa raqiki vaura.

² Vira kaiqaqaa raqiki vau vaintika nutu:

Asariaava – viva Sadokira maaquvano Kotira kaiqa vara amite vaura.

³ Eliorepika Abiaaka – vitanta Sisaara maaqutanta avuhainaara uva qara ntua amite vau vaintitanta vaura.

Jehosafaativa – viva Ahilutira maaquvano King Soromonuva varo kaiqara, vo kaiqa vo kaiqara vukuqi qara nti vaura.

⁴ Benaiava – viva Jehoiadaara maaquvano Isarerini iqoka vaintiqaa raqiki vaura.

Sadokika Abiataaka – vitanta Kotira kaiqa vara amite vautanta vaura.

⁵ Asariaava – viva Nataanira maaquvano vo vata vo vataqaa raqiki vau vaintika vika noravano vaura.

Sabutiva – viva Nataanira maaquvano Kotira kaiqa vara amite vau vaintiva vaharo koqe avu aato avuhainaara ami vauva vaura.

⁶ Ahisaava – viva avuhainaara naavuqi kaiqa vare vauqaaqaa raqiki vaura.

Adoniraamuva – viva Apadaara maaquvano vau vokuka ntita vatoqaaqaa raqiki vaumanta vika karapuhi kaiqa voqaara, vo kaiqa vo kaiqa vare vaura.

⁷ Soromonuva vaiinti 12navu noraiqama komanta vika Isareri vata, vo vata vo vataqaa raqiki vaura. Vi vaiintika kara qantukeha Ieruharemini varake vaumanta Soromonuvavata vira hampata vaukavata vi karara ne vaura.

Ekaa ihiara vikaqihai vohaiqa vohaiqvano vohaa tora vohaa torara kara Ieruharemini varakovaro vi vaura.

⁸ Vika nutu:

Beni-Huva - viva Efaramiu ainqinaini vau vataraqaa raqiki vaura.

⁹ Beni-Dekeva - viva maa vatukanavuraqaa raqiki vaura: Makaasi, Salabimu, Beti-Semesi, Eloni-Betihanaani.

¹⁰ Beni-Hesetiva - viva Aruboti vatukaqaavata, Soko vatukaqaavata, ekaa Hefe vatukavano vau vataraqaa vata raqiki vaura.

¹¹ Beni-Abinadaapiva - viva Doru vatukavano vau vataraqaa raqiki vaura. (Viva Soromonura raavura Tafaatira varatora.)

¹² Banaava - viva Ahilutira maaquvano vahiaro Tanaki vatukave, Megido vatukave, vitantaqaa raqikiharo, Beti-Sani vatukavano vau vataraqaa vata raqiki vaura. Vi vatava Saretaani vatuka aumanto vauvaro Jeseriri vatukavano sauti mantaraini vaura. Vi vatava viviro, Abeli-Mehola vatukavanovata, Jokimeamu vatukavanovata vaunaini vuru taiqora.

¹³ Beni-Gebeva - viva Gileatti vataini vau vatukara Ramotiqaa raqiki vaura. Manasera ankuqiraava Jairiva u vatukanavuka Gileattini vauvaro Beni-Gebeva vatuka vinavuraqaa raqikiharo, vatuka vonavu Basaani vata Agopi mantaraini vau vatukanavuraqaa vata raqikura. (Mini vaantaavura ututo vatukava 60navu vaumanta, vika vaantaavura qenti *baraasiqohai* aututo kaavuraqohai kempukaiqamake tintatora.)

¹⁴ Ahinadaapiva - viva Idora maaquvano Mahanaimi vatukaqa raqiki vaura.

¹⁵ Ahimaasiva - viva Napataarira ankuqihainaaka vataqaa raqiki vaura. (Viva Soromonura raavura Basemaatira varatora.)

¹⁶ Baanava - viva Husaira maaquvano Asera ankuqihainaaka vataqaavata, Bealoti vatukaqaavata, raqiki vaura.

¹⁷ Jehosafaativa - viva Paruaara maaquvano Isakaara anku vika vau vataraqaa raqiki vaura.

¹⁸ Simeiva - viva Elaara maaquvano Benaminira anku vika vau vataraqaa raqiki vaura.

¹⁹ Gebeva - viva Urira maaquvano Gileatti vata hini mantaraini raqiki vaura. Haaru King Sihoniva Amo vatanaakaqaa raqikuvavata, King Okuva Basaani vatukaqa raqikuvavata, vi vataraqaa raqiki vaura. Gebeva vivaqai ekaa vi vataraqaa raqiki vaura.

Isarerivata Iutaavata koqemake vaurara tura

²⁰ Iuttaa vaiinti nahentivata Isareri vaiinti nahentivata vika airitaha nuqavano *nampisini* vaintemake vaura. „King Soromonuva vau entara“ vika koqemake vaiha karavata namarivata neha quaheha vaura.

²¹ Soromonuva raqiki vau vatava Iufaretisi Namari kuari urinaihairo viviro, Pirisia vataini kuari avu aquvinaini oruntora. Viraqahairo vi vatava *sautihairo* viviro, Isipi auvahini oru taiqora. Soromonuva qaqi vau entara ekaa vi vataihainaaka vira vevaaraini vaiha vira *takisi* ami vaura.

²² Vohaa enta vohaa enta Soromonuva kara varova vaireva, maantimama vairo:

Porihu/Vorusi uta vira maavarano 6,000 kilo.

Koqemake aututaa *porihira/vorusira* 3,000 kilo.

²³ Purumakau 10navu. Vi purumakaua *uiti* auruve, *baali* auruve ne vauvaro vika vaatavano koqemaviro vaura.

Purumakau 20navu. Vika koqe ukau neha koqe vaata vatauka vaura.

Sipisipi 100navu.

Diaave, gaselive, vo aantauve, kokoraarave.

Mintima kero vohaa enta vohaa enta Soromonuva kara vare vaura.

²⁴ Soromonuva ekaa Isareri aumanto vau vataraqaa raqikiqiro viviro, Iufaretisi Namari vainaini kuari urinaini oruntora. Viva raqiku vatava vaireva, Tipisa vatuka Iufaretisi Namari vaunaihairo viviro, Gaasa vatuka Nora Namari auvahini kuari avu aquvinaini muntu kora.

Ekaa auvahainaaka mini vauka vika Soromonura vevaaraini vaumanta vira hini hini mantaraini vau vatanaaka vika kia vira navutaiqiraiti, maateraiqihia vaura.

²⁵ Soromonuva avuhainaa vaiintivano vau entara ekaa Iutaave, Isarerive, vika nái uaini naaho ututoraqive, *fiki* katari ututora okarainive koqemake oquvi vauvaro kia qora haikavano vikaqaa qovaramaviro qoraiqama nimite vaura.

²⁶ Soromonuva ohi airitahaa vatora. Iqoka *kaari* raraau vare vuaina ohira 4,000navu vaumanta vika vo naavu vo naavuqii nai kavaqaara nai kavaqaaraqi vatomanta vaura. Soromonuva iqoka raqi ohira 12,000navu vatora.

²⁷ Soromonuva vaiinti 12navu noraiqama komanta vika vi vataraqaa raqiki vaha, vika vohaiqaa vohaiqavano, vohaa tora vohaa torara, kara varake vaumanta Soromonuvavata vira hampata kara ne vaukavata vi karara ho neha kia karara aavoqura.

²⁸ Nora vaiinti 12 vinavuka avuhainaa vaiinti vira ohira iriha, nai kaamato toraraqaa *baali* auruvata, vira kaqivata, vara vuru iqoka *kaari* rarauri vau ohikavata, vo ohivata, nimumanta ne vaura.

²⁹ Kotiva koqe avu aato Soromonura amuvaro viva vi haikara vi haikara okara kankoma kero iri tave vauva vauvaro vira avu aatovano nai uri aatara kero vaura.

³⁰ Kuari avu urinaihainaaka vo kukavata, Isipihainaaka vo kukavata, koqe avu aato iri vauka vaha vo okara vo okara iri tave vau vaiintika vauvarovata, Soromonura avu aatovano ekaa vika avu aatovata uri aatarakero vaura.

³¹ Soromonura avu aatovano ekaa vata maataqaa vau vaiintika avu aatovata uri aatara kora. Esraara ankuqhainaa vainti Etaamuva koqe avu aato vataava vaumanta, Maholura maaqunavu, Hemanivave, Kalakoluvave, Dadaavave, vinavukavata koqe avu aato vataaka vauvarovata, Soromonura avu aatovano vika avu aatovata uri aatara kora.

Mintumanta ekaa Isareru aumanto vau vatanaaka, vika Soromonuva nai koqe avu aato vataavama vaivo tu uvara irura.

³² Soromonuva uva maara koqera 3,000navu qara ntuvatora. Viva ihi 1,005navuvata qara ntuvatora.

³³ Nana nana kuvu kanaave katarive qampiqe vaira, Lebanonini vai *sidaa* katarirave, hohaa vau qampiqe vai maurara *hisopive* tura, viva vi haikara vi haikara okarara kankoma kero iriharo, vaiinti nahenti tiva nimumanta iri vaura.

Qaqi variqi vi haikara, aantauvahive, uvirive, memaruve, havukave, viva vi haikara vi haikara okarara kankoma kero iriro, vaiinti nahenti tiva nimumanta iri vaura.

³⁴ Ekaa vo vata vo vataihainaaka vika King Soromonuva koqe avu aato vataava vaivo tu uvara iri, vika vaiinti nititomanta hihai hihai vira koqe avu aato irireka ani vaura.

5

Soromonuva Kotira Naavu kaqa amitareva qera i vaura

¹ Haaru Devitiva qaqi vau entara King Hiraamuva Taiaa vatukaqaa raqikuva Devitira tonti koqeva vaurara tiro, Soromonuva nai qora Devitira vatuka varo uvvara Hiraamuva iriro, vaiinti vokuka nititomanta vika Soromonura quahama amitareka *Jeruhareminini* vura.

² Vika oruntovaro Soromonuva Hiraamuraini uva varakero mintima tiro: ³ Are irianarave. Ti qova Devitiva avuhainaa vaiintivano vaiharo viva kaiqe te Nora Kotira naavu kaqa amitaariraro vira autuvano noraiqama vuarire tumantavata, navutaaka qaiqaa qaiqaa ani vira hampata raqi vaura kaara viva kia naavu kaqa amitorave. Viva tiharo, Kairaro Noravano Kotiva navutaaka naatara timitairage vira naantiara te vira naavu kaqa amitaare, turave.

⁴ Ho maa entara Noravano Kotiva ti Variqavano ti koqema timitaimanta te koqemake vauramanta tinavu Isareru hini hini mantaraini varia vatanaaka maateraiqihia variamanta, kia vokiaka tinavu Isareru navutaiqiamanta kia vokiakavata tinavu qoraiqama timitareka auti variavo.

⁵ Mintiaverama te maa entara Nora Kotira tenta Variqa naavu kaqa amitaariraro vira autuvano noraiqama vuarire. Haaru Noravano Kotiva nai kauqu aqiqaa aqukero ti qora Devitirara minti turave: Te ai maagu vo noraiqama kaariraro viva ai vatuka varero avuhainaa vaiintivano varianarove. Vivama ti naavu kaqa timitairaro ti hutuvano noraiqama vuarire, turave.

⁶ Viva minti turara ti, te ariara tiha, Are nena kaiqa vaiinti nititairamanta vika Lebanoni aqina vainaini orunte *sidaa* katari teqa timitaiqe te vi katariraqohai vi naavura kaqaare. Saidonihainaaka vika katari teqe varia okarara kankomake tave variakama variavo. Vika katari teqa timitaiqe te tenta kaiqa vaiintivata nititaari vika ai kaiqa vaiinti kahaqiate. Are nanti nanti monue nena kaiqa vaiinti koqaa iainara ti tiva timirage te vi monura vika nimirerave, tiro.

⁷ Minti tuvaro Hiraamuva Soromonura uva vira iriro voqamakero quahakero tiharo, Kaijenavu Nora Kotira autu tuahera kaare. Viva Devitira qorainti vanti vo amivaro vi vaiintiva koqe avu aato vataava nai qora vatuka varero nora vatanaaka Isareriqaa raqiki vaivo, tiro.

⁸ Ho Hiraamuva minti tivakero viva Soromonuraini uva varakero tiharo, Te ai uva iri virara hovemra turo. Te ai antuqavano vainantemake, *sidaa* katarivata toqukeravata are inanaini vara karerave.

⁹ Ti kaiqa vaiinti Lebanonihai vo katari vo katari tegake vare muntu Nora Namariqaa ruvaaqumake vate, rumpake, Nora Namari turuvau rarau vare, vika ta mantaraini are kaama tenanaini vuru vatevarave. Mini vuru ke ti kaiqa vaiinti naaqunta qantuke vataimanta ai kaiqa vaiinti vihaima katari vira varevarave. Te mintimake vara kaarirara are virara irihara kara tinivata ti naavuqi vaikaravata vara kairaro aniarire, tiro.

¹⁰ Minti tivakero Hiraamuva airi *sidaavata* toqukeravata Soromonuva kaamatero mintima timiane tu katarira vara kovaro Soromonuva unaini vura.

¹¹ Mintuvaro Hiraamuva nai navunaaka hampata naarire tiro, ekaa ihiara Soromonuva *uti* auru vira maaravano 2,000 ton vairavata, *orivi* vahavera koqera mpiqato taqura 4,000 *lita* vauravata amite vaura.

¹² Noravano Kotiva nai kauqu ainqaa aqukero te mintirerave tuntema kero, viva Soromonura koqe avu aato mpiqa amitora.

Hiraamuka Soromonuka koqemake tontiqama ketanta vaiha, vitanta maateraiqamake variqi virerave tivake, uva tiva taatautora.

¹³ King Soromonuva vika vira kaiqa vara amitaate tiro, ekaa Isareri vataihairo 30,000 vaiinti ntita vatero,¹⁴ vika taaramo ankuqaa rairakero vatero, vo toraqa vo anku 10,000 Lebanonini nititonmanta vika oru vohaa torara kaiqa varate orurante maaqaini ani qaqi vaumanta, vo anku 10,000vano qaqaa oru kaiqa vare vaura.

Taaramo anku vika vohaa tora vohaa torara vitare aitare iha, kaiqa varateha orurante maaqaini taara torara auraara ani qaqi vaura. Adoniraamuva kaiqa vaiinti vikaqaa raqiki vaura.

¹⁵ Vika ori teqaate tiro, Soromonuva 80,000 vaiinti ntita vatomanta vika ainqaini vaiha ori teqe vaura. Vokuka ori vareha aniate tiro, 70,000 vaiinti ntita vatora. ¹⁶ Vi kaiqaraqaa raqikiate tiro, viva qiata vaiinti 3,300navu kaama tora.

¹⁷ Soromonuva tuntemake, kaiqa vaiinti vika oru koqe ori vaunaini vaiha, ori nora haunti tegake vatomanta, vokuka ori vira vareha vuru Ieruharemini Kotira Naavu vi oriraqaa kaqa amitaate ti, vika vi orira vare vuru vataqaa vuqitora.

¹⁸ Soromonuka Hiraamuka kaiqa vaiinti naavu kago kaiqara tavokavata, Bibilosihainaa vaiintivata, ekaa vika ori teqake avuqavuqamake vateha, katarivata kutuke humuquuke geramake vate vaura.

6

Soromonuva Kotira Naavu kaqa amitora

¹ Soromonuva Isareri vatanaakaqaa raqikiqiro viharo 4 ihi varakero, vi ihira 2 toraqa, Sivive tu toraraqaa Soromonuva Nora Kotira naavu kaqa amitareva vi kaiqara hoqarama tora. Vi entara Isareri vatanaaka Isipi ke anu entaraqaaahairo 480 ihi aitarora.

² Soromonuva maantima vau naavura Nora Kotira kaqa amitora:

Vi naavura hini hini vukaitantavano vaireva, 27 *mita* vauvaro, tauriniatanta vaireva, 9 *mita* vaura.

Vi naavura virimi tura aratova vaireva 13½ *mita* vaura.

³ Nora naavu vira qentiana vika *rumu* vo tomaqa kovaro vi *rumura* tauriniava vaireva, nora naavu voqaantema kero, 9 *mita* vaura.

Vira vukaitantavano vaireva, 4½ *mita* vaura.

⁴ Naavuqi ataa iarie ti, vika oriqohai *antura/tura* ntavatora voqi voqi inaara *uintua* aututora. *Uintua* novano vahaqaini inaara no vauvaro avutaqi nora no vaura.

⁵ Soromonuva tumanta vika nora naavu mintimake kajate, viraqaaahai *rumu* vonavu nora naavu ututuma taate ti, vika vira hini hini mantarainivata vira tauvaqainivata *rumu* vonavu tomaqake autu kora.

Rumu vonavu vatainai autuke vate, vira qiataqaa vo autuke vate, qaiqaa vira qiataqaa vovata autuke vatora.

⁶ Vika vi *rumura* vi *rumura* nora naavuqaa tomaqa keha nora naavuqaa ori ntavatora kia nkauru karaiti, qaqi tomaqa tora. Vika vi *rumura* vi *rumura* tomaqerara iriha, hoqare vika nora ori *antura/tura* miani ntavaqiqi vivi, viraqaaahai vira vuruvi katari rukiteva ho

variariere ti, vika mantaquma vau orira ntavate, qaiqaa vira vuruvi katari rukiteva ho variariere ti, vika voqavata mantaquma vau orira ntavaqi vivi, vuru taiqa kora.

Vataqi vau *rumura tauriniava* vaireva, 2 *mita* 20 *sentimita* vauvaro, vira qiataqaa vau *rumura tauriniava* vaireva, 2 *mita* 70 *sentimita* vauvaro, qaiqaa vira qiataqaa vau *rumura tauriniava* vaireva, 3 *mita* 10 *sentimita* vaura.

⁷⁻¹⁰ Nora naavu ututumato *rumunavura* viriniava vaireva, vohaa qarama kero 2 *mita* 20 *sentimita* vaura. Vika vi *rumura* vi *rumura sidaa* katariqohai nora naavuqaa tomaqake kaqatora.

Vataqi vau *rumunavura* qentivano *sauti* mantaraini vauvaro, viraqihairo *rataa* vovano vira qiataqaa vau *rumuraqi* vuvuro, *rataa* vovano vira qiataqaa vau *rumuraqviva* vura.

Kotira Naavu kaqe vaivaro noraiqaakero kenko kaanko tiantorave ti, vika kia *hamaaive*, *kolsisive*, vo *aini* haikave, varake kaiqa vararaiti, vika niaraini nora orivano vaunaini vhaihori ori avuqavuqama keha koqemake teqakeha, viraqaaahai ori vira vare vuru Kotira Naavu kaqatonaivina evaara kaqe vaura.

Soromonuva tumanta vika vo ori vo ori varake naavu vira kaqaqi vivi, viraqaaahai vika naavu qiata autiha nora *sidaa* rukite, *sidaa* tanuqira kututoraqohai qiatainivuqiteha naavumatora.¹¹ Noravano Kotiva Soromonurara tiharo,

¹² *Are ti naavu kaqa timite varianarara irihama, te ai uva tiva amirerave.*

Are te tivatauna uvaravata, te ariara minti minti iane tivatauna uvaravata, koqema kera irihara vira avataqira virera, te tota ai qora Devitirara kauqu aiqiqaa aquke tiva amunantemake, ai koqema amitarerave.

¹³ Te ni tenta vaiinti nahenti Isarerikia qaqira karaiti, ni hampata variqi virerave, tiro.

Noravano Kotiva Soromonurara minti tura.¹⁴ Ho Soromonuva Kotira Naavu kaqa vuru taiqa kora.

¹⁵ Soromonuva tumanta vika *sidaa* varake vi katariraqohai Kotira Naavu avutaqি *antura/tura aratoraqaa* vataihai vuqiqi vivi, vuru naavu qiatainivuqiteha viraqaaahai vika toqukeria kututoraqohai vatakanta vuqitora.

¹⁶⁻¹⁷ Kotira Naavuqiqi vira turuaravano variariere tiro, Soromonuva tumanta vika naavu avutaqি 9 *mita* kaara ntuvake kavaqaara aratovalo viva kaankuka voqaara vauvaro vira hini mantaraini Kotira turuaravano vauvaro vira avuni vau *rumura* vira vukaivano vaireva, 18 *mita* vaura. Kavaqaara vira vataihai *sidaaqohai* aruqi vivi, naavu qiatainivu kora.

¹⁸ Hauri avutaqи ori ntava taava qoqaa variantorave ti, vika *sidaa* katariraqohai naavumate, *sidaa* viraqaa timonave/qantirave, qaqi maurave nkauruke vaataiqama tora.

¹⁹ Nora Kotira turuaraini vira *Vokise* vuru vataate ti, vika vi *rumura* qerama tora.

²⁰ Vi *rumuva* vaireva: Vira vukaitantavano 9 *mita* vauvaro, vira tauriniava 9 *mita* vauvaro, vira viriniavavata vohaa qaramakero 9 *mita* vaura.

Soromonuva tumanta vika *kori* ori koqera ruqutuke *kakanairimake/kavanairimake* noraiqamakora varake, vi haikaraqohai vi *rumura sidaa* vaavi arutora naavuma teha mantaqa kora. Vika *ofaa* tainta* autotoravata *kori* oriqohai vuqiteha mantaqa kora.

²¹ Soromonuva tumanta vika Kotira Naavu avutaqি *kori* ori koqera varake viraqohai ekaa katarive orive taatauke qapuqama tora. Vika *koriqohai* rerupa voqaara aututo *seni* naaquntara varake, viraqohai Kotira turuaraini vau *rumura* vira qentiana virini hiritora. Vika vi gentiravata *koriqohai* taatauke qapuqama tora.

²² Soromonuva tumanta vika ekaa Kotira Naavu avutaqivata, *ofaa* taintavano Kotira turuara gentiana vauravata, *koriqohai* ekaa vi haikara taatauke qapuqama kora.

²³ Vika *orivi* katari varake viraqohai aroka vataa *enseli maraqura/varaha* taaraqanta autuke Kotira turuaraini vuru vatora. Vitanta viriniava vaireva, 4½ *mita* vaura.

²⁴ *Enseli* aroka hinivanovaireva, 2 *mita* 25 *sentimita* vauvaro, vira hinivanovohaa qaramake vaura. Vira aroka aratovalo hini vitivano oru hini vitiqaa akukumaviro 4½ *mita* vaura.²⁵ *Enseli* vovata vohaa qaramake autuke vatora.

²⁶ *Enseli* taara vitanta vohaa qaramake autu tovaro vitanta vukaivano 4½ *mita* vaura.

²⁷ Soromonuva tumanta vika *enseli* taaraqanta autuke vare, vuru Kotira turuaravano vau *rumuraqi* vaavarama tomanta vitanta aroka *rairate/airate* vaura.

Enseli vovano himpi vauvaro, vira aroka viti vovano naavu taqe hini vauvaro, *enseli* vovano vira tataqa himpi vauvaro vira aroka viti vovano naavu taqe hini vaura. *Rumu* avuta viraqiqi vitanta aroka vitivano naiqaa naiqaa ani akukuma vura.²⁸ Vika *enseli* vitantavata *koriqohai* qapuqamake vatora.

* **6:20:** Vi taintara vaireva, koqe unta iaina haikara Kotira iha quara amite taintava, *sidaaqohai* aututo taintava vaura.

²⁹ Vika Kotira Naavu *rumu* taaraqantaqi *vahemehema/vaataiqama* tareka, *deti* katarive, *enseli* aroka vataakave, qaqi maurave, *sidaaqaa nkauruke aututora*. ³⁰ Vika qaiqaa *kori ruqutuke kakanairimake/ kavanairimake* viraqohai *rumu* vitantaqi vataini vau taintaraqaa vuqite mantaqa kora.

³¹ Vika *orivi* kututora varake, viraqohai Kotira turuaravano vau *rumura* nora qenti taaraqanta tampamake autuke vatora. Vi qentira auvahianta aruto katariva 5navu vaura.

³² Vi qentitanta *vaataiqireka*, *enseli* aroka vataakave, *deti* katarive, qaqi maurave nkauru keha autute, viraqaaqhai *kori* ori ruqutuke tanuqama toraqohai vi haikara vi haikara naavumatora.

³³ Kotira Naavu vahaqaqaini vau qentira autireka, vika *orivi* katari 4navuqohai qenti auvahianta arute, ³⁴ viraqaaqhai vika qenti vitanta toqukeraqohai autuke, tampamake autora.

Hini qenti quantua kaivarao tavaaraqaahairo raqantaa vuarirava vauvaro, hini qenti vanovata vohaa qaramakero vaura.

³⁵ Avutaqni vau qentitanta vahehemma kontemake, vika vi qentitantavata vaatai qama kora. (6:32)

³⁶ Kotira Naavuvano hohaa avutaqni vaumanta vika vi hohaara autireka maantimake aututora: Vika koqemake teqato orira, vo ori vo vevanto vontaqaa vontaqaa taaramo tataa ntavate, vira qiatqaqaa *sidaa* vuqitora.

³⁷ Soromonuva Isareriqaa raqikiqiro viharo ihi 4navu varakero, vi ihira 2 tora, *Sivive* tu toraraqaa vika Nora Kotira Naavu kaqe kaiqara hoqaramate, avuni ori vataini ntava tora.

³⁸ Soromonuva Isareriqaa raqikiqiro 11 ihi 8 tora, *Buluve* tu torara varako entaraqaa, vika vi naavura kaqa vuru taiqa kora. Soromonuva minti mintimake kaqaate tunttemake, vika vi naavura 7 ihi varaqi viha, kaqa taiqa kora.

7

Avuhainaara naavu kaqatora

¹ Soromonuva tumanta vika qaiqaa avuhainaara naavu, vo naavu vo naavu 13 ihiara kaqaqivi vivi, vuru taiqa kora.

²⁻³ Avuhainaara naavu vo, virara *Lebanoni-Nantave* tu naavura vira hini hini taaqeni vukaitantavano 44 *mita* vauvaro, vira tauriniava 22 *mita* vauvaro, vira viriniava 13½ *mita* vaura.

Vika nora *sidaa pohi* taaramontaqaa aratovaro vontaqaa 15 *pohivano* vauvaro, vontaqaa 15 *pohivano* vauvaro, vontaqaaavata vohaa qaramakero 15 *pohivano* vaura. Vika mintimake nora *pohi* arate naavu qiaata autireka *pohi* viraqataa nora *sidaa* kututora 45navu taurini rukitora. ⁴ Naavu hini hini taaqeni *uintua* taaramontaqaa vohaa qaramake autuke vatora.

⁵ Naavu vira qentinavu autireka, qaqi qenti voqaara taaramonavu hini hini taaqeni vohaa qaramake autuke vatora.

⁶ Vika naavu vo kaqake vi naavura autu nteha *Nora Pohinavu Vai Naavurave* tura. Naavu vira hini hini taaqeni vukaitantavano 22 *mita* vauvaro vira tauriniava 13½ *mita* vaura. Vi naavura avuni vika *veranda* autuke, *veranda* qiaata totaareti, vika *pohinavu* aratora.

⁷ Vika avuhainaara taintavano variaina naavuravata kaqa amite virara *Uva Avuqavuqaina Naavurave* tura. Soromonuva viraqiqi vainti nahenti *ko* ori vaura. Vika vi naavura avutaqni taaqeni *sidaa* varake vataihai aruke naavumaqivi vivi, vuru qiatqaini taiqa kora.

⁸ Ko iriaina naavura tauvaqaini vika naavu vo, Soromonuva nai variaina naavura kaqa amitora. Vo naavu kaqontemake, vika vohaa qaramake viravata kaqa amite, viraqaaqhai vika naavu vo, Soromonuva naata, Isipi avuhainaara raavu naavuvata kaqa amitora.

⁹ Vika ekaa vi naavura vi naavura kaqeha, nora ori koqe oriqai varakeha vataihai ntavaiqivi vivi, vuru naavu qiatqaini ke vaura. Vika koqe ori vaunaini vaiha, vo ori vo ori avatama keha, koqemake soqohai teqakeha naavu avutaqivata vahaqaqainivata variainaara avuqavumakeha vate vaura.

¹⁰ Naavuvano kempukaiqama kero variarireti, vika ori nora haunti teqatora vira naane vataini vuqite vaura. Nora ori vokura vira vukaivano vaireva, 3½ *mitave*, 4 *mitave* vaura.

¹¹ Vika vataini nora ori vuqite, viraqataa koqemake teqato orira ntavaiqivi vivi, *sidaa* kututoravata varake naavu vira kaqora.

¹² Vi naavuvi vi naavuvi hohaa avutaqni vaumanta vika vi hohaara maantimake aututora: Vika teqato orira, vo ori vo taaramontaqaa ntavate, vira qiatqaqaa *sidaa* vuqitora.

Vika vohaa qaramake aututo hohaaraqohai Nora Kotira naavuvata vira avuni vau rumuruvata ututumatora. (6:36)

Huraamuva King Soromonura kaiqa vara amitora

¹³⁻¹⁴ Vaiinti vo Taiaa vatukaihainaava Huraamuva nai qora aanantero *baraasi* oriqohai auti varia kaiqara kankomakero tavo vaiintiva vaura. Huraamura qova qutu vuvaro vira nova Napataarira ankuqiraava vaura.

King Soromonuva Huraamuraini uva vara kero aarovaro viva ani ekaa *baraasiqohai* auti kaiqaraqa raqiki vaura.

Huraamuva nora pohitanta autukora

¹⁵ „Nora *pohi* taaraqantavano Kotira Naavu qentiana variare tiro,“ Huraamuva nora *pohitanta* *baraasiqohairo* vohaa qarama kero autukero vatora. Posi vira vukaivano vaireva, 8 *mita* vuvaro, vira vaata ovenaaruma taiva vaireva, 5 *mita* 30 *sentimita* vaura.

¹⁶ Viva *pohi* qiata taaraqantavata *baraasiqohairo* autukora. Qiata vukaivano vaireva, 2 *mita* 20 *sentimita* vaura.

¹⁷ Viva *pohi* qiata *vahehema/vaataiqama* kareva, *baraasiqohairo* rerupa voqaara *seni* 7navu autukero vuntakero *pohi* ututumatero hirifora. Taara *pohi* vitantaqaa vohaa qaramakero *seni* autukero vatora.

¹⁸ Viva *seni* vuntakero vatora vira virinivata mianivata *pomigraneti* * tava 100navu naiqi naiqi *pohi* viraqaa ututumakero vatora. Taara *pohi* vitantaqaa vohaa qaramakero *pomigraneti* tava autukero vatora.

¹⁹ Viva taara *pohi* qiata vitantaqaa *lilive* tu maurara autukero vatora. Maura vukaivano vaireva, 1 *mita* 80 *sentimita* vaura. ²⁰ *Pohi* qiata tavaaranana naqavuviro vuvaro vira vuruvi, viva *lili* maura autukero vatora.

²¹ Huraamuva *pohi* vitanta autu komanta vika vitanta varake Kotira Naavu qenti vaunaini vaavi aratora.

Viva sauti mantaraini vau *pohirara Jakinive - Kotiva, vi haikara qovaramake vairave, tivakero noti* mantaraini vau *pohirara Boaasive - Nora kempukavano Kotiraqi vairave, tiro.*

²² *Pohi* vitanta qiataqaa *lilive* tu maurara aututova vaura. Ho mintima kero *pohi* vitanta autu vuru taiqakora.

Huraamuva nora tave autu kora

²³ Huraamuva nora tave vo, *taani* voqaara *baraasiqohairo* autu komanta vira autu nteha Varuva Namarive tura. Nora tave vira virini miani vaireva, 2 *mita* 20 *sentimita* vuvaro, vira novano vaireva, 4 *mita* 40 *sentimita* vaura. Nora tave vira ovenaaruma taiva vaireva, 13½ *mita* vaura.

²⁴ Viva tave aaqaini vaataiqama kareva, vira no auvahianta *timona/qantira* naiqi naiqi ututumakero aututero, vira muntuvu qaiqaa *timona/qantira* naiqi naiqi vontaqaa ututumakero aututora. Viva *baraasi* ihaqi kovaro ravitavura[†] qihia keharo tavevata viraqaa vaataiqamato haikaravata vohaa vaka autukora.

²⁵ Huraamuva Varuva Namarive tu tavera vira autukero, viraqaaohairo viva purumakau qora 12navu *baraasiqohairo* autu komanta vika nora tave vinavura tauvaqaaqaa vaari vatora. Purumakau taaramonavu kuari uri mantaraini viri vatovaro, taaramonavu kuari avu aquvunaini viri vatovaro, taaramonavu *noti* mantaraini viri vatovaro, taaramonavu *sauti* mantaraini viri vatora.

²⁶ Nora tave vira vaatavano vaireva, vatoqiqama kero 8 *sentimita* vaura. Vira novano vaireva, *kaapu* nove, *lili* maura vira mareve, vira voqaara vaura. Vi taveraqi namari kaqake mpiqa kareka, 40,000 *lita* kaqake vatora.

Huraamuva uiri kaari vonavu autu kora

²⁷ Huraamuva *baraasiqohairo* *uiru kaari* 10navuvata autu kora. *Uiri kaari* vira vukaivanovata vira tauriniavavata vohaa qaramakero 1 *mita* 80 *sentimita* vuvaro vira virini miani 1 *mita* 30 *sentimita* vaura.

* ^{7:18:} *pomigraneti* tava vaireva, *epelive orinsive* vira tava voqaara vaira. † ^{7:24:} Maa entara vaiinti vika *simeniqohai amukove, taanive, autireka iha, vika vahuqa aututaa haikaraqi simeni* qihia kaavarvo *simenivan* kempukaiqama vimanta viraqaahai vika vahuqa aututaa haikara ravaqaa kaavarvo *amukovanove, taanivanove* qovarama vi vaira. Vira voqaantemake, vi vatanaaka vo haika autireka iha *baraasive, aini* orive nora ihaqohai ravitake, viraqaahai vika vahuqa aututo haikaraqi ori ravitavura qihia kovaro orivano humpama viharo kempukaiqama vumanta viraqaahai vika vahuqa aututo haikara qaqini ravaqaa kovaro vi haikara autireka u haikava qovarama vi vaura.

²⁸ Viva *uiri kaari* autiharo vuhaari naane aututero, vuhaari viraqaa *baraasi* tanuqama tora varakero taatautora.

²⁹ *Baraasi* tanuqama tora viraqaa viva *raionive*, purumakau qorave, *enseli* aroka vataakave, autukero vatero, *baraasi* tanuqama tora vira auvahini vau vuhaariraqaa viva maura vuntatora *maraqura/varaha* autukero vatora.

³⁰ *Uiri kaari* vohaiqa vohaiqavano aiqu *uiri* vaura, taaraqanta taaraqanta vatora. Vi aiquravata, vira tugantaa vuaina vuhaariravata *baraasiqohai* aututora.

Ekaa *uiri kaari* vauvaro namari tavevano ho oqu vuarire ti, vika vo kaantara vo kaantaraqaa *baraasi* haika arute, vi haikaraqaavata maura vuntatoraqohai *vahehema/vaataiqama* tora.

³¹ *Uiri kaari* vira kantaqaqaa vika no autukovaro vira viriniava 45 *sentimita* vauvaro vira tauriniava 67 *sentimita* vaura. No vira auvahianta vika maura vuntatora *maraqura/varaha* viraqohai vahehema tora.

³² *Uiri kaari* aiqu tauriniava vaireva, 67 *sentimita* vaura. *Uiri kaari* vevanto aiqu 4navuvano vauvaro vira tugantaa vuarira *ainivavata* vevanto vaura.

³³ Vira aiquvano vaireva, iqoka *kaari* aiqu voqaara vaura. Vika aiqu *rinive*, aiqu tavaaranave, aiqu viraqaa hampakira vuhaarive, ekaa vi haikara vi haikara *baraasi* ori *unta/nuta* kovaro ravitavuraqohai autukora. ³⁴ Utuvare vi aniva *uiri kaari* kaantaaqaa aqu 4navuvano vaura.

³⁵ Aunta ovenaaruma tova vira viriniava 22 *sentimita* vauva *uiri kaariqaa* vaura. Auntavata aqunavuvata *uiri kaari* vira hini vaatavata vika vohaa vaka *baraasi* ori ravitavuraqohai autukora.

³⁶ Huraamuva *uiri kaari vahehema/vaataiqama* kareva iharo, viraqaa *enseli* aroka vataakave, *raionive*, *deti* katarive, autura. Ta mantaraini *maraqura/varaha* autuarira vatukava ho vaunaini viva vi haikara vi haikara autukero, auvahini qaqi maura vuntatoravata vahehema tora.

³⁷ Mintima keharo Huraamuva „nai kaiqa vaiintinavu hampata, *baraasi* ori *unta/nuta* kovaro ravitavuraqohairo *uiri kaari* 10navu autukomanta, ekaa *uiri kaari* vika vohaa qaramake vaura.

³⁸ Huraamuva vi haikara autukero, viraqaaahairo viva namari taqu tave 10navu *baraasiqohairo* autukero *uiri kaari* vohaiqa vohaiqaqiri vuru vatora. Namari tave vira novano vaireva, 1 *mita* 80 *sentimita* vauvaro vi taveraqi namarivano 800 *lita* mpiqaro vaura.

³⁹ Ho Huraamuva vi haikara autu taiqa kero *uiri kaari* 5navu varakero Kotira Naavu tataqa *sauti* mantaraini vatero, vo 5navu varakero Kotira Naavu *noti* mantaraini vatero, *Varuva Namarive* tu tavera varakero Kotira Naavu avuni kaanaaqaini vuru vatora.

⁴⁰ Huraamuva voku haikaravata, namari ntuaina tanurave, havoreve, inaara tanuve autukero vatora. King Soromonuva Nora Kotira naavuqi vara timitaane tu kaiqara, Huraamuva ekaa vi kaiqara vara vuru taiqa kora.

⁴¹ Huraamuva maa haikara maa haikara *[baraasiqohairo]* autu amitero:

Vukai *pohitantave*, (7:15)

Pohi vira qiatatanta tave voqaara vaurave, (7:16)

Pohi qiaataqama ko haikara *seni* rerrupa voqaara vuntatorave,

⁴² *Pomigraneti* tava 400navuve, (*Seni* vuntakero vatora vira virini *pomigraneti* 100navu naiqi naiqi vontaaqaa ututumakero vatero, *seni* vuntakero vatora vira mianivata viva *pomigraneti* 100navu naiqi naiqi vontaaqaa ututumakero vatora. Viva hini mantaraini vau *pohira* vira qiatavata vohaa qaramakero vaataiqama kora.) (7:18)

⁴³ *Uiri kaari* 10navuve,

namari tave 10navuve, (7:27-38)

⁴⁴ Varuva Namarive tu taverave,
purumakau qora 12navuve,

⁴⁵ Kure vonavuve, havore vonavuve, inaara tanu vokurave,

Soromonuva tuntema kero, Huraamuva ekaa vi haikara vi haikara Nora Kotira Naavuara iriharo autukero vatora. Viva vi haikara *baraasiqohairo* autu taiqa kero takuqiarire tiro, vi haikara humuqukero vatora.

⁴⁶ Avuhainaa vaiintivano tuvaro Huraamuva Iotani Uqitaini vi haikara vi haikara autireva vi kaiqara varora. Sukoti vatuka hini vauvaro Saretanai vatuka hini vauvaro tavaarana aaqatai vata kogeva vauvaro Huraamuva vi haikara maraqua aaqatai vataqi autukero, „viraqaaahairo viva *baraasi* ori ravitavura aaqatai vataqi qihia kovaro *baraasivano* aaqatai aututora viraqi vahiaro kempukaiqama viro maraqua aututova qovarama vura..”

⁴⁷ Ekaa vi haikava airitahaa vaurara tiro, Soromonuva kia vi haikara *sikeriqaa* hiritaiqe vira maara tavaare tiraitiro, viva qaqi kovaro, kia vaiinti vovanovata vi haikara maara ho iri tavora.

Vo haika vo haika autuke Kotira naavuqi vatora

⁴⁸ Kotira Naavuqiraa haika autuate tiro, Soromonuva tumanta vika *ofaa* tainta vo autute, Kotira mpareti amite taintaravata autuke vatora. Vika tainta vitanta *kori* ori tanuqama toraqohai naavumatora.

⁴⁹ Vika *kori* oriqohaiqai *raamu* vate kairiqara 10navu autuke, Kotira turuaraini vau *rumura* vira tataaqa vi haikara 5navu kauqu tanaraini vuru vaaviaramate, hini 5navu kauqu kaanaaqaini vuru vaaviarama tora. Vika *koriqohai raamu* qumpike vate kairiqaraqa maara autuke vatora. Vika iha auri raaquvare haikara *kotaavata/kuahaavata* autuke vatora.

⁵⁰ Qaiqaa *kori* oriqohai *kaapuve*, vo tanuve, *raamu* qimpe haikarave, iha mura quare tanurave,

iha auri vaqite tanurave autuke vatora.

Qaiqaa *koriqohai* Kotira *rumu* turuaraini vau qentira *hinisi* autuke, Kotira Naavu avuni vau qentira vira *hinisivata* autuke vatora.

⁵¹ King Soromonuva Nora Kotira naavuqiraa kaiqa vara vuru taiqakero, viraqaahairo viva nai qova Devitiva Kotira kaama amito haikara, *silvaa* orive, *kori* orive, vo haikave, ekaa vi haikara vi haikara varero vuru Kotira Naavuqi airaira vate vau *rumuraqi* vatora.

8

Kotira Vokise vare vuru vatora

¹ Vika vi kaiqara taiqa kovaro, King Soromonuva Nora Kotira *Vokise* Devitira vatuka Saioniqihai vare vuru Kotira Naavuqi vataate tiro, viva Isareri nora vaiintive, qiafa vaiinti nora ankuqaave inaara ankuqaave raqiki vauka naaromanta ² vika hihai hihai ani ruvaaqumavi vaura. Vi entava *Haraara Naavu* ovata no entava 7 tora *Etanimive* * tu torava vaura.

³ Ho Isareri nora vaiintinavu ani ruvaaquma vumanta Kotira kaiqa vara amite vau vaiintika Nora Kotira *Vokise* vare ⁴ vumanta Kotira kaiqa vara amite vau vaiintikavata, Viraira anku vokukavata, vika Nora Kotira *Seri* Naavu rampaikе vare, viraqi vau taintarave vo haikave vare vuru Kotira Naavu aumanto vatora.

⁵ Vika *Vokise* vira vare oruntomanta King Soromonuvavata, ekaa Isareri vaiinti nahentivata, oru *Vokise* vira tataaqa ruvaaqumavi vaiha, sipisipive purumakau qorave airitahaa aruke, Kotira *ofaa* iha quara amitora. Vika nai airi sipisipive purumakauve aruke Kotira iha quara amitorara ti, vi quaranavura kaara ntuvake taveva kia ho vaura.

⁶ Ho viraqaahai Kotira kaiqa vara amite vauka *Vokise* vira vare Nora Kotira Naavuqi vira turuaravano vau *rumuraqi enseli* taaraqanta arokaq ieta vatora.

⁷ *Enseli* vitanta arokavano rairaviro vaiharo vi *Vokiseravata*, vira aqu vare anu kataritantavata, mantaaqa kora.

⁸ Katari vukaitanta vaumontara ti, vaiintivano vira tataaqa vaiharo vitanta viti tavaarirava ho vauvarovata, vaiintivano vo *rumuqi* vaiharo vitanta viti tavaarirava kia ho vaura. Vate maa entara vi kataritanta qaqi vi *rumuraqi* variara.

⁹ Vi *Vokisera* avutaqи Kotiva qara ntuvato oriva taaraqanta vauvaro kia vo haikavanovata viraqi vaura. Haaru Mosiva Sainai Aiqinaqaa vaiharo ori vitanta *Vokiseqi* vatora. Vi entara Isareri Isipihi katu vare Sainai Aiqinaqaa ani vauvaro Noravano Kotiva vika hampata volhava uva tiva taataukero vatora. (Katu Varora 25:21)

¹⁰ Ho Kotira kaiqa vara amite vauka vi *Vokisera* Kotira turuaravano vau *rumuraqi* vuru vate, vevantovaro vaakama tonavuvano Nora Kotira Naavuqi mpiqa viro mantaaqa kora.

¹¹ Nora Kotira mpeqa okaravano takuqi vauva tonavuqihairo voqama kero ataa i vaumontara ti, Kotira kaiqa vara amite vauka kia ho naavuqi oriqete nai kaiqa vararaiti, qaqi vahaqaqaini vaura.

¹² Mintuvaro Soromonuva tiharo, Noravano Kotiva tiharo, Te tonavuvano voqamakero taatau vinaraqi vairerave turave. (Katu Varora 19:9)

¹³ Mpo, Noravaavuo, are haaru minti tiaravata, te ariara viva ekaa enta ekaa enta maa naavuraqi variqiro vuarire ti, vira ai kaqa amitaunarave, tiro.

¹⁴ King Soromonuva minti tivakero viva tuqantaaviro Isareri vaiinti nahenti mini ruvaaqumavi vauka taveharo, nai kauqu aqu nimitero Kotiva ni koqema nimitaarire tiro.

* **8:2:** Etanimi tora vaireva, Septemba toravata Oktoba toravata vitanta tavaarana vaura. (Wkp 23:34)

¹⁵ Minti tivakero viva tiharo, Kaiqenavu Isarerri Variqa Nora Kotira autu tuahera kaare. Viva nai aiqiqaa kauqu aqu kero ti qora Devitirara tivato uvava kia tauru kaivaro vi uvava vate vivauma vaivo.

¹⁶ „Viva ti qora Devitirara minti turave:„

Te tenta vaiinti nahenti Isipiqihai ntite anuna entaraqaahai te kiama Isarerri anku vorara tiha, Te vatuka vo kaama taari ne vi vatukaraaqi ti naavu kaqa timitaimanta vaiinti nahenti ti hutu noraiqama kaate, tunaravauve. (2 Sam 7:6)

Devitio, te kia minti tiraiti, ariara viva ti vaiinti nahentigaa raqikiarire ti, ai kaama taunarave. Kotiva minti turave.

¹⁷ Ti qova Devitiva tiharo, Kaiqe te Nora Kotira tinavu Isarerri Variqara iriha, vira naavu kaqa amitaariraro vira autuvano noraiqiarire, tuvarovata, ¹⁸ Noravano Kotiva ti qora Devitira nai tiva amiro tiharo,

Are tiharo te Nora Kotira naavu kaqa amitarerave tiara uvava koqe uva vaivaravata, ¹⁹ are nenama vi naavura kia kaqa timitenarave.

Ai maaqu vo vivama ti naavu kaqa timitairaro ti hutuvano noraiqama vuarire, turave.

²⁰ Ho Noravano Kotiva nai aiqiqaa kauqu aqukero tivato uvava vate vivauma vaivo. Viva tiva taintemake, te tenta qora Devitira vatuka vare, Isarerri avuhainaa vaiintiqamavi vaiha, Nora Kotira tinavu Isarerri Variqa autu noraiqama vuarire ti, vira naavu kaqa amitauro.

²¹ Vi naavuraqi Kotira *Vokise* vate *rumura* te autu amitauro. Noravano Kotiva Isipiqihairo tinavu kaivaqaukvara ntita varero anu entara viva tinavu kaivaqauka hampata vaiharo uva tiva taatauto oritanta *Vokise* viraqima vaivo, tiro.

²² Minti tivakero Soromonuva Isarerri vaiinti nahenti nivuqaa Nora Kotira *ofaa* tainta tataaqa oru himpi vaiharo nai kauqtanta virini tututeharo ²³ Kotira aarero tiharo,

Mpo Noravauvu, are Isarerri Variqavanoma variaro. Kia ai voqaraa variqa vovano naaruva virinive, vata mianive vaivo.

Tenavu ai uva iriha ai aaraqaa koqemake nuarera, ai muntukavano tinavuara vairara, are nena uva tivakera taatau taanarara iriqira vinarave.

²⁴ Haaru are ti qora Devitirara irihera nena aiqiqaa kauqu aqukera te mintirerave tiva taana uvava vate vivauma vaivo.

²⁵ Noravauvu, are tinavu Isarerri Variqavanoma variaro. Mpo, are vo uvavata nena aiqiqaa kauqu aqukera ti qora Devitirara tiva taanara kia tauru karaitira, vi uvaravata iriqira vuane. Are haaru Devitirara tiharo,

Are ti tivuqaa avuqavuqama kera nuanantemake, are kuvuarama teraukavata kia qora okara autiraiti, ti tivuqaa avuqavuqamake nivera, te ekaa entama qaqi kaari vikaqihai avuhainaa vaiintiqamavi, Isarerriqaa raqikivarave, tianarave.

²⁶ Mpo, Isarerri Variqavanuo, are vi uvava nena aiqiqaa kauqu aqukehara ti qora Devitirara tianara iriharama, are qaqi kairaro vi uvava vivau variarire.

²⁷ Te ariara tiha, Quqaae Kotiva maa vataraqaa tuvu vaiharo variqiro vuuanarove? turo. Ike, virini naaruvavano nai nora vatukavano vaivarovata, kia are mini vaina vatukava ho vaivo. Naaruvavano kia ho vairara tiro, te ai kaqa amitauna naavuvavata kiama ho varianarove.

²⁸ Ti Variqa Noravauvu, mintima vaivaravata, te ai kaiqa vaiintivano vate ai aareha ariara ike mpo tiva timitaane tiaina uvava irira, are te ai iraainantema kera mintima timitaane.

²⁹ Haaru are tiharo, Te vi naavuraqi variqi virerave tianarara irihara, are maa naavuraqaa ekaa enta, entaqive aatitainaraqaave raqikiqira vi vairaqa te maa naavura tavehamai aaraarirara are te ai aaraaina uvava iriane. (Lo 12:11)

³⁰ Noravauvu, ai vaiinti nahenti Isarerivata, tevata maa naavura viti taveha ai aaraarirara, tinavu uva iriane. Are naaruvaini vainaraqihira tinavu uva irihara, tenavu qora okara autuina uvava nunka timitaanerama turo.

³¹ Nai kena vaiinti qoraiqama amitaaina vaiintira vika vita vare maa naavuva vainaini viri ke, vi vaiintirara tiha, Quqaae are vi vaiintira qoraiqama amitaaro, kiae qoraiqama amitaaro? tivaro, vi vaiintiva ai *ofaa* tainta tataaqa vaiharo, viva nai kauqu aqiqaa aqukeharo ariara kia vi vaiintira qoraiqama amitauro tirera,

³² are naaruvaini vainaraqahaira vira uva irira, vika uva avuqavuqama nimitehara, vaiintivano qora okara autinara nai umiqaane. Qora okara kia autina vaiintirara kiama ariqaa uva vaivo tiane.

³³ Vo enta tenavu Isarerri ai vaiinti nahenti ai uva raqakaainara kaara are navutaaka qaqi kairamanta vika tinavu haatara kaiqe, viraqahai tenavu orurante are inanaini ani, ai Naavuvano maini vainaini aninte tentanavu qora okara autuainara tiva

qovarama kaarera,³⁴ are nena naaruvaini vainaraqaahaira tinavu nena vaiinti nahenti uva iriane.

Are tinavu qora okara nunka timitera, navutaaka tinavu tivita vare vo vataini vuru kenaihairs are qaiqaa tinavu tivita varera viri haaru maini are tinavu kaivaqaukavara nimiana vataraaqa viri kaane.

³⁵ Qaiqaa, tenavu ai vaiinti nahenti ai uva raqake qora okara autu amitaainara kaara are aaqu qioqama tairaqe, viraqaahai tenavu mpo ike tiha kia qaiqaa vi okarara autirerave tiha, ai Naavu maa taveha tentanavu qora okara autuainara tiva qovarama kaarera,³⁶ are nena naaruvaini vainaraqaahaira tinavu Isareru nena vaiinti nahenti uva irira, tenavu qora okara ai autu amitaaina uvvara nunka timitaane.

Are tenavu koqemake variaina okarara tinavu humiqehara, aaqu varakairaro tinavu vataqaan tuuarire. Tinavu vata maava maahota variarire tira, are haaru tinavu nena vaiinti nahenti timianarave.

³⁷ Tinavu vataini karara aavoqi entava qovaraiqirerave, vaiinti arukaaina rovarava qovaraiqirerave, naaho maataqaa rovaravano qovaraiqirerave,

kaintaaqa airitahaavano karakaqa qoraiqama kareka qovaraiqiverave, navutaaka tinavu hampata raqireka ani tinavu vatukanavu ututuma taiverave, vo rovara vo rovaravano tinavu qoraiqama kareva irerave, nai nana nana qora haikavano qovaraiqirera,

³⁸ vi entara are tenavu ai vaiinti nahenti ai aaraaina uvvara iriane.

Vi entara Isareru vaiinti nahentiqihairo vo vaiintiqaae, vo nahentiqaee, vi maarava qovaraiqiraro viva ai Naavu maa taveharo nai kauqu virini tututero ai aarairera,³⁹ are naaruvaini variqira vinaraqaahaira vira uva irihara vira qora okara autira nunka amitera kahaqama amitaane.

Areqaima ekaa vaiinti nahenti avu aatoqi vai okarara iri tave variaravara tira, are vika vohaiqa vohaiqavano nai nana nana okara autirara irihara, vika nai nimirarave.

⁴⁰ Are mintiaqira viraqe tenavu ai vaiinti nahenti are tinavu kaivaqaukavara nimiana vataraaqa variqi viha, ekaa enta ai aatu qeteha variqi vuare.

⁴¹⁻⁴² Vo vatanaa vaiintivano nai maaqaini vaharo ai nora autuaravata, are nora kaiga varaanararavata, iri vaina vaiintiva maini anintero ai Naavu taveharo nai kauqu tututeharo ai aarairera,⁴³ are naaruvaini variqira vinaraqaahaira vira uva irira vira kahaqiane.

Are mintiramanta ekaa vo vatanaaka ai okara tave, tenavu Isareru ai aatu qeteha ni vaunantemake, vikavata ai aatu qeteha nivarave. Vi entara te ai kaqa amitauna naavura maa taveha, kankomake iri tiha, Noravano Kotiva i Naavurave, tivarave.

⁴⁴ Vo enta, are tinavu nena vaiinti nahenti varakairaqe tenavu oru vonaini navutaaka hampata raqihai, vi entara tenavu vona vona vaiha, tenavu are nena kaama taana vatukara Ieruharemivata, te ai kaqa amitauna Naavuravata taveha ai aaraarer,⁴⁵ are naaruvaihairs tenavu ai aaraaina uvvara irira, tinavu kahaqama timitairaue navutaaka naatara kaare.

⁴⁶ Tenavu ekaa qora okara auti vaunarara ti, kia ho vovano tiharo, Kia te mintunarave, tianarove. Ho vo enta, tenavu Isareru ai qora okara autu amitaariraro ai arara itairara vira kaara are navutaaka kauquqi tinavu kairamanta vika ani tinavu rumpa vare vo vataini, niarainive, aumantove, vuru kaivera,⁴⁷ are vi entara tenavu ai aaraaina uvvara iriane.

Tenavu navutaaka vata mini vaiha, tentanavu qora okara autuainara mpo ike tiha ai aareha, Mpo, quqaama tenavu ai uva raqakeha qora okara autu kaunarave, tiarera, are tenavu ai aaraaina uvvara iriane.

⁴⁸ Mpo, vi entara tenavu navutaaka vataini vaiha tentanavu avu aato muntukaqihai qora okara qaqrake orurante are iananaini anirera iha, are tinavu kaivaqaukavara nimiana vataraa are nena kaama taana vatukara Ieruharemini taveha, te ai kaqa amitauna Naavuravata taveha ai aaraarer,⁴⁹ are naaruvaini variqira vinaraqaahaira tenavu ariara ike mpo tiaina uvvara irihara tinavu aaqurihama timitaane.

⁵⁰ Are tenavu ai vaiinti nahenti vaaqu okara autu amitaaina uvvara nunka timitera, tinavu navutaaka vo avu aato nimiramanta vika tinavu aaqurihama timitaate.

⁵¹ Tenavu Isareru vaiinti nahenti vairera, tenavu ai vaiinti nahentima vauro. Tenavu are nena kaama taana vainti nahentikama vauro.

Nora iha itairaqhairs ruaruama nimitaanantema kera, are haaru tinavu kaivaqaukavara Isipiqihairs ruaruama nimitera vika ntita varaaramanta maini aniarave.

⁵² Mpo Noravauvu, are ekaa enta ti nena kaiqa vaiintivata, ekaa nena vaiinti nahenti Isarerivata, tavamaqira vihara, tenavu ariara ike mpo tiaina uvvara irihara variane.

⁵³ Maa vataraqaa ekaa naato vatanaaka variavaravata, are tinavu Isareriqai nena kaama taanarave. Noravauvu, Kotio, are tinavu kaivaqaukavara Isipiqihaira ntita varera aniana entara are nena kaiqa vaiinti Mosira noqihaira vi uvvara tianarave, tiro. (Katu Varora 19:5)

⁵⁴ Soromonuva tori kauru araviro vaiharo nai kauqu tuaherakero Nora Kotira aaramaqiro viviro vuru taiga kero, viraqaahairo viva *ofaa* tainta tataaqa vaunaihairo himpiro, ⁵⁵ Kotiva Isareri vaiinti nahenti mini ruvaaqumavi vauka koqema nimitaarire tiro, nai kauqu aqu nimitero naveraitiro mintima tiro:

⁵⁶ Kaiqenavu Nora Kotira autu tuahera kaare. Viva nai kauqu aqiqaa aqukeharo tintema kero, tinavu Isareri nai vaiinti nahenti koqema timitaimanta muntuka paru imantama vauro.

Viva haaru nai kaiqa vaiinti Mosira noqihairo tinavu Isareriera te ni minti mintimake koqema nimitarareve tu uvaraqihairo kia vo uvavanovata kakakima vivo.

⁵⁷ Kaivaru Noravano Kotiva tinavu kaivaqaukavara hampata vauntema kero, viva tinavu hampatavata vaiharo, kia tinavu goririma keharo qaqira kaarire.

⁵⁸ Kaivaru viva tinavu avu aato koqema timitairae tenavu vira aaraqaa nuvaqi viha, viva tinavu kaivaqaukavarara tiva tai uvarave, uva maara tirave, vi uvvara vi uvvara iriqi vuare.

⁵⁹ Kaivaru Noravano Kotiva tinavu Variqavano te vate tuna uvvara kia tauru karaitiro, ekaa enta, entaqive aatitainaraqaave, iriqiro viharo Isareri nai vaiinti nahentivata, ti nai kaiqa vaiintivata, kahaqama timitairaro *vo* maaravano kia tinavuqaa qovaraiqirae, tenavu koqemake variqi vuare.

⁶⁰ Viva mintira ekaa naato vatanaaka avu aato kenko tiramanta vika kankomake iri tiha, Noravano Kotiva vivaqaaima Variqavano vaivaro kia variqa vovanovata vaivo, tiate, turo.

⁶¹ Ho ekaa enta ne tinavu Variqa Nora Kotira viraraqai noraiqaake iriqi viha, ne vate intemake, kempukaiqamake viva tivatai uvaravata vo uva maaravata iriqi vuaterama turo, tiro.

⁶² King Soromonuva minti tivakero viraqaahairo viva ekaa Isareri mini ruvaaqumavi vauka hampata *vo ofaa* *vo ofaa* Nora Kotira iha quara amitora.

⁶³ Soromonuva Nora Kotikantiro vohaa variaina *ofaara* iha quara amitaare tumanta vika purumakau 22,000 vare, sipisipi 120,000 vare, Nora Kotira iha quara amitora. Avuhainaa vaiintivanovata ekaa Isareri vaiinti nahentivata mintima keha vi Naavura Nora Kotira kaama amitora.

⁶⁴ Airi *ofaa* vauvarora tiro, Soromonuva tavovaro *ofaa* tainta *baraasiqohai* aututo taintava Kotira Naavu avuni vauva inaara taintavano vaumanta vika viraqaa kia ho airi quara aantau iha quara amiteva vauvaro, vohaa vi entaraqai Soromonuva Nora Kotira Naavu avuqaa vata vo, vaiinti nahenti ruvaaqumavi vau vatara Kotira kaama amitero, vi vataraqaa vika *vo ofaa* *vo ofaa*, *uiti* auruve, Kotira kaintu iha quara amite *ofaarave*, Kotikanti vohaa variaina *ofaara* vira vahaverave, Nora Kotira iha quara amitora.

⁶⁵ Vi entava *Haraara Naavu Ovatave* tu entava vaumanta, vi entanavuraqaa Soromonuvalava ekaa Isareri vaiinti nahentivata Ieruharemipi ruvaaqumavi vaiha nora ovata virara iriha nora. (8:2)

Notini vau vatukara Hamaatihiave, *sautini* Isipi vatavano antuatonaithiave, tavaarana vau vatukaihiave, vaiinti nahenti airitahaa Nora Kotira tinavu Variqa avuqaa 14 enta Ieruharemimi ruvaaqumavi vaiha ovata nora. Vika *Kotira Naavu kaamatorara* iriha, 7 entara ovata namaqi vivi, *Haraara Naavu*, ovataravata iriha, qaiqaa 7 entara ovata namaqi vura. (2 Sto 7:8-10)

⁶⁶ Ho vira qararae Soromonuva vaiinti nahenti nititonanta, vika avuhainaa vaiinti vira Kotiva koqema amitaarie tivake nai maaqa nai maaqa vura.

Noravano Kotiva nai kaiqa vaiinti Devitirara *te minti minti irerave*, tu uvava vivau vaumantara ti, vika nái muntukaqihai koqe umanta quaheha vura.

9

Kotiva qaiqaa tairakaa Soromonura avuqaa qovarama vura

¹ Soromonuva Nora Kotira Naavuvata avuhainaara naavuvata kaga taiqakero, ekaa vo kaiqa nai varaataa u kaiqaravata taiqa kero vauvaro ² Noravano Kotiva haaru Gibeonini Soromonuva unaini *tairakaa*, qovarama vuntema kero, qaiqaavata qovarama vura.

³ Noravano Kotiva virara tiharo,

Are ti haarehara mpo ike tiana uvvara te irunarave. Are ti Naavu kaqa timitaanara, vi Naavura te tenta kaama taunarara ti, te vi Naavuraqi ekaa enta variqi virerave. (8:10)

Ekaa enta ti muntukavano vi Naavurara vairaqe te vi Naavuraqaa maimaraara raqikiqi virerave. (8:29)

⁴ Ai qova Devitiva tiriara noraiqaakero iriqiro viharo avugavu okara autuqiro viharo ti aaraqaa nintemakera, arevata mintima kera nuane. (8:25)

Are ekaa te tiva tauna uvarave, ekaa te ariara minti minti iane tuna uvarave, kojema kera iriqira virera, ⁵ te tenta kauqu ainqaa aqukeha ai qora Devitirara tiha, Are kuvuarama teraukama ekaa enta Isareriqaa raqikiqi vivarave, tuna uvava vivauma varianarove. (2 Sam 7:12, 16)

⁶ Arevata are kuvuarama teraukavata ti qaqrake te tiva tauna uvaravata, te minti minti iate tuna uvaravata kia iriraiti, oru una variqa naareha vika nutu tuahera kaivera, ⁷ te ni Isareri qoririma keha maa vatara ni nimunaraqaa hai ni nititama karerave.

Te ni Isareri nititama keha, tenta viraqi vairera kaama tauna Naavura, viravata tauvaqa utu amitarerave. Te mintiari ekaa vo vatanaaka ni Isareri naaraihamu nimitheha ni qoraiqama nimitavarave.

⁸ Vate nora Naavu maava vaimantavata, naantiara vaiinti nahenti vitare aitare iha maa Naavura taveha, ravukuvi voqamake qeteha tiha, Nana kaarae Noravano Kotiva maa vataravata maa Naavuravata qoraiqama kaivo? tivarave.

⁹ Vika vi entara minti timanta vokika vika nái tiva nimi tiha, Vira okara maantimama vaivo: Isareri vika nái Variqa Nora Kotira qoririma kaara vira kaarama mintivo. Noravano Kotiva vika kaivaqaukavara Isipiqihairo ntita varero maa vataraqaa viri kaiva vaimantavata, vika vira tauvaqa utu amiteha una variqa vikaraqai noraiqaake iriqi viha, vinavuka nutuqai tuahere variarave. Vika mintiara kaarama Noravano Kotiva maa Naavuravata vikavata qoraiqama nimitaivo, tivarave. „Ho arevata are kuvuarama teraukavata naantiara ti qaqrira kaivera, te mintimake ni qoraiqama nimitarerave.“ tiro.

Noravano Kotiva minti tivakero Soromonura tiva amura. ¹⁰ Ho Soromonuva nai kaiqa vaiinti hampata 20 ihi kaiqa varaqiro viharo, Nora Kotira Naavuvata, avuhainaara naavuvata kaqa vuru taiqa kora.

¹¹ Soromonuva naavu kaqeharo *sidaave*, toqukerave, *kori* orive, varareva uvapo King Hiraamuva Taiaa vatukaaqa raqikuva vi haikara vi haikara vira amuvaro Soromonuva vira iriharo vatuka 20navu Kariri vatainai vaura vira amura.

¹² Vira amuvarovato King Hiraamuva Taiaihairo oru Karirini vau vatukara 20navu tavamakero, kia quaharaatiro, ¹³ Soromonurara aqao tiro, Ti qata vakaao, nana vatukanavue ti timiario? „Kia koqe vatukanavuve,“ tivakero vira kaara vi vatarara *Kabuluve - Qumina Vatave* tura. Maa entaravata vaiinti nahenti vi autura nte variera.

¹⁴ Tota Hiraamuva *kori* ori airithaa vara kovaro Soromonuva vaunaini vuvaro vira maavarano 4,000 kilo vaura.

Soromonuva vo kaiqa vo kaiqa varora

¹⁵ Vo kaiqa vo kaiqa varaaate tiro, King Soromonuva kaiqa vaiinti airithaa ntita vatomanta vika maa kaiqara vara amitora:

Vika Nora Kotira Naavu kaqa amite,

Soromonura nai avuhainaara naavu kaqa amite,

Ieruharemi vatuka vaantaavurvata autu amite,

Ieruharemi vatuka otiqete urunte ura tuquke ntava amite,

vo vatukanavu haaru qoraiqama kora, Hasove, Megidove, Geseve, qaiqaa autu amitora.

¹⁶ (Tota Gese vatukavano Kenaani vatanaaka u vatukava vauvaro Isipi avuhainaava ani iqoka raqiharo vi vatukara iha qumpiarama tero viraqi vau vaiinti nahentika aru taiqa kora. Ho naantiara Soromonuva vira raavura varato entara, Isipi avuhainaava vi vatukara nai raavura amura. ¹⁷ Mintuvaro Soromonuva „tumanta kaiqa vaiinti vika,“ Gese vatuka qaiqaa autu amitora.)

Soromonura kaiqa vaiinti vika Beti-Horoni muani vau vatukara qaiqaa autu amite,

¹⁸ Balati vatukavata Tamaa vatukavata autu amitora. (Vi vatukatanta Iutaa aahara vataini vaura.)

¹⁹ Soromonura karakaqa vara vuru vate naavuva vo vatuka vo vatukaqi variarire ti, vika vira vira autu amite,

Soromonura ohinavuvata, iqokakaarivata, vate naavuva variarire ti, vika qaraaka vatuka, vo vatuka vo vatuka autu amite,

Soromonuva vo qara vo qara u naavura Ieruharemigive, Lebanoniqive, ekaa nai raqiku vataragaave, kaqaataa ura vira kaiqa vaiinti vika vi kaiqara vi kaiqara vara amitora.

²⁰ „Vi entara,“ vo vatanaa vo vatanaaka Amonive, Hitive, Peresive, Hivive, Jebusive, Isarerini qaqi vaura.

²¹ Haaru Isarereri vika „kaivaqaukavara,“ hampata iqoka raqihaa airitahaa arukehavata, kia ekaa aru taiqa kora. Ho Soromonuva hini qaqi vauka vara nai kaiqa vaiintiqama komanta vika karapuhi vaiinti voqaara vaiha vira kaiqa vara amitora. (Maa entaravata vika mintimakeha Isarereri kaiqa vara nimite variara.)

²² Soromonuva Isarereri vaiinti vika kia qaqi qumina kaiqa vaiintiqama karaitiro, vika noraiqama komanta vokuka iqoka raqi vaiintika vaumanta, vokuka *kamaanira* kaiqa vaiinti vaumanta, vokuka qiata vaiintiqamavi iqoka vaiintiqaa raqiki vaumanta, vokuka iqoka *kaariqive* ohichaave niha raqireka ukaqaa raqiki vaura.

²³ Soromonuva Isarereri vaiinti vokuka 550navu noraiqama komanta vika qiata vaiintiqamavi vira kaiqa, vo kaiqaa vo kaiqaa raqiki vaura.

²⁴ „Vi entara,“ Soromonura naata, Isipi avuhainaara raavuravano Devitira vatukave tunaihairo katu varero Soromonuva vira nai kaqa amito naavuraqj vuvaro, Soromonuva tumanta vika vi naavura auvahianta otigete urunte u vatara tuquke ntava amitora.

²⁵ Ekaa ihiara taaramo tataa Soromonuva oruntero Nora Kotirara iriharo autu amito taintaraqaa *ofaa* iha quara amite vaura. Viva ekaara kaintu iha quara amito *ofaarave*, Kotikantiro vohaa variaina *ofaarave*, iha quara amitero, koqe unta iaina haikaravata Nora Kotira iha quara amitora. Mintima keharo Soromonuva Kotira Naavu vaunaini vaiharo Kotira *ofaa* iha quara amite vaura.

²⁶ King Soromonuva tumanta vika Esoni-Gebe vatukaini *sipi* airitahaa autu kora. Vi vatukava Idomu vataini nora namari Akabaa Namari auvahini vuvaro Elati vatukavano vira aumanto vaura.

²⁷ King Hiraamuva nai kaiqa vaiinti vokuka kankomake *sipi* kaiqa tavoka nititomanta vika oru Soromonura kaiqa vaiinti hampata *sipi* kaiqa vare vaura.

²⁸ *Sipi* vika oru Ofi vataihai *kori* ori airitahaa vare viri Soromonura ami vaura. *Kori* ori maaravano vaireva, 14,000 *kilo* vaura.

10

Avuhainaah nahenti Sebahainaava Soromonura uru tavora

¹ Avuhainaah nahenti Sebaa vataihai naava Noravano Kotiva Soromonura kojema amitaivaro viva nai nora autu vataava vaivo tu uvara iriro, viva kaiqe te Soromonura oru taveha, nora uva maara ntairaqhohai vira irama amiteha vira avu aato avateha tavaare, tivakero viva unaini urura.

² Avuhainaah nahentivano Ieruharemini urireva iharo nai kaiqa vaiintivata kameri airitahaavata ntita varero urura. Kameri vika karaqaa aatake ne haikara vare, airi *kori* ori vare, vo qara vo qara u orira nora koqaa aqueha vare vau oriravata vare urura.

Ho avuhainaah nahenti viva Soromonuva unaini uruntero viva ekaa vo okara nai aatoqj iritora Soromonura irama amitovaro ³ Soromonuva kia vukaari uthiaro nai tiva amiraitiro, ekaa vi nahentiva vira irama amito uvara avuqavuqama kero nai tiva amura.

⁴ Minti tuvaro avuhainaah nahenti Sebaa vataihainaava Soromonuva koqe avu aato vatora iriro, Soromonuva avuhainaara naavu kaqatoravata tavora.

⁵ Viva vahiaro tavovaro Soromonuva kara ne vau taintaraqaa koqe kara, vo kara vo kara vaumanta, qiata vaiinti vika Soromonura hampata oquvi vaiha vi karara ne vaumanta, avuhainaara kaiqa vaiintinavu koqe utavaaqa nonkutoka vi karara raaqu nimite vaumanta, vokuka *uaini* qihia keha nimite vaura.

Vi nahentiva vahiaro tavovaro Soromonuva Nora Kotira Naavuvano vaunaini vaiharo ekaara kaintu iha quara amito *ofaa*, vo *ofaa* vo *ofaa* Kotira iha quara amite vaura. Nahenti viva vi haikara vi haikara tavero voqamakero ravukuviro nai kauqu runkinkiri iharo vaura.

⁶ Viva Soromonurara tiharo, Ike, te tenta maaqaini vaiha, are vo kaiqa vo kaiqa varaanarave, ariqi koqe avu aatovano vairave, ekaa vi uvava quqaa uvama vaivo.

⁷ Tota te virara kia quqaa uvama varianarove tivake, viraqahai te maini urunte, vi haikara vi haikara tenta avuqohai tavauraro ququaama vaivo. Ike, tota vika hini uvaqai tiva timiarave. Te vate tenta avuqohai tavaurā haikava te maaqaini vaiha iruna uvaravata uri aatara kaivo. Ai koqe avu aatovano voqavata vaivarō are monuve airairave vataara haikavavata nai airitahaama vaivo.

⁸ Ike, mintima vaimanta ai naatavara quahevaqaima varianarove. Ai qiata vaiinti vikavata ai aaqanto himpi vaiha vo enta vo enta are koqe avu aatoqihairi ti variana uvira irihara ti, vika quahevaqaima varianarove.

⁹ Virara virara irihama te ai Variqa Nora Kotira autu tuahera karerave. Viva ai quahama amiteharo ai noraiqama kaivara are Isareri avuhainaa vaiintivano variaro. Kotira muntukavano ni Isarerira ekaa enta ekaa enta variqiro virara tiro, viva ariara Isareriaa kojema kero raqikiharo vika uva avuqavuqama nimitaarire tiro, ai kaama taivara are avuhainaa vaiintiqamavira variaro, tiro.

¹⁰ Avuhainaa nahenti Sebahainaava minti tivakero viva King Soromonura *kori* orivata, karaga aatake neravata, vo qara vo qara u orira nora monu aqutoravata vira amura. *Kori* ori vira maaravano 4,000 kilo vauvaro, karaga aatake neva nai airitaha vaurara tiro, kia vovano vira naantiara vira uri aatarakero qaiqaa vi haikara varakaarirava vaura.

¹¹ King Hiraamura *sipinavu* Ofi vataihai *kori* orive, vo qara u katarira vira untavano koqe urave, nora monu aquto orirave, vareha Isarerini vuru ke vaura.

¹² Ho Soromonuva nai kaiqa vaiinti tiva nimumanta vika koqe untavu katarira varake viragoohai Nora Kotira Naavuqive, avuhainaa naavuqive vaataiqamate, vaiintivano *musiki* ruqutuate ti, vika vo *musiki* vo *musikivata* vi katariraqohai autu nimitora.

Vi entara koqe untavu katarira airi Isarerini vuru kovarora tiro, kia naantiara vovano qaiqaa vira uri aatarakero airi koqe untavu katarira Isarerini vara kaarirava vaura.

¹³ King Soromonuva vo haika vo haika avuhainaa nahenti Sebaa vataihainaara amiro, vi nahentira muntukavano vo haika vo haikaravata vaura vira amuvaro, viraqaaahairo avuhainaa nahenti viva nai kaiqa vaiinti hampata qaiqaa ururantero nai maaqaini vura.

Soromonuva airi monuve airairave vatora

¹⁴ Vohaa ihi vohaa ihi Soromonuva *kori* ori 23,000 kilo vare vaumanta, ¹⁵ koqaa kaiqa vare vaukave, Arebia avuhainaaakave, Isareri vo vata vo vataqaa raqiki vaukave, vika vika takisi aqukeha *kori* ori amuvaro vare vaura.

¹⁶ Soromonuva tumanta vika nora kainke 200navu autuke, *kori kakanairima/kavanairima* toraqohai kainke vinavura naavuma tora. Vohaa kainkeqaa *kori* naavuma tora maaravano vaireva, 7 kilo vaura.

¹⁷ Viva qaiqaa tumanta vika inaara kainke 300navu autu amitora. Vohaa kainkeqaa *kori* naavuma tora maaravano vaireva, 2 kilo vaura. Avuhainaaava tuntmake vika kainke vira vare vuru avuhainaaara naavu *Lebanoni-Nantave* tu naavura viraqi vatora.

¹⁸ Mintuvaro Soromonuva nai avuhainaaava oquvuinaava taintara autu timitaate tiro, tumanta viravata autu amitora. Vika *erefanti* aaraiqohai vi taintara autuke, *kori* ori kogera varake, viragoohai vira vaataiqama tora.

¹⁹⁻²⁰ Taintavano kaantaqa maariqaqaa vauvaro vira avuni viraqaa vaarinte viva 6navuvano vaura. Vika *raioni maraqura/varaha* 12navu autuke, aiqu nteraqaa hini auvahini 6navu vate, hini auvahini vo 6navu vatora.

Taintavano kaantaqa maariqaqaa vauvaro tainta hini hini mantarainiqaaku vataarirava vaura. *Raioni maraqura/varaha* vovano tainta tataaqa hini mantaraini himpi vauvaro, vovano hini mantaraini himpi vaura.

Avuhainaa taintavano nai aahuva tainta vaumanta kia vo vataini vo vataini avuhainaaaka vi taintara voqaa vatora.

²¹ King Soromonura *kaapunavu* vaireva, *kori* origohai aututova vauvaro *Lebanoni-Nantave* tu naavuraqi vau haikara tanuve kureve, ekaa vi haikaravata *kori* koqeraqohai aututova vaura.

Soromonuva vau entara *silvaa* oriara kia anomakero koqe ori vaivo turara tiro, silvaaqohai aututo *kaapuvave* tanuvave kia avuhainaaara naavuqi vaura.

²² Soromonuva airi *sipi* vatomanta vika Hiraamura *sipi* hampata vatuka vatuka vi ani vaura. Vika taaramo ihiara vatuka vatuka nini, orurante aninha *kori* orive, *silvaa* orive, *elefanti* aaraive, vareha, *monki* vo qara vo qara uravata vare viri Isarerini ke vaura.

²³ King Soromonuva ekaa maa vataraqaa avuhainauka vaukavata uri naatara kero, airi monuve, airairave, koqe avu aatove vatova vaura.

²⁴ Ekaa maa vataraqaa vauka iruvaro Kotiva Soromonura koqe avu aato amurara ti, vika ihai ihai vira tavareka ani vaura.

²⁵ Vo ihi vo ihi Soromonura tavareka ani vauka, ekaa vika koqe haika vare vuru vira ami vaura. *Silvaa* orive *kori* orive viraqohai aututo haikarave, koqe utavaaqave, auihihehavaave, karaga aatake nerave, ohive, donkive, vareha vuru vira ami vaura.

²⁶ Soromonuva airi iqoka *kaarivata* airi ohivata varero vuru hini ku haikara Ieruharemini vatero, hini ku haikara viva nai kaamato vatukara voqi voqi vuru vatovaro vaura. Viva iqoka *kaari* 1,400navu vatero, ohi 12,000navu vatora.

²⁷ Soromonuva avuhainaa vaiinti vau entara airi *silvaa* ori Ieruharemini vuru ke vaurara tiro, qaqi orivano airitahaa vaintema kero, *silvaa* orivano Ieruharemipi airitahaa vaura.

Vika *sidaa* katari airitahaa tegatora Ieruharemini vuru korara tiro, qumina katari airitahaa inaara ainqinaqaa qampiqe vauntemakero, vi entara *sidaa* katari airitahaa Ieruharemipi vaura.

²⁸ Vika Soromonura ohinavu Isipihavata Silisia vataihavata oru varora. Avuhainaa vaiintivano nai koqaa kaiqa vare vau vaiintika nititama komanta vika Silisiaini otu vira ohi koqaa ura.

²⁹ Vika Isipihai iqoka *kaari* varareka vohaiqara 600 *silvaa* aquke, ohi vohaiqara vohaiqara 150 *silvaa* aquke varora. (600 *silvaa* = K6,000; 150 *silvaa* = K1,500)

Vika hini iqoka *kaarivata* hini ohivata vare vuru Hiti vatanaakave Siria vatanaakave nimiha koqaa varora.

11

Soromonuva Kotira tauvaqa utu amitora

¹ King Soromonura muntukavano airi vo vatanaa vo vatanaa nahentiara vauvaro vaura.

Viva Isipi avuhainaara raavura varatero qaqaa Moapi nahentive, Amoni nahentive, Idomu nahentive, Saidonihainaa nahentive, Hiti nahentive, vare tero vaura.

² Haaru Noravano Kotiva Isarerri qioqama tero tiharo, *Ne vo vatanaa nahenti kia varaate. Ne vi nahentika varataivera, vika ni a vu aato vara hampiqama kaimanta ne vika una variqanavu quahama nimitevarave, tura.*

Viva minti tuvarovata, Soromonuva vi nahentikara voqama kero antuqa aruvaro vaura.

³ Viva nora autu vataaa nahenti 700navu varatoka vika avuni vaumanta, vo nahenti 300navu varatoka vira naata naantiaraaka vaura. Vi nahentika Soromonura avu aato vara hampiqama kovaro Soromonuva kia Kotira aaraqaa koqema kero niraitiro vaura.

⁴ Soromonuva naampaiqama vumanta vira naatavarava vira avu aato vara hampiqama kovaro viva kia nai qova Devitiva Nora Kotirara kempukaiqama kero iruntema kero iriraitiro, viva una variqanavu nutu tuaherake vaura.

⁵ Soromonuva Saidoni vatanaaka una variqa nahenti Astaatera autu tuaherakero, Amonihainaauna variqa vaaquqira Molekira autuvata tuaherake vaura.

⁶ Soromonuva mintima keharo Nora Kotira avuqaa qora okara autura. Viva kia nai qova Devitiva Nora Kotirara noraiqaakero iriqiro vuntema kero iriraitiro, viva una variqa vikaravata iriqiro vi vaura.

⁷ Kuari urinaini Ieruharemi hini mantaraini vau ainqinaraqaa, Moapi vatanaaka una variqa vaaquqira Kemosirara iriharo, Soromonuva *ofaa* tainta vo autu amitero, Amoni vatanaaka una variqa vaaquqira Molekiraravata iriharo, viva *ofaa* tainta vo autu amitora.

⁸ Soromonuva ekaa nai naatavara vo vatanaaka varetokara iriharo, mintima kero *ofaa* tainta, vo tainta vo tainta autu nimitomanta, vika mini vaiha nái una variqara iriha koqe unta iaina haikaravata, vo haika vo haikavata, iha quara nimite vaura.

⁹⁻¹⁰ Haaru Noravano Kotiva Isarerri vika Variqavano taara enta Soromonuva vaunaini govarama viro Soromonura qioqama teharo kia una variqa nutu tuahera kaane tuvaro Soromonuva kia vira uva iriraitiro, viva Nora Kotira uva raqa kora.

Vira uva raqa kora kaara Nora Kotira arara itovaro viva Soromonurara tiharo,

¹¹ Oho, te uva tivake taatau tauna uvaravata, ariara minti mintiane tuna uvaravata, are kia iriraitira, are nena varaaatai i kaiqara varaqira vuanara kaara, te are maa vataraqaa raqikina kaiqara ai vevaaraini vaina vaiintira vo amiariraro viva Isareriqaa raqikianarove.

¹² Ho te ai qora Devitirarao ti, te are qaqi variqira vina entara te autirera iaina kaiqara kia autiraiti, te qaqi variqi vuarirara are qutu viraro ai maaquvano avuhainaa vaiintiqama virage vi entarama te viva Isareriqaa raqikiaina kaiqara taiqa karerave.

¹³ Vi entara te qaigaavata ai qora Devitiraravata, tenta kaama tauna vatukara Ieruharemiaravata iriha, te ai maaquvano raqikiaina kaiqara kia ekaara taiqa karaiti, te vira qaqi kaariraro viva Isarerri anku vohaiqaaqaa raqikiqiro vuanarove, tiro. Noravano Kotiva Soromonurara minti tura.

Soromonura navutaaka

¹⁴ Soromonura navutaiqiarire tiro, Noravano Kotiva qaqi kovaro Hadaativa Soromonura navutaiqi vaura. Hadaativa Idomu vatanaaka avuhainaara maaqu vovano

vaura. ¹⁵ Haaru King Devitiva Idomu vatanaaka hampata raqu entara Ioaapiva Isarer iqoka vaiintiqaa raqikuva Idomuni oru raqiha aruko vaiintika quntareva vura.

¹⁶ Ioaapiva nai iqoka vaiintinavu hampata Idomu vataini 6 toranavuara variqiro viharo, ekaa Idomu qoraintiqai, vaiintivata vaintivata aru taiqa kora.

¹⁷ Vika ekaa aru taiqa kareka auti vauvaro vi entara Hadaativa quavaaraa vaintivano vauva nai qora kaiqa vaiinti Idomu hampata qetakero ruqema kero Isipini vura.

¹⁸ Vika Isipini viha, Midiani vata vara maini ke vivi, Paraani Aahara Vataini orunte, Paraani vatanaa vaiinti vokuka ntita vare vikavatamake Isipini orunte, avuhainaava Pero vaiintivano vaunaini oruntovaro viva naavuvata karavata Hadaatira amiro, vatavata vira amura.

¹⁹ Pero vaiintivano Hadaatirara voqama kero quaheharora tiro, viva nai naata Kuini Tapenesira aura amuvaro Hadaativa vira varatero vaura.

²⁰ Tapenesira auravano qorainti vainti Hadaatira vata amitero, vira autu nteharo Genubaatirave tura. Vira vatavaro Kuini Tepenesiva vira viriharo viraqaa raqiki vauvaro, Genubaativa avuhainaara naavuqi Pero vainti vira vaintivara hampata variqiro viro noruqama vura.

²¹ Hadaativa Isipini variqiro vuvaro Devitiva qutu vuvaro Isarer iqoka vaiintiqaa raqikuva Ioaapivavata qutu vuvaro Hadaativa vi uvara iriro, oru Pero vaiinti tiharo, Are ti qaqi kairage te anirante tenta maaqaini vuare, tiro.

²² Minta tuvaro Pero vaiinti viva Hadaatira irero tiharo, Mpo, are maini vahara nana haikarae avaqihara vira kaara are nena maaqaini anirantera vireva auti varario? tuvaro Hadaativa aqao tiro, Te maini vahia kiama vo haikaravata aavoquro. Are ti qaqi kairage vuare, tiro. „Minta tivakero viva nai maaqa Idomuni anirantero vura..”

²³ Ho qaiqaa Soromonura navutaiqiarire tiro, Kotiva qaqi kovaro vainti vovanovata vira navutaava vaura. Vi vaiintiva Eliadaara maaqu Resoniva. Haaru Resoniva Soba vatanaaka King Hadatesera kaiqa vareharo vo haika kaara Hadatesera aatu qeta kero ruqema kero vura.

²⁴ Viva ruqema kero oru vonaini vaharo iqoka qaqrake vu vaiintika vokuka ntita varero vika qiata vaiintiqama viro vaura. Devitiva King Hadatesera iqoka vaiinti aru taigako entara, Resoniva nai iqoka vaiinti hampata oru Damasikusini vaura. Vika mini variqi vuvaro Resoniva vi vatanaaka avuhainaava vaiintiqama viro vaura.

²⁵ Ho Soromonuva qaqi vau entara Hadaativa Isarer i navutaiqama nimite vauntema kero, Resonivavata Isarer i navutaiqama nimite vaura. Resoniva Siria vatanaakaqa raqikiqiro viharo Isarer i vika iri qoraiqama nimite vaura.

²⁶ Ho Soromonura qiata vaiinti vo Nebaatira maaqu Jeroboamuva vivavata Soromonura navutaiqiharo kia vira vevaaraini vaireva auti vaura. Jeroboamuva Efaraimura anku Sereda vatukaihainaava vauvaro vira nova tentoqa nahenti Seruaava vaura.

²⁷ Jeroboamuva kia avuhainaava vaiinti vevaaraini vaireva u okarava maantimama vairo: Haaru Soromonuva tumanta vira kaiqa vaiinti, Ieruharemi vatukaqi otigete urunte u vataru tuuke ntava amite, Devitira vatukave tunaini vaantaavura qoraiqamavura viravata qaiqaa autukora.

²⁸ Vi entara Soromonuva tavovaro Jeroboamuva koqe kaiqa vare vauvaro viva vira noraiqama kovaro viva ekaa Iohepira anku vika kaiqa vare vauraqaa raqiki vaura.

²⁹ Vo enta Jeroboamuva Ieruharemi kero aaraini vi vauvaro paropeti vaiinti Silohainaava Ahiaava vihairo uru Jeroboamura vitakora. Ahiaava vukai tavuna qaraaka aqutova aaraini uri vauvaro, kia vo vaiintivanovata aara mini vaumanta vitantaqai mini vaura.

³⁰ Ho Ahiaava nai tavunauta aqutora qaqlini ravaqaakero vira 12navu qunahikero ³¹ Jeroboamurara tiharo, Are 10navu varane. Noravano Kotiva tinavu Isarer i Variqavano ariara mintima tivo:

Te Noravano Kotika Soromonura kauquqihai Isarer i anku hininavu qaqlini varake, 10navu ai amirerave.

³² Te kia ekaa Isarer i anku ai amiraiti, te tenta kaiqa vaiinti Devitirayata, ekaa Isareriqihai Ieruharemi tenta kaama taunaravata iriha, te Soromonura qaqi kaariraro viva vohaa ankuqaaqai raqikianarove.

³³ Soromonuva ti tauvaqa utu timiteharo Saidoni vatanaaka una variqa nahenti Aastaateravata, Moapihainaaka una variqa Kemosiravata, Amonihainaaka una variqa Molekiravata, vinavuka nutu tuahere vaira kaara te mintirerave.

Viva kia ti aaraqaa koqemakero niraitiro, kia ti tivuqaa avuqavu okara autirave. Viva kia nai qova Devitiva intemakero te tivatauna uvaravata, te virara minti minti iane tuna uvaravata, koqemakero iri vairave.

³⁴ Te kiama Soromonura kauquqihai ekaa Isareri anku qaqlini vara karerave. Tenta kaiqa vaiinti Devitirarao ti, te Soromonura qaqlini kaariraro viva ekaa nai qaqlini variqiro vuaina entara Isareriqaa raqikiqiro viviro, vuru qutu vuanarove. Devitiva te tivatauna uvaravata, te virara minti minti iane tuna uvaravata, koqemakero irirara ti, te mintirerave.

³⁵ Ho Soromonura maaqu vovano avuhainaa vaiintiqama vina entara te vira kauquqihai Isareri anku 10navu varake ai amirerave.

³⁶ Te Soromonura maaqu vo qaqlini kaariraro viva Isareri anku voqaa raqikianarove. Mintiraro ovavano kia qimpa viraitiro, qaqlini itaqiro viintemake, Ieruharemiqi ti kaiqa vaiinti Devitiva kuvuarama tairauka kia taiqa viraiti, vika qaqlini raqikiqiri vivarave. Vaiinti nahenti ti hutu tuahera kaate ti, te Ieruharemi vatuka tenta kaama taunarave.

³⁷ Ho Jeroboamuo, te ai noraiqama kaarirara are Isareri avuhainaa vaiintivano vaihara, ekaa nena muntukavano vaina vataraqaa raqikiqira vinarave.

³⁸ Are ti aaraqaa koqemakera nihara, ti avuqaa avuqavu okaraqai autihara, ti kaiqa vaiinti Devitiva te tivatauna uvaravata, te virara minti minti iane tuna uvaravata, koqemakero irintemakera are iriqira virera, te ai hampata variqi virerave. Te Devitira koqema amitaunanternake, aivata koqema amitaari are kuvuarama terauka Isareriqaa raqikiqiri vivarave.

³⁹ Soromonuva ti uva raqakaira kaara te Devitiva kuvuarama taika qoraiqama nimitrarave. Te mintiaqi vihavata, kia ekaa enta mintiaqi virerave, tiro.

Noravano Kotiva Ahiaara noqihairo vi uvava Jeroboamura tiva amura.

⁴⁰ Ho Soromonuva Jeroboamura arukaare tuvoro viva qetakero ruqemakero Isipini oru Pero vaiinti Sisaakiva vaunaini variqiro vuvaro Soromonuva qutu vura.

Soromonuva qutu vura

⁴¹ Soromonuva varo kaiqarave, viva koqe avu aatoqihairo tu uvarave, ekaa vi uvava vi uvava vuku vo, *Soromonuva varo kaiqarave tu vukuraqiqi qara ntuvatora*.

⁴² Soromonuva ekaa Isareriqaa 40 ihiara raqikiqiro viro vuru qutu vumanta ⁴³ vika vira vaata vare nai qora Devitira Vatukave turaqiqi vuru quntama tovaro vira maaqu Rehoboamuva nai qora vira vatuka varero Isareriqaa raqikiqiro vura.

12

Isareri noti mantaraini vau ankuka Iutaa avuhainaa vaiinti qoririma kora

¹ Vika Soromonura maaqu Rehoboamura noraiqama kaariraro viva tinavu avuhainaaava variarire ti, ekaa Isareri noti mantaraini vau vaiinti nahentika Sekemi vatkaini oru ruvaaqumavi vauvaro Rehoboamuva vivavata mini vura.

² Vi entara Nebaatira maaqu Jeroboamuva Soromonura aatu qetakero ruqema kero vuva Isipini vaihara vi vakaakara iriro, viva vihairo anirantero vura.

³ Viva Isarerini oruntomanta Isareri vika vira aaramakovaro vivavata ekaa Isarerivata Rehoboamuva vaunaini orunte virara tiha, ⁴ Ai qova Soromonuva nora maara, vo maara vo maara tinavuqaa vataimanta tenavu vukaari utiha vo kaiqa vo kaiqa vira vara amitaunarave. Are vi maara tinavu vuaqa ntava timitarera, tenavu Isareri ai vevaaraini vaiha ai kaiqa vara amitaare, ti.

⁵ Vika minti tuvaro King Rehoboamuva vikara tiharo, Ne oru taaramo enta varikema orurante aniqe te tenta avu aatoqiraara ni tiva nimiare, tumanta vika vira mini ke vura.

⁶ Isareri vika vuvaro Rehoboamuva oru qjata vaiinti naampaiqama vuka avu aatoqiraara irareva vura. Haaru vika vira qora Soromonura koqe avu aato ami vauka vuvaro Rehoboamuva vika irero tiharo, Te vi vaiinti nahentika nana uvae nai tiva nimirarave? tiro.

⁷ Viva minti tumanta vika vira tiva ami tiha, Are vi vaiinti nahentika koqe kaiqa vara nimitaqira vihara, vika ai iraa uvararavata eo tirera, vika ekaa enta ai vevaaraini vaiha ai kaiqa vara amitevarave, ti.

⁸ Vika minti tuvarovata, Rehoboamuva naampainavu uva kia iriraitiro, viva oru nai kena vaiinti qaraaka vaiintinavu irora. Vika Rehoboamura hampata qampiqoka koqe avu aato Rehoboamura ami vauka vaura.

⁹ Ho Rehoboamuva vinavuka irero tiharo, Isareri vika tiriara tiha, Ai qova tinavuqaa nora maara vataira vuaqa ntava timitaane tiarave. Ho te nana uvae vika tiva nimirarave? tiro.

¹⁰ Minta tumanta qaraaka vaiinti vinavuka vira hampata qampiqoka tiha, Ho ariara ai qova tinavuqaa maara vataira vuaqa ntava timitaane ti variaka mintima nai tiva nimiane:

Ti qora kempukavano nora kempuka vaivarovata, ti kauqu eranara kempukavano vira kempukavata uri aatara kaivo.

¹¹ Quqaama ti qova niqaa maara vataiva nora maara vaimantavata, te viravata uri aatarake nai nora maara niqaa vatarerave. Ti qova naaquntaqohairo ni ntaihaiava vaimantavata, te viravata uri aatarake auqu vataa naaquntaqohai ni voqavata ntaiharerave, tiane, ti.

Vika Rehoboamurara minti tiane tuvaro ¹² taaramo enta aitarovaro Jeroboamuuvavata ekaa Isarerivata ani King Rehoboamuva tuntemake qaiqaa ani vira tavore.

¹³⁻¹⁴ Avuhainaa vaiinti viva kia naampainavu avu aato amura iriraitiro, viva qaraaka vaiintinavu avu aato amura iriharo vaiinti nahentiara tiharo, Quqaama ti qova niqaa nora maara vatairave. Oho, te niqaa nora maara voqavatama vatarerave. Ti qova naaquntaqohairo ni ruqutiva vaimantavata, te auqu vataa naaquntaqohai ni voqavata ruqutirerave, tiro.

¹⁵ Noravano Kotiva paropeti vaiinti Ahiaara Silohainaara noqihairo Nebaatira maaqu Jeroboamurara tu uvava vivau variarire tiro, Noravano Kotiva vira qaqi kovaro Rehoboamuva kia Isareri vaiinti nahenti antuq avatora.

¹⁶ Ho Isareri vika tavovaro King Rehoboamuva kia vika uva iriare tumanta, vika noraiqamake neveraitiha avuhainaa vaiinti vira nai tiva ami tiha, Tenavu kia Iesira maaqu Devitira ankuvanovauve vauro. Kia tenavu maa vaintira vevaaraini vairerave. Isareri vaiinti nahentivauvo, aniqenavu tentanavu maaqaini anirante vuare. Ne Devitira anku nentavano nentaqaa raqikiate, tivake nai maaqa nai maaqa vura.

¹⁷ Vika vuvaro Rehoboamuva Isareri vokuka Iutaa vataini vauka vikaqaaqai raqiki vaura.

¹⁸ Ho Rehoboamuva Adoniraamura Isarerini atitama kovaro vura. Adoniraamuva kaiqa vaiintiqaa raqiki vauva oruntomanta Isareri vika vira tave, ori aqukeha vira arukora. Vira arukovaro King Rehoboamuva vi uvava iriro, qetakero vaaka nai iqoka kaariqi vaarintero ruqema kero Ieruharemini vura.

¹⁹ Ho vi entaraqaahai Isareri anku „10navu“ kia Devitira ankuqihainaa vaiinti vevaaraini vaireka auti vailha, maa entaravata kia vilka vevaaraini vaireka auti variara.

²⁰ Vi entara ekaa Isareri iruvaro Jeroboamuva Isipi kero qaiqaa orurantero ani vaumanta, vika viva unaini uva varake virara tiha, Are tenavu iainanaini aniane tuvaro, viva vika unaini anumanta vika vira vara noraiqama kovaro viva ekaa Isareri vika avuhainaa vaiintiqama vura. Mintumanta Iutaa ankuqai Devitiva kuvuarama toka vevaaraini vaura.

Semaiaava Kotira uva tiva qoqaiqura

²¹ Rehoboamuva Ieruharemini oruntero Isareri anku 10navu qaiqaa vira vevaaraini variate tiro, vika hampata iqoka raqireva autiharo, viva Iutaa ankuqihairovata Benaminira ankuqihairovata iqoka vaiinti koqeka naarama komanta vika 180,000 vaiinti viva unaini ani ruuaqumavi vaura.

²² Mintuvaro Kotiva paropeti vaiinti Semaiaarara tiharо,

²³ Are King Rehoboamuva inaini oruntera ekaa Iutaa ankuqiraakavata, Benaminira ankuqiraakavata, ekaa vokiaakavata, vikara mintima tiane:

²⁴ Te Noravano Kotika niara mintima turo: Ne kiama Isareri nenta qata vakaa hampata oru raquate. Ne ekaa qaqrake anirante nenta maaqa vuate. Isareri „anku 10navu“ vika nariaraa variate ti, tema vi okarara qovarama kauro, tiro.

Noravano Kotiva Semaiaarara minti tuvaro viva vuru Noravano Kotiva tu uvara vika tiva nimumanta iri, Noravano tuntemake, anirante nai maaqa nai maaqa vura.

Jeroboamuva Kotira tauvaqa utu amitora

²⁵ Ho King Jeroboamuva Sekemi ainqainini vau vatukara „qaiqaa“ kempukaiqama kero autukero katu varero vi vatukaraqi oru vaura. Viva mini vailharo oru Penueli vatukavata qaiqaa kempukaiqama kero autukora.

²⁶ Ho Jeroboamuva nai iriro tiharo, Hauri te raqiki vauna vaiinti nahentika ti qaqrake qaiqaa Devitira anku vevaaraini vaireka, vivorave. ²⁷ Vika Nora Kotira ofaa iha quara amitareka Ieruharemini Nora Kotira Naavuni vivera, vika qaiqaa King Rehoboamura Iutaa avuhainaaraa tinavu nora vaiintive tiha, vika qaiqaa vira vevaaraini vailha ti haruma kevarave, tiro.

²⁸ Jeroboamuva minti tivakero nai avu aato ami vau vaiintika iromanta vika vira tiva amuvaro iriro, viva kori ori varakero purumakau naati qora maraqua/varaha taaraqanta autu kora.

Autu kero vatero viva Isarerira tiharо, Ne Isareri qumina niara aara Ieruharemini vivorave. Ho tavaate. Maara ni Isareri variqatantama autu nimitauro. Vitanta ni „kaivaqaukavara“, Isipihai ntita vare maini viri korave. „Ne vitanta nutu tuahera kaate“, tiro.

²⁹ Ho viva minti tivakero *koriqohairo* aututo purumakaura vo Isarereri *sauti* mantaraini Beteli vatukaqi vuru vatero, vo Isarereri *noti* mantaraini Daani vatukaqi vuru vatora.

³⁰ Ho mintimake Isarereri vika purumakau vitanta quahama nimitareka Daaninivata „Betelinivata,“ oru vaiha Kotira qora okara autu amitora.

³¹ Jeroboamuva vo ainqina vo ainqinaqaa *ofaa* tainta autukero, *ofaa* iha quaraate tiro, viva kia Rivaira ankuqiraka kaama taraitiro, viva qaqi qumina vaiinti kaama tomanta vika vi kaiqara vare vaura.

³² Iutaa vataini vika vo ihi vo ihi „*Haraara Naayu*,“ ovata no entarara iriharo Jeroboamuva Isarerini nora entavanovata variarire tiro, viva 8 tora 15 enta kaama tero Isareriria tiharo, Maa entava tinavu nora entama varianarove, tiro. Minti tivakero vi entaraqaa viva Betelini vaiharo purumakau naatitanta aututorara iriharo, vitanta *ofaa* iha quara nimitora.

Jeroboamuva Betelini vaiharo vaiinti vonavu vo ainqina vo ainqinaqaa *ofaa* iha quara nimitate tiro, viva vika kaamatora.

³³ Ho Jeroboamuva mintima kero nai irikero 8 tora 15 enta kaamatero tiharo, Vi entara Isareri nora entave tivakero, viraqaaahairo Betelini vaiharo nai aututo *ofaa* taintara tataaqa *ofaa* iha quarora.

13

Paropeti vovano tu uvava

¹ Ho Noravano Kotiva tuvaro paropeti vaiinti vovano Iutaihairo Betelini vura. Viva oruntero tavovaro Jeroboamuva *ofaa* tainta tataaqa himpi vaiharo *ofaa* autireva uvavu ²paropeti vaiinti viva oruntero Noravano Kotiva tu uvava naveraitiharo *ofaa* tainta vira atiro tiharo,

Oho, taintavauvu, taintavauvu, te Noravano Kotika ariara mintima turo:

Naantiara Devitira ankuqihai qorainti vainti vo vataate virara Josaiaarave tivarave. Viva noruqamaviro maini ani vaiharo vaiinti vonavu ariqaa vaari vatero arukaa-narove.

Vi vaiintika vo ainqina vo ainqinaqaa *ofaa* iha quara nimite variaka vate vika ariqaa *ofaa* auti variavo. Ho naantiara Josaiaava vi vaiintika ravaaqavu kero vaari ariqaa vatero aru kaanarove. Oho, viva vaiinti vuhaari airima ariqaa iha quara taanarove, tivo, tiro. (2 King 23:15-16)

³ Paropeti vaiinti viva Kotiva tu uvava minti tivakero tiharo, Ho maa taintava tavaaraqaa nkahi viraro, hanta viraqaa vairava vata kanta rauru vuanarove. Taintavano mintiramanta ne tave, ne tiriara mintima tivarave: Oho, viva quqaama Noravano Kotiva ti uvava tinavu tiva timirave, tivarave, tiro.

⁴ Paropeti vaiinti viva minti tuvaro King Jeroboamuva tainta tataaqa himpi vauva „arara itovaro,“ nai kauqu paropeti vaiintiqaa tutukero tiharo, Vira ravaaqavu timitaate, tuvaro vaakama kauqu tututova raqikiviro vauvaro, kia ho qaiqaa raqantaa kaarirava vaura. ⁵ Kia ho vauvaro Noravano Kotiva paropeti vaiinti noqaahairo tuntema kero, tainta viva nkahi vuvaro hanta viraqaa vauva vataini rauru vura.

⁶ Mintuvaro King Jeroboamuva paropeti vaiintiara tiharo, Ike mpo, are tiriara irihara nena Variqa Nora Kotira aarairaro viva ti kauqu koqema timitararo ho variarire, tuvaro paropeti vaiinti viva Nora Kotira aarovaro avuhainaa vaiinti vira kauquvano tota koqema vauntemakero qaiqaa ho vaura.

⁷ Mintuvaro avuhainaa vaiintivano paropeti virara tiharo, Are vate ani ti naavuqi kara ne vairaque te „ariara quaheha,“ vo haika ai amiare, tiro.

⁸ Minti tuvaro paropeti vaiinti viva aqao tiro, Are monu airaira vataanaraqihaira hini haika ti timirera, te kia ai hampata virerave. Te „maa vatukaraqiqi“ vaiha kia karavata namarivata narerave.

⁹ Noravano Kotiva ti qioqama tero tiharo, „Betelini,“ vaihara kiama karavata namarivata naane. Kiama nena anina aararaqaa qaiqaa anirantera maaqaini viraitira, vo aaraqaa anirantera vuane tirave, tiro.

¹⁰ Minti tivakero ho paropeti vaiinti viva kia hoqare anu aararaqaa viraitiro, viva vo aaraqaa anirantero vurama.

Paropeti naampaivano una uva tura

¹¹ Vi entara paropeti naampaivano Betelini vaumanta vira maaqunavu aninte Iutaa paropetivano autu kaiqararavata, King Jeroboamurara tu uvaravata vira tiva amura.

¹² Tiva amuvaro vika qova vika irero tiharo, Paropeti vaiinti viva nana aaraqaae vivo? tumanta vika viva vu aarara nái qora tiva amuvaro ¹³viva tiharo, Nenavu ti donki qerama timitaiqe viraqaa vuare, tumanta donki vira qerama amitovaro viva viraqaa vaarintero

¹⁴ Iutaa paropeti vaiinti avata varero oru tavovaro viva oqiva okara oquiviro vaura. Viva mini vauvaro paropeti naampai viva vira irero tiharo, Are Iutaihainaa paropetivanove? tuvaro viva, Eo, te maa vikave, tiro.

¹⁵ Minti tuvaro naampai viva virara tiharo, Ho ani ti naavuqi kara naane, ¹⁶ tuvaro Iutaihainaa paropeti viva aqao tiro, Te kiama ho ai hampata virarave. Te kia ho maini vahia karavata namarivata nararave. ¹⁷ Noravano Kotiva ti qioqama teharo tiriara tiharo, Are mini vahara kia karavata namarivata naratitra, nena anina aarara qoqaraaraqaqaa kia aniraitira, vo aaraqaqaa oruranteria aniane tirave, tiro.

¹⁸ Minti tuvaro paropeti naampai viva virara tiharo, Tevata ai voqaara paropeti vaiintivanoma vauro. Noravano Kotiva *enseli* vo attaivarovo viva muntu tiriara tiharo, Are vi vaiintira vita varera vuru nena naavuqi kera, kara vokinaravata namarivata amiraro naaire tirave, tiro. Naampai viva minti tivakeharo una uva tura.

¹⁹ Minti tuvaro Iutaa paropeti viva naampai vikantiro anirantero oru vira naavuqi vahiaro karavata namarivata nora.

²⁰ Vitanta kara tainta tataaqa oquivi vauvaro Nora Kotira uvavano paropeti naampai noqihairo qovaraiquvaro ²¹ viva Iutaa paropeti vaiintiara naveraitiharo, Noravano Kotiva ariara mintima tivo:

Are kia te ai uva tiva amunantema kera mintiraitira, are ti uva raqama kaaro.

²² Te ariara maini ani vahara kia karavata namarivata naane tuna uvara raqakehara, are oruranteria maini ani karavata namarivata nama kaaro. Mintianara kaara vika kiama ho ai vaata vare muntu ai kaivaqaukavara quntama taaraqi quntama tevarave, tivo, tiro.

²³ Minti tuvaro Iutaihainaa paropeti viva kara nama taiqa kovaro naampai viva vira donki gerama amitovaro viva viraqaa vaarintero vura.

²⁴ Viva aaraini vi vauvaro *raioni* vovano vira rantakero arukovaro vira vaatavano aaraqaa vaumanta donkivanovata *raionivanovata* vira vaata tataaqa hini hini himpite vaura.

²⁵ Mintumanta vokuka aara viraqaa vi anihia tavovaro vira vaatavano aaraqaa vauvaro, *raionivanovata* vira tataaqa himpitero vaumanta vika tave, oru Betelini vi haikara tavora vaiinti nahenti tiva nimura.

²⁶ Vika tiva nimuvaro paropeti naampai vivavata vi uvara iriro tiharo, Oho, Iutaihainaa paropeti vaiinti vaatama minima vaivo. Viva Nora Kotira no raqa kaira kaara Noravano Kotiva *raioni* vara kaivaro vira aru kaivo. Noravano Kotiva nai tintema kero mintivo, tiro.

²⁷ Minti tivakero viva nai maaqunavuara, Ti donki gerama timitaate, tumanta vika vira gerama amitovaro ²⁸ donki viraqaa vaarintero vi aararaqaa avata varero viro tavovaro paropeti vaiinti vira vaatavano aaraqaa vauvaro donkivanovata *raionivanovata* vira vaata tataaqa mini himpitero vaura.

Raionivano mini vaharo kia vira vaatavata naratitro, kia donkivata arukero ruqe-qaama karaitiro, qaqi himpitero mini vaura.

²⁹ Ho paropeti naampai viva oru vira vaata tavero vira vara vaari donkiqaa vatero vira varero anirantero Betelini vuru virara iqi rata amiteharo quntama tareva vura.

³⁰ Paropeti naampai viva nariara iriharo quvito matipara viraqi vira vuru quntama tora. Viva nai maaqau hampata virara iqi rata amitero tiharo, Mpo ti qata vakao, mpo ti qata vakao, tivaqi viharo vira vuru quntama tora.

³¹ Vira quntama tero paropeti naampai viva nai maaqunavuara tiharo, Mpo, te qutu vuari ne maa vira vaata tataaqama ti vaatavata quntama taate.

³² Noravano Kotiva maa vaiintira noqihairo ti uvava naantiara quqaa vivauma varianarove. Noravano Kotiva Betelini *ofaa* taintara ti uvavave, Sameriaini vo vatuka vo vatukaini una variqa nutu tuaherake varianainiara ti uvavave, ekaa vi uvava quqaa vivauma varianarove, tura.

Jeroboamuva qora kaiqa voqavata varora

³³ Ho vi haikava qovaraiqura Jeroboamuva taverovata, viva kia nai qora okara autura qaqira karaitiro, vika vo aiqina vo aiqinaqaa *ofaa* kaiqa varaate tiro, nai tauka taukae vi kaiqara varaataa uka, viva vika noraiqama komanta vi kaiqara vare vaura.

³⁴ Jeroboamuva mintima keharo Nora Kotira qora okara autu amitora kaara „Kotiva, viva kuvuarama toka vehi autu taiqa kora.

² Mintuvaro Jeroboamuva nai naatara tiharo, Vaiinti nahenti ai viri viraaqamake taveha tiriara naatave tivorave tira, are vo utavaaqa nonku varera, oru paropeti vaiinti Ahiaava Siloni vainaini vuane. Haaru vi vaiintiva tiriara tiharo, Arema Isareri avuhainaa vaiintivano vainarave tirave.

³ Are mpareti 10navu varera, *bisiketi* vonavu varera, *hani* kure vo varera, vuru vira amiharama, are ti maaquara vira irairaro viva nana haikavano viraqaa qovaraiqiaina uvara ai tiva amiarie, tiro.

⁴ Minti tuvaro Jeroboamuva tuntemakero vira naatavano Siloni Ahiaara naavuvano vaunaini oru vura. Ahiaava naampaiqama vuvaro vira avuvanovata qimpa vuvaro vaura.

⁵ Mintuvarovata, Noravano Kotiva Ahiaara tiva amiro tiharo,

Jeroboamura maaquvano rovara varaivaro vira naatavano virara ai ireharo tavareva, ariara vo nahentive tiare tiro, vo nahenti voqaantemra kero are inanaini anianarove. Ho viva anintairara are maa uvarama vira tiva amiane, tiro.

⁶ Noravano Kotiva minti tuvaro Ahiaava vahiaro iruvaro nahenti viva vira naavu qenti vaunaini aniharo vuvuai tuvaro Ahiaava tiharo, Jeroboamura naatavauvu, uriqetaane. Nantiharae are vo nahenti voqaantemra kera aniaro? Te qora vakaakama ai tiva amirerave.

⁷ Are aniranterea vuru maa uvara Jeroboamura tiva amiane. Isareri Variqa Noravano Kotiva ariara mintima tivo:

Te Isareri vaiinti nahenti vikaqihai ai kaamate ai noraiqama kaurara are vika avuhainaa vaiintiqama vuanarave.

⁸ Devitira ankuvano kia Isareriqaa raqikiate ti, te ai noraiqamake ariara vikaqaa raqikiane tunarave. Are avuhainaa vaiinti vaiharavata, are kiama ti kaiqa vaiinti Devitiva intema kera raqikianarave. Devitiva tiriara noraiqaakero iriharo, viva te tivatauna uvara koqemakero iriqiro virave. Viva ti tivuqaa koqe okara avuqavu okaraqai auti vairave.

⁹ Are voqama kerama qora okara auti variaro. Are qora okara autuarava ekaa avuhainauka haaro vauka qora okara autura viravatama aatara kaivo. Are ti tauvaqa utu timitehara origohai maraqura/varaha aututaara, vi haikara vi haikarara ti variqave tianara kaara ti voqama kero arara itaimantama vauro.

¹⁰ Vira kaara te ai Jeroboamura ankuqaa qora haika qovarama karerave. Are Jeroboamuva kuvuarama tena vaiintika, autu vataa vaiintive qumina vaiintive, te ekaama vika aru taiqa karerave. Raha vavukaavaro kia ataaravata vainantemake, te vika aru taiqa karerave.

¹¹ Ai ankuqihai vokika nora vatukaqi vaika qutu vimanta vairivano vika vaata nevarave. Vokika inaara vatukaqi vaika qutu vimanta mati ne vai uvirika vika vaata nevarave, tivo.

Noravano Kotiva ariara mintima tivo, tiro.

¹² Ahiaava minti tivakero Jeroboamura naata uva voqavata tiva amiro tiharo, Are nena maaqaini aniranterea vuane. Ho are mini oruntairaro ai maaquvano qutuma vuanarove.

¹³ Viva qutu viramanta ekaa Isareri vira iq'i rata amite quntama tevarave. Tinavu Isareri Variqa Noravano Kotiva tavaivaro Jeroboamura ankuqihairo vira maaqu vivaqai koqe okara auti vai vaintive vaivarov Noravano Kotiva viraqai qaqi kairamanta vira naitaramake vataqai quntama tevarave.

¹⁴ Ho Noravano Kotiva Isareri avuhainaa vaiinti vo kaama tairaro viva Jeroboamura anku ekaa aru taiqa kaanarove. Vi entava vaakama qovaraiqianarove.

¹⁵ Oho, Noravano Kotiva Isareri vika ruqutiramanta vika qetake, kiaravano namariqi vaiva qaki qaki intemake, vika ntiri ntiri iha vaivarave.

Isareri vika una variga nahenti Aseraa *maraqura/varaha*, vo katari vo katariqaa nkauruke aututaara vi haikarara tinavu variqave ti variara kaara, Nora Kotira araravano voqamakero vikara itaivo.

Nimiri tuqa vataakero raru kaintema kero, Noravano Kotiva Isareri vika kaivaqaukvara koqe vata nimitalraqahairo vara qaqlini kero, Iufaretisi Namari vutu mantaraini vika vara raumpirima kaira qoraiqamavu vaivarave.

¹⁶ Jeroboamuva naivano qora okara auti vahiaro Isarerivata kuntama virivi komanta vikavata viva intemake, qora okara auti variara kaara Noravano Kotiva Isareri vika qoririma kaanarove, tiro.

¹⁷ Ahiaava minti tuvaro Jeroboamura naatavano himpiro anirantero Tirisa vatukaini oruntereo naavuqi oriqete vauvaro vira maaquvano qutu vura.

¹⁸ Noravano Kotiva nai kaiqa vaiinti Ahiaara noqihairo tuntema kero, vi vaintiva qutu vumanta, ekaa Isareri vi vaintira iq'i rata amiteha vira quntama tora.

Jeroboamuva qutu vura

¹⁹ King Jeroboamuva ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave* tu vukuraqi qara ntuvatora. Jeroboamuva nai navutaaka hampata raqu uvavave, viva Isareriqaa raqiku uvavave, vi vukuraqima vairo.

²⁰ Jeroboamuva 22 ihiara Isareriqaa raqikiqiro viro vuru qutu vumanta vika vira vaata vare vuru quntama tora. Jeroboamuva qutu vuvaro vira maaqu Nadaapiva nai qora vatuka varero avuhainaava vaiintiqama viro vaura.

Rehoboamuva Iuttaaqaa raqikura

²¹ Soromonura maaqu Rehoboamuva 41 ihi varakova avuhainaava vaiintiqama viro, Iuttaaqaa 17 ihiara Ieruharemiqii vaharo raqiki vaura. Isareri vika vo vatukaqii vauvarovata, Noravano Kotiva vaiinti nahentii viraqii vahia ti hutu tuahera kaate tiro, Ieruharemi vatukaqai nai kaama tora. Rehoboamura nova Namaava Amoni vatanaa nahentivano vaura.

²² Vi entara Iuttaa vika Nora Kotira avuqaa qora okara autuqi vi vaura. Vika qora okara auti vauva nai kaivaqaukavara qora okara auti vauravata aatara kora kaara Nora Kotira nai voqama kero arara itora.

²³ Vika inaara ainqina voqaa voqaaave, aumaqaara vau katarira okarainive, vukai ori aratehira virara variqave ti vaura. Vika Aseraa *maraqura/varaha* katariqaa nkaurutora viravata arate, vi haikara vi haikara quahama nimite vaura. ²⁴ Vika vi haikara quahama nimite vahia, qora okara vo qara uravata auti vaura. Qorainti vika nai hana gorainti hampata hampi ni vau okararavata auti vaura. (Rom 1:27)

Haaru vo vatanaa vo vatanaaka vi vataraqaa vahia vi okarara vaaqu okara kaurira okara, vo okara vo okaravata auti vauvaro, Noravano Kotiva vi vataraqahairo vika vara qaquin kero vi vataro Isarerii nimura. Ho haaru vo vatanaa vo vatanaaka vaaqu okara auti vauntemake, Iuttaa vikavata vi okarara auti vaura.

²⁵ Rehoboamuva avuhainaava vaiintiqama viro variqiro viharo 5 ihi varakovaro Isipi avuhainaava Sisaakiva nai iqoka vaiinti hampata Ieruharemi vatanaaka hampata ani raqura.

²⁶ Sisaakiva iqoka raqiharo Ieruharemi vatanaaka naatara kero, Nora Kotira naavuqihairove, avuhainaara naavuqihairove, koqe haika, vo haika vo haika ekaa varora. Viva Soromonura *kori* origohairo aututo kainkera vinavuravata varora. „Viva ekaa vi haikara varero ururantero Isipini vura.“

²⁷ Isipi vika kainke vinavura vare vuvaro King Rehoboamuva tumanta vika *bareaasi* origohai kainke vonavu qaiqaa autu amitovaro Rehoboamuva kainke vinavura avuhainaara naavuqaa maimaraara raqiku vaiintika nimumanta vika naavu qentiaqa raqiku entara vi kainkera hirite vaura.

²⁸ Avuhainaava vaiintivano Kotira Naavuqi vireva umanta vi vaiintika kainke vinavura hirite vira hampata vi vaura. Viva vevantero vumanta vika kainke vinavura vare muntu maimaraara raqiku vauka naavuqi vuru vate vaura.

²⁹ King Rehoboamuva ekaa vo kaiqa vo kaiqa varo uvvara vuku vo, *Iuttaa Avuhainaaka Uva Okarave* tu vukuraqi qara ntuvatora. ³⁰ Vi entara King Rehoboamuka, King Jeroboamuka, navutaiqihaa qaiqaa qaiqaavata iqoka raqi vaura.

³¹ Rehoboamuva qutu vumanta vika vira vaata vare vuru nai kaivaqara *Devitira Vatukave* turaqi quntama tora. Vira nova Namaava Amoni vatanaa nahentivano vaura. Rehoboamuva qutu vuvaro vira maaqu Abiaava vira vatuka varero Iuttaa vikaqaa raqiki vaura.

15

Abiaava Iuttaaqaa raqiki vaura

¹ Nebaatira maaqu Jeroboamuva 18 ihiara Isareriqaa raqiki vau entara Abiaava, vira autu vo Abiaamuva, Iuttaa avuhainaava vaiintiqama viro ² Ieruharemiqii vaharo taaramo ihiara „Iuttaaqaa“ raqiki vaura. Abiaara nova Makaava Apasalomura raavuravano vaura.

³ Abiaava kia nai kaivaqava Devitiva nai Variqa Nora Kotiraraqai noraiqaakero iruntemakero iriraitiro, viva ekaa qora kaiqa nai qova „Rehoboamuva“ autuntema kero auti vaura.

⁴ Mintuvarovata, Noravano Kotiva Devitirarao tiro, kia Abiaara anku aru taiqa karaitiro, vira maaquvano nai qora vatuka varero Ieruharemi vatuka kempukaiqama kaarire tiro, qorainti vainti vo Abiaara amura.

⁵ Devitiva Nora Kotira avuqaa niharo kia vira no raqa karaitiro, viva nai qaqi variqiro vu entara koqe okara auturara tiro, Kotiva virarao tiro mintura. Vohaa entaqai Hiti vatanaa vaiinti Uriaara qoraiqama amito entara Devitiva qora okara autura.

⁶ Ho Abiaava vau entara Isarerivata Iutaavata nai ari nai ari i vaura.

⁷ King Abiaava ekaa vo kaiqa vo kaiqa varo uvura vuku vo, *Iutaa Avuhainaaka Uva Okarave* tu vukuraqi qara ntuvatora. King Abiaava Isarer King Jeroboamura hampata iqoka raqura. (2 Sto 13:3-21)

⁸ Abiaava qutu vumanta vira vaata vare *Devitira Vatukave* tunaini vuru quntama tora. Vira quntama tovaro vira maaqu Asaava vira vatuka varero Iutaaqaa raqiki vaura.

King Asaava Iutaaqaa raqiki vaura

⁹ King Jeroboamuva Isarerigaa 20 ihiara raqiki vau entara, Asaava Iutaa avuhainaai vaiintiqama viro, ¹⁰ Ieruharemipi vahiaro 41 ihiara „Iutaqaa“ raqiki vaura. Makaava Apasalomura raaurvuravano viva Asaara taatova vaura. ¹¹ Asaava nai kaivaqava Devitiva autuntema kero, Nora Kotira avuqaa koqe okara autura.

¹² Una variqanavu *maraqura/varaha* quahama nimite vau vatukara, vo vatuka vo vatukaqaa qorainti vonavu nai hana vaiinti hampata hampi ni vau okarara auti vauvaro Asaava Iutaa vataihairo vinavuka nititama kora.

Viva nai qokavara una variqa *maraqura/varaha* autuke voqaa voqaa vatora, viravata vara qaqini kora.

¹³ Vira taatova Makaava una variqa nahenti Aseraara *maraqura/varaha* ohaamakero vaura katariqaa nkauru kero aututora kaara King Asaava nai taatora nora autu vara qaqini kero, katari vira teqa kero Kidaroni Uqitaini muntu iha quara kora.

¹⁴ Vi entara vo ainqina vo ainqinaga una variganavu quahama nimito vatukava vo vatuka vo vatuka qaqi vauvaro Asaava kia vi vatukara qaqini varakaraitiro vaharovata, viva ekaa nai qaqi vau entara Nora Kotirara noraiqaakero iriqiro vi vaura.

¹⁵ Vira qova Kotira kaama amito haikara, *silvaave korive* vo haikave varero, Asaava nai Kotira kaama amito haikaravata varero, ekaa vi haikara Nora Kotira naavuqi vuru vatora.

¹⁶ Vi entara Asaavavata, Isarer King Basaavavata, avuhainaai vaiinti vau entara vitanta qaqqi nai ari nai ari i vaura.

¹⁷ Vo enta Isarer King Basaava iqoka vaiinti ntita varero oru Iutaini Ramaa vatuka varero, vaiinti nahenti kia vi aararaqaa Iutaini vi aniate tiro, ori vaantaavuravano vi vatukara ututuma tora qaiqaa kempukaiqama kero autukora.

¹⁸ Basaava mintuvaro Asaava Nora Kotira Naavuqi monu vato rumuqihairovata, nai avuhainaara naavuqihairovata, ekaa *silvaave korive* varakero nai qiata vaiinti nimiro nititama komanta vika vare Siria vatain Damasikusini King Beni-Hadaativa vaunaini vura.

Beni-Hadaativa Tapirimonira maaqvano vauvaro vira naaqqua Hesioniva vaura.

¹⁹ Ho vika orunte Beni-Hadaatirara tiha, King Asaava ariara mintima tivo: Kaiqetanta haaru titanta qoka tontiqamake variantemake, tetantavata mintimake variare. Te *silvaave, korive*, ai qaqi amitaunara tavaane. Vate are tirirao tira, Isarer ayuhainaara King Basaakantira uva tiva taatau taanara qaqira kairaro viva nai iqoka vaiinti ekaa ntita varero tinavu Iutaa vata kero vuarire tivo, ti.

²⁰ Vika minti tuvaro Beni-Hadaativa King Asaava tu uvarara hove tivakero, nai iqoka vaiintiqa raqiku vaiintika nititomanta vika iqoka vaiinti ntita vare oru Isarer hampata raqireka vika vatuka vonavu vaunaini vura.

Vika oru raqiba Isoni vatukave, Daani vatukave, Abeli-Beti-Maka vatukave vare, Kariri Varuva aumanto vau vataravata, ekaa Napataarira ankuvano u vataravata, varora.

²¹ Siria vika mintuvaro King Basaava „Ramaaqi vahiaro“ vi uvura iriro, viva Ramaa vatuka kempukaiqama kaare tu kaiqara qaqira kero, „getakero, anirantero oru Tirisa vatukaini vaura.

²² Basaava mini oru vauvaro King Asaava uva varakero Iutaa vaiinti nahentiara kempukaiqama kero tiharo, Niqihairo kia voqavanovata maaqaini qaqi qumina variarie. Ne ekaa Ramaini vuate, tumanta vika mini orunte King Basaava Ramaa ori vaantaavura kempukaiqama kareva orive katarive ruvaaquma kero vatora, ekaa vi haikara vare vauvaro, Asaava vi haikaraqohairo Misipaa vatuka ori vaantaavuravata, Benaminira anku vata vaunaini vau vatukara Geba ori vaantaavuravata, autukeharo kempukaiqama kora.

²³ Ho „Iutaa“ avuhainaava King Asaava ekaa vo kaiqa vo kaiqa varo uvarave, viva iqoka raqu uvarave, viva vo vatuka vo vatuka autuke vato uvarave, ekaa vi uvura vi uvura vuku vo, *Iutaa Avuhainaaka Uva Okarave* tu vukuraqi qara ntuvatora. Asaava mintima kero vi kaiqara vare vauva naampaiqama vauvaro qora rovara vovano vira aiquqaa qovarama vura.

²⁴ Asaava qutu vumanta vira vaata vare *Devitira Vatukave* tunaini vuru quntama tora. Quntama tovaro vira maaqu Jehosafaativa nai qora vatuka varero avuhainaa vaiinti vaura.

Nadaapiva Isareri avuhainaa vaiintiqama vura

²⁵ King Asaava taara ihiara Iutaaqaa raqiki vau entara, Jeroboamura maaqu Nadaapiva Isareri avuhainaa vaiintiqama viro vikaqaa taara ihiara raqiki vaura.

²⁶ Viva nai qova autintema kero, Nora Kotira avuqaa qora okara autiharo „una variqanavu *maraqura/varaha* quahama nimitero, Isarerivata kuntama virivi komanta vikavata qora okara viraqai auti vaura. (12:28-33)

²⁷ Ho Nadaapiva Isareriqaa raqiki vauvaro Isakaara ankuqhainaa vaiinti Ahiaara maaqu Basaava, viva nai hana vaiinti hampata Nadaapira arukaina aarara rante vaura.

Vo enta Nadaapiva ekaa nai Isareri iqoka vaiinti hampata oru Pirisia vatanaaka u vatkukar, Gibetoni ututuma tero kuval tero vauvaro Basaava Nadaapiva unaini anintero vira arukora.

²⁸ Vira arukero viva naivano Isareri avuhainaa vaiintiqama viro vaura. King Asaava taaramo ihiara Iutaaqaa raqiki vau entara, Basaava Nadaapira arukora.

²⁹ Ho Basaava Isareri avuhainaa vaiintiqama viro, kia inaaraiqakaa qaqi vairaitiro, viva vaakama Jeroboamura vaintivarave, ankuve, aru taiqa kovaro kia voqavanovata qaqi vaura.

Basaava vika arukovaro haaru Noravano Kotiva nai kaiqa vaiinti Silohainaara Ahiaara noqihairo tu uvava vivauma vaura. (14:9-16)

³⁰ Haaru Jeroboamuva Isareri Variqa Nora Kotira vo okara vo okara qora okara autu amiteharo Isarerivata kuntama virivi komanta vikavata viva untemake, qora okaraqai auti vaura. Ho vira kaara, Nora Kotira arara itovaro vahilo vi haikara qovarama kora.

³¹ King Nadaapiva ekaa vo kaiqa vo kaiqa varo uvvara vuku vo, *Isareri Avuhainaaaka Uva Okarave* tu vukuraqi qara ntuvatora.

³² Vi entara Asaavavata, Isareri King Basaavavata, avuhainaa vaiinti vau entara vitanta qaqiqaq nai ari nai ari nai vaura.

³³ King Asaava Iutaaqaa taaramo ihiara raqiki vau entara, Ahiaara maaqu Basaava avuhainaa vaiintiqama viro Tirisa vatkaini vahilo Isareriqaa 24 ihiara raqiki vaura.

³⁴ Jeroboamuva autintema kero, Basaava Nora Kotira avuqaa qora okara autu amiteharo „una variqanavu *maraqura/varaha* quahama nimitero, Isarerivata kuntama virivi komanta vikavata qora okara viraqai auti vaura.

16

Isareri avuhainauka qora kaiqa varora

¹ Ho Noravano Kotiva Hanaanira maaqu Jehurara tiharo,
Are King Basaara mintima tiva amiane:

² Are qumina vaiintivano variaramanta viraqaaahai te Noravano Kotika ai noraiqama kaurara are Isareri ti v aiinti nahenti avuhainaa vaiintiqama vuanarave.

Are avuhainaa vaiintivano vahila Jeroboamuva qora okara autuntema kera, qora okara autu timitehara ti vaiinti nahenti Isareri kuntama virivi kaaramanta, vikavata are ianantemake, qora okara autu timitaavarao vira kaara ti arara itaimantama vaura.

³ Are mintianara kaara te Nebaatira maaqu Jeroboamura anku vehi autu taiqa kaunantemake, ai Basaavavata, ai vaintivaravata, vehi autu taiqa karerave.

⁴ Ai ankuqhahai vokika nora vatkuaqi vaika qutu vimanta vairinavuvano vika vaata neveravare. Ai ankuqhahai vokika inaara vatkuaqi vaika qutu vimanta mati ne vai uvirikama ani vika vaata neveravare tivo, tiro.

Noravano Kotiva Jehurara minti tuvaro Jehuvi uvvara Basaara tiva amura..

⁵⁻⁷ Basaava Nora Kotira avuqaa Jeroboamuva autintema kero, qora kaiqa autura kaaravata, Basaava Jeroboamura anku vehi autu taiqa kora kaaravata, Nora Kotira voqama kero arara itovaro viva Jehura noqihairo vi uvvara tura.

Ho King Basaava ekaa vo kaiqa vo kaiqa varo uvvara vuku vo, *Isareri Avuhainaaaka Uva Okarave* tu vukuraqi qara ntuvatora.

Basaava qutu vumanta vira vaata vare vuru Tirisa vatkuaqi quntama tora. Viva qutu vuvvaro vira maaqu Elaava vira vatuka varero *[Isareri]* avuhainaa vaiintiqama vura.

Elaava Isareriqaa raqikura

⁸ King Asaava 26 ihiara Iutaaqaa raqiki vau entara, Basaara maaqu Elaava Isareri avuhainaa vaiintiqama viro Tirisa vatkuaqi vahilo taara ihiara Isareriqaa raqikura.

⁹ King Elaava avuhainaava vauvaro vaiinti vo Simuriva Elaara iqoka *kaari* hiniqaa raqiki vauva vaiharo Elaara arukaaina aarara rante vaura.

Vo enta Elaava Tirisa vatukaqi vaharo oru nai avuhainaara naavuqaa raqiki vau vai-intira, Arisaara naavuqi vaharo iha namari ne vauvaro vira avu aatovano vueraiquvoro vaura.

¹⁰ Elaava mintima vuvuro Simuriva oriqetero „iqoka paipeqohairo“ vira arukora. Viva qutu vuvuro Simuriva naivano „Isarereri“ avuhainaava vaiintiqama vura. King Asaava 26 ihia Iutaaqaa raqiki vau entara, Simuriva Elaara arukora.

¹¹ Ho Simuriva „Isarereri“ avuhainaava vaiintiqama viro kia inaaraikakaa qaqi vairaitiro, viva vaakama ekaa Basaara vaintivarave, vira ankuve, aru taiqa kora. Simuriva kia qorainti voqavata vehakuma nimitaraitiro, viva kia Basaara tonti voqavata vehakuma nimitaraitiro, ekaa vika aru taiqa kora.

¹² Simuriva vika arukovaro haaru Noravano Kotiva nai paropeti vaiinti Jehura noqihairo tu uvava vivau vaura. (16:3)

¹³ Basaavavata vira maaqu Elaavavata qora okara autiha Isarerivata kuntama virivi komanta, vikavata vitanta qora okara autuntemake, qumina una variqa *maraqura/varaha* quahama nimitora kaara Isarereri Variqa Nora Kotira voqamakero arara itovaro vaura.

¹⁴ King Elaava ekaa vo kaiqa vo kaiqa varo uvvara vuku vo, *Isarereri Avuhainaaka Uva Okarave* tu vukuraqi qara ntuvatora.

Simuriva Isareriqaa raqikura

¹⁵ King Asaava 27 ihia Iutaaqaa raqiki vau entara, Simuriva „Isarereri“ avuhainaava vaiintiqama viro Tirisa vatukaqi vaharo 7 entanavuqai Isareriqaa raqikura.

Vi entara Isareri iqoka vaiinti Pirisia vatuku vo Gibetonini raqireka autiha, vi vatukara aumanto nái seri naavu maaqa kaqate vaura.

¹⁶ Ho Isareri iqoka vaiinti mini vauka Simuriva Elaara arukaaina aarara rantakero vira aruko uvvara iri, vohaa vi entara vika náiqaa raqiku vaiintira Omurira kaamate naveraitiha, Iriate, Omuriva tinavu Isareri avuhainaava vaiintima vaivo, ti vaura.

¹⁷ Minta tuvaro Omuriva ekaa Isareri iqoka vaiinti hampata Gibetoni ke, Tirisa vatukaini raqireka ani vira ututumate vaura.

¹⁸ Vika ani Tirisa vatuka ututumate iqoka raqi vauvaro Simuriva tavomanta iqoka vaiinti vika vatuka vira aatarakovaro viva avuhainaara naavu vo, kempukaiqamake kaqato naavuraqi oriqetero viraqi vaharo naavu vira iha qumpiarama tovaro, ihavano iteharo vira tatoqa aqukovaro qutu vura.

¹⁹ Haaru Jeroboamuva autintema kero, Simurivavata Nora Kotira avuqaa qora okara autu amiteharo „una variqa *maraqura/varaha* quahama nimitero“, Isarerivata kuntama virivi komanta vikavata qora okara auti vaura.

²⁰ Ho Simuriva ekaa vo kaiqa vo kaiqa varo uvaravata, viva vo aara rantakero Elaara aruko uvaravata, vuku vo, *Isarereri Avuhainaaka Uva Okarave* tu vukuraqi qara ntuvatora.

Omuriva Isareriqaa raqikura

²¹ Ho Simuriva qutu vumanta Isareri vika rairavi taara anku autuvi vaura. Hininavu Ginaatira maaqu Tipinira mantaraini vaumanta, hininavu Omurira mantaraini vaura.

²² Mintimake vaumanta Omurira mantaraini vauka Tipinira mantaraini vauka naatara kovaro Tipiniva qutu vuvuro Omuriva avuhainaava vaiintiqama vura.

²³ King Asaava 31 ihia Iutaaqaa raqiki vau entara, Omuriva avuhainaava vaiintiqama viro Isareriqaa 12 ihia raqiki vaura. Viva hoqare Tirisa vatukaqi vaharo 6 ihia Isareriqaa raqiki vaura.

²⁴ Vaiinti vo vata inaara aiqinavano vaura vatovaro Omuriva vi vataro varareva iharo *silvaa* ori vira maaranavo 68 kilo vaura Semera amiharo vi vataro varero, viraqaa vatuka autukero ori vaantaavuravata autu kora. Vata qora Semera autuua iriharo Omuriva vi vatukara autu nteharo *Sameriave* tura.

²⁵ Omuriva Nora Kotira avuqaa qora okaraqai auti vaura. Viva qora kaiqa varova vira avuni vau avuhainaaka qora kaiqa varoravata uri aatara kora.

²⁶ Nebaatira maaqu Jeroboamuva qora okara autintema kero, Omurivavata qora okaraqai auti vaura. Haaru Nebaatira maaqu Jeroboamuva qumina una variqa *maraqura/varaha* quahama nimiteharo, Isarerivata kuntama virivi komanta, vikavata vira qora okara avataqi vura kaara Nora Kotira arara itovaro vaura.

²⁷ King Omuriva ekaa vo kaiqa vo kaiqa varo uvvara vuku vo, *Isarereri Avuhainaaka Uva Okarave* tu vukuraqi qara ntuvatora.

²⁸ Omuriva qutu vumanta vira vaata vare vuru Sameria vatukaqi quntama tora. Viva qutu vuvuro vira maaqu Ahaapiva vira vatuka varero avuhainaava vaiintiqama vura.

Ahaapiva Isareriqaa raqikura

²⁹ King Asaava 38 ihiara Iutaaqaa raqiki vau entara, Omurira maaqu Ahaapiva avuhainaa vaiintiqama viro Sameria vatukaqi vahiaro 22 ihiara Isareriqaa raqiki vaura.

³⁰ Omurira maaqu Ahaapiva Nora Kotira avuqaa qora okaraqai auti vaura. Viva qora kaiqa varova vira avuni vau avuhainaaka qora kaiqa varoravata uri aatara kora.

³¹ Jeroboamuva autuntema kero, Ahaapivavata qora kaiqa vareharo una variqa *maraqura/varaha* quahama nimitaqiro viro, viraqaaahairo viva vo vatanaa nahenti Jesebelia varatero, una variqa Baalirara quahama amite vaura. Jesebeliva Saidonihainaa King Etabaalira raavuravano vaura.

³² Ahaapiva una variqa Baalirara iriharo Sameria vatukaqi naavu kaqa amitero, viraqi Baalirara *ofaa* taintavata autu amitora.

³³ Viva una variqa nahenti Aseraarara iriharo vira *maraqura/varaha* katariqaa nkauru kero autukora. Ahaapiva qora kaiqa varova vira avuni vau avuhainaaka qora kaiqa varoravata uri aatarakora kaara Isarerri Variqa Nora Kotira vogamakero arara itora.

³⁴ Ahaapiva Isareriqaa raqiki vau entara Betelihainaa vaiinti Hieliva qaiqaa Ieriko vatukavata vira ori vaantaavuravata autukora. Viva vi kaiqara hogaramatero vataqiqi ori ntavato entara vira maaqu hoqarenaava Abiraamuva qutu vura. Vira naantiara Hieliva vaantaavura qenti vaaviarama kero aruto entara vira maaqu ekaara vitihainaava Segupuva qutu vura.

Mintuvaro haaru Noravano Kotiva Nunira maaqu Iosuaara noqihairo tu uvava vivau vaura. (Iosua 6:26)

17

Elaitaava tuvaro kia aaqu ntura

¹ Gileaati vata Tisibe vatukaqi paropeti vaiinti Elaitaava vaura. Viva oruntero King Ahaapirara tiharo, Iriane. Noravano Kotiva Isarerri Variqavano qaqi vaira te vira kaiqa vaiintimia vaura. Te vira autuqaa ariara mintima turo: Vo ihiara kia aaqu ntuarire ti, te qioqama tarerave. Entaqivata varavuvano kia varianarove. Mintiaqiro vi vairaqe te qaiqaa tiariraro aaqu ntuarire, tivakero ² Elaitaava vauvaro Noravano Kotiva virara tiharo,

³ Are maini kera kuari urinaini otu Iotani Namari taqa varera, Keriti Namari tuvinaini otu onkaiqi kukeqvira variane.

⁴ Are mini vahiaro vi namarira nendarave. Te kotikoti uvirinavuara, Ne kara vare vuru vira amiate turo, tiro.

⁵ Noravano Kotiva minti tuvaro Elaitaava viva tunte iro oru Keriti Namari tuvunaini vaura. ⁶ Viva mini vahiaro vi namarira ne vaumanta kotikoti vo enta vo enta toqaqvata, enta ire unainivata, mparetivata mativata vareha vuru vira ami vaura.

⁷ Elaitaava mini variqiro vuvaro aaqu kia ntuarora tiro, vi namarivavata aaharaiqama vura.

Elaitaava nahenti nai maaquntiro kahaqura

⁸ Keriti Namari aaharaiqama vuvaro Noravano Kotiva Elaitaarara tiharo,

⁹ Saidoni tataqaqai vai vatukara Sarefatini vuane. Sarefatiqi tentoqa nahenti vovano vairave. Te vi nahentira tiva amunarave. Viva homa kara ai amianarove, tiro.

¹⁰ Minti tuvaro Elaitaava Sarefatini vura.

Viva Sarefatini oruntero vaantaavura qentiana vahiaro tavovaro tentoqa nahenti vovano iha kaiha nuntu vuvaro viva virara tiharo, Ti namari naataama ivo. Are hoe namari kaqa timinarave? tuvaro ¹¹ vi nahentiva namari kaqareva vuvaro Elaitaava naaveraitiharо, Mparetivata varera viri timiane, tiro.

¹² Minti tuvaro nahenti viva tiharo, Mpo, Nora Kotira ai Variqa qaqi vaira autuqaa te ariara tiha, Kiama te mpareti vatauro. Te *porihi/vorusi* taaraiqaqai taveqi vate, *orivi* vahavera taaraiqaqai *votorihi* vatauro. Te maini ani iha kaiha nuntu vare oru naavuqi inaara kara untake tenta maaqunti nama kaariraro kia kara voqavata vairaqe te tenta maaqunti variqi vi vuru qutu virarave, tiro.

¹³ Viva minti tuvaro Elaitaava tiharo, Kia virara noraiqaakera iriane. Are naavuqi oru kara untaane. Nena untena *porihi/vorusi* qihira tiriara naane irihara inaara mpareti vo unakeria viri timira, viraqaahai nentatantara untaate.

¹⁴ Noravano Kotiva Isareriqaa raqiki vai Variqava mintima tivo:

Ai taveqi *porihi/vorusi* taaraiqa vairavavata, ai *votorihi* vahavera taaraiqa vairavavata, kiama taiqa vuanarove. Vi haikava qaqi variqi vi vairaqe te Noravano Kotika tiariraro qaiqaa aaqu ntuanarove tivo, tiro.

¹⁵ Minti tuvaro tentoqa nahenti viva Elaitavaa tunte ura. Mintuvaro airi enta karavano ho vaumanta Elaitavaavata vitanta nokavata kara neva ho vaura.

¹⁶ Elaitavaa Noravano Kotiva minti mintianarove tu uvava quqaa vauvaro taveqi vau porihiva/vorusiva kia taiqa vuvaro votoriqi vau vahaveravavata kia taiqora.

Vira maaquvano qutu vura

¹⁷ Vo enta tentoqa nahenti vira maaquvano aiha viraara varero variqiro viro vuru qutu vura.

¹⁸ Qutu vuvaro nahenti viva Elaitaarara tiharo, Oho, are Kotira kaiqa vare variara vaiintiva vahara nana kaarae ti mintima timitaaro? Ti qora kaiqa kaara Kotiva ti maaqu ruquutu kaarie tivakerae are maini anira iaro? tiro.

¹⁹ Nahentivanu minti tuvaro Elaitavaa tiharo, Are nena maaqu ti timiane, tivakero vainti vira nai nora kauquqihairo utu varero maarira nai rumuqi vuru nai vaito taintaraqaa kero ²⁰ Kotira aarero tiharo, Mpo, Noravaavo, are ti Variqavano variaro. Maa nahentiva tiqaa koqema kero raqikiharo kara ti timi vaivara are nana kaarae nora maara viraqaa vatehara vira maaqu qaqi kaararo qutu vivo? tiro.

²¹ Minti tivakero viva vainti viraqaa taaramo tataa ropapaiiro Kotira aarero tiharo, Mpo, Noravaavo, are ti Variqavano variaro. Are qaqi kairaro maa vaintiruva qaqi himpimo variqiro vuarire, tiro.

²² Minti tuvaro Noravano Kotiva Elaitavaa vira aaro uvvara iriro vaintiruvano qutu vuraqihairo qaqi vara himpima kovaro qaqi vaura.

²³ Viva qaqi himpuvaro Elaitavaa vira vita varero muntu nai nora amiro tiharo, Ho tavaane. Ai maaquvano qaqlima vaivo, tuvaro ²⁴ vira nova tiharo, Ike, te vate tavaurara are quqaama Kotira kaiqa vare variara vaiintivama variaro. Quqaama Noravano Kotiva ai noqihairo uva ti vaivo, tura.

18

Elaitaaka Obadiaakara tura

¹ Kia aaqu ntuvoro kuarivanoqai itaqiro vuvaro taara ihi aitarovaro vo ihi anintovaro Noravano Kotiva Elaitaarara tiharo, Are Ahaapiva vainaini oru viraqe te aaqu vara kaariraro ntuarire, tuvaro ² viva Ahaapira tavareva vura.

Vi entara Sameriaini karara voqamake aavoqu entava vauvaro ³ Ahaapiva vaiinti vo Obadiaara aarovaro anura. (Obadiaava avuhainaara naavuqaa raqikiharo Nora Kotirara kempukaiqama kero iri vau vaiintiva vaura. ⁴ Haaru Kuini Jesebeliva Nora Kotira paropeti vaiinti aruka arukamaqi vi vau entara Obadiaava paropeti vaiinti 100navu ntitakero 50navu ori onavu voqi kukeqa tero, 50 vonavu onavu voqi kukeqa tero, karavata namarivata vika nimi vaura.)

⁵ Ho Ahaapiva Obadiaara aarama kero virara tiharo, Maini ti ohivata donkivata ne ukauva kiama vaivo. Kaiqetanta vi aniba ruvu namari vainainie, namari aaharaiqama vintunae, ukaura rantaare. Ukau mini vairera, tenta ohivata donkivata kia aru kaari vika qaqi variqi vuuate, tiro. ⁶ Minti tivakero Ahaapiva vo mantaraini ukaura rantareva vuvaro Obadiaava vo mantaraini ukaura rantareva vurama.

⁷ Ho Obadiaava mini niharo Elaitaara rantakero vira viraqama kero tavero vataini hiqinti viro kankakaama viro vaharo tiharo, Nora vaiintio, quqaa are Elaitavaae variaro? tuvaro ⁸ Elaitavaa tiharo, Eo, te maa vikave. Are aniranteria King Ahaapira vuru tiva amiane. Elaitavaa maini ani vaivo, tiane, tiro.

⁹ Minti tuvaro Obadiaava tiharo, Oho, te minti tiariraro Ahaapiva vi uvvara iriro, ti haruma kaanarove. Te nana kaiqa vara kaunara kaarae ti tititehara vi uvvara vuru tiva amiane tiaro?

¹⁰ Noravano Kotiva ai Variqavano qaqi vaira autuqaa te ariara quqaama turo, Avuhainaava vaiintivanu ariara vo vataini vo vataini vaiinti nititaimanta ai rantareka vi aniarave. Avuhainaaka vika aqao ti, Viva kiama maini vaivo, tiavarovata, Ahaapiva kia vika uvvara quqaave tiraitiro, vi vaiintikara tiharo, Ne nenta kauqu aqiqaa aqukeha, Quqaama viva kia maini vaivo tiate, ti vairave. ¹¹ Viva minti ti vaiva vaivara are tiriara vira vuru tiva amira, Elaitavaa maini ani vaivo tiane, tiaro.

¹² Mpo, te vira tiva amirera vuariraro Nora Kotira Maraquravano ai vita varero te kia iri tavaainanaini ai vuru kaantorave. Te Ahaapirara ariara mainima vaivo tiariraro viva kia ai tavaraitiro, vira kaara viva ti haruma kaanarove. Mpo, te vainti naatika Nora Kotira autu tuaheraqi ani, vate maa entaravata mintiaqvi vaunarara are riataarave.

¹³ Jesebeliva Nora Kotira paropeti aruka arukamaqi vi vai entara te paropeti vaiinti 100navu ntita vare, 50navu ori onavu voqi kukeqate, onavu voqi 50navu kukeqate, karavata namarivata vika nimunarave. Are kiae vi uvvara iritaaro?

¹⁴ Te mintunarara are iriataara vaivara nantivarae are tiriara avuhainaava vainaini oruntera virara, Elaitaava mainima ani vaivo tiane tiaro? Oho, viva ti haruma kaanarove, tiro.

¹⁵ Minti tuvaro Elaitaava tiharo, Noravano Kotiva ekaa kempuka vatero qaqi variqiro vi vaiya vaimanta te vira kaiqa vaiintivanoma vauro. Te vira autuqaa quqaama turo, Te vate Ahaapira avuqaa oru vairerave, tiro.

¹⁶ Elaitaava minti tuvaro Obadipaava Ahaapiva vaunaini oruntero vira tiva amuvaro Ahaapiva Elaitaara tavareva vura.

¹⁷ Viva Elaitaara tavero virara tiharo, Oho, are viraqaae variaro? Vate tenavu Isarerai ai okaraqaahai nora maarama varauro, tiro.

¹⁸ Minti tuvaro Elaitaava aqao tiro, Kia tevauve Isareriqaa maara vatauro. Arevata ai qora ankuvata, nema Isareriqaa nora maara vataavo. Noravano Kotiva niara minti mintiate ti uvara qaqrake, ne una variqa Baalira *maraqura/varaha*, vo varaha vo varaha quahama nimite variavo.

¹⁹ Ho are uva vara kaira ekaa Isarerai vataini variaka hihai hihai Kaameli Aiqinaqaa ti hampata ani ruvaaquma vuate. Baalira paropeti vaiinti 450navuvata, una variqa nahenti Aseraara paropeti vaiinti 400navuvata, Kuini Jesebeliva vika kara nimi vaimanta variaka, are vikavata ntita kairamanta Kaameli Aiqinaqaa vuate, tiro.

²⁰ Elaitaava minti tuvaro Ahaapiva hihai hihairo ekaa Isarerai naarama kero, una variqa vika paropetivata naarama komanta oru Kaameli Aiqinaqaa ruvaaquma vura.

²¹ Ruvaaquma vuvaro Elaitaava vaiinti nahenti nivuqaa himpiro tiharo, Ne taara avu aato vataaka, tarentave ne vohaa avu aato vatevarave? Noravano Kotiva viva quqaa Variqavano vairera, ne vira autuqai tuaheraqi vuate. Baaliva quqaa variqavano vairera, ne vira autuqai tuaheraqi vuate, tumanta vaiinti nahenti mini ruvaaqumavi vauka kia uvavata tiraiti, evaara vaura.

²² Evaara vuvaro Elaitaava vikara tiharo, Ekaa Nora Kotira paropeti vaiintiqhai teqaiqa qaqi vauramata una variqa Baalira paropeti 450 variavo.

²³ Ho ne purumakau qora taaraqanta vare viri kaimanta Baalira paropeti vika purumakau vo varaaete. Vika purumakau vira aruke teqake Baalira *ofaa* taintaqaahai iha quarareka qerama taate. Vira qeramate kia iha roqauriraiti, qaqima vataate. Vika minti tevata vika intemake, purumakau qora vo vare qeramate kia iha roqauriraiti, qaqi qeramate vataare.

²⁴ Viraqaaahai ne qaqi kaimanta Baalira paropeti vika nái variqa aaraiqe te tenta Variqa Nora Kotira aaraare. Mintiariraro ta variqavae iha vara kairaro tuvu purumakau ekaa ita taiqa kairava, vivama quqaa Variqavano vaivo, tiro.

Elaitaava minti tumanta vaiinti nahenti tiha, Are koqe uvama tiaro, tura.

²⁵ Minti tuvaro Elaitaava Baalira paropeti vikara tiharo, Ne airitahaa variarara ti, ne naane purumakau varake qerama taate. Qeramate kia iha roqauriraiti, nenta variqa aaraate, tiro.

²⁶ Minti tumanta vika purumakau nimura qeramate viraqaaahai vika Baalira aarora. Vika toqaqihai hoqaramate aaramaqi vuvaro kuari avuvano qiatqaahai uruntora. Kuari avuvano qiatqaahai uruntomanta vika naveraiti tiha, Mpo, Baalio, tinavu uva iriane, tivaqi viha vika *ofaa* tainta ututuma vare vi anihia raukuvi raukuvi i vauvarovata, kia naaruvalihairo vovanota vika uva iriro vo tura.

²⁷ Mintuvaro kuari avuvano qiatqaahai uruvaro Elaitaava vika naarahaima nimitero tiharo, Ne voqavata noraiqaake vira aaraate. Viva variqavanoma vaivo. Viva vo haikara iriharo ni uva kia irivo? Viva vo kaiqae vare vaivo? Viva aarainie vivo? Viva vaitee vaivo? Viva vaitee vairera, ne vira vauruqama kaate, tiro.

²⁸ Elaitaava minti tumanta Baalira paropeti vika qaqi voqavata noraiqaake naveraitiha, nái maara okarara iriha vika *ehaiqohaire/muhupaqohaire*, vahai haikaraqohaire, nái waata teqa taaqama kovaro naare noraiqaakeri ntora. ²⁹ Kuarivano aitarare vitini umanta vika qaqiqa naveraitiha oi aai ti vauvaro 3 *kiroki* quvaro naaruvalihairo kia vovanovata vika uva iruvaro kia vovanovata vo tura.

³⁰ Minti vauvaro Elaitaava vaiinti nahentiara tiharo, Ho, ne maini aniate, tumanta ekaa vika viva unaini vuvaro viva Nora Kotira *ofaa* tainta ravantiaqa kora qaqaa naitarama kero autu kora.

³¹ Elaitaava vira autiharo Iekopira maaqu 12navuara iriharo ori 12navu varora. Haaru Noravano Kotiva Iekopirara tiharo, Te ai qaraaka autu ntava amiteha Isarerirave turo, tura.

³² Ho Elaitaava nora ori 12navu varakero viraqohairo Nora Kotira *ofaa* tainta autu taiqa kero vira auvahini ora quvitova 14 *lita* namari mpiqa vuarirava vaura. ³³ Viraqaaahairo viva taintaqaahai iha raukuma tero purumakau teqa taaqama kero ihaqaa vaari vatora.

Viva vokukara tiharo, Nora tave 4navuqi namari kaqa vare vuru matiqaavata ihaqaavata qihira taate, tiro.

³⁴ Tumanta vika viva tuntemake qihia tovaro viva qaiqaavata mintiate tumanta vika qaiqaavata qihia tovaro Elaitaava tiharo, Qaiqaavatave, tumanta vika taaramo tataa namari kaqa vare vuru taintaqaa qihia tovaro ³⁵ namarivano ihavata putama kero tainta auvahianta tuvhitaro ora quvitora viravata mpiqa kora.

³⁶ Ho eronaini Kotira *ofaa* iha quara amitaarirava anintovaro paropeti vaiinti Elaitaava vi taintara tataaqua oru vahiaro Kotira aarerero tiharo, Noravaavo, are Eparahaamira, Aisaakira, Iekopira, Variqavanoma varario. Ho vate nena kempuka numiqaira maa vaiinti nahentika are Isarereri Variqavano varianarara kankomake tavaate. Te ai kaiqa vaiinti vaiha ai uva avataqi viha maa kaiqara varauanara viravata vika kankomake tavaate.

³⁷ Noravaavo, are te ai aaraaina uvra iriramanta maa vaiinti nahentika ai okara kankomake tave tiha, Noravano Kotiva quqaama Variqavano vaivo. Kaiqe tenavu vira qaiqaa avataqi vuare tiate, tiro.

³⁸ Elaitaava minti tuvaro Noravano Kotiva naaruvaihairo iha tuta kovaro ihavano tuvu Kotira amito *ofaaravata*, ihavata, orivata, ekaa ita aqukero, oraqi vau namariravata ekaa aaharaiqama kora.

³⁹ Mintumanta ekaa vaiinti nahenti vira tave, vataini hiqintivi vaiha tiha, Noravano Kotiva, vivaqaima Variqavanove. Noravano Kotiva, vivaqaima Variqavanove, ti vaura.

⁴⁰ Vika minti ti vauvaro Elaitaava tiharo, Ne una variqa Baalira paropeti vika ekaa ravaaqaqvau kaate. Voqavanovata ruqema kero qaqi vuantorave, tumanta vaiinti nahenti vika ekaa ravaaqaqvau kovaro Elaitaava vika ntita varero Kisoni Namari tuvunaini muntu kero vika aru taiqa kora.

Aaquvano qaiqaa ntura

⁴¹ Vika aru taiqa kero Elaitaava King Ahaapirara tiharo, Ho vaaka oru kara naane. Te iruraro aaquvano noraiqaakero maini ntuvaqiro ani vaivo, tiro.

⁴² Minti tuvaro Ahaapiva kara nareva vuvaro Elaitaava „nai kaiqa vaiinti vataakero, Kaameli Aiqina noraqaa vaarintero kankakaama viro nai viri toritantaqi veva vatero ⁴³ nai kaiqa vaiinti tiharo, Vutuni oruntera nora namari tavaane, tuvaro vira kaiqa vaiintivano orurantero viri vira tiva amiro tiharo, Kia te vo haikavata tavauro, tiro.

Minti tuvaro Elaitaava qaiqaa oru tavaane tuvaro vira kaiqa vaiintivano 6 tataa Elaitaava tunte iro oru tavero ⁴⁴ ekaara 7qama kero oru tavero orurantero viri vira tiva amiro tiharo, Te tavauraro inaara tonavu vaiinti kauqu vuqa voqaava nora namariqahairo oru vi vaivo, tiro.

Minti tuvaro Elaitaava tiharo, Ho kantera Ahaapira muntu tiva amihara tiane: Nena iqoka *kaariqi* vaarintera maaqaini aniranterea vuane. Hauri aaquvano ai kuvai kaantorave, tiane, tiro.

⁴⁵ Minti tuvaro vaakama tonavuvano naaruvaini konkiraquivaro uvaivano noraiqaakero utuvaro nora aequo hoqarama kero ntura. Mintuvaro Ahaapiva nai iqoka *kaariqi* vaarintero anirantero nai maaqa Jeseririni vireva vura.

⁴⁶ Aaraini vi vauvaro Nora Kotira kempukavano Elaitaaraqaa vauvaro viva nai utavaaqa raqantaakero rumpa varero Ahaapira avuni kantamaqiro viviro, Jeseririni oruntora.

19

Elaitaava qetakero Sainai Aiqinaini vura

¹ King Ahaapiva Jeseririni oruntero Elaitaava autu okarara vuru nai naata Jesebelira tiva amura. Elaitaava ekaa Baalira paropeti aru taiqa ko uvaravata vira tiva amura.

² Vira tiva amuvaro Jesebelira arara itovaro viva Elaitaaraaini uva vara kero tiharo, Are ekaa paropeti arukaanantemake, te ninavata aru karerave. Hura, vohaa vi kuari avuraqaa, are kia qutu viraitira qaqi vairera, homa tinta variqanavu ti harukevarave, tiro.

³ Jesebeliva vi uvra tura Elaitaava iriro, viva qetakero kantero nai kaiqa vaiinti vita varero Iutaa vata Besebaini ⁴ muntu kero, nariaraa aahara vatainu vura.

Viva vohaa entara aahara vatainu viviro, oru katari okara aumaqaara oquiviro vahiaro nai qutu vuaina entava vaaka aniarire tiro Kotira aarerero tiharo, Noravaavo, nora maaravano tiqaa vaimanta te kia ho vauro. Are qaqi kairage te qutu vuare. Ti kaivaqaukavara kia koqe vaiinti variantemake, tevata kia koqe vaiinti vauro, tiro. ⁵ Viva minti tivakero katari okaraini vaita vura.

Viva vaite vauvaro vaakama *enseli* vovano vira vauraqama kero tiharo, Himpira kara naane, tuvaro Elaitaava himpiro⁶ viti viri tavovaro ihaqi untato mparetivavata, namari taquvanovata, vira qiataini vauvaro viva mparetivata namarivata namakero qaiqa vaitora.

⁷ Viva vaite vauvaro qaiqa Noravano Kotiva atito *enseliva* vira vauraqama kero tiharo, Himpira kara naane. Are kia maa karara nairera, are kiama ho niaraini vinarave, tiro.

⁸ Minti tuvaro Elaitaava himpiro qaiqa karavata namarivata nama kovaro vi karava vira kempukaiqama kovaro viva 40 entara aatitoraqaaavata entaqivata viviro, Horepi Aiqinave – Sainai Aiqinave, Kotiva u aiqinainira oruntero. ⁹ Viva mini oruntero entaqi ori onavuqi vaitora.

Elaitaava ori onavuqi vauvaro Noravano Kotiva virara tiharo, Elaitao, are nantiharae maaqi variaro? tiro.

¹⁰ Minti tuvaro Elaitaava tiharo, Noravaavo, are ekaa kempuka vataavama variaro. Isareri vaiinti nahenti koqemake ai uva iriate ti, te kempukaiqamake ai kaiqa varau-narave. Te minti uramantavata, Isareri vika ai tauvaqa utu amite, are tiva taana uvava qoririmake, ai *ofaa* tainta, vo tainta vo tainta ravantiqa aquke, vika iqoka paiseqohai ai paropeti ekaa aru kaamanta te vohaiqvano qaqi vauramanta vika tivata aru kareka auti variavo, tiro.

¹¹ Minti tuvaro Noravano Kotiva tiharo, Ho maaqihira veva ntera ainqinaqaa ti Nora Kotika tivuqaa himpira variane. Te Noravano Kotika inaaraqa varike vi ainqinaraqaa vitare virerave, tiro.

Minti tuvaro uvaivanu noraiqaakero utiharo ainqina vira ruqutiharo vo ori vo ori tairi taarima kora. Uvaivanu mintuvarovata, Noravano Kotiva kia uvavi viraqivi vaura. Uvaivanu taiqa vuvaro viraqahairo vaturavano utura. Vaturavano utuvarovata, Noravano Kotiva kia viraqivi vaura.

¹² Vaturavano utuvaro viraqahairo ihavano itora. Ihavano itovarovata, Noravano Kotiva kia ihaqi vaura.

Viraqahairo Elaitaava iruvaro vaiintivano qihaaqama kero vora aatona tiva amimenta kero, uvavano ti vaura.

¹³ Mintuvaro Elaitaava vi uvava iriro, vukai tavunaqohairo nai viri naavuma tero onavuqihairo veva ntero qentiana vaura.

Viva mini vauvaro uvavano virara tiharo, Elaitao, are nantiharae maini variaro? tiro. ¹⁴ Minti tuvaro Elaitaava tiharo, Noravaavo, are ekaa kempuka vataavama variaro. Isareri vaiinti nahenti ai uva iriate ti, te virara noraiqamake iriha ai kaiqa vare vaunarave. Te minti vauravata, Isareri vika ai tauvaqa utu amite, are uva tiva taanara qoririmake, ai *ofaa* tainta, vo tainta vo tainta ravantiqa aquke, vika iqoka paiseqohai ai paropeti ekaa aru kaamanta te vohaiqvano qaqi vauramanta vika tivata aru kareka auti variavo, tiro. (Rom 11:2-4)

¹⁵ Elaitaava minti tuvaro Noravano Kotiva tiharo, *Ho ururanterea Damasikusi tataaqaa aahara vataini vuane. Mini otuntera vaiinti vo Hasaelira qiatagaqaa vahavera aqu amitera vira kaama tairaro viva Siria vatanaaka avuhainaa vaiintiqama vuarire.*

¹⁶ *Viraqahairo oru Nimisira maaqu Jehura qiatagaqavata vahavera aqu amitera vira kaama tairaro viva Isareri avuhainaa vaiintiqama vuarire.*

Viraqahairo oru Abeli-Meholahainaa vaiinti Safatira maaqu Elisaara qiatagaqavata vahavera aqu amitera vira kaama tairaro viva naantiara paropeti vaiinti vaharo ai vatuka varaarire.

¹⁷ *Naantiara Hasaeliva avuhainaa vaiintiqama viro vaiinti nahenti airitaha arukaa-narove. Hasaelira aatu qetake ruqemake vi anika Jehuva vika arukaanarove. Jehura aatu qetake ruqemake vi anika Elisaava vika arukaanarove.*

¹⁸ *Vinavuka mintiqevata, te Isareri vaiinti nahenti 7,000 navu kaama taari vika qaqi viavarave. Vika ti uva iriqi viha, kia una variqa Baalirara tori kauru ara amiteha, vira maraqua/varaha moqake variaka variarave, tura. (Rom 11:4)*

Elaitaava Elisaara aarora

¹⁹ Noravano Kotiva minti tuvaro Elaitaava Sainai Aiqlina kero oru Safatira maaqu Elisaara rantareva viro oru tavovaro viva vaiinti 11navu hampata naaho kaiqa vare vaura. Elisaava purumakau taaraqanta rumpa tomanta vitanta vata vauruaina haikara rarau vare vi vaumanta vira kena vaiinti 11navuvata vira aanante avuni mintiaqivi vauvaro Elisaava vika naantiaraini vi vaura. Viva vi vauvaro Elaitaava oruntero nai vukai tavuna aqutora ravaqakero Elisaara aqu amitora.

²⁰ Vira aqu amitoraro Elisaava nai purumakautanta mini kero kante Elaitaara avataqiro viro tiharo, Are ti qaqi kairaqe te tenta noka qoka oru moqake vitantara te vuro

tivake, ani ai vataake vuare, tuvaro Elaitaava, Ho anirantera vuane. Kia te ai ravaaqavu kauro, tiro.

²¹ Minti tuvaro Elisaava oru nai purumakautanta arukero vitantaqaa rumpato katarira ruvarikero, iha viraqohairo purumakau untakero, nai navunaaka nimumanta nora. Mintimakero viraqaahairo Elisaava Elaitaara avataqiro viharo vira kahaqura.

20

Siria vika Isareri hampata iqoka raqura

¹ Siria avuhainaava Beni-Hadaativa Isareri hampata iqoka raqireva iharo ekaa nai iqoka vaiinti ruvaaquma komanta, avuhainaaka 32navuvata nai iqoka kaarivata ohivata vare vira kainke hiri amitareka vira hampata vivi, Sameria vatuka ututumate Isareri hampata raqi vaura.

² Beni-Hadaativa vaiinti vonavu Sameria vatukaqi nititomanta vika Isareri King Ahaapiva vaunaini orunte virara tiha, Beni-Hadaativa ariara mintima tivo: ³ Nena korivata, silvaavata, ti timira, nena naata vainti koqekavata ti timiane, tivo, ti.

⁴ Minti tuvaro King Ahaapiva vika tiva nimiru tiharo, Ne Beni-Hadaatira mintima tiva amiate: „Are ti avuhainaava vaiinti noravano variaro. Ho are tianantemake, te ai amirerave. Tevata ekaa te una haikavavata are iara haikavama vaivo tiate, tiro.

⁵ Minti tumanta vika Beni-Hadaativa vaunaini oru vi, qaiqaa orurante Ahaapiva vaunaini aninte tiha, Beni-Hadaativa ariara mintima tivo: Te ai naariha nena korivata silvaavata, nena naata vaintivata, ti timiane tunarave.

⁶ Te voqavata qaiqaa ai naarirerave. Hura vohaa maa kuari avuraqaa te tenta kaiqa vaiinti nititaari vika ai avuhainaara naavuqvivata ai qjata vaiintinavu naavuqvivata rantaqvihi, ekaa koqe haika vatera ranta vare maini viri kevarave, tivo. Beni-Hadaativa ariara mintima tivo, ti.

⁷ Vika minti tuvaro King Ahaapiva ekaa Isareri nora vaiinti naarama kero vikara tiharo, Oho, ne tavaate. Vi vaiintiva „voqavata ti naariharoma, tinavu anomakero qoraiqama timitareva auti vaivo. Hoqare viva vaiinti vonavu nititero ti naata vaintive, korive silvaave, varareva naarimanta te vi haikara vira amirerave tunarave, tiro.

⁸ Minti tumanta Isareri nora vaiintivata vaiinti nahentivata ekaa vika tiha, Are kia vira uva iriane. Viva naarumatai haikaravata kia vira amiane, ti.

⁹ Vika minti tuvaro Ahaapiva Beni-Hadaativa nititoka tiva nimiru tiharo, Ne vuru ti nora vaiinti King Beni-Hadaatira tiva amiate: Are hoqare naarihara tiana uvarara te hovema turo. Are naantiara naarihara tiana uvvara virara te kiama hove turo, tumanta vika vuru Beni-Hadaatira tiva amura.

¹⁰ Vira tiva amuvaro viva qaiqaa vika Ahaapiraini nititero virara tiharo, Oho, „are minti tiaravera,“ te tenta iqoka vaiinti nititaari vika Sameria vatuka anomake rukavu raakavuma kaivaro konkomaiqama vuuanarove. Vika kia ho mintivera, homa tinavu variqa vika ti harukevarave, tiro.

¹¹ Minti tuvaro King Ahaapiva vika tiva nimiru tiharo, Ne mintima Beni-Hadaatira tiva amiate: Iqoka vaiinti taruva iqoka raqireva iharo kia nai mahuta naane tiraitiro, viva iqoka naane aatarakero viraqaahairo nai mahuta tirave, tiro. ¹² Minti tumanta vika Beni-Hadaatira tiva amireka vura.

Beni-Hadaativa nai hana avuhainaaka hampata *seri* naavuqi iha namari ne vaumanta vika vuru vira tiva amuvaro iriro, nai iqoka vaiintiara tiharo, Ne iqoka raqireka qera iha variate, tumanta vika qera i vaura.

¹³ Vika qera i vauvaro paropeti vaiinti vovano King Ahaapiva vaunaini oruntero virara tiharo, Noravano Kotiva ariara mintima tivo:

Are tavaane. Siria iqoka vaiinti vika nai airitahaa variavo. Ho vate te vika ai kauquqi kaarirara viraqaahairo are te Noravano Kotika vaunarara kankoma kera irinarave, tivo, tiro.

¹⁴ Minti tuvaro Ahaapiva paropeti vaiinti vira irero tiharo, Tauka taukae maihai oru iqoka raqivarave? tuvaro paropeti viva vira tiva amiro tiharo, Noravano Kotiva mintima tivo:

Qaraaka qjata vaiinti vo vata vo vataqaa raqiki variaka vevaaraini variaka, vikama „Siria hampata“ raqivarave, tiro.

Minti tuvaro Ahaapiva qaiqaa irero tiharo, Tavave qaraaka vaiinti vika ntita varero vuuanarove? tuvaro paropeti viva vira tiva amiro tiharo, Are nenave, tiro.

¹⁵ Paropeti viva minti tuvaro Ahaapiva qaraaka qjata vaiinti vo vata vo vataqaa raqiki vauka vevaaraini vauka 232 naarama ruvaaquma kero, Isareri iqoka vaiinti vokukavata

7,000 ruvaaquma kovaro¹⁶ kuarivano qiataqaa oruntomanta vika Siria iqoka vaiinti hampata raqireka vura.

Avhainaaka 32navu Beni-Hadaatira kainke hiri amitareka anuka vira hampata *seri* naavuqi iha namari neha vueraiqama vumanta¹⁷ Isareri qaraaka iqoka vaiinti vika naane avuni iqoka raqireka vura.

Vika vumanta Beni-Hadaativa ampeeqiha tavaate tiro nititoka vika Isareri tave, vuru Beni-Hadaatira tiva ami tiha, Iqoka vaiinti vokiaka Sameria vatukaqihai maini aniamo, tuvaro¹⁸ viva tiharo, Vika iqoka raqirekae aniamo, maateraqirekae aniamo? Ne kia vika arukaraiti, qaqi ravaaqavu timitaate, tiro.

¹⁹ Viva minti tumanta qaraaka vaiinti vika Sameria vatukaqihai anumanta Isareri iqoka vaiinti vokuka vika naantiara aninte,²⁰ vohaiqa vohaiqavano Siria iqoka vaiinti vohaiqa vohaiqa hampata raqihai vika ari kora. Mintumanta Siria vokuka qetake ruqemake vumanta Isareri vika aru ntataqi vura. Beni-Hadaativa ohiqaa vaarintero ruqemakero vumanta Siria vokuka ohiqaa vauka vikavata ruqemake vura.

²¹ King Ahaapiva „nai iqoka vaiinti hampata,“ oru iqoka raqiharo Siria iqoka vaiinti airitaha arukero vika ohivata iqoka *kaarivata* raqikero varoro.

²² Ho vira naantiara paropeti vaiinti viva qaiqaa Isareri avuhainaava vaunaini oruntero virara tiharo, „Ho iriane.“ Qaraaka ihi anintairaro Siria avuhainaava qaiqaa Isareri hampata iqoka raqireva anianarove. Virara irihara are kia qaqi vairaitira, Siria hampata iqoka raqina okarara irihara are geramatera variane, tura.

Siria qaiqaa iqoka raqireka anura

²³ Ho Beni-Hadaatira koqe avu aato ami vauka virara tiha, Isareri variqanavu ainqinaini varia variqauka variamantara ti, tenavu Isareri hampata ainqinaini iqoka raqi vauramanta vika tinavu haatara kaarave. Tenavu uqitaini vaiha vika hampata iqoka raquarerata, tenavu homa vika naatara kararave.

²⁴ Are mintima iane: Are avuhainaaka iqoka vaiintiqaa raqikiaka qaqini vara kaira, nina iqoka vaiintiqaa raqikika vika vatuka varaate.

²⁵ Are tota iqoka vaiintive, ohive, iqoka *kaarive*, kakakima kaanarara iriharama, vate qaiqaa airi iqoka vaiintive, ohive, iqoka *kaarive*, ruvaaquma kera vataane. Are mintiraqe tenavu oru uqitakanta iqoka raqihai homa Isareri naatara kararave, tuvaro King Beni-Hadaativa vika tunte ura.

²⁶ Qaraaka ihi anintovaro Beni-Hadaativa Siria iqoka vaiinti ruvaaquma kero Isareri hampata iqoka raqireva Afeki vatukaini oru vaura.

²⁷ Mintumanta Isarerivata ruvaaqumavi, nái iqoka raqi haikaravata vare, Siria hampata iqoka raqireka oru Siria avuni nái *seri* naavu maaqa taara mantaraini kaqate vaura. Siria naavu maaqa kaqatova vo kanta vo kanta airi mpiqaro vauvaro, Isareri naavu maaqa kaqatova kia airi vairaitiro, taaraqantaaqaa memeraa ruvaaqumavi vauntemake vaura.

²⁸ Paropeti viva „qaiqaa“ King Ahaapiva vaunaini oruntero vira tiva amiro tiharo, Noravano Kotiva mintima tivo:

Siria vika tiriara viva ainqinainiqai vai variqava vahiaro kia uqitaini vai variqavama vaivo, tiarave. Ho vira kaara te vika iqoka vaiinti airitaha ai kauquqi vataarirara viragaahairaa are te Noravano Kotika vaunarara kankoma kera irinarave, tivo, tiro.

²⁹ Minti tumanta Isarerivata, Siriavata 7 entanavu nái *seri* naavu maaqa kaqatonaini variqi vi, 7 entaaqaa vika iqoka hoqaramate, Isareri Siria iqoka vaiinti 100,000 arukora.

³⁰ Arukomanta hini kuka ruqemake Afeki vatukaiqi oru vauvaro ori vaantaavuravano rapatutiro iqoka vaiinti 27,000 aru taiga kora. Beni-Hadaativavata ruqemakero vi vatukaiqi oru naavu vo vira naantiaraini vau *rumuraqiqi* kukeqaviro vaura.

³¹ Beni-Hadaativa viraqiqi vaumanta vira kaiqa vaiintinavu virara tiha, Mpo, Isareri avuhainaaka vaireka, vika nái navutaaka aaqurihamu nimite variakave tiamanta irunarave. Ho are tinavu qaqi kairage tenavu kovaara utavaaqa nonkute, naaqunta auntaqi rumpate Isareri avuhainaava vainaini vuure. Tenavu mintiariraro viva ai vehakuma amitaanaroe, kiae vehakuma amitaanarove? ti.

³² Vinavuka minti tivake kovaara utavaaqa nonkute, naaqunta nái auntaqi rumpate Isareri avuhainaava vaunaini orunte tiha, Mpo, ai kaiqa vaiinti Beni-Hadaativa ariara ike mpo tiharo ti qaqi kairage variqi vuare tivo, tuvaro Ahaapiva tiharo, Ike, viva qaqqie vaivo? Viva ti qata vakaavama vaivo, tiro. ³³ Ahaapiva virara ti qata vakaave tumanta vika vi uvara iri, Ahaapiva tinavu quahama timitaanarove tivake tiha, Eo, Beni-Hadaativa ai qata vakaavama vaivo, tuvaro Ahaapiva vira oru vita vare maini aniate tiro.

Ahaapiva minti tuvaro Beni-Hadaativa kukeqavi vauraqihairo vevantovaro Ahaapiva virara ho ti iqoka *kaaripi* vaarintaane tuvaro viva viraqii vaarintora.

³⁴ Beni-Hadaatativa viraqi vaarintero Ahaapirara tiharo, Mpo, haaru ti qova iqoka raijiharo ai qora vatukanavu varora, te vi vatukara qaiqaa nina amirerave. Haaru ti qova Sameria vatukaqi koqaa kaiqa varontema kera, arevata homa Damasikusiqi koqaa kaiqa, vo kaiqa vo kaiqa varenarare, tuvaro Ahaapiva hove tiro, Te vate are tiana uvvara irihama, ai kuvantu karerave, tivakero Beni-Hadaatikantiro uva tiva taatautero, viraqaahairo Beni-Hadaatira qaqi kovaro vura.

Paropetivano tu uvvara

³⁵ Ho vi entara paropeti vaiinti vokuka vauvaro Noravano Kotiva paropeti vaiinti vorara maa uvvara tiane tuvaro viva nai kena paropeti vaiinti tiharo, Are nena paipaqohaira ti tivaata teqa kaane, tuvaro vi vaiintiva kia vira uva iriraitiro, kia mintura.

³⁶ Vira uva kia iriraitiro vauvaro paropeti viva tiharo, Are Noravano Kotiva ti uvvara kia irianara kaara, are ti maini kera viraro *raionivano* ai arukaanarove, tuvaro vi vaiintiva vuvvaro *raionivano* vira tavero arukora.

³⁷ Vira arukovaro paropeti vaiinti viva vainti vo rantakero virara tiharo, Are nena paipaqohaira ti tivaata teqa kaane, tuvaro vi vaiintiva viva tunte iro vira vaata teqa kora.

³⁸ Vira vaata teqa kovaro paropeti viva oru aara auvahini Isareri avuhainaa vaiinti veka vaura. Vira viri viraqamakero tavaantorave tiro, viva tavunaqohairo nai viri naavuma tero vaura.

³⁹ Ho viva aara auvahini vauvaro avuhainaaava aaraqaa aitarero vi vauvaro paropeti vaiinti viva vira aarero tiharo, Nora vaiintio, te iqoka raiqi vauraro iqoka vaiinti vovano navutaara vo ravaaqavu kero te unanaini vita vuru kero tiriara tiharo, Are maa vaiintiraqaa raqikiane. Viva ruqema kero virera, are vira vatuka varera qutu vinarave. Tenavu kia ai arukaarera, are *silvae* monu 3,000 koqaa inarave, tivakero vivo.

⁴⁰ Ho te vo kaiqa vo kaiqa vareha kia viraqaa koqemake raqikuraro viva ruqema kero virave, tuvaro avuhainaaava tiharo, Oho, are minti tiharama nenaqaa uva vataaro, tiro.

⁴¹ Minti tuvaro paropeti vaiinti viva vaakama nai qjataqaahairo tavuna naavumatora qaqini varakovaro Isareri avuhainaaava tavovaro viva paropeti vaiinti vovano vaura.

⁴² Paropeti vaiinti viva avuhainaara tiharo, Noravano Kotiva ariara mintima tivo:

Te vi vaintira arukaane tuna vaiintira are qaqi kaararo viva ruqema kero virave.

Vira kaara are nena vira vatuka varera qutu vinarave. Vira vaiinti nahenti kia qoraiqama vimanta, ai vaiinti nahentima qoraiqama vivarave, tiro.

⁴³ Paropeti vaiinti viva minti tuvaro Isareri avuhainaa vaiinti arara itovaro viva tomakero nai maqa Sameriaiini vura.

21

Nabotira uaini naaho

¹ Ho King Ahaapira naavu vo Jeseriri vatukaini vauvaro vira tataaqa vaiinti vo Nabotira uaini naahovano vaura.

² Ahaapiva Nabotirara tiharo, Ai *uaini* naahovano ti avuhainaara naavu tataaqa vairara tira, are vira ti timirage te viraqi naahara utuare. Are vi vataro ti timirera, te koqe vata vo ai amirerave. Are kia vi vataro varareva irera, te ai vata vareha, koqe koqaama ai amirarave.

³ Viva minti tuvaro Nabotiva aqao tiro, Noravano Kotiva qioqamato uvvara irihama, te tenta kaivaqaukavara u vataro kia ai amirerave, tiro. (Wkp 25:23; Kaarantura 36:7)

⁴ Nabotiva minti tura kaara, Ahaapira arara itovaro tomakero nai naavuqi oru nai vaite vau taintaraqaa vaiteharo nai viri porovaini vatero vaharo kia kara nareva auti vaura.

⁵ Mintimakero vauvaro vira naata Jesebeliva vira irero tiharo, Nana kaarae are uua viri aratera variaro? Nantivarae kia kara nareva auti variaro? tiro.

⁶ Minti tuvaro Ahaapiva nai tiva amiro tiharo, Te Jeseririhainaa vaiinti Nabotirara tiha, Are nena *uaini* naaho ti timirage te monu ai amiare. Are kia monu varareva irera, te *uaini* naaho vo ai amirerave, turaro viva tiharo, Kia te tenta *uaini* naaho ai amirerave, tira kaara te minturo, tiro.

⁷ Minti tuvaro Jesebeliva tiharo, Are Isareri avuhainaava vahara nantivarae toihara variaro? Kia toiane. Himpira kara naane. Te Nabotira naaho varake, ai amirerave, tiro.

⁸ Minti tivakero Jesebeliva Ahaapira autuqaa qara vonavu ntuvakero King Ahaapira ringiqohairo taatau kero, qara vinavura varakovaro Nabotira vatukaini nora vaiintinavuve, nora autu vataa vaiintive vika unaini vura.

⁹ Jesebeliva qaraqi mintima tiro:

Ne enta vo kaamate vi entaraqaa vaiinti nahentiara kara aurama taate tivake, vika ruuvaqumake Nabotirara tiha, Are avuni vai taintaraqaa oquvuane, tiate.

10 Viva oquivi vairamanta ne qora vaiintitanta ntita virike vitantara Nabolira avuqaa vahia virara mintima tiate: Naboliva Kotiraravata avuhainaa vaiintiaravata qora uva tiharo vitantara vaaquqama vuate tirave, tiate. Vitanta minti timanta viraqaahai ne Nabolira ravaaqavu vare muntu vatuka aaqaini ke, oriqohai vira ruqutuqi vivi, vira aru kaate, tiro.

11 Minti tuvaro Jeleririqi vauka, nora vaiintivata, nora autu vataakavata Jesebeliva tunte ura.

12 Vaiinti nahenti kara aurama taate ti, vika enta vo kaamate, vi entaraqaa Nabolira vita vare vaiinti nahenti nivuqaa taintaqaa oquivuane tuvaro oquivi vaumanta¹³ qora vaiintitanta oru Nabolira avuqaa vahia Naboliraqaa una uva oqike tiha, Naboliva Kotiraravata avuhainaa vaiintiaravata qora uva tiharo vitantara vaaquqama vuate tirave, tumanta vika Nabolira vita vare vatuka aaqaini muntu ke oriqohai ruqutuqi vivi, vira arukora.

14 Vika vira aruke Jesebeliraini uva varake tiha, Tenavu Nabolira oriqohai ruqutuma kauro, tuvaro¹⁵ Jesebeliva iriro, nai vaati Ahaapirara tiharo, Ho himpira oru Nabolira *uaini* naaho varaane. Vi naahora kia ai amireva i vaiintivat qutuma vivo, tuvaro¹⁶ Ahaapiva vaaka himpiro Nabolira *uaini* naaho varareva otu vura.

17 Viva mini vuvaro Noravano Kotiva paropeti vaiinti Tisibehainaara Elaitaarara mintima tiro:

18 Are Isarerri avuhainaava Sameria vatukaqi vainaini otu vuane. Viva Nabolira *uaini* naaho varareva vivo.

19 Are mini otuntera Ahaapirara mintima tiane: Noravano Kotiva ariara mintima tivo:

Are vaiinti vo arukera, vira naahovata varareva auti variaro, tivo.

Noravano Kotiva qaiqaa tiharo: Nabolira naare ntaira vairinavu mpuike naanaini, vohaa minima vika ai naarevata mpuike nevarave, tivo. Minti tivakera Ahaapira tiva amiane, tiro.

20 Noravano Kotiva minti tuvaro Ahaapiva naahoqira vunaihairo Elaitaara tavero tiharo, Ti navutao, are ti rantakera iaro, tuvaro Elaitaava nai tiva amiro tiharo, Eo, te ai rantama kauro. Are voqama kera Nora Kotira avuqaa qora kaiqa vare varianara kaara viva ariara mintima tivo:

21 Te Noravano Kotika ai anku voqamake qoraiqama nimiteha are kuvuarama tena qoraintika, nora vaiintive qumina vaiintive, ekaama aru taiqa kaainarave.

22 Are Isarerri vaiinti nahenti kuntama virivi kaaramanta vika ai aanante qora kaiqa varaara kaara ti voqama kero arara itaimanta te Nebaatira maaqu Jeroboamura ankuvata, Ahiaara maaqu Basaara ankuvata, qoraiqama nimitaunantemake, ai ankuvata qoraiqama nimitarerave, tivo.

23 Noravano Kotiva ai naata Jesebelirara mintima tivo:

Jeleriri ori vaantaavura tataaqa vairinavu Jesebelira vaata nama kevarave.

24 Ai vaintivara vokiaka nora vatukaqi vaika qutu vimanta vairivano vika vaata nevarave. Vokiaka inaara vatukaqi vaika qutu vimanta mati ne vai uvirika vika vaata nevarave tivo, tura.

25 (Jesebeliva nai vaati vihi vaahi ti vauvaro Ahaapiva Nora Kotira avuqaa nai voqamakero uritarakero qora okara auti vau vaiintiva vaura.

26 Amoriti vatanaaka una variqanavu quahama nimiteha vaaqu okara auti vauntema kero, Ahaapivavata una variqanavu quahama nimiteha vaura. Haaru Noravano Kotiva Amoriti vatanaaka nái vataqaahairo vara qaqini komanta Isarerri vika vata varora.)

27 Ho Elaitaava Ahaapirara minti tuvaro viva nai utavaaqa qunahi qaanahima kero, kovaara utavaaqa nonkutero kara kia naraitiro vaura. Viva vaitareva iharo kia kovaara utavaaqa qaqini vara karaitiro, vira hampata vaitovaro vira muntukavano qoraiquvaro viva evaara vi ani vaura.

28 Mintimakero ni vauvaro Noravano Kotiva paropeti vaiinti Elaitaarara tiharo,

29 Ahaapiva ti tivuqaa nai autu vatainiqama kero ni vaira, arevata taverae iaro?

Viva ti tivuqaa nai autu vatainiqama kero ni vaimantara ti, te vira anku voqamake qoraiqama nimitaainara kia viva qaqi variaina entara qovarama karaiti, te varike naantiara vira maaquvano variaina entara Ahaapira anku qoraiqama nimitarerave, tiro.

Noravano Kotiva paropeti vaiinti Elaitaarara minti tura.

¹ Taaramo ihiara Siriavata Isarerivata kia iqoka raqiraiti, maateraiqamake vaura. ² Ho taaramo ihi aitarovaro Iutaa King Jehosafaativa Isareri King Ahaapira, tavareva Isarerini vura.

³ Vi entara Ahaapiva nai qiata vaiintiara tiharo, Ne kiae iriavo? Ramoti vatuka Gileatti vatainai vaira, tenavu Isareri ura vatukava vaimanta Siria vika vira tuataavo. Nantihae tenavu vika kauquqihai kia vira qaiqaa varauro? tiro.

⁴ Viva minti tivakero Jehosafaativa irero tiharo, Te tenta iqoka vaiinti hampata, qaiqaa Ramoti vatuka varararua vuarirara, are hoe tinavu hampata vinarave? tuvaro Jehosafaativa nai tiva amiro tiharo, Eo, are mintiraqe te ai kahaqirerave. Ti iqoka vaiintive, ohive, ekaa vika homa ai kahaqivarave, tiro.

⁵ Jehosafaativa minti tivakero Isareri avuhainaa vaiintiara tiharo, Are avuni Nora Kotira virara irehara tavaane, tiro.

⁶ Minti tuvaro King Ahaapiva paropeti vaiinti vokuka naarama komanta vika 400 vano ruuaquamavi vauvaro viva vika irero tiharo, Te oru iqoka raqiba Ramoti vatuka vararera vuainarave, kiae vuainarave? tiro.

Minti tumanta vika nai tiva ami tiha, Homa vinarave. Noravano Kotiva vi vatukara ai kauquqima vataanarove, ti.

⁷ Vika minti tuvarovata, Jehosafaativa tiharo, Kiae Nora Kotira paropeti vaiinti vovano vaivo? Viva vairera, tetanta vi vaiintiravata ireha tavaare, tiro.

⁸ Minti tuvaro Ahaapiva virara tiharo, Vovano vaivo. Viva Imiara maaqu Mikaiavave. Ho vi vaiintiva wo enta kia tiriara koqe uva tiraitiro, qora haikavano tiqaa qovaraiqanara viraraqai ti vairara ti, kia ti hantuqvavano virara vaivo, tuvaro Jehosafaativa eqaane tiro, Kia minti tivakera tiane, tiro.

⁹ Jehosafaativa minti tuvaro Ahaapiva nai qiata vaiinti vo aaramakero tiharo, Are vaaka oru Mikaiara vita varera maini aniane, tura.

¹⁰ Vi entara Ahaapika Jehosafaatika naitanta avuhainaa utavaaqqa nonkutetanta, naitanta avuhainaa taintaqqaa oquivi vaura. Sameria vatuka aqiqaini qenti tataaqqa uitu vuhaantaari aque vaunaini, vitanta naitanta taintaqqaa oquivi vaumanta, paropeti vaiinti vika vitanta nivuqaa vahia paropeti uva, vo uva vo uva ti vaura.

¹¹ Ho paropeti vaiinti 400 vikaqihairo Kenaanara maaqu Sedekaiava purumakau komutanta ainqohairo autukero vi haikara nai kauquqi tuatero Ahaapirara tiharo, Noravano Kotiva ariara mintima tivo:

Purumakauvano nai komuqohairo vaiinti raqontakero arukaintema kera, are Siria hampata raquqira vihara vika vehi autu taiqa kenarave, tivo, tiro.

¹² Sedekaiava minti tumanta ekaa hini paropeti vikavata vohaa vi uvvaraqai tiha, Noravano Kotiva Ramoti vatuka i kauquqi vatarerave tirara tira, are iqoka raqihara homa vi vatukara varenarave, ti.

¹³ Vika vohaa uvaqai ti vauvaro Mikaiara vita veva vu vaiintiva Mikaiarara tiharo, Ekaa hini paropeti vaiinti vika vohaa uvaqai tiha King Ahaapiva homa iqoka aatara kaanarove, ti variavo. Arevata vika tiantema kera, koqe uvama tiane, tiro.

¹⁴ Minti tuvaro Mikaiava aqao tiro, Noravano Kotiva ekaa enta qaqi variqiro vi vaira autuqaa, te Noravano Kotiva ti tiva timiaina uvara, te vi uvvaraqai vira tiva amirerave, tiro.

¹⁵ Viva minti tivakero King Ahaapiva vaunaini oruntovaro viva vira irero tiharo, Mikaiava, tenavu hoe iqoka raqiba Ramoti vatuka varainarave, kiae varainarave? tiro.

Minti tuvaro Mikaiava nai tiva amiro tiharo, Hove. Ne oru Ramoti vatukaini vi watanaaka hampata iqoka raqiba, homa vi vatukara aatara kevarave. Noravano Kotiva vi vatukara ni kauquqi vataanarove, tiro.

¹⁶ Minti tuvaro Ahaapiva tiharo, Oho, te airi tataa ariara kia una uva tiraitira, Nora Kotira autuqaa quqaa uvaqai tihara ti tiva timiaine tunarave, tiro.

¹⁷ Minti tuvaro Mikaiava Ahaapira nai tiva amiro tiharo, Mpo, te tavauraro sipisipi qova kia vaimanta sipisipi vika raumpirima vuantemake, Isareri iqoka vaiinti vo ainqina vo ainqaqaqaa variarave. Vika mintimake variavaro Noravano Kotiva tiharo, Maa vaiintika variavaro vovano vikaqaa raqikiva kiama vaivo. Ho vika qaqi kairamanta nai maaqa nai maaqa maateraiqiba vuate, tivo, tiro.

¹⁸ Mikaiava minti tuvaro Ahaapiva King Jehosafaatirara tiharo, Ho te vaaka ai tiva amunarave. Maa vaiintiva kia tiriara koqe uva tiraitiro, qora haikavano tiqaa qovaraiqinara viraraqai ti vairave, tiro.

¹⁹ Minti tuvaro Mikaiava qaigaa tiharo, Ho iri vase te Noravano Kotiva ti humiqai uvara ni tiva nimiare. Te vaiha tavauraro Noravano Kotiva nai avuhainaa taintaqqaa oquivi vaimanta naaruvhainaa iqoka vaiinti vika ekaa vira kauqu tanarainivata kaanaaqainivata variarave.

²⁰ Vika mintimake variavaro Noravano Kotiva tiharo, Tavave Ahaapira kuntama varero Ramoti vatukaini oru viramanta vika vira arukaate? timanta *enseli* hini kiaka vo uva tiamanta hini kiaka vo uva ti variarave.

²¹ Vika minti ti variavaro ekaanaini „qora“ maraqua vovano Nora Kotira avuqaa oru himpi vaiharo tiharo, Tema vira kuntama vare virerave, tivo.

²² Viva minti tivaro Noravano Kotiva vira irero, Are nantiakera Ahaapira kuntama varera vinarave? tivaro „qora“ maraqua viva tiharo, Te otu vira paropeti vaiintinavu noqihai una uva tirerave, tivaro Noravano Kotiva virara tiharo, Ho, are otu minti tivakehara vira kuntama varerar vuane, tivo, tiro.

²³ Mikaaava minti tivakero Ahaapirara tiharo, Ho tavaane. Noravano Kotiva qaqi kaivaruna uva ti vai maraqravai ai paropeti maaka noqi vaimanta vika una uva ti variavo. Noravano Kotiva ariara qoraigama vuarire tiro, mintivo, tiro.

²⁴ Viva minti tuvaro Sedekajava oru Mikaaara auruvuta ntuvakero tiharo, Oho, taireve Nora Kotira Maraquravano ti qaqrakero nai uva oru ai tiva amivo? tiro.

²⁵ Minti tuvaro Mikaaava nai tiva amiro tiharo, Vo enta „navutaaka tinavu Isarerihatara kaivarua, are aiqu aututera naavu *rumu* voqi kukeqavi vaina entara, vi entaraqaa are vi uvvara kankomakera irinarave, tiro.

²⁶ Minti tuvaro King Ahaapiva vokukara tiharo, Ne Mikaaara vita vare vuru Emonuva maa vatukaraqaa raqiki vai vaiintiravata, ti maaqu Joasiravata nimihā ²⁷ vitantara mintima tiate: Maa vaiintira karapuhi naavuqi ke, mparetivata namarivataqai ami vaise te oru iqoka raquqe qaqi orurante anirerave, tiro.

²⁸ Minti tuvaro Mikaaava Ahaapirara tiharo, Oho, are qaqi oruranteria anirera, te Noravano Kotiva ariara mintima tivo tuna uvava una uvama varianarove, tivakero vaiinti nahentia tiharo, Ne ekaa te tuna uvara iritaate, tura.

Ahaapiva qutu vura

²⁹ Ho Isarerihatara King Ahaapivavata, Jutaa King Jehosafaativavata, vitanta nái iqoka vaiinti ntita vare oru Gileaati vatainai vau vatukara Ramotini raqireka vura.

³⁰ Vitanta mini viha Ahaapiva Jehosafaatirara tiharo, „Navutaaka ti viraqamake tavevorave ti,“ te iqoka raqirera iha, tenta avuhainaa utavaaqa qaqini varake, qaqi utavaaqa nonkicerare. Are kia mintiraitira, nena avuhainaa utavaaqa qaqi nonkutera vuane, tivakero viva vo utavaaqa nonkutero iqoka raqireva vura.

³¹ Ho Siria avuhainaa vaiinti viva nai iqoka vaiinti taruka 32navu iqokakaariqi himpi vahia raqi vaukara tiharo, Ne kia qumina vaiinti hampata iqoka raqiraiti, Isarerihatara avuhainaa vaiinti hampatagai raquate, tiro.

³² Minti tumanta vika raqiba Jehosafaatira tave tiha, Vi vaiintiva Isarerihatara avuhainaarave, tivake tuqantaavi vira arirare tuvaro Jehosafaativa oi aai tumanta ³³ vika tavovaro viva kia Isarerihatara avuhainaaava vaumanta qaqrake kia vira arura.

³⁴ Ho vika iqoka raqi vauvaro Siria iqoka vaiinti vovano hampiqama kero veva aqukovaro veva viva King Ahaapira arutora.

Ahaapira vaata kia iqoka utavaaqa mantaaqa tonaini vevavano aruvavarao Ahaapiva nai iqoka *kaari* naaquantu tuate vau vaiintirara tiharo, Oho, vevavano ti harivo. Iqokaqihairatuqantaavira ti tivita varera vuane, tiro.

³⁵ Ho vi entara iqokavano kia taiqa viraitiro, nora iqokavano qaqi variqiro vumanta vokuka Ahaapira tuatovaro Ahaapiva nai iqoka *kaariqi* vauharo Siria vika tave vaura.

Vevavano vira vaata raqonta koraqihairo naarevano nteharo iqoka *kaariqi* vauvaro enta ire uvavarao Ahaapira qutu vura.

³⁶ Kuari avuvano ruhunkireva uvaro uvavano iqoka vaiinti vika vaunaini vi aniro tiharo: King Ahaapiva qutu vivo. Qaqirake nenta maaqainive vatukainive anirante vuate, tura. ³⁷ Ho Isarerihatara avuhainaa vaiintivano qutu vumanta vika vira vaata vare vuru Sameria vatukaini quntama tora.

³⁸ Vika vira iqoka *kaari* vare, Sameria vatuka ruvu namari vauraqi vuru hiqama kora. (Vi namariva vaireva, hampi nari vau nahentika namari tunti vauva vaura.)

Ho Noravano Kotiva tuntemake, vika iqokakaari hiqe vaumanta vairinavu ani Ahaapira naare mpuike ne vaura. (21:19)

³⁹ Ho King Ahaapiva ekaa vo kaiqa vo kaiqa varo uvarave, viva avuhainaara naavu kaqatero *elefanti* aaraiqohairo vi naavura *vahehemato/vaataiqamato* uvarave, viva vo vatuka vo vatuka kempukaiqama kero autuko uvarave, ekaa vi uvvara vi uvvara vuku vo, Isarerihatara Avuhainaa Uva Okarave tu vukuraqi qara ntuvatora.

⁴⁰ Ahaapiva qutu vuvaro vira maaqu Ahasiava vira vatuka varero avuhainaa vaiintiqama vura.

Jehosafaativa Iutaa avuhainaaava vaurara tura

⁴¹ Ahaapiva 4 ihiara Isareriqaa raqiki vau entara, Asaara maaqu Jehosafaativa avuhainaa vaiintiqama viro Iutaaqaa raqiki vaura. ⁴² Jehosafaativa 35 ihi varakova avuhainaa vaiintiqama viro Ieruharemini vaiharo 25 ihiara Iutaaqaa raqiki vaura. Vira nova Asubaava Silihira raavuravano vaura.

⁴³ Jehosafaativa nai qova Asaava untemakero, Nora Kotira avuqaa koqe okara auti vaura. Viva mintiharovata, viva kiama vo ainqina vo ainqinaqaa *ofaa* tainta ravantiaqa komanta, vaiinti nahenti mini mini vaiha *ofaa* autiha, koqe una iaina haikara iha quare vaura.

⁴⁴ Jehosafaativa kia Isareri hampata iqoka raqiraitiro vaumanta Isarerivata Iutaavata vi entara maateraiqiha vaura.

⁴⁵ Ho King Jehosafaativa ekaa vo kaiqa vo kaiqa varo uvarave, viva iqoka raqi vau uvarave, ekaa vi uvara vi uvara vuku vo, *Iutaa Avuhainaaka Uva Okarave* tu vukuraqi qara ntuvatora.

⁴⁶ Haaru qorainti vokuka una variqa *maraqura/varaha* quahama nimito vatukara, vo vatuka vo vatukaqaa vaiha, nái hana vaiinti hampata hampi ni vau okarara auti vauvaro, Jehosafaatira qova Asaava Iutaa vataihairo vika nititama komanta vumanta, hini kuka kia viraiti, qaqi Iutaini vauka Jehosafaativa vikavata nititama komanta vura.

⁴⁷ Vi entara kia avuhainaa vaiinti vovano Idomu vataini vauvaro, Iutaa avuhainaa vau vau inti vo noraiqama kovaro vi vaintinta Idomuqaa raqiki vaura.

⁴⁸ King Jehosafaativa Ofi vataihairo *kori* ori varaare tiro, tumanta vira kaiqa vaiinti *sipi* vonavu autu komanta *sipi* vika Ofi vataini viha Esioni-Gebe vatukavano vaunaini *sipi* vika qoraiqamavi namariqi rupeqa vura.

⁴⁹ Rupeqa vuvaro Ahaapira maaqu King Ahasiava Jehosafaatirara tiharo, Are qaqi kairamanta ti *sipi* kaiqa taveka ai *sipi* kaiqa taveka hampata *sipi* vuate, tuvaro Jehosafaativa kia mintiataa uvoro kia mintura.

⁵⁰ Ho Jehosafaativa qutu vumanta vira vaata vare nai kaivaqara Devitira Vatukave turaqi vuru quntama tora. Jehosafaativa qutu vuvaro vira maaqu Jehoraamuva vira vatuka varero *Iutaa*, avuhainaa vaiintiqama vura.

Ahasiava Isareri avuhainaava vaura

⁵¹ Jehosafaativa 17 ihiara Iutaqaa raqiki vau entara, Ahaapira maaqu Ahasiava avuhainaa vaiintiqama viro Isareriqaa taara ihiara raqiki vaura.

⁵² Ahasiava Nora Kotira avuqaa qora okaraqai auti vaura. Vira noka qoka qora okara auti vauntema kero, vivavata qora okara auti vaura.

Haaru Nebaatira maaqu Jeroboamuva qora okara autiharo Isarerivata kuntama virivi komanta autuntema kero, Ahasiavavata qora okara auti vaura.

⁵³ Viva una variqa Baalirara ti variqave tivakeharo vira quahama amiteharo vira kaiqa vara amitora kaara, Nora Kotira arara itora. Haaru vira qora Ahaapirara arara itontema kero, vira maaquaravata arara itora.

2 KING (2 Kings – 2 King)

Elaitaava Ahasiarara tu uvara

¹ Isareri King Ahaapiva qutu vumanta viraqaahai Moapi vika kia Isareri King Ahaapira maaqu Ahasiara, vevaaraini vaireka, auti vaura. (3:4-27)

² Vi entara King Ahasiava Sameria vatukaini nai avuhainaara naavu veraraqaa *rumu* voqi vaiharo „*uintuaqaa* muntuviro *vauvaro*“ katari taurini taurini *uintuaqaa* arutova kinta vuvaro viva vatainie hicintiro nai vaata qoraqama kero.

Vira vaatavano qoraqama vuvaro viva tiharo, Mpo, ti tivataa koqemae vuunarove, kiae koqema vuunarove? tivakeharo vaiinti vonavu „*Pirisia vata*“ Ekaroni vatukaini una variqa Baali-Sebupira oru ireha tavaate tiro, vinavuka nititama komanta vura.

³ Vinavuka aaraini vuvaro Noravano Kotiva atito *enseliva* Tisibehainaa paropeti vaiinti Elaitaaraa tiharo,

Are oru King Ahasiava nititai vaiintika aaraini ani variakara mintima tiane: Ne nantihae Ekaroni vatukaihainaa variqa Baali-Sebupira irareka mini vi variavo? Isarerini kia Variqavano vaivo tivakehae ne „*Pirisia vatainai*“ vi variavo?

⁴ Ne „anirante“ maa uvra avuhainaaa vaiinti vuru tiva amiate: Are mintianara kaarama Noravano Kotiva ariara mintima tivo:

Are nena vaite variana taintaraqaahairia kia ho qaiqaa qaqi himpiraitira, qutuma vinarave tivo, tiate, tiro.

⁵ Minti tuvaro Elaitaava viva tunte iro „oru avuhainaaa vaiintivano nititoka rantakero vuru tiva nimumanta“ kia anirante avuhainaava vaunaini oruntovaro avuhainaava vika irero tiharo, Ne nantihae qaqrake orurante aniaovo? tiro.

⁶ Tumanta vika nai tiva ami tiha, Aaraini vaiinti vovano tinavu rantakero tinavuara tiharo, Ne anirante vuru avuhainaaa vaiinti ni nititaira mintima tiva amiate: Noravano Kotiva ariara mintima tivo: Are nantihae Ekaroni vatukaihainaa variqa Baali-Sebupira ireha tavaate tira, vaiinti vonavu nititama kaaro? Isarerini kia Variqavano vaivo tivakehae „*Pirisia vatainai*“ kia nititama kaaro? Are mintianara kaarama are nena vaite variana taintaraqaahairia kia ho qaiqaa qaqi himpiraitira, are qutuma vinarave tivo. Vi vaiintiva Noravano Kotiva mintima tivo tirave, ti.

⁷ Vika minti tuvaro avuhainaaa vaiinti viva vika irero tiharo, Vi vaiintiva nana viri vaata vataavae vaivo? tumanta ⁸ vika tiha, Viva kauhigohai aututaa utavaaqara nonkutero retivata tavaarana rumpataivave, tuvaro avuhainaava tiharo, Oho, viva Tisibehainaa vaiinti Elaitaavave, tiro. ⁹ Minti tivakero Elaitaara vita vare aniate tiro, Ahasiava iqoka vaiintiqaa raqikuravata iqoka vaiinti 50navuvata nititomanta vura.

Vika oru tavavaro Elaitaava inaara ainqina noragaqaa oquvi vuvaro iqoka vaiintiqaa raqikuva oruntero virara tiharo, Kotira kaiqa vaiinti taruo, avuhainaava ariara tuvu ti tavaane tivo, tiro.

¹⁰ Minti tuvaro Elaitaava tiharo, Te quqaa Kotira kaiqa vaiinti taruka variarera, te tiariraro naaruvalihairo ihavano tuvu aivata ai iqoka vaiinti 50navuvata tatoqa kaarire, tuvaro naaruvalihairo ihavano tuvu viravata vira iqoka vaiintinavuvata tatoqa aqukora.

¹¹ Ho vira naantiara avuhainaaa vaiinti viva iqoka vaiintiqaa raqikura vovata, iqoka vaiinti 50navuvata Elaitaava vaunaini qaiqaa nititama komanta vura. Iqoka vaiintiqaa raqikuva Elaitaaraa tiharo, Kotira kaiqa vaiinti taruo, avuhainaava vaiinti viva ariara vaaka tuvu ti tavaane tivo, tiro.

¹² Minti tuvaro Elaitaava tiharo, Te quqaa Kotira kaiqa vaiinti taruka variarera, te tiariraro naaruvalihairo ihavano tuvu aivata ai iqoka vaiinti 50navuvata tatoqa kaarire, tuvaro naaruvalihairo ihavano tuvu viravata iqoka vaiintinavuvata tatoqa aqukora.

¹³ Ho vira naantiara avuhainaaa vaiinti viva qaiqaavata iqoka vaiintiqaa raqikura vovata, iqoka vaiinti 50navuvata Elaitaava vaunaini nititama komanta vura. Iqoka vaiintiqaa raqikuva Elaitaava vaunaini oruntero vira avuqa tori kauru araviro tiharo, Mpo, Kotira kaiqa vaiinti taruo, tivata ti iqoka vaiintinavuvata kia aru karaitira, tinavu qaiqi vehakuma timitaane. ¹⁴ Ihavano naaruvalihairo iqoka vaiintiqaa raqikiatantavata vitanta iqoka vaiintinavuvata tatoqa aqukaivo. Mpo, ti qaiqi aaqurihama timitaane, tuvaro ¹⁵ Noravano Kotiva atito *enseliva* Elaitaaraa tiharo, Ho are kia qetaraitira, vi vaiintikantira otu vuane, tuvaro Elaitaava himpiro vikantiro avuhainaava vaunaini vura.

¹⁶ Elaitaava otuntero virara tiharo, Noravano Kotiva ariara mintima tivo: Are Isarerini vatainai kia Variqavano vaivo tivakerae vaiinti vonavu Ekaroni vatukaini una variqa

Baali-Sebupira ireha tavaate tira, are vika mini nititama kaaro? Are mintianara kaara nena vaite variana taintaraqaahairo kia ho qaqi himpiraitira, qutuma vinarave tivo, tiro.

¹⁷ Ho Elaitaara noqihairo Noravano Kotiva uva tuntema kero, Ahasiava qutu vura. Ahasiara maaqu kia vauvarora tiro, vira qata Joraamuva vira vatuka varero avuhainaa vaiintiqama vura.

King Jehosafaatira maaqu Jehoraamuva taara ihiara Iuttaaqaa raqiki vau entara, Joraamuva avuhainaa vaiintiqama viro Isareriqaa raqiki vaura.

¹⁸ Ho Ahasiava ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave tu vukuraqi qara ntuvatora*.

2

Kotiva Elaitaara vita varovaro naaruvaini vura

¹ Noravano Kotiva vetoraqohairo Elaitaara vita varero naaruvaini vuarira entava aumaiquimanta Elaitaaka Elisaaka Giligaali vatuka ke aaraini vura.

² Elaitaava Elisaarara tiharo, Noravano Kotiva tiriara Betelini vuane timanta, te mini vuarirara are mainima variane, tuvaro Elisaava aqao tiro, Noravano Kotiva qaqi variqiro vi vaira autuqaavata, ai autuqaavata te ququaama turo: Te ai hampata vairerave, tiro. Elisaava minti tiva kero Elaitaakantiro Betelini vura.

³ Vitanta Betelini oruntomanta paropeti vaiinti mini vauka ani Elisaara ireha tiha, Vatema Noravano Kotiya ai nora vaiinti vita varairara „are nenaraa vainerave.“ Are virara irianarave, kiae irianarave? tuvaro Elisaava vika nai tiva nimiro tiharo, Te virara irunarave. Ne kiama qaiqaavata vi haikarara tiate, tiro.

⁴ Minti tivakero vauvaro Elaitaava Elisaarara tiharo, Noravano Kotiva tiriara Ierikoni vuane timanta te mini vuarirara are mainima variane, tuvaro Elisaava aqao tiro, Noravano Kotiva ekaa enta qaqi variqiro vi vaira autuqaavata, ai autuqaavata te ququaama turo: Te ai hampata vairerave, tiva kero Elaitaakantiro Ierikoni vura.

⁵ Vitanta Ierikoni oruntomanta paropeti vaiinti mini vauka ani Elisaara ireha tiha, Vatema Noravano Kotiva ai nora vaiinti vita varairara are nenaraa vainerave. Are virara irianarave, kiae irianarave? tuvaro Elisaava vika nai tiva nimiro tiharo, Te virara irunarave. Ne kiama qaiqaavata vi haikarara tiate, tiro.

⁶ Minti tivakero vauvaro Elaitaava Elisaarara tiharo, Noravano Kotiva tiriara Iotani Namari vaineraini vuane timanta te mini vuarirara are mainima variane, tiro.

Elaitaava minti tuvaro Elisaava aqao tiro, Noravano Kotiva qaqi variqiro vi vaira autuqaavata, ai autuqaavata te ququaama turo: Te ai hampata vairerave, tivakero Elaitaakantiro Iotani Namari vaineraini vura.

⁷ Vitanta aaraini vi vaumanta paropeti vaiinti 50navuvata Elaitaaka Elisaaka avata vare vumanta vitanta vivi, Iotani Namari vaineraini otunte mini vaumanta paropeti vikavata vutuni himpite vailha vitanta aititu vaura.

⁸ Ho Elaitaava nai vukai tavunauta aqutora ravaqaa kero ququrama kero viraqohairo namari ruqutu kovaro namarivano rairaviro hini hini vaumanta vitanta tavaaraqaa vatavano aaharaiqama vuraqaa taqa vare hini mantaraini vura.

⁹ Vitanta mini orunte, Elaitaava Elisaarara tiharo, Aumakaama Noravano Kotiva ti tivita varaireqe te ai maini kararave. Ho te nana haikae naane ai autu amite vuare? tiro.

Minti tuvaro Elisaava nai tiva amiro tiharo, Mpo, nai gova nai maaqu hogarenaara airaira voqavata amintema kera, are Kotiva ai ami kempukara vira voqavata ti timiraqe te ai vatuka vare, ai aanante paropeti kaiqa varaare, tiro.

¹⁰ Elisaava minti tuvaro Elaitaava tiharo, Ike, vi haikarara are ti iraanara, te kiama ho qihaaqamake ai amirarave. Ho Noravano Kotiva ti tivita varero vuainara are vailhara tavairera, are homa vi kempukara varenarave. Are vailhara kia tavairera, are kia ho vi kempukara varenarave, tiro.

¹¹ Minti tivakero vitanta aaraini viha uva tivaqvi vi vauvaro vaakama iha auru voqavata qovarama vuvuro viraqii ohinavuvano iqoka *kaarivata* iqoka *kaarivata* viraqii vailha Isareri kahaqiantema kera, are kempukavano Isareri kahaqiaravave, tiro. Minti tivakero viva kia Elaitaara qaiqaavata tavora.

¹² Vetoravano Elaitaara vita varovaro naaruvaini vuvuro Elisaava tavero naveraitiharo, Mpo, ti qo, ti qo, iqoka *kaarivata* iqoka *kaarivata* viraqii vailha Isareri kahaqiantema kera, are kempukavano Isareri kahaqiaravave, tiro. Minti tivakero viva kia Elaitaara qaiqaavata tavora.

Ho Elaitaava naaruvaini vuvuro Elisaara muntukavano qoraiquvaro viva mpo ike tiharo nai tavunauta aqutora qaqini varakero tavaaraqaa qunahi kero, ¹³ Elaitaara

tavunautavano vataini hiqintura utu varero anirantero Iotani Namari auvahini oru himpiro vaura.

¹⁴ Ho Elisaava tavuna virauta varero otu namari vira ruqutukero tiharo, Mpo, Noravano Kotiva Elaitaara hampata vaintema kero, viva ti hampatavata varianarove? tivakero viva namari ruqutu kovaro vaakama namarivano rairaviro hini hini vauvaro tavaaraqaa aahara vata vauvaro viva taqa varero hini mantaraini vura.

¹⁵ Mintumanta paropeti vaiinti Ierikohai ani tave vauka tiha, Ho tavaate. Kotiva Elaitaara ami kempukava Elisaaraqaavata vaivo, tivake vika viva vaunaini oru tori kauru aravi nái qiaita vatainiquamake tiha,

¹⁶ Ho tavaane. Tenavu kempuka vaiinti 50navuma vauro. Ho are qaqi kairaqe tenavu ai nora vaiinti ranteha tavaare. Nora Kotira Maraqravano vira vitá varero vuruvi ainqinainie kaivo ugítainie kaivo? tuvaro Elisaava aqao tiro, Kia vuate, tiro.

¹⁷ Elisaava minti tumantavata, vika kempukaiqamake Elisaara iramaqí vuvoro vira popohovaro tiharo, Hove. Ne vira rantareka vuate, tumanta vika 50navu taaramo entanavuara Elaitaara rantaqí vi, kia ranta kora. ¹⁸ Vika orurante Elisaava Ierikoni vaunaini anintovaro Elisaava vi vaiintikara tiharo, Te niara kia vuate turamantavata, ne kia ti uva iriavo, tura.

Elisaava nora kaiqa, vo kaiqa vo kaiqa varora

¹⁹ Elisaava Ierikoni vaumanta Ierikohainaa vaiinti vika aninte Elisaarara tiha, Nora vaiintio, are tavaane. Maa vatukava koqe vataini vaivarovata, namarivano kia koqe ivaro karavanovata kia koqemakero qampiqe vaivo, ti.

²⁰ Vika minti tuvaro Elisaava tiharo, Ne oru qaraaka tanuqí hore qihiake vare viri ti timiate, tumanta ho vika Elisaava tunttemake, vare vira vuru amura.

²¹ Vira amuvaro Elisaava ruvu namari tuvunaini hore vira namariqí aqukero tiharo, Noravano Kotiva mintima tivo:

Te maa namarira koqema kauraro koqema vivo.

Namarivano kia qaiqaavata qoraiqama viro vainti naati arukaanarove.

Mintiraro karavanovata koqemakero qampigaanarove tivo, tiro.

²² Ho Elisaava tunttema kero, namarivano koqema viro variqiro aniro, vate maa entaravata mintima kero vairo.

²³ Ho Elisaava Ieriko kero Betelini vura. Viva aaraini vi vaumanta vi vatukaraqihai qaraaka vaiinti airitahaa vira tave, vira naaraihama amiteha vira uva virera tiva amiteha tiha, Ae, qivorih aituqiravave, maihairs vuane. Qivorih aituqiravave, maihairs vuane, ti vaura.

²⁴ Vika minti ti vauvaro Elisaava tuqantaa viro kempuka viri aratero vika taveharo Nora Kotira autuqaa naveraitharo, Kaivaro viva ni qoraiqama kaira ne vaaquqama vuate, tumanta *bea* taaraqantavano nantaqihai tuvunte, qaraaka vaiinti 42navu aruke ruqeqlama kora.

²⁵ Ho Elisaava Kaameli Aiqinaini oru viro, viraqaahairo anirantero Sameriaini vura.

3

Isareri vika Moapi hampata raqura

¹ Jehosafaativa 18 ihiara Iutaqaqa raqiki vau entara, Ahaapira maaqu Joraamuva Isareri avuhainaa vaiintiqama viro, 12 ihiara Sameria vatukaqi vaharo Isarerigaa raqikiqiro vi vaura.

² Joraamuva Nora Kotira avuqaa qora kaiqa vare vaura. Mintiharovata, viva kia nai noka qoka anomake qora kaiqa autuntema kero, qora kaiqa auti vaura. Haaru Joraamura gova una variqa Baalira *maraqura/varaha* vara qaqira kora.

³ Viva mintiharovata, Nebaatiira maaqu Jeroboamuva qora okara autuntema kero, Joraamuvavata qora okara auti vaura.

Haaru Nebaatiira maaqu Jeroboamuva qora okara autiharo, una variqanavu *maraqura/varaha* quahama nimitero, Isareri vikavata kuntama virivi komanta vikavata qora okara autura. Joraamuva qora okara autura kia qaqira karaitiro, qaqiqai auti vaura.

⁴ Moapihainaa King Mesaava airi sipisipi vato vaiintiva vaharo Isareri avuhainaa vaiinti vevaaraini vaharo viva ekaa ihiara *takisi* aquntema keharo sipisipi naati 100,000 Isareri avuhainaa amiro, sipisipi qora 100,000qaahairo vika kauhivata toqa kero vira amite vaura.

⁵ Ho Isareri King Ahaapiva qutu vuvoro Mesaava kia Isareri King Joraamura, vevaraaini vaireva autiharo, „viva kia vira qaiqaa *takisi* amura.“

⁶ Mintuvaro vaakama King Joraamuva Sameria kero nai iqoka vaiinti Isareri ekaa *untu/nutu* ruvaaquma kero ⁷Iutta King Jehosafaatraini uva varakero tiharo, Moapi avuhainaa

vaiintivano kia ti vevaaraini vaireva auti vaimanta te oru Moapi hampata raqirerave. Are hoe tintira aninarave, kiae aninarave? tiro.

Joraamuva minti tuvaro King Jehosafaativa nai tiva amiro tiharo, Te homa ainti vuainarave. Tentavata, ti iqoka vaiintive, ohive, ai kahaqiaraukama vauro.⁸ Ho tenavu ta aararaqaae Moapini vuainarave? tuvaro Joraamuva vira tiva amiro tiharo, Aniqenavu Idomuni Ahara Vataini vi varia aararaqaa vuare, tiro.

⁹ Minti tivakero King Joraamuva vo, Iutaa avuhainaava vo, Idomu avuhainaava vo, nái iqoka vaiinti ntita vare vura. Vi aarava yukai aara vaumanta vika 7 entara aaraqaa vi vauvaro namari taiqa vuvaro vaiintive ohive donkive namari neva kia vaura.

¹⁰ Kia vauvaro King Joraamuva oho tiro, Noravano Kotiva tinavu taaramonavu Moapi avuhainaara kauquqi vatareve auti vaivo, tiro.

¹¹ Minti tuvaro King Jehosafaativa Joraamura irero tiharo, Nora Kotira paropeti vovano vairove, kiae vaivo? Viva vairera, tenavu nana nana haika autuainara vira tiva amiariraro viva Nora Kotira ireharo tavaarire, tiro.

Minti tuvaro Joraamura iqoka vaiintiqa raqikuva vovano vira tiva amiro tiharo, Safatira maaqu Elisaava vaivo. Haaru viva Elaitaara paanaa vaiintivano vaurave, tiro.

¹² Minti tuvaro King Jehosafaativa tiharo, Ququaama Elisaava Nora Kotira uva ti vai vaiintiva vaivo, tivake avuhainaaka taaramonavu Elisaava vaunaini oru vura.

¹³ Mini vuvaro Elisaava Isareri avuhainaava vaiintiara aqao tiro, Nantivarae are te unanaini aniaro? Ai noka qoka paropeti vainti ire variaka, arevata oru vika irehara tavaane, tuvaro Isareri avuhainaava tiharo, Kiave. Noravano Kotiva tinavu avuhainaaka taaramonavu Moapi kauquqi vatareve auti vaira kaara tenavu ai tavarera anuro, tiro.

¹⁴ Minti tuvaro Elisaava tiharo, Oho, Noravano Kotiva ekaa kempuka vatero qaqi variqiro vi vaiva vaimanta te vira kaiqa vaiintivano ariara mintima turo: Jehosafaativa kia ai hampata anitirio, te kia ai tavaraiti, kia ai hampata uva tireravema turaitirio. Jehosafaatirara koqe vaiintive tunarara ti, te ai uva irirerave, tiro.

¹⁵ Minti tivakero viva tiharo, *Musiki* ruquti vai vaiintira vo vita vare aniate, tumanta vira vita vare anuvaro vi vaiintiva *musiki* ruquti vauvaro Nora Kotira kempukavano Elisaaraqaa tuvu vauvaro¹⁶ Elisaava tiharo, Noravano Kotiva mintima tivo:

Ne ugita maa kanta vo ora vo ora quijke vataivaro airi oravano variarire.¹⁷ Ne tavaivaro kia uvaivano utiraro kia aaquvata ntiraro, namarivano ugita maa kanta mpiqaviro vairamanta nevata, ni purumakauvata, donkivata ho nevarave tivo. Noravano Kotiva mintima tivo.

¹⁸ Noravano Kotiva qihaaqama keroma vi haikara autukero, Moapi vatanaaka ni kauquqi vataanarove.

¹⁹ Ne iqoka raqihama vaantaavura ututaa vatukarave, nora vatukave, ekaa vi vatukara vi vatukara varevarave. Ne vika katari koqe tava ire vaira, vo katari vo katari tuqu kevarave. Ne vika ruvu namarivata, ekaa tinta kevarave. Ne vika kara utuke ne vataraqaa ori ntava taivaro kia ho koqe vata variarire, tiro.

²⁰ Elisaava minti tuvaro vira qarara toqaqi Kotira *ofaa* autu amite vau kuari avuraqaa namarivano Idomu vataihairo tuyiharo ekaa vi vatara mpiqa kora.

²¹ Ho Moapi vika vailha irumanta avuhainaaka taaramonavu vika hampata raqireka anumanta vika ekaa qaraaka vaiintive, naampaive, auvihehavaa ho vareka naaromanta vika Moapi vata avuhianta oru vaura.

²² Moapi vika vaaka toqaqi himpi tavovaro kuarivano namariqaa ite vauvaro namarivano naare voqaa vaura.

²³ Naare voqaa vaumanta Moapi vika tiha, Ho tavaate. Vutura naarema vaivo. Ike, avuhainaaka taaramonavu iqoka vaiinti nai ari nai ari i kaavaro, vika naarevano vataqaa vaivo,. Ho varaiqenavu oru vika airaira, vo haika vo haika varaare, ti.

²⁴ Vika minti tivake Isareri *seri* naavu maaqa kaqatonaini oruntomanta Isareri vika himpi Moapi hampata iqoka raquqi vumanta Moapi vika qetake ruqemake vumanta Isareri vika aru ntataqi vivi, Moapi vataini vi anisha vika aruqi vura.

²⁵ Vika Moapi vatuka, vo vatuka vo vatuka qoraigamake, vohaiqa vohaiqvano ori utu vare vuru naahogi aqukovaro orivano vi vataraqi mpiqa vura. Vika ruvu namari, vo namari vo namari tintake, koqe tava ire vau katariravata ekaa teqa taaqama kora. Vika ekaa vatuka qoraigama kovaro nora vatuka Kiri-Heresi vatukaqai qaqi vaura.

Ho nora *kataperiqohai* iqoka raqi vau vaiintika vi vatukara ututumate, vatuka avutaqi ori ari vaura.

²⁶ Ho Moapi avuhainaava tavovaro vira navutaaka vira aatara kareka auti vauvaro, viva iqoka paipeqohai raqu vaiintika 700 ntita varero vatukaqihairo ruqemakero Idomu avuhainaava vaunaini vuare tiro, tavovarovata vika vi aarava kia ho vaura.

²⁷ Mintuvaro Moapi avuhainaa vaiintivano nai maaqu hoqarenaava nai vira vatuka varero avuhainaaava variaina vaiintira vita varero, vaantaavura qiataqaa vi vaiintira arukero nai una variqara iriharo *ofaa* iha quara amitora.

Viva nai maaqu mintimakero arukora kaara Isarer ika voqamake aatu itomanta qaquirake nái maaqaini vura.

4

Elisaava tentoqa nahenti vo kahaqura

¹ Paropeti vaiintinavu vauraqihairo vo paropeti vira naatavano Elisaava unaini oruntero tiharo, Mpo, ti vaativano qutuma vivo. Viva qaqi vai entara Nora Kotira aatu geteharo koqema kero ni vaira arevata iri tavaanarave. Ho viva monu vo vaiintiqi viqataira kia vira amira kaara vi vaiintiva anintero tiriara tiharo, Are kia vi monura vaaka ti timirera, te ai maaqtanta rumpa vare vuru kaari vitanta ti paanaa kaiqa vaiintitanta vaivarave, tiro.

² Manti tuvaro Elisaava vi uvara iriro nahenti virara tiharo, Te nantiabee ai kahaqirarave? Nana haikae ai naavuqi vaivo? tuvaro nahenti viva tiharo, Mpo, te inaara taquqi *orivi* vahavera nonku taurava vivaqaima naavuqi vaivo. Kia vo haikavata vaivo, tiro.

³ Manti tuvaro Elisaava nahenti virara tiharo, Ho oru nena naavu tataaqa variaka irairamanta vika qumina vai taqura, ai amivara varaane. Airi taqu varera⁴ nena naavuqi oriqetero qenti tinta tero viraqi vahavera are nena maaqtanta hampata *orivi* vahavera taqu vinavuraqi qihiraane. Vo taquqi mpiqakera vatera, vo taquqi mpiqakera vatera, mintiaqira vira, ekaa taqunavu mpiqakera kaane, tiro.

⁵ Manti tuvaro nahenti viva Elisaava tuntémakero, airi taqu varero nai naavuqi oriqetero qenti tinta tero viraqi vaumanta vira maaqtanta vo taqu vo taqu vare viri nai nora amuvoro, viva nai *orivi* taqu vatoraqihairo taqu voqi voqi qihiarora.

⁶ Qihiaqiro viharo viva ekaa taqu mpiqakera nai maaqu vorara tiharo, Taqu vo vare aniane, tuvaro viva tiharo, Kia taqu voqavata maini vaivo, tuvaro vi nahentiva tavovaro nai taquqihairo vahavera qaiqaa qihiraarirava kia vaura.

⁷ Ho mintimakero nahentivano vuru Elisaara tiva amuvoro viva tiharo, Vahavera vira vo vaiinti vo vaiinti nimihara monu varera, nena vaativano viqataira taiqa kaane. Hini monu qaqi vainaraqohairakarave vo airairave koqaama kera varera nena maaqtanta hampata variqira vuane, tura.

Sunemi vatukaihainaa nahentivano Elisaaraqaa raqikura

⁸ Vo enta Elisaava Sunemi vatukaini oru vauvaro vihainaa nahenti vovano, airi monu vatova Elisaarara ani ti naavuqi kara naane tuvaro Elisaava vira naavuqi oru kara nora. Ho Elisaava Sunemini oru vau entara viva vi nahentira naavuqiqai kara ne vaura.

⁹ Mintiaqiro vi vauvaro vi nahentiva nai vaatiara tiharo, Ike, ti aatovano kenko timanta iruro. Vo enta vo enta tinavu hampata kara ne vai vaiintiva, viva Kotira kaiqa vaiinti taruvave. ¹⁰ Ho kaiqetanta naavu qiataqaa viva variaina *rumura* vo autu amite, viraqi vaitaaina taintarave, kara taintave, oquivuaina taintarave, *raamuve*, viraqi vataare. Mintimake amitaariraro vi vaiintiva anina entara viraqi ani vaitaarire, tiro. „Manti tivake vitanta vi *rumura* Elisaara autu amitora..”

¹¹ Ho vo enta Elisaava Sunemini qaiqaa oruntero vi *rumuraqi* nai vaitaaina taintaraqaa auraara vahavera vaura.

¹² Viva nai kaiqa vaiinti Gehaasirara tiharo, Are nahenti vira aarairaro maini uruarire, tuvaro viva vira aarovaro uruntero vahaqaini himpi vauvaro ¹³ Elisaava Gehaasirara tiharo, Are vi nahentira iredhara tiane: Are titanta koqema kera maa *rumura* autu timitaanarara ti, tetanta virara iriha nana haikae ai amirarave? Ai antugavano nanarae vaivo? Tetanta oru avuhainaa vaiintie, *aami* nora vaiintie, iraari vitanta ai vo haikae autu amitevarave? tuvaro Gehaasiva otu nahenti vira irovoro viva aqao tiro, Te tenta navunaaka hampata vahavera kiamava vahavera vaura.

¹⁴ Manti tuvaro Gehaasiva nahenti viva tu uvara Elisaara tiva amuvoro Elisaava vira irero tiharo, Ho tetanta nana kaiqae vira vara amitararave? tuvaro Gehaasiva tiharo, Vira maaqvano kia vahavera vira vaativano naampaiqama vivo, tiro.

¹⁵ Manti tuvaro Elisaava tiharo, Vi nahentira aaraane, tuvaro vira aarovaro uru qentiana himpite vauvaro ¹⁶ Elisaava virara tiharo, Are huru ihi maa toraraqaa nena maaqu ravuku tenarave, tuvaro nahenti viva tiharo, Mpo, nora vaiintio, are Kotira kaiqa vaiinti taruvama variaro. Kia ti una tiane, tura.

¹⁷ Ho nahenti viva variqiro viro vainti taiqamaviro, vi ihira vi toraraqaa Elisaava tuntema kero, qorainti vainti vata tora.

¹⁸ Vira maaquvano vo ihinavu varakero vo enta toqaqi nai qora tavareva vura. Vi entara *uiti* teqe vau entava vauvaro vira qova nai kaiqa vaiinti hampata *uiti* naahoqi vauvaro ¹⁹ vaintiruvano oru nai qora vataakero vaura. Ho vate virave tiro aiha vuvaro nai qora aarerero tiharo, Mpo qao, ti qiatave. Ti qiatu aiho vivo, tuvaro vira qova nai kaiqa vaiinti vorara tiharo, Ho vainti virauru ravuku varera nai nova inaini vuru kaane, tuvaro ²⁰ vira kaiqa vaiintivano vainti virauru ravuku varero vuru nai nova unaini kovaro viva nai nora auvoqi variqiro vuvaro kuarivano qiatagaqaa uruntovaro qutu vura.

²¹ Qutu vuvaro vira nova vainti vira varero vuru veraraga Elisaava vaito taintaraqaa vatero vevantero qenti tinta tero ²² nai vaati aarovaro anuvaro virara tiharo, Are oru nena kaiqa vaiinti vo tiraro donki varero viri ti timiarire. Te Kotira kaiqa vaiinti tarura kante oru tave, qaiqaa orurante anirerave, tiro.

²³ Tuvaro vira vaativano aqao tiro, Nanarae are vate vaiinti vira tavareva iaro? Vate kia Maara Entave, kia qaraaka torara ovata ne entavama vaivo. Vi entava anintainaraqaa vira oru tavaane, tuvaro nahenti viva kempukaiqama kero tiharo, Ho are kia virara noraiqaakera iriane. Te virerave, tiro.

²⁴ Minti tivakero viva nai oquvvaina tanura donkiqaa rumpatero nai kaiqa vaiintiara tiharo, Ho are donki vihi vaahi tiraro kantero yuarire. Te kia vo uva tiarera, kia qakoma kera vuane, tivakero ²⁵ viva nai kaiqa vaiintintiro Kaameli Aiqinaqaa Kotira kaiqa vaiinti taruva vaunaini vura.

Vitanta aaraini vi vauvaro Elisaava vaharo vutu tavovaro vitanta ani vauvaro viva nai kaiqa vaiinti Gehaa sira tiharo, Vutuni vutu tavaane. Sunemi nahentivano anivo. ²⁶ Are kantera oru vira irehara tavaane. Viva nai vaati vainti hampata hoe variavo, kiae ho variavo? tuvaro ho Gehaa siva oru nahenti vira irovoro nahenti viva tiharo, Tenavu homa vauro, tiro.

²⁷ Ho nahenti viva minti tivakero viva aqinaqaa Elisaava unaini oruntero vira aqutaraini kankakaaviro Elisaara aiqu ataa tote vauvaro Gehaa siva tavero, vira niaranto venta vuruvi kaare tuvaro Elisaava aqao tiro, Kia mintiane. Vira qaqi kaane. Te tavauraro vira muntukavano voqama kero qoraiqivo. Mintivarso Noravano Kotiva vira muntukavano qoraiqirara kiama ti tiva timivo, tiro.

²⁸ Minti tuvaro nahenti viva tiharo, Nora vaintio, ike mpo, ai uvaqaa Kotiva vainti vira ti timirave. Mpo, vi entara te ariara kia ti una tiane tunarave, tiro.

²⁹ Minti tuvaro Elisaava Gehaa sira tiharo, Te quruqi nuna kaurura varera, nena utavaaqaa iquqamakera rumpa varera, kantera Sunemini vuane. Viharama kia vo vaiinti uva mantaraitira, qaqi viraro vo vaiintivano ai aarairara kia vo tiraitira oruntera, ti kaura vi vaintirura viriqaa vataane, tiro.

³⁰ Minti tuvaro vainti vira nova tavovaro Elisaava kia nai vireva iharo nai kaiqa vaiintiqai atitareva auti vauvaro viva aqao tiro, Noravano Kotiva qaqi vaira autuqaavata, ai autuqaavata, te kempukaiqamake turo: Are kia virera, tevata kia viraiti, maini vairerave, tuvaro Elisaava nahenti vikantiro Sunemini vura.

³¹ Ho Gehaa siva naane avuni vuva kauru vuru vi vaintira viriqaa vatovaro kia viva himpura. Kia himpuvaro Gehaa siva anirantero aaraini viharo Elisaara rantakero tiharo, Mpo, vaintiruvano kiama himpivo, tuvaro ³² Elisaava naavuni oruntovaro nai *rumuqi* oruntero qentiaahairo tavovaro qutu vaintiruva taintagaqaa vauvaro ³³ viva oriqetero qenti tinta tero Nora Kotira aarora.

³⁴ Nora Kotira aarama kero taintagaqaa oruntero vaintiru vaataqaa ropapaiviro, viva nai no avu kauqu vi vaintirura no avu kauquqaa vatero tavovaro vi vaintirura vaatavano totoqireva auti vaura.

³⁵ Ho totoqi vauvaro Elisaava himpiro *rumuqi* vi anima kero, oruntero qaiqaa vi vaintiruraqaa ropapaivuvu vainti virauruvano ⁷ tataa ahira ntuva kero nai avu rampai kora.

³⁶ Avu rampai kovaro Elisaava tavero, Gehaa sira aarama kero tiharo, Vira nora aarairaro uruarire, tuvaro nahenti viva uruvaro Elisaava tiharo, Ho nena maaqu vitaane, tiro.

³⁷ Minti tuvaro „nahenti vira muntukaqihairo voqamakero quahovaro,“ viva Elisaara aqutaraini kankakaama viro varikero, nai vainti vira vita kero otu vura.

Kara qoraiqura Elisaava koqema nimitora

³⁸ Vo enta Isarerini karara aavogu entava anintora. Vi entara Elisaava anirantero Giligaali vatu kaini oru vaura. Vi entara paropeti vaiinti yokuka ani ruvaqumavi vaiha Elisaava uva tura iri vauvaro viva nai kaiqa vaiintiara tiharo, Oru tave nora varera viraqi maa vaiintika kara unta nimitane, tiro.

³⁹ Minti tuvaro paropeti vaiinti vovano naahara rantareva vuva oru qaakau mantau tavero koqe karave tiva kero, airitahaa hiqi kero nai tavunaqi apuqama kero varero viri teqekero, taveqi aratora. Vikaqihairo kia vovanovata qaakau mantau okarara irura.

⁴⁰ Aratovaro ita vuvaro mpaqi kero tanuqi raaqu kero paropeti vaiinti nimumanta vika neha tave tiha, Oho, Kotira kaiqa vaiinti taruo, uhima kara maaqi vaivo. Hauri tenavu namake qutu vuvarorave, ti.

⁴¹ Vika minti tuvaro Elisaava tiharo, *Porisi/Vorusi* vonavu vare aniate, tumanta vare anuvaro Elisaava *porisi* vira taveqi aqukero tiharo, Ho kara raaquke nimiramanta naate, tumanta raaquke nimumanta vika neha tavovaro karavano ho vaura.

Elisaava vaiinti 100 navu kara nimura

⁴² Utivata *baalivata* impeqaiqu entara, vaiinti vovano *baaliqohairo* mpareti 20navu untakero ntuva varero, qaraaka *baalivata* ntuva varero, nai vatuka Baali-Salisa kero Elisaava vaunaini anintero, vira amuvaro, Elisaava nai kaiqa vaiintiara tiharo, Vi karara paropeti vika nimiane, tiro.

⁴³ Ho minti tuvaro vira kaiqa vaiintivano aqao tiro, Paropeti vaiinti 100 variavaro maa karava kia ho vikaqi varianarove, tuvaro Elisaava tiharo, Ho qaqi nimira naate. Noravano Kotiva mintima tivo: *Vika kara ho naivar hini karavano qaqima varianarove, tivo, tiro.*

⁴⁴ Elisaava minti tuvaro vira kaiqa vaiintivano vi karara paropeti vika nimumanta nora. Noravano Kotiva tuntemake, vika ho novaro hini kara qaqi vaura.

5

Nemaanirara tura

¹ Vaiinti vo Nemaaniva ekaa Siria iqoka vaiintiqaa raqiki vauva vaura. Noravano Kotiva vira kahaquvaro viva Siria vika navutaaka naatarake vauvarora tiro, Siria avuhainaava virara nora vaiintive tivakeharo virara quahe vaura. Nemaaniva iqoka vaiinti taruva vauvarovata, qora numuaravano vira vaata ne vauvaro vaura.

² Ho vo enta Siria Isareri vataini orunte iqoka raqiba Isareri nahenti vainti vo ravaaqavu vare vuru Nemaanira naata amuvaro viva vira paanaa kaiqa vare vaura.

³ Vira kaiqa vareharo vo enta viva Nemaanira naatara tiharo, Mpo, ti nora vaiintivano Sameriaini vai paropetira oru tavaitaro, paropeti viva vira numuara homa taiqa kaitirio. Viva mini virage te koqeve tiataarave, tiro.

⁴ Minti tuvaro vira naatavano nai vaati Nemaanira tiva amuvaro, viva Siria avuhainaava vaiinti nai kaiqa nahentivano tu uvara vuru tiva amuvaro ⁵ avuhainaava Nemaanirara tiharo, Te qara vo ai amiarirara are vira varera vuru Isareri avuhainaava vaiinti amiiane, tivakero avuhainaava qara ntuva kero Nemaanira amuvaro viva Isarerini vireva iharo 300,000 silvaa monu viravata varero, *kori* ori vira maara 60 kilo vaura viravata varero, koqe utavaaqa 10navuvata varero Sameriaini vura.

⁶ Mini oruntero Isareri avuhainaava vaiinti qara amuvaro qara viraqi uvavano mintima tiro:

Maa ti iqoka vaiinti Nemaanirave. Are vira kahaqiraro vira numuara tavanta viro taiqa vuarire, tiro.

⁷ Ho Isareri avuhainaava vi uvara kaara ntuva kero, nai utavaaqa qunahi qaannahima kero tiharo, Oho, Siria avuhainaava vaiintivano nantivaroe tiriara minti tivo? Te Kotika vaihae vaiinti aruke viraqaahai qaiqaa qaqi vara himpima kararave? Oho, viva ti hampata iqoka raquaina aarara rante vaivo, tiro.

⁸ Minti tuvaro vi uvava vi ani uvavar Kotira kaiqa vaiinti taruva Elisaavavata vi uvara iriro viva Isareri avuhainaava vaiintini uva varakero mintima tiro: Nana kaarae nena utavaaqa qunahi qaannahima kaaro? Vi vaiintira atitairaro te unanaini aniraqe te vira umiqaariraro viva ququaama paropeti vaiintivano Isarerini vaivo tiarire, tiro.

⁹ Elisaava minti tuvaro Nemaaniva nai iqoka *kaarinavuvata* ohivata varero Elisaara naavu qentiana oruntora.

¹⁰ Oruntovaro Elisaava nai kaiqa vaiinti attero tiharo, Are vevantero virara mintima tiane: Are Iotani Namariqi otuntera 7 tataama namari tuntuane. Are mintiraro ai numuaravano ekaa taiqa viraro ai vaatavano koqema vuarire, tiane, tiro.

¹¹ Minti tuvaro muntu tiva amuvaro, Nemaaniva vi uvara iruvaro vira arara itovaro naavu kero viharo tiharo, Oho, paropeti vaiintivano vahaqagaini veva ntero ti numuaravano taiqaarire tiro, nai Variqa Nora Kotira aareharo nai kauqu ti numuaraga vutuni maini iraro taiqaarire, turaroma viva kia mintiraitiro, viva qaqi naavuqi vaharo tiriara Iotani Namariqi otu tuntuane tivo.

¹² Ike, ti maaqa Damasikusini Apanaa Namarivata, Paripari Namarivata, koqe namaritanta vaiha ekaa Isarerini vai namariravata aatara kaarave. Namarivano numuara kahaqeharo taiqa kaitirio, te homa tenta maaqaini vaiha namari vitantaqi tunturaro ti numuaravano taiqa vitirio, tiro.

¹³ Minti tivakero viva tuqantaaviro nai maaqaini vuare tumanta, Nemaanira kaiqa vaiintinavu vira aaqant orunte virara tiha, Mpo, nora vaiintio, paropetivano ariara vukaari uti kaiqara varaane titirio, are vaakama varaaraitirio. Viva kia minti tiraitiro, ariara namariqai tuntiraro ai numuaravano taiqa vuarire tivo. Homa, are viva tinantema kera mintiane, ti.

¹⁴ Vinavuka minti tuvaro Elisaava tuntema kero, Nemaaniva otu Iotani Namariqi 7 tataa tuntukero tavovaro vira numuaravano taiqa vuvaro vira vaatavano qaraakaiqama viro, vainti naati vaata voqaara vaura.

¹⁵ Vira vaata koqema vuvaro viva nai kaiqa vaiintinavu hampata tuvurantero Elisaava vaunaini oruntero tiharo, Ho vate te kankomake iri tavauramanta kia maa vataraqaa vo variqa vo variqa variavo. Isareriqaa raqikiva Kotiva, vivaqaima Variqavano vaivo. Mpo, kaiqe te ariara quaheha vo haika ai amiare, tiro.

¹⁶ Minti tuvaro Elisaava aqao tiro, Noravano Kotiva qaqi vaimanta te vira kaiqa vaiintima vauvo. Vira autuqaa te ququaama turo, Kia te ariqihai vo haikavata vararerave, tuvaro Nemaaniva kempukaiqama kero tuvarovata, Elisaava kia vo haikavata viraqihairo varorva.

¹⁷ Ho Nemaaniva tiharo, Te kia vo haika ai amiarera, are ti qaqi kairage te Isareri vata quivike, donki taaraqantaqaa vaari vataari vitanta vare vuru maaqaini timitaate. Mintiqe te homa tenta maaqaini vi vataraqaa vaiha kia vo variqara iriraiti, Nora Kotiraraqai iriha ofaa vira iha quara amitaare, tiro.

¹⁸ Minti tivakero Nemaaniva qaqaa tiharo, Te vo haikara ai tiva amiariraro Noravano Kotiva vi uvava nunka timitaarie. Ti avuhainaava una variqa Rimonira autu tuahera kareva Rimonira naavuqi viharo viva ti kauqu tuma varero vi naavuraqi vi vairave. Ho vo enta vo enta ti avuhainaava Rimonira naavuqi oriqetero vira avuqaa kankakaama viro, ti kauqu tuate vairara ti, tevata una variqa avuqaa kankakaamavi vaunarave. Te naantiaravata minti minti iarera, hoe Noravano Kotiva vi uvaravata nunka timitaanarove? tiro.

¹⁹ Nemaaniva minti tuvaro Elisaava tiharo, Ai muntukavano paru irara vuane, tuvaro Nemaaniva Elisaara mini kero vura.

²⁰ Vira kero aaraini inaaraiqa vuvaro Elisaara kaiqa vaiinti Gehaasiva nai aatoqi irikero tiharo, Ike, ti nora vaiintivano Nemaaniva vira amireva i haikara varaataara vaivarovo viva Nemaanira qaqi kaivaro vivo. Noravano Kotiva qaqi vaira autuqaa te ququaama turo: Te kante vi, oru vi vaiintiraqaa vo haika vararerave, tiro.

²¹ Gehaasiva mintima kero iriro, viva vaaka Nemaanira avataqiro vuvaro Nemaaniva vira tavero nai ohi ravaaqavu kero iqoka *kaariqihairo* viavintero Gehaasira vitakero tiharo, Nana haikavanoe qovaraiqivo? Netanta hoe variavo? tiro.

²² Minti tuvaro Gehaasiva tiharo, Tetanta homa vauro. Ti nora vaiintivano ti tititeharo ariara mintima tiva amiane tivo: Paropetinavu Efaraimu ainqinaini varianaihai taaraqantavano tuvuntaavo. Are hoe *silvaa* monu uta vohaiqavata, utavaaqa taaraqantavata, ti kaiqa vaiinti amiraro viri vitanta nimiarire? tivo, tiro.

²³ Gehaasiva minti tuvaro Nemaaniva tiharo, Hove. Kia *silvaa* monu uta vohaiqa vararaitira, taara uta varaane, tivakero viva 6,000 *silvaa* monu taara uta mpikakero uta vitantavata, vaiinti taaraqantara iriharo utavaaqavata, Gehaasira amiro, nai kaiqa vaiinti taaraqanta nititomanta vitanta Gehaasira kahaqama vare vira avuni vi, vuru amitora.

²⁴ Vitanta Elisaara naava vururaga qa vaunaini orunterovo Gehaasiva vitantaqahairo monu utavata vo haikavata varero vuru naavuqi vatero, Nemaanira kaiqa vaiintitanta nititomanta anirante vura.

²⁵ Vitanta vuvaro Gehaasiva nai nora vaiintivano vaunaini vuvaro Elisaava virara tiharo, Gehaasio, taini vuaravave aniaro? tuvaro viva tiharo, Nora vaiintio, kia te vonaini vuraukavauve anuro, tiro.

²⁶ Minti tuvaro Elisaava aqao tiro, Ti maraquravano vaiharo tavaivaro vi vaiintiva nai iqoka *kaariqihairo* vaavintero ai vita kairave. Gehaasio, are kia vi monura varaataarave. Are tiharo, Te vi monura aquukeha utavaaqave, *orivi* naahove, *uaini* naahove, sipisipive, purumakauve, kaiqa vaiintive, kaiqa nahentive, ho varaainarave tivakera Nemaanira monu vararo.

²⁷ Are mintianara kaara Nemaanira arina numuarava aivata, are kuvuarama teraukavata, ekaa enta aruqiro vuanarove, tiro.

Elisaava minti tuvaro Gehaasiva vira mini kero tavovaro vaata ne vau numuarava viraqaa qovarama vuvaro vira vaatavano anoma kero hantaiqiro vaura.

6

Rori qiatavano namariqihairo kumpetaqi urura

¹ Vo enta paropeti vaiinti vika Elisaarara tiha, Ho tavaane. Tinavu naavu maa inaarauruma vaivo. ² Kairage tenavu otu Iotani Namari auvahihai katari teqake, nora naavu kaqake viraqai variare, tuvaro viva ho mintiate tiro.

³ Minti tuvaro paropeti vaiinti vovano vira irero tiharo, Mpo, nora vaiintio, arevata tinavu hampata aniane, tuvaro Elisaava hove tivakero ⁴ vika hampata vumanta vika Iotani Namari vaunaini otunte katari hoqaramake teqe vaura.

⁵ Teqe vauvaro vikaqihairo vaiinti vovano tuato roriva rahunkiro namariqi aqu vuvuro viva Elisaarara tiharo, Mpo nora vaiintio, te vo vaiinti rori vare anurava ruhunkiro namariqi aqu vivo, tiro.

⁶ Minti tuvaro Elisaava vira irero, Tanae aqu vivo? tuvaro vaiinti viva rori viva aqu vina Elisaara umiqovaro Elisaava katari kaara inaaraipa teqakero kaara vira viavi namariqi aqu kovaro rorivano namariqihairo kumpetero qaqini uru ntora.

⁷ Uru ntovaro ho Elisaava vaiinti virara tiharo, Ho nena rori varaane, tuvaro viva namariqihairo viavi nai rori varora.

Elisaava Siria iqoka vaiinti naatara kora

⁸ Vo enta Siria avuhainaava Isareri hampata raqireva iharo nai iqoka vaiinti taruka hampata seri naavu maaqa kaqaaina uvvara tivakero vo vatuka kaama tero vi vataraqaa seri naavu maaqa kaqareva vura.

⁹ Vika vi vataraqaa nái seri naavu maaqa kaqatovaro, Elisaava Isareri avuhainaaraini uva varakero tiharo, Are raurihara variane. Siria vika vi vataraqaa variavo. Hauri Isareri mini vivorave, tiro.

¹⁰ Elisaava vi uvvara vara kovaro Isareri avuhainaava iriro, vaiinti vonavu nititomanta vinavuka ampeqamake tavovaro Elisaara uvavano ququa vaumanta Isareri kia Siria seri naavu maaqa kaqatonaini vura. Qaiqaa qaiqaavata Siria voqi voqi vaara autute vauvaro Elisaava virara Isareri avuhainaara tiva ami vaura.

¹¹ Mintiaqiro vi vauvaro Siria avuhainaa vaiinti arara itovaro nai iqoka vaiinti taruka naarama kero tiharo, Niqihairo ta vaiintivae Isareri avuhainaara mantaraini vaivo? tuvaro ¹² vikaqihairo vovano aqao tiro, Nora vaiintio, kiama tinavuqihairo vovano mintivo. Paropeti vaiinti Elisaava Isarerini vaiva, vivama ekaa haika tenavu autirera unara Isareri avuhainaara tiva ami vaivo. Are nena vaitaanra rumuraqi vahara uva tianara, vi uvaravata viva Isareri avuhainaara tiva ami vaivo, tiro.

¹³ Minti tuvaro Siria avuhainaava vikara tiharo, Ne oru Elisaava variainaara rantake tave, viri ti tiva timiqe te iqoka vaiinti nititaari oru vira ravaaqvavu vare aniate, tivakero vika nititama kora.

Ho vovano uva varakero tiharo, Viva Dotaani vatukainima vaivo, tuvaro ¹⁴ Siria avuhainaava iqoka vaiintive, ohive, iqoka *kaarive*, vara komanta vika entaqi oru Dotaani vatuka ututuma tora.

¹⁵ Mintimate vauvaro vira qararaa toqaqi Elisaara kaiqa vaiinti viva vahaqaini vevantero tavovaro Siria iqoka vaiintive ohive iqoka *kaarive* vi vatukara ekaa ututuma tovaro viva oru Elisaarara tiharo, Oho, nora vaiintio, tetanta nantie irarave? tiro.

¹⁶ Viva minti tuvaro Elisaava vira tiva amiro tiharo, Kia qetaane. Quqaama vika airi iqoka vaiinti variavarovata, titanta kahaqi variaka nái airitahaama variavo, tiro.

¹⁷ Minti tivakero Elisaava Nora Kotira aarero tiharo, Noravaauvo, are maa vaiintira avu rampai kairaro viva ti kahaqi variakara tunara tavaaire, tuvaro Noravano Kotiva vira kaiqa vaiinti avu rampai kovaro viva tavovaro Elisaava vau aiqinaraqaa ohive iqoka *kaari* iha itokave airitahaampiqavi Elisaara ututumate vaura.

¹⁸ Ho Siria vika Elisaara ani ravaaqvavu kareka uvaro Elisaava Nora Kotira aarero tiharo, Are Siria vaiinti maaka avu konkiraigama kairamanta vika kia ho tavaate, tuvaro Noravano Kotiva vika avu konkiraigama kora.

¹⁹ Vika avu konkiraigama kovaro Elisaava vika unaini oruntero vikara tiharo, Ne hampi aaraqaa aninte vo vatukaqima anintaavo. Ho ne ti avataqai aniqe te ni ntitavare ne rante varia vaiintiva vainaini vuare, tumanta vika Elisaara avata vare vauvaro viva vika ntita varero Sameria vatukaini vuru kora.

²⁰ Ho vika Sameria vatukaqai oriqetovaro Elisaava Nora Kotirara tiharo, Noravaauvo, are vika avu rampai kairaa qaiqaa koqemake tavaate, tuvaro Noravano Kotiva vika avu rampai komanta vika nái Sameria vatukaqai vaura kankomake tavora.

²¹ Siria vika Sameria vatukaqì vauvaro Isarerì avuhainaava Elisaara irero tiharo, Nora vaiintio, te vika arukarerave? tiro.

²² Minti tuvaro Elisaava aqao tiro, Kia vika arukaane. Are raqihara nena navutaaka ravaaqavu taana vaiintika kia arukaantema kera, are maaka kia arukaraitira, karavata namarivata nimiramanta namake anirante nai avuhainaava vainaini vuate, tiro.

²³ Minti tuvaro viva nora karakaqa autukero Siria vika nimumanta nora. Nama kovaro viva vika nititama komanta anirante Siria avuhainaava vaunaini vura. Vi entaraqaaah Siria vika kia qaiqaavata Isarerì vataini ani vika hampata iqoka raqua.

Siria vika Sameria vatuka ututuma tora

²⁴ Vo ihinavu aitarovaro Siria King Beni-Hadaativa, Isarerì hampata, raqireva ekaa nai iqoka vaiinti nutu ruvaaquma varero oru Sameria vatuka ututuma tora.

²⁵ Vika yukai enta ututumate vaumanta Sameria vatukaqì vauka karara aavoqua. Mintuvaro kara koqaavano uritarero vauvaro donki qjata koqaa vaireva, 80 silvaa monu vauvaro, qaakau qaniqani vira maaravano ¼ kiloqai vauvaro vira koqaa silvaa monu 5navu vaura.

²⁶ Vo enta Isarerì avuhainaava vatuka vaantaavura qjataqaa ni vauvaro nahenti vovano vira aarero tiharo, Mpo, nora vaiinti ti avuhainaao, are ti kahaqiane, tiro.

²⁷ Minti tuvaro avuhainaava nai tiva amiro tiharo, Noravano Kotiva kia ai kahaqirera, te nantiakee ai kahaqirarave? Te uitivata uainivata kia vatauro, tiro.

²⁸ Minti tivakero vira irero tiharo, Ho nena uva tiraqe iriare, tuvaro nahenti viva vira tiva amiro tiharo, Viti nahentiva tiriara tiharo, Kaiqetanta vate ai vainti naane namake, huratanta tenta vainti naare, timanta ²⁹ te eo tivake tenta vainti naane aruke vikanti unta namakema, ho vira qararaa vi nahentira vainti aruke untake narare turaro viva nai vainti kukeqa taivo, tiro.

³⁰ Minti tuvaro avuhainaava nahentivano tu uvvara iriro, ike mpo tiharo nai utavaaqa qunahi qaanahima kero, vaantaavura qjataqaa ni vaumanta vaiinti nahenti tavovaro viva nai utavaaqa qunahitora vira vetanto vaataqaa nonkutova kovaara utavaaqa vaura.

³¹ Avuhainaava vaiinti viva tiharo, Oho, Elisaara okaraqaama maa maarava qovaraiqivo. Vate vira qiatavano nai kururuqaa qaqi vairera, Kotiva homa ti arukaanarove, tivakero ³² viva Elisaava auunta teqa kaarire tiro, vo vaiinti atitovaro vura.

Ho Elisaava nai naavuqi Sameria nora vaiinti vokuka hampata oquvi vauvaro avuhainaava atito vaiintiva aaraini qaqi ani vauvaro Elisaava nora vaiinti vika tiva nimiyo tiharo, Vojama kero vaiinti aruke vaiva, viva vatema ti auonta teqa kaaina vaiintira vo atitavaro ani vaivo. Ho vi vaiintiva maini aniramanta ne kempukaiqamake qenti tinta taivaro viva kia naavuqi uriqetaarire. Vi vaiintiva anintairaro avuhainaava naivatama vira avata varero anintaanarove, tiro.

³³ Elisaava uva ti vauvaro vira arukaarira vaiintiva oruntovaro avuhainaava naivata vira naantia orauntora. Avuhainaava Elisaarara tiharo, Oho, Noravano Kotiva tivaro qora enta maava tinavuqi qovarama vivo. Te qumina viva tinavu kahaqianara veka variarorave. Te ai arukarerave, tiro.

7

¹ Minti tuvaro Elisaava tiharo, Are Noravano Kotiva ti uvvara iriane. Viva mintima tivo:

Hura maa kuari avuraqaa vaiinti nahenti maa vatukara qenti vainaini orunte, vika porisi vira maara 3 kilo vainarave, baali vira maara 6 kilo vainarave, vika 1 kinaaqai aqukeha varevarare, tivo, tiro.

² Elisaava minti tuvaro iqoka vaiinti vovano avuhainaara kauqu tuateharo ni vauva tiharo, Eqaane. Noravano Kotiva vate nora aaqu vara kairaro ntirarovata, hura kiama vi karava varianarove, tiro.

Minti tuvaro Elisaava nai vira tiva amiro tiharo, Te quqaama turo. Are vi haikava qovaraiqinara taveravata, kiama vi karara nenanrave, tura.

Siria iqoka vaiinti getake vura

³ Vi entara vaiinti 4navu vaata ne vau numuarava vikaqaa vauka Sameria vatuka qenti aqaaqini vaura.

Vinavuka nai tiva ami nai tiva ami tiha, Qumina tenavu maini vahia qutuainara veka variarorave? ⁴ Tenavu vatukaqì vuarera, tenavu karara narara variqi vi, qutuma virarave. Tenavu maini aqaaqini variarera, tenavu qutuma virarave. Ho kaiqenavu Siria seri naavu maaqa kaqataanaini vuare. Vika tinavu vehakuma timitaivera, tenavu qaqi variare. Vika tinavu haru kaivera, tenavu qutu vuare, ti.

⁵ Minti ti vauvaro enta ireva umanta vinavuka himpi Siria vika vaunaini orunte tavovaro kia vovanovata mini vaura. ⁶ Eronaini Noravano Kotiva uva *nontanta/otata*

qovarama komanta Siria vika tiha, Navutaaka iqoka vaiinti nora haikavano nai ohive, iqoka *kaarive*, vare aniavaro auvantaivo. Oho, Isarerini vika Hiti avuhainaaravata Isipi avuhainaaravata koqaama kaamanta vitanta nái iqoka vaiinti ntita vare tinavu hampata raqireka aniaavo, ti.

⁷ Enta ireva umanta Siria vika minti tivake nái *seri* naavuve, nái ohive, donkive, qaqira mini ke, getake aiqu autute vinura. Navutaaka harivorave ti, kia vo haikavata vararaiti, vika qaqi vinura.

⁸ Ho vika vumanta vaiinti 4navu mini orunte vatuka viraqi oriqete *seri* naavu voqi tavovaro karavanovata namarivanovata viraqi vaumanta vinavuka vira varake ne vaura. Namake vika Siria u haikara *kori* orive, *silvaa* orive, utavaaqave, vare muntu vahaqaqaini voqi vauvu tora. Vinavuka qaiqaa uru vo *seri* naavuqihai vo airairavata vare muntu voqi vauvu tora.

⁹ Mintimake vinavuka nai tiva ami nai tiva ami tiha, Tenavu kiama koqe okara auturo. Vate tenavu tavaura haikava koqe vakaakama vaivo. Hauri tenavu vi uvvara kia voravata tiva amiraiti, aatitainara veka variariraro tinavuqaa uva variantorave. Varaiqenavu vaaka vuru avuhainaara qiata vaiintinava tiva nimiare, ti.

¹⁰ Ho vinavuka minti tivake entaqiraara anirante Sameriaiini orunte qentiqaa maimaraara raqikuka naaramake tiha, Tenavu Siria *seri* naavu maaqa kaqataararaqi orunte tavauramanta kia vaiinti voqavanovata viraqi variavaro kia vaiinti uvavata vaivo. „Siria vika getake ruqemake vuavaro vika ia haikava vatuka viraqi qaqi vaivo.“ Vika kiama nái ohivata donkivata kantaruma taara qantu karaiti, kia nái *seri* naavu kaqataara rampai karaiti, vika vi haikara vi haikara qaqi kema vuavo, ti.

¹¹ Minti tumanta qentiqaa maimaraara raqikuka vi uvvara iri, naveraiti vaumanta, vokuka vi uvvara vare avuhainaara vuru tiva amura.

¹² Avuhainaava entaqi vi uvvara iriro himpiro nai qiata vaiintinavuara tiharo, Te Siria vika avu aatoqi vaira irima kauro. Tenavu karara aavoqunara tavema, vika nái vatuka ke, otu ahikaqii vaara autute variavo. Vika tinavuara vatuka ke aqagaini vevantaiqe vika ravaaqavuke vika vatuka varaare ti, mintiavo, tiro.

¹³ Minti tuvaro qiata vaiinti vovano tiharo, Kaijenavu vaiinti vonavu vara kaari vinavuka oru vatukaqii Siria ampeqihā tavaate. Vika vinavuka arukaivera, vira hove. Tenavu ekaa Isarerini maini vauraukavata qutuma virarave. Vinavuka mini qutirave, tinavu hampata maini vaiha qutirave, tenavu virara hovema turo. Kaiqe ohi 5navu qaqi vainara nimiari vare vuate, tiro.

¹⁴ Minti tumanta vika vaiinti vokuka kaamate iqoka *kaari* taaraqantavata, ohinavuvata, vi vaiintika nimuvaro avuhainaava vinavuka nititero tiharo, Nenavu oru ampeqamake tavaate, tiro.

¹⁵ Tumanta vaiinti vinavuka aaraini viha tavovaro Siria qaqirako utavaaqarave, avu- hehavaarave, vi haikara vi haikara aara voqaa voqaa vaumanta vinavuka tavamaqii vivi, Iotani Namarini otunte, viraqaahai oturante vi haikara vi haikara tavora avuhainaara vuru tiva amura.

¹⁶ Vuru tiva amumanta vaiinti nahentivata vi uvvara iri, vika kante Siria naavu maaqa kaqatonaini orunte, ekaa haika vika kora, karave vo haikave varora. Vi entara Noravano Kotiva tintemake, vaiinti nahenti *porisi* 3 *kilo* maara vaurave, *baali* 6 *kilo* maara vaurave, varareka 1 kinaa aquukeha vare vaura.

¹⁷ Ho avuhainaara kauqu tuateharo vira hampata ni vau vaiintiva vauvaro avuhainaava virara oru vatuka qentiqaa raqikiane tuvaro viva mini oru himpi vaumanta vaiinti nahenti Siria naavu maaqainiara kante viha vira venta kovaro hiqintumanta vika viha vi vaiintira rakavu kovaro qutu vura. Avuhainaava Elisaara naavuni oruntovaro Elisaava vira tiva amuntemakero, vi vaiintiva qutu vura.

¹⁸ Elisaava avuhainaara tiva amiro tiharo, Hura maa kuari avuraqaa vaiinti nahenti Sameria qenti vainaini orunte, *porisi* vira maara 3 *kilo* vainarave, *baali* vira maara 6 *kilo* vainarave, 1 kinaa aquukeha varevarave, tuvaro ¹⁹ iqoka vaiinti qutu vuva Elisaarara tiharo, Eqaane. Noravano Kotiva vate nora aequa vara kairaro ntirarovata, hura kiama vi karava varianarove, tuvaro Elisaava nai vira tiva amiro tiharo, Te quqaama turo. Are vi haikava qovaraiqinara taveravata, kiama vi karara nenanrave, tura.

²⁰ Ho Elisaava tunte iro vi haikava qovaraiqura. Iqoka vaiinti viva vatuka qentiana himpi vaumanta vaiinti nahenti kante viha vira ventake rakavu kovaro qutu vura.

¹ Vira maaqu qutuvura Elisaava vira qaqi vara himpimako nahentiva Sunemihainaava vauvaro Elisaava vira tiva amiro tiharo, Noravano Kotiva mintima tivo: Karara aavoqi entava tinavu vataini qovarama viro 7 ihiara variqiro vuainarara tira, are himpira nena vaintivara ntita varera oru vo vataini vairaro qora enta viva taiqa vuarire, tuvaro ² nahenti viva Elisaava tunte iro, nai vaintiaravata himpiro Pirisia vataini 7 ihiara oru vaura.

³ Ho 7 ihi aitarovaro viva Pirisia mini kero nai vaintiaravata orurantero Isarerini nai naahuvata nai vatavata qaiqaa nai amiarire tiro, avuhainaara tavareva vura.

⁴ Vira tavareva vuvaro avuhainaava Elisaara kaiqa vaiinti Gehaasikantiro uva tivaqiro viharo virara tiharo, Are Elisaava nora kaiqa varaira virara ti tiva timiqe te iriare, tiro.

⁵ Minti tuvaro Gehaasiva „nahenti vira maaquvano qutu vura“ Elisaava qaiqaa qaqi vara himpimako uvvara avuhainaara tiva ami vauvaro vi nahentiva avuhainaa vaiinti irareva vihairo anintora.

Anintovaro Gehaasiva vitanta noka tavero avuhainaara tiharo, Ho tavaane. Maa vi nahentivave. Maa vira maaquve. Vira maaqu maava qutu vivaro Elisaava vira qaqi vara himpima kairave, tiro.

⁶ Tuvaro ho avuhainaa vaiinti viva Elisaava vi haikara auturara nahenti vira irovoro nahentivave. Maa vira maaquve. Vira maaqu maava qutu vivaro Elisaava vira qaqi vara himpima kairave, tiro.

⁷ Vo enta Elisaava Siria vataini nora vatuka Damasikusiqi vura. Vi entara Siria King Beni-Hadaativa rovara varomanta vokuka avuhainaa vaiinti vira tiva ami tiha, Elisaava vate Damasikusinima ani vaivo tura.

⁸ Tuvaro avuhainaava Hasaelira aaramakero virara tiharo, Vo haika vira aminaravata varera oru Kotira kaiqa vaiinti tarura tavaane. Are vira tiva amiraro viva Nora Kotira ireharo tavaareire. Ti rovara taiqaanarove, kiae taiqaanarove, tiro.

⁹ Minti tuvaro Hasaeliva Damasikusiqraara, koqe haika, vo haika vo haika, 40 kamerivano ho varera raira kero kameriqaa vaari vatero varero Elisaava vaunaini vura. Viva mini oruntero Elisaarara tiharo, Nora vaiintio, ai paanaa vaiinti Beni-Hadaativa Siria avuhainaava ti are iananaini tititero mintima tivo: Oru vira irehara tavaane. Ti rovaravano taiqaanarove, kiae taiqaanarove? tiane tivo, tiro.

¹⁰ Tuvaro Elisaava vira tiva amiro tiharo, Are virara tiharo, Ai rovaravano taiqama vuanarove tiane. Oho, Noravano Kotiva ti tiva timiharo viva qutuma vuanarove tivo, tiro.

¹¹ Elisaava minti tivakero viva kempukaiqama kero Hasaelira aituti vauvaro Hasaeliva airi avu aato uti vauvaro viraqaaahairo Elisaava iqj ratora.

¹² Iqi rate vauvaro Hasaeliva vira irero tiharo, Nora vaiintio, are nana kaarae iqj rate variaro? tuvaro Elisaava nai vira tiva amiro tiharo, Oho, naantiara are airi qora okara Isarerini vaiinti nahenti autu nimitenarara irihama te iqj rate vauro. Are iqoka raqihara Isarerini vika kempuka naavu maaqa iha quarakeria, vika qaraaka vaiinti iqoka paiseqohairaa arukera, vika vainti naati utu vataqaa tairi kairaa qutu vivarave. Are vika nahenti vainti taiqama vika iqoka paiseqohairaa auhavau *kuhia/qumpihia* kenarave, tiro.

¹³ Elisaava minti tuvaro Hasaeliva aqao tiro, Te qaqi qumina vaiintivanoma vauro. Nantiabee te vi haikara nora haika autirarave? tuvaro Elisaava vira tiva amiro tiharo, Noravano Kotiva ti humiqeharo arema Siria avuhainaa vaiintiqama vinarave tivo, tiro.

¹⁴ Elisaava minti tuvaro Hasaeliva anirantero King Beni-Hadaativa vaunaini vuvaro avuhainaava vira irero tiharo, Elisaava nana uvae ai tiva amivo? tuvaro Hasaeliva vira tiva amiro tiharo, Viva tirira tiharo, Ai rovaravano taiqa virara are homa vainarave tivo, tiro.

¹⁵ Minti tiva amirovata, vira qararaa Hasaeliva *paraanke* varero muntu namariqi quntama kero varero vuru avuhainaa vaiinti viri naavuma tovaro avuhainaa vaiintivano kia aihovata vararaitiro, qutu vura. Beni-Hadaativa qutu vuvaro Hasaeliva vira vatuva varero Siria avuhainaa vaiintiqama vura.

Jehoraamuva Iutaa avuhainaava vaura

¹⁶ Ahaapira maaqu Joraamuva 5 ihiara Isareriqaa raqiki vau entara, Jehosafaatira maaqu Jehoraamuva nai qora vatuka varero Iutaa avuhainaa vaiintiqama viro vaura.

¹⁷ Vi entara viva 32 ihi varakova avuhainaa vaiintiqama viro 8 ihiara Ieruharemiqu vaiharo Iutaaqaa raqiki vaura.

¹⁸ Viva Isareri King Ahaapira raavura varatovara tiro, viva Ahaapira anku aanantero, Isareri avuhainaa vaiinti vokuka qora okara autuntema kero, Nora Kotira avuqaa qora okara auti vaura.

¹⁹ Mintuvarovata, Noravano Kotiva nai kaiqa vaiinti Devitiraro tiro, viva kia Iutaa vehi autu taiqakaataa uvaro kia vika taiqa kora. Haaru viva nai kauqu aiqiqaa aqukeharo ekaa enta Devitira ankuqihairo vaiinti vovano avuhainaa vaiinti varianarove turara iriharo kia mintura.

²⁰ Jehoraamuva Iutaaqaa raqiki vau entara Idomu vika kia Iutaa avuhainaa vaiinti vira vevaaraini vairaiti, vika vaiinti vo kaama tovaro viva vika avuhainaa vaiintivano vaura.

²¹ Mintuvaro Jehoraamuva iqoka *kaariqi* niha raquka ekaa ntta varero, Idomu hampata raqireva Sai vatukaini oruntomanta, Idomu vika ani Jehoraamuravata vira qiata vaiintinavu iqoka *kaariqaa* raqikukavata ututumate vaura. Ututumate vauvaro Jehoraamuva entaqi himpiro Idomu ututoraqihairo ruqema kero vumanta vira iqoka vaiinti qetake iqoka qaqrake anirante maaqaini vura.

²² Vi entara Iutaa kia Idomu naatarake iqoka qaqrake vurara ti, maa entaravata Idomu vika kia Iutaa vevaaraini vairaiti, náivano náiqaa raqiki variara. Vi entara Lipina vatukaihainaaka vikavata kia Iutaa vevaaraini vaireke auti vaura.

²³ Ho King Jehoraamuva ekaa vo kaiqa vo kaiqa varo uvara vuku vo, *Iutaa Avuhainaaka Uva Okarave* tu vukuraqi qara ntuvatora. ²⁴ Jehoraamuva qutu vumanta vira vaata vare nai kaivaquakavara quntama tonaini Devitira Vatukave turraqi vuru quntama tora. Quntama tovaro vira maaqu Ahasiava vira vatuka varero avuhainaa vaiintiqama viro vaura.

Ahasiava Iutaa avuhainaava vaura

²⁵ Ahaapira maaqu Joraamuva 12 ihiara Isareriqaa raqiki vau entara, Jehoraamura maaqu Ahasiava avuhainaa vaiintiqama viro Iutaqaa raqiki vaura.

²⁶ Ahasiava 22 ihi varakova avuhainaa vaiintiqama viro Ieruharemipi vohaa ihiara raqikura. Vira nova Ataliaava Isareri King Ahaapira raavuravano vauvaro vira naaqua Isareri King Omuriva vaura.

²⁷ Ahasiava nova Ahaapira ankuqihaina nahentivano vaurara tiro, Ahaapira anku qora okara autuntema kero, Ahasiavavata Nora Kotira avuqaa qora okara auti vaura.

²⁸ Vo enta King Ahasiava Isareri King Joraamukantiro Siria King Hasaelira hampata raqireka oru Ramoti vatuka aumanto Gileaatini raqi vauvaro Siria iqoka vaiinti vika Joraamura arutora.

²⁹ Vira arutovaro viva iqoka qaqlira kero vaata arutora tavanta vuarire tiro, oru Jeseririni vaura. Viva mini vauvaro Ahasiava vira tavareva mini vura.

9

Jehura kaamatora

¹ King Joraamuva Jeseririni vauvaro paropeti vaiinti Elisaava paropeti vaiintiqihairo vaiinti vo aaramakero virara tiharo, Are gerama varera, orivi vahavera taqu maa varera Gileati vatainai vai vatukara Ramotini vuane.

² Mini oruntera Nimisira nainti Jehosafaatira maaqu Jehura rantakaane. Viva nai hana vaiinti hampata vainaraqihairo are vira vita varera vo *rumuqi* vuru kera ³ vahavera vira qiataqaa aqu amitehara vira mintima tiva amiane: Noravano Kotiva ariara tiharo, Te ai kaamate ariara viva Isareri avuhainaa vaiintima vaito turo, tiane.

Are minti tivakera kia vairaitira, genti quantu kera kantama vuane, tiro. ⁴ Elisaava minti tuvaro qaraaka paropeti viva himpiro Ramotini vura.

⁵ Viva mini oruntero tavomanta iqoka vaiintiqaa raqiki vauka ruvaquamavi vaita uva ti vauvaro viva vikara tiharo, Ninavu qiata vaiinti te uva tiva amirera anuro, tuvaro Jehuva vira irero, Are takantira uva tirevave? tuvaro viva viva ainti uva tirerave tiro.

⁶ Minta tuvaro Jehuva himpiro vira hampata naavuqi origetovaro paropeti vaiinti viva orivi vahavera Jehura qiataqaa aqu amitero vira tiva amiro tiharo, Noravano Kotiva tinavu Isareri Variqavano mintima tivo:

Te vate ai kaama taarirara are Isareri avuhainaa vaiintiqama vira, ti vaiinti nahenti vikaqaa raqikiane.

⁷ Are nora vaiinti Ahaapira anku vika ekaa aru taiqa kaane. Are mintiraqe te Kuini Jesebelira nai qora kaiqa kaara vira qoraiqama amitarerave. Viva ti paropetivata, ti kaiqa vaiinti vonavuvata, arukai nahentivave.

⁸ Are Ahaapira anku ekaa vehi autu taiqa kaane. Vira anku nora vaiintive, vehi vaiintive, te ekaa vika aru taiqa karerave.

⁹ Te haaru Nebaatira maaqu Jeroboamura ankuvata, Ahiaara maaqu Basaara ankuvata, qoraiqama nimitaunantemake, vikavata mintima nimitaari kia voqavanovata qaqi vaivarave. ¹⁰ Jesebeliva qutu viramanta Jeseriri vatukaihainaa vairinavu vira vaata nama taiqa kaimanta kiama ho vira vaata vare muntu quntevarave tivo, tiro.

Paropeti vaiinti viva Noravano Kotiva tu uvvara tiva taiqakero, qenti quantuakero vevantero kantama vura.

¹¹ Kantama vuvaro Jehuva vevantero nai kana qiata vaiinti vaunaini vumanta vika vira ireha tiha, Ekaa haikavano hoe vaivo? Nantivaroe vuera vaiinti viva ai ani tavaivo? tuvaro Jehuva vika tiva nimiro tiharo, Ne mintia vaiintika tia okarara iri tavaarave, tiro.

¹² Tumanta vika aqao ti, Tenavu kia iri tavaunarave. Are vira uva tinavu tiva timirage iriare, tuvaro Jehuva vikara tiharo, Vi vaiintiva ti viri tiva timiro tiharo, Noravano Kotiva mintima tivo: Te vate ai kaama taarirara are Isareri avuhainaa vaiintiqama vinarave tivo, tiro.

¹³ Jehuva minti tumanta vira kenuka vaakama nái vukai tavuna aqutora ravaqaake aiqu ntavaqí vuavau vuqi amitovaro Jehuva viraqaa himpi vaumanta vika *aanumaara/noma* vuaqeha naveraitiha, Jehuva *Isareri*, avuhainaa vaiintivano vaivo, tura.

Jehuva Joraamura arukora

¹⁴ Minti tuvaro Nimisira nainti Jehosafaatira maaqu Jehuva Ramotini vahiaro nai kena iqoka vaiintinavu hampata Joraamura arukerara ti vaura.

Isareri vika Siria King Hasaelira hampata raqu entara Siria vika Joraamura arutovaro ¹⁵ viva iqoka qaqlira kero nai vaata arutora tavanta vuarire tiro, Jeseririni oru vaura.

Mintuvaro Jehuva nai kena iqoka vaiintiara tiharo, Nenavu quqaa tiriara tiha viva Isareri avuhainaa vaiintivano vaivo tivera, nenavu koqemake raqikivaro Ramotihainaa vaiinti vovano kia vi uvvara varero Jeseririni tenavu autirera iaina uvvara vuru tiva nimiarire, tiro. ¹⁶ Jehuva minti tivakero nai iqoka *kaariqi* vaarintero Ramoti kero Jeseririni vura.

King Joraamura vaatavano kia anoma tavanta vuvaro viva Jeseririni nai naavuqi taintaqaa vaitatero vauvaro Iutaa King Ahasiavavata mini otuntero vira tave vaura.

¹⁷ Vira tave vauvaro vaiinti vovano Jeseriri vatuka vaantaavura qiataga maimaraara raqiki vauva vahiaro tavovaro Jehura iqoka vaiintinavu vira hampata ani vaura. Ani vauvaro viva naveraitiha, Te tavauramanta iqoka vaiintima aaraini aniaavo, tiro.

Minti tuvaro Joraamuva tiharo, Ne iqoka vaiinti vo tivaro viva ohigaa kantero aaraini oruntero vika ireharo, Ne taro mantaraini variakae aniaavo? tiarire, tiro.

¹⁸ Ho minti tuvaro iqoka vaiinti vovano ohigaa aaraini oruntero Jehurara tiharo, Avuhainaa vaiintivano are aniana okarara irirevave. Are maateraiqirevae aniaro? tuvaro Jehuva vira tiva amiro tiharo, Vira kia ai kaiqavauve. Are tinavu naantiaraini tinavu avataqira aniane, tiro.

Tuvaro maimaraara raqikuva tavovaro iqoka vaiinti viva kia orurantero anuvaro viva avuhainaa vaiintivano vaunaini uva varakero tiharo, Vika ianaini vi vaiintiva kia orurantero anivo, tiro.

¹⁹ Tuvaro avuhainaava vaiinti vo vara kovaro vura. Vivavata oruntero Jehurara tiharo, Avuhainaava are aniana okarara irirevave. Are maateraiqirevae aniaro? tuvaro Jehuva virara tiharo, Vira kia ai kaiqavauve. Are tinavu naantiaraini tinavu avataqira aniane, tiro.

²⁰ Tuvaro maimaraara raqikuva tavovaro vaiinti viva kia orurantero anuvaro viva avuhainaava vaunaini uva varakero tiharo, Vaiinti vivavata vika ianaini viva kiama qaiqaa orurantero anivo. Te tavauraro avuni iqoka *kaariqi* ani vai vaiintiva, viva Nimisira maaqu Jehura voqantemba kero, kante ani vaivo. Jehuva iqoka *kaariqi* vueraiqaavi vaiintiva kantaintemba kero, kante vaivama vaivo, tiro.

²¹ Minti tuvaro King Joraamuva tiharo, Ti iqoka *kaari* qerama timitaane, tumanta vika qerama amitovaro Joraamuva nai iqoka *kaariqi* vaarintovaro Iutaa King Ahasiava iqoka *kaari* voqi vaarintora. Vitanta aaraini Jehura vitakareka vivi, Jeseririhainaa vaiinti Nabotiva u vatava vaunaini oru vira vitakora.

²² Joraamuva oru Jehura tavero viva vira irero tiharo, Jehuo, are maateraiqirevae aniaro? tuvaro Jehuva nai tiva amiro tiharo, Oho, ai nova Jesebeliva una variqanavu quahama nimiteharo viva vaana kaiqa vare vairara ti, nantiakée tenavu maateraiqihā vairarave? tiro.

²³ Minti tuvaro Joraamuva Jehura uva iriro vaaka nai iqoka *kaari* tuqantaakero anirantero kanteharo naveraitiro, Oho, Ahasiao, are ti qoraiqama timitateva aniaro, tiro.

²⁴ Minti tivakero vuvaro Jehuva veva hinta utukero vutu Joraamura tauvaqakanta arutovaro vevavano vira muntuka raqonta kovaro viva nai iqoka *kaariqi* hiqintiro qutu vura.

²⁵ Ho qutu vuvaro Jehuva nai kahaqi vau vaiintira Bitikaarara tiharo, Joraamura vaata varakera Jeseririhainaara Nabotira vataqaa aqukaane. Haaru Noravano Kotiva Joraamura qora Ahaapira tiva amu uvara, are qaqie vi uvvara iritaaro? Vi entara tetanta ohiqaa oquvi vaiha Ahaapira naantiaraini vi vauraro Noravano Kotiva Ahaapirara tiharo,

²⁶ Te tavauramanta enta vaiinti vokiaka Nabotiravata vira maaqunavuvata arukaarave. Oho, te Noravano Kotika quqaama turo: Naantiara ai okara kaara te Nabotira vataqaa nina qoraiqama amitaainarave, turave. (1 King 21:21, 29)

Ho are Joraamura vaata varakera Nabotira vataqaa viavi aqu kairaro Noravano Kotiva tivatai uvava vivau variarire, tura.

Iuttaa King Ahasiava qutu vura

²⁷ Iuttaa King Ahasiava tavovaro Joraamura arukovaro viva qetakero nai iqoka *kaariqi* ruqemake vuare tiro, Beti-Hagani vatukaini vi vau aararaqaa kantama vuvaro Jehuva nai iqoka vaiinti hampata Ahasiara avataqiro vura.

Jehuva naveraitiharo, Viravata arukaate, tumanta vira iqoka vaiinti vira avataqiqi vuvaro Ahasiava nai iqoka *kaariqi* viviro, Guru Aiqinaini vi vau aararaqaa Ipiremi vatuka aumanto oruntomanta vika *vevaqohai*, Ahasiara arutovaro viva viviro, Megido vatukaini oruntero qutu vura.

²⁸ Viva qutu vumanta vira kaiqa vaiintinavu iqoka *kaari* voqi vira vaata vara vaari vate, vare vuru Ieruharemini nai kaivaqara Devitira vatukave turaqi quntama tora.

²⁹ (Joraamuva 11 ihiara Isareriqaa raqiki vau entara Ahasiava Iuttaa avuhainaa vaiintiqama vura.)

Kuini Jesebelira arukora

³⁰ Jehuva Ahasiara arukero orurantero Jeseririni anura.

Ho Jesebelira mini vaiharo Joraamuva qutu vu uvvara iriro, nai avu kaukiqaa *peni* aqutero qiata kaukivata rumpa tero, oru *uintuaqaa* himpi vaiharo aaraini vuavu tave vaura.

³¹ Viva vuavu tavovaro Jehuva vaantaavura qentiqaa uriqetovaro Jesebeliva naveraitiharo, Are maateraiqirevae aniaro? Oho, are Simurira aananteria nena nora vaiinti aru kaaravama aniaro, tiro.

(1 King 16:8-12)

³² Minti tuvaro Jehuva vuruvi vira tavero naveraitiharo, Tauka taukae ti mantaraini variavo? tumanta kaiqa vaiinti taaraqantae, taaraqanta vohaiqae, kante aninte vuavu tave vauvaro ³³ Jehuva vinavukara tiharo, Vira *uintuaqhai* vara vaavi aqu kaate, tumanta vinavukka Jesebelira vara vaavi aqu kovaro vira vaatavano vataqaa tairi vuvaro naarevano naavuqaavata ohitantaqaavata taatavuviro vaura. Jehuva qaqi komanta vira ohitanta aiquqohai Jesebelira vaata rakavu raakavumake vatora.

³⁴ Ho Jehuva avuhainaara naavuqi origetero karavata namarivata nama kero viraqiqi vauka tiva nimiro tiharo, Ne otu Kotiva virara vaaqumama vuane ti nahentira vaata vara kaate. Viva avuhainaara raavurvavano vaimantara ti, ne vira vaata vare muntu quntama taate, tiro.

³⁵ Tumanta ho vika vira vaata vare quintaare ti, vevante tavovaro vira qiata vuhaarive, aiqu kauqu kakahive viraqai ³⁶ vaumanta vika vuru Jehura tiva amuvaro viva tiharo, Noravano Kotiva nai kaiqa vaiinti Tisibehainaara Elaitara noqihairo ti uvava vate vivauma vaivo. Noravano Kotiva mintima tivo:

Naantiara Jeseririqiraa vairi vika Jesebelira vaata nama kevarave.

³⁷ Vira vaata hini viti keva raha voqaara voqaa voqaa vaira, vaiinti vira taveha kia Jesebelira vaata viraqaqamake tavevarave turave, tiro.

10

Ahaapira kuvuarama toka aru taiqa kora

¹ King Ahaapira maaqunavu Sameria vatukaini 70navu vaura. Ho Jehuva qara ntuvakero qiata vaiintive, nora vaiintive, Ahaapira vaintivaraoqaa raqikukave, vika vaunaini vara kero tiharo,

² Ahaapira maaqunavu ni hampata variamanta ne iqoka *kaarive*, ohive, auvihe-havaave, vate variavaro kempuka vaantaavurvavano ni vatuka ututuma tero vairave.

³ Ho Ahaapira maaqunavuqihai koqe vaiinti vo kaama taivaro viva „Isarer, avuhainaava vairamanta ne tiriara viva vi vaiintira vatuka varaantorave ti, ti hampata ani iqoka raquate, tiro.

⁴ Minti tivakero qara vara komanta vika vi qarara tave, voqamake qeteha tiha, Oho, Jehuva avuhainaava vaiinti taaraqanta naatara kaivave. Nantiabee tenavu vira aatarakaarare? ti.

⁵ Minti tivake avuhainaara naavuqaa raqikuvave, vi vatukaraqaa raqiki vauvave, nora vaiinti vonavuve, Ahaapira vaintivarqaqaa raqikukave, ekaa vika vika Jehuraini uva varake taha,

Tenavu ekaa ai kaiqa vaiinti vaiha qeramate, ai antuqa avatarera vauro. Tenavu kiama ho vo vaiinti kaama taariraro avuhainaava vaiintivano varianarove. Ho are nana haika autireva inara, qaqqiqai autuane, ti.

⁶ Vika minti tivake qara vara kovaro Jehuva tavero, qaiqaa qara varakero vikara tiharo,

Ne ekaa ti vevaaraini vaiha ti hantuqa avatareka ivera, „ne ekaa Ahaapira maaqunavu aunta teqake,“ hora maa kuari avuraqaa vika qiata vare te iainanaini Jeseririni viri kaate, tiro.

Vi entara Sameriaini nora vaiintinavu Ahaapira maaqu 70navuqaa raqiki vaura. ⁷ Ho nora vaiinti vika Jehura qara tave, ekaa Ahaapira vainti 70navu aruke, vika aunta teqake vika qiata rutantuto utanavuraqi ntuvake, Jeseririni Jehuva unaini vara kovaro vura.

⁸ Mintuvaro vaiinti uvavano Jehura tiva amiro tiharo, Vika Ahaapira maaqunavu qiata vare aniavo, tuvaro Jehuva vika tiva nimiro tiharo, Vatuka qentiana rairake tararaqantaqaa vataivaro hora aatitarire, tiro.

⁹ Minti tivakero vira qararaa toqaqi Jehuva himpiro vatuka qenti vaunaini otu vumanta ari vaiinti nahenti mini ruvaaqumavi vauvaro Jehuva vikara tiharo, Te tenta nora vaiinti Joraamura qoraiqama karera aato iritaunara te vira aru kauro. Kiama vi uvava niqaa vairaitiro, tintaqama vaivo. Ho taukae maanavuka arukaavo?

¹⁰ Ho iriate. Haaru Noravano Kotiva Ahaapira ankuvano qoraiqama virara tivatai uvava kia voqavanovata quminaiqianarove. Haaru Noravano Kotiva nai kaiqa vaiinti Elaitaara noqahairo te minti minti irerave tivatai uvava vate vivauma vaivo, tiro.

¹¹ Jehuva minti tivakero Ahaapira anku Jeseririqi vaukave, vira qiata vaiintive, vira tontive, Ahaapira kahaqiba *ofaa* iha quare vaukave, ekaa aru taiqa komanta kia voqavanovata qaqi vaura.

Jehuva Ahasiara ankuvata ari kora

¹² Ho Jehuva „nai iqoka vaiinti hampata, Jeseririni kero Sameriaini vura. Vika aaraini vivi, *Sipisipiqa Raqikiaka Ruvaaqumavi Varianainive* tu vataraqaa oruntora.

¹³ Mini oruntero viva vaiinti vokuka tavero vika irero tiharo, Ne taihainaakave? tumanta vika vira tiva ami tiha, Tenavu King Ahasiara qata vakaukavarave. Tenavu Jeseririni oru King Joraamura navunaakovata, Kuini Jesebelira navunaakovata, uva mantareranu, ti.

¹⁴ Minti tuvaro Jehuva nai iqoka vaiintiara tiharo, Ekaa vika ravaaqavu kaate, tumanta vira iqoka vaiinti vi vaiintika ravaaqavu vare, *ruvu/mpumpi* vo vi mantaraini vauraqi vuru vi vaiintika 42navu ekaa aru taiqa kovaro kia voqavanovata qaqi vaura.

Jehuva Ahaapira anku ekaa aru taiqa kora

¹⁵ Jehuva qaqqaa aaraini viharo Rekapira maaqu Jonadaapira rantakero vira uva mantedero tiharo, Te ai tontivano vaurara arevata ti tontivano variaro? tuvaro Jonadaapiva eo tuvaro Jehuva tiharo, Are quqaa mintima vairera, kauqu timiane, tuvaro nai kauqu vira amuvaro Jehuva Jonadaapira nai iqoka *kaariqi* vara vaari kora.

¹⁶ Vaari kero virara tiharo, Are ti hampata aniraqe te tenta Nora Kotirara kem-pukaiqaake iriqi vuainara ai umiqaarirara tavaane, tuvaro „Jonadaapiva hove tivakero,“ vira hampata Sameriaini vura.

¹⁷ Mini oruntero Jehuva Ahaapira vaintivarera ekaara vitini qaqi vauka, ekaa vikavata aru taiqa kora. Noravano Kotiva nai kaiqa vaiinti Elaitaara tiva amu uvava vivauma vaura.

Baalirara quahama amitoka aru taiqa kora

¹⁸ Jehuva Sameriaqi vaharo ekaa vaiinti nahenti naaramakero vikara tiharo, Haaru King Ahaapira Baalirara quaheharo vira kaiqa vara amitorave. Ho vate te voqavata Baalira kaiqa vara amitarerave, tiro.

¹⁹ Minti tivakero Jehuva vikara tiharo, Ne ekaa Baalira paropeti vaiintive, vira kaiqa vara amite varia vaiintikave, vira *ofaa* iha quara amite varia vaiintikave, ekaa vika vika naarama ruvaaquma kaate. Te nora *ofaa* Baalirara iha quara amitainarara ti, kiama

voqavanovata mini variate. Vovano kia anirera, ho viva qutuma vuanarove, tiro. Jehuva Baalira quahama amito vaiinti nahentika aru taiqa kareva iharo una uva minti tura.

²⁰Jehuva minti tivakero qaiqaa tiharo, Ne enta vo kaama taimanta vi entaraqaa vaiinti nahenti ruvaaqumavi vaiha Baalira autu tuahera kaate, tumanta enta vo kaama tora. ²¹Jehuva ekaa Isarerini uva vara komanta Baalira quahama amitoka ekaa hihai hihai ani ruvaaquma vuvaro kia voqavanovata maaqaini vaura. Vika una variqa Baalira naavuqi oriqete mpiqa kora.

²²Ekaa mpiqa vuvaro Jehuva oruntero utavaaqa nonkuteha Baalira kaiqa vara amitoraaqa raqiku vaiintirara tiharo, Vi utavaaqaara vara kera Baalira quahama amitareka aniaka nimiane, tuvaro viva Jehuva tunte iro nimura.

²³Nimumanta Jehuvavata, Rekaapira maaqu Jonadaapivavata, una variqa Baalira naavuqi oriqetora. Jehuva vaiinti nahenti Baalira quahama amitokara tiharo, Hauri Nora Kotira autu tuahere variaka tinavu hampata vaivorave. Ne aitutumake tavaimanta Baalirara maara tti variakaqai maaqi variate, tiro. ²⁴Ho hitanta oriqete kaintu iha quara amito ofaaravata, vo ofaaavata Baalira iha quara amitareka vura.

Vi entara avuni Jehuva vaiinti 80navu kaama tero vika tiva nimo tiharo, Ne Baalira naavu vahaqaqaini ani vekaiqiba variate, tivakero viva tiharo, Ne una variqa Baalira quahama amite variaka ekaama aru taiqa kaate. Ho iriate. Niqihairo vovano vo qaqi kairaro virera, ho vivama vira vatuka varero qutu vuanarove, tura.

²⁵Ho Jehuva ekaa kaintu iha quara amito ofaara quara taiqakero, vevantero nai iqoka vaiintivata vika qjata vaiintivata tiva nimo tiharo, Ne oriqete ekaama vika aru taiqa kaate. Kiama voqavata qaqi kaimanta variate, tiro.

Tumanta ho vika oriqete iqoka paipeqohai ekaa aru taiqake, vika vaata rarau vare vahaqaqaini muntu ke, tururante una variqa Baalira *rumuqi* oriqete, ²⁶„Baalira“ ara amito ori *pohira* nkaqu vare muntu vahaqaqaini rukavuke, ²⁷vira *maraqura/varaha* aututoravata rukavuke, naavuvata ravantiaqa aqukora. Mintimake vi vatukara qaqi komanta vaiinti nahenti viraqi rahate vaura. Maa entaravata vi vatukava rahate varia vatukavama vairo.

²⁸Ho Jehuva mintimakero vaiinti nahenti Isarerini una variqa Baalirara maara tura vehi autu taiqakora.

²⁹⁻³¹Noravano Kotiva Jehurara tiharo, *Te tunantema kera are Ahaapira anku vehi autu taiqa kaanarara ti, te ariara koqe kaiqa varaaro turo. Te qaqi kaariraro naantiara ai maaquvanovata, viva vatatairauka taaramo navuvata Isareriqaa raqikiq vivarave, tiro.*

Minti tuvarovata, Jehuva kia Isareri Variqa Noravano Kotiva tivato uvira koqemakero iriraitiro, viva Nebaatira maaqu Jeroboamuva qora okara autuntema kero autura. Haaru Jeroboamuva purumakau naati *maraqura/varaha* taaraqanta *koriqohairo* autukero, vo Beteli vatukaqi vatero vo Daaniqi vatero Isareri kuntama virivi komanta vika vi haikatanta quahama nimite vaura. (1 King 12:28-39)

Jehuva kia vi okarara qaqla karaitiro, qaqi autuqiro vi vaura.

Jehuva qutu vura

³²Vi entara Jehuva avuhainaa vaiinti vau entara Noravano Kotiva qaqi komanta navutaaka Isareri naatarake vika vata hini varora. Siria King Hasaeliva Isareri vata ³³Iotani Namari hini mantaraini kuari avu urinaini vaura varora. Hasaeliva vata varova vaireva, Aroe vatuka Anoni Namariqaahairo hogarama tero viviro, Gileatti vatainivata Besani vatainivata oruntero vi vatara varora. Vi vatava Gaatira ankuve, Rubenira ankuve, Manasera ankuve, vika u vatava vaura.

³⁴Ho Jehuva vo kaiqa vo kaiqa varo uvarave, viva kempuka kaiqa varo uvarave, ekaa vi uvira vuku vo, *Isareri Avuhainaaka Uva Okarave* tu vukuraqi qara ntuvatora.

³⁵Jehuva qutu vumanta vira Samerianini quntama tora. Quntama tovaro vira maaqu Jehoohaasiva nai qora vatuka varero avuhainaa vaiintiqama vura.

³⁶Jehuva Sameria vatukaqi vaharo, 28 ihiara Isareriqaa raqiki vaura.

11

Ataliaava Iutaa avuhainaava vaura

¹Iutaa King Ahasiava qutu vuvaro vira nova Ataliaava vi uvira iriro, „viva te avuhainaa nahentivano vairerave tivakero“, iqoka vaiinti tiva nimo tiharo, Ne avuhainaara anku ekaama aru taiqa kaate, tiro.

²Minti tumantavata, iqoka vaiinti vika Ahasiara maaqu Joasira kia arukora. Iqoka vaiinti vika Ahasiara maaqunavu arukovaro, Ahasiara aura Jehosebaava* Joasiravata

* ^{11:2:} Jehosebaava Isareri King Joraamura raavuravano vaura.

arukevorave tiro, vi vaintiruravata, viraqaa raqiki vau nahentiravata, ntita varero. ¹Kotira Naavu *rumu* voqi, vaito haikara vatoraqi vitanta kukeqa tovaro Ataliaava kia Joasira aru kora.

³ Jehosebaava Nora Kotira naavuqi 6 ihiara Joasira kukeqa tovaro vauvaro Ataliaava avuhainaa nahentivano vaiharo Iutaqaqa raqiki vaura.

⁴ Ho 7 ihi anintovaro ¹Kotira kaiqa vara amite vau vaintiva, Jehoiadaava avuhainaa nahentiqaa raqikukavata, vira naavuqaa raqikuka qiata vαιintivata, viva unaini aniate tiro, uva vara komanta anuvoro Jehoiadaava Nora Kotira Naavuqi vika hampata uva vo tiva taatau kero tiharo, Ne nenta ainqiqa kauqu aqueha tenavu vi uvvara avatarerave tiate tivakero, viraqahaaro viva Ahasiara maaqu Joasira vita varero muntu vika numiqora.

⁵ Vira vika numiqero, Jehoiadaava vika tiva nimiro tiharo, ¹Tenavu maa vaintirura kaama taariraro viva avuhainaava variarire, Ho iqoka vαιinti ne minti minti iate. Niqihai taaramo varavano Maara Entaqaa kaiqa hoqaramate ne mintima iate:

Vo varavano avuhainaara naavuqaa maimaraara raqiki vaimanta, ⁶ vo ankuvano hohaa qenti vo Suri qentive tiaraqaa maimaraara raqiki vaimanta, vo varavano iqoka vαιinti vika tauvaqaini vahaa hohaa qenti voqaa raqikiate. Ne taaramo varavano mintimakeha avuhainaara naavuqaa maimaraara raqikiate.

⁷ Niqihai taara varavano Maara Entaqaa kaiqa taiqake auraara variaka, ne mintima iate:

Ne Nora Kotira Naavu vainaini oru vaiha King Joasiraqaa raqikiate. ⁸ Ne vira ututumake himpi vaiha iqoka paipe kauquqi tuateha viraqaa koqemake raqiki amitatae. Viva vona vireva irera, nevata vira hampata vuate. Vo vαιintivato vira aumanto anireva irera, ne vi vαιintira aru kaate, tiro.

⁹ Minti tumanta iqoka vαιintiqaa raqikuka Jehoiadaava tunte ura. Vika iqoka vαιinti kaiqa varake Maara Entaqaa auraara vauka ntita vare, vokuka vika vatuva vare kaiqa varokavata ntita vare, Jehoiadaava vaunaini anura.

¹⁰ Anuvaro Jehoiadaava Nora Kotira Naavuqihairo Devitiva vato haikara, vaantaara vonavu varero, kainke vonavu varero iqoka vαιintiqaa raqikuka nimumanta ¹¹ vika vare oru Nora Kotira Naavu avuni himpi vaiha vi haikara nai kauquqi tuateha avuhainaaraqaa raqiki vaura. Vika Nora Kotira Naavu *sauti* mantaraihai hoqaramake naiqi naiqi himpi vaiha raqikiqi vivi, Kotira *ofaa* tainta ori aatarake, *noti* mantaraini oruntora.

¹² Vika mintimake maimaraara raqiki vauvaro Jehoiadaava ¹Nora Kotira Naavuqihairo, Joasira vita varero vahaaqaini vevantero Joasira qiataqaa avuhainaava tovaqa aqu amitero, vuku vo, Kotiva tivato uvvara vau vukura vira amura.

Vika *orivi* vahavera qihiake vira qiataqaa acute vira kaama tomanta vαιinti nahenti vika kauqu ruqutiha naveraitiha, Joasiva avuhainaavama vaivo. Viva vukai enta variqiro vuarire, tivakeha naveraiti vaura.

¹³ Iqoka vαιintivata vαιinti nahentivata vika naveraitiha oi aai ti vauvaro Ataliaava uva *nontanta/otata* iriro, viva vevantero vαιinti nahenti Nora Kotira Naavuni ruvaaqumavi vaunaini vura.

¹⁴ Viva mini oruntero tavovaro avuhainaara qaraaka kaamatova vukai *pohi* vo aratoraqaa, haaru avuhainaaka vokuka untema kero, vivavata vi *pohira* tataaqa himpiro vaura. Viva mini vaumanta iqoka vαιintiqaa raqikukavata, *aanumaara/noma* vuage vaukavata, vika avuhainaara aumanto himpi vaumanta, vαιinti nahenti vika quahe vaumanta viqaqihai vokuka *aanumaara/noma* vuage vaura.

Ataliaava tavero, nai utavaqa qunahi qaannahima kero naveraitiha, Oho, ne uva taatauke ti qaqira kareka auti variavo. Ne ti qaqira kareka auti variavo, tiro.

¹⁵ Minti tuvaro Jehoiadaava iqoka vαιintiqaa raqiki vaintika tiva nimiro tiharo, Hauri ne Nora Kotira Naavu aumanto vi nahentira arukevorave. Iqoka vαιinti himpi variaka ne vika avutaqaa vira vita vare vitare vonaini vuru vira arukaate. Vokiaka vira ruaruuma amitareka auti vaivera, ho ne vikavata arukaate, tumanta ¹⁶ vika Ataliaara ravaaqavuke vare avuhainaara naavu hohaa qenti vo, ohi origete vau qentiraqaa vira vuru arukora.

Jehoiadaava qora okara qaqlira kora

¹⁷ King Joasirasavata, vαιinti nahentivata, vika Nora Kotira vαιinti nahenti variate tiro, Jehoiadaava Nora Kotira avuqaa vaiharo uva tiva taatau kero vatora.

Mintima kero, avuhainaavavata vαιinti nahentivata vika náivota vohaa variate tiro, uva vo tiva taatau kero vatora.

¹⁸ Mintumanta ekaa vαιinti nahenti mini ruvaaqumavuka una variqa Baalira naavu vaunaini orunte vi naavura ravantiaqa aqukora. Baalira *ofaa* taintanavu ravantiaqa

aquke, una variqa *maraqura/varaha* vi haikara vi haikaravata rakavu raakavumake, Baalira kaiqa vara amite vau vaiintira Mataanira *ofaa* tainta tataqaq vira aru kora.

Vika mintuvuaro Jehoiadaava iqoka vaiinti vokuka Nora Kotira Naavuqaa maimaraara raqikiate tiro, vika kaama tora.

¹⁹ Ho Jehoiadaava iqoka vaiintiqaa raqikukavata, avuhainaa vaiintiqaa raqikukavata, avuhainaara naavuqaa raqikukavata, ntita varero vika hampata Nora Kotira Naavuqihairo avuhainaara vita varero nai avuhainaara naavuqi vuru kora. Vika vira vite vumanta vaiinti nahenti vira avataq vuvaro Joasiva *Maimaraara Qentive* tu qentiraqaa oriqetero viva oru avuhainaara taintaqaa oquiviro vaura.

²⁰ Avuhainaara naavu vaunaini Ataliaara arukorara ti, ekaa vaiinti nahenti „Iutaini vauka“ quahe vaumanta Ieruharemipi vaukavata koqemake qaqi manamana vaura.

²¹ Ho Joasiva 7 ihi varakova avuhainaava vauharo Iutaqaqa raqiki vaura.

12

Joaasiva Iutaqaqa raqiki vaura

¹ Jehuva 7 ihiara Isareriqaa raqiki vau entara, Joasiva Iuttaa avuhainaa vaiintiqama viro 40 ihiara Ieruharemipi vauharo „Iutaqaqa“ raqiki vaura. Vira nova Sibiaava Beseba vatukaihainaava vaura.

² Kotira kaiqa vara amite vauva Jehoiadaava uva maara vira tiva ami vauvaro Joasiva Nora Kotira avuqaa koqe okara auti vaura. ³ Mintiharovata, viva kiama vo ainqina vo ainqinaga *ofaa* tainta ravantiaq komata vaiinti nahenti qaqiqai mini mini vauha *ofaa* iha quarake, koqe unta iaina haikara iha quare vaura.

⁴ Joasiva Kotira kaiqa vara amite vau vaiintika naaramakero vikara tiharo, Vaiinti nahenti Nora Kotira Naavuqi vira amitaa monura ne varate. Vika *ofaara* iriha aquakaa monurave, nái ainqiqa kauqu aquke tiha, Kotira amirerave tivake amia monurave, Kotira amiataa imanta qaqi amia monurave, ne vi monura vi monura varate. ⁵ Ne Kotira kaiqa vaiinti vohaiqa vohaiqavano vi monura vare, vi monuraqohai Nora Kotira Naavuqi vo haika vo haika qoraiqiaqinara avuqavu iate, tiro.

⁶ Joasiva minti tivakero variqiro viro 23 ihiara avuhainaava vau entara tavomanta vika Kotira Naavu qoraiqura kia avuqavu iraiti, kia vi kaiqara varora.

⁷ Vira kaara King Joasiva Kotira kaiqa vara amito vaiintira Jehoiadaaravata, vira kena vaiintivata naaramakero vika irero tiharo, Nantihae Kotira Naavuvano qoraiqira ne kia avuqavu iavar qaqi vaivo? Ho vate maa entaraqahai vaiinti nahenti ni nimi monura kiama qumina haika vareha aqu karaiti, ne vo vaiintinavu vi monura nimimanta vika naavu qoraiqiaqinara avuqavu iate, tiro.

⁸ Joasiva minti tumanta vika eo ti, Tenavu kia qaiqaavata vi monura vararerave. Kia tenavu Kotira Naavu qoraiqiaqinara avuqavu qirerave, ti.

⁹ Minta tuvaro Jehoiadaava *vokise* vo varakero vira avuqaa ntoma kero no autu kero, hohaa avutuq *ofaa* tainta tataqaq kauqu tanaraini vi *vokisera* vatora. Kotira kaiqa vara amite vauka hohaa qentiqaq raqiki vauha, vaiinti nahenti Nora Kotira Naavuni anuka aquko monura varakeha vi *vokiseq*i vate vaura.

¹⁰ Kotira kaiqa vara amite vauka tavovaro *vokiseq*i airi monu vaumanta, vika avuhainaara qara ntuva amite vau vaiintirave, Kotira kaiqa vara amite vau vaiintika qiatu vaiintive, vitanta naarmonta aninte, vi monura kaara ntuvake utaqi ntuvatora.

¹¹ Viraqqaahai vitanta Nora Kotira Naavuqi kaiqa vare vaukaqaa raqiki vauka nimimanta, vinavuka vi monura nái kaiqa vaiinti nimura. Taintave qentive auti okarara tavokave, oriqohai naavu kaqo okarara tavokave,¹² ori teqo okarara tavokave, vika vika nái koqaa nimura.

Vinavuka vi monuraqohai ori teqatorave, katarive, koqamake Nora Kotira Naavuqi kaiqa vare vauka nimumanta vika vi haikaraqohai Naavu vira qaiqaa koqemake autukora. Vinavuka vi monuraqohai naavu kaqera vo haika vo haika koqamake varora.

¹³ Kotira Naavuara iriha amu monuraqohai vinavuka kia vi Naavura avutuq i vato haikara varoravauve. Vika kiama vi monuraqohai *silvaqohai* aututo tanura norave inaarave, *raamu* qimperave, aanumaarave, *koriqohai* *silvaqohai* vo haika vo haika aututo haikara Nora Kotira Naavu avutuq i vate haikarave, vika kiama vi monura aqukeha vi haikara varoravauve.

¹⁴ Vika vi monuraqohai Kotira Naavu qaiqaa koqemake auti vauka koqaa i vaura.

¹⁵ Kaiqaqaa raqiki vauka kia vi monura qumina hampiara voqara aqu karaiti, vinavuka avuqavumake kaiqa vaiinti vika nimi vauvarora tiro, kia nora vaiinti vovano vinavuka ireharo, Nenavu vi monuraqohai nana haikae varavao? tura.

¹⁶ Vaiinti nahentivano nái qora kaiqa vare vau uvvara Kotiva nunka timitaarire ti, *ofaa* ami vau monura, vi monura kia Nora Kotira Naavu aumanto vau *vokiseraqi* vatora. Vi monuva Kotira kaiqa vara amite vau vaiintika u monuva vaumontara ti, vi monura vika nimi vaura. (Wok Pris 7:7)

Hasaeliva Iutaa hampata iqoka raqura

¹⁷ Vi entara Siria King Hasaeliva nai iqoka vaiinti ntita varero „Iutaa vataini“ Geti vatukaini raqiharo vi vatukara varero, qaiqaa tuqantaa viro Ieruharemipi vauka ham-pata raqireva auti vaura.

¹⁸ Hasaeliva raqireva auti vauvaro King Joaasiva viva iqoka qaqlira kero vuvarire „tiro, nora koqaa vira amura. Nai naaquka Iutaa avuhainaaka, Jehosafaativave, Jehoraamuvave, vira qova Ahasiavave, Kotira kaama amitora Joaasiva ekaa vi haikara varero, nai Kotira kaama amito haikaravata varero, Nora Kotira Naavu avutaqi monu vato *rumuraqi* vau *koriravata* varero, avuhainaara naavuqi vau *koriravata* varero, Joaasiva ekaa vi haikara vi haikara varero Hasaeliva vaunaini vara kovaro vuvaro Hasaeliva varero iqoka qaqlira kero vura.

¹⁹ Ho King Joaasiva ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

²⁰ Vo enta Joaasira kaiqa vaiinti vonavu vira aruke uvvara tiva taatau kovaro Joaasiva Silaini vi vau aararaqaa Beti-Milonini oru vaumonta vikaqihai vaiinti taaraqantavano Joaasira arukora.

²¹ Simeatira maaqu Josabaativavata, Somera maaqu Jehosabativavata, Joaasira arukora. Ho Joaasiva qutu vumanta vira vaata vare vuru nai kaivaqara Devitira vatukave tunaini quntama tora.

Joaasira maaqu Amasiava nai qora vatuka varero avuhaina vaiintiqama viro „Iutaqaqa, raqiki vaura.

13

Jehoahaasiva Isareriqaa raqikura

¹ Ahasiara maaqu Joaasiva 23 ihiara Iutaqaqa raqiki vau entara, Jehura maaqu Jehoahaasiva Isarerri avuhaina vaiintiqama viro 17 ihiara Sameria vatukaqi vaharo Isareriqaa raqiki vaura.

² King Jeroboamuva qora okara autuntema kero, Jehoahaasivavata Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo „una variqanavu *maraqura/varaha* quahama nimiteharo.“ Isarerivata kunta virivi komanta vikavata qora okara autura. Jehoahaasiva qora okara kia qaqlira karaitiro, qaqliqai autuqiro vi vaura.

³ Mintura kaara Nora Kotira Isarerriara arara itovaro viva Siria King Hasaeliravata, vira maaqu Beni-Hadaatiravata, qaqla komanta vitanta airi tataa Isarerri hampata raquqi viha vika naatara kora.

⁴ Mintuvaro King Jehoahaasiva Nora Kotira aarovaro viva tavomanta Siria Isarerri qoraiqama nimite vauvuu vira kaara Noravano Jehoahaasira uva irura.

⁵ Isarerri Siria kauquqihairo ruaruuma nimitaarire tiro, Noravano Kotiva vaiinti vo kaama tovaro viva Isarerri ruaruuma nimitorama vika haaru nai maaqa nai maaqa kogemake vauntemake qaiqaa vaura.

⁶ Vika mintimake vaihavata, haaru Jeroboamuva qora okara autiharo Isarerri vika kuntama virivi komanta auti vau okarara, kia qaqlira karaiti, vika qaqliqai qora okara autuqi vi vaura. Katari voqaa una variqaa nahenti Aseraara *maraqura/varaha* nkaurutova Sameria vatukaqi qaqla vaavi vaumonta vika kia vira qaqlina vara aqu kora.

⁷ Vi entara Siria iqoka vaiinti vika Jehoahaasira iqoka vaiinti hampata raqihaa airitahaa ari komanta vira iqoka vaiinti kia airi qaqla vaura. Ohiqaa vaiha raqii vauka 50navuqai qaqla vaumonta, iqoka *kaari* 10navuwata qaqla vaumonta, 10,000 vaiintivata qaqla vaura. Vaiintivano aiqquqohairo vata rakavu konkomaqama kaintemakero, Siria avuhainaava ekaa hini Isarerri iqoka vaiinti vehi autu taiqa kora.

⁸ Ho Jehoahaasiva vo kaiqa vo kaiqa varo uvvarave, viva kempuka kaiqa varo uvvarave, ekkaa vi uvvara vuku vo, *Isarerri Avuhainaaka Uva Okarave* tu vukuraqi qara ntuvatora.

⁹ King Jehoahaasiva qutu vumanta vira vaata Sameriaiini quntama tovaro vira maaqu Jehoasiva vira vatuka varero avuhaina vaiintiqama viro vaura.

¹⁰ Joaasiva 37 ihiara Iutaqaqa raqiki vau entara, Jehoahaasira maaqu Jehoasiva Isarerri avuhaina vaiintiqama viro 16 ihiara Sameria vatukaqi vaharo Isareriqaa raqiki vaura.

¹¹ King Jeroboamuva qora okara autuntema kero, Jehoasiva Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo „una variqaa

maraqura/varaha quahama nimiteharo, Isarerivata kunta virivi komanta vikavata qora okaraqai auti vaura. Jehoasiva qora okara kia qaqa karaitiro, qaqaqai autuqiro vi vaura.

¹² Ho Jehoasiva vo kaiqa vo kaiqa varo uvarave, viva Iutaa King Amasiara hampata iqoka raqu uvarave, ekaa vi uvare vuku vo, *Isareri Avuhainaaka Uva Okarave* tu vukurraqi qara ntuvatora.

¹³ Jehoasiva qutu vumanta vira vaata vare Isareri avuhainaaka quntama tonaini Sameraini quntama tovaro, vira maaqu Jeroboamuva vira vatuka varero avuhainaai vaiintiqama viro vaura.

Elisaava qutu vura

¹⁴ Vi entara Elisaava nora rovara varero qutu vuvarirava aumanto vauvaro Isareri King Jehoasiva vira tavareva oruntero vira iq'i rata amitero tiharo, Mpo, ti qo, ti qo, iqoka kaarivata iqoka vaiintivata viraqi vaiha Isareri kahaqiantema kera, are kempukavano Isareri kahaqiaravave, tiro.

¹⁵ Viva minti tuvaro Elisaava virara tiharo, Are oru huruvata vevanavuvata varera aniane, tuvaro Jehoasiva viva tuntema kero oru varero anuvaro ¹⁶ Elisaava virara tiharo, Are nena kauquqi huru totaane, tuvaro avuhainaava viva tuntema kero, ututovaro Elisaava nai kauqu avuhainaai vaiinti kauquqaa vaari vatero tiharo, ¹⁷ Are kuari urinaihainaai *uintua* quantua kaane, tuvaro quantua kovaro Elisaava, Ho veva aruane, tuvaro viva veva ariro.

Jehoasiva Elisaava tunte iro veva vira aruvaro Elisaava vira tiva amiro tiharo, Vi vevava vaireva, Noravano Kotiva Siria aatara kaarira vevavama vaivo. Vo enta are Siria hampata raqihara Afeki vatukaini vika aru taiqa kenarave, tiro.

¹⁸ Minti tivakero Elisaava avuhainaara tiva amiro tiharo, Vevanavu qaqi vataanara varakera vata ruqutuanne, tuvaro Jehoasiva viraqohairo taaramo tataa vata ruqutiro.

¹⁹ Mintuvaro Elisaara arara itovaro avuhainaara atiro tiharo, Are 5 tataave, 6 tataave vata ruqutuataarave. Are mintiaraitirio, are Siria ekaa aru taiqa keravama vaitirio. Are taaramo tataa vata ruqutuanarara tira, taaramo tataaqaima Siria aatara kenarave, tura.

²⁰ Ho Elisaava qutu vumanta vira vaata vare ori intomatoraqi vuru vatora. Ho vo ihi vo ihi Moapi vo vara vo varavano Isarerini orunte, vika qoraqigama nimite vaura. ²¹ Vo enta Isareri vokuka qutu vu vaiintira vaata vara vuru quntarare ti, tavomanta Moapi vo varavano vika arireka anumanta vika qetake Elisaara vuhaarivano vauraqi vira vaata vaati aqukovaro vira vaatavano Elisaara vuhaarigaa hiqintuvaro vaakama vi vaiintiva qaqi himpiro nai aiquidantaqaa himpitero vaura.

²² Jehoasira qova Jehoahaasiva Isareriqaa raqiki vau entara, Siria King Hasaeliva qaigaqaa qaiqaavata Isareri hampata raqiharo nora maara vika nimi vaura.

²³ Vika minti vauvarovata, Noravano Kotiva haaru Eparahaamirave, Aisaakirave, Iekopirave, vinavuka hampata uva tiva taatau torara iriharora tiro, viva Isareri vika aqurihama nimiteharo vika koqema nimitora. Maa entaravata Noravano Kotiva kia Isareri vehi autu taiqa kaataa ivaro kia vika vehi autu taiqa karaitiro, kia nai aqantohairo vika nititama kaira.

²⁴ Siria King Hasaeliva qutu vuvaro vira maaqu Beni-Hadaatativa vira vatuka varero Siria avuhainaai vaiintiqama vura.

²⁵ Mintuvaro Isareri King Jehoasiva iqoka raqiharo Beni-Hadaatira kauquqihairo vatuka vonavu qaiqaa varora. Haaru Jehoasira qova Jehoahaasiva avuhainaava vau entara Siria vira hampata raqiharo vi vatukanavura varora.

Jehoasiva taaramo tataa Beni-Hadaatira aatara kero vi vatukanavura qaiqaa varora.

14

Amasiava Iuttaaqaa raqikura

¹ Jehoahaasira maaqu Jehoasiva taara ihiara Isareriqaa raqiki vau entara, Joasira maaqu Amasiava Iuttaa avuhainaai vaiintiqama viro vaura.

² Amasiava 25 ihi varakova avuhainaai vaiintiqama viro Ieruharemipi 29 ihiara vaiharo Iuttaaqaa raqiki vaura. Vira nova Jehoadiniva Ieruharemihainaava vaura.

³ Amasiava nai qova Joasiva untemakero, koqe okara Nora Kotira avuqaa autiharovata, viva kia nai kaivaqava Devitiva koqe okara autuntema kero autura.

⁴ Viva kiama vo aqina vo aqinaqaa *ofaa* tainta ravantiaqqa komanta vaiinti nahenti qaqaqai mini mini vaiha *ofaa* iha quarake, koqe unta iaina haikara iha quare vaura.

⁵ Amasiava avuhainaai vaiintiqama viro Iuttaaqaa kempukaiqama kero raqikiqiro vi vau entara, viva vaakama nora vaiintinavu nai qora arukoka naivata arukora.

⁶ Amasiava vi vaiintika arukero viva kia vika vaintivara arukaraitiro, viva Mosiva qara ntuvato uvvara iriharo, vika qaqi komanta vaura. Haaru Noravano Kotiva Mosira tiva amiro mintima tiro:

Ne tavaivarao vira maaquvano qora okara autu kairera, kia vira qora arukaate.

Vira voqaantemake vira qova qora okara autu kairera, kiama vira maaqu arukaate.

Vaiintivano qora okara autina vaiintira nai viraqaima arukaate, ti tura. (Lo 24:16)

⁷ Vo enta Amasiava „nai iqoka vaiinti ntita varero, *Hore Uqitainive* tunaini oru iqoka raqiharo Idomu iqoka vaiinti 10,000 arukero, viraqahaairo viva Selaa vatuka varero, vi vatukara autu nteharo Jokateline tura. Vatevata qaqima vi autura nte variara.

⁸ Amasiava vi vatukara varero, vaiinti vonavu nititama komanta Isarer King Jehoasiva vaunaini vura. Jehoasiva Jehoahaasira maaqu, Jehura naintivano vaura. King Amasiava nititoka Jehoasiva vaunaini orunte virara tiha, King Amasiava ariara tiharo, Are „nena iqoka vaiinti ntita varero,“ aniqe ai hampata raquare, tivo, ti.

⁹ Minta tuvaro Isarer King Jehoasiva vo haikaqaa uva tuqantaakero Amasiara tiva amiro tiharo,

Auquro Lebanonini vaiva uva vara kaivarao *sidaa* katariara tiharo, Are nena raavura ti maaqu amiraro varaaire, tirave. Viva minti tivarovata, qaakau aantauvano auquro rahiti raahitima kaivarao qoraiqama virave.

¹⁰ Ho Amasiao, are Idomu hampata raqihara vika naatara kaanarara iriharama nena mahuta ti variaro. Ho nena maaqaini vahara virara quahaane. Hauri are ani tinavu hampata raqihara qoraiqama viramanta Iutaavata qoraiqama vivorave, tiro.

¹¹ Jehoasiva minti tuvaro Amasiava kia vira uva iriraitiro vauvaro Jehoasiva nai iqoka vaiinti Isarer ntita varero Iutaa vataini Beti-Semesi vatukavano vaunaini oru Iutaa hampata iqoka raqura. ¹² Ho Isarer Iutaa naatara komanta vika qetake ruqemake nai maaqa nai maaqa vura.

¹³ King Jehoasiva Iutaa King Amasiara rumpa varero, Beti-Semesi vatuka kero Ieruharemini oruntero, Efaraimu Qentive turuqahaairo hoqaramatero Ieruharemi vaantaavura ravantiaqaqiro viviro, Kaantaa Qentive turuqaa vuru kora. Ieruharemi vaantaavura 200 *mita* vaura ravantiaqaqiro.

¹⁴ Ravantiaqaqiro Jehoasiva oru Nora Kotira Naavuqihairovata, avuhainaara naavuqihairovata, *koriqohai* aututo haikarave, *silvaagohai* aututo haikarave, ekaa vi haikara vi haikara varora.

Viva Iutaa nora vaiintinavu rumpa kero ntita varero nai maaqaini vireva iharo „Amasiarara tiharo, Amasiao, are tinavu hampata qaiqaa raqirera, te ai nora vaiintinavu ntita vare vunara aruma kararave, tivakero, anirantero Sameriaini vura.

¹⁵ Ho Jehoasiva vo kaiqa vo kaiqa varo uvavarave, viva Iutaa King Amasiara hampata iqoka raqu uvarave, ekaa vi uvvara vuku vo, *Isarer Avuhainaaka Uva Okarave* tu vukuraqi qara ntuvatora.

¹⁶ Jehoasiva qutu vumanta vira vaata vare Isarer avuhainaaka quntama tonaini Sameriaini quntama tovaro, vira maaqu Jeroboamuva vira vatuka varero avuhainaai vaiintiqama viro vaura. (13:13)

¹⁷ Isarer King Jehoasiva qutu vu entaraqaahairo Iutaa King Amasiava qaqi variqiro viharo 15 ihi vira kero qutu viro.

¹⁸ King Amasiava ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

¹⁹ King Amasiava Ieruharemiqi vumanta vaiinti vonavu vira aruke uvvara tiva taatau tovaro, Amasiava vi uvvara iriro, getakero Lakisini vura. Viva mini vumanta vira arukareka u vaiintika vaiinti vonavu nititomanta vira avata vare orunte Lakisiqi vira arukora.

²⁰ Amasiara aru komanta vira vaata ohiqaa vate vare, anirannte Ieruharemini vuru komanta vira nai kaivaqaukvara quntama tonaini Devitira Vatukave turaqi quntama tora.

²¹ Amasiava qutu vumanta Iutaa vika Amasiara maaqu Usiara „vira vara autu vo Asariara,“ kaama tovaro, viva nai qora vatuka varero avuhainaai vaiintiqama vura. Vi entara Usiava 16 ihi varakova qaraaka vaiintivano vaura.

²² Usiava „Itomu vatanaaka hampata iqoka raqiharo,“ vika kauquqihairo Elaati vatuka qaiqaa varero vatukavano qoraiquravata qaiqaa avuqavuqama kora.

Jeroboamuva Isareriqaa raqikura

²³ Joasira maaqu Amasiava 15 ihiara Iutaaqaa raqiki vau entara, Jehoasira maaqu Jeroboamuva Isarer avuhainaai vaiintiqama viro 41 ihiara Sameria vatukaqi vaiharo Isareriqaa raqiki vaura.

²⁴ Haaru nai qamaqova King Jeroboamuva qora okara autuntema kero, Jeroboamuva vira qamaqova Nora Kotira avuqaa qora okara auti vaura. Haaru Nebaatira maaqu Jeroboamuva qora okara autiharo, una variqanavu *maraqura/varaha* quahama nimiteharo, Isareri kunta virivi komanta vikavata qora okara autura.

²⁵ Ho navutaaka haaru Isareri vata varora Jeroboamuva iqoka raqikiharo vi vatara qaiqaa varora. Vi vatava vaireva, *noti* mantaraini Hamaati vatukaini vi vau aararaqaahairo hoqarama tero viviro, *sauti* mantaraini Qutuvi-Varuvava vaunaini vuru taiqora.

Jeroboamuva vi vatara qaiqaa varovaro Isareri Variqa Noravano Kotiva Amitaira maaqu Ionaara noqihairo tu uvava vivauma vaura. Paropeti vaiinti Ionaava Gati-Hefe vatukaihainaava vaura.

²⁶ Vi entara Noravano Kotiva tavomanta navutaaka Isareri nora vaiintive inaara vaiintive qoraiqama nimite vauvaro kia vaiinti vovanovata Isareri kahaqiarirava vaura.

²⁷ Noravano Kotiva kiama tiharo, Te Isareri aru taiqa kaariraro vika nutuvanovata ekaara taiqa vuarire turavauve. Viva Jehoasira maaqu Jeroboamura kempukaqohairo Isareri ruuaruma nimitora.

²⁸ Ho Jeroboamuva vo kaiqa vo kaiqa varo uvarave, viva navutaaka hampata iqoka raqu uvarave, viva raqiharo Isareri vata varare tiro, Damasikusivata Hamaativata qaiqaa nai varo uvarave, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

²⁹ Jeroboamuva qutu vumanta Isareri avuhainaaka quntama tonaini viravata quntama tovaro, vira maaqu Sekaraiaava nai qora vatuka varero avuhainaava vaiintiqama viro vaura.

15

Usiava Iuttaaqaa raqiki vaura

¹ Jeroboamuva 27 ihiara Isareriqaa raqiki vau entara, Amasiara maaqu Usiava Iuttaa avuhainaava vaiintiqama viro vaura. Usiara autu vo Asariara.

² Viva 16 ihi varakova avuhainaava vaiintiqama viro, 52 ihiara Ieruharemipi vaharo Iuttaaqaa raqiki vaura. Vira nova Jekoliava Ieruharemihainaava vaura.

³ Usiara qova Amasiava Nora Kotira avuqaa koqe okara autuntema kero, Usiavavata koqe okara auti vaura.

⁴ Viva mintiharovata, viva kiama vo ainqina vo ainqinaqaa *ofaa* tainta ravantiaqa komanta vaiinti nahenti qaqiqai mini mini vaiha *ofaa* iha quarake, koqe unta iaina haikara iha quare vaura.

⁵ Noravano Kotiva qaqi kovaro vaata ne vau numuarava Usiara vaataqaa vaura. Usiava qaqi vau entara vi numuarava vira ari vaura kaara viva oru nariaraa vo naavuqi variqiro vuvuro, vira maaqu Jotamuva avuhainaara naavuqi vaharo Iuttaaqaa raqiki vaura.

⁶ King Usiava ekaa vo kaiqa vo kaiqa varo uvvara vuku vo, *Iuttaa Avuhainaaka Uva Okarave* tu vukuraqi qara ntuvatora.

⁷ Usiava qutu vumanta vira vaata vare nai kaivaqara Devitira Vatukave turaqi vuru quntama tovaro vira maaqu Jotamuva vira vatuka varero avuhainaava vaiintiqama viro vaura.

⁸ Usiava Iuttaaqaa 38 ihiara raqiki vau entara, Jeroboamura maaqu Sekaraiaava Isareri avuhainaava vaiintiqama viro, Sameria vatukaqi vaharo 6 toraraqai Isareriqaa raqiki vaura.

⁹ Sekaraiaava nai naaqukavara Nora Kotira avuqaa qora okara autuntema kero autura. Haaru Nebaatira maaqu Jeroboamuva qora okara autiharo, una variqa *maraqura/varaha* quahama nimiteharo, Isarerivata kunta virivi komanta vikavata qora okara autura.

¹⁰ Ho Sekaraiaava Isareri avuhainaava vauvaro Jubesira maaqu Salumuva vaiinti vokuka hampata Sekaraiaara arukerara uva tiva taatautero, Salumuva oru vaiinti nahenti nivuqaa Sekaraiaara arukero nai vira vatuka varero avuhainaava vaiintiqama vura.

¹¹⁻¹² Haaru Noravano Kotiva Jehurara tu uvava vivau vaura. Viva mintima tiro: *Te qaqi kaariraro naantiara ai maaquvanovata, viva vatatairauka taaramonavuvata Isareriqaa raqikiqi vivarave, tivo tura.* (10:30)

Ho Sekaraiaava wo kaiqa vo kaiqa varo uvvara, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

¹³ Usiava 39 ihiara Iuttaaqaa raqiki vau entara, Jubesira maaqu Salumuva Isareri avuhainaava vaiintiqama viro Sameria vatukaqi vaharo vohaa toraqai Isareriqaa raqiki vaura. ¹⁴ Viva Sameria vatukaqi vauvaro Gadira maaqu Menahemuva Tirisa vatukaihairo Sameriani oruntero Salumura arukero viva nai vira vatuka varero avuhainaava vaiintiqama viro vaura.

¹⁵ Ho Salumuva ekaa vo kaiqa vo kaiqa varo uvarave, viva vonavu hampata avuhainaa vaiinti arukerara uva tiva taatau torave, ekaa vi uvvara vuku vo, *Isareri Avuhainaaka Uva Okarave* tu vukuraqi qara ntuvatora.

¹⁶ Menahemuva Tirisa vatuka kero „nai navunaa vaiinti ntita varero. Tipisa vatukaini oruntomanta vihainaaka kia vaantaavura qenti qantua amitovaro vira kaara Menahemuva arara itovaro viva raqiharo vi vatukara vehi autu kora. Tipisaqi vau vaiinti nahentikavata, vi vatukara aumanto vau vaiinti nahentikavata, viva aru taiqa kero, nahenti vainti taiqama vuka viva vika avuhava iqoka paipeqohairo *kuhia/qumpihia* kora. ¹⁷ Usiava 39 ihiara Iuttaaqaa raqiki vau entara, Gadira maaqu Menahemuva Isareri avuhainaa vaiintiqama viro Sameria vatukaqi vahiaro 10 ihiara Isareriqaa raqiki vaura.

¹⁸ Menahemuva Nora Kotira avuqaa qora okara autura. Haaru Nebaatira maaqu Jeroboamuva qora okara autiharo „una variqa *maraqura/varaha* quahama nimiteharo, Isarerivata kunta virivi komanta vikavata qora okara autura. Ho Menahemuva Isareriqaa raqiku entara viva qaqqi qara okarara auti vaura.

¹⁹ Menahemuva avuhainaava vau entara Asiria King Tikilati-Pileseva, vira autu vo Puluva, viva „nai iqoka vaiinti ntita varero. Isareri vatainai anuvaro Menahemuva virara viva kia ti hampata iqoka raqiraitiro, ti kahagirage te voqavata kempukaiqamake Isareriqaa raqikiare tiro, viva 1,000 *silvaa* monu Tikilati-Pilesera amura.

²⁰ Menahemuva vi monura varareva airi airaira vataakaiqihairo *takisi* naaruma keharo varora. Viva vohaa vaiinti vohaa vaiintiqihairo 50 *silvaa* monu naaruma kero King Tikilati-Pilesera amuvaro ho Tikilati-Pileseva Isareri kero nai maaqaimi vurama.

²¹ Ho Menahemuva ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave* tu vukuraqi qara ntuvatora.

²² Menahemuva qutu yumanta quntama tovaro vira maaqu Pekahiava nai qora vatuka varero avuhainaa vaiintiqama vura.

²³ Usiava 50 ihiara Iuttaaqaa raqiki vau entara, Menahemura maaqu Pekahiava Isareri avuhainaa vaiintiqama viro Sameria vatukaqi vahiaro taara ihiara Isareriqaa raqiki vaura.

²⁴ Pekahiava Nora Kotira avuqaa qora okara autura. Haaru Nebaatira maaqu Jeroboamuva qora okara autiharo „una variqa *maraqura/varaha* quahama nimiteharo, Isarerivata kunta virivi komanta vikavata qora okara autura.

²⁵ Pekahiava iqoka vaiintiqa raqikaiqihairo Remaliara maaqu Pekaava vo vaiinti hampata Pekahiava arukerara uva tiva taatau tero, viva Gileatti vataihainaa vaiinti 50navu ntita varero oru Sameria vatukaqi avuhainaara naavu kempukaiqamake aututo *rumuraqi* oriqetero Pekahiava arukero, vaiinti taaraqanta Akopika Arieckavata arukora. Mintimakero Pekaava Pekahiava vatuka varero avuhainaa vaiintiqama viro vaura.

²⁶ Ho Pekahiava ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave* tu vukuraqi qara ntuvatora.

²⁷ Usiava 52 ihiara Iuttaaqaa raqiki vau entara, Remaliara maaqu Pekaava Isareri avuhainaa vaiintiqama viro, Sameriaqi vahiaro 20 ihiara Isareriqaa raqiki vaura.

²⁸ Pekaava Nora Kotira avuqaa qora okara autura. Haaru Nebaatira maaqu Jeroboamuva qora okara autiharo „una variqa *maraqura/varaha* quahama nimiteharo, Isarerivata kunta virivi komanta vikavata qora okara autura. ²⁹ Pekaava Isareri avuhainaava vau entara Asiria King Tikilati-Pileseva Isareri hampata raqiharo Isoni vatukave, Abeli-Beti-Maka vatukave, Janoa vatukave, Kedesi vatukave, Haso vatukave, Gileatti vatave, Kariri vatave, Napataarira ankuvano u vatara ekaa vi vataravata varora.

Viva vi vatukaravata vi vataravata varero, viraqaahairo ekaa vaiinti nahenti rumpa kero ntita varero Asiriaiini vuru kora.

³⁰ Usiara maaqu Jotamuva 20 ihiara Iuttaaqaa raqiki vau entara, Elaara maaqu Hosiava vonavu hampata Pekaara oru aru kerara uva tiva taatau kero, oru vira arukero, Hosiava nai avuhainaa vaiintiqama viro vaura.

³¹ Ho Pekaava ekaa vo kaiqa vo kaiqa varo uvvara vuku vo, *Isareri Avuhainaaka Uva Okarave* tu vukuraqi qara ntuvatora.

³² Remaliara maaqu Pekaava taara ihiara Isareriqaa raqiki vau entara, Usiara maaqu Jotamuva Iuttaaqaa avuhainaa vaiintiqama viro vaura.

³³ Jotamuva 25 ihiara varakova avuhainaa vaiintiqama viro, 16 ihiara Ieruharemipi vahiaro Iuttaaqaa raqiki vaura. Vira nova Sadokira raavura Jerusaava vaura.

³⁴ Vira gova Usiava Nora Kotira avuqaa koqe okara autuntema kero, Jotamuuvata koqe okara auti vaura.

³⁵ Mintiharovata, viva kiama vo ainqina vo ainqina *ofaa* tainta ravantiaqa komanta vaiinti nahenti qaqqi qai mini mini vahia *ofaa* iha quarake, koqe unta iaina haikara iha

quare vaura. Jotamuva Nora Kotira Naavu vaunaini hohaa virini vau qentira qaiqaa autukora.

³⁶ King Jotamuva ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

³⁷ Jotamuva avuhainaava vau entara Noravano Kotiva Siria King Resiniravata, Isareri King Pekaaravata, vitanta qaqi komanta oru Iutaa hampata iqoka hogaramate raqura.

³⁸ Jotamuva qutu yumanta vira vaata vare nai kaivaqaukavara quntama tonaini Devitira Vatukave turaqi vuru quntama tovaro vira maaqu Ahaasiva nai qora vatuka varero avuhainaava vaiintiqama viro vaura.

16

Ahaasiva Iutaa avuhainaava vaura

¹ Pekaava 17 ihiara Isareriqaa raqiki vau entara, Jotamura maaqu Ahaasiva Iutaa avuhainaava vaiintiqama viro vaura.

² Ahaasiva 20 ihi varakova avuhainaava vaiintiqama viro Ieruharemiqi vaharo 16 ihiara Iutaaqaa raqiki vaura. Viva Iutaaqaa raqikiharo viva Nora Kotira avuqaa kia avuqavu okara autiraitiro, viva kia nai kaivaqava Devitiva koqe okara autintema kero autura.

³ Viva Isareri avuhainaaka qora okara autuntema kero, qora okara autuqiro viharo, nai anomia kero qora okara voqavata autiharo, una variqa quahama nimitareva nai maaqu arukero iha quara nimitora. Haaru Isarerini vau vaiinti nahentika qora okara autura viva vika avataqiro vi vaura. Noravano Kotiva haaru Isareri vataini vauka vara qaqini kero, vika u vatara tinavu kaivaqaukavara Isareri nimura.

⁴ Ahaasiva una variqanavu quahama nimitareva, vo vatuka vo vatukagaave, vo ainqina vo ainqinaqaave, ekaa aumaaqa vau katarira okarainive, viva mini mini vaharo *ofaa* iha quara kero, koqe unta iaina haikaravata iha quare vaura.

⁵ Ho Siria King Resiniravata, Isareri King Pekaavavata, vitanta náitonta iqoka vaiinti ntita vare oru Ieruharemi ututumate iqoka raqihha vitanta kia ho Ahaasira aatara kora.

⁶ (Vi entara Siria King Resiniva oru Elati vatukaini iqoka raqiharo Elatiqihairo Iutaa vatanaaka viraqi vauka vara qaqini kero qaiqaa vi vatukara varomanta Idomu vatanaaka vi vatukaraqi oru variqi vi vaura. Vate maa entaravata Idomu vika Elatiqiqi variari.) (14:22)

⁷ Resinika Pekaaka Ieruharemi vatuka ututumate vauvaro, Ahaasiva uva vara kero Asiria King Tikilati-Pileslerara tiharo, Mpo, te ai kaiqa vaiintivano ai vevaarainima vauvo. Siria avuhainaavavata Isareri avuhainaavavata ti hampata raqi variavo. Mpo, are ani ti ruarua ma timitaane, tiro.

⁸ Minti tivakero Ahaasiva *korivata silvaavata* Nora Kotira Naavuqvi vauravata, avuhainaara naavu monu vate vau *rumuraqi* vauravata, varakero Asiria avuhainaava vira quahama amitaarie tiro, viva unaini vara kora.

⁹ Mintuvaro King Tikilati-Pileseva Ahaasira kahaqireva viva nai iqoka vaiinti ntita varero Damasikusi vatuakaini otu raqiharo vi vatukara varero King Resinira arukero Damasikusiqi vauka rumpa kero ntita varero vuru Asiriai Kiri vatukaini kora.

¹⁰ Mintuvaro King Ahaasiva Tikilati-Pilesera tavareva Damasikusini oruntero *ofaa* tainta viraqiraaka autu tora tavero, Kotira kaiqa vara amito vaiintiva Uriaava vi taintara voqaara autuarire tiro, vira *maraqura/varaħa* autu kero, *ofaa* tainta mintima kera autuane tu uvra qara ntuvakero, qara vira vara kovaro Uriaava Ieruharemiqi vaunaini kora.

¹¹ Uriaava qara tavero, viva Damasikusiqi aututo *ofaa* taintara voqaara tainta vo autuqi viharo, Ahaasiva kia Ieruharemini orurantero anu entara Uriaava *ofaa* tainta vira autu taiga kora.

¹² Ho Ahaasiva Damasikusiqihairo anirantero oru tainta vira tavero, vira tataaqqa vaharo *naivano* *ofaa* iha quare vaura.

¹³ Viva ekaara ita vuaina *ofaarave*, *uiti ofaave*, *uaini qihiarraaina ofaarave*, Kotikantiro vohaa variaina *ofaarave*, iha quara kero, naare varakero *ofaa* tainta viraqaa rintatima kora.

¹⁴ Haaru *baraasiqohai* aututo *ofaa* taintava Nora Kotira Naavu avuqaa vauvaro *ofaa* tainta qaraaka aututova vira tataaqqa qumina tauvaqaini vauvarora tiro, Ahaasiva qaraaka *ofaa* tainta viva Kotira Naavu avuqaa variarire tiro, viva tumanta *baraasi* tainta vira qaqini vara vuruvi *noti* mantaraini vatoria.

¹⁵ Mini vuruvi vatovaro King Ahaasiva Uriaara tiva amiro tiharo, Are ekaa enta *ofaa* iha quarareva iħara, qaraaka *ofaa* taintaqqaqai iha quaraane. Ekaa enta toqaqi ekaara ita vuaina *ofaara* iha quaratera, erainaini *uiti ofaa* iha quaraane.

Are avuhainaarara irihara ekaara ita vuaina *ofaara* iha quara amitera, vaiinti nahentiaravata irihara iha quara nimitaane. Vikara irihara *uittvata ofaa* iha quara taane. Are vaiinti nahentiarira irihara *uainivata ofaa* taintaaga qihiraane. Are ekaa naare kaqakera qaraaka *ofaa* tainta viraqaaqaima aqu aqu iane.

Baraasi tainta vira qaqi kairaqe te naantiara vira tataqaqai vira nana nana kaiqa varaainarara Kotira ireha tavarerave, tiro. ¹⁶ King Ahaasiva minti tuvaro Uriavaa viva tunte ura.

¹⁷ Asiria avuhainaarara iriharo, King Ahaasiva tumanta vika *uri kaarinavu* Kotira Naavu vahaqaini vauraqihai *baraasi* tanuqama tora qaqini varake, namari tanuvata *uri kaariqaa* vatora qaqini varakora. (1 King 7:28)

Varuva Namariive tu tavera *baraasi* purumakauqaa vatora, Ahaasiva tumanta vika viraqaaqai qaqini varake, ori ntavatoraqaa vira vaari vatora. (1 King 7:25)

¹⁸ Aumaqaara variate ti kaqato naavuva Nora Kotira Naavu aumanto vaumanta Maara Entaagaqaa avuhainaava viraqiqi vaura, Ahaasiva tumanta vika vira rampaik, avuhainaava Nora Kotira Naavuqijara vu hohaa gentiravata tinta tora. Asiria avuhainaarara iriharo, King Ahaasiva tumanta, vika vi haikara mintimake vatora.

¹⁹ King Ahaasiva ekaa vo kaiqa vo kaiqa varo uvvara vuuku vo, *Iutaa Avuhainaaka Uva Okarave* tu vukuraqiqi qara ntuvatora.

²⁰ Ahaasiva qutu vumanta vira vaata vare nai kaivaqaukavara quntama tonaini Devitira Vatukave turraqi vuru quntama tovaro, vira maaqu Hesekiaava nai qora vatuka varero avuhainaava vaiintiqama viro vaura.

17

Hosiava Isareri avuhainaava vaura

¹ Ahaasiva 12 ihiara Iutaqaa raqiki vau entara Elaara maaqu Hosiava Isareri avuhainaava vaiintiqama viro 9 ihiara Sameria vatukaqi vaiharo Isareriqaa raqiki vaura.

² Viva raqikiharo Nora Kotira avuqaa qora okara autiharovata, kia anomakero Isareri avuhainaaka autuntema kero autura.

³ Vi entara Asiria King Samaneseva ani Isareri hampata iqoka raqiharo vika naatara kovaro, Hosiava Samanesera vevaarainiqama viro, vo ihi vo ihiara *takisi* vira ami vaura.

⁴ Isipi King Sova vira kahaqiarire tiro, Hosiava voku vaiintika viva unaini nititama kero, vi ihira Hosiava kia vo ihi vo ihi untema kero, *takisi* Samanesera amiraitiro vaura. Mintuvaro vira kaara Samaneseva iqoka vaiinti nititomanta vika oru Hosiara ravaaqavu vare viri karapuhiqi kora.

Asiria iqoka raqihai Sameria vatuka varora

⁵ Asiria King Samaneseva nai iqoka vaiinti ntita varero oru Isareri vataini iqoka raqiharo, Sameria vatuka taaramo ihiara ututumate vaumanta vatukaqi vauka aaqaini vaatinte vi aniva kia ho vaura.

⁶ Mintuvaro Hosiava 9 ihiara Isareriqaa raqiki vau entara Asiria avuhainaava Sameria vatukaqi vauka naatara kero vi vatukara varero, Isareri vika rumpa varero vuru Asiriaini kora. Viva vika rairakeri maa vatukanavuraqi komanta vaura: Hala vatukave, Habo Namari aumanto Gosani vatukainive, Midia vataini vatukanavu vauraqive, komanta vaura.

⁷ Ho Isareri nai Variga Nora Kotira qora okara autu amite vaura kaara vi maarava vikaqaa qovaraiqura. Haaru Noravano Kotiva vika kaivaqaukavara Isipi avuhainaara kauquqihairo kuvantukero ntita varorara kia iriraiti, una variqa quahama nimite vaura.

⁸ Haaru Noravano Kotiva Isareri vataini vauka vara qaqini kero, vika u vataro tinavu Isareri kaivaqaukavara nimumanta Isareri hoqare vauka qora okara autura avataqi viha, Isareri avuhainaaka qora okara auturavata avataqi vi vaura.

⁹ Noravano Kotiva kia antuqa ari okarara, vo okara vo okara Isareri kukeqavi vaiha auti vaura. Vika una variqa quahama nimitareka ekaa vatuka, inaara vatukaqive nora vatukaqive, *ofaa* tainta aututora.

¹⁰ Vika una variqa *ori*, vo ori tegake, una variqa nahenti Aseraara *maraqura/varaha* vo katari vo katariqaa nkauruke, vi haikara vi haikaravata vare, ekaa ainqinaqaaave, aumaqaara vau katarira okarainive vuru arate, vi haikarara tinavu variqave tivakeha quahama nimite vaura.

¹¹ Noravano Kotiva maa vataraqahairo vara qaqini koka autuntemake, vikavata una variqara iriha vo ainqina vo ainqinaqaa vaiha koqe unta iaina haikara iha quare vaura. Isareri vo okara vo okara mintima keha auti vauvaro Nora Kotira voqamakero arara itora.

¹² Haaru Noravano Kotiva vikara tiharo, Kiama una variqara tinavu variqave tivakeha vika quahama nimitaate, tumanta vika vira uva kia iriraiti, vi haikara quahama nimita vaura.

¹³ Vika qora okara autivorave tiro, Noravano Kotiva paropeti vaiinti Isarerinivata Iutainivata varakero vika noqihairo tiva nimiro tiharo, *Ne qora okara auti variara qaqrake, ekaa te tiva tauna uvava iriqi vuave. Te vi uvava ni kaivaqaukavara tiva nimunara, vi uvava tenta kaiqa vaiinti paropeti noqihai ni tiva nimuro*, tura.

¹⁴ Minti tumantavata, vika kaivaqaukavara avu aato kempukaiqama yumanta kia nái Variqa Nora Kotira uva iruntemake, vikavata kia vira uva irura.

¹⁵ Noravano Kotiva vika kaivaqaukavara hampata uva tiva taatauto uvarave, viva uva maara turave, vikara ne rauriha variate tu uvarave, Isareri vika vi uvava vi uvava qoririma kora. Vika vira uva kia iriraiti, qumina variqanavuara noraiqaake iriqi vivi, vikavata qumina haikaiqama vuara.

Haaru Noravano Kotiva vika tiva nimiro tiharo, Ne kiama vo vatanaaka ni aumanto variaka auti varia okarara avataate, tumanta Isareri vika qaqi vi okarara avataqi viha, Noravano Kotiva qioqamato uvava kia irireka auti vaura.

¹⁶ Vika nái Variqa Noravano Kotiva tivato uvava ekaa raqa kora. Vika *koriqohai* purumakau naati qora taaraqanta autuke vitantara tinavu variqave tura. Vika una variqa nahenti Aseraara *maraqura/varaha* autuke viravata quahama amitora. Vika opu makaura variqave tivakeha quahama nimita, una variqa Baaliravata quahama amitora.

¹⁷ Vika una variqara iriha, nái maaquve raavurave arukeha *ofaa* iha quare vaura.

Vika naantiara qovaraiqaina okarara irireka, varante varia nahentikave, vaana kaiqa vare variakave, unaini orunte vika ire vaura. Vika *vure/quaha* vaiintiara uhiakaa autu timitatee ti, vika naare vaura. Noravano Kotiva vi okarara qora okarave tura vika vira autura kaara vira voqama kero arara itovaro vaura.

¹⁸ Nora Kotira voqama kero arara itovaro viva Isareriara ne kia ti aaqanto variate tivakero navutaaka qaqi komanta vika ani vika rumpa vare vo vataini vuru komanta Iutaaqai nái vata mini qaqi vaura.

¹⁹ Ho Iutaavika kia nái Variqa Noravano Kotiva tivato uvava iriraiti, vikavata vira uva raqake vaura. Isareri qora okara autuntemake, Iutaa vikavata vi okarara auti vaura.

²⁰ Ho Noravano Kotiva ekaa Isareri qoririma kero navutaaka vika qoraiqama nimitheha vika u haikara varaate tiro, vika kauquqi ke vaura. Mintumanta Isareri kia qora okara qaqla karaiti, qaqlai autu vauvaro ekaara vitini Nora Kotira popohovaro nai aqantohairo vika qaqlin vara kora.

²¹ Haaru Devitira ankuvano ekaa Isareri vaiinti nahentiqa raqiki vauvaro, viraqahaio Noravano Kotiva Isareri vika raira komanta Isareri anku 10navu Nebaatira maaqu Jeroboamura kaama tovaro viva vika avuhainaa vaiinti vaura.

(King 11:11, 31)

Ho Jeroboamuva Isareri kuntama virivi komanta vika Nora Kotira qoririmake, qora okara anomake autura. (King 12:28-29)

²² Jeroboamuva ekaa qora okara autuntemake, Isareri vika kia vi okarara qaqla karaiti, qaqlai autu vauvaro ²³vira kaara Nora Kotira popohovaro nai aqantohairo vika nititama kora.

Noravano Kotiva ekaa nai kaiqa vaiinti paropeti noqihairo Isareri tiva nimiro tiharo, Oho, ne kia vi aarara qaqla kaivera, te ni tenta aqantohai qaqlin vara karerave tuntema kero, viva qaqla komanta navutaaka Isareri rumpa vare vuru Asiria vataini kora. Vate maa entara vika qaqlin variara.

Vo vatanaaka ani Isareri vataini vaura

²⁴ Asiria avuhainaava vaiinti nahenti vonaihainauka, Babironive, Kuta vatukave, Iva vatukave, Hamaati vatukave, Sefavaimi vatukave, mini minihainaaka ntita varero Sameria vataini Isareri vika vatukaqi vuru komanta vaura.

²⁵ Ho vi vatanaaka katu vare Sameria vataini oru vaiha, vika avuni kia Nora Kotirara tinavu Variqave tiraiti, kia vira quahama amitaraiti vauvaro, vira kaara Noravano Kotiva *raioni* vonavu vara komanta vika vi aniba vaiinti nahenti vokuka aru kora.

²⁶ Mintumanta vaiinti vokuka Asiria avuhainaava unaini orunte virara tiha, Are ntita varera Sameria vataini vuru kaarauka, vika kiama vi vataihainaa variqa uva okara kankomake iriavaro vira kaara vi variqava *raioni* vonavu vara kaimanta vika vi aniba vaiinti nahenti aruke variavo, ti.

²⁷ Minti tuvaro Asiria avuhainaava qiata vaiinti vo tiva amiro tiharo, Tenavu Sameriaqihai ntita vare anuraukaqihair are oru Isareri variqa kaiqa vara amite vai vaiintira

vo atitairaro viva qaiqaa Sameria vataini oru vaiharo vi vataihainaa variqa vira okara vaiinti nahenti numiqqaire, tiro.

²⁸ Minti tuvaro viva Isarerri vaiinti vo, Kotira kaiqa vara amite vau vaiintira vara kovaro viva anirantero Sameriaiini oruntero, Beteli vatumaini vaiharo vi vaiinti nahentika Nora Kotira quahama amite okarara vika tiva nimi vaura.

²⁹ Viva tiva nimi vaumantavata, vihainaaka vo vatuka vo vatukaqi ani vauka, vika nái okaravata qaqi tuataqi viha, nái una variqa *maraqura/varaha* autuke haaru Isarerri *ofaa* tainta viri kanta aututora viraqaa viraqaa vika nái una variqa *maraqura/varaha* vaaviarama tovaro vaura.

³⁰ Babironihainaaka vika nái una variqa Sukoti-Benotira *maraqura/varaha* autuke vatomanta, Kutaihainaaka vika nái una variqa Negaalira *maraqura/varaha* autuke vatomanta, Hamaatihainaaka vika nái una variqa Asimaara *maraqura/varaha* autuke vatomanta, ³¹ Ivaihainaaka vika nái una variqatanta Nipahaasika Tataakika autuke vatora.

Sefavaimihainaaka vika nái una variqatanta Adramelekika Anamelekika quahama nimitareka iha, vika nái vainti arukeha vitanta *ofaa* iha quara nimite vaura.

³² Vi vatanakaaka Nora Kotira quahama amiteha, nái vikaqihai vaiinti vonavu kaama tomanta vika *ofaa* tainta viri kanta aututova mini mini vauraqaa vhaiha *ofaa* iha quare vaura.

³³ Vi vatanakaaka Nora Kotira quahama amiteha, vika haaru nái maaqaini vhaiha autu okarara kia qaqira karaiti, qaqi tuateha, nái una variqaravata kaiqa vara nimite vaura.

³⁴ Vate maa entaravata vi vatanakaaka nái mintia okarara qaqi tuataqi vi variara. Vika kia Nora Kotira autu ququaqamake tuahera karaiti, Noravano Iekopira ankuara tivato uvarave, minti minti iate tu uvarave, kia avataqi vi variara. (Noravano Kotiva Iekopira vo autu ntava amiteharo Isarerirave tura.)

³⁵ Haaru Noravano Kotiva Isarerri hampata kempukaiqama kero uva tiva taatautero, vikara mintima tiro:

Ne kia una variqa nutu tuaheraate. Kia vika nivuqaa vhaiha kankakaavi variate. Kia vika kaiqa vara nimiraititi, kia *ofaa* iha quara nimitaate.

³⁶ Te Noravano Kotika tenta kempukaiqohai ni Isipihai ntita vare maini viri kaunarara ti, ne ti hutuqai tuahera kaate. Ne tiriraqai tori kauru aravi vhaiha ti vohaiqaqai *ofaa* iha quara timitaate.

³⁷ Te ekaa niara iriha uva tiva taunarave, uva maara tiva nimunarave, ekaa vi uvara vi uvara qara ntuva taunara ne koqemake iriqi vuate. Kia una variqa nutu tuahera kaate.

³⁸ Te ni hampata uva tiva taatau tauna uvara kia tauru karaiti, kia una variqa nutu tuahera kaate.

³⁹ Ne kia mintiraiti, ti nenta Variqa Nora Kotika hutuqai tuahera kaate. Ne mintiqe te navutaaka kauquqihai ni ruaruama nimiritararave, tiro. Noravano Kotiva minti tura.

⁴⁰ Noravano Kotiva minti tumantavata, vika kia vira uva iriraiti, nái haaru okara qaqiqai autuqi vi vaura.

⁴¹ Vi vatanakaaka Nora Kotira autu tuahe-reha, nái una variqa nutuvata tuahere vaura. Vate maa entaravata vika vaintivarave, naintivarave, nái naaqua taatoka untemake, hampi okaraqai autuqi vi variara.

18

Hesekiaava Iutaaqaa raqiki vaura

¹ Elaara maaqu Hosiaava taaramo ihiara Isareriqaa raqiki vau entara, Ahaasira maaqu Hesekiaava Iutaan avuhainaa vaiintiqama viro vaura.

² Hesekiaava 25 ihi varakova avuhainaa vaiintiqama viro Ieruharemipi vaharo 29 ihiara Iutaaqaa raqiki vaura. Vira nova Abiaava Sekaraiaara raavura vaura.

³ Hesekiaava nai kaivaqava Devitiva Nora Kotira avuqaa koqe okara autuntema kero, koqe okara auti vaura.

⁴ Viva *ofaa* taintanavu vo aiqina vo aiqinaqaa vaura qaqini vara aqukero, origohai una variqa *maraqura/varaha* aututora voqi voqi vaaviarama tora ravantiaqa aqukero, una variqa nahenti Aseraara *maraqura/varaha* katariqaa nkaurutora voqi voqi aratoria tuqu taaquma kero, haaru Mosiva *baraasiqohairo* memaru *maraqura/varaha* aututora, viravata kinta kaantama aqukora. Mosiva memaru *maraqura/varaha* aututora, haaruvata vatevata vaiinti nahenti virara *Nehusitaanirave* tivake vi haikara quahama amiteha, koqe unta iaina haikara vira iha quara amite vaura.

⁵ Hesekiaava Isarerri Variqa Nora Kotirara ququaama viva ti kahaqiarirava vaivo tivakeharo virara noraiqaakero iriqi vi vaurara ti, Iutaa avuhainaaka haaru avuni vaukavata Hesekiaara naantiara qovaraiqukavata kia vira voquka vaura.

⁶ Hesekiaava Nora Kotirara noraiqaakero iriqiro viharo kia vira uva raqa karaitiro, viva Mosirara tivato uvvara koqema kero iriqiro vi vaura.

⁷ Mintuvaro Noravano Kotiva Hesekiaakantiro vahiharo vira kahaqi vauvaro viva ekaa kaiqa varova koge iro vaura.

Hesekiaava kia Asiria avuhainaara vevaaraini vaireva iharo kia vira kaiqa vara amite vaura.

⁸ Hesekiaava nai iqoka vaiinti ntita varero Pirisia vataini oruntero vi vatanaaka hampata raqiharo nora vatukave inaara vatukave aatara kero, oru viviro, Gaasa vatukaqi vaukavata vi vatukara tataaqqa vaukavata naatara kora.

⁹ King Hesekiaava 4 ihiara Iutaqaqa raqiki vau entara King Hosiava 7 ihiara Isarerriqa raqiki vauvaro vi ihiraqi Asiria King Samaneseva nai iqoka vaiinti ntita varero Isarerri hampata raqireva oru Sameria vatuka ututumate vaumanta vatukaqi vauka aaqaini vaatinti vi aniva kia vaura.

¹⁰ Ho Asiria vilka taaramo ihiara Sameria vatuka ututumate variqi vi, viraqaahai vi vatukara varora. Vi entara Hesekiaava 6 ihiara Iutaqaqa raqiki vauvaro Hosiavavata 9 ihiara Isarerriqa raqiki vau entara Asiria vi vatukara varora.

¹¹ Sameria vatuka varovaro Asiria avuhainaava Isarerri vika rumpa varero vuru Asiriaini kora. Viva vika rairakero maa vatukanavuraqi komanta vaura: Hala vatukave, Habo Namari aumanto Gosani vatukainive, Midia vataini vatukanavu vauraqive, komanta vaura.

¹² Isarerri nai Variqa Nora Kotira uva kia irura kaara vi maarava vikaqaa qovaraiqu. Noravano uva tiva taatau tero nai kaiqa vaiinti Mosira tiva amu uvvara vika ekaa vi uvvara raqake vaura. Vika vi uvvara kia iriataa umanta kia avataqi vi vaura.

¹³ Hesekiaava 14 ihiara Iutaqaqa raqiki vau entara Asiria King Senakeripiva nai iqoka vaiinti ntita varero ani Iutaa hampata raqiharo vika naatara kero, vo vatuka vo vatuka vaantaavuravano ututumatora vare, „Ieruharemiqai kia varora.“

¹⁴ King Senakeripiva Lakisi vatukaqi vauvaro Hesekiaava viraini uva vara kero tiharo, Oho, „te ai vevaaraini variataara valmanta te kia mintiraiti, qora okara autu kauro. Are iqoka qaqlira kera viraqe te nana nana haikarae are ti naarinara ai amiare, tuvaro Senakeripiva vira naariro tiharo, Silvaa 10,000 kilovata, kori 1,000 kilovata timiane, tiro.

¹⁵ Minti tuvaro Hesekiaava Nora Kotira Naavuqihairove, avuhainaara naavu monu vate vau rumuraqihairove, ekaa silvaa viraqi vaura varakero Senakeripira amitora.

¹⁶ Hesekiaava Nora Kotira Naavu qentingavuqaave, genti pohinavuqaave, kori ruqutukero naavumatora ravaqaakero King Senakeripiva vaunaini vara kora.

¹⁷ Asiria avuhainaava „korivata silvaa varero, viva kia iqoka qaqlira karaitiro,“ viva nai iqoka vaiintiqa qaqlirkuka taaramonavu, Tataanirave, Rabi-Sarisirave, Rabi-Sakerave, nititonmanta vinavuka iqoka vaiinti airitahaa vataake Lakisiqihai Ieruharemini vura.

Ieruharemi „vaantaavura aaqaini,“ vaiinti nahenti tavuna hiqe vaunaini vika orunte mini himpi vaura. Varuva namari veraraqaa vauraqahairo oraqi tuvi vaura.

¹⁸ Ho Asiria vika mini orunte King Hesekiaara aarovaro viva nai nora vaiinti taaramonavu Asiria vaunaini nititora. Viva Hikiara maaqu Eliakimira avuhainaara naavuqaa raqiki vaurave, vira qara ntuvu amite vaura Sepinaarave, viva varo kaiqarave, vo uvave, vukuqi qara nti vaura Asapira maaqu Joaarave, vinavuka nititonmanta vura.

¹⁹ Oru ntomanta Rabi-Sakeva vinavukara tiharo, Ne Hesekiaara maa uvvara muntu tiva amiate: Asiria avuhainaava nora vaiintivano ariaria mintima tivo: Hesekiaao, are nana haikaaqaa muntuvi vahiharee, kia ti vevaaraini vaireva, auti variaro? ²⁰ Are ti variara uvava qumina uvama vaivo. Vi uvava kia ho ti iqoka vaiinti kempukave, iqoka okara iri taverave, aatara kaanarove. Are taraqaa muntuvi vahiharee kia ti vevaaraini vaireva, auti variaro?

²¹ Oho, te iri tavauro. Are Isipiqa muntuvi vahiharee kia ti kahaqivarave tivakehara variaro. Vaiintivano anu aaharaqaa muntuvi vahiharee kia vira kauqu teqa kaintemake, Isipi avuhainaaa vaiintiqa muntuvi vaika qoraiqama vivarave.

²² Are tiriara tihara, Tenavu tentanavu Variqa Nora Kotiraqaa muntuvi vauro, tirera, vi uvavavata kia ho varianarove. Hesekiaao, are kiae iritaaro? Arema Nora Kotira ofaa tainta vo ainqina vo ainqinaqaa vaira ravantiaqa kaaro. Arema Iutaavata Ieruharemini variakavata tiva nimira tihara, Ne Ieruharemiqiqai oru vaiha ofaa tainta vohaiqaaqaa ofaa iha quaraate, tianarave.

²³ Ho Hesekiaao, tenta avuhainaai vaiinti autuqaa te ariara tiha, Are minti minti irera, te mintima irarave. Are 2,000 iqoka vaiinti ohiqaa raqika ranta kairera, te 2,000 ohi ai amirerave. Te tavaurara are kia ho mintinarave.

²⁴ Ti avuhainaara iqoka vaiinti inaara autu vataaka are kia ho vika naatara kenarave. Isipi iqoka vaiinti iqoka *kaariqi* vaiha raquaka kia ho ani ai kahaqivarave. Are qumina vika veka vainerave.

²⁵ Noravano Kotiva kia ti tititaimantae te ni hampata iqoka raqiba ni vehi autu karera anuro? Are mintimae iriaro? Aqao, Noravano Kotiva viva ti tiva timivera, te ai hampata raqiba ai vatavata vehi autu taiqa karera anuro, tiro.

²⁶ Asiria iqoka vaiintiqa raqiki vauva Rabi-Sakeva minti tumanta Eliakimivavata Sepinaavavata Joaavavata virara tiha, Mpo, tenavu Asiria uva irunarave. Kia Hiparu uvaqihaira uva tiraitira, Asiria uvaqihaira tiane. Hauri virira vatuka vaantaavuraqaa variaka are tina uvvara irivorave, ti.

²⁷ Vinavuka minti tuvaro Rabi-Sakeva aqao tiro, Ti avuhainaava kiama ninavuvata ni-navu avuhainaaraavataqai tiva amiate tiraitiro, ti tititairavauve. Te virira vaantaavuraqaa variakavata maa uvvara tiva nimirerave. „Naantiara ne kara neva kia variaina entara,“ vika ninavu aanante nái raha viara nevarare, tiro.

²⁸ Minti tivakero Asiria vaiinti viva himpiro vaantaavuraqaa vauka taveharo Hiparu uvaqihairo naveratiharo, Asiria avuhainaava nora vaiintivano ti uvvara ne iriate. ²⁹ Viva mintima tivo: Ne kiama qaqi kaivaro Hesekiaava ni unaqaraiqama nimitaare. Viva kiama ho ti kauquqihairo ni ruaruama nimitaanarove.

³⁰ Hesekiaava tiharo, Noravano Kotiva tinavu ruaruama timitaanarove. Maa vatukava kiama Asiria avuhainaara kauquqi varianarove, ti vai uvvara kia iriate. Ne kiama Hesekiaara uquerara uva iriha Nora Kotiraqaa muntuvi variate.

³¹ Ne kia Hesekiaara uva iriraiti, Asiria avuhainaara uva iriate. Viva niara mintima tivo: Ne iqoka raqira qaqrake, aaqaini vevante ani ti vevaaraini variate. Ne mintivera, ne homa nenta naahogiraara, *uaini* tavave *fiki* tavave varake neha, nenta vata quvitaaraqihairo urina namarira nevarare.

³² Ne mintiaqi viha ti veka vaiqe te ani ni ntita vare vo vataini vuru kaari ne nenta vataini variantemake variate. Vi vataraaqa *uaini* naaho airi vaimanta ne homa *uaini* tattike nevarare. *Uiti* naaho airi vaimanta ne viraqohai homa mpareti untake nevarare. *Orivivata hanivata* airima mini vaivo.

Ni muntukavano nana haikarae vaivo? Ne ti uva irivera, ne kia qutu viraiti, qaqi vaivarare. Ne Hesekiaara uva irivera, ne qutu vivarave. Viva ni una tiharo, Noravano Kotiva tinavu ruaruama timitaanarove, ti uvvara ne kia iriate.

³³ Ho iriate. Te Asiria avuhainaaka vo vatanaa vo vatanaaka hampata raquqi vuramanta, kia vika variqa vovano ti kauquqihairo vika ruaruama nimitairave.

³⁴ Te vo vataini vatuka vonavu Hamaative, Apaative, Sefavaimive, Henaave, Ivaave, vika hampata raquna entara vika variqanavu tainie variamanta „te vi vatukaranavu naatara kaumarave?“ Te Sameria vatukaqí variaka naatara kauna entara vika variqavano ti kauquqihairo vika ruuaramea nimitairave? Aqao, kiavuue.

³⁵ Ekaa vi vataraqi varia variqaukaqihairo kia variqa vovano vo vatawata ti kauquqihairo qaqini vara kairara ti, nantihae ne Ieruharemíqi variaka tiriara tiha, Noravano Kotiva vi vaiintira kauquqihairo tinavu ruaruama timitaanarove, ti variavo? Tinavu Asiria avuhainaava niara mintima tivo, tiro.

³⁶ Asiria iqoka vaiintiqa raqiki vauva ekaa nai uva tiva taiqa kovaro Hesekiaava kia vo uvavata virara tiate turara ti, vaantaavuraqaa vauka kia uva voqavata tiraiti, qaqi evaara vaura.

³⁷ Eliakimivavata Sepinaavavata Joaavavata vinavuka muntuka qoraiqumantia vika nái utavaaqa qunahi qaanahimake, Rabi-Sakeva tu uvvara vuru Hesekiaara tiva amura.

19

Hesekiaava Aisaiara irora

¹ Hesekiaava Asiria vatanaaka tu uvvara iruvaro vira muntuka qoraiquvaro nai utavaaqa qunahi qaanahimake kero kovaara utavaaqa nonku varero Nora Kotira Naavuqi oru vaura.

² Viva avuhainaara naavuqaa raqiki vau vaiintira Eliakimirave, avuhainaara qara ntuvu amite vau vaiintira Sepinaarave, Kotira kaiqa vara amito vaiintika noranavuve, naaramakero nititonmanta vikavata kovaara utavaaqa nonkute paropeti vaiinti Emosira maaqau Aisaiava unaini vura.

³ Vika orunte vira tiva ami tiha, Hesekiaava mintima tivo: Mpo, vate tinavuqaa nora maara qovaraiqi entarave. „Asiria“ tinavu tauvaqavaura uva tiavarо tinavu vogama kero kaurivo. Nahenti kempukavano kia vaivarо viva kia ho vainti vatataintema kero, tinavu kempukavano kia vaivo.

⁴ Asiria avuhainaava Rabi-Sakera atitaivarо viva anintero qaqi variqiro vi vai Variqarara qora uva tiva amitaivo. Mpo, vika qora uva tiara ai Variqa Noravano Kotiva iriro, vika qoraiqama nimitarerа, te hove tiataarave. Are Kotira aarairaro viva tenavu taaraqa qaqi vaurauka kahaqiarie tivo, ti.

⁵ Hesekiaava nititoka vira uva Aisaiaara tiva amuvaro viva vikara tiharo, ⁶ Ne anirante nenta nora vaiinti vuru mintima tiva amiate: Noravano Kotiva tiharo,

Asiria avuhainaara paanaa kaiqa vare variaka ti Kotikara qora uva tiara are kia vira aatu qetehara variane.

⁷ Te „Asiria avuhainaara“ avu aato hampiqama kaariraro viva aaranahairo uva vo iriro, anirantero nai maaqaini vuarire. Viva nai maaqaini oru vairaqe te qaqi kaari vo vαιintinavu iqoka paiseqohai vira aru kaate tivo, tiro.

Aisaiaava Kotiva mintima tivo tura.

⁸ Ho Rabi-Sakeva vahiarо iruvarto King Senakeripiva Lakisi vatuka kero vonaini vuvaro viva nai iqoka vaiinti ntita varero Ieruharemi kero oru tavovaro Asiria avuhainaava Lipina vatukaqи vauka hampata raqi vaura.

⁹ Asiria King Senakeripiva iqoka raqi vaumanta vokuka ani vira tiva ami tiha, Itiopia King Tihakiva Isipi ntita varero ani ai hampata iqoka raqirevave, tuvaro Senakeripiva vi uvarto iriro vaiintinavu nititomanta vira qara vare vuru Hesekiaara amura. Senakeripiva mintima tiro:

¹⁰ Are Variqa voqaa muntuvи variarava viva ariara unahaa tiharo, Te kia Asiria avuhainaara qaqi kaariraro viva Ieruharemi vatuka ho varaanarove tivo. Hauri are vira uvara quqaa uvave tirorave.

¹¹ Asiria avuhainaaka ti avuni vauka raqua okararavata te raquna okararavata are irira tavaanarave. Tenavu oru vo vataini vo vataini vo vatanaa vo vatanaa hampata raqha vika vehi autu taiqa kaunarave. Hauri are tihara, Tinavu Variqavano tinavu ruaruuma timitaanarove tirorave.

¹² Haaru ti kaivaqaukavara Gosani vatukaqи vaukave, Haraani vatukaqи vaukave, Resepi vatukaqи vaukave, vehi autu taiqake, Beti-Edeni vatanaaka Telasaa vatukaqи vaukavata aru taiqa korave. Ti kaivaqaukavara vi vatanaa vi vatanaa hampata iqoka raqi vaumanta vika variqanavu kia vika ruaruuma nimitorave.

¹³ Hamaati avuhainaavave, Apaati avuhainaavave, Sefavaimi avuhainaavave, Henaавуаве, Ivaавуаве, vika vate qaqie variavo? Kiavuve. Tenavu vika ekaa aru kaunarave, tiro.

Senakeripiva mintima qara ntuvatora.

¹⁴ Senakeripiva nititoka vi qarara vare vuru Hesekiaara amuvaro viva vira tavero, Nora Kotira Naavuqi oriqetero vira aaqanto vahiarо vi qarara raira kero vatero ¹⁵ Nora Kotira aarero tiharo,

Mpo, Noravauvо, are tinavu Isarerо Variqavano vahira are nena avuhaina tain-taqa оquvi variaramanta aroka vataa *enselinavu* ai hini hini mantaraini variavara variaro. Areqai Variqavano vaharara tira, are ekaa maa vataraqaa raqiki variaravama variaro. Are vatavata naaruvavata autu kera vataaravama variaro.

¹⁶ Mpo, Noravauvо, are nena aato ti timihara ti uva iriane. Mpo, Noravauvо, nena avu rampaikera tavaane. Are qaqi variiana Variqarara Senakeripiva qora uva tira iriane.

¹⁷ Noravauvо, tenavu iri tavauramanta Asiria avuhainaaka vo vatanaa vo vatanaa vehi autu taiqake vika vatavata qoraiqama kaarave.

¹⁸ Asiria avuhainaaka vi vatanaa una variqvata varake ekaa iha quara kaarave. Ho vi haikauka kia quqaa variqa variamanta vaiintivano katarive orive varake nai kauquqohai vi haikauka autuke vataarave.

¹⁹ Noravauvо, are tinavu Variqavano variaro. Mpo, vate are Asiria King Senakeripira kauquqihaira tinavu tivita varaaне. Are mintiramanta ekaa maa vataraqaa variaka tave ariara tiha, Noravano Kotiva vivaqaima Variqavano vaivo tivarave, tura.

Aisaiaava Hesekiaara tiva amu uvara

²⁰ Hesekiaava Kotira aarovaro Aisaiaava viva unaini uva varakeharо mintima tiro: Tinavu Isarerо Variqa Noravano Kotiva ariara mintima tivo:

Are ti aarehara King Senakeripirara tiana uvara te iruro.

²¹ Ho te Noravano Kotika maa uvara Senakeripirara turo: Senakeripio, Ieruharemiqi variaka ai vehiqama amiteha ai naaraihamu amite variavo.

Are Ieruharemi kera aiqu aututera kante vi variaramanta vika nái anu tukiarima keha, vehi vaiintivanoma vivo ti variavo.

²² Senakeripio, are tauvaqavaura ua vave qora uvave ti hara, tararae vi uvara tiaro? Are tiriarama vi uvara tiaro.

Are nena mahuta ti hara, noraiqaakera uva ti hara, are tararae vi uvara tiaro? Are te Isarerri Varipa takuquvi vauraukarama vi uvara ti variaro.

²³ Ti Nora Kotikara qora uva tiate tira, are vaiinti vonavu nititera, vinavuka noqihaira are ti hara,

Te tenta iqoka *kaari* airitahaa hampata iqoka raquqi viha Lebanoni ainqina, vo ainqina vo ainqina noraqaa vaarintauro, tiaro.

Te Lebanoni nanta noraqiqi origete vi vatanaaka *sidaa* vukaivata, toqukera koqeravata, tuqu taaquma keha vika nanta nora avutaqiqi vunarave.

²⁴ Te vo vata vo vataini niha tenta namariara quvitaunaraqihai namari kaqake ne vunarave.

Te Isipini vo namari vo namariqaa aiqu ntava tauraro ekaa vi namariva aaharaiqama virave, tiaro.

²⁵ Are vi uvara vi uvara ti harama nena mahuta ti variaro.

Ho Senakeripio, kiae irianarave? Nai haaru te vi haikara vi haikara maa entara mintimakero qovaraiqiarire ti, ai kaama taunarave. Te tenta aatoqi iritaunantemake, te ai kempukaiqama kaurara are kempuka vatuka, vo vatuka vo vatuka ravantiaqa raavantiaqama kaararo orivano kirikairiro vaivo.

²⁶ Vi vatukaraqiqi varia vatanaaka voqamake qete variavaro vika avu aatovanovata hampiqimqam variavaro vika kempukavata kia vaivo. Naaho qaraaka ututairave, naavu qiaqaa qampiqatai ukaurave, nora kuarivano tatoqa kaivaro kia qampiqaintemake, vi vatanaaka variavo.

²⁷ Ho are oquivi varianarave, himpi varianarave, aaraini vi anianarave, te ekaa vira vira kankomake iri tavaunarave. Ai voqama kero tiriara arara itairavata te iri tavaunarave.

²⁸ Ai voqama kero tiriara arara itairave, nena mahuta tianarave, te virara iri, vira kaara te qiqora ai ainqiana rugiakae, ohi noqi vate varia ainira varake ai noqi vate, ai rara vuruvi kaarirara are vohaa vi aararaqaa aniranterea vinarave, tivo.

Kotiva Senakeripirara mintima tivo, tiro.

²⁹ Aisaavaa vi uvara minti tivakero viva Hesekiaarara tiharo,

Maa ihiravata, hora ihivata, ne kia ho kara utiraiti, ne qaakau karavano qampiqairaqaima neverave. Vi ihitanta taiqairaro vo ihi anintairamanta, ne vi ihirraqi *uitive uainive* utukeha neverave. Te tunantema kero, vi haikava qovaraiqirara are tavera, te Senakeripirara tiva tauna uvararavata quqaa uvave tinarave.

³⁰ Ho naantiara Iutaa vokiaka navutaaka kia qoraiqama nimitamanta qaqi variaka, kara naahoqiqi ututaavaro qampiqero airi tava iraintemake, vika koqemake vaiha airitahaa vaivarave.

³¹ Ieruharemiqihai, Saioni Aiqinaihaiye vaiinti nahenti taaraqavano ruqemake vuaka vika qaiqaa anivarave. Noravano Kotiva ekaa kempuka vataava vi haikava qovaraiqiainarara noraiqaakero iriqiro viharora tiro, viva vi haikara qovaraiqama kaanarove. ³² Noravano Kotiva Asiria avuhainaarara mintima tiro:

Viva nai iqoka vaiinti hampata kiama ho Ieruharemiquriqetero veva voqavata viraqiqi aruanarove. Viva kiama kainke hiri varero vatuka aumanto anianarove. Vika kiama vaantaavura tataqaqaa vata ntavate viraqaa vaarinente vaiha raqivarave.

³³ Viva kiama Ieruharemiquriqetero veva nai ani aararaqaa anirantero vuanarove. Te Noravano Kotika vi uvara turo. ³⁴ Te tenta nora autuaravata, tenta kaiqa vaiinti Devitiraravata irihama mintirerave tivo, tura.

³⁵ Ho vi entara entaqi Noravano Kotiva atito *enseliva* Asiria naavu maaqqa kaqatoraqi otuntero 185,000 vaiinti aru kora. Vira qararaa toqaqiqi Asiria iqoka vaiinti qaqi vauka himpi tavomanta vaiinti vaata airitahaa vona vona vaura.

³⁶ Mintuvaro Senakeripiva nai iqoka vaiinti qaqi vauka hampata nai anu aararaqaa anirantero Asiriaini viro Ninive vatukaini oru vaura.

³⁷ Viva mini vaiharo vo enta nai una variqa Nisirokira naavuqiqi origetero vira quahama amite vaumanta vira maaqutanta Adramelekika Sareseaka iqoka paipeqohai vira aruke, vitanta ruqemake Araraata vataini oru vaura.

Senakeripira arukovaro vira maaqu vo Esahadoniva nai qora vatuka varero Asiria avuhainaa vaiintiqama viro vaura.

20*King Hesekiaava rovara varora*

¹ Vi entara King Hesekiaava rovara varero aumakaa qutuarirava vauvaro paropeti vaiinti Emosira maaqu Aisaiaava oru vira tavero virara tiharo, Noravano Kotiva ariara mintima tivo:

Ai rovaravano kia taiqairara are qutu vinarara tira, are vaiinti nahenti ai naavuqi variaka tiramanta vika ekaa are iana haikara tumaara maaramake vataate, tivo, tiro.

² Aisaiaava minti tuvaro Hesekiaava vi uvara iriro tuqantaaviro nai viri porovaini vatero Nora Kotira aarero tiharo, ³ Mpo, Noravauvu, te kia ai qaqira karaiti, ai aaraaga kogemake niha, ariaraqai iriha, ai avuqaa koqe kaiqaqai varaqi vunarave, tivakero noraiqaakero iqi ratora.

⁴ Iqi rate vauvaro Aisaiaava avuhainaara naavuqihairo vevantero naanteqaraini ni vauvaro Noravano Kotiva vira tiva amiro tiharo, ⁵ Are aniranteror u maavara ti vaiinti nahentiqaa raqiki vaira tiva amiane:

Te Noravano Kotika ai kaivaqara Devitira Variqavano ariara mintima turo: Are ti aaraana uvara iri, ai auquru ntairavata tavauro. Te virara irihama ai rovara taiqa amitarerave. Hura vira qararaa are ti Nora Kotika Naavuqi oru vainerareve.

⁶ Te ai qaqi kaarirara are kia vaaka qutu viraitira, 15 ihi voqavata variqira vinarave. Te Asiria avuhainaara kauquqihai aivata Ieruharemi vatukavata ruaruama nimitarerave.

Te tenta nora autuaravata, tenta kaiqa vaiinti Devitiraravata iriha, maa vatukara antua taari navutaaka kia ho varevarave tivo, tiro.

⁷ Aisaiaava vuru vi uvara avuhainaara tiva amiro, „vira kaiqa vaiintiara tiharo, Orufiki tava vare, Hesekiaara meqaqaa/veqaqaa aqu amitaivarovata vuanarave, tiro.

⁸ Minti tuvaro Hesekiaava Aisaiaara irero tiharo, Te nana haika tavehae tiha, Ququaama Noravano Kotiva ti koqema timitaivo tivake, hura vira qararaa Nora Kotira Naavuqi vuanarave? tiro.

⁹ Tuvaro Aisaiaava nai tiva amiro tiharo, Ho maa haikara are tavera quqaama Noravano ti koqema timitaivo tinarave. Are tenavu kuari avuara iriha kairiqa kaara ntuinara tavaane. Ho erairaro vira maraquravano vukaiqiharo vutunie vuanarove, mainie anianarove? tiro.

¹⁰ Aisaiaava minti tuvaro Hesekiaava tiharo, Erairaro vira maraquravano maini aniaravama vaivo. Ho qaqi kairaro vira maraquravano kia maini aniraitiro, tuqantaaviro vutuni vuarire. „Kairiqa maraquravano mintirera, te tiha, Ququaama Kotiva ti rovara taiqa kaivo tiare, „tiro.

¹¹ Minti tuvaro paropeti vaiinti Aisaiaava Nora Kotira aarovaro Noravano qaqi kovaro erovaro maraquravano kia aniraitiro, tuqantaaviro vutuniqai vukaiqaakero vaura. (Haaru King Ahaasiva vi kirokira kuari avuara iriharo autu tora.)

Babironihainaaka Ieruharemini vura

¹² Vi entara Babironi King Baladaatira maaqu Merodaki-Baladaaniva Hesekiaava nora rovara varo uvara iriro, viva virara mpo ike tivakero qara vo ntuva kero koqe haika vovata qerama kero voku vaiintika nimumanta vika Hesekiaara amireka viva unaini vare vura.

¹³ Vare oruntovaro Hesekiaava vika quahama nimitero, ntita varero ekaa haika vatora vika numiqora. Viva nai kori orive silvaa orive, karaqaa aatake nerave, vahavera koqe mutna iainarave, avihehavaave, numiqora. Viva kia vo haikavata kukeqa taraitiro, viva ekaa nai avuhainaara naavuqive, vo naavuqive nai raqiki vau vataraqaa vau haikarave, ekaa vi haikara vi haikara vika numiqomanta tavora.

¹⁴ Ho vika tave anirante vuvaro paropeti vaiinti Aisaiaava King Hesekiaava unaini anintero vira irero tiharo, Vi vaiintika tihainaakave? Vika nana uvae ai tiva amiavo? tuvaro Hesekiaava vira tiva amiro tiharo, Vika Babironi niaraihai aniaakave, tuvaro ¹⁵ Aisaiaava virara tiharo, Vika nana nana haikae avuhainaara naavuqi tavaavo? tuvaro Hesekiaava tiharo, Te tenta una haikara ekaama numiqake, kiama voqavata kukeqa tauro, tiro.

¹⁶ Tuvaro Aisaiaava Hesekiaarara tiharo, Oho, te Noravano Kotiva ti uvara ai tiva amiarirara iriane. Viva mintima tivo:

¹⁷ Vo enta anintairamanta Babironi vika ani ekaa haika avuhainaara naavuqi vainara vare, ai kaivaqaukavara ruvaqumake vataa haikaravata vare, kia vo haikavata qaqi karaiti, vika ekaa haika vare Babironini vuru kevarave, tivo.

¹⁸ Vi entara vika are kuvuarama terauka qorainti vaiinti vokika ravaaqavuke vare Babironini vuru ke, vika tava toqa kaimanta vika nai avuhainaara naavuqi vira paanaa kaiqa varevarave, tivo.

Noravano Kotiva mintima tivo tiro.

¹⁹ Aisaiavaa minti tuvaro Hesekiaava nai aatoqi mintimama iriro, Te qaqi variqi vuaina entara vi haikava kia ho qovaraiqiraro iqokavanovata kia vairaqe te koqemake variqi virarave, tivakero viva tiharo, Are Nora Kotira uva ti tiva timiarava koqe uvama vaivo, tura.

Hesekiaava qutu vura

²⁰ King Hesekiaava ekaa vo kaiqa vo kaiqa varo uvarave, viva kempukaiqama kero iqoka raqu uvarave, viva varuva namarivano variarire tiro vata quvikero, namarivano viraqihairo Ieruharemimi otu vuarire tiro, viva ora maavira vataqí quvito uvarave, ekaa vi uvara vuku vo, *Iutaa Avuhainaaka Uva Okarave* tu vukuraqi qara ntuvatora.

²¹ King Hesekiaava qutu vuvaro vira maaqu Manaseva vira vatuka varero avuhaina vaiinti vaura.

21

Manaseva Iutaa avuhainaava vaura

¹ Manaseva 12 ihi varako entara, viva avuhaina vaiintiqama viro Ieruharemipi vaharo 55 ihiara Iutaqaqa raqiki vaura. Vira nova Hepsibaava vaura.

² Manaseva Nora Kotira avuqaa qora okara autuqiro vi vaharo haaru vauka qora okara auturavata avataqiro vi vaura. Noravano Kotiva vi vatanaaka vara qaqini kero vika vata tinavu Isareri kaivaqaukavara nimura.

³ Vira qova Hesekiaava *ofaa* tainta vo aiqina vo aiqinaqaa aututora ravantiaqa kora, Manaseva qaiqaa autukero, una variqa Baalirara iriharo *ofaa* tainta, vo tainta vo taintavata autukero, haaru Isareri King Ahaapiva autuntema kero, viva una variqa nahenti Aseraara *maraqura/varaha* katatu nkauru kero aratero, viva naaruvaini opu makaura variqa haikave tivakeharo kankakaavaro vi haikara quahama nimite vaura.

⁴ Haaru Noravano Kotiva tiharo, Vaiinti nahenti Ieruharemipi vaiha ti hutu tuahera kaate, tu Naavuva vauvaro, Manaseva una variqanavuara iriharo Nora Kotira Naavuqi *ofaa* tainta vonavu autu kero vatora.

⁵ Nora Kotira Naavu naanteqaraini vatuka taaraqanta vauvaro Manaseva vaiinti nahenti opu makau quahama nimitaate tiro, viva *ofaa* tainta vonavu mini autu kero vatora.

⁶ Manaseva una variqa *ofaa* iha quara nimitevra nai maaqu arukero iha quaratero, vaana kaiqave hepi kaiqave varaqiro vura. Viva *vure/quaha* vaiintive, vara nte vaukave, naaramakero vikara ti koqe avu aato timiate ti vaura. Manaseva mintima kero qora okara noraiqaakero Nora Kotira avuqaa auti vaura kaara Kotira voqama kero arara itovaro vaura.

⁷ Manaseva una variqa nahenti Aseraara *maraqura/varaha* nkauruto katarira varero vuru Nora Kotira Naavuqi vatora.

Haaru Noravano Kotiva Devitiravata vira maaqu Soromonuravata tiva nimiro tiharo,

Vaiinti nahenti maa Naavuraqi ekaa enta ti hutu tuahera kaate ti, te ekaa Isareri ankuvano varia vataraqihai Ieruharemipi kaama taunarave.

⁸ Ne ti vaiinti nahenti ti uva koqemake iriqi viha, ti kaiqa vaiinti Mosiva ekaa ni tiva nimi uvara iriqi vivera, te ni kaivaqaukavara nimuna vataraqahai kiama ni nititama kararave, tiro.

⁹ Nora Kotira uvavano mintima vaumanta vika kia vira uva irura. Manaseva vika kuntama virivi komanta vika voqamake qora okara auti vaura. Vika qora okara autuva haaru vo vatanaaka vi vataraqaa vauka qora okara auturavata aataro kora. Noravano Kotiva haaru vi entara vauka vehi autu komanta Isareri vika vata varora.

¹⁰ Noravano Kotiva nai kaiqa vainti paropetinavu noqihairo maantima tiro:

¹¹ Haaru Amo vatanaaka avuni vi vataraqaa vaiha vika qora okara auti vaurave. Ho maa entara Iutaa King Manaseva vika auturavata aatarakero nai voqavata qora okara auti vaharo una variqa maraqura/varaha autu kero vatero, Iutaa vata kuntama vuruvi kaimanta vikavata qora okara auti variarave.

¹² Mintiara kaarama te Noravano Kotika ni Isareri Variqavano mintima tiro: Te vo enta Ieruharemipi vaikavata Iutaini vaikavata anomake qoraiqama nimitaari vo vatanaaka vi uvara iri, virara mpo ike tivarave.

¹³ Te Sameria vatukaqi variakavata, Isareri King Ahaapiravata vira ankuvata ntaihe kaunantemake, Ieruharemipi variakavata ntaiharerave. Vaiintivano namari ataara

nunka kero tanu tuqantaakero vataintemake, te Ieruharemi vatukaqi variaka nunka kaari kia vaivarave.

¹⁴⁻¹⁵ Haaru vika kaivaqaukavara Isipi ke anu entaraqaahai vika qora okaraqai ti tivuqaa autuqi anixa, ti arara itai haikara timiqi ani, vate maa entaravata vi okarara qaqaqai autuqi vi variara kaara te ti vaiinti nahenti qaqaqai variaka navutaaka kauquqi kaari, navutaaka vika qoraiqama nimiteha vika ia haikara raqiake varevarave, tiro. Noravano Kotiva nai kaiqa vaiinti paropeti noqihairo minti tura.

¹⁶ Manaseva Iutaa kuntama virivi komanta vikavata Nora Kotira avuqaa qora okara autihama una variqa *maraqura/varaha* quahama nimitora. Kia vo uvavanovata vikaaqaa vau vaiinti nahentika Manaseva qumina arikovaro vika naarevano Ieruharemi vatuka mpiqa vurave.

¹⁷ King Manaseva ekaa vo kaiqa vo kaiqa varo uvarave, viva qora kaiqa varo uvarave, ekkaa vi uvara vulku vo, *Iutaa Avuhainaaka Uva Okarave* tu vulkuraqi qara ntuvatora.

¹⁸ Manaseva qutu vumanta vira vaata vare vuru avuhainaara naavu kaqava, *Usaara Kaqavave* turaqi quntama tovaro vira maaqu Emoniva nai qora vatuka varero avuhainaaa vaiintiqaama vura.

Emoniva Iutaa avuhainaava vaura

¹⁹ Emoniva 22 ihi varakova avuhainaaa vaiintiqaama viro Ieruharemiqi vahiaro taara ihiara Iutaqaqa raqiki vaura. Vira nova Mesulemetiva Harusira raavuravano Jotaba vatukaihainaava vaura.

²⁰ Emoniva nai qova Manaseva autuntema kero, Nora Kotira avuqaa qora okara autura.

²¹ Nai qova qora aaraqaa nuntema kero, vivavata qora aaraqaa ni vaura. Nai qova una variqa *maraqura/varaha* quahama nimitonema kero, vivavata vi haikara vi haikara nivuqaa kankakaaviro vahiaro quahama nimite vaura.

²² Viva nai kaivaqaukavara Variqa Nora Kotira tauvaqa utu amitero, kia Nora Kotira aaraqaa ni vaura.

²³ Ho vo enta Emonira qiata vaiintinavu ruvaaqumavi vira aruke uvara tiva taataute, avuhainaara naavuqi vira arukora.

²⁴ Vira arukomanta Iutaini vauka Emonira arukoka náivata aruke, viraqaahai vika Emonira maaqu Josaiara kaama tovaro viva nai qora vatuka varero avuhainaaa vaiintiqaama vura.

²⁵ King Emoniva ekaa vo kaiqa vo kaiqa varo uvara vulku vo, *Iutaa Avuhainaaka Uva Okarave* tu vulkuraqi qara ntuvatora.

²⁶ Emoniva qutu vumanta vira vaata vare Usaara Kaqavave turaqi vuru quntama tovaro vira maaqu Josaiava nai qora vatuka varero avuhainaaa vaiintiqaama vura.

22

Josaiava Iutaa avuhainaava vaura

¹ Josaiava 8 ihi varakova avuhainaaa vaiintiqaama viro Ieruharemiqi vahiaro 31 ihiara Iutaqaqa raqiki vaura. Vira nova Jedidaava Bosikata vatukaihainaara Adaaara raavuravano vaura.

² Josaiava Nora Kotira avuqaa koqe okara autura. Haaru vira kaivaqava Devitiva koqe aaraqaa nuntemakero, viva kia qora aara, vo aara vo aaraqaa niraitiro, avuqavu qama kero Kotira aaraqaaqai ni vaura.

Kotira vuku ranta varoraa

³ Ho viva 18 ihiara Iutaqaqa raqiki vau entara Josaiava nai qara ntua amite vau vaiintiria Safaanira atitovaro vira uva varero Nora Kotira Naavuqi vura. Safaanira qova Asaliava vauvaro Mesulaamiva Asaliara qova vaura.

Josaiava Safaanirara tiharo, ⁴ Are oru Kotira kaiqa vara amite variaka qiata vaiinti Hilikiarara tiraro viva vaiinti nahenti Nora Kotira Naavu qentiqaqaa raqikiaka nimia monura kaara ntuarire.

⁵ Viva monu vira kaara ntua kero vi monura varakero Nora Kotira Naavu kaiqaqaa raqikiaka nimiramanta vika vi monuraqohai naavu kaiqa vare variaka koqaa iate. ⁶ Vika naavu kaqe okarara tave variakavata, tainta auti variakavata, origohai naavu kaqe okarara tave variakavata koqaa iate. Vi monura hiniqohai katarive orive koqaamake vi haikaraqohai Nora Kotira Naavu qaiqaa avuqavu iate ti, vataarave.

⁷ Te irunarave. Kaiqaqaa raqiki varia vaiintika vika kia vi monura hampiara voqaa aqu karaiti, vika avuqavuqamake vi monura aqukevarave. Mintiarara tiro, vovano vika ireharo, Nenavu vi monuraqohai nana nana haika varehae aqukaavo tiarirava kia varianarove, tiro.

⁸ Ho Josaiava tuntema kero Safaaniva oru Hilikiara tiva amuvaro viva Safaanira tiva amiro tiharo, Te vuku vo Nora Kotira Naavuqihai ranta kauro. Vi vukuraqiqi Kotiva uva tivatora Mosiva qara ntuvatova vaivo, tivakero Hilikiava vi vukura Safaanira amuvaro Safaaniva vuku vira kaara ntura.

⁹ Viva vuku vira kaara ntura taiqa kero viraqaahairo viva vuku viravata varero King Josaiava vaunaini oruntera vira tiva amiro tiharo, Ai kaiqa vaiintinavu monu Nora Kotira Naavuqi vaira varake naavu kaiqaaqaa raqikiaka nimiaivo, tiro.

¹⁰ Safaaniva minti tivakero viva avuhainaara uva po tiva amiro tiharo, Hilikiava ti maa vukura timivo, tivakero ho viva vuku vira rairakero avuhainaara kaara ntura amitora.

¹¹ Vi vukura kaara ntura amitovaro avuhainaava Kotiva uva tivatora Mosiva qara ntuvatora iruvaro vira muntuka qoraiquvaro viva nai utavaaqa qunahi qaanahima kero, ¹² vaiinti vonavu naarama komanta anura. Kotira kaiqa vara amitora Hilikiarave, Safaanira maaqi Ahikaamirave, Mikaiara maaqi Akaborave, Josaiara qara ntura amite vaura Safaanirave, Josaiara koqe avu aato ami vaura Asaiaarave, Josaiava vi vaiintika naarama kero vika tiva nimiro tiharo, ¹³ Ne tiriaravata, vaiinti nahentiaravata, ekaa Iutaini variakaravata iriha, oru Nora Kotira iraivarava viva vate maa vukura rantakerovo timira viraqi vai uvvara tinavu tiva timiarire. Oho, tinavu kaivaqaukavara maa vukuraqiqi vai uvvara kia iriha ni variara kaara Nora Kotira voqama kero tinavuara arara ite vaivaro vaivo, tiro.

¹⁴ Minti tumanta vika paropeti nahenti vo, Huldaara tavareka vura. Huldaava Ieruharemi hini mantaraini qaraaka vatuka autu tonaini vauvaro vira vaativano Tiki-vara maaqu Salumuva vauvaro Tikivaava Hahaasira maaquvano vauvaro Hahaasiva Kotira kaiqa vara amito vaiintika vika utavaaqaqaa raqikuva vaura.

Ho vika Huldaara tavareka vauvaro ¹⁵ viva vikara tiharo, Tinavu Isareru Variqa Noravano Kotiva mintima tivo:

Ne anirante oru avuhainaara maantima tiva amiate:

¹⁶ Iutaa avuhainaava vukuqihairo uva kaara ntura kaintemake, te Noravano Kotika Ieruharemiata vi vatukarraqi variakavata anomake qoraiqama nimirerave.

¹⁷ Vika ti qoririmake, una variqanavuara ofaa iha quara nimite, vika nai kauquqohai vo variqa vo variqa una variqa, aututaarave. Vira kaara ti vikara voqamakero arara itaimantama vauro. Ti Ieruharemiara arara itaarirava kiama vaahaanarove turo. ¹⁸ Te Noravano Kotika ni Iutaa avuhainaarara mintima turo:

Are vukuqi qara ntuvato uvvara irianarara irihama, te Noravano Kotika Isareru Variqavano ariara maantima turo:

¹⁹ Te Ieruharemiata, viraqi variakavata, qoraiqama kaariraro vi vatava qumina vataiqama viramanta Ieruharemiqi variaka anomake vaaquqama vuate, tunarave. Te mintirera una uvvara are iriha ti Nora Kotika avuqaa nena vara muntuviqama kera, nena utavaaqaqavata qunahi qaanahima kera, ti haarehara iqqi rataanarave. Are mintianarara ti, te are ti haarana uvvara iruro.

²⁰ Te Ieruharemiata, viraqi variakavata, qoraiqama kaainara tavenarave. Are maateraiqhara variqira vira vuru qutu viramanta ai quntama taiqe vira naantiara te Ieruharemi qoraiqama karerave.

Noravano Kotiva avuhainaarara mintima tivo. Paropeti nahenti Huldaava vi uvvara vika tiva nimumanta vika anirante avuhainaara vi uvvara vuru tiva amura.

23

Josaiava Kotira uva vaiinti nahenti kaara ntura nimitora

¹ King Josaiava ekaa qiata vaiinti Iutaini vaukavata, Ieruharemiqi vaukavata naarama kero, ² vika hampata Nora Kotira Naavu vaunaini vumanta Iutaa nora vaiintive, Kotira kaiqa vara amite vaukave, paropeti vaiintive, nora autu vataakave kia nora autu vataakave, ekaa vika avuhainaara hampata mini ruvaaqumavi vauvaro Josaiava Nora Kotira Naavuqihairo rantato vukura rairakero Kotiva tivato uvvara vukuqi qara ntuvatora, ekaa vi uvvara vika kaara ntura nimitora.

³ Viva vukai pohivano Kotira Naavu avuni vaura aumanto himpi vaharo Nora Kotira avuqaa nai kauqu aqiqaa aqukero tiharo, Te Nora Kotira viraqai avataqiqi viha te ekaa viva tivato uvavarave, viva minti mintiate tu uvavarave, viva ekaa uva maara turave, te tenta muntuka maraqaqihai vi uvvara iriqi vireravema turo. Vukuqi qara ntura taantemake, te vira uva iriqi virerave, tiro. Minti tumanta ekaa vaiinti nahentivata nai kauqu aqiqaa aqukeha tiha, Tenavuvata vohaa qaramake Kotiva tiva taatauto uvvara iriqi virerave, tura.

⁴ Vika minti tuvaro King Josaiava Kotira kaiqa vara amito vaiintika qiata vaiinti Hilikiaravata, Hilikiara vira vevaaraini vaiha Kotira kaiqa vara amite vaukavata, Kotira Naavu qentiqaa raqiki vaukavata, naarama kero vika tiva nimiro tiharo, Ne ekaa Nora

Kotira Naavuqi oriqete una variqa Baaliravata, una variqa nahenti Aseraaravata, opu makaura iriha aututaa haikara, ekaa vi haikara vara veva vahaqaqaini kaate, tiro.

Viva tuntema kovaro, viragaahairo Josaiava vi haikara vi haikara varero Ieruharemi aaqaini Kidaroni Uqitaini muntu ekaa vi haikara iha quara kovaro hantaiqama vuvaro hanta vira vaqita varero Beteli vatukaini vuru „aqukora..”

⁵ Haaru Iutaa avuhainaaka una variqanavuura *ofaa* iha quaraate ti, vaiinti vokuka noraiqama komanta vika Iutaini vo vatuka vo vatukaqive, Ieruharemi aumantove, vaiha una variqarave, kuariarave, torarave, opu makaurave, iriha *ofaa* iha quara nimite vaura. Ho Josaiava vika kaiqa taiqakero vika nititama kora.

⁶ Viva una variqa nahenti Aseraara katari viravata Nora Kotira Naavuqhairo vara veva kero varero Ieruharemi aaqaini Kidaroni Uqitaini muntu iha quara kovaro hantaiqama vuvaro hanta vira vauqita kero ruqutu ruqutuma kovaro konkomaiqama vuvaro varero Ieruharemini qaqi vaiinti nahenti quntama toraqaa rauru raaruma kora.

⁷ Nora Kotira Naavuqi vaiha vika nái una variqara iriha nái hana qorainti hampata nu vaiintika naavuvata ravantiaqa kora. (Vika naavuvano vaunaini nahenti vonavu Aseraara kaiqa vara amite vaukara iriha, vika utavaaqa autu nimitora.)

⁸ Kotira kaiqa vara amite vau vaiintika Iutaini vo vatuka vo vatukaqivi vauka Josaiava ekaa vika ntita vuru Ieruharemini kero, vika kia ho qaiqaa mini mini vaiha *ofaa* kaiqa varaate tiro, viva Iutaa vataini vi aniharo vika *ofaa* iha quare vau vatukara qoraiqama keharo, Geba vatuka *notihairo* qoraiqama nimitaqiro viviro, Beseba vatuka *sautini* vuru taiqakora.

Mintiakero viva una variqa quahama amito vatukara vo, Iosuaara Qentive tunaini aumanto vaura, viravata qoraiqama kora. (Iosuaava Ieruharemiq i vauka *kansoru* qjata vaiintivano vauvaro Iosuaara Qentivano vaantaavura nora qenti kaanaaqaini vaura.)

⁹ Avuhainaava Kotira kaiqa vara amito vaiintika vo vatuka vo vatukaihai Ieruharemini ntita viri komanta vauvaro viva vika qioqama tomanta Nora Kotira Naavu vaunaini vau taintaraqaa *ofaa* iha quareva kia vaura. Kia vauvaro viva qaqi komanta vika nái hana kaiqa vaiinti hampata vaiha, mpareti kia noqavura varake ne vaura.

¹⁰ Hinomu Uqitaini *ofaa* tainta vo Tofetini aututova vaumanta viraqaa vaiinti nahenti una variqa Molekira quahama amitareka vika nái maaqive, raavurave, arukeha *ofaa* iha quara amite vaura. Ho King Josaiava kia qaiqaa mintiate tiro, viva Tofeti vatuka anomakero qoraiqama kora.

¹¹ Haaru Iutaa avuhainaaka kuariara variqave tivakeha, vika ohi vonavu varake vikara kuarivano i ohikave tivakeha kuari kaama amite, ohi vika Nora Kotira Naavu qenti aumanto vuru kora. Hoohaa avuta viva Natani-Melekira naavu tataaqaa vaura. Ho Josaiava ohi vika qaqini varakero, vika iqoka *kaarinavu* iha quara kora.

¹² Avuhainaara naavu veraraqaa *rumu* vo Ahaasira *rumuve* tuva vaumanta tanu vira qjataqaa Iutaa avuhainaaka *ofaa* tainta vonavu autuke vatora. Ho Josaiava vi taintanavura ravantiaqa aqukero, viragaahairo viva haaru Manaseva Nora Kotira Naavu vaunaini avuta taaraqantaqi *ofaa* tainta autukero vatoravata qaqini varakero, ekaa vi taintara ravantiaqa aqu aquma kero varero, muntu Kidaroni Uqitaini aqukora.

¹³ Haaru King Soromonuva una variqanavu vaaku haikara iriharo Ieruharemini kuari avu uruntonaini, Orivi Aiqina *sauti* mantaraini *ofaa* tainta vonavu autukero vatora. Saidonihainaaka una variqa nahenti Astaaterave, Moapihainaaka una variqa Kemosirave, Amonihainaaka una variqa Molekirave, Soromonuva vinavukara iriharo *ofaa* tainta vonavu autukero vatora, Josaiava ekaa vi taintaravata qoraiqama kora.

¹⁴ Soromonuva una variqara iriharo kaamato orira, Josaiava vi orira vi orira rakavu raakavuma kero, una variqa nahenti Aseraara *maraqura/varaha* katari, voqi voqi vaura teqa taagama kero, vaiinti nahenti vi vatukara qora vatukave tiate tiro, viva vaiinti vuhanthaari vatukavau aqu aquma kora.

¹⁵ Haaru Nebaatira maaqu Jeroboamuva Betelini *ofaa* tainta autukero vatero qora okara autiharo Isarerivata kuntama virivi komanta vikavata qora okara autura. Ho Josaiava *ofaa* tainta vira rakikiaqa kero, vi orira tairi taarima kero, una variqa nahenti Aseraara katari aratoravata iha quara kora.

¹⁶ Ho Josaiava mini vaiharo tuqantaaviro tavovaro vutuni inaara ainqinaqaa matipa vonavu vauvaro tavero, viva *ofaa* tainta anomakero qoraiqama vuarire tiro, nai kaiqa vaiinti nititonanta vika oru matipaqhahai vaiinti vuhanthaari mpaqi vare vuru *ofaa* taintaqua iha quara kora. Josaiava mintuvaro haaru Noravano Kotiva paropeti noqihairo tu uvava vivauma vaura. (1 King 13:2)

¹⁷ King Josaiava mintima kero, qaiqaa matipa vo tavero vaiinti vihainaaka irero tiharo, Vira tara quntama taa matipavae vaivo? tumanta vika tiha, Iutaihaina paropeti vaiinti matipave. Vi vaiintiva haaru anintero tiharo, Naantiara vo enta maa *ofaa* taintara minti

mintima keharo qoraiqama kaanarove tu uvara, are vate mintiararo viva tu uvava quqaa vivauma vaivo, ti.

¹⁸ Vika minti tuvaro Josaiava tiharo, Ho kia vira vuhaari qaqini vara kaate. Vira qaqi kaivaro nai matipa viraqi variarire, tumanta vika vira vuhaarivata, Sameria paropeti vaiinti vuhaarivata, kia varora.

(1 King 13:31-32)

¹⁹ Haaru Isarerri avuhainaaka una variqara iriha *ofaa* tainta vo aiqina vo aiqinaqaa autuke vatora kaara Nora Kotira voqama kero arara itora. Ho Josaiava Beteli vatukaini *ofaa* tainta qoraiqama kontema kero, viva Sameria vatainivata vi aniharo ekaa *ofaa* tainta rakikiaqa kero qoraiqama kora.

²⁰ Viva una variqanavu kaiqa vara nimitoka ntita varero nái *ofaa* taintaqaa vara vaari vatero arikora. Viva vika arikero vaiinti vuhantaarivata varakero *ofaa* taintaqaa iha quara kora. Viva minti mintima kero, anirantero Ieruharemini vura.

Josaiava vehakuma nimito karara nora

²¹ King Josaiava vaiinti nahenti tiva nimoiro tiharo, Kotiva tiva taatauto uvara vukuqi qara ntuva tontemake, ne Vehakuma Nimito Entarara iriha, vi karara naivaror Nora Kotira ni Variqa autuvano noraiqiarire, tura.

²² Qiata vaiintinavu Isareriqaa raqiki vau entarave, Isarerri avuhainaakavata Iutaa avuhainaakavata raqiki vau entarave, Isarerri vaiha kia vehakuma nimito karara mintimakeha nora.

²³ Mintumantavata, King Josaiava 18 ihiara Iuttaaqaa raqiki vau entara, vika vukuqi vau uvvara iriha, Vehakuma Nimito Entarara iriha, Ieruharemiqi vi karara naitaramake neha, Nora Kotira autu noraiqama kora.

Josaiava qora okara, vo okara vo taiqa kora

²⁴ Kotira kaiqa vara amitova Hilikiava Nora Kotira Naavuqihairo rantato vukuraqihainaa uva avataqiro viharo, Josaiava vara nte vau nahentikave, vaana kaiqa vare vaukave, vika nititama kero, vaiinti nahenti una variqa *maraqura/yaraha* nái naavuqirainti vatorave, ekaa variqave tu haikarave, nana nana vaaqu haika quahama nimite vaura leruharemipivat lutaaqivata vatora, viva ekaa vi haikara vehi autu taiqa kora.

²⁵ Haaru avuhainaaka Josaiara avuni vaukave, vira naantiaraini avuhainaaka qovaraiqukave, kia vikaqihairo vovano Josaiara voqaantema kero Nora Kotira avataqiro vi vaura. Josaiava ekaa Kotiva tiva taatauto uvvara Mosiva qara ntuvatora iriqiro viharo, ekaa nai muntukaqihairove, avu aatoqihairove, ekaa nai kempukaqohairove, vi uvvara iriqiro vi vaura.

²⁶ Viva mintiaqiro vi vauvarovata, King Manaseva qora okara autura kaara, Nora Kotira Iutaara voqama kero arara itovaro vikara arara itova kia vaaharaitiro, qaqi arara ite vaura. ²⁷ Noravano Kotiva tiharo,

Te haaru Isarerri tenta aqantohai qaqini vara kaunantemake, te Iutaavata qaqini vara kaari kia ti aqanton variate.

Te tenta kaama tauna vatukara Ieruharemi qoririmake, te variqi virerave tuna Naavuravata qoririma karerave, tiro. Noravano Kotiva minti tura.

Josaiava qutu vura

²⁸ King Josaiava ekaa vo kaiqa vo kaiqa varo uvvara vuku vo, *Iutaa Avuhainaaka Uva Okarave* tu vukuraqi qara ntuvatora.

²⁹ Josaiava avuhainaava vau entara Isipi King Nekova nai iqoka vaiinti ntita varero Iufaretisi Namari vaunaini oru Asiria avuhainaara hampata iqoka raqireva vuvaro, Josaiavavata nai iqoka vaiinti ntita varero Isipi hampata raqireva Megido vatukaini oruntovaro Nekova iqoka raqiharo Josaiara arukora.

³⁰ Arukomanta vira kaiqa vaiinti vira vaata iqoka *kaariqi* vaari vate, anirante vuru Ieruharemini Iutaa avuhainaaka quntama to matiparaqi quntama tora. Vira quntama tomanta Iutaa vika Josaiara maaku Joahaasira vitake vira qitataqaa vahavera aqu amitovaro viva nai qora vatuka varero avuhainaava vaiintivano vaura.

Joahaasiva Iutaa avuhainaava vaura

³¹ Joahaasiva 23 ihi varakova avuhainaava vaiintiqama viro Ieruharemiqi vaiharo taaramo torara Iuttaaqaa raqiki vaura. Vira nova Hamutaliva Jeremaiara raavuravano Lipina vatukaihainaava vaura.

³² Joahaasiva nai kaivaqaukavarava autuntema kero, Nora Kotira avuqaa qora okara autura.

³³ Johaaasiva kia Ieruharemiqi vahiaro Iutaqaqa raqikiarire tiro, Isipi King Nekova Hamati vataini Ripila vatukaqi Johaaasira rumpa fero, Iutaa vaiinti nahentiara nora *takisi* 3,400 kilo silvaavata, 34 kilo korivata timiate tiro naaruma tora.

³⁴ Mintuvaro Isipi King Nekova Josaiara maaqu vo Elikamira noraiqama kovaro Elikamiva nai qora Josaiara vatuka varero Iutaa avuhainaa vaiintiqama viro vaura. Nekova Elikamira vo autu ntavateharo Jehoiakimirave tivakero viraqahaairo Johaaasira vita varero vuru Isipini kovaro viva mini vahiaro qutu vura.

³⁵ King Nekova nora monu naaruma torara iriharo, Jehoiakimiva ekaa Iutaa vatanaa vaiinti nahentiara *takisi* aquukeha, *silvaave korive* ti timiate tiro. Airi airaira vataaka noraiqaake timiate, kia airi airaira vataaka inaaraiqama timiate, tiro. Ho Jehoiakimiva minti tumanta amuvaro varakero Nekova unaini varakora.

Jehoiakimiva Iutaa avuhainaava vaura

³⁶ Jehoiakimiva 25 ihi varakova avuhainaa vaiintiqama viro Ieruharemiqi vahiaro 11 ihira Iutaqaqa raqiki vaura. Vira nora Sebidaava Rumaihainaava Pedaiaara raavuravano vaura.

³⁷ Jehoiakimiva nai kaivaqaukavara qora okara autuntema kero, Nora Kotira avuqaa qora okara autura.

24

¹ Jehoiakimiva avuhainaa vaiinti vau entara Babironi vika King Nebukanesaava nai iqoka vaiinti ntita varero ani Iutaa hampata iqoka raqiharo iqoka aatara kovaro Jehoiakimiva vira vevaaraini vahiaro „*takisi* vira ami vaura.“ Ho taaramo ihi aitarovaro Jehoiakimiva kia qaiqaqa vira vevaaraini vaireva auti vaura.

² Mintuvaro vi entara Noravano Kotiva nai kaiqa vaiinti paropetinavu noqihairo tu uvava vivau variarire tiro, viva vaiinti yokuka Babironihaiive, Siriaihaiive, Moapihaiive, Amonihaiive, vika Iutaa vata qoraiqama kaate tiro, vara komanta oru Jehoiakimira hampata raqihai Iutaa vata qoraiqama kora.

³ King Manaseva qora okara, vo okara vo okara auti vaura kaara Noravano Kotiva Iutaa vika kia ti aaqanto variate tiro, vi vatanaaka vara komanta vika ani Iutaa vata qoraiqama kora.

⁴ Kia vo uvavanovata vikaqaa vau vaiinti nahentika Manaseva qumina arukovaro vika naarevano Ieruharemi vatuka mpiqa kora kaara, Noravano Kotiva kia vira qora okara qaqlira karaitiro, qaqla iritora.

⁵ King Jehoiakimiva ekaa vo kaiqa vo kaiqa varo uvvara vuku vo, *Iutaa Avuhai naaka Uva Okarave* tu vukuraqi qara ntuvatora. ⁶ Jehoiakimiva qutu vuvaro vira maaqu Jehoiakiniva nai qora vatuka varero avuhainaa vaiintiqama viro vaura.

⁷ Babironi avuhainaaava Isipi avuhainara hampata iqoka raqiharo Isipi avuhainaaava u vataro, vo vata vo vata nai varoraro tiro, Isipi avuhainaaava kia qaiqaavata iqoka raqireva viraaitiro, qaqlira kero Isipini vaura. Babironi avuhainaaava raqiki vau watava vaireva, Iufaretisi Namari vaunaihairo viviro, muntu Isipi vata auvahianta taiqora.

Jehoiakiniva Iutaa avuhainaava vaura

⁸ Jehoiakiniva 18 ihi varakova avuhainaa vaiintiqama viro Ieruharemiqi vahiaro taaramo torara Iutaqaqa raqiki vaura. Vira nova Nehutaava Ieruharemihainaava Elinataanira raavuravano vaura.

⁹ Jehoiakiniva nai qova qora okara autuntema kero, Nora Kotira avuqaa qora okara autura.

¹⁰ Vi entara Babironi King Nebukanesaara qiata vaiintinavu iqoka vaiintivata ntita vare oru Ieruharemi vatuka varareka vira ututumate vaura.

¹¹ Ieruharemi ututumate vauvaro Nebukanesaava naivata Ieruharemini oru vaumanta

¹² King Jehoiakiniva, nai norave, nai kaiqaqaa raqiku vaiintikave, nai qiata vaiintinavuve, avuhainara naavuqaa raqiku vaiintikave, ntita varero iqoka qaqlirakero Nebukanesaava vaunaini vuvaro Nebukanesaava Jehoiakinira rumpa tora. Vi entara Nebukanesaava 8 ihiara Babironiqaa raqiki vau entava vaura.

¹³ Nebukanesaava Nora Kotira Naavuqihairovata avuhainara naavuqihairovata ekaa koqe haika qaqlini varakero, King Soromonuva Nora Kotira Naavuvara iriharo *koriqohairo* autukero vato haikara, ekaa vi haikara varero Babironini vuru vatovaro haaru Noravano Kotiva tu uvava vivau vaura.

¹⁴ Nebukanesaava ekaa Ieruharemihainaava vaiinti nahentivata, ekaa iqoka vaiintivata vika qiata vaiintivata, ekaa vo kaiqa vo kaiqa tave vaukavata, vika ekaa rumpa varero Babironini vuru kora. Viva 10,000 vaiinti nahenti rumpa varero viharo, anomia vehi vaiinti nahentiqai Iutaa vataini qaqla komanta vaura.

¹⁵ Nebukanesaava Jehoiakiniravata, vira noravata, vira naatavaravata, vira kaiqaqaa raqikukavata, Iutaa qita vaiintivata, rumpa varero Babironiqi vuru kora.

¹⁶ Nebukanesaava „Iutaa, iqoka vaiinti 7,000 rumpa varero Babironini vuru kero, viva vo kaiqa vo kaiqa tavo vaiintika 1,000 navu *aini* auti okarara tavokave, „auvihehavaa, auti okarara tavo vaiintikave, viva vika vika rumpa varero Babironini vuru kora. Ekaa vi vaiintika kempuka vaiinti ho iqoka raqi vauka vaura.

¹⁷ Ho Nebukanesaava Jehoiakinira vira qora qata Mataniara kaama tovaro viva Jehoiakinira vatuka varero avuhainaai vaitinti vaura. Nebukanesaava Mataniara vo autu ntava teharo Sedekaiarave tura.

Sedekaiava Iutaa avuhainaava vaura

¹⁸ Sedekaiava 21 ihi varakova Iutaa avuhainaai vaitintiqama viro vahiharo Ieruharemiqi 11 ihiara „Iuttaaqaa, raqiki vaura. Vira nova Hamataliva Lipina vatukaihainaava Jeremaiara raavuravano vaura.

¹⁹ Jehoiakimiva qora okara autuntema kero, Sedekaiavavata Nora Kotira avuqaa qora okara autura.

²⁰ Iutaavata Ieruharemiqi vaukavata qora okara auti vaura kaara, Nora Kotira voqama kero arara itovaro viva ekaara vitini vi vaitinti nahentikara popohovaro vika nai aaqantohairo qaqqini vara kora.

25

Navutaaka Ieruharemi varora

¹ Sedekaiava kia Babironi avuhainaai vaitinti vevaaraini vaireva auti vaura kaara Sedekaiava 9 ihi 10 tora Iuttaaqaa raqiki vau entaraqaa Babironi King Nebukanesaava nai iqoka vaitinti ekaa ntita varero ani raqireva Ieruharemi vatuka ututumatero aaqaini vahiharo nai *seri* naavu maaqaa kaqatero vaura. Vika Ieruharemi vatuka ututumate viraqaa vaarinte raquare tivake vata quvike vuru vaantaavura tataaqa nte vaura.

² Vika vohaa ihi 6 torara Ieruharemi ututumate vauvaro vi entara Sedekaiava 11 ihiara Iuttaaqaa raqiki vau entava vauvaro ³ vi ihira 4 tora 9 entaqaa Ieruharemiqi karavano ekaa taiqa vuvuro vika kara neva kia vaura.

⁴ Vi entara Babironi vika vaantaavura hini mantaraini ravantiaqake vatukaqi oriqetora.

Mintumanta King Sedekaiavavata, Ieruharemiqi vau iqoka vaitintikavata, vika qetake entaqi ekaa ruqemake vura. Babironi vika Ieruharemi vatuka ututumate vaumanta avuhainaara kaqava tataaqa vaantaavura taaraqanta vaunaini qenti voqihai vika ruqiare vevante, Ieruharemi ke Iotani Uqitaini vireka vura.

⁵ Mini vireka vumanta Babironi iqoka vaitinti vika King Sedekaiara avataqi vuvaro viva Ieriko Uqitaini otu vumanta Sedekaiara iqoka vaitinti vika vira qaqrake ruqemake vona vura.

⁶ Vika vumanta Babironi iqoka vaitinti Sedekaiara ravaaqavu vare Nebukanesaava Ripilo vatukaqi vaunaini vuru kovaro Nebukanesaava viraqaa uva vatero *ko* tiva taiqa komanta ⁷ vika Sedekaiara maaqunavu ntita vare Sedekaiara avuqaa aruke, vika Sedekaiara avutantavata vauru kora. Vika vira avutanta vauruke *baraasi seniqohai* vira aiqu kauqu rumpake vare Babironiqi vuru kora.

⁸ King Nebukanesaava 7 enta 5 tora 19 ihiara Babironiqaa raqiki vau entara, vaitinti vo Nebusaradaaniva Ieruharemini anura. Vi vaitintiva Nebukanesaaraqaa maimaraara raqiki vau vaitintika qita vaitintivan vaura.

⁹ Vika Ieruharemini anintero, Nora Kotira Naavuvata avuhainaara naavuvata qumpiarama kero, ekaa Ieruharemiqi nora vaitintinavu naavuvata qumpiarama kero, 10 viraqahaario viva tumanta nai Babironi iqoka vaitinti vika Ieruharemi ori vaantaavura aututora ekaa ravantiaqa raavantiaqama aqukora.

¹¹ Vika mintima kovaro Nebusaradaaniva Ieruharemiqi qaqqi vaukavata, voku vaitinti nahentikavata ntita varero vuru Babironiqi kora. Raqu entara Iutaa iqoka vaitinti iqoka qaqrake Babironi mantaraini vauka, Nebusaradaaniva vikavata ntita varero vuru Babironiqi kora.

¹² Viva ekaa vika Babironini vuru keharovata, Iutaa vokuka anomma vehiqamavi vauka vikaqai *uaini* naahoqaavata ekaa vo naahoqaavata raqikiate tiro, qaqqi mini kora.

¹³ Babironi vika Nora Kotira Naavu avuni *baraasiqohai* aututo *pohitanta* aratora ravantiaqake rakavu raakavumake, Naavu naantegaraini *uiri kaarinavuvata* rakavu raakavumake, nora tave Varuva Namarive tu tavera *baraasiqohai* autu tora, viravata rakavu raakavumake, *baraasi* vira vare Babironini vuru kora.

¹⁴ Kotira Naavuqi vira kaiqa vara amito haikara *baraasiqohai* aututora, kureve, havoreve, ova qimperave, tanuve, ekaa vo haika vo haikave, Babironi vika ekaa vi haikara vi haikara varora.

¹⁵ *Korivata silvaavataqohai* aututo haikara, ihauri vaqita tanurave, vo tanu vo tanuve, ekaa vi haikara Nebusaradaaniva varora.

¹⁶ Haaru Soromonuva Nora Kotira Naavuara iriharo aututo haikara, *baraasiqohai* aututo *pohitavata*, *Varuva Namarive* tu taveravata, *uiri kaarivata*, „vika vi haikara rakavu raakavumake varora.“ *Baraasi* ori vira maaravano vogamakero maara ntomantara ti, vika kia ho vira maara rairake tavora.

¹⁷ Kotira Naavu avuni *baraasiqohai* aututo *pohitanta* vauvaro vi *pohitanta* vukaivano vaireva, 8 *mita* vaura. Pohi vitantaqaa *baraasiqohai* qiatatantavata aututova vauvaro qjata vukaivano vaireva, 1 *mita* 30 sentimita vaura. *Baraasiqohairo* airi *pomigraneti* tava *maraqura/varaha* naiqi naiqi vi *pohira* ututumate *vahehema/vaataiqama* tova vauvaro, hini *pohivata* vohaa qaramake vaura.

¹⁸ Nebusaradaaniva „Ieruharemiqi vahiaro“ Kotira kaiqa vara amite vauka qjata vaiinti Seraaara rumpakero, Seraaara vevaaraini vau vaiintira Sefanaiara rumpakero, Kotira Naavu qentiqaa raqikuka taaramonavu rumpakero,¹⁹ Ieruharemiqi Iutaa iqoka vaiintiqaa raqiku vaiintira vo rumpakero, Iutaa avuhainaara koqe avu aato ami vauka 5navu rumpakero, Iutaa iqoka vaiinti naarama keharo vika nutu qara nti vau vaiintira rumpakero, Ieruharemiqi nora vaiinti 60navuvata rumpakoro.

²⁰ Nebusaradaaniva vi vaiintika vi vaiintika rumpakero ntita varero Babironi avuhainaava vaunaini Ripila vatukaqi²¹ Hamaati vatainai vuru kovaro Babironi avuhainaava tumanta ekaa vika arukora.

Ho Babironi mintimake „Iutaa vokuka aruke,“ vokuka rumpa vare vika nái vataihai vonaini vuru kora.

Iutaqaqa raqikiarire tiro Gedaliaara noraiqama kora

²² Ho Iutaini qaqi vau vaiinti nahentikaqaa raqikiarire tiro, Babironi King Nebukane-saava Gedaliaara kaama tora. Gedaliaava Ahikaamira maaqu Safaanira naintivano vaura.

²³ Gedaliaava Iutaqaqa raqikiarire tiro, Babironi avuhainaava vira noraiqama komanta Iutaa qjata vaiinti vonavuvata nái iqoka vaiintivata vi uvara iri, „nái kukeqavi vaunaihai, oru Misipaini Gedaliaara tavareka vura. Qjata vaiinti vika nutu vaireva, Netaaniara maaqu Isamairiva, Kareara maaqu Johanaaniva, Netofuhainaara Tanihumetira maaqu Seraaiva, Makaa vataihainaava Jesaaniava.

²⁴ Vika Gedaliaava vaunaini oruntovaro viva nai kauqu aqiqaa aqukero tiharo, Ne kia Babironi naatu qetaraiti, ne maa vataraqaa vahia, Babironi avuhainaara vevaaraini vaiviera, ne koqemake vaivarave, tiro.

²⁵ Gedaliaava minti tuvarovata, vi ihera 7 toraqaa Netaaniara maaqu Elisamaara nainti Isamairiva, viva Iutaa avuhainaara ankuqhainavaa vaiinti 10 navu ntita varero ani Misipaini vahiaro Gedaliaara arukora. Vika vira aruke, Iutaa vaiinti Gedaliaara hampata vaukavata, Babironi iqoka vaiinti Misipaa vatukaqi vaukavata, arukora.

²⁶ Mintumanta Iutaa nora vaiinti nahentive, qaqi vaiinti nahentive, Babironi naatu qetake, iqoka vaiintiqaa raqikuka hampata ruqemake Isipini oru vaura.

Jehoiakinira kuvantu kora

²⁷ Ho Iutaa King Jehoiakiniva Babironiqi 37 ihiara karapuhiqama viro vau entara, Esvili-Merodaakiva Babironi avuhainaava vaiintiqama viro, vi ihera 12 tora 27 entaqaa viva Jehoiakinira koqeme amiteharo vira karapuhiqihairo kuvantu kora.

²⁸ Esvili-Merodaakiva Jehoiakinikantiro koqe uva tivakeharo, vira koqe autu amuvoro Babironiqi ekaa avuhainaaka vira hampata rumpatokaqihairo Jehoiakinira autuvano avuni vaura.

²⁹ Jehoiakiniva qaqlini kuvantuviro vau entaraqaahairo viva kia qajaa karapuhi utavaaqa nonkutero, koqemakero vahiaro viva qaqlini vau entara Babironi avuhainaara naavuqi kara ne vaura.

³⁰ Jehoiakiniva koqema kero variarire tiro, Babironi avuhainaava tumanta ekaa Jehoiakiniva qaqlini vau entara vika vira monuve airairave ami vaura.

NEHEMIA (Nehemiah - Nehemia)

Babironihainaaka Iutaa vika rumpa vare Babironini vuru komanta airi ihiara mini vauvaro viraqaahairo Pesia vatanaa vaiinti vo Sairusiva noraiqama viro Pesia vataqaavata, Midia vataqaavata, raqiki vaharo oru Babironi vatanaaka hampata raqiharo vika naatara kora. Viva vika naatara kero, viraqaahairo Iutaa vika quahama nimitero vikara, Ne hini kiaka nenta maaqaini homa vivarave, tiro. King Sairusiva minti turara tiro, haaru Aisaiaava tuntemakero quqaa vi vau vaura. (Ais 44:28; 45:1)

Ieremaiaava vivavata haaru 604 BC vi entara nai navunaakara tiharo, Ne 70 ihiara Babironini variqi vivi, viraqaahai orurante anivarave, tura. (Jer 11:14; 29:10) Ho vi uvavavata quqaa vi vau vaura.

King Sairusiva minti tumanta 538 BC Iutaa nora vaiinti vo Serubabeliva nai kenauka airitahaa ntita varero Iutaini anirantero vura. Serubabelivavata, Kotira kaiqa vara amite vau vaiintiva Jesuaavavata, Iutaa vaiinti vonavuvata, Ieruharemini vaiha qaiqaa Kotira Naavu kaqaqi vivi, 516 BC vi ihiraqaa kaqa vuru taiqa kora. (Esra 1-6)

Serubabeliva vau entara vika qaiqaa Kotira Naavu kaqa taiqa kovaro vo ihinavu aitarovaro viraqaahairo 458 BC Kotira kaiqa vara amite vau vaiintiva Esraava, vivavata vo vaiinti nahenti hampata Ieruharemini anirantero vura.

Mintuvaro Iutaa vaiinti vo Nehemiava Pesia vataini vauva, vivavata vo vaiinti nahenti hampata Pesia mini kero Ieruharemini ani vaharo Ieruharemi vaantaavura ravantiaqa aqukora qaiqaa autu kora. Nehemiava kaiqa varo uvava maa vukuraqima vairo. Vi entara Iutaa vika qaiqaa nariara tiha, Tenavu Isarerive tura.

Nehemiava Ieruharemiara nora aato irura

¹ Maa uvava vaireva, Hakariaara maaqu Nehemiava varo kaiqara uvama vairo. Nehemiava mintima tiro:

King Atasakesisiva 20 ihiara raqiki vau entara Kisilevi* toraqaa te nora vatuksusaaqivi variavaunara.

² Te Nehemiaka vi entaraqaa Susaaqi vauraro ti qatavakaa vo Hanaaniva vaiinti vonavu hampata Iutaa vataihairo anura. Vika anumanta te vika ireha tiha, Tinavu navunaaka haaru rumpa vare Babironini viri kokaqihai vaiinti nahenti vonavu Babironi ke, anirante qaiqaa nai maaqaini vuaka, vika hoe variavo? Ieruhareminvata vo? Vi vatumava hoe vaivo? ti.

³ Minti turamanta vika ti tiva timi tiha, Oho, tinavu navunaa vaiinti nahenti anirante Ieruharemini vuaka, vika kia koqemake variavaro nora maaravano vikaqaa vaimanta variavo. Vo vatanaaka Ieruharemi tataaqa variaka, vika tinavu navunaakara vehi vatanaakave ti variarov. Ieruharemi vaantaavura haaru ravantiaqa kova qaqi mintiro vaimanta kia vira qaiqaa maa entara autuke vaaviarama kaavo. Vaantaavura qentinavu haaru iha tatoqa kora, vinavuravata kiama qaiqaa autu kaavo, ti.

⁴ Minti tumanta te vi uvara iruraro ti muntukavano goraiqimanta te vatakanta oquivi vauha iqj rataunara. Te vo entanavuara iqj rataqj viha, kia karavata naraiti, Kotiva naaruvaini vai Variqara aaramaqi vi vaunara.

⁵ Te Kotira aarehamo mintima ti:
Noravaauvo, are Kotiva naaruvaini variana Variqavave. Are uritarakera variaramanta tenavu ai aatu geteha vauro. Ariara muntuka vaimanta ai uva iriqi vi varia vaiinti nahentika are kia vika qaqlira karaitira, are vika koqema nimite variararo haaru are tiva tana uvara vikaqj vairave.

⁶ Noravaauvo, ti tavehara te ai aaraaina uvara iriane. Te entaqivata aatitairaqaavata ai kaiqa vaiinti nahenti Isareriera irihama ai aaramaqi vi vauro. Mpo, tenavu Isareriera vaiinti nahenti ai uva, vo uva vo uva raqa kaunarave. Te tenta kaivaqaukavara hampata ai uva, vo uva vo uva raqa kaunarave.

⁷ Tenavu ai uva raqakeha ai goraiqama amitaunarave. Are nena kaiqa vaiinti Mosiraqaa uva tiva taataukera amianara, tenavu vi uvara vi uvara raqake kia irunarave.

⁸ Ho haaru are Mosira vo uva tiva amunara, vi uvara vate qaiqaa iriane. Haaru are minti tianarave:

Ne Isareriera vaiinti nahenti ti tauvaqa utu timiteha ti qaqlira kaivera, te nintavata qaqlira keha vo vataini vo vataini ni vara kaari vi raumpirima vivarave.

* 1:1: Kisilevi = November

⁹ Te mintiarivata, ne qora aara qaquirake orurante te iainanaini aninte ti uva koqemake iriqi vivera, te niara maini vaiha ti hutu tuahera kaate tunanaini qaiqa ni ntita viri karerave. Ne vo vataini vo vataini anomake niaraini vaiqevata, te vihai vihai ni ntita vare viri karerave, tianarave.

¹⁰ Mpo, tenavu Isarerai ai vaiinti nahentive, ai kaiqa vaiinti nahenti vaunarave. Are haaru nena kempukaqohairu tinavu Isarerai ruaruama timitaanarave.

¹¹ Ho Noravauvu, vate te aaraaina uvaravata, ekaa tenavu Isarerai ai autu tuaherake vaurauka aaraaina uvaravata iriane. Are ti kahaqirage te avuhainaa vaiinti aaqanto oru variariraro viva ti aaqurihamu timiteharo ti kahaqiarire, tunara. Vi entara te avuhainaara *uainiqaa* raqiki vaiha vira *uaini* kaqa vare vuru ami vaunara.

2

Nehemiava Ieruharemimi vura

¹ Ho tora taaraqanta taaraqanta aitaro varo vo enta King Atasakesisiva kara ne vaumanta te vira *uaini kaapu* vare vuru ami vaunara. Vo enta vo enta te vi kaiqara vareha avuhainaa vaiinti aaqanto koqe viriqai arateha vaiha, vi entaraqai te kia koqe viri arateha vauraro ² avuhainaa vaiinti viva ti irero tiharo, Are kia rovara vararaitira, nana kaarae kia koqe viri aratera variaro? Ai muntukavano qoraiqvare mintira iaro? tiro.

Viva minti tuvaro ti haatu itomanta te voqamake qeteha ³ tiha, Avuhainaa vaiintio, are ekaa enta variqiru vinarave. Quqaama ti muntukavano qoraiqvivo. Ti kaivaqauka quntama to vatukara haaru ravantiaqa aqukova vate qaqi mintiro vaimanta, vaantaavura qentinavu haaru iha tatoqa kora, vinavuravata kia vate qaiqaa autuke vataara, vira kaara ti muntuka qoraiqvivo, ti.

⁴ Te minti turaro avuhainaa vaiinti viva tiriara tiharo, Te nantiakée ai kahaqirarave? tumanta te tenta avu aatoqihai naaruvaini vai Variqara aaramake, ⁵ viraqaaahai avuhainaa vaiintiara tiha, Avuhainaa vaiintio, are tiriara quahehara te ai iraaina uvarara eo tirera, are ti qaqi kairage te lutaat vataini tenta kaivaqauka quntama to vatukara mini oru vaiha tenta navunaaka kahaqihua vi vatukara qaiqaa autuare, ti.

⁶ Te minti turaro avuhainaa vaiinti viva avuhainaa nahenti tataaqia oquvi vauva tiriara eo ho vinarave tivakero tiharo, Are vukaiqaa kerae lutaat vinaarave? Are taireve oruranteria maini aninarave? tumanta te mini oru variainara viravata, vihai orurante aniaianara viravata, vira tiva ami.

⁷ Te minti tivake qaiqaa avuhainaa vaiintiara tiha, Ai antuqavano vairera, are qara vonavu ntuva kera ti timirage te vare Iufaretisi Namari vutu mantaraini aaraini viha *kamaanira* kaiqa vaiinti vonavu numiqari vinavuka tave kia ti ravaaqavu kaiqe te ho Iutaini vuare.

⁸ Are qara vo ti timirage te vare, ai nanta katariqaa raqiki vai vaiintira Asaapira umiqhaariraro viva katari ti timiarire. Te katari vira kutuke viraqohai vaantaavura qenti autuke, Kotira Naavuqaa raqiki varia vaiintika naavu qentivata autuke, viraqaaahai te tenta variaina naavuravata kaaqare, turaro Kotiva ti koqema timitoravora tiro, avuhainaa vaiintivano ekaa ti uvra eo tura.

⁹ Viva ti uvra eo tivakero *ohiqaa* ni vauka iqoka vaiinti hininavu nai nora vaiinti hampata nititomanta vinavuka tiqaa raqikireka ti hampata vura. Ho tenavu Iufaretisi Namari vutu mantaraini orunte, viraqaaahai te avuhainaara qara *kamaanira* kaiqa vaiintinavu nimunara.

¹⁰ Vinavuka qara vira nimuramanta vaiinti votanta Sanbalaatika, Tobiaaka, vitanta te lutaat virera una uvra iri, vitanta arara itomanta tiha, Vovano Isarerai vaiinti nahenti lutaat variaka oru kahaqiantorave, tura. Sanbalaativa Beti-Horonihaianaava vauvaro Tobiaava Amoni provinsiqi *kamaanira* kaiqa vare vauva vaura.

¹¹ Ho te Ieruharemimi orunte, taaramo enta varike ¹² kia vo vaiintivata Kotiva ti avu aatoqi Ieruharemii kahaqaina uvra tiva nimiraiti, qaqi vaunara. Viraqaaahai te entaqi vaiinti vonavu ntita vare, vi haikara vi haikara tuantike tavarera, donkiqaa vaarinte vuramanta vinavuka vatantuna vura.

¹³ Entaqi tenavu vatukaqihai vaantaavura qenti vo, Uqita-Qentive tunaihai aaqaini vevante vunara. Vi qentiva kuari avu ruhunkinaini vaumanta tenavu minahai aaqaini vevante, viraqaaahai tenavu kaanaaqaini vau aarara vaantaavura avuhainta viha, namari kaqora Memaru-Namarive tura aatarake vivi, vaantaavura qenti vo, Raha-Qentive turavata aatarake vunara. Tenavu mintimake viha, haaru vaantaavura ravantiaqa aqukoravata, qentinavu ihaqohai tatoqa koravata tuantike tavamaqiqi vunara.

¹⁴ Mintiaqi viha vaantaavura auvahianta virante airantemaqi vivi, vaantaavura viva kuari urinaini vauraqaa orunte, qenti vo Aruvu-Namari-Qenti vaunainivata Avuhainaara-Namari vaunainivata orunte, tavauraro vaantaavura ori airitahaa aqukova mini kuvakorara tiro, donkivano vuaina aarava kia ho vaumanta te qaqirake ¹⁵ Kidaroni Uqitaini vi vau aararaqaa viha vaantaavura tuantike tavamaqi vunara. Ho vi haikara vi haikara ekaa tuantike tavamake, viraqaahai te anirante qoqaraa aara avata vare vivi, Uqita-Qenti vaunaini orunte vaantaavuraqii oriqetaunara.

¹⁶ Ieruharemiqaa raqiki vau vaiintinavuka te entaqi Ieruharemi vaantaavura tuantike tavaunarara kia irura. Vi entara te tenta kena lutaavaiintinavuve, Kotira Naavuqi kaiqa vara amite vaukave, nora vaiinti vonavuve, vo vaiintinavu ti hampata kaiqa varekave, vi uvvara ekaa vika kia tiva nimiraiti vaunara.

¹⁷ Kia tiva nimiraiti, viraqaahai te ekaa vika ruvaaqumake tiva nimi tiha, Tenavu maarraqi vaunarara ne iriarave.

Vaantaavura qentinavu haaru ihaqohai tatoqakora kia vate qaiqaa autu kaavaru, vaantaavura ravantiaqa aqukova, vivavata qaqima kirikairiro vaivo. Kaiqenavu qaiqaa Ieruharemi vatuka ori vaantaavura autuke, vaantaavura qentinavuvata autu kaari tinavu navutaaka kia qaiqaa kaurira haika tinavu timiate, ti.

¹⁸ Te minti tivake Kotiva ti kahaqiharo koqema timito uvaravata vika tiva nimi, King Atasekesisiva ti tiva timu uvaravata vika tiva nimuramanta viraqaahai vika tiriara tiha, Are koqe uvamaa tiaro. Kaiqenavu vi kaiqara varaa, tivake vika vi kaiqara varareka qera i vaura.

¹⁹ Vika qera i vaumanta Sanbalaativa vo, Tobiaava vo, Gesemuva Arapi vatanaava vo, vinavuka tenavu varare una kaiqarara iri, tinavu naaraihamma timiteha tiha, Ike, ne nana kaiqae varareka auti variavo? Ne vi kaiqara vuru taiqake avuhainaa vaiinti uva raqake kia vira vevaaraini vairekae auti variavo? ti.

²⁰ Minto tumanta te vinavuka nái tiva nimi tiha, Naaruvaini vai Variqava Kotiva tinavu kahaqiraqe tenavu maa kaiqara koqemake vara vuru taiqa karerave. Tenavu vira kaiqa vaiinti vailha maa kaiqara hoqaramate varaqi virerave. Ho Ieruharemi vatukavano kia ninavu vatuka vaimanta ninavu kaiqaquakvara vikavata kia Ieruharemi viraqi vaurara ti, maa kaiqava kia ninavu kaiqavauve vaivo, tiavaunara.

3

Vika Ieruharemi vaantaavura qaiqaa autu kora

¹ Te minti tivake vi kaiqara hoqarama taunara. Maantimake vo vaiinti vo vaiinti haaru Ieruharemi vaantaavura ravantiaqa kora qaiqaa autura:

Kotira kaiqa vara amite vauva qiaata vaiinti Eliaasipiva, vivavata, vira hampata vi kaiqara varoka, vika vaantaavura Sipisipi-Qenti vaunaini vaura vira qaiqaa autura. Vika vira autuke, Sipisipi-Qenti viravata qaiqaa autuke, qenti vira vaantaavuraqaa arute, viraqaahai vika vaantaavura autuqi vivi, *tauaa* * vo, 100-Iqoka-Vaintive tu *tauaara* autuke, Hananerira *tauaavata* autukora.

Vika vi kaiqara vara vuru taiqake viraqaahai vika Kotira aareha tiha, Kotio, tenavu vaantaavurave, qentive, *tauaave*, qaiqaa autuke vataunara ai kaama amitauro, tura.

² Ho Kotira kaiqa vara amite vau vaiintika vi kaiqara vare vaumanta Ierikohainaaka vira vuruvi vau vaantaavurara qaiqaa autu kora.

Vika vi kaiqara vare vauvaro Imurira maaqu Sakuriva nai kaiqa vaiintinavu hampata vira vuruvi vau vaantaavurara qaiqaa autu kora.

³ Vika vi kaiqara vare vauvaro Hasenaava nai anku hampata vira vuruvi vau vaantaavurara qaiqaa autuke, vaantaavura viraqi vau qentira vo, Havuka-Qentive turavata autukora. Vika qenti auvahini variaina katarira arute, viraqaahai qenti taataute, *rokivata*, qenti taurini kuvaita *ainiravata*, autuke vatora.

⁴ Vika vi kaiqara vare vauvaro Merimotiva vo vaiintinavu hampata vira vuruvi vau vaantaavurara qaiqaa autu kora. Merimotira qova Uriaava vauvaro Uriaara qova Hakosiva vaura.

Vika vi kaiqara vare vauvaro Mesulaamiva vo vaiintinavu hampata vira vuruvi vau vaantaavurara qaiqaa autu kora. Mesulaamira qova Berekiaava vauvaro Berekiaara qova Mesesabeliva vaura.

Vika vi kaiqara vare vauvaro Baanara maaqu Sadokiva vo vaiintinavu hampata vira vuruvi vau vaantaavurara qaiqaa autu kora.

* **3:1:** Maimaraara vaiha vutu vuru tavaate tivakeha vaantaavura qiatavu voqaa voqaa vukaiqamake kaqa torara tauua ve tura.

5 Vika vi kaiqara vare vaumanta Tekoa vatukaihainaaka vira vuruvi vau vaantaavurara qaiqaa autu kora. Vika autuke vaumanta vika nora vaiintinavu kia kaiqaqaa raqikuka uva iriraiti, popohomanta kia kaiqavata varora.

6 Tekoa vatukaihainaaka vi kaiqara taiqa komanta Paseaara maaqu Joiadaava vo, Besodeaara maaqu Mesulaamiva vo, vitanta vo vaiintinavu hampata vira vuruvi vau vaantaavurara qaiqaa autuke, vi vaantaavuraraqaiqaa autu kora. Vika qenti auvahini variaina katarira arute, viraqaahai qenti taataute, rokivata, qenti taurini kuvaite *ainiravata*, autuke vatora.

7 Vika vi kaiqara vare vaumanta Gibeonihainaava Melatiaava vo, Meronotihainaava Iatoniva vo, Gibeonihainaava vaiinti vonavu, Misipaahainaava vaiinti vonavu make, vira vuruvi vau vaantaavurara qaiqaa autuqivi, vuru *kamaanira* naavu vaunaini taiqa kora. *Kamaanira* kaiqa vaiinti viva Iufaretisi Namari kuari avu ruhunkinaini vau vataraqaa raqikuva vaura.

8 Vi vaiintinavuka vi kaiqara vare vauvaro Hahaiaara maaqu Usieriva vo vaiintinavu hampata vira vuruvi vau vaantaavurara qaiqaa autu kora. Usieriva *kori* ori varakero viraqohairo vo haika vo haika autu vau vaiintiva vaura.

Usieriva vira vuruvi vau vaantaavurara auti vauvaro Hananiaava, koqe untavi vau haikara auti vau vaiintiva, viva vo vaiintinavu hampata vira vuruvi vau vaantaavurara qaiqaa autuqivi viharo Nora-Vaantaavurave tunaini vuru taiqa kora.

9 Vika vi kaiqara vare vauvaro Hurira maaqu Repaiaava vo vaiinti hampata vira vuruvi vau vaantaavurara qaiqaa autu kora. Repaiaava Ieruharemi hini vatukaaqa raqiki vau vaiintiva vaura.

10 Vika vi kaiqara vare vauvaro Harumaapira maaqu Jedaiaava vo vaiintinavu hampata vira vuruvi vau vaantaavurara qaiqaa autu kora. Vi vaantaavurava Jedaiaara naavu tataaqa vaura.

Vika vi kaiqara vare vauvaro Hasapaneaara maaqu Hatusiva vo vaiintinavu hampata vira vuruvi vau vaantaavurara autu kora.

11 Vika vi kaiqara vare vaumanta Harimura maaqu Malkiavavata, Pahati-Moapira maaqu Hasupuvavata, vitanta vo vaiintinavu hampata vira vuruvi vau vaantaavurara qaiqaa autuke, *tauaa* vo, vira autu *Sitopu Tauaave* tura, viravata qaiqaa autu kora.

12 Vika vi kaiqara vare vauvaro Halohesira maaqu Salumiva vira vuruvi vau vaantaavurara qaiqaa autu kora. Salumira raavuranavu nai qora kahaquvaro viva vi kaiqara varora. Salumiva Ieruharemi hini vatukaaqa raqiki vau vaiintiva vaura.

13 Vika vi kaiqara vare vaumanta Hanunivavata, Sanoaa vatukaihainaakavata, vika qenti vo, vira autu Uqita-Qentive tura, qaiqaa autuke, qenti auvahini vau katarira arute viraqaahai qenti taataute, rokivata, qenti taurini kuvaite *ainiravata* autuke vate, viraqaahai vira vuruvi vau vaantaavurara qaiqaa autuqivi vivi vukaiqaake 440 *mita* autuqivi vi vuru Raha-Qenti tataaqa taiqa kora.

14 Vika vi kaiqara vare vauvaro Rekaapira maaqu Malakiaava vo vaiintinavu hampata Raha-Qenti vira qaiqaa autukero, qenti auvahini vau katarira arutero, viraqaahai qenti taataukero, rokivata, qenti taurini kuvaite *ainiravata*, autukero vatora. Malakiaava Beti-Hakeremi vatukaaqa raqiki vau vaiintiva vaura.

15 Vika vi kaiqara vare vauvaro Kolu-Hosera maaqu Saluniva, viva Misipaa vatukaaqa raqiki vauva, viva vo vaiintinavu hampata Aruvu-Namari-Qenti qaiqaa autu kora. Vika katarri varake viraqohai qenti vira vuruvi vaunaini tintate, viraqaahai vika qenti vira qaiqaa autuke qenti auvahini vau katarira arute, viraqaahai qenti taataute, rokivata, qenti taurini kuvaite *ainiravata*, autuke vatora.

Vika vi kaiqara taiqake vira vuruvi, Sela Varuva tataaqa vau vaantaavurara, qaiqaa autu kora. Vi vaantaavurava avuhainaa vaiinti kaqava ututora tataaqa vaura. Vika vi vaantaavurara autuqivi vivi, vuru Devitira vatukaini vi vau iriva vaunaini vuru taiqa kora.

16 Vika vi kaiqara vare vauvaro Asabukura maaqu Nehemiava, viva Beti-Su vatuka hiniquaa raqiki vau vaiintiva, viva vo vaiintinavu hampata vira vuruvi vau vaantaavurara qaiqaa autuqiro viro, Devitira quntama tora tataaqa, iqoka vaintinavu naavu vaura, varuva namari vo vaunaini vuru taiqa kora.

Rivaira anku vi kaiqara varoka nutu

17 Vika vi kaiqara vare vaumanta Rivaira ankuqihai vaiinti vonavu vaantaavurara qaiqaa autu kora. Vika nutu vaireva:

Banira maaqu Rehumiva Rivaira anku vokuka hampata vira vuruvi vau vaantaavurara qaiqaa autu kora.

Hasabiaava qiaata vaiintivano Keira vatuka hiniqaa raqikiharo, nai vatukara iriharo Rivaira anku vokuka hampata vira vuruvi vau vaantaavurara qaiqaa autu kora.

¹⁸ Henadaatira maaqu Babaiva, viva Keira vatuka hiniqaa raqiki vauva, viva Rivaira anku vokuka hampata vaantaavura vira vuruvi vaura qaiqaa autu kora.

¹⁹ Jesuaara maaqu Eseva Misipaa vatukaaqaa raqiki vauva, viva Rivaira anku vokuka hampata vaantaavura vira vuruvi vaura qaiqaa autu kora. Vaantaavura viva vo naavu tataaqa vaavuro vi naavuva iqoka vaiinti vika nai auvihetavaa vato naavuva vaura. Vika vaantaavura vira qaiqaa autuqivi, vaantaavura kaantaraqaa vuru taiqa kora.

²⁰ Sabaira maaqu Barukiva Rivaira anku vokuka hampata vira vuruvi vau vaantaavurara autuqiro viviro, vuru Eliaasipira naavu qenti vaunaini taiqa kora. Eliaasipira Kotira kaiqa vara amite vau vaiintinavuka vika qiaata vaiintivano vaura.

²¹ Uriaara maaqu, Hakosira nainti Meremotiva, viva Rivaira anku vokuka hampata vira vuruvi vau vaantaavurara qaiqaa autuqiro viviro, vuru Eliaasipira naavu hini viti vaunaini taiqa kora.

Kotira kaiqa vara amite vauka vikavata kahaqura

²² Ho Kotira kaiqa vara amite vau vaiintika vokukavata vi kaiqara vare vaura.

Kotira kaiqa vara amite vau vaiintika Ieruharemi aaqaini vauka vika vaantaavura vira vuruvi vaura qaiqaa autu kora.

²³ Benaminika, Hasupuka, vitanta vo vaiintinavu hampata vira vuruvi naitanta naavu tataaqa vau vaantaavurara, qaiqaa autu kora.

Masearaa maaqu Ananiaara nainti Asariaava, viva vo vaiintinavu hampata nai naavu tataaqa vau vaantaavurara qaiqaa autu kora.

²⁴ Henadaatira maaqu Binuiva vo vaiintinavu hampata vira vuruvi vau vaantaavurara qaiqaa autuqiro viviro, kaantaaraqaa vuru taiqa kora.

²⁵ Usaira maaqu Palaiva vo vaiintinavu hampata vira vuruvi vau vaantaavurara qaiqaa autuqiro viviro *tauua* vo, avuhainaara naavuqaahairo oru vu *tauuara*, vira qaiqaa autu kora. Vi *tauuava* maimaraara raqiki vau vaiintika vika naavu tataaqa vaura.

Parosira maaqu Pedaaiaava vo vaiintinavu hampata vira vuruvi vau vaantaavurara qaiqaa autuqiro viviro,²⁶ vuru kuari avu uruntonaini Namari-Qentive tunaini taiqa kora. Ieruharemi vatuka inaara autu vo Ofelive tunaini Kotira Naavuqi kaiqa varo vaiintinavuka vika naavu, vo naavu vo naavu mini vaura.

Kaiqa varoka vokuka nutu

²⁷ Vika vi kaiqara vare vaumanta Tekoa vatukaihainaaka, vika tota hoqaramake vaantaavura voqiqi autu koka, vika avuhainaara naavuqaahairo oru vu *tauuara* vira vuruvi vau vaantaavurara qaiqaa autuqivi, Ofeli vaantaavurave tunaini vuru taiqa kora.

²⁸ Kotira kaiqa vara amite vau vaiintika vokuka vira vuruvi vau vaantaavurara qaiqaa autuqivi, vuru taiqakora. Ohi-Qenti vaura viraqaaahai ekaa vika nai naavu nai naavu tataaqa vau vaantaavurara qaiqaa autuqivi, vuru taiqa kora.

²⁹ Imera maaqu Sadokiva vo vaiintinavu hampata vira vuruvi nai naavu tataaqa vau vaantaavurara qaiqaa autu kora.

Sekaniaara maaqu Semaiaava vo vaiintinavu hampata vira vuruvi vau vaantaavurara qaiqaa autu kora. Semaiaava Kuari-Avu-Urinaihainaa-Qentigaa raqikiharo vaura.

³⁰ Selemiaara maaqu Hanaaniaka, Salapira maaqu *nampa* 6 Hanunika, vitanta tota vaantaavura vona autu kotanta, vitanta vo vaiintinavu hampata vira vuruvi vau vaantaavurara qaiqaa autu kora.

Berekiaara maaqu Mesulaamiva vo vaiinti hampata vira vuruvi nai naavu tataaqa vau vaantaavurara qaiqaa autu kora.

³¹ Malakiaava *kori* ori varakeharo vo haika vo haika autuke vauva, viva vo vaiintinavu hampata vira vuruvi vau vaantaavurara qaiqaa autuqiro viviro, naavu vo vauraaqaa vuru taiqa kora. Naavu viraqti Kotira Naavuqi kaiqa vare vau vaiintikavata, koqaa kaiqa vare vau vaiintikavata, vi ani vau naavuva vaura. Vi naavuva Maimaraara-Qenti tataaqa vaavuro vaantaavura kaantaraaini *rumu* vovano vira tataaqa vaura.

³² Vaiinti vonavu, *kori* oriqohai vo haika vo haika autuke vau vaiintikavata, koqaa kaiqa vare vau vaiintikavata, vika vaantaavura kaantaraqihai qaiqaa autuqivi, ekaanaini vau vaantaavurara Sipisipi-Qenti vaura hoqarama tonaini vuru taiqa kora.

4

Navutaaka vikara naaraihama nimitora

¹ Iutaa vatanaaka Ieruharemi vaantaa vura qaiqaa auti vauvaro Sanbalaativa vi uvara iruvaro vira arara itovaro viva tinavu Iutaara naaraihama timitaare tiro, ² oru nai kenauka nivuqaave, Sameria iqoka vaiintinavu nivuqaave, vaiharo tiharo, Ike, Iutaa vika vehi vaiinti nahenti variaka nana kaiqa vararekae auti variavo? Vika mintie tiavo: Tenavu homa Ieruharemi vaantaavura qaiqaa autu kararave. Tenavu Kotira *ofaa* iha quara amitaariraro viva tinavu kahaqiraqe tenavu vohaa enta kaiqa vareha vaantaavura vira qaiqaa autu taiqa kararave, tivakehе variavo? Haaru vaantaavura ravantiaq keha iha quara kovaro vankoraiqaaivi orivaqai maa entara vairave. Vika vi oriraqohai vaantaavura vira qaiqaa autu karerave tivakehе vi kaiqara vare variavo? tiro.

³ Sanbalaativa minti tuvaro vira tataqaqo himpi vauva Amonihainaava Tobiaavavata tiharo, Vika kiama ho kempuka vaantaavura autukevarave. Qaakau vairi vovano vaantaavura viraqaa vaari ntairera, viva ekaarama rapatutuma vuanarove, tiro.

⁴ Vitanta tu uvara vo vaiintinavu viri ti tiva timumanta iri, te Kotira aareha tiha, Mpo, Kotio, vitanta tinavu naaraihama timiteha qora uva tiva taava náitantaqima variarire. Are qaqi kaira vo vaiintinavu vitanta vate haikara muara vare vitanta rumpa vare niaraini vo vatanaaka vataini vuru kaate.

⁵ Tenavu vaantaavura qaiqaa auti vauramanta vitanta tinavu naaraihama timiteha tinavu tauvaqa vauraa uva tiva timitaara kaara are kia tauru karaitira, vitanta qora kaiqa varaa uvaravata kia nunka nimitaane, ti.

⁶ Te minti tivake Kotira aaramake viraqaahai tenavu vaantaavura vira qaiqaa autuqiu vuavaunara. Vaiinti nahenti vi kaiqara varaataa umanta vare vaihara ti, vika vaaka mia mantaraini vau vaantaavurara autuq vivi, vuru tavaarana taiqa kovaro viri mantaraini vau vaantaavurara qaqi vaura.

⁷ Ho tenavu koqemake Ieruharemi vaantaavura qaiqaa autuq viha, vo irirana vo irirana tinta kauramanta Sanbalaatika, Tobiaaka, vo vatanaaka Arapive, Amonive, Asadotive, vika hampata vi uvara iruvaro voqama kero nirara ite vaumanta vaura.

⁸ Vika tinavu hampiqamavi vi kaiqara qaqira kaate ti, vika ruvaaqumavi vaiha Ieruharemi hampata iqoka raqi uvara evaara nai tiva ami nai tiva amiha vaura.

⁹ Minti ti vaumantavata, tenavu Kotira aaramaqi viha vaiinti vonavuara entaqivata aatitariraqaaavata maimaraara raqiki timitate tunara.

¹⁰ Minti turamanta Iutaa vokuka tiha, Oho, haaru vaantaavura ravantiaqako oriva airitaha vona vona vaivarо airi kaiqavano qaqi vaivarо tinavu kaiqa vaiinti kempukua tajqe vaivo. Mintira kaara tenavu kia ho qaiqaa vaantaavura vira vara vuru taiqa kararave, tura.

¹¹ Vika minti tumanta tinavu navutaaka tinavuara tiha, Vika kia tinavu tavaige tenavu vika ntaiharera evaara vivi, oru vika nivuqaa qovaramavvi vika arukaariraro vika kaiqavanovata taiqa vuarire, ti vaura.

¹² Iutaa vokuka tinavu navutaaka tataqaq vauka, vikavata votataa votataa tinavu viri tiva timi tiha, Navutaaka hihai hihai ani ruvaaqumavi vaiha ninavu arireka auti variavo. Rauriha variate, tura.

¹³ Vika minti tumanta te iqoka paipeve, vaantaarave, huru vevave, kaiqa vaiinti nimi vikara tiha, Ne vo anku vo anku oru vaantaavura kia autinaini vona vona vaiha maimaraara raqikiha variate, ti.

¹⁴ Te tavauramanta vaiinti nahenti airi avu aato iri vaumanta te himpi, nora vaiinti vikaravata, autu vatauva vokukaravata, hinikukaravata, mintima ti: Kia navutaaka naatu qetaraiti, Nora Kotira kempukara noraiqaake iriteha variate. Vira kempukavano uritarakero vaimanta vaiinti nahenti vira kempuka aatu qeteha variarave. Virara irihama ne nenta qata vakaakave, nenta maaqi raavurave, nenta naatavarave, nenta naavu maqaqaaave, virara virara irihama iqoka raquate, tunara.

¹⁵ Ho tinavu navutaaka iruvaro vika tinavu arireka evaara tivato uvava qovarama vuvaro Kotiva vi aarara kuvaikomanta vika qaqirake vaumanta, tenavu ekaa anirante qaiqaa vaantaavura autuq vi vaunara.

¹⁶⁻¹⁷ Ho vi entaraqaahai navutaa vika naatu tenavu maantimake kaiqa vare vaunara: Tinavuqihai vokuka kaiqa vare vaumanta vokuka qaqi vaiha *aini sioti* nonkuteha huruve vevave, vaantaarave, kainkeve, vi haikara vi haikara tote, nái kenaukaqaa maimaraara raqikiha vaura.

Minti vaumanta Iutaa vika qjata vaiintinavu ani vika tauvaqaini vaiha vika kahaqama nimite vaura. Vaiinti vokuka vaantaavura vira auti vai haikara aqu vare vauka, vika hini kauquqohai vi haikara aqu vareha, hini kauquqohai auvihehavaa totaqui vi vaura.

¹⁸ Vokuka vaantaavura ori vuqike vate vauka, vika iqoka paise nái taaqeni ntuvateha kaiqa vare vaura. Vaiinti vovano navutaaka anirara veve tiharo *aanumaara/noma* vuaqe vauva, viva ti aaqanto vaiharo ti avataqiro vi vaura.

¹⁹ Nora vaiintinavuve, autu vataukave, qaqi vaiinti nahentive, te vikara mintima ti: Vaantaavura viva vukai vaimanta tenavu niara kanta niara kanta vahama vi kaiqara vare vaura. ²⁰ Ne *aanumaara/noma* uva iri, vaakama te iainanaini ani ruvaaquma vuate. Kotiva tinavu Variqavano tinavuara iriharo vivama iqoka raqu timitaanarove, ti.

²¹ Te minti turamanta tinavuqihai hininavu vaantaavura viraqaa kaiqa vare vaumanta hininavu vaantaara tote vaiha maimaraara raqiki vaura. Vo enta vo enta vika aatitareva uraqahaai kaiqa hoqaramate varaqi vivi, entaqi uhai opu makauvano itoraqaa taiqake vaura.

²² Vi entara te ekaa vikara mintima ti: Ne nenta kaiqa vaiintinavu hampata kia nenta maaqaini entaqi vaitareka viraiti, Ieruharemi maaqiqaima variate. Ne ekaa maaqi vaiha entaqi maimaraara raqikiha, aatitairaqa kaiqa varaqi vuate, ti.

²³ Minti tivake tenavu ekaa vairarera iha kia tentanavu utavaaqa qaqini varake vaitaaina utavaaqa nonkiraiti, tenavu qaqi kaiqa utavaaqa vira hampata vaiteha, iqoka raqirera geramatahe vaunarave. Ti kena vaiintinavuve, ti kaiqa vaiintinavuve, tiqaa maimaraara raqiki vaukave, tenavu ekaa tentanavu auvihehavaa vaqa ntuvateha vaunara.

5

Nehemiava vehi vaiinti nahenti kahaqama nimitora

¹ Ho vo entanavu aitaromanta Iutaa vaiinti nahenti vonavu nai kena Iutaa vaiinti nahenti hampata nuntu naantu ti vaura.

² Vika hinikuka tiha, Tinavu vainti airitahaa variavaro tinavu karavano kiama airi vaivo. Tinavu kara kia vairera, tenavu qutuma virarave, ti.

³ Vinavuka minti tumanta vokukavata tiha, Avuhainaa vaiintivano tinavu naahorave vatarave iriharo virara virara *takisi* aquate ti monuva kia vaimanta tenavuvata tentanavu navunaakaqihai vi monura vahuqa vare *takisi* aqukaunarave.

⁴ Vinavuka minti tumanta vokukavata tiha, Avuhainaa vaiintivano tinavu naahorave vatarave iriharo virara virara *takisi* aquate ti monuva kia vaimanta tenavuvata tentanavu navunaakaqihai vi monura vahuqa vare *takisi* aqukaunarave.

⁵ Mpo, tenavu tentanavu navunaaka aanante vohaa Iutaa vatanaakaqai vauramanta vika nora maarama tinavu timiavo. Vika vaintivarae koqeqe variamanta tinavu vaintivarae qora vainti variavo? Aqao, vika vaintivata tinavu vaintivata vohaa qaramakema variavo. Minti iamantavata, tenavu kara naairirava ho variarire ti, tenavu tentanavu vaintivara tentanavu navunaaka nimiaina aaravaqaima vaivo. Vaakama tinavuqihai vokiaka nái raavuranaavu varake tinavu navunaaka nimiamanta vika qumina kaiqa nahenti variavo. Mpo, ti navunaaka vonavu tinavu vatawata naahovata varaara kaara tenavu tentanavu vainti kahaqiarira aarava kia ho vaimantama vauro, ti.

⁶ Vika minti tumanta te vika nuntu naantu tura kaara ti tirara itomanta ⁷ te vika kahaqiaina aarara aato iriqi vivi, viraqahaai te nora vaintinavuvata, *kamaanira* kaiqa varokavata naaramake, vika tiva nimi tiha, Ne nenta qaiqaa koqaa varerara iriha ne nenta qata vakaukavara nora maarama nimi variavo, ti.

Minti tivake te vi uvvara avuqavu irera vaiinti nahenti ruvaaqumake ⁸ vikara tiha, Haaru tinavu qata vakaukavara Iutaa rumpa vare vuamanta vika vo vatanaaka qumina kaiqa vaiinti variako, vikara tenavu vukaari utiha monu ruvaaqumake vo vatanaaka vi monura nimi, viraqahaai tentanavu qata vakaukavara qaiqaa maini ntita vare anunarave. Ho vate ne nora vaiintinavu nenta qata vakaukavaraqaqaa nora maara vataara kaara ni qata vakauka nái vaintivara ni nimiamanta vika ni qumina kaiqa vaiinti variarave. Ne vika kena Iutaa vatanaaka vahavata, ne vika qoraiqama nimite variavo, turamanta vika kauriha kia uva tiraiti, evaara vaura.

⁹ Vika evaara vaumanta te qaiqaa tiha, Ne vare varia kaiqava qora kaiqama vaivo. Nenavu Kotira aatu qeteha avuqavu vaina kaiqaraqai varaaataarave. Ne mintivera, vo vatanaaka tinavu navutaaka kia vira kaara tinavu kaiqara qora kaiqave tivarave.

¹⁰ Tevata ti hampata kaiqa varaakavata, ti qata vakauka vonavuvata, tenavu vo vaiinti nahenti qaqi kauramanta vika tinavuqihai monuvata karavata vahuqa varaaarave. Ho kaiqenavu vikara tiha, Ekaa vi monura kia tintanavu qaiqaa timiate.

¹¹ Nana nana *dinau*, monue, karae, *uainie*, *orivi* valhaverae, nenavu qaqrake kia tintanavu timiate tivakeha vika vatave, *uaini* naahove, kara naahove, *orivi* katari naahove, naavuve, nái qaqi nimiate, tunara.

¹² Te minti turamanta nora vaiinti vika tiriara tiha, Tenavu are tianantemake mintirerave. Tenavu vika i haikara nái qaiqaa nimiha vika *dinauvata* qaqira karerave, ti.

Vika minti tumanta te Kotira kaiqa vara amite vau vaiintinavuka naaramake, viraqqa-hai nora vaiintinavuara qaiqaa tiha, Ne nenta kauqu ainqaa aquukeha vaaka tivataa uvvara maa vaiintinavuka nivuqaa vaiha qaiqaa tiate, turamanta vika nái kauqu ainqaa aquukeha Kotira kaiqa vara amite vau vaiintika nivuqaa vaiha vi uvvara tura.

¹³ Vika minti tumanta te tavuna tegoni rumpataunara qaqini varake vira rintatima keha vikara tiha, Niqihai vonavu nái kauqu ainqaa aquuke tivataa uvvara raqa kaivera, Noravano Kotiva vi vaiintika maantima kero rintatima kairaro ekaa vika i haikava, naavuve vo haikave taiqa vuarire. Noravano Kotiva vi vaiintikaqaahairo ekaa vika i haikava vara kairamanta vika kia vo haikavata vataate, turamanta ekaa mini ruvaaquma vuka tiha, Quqaave, tivake viraqqaahai vika Kotira autu tuahere vaura. Te tavauramanta ekaa nora vaiintinavu nái kauqu ainqaa aquuke tivato uvvara kia raqa karaiti, koqema keha vi uvvara avataqi vi vaura.

Nehemiava koqema kero vaiinti nahenti kahaqura

¹⁴ King Atasakesisiva 20 ihiara raqiki vau entaraqaahai te noraiqamavi Iutaa vataini *kamaanira* avuhainaa vaiinti vaiha vi kaiqara varaqi viha Atasakesisiva 32 ihiara raqiki vau entaraqaa te vi kaiqara tuta kaunara. Ho te 12 ihiara vi kaiqara varaqi viha te tenta qata vakaa hampata kia *kamaanira* kaama amito karara varake naunara.

¹⁵ Haaru ekaa *kamaanira* kaiqa vaiinti ti avuni kaiqa varoka vaiinti nahenti monuara naariha tiha, Ne vo enta vo enta 40 *silvaa* monu ti timiже te tenta karavata *uainivata* varaare, ti vaurave. Vika minti tivakeha nora maara vaiinti nahentiqa vate vaumanta vika kahaqi vau vaiintikavata nora maara vaiinti nahentiqa vate vaurave. Ho te *kamaanira* avuhainaa vaiintiqamavi vaiha, kia te vika aanantaratit, te Kotira autu qeteha kia mintunara.

¹⁶ Te Ieruharemi vaantaavura qaiqaa autuainara virara noraiqaake iriha vi kaiqaraqai varaqi vunara. Ti kahaqi vau vaiintika, vikavata ruvaaqumavi vi kaiqara vare vaumanta tenavu mintiaqi viha, kia vata vo oru koqaa aquukeha varuanarave.

¹⁷ Te vi kaiqara vare vauramanta Iutaa vika nora vaiintive, *kamaanira* kaiqa vaiintive, vo vatanaa vo vatanaaka Iutaa vata tataaqa variakave, vika vika 150navu vo enta vo enta ti naavuqi ani vaiha kara ne vaura.

¹⁸ Vo enta vo enta ti naavuqi kaiqa vare vauka purumakau vo aruke, sipisipi koqera 6navu aruke, kokoraara vonavuvata ruqutuke unta timitomanta te vi karara 150 vaiinti vika nimunara. Vika *uaini* ho naate ti, te ekaa 10 entaaqa tenta naavuqi kaiqa vare vauka nititama kauramanta vinavuka *uaini* qaiqaavata vare ani vaura.

Te vi vaiintika kara nimiha kia te qaqi vaiinti nahentiara *takisi* aquukeha monu timiже vi karara varaare tiraiti, te vika nora maaraqai vaurara iriha, te vikaqaa maara voqavata vataarorave ti, kia te minti tunara. Te avuhainaara *kamaanira* vaiinti vaiha te minti tiarirava ho vaimantavata, kia te minti tunara.

¹⁹ O Kotio, te ai aareha mintima turo: Te vaiinti nahenti kahaqama nimite vaunarara iritehara ti koqema timitaane, turo.

6

Navutaaka qaiqaa vira qoraiqama amitareka auti vaura

¹ Tenavu vaantaavura qaiqaa autuqi vivi, vuru taiqa kauraro kia irira voqavanovata vauvatu, vaantaavura qentinavu qaiqaa vuvataarirava viva qaqiqai vaumanta tinavu navutaaka Sanbalaativa vo, Tobiaava vo, Arapihaiinaa vaiinti Gesemuva vo, vo vaiinti navuvata, vi uvvara irura.

² Tenavu vaantaavura taiqa kauna uvvara navutaaka iri, Sanbalaatika Gesemuka tini uva varake mintima ti: Nehemiao, are Ono Uqitaini vo vatuka vainanaini tuvu vairage tetanta ai vataake uva tiare, tumanta te iruramanta vitanta ti mintamake qoraiqama timitareka auti vaumanta te kia mini viraiti, ³ vitantaini uva varake tiha, Te Nehemiaka nora kaiqa varehara ti, kia te mini otu virerave. Te nitanta tavarera mini otu vuari maini kia kaiqa varevorave, ti.

⁴ Te minti turamanta vitanta erakaimaante tataa vohaa uvaqai vara komanta tevata erakaimaante tataa vohaa uvaqai varakeha tiha, Kia virerave, tunara.

⁵ Te minti turaro Sanbalaativa qara vo ntuvu kero, „ekaa vo vaiinti vo vaiintivata vi uvvara ho kaara ntuate tiro,“ viva vi qarara kia naavumakero taatau karaitiro, nai kaiqa vaiinti vo atitovaro viva vi qarara qaqi varero viri ti timura.

⁶ Qara viraqti mintima tiro:

Vo vatanaa vo vatanaaka ni Iutaa vatanaa auvahini variakaqi uva vovano vi ani vaivo. Gesemuvavata vi uvava iriro tiriara vi uvava quqaa uvama vaivo tirave. Vi uvava mintima tivo: Ne Iutaa vatanaaka kia „King Atasesesisira“ vira vevaaraini vaireka, auti vahira ti, ne Ieruharemi vaantaavura qaiqaa auti variarave. Nehemiava nai noraiqama viro Iutaa vatanaakaqaq raqikiare tiro,⁷ viva paropeti vaiintinavu nititama kaimanta vinavuka Ieruharemiq vaiba vaiinti nahentira tiha, Nehemiava vivaqaima tinavu avuhainaa vaiintivanoma vaivo, ti variarave. Vi uvava mintimakero vi ani vaivo. Ho, Nehemiao, King Atasesesisiva vivavata vaakama vi uvava irianarove. Virara irihara are aniqetanta vohaaraqi vaiba vi uvava avuqavu iare, tiro.

⁸ Sanbalaativa minti tumanta te qaiqaa uva varake nariara mintima ti: Kia are tiana uvava voqavanovata quqaa uva vaivo. Are nena avu aatoqihair vi uvava irikehara unama tiaro, tunara.

⁹ Tinavu navutaaka tinavuara vika qeteha vi kaiqara qaqlira kaate ti, vika una uva ti vaura kaara te Kotira aareha mintima ti: Mpo, Kotio, are ti kempukaiqama timitairaqe te vi kaiqara ho varaare, tunara.

¹⁰ Vi entara Mehetabelira nainti, Delaiaara maaqu Semaiaava rovara varero kia nai naavuqihairo ho veva ntaariva vaumanta te vira tavarera vunara. Te viva unaini oruntauraro viva tiriara tiharo, Ai navutaaka ai arukareka anima variavo. Vika vo enta entaqima ai arukareka anivarave. Kaiqetanta oru Kotira Naavuqi oriqete qenti tintate viraqi kukegavi variare, tiro.

¹¹ Viva minti tumanta te nai tiva ami tiha, Aqao, kia te qetara vaiinti vahavauve oru kukegavi vairarave. Hauri te tenta qaqi variqi vuainarara iriha mini vuarorave. Kia te mini virerave, ti.

¹² Te minti tivake iriavauraro ti aato kenko tumanta te tiha, Oho, kia Kotiva Semaiaarara vi uvava tiane tivarovaauve tivo. Tobiaaka Sanbalaatika vira qutaru monu amiha vi uvava tiane tiavaroma tivo. ¹³ Vitanta tiriara viva qetakero qora kaiqa vareharo kaurira haika varairaro vira autuvano vataini tuvi vuarire ti, Semaiaarara vi uvava tiane tivakeha vira qutaru monu amura.

¹⁴ Viraqahai te Kotira aareha mintima ti: Kotio, are Tobiaaka Sanbalaatika varaa kaiqara irihera vitanta ntaihaane. Paropeti nahenti Noadiahare, vo paropeti vaiintinavuve, are vikaravata iritaane. Vikavata tiriara aatu itaarire ti, una uva tiriara ti variarave, ti. Te Kotira aareha minti tunara.

Vaantaavura autu vuru taiqa kora

¹⁵ Ho tenavu Ieruharemi vaantaavura qaiqaa autuqi vivi, 52 entanavu varake, Eluli^{*} tora 25 entaqaa vaantaavura vira taiqa kaunara.

¹⁶ Tenavu vaantaavura vira taiqa kauramanta tinavu navutaaka vona vona tinavu auvahini vauka, vika vi uvava iri, qeteha tiha, Oho, vika Variqavano vika kahaqimanta vi kaiqara vara vuru taiqa kaavo, tuvaro vika nai mahuta tu uvavavata vatainiqama vura.

¹⁷ Vi entara Iutaa nora vaiinti vonavu airi qara vara kovaro Tobiaava unaini vuvaro Tobiaavavata vika nai qara qaiqaa nimite vaura.

¹⁸ Tobiaara airaaviva Araara maaqu Sekaniaava Iutaa vaiintivano vauvaro Tobiaara maaqu Johanaaniva Iutaa nahenti varatero vaura. Vi nahentiva Berekiaara maaqu Mesulaamira raavuravano vaura. Tobiaara airaavivavata vira naaqutuvanovata Iutaa vatanaaka vaurara ti, airi Iutaa vika Tobiaara kahaqireka vira mantaraini vaura.

¹⁹ Ho vika aninte tiriara tiha, Tobiaava minti mintima kero koqe kaiqa vare vairave, tivakeha vika te tuna uvaravata vira vuru tiva ami vaura. Mintuvaro Tobiaava tiriara qetaarire tiro, airi qara tini varake vaura.

7

¹ Ho tenavu vaantaavura vira taiqake, vaantaavura qenti, vo qenti vo qenti vaaviamate, viraqahai qentiqaq raqiki vaiintinavukave, ihi tikave, Rivaira ankuqihai Kotira kaiqa vara amitekave, vika vika kaama taunara.

² Te taara vaiinti Ieruharemiqaa raqikiate ti, tenta qata Hanaanirave, iqoka vaiintiqaq raqikura Hananiaarave, vitanta noraiqama kaunara. Hananiaava Kotira aatu qeteharo avuqavu ni vaurara tiro, viva ni vau okarava uritarakero nai hana vaiinti hinikuka nu okararavata aataara kora.

³ Te vitantara tiha, Netanta timanta ekaa enta toqaqi vaantaavura qentinavu kiama vaaka qantuara karaiti, vaivaros kuarivano uruntero anomakero itainaraqaa qentinavu qantuara kaate. Kuarivano ruhunkireva inaraqaa qentinavuqaa raqikika qenti vinavura

* 6:15: Eluli tora = September

tintate, taurini tinte *ainiravata veta vate, taiqake vuante*. Netanta timanta mintiaqi vuante, tunara.

Te qaiqaa vitantara tiha, Netanta Ieruharemiqihai vaiinti vonavu kaama taimanta hininavu voqi voqi maimaraara raqiki vaimanta, hininavu nái naavu maaqa vainaini vi aniba maimaraara raqikiate, tunara.

Isareri vo vataihai orurante anuka vika nutu

⁴ Vi entara Ieruharemi vatukavano nora vaumantavata, kia airi vaiinti nahenti viraqi vaumanta kia airi naavu maaqavata viraqi kaqate vaura.

⁵ Mintuvaro Kotiva vo uva ti aatoqi vatomanta te vi uvara avateha ekaa vaiinti nahenti nutu vukuqi vainara tavaariraro vika nutu viraqi vairove kiae vairove tivake, vaiinti nahentive, vika nora vaiintinavuve, vo kaiqa vo kaiqaqaa raqiki vaukave, ekaa vika vika vohaaraqaa ruvaaquma kaunara. Te vo yuku varake tavauraro vi vukuraqi vo vataihai hogare orurante ani Iutaini vau vaiinti nahentika nutu vaura. Vi vukuraqi vaiinti nahenti nutu vaireva maantima vaura:

⁶ Haaru King Nebukanesaava Iutaa vaiinti nahenti rumpa varero vuru nai maaqa Babironini kokaqihai maa vaiinti nahentika qaiqaa orurante Iutaa vataini, nái hogare vau vatukara Ieruhareminive, vo vatuka vo vatukainive, ani vaura.

⁷ Vika qaiqaa ani vaumanta vika nora vaiintinavu Serubabelivave, Iosuaavave, Nehemiasavave, Asariaavave, Ramiaavave, Nahamaanivave, Motekaiavave, Bilisaanivave, Misiperetivave, Bikivavave, Nehumivave, Baanavave, vinavukavata vika hampata orurante anura.

⁸ Babironihai orurante anuka vika anku nutuvata, vika *nampavata maantima vaura*:

Parosira anku 2,172

⁹ Sefatiaara anku 372

¹⁰ Araara anku 652

11 Pahati-Moapira anku (Jesuaara vaintivaravata Ioaapira vaintivaravata) 2,818

12 Elaamura anku 1,254

13 Satura anku 845

14 Sakaira anku 760

15 Binuira anku 648

16 Bebairia anku 628

17 Asagaatira anku 2,322

18 Adonikaamira anku 667

19 Bikivaira anku 2,067

20 Adinira anku 655

21 Atera (vira vo autu Hesekiaara) anku 98

22 Hasumura anku 328

23 Besaira anku 324

24 Haripira anku 112

25 Gibeonira anku 95

²⁶ Vika vika orurante anumanta vo vaiinti nahentinavuvata orurante ani haaru nai kaivaqaukavara vau vatukara, vo vatuka vo vatukaini ani vaura. Vi vatukara autuvata vaiinti nahenti *nampaavata maantima vaura*:

Betarihemti vatukavata, Netofa vatukavata 188

27 Ananoti vatuka 128

28 Beti-Asamaveti vatuka 42

29 Kiriati-Jearimi vatukavata, Kefira vatukavata, Berotira vatukavata 743

30 Raama vatukavata, Geba vatukavata 621

31 Mikimaasi vatuka 122

32 Beteli vatukavata, Ai vatukavata 123

33 Nebo vatuka *nampa* 2 52

34 Elaamu vatuka *nampa* 2 1,254

35 Harimu vatuka 320

36 Ieriko vatuka 345

37 Loti vatukavata, Haditi vatukavata, Ono vatukavata 721

38 Senaa vatuka 3,930

Vika vika vihai orurante vi vatukara vi vatukara mini ani vaura.

³⁹ Kotira kaiqa vara amite vau vaiintika ankuqihai vo vaiintinavu orurante Ieruharemini anura. Vika anku nutuvata vika *nampavata maantima vaura*:

Jedaiaara anku (vika kaivaqava Jesuaara) 973

⁴⁰ Imerira anku 1,052

⁴¹ Pasurira anku 1,247

⁴² Harimura anku 1,017

Vika vikavata vihai orurante Ieruharemini ani vaura.

⁴³ Rivaira ankuqihai vaiinti vonavu vihai orurante Ieruharemini anura. Vika anku nutuvata vika *nampaavata* maantima vaura:

Jesuaara ankuvata Katmielira ankuvata (vi ankutanta kaivaqava Hodaviaava) 74

⁴⁴ Kotira Naavuqi vaha ihi ti vau ankuva vika kaivaqava Asaapiva 148

⁴⁵ Kotira Naavuqaa maimaraara raqiki vau ankuva, Salumira ankuve, Atera ankuve, Talamonira ankuve, Akupira ankuve, Hatitaara ankuve, Sobaira ankuve 138

Vika vikavata vihai orurante Ieruharemini ani vaura.

⁴⁶ Kotira Naavuqi qaqi kaiqa vare vau ankukaqihai vaiinti vonavu vihai orurante anura. Vika ankunavu nutu maantima vaura:

Siaarave, Hasufaarave, Taboaatirave,⁴⁷ Kerosirave, Siaarave, Padonirave,

⁴⁸ Lebanaarave, Hagabaarave, Salmairave,

⁴⁹ Hanaanirave, Gidelirave, Gahaarave,

⁵⁰ Reaiaarave, Resinirave, Nekodaarave,

⁵¹ Gasaamurave, Usaarave, Paseaarave,

⁵² Besairave, Meunimirave, Nefusesimirave,

⁵³ Bakabukirave, Hakufaarave, Hahurave,

⁵⁴ Basalutirave, Mehidave, Hassaarave,

⁵⁵ Bakosirave, Siseraarave, Temaarave,

⁵⁶ Nesiaarave, Hatifaarave.

Vika vikavata vihai orurante Ieruharemini ani vaura.

⁵⁷ Haaru Soromonura kaiqa vaintinavu vika nainti vo anku vo ankuvata orurante anura. Vi ankuva nutu maantima vaura:

Sotairave, Soferetirave, Peridaarave,

⁵⁸ Jalaarave, Dakonirave, Gidelirave,

⁵⁹ Sefatiaarave, Hatilirave, Pokereti-Hasebaimirave, Emonirave,

vika vikavata vihai orurante Ieruharemini ani vaura.

⁶⁰ Kotira Naavuqi qaqi kaiqa varo vaiintikavata, Soromonura kaiqa vaintinavu vika naintinavuvata, vihai orurante anu vaiintika vika 392 vaiintinavu vaura.

⁶¹⁻⁶² Vaiinti vonavu 642navu Tel-Mela vatukaihaive, Tel-Hasa vatukaihaive, Kerupi vatukaihaive, Adoni vatukaihaive, Ime vatukaihaive vihai vihai anura. Vi ankuva taaramo ankuqihai Delaiaara ankuve, Tobiaara ankuve, Nekodaara ankuve, vaura. Vika kia nai kaivaqaukavara nutu kankomake irurara ti, vika Isarerri nai kaivaqaukavara okara numiqe aarava kia ho vaura.

⁶³⁻⁶⁴ Vo ankunavu Hobaiara ankuve, Hakosira ankuve, Basalaira ankuve, vika tiha, Tinavu kaivaqaukavara Kotira kaiqa vara amite vau vaiintika vaurave, tuvarovata, vika kaivaqaukavara nutu kia vukuqi vaura. (Haaru Gileati vatukaihainaa vaiinti vovano Basalaira raavura vara tero vaura. Vi vaiintiva nai airaavira autu naiqaa ntava tora.) Ho vika nutu vukuqi qumina ranta tavovaro kia vaumanta Isarerri nora vaiintinavu vika qioqamate tiha, Nenavu kiama ho Kotira kaiqa vara amitevarave, tura.

⁶⁵ Vika minti tuvaro *kamaanira* avuhainaava vivavata tiharo, Kotira iha quara amite kararavata nenavu kia ho neverave. Nenavu vaivarova naantiara Kotira kaiqa vara amite vaina vaiintiva, viva *Urimi Tumimi** okara kankoma kero tavairava vairera, vi vaiintiva ninavu uva homa avuquqama nimitaanarove, tura.

⁶⁶ Ho ekaa Isarerri rumpa vare vuru konaihai orurante anuka vaireka, 42,360 vaiinti nahenti vaura.

⁶⁷ Vika mintima vaumanta vika kaiqa vaiinti nahenti 7,337 vaumanta vika ihi tiva nimite vauka 245 vaura.

⁶⁸⁻⁶⁹ Vika ohi 736 vauvaro kameri 435 vauvaro vika donki 6,720 vauvaro vika mulivata 245 vaura. †

⁷⁰⁻⁷² Kotira Naavu qaiqaa kagerara iriha airi vaiinti nahenti maantimake monuve, vo haika vo haikave, ruvaaquma kora:

Kamaanira vaiinti avuhainaava:

kori ori vira maaravano 8 *kilo*

kori oriqohai aututo tanura 50navu

Kotira kaiqa vara amite vau vaiintika utavaaqa 530navu.

* ^{7:65:} Urimi Tumimi okara vaireva, Kotira kaiqa vara amite vau vaiintiva oritantae vara kero viraqohairo Kotira munkukavano vai okarara kankoma kero iri vaura. Vi okarara kia tenavu kankomake irunara. (Kis 28:30) † ^{7:68-69:} muli vaireva, vira qova donkivano vaivarova vira nova ohi vaira. English = mule

Vo anku vo anku vika nora vaiintinavu:

kori ori vira maaravano 168 kilo

silvaa ori vira maaravano 1,250 kilo.

Qaqi vaiinti nahenti:

kori ori vira maaravano 168 kilo

silvaa ori vira maaravano 140 kilo

Kotira kaiqa vara amite vau vaiintika utavaaqa 67navu.

Mintimake Kotira Naavuara iriha vi haikara vi haikara ruvaaquamake vatora.

⁷³ Ho Kotira kaiqa vara amite vaukave, Rivaira ankuqihainaukave, Kotira Naavu gentiqa qaqiki vaukave, Kotira Naavuqi qaqi kaiqa vare vaukave, ihi tiva nimite vaukave, Isareru hini vaiinti nahentive, vika vika nai vatuka nai vatukaini orurante ani vaura.

8

Esraava Kotira vukuqihairo kaara ntura

¹ Ho ekaa Isareru nai vatuka nai vatukaini ani vauvaro 7 tora anintomanta 1 entaqaa ekaa vaiinti nahenti Ieruharemini oru Namari-Qenti tataaqa nora vatuka vaunaini ruvaaquamavi vaura. Vika mini vaiha Kotira kaiqa vara amite vau vaiintira vo Esraarara tiha, Kotiva Mosira tiva amu uvvara are vi vukura varera vi uvvara kaara ntua timitaane, tura.

² Vika minti tuvaro Kotira kaiqa vara amito vaiintiva Esraava Kotiva uva tivatova viraqivi vau vukura varakero vaiinti nahentivata, vika vaintivara uva ho irukavata, vaunaini vaura.

³ Viva Namari-Qenti tataaqa nora vatuka vaunaini vahilo, vaaka toqaqi hoqaramatero vi vuk uraqihairo kaara ntuaqiro vuvuaro kuarivano qiataqaa uruntora.

Esraava Kotiva Mosiraqaa tivato uvvara kaara ntuaqiro vi vaumanta vaiinti nahentivata, vika vaintivara uva ho irukavata, ekaa vika nai aato Esraara amiha vi uvvara iri vaura.

⁴ Esraava vukuqihairo uva kaara ntuarire ti, vika tainta naavu vo kantaaqaini qaqi amito varo Esraava viraqivi himpi vaumanta vaiinti vonavu vira hini hini himpi vaura.

Vira kauqu tanaraini Matitiava vo, Semaava vo, Anaiaava vo, Uriaava vo, Hilikiyeava vo, Maseaava vo, vaumanta vira kaanaaqaini Pedaiaava vo, Misaeliva vo, Malakiaava vo, Hasumuva vo, Hasabadaanaava vo, Sekaraiaava vo, Mesulaamiva vo, vaura.

⁵ Esraava kantaaqaini himppite vaumantara ti, ekaa vaiinti nahenti vira taveva ho vaura. Mintuvaro Esraava vuku vi varakero qanturomanta vaiinti nahenti tave, viraqahai vika ekaa vataihai himpi vaura. Vika himpi vauvaro Esraava tiharo, Noravano Kotiva vaimanta kaiqe tenavu vira autu tuahera kaare. Viva uritarakero vai Variqave, tiro.

⁶ Esraava minti tumanta ekaa vaiinti nahenti nai kauqu vara virini tuherake tiha, Ququaave, ququaave, ti vaura. Minti tivake vika vatainai kankakaavi vaiha nai viri vatainai vateha Kotira autu tuaherake vaura.

⁷ Vika mintimake, viraqahai qaiqaa ekaa himpi vauvaro Esraava Kotiva Mosiraqaa tivato uvvara kaara ntuaqiro vi vaumanta Rivaira ankuqihai vaiinti vonavu ekaa vi uvvara okara vutuke vika tiva nimi vaura.

Jesuaavave, Banivave, Serebiaavave, Jaminivave, Akupivave, Sabetavive, Hodiaavave, Maseaavave, Kelitaavave, Asariaavave, Josabaativave, Hanaanivave, Peliaavave, ⁸ vinavuka Esraava tu uvvara tuqantaake vaiinti nahenti ho iriate ti, vi uvvara okara vutuke vika tiva nimi vaura. [Vaiinti nahenti rumpa vare vuru konaini vaiha, vika Araami uva iriha, nai Hiparu uva tauru korara ti, vinavuka mintura.]

⁹ Kotiva Mosiraqaa tivato uvvara Esraava kaara nti vaumanta vaiinti nahenti vi uvvara okara iruvaro vika muntuka qoraiqumanta iq'i rate vaura. Mintumanta *kamaanira* avuhainaava Nehemiava vo, Esraava Kotira kaiqa vara amite vau vaiintiva kankoma kero Kotira uva tiva nimi vauva vo, Rivaira anku uva tuqantaake tiva nimi vauka vo, vinavuka vaiinti nahentiara tiha, Kia iq'i rataate. Maa entava vaireva, Nora Kotira ni Variqa vira entave. Virara iriha hauri ni muntuka qoraiqira iq'i ratevorave. ¹⁰ Ho ne nenta maaqaini oru vaiha nora kara autuke neha, nenta kara viravata *uainivata* rairake karara aavoqikavata nimiate. Maa entara Nora Kotira entaqaa ni muntukavano qoraiqiantorave. Ne Nora Kotirara quaheha vaivaro Noravano Kotiva ni kempukaiqama nimitaarire, tura.

¹¹ Rivaira anku vikavata vaiinti nahentiqi vi anisha tiha, Ni muntuka qihaaqama kero variarire. Maa entara nora enta Kotira entave, tumanta ¹² vaiinti nahenti vinavuka uva iri, nai maaqa nai maaqa oru vaiha quaheha karavata namarivata neha, kara rairake

vokukavata nimi vaura. Vika Kotiva Mosiraqaa tivato uva okarara irihara ti, vika mintura.

Vaiinti nahenti haraara naavuqi oru vaura

¹³ Mintumanta vira qararaa ekaa vo anku vo ankuqihai qiata vaiintivata, Kotira kaiqa vara amite vaukavata, Rivaira anku vonavuvata, vika vika Esraava vaunaini oru Kotiva Mosiraqaa tivato uvvara kankomake iri varareka vura.

¹⁴ Ho vika Esraava vaunaini oru vaiha Noravano Kotiva Mosiraqaa tivato uvvara qaiqaa iriqi vura. Vika iriqi viha vo uva ranta kovaro vi uvava Nora Kotira uva viva mintima tiro: Ne Isareri vo ihi vo ihi 7 toraqaa haraara naavu vokira kaqateha viraqi variqi vuate, tura.

(Wkp 23:33-43; Lo 16:13-15)

¹⁵ Vika vi uvvara rantake iri tiha, Ike, tenavuvata maa entara vi uvvara iriha mintiataarave, tivakeha vika uva vara kovaro Ieruhareminivata, Jutaini vo vatuka vo vatukainivata vura. Vika varako uvava mintima tiro: Ne oru ainqinaihai toqera kaarave, *orivi* kaarave, vo katari vo katari kaarave, teqa vare ani Kotiva Mosiraqaa tivato uvava tunttemake, haraara naavu vokira kaqate, ti.

¹⁶ Vika minti tumanta vaiinti nahenti vi uvvara iri, oru katari kaara teqa vare vuru nái naavu qiata tanuquraqaave, avutaqive, Kotira Naavu naantegaraini vau vatukaraqaave, vaiinti nahenti ruvaaqumavi vau vatukaraqaave, Namari-Qenti tataaqave, Efaraimu-Qenti tataaqave, mini mini haraara naavu maaqa kaqate vaura.

¹⁷ Vaiinti nahenti rumpa vare vuru konaihai orurante anuka, vika ekaa haraara naavu maaqa kaqate, vo entanavuara viraqi variqi vura. Haaru Nunira maaqu Iosuaava vau entava taiqoraqaahai Isareri vika kia qaiqaavata mintimake variqi vura.

Ho vi entara Kotira uva *vukuqi* qara ntuvatora tave, viraqaahai qaiqaa vika haraara naavu maaqa hoqaramake kaqa teha viraqi vaura. Vika qaiqaa mintihara ti, ekaa Isareri voqamake quahela vaura.

¹⁸ Vika quaheha 7 entara haraara naavuqi variqi vura. Vi entara ekaa vo enta vo enta Esraava Kotiva Mosiraqaa tivato uvvara qara ntuvato vukuraqihairo kaara ntumanta vaiinti nahenti iri vaura. Mintiaqi viha 7 enta varake, vira qararaa 8 entaaga Kotiva vukuqi tunttemake, ekaa Isareri vika vohaaraqi ruvaaqumavi vaiha Kotira autu tuahera amitora.

9

Vika nái qora kaiqa varo uvvara tiva qovaramake vaura

¹⁻² Ho vi torara 24 entaaga Isareri vika qaiqaa ruvaaquma vura. Vika nái qora kaiqa varo kaiqara virara ike mpo tura Kotiva tavaarire ti, vika kia vo vatanaaka hampata vairaiti, náiqai vaiha, kara auramate, kovaara utavaaqa nonkute, hanta varake nai qiaataqaa aquteha vaura. Vika mintimake himpi vaiha, nái Kotira uva raqako uvvara tiva qovaramaqi viha, nái kaivaqaukavara qora kaiqa varo uvaravata tiva qovarama kora.

³ Vika ruvaaqumavi himpi vauvaro Noravano Kotiva Mosiraqaa tivato uvvara vukugihairo 3 *auara* kaara ntuvu nimotomanta viraqaahai vaiinti nahenti 3 *auara* vaiha nái qora kaiqa varo uvvara tiva qovaramake Nora Kotira nái Variqa autu tuahereha vaura.

⁴ Vika ruvaaqumavi vaumanta Rivaira anku vonavu kantaqaqa taintaqaqa himpi vauka Jesuaavave, Banivave, Katmielivave, Sebaniaavave, Bunivave, Serebiaavave, vo Bani-vave, Kenaanivave, vinavuka taintaqaqa vaiha Nora Kotira nái Variqa aareha vaura.

⁵ Vika mintumanta Rivaira anku vonavu Jesuaavave, Katmielivave, Banivave, Hasapaneaavave, Serebiaavave, Hodiaavave, Sebaniaavave, Petahiaavave, vika tiha, Ne ekaa himpi vaiha Nora Kotira nenta Variqa autu tuahera kaate. Kaiqe tenavu ekaa enta ekaa enta vira autu tuaheraqi vuare, tivake Kotira aareha mintima ti:

Ai autuvano uritarero koqe autu vairara ti, tenavu ai autu koqemake tuahera kaarirava kia ho vaivo.

⁶ Noravauvo, areqaima Noravano Kotiva varianaranarave.

Naaruvaini vai haikarave, opu makau niaraini vai haikarave, maa vatarave, maa vataraqaa ekaa haika vairavata, nora namarivata, ekaa namariqi vai haikaravata areqaima autukera vataanaranarave.

Ekaa qaqi variqi vi varia haikauka variavara are nena vika qaqi variqi vi haikara nimiaramanteria ti, vika qaqi variqi vi variarave.

Naaruvaini variaka airitaha ekaa vika ai autuma tuaherake variavo.

⁷ Are Noravano Kotiva Variqavano vahara haaru tinavu kaivaqara Eparaamira kaama tera, Uri vatuka Babironi vataihaira vira vita varera, qaraaka autuvata ntava tehera virara Eparahaamirave, tianarave. (Okara 11:31; 17:5)

⁸ Are vira vita varera vo vatainai kera tavaararo Eparahaamiva ariara kempukaiqama kero iriqiro vi vai vaiintiva vairave.

Viva mintimakero vaivara are vira vataakera vahara uva vo vataanarave.

Are nena kauqu ainqaa aquukehara virara tihara, Kenaani vatanaaka vatave, Hiti vatanaaka vatave, Amo vatanaaka vatave, Peresi vatanaaka vatave,

Jebusi vatanaaka vatave, Girigaasi vatanaaka vatave, ekaa vi vataru vi amiariraro ai vaintivara vatama varianarove, tianarave.

(Okara 15:18-21)

Are avuqavu kaiqa vare variarvara tira, are nena kauqu ainqaa aqukera tivataanara kia qaqira kaanarave.

⁹ Haaru tinavu kaivaqaukvara Isipini variamanta Isipi vatanaaka vika qoraiqama nimiteha nora maara vikaqaa vate variara are tavaanarave. (Katu Varora 3:7)

Ho tinavu kaivaqaukvara Isipi mini ke Naare Namari vainaini anintaamanta Isipi iqoka vaiinti vika ntaihareka auti variavara are tinavu kaivaqaukvara mpo ike tia uvvara irianarave. (Katu Varora 14:10-12)

¹⁰ Pero vaiintivanove, Isipi nora vaiinti vikave, Isipi vaiinti nahentive,

tinavu kaivaqaukvara qoraiqama nimiteha nora maara vikaqaa vate variavara are vika kahaqama nimitehara nora kaiqa, vo kaiqa vo kaiqa qovarama kehara náivata qoraiqama nimitaanarave. (Katu Varora 7:8-12:32)

Are mintima kaanarara tiro, ai autuvano noraiqama viro vairave.

Maa entaravata ai autuvano nora autuqaima vaivo.

¹¹ Tinavu kaivaqaukvara Naare Namari hini mantaraini variavara are namari viraqi aahara aara autu nimitera vika ntita varera hini mantaraini vuru kaanarave. Viraqaaahaira are Isipi iqoka vaiinti vika ntataqqi aniaka namariqi raqutu kaanarave. Ori aqukaivaro namariqi otu vintemake, vika namariqi otu vuvarave. (Katu Varora 14:21-29; 15:4-5)

¹² Vi entara aatitairaqqaa are quromura vaavi vairaqui vahara, avuni vihara tinavu kaivaqaukvara aara numiqaanarave.

Entaqi iha vaavi ite vairaqui are vahara, tinavu kaivaqaukvara aara ataama nimite variaranarave. (Katu Varora 13:21-22)

¹³ Ho are mintiaqira vuaramanta vika Sainai Aiqinaini anintaavara are naaruvhaira tuvu Sainai Aiqinaqaa vahara, tinavu kaivaqaukvara nena vaiinti nahenti uva tiva nimianarave.

Are vika koqe uva vaiinti nahenti avuqavu ni okarara, vo uva vo uva vika tiva nimianarave.

¹⁴ Are vika tiva nimihara 7 entara, vi entava tinta entama varianarove tivakera, vaiinti nahenti ai uva, vo uva vo uva ho iriate tira, are Mosira ekaa vi uvvara tiva amianarave. (Katu Varora 19:18-23:33)

¹⁵ Tinavu kaivaqaukvara voqamake karara naataa iavara are naaruvhaina kara vika nimiarananta naarave. (Katu Varora 16:4)

Vika namariara voqamake naataa iavara are ori noraqhairs namari qovarama kaaramanta naarave. (Katu Varora 17:1-7)

Are vikara tihara, Te kauqu ainqaa aquke vi vataru ni nimirerave tunara, ne vi vatarama oru vvaraate, tianarave. (Lo 1:21)

¹⁶ Ho are minti minti iaramantavata, tinavu kaivaqaukvara kia ariara noraiqaake iriraiti, vika nái antuqaaqai avateha qora kaiqaqai varaaq viha kia ai uva, vo uva vo uva iriarave.

¹⁷ Vika kia ai uva iriataa imanta vahara, are nora kaiqa, vo kaiqa vo kaiqa vara nimitaanara, viraravata tauruke variarave.

Vika avu aatovano kempukaiqimanta vika nariaraqai iriha tiha, Kaiqe vaiinti vo noraiqama kaariraro viva tinavu tivita varairaque tenavu qaiqaa anirante Isipi vatanaaka paanaa kaiqa vara nimitaare, tiarave. (Kaara 14:1-4)

Vika minti iavaravata, are kia vika qoririma nimitaanarave.

Are Variqavano vahara are vaaka vaiinti qora kaiqa varaa uvvara nunka nimitareva auti variaravave.

Are vaiinti nahenti koqema nimite variaravave.

Ai muntukavano vaiinti nahentiara vaivara kia vikara vaaka arara ite vaivave.

Are vaiinti nahentiara voqama kera aaqurihama nimite variaravave.

Are minti variarvara tira, are kia tinavu kaivaqaukvara qaqira kaanarave.

¹⁸ Vika purumakau qora maraqua/varaha autuke virara tinavu variqave tivake tiha, Maa variqava tinavu Isipiqlihairo tivita varero viri kaivama vaivo, tiarave. (Katu Varora 32:1-4)

Oho, vika minti tiha anomake ai Nora Kotira vehi uva tiva amitaarave.

¹⁹ Vika minti minti iavaravata, are mpo ike ti variaravara tira, are kia vika aahara vataini qoririma karaitira, tota ianantema kera, are aatitairaqaa quromura vaavi vairaqi avuni vihara, tinavu kaivaqaukavara aara numiqe varianarave.

Are entaqi iha vaavi ite vairaqi vaihara, tinavu kaivaqaukavara aara ataama nimite varianarave.

²⁰ Vika ai uva maara kankomake iriate tira, are nena Maraqua koqera vika nimianarave.

Vika qumina vataini variqi vuavara are vo kara, *manaaavata*, namarivata nimiaramanta vika naarave.

²¹ Vika 40 ihiara aahara vataini variqi vuavara are karave vo haika vo haikave vika nimiaramanta vika kia vo haika vo haikara aavoqiarave.

Are mintima kera vika kahaqama nimitaararo vilka utavaaqa kia nihiqiraitiro, qaraaka utavaaqa voqaara vaivaro vika aiquvata kia aiha viraitiro kia noqa virave. (Lo 8:2-4)

²² Are tinavu kaivaqaukavara qaqi kaaramanta vika iqoka raquqi viha vika vo vatanaa vo vatanaaka naatarakeha vika vata varora.

Vika iqoka raquqi viha King Sihoniva raqiku vataara Hesaboni vare,
qaqaa vika iqoka raquqi viha King Okuva raqiku vataara Basaanivata varora. (Kaaranutura 21:21-35)

²³ Are vika airi vainti nimiaramanta opu makau airi vaintemake, vika vaintivara variarave.

Are nena kauqu aqiqaa aqukehara vika kaivaqaukavarara tihara, Vi vatara ni nimirerave, tiana vatara, virara vika vaintivara iqoka raquqi vivi, navutaaka naatarake vi vatara vare oru viraqaa variarave. (Okara 15:5; 22:17, Iosuaa 3:14-17)

²⁴ Vika mini variavara are Kenaani vatanaaka vi vataraqaa variaka naatara nimitaarave.

Are Kenaani vatanaakavata vika avuhainaa vaiintinavuvata vika kauquqi kaaramanta vika nái antuqaqaata varaataa i kaiqara varaarave. (Iosuaa 11:23)

²⁵ Vika ai vaiinti nahenti vaantaavura aututaa vatukara, vo vatuka vo vatuka naatarake vare, navutaaka koqe vatavata vare, vika naavuvata viraqi koqe airaira vairavata vare, ori vauruke namari tanu autu taaravata vare, *orivi* katarivata vare, tava iraaina katarira, vo katari vo katarivata vare, *uaini* ututaa naahora vo naaho vo naahovata varaarave.

Vika navutaaka ia haikara, vo haika vo haika vare, vo kara vo kara naataa imanta naavar vika vaata noruqama taimanta vaiha vika are vo haika vo haika nimianara vare koqema keha variarave. (Lo 6:10-11)

²⁶ Ai vaiinti nahenti mintimake vahavata, vika ai uva raqake ai qoririma amite variarave.

Are Mosiraqaa tivataana uvara tauvaqa utu amite variarave.

Ai paropeti vaiintinavu aninte vikara tiha, Eqaaete. Qora aara qaqira kaate, tiamanta vika vinavuka arukaarave.

Vika qaiqaa qaiqaavata ariara vehi uva ti variarave.

²⁷ Ai vaiinti nahenti minti variara kaara are navutaaka qaqi kaaramanta navutaaka vika naatarake vikaqaa nora maara vate variarave.

Ho ai vaiinti nahenti tinavu kaivaqaukavara nora maaraqi vaiha ai aaraavara are naaruvaini vaihara vika uva irianarave.

Are vika uva irira vikara noraiqaakera aaqurihama nimitehlera vaiinti vonavu nititaara vinavuka nái navutaaka kauquqihai vika ruaruuma nimitaarave.

²⁸ Vinavuka mintiataa ai vaiinti nahenti qaiqaa maateraiqamake vaiha, qaiqaa ai uva raqake variavara qaiqaa are navutaaka qaqi kaaramanta navutaaka qaiqaa vika naatarake vikaqaa raqiki variamanta variarave.

Ai vaiinti nahenti tinavu kaivaqaukavara mintima vaiha vika qaiqaa qora aara qaiqirake ariara tinavu ruaruuma timitaane tiavara are qaiqaa naaruvaini vaihara vika uva irira, are vika qaiqaa aaqurihama nimitehlerama vika ruaruuma nimitaararamanta vika ho variarave.

Are voqama kera aaqurihama nimitaarava varianarara ti, tinavu kaivaqaukavara qaiqaa qaiqaa mintiaqi vi variavara are qaiqaa qaiqaavata vika ruaruuma nimitaarave.

²⁹ Mosiraqaa tivataana uvara qaiqaa iriqi vuate tira, are tinavu kaivaqaukavika rauriha variate tiaramanta, vika nái avu aato kempukaiqamate, kia ai uva iriraiti, are minti minti iate tiana uvara qoririma kaarave.

Vaiinti vovano ai uva iriqiro vi vairava, vi vaiintiva koqema kero variqiro vuanarove.

Ho tinavu kaivaqaukavarava virara kankomake irihavata, vika nái avu aato tintake kia ai uva irireka auti vaiha ai tauvaqa utu amite variarave. (Wkp 18:5)

³⁰ Airi ihi variqira vihara are kia vaaka arara itaivara are vikara qora aara qaqira kaate tivaqira vuanarave.

Ai Maraqravano ai paropeti vaiintinavu kahaqimanta vika ai uva tiva nimiamanta tinavu kaivaqaukavarava aato tintavika voqaara vaiha kia ai uva iriarave.

Vira kaara are vo vatanaa vo vatanaaka qaqi kaaramanta vika tinavu kaivaqaukavarava naatarake, vikaqaa raqiki variarave.

³¹ Are tinavu kaivaqaukavarava navutaaka kauquqi keharavata, are kia vika ekaara qoririma kaanarave.

Are vogama kera aaqurihama nimite variarava varianarara tira, are vika kia ekaara qoririma kera vehi autu taiqa kaanarave.

Are vaiinti nahenti aaqurihama nimitehara koqema nimite variara Variqavama variaro.

³² Mpo, Kotio, are tinavu Variqavano uritarakera variararo ai kempukavanovata uritarakero vairara ti, tenavu vogamake ai aatu qeteha vauro.

Are nena kauqu ainqiqa aqukera tinavu Isareri koqema timitareva tiva taana uvra kia tauru kaanarave.

Ho are mintimake variaravara tira, tenavu nora maaraqi vaunarara kia qumina maarave tiane.

Haaru Asiria vatanaaka avuhainaa vaiintinavu tinavu Isareri qoraiqama timitaa entaraqaahai tenavu nora maaraqi variqi vivi, maa entaravata qaqqiqa nora maaraqi variqi vi vauro.

Tinavu avuhainaakave, tinavu nora vaiintinavuve, ai kaiqa vara amite varia vaiintikave, tinavu paropeti vaiintinavuve, tinavu kaivaqaukave, ekaa ai vaiinti nahentive, tenavu ekaa nora maaraqima vauro.

Are virara iriharama tinavu kahaqiane.

³³ Tenavu Isareri ai uva raqakeha qora kaiqa varau nara kaara are tinavu avuqavuqama kehara tinavu haruanarave.

Tenavu qora kaiqaqai ai autu amite vauraravata, are ekaa enta tinavu avuqavuqama timite varianarave.

³⁴ Tinavu kaivaqaukavarave, tinavu avuhainaa vaiintinavuve, tinavu nora vaiintinavuve, ai kaiqa vara amite varia vaiintikave, vika vika kia are Mosiraqaa tivataana uvra iriarave.

Are vikara minti minti iate tiana uvra kia iriraiti, are vikara rauriha variate tiana uvaravata vika kia iriarave.

³⁵ Haaru are tinavu Isareri avuhainaa vaiinti, vika koqema nimitaaramanta vika ai vaiinti nahentiqa raqiki variavara are nena vaiinti nahenti koqe vata nimiaramanta vika vi vatara nahainaini variqi vuarave.

Vika mini vahavata, vika ai qoririmake kia ai kaiqa vara amitaraiti, vika kia qora okara qaqira kaarave.

³⁶ Are tinavu kaivaqaukvara koqe kara utuke qantuke naate tira, maa vatara vika nimianarave. Ho tavaane. Vate tenavu vi vataraqaa vaiha vo vatanaaka paanaa kaiqaqai vara nimite vaunarave.

³⁷ Tenavu ai uva raqake qora kaiqa varau nara kaara are vo vatanaaka qaqi kaaramanta vika avuhainaa vaiintinavu tinavuqaa raqiki vaiha, tinavu vataqaa vai karara vare variarave.

Vika tinavuqaa raqikiha tinavu sipisipive, purumakauve, vo quara vo quaraqaave, raqikiha vika nái antuqaqaa varaataa imanta vare variarave. Oho, tenavu anomake qoraiqamavi nora maaraqi vauro, tura.

Isareri nai kauqu ainqiqa aquke minti minti irerave tura

³⁸ Vika Kotira aaramake tiha, Tenavu vaaka tuna uvarara iriha, vate tenavu Isareru voohaa uva vateha tentanavu kauqu ainqiqa aqukeha Kotirara quqaa tirerave: Tenavu maa entaraqaahai Kotiva uva tivataira avataqi virerave, turo. Tenavu kia vi uvra qumina noqihai tiraiti, tenavu vi uvra qara ntuvake qara viraqaa tentanavu nora vaiinti nutuvata, Rivaira anku nutuvata, Kotira kaiqa vara amite varia vaiintika nutuvata, vataare. Vi uvava kempukaiqama vuarire ti, tentanavu ringiqohai qara viraqaa taatau kaare, tura.

10

¹ Mintl tivake maa vaiintinavuka nái nutu vi uvaraqaa qara ntuvatora:
Hakariaara maaqu Kamaanira avuhainaa vaiinti Nehemiava.

Kotira kaiqa vara amite vau vaiintinavuka:

² Sedeikaiva, ² Seraiaava, Asariaava, Jeremaiaava,

³ Pasuriva, Amariaava, Malakiaava,

⁴ Hatusiva, Sebaninaava, Malukiva,

⁵ Harimuva, Merimotiva, Obadiaava,

⁶ Danieriva, Ginetoniva, Barukiva,

⁷ Mesulaamiva, Abiaava, Mijaminiva,

⁸ Masiaava, Biligaiva, Semaiaava.

⁹ Rivaira anku vaiintinavu:

Asaniaara maaqu Jesuaava, Henadaatira anku Binuiva, Katmieliva,

¹⁰ Sebaniaava, Hodiaava, Kelitaava, Pelaiaava, Hanaaniva,

¹¹ Mikaava, Rehopiva, Hasabiaava,

¹² Sakuriva, Serebiaava, vo Sebaniaava,

¹³ vo Hodiaava, Baniva, Beninuva.

¹⁴ Nora vaiintinavu:

Parosiva, Pahati-Moapiva, Elamuva, Satuva, Baniva,

¹⁵ Buniva, Asagaativa, Bebaiva,

¹⁶ Adoniaava, Bikivaiva, Adiniva,

¹⁷ Ateva, Hesekiaava, Asuva,

¹⁸ Hodiaava, Hasumuva, Besaiva,

¹⁹ Haripiva, Anatotiva, Nebaativa,

²⁰ Makapiaasiva, Mesulaamiva, Hesiva,

²¹ Mesesabeliva, Sadokiva, Jaduaava,

²² Pelatiaava, Hanaaniava, Anaiaava,

²³ Hoseaava, Hanaaniava, Hasupuva,

²⁴ Halohesiva, Pilhaava, Sobekiva,

²⁵ Rehumiva, Hasapanaava, Maseava,

²⁶ Ahiaava, vo Hanaaniva, Anaaniva,

²⁷ Malukiva, Harimuva, Baanava.

Vi vaiintika nái nutu vi uvaraqaa qara ntuvatora.

Vika vohaa uva vateha qara ntuvatora

²⁸ Vika nái nutu vi uvaraqaa qara ntuvu tomanta ekaa hini vaiintivata, Kotira kaiqa vara amite vau vaiintikave, Rivaira ankuqhah vo vaiintinavuve, vaantaavura qentiqaarraqiki vau vaiintikave, Kotirara ihi tiva amite vau vaiintikave, Kotira Naavuqi kaiqa vare vau vaintikave, ekaa vo vaiinti vo vaiinti vika Kotiva Mosiraqaa tivato uvara iriha kia vo vatanaaka hampata voharaqai vaireka auti vauka vikave, vika naatavarave, vika vaintivara ho uva irukave,²⁹ vika vika nora vaiintinavu hampata vahia vohaa uva tivake vatora. Vika nái kauqu ainqiqaa aqukeha mintima ti:

Tenavu Isareru Kotira uvaqai iriqi virerave. Noravano Kotiva tinavuara vika minti mintima keha nuate tiro, viva nai kaiqa vainti Mosiraqaa tivatai uvara, tenavu kia vi uvara raga karaiti, tenavu ekaa vi uvara iriqi virerave. Tenavu kia mintiraiti, vi uvara raga kaareru, Kotiva tinavuqaa uva vateharo qoraiqama timitaarire.

³⁰ Tenavu kauqu ainqiqaa aqukeha tiha, Tenavu kia tentanavu raavura vika vo vatanaaka tinavu tataaqa vaika nimirerave. Tenavu tentanavu maaqu vika nahenti vara nimirera kia tenavu vo vatanaaka tinavu tataaqa vaikaqhah vara nimirerave. (Katu Varora 34:16)

³¹ Vo vatanaaka Maara Entaqaa koqaa varareka karave airairave vare aniqe kia tenavu vi entaraqaave, ai nora enta voqaave, vi haikara varaainarave.

Tenavu 6 ihiara vataqi kara utuqi vivi, viraqaahai 7 ihiqaa vata qaqi kaariraro kantu variariare. (Kis 23:11)

Vi ihiraqaa tenavu ekaa *dinau* varaainaravata nunka taiqa kaainarave. (Lo 15:1-2)

³² Ekaa vo ihi vo ihi tenavu vohaiqa vohaiqavano *silvaa* ori inaaraiqa nimiasi viraqohai Kotira Naavuqaa koqema keha raqikiate.

³³ Vi monuraqohai vika homa hini aqukeha mpareti vare, Kotira taintaqaa vuru vatevarave.

Vika homa hini aqukeha *uiti* vare, vo enta vo enta Kotira amitevarave.

Vika homa hini aqukeha mati vare, vo enta vo enta Kotira kaintu iha quara amitevarave.

Vika homa hini aquukeha vo haika vare, Maara Entaqaaave, qaraaka tora itaaina entaraqaave, nora enta voqaave, Kotira amitevarave.

Vi monuraqohai vika homa hini aquukeha Kotira kaiqa vare vai vaiintika tenavu Isareri qora kaiqa varaaaina uvarara iriha, Kotira *ofaa* iha quara amitevarave.

Vika homa hini aquukeha vo kaiqa vo kaiqa Kotira Naavuqi qaqi vainara varevarave.

³⁴ Tenavu qumina vaiinti nahentive, Kotira kaiqa vara amite variakave, Rivaira ankuqihaiive, tenavu Noravano Kotiva Mosiraqaa tivatai uvvara iriha, Nora Kotira tinavu Variqa *ofaa* taintaqaas quare ihara vare amiate ti, tenavu *satu* arukeha, vo anku vo anku kaama taari vika nai kaamate entaraqaas iha aqu vareha viri vataate.

³⁵ Tenavu Isareri ekaa vo ihi vo ihi tentanavu naahoqihai kara avuni mpeqaiqinareave, aquitaainarave, kia naraiti, Kotira Naavuqi vuru kaare.

³⁶ Tenavu Isareri Kotiva Mosiraqaa tivatai uvvara iriha, tentanavu qorainti vainti, kara hunka vika ntita vare, Kotira kaiqa vara amite vaika inaini vuru kaari vika vi vaintinavuka Kotira kaama amitaate.

Hoqare avuni vataatai purumakaura qorave, sipisipi qorave, memeraa qorave, tenavu vikavata Kotira Naavuqi vuru kaari Kotira kaiqa vara amite vaika vika Kotira vara amitaate. (Katu Varora 13:2)

³⁷ Vo ihi vo ihi tenavu avuni hoqare *uiti* tegake rukokakima taainara vuru Kotira Naavuqi Kotira kaiqa vara amite vaika nimitaare.

Avuni hoqare aqu itaaina katari tavaravata, hoqare avuni *orivi* vahavera varaterava, hoqare avuni tatite *uainiravata*, tenavu vira vira vuru Kotira Naavuqi Kotira kaiqa vara amite vaika nimitaare.

Rivaira ankuqiraa valintinavu vo vatuka vo vatukaini niha, tinavu hini naaho varareka ivaqe, tenavu tentanavu naaho kaqurutantaqihai vohaiqa rairake vika nimiare. (Kaarentura 18:21)

³⁸ Rivaira anku vika vi naahora varareka imanta Eronira ankuqihai Kotira kaiqa vara amite vaika, vikavata Rivaira anku vika hampata oru vi naahora varaaete.

Ho Rivaira anku vika vi naahora maatara vare, vikavata qaiqaa vi naahora kauqurutan-taqihai rairake vohaiqa vuru Kotira Naavuqi kara vate *rumuraqi* vataate. (Kaarentura 18:26)

³⁹ Isareri vaiinti nahenti vikavata, Rivaira anku vikavata, nái *uitive*, *orivi* vahaverave, *uainive*, nimireka iha, vika vuru Kotira Naavuqi kara vate vai *rumunavuraqi* vataate. Viraqi Kotira kaiqa vara amite varia tanura vonavu vairave. Mini Kotira kaiqa vara amite variakavata, Kotira Naavuqaa maimaraara raqiki variakavata, Kotirara ihi tiva amite variakavata, vaite varianaainive.

Tenavu Kotira Naavu qaqirake tentanavu kaiqaqai varaarorave ti, tenavu Kotira Naavuqaa mintima keha raqikiqi virerave, tura.

„Vi entara ekaa Isareri ruvaqaumavi vaha vi uvvara qara ntura..”

11

Vokukavata Ieruharemini qaiqaa ani vaura

¹ Vi entara Isareri vika nora vaiinti navu Ieruharemini oru vaumanta Isareri airitaha kia Ieruharemini vairaiti, vika Ieruharemi aaqaimi vo vatuka vo vatukaini vaura. Ho Isareri vokikavata katu vare Ieruharemini oru variate ti, vika *satu* arukeha naavu 9navuqi vauka aatarakeha vohaa naavuqi vauka kaamateha, vikara nenavu katu vare Ieruharemini oru variate, tivakeha *satu* aruqi vumanta vo naavu vo naavuqi vauka nái navunaaka mini keha, katu vare Ieruharemini Kotira vatukaqi oru vura.

² Mintumanta vo naavu vo naavuqi vauka vikavata tiha, Tenavuvata katu vare vuataa iraqe Ieruharemini virerave, tumanta Isareri vikaravata quaha keha koqeve tura.

³ Hini Isareri Ieruharemiqi vaumanta hini Isareri nái vatuka, vo vatuka vo vatukaini vaura. Qaqi vaiinti nahentive, Kotira kaiqa vara amite vauka vonavuve, Rivaira ankuve, Kotira Naavuqi kaiqa vare vaukave, Soromonura kaiqa vaiinti vika naintinavuve, vika vo vatuka vo vatukaini vaiha nai vata nai vataqaa vaura.

Iutaai vataini Ieruharemini nora vaiintinavu vauka, vika nutu maantimama vairo:

⁴ Nora vaiinti taaraqanta Iutaara ankuqihai Ataiaaka Maseaaka vaura. Ataiaara okara maantimama vairo:

Ataiaara qova Usiava vauvaro
vira qova Sekaraiaava vauvaro
vira qova Amariaaava vauvaro
vira qova Sefatiaava vauvaro
vira qova Mahalaleliva vaura.

Mahalaleliva Peresira anku vaura.

⁵ Maseara okara maantimama vairo:

Maseara qova Barukiva vauvaro
vira qova Kolu-Hoseva vauvaro
vira qova Hasaaava vauvaro
vira qova Adaiaava vauvaro
vira qova Joiaripiva vauvaro
vira qova Sekaraiaava vauvaro
vira qova Selaara anku vaura.

⁶ Peresira vaintivara Ieruharemini vauka vaireka, 468 vaiinti kempuka iqoka vaiintinavu vaura.

⁷⁻⁹ Benaminira ankuqihai maa vaiintinavuka nora vaiintinavu vaura:

Saluva vo, Gabaiva vo, Salaiva vo, Joeliva vo, Judaava vo, vaura.
Saluva vaumanta Gabaika Salaikaa vira vohaa naare vaura.
Salura qova Mesulaamiva vauvaro
vira qova Joetiva vauvaro
vira qova Pedaiaava vauvaro
vira qova Kolaiaava vauvaro
vira qova Maseaava vauvaro
vira qova Itieliva vauvaro
vira qova Jesaiaava vaura.

Benaminira anku Ieruharemini vauka vaireka, 928 vaiintinavu vaura. Vika vauvaro Sikarira maaqu Joeliva vika nora vaiinti vauvaro Hasenuara maaqu Judaava Ieruharemini *nampa* 2 vatukaqaa raqiki vaura.

¹⁰ Kotira kaiqa vara amite vau vaiintinavuka vika nora vaiintinavu maantima vaura:

Joiaripira maaqu Jedaiaava, Jakiniva,
¹¹ Seraiaava.

Seraiaara okara maantimama vairo:

Seraiaara qova Hilikiava vauvaro
vira qova Mesulaamiva vauvaro
vira qova Sadokiva vauvaro
vira qova Meraiotiva vauvaro
vira qova Ahitupiva vaura. Ahitupiva Kotira kaiqa vara amite vau vaiintikaqihairo qiata vaiintivano vaura.

¹² Vi entara Kotira Naavuqi Kotira kaiqa vara amite vau vaiintika 822navu vaura.

Adaiaava nora vaiinti vovano vaura. Vira okara maantimama vairo:

Adaiaara qova Jerohaamuva vauvaro
vira qova Pelaliaava vauvaro
vira qova Amasiva vauvaro
vira qova Sekaraiaava vauvaro
vira qova Pasuriva vauvaro
vira qova Malakiaava vaura.

¹³ Vi ankukaqihai 242 vaiintinavu nai naavu nai naavuqi vaukaqaa raqiki vaura.

Amasaiva nora vaiinti vovano vaura. Vira okara maantimama vairo:

Amasaira qova Asareliva vauvaro
vira qova Asaiva vauvaro
vira kaivaqava vo Mesilemotiva vauvaro vira kaivaqava vo Imeva vaura.

¹⁴ Vi ankukaqihai 128 vaiinti kempuka iqoka vaiintinavu vauvaro vika qiata vaiinti Hagedolimura maaqu Sapadieliva vaura.

¹⁵ Rivaira ankuqihai vika nora vaiintinavu maantima vaura:

Semaiaava. Semaiaara okaravano maantimama vairo:
Semaiaara qova Hasupuva vauvaro
vira qova Asarikaamuva vauvaro
vira kaivaqava vo Hasabiaava vauvaro
vira kaivaqava vo Buniva vaura.

¹⁶ Sabetaika Josabaatika.

Vitanta naitonta kena Rivaira anku vika qiata vaiintitanta vaiha, Kotira Naavu naanteqaraini kaiqa vare vau vaiintikaqaa raqiki vaura.

¹⁷ Mataniava. Mataniara qova Mikaava vauvaro Mikaara qova Sapadiva vauvaro Sapadira kaivaqava Asaapiva vaura. Mataniava Kotira Naavuqi vaiharo vo vaiintinavuqaa raqiki vaumanta vinavuka ihi tiha Kotira aareha virara koqema iaro tivakeha vira quahama amite vaura.

Bakabukiaava. Bakabukiaava Mataniara kahaqi vau vaiintivama vaura.

Apadaava. Apadaara qova Samuaava vauvaro Samuaara qova Galaaliva vauvaro Jedutuniva vira kaivaqava vaura.

¹⁸ Kotira vatuka Ieruharemiqi Rivaira anku 284 vaiintinavu vaura.

¹⁹ Kotira Naavu qentiqa maimaraara raqiki vau vaiintika vika qiata vaiinti vaireka, maantima vaura:

Akupiva, Talamoniva. Vika anku 172 vaiintinavu vaura.

²⁰ Isareri vaiinti nahenti hinikukave, Kotira kaiqa vara amite vauka hinikukave, Rivaira anku hinikukave, vika Iutaini vo vatuka vo vatukaqi vaiha, nai vataqaa nai vataqaa raqikiha vaura.

²¹ Kotira Naavuqi kaiqa vare vau vaiintika, vika Ieruharemini Ofelive tunaini vau-manta Sihaaka Gisapaaka vika kaiqaqaa raqiki vaura.

²² Rivaira anku vika qiata vaiinti Usiva Ieruharemini vaura. Usira okara maantimama vairo:

Usira qova Baniva vauvaro
vira qova Hasabiaava vauvaro
vira kaivaqava vo Asaapiva vauvaro
vira kaivaqava vo Mataniava vauvaro
vira kaivaqava vo Mikaava vaura.

Asaapira ankuqiraaka Kotira Naavuqi ihi ti vau vaiintika vaura. ²³ Avuhaina vau vaiinti viva vika kaiqara iriharo minti mintimake kaiqa varaate tumantara ti, vo enta vo enta vika viva tivatora avataqvi vi vaura.

²⁴ Vaiinti vo Mesesabelira maaqu Petahiaava Pesia vataini avuhainaara *opisiqi* vaharo Isareri vikara iriharo vika kaiqa kahaqama nimite vauva vaura. Petahiaara kaivaqava vo Seraava vauvaro Iutaava Seraara qova vaura.

Vo vatuka vo vatukaqi vaukara tura

²⁵ Airi vaiinti nahenti nai kaiqave naahove vaura tataaqa vo vatuka vo vatukaqi vaura. Iutaara anku hinikuka, Kiriati-Aba vatukave, Diboni vatukave, Jekapaseli vatukave, vi vatukara tataaqa vau vatukaraqvata, vaura.

²⁶ Iutaara anku hininavu vo vatukanavu Jesuaave, Moladaave, BetiPelette, ²⁷ Hasa-Suaalive, Besebave, Beseba tataaqa ututumate vau vatukanavurave, viraqi viraqi vau-manta ²⁸ hinikuka vatuka vonavu Sikiraakive, Mekonaave, Mekonaataaqa vau vatukar-ave, viraqi viraqi vaumanta ²⁹ vokuka vatuka vonavu Eni-Rimonive, Soraave, Jamutuve ³⁰ Sanoaave, Adulaamuve, viraqi viraqvata, vi vatukara tataaqa vau vatukaraqvata, vaumanta hinikuka Lakisiqi vaumanta hinikuka Lakisi tataaqa vau vataraqaa vaumanta hinikuka Asekaaqi vaumanta hinikuka Asekaa tataaqa vau vataraqaa vaura. Iutaara ankunavu mintimake viraqi viraqi vaura.

Vika varia vatava vaireva, *sauti* mantara Beseba vatukaihairo oru viviro, *noti* man-taraini Hinomu Uqitaini vuru taiqora.

³¹ Mintumanta Benaminira anku hinikuka vatuka vonavu Gebave, Mikimaasive, Aiyaave, Betelive, mini vaumanta hinikuka Beteli tataaqa vau vatukaraqvata.

³² Hinikuka vatuka vonavu Anatotive, Nopive, Ananiaave, ³³ Hasove, Ramaave, Gitaimuve, ³⁴ Haditive, Seboimuve, Nebalaative, ³⁵ Lotive, Onove, mini mini vaumanta vokuka uqitaini, Ge-Harasimive tunaini vaura.

³⁶ Vi entara Rivaira anku hinikuka Iutaara ankunavu vau vataraqaa vaumanta nora vaiintinavu vikara mintima ti: Ne katu vare oru Benaminira ankunavu varianaini variate, tumanta vika nora vaiintinavu tuntemake, katu vare mini Benaminira ankunavu hampata oru vaura.

12

Kotira kaiqa vara amite vaukavata Rivaira ankuvata vika nutu

¹ Haaru Seatielira maaqu Serubabelivavata, Kotira kaiqa vara amite vauka qiata vaiinti Iosuaavavata, vitanta Babironi mini ke orurante Ieruharemini anireka umanta airi vokuka Kotira kaiqa vara amitokavata, Rivaira ankuqihai vokukavata, vitanta hampata Ieruharemini anura.

Kotira kaiqa vara amite vauka vika nutu:

Seraiaava, Jeremaiaava, Esraava,

² Amariaava, Malukiva, Hatusiva,

³ Sekaniaava, Rehumiva, Meremotiva,

⁴ Idova, Ginetoiva, Abiaava,

⁵ Mijaminiva, Madiaava, Biligaava,

⁶ Semaiaava, Joiaripiva, Jedaiaava,

⁷ Saluva, Amokiva, Hilikiava, Jedaiaava.

Kotira kaiqa vara amite vauka qjata vaiinti Iosuaava vau entara nora vaiinti vinavuka vaiha nái kenuakaqaa raqiki vaura.

⁸⁻⁹ Vi entara Rivaira anku Babironihai orurante anuka, vika nutu:

Jesuaava, Binuiva, Katmieliva,

Serebiaava, Judaava, Mataniava,

Bakabukiaava, Unova.

Mataniava nai kenuaka hampata vokukaqaa raqiki vaumanta vika Kotirara koqeve tu ihira tireka hoqarama tomanta Bakabukiaaka, Unoka, náitonta kenuaka hampata vika avataqi vi vaura.

Iosuaara anku

¹⁰ Iosuaara okara maantimama vairo:

Viva Joakimira qova vauvaro

Joiakimiva Eliaasipira qova vauvaro Eliaasipiva Joiadaara qova vauvaro ¹¹ Joiadaava Jonataanira qova vauvaro Jonataaniva Jaduaara qova vaura.

¹²⁻²¹ Kotira kaiqa vara amite vau vaiintika qjata vaiinti Joiakimiva vaura. Viva vau entara Kotira kaiqa vara amite vauka vika nutuvata, vika anku nutuvata, maantimama vairo:

Vika nutu Vika anku nutu

Meraiaara Seraiaara

Hananiaara Jeremajaara

Mesulaamira Esraara

Jehohanaanira Amariaara

Jonataanira Malukira

Iohepira Sebaniaara

Atanaara Hárímura

Helakaira Meraiotira

Sekraiaara Idora

Mesulaamira Ginetonira

Sikarira Abiaara

(autu kia vairo) Miniaminira

Piltaira Moadiaara

Samuaara Biliagaara

Jehonataanira Semaiaara

Matenaira Joiaripira

Usira Jedaiaara

Kalaira Salaira

Ebera Amokira

Hasabiaara Hilikiaara

Netanelira Jedaiaara.

²²⁻²³ Kotira kaiqa vara amite vauka qjata vaiinti Eliaasipiva vauvaro vira naantiara, Joiadaava vira vatuka varova vauvaro, vira naantiara Jonataaniva vira vatuka varova vauvaro, vira naantiara Jaduaava vira vatuka varova vaura. Ho vika vika vau entara vaiinti vonavu *vuku* voqi vika nora vaiintinavu nutu qara ntuvaqi vivi, Dariusiva Pesiaqaa raqiki vau entava qovarama vu entaraqaahai kia qaiqaavata vika nutu qara ntuvatorata.

Rivaira ankuqihai inaara anku, vo anku vo anku vauka nutu *vivukuraqi* qara ntuvaqi vivi, Eliaasipira nainti Jonataaniva qjata vaiinti vau entara kia qaiqaavata qara ntura.

Rivaira anku vo kaiqa vo kaiqa nimura

²⁴ Rivaira anku qjata vaiintinavu Hasabiaavave, Serebiaavave, Katmielira maaqu Jesuaavave, vinavuka Rivaira ankuqihai taara anku rairake tiha, Tinavu kaivaqava Devitiva, Kotira vaiinti taruva tintemake, tenavu niara mintima ti: Ne hinivano ihi hoqaramate tivaqiqi vimanta hinivano ni avataqi viha Kotirara koqeve tivaqiqi viha vira autu tuaheraqiqi vuate, tura.

²⁵ Mataniavave, Bakabukiaavave, Obadiaavave, Mesulaamivave, Talamonivave, Akupiavave, vinavuka Kotira Naavu qentiqaa maimaraara raqiki vaiha, qenti tataaqa *rumunavu* vauraqiqi vo haika vo haikavata vatoraqaa raqiki vaura.

²⁶ Joiakimiva vau entara maa vaiintinavuka qjata vaiintinavu vaura:

Joiakimiva. Viva Iosuaara maaqu vauvaro Iosuaava Jehosadaakira maaqu vaura.

Nehemiava. Viva *kamaanira* kaiqa vaiinti avuhainaava vaura.

Esraava. Viva Kotira kaiqa vara amite vau vaiintiva vaiharo Kotira uva qara ntuvatora kankoma kero iri vauva vaura.

Ieruharemi vaantaavura quahama amitora

²⁷ Ieruharemi vaantaavura autu vuru taiqake, vo entaqaa ekaa vaiinti nahenti ruvaaquamivi quaheha vaantaavura virara Kotira vaantaavurave tura. Vika mini ruvaaqihia, Rivaira anku vonaini vonaini vauka naaramake tiha, Nevata tinavu hampata ani Kotira autu tuaheraqi viha, ihi tivaqi viha, nenta *kitaave, baraasi* tanuqira hini hini kauquqi tuateha ruqutuqi vuante, tivake hihai hihai vika ntita vare Ieruharemini vuru kora.

²⁸⁻²⁹ Rivaira anku ihi ti vauka, Netofa vatukave, Beti-Giligaali vatukave, Geba vatukave, Asamaveti vatukave, vo vatukave, vika hihai hihai ani Ieruharemini ruvaaquamivi vaura. Ekaa vauka vinavuva Ieruharemi tataqa vaura.

³⁰ Kotira kaiqa vara amite vaukavata, Rivaira anku vonavuvata, vika nái avu aato muntuka hiqe okarara iriha nái naane hiqamake, viraqaahai vika vaiinti nahentivata, vaantaavuravata vira qentinavuvata hiqama nimitora.

³¹ Ho te Nehemiaka vaantaavura viraqaa vaiha, Iutaa qjata vaiinti vika ruvaaquamake tiha, Nenavu rairavi taara anku autuke Kotirara koqeve tivaqi viha, vira autu tuaheraqi viha Ieruharemi vaantaavura vaura virante airante iate, turaro vo ankuvano ti kauqu tanaraihairo oru viro Raha-Qenti vaunaini oruntora.

³² Hosaaava, Iutaa qjata vaiinti hinikuka hampata vika avataqi vura. ³³⁻³⁵ Vinavuka naantiaraini Kotira kaiqa vara amite vauka vonavu *aanumaara/noma* vuqaqiqi viha oru vi vaura. Vika nutu maantimama vairo:

Asariaava, Esraava, Mesulaamiva, Judaava, Benaminiva, Semaiaava, Jeremaiava.

Vinavuka naantiaraini Sekaraiaava oru vi vaura. Sekaraiaara qova Jonataaniva vauvau vira qova Semaiaava vaura.

Mataniaava, Mikaaiaava, Sakuriva, Asaapiva, vinavukavata Sekaraiaara kaivaqaukavara vaura.

³⁶ Sekaraiaava vumanta vira navunaaka vonavu vira avataqi vura. Vika nutu maantimama vairo:

Semaiaava, Asareliva, Milalaiaava, Gilalaiva, Maiva, Netaneliva, Judaava, Hanaaniva.

Vinavuka vo qara vo qaramake ihi tiha ruquti vau haikara totaqi vi vaura. Haaru Devitiva Kotira vaiinti taruva, viva ihi tiharo vi haikara varakeharo ruqutiharo ihi tura. Esraava Kotira uva qara ntuvatova vika avuni vi vaura.

³⁷ Vi ankuva oru vivi, Aruvu-Namari-Qenti vaunaini orunte, Devitira vatukaini vi vau iriragaqaa orunte, vira naavu ori aatarake, qaiqaa vika vaantaavuraqaa oru vivi, kuari avu urinaini Namari-Qenti vaunaini oruntora.

³⁸ Vi ankuva kauqu tanaraini vuvaro vo ankuvano kaanaaqaini vaantaavura vaura viha, Kotirara koqeve tivaqi vi vaura. Vi ankuva vumanta te Nehemiaka hini vaiinti nahenti hampata vika avataqi vunara.

Ho tenavu vaantaavura vaura oru vivi, *Sitopu Tauaave* tura aatarake, Nora Vaantaavurave tunaini orunte, ³⁹ viraqaahai Efaraimu-Qentine, Jesana-Qentine, Havuka-Qentine, Hananeria *Tauaave*, 100-Iqoka-Vaiinti *Tauaave*, Sipisipi-Qentine turavata ori aatarake, viraqaahai tenavu oru vivi, Kotira Naavu qenti vaunaini orunte mini vaunara.

⁴⁰ Ho taara anku vitanta hihai hihai Kotirara koqeve tu ihira tivaqi vivi, Kotira Naavu vaunaini vohaaraqi ruvaaquma vumanta tevata qjata vaiinti hinikuka hampata viraqiqi vaunara.

⁴¹ Kotira kaiqa vara amiteha *aanumaara/noma* vuqae vauka Eliakimivave, Maseaavave, Miniaminivave, Mikaaiaavave, Elio-Enaivave, Sekaraiaavave, Hanaaniavave, vinavuka ti hampata vura.

⁴² Vonavu ti hampata vuka nutu maantimama vairo:

Maseara, Semaiaara, Eleasaara, Usira, Jehohanaanira, Malakiaara, Elaamura, Esera. Jesirahiaava vikaqaa raqiki vaumanta vika ihi tivaqi vi vaura.

⁴³ Vi entaraqaa taara ankuvano Kotira Naavu vaunaini vohaaraqi avituma vumanta vo *ofaa* vo *ofaa* vare Kotira iha quara amitora. Kotiva vaiinti nahenti muntuka koqema nimitorara ti, ekaa vaiinti nahenti voqamake quaheha vaura. Vika Ieruharemini quaheha uva *nontanta/otata* tura niaraini vaukavata ho irura.

Vaiinti nahenti Rivaira ankunavuvata Kotira kaiqa vara amite vaukavata kahaqura

⁴⁴ Vi entara vika vaiinti vonavu kaama tomanta vinavuka Kotira Naavuqi *rumu* vonavuqaa raqiki vaura. Vaiinti nahenti avuni aquito katari tavarave, avuni qantuto

uitirave, kauqurutantaqihai rairake vohaiqa Kotira amito naahorave, vi haikara vi haikara vinavuka vare *rumu* vinavuraqí vate vaura.

Vinavuka oru vo vatuka vo vatuka tataaga vau naahoraqihai Kotira amito karara vareha *vuru* vi *rumunavuraqí* vate vaura. Kotiva Mosiraqaa tivato uvarara iriha, vika Kotira kaiqa vara amite vaika karave, Rivaira ankunavu karave variarire ti, vi karara ruuvaaqumake vate vaura. Ekaa luitaini vau vaiinti nahentika vinavuka kaiqara quaheha vaura.

⁴⁵ Kotira kaiqa vara amite vaukavata, Rivaira ankuvata, vika Kotiva tivato uvvara iriha, avu aato muntuka hiqe okararave, vo okarave, ekaa vi okarara autuqí vi vaumanta Kotira Naavuqí ihi ti vau vaiintikavata, Kotira Naavu qentinavuqaa raqiki vaukavata, vika nái kaiqa koqema keha varora. Haaru King Devitiva nai maaqu Soromonukantiro tivato uvvara avateha, vika nái kaiqa avuqavuqama keha varora.

(1 Sto 25:1-8, 26:12)

⁴⁶ Haaru King Devitika Asaapika vau entaraqaahai tinavu kaivaqaukavara vonavu ihi tu okarara kankomake tave vauka ihi ti vaukaqaa raqiki vaumanta vika Kotira autu tuahere vau ihiravata, Kotira quahama amite vau ihiravata, tivaqí vi vaura.

⁴⁷ Ho Serubabelika Nehemiaka vau entaravata, Isarerí vaiinti nahenti vo enta vo enta nái kara rairake hini vare Kotira ihi tiva amite vaukavata, Kotira Naavu qentiqa maimaraara raqiki vaukavata, *vuru* nimi vaura. Mintiha vika kia Rivaira ankuara tauru karaiti, vikaravata kara raira keha nimite vaumanta, Rivaira anku vika Eronira ankuara iriha hini rairake nimite vaura.

13

Isarerí vo vatanaaka hampata vohaaraqi vaivorave tura

¹ Vi entara vaiinti nahenti ruuvaqumavi vaumanta vo vaiintinavu Kotiva Mosiraqaa tivato uvvara vika kaara ntuvu nimitaqi viha vo uva ranta kovaro vi uvava mintima tiro:

Amoni vatanaakavata, Moapi vatanaakavata kia ho Kotira vaiinti nahenti Isarerí hampata vohaaraqi avitumamvi vaivarave. Te qioqama tauro, tura. (Lo 23:3-5)

² Vi uvvara okara maantimama vairo: Haaru Isarerí Isipiqaqí ihi ami vauvanta Amoni vatanaakavata Moapi vatanaakavata kia karavata namarivata Isarerí nimiraiti, vika paropeti vaiinti vo Balaamira, koqaa amiha tiha, Are Kotira aarairaro viva Isarerí anomá kero qoraiqama nimitaarie tura. Vika minti tuvarovata, Kotira kia Balaamira qaqi kovaro Balaamira kia ho vi uvvara qora uva tiraitiro, viva Kotirara Isarerí koqema nimitaane tui uvaraqqai tura. (Kaara 22:1-6)

³ Ho Isarerí vika vi uvvara kaara ntura iri, viraqaahai vika tiha, Oho, maa entaravata ekka vo vatanaao vo vatanaaka vika kia ho tinavu Isarerí hampata vohaaraqi variate. Tenavu qioqama tauro. Vika nariara vaiqe tenavu Isarerí tentaranavu vairerave, tura.

Nehemiava vo haika vo haika qaiqaa avuqavuqama kora

⁴ Vi entara Kotira kaiqa vara amite vau vaiintiva vovano, Eliaasipiva Kotira Naavuqi airairave, karave, vate vau *rum unavuraqí* raqiki vaura. Vi vaiintiva vukaiqamakero vo vatanaa vaiinti Tobiaakkantiro tontiqama kero vaura. (2:10)

⁵ Ho Eliaasipiva qaqi kovaro Tobiaava vo vatanaava Kotira Naavu nora *rumu* voqi oru vaura.

Kotira amito *uitirave*, koqe mura unta iainarave, Kotira Naavuqi kaiqa vare airairarave, Kotira kaiqa vara amite vauka nimito kararave, *uitive uainive orivi* vahaverave rairake kauqurutantaqihai vohaiqa Rivaira ankuvata, Kotira ihi tiva amite vaukavata, Kotira Naavuqaa maimaraara raqiki vaukavata nimitorave, vi haikara vi haikara tota vi *rumuraqí* vuru vate vaura.

⁶ „Ho Eliaasipiva Tobiaava qaqi kovaro viva vi *rumuraqí* vaura.“

King Atasekesisiva Babironiqaa raqikuva 32 ihiara raqikiqiro vi vau entara te Nehemika kia Ieruharemini vairaiti, te kaiqa varaua uvvara King Atasekesisira tiva amirera Plesia vataini vunara. Te mini oru vauraro viva vo enta tiriara homa are qaiqaa maaqaini vinarave, tumanta ⁷⁻⁸ te orurante Ieruharemini anunara.

Te Ieruharemini ani vaiha Eliaasipiva Tobiaava qaqi kovaro viva vi *rumuraqí* oru vau uvvara iruraro ti tirara itomanta te tiha, Oho, Eliaasipiva qorahaama autivo, tivake, oru Tobiaava u haikara ekaa vara veva vahaqaqaini aquaqumake, ⁹ viraqaahai te vokukara tiha, Vo vatanaava maa *rumura qoraiqama* kaivo. Tinavu maara okarara iriha nenavu vi *rumunavura* hiqama kaivaro ho variarire. Viraqaahai Kotira Naavuqi Kotira kaiqa vara amite airairarave, vaiinti nahenti amite *uitiravata*, mura koqe unta iainaravata, qaiqaa viraqí vuru vataate, ti.

¹⁰ Ho vo uvavata tumanta te irunara. Vaiinti nahenti Rivaira ankuvata Kotira Naavuqi ihi tiva amite vaukavata karave vo haika vo haikave kia nimura kaara vika anirante nái naaho kaiqa varareka vura.

¹¹ Te vi uvara iri, viraqaahai te vikaqaa raqikuka nitihā tiha, Aqao, nenavu Kotira Naavuqaa koqemake raqikiataarave, tivake Kotira ihi tiva amite vaukavata, Rivaira anku vonavuvuta, naahoiq vuinalhai qaiqaa ntita vare Ieruharemini viri ke vinavukara tiha, Ne nenta kaiqa qaiqaa varata, turamanta ¹² vika qaiqaa kaiqa vare vaumanta lutaā vika qaiqaa *uitive, uainive, orivi* vahaverave, rairakeha, kauqurutantaqihai vohaiqa Kotira Naavuqi vuru ke vaura.

¹³ Viraqaahai te vaiinti vonavu vi *rumunavuraqaa* raqikiate ti, Kotira kaiqa vara amite vau vaiintira Selemiaarave, Maara okara kankoma kero iru vaiintira Sadokirave, Rivaira ankuqihainaara Pedaiaarave kaama taunara.

Vovanopata vinauvuka kahaqiarire ti, te Hanaaniravata kaama taunara. Hanaaniva Sakura maaqu vauvaro vira naaqava Mataniava vaura.

Te kankomake iruramanta vi vaiintinavuka kia muara vararaiti, avuqavuqama keha ekaa vi karara rairakeha nái kenuaka nimi vαιintika vaura.

¹⁴ Mpo ti Variqavaavo, te ai Naavuaravata, vaiinti nahenti ai autu koqemake tuahera keraravata irihama, vi kaiqara vi kaiqara vara amitaunara virara irihara, kia tauru karaitira, virara qaqi iritaane, tunara.

¹⁵ Vi entara te Iutaini vaiha tavauramanta Maara Entaqaa vaiinti vonavu nái *uaini* tava hiqitora varake aiquqohai rakakavuma keha tati vaura. Vokukavata *uitive, uaini* namari taque, *uaini* tavave, *fiki* tavave, vo karave, vi haikara vi haikara vare vuru nái donkinavuqaa rumpakeha vare vuru Ieruharemini ke vaurave. Vika minti vaura kaara te vikara rauriha variate. Ne Maara Entaqaa vi haikara nimiha monu varevorave, tunara.

¹⁶ Vaiinti vonavu vevara Taiahinaaka Ieruharemini uru vauka, vika vevaihai havukave, vo haika vo haikave, vareha Maara Entaqaa Ieruharemiqi vaukaqaa vuru keha monu vare vaura.

¹⁷ Vika minti vaura kaara te Iutaa nora vaiintinavu nitihā tiha, Nenavu nana qora kaiqae Maara Entaqaa vare variavo? Nenavu Maara Entaqaa qoraiqamake variamanta vaiinti nahenti Maara Entaqaa virara qumina enta vaivo ti variarave. ¹⁸ Ni kaivaqaukavara vohaa qaramake mintura kaara Kotira vo vatanaaka qaqi komanta vika Ieruharemi vehi autu taiqa korave. Kotira qaiqaa arara itairaro viva tinavu Isareru ruqutuarire tie, ne Maara Entaqaa qaiqaa minti variavo? ti.

¹⁹ Te minti tivake kempukaiqamake tiha, Ne tavaivaro kuari ruhunkireva iraro Maara Entavano hogarama tareva inaraqaa ne Ieruharemi vaantaavura qentinavu ekaa tinta taate. Tintate vaivaro Maara Entavano taiqa viramanta qaiqaa qenti vinavura qantua kaate, ti. Minti tivake te tenta vaiinti vonavu ekaa qenti vinavuraqaa ke, vikara tiha, Maara Entaqaa vo haika vo haika aaqaihai vare Ieruharemiqi uriqetevorave ti, ne maimaraara raqikiha variate, ti.

²⁰ Te minti tivake vaiha tavauramanta vohaa tataae taara tataae vaiinti vonavu vo airaira vo airaira viri nimiha monu varare tivake anuka ani Ieruharemi vaantaavura tataaga aaqaini vaiteha qenti qantuarera veka vaura.

²¹ Mintumanta te vikara tiha, Rauriha variate. Ne nantihae vaantaavura tataaga vaite variavo? Ne qaiqaa mintivera, ne ti okara tavevarave, ti. Te minti turamanta vika kia qaiqaavata Maara Entaqaa anura.

²² Viraqaahai te Rivaira anku vonavuara mintima ti: Nenavu avu aato muntuka hiqe okarara iriha, nenta naane hiqamake, viraqaahai oru vaantaavura qentinavuqaa maimaraara raqiki vaimanta vaiinti nahenti Maara Entaqaa Kotira qioqama tai uvara kia raqa kaate, tunara.

Kotio, ai muntukavano vaiinti nahentira vogama kero vairara tira, are te vi kaiqaravata varaukana iritehara ti aqurihama timitaane, turo.

²³ Ho vi entara te tavauramanta Iutaa vaiinti vonavu vo vatanaa nahentinavu, Asadotihinaa nahentive, Amonihinaa nahentive, Moapihinaa nahentive, vika varateha vaura. ²⁴ Vika vainti hinikuka Asadoti uvave, vo vatanaaka uvave tiha kia tinavu uvavata ho turave. ²⁵ Mintura kaara te orunte vi vaiintinavuka nitihā Kotira aareha tiha, Vi vaiintinavuka qoraiqama nimitaane, tivake, hini vaiintinavu te ruqutuke vate, vika qita kaukivata *nuqu/muqu* ke, viraqaahai te kempukaiqamake vikara tiha, Ne kauqu aqiqaa aqukeha Kotira autuqaa mintima tiate: Tenavu kia qaiqaavata vo vatanaa nahentie vararaiti, tinavu vaintinavu vataanaa vaintie nahentie nimirerave vararerave, tiate, ti.

²⁶ Minti tivake te qaiqaa vikara tiha, Vo vatanaa nahenti varatora kaara haaru King Soromonuva Kotira uva raqa kero qoraiqama vurave. Viva avuhainaava noravano

vauvaro kia avuhainaava vovanovata vira voqaara vaura. Kotira muntukavano virara vauvaro Kotiva vira noraiqama kovaro viva ekaa Isareriqaa raqiki vaurave. Viva nora vaiintivano vaiharovata, viva vo vatanaa nahentinavu varatero vaumanta vinavuka vira avu aato hampiqama kora kaara viva Kotira uva raqa korave. ²⁷ Nenavuvata tinavu Variqa qoraiqama amiteha vo vatanaa nahentinavu varate variavo. Hauri te iriari ne qaqqai mintiaqi vivorave, tunara.

²⁸ Eliaasipiva Kotira kaiqa vara amite vauka qiata vaiinti vauvaro vira maaqu vo Joiaadaava vo vatanaa nahenti, Sanbalaatira raavura Beti-Horonihainaa nahenti, varatero vaura. Mintura kaara te vi vaiintira tentanavuqihai qaqqini teqa keha virara kia qaiqaavata Ieruharemi maaqi variane, tunara. (4:1)

²⁹ Viraqaahai te Kotira aareha tiha, Kotio, vi vaiintinavuka mintiha ai kaiqa vara amite variaka hini kiakavata qoraiqama nimitaavo. Haaru are nena kaiqa vara amitokaravata, Rivaira anku volukaravata, vohaa vahara uva vataanara, virara vinavuka kia noraiqaake iriraiti, vi uvara raqakeha ai qoraiqama amitaavo, ti.

³⁰ Mintimake viraqaahai te ekaa vo vatanaa vika vato haikava tinavu Isareri avutaqi variantorave ti, ekaa vi haikara vara qaqqini kaunararave.

Kotira kaiqa vara amite vaukavata, Rivaira anku vonavuvata, vika vohaiqa vohaiqvano nái kaiqa vare okarara kankomake iriha, vi kaiqara vi kaiqara naitaramake varaqi vuate ti, te vikara minti mintimake nenta kaiqa varaqi vuate tunara.

³¹ Miti tivake te vaiinti vonavuara ninta kaamate entaraqaa ne iha teqake vuru vataimanta Kotira *ofaa* iha quara amitaqi vuate, ti. Miti tivake te vaiinti nahentiara ne hoqare avuni mpeqaiqaina naahorave, hoqare avuni aqu itaaina katari tavarave, vareha vuru Kotira amitaate, tunara.

Mpo Kotio, Te ekaa vi kaiqara vi kaiqara varauunara virara iritehara are tiriara quahehara variane, turo.

ESTAA (*Esther – Esta*)

Estaava Isareri vatanaa nahenti vovano vaura. Vi entara Isareri vatanaaka vaumanta vika navutaka iqoka raquqi viha vika naatarake vika rumpa vare vuru Pesia vataini kora. Vi entara Pesia vatanaakavata Midia vatanaakavata vohaarraqi tampamavi vaiha kempuka vatanaaka vaura.

Ho vi vatanaaka Isareri naatarake rumpa vare vuru Pesiaini komanta Isareri mini variqi vuvaro vika navutaa vaiinti vovano vika qoraiqama nimitareva auti vaura. Mintuvavar KoTiva Estaara qaqi kovaro viva noruqama viro vi vataraqahaaina avuhainaa vaiinti naata vovano vaura. Estaava avuhainaara vira naata vaiharo kia nai qaqi variainarara noraiqaakero iriraitiro, viva nai navunaaka vairara noraiqaakero iriharo vika kahaguvaro vira navutaara uvavano kia kempuka vuvaro viva kia Isareri vatanaaka qoraiqama nimitora.

Maa vukura qara ntuvato vaiintiva Isareri vatanaakara Iutaa vatanaakave tura.

Kuini Vasaativa nai vaati uva raqakora

¹⁻² King Sekesisiva Pesia vataini nora vatuka vo Susaaqi vaiharo ekaa 127 provinsiqaa raqiki vaura. India vataihairo vo provinsi vo provinsiqaa raqikiqiro viviro, vuru Itiopia vataini kora.

³ Viva taaramo ihiara raqikiqiro viviro, viraqahaairo viva nora kara autukero vo vata vo vataqaa noraiqukave, kamaanira *opisiqi* kaiqa varokave, vika naarama komanta anumanta Pesia iqoka vaiinti noranavuvata, Midia iqoka vaiinti vika noranavuvata, vi karara nareka anura. ⁴ Vika hihai hihai ani ruvaaqumavi vaiha vi karara 6 toranavuara namaqi vi vuvaro avuhainaaa vaiintivano vika ti kempuka, vo kempuka vo kempuka tavaate tiro, ekaa nai airaira, monuve, tavunave, vo haika vo haikave, vika numiqomanta tavora.

⁵ Nora kara no entanavuva vuru taiqa vuvaro viraqahaairo avuhainaaa vaiintivano Susaa vatukaqi vauka, airi airaira vatokave, kia airi airaira vatokave, vika vikara iriharo viva qaqqaa kara vo autukero vohaa *uiki* vi karara vika hampata namaqiro vura. Avuhainaara naavu aumanto kaqava ututora, mini vika ruvaaqumavi vaiha vi karara nora.

⁶ Kara vira nareka unaini maantimake *vahehematora/vaataiqamatora*: Vika vo ori vo ori tanugira, egarorive, naare orive, ihiqa orive, varake vatuka vikanta ntavate, vatuka auvhainta ori pohi naavu kaara voqara, vo pohi vo pohi vaavi aratova vuvaro ekaa pohi vira qiataini *silvaa ringi* ampakuma tova vaura. Vika ekaa *ringi* viraqi naare naaqunta ruqiake vate, viraqaa hanta tavunave, ihiqa tavunave, *vahehemake/vaataiqamake* hiritora.

Mintimake viraqaahai vika oquivi taintara, vo tainta vo tainta vatuka voqaa voqaa vuru vatora. Hini tainta *kori* oriqohai aututo taintava vuvaro hini tainta *silvaa* oriqohai aututo taintava vaura.

⁷ Mintimake kara nareka unaini vaataiqama tomanta vika mini ruvaaqumavi kara ne vaumanta, avuhainaara kaiqa vaiintinavu vi aninha vika *kori kaapuqi uaini* qihiake nimi vaumanta ne vaura.

Vi *kaapuva* vaireva, kia vohaa qara u *kaapuva* vairaitiro, vo qara vo qara u *kaapuva* vaura. Avuhainaava nai *uaini* parumakero nimumanta nora. ⁸ Viva nai kaiqa vaiintinavu tiva nimiro tiharo, Ne *uaini* qihiake nimimanta vika nai antuqaaqaa naate, tura.

⁹ Vika mini kara ne vuvaro avuhainaara naavuqii vira naata Kuini Vasaativa, vivavata nai hana nahentiara iriharo kara autukero vika nimura.

¹⁰ Mintiaqi vi vuvaro 7 entagaa King Sekesisiva *uaini* namaqiro vuvaro vira avu aatovano vueraiqaa vuvaro, viva nai paanaa vaiinti 7navu naarama komanta anura. Viva Mehumaanira, Bisitaara, Habonaara, Bikitaara, Abakitaara, Setaara, Kakaasira, vinavuka naaromanta anuvaro ¹¹ viva vinavuka nititero tiharo, Nenavu oru ti naata Vasaatira vita vare maini tuvuate. Ne virara tivarava koqera viravata aqu vare tuvuarire tiate, tura.

Vira naata viri vaata koqe viri vaata vauvarora tiro, viva kaiqe ti naata vika numiqari ekaa ti nora vaiintinavuve, ekaa te naarama tauraukave, vira tavaate tiro, nai kaiqa vaiinti 7navu ntitama komanta ¹² vinavuka oru avuhainaara naata vi uvara tiva amuvaro viva aqao kia te mini vireravauve tivakero kia vuvaro vira kaara avuhainaaa vaiinti voqama kero arara itovaro vaura.

¹³ Vi entara avuhainaa vaiinti viva nai uva vatai okararave, nai uva avuqavuqi vai okararave, kia kankoma kero iriraitiro, viva uva okara irireva, koqe avu aato vatauka naarama kero iromanta vinavuka vira koqe avu aato ami vaura.

Ho vira arara itovaro viva vaiinti vonavu koqe avu aato vatauka naarama kero vika irero tiharo, Ti naatavano ti uva raqa kaira kaara te vira nantie irarave? tura. ¹⁴ Viva naaro vaiintika nutu vaireva, Kasenaarave, Setaarirave, Atamaatarave, Tasisirave, Mere-sirave, Masenaarave, Memukaanirave, vaura. Vaiinti 7 vinavuka Pesiavata Midiaivata vihainauka vaiha, vika uri aatarake avuhainaa vaiinti vira kaiqa nora kaiqa vare vauka vaura.

¹⁵ Viva vinavuka naaromanta anuvaro tiharo, Te King Sekesisika tenta paanaa vaiinti vonavu niti tauramanta vika vuru Kuini Vasaatira ti uva tiva amiavar viva kia iriraitiro, qaqira kero mini vairave. Tenavu uva maara vataurava virara nana uvae tivo? Tenavu avuhainaa nahenti virara nantie iainarave? tuvaro ¹⁶ Memukaaniva avuhainaa vaiintiaravata, nora vaiintinavuaravata, mintima tiro:

Mpo, Kuini Vasaativa mintiharo kia avuhainaa vaiinti viraqai qoraiqama amita raitiro, viva tinavu ai nora kaiqa vaiintinavuvata qoraiqama timitaivo. Viva ekaa are raqikiana vataraqaa varia vaiintika vikavata qoraiqama nimitaivo. ¹⁷ Kuini Vasaativa ai uva raqakai vakaakava vaakama vi anira ekaa nahenti are raqikiana vataraqaa variaka, vika vi uvvara iri, vikavata nái vaativara uva kia iriraiti, vika mintima tivarave: King Sekesisiva Kuini Vasaatira aarovaro viva aqao te kia virerave tivo tivarave. ¹⁸ Ike, vate maa entara Pesiavata Midiaivata ai kaiqa vaiinti, nora vaiintinavu vika naatavara avuhainaa nahentivanu ai uva raqakai uvvara iri, vikavata vohaa qaramake nái vaativara uva kia irivarave. Minti okarara kaara tiorira okaravano ekaa vona vona qovarama vuuanarove.

¹⁹ Ho avuhainaa vaiintio, are te tiaina uvarara koqe uva vaivo tirera, vi uvvara vara kairamanta ekaa vaiinti nahenti iriate. Mintima tiane: Vasaativa kia qaiqaavata te King Sekesisika iainanaini aniarire, tiane. Are tiramanta vi uvvara tenavu Pesia vatanaakavata Midia vatanaakavata uva maara tiva tauna vukuraqi qara ntuvataate. Mintima kaivaro kia ho vovano vi uvvara qaqira kero vo uva vataarire. Viraqaahaira are Vasaatira aatara kaaina nahentira vo qaqi kairaro vira vatuka varaarire.

²⁰ Are mintima kera uva vara kairaro vi uvava are raqikina vataraqaa vi aniramanta ekaa nahenti, nora autu vataakave, kia nora autu vataakave, vika nái vaativarara koqe vaiintive tivakeha vika uva iriate, tiro.

²¹ Memukaaniva minti tumanta avuhainaa vaiinti vivavata, vira nora vaiinti vikavata, vi uvarara quahake, viraqaahairo avuhainaa vaiinti viva Memukaaniva tunte ura.

²² Avuhainaa vaiinti viva vi uvvara qara ntuvu kero vara kovaro vi uvava ekaa viva vo provinsi vo provinsiqaa raqikunaini vi anura. Viva vi uvvara tuqantaakero ekaa vi vatanaaka nái uvaqihairo qara ntuvu tero mintima tiro:

Vaativanooqai nai naavuqi vaikaqaa raqikiarire. Viva tina uvavaqai kempukaiqama kero variarire, tura.

2

Estaara noraiqama kovaro avuhainaa nahentiqama vura

¹ Vira naantia King Sekesisira arara itova humpama vuvarovata, viva Vasaativa vira uva raqakoravata, vira qioqamato uvaravata, qaqi iriharo vaura.

² Qaqi iritero vaumanta vo vaiintinavu, vira koqe avu aato ami vauka vira aqamoto vihaih tiha, Are qaqi kaira ariara iriha koqe viri vaata vataa varaata vonavu rantake ntita vare aniate. ³ Are nena raqikina vatara, vo provinsi vo provinsiqihaira vaiinti vokika noraiqama kairamanta vika ekaa koqe viri vaata vataa varaata vonavu ntita vare viri maini avuni vai vatukara Susaaqi kaate. Vika maini viri kaivaro Hegava, ai nahentinavuqaa raqiki vai vaiintiva vikaqaavata raqikiramanata vo nahentinavu varaata vikaqaa vahaverave, vo haikave, aqu nimitaivaro vinavuka viri vaatavano voqavata koqema vuarire. ⁴ Mintima kaivaro are oru varaata vikaqihaira nena muntuka vaina varaataro vo varera, vi nahentira noraiqama kairaro viva avuhainaa nahenti vaiharo Vasaatira vatuka varaarire, ti.

Vika minti tuvaro avuhainaa vaiinti viva koqe uvama tiavo tivakero vika tunte ura.

⁵ Vi entara Susaa vatukaqi Iutaa vatanaa vaiinti vo, vira autu Motekairava vaura. Motekairava vira qova Jairaara vauvaro Jairaara vira qova Simaiva vauvaro Simaiva vira qova Kisiva vaura. Kisiva Benaminira ankuqiraava vaura. ⁶ Haaru Babironihainaa King Nebukanesaava iqoka raqiharo Iutaa vataqaa raqikura King Jehoiakinira Ieruharemiqu-hairo rumpa varero vuru Babironini kora. Vi entara viravata, airi vaiinti nahenti vonavuvata, Motekairavata rumpa varero vuru mini kora.

⁷ Motekaiva nai qora vo vira raavura Estaara virikero vatora. Estaara vo autu Hiparu uvaqihai Hadasaarave – *Aukuverarave* tura. Estaava koqe viri vaata vataa varaatavano vaura. Vira noka qoka qutu vu entara Motekaiva vira virikero vatero viraqaa raqikiqiro vi vaura.

⁸ Ho King Sekesisiva varaata koqe viri vaata vatauka ranta viri timitaate tumanta vika airi varaata ntiteha Estaaravata vita vare Susaaqi avuhainaara naavuqi vuru kovaro Hegaiqa vikaqaa raqiki vaura.

⁹ Hegaiqa Estaara quahama amitero vira naane avuni kahaqama amitora. Viva vaaka vaata koqe iaina haikarave, vaata kahaqiaina kararave, vira amiro, viraqaaahairo viva avuhainaara naavuqihairo kaiqa nahenti 7navu ntitakero vika tiva nimiro tiharo, Maa varaataraqaa koqemake raqikiate, tivakero, anomakero koqemakero vau *rumura* Estaara amura. ¹⁰ Tota Motekaiva Estaarara tiharo, Are kia qoqaa tiharo, Te Iutaa vatanaa nahentive, tiane turara tiro, Estaava vi uvvara kukeqa tora.

¹¹ Vo enta vo enta Motekaiva avuhainaara naavuqi nahentinavu vaura vahaqaini vi aniharo Estaarara, Viva hoe vaivo, kiae ho vaivo? Nana haikavanoe viraqaa qovaraqianarove? ti vaura.

¹² Varaata vika viri vaata anomakero koqe iarire ti, 6 tora varakeha *meave* tu katari vahaverara vika vaataqaa aqu nimitaqi vivi, viraqaaahai qaiqaa 6 tora varakeha vahavera vo, koqe untavira vika vaataqaa aqu nimitaqi vi vaura. Vohaa ihiara mintiaqi vivi, viraqaaahai vika varaata vohaiqa vohaiqa ntita vareha King Sekesisiva vauraqi vuru ke vaura. ¹³ Varaata vikaqihairo vovano avuhainaava vaunaini vireva iharo, viva nai antuqa vai utavaaqaqra nonku varero viva unaini vi vaura.

¹⁴ Enta ireva unaini varaata viva avuhainaava vaunaini oruntero, mini variqiro viro aatita kora. Aatita vumanta vira ani vite vuru vaiinti vo Sasakaasiva raqiki vauraqi kora. Sasakaasiva King Sekesisira nahenti vonavuqaa raqiki vauva vaura.

Varaata vira vita vare viva vaunaini vuru kovaro vi varaatavava kia qaiqaavata anirantero avuhainaava vauraqi viraitiro, ekaara miniqai vaura. Avuhainaava vaiintivano vi varaatarara quahakero vira autu ntora, viraqai qaiqaa vita vare avuhainaava vauraqi vuru ke vaura.

¹⁵ Minti okarava vauvaro Estaava avuhainaava vaiinti oru tavaaina entava anintora. Estaava Abihailira raavuravano vauvaro Motekaiva Abihailira vara maaquvano vaura. Motekaiva Estaara virikero vatero viraqaa raqiki vaura. Ekaa vaiinti nahenti Estaara taveha, virara koqe viri vaata vataa nahentive ti vaura.

Ho Estaava avuhainaava vaiinti oru tavaaina entava ani ntovaro viva Hegaiqa nahentigaa raqiki vau vaiintiva tu uvvara iriharo vi utavaaqaqra nonku varero vura. ¹⁶ Vi entara King Sekesisiva 7 ihiara raqiki vau entara, *Tempiti** tora 10 toraqaa Estaara vita vare avuhainaara naavuqi Sekesisiva vaunaini vuru kora.

¹⁷ Estaara vita vare vuru kovaro avuhainaava vaiintivano vira tavero viva ekaa nai nahenti vikaqihairo avuni Estaarara voqavata muntuka vateharo vaura. Ekaa varaata vikaqihairo viva Estaara viraqai quahama amiteharo vira koqema amite vaura.

Mintiharo viva avuhainaava nahenti tovaqa vara kero vuru Estaara qiataqaa aqu amitovaro Estaava Kuini Vasaatira vatuva varero avuhainaava nahenti vaura.

¹⁸ Estaava noraiqama viro avuhainaava nahentii vauvaro avuhainaava vaiinti viva Estaara quahama amitareva nora vaiintinavuve, nai kaiqaqaa raqiki vaukave, naarama kero nora kara vika nimura. Viva nai vo *provinsi* vo *provinsiga* raqiki vaukarra tiharo, Vate auraara entama varianarove, tivakero parumakero vo haika vo haika rairakero vaiinti nahenti nimura.

Motekaiva avuhainaava vaiinti aruke uvara qovarama kora

¹⁹ Vi entara avuhainaava vaiinti viva Motekaira noraiqama kovaro viva *kamaanira* kaiqa voqaa raqiki vaura. ²⁰ Tota Motekaiva Estaarara tiharo, Are Iutaa vatanaa nahenti varianarara kia voravata tiva amiane, turara tiro, Estaava viva tunte iro kia voravata tiva amiraitiro vaura. Estaava vainti naatika vahiaro Motekaira uva iriqiro viviro, noruqamaviro viva qaqqiqai Motekaira uva iriqiro vi vaura.

²¹ Ho Motekaiva avuhainaara naavuqi kaiqa vare vaumanta kaiqa vaiinti votanta Bikitanaka Teresika vo haika kaara avuhainaava vaiinti navutaiqama amiteha evaara vira arukerara ti vaura. Vitanta avuhainaara naavuqi kaiqa vareha vira *rumu* genti voqaa maimaraara raqiki vauvaro ²² Motekaiva vitanta King Sekesisira aruke uvara iriro, viraqaaahairo viva vuru Kuini Estaara tiva amura.

Vira tiva amuvaro Estaava Motekaiva qovaramako uvara vuru avuhainaava vaiinti vira tiva amura.

* 2:16: *Tempiti* tora = January

²³ Minti tumanta vo vaiintinavu vi uvara rantake tavovaro vi uvava quqaa uva vaumanta vika oru vitanta ravaaqavuke vuru aunta taaqikumake katariqaa hiritomanta vitanta qutu vura. Avuhainaa vaiinti viva ekaa vi uvara *kamaanira* vukuqi qara ntuva taate tumanta qara ntuvatora.

3

Hamaaniva Iutaa vatanaaka aru taiqa kareva auti vaura

¹ Ho vo entanavu aitarovaro King Sekesisiva vaiinti vo, vira autu Hamaanira noraiqama kovaro viva kamaanira avuhainaa vaiintiqama viro vaura. Hamaanira qova Hamedaatava vauvoro Hamedaatara kaivaqava Agaakiva vaura. (Haaru King Agaakiva Iutaa navutaaka Amareki vatanaakaqaa raqiki vaura.)

² King Sekesisiva Hamaanira noraiqama kero *kamaanira* vaiinti yokukara tiharo, Ne Hamaanira taveha, tori kauru aravi vaiha anu kimaara amitaate, tiro. Minti tumanta ekaa vi vaiintinavuka viva tuntemake mintuvaro, Motekaivaqai kia te mintirerave tivakero qaqi vaura.

³ Viva kia mintiraitiro, qaqi vaumanta vira hana kaiqa vaiinti vira ireha tiha, Are nana kaarae avuhainaa vaiinti uva raqake variaro, ti vaura.

⁴ Vika vo enta wo enta vira vihi vaahi tuvaro Motekaiva kia vika uva iriraitiro vaura. Viva tiharo, Te Iutaa vatanaaka vaunarara ti, te kia mintirerave, tiro. Minti tumanta vika tiha, Hamaaniva vira uvava quahaanarovve? tivake vuru Hamaanira tiva amura.

⁵ Vuru tiva amuvaro Hamaaniva tavovaro Motekaiva kia vira tori kauru araviro anu kimaara amitora kaara Hamaanira voqamakero arara itovaro vaura. ⁶ Mintumanta vika Motekaiva te Iutaa vatanaave tu uvaravata vira tiva amuvaro, viraqahairo Hamaaniva nai irikero tiharo, Kia te Motekaira viraqai arukaaina aarara rantaraiti, te ekaa Iutaa vatanaaka Pesia vataini vaika, vikavata aru taiqakaaaina aarara rantarerave, tiro.

⁷ Minti tivakero King Sekesisiva 12 ihiara raqiki vau entara *Nisaani* * ¹ 1 toraqaa Hamaaniva tiharo, Nana torae nana entae kaamate tenavu Iutaa vatanaaka aru taiqa kararave? Kaiqenavu *puri satu* arukeha vi entara kaama taare, tivakero *satu* arukero tavero tiharo, Kaiqe Adaa tora 12 toraqaa kaama taare, tura.

⁸ Minti tivakero Hamaaniva vuru King Sekesisira tiva amiro tiharo, Te tavauramanta vo vatanaaka are raqiki variana vataro, vo *provinci* vo *provincesi* variavo. Vi vatanaaka nai okaraqai avataqi viha, kia tinavu uva maara avate variarave. Are vika qaqi kairera, vika voqamake tinavu qoraiqama timitevarave.

⁹ Avuhainaa vaiintio, ai antuqa vairera, are qaraaka uva vo vatehara ekaa vi vatanaaka aru taiqa kaate tiane. Are minti tirera, te ai monu naavuqaa raqiki varia vaiintika *silvaa* monu 10,000navu nimiari vika vi monura varake ai monu naavuqi vataivara, are viraqohairo *kamaani* kaiqa ho varaqira vinarave, tiro.

¹⁰ Hamaaniva minti tuvaro avuhainaa vaiinti viva nai vuqaqhairo *ringi* vo rahunku kora. *Ringi* vira qjataqaa qara vo vauvaro avuhainaa vaiintivano nai uva vatova kempukaiqama vuarire tiro, uva qara ntuvatoraqaa *ringi* viraqohairo taatau tovaro uva viva kempukaiqama vura. *Ringi* vira okara mintima vauvaro avuhainaa vaiinti viva *ringi* vira nai vuqaqhairo rahunku kero viti Iutaa vatanaaka navutaara Hamaanira amura.

¹¹ Avuhainaa vaiintivano Hamaanira vira amiro tiharo, Nena *silvaa* monu qaqi tuutaane. Are homa vi vatanaakara nena antuqa vainara autuane, tiro.

¹² Minti tuvaro 13 enta 1 toraqaa Hamaaniva avuhainaa vaiinti qara kaiqa vare vauka naaromanta anuvaro viva nai uva tiva nimumanta vika vi uvava qara ntuvatora. Vika vi uvava qara ntiha tuqantaake ekaa vi vatanaaka vi vatanaaka uvaqihai qara ntuva tovaro Hamaanira *ringiqohairo* Sekesisira autu ekaa qaraqaa taatau tero, ekaa nora vaiintive, *kamaanira* vaiintive, vi uvava tavaate tiro, vara kora.

¹³ Vara komanta vaiinti vonavu qara vare vuru ke viri ke i vauka kante avuhainaa vaiintivano raqiki vau vataro, vo vataini vo vataini vuru viri ke vaura. Qara ntuvato uvava maantima tiro:

Naantiara 13 enta Adaa toraqaa, ne oru ekaa Iutaa vatanaaka konta naampaive, qaraaka vaiinti nahentive, ekaa naati vaintive, aru taiqa kaate. Ne kia vikara mpo ike tiva nimiratati, vika ekaa aru taiqake, vika i haikara ne varaate.

¹⁴ Ne nora vaiinti maa uvava kaara ntimanta ekaa vaiinti nahenti vi uvava iri, vi entara veka geramate variate, tiro.
Hamaaniva vi uvava qara ntuvatora.

* 3:7: Nisaani tora = April; Adaa tora = March

¹⁵ Vaiinti vonavu qara vuru ke viri ke i vauka, vi qarara vare kante vo vataini vuru ke viri ke i vaura.

Nora vauka Susaaqivata vi uvvara tiva nimumanta ekaa vaiinti nahenti irura.

Avhainaa vaiintivano Hamaanikantiro oquiviro vahiaro *uaini* ne vaumanta vaiinti nahenti Susaaqi vauka vi uvvara iruvaro vika avu aatovano hampi qumanta vaura.

4

Motekaiva Estaara tinauv kahaqiane tura

¹ Motekaiva vivavata vi uvvara iriro qeto varo vira muntukavano voqama kero goraiquvaro nai utavaaqa qunahi qaannahima kero, kovaara utavaaqa nonkutero, hanta varakero nai qiataqaa aqu varero, Susaa vatukaqi niharo mpoqi ihira tivaqiro viharo, iqi rataqiro viharo ² avuhainaaara naavu qentiana oru ntero mini vaura. Viva kia koqe utavaaqa nonkutovara tiro, viva kia ho avuhainaaara naavuqi oriqetaarirava vaura.

³ Avuhainaa vaiinti uvavano ekaa *provinci* vi anumanta Iutaa vatanaaka iri, vika ike mpo tiha kia karavata naraiti, mpoqi varia ihira tivakeha iqi rateha vaura. Iutaa vika airitahaa kovaara utavaaqa nonkuteha, kia koqe taintaqaa vaitaraiti, hanta kantaqai vaite vaura.

⁴ Motekaiva gentiana vaumanta Estaara kaiqa nahentinavuvata, kaiqa vaiinti vonavuva, vuru Estaara tiva amuvaro viva nana kaarae mintivo tivakero vira muntuka qoraiquvaro koqe utavaaqa varakero vo vaiinti amiro tiharo, Vuru Motekaira amihara mintima tiane: Kovaara utavaaqa qaqlini varakera maa utavaaqa nonkutaane tiane, tuvaro varero vuru Motekaira amuvaro viva aqao kia te vira varerave tiro.

⁵ Minto tuvaro Estaava vaiinti vo Hataakira aarora. Avuhainaa vaiintivano Hataakirara Estaara kaiqa vara amitaane tu vaiintiva vauvaro Estaava vira aarero tiharo, Motekaiva nana kaarae mintivo? Viva nana haikara iriharoe mintivo? Are oru virara iraane, tiro.

⁶ Minto tuvaro Motekaiva avuhainaaara naavu genti kanta vaiinti nahenti ruvaaqi vaunaini vauvaro Hataakiva oruntovaro ⁷ Motekaiva vi uvvara naiqaa qovaraiqura ekaa vira tiva amura. Ekaa Iutaa vatanaaka aru taiqa kaivaro Hamaaniva nora monu avuhainaaara monu naavuqi mintuma vatarerave tu uvaravata vira tiva amura.

⁸ Hamaaniva ekaa Iutaa vatanaaka aru taiqa kaate tu uvvara qara vo Susaa vatukainiara varakora, viravata Hataakira amiro tiharo, Are maa qarara Estaara vuru amira, naantiara qovaraiqaina uvaravata vira tiva amiane. Are Estaara vihi tiraro viva avuhainaa vaiintivano variainanaini oruntero Iutaa vatanaakara aaqurihama nimitaane tiarire, tiro.

⁹ Motekaiva minto tuvaro Hataakiva vuru Estaara tiva amuvaro ¹⁰ Estaava vira qaiqaa Motekaiva vaunaini atitero tiharo, Motekairara mintima tiane: ¹¹ Avuhainaa vaiintivano vaiinti voe, nahenti voe, kia aarairaro viva nai irikero avuhainaa vaiintivano avutraqi vaina *rumuraq* oriqtairera, viva mintiharo *kamaanira* uva raqakaainara kaara vira aruma kevarave. Ekaa avuhainaaara naavuqi kaiqa vare variakavata, ekaa *provinci* variakavata, virara iriarave. Virara irihama te avuhainaa vaiintivano vainaraqi qumina vuvarorave.

Vi uvvara aatara kaarira aarava vohaiqaqai vairave. Vaiinti vovano nai irikero oruntairaro avuhainaa vaiintivano vira tavero, nai *kori* kauru tuatainara tutukero tuatairera, vi vaiintira kiama aru kevarave. Kia tutukero tuatairera, vira aruma kevarave. Ho vohaa torarama avuhainaa vaiintivano kia ti haaramanta vauro, tiro.

¹² Estaava minto tuvaro Hataakiva mutu Motekaira tiva amuvaro ¹³ Motekaiva Estaara nai tiva amiro tiharo, Hauri are avuhainaaara naavuqi vahira te ho variari ti kiama harukevarave tirorave. Naantiara ekaa tinauv Iutaa vatanaaka aruke entara, vika kia ai vehakuma amitaraiti, aivata aruma kevarave.

¹⁴ Are maa entara evaara vahira kia tinauv kahaqirera, tinauv Iutaa vatanaaka kahaqiarirava vonaihairo qovaraiqianarove. Mintiramantavata, vika aivata ai qora ankuvata aruma kevarave. Ho *Kotiva*, maa entara iriharoe ai qaqi kaivara are noraiqamavira avuhainaa nahentivano variaro? Virara kia tenavu kankomake iruro, tiro.

¹⁵ Motekaiva minto tuvaro Estaava qaiqaa uva varakero mintima tiro: ¹⁶ Are ekaa Iutaa vatanaaka Susaaqi variaka ruvaaquma kera, ne ekaa vahira tiriara iriha taaramo enta aatitairaqaavata, entaqivata, karavata namarivata kia naraiti, qaqi variqi vuate. Ne mintiaqi vi vaiqe tevata, tenta kaiqa nahentinavuvata, ni aanante karavata namarivata kia naraiti, variqi virerave. Vi entava taiqa virage te *kamaaniva* qioqama tai uvarara kia noraiqamake iriraiti, te qaqi avuhainaa vaiintivano vainaraqi virerave. Te mintiainaara

kaara ti haru kaiqe qutu vuarera, te homa qutu virarave, tuvaro¹⁷ Motekaiva oruntero Estaava ekaa uva tuntema kero mintura.

5

Estaava avuhainaa vaiintiaravata Hamaaniraravata ani kara naate tura

¹ Estaava taaramo entara kara aurama tero variqiro viro, ekaara entaqaa viva nai avuhainaa nahenti utavaaqa nonkutero oru avuhainaa naavu avutaqi vau *rumura* qentiana oruntero vauvaro avuhainaa vaiinti viva nai taintaqa oquvi vainaihairo² vahaqaini tavovaro Estaava himpitero vauvaro viva virara quahakero nai kori kauru tuatora tutukero tuatero vaura.

Mintuvaro Estaava oriqetero oru kauru viti vira autama kero mini himpitero vauvaro³ avuhainaa vaiinti viva vira irero tiharo, Kuini Estaao, nana haikarae aniaro? Ai muntukavano vaina haikarara ti irairaqe ai amiare. Are ti irairaqe te hini *provinsinavu* raqikainara rairake ai amiare, tiro.

⁴ Minti tuvaro Estaava tiharo, Avuhainaa vaiintivauvo, Te ariara irihama nora kara untake qera i vaura. Ai antuqa virara vairera, arevata Hamaanivavata hoe entaqi ani vi karara nevarave? tiro.

⁵ Estaava minti tuvaro avuhainaa vaiinti viva tiharo, Kante Hamaanira vite aniqe tetanta Hamaanika oru Estaara kara naare, tiro. Minti tivakero avuhainaa vaintivanovata, Hamaanivavata, Estaava nora kara qerama toraqi vura.

⁶ Mini oru vaiha *uaini* ne vauvaro avuhainaa vaiinti viva Estaara qaiqaa irero tiharo, Are nana haikarae ti irenarave? Ai muntukavano nana haikarae vaivo? Are ti irairaqe te hini *provinsinavu* raqikainara rairake ai amiare, tiro.

⁷ Avuhainaa vaiintivano minti tuvaro Estaava tiharo, ⁸ Avuhainaa vaiintivauvo, are tiriara quahehara te ai irarer aina uvarara eo tirera, are qaqi kairaqe te hora entaqi qaiqaa nora kara vo qerama taari netanta Hamaanika ani naate. Ho vi entara te ai irarer aina uvara ai tiva amirerave, tura.

Hamaaniva Motekairara arara itora

⁹ Hamaaniva kara noraqihairo vevantero quahakero muntukaqihairo koqe uvaro viharo tavovaro Motekaiva avuhainaa naavu qentiana oquvi vahiaro kia himpiro vira quahama amitaraitiro, qaqi oquvi vauvaro vira kaara Hamaanira vogama kero arara itora. ¹⁰ Mintuvarovata, Hamaaniva nai arara itora vara muntuviqama kero, nai naavuniara vura.

Hamaaniva nai naavuqi oruntero nai tontinavuvata nai naata Seresiravata naarama komata¹¹ anuvaro nai mahuta tiharo nai airi haika vatorarave, nai maaqu airinavu vatatorarave, avuhainaa vaiintivano vira noraiqama kero nora autu amuvaro viva ekaa *kamaanira* kaiqa varoka naatara kero vikaqaa raqiki vaurarave, vi uvara vi uvara vika tiva nimi vaura.

¹² Minti tivakero Hamaaniva vo uvavata tiharo, Kuini Estaava kara vo qerama tero avuhainaa vaiinti aareharo tiriaraqai vikantira aniane tirave. Estaava avuhainaa vaiinti vikanti tiriaraqai qaiqaa hora nora kara naate tirave. ¹³ Vi uvava vaivarovata, Iutaa vaiinti vo Motekaiva avuhainaa vaiinti qentiana oquvi vahiaro kia ti quahama timitaira kaara ti voqamakero arara itaiva te vo haika vo haikara quahe vaunara taiqa kairave, tiro.

¹⁴ Hamaaniva minti tumanta vira naata Seresivavata vira tontinavuvata vi uvara iri tih, Are tiramanta vaiinti vonavu vukai *pohi* 20 *mita* vainara vataqiqi arataivara are hora toqaqi avuhainaa vaiinti oru irairaro viva hove tiramanta vika vi *pohiraqaa* Motekairaa aunta taaqimake hiritaivaro qutu vuarire. Viraqaaahira are quahakera avuhainaa vaintintira kara nareva vuane, ti.

Vika minti tuvaro Hamaaniva vika tu uvarara quahakero oru vo vaiintinavuara *pohi* vira ara timitate, tura.

6

Avuhainaa vaiintivano Motekairaa noraiqama kora

¹ Vi entara entaqi avuhainaa vaiintivano kia ho vaitaraitiro, qaqi vahiaro tiharo, Vuku vo oru vare, viraqiqi vaina uvara kaara ntuva timitate, tura. Vi vukuraqiqi avuhainaa vaiintivano raqikiqi vi vau entara vo haika vo haikavano govaraiqura qara ntuvato uvava vaumanta vira vare, vi uvara kaara ntuva amitaqi viha, ² Motekairaa uvavata kaara ntuva amitora.

Vi uvava maantimakero vaura:

Vaiinti votanta Bikitanaka Teresika avuhainaara naavuqi kaiqa vareha, vira genti voqaa maimaraara raqikiha vo haika kaara King Sekesisira navutaiqihā vira aruke uvvara evaara nai tiva ami nai tiva ami i vauvaro, Motekaiva vitanta uva qovarama kora. (2:19-23)

³ Vi uvara kaara ntuvoro avuhaina vika ireharo tiharo, Ike, Motekaiva ti koqe kaiqa vara timitarerave. Tenavu virara iriha nana haikae nana autue vira qiatia nai amunarave? tumanta vika tiha, Kia vo haikavata virara iriha nai amunarave, ti.

⁴ Vika minti tuvaro avuhaina vaintivano tiharo, Ti kaiqa vaiinti nora vovano vahaqaqaini vairove? tiro.

Minti tuvaro Hamaaniva vate viqanaqai anintero Motekaira aunta taaqimake vukai katari aratoraqaa hiriterara iriharo avuhaina vainti virara irareva vaumanta, ⁵ vika tiha, Hamaaniva vahaqaqaini ani ai tavareva himpi vaivo, tuvaro avuhaina vaintivano tiharo, Vira maini vite uruate, tiro.

⁶ Tumanta vira vite anuvaro avuhaina vaintivano Hamaanira irero tiharo, Te vaiinti vo quahama amiteha vira koqema amitarerave. Te nantima kaarie vaiinti nahenti vi vaintiria taveha virara avuhaina vaintivano quahama amitai vaintirave tivarave? tiro.

Avhainaa vaintivano minti tuvaro Hamaaniva nai irikero tiharo, Ekaa vaiinti vikaqihairo avuhaina vaintivano tarae koqema amitareva auti vaivo? Viva tiqaima koqema timitateva auti vaivo, tiro.

⁷⁻⁸ Hamaaniva nai irikero minti tivakero viva avuhainaa vainti nai tiva amiro tiharo, Are tiramanta vika are avuhaina vaintivano nonkina utavaaqara vo qerama vare, viraqaaahai are oquvi vahara nina *ohira* vovata vare, *ohi* vira qiataga avuhainaava vaataiqina haikara aqu amite, ⁹ viraqaaahair are autu vataa vainti vo tiraro viva are quahama amitenia vaintiria vi utavaaqara nonku amitero, vira *ohiqa* vaarikero vita varero, vuru vainti nahenti ruvaaqumavi vai vatukaraqaa vi aniarire.

Viva vi aniharo vainti nahentiara maantimakero naverai tivaqiro vuarire: Ne ekaa maa vaintiria tavaate. Avuhainaa vaintivano nai quahama amitai vaintiria maantima kero vira autu tuahera kero vira koqema amitaivo, tivaqiro vuarire, tiro.

¹⁰ Hamaaniva minti tuvaro avuhainaa vaintivano virara tiharo, Ho kantera nena tinantemakera, utavaaqavata *ohivata* varera oru avuhainaara naavu qentiana Iutaa vainti Motekaiva oquvi vairaa vira mointima amitaane. Kia nena tiva tena uvvara voqavata qaqira karaitira, ekaa vi uvarama avataane, tiro.

¹¹ Avuhainaa vaintivano minti tuvaro Hamaaniva oru utavaaqavata ohivata varero vuru Motekaira nonku amitovalo Motekaiva ohiqaa oquvi vauvaro Hamaaniva ohi vira vita varero vuru vainti nahenti ruvaaqumavi vau vatukaraqaa vi aniharo naveraitiharo, Ekaa maa vaintiria tavaate. Avuhainaa vaintivano nai quahama amitaa vaintiria maantima kero vira autu tuahera kero vira koqema amitairave, tura.

¹² Mintima kovaro Motekaiva orurantero avuhainaara naavu qentiana ani vauvaro, Hamaanira voqamakero kauruvaro vira muntukavano qoraiquivaro nai viri naavuma varero kantero nai naavuqi ¹³ vuru nai naata Seresiravata nai tontinavuvata vi haikava vi haikava qovaraiqurara tiva nimura.

Hamaaniva minti tumanta vinavuka tiha, Oho, Motekaiva Iutaa vatanaa vaintivano vairaro tiro, viva uritarakero vairara are vatainiqama vinarave. Viva mintiakero vaharo ai aataro kairara are ekaarama vatainiqama vinarave, tura.

¹⁴ Vinavuka vi uvvara qaqi ti vaumanta avuhainaava taara vainti nititoka vihai ani Hamaanira vitake kante vuru Estaava kara qerama nimitonaini kora.

7

Estaava Hamaaniraqaa uva vatora

¹⁻² Avuhainaa vaintivano vata, Hamaanivavata, qaiqaa oru Estaara kara nareka vura.

Kara namake viraqaaahai *uaini* ne vauvaro avuhaina vainti viva Estaara qaiqaa irero tiharo, Kuini Estaao, ai muntukavano nana haikarae vaivo? Ai muntukavano vaina haikarara ti iraireqae ai amiare. Are ti iraireqae te hini *provinisnavu* raqkiainara rairake ai amiare, tiro.

³ Minti tuvaro Estaava nai tiva amiro tiharo, Avuhainaa vaintivauvo, are tiriara quahainera, te tiaina uvaravata ho irirera, are tivata ti navunaakovata qaqi vehakuma timitate kia tinavu harukaivaqae qaqi variare. Te ai irareruna una uvava mintiakero vaivo, tiro.

⁴ Minti tivakero viva tiharo, Vaiinti vovano vo uva tiva taataukero vatairara ti, vika tivata ekaa ti navunaakovata aru taiqa kevarave. Vika kia tinavu karapuhi vainti voqaa rumpate qaqi kaiqa vara timitate tiaravauve. Vika mintireka iatirio, te vi uvvara

maara ntaira kiama ai tiva amuraitirio. Vika tinavu ekaara aru taiqa kareka auti variara kaarama te vi uvvara ai tiva amuro, tiro.

⁵ Kuini Estaava minti tuvaro King Sekesisiva vira irero tiharo, Oho, tavave kia getaraitiro, vi uvvara tivakero vataivo? Vi vaiintiva tantoe vaivo? tiro.

⁶ Minti tuvaro Estaava vira tiva amiro tiharo, Tinavu navutaava, tinavu qoraiqama timite vai vaiintiva vaireva, maa Hamaaniva qora vaiinti vivama vaivo, tiro.

Estaava minti tuvaro Hamaaniva avuhainaa vaiinti nahenti vitanta nivuqaa vaharo voqama kero getovaro vira aiqou kauqu ntiri ntiri i vauvaro vaura.

⁷ Mintuvaro avuhainaa vaiinti vira voqamakero arara itovaro viva himpiro vahaaqaini veva ntero nai kaqava ututonaini vuvaro Hamaaniva tavovaro avuhainaa vaiinti viva vira arukaaina avu aatoraqaa vuvaro Hamaaniva kara nora miniqai vaharo Kuini Estaarara ti aaqurihamo timitaira kia ti harukaate tiro, ⁸ viva oru Estaava oquivi vau taatara tataaga hinqintiro vaura.

Hinqintiro vuvaro avuhainaa vaiintivano nai kaqava vaunaihairo uruntero naavuqi oriqetero tavovaro Hamaanira Estaara aaqanto taintaqaa hinqinti vauvaro tavero, avuhainaa vaiinti viva naveraitiharo, Oho, maa vaiintiva ti naavuqi tinta avuqaa vaharo ti avuhainaa nahenti hampata nireva auti vaivo, tiro.

Avhainaa vaiintivano minti tumanta vaakama kante vira kaiqa vaiinti vonavu oru Hamaanira qjata tavunaqohai naavumatora. Vika mintiakе vira arukareka auti vaura.

⁹ Vira qjata naavuma tovaro vikaqihairo Habonaava tiharo, Ike, Motekaiva haaru avuhainaa vaiinti kahaquvaro qaqi vaurave. Hamaaniva Motekairara arukaare tiro, nai naavu tataaqaa vira autua taaqikuma kaaina pohira arataava, tiro.

Minti tuvaro avuhainaa vaiinti viva tiharo, Ho vi pohiraqaa Hamaanira nai taaqikumake hiritaate, tiro.

¹⁰ Minti tumanta vika vuru Hamaaniva Motekairara iriharo qeramato pohiraqaa nai taaqikumake hiritora. Mintuvaro avuhainaa vaiinti arara itova humpama vura.

8

Iutaa vika nái navutaaka náivata ntaihate tura

¹ Ho vohaa vi entara King Sekesisiva Iutaa vika navutaava Hamaaniva vato haikara, vataave airairave Kuini Estaara amura.

Estaava Motekairara ti vohaa naareve tuvaro avuhainaa vaiintivano Motekairara quahakero tiharo, Homa viva ekaa enta ani ti tavaanarove, tiro.

² Minti tivakero avuhainaa vaiintivano nai *ringi* Hamaanira amura qaiqaa vara kero nai vuqaqi nonkutora rahunku kero viti Motekairara amura. Mintuvaro Estaava Motekairara are Hamaaniva i haikaraqaa raqiki timitaane, tura.

³ Estaava qaiqaa oru avuhainaa vaiintivano vauraqi oruntero vira aiqutaraini hinqintiro vaharo rateharo virara mpo ike tiro tiharo, ⁴ King Agaakira nainti Hamaaniva tinavu Iutaa vatanaaka aru taiqa kareva qora uva tiva taatauke vataira, are vi uvvara nunqa qaqini kaane, tiro.

⁴ Minti tivakero vauvaro avuhainaa vaiintivano nai *kori* kauru tutukero tuatovaro Estaava vira avuqaa himpiro tiharo, ⁵ Avuhainaa vaiintivauvo, are ti koqema timitera tirira quahairera, te tiaina uvavarata avuqavu vaivo tirera, are vo uva vatairaro vi uvava Hamaaniva tivatii uvvara aatara kaarire. Ekaa Iutaa vatanaaka vo *provinsi* vo *provinisiqaa* are raqikananaini variaku aru taiqa kaate tiro, Hamaaniva uva tivatairave. ⁶ Mpo, nantiakе vika ti navunaaka aru taiqake vaira te vahia tavararave? Nantiakе te tenta vaiinti nahenti vehi autuke vaira ho tavararave? tiro.

⁷ Minti tuvaro King Sekesisiva Kuini Estaaravata, Iutaa vaiinti Motekairavata, tiva nimiro tiharo, Ho tavaate. Hamaaniva Iutaa vatanaaka aru taiqa kareva auti vaira kaara te nai autua taaqikuma kauraro qutu vimanta ekaa viva i haikara te Estaara amunarave.

⁸ Hamaaniva uva vateharo ti autu qara ntuva tero ti *ringiqohairo* vi uvvara kempukaiqama kairara tiro, vi uvava qaqi vairaro kia ho vovanovata vi uvvara nunkakero vo uva tianarove. Vi okarava mintiro vaimantavata, netanta homa vo uva qara ntuva taivarо Iutaa vatanaaka varianaini vuarire. Vi uvvara qara ntuva tema, netanta homa ti hutu ntehama ti *ringiqohai* vi uvvara kempukaiqama kevarave, tiro.

⁹ Avuhainaa vaiintivano minti tuvaro 23 enta *Sivaani** tora, 3 toraqaa, Motekaiva oru avuhainaara qara kaiqa vare vauka naaromanta anuvaro Motekaiva nai uva vika tiva nimumanta vi uvvara qara ntuvatora.

Vika vi uvvara qara niha ekaa vi vatanaaka nái uvaqihai tuqantaake qara ntuvatora. India vataihairo viviro Itiopia vatainи vuru taiqo vatava vauvaro, ¹²⁷ *provinsinavu*

* 8:9: Sivaani tora = June

vaumanta mini Iutaa vatanaakave, ekaa nora vaiintive, *kamaanira* kaiqa vaiintive, vi uvara tavaate ti, vi uvara qara ntuvu tovaro¹⁰ Motekaiva King Sekesisira *ringi* viraqohairo ekaa qara viraqaa taatau tora.

Minti umanta vaiinti vonavu qara vuru ke viri ke i vauka *ohi* koqera vonavuqua vaarinte vaiha, kante qara vira vare vuru ke viri ke i vaura. *Oh i* vinavuka voqamake kante vauka avuhainaara hohaaqihai varora.

¹¹ Qara viraqi ntuvuot uvava maantima tiro:

Iutaa vatanaaka vo vatuka vo vatukaini variaka homa nái auta ntireka auihehavaya qaqua ntuvu vataimanta, nai ta vatanaakave, nai taihainaakave, vika navutaqiqha arirena autivera, vika homa náivata arivarave. Vika náivata aruqi viha homa navutaa vika vaiintive, nahentive, vaintive, ekaa aru taiqake vika i haikaravata varevarave.

Te King Sekesisika minti turo, tiro.

¹² Haaru Hamaaniva 13 enta 12 tora Adaa toragaa ekaa Iutaa vatanaaka aru taiqa kaate tu entara, vi entaraqaa Motekaira uvavanovata kempukaiqama viro vaumanta Iutaa vatanaaka vi entaraqaa nái navutaaka ho arukeva vaura. ¹³ Iutaa vatanaaka vi entaraqaa geramate vaiha navutaaka náivata aruate tiro, vi uvara tiva tova ekaa vataini vi anumanta ekaa vo vatanaaa vo vatanaaka irura.

¹⁴ Ho vaiinti vonavu qara vira vuru ke viri ke i vauka koqe *ohinavuqua* vaarinte vaiha kante qara vira vare vuru ke viri ke i vaura. Nora vatuka Susaaqi vaukavata vi uvara tiva nimumanta ekaa irura.

¹⁵ Mintuvaro Motekaiva avuhainaara naavuqi vaumanta vika avuhainaara utavaaqa koqera varake, hanta tavunave, ihiqi tavunave, viraqohai nonku amite, naare tavuna vo vukaivata nonku amite, vira qitaqaa nora vaiinti tovaqa, *kori* origohai aututora, aqu amitovaro Motekaiva vevantero Susaa vatuka aaraini vi vaumanta vaiinti nahenti vira taveha quaheha naverai ti vaura.

¹⁶ Iutaa vatanaaka Motekaira uva iriha voqamake quaheha vauvaro vika muntukavano parumaviro qihaaqumanta vaiha tiha, Tenavu tentanavu navutaaka homa naatara kaarirava vaivo, tura.

¹⁷ Iutaa vatanaaka ekaa vatukaqi vaukave, ekaa *provinsi* vaukave, avuhainaara vaiinti uva Motekaiva qara ntuvatora iri, virara quahake vo enta kaamate auraara vaiha nora kara nora.

Vo vatanaaa vika hini kuka vi uvara iri tiha, Vi entaraqaa Iutaa vatanaaka tinavuvata haru kevorave tivake, viraqaahai vikavata Iutaa vaiintiqama vura.

9

Iutaa vika nái navutaaka naatara kora

¹ Ho 13 enta Adaa tora vi entava ani ntora. Iutaa navutaaka vika Hamaaniva vato uvarara iriha Iutaa vika aru taiqa kaare tu entaraqaa, Iutaa vikaqai nái navutaaka ntaiheha naatara kora.

² King Sekesisiva raijiku vatara vo vatuka vo vatukaqi Iutaa vatanaaka ruvaaqumavi vaiha vo vatanaaka vika aru kareka auti vauka vika náivata arireka geramate vaura. Mintumanta vo vatanaaa vo vatanaaka vika naatu qete vaumanta kia vokukavata Iutaa vatanaaa vika naatara kora.

³ Ekaa vi vataraqaa raqiki vau vaiintikavata, *kamaanira* kaiqa varokavata, nora vaiinti vokukavata, vika Motekaira aatu voqamake qeteha Iutaa vatanaaka mantaraini vaiha vika kahaqura.

⁴ Ekaa vo *provinsi* vo *provinsi* vauka iruvaro avuhainaara vaiintivano Motekaira noraiqama kovaro Motekaiva avuhainaara naavuqi kaiqa vare vauvaro vira kempukavano voqavata uritarakeri variqiro vi vaura.

⁵ Mintumanta Iutaa vatanaaka iqoka paiseqohai nái navutaaka aruqi vivi, vika aru taiqakora. Vika navutaaka ntaihamma kaataa umanta nái antuqaaqaa mintuma kora. ⁶ Nora vatuka Susaaqi Iutaa vika nái navutaaka 500 arukeha ⁷⁻¹⁰ Hamaanira maaqu 10navuvata arukora.

Vira maaqu vika nutu vaireva, Pasantataarave, Daponirave, Asapaatarave, Poraatarave, Adaliaarave, Aridaatarave, Pamasaarave, Arisairave, Aridairave, Vaisaatarave, vaura. Iutaa vika nái navutaaka aru taiqake, vika vatave, airairave, kia utu vararaiti, qaqira minni kora.

¹¹ Vohaa vi entaraqaa Iutaa vika Susaaqi vaiha navutaaka nanti nantima arukorara vuru avuhainaara vaiinti tiva amuvaro¹² avuhainaara vaiinti viva Kuini Estaara tiva amiro tiharo, Iutaa vika Susaa vatukaqi nái navutaaka 500 aru taiqa ke, Hamaanira maaqu 10navuvata aru kaavo. Ike, mintihama Iutaa vika vo *provinsi* vo *provinsi* navutaaka

nai airitahaa arukevama varianarove. Virara iriharama are nana haikarae irairaqe te homa ai amirarave. Are tiraqe te ai muntukavano vaina haikara ai amiare, tiro.

¹³ Minti tuvaro Estaava nai tiva amiro tiharo, Avuhainaa vaiintivauvo, are maa uvarara quahairera, Iutaa vatanaaka Susaaqi variaka qaqi kairamanta vika navutaaka vate arukaantemake, hora qaiqaavata arukaate. Viraqaaahira are tiramanta vika Hamaanira maaqau 10navu arukaara vika vaata varepohi arateraqaa vuru hiritate, tiro.

¹⁴ Estaava minti tuvaro avuhainaa vaiintivano ho mintiate tivakero vi uvvara varakovaro Susaaqi vumanta virara irura. Vika Hamaanira maaqau 10navu vaata vare vuru pohi aratoraqaa hiritomata vaiinti nahenti tavora.

¹⁵ Iutaa vatanaaka Susaaqi vauka 14 enta Adaa toraqaa ruvaaqumavi oru nái navutaaka qaiqaa 300 arukevata, kia vika vatave airairave utu vararaiti, qaqi mini kora.

¹⁶ Iutaa vatanaaka vo *provinsi* vo *provinsi* qí vauka, vikavata vo vatuka vo vatukagi ruvaaqumavi nái auta ntiha iqoka raquqi viha, navutaaka vika ntaihareka auti vauka airitahaa arukora. Vika nái navutaiqama nimite vauka 75,000 arukevata, kia vika vatave, airairave, utu vararaiti, qaqi mini kora.

¹⁷ Iutaa vatanaaka 13 enta Adaa toraqaa nái navutaaka aru taiqake vira qararaa 14 entaqaa kia qaiqaa iqoka raqiraiti, qaqi vaura. Vi entaraqaa vika voqamake quaheha ovata neha vaura.

¹⁸ Mintumanta Iutaa vika Susaaqi vauka 13 entaqaaavata 14 entaqaaavata nái navutaaka aruqi vurara ti, vika 15 entaqaa auraara vaiha quaheha vaura.

¹⁹ Haaru Iutaa vika minturara ti, maa entara Iutaa vatanaaka, inaara vatuka, vo vatuka vo vatukaini variaka, vikavata 14 enta Adaa toraqaa auraara vaiha ruvaaqumavi ovata neha, viraqaaahai vo haika vo haika nai ami nai ami i variara.

Purimi entaqaa ovata no okarara

²⁰ Motekaiva vi entara vi haikava vi haikava qovaraiqura qara ntuvu kero ekaa Iutaa vatanaaka vi uvvara tavaate tiro, qara vara kovaro vi uvava Sékesisiva raqiku vataraqaa ekaa vo *provinsi* vo *provinsi* vi anura. ²¹ Motekaiva qara ntuvato uvava mintima tiro:

Ne vo ihi vo ihi variqi viha Adaa tora 14 entaqaaavata 15 entaqaaavata auraara variate.

²² Vi entaraqaa tenavu Iutaa vatanaaka navutaaka aru taiqa kaunarave. Tenavu nora maaraqi vauraro tinavu muntukavano voqama kero qoraiqimanta vaiha, viraqaaahai tenavu tentanavu navutaaka naatara kauraro tinavu muntukaqihairo koqe imanta quaheha vaunuarave. Virara irihama ne vi entara taara entama ruvaaqumavi vaiha ovata neha, quaheha vo haika vo haika nai ami nai ami iha, vehi vaiinti nahenti vaikavata kara nimiate, tiro.

²³ Motekaiva vi uvvara tumanta Iutaa vatanaa vika viva tuntemake, vo ihi vo ihi vi ovatara ne vaura.

²⁴ Hamaanira qova Hamedaatava vauvaro Hamedaatara kaivaqava „King, Agaakiva vaura. Ho Hamaaniva ekaa Iutaa vatanaaka navutaava vaiharo Iutaa vatanaaka aru taiqa kerara tivaqiro viro, Nana entae kaamate tenavu ho vika arukararave? tivakero viva *satu* ruhamakero tavora. Hiparu uvaqihai *satu* virara *purive* ti variara.

²⁵ Hamaaniva mintuvuvaro Estaava oru avuhainaa vaiinti tiva amuvaro viva uva vo qara ntuvakero vara kovaro vi uvava Hamaanira uva aatara korara ti, Hamaaniravata vira maaqunavuvata aruke *pohiqa* hiritore.

²⁶ Virara virara irihama, Motekaiva qara ntuvato uvara viraravata irihama, Iutaa vatanaaka auraara enta taaraqantara *Purimi* entatantave ti variara.

²⁷ Iutaa vika nariara tiha, Vo ihi vo ihi aniraqe tenavu Motekaiva taara entara tivato uvvara kia tauru karaiti, tenavuvata, tentanavu kuvuarama taariraukavata, vo vatanaaka Iutaa vatanaaqama vikavata, vi uvvara avataqji virerave, tura.

²⁸ Iutaa vika minti tivake qaiqaa tiha, Naantiara ekaa Iutaa vatanaaka vo vataini vo vataini vaikave, vo vatukaini vo vatukaini vaikave, ekaa vo naavu vo naavuqi vaikave, ekaa tenavu kuvuara iariraukave, vika *Purimi* enta kia qaqira karaiti, enta vitantara iriha auraara vaiha *Purimi* ovata namaqji vivarave, tura.

²⁹ Minti tumanta Abihailira raavura Kuini Estaavavata, Motekaivavata, *Purimi* entara iriha qara vo ntuvake vara kora.

Vi qararaqji vitanta Motekaika hoqare *Purimi* qara ntuvato uvara qaiqaa kem-pukaiqama kora. ³⁰ Vitanta vi garara vara kovaro vi uvava Iutaa vatanaaka Pesia vataini 127 *provinsi* vaunaini vura. Qara ntuvato uvava mintima tiro:

Ne Iutaa vatanaaka homa muntukaqihai paru i vaira qihaaqamake maateraiqihai vaivarave.

³¹ Ne kara auramate vai okararave, qutu vi vaiintirara iqi rate vai okararave, koqemake iriqi vintemake, nevata, nenta kuvuara ikavata, naitaramake vo ihi vo ihi *Purimi* okarara vi entaraqaa iriqi vuate.

Te Kuini Estaaka Motekaikanti niara vi okarara iriqi vuate turo, tura.

³² Estaava *Purimi* okarara iriva kempukaiqama vuarire tiro, vi uvvara *vukuqi* qara ntuvakero vatora.

10

Motekaiva nora vaiinti vaurara tura

¹ King Sekesisiva vo *provinsi* vo *provinsiqaa* raqikiharoma vikara *takisi* vo aquate tumanta niaraini nora namari auvahini vaukavata, nora vata avutaini vaukavata, takisi vira aqukora.

² Avuhainaa vaiintivano nora kaiqa, vo kaiqa vo kaiqa varo uvaravata, viva Motekaira noraiqamako uvaravata, ekaa vi uvvara *kamaanira* vuku voqi qara ntuvake vatora. Pesiave Midiae vika avuhainaa vaiintinavu kaiqa varo vukuraqi ekaa vi uvvara qara ntuvake vatora.

³ King Sekesisiva avuni vauvaro Motekaiva Iutaa vaiintivano vira naantiara nora vaiintivano vaura. Motekaiva nai kenuka Iutaa vatanaakara noraiqaakero iriharo, vika kahaqiai koqemake variate tiro, kaiqa vara nimite vaura. Minturara ti, vira kenuka Iutaa vatanaaka Motekairara koqe vaiintive tivakeha nora autu vira amura.

IHI (**Psalms — Buk Song**)

1

Avuqavu ni vai vaiintiraravata kia avuqavu ni vai vaiintiraravata tura

¹ Vaiinti vovano qora avu aato ami varia uvara kia avataqiro viraitiro, viva Kotira uva raqake variaka hampata kia himpi vairaitiro, viva Kotirara qora uva ti variaka hampata kia oquivi vai vaiintira Kotiva vira koqema amite vaira.

² Vi vaiintiva Noravano Kotiva tivatai uvarara voqama kero quaheharo vi uvara varakero nai avu aatoqi vatero, entaqivata aatitairaqaavata iriqiro ni vaira.

³ Vi vaiintiva vaireva, koqe katari namarivano tuvinaini ututaa katarira voqaarama vairo. Namari auvahini ututaa katariva vo ihi vo ihi koqema kero tava iraqiro vi vaivaro vira marevanovata kia tamunta viraitiro, qaqi koqe iro vaira. Vi katarira voqaantema kero, vi vaiintiva kaiqa vare vaiva koqe iro vairo.

⁴ Koqe vainti nahenti mintimake variamanta qora vaiinti nahenti kia vika voqaara variara. Qora vaiinti nahenti vaireka, vika uvaivano qeqi kuvu rapa vuaqa kaira voqaara variara.

⁵ Kotiva *ko* tiaina entaraqaa qora vaiinti nahenti kia ho *ko* aatara karaiti, vika avuqavu ni vai vaiinti nahentika ruvaaqumavi vainaini kia ho vaivara.

⁶ Avuqavu ni vai vainti nahentika vaivaro Noravano Kotiva vikaqaa raqikiqiro vi vairamanta vika koqe aaraqaa nuvaqi vivara.

Qora vaiinti nahenti qora aaraqaqai nuvaqi vi, vuru taiqa vivara.

2

Kotiva kaama tai vaiintirara tura

¹ Oho, nantihae vo vatanaa vo vatanaaka Kotirara voqamake arara ite vaimanta variavo?

Nantihae maa vataraqaa variaka ruvaaqumavi uva tiva vare Kotira raqu amitareka auti variavo? Vika uva tiva teva kia ho aru viraro qumina uvaiqama vuanaro.

² Oho, eeka naato vatanaaka avuhainaa vaiintinavu ruvaaqumavi, vika auvihehavaa waqa ntua vare, Nora Kotiravata, viva kaama tai vaiintiravata, raqu nimitareka auti variavo.

³ Vika tiha, Kaiqe tenavu vitanta tinavu rumpataa *senira* ruqemake qaqini variare. Hauri vitanta tinavuqaa raqikiqiri vivorave, ti variarave.

⁴ Vika minti tiavarovata, naaruvali Noravano nai avuhainaa taintaqaa oquiviro vaharo vika uvara naarahama nimite vaira.

⁵ Mintiharo vikara arara itairaro vika nitiramanta vika voqamake aatu ite vaira vaivarave.

⁶ Vika voqamake qete vaivaro Noravano Kotiva vikara mintima tianaro: Te tenta kaama tauna vaiintira noraqama kauraro viva avuhainaa vaiintivano tinta takuqi vai aiqinara Saioni Aiqaqaa vaivo, tianaro.

⁷ Noravano Kotiva minti tiraro viva kaama tai vaiintiva avuhainaa vaiintivano mintima tianaro: Noravano Kotiva tiriara mintima tivo: Are ti Maaquvana variaro. Are ti Maaquvano variana okarara vate te qovarama kauro.

⁸ Are ti irairaqe te eeka vatanaaka vataini variaka ai amiarirara are vikaqaa raqikiqira viraro eeka maa vatava ai vatama varianarove.

⁹ Are *aini* kaavu tuateharama vika naatara kenarave. Aaqatai vataqohai aututaa tavera rakavu kaantema kera, are vika kempuka taiqa kenarave, tiro. Noravano Kotiva tiriara minti tirave.

¹⁰ Ne avuhainaaka, qora avu aato qaqirake, koqe avu aato iriha variate.

Ne vataini varia vaiinti nahentikaqaa raqiki variaka, ne rauriha variate.

¹¹⁻¹² Hauri Kotira vaaka arara itairaro ni vehi autu taiqa kaantorave ti, ne Nora Kotira aatu geteha vira kaiqa vara amitaqi vuate. Aiqu kauqu ntiri ntiri i vairamanta ne vira vevaaraini variaterama, turo.

Kotiva tinavu antua timitaarire ti, viva inaini oru vi variaka, vika quaheha variqi vivara.

3

Devitiva nai maaqu Apasalomura aatu qetakero vu entara maa ihira qara ntuvatora
¹ Mpo Noravauvo, ti navutaaka airitahaa variamantama vauro. Airi vaiinti ti navutaiqaha qoraiqama timitareka auti variavo.

² Vika airitahaa tiriara tiha, Kotiva kia vira kahaqianarove, ti variarave.

³ Vika minti ti variamantavata, te ariara tiha, Noravano Kotiva kainke voqaara ti koqema kero antua timite vaivama vaivo, turo. Arema ti kahaqiaramanata te tentanavutaaka naatarake vaunarave.

Ti kempukavano taiqa vimanta vaurara arema ti qaiqaa kempuka timiaramanta ho vauro.

⁴ Te Nora Kotirara naverai tiha, Ti kahaqiane, turaro viva nai takuqi vai aiqinara, „Saioni Aiqlinaqaahairo,“ ti uva iriharo, ti kahaqi vaivo.

⁵ Entaqi te taari vuqite vaite vauraro, Noravano Kotiva tiqaa koqema kero raqikiqiro vi vaimantara ti, te aavata vaitaqi vivi aatitake himpi koqemake vaunara.

⁶ Ti navutaaka 10,000 ti ututumate harireka auti vaivera, te kia vika naatu getarara.

⁷ Noravauvo, are ti Variqavanoma variaro. Are himpira ti ruaruama timitaane.

Are ti navutaaka kaurira haika nimiane.

Are qora kaiqa vare variaka ruqutiramanta vika aarai nkuivi vairika voqaara vaiha kia ti qoraiqama timitaate.

⁸ Noravano Kotiva tinavu ruaruama timite vaivama vairo. Mpo Noravauvo, tinavu nena vaiinti nahenti koqema timitaane.

4

Devitiva maa ihira qara ntuvatora

¹ Mpo Kotio, are ti antua timite variaravama variaro. Te ai aaraarirara ti uva irira votiane.

Te nora maaraqi vauna entara are ti aanti autu timitaaramanta te ho rugemake vunarave.

Ho vate are ti aaqurihama timitehara te ai aaraaina uvaravata iriane, turo.

² Noravano Kotiva tiharo, Oho, ne maa vaiintika, ne ti hutu koqera vatainiqama keha, kaurira haikaqai ti timi variaka, ne tarentae minti vai okarara qaqrake kia mintivarave?

Tarentae ne qumina haikara noraiqaake iriqi vi vai okarara qaqrake, kia una okara avataqi vivarave? tiro.

³ Ne kiae iriavo? Tenavu avuqavu ni vaurauka tinavuara nai vainti variate tiro, Noravano Kotiva tinavu naini kaama taira. Mintirara ti, te Kotira aaraariraro viva ti uva homa irianaro.

⁴ Virara irihama ne Kotira aatu voqamake qeteha, Kotira uva raqake vai okarara qaqrake, nenta vaite taintaraqaa vaiha nenta avu aatoqi vaina uvvara evaara rairakeha iriqi vuata.

⁵ Kotiva tivatai uvvara irihama ne koqemake *ofaa* iha quara amiteha, Nora Kotirara noraiqaake iriqi viha vira uva iriqi vuata.

⁶ Noravauvo, airi vaiinti nahenti tiha, Mpo, koqe entavano qaiqaavata qovaraiqiataarave, ti variarave.

Mpo, are qaiqaavata tinavu koqema timitairaqe tenavu ho variare, turo.

⁷ Naahoqi *uitivata uainivata* koqemakero mpeqaiqi entara vaiinti nahenti quahe variarave. Ho are timiana quaharava vika quahe variaravata aatara kairave.

⁸ Noravauvo, areqaima tiqaa koqema kera raqiki variaramantara ti, te vaitarera iha kia getaraiti, koqemake vaite vaunara.

5

Devitiva maa ihira qara ntuvatora

¹ Mpo Noravauvo, te ai aaraarirara are te keke ti vauna uvvara iriane.

² Are ti avuhainaava ti Variqavanoma variaro. Te kia voravata aararaiti, ariqai aare vaunarara tira, are ti uva irira ti kahaqiane.

³ Noravauvo, ekka enta toqaqi te ai aare vauna uvvara are iri varianarave.

Kuari avu uriraqaa te ai aaramake, viraqaahai te qaiqaa are tinta tiva timinara vira veka vaunarave.

⁴ Are Variqavano vaihara kia qora kaiqara quaharaitira variaramanta, qora kaiqa vare variaka kiama ho ai aaqanto vaivarave.

⁵ Nái nutu tuahere variaka kia ho ai avuqaa oru vaivarave. Ekaa qora kaiqa vare variakara kia ai muntukavano vaivo.

⁶ Una uva ti variaka are ekaa vika vehi autu kenarave.

Vaiinti arukaakave, unaqaraiqama keha kaiqa vare variakave, are vika navutaiqama nimite varianarave.

⁷ Ai muntukavano tiriara vogama kero vaimantara ti, te homa ai takuqira Naavuqi oriqete, kankakaavi vaiha ai autu tuahera karerave.

⁸ Noravauvu, ti navutaaka airitaha variarara tira, are koqe aaraqaa ti tivita varera vi vairaque te ai avuqavu kaiqa ho varaare.

Te vuaina aarara are ti humiqairaqe te vi aararaqaa vuare.

⁹ Ti navutaaka ti varia uvava una uvaqai vaimanta kia te vika uvara quaave tirarave. Vaiinti nahenti vehi autu nimitevaqai vika avu aatoqi vaivo.

Vaiinti quntama taara kia rahirama taavaro qora untavano urintema kero, vika noqihairo qora uvavano qovaraiqi vairave. Vokiakavata vinavuka hampi ni varia aararaqaa vuate ti, vinavuka vikara uquerara uva ti variarave.

¹⁰ Mpo Kotio, are vika uva avuqavuqama nimitera, vika nái qora kaiqa kaara ruqutuane.

Are qaqi kairaro vika vokiaka qoraiqama nimiteureka tivate uvava, vi uvava vika nái qoraiqama nimitaarie.

Vika ai no kia iriraiti, qora kaiqa, vo kaiqa vo kaiqa vare variara kaara are nena avuqaahira vika nititama kaira niaraini variate.

¹¹ Tinavu qoraiqama timitevorave ti, are iananaini aniaka, are vika qaqi kairamanta quaheha variate.

Are qaqi kairamanta vika quaheha ihi tivaqiqi viha ai autu tuahera kaate.

Ariara muntuka vataaka, are vika antua nimitaqira viramanta vika quaheha variqi vuate.

¹² Noravauvu, kainkevano vaiinti antua amitaintema kera, are avuqavu ni variaka antua nimitehara, vika koqema nimite variaravama variaro.

6

Devitiva maa ihira qara ntuvatora

¹ Mpo Noravauvu, kia ai arara itairara ti titiane. Te qora kaiqa varaainara kaara kia ai arara itairara ti ruqutuane.

² Mpo Noravauvu, ti kempukavano taiqa virara tira, are ti aqurihama timitaane.

Ekaa ti vuhaantaarivanu ihavimantama vauro. Mpo, ti tivaata koqema timitaane.

³ Nora maaravano tiqui vaivaro ti muntukavano qoraiqimantama vauro.

Mpo Noravauvu, are nanti nanti entae varikera ti kahaqinarave?

⁴ Noravauvu, oruranteria nati ti ruaruuma timitaane.

Nena vaiinti nahenti aqurihama nimite vaina okarara iriharama, tivata nati kahaqama timitaane.

⁵ Mpo, qutu vuaka kiama ho ariara iritevarave.

Te qutu vuaka vuuanini otu variarera, te mini vaiha kia te ho ai autu tuahera kararave.

⁶ Mpo, vi haikara vi haikara kaara te iqi rataqiqi vuraro ti kempuka kia vaimantama vauro.

Vo enta vo enta entaqi ti auquruvano te vaitauna taintara putaiqamake vaimanta vaunarave.

Te noraiqamake iqi rataqiqi vi vaurarora tiro, ti pilovanovata putaiqama virave.

⁷ Ti navutaaka airitaha variara kaara te iqi rataqiqi vi vaurararo ti tivuvano noqa vimanta kia te koqemake tave vauro.

⁸ Ne qora kaiqa vare variaka iriate.

Noravano Kotiva te iqi rate vauna uvvara irirara ti, ne te iainanaihai qaqrakave vuate.

⁹ Noravano Kotiva te vira aare vauna uvvara irirara tiro, viva quqaama ti kahaqianaro.

¹⁰ Viva ti navutaaka kaurira haika nimianaro.

Ti navutaaka ti harireka anivaro viva vika ruqutu kaira vika qeteha kaurira, qaqrake vaaka anirante vivarave.

7

Devitiva maa ihira qara ntuvatora

¹ Noravaauvo, are ti Variqavanoma variaro. Mpo, are ti antua timitaane ti, te ai aare vauro.

Ti avataaqi ani variaka ti harivorave tira, are ti ruaruama timitaane.

² Are kia mintirera, *raionivano* vaiinti nkaqakero rapepaama kaintemake, vika ti arukaivaro kia vovano ho ti kahaqianarove.

³ Noravaauvo, are ti Variqavanoma variaro. „Ti navutaiqi variaka tiriara viva vi kaiqara vi kaiqara qora kaiqa varaivave tiamantavata, kia te mintunarave.“

Te kia una tivakeha vo vaiintiqa uva vate vaunarave.

⁴ Ti koqema timite vai vaiintira kia te vira nai qoraiqama amite vaunarave.

Kia te qumina uva kaara tenta navutaara qoraiqama amite vaunarave.

⁵ Te minti kaiqara varaariraravauve, are ti navutaaka qaqi kairamanta vika ti avataaqi viha ti ravaaqavu kevarave. Are vika qaqi kaira vika ti aru vataaini ke, ti tivaata konkoma kanta kevarave.

⁶ Mpo Noravaauvo, ai arara itairara are himpira ti kahaqiane. Ti navutaaka tiriara vogamake nirara itaimanta ti aru kareka auti variavo. Are ti uva avuqavu qiane.

⁷ Are himpira ekaa vo vatanaa vo vatanaa ruvaaquma kairamanta vika are raqiki vaina taintara ututumate vaivara are vi taintaraqaa vähara vikaqaa raqikiqira vuane.

⁸ Arema avuqavuqama kera vaiinti nahenti uva rairakeri iri variaravara tira, are ti uvavata irira, tiriara viraqaa kia uva vaivo tiane.

Mpo Noravaauvo, are nai virini kantaaqaini variaravara tira, te avuqavu ni vauna okarara kankoma kera tavaanarara tira, ti uva avuqavu qiane.

⁹ Mpo, are Variqavano avuqavuqama kera kaiqa vare variarava vähara, are ekaa vaiinti nahenti avu aatoqi vai uvvara kankoma kera iri varianarara tira, are qora kaiqa vare variaka vika qora kaiqa taiqa kera, koqe kaiqa vare variaka kahaqiramanta ho variate.

¹⁰ Ne iriate. Kotiva nai virini kantaaqaini vaiva ti kainke voqaara väharo ti antua timite vaivo.

Vira uva koqemake iri variaka, viva vika kahaqama nimite vairave.

¹¹ Kotiva vaiinti nahenti uva iriharoma viva avuqavuqama kero *ko* tiharo, viva vo enta vo enta qora kaiqa vare variakaqaa uva vate vairava.

¹² Vaiintivano kia qora aara qaqla kairera, Kotiva nai iqoka paippe uvi anakero vatero, huruvata vuikero vataanaro.

¹³ Viva vaiinti arukaaina avihehavaara vaqa ntuvakero vatero, iha itaaina vevara hinta ututero vira arirena auti varianaro.

¹⁴ Qora kaiqa vare variaka vika nái avu aatoqi qora kaiqa varerara iriteha, nái noqihai una uva ti variara.

¹⁵ Vokiaka aqu vuate ti, hinqanti quviteraqi, vika náima aqu vivara.

¹⁶ Vika qora kaiqa vareva tugantaaviro náima ravaaqavu kaanaro.

Vika vo vaiinti qoraiqama amitareka auti vaiva náima qoraiqama nimitaanaro.

¹⁷ Noravano Kotiva avuqavuqama kero kaiqa vare vairara ti, te virara koqemave turo. Noravano Kotiva nai virini kantaaqaini vaimanta te vira autu tuaheraqi viha ihi tivaqti virerave.

8

Devitiva maa ihira qara ntuvatora

¹ Ike, Noravaauvo, are tinavu Noravanoma variaro. Ai autuvano nora autu vaimantara ti, ekaa maa vataraaqaa variaka virara iriarave. Ai mpeqa okaravano takuqi vaiva naaruvinai nai uritarakero mpiqaviro vaivo.

² Naati vainti naama ne variakavata, uri vaiqi varia vaintikavata variavara are nena okara vika numiqe variaramanta vika ai autu tuaherakeha ihi ti variarave.

Vika minti ti variamanta ai navutaakave, ai no raqake variakave, kaurira haika vare variarave.

³ Te entaqi naaruvinai viri taveha tiha, Torave, opu makauve, ekaa vi haikara vi haikara arema autukera, vika nái nimiana vatukaraqaa vonaini vonaini variarave, turo.

⁴ Ike, are vi haikara vi haikara nora haika autukera vataarava vahara, nantiharae are vaiinti nahentiaravata noraiqaakera iri variaro? Nantiharae are qumina vaiinti nahentiaavata koqema kera raqiki variaro?

⁵ Vaiinti nahenti vika *enseli* vevaaraaini vahuqa variate tivakera, are vika autukera vatera, vika noraiqama kera, nora autuvata vika nimianarave.

⁶ Are vaiinti nahentia tihara, Ne te autuke vatauna haikara ekaa haikaaqaa raqikiate, tivakera vika noraiqama kaaramanta vika ekaa are autukera vataana haikaraqaa raqiki variarave.

⁷ Sipisipive, purumakauve, ekaa vo aantauvahi vo aantauvahive,

⁸ naaruvinai ata vare ni varia uvirikave, nora namariqi ni varia havukaukave, ekaa haika namariqi vi ani vai haikarave, are vika nimiamanta vika vi haikara vi haikaraqaa raqiki variarave.

⁹ Ike, Noravaavo, are tinavu Noravanoma variaro. Ai autuvano nora autu vaimantara ti, ekaa maa vataraqaa variaka ai autuara iriarave.

9

Devitiva maa ihira qara ntuvatora

¹ Noravaavo, te tenta muntukaqihai ariara koqeve tivaqiqi virerave.

Are koqe kaiqa vo kaiqa vo kaiqa varaanarara te vaiinti nahenti tiva nimiqi virerave.

² Are mintianarara ti, te ariara iriha quaheha variqiqi virerave.

Noravaavo, are nai virini kantaqaqini variarava variaramanta te ai autuqai tuaheraqivi ihi tivaqiqi virerave.

³ Ti navutaaka ti harireka aniavara are ti kahaqiaramanta vika ai aatu qetake tuqantaavi kantama virare ti, kaavuntiha taiqa vi variarave.

⁴ Are nena *ko* ti variana taintaraqaa oquivi vahara avuqavuqama kera *ko* tihara tiqaa kia uva vaivo tianarave.

⁵ Are vo vatanaa vo vatanaaka una variqa autu tuahere variaka nitihara vikaqaa uva vataanarave.

Are qora kaiqa varaaka vehi autu taiqa kera, vika nutuvata nunka kaararo kia vovanovata vika nutu qaiqaa iritaanarove.

⁶ Are navutaaka vehi autu taiqa kera vika vatuka, vo vatuka vo vatukavata vehi autu taiqa kaararo kia maa entara vovanovata vika vatuka autu irirave.

⁷ Ho iriate. Noravano Kotiva avuhainaava ekaa haikaaqaa ekaa enta raqikiqiro vuanarove. Viva *ko* tireva nai avuhainaava tainta qerama kero vataivo.

⁸ Viva maa vataraqaa variaka uva iriharo avuqavu *ko* tivaqiro viharo vikaqaa koqema kero raqikiqiro vuanaro.

⁹ Navutaaka kauquqihai ruqemake anika, vika homa Noravano Kotiva inaini vivaro viva vikaqaa koqema kero raqikanaro. Nora maaraqiqi vaina vaiintiva, viva homa Noravano Kotiva inaini oru viraro vovano kia ho vira qoraiqama amitaanaro.

¹⁰ Noravaavo, ariara kankomake iriaka vika ariqaa muntuvi vaivarave. Ariara viva tinavu kahaqama timitaanarove ti variaka are kiama vika qaqlira kenarave.

¹¹ Iriate. Noravano Kotiva Saionqi vaharo tinavuqaa raqiki vairaa. Ne ihi tivaqiqi viha vira autu tuahereha viva nora kaiqa varaira ekaa vatanaka tiva nimiate.

¹² Kotiva nora maaraqiqi varia vaiinti nahentika ike mpo ti varia uvvara kia tauru karaitiro, viva vika uvavata iriharo, vika qoraiqama nimite variaka náívata qoraiqama nimite vairaa.

¹³ Mpo Noravaavo, ti tavehara ike mpo tiva timitaane. Ti navutaaka ti qoraiqama timite variamanta te nora maaraqiqi vauraro ti noraiqaakero iha vimanta vauro. Ani ti ruaruuma timitairaqe te kia qutu vuare.

¹⁴ Are ti ruaruuma timitairaqe te quaheha, Ieruharemipi variaka nivuqaa vahaa, are ti kahaqama timitenia kaiqara vikavata tiva nimihaa, ai autu tuaheraqivi vuare.

¹⁵ Vo vatanaka tinavuara aqu vuante ti, higainti quvitaaraqii nái aqu vuarave.

Vika tinavuara vaara vuitaaraqaa nái aru vuarave.

¹⁶ Noravano Kotiva uva avuqavu iriharo avuqavu uvaqai ti vaimanta, vaiinti nahenti vira avuqavu okara kankomake tavaara.

Qora kaiqa vare variaka vokiaka qoraiqama nimitareka auti variavaro, vika qora kaiqavano nái qoraiqama nimite vaira.

¹⁷Ekaa qora kaiqa vare variakave, Kotira tauvaqa utu amite variakave, vika qutu vuaka varianaini vivara.

¹⁸Kotiva kiama vehi vaiinti nahentiara ekaa enta tauru kaanaro. Viva vika kahaqaina entava quqaama qovaraiqianaro. Nora maaraqi variaka, vika kia qumina Kotira veka vaivara. Viva vika uva irima nimitaanaro.

¹⁹Mpo Noravaauvo, himpuane. Kia qaqi kaira maa vataraqaa variaka ai uva raqake nái kaiqaqai varaqi vuate.

Are vo vatanaa vo vatanaaka una variqa autu tuahere variaka ntita varera vuru nena avuqaa kera vikqaas uva vataane.

²⁰Are vika aatu itara haika nimiramanta vika voqamake qeteha tiha, Quqaama tenavu qumina vaiintiqaima vauro, tiate.

10

¹Mpo Noravaauvo, nantiharae are kia ani tinavu kahaqiraitira, niaraini variaro?

Tenavu nora maaraqi vauna entara are nantiharae kukeqavira variaro?

²Qora kaiqa vare variaka vika vehi vaiinti nahentiara qumina vaiinti nahentive tivakeha vika qoraiqama nimite variara.

Oho, are qaqi kairamanta vika vokiaka qoraiqama nimitareka tivate uvava vika nái qoraiqama nimitaarire.

³Qora kaiqa vare vai vaiintiva, viva nai qora kaiqa varaainarara iriharo nai mahuta ti vairave.

Airaira voqavata varataa i vaiintiva, viva Nora Kotirara are vaaquqama vuane tivakeharo vira qoririma amite vairave.

⁴Qora kaiqa vare vaiva te nora vaiintima vauro tivakeharo kia Kotirara noraiqaakero iriraitiro, kia vira rantareva auti vaira.

⁵Mpo, qora kaiqa vare variaka koqemake variarave. Are avuqavu *ko* ti variana okarara, virara kia vika iri variara. Vika nái navutaakara naarahama nimite variara.

⁶Vika nariara tiha, Kiama vo haikavano tinavu qoraiqama timitaanarove. Maaranovata tinavuqaa kiama qovaraiqianarove. Tenavu quaheha homa qaqi variqi virarave, ti variara.

⁷Vika noqihairo qora uvaqai qovaraiqi vaimanta vika una uva vo uva vo uva ti variara. Vika vokiakara vaaquqama vuate tivakeha vika ntaihareka auti variara. Vaakama antua autivave, qora kaiqa varevave, vika noqihairo qovaraiqi vaira.

⁸Vika vatuka tataaqa kukeqavi vaiha qumina vitare aitare i variaka arukareka auti variara.

Vika kia kempuka vai vaiintika arireka ampeqi variara.

⁹Raionivano kukeqaviro vaiharo aantau tavekeri viraqaa aaquviro ravaaqavu kaintemake, vika kia kempuka vai vaiintika ravaaqavuke raraau vare vuara.

¹⁰Oho, qora kaiqa vare variaka kempukavano voqavata vaimanta vika kia kempuka vai vaiintika ruqutuke rupitaitima kaamanta vika hiqintivi variara.

¹¹Qora kaiqa vare variaka nariara tiha, Kotiva kiama tinavu tave vaivo. Viva tenavu qora kaiqa vare vaunarara kia noraiqaakero iri vaivo, ti variarave.

¹²Mpo Noravaauvo, himpuane. Kotio, are nora maaraqi variakara kia tauru karaitira, qora kaiqa vare variaka ruqutuan.

¹³Qora kaiqa vare variaka ai tauvaqa utu amiteha tiha, Kotiva kiama tinavu qora kaiqa kaara ruqutuanarove, ti variara.

Ho nantihae vika minti ti variavo?

¹⁴Quqaama are vika qora kaiqa vare variara tave varianarave. Are vika vaiinti nahenti qoraiqama nimite variara tavera, vika ntaihareva geramatera varianarave.

Vaiinti nahenti kia ho nái kahaqi variaka, vika ariqaa muntuvu vaiha, ariara viva tinavu homa kahaqianarove, ti variavo. Viqa vaintive, vehi vaiinti nahentive, are vika kahaqiravama variaro.

¹⁵Are qora kaiqa vare variaka vika kempuka taiqa kaane. Nái qora kaiqa kaara are vika ntaihairamanta vika kia qaiqaa qora kaiqa varaate, turo.

¹⁶ Noravaauvo, are tinavu avuhainaava vaihara, are ekaa enta variqira vinarave. Are una variqanavu autu tuahere variaka, nena vataqaahaira nititama kairamanta vuate.

¹⁷ Noravaauvo, qoraiqama nimitaa vaiinti nahentika vaiha vika ai aare uvvara irira, vika kempukaiqama nimitaane.

¹⁸ Viqa vaintive, nora maaraqi variakave, are vika uva avuqavuqama nimitaira vika ho vaimanta maa vataraqaa variakaqhairo kia vovano qaiqaa vika getara haika nimiarire, turo.

11

Devitiva maa ihira qara ntuvatora

¹ Noravano Kotiva ti antua timitaarire ti, te virara noraiqaake iriqi vi vaunara.

Te minturamanta ne nantiiae tiriara tiha, Uvirivano qetakero vintema kera, are kanteria ainqinaini viramanta ai navutaaka kia ai aruate, ti variavo?

² Ne tiha, Oho, qora kaiqa vare variaka mantaqaqvai vaiha, vika nái huru vuike avuqavu ni variaka ntaihareka vikaqaa hinta utute variavo.

³ *Kamaanira* kempukavanovata taiqa viramanta „qora kaiqa vare variaka vika nái varaataa i kaiqara vare variamanta, avuqavu ni variaka nantiabee ho vaivarave?

⁴ „Ho ne minti ti variaka irate.“ Noravano Kotiva „kia viraitiro“, viva nai takuqi Naavuraraqi qaqlima vaivo.

Noravano Kotiva naaruvaini vaiharo nai avuhaina taintagaa oquivi vaiharo ekaa naato vataini varia vaiinti nahentika taveharo, vika vare varia kaiqaravata kankoma kero iri tave vairave.

⁵ Noravano Kotiva vaiharo koqe vaiinti nahentivata, qora vaiinti nahentivata tuantikero tave vaira. Vokiaka ruutihä qoraiqama nimite variakara, viva kia vikara antuqa arivararo vairo.

⁶ Viva naaruvaihairo iha auru qaqi ite vainara qora kaiqa vare variakaqaa rauru kaanaro.

Nái qora kaiqa varera kaara viva kempuka uvai vara kairaro utiharo vika tatoqa aquakaanaro.

⁷ Noravano Kotiva avuqavu kaiqa vare vaivara tiro, viva avuqavu kaiqa vare variakara antuqa arivararo vairo.

Avuqavu kaiqa vare variaka, vika homa Kotiva vainaini oru vaiha koqemake variqi vivara.

12

Devitiva maa ihira qara ntuvatora

¹ Mpo Noravaauvo, ti kahaqiane.

Koqe vaiinti vovanovata kia maini qaqi vaivo.

Ekaa maa vaiinti nahentikaqhairo kia vovanovata ariara noraiqaakero iri vaivo.

² Ekaa vika nai una tiva amite nai una tiva amite i variara.

Vika nái noqihai ugerara uva tivakeha una uvaqai ti variara.

³ Noravaauvo, are vika no tinta kairamanta kia qaiqaavata ugerara uva tiate.

Nái mahuta ti varia vaiintika no tinta kaira evaara variate.

⁴ Vika tiha, Tenavu ugerara uva tivaqvi viha vo haika vo haika vararerave. Tenavu uva tiataa iraqe qaqliqai tivaqvi vuariraro kia ho vovano tinavu no tinta kaanarove, ti variara.

⁵ Vika minti ti variavarovata, Noravano Kotiva tiharo, Vinavuka nora maara vehi vaiinti nahentiqaa vate variamanta vika ke ke ti variara te irunarara ti, vate te himpi vika antua nimitaari vika koqemake vaimanta qora vaiintinavu kia qaiqaavata vika qoraiqama nimitaate, tiro.

⁶ Noravano Kotiva tivatai uvava vaireva, quqaa uvama vairo.

Silvaa orivano anomakero hiqama vuarire ti, 7 tataa ihaqohai *unta/nuta* keha hiqama taara voqaara, Kotira uvavano nai koqe uvama vairo.

⁷⁻⁸ Noravaauvo, te tavauramanta qora kaiqa vare variaka vona vona tuqavaaqamake vi ani variamanta qaqliqai vaiinti nahenti vika taveha, vika qora kaiqara koqe kaiqave ti variara.

Mpo Noravaauvo, qora vaiinti nahenti vika tinavu qoraiqama timitevorave tira, are tinavu antua timitaqvi vi vairaqe tenavu ho variare.

13

Devitiva maa ihira qara ntuvatora

- ¹ Mpo Noravaauvo, tarentae are qaiqaa ti iri timitenarave?
- Are ekaa entae tiriara tauru kehara variqira vinarave?
- Are nanti nanti entae ti tivuqaa kukeqavira variqira vinarave?
- ² Ti muntukavano goraiqimanta te vo enta vo enta nora maara varaqi vi vaunara.
- Mpo, are taireve vi maarara taiqa timitenarave?
- Tarentae are ti kahaqiramanta ti navutaaka kia qaiqaavata ti haatara kaate?

³ Noravaauvo, are ti Variqavano variaro. Vo tivakera, ti tavera ti qaiqaa kempukaiqama timitaane.

Hauri are ti qaqi kairage te qutu vuarora.

⁴ Hauri ti navutaaka tiriara tiha, Tenavu vira aatarama kauro, tivakeha oqovivi autiha vora ntua timitevora.

⁵ Ai muntukavano tiriara vainara te virara noraiqaake iriqi virera.

Quqama are ti ruaruuma timitenarara tiro, ti muntukaqihairo koqe i vairaqe variqi virera.

⁶ Noravaauvo, are ti koqema timitaanarara ti, te ai ihi tiva amitaqi virerave, turo.

14

Devitiva maa ihira qara ntuvatora

¹ Kia avu aato vataaka tiha, Kia Variqavanovata vaivo, ti variara.

Vika qoraiqamavi vaiha, qora kaiqaqai vare variara. Vikaqihairo kia voqavanovata koqema kero avuqavu ni vaira.

² Noravano Kotiva naaruvalihairo maini viavi tavaivarao maa vataraqaa variakaqihairo kia voqavanovata vira okara kankoma kero tavaiva vaira.

Vikaqihairo kia voqavanovata vira okarara irireva vira rante vaira.

³ Kia voqavanovata mintimanta ekaa vataini variaka Kotira aaraqaahai tuqantaavi hampi aaraqaa vi variara.

Ekaa vataini variaka qoraiqamavi variavaro, kia vikaqihairo voqavanovata Kotira kaiqa koqema kero vare vaira. Kia voqavanovata mintirave. (Romeni 3:10-12)

⁴ Noravano Kotiva tiharo, Qora kaiqa vare variaka, kiae vika avu aato vaivo? Vaiinti-vano kara nama taiqa kaintemake, vika ti valiinti nahenti aru taiqake variarave. Vika kia tiriara iriraiti, kia ti haare variarave, tiro.

⁵ Ho Kotira uva koqemake iri varia valiinti nahentika viva vika kahaqama nimite vairara ti, naantiara qora kaiqa vare variaka aiqu kauqu ntiri ntiri i vaira voqamake aatu itaira qeteha vaivara.

⁶ Vehi valiinti nahenti tiha, Kaiqe minti minti iare, ti variamanta qora kaiqa vare variaka vika aara kuval nimite variara.

Ho ne qora kaiqa vare variaka iriate. Vehi valiinti nahenti variavaro Noravano Kotiva vika antua nimite vaivama vaivo.

⁷ Mpo, Kotiva Saioni vatumihairo valiinti vo atitairaro viva tinavu Isareru ruaruuma timitarera, te virara koqeve tiataarave.

Naantiara Noravano Kotiva nai valiinti nahenti qaiqaa koqema nimitaaina entara vika kaiqavano ho vairamanta vika koqemake variqi vivarave. Vi entara Isareru voqamake quaheha vaivarave.

15

Devitiva maa ihira qara ntuvatora

¹ Noravaauvo, tauka taukae ai Naavu turuaraini ho vaivarave?

Tauka taukae ai takuqi vai aiqinara Saioni Aiqinaqaa vaiha, ai quahama amitevarave?

² Maa valiinti nahentikama ho mintivarave: „

Vika kia Kotira uva raqa karaiti, ekaa vira uva iriqi viha koqe aaraqaa niha quqaa uvaqai ti variaka, vikama Kotira Naavuqive Kotira aiqinaqaahe ho vaivara.

³ Vika vo valiinti autu vataini tuvi vuantorave ti, kia virara qora uva ti variara. Vika nái tonti kia qoraiqama nimite variara.

Vika nái tataaqa varia vaiinti nahentika kia qoraiqama nimitareka una uva vokiaka viti viri tiva nimi variara.

⁴ Vika Kotiva qoririma nimitai vaiinti nahentikara kia antuqa arimanta vaiha, Nora Kotira uva koqemake iri variaka nora autu nimi variara.

Vika nái kauqu aiqiqa aquukeha tivataa uvvara kia qaqla karaiti, koqe entae qora entae vi uvvara avataqi vi variara.

⁵ Vika vokiaka nimia monura qaiqaa nái varareka iha, kia vitare vo monuvata naariraiti, qaqi nái nimia monura viraqai vare variara.

Vovano qutaru monu vika nimiharo tiharo, Ne vi vaiintirara una uva tivaro viva kia ko aataraa kaarire timanta vika kia vira uva iriara.

Tauka taukae koqe kaiqa mintimake vare variaka, vika kia kuntavaivaima vare kaavu ntiraiti, koqemake variqi vivara.

16

Devitiva maa ihira qara ntuvatora

¹ Mpo Kotio, are ti antua timitaane ti, te are iananaini ani vauro.

² Te Nora Kotirara tiha, Are ti Noravano variaro. Areqai ti koqema timite variaravama variaro, turo.

³ Vataini variaka vo variqara noraiqaake iriaka, vi variqauka qumina haikaqai variarovar vikara kia ti antuqvano vaimantama vauro.

⁴ Vaiinti nahenti tuqavaaqamake vi anilha una variqanavu avataqi ni variaka, vika vaivaro nora maaravano vikaqi qovaraiqianaro.

Vika ruvaaquamavi vahua una variqara quara aantau aru nimitareka ivaqe kia te vika hampata oru vairera. Kia te vika una variqa nutu tuahera karera.

⁵ Noravauvu, kia vovano ti noravano vaivara areqaima ti noravano variaro.

Te vo haikara aavoqiarirara are homa vi haikara ti timinarave. Are tiqaa koqema kera raqiki variaramanta te kia qetaraiti, variqi vi vaunara.

⁶ Are timiara vatava koqe vata vaivaro tini kaama taara haikava koqe haikama vaivo.

⁷ Noravano Kotiva ti koqe uva maara tiva timi vaimantara ti, te vira autu tuaheraqi virera. Entaqivata Noravano Kotiva ti koqe avu aato timi vaimanta vaunara.

⁸ Te tavavararo Noravano Kotiva ti kauqu tanaraini vairara tiro, kia vo haikavanovata ti qoraiqama timite vaimanta te ho vaunara.

⁹ Noravano ti aqamoto vaivarora tiro, ti muntukavano koqe ivaro ti novanovata quaheharo uva ti vaimanta te kia vo haika aatu qetaraiti, variqi virera.

¹⁰ Are kia ti qutu vuaka varianaini kenarare. Are kia ti nena kaiqa vaiinti koqera qaqira kairaro ti vaatavano qumina nteraanaro. (Kaiqa Varora 13:35)

¹¹ Tiriara viva koqema kero qaqi variqiro vuuarire tira, are vi aarara ti humiqaanara.

Te ai aqamoto variariraro ti muntukavano koqe iarire.

Te ai kauqu tanaraini vahua ekaa enta quaheha variqi virera.

17

Devitiva maa ihira qara ntuvatora

¹ Mpo Noravauvu, te ariara viva ti uva avuqavuqama timitaarie ti, te ai aare vauro.

Te tenta noqihai kia una uva tiraiti, ai aare vaunara tira, are ti uva iriane.

² Avuqavu ni varia okarara are kankoma kera iriaravara tira, are ko ti harama tiriara kia viraqaa uva vaivo tinarare.

³ Ti avu aatoqi vaira are kankoma kera iri tavaanara. Te qora kaiqa varaorarave tivake vaurara, are entaqi ti avu aato muntukaqi tuanti taantima kera tavairara, are tavairaro kia viraqai te qora kaiqa autuarirava voqavanovata varianarove.

⁴ Te ai uva koqemake iri vaunara tira, vo vaiintinavu tirohi nái kenauka ruquti varia aararaqaa kia te ni vaunara.

⁵ Te ai aaraqaa niha, kia te vi aararaqaaahai vo aaraqaavata vetante verantemaqi ni vaunara.

⁶ Kotio, ququaama are ti uva iri varianarara tira, te ai aare vauro. Ho vate are nena aato ti timiharama ti uva iriane.

⁷ Ai aumanto oru variaka are vika antua nimite variaravara tira, ai muntukavano tiriara vainara ti humiqehara tivata ruaruama timitaane.

⁸ Are nena avuqaa koqema kera raqikianantema kera, tiqaavata raqikiana.

Kokoraaravano aroka rairakero nai naati aqu amitaintema kera, are tiqaavata koqema kera raqikiramanta ⁹ qora kaiqa vare variaka kia ti qoraiqama timitaata.

Oho, navutaaka ti haru kareka ti ututumate variavo.

¹⁰ Aaqurihama nimite varia okarava kia vikaq'i vaimanta variara.

Vika nái mahuta tivakeha nái nutuqai tuahere variara.

¹¹ Oho, vika ti aiq'u *taararamaqi/uramaqi* ani, ti ututumate, ti utu vatainai rutahaa karekama auti variavo.

¹² *Raioninavu* aantau aru kareka autuantemake, vika ti haru kareka auti variara. *Nora raioninavu* aantau arukareva kukeqavi vaintemake, vika tiriara aituti variara.

¹³ Mpo Noravauvu, ani ti navutaaka hampata iqoka raquqira vihara vika naatara kaane.

Nena iqoka paipeqohaira qora kaiqa vare variaka kauquqihairo ti ruaruama timitaane.

¹⁴ Noravauvu, vatalhainaa haikaraqai noraiqaake iri variakaqaahairo ti ruaruama timitaane.

Vika nái qora kaiqa varaara kaara are nái qoraiqama nimitehara vika vaintivaravata naintivaravata qoraiqama nimitaane.

¹⁵ Te avuqavuqamake ni vauraukara ti, te naantiara ququaama ai viri tavarara.

Te vaitainaraqai himpi, are ti vataakera vainerara iriariraro, ti muntukaqihairo koqe iraqe vairara.

18

Kotiva Devitira Sorura kauquqihairo ruaruama amito entara maa ihira qara ntuvatora (2 Samueri 22:1-51)

¹ Noravauvu, ti muntukavano ariara voqama kero vaimanta vauro.

Are ti kempukaiqama timitaaravama variaro.

² Nora orivano ti antua timitaintema kero, Noravano Kotiva ti antua timite vaivo.

Kempuka vaantaavura voqaarama viva ti ututumate vaimanta te ho vauro.

Viva navutaaka kauquqihairo ti ruaruama timite vaivama vaivo.

Nora orivano ti antua timitaintema kero, ti Variqavano ti antua timite vaimantara ti, te vira vataake variari ti navutaaka kia ho ti qoraiqama timitevarave.

Kainkevano vaiinti antua amitaintema kero, viva tiqaa koqema kero raqiki vaimanta vaunarave.

Vira kempukavano navutaaka kauquqihairo ti ruaruama timite vairave.

Kempuka vaantaavura avutaqi variaka ho variantemake, te viva inaini vaiha koqemake vauro.

³ Te Nora Kotira aarauraro viva navutaaka kauquqihairo ti qaqlini vara kaimantara ti, tenavu vira autu voqavata tuahera kaarivama vaivo.

⁴ Qutira haikavano naaqunta voqaara ti vunta vaantama kero uqurama taimanta te putuvi ruhiqauvi vaunara.

Huvura namarivano ekaa haika qoraiqama kaintema kero, qora haika, vo haika vo haikavano ti qoraiqama timite vaimanta vaunara.

⁵ Kunavano aantau arukareva kahe kahemaqiro vintema kero, qutira haikavano ti ravaaqavu kareva auti vairave.

Vaara vuutaara voqaara matipa quvitaava ti ravaaqavu kareva auti vairave.

⁶ Te mintimake nora maaraqi vaiha Nora Kotira aare vaunara.

Ti Variqavano ti kahaqiarire ti, te vira aare vauraro viva nai naavuqihairo ti uva irira. Te virara tiha, Mpo Noravauvu, ti kahaqiane, turaro viva aato ti timiro ti uva irira.

⁷ Viva ti uva irivararo vira voqamakero arara itaivarora tiro, vaturavano utivararo aqina tuqaqihairo voqama kero qakaa qakaa iharo vairaa.

⁸ Mintivaro vira aqianahairo iha muravano oru vivaro noqihairovata ihavano aitarero voqama kero iteharo tatoqaqiro vivaro iha auruvanovata aitarero itaqiro vi vairaa.

⁹ Viva naaruva qantuakero viraqihairo tuvitaro vira aqitartaini voqama kero konkira ari tonavuva vaivaro ¹⁰ viva kempuka *enseliqaa* oquiviro vaivaro uvai vai arokava vira vita varero ata varero tuvi vaivaro ¹¹ viva konkira aruraqohairo nai viri vaata *navuma/naavuma* taivaro vankora tonavuvano vira ututuma taivaro ¹² viva vainaini voqamakero ataa i vaivaro vira avuni tonavuvano kumporaiqama taivaro *taaru/kaampura* nti vaivaro aaquakaavata uti vairaa.

¹³ Mintiaqiro vi vaivaro naaruuvavano uva tintema kero, Noravano Kotiva uva timanta vataini variaka iriavaro nai virini kantaaqaini vaiva uva tira.

¹⁴ Vaiintivano veva tuta kaintema kero, Kotiva aaquakaa aquqiro viharo navutaaka raumpirima kaimanta vika voqamake qeteha ruqemake vi anира.

¹⁵ Mpo Noravauvu, are nena navutaaka niti vahara nena aqianahaira aiho vuaqa kaararo nora uvaivanu uti vaira voqara ai aihovano nora namari raira aquaivaror, revanto ataaqi vai vatava qoqaa vaivaro vata tuqavanovata qoqaa vaira.

¹⁶ Noravano naaruvhairo nai kauqu tutukero veva muntukaraqi vai varuvaqihairo ti utu mpaqi vaari qaçini kaira.

¹⁷ Ti navutaaka kempuka vaikave, ekaa ti navutaiqi variakave, vika ti haatara kareka auti variavaro Noravano Kotiva vika kauquqihairo ti ruuaruma timitairu.

¹⁸ Te nora maaraqi vauraro ti kempukavano kia ho vai entara ti navutaaka ti hampata iqoka raqireka anintaavaror Noravano Kotiva ti antua timitero ¹⁹ ti tivita varero navutaaka kia ho ti harinaini, nahainaini vuru kaira. Vira muntukavano tiriara vaivarorar tiro, viva mintira.

²⁰ Te avuqvavuqama keha kaiqa vare vaunarara tiro, Noravano Kotiva virara iriharor ti koqema timitero tiqaa koqema kero raqiki vaira.

Kia tiqaa uva vaivaror tiro, viva ti koqema timite vaira.

²¹ Noravano Kotiva tivatai uvvara, te vi uvvara iriqi vi vaunara.

Kia te tenta Variqa tauvaqa utu amitheha qora kaiqa vare vaunara.

²² Te viva vo uva vo uva tivakeru vataira iriqi viha, kia vira uva voqavata raqa kaunara.

²³ Kotiva kankoma kero iri tavaivaro kia vovano vo haika kaara tiqaa uva ho vataanaro.

Viva kankoma kero iri tavaimanta te qora kaiqa varaororave ti, te tentaqaa koqemake raqiki vaunara.

²⁴ Noravano Kotiva te avuqvavu ni vaunarara iriharoma viva tiqaa koqema kero raqiki vairo.

Viva kankoma kero iri tavaivaro kia vo uvavanovata tiqaa vairo.

²⁵ Noravauvu, ariara noraiqaakero iriqiro vi vai vaiintirara arevata virara noraiqaaker era iriqira vinarave.

Kia viraqaa uva vai vaiintiva vaivara are kia vi vaiintiraqaa uva vatenarave.

²⁶ Nai avu aatoqi kia vaaqu kaiqa varaainarara iriraitiro, takuqi vai okarara iri vai vaiintiva vaivara, are nena takuqi vai okarara vi vaiintira umiqenara.

Qora okararaqai nai avu aatoqi iri vai vaiintiva vaivara are vira navutaiqama amitenara.

²⁷ Kia nái autu tuahere variaka variavara are vika ruuaruma nimite varianara.

Nái nutu tuahere variaka variavara are vika nutu vatainiqama kenara.

²⁸ Noravauvu, are ti aara ataama timite variaravama variaro.

Konkiraiqiva tiqaa vaivara, are vira vara qaçini kera, ataama timite variaro.

²⁹ Are ti kempukaiqama timitairage te tenta navutaaka hampata homa iqoka raqirarave. Are ti Variqavano ti kahaqirage te homa ori vaantaavuraqi vaatinte navutaaka naatara kararave.

³⁰ Kotiva vare vai kaiqava vaireva, ekaa vi kaiqava koqe kaiqaqaima vairo.

Noravano Kotiva tivatai uvava quqaa uva vaivaro vaiintivano homa vi uvvara iriro viraqaa muntuviro varianaro.

Tinavu mantaaqa timitaane ti varia vaiinti nahentika, viva kainke voqara vika antua nimitaanaro.

³¹ Noravano Kotiva viva Variqavano vaivaro kia variqa voqavanovata vairo.

Vivaqaima nora ori voqara kempukavano vaharo tinavu avuta ntuva timite vairo.

³² Kotiva vivaqaima ti kempukaiqama kaimanta te aaraini vi ani vauraro viva te nuaina arara koqema timite vaimanta ni vaunara.

³³ Daa aantauvano aqinaini kia kuntavaivai iraitiro, koqema kero nintema kero, viva ti aqutanta kempukaiqama timitaimanta te onkaiqirainti niha kia kaavu ntiraiti, ni vaunara.

³⁴ Viva iqoka raqua okarara ti humiqe vaimanta te baraasiqohai aututaa hurura ho hinta uti vaunara.

³⁵ Noravauvu, are ti antua timitera, ti ruuaruma timitehara, tiriara viva hiqintuanatorave tira, nena kauqu tanaraqohairu ti tuate varianara.

Are ti kahaqiararamanta te vaiinti nahenti nivuqaa nora autu vataukama vauro.

³⁶ Are koqe aara autu timitaara te vi aararaqaa niha kia kaavu nturo.

³⁷ Te tenta navutaaka ntataqi viha vika qoraiqama nimitaunara.

Te vika ntataqi viha kia tuqantaa taqantaa iraiti, kempukaiqamake vika ntataqi vivi, oru vika aru taiqa kaunara.

³⁸ Te vika aru kauramanta vika ti aiquidaraini higintivi kia qaiqaavata himpuara.

³⁹ Are ti kempukaiqama timitaaramanta te tenta navutaaka hampata raquqi vivi, vika naatara kaunara.

⁴⁰ Are ti navutaaka qetara haika nimiaramanta vika te unanaihai ruqemake kantama vuara.

Ti navutaiqi varia vaiintika te vika vehi autu taiqa kaunara.

⁴¹ Vika naveraitiha, Mpo, vovano tinavu kahaqiane ti variavaro, kia vovanovata vika kahaqama nimitaira.

Vika Nora Kotira aaraavaro viva kia vo tiraitiro, kia vika kahaqama nimitaira.

⁴² Uvaivano vuaqa kai konkomara voqaara te vika rukavu raakavuma kaunara.

Vaiintivano aaraqaa vai horara vi ntavake ai ntavake iantemake, te vika qoraiqama nimitaunara.

⁴³ Noravauvu, vo vaiintinavu tiriara viva tinavuqaa raqikiantorave ti, ani ti hampata iqoka raqi variakaqaahaira are ti ruaruama timitera, ti noraiqama kaaramanta, te vo vatanaa vo vatanaakaqaa raqiki vaunara.

Te kia iri tavauna vatanaaka, vate te vikaqaa raqiki vauramanta ⁴⁴ vika ani ti aaqanto kankakaavi vaiha te uva ti vaunara koqemake iri variara.

⁴⁵ Vika ti aatu geteha aiqu kauqu ntiri ntiri i vahia nái vaantaavura ututuma taa vatukara, vo vatuka vo vatuka qaqrake, ani ti vevaaraini variara.

⁴⁶ Ho iriate. Quqaama Noravano Kotiva qaqi variqiro vi vaiva vaivo. Nora orivano vaiinti antua amitaintema kero, viva ti antua timite vaivama vaivo. Ne vira autu tuahera kaate.

Ti ruaruama timite vaira, ne vira autu noraiqama kaate.

⁴⁷ Viva ti kahaqi vaimanta te navutaaka naatarake vaunara.

Viva vo vatanaa vo vatanaaka ti vevaarainiqama kaimanta te vikaqaa raqiki vaunara.

⁴⁸ Viva navutaaka kauquqihairo ti ruaruama timite vaira.

Noravauvu, vokiaka iqoka raqiba ti haatara kaare tiavara, are vika kauquqihairo ti tivita viri qaqini kaanara.

Voqamake nái kena vaiinti ruquti variaka ti aru kaare tiavara, are vika kauquqihairo ti ruaruama timitaanara.

⁴⁹ Noravauvu, are mintianarara ti, te vo vatanaa vo vatanaaka avutana vaiha ai autu tuahera karerave.

Are kaiqa vara timitaanarara iriha, te ihi tivaqi viha ai autu tuahera karerave.

⁵⁰ Noravano Kotiva ti Devitika noraiqama kaimanta te avuhainaa vaiinti vauraro viva ti kahaqimanta te qaiqaa qaiqaavata tenta navutaaka naatarake vaunara.

Te viva kaama tai vaiintika vauraro vira muntukavano tiriara vaira.

Viva ti Devitikaravata, te kuvuarama tauraukaravata, ekaa enta muntuka vateharo variqiro vuanaro.

19

Devitiva maa ihira qara ntuvatora

¹ Ike, naaruvavano Kotira mpeqa okaravano takuqi vaira tinavu tiva timi vaivaro virikanta viva nai kauquqhairo koqema kero autukero vatai haikava, vo haika vo haikavano qoqaa vaimanta tave vaunarave.

² Vo enta vo enta aatitairaqaa naaruvavano mintima keharo Kotiva Noravano vairara tiva timiqiro vi vaivarao, vo enta vo enta entaqi naaruvaini vai haikava Kotira mpeqa okara humiqe vaimanta tave vaunarave.

³ Vi haikava vi haikava naaruvaini vaiha Kotira mpeqa okarara tiva timiha kia vaiintivano tiva timiantemake tiva timi variara. Vika tiva timi variamanta tenavu vika uva iriha kia aatogohai vika uva iri vaunarave.

⁴ Vika mintimake tiavarovata, vika uvavano ekaa naato vataini vi ani vaimanta ekaa tenavu vataini vaurauka vika uva iri vaunarave.

Kuari avuvano naaruvaini variarire tiro, Kotiva kuarivano variaina vatukara autu kero vataivarō,⁵ nahenti varareva i vaiintiva nai naavuqihairo quaheharo veva ntaintema kero, kuari avuvano vevantero ite vairave.

Kempuka vaiintivano quaheharo vokiaka naatara kareva kantaintema kero, kuari avuvano naaruvaini uri vi vairave.

⁶ Kuari avuvano naaruva hini mantaraihairo uruntero uritarero otu ntavara hini mantaraini aqu vi vairave.

Kuari avuvano naaruvaini uriharo ite vaivaro kia vo haikavanovata viva ite vairaqaahairo kukeqaviro varianarove.

Kotiva tiva vatai uvarara tura

⁷ Noravano Kotiva tiva vatai uvava koqe uvaqai vairave. Vi uvava vaiinti kem-pukaiqama amite vaivaro viva koqema kero variqiro vi vairave.

Noravano Kotiva mintimake nuate ti uvava quqaa uva vairara ti, tenavu vira uvara homa noraiqaake iriqi virarave.

Vira uvavano kia koqe avu aato vatai vaiintira kahaqi vaivaro vira avu aatovano koqema virave.

⁸ Noravano Kotiva uva maara tivataiva avuqavu uva vaimanta tenavu vira uva maara iri vauraro tinavu muntukavano koqe iro vairave.

Nora Kotira uvavano vaiinti avu aato ataama amitaivaro viva kankoma kero irirave.

⁹ Nora Kotira aatu qeteha vira autu tuahere okarava koqe okara vaimanta vaiinti nahenti vi okarara avataqi vi variaka ekaa enta variqivi vivara.

Noravano Kotiva ekaa uva vataiva quqaa uva vaivaro vi uvava iriqiro virava avuqavu nuanaro.

¹⁰ Kori oriara koqe haikave tivakeha vira varareka auti variantemake, tenavu Kotira uvava koqe uvave tivakeha vi uvava irirera autiha vaunara.

Kogemake hiqamataa kori oriva koqe ori vaivarovata, Noravano Kotiva tivatai uvava vi oriravata aatarakero avunima vairo.

Noravano tivatai uvava hanivata aatarakero voqama kero hiakaa irave. Bivano nai naavuqī nkurutai hanira hiakaa ivarovata, Noravano Kotiva tivatai uvava viravata aatarakero voqama kero hiakaa iro vairave.

¹¹ Mpo Kotio, te ai kaiqa vaiintivano qora aaraqaa vuvarorave ti, te ai uva viraqai iriqi vi vaunarave.

Te vi uvava koqemake iriqi vi vaurara, are virara irihara ti koqema timite variaro.

¹² Mpo Noravauvu, te kia kankomake iriraiti, qora kaiqa vo kaiqa vare vauna uvava ti nunka timitaane. Ti avu aato hiqama timitairaqe te vi kaiqara vi kaiqara kia vaaare.

¹³ Te qora kaiqa vo kaiqa vo kaiqa varaataa imanta vare vaunara, vi kaiqara qaiqaa varaarorave. Are ti kahaqama timitairaro vi kaiqava kia qaiqaa tiqaa raqiki vairaque te kia ai uva raqa karaiti, koqemake variariraro kia vo uvavanovata tiqaa variarire.

¹⁴ Mpo Noravauvu, arema ti antua timitera, ti ruaruama timite variaravara tira, ti kahaqama timitairaro ti noqihairo qovaraiqiaina uvavavata, te avu aatoqi iritaaina uvavavata, koqe uvavanoqai vaharo ai quahama amitaarire.

20

Devitiva maa ihira qara ntuvatora

¹ „Avuhainaao,“ kairaro nora maaravano ariqi vaina entara Noravano Kotiva ai kahaqiarire.

Kairaro tinavu kaivaqara Iekopira Variqa nora autu vaiva viva ai antua amitaarire.

² Kairaro Saioni Aiqinaqaa Nora Naavuqī vaiva, viva ai kahaqiharo kempukaiqama amitaarire.

³ Kairaro viva are vo *ofaa* vo *ofaa* vira amite varianara, kia tauru karaitiro, viva are vo *ofaa* vo *ofaa* iha quara amitaanara viraravata ai quahama amitaarire.

⁴ Kairaro ai muntukavano vaina haikara viva ai amiro, are nana kaiqa varareva aatoqi iritenara viravata ai amiarire. [Te ai avuhainaarar irihama Kotira aarama amitauro.]

⁵ Kotiva mintima kero ai kahaqirara are iqoka raquqira vihara nena navutaaka naatara kena entara, vi entaraqaa tenavu ai hampata vaiha voqamake quaheha naverai tivaqi viha Kotira autu tuaheraqi virerave.

Mpo, kairaro Noravano Kotiva are vira aarehara tina uvara ekaa iriarire.

⁶ Te kankomake iruraro Noravano Kotiva ti kaama tero ti noraiqama kaimanta te avuhainaa vaiinti vauraro viva ti kahaqi vaimanta vaunara.

Te vira aarauraro viva naaruvaini nai takuqi vairaqlahiro ti uva iriro ti kempukaiqama timitaimanta te navutaaka naatarake vaunara.

⁷ Hini kiaka tiha, Tenavu airi iqoka *kaari* vataarerera, homa navutaaka naatara kararave tiamanta, hini kiaka tiha, Tenavu iqoka ohi airitahaa vataarerera, homa navutaaka naatara kararave, ti variara.

Minti ti variamanta tenavu tentanavu Variqa Nora Kotira kempuka viraraqai noraiqaake iriqi vuvariraro viva tinavu navutaaka ho naatara timitaanarove, ti vaunara.

⁸ Vi vaiintika kuntavaivaima vare kaavu ntivaqevata, tenavu kia mintiraiti kempukaiqamake himpi vairara.

⁹ Noravaauvo, are tinavu avuhainaa vaiinti kahaqiraro viva tinavu navutaaka naatara kaarire.

Tenavu ai aaraaina entara are tinavu uva irira, tinavu kahaqama timitaane, turo.

21

Devitiva maa ihira qara ntuvatora

¹ Noravaauvo, are tinavu avuhainaa vaiinti kempukaiqama amitaararo viva oru navutaaka naatara kairara tiro, viva ariara voqama kero quaheharo vairo.

² Vira muntukavano vai haikara, are vi haikara vira amianara.

Viva ai aareharo ariara ti navutaaka naatara timitaane tivara are vira uva irira vira kahaqianara.

³ Are viva inaini oru ntera vira koqema amitera, viraqaahaira are avuhainaa tovaqa *koriqohai* aututaara vira qiataqaa aqu amitaanara.

⁴ Viva ariara tiharo, Te airi enta variqi virerave, tivara are vira uva irira, airi enta qaqi variqiro vuainara vira amiararo viva variqiro vi vaira.

⁵ Are vira kahaqiararo vira autuvano ekaa vo autu vo autuvata uri aatarakero nai nora autuma vairo.

Viva ai kauquqlahiro nora autuvata, nora kempuka takuqi vai kempukaravata, varaira.

⁶ Are vira koqema amitaana haikava kia taiqa viraitiro, ekaa enta ekaa enta vira vataakero variqiro vuanaro.

Are vira aaqanto varianarara tiro, vira muntukavano koqe ivaro vairave, turo.

⁷ Noravano Kotiva nai virini kantaaqaini vai Variqara, viraraqai avuhainaa vaiintivano noraiqaakero iriharo, vivaqaima ti ho kahaqianarove, ti vaira.

Noravano Kotiva vira koqema amitaqiro vi vairara tiro, viva ho kempukaiqama kero variqiro vuanaro.

⁸ Avuhainaa vaiinti viva nai navutaaka ekaama ravaaqavu kaanaro.

Vira navutaiqi variaka, viva nai kauqu tanaraqohairo vika ekaa ravaaqavu kaanaro.

⁹ Nora ihavano iteharo ekaa haika ita kaintema kero, Noravano nai qovaraiqaina entaraqaa vika ekaa tatoqa aqukaanaro.

Vi entara Noravano Kotiva vairaro vira arara itairaro viva avuhainaa vaiinti vira navutaaka ihaqohairo tatoqa taiqa aqu kaanaro.

¹⁰ Viva vika ekaa vehi autu taiqa kairamanta kia vika vaintivara voqavanovata vataini qaqi vairava.

¹¹ Vika ruvaaqumavi vaiha, avuhainaa vaiinti qoraiqama amitareka vo uva vo uva tivateva quminaqiqama vuanaro.

¹² Avuhainaa vaiinti viva hinta utukero vika arireva auti vairamanta vika getake tuqantaavi aiqu autute kantama vivara.

¹³ Noravaauvo, ai kempukavano nai uri aatarakero vairara ti, tenavu ai autu tuahere vauro.

Tenavu ihi tivaqi viha are nora kaiga vo kaiqa vo kaiqa vare varianarara tivaqi virerave, turo.

22

Devitiva maa ihira qara ntuvatora

¹ Mpo Kotio, Kotio, ti Variqavaauvo, nantiharae ti qaqlira kaaro?

Mpo, te ariara ti kahaqiane turara nantiharae are niaraini vaihara kia ti ani ruaruama timitera iaro?

² Mpo, ti Variqavauvo, te vo enta vo enta aatitairaqaai aare vauraravata, are kia ti uva irira iaro.

Te vo enta vo enta entaqi ai aare vauraro ti muntukavano kia qihaaqirave.

³ Are koqe kaiqaqai vare variarava nena avuhainaa taintaqaai oquivi variaramanta Isarerini vaiinti nahenti ai autu tuahere variarave.

⁴ Haaru tinavu kaivaqaukavara ariqaa muntuvi vauvara are vika ruaruama nimitaanarave.

⁵ Vika ariara mpo tinavu kahaqiane tuvara are navutaaka kauquqihair vika qaqini varakaanarave.

Vika ariqaa muntuvi vauvara are kia vika qaqira karaitira, are vika kahaqama nimitaanarave.

⁶ Mpo, kia te vaiintivauve vauro, te ahequ voqaukama vauro. Ekaa vaiinti nahenti ti nunurama timiteha kia tiriara antuqa arimanta variarave.

⁷ Vika ti taveha naarahama timiteha, nai aru runkinkiri iha, mauru kumiki timiteha tiha,

⁸ Quqaae maa vaiintiva Kotirara tiharo, Viva ti kahaqiariravama vaivo tirave? Ho qaqi kaivar Noravano vira kahaqiarire. Noravano Kotiva quqaa virara quahairera, vira qaqi kaivar ruaruama amitaarire, tiarave. (Mat 27:39)

⁹ Mpo Noravauvu, are koqema kera tiqaa raqiki variararo ti nova ti vatatairave.

Te naama ne vauna entaravata are tiqaa raqiqiqa vuvaro kia vo haikavanovata ti qoraiqama timitairave.

¹⁰ Ti vatatai entaraqaahai te ariqaa muntuvi vaunara. Te vanti naatika vaurara are ti Variqavano varianarave.

¹¹ Mpo Noravauvu, ti qoraiqama timitare iaka ani ti aumanto variarara tira, kia ti qaqirakera niaraini variane.

¹² Purumakau qoranavu voqaantemake, ti navutaaka ti ututumate variarave.

Basaani vataihainaa purumakau qoranavu voqamake arara ite variaka voqaara vika ti ututuma taamanta „te ruqemake vuaina aarava kia ho vaivo“.

¹³ Raionivan aantau arukareva noraiqaakero uva tiharo no aaqaavu taintemake, ti navutaaka ti arukareka no aaqaavute variavo.

¹⁴ Mpo, namari ekaa qihia kaintema kero, ti kempukavano taiqa vivaro ekaa ti vuhaarivano aantauruma vivaro, vahavera ravita vintema kero, ti muntukavano qoraiqimantama vauro.

¹⁵ Ti huntavano aaharaiqama vivaro ti maaqirivano no virini vuruvi taatau vimantama vauro.

Mpo, te qutu vuarirava aumanto vaivara are ti qaqira kera iaro.

¹⁶ Qaakau vairinavu aantau avuta ntuvu taantemake, qora kaiqa vare variaka ti ututuma teha ti qoraiqama timitareka auti variavo. Vika ti aiqu kauqu raqonta kaavo.

¹⁷ Ekaa ti vuhaarinavu qoqaa vaimanta, ti navutaaka ti taveha ti naarahama timiteha huvigorave ti variavo.

¹⁸ Vika ti utavaaqa varareka iha, satu arukeha ti utavaaqa rairake vare variara. (Mat 27:35)

¹⁹ Noravauvu, are ti kempukaiqama timite variaravama variaro. Mpo, kia ti qaqirakera niaraini variane. Vaaka ani ti ruaruama timitaira, ²⁰ qaakau vairi vika kia nai iqoka paipeqohai ti harukaate.

²¹ Are raioni noqihair ti qaqini vara kaane. Qaakau purumakauvano nai pomuqohairo ti raqonta kaantorave tira, are ti ruaruama timitaane.

²² Mpo, are mintima kera ti kahaqirage te are ti kaiqa vara timitenarara iriha tenta qata vakaukavara tiva nimiare.

Te vaiinti nahenti ruvaaqumavi vainaini vaiha ai autu tuahera karerave.

²³ Ne iriate. Ne Nora Kotira aatu qeteha koqemake vira uva iriqi vi variaka, ne vira autu tuaheraqi vuate.

Ne Iekopira naintivara, ne Kotira autu noraiqama kaate.

Ne Isarerini vaiinti nahenti, ne Kotira quahama amitaate.

²⁴ Vehi vaiinti nahenti nora maaraqi variavaro Noravano Kotiva kia vika nunuruma nimitaraitiro, viva vika vira aareha, Mpo, tinavu kahaqiane, ti varia uvvara iriharo vika kahaqama nimite vaira.

²⁵ Noravauvo, te vaiinti nahenti ruvaaqumavi vairaqui vaiha, te are kaiqa vara timitaanarara iriha, ai autu tuahera karerave.

Vaiinti nahenti ai autu tuahereka nivuqaa vaiha te tenta kauqu aiqiqaa aqukeha tivatauna uvarara irihama, te ai *ofaa* iha quara amitaari ²⁶ vehi vaiinti nahenti vika vi karara ho nevarave.

Vaiinti nahenti are inanaini ani vaika, vika ai autu tuaheraqi vivarave. Mpo, are vika kojema nimitaira vika ekaa enta kojemake variqi vuate.

²⁷ Mpo, naantiara ekaa vo vatanaa vo vatanaaka vataini vaika, vika tuqantaavi orurante are Noravano vainanaini ani ai avuqaa kankakaamavi vaiha, ai quahama amitevarave, turo.

²⁸ Noravano Kotiva viva avuhainaava vaiharo ekaa vo vatanaa vo vatanaakaqaa raqiki vaivama vairo.

²⁹ Noravano Kotiva mintima vairara ti, naantiara ekaa vataini vaika, airi airaira vateha koqe kara ne vaikave, ekaa vaiinti nahenti qutuvi taiqavi konkomaqama vikave, naantiara ekaa vika vika Kotira avuqaa kankakaamavi vaiha vira autu tuahera kevarave.

³⁰ Naantiara qovaraiqika, vika Kotiva nora kaiqa varainarara tiva nimiqi vimanta ekaa vika vika vaiha Nora Kotira kaiqa vara amitaqi vivara.

³¹ Kia maa entara vatataamanta qovaraiqika naantiara vika qovarama vimanta, maantimake vika tiva nimivara:

Noravano avuqavu kaiqaqai vare vaiva, viva naivano vaiinti nahenti ruaruuma nimite vaivama vaivo, tivarave.

23

Devitiva maa ihira qara ntuvatora

¹ Sipisipi qova koqeva nai sipisipiqa raqikintema kero, Noravano Kotiva tiqaa raqiki vaimanta kia te vo haikaravata aavoqunara.

² Viva ti qaqqi kaimanta te koqe ukau kanta auraara vaunara. Viva ti tivita varero vuru koqe namarivano qihaaqama kero tuvi vainaini kaimanta te ho vaunara. (Qoqaiqama Kora 7:17)

³ Viva ti qaraaka kempuka timimanta te kojemake variqi vi vaunara.

Viva nai autu koqerara iriharo avuqavu vai aarara, vo aara vo aara ti humiqaimanta te taveha ho ni vaunara.

⁴ Noravauvo, are tintira variqira vihara nena sipisipiqa raqiki variana kaavuraqo-hairavata, qaqqi kauruqohairavata, ti antua timite variaramantara ti,

te qora onkaiqi voqama kero konkira ari vainaini nuarera, kia te qora haika aatu qetaariraro ti muntukavano qihaaqama kero vairae te kojemake vairara.

⁵ Te tenta navutaaka avuqaa vaurara are kara koqera ti qerama timitera, ti quahama timitehara ti qiatqaqa vahavera koqera aqu timitera, tiriara ani kara naane tivakera, namarivata ti *kaapuqi* mpiqa kaaramanta te ho ne vauro.

⁶ Te kankomake iri tavauraro ai muntukavano tiriara variqiro vi vairara are ti kojema timite vairae te maa vataraqaa variqi vivi, ai Nora Kotira naavuqi ekaa enta variqi virerave.

24

Devitiva maa ihira qara ntuvatora

¹ Maa vataavavata, ekaa maa vataraqaa vai haikavavata, ekaa vi haikava vi haikava vaireva, Noravano Kotiva i haikavama vairo.

Maa vataraqaa variaka, ekaa vikavata viva ikama variara.

² Viva hoqarero nora namariqi vata tuqa autukero, nora namari veva muntukaraqi vata vira tuqa arakero vataira.

³ Taukae Nora Kotira aiqinaqaa ho oru vaivara? Taukae vira Naavu turuaraini ho oriqete vaivara?

⁴ „Maa vaiinti nahentikama ho mintivarave:“ Vika nái kauquqohai kia qora kaiqa vararaiti, nái avu aatoqi kia qora kaiqa varerara iriraiti, kia una variqa nutu tuahera karaiti, kia unahaa tiha te quqaa minti mintirerave ti variaka, vikama Kotira aiqinaqaave, vira Naavu turuarainive, ho oru vaivara.

⁵ Mintimake variakama Noravano Kotiva kojema nimitaanaro.

Kotiva vika ruaruama nimitaiva vikara mintima tianaro: Kia vikaqaa uva vaimanta vika avuqavuqamake ni varia vaiinti nahentikave, tianaro.

⁶ Mintiaka vikama quqaa Kotira rantake, Iekopira Variqa aaqanto oru vaivara.

⁷ Ne vaantaavura qenti qantua kaate.

Ne haaru aututaa gentika, anomake qantua vivaro Avuhainaa Vaiinti vira mpeqa okaravano takuqi vaiva vatuka avutaqi oriqetaarire.

⁸ Avuhainaa Vaiinti vira mpeqa okaravano takuqi vaiva, viva tavave?

Viva Noravano Kotivave. Vira kempukavano uri aatarakero vairave. Noravano Kotiva iqoka raquqiro viharo navutaaka naatarake vaivama vaivo.

⁹ Ne vaantaavura qenti qantua kaate.

Ne haaru aututaa gentika, anomake qantua vivaro Avuhainaa Vaiinti vira mpeqa okaravano takuqi vaiva vatuka avutaqi oriqetaarire.

¹⁰ Avuhainaa Vaiinti vira mpeqa okaravano takuqi vaiva, viva tavave?

Viva Noravano Kotivave. Viva ekkaa kempuka vataava vaivar, vira mpeqa okaravano takuqi vairave. Viva Avuhainaava avuni vaivama vaivo, turo.

25

Devitiva maa ihira qara ntuvatora

¹ Noravauvu, te ai aareha mpoma turo.

² Mpo, are ti Variqavonoma variaro.

Te ariara viva ti kahaqiariravama vaivo tunara.

Mpo, hauri are ti navutaaka qaqa kairamanta vika ti aatarake vora ahora ntuvatimitaige te kaurira haika varaororave.

³ Ariara viva ququaama tinavu kahaqianarove ti variaka vika kiama kaurira haika varevarave.

Qumina haika kaara vokiaka qoraiqama nimite variaka, are vika kaurira haika niminara.

⁴ Noravauvu, are nena koqe okara, vo okara vo okara ti humiqairaqe te koqemake ai aaraqaa vuure.

⁵ Are ti Variqavano ti ruaruama timite variaravara tira, nena quqaa uva ti tiva timiraqe te vi uvara iriqi vuure.

Vo enta vo enta ariara viva ti kahaqiarire ti, te ariara noraiqaake iri vaunarave.

⁶ Noravauvu, nai haaru ai muntukavano vaiinti nahentiara vaivara are vika aaqurihama nimitaanantema kera, tivata mintima timitaane.

⁷ Mpo Noravauvu, te qaraaka vaiinti vaiha qora kaiqa, vo kaiqa vo kaiqa varauna uvara, kia iritaraitira, nunka timitaane.

Ai muntukavano vaiinti nahentiara vaivaro koqe okaravanoqai ariqi vairara tira, are tirira iritehara ti aaqurihama timitaane.

⁸ Koqe okaravanovata avuqavu okaravanovata Nora Kotiraqai vairave. Viva qora kaiqa vare variaka aaqurihama nimiteharo vika koqemake ni okarara numiqe vaira.

⁹ Kia nái mahuta ti variaka viva vika ntita varero avuqavu aaraqaa viharo, nai antuqavano vai kaiqara vika numiqe vaira.

¹⁰ Noravano Kotiva tivatai uvara vo uva vo uva koqemake iri varia vaiinti nahentika variavaro Kotira antuqavano vikara vaivaro viva vika kia qaqla karaitiro, koqe aaraqaa ntitaqiro vi vaira.

¹¹ Noravauvu, nena nora autuara iriharama te ai uva raqa kaunara nunka timitaane. Mpo, vi uvava nora uvama vaivo.

¹² Nora Kotira aatu qeteha koqe aaraqaa nireka auti variaka, Noravano vika aara numiqairamanta ¹³ vika koqemake variqi vi vaimanta vika kuvuarama teka nái noka qoka i vataro varevara.

¹⁴ Nora Kotira aatu qeteha koqemake ni variaka variavaro Noravano kia nai tivatai uvara kukeqa taraitiro, vika tiva nimi vairo.

¹⁵ Noravano Kotiva ti kahaqiarire ti, te virara noraiqaake iri vaunara.

Ti qoraiqama timitate iaka vaara vuitaaraqihairo viva ti ruaruama timitaanaro.

¹⁶ Mpo Noravauvu, te tentaraa vauraro ti kempukavanovata taiqa vimanta vaunarara tira, are tuqantaavira tirira mpo ike tiva timitaane.

¹⁷ Mpo, vo maara vo maaravano tigi vaivaro ti muntukavano qoraiqivo.

Are anira vi maarara qaqla vara kaane.

¹⁸ Te nora aihaviraarave nora maarave varauvara tavehara, ai uva, vo uva vo uva raga kaunaravata nunka timitaane.

¹⁹ Ti navutaaka airitahaa vaiha vika anomake ti navutaiqihia ti qoraiqama timitaareka auti variara are tavaane.

²⁰ Mpo, te ariara viva ti kahaqiariravave tivakeha are iananaini anunara virara irihara ti antua timitehara ruaruama timitairamanta ti navutaaka kia ti aatara kaate.

²¹ Te ariara noraiqaakee iriha koqemake nunarave, avuqavu nunarave, are virara virara iriharama ti kahaqiane.

²² Noravaauvo, are tinavu Isareru Variqavano vahara vo maara vo maaraqihairu tinavu ruaruama timitaane.

26

Devitiva maa ihira qara ntuvatora

¹ Noravaauvo, te ariara noraiqaakee iriqi viha te kia tuqantaa taqantaa iraiti, te ai aaraqaa avuqavu ni vaunarara tira, are tiriara kia viraqaa uva vaivo tiane.

² Noravaauvo, are ti okara avatama kera tavaane. Ti muntukavano nana nana haikara vainarave, ti avu aatovano nana nana haikara iri vainarave, are ekaa vira tuantikera tavaane.

³ Ai muntukavano tiriara vaira te kia tauru karaiti, te ariara noraiqaakee iriha, ai ququa uva iriqi vi vaunarave.

⁴ Kia te una uva ti variaka hampata vi ani vauraukave. Unaqaraiqama keha koqe kaiqa vare variaka, te kia vika iananaini oru vaunarave.

⁵ Qora kaiqa varareka ruvaaqumavi variaka, kia ti muntukavano vikara vairave. Te qora kaiqa vare variakagaahai niaraini vaunarave.

⁶ Noravaauvo, kia tiqaa uva vaimantara ti, tenta kauqu ai avuqaa, hiqamake, ai ofaa tainta virante airante ututihu, ai autu tuahere vauro.

⁷ Te mintimake ihi tivaqi viha ariara koqemake tivakeha are nora kaiqa, vo kaiqa vo kaiqa varaanara vaiinti nahenti tiva nimi vauro.

⁸ Noravaauvo, are variana Naavura, virara ti muntukavano vaimantama vauro. Vi Naavuraqai ai mpeqa okaravano takuqiro vaivara variaro.

⁹ Mpo, are qora kaiqa vare variaka vehi autu keharama, kia tivata vehi autu kaane. Are nai kena vaiinti arukekaqaa uva vateharama, kia tiqaa uva vataane.

¹⁰ Vi vaiintika voqamake qora kaiqa vare variakara ti, vika qutaru monu varerara iriha vaakama vaiinti arukevara.

¹¹ Vika minti variaveravata, tiqaa uva variantorave ti, te avuqavuqamake ni vaunara. Mpo, are virara irihara ti aqurihama timitehara ruaruama timitaane.

¹² Te koqe aaraqaa vauraro kia vo haikavanovata ti qoraiqama timitaanaro.

Te mintimake vaiha, te Kotira vaiinti nahenti ruvaaqumavi vainaini vaiha, Nora Kotira autu tuaheraqai virera.

27

Devitiva maa ihira qara ntuvatora

¹ Noravano Kotiva viva ti aara ataama timite vaivama vairo.

Viva ti ruaruama timite vaivama vairo.

Viva minti vaimantara ti, te kia vo vaiinti aatu qeteha vairara.

Qora haikavano ti qoraiqama kaantorave tiro, Noravano Kotiva tiqaa raqiki vaiva vaimantara ti, te qumina qetaarora.

² Qora kaiqa vare variaka ti haru kareka ani ti hampata iqoka raqi entara, vika náima kuntavaivama vare kaavu ntivara.

³ Iqoka vaiinti airitahaa ani ti ututuma taivera, kia te vika aatu qetarera.

Ti navutaaka ti hampata iqoka raqireka anivera, vi entara te Kotiraraqai noraiqaake iriqi virera.

⁴ Noravano Kotiva vohaa haikaqai ti timiarire ti, te vira aare vaunara.

Ti hantuqavano vohaa haikaraqai vaimanta vaunara.

Te Nora Kotira ireha mintima ti: Te qaqi variqi vuaina entara, ekaa vi entara te hoe ai Naavuqi variqi virarave? tunara.

Te viraqi vaiha viva ti kojema timite vairara aatoqi iriqi viha, virara koqe aara ti humiqairage vuare tirara.

⁵ Nora maaranavo tiqaa qovaraiqaina entara viva ti tivita varero vuru nai Naavuqi kukeqa taanaro.

Vi entara viva nai vainaini turuaraini ti kukeqa taanaro.

Viva ti tivita varero vuru nora oriqaa kairamanta navutaaka kia ho ti harivara.

⁶ Noravano Kotiva mintima kero ti kahaqirage te vuruni vaiha tenta navutaaka miani ti ututumate variaka naatara keha, vika vora ahora autu nimirarerave.

Te vora ahora autuqi vivi, viraqaaahai oru Kotira Naavuqi quaheha Kotira *ofaa* iha quara amitarera.

Te mintiaqi viha Nora Kotira autu tuahereha ihi tivaqi virera.

⁷ Mpo Noravauvu, te ai aaraaina entara are ti aaqurihamu timitehara uva ti tiva timiane.

⁸ Noravauvu, ti muntukaqihairo ai aaqanto oru variane timanta te ai aaqanto oru vairerave.

⁹ Te mintiarirara are ti tivuqaa kia kukeqa vuane.

Hauri ai arara itairara are ti nena kaiqa vaintiara vuane tirora.

Are ti kahaqi variaravara tira, kia ti qoririma timitera, qaqira kaane.

Are ti Variqavano ti ruaruama timite variaravama variaro.

¹⁰ Mpo, ti noka qoka ti tauvaqa utu timitaivera, Noravano Kotiva kia mintiraitiro, viva ti tivitaanaro.

¹¹ Noravauvu, ai antuqavano vai kaiqara ti humiqairage te vi kaiqara varaqi vuare. Mpo, ti navutaaka airitahaa variarara tira, are avuqavu aaraqaa ti tivitaqira viramanta vika kia ti qoraiqama timitaate.

¹² Mpo, are kia ti navutaaka kauquqi kaane. Tiriara qetaarire ti, vika tiqaa una uva oqiteha tiha, Tenavu ai minti mintimake qoraiqama amitarerave, tivakeha ti rauqi timite variarave.

¹³ Vika minti iaveravata, te vo haikara kankomake irunara: Te maa vataraqaa qaqi variaina entara Noravano Kotiva ti kojema timitaanaro.

¹⁴ Are Nora Kotira veka vairaro viva ai kahaqiarire. Ai muntukavano qoraiqama vuantorave tira, are Nora Kotirara kempukaiqamakera iriqira vuane.

Nora Kotira veka vairaro viva ai kahaqiarire.

28

Devitiva maa ihira qara ntuvatora

¹ Noravauvu, are ti antua timite variaravama variaro.

Mpo, te ai aaraarirara are kia aato tinta vi vaiintira voqaara vairaitira, ti uva iriane. Hauri are evaara vairage te qutuaka vatukaini vuarorave.

² Ai takuqi vai Naavuva vainaini te tenta kauqu tutuke, ariara mpo ike ti kahaqiane ti vauna uvvara iriane, turo.

³ Mpo, are qora kaiqa vare variakaqaa uva vateharama kia tiqaa uva vataane.

Vika nái noqihai nái kenukara koqe uva uqerara uva tivakeha, nái aatoqihai vika qoraiqama nimiterara iriqi vi variara.

⁴ Vika qora kaiqa varaara kaara vika nái koqaa nimiane.

Vika qora kaiqa, vo kaiqa vo kaiqa varaarara irihara, vika ntaihaane.

Are vikara huviqorave tivakehara vika qoraiqama nimitaane, turo.

⁵ Noravano Kotiva vare vai kaiqarave, viva autukero vatai haikarave, vika virara kia noraiqaae riara kaara Kotiva vika ntaieharo vehi autu taiqa kaira kia qaiqaavata vaivvara.

⁶ Mpo, te Nora Kotira aareha ti aaqurihamu timitaane turaro viva ti uva irirara ti, kaiqenavu vira autu tuahera kaare.

⁷ Noravano Kotiva ti kempukaiqama timiteharo viva kainke voqaara ti antua timite vaivama vairo.

Viva ti kahaqama timite vaiva vaimanta te viraqaa muntuvi variqi virera.

Te tenta muntukaqihai voqamake quaheha, ihi tivaqi viha vira autu tuaheraqivi.

⁸ Noravano Kotiva nai vaiinti nahenti kempukaiqama nimite vaiva vaharo, viva avuhainaa vaiinti nai kaama taira, viravata kahaqiharo navutaaka kauquqihairo vira ruaruama amite vairo.

⁹ Noravauvu, nena vaiinti nahenti ruaruama nimitaqira vuane.

Nena kaama taana vaiinti nahentika koqema nimitaqira viharama, sipisipi qova nai sipisipiqaa koqema kero raqikintema kera, ekaa enta nena vaiinti nahentiqaa raqiqiqira vuanelerama, turo.

29

Devitiva maa ihira qara ntuvatora

¹ Ne naaruvalihainaaka Nora Kotira autu tuaheraate.

Vira kempukaravata, vira mpeqa okaravano takuqiro vairaravata, irihama ne vira autu tuaheraate.

² Vira nora autuvano takuqiro vaira tuahera amitaate.

Noravano Kotiva koqe kaiqaqai vare vaiva nai turuaraini takuqinaini vairara irihama, ne kankakaavi vaiha vira quahama amitaate.

³ Noravano Kotiva uva tivaro vira uvavano oru vimanta nora namariqaa vi ani variaka ekaa vira uva iri variara.

Variqavano takuqiro vaiva naaruvalihaina uva tintema kero, viva uva ti vaiva nora namari vaura oru vi vaira.

⁴ Noravano Kotiva uva tivaro vira uvavano kempukaiqaakero uva ti vairara ti, vaiinti nahenti vira uva iriha qete variara.

⁵ Noravano Kotiva uva tivaro vira uvavano Lebanonini vai *sidaa* katarira, vo katari vo katari rauhaantima kaimanta ekaa raqa raaqama vuara.

⁶ Viva uva tivaro purumakau naativano ravukuvu ravukuvu intemakero, Lebanoni vatainai vai ainqinava, vo ainqina vo ainqinavano qakaa qakaa i vaira.

Viva uva tivaro purumakau naati qoravano ravukuvu ravukuvu intema kero, Hemoni Ainqinavano voqama kero qakaa qakaa i vaira.

⁷ Noravano Kotiva uva tivaro vira uvavano aaquakaa qovarama kaivaro uti vaira.

⁸ Viva uva tivaro aahara vatainai vai vatava, ekaa qakaa qakaa i vaira. Viva Kadesini Aahara vata qaki qakima kaira.

⁹ Noravano Kotiva uva tivaro vira uvavano nantaqi nora katari, vo katari vo katari rare raarerama kaimanta ekaa katari mare ratutu vuara.

Minti vaimanta Kotira Naavuqi ruvaaquamavi variaka naverai tiha, Kotira mpeqa okaravano takuqi vaivo, tiara.

¹⁰ Noravano Kotiva nai avuhainaa taintaqaa oquiviro vaharo nora namariqaa raqiki vairave.

Noravano Kotiva Avuhainaaava ekaa enta ekaa enta raqikiqiro vuanelarave.

¹¹ Noravano Kotiva nai vaiinti nahenti kempukaiqama nimite vairave.

Noravano Kotiva nai vaiinti nahenti koqema nimite vaivar vika muntukaqihairo paru i vaimanta variarave.

30

Devitiva maa ihira qara ntuvatora

¹ Noravauvu, are ti ruaruama timitaaramanta ti navutaaka kia vora ntiha vira aru kauro tiaverama, te ai autu tuahere vauro.

² Noravauvu, are ti Variqavano variaro.

Te ariara mpo, ti kahaqiane turara are ti uva irira, ti kahaqiararo ti tivaata rukukuqaimanta te ho vaunara.

³ Noravauvu, te qutuvi ruhiqauri vaurara are ti kahaqama timitaaramanta te qaqi vauro.

Te qutu vuaka varianaini virera urara, are ti kahaqama timitaaramanta kia qutu vuro.

⁴ Ne Kotira vaiinti nahenti ihi tivaqi viha vira autu takuqi vaira tuahera kaate. Viva koqe kaiqa, vo kaiqa vo kaiqa ni vara nimitairara irihama, virara koqeve tivaqi vuate.

⁵ Vira arara itaiva kia vukai vairaitiro, vaaka humpama vi vaira. Viva tinavu koqema timite vaiva kia vaaka taiqa viraitiro, ekaa tenavu qaqi variqi vuaina entara variqiro vuanelarave.

Entaqi tenavu iqi rataqi vuariraro auquru ntavaqiro viro, toqaqi aaharauqama viraqe tenavu quaheha vairera.

⁶ Te tentara tiha, Te homa vauro. Kia vo haikavano ti qoraiqama timitaanarove, tuna entara,⁷ are ti koqema timite variaramanta te ainqina voqaara kempukaiqamake vaunara.

Noravaavo, te mintimake vauraravata, are ti avuqaahaira kukeqa vuararo ti muntuka qoraiqimanta qeteha vaunara.

⁸ Noravaavo, te ai aareha ariara, Mpo, ti kahaqiane. ⁹ Ti arukaiqe te qutu vuainaraqaa-hairo kia koqe haikavano qovaraiqianarove.

Te qutu vuaka varianaini otu vuarer, ti vaatavano konkomaiqama viro nantiakeroe vi konkomava ai autu tuaheraanarove? (6:5)

Vi konkomava kia ho are ti koqema timitenarara vaiinti nahenti tiva nimianarove.

¹⁰ Mpo Noravaavo, are ti uva irihara ti aaqurihama timitehara ti kahaqiane, turo.

¹¹ Ti muntuka qoraiqimanta vaurara are tiqaahaira kovaara utavaaqa qaqini varakera, ihi ntaaina utavaaqa nonku timitaaramanta te quaheha ihi nte vauvo.

¹² Are mintima kera ti koqema timitaanarara ti, te kia evaara vairaiti, te tenta muntukaqihai ihi tivaqি virera.

Noravaavo, are ti Variqavanoma variaro.

Te ekaa enta variqi viha, ariara koqemave tivaqি virera.

31

Devitiva maa ihira qara ntuvatora

¹ Noravaavo, vokiaka ti qoraiqama timitevorave ti, te are iananaini anunarave.

Mpo, are kia ti navutaaka qaqi kairamanta kaurira haika ti timiate. Are avuquvu kaiqa vare variaravara tira, ti ruaruuma timitaane.

² Mpo, nena aato ti timira ti uva irira, vaakama ti ruaruuma timitaane.

Vaiintivano ori onavuqi kukeqaviro vaintemake, te are variananaini oru variarirara are ti kukeqa timitaane.

Te ai kempuka vaantaavura avutaqi oru variarirara are ti antua timitaane.

³ Ququaama are ti ori onavu koqeva variaro.

Ququaama are ti kempuka vaantaavuravano variaro.

Are mintimake variaravara tira, nena nora autuara iriharama ti tivita varairage te koqe aaraqaa vuare.

⁴ Hauri te navutaaka vaara vuitaaraqi vuarorave. Vika qoraiqama timitevorave tira, ti antua timitaane.

⁵ Te tenta qaqi variqi vuainara ai kauquqima vatauro.

Noravaavo, are Variqavano ququa uvaqai ti variaravara tira, ququaama are ti ruaruuma timitenarave, turo.

⁶ Noravaavo, una variqanavu autu tuahere variaka, vikara ti muntukavano kia vaimanta te ariqaa muntuvi vaunarave.

⁷ Te maara varaunarare, ti qoraiqama timitaarave, are virara iri tavaanarara ti, ai muntukavano tiriara vainara te virara noraiqaake iriqi viha quaheha vairerave.

⁸ Tiriara navutaaka vira ravaaqvav kevorave tira, are ti tivita varera vuru nahaikanta kaaramanta te ho vi ani vaunara.

⁹ Mpo Noravaavo, nora maaravano tigi vaimanta vira kaara te iqi rataqi vi vauraro ti tivu noqa vivaro ti kempukavanovata taiqa vimanta vaunarara irihara are ti aaqurihama timitaane.

¹⁰ Ti muntukavano qoraiqimanta te iqi rataqi vi vaunara kaara te qaqi variqi vuaina entava iquqama vivo.

Tigi vai maarava ti kempuka taiqa kaivarо ti vaatavano ogita vimanta vauro.

¹¹ Ti navutaaka tiriara qumina vaiintive ti variamanta ti kenukavata ti aipi nota timite variarave. Ti tontivata ti aatu qetake kia te vaunanaini aniarave.

Te aaraini ani vauramanta vika ti tave, ti aatu tuqantaavi kantama vuarave.

¹² Vaiintivano qutu virara tauru kaantemake, vika tiriariavata tauru kaavo.

Vataqohai aututaa taveva rukavuvira qaqla kaara, vira voqaarama te vauro.

¹³Oho, te iruramanta ti navutaaka tiriara qetaarire ti, vika evaara evaara uva ti variavo.

Vika evaara ruvaaqumavi vaiha ti harukerara nai tiva ami nai tiva ami i variavo.

¹⁴ Noravauvu, vika minti ti variamanta, te ariqaa muntuvi vairerave. Are ti Variqavano variaro.

¹⁵ Are tiqaa raqiki variaravama variaro.

Ti navutaaka ti qoraiqama timitareka auti variakaqhairs ti ruaruama timitaane.

¹⁶ Mpo, are ti nena kaiqa vaiinti koqema timitaane. Ai muntukavano tiriara vaivarara tira, are ti ruaruama timitaane.

¹⁷ Mpo Noravauvu, te ai aareha ariara ti kahaqiane ti vaunarara tira, hauri are ti navutaaka qaqi kairamanta vika kaurira haika ti timivorave.

Are qaqi kairamanta vika nái kaurira haika varaate. Qaqi kairamanta vika qutu vuaka varianaini otu evaara variate.

¹⁸ Vika nái nutuqai tuahereha avuqavu ni varia vaiinti nahentika nota nimiteha, vikara tauvaqa vauraa uva ti variavo.

Vira kaara are vika no tinta kairamanta kia qaiqaavata vi uvvara tiate.

¹⁹ Ai aatu qeteha koqe aaraqaa ni variakara irihara, are vo haika vo haika koqe haika vika kaama nimitaanarave.

Are vi haikara kia kukeqa kera nimiraitira, ekaa vaiinti nahenti tavaate tira, ariara antua timitaane ti varia vaiinti nahentika qoqaa nimianaranave.

²⁰ Are nena vaiinti nahenti kukeqa taaramanta vika ai aaqanto variavaro qora vaiinti vika arukareka tivataa uvava kia qovaraiqira.

Vika navutaaka kia ho vikaqaa uva ntuvakeha tiate tira, are nena vaiinti nahenti nena aaqanto kaaramanta variara.

²¹ Ne Nora Kotira autu tuahera kaate.

Vira muntukavano tiriara voqavata vairara ti, te vatukaqi vauramanta navutaaka vatuka vira ututumate ti haru kareka auti variavaro Noravano ti kahaqama timitaira.

²² Noravauvu, vi entara te qeteha tiha, Mpo, are nena aaqantohaira ti qaqirae kaaro? tivake vaurara are ti uva irira ti kahaqama timitaanarave.

²³ Ne Kotira vaiinti nahentivauvo, ne Nora Kotirara muntuka vateha variate.

Vaiinti nahenti virara noraiqaake iriqi vi variakara, viva vikaqaa koqema kero raqikiqiro vi vaira.

Nái nutu tuahere variaka, viva nái qora kaiqa kaara qoraiqama nimite vaira.

²⁴ Ne Nora Kotirara noraiqaake iriha viva tinau ho kahaqiariravave ti variaka, ne kia tetaraiti, kempukaiqaake vira aaraqaa variqi vuate.

32

Devitiva maa ihira qara ntuvatora

¹ Qora kaiqa vare vai uvvara nunka amitaarira vaiintiva quaheharo varianaro. Kotiva nai uva raqakai vaiintirara ai uva tauruma amitauro tirava quahaanaro.

² Kia vo uvavata kukeqa taraitiro, ekaa vi uvvara qoqaa tiva qovarama kaaina vaiintira, Noravano Kotiva virara ariqaa kiama uva vaivo tira vaiintiva quaheharo varianaro.

³ Te tenta qora kaiqa varauara kia tiva qovarama kauna entara, vi entara te ke ke tivaqti vi vauraro ti tivaatavano kia kempuka vaimanta vaunara.

⁴ Aatitairaqaavata are nena kauquohairs ti ruqutuqira vuararo nora kuarivano itai entara namarivano aaharaiqama vintema kero, ti kempukavano taiqa vimanta vaunara.

⁵ Te mintiaqti vi, viraqaahai kia tenta qora kaiqa kukeqa karaiti, ekaa vi uvvara ai avuqaa tiva qovarama kaunara.

Te ariara tiha, Kaiqe te tenta qora kaiqa varauara uvvara Nora Kotira avuqaa tiva qovarama kaare, turara are ekaa vi uvvara nunka timitaanarave.

⁶ Are Variqavano minti varianarara ti, vaiinti nahenti qaqi kairamanta vika maaraqi vai entara ariara noraiqaake iriha ai aaraate.

Vika ai aaraivara are vika kahaqama nimitairaro maaravano kia huvura namarivano vaiinti ravaaqavu kaintema kero, vika qoraiqama nimitaira ho variate.

⁷ Maara vaina entara te ariqi kukeqavi variarirara are tiqaa koqema kera raqikinarave.

Are ti antua timitaanarara ti, te ariara ihi tivaqti viha are ti ruaruama timitaanarara tirerave.

⁸ Noravano Kotiva tiriara tiharo, Te are koqe aaraqaa vinara ai umiqarerave. Are vi aararaqaa vi vairage te koqe uva maara ai tiva amiqi viha, ariqaa raqikiqiqi virerave.

⁹ Are kia ohive, donkive, voqaara variane. Vitanta avu aato kia vairave. Vitanta avuqavu vuate tiro, vaiintivano *aini* inaaraiqa vira noqi aaqu amitero naaqunta utu varero aaraqaa vi vaira. Vaiintivano kia mintirera, vitanta kia ho aaraqaa avuqavu vivara.

¹⁰ Qora kaiqa vare variaka vaivaro naantiara nora maaravano vikaqaa qovaraiqianaro. Kotirara noraiqaake iriqi vi variaka vaivaro Nora Kotira muntukavano vikara vairava vika antua nimitaqiro viramanta vika ho vaivara.

¹¹ Ne avuqavu ni varia vaiinti nahentika, Noravano Kotiva koqe kaiqa, vo kaiqa vo kaiqa vare vairara irihama, nenta muntukaqihai quaheha variqi vuate.

Ne vira uva koqemake iriaka, ne quaheha naverai tivaqiqi vuate.

33

¹ Ne avuqavu ni variaka, Noravano Kotiva koqe kaiqa, vo kaiqa vo kaiqa vare vairara irihama, nenta muntukaqihai quaheha variqi vuate.

Vira uva koqemake iri variaka, vika Kotira autu homa tuaheraqi vivarave.

² Ne *kulele* ruqutihama Kotira autu tuahera kaate.

Kitaa 10navu vaina naaquntara ruqutihama, Kotira ihi tiva amitaqi vuate.

³ Kotirara irihama ne qaraaka ihi tiva amiteha, koqemake *kitaa* ruqutihama, quaheha noraiqaake ihi tivaqiqi vuate.

⁴ Noravano Kotiva tivatai uvava quqaa uva vaimanta vaiinti nahenti homa viva vo kaiqa vo kaiqa varairara iriha viraqaa muntuvi vaivara.

⁵ Nana nana koqe okarave, avuqavu vai okararave, Kotira muntukavano virarama vairo.

Ekaa vata maata variaka tavaavararo Kotiva vika koqema nimite vai okarava uritarakero vairo.

⁶ Noravano Kotiva ti uvava naaruva autu kero vataivaro vaira.

Kuarive, torave, opu makauve, viva tivaro ekaa vi haikava vi haikava qovarama viro vaira.

⁷ Taqu vohaiqaqi namari kaqa kaintema kero, Noravano Kotiva nora namari vohaanaini ruvaaquma kero vataira.

Vaiintivano kara vatai naavuraqi kara qantukero vataintema kero, Noravano nora namari vona vona ruvaaqumakero vataira.

⁸ Kairamanta ekaa naato vatanaaka Nora Kotira aatu qeteha vira vevaaraini variate.

⁹ Viva uva tivaro maa vataava qovarama viro vairave. Viva uva tivaro ekaa haikavano qovarama viro vairave.

¹⁰ Vo vatanaa vo vatanaaka minti mintirerave tivataa uvava vaivarovata, Noravano Kotiva vi aarara kuval kaimanta vika kia ho nái varareka ia kaiqara vare variara.

¹¹ Mintivarovata, Kotiva tivatai uvava kia taiqa viraitiro, ekaa enta qaqi variqiro vuanaro. Viva te mintirerave ti uvava quqaa qovaraiqama viro, ekaa enta qaqi variqiro vuanaro.

¹² Nora Kotirara tinavu Variqavano vaivo tia vatanaaka, vika quaheha variqi vivara. Kotiva tinta vaiinti nahenti variate tiro, nai kaama tai vaiinti nahentika quaheha variqi vivara.

¹³ Noravano Kotiva naaruvhairo viavi ekaa vo vatanaa vo vatanaaka tave vaira. ¹⁴ Viva nai ayuhainaa taintaqaa vaharo viavi vataini variaka tave vaira.

¹⁵ Viva vaiinti nahenti avu aato autukero vataivara tiro, viva vika vo kaiqa vo kaiqa vare variara kankoma kero iri tave vaira.

¹⁶ Hauri avuhainaa vaiinti vovano tiharo, Te airi iqoka vaiinti vataurauka homa navutaaka naatara kararave, tiantora.

Hauri iqoka vaiinti vovano tiharo, Te kempuka vaiintima vauro. Kia vovano ti ho arukaanarove, tiantora.

¹⁷ Hauri iqoka vaiinti vovano tiharo, Ti ohivano kempuka vaivo. Te homa viraqaa vaiha navutaaka naatara kararave, tiantora.

¹⁸ Ho ne iriate. „Ne kia vi haikaraqaa muntuvi vairaiti, Kotiraqaa muntuvi variate.“ Kotira aatu qeteha vira uva koqemake iri variaka, Noravano vikaqaa koqema kero raqiki vaira.

Kotiva tinavu aaqurihamma timitaanarove ti variaka, viva vikaqaa koqema kero raqikiqiro vuanaro.

¹⁹ Viva vika ruaruama nimite vaimanta kia qutuara. Kara kia vai entara viva vikaqaa raqiki vaimanta vika kia qutiraiti, qaqi variqi vi variara.

²⁰ Noravano Kotiva tinavu kahaqiarirava vaimantara ti, tenavu viraraqai noraiqaake iriqi viha vira veka vaunara.

Navutaaka tinavu qoraiqama timitevorave tiro, Noravano Kotiva tinavu antua timiteharo tinavu kainke voqara vairaa.

²¹ Tenavu vira autuvano takuqi vairara noraiqaake iriqi vihara ti, tentanavu muntukaqihai quaheha variqi virera.

²² Noravauvu, kairae tenavu ariara viva tinavu kahaqiariravama vaivo, tiarirara are tinavu aaqurihamma timitaqira vuane.

34

Devitiva maa ihira qara ntuvatora

¹ Te Nora Kotirara koqemave tivaqi virera. Ekaa enta te tenta noqihai vira autu tuaheraqiqi virera.

² Noravano Kotiva ti koqema timitairara irihama, te vira autu tuaheraqiqi virera.

Te minti tivaqi vuari nora maaraqiqi vaika ti uva iri, vikavata quaheha vaivaravare.

³ Varaiqenavu vohaaraqiqi vaiha Noravano Kotiva vo kaiqa vo kaiqa vare vairara iriha, vaiinti nahenti tiva nimiare.

⁴ Te vo haika vo haika aatu qeteha vira aarauraro Noravano Kotiva ti uva iriro, ti muntuka qihaaqama timitaira.

⁵ Nora maaraqiqi vaiha Kotirara tinavu kahaqiane ti variaka, vika kia kaurira haika vararaiti, quaheha vaivara.

⁶ Te vehiqamavi vaunaraqihai Nora Kotira aarauraro viva ti uva iriro, te vo maara vo maara varaunaraqihairo ti ruaruama timitaira.

⁷ Kotira aatu qeteha vira uva koqemake iri variaka variavaro Noravano Kotiva atitai enseliva vika aumanto tuvu vaharo vikaqaa maimaraara raqikiharo ruaruama nimite vaira.

⁸ Quqaae Noravano Kotiva vaiinti nahenti koqema nimite vaivave vaivo?

Ne nentavano vira avateha tavaate.

Viva vainaini oru variaina vaiintiva koqemakero vaharo quahaanaro.

⁹ Ne Kotira vaiinti nahenti, ne Nora Kotira aatu qeteha vira uva koqemake iriqi vuate. Vira uva koqemake iri varia vaiinti nahentika kia vo haikaravata aavoqivara.

¹⁰ Qaraaka *raioninavu* kempuka vairi valhavata, vika kia aantau aruke naa entara, narara variara.

Vika mintimake variamanta Nora Kotirara noraiqaake iri variaka, vika kia vo haika koqe haikara aavoqivara.

¹¹ Ti vaintivaravauvu, ani iri vaiqe te Nora Kotira aatu qeteha vira uva koqemake iri vai okarara ni tiva nimiare.

¹² Ne airi entae maa vataragaqa qaqi variqi viha koqemake vaivarave?

¹³ Ni muntukavano mintima vairera, ho nenta noqihai kia qora uva tiraiti, kia una uvavata tiate.

¹⁴ Qora kaiqa tauvaqa utu amite, koqe kaiqaqai varaqi vuate. Ne vaiinti nahenti muntuka paruma nimite vai okarara avataqi vuate.

¹⁵ Noravano Kotiva nai avuqohairo avuqavuqamake ni varia vaiinti nahentika tava-maqiro viharo, vika ike mpo ti varia uvaravata iri vairave. ¹⁶ Viva qora kaiqa vare variaka navutaiqiharo vairo. Vika qutu vimanta vaiinti nahenti vaakama vikara tauru kevarave.

¹⁷ Avuqavu ni varia vaiinti nahentika ike mpo tiha Nora Kotira aare varia entara, Noravano Kotiva vika uva iriro, vika vo maara vo maaraqihairo ruaruama nimite vaira.

¹⁸ Muntuka qoraiqimanta variaka variavaro Noravano Kotiva vika kahaqireva vika aumanto vaira.

Mpo, airi maaravano tinavu qoraiqama timite vaivo ti variaka Noravano Kotiva vika ruaruama nimite vaira.

¹⁹ Avuqavu ni varia vaiinti nahentika variavaro vo maara vo maaravano vikaqi qovaraiqi vaimanta variara.

Vika mintimake variavarovata, Noravano Kotiva vika kahaqi vaivarao maaravano kia vika anomia kero qoraiqama nimite vaira.

²⁰ Noravano Kotiva vikaqaa koqema kero raqikiqiro vi vaivarora tiro, kia vika vuhaari voqavanovata kinta vuanaro.

²¹ Qora entavano qovaraiqama viro, qora kaiqa vare variaka arukaanaro.

Avuqavu ni varia vaiinti nahentika navutaiqi variaka, Noravano Kotiva vikaqaa nora uvama vataanaro.

²² Noravano Kotiva nai kaiqa vare variaka, ruaruama nimitaira vika koqemake variqi vivara.

Kotiva inaini orunte virara tinavu kahaqiane tiaka, viva vika kahaqama nimitaanaro.

35

Devitiva maa ihira qara ntuvatora

¹ Noravauvu, ti navutaiqi variaka are náivota navutaiqiane. Ti hampata iqoka rai variaka are náivota ntaihane.

² Himpira nena iqoka utavaaqa nonkutera, kainkevata varera ani ti kahaqiane.

³ Nena vaantaaravata, iqoka rorivata, rauqi varera, ti harireka avataqi aniaka ntaihane. Are tiriara, Te ai ruaruama amitarerave tiane.

⁴ Ti haru kareka auti variaka, are vika naatarakera kaurira haika nimiraro vika nutuvano vataini tuvi vuarire.

Ti qoraiqama timitareka uva tiva taatau taaka, are vika hampata raquqira viramanta vika qetake anirante vuate.

⁵ Are enseli vo atitairaro viva vika ntata kairamanta vika uvaivano utiharo ahaka rapa venta venta kaintemake vinuate.

⁶ Are vika vi aarara vauriri ntava nimitera konkiraqama kairaro ai Nora Kotira enselivano vika aru ntata kaarire.

⁷ Vika qumina uva kaara tiriara aru vuarire ti, vaara vuike vataarave.

Vika qumina uva kaara tiriara viraqi aqu vuarire ti, hiqainti quvike vataarave.

⁸ Oho, naantiara vika qumimaqamake vai entara, are vika vehi autu kena haikara qovarama kaane.

Are qaqi kaira vika nái vaara vuiteraqi aru vuate. Are qaqi kaira vika nái hiqainti quviteraqi aqu vuate.

⁹ Are vika mintima nimitairage te are Noravano Kotiva ti ruaruama timitenarara iriha quahaare.

¹⁰ Are ti kahaqama timitenarara iriha te tenta muntukaqihai quaheha minti tirerave: Noravauvu, kia ai voqaara vovano vairave.

Voqavata kempuka vataaka uquerara vaiinti nahenti qoraiqama nimitevorave tira, are vika antua nimite varianarave.

Airi airaira vataaka vehi vaiinti nahenti qoraiqama nimitaqi vivorave tira, are vika kauquqihairuaruuma nimite variavave, tirera.

¹¹ Mpo, qora vaiintinavu kia te iruna haikara tiqaa una uva ntuvakeha ti variara.

¹² Te vika koqema nimitauramanta vika tinta qoraiqama timite variara kaara ti muntukavano voqama kero maara ntaimantama vauro.

¹³ Vika rovara varaamantu te vikara ike mpo tiha, kara auramate kovaara utavaaqa nonkute, tenta aru kintate vikara Kotira aarama nimite vaunara.

¹⁴ Te tenta tontiarave, qatarave, vakaararave, iqí rata nimitaunantemake, te vikaravata iqí rata nimitaunara.

Vaiintivano nai nova qutu vivaro kimaara viro antura ntuvaqiro vintemake, tevata mintiaqi viha vikara iqí rata nimitaunara.

¹⁵ Te vikara minturamanta maaravano tiqaa qovaraiqi entara vika kia ti koqema timitaraiti, vika ruvaaquamavi quaheha ti naaraihama timite variara.

Kia te tavauna vaiintika enena ti qoraiqama timiteha tauvaqa vauraa uva tiva timite variara.

¹⁶ Vika ti naaraihama timiteha, ti qoraiqama timitareka nái aarai *tentiri tiha/teti aneha*, mauru nkaqe variara.

¹⁷ Mpo Noravaauvo, tairentae vika minti minti i vaira are kia qaqi tavaraitira, tuvu ti kahaqinrarave?

Raiioni aantau arukareka iha vira nkaqa nkaaqama kaantemake, vika ti enena qoraqama timite variara. Are tuvu ti ruaruama timitaira vika kia ti harukaate.

¹⁸ Mpo, are mintima kera ti kahaqirage te ai vaiinti nahenti ruuaquumavi vainaini vaha ariara koqeve tiare. Te vika nivuqaa vaha ai autu tuahera karerama, turo.

¹⁹ Qumina uva kaara ti navutaiqi variaka, kia qaqi kaira vika oqovivi autiha vora ntua timitate.

Ti iri oraiqama timite variaka, kia qaqi kaira vika tiriara huviqorama viva nora maaraqi vaivo tiate.

²⁰ Vika antua antua tivaqi viha, maateraiqiha variakara tauvaqa vauraa uva tiva nimite variara.

²¹ Vika tiqaa una uva ntuvake tiha, Oho, are qora kaiqa vare variaramanta tenavu ai tavaunarave, ti variara.

²² Vika minti ti variavara are vika qora okara tavaanarara tira, kia evaara variane. Noravaauvo, kia ti niaraini variane.

²³ Noravaauvo, are ti Variqavano variaro.

Himpira tuvu ti kahaqiane.

Himpira tuvu ti mantaraini vahara uva tivakera, ti auta ntua timitaane.

²⁴ Are nena avuqavu okarara irihara, ti uvavata irira, viraqaa kia uva vaivo tiane. Are kia qaqi kairamanta ti navutaaka tiriara, Huviqorama, Kotiva viraqaa uva vataivo, tiate.

²⁵ Are kia qaqi kairamanta vika tiriara, Viva ekaarama taiqa vivo. Tenavu Kotiva vira mintimakero qoraqama amitaarire turaro mintivo, tiate.

²⁶ Te nora maaraqi vauramanta virara iriha quahe variaka, are vika kaurira haika nimiraro vika avu aato hampiqama viramanta vi anima vuate.

Tiriara qumina vaiinti tivakeha näi nutu tuahere variaka, are vika kaurira haika nimiramanta vika nutuvano vataini tuvi vuarire.

²⁷ Vo vaiinti nahenti tiriara tiha, Viva avuqavu vaiintivano vaivo. Viva *ko* aatarakairage koqemave tirerave, ti variaka, are vika qaqi kairamanta vika quaheha naverai tiha, Noravano Kotiva uritara kero nai noravanoma vaivo. Viva nai kaiqa vaiinti *Devitiva*, koqemakero variainarara quaheharo vaivo, tivara.

²⁸ Vika minti tiqe tevata are avuqavu ni vaina okarara vaiinti nahenti tiva nimiqi viha aatitainaraqaavata entaqivata ai autu tuaheraqi virera.

36

Devitiva maa ihira qara ntuvatora

¹ Qora kaiqavano uva tivaro qora kaiqa vare vai vaiintiva nai muntukaqihairo vira uva iriharao kia Kotira aatu getaraitiro, vi kaiqara varaqiro vi vairo.

² Vi vaiintiva nariara noraiqaakero iriharora tiro, viva nai qora kaiqa vare vairara tiharo, Kotiva kia ho vira rantakeri tiqaa uva vataanarove, tivaro ³ vira uvavano qora uva, una uva vaivarao viva haaru koqe avu aato irikeharo kaiqa varai okarara qaqrakero, kia koqe kaiqa voqavata vararaitiro vaira.

⁴ Entaqi viva nai vaitai taintaraqaa vaharo, nai avu aatoqihairo qora kaiqa varainarara iriqiro vi vairo.

Viva qora aaraqaa vaharo kia qora kaiqa tauvaqa utu amitaraitiro, qaqiqai qora kaiqa vo kaiqa vo kaiqa vare vaira.

⁵ Noravaauvo, are vaiinti nahenti aaqurihama nimite variana okarava vaireva, viva uri aatarakero vata maaqaahairo oru viviro, nai vurura naaruvaini oruntairave.

Are kia nena vaiinti nahenti qaqira karaitira, are vikara noraiqaakera iriqira vi variara okarava vaireva, vivavata vata maaqaahairo nai viviro, vurura tonavuvano vairaaqaa oruntairave.

⁶ Nora ainqinavano kempukaiqama kero vaintema kero, ai avuqavu okaravano paama tivakero vairave.

Are avuqavuqama kera *ko* ti variara okarava vaireva, viva nora namarivano veva muntukara vai namarira voqaarama vairave.

Noravaauvo, are vaiinti nahenti aaqurihama nimite variana okarava uri aatarakero nai koqe okarama vairo.

⁷ Mpo Kotio, are vaiinti nahenti aaqurihama nimite variana okarava uri aatarakero nai koqe okarama vairo.

Kokoraaravano aroka rairakero nai naati aqu nimitaintema kera, are vataini variaka antua nimite varianara.

⁸ Ai naavuqi airi kara vaivara are vi karara nena vaiinti nahenti nimiramanta ne variara.

Koqe namarivano tuvira vaiinti nahenti ho ne variantema kera, are nena vaiinti nahenti koqema nimite variaramanta vika ho variara.

⁹ Namarivano aruvuqihairo nte vaintemakero, qaqi variqi vi varia okarava ariqihairo qovaraiqi vaira.

Are tinavu ataama timite variaramanta tenavu koqemake taveha vaunara.

¹⁰ Ai koqe okara iri tavaaka, are vikara nena muntuka qaqqai vataqira vuane. Avuqavu ni variaka, are vika koqema nimitaqira viramanta vika ho variate.

¹¹ Mpo, nái autuara noraiqaake iri variaka, are kia vika qaqi kairamanta vika ti haruate.

Hauri qora kaiqa vare variaka ti harireka ti avataqi anivora.

¹² Ho tavaate. Qora kaiqa vare variaka ekaara vataini hiqintivi variavo. Vika kia ho qaiqaavata himpivarave.

37

Devitiva maa ihira qara ntuva teharo Hiparu ABC virara iriharo Alef, Beth, Ghimel, Daleth, vi uvara vi uvara iriqiro viharo, maa ihira raira keharo qara ntuvatora

Alef ﺍ

¹ Qora kaiqa vare variaka koqemake vairara, kia virara noraiqaakera iriane.

Qora kaiqa vare variaka vataa haikara, tavera, hauri are tevata mintimake vi haikara vataataarave tirora.

² Ukauvano aaharaiqama vinantemake, vika inaaraiqa varike taiqa vivara.

Mauravano tamunta vinantemake, vika qutu vivara.

Beth ﺏ

³ Are Kotirara noraiqaakera iriqira vihara koqe kaiqaqai varaqira vuane.

Are mintiaqira virera, are nena vataqaa vairaro kia vo haikavano ai qoraiqama amitairara are koqemakera variqira vinara.

⁴ Noravano Kotiva ai koqema amitaarire tira, are virara noraiqaakera iriqira vihara virara quahaane.

Are mintiaqira viraro viva ai muntukavano vaina haikara amianaro.

Ghimel ﺁ

⁵ Qaqi kairaro Noravano Kotiva are vireva ina aarara ai umiqaarire.

Virara noraiqaakera iriqira viraro viva ai kahaqiarire.

⁶ Viva ai kahaqiraro ovavano itaintema kero, ai koqe okaravano takuqi vairamanta vahenti nahenti vira anomake tavevara.

Kuarivano ikaraqaa noraiqaakero itaintemake, vaiinti nahenti are avuqavu ni vaina okarara anomake tavevara.

Daleth ﺔ

⁷ Muntuka paruma kera oru Kotira aqanto vahara vira veka vairaro viva ai kahaqiarira.

Qora kaiqa vareha koqemake variqi vi variakara, are kia vikara noraiqaakera iriane. Vika qora kaiqa varera nái aatoqi iriqi viha vi kaiqara vare variara, are kia virara tevata mintiataarave tiane.

He ﻪ

⁸ Hauri vo haika kaara ai arara itairara vairora. Arara itainaraqaahairo qora okara autirava qovaraiqianaro.

⁹ Qora kaiqa vare vaika variqi vi vuru vehi autu taiqa vimanta, Nora Kotirara noraiqaake iri vaika vika Kotiva nái kaama nimitaaina vatarava varevara.

Waw ﻮ

¹⁰ Qora kaiqa vare variaka inaaraiqa varike taiqavi kia vaivarave. Vi entara are vika rantareva ihaba kia ho vika ranta kenara.

¹¹ Tirema vahha kia návata qoraiqama nimite variaka, vika Kotiva nái kaama nimitai vatarava vare, maateraiqamavi quaheha variqi vivara.

Zain ﻰ

¹² Qora kaiqa vare variaka avuqavu ni variaka qoraiqama nimiterara nái aatoqi iriqi viha vika mauru kumiki nimite variara.

¹³ Vika minti variavarovata, Noravano Kotiva vika vehi autuvi taiqavi entava anainarara iriharo, vika naarahama nimite vairo.

Heth ▪

¹⁴ Qora kaiqa vare variaka nái iqoka paipē utaqihai urequke qeramake tuate, nái huruvata hinta utute vehi vaiinti nahentive, airairara aavoqiakave, arukareka auti variarave.

Vika avuqavu ni varia vaiinti nahentika arukareka auti variarave.

¹⁵ Vika mintimake vaivarovata, nái iqoka paiprevano nái muntuka raqonta kairaro, Kotiva, vika huru kaavuvata rauhaantima kaanaro.

Teth ♀

¹⁶⁻¹⁷ Noravano Kotiva qora kaiqa vare variaka kempuka taiqakero qaqlini varakero, viva avuqavu ni varia vaiinti nahentika antua nimite vaira.

Mintima vairara tiro, avuqavu ni vai vaiintiva kia airi haika vataiva ho vairamanta, airi haika vateha qora kaiqa vare variaka vika kia ho vaivara.

Yod †

¹⁸ Kia uvavanovata vikaqaa vaimanta variaka Noravano Kotiva vikaqaa koqema kero raqiki vairo.

Noravano vika kaama nimitai haikava kia taiqa viraitiro, ekaa enta ekaa enta qaqlini variqiro vuanaro.

¹⁹ Qora entavano anintairamanta vi vaiinti nahentika kia nora maaraqi vaivara. Karara nararaiqi entara vika kia karara aavoqivara.

Kaf ♀

²⁰ Qora kaiqa vare variaka, vika variqi vi taiqama vivara.

Ahakaqí väi maurava vahuqa variro tamunta vintemake, Kotira navutaaka inaaraipi varike, taiqa vivara.

Iha muravano oru viro ruqema viro taiqa vintemake, vika variqi vi tuqaakuma vivara.

Lamed ♀

²¹ Qora kaiqa vare variaka tiha, Monue, airairae ti timirage te naantiara nina amiare, tivakeha kia nai qaqlaa ami variara.

Avuqavu ni variaka paruma keha nái kenauka nái ia haikara nimi variara.

²² Noravano Kotiva koqema nimite vaika, viva vika nái kaama nimitaaina vatara varevara. Kotiva vaaquqama vuate ti vaiinti nahentika, vika variqi vi vehi autu taiqa vivara.

Mem ♀

²³ Vaiintivano Noravano vira umiqe vai aararaqaa viraro viva vi vaiintirara quahaanaro.

²⁴ Vi vaiintiva kuntavaivaima varero kaavu ntireva irera, Noravano Kotiva nai kauquqohairo vira totairaro viva kia kaavu ntuanaro.

Nun ♀

²⁵ Te haaro qaraaka vaiintivano variqi ani, vate naampaiqama vuro.

Ho haaruvata maa entaravata te vailha tavauraro kia Noravano Kotiva avuqavu ni variaka qaqlira karaitiro, vikaqaa koqema kero raqikiqiro vi vaimanta vika ho variamanta vika vaintivaravata kia karara aavoqiraiti, kia vokiaka karara naari variara.

²⁶ Te tavauramanta avuqavu ni variaka parumake ekaa haika vokiaka nimi variamanta vika vaintivaravata vokiaka koqema nimite variara.

Samek ♀

²⁷ Are qora kaiqa vare okarara tauvaqa utu amitera, koqe kaiqaqai varaqira vuane. Are mintiaqira virera, are kuvuarama terauka ekaa entama ai vataqaa qaqlini variqi vivara.

²⁸ Noravano Kotiva avuqavu kaiqa vare variakara antuqa arivaro viva nai Kotirara noraiqaake iriqi vi variaka kia qaqlira karaitiro, ekaa enta vika antua nimitaqiro vuanaro.

Qora kaiqa vare variaka ekaara taiqa vimanta vika vaintivaravata vehi autu vivara.

Ayin ♀

²⁹ Avuqavu ni variaka Kotiva vika kaama nimitaaina vatara vare, vi vataqaa ekaa enta qaqlini variqi vivara.

Pe ♂

³⁰ Avuqavu ni vai vaiintira avu aato koqe avu aato vaivaro vira uvavanovata koqe uva vaivaro viva koqema kero uva avuqavu i vairo.

³¹ Nai vira Variqavano tivatai uvava vira avu aatoqi vaivaro viva vi uvara koqema kero iriqiro viharo kia qora kaiqavata vare vaira.

Sade ♀

³² Qora kaiqa vare variaka koqe vaiinti arukareka vaara auti variara.

³³ Vika minti variavarovata, Noravano Kotiva kia koqe vaiinti vika kauquqi kaanaro.

Vira navutaaka koqe vaiintiqa uva vataivaro Noravano Kotiva kia vira navutaaka qaqi kaira vika kovano vira aatara kaanaro.

Qof ♂

³⁴ Are Kotirara noraiqaakera iriqira vihara vira uva koqema kera iriqira viraro viva ai koqema amiteharo nina kaama taaina vatara ai amiarire.

Naantiara are vahara tavairaro Noravano Kotiva qora kaiqa vare vaika vehi autu taiqama kaanaro.

Resh ♀

³⁵ Haaru te tavauraro vo vaiintivano voqama kero nai kenuka qoraiqama nimite vau vaiintiva vaura.

Toqukeravano vo katari vo katari uri aatara kaintema kero, vi vaiintiva vukai vaiintivano vaharo ekaa nai kena vaiinti uri aatarakero vaura.

³⁶ Vi vaiintiva qutu vumanta te virara qumina ranteha tavauraro viva kia vaura.

Shin ♀

³⁷ Kia viraqaa vo uvavata vaivaro avuqavu ni vai vaiintira aitutuma kera tavaane. Viva vaiintiara maateraiqi vaiva vaimanta vira naintivara airitahaa variara.

³⁸ Kotira uva raqake variaka Noravano Kotiva vika nái vaintivara hampata vehi autu kairamanta taiqa vivara.

Tau ▲

³⁹ Noravano Kotiva avuqavu ni variaka ruaruama nimite vaivama vairo.

Vika maaraqi vaivaro Noravano Kotiva vika antua nimite vairamanta vika ho vaivara.

⁴⁰ Vika Kotirara tinavu antua timitaane tiavarora tiro, viva vika kahaqiharo qora kaiqa vare variaka kauquqihairo ruaruama nimite vairo.

38

Devitiva maa ihira qara ntuvatora

¹ Mpo Noravauvu, ai arara itairara, kia ti titihara haruane.

² Mpo, ai veva vo veva vo vevavano ti harimantama vauro. Are nena kauquqohaira ti ruquto kaaramanta te hiqintivi vauro.

³ Ai arara itaira kaara te antura ntiha vauro. Te ai uva raqa kaunara kaara ekaa ti vaatavano hiha vimantama vauro.

⁴ Vaiintivano maara ntai haikara kia ho aqu varero vintemake, te tenta qora kaiqa varauva uvara kia ho vare virara.

⁵ Te hampi kaiqa varaunara kaara numuaravano ti vaataqaa iteharo *ahiara/aquahiara* nteharo unta i vaimanta vauro.

⁶ Vira kaara ti kempukavano kia vaimanta te vautautamaqi viha, toqaqivata erainaini-vata qutuvi vaiintirara iqí rataantemake, iqí rataaqi vi vaunara.

⁷ Ti ekaa vaata hiha viharo iha ite vaimantama vauro.

⁸ Nora maaravano tiqaa vaivaro kia ti kempuka voqavata vaimantama vauro. Ti muntukavano qoraiqimanta te keke ti vauro.

⁹ Noravauvu, te mpo ike ti vauna uvara are kankoma kera irianara.

Te keke ti vauna uvava kia kukeqavi vairaitiro, vi uvava ai avuqaa qoqaa vaivara tavaanara.

¹⁰ Ti muntukavano voqama kero nti vaivaro ekaa ti kempukavano taiqa vivaro ti tivuvanovata kia nahaimanta vaunara.

¹¹ Ti tontinavuvata, ti hampata ni variakavata, ti numuara aatu qeteha kia te vau-nanaini aniamanta, ti vohaa naare vikavata kia ti ani tavaraiti, niaraini variara.

¹² Ti arukareka auti variaka tiriara vaara autute variara.

Ti autuvano vataini qiarire ti, ti qoraiqama timitatekka auti variaka enena ruvaaqumavi vaiha ti qoraiqama timite uvara tiva taatauke vate variara.

¹³ Mpo, aato tintavi vaiintiva kia uva irintemake, te kia vika uva irunara. Kia ho uva ti vaiintira voqaara, te kia uvavata tiraiti, evaara vaunara.

¹⁴ Eo, uva tiara kia ho iri vai vaiintira voqaara vailha te kia vika uva nái tiva nimi vaunara.

¹⁵ Noravaavo, te are ti kahaqinara vekama vauro. Arema ti Variqavano variaro. Quqaama are ti uva irihara nena uva ti tiva timinarave.

¹⁶ Mpo, are ti navutaaka kia qaqi kairamanta vika tiriara, Koqemama viva qoraiqama vivo, tiate.

Kia qaqi kairamanta vika tiha, Ho tavaate. Tenavu vira ruqutu kauraroma kaavu ntivo, tiate.

¹⁷ Aihaviraava kia ti tuta karaitiro, qaqi ti tuate vaimanta te taiqaarirava aumanto vaimantama vauro.

¹⁸ Te qora kaiqa varaunara qoqaa ai tiva qovarama amirera. Te vi kaiqara varaunara ike mpo tivakeha kia te mintiataarave turo.

¹⁹ Mpo, ti navutaaka kia aihaviraaravata vararaiti, vika kempuka vaiintima variavo. Airi vaiinti qumina haika kaara ti navutaiqi variara.

²⁰ Te vika koqema nimitauramanta vika kia tinta mintima timitaraiti, ti navutaiqiha, tauvaqa vauraa uva ti variara.

²¹ Mpo Noravaavo, kia ti qaqira kaane.

Are ti Variqavanoma variaro. Kia ti niaranto variane. ²² Noravaavo, are ti ruaruama timiteravama variaro. Vaaka ani ti kahaqiane.

39

Devitiva maa ihira qara ntuvatora

¹ Te tentara mintimati ti: Kaiqe te tenta vararerera iaina kaiqaraqaa koqemake raqikiqi viha, tenta novata kia qaqi kaariraro qora uvavano viraqihairo qovaraqiarire. Qora kaiqa vare variaka ti aumanto vaise te kia vika hampata uva tirerave, tunara.

² Te minti tivake kia qora uvave koqe uvave tiraiti, evaara vaurarovata, maaravano tiqi vaiva voqama kero maara ntaimanta vauraro ³ ti muntukavanovata voqama kero qoraiqimanta vaunara.

Te mintimake vaiha te tenta aatoqihai voqavata iriqi vi vauraro tiqi vai maarava voqavata ti maara timiqiro vi vaimanta viraqaahai te kia ho evaara vairaiti, te Kotirara mintima ti:

⁴ Mpo Noravaavo, te qaqi variqi vuaina entava nanti nantie ianarove?

Te tairentae qutu virarave?

Te qaqi variqi vuarirava tairentae taiqa vuanarove? tunara.

⁵ Mpo, are kia vukai enta ti kaama timitaanarara tiro, te qaqi variqi vuarirava iquqama vaivo.

Are te qaqi variqi vuainara tavehara, virara qumina haikavema ti variaro. Mpo, ekaa qaqi varia vaiintika vaireka, vika uvaivano inaaraia utiro taiqavira voqaara variarave.

⁶ Mpo, kuarivano itaivarao vaiinti maraqua vataini vaira voqaarama, tenavu maa vataraqaa vahuga variqi vi, vuru taiqa virara.

Tenavu vi anilha nana nana vo kaiqa vo kaiqa vara taarirava, vi kaiqava vi kaiqava naantiara quminaqama vuanaro.

Tenavu qaqi variaina entara monuve airairave ruvaaqumake vataainara, naantiara nai ta vaiintivave varaanaro.

⁷ Noravaavo, tenavu vataini qaqi variqi vuaina okarava mintima vaimantara ti, te nana haikarae noraiqaake iriqi vuariraro vi haikava ti kahaqianaro?

Mpo Noravaavo, te ariara noraiqaake iriqi virerave.

⁸ Te tenta qora kaiqa vare vaurava ti taiqa kaantorave tira, are ti ruaruama timitaane. Kia avu aato vataaka hauri vo haika kaara ti naarahama timitevora.

⁹ Te qora kaiqa varaunara, kaara are ti ruqutu variaramanta te nora maaraqi vahara ti, te kia uva voqavata tiraiti, tenta no tintate vairera.

¹⁰ Mpo, kia ti qaiqaa ruqutuanne. Are nena kauquqohaira ti ruqutuaravera te qutu vi ruhiqaurima vauro.

¹¹ Quqaama, ai uva raqake variaka, are vika nái nitiharama vika utetaaravama variaro.

Oqokavano tavuna nama kaivaro taiqvintema kera, are tinavu antuqa vai haikara taiqake varianara.

Mpo, ekaa qaqi varia vaiintika vaireka, vika uvaivano inaaraiaq utiro taiqvira voqaarama variara.

¹² Noravauvu, te ai aaraaina uvara iriane. Te ariara naverai tiha, mpo ti kahaqiane tainara are aato vatehara iriane. Te iqi rate variarirara kia are qumina vairaitira, ani ti kahaqiane.

Ti kaivaqaukavara maa vataraqaa vahuqa variqi vuntemake, tevata vahuqa variqi virerave.

¹³ Mpo, kia inaara yiri aratera variane. Te maa vataraqaa vahuqa vai, taiqa vuainarara irihara, are qaqi kairaro ti muntukavano qaiqaa koqe iraqe variare.

40

Devitiva maa ihira qara ntuvatora

¹ Noravano Kotiva ti kahaqiarire ti, te tenta muntuka qihaaqamake vira veka vauraro viva aato ti timiharo te mpo ike ti vauna uvara irirave.

² Te vata devanto quvitaaraqi vailha kia ho vaarintaarirava vaimanta vauraro viva viraqihairo ti kauqu raimpatama vaari qaqini kaimanta vaunara.

Te hora kupaiqiraqi taatauvi vauraro viva viraqihairo ti mpaqi kero nora oriqaahimpima kaimanta te qaiqaa kempukaiqamake ni vaunara.

³ Viva qaraaka ihi vo, tentanavu Variqa autu tuaheraaina ihira ti noqi vataimanta te vi ihira tivaqvi vi vaunara.

Vaiinti nahenti airitaha Noravano Kotiva ti kahaqama timitai kaiqarara iriha, kauqu runkinkiri iha tiha, Kotiva Noravanove, tivakeha virara noraiqaake iriqi vivara.

⁴ Kia nái nutuaraqai iri variakara ti kahaqiate tiraitiro, kia una variqa nutu tuahera karaitiro, Kotiraraqai noraiqaakero iriqiro vina vaiintira, Kotiva virama koqema amitaanaro.

⁵ Noravauvu, are ti Variqavano variararo kia ai voqaara vovano vaivo.

Are tinavuara irihara koqe kaiqa, vo kaiqa vo kaiqa vara timitaarava airi kaiqa vaimantara ti, te kia ho vohaiqa vohaiqa vi kaiqarara vokiaka tiva nimirara.

⁶ Quara aantau aruke ai *ofaa* iha quara amiterave, naaho ai qantu amiterave, vi *ofaara* vi *ofaarara* kia ai muntukavano vaivo.

Ekaa kaintu iha quara amiterave, qora kaiqa varera nunka nimitaarire ti, vare ania *ofaarave*, vi *ofaara* vi *ofaarara* kia ai antuqa arivara are kia vi haikara timiate tianarave.

Are ti kahaqiararo ti aatovano kenko timanta te ai antuqavano vairara kankomake irunrarave. [Ai antuqavano vaireva, vaiinti nahenti ai uva koqemake iriqi vira, virarama vairo.]

⁷ Ai antuqavano mintima vairara ti, te ariara tiha, Tavaane. Haaru ai vukuqi tiriara viva mintima ianarove tu uvava vaura, te vate virama anuro.

⁸ Ti Variqavauvo, te quaheha ai antuqavano vainara avataqvirerave. Are tiva taana uvava ti muntukaqi vaimanta te vi uvara iriqi vi vaunarave.

⁹ Noravauvu, ai vaiinti nahenti ruvaaqumavi varianaini vaiha te ai koqe vakaaka vika tiva nimi tiha, Noravano Kotiva tinavu ruaruuma timite vaivama vaivo, ti vaunarave.

Noravauvu, are kankoma kera irianarave. Te qaiqaa qaiqaavata vi uvara vaiinti nahenti tiva nimiqi virerave.

¹⁰ Are ti kahaqihara ruaruuma timitaana uvara kia kukeqa karaiti, te ai Naavuqi vaiha vaiinti nahenti nivuqaa vi uvara vika tiva nimi vaunara.

Ai muntukavano tinavuara vaivara are tinavuara noraiqaakera iriqira vi varianara, te viraravata kia evaara karaiti, vi uvaravata vika qoqaa vutuke tiva nimiqi vi vaunara.

¹¹ Mpo Noravauvu, are kia ti qaqira karaitira, are qaiqaa qaiqaavata ti aaqrurahama timitaqira vuane.

Are mintiaqira vi vairaro ai muntukavano tiriara vairavavata, are tiriara noraiqaakera iriqira viravavata, tiqaa raqiki vairaque te ho variare.

¹² Mpo, ari maaravano tiqi vaimanta te kia ho vira kaara ntirara.

Te qora kaiqa, vo kaiqa vo kaiqa varaurava ti ravaaqavu kaimanta te tenta vuaina arara kia ho tave vaunara.

Ti qiatu kauhi airi vaivarovata, te qora kaiqa varaurava ti qiatu kaukivata aatarakero nai airi vaivaro ti kempukavano kia vaimanta vaunara.

¹³ Mpo Noravauvu, ti ruaruuma timitaane.

Mpo Noravauvu, vaaka tuvu ti kahaqama timitaane.

¹⁴ Ti harukareka auti variaka, are vika hampata iqoka raquqira vihara vika naatarakera kaurira haika nimiramanta vika avu aatovano hampiqama viramanta vi anima vuate.

Te nora maaraqi vaunrarara iriha quahe variaka, ruqutiramanta vika anirante vivaro vika nutuvanovata vatainai qiarire.

¹⁵ Vika ti naarahama timiteha huvigorave ti variaka, are vika qoraiqama nimitairamanta vika tiha, Mpo Kotiva tinavu haatara kaimanta kaurira haika varauro tivara.

¹⁶ Noravauvu, ai rantare iaka are qaqi kairamanta vika ai aaqanto oru vaiha muntuka paru ira quaheha variate.

Ariari viva tinavu kahaqiharo ruaruuma timite vaivama vaivo ti variaka, are vika qaqi kairamanta vika ekaa enta ariara tiha, Noravano Kotiva nai anomakero Noravanoma vaivo, tiate.

¹⁷ Noravauvu, quqaama te vehi vaiinti vaiha kia ho tenta kahaqiarirava vaivara, are kia tiriara tauru karaitira, tiriara noraiqaakera iri variaro.

Arema ti kahaqihara ti ruaruuma timite variaravama variaro. Vaaka tuvu ti kahaqiane.

41

Devitiva maa ihira qara ntuvatora

¹ Vehi vaiinti nahentiara iriha vika kahaqireka auti variaka, Kotiva vika koqema nimitavaira.

Vika nora maaraqi vai entara Noravano Kotiva vi vaiinti nahentika kahaqianaro.

² Noravano Kotiva vikaqaa koqema kero raqikiqiro viramanta vika kia vaaka qutu viraiti, koqemake variqi viha vika nái vataqaa koqemake vaivaro Noravano kia navutaaka kauquqi kaanaro.

³ Noravano Kotiva vikaqaa raqiki vairamanta vika rovara varaivera, viva vika kem-pukaiqama nimitaira ho vaivara.

⁴ Noravauvu, te ai uva raqa kaunrarara irihama ariara mpo, ti aaqurihamma timitehara, ti tivaata koqema timitaireqe te ho variare, turo.

⁵ Ti navutaaka ti qoraiqama timitareka auti vaiha tiha, Viva vaaka qutu viramanta vaiinti nahenti vira autu tauru kaiqe tenavu hove tiataarave, ti variara.

⁶ Vikaqihai vaiinti vonavu kia tiriara quqaa ike mpo tiva timitareka aniraiti, vika unaqaraiqamake ti ampeqamake tave, orunte tiha, Viva vaakama qutu vuanarove tivakeha, vi uvava viti viri vaiinti nahent tiva nimi variara.

⁷ Tiriara kia muntuka vaimanta variaka, vika nái irike tiriara tiha, Viva quqaama qutu vuanarove tivakeha, evaara vi uvava nai tiva ami nai tiva ami i variara.

⁸ Vika tiha, Viva qora rovara varaira kaara kia nái vaitaana taintaraqaahairo qaqi himpiraitiro, viva variqiro viro, vuru qutuma vuanarove, ti variara.

⁹ Ti tonti koqeva te virara kia vo haika kaara ti qoraiqama timitaanarove turava vivavata ti navutaiqi vaira. Viva ti hampata kara ne vaiva ti qaqrakero ti navutaiqi vaira.

¹⁰ Mpo Noravauvu, are ti aaqurihamma timitehara ti rovara taiqa timitaireqe te kempukaiqamavi vaiha, vi vaiintika návata qoraiqama nimitaire.

¹¹ Are ti kahaqama timitairera, vika kia ho vora ntuva timitaiqe, te are tiriara quahenarara kankomake irirara.

¹² Noravauvu, te avuqavu ni vaunrarara tira, are tiqaa koqema kera raqikiqira vihara, ti tivitaqira vi vairage te ai aaqanto ekaa enta variqi vuare.

¹³ Noravano Kotiva tinavu Variqavano tinavu Isareriqaa raqiki vaivama vaivo.

Kaiqenavu vira autu ekaa enta tuaheraqi vuare.

Quqaave, quqaave turo.

42

Koraara naintivaraqihairo vovano maa ihira qara ntuvatora

¹ Mpo Kotio, diaa aantauvano koqemakero tuvi vai namarira naataa intemakero, ti maraquravano ai aaqanto oru variataa imantama vauro.

² Are qaqi variqira vi variana Variqava variararo ti maraquravano ai hampata variataa imantama vauro.

Mpo, tarentae te ai Naavuqi origete ai avuqaa vairarar?

³ Entaqive aatitairaqaave te iqí rataqi vi vauraro ti auquruvano ti kara voqara vaimanta ti navutaaka enena tiriara tiha, Ai Variqavano taini vaharoe kia ai kahaqivo? ti variara.

⁴ Mpo, te haaru koqemake vauna entarara qaqi iritauraro ti muntukavano qoraiqimanta vauro. Vi entara Maara Entaqaa te airi vaiinti nahenti nivuni viha Kotira Naavuniara vi vaunara.

Tenavu miniara viha, quaheha naverai tivaqi viha ihi tivaqi viha Kotira autu tuaheraqi vi vaunara.

⁵ Mpo, vate nora maaravano tigi vaivaro ti muntuka voqama kero qoraiqimantama vauro.

Mpo, te mintiaqi vuarorave. Kaiqe te Kotirara noraiqaake iriqi viha, virara ti kahaqiariravama vaivo tivaqi vuare.

Te mintiaqi viha qaiqaavata vira autu tuaheraqi virerave.

Viva ti Variqavano vaharo, ti ruaruuma timitaariravama vaivo.

⁶ Mpo, ti muntukavano qoraiqimantara ti, te ariara iriqi virera.

Hemoni Aiqinavanovata Misaa Aiqinavanovata vaivaro Iotani Namarivano vitantaqihairo tuvinaini vaiha, te qaiqaa ariara iriqi virerave.

⁷ Mpo, nora namarivano nai naantiara nai naantiara kumpetaqiro oru vintema kero, ai kauquqihairo vo maara vo maaravano ti qoraiqama timite vaimantama vauro.

Namarivano aintaakaqaa tuviharo auva ntaintema kero, vi maarava ti qoraiqama timitaimanta vauro.

⁸ Mpo Noravauvu, are ti Variqavano variaramanta te ariqi vaiha qaqi variqi vi vaurauka ai aareha tiha, Are vo enta vo enta aatitainaaraqaa ti aaqurihama timitairaqe te entaqi ihi tivaqi viha ai autu tuaheraqi virerave, turo.

⁹ Kotiva ti kempukaiqama timite vaiva vaimanta te virara mintima ti: Mpo, nantivarae ti qaqira kaaro?

Nantivarae navutaaka qaqi kaaramanta vika ti qoraiqama timite variavaro, ti muntuka qoraiqimanta vauro?

¹⁰ Mpo, navutaaka enena ti naarahama timiteha tiha, Ai Variqavano taini vaharo kia ai kahaqvivo? ti variavaro vika uvavano kaavuqohai ti vuhaari tairi kaantema kero, ti qoraiqama timite vaivo.

¹¹ Mpo, vate nora maaravano tigi vaivaro ti muntuka qoraiqimantama vauro.

Ho te mintiaqi vuarorave. Kaiqe te Kotirara noraiqaake iriha, virara viva ti kahaqiariravama vaivo tivaqi viha qaiqaavata vira autu tuaheraqi vuare. Vivama ti Variqavano ti ruaruuma timitaariravama vaivo.

43

Koraara naintivaraqihairo vovano maa ihira qara ntuvatora

¹ Kotio, kia ai uva iriaka tiqaa uva vatareka auti variavara are ti uva iriharama tiriara kia viraqaa uva vaivo tiane.

Qora kaiqa vareha una uva ti varia vaiintika kauquqihairo are ti ruaruuma timitaane.

² Are ti Variqavano ti antua timite variarava vaharo, nantivarae ti qaqira kera iaro? Nantivarae are ti navutaaka qaqi kaaramanta vika ti qoraiqama timite variamanta te nora maaragi vauro?

³ Mpo Noravauvu, te virera iaina aarara ataama timitehara, nena quqaa uva tiva timi vairaque te are variananaini Saioni Aiqina, takuqi vai ainqinaraqaa oru vuare.

⁴ Are mintiraque te ai Naavuqi oru ai *ofaa* tainta tataaqa vaiha, ai quahama amiteha tenta *kitaa* ruqutuqi viha ai autu tuahera kaare. Kotio, are ti Variqavano vahara are ti quahama timite variaravama variaro.

⁵ Mpo, vate nora maaravano tigi vaimanta vauraro ti voqama kero muntuka qoraiqimantama vauro.

Mpo, te mintimake variqi vuarora. Kaiqe te Kotirara viva ti kahaqiariravama vaivo tivaqi vuare. Te mintiaqi viha qaiqaavata vira autu tuaheraqi virerave.

Vivama ti Variqavano ti ruaruuma timitaariravama vaivo.

44

Koraara naintivaraqihairo vovano maa ihira qara ntuvatora

¹ Kotio, are haaru nora kaiqa, vo kaiqa vo kaiqa tinavu kaivaqaukavara vara nimitaanara vika tinavu tiva timiamanta tentanavu aato vika nimiha vi uvvara irunara.

² Vi entara are nena kempukaqohaira vo vatanaa vo vatanaaka maa vataraqahahira aru ntata kera, vi vatara tinavu kaivaqaukavara nimianara.

Vi entara are vi vatanaa vi vatanaaka voqama kera qoraiqama nimiteharavata, tinavu kaivaqaukavara kia mintiraitira, vika koqema nimitaaramanta tinavu kaivaqaukavara koqemake variqi vuara.

³ Kia tinavu kaivaqaukavara iqoka raquraqaahaiive, nái kempukaqohaiive, vi vatanaa vi vatanaaka naataraake vi vatara varaaravauve.

Are nena kempukaqohaira vi vatanaa vi vatanaaka naatara kaaramantara ti, tinavu kaivaqaukavara vi vatara varaarave.

Ai muntukavano tinavu kaivaqaukavarara vaivarara tira, are vika hampata variqira vihara, nena kauquqohaira vika navutaaka naatara nimitaanara.

⁴ Arema ti Avuhainaava ti Variqavano variaro. Are tiaramanta tenavu Iekopira vaintivara tentanavu navutaaka naataraake vaunara.

⁵ Tenavu ai kempukaqohai tentanavu navutaaka aru ntatake vaunara. Tenavu ai autuqaa, tinavu hampata iqoka raqi variaka naataraake vaunara.

⁶ Te huruve, iqoka paiseve, vatehavata, kia te vi haikarara noraiqaake iriraiti, kia vi haikaraqohai navutaaka ho naatara kararave ti vaunara.

⁷ Tenavu ariara tiha, Kotiva tinavu kahaqirage tenavu homa navutaaka naatara kararave. Kotiva tinavu navutaaka kaurira haïka nimianarove, ti vaunara.

⁸ Toqaqvata erainainivata tenavu ai mahutaqai tivaqi vi vauro. Tenavu ekaa enta ai autu tuaheraqi virera.

⁹ Mpo, tenavu minti minti ti vauraravata, are vate maa entara tinavu qorrima kera tinavu hutu vatainiqama kaanarave. Are kia haaru ianantema kera tinavu iqoka vaiinti hampata vihara vika kahaqi variaro.

¹⁰ Are navutaaka qaqi kaaramanta vika tinavu haatara kaamanta tenavu vika naatu qetake, aiqu autute vuramanta vika tenavu una haikara, vo haïka vo haïka varaarave.

¹¹ Sipisipi arukaantemake, are navutaaka qaqi kaaramanta vika tinavu aruqi vuamanta tenavu qetake vo vatanaa vo vatanaaka vataini vi raumpirima vunarave.

¹² Mpo, vaiintivano vo haïka amiharo inaara koqaa varaintema kera, are vo vatanaaka kauquqi tinavu kaaro.

¹³ Are mintianara kaara, tinavu tataaqa varia vatanaaka tinavuara vehi vatanaakave tivakeha tinavu naaraihama timite variara.

¹⁴ Vo vatanaa vo vatanaaka tinavu luttaa vatanaakara uva virera tiva timiteha, vika nái aru runkinkiri iha tinavu naaraihama timite variara.

¹⁵ Vika minti minti iha kaurira haïka ti timiavaro vo enta vo enta ti toqaavu harimantama vauro.

¹⁶ Tenavu navutaaka nái navunaakaqaa aru muntu kareka aniamanta vokiaka tinavu tauvaqa vauraa uva tiha, huviqorave ti variamanta te kaurira haïka varaunara.

¹⁷ Tenavu kia ariara tauru karaiti, kia ai uvavata raqa karaiti vaurarovata, vi haikava vi haikava qovarama vimanta tenavu qoraiqamavi vaunara.

¹⁸ Tenavu kia ai qaqla karaiti, ariaraqai noraiqaake iriqi viha ai aaraqaa nuvaqi vunarave.

¹⁹ Tenavu mintiaqi vi vauraravata, are tinavu qoraiqama timitehara qaakau vairinavu varianaini kaanarave.

Are tinavu qaqla kaaramanta tenavu voqamake konkira ari vainainima vauro.

²⁰ Mpo, tenavu kia ai autu tauru karaiti, kia tentanavu kauqu tuaherake una variqa aare vaunarave.

²¹ Are vaiinti avu aatoqi kukeqavi vai uvara ekaa vi uvara iri tave variarava varianarara ti, tenavu minturaitirio, are vaakama vi haikara iri tavaaraitirio.

²² Tenavu ai vaiinti nahenti vaunara kaara vo enta vo enta navutaaka tinavu harukareka auti variarave. Sipisipi arukareka auti variantemake, navutaaka tinavu arukareka auti variarave.

²³ Mpo Noravaavo, himpuane. Nantivarae are vaite variaro? Himpune. Kia ekaa enta tinavu tauvaqa utu timitaane.

²⁴ Nantivarae are tinavu tivuqaa kukeqavira variaro?

Mpo, navutaaka tinavu qoraiqama timite variamanta tenavu nora maaraqi vaunara tavehara kia notatera variane.

²⁵ Tenavu vatainai hiqintivi vauraro tinavu vaatavano konkoma kanta vaimanta vauro.

²⁶ Mpo, himpira tinavu kahaqiane.

Ai muntukavano vaiinti nahentiara vaina okararave, are vaiinti nahenti aaqurihamma nimiteina okararave, virara virara iriharama, tuvu tinavu ruaruama timitaanerama turo.

45

Koraara naintivarraqihairo povano avuhainaava nahenti varaaina ihira qara ntuvatora.

¹ Te avuhainaa vaiintiara ihi irikeha tire uraro koqe uvavano ti avu aatoqi mpiqe vaimanta vauro.

Vaiintivano peniqohairo koqe uva qara ntintemake, te tenta auntaqihai koqe ihi tirera.

² Avuhainaa vaiintio, ai viri vaatavano koqe viri vaata vaharo ekaa vo vaiinti vo vaiinti viri vaata naatara kairave.

Ai noqihairo vaiinti qihaaqama nimite uvava qovaraiqi vairara tiro, Kotiva ekaa enta ai koqema amitaqiro vuuanaro.

³ Mpo, are avuhainaa vaiinti kempukavano variararo ai autuvanovata nora autu vaivarama variaro.

Are nena avuhainaa utavaaqa nonkutera nena iqoka paipe tegoni nai utaqi nonku varera ⁴ are avuhainaaava mpeqavano vahara, nena ohiqaa oquvi vahara oru quqaa uva ti vai okararave, avuqavuqamake ni vai okararave, aaqurihamma nimite vai okararave, virara virara iriharama vi haikaraqaa maimaraara raqikiqira viharama nena kauqu tanaraqohaira nora kaiqa varaqira vuane.

⁵ Are nena veva viaru vainaraqohaira navutaaka muntuka raqonta kera oru vo vatanaa vo vatanaaka naatara kairamanta vika ai vevaaraini variate.

⁶ Kotio, are avuqavuma kera raqikiqira vi variarava vaharama, are ekaa enta ekaa enta qaqi variqira vihara vaiinti nahentiqaavuqavuma kera raqikiqira vinarave.*

⁷ Avuqavuqamake ni varia okarara ai muntukavano vaivaro qora kaiqa vare varia okarara kia ai muntukavano vairave.

Are mintianarara tiro, Kotiva ai Variqavano ariqaa vahavera aquteharo ai noraiqama kaivara are nena kena vaiintinavuqihaira voqama kera quahe variaro.

⁸ Ueri vahavera *meave, kasiave, alove*, aqu amitaavarao ai utavaaqaqavano koqe unta ivaro *elefanti* avaiqohai aututaa haikava, vo haika vo haikavano ai avuhainaara naavu *vaheheqiro/vaataiqiro* vaimanta ariara quahaarire ti, vo *musiki* vo *musiki* ruquti variara.

⁹ Avuhainaaka raavuraranavu ai naavuqi variamanta nora autu vataa nahenti vonavu-vata viraqi variavaro ai varareva i nahentira ai kauqu tanaraini vairo.

Kori ori koqera, Ofiri vataihai aututaava, vi nahentira utavaaqaqaa *vaheheqiro/vaataiqiro* vaivaro vairo.

¹⁰ Te vi nahentirara mintima turo: Ti raavuravauvo, te uva tiarirara nena aato ti timihara koqema kera ti uva iriane.

Nena maaqainiarave, nena navunaakarave, kia noraiqaakera iriqira vuane.

¹¹ Avuhainaa vaiinti viva ai viri vaata tavaivaro koqe viri vaata vaharo viva ariara antuqa arivarao viva ai noravano vairara tira, are virara noraiqaakera iriqira vihara vira autu tuaheraqira vuane.

¹² Taiaa vatkaihainaaka koqe haika vo haika vo haika vara viri ai amivarave.

Airi airaira vataaka ariara viva tinavu quahama timitaarire tivakeha are inanaini anivarave, turo.

¹³ Ho avuhainaara raavuravano nai naavuqi vaivaro vira viri vaata koqe viri vaata vaharo viva koqe utavaaqa nonkutero vairo.

¹⁴ Vira koqe utavaaqa nonku amite vita vare avuhainaa vaiintivano vainaini vuru kaara. Vira vuru ke variamanta vira kena nahentinavuvata vira avataqi vi variara.

¹⁵ Mintiaqi viha vika ekaa quahaqi viha avuhainaara naavuqi origetaara.

* **45:6:** Haarua vuku hininavu mintima ti: Kotiva ai noraiqama kaivara are avuhainaa vaiintivano vahara are ekaa enta ekaa enta vaiinti nahentiqaavuqavuma kera raqikiqira vinarave.

¹⁶ Ho avuhainaa vaiintio, naantiara ai maaquvara airitahaq qovaramavi, vika ai kaivaqaukavara vatuka vare kaiqa varaivaro, vika autuvata nora autu vairamanta vika vo vataini vo vataini ai vaiinti nahentigaa raqikiqi vivarave.

¹⁷ Ekaa naantiara kuvuaramateka vikavata ai autu tuaheraqi viha, maa ihira ekaa enta tivaqi vivarave.

46

Koraara naintivaraqihairo vovano maa ihira qara ntuvatora.

¹ Kotiva tinavu antua timiteharo tinavu kempukaiqama timite vaivama vairo.

Maaravano tinavuqi qovaraiqivaro viva vaaka tinavu kahaqireva auti vaira.

² Viva minti vairara ti, tenavu kia vo haika aatu qetarera. Maa vatava vogamakero qaki qaki i vairaro vo ainqina vo ainqinavano nora namariq aqu virera, tenavu kia qetarera.

³ Nora namarivano hari hari tiharo taarapara ntiharo kumpetaqiro viharo ainqinanavu kauru kaaruma kairaro rapatutirera, tenavu kia qetarera.

⁴ Namari vovanovata vairo. Vi namariva Kotira vatukaqi tuvi vaimanta viraqi variaka quaheha variara. Vi vatukaraqi nai virini kantaaqaini vai Variqava turuaraini tuekaama kero vairo.

⁵ Kotiva vi vatukaraqi vairara ti, kia ho vi vatukara qoraiqama kevara. Vokika vi vatukara qoraiqama kareka ivera, Kotiva aatitare inaraqaa vaakama vi vatukara kahaqianaro.

⁶ Vo vatanaa vo vatanaka voqamake arara ite vaimanta iqoka raqi variamanta vika avuhainaaaka nái vaiinti nahenti hampata qoraiqamavi variarave.

Vika minti variavaro Kotira kempukavano vika naatara kaira. Naaruvavano uva tintemakero, Kotiva uva tivaro vira uvavano vata ravita kairave.

⁷ Noravano Kotiva ekaa kempuka vataava, viva tinavu hampata vairo. Ti kaivaqara Iekopira Variqavano, viva tinavu antua timite vaivama vairo.

⁸ Noravano Kotiva vare vai kaiqara ne ani tavaate. Ne ani viva nora kaiqa, vo kaiqa vo kaiqa vare vaira taveha kauqu runkinkiri iate.

⁹ Ekaa vata maata iqoka raqi variara viva taveharo taiqake vairave.

Viva vika huruve, vaantaarave, rauhaantima keharo vika kainkevata iha quarake vairave.

¹⁰ Viva tiharo, Kia qaiqaavata iqoka raquate. Ne kankomake ti tavaate. Te Kotika Noravanoma vauro.

Te Noravano variari ekaa naato vatanaka ti hutuqai tuaheraqi vivarave. Ekaa vataini variaka ti hutuqai tuaheraqi vivarave, tiro.

¹¹ Noravano Kotiva ekaa kempuka vataava viva tinavu hampata vaimantama vauro.

Tinavu kaivaqara Iekopira Variqavano tinavu antua timite vaivama vaivo.

47

Koraara naintivaraqihairo vovano maa ihira qara ntuvatora

¹ Ne ekaa naato vatanaka, nenta kauqu ruqutuqi viha quaheha variate. Ne noraiqaake ihi tivaqi viha Kotira autu tuaheraqi vuute.

² Noravano Kotiva nai virini kantaaqaini vaiva, viva Avuhainaava ekaa maa vataraqaa raqiki vaira, ne vira aatu qeteha variate.

³ Viva vo vatanaa vo vatanaka tinavu kauquqi kaimanta vika tinavu vevaaraini variara.

⁴ Viva tinavu kaama tai vataro timimanta tenavu vare viraqaa vairaquahe vaunara. Mpo, vira muntukavano tinavu Iekopira vaintivarara vairaro viva mintivo.

⁵ Vaiinti nahenti quaheha naveraiti variavaro Noravano Kotiva naaruvaini oru vi vaira. Viva oru vi vaimanta vika naverai tiha aanumaaravata varake vuaqaqi vi variara.

⁶ Kaiqenavu Kotira autu tuaheraqi viha ihi tiare. Kaiqenavu tentanavu Avuhainaara Kotira autu tuaheraqi viha ihi tiva amitaare.

⁷ Kotiva maa vataraqaa Avuhainaava vairara ti, tenavu vira autu tuaheraqi viha ihi tiare.

⁸ Kotiva nai avuhainaa tainta, takuqi vairaqua, oquvi vairaro, ekaa naato vatanakaqua raqiki vairo.

⁹ Maa vataraqaa avuhainaaka variaka, vika Eparahaamira Variqa vira vaiinti nahenti hampata ruvaaqumavi variara.

Kotira kempukavano ekaa vatainai avuhainaaka kempukavata aatara kairara tiro, viva ekaa naato vataqaa raqiki vaivama vairo.

48

Koraara naintivarraqihairo vovano maa ihira qara ntuvatora

¹ Noravano Kotiva vaivaro vira autuvano nai nora autu vairara ti, kaiqenavu vira vatukaqi vira takuqi ainqinaraqaa oru vaiha, vira autu tuahera kaare.

² Kotira ainqinavano vaireva, viva koqe ainqina veraraqaa vaira. Ekaa naato vatanaaka vi ainqinaraquaheha variara.

Saioni Aiqinavano vaivaro tinavu Avuhainaava Noravano virara ti vatukave tivake-haro, mini variqiro vi vaira.

³ Kotiva vi vatukarraqi vaharo koqema kero viraqaa raqikiharo viraqi varia vaiinti nahentika antua nimite vaira.

⁴ Avuhainaa vaiinti vonavu ruvaaqumavi vi vatukara aatara karare ti,⁵ uru vi vatukara tave, vika voqamake aatu itaimanta qaqrake ururante kantama vuara.

⁶ Vika vi vatukara tavaavarao aiqu kauqu ntiri ntiri i vaimanta, nahentivano vainti vatareva iharo antura ntintemake, vika qeteha oi aai ti variara.

⁷ Aaronavano utiharo Taasisihainaa votunavu qoraiqama kaintema kera, are vi entara vika vehi autu taiqa kaanara.

⁸ Tota tenavu Kotira vatuka kia tavaraiti, aatoqihai irunarave. Ho vate tenavu tentanavu tivuqohai tavauro.

Noravano Kotiva ekaa kempuka vataava i vatukara, vi vatukarraqaa Kotiva ekaa enta koqema kero maimaraara raqikiqiro vuanaro.

⁹ Mpo Kotio, tenavu ai Naavuqai vaiha are tinavu kia qaqira kaararo ai muntukavano tinavuvara vaira, virara tenavu aatoqi iriqi viha vauro.

¹⁰ Ekaa vo vatanaka ai autu tuaheraqi vi variarave.

Are vaiinti nahentiqaa avuqavuqama kehara raqiki varianarara ti, ekaa naato vatanaaka ai nora autuara ho iriarave.

¹¹ Are mintimakera raqiki varianarara ti, ekaa vaiinti nahenti Saioni Aiqinaraqaa variakave, ekaa Iutaini variakave, vika vika muntukaqihai quaheha variara.

¹² Kaiqenavu Saioni vatukaqi niha vaantaavuraqaa vo tauaa vo tauaa kaara ntuvake tavaare.

¹³ Tenavu Saioni kempuka vaantaavuravata tuantike tavamaqi viha, vaantaavuraqai kempuka naavu, vo naavu vo naavu kagataaravata tavaare.

Tenavu vi haikara vi haikara tavamake, tentanavu vaintivarave naintivarave maanti-make tiva nimirera:

¹⁴ Kotiva tinavu Variqavano tinavuqaa koqema kero ekaa enta ekaa enta raqikiqiro vuanarove.

Viva ekaa enta koqe aara tinavu humiqe vairaqe tenavu koqe aaraqaa vuare.

49

Koraara naintivarraqihairo vovano maa ihira qara ntuvatora

¹ Ne ekaa vatanaaka iriate.

Ne ekaa vata maata variaka, te uva tiari ne nenta aato ti timiha iriate.

² Ne nora nutu vataakave, qumina vaiinti nahentive, airi airaira vataakave, vehi vaiinti nahentive, ne ekaa nenta aato te uva tiainarraqaa vataiqe te uva tiare.

³ Te tenta noqihai koqe avu aato iri vai okarara ni tiva nimirera.

Te tenta avu aatoqihai iritauna uvvara tiariraro, vi uvava ni avu aato ho kahaqianaro.

⁴ Te uva vo tenta aatoqihai irike, kitaa ruqutuqi viha, vi uvvara okara kukeqavira ni tiva nimirera.

⁵ Vo haikavano ti qoraiqama timitaaina entava qovaraiqiraqe kia te vira aatu qetarerava. Navutaaka ti ututumate entara kia te qetarerave.

⁶ Vika nái airi airaira vataarara noraiqaaake iriha, vi haikava tinavu homa kahaqianrove ti variara.

⁷ Ho iriate. Vaiintivano qutu viraro kia vovano monu aqukeharo vi vaiintira kahaqiraro viva qaiqaa qaqi himpuanaro.

Kia ho vovano Kotira koqaa amiraro viva vi vaiintira qaiqaa qaqi vara himpima kaanaro.

⁸⁻⁹ Tenavu nana koqaae aqu kaariraro Kotiva tinavu qaqi kairae tenavu kia qutuvi nteria viraiti, qaqi variqi virarave? Vi koqaava nai uritarakero vairara ti, tinavu koqaavano kia ho varianaro.

¹⁰ Tenavu tavauramanta koqe avu aato vataakavata, kia avu aato vataakavata, qutu variara. Vika qutu vuamanta qaqi variaka vika vataa onaanave, monuve, vare variara.

¹¹ Qaqi varia entara vika vata qoka variara. Ho vika qutuvi, nái quntama te vataraqi ekaa enta vaivara.

¹² Tenavu qutu vuaina entara tinavu nora autuvano kiama ho tinavu kahaqianaro.

Ekaa aantauvahivano qutintemake tenavuvata qutu virara.

¹³ Ho tavaate. Nariara noraiqaake iri variakavata, vika avataqi viha vika uvvara quahe variakavata, vika maantimake taiqa vivara:

¹⁴ Sipisipi qova nai sipisipi ruhaaqikero arukaintema kero, Qutira Haikavano vika ntita varero muntu qutu vuaka varianaini kaira vaivara.

Vika naavu koqeva qumina vairamanta, vokiaka vika vaata vare muntu vataaqi quntama taivaro ntere vairamanta, avuqavu ni variaka quaheha *ahaa vuvukai/ehe mpumpukai* tiva nimitevara.

¹⁵ Ho vika mintimake taiqa vivarovata, Kotiva ti quntama teraqihairo ti ruaruama timitaanaro.

¹⁶ Ne virara virara irihama tavaivaro vaiinti vovano airi airaira ruvaaqumaqi viharo koqe naavu kaqakero viraqi vairera, kia ne tiha, Mpo, tenavuvata mintiataarave, tiate.

¹⁷ Vi vaiintiva qutu viro nai iaina haikaraqihairo kia vo haikavata varero vuanarove. Viva vatai airairava kia ho vira vataakero qutu vuaka varianaini otu vuanaro.

¹⁸ Vi vaiintiva qaqi vai entara te koqemake vauro ti vaimanta vaiinti nahenti viva i haikara taveha virara koqe vaiintive ti variarave.

¹⁹ Ho vi vaiintiva qutu viro nai kaivaqaukavara qutuvi varianaini otu vaharo, viva vika aanantero kia qaiqavata kuarivano itaianara tavaanaro.

²⁰ Tenavu qutu vuaina entara tenavu nora autu vataarirava kia ho tinavu kahaqianaro.

Ekaa aantauvahivano qutintemake tenavuvata qutirarave.

50

Asaapiva maa ihira qara ntuvatora

¹ Ekaa kempuka vatai Variqava, Noravano Kotiva uva tiro.

Ekaa naato vatanaaka kuari avu urinaihainaakave, kuari avu ruhunku vinaihainaakave, vika vika naare vairave.

² Saioni vatuka voqaraa vatukavano vaivaro viraqaahairo Kotiva ataama nimite vairo.

³ Mpo, ti Variqavano tuvi vaivo. Viva kia evaara tuviraitiro, viva tuvi vaivaro voqama kero tatoqake vai ihava vira avuni otu vi vaivaro, aaronaa noravano vira ututuma tero vairo.

⁴ Viva tuviharo naveraitiharo, Naaruvavanovata vatavanovata tave vase te tenta vaiinti nahenti uva avuqavu qjare.

⁵ Te tenta Isarereri, vaiinti nahenti hampata uva tiva taatau taunara kempukaiqama vuarire ti, quara aantau ti iha quara timitaaka, ne ani ruvaaqumavi vase uva tiare, tiro.

⁶ Kotiva minti tivaro naaruvavano tiharo, Kotiva naima ko avuqavu ti vaivara tiro, viva avuqavuqama keharo uva avuqavu i vairave, tiro.

⁷ Minti tivaro Kotiva tiharo, Ho ti vaiinti nahentivauvo, te uva tiari iriate.

Ne Isarereri vatanaakao, te Kotika ni Variqavano vaurauka niqaa uva vatarerave.

⁸ Ne quara aantau arukeha iha quara timite varia *ofaarave*, ne ekaara iha quara timite varia *ofaarave*, te kia vira kaara niqaa uva vataraiti, te vo haika kaara niqaa uva vatarerave..

⁹ Ne nenta avutaqihai purumakauve memeraave vare qumina ti timivorave.

¹⁰ Ne kiae iriavo? Ekaa aantauvahivano nantaqi variaka te uraukaqaima variavo.

Ekaa vo aiqina vo aiqinaqaa varia purumakauka, te uraukaqaima variavo.

¹¹ Aiqina vainaini vai uvirirave, ekaa aantauvahivano toveqive, ekaa vi haikara vi haikara te uraukaqaima variavo.

¹² Ti hantuqa haritirio, te kiama ni karara naariraiti, „te tentama kara varake nauraitirio.“ Maa vataravata, ekaa viraqaa vai haikaravata, ekaa vi haikava vi haikava te una haikavaqaima vaivo.

¹³ Te purumakau qora vira mati naunarae? Te memeraa naare naunarae? Kiavuve.

¹⁴ Te nai virini kantaqaqaini vaura Variqaukama vauro.

„Ni avu aato qora avu aatoqai vaira kaara ne quara aantau iha quara timite variara kia ti virara hantuqa harivo.“

Ne maa haikararaqai irihama ti quahama timitaate: Ne tiriara koqeve tivaqi vuate.

Ne kauqu ainqiqaa aquekeha tiriara tivate uvara „kia qaqira karaiti,“ vi uvara avataate.

¹⁵ Maaravano niqi qovaraiqaina entara tiqai haaraate. Ne mintiaqi viqe te ni ruaruuma nimitaari ne ti hutu tuaheraqi vivarave, tiro.

¹⁶ Viva minti tivakero Kotiva qora kaiqa vare variakara tiharo, „Ne qora kaiqa vare variara kaara, hauri ne nenta noqihai te tiva tauna uvara tivaqi vivorave.

Ne unahaa tiha, Kotiva tinavu hampata vohaa vahiaro uva tiva taatautaira tenavu iriqi vi vaunrarave, ti variarave.

¹⁷ Te uva maara tiva taunarara kia ni antuqvano vaimanta ne ti uva qoririmake variarave.

¹⁸ Ne muara vaiinti taveha, vika tontiqi variarave.

Naata vaati varaa okarara raqake variaka, ne vikara quaheha variarave.

¹⁹ Ne nenta noqihai qora kaiqa vareraraqai ti variarave.

Ni maaqirivano una uvaqai ti vairave.

²⁰ Ne nenta qata vakaqaa una uva oqikeha ti variarave. Ne nenta nora vira maaquara tauvaqa vauraa uvaqai ti variarave.

²¹ Ne vi kaiqara vi kaiqara qora kaiqa varaamanta te Kotika kia uvavata tiraiti, evaara vauramanta viraqahai ne tiha, Kotiva vaireva, viva tinavu voqaavama vaivo, ti variarave. Ho vate te ni nivuqaa qoqaa vaiha niqaa uva vatarerave.

²² Ne ti Kotika tauvaqa utu timite variaka, ne iri vaiqe te tiare.

Ne kia ti uva irivera, *raionivano* aantau rapepaama kaintmake, te ni qoraiqama nimitaari raro kia vovanovata ni ho ruaruuma nimitaanarove.

²³ Tiriara koqeve tivaqi vi varia vaiinti nahentika, vikama ti hutu noraiqama timite variavo.

Ti uva koqemake iri varia vaiinti nahentika, te vikama ruaruuma nimiteha ntitararave turo.

51

Devitiva Basebaara vataakero muara nuvakero vauvaro paropeti vaiinti Nataaniva Devitira oru tavo entaraqaahairo Devitiva nai qora kaiqa varorara mpo ike tiharo maa ihira qara ntuvatora

¹ Mpo Kotio, nena vaiinti nahentiara muntuka vatena okarara iriharama, tiriara ike mpo tiva timitaane.

Nena vaiinti nahentiara aaqurihama nimitena okarara iriharama, te ai uva raqa kaunara nunka timitaane.

² Mpo, are ti hiqama timitararo are tiqaa vataana uvava taiqa vuarire.

Are ti hiqama timitararo te qora kaiqa autuna uvava kia variarire.

³ Te tenta qora kaiqa autunarara kankomake irunarave.

Te vira kia ho tauru kauraro viva ti tivuqaa qoqaa vaimantama vauro.

⁴ Mpo, te qora kaiqa vira autiha ai uvaqaima raqa kaunarave.

Te qora kaiqa vira autiha ariqai qoraiqama amitaunarave.

Are vi kaiqarara nai qora kaiqave ti variana kaiqara, te vi kaiqara autu kaunara kaara are avuqavuqama kera tiqaa uva vataanarave.

⁵ Mpo, ti vatatai entaraqaahai te ai no raqaqi vi vaunrarave.

Ti nova vainti taiqa vimanta te auhaqi vauna entaraqaahai ai no raqaqi vi vaunrarave.

⁶ Quqaama, vaiintivano nai muntukaqihairo quqaa uva ti vai okarara, virara ai antuqvano vairave.

Nena koqe avu aatoqohairo ti avu aato kahaqiraro ho variarire.

⁷ Mpo, are ti uva nunka timitararo te anomake hiqamavi variare.

Are ti hiqama timitararo ti avu aato muntukavano kia konkira arraitiro, anom akeruromura voqaara hantaiqama vuarire.

⁸ Mpo, are ti qaqi kairae te qaiqaa quaheha variare. Tinta qora kaiqa kaara are ti ruqutuararo ti muntukavano voqama kero qoraiqimanta vauro.

Mpo, qaqi kairaro ti muntukavano qaiqaa koqema viraqe te quaheha variare.

⁹ Are nena viri tuqantaakera, kia te qora kaiqa varaunara tavaane. Te ekaa ai uva, vo uva vo uva raqakaunara nunka timitaane.

¹⁰ Mpo Kotio, qaraaka muntuka, takuqiro vainara ti autu timitaane.

Ti maraqua qaraakaiqama timitaireqe te ariaraqai noraiqaake iriqi vuare.

¹¹ Mpo, kia nena aqantohaira ti tititama kaane. Kia nena Maraqua takuqi vaira tiqihaira qaqini vara kaane.

¹² Haaru are ti ruaruama timitaaramanta te quaheha vaunarave.

Ho are ti qaqi kairage te haaru vaunantemake, vatevata qaiqaa quaheha variare.

Are ti kahaqiraro ti maraquravano ai uva iriqi vuataa iraqe iriqi vuare.

¹³ Are mintirage te ai uva raqake variaka kahaqihā, ai koqe okara, vo okara vo okara numiqaqi vuari vika tuqantaavi orurante ai aaraqaa aniate.

¹⁴ Are ti ruaruama timite variaravara tira, te vaiinti arukauna uvava tiqaa vaira qaqini vara kaane.

Are mintirage te ai avuqayu okarara iriha tenta noqihai ihi tivaqi vuare.

¹⁵ Noravauvu, are ti maaqiri kahaqī vairage te tenta noqihai ai autu tuaheraqi vuare.

¹⁶ Quara aantau aruke iha quara amite *oфаара* ai antuqavano vaitirio, te quara aantau ai iha quara amitauraitirio.

Ekaa kaintu ai iha quara amite *oфаара* kia are quahe varianarave.

¹⁷ Te mpo ike tiha, kia qora kaiqa varaaataarave tivakeha, ai vevaarainiqamake variaina *oфаара*, virarama ai antuqavano vaivo.

Te vi *oфаара* ai amitaarirara are kia virara nunurama timitenara.

¹⁸ Mpo Kotio, are Saioni vatuka quahama amitairamanta viraqi variaka koqemake variqi vuate.

Are vika kahaqiramanta vika qaiqaa Ieruharemi vaantaavura autuate.

¹⁹ Are mintima kera vika kahaqiramanta vika naitaramake ai *oфаа* iha quara amiterave, ekaara kaintu *oфаа* iha quara amiterave, vira tavehara quahenarave.

Vi entara vika purumakau qora vonavu ai *oфаа* taintaqaa iha quara amitevarave.

52

Devitiva maa ihira qara ntuvatora. Soruva Devitira arukareva auti vau entara, Idomu vatanaava Doeikiva Soruva unaini oruntero, vira tiva amiro tiharo, Devitiva Ahimerekira naavuqima oru vaivo, tura.

(1 Samueri 22:9)

¹ Oho, kempuka vaiintio, nantiharae are nena qora kaiqa varaanarara viti viri vaiinti nahenti tiva nimi variaro?

Nantiharae are toqaqhairsa nena mahuta tivaqira vivira, entama kaaro? Are mintiharama Kotira kaurira haikama amiaro.

² Vehi autu taiqa keravaqaima ai aatoqi vaivo. Ori hakare vaihaiva teqa taaqama kaintema kero, ai una uvavano vaiinti qoraiqama nimite vaivara variaro.

³ Ai muntukavano kia koqe kaiqara vairaitiro, qora kaiqaraqaima vaivo.

Ai muntukavano kia quqaa uva tirara vairaitiro, una uva tiraraqai vaivo.

⁴ Una uva inaara ti variara vaiintio, nana uvarae ai antuqavano vaivo? Vaiinti qoraiqama nimiteni uvararama ai antuqavano vaivo.

⁵ Ho iriane. Kotiva ai ekaara vehi autu taiqa kareva, nina naavuqihairo kempukaiqama kero raraau veva aqu kaanaro.

Katari tuqa vataakero vataqihairo ravau kaintema kero, viva maa vataraqaa qaqi variakaqihairo ai raraau aqu kaanaro.

⁶ Kotiva ai mintima kaira avuqayu ni variaka are qoraiqama vinara tave, vika vira aatu geteha vaivara.

Vika qeteha, ai naaraihama amiteha tiha, ⁷ Huviqorave. Maa vaiintiva kia Kotirara noraiqaakero iriraitiro, nai airi airaira vataira viraraqai noraiqaakero irirave. Viva te qora kaiqa vare vaunaraqaahai koqemake variqi virerave, ti vairave. Vika ariara mintima tivarave.

⁸ Kia te ai aanantamake vauro. *Orivi* katarivano Kotira Naavuqi koqema kero gampiqaintemake, te koqemake variqi virera. Kotira muntukavano tiriara enena vaira, te virara ekaa enta noraiqaake iriqi virera.

⁹ Kotio, are ti kahaqama timitaanarara irihama te ariara koqeve tivaqi virerave.

Ai vaiinti nahenti ruvaaqumavi vainaini vaiha te are ti koqema timitenarara vika tiva nimiha ai autu tuahera karerave, turo.

53

Devitiva maa ihira qara ntuvatora

¹ Kia avu aato vataaka tiha, Kia Variqavano vaivo, ti variara.

Vika qora vaiinti vaiha qora kaiqaqai vare variara. Vikaqihairo kia vovanovata koqema kero avuqavu ni vaira.

² Kotiva naaruvalihairo viavi maini taveharo tiharo, Maa vataraqaa variakaqihairo koqe avu aato vataava vovano ti okara kankoma kero tavareva autie vaivo, kiae auti vaivo? tivakero tavaivarao kia vikaqihairo voqavanovata vaira.

³ Kia voqavanovata vaimanta ekaa vataini variaka Kotira aara qaqrake hampi aaraqaqaqai vi variara.

Ekaa vataini variaka qoraiqamavi variavaro kia vikaqihairo voqavanovata Kotira kaiqa koqema kero vare vaira. Kia voqavanovata mintirave. (Romeni 3:10-12)

⁴ Kotiva tiharo, Qora kaiqa vare variaka, vika avu aato kiae vaivo? Kara nama taiqa kaintemake, vika ti vaiinti nahenti taiqake variarave. Vika kia tiriara iriraiti, kia ti haare variarave, tira.

⁵ Ho vate kia qetaraiti qora kaiqa vare variaka, vika naantiara voqamake aiqu kauqu ntiri ntiri i vairamanta qetehe vaivarave.

Kotira vaiinti nahenti hampata iqoka raqi variaka, viva vika arukero vika vuhaantaari raumpirima kaanarove.

Kotiva vika qoririma kairara ti, Isareru vika naatara kevarave.

⁶ Mpo Kotiva Saioni vatukaihairo vaiinti vo atitairaro viva tinavu Isareru ruaruama timitarera, te virara koqevema tirara.

Naantiara Kotiva nái vaiinti nahenti qaiqaa koqema nimitairaro vi entara vika kaiqavano ho vaira vika koqemake variqi vivara. Vi entara Isareru vika voqamake quaheha vaivara.

54

Devitiva maa ihira qara ntuvatora. Soruva Devitira arukareva auti vau entara, Sifhainaaka vuru Sorura tiva ami tiha, Devitiva tinavu vatukaqi kukeqavi vaivo, tura.

(1 Samueri 23:19)

¹ Mpo Kotio, nena nora autuara iriharama ti ruaruama timitaane.

Nena kempukaqhairs ti kahaqiramanta vaiinti nahenti te avuqavu nuainarara anomake tavaate.

² Mpo Kotio, te ai aaraarirara are ti uva iriane. Nena aato ti timihara te tiaina uvara iriane.

³ Kia vo vaiintiara noraiqaake iri variaka ti hampata iqoka raqireka auti variavo.

Kia vokiakara mpo ike tiva nimitaraiti, vika qoraiqama nimite varia vaiintika tivata haru kareka auti variavo. Vi vaiintika Kotira qoririma amiteha vira uva kia iri variarave.

⁴ Ho tavaate. Kotiva ti kahaqi vaivama vaivo. Noravano Kotiva vivama tiqaa raqiki vaimanta te koqemake qaqi variqi vi vauro.

⁵ Mpo Kotio, are qaqi kairaro ti qoraiqama timitareka auti vaiva, viva vika nái qoraiqama nimitaare, turo.

Are tiriara noraiqaakera iriqira vihara vika vehi autu taiqa kaane.

⁶ Noravauvo, are mintirage te quaheha *ofaa* vo ai iha quara amitaare.

Ai okaravano vaireva, koqe okaravano vaimantara ti, te ariara koqeve tivaqi virerave.

⁷ Nora maara, vo maara vo maaravano tiqi vaimanta vaurara are ti ruaruama timitaaravera te tenta avuqohai tavarura are ti navutaaka naatara kaanarave, turo.

55

Devitiva maa ihira qara ntuvatora

¹ Kotio, te ai aaraarirara kia nena aato tintataraitira, te ariara ike mpo tiaina uvara iriane.

² Mpo, are ti uva irira, tinta tiva timiane.

Vo maara vo maaravano tiqi vaiva ti qoraiqama timite vaivaro ti avu aatovano hampiqi vaimanta vauro.

³ Ti navutaaka naverai tiha, Tenavu ai arukarerave, ti variavaro ti vogamakero haatu ite vaimantama vauro.

Vira kaara vo maara vo maaravano ti qoraiqama timite vaivo. Ti navutaaka nirara itaimanta vika tiriara qora uva, vo uva vo uva ti variavo.

⁴ Ti muntukavano vogamakero nti vaimanta te qeteha mpo te qutu vuuarorave ti vauro.

⁵ Ti haatu itaivaro aiqu kauqu ntiri ntiri i vaivaro qetara haikavano ti ravaaqavu kaimantama vauro.

⁶ Mpo, te mirura aanante aroka vatauraitirio, te ata vare niaraini oru koqemake auraara vairera vuraitirio. ⁷ Te ata vare niaraini qumina kanta kia vaiintivanovata varianaini oru vairera vuraitirio.

⁸ Mpo, aaronavano utiharo vo haika vo haika qoraiqama kaintemake, navutaaka ti qoraiqama kareka auti variavo. Te aroka vataurauka vauraitirio, te homa ata vare vuramanta vika kia ti qoraiqama timitaatirio.

⁹ Mpo Noravauvu, are qora kaiqa vare variaka avu aato hampiqama kairamanta vika uva tireka iha, kia ho uva vutuke tiate.

Te tavauramanta vokiaka qoraiqama nimite variakave, vokiaka ruquti variakave, vika nora vatukaqi ni variarave.

¹⁰ Entaqive aaitairaqaaave vika ori vaantaavuraqaavata *tauniqvata* vi anihā, vaiinti qoraiqama nimite variarave.

¹¹ Nora vatukaqi vaiinti vonavu vi anihā vaiinti nahenti ntaihē variamanta *maaketiqi* vonavu unaqaraiqama keha koqaa kaiqa vare variarave.

¹² Ho vaiinti vovano ti vogama kero qoraiqama timite vaira. Vi vaiintiva ti navutaava vaitirio, viva tiriara qora uva timanta te vi maarara homa varauraitirio.

Ti navutaava vovano ti harireva auti vairaque te homa vira aatu kukeqavi vairara.

¹³ Mpo, vi vaiintiva ti kena vaiintivano ti tonti taruva vaimanta ¹⁴ tetanta aaraini viha nai kauqu nai kauqu tuataqi viha koqe uva tivaqi viha vaiinti nahenti hampata Kotira Naavuqi vi vaunarave.

¹⁵ Ti navutaaka variavaro qora kaiqavano vikaqaa raqiki vaimanta variara. Vira kaara are qaqi kairaro qutira haikavano vika vaaka ravaaqavu kaira vika ravukuvi qaqi vairerave tihavata, vika qutu vuaka varianaini otu vuate.

¹⁶ Ho te Kotira aareha ti kahaqiane ti vauraro viva ti ruaruama timite vaira.

¹⁷ Toqaqive, ikarave, entaqive, te Kotirara ike mpo tiha vira aare vauraro viva ti uva iri vaira.

¹⁸ Hihai hihai navutaaka ti hampata iqoka raqi variavarovata, Kotiva ti ruaruama timite vaimanta te ho vaunara.

¹⁹ Ti navutaaka kia qora aara qaqlira karaiti, kia Kotira aatu qete variara. Vira kaara Kotiva tota avuni hoqaramatai entaraqaahairo raqikiqiro ani vaiva, viva ti uva iriro, ti navutaaka naatara kaanaro.

²⁰ Mpo, ti tonti viva ti navutaiqiharo, haaru nai kauqu ainqa aqukero tivatai uvara qaqlirakeria kia avataira.

²¹ Vira uvavano koqe uva ugerara uva vaivarovata, vira avu aatoqi iqoka raquari-ravaqa vaira.

Vira uvavano *orivi* vahavera voqaara vaharovata, iqoka paipe voqaara vaiinti teqa taaqamake vaira.

²² Ho, kia qumina vo maara vo maarara noraiqaake iriqi vivaro ni muntukavano qoraiqiarira.

Ne ekaa vi maarara Nora Kotira tiva amivaro viva ni kahaqiharo ni kempukaiqama nimitaira ne ho variqi vuate.

Avuqavu ni variaka variavaro Noravano kia vika qaqi kaira vika hiqintivi qoraiqama vivara.

²³ Kotio, quqaama are qora kaiqa vare variaka nai revanto vaina *ruvuraqi/mpumpiraqi* aqukenarave.

Vaiinti aruke variakave, una uva ti variakave, vika kia naampaiqama viraiti, vaakama qutu vuaka varianaini vivarave.

Mpo Kotio, te ariara noraiqaake iriqi virerave, turo.

56

Pirisia vatanaaka Geti vatukaqi Devitira ravaaqavuko entara viva maa ihira qara ntuvatora

(1 Samueri 21:10)

¹ Mpo Kotio, ti aaqurihama timitaane. Ti navutaaka ti harukareka ti avataqi ani variavo.

Vika toqaqihai hoqaramate ti hampata raquqi vivi vuru entamake variavo.

² Ti navutaqi variaka airitahaa toqaqi ti avataqi vivi, vuru entamake variavo.

³ Mpo Kotio, te qete variaina entara te ariara noraiqaake iriqi virerave, turo.

⁴ Te Kotiraqaa muntuvu vahia, viva tivatai uvara iriha vira autu tuaherake tiha, Qumina vaiinti vika kia ho ti qoraiqama timitevarave, tirerave.

⁵ Ti navutaaka nái aatoqi ti qoraiqama timiteva vaimanta vika enena te ti vauna uvara tugantaake unahaa tiha, Viva maa uvarama ti vaivo, ti variara.

⁶ Vika ruvaaqumavi kukeqavi vahia ti haru kareka autiha te vi anunara ampeqamake tave variara. ⁷ Oho, Kotio, kia qaqi kaira vika ruqemake vuate. Ai arara ite vairara vika ntaihaane.

⁸ Mpo, maaravano tigi vairara are irianarave. Te iqi rate vauraro ti auquruvano nte vaira, are vira kaara ntuva kehara, nanti nantie vaivo tivakehara, vira nena vukuqi qara ntuva taane.

⁹ O Kotio, te irunrarave. Te ai aareha ti kahaqiane tiaina entara, ti navutaaka mintima tivarave: Oho, Kotiva vira mantarainima vaivo tivakeha, qetake anirante vivarave, turo.

¹⁰ Te Kotiva tivatai uvara irihamma vira autu tuaherake, ¹¹ virara noraiqaake iriqi viha tiha, Qumina vaiinti vika kia ho ti qoraiqama timitevarave, tirerave.

¹²⁻¹³ Kotio, are tiriara viva ti avuqaa niharo, tinta ataa i vainaini qaqi variqiro vuarire tira, are ti ruaruama timitaaramanta te kia kaavunti qutu vunarave.

Are mintianarara ti, te tenta kauqu ainqqaa aquukeha ariara te mintirerave tuna uvara kia tauru karaiti, te ariara koqeve tiaina *ofaara* iha quara amitarerave, turo.

57

Sorura aatu Devitiva oru ori onavuqi kukeqaviro vau entara maa ihira qara ntuvatora

(1 Samueri 22:1; 24:4)

¹ Mpo Kotio, are ti aaqurihama timitaane.

Te are iananaini oru vaunaraara tira, are ti antua timitehara ti aaqurihama timitaane. Kokoraaravano nai naati aroka rairakero aqu amitaintema kera, are ti antua timitairaro ti qoraiqama timitareva i haikava taiqa vuarire.

² Noravano Kotiva nai virini kantaaqaini vai Variqava, ti koqema timite vaiva vaimanta te vira aare vauro.

³ Te vira aare vauraro viva ti uva iriro naaruvalihairo ti ruaruama timitaanaro.

Viva kia ti qaqla karaitiro, viva tiriara noraiqaakero irihamo ti harukareka tivataqi ani variaka ntaihamma kaanaro.

⁴ Mpo, *raioni* voqamake karara antuqa arimanta variantemake, navutaaka ti arukareka ututumavi variavo. Vika aaraivano vaantaarave vevave voqaara vaivarvo, vika maaqirivano iqoka paipe voqaara vaimanta variara.

⁵ O Kotio, naaruvalihairo nena mpeqa okara vaiinti nahenti numiqairamanta tavaate. Nena takuqi vaina okarara qoqaiqama kaira vataini variaka tavaate.

⁶ Tiriara viraqi ntuva vuarire ti, ti navutaaka vahe vugitaarave. Ho vika náima viraqi ntuva vuavo. Viha te virera una aararaqaa hiqainti quvi taara viraqi nái aqu vuavo.

⁷ O Kotio, ti muntukavano paru imantama vauro. Ti muntukaqihairo paru i vaimanta te ihi tiha ai autu tuahera karerave.

⁸ Ho ti maraquravauvo, himpuane. Ho ti *kitaa kulelevauvo*, aniqenavu himpi vaiha aatitare inaraqaahai ihi tivaqi vuare.

⁹ Noravauvo, te vo vatanaa vo vatanaaka nivutaini vaiha ai autu tuaheraqi virerave. Te vaiinti nahenti vainaini oru vaiha ariara ihi tivaqì virerave.

¹⁰ Are vaiinti nahenti aaqurihama nimite variarava nai uri aatarakero voqavatama vaivo. Viva maaqaahairo oru viviro, vurura naaruvaini oru ntairave.

Are nena vaiinti nahentiara noraiqaakera iriqira vi variara okarava, vivavata maaqaahairo oru viviro, vurura tonavuvano vairaqua oru ntairave.

¹¹ O Kotio, virira naaruvaahira nena impeqa okara vaiinti nahenti numiqaira tavaate. Nena takuqi vai okarara qoqaa qovarama kaira ekaa vataini variaka tavaate.

58

Devitiva maa ihira qara ntuvatora

¹ Ne qjata vaiinti *ko* tiha avuqavuqamakee uva rairake variavo? Ne vaiinti autuara irihae *ko* rairake variavo?

² Kiave, ne nenta avuqavu *ko* tiara kaara vaiinti nahenti ntaihe varia okarava ekaa vataini qovaraipi vairave.

Ne kia avuqavu *ko* tiara kaara vaiinti nahenti ntaihe varia okarava ekaa vataini qovaraipi vairave.

³ Oho, qora kaiqa vare variaka, nái vatataa entaraqaahai koqe aara qaquirake, qora aaraqaa vi variara. Nái nokavara auhaqihai qovaraipi entaraqaahai vika una uva tivaqì ania variara.

⁴ Vika una uvavano vaireva, memaru uhi voqaarama vairo. *Kobra* memaruvano nai qova ti uvvara kia irintemake, vika kia uva iri variara.

⁵ Vira qova koqema kero aanumaara vuaqaivarovata, vi memaruva aato tintatero kia nai qora uva iri vaira. „Vira voqaara vi vaiintika koqe uva ti variara kia iri variara.“

⁶ Kotio, vika qaakau vairi *raioni* voqaara variavo. Are vika aarai nkui kaane. Noravauvo, are vika aarai nkui kairaro vika kempukavano kia variarire.

⁷ Namari qihia kaivaro aahara vataqaa taiqa vintema kera, are qaqi kairamanta vika etaqia vuate. Are qaqi kairaro vika aquek vevava qaqini vitaraarire.

⁸ Ovikaara tatavano aaharauqama vivaro qutu vintema kera, are vika qaqi kairamanta qutu vuate.

Vainti naatiruvano nai nora auhaqi qutu viro kia kuarivata tavaintema kera, are vika qaqi kairamanta vaaka qutu vuate.

⁹ Ihavano namari kia anomia tutoqama kaintema kera, are qora kaiqa vare variaka qaraaka vaiinti vai entara vehi autu taiqa kaane, turo.

¹⁰ Avuqavu ni variaka tavaivaro Kotiva vikagaa muntu keharo qora kaiqa vare variaka qoraiqama nimitaaina entara, vika quahela vikara huvigorave, tivara.

Qora kaiqa vare variaka naare nte vainaraipi avuqavu ni variaka nái aiqu quntama teha hígevara.

¹¹ Vika mintimanta vaiinti nahenti vira taveha mintima tivara: Quqaama, Kotiva avuqavu ni variaka koqe koqaa nimi vaivama vaivo. Vataini variaka uva avuqavu i vai Variqava, quqaama vaivo, tivara.

59

Soruva vaiinti vonavu nititero Devitira naavu ampeqiate tu entara, Devitiva maa ihira qara ntuvatora

(1 Samueri 19:11)

¹ Mpo Kotio, navutaaka kauquqihairi ti ruaruama timitaane. Ti arireka auti variakaqihairi ti antua timitaane.

² Qora kaiqa vare variaka kauquqihairi ti qaqini varakaane. Vaiinti aruke variaka tivata haru kevorave tira, ti ruaruama timitaane, turo.

³ Oho, tavaane. Kia vaiintiara mpo ike tiva nimite variaka, vika vaara vuike ti haru kareka auti variavo.

Kia te ai uva voqavata raqa karaiti, qaqi vauramanta quminama vika ruvaaqumavi ti haru kerara nai tiva ami nai tiva ami i variavo.

⁴ Te kia qora kaiqa voqavata varauramanta, quminama vika qeramate ti harireka auti variavo. Ho vaaka himpira, tuvu ti tavera kahaqiane.

⁵ Mpo Noravauvu, are ekaa kempuka vataavama variaro. Are tinavu Isarerri Variqavano tinavuqaa raqiki variaravama variaro. Are himpira vo vatanaa vo vatanaaka ntaihaane.

Qora vaiinti nái kenauka ntita vare vuru navutaaka kauquqi ke variaka, are kia vika aaqrurahama nimitaane, turo.

⁶ Oho, ti navutaaka vo enta vo enta, entaqi orurante, vairinavu *taunikanta* vi anihā rau rau tiantema keha, vika vi ani variara.

⁷ Vika nái noqihai gora uva ti variara. Vika maaqirivano iqoka paipē voqaara vaiinti qoraiqama nimite vaimanta vika tiha, Kia vovanovata tinavu uva iriharo tinavu qoraiqama timitaanarove, ti variara.

⁸ Noravauvu, vika minti ti variavara, are vika naarahama nimite variaro. Are ekaa minti varia vatanaaka nunurama nimite variaro.

⁹ Kotio, te ai kempukara noraiqaake iriqi virera. Are ti ori onavu koqevama variaro, turo.

¹⁰ Kotira muntukavano tiriara vaivaro viva ani ti kahaqianaro. Viva ti qaqi kairaqe te tenta navutaaka naatarake vora ntuvu nimitarera.

¹¹ Kotio, navutaaka ti vaiinti nahenti qora kaiqa vara nimite variara tauru kevorave tira, are kia vika aaqrurahama nimitaane.

Nena kempukaqohaira vika ntaihairamanta vika aiqu popareta ira hiqintuate.

Mpo Noravauvu, arema tinavu antua timite variaravama variaro.

¹² Ti navutaaka nái noqihai ti varia uvava qora uvaqai vairave.

Oh, vaara vuitaava aantau ravaaqavu kaintema kera, are qaqi kairaro vika una tiha nái mahuta ti vaiva nái ravaaqavu kero qoraiqama nimitaarie.

¹³ Ai arara itairara are vika vehi autu taiqa kairamanta kia qaiqaavata variate. Are mintiramanta ekaa naato vatanaaka are Kotira Isareriqaa koqemakera raqiki vainarara kankomake irivarave.

¹⁴ Oho, ti navutaaka vo enta vo enta, entaqi orurante, vairinavu *taunikanta* vi anihā rau rau tiantema keha, vika vi ani variara.

¹⁵ Vairinavu vo haika aruke nareka vi anihā kia ranta karaiti, qaqi rau rau tiantemake, vikavata qumina vi ani variara.

¹⁶ Vika minti variamanta te ai nora kempukara iriha ihi tivaqi virera. Te toqaqi ai muntukavano tiriara vairara iriha ihi tivaqi virera. Are ti ori onavu koqeva varianarara ti, nora maaranvano tiqaa qovaraiqiraqe te are inanaini oru vuarirara ti antua timitaane.

¹⁷ Are ti kempukaiqama timite variarava varianarara ti, te ai ihi tiva amiteha ai autu tuaheraqi virera.

Are ti antua timite variara Variqava variararo ai muntukavano tiriara vogavata vaivarama variaro.

60

Devitiva maa ihira qara ntuvatora. Viva Siria vatanaaka hampata iqoka raqiharo Mesopotemia vatainivata Soba vatainivata vauvaro Ioaapiva anirantero, oru Hore Uquitaini raqiharo Idoru vatanaaka 12,000 arukora.

(2 Samueri 8:3-13)

¹ Mpo Kotio, ai arara ite vaivara are tinavu qoririma kehara tinavu kempuka rauha kaaramanta tenavu kia navutaaka naatarae kauro.

Mpo, are qaiqaa tinavu kahaqiraqe tenavu qaiqaa kempukaiqamake variare.

² Vaturavano noraiqaakero utiharo vata qaki qaki ivaro qantuura vintema kera, are tinavu Isarerri qoraiqama timitaaro.

Mpo, tinavu koqema timitairaqe kia ntiri ntiri iraiti, qaiqaa ho variare.

³ Mpo, are tinavu nena vaiinti nahentiqaa nora maara vataaramanta vauro.

Uainivano vaiinti vueraiqaa kaivaro vira aiqu popareta intema kera, are tinavu ruqutu kaararo tinavu aiqu kauqu popareta imantama vauro.

⁴ Mpo Kotio, tenavu ai aatu qeteha ni vauraukave. Navutaaka vevavano tinavu haruantorave tira, are nena vutora virini hiritairaqe tenavu vira taveha, mini oru ho variare.

⁵ Tenavu ai muntukavano vaika, ai aaraaina uvvara irihara, nena kempukaqohaira tinavu ruaruama timitaane.

⁶ Mpo Kotio, are nena turuaraini vahara maa uvara tianarave: Te Kotika navutaaka naatarake Sekemi vatukavata, Sukoti Uqitaini vai vataravata, rairake tenta vaiinti nahenti nimirerave.

⁷ Gileativata Manasevata te una vatatantama vaivo.

Efaraimu vatavano vaireva, ti iqoka tovaqa voqaara vaivaro, Iutaa vatavano vaireva, ti avuhainaa kauru voqaara vaivo.

⁸ Moapi vatavano vaireva, te namari tunti vauna tanura voqaara vaivo.

Idomu vatavano vaireva, tenta su rahunkuke aqu kauna vatavama vaivo.

Te Pirisia vatainai vahira vora ntuvuagi virerave, tianarave. Kotio, are minti tianarave.

⁹ Mpo Kotio, tavave ti tivita varairage te vaantaavuravano ututumatai vatukaraqi oru virarave? Tavave ti tivita varairage te oru Idomu vataanaaka naatara kararave?

¹⁰ Ho are mintiataarave. Vate maa entara are kia mintiraitira, tinavu tauvaqa utu timitera, kia tinavu iqoka vaiinti hampata vuaro.

¹¹ Qaqi vaiintivan kahaqiarirava kia ho vairara tira, are tinavu kahaqiraqe tenavu homa navutaaka naatara kararave, turo.

¹² Kotiva tinavu kahaqirera, tenavu homa navutaaka naatara kaariraro viva vikaqaa aiqo ntavaqiro vuanarove.

61

Devitiva maa ihira qara ntuvatora

¹ Kotio, te ariara mpo ike ti kahaqiane ti vauna uvara iriane. ² Ti maaqa niaraini vaivaro ti muntukavano qoraiqimanta te nantie irarave tivakeha ai aare vauro.

Are ti tivita varera verara nora oriqaar vuru kairamanta navutaaka kia ti haruate. ³ Mpo, are ti antua timite variarava variaramanta te are iananaini oru vahira ho vairarave. Ori vaantaavuravano vaiinti mantaaqa amitaintema kera, are ti antua timite variaravama variaro.

⁴ Mpo, are ti qaqi kairage te ekaa enta ai Naavugi variqi vuare.

Kokoraaravano aroka rairakero nai naati mantaaqa nimitaintema kera, are ti antua timitarage ho variare.

⁵ Kotio, te tenta kauqu aiqiqaa aquukeha ariara te minti mintirerave tiva tauna uvara, are vi uvara vi uvara irianarave.

Ai vaiinti nahenti ai autuara noraiqaake iri variakara irihara, are vo haika vo haika vika kaama nimitaanara tivata timianarave.

⁶ Mpo, are ti nena avuhainaa vaiinti qaqi kairage te kia vaaka qutu viraiti, vukaiqamake maa vataraqaa variqi vuare.

⁷ Are qaqi kairage te ai aaqanto vahira ekaa enta vaiinti nahentiqa koqemake raqikiqi vuare.

Are qaqi kairaro ai muntukavano tiriara vairavavata, tiriara noraiqaakera iriqira viravavata, ti antua timitaqiro vi vairage te ho variare.

⁸ Are minti minti irage te ekaa enta ai autu tuaheraqi viha, tenta kauqu aiqiqaa aquke tivatauna uvara avateha, vo *ofaa* vo *ofaa* ai iha quara amitaqi vuare.

62

Devitiva maa ihira qara ntuvatora

¹ Te Kotira veka qihaaqamake vauro.

Vivama ti ruaruuma timite vaivama vairo.

² Vivaqaima ti antua timiteharo navutaaka kauquqihairo ti vara qaqini kuvantu timite vaivama vairo.

Ori vaantaavuravano vaiinti antua amitaintema kero, viva ti antua timite vaimanta navutaaka kia ti aatara kaarave.

³ Ti navutaaka,, ne tairentae qaqrake kia ti harireka anivarave?

Hohaa vaiqatavira venta kaantemake, ne tiriara viva ekaara taiqa vuarire ti, ti hampata raqi variavo.

⁴ Ne te nora autu vataunara vira vatainiqama kareka auti variavo.

Ne quaheha una uva tivaqti vi variarave.

Ne nenta noqihai vaiintiara koqema kera variane tivakeha, nenta aatoqihai vi vaiintiva qoraiqama vuataarave ti variarave, turo.

⁵ Te Kotira veka qihaaqamake vauro. Te vira veka vaiha virara noraiqaake iriqi virerave.

⁶ Vivaqaima ti antua timiteharo navutaaka kauquihairo ti vara qaqlini kuvantu timite vaivama vairo.

Ori vaantaavuravano vaiinti antua amitaintema kero, viva ti antua timite vaimanta navutaaka kia ti aatara kaarave.

⁷ Kotiva vivaqai ti ruaruama timiteharo, nora autuvata ti timirave.

Viva kempukaiqama kero ti antua timite vaimantama vauro. Vaiintivano ori onavuqi mantaaqaviro ho vaintemake, te viva inaini oru vaunara.

⁸ Ti vaiinti nahentivauvo, ne ekaa enta Kotiraqaa muntuvi vaiha virara noraiqaake iriqi vuuate.

Kotiva tinavu antua timite vaiva vairara ti, maaravano niqi vaina entara ne vira tiva amivaro viva ni kahaqiarire.

⁹ Tenavu vaiinti nahenti vairera, noqihairo aiho uritaraira voqaarama vauro.

Nora vaiintive, vehi vaiintive, tenavu ekaa qumina haika voqaarama vauro.

Vovano tinavu maara sikeriqa hirikero tavairera, tinavu maaravano kiama varianaro.

¹⁰ Vaiinti ruqutihira vira airaira vare varia okarara qora okarave tivakera kia vira autuane. Vo haika varareva ihara kia muara autukera vi haikara varaane.

Are airi airaira vatairera, kia vi haikaraqaa muntuvi variane.

¹¹ Kotiva kia vohaa tataa maa uvvara tiraitiro, viva qaiqaavata mintima tiro: Te kempukavano vauraro ¹²ti muntukavano vaiinti nahentiara vaimantama vauro, ti vaira.

Noravano Kotiva ekaa vaiinti nahenti kaiqara iriharo nái koqaa nimi vaivama vaivo, turo.

63

Devitiva maa ihira qara ntuvatora

¹ Mpo Kotio, are ti Variqavanoma variaro. Te ai vataake vairerave tivakehama ai rante vauro.

Ti maraquravano ariara voqama kero hantuqa harimantama vauro.

Vaiintivano aahara vatainai, kia namarivata vainaini niharo namari naataa ivaro vaintemake, te ai tavaataa imantama vauro.

² Mpo, are ti qaqi kairaqe te ai Naavuqi turuaraini vaiha ai mpeqa okaravano takuqi vainara ho tavaare.

³ Te tenta qaqi variqi vuainarara kia noraiqaake iriraiti, ai muntukavano tiriara vaira virara te noraiqaake iriqi virerave.

Te mintimake iriqi viha ai autu tuaheraqi virerave.

⁴ Te maa vataraqaa qaqi variqi vuaina entara ariara koqeve tivaqiqi virera.

Te tenta kauqu tuaherakeha, ai aararerave.

⁵ Vaiintivano koqe kara nero ho vaintemakero, ti maraquravano quahe vairaqe te ihi tiha ai autu tuaheraqi virera.

⁶ Te tenta vaite vauna taintaraqaa vaiha, ariara kia tauru karaiti, qaqi iriqi vi vaunara.

Enta tavaarave, kokoraaravano uva tiraqaave, te ariara iriqi vi vaunara.

⁷ Are ti kahaqama timite variarava varianarara ti, kokoraara naativano nai nora arokaqi vaintemake, te ai aaqanto vaiha, ai quahe amitaaina ihira tivaqiqi virera.

⁸ Te ai aaqanto vauraro ai kauqu tanaravano ti tuataimanta vaunarave.

⁹ Oho, ti haru kareka auti variaka, vika vehiqamavi, qutu vuaka varianaini otu vaivara.

¹⁰ Iqoka paipevano vika aru kairamanta qaakau vairivano vika vaata neverave, turo.

¹¹ O Kotio, are ti avuhainaa vaiinti kahaqiqi variaramanta te navutaaka naatarake vaunarara ti, te quaheha variqi virerave.

Vika nái aiiqiqaa kauqu aquukeha ai avataqi virerave ti variaka, vika ai autu tuaheraqi vivarave.

Una uva ti variaka, naantiara are vika no tinta kairamanta vika kia ho uva tivarave.

64

Devitiva maa ihira qara ntuvatora

¹ Kotio, nora maaravano tiqi vaimanta vauro. Mpo, te ai aaraaina uvvara iriane.

Te navutaaka aatu qetehama vauro. Are ti antua timitairaqe te qaqi variare.

² Qora kaiqa vare variaka ruvaaqumavi vaiha ti haruke aarara rante variakaqihaira are ti kukeqa timitaane.

³ Vika maaqirivan iqoka paipere vaihairs voqaara vaivar, vevavano vaiinti arukain-temake, vika qora uvaqohai vaiinti qoraiqama nimite variara.

⁴ Vika vaara autute variaraqihai kia qetaraiti, quminq vaiinti kia qora kaiqa vare variaka vaaka ntauhe variara.

⁵ Vika qora kaiqa varareka iha, nariara vihi vaahi tiha, Kaiqe vaiintivano kia tavenaini vuru vaara vui taare, ti variara.

⁶ Vika qora kaiqa varareka auti vaiha tiha, Kaiqenavu qora kaiqa vo autuariraro kia vovanovata tinavuara vi kaiqara varaavo tianarove, ti variara.

Vika minti t variavarovata, Kotiva vaiinti avu aatoqi kankoma kero iri tave vaiva, viva vika qora kaiqa tave vairave, turo.

⁷ Kotiva kia vikara rauruate tiraitiro, viva vaakama nai vevaqohairo vika ntaihaanaro.

⁸ Kotiva qaqi kairaro vika qora uva ti vaiva nai qoraiqama nimitero vehi autu kaarire.

Vika taiqa vimanta ekaa vaiinti nahenti vika taveha, nai qjata runkinkiri iha vikara huviqorave tivara.

⁹ Vi entara ekaa vatainai vaika Kotira aatu qeteha viva varai kaiqara viti viri tiva nimiqi viha, virar nai aatoqi iriqi vivarave.

¹⁰ Kairamanta avuqavu ni variaka Nora Kotira kaiqara iriha quahaqi viha, viva inaini oru vivaro viva vika antua nimitaare.

Kairamanta ekaa avuqavu kaiqa vare variaka Kotira autu tuahera kaate.

65

Devitiva maa ihira qara ntuvatora

¹ Kotio, tenavu Saionini oru vaiha tentanavu kauqu aiqiqaa aquke tiva tauna uvarara iriha, ai autu tuahera karerave.

² Are tenavu ai aare vauna uvvara iri varianarara ti, ekaa vaiinti nahenti are iananaini oru vivarave.

³ Tenavu ai uva raqa kaunara kaara tinavu muntukavano qoraiqimanta vauraravata, are tinavu uva nunka timitaanaro.

⁴ Are nena kaama taana vaiinti nahentika quaheha vaivara. Vika ai Naavu takuqi vairaqi quaheha variqi vivara.

Tenavu ai Naavu takuqi vairaqi oru variariraro are tinavu koqema timitera haikava tinavu muntuka paruma timitaanaro.

⁵ Kotio, are ti ruaruama timite variaravama variaro.

Tenavu ai aare vauna uvvara irihara, are tinavu nora kaiqa, vo kaiqa vo kaiqa vara timitaanaro taveha voqamake kauqu runkinkiri i vaunara.

Ekaa maa vataraqaa variakave, nora namari hini mantaraini variakave, vika ariara noraiqaake iriqi vivera, vika koqemake vaivara.

⁶ Ai kempukavano uri aatarakero vairara tira, are nena kempukaqohaira ekaa aiqina nai vatuka nai vatukaqaa variate tira arataanara.

⁷ Nora namarivano noraiqaakero avua nte vaivara are vira qioqama kaararo kia qiaqavata avua ntaira.

Vo vatanaka vo vatanaka naveraitiha iqoka raqi variavara are vika qioqama kaaramanta vika evaara variara.

⁸ Niaraini variakavata are nora kaiqa, vo kaiqa vo kaiqa vare varianara taveha, voqamake qeteha variara.

Kuari urinaini variakave, kuari ruhunkinaini variakave, vika vika are nora kaiqa vare varianara taveha, ihi tivaqj viha ai quahama amite variara.

⁹ Are maa vataraqaa koqema kera raqikhara aagu varake variararo vatavano koqe iro vaivaro karavanovata koqema kero qampiqe vaira.

Are namari tuvinaini mpinqake vataararo namarivano koqemakero tuvi vaira. Are vata koqemakera vataararo viraqihairo vo kara vo karavano koqema kero qampiqe vaira.

¹⁰ Are aagu koqemake varake variararo aqvavano vata korataara putama kaivaro vatavano uqera vivaro karavano qampiqe vaira.

¹¹ Are mintima kehara vata vira koqemake variaramanta vaiinti nahenti vata viraqaa-hai airi kara qantuke vare variara.

Are vi ani variana vataraqaaahairo koqe karavano qampiye vaira.

¹² Qumina vataini koqe ukau qampiye vaimanta purumakauve sipisipive mini mpiqavi variara.

Aiqinaini koqe naaho vo naaho vo naahovano vaimanta vaiinti nahenti quaheha variara.

¹³ Ukau vainaini airi sipisipive, memeraave vi aniba ukau ne variamanta uqitaini *uiti* ututavaaro koqema kero qampiqeharo vi vatara mpiye vaimanta vaiinti nahenti quaheha ihi tivaqi vi variara.

66

¹ Qaqi kairamanta ekaa vataini variaka quaheha naverai tiha Kotira autu tuaheraqi vuate.

² Ne vira nora autuara irihama ihi tivaqi vuate. Vira autuvano nora autuma vaivo tivaqi vuate.

³ Ne Kotirara tiha, Are nora kaiqa vo kaiqa vo kaiqa vare varianara taveha, tenavu kauqu runkinkiri iha vauro.

Ai kempukavano uri aatarakero vaimantara ti, ai navutaaka ai aatu qeteha ai avucaa vevu vevu iha variavo.

⁴ Mpo, ekaa vataini variaka ai ayuqaa kankakaamavi vaiha, ai ihi tiva amite variara. Vika ai nora autuara iriha, ihi tivaqi vi variara.

⁵ Ho aniqenavu Kotiva nora kaiqa varainara tavaare. Viva tinavu vaiinti nahentiara iriharo nora kaiqa, vo kaiqa vo kaiqa vara timitaira taveha, tenavu kauqu runkinkiri i vauro.

⁶ Viva tinavu kaivaqaukavara nora namari aaharaiqama nimitaimanta vika aahara vatavau taqa vare hini mantaraini vuarave.

Kaiqenavu virara irihama tenavu quahaqi viha, vira quahama amitaare.

⁷ Viva nai kempukaqohairo ekaa enta naato vatanakaqaa raqiki vairo.

Viva vika aitutumakero tave vaimanta variarara ti, hauri vika kia vira vevaaraini vairaiti, vira hampata raqivora.

⁸ Ne ekaa naato vatanakaani tinavu Variqa autu tuahera keha, vi uvvara naverai ti vaimanta ekaa iriate.

⁹ Viva tinavu antua timite vaimanta tenavu kia qutu viraiti, qaqi variqi vi vaunara. Viva kia tinavu qaqira kaimanta tenavu kaavunti qoraiqama vunara.

¹⁰ O Kotio, are tenavu autuna okarara avatama kera tavaanara.

Vaiintivano *silvaa* ori ihaqohairo untakero hiqama kaintema kera, are tinavu Isareri avatama kehara tavaanara.

¹¹ Are qaqi kaaramanta vo vatanakaani tinavu Isareri ravaaqavuke nora maara tinavuqaa vataaramanta tenavu vira aqu vare vaunara.

¹² Are qaqi kaaramanta navutaaka iqoka raqiba tinavu qiata rukavu kaarave.

Mpo, ihavanove, huvuravanove, vaiinti qoraiqama nimite vaintema kero, vo maara vo maaravano tinavu qoraiqama timite vaimanta vaunara.

Mintivara viraqaaahairo are tinavu „Isareri“ tivita varera vuru koqe vataini kaanarara ti, vate maa entara tenavu kia vo haikara aavoirqairaiti, koqemake vaunara.

¹³⁻¹⁴ Ho nora maaravano tigi vai entara te tenta kauqu ainqiqaa aqukeha tuna uvvara iriha, te vo *ofaa* vo *ofaa* vare vuru ai Naavuni ekaara kaintu iha quara amitaaina *ofaara* ai autu amitarerave.

¹⁵ Te *ofaa* ai iha quara amiteha, sipisipi qora koqenavuvata, purumakau qora vonavu-vata, memeraae vonavuvata, ai iha quara amitarerave, turo.

¹⁶ Ne Kotira aatu qeteha vira autu tuahere variaka, ne ani ti uva iri vaiqe te viva vo kaiqa vo kaiqa vara timitairara ni tiva nimiare.

¹⁷ Te Nora Kotira tenta noqihai aaururaro „viva ti uva irirara ti,“ te tenta maaqiriqohai vira autu tuahera kauro.

¹⁸ Vi entara tenta qora kaiqa varaunarara kia nora haikave turaitirio, Noravano Kotiva kiama ti uva iritirio.

¹⁹ Ho Kotiva te vira aarauna uvvara iriro, ti kahaqama timitaira.

²⁰ Ho kaiqenavu Kotira autu tuaheraqi vuare.

Viva te vira aarauna uvvara kia qoririma karaitiro, ti uva iriharo vira muntukavano tiriara vaira kia qaqlira kairarama turo.

67

¹ Mpo Kotio, tinavu aaqurihama timitehara koqema timitaane.

Are qoqe viri vatehara tinavu quahama timitaane.

² Are tinavu Isarerri mintimakera koqema timitairamanta, ekaa naato vatanaaka ai koqe okara kankomake tave, are vaiinti nahenti ruaruuma nimite vaina okararavata kankomake tavaate.

³ Kotio, are qaqlira kairamanta vo vatanaa vo vatanaaka ai autuqai tuaheraqi vuote.

Are qaqlira kairamanta ekaa naato vatanaaka ai autuqai tuaheraqi vuote.

⁴ Are avuqavuqama kera vo vatanaa vo vatanaakaqa raqikihara koqe aaraqai vika numiqe variarvara tira, are qaqlira kairamanta vika quaheha ihi tivaqi vuote.

⁵ Kotio, are qaqlira kairamanta vo vatanaa vo vatanaaka ai autuqai tuaheraqi vuote.

Are qaqlira kairamanta ekaa naato vatanaaka ai autuqai tuaheraqi vuote, turo.

⁶ Kotiva tinavu Variqavano tinavu koqema timite vaivarora tiro, tinavu vataqihairo koqe kara qampiqaimanta tenavu airi kara qantuke vare vaunara.

⁷ Mpo, Kotiva tinavu koqema timitaqi vuarire.

Mpo, ekaa naato vatanaaka Kotira autuqai qeteha variqi vuote.

68

Devitiva maa ihira qara ntuvatora

¹ Mpo Kotio, himpira nena navutaaka ntaihehara vika raumpirima kaane.

Ai navutaiqi varia vaiintika, are vika ntaihairamanta vika qetake kantama vuote.

² Uvavano iha mura raumpirima kaintema kera, are vika vona vona raumpirima kaane.

Are vika ruqutu kairamanta vika ai avuqaa vahavera *taakamavira/ kaakamavira* ihavano ravita kaintemake, taiqa vuote.

³ Are mintiharama avuqavu ni varia vaiinti nahentika qaqlira kairamanta vika ai avuqaa vaiha quaheha variate. Are vika qaqlira kairamanta vika nái muntukaqihai quaheha variqi vuote.

⁴ Kaiqenavu ihi tiha Kotira autu tuaheraqi vuare.

Tonavuqaa oquiviro vaharo vi ani vaira, virara irihama ne ihi tivaqi vuote. Vira autu Nora Kotirave. Kaiqenavu vira avuqaa vaiha quaheha variqi vuare.

⁵ Kotiva nai turuaraini vaharo koqema kero *iqa/viqa* vaintiqa raqiki vaimanta vika ho variara.

Viva tentoqa nahenti kahaqi vaimanta vika *ko* ho aatarake variara.

⁶ Kia tontivanovata vai vaiintiva vaivaro Kotiva vira qaqlira kaivaro viva koqe vaiinti nahenti ranta kaimanta vika viraqaa koqemake raqiki variarave.

Viva karapuhiqi variaka kuvantuke vaimanta vika quaheha ihi tivaqi viha karapuhiqi-hai vevantape vi variarave.

Vira qoririma kaaka viva nititama kairamanta vika kuarivano tatoqe vai vataraqaa oru variqi vivarave.

⁷ O Kotio, haaru are nena vaiinti nahenti *Isipihairo*, ntita varera, vika avuni aahara vataini vi variararo ⁸naaruvalihairo aequ hiqinti hiqinti i vairave.

Vi entara are Isarerri Variqavano Sainai Aiqlinaqaa tuvu variararo vatavano qaki qaki i vairave.

⁹ Are nena vaiinti nahenti kaama nimitaana vatara qaiqaa koqema vuarire tira, aequ varakaararo ntirave.

¹⁰ Ai vaiinti nahenti vi vataraqaa vaireka, oru mini variavara are koqe Variqavano vaharara tira, are vehi vaiinti nahentiqaavata koqema kera raqikiqira vi variaramanta vika kia vo haikara aavociarave.

¹¹ Ho Noravano Kotiva timanta tinavu navutaaka qetake kantama vuamanta nahenti-navu vi uvvara vare vuru vaiinti nahenti tiva nimi ihi, ¹² Navutaaka nái avuhainaa vaiintinavu hampata qetake kantama vuavo. Vika ekaa vuamanta nahenti vonavu vika ke vua airairara rairake vare variavo, tiara. (1 Sam 18:6)

¹³ Vehi nahenti vinavuka sipisipi naavu avutaqai variaka *silvaa* orive, *kori* orive, varake viraqohai nái vaata *vaahemavaataiqama* teha variara.

Mirura arokavano nai vaata naavuma taintemake, vika vi haikara varakeha nái vaata *vaahemavaataiqama* taavarō takuqiharo vaira. (Ves 13 Hiparu uva kia kankoma kero vairo.)

¹⁴ Kotiva ekaa kempuka vataava *taaruvano/kaampuravano* Salamoni Aiqinaqaa ntintema kero, avuhainauka vonavu raumpirima kaimanta qetake vuara.

¹⁵ Basaani Aiqinavano nai nora ainqinavano vaivaro vi ainqinaraqaa airi onkaivano vaira.

¹⁶ Basaani Aiqinao, are airi onkai vataava vahara nantiharae are Saioni Aiqina tavehara tihara, Tevata vi ainqinara voqaara variataarave, tiaro?

Noravano Kotiva nai Saioni Aiqina vira kaama tero tihara, Te vi ainqinaraqaa ekaa enta variqi virerave, tirave.

¹⁷ Noravano Kotiva Sainai Aiqina mini kero „Saionini“ nai naavuqjara vi vaimanta vira iqoka vaiinti nai airitahaa nái iqoka *kaariq* vaiha vira ututumate vira hampata oru vi variavaro viva nai naavuqi turuaraini oru vaira.

¹⁸ Are verara kantaqaqini vihara, airitahaa rumpataaka ntita varaaramanta vika ai hampata vuara. (Epasaasi 4:8)

Are mini vuaramanta ai qoririmake variaka, vika „ai aatu qeteha“, vo haika vo haika ai ami variara.

Noravano Kotiva Saionini „tinavu hampata“ variqiro vuanaro.

¹⁹ Kaiqenavu Noravano Kotiva tinavu ruaruama timite vaira vira autu tuaheraqi vuare. Viva vo enta vo enta tinavu maara qaqini varakeharo naiqaa aqu vare vairave.

²⁰ Tinavu Variqavano viva tinavu ruaruama timite vai Variqavama vaivo.

Noravano Kotiva ekaa haikaqaa raqiki vaiva, viva tinavu kahaqi vaimanta tenavu kia qukitaiti, qaqi variqi vi vaunara.

²¹ Vira navutaaka qora kaiqa kia qaqlira karaiti, qaqlqai vare variaka Kotiva ququaama vika qiata rukavuma kaanaro.

²² Noravano Kotiva tihara, Te ni navutaaka Basaanihaive, nora namari vevaihaive, ntita vare vuru ne vainaini kaari ²³ ne vika naareqi nenta aiqo quntama taimanta ni vairi vika naare nevarave.

²⁴ Tinavu Avuhainaao, Kotio, vaiinti nahenti tavaavara, are navutaaka naatara kaarava airi vaiinti ntita varera vika avuni vora ntuvajira vihara nena Naavuqira oru vuanarave.

²⁵ Ihi ti variaka avuni oru vuamanta vika naantiaraini *musiki* ruquti variaka oru vuamanta vika avutana varaaatanavu *tamparini* rintatimaqi vuarave.

²⁶ Ne airi vaiinti nahenti ruvaaquamivi variaka, ne Kotira autu tuahera kaate.

Ne ekaa Isareri Nora Kotira autu tuahera kaate.

²⁷ Tavaate. Benaminira anku inaara ankuvano avuni vi variamanta vika naantiara Iutaara ankuqihai qiata vaiinti airitahaa vi variamanta, vika naantiara Sebulunika Napataarika ankuqihai vika qiata vaiintivata vi variara.

²⁸ O Kotio, nena kempuka okara vaiinti nahenti numiqairamanta vika tavaate.

Are haaru autuanantem kera qaiqaavata nena kempukaqohairi tinavu kahaqiramanta ²⁹ vo vatanaa vo vatanaa avuhainaaka ai aatu qeteha vo koqaa vo koqaa vare vuru Ieruharemini ai naavuqi kaate.

³⁰ Qaakau aantau vovano* kiara noruvaqi vaira, are vira atiane.

Qaakau purumakau qoranavu nái naati hampata variaka, are vi vatanaakavata nitiane. Are vika nitiramanta vika ai aatu qeteha tori kauru aravi vaiha airi *silvaa* ori ai vuru amiate.

Quaheha iqoka raqii varia vatanaaka, are vika vika ntaihehara raumpirima kaira vi anima vuate.

³¹ Naantiara Isipi avuhainaava nititaika Ieruharemini anivarave. Itiopia vatanaaka Kotira vevaaraini vaireka, vika nái kauqu tuaherakeha vira aarevarave.

³² Ho ekaa naato vatanaaka, ne Kotirara iriha ihi tivaqi vuate.

Ne Nora Kotira autu tuaheraqi vuate.

³³ Haaru naaruva autukero vataiva viva tonavuqaa oquiviro vaharo vi ani vai Variqara, ne virara ihi tivaqi vuate.

* 68:30: Uva tuqantaakero Isipi tiro.

Naaruvavano uva tintema kero, uva ti vai Variqarara irihama ³⁴ ne vaiinti nahenti tiva nimi tiha, Vira kempukavano uritarakero vairave, tiate. Viva tinavu Isareri Avuhainaavama vaivo. Tenavu naaruvaini vira mpeqa okara tave vaunarave.

³⁵ Mpo Kotio, are nena turuaraini variaramanta tenavu ai aatu voqamake qeteha vauro.

Isareri Variqavano tinavu nai vaiinti nahenti kempukaiqama timite vaimanta tenavu ho vaunara.

Kaiqenavu Kotira autu tuaheraqi vuare.

69

Devitiva maa ihira qara ntuvatora.

¹ Mpo Kotio, ti ruaruama timitaane.

Namarivano ti vara nampiqama kareva auntana uru vaimantama vauro.

² Te kapoqi rupeqavi vauraro ti aiquvano kempuka vataqaa ntava taairava kia vaivo.

Mpo, te varuvaqi vauraro huvuravano ti nampiqama kareva auti vaimanta vauro.

³ Mpo, te airi tataa naverai tiha, Ti kahaqiane ti vauraro ti kempuka taiqa vivaro huntavanovata aaharaiqimantama vauro.

Te ai viriara qumina aitutumaqi vuraro ti avuantaisha itaivo.

⁴ Mpo, ti qumina navutaiqi variaka airithaa variavo. Ti qiata kauhi airithaa vaira viravata aafarake nai airithaa variavo.

Ti navutaaka tiqaa uva vateva kia vaimanta, qumina ti vehi autu kareka auti variavo. Te kia vika ia haikara vo haikavata muara varauramanta, vika qumina kempukaiqamake tiha, Vi haikara tintanavu timiane ti variara.

⁵ Mpo Kotio, te ai uva, vo uva vo uva raqa kaunara, are kankoma kera iri tavaanarara ti, kia te vi uvara ho kukeqa kararave.

⁶ Are Noravano Kotiva ekaa kempuka vataavama variaro. Hauri ti qora okara kaara ariara noraiqaake iri variaka kaurira haika varevorave.

Mpo, are tinavu Isareri Variqavanoma variaro.

Hauri ti qora okara kaara ai rantareka auti variaka toqaavu ntaihaantorave.

⁷ Te ariarao ti, qaqi kauramanta ti navutaiqi variaka ti naarahama timiteha tiriara qora uva ti variara. Vika mintiavaro ti voqamakero toqaavu harimanta vauro.

⁸ Te vo vatanaaka voqaara, tenta qata vakaukavara nivutaini vauro.

Ti nora maaqunavu, vo vataihainaara nunura amitaantemake, ti nunurama timite variara.

⁹ Mpo, ai Naavuara ti voqama kero hantuqa harimanta vaurava, ihavano itaintema kero, tiqi vaivo. (Ioni 2:17)

Ai Naavuara noraiqaake iriqi vi vaunara kaara vokiaka ariara qora uva ti variava tivata qoraiqama timite valvo.

¹⁰ Mpo, te iqj rataqi viha karavata aurumate vauramanta, vika tiriara qora uva qaqqiqai tivaqi vi variara.

¹¹ Te kovaara utavaaqavata nonkute vauramanta, vika qaqqiqai ti naarahama timite variara.

¹² Vaantaavura qentiana ruvaaqumavi variaka, vika ti tauvaqa vaura uva ti variara.

Uaini neha vueraiqi variaka, vika ti naarahama timiteha vo ihi vo ihi tiriara ti variara.

¹³ Vika mintiaveravata, te ai aareha tiha, Noravauvo, are nena kaama tena entaraqaa ti uva irihara ti kahaqama timitaane.

Kotio, ai muntukavano tiriara voqama kero vairara irihara, vo tivakera ti ruaruama timitaane.

¹⁴ Mpo, te kapoqi rupeqva vunaraqihaira ti ruaruama timitaane. Kia ti qaqi kairaqe te ekaara viraqi rupeqva vuare.

Ti navutaiqi variaka kauquqihaira ti qaqqini vara kaane. Varuva namariqihaira ti qaqqini vara kairaqe ho variare.

¹⁵ Mpo, kia qaqi kairaro huvura namarivano ekaara ti aqu ravaaqavu kaarire.

Kia qaqi kairaro varuva namarivano ti nampiqama kaarire.

Kia qaqi kairaro hiqainti novano ti ekaara tinta kaarire.

¹⁶ Noravauvo, ai muntukavano tiriara enena vairara irihara, vo tivakera ti uva iriane. Tuqantaavira ti aqqruihama timitaane.

¹⁷ Mpo, te ai kaiqa vaiinti vaurara kia kukeqavira variane. Nora maaravano tiqi vaimanta vaunarara tira, vaaka vo tivakera ti kahaqama timitaane.

¹⁸ Te unanaini anintera ti ruaruama timitaane. Ti navutaaka kauquqihairaqaqini vara kairaqe te ho variare.

¹⁹ Ti navutaaka qora uva tiriara ti variarave, ti naarahama timite variarave, vika ti hutu vatainiquamake variarave, are ekaa virara virara irira tavaanarave.

²⁰ Mpo, vika ti naarahama timiteha tiriara qora uva tiava, ti muntuka qoraiqama kaivaroti vai maarava ti kempuka taiqama kaivo.

Vaiinti vonavu ti aaqurihama timitevarave, turaro, kia voqavanovata mintivo. Vokiaka ti muntuka kukuqama timitevarave turaro, kia voqavanovata mintivo.

²¹ Ti karara hantuqa harimanta vauramanta vika hunkavi karara ti timiavo.

Ti namari naataa imanta vauramanta vika hunka vi *uainira* ti timiavo.

²² Oho, vika ruvaaqumavi kara ne vaivaro vi karava vika qoraiqama kairaqe te vikara huviqorave tiataarave.

Are vika ntaihaira kaavuntiqe te vikara huviqorave tiataarave.

²³ Are kairaro vika nivu qimpa viramanta vika kia ho qaiqaavata tavaate.

Are kairamanta vika kia koqemake himpi viraiti, varuvaramaqi vuate.

²⁴ Are nena arara ite vaina okarara vika numiqaae. Kairaro ai arara ite vairava ntaihairamanta qoraiqama vuate.

²⁵ Are vika naavu maaqa vehi autu kairaro kia vovanovata ho viraqi variarire. Ekaa aru kairaro kia vovanovata *seri* naavu kaqataaraqi qaqi variarire.

²⁶ Are ntaihaana vaiintika, vika vikavata ntataqi viha qoraiqama nimite variamo.

Are teqa taaqama kaana vaiintika, vika vi vaiintikavata voqavata qoraiqama nimite vauramanta vika voqavata aihavira haika varaaavo.

²⁷ Kia vika qora kaiqa varaara tauru karaitira, vikaqaa vo uva vo uva vataane. Kia vika kuvantu nimitaane.

²⁸ Qaqi variqi vi vaika nutu vukuqi qara ntuva taanaraqihairaqaqini vika nutu nunka kaane. Hauri vika nutuvano avuqavu ni vaika nutu vataakero vi vukuraqi variantorave.

²⁹ Ti navutaaka ti qoraiqama timite variavera te nora maaraqi vauraro aiha vimantama vauro. Mpo Kotio, ti ruaruama timitera, ti antua timitaane.

³⁰ Kotiva mintirage te ihi tivaqi viha vira autu tuahereha virara koqeve tivaqi vuariraro vira autuvano noraiqama vuarire.

³¹ Purumakau qoravano noruqama vira aruke Kotira iha quara amiterara Kotiva kia vi *ofaarara* noraiqaakero iriraitiro, viva te mintimake Kotirara koqeve tiainarara noraiqaakero iriharao quaahanaro.

³² Nora maaraqi variaka tavaivarao Kotiva ti ruaruama timitaira vikavata quaheha vaivara. Kotira rantareka auti variaka, vikavata qaiqaa kempukaiqamavi ho variqi vivara.

³³ Vo haika vo haikara aavoqiaka vira aare variavaro Noravano Kotiva vika uva iri vairave.

Vira vaiinti nahenti rumpataaka, viva kia nunurama nimitaanaro.

³⁴ Ho kairamanta naaruvaini variakavata, maa vataraqaa variakavata, nora namariqi vi ani variakavata, ekaa vika Kotira autu tuaheraqi vuate.

³⁵ Kotiva Saioni vatukaqi varia vaiinti nahentika ruaruama nimitalira vika ho variate.

Viva Iutaa vataini vo vatuka vo vatuka qaiqaa autu nimitalira vaiinti nahenti qaiqaa oru vi vatukaraqi vaiha tiha, Maa tinavu vatama vaivo, tivarave.

³⁶ Kotira kaiqa vaiinti nahenti minti tivake vaimanta vika vaintivaravata vi vatarara tinavu vatama vaivo tivakeha mini vaivara.

Kotirara muntuka vaika vi vataraaqaa variqi vivarave.

70

Devitiva maa ihira qara ntuvatora

¹ Mpo Noravauvo, vaakama tuvu ti kahaqiane. Mpo Kotio, kia varikera ti ruaruama timitaane.

² Ti haru kareka auti variaka, are vika hampata iqoka raquqira vihara vika naatarakera kaurira haika nimiramanta hampiqama vuate.

Te nora maaraqi vaunarara iriha quahe variaka, are vika ruqutu kairamanta vika tiqaahai anirante vivaro vika autuvanovata vataini tuvi vuarire.

³ Vika ti naaraihamma timiteha huviqorave ti variaka, are vika qoraiqama nimitaira vika kaurira qaqrake vuate.

⁴ Noravauvu, ai rante variaka are qaqi kairamanta vika ai aaqanto oru vaiha muntuka paru i vaira quaheha variate.

Ariara viva ti kahaqiharo ruaruama timite vaivama vaivo ti variaka, are vika qaqi kairamanta vika ariara tiha, Kotiva nai Noravanoma vaivo, tivaqi vuate.

⁵ Noravauvu, ququaama te vehi vaiinti vaiha kia te tenta ho kahaqiarirava vaimantama vauro.

Mpo Kotio, vaakama tuvu ti kahaqiane.

Areqaima ti kahaqihara ruaruama timite variaravama variaro. Noravauvu, kia varikera tuvuanerama turo.

71

¹ Noravauvu, vokiaka ti qoraiqama timitevorave ti, te are iananaini anuro.

Mpo, kia ti navutaaka qaqi kairamanta vika kaurira haika ti timiate.

² Are avuqavuqama kera kaiqa vare variaravara tira, ti ruaruama timitaane.

Mpo, nena aato ti timira ti uva irihara, vaaka ti ruaruama timitaane.

³ Vaiintivano ori onavuqi kukeqareva oru vaintema kera, are ti qaqi kairaqe te are variananaini oru vaiha ho variare.

Arema ti ori onavu koqeva variaro.

Arema ti kempuka vaantaavura variaro.

Are mintima variaravara tira, are ti kahaqina uvvara tiraqe te ho variare.

⁴ Mpo, ti Variqavauvo, qora vaiinti kauquqihira ti ruaruama timitaane.

Qora kaiqa vareha voqamake nái kena vaiinti qoraiqama nimite variaka tivata ravaaqavu kevorave.

⁵ Noravauvu, are ekaa haikaqaa raqiki variaravama variaro.

Te qaraaka vaiinti vaunaraqaahai ariara viva ti kahaqiariravave tivakeha, ariaraqai noraiqake iriqi anima naampaiqama vuro.

⁶ Ti vatatai entaraqaahai te ariqaa muntuvi variqi anunarave.

Te tenta nora auhaqi vauna entaraqaahira are tiqaa koqemakera raqikiqira anianarara ti, te ekaa enta ai autu tuaheraqi virerave.

⁷ Are tiqaa koqema kera raqikhara ti kempukaiqama kera antua timite varianarara ti, airi vaiinti nahenti are ti kaiqa vara timitaanara taveha kauqu runkinkiri i variara.

⁸ Te aatitainaraqaavata entaqivata ai autu tuaheraqi viha ai takuqi vaina okarara vaiinti nahenti tiva nimiqi virerave.

⁹ Mpo, te naampaiqama vuro. Kia ti qorrima kaane. Ti kempukavano taiqa vimanta vauro. Kia ti tauvaqa utu timitaane.

¹⁰ Ti navutaaka ti haruke uvvara nai tiva ami nai tiva ami i variavo. Ti haru kareka auti variaka, vika ruvaaqumavi vaiha uva tiva taatauke vataavo.

¹¹ Vika tiha, Kotiva vira qorrima kaivaro vira ruaruama amitaarirava vovano kiama vaivo. Ho kaiqenavu vira avataqi viha vira ravaaqavu kaare, ti variarave.

¹² Mpo Kotio, kia ti qaqrakeria niaraini variane. Mpo, ti Variqavauvo, vaaka tuvu ti kahaqiane.

¹³ Oho, qumina tiqaa oqike una uva ti variaka qaqi kairava vika vehi autuvi taiqa vuate.

Ti qoraiqama timitateka auti variaka, are qaqi kairava vika kaurira haika varaivaro vika autuvano vataini tuvi vuarire.

¹⁴ Ho te ai veka vaiha ariara noraiqaake iriqi viha, ai autu qaqaa qaiqaavata tuaheraqi virerave.

¹⁵ Te tenta noqihai are avuqavu kaiqa vara timitaanarave, nena kempukaqharia ti ruaruama timitaanarave, te virara virara aatitainaraqaavata entaqivata vaiinti nahenti tiva nimiqi virerave.

Mpo, are arii tataa ti kahaqianarara ti, te virara vika tiva nimiqi vivi, kia ho vi uvvara tiva vuru taiqa kararave.

¹⁶ Noravauvu, are ti Variqavano ekaa kempuka vataavama variaro.

Are nena kempukaqohaira nora kaiqa, vo kaiqa vo kaiqa varenarara te vika tiva nimi tihā, Noravano Kotiva vivaqaima avuqavu vaivama vaivo, tirera.

¹⁷ Kotio, te qaraaka vaiinti vauna entaraqaahaira are nena koqe okara ti humiqaqira vihara, vate maa entaravata are ti koqema timitaanarara te qaqiqai vaiinti nahenti tiva nimiqi vi vauro.

¹⁸ Mpo Kotio, te naampaiqama vi, erera kauki vataaka vaurara, kia ti qaqira kaane.

Are tintira vairamanta naantiara kuvuarama tekavata qovarama viqe te ekaa vikavata ai kempuka okarara tiva nimiare.

¹⁹ Are avuqavuqama kera raqiki variana okarava nai uri aatarakero naaruvaini vairave.

Ike, are nora kaiqa, vo kaiqa vo kaiqa vare variarava nai noraiqama kero vairave.

Mpo Kotio, tavave ai voqaara vaivo? „Kiama voqavanovata vaivo.“

²⁰ Are tiqaa nora maara, vo maara vo maara vateharavata, naantiara ti qaiqaa koqema timitehara ti kempukaiqama timitenarave.

Te inaaraqakaaqutu vuaka varianaini virera uraravata, are ti qaiqaa kahaqama timitairaqe kia te qutu vuare.

²¹ Vi entara are qaiqaa ti nora autu timihara ti muntuka kukuqama timitenarave.

²² Ti Variqavaauvo, are kia ti qaqira karaitira, tiriara noraiqaakera iriqira vi varianarara ti, te kitaa ruqutiha ai autu tuahera karerave.

Are takuqukera variara Variqava tinavu Isareriqaa raqiki varianarara ti, te musiki ruqutiha ai autu tuaheraqvi virerave.

²³ Te quaheha naverai tiha ai autu tuaheraqvi virerave.

Are ti kuvantu timitaanarara ti, te tenta avu aato muntukaqihai quaheha, ai autu tuaheraqvi virerave.

²⁴ Ti qoraiqama timitareka auti variaka, are vika naatara kaaramanta vika kaurira haika vare ruqemake hampiqama vuarara ti, te are avuqavu kaiqa vara timitaanarara iriha, aatitairaqaavata, entaqivata vaiinti nahenti tiva nimiqi virerave.

72

Soromonuva maa ihira qara ntuvatora

¹ Kotio, are koqe okara tinavu avuhainaa vaiinti umiqairaro viva ai aanantero vaiinti nahenti uva avuqavuqama keharo avuqavu iarire.

Are vira kahaqiraro viva are tiva taana uvvara iriharo koqema kero vika uva avuqavuqama nimitaarire.

² Are mintima kehara vira kahaqiraro viva avuqavuqama keharo ai vaiinti nahentiqaa raqikiharo, vika qoraiqama nimite vaika uvavata koqema kero avuqavuqama nimitaarire.

³ Avuhainaa vaiinti viva mintima keharo vaiinti nahentiqaa raqiki vairaro, koqe entavano vairamanta vaiinti nahenti ainqinainive, uqitainive, variaka muntuka paru i vaira koqemake variqi vuate.

⁴ Qoraiqama nimite vaika vaivaro avuhainaa vaiinti viva vika antua nimitaarire.

Vo haika vo haikara aavoqi vaiinti nahentika vaivaro viva vika vaintivaravata kahaqama nimitaarire.

Vaiinti nahenti qoraiqama nimitehara vikaqaa nora maara vate vaika, viva vi vaiintika ntaileharo naatara kaarie.

⁵ Kuarivanove, toravanove, ekaa enta itaqiro vinantema kera, are avuhainaa vaiinti vira qaqi kairaro viva ekaa enta ai vaiinti nahenti naantiara kuvuarama teka, ekaa vikaqaavata raqikiqiro vuarire.

⁶ Koqe aaquvano naahoqive, qaqi vataqaave, ntua kaintema kero, avuhainaa vaiinti viva vaiinti nahenti koqema nimitaarire.

⁷ Viva mintima kero vaiinti nahentiqaa raqiki vairaro avuqavu ni vai okarava koqema kero variqiro vuarire.

Toravano kia qimpa viraitiro, qaqi itaqiro vi vaintema kero, vaiinti nahenti koqe kaiqa vareraqihairo koqe haikavano qovaraiqiarire.

⁸ Avuhainaa vaiinti viva vaiinti nahentiqaa raqikiharoma, viva nora namari hini hini mantaraini variakaqaave, Iufaretisi Namari tuvinaini variakaqaave, maa vatara hini viti hini vitini variakaqaave, raqikiqiro vuarire.

⁹ Vo vatanaa vo vatanaaka aahara vataini variaka, vika vika avuhainaa vaiinti vira vevaaraainima vaivarave.

Vira navutaaka vata kanta vaiha konkoma nevarave.

¹⁰ Avuhainaa vaiintinavu Speni vataini variakave, nora namari avutaqi vai vataraqaa variakave, vika vikama vira *takis* vuru amivarave.

Arebia vataqaa raqiki vaivavata, Sebaa vataqaa raqiki vaivavata, vitantavata vo haika vo haika vare vuru vira amivarave.

¹¹ Ekaa avuhainaa vaiinti vika oru vira avuqaa kankakaamavi vaivarave.

Ekaa naato vatanaaka vira kaiqa vara amitevarave.

¹² Vehi vaiinti nahenti vira aare variaka, viva vika uva iriro, vika ruaruama nimitaanaro.

Vika kahaqama nimiteka kia vaimanta nora maaraqi variaka, avuhainaa vaiinti viva vivakata kahaqama nimitaanaro.

¹³ Vika kempukavano kia vaikave, vo haika vo haikara aavoqikave, viva vika aaqurihama nimiteharo kahaqiramanta vika kia qutu viraiti, qaqi variqi vivara.

¹⁴ Avuhainaa vaiinti viva vika qaqi variqi virara noraiqaakero iriharora tiro, viva nora maara vikaqaa vate vaika kauquqihairo qaqini vara kaanaro.

Vika ruqutiha qoraiqama nimite vaika kauquqihairo vika ruaruama nimitaanaro.

¹⁵ Mpo, avuhainaa vaiinti viva vukaiqama kero variqiro vuarire. Kaira Arebia vatanaaka *kori* ori vare vuru vira amiate.

Kaira vaiinti nahenti avuhainaa vaiinti virara iriha, vo enta vo enta Kotira aaraivaro viva vira koqema amitaarire.

¹⁶ Kairaro *uitive*, *baalive*, ekaa maa vataraqaa koqema kero qampiqaarire. Vi karava ainqainivata koqema kero qampiqaarire.

Kairaro Lebanoni vataini airi kara qampiqaintema kero, maa vataraqaaavata kara koqema kero qampiqaarire.

Kairaro ukuuvano koqe vataqaa koqema kero qampiqaintemake, vo vatuka vo vatukaqi variakavata koqemake variqi viha, airiqamavi variate.

¹⁷ Kairamanta vaiinti nahenti avuhainaa vaiinti vira autu kia tauru karaiti vaivaro, kuari avuvano koqema kero itaqiro vintema kero, avuhainaa vaiinti vira nora autuvano ekaa enta takuukero variqiro vuarire.

Avuhainaa vaiinti viva ekaa naato vatanaaka koqema nimitalramanta, vika virara viva tinavu koqema timite vaivama vaivo tivarave.

¹⁸ Ho kaiqenavu Nora Kotira, tinavu Isareru Variqa autu tuahera kaare.

Vivaqaima nora kaiqa vara timite vaimanta tenavu vi kaiqara taveha, kauqu runkinkiri i vauro.

¹⁹ Kaiqenavu vira autuvano takuqi vaira ekaa enta ekaa enta tuaheragi vuare.

Kairamanta ekaa naato vatanaaka vira mpeqa okaravano takuqi vaira tavaate. Ququaave. Ququaave.

²⁰ (Ho te Iesira maaqu Devitika Kotira aarauna uvara taiqama kauro.)

73

Asaapiva maa ihira qara ntuvatora

¹ Isareru hini kiaka muntukavano Kotirara vaimanta vira aaraqaa ni variaka quqaama Kotiva vika koqema nimite vaira.

² Mpo, vika mintiaveravata, te Kotira aaraqaa niha, vo haika kaara vauriri ntava vare kaavunti ruhiqau vunara.

³ Te tavauramanta qora kaiqa vareha nái nutu tuahere variaka, vo haika vo haika koqe haika vateha variavera te taveha taara tuqu ne tiha, Oho, tevata vika aanante mintimake variataarave, tunara.

⁴ Qora kaiqa vare variaka kia aiheviraara vararaiti variavaro, vika vaatavano kempuka vaimanta ho variara.

⁵ Nora maaravano kia vikaqaa vaimanta vika ho variavaro vaiinti nahenti qoraiqama nimite vai haikava kia vikaqaa qovaraiqimanta variara.

⁶ Vika mintimake vaiha, nái mahuta tivaqi viha, vika qaqi vaiinti nahenti voqamake ruqutiha qoraiqama nimite variara.

⁷ Qora kaiqa vareva vika avu aatoqi mpiqe vaimanta vika qora kaiqa varera viraraqai iriqi vi variara.

⁸ Vika vo vaiinti nahenti naaraihamma nimiteha, vikara qora uva ti variara.

Vika nái autuara noraiqaake iriha vo vaiinti nahentiari tiha, Ne rauriha variate. Ni qoraiqama nimitaarorave, ti variara.

⁹ Vika nái noqihai Kotiva naaruavaini vairara qora uva ti variara.

Vika ekaa vataini variaka vihi vaahi tiha tinavu uvaqai iriate ti variara.

¹⁰ Vika minti ti variarara ti, qaqi vaiinti nahenti vika avataqii viha vika una uvara quqaa uvave ti variara.

¹¹ Vika tiha, Kotiva tenavu qora kaiqa vare vaunara kia ho tave vairave. Nai virini kantaaqaini vaiva viva kia ekaa haikara ho iri tave vairave. ¹² Tenavu qora kaiqa vareha, koqemake variqi viha vo airaira vo airaira varaqi virerave, ti variara.

¹³ Qora kaiqa vare variaka mintimake variqi vuamanta, te vo, quminae Kotira aaraqaa koqemake ni vauro?

Te kia qora kaiqa vararaiti, koqemake vaunaraqaahairo kia koqe haikavata tiqaa govaraiqivo.

¹⁴ Mpo, qora haikavano entaqivata aatitairaqaavata ti qoraiqama timite vaimantama vauro.

Ekaa enta toqaqi are ti ruquti variaro.

¹⁵ Mpo, te qora kaiqa vare variaka tiantemake uva turaitirio, te ai vaiinti nahenti qoraiqamama nimitaauraitirio.

¹⁶ Te qora kaiqa vare variaka koqemake variarara kankomake iriare turarovata, kia ti aatovano kanko irave.

¹⁷ Te mintimake vaiha oru Kotira Naavuqi oriqete vauraro ti aatovano kenko tiro iri vimanta te qora kaiqa vare variaka taiqa virara kankomake irunara.

¹⁸ Vika kaavu ntuate tira, are vika ntita varera vuru vauriri ntaaina aararaqaa kenarare.

Are vika aqu kairamanta vika vehiqamavi taiqa vivarave.

¹⁹ Vika voqamake aatu ite vairamanta huvuravano vo haika raaqu varaivaro taiqa vintemake, vika vaakama vehi autuvi taiqa vivarave.

²⁰ Vaiintivano entaqi tavai tairara toqaqi tauru kaintemakera, are qora kaiqa vare variaka tauru kairamanta vika taiqavi kia vaivara.

²¹ Ti aatovano kia kankomake iri entara ti muntukavano qoraiqivaro ti avu aatovanovata qoraiqimanta te kia koqemake irunara.

²² Vi entara te kia avu aato vataaka vaiha, quara vairi voqaara ai avuqaa ni vaunara.

²³ Te mintimake ni vahavata, kia te ai ke niaraini viraiti, te ai aaqanto vaurara are nena kauqu tanaraqhohira ti tuate varianarave.

²⁴ Ai uva maaravano koqe aara ti humiqe vaimanta te vi aararaqaa vi vaunara.

Te mintiaqi vi variarirara are naantiara ti tivita varera vuru koqema kero takuqi vainanaini kenarave.

²⁵ Mpo, tavave naaruvaini vaharo tiqaa koqema kero raqkianarove?

Are vohaiqavano tiqaa koqema kera raqiki variaravama variaro.

²⁶ Ti vaatave, avu aatove, vitanta kempukavano taiqairera, Kotivama ti kempukaiqama timitairaqe te ekaa enta virara noraiqaake iriqi virera.

²⁷ Oho, ai qaqrake vua vaiinti nahentika taiqama vivara. Kia ariara noraiqaake iriaka are vika vehi autu taiqa kenara.

²⁸ Mpo, koqemama te Kotira aaqanto variqi vi vaunara. Noravano Kotiva ekaa haikaaqaa raqiki vaiva vaimanta te viva vainaini kukeqavi variariraro viva ti antua timitaanarove.

Ho Kotio, are ti kahaqihara vo kaiqa vo kaiqa vara timitaanara, te virara iriha vaiinti nahenti viti viri tiva nimiqi virerave.

74

Asaapiva maa ihira qara ntuvatora

¹ Mpo Kotio, nana kaarae are tinavu qaqla kaaro? Are ekaa entae tinavu qaqla kenarave?

Mpo, nana kaarae tenavu ai sipisipi vauraukara arara itaivara variaro?

² Ho iritaane. Haaru Isipi vatanaaka tinavu Isarerri rumpa taamanta vaurara are tinavu ruaruama timitera, tinavu Isarerriara vika tinta vaiinti nahenti variate tivakera tinavu kaama taanarave.

Saioni Aiqinaravata iritaane. Haaru are tinavu hampata vaireva, Saioni Aiqinaga variqira vuanarave.

³ Mpo, are vi vatukaraqi nihara tavaane. Navutaaka ai Naavu ekaama ravantiaqa aqu kaavo.

⁴ Haaru tenavu ai vataake ruvaaqumavi vaunananini ai navutaaka vora ntuvuvi viha, vika nái *vutora/qarareqa* voqi voqi arataarave.

⁵ Mpo, vaiintinavu roriqohai nantaqi vo katari vo katari teqa taaqama kaantemake, navutaaka ai Naavuqi *vahehema/vaataiqama* taa katarira, vo katari vo katari teqa taaqama kaarave.

⁶ Vika nora roriqohaiive, inaara roriqohaiive, ai Naavuqi koqemake nkauruke qara ntuvataa katarira teqa taaqamake ⁷ viraqaahai vika ai Naavu viravata qumpiarama taavaroo ekaa ita taiqa virave.

Mpo, vika mintima keha are tinavu Isarerri hampata variana Naavura qoraiqama kaarave.

⁸ Navutaaka tinavuara tiha, Tenavu vika ekaa ruqutu taiqa karerave tivakeha, tinavu vataaini vi aniba ekaa ai maara naavu qumpiarama taiqa kaarave.

⁹ Maa entara are nora kaiqa vo kaiqa vo kaiqa varaarava kia qaiqaavata qovaraiqivo. Ekaa ai paropeti vaiintinavu taiqa vuavaro kia voqavanovata valvo. Mpo, tarentae qora enta viva taiqa vuanarove?

¹⁰ Mpo Kotio, navutaaka nanti nanti entae ai naaraihama amitaqi vivarave? Vika ekaa entae ai autuura qora uva tivaqi vivarave?

¹¹ Mpo, nana kaarae are tinavu qajira kera kia nena kauqu tanaraqohaira tuvu tinavu kahaqiaro? Nantiharae are nena kauqu kia tutiraitira, qaqi variaro?

¹² O Kotio, nai haaru are tinavu Isarerri Avuhainaava vahara tinavuqaa raqikiqira vuanarave. Are airi tataa tinavu Isarerri ruaruama timitaanarave.

¹³ Are nena kempukahohira nora namari raira kaanarave.

Qaakau haika airi qjata vataava nora namariqi vaira are vira qiatanavu rukavu kaanarave. (Vi uvara okara: Isipi iqoka vaiinti namariqi aru taiqa kairara tura.)

¹⁴ Are qaakau haika airi qjata vataara vira qiatanavu rukavu kera, vira vaata qaakau vairinavu aahara vataaini variaka nimiaramanta naarave.

¹⁵ Arema vata qantua kaararo viraqihairo aruvu namarivano qovaramaviro tuvi vaira.

Arema namari tuvi vaira vo namari vo namari aaharaiqama kaanara.

¹⁶ Arema aatitairavata enta iravata autu kera vataanara. Arema kuarivata, toravata naaruvinai nái vatukaini vataanara.

¹⁷ Arema vi vatava vi vatava mini mini mintimakero varianarove tivakera vataanara.

Arema nora kuari itaaina entarave, aequ ntuaina entarave, autukera vataanara.

¹⁸ Noravauvu, are mintiarava variaramantavata, ai navutaaka ai naaraihama amite variarave.

Kia avu aato vataa vaiinti nahenti vika ai autu vatainiqamake variarave.

Ho virara virara iritaane.

¹⁹ Tinavu navutaaka qaakau vairinavu voqaara variamanta tenavu qaqi mirura voqaara vaunara. Are virara iriharama tinavu navutaaka kauquqi kerora.

Vika tinavu ai vaiinti nahenti qoraiqama timite variara. Mpo, tinavuara irihara tinavu kahaqiraqe tenavu kia qutu viraiti, qaqi variqi vuare.

²⁰ Vaiinti nahenti ntaieha qoraiqama nimite variaka mantaaqainaini voqi voqi kukeqavi variarara tira, haaru are tinavu Isarerri vataakera vahara uva tiva taatau taanara irihara tinavu kahaqiane.

²¹ Hauri qora kaiqa vare variaka vaiinti nahenti qoraiqama nimiteha nora maara vikaqaa vataaqi vivora. Are vi vaiinti nahentika ike mpo tiva nimitehara, vika kahaqira kia kaurira haika varaate.

Are vehi vaiinti nahentive, ekaa haikara aavoqikave, kahaqira vika vika ai autu tahuera kaate.

²² Mpo Kotio, kia avu aato vataaka vo enta vo enta ariara mometa ti varia uvara iriharama, himpira nena auta ntina uvara tiramanta ai navutaaka kia ai *ko ho* aatara kaate.

²³ Ai navutaaka naverai tiha ariara qora uva ti variarave, vika vo enta vo enta qora uva noraiqaake ti variarave, kia vi uvara vi uvara tauru kaane.

75

Asaapiva maa ihira qara ntuvatora

¹ O Kotio, ai autu nora autu vaimanta tenavu ariara koqeve tivakema qaiqaavata koqeve turo.

Are nora kaiqa, vo kaiqa vo kaiqa tinavu vara timitaanarara irihama, tenavu vaiinti nahenti vi uvvara viti viri tiva nimi vauro, turo.

² Ho Kotiva mintima tiro: Te kaama taura entava qovaraiqiraqe vi entaraqaa *ko* tihamma avuqavuqama keha vaiinti nahenti uva irirerave.

³ Vi entara vatavano qaki qaki i vairamanta ekaa vaiinti nahenti aigu kauquvano ntiri ntiri i vairaqe te maa vataru tuqa kempukaiqamake tuataariraro qaqi varianarove.

⁴ Nora vaiintima vauro ti variaka te Kotika niara mintima ti: Kia qaiqaavata nenta autu tuahera kaate, turo.

Te qora kaiqa vare variakara mintima ti: Kia nenta mahuta tiate, turo.

⁵ Kia ne tiha, Tinavu kempukavano uri aatarakero vaimantama vauro, tiate.

Kia ne nentara tiha, Te nora vaiintima vauro tivakeha qora uva tiate. Kotiva minti tira.

⁶⁻⁷ Kotivama vaiinti nahenti uva avuqavu i vaiva vairara tiro, kia vaiinti vovano vevaihairoe, veraihairoe, vetaihairoe, vaiinti nahenti uva avuqavu ianaro.

Kotivama vaiinti nahentiqa raqikiharo vo vaiinti autu vatainiqama kero, vo vaiinti autu noraiqamake vaivama vairo.

⁸ „Nora Kotira arara ite vaiva vaireva, kempuka *uaini kaapuqi* vaira voqaarama vairo.„ Oho, Noravano Kotiva nai kauquqi vi *kaapura* tuate vaivaru *uaini* viva voqamakero taarapara nti vairave.

Ho Noravano Kotiva maa vataraqaa vi *uainira* qihia kairamanta vaiinti nahenti qora kaiqa vare vaika vi namarira namaqi viha ekaa nama taiqa kevaravema turo.

⁹ Ho te kia vika inte irera. Te Iekopira Variqara noraiqaake iriqi viha, vira autu tuaheraqi viha ihi tivaqvi virera.

¹⁰ Noravano Kotiva qora kaiqa vare vaika kempuka taiqa keharo, avuqavu ni vaika kahaqiraro vika kempukavano voqavata vairamanta vaivara.

76

Asaapiva maa ihira qara ntuvatora

¹ Iutaa vika Kotira autuara nora autuma vaivo ti variamanta Isareru vika Kotira autu tuaherake variarave.

² Vira Naavuvano Ieruharemimi vairave.

Saioni Aiqinaqaa viva variqiro vi vairave.

³ Viva mini vaharo navutaaka auvihehavaa, iha itaaina vevarave, kainkeve, iqoka paipewe, vira vira varakero rauhaantima kaira.

⁴ Mpo Kotio, are ainqinaini nena navutaaka naatara kaananaihira orurantera tuvi variararo ai mpeqa okaravano voqama kero takuqi vaivara tuvuaru.

⁵ Navutaaka vika iqoka vaiinti taruka, vataini hiqintivi ekaara qutu vuamanta vikaqihairo kia voqavanovata qaki irave. Vika ia haikara, vo haika vo haika, vokiaka ani rahunku keha varaarave.

⁶ Kotio, are Iekopira Variqavanoma variaro. Are navutaaka rauqi nimitaramanta vika ohivata, iqoka *kaariqi* variakavata, vataini hiqintivi qutu vuarave.

⁷ Noravauno, ekaa vaiinti nahenti ai aatu qeteha variara. Oho, ai arara itaaina entara, tavave ai avuqaa ho himpitero varianaro?

⁸⁻⁹ Nora maara vaiinti nahentiqa vate variaka kauquqihira kuvantu nimitareva ihara, are naaruvaini vi kora tiva taiqa kera, vi uvvara vataini variaka tiva nimiaramanta, vika voqamake qeteha kia uvavata tiraiti, evaara variara.

¹⁰ Ai arara itairara are qora kaiqa vare vaika ntaihena entara, nora maaraqi vai vaiinti nahentika ai autu tuaherevarave, turo.

¹¹ Noravano Kotiva ni Variqavano vairara ti, ne nenta kauqu ainqiqa aquukeha minti minti irerave tivate uvvara avataate.

Kairamanta tinavu Isareri tataaqqa variaka vikavata koqe haika vare vuru tenavu voqamake qete vauna Variqara amitaate.

¹² Viva Nora autu vataaka kempuka taiqake vaiva vaimanta avuhainaaka maa vataraqaa variaka vira aatu voqamake qete variara.

77

Asaapiva maa ihira qara ntuvatora

¹ Te noraiqaake Kotira aareha, Mpo, ti kahaqiane, turo. Te noraiqaake Kotira aareha, Mpo, ti uva iriane, turo.

² Nora maaravano tigi vai entara Noravano Kotiva ti uva iriarire ti, te vira aare vaunara.

Entaqi tenta kauqutanta tuahera keha Kotira aaramaqi vurarovata, Kotiva kia ti muntuka kukuqama timitaaimanta vauro.

³ Te aatoqi Kotirara iriqi vuraro ti maraquravano maara ntaimanta te ke ke tivaqi vi vaunara.

Te Kotirara iriqi vuraro ti kempukavano taiqa vimanta vaunara.

⁴ Te entaqi qaqqi varikauraukama vaite vauro. Nora maaravano tigi vaira kaara te kia ho uva tiraiti vaunara.

⁵ Te haaru aitarai entarave, aitarai ihirave, virara virara iriqi ani vaunara.

⁶ Mpo, vi entara te entaqi quaheha ihi tivaqi vuavaunara. Ho te mintimake iriqi viha, tenta ireha mintima ti:

⁷ Noravano Kotiva ekaa entae tinavu qoririma timitaqiro vuanarove? Viva kiae qaiqaa tinavu quahama timitaanarove?

⁸ Mpo, Kotira muntukavano tinavuara enena vaiva taiqa vivaroe kia qaiqaavata tinavuara antuqa arivo? Viva nai kauqu ainqaqa aqukeharo tivatui uvara qaqirae kaivo?

⁹ Kotiva tinavuara tauru keharoe kia qaiqaavata tinavu aqaurihama timitaivo? Vira arara ite vaiva tinavuara ike mpo tiva timite vai vatukarae varairo?

Te mintimake tenta ire vaunara.

¹⁰ Te maa haikarara iriqi vuraro vira kaara ti muntukavano qoraiqimantama vauro. Kotiva nai virini kantaaqaini vaiva nai kauqu tanaraqohairo kia tinavu qaiqaa kahaqireva auti vaivo.

¹¹ Mpo Noravaavo, haaru are tinavu Isareri kaiqa vara timitaanara, virara iriqi virerave.

Are nora kaiqa, vo kaiqa vo kaiqa tinavu vara timitaanara, virara qaiqaa iriqi virerave.

¹² Are tinavu vara timitaana kaiqara, ekaa vi kaiqara vi kaiqara te tenta aatoqi iriqi viha ariara tiha, Mpo, vi entara Kotiva nora kaiqa, vo kaiqa vo kaiqa vara timite vairave, tirerave.

¹³ Mpo Kotio, are vare variara kaiqava, ekaa vi kaiqava koqe kaiqa takuqi vai kaiqavama vaivo. Kia variqa vovano ai aatarakero vaivara, areqaima Variqaa noravano variaro.

¹⁴ Are Variqavano vahihara nora kaiqa vare variaramanta vaiinti nahenti ekaa vi kaiqara taveha, kauqu runkinkiri i variara. Are vi kaiqara vare variaramanta vaiinti nahenti ai kempuka okara kankomake tave variara.

¹⁵ Are nena kempukaqohairo nena vaiinti nahenti, Iekopika Iohepika naintivara ruaruama nimitaanara.

¹⁶ O Kotio, haaru nora namarivano ai tavero voqama kero qete vaivaro, nai veva muntukaraqi vaivavata voqama kero ntiri ntiri i vairave.

¹⁷ Tonavuqihairo nora aagu ntivarao naaruvavano qaiqaa qaiqaavata uva tivaqiro vivaro veva hini hini aruantema kero, aaquakaavano uti vairave.

¹⁸ Igoka kaari aiquvano noraiqama kero harara harara tintema kera, are qaqqi kaararo naaruvavano voqama kero auvante vaivaro aaquakaavano utiharao ekaa vata maata ataama kaivaro vatavano qaki qaki i vairaa.

¹⁹ Are ni variana aarava nora namariqi vaivaro kia vaiinti vovanovata are aiqu ntavataanara tavaira.

²⁰ Sipisipi qova nai sipisipi aara numiqaintema kera, are nena vaiinti nahenti ntita varera vi aarara vika numiqaanara.

Are Mosika Eronika noraiqama kaaramanta vitanta qiata vaiinti vaiha, ai vaiinti nahenti ntita vare vi aararaqaa vuara.

78

Asaapiva maa ihira qara ntuvatora

¹ Ti vaiinti nahentivauvo, te uva maara ni tiva nimiari iriate. Ne nenta aato ti timiqe te uva ni tiva nimiare.

² Te uva ni tiva nimirera iha, vi uvvara tuqantaake tiva nimirera. Haaru enta variaka kia kankomake iria uvvara, te vi uvvara okara ni tiva nimirera.

³ Vi uvvara tinavu kaivaqaukavara tinavu tiva timiamanta irunara, vi uvvara okara ni tiva nimirera.

⁴ Tenavu vi uvvara okara kia kukeqa karaiti, tentanavu vaintivaravata tiva nimirera.

Tenavu tentanavu vaintivara tiva nimiqi viha, Noravano Kotiva tinavu kaivaqaukavara vara nimitai kaiqarave, viva kempukaiqama keharo vika kahaqirave, nora kaiqa, vo kaiqa vo kaiqa vara nimitairave, te virara virara vika tiva nimirera.

⁵ Kotiva tivatai uvvara, vi uvvara viva Iekopiva kuvuarama taika, Isareru vatanaaka nimitaira.

Viva tinavu kaivaqaukavara vi uvvara nimitero tiharo, Ne nenta vaintivaravata vi uvvara nimiqi vuate.

⁶ Ne mintimanta ni vaintivara noruqamavi, nái vaintivaravata tiva nimiqi vimanta vika vaintivaravata mintiaqi viqata viqata ti, ekaa naantiara kuvuarama teka vikavata vi uvvara ho irivarave, tura.

⁷ Vika Kotiva tivatai uvvara mintima keha tiva nimiqi viha, ekaa naantiara kuvuarama teka Kotirara tinavu kahaqi vaivama vaivo tivakeha virara noraiqaake iriqi viha, vika Kotiva tinavu kaivaqaukavara kahaqiharo nora kaiqa, vo kaiqa vo kaiqa vara nimitairara kia tauru karaiti, vira uva koqemake iriqi vivara.

⁸ Vika mintimake Kotira uva koqemake iriqi viha, kia nái kaivaqaukavara aanante Kotira uva raqaqi vivara.

Vika kaivaqaukavara kempukaiqamake qora aaraqaa vireka auti vaiha Kotira uva raqaqi viha, kia virara noraiqaake iriraiti, vaaka vira qaqrake una variqa quahama nimiti variara.

⁹ Efaramura ankuqhah iqoka vaiinti huru veva tote variaka variavaro iqoka enta qovaraiqimanta, vika navutaaka aatu qetake vuara.

¹⁰ Vika Kotiva tinavu kaivaqaukavara hampata uva tiva taatau taira qaqrake, vira uva maaravata kia iriqi vuara.

¹¹ Kotiva nora kaiqa, vo kaiqa vo kaiqa vika vara nimitairara kia iriraiti, taurukaara.

¹² Ho tinavu kaivaqaukavara Isipini, Soaa Uqitaini varia entara, Kotiva vikara iriharo nora kaiqa, vo kaiqa vo kaiqa vara nimitaimanta tavaara.

¹³ Kotiva Naare Namari rairakero tinavu kaivaqaukavara ntita varero vuru hini mantaraini kaira. Viva vika ntitero vi vaivaro namarivano hini hini vaavarama viro, vaantaavura voqaara vaira.

¹⁴ Vi entara aatitarraqaa Kotiva uromura tonavuqi vaharo, tinavu kaivaqaukavara avuni viharo aara numiqaimanta vi variara.

Entaqi Kotiva ihavano viavi ite vairaqi vaharo aara ataama nimiti vaimanta vika ho taveha vi variara.

¹⁵ Vika aahara vataini varia entara namari naate tiro, Kotiva nora ori nkahi kaivaro namarivano koqema kero nte vaimanta naara.

¹⁶ Kotiva mintima kero namari qovarama kaivaro nora namarivano tuvintemakero, oriqihairo airi namari tuvi vaira.

¹⁷ Kotiva nai virini kantaaqaini vai Variqava vika mintima kero kahaqi vaimantavata, vika aahara vataini vaiha, Kotira uva qaqqai raqaqi viha kia vira antuqa avataraiti, nái antuqa avate variara.

¹⁸ Vika Kotira avatareka iha, vira naariha tiha, Are hiakaa i karara tinavu timiraqe naare, tiara.

¹⁹ Vika Kotirara nuntu naantu tiha, Viva hoe tinavu aahara vataini kara timianarove?

²⁰ Ququaama viva ori ruqutu kaivaro airi namarivano viraqihairo tuvirave.

Ho vate maa entara viva kara tinavu timiarirava vairoe, kiae vaivo?

Viva hoe karave mative tinavu timiraqe naainararave? ti variara.

21-22 Vira kaara Nora Kotira voqama kero vikara arara itaivaro vaira.

Iekopira vaintivara Isareri vika kia Kotirara noraiqaake iriraiti, virara kia ho tinavu kahaqianarove tiara kaara Kotira arara itaivarova viva vika hininavu ihaqohairo tatoqa kaira.

²³ Kotiva mintiharovata, viva naaruvara qantua vuane, tivarova qantua vivaro ²⁴ aaquvano ntintema kero, naaruvalihairo vo kara, *manaavano* hiqinti hiqinti i vaira.

²⁵ Kotiva *enseli* ne varia karara vaiinti nahenti nimimanta vika varake ho ne variara.

²⁶ Vika mativat naate tiro, Kotiva uvavi varava kuaru urinaihairove, *sautihairove*, uvaivano uti vaimanta muavu voqaa uviri airitahaa uvavi hampata aniera.

²⁷ Kotiva mintima kero uviri airitahaa vara kaimanta vika ata vare tonavu voqaraa hihipaamaqi aniera. Nora namari auvahini nuqa airitahaa vaintemake, vi uvirika airitahavano ata vare aniavaro ²⁸ Kotiva uviri vika qaqqi kaimanta vika ani Isareri *seri* naavu maaqa kaqataanaini vo naavu vo naavu naanteqaraini unutete variara.

²⁹ Vi entara Isareri vika matiara vogamakero antuqa arimanta vi karara naari variavarovata Kotiva qaqqi kaimanta vika uviri airitahaa varake ne variara.

³⁰ Ho vika nái antuqa vai karara qaqqiqai ne variavaro ³¹ ihavano vaaka auruma vintema kero, Kotira arara itaivarova viva Isareri kempuka vaiintive, qaraaka vaiinti avuni variakave, aruqiro viharo vika aru vehi autu kaira.

³² Kotiva vika mintimantavata, Isareri kia qora kaiqa qaqqira karaiti, Kotira uva qaqqiqai raqqiqi vi variara.

Kotiva vika niruqaa nora kaiqa, vo kaiqa vo kaiqa vara nimitemanta vika kia virara noraiqaake iriraiti tiha, Viva kia tinavu ho kahaqiaina Variqavama vaivo, ti variara.

³³ Vika minti tiara kaara uvaivano inaaraqiqi utiro taiqa vintema kero, Kotiva vika qaqqi variqi vi entara iquqama kaimanta vaaka qutu vuara.

³⁴ Kotiva mintima keharo tinavu kaivaqaukavara hininavu aru kaimanta hininavu qaqqi variaka nái qora kaiqa vare variaraqaahai tuqantaavi qaiqaa Kotirara mpo tinavu kahagiane ti variara.

³⁵ Kotiva nai virini kantaqaqaini vaiva vika antua nimite vairave, viva vika ruaruuma nimite vairave, virara virara vika qaiqaa iriteha variara.

³⁶ Vika mintihavata, kia Kotirara quqaa uva tiraiti, virara una uvaqai ti variara.

³⁷ Vika kia Kotirara noraiqaake iriqi viraiti, „una variqanavuara noraiqaake iriqi viha,“ Kotira vika hampata vahiaro tivatai uvvara raqqiqi vi variara.

³⁸ Vika mintimak Kotira qoraiqama amite variavarovata, Kotiva vika qaqqiqai aaqurihama nimite vairaa.

Viva vika qora kaiqa varaara kaara kia vika vehi autu taiqa karaitiro, vi uvvara qaqqi nunka nimite vairaa.

Qaiqaa qaiqaavata viva nai arara itaira nanta muntuvi keharo kia vikara voqama kero arara itaivarova vairaa.

³⁹ Viva vikara tiharo, Vika qaqqi qumina vaiinti nahentima variarave. Uvaivano utiharo vuru taiqa vintemake, vika variqi vi vuru taiqa vivarave, tira.

⁴⁰ Oho, tinavu kaivaqaukavara aahara vataini nuvaqii viha, airi tataa vika kia Kotira uva iriraiti, vira qoririmake variara kaara Kotira muntuka qoraiqvoro vaira.

⁴¹ Kotiva takuqu kero vai Variqava tinavu Isareriqaa raqqiki vaiva vaimanta, vika qaiqaa qaiqaavata vira avateha qoraiqama amite variara.

⁴² „Isipi vatanaaka,“ vika qoraiqama nimiteha nora maara Isareriqaa vataavarovata Kotiva nai kempukaqohairo Isipi kauquqihairo vika ruaruuma nimitemira qaqqi iritaataara vaimanta vika viravata tauru kaara.

⁴³ Tinavu kaivaqaukavara Isipini Sooa Uqitaini varia entara, Kotiva vikara iriharo nora kaiqa, vo kaiqa vo kaiqa vara nimitemanta vika tavaara.

⁴⁴ Vi entara Kotiva Isipini vai namarira, vo namari vo namari qoraiqama kaivarova naareqama vira kaara Isipi vatanaaka kia ho naara.

⁴⁵ Vi entara Kotiva vauvaari airitahaa nititaimanta vika Isipi vatanaakaqaa hihipaamavi vaiha vika qoraiqama nimitemara.

Kotiva eqavoka nititaimanta vika airitahaa Isipi vataqaa mpiqavi vaiha vika vata maata qoraiqama nimitemara.

⁴⁶ Kotiva kaintaaqa vara kaimanta vika airitahaa qovarama vi, Isipini naahoqi vai karara nama taiqa kaara.

⁴⁷ Viva nora aqqi vara kaivarova *taaruvano/kaampuravano* ntiharo vika *uaini* ututaarave, fiki katari ututaarave, vehi autu taiqakaira.

⁴⁸ Viva qaqqi kaivarova *taaruvano/kaampuravano* ntiharo vika purumakau ruqutu taiqa kaivarova, aequakaavano utiharo vika sipisipive, vo quarave, aru taiqa kaira.

⁴⁹ Kotira nai voqama kero arara itaivarora tiro, viva *enselinavu nititaimanta* vika Isipi vatanaaka vainti arukareka tuvuara.

⁵⁰ Kotiva nai arara itaira kia nanta muntuvi karaitiro, viva kia Isipi vatanaaka vehakuma nimitaraitiro, viva qaqi kaivaro nora rovaravano Isipi vokiaka arukaira.

⁵¹ Mintima keharo Kotiva Isipi vatanaaka vo naavu vo naavuqirauka qorainti vainti kara hunka, ekaa arukaira.

⁵² Viraqaahairo sipisipi qova nai sipisipi ntitaintema kero, Kotiva Isipiqihairo nai vaiinti nahenti ntita varero, vika avuni viharo aahara vataini vika aara numiqaqiro vimanta vuara.

⁵³ Kotiva vikaqaa koqema kero raqikiqiro vi vaimanta vika kia getaraiti, vi variavaro nora namarivano vika navutaaka raqutu kaira.

⁵⁴ Vika cutu vuavararo Kotiva nai vaiinti nahenti ntita varero, vuru nái kaama nimitai vatara, ainqinaini kaira. Kotiva nai kempukaqohairo vi vatara vika vara nimira.

⁵⁵ Kotiva vo vatanaaa vo vatanaaka mini variaka nititama kaimanta vika Isareri naatu getake kantama vuara.

Vika vuavararo Kotiva Isareri vo anku vo ankuara iriharo kaama nimitai vatara raira kero nimimanta vika vi vataraqaa nái naavu maaqa kaqate koqemake variara.

⁵⁶ Kotiva nai virini kantaqaqaini vai Variqava minti mintima keharo Isareri koqema nimitaimantavata, vika qaqqiqai vira avateha, viva tivatai uvaravata kia iriraiti, vira qoririma amite variara.

⁵⁷ Nái kaivaqaukavara voqaantemake, vika kia Kotirara noraiqaake iriraiti, una variqara noraiqaake iriqi vi variara.

Qora huruvano kia koqemakero veva arintemake, vi vaiinti nahentika Kotira uva kia koqemake avataqi vi variara.

⁵⁸ Vika una variqara iriha *ofaa* tainta, vo tainta vo tainta voqaa voqaa autuke vataara kaara Kotira arara itaivarо vaira.

Vika Kotiraqai quahama amitaataara vaimanta vika una variqanavuvata quahama nomite variara kaara Kotira arara itaira.

⁵⁹ Kotiva tavaimanta vika minti mintima keha vira qoraiqama amitaqi vuavararo, vira kaara viva voqama kero arara itaivarо nai vaiinti nahenti Isareri vika ekaara qoririma kero qaqaq kaira.

⁶⁰ Viva vika qoririma keharo Silo vatukaini nai *Seri Naavuqi* vairavata qaquirakerо vira.

Tota Kotiva Isareri hampata vaireva, vi *Seri Naavuraqi* vaira qaqaq kero,⁶¹ navutaaka qaqqi kaimanta vika viva uva tiva taatautai *Vokisera*, vira mpeqa okaravano viraqaa takuqiro vai *Vokisera*, Siloqihai vare vuru nái maaqaini kaara. (1 Sam 4:4-22)

⁶² Kotira voqama kero arara itaivarо vika navutaaka qaqqi kaimanta iqoka paipeqohai Kotiva kaamatai vaiinti nahentika arukaara.

⁶³ Ihavano ita taiqa kaintemake, navutaaka iqoka raquqi viha Isareri qaraaka vaiinti aru taiqa kaara. Mintima kaamanta Isareri varaata vika qorainti vareva kia vaira.

⁶⁴ Navutaaka Kotira Naavuqi vira kaiqa vara amite variaka iqoka paipeqohai aruke, vika nahenti tentoqanavu qioqama taamanta kia vikara iqi rata nimitaara.

⁶⁵ Navutaaka mintima keha Isareri qoraiqama nimitaqi vuavararo, airi *uaini* namakai vaiinti vaitainaihairo himpintema kero, Noravano Kotiva himpiro⁶⁶ Isareri navutaaka ntaihamaqiro viharo vika vataqaahairo navutaaka ruqutu ntata kero, kaurira haika nimimanta vika kia ho qaqaavata raquara.

⁶⁷ Vika naatarakero viraqaahairo viva Isareri hampata qaiqaa vaireva, viva kia qaqqaa Iohepira ankuve, Efaraimura ankuve kaama taraitiro,⁶⁸ Iutaara anku kaama tero oru Saioni Aiqinaini, nai muntukavano vainainiara vira.

⁶⁹ Viva mini vaiharo nai Naavu kaegeharo naaruvalini vai Naavura voqaara vi Naavura kaqaq taira. Vira Naavuvano maahota variare tiro, viva maa vatara kempukaiqama kaintema kero, vi naavuravata kaqaq taira.

⁷⁰ Devitiva vira kaiqa vaiinti variare tiro, Kotiva Devitiva sipisipiqaqaa raqiki vai entara vira kaama taira.

⁷¹ Devitiva sipisipiqaqaa raqiki vaiva vaivaro Kotiva vira vita kero noraiqama kaivaro Devitiva avuhainaa vaiinti vaiharo Kotira vaiinti nahenti Isareriqaa raqiki vaira.

⁷² Devitiva Isareriqaa raqikiharo viva kia nariara noraiqaakero iriraitiro, viva Kotira vaiinti nahentiara iriharo, vika ntita varero koqe aara numiqa vaira.

79*Asaapiva maa ihira qara ntuvatora*

¹ Mpo Kotio, vo vatanaa vo vatanaaka are iana vataro maini iqoka raquqi anihia, vika a takuqira Naavu qoraiqamake, Ieruharemi vaantaavuravata, viraqi vai naavu maaqaravata, ekaa vehi autu taiga kaarave.

² Vika ai kaiqa vaiinti nahenti aruqi viha, nterai matira ne varia uvirika vika vaata naate ti, vika vaata nimitaarave. Qaakau vairivata vika vaata naate ti, nimitaarave.

³ Mpo, navutaaka Ieruharemiqi ai vaiinti nahenti aruqi vuavaro vika naarevano namarivano tuvintema kero, tuvi vaavaro kia vovano vika vaata quntama taarirava vairave.

⁴ Vo vatanaa vo vatanaaka tinavu Isareri tataaqa variaka, vika tinavu naaraihama timiteha tinavuvara qora uva tivakeha, tauvaqa vauraa uva ti variarave.

⁵ Mpo Noravaauvo, tairentae tinavuvara ai arara itairava taiqaanarove? Are ekaa entae tinavuvara arara itairara vainerave?

Ihavano kia qimpa viraitiro, qaqqi itaqiro vintema keroe, viva qaqqi itaqiro vuanarove?

⁶ Mpo, kia tinavu mintiraitira, are vo vatanaa vo vatanaaka kia ai quahama amite variaka nitihara, vikara ai arara itairara variane. Vika kia ai aararaiti, una variqanavu naare variarave.

⁷ Vika tinavu Iekopiva kuvuarama taika harukeha, tinavu vatawata qoraiqama kaarave.

⁸ Mpo, tinavu kaivaqaukavara ai uva raqakaara vi uvara kia tinavuqaa vataane.

Tenavu anomake qoraiqamavi vaunarara tira, are tinavu aaqrighama timitehara vaaka tuvu tinavu kahaqama timitaane.

⁹ Mpo Kotio, are tinavu ruaruama timite variarava nena takuqi vai auturara irihara, tuvu navutaaka kauquqihaira tinavu qaqqini vara kaane.

Are nena nora autuara irihara, tenavu ai no raqqi kauna uvara nunka timitaane.

¹⁰ Hauri vo vatanaa vo vatanaaka tinavuvara, Ni Variqavano tainie vaivo? tivora.

Vika ai kaiqa vaiinti nahenti arukaavarro vika naarevano ntairara irihara, are tinavu qaqqi kairaqe tenavu tave variarirara are vikaqaa aru muntukena okarara vo vatanaa vo vatanaaka tavaate.

¹¹ Mpo, iqoka raiha Isareri ravaaqavu vare vuru rumpataaka ke ke ti varia uvara irihara vika kahaqiane.

Navutaaka vikaqaa uva vateha vika arukareka ia vaiintikara irihara, nena kempukaqhairs vika ruaruama nimitaane.

¹² Mpo Noravaauvo, ekaa vi vatanaaka ai qoraiqama amiteha ai naaraihama amitaarara irihara, kia vohaa tataa vika qoraiqama nimitaraitira, airi tataa vika qoraiqama nimitaane.

¹³ Are mintiraqe tenavu ai vaiinti nahenti ai sipisipi vaurauka, ekaa enta ariara koqeve tiha ai autu tuaheraqi vuare.

Are mintiramanta ai vaiinti nahenti naantiara qovaraiqika, vikavata ai autu tuaheraqi viha, are tinavu nora kaiqa vara timitenarara tiva nimiqi vuare.

80*Asaapiva maa ihira qara ntuvatora*

¹ Mpo Kotio, nena aato tinavu timihara tinavu uva iriane.

Tenavu ai sipisipinavu vaurara are tinavu Isareri sipisipi qova vahara tinavu Iohepira vaintivarra koqe aara humiqe variaravama variaro. Are nena avuhainaa taintaqa oquivi vahara *enseli* aroka vataukaqaa raqqi varianarave.

² Are nena mpeqa okaravano takuqi vaira qoqaiqama kehara, tinavu Efaraimura ankuve, Benaminira ankuve, Manasera ankuve, ataama timitehara nena kempukaqhairs tuvu navutaaka kauquqihaira tinavu qaqqini vara kaane.

³ Mpo Kotio, are tinavu kahaqama timitairaue tenavu haaru koqemake vaunantemake, vatevata qaiqaa mintimake variare.

Are tinavu aaqrighama timitehara tinavu ruaruama timitaane.

⁴ Noravaauvo, are ekaa kempuka vataavama variaro.

Mpo, nanti nanti entae ai arara ite vaiva qaqqi itaqiro vi vairara, ai vaiinti nahenti ai aare uvara kia iriraitira vainarave?

⁵ Are kia koqe kara tinavu timiraitira, muntuka qoraiqi haikara tinavu timiaramanta tenavu tentanavu auquruqai neha vauro.

⁶ Are tinavu qoririma kaanara kaara vo vatanaa vo vatanaaka tinavu vata varareka iha, vika nai ari nai ari i variara.

Are tinavu qoririma kaanara kaara navutaaka tinavu naaraihama timite variara.

⁷ Mpo Noravaauvo, are ekaa kempuka vataavama variaro. Are tinavu kahaqama timitairaqe tenavu haaru koqemake vaunantemake, vatevata qaiqaa mintimake variare.

Are tinavu aaqurihama timitehara tinavu ruaruama timitaane.

⁸ Haaru are Isipiqihira *uaini* kuvu ntava varera ani vo vatanaa vo vatanaaka maini variaka nititama kera, *uaini* kuvu vira vika vataqaa ututaaanarave.

⁹ *Uaini* kuvu vira utireva ihara, are koqema kera vata ruhiqaukera vira ututaararo viva tuqa aratero koqema kero qampiqeharo maa vataro mpiqa kairave.

¹⁰ *Uaini* viva qampiqeharo maa vataro mpiqa kaivaro vira kaaravano ainqinanavu aumaqaaraiqama nimiteharo, nora *sidaa* katarivata uri aatarakero aumaqaaraiqama nimitaira.

¹¹ *Uaini* viva qampiqaqiro vivaro vira kantakaara hinivano nora namari, Meditarenia Namari auvahini vivaro vira kantakaara hinivano Iufaretisi Namari tuvinaini virave.

¹² *Uaini* viva mintima kero qampiqavarra, are nana kaarae vira hohaa ravantiaqa kaaro?

Are mintianara kaara aaraini vi ani variaka *uaini* tava vira muara hiqike vare variavo.

¹³ Mpo, nantaqihai qaakau quara ani *uaini* tanta taantamake vataamanta aantauvahi ani *uaini* tava vira ne variavo.

¹⁴ Mpo Noravaauvo, are ekaa kempuka vataavama variaro. Are qaiqaa tinavuara noraiqaakera iriane.

Are naaruvhahira viavi tenavu qoraiqama vi vauraukara ike mpo tiva timitaane.

Tenavu are ututaara *uainikama* vauro. Are tinavu nena vaiinti nahentiqaa koqema kera raqikiane.

¹⁵ Are nena kauqu tanaraqohaira *uaini* vira ututera, tinta *uaini* variarire tira, vira kempukaiqama kaararo koqema kero qampiqairave.

¹⁶ Mpo, vate navutaaka *uaini* vira teqa taagamake, ihaqohai vira tatoqa aqu kaavo.

Oh, vira kaara ai arara itairara vika vehi autu taiqa kaane.

¹⁷ O Kotio, are tinavu nena kaama taana valinti nahentika antua timitehara, tinavuqaa koqema kera raqikiqira vuane.

Tinavuara vika tinta vaiinti nahenti variate tira, are haaru tinavuqaa koqema kera raqikiqira vuaramanta tenavu noruqama vunarave.

¹⁸ Are qaiqaa tinavuqaa koqema kera raqiki vairaqe tenavu kia qaiqaa ai tauvaqa utu amitaare. Are tinavu qaraakaiqama kera kempukaiqama timitairaqe tenavu ai autu tuaheraqi vuare.

¹⁹ Mpo Noravaauvo, are ekaa kempuka vataavama variaro. Are tinavu kahaqama timitairaqe tenavu haaru koqemake vaunantemake, vatevata qaiqaa mintimake variare.

Are tinavu aaqurihama timitehara ruaruama timitaane.

81

Asaapiva maa ihira qara ntuvatora

¹ Kaiqenavu Kotiva tinavu kempukaiqama timite vairara quaheha vira ihi tiva amitaqivi vuare.

Kaiqenavu Iekopira Variqara iriha, naverai tiha ihi tivaqvi vuare.

² Ne ihi tivaqvi viha *tamparini* rintatimiqi viha, *kitaavata*, *ukulelevata*, ruqutuqi vuate.

³ Qaraaka tora ani ntaainaraqaavata, nora tora itainaraqaavata, *aanumaara/noma* vuqaq kaimanta ekaa vaiinti nahenti ruvaaqumavi vaiha ovata naate.

⁴ Ne Isareri mintimake ruvaaquma vuate tiro, tinavu kaivaqara Iekopira Variqavano vi uvvara tiva taira.

⁵ Kotiva Isipiqihairo tinavu kaivaqaukavara Iohepira vaintivara ntita varero vuru kai entara viva vi uvvara tiva taira.

Isipi vatanaaka vo uvaqihai tiamanta tinavu kaivaqaukavara kia kankomake vika uva iriara.

⁶ Kotiva, tiharo, Nora maara nenta kururuqaa aqu vare variara, te vira qaqini vara kaunarave.

Te ni kauquqihai maara ntai haikara qaqini vara nimitaunarave.

⁷ Ne nora maaraqvi vaiha ti haaraa entara, te ni uva iri, ni ruaruama nimitaunarave.

Ne ti haaraamanta te kumpora ari tonavuraqi vaiha, ni uva iriha ni kahaqama nimitaunarave.

Ne Meribaini vaiha nuntu nauntu ti varia entara te ni okara avatamake tavaunarave.

⁸ Ho ne ti vaiinti nahenti iriate. Te niara rauriha variate turo. Mpo, ne ti uva iriqi vuataarave. Ne Isareri ti uva iriqi viqe te hove tiataarave.

⁹ Te ni qioqamateha mintima turo: Kia vo vatanaaka una variqanavu quahama nimitaate.

Kia vo vatanaaka *maraqura/varaha* aututera vika nivuqaa kankakaavi vaiha virara tinavu variqave tivakeha quahama nimitaate, turo.

¹⁰ Ne kiae iriavo? Te Noravano Kotika ni Variqavano ni Isareri Isipiqihai ntita vare viri kauraukama vauro.

Ne nenta no aaqaavute vaiqe te ni kara nimiare.

¹¹ Te mintirerave turamanta, ne ti qoririmake kia ti uva irireka auti variara.

Ne Isareri ti vevaaraini variataara vaimanta kia mintiara.

¹² Ne kia mintiara kaara te ni Isareri qaqi kauramanta ne hampi aaraqaa vuataa imanta vuara.

¹³ Mpo, ne Isareri ti uva koqemake iriha, ti aaraqaa vuatirio, ¹⁴ te vaakama tenta kauquqohai ni navutaaka naatarakeha, vika vehi autu taiqa kauraitirio.

¹⁵ Oho, te Noravano Kotika vauro. Naantiara ti navutaiqi variaka ti tivuqaa vaivarao vika naatu ite vaira aiqu kauqu ntiri ntiri i vairamanta vaivarave.

Te vika ruqutuqi vuarirava kia taiqa viraitiro, ekaa enta qaqi variqiro vuanarove.

¹⁶ Te vika mintimake qoraiqama nimithehavata, ni Isareri koqe karaqai nimiqi viha, nantaqi *bivano* kurutai *hanira*, ni nimiari neha ho vaivarave, tiro. Kotiva tinavu Isareriara minti tura.

82

Asaapiva maa ihira qara ntuvatora

¹ Kotiva naaruvinai vaiharo vaiinti noranavu naarama kaimanta vika vira avuqaa ruvaaqumavi variavarao Kotiva vikaqaa uva vatero tiharo,

² Nanti nanti entae nenavu *ko* iriha kia koqemake uva avuqavu iraiti, qora kaiqa vare variaka uva iriha vikaqai kahaqai variavo?

³ Nenavu kia mintiraiti, vehi vaiinti nahentive, *iqa/viqa* vaintive, qaqi vika kahaqiataraave.

Kia airaira vataa vaiinti nahentive, nora maaravano vikaqai vaimanta variakave, nenavu vika uva iriha koqemake vika uva avuqavu iate.

⁴ Ugerara vaiinti nahentive, vo haika vo haikara aavoqiakave, ne vika vika qora vaiintinavu kauquqihai ruaruama nimitaate.

⁵ Oho, ne kia vo okaravata kankomake iriraiti variavaro, ni avu aatovanovata kia vaimanta ne konkiraqi ni variamanta vira kaara vaiinti nahenti kia koqe aaraqaa ni variavo.

⁶ Tota te ni tiva nimi tiha, Ne variqanavuma variavo. Te nai virini kantaaqaini vaura Variqauka vauramanta ne ti maaqunavu variavo, tunarave. (Ioni 10:34)

⁷ Te minti turauka, vate te vo uvavata ni tiva nimiari iriate.

Qaqi vaiinti qutintemake, nevata qutivarave. Ekaa avuhainauka qutintemake, nevata variqi vi, vuru qutu vivarave, turo. Kotiva minti tura.

⁸ Mpo Kotio, himpira maa vataraqaa variaka uva avuqavu iane.

Ekaa naato vatanaaka vaireka, vika are iaraukama variavo.

83

Asaapiva maa ihira qara ntuvatora

¹ Mpo Kotio, kia qaqi variane.

Kia evaara vairaitira, uva tiane.

² Ho tavaane. Ai navutaaka iqoka raqireka auti vaiha nora uva ti variavo.

Vika ai navutaiqiha ai tauvaqa utu amite variavo.

³ Vika evaara ruvaaqumavi vaiha, tinavu ai vaiinti nahenti haru kerara nai tiva ami nai tiva ami i variavo.

Vika tinavu ai muntukavano vai vaiinti nahentika qoraiqama timiterara nai tiva ami nai tiva ami i variavo.

⁴ Vika tiha, Aniqe Isareri aru vehi autu kaari ekaa vo vatanaa vo vatanaaka vika autu tauru kaate, ti variavo.

⁵ Vo vatanaa vo vatanaaka voharaaqi avitumavi vaiha, uva tiva taatauke ai qoraiqama amitareka auti variavo.

⁶ Idomuve, Isamairive, Moapive, Hakarive, ⁷Gebaarive, Amonive, Amarekive, Pirisiave, Taiaave, ekaa vika ai qoraiqama amitareka auti vaiha, voharaaqi avitumavi variavo.

⁸ Kempuka vatanaaka Asiriavata Rotira naintivara kahaqireka vikavata voharaaqi avitumavi ai qoraiqama amitareka auti variavo.

⁹ Oho, haaru are Midiani vatanaaka ntaihama kaanantema kera, vika ntaihaane. (Kaaranatura 31:7)

Siseraaka Jabinika Kisoni Namari tuvinaini variavara are vitanta aru kaanantema kera, vikavata arukaane. (Qiata Vaiinti 4:15, 24)

¹⁰ Vi entara vika Ento vatkaini variavara are vika naatara kaararo, vika vaatavano qaqi vata kanta vaharo nteri virave.

¹¹ Are Orepika Sepika qoraiqama nimitaanantema kera, vika qiata vaiintivata qoraiqama nimitaane. (Hetman 7:25)

Sebaaka, Salmunaaka nora vaiintitanta aru kaanantema kera, vika nora vaiintivata aru taiga kaane. (Hetman 8.21)

¹² Vi vaiintika tiha, Tenavu Kotiva i vatara oru varaariraro vi vatava tinavuni variarire tiara kaara are vika aru kaanara.

¹³ O Kotio, are ti Variqavano variaro.

Uvaivano konkomave, ahaka rapave, vuqa kaintema kera, are vi vatanaa vi vatanaaka ekaa raantaupirima kaane.

¹⁴ Ihavano itaqiro viharo nantave aiqinave tatoqa kaintema kera, ¹⁵ are nena aaron-aqohaira vika avataqira viramanta vika voqamake qetaate.

¹⁶ Noravauvu, are vika naatarakera, kaurira haika nimiramanta vika anomake ai kempuka tavaate.

¹⁷ Ho kaira vika kaurira haika varaivaro vika autu vatainiqama viramanta vika voqamake qeteha variqi vi vuru qutu vuate.

¹⁸ Qaqi kaira vika kankomake maa uvvara iriate:

Arema Noravano Kotiva variaro.

Arema nai virini kantaqaqaini variara Variqava vahara, ekaa maa vataraqaa raqiki variarava variaro.

84

Koraara ankuqihainauka maa ihira qara ntuvatora

¹ Noravauvu, are ekaa kempuka vataavama variaro.

Ike, are „Ieruharemini“ variiana Naavuva nai voqaraa Naavuvanoma vaivo.

² Mpo, vi Naavuraaqi ti maraquravano voqama kero vuataa ivaro vireva auti vaivo.

Mpo, are qaqi variqira vi variara Variqava variaramantara ti, te ekaa tenta vaataqohaive, tenta avu aatoqihaiive, tenta muntukaqihaiive, quaheha ariara ihi tiva amitaqi virerave.

³ Noravauvu, are ekaa kempuka vataava vahara are ti Avuhainaava, ti Variqavanoma variaro.

Ho tavaane. Tavivirave vo uvirive ai takuqira Naavuara antuqa arimanta viraqi nái naavu kaqe variarave.

Ai *ofaa* tainta tataaqa vika naativano variarire ti, ai Naavu naanteqaraini nái naavu kaqateha variarave.

⁴ Ai Naavuqi variaka, vika ekaa enta ihi tiha ai autu tuahere variaka, vika quaheha variavara are vika koqema nimite variaro.

⁵ Ariqaahai vika kempuka vareha, Saionini ai Naavuqi vireka auti variaka, vika quaheha vaivara.

⁶ Vika aahara vata Baka Uqitaini vitare vi variavaro aruvu airitaha voqi voqi vaivaro aaquvano ntiharo akantunavu mpiqa kaimanta vika aitareha vi variarave.

⁷ Vika vi variavaro vika kempukavano voqavata voqavata oru vi vaimanta Saioni Aiqinaqaa orunte, Kotira avuqaa oru variara.

⁸ Noravauvu, are ekaa kempuka vataavama variaro. Are Iekopira tinavu kaivaqara Variqavanoma variaro.

Mpo, are te ai aaraaina uvvara iriane.

⁹ Kotio, are tinavu avuhaina vaiti nena kaama taanara koqema amitaane.

¹⁰ Te vo naavuqi 1,000 enta variainarara kia noraiqaake iriraiti, ai Naavuqi vohaa enta variainara virara noraiqaake irirera.

Qora kaiqa vare variaka naavu kaqataaraqi kia ti viraqi variataa imantama vauro. Te tenta Variqa Naavu qentiana variarera, te virara hove tirera.

¹¹ Noravano Kotiva tinavu antua timite vaivama vairo. Viva tinavu Avuhainaava takuukero vaiva vaiharo tinavu koqema timitaqiro viharo, nora autuvata timi vaira.

Vira avuqaa avuqavuqamake ni variakara iriharo, viva kia vo haika nai tuataraitiro, ekaa koqe haika parumakero vika nimi vaira.

¹² Noravaauvo, are ekaa kempuka vataavama variaro. Ariara noraiqaakero iriqiro vi vai vaiintira, virama are koqema amitaqira vinarave, turo.

85

Koraara ankuqhainauka maa ihira qara ntuvatora

¹ Noravaauvo, are nena vata koqema kera vatera, tinavu kahaqama timitaaramanta tenavu Iekopira anku qaiqaa koqemake variqi vi vaunara.

² Are tinavu nena vaiinti nahenti qora kaiqa varauna uvra nunka timitaanarave. Are tenavu ai uva raqakaunara kaara kia tinavuqaa uva vataraitira, tauru timitauro tianarave.

³ Are tinavuara arara ite vaira qaqla kaararo ai arara itaiva vaahama vivara variaro.

⁴ Mpo Kotio, areqaima tinavu ruaruuma timite variaravama variaro. Are qaiqaa tinavu tivita varera, nena variananaini vuru kaane. Hauri are kia tinavuara quahehara variqira virora.

⁵ Mpo, ekaa entae tinavuara ai arara itaqiro vuanarove? Tinavu naantiara qovaraiqika vikaravatae, ai arara itaqiro vuanarove?

⁶ Mpo, are kiae tinavu qaiqaa kempukaiqama timitairaqe tenavu ariara quaheha variqi virarave?

⁷ Noravaauvo, ai muntukavano tinavuara vainara tinavu humiqehara, tinavu kahaqiraqe tenavu ho variare.

⁸ Ho Noravano Kotiva viva tinavu Variqavano vaimanta te aato vira amiha vira uva irirerave.

Viva tinavu nai kaama taikara tiharo, Vika muntuka paru i vaira qihaaqamake variqi vivarave, tirara ti, hauri tenavu anirante qaiqaa hampi aaraqaa vuarora.

⁹ Vira aatu qeteha koqemake ni variaka viva vika ruaruuma nimitaarirava aumantoma vairo. Vira mpeqa okara takuqi vaiva tinavu vataqaaahairo kia viraitiro, qaqi variqiro vuanaro.

¹⁰ Vi entara vaiinti nahenti Kotirara kempukaiqaaake iriqi viha, vika nariara nariara muntuka vateha variqi vivara. Vi entara vika avuqavuqamake niha muntuka qihaaqamake vaivara.

¹¹ Vi entara vataini vaika Kotirara kempukaiqamake iriqi vivaro vira avuqavu okaravano naaruvaihairo vaiinti nahenti ataama nimitaanaro.

¹² Quqaama, Noravano Kotiva tinavu koqema timitairaqe tenavu airi kara qantuke varaaanina.

¹³ Noravano vaiinti nahenti avuqavu ni aarara qerama nimitaara vika vi aararaqaa qihaaqamake vivara.

86

Devitiva maa ihira qara ntuvatora

¹ Noravaauvo, te vehi vaiinti vaiha tenta kahaqiarirava kia vaimantara tira, are ti uva irira tinta tiva timiane.

² Te ariara kempukaiqaaake iri vaunarara tira, are tiqaa raqliki vairaqe te kia qutu vuare.

Ti Variqavauvo, te ai kaiqa vaiintivano ariara noraiqaake iri vaunarara tira, are ti ruaruuma timitaane.

³ Mpo, te aatitairaqaavata, entaqivata, ai aaramaqi vi vaunarara tira, are ti uva irira ti aqurihamma timitaane.

⁴ Mpo Noravaauvo, te aqai aare vaunarara tira, are ti nena kaiqa vaiinti koqema timitairaqe te quaheha variare.

⁵ Noravauvo, are vaiinti nahenti koqema nimitehara vika qora kaiqa vare varia uvara nunka nimite variaravama variaro.

Ai aareha tinavu kahaqiane ti variakara ai muntukavano voqamakero vikara vaivarama variaro.

⁶ Mpo Noravauvo, are minti variaravara tira, te ariara ike mpo ti kahaqiane ti vauna uvara iriane.

⁷ Are te ai aare vauna uvara irianarara ti, nora maaravano tigi qovaraiqina entara te ai aararera.

⁸ Noravauvo, kia ai voqaara variqa vovano vaivo. Are vare variara kaiqava nai uritarakero vaivar, kia vovano ai aantantema kero kaiqa varaanaro.

⁹ Ekaa vo vatanaa vo vatanaaka are autukera vataarauka, vika naantiara ani ai avuqaa tori kauru aravi vaiba ai autu tuahereha noraiqama kevarave.

¹⁰ Are kempukavano vahara nora kaiqa, vo kaiqa vo kaiqa vare variaravama variaro. Areqaima Variqavano variaro.

¹¹ Mpo Noravauvo, nena antuqavano vai kaiqara ti humiqairaqe te ai quqaa uva avataqiqi viha koqe aaraqaa vuure.

Are ti kahaqirae te ariara noraiqaake iriqi viha, ai aatu qeteha koqemake variqi vuare.

¹² Noravauvo, are ti Variqavano variaramanta te ekaa tenta muntukaqihai ai autu tuahera karerave.

Ekaa enta te ai autuvano takuqi vairara iriha vira tuaheraqi virerave.

¹³ Te tavauraro ai muntukavano noraiqaakero tiriara vaivo.

Te qutu vuaka varianaini aumakaa otu vuarirava vaivara are ti ruaruama timitaanara.

¹⁴ Oho Noravauvo, kia vo vaiintiara noraiqaake iri variaka ti hampata iqoka raqireka auti variavo.

Kia vokiakara mpo ike tiva nimitaraiti, vika qoraiqama nimite variaka tivata haru kareka auti variavo.

Vika kia ariara noraiqaake iri varia vaiintikama variavo.

¹⁵ Noravauvo, vika minti variavaravata, are vaiinti nahentiara aaqurihamma nimite variara Variqavave.

Ai muntukavano voqamakero vaiinti nahentiara vaivo.

Ai araravano kia vaaka itaivara are vaiinti nahenti koqema nimitehara, vikara noraiqaakera iri variaravama variaro.

¹⁶ Are minti variaravara tira, tuqantaavira tivata aaqurihamma timitaane.

Are ti nena kaiqa nahenti maaquara irihara kempukaiqama timitera, ti ruaruama timitaane.

¹⁷ Noravauvo, are ti kahaqihara ti muntuka kukuqama timite variaravara tira, are vo haika ti humiqairaqe te vi haikara tave, ariara quqaama viva ti koqema timitaanarove tiasi, navutaakavata vi haikara taveha, kaurira haika varaae, turo.

87

Koraara ankuqirauka maa ihira qara ntuvatora

¹ Noravano Kotiva autukero vatai vatukava nai kaamatai ainqinaraqaama vairo.

² Vo vatuka vo vatukavano Isarerini vaivarovata, Noravano Kotiva Saioniara naane avuni antuqa arivaro vairo.

³ Kotira vatuka Saionio, are iri vairaqa Kotiva ariara koqe uva tiva taira ai tiva amiri. Viva tiharo,⁴ Isipive, Babironive, Pirisiave, Taiaave, Itiopiave, mini mini ti hutu tuahereka vaivarave. Te vikara tenta kaama tauna vaiinti nahentika, Saionihainaakave tirerave. ⁵ Naantiara airi vaiinti nahenti Saioniara vi vatukava tinavu nova vaivo tivarave. Kotiva ariara mintima tivo.

Nai virini kantaaqaini vai Variqava, viva naima naantiara vi vatukara koqema amiteharo kempukaiqama kaanaro.

⁶ Viva vo vatanaa vo vatanaaka nutu qara ntua teharo mintima tianaro: Maa vaiinti nahentika quqaa Saionihainaaka variavo,⁷ tiramanta vika ihi tivaqiqi viha mintima tivara: Kotiva tinavu koqema timite vai haikava, vo haika vo haikavano Saioni vatukaqihairo qovaraiqi vaivo, tivarave, turo.

88

Koraara ankuqirauka maa ihira qara ntuvatora

¹ Noravaauvo, are ti Variqavano ti ruaruama timite variarava variaro. Te aatitairaqaavata entaqivata ai aareha ike mpo tivaqi vi vaunara.

²⁻³ Nora maaravano tigi vaimanta te qutuarirava aumanto vaimantama vauro. Are ti uva irira ti kahaqiane.

⁴ Ti kempuka taiqa vimanta vokiaka tiriara tiha, Viva vaakama qutuaka varianaini vuunarove, ti variara.

⁵ Mpo, qutu vi vaiintira qaqrake vuantemake, vaiinti nahenti ti qaqrake vuavo.

Iqqaq arukaa vaiintira vata quvitaaraqi qaqlira aqukaantema kera, are ti taurukera kia ti kahaqiaramanta vauro.

⁶ Mpo, maiqa veva muntukaraqi are ti aqu kaaramanta te voqamake konkira ariraqima vauro.

⁷ Ai arara ite vaiva ti vara vatainiqama kaivo. Huvura namarivano vukuqiro aniharo vaiinti aqu ravaaqavu kaintemake, te qoraiqamavi vauro.

⁸ Are ti tonti koqeka qaqlina vara kaaramanta vika ti taveha nunurama timite variavo.

Te muageraqi vaiha viraqihai ruqemake vuarira aarava kia ho vaimantama vauro.

⁹ Ti muntuka qoraiqivaro auquruvano ti tivu mpiqe vaimanta te kia koqemake tave vauro.

Mpo Noravaauvo, te vo enta vo enta tenta kauqutanta virini tuherakeha ai aare vaunarave.

¹⁰ Mpo, qutu vuaka are nora kaiqa vare vainara hoe tavevarave?

Vika hoe himpi ai autu tuahera kevarave? ¹¹ Qutu vuaka varianaini variaka ai muntukavano vai okarara hoe vaiinti nahenti tiva nimivarave?

Vehi autuvi taiqa vuuanaini variaka, vikae ariara noraiqaake iriqi vi variavo?

¹² Voqama kero konkira ari vuuanaini variaka, vikae are nora kaiqa vare varianarara nati amai nai tiva amivarave?

Avu aato qumimaqama keha varianaini variaka, vika hoe are avuqavuqama kera ni varianarara tivaqvi vivarave?

¹³ Noravaauvo, vika kia ho mintiaveravata, te ai aareha ti kahaqiane ti vaunarave. Vo enta vo enta toqaqi te mintima keha ai aare vaunara.

¹⁴ Mpo Noravaauvo, te minti vauraravata, nantiharae are ti qoririma kera kukeqavira variaro?

¹⁵ Te qaraaka vaiinti vauna entaraqaahairo vo haika vo haikavano ti qoraiqama timitaqiro ani vaira kaara te qutu vuarirava aumanto vaimantama vauro.

Are qaiqaa qaiqaa ti ruquti variararo ti kempuka taiqa vimantama vauro.

¹⁶ Huvura namarivano vuku varero tuvintema kero, ai arara ite vaiva ti qoraiqama timite vaimantama vauro.

Are vo haika vo haika, aatu ite vai haikara tiqaa qovarama kaararo vi haikava ti vehiqama kaimantama vauro.

¹⁷ Vi haikava aatitairaqaavata entaqivata huvura namarivano raqutu kareva autintema kero, ti ututuma taimantama vauro.

¹⁸ Mpo, are ti tonti koqeka qaqlina vara kaararo konkira ari vai haikavaqai ti airuqiamantama vauro.

89

*Esraara ankuqihairo Etaaniva maa ihira qara ntuvatora
(1 King 4:31)*

¹ Te ekaa enta Noravano Kotiva vaiinti nahentiara muntuka vate vai okarara iriha, ihi tivaqi virera.

Noravaauvo, te tenta noqihai are vaiinti nahentiara noraiqaakera iriqira vi variana okarara tivaqvi vuari qaraaka vaiinti nahentive, konta naampaive, vi uvara iriate.

² Te kankomake iruraro ai muntukavano tinavuara vaiva kia taiqa viraitiro, qaqlira variqiro vuuanaro.

Naaruvavano ekaa enta vaintema kero, are tinavuara noraiqama kera iri variarava qaqlira variqiro vuuanaro.

³ Noravaauvo, are tihara, Te Devitira tenta kaama tauna vaiintira vataake vaiha, uva tiva taatauke virara tiha, Are ti kaiqa vaiintima variaro. ⁴ Ai ankuvano kia taiqa viraitiro, ekaa enta vairamanta viraqihai avuhainauka, vo vaiinti vo vaiinti noraiqamavi raqikiqi vivarave, tianara.

⁵ Noravauvo, naaruvaini variaka are nora kaiqa vare varianarara iriha, vika ai autu tuahere variara.

Naaruvaihainaaka ruvaaqumavi vaiha are vikara noraiqaakera iri varianarara iriha, ihi ti variara.

⁶ Nai tavave Nora Kotira voqaara naaruvaini vaivo?

Naaruvaini variakaqihairo kia vovano Nora Kotira uri aatarakero vaivo.

⁷ Naaruvaini variaka qita vaiintinavu Kotira aatu geteha ruvaaqumavi variara. Vika vira mpeqa okara taveha ututumate vaiha kauqu runkinkiri i variara.

⁸ Ike, Noravauvo, are ekaa kempuka vataavama variaro. Tavave ai voqaara vaivo?

Ai kempukavano uri aatarakero vaivara are nena kauqu ainqaa aqukera tiva taana uvvara kia qaqlira kera vo uva tiraitira, vi uvvara koqema kera iriqira vi variaravama variaro.

⁹ Are nena kempukaqohair a nora namariqaa raqiki varianara. Nora namarivano kumpetaqiro uri vaivara are virara tirema kera variane tiararo tirema vaira.

¹⁰ Qaakau haika arukaintema kera, are nena kempukaqohair Isipi ntaihamma kaanarave.

Are nena kempuka kauquqohair navutaaka raantaumpirima kaaramanta vika qetake vi anima vuara.

¹¹ Naaruvavano are iarava vaivaro vatavanovata are iarava vaira. Arema maa vataru tuqa aratera, ekaa viraqaa vai haikaravata qovarama kaanara.

¹² Ekaa mantaraini vai haikara, are vi haikara vi haikara autukera vataanara.

Nora ainqatanta Tabovata Hemonivata, vitanta ariara quaheha ai autu tuahere variavo.

¹³ Ike, are kempukavanoma variaro. Ai kempukavano nai uri aatarakero vaivo.

¹⁴ Kempuka naaquratanta arataava naavu kempukaqama taintemake, are avuqavu ni variana okaravavata, are avuqavuqama kera ko ti variana okaravavata, are raqiki variana taintara kempukaqama taivara, are viraqaa oquivi vaihara vaiinti nahentiqaa koqema kera raqiki varianara.

Kaiqa vaiintitanta nai nora vaiinti avuni viha vira kahaqi variantemake, ai muntukavano vaiinti nahentiara vai okaravavata, are vaiinti nahentiara noraiqaakera iri variana okaravavata, vitanta ai kahaqi variavara are vaiinti nahentiqaa koqema kera raqiki varianara.

¹⁵ Maara tiha ai autu tuahereha ihi ti variaka, are vika koqema nimite variaramanta vika quaheha variara.

¹⁶ Vika ai nora autuara iriha aatitairaqaavata entaqivata quaheha variqi viha, are avuqavu ni variana okararavata iriha, ai autu tuaheraqi vi variara.

¹⁷ Are vi vaiinti nahentika kempukavanoma variaro. Are tinavu kempukaiqama timite variaramanta tenavu navutaaka naatarake vauru.

¹⁸ Noravauvo, are tinavu Isareru Variqavano takuqu kera variaravama variaro. Are avuhainaa vaiinti kaama timitaararo viva tinavuqaa raqiki vaira.

Kotiva kauqu ainqaa aqukeharo Devitirara tu uvara

¹⁹ Are haaru ariara noraiqaake iri variakara tairakaa tihara,

Iqoka vaiinti taruka variaveravata, te qaraaka vaiinti vo rantate, vi vaiintirama kaama tauru.

²⁰ Vi vaiintiva ti kaiqa vaiinti Devitiva ni avuhainaa vaiintivano variarire ti, te vira kaamate, vira qitaqaa vahavera aqu amitaunarave.

²¹ Viva niqaa raqiki vairage te tenta kempukaqohai vira kempukaiqama amitaari 22 navutaaka kia ho vira aatara kaimanta, qora kaiqa vareka kia ho vira kaurira haika amiyara.

²³ Te vira navutaaka vehi autu amitarera. Vira navutaiqi vaika tema vika ruqutu kaari hiqintivara.

²⁴ Te kia vira qaqlira karaiti, virara noraiqaake iriqi viha, vira koqema amitaqivuariraro, viva ti hutuara iriharo kempuka vaiinti nora autu vataavama varianaro.

²⁵ Nora varuva Meditarenia Namariive tianaihairo viva raqikiqiro viviro, Iufaretisi Namari tuvinaini vo vata vo vataqaa raqikiqiro vuanaro.

²⁶ Mintiaqiro viharoma viva tirira tiharo, Are ti Qovama variaro. Are ti Variqavano vaihara kempuka orivano vaiinti antua amite vaintemata kera, are ti antua timite variaro. Are ti rruaruma timite variaravama variaro, tianaro.

²⁷ Viva minti tirage te vira noraiqamake virara tiha, Are ti maaqu kara hunkavano variaro, tiariraro viva ekaa avuhainaaka naatarakero nai noravanoma varianaro.

²⁸ Te ainqiqaa kauqu aquukeha virara tiva taaina uvava vi vauma varianaro. Te vikanti vaiha tiva taatau tauna uvvara, kia tauru karaiti, vi uvvara ekaa enta iriqi virera.

²⁹ Naaruvavano maahota vaintema kero, vira ankuvano maahota variqiro viraro vira ankuqihairo avuhainaa vaiinti, vo vaiinti vo vaiinti Isareriqaa raqikiqi vivara.

³⁰⁻³² Viva kuvuarama tairauka te tivatauna uvarave, uva maara tiva taunarave, minti minti iate tuna uvarave, vi uvvara vika kia avataqi viraiti, hampi aaraqaa vivera, vira kaara te vika vogamake kaavu numiqa karera.

³³ Te vika mintima nimiteha, Devitira kia qoririma karaiti, te virara muntuka vateha virara noraiqaake iriqi viha ³⁴ vikanti vaiha tiva taatau tauna uvaravata, kauqu ainqiqaa aquukeha tiva tauna uvaravata, kia tauru karaiti, ekaa vi uvvara qaqi iriqi virera.

³⁵ Te ququaama turo: Tinta takuqi vai auturaqaa te tiha, Kia te Devitirara una uva tirerave, turo.

³⁶ Vira ankuvano ekaa entama variqiro vuunararo. Kuarivano ekaa enta itaqiro vintemake, vira ankuqihai avuhainaa vaiinti, vovano vovano Isareriqaa raqikiqi vivara.

³⁷ Toravano maahota vaiharo itaqiro virara iriha, vaiinti nahenti mintima tivara: Devitira ankuvanovata mintiaqiro vuunarove, tivara. Kotio, haaru are vi uvvara vi uvvara minti tianara.

³⁸ Are minti tiaravavata, vate nana kaarae nena kaama taana vaiintirara arara itaivara vira qoririma kaaro?

³⁹ Are vikantira vahira tiva taatau taana uvvara nunkakera vira avuhainaa tovaqa qaqlini varakera horaqi aqu kaaro.

⁴⁰ Vira vatuka ututumataa ori vaantaavurara ravantiaqa raavantiaqama aqu kera, vira iqoka naavu, vo naavu vo naavuvata rampairi raampairima kaaro.

⁴¹ Are mintianara kaara aaraqaa vitare aitare i variaka viva i haikara muara varaa-manta, vo vatanaa vo vatanaka Isareri tataaqa variaka vira naaraihamma amite variavo.

⁴² Are vira navutaaka qaqlini kaaramanta vika avuhainaa vaiinti vira hampata iqoka raqihira vira aatarake, vora ntuvu amitaavoo.

⁴³ Vira navutaaka vira aatarakaate tira, are vira auvihehavaa qoraiqama kaanara.

⁴⁴ Are vira kauquqihira avuhainaa kauru qaqlini varakera, Isareriqaa raqiki vaira taiqa kera, vira avuhainaa taintavata vatainai vara aqukera iaro.

⁴⁵ Are viva vatainai qaqlini variqiro vuaina ihira iquqama kaararo viva vaaka vakaqo-raiqlama viro, vira kaara viva nora kaurira haika varaiavo.

⁴⁶ Mpo Noravauvo, are ekaa entae tinavu tivuqaa kukeqvira vainarave?

Mpo, nanti nanti entae nora ihavano itaqiro vi vaintema kero, ai arara ite vaiva qaqlini itaqiro vuunarove?

⁴⁷ Mpo, are tenavu maa vataraqaa vahuqa variqi vuainarara irihara variane.

Tinavuvara vika variqi vi, qumina vuru qutu vuate tira, are tinavu maa vataraqaa autu kera vataanarareve?

⁴⁸ Mpo, tavave tinavuqihairo kia qutiraitiro, qaqlini variqiro vuunarove?

Tavave kempukaiqama kero qutira haika aataraka keharo kia qutuanarove?

⁴⁹ Mpo Noravauvo, ai muntukavano tinavuvara vaiva taiqae vivo?

Are nena kauqu ainqiqaa aqu kehara Devitirara tiva taana uvvara vo? Vi uvvara qaqlina kera iaro?

⁵⁰ Mpo Noravauvo, vo vatanaa vo vatanaka ti ai kaiqa vaiintiara tauvaqa vaura uva ti variara kaara ti muntukavano qoraiqimantama vauro.

Are kia vika qora uva ti variara tauru karaitira, qaqlini iritehara variane.

⁵¹ Noravauvo, te are kaama taana vaintikama vauro.

Ai navutaaka te taini tainie vi ani vauramanta vika ti avataqi viha, tiriara tauvaqa vaura uva tivaqi viha, ti naaraihamma timite variavo.

⁵² Ho kaiqenavu ekaa enta Nora Kotira autu tuaheraqi vuare. Ququaave, qaqlinaavata ququaavema turo.

90

Mosiva Kotira aaro uvara

¹ Noravauvo, tinavu noka qokave, naaqua taatokave, tinavu kaivaqaukavarave, vika vika ariara tinavu antua timite vaivama vaivo ti variarave.

² Haaru kia ainqinavano qovaraiqi entarave, kia maa vataru autukera vataana entarave, nai haaru, are Variqavano qaqlini variqira vi variaravave. Are kia taiqa viraitira, ekaa enta qaqlini variqira vinarave.

³ Are vaiinti nahentiara tihara, Ne qaqi variqi vi vuru qutu vuate, tiaramanta, vika variqi vi vuru qutu vi, qaiqaa vataiqama vi variarave.

⁴ Tenavu 1,000 ihiara, airi ihima vaivo turaravata, are vi ihirara vohaa enta voqaara, 1,000 ihi vaivo, tianarave. (2 Pitaa 3:8)

Vaiintivano entaqi inaaraiqakaa maimaraara raqikiqiro vintemakera, are 1,000 ihiara iqu entave tianarave.

⁵ Huvura namaravano vaiinti raaqu varero vira raqutu kaintema kera, are tinavu vaiinti nahenti vaaka taiqake varianarave.

Tenavu maa vataraqaa qaqi variqi vuarirava vaireva, taira tavaiva inaaraiqa variro taiqa vintema kero vairo.

Ukauvano toqaqi qaraaka ⁶ variqiro viro enta ire inaini tamunta vintemakero, tenavu maa vataraqaa qaqi variaina entava iqu entaqaima vairo.

⁷ Ai arara ite vaiva tinavu vehi autu taiqake vairave. Ai arara ite vaira aatu tenavu voqamake qeteha vauro.

⁸ Tenavu qora kaiqa vare vaurava ai avuqaa qoqaa vairave.

Tenavu kukeqavi vaiha ai uva raqakaunara are vira vare vuru ataa inaini kehara tave varianarave.

⁹ Ai arara ite vaira kaara tenavu maa vataraqaa qaqi variqi vuarirava iquqama vaivo. Tenavu mintiaqi viha ke ke tivaqi viha qutuvi vaunarave.

¹⁰ Tenavu maa vataraqaa qaqi variqi vuaina entava 70 ihi vairave.

Tinavu kempuka qaqi voqavata vairera, tenavu 80 ihi varakehе vuru qutu vuainarave.

Mpo, tenavu vi ihinavura varaqi viha, vukaari utiha kaiqa vareha, nora maaraqvata variqi vi vauraro vi ihinavuva vaaka aitaraimanta qutuvi vaunarave.

¹¹ Oho, ai arara ite vai kempukava nai uritarakero vaivarо nai tavave vi kempukara aatarakero ho varianarove?

Vi kempukava uritarakero vaimantara ti, tenavu ai aatu qetaarirava vohaa qaramakero uritarakero vaimanta vaunara.

¹² Mpo, are tinavu koqe okara humiqairaqe tenavu maa vataraqaa inaara entaqi qaqi variqi viha kia qumina vairaiti, koqe kaiqa vare variariraro tinavu avu aatovano koqe iariре.

¹³ Mpo Noravauvо, tarentae tinavuara ai arara ite vairava vaahaanarove?

Mpo, are tinavu nena kaiqa vaiinti nahentiara aaqurihamо timitaane.

¹⁴ Ai munukavanо ekaa enta tinavuara vainara are vo enta vo enta toqaqi tinavu humiqairaqe tenavu quaheha ihi tivaqi viha maa vataraqaa variqi vuare.

¹⁵ Mpo, are nantima ihinavuara nora maara tinavuqaa vatehara tinavu qoraiqama timitaqira vuanarara irihara, are qaiqaa mintima ihinavuara kia tinavu qoraiqama timitaraitira, koqema timitaqira viraqe tenavu quaheha variqi vuare.

¹⁶ Are tinavu nena kaiqa vaiinti nahenti qaqi kairaqe tenavu are nora kaiqa, vo kaiqa vo kaiqa varenara tavaare.

Are tenavu kuvuarama taarirauka nena takuqi vai okarara numiqaira vikavata vira tavaate, turo.

¹⁷ Noravauvо, arema tinavu Variqavano variaro. Mpo, are tinavu koqema timite vairaque tenavu vo kaiqa vo kaiqa varaarirava ho variarire.

91

¹ Navutaara aatu qetakero, nai virini kantaaqaini vai Variqara aaqanto oru vai vaiintiva koqema kero vairaro ekaa kempuka vataava vi vaiintiraqaa koqema kero raqikiqiro vuanaro.

² Te Nora Kotirara mintima tirara:

Vivama ti antua timite vaivama vaivo.

Kempuka vaantaavuravano vaiinti antua amitaintema kero, viva ti antua timite vaivo.

Viva ti Variqavano vaimanta te viraqaa muntuvi vairerave, turo.

³ Uvirivano vaara vuitaara kia tavaintema kero, kukeqavi vai haikava ai qoraiqama kaantorave tiro, Noravano ai ruaruama amitaqiro vuanaro.

Nora rovaravano ai arukaantorave tiro, viva ariqaa koqema kero raqikiqiro vuanaro.

⁴ Uvirivano nai aroka rairakero nai naati aqu amitaintema kero, viva ai antua amitaqiro viraro navutaava kia ho ai aruanaro.

Viva ariara noraiqaakero iri vairara tiro, viva kainke voqaara ai antua amitaqiro viramanta navutaaka kia ho ai arivara.

⁵ Noravano ariqaa koqema kero raqikiqiro vi vairara tira, are qumina entaqi qora haika aatu qeterora.

Aatitairaqa are qumina navutaaka veva aatu qetaqi nirora. ⁶ Aatitairaqaave entaqive are qumina uhiakaa aatu qeterora.

⁷ Are tavairamanta 1,000 vaiinti ai kauqu kaanaaqaini qutu vimanta ai kauqu tanaraini 10,000 qutu vivera, kia virara qetaane. Vi haikava kiama ho ai arukaanaro.

⁸ Vi entara are nena avuqohairia Noravano Kotiva qora kaiqa vare vaika ntaihamaa kaainara tavenara.

⁹ Are nai virini kantaaqaini vai Variqarara tihara, Noravauvu, navutaaka ti harivorave ti, te ai aaqanto oru vairerave. Arema ti antua timite variaravave, tirera, ¹⁰ kia vo haikavano ai qoraiqama amitairaro, vaiinti aruke vai rovaravavata kia ai naavu aumanto ho anianarove.

¹¹ Vi entara Kotiva nai enselinavu nititairamanta vinavuka ariqaa koqemake maimaraara raqikiqi vi vaivara are homa vi aninara.

¹² Are nena aiqu oriqaa ruteqa kerorave ti, vinavuka ai tuate vaivara are koqemakera nuvaqira vinara.

¹³ Are raioniqaave, uqahiqaave/quaihaqaave, nena aiqu ntava tairamanta vika kia ho ai qoraiqama amitevarave.

¹⁴ Noravano Kotiva mintima tiro: Tiriara muntuka vate vaiinti nahentika, te vika ruaruama nimitainarave. Ti hutuara noraiqaake iriqi vi vai vaiinti nahentika, te vika antua nimitaqi virerave.

¹⁵ Mintimake vai vaiinti nahentika ti haareha tinavu kahaqiane tiqe te vika uva iriha vika kahaqirerave.

Nora maaravano vikaqi vairaqe te vika hampata vaiha vika kahaqihaa nora autuvata vika nimirerave.

¹⁶ Te vi vaiinti nahentika kahaqama nimitaari vika koqemake vaiha maa vataraqaa vukaiqamake variqi vivarave.

Te vika „Sataanira kauquqihai qaqlini, kuvantu karerave, tiro.

„Noravano Kotiva nariara muntuka vai vaiinti nahentikara vi uvura turave..„

92

Maara Entara iriharo maa ihira qara ntuvatora

¹ Noravauvu, are virini kantaaqaini variara Variqavama variaro. Koqemama te ariara koqeve tivakeha ihi tivaqti viha ai autu tuahera kaare.

²⁻³ Koqemama te *kitaaave* vo *musikive* ruqutiha, ai muntukavano tiriara vairara toqaqi vaiinti nahenti tiva nimiqi vi, entaqi are tiriara noraiqaakera iriqira vi varianararavata vaiinti nahenti tiva nimiqi vuare.

⁴ Noravauvu, are nora kaiqa, vo kaiqa vo kaiqa vare varianarara tiro, ti muntukavano koqe imantama vauro.

Are nena kauquqohairia koqe kaiqa, vo kaiqa vo kaiqa vare varianara tavehama, te voqamake quaheha ihi tivaqti vi vauro.

⁵ Ike, are vare variana kaiqava vo kaiqa vo kaiqvano, nai nora kaiqa kempuka kaiqama vaivo. Nena avu aatoqi iritaana uvava, nai nora uvama vaivo.

⁶ Oho, kia avu aato vataakave, hampi avu aato iri variakave, vika qora kaiqa vare variaka taiqe okarara kia kankomake iriara.

⁷ Ukauvano vaaka qampiqaintemake, qora kaiqa vare variaka vo haika vo haika vare, koqemake variqi vi variarave.

Vika mintimake variqi vi vaivarovata, vo enta Kotiva vika vehi autu kairamanta vika kia qaiqaavata vaivarave.

⁸ Noravauvu, vika mintimake taiqa vivara, are kia taiqa viraitira, ekaa enta Avuhainaava vahara tinavuqaa raqikiqira vinarave.

⁹ Noravauvu, te maa haikarara kankomake irunara. Naantiara ai navutaaka ekaa vehi autuvi taiqa vimanta qora kaiqa vare vaikavata ekaa raumpirimavi taiqa vivara.

¹⁰ Are ti kempukaiqama kaararo ti kempukavano qaakau purumakau qora kempuka voqaarama vaivo.

Are ti koqema timitaaramanta te quaheha vauro.

¹¹ Te tenta avuqohai tavaurara are ti navutaaka naatara kaanarave. Qora kaiqa vareha ti navutaiqi variaka, are vika aru ntataqi vuaramanta vika oi aai ti varia uvara tenta aatoqihai irunarave.

¹² Deti katarivano koqema kero qampiqaintemake, avuqavu ni variaka koqemake variqi vivara.

Vika Lebanoni vataimi *sidaa* katarivano koqemakero qampiqaintemake, koqemake variqi vivara.

¹³ Nora Kotira Naavu vainaini ututaa katarira voqaara, vika koqemake variqi vivara.

¹⁴ Koqe katarivano airi ihiara variqiro viharo qaqqai koqe tava ire vaintemake, vika koqe kaiqa varaqi vivi, konta naampaiqamavi, qaraaka vaiinti nahenti voqaara vaivarava.

¹⁵ Vika mintima tivara: Noravano Kotiva vaiinti nahenti avuqavuqama nimite vaivave. Viva ti antua timite vaiva vaivaro kia qora okara voqavanovata viraqi vairave, tivara.

93

¹ Noravano Kotiva Avuhainaava vaharo ekaa haikaqaa raqiki vaivaro vira nora autuvanovata vira kempuka okaravanovata nai vira avuhainaa utavaaqa voqaara vairave.

Viva maa vatara tuqa kempukaiqama kero aratairara tiro, kia ho vovano vira qaki qaki iariravama vaivo.

² Ike, Noravauvu, are nai haaru kia vo haikavanovata vai entara are raqikiqira ani varianarave. Are kia vo entavata kia vairaitira, are ekaa enta variqira ani variaravama variaro.

³ Noravauvu, nora namarivano voqama kero auva nteharo vukuqiro aniharo paama tivakero vata ruquti vairave.

⁴ Mintimakero kumpetaqiro uri vaivarovata, ai kempukavano viravata uri aatarakero nai voqavatama vaivo.

Are kempukavano nai virini kantaaqaini Variaravama variaro.

⁵ Are uva tiva taarava kempuka uva vaivaro kia vovanovata vi uvara nunka kero vo uva tianarove.

Noravauvu, ai Naavuvano ekaa enta ekaa enta takuqu kero variqiro vuanarove, turo.

94

¹ Noravauvu, qora kaiqa vare variaka, are vika náivata qoraiqama nimite variara Variqavama variaro.

Are mintima kehara aru vuntuke variara Variqavara tira, qora kaiqa vare variaka nena arara ite vai okarara numiqaane.

² Are vataini variaka uva avuqavu i variaravara tira, himpira vika nái autuaraqai noraiqaake iri variaka qoraiqama nimitaraqe tenavu vikara huviqorave tiare.

³ Mpo Noravauvu, qora kaiqa vare variaka nanti nanti entae qaqi quaheha variqi vivarave? Are tarentae vika quahe vaira taiqa kenarave?

⁴ Vika nái mahuta tivaqi viha, airi qora uva ti variavo.

⁵ Noravauvu, vika ai vaiinti nahenti qoraiqama nimite variavaro vika nutuvano vatainiquama vivo.

Qora kaiqa vare variaka are kaama taana vaiinti nahentikaqaa nora maara vate variavo.

⁶ Vika tentoqa nahentivata *iqa/viqa* vaintivata arukeha, vo vataihai maini ani variakavata aruke variavo.

⁷ Vika arukeha tiha, Noravano Kotiva tenavu vare vauna kaiqara kiama tave vaivo. Iekopira Variqavano tinavu kaiqara kia noraiqaakero iriraitiro, kia virara tianarove, ti variara.

⁸ Oho, ne vaiinti nahenti qoraiqama nimite variaka, rauriha variate. Ni avu aato kiae vaivo?

Tarentae ni avu aatovano kanko ira ne Kotira okarara irivarave?

⁹ „Te ni irama nimitarerave.“ Kotiva tinavu aato autukero timitaiva, viva nai kiae iri vaivo? Tinavu avu autukero timitaiva, viva nai kiae tave vaivo?

¹⁰ Kotiva vo vatanaa vo vatanaakaqaa raqikiharo vo haika kaara vika ruqutuke vaiva, viva tinavu Isarer i nora vaiintivata kiae ruqutu kaanarove?

Kotiva vo okara vo okara tinavu vaiinti nahenti humiqe vaiva vaivar, vira avu aatovano kiae vi okarara vi okarara kankoma kero iri tave vairave?

¹¹ Ho iriate. Noravano Kotiva ekaa vaiinti avu aatoqi vai uvvara kankoma kero iri vaivama vairo.

Viva tavaivar o tinavu vaiinti nahenti avu aatoqi vai uvava qumina uvaqai vaira.

¹² Noravauvu, koqe aaraqaa vuate tira, are vika uva maara tiva nimi variiana vaiinti nahentika, vika vi uvvara avataqvi viha quaheha variqi vivara.

¹³ Maaravano qovaraiqaina entaraqaa vika muntukavano paru ira variqi vi vaivara, are qora kaiqa vare variaka ntaihena entava qovaraiqiarire.

¹⁴ Noravano Kotiva kia nai vaiinti nahenti qoririma karaitiro, kia vo enta vika qaqira kaanaro.

¹⁵ Naantiara qovaraiqaina entaraqaa, *ko* rahe vaika kia qaiqaa hampi *ko* tiraiti, avuqavuqamake *ko* timanta avuqavu ni vaikavata vika uvvara koqe uvave tivara.

¹⁶ *Qora kaiqa vare variaka tiqaa una uva vatera tavave ti kahaqiharo vi uvvara vara qaqini kaanaro?*

Qora kaiqa vare variaka ti qoraiqama timitevorave tiro, tavave ti mantaraini vaharo ti kahaqianaro?

¹⁷ Ho Noravano Kotiva vivaqai ti kahaqi vaira. Viva kia ti kahaqitiro, te vaakama quutuvi, kia uva tiaka varianaini otu vauraitiro.

¹⁸ Noravauvu, ti aiqvano vauriri ntaimanta te kaavunti ruhiqau vuraro, ai muntukavano tiriara vaiva ti tuataira.

¹⁹ Nora maaravano tiqi vai entara are ti muntuka kukuqama timitaaravera te quaheha vauro.

²⁰ Qiata vaiinti qora kaiqa vareha, hoe vika tiha, Kotiva tinavu kahaqi vaivo, tivarave? Vika qora uva tiava vaiinti nahenti qoraiqama nimite vaimanta vika nora maaraqi variara.

²¹ Vi vaiintika ruvaaqumavi vaiha, avuqavu ni variaka qoraiqama nimiteha, koqe vaiintiqa qumina una uva vateha vika aruke variara.

²² Vika mintimake variamanta te Noravano Kotiva vainaini oru vuraro viva kempuka vaantaa vura voqara ti antua timite vairava.

²³ Viva vika nái qora kaiqa varera kaara ntaihaanaro. Vika vira uva raqakera kaara viki vehi autu taiqa kaanaro.

Noravano Kotiva vika ekaa vehi autu taiqa kaanarovema, turo.

95

¹ Aniqenavu ihi tivaqvi viha Nora Kotira autu tuaheraqvi vuare.

Viva tinavu antua timiteharo tinavu ruaruama timite vaiva vairara ti, kaiqenavu quaheha noraiqaake ihi tivaqvi vuare.

² Aniqenavu viva inaini oru vaiha virara koqeve tivaqvi viha, *musiki* ruqutiha vira autu tuaheraqvi vuare.

³ „Ne kiae iriavo?“ Noravano Kotiva nai Variqa noravanoma vaivo.

Una variqa, vo variqa vo variqa variavaro Noravano Kotiva vika uri aatarakero avuni vaivo.

⁴ Maa vataro veva muntukaraqive, vo ainqina vo ainqinave, ekaa vi haikava vi haikava viva i haikavama vaivo.

⁵ Viva nora namari autukero vatairara tiro, vi namariva viva i haikavama vaivo.

Vira kauquvano aahara vatavata autu kero vatairave.

⁶ Mintima vaimantara ti, aniqenavu oru hiqintivi vaiha vira autu tuahera kaare.

Kaiqenavu oru Noravano Kotiva tinavu autu kero vataira avuqaa tori kauru aravi variare.

⁷ Vivama tinavu Variqavano vaimanta tenavu vira sipisipi vauraro viva tinavuqaa koqema kero raqiki vaivo.

Vate ne Kotira uva iriate. Viva mintima tivo:

⁸ Ni kaivaqaukavara aahara vata Masainive Meribainive vaiha, tiriara viva tinavuqaa kiama ho raqikianarove tivakeha, nái avu aato kempukaiqamate vira uva kia iriraiti, variqi vuantemake, nevata mintivorave.

⁹ Te ni kaivaqaukavara nora kaiqa vara nimitaqi vi vauramanta, vika kia virara noraiqaake iriraiti, vika ti avatamake tavarekaqai auti variara.

¹⁰ Vika mintiaqi vi variara kaara ti arara itaiva 40 ihi variqiro vimanta vaunarave. Te vikara tiha, Maa vainti nahentika inaara hampi aaraqaa ni variakave. Vika ti uva raqakeha kia ti aaraqaa ni variarave.

¹¹ Vira kaara ti arara itaimanta te tenta kauqu aiqiqaa aquukeha tiha, Te vo vata nimitaainarraqaa vika kiama ho oru auraara vaivarave, tiro. Kotiva minti tura.

96

¹ Ne qaraaka ihi Nora Kotira tiva amitaate. Ne ekaa maa vataraqaa variaka, ne Kotira ihi tiva amitaate.

² Ne Kotira ihi tiva amiteha vira autu tuaherakeha viva ni kuvantu nimitaainarara vo enta vo enta vaiinti nahenti viti viri tiva nimiqi vuate.

³ Vira mpeqa okaravano takuqi vaira ekaa vo vatanaaa vo vatanaaka tiva nimiqi vuate. Viva nora kaiqa, vo kaiqa vo kaiqa ni vara nimitairara iriha, vika tiva nimiqi vuate.

⁴ Noravano Kotiva nai uritarakero avumi vaimantara ti, tenavu vira autu tuahera kaariravama vaivo. Vo variqa vo variqa variamantavata, tenavu Nora Kotira aatuqai qetaariravama vaivo.

⁵ Ekaa vo vatanaaa vo vatanaaka variqa vaireka, una variqaqai variavaro Noravano Kotiva vivaqaima naaruvave, naaruvaini vai haikarave, autu kero vataivama vaivo.

⁶ Vira mpeqa okaravanove, viva takuqi vai okaravave, vira Naavu turuaraini mpiqe vaimantara ti, ne Nora Kotira autu noraiqaake tuahera kaate.

⁷ Ne ekaa vo vatanaaa vo vatanaaka, Kotirara mintima tiate: Vira autuvano nora autu vaivarao vira kempukavanovata uritarakero vaivo, tiate.

⁸ Ne vira nora autuara irihama vira autu tuahereha, *ofaa* vo vare vira Naavuni vuate.

⁹ Viva koqe kaiqaqai vare vaiva nai turuara takuqi vainaini vairara irihama, ne kankakaavi vaiha vira quahama amitaate.

Ne ekaa maa vataraqaa variaka Nora Kotira avuqaa vaiha aiqu kauqu ntiri ntiri i vaiha variate.

¹⁰ Ne Kotira vaiinti nahenti ekaa vo vatanaaa vo vatanaaka mintima tiva nimiate: Noravano Kotira Avuhainaava vaiharo ekaa haikaqaa raqiki vairave.

Vivama maa vatarua tuqa aratairara tiro, vovano kia ho vira qaki qaki ianarove.

Viva maa vataraqaa variaka uva iriharo avuqavu *ko* tianarove, tiate.

¹¹ Kairamanta naaruvavanovata vatavanovata quaheha variate.

Kairamanta nora namarivanovata ekaa viraqi vaikavavata noraiqaake quaheha auva ntataate.

¹² Kairamanta naahovanovata ekaa viraqi vai naaho maatavavata quaheate.

Nantaqiraa katari vo katari vo katarivano quaheha ihi tivaqiqi vuate.

¹³ Vika mintimake Nora Kotira avuqaa ihi tivaqiqi vivara.

Ho tavaate. Noravano Kotira vataini tuvireva auti vaivo. Viva maa vataraqaaahainaa uva avuqavu ireva tuvirevave.

Viva nai quqaa okarara iriharo ekaa vataini variaka uva avuqavuqiharо vohaa garamakero rairaananaro.

97

¹ Maa vatavao, Noravano Kotira Avuhainaava vaiharo ekaa haikaqaa raqiki vairara tira, are quaheha variane.

Nora namari avuta kanta varia vataukao, nevata quaheha variate.

² Tonavuvanovata voqama kero konkira ari vaivavata vira ututumatero vaivarao, kempuka naaquratanta arataava naavu kempukaiqama amitaintemake, viva avuqavu ni vai okaravavata, viva avuqavuqama kero *ko* ti vai okaravavata, vira avuhainaava tainta kempukaiqama amitaavarao viva viraqaa oquivi vaiharo vaiinti nahentiqaa koqema kero raqikiqiro vi vaira.

³ Ihavano vira avuni viharo, vira navutaaka hini hini variaka tatoqaqiro vi vaivarao

⁴ 4 vira aaquakaavano utuqiro viharo, ekaa vata ataamake vaimanta vataini variaka vira taveha, voqamake aiqu kauqu ntiri ntiri i vaimanta variara.

⁵ Noravano Kotiva ekaa maa vataro raqiki vaiva vataini vi ani vaimanta, vahaveravano ravita vintemake, aiqina vika vira taveha ravita vi variara.

⁶ Naaruvavano tiharo, Kotiva avuqavu kaiqa vare vaivave, ti vaimanta ekaa vo vatanaaa vo vatanaaka Kotira mpeqa okaravano takuqi vaira tave variara.

⁷ Una variqa nutu tuahereha vika mahuta ti variaka kaurira haika varevara. Oho, naantiara ekaa vi haikava vi haikava Kotira aiqutaraini higintivi vaivarave.

⁸ Noravauvo, are avuqavuqama kera ko ti varianarara ti, Saioniqi variakavata, ekaa Iutaini vo vatuka vo vatukaqi variakavata, quahe variara.

⁹ Noravauvo, are nai virini kantaqaqini variaravama variaro. Ai autuvano ekaa una variqa autuvata uri aatarakero vairave.

¹⁰ Nora Kotirara muntuka vaimanta variaka, ne qora kaiqa, vo kaiqa vo kaiqara kia antuqa arira variate.

Noravano Kotiva nariara noraiqaake iri variakaqaa koqema kero raqiki vaharo, navutaaka kauquqihairo vika ruaruama nimite vaira.

¹¹ Viva avuqavu ni variaka avu aato ataama nimite vaira. Koqemake variqi vi variaka quaheha variara.

¹² Ne avuqavu ni variaka, Noravano Kotiva ni koqema nimite vairara iriha quaheha vira autuvano takuqi vaira tuaheraqi vuante.

98

¹ Noravano Kotiva nora kaiqa, vo kaiqa vo kaiqa tinavu vara timitairara ti, kaiqenavu qaraaka ihi Nora Kotira tiva amitaare.

Viva avuqavu ni vaiva nai kempuka kauqu takuqi vairaqqohairo navutaaka naatara timitairave.

² Ekaa yatanakaaka tavaavararo Noravano Kotiva tinavu nai vaiinti nahentiqa muntu/vuntu keharo navutaaka naatara timitairave.

³ Viva tinavuara noraiqaakero irivaro vira muntukavano tinavuara voqavata vaivarora tiro, viva kia tinavu Isareriera tauru karaitiro, tinavu Variqavano vaharo navutaaka kauquqihairo tinavu Isarereri qaqini varakaimanta ekaa naato vatanaaka iri tavaarave.

⁴ Virara virara irihama ne ekaa vataini variaka naverai tiha Nora Kotira quahama amitaate. Ne quaheha musiki ruqutiha noraiqaake ihi tivaqi vuante.

⁵ Naaquntaqohai taaqimataa musikira, vo musiki vo musiki varake vira vira ruqutiha ihi tivaqi viha Nora Kotira quahama amitaate.

⁶ Ne aanumaarave/nomave, sipisipi pomuve, vi haikara vi haikara varake vuaqqaqvi viha, Avuhainaara Nora Kotira avuqaa vaiha, quaheha naverai tivaqi vuante.

⁷ Kairamanta nora namarivanovata ekaa viraqii vaikavata noraiqaake quaheha avua ntaate. Maa vatavavata ekaa viraqaa vaikavata noraiqaake uva tivaqi viha Kotira quahama amitaate.

⁸ Nora namarivauvo, inaara namarivauvo, nenta kauqu ruqutiha quaheha variate.

Aiqinavauvo, nevata ihi tivaqi vuante.

⁹ Ne ekaa vi haikava vi haikava Nora Kotira avuqaa ihi tivaqi vi vaivaro viva vataini tuvu vaiinti nahenti uva avuqavu iarire.

Viva nai quqaa okarara iriharo ekaa vataini variaka uva avuqavu qiharo vohaa qaramakero rairaananaro.

99

¹ Noravano Kotiva Avuhainaava ekaa haikaqaa raqiki vaiva vairara ti, ne ekaa vo vatanaa vo vatanaaka aiq kauqu ntiri ntiri iramanta variate.

Noravano Kotiva nai avuhainaa taintaqaa oquivi vaimanta nora enseli aroka vataaka vira hini hini variarave. Kairaro vatavano qaki qaki iarire.

² Noravano Kotiva kempukavano Saionini vaharo viva uritarakero ekaa naato vatanaaka Avuhainaava vaivo.

³ Naantiara ekaa naato vatanaaka vira nora autuara iriha nái kauqu runkinkiri ivarave.

Noravano Kotiva vivaqaima takuqu kero vaivama vaivo.

⁴ Mpo Noravauvo, are Avuhainaava kempukavano variararo ai muntukavano avuqavu ni varia okararaqai vaivara, are vi okarara tinavu Isarereri humiqaaramanta tenavu vira avataqi viha vaiinti nahentiqa raqiki vaunarave.

⁵ Ho ne ekaa Nora Kotira autu tuahera keha vira aiqutaraini vaiha vira quahama amitaate.

Noravano Kotiva vivaqaima takuqukero vaivama vaivo.

⁶ Mosika Eronika Kotira kaiqa vara amitaat vaiintitanta variavaro Samuerivavata Kotira aare vai vaiintiva vaira.

Vinavuka Nora Kotira aaraavararo viva vinavuka uva iriharo nái tiva nimirave.

⁷ Viva uromuravano vaavi vairaqi vaharo nai vaiinti nahenti tiva nimimanta vika viva tivatatai uvara vo uva vo uva iriqi vuvarave.

⁸ Mpo Noravauvu, are tinavu Varicavanoma variaro.

Are ai vaiinti nahenti ai aaraa uvara iri varianarave. Vika tavaavara are vika qora kaiqa varaa uvara nunka nimite variaravama variaro.

Are vika nái qora kaiqa kaara qoraiqama nimiteharavata, vika uva nunka nimite varianarave.

⁹ Virara virara iriha kaiqenavu Nora Kotira nora autu amihā, vira takuqina aiqinaraqaa vaha vira quahama amitaare.

Noravano Kotiva vivaqaima takuqukero vaivama vaivo.

100

Kotirara koqeve tia ihira

¹ Ekaa naato vatanaaka, ne quaheha naverai tiha Nora Kotira autu tuaheraqi vuate.

² Ne quaheha vira avuqaa oru vaha ihi tiva amitaate. ³ Maa uvara kankomake iringe: Noravano Kotiva vivaqaima Varicavanomo vaivo.

Viva tinavu autukero vataimanta tenavu viva ikama vauro.

Tenavu viva i sipisipika vauraro viva tinavuqaa raqiki vaimantama vauro.

⁴ Aniqenavu vira Naavuvano vai vatukara qentiana oru vaha, virara koqeve tivaqvi viha vira autu tuahera kaare.

Viva nora kaiqa tinavu vara timite vairara iriha, virara koqeve tivaqvi viha vira nora autu tuahera kaare.

⁵ Vira okaravano koqe okara vaivaro vira muntukavano nai vaiinti nahentiara ekaa entama variqiro vuanarove.

Viva kia vika qaqlira karaitiro, ekaa vika kuvuarama tekaravata noraiqamakero iriqiro vuanarovema turo.

101

Devitiva maa ihira qara ntuvatora

¹ Noravauvu, ai muntukavano vaiinti nahentiara vai okararavata, are avuqavuqama kehara raqiki variiana okararavata iriha te ihi tiha ai autu tuahera karera.

² Tiquaa uva variantorave ti, te avuqavuqamake ai aaraqaa nirera. Mpo, te mintiarirara tarentae are tuvu ti kahaqinarave?

Vovano tiqaa uva vataantorave ti, te tenta naavuqi variakaqaa koqemake raqikirera.

³ Te tenta tivuqohai kia vaaqu okara vo okara vo okara autira tavareera.

Ai tauvaqa utu amite variakara kia ti hantuqa vaimanta, te kia vika tontiqamake vika hampata vairera.

⁴ Kia tenta avu aatoqi unaqaraiqama keha kaiqa varaainarara iriqi virera.

Te qora kaiqa tauvaqa utu amitarera.

⁵ Te tavaari vokiaka evaara evaara nái kena vaiintiara tauvaqa vauraa uva tivera, te vika qioqama karera.

Vokiaka nái nutu tuaherakeha, nái kena vaiinti nahenti toma nimite vaivera, te vika qioqama karerave.

⁶ Te Kotirara noraiqaake iri variaka quahama nimitaari vika homa ti hampata avuhainaara naavuqi vaivara.

Kia vikaqaa uva vaimanta avuqavuqamake ni vaika, vikaqaima ti kaiqa vara timitevara.

⁷ Una uva ti variaka kiama ti avuhainaara naavuqi ho vaivara.

Unaqaraiqama keha koqe kaiqa vare variaka kiama ho ti aqamoto himpi vaivara.

⁸ Te vo enta vo enta qora kaiqa vare variaka aru ntata kaari vika kia ho Nora Kotira vataukaqive, maa vataraqqaave, vaivara.

102

Vaiintivano nora maaraqi vaharo Kotira aaro uvara

¹ Mpo Noravauvu, te ai aaraaina uvara iriane. Mpo, are qaqlira kairaro te ai aareha ti kahaqiane tiaina uvava are inanaini oru vuarire.

² Mpo, te nora maaraqi variaina entara are kia ti tivuqaa kukeqavi vairaitira, nena aato ti timihara te ai aaraaina uvara irira vaaka vo tiane.

³ Iha muravano oru vaharo vaaka ruqema vintema kero, te vataini variqi vuarirava vaakama taiqa vuanaro.

Iha ite vaintema kero, ti vaatavanovata voqamakero iha ite vaimantama vauro.

⁴ Ahakavano tamunta vintema kero, ti muntukavano qoraiqmanta vauraro kia ti karavata naataa imantama vauro.

⁵ Te ke ke tivaqi vi vauraro ti vaatavano oqita viro vuhaariru aqu vimantama vauro.

⁶ Uvirivano aahara vataini nariaraa vaintemake, te tentaraa vaiha kia koqemake vauro. Haarua nuqihiqi maromarivano nariaraa vaintemake, te tentaraa vauro.

⁷ Uvirivano naavu qjataqa nariaraa vaintemake, tevata tentaraa vauro.

Entaqi te kia vaitaraita, qaqiqai avu rampaiteha variqi vi vaunara.

⁸ Ti navutaaka toqaqihai hoqaramate ti naarahama timitaqi vivi vuru entamake variara.

Vokiakara qoraiqama vuate ti, vika ti autuqaa qora uva tiva nimite variara.

⁹⁻¹⁰ Ai voqamakero tiriara arara ite vaivo. Vaiintivano vo haika vara aqu kaintema kera, are ti qaqini vara kaaro.

Mintianara kaara hantavano ti kara vaivaro, auquruvano ti *kaapuqi* hiqinti vaimanta namari vataake ne vaunara.

¹¹ Kuarivano erainaini vaaka ruhunku vintemake, te inaaraipa varike taiqa virara.

Ukau teqa kaavaro vaaka aaharauqama vintemake, tevata vaakama taiqa virara.

¹² Noravauvu, te mintimake variariraravata, are Avuhainaava ekaa enta raqikiqira vinarare.

Ai nora autuvano kia taiqa viraitiro, ekaa enta qaqi variqiro vi vaira ekaa naantiara qovaraiqika, vikavata ai autuara iriha vira tuaheraqi vivara.

¹³ Ququaama are vo enta Saioniqi variaka aaqurihama nimitenara. Ho, vate vi entava anintiavo. Are Saioniqi variakara mpo ike tihiha vika quahama nimitaane.

¹⁴ Saioni vatukavano qoraiqama viro vaimantavata, tenavu ai kaiqa vaiinti nahenti qaqiqaima vi vatukarara muntuka vatauro.

Vaantaavura ori qaqini vara aqu aquma kaava kiri kairiro vaimantavata, tenavu virara qaqiqai mpo ike ti vauro.

¹⁵⁻¹⁶ Ho naantiara Noravano Kotiva Saioni vatuka qaiqaa autu kaira vi entara ekaa vo vatanaa vo watanaaka vira mpeqa okara taveha getevara.

Vi entara ekaa avuhainaauka vataini vaika, vika Nora Kotira kempuka aatu qeteha, aiqu kauqu ntiri ntiri i vaira vaivara.

¹⁷ Vi entara vehi vaiinti nahenti Kotira aaraivaro viva vika kia qoririma nimitaraitiro, vika uva irianaro.

¹⁸ Ho naantiara tenavu kuvuarama taarirauka Noravano Kotiva vare vai kaiqara kankomake iri taveha vira autu tuahera kaate ti, kaiqenavu vi uvvara qara ntuva taari vikavata vi uvvara tavaate.

¹⁹ Tenavu maantimake uva qara ntirera:

Noravano Kotiva naaruvaini nai turuaraini vaiharo maa vatara viavi tave vairave.

²⁰ Viva viavi taveharo rumpataa vaiinti nahentika ke ke ti varia uvvara iriro, vikavata uva taveha arukaate ti variaka kuvantu nimite vairave.

²¹ Tenavu vi uvvara mintimake qara ntuva taari Saioniqi vai vaiinti nahentika Nora Kotira autu tiva qoqaiqama keha, vira autu tuaheraqi vuate.

²² Vi entara hihai hihai vo watanaa vo watanaaka nai avuhainaauka hampata Kotira quahama amitareka Ieruharemipi ani ruvaaqivarave.

²³ Mpo, te qaraaka vaiinti vauna entara, Noravano Kotiva ti kempuka taiqa kero, te variaina entaravata iquqama kairave.

²⁴ Viva mintimake kaimanta te virara tiha, Ti Variqavauvo, are ekaa enta ekaa enta variaravave. Mpo, te kia naampaiqiraiti, qaraaka vaiinti vaiha qutu vuvarorave. Kia ti vaaka vitaane.

²⁵ Haaruqama kera are maa vatara tuqa autukera arataanarave. Are nena kauquqohaira naaruvavata autukero vataanarave.

²⁶ Vatavanovata naaruvavanovata variqi vi vuru taiqa vivaravata, are ekaa entama qaqi variqira vinarave. Utavaaqavano nihiqama viro qunahi vinantemake, vitanta taiqa vivara. Qaraaka utavaaqaa nonkireva iharo, haaruara qaqini vara kaintema kera, are vitanta taiqa kenara.

²⁷ Vitanta taiqa vivaravata, are kia taiqa viraitira, haaru varianantema kera, ekaa enta qaqi variqira vinarave.

²⁸ Are mintiaqira viramanta tinavu vaintivara, vikavata ai aqamoto koqemake variqi vivara, are vika kuvuarama tekavata antua nimitaqira viramanta vikavata koqemake variqi vivarave.

103

Devitiva maa ihira qara ntuvatora

¹ Mpo, kaiqe te Nora Kotira autu tuahera kaare.

Kaiqe ekaa tenta avu aato muntukaqihaiive, tivaata maraquraqohaive, Nora Kotira autuvano takuqi vaira tuahera kaare.

² Noravano Kotiva qaiqaa qaiqaavata ti koqema timite vairara kia tauru karaiti, te ekaa virara iriqi viha vira autu tuaheraqgi virerave.

³ Viva te qora kaiqa varauna uvvara ekaa nunka timitero, ekaa ti aihaviraaravata koqema timite vaira.

⁴ Viva tiriara viva qutu vuaka varianaini vaaka vuantorave tiro, ti ruaruama timite vaimanta qaqi vauro.

Vira muntukavano tiriara vaivavata, viva aaqurihama timite vaivavata, vitanta ti koqemake timite variamantama vauro.

⁵ Te vatainai variqi vi vauraro viva ti koqema timitaqiro viharo ti qaraakaiqama timite vaimantama vauro.

Viva mintima timite vaivarora tiro, ti kempukavano memora kempuka voqaara, kia taiqa viraitiro, qaraakaiqama viro vaimantama vauro.

⁶ Qora vaiintinavu vaiinti nahentiqaa maara voqavata vatevorave tiro, Noravano Kotiva vika kahaqiharo vika uva avuqavuqama nimite vaivaro vika maaravano taiqa vi vaira.

⁷ Haaru Noravano Kotiva nai varareva i kaiqara Mosira tiva amiro, viva nora kaiqa, vo kaiqa vo kaiqa Isarer i vaiinti nahenti vara nimitaimanta vika tavaara.

⁸ Noravano Kotiva tinavu koqema timiteharo tinavu aaqurihama timite vaivaro kia vaaka vira arara ite vaira. Vira muntukavano tinavuara voqama kero vaira.

⁹ Viva kiama enena tinavu titianaro. Viva tinavuara arara ite vaiva kiama vukaiqama kero varianaro.

¹⁰ Tenavu vira uva raqake vaunara kaara viva tinavu noraiqaakero ruqutuataara vaivaro, qihaaqama kero tinavu ruquti vaira. Tenavu qora kaiqa autunara kaara viva tinavu qoraiqama timitaataara vaivaro, kia minti vaira.

¹¹ Vira aatu qeteha virara noraiqaake iri variakara vira muntukavano voqama kero vikara vaira.

Vatavano miani vaivaro naaruvavano virini vaira vira voqaantema kero, vira muntukavano vikara vaiva nai uri aatarakero voqavata vaira.

¹² Viva tenavu qora kaiqa varauna uvvara taiqa kero, vi uvvara nai niaraini vara aqu kaira. Kuari avu urinaihairo viviro vuru kuari avu ruhunku vinaini vaintemakero, viva vi uvvara nai niaraini vara aqu kaira.

¹³ Vika qova nai vaintivarara mpo ike tiharo koqema nimitaintema kero, Noravano Kotiva vira aatu qeteha virara noraiqaake iri variakara koqema nimite vaira.

¹⁴ Viva kia tauru karaitiro, kankoma kero iri tavaimanta tenavu uqerara vaiinti nahenti vataqohairo aututaikama vauro.

¹⁵⁻¹⁶ Ahakavano vaaka tamunta viro taiqa vintemake, tenavu maa vataraqaa variqi vi taiqa virara.

Maura tavavano vaaka iratero vaivaro uvaivano utivaro tava viva vaaka aaharaugama vimanta kia vira qaiqaavata tavaarave. Vira voqaantemake tenavuvata variqi vi, taiqa virara.

¹⁷⁻¹⁸ Mintimantavata, vaiinti nahenti Nora Kotira aatu qeteha, viva tivakero taatautai uvvara kia tauru karaiti, ekaa vi uvvara koqemake iriqi vivera, viva vikara noraiqaakero iriqiro viraro, vira muntukavano ekaa enta vikara vairaro, viva vikavata, vika naintivara naantiari qovaraiqikavata, koqema nimitaqiro vuanaro.

¹⁹ Nora Kotira avuhainaa taintavano naaruvaini vaivaro viva viraqaa vaiharo ekaa haikaqaa raqiki vaira.

²⁰ Ne enseli kempuka voqavata vataaka, ne vira no iriha vira kaiqa vara amite variaka, ne ekaa Nora Kotira autu tuahera kaate.

²¹ Ne vira iqoka vaiinti naaruvaini vaiha vira antuqa avataqi ni variaka, ne ekaa Nora Kotira autu tuahera kaate.

²² Noravano Kotiva ni ekaa haika autu kero vataimanta ne ekaa vata maata variaka, viva niqaa raqiki vaiva vairara ti, ne vira autu tuahera kaate.

Mpo, kaiqe tevata Nora Kotira autu tuahera kaare.

104

¹ Mpo, kaiqe te Nora Kotira autu tuahera kaare.

Noravauvo, are ti Variqavano vaihara are nai noravanoma variaro.

Are Avuhainaava variararo ai nora autuvanovata, ai takuqi vai okaravavata, vitanta ai naavumataavarama variaro.

² Vaiintivano nai tavaarana tavuna rumpa taintema kera, are ataa ira haikaqhohair a nena naavuma taanara.

Vaiintivano seri rairakero aqutaintema kera, are naaruva rairakera vataanara.

³ Are verara tonavuqaa nena naavu kaqa taanara.

Tonavuvano ai iqoka *kaari* vaivara, are uvai arokaqaa variararo viva ai vita varero vi vaira.

⁴ Are uvai atitaararo uvaivano ai vakaaka varero vi ani vaira.

Aaquakaavano utiharo ai kaiqa vara amite vairave.

⁵ Are maa vatara tuqa kempukaiqama kera arataararo kia ho qakianaro.

⁶ Tavunaqohai naavuma kaantemakera, are nora namariqohair ekaa maa vatara apuqama kaararo namarivano ekaa ainqinavata mantaaqa kaira.

⁷ Viraqahaahira are nora namari vira atiararo viva qetakero virave.

Naaruuvavano karara tintema kera, are tiararo nora namarivano qetakero ⁸ ainqina kero otii vairiro, are virara mini variane tiananaini uqitaini otu vaira.

⁹ Nora namarivano mini otiniro vaivara, are viva qaiqaa *auvuteharo/ruaqairiharo* vata maata naavuma kaantorave tira, vira qioqama taanara.

¹⁰ Are tiararo ainqinaihairo aruvu namari, vo namari vo namarivano nteharo uqitaini otu vi vaira.

¹¹ Namari viva mintimakero tuvi vaimanta ekaa aantauvahи ne variavaro qaakau donkivata namari naataa imanta vira ne variara.

¹² Vi namarira auvahini vo uviri vo uvirivanu katari kaaraqi *navu/naavu* kaqate vaiha, ihi ti variara.

¹³ Are nena maaqa vuruni vahara aaqu varake variararo aaquvano ainqinaini nti vaira.

Are aaqu vara kaanaraqahaahira vatainu vo kara vo karavano koqemakero qampiже vaira.

¹⁴ Are qaqi kaararo purumakauvano ne ukauva kojema kero qampiже vaivarо, vайinti nahenti utuke ne karava vo kara vo karavano kojema kero qampiже vaira.

¹⁵ Vataqihairo *uaini* naaqunta qampiже vaimanta tenavu vira tava tatike, vi namarira neha quaheha vaunara.

Tenavu *orivi* tava tatike vira vahavera viriqa aqutauraro tinavu virivano takuqi vaira.

Tenavu *uiti* varake mpareti autuke ne vauraro tinavu vaata kempukaiqama timite vaira.

¹⁶ Noravauvo, are aaqu vara kaararo nti vaivaro Lebanonini are ututaana *sidaa* katarika kojemake qampiже variamanta ¹⁷ vika kaaraqi vo uviri vo uviri nai *navu/naavu* kaqate variara.

Hevikavano toqukera kaaraqi nai *navu/naavu* kaqatero vaira.

¹⁸ Mini ainqina uritarakero vainaini qaakau memeraara ni variamanta, vo aantau iroka voqaaka oriqi kukeqavi variara.

¹⁹ Quara tiraro karakaqa utute, qantuke varaaate tira, are tora autukera vataanara. Are kuari autu kera vataararo, iteharo naitarama kero ruhunki vaira.

²⁰ Are tiararo entama vivaro nantaqi varia aantauvahika himpi vi ani variara.

²¹ Qaraaka *raioninavu* entaqi are vika kara niminarara rantaqi niha, vika naverai tiha aantau aruke ne variara.

²² Vika entaqi mintiaqi vivi aatitake, anirante nai vaite variaroq oru vaite variara.

²³ Vaiinti nahenti toqaqi himpi oru kaiqa varaqi vivi, entamake variara.

²⁴ Noravauvo, are nai vo haika vo haika airi haika autu kera vataanarave.

Mpo Noravauvo, ai avu aatovano koqe avu aato vaivara are ekaa okara tave variarava vahara, are ekaa vi haikara vi haikara autukera vataaramanta vika maa vataraqaa mpiqavi variara.

²⁵ Nora namarivano nai noraiqamakero vaimanta viraqi airi vo haika vo haika mpiqavi variamantara ti, tenavu kia ho vika kaara ntirara.

²⁶ Vo *sipi* vo *sipivano* nora namariqaa vi ani variamanta, nora havuka are autukera vataarauka, vikavata nora namariqи niha otiqete urunte i variara.

²⁷ Ekaa vi haikava vi haikava karara antuqa arimanta vika ai veka variavara are avuqavumakera vika nai ne karara nimi varianara.

²⁸ Are vika kara nimiaramanta vika vira ne variarave. Are nena kauquqihaira vika kara nimiaramanta vika kara vira ho ne variara.

²⁹ Are vika qioqama tehara kia kara nimiana entara, vika voqamake qete variara.

Are vikaqihaira aiho qaqqina vara kaana entara, vika vaaka qutuvi qaiqaa vataiqama vi variara.

³⁰ Vika mintimake taiqa vuavara, „are vika kuvuarama taaka“ qaiqaa aiho nimiaramanta vi haikava vi haikava maa vataraqaa vi ani variara.

³¹ Ho kairaro Nora Kotira mpeqa okara takuqi vaiva ekaa enta ekaa enta variqiro vuarire.

Kairaro Noravano Kotiva ekaa haika nai autu kero vatairara quaheharo variqiro vuarire.

³² Viva kempukavano vairara tiro, viva vataini viavi tavai entara vaturavano utirave. Viva ainqinaqaa nai kauqu vatai entara ainqinaqihairo iha muravano oru vi vairave.

³³ Noravano Kotiva mintimakero vairara ti, te qaqqi variqi vuaina entara, Kotira autu tuaheraqi virera.

Te qaqqi variqi vuaina entara, ekaa vi entanavura te tenta Variqa autu tuaheraaina ihira tivaqiqi virera.

³⁴ Mpo, kairaro Noravano Kotiva te mintimake ihi tivaqiqi viha vira quahama amitainarara iriharo, ti quahama timitaarire.

³⁵ Noravaavo, are kairamanta qora okara auti variaka vehi autu taiqavi, kia qaiqaavata maa vataraqaa variate.

Ho kaiqe te Nora Kotira autu tuahera kaare.

Ne ekaa Nora Kotira autu tuahera kaaterama turo.

105

¹ Kaiqenavu Nora Kotirara koqeve tivaqiqi viha, vira autu tuahereha, viva nora kaiqa tinavu vara timitarara iriha, ekaa vata maata variaka virara tiva qoqaiqama nimiare.

² Vira autu noraiqama keha *musiki* ruqutiha virara ihi tiate.

Viva nora kaiqa tinavu vara timite vaira, ne ekaa vi kaiqara vi kaiqarara irihama vaiinti nahenti tiva nimiare.

³ Vira nora autuvano takuqi vairara irihama tenavu quaheda variqi vuare.

Ne Kotira aaraqaa koqemake nireka auti variaka quahaate.

⁴ Ne Nora Kotira kempukara noraiqaake iriha, viva inaini vivaro viva ni kahaqiarire. Ekaa enta vira aaqanto oru vaiha vira aaraate.

⁵⁻⁶ Ne Isarerri kiae iritaavo? Ne Kotira kaiqa vaiinti Eparahaamira vaintivarama variavo. Ne nenta kaivaqara Iekopira vaintivarama variavo. Ne Kotiva ni kaama taikama variavo.

Ne mintimake variakara ti, ne Noravano Kotiva nora kaiqa, vo kaiqa vo kaiqa ni Isarerri vara nimitairara iriteha variate. Viva ni navutaakaqaa uva vatero vika qoraiqama nimitairaravata iriteha variate.

⁷ Noravano Kotiva viva tinavu Variqavano vaharo, viva ekaa naato vatanaakaqaa raqiki vaivama vaivo.

⁸ Viva tinavu Isarerri hampata vaharo uva tiva taatautairave, viva kauqu ainqiqa aqukero uva tivatairave, viva vi uvvara kia tauru karaitiro, ekaa enta iriqiro vuuanaro.

⁹ Haaru viva Eparahaamikantiro uva tiva taatau tero varikero, qaiqaa vi uvvara iriha vo enta Aisaakikantiro vaharo viva kauqu ainqiqa aqukero te vi uvvara qaqqi iriqi virerave tira.

¹⁰ Viva minti tivakero qaiqaa vo enta Iekopirara te quqaa mintirerave tira.

Noravano Kotiva mintima keharo qaiqaa qaiqaa tinavu Isarerri kaivaqaukavara ham-pata vaharo vi uvvara tiva taatau kero vataira. Ho vi uvava kia taiqaraitiro, ekaa entama varianaro.

¹¹ Viva vinavuka tiva nimiro tiharo, Te Kenaani vata ni nimiriraro vi vatava ne kuvuarama teka vika vatama varianarove tira.

¹² Vi entara Isarerri vika kia airi vaiinti nahenti vairaiti, taaraiqaqai vaiha vika naavuru vaiinti nahenti Kenaanini vahuqa variara.

¹³ Vi entara vika katu vare vo vataini vahuqa oru varike, viraqaahai qaiqaa katu vare vo vataini oru vahuqa varike mintiaqti vi variara.

Vika avuhainaa vaiinti vovano raqiki vataraqaa oru inaaraiqa varike, qaiqaa avuhainaa vaiinti vovano raqiki vataraqaa oru inaaraiqa varike i variara.

¹⁴ Vika mintiake vi ani variavaro Noravano Kotiva kia qaqqi kaimanta vokiaka vika qoraiqama nimitaara.

Viva Isareriera iriharo vo vatanaa vo vatanaaka avuhainaaka qioqama teharo tiharo,
¹⁵ Te kaama tauna vaiinti nahentika ne qoraiqama nimitevorave. Paropeti vaiinti ti uva qoqaiqamake variaka ne ravaaqavu kevorave, tira.

¹⁶ Vo enta Noravano Kotiva qaqi kaivaro karara aavoqi entava Kenaanini qovaraiqivaro viva vi vataraqaa vai karara ekaa taiqa kaira.

¹⁷ Ho Noravano Kotiva nai vaiinti nahentira vi entara ho variate tiro, viva Iohepira naane avuni vara kaivaro Isipini oru vaira.

Vira vaukukvara monu varareka iha vira vo vatanaaka nimiamanta vika vira vita vare Isipini vuru ke koqaa varavaroo viva qaqi qumina kaiqa vaiinti vaira.

¹⁸ Iohepiva Isipini vaimanta vika vira karapuhiqamate *seniqohai* vira aiqu rumpate, vira auntaqivata kantaruma taavaro vaira.

¹⁹ Iohepiva karapuhiqi vaivaro Noravano Kotiva naantiara vi haikava vi haikavama qovaraiqianarove ti uvava vivau vaira.

Noravano Kotiva Iohepira tiva ami uvava quqaa vaivaro ²⁰ avuhainaaa vaiintivano Isipi vatanaakaqaa raqiki vaiva Iohepira karapuhiqi vaira aaraivaro anivaro vira kuvantu kaira.

²¹ Avuhainaava Iohepira nora autu amiro virara tiharo, Are ekaa ti kaiqaqaavata te una haikaraqaavata raqikiane, tivakero ²² vira noraiqama kaivaro Iohepiva nai antuqaaqaa ekaa Isipi nora vaiintiqaqaa raqiki vaira. Avuhainaaa vaiinti avu aato ami variakavata viva kahaqiharo koqe okarara tiva nimi vaira.

²³ Iohepiva mintima kero noraiqamaviro vaivaro vira qova Iekopivavata katu varero oru Isipi vatanaaka vataqaa vaira.

²⁴ Oru mini vaivaro Noravano Kotiva vira vaiinti nahenti kahaqimanta vika airi vainti vataqi viha airitahaa variamanta Isipi vika Isarerera naatu qetehe variara.

²⁵ Noravano Kotiva Isipi qaqi kaimanta vika Kotira kaiqa vaiinti nahenti Isarerera navutaiqihaa, vika qoraiqama nimite aarara, vo aara vo aara rante variara.

²⁶ Isipi vika mintiavaro Noravano Kotiva Mosika Eronika nai kaiqa vaiintitanta kaama tero vitanta vara kaimanta ²⁷ vitanta Isipini vaha Kotira kaiqa kempukaiqamake vareha aahuva kaiqa, vo kaiqa vo kaiqa vare variara.

²⁸ Kotiva Isipiri ne ti vaiinti nahenti qaqi kaimanta vuate timanta Isipi vika kia vira uva irireka auti variara kaara Noravano Kotiva konkiraiqi haikara vara kaivaro vi vataraqaa entama tero vaira.

²⁹ Mintiavaro qaiqaa Kotiva Isipini vai namarira tuqantaa kaivaro namarivano naaregama vimanta viraqi varia havukauka qutu vuara.

³⁰ Eqavoka airitahaa qovaramavi, Isipi vata maata mpiqa keha avuhainaara naavuqivata mpiqa vuara.

³¹ Mintiavaro Kotiva qaiqaa tivarо vauvaarivata aaquqavata airitahaa qovaramavi ekaa vata maata mpiqake variara.

³² Viva kia qaqi aaqu vara karaitiro, *taaru/kaampura* aaqu varakero aaquakaavata varakaivaro ³³ *taaruvano/kaampuravano* ntiharo Isipi *uaini* ututaarave, *fiki* ututorave, qoraiqama kaivaro aaronavaano ekaa katari rauhaantima kero vataira.

³⁴ Viva qaiqaa timanta kaintaaqaa airitahaa qovaramavi ³⁵ ekaa vi vataraqaa mare vai haikarave, ekaa naaho maata ututaarave, nama taiqa kaara.

³⁶ Mintima kaavaro Noravano Kotiva ekaa Isipi vatanaaka qorainti vainti kara hunka avuni vatataaka aru taiqa kaira.

³⁷ Vika aru taiqa kero viraqahairo viva Isarerera ntita varero vireva iharo, vika qaqi kaimanta Isipi vika vo haika vo haika, *koriqohai* aututaa haikarave, *silvaaqohai* aututaa haikarave, nimiamanta vare Isipi ke vuara.

Isarerera vuavaro vikaqihairo kia vogavanovata kakakima vimanta ekaa koqemake vuara.

³⁸ Isipi vika Isarerera autu qete variarara ti, vika Isarerera vuarara quahe variara.

³⁹ Ho Kotiva Isarerera autua nimiteharo aatitairaqaa tonavuqohairo vika aqu nimitero, entaqi ihaqohairo vika ataama nimite vaira.

⁴⁰ Vika „matiara“ naaruavaro viva muavu vara kaivaro tuvimanta varake naara.

Qaiqaa viva naaruvalhainaa kara vara kaivaro tuvimanta vika ho ne variara.

⁴¹ Viva tivarо nora orivano nkahi vivaro viraqahairo namarivano noraiqaakero tuvhitaro aahara vata vaura otu vi vaira.

⁴² Haaru Kotiva nai kaiqa vaiinti Eparahaamirara kempukaiqama kero tivatai uvarara iriharo, viva minti mintima keharo Isareri koqema nimite vaira.

⁴³ Ho mintima kero viva nai kaamatai vaiinti nahentika ntita varero vimanta vika ihi tiha, quaheha naverai ti variara.

⁴⁴ Viva vika ntita varero vuru vo vatanaaka ia vatara nimiharo, vika qaqi kaimanta vi vatanaaka naaho maata ututaaravata varaara.

⁴⁵ Ho Isareri vika viva tivatai uvarave, viva minti minti iate ti uvarave, koqemake iriqi vuate tiro, viva vi vatara vika nimira. Ho kaiqenavu Nora Kotira autu tuahera kaare.

106

¹ Kaiqenavu Nora Kotira autu tuahera kaare. Vira okaravano koqe okaraqai vaivaro vira muntukavano tinavuara ekaa enta vairara ti, tenavu virara koqeve tivaqi virerave.

² Tavave Noravano Kotiva nora haika autinara ekaa vi haikara ho tiva qoqaiqama kaanarove?

Tavave vira autu ho tuahera kaanarove?

³ Vira uva koqemake iriha, nái kena vaiinti nahenti avuqavuqamake kahaqama nimite variaka, vika quaheha vaivara.

⁴ Noravauvo, are nena vaiinti nahenti koqema nimitehara tiriavaravata iriane.

Are vika kuvantu kera ntitehara, tivatama ruaruuma timitaane.

⁵ Are ti qaqi kairage te are kaama taana vaiinti nahentika hampata vaiha, vika aanante koqemake variqi viha quaheha variqi vuure.

Are ti qaqi kairage tevata ai vaintima vauro tivakeha ai vaiinti nahenti hampata vaiha, ai autu tuaheraqiqi vuure.

⁶ Mpo, tinavu kaivaqaukavara haaru qora kaiqa varaantemake, tenavuvata qora kaiqa, vo kaiqa vo kaiqa vareha, qora okara, vo okara vo okara autu kauro.

⁷ Tinavu kaivaqaukavara Isipini varia entara, are aahuva kaiqa vo kaiqa vo kaiqa vara kaaramanta vika kia virara noraiqaake iriara.

Are airi tataa vika koqema nimitaaramanta vika vaaka virara tauruke variara. Naare Namari* vainaini aninte, vika kia ai uva iriraiti, kia ai aaraqaa vireka auti variara.

⁸ Vika mintiavaro Noravano Kotiva kia vika qaqira karaitiro, viva nai nora autuara iriharo, nai nora kempukavata tavaata tiro, vika ruaruuma nimitaara.

⁹ Viva namariara tivaro Naare Namari viva ruqe iro hini hini orinivaro aahara vata vaivaro, vika ntita kaimanta aahara vataqaa hini mantaraini vuura.

¹⁰ Mintima kero Noravano Kotiva tinavu kaivaqaukavara navutaiqi variaka kauquqihairo ruaruuma nimitaara.

Viva navutaaka kauquqihairo vika qaqini vara kaivaro, ¹¹ namarivano ihai ihairo tuviro navutaaka aqu ravaaqavu kaimanta vika namariqi qutu taiqa vuavaroo kia voqavanovata qaqi vaira.

¹² Noravano Kotiva mintima kero vika kahaqimanta vika tiha, Noravano te mintirerave ti uvava ququa uvama vaivo, tivakeha, vika ihi tivaqi viha vira autu tuahera kaara.

¹³ Vika mintiaqi vi, viraqaaahai vika Noravano vara nimitai kaiqara vaaka tauruke, qaiqaa kia Kotira antuqa avataraiti, nái antuqaaqaa vireka auti variara.

¹⁴ Vika aahara vatainai vaiha voqamake matiara antuqa arimanta vika Kotira avateha mativata tinavu timiataarave ti variara.

¹⁵ Vika minti tivakeha Kotira avataravaroo viva vika naarumataa karara nimiharo, nora rovaravata vara kaivaro vika ntaihamma kaira. (Kaarantura 11:31-34)

¹⁶ Ho mintimanta tinavu kaivaqaukavara aahara vatainai nái seri naavuqi vaiha, Mosika Eronika Kotira kaiqa vara amite variatanta kaiqara taara neha tiha, Vitanta kia tinavuqaa raqikiataarave, ti variara.

¹⁷ Vika minti ti variara kaara „Noravano tivaro“ vatavano qantua vimanta Dataanika Abiraamuka náitonta vainti nahentiaravata vata viraqi ekaa aqu vuavaroo vatavano vika aqu ravaaqavu kaira. (Kaarantura 16:31-32)

¹⁸ Ihavano naaruvalihairo tuvuntero, vitanta avataqi vuaka qora vaiintinavu tatoqa aqu kaira. (Kaarantura 16:35)

* **106:7:** Naare Namari – vo autu: Kiaravano Vai Namarira

¹⁹ Tinavu kaivaqaukavara Horepi Aiqlinaqi vaiha *koriqohai* purumakau naati *maraqura/varaha* vo autukaara.

Vika *koriqohai* aututaa haikara vo haika vo haika varake, vi haikara ihaqi ravitake *viraqohai* purumakau autuke, vi haikara quahama amiteha tinavu variqave ti variara.

²⁰ Vika Noravano takuqi vai Variqara tauvaqa utu amite, purumakauvano ukau ne vaira vira *maraqura/varaha* autuke, virara tinavu variqave ti variara.

²¹ Noravano Kotiva nora kaiqa, vo kaiqa vo kaiqa tinavu kaivaqaukavara vara nimiteharo Isipi kauquqihairo vika ruaruama nimitaira, viraravata tauru kaara.

²² Vika Isipiqi variavarao Noravano Kotiva vi kaiqara vi kaiqara vara nimitero, *viraqaa-hairo* viva vika ntita varero Naare Namari vainaini anintero, vo qara i kaiqara vara nimitaimanta vainti nahenti vi kaiqara tave vogamake ravuku vuara.

²³ Ho vika una variqa aututaara kaara Kotiva vika vehi autu kareva auti vaivaro nai kaamatai vaintiva Mosiva himpiro, tinavu kaivaqaukavara auta ntua nimitaivarao Kotira arara itaiva vaahama vivaro kia vika vehi autu taiqa kaira.

²⁴ Ho tinavu kaivaqaukavara Kotiva kauqu aiqiqaa aqukero vi vatara ni nimirerave ti uvarara kia quqaave tivake, vika vi vatarara kia antuq arimanta qeteha kia vi vataragaan vireka auti variara.

²⁵ Vi entara vika nái seri naavuqi vaiha Kotirara nuntu nauntu tivaqi viha kia Nora Kotira uva avatareka auti variara.

²⁶ Tinavu kaivaqaukavara kia vira uva iriara kaara Kotiva nai kauqu vika avuana vatero tiharo, Ne variqi vi vuru aahara vatainima qutu vivarave.

²⁷ Te vo vatanaa vo vatanaaka qaqi kaari vika ne kuvuarama teka naatarakeha vika rumpa vare, vo vataini vo vataini vuru raumpirima kevarave, tira.

²⁸ Ho tinavu kaivaqaukavara Nora Kotirara kia noraiqaake iriraiti, oru Peora Aiqlinaini vaiha una variqa Baalira quahama amite variara.

Vika qumina haika, kia qaqi variqiro vi vai haikara, virara variqave tivakeha quahama amiteha, vo *ofaa* vo *ofaa* vira amitaan kararavata ne variara.

²⁹ Vika vi okarara qora okara autuara kaara Nora Kotira arara itaivarao viva nora rovara vara kaiyaro vi rovarava vikaqiqi qovaramaviro aruqiro vi vaira.

³⁰ Aruqiro vivaro, *viraqaa-hairo* Finiaasiva himpiro oru qora kaiqa vare variatanta arukaivaro nora rovara viva taiqa vira. (Kaarantura 25:6-9)

³¹ Finiaasiva mintirara ti, tenavu Isareru vatevata virara quaheha tiha, Viva avuqvauqama kero mintima kairave.

Ekaa naantiara kuvuarama tekavata Finiaasirara tenavu tianantemake tivarave, turo.

³² Ho tinavu kaivaqaukavara Meriba Namari vainaini oru vaiha qaiqaa Kotira qo-raiqama amitaara kaara Kotira arara itaivarao Mosiraqaavata uva vataira.

³³ Vika qora okara auti variara kaara Mosiva popohaivarao vika nitiharo kia uva avuqvau tiraitiro, hampi uva tira kaara Kotiva Mosiraqaavata uva vataira.

³⁴ Ho tinavu kaivaqaukavara Kotiva vika kaama nimitai vataragaan oru vaiha, vika Kotira uva raqakeha kia vi vatanaa vi vatanaaka mini variaka ekaa aru taiqa karaiti, ³⁵ vika hampata naatai vaati varateha, vi vatanaaka qora okara auti variantemake, vikavata qora okara autuqi vi variara.

³⁶ Vika vi vatanaaka una variqa *maraqura/varaha* quahama nimite variara kaara vika qoraiqama vuara.

³⁷ Tinavu kaivaqaukavara nái maaquve raavurave arukeha, una variqa vikara iha quara nimite variara. (Lo 32:17)

³⁸ Mpo, vika vaintivara kia qora okara autuamanta, tinavu kaivaqaukavara Kenaani una variqara iriha qumina vika aruke iha quara nimite variarave.

Vika kaara vika vaintivara naarevano maa vataru qoraiqama kaira.

³⁹ Vika nái qora okara autura kaara vika qoraiqamake variara. Hampi nariro ni vai nahentiva nai vaati qoraiqama amitaintemake, vika Nora Kotira qoraiqama amite variara.

⁴⁰ Ho vika mintiara kaara Nora Kotira arara itaivarao nai vainti nahentiara tiharo, Te tenta kaama tauna vainti nahentikara kia ti hantuqa harimantama vauro, tira.

⁴¹ Viva vo vatanaa vo vatanaaka qaqi kaimanta vika iqoka raquqi viha tinavu kaivaqaukavara naatarakeha vikaqaa raqiki variara.

⁴² Vika navutaaka kempukaiqama keha vikaqaa raqikiha, airi maara vikaqaa vate variamanta vika qoraiqamavi variara.

⁴³ Vika mintimake variavaro airi tataa Noravano Kotiva tinavu kaivaqaukavara ruaruama nimite vaimantavata, vika qaqiqai vira tauvaqa utu amiteha qora okara auti variara kaara vika anomake goraiqamavi variara.

⁴⁴ Vika mintimake variqi vivi, viraqaahai vika Nora Kotirara ike mpo tiha vira aaraavaro viva kia vika qaqira karaitiro, vika ike mpo tia uvava iri vaira.

⁴⁵ Viva aaqurihamma nimite vaivarava tiro, vika uva iriro, nai haaru tivakero taatau tai uvarara iriteharo, vika vehakuma nimitaира.

⁴⁶ Mintiharoma viva navutaaka tinavu kaivaqaukavara rumpataaka vo avu aato nimimanta vika tinavu kaivaqaukavarara mpo ike tiva nimite variara.

⁴⁷ Mpo Noravauvo, are tinavu Variqavanoma variaro. Are haaru tinavu kaivaqaukavara kahaqianantema kera, qaqaa vo vatanaaka vataihaira tinavu ruvaaquma kera tivita varerar tintanavu maaqaini vuru kaane.

Are mintiraqe tenavu ariara koqeve tiha, ai autuvano takuqi vaira tuahera kaare.

⁴⁸ Noravano Kotiva tinavu Isareru Variqavano vairara ti, kaiqenavu vira autu vatevata naantiara ekaa entavata tuaheraqi vuure.

Kairamanta ekaa vaiinti nahenti vi uvarara quqaave tiate. Ne ekaa Nora Kotira autu tuahera kaaterama turo.

107

¹ Nora Kotira okaravano koqe okaraqai vaivarava muntukavano tinavuara ekaa enta variqiro vuainarara ti, kaiqenavu virara koqeve tivaqiqi vuure.

² Ekaa vaiinti nahenti Noravano Kotiva ni kuvantu nimitaika, ne ekaa Kotirara koqeve tiate.

Viva navutaaka kauquqihairo ni ruaruama nimiteharo ³ vo vataihairo kuari avu urinaihairove, kuari avu aqu vinaihairove, notihairove, ni ntita varairave.

⁴ Niqihai vokiaka haaru aahara vataini vi anicha, nora vatuka voqi oru variare ti, kia ho vi vatukara rantakaara.

⁵ Vika voqama kero kararavata namariaravata antuqa arimanta tiha, Mpo, ⁶ tenavu qoraiqamama virarave tivake variaraqihai Nora Kotira aaraavaro viva vika qoraiqamavi variaraqihairo ruaruama nimitero ⁷ vika ntita varero avuqavu aaraqaa viviro, vo vatuka vika vaireka ia vatukaraqi vuru kaira.

⁸ Noravano Kotiva mintima keharo vika koqema nimiteharo nora kaiqa vo kaiqa vo kaiqa vara nimiteharara iriha, vika Nora Kotirara koqeve tiate.

⁹ Namari naataaa imanta variavaro viva vika namari nimimanta ho ne variara.

Vika karara antuqa arimanta variavaro viva vika kara nimimanta ho ne variara.

¹⁰⁻¹¹ Niqihai vokiaka haaru Noravano Kotiva nai virini kantaqaqaini vaira uva raqakeha vira uva maara kia irireka auti variara kaara, Kotiva qaqi kaimanta navutaaka vika karapuhiqi seniqohai rumpa taamanta vika voqama kero konkira ariraqiqi vahia, ke ke tivaqi vi variara.

¹² Kotiva qaqi kaimanta vika rumpataaka vukaari utiha navutaaka kaiqa vara nimite variavaro, vika kempukavano taiqa vimanta vataini hiqintuavarao kia vika kahaqiarirava vovanovata vaira.

¹³ Vika mintimake variaraqihai Nora Kotira aaraavaro viva vika qoraiqamavi variaraqihairo ruaruama nimiteharo, ¹⁴ seniqohai rumpataara ruqema kero, voqama kero konkira ariraqihairo vika ntita varaira.

¹⁵ Noravano Kotiva mintima keharo vika koqema nimiteharo nora kaiqa, vo kaiqa vo kaiqa vara nimiteharara iriha, vika Nora Kotirara koqeve tiate.

¹⁶ Viva *baraasi* oriqohai vaantaavura qenti aututaara ravantiaqa aquukero, qenti rutaquute varia *ainiravata* kinta kaantama kero aquke vaivama vaivo.

¹⁷ Niqihai haaru vokiaka Kotira uva raqakaara kaara nora rovaravano vika ntaihairo.

Vika qora okara autuara kaara aihaviraara vare antura ntiha ¹⁸ kia karavata naataaa imanta aumakaa qutireka auti variara.

¹⁹ Vika mintimake variaraqihai Nora Kotira aaraavaro viva vika qoraiqamavi variaraqihairo ruaruama nimitaира.

²⁰ Viva uva tivarō vira uvavano vika vaata koqema nimitaimanta vika kia qutu viraiti, qaqi koqemake variara.

²¹ Noravano Kotiva mintima kero vika koqema nimiteharo nora kaiqa vo kaiqa vo kaiqa vara nimitairara iriha, vika Nora Kotirara koqeve tiate.

²² Kaira vika Kotirara koqeve ti ofaara autu amiteha, quaheha ihi tivaqи viha, viva nora kaiqa, vo kaiqa vo kaiqa vika vara nimitairara, vaiinti nahenti tiva nimiate.

²³ Niqihai vokiaka *sipiqa* nora namariqaa vo vataini vo vataini vi aniha, monu kaiqa vareha airaira vuru keha vaiinti nahenti nimu variara.

²⁴ Vika sipiqa nora namariqqa vi aniha, Noravano Kotiva vo kaiqa vo kaiqa, kempuka kaiqa vare vaira tavaara.

²⁵Vika tavaavararo Noravano tivaro aaronavaavano govarama viro nora namari vira venta
venta i vaivarao namarivano voqama kero kumpetaqiro viharo ²⁶sipi muntuvu aquke
vuruvi aqukero i vaivarao sipivano otunte uruntemaqiro vi vaira.

Minti vaimanta *sipiqa* kaiqa varaaka, Mpo, tenavu raqutu vuarorave tivakeha, voqamake qete variara.

²⁷ Iha namari naaka vueraiqiantemake, vika tавentu vauntumaqi niha, Mpo, tenavu nana haika autukee kahaqira haika varaainarave? ti variara. ²⁸ Vika mintimake variaraqihai Nora Kotira aaraavarо viva vika qoraiqamavi variaraqihairo ruaruama nimitaira.

²⁹ Viva tivaro aaronaa utiva taiqa vivaro namarivanovata kia kumpetaraitiro, tiremakero vaira.

³⁰ Nora namarivano tirema kero vaimanta vika vira tave, quahake variavaro viva vika ntita varero vika nái vireka ianaini koqema kero vuru kaira.

³¹ Noravano Kotiva mintima kero vika koqema nimiteharo nora kaiqa, vo kaiqa vo kaiqa vara nimitairara iriha, vika Nora Kotirara koqeve tiate.

³² Vika Kotira vaimi nahenti hampata ruvaaqumavi vaiha, vira nora autuara tiva qogaiqama kaate.

Vika qianta vaiinti nivutana ruvaaqumavi vaiha, vira autu tuahera kaate.

³³⁻³⁴ Vaiinti nahenti qora kaiqa vare variara kaara Noravano tivaro taatika namari-vanove, inaara namarivanove, aaharaiqama vivaro aruvu namarivanovata taiqa vivaro vatavano aaharaiqama viro vaira.

Karavano koqema keharo qampiqe vai vatara viva qoraiqama kaivaro vi vataraqi kia karavano qaiqaavata gampiqairaa.

³⁵ Ho Noravano qaiqaa tivaro aahara vataqaa namarivano voqi voqi tuvi vaira.

³⁶ Namarivano koqema kero tuvi vaivaro, viva karara aavoqiaka ntita varero vuru mini kaimanta vika mini vutuka autuke variara.

³⁷ Vika mini vaiha naahoqi karavata *uaini* naaquntavata utukeha, koqemake varakeha ne variara.

³⁸ Noravano nai vaiinti nahenti koqema nimitaimanta vika airi vainti vataavaro viva vika purumakaavata airigama kaimanta variara.

39 Navutaaka vika hampata raqihā vika naatarake kaurira haika nimiha nora maara vikaqaa vataamanta qoraiqamavi varia entara,⁴⁰ Noravano Kotiva vika navutaaka nora autu vataakara kia noraiqaakero iriraitiro, viva vika autu vatainiqama kero nititama kaimanta vika ahara vataini kia aaravata vainaini hampi vi ani variara. (ves 39-40 Hiparu uvavano kia kankomakero vaira.)

⁴¹ Vehi vaiinti nahenti vo haika vo haikara aavoqihā qoraiqamavi variaka, Noravano vika ruaruuma nimiteharo kojema nimitaira. Viva vika vaintivaravata airiqama kaimanta vika airi sipisipi voqaara variara.

⁴² Noravano Kotiva mintima kero vehi vaiinti nahenti kahaqi vaimanta avuqavu ni variaka vira kaiqa taveha, quahe variamanta, qora okara auti variaka kia uvavata tiraiti, evaara variara.

⁴³ Ho koqe avu aato vataaka ne koqemake te qara ntuva tauna uvara aatoqi iriteha, Nora Kotira muntukavano tinavuara vairara noraiqaake iriqi vuate.

108

Devitiva maa ihira qara ntuvatora

¹ O Kotio, te ariqaa muntuvi vauraro ti muntuqaqhairo paru i vaimanta te ihi tivaqiviha ai autu tuahera karerave.

² Ho ti maraquravauvo, himpuane.

Ti kitaa kulelevauvo, himpuate. Himpigenavu ihi tivaqi viha kuari vauraqama kaariraro uru ntaaire.

³ Noravauvo, te vo vatanaa vo vatanaaka nivutaini vaiha ai autu tuaheraqi virerave.

Te vo vaiinti nahenti vainaini oru vaiha ariara ihi tivaqi virerave.

⁴ Are vaiinti nahenti aaqurihama nimite variarava nai uri aatarakero voqavatama vaivo. Viva maaqaahairo oru viviro, vurura naaruvaini oru ntairave.

Are nena vaiinti nahentiara noraiqaakera iriqira vi variara okarava, vivavata maaqaahairo oru viviro, vurura tonavuvano vairaqua ora ntairave.

⁵ O Kotio, naaruvalhaira nena mpeqa okara vaiinti nahenti numiqairamanta tavaate.

Nena takuqi vai okarara qoqaa qovarama kaira ekaa vataini variaka tavaate.

⁶ Mpo, are te ai aarauna uvvara irihara, tinavu ai muntukavano vai vaiinti nahentika nena kempukaqhairs ruaruama timitairaqe ho variare.

⁷ Mpo Kotio, are nena turuaraina vaihara maa uvvara tianarave:

Te Kotika te navutaaka naatarake Sekemi vatuakavata, Sukoti Uqitaini vai vataravata, rairake tenta vaiinti nahenti nimirerave.

⁸ Gileativat Manasevata te una vataatantama vaivo.

Efaraimu vatavano vaireva, ti iqoka tovaqa voqaara vaivaro, Iutaa vatavano vaireva, ti avuhainaa kauru voqarama vaivo.

⁹ Moapi vatavano vaireva, te namari tunti vauna tanura voqarama vaivo.

Idomu vatavano vaireva, tenta su rahunkuke aqu kauna vatavama vaivo.

Te Pirisia vatainai vaiha vora ntuvaqi virerave, tianarave. Kotio, are minti tianarave.

¹⁰ Mpo Kotio, tavave ti tivita varairaqe te vaantaavuravano ututuma tai vatuakaraqi ho oru virarave?

Tavave ti tivita varairaqe te oru Idomu vataanaaka naatara kararave?

¹¹ Ho are mintiataarave. Vate maa entara are kia mintiraitira, tinavu tauvaqa utu timitera, kia tinavu iqoka vaiinti hampata vuaro.

¹² Vaiintivano tinavu kahaqiarirava kia ho vairara tira, arema tinavu kahaqiraqe tenavu navutaaka ho naatara kararave, turo.

¹³ Kotiva tinavu mantaraini vairera, tenavu homa navutaaka naatara kaariraro viva vikaqaa aiqu ntava taanaro.

109

Devitiva maa ihira qara ntuvatora

¹ Mpo Kotio, te ai autu tuahere vauraukama vauro. Virara iriharama are kia evaara vairaitira, te ai aare vauna uvvara irihara ti kahaqiane, turo.

² „Are kiae iriaro?“ Qora okara auti variaka tiriara tauvaqa vaura uva ti variavo.

Vika una uva tiqaa ntuvakeha ti variavo.

³ Vika ti qoraiqama timitareka ti ututuma teha qora uva, vo uva vo uva ti variavo.

Oho, qumina uva kaara vika minti ti variavo.

⁴ Te vikara muntuka vateha vikara iriha ai aarama nimitauramanta vika kia virara iriraiti, tiqaa uva vatareka auti variavo.

⁵ Te koqe okara autu nimitauramanta vika qora okaraqai tinta autu timitaavo.

Te vikara antuqa vaimanta vauramanta vika kiama tiriara antuqa arimanta variavo.

⁶ Oho, are kia koqe *ko* ti vai vaiintira vo kaama tairaro vi vaiintiva ti navutaara uva iriarire. Nai navutaava nai vira *ko* iriarire. ⁷ Are qaqi kairaro viva vira *ko* iri taiqakero, virara quqaama ariqaa uva vaivo tiarire.

Ti navutaava ai aaraaina entara are vira uvvara qora uvama vaivo tiane.

⁸ Are viva qaqi variaina entara qiqugama kairaro viva vaaka qutu viraro vovano viva raqikiaina kaiqara varaarie. (Kaiqa Varora 1:20)

⁹ Are kairaro viva vaaka qutu viramanta vira vaintinavu viqa vainti kia qovavata vaika vaivarro vira naatavanovata tentoqa variarire.

¹⁰ Are qaqi kairamanta vira vaintivara vehiqamavi qumina vi anilha karara naarumaqi nuate.

Are qaqi kairamanta vinavuka naavuvata rampai aquke vika nititama kaimanta kia naavuqvivata variate.

¹¹ Are ti navutaara goraiqama amitechera, qaqi kairamanta viraqi viqateka aninte, viva iaina haikara, vatave airairave ekaa vi haikara vi haikara raiqake varaate. Are qaqi kairamanta vo vataanaaka aninte, viva kaiqa vareharo vukaari utukero vara vatai haikara, ekaa vi haikara muara varaate.

¹² Are qaqi kairaro kia vo vaiintivanovata vi vaiintira aaqurihama amitaarire.

Viva qutu virara are qaqi kairaro kia vovanovata vira viqa vaintinavuara mpoqama nimitaarire.

¹³ Are qaqi kairamanta viva kuvuarama taika vaaka qutu vimanta, naantiarai vai vaiinti nahentika vika nutu kia iritaraiti, ekaara tauru kaate.

¹⁴ Oho, Noravano Kotiva ti navutaara kaivaqaukavara qora okara autuara kia tauru karaitiro, qaqi iritaarire.

Vira nova qora kaiqa varai uvaravata kia nunka amitairaqe te hove tiataarave.

¹⁵ Ho Noravaauvo, are vi vaiintira ankuvano qora okara autua uvvara ekaa enta qaqi iritehara kia nunka nimitaraitira, are qaqi kairamanta ekaa vaiinti nahenti vikara tauruke qumimaqama kaate.

¹⁶ Vi vaiintiaria kia vo vaiintiaria kaiqe te vira kojema amitaare tiraitiro, viva vehi vaiinti nahentive, vo haika vo haikara aavoqiaqave, nora maaraqi variakave, viva vika qoraiqama nimitaqiro vira kaara vika qutu vuuarave.

¹⁷ Vi vaiintivaa kia koqe uvvara quaharaitiro, viva qora uvaraqai quaheharo vo vaiinti vo vaiintiaria ne vaaquqama vuate ti vaivama vairave. Oho, vi uvvara tirava nai vaaquqama vuuarire.

Vi vaiintivaa kia Kotira aareharo vo vaiintivata kojema amitaane tiraitiro vairave. Vira kaara Kotiva naivata kia koqema amitaarire.

¹⁸ Vaiintivano utavaaqa nonku taintemakero, vi vaiintivaa vaiinti nahentiaria vaaquqama vuate tivaqiro vi vairave.

Oho, namari naavaro vaataaqi viqetaintema kero, vira qora uvavano vira vaataaqi oriqetero nai qoraiqama amitairaqe te hove tiataarave.

Vahavera vaataqaa tutiqama kaivaro vuhaariqi viqetaintema kero, vira qora uvavano nai vuhaari qoraiqama kairage te hove tiataarave.

¹⁹ Oho, vira qora uvavano nai qoraiqama amiteharo kia vira tuta karaitiro, utavaaqa nonkutaira voqaara vira naavuma tairaro, tavaaranan reti rumpa taira voqaara ekaa enta vira ututuma teharo vairage te hove tiataarave.

²⁰ Tiriara qora uva ti variakave, tiqaa una uva ntuvakeha ti variakave, Noravano Kotiva mintimakero nái qoraiqama nimitairage te hove tiataarave.

²¹ Noravaauvo, are ekaa haikaqaa raqiki variaravama variaro. Are nena nora autu koqerara irihara, ti kojema timitaane. Ekaa enta ai muntukavano tiriara vairara tira, are navutaaka kauquqihairi ti qaqini vara kaane.

²² Mpo, te vehi vaiintivano vaiha te tenta kahaqiarirava kia vaimanta vauraro ti muntukavanovata qoraiqimantama vauro.

²³ Erainaini kuarivano aqu vireva ivaro maraquravano vukaiqama viro taiqa vintemake, te inaararaqaqai varike taiqa virerave. Kaintaaqa ruqutu venta kaantemakero, ti qaqira kaivo.

²⁴ Te kara aurama tauraro ti torivano kia kempukaiqivaro ti vaatavano ogita vivaro vuhaariru aqu vimantama vauro.

²⁵ Vaiinti nahenti ti tauvaqa vauraa uva tiavo. Vika ti taveha nái qiata runkinkiri iha naaraihama timite variavo.

²⁶ Mpo Noravaauvo, are ti Variqavano variararo ai muntukavano tiriara vairara tira, are ti ruaruama timitaane.

²⁷ Are mintiramanta ti navutaaka kankomake iri tave tiha, Oho, Noravano Kotiva vira ruaruama amite vaivama vaivo, tivarave.

²⁸ Vika tiriara tiha, Kotiva vira qoraiqama amitairaro vaaquqama vuuarire, tivara are kia mintiraitira, ti kojema timitenara.

Are ti qoraiqama timite variaka návata qoraiqama nimitehara vika vara muntuvi kairage te ai kaiqa vaiintivano virara quahaare.

²⁹ Are qaqi kairamanta ti navutaaka anomake kauruate.

Are qaqi kairaro vukai tavunavano vaiinti naavuma taintema kero, kaurira haikavano vika naavuma taarire.

30-31 Kia ho nái kahaqika variamanta hauri navutaaka vikaqaa uva vateha vika arukevorave tiro, Noravano Kotiva vika tataaqa himpi vaharo vika kahaqirara ti, te naverai tivaqti viha Nora Kotira autu nora ami, virara koqeve tirera. Te vaiinti nahenti ruvaaqumavi vainaini vaiha, vira autu tuahera kareravema turo.

110

Devitiva maa ihira qara ntuvatora

¹ Noravano Kotiva ti Nora Vaiintiara tiharo, Are uritarera tinta kauqu tanaraini oquivi vairaqe te ai navutaaka aru naatara amitaarirara are vikaqaata nena aiqu ntava taane, tirave. (Mat 22:44; Maaki 12:36; Ruki 20:42-43; Kaiqa Va 2:34-35; 1 Korinti 15:25; Epa 1:20-22; Ko 3:1; Hiparu 1:13, 8:1, 10:12-13)

² Noravano Kotiva ai voqavata noraiqama kairara are Saioni vatukaihira airi vataqaa raqikiqira vihara nena navutaakaqaavata raqikinarave.

³ Are nena navutaaka hampata raqireva ina entara ai iqoka vaiinti iqoka raquataa iramanta raqivarave.

Toqaqi varavuvano ukau qaraakaiqama amitaintema kera, are vo enta vo enta qaraaka kempuka varenarave.

⁴ Noravano Kotiva nai kauqu ainqaa aquukeharo ariara mintima tivo: Merikisitekira voqaantema kera, are ekaa entama Kotira kaiqa vara amitenia vaiintiva vainarave, tirave. Ho Noravano Kotiva kiama vi uvvara qaqrakero vo uva tianarove. (Okara 14:18)

⁵ Noravano ai kauqu tanaraini vaiharo ai kempukaiqama amitaqiro vuanaro. Vira arara itaaina entara viva avuhainauka hampata raquqiro viharo vika kempuka taiqa kaanaro.

⁶ Naantiara viva vo vatanaa vo vatanaaka qora okara autira kaara vika qiata rukavu raakavuma kairaro vika vaatavano vata maata mpiqa viro varianaro.

⁷ Avuhainaava namarivano aara auvahini tuvinara nairaro vi namariva vira kempukaiqama kairaro viva navutaaka naataraqiro vuanaro.

111

¹ Kaiqenavu Nora Kotira autu tuahera kaare.

Te vira vaiinti nahenti ruvaaquamavi vainaini vaha, ekaa tenta muntukaqihai Nora Kotira autu noraiqama keha, viva varai kaiqara vika tiva nimiqi virera.

² Noravano Kotiva tinavu vara timite vai kaiqava, nai nora kaiqa, vo kaiqa vo kaiqa vaimantara ti, virara voqamake quaheha variaka vira okara irireka aato tara iha variarave.

³ Viva vo kaiqa vo kaiqa vare vaiva, vi kaiqava vira mpeqa okaravano takuqi vairavata, viva uritarero avuhainaava vairaravata, tinavu humiqe vaira.

Mpo, viva avuqavuqama keharo vaiinti nahentiaa raqikiqiro vi vairava kia taiqa viraitiro, ekaa enta qaqi variqiro vuanarove. ⁴ Viva aahuva kaiqa, vo kaiqa vo kaiqa tinavu vara timite vaiva nora kaiqa vairara ti, tenavu virara kia tauru karaiti, qaqi iriqi virerave.

Mpo, Noravano Kotiva tinavu koqema timiteharo tinavuara aaqurihama timite vaivama vaivo.

⁵ Vira aatu qeteha koqemake vira uva iriqi vi variakaqaa viva raqikiharo kara nimi vairave.

Viva nai vaiinti nahenti hampata uva tiva taatau taira kia tauru karaitiro, ekaa enta vi uvvara iriqiro vi vairave.

⁶ Viva tinavu nai vaiinti nahenti nai kempuka humiqeharo, vo vatanaa vo vatanaaka ia vataro tinavu timimanta varauunara.

⁷ Viva vare vai kaiqava, ekaa vi kaiqava avuqavu vai kaiqava vaivaro, viva uva maara tiva taivavata tinavu kahaqaina uvava vaimanta tenavu homa vi uvaraqaa muntuvi vairara.

⁸ Noravano Kotiva tinavuara noraiqaakero iriharo tinavu avuqavuqama timi tareva nai uva maara tivataiva kia taiqa viraitiro, ekaa enta variqiro vuanaro.

⁹ Viva nai vaiinti nahenti kuvantu nimitero, vika hampata vaiharo uva tiva taatau kero vataira. Viva vi uvvara kia qaqira kairaro ekaa entama qaqi varianaro.

Mpo, tenavu vira mpeqa okara takuqi vairara iriha, voqamake qeteha vauro.

¹⁰ Vaiintivano koqe avu aato varareva irera, viva hoqare Kotira aatu qeteharo variarire.

Vira uva maara iriqi vi variaka variavaro viva vika koqe avu aato nimimanta variara. Ho kaiqenavu vira autu ekaa enta tuaheraare.

112

¹ Kaiqenavu Nora Kotira autu tuahera kaare.

Nora Kotira aatu qeteharo vira uva avataqiro vi vai vaiintira Noravano Kotiva vira koqema amite vaira.

² Kotiva vira vaintivaravata koqema nimitaira vaiinti nahenti vinavuka nora autu nimimanta vinavuka nora kempuka vatekama vaivara.

³ Vira vaintivara airi monu airaira vataimanta vaiinti nahenti vinavuka parumakeha nimirara kia tauru karaiti, qaqi iritevara.

⁴ Noravano vaiinti nahenti koqema nimiteharo aaqurihamma nimite vaiva vairara ti, avuqavu ni vai vaiinti nahentika konkira ariraqi vaivaro viva vika ataama nimitaanaro.

⁵ Paruma keharo nai kenuaka kahaqiharo *dinau* monuvata nimi vai vaiintira Kotiva vira koqema amitairaro quahaanaro.

⁶ Vi vaiintiva kia qoraiqama viraitiro, koqema kero variqiro viramanta vaiinti nahenti viva avuqavu kaiqa varainarara qaqi iritevara.

⁷ Vi vaiintiva Nora Kotirara noraiqaakero iriqiro vivaro vira muntukavano paru ivaro vaharo, qora vakaakavano qovaraiqiaina entaraqaa viva kia qetaanaro.

⁸ Vira muntukavano Kotirara noraiqaakero vaivarora tiro, viva kia vo haikara noraiqaakero iriharo vira aatu qetaraitiro, Kotiva ti navutaaka naatarama timitaanarove, ti vairia.

⁹ Vi vaiintiva paruma kero vehi vaiinti nahenti airaira viti viri nimi vaimanta, vika nora autu vira amivaro viva nora vaiinti varianaro. Vika vira avuqavu okarara kia tauru karaiti, qaqi iritevara.

¹⁰ Qora okara auti vaika vi vaiintira taveha arara itairamanta vaivara. Vika nái aarai *tentiri tiha/teti aneha* variqi vi, vuru taiqa vivara.

Qora kaiqa vare vaika vika antuqavano vaina haikava kia qovaraiqiraitiro, qumi-naiqama vuanaro.

113

¹ Kaiqenavu Nora Kotira autu tuahera kaare.

Ne Nora Kotira kaiqa vaiinti nahenti, vira autu tuahera kaate.

Kaiqenavu Nora Kotira autu tuahera karerama turo.

² Kaiqenavu vatevata, naantiara ekaa entavata, Nora Kotira autu tuaheraqi vuare.

³ Ne kuari avu urinaini variakavata, uritarero aquvinaini variakavata, ekaa ne Nora Kotira autu tuahera kaate.

⁴ Noravano Kotiva ekaa vo vatanaa vo vatanaakaqaa raqiki vaiva vaivaro, vira mpeqa okaravano takuqi vaiva naaruvavata uri aatarakero vaira.

⁵ Nai tavave tinavu Variqa Nora Kotira voqaara vaivo?

Viva nai virini kantaqaqini vaiharo nai avuhainaa taintaqaa oquvi vaiharo ⁶naaruvavata vatawata viavi tave vaira.

⁷ Vehi vaiinti nahenti qoraiqamavi konkomaqi variakave, vo haika vo haikara aavoqihia nora maaraqi variakave, viva vika vika ntita varero, ⁸qiata vaiintinavu varianaini vuru kaimanta koqemake variara.

⁹ Viva *naahiaru/qururaiqama* vua nahentika koqema nimitaimanta vika airi vainti vataate quaheha variara.

Ho kaiqenavu qaiqaavata Nora Kotira autu tuahera kaare.

114

¹ Haaru tinavu kaivaqaukavara Isareri vika Isipi mini ke aniera. Iekopira vaintivara vo uvajihai ti varia vatanaaka mini ke aniera.

² Vi entara Noravano Kotiva Iutaa vikara tinta vaiinti nahentima variavo tivakero, Isarerriara, Vika tenta kaama tauna vaiinti nahentikama variavo, tira.

³ Ho Isareri vika Isipi ke vuavaro, Naare Namarivanu vika tavero qetakero vivaro Iotani Namarivanovata kia tuviraitiro, tuvurantero vira.

⁴ Namarivanu mintivaro vo aiqina vo aiqinavano memeraavano ravukuvi ravukuvi intemake, qaki qaki i variavaro, inaara aiqinavanovata sipisipi naativano ravukuvi ravukuvi intemake, qaki qaki i variara.

⁵ Naare Namarivauvo, vi entara nana haikavano qovaraiqvare are qetakera vuanarave?

Iotani Namarivauvo, nantivarae are kia tuviraitira, tuvurantera vuanarave?

⁶ Aiqinataario, vi entara ne nana kaarae memeraavano ravukuvi ravukuvi intemake, qaki qaki i variarave?

Ne inaara aiqinavauvo, nana kaarae sipisipi naativano ravukuvi ravukuvi intemake, qaki qaki i variarave?

⁷ Vatavauvo, vate Noravano Kotiva tuvirara are qetehara qaki qaki iane. Iekopira Variqavano tuvirara are qetehara ntiri ntiri iane.

⁸ Viva nora ori tuqantaa kaivaro orivano varuva namari kuquviro vairave.

Viva tivarо kempuka origihairo ruvu namarivano noraiqaakero tuvi vairarama turo.

115

¹ Noravauvo, tenavu tentanavu hutu tuahera kaarorave.

Ai muntukavano tinavuara vaivara are tinavuara noraiqaakera irigira vi varianarara ti, tenavu tentanavu hutu kia tuahera karaiti, ai nora autu tuaheraqi virerave.

² Oho, vo vatanaa vo vatanaaka nantihae tinavu ireha tiha, Tantoe ni Variqavano vaivo? ti variara.

³ Tinavu Variqavano naaruvaini vaiharo, nai nana nana kaiqa varaataa ira vare vaira.

⁴ Tinavu Variqavano mintimakero vaimanta vo vatanaa vo vatanaaka variqa vaireka, vaiintivano kauquqohai aututaaka variara. Valintivano korive silvaave varake, vi haikaraqohai una variqa autukeha vate variara.

⁵ Ike, una variqa vika no vaimantavata, kia ho uva tivara.

Vika avu vaimantavata, kia ho tavevara.

⁶ Vika aato vaimantavata, kia ho uva irivara.

Vika aiqi vaimantavata, kia ho uhirevara. ⁷ Vika kauqu vaimantavata, kia ho auteha tavevara.

Vika aiqu vaimantavata, kia ho nirava.

Vika noqihai kia ho uva voqavata tivara.

⁸ Oho, una variqa auti variaka variqi vi, naantiara vika nái aututaa haikara vira voqaantemake vaivara.

Qaqi vaiinti nahenti una variqara noraiqaake iri variaka, vikavata vohaa qaramake vira voqaaara vaivara.

⁹ Ne Isarer, Nora Kotiraqaa kempukaiqamake muntuvi variate.

Vivama ni kahaqiharo, kainkevano vaiinti antua amitaintema kero, ni antua nimite vairave.

¹⁰ Eronira anku Kotira kaiqa vara amite variaka, ne Kotiraqaa kempukaiqamake muntuvi variate. Vivama ni kahaqiharo, kainkevano vaiinti antua amitaintema kero, ni antua nimite vairave.

¹¹ Nora Kotira aatu qeteha koqemake ni variaka, nevata Kotiraqaa kempukaiqamake muntuvi variate.

Vivama ni kahaqiharo, kainkevano vaiinti antua amitaintema kero, ni antua nimite vairave.

¹² Noravano Kotiva kia tinavuara tauru karaitiro, viva tinavuara iriharо tinavu koqema timitaanaro.

Viva tinavu Isarer koqema timiteharo, Eronira anku Kotira kaiqa vara amite variakavata koqema nimitaanaro.

¹³ Nora autu vataakave, inaara autu vataakave, Nora Kotira aatu qeteha koqemake ni variaka, viva ekaa vika koqema nimitaanaro.

¹⁴ Mpo, kairaro Noravano Kotiva airi vainti ni nimiro, ni vaintivaravata airiqama kaarie.

¹⁵ Kairaro Noravano Kotiva naaruvavata vatavata autu kero vataiva, viva ni koqema nimitaarie.

¹⁶ Naaruvavano nai Noravano Kotiva iva vaivaro, vatavano tinavu vaiinti nahenti timitaivama vaivo.

¹⁷ Qutu vuaka evaara varianaini otu variarara ti, vika kiama ho Nora Kotira autu tuahera kevara.

¹⁸ Tenavu qaqi vaurauka vatevata naantiara ekaa entavata Nora Kotirara koqeve tivaqi virera.

Ho kaiqenavu Nora Kotira autu tuahera kaare.

116

¹ Te Nora Kotirara ti aaqurihama timitaane turaro viva te vira aaraunara irirara tiro, ti muntukavano voqamakero virara vaimantama vauro.

² Te vira aarauraro viva nai aato ti timi vairara ti, te tenta qaqi variqi vuaina entara vira aaramaqi virera.

³ Mpo, qutira haikavano naaqunta voqaara tiqaa vunta vaantama kero uqurama taimanta te qutuvi ruhiqauvi vaunara.

Te qutu vuaka varianaini vuarirava aumanto vaimanta te voqamake qeteha vauraro vi maaraava ti taiqa kareva auti vaimanta vaunara.

⁴ Te mintimake vaiha viraqahai Nora Kotira aareha tiha, Mpo Noravaauvo, ti ruaruama timitaraqe te kia qutu vuure, tunara.

⁵ Noravano Kotiva tinavu aaqurihamu timiteharo tinavu koqema timite vaivama vairo. Tinavu Variqavano tinavuara mpo ike ti vaivama vairo.

⁶ Kia ho nái kahaqi varia vaiinti nahentika variavaro Noravano Kotiva vika antua nimite vaimanta vika ho variara.

Tevata mintimake qoraiqamavi vauraro viva ti ruaruama timitaira.

⁷ Noravano Kotiva mintima kero ti koqema timitaivarо ti muntukavano paru i vaimanta vauro.

⁸ Noravaauvo, te qutuvi ruhiqauvi vaurara are ti ruaruama timitera, ti auquru aaharaqama timitera, tiriara hiqintuantorave tira, are tiqaa koqema kera raqikiqira vuanararama turo.

⁹ Noravano Kotiva mintima kero ti kahaqirara ti, te maa vataraqaa qaqi variqi vuaina entara vira avuqaa koqemake nuvaqi virera.

¹⁰ Te Kotirara viva quqaama ti kahaqianarove tivakeha vira aareha tiha, Mpo Noravaauvo, nora maaravano tiqaa vaivo, tunara.

¹¹ Vi entara ti muntukavano qoraiqimanta vaiha te tiha, Ike, ekaa vaiintivano ti varia uvava una uvaqaima vaivo, tunara.

¹² „Te mintimake iriha vauraro Noravano Kotiva ti koqema timitaira.“ Ike, viva ti koqema timitairara iriha te nana *ofaae* vira nai amirarave?

¹³ „Ho te maa *ofaa* vira amirerave.“

Te *uaini* kaqa vare oru Nora Kotira avuqaa vaiha, viva ti ruaruama timitairara iriha virara koqeve tivakeha, vi *uainira* qihira amitarera.

¹⁴ Mintimake viraqahai te vira vaiinti nahenti ruvaaqumavi vainaini vaiha, te tenta kauqu aiqiqaa aquukeha vo uva vo uva tiva taunantemake autirera.

¹⁵ Noravano Kotiva nai vaiinti nahentiara noraiqaakero iri vairara tiro, vikaqihairo vovano qutiraro viva kiama virara qumina haikave tianaro.

¹⁶ Noravaauvo, te ai kaiqa vaiintima vauro. Haaru ti nova ai kaiqa nahenti vaharo ai kaiqa varaintemake, tevata vate ai kaiqa vare vauro.

Seni naaquntavano ti rumpa taivara are ti qantu timitaaramanta te qaqini kuvantuvi ho vauro.

¹⁷ Are ti mintima timitaanarara ti, te ariara koqeve tiaina *ofaa* iha quara amiteha ai aarara.

¹⁸ Mintimake viraqahai te ai vaiinti nahenti ruvaaqumavi vainaini vaiha, te tenta kauqu aiqiqaa aquukeha vo uva vo uva tiva taunantemake autirera.

¹⁹ Noravaauvo, te vi *ofaa* Ieruharemini ai Naavu vainaini vaiha autu amitarerave.

Ho aniqenavu Nora Kotira autu tuahera kaare.

117

¹ Ne ekaa vo vatanaa vo vatanaaka Nora Kotira autu tuahera kaate.

Ne naato vata maata variaka vira autu noraiqamake tuahera kaate.

² Vira muntukavano tinavuara voqamakero vaivaro viva tinavuara noraiqaakero iriqiro vi vairava kia taiqa viraitiro, ekaa enta variqiro vi variainarara ti, aniqenavu Nora Kotira autu tuahera kaare.

118

¹ Kaijenavu Nora Kotirara koqeve tiare.

Vira okaravano koqe okaraqai vaivaro, vira muntukavano tinavuara ekaa entama variqiro vuanarrove.

² Kaiqe tenavu ekaa Isarerri virara minti tiare:

Vira muntukavano tinavuara ekaa entama variqiro vuanarrove, tiare.

³ Kairamanta Kotira kaiqa vara amite varia vaiintikavata minti tiate:

Vira muntukavano tinavuara ekaa entama variqiro vuanarrove, tiate.

⁴ Ho kairamanta ekaa vaiinti nahenti Nora Kotira aatu qeteha vira uva koqemake iri variakavata minti tiate:

Vira muntukavano tinavuara ekaa entama variqiro vuanarove, tiate.

⁵ Tiqi nora maaravano vaimanta te Nora Kotira aauraro viva ti uva iriro ti kuvantu timitaira.

⁶ Noravano Kotiva ti hampata vairara ti, te kia qetarerave. Vaiintivano ti qoraiqama timitaainara aatu kia te qetarerave.

⁷ Noravano Kotiva ti hampata vaharo ti kahaqi vaimantara ti, te tenta navutaaka naatarakeha, vika vora ntua nimitarerave.

⁸ Kojemama tenavu kia vaiintiqa muntuvi vairaiti, Nora Kotirara noraiqaake iriqi vuare.

⁹ Kojemama tenavu kia avuhainaa vaiintive, qiata vaiintive, vikaqaa muntuvi vairaiti, Nora Kotirara noraiqaake iriqi vuare.

¹⁰ Airi vo vatanaa vo vatanaaka ti navutaiqihha ti ututuma taamanta, te Nora Kotira kempukaqohai vika vehi autu taiqa kaunara.

¹¹ Vika hihai hihai ani ti ututuma taamanta te Nora Kotira kempukaqohai vika vehi autu taiqa kaunara.

¹² Mpora airithaaavano vaiinti arireva vira ututuma taintemake, vika ti ututuma taavaro, ihavano ukau itaqi viro vuru vaaka qimpa vintemake, vika vaaka qutu vuarave. Te Nora Kotira kempukaqohai vika vehi autu taiqa kaunarave.

¹³ Oho, vika ti hampata kempukaiqamake raquqi vuamanta te aumakaa hinqintivi ruhiqau vuraro, Noravano Kotiva ti kahaqama timitaira.

¹⁴ Ho Noravano Kotiva ti kempukaiqama timite vaiva vaimanta te vira ihi tiva amitarera. Viva ti ruaruama timitaimanta te ho vauro.

¹⁵ Kotira vaiinti nahenti vika nái naavuqihai naverai tiha, Noravano Kotiva nai kempuka kauquqohairo navutaaka naatarama kaivo.

¹⁶ Vira kempukavano navutaaka naatara timitaivo. Noravano Kotiva nai kempukaqohairo iqoka aatara kaivo.

¹⁷ Mpo, te kia qutiraiti, qaqi variqi viha Noravano Kotiva ti kahaqama timitairara vaiinti nahenti tiva nimiqi virera.

¹⁸ Noravano Kotiva tiriara viva avuqavu aaraqaa vuarire tiro, ti noraiqamakero ruqutimanta te qoraiqamavi vaurarovata, viva kia ti qaqi kaimanta qutu vunara.

¹⁹ Ho Nora Kotira Naavuni tutuka arataa qentinavura qantua timitaiqe te viraqi oriqete vайha virara koqeve tiare.

²⁰ Maa virama Nora Kotira Naavu qenti vaivo. Avuqavu ni variakaqaima viraqi oriqetevarave.

²¹ Noravauvu, are te ai aarauna uvvara irira, ti ruaruama timitaanarara ti, te ariara koqevema turo.

²² Naavu kaqeha vo oriara qora orive tivake qaqrakaa oriva, vate vi oriva naaquraiqama vivo. (Matiu 21:42)

²³ Noravano Kotiva vi haikara autukero vataimanta tenavu tavauraro nai koqe iro vairave.

²⁴ Noravano Kotiva vate maa entara koqe enta tinavu timimantara ti, kaiqenavu tinavu muntukaqihairo koqe iraque quahaare.

²⁵ Mpo Noravauvu, tinavu ruaruama timitaane. Noravauvu, tinavu kahaqirage tenavu ekaa haika autuarirava koqe iro variarire.

²⁶ Noravano Kotiva nai autuqaa ani vai vaiintira kojema amitaanaro. (Mat 21:9)
Aniqenavu Nora Kotira Naavuni vайha vira quahama amitaare.

²⁷ Noravano Kotiva viva Variqavanoma vaivo. Viva tinavu kojema timitaimanta vauro. Virara irihama kaiqenavu katari mare kauquqi tuata vare oru *ofaa* tainta tataaqa variare.

²⁸ Mpo Noravauvu, are ti Variqavano variaravera te ariara kojemave turo.
Are ti Variqavano variaravera te ai autu noraiqama karerave.

²⁹ Ho ne Nora Kotirara koqeve tiare.

Vira okaravano koqe okara vaivaro vira muntukavano tinavuara ekaa enta variqiro vuanarovem turo.

119

Alef ♀

¹ Kia vo uvavanovata vikaqvi vaimanta vika Noravano Kotiva tivatai uvara koqemake iriha ni variaka, Kotiva vika koqema nimite vaimanta vika quaheha variqi vi variara.

² Vika Kotiva tivatai uvara koqemake iriqi viha, ekaa nái muntukaqihai vira rantareka auti variaka Kotiva vika koqema nimitaanaro.

³ Vika kia qora okara voqavata autiraiti, Nora Kotira aaraqaa koqemake ni variara.

⁴ Noravauvu, are tinavuara ti uva kia raqa karaiti, ekaa vi uvara koqemake raqikiha iriqi vuate tira, vo uva vo uva tiva taanarave.

⁵ Mpo, are uva maara tiva taanara te kempukaiqamake iriqi vuarera, te virara hove tiaara.

⁶ Are minti minti iate tiana uvara te koqemake iriqi vuarera, te kia kaurira haika varaainarave.

⁷ Are tiva taana uvava avuqavu uvaqai vaimanta te vi uvara vo enta vo enta kankomake iriqi viha, te tenta muntukaqihai quqaiqamake ai autu tuaheraqvirerave.

⁸ Mpo Noravauvu, te ekaa are tiva taatau taana uvara iriqi virerave. Are kia ti qaqla kaane.

Beth □

⁹ Quvaaraa vantive varaata vantive, vika nantiabee kia hampi kaiqa vararaiti, koqemake vaivara? Ho vika ai uva iriha, vi uvara koqemake avataqi vivera, vika homa mintiaka vaivara.

¹⁰ Mpo, te ekaa tenta avu aato muntukaqihai ai kaiqa vararerave. Are ti kahaqiraqe te kia ai uva voqavata raqa karaiti, ekaa vi uvara iriqi vuare.

¹¹ Te ai uva raqa kaarorave ti, are tiva taana uvara tenta avu aatoqi vataunara.

¹² Mpo Noravauvu, te ai autu tuahera karerave. Are nena koqe okara, vo okara vo okara ti humiqairaqe te vira avataare.

¹³ Are uva tiva taanara, ekaa vi uvara te tenta noqihai vaiinti nahenti tiva nimi vaunara.

¹⁴ Vaiintivano airi monuaravu airairarave quahaintemake, te ai uva iriha avataainarara voqamake quaheha vairera.

¹⁵ Are uva maara tiva taanarave, koqe aaraqaa ni uvara tiva taanarave, te tenta aatoqi iriqi vi vaunara.

¹⁶ Mpo, are uva tivakera vataanarara ti hantuqa harimanta, te kia vi uvara tauku karerave.

Ghimel ♫

¹⁷ Mpo, are ti nena kaiqa vaiinti koqema timitairaqe „te kia qutiraiti,“ qaqla variqi viha ai uva iriqi vuare.

¹⁸ Are ti avu aato qantua timitairaqe te are uva tiva taanara iriqi viha, vi uvara voqaraa uva vira okara, vo okara vo anomake iri tavaare.

¹⁹ Mpo, kia te vukai enta maa vataraqaa variainarara tira, are kiama nena tivakera vataana uvara kukeqa karaitira, vira okara humiqaaane.

²⁰ Mpo, ti muntukavano ekaa enta are uva tiva taanara voqamakero iriataa ivaro vaira.

²¹ Nái nutuaraqai iri variaka are vika nitinara. Vika are uva tivakera vataanara tauvaqa utu amitaara kaara, are vika qoraiqama nimitaira vaaquqama vivarave.

²² Te are tivakera vataana uvara iriqi yunara kaara vika ti turoqareha naarahama timite variarave. Are kia qaqla kaira vika mintina uvara tiriara tiate.

²³ Mpo, qiaata vaiintinavu ti hutu vataini tuvi yuarie ti, ruvaqumavi variaveravata, te ai kaiqa vaiinti vaiha ai uva maara tenta aatoqi iriqi virerave.

²⁴ Are uva maara tiva taarava ti muntuka paruma timitaimanta te quaheha vauro. Vi uvava ekaa enta avuqavu aara ti humiqe vaira.

Daleth ▶

²⁵ Oho, ti kempuka taiqaimanta te konkoma kanta hijintivi vauro. Are nena tiva taana uvara iriharama, ti qaiqaa kempukaiqama timitairaqe ho variare.

²⁶ Mpo, te tenta varauka kaiqara ekaa ai tiva amurara are vira irira, tinta tiva timianarave.

Are nena koqe okara, vo okara vo okara ti humiqairaqe te vira avataare.

²⁷ Are ti kahaqiraqe te are tiva taana uvara okara kankomake iriare.

Are mintirage te are nora kaiqa, vo kaiqa vo kaiqa varenarara aatoqi iriqi vuare.

²⁸ Mpo, ti muntukavano qoraiqivaro ti kempukavano kia vaimantama vauro.

Are nena kauqu aqiqaa aqu kera tiva taana uvara iriharama, ti kempukaiqama timitairaqe te ho variare.

²⁹ Mpo, are kia ti qaqi kairaqe te hampi aaraqaa viha una kaiqa varaare.

Tiriara viva vi aararaqaa vuantorave tira, are ti koqema timitehara nena uva tiva taanara ti humiqaqira vuane.

³⁰ Ti muntukavano avuqavuqamake ni varia aarara vaimanta, te are tiva taana uvara viraqai iriqi virera.

³¹ Noravaavo, te ai uva maara kempukaiqamake iriqi vi vaunarara tira, are kia ti qaqi kairaqe te vo haika kaara kaurira haika varaare.

³² Are koqe avu aato voqavata ti timi varianarara ti, te kia rumokamake viraiti, te tuqavaaqamake ai aaraqaa viha, ai uva iriqi virerave.

He ፪

³³ Noravaavo, are nena uva tiva taanara ti humiqaqiraqe te ekaa enta vi uvvara koqemake iriqi vuare.

³⁴ Nena uva okara kankoma kera ti humiqaqiraqe te tenta muntukaqihai kempukaiqamake vira avataqi vuare.

³⁵ Are minti mintimake nuate tiana uvvara ti humiqaqiraqe te quahake vi aaraqaa nuvaqai vuare.

³⁶ Are ti kahaqiraqe te monu airaira varaainarara kia noraiqaake iriraiti, ai uva iriqi vuainarara noraiqaake iriqi vuare.

³⁷ Te qumina vo haika vo haikara avu autuarorave tira, are ti kahaqiraqe te ekaa vi haikara tauvaqa utu amitaare.

Are nena tianantema kera, ti koqema timitairaqe te ho variqi vuare.

³⁸ Are nena tiva taana uvvara irihara, ti nena kaiqa vaiinti koqema timitairaqe te ai aatu qeteha ai uva iriqi vuare.

³⁹ Mpo, te qaiqaa kaurira haika varaarorave tira, are ti kahaqiraqe te ai uva koqera iriqi vuare.

⁴⁰ Mpo, ekaa enta te are uva tiva taanara iriataa imantama vauro. Are nena avuqavu okarara irihara, ti qaqi kairaqe te kia qutiraiti, qaqi variqi vuare.

Waw ፫

⁴¹ Noravaavo, ai muntukavano tiriara enena vaira qaiqaavata ti humiqaane.

Are nena kauqu ainqiqa aqu kera tiana uvvara irihara, ti ruuuama timitaane.

⁴² Are mintirae te tiriara qora uva ti variaka náivata tiva nimiare. Te are tiva taana uvvaraqaa muntuvi vauraukave.

⁴³ Are tiva taana uvava vivaqai ti ho kahaqianarove tunarara tira, kia ti qioqama tairaqe te ai quqaa uva qaqqai tivaqai vuare.

⁴⁴ Te ekaa enta are uva tiva taanara koqemake iriqi virerave.

⁴⁵ Te ai uva maarara noraiqaake iriqi vihara ti, te kia vo haika aatu qetaraiti, nahainaini qaqi nuvaqai virera.

⁴⁶ Te avuhainaa vaiinti nivuqaa oru vaiha kia kaurirajti, ai uva qaqi tiva nimirera.

⁴⁷ Are uva tiva taanarara ti voqama kero hantuqa harimanta, te quaheha vi uvvara iriqi virera.

⁴⁸ Mpo, ti muntukavano voqamakero are uva tiva taanarara vaimanta, te vi uvarara voqaraa uvavema turo.

Are vaiinti nahentiaara maantimake ti aaraqaa nuate tiana uvvara, te vi uvvara vo enta vo enta tenta avu aatoqi iriqi virerave.

Zain ፬

⁴⁹ Are haaru nena kauqu ainqiqa aqu kehara ti nena kaiqa vaiintiara tivataana uvvara qaiqaa iritaane.

Te vi uvvara iriha ariara viva ququaama ti kahaqianarove, tunara.

⁵⁰ Te nora maaraqi vauna entara are nena kauqu ainqiqa aqu kera tiva taara uvava ti muntuka qihaaqama timitaira.

Te vi uvvara iri tiha, Ququaama, te kia qutu viraiti, qaqi variqi virarave, tunara.

⁵¹ Nariaraqai noraiqaake iri variaka, enena tiriara qoriri qaariri tiha naaraihama timite variamantavata, te kia are tiva taana uvvara qaqira kaunarave.

⁵² Noravaavo, are haaru vo uva vo uva tiva taanara, te kia tauru karaiti, qaqi irite vauraro vi uvava ti muntuka paruma timite vaira.

⁵³ Oho, qora vaiinti vika are uva tiva taanara raqake variara kaara ti voqamakero arara ite vaimanta vaunara.

⁵⁴ Te maa vataraqaa vona vona variqi viha, are uva tiva taanara viraqaa te ihi arakeha ti vaunara.

⁵⁵ Noravauvu, te entaqi vaiha kia ai tauru karaiti, ariara qaqi iriteha are uva tiva taanaravata koqemake avataqi vi vaunara.

⁵⁶ Te are tiva taana uvvara iriqi vuraro vi uvava ti muntuka paruma timite vaimanta vaunarave.

Heth ▪

⁵⁷ Noravauvu, te variqi viha ariaraqai noraiqaake iriqi virerave.

Te tenta kauqu ainqiqa aquke tiha, Te ekaa ai uva iriqi virerave, turo.

⁵⁸ Ekaa tenta muntukaiqihai ariara ike mpo tiha, Are nena kauqu ainqiqa aqu kera tianantema kera, ti aqurihama timitaane, turo.

⁵⁹ Te tenta qaqi variqi vuainarara aatoqi iriqi viha tiha, Mpo, te ai aaraqaa viha ai uva maara iriqi virerave, tunara.

⁶⁰ Kia te varike mintirerave, te vaaka are minti minti iate tiana uvvara avataqi virera.

⁶¹ Qora vaiinti vika qora kaiqa varareka ti raraau vare viqelevata, te kia are tiva taana uvvara tauru karaiti, qaqi vira iriqi virera.

⁶² Are tiva taana uvava avuqavu uva vaimantara ti, te vo enta vo enta, enta tavaara himpi vaiha ariara koqeve ti vaunara.

⁶³ Ai aatu qeteha koqemake ai uva iriqi vi variaka, te vikara ti qata vakaa, aura nakaama variavo tunara.

⁶⁴ Noravauvu, ekaa naato vata maata variaka ai muntukavano vikara vaira tave variara.

Are nena koqe okara, vo okara vo okara ti humiqairaque te vira avataare.

Teth ♀

⁶⁵ Noravauvu, are nena tiva taana uvarara irihara, ti nena kaiqa vaiinti koqema timite variaro.

⁶⁶ Are uva tivakera vataanarara te kempukaiqamake iriqi vi vaunarara tira, are ti avu aato kahaqiraqe te ai uva okara kankomake iriare.

⁶⁷ Te koqe aara qaqrake hampi aaraqaa vurara are ti ruqutihara utetaanarara ti, te vate ai uva iriqi vi vaunara.

⁶⁸ Mpo, ai okaravano koqe okara vaivaro ai kaiqavanovata koqe kaiqa vairara tira, are vira vira ti humiqairaque te avataare.

⁶⁹ Náí autuaraqai iri variaka una uva tiriara viti viri tiva nimi variamantavata, te ekaa tenta avu aatoqihai are tivakera vataana uvvara iriqi vi vaunara.

⁷⁰ Vo vaiintiara ike mpo tiva nimiteva kia vikaqai vaimantavata, te are tiva taana uvarara hantuqa harimantama vauro.

⁷¹ Mpo, koqemama are haaru ti ruqutihara utetaanarave.

Are kia mintima timitaaraitirio, te kiama ai uva okara avataqi vuraitirio.

⁷² Are nena noqihai tivatanaa uvvara irihama te tiha, Airi korive, silvaave, vi haikava vi haikava qumina haikaqai vaivaro, ai uvavano nai nora haikama vaivo, turo.

Yod ♀

⁷³ Are nena kauquqohaira ti autu kera vataanarara tira, ti avu aato kahaqi vairaque te vo uva vo uva are tiva taanara koqemake iriqi vuare.

⁷⁴ Ai uvavano quqaa vivuma varianarove ti vaunarara tira, are qaqi kaira ai aatu qeteha ai autu tuahere vaika ti taveha quahela variate.

⁷⁵ Noravauvu, te kankomake iruraro are tiva taana uvava avuqavu uvaqai vairave. Are tiriara noraiqaakera iri variaravara tira, are ti utetehara tiqaa maara vataaro.

⁷⁶ Are kauqu ainqiqa aqu kehara ti nena kaiqa vaiintiara tiva taana uvvara irihara, qaqi kairaro ai muntukavano tiriara enena vaiva ti muntuka paruma timite vairaque te ho variqi vuare.

⁷⁷ Are tiva taana uvarara te vogamake quahela vaunarara tira, are ti aqurihama timitehara qaqi kairaque te kia qutu viraiti, qaqi variqi vuare.

⁷⁸ Oho, náí autuaraqai iri variaka una uva tiqaa oqike ti variara kaara are qaqi kairamanta vika kaurira haika varaate.

Ai uva maara, vo uva vo uva tenta aatoqi qaqi iriqi virera.

⁷⁹ Are qaqi kairamanta ai aatu qeteha ai uva iriqi vi variaka, vika te iainanaini ani ti hampata variate.

⁸⁰ Mpo, are ti kahaqiraqe te are ekaa uva tivakera vataanara iriqi viha, kia te tenta autuaina okarara iriha kauruare.

K af ♂

⁸¹ Are ti ruaruama timitenara veka vauraro ti muntukavano maara ntaimantama vauro.

Te mintimake vaihavata, te are tiva taana uvava quqaa vivauma varianarove tivake-hama, vi uvarara noraiqaake iri vauro.

⁸² Mpo, are kauqu aiqiqaa aqu kera tiva taarava qovaraiqiaina entarara te qumina aitutumäqi viruraro ti tivuuantaiha itaivo. Mintimanta te ariara tiha, Mpo, tarentae viva ti muntuka qihaaqama timitaanarove? turo.

⁸³ Memeraa pahiqi *uaini* vataavararo qunahi vimanta qaqrakaara, te vira voqaarama qoraiqamavi vauro.

Te mintimake vaihavata, kia te are uva maara tianara tauru karaiti, qaqi iriqi vi vauro.

⁸⁴ Mpo, te ai kaiqa vaiintivano nora maaraqi vauro. Are nanti nanti enta varikerae ani ti kahaqinarave?

Are tarentae ti qoraiqama timite variakaqaa uva vatehara náivota ntaihenara?

⁸⁵ Nái autuaraqai iri variaka, vika kia are tiva taana uvvara iriraiti, vika tiriara viraqi aqu uvarire ti, híqainti quvite variara.

⁸⁶ Are minti minti iate tiana uvava vaireva, koqe uva vaimanta tenavu homa ekaa vi uvvaraqaa muntuvu vairara.

Vika quminaiqama keha ti qoraiqama timite variara kaara te ariara ti kahaqiane turo.

⁸⁷ Oho, vika ti haruke ruhiqau kaamantavata, te kia ai uva maara qaqira karaiti, vi uvvara qaqi iriqi vi vaunara.

⁸⁸ Mpo, ai muntukavano tiriara vairara irihara, are tiqaa koqema kera raqiki vairaque te kia qutiraiti, qaqi variqi vuare.

Are mintirae te are tiva taana uvvara koqemake iriqi vuare.

Lamed ♦

⁸⁹ Noravaavo, ai uvavano ekaa entama variqiro vuanarove. Ai uvavano naaruvaini kempukaiqama keroma vaivo.

⁹⁰ Are nena vaiinti nahentiera kia tauru karaitira, are vikaravata, ekaa vika kuvuarama tekaravata, noraiqaakera iriqira vinarave.

Are maa vatara autu kera nai vairaqqaa vataanarara tiro, vatevata maa vatava qaqi nai mintiakero vairave.

⁹¹ Are tiararo ekaa haikavano qovaramaviro vaira. Ho vi haikava vi haikava vatevata qaqi mintimake variarave.

Ekaa vi haikava vaireva, ai kaiqa vara amite variaka vaiha kia taiqa viraiti, qaqi variqi vi variara.

⁹² Are tiva taana uvava ti voqamakero quahama timite vaimantama vauro.

Vi uvava kia ti mintitirio, nora maaravano tiqi vaiva ti haru kaimanta te qutuma vuraitirio.

⁹³ Te ai uva maara iriqi vurara are ti qaqi kaaramanta te kia qutiraiti qaqi vaunara. Virara irihama te kia ai uva qaqira karerave.

⁹⁴ Mpo, te are iaraukama vauro. Te ai uvvara noraiqaake iriqi virerave ti vaunarara tira, are ti ruaruuma timitaane.

⁹⁵ Qora kaiqa vare variaka kukegavi vaiha ti haru kareka auti variamanta, te kia vikara noraiqaake iriraiti, te tenta avu aatoqi ekaa are tivakera vataana uvvara qaqiqai iriqi virera.

⁹⁶ Te tavauraro ekaa vo haika vo haikavano variqiro viro vuru taiqa vuarira haikava vaivaro, ai uva vivaqaima kia taiqa viraitiro, qaqi variqiro vuanarovem turo.

Mem ♫

⁹⁷ Mpo, are tiva taana uvarara ti voqama kero hantuqa harimanta, te virara entaqivata aatitairaqaavata aatoqi qaqi iriqi vi vaunara.

⁹⁸ Are tivakera vataara uvava ekaa enta ti hampata vahiaro ti koqe avu aato timi vaimantara ti, te tenta navutaaka avu aatovata naatara kaunara.

⁹⁹ Ekaa enta te ai uva maara tenta aatoqi iriqi vihara ti, te vo okara vo okara kankomake iri tave, tenta *tisaaka* avu aatovata naatara kaunara.

¹⁰⁰ Te are minti minti iate tiana uvvara koqemake avataqi vi vaunarara tiro, ti avu aatovano naampai avu aatovata naatara kairaa.

¹⁰¹ Qora aara airi vaimantavata, te ai uvqai iriqi virerave tivakeha, kia vi aararaqaa vunara.

¹⁰² „Kotio,“ are nenavano nena uva maara ti humiqe varianarara ti, te vi uvvara kia qaqira karaiti, qaqi iriqi vi vaunara.

¹⁰³ *Hani* nauraro noqaahairo hiakaa i vaivarovata, ai uvavano nai voqavatama hiakaa ivo.

¹⁰⁴ Are tivakera vataana uvava ti koqe avu aato timi vairara tiro, ekaa qora okarara kia ti hantuqavano vaimantama vauro.

Nun ♫

¹⁰⁵ *Raamuvano* aara ataama timitaintema kero, ai uvavano koqe aara ti humiqe vaimanta ni vaunara.

OVavano ataama amitaintema kero, ai uvavano ti aara humiqe vaimanta te avuqavu ni vaunara.

¹⁰⁶ Te tenta kauqu ainqaakaa aquukeha ekaa ai avuqavu uva avataqi virerave tunara kia qaqlira karaiti, tenta tunantemake ai uva iriqi virerave.

¹⁰⁷ Mpo Noravaavo, maavarano voqamakero ti qoraiqama timite vaimantama vauro. Are nena tiva taana uvvara irihara, ti qaqi kairage kia qutiraiti, qaqi variare.

¹⁰⁸ Noravaavo, are *ofaara* quahaanantema kera, te ai ihi tiva amite variainarara quahaane. Are nena uva tivakera vataanara viravata ti humiqairage te ekaa vi uvvara kogemake iriqi vuare.

¹⁰⁹ Vo enta vo enta te kia tenta qaqi variqi vuainarara noraiqaake iriraiti, te are tiva taana uvvaraqai iriqi virera.

¹¹⁰ Qora vaiinti vika ti ravaaqavu kareka vaara vuike vataamanta, te kia ai uva qaqlira karaiti, kempukaiqamake iriqi vi vaunarave.

¹¹¹ Ai uvavano voqama kero ti muntukaqti quahara haika timi vaimanta, te vi uvvara ekaa enta tuataqi virera.

¹¹² Te tentara tiha, Te are tiva taana uvvara kia qaqlira karaiti, ekaa vi uvvara avataqi vi, vuru qutu vireravema turo.

Samek ♪

¹¹³ Oho, unaqaraiqama keha ai avataqi ni variakara kia ti hantuqa harivo.

Are tiva taana uvarara ti hantuqa harimantama vauro.

¹¹⁴ Navutaaka ti harukevorave ti, te are variananaini kukeqavi vaunara. Kainke voqantemeta kera, are ti antua timite varianara.

Te ai uvvara noraiqaake iriha vi uvava quqaa vivauma varianarove, turo.

¹¹⁵ Ne qora okara auti variaka, te iainanaihai qaqlirake vuate. Te tenta Variqavano uva tivakero vataaira iriqi virera.

¹¹⁶ Kotio, are nena kauqu ainqaakaa aquukera tiva taana uvarara irihara, ti kempukaiqama timitarage te kia qutiraiti, qaqi variqi vuare.

Hauri te ariara viva ti kahaqianarove tiarirava quminaqiantora.

¹¹⁷ Are ti tuatairage te koqemake variare.

Te ekaa enta ai uvvara koqe uvave tivakeha viraqai iriqi virerave.

¹¹⁸ Are uva tivakera vataanara qaqlirakaaka are vika qoririmake varianara. Vika una uva tivateva quminaqama vuano.

¹¹⁹ Qumina nuhiqi haikara qaqlira kaantemakera, are ekaa vataaini qora kaiqa vare variaka qaqlirake varianarara tiro, ti muntukavano ai uvvara voqama kero hantuqa harimantama vauro.

¹²⁰ Mpo, te ai mpeqa okarara iriha ai aatu qete vauraro ti aiqu kauqu ntiri ntiri i vaimantama vauro.

Are uva uvuqavuqina okarara, viraravata te irihama qete vauro.

Ayin ♩

¹²¹ Mpo Noravaavo, te koqe okara, avuqavu okaraqai autunarave. Virara iriharama kia ti navutaka kauquqi qaqi kairamanta vika ti qoraiqama timitaate.

¹²² Vo haikavano ti qoraiqama timitaantorave tira, are ti nena kaiqa vaiinti kahaqiane.

Kia qaqi kairamanta nai autuaraqai iri variaka tiqaa maara vataate.

¹²³ Mpo, are nena kauqu ainqaakaa aquukehaa tihara, Ai ruaruama amitarerave tianarave. Vi entava qovaraiqainarara te qumina aitutumaqti vuraro ti tivuontaiha itaivo.

¹²⁴ Ai muntukavano tinavuara enena vairara iriharama, ti nena kaiqa vaiinti nena koqe okara, vo okara vo okara humiqairage te vira avataare.

¹²⁵ Te ai kaiqa vaiintivano vaunarara tira, are ti koqe avu aato timirage te ai uva kankomake iriare.

¹²⁶ Noravaavo, qora vaiinti nahenti are uva tiva taanara raqake variara kaara himpira, nena okara vika numiqaane.

¹²⁷ Airi tataa koqemake hiqamataa koriva vaivarovata, ti muntukavano avuniqamakero are tiva taana uvararama vaivo.

¹²⁸ Te ekaa ai uvvara avuqavu uvama vaivo ti vaunara. Ekaa qora okarara kia ti hantuqa vaimantama vauro.

Pe □

¹²⁹ Ai uvavano nai koqe uva vairara ti, te ekaa vi uvvara koqemake iriqi vi vaunara.

¹³⁰ Ai uvavano vaiinti avu aatoqi vairaro vi uvava vira avu aato ataama amitaanaro. Vi uvvara kia koqe avu aato vataa vaiintivata koqe avu aatoma amianaro.

¹³¹ Vainti naativano karara antura ntiharo no aaqaa vintemakero, ti voqamakero ai uvvara hantuqa harimantama vauro.

¹³² Ai autuara noraiqaake iri variaka aaqurihamma nimitaanantema kera, tuqantaavira tivata tavehara aaqurihamma timitaane.

¹³³ Are nena uvvara irihara ti koqe aara humiqairage te viraqaa nuare.

Mpo, are kia qora okara qaqi kairaro viva ti ravaaqavukero tiqaa raqikiarire.

¹³⁴ Ti qoraiqama timitareka auti variakaqihaira ruaruama timitairage te ai uva ho iriqi vuare.

¹³⁵ Mpo, are ti nena kaiqa vaiinti koqema timitehara nena koqe okara, vo okara vo okara ti humiqairage te vira avataare.

¹³⁶ Airi vaiinti nahenti are tiva tanaa uvarara kia noraiqaake iriraiti, vi uvvara raqake variara kaara te iqi rate vauraro ti auquruvano voqama kero nte vaimanta vauro.

Sade □

¹³⁷ Noravaauvo, ai okaravano vaireva, avuqavu okara vaivar, are ekaa uva tiva taaravavata avuqavu iro vairave.

¹³⁸ Are uva maara tiva taarava nai avuqavu iro vaimanta, tenavu homa ekaa vi uvvaraqua muntuvi vairara.

¹³⁹ Oho, ti navutaaka ai uvvara qumina uvave ti variara kaara ti voqama kero vikara arara ite vaimantama vauro.

¹⁴⁰ Te tavaurara are kauqu ainqiqa aqu kera ekaa uva tiva taarava quqaa uvama vaivo. Ti ai kaiqa vaiinti vi uvarara voqamakero hantuqa harivo.

¹⁴¹ Te qumina vaiinti vauramanta vaiinti nahenti ti iri qoraiqama timite variamantavata, te ai uva maara kia tauru karaiti, ekaa vi uvvara qaqi iriqi vi vaunara.

¹⁴² Ai avuqavu okaravano kia taiqa viraitiro, ekaa entama variqiro vuanaro. Are uva tiva taarava, quqaa uvama vaivo.

¹⁴³ Airi maaravano tiqi qovaraqivarovata, are uva maara tiva taarava ti muntukaqi quahara haika timimanta te quaheha vauro.

¹⁴⁴ Are uva maara tiva taarava ekaa enta avuqavuqiro varianaro.

Are ti avu aato kahaqirage te vi uvvara kankomake iriqi viha, kia qutiraiti, qaqi variqi vuare.

Qof ▷

¹⁴⁵ Mpo Noravaauvo, te ekaa tenta kempukaqohai ai aareha tiha, Are ti uva iriane, turo. Mpo, te ekaa ai uva avataaqi virerave.

¹⁴⁶ Te ai aareha tiha, Are ti ruaruama timitairage te ekaa are tiva taana uvvara tuataqi vuare, turo.

¹⁴⁷ Te kia aatitairaqi himpi, ariara viva ti kahaqiarire ti, ai aare vauro.

Te are kauqu ainqiqa aqukera tiva taana uvava quqaa vivauma varianarove tivakeha, vi uvarara noraiqaake iri vauro.

¹⁴⁸ Vo enta vo enta entaqi te kia vaitaraiti, taintaqaa qaqi vaiha, are tiva taana uvvara tenta aatoqi qaqi iriqi vi vaunara.

¹⁴⁹ Noravaauvo, ai muntukavano tiriara vairara iriharama, ti uva iriane.

Are avuqavuqama kera uva rahe variaravara tira, are tiqaa raqiki vairage te kia qutiraiti, qaqi variqi vuare.

¹⁵⁰ Oho, ti qoraiqama timitareka auti variaka te unanaini vaini vainimaqi ani variavo. Vika are tiva taana uvvara kia avate variakave.

¹⁵¹ Noravaauvo, vika mintiavaravata, are ti aumanto varianara. Te tavauraro are uva tivakera vataarava, ekaa vi uvava quqaa uvaqaima vaivo.

¹⁵² Nai haaru te ai uva kaara nti vauraro ti aatovano kenko tiro iri vimanta te tiha, Vira uvavano ekaa enta variarire tiro, viva vi uvvara tivakero vatairave, tunara.

Resh ▷

¹⁵³ Mpo Noravaauvo, te are tiva taana uvvara kia tauru kaunarara tira, are maaravano ti qoraiqama timite vaira tavehara, ti ruaruama timitaane.

¹⁵⁴ Are navutaaka nivuqaa vahara, ti auta ntuva timitera kuvantu timitaane. Nena kauqu ainqaak aqkera tiva taanantema kera, ti kahaqiraqe te kia qutiraiti, qaqi variqi vuare.

¹⁵⁵ Qora kaiqa vare variaka, vika are tiva taana uvvara kia avataqi vuara kaara, are vika kuvantukera ntitera aarava kia ho varianaro.

¹⁵⁶ Noravaauvo, are vaiinti nahenti aaqurihamma nimite variana okarava nai uritarero vairara tira, are qaqi kairaque te kia qutiraiti, qaqi variare.

¹⁵⁷ Navutaaka airitahaa vaiha ti qoraiqama timite variamantavata, te kia ai uva qaqira karaiti, vi uvvara qaqi iriqi vi vaunara.

¹⁵⁸ Oho, kia ariara noraiqaake iri varia vaiintika, vika kia ai uva avate variara kaara te vika tavauraro tivu naavu aqimantama vauro.

¹⁵⁹ Noravaauvo, are ti tavaararo ti ai uvvara hantuqa harimantama vauro.

Te mintunarara tira, ai muntukavano vaiinti nahentiara vai okarara irihara, ti qaqi kairaque kia qutiraiti, qaqi variare.

¹⁶⁰ Ekaa ai uvavano vaireva, quqaa uvaqaima vaivo.

Ekaa vi uvava avuqavu uvavano vairara tiro, kia taiqa viraitiro, ekaa entama varianaro.

Shin ♀

¹⁶¹ Qiata vaiinti vika quminaiqama keha ti qoraiqama timite variamantavata, te kia vika naatu qetaraaiti, ai uvaraqai qeteha, virara noraiqaake iriqi vi vaunara.

¹⁶² Vaiintivano airi monuve airairave rantakero varero quahaintemake, te are kauqu ainqaak aqu kera tiva taana uvarara quahehama vauro.

¹⁶³ Kia ti una uvvara hantuqa harivo. Are tiva taana uvvara, viraraqai ti hantuqa harimantama vauro.

¹⁶⁴ Are uva tiva taarava avuqavu uvaqai vaimantara ti, te vo enta vo enta 7 tataa ariara koqeve tivaqai vi vaunara.

¹⁶⁵ Are uva tiva taanara virara antuqa arimanta variaka, vika muntukavano paru i vaimanta variavaro kia vo haikavanovata vika qoraiqama nimittaira hiqinti qoraiqama vivara.

¹⁶⁶ Noravaauvo, are ti kuvantu timitenentara veka vaiha, te are minti minti iate tiana uvvara koqemake iriqi vi vauro.

¹⁶⁷ Ti muntukavano ai uva maarara voqamakero vaimanta, te ekaa vi uvvara koqemake iriqi vi vaunara.

¹⁶⁸ Are ekaa te auti vauna okarara kankoma kera iri tave varianarara ti, te are ekaa uva tivakera vataanara koqemake iriqi vi vaunarave turo.

Tau ▲

¹⁶⁹ Noravaauvo, qaqi kairaro te ai aareha ariara ike mpo tiaina uvava are inanaini oru vuariere.

Are haaru tiriara tiva taanara irihara, koqe avu aato iriainara ti timiane.

¹⁷⁰ Te ai aaraaina uvvara iriharama, haaru nena tianantema kera, ti ruaruama timitaane.

¹⁷¹ Are nena koqe okara, vo okara vo okara ti humiqe variaramantara ti, te ai autu ekaa enta tuaheraqai virera.

¹⁷² Are tivakera vataara uvava nai avuqavuqiro vaimantara ti, te ekaa vi uvvara iriha tenta noqihai ariara ihi tivaqai virera.

¹⁷³ Te are tivakera vataana uvvara avataqi vi vaunarara tira, are ti kahaqireva geramatera variane.

¹⁷⁴ Mpo, are ti kuvantu timitenentara, tavaataa imantama vauro. Te ekaa are tiva taana uvvara iriha vogamake quaheha vauro.

¹⁷⁵ Are ti qaqi kairaque te kia qutiraiti, qaqi variqi viha ai autu tuahera kaare.

Kairaro are tiva taana uvava ti kempukaiqama timitairaque te koqemake variqi vuare.

¹⁷⁶ Sipisipivano vi aniharo kakakima vintemake, tevata hampi niha kakakima vunarave.

Mpo, te mintunarara tira, are ti nena kaiqa vaiinti tuvu ranta kaane. Are tiva taana uvvara te kiama tauku kauro.

120

¹ Maaravano tiqi vai entara te Nora Kotira aaurararo viva ti uva irira.

² Te virara tiha, Mpo, hauri una uva ti variaka ti qoraiqama timitevorave. Are ti ruaruama timitairaque te ho variare, tunara.

³ Oho, ne una uva ti varia vaiintikao, Kotiva ni nantimae kaanarove? Viva nantiakeroe ni qoraiqama nimitaanarove?

⁴ Viva iqoka vaiinti vevaqohairo ni ntaihaanaro. Viva iha auru itaainara niqaa qihia taanaro.

⁵ Meseki vatanaakave, Kedaa vatanaakave, vika nivutaini vaiintivano qoraiqamaviro vaintemake, te vate ni nivutaini kia koqemake variqi vi vaunara.

⁶ Kia maateraiqamake varia okarara antuqa arimanta variaka, te vika hampata vuqaiqamake vauraro, ti voqama kero popohaimanta vauraro.

⁷ Te vikara maateraiqha koqemake variate ti vauramanta vika kia ti uva iriraiti, iqoka raqirekaqai auti variavo.

121

¹ Te ainqinaini vuruvi aitutuma taveha tiha, Mpo, ti kahaqiarirava taihairoe qovaraiqianarove? tunara.

² Te minti tivake tiha, Ho Noravano Kotiva naaruvavata vatavata autukero vataiva, vivama ti kahaqiarirava vaivo, tunara.

³ Viva kia vaitaraitiro, koqema kero ariqaa raqikiqiro viharo, kia ai qaqi kairaro ai aiquvano vauriri ntairara are higintinara.

⁴ Ho irate. Isareriqaa maimaraara raqiki vaiva, viva kia naka uaqavata avu tauntaivarao vaitaraitiro, viva qaqi avu rampaikero tavamaqiro vi vaivama vaivo.

⁵ Noravano Kotiva ariqaa koqema kero raqiki vaira.

Viva ai kauqu tanaraini vaharo ai mantaaqa amite vaivara are vira aumaqaaraqi koqemakera vi ani varianara.

⁶ Aatitainaraqaa kuarivano kia ai tatoqa kairaro, entaqi toravano kia ai qoraiqama amitaanaro.

⁷ Nai nana nana haikavanoe ai qoraiqama amitareva auti vairaro Noravano Kotiva ai antua amitairaro kia vo haikavanovata ai qoraiqama amitairara are ho variqira vinara.

⁸ Are vona vona vi ani vairaro Noravano Kotiva qaqqiariqaa koqemakero raqikiqiro virara, are vatevata naantiara ekaa entavata, koqema kera variqira vinaravema turo.

122

Devitiva maa ihira qara ntuvatora

¹ Vika tiriara tiha, Aniqenavu Nora Kotira Naavuqi variare, tiavarro ti muntukaqihairo koqe i vaimanta vauro.

² O Ieruharemio, vika minti tiamanta vate tenavu ai vaantaavura qentiana himpite vauro.

³ Ike, Ieruharemio vatuka koqemake aututaaraqi airi vaiinti nahenti viraqi koqemake vohaa ruvaaquamavi variara.

⁴ Noravano Kotiva Isarereri vika tiva nimintemake, vo anku vo ankuvano ani viraqi ruvaaquamavi vaiha, vira autu tuaherakeha virara koqeve ti variara.

⁵ Vi vatukaraqi ekaa Isarereri avuhainauka vaiinti nahenti uva avuqavu i variara.

⁶ Ho Ieruharemipi variaka maateraiqha variate ti, ne Nora Kotira aarama nimiteha maantimake tiate:

Mpo, Ieruharemira antuqa arimanta variaka, are vika qaqi kairamanta koqemake variqi vuate.

⁷ Are Ieruharemipi avutaqi variaka qaqi kaira vika maateraiqha vaimanta, vika avuhainaakovata vika qiaqta vaiintivata koqemake variqi vuate, tiate. Mintimake Kotira aaraate.

⁸ Tenta qata vakaave, aura nakaave, tenta tontive, vikara vikara iriha, te mintima ti: Ne Ieruharemipi maateraiqha koqemake variqi vuate, turo.

⁹ Tinavu Nora Kotira Naavuvano Ieruharemipi vairara ti, te virara iriha mintima turo: Mpo, Ieruharemipi iqokavano kia qovaraiqira viraqi vaika koqemake variqi vuatema turo.

123

¹ Noravauvo, are Avuhainaava naaruvaini variaravera te mini vuruvi taveha ai aare vauro.

² Noravaauvo, are tinavu Variqavanoma variaro. Kaiqa vaiintivano nai nora vaiintiqa muntuvi vaivar, kaiqa nahentivano nai nora nahentiqa muntuvi vaintemake, tenavuvata ariqaa muntuvi vaiha tiha, Vivaqaima tinavu aaqurihama timitaanarove, ti vauro.

³ Mpo Noravaauvo, vokiaka tinavu naaraihama timiteha tinavu autu vatainiqamake variara. Vika tinavu qoraiqama timitaarara irihara, are tinavu aaqurihama timitaane.

Mpo, tenavu qaiqaavata ariara tiha, Tinavu aaqurihama timitaane, turo.

⁴ Airi airaira vataaka airi tataa tinavu tauvaqa vaura uva tiva timite variavo.

Nái nutuaraqai noraiqaake iri variaka, vikavata tinavuara qumina vaiinti nahentive tivakeha tinavu hutu vatainiqamake variavo.

124

Devitiva maa ihira qara ntuvatora

¹ Vi entara Noravano Kotiva kia tinavu mantaraini vайharo kahaqama timitaitirio, navutaaka tinavu nantimae kaatirio? Ne Isareri virara ti tiva timiqe iriare.

²⁻³ Oho, vi entara Noravano Kotiva kia tinavu mantaraini vaitirio, navutaaka tinavu vehima autu kaatirio.

Qaakau vairivano qaqi qaki vai aantaura nampiqama kaintemake, vika voqamake arara itaira tinavu taiqama kaatirio.

⁴⁻⁵ Huvura namariwano vaiinti raaqu varero muntuvi raqutu kaintemake, navutaaka tinavu taiqama kaatirio.

⁶ Ho kaiqenavu Nora Kotirara koqeve tiare. Vi entara viva kia navutaaka qaqi kaimanta tinavu vehi autu taiqa kaarave.

⁷ Uvirivano vaara vuitaaraqihairo qaqi ata varero vintemake, tenavu navutaaka kauquqihai ruqemake qaqi vunara.

Noravano vaara vira ruviqa kaimanta tenavu kia viraqaa aru vunara.

⁸ Noravano Kotiva naaruvavata vatavata autukero vataiva, vivama tinavu kahagiari-ravama vaivo.

125

¹ Vaiinti nahenti Nora Kotiraqaa muntuvi variaka vika vaireka, Saioni Aiqina voqaarama variavo. Vi aiqinava kempukaiqama kero vairaro kia vo haikavanovata vira ho qaki qakima kaanarove.

² Aiqinavano Ieruharemi ututumatero vira antua amitaintema kero, Noravano Kotiva nai vaiinti nahenti antua nimite vaira. Viva vatevata naantiara ekaa entavata mintiaqiro vuanaro.

³ Qora kaiqa vare variaka kiama ekaa enta avuqavu ni variakaqaa raqikiqi vivara. Vika mintivera, avuqavu ni variakavata vika aanante qora kaiqama varevara.

⁴ Noravaauvo, koqe kaiqa vare variaka are vika nái koqema nimitaane. Vi vaiinti nahentika are tiva taana uvara avataqi ni variarave.

⁵ Naantiara are qora kaiqa vareka qoraiqama nimitenä entara, ai aara qaquirake hampi aaraqaa nikavata qoraiqama nimitaane.

Ho ne Isareri maateraiqihai variqi vuaterama turo.

126

¹ Haaru navutaaka tinavu rumpa vare vo vataini vuru kaamanta vauraro Noravano Kotiva vihairo tinavu kuvantu kero tivita varero Saioni Aiqinaqaa viri kaimanta tenavu tiha, Oho, tenavu qaqi tairama tave vauro, turaro quqaa vi entara Kotiva mintima timitaira.

² Kotiva mintima timitaimanta tenavu voqamake quaheha naaraihamaqi viha, vira ihi tiva amitaqiqi vunara.

Tenavu mintiaqiqi vuramanta vo vatanaa vo vatanaaka tinavu tave tiha, Ike, Noravano Kotiva Isareriera iriharo nora kaiqa vara nimitaivo, tiara.

³ Quqaama, Noravano Kotiva nora kaiqa tinavu vara timitaivaro vi entara tinavu muntukaqihairo koqe imanta vaunara.

⁴ Mpo Noravauvu, are qaiqaavata tinavu koqema timitairaqe tenavu koqemake variqi vuare. Aahara vataqaa aaqu ntivaro qaiqaa namarivano tuvintema kera, are tinavu qaiqaa koqema timitaane.

⁵ Are qaqi kairamanta iq'i rateha kara ututaaka naantiara quaheha kara mpeqaiqinara qantuate.

⁶ Vika iq'i rateha kuvukanaa ututaaka, naantiara vika quahe ihira tivaqi viha, kara mpeqaiqinara qantu vare anivarave.

127

Soromonuva maa ihira qara ntuvatora

¹ Vaiintivano naavu kaqareva iharo kia Nora Kotirara ti kahaqiane tirera, vira kaiqavano qumina kaiqaqaima varianaro.

Noravano Kotiva kia vo vatukaqaa maimaraara raqikirera, vi vatukaraqaa maimaraara raqikiva quminaiqira „navutaaka homa vi vatukara aatara kevara.“

² Are airi kara variarire tira, vo enta vo enta toqaqi himpira vukaari utihara kaiqa varaqira vivira entama kehara, kia Nora Kotirara noraiqaakera iriqira virera, ai kaiqavano quminaqama vuano.

Noravano Kotiva nai antuqa vaika kara nimi vaivama vairo.

³ Tinavu vaintivara vaireka, vika Noravano Kotiva tinavu koqema timiteharo qaqi timikama variavo.

⁴ Airi veva iqoka vaiinti kauquqi vaintemakero, qaraaka vaintivano qorainti vainti airinavu vatataika näi qora koqemake kahaqama amitevara.

⁵ Vaiintivano qorainti vainti airi irava, viva quahaarire.

Vi vaiintiva nai navutaaka hampata *ko* ti vatukaraqaa vaiharo uva avuqavu ireva iramanta, vira maaqunavu vira hampata vaiha vira kahaqama amitaivaro viva *ko* ho aatara kaanarovema turo.

128

¹ Nora Kotira aatu geteha vira aaraqaa koqemake ni variaka, viva vika koqema nimitaanaro.

² Arevata mintimake nirera, are nena kauquqohaira ututena karara qantukera namaqi vihara, quahehara koqema kera variqira vinara.

³ *Uaini* naaqunta koqeva airi tava iraintema kero, ai naatavano airi vainti ai vata amitaanaro. *Orivi* katari noqa airivano vira ututuma taintemakero, ai maaqunavu ai hanta taqi ututuma tevara.

⁴ Mintimakero Nora Kotira aatu geteharo koqemakero ni variaina vaiintira koqema amitaanaro.

⁵ Kairaro Noravano Kotiva Saioni Aiqinaqaa vaharo ai koqema amitairara, are maa vataraqaa qaqi variqira vina entara koqema kera variqira vuane. Viva ai qaqi kairara are Ieruharemipi vaika hampata koqemä kera variqira vuane.

⁶ Viva ai qaqi kairara are vukai enta qaqi variqira vihara nena naintivaravata tavaane. Mpo, Isareriuuvu, ne maateraiqihä variqi vuaterama turo.

129

¹ Ne iri vase te Isarereri okarara tiare.

Nai haaru tenavu Isarereri qovaraiquna entaraqaahai navutaaka voqamake tinavu qoraiqama timitaqui ani, vate maa entaravata vika qaqqai tinavu qoraiqama timite variavo.

Ho ne ekaa Isarereri maa uvaravata tiate:

² Nai haaru tenavu Isarereri qovaraiquna entaraqaahai navutaaka voqamake tinavu qoraiqama timitaqui ani, vate maa entaravata vika qaqqai tinavu qoraiqama timite variavo.

Vika tinavu qoraiqama timitaqui anihavata, kia tinavu ekaa haatara kaarave.

³ Oho, vaiintivano kaiqaqaa ora yutu yuru quvi taintemakero, navutaaka tinavu Isarereri tauvaqa teqa taaqama kaavaroo vukai vaaraqvano tinavuqaa vaira.

⁴ Ho Noravano Kotiva avuqavu kaiqa vare vaiva, viva tinavu Isarereri kahaqama timiteharo qora vaiinti kauquqihairo tinavu kuvantu timitaimanta vate tenavu kiama rumpataaka vauro.

⁵ Ho kairamanta Saioni vatukara navutaiqi variaka anivaro Noravano Kotiva vika naatarakero kaurira haika nimiramanta anirante vuate.

⁶ Kairaro aahara vataqaa qumpiqatai ukauva vaaka aaharaiqama vintemake, vika vaaka taiqa vuate.

⁷ Kairaro navuhi nuquutaava kia airi vaintemake, vika kia airi variate.

⁸ Hauri vaiinti nahenti vitare aitare ika vika tave tiha, Noravano ni koqema nimitaarire. Tenavu Nora Kotira autuqaa ni koqema nimitauro, tivora.

130

¹ Mpo Noravaavo, te nora maaraqi vauraro ti muntukavano voqama kero qoraiqimanta vaunaraqihai ai aare vauro.

² Mpo Noravaavo, te ai aare vauna uvvara iriane. Te ariara ti aaqurihama timitaane ti vauna uvvara irihara ti kahaqiane.

³ Mpo Noravaavo, tenavu ai uva raqa kaunara are kia tauru karaitira, ekaa vi uvvara nena vukuqi qara ntuvu taaraitirio, nai tavave tinavuqihairo ai ko ho aatara kaitirio?

⁴ Areqai vaiinti nahenti uva nunka nimite variarava varianarara ti, tenavu ai aatu geteha variqi vireravema turo.

⁵ Noravano Kotiva ti kahaqiarire ti, te vira vekama vauro. Te viva tiva tai uvarara noraiqaake iriha mintima ti: Ququaama viva nai tintemakero autuanarove turo.

⁶ Noravano ti kahaqiarire ti, te vira vekama vauro.

Vatukaqaa maimaraara raqiki variaki entaqi vaiha tiha, Mpo, vaaka aatitaarire tiantemake, tevata Nora Kotira veka vaiha tiha, Mpo, viva vaaka tuvu ti kahaqiarire. Qaiqaavata tiha, Mpo, viva vaaka tuvu ti kahaqiarire, ti vaunara.

⁷ Ne Isarer, iariate. Noravano Kotiva tinavu ruaruama timite vaiva vaivarao vira muntukavano enena tinavuvara vairara ti, kaiqenavu virara noraiqaake iriqi viha quaqaama viva tinavu kahaqianarove tivaq vuare.

⁸ Tenavu Isareri vira uva raqake vaunarave. Ho viva naima ekaa vi uvvara tinavu nunka timiteharo kuvantu timitaanarove.

131

Devitiva maa ihira qara ntuvatora

¹ Noravaavo, kia te tenta autu tuahere vaunarave.

Ti aatovano kia ho iriaina haikara, vi haikara vi haikarara kia te iriqi virera.

² Te kia mintiraiti, vaintiruvano nai nora auvoqi manamana vaintemake, ti muntukaqihairo paru i vaira vairera.

³ Isarerio, ne mintima tiate: Tenavu vatevata naantiara ekaa entavata Nora Kotiraqaa muntuvi variqi virerave, tiate.

132

¹ Noravaavo, haaru Devitiva ariarao tiro, vukaari utiharo vo kaiqa vo kaiqa varaira kia tauru kaane.

² Mpo, are Isareri vatanaaka kempuka Variqavano variaro. Devitiva nai kauqu ainqiaa aqukero tivatati uvvara, qaqi iritaane.

³⁻⁵ Viva minti tirave: Hauri te kia vira Naavu kaqa amitaraiti, te tenta naavuqi oriqete tenta taintaqaqa vaitaarorave.

Noravano Kotiva tinavu Isareri kempuka Variqavano variaina Naavurara iriha, te vira Naavu naane kaqa amite, viraqahai te auraara vaiha vaitarerave.

⁶ Tenavu tota Betariheminai vaiha Kotiva uva tiva taatautai *Vokiseva* vai vakaakara iri, viraqahai tenavu virara rantaqivi vivi tavauraro *Vokise* viva Kiriat-Jearimi vatuka tataaqaq naahoqi vaira.

⁷ Mini vaimanta tenavu *Vokise* vira vare vuru Ieruharemimi ke, „viraqahai tenavu tira, Kaiqenavu Nora Kotira Naavuni oru vira aiqutaraini kankakaavi vaiha, vira autu tuahera kaare, tunara.

⁸ Noravaavo, are uva tiva taatau taana *Vokiseva* viva ai mpeqa okara tinavu humiqa vairara tira, are himpira vi *Vokisera* hampata ani nena Naavuqi ekaa enta variqira vuane.

⁹ Are nena kaiqa vara amite varia vaiintika kairamanta, vika ekaa enta avuqavu okaraqai autuq vuate.

Are nena vaiinti nahenti qaqi kairamanta vika quaheha ihi tivaq vuate.

¹⁰ Noravaauvo, are nena kaiqa vaiinti Devitirara irihara, kiama avuhainaara vira nena kaama taanara qoririma kaane.

¹¹ Haaru Noravano Kotiva nai kauqu ainqiqaa aqukero Devitirara kempukaiqama kero tivatata uvvara viva kiama qaqlini vara kaanaro.

Viva Devitirara mintima tiro: Te are kuvuarama tenaraqihai vaiinti vo noraiqama kaariraro viva avuhainaa vaiintivan varianarove.

¹² Ho ai maaqu vika te uva tiva taatau taunarave, ekaa te uva maara tiva taunarave, koqemake iriqi vivera, naantiara vika maaquvura nai qoka vatuka vare, avuhainaa vaiintiqamavi vaivarave. Vika ekaa enta mintiakema raqikiqi vivarave, tiro. Noravano Devitirara minti tira.

¹³ Noravano Kotiva Saioni vatuka nai kaama tero te viraqiqi vairerave tira.

¹⁴ Viva tiharo, Te maa vatukaraqi ekaa enta variqi virerave. Ti muntukavano maa vatukarara vaimanta, te viraqiqi vaiha vaiinti nahentiqaa raqikiqi virerave.

¹⁵ Te Saioni vatukaqiqi vaika airi haika nimiaari vika kiama vo haikaravata aavo qivarave. Te vehi vaiinti nahenti kara nimiaari vika ho nevarave.

¹⁶ Ti kaiqa vara timite vaika, te vika koqemake nimitaari vika te vaiinti nahenti kuvantu nimitaaina okarara iriha, koqe kaiqa varaqi vimanta, Saioniqi vai vaiinti nahentika quaheha ihi tivaqiqi vuate.

¹⁷ Te Devitira ankugihai vaiinti vo kaamate noraiqama kaariraro viva ovavano koqemakero itaintema kero, raqikiqiro vuanaro.

¹⁸ Viva raqiki vairaqe te vira navutaaka naatara amite, kaurira haika vika nimirerave.

Te kaama taaina vaiintiva mintimakero nai vaiinti nahentiqaa raqiki vairamanta vika koqemake variqi vivarave, tiro. „Noravano Devitirara minti tira..“

133

Devitiva maa ihira qara ntuvatora

¹ Mpo, Kotira vaiinti nahenti kia raqi tioriraiti, vohaa muntuka vateha variqi vua okarava, nai koqe okara vaimanta te vi okarara voqamake quaheha vauro.

² Mintimake varia okarava vaireva, koqe vahavera voqaarama vairo.

Koqe vahavera Eronira qiatagaqaa qihia kaavaro otuntero okauquaavata, vira vukai utavaaqa avuhiantavata otu virave.

³ Qaiqaa mintimake varia okarava vaireva, varavu voqaarama vairo.

Varavuvano Hemoni Aiqinaqaavata Saioni Aiqinaqaavata tuviharo vata koqemakero putaiqama kaintema kero, vi okarava vairo.

Kotira vaiinti nahenti vohaa muntuka vateha koqemake variqi vi vaivaro, Noravano Kotiva vika koqemake nimitaaira vika kia qutiraiti, ekaa enta qaqi variqi vivara.

134

¹ Entaqi Nora Kotira Naavuqi vira kaiqa vara amite variaka, ne vira autu tuahera kaate.

² Ne vira Naavuqi vaiha nenta kauqu tuaherake, Nora Kotira aareha vira autu tuahera kaate.

³ Kairaro Noravano Kotiva vatavata naaruvavata autukero vataiva, viva Saioni vatukaqiqi vaiharo ni koqemake nimitaairire.

135

¹ Kaiqenavu Nora Kotira autu tuahera kaare. Ne Nora Kotira kaiqa vaiinti, ne vira autu tuahera kaate.

² Ne Kotira Naavuqi Kotira kaiqa vara amite variakavata, ne vira Naavu vahaaqaini vaha vira kaiqa vara amite variakavata, ne ekaa vira autu tuahera kaate.

³ Nora Kotira okaravano koqe okaraqai vairara ti, ne vira autu tuahera kaate.

Vira autuvano koqe autu vairara ti, ne virara ihi tivaqiqi viha vira autu tuahera kaate.

⁴ Noravano tinavu kaivaqara Iekopira anku vika nai kaama tero tiharo, Isarerri vika ti anku tarukama vaivarave, tira.

⁵ Te maa uvvara kankomake irunara: Noravano Kotiva nai noravano vaiharora tiro, viva ekaa „una“ variqa uri aatarakero vairave.

⁶ Noravano Kotiva nana nana haika autuataa ivaro viva naaruvainive, vataqaave, nora namariqive, nora namari veva muntukaraqive, auti vaira.

⁷ Viva tonavu vara kaivaro tonavuvano vo vata vo vataihairo virini oru vi vaira.

Viva aaquakaa vara kaivaro aaquakaavano uti vaivaro aaqu nti vaira.

Viva uvai vara kaivaro uvaivano maa vataraqaa utiharo vi ani vaira.

⁸ Viva Isipi vatanaaka qorainti vainti kara hunka vatataakave, quara vairi avuni vatataakave, ekaa arukaira.

⁹ Viva Isipini Pero vaiintivata vira nora vaiintinavuvata qoraiqama nimitareva iharo, nora kaiqa, vo qara vo qara i kaiqara qovarama keharo vika qoraiqama nimitaira.

¹⁰ Ike, Noravano Kotiva airi vatanaaka qoraiqama nimiteharo avuhainaa vaiinti kempuka vataaka vikavata arukaira.

¹¹ Viva Amo vatanaaka King Sihonira arukero, Basaani vatanaaka King Okura arukero, ekaa Kenaani vatanaaka avuhainaukavata aru taiqa kaira.

¹² Viva vika aru taiqa kero, vika vata varakero nai vaiinti nahenti Isarerि nimira.

¹³ Noravaavo, ai autuvano ekaa entama variqiro vuanarove.

Maa entara variakavata, naantiara qovaraiqikavata, ekaa vika ai autuara iriha ai autu tuaheraqi vivara.

¹⁴ Noravano Kotiva tinavu nai vaiinti nahentiara iriharo tinavu auta ntuva timitero tinavu uva taiqa timitaanaro.

Viva tinavu nai kaiqa vaiinti nahentiara mpo ike tiva timitaanaro.

¹⁵ Vo vatanaa vo vatanaaka *korive silvae varakeha* vo qara vo qaramake *maraqura/varaha* nái kauquqohai autuke, vi haikarara tinavu variqave ti variara.

¹⁶ Vika no vaimantavata, viraqihai kia ho uva tivara. Vika avu vaimantavata, kia ho tavevara.

¹⁷ Vika aato vaimantavata, kia ho uva irivara. Ike, vika aihovata kia ho varevarave turo.

¹⁸ Oho, una variqa auti variaka variqi vi, naantiara vika nái aututaa haikara vira voqaantemake vaivara.

Vaiinti nahenti una variqara noraiqaake iri variaka, vikavata vohaa qaramake vira voquaara vaivara.

¹⁹ Ho ne Isarerি, Nora Kotira autu tuahera kaate. Eronira anku Nora Kotira kaiqa vara amite variaka, nevata vira autu tuahera kaate.

²⁰ Rivaira anku, ne Nora Kotira autu tuahera kaate. Vaiinti nahenti Nora Kotira autu qete variaka, ne ekaa vira autu tuahera kaate.

²¹ Ne Saioni Aiqina Ieruharemipi variaka, nevata Nora Kotira autu tuahera kaate.

Kaiqe tenavu ekaa Nora Kotira autu tuahera kaare.

136

¹ Nora Kotira okaravano koqe okara vairara ti, aniqenavu virara koqeve tiare.

Vira muntukavano tinavuara ekaa entama variqiro vuanarove.

² Tenavu Nora Kotirara koqeve tiare. Viva ekaa *una* variqvavata uri aatarakero avuni vai Variqavama vaivo.

Vira muntukavano tinavuara ekaa entama variqiro vuanarove.

³ Tenavu Nora Kotirara koqeve tiare. Viva ekaa nora autu vataakavata uri aatarakero nai nora autu vataavama vaivo.

Vira muntukavano tinavuara ekaa entama variqiro vuanarove.

⁴ Vivaqaima nora kaiqa kia tavaa kaiqara vare vaivama vaivo.

Vira muntukavano tinavuara ekaa entama variqiro vuanarove.

⁵ Viva nai koqe avu aatoqaa naaruva autu kero vatero viraqaa vai haikaravata autu kero vataivama vaivo.

Vira muntukavano tinavuara ekaa entama variqiro vuanarove.

⁶ Viva nora namari autukero vatero, viraqihairo vatavata qovarama kero, vuruvi virivi vataivama vaivo.

Vira muntukavano tinavuara ekaa entama variqiro vuanarove.

⁷ Vivama kuarivata toravata autu kero vataivama vaivo.

Vira muntukavano tinavuara ekaa entama variqiro vuanarove.

⁸ Viva kuari autu kero vataivaro kuari viva aatitairaqaanraqikiqiro vi vairave.

Vira muntukavano tinavuara ekaa entama variqiro vuanarove.

⁹ Viva toravata opu makauvata autu kero vataivaro entaqi raqikiqiro vi vairave.

Vira muntukavano tinavuara ekaa entama variqiro vuanarove.

¹⁰ Viva Isipi qorainti vainti kara hunka vatataaka arukairave.

Vira muntukavano tinavuara ekaa entama variqiro vuanarove.
 11 Viva Isipiqihairo Isareri qaqini ntita vare anirave.
Vira muntukavano tinavuara ekaa entama variqiro vuanarove.
 12 Viva nai kempuka kauquqohairo vika ntita varero anirave.
Vira muntukavano tinavuara ekaa entama variqiro vuanarove.
 13 Viva tivarо Naare Namarivano hini hini raira virave.
Vira muntukavano tinavuara ekaa entama variqiro vuanarove.
 14 Viva nai vaiinti nahenti ntita varero vimanta vika nora namari taqa vare vuuarave.
Vira muntukavano tinavuara ekaa entama variqiro vuanarove.
 15 „Vika hini mantarainaa oritaraavarо, viva namari qaqi kaivarо namarivano Isipi avuhainaara Pero vaiintivata, vira iqoka vaiintivata, ekaa raqutu kairave.
Vira muntukavano tinavuara ekaa entama variqiro vuanarove.
 16 Viva aahara vatainai nai vaiinti nahenti ntita varero virave.
Vira muntukavano tinavuara ekaa entama variqiro vuanarove.
 17 Viva avuhainaara vaiinti kempuka vataaka arukairave.
Vira muntukavano tinavuara ekaa entama variqiro vuanarove.
 18 Viva avuhainaara vaiinti nora autu vataaka arukairave.
Vira muntukavano tinavuara ekaa entama variqiro vuanarove.
 19 Viva Amo vatanaaka King Sihonira arukairave.
Vira muntukavano tinavuara ekaa entama variqiro vuanarove.
 20 Viva Basaani vatanaaka King Okura arukairave.
Vira muntukavano tinavuara ekaa entama variqiro vuanarove.
 21 Viva vika vatawata varakero tinavu nai vaiinti nahenti timirave.
Vira muntukavano tinavuara ekaa entama variqiro vuanarove.
 22 Viva vi vatawata varakero tinavu Isareri nai kaiga vaiinti nahenti timirave.
Vira muntukavano tinavuara ekaa entama variqiro vuanarove.
 23 Navutaaka tinavu aatarakaa entara viva kia tinavuara tauru karaitiro, qaqi tinavuara iriqiro vi vairave.
Vira muntukavano tinavuara ekaa entama variqiro vuanarove.
 24 Viva navutaaka kauquqihairo tinavu kuvantu timitairave.
Vira muntukavano tinavuara ekaa entama variqiro vuanarove.
 25 Viva vaiinti nahentive, aantauvahive, ekaa qaqi vai haikara kara nimi vaivama vaivo.
Vira muntukavano tinavuara ekaa entama variqiro vuanarove.
 26 Ho kaiqe tenavu naaruvaini vai Variqarara koqeve tivaqvi vuare.
Vira muntukavano tinavuara ekaa entama variqiro vuanarovemа turo.

137

Isareri vika nái maaqainiara iqi ratora

¹ Mpo, tenavu Babironini vai namarira, vo namari vo namari auvahianta oquivi vaiha, Saioniniara aato iruraro tinavu muntuka qoraiqmanta iqi rate vaunara.

² Tenavu ihi tiha ruquti vauna haikara nontauni vai katariraqи hirite tiha, Mpo, tenavu kia ihi tiataarave, tunara.

³ Tinavu rumpataaka tinavuara tiha, Ne tinavu ihi tiva timite vaiqe tenavu quaheha variare. Ne Saioniniara tivate ihira tinavu tiva timiqe iriare. tiara.

⁴ Oho, tenavu vo vatanaaka vatainai vaiha nantiakеe Nora Kotirara tivate ihira tirarave?

⁵ Mpo, Ieruharemivaуvo, te ai tauru kaarera, homa ti kauquvanovata *kitaa* ruqutinara tauru kaarire.

⁶ Ieruharemivaуvo, te ariara tiha, Are avuhainaaa vatuka, te quahaarira vatukavama variaro, ti vaunarave. Te vi uvvara tauru kaarera, homa ti aunta qoraiqiraqe te kia ho qaiqaa ihi tiare, turo.

⁷ Oho, Noravaуvo, navutaaka Ieruharemivaуvo vatuka aatarakaa entara Idomu vatanaaka tia uvvara are tauru kerora.

Vi entara Idomu vika tinavu navutaakara tiha, Ne vi vatukara ekaa ravantiaqa aquaaate. Ekaa Ieruharemiviqи vai haikaravata rakavu raakavuma kaivarо anomа taiqa vuarire, tiara.

⁸ Babironivaуvo, getehara variane. Are qoraiqamama vinarave. Vaiinti vovano are tinavu qoraiqama timitaanarara iriharo, ninavata qoraiqama amitaarira vaiintiva quahaarire.

⁹ Ai vainti naati vika nái noka kauquihairo raqiakero oriqa vika qiata rukavu kaarirava quahaarema turo.

138

Devitiva maa ihira qara ntuvatora

¹ Noravaavo, te naaruvaahinaaka nivuqaa vaiha, ekaa tenta muntukaqihai ariara koqeve tiha ihi tivakeha ai autu tuahera karerave. (Haarua vuku hinivano *naaruvaahinaakave* tiamaanta hinivano *variqanavuve* ti variara.)

² Ai muntukavano tiriara vaivara are tiriara noraiqaakera iri varianarara ti, te ai takuqi vai Naavuva vainaini kankakaamavi viri vataini vate vaiha, ai autu tuahera karerave.

Ai autuvanovata ai uvavanovata ekaa vo haika vo haika uri aatarakero avunima vaivo.

³ Te ai aarauna entara are ti uva irira, ti kempukaiqama timite variaramanta te kia getaraiti vaunara.

⁴ Noravaavo, naantiara ekaa avuhainaaka vo vataini vo vataini vaika ai uva iri, vika ai autu tuahera kevara.

⁵ Ai okaravano nai mpeqa okara vairara ti, vi entara vika are ekaa kaiqa varenarara iriha tihivara.

⁶ Noravaavo, are nai uritarakera kantaaqaini vaharavata, vahinti nahenti nái nutu vatainiqamake variakara are kia tauru karaaitira, vikara qaqi iriqira vi varianara.

Nái nutu tuahera variaka kia ho ai avuqaa kukeqavi vaivara.

⁷ Airi maaravano ti ravaaqavu kareva auti vaivaravata, are ti antua timite variaramanta te kia qutiraiti, kogemake vaunara.

Ti navutaaka arara itaimanta ti qoraiqama timitateka auti variavara, are vika ntaihera nena kempukaqohaira ti ruuaruma timite varianara.

⁸ Noravaavo, are ti muntukaqi hoqarama taana kaiqara irihara, vi kaiqara vara vuru taiqa kairage te ho variare.

Ai muntukavano tiriara ekaa entama variqiro vuuanaro.

Mpo, are nena kauquohaira ti autukera vataarava varianarara tira, kia ti qaqla kaanerama turo.

139

Devitiva maa ihira qara ntuvatora

¹ Noravaavo, are ti avu aatoqi ugautama kera tuanti taantima kera tavaanara.

Are ti okara kankoma kera iri tavaanara.

² Te oquvi vaunarave, te himpi nunarave, te minti minti unara are kankoma kera iri tave varianara.

Are ti niaraini vaharavata, ti avu aatoqi vaira ho iri tave varianara.

³ Te oru kaiqa vare vaunaraqaavata te vaite vaunaraqaavata are ti tave varianara.

Te nana nana haika auti vaunara, are ekaa vira vira iri tavaanara.

⁴ Noravaavo, te tirera una uvvara, are naane vaaka irikaanara.

⁵ Are ti avunive, tauvaqainive, taqenive, ekaa mini mini ututuma taanara. Are nena kempukaqohaira ti antua timite varianara.

⁶ Are mintima kehara ti okara kankoma kera iri tavaanarara ti, te tiha, Mpo, ai avu aatovano uritarero vaivaro ti avu aatovano ai avu aatoqi vainara kia ho iri tavaanarove, turo.

⁷ Mpo, te tainie vuariraro ai Maraqravano kia ti tavaanaro? Te tainie rugemake vihae kia ai avuqaa vairara?

Are naaruvaini varianarara ti, te qumina mini rugemake vuarora.

Are qutu vuaka varianainivata varianarara ti, te kia ho mini otu kukeqavi vairara.

⁹⁻¹⁰ Te niaraini kuari avu urinaini ata vare oru variarera, ai kauquvano minivata homa ti tuataanaro.

Te kuari avu ruhunku vinaini oru variarera, minivata ai kauquvano ti utuma varaanaro.

¹¹ Te konkira arinaini oru variarera, te kia ho ai avuqaa kukeqavi vairara.

Enta ira haikavano ti mantaaqa kairage te kukeqavi variare tiarera, are mini qaqla qoqaa ti tavenara.

¹² Veqamakero konkira ariva vaivaravata, are virara aatitairave ti varianara.

Are aatitairaqa ho tave varianantema kera, entaqivata ho tave variaravama variaro.

Enta ivavata aatitaivavata ai avuqaa vohaa qarama keroma vaivo.

¹³ Arema ekaa ti vaatave, ti avu aatove, autukera vataaravama variaro.

Are ti nora auhaqi ti vaata akukumakera autukera vataanara.

¹⁴ Mpo, are minti mintima kera ti autu kera vataanarara irihama, te kauqu runkinkiri iha ai autu qeteha ai autu tuaherake vauro.

Te kankomake irunara. Ekaa are vare variana kaiqava nai voqaraa kaiqama vaivo.

¹⁵ Te tenta nora auhaqi kukeqavi vauna entara are ekaa ti vuhaarinavu tavaanara.

Vi entara are ti mative, vuhaarive koqema kera taataukera vataararo ti vaatavano koqemakero akukumavi vaira.

¹⁶ Mpo, ti nova kia ti vatatai entara are ti kankoma kera tavaanara.

Te kia qovaraiquna entara are ekaa te maa vataraqaa qaqi variaina entanavura nena vukuqi qara ntuva taanara.

¹⁷ Ike, Kotio, ai avu aatoqira nai nora uva, vo uva vo uva vaimantara ti, te vi uvvara vi uvvara kankomake iriarirava kia ho vaivo.

¹⁸ Are avu aato uti variarava nai airi vaimantara ti, te ai avu aatoqiraara kaara ntuarera, nai nora namari auvhahini airi nuqa vaira viravatama aatara kaanaro.

Te vira ho kaara ntuva taiqa kaareravata, te kiama ho ai okara vira kankomake irirara.

¹⁹ Mpo Kotio, are qora kaiqa vare variaka aru taiqa kairage, te hove tiataara.

Ne vaiinti aruke variaka, ne tiqahai qaqrake niaraini vuaterama turo.

²⁰ Kotio, vi vaiintika ariara qora uva ti variakave. Vika ai navutaiqiba ai autu koqera qoraiqamake variavo.

²¹ Noravauvo, ariara kia antuqa ari vaiintika ti kia vikara hantuqa harivo.

Ai navutaiqi variaka kia vikara ti muntukavano vaivo.

²² Quqaa tarurama turo. Ti muntukavano kia vi vaiintikara vaivo. Te vi vaiintikara ti navutaakama variavo ti vaunara.

²³ Kotio, ugautama kera tuanti taantima kera ti avu aato muntukaqi vainara tavaane.

Te nana nana haikara avu aato utuainara avatama kera tavaane.

²⁴ Ti avu aatoqi qora uva vovano variantorave tira, viraqi rantakera tavaane.

Are koqe aaraqaa ti tivita kera vatairage te ekaa enta qaqi variqi vuare.

140

Devitiva maa ihira qara ntuvatora

¹ Noravauvo, are qora vaiintinavu kauquqhairs ti ruaruama timitaane.

Are ti antua timitairamanta voqamake nái kena vaiinti ruquti varia vaiintika kia ti ruqutuate.

² Qora kaiqa varevaqaq vika avu aatoqi vaimanta, ekaa enta vika vaiinti nahenti avutana vaiha tiroriha raqira haika vara qovaramake variara.

³ Memaru avai vaihaiva vaiinti qoraiqama kaintema kero, vika qora uvavano vaiinti nahenti qoraiqama nimite vaira. Vika nái noqihai ti varia uvava *uqahi/quaiha* uhi voqara vaira.

⁴ Noravauvo, qora kaiqa vare variaka ti ravaaqavu kevorave tira, are tiqaa koqema kera raqikiane.

Voqamake nái kena vaiinti ruquti variaka ruvaaqumavi vaiha, te qoraiqama vuainarara nai tiva ami nai tiva ami i variarara irihara, are ti antua timitaane.

⁵ Oho, nái nutuqai tuahere variaka ti ravaaqavu kareka, vika te virera una aararaqaa vaara vuite variara.

⁶ Mpo Noravauvo, te ariara are ti Variqavanoma variaro. Te ai aareha ti aaqurihama timitaane ti vauna uvvara iriane. ⁷ Mpo Noravauvo, are ekaa haikaaqaa raqiki variaravama variaro. Are nena kempukaqhairs ti ruaruama timite variaravama variaro. Tenavu navutaaka hampata raqí vauna entara are tiqaa koqema kera raqiki varianarave.

⁸ Noravauvo, are virara virara irihara, kia navutaaka qaqi kairamanta vika nái autuataa inara autute.

Kia qaqi kairamanta vika ruvaaqumavi vaiha qora uva tiva taatauteva qovaraiqiarire.

⁹ Kia ti navutaaka qaqi kairamanta vika iqoka raqiba ti haatara kaate.

Oh, are qaqi kairaro vika ti qoraiqama timitareka tivate uvava náiqaa qovarama vuarire.

¹⁰ Are iha auru tutu kairaro vikaqaa hiqinti hiqinti iharo tatoqa taiqa kaarire.

Are vika *ruvuqi/mpumpipi* vara vaavi aqukaira vika kia ho qaiqaa viraqihai vaarintaate.

¹¹ Vo vaiinti autuvano vataini tuvi vuvarire ti, una uva ti variaka, are kia vika qaqi kaira maa vataraqaa koqemake variqi vuate.

Oho, qaqi kairaro qora haikavano qovarama viro, voqamake nái kena vaiinti ruquti variaka vehi autu taiqa kaarire.

¹² Noravaauvo, te kankomake iri tavaunara. Are vehi vaiinti nahenti auta ntuva nimitehara vika kahaqiqi variaravama variaro.

Vo haika vo haikara aavoqiaka qoraiqama nimitevorave tira, are vika kahaqama nimite variaravama variaro.

¹³ Avuqavu ni variaka ai autu tuahereha vika ai aaqanto ekaa entama variqi vivaravema turo.

141

Devitiva maa ihira qara ntuvatora

¹ Mpo Noravaauvo, te ai aare vauro. Vaaka ti kahaqiane. Mpo, are te ai aare vauna uvara iriane.

² Mpo, koqe unta i murava are iananaini oru vintemakero, te ai aaraaina uvava are iananaini oru vuvarire.

Entaqi ai *ofaa* iha quara amitaavara are quahaanantema kera, te tenta kauqu tuaherakeha ai aaraaina uvarara quahaane.

³ Noravaauvo, ti noqaa raqiki timitaireqe te kia qora uva tiare.

⁴ Noravaauvo, are kia ti qaqi kairaro ti muntukavano qora haika autirara ntuarire.

Kia ti qaqi kairaqe te qora vaiinti hampata ruvaaqumavi vaiha qora kaiqa varaare. Are ti ravaaqavu kairaqe te kia vika hampata ruvaaqumavi vaiha ovata naare.

⁵ Avuqavu ni vai vaiintiva ti ruqutirera, te virara hovema tirara. Viva ti kahaqirevama mintivo tirara.

Koqe vaiintivano mintiraro, qora kaiqa vare vai vaiintiva ti autu tuahera kairera, te virara kia ti mintima timitaane tirera. Te vo enta vo enta Kotira aareha, vika nái qora kaiqa vare variara kaara vika qoraiqama nimitaane ti vuunarrara ti, te minti tirera.

⁶ Hini kiaka nái qjata vaiinti ntita vare muntu qora onkaiqi aqu kaimanta, vi entara vaiinti nahenti te tuna uvarara quqaa uvavema tivara.

⁷ Vaiintivano iha kantakaara teqa taaqama kero aqu aquma kaintemake, vi vaiintika vuhaantaaari vara vaavi matipaqi aqu kevara. (ves 5-7 Hiparu uva okaravano kia kankomake vairo.)

⁸ Noravaauvo, are ekaa haikaqaa raqiki variaravama variaro. Te ariaraqai noraiqaake ri vaunara.

Te ariara viva ti antua timite vaivama vaivo, tunara. Mpo, are kia ti qaqi kairaqe qutuare.

⁹ Are ti antua timitaireqe te qora vaiinti kukeqake vaara vuiteraqaa kia aru vuare.

¹⁰ Are qaqi kairamanta qora vaiinti vika nái vaara vuiteraqaa aru viqe, te qaqi vitare vuare.

142

Devitiva ori onavuqi vaharo maa ihira qara ntuvatora

¹ Te ike mpo tihamma Nora Kotira aare vauro. Viva ti aaqurihama timitaarire ti, te vira aare vauro.

² Ekaa maaravano tiqi qovaraiqirave, te avu aato uti vaunarave, te ekaa vi uvara vira tiva ami vauro.

³ Noravaauvo, ti muntukaqihairo maara ntaivaro ti kempukavanovata kia vaimanta te ta aararaqaae virarave tuna entara, are vi aarara kankoma kera irira tavaanara.

Oho, vi vaiintika tiriara aru vuvarire ti, te ni vauna aararaqaa vaara vo kukeqake vui taavo.

⁴ Te hini hini tuqantaavi tavauraro vaiinti vovano ti kahaqiarirava kia vaivo.

Tiriara viva qoraiqama vuantorave tiro, tiriara noraiqaakero iri vai vaiintiva kiama vaivo. Te vonaini ruqemake kukeqavi variarirava kiama vaivo.

Kia voqavanovata te qaqi variqi vuainarara noraiqaakero irivo.

⁵ Mintiverama Noravaauvo, te ariara ike mpo tiha, Te are variananaini ruqemake oru kukeqavi vairerave.

Te maa vataraqaa qaqi variqi vuaina entara te ariaraqaima ti Noravano vaivo, tivaqi virera.

⁶ Mpo, te tenta kahaqiarirava kia ho vaimanta te nora maaraqi vaunarara tira, are te ai aare vauna uvvara iriane.

Ti haru kareka ti avataqi ani variaka kempukavano voqavata vairara tira, are vika kauquqihaira ti ruaruama timitaanerema turo.

⁷ Mpo, nora maaravano ti rumpa tairaqihairo are ti kuvantu timitairaque te qaqini aitare variare.

Are mintiramanta ai vaiinti nahenti are ti koqema timitenarara iriha, vika te iainanaini ani ruvaaqumavi vaiqe te vika nivutana vaiha ai autu tuahera kaare.

143

Devitiva maa ihira qara ntuvatora

¹ Mpo Noravauvu, te ai aare vauna uvvara iriane.

Ai okaravano avuqavu okara vaivara are nena vaiinti nahentiara noraiqaakera iri variaravara tira, te ariara ike mpo ti vauna uvvara irihara ti aaqurihama timitaane.

² Maa vataraqaa qaqi variqi vi variakaqihairo kia ho vovano ai *ko* aatara kaariravama vaivo. Mpo, te virara irihama ariara kia ti nena kaiqa vaintiqaa uva vataanerama turo.

³ Oho, navutaaka ti avata vare anisha ti ruqutu kaamanta, te vataini konkoma kanta hinqintivi qoraiqamavi vauro.

Haaru qutu vuaka konkira arinaini variantemake, vika konkira ariraqi ti muntu kaamantama vauro.

⁴ Mintira kaara ti muntukavano maara ntaivaro ti kempukavanovata kia vaimantama vauro.

⁵ Mpo, are haaru tinavu koqema timite variana entara, virara te vate qaqi iriteha vauro.

Are nora kaiqa, vo kaiqa vo kaiqa tinavu vara timitaanara, viraravata tenta aatoqi qaqi irite vauro.

⁶ Mpo, auntavano aaharaigama vivaro namari naataa intemakero, ti maraquravano voqama kero ariara antuqa arimanta te tenta kauqu tuaherake ai aare vauro.

⁷ Mpo Noravauvu, ti kempukavano kia voqavata vaivo. Vaaka ti uva iriane.

Kia ti tivuqaa kukeqavira variane. Hauri te qutu vuaka varianaini otu vuarora.

⁸ Te ariqaa muntuvi vaunarara irihara, ai muntukavano tiriara vaira vo enta vo enta toqaqi ti humiqehara kahaqiane.

Te ai aare vaunarara tira, are ti aara humiqairaque te vi aarara avataqi vuare.

⁹ Noravauvu, are ti antua timitaane ti, te are varianaini anuro. Are virara irihara navutaaka kauquqihairo ti ruaruama timitaane.

¹⁰ Are ti Variqavano varianarara tira, are ti nena antuqa humiqairaque te vira avataqi vuare. Kairaro ai koqe Maraquravano ti tivita varairaque te koqe aaraqaa vuare.

¹¹ Mpo Noravauvu, are nena nora autuara irihara ti qaqi kairaque te kia qutiraiti, qaqi variqi vuare.

Are nena avuqavu okarara irihara, te nora maaraqi vaunaraqihairo ti tivita varera qaqini vuru kaane.

¹² Nena vaiinti nahenti aaqurihama nimite variana okarara irihara, ti navutaaka aru vehi autu taiqa kaane.

Te ai kaiqa vaiinti vaunarara tira, are ti navutaiqi varia vaiintika aru taiqa kaanerama turo.

144

Devitiva maa ihira qara ntuvatora

¹ Nora orivano ti antua timitaintema kero, Noravano Kotiva ti antua timite vairara ti, te vira autu tuahere vauro.

Tiriara viva koqemakero auihehavaa kauquqi totaarire tiro, viva iqoka raqua okarara ti humiqe vaira.

² Vira muntukavano tiriara vaiva ori vaantaavuravano vaiinti antua amitaintema kero, ti antua timite vaira.

Viva navutaaka kauquqihairo ti ruaruama timite vaivama vairo.

Kainkevano vaiinti antua amitaintema kero, viva tiqaa kojema kero raqiki vaimanta vaunara.

Navutaaka ti harukevorave ti, te viva vainaini oru kukeqavi vaunara.

Viva vo vatanaa vo vatanaaka ti vevaarainiqama kaimanta te vikaqaa raqiki vaunara.

³ Noravaauvo, tenavu nantima vaura vaiinti nahentika vaurarae are tinavuqaa kojema kera raqiki variaro?

Nantiharae are tinavu qumina vaiinti nahentiera noraiqaakera iri variaro?

⁴ Mpo, vaiintivanu vaireva, uvaavano inaaraqia utiro taiqavira voqaarama vairo.

Kuarivano itaivaro vaiinti maraqura vataqaa vaira voqaarama, tenavu vahuqa variqi vi, vuru taiqa virara.

⁵ Noravaauvo, naaruva qantua kera viraqihairu tuvuane. Nena kauqu ainqinanavuqaa vatairaro muravano viraqihairo qovaraiqiharo oru vuari.

⁶ Veva arintema kera, are aaquakaa utu kaira navutaaka iqoka qaqrake qetake kantama vuate.

⁷ Are virihairu nena kauqu viavi tutukera, namari veva muntukaraqihairu ti mpaqi kaane. Are vo vatanaaka kauquqihairu ti ruaruama timitaanerama turo.

⁸ Una uvavano vika noqi mpiqa vimanta vika kauqu ainqaa aqukeha tiha, Quqaa uvama ti vauro, tivakeha una uvaqai ti variara.

⁹ Kotio, te vate ariara qaraaka ihi tirera. Te naaqunta 10navu vai *kitaara ruqutiha*, ariara ihi tirera.

¹⁰ Arema avuhainauka kahaqiarananta vika navutaaka naatarake variara.

Arema ti nena kaiqa vaiinti Devitika ruaruama timite variararo iqoka paiprevano kia ti arukaira.

¹¹ Mpo, are vo vatanaaka kauquqihairu ti tivita varera ruaruama timitaane.

Una uvavano vika noqi mpiqa vimanta vika kauqu ainqaa aqukeha tiha, Quqaa uvama ti vauro, tivakeha vika una uvaqai ti variara.

¹² Mpo, kairamanta tinavu maaquvara noruqamavi, koqe katari voqaara, kempuka vaiintinavu variate.

Kairamanta tinavu raavuravara noruqamavi, avuhainaara naavu *pohi nkauruke vahehemake/vaataiqamake* arataara voqaara, koqe nahentinavu variate.

¹³ Kairaro naahoqi vo kara vo karavano airi vairaro karavano ekaa kara vate naavuraqi mpiqa vuari.

Kairamanta tinavu sipisipi voqavata naati vatataimanta airitaha variate.

¹⁴ Kairamanta tinavu purumakau noruqamavi kempuka variate.

Hauri navutaaka tinavu ori vaantaavura rukavuke viraqti vaatinte tinavu rumpa vare vo vataini vuru kevorave.

Kairaro ike mpo tiha iqj rateva kia tinavu vatukaqi qovaraiqiarire.

¹⁵ Mintima keha variqi vi vaika quaheha vaivara.

Nora Kotirara viva tinavu Variqavanoma vaivo ti variaka quaheha variqi vivaravema turo.

145

Devitiva maa ihira qara ntuvatora

¹ Arema ti Variqavanoma ti Avuhainaava varianarara ti, te ai autu noraiqama karerave. Ekaa enta ekaa enta te ai autu tuaheraqiqi virerave.

² Vo enta vo enta te ariara koqeve tivaqiqi virera. Te ekaa enta ai autu tuahera karerave.

³ Noravano Kotiva nai uritarakero noravano vairara ti, tenavu vira autu voqavata tuahera kaariravama vaivo. Viva noravano vairara kia vovanovata ho kankomakero iri tavaanarove.

⁴ Vate varia vaiinti nahentika are autinarara naantiara qovaraiqika tiva nimiqi vivara. Mintiaqi viha, naantiara naantiara qovaraiqikavata are nora kaiqa varenarara iriha ai autu tuahera kevara.

⁵ Are takuqu kera variana okararave, are Avuhainaava variana okararave, virara virara vika viti viri tiva nimivara. Vika mintiqe te are voqaraa kaiqa varaanarara aatoqi iriqi virerave.

⁶ Vika are nora kaiqa varenarara kauqu runkinkiri iha vokika tiva nimiqi viqe, te ai nora autuara tiva qoqaiqama karerave.

⁷ Vaiinti nahenti ruvaaqumavi vaiha, ai koqe okararavata, are avuqavuqama nimite vaina okararavata quaheha ihi tivaqiqi vivara.

⁸ Noravano Kotiva tinavu koqema timite vaiva tinavu aaqurihamma timite vaivaro vira araravano kia vaaka ite vaira. Vira muntukavano tinavuara voqama kero vaira.

⁹ Viva ekaa vaiinti nahenti koqe okaraqai autu nimite vaira.

Viva ekaa haika nai autu kero vatai haikararavata aaqurihamma nimite vaira.

¹⁰ Noravauvu, are ekaa haika autu kera vataarauka, vika ai autu tuahera kevara.

Are vaiinti nahenti koqema nimitaanarara iriha, vika ai autu tuahera kevara.

¹¹ Are avuhainaava kempukaiqama kera raqiki variana okararave, ai kempukavano uritarakero vai okararave, vika virara virara vokika tiva nimiqi vivara.

¹² Vika minti tiva nimiqi vimanta ekaa vo vatanaa vo vatanaaka are nora kaiqa varenarara kankomake irivara.

Are Avuhainaava kempukavano variararo ai autuvano nora autu vaira, viraravata vika kankomake irivara.

¹³ Are Avuhainaava vaihara, ekaa enta ekaa enta raqikiqira vinara.

Are maa entara variakaqaa raqikiqira vivira, ekaa naantiara naantiara qovaraiqika vikaqaavata raqikiqira vinaravema turo.

Noravano Kotiva nai kauqu aqiqaa aqu keharo tivatai uvvara kia tauru karaitiro, ekaa vi uvvara avate vaira.

Vira muntukavano ekaa haika nai autukero vatairara vaira.

¹⁴ Nona maaravano vikaqaa vaika Noravano Kotiva vika kahaqama nimite vaira. Vika kempukavano kia vaika viva vika kempukaiqama nimite vaira.

¹⁵ Ekaa qaqi variqi vi varia haikauka karara antuqa arimanta ai veka variavara are vika avuqavuma kera nai kara nimi varianara.

¹⁶ Are nena kauquqihair vika kara nimiaramanta vika ho ne variara.

¹⁷ Noravano Kotiva ekaa kaiqa vare vaiva avuqavuqama kero vaivaro vira muntukavano ekaa nai autukero vatai haikarara vaira.

¹⁸ Kia unaqaraiqama keha Kotira aararaiti, quqaa vira aare variaka, viva vika aumanto vairaro vika kahaqi vaira.

¹⁹ Vira uva raqa kaarorave ti, vira aatu qeteha ni variaka, viva vika muntukavano vai haikara nimi vaira.

Vika virara ike mpo tiha tinavu kahaqiane ti varia uvvara iriharo, vika ruaruama nimite vaira.

²⁰ Virara muntuka vaika Noravano Kotiva vikaqaa koqema kero raqiki vairaro, qora okara auti variaka vehi autu taiqake vaira.

²¹ Mpo, te tenta noqihai Nora Kotira autu tuaheraqi virera.

Qaqi kaira ekaa viva autukero vatai haikauka vira autu takuqi vaira ekaa enta ekaa enta tuaheraqi vuate.

146

¹ Kaiqe te tenta tivaata muntukaqohai Nora Kotira autu tuahera kaare.

² Te ekaa maa vataraqaa qaqi variqi vuaina entara Nora Kotira autu tuaheraqi virera.

Ekaa vi entara te tenta Variqa autu tuahera kaaina ihira tivaqiqi virera.

³ Ho iriate. Hauri ne nora vaiintiqaave, qjata vaiintiqaave, muntuvi vaiha, vikara tinavu ho kahaqama timitevarave tivora. Vika variqi vi vuru qutu vikama variavo. Vika ni ruaruama nimite aarava kiama ho vaivo.

⁴ Vika qutuvi, qaqaa vataiqama vivara. Vi entara vika vo haika autireka iritera kiama ho autivaravema turo.

⁵ Ho tinavu kaivaqara Iekopira Variqara viva tinavu kahaqi vaivama vaivo ti variaka, vika quaheha variqi vivara.

Noravano Kotiva vika Variqavano vaimanta vika viraqaa muntuvi variqi vivara.

⁶ Noravano Kotiva naaruvave vatave nora namarive autu kero vatero, ekaa viraqi vai haikaravata autu kero vataira.

Viva nai vaiinti nahentiara tivatai uvvara kia qaqira karaitiro, ekaa entama vikaqaa raqikiqiro vuuanaro.

⁷ Qora vaiintinavu vaiinti nahentiqa maara voqavata vatevorave tiro, Noravano Kotiva vi vainti nahentika kahaqi vaira.

Karara antuqa ari variaka, viva vika kara nimi vaira.

Viva rumpataaka kuvantu nimite vaira.

⁸ Viva avu qimpa vuaka rampai nimite vaira.

Nora maaravano vika ravaaqavu kaika, viva vika maara qaqini varake vaira.

Vira muntukavano avuqavu ni varia vaiinti nahentikara vaira.

⁹ Viva vo vatanaaka tinavu vataini variakaqaa koqema kero raqiki vaira.

Viva tentoqa nahentive, viqa vaintive, vika vika kahaqi vaira.

Qora vaiintinavu nái aatoqi iritaa haikara viva hampiqama kaimanta vika kia ho vi haikara auti variara.

¹⁰ Noravano Kotiva ekaa enta Avuhainaava vaharo raqikiqiro vuanarove.

Ne Saionini variaka iriate. Ni Variqavano niqaa raqikiqiro viviro, viva ekaa naantiara qovaraiqi vaiinti nahentikaqaaavata raqikiqiro vuanarove.

Kaiqenavu Nora Kotira autu tuahera kaare.

147

¹ Kaiqenavu Nora Kotira autu tuahera kaare.

Koqemama tenavu ihi tivakeha tentanavu Variqa autu tuahere vauro.

Tenavu vira autu tuahera kaaina okarava koqe okara vaimanta tenavu quaheha vi okarara avataqi virera.

² Noravano Kotiva Ieruharemi vatuka qaiqaa auti vaivo.

Haaru navutaaka Isarerri rumpa vare vo vataini vuru kaaka, viva vate maa entara vika vo vata vo vataihairo ruvaaquma kero ntita varero nái maaqaini qaiqaa viri ke vaivo.

³ Vika muntukavano voqama kero qoraiqimanta variaka, viva vika koqema nimiteharo, vika vaata teqa taaqama kaara rumpa nimite vaivo.

⁴ Viva opu makau autiharo mintima tiro: Minti mintimavano naaruvaini vaivarave tivakero, vika vohaiqa vohaiqa vo autu vo autu ntava nimiteaira.

⁵ Tinavu Noravano nora autu vataava vaharo viva ekaa kempuka vataavama vairo.

Vira avu aatovano ekaa okarara kankoma kero iri vairara tiro, tinavu avu aatovano kia ho vira rairakeri avatamakero tavaanaro.

⁶ Noravano Kotiva nái vara vatainiqamake variaka kempukaiqama nimiteharo, qora okara auti variaka konkoma kanta ruqutu aquke vaira.

⁷ Ne Nora Kotirara ihi tivaqi viha virara koqeve tiate. Ne tinavu Variqa quahama amiteha *kitaa* ruqutuate.

⁸ Viva tonavu vara kero viraqohairo naaruva mantaaqa amite vaira.

Viva aagu vara kaivaro aaquvano ntiharo vata maata putamake vaivaro vo ainqina vo ainqinaqahairo koqe ukauvano qampiqe vaira.

⁹ Viva ekaa aantauvahi kara nimiharo, *kotikoti* naativata karara naaruavaro vikavata kara nimi vaira.

¹⁰ Noravano Kotiva nana haikarae voqama kero quahe vairave? Kempuka ohiarave, kempuka iqoka vaiintiarave, vikarae viva quahe vairave? Aqao, kiave.

¹¹ Vira uva raqa kaarorave ti, vira aatu qeteha ni varia vaiinti nahentika, vikarama viva voqama kero quahe vaira.

Vi vaiinti nahentika tiha, Vira muntukavano tinavuara enena vaira virara tenavu noraiqaake iriqi virerave, ti variara.

¹² Ne Ieruharemiqi variaka, Nora Kotira autu noraiqama kaate.

Eo, ne Saioniqi variaka, nenta Variqa autu tuahera kaate.

¹³ Navutaaka ni naatara kevorave tiro, viva Ieruharemi vaantaavura qenti kempukaiqama teharo, Ieruharemi avutaqi variaka ni koqema nimite vaira.

¹⁴ Viva koqemakero ni Isarerri vataqaa maimaraara raqiki nimiteharo, ni koqema nimite vaimanta ne koqe kara neha ho variara.

¹⁵ Viva naaru vahairo uva tivaro vatavano vira uva vaaka iriro vira avate vaira.

¹⁶ Vaiintivano hanta vaqita kero viti viri aqua kaintema kero, viva iqara vara kaivaro tonavu voqara vata maata naavumake vaira.

¹⁷ Viva tivaro egarori ori voqara *taaruvano/kaampuravano* nti vaira. Mintivaro iqara entavano qovarama vivaro nai tavave iqara viraqi ho varianaro?

¹⁸ Ho viva qaiqaa tivaro *taaruvano/kaampuravano* ravita vivaro qaiqaa vatavano koqe iro vaira.

Kuarivano, *taaru/kaampura* vira ravita kaivaro namariqama viro otu vi vaira.

¹⁹⁻²⁰ Viva nai uva kia vo vatanaaka tiva nimiraitiro, Iekopira ankuqai tiva nimirave.

Viva nai tivatai uvvara kia vo vatanaa vo vatanaaka tiva nimiraitiro, Isareriqai tiva nimirara ti, vo vatanaa vo vatanaaka kia vira uva iriara.

Noravano Kotiva „mintima kero nai uva tinavu Isarereri tiva timirara ti,“ kaiqenavu vira autu tuaheraqi vuare.

148

¹ Kaiqenavu Nora Kotira autu tuahera kaare.

Ne ekaa naaruva virini variaka Nora Kotira autu tuahera kaate.

² Ne *enselive*, ne naaruvaihainaa iqoka *enselive*, ne ekaa vira autu tuahera kaate.

³ Kuarivauvo, toravaavo, netanta vira autu tuahera kaate.

Ekaa opu makau virini ite variaka vira autu tuahera kaate.

⁴ Nai verantogama kera variana naaruvava, are vira autu tuahera kaane.

Tonavu turuqaa variara namariiva, arevata vira autu tuahera kaane.

⁵ Noravano Kotiva tivarо ekaa vi haikava vi haikava qovaraiqama vuvarara tiro, ekaa vi haikava vi haikava vira autu tuahera kaate.

⁶ Noravano Kotiva timanta viva tintemake vika nái nimi vatukaraqaa vaiha, kia vira uva raqake hampi vi aniraiti, ekaa enta nái nimiraqaa variqi vivara.

⁷ Ne ekaa haikavano vataqaa variaka, Nora Kotira autu tuahera kaate.

Nora haikavano nora namariqi variakave, namari veva muntukaraqi variakave, „ne Nora Kotira autu tuahera kaate.“

⁸ Aaquakaavanove, *taaruvanove/ kaampuravanove*, toqa vaururuvanove, tonavu vanove, vira uva iri vai aaronaa uvaivave, „ne ekaa Nora Kotira autu tuahera kaate.“

⁹ Nora ainqinave, inaara ainqinave, tava ire varia katarikave, nantaqi vai katarikave, ¹⁰ ekaa kuvu aantauvhive, ekaa qaakau aantauvhive, ekaa memaru kuveqave, ekaa uvirive, „ne ekaa Nora Kotira autu tuahera kaate.“

¹¹ Avuhainaaka maa vataqaa variakave, ekaa vo vatanaa vo vatanaakave, ekaa vaiinti nahentiqaqaa raqikiakave, ekaa nora vaiintive, ¹² ekaa qaraaka vaiinti nahentive, konta naampaise, „ne ekaa Nora Kotira autu tuahera kaate.“

¹³ Kairamanta ekaa vika vika Nora Kotira autu tuahera kaate. Vira autuvano ekaa vo autu vo autuvata uri aatarakero nai nora autu avuni vairave.

Vira mpeqa okaravano takuqi vaiva naaruvavata vatavata uri aatarakero nai virini vairave.

¹⁴ Vira muntukavano tinavu Isarereri nai vaiinti nahentiara vaivaro viva tinavu nai vaiinti nahenti koqema timiteharo kempukaiqama timite vaimantara ti, tenavu vira autu tuaherake vaunara.

Ho kaiqenavu Nora Kotira autu tuahera kaare.

149

¹ Kaiqenavu Nora Kotira autu tuahera kaare.

Virara kempukaiqamake iri variaka ruvaaqumavi vainaini vaiha, ne qaraaka ihi Nora Kotira tiva amiteha, vira autu tuahera kaate.

² Ni autu kero vatai Variqarara irihama, ne Isarereri nenta muntukaqihai quaheha variate.

Ne Saioniqi variaka, Kotira nenta Avuhainaarara quaheha variate.

³ Ne ihi nteha *taaqavata/quvaaravata kitaavata ruqutihia*, vira autu tuahera kaate.

⁴ Noravano Kotiva tinavu nai vaiinti nahentiara voqama kero quahe vairara ti, ne vira autu tuahera kaate.

Kia kempuka vai vatanaaka viva vika koqema nimiteharo, vika navutaaka naatara nimite vaira.

⁵ Viva minti vairara ti, kaiqenavu vira vaiinti nahenti entaqi ihi tiva amitaqi viha virara quahaare.

⁶ Ne nenta kauquqi iqoka paise voqamakero vahira tuateha, nenta noqihai Nora Kotira autu tuaheraqi vuate.

⁷ Mintiaqi viha ne vo vatanaa vo vatanaaka hampata raquqi viha, vika tinavu qoraiqama timitaarara irihama, náivata qoraiqama nimitaate.

⁸ Tinavu navutaaka avuhainaakave, vika qjata vaiintive, ne seniqohai vika rumpa taate.

⁹ Kotiva tintemake, ne vo vatanaa vo vatanaaka qoraiqama nimitaate.

Ne vira vaiinti nahenti mintihama vira autu takuqi vaira noraiqama kevarave.
Ho kaiqenavu Nora Kotira autu tuahera kaare.

150

¹ Kaiqenavu Nora Kotira autu tuahera kaare.

Kotiva nai turuaraini vairara irihama, ne vira autu tuahera kaate.

Viva naaruvaini vairara irihama, ne vira autu tuahera kaate.

² Viva nora kaiga, vo kaiqa vo kaiqa qovarama kairara irihama, vira autu tuahera kaate.

Viva ekaa haika uri aatarakero nai anomia noravano vairara irihama, ne vira autu tuahera kaate.

³ Ne *aanumaara/noma* vuaqeha vira autu tuahera kaate.

Ne vo qara vo qara ina *musikira* ariha vira autu tuahera kaate. ⁴ Ne ihi nteha *taaqa/quvaara* ruqutihā vira autu tuahera kaate. Ne *musiki* ruqutihā pempuravata vuaqeha vira autu tuahera kaate.

⁵ *Baraasi* tanuqira hini hini kauquqi tuateha ruqutivaro vira uvavano noraiqama kero auva ntairamanta vira autu tuahera kaate.

Baraasi tanuqira vira anomake ruqutivaro auvante vaira Nora Kotira autu tuahera kaate.

⁶ Ne ekaa qaqi variqi vi varia haikauka, Nora Kotira autu tuahera kaate.

Ekaa mintiaqi viha Nora Kotira autu tuahera kaare.

UVA MAARA KOQERA (Proverbs - Sindaun)

Uva maara maava ni ho kahaqianaro

¹ King Devitiva Isareri avuhainaava vauvaro vira maaqu Soromonuva uva maara tivatova maa vukuraqi vairo.

² Maa uvava ni avu aato kahaqiramanta ne koqe uvave, koqe uva maarave, kankomake iriha, vo uva okaravano kukeqa vinara, vira okaravata anomake irivar.

³ Maa uvava ni kahaqiramanta ne „maa vataraqaa, qaqi variqi viha, avuqavu okara avataqi viha, avuqavuqama keha nenta kena vaiintinavu koqema nimitaqi vivara.

⁴ Vo haika vo haika kia kankomake iri tavaa vaiinti nahentika maa uvava vika avu aatovata kahaqiramanta vikavata koqe uva okara kankomake iri tavevara.

Maa uvava qaraaka vaiintie, nahentie, kahaqiraro vika avu aatovano ho vairamanta vika koqe aaraqaa nirave, qora aaraqaa nirave, rairake iri tavevara.

⁵ Maa uvava vaiinti nahenti avu aato vataaka kahaqiraro vika avu aatovano voqavata koqe iromaa varianaro.

Maa uvava avu aato vataaka koqe aara numiqaira vika koqe aaraqaqai nivara.

⁶ Maa uvava ni kahaqiramanta ne uva maara tirave, uva tuqantaake tirave, uva okara kukeqaterave, ne vi uvara vi uvara ho iri tavevara.

⁷ Are koqe avu aato varareva irera, avuni Nora Kotira aatu qetehara variana.

Kia avu aato vataaka vika avu aato vataaka ti varia uvaravar qumina uvave tivakeha, koqe aaraqaa ni varia okararavata kia iriataa imanta variara.

Qaraaka vaiintiara tu uvara

⁸ Ti maaquo, ai qova ai tiva amiaina uvara koqema kera iriqira vuana. Nina nova ariara tina uvaravata kia qaqa kaana.

⁹ Maurakanaa taaqima taara ai qiataqaa aqu amitero, kunkura taaqima taara ai auntaqi ruvu amitaintema kero, ai noka qoka uvavano ai koqema amitairara are koqe vaiintivanoma vainara.

¹⁰ Ti maaquo, muara vaiintinavu ariara tinavu hampata qora kaiqa varaarie ti, ai aaraivera, kiama are vika uva iriraitira, kiama vika avataqira vuane.

¹¹ Vika ariara tiha, Are tinavu hampata aniraqe tenavu oru vaara autute vo vaiinti arukaare. Varaiqenavu oru kukeqavi vaiha vo vaiinti qaqi qumina arukaare.

¹² Qaakau vairivano aantau arukero nampiqama kaintemake, kaiqenavu vi vaiintika aru kaari vika qutu vika vainaini vuate. ¹³ Tenavu vi vaiintika aruke, vika ia haikara, vo haika vo haika vara vuru vataariraro tinavu naavu mpiqaarire.

¹⁴ Are tinavu hampata aniraqe tenavu vi haikara vi haikara vare vuru vohaaqiqi vate, rairake aivata amiare, tivara. Muara vaiintinavu mintima tivara.

¹⁵ Minti ti varia vaiintika are kia vika uva iriraitira, kia vika hampata vuana. Kia vika vi varia aararaqaa avataqira vuana.

¹⁶ Minti varia vaiintika vaaka qora kaiqa varareka auti vaiha, vika vaakama vo vaiinti arukevara.

¹⁷⁻¹⁸ Uvirivano tavaivaro vaiintivano vaara vuitaivaro tavero, kia viraqaa aru viraitiro, getakero qaqqini virave. Vi vaiintika kia vi uvirira voqara variara. Minti varia vaiintika vaivar vika vaiinti arukareka vaara vuiteva vika náima arukaanaro.

¹⁹ Vo vaiinti vo vaiinti qoraiqama nimiteha muara vare variaka, ekaa vikavata variqi vi, vohaa qaramake qoraiqama vivara.

Koqe avu aato vovano qoririma kaantora

²⁰ Nahentivano aaraqaave maaketiqive, himpi vaharo vaiinti nahentiara naverai tintemaka kero, koqe avu aatovano naverai ti vaira.

²¹ Airi vaiinti nahenti vi ani varia aararaqaae, vaantaavura qentianave, vaiinti nahenti ruvaaqumavi varianainive, viva naverai tiharo mintima tiro:

²² Ne kia avu aato vataaka, tarentae hampi kaiqara noraiqaake iri vai okarara qaqqira kevarave?

Ne quaheha koqe vaiinti nahenti naaraishama nimite variara, tarentae vi okarara qaqqira kevarave?

Ne koqe avu aato vai okarara navutaiqi variaka, tarentae vira qaqqirake koqe avu aato varevarave?

²³ Te niara ne nenta qora okara autira qaqlira kaate turamanta ne kia ti uva iriarave. Ne ti uva iriatirio, te ni koqe aara numiqeha, koqe avu aato ni nimuraitirio.

²⁴ Te ni naarauramanta ne kia te unanaini aniarave. Te ni kauqu katu nturaro niqihairo kia vovano anirave.

²⁵ Te koqe avu aato ni nimiare turamanta ne ti tauvaqa utu timiteha kia ti uva iriarave. Te niara qora aara qaqlirake koqe aaraqaa vuate turamanta ne kia iriarave.

²⁶ Ne mintimake ti qoririma timitaara kaara tevata ninta qoririma karerave.

Vo haika kaara ne qoraiqama viqe, te niara huviqorave tivakeha ni naarahama nimiraterave.

Qora entavano niqaa qovaraiqiramanta ne voqamake qete vaiqe vi entara te kia ni kahaqiraiti, ni tauvaqa vauraqai tiva nimirerave.

²⁷ Arionaavano utintema kero, qora entavano niqaa qovaraiqiaina entarave, vetora noraiqaakero utiharo naavu maaqa rampai raampairima kaintema kero, qora maaravano niqaa qovarama viramanta ne vehiqamavi entarave,²⁸ vi entara ne ti haareha tinavu kahaqiane tiqe, te kia ni uva irirerave. Ne vi entara ti rantareka iha kiama ho ti ranta kevarave.

Ne koqe avu aato iri varia okarara navutaiqiba Nora Kotira qoririma keha kia vira aatu qetaraiti,³⁰ te koqe avu aato nimunara ne kia iriraiti, te nenta qora okara qaqlira kaate tuna uvaravata ne kia iriarave.

³¹ Ne mintiara kaara naantiara nenta qora kaiqa varera vira koqaa, qora koqama varevarare. Nenta qora kaiqa vare variava, vivama ni qoraiqama nimitaanarove.

³² Kia avu aato vataaka hampi kaiqaraqai noraiqaake iri variaka variqi vivaro, nái vare kaiqava vika aru kaanarove.

Koqe avu aatora kia noraiqaake iriaka vaivaro nái mintimake iri variava vika qoraiqama kairamanta taiqa vivarave.

³³ Ti uva iriaka koqemake qaqi variqi vivarave. Maaravano kia vikaqivi vairaro vika muntukavano qihaaqama kero vairamanta vika kia vo haika aatu qetavarave, tiro.

[Nahentivano aaraqaa himpi vaharo naverai tintema kero, koqe avu aatovano vi uvava vi uvarara ti vaura.]

2

Koqe avu aato vira koqaa

¹ Ti maaquo, ti uva irira koqema kera vi uvava nena avu aatoqi vataana. ² Are koqe avu aato vai okarara iriqira vihara, vi uvava kankoma kera irireva autihara variana.

³ Are Kotirara, Mpo, koqe avu aato timiane, tiana. Mpo, koqe aaraqaa viravata qora aaraqaa viravata, ti humiqairaque te avuqavu aaraqaa vuare, tiana.

⁴ Silvaa orie, vo haika koqe haika kukeqa tairae, rantareva autintema kera, are koqe avu aatora rantaqira vuana. ⁵ Are mintimakera rantaqira virera, are Nora Kotira aatu qetehara ni vaina okarara kankoma kera irira, vira vo okara vo okaravata iri tavenara.

⁶ Noravano Kotiva koqe avu aato nimi vaivama vairo. Vivama koqe avu aato tinavu timi vaimanta tenavu vira okara, vo okara vo okara ho iri tavevaunara.

⁷ Noravano Kotiva avuqavu ni variaka kahaqivi vaivama vairo. Kainkevano vaiinti antua amitaintema kero, viva koqe aaraqaa ni variaka antua nimite vaimanta vika kia qoraiqama vuara.

⁸ Nái kena vaiinti nahenti avuqavu okara autu nimite variaka variavaro Noravano Kotiva vika antua nimite vaira. Virara kempukaiqaake iriqi vi variaka variavaro viva vikaqaa maimaraara raqiki nimite vaira.

⁹ Ti maaquo, are koqe avu aatovano vai okarara iriqira virera, are avuqavuqama nimite vaina okarara, vo okara vo okara kankoma kera iri taverava, ekaa koqe aaraqaa ninaravata ho tavenara.

¹⁰ Are mintima vaina vaiintiva vairera, ai avu aatovano anomia kero koqema viraro ai muntukavanovata paru irarama vainara. ¹¹ Are mintima kera koqe aaraqaa viva qora aaraqaa viva kankoma kera irirava, viva ai antuama amitaanaro. Are vo uva vo uva kankoma kera iri taverava, viva ariqaa koqema kero maimaraara raqiki amitaanaro.

¹² Koqe avu aatovano mintima kero ariqaa raqikirara are kiama qora okara auti vaikave, qora uva ti vaikave, ntataqira vinara.

¹³ Vi vaiintika avuqavu ni varia aarara qaqlirake konkiraiqi aararaqaa ni vhaiha

¹⁴ quaheha qora kaiqa, vo kaiqa vo kaiqa vare variara. Vika qora okara, vo okara vo okarara quaheha variara.

¹⁵ Mintia vaiintika qora aaraqaa ni variavara are kia vika uvava quqaa uvave tinara.

¹⁶ Vo vaiinti naatavano ariara tiharo, Ani tintira nuane, tina entara koqe avu aatovano ai kahaqirara are kia vi nahentira uva irinara.

¹⁷ Minti vai nahentiva nai qaraaka nahenti vau entara qorainti varatora qaqrakero, Kotira avuqaa nai kauqu ainqaa aqukeharo tivato uvaravata qaqrakero, hampi kaiqa varareva iharo ai aaraanaro.

¹⁸ Ho are vi nahentira hampata vira naavuqi virera, are qora aaraqaama vinara. Vi aarava qutu vuaka varianaini muntu taiqaanaro. ¹⁹ Vaiintinavu vi nahentira tavareka vuakaqihairo kia voyovanovata oturantero uri vairave. Vi vaiintika kia ho qaqi variaka ni varia aararaqaa qaqaa nivara.

²⁰ Are virara virara iriharama, koqe vaiinti ni varia aararaqaaave, avuqavu ni variaka ni varia aararaqaaave, vi aararaqaaqai nuana. ²¹ Avuqavumake ni varia vaiinti nahentika, vika maa vataraqaa maahotama variqi vivara. Vikaqaa uva vateva kia vairamanta vika koqemake qaqi variqi vivara.

²² Vika mintiaqiqi vimanta vo vaiinti nahenti kia Kotira uva iriraiti, qora kaiqa vareka vaivarao nimiri raru kaintema kero, Kotiva vika qaqini vara kero vehi autu kaanaro.

3

Qaraaka vaiintinavu koqe uva maara tura

¹ Ti maaquo, te ai koqe uva maara tiva ami vaunara, are vi uvvara kia tauru karaitira, vi uvvara nena avu aatoqi vataana. ² Are vi uvvara iriqira virera, are maa vataraqaa vukai entama koqema kera variqira vinara.

³ Vorara muntuka vate okararave, mpo ike tiha vira koqema amite okararave, are kia vi okaratanta qaqira kaana. Vi okaratanta paama tivakera tuatera nena avu aatoqi qara ntuva taana. ⁴ Are mintiaqira viramanta vaiinti nahentivata Kotivavata ariara quahevvara.

⁵ Kia nena avu aatogaa muntuvi vairaitira, Nora Kotiraqaa muntuvi vahara virarama noraiqaa kera iriana.

⁶ Are nana nana kaiqae varareva ihara, Noravano Kotiva ti kahaqirirava vaivo tivakehara, vi kaiqara varairaro viva avuqavu vaina aarara, vo aara vo aara ai umiqaarira.

⁷ Hauri are nena avu aatora koqe avu aato vaivo tivakehara nena mahuta tirora. Are Nora Kotira aatu qetehara vira uvaqai iriqira vihara qora okara tauvaqa utu amitaana.

⁸ Are mintiaqira viraro ai vaatavano kempuka vairara are koqema kera variqira vinara.

⁹ Nora Kotirara noraiqakera irihara are nena naahoqihira avuni mpeqaiqina karara qantu varera vira naane viri amitaana.

¹⁰ Are mintiraro Noravano Kotiva ai naahoq kara airiqama kairara are kara qantu kera vuru vatena naavuraqi karavano mpinqairaro, ai uainivata mpinqero qaqini ruqaqiaranaro.

¹¹ Ti maaquo, Noravano Kotiva ariara avuqavu nuarire tiro, vo maara ariqaa vatairara kia virara qora haikave tiane. Viva ai atirara kia virara muntuka qoraiqirara variana.

¹² Noravano Kotiva nai muntuka vai vaiinti nahentikara qaqaa qora aaraqaa vivorave tiro, viva vika nitiharo ruqutuqiro vi vaira. Vira qova nai muntuka vai vaintiva koqe aaraqaa vuarer tiro avuqavu qintemakero, Noravano Kotiva vika avuqavuq vaira. (Hiparu 12:5-6)

¹³⁻¹⁵ Nana haikavanoe vaiinti kahaqiraro viva quaheharo varianarove? Airi monue, korie, silvaae, vahehema/vaataiqama tai haikavae, vi haikava vi haikava hoe vira kahaqiraro viva quaheharo varianarove? Aqao, vi haikava vi haikava kia nora haika vaivarao koqe avu aatovano nora haikama vairo. Virara iriharama are koqe avu aato varenarare, vo uva okara kankomakera irinrarave, vi haikara varenarara noraiqakera iriane.

¹⁶ Koqe avu aato vataaka variavaro vika avu aatovano vika kahaqimanta vika koqemake vukai entama maa vataraqaa variqi vivaro vika autuvanovata nora autu vairaro vika airairavanovata airitahaama varianaro.

¹⁷ Koqe avu aatovano vika koqema nimitairaro vika muntukavano paru iramantama vaivara. ¹⁸ Koqe avu aato rantake variaka, vika quaheha koqemake variqi vivarave.

¹⁹ Noravano Kotiva nai koqe avu aatoqohairo maa vatarao autu kero vataira. Viva vo okara vo okara kankoma kero iriraqohairo naaruvavata autu kero vataira.

²⁰ Viva vo haika vo haikara kankoma kero iri vaivara tiro, viva tivaro vo namari vo namarivano aruvuqihairo tuvi vaira. Qaiqaa viva tivaro tonavuqaaohairo aaqu nti vaira.

²¹ Ti maaquo, koqe avu aato iri vai okararave, uva tiara rairakeha una uvave quqaa uvave ti okarara, are vi okarara vi okarara paama tivakera tuataana.

²² Are mintiraro vi okarava ai kahaqirara are vukai enta maa vataraqaa variqira vihara ²³ aaraini viraro kia vo haikavano ai qoraiqama amitairara kia kuntavaivai iraitira,

koqema kera nuvaqi vinara. ²⁴ Are vaitareva ihara kia qetaraitira, koqema kerama vaitenara.

²⁵ Qora entavano qora vaiinti nahentiqa qovaraiqaina entarave, qete haikava vaaka qovaraiqaina entarave, are vi entara kia qetehara vairaitira, ²⁶ Nora Kotirara kempukaiqama kera iriraro vivama ariqaa raqikiqiro vuarira. Viva ariqaa raqikiqiro viraro ai aiquvano kia vaara vuiteraqi aru vuarira.

²⁷ Ho vo vaiintivano ariara tiharo, Mpo, ti kahaqjane tirara, are tavairaro vira kahaqira aarava ho vairera, kia virara ai kia kahaqirerave tiraitira, vi vaiintira qaqi kahaqiana.

²⁸ Ai kena vaiintivano vo haikara aavoqiharo ai naarirera, kia virara tiharo, Ho vairaque hura amiare tiane. Are vira amira aarava ho vairera, vaaka vi haikara vira amiana.

²⁹ Ai naavu aumanto variaka ariara koqe vaiintive tiaka vaivara, are kiama vika qoraiqama nimitenarara aatoqi iritaana. ³⁰ Vaiintivano kia ai qoraiqama amitairara hauri are qumina okara kaara viraqaa uva vaterora.

³¹ Hauri vaaka himpiharo raqi vai vaiintiva nintema kera are nirora. Are kia vira voqaantema kera mintiana.

³² Nora Kotira antuqavano kia mintia vaiintikara vaivaro, viva nai avu aatoqi vai uvare avuqavu ni variaka tiva nimi vaira.

³³ Noravano Kotiva tiharo, Qora vaiinti nahenti nai vaintivara hampata qoraiqama vivarave. Te koqe vaiinti nahenti nai vaintivara hampata koqema nimitaqui virerave, ti vaira.

³⁴ Nái mahuta tiha nái kena vaiinti nahenti naaraihama nimite variaka Kotiva náivata vohaa qarama nimitaanaro. Nái vara vatainiqama keha variaka, viva vika aaqurihama nimiteharo koqema nimitaanaro.

³⁵ Koqe avu aato vataa vaiinti nahenti nora autuma varevara. Koqe avu aato qoririmake variaka, vika autuvano vatainiqama viramanta kaurira haika varevara.

4

Ne koqe avu aato varaate tura

¹ Ti maaquvarao, te ni qoka koqe uva maara tiva nimiainara iriate. Ne aato ti timiha koqemake iri vaivaro ni avu aatovano koqema vuarira.

² Koqe uva maara te ni tiva nimunara kia vira qaqira kaata.

³ Haaru ti nova ti vohaiqa vatataika vailha, te vaintikaa tenta qora naavuqi vauraro ⁴ vi entara ti qova koqe uva maara ti tiva timiro tiharo:

Are ti uva maa koqema kera nena avu aatoqi vataane.

Te ariara minti mintiane tiaina uvare, are vi uvare iriqira virera, are koqema kera qaqi variqira vinarave.

⁵ Koqe avu aato vai okararave, vo okara vo okara kankomake iri taverave, vi uvare vi uvare are kankoma kera irireva autihara variane. Are kia ti uva tauru karaitira, kia vi uvareqaahaira tuqantaavira vo uva vo uva hampi uva iriane.

⁶ Are koqe avu aato vai okarara kia qoririma kairera, vi okarava ai koqema kero antuama amitaanarove. Ai muntukavano vi okarara variqiro virera, vi okarava koqema kero ariqaa raqikiqiro vuuanarove.

⁷ Koqe avu aatovano avuni vai okaravama vairo. Mintima vairara tira, are kia vo haika vo haika varenarara noraiqaakera iriraitira, avuni koqe avu aato varareva autihara variane.

⁸ Are koqe avu aato vai okarara antuqa arirara vaharama, vi okarara paama tivakera tuatairaro vivama ai nora autu amiarire.

⁹ Maurakanaa taaqima taara ai qiataqaa *vahehema/vaataiqama* amitaantema kero, vi okarava ai vahehema amitaanarove. Avuhainaa tovaqa voqara vi okarava ai vaataiqama amitaanarove turo, tura.

„Te vainti naankuavano vauna entara ti qova minti tivakeharo koqe uva maara ti tiva timira..”

Taara aarara tura

¹⁰ Ti maaquo, are noraiqaakera ti uva maara iriqira virera, are vukai entama maa vataraqa variqira vinara. ¹¹ Te koqe avu aato vai okararama ai tiva ami vai. Are koqe aara avuqavu aaraqaa nuane ti, te vi aararama ai umiqe vai.

¹² Are vi aararaqaa nuvaqira virera, kiama qora haikavano ai aiqu ravaaqavu kairara kuntavaivai iraitira, qaqima kantamaqui vinara.

¹³ Te uva maara ai tiva amunara, kia tuta karaitira, paama tivakera tuataqira vuana. Are vi uvareqaqaa koqema kera raqikiqira virera, are koqemakera variqira vinara.

¹⁴ Kia qora vaiinti ni varia aararaqaa nuana. Kia vika hampi nuantema kera nuana.
¹⁵ Are vika ni varia aararaqaa kia viraitira, tuqantaavira koqe aaraqaa nuana.

¹⁶ Qora kaiqa vare variaka qora kaiqa kia varaivera, vika kiama ho vaitevara. Vika vo vaiinti naane qoraiqama amite, viraqahai vika homa vaitevara.

¹⁷ Qora kaiqa vare variava vika kara vaivaro, vokiaka ruquti variava vika namari ne variava voqaara vaira.

¹⁸⁻¹⁹ Qora kaiqa vare variaka ni varia aarava vaireva, anomakero konkira ari aarara voqaara vaira. Vi aararaqaa ni variaka kia koqemake tavaraiti, kuntavaivai i variara.

Avuqavu ni variaka vika ni varia aarava vaireva, kuarivano toqaqi uruntero inaaraqakaa itaqiro uriro, viraqahairo noraiqama kero ite vaira voqarama vairo.

²⁰ Ti maaquo, aato ti timihara te uva tiainara iriane. Koqema kera aato vate vairaque tiare. ²¹ Ti uva maa kia tuta karaitira, koqema kera tuaterama, nena avu aatoqi vataane.

²² Are ti uva koqema kera irirera, ho vi uvava ai koqema amitairara are koqema kera variqira viraro ai vaatavanovata koqema kero varianaro.

²³ Vaiintivano nai avu aatoqi iritaintemakero viva kaiqa vare vairara tira, are nena avu aatoqaa koqema kera raqiqiqira vi vairaro kia qora okaravano viraqihairo qvaraiqiarira.

²⁴ Hauri ai noqihairo kia quqaa uvavano qovaraiqiantora. Are una uvave, hampi uvave, ekaa vi uvara kia tiana.

²⁵ Hauri ai avuvano viti viri qora aara tavairara are vi aararaqaa virora. Avuqavu taveharama koqe aaraqaa nuana.

²⁶ Hauri are hampiara voqaara vo aara vo aaraqaa nirora. Kempuka vata vai aarara tavehara viraqaaqai nuana.

²⁷ Are qora aaraqaa vuarorave tira, kia kauqu tanarainie kaanaaqainie viraitira, avuqavuqama kera koqe aaraqaa nuana.

5

Vora naatantira kia nuane

¹ Ti maaquo, koqema kera aato vate vairaque te koqe avu aato vai okarara ai tiva amiari. Are koqema kera iri vairaque te vo uva vo uva okara ai tiva amiarirara ² are vi uvara iriharama vaiinti nahenti nivuqaa kia hamahama iraitira, koqema kera niraro ai noqihairovata koqe uvaqai qovaraiqiarira.

³ Are koqema kera ti uva iriqira viraro vo vaiinti naatavano kia ho ai mintama kero vittaaria. Vi nahentiva hiakaa i uvara nai noqihairo tivakeharo vo vaiinti mintimake vite vaira.

⁴ Viva qorainti vo aaraivaro viva vira hampata nuva kero tavaivaro hunka vi haikara voqaara vi nahentiva vaira. Ehai taara avai vataava ranteqaintema kero, vi qoraintira qoraiqama kaira.

⁵ Minti vai nahentiva vo vaiinti vo vaiinti ntita varero qutu vuaka varianaini muntu ke vaira. ⁶ Koqemake qaqi variqi vi varia aarava vaivaro vi nahentiva kia virara nai aatoqi irraitiro, viva qora aaraqaa niharo tiharo, Te maa aararaqaa homa ni vauro, ti vaira.

⁷ Ho ti maaquvarao, ne ti uva kia qaqlira karaiti, koqemake vira iriata. ⁸ Ne minti varia nahentika aumanto kia vairaiti, niaraini variata. Ne vira naavu qentiana kia oru vuata.

⁹ Hauri vi nahentira kaara are nena koqe autu qaqlira kerora. Hauri vira vaativano ariara kia mpo tiraitiro, ai aru kairara are kia naampai qiraitira, qaraaka vaiintivano vahara qutu virora.

¹⁰ Hauri vi nahentira kaara vo vaiintinavu ariqaa uva vateha, are koqe haika ruvaquma kera vatenara naarumake varevora. Hauri vi nahentira kaara are kaiqa varehara varatena airairara, vo vaiintivano raqia varero nai naavuqai vuru vataantora.

¹¹ Hauri vi nahentira kaara are aihaviraara varera vuhaariruqai aqu vira, antura ntuvuqai vihara qutu virora.

¹² Vi entara are mintima tinara:

Oho, te qaraaka vaiinti vauna entara nantihae te koqe uva maara kia irunarave? Vokiaka tiriara qora aara qaqlira kaane tiamanta nantihae te kia vika uva irunara?

¹³ Oho, vi entara te tenta tisaaka no raqake, koqe uva maara tiva timiaka uva iriataarave. ¹⁴ Vate te ekaa vaiinti nahenti nivuqaa anomake qoraiqama vuarirava aumantoma vaivo, tinara. ¹⁵ Hauri vi nahentira kaara are naantiara minti tirora.

¹⁵ Vaiintivano kia oru vo vaiinti ruvu namari kaqa naraitiro, nai ruvu namariqai kaqa kero naintema kera, are kia vo vaiinti naatavano vainaini viraitira, nena naatantira vaharama vikantiraqai vaitaana.

¹⁶ Are hampi vo nahenti vo nahentiqaaahaira vainti vataterauka, vika naantiara kiama ai kahaqivara. Qaqi kairaro nina naatavanoqai vainti vata amitaarira.

¹⁷ Hauri are hampi nahentiqaa vatatera vaintika, nahenti vira navunaaka kahaqivora. Are nena naataqaa avuqavuqama kera vatatera vaintika, vika ai ninaqai kahaqika variata.

¹⁸ Ho Kotiva ai naata koqema amitairaro viva ai vainti vata amitaarira. Are qaraaka vainti vaihara varataana nahentira, viraraqai quahaana.

¹⁹ Diaa aantau tumunta taiva, nai qorara antuqa arintema kero, ai naatavano ariara antuqa arivaroma vairo. Aantauvano qihaaqama kero nintema kero, ai naatavanovata qihaaqama kero koqema kero ni vairo. Are ekaa enta virara antuqa arirara ekaa entama vira naamara quahehara variana.

²⁰ Ti maaquo, hauri are hampi nariro ni vai nahentirara noraiqaakera iriqira virora. Hauri are vora naata naama utu varerora.

²¹ Tenavu nana nana haika auti vaunara, Noravano Kotiva ekaa vi haikara vi haikara tave vaira. Tenavu vo aara vo aaraqaa ni vaunara, viva ekaa viravata rairakero tave vaira.

²² Qora vaiintivano vare vai kaiqava, vi kaiqava vaara vuitaantema kero, vira ravaaqavuke vaira. Viva nai qora kaiqa varaiva naaquntavano rumpataintema kero, vira rumpate vaira.

²³ Minti vai vaiintiva kia naiqaa koqemakero raqiki vaira kaara viva qutuma vuanaro. Nai hampi avu aatovano vira qoraiqama kairaro viva qutuma vuanaro.

6

Maantina kaiqara varerora

¹ Ti maaquo, ai kena vaiinti vovano *dinauqama* kero vo haika varareva auti vairera, hauri are vira *dinau pepaaqaa* qara ntihara, Viva kia vi monura koqaama kairera, te vira koqaama karerave tirora. ² Are mintirera, are qara ntua tena uvava ninama tuataanaro.

³ Naantiara ai kena vaiinti viva *dinau* vira vo vainti kia amirera, vi vaintiva ariarama are nena autu *dinau pepaaqaa* qara ntua taanarara iriharama, arema vi monura amiane tianarove. Viva mintiantorave tira, are vaakama nena kena vaiintivano vainanaini oruntera, virara mpo ike tihara ti hutu *pepaaqahaira* nunka kaane tiana.

⁴ Hauri are tihara, Te vate vaitake hura mintirerave, tirora. Vaaka himpira vi vaiintiva vainanaini oruntera vi uvara avuqavu qiana. ⁵ *Diaavanoe*, uvirianoe, vaara vuitaaraqihairo qaqini ruqiarero vintema kera, arevata vi vaintira kauquqihaira ruqema kera qaqi vinara.

Popohaa vaiintikara tura

⁶ Ne popoheha kia kaiqa varaa vaiintikara tirera: Ne tompiqara varianaini oru vaiha vika kaiqa tave vaivaro ni avu aato kanko iarira.

⁷ Vi toveqika kaiqa vare variamanta kia vika qiata vaiintive, nora vaiintive, vikara vihi vaahi ti variamantavata, ⁸ vika vo kaiqa vo kaiqa vareha, karara aavoqi entarara iriha, kara nuntu ruvaaquma keha vate variara.

⁹ Ho ne popohaa vaiintika, ne vukaiqamake vaitarekave? Ne tairentae vaiteraqihai himpivarave? ¹⁰ Ne tiha, Ho qaqi kaiqe tenavu voqavata vaita kaare. Tenavu inaaraipa auraara varike himpuare, tivakeha kia kaiqa vare variara.

¹¹ Ho ne mintiaqi vivaro vaakama ne vataa haikava taiqa vira, ne vehiqama vivara. Muara vaiintivano ne ia haikara muara autu kaintema kero, ne vataa haikava kia vairamanta ne vehiqama vivara.

Qora kaiqa vare variaka okarara tura

¹² Qora kaiqa vare variaka inaara una uva ti variaka variavo. ¹³ Ariara viva tenavu qora kaiqa autuaina okarara iri tavaantorave ti, vika avu kireha, kauquqohai aave vateha, aiquqohai mintirerave tivakeha, auti variamanta nai hanauka mintireka auti variara vika iri tave variara. ¹⁴ Vika qora kaiqa auti okarara noraiqaake nai avu aatoqi iriqi vi variara. Vika qora uva ti variara kaara tivorira haikavano qovaraiqi vaira.

¹⁵ Vo enta vaakama vika qoraiqama nimitaarira haikava viqaqaa qovarama viramanta vika kia ho ruqemake viraiti, vika ekaa vehi autuvi taiqa vivara.

Qora okara 7navu

¹⁶ Qora okara 7navu vaivaro Noravano Kotiva vi okaranavuara anomakero kia antuqa arivaro vairo:

¹⁷ Nai hana vaiinti taveharo qumina vaiintive ti vai *avurave*, una uva ti vai *maaqirirave*, qaqi vaiinti aruke vai *kauqurave*, ¹⁸ vaaku kaiqara iri vai *avu aatorave*, kante vi aniharo

qora kaiqa vare vai *aiqurave*,¹⁹ vo *vaiintiara una uva* ti vai *vaiintirave*, nai qata vakaavutana *antuua uva qovaramake* vai *vaiintirave*. „Kotiva vi haikara vi haikara, 7navuara anomakero kia antuqa arivaro vaira.“

Vora naatantira kia nuane tura

²⁰ Ti maaquo, nina qova ariara minti mintiane ti uvvara koqema kera iriqira vuana. Nina nova ariara ti uvaravata kia qaqa kaana. ²¹ Are vitanta uva nena avu aatoqi koqema kera vatairaro vitanta uvavano ai avu aatoqi variqiro vuarira.

²² Are aaraini vi ani vairaro vi uvavama ai aara umiqaanaro. Are vaite vairaro vi uvavama ariqaa raqiki vairara are vaitenaraqihairu himpiraro vi uvavama ai koqe avu aato amianaro.

²³ Ovavano iteharo ataama amitaintema kero, ai noka qoka uva maaravano ai koqe aara ataama amitaanaro. Vitanta ai avuqavu iha koqe okara ai umiqeva, viva ai kahaqirara are koqema kera variqira vinara. ²⁴ Ai noka qoka uvavano ai kahaqiramanta qora kaiqa vare vai nahentika kiama ai hampiqama kevara. Vo vaiinti naatavano hiakaaina uvvara tinaravata kiama irinara.

²⁵ Hauri are vi nahentira viri vaata koqerara avu autihara nena avu aatoqihairu vikanti nirerave tirora. Viva nai avu ariara kirirera, kia viva inanaini vuana.

²⁶ Vaiintivano hampi ni vai nahentira vataakero nirera, viva vehiqama vuanaro. Vaiintivano vora naata hampata nirera, vira kaara vira arukaariravama varianaro.

²⁷ Vaiintivano iha ite vainara nai auvoqi kaqa varero viraro kiae ihavano vira utavaaqa ita kaanarove? ²⁸ Vaiintivano iha auri vaura aiqu ntavaaqiro viraro, kiae iha aurivano vira aiqu ataa tatoqa kaanarove?

²⁹ Vira voqaantema kero, vora naatantiro nirava kia ho ruqema kero vuanaro. „Kotiva, vira ruqutuma kaanaro.

³⁰ Vaiinti voqamakero antuqa ariraro kara muara vara kairera, kiama virara anomake qora vaiintive tivara.

³¹ Mintivarovata, vira rantake ravaaqaqvavu kaivera, viva nai muara autinara kaara nora koqaama aqukaanarove. Ekaa haika nai naavuqi vatainara nimi taiqama kaanaro.

³² Ho vaiinti vovano vora naata hampata nuva kaira avu aatovano kia vaivaro viva mintiharo naima nai qoraiqamake vaira.

³³ Mintinara kaara vika vira qorahaa ruqutuke vataivaro, vira autuvano vataini qiraro viva kaurira haikavata varaanarove. Viva kaurira haika varairava kia nunka viraitiro, qaqqiqaima varianaro.

³⁴⁻³⁵ Nahenti vira vaativano voqama kero arara itairaro, kia monu amirava vira arara itainara vaahama kairaro viva kia vi vaiintira aaqurihama amitaraitiro, vira anomakero qoraiqama amitaanarove.

7

¹ Ti maaquo, koqemakera nena avu aatoqi ti uva vara vataana. ² Te ariara minti mintiane tuna uvvara, are vi uvvara iriqira virera, are koqema kera variqira vinara. Are nena avuqaa koqema kera raqikanntema kera, ti uvavaqvata raqikharama kia ti uva voqavata tauru karaitira, ekaa vi uvvara iriqira vuana. ³ Ringivano ekaa enta ai kauqu vuqaqi vainantema kera, are ti uva maa, nena avu aato muntukaqi vataane.

⁴ Koqe avu aatora mintima tiane: Are ti nakaava koqevama variaro, tiane. Vo okara vo okara kankomake iri tave vairara are mintima tiane: Are ti tonti koqevama variaro, tiane.

⁵ Are mintima kera tiraro vitanta ai antua amite vaivara are kia oru vo vaiinti naata hampata niraitira, are vi nahentiva ai minta ireva ina uvaravata kia ho irinara.

Vora naatavano hampi ni okarara tura

⁶ Vo enta te tenta naavu *uintuanahai* vutu ⁷ tavauramanta qaraaka vaiinti kia koqe avu aato vataaka aaraqaa ni variarave. Vikaqihairo vovano, viva kia qora okarave koqe okarave iri tave vai vaiintiva ⁸ aara kaantaraqaa nahenti vira naavu aumanto oruntovaro ⁹ enta ire ivaro ¹⁰ vi nahentiva aaranahainaa nahenti utavaaqa voqara nonku varero, vevantero vi vaiintira minta ireva auti vairave.

¹¹ Vi nahentiva voqama kero hampi kaiqa vare vaiva vairaro, viva kia koqema kero naavuqi oquvi vairaitiro, ¹² ekaa enta *madketiqive*, aaraqaave, niharо vaiintiara rante vai nahentiva vaira.

¹³ Te tavauraro vi nahentiva qaraaka vaiinti vira ravaaqaqvavu kero kia kauriraitiro, vira moqakero virara tiharo, ¹⁴ Vate te aantau mati Kotira *ofaa* amitaunaraqihai hini mati untataurava ti naavuqi vaivo. ¹⁵ Mintiverama te tenta naavuqihai vevante ai rantareru tuvuraukama, tuvu ai ranta kauro.

¹⁶ Te tenta vaitaaina taintara qeramake vate, koqe tavuna Isipiqhah aututaara, vo *kala* vo *kalaa* vaira vi taintaraqaa vuqite, ¹⁷ koqe unta i haikara, vo *pauraa* vo *pauraavata* vi taintaraqaa rauruke vatauro.

¹⁸ Are tintira aniraqe tetanta oru naavuqi vaiha quaheha ruhe tutiqamaqi vivitanta aatita kaare.

¹⁹ Are kiama ti vaatiara getaaane. Viva niara aaraini vivo. ²⁰ Viva airi monu varero vivara tiro, taara *uiki* aitarairaroma viva orurantero anianarove, tiro.

²¹ Minti tivakehero vi nahentiva airi uquerara uvaqohairo vi vaiintira mintama varero nai naavuqi vira.

²² Purumakau vita vare vuru arukareka iantema kero, vaakama vi vaiintiva vi nahentira uva iriro, vira avata varero vira.

Diaavano vaara vuitaaraqaa oru aru viro qaqi vaimanta ²³ veqaqohai vira arukaantema kero, vi vaiintiva vi nahentira avata varero vira.

Uvirivano vaara vuitaaraqaa aru vintema kero, vi vaiintiva mini vira. Vi vaiintiva kia nai vaaka qutu quuinaraara kankomakero iriraitiro, mini vira.

²⁴ Ho ti maaquvarao, ne koqemake aato vatehamta ti uva iriate.

²⁵ Ni muntukavano minti nahentikara variantorave ti, ne kia vika avataaqi vuata.

²⁶ Vi nahentika minti variara kaara airi vaiinti qoraiqamavi quuti variara.

²⁷ Vi nahentira naavuqi vi varia aarava vaireva, qutu vuaka vi varianaini vua aaravama vairo. Ne vi aararaqaa vivera, ne vaakama qutu vivara.

8

Koqe avu aatovano ni naare vaira

¹ Ho iriata. Nahentivano himpiro vokiaka naare vaintema kero, koqe avu aatovano ni naare vaira.

²⁻³ Aara aumanto vai ainqinaraqaave, ruvaaqumavi varia aararaqaave, nora vatuka qentianave, viva mini mini himpitero vailharo maantima kero naverai tiharo:

⁴ Te naverai tihama ni ekaa vaiinti nahentima naare vauro.

⁵ Ne kia vo haika vo haikara kankomake iri variaka aniqe te vo haika vo haikara iri vai okarara ni tiva nimiare. Ne kia koqe avu aato vataaka, ani koqe avu aato varaate.

⁶ Ne koqemake aato vate vaiqe te koqe haikara ni tiva nimiare. Ne iri vaiqe te avuqavu vaina okarara ni tiva nimiare.

⁷ Ti novano una uvvara kia antuqa arimantara ti, te tenta noqihai quqaa uvaqai ti vauraukave.

⁸ Kia ti uva voqavanovata hampi uva una uva vairaitiro, ekaa ti uvavano quqaa uvaqai vairave.

⁹ Koqe avu aato vataaka tavaavarao ekaa ti uva okaravano qoqaa vaimanta vika kankomake ti uva okarara iri variarave. Vika tavaavarao ekaa ti uvavano avuqavu uvaqai vairave.

¹⁰ Kia *silvaa* ori koqera varenarara noraiqaake iriraitira, koqe uva maara varenarara noraiqaakera iriane.

Kia *kori* ori koqera varenarara noraiqaake iriraitira, koqe avu aato varenarara noraiqaakera iriane.

¹¹ Koqe avu aatovano ekaa koqe ori, vo ori vo orivata aatarakero avuni vai haikava vairara tira, are vi haikara varaataas irara varareva autihara variane.

¹² Te tenta koqe avu aato vikama vauro. Te vaiinti nahenti kahaqi vauramanta vika vo okara vo okara kankomake iri taveha, koqe aarae, qora aarae, ho rairake taveha koqe aaraqaa vi variarave.

¹³ Kotira aatu qeteha variaka, vika qora kaiqa navutaiqiha variqi vivarave.

Nai mahuta ti vairave, nai autu tuahere vairave, vaaqu kaiqa vo kaiqa vare vairave, una uva ti vairave, kia ti hantuqvano vi haikarara vairave.

¹⁴ Te vaiinti nahenti avu aato kahaqama nimite vauramanta vika koqe kaiqa kankomake iri taveha vare variarave.

Te tenta koqe avu aato vika vauraro ti kempukavanovata ho vaimantama vauro.

¹⁵ Te avuhainaa vaiintinavu kahaqi vauramanta vika koqemake uva tivake vateha, nái vaiinti nahentiqa koqemake raqiki variarave.

¹⁶ Ekaa nora vaiintive, qita vaiintive, vika variamanta te vika kahaqi vauramanta vika nái navunaakaqaa koqemake raqiki variarave.

¹⁷ Ti rantareka auti variaka, vika ti homa ranta kevarave. Tiriara antuqa harimanta variaka, te nái vikaravata antuqa arimanta vaunarave.

¹⁸ Te homa vi vaiinti nahentika nora autuvata airi monuvata nimirarave. Te vika kahaqi variari vika avuqavu niha koqe haika, vo haika vo haikavata varevararave.

¹⁹ Korivata silvaavata koqe haikatanta vaivarovata, tigaahai vare varia haikava vitantavata uri naatarakero vaivo.

²⁰ Te avuqavu aaraqaa ni vaurauka vaiinti nahenti uva iriha vika uva avuqavuqamake raira nimite vauraukama vauro.

²¹ Ti uvara antuqa arimanta variaka, te vika airi airaira nimiriraro vika naavu mpiqama vuuanarove.

²² Haaru Noravano Kotiva nai kaiqa hogarama teharo viva kia vo kaiqa naane qovarama karaitiro, ti naane qovarama korave. ²³ Nai haaru, kia maa vatava vau entara Noravano Kotiva ti naane norai-qama komanta te naane variavaunarave.

²⁴ Noravano Kotiva kia nora namarive, ruvu namari vo namari vo namarive, autuko entara, viva ti naane vatatomanta qovarama vuavaunarave. ²⁵⁻²⁶ Nora aiqinavata inaara aiqinavata vika kia nái nimu vatukaraqaa vau entarave, kia vatave, naahove, kara qampiqaaaina vatarave autuko entara, viva ti naane vatatomanta qovarama vuavaunarave.

²⁷ Te „Nora Kotira hampata,“ variavauraro viva naaruva autu kero nora namari vaura rantuta kero vatora. ²⁸ Viva tonavu varakero naaruva virikanta vatero, viva tuvaro aruvu namarivano nteharo nora namari mpiqa korave.

²⁹ Vi entara te vira hampata variavauraro viva nora namari auvahianta qioqama tero thiaro, Kia qaqi qumina vataini vaari ntaraitira, mini variane tivakero, vata tuqavata nai vainaini arakero vatora.

³⁰⁻³¹ Noravano Kotiva vi kaiqara vare vaumanta te vira hampata vaiha vira kaiqa, vo kaiqa vo kaiqaqaa raqiki variavaunarave.

Te vo enta vo enta vira avuqaa vaiha viva aututo haikara taveha, vi haikara vi haikarara quahe variavauraro viva tiriaravata quaheharo vaurave. Te maa vataravata, maa vataraqaa vau vaiinti nahentikaravata, quaheha variavaunarave.

³² Ti maaquvara, ne ti uva iriqi vuate. Ne te tiainantemake variqi vivera, ne quaheha variqi vivarave.

³³ Ne ti uva maara koqera kia qoririma karaiti, vi uvvara iriqi vivaro ni avu aatovano koqe iro vaira variate.

³⁴ Ti uva koqemake irireka iha vo enta vo enta ani ti naavu qentiana ti veka vaika vaivaroo Kotiva vika koqema nimitaanarove.

³⁵ Nai tauka taukae ti ranta keka, vikama qaqi variqi vi aarara ranta kaivaro Noravano Kotiva vika quahama nimitaanarove. ³⁶ Nai taukae kia ti rantareka auti vaika, vika náima nái qoraiqama kevarave. Kia tiriara antuqa arimanta qutira haikara antuqa ariramanta variaka vika qutuma vivarave, tiro. „Koqe avu aatovano vi uvvara vi uvarara minti tura.“

9

Koqe avu aatovano aareharo tu uvvara

¹ Koqe avu aatovano nai naavu kaqa taira. Viva naavu kaqeharo *pohi* nora, 7navu qohikero vaavi arataira. ² Viva mati unta kero, hiakaa i haikara *uainiqi* tuqantaakero, kara taintaqaqa qerama kero vataira.

³ Viva nai kaiqa nahenti nititama kaimanta vika oru nora vatukaqi aiqinaqaa vaiha maantimake naverai tiha, ⁴ Ne kia avu aato vataaka hampi kaiqara noraiqaake iri variaka, ani ti naavuq ⁵ ti kara nehama te *uaini* tuqantaake vataunaravata naate.

⁶ Ne nenta hampi avu aatoqaa nira qaqrake, koqe avu aatoqaa ni vai aararaqaa niha qaqi variqi vuate, tura.

Taara vaiinti okarara tura

⁷ Koqe avu aatora naaraihama amite vai vaiintira uva avuqavu qiraro viva kia ai uva iriraitiro, ariara qora uvaqaima tianaro. Are qora kaiqa vare vaina vaiintirara kia mintiataarave tiraro viva ariara vaauq uvaqaima tianaro.

⁸ Virara irihara, koqe avu aatora naaraihama amite vaina vaiintira uva kia avuqavu qiane. Hauri are mintiraro viva ai navutaiqama amitaantora.

Ho are koqe avu aato vataarara kia mintiataarave tiraro, viva ariara quqaama tiaro tivakero, ariara antuqa ariraro varianaro.

⁹ Are koqe avu aato vataara uva maara tiva amiraro vira avu aatovano vogavatama koqe iro varianaro. Are avuqavu nina vaiintira koqe okara umiqairaro viva vi okararavata iriqiro vuuanaro.

¹⁰ Ho vaiintivano koqe avu aato varareva irera, viva avuni Nora Kotira aatu naane geteharo variarire. Kotiva takuqu kero vairara tiro, vaiintivano virara kankoma kero irirera, vira avu aatovano koqema kero varianaro.

¹¹ Koqe avu aatovano ai koqema amitairara are maa vataraqaa airi ihima qaqi variqira vinara.

¹² Ai avu aatovano koqe avu aato vairera, vi avu aatova ninama koqema amitaanaro.

Are vi okarara qoririma kehara naarahama amitairera, vira kaara are nenama nena qoraqama kenara.

Qora avu aatovanovata vaiinti naare vaira

¹³ Qora avu aatovano vaireva, nahenti vovano naverai ti vaira voqaarama vairo. Vi nahentira avu aatovano qora avu aato vaivaro viva kia koqe okara iri tave vaiva vaharo ¹⁴ nora vatukuruni nai naavu qentiana taintaqaa oquiviro vaharo ¹⁵ vaiinti nahenti vitare aitare i variaka naareharo mintima tiro:

¹⁶ Ne kia avu aato vataaka, homa maini anivarave. Ne kia vo okara vo okara kankomake iri tavaaka, ¹⁷ ne kiae iriavo? Namari muara kaqake neva koqema ianarove. Kara muara varake neva hiakaama ianarove, ti vaira. (Uva tuqantaakero nahenti muara ni variarara ti vaira.)

¹⁸ Viva minti ti vaimanta vaiinti vika kia kankomake iriraiti, vira naavuqi avuni oriqtaka, vika qutuma vuavo. Viva naaraimanta viva inaini vuaka, vika ekaa qutu vuaka varianaini otu variavo.

10

Soromonuva uva maara koqera tivatora

¹ Soromonuva maa uvvara koqe uva maara tivatovama vairo:

Vira maaquvano koqe okara avataqiro vi vaiva nai qora muntuka koqema amite vaira. Vira maaquvano qora okara avataqiro vi vaiva nai nora muntuka qoraqama amite vaira.

² Are qora kaiqa varehara varatena monuva kia ai koqemakero kahaqianaro. Are avuqavuqama kera nirava, viva ai ruuruama amitairara are kiama qutinara.

³ Noravano Kotiva avuqavu ni variakaqaa raqikihroma viva kia vika qaqi kairamanta karara aavoqivara. Qora vaiinti vika vo haika vo haika varareka auti variavaro Noravano Kotiva vika aara kuvakaimanta vika kia vi haikara rantake vare variara.

⁴ Are popohehara kia nena kauquqohara kaiqa varairera, are vehi vaiintiqama vinara. Are kempukaiqama kera kaiqa varaqira virera, ai naahoqi airi karama varianaro.

⁵ Vira maaquvano kara mpeqaiqi entara kara qantu vare vaiva koqe avu aato vataava vaira. Vira maaquvano vi entara qaqi vaitatero vaiva nai qora kaurira haika ami vaira.

⁶ Kotiva avuqavu ni varia vaiinti nahentika koqema nimite vaimanta vika koqemake variara. Qora kaiqa vare variaka uquerara, uva tiha nai kena vaiinti ruquti vai okarara kukeqate vaira.

⁷ Koqe kaiqa vare variaka qutu vimanta vaiinti nahenti vikara qaqi iriteha tiha, Mpo, vika qaqi vau entara koqema timite vaurave, tivara. Qora kaiqa vare variaka qutu vimanta vaiinti nahenti vikara vaakama tauru kevara.

⁸ Avu aato vataaka vo vaiintivano koqe uva tinara avataqi vivara. Qumina uvaqai ti variaka, vika qumina uva tivaqivi, vuru qoraqama vivara.

⁹ Kia una tiraiti, avuqavu ni variaka, vika kia qetaraiti, muntuka parumake nuvaqivivara. Qora aaraqaa ni variaka nai qora okara kukeqa tera vovano qovarama kaanaro.

¹⁰ Are vo vaiinti kia quqaa uva tiva amiraitira, vi uvvara kukeqa tairera, are vi vaiintira qoraqama amitenara. Are vi uvvara vutukera vira tiva amirera, vira muntukavano paruma ianaro.

¹¹ Avuqavu ni varia vaiinti nahentika nai noqihai ti varia uvava vaireva, ruvu namari koqera voqaara vaira. Vi namarira nairava qaqi variqiro vuanaro. Qora kaiqa vare variaka uquerara, uva ti variava nai kena vaiinti ntaihe okarara kukeqate vaira.

¹² Are vokiaka iri qoraqama nimiteirera, tirorira haikavano qovaraqianaro. Ai muntukavano vikara vairera, are vika qora kaiqa vareravata nunkama nimitenara.

¹³ Avu aato vataava nai noqihairo ti vai uvava koqe uvama varianaro. Kia avu aato vataava hampi uva tinara kaara vira tunaaraqohai ruqutivara.

¹⁴ Avu aato vataava koqe uva tauru kaarorave tiro, ekaa vo uva vo uva nai avu aatoqivate vaira. Kia avu aato vataava hampi uva ti vaira kaara qoraqama vuanaro.

¹⁵ Airi monu vataaka variavaro vika vataa haikava vika antua nimite vaimanta ho variara. Vehi vaiinti nahenti airairara aavoqiyava vika qoraqama nimite vaimanta vira kaara vika taiqa vi variara.

¹⁶ Avuqavu ni variaka vare varia kaiqava vika kahaqi vaimanta vika koqemake variqi vi variara. Qora kaiqa vare variaka vare varia kaiqava vika nái qoraiqama nimite vaira.

¹⁷ Ariara hampi aaraqaa vuantorave tiro, koqe uva maara ai tiva amira are iriqira virera, are qaqi variqi vi vai aararaqaa homa ninara. Are vi uvvara tauvaqa utu amitairera, are hampi aaraqaa vivira, taiqama vinara.

¹⁸ Vo vaiinti navutaiqama amiteharo vi uvvara kukeqatai vaiintira noqihairo una uvqaqaima qovaraiqianaro. Vorara tauvaqa vauraa uva ti vai vaiintiva kia avu aato vataavama vaira.

¹⁹ Are airi uva tivaqira vihara hampi uvavatama tinara. Ai avu aato vairera, kia airi uva tiraitira, evaara variana.

²⁰ Avuqavu ni variaka ti varia uvava *silvaa* ori koqera voqaarama vairo. Qora kaiqa vare variaka nái avu aatoqi irite varia uvava vehi uvama vairo.

²¹ Avuqavu ni variaka koqe avu aato nimi varia uvava airi vaiinti nahenti kahaqi vaimanta ho variara. Kia avu aato vataaka variavaro vika avu aatovano hampiqira kaara vika vaaka quti variara.

²² Noravano Kotiva tinavu koqema timite vairaqaahai kia tenavu maara vararaiti, tenavu koqe haika, vo haika vo haika vare vaunara.

²³ Kia avu aato vataaka qora okara, vo okara vo okara autiha quaheha variara. Avu aato vataaka, vika koqe okara, vo okara vo okara tavamaqi viha quaheha variara.

²⁴ Qora vaiinti nahenti vika qora haika vo haika vo haikara qeteha tinavuqaa qovarama vuantorave ti varia haikava, vi haikava viqaqaa qovaraiqianaro. Avuqavu ni varia vaiinti nahentika ekaa haikara antuqaa arinara Kotiva vika nimianaro.

²⁵ Aaronavano qovarama viro ekaa haika taiqa kaintema kero, qora entavano qora vaiinti nahentika qovarama viro vika taiqa kaanaro. Mintirarovata, avuqavu ni varia vaiinti nahentika ekaa enta koqemake variqi vivara.

²⁶ Popohara vaiinti kia vita vatairaro ai kaiqa varaarira. *Marahinavano* noqaa hunka intema kerove, iha muravano avuqi hunka intema kerove, vi vaiintiva kaiqa varairava ai popohama amitaanaro.

²⁷ Nora Kotira aatu qeteha vira aaraqaa ni variaka, vika vukai entama maa vataraqaa qaqi variqi vivara. Qora vaiinti nahenti inaaraqakaa variqi vi, qutu vivara.

²⁸ Avuqavu ni variaka vika Noravano koqe enta nimiainara vira veka variarara ti, naantiara vika vi entara taveha quahevara. Qora vaiinti nahenti vika vo haika qovaraiqainara veka vaiha, vika quminama vi entara veka vaivara.

²⁹ Noravano Kotiva avuqavu ni variaka koqema kero antua nimiteharo, viva qora kaiqa vare variaka vehi autu taiqa kaanaro.

³⁰ Avuqavu ni variaka vataini vaiha koqemake variqi vimanta, qora vaiinti nahenti kiama maahota vaivara.

³¹ Avuqavu ni variaka variavaro vika noqihairo koqe uvavano qovaraiqi vaira. Qora uva ti variaka vaivaroo naantiara Kotiva, vika no tinta kairamanta vika kia ho uva tivara.

³² Avuqavu ni variaka nái noqihai vaiinti kahaqiaina uvvara koqe uva ti variara. Qora kaiqa vare variaka ti varia uvava vaiinti nahenti qoraiqama nimite vaira.

11

¹ Unaqaraiqama keha *sikeri* hiriteha rahe variaka Noravano Kotiva vika iri qoraiqama nimite vaira. Avuqavuqama keha rahe varia *sikerira*, virarama vira antuqavano vairo.

² Nái nutuqai tuahere variaka variqi vivaro naantiara vika nutuvano vatainiqama vuuanaro. Avu aato vataaka kiama nái autu tuaheraqi vivara.

³ Avuqavu okaravano avuqavu ni varia vaiinti nahentika koqe aara numiqe vaimanta ni variari. Una uva ti variaka, vika nái una uva kaara qoraiqamama vivara.

⁴ Kotiva vaiinti nahentika uva vateharo *ko* tiaina entaraqaa are airi airaira vaterava kiama ho ai kahaqianaro. Are avuqavu nina okarara avaterava, viva ai kahaqirara are kiama qutinara.

⁵ Kia qora kaiqa varaaka variavaro vika nái avuqavu ni varia okarava vika kahaqi vaimanta vika avuqavu aaraqaa ni variara.

Qora vaiinti nahenti variavaro, vika nái qora kaiqavano nái qoraiqama kaimanta vika qoraiqamavi variara.

⁶ Avuqavu ni variaka variavaro vika nái avuqavu ni varia okarava vika ruaruuma nimite vaimanta vika koqemake variara. Kia quqaa uva ti variaka nái aatoqi qora kaiqa varareka auti variava vika ravaaqavu kero qoraiqama nimite vaira.

⁷ Qora kaiqa vare variaka naantiara qutivarо vika airi haika vararerave tivate uvavavata quminaiqama viro nái hampata taiqa vuuanaro.

⁸ Avuqavu ni variaka nora maaraqi variavaro Noravano Kotiva vi maarara varakero qora kaiqa vare variakaqaa vate vaira.

⁹ Kotira tauvaga utu amite variaka ti varia uvava, vi uvava nái kenauka qoraiqama nimiteharo vika vehi autu nimite vaira. Avuqavu ni variaka variavaro vika nái koqe avu aatovano vika rruaruuma nimite vaira.

¹⁰ Avuqavu ni variaka kaiqavano uritarakero vaimanta ekaa vatukaqi variaka vikara quahae variara. Qora kaiqa vare variaka qutu vua entara, vaiinti nahenti naaveraitiha, Hove, huvigorave, koqeve, ti variara.

¹¹ Avuqavu ni variaka vare varia kaiqava ekaa vatukaqi variaka koqema nimite vaivar, vika vatuka autuvano uritarer vaira. Qora kaiqa vare variaka qora uva ti variava nái vatuka qoraiqama nimite vaivar vi vatukava vehiqama vira.

¹² Kia avu aato vataava nai kena vaiinti uva virera tiva amite vaira. Koqe avu aato vataava kia minti tiraitiro, nai no tinta tero vaira.

¹³ Ekaa uva viti viri tiva nimi vaiva vaakama are evaara vira tiva amina uvvara voravata amianaro. Ai tontivano quqaa uvaqai ti vaiva kiama ai uva qovarama kaanaro.

¹⁴ *Kamaanira* kaiqaqaa noraiqika kia vaiinti nahenti avuqavu aara numiqavera, vi vataraqaa vaika qoraiqamavi vaivar. Ho airi vaiinti *kamaanira* kaiqaqaa noraiqika koqe avu aato nimivera, vi vataraqaa vaika koqemake variqi vivara.

¹⁵ Ho vaiinti vovano qaqi *dinaugama* kero vo haika varareva autirara, hauri are airaira qorara tihara, Maa vaiintiva naantiara kia vi monura ai amirera, tema vi monura ai amirerare, tirora. Are minti tirera, naantiara ai aihovano nona uriro tintama vuanaro.

Are tihara, Aqao, te kia vi vaintira kahaqirerave tirera, are homa vainara.

¹⁶ Koqema kero kahaqama nimite vai nahentiva vaimanta vaiinti nahenti virara koqe nahentive ti variara. Kaiqa vukaari utuke vare varia vaiintika vika airi haikama varevara.

¹⁷ Are vorara mpo ike tihara vira koqema amitairera, are mintihara nenavata koqemama amitenara. Are vora qoraiqama amitairera, are mintihara nenavata qoraiqama kenara.

¹⁸ Qora kaiqa vare variaka koqaavano vahuqa variro taiqa vuanaro. Avuqavu kaiqa vare variaka koqaavano maahotama varianaro.

¹⁹ Quqaqamake avuqavu nireka auti variaka, vika qaqi variqi vivara. Vaiinti nahenti qora araaqaa nireka auti variaka, vika ekaarama qutu vivara.

²⁰ Noravano Kotiva qora avu aato uti variakara iri qoraiqama nimite vairo. Vira muntukavano avuqavu ni varia vaiinti nahentikarama vairo.

²¹ Maa uvava quqaa uvama vairo: Qora kaiqa vare variaka kia ho Kotira *ko* aatara kevara. Avuqavu ni variaka vika Kotira *ko* homa aatara kevara.

²² Nahenti vo, koqe viri vaata vataava vaivaro vira avu aato kia vairera, viva *kori ringi* quara ainqiqi ukutaara voqarama vairo.

²³ Avuqavu ni variaka muntukavano vai haikaraqaahairo koqe haikavano qovaraiqianaro. Qora kaiqa vare variaka muntukavano vai haikaraqaahairo tirorira haikavanoqaima qovaraiqianaro.

²⁴ Paruma kero „vehi vainti nahenti, viti viri nimi vai vaiintiva monu airaira voqavatama vataanaro. Vovano nai monu airaira kampaiqama kero tuate vaiva, viva vehiqama vuanaro.

²⁵ Paruma kero nimi vai vaiintiva vare vai kaiqava voqavatama koqemakero varianaro. Are vo vaiinti nahenti kahaqirera, vika ninavata kahaqivara.

²⁶ Te vailha tavaariraro kara koqaavano uritarake vairaque te nimiha nora koqaa vararerave ti vai vaiintira, virara qora vaiintivema tivara. Vovano kia mintiraitiro, inaara koqaqaa kara nimi vai vaiintira, virara koqe vaiintivema tivara.

²⁷ Koqe okara avataqiro vi vai vaiintira „Noravano Kotiva“ vira quahama amitaanaro. Qora kaiqa varareva auti vai vaiintiva vairaro qora entavano vira ranta kaanarove.

²⁸ Nai monu airairaqa muntuviro vaira vaiintiva qoraiqama vuanaro. Katari marevanoo qaraaka amuri ntaintemake, avuqavu ni variaka koqemake variqi vivara.

²⁹ Nora maara nai noka qoka qata vakaa aura nakaa nimi vai vaiintiva naantiara vika qui entara viva vika i haikara kia voqavata varaanaro. Kia avu aato vataa vaiintivano avu aato vataa vaiinti vira paanaa vaiintima varianaro.

³⁰ Avuqavu ni okararaqaahai vo vaiinti vo vaiinti qaqi variqi vivara. Raqi okararaqaahai hini vaiinti qutuma vivara.

³¹ Maa vataraqaa qaqi variqi vi entara avuqavu ni variaka koqe kaiqa varateraqaaahai nái koqaa varevara. Qora kaiqa vare variaka qora kaiqa varateraqaaahai anomake qora koqaama varevara.

12

¹ Koqe avu aato vataava vaakama vovano vira utetaaina uvvara avataqiro vuanaro. Hampi avu aato vataava vovano vira utetaaina uvvara kiama avataqiro vuanaro.

² Noravano Kotiva koqe aaraqaa ni vai vaiintira quahama amite vaira. Nai avu aatoqihairo vora qoraiqama amitaainara iri vai vaiintira Noravano Kotiva viraqaa uva vate vaira.

³ Qora kaiqa vare vai okarava kia ho vainti antua amitairaro viva kogema kero varianaro. Katari kia ho raru kaantemake, avuqavu ni variaka kempukaiqamake vaivara.

⁴ Kogema kero ni vai nahentiva nai vaati nora autu ami vaira. Nai vaati kaurira haika ami vai nahentiva qora numuaravano vuhaariqi ite vaintema kero, vira qoraiqama amite vaira.

⁵ Avuqavu ni variaka ai koqemake uteta amitevara. Qora kaiqa vare variaka ai avu aato ami varia uvava una uvama vairo.

⁶ Kukeqavi vaiha vainti arukareka auti variantemake, qora kaiqa vare variaka tia uvava vokiaka qoraiqama nimite vaira. Avuqavu ni variaka tia uvava vokiaka ruaruuma nimite vaira.

⁷ Qora kaiqa vare variaka qoraiqamavi taiqama vivara. Koqe kaiqa vare variaka vaintivara kia taiqa viraiti, koqemake variqi vivara.

⁸ Vika koqe avu aato vataaa vaiinti autu tuahera kevara. Vika avu aato hampiqinara vira autu vatainigama kevara.

⁹ Are unaqaraiqama kehara te nora vaiintima vauro tiharo kia kara vatairera, vira kiama koqe ianaro. Koqemama are kia nora autu vataava vahara airi kara vatenara.

¹⁰ Avuqavu ni variaka nai quara vairiara mpo ike tiha vikaqaa koqemake raqiki variara. Qora kaiqa vare variaka nai quara vairi qoraiqama nimite variara.

¹¹ Kaiqa vareha koqemake nai naahoqaa raqiki variaka, vika airi kara qantukeha vare variara. Naaho kaiqa qaqirakero vo kaiqa vo kaiqa qumina kaiqa vare vaira vira avu aatovano hampi avu aatoma vairo.

¹² Qora kaiqa vare variaka nai hana vaiinti muara varataha haikara taveha virara avu auti variara. Koqe vainti nahenti vika nai koqe kaiqa varataaraqaaahai airi haika vare variara.

¹³ Vaaravano aantau ravaaqavu kaintemakero, qora vaiinti una uva ti variava, vika nai ravaaqavuke vaira. Avuqavu ni variaka ,ti varia uvava, kia vika ravaaqavu kaimanta vika ho variara.

¹⁴ Vaiintivano koqe uva tivavata, viva koqe kaiqa vare vaivavata, vira kahaqi vaivaro viva koqema kero vairo.

¹⁵ Hampi avu aato vataava tiharo, Te koqe aaraqaaama ni vauro tiharovata, viva hampi aaraqaa ni vaira. Koqe avu aato vataava vo vaiintivano koqe avu aato amira avataqiro viharo koqe aaraqaa ni vaira.

¹⁶ Kia avu aato vataava vairaro vo haika kaara vaakama vira arara itaanaro. Avu aato vataava qora uva tira kaara kia arara itairaro tirema kero varianaro.

¹⁷ Quqaa uva ti vai vaiintiva, viva quqaa uva tiharo ko homa kahaqianaro. Una uva ti vai vaiintiva ko hampiqama kaanaro.

¹⁸ Paparuqamake uva ti variava iqoka paiprevano raqontaintema kero, vaiinti qoraiqamake vaira. Koqe avu aato vataava uva ti vaiva koqe marasina voqaara vaiinti kahaqi vaira.

¹⁹ Una uvavano vahuqa vairo taiqa viraro, quqaa uvavano ekaa entama variqiro vuanaro.

²⁰ Vokiaka qoraiqama nimitareka auti variaka, vika avu aatoqi una uvavanoqai vairo. Vaiinti antua nimiteha vaavaa ti variaka vika quaheha variqi vivara.

²¹ Avuqavu ni variaka variavaro qora haikavano kia vika „maahota“ qoraiqama nimitaqiro vuanaro. Qora haika, vo haika vo haikavano vaaqu kaiqa vare variaka qaqqai qoraiqama nimitaqiro vuanaro.

²² Nai noqihai una uva ti variaka Noravano Kotiva vika iri qoraiqama nimite vaira. Viva quqaa uva ti variakara quaheharo vairo.

²³ Avu aato vataava vo okara vo okara nai avu aatoqi iritaira kia vuruvi virivi tiva nimiraitiro, viva tiremakero vaharo vi uvara iriqiro vi vairo. Kia avu aato vataaka nai hampi uva iritaara vaaka vuruvi virivi tiva nimi variara.

²⁴ Voqamakero kaiqa vare vaiva, viva naantiara noraiqamaviro hini kikaqaa raqikianaro. Kaiqara popohairava, viva vokika vevaaraini vaharo vika kaiqa vara nimitaanaro.

²⁵ Vaiintivano vo haika vo haikara airi avu aato iriqiro viraro vira muntukavano qoraiqiraro varianaro. Mintiraro vovano vi vaiintira koqe uva tiva amiraro vira muntukavano paru iraro varianaro.

²⁶ Avuqavu ni variaka nái kenuka koqe aara numiqe variara. Qora kaiqa vare variaka qora aaraqaa ni vайha nái kenukavata vi aararaqaa ntita vare vi variara.

²⁷ Popohara vaiintivano kia ho aantauvah arukero naanaro. Voqamakero kaiqa vare vai vaiintiv, viva vo haika vo haika vataainarara quahaanaro. ²⁸ Avuqavu okara avataqiro ni vai vaiintiva koqema kero qaqi variqiro vuanaro. Vi aararaqaa ni vaika kia qutiraiti, ekaa enta qaqi variq vivara.

13

¹ Vira maaquvano avu aato vataava nai qora uva koqemakero iriqiro vuanaro. Koqe avu aato naaraihamo amite vaiva „nai qova“ vira utetaa uvaravata kiama irianaro.

² Vaiintivano nai koqe uva tinaraqaahairo koqema kero variqiro vuanaro. Una uva ti variaka vika vaiinti ntaihera noraiqaake iriqi vi variara.

³ Nai noqaa koqemakero raqiki vaiva, viva qaqi variqiro vuanaro. Paparuqamakero uva ti vaiva, viva qoraiqama vuanaro.

⁴ Popohara vaiintivano vo haika vo haika varareva autiharovata, kia ho vi haikara varaanaro. Voqamake kaiqa vare variaka, vika ho nái varaataa i haikara varevara.

⁵ Avuqavu ni variaka, vika kia una uvvara antuqa arimanta variara. Qora kaiqa vare variaka, vika nái kenuka kaurira haika nimicha vika qoraiqama nimite variara.

⁶ Vaiintivano avuqavu okara avataqiro virera, vi okarava vira antuama amitaanaro. Vaiintivano qora okara avataqiro virera, vi okarava vira qoraiqama kaanaro.

⁷ Vehi vaiinti vokiaka unahaa tiha, Tenavu airi haika vatauro, ti variamanta, vokiaka airi haika vataaka unahaa tiha, Tenavu kia vo haikavata vatauro, ti variara.

⁸ Airi monu vatai vaiintiva muara vaiinti kauquqihairo nai monu koqama kero qaqi kuvantu viro vuanaro. Vehi vaiinti kia monuvata vataakara ti, vika kia muara vaiinti autu getaraiti, hampiara voqaara ni variara.

⁹ Avuqavu ni variaka *raamuvano* koqema kero ite vaira voqaara variara. Qora kaiqa vare variaka *raamuvano* qimpare ira voqaara variara.

¹⁰ Koqe uva maara tiva nimira qoririma kera kaara raqi tirorira haikavano qovaraiqanaro. Koqe uva maara tivatera avataarira vaiintira avu aatovano koqe iro varianaro.

¹¹ Vaiintivano una aaraqaahairo airi monu varatairava vaakama vi monuva taiqa vuanaro. Vaiintivano kaiqa vareharo monu inaaraiqa inaaraiqa ruvaaquma kero vatairava airima varianaro.

¹² Vaiintivano vo haika varareva iharo vira veka qumina vukaiqama kero vairera, vira muntukavano qoraiqianaro. Viva nai varaataa ina haikara varairera, vira muntukavano koqe iraro viva voqavatama quahaanarove.

¹³ Koqe avu aato nimira qaqlira keka nora maarama varevara. Vi uvvara avataqi vika, vika koqemake vaivara.

¹⁴ Koqe avu aato vataaka uva maara ti varia uvava vaireva, ruvu namari koqera voqara vaira. Vi namarira nairava qaqi variqiro vuanaro. Qutira haikavano vaara vuitaiva kia ho vira totaanaro.

¹⁵ Vaiinti nahenti koqe avu aato vataakara quahae variara. Nái kauqu aqiqaa aquke tivataa uvvara qaqlira kaaka hampi aaraqaa nuvaqi vi qoraiqama vivarave.

¹⁶ Koqe avu aato vataaka kia paparuqamake kaiqa vararaiti, vika avuni koqemake irike, viraqahai kaiqa vare variara.

Kia koqe avu aato vataaka vika kaiqa vareha nái hampi okara vaiinti nahenti nivuqaa qoqaa qovaramake variara.

¹⁷ Una uva ti vai vaiintiva varakai uvava tirorira haikama qovarama kaanaro. Ququa uvaqai ti vai vaiintiva uva varakairava vaiinti nahenti kahaqihairo koqema nimitaanaro.

¹⁸ Vira uteteha koqe avu aato amira kia iriraitiro, nai antuqaqaa nirava viva vehiqama viro kaurira haikama varaanaro. Vira uteteha koqe avu aato amira irirava vairamanta vaiinti nahenti vira koqe autuma amivara.

¹⁹ Vaiintivano nai antuqavano vaina haikara varairera, vira muntukaqihairo koqe iraro quahaanaro.

Kia avu aato vataaka qora kaiqa qaqlira kaarorave tivake, vi kaiqara qaqlqai autuqi viha, kia nái antuqa vai haikara ho varevara..

²⁰ Koqe avu aato vataaka hampata vairava viva vikaqihairo koqe avu aatoma varaanaro. Kia koqe avu aato vataaka hampata vairava viva qoraiqama vuanaro.

²¹ Qora okara auti variaka vaivaro vo maara vo maaravano vika avataqiro vuanaro. Avuqavu ni variaka vaivaro „Kotiva“ vika koqema nimitaira koqemake vaivara.

²² Koqe vaiintivano qutu viramanta vira vaintivara vira naintivara hampata viva i haikara varevara. Qora vaiintivano airairave monuve ruvaaqumakero vataira avuqavu ni variaka varevara.

²³ Vehi vaiinti naahoqihairo airi karavano qampiqaimanta qora vaiinti vika kara muara quantuke vare variara.

²⁴ Vaintivano kia nai vanti ruqutiharo utetaiva, viva kia nai vaintiara antuqa arivaro vairo. Nai vaintiara muntuka vaivarvaiva, viva vaakama vira utetakero vataanaro.

²⁵ Avuqavu ni variaka vika airi kara neha variamanta qora kaiqa vare variaka enena karara antuqa arimanta variara.

14

¹ Koqe avu aato vataa nahentivano koqema kero kaiqa vareharo nai vaati vaintivaraqaa raqiki vaira. Kia koqe avu aato vataa nahentivano nai vaati vaintivara qoraiqama kaimanta kia koqemake variara.

² Avuqavu aaraqaa ni vaiva viva Nora Kotira aatu qeteharo vira uva iriqiro vuanaro. Kia avuqavu aaraqaa ni variaka vika Nora Kotirara kia antuqa arimanta variara.

³ Kia koqe avu aato vataava hampi uva tiva taira kaara vo kiaka vira ruquti variara. Koqe avu aato vataaka tia uvava nái antua nimite vaira.

⁴ Vata korai purumakauva kia vairera, kara vate naavuraqi karavano kiama ho varianarove. Ho vata korai purumakauravano vairer, airi karavanoma naahoqi varianaro. (Vi uvvara okara: Vaiinti nahenti kia kempukaiqamake naaho kaiqa varaver, kia airi karavano vika naavuqi varianaro. Vika kia popoharaiti, koqemake naaho kaiqa varaver, airi karavano vika naavuqi varianaro.)

⁵ Quqaa uva ti vai vaiintiva *ko* avuqaa vahilo kia una uva tianaro. Una uva ti vai vaiintiva viva *ko* avuqaa vahilo una uvaqaima tianaro.

⁶ Koqe avu aato vataakara naarahama nimite variaka vika koqe avu aato varare tihavata, kiama rantake varevara. Vaiinti avu aatovano koqe iro vairera, viva vaakama vo okara vo okara kankomakero tavaanaro. ⁷ Are qora avu aato vataa vaiinti vira niarainiqama kera variane. Viva kiama ho ai koqe avu aato amianaro.

⁸ Koqe avu aato vataaka variavaro vika avu aatovano vika koqe aaraqaa ntite vi vaira. Kia koqe avu aato vataaka variavaro vika avu aatovano vika hampi aaraqaa ntite vi vaira.

⁹ Qora avu aato vataaka nái qora kaiqa auti variarara kia noraiqaake iriara. Koqe kaiqa vare variaka variavaro Kotiva vikara quaheharo vairo.

¹⁰ Kia vovano ai muntukavano qoraiqinarave, ai muntukavano quahaainarave ho iri tavaanarove, are nenaqaima virara kankomakera irinrarave.

¹¹ Qora vaiintivano nai naata vaintiaravata qoraiqamaviro taiqama vuanarove. Avuqavu ni vai vaiintiva nai naata vaintiaravata koqemakero variqiro vuanarove.

¹² Aara vovano vaimanta vokiaka vi aarara koqe aarave tivake viraqaa vi variavarovata, vi aarava viviro muntu qutu vuuanaini taiqa vira.

¹³ Vaiintivano naarahiharo nai muntuka qoraiqinara kukeqa kairarovata, viva qua-hairava taiqa viraro vira muntuka qoraiqirava qaqlima varianaro.

¹⁴ Qora kaiqa vare variaka vika nái qora kaiqa vare koqaara varavaqae te huviqorave tirera. Koqe kaiqa vare variaka vika koqe koqama varevara.

¹⁵ Vo haika vo haikara kia kankomakero iri tawai vaiintiva ekaa uvvara quqaave tivaro, avu aato vataava kia paparuqamakero vi haikara quqaave tiraitiro, koqemakero irikero taveharo nai kaiqa vare vaira.

¹⁶ Koqe avu aato vataava Nora Kotira aatu qeteharo qora kaiqa varaororave tiro, kia vi kaiqara vare vaira. Kia koqe avu aato vataava kia irikero taveharo kaiqa vararaitiro, paparuqama kero hampi kaiqa vare vaira.

¹⁷ Vaaka arata ite vai vaiintiva kia irikero autiraitiro, viva vaakama hampi kaiqa varaanaro. Koqemakero irikero auti vai vaiintiva viva qihaaqama kero varianaro.

¹⁸ Kia avu aato vataaka hampi kaiqa varaqi viraqaaahai kia koqe koqaa varevara. Koqe avu aato vataaka vika koqe kaiqa vareha koqe avu aato voqavatama varevara.

¹⁹ Qora kaiqa vare variaka vika avuqavu ni variaka vevaaraini vaiha vikara, Tinavuara mpo ike tiha kahaqama timitaate tivarave.

²⁰ Are vehi vaiintivano vairera, kia ai tontivata vaivara. Are airi airaira vaterava vairera, ai tontivata airima vaivara.

²¹ Are quaheharo variataa irera, vehi vaiinti nahenti koqema nimitaane. Are vora iri qoraiqama amitairera, are Kotira uva raqama kenara.

²² Qora kaiqa varerara avu aato utuqi vi vaika variqi vi, raumpirimama vivara.

Koqe kaiqa varerara nái avu aato utuqi vi vaika vaimanta, vaiinti naqhenti vika uvvara quqaave tivakeha, vikara muntuka vatevara.

²³ Ho are kempukaiqama kera kaiqa varairera, are koqe koqaama varenara. Are kia kaiqa vararaitira, uvaqai tihara vi kaiqara vararerave tirera, are vehi vaiintiqama vinara.

²⁴ Koqe avu aato vataaka variamanta vaiinti nahenti vika nora autu nimi variara.

Kia koqe avu aato vataaka variamanta vaiinti nahenti vikara hampi okara auti variakave ti variara.

²⁵ Vovano *ko* avuqaa kia una uva tiraitiro, quqaa uva tirava *ko* kahaqiraro *iasivano* kia rumpataa vaiintira arukaate tiraitiro, kuvantu kaate tianaro. Vaiintivano kia uva avuqavu tirera, vira una uva kaara rumpataa vaiintira arukevara.

²⁶ Nora Kotira aatu qeteharo vira vevaaraini vairava vairaro vira muntukavano paru iraro viva kia vo haikaravata qetaraitiro vairamanta, vira naata vaintivata koqemake vaivara.

²⁷ Ruvu namari koqera ne vaiva kia qutu viraitiro, qaqi variqiro vintema kero, Nora Kotira aatu qeteharo ni vairava qaqi variqiro viraro, qutira haikavano vaara vuitaarirava kia ho vira ravaaqvau kaanaro.

²⁸ Avuhainaava airi vaiinti nahentiqaa raqikirava vairaro vira autuvanovata nora autuma varianaro. Vira vevaaraini vaika kia airi vaivera, vira kempukavano taiqa vuuanaro.

²⁹ Kia vaaka arara itai vaiintira avu aatovano koqe avu aatoma vairo. Vaaka arara itai vaiintiva naiqi hampi avu aato vaira qovaramake vaira.

³⁰ Muntuka paru irava vaiinti kahaqiraro vira vaatavano koqe iroma varianaro. Vovano ina haikarara muntuka nti vairava vaiinti vaata qoraiqama kaanaro.

³¹ Kotiva ekaa vaiinti nahenti autu kero vatairara tira, are vehi vaiinti nahentiqaa nora maara vatairera, are mintihara Kotirama qoraiqama amitenara. Are vehi vaiinti nahenti koqema nimitehara vika kahaqirera, are mintihara Kotira autuma tuahera kenara.

³² Qora kaiqa vare variaka variavaro vi kaiqava nái qoraiqamake vaira. Avuqavu ni variaka qutire iha vika „Kotira vataake vairara“ kempukaiqamake iri variara.

³³ Vo okara vo okara koqemakero rairakero iri vai vaiintira avu aatovano koqe iro vaira. Hampiqamakeha ni variakaqai kia koqe avu aatovano vaira.

³⁴ Avuqavu ni okarara avataqni variaka nái vata maata nora autuma amivara. Kotira uva raqake variaka nái qora kaiqa kaara nái vata maata kaurira haika amivara.

³⁵ Vira kaiqa vaiintivano koqemakero aato irikeharo kaiqa vara kairaro avuhainaava vaiintivano virara iriharo quahaanaro. Vira kaiqa vaiintivano qora kaiqa varainara kaara kaurira haika avuhainaara amiraro vira ararama itaanaro.

15

¹ Vovano ariara arara itairara are qihaaqama kera nai uva tiva amirera, vira arara itairara taiqa vuuanaro. Are virara kempuka uva tirera, vira arara itairava voqavatama varianaro.

² Koqe avu aato vataaka uva ti variamanta vaiinti nahenti vika uva voqavata iriataa imanta variara. Kia avu aato vataaka noqihairo hampi uva vo uva vo uva qovaraiqi vaira.

³ Nora Kotira avuvano vonaini vonaini ekaa haikavano qovaraiqi vaira tave vaira. Viva qora kaiqa vare variakavata koqe kaiqa vare variakavata aitutuma kero tave vaira.

⁴ Koqe uva tirava qoraiqama viro vaina vaiintira kahaqiraro viva koqema viro varianaro. Una uva tirava vaiinti avu aato qoraiqama kairaro vira muntukavano qoraiqama vuuanaro.

⁵ Kia avu aato vataava nai qova vira uteteharo tiaina uvvara kia irianaro. Nai qora uva avataqiro vi vai vaiintiva koqe avu aato vataavama varianaro.

⁶ Avuqavu ni variaka naavuqi airi haika vaira. Qora kaiqa vare variaka vataa airairava nái qoraiqama nimite vaira.

⁷ Koqe avu aato vataaka homa vokiaka koqe avu aato nimivara. Kia koqe avu aato vataaka kia ho vora koqe avu aato amivara.

⁸ Noravano Kotiva avuqavu ni variaka vira aare varia uvarara quahe vahiaro, viva qora kaiqa vare variaka *ofaa* autu amite variarara kia antuqa arivaro vaira.

⁹ Noravano Kotiva qora okara auti variaka vare varia kaiqarara kia antuqa arivaro vahiaro, viva avuqavu okara auti variakara antuqa arivaro vaira.

¹⁰ Are avuqavu aaraqaa ninara qaqla kairerava, vira kaara ai uteteha qorahaama ruqutu amitevara. Are kia qaqi kairamanta ai utetaivera, are qutuma vinara.

¹¹ Noravano Kotiva qutuaka varianaini kankomakero tave vairara ti, ho nantiabee tentanavu avu aatoqii vainara kukeqa kaaariraro viva kia tavaanaro?

¹² Koqe avu aatora naaraihama amite variaka vika kiama vovano vika utetainara irivara. Vika koqe avu aato vataakara kiama ireha koqe okara tinavu tiva timiate tivara.

¹³ Vira muntukaqihairo quahairera, vira virivanovata koqe iroma varianaro. Vira muntuka qoraiqirera, vira vaatavano maara ntairaro uaa viri aratero varianaro.

¹⁴ Koqe avu aato vataaka vo okara vo okara voqavata iri tavareka auti variamanta, kia avu aato vataaka vika hampi okarara voqavata antuqa arimanta variara.

¹⁵ Vehi variaka vika vo enta vo enta vukaari utiha nora maaraqi variqi vuamanta, muntukaqihairo koqe i vaimanta variaka „vika vehi variarara kia noraiqaake iriraiti,“ vika airi kara naaka quaheha variantemake vaivara.

¹⁶ Airi monu airaira vataakaqihai vokiaka variavaro vi haikara vataara kaara tirorira haikavanove, nora maaranavo vikaqaa qovaraiqi vaira. Koqemama are kia airi haika vataraitira, Nora Kotira aatu qetehara variqira vinara.

¹⁷ Are mati koqera kia ariara antuqa vaika hampata nairera, virara kiama ai muntukaqihairo koqe ianaro. Are qaqi naaharaqai ariara muntuka vataaka hampata nairera, ai muntukaqihairo qihaaqianaro.

¹⁸ Vaaka arara ite vai vaiintiva vora arara rateqa kaivararo tirorira haikavano qovaraiqi vaira. Kia arara itaivararo qihaaqama kero uva ti vai vaiintiva tirorira haika taiqake vaira.

¹⁹ Popohara vaiintivano variqiro viraro auqu vai nimiriva aara kuval kaintema kero, vo haika vo haikavano vira qoraiqama kaanaro.

Kia popoharaitiro, avuqavu okara avataqiro vi vai vaiintiva koqe aaraqaa viraro kia vo haikavanovata vira kuval amitaanaro.

²⁰ Vira maaquvano koqe okara avataqiro virera, vira qova quaheharo varianaro. Vira maaquvano kia koqe okara avataraitiro, hampi nirera, viva nai nora kaurira haikama amianaro.

²¹ Kia avu aato vaika vika nái hampi okara autuarara quahe variara. Koqe avu aato vataaka vika avuqavu okara avataqiqi vivara.

²² Are kaiqa varareva ihara koqe avu aato ami uvvara qoririma kairera, ai kaiqavano qoraiqama vuanaro. Airivano koqe avu aato amira are avataqira virera, ai kaiqavano koqe iro varianaro.

²³ Are vo vaiintivano ti uvvara irira, nai koqe uva tiva amirera, ai muntukaqihairo koqema ianaro. Vi entara vika ariara koqe uvama tiaro tivara.

²⁴ Koqe avu aato vataaka kia qutuaka vi varia aararaqaa otu viraiti, vika naaruvaini qaqi variqi virara iriha, mini vi varia aararaqaa oru vi variara.

²⁵ Noravano Kotiva nái mahuta ti variaka naavu rampai aquukeharo, tentoqa nahenti vata o ntuvu taaraqaa haara ututaara vovano varaanatorave tiro, antua nimitaanaro.

²⁶ Qora kaiqa vare variaka nái avu aatoqi irite variarara Noravano Kotiva anomakero kia antuqa arivararo vaira. Viva koqe uva ti variarara quaheharo vaira.

²⁷ Qora okara autiharo una aaraqaa airi monu vare vai vaiintiva viva nai naavuqi variaka airi maarama nimianaro. Qutaru monuara kia antuqa vaiva, viva koqema kero qaqi variqiro vuanaro.

²⁸ Avuqavu okara avate vaiva viva kia paparuqama kero vora nai uva tiva amiraitiro, viva aato irikero, viraqahaqairo uva tiva ami vaira. Qora kaiqa vare variaka vaaka nái noqihai qora uva ti variara.

²⁹ Noravano Kotiva koqe vaiinti nahenti vira aare varia uvvara irihararo, viva qora kaiqa vare variaka uva kia iri vaira.

³⁰ Vo kiaka viriqihairo koqe iharo naaraihi vairera, ai muntukaqihairo koqe irarama vainara. Koge vakaakavano ai vaata koqema amitaanaro.

³¹ Ai kahaqiharo utetaina uvvara are irirera, vika ariara koqe avu aato vataavama vaivo tivara.

³² Vovano ai utetaina uvvara qoririma kairera, are mintihara nenama nena qoraiqama kenara. Are vi uvvara avataqira virera, ai avu aatovano voqavatama koqe iro varianaro.

³³ Are Nora Kotira aatu qetehara vairaro ai avu aatovano koqe iro varianaro. Are Kotira avuqaa nena vara muntuvikera vairera, viva naantiara ai nora autumna amianaro.

16

¹ Tenavu avu aato irikeha tiha, Naantiara minti mintima irerave tiarirarovata, Noravano Kotiva hove tirera, vi haikara homa autirara, kia hove tirera, kia ho autirara.

² Tenavu tiha, Tenavu avuqavuqamake ekaa okara auti vauro ti vaurarovata, Noravano Kotiva tinavu avu aatoqiraara tuantikero rairakero tave vaira.

³ Are ekaa nena autire ina haikara Nora Kotira kauquqi vatairaro viva ai kahaqiraro vi haikava koqe iro variarire.

⁴ Noravano Kotiva nái kaiqa varaa ina okarara irihararo ekaa haika autukero vataira. Qora kaiqa vare variaka ekaara entaqaeha vehi autu vuate tiro, viva vikavata autukero vataira.

⁵ Nariaraqai noraiqaake iri variakara Nora Kotira kia antuqa arivaro vaira. Quqaama viva kiama vika qaqi kaira variqi vivara. Viva vika qoraiqamama nimitaanaro.

⁶ Kotirara antuqa ariraro virara kempukaiqama kero iriqiro vinara viva vira qora kaiqa varaina uvvara nunkama amitaanaro. Nora Kotira aatu qeteharo ni vairava qora okara aatarama kaanaro.

⁷ Noravano Kotiva tavairaro vaiintivano vira aaraqaa koqemakero nirera, viva vi vaiinrirara quahairaro viva nai navutaaka hampatavata maateraiqama kero varianaro.

⁸ Hauri are una kaiqa varehara airi airaira varakera vaterora. Koqemama are inaara haikaqai vatehara avuqavu okara avataqira vinara.

⁹ Are nena avu aato uthihara te minti minti irerave tirarovata, Noravano Kotiva ariara nai tiva tai aararaqaa vuane ti vaira.

¹⁰ Kotiva avuhainaa vaiinti noraiqama kaivarora tiro, vi vaiintiva vira uva vaiinti nahenti tiva nimi vaira. Viva vaiinti nahenti uva avuqavu i entara avuqavuqama kero uva rahe vaira.

¹¹ Avuqavu rahe vai sikerira, virarama Nora Kotira antuqavano vairo. Viraqohai koqemake rairake vataate ti vaira.

¹² Avuqavu okara avataqi vi vai *kamaaniva* kempuka vairara ti, vira avuhainauka kia qora okarara antuqa arimanta variara.

¹³ Avuhainaa vaiintivano quqaa uva ti variaka uva iriataa ivaro vaharo vikara quaheharo vaira.

¹⁴ Avuhainaa vaiintivano vo vaiintiara arara itairera, viva vira aruma kaanaro. Virara iriharo koqe avu aato vataava avuhainaa vaiinti koqema amitairaro vira arara itairava humpama vuarire.

¹⁵ Avuhainaa vaiinti virivano koqe iro vairera, viva vaiinti vo kia arukaraitiro, qaqi kairaro variqiro vuanaro.

Avuhainaaava vira quahama amitaarirava koqe aaqu voqaarama varianaro.

¹⁶ Kia airi monu* varerara noraiqaakera iriraitira, koqe avu aato varenarara noraiqaakera iriqira vuana. Koqe avu aato vareva nora haikama vairo.

¹⁷ Avuqavu ni variaka qora kaiqa varaororave ti, koqe aaraqaa vi variara. Ho raurihara variane. Are kia qutiraitira, qaqi variqi virerave tirera, kia qora aaraqaa nuane.

¹⁸ Nai autu tuherairava variqiro viro, vuru qoraiqama vuanaro. Nariaraqai noraiqaakero irirava variqiro viro, vuru kaavu ntuanaro.

¹⁹ Hauri nái nutu tuheraaka muara varate airairara aivata rairake amivora. Koqemama are kia airi airaira vataraitira, nena vara muntuviqama kera, vehi variaka hampata variqira vinara.

²⁰ Koqe uva maara avataqiro virava koqe iro varianaro. Nora Kotiraqaa muntuvi vairava viva nai muntukaqihairo quaheharo varianaro.

²¹ Koqe avu aato vataaka variamanta vaiinti nahenti vikara tiha, Vika koqemake vo okara vo okara rairake iri tave variakave, ti variara.

Qihaaqamake uva maara ti variaka variamanta vaiinti nahenti vika uva iriataa imanta variara.

²² Vo okara vo okara koqemake rairake tavaa okarava vaireva, ruvu namari koqera voqaarama vairo. Vi okarara avateka qaqi variqi vivara. Kia avu aato vataaka hampi okara auti variava nái qoraiqamake vaira.

²³ Koqe avu aato vataava hampi uva tiarorave tiro, nai noqaa koqemakero raiqiki vaimanta vaiinti nahenti vira uva maara iriataa imanta variara.

²⁴ Koqe uvavano *hani* voqaarama vairo. Vi uvava voqavata hiakaa iharo vaiinti nahenti vaataa kempukaiqama nimite vaira.

²⁵ Raurihara variane. Aara vovatama vaivo. Are vi aarara koqe aarave tirora. Vi aararaqaa ni variaka variqi vi, vuru qutuma vivarave.

²⁶ Kaiqa vaiintivano te karara narara variarorave tiro, viva kempukaiqamakero kaiqa vare vaira.

²⁷ Qora vaiinti vokiaka qoraiqama nimitareka vo aara vo aara rante variara. Ihavano tatoqa kaintemakero, vika uvavano qoraiqamake vaira.

²⁸ Qora okara auti vai vaiintiva tirorira haika qovaramake vaira. Viti viri niharauvaqaa vauraa uva ti vaira kaara tontiqamake variaka nai navutaiqi nai navutaiqi variara.

²⁹ Qovaramake vaiinti ntaihie variaka nái kena vaiinti qora aaraqaa kuntama muntuvi kaamanta vikavata qoraiqamavi variara.

* **16:16:** Hiparu: korivata silvaavata

³⁰ Raurihara variane. Vovano nai kena vaiintiara avu kirairera, viva qora kaiqa varareva iharoma mintianaro. Vaintivano nai no qakiharo evaara uva tirera, viva qora okara autireva iharoma mintianaro.

³¹ Avuqavu niha konta naampaiqama vuaka variavaro vika erera kauhivano avuhainaa tovaqa voqaara vaira.

³² Koqemama are kia airi kempuka varenarara noraiqaakera iriraitira, muntuka qihaaqamakera vainarara noraiqaakera iriqira vuana.

Koqemama are kia iqoka aatarakera vo vatuka vo vatukaaqa raqikinarara noraiqaakera iriraitira, are nenaqaa koqemakera raqikinarara noraiqaakera iriqira vuana. Vi haikava nora haikama vairo.

³³ Tenavu vi kaiqara vi kaiqara vararerave tiarirarovata, Noravano Kotiva hove tirera, homa vi kaiqara varaainara, kia hove tirera, kia ho varaainara.

17

¹ Are raqi tirokira hampata vahara nora kara koqe kara nehara vairera, vira kiama koqe ianaro. Are qihaaqama kera vahara qaqi qumina kara nehara vairera, vira koqema ianaro.

² Vira maaquvano qora okara autukero nai qora kaurira haika amirera, vira qova nai kaiqa vaiinti koqe avu aato vataarara are ti maaqu vatuka varera ekaa ti kaiqaqa raqikiane tianaro. Viva qutu virar vira maaqunavu nái qora onaana varentemakero vira kaiqa vaiintivanovata varaanaro.

³ Vaintivano ihaqohairo korive silvae untakero avatamakero tave vaira. Noravano Kotiva tinavu avu aato muntukaqi avatamakero tave vaira.

⁴ Qora kaiqa vare variaka nái kenuka qora kaiqa varareka tia uvira iri variara. Una uva ti variaka vika nái kenuka una uva tiara aato vateha iri variara.

⁵ Kotiva ekaa vaiinti nahenti autu kero vatairara tira, are vehi vainti nahentiara qora uva tirera, are mintihara Kotirama qoraiqama amitenara.

Are vovano qoraiqama viro vainara tavera naaraihama amitehara quahairera, Kotiva ninavata qoraiqama amitaanaro.

⁶ Konta naampai nái naintivara taveha vikara quaheha tinavu naintivara koqekave ti variara. Vainti vikavata nái noka qokara quaheha tinavu noka qoka koqekave ti variara.

⁷ Kia Kotirara noraiqaakero irí vai vaiintiva koqe uva maara vaiinti nahenti tiva nimirera, vi okarava kiama avuqavu ianaro. Qaiqaa, nora autu vataara noqihairo una uva qovaraiqirera, vira anomakero kia koqe ianaro.

⁸ Vokiaka tihā, Qutaru monuvano vaireva, hepi haika voqaarama vaivo. Tenavu qutaru monu nimiari vika homa tinavu antuqa vainara vo haika vo haika autu timitevarave ti variara.

⁹ Are nena hana vaiintivano ai qoraiqama amitainara tauru amitairera, viva ariara antuqa ariroma varianaro. Are vira uva qaqi iri amitairera, viva kiama ariara ti tontivano vaivo tianaro.

¹⁰ Are avu aato vataa vaiinti vohaa tataa atihara utetairera, viva vaakama ai uva iiro avataanaro. Are kia avu aato vataaa vaiinti 100 tataa ruqutihara utetairera, viva qaqqaima qora okara autuqiro vuuanaro.

¹¹ Qora kaiqa vare variaka vika kia „Kotira“ vevaaraini vaireka auti variara kaara „Kotiva“ vaiinti vo varakairaro viva kia vika aaqurihama nimiraitiro, qoraiqama nimitaanaro.

¹² Are *bea* naati muara vare vivara vira nora aaraini ranta kairera, vira nova ai qoraiqama amitaainarar mpo ikema tirara.

Kia koqe avu aato vataava nai hampi kaiqa vare vaina entara are vira ranta kairera, te viva ai qoraiqama amitaanarara anomake mpo ike tirarave.

¹³ Vovano ai koqe okara autu amitairara are vira nai qora okara autu amitairera, qora okaravano aivata ai naavuqi vaikavata qoraiqama nimitaapiro vuuanaro.

¹⁴ Vaiintivano tirokira uva vara qovarama kaiva vaireva, namari tintataara inaaraiqa tomavira voqaarama vairo. Kia vaaka tomavira tinta tairera, namarivano noraiqama kero tuvuanaro. Virara iriha vaakama tirokira uvira qioqama kaate.

¹⁵ Noravano Kotiva taara okara maatantara kiama antuqa arivo:

^{1..} Ko rairakeha qora kaiqa varai vaiintira kuvantu amitaarave.

^{2..} Qumina vaiintiqa uva vateha vira karapuhiqama kaarave.

¹⁶ Kia koqe avu aato vataava koqe avu aato kia varareva autirara, are qumina nena monu vira *sikuruu* koqaa irora.

¹⁷ Tinavu tonti koqeka vika ekaa entama tinavuara antuqa arirama vaivara. Maara vaina entara tinavu qata vakaa aura nakaa tinavu kahaqama timitekama vaivara.

¹⁸ Kia avu aato vataava nai kena vaiintivano voraqihairo viqatainrarara tiharo, Are kia vira nai amirera, tema vira amirerave tianaro.

¹⁹ Tirorira haikara antuqa ari vaiva viva qora okarara antuqa arivararo vaira. Nai mahuta ti vaiva viva qora okarama naiqaa qovarama kaanaro.

²⁰ Vaiintivano qora avu aato utuqiro virava kiama koqemakero varianaro. Nai noqihairo qora uva ti vairava viva qoraiqama viro varianaro.

²¹ Vira maaquvano hampi kaiqa varairera, vira qora muntukavano qoraiqiraro varianaro. Viva hampi kaiqa varainara kaara vira qora muntukaqihairo kia koqe ianaro.

²² Muntukaqihairo quahaiva *marasinavano* ai koqema amitaintema kero, ai kahaqianaro. Muntuka qoraiqiva ai avu aato namaqiro viro vuru ai aruma kaanaro.

²³ Qora *iasivano* kukeqa keharo qutaru monu varero kia avuqavuqama kero *ko* rahe vaira.

²⁴ Koqe aato vataava viva koqe okara autuainara tavamaqiro viharo vira avataqiro vi vaira. Qora avu aato vataava hampi okara, vo okara vo okara avataqiro vi vaira.

²⁵ Vira maaquvano hampi okara avataqiro virera, viva nai qora muntuka qoraiqama amitairaro, vira nora muntukavanovata voqamakero qoraiqianaro.

²⁶ Kia viraqaa uva vai vaiintira qumina virara *ko* koqaa iane tivora. Qiata vaiinti avuqavuqamake nai kaiqa varera kaara qumina vilka ntaihevora.

²⁷ Koqe avu aato vaiva kia arara itairaro qihaaqama kero varianaro. Vo okara vo okara kankoma kero iri tave vaiva kiama airi uva tianaro.

²⁸ Mintiraro kia avu aato vataava kia uva tiraitiro evaara vairera, vika viraravata koqe avu aato vataa vaiintivema tivara.

18

¹ Kia vo vaiinti tonti qireva autiharo nariaraa kanta vai vaiintiva viva nariaraqai noraiqama kero iri vai vaiintivama vairo. Viva vokiaka koqe uva tiva terara kia antuqa ariraro varianaro.

² Kia avu aato vataava vaharo viva koqe avu aato varainarara kia noraiqaakero iriraitiro, viva nai hampi uva iritaira virara quaheharo vaiinti nahenti tiva nimi vaira.

³ Are qora kaiqa varairera, vaiinti nahenti ariara qora vaiintive tivaro ai autuvanovata vatainiquama virara are kaurira haikama varenara.

⁴ „Koqe,“ avu aato vataava ti vai uvava vaireva, aruvuqihairo koqe ruvu namari tuvi vaira voqarama vairo. „Vi namarira nairava qaqi variqiro vuanaro.“

⁵ Hauri *iasivano* qora okara autina vaiintira quahama amiteharo, qumina vaiintiqaa uva vataantora.

⁶ Kia avu aato vataava ti vai uvava tirorira haika qovarama kaimanta vira kaara vira ruqutireka auti variara.

⁷ Kia avu aato vataava tina uvava naima qoraiqama amitaanaro. Vaara vuitaaraqaa aru vintema kero, vira uvavano nai ravaaqavu kaanaro.

⁸ Vo vaiintiara tuavaqa vaura uva tira vaiinti nahenti quahake iri variara. Hiakaa i karara vaaka nampiqama kaantemake, vika vi uvara irireka auti variara.

⁹ Popohara vaiintivanovata, vora airaira rakavu raakavumake vai vaiintivavata, vitanta vohaa qaramake vaiha qata vakaatanta voqara variara.

¹⁰ Noravano Kotiva vaireva, kempuka naavu voqara vaira. Avuqavu ni variaka kante oru vi naavuraqiqi koqemake variara.

¹¹ Vokiaka nai airi monu airaira vataaraqaa muntuvi variara. Vika tiha, Vaantaavuravano tinavu antua timitaintema kero, vi haikava tinavu antua timite vaivo, ti variara.

¹² Nai autuqai tuahere vairava variqiro viro, qoraiqama vuanaro. Are avuni kia nena vara muntuviqama kairera, naantiara are kiama nora autu varenara.

¹³ Are avuni aato vatera koqema kera uva irira, nai tiva amiane. Are paparuqamakera uva tirera, are kaurira haikama varenara.

¹⁴ Vaiintivano rovara varero tiharo, Te homa rovara aatarake koqema virerave tira uvava vira kahaqiraro viva koqema vuanaro. Oho, ti muntukavano voqamakero qoraiqimanta vauro tira uvava vira qoraiqama kairaro viva qutu vuanaro.

¹⁵ Avu aato vataaka vika qaiqaa vo okara vo okara iri tavareka auti variara. Vika vovano uva tiva nimiainarara aato vateha variara.

¹⁶ Are nora vaiinti hampata uva tirera ihara vo haika vira aminara varera viraro viva ai qaqi kairara vira tavaane.

¹⁷ Vo vaiintivano naane koqaa vaharo nai auta ntuaina uvava tirara irira, hauri are vira uvava quqaa uvave tirora. Are vairaro vovanovata ani nai uva tirara irira, viraqaaahaira homa are vitanta uva rairakenara.

¹⁸ Ho ne nora vaiinti taaraqanta uva iriha kia ho avuqavuqivera, nesatu ariha vo vaiinti kaama taivaro vira uvavano vora aatara kaarire.

¹⁹ Are nena qata vakaara vo haika kaara qoraiqama amitairera, are vukaari utihara qaiqaa vira qata vakaaqama kenara.

Kempuka vaantaavura vukaari utiha ravantiaqa kaantemakera, are voqavata vukaari utihara vira vitenarave.

Qentiqaq *aini* nora vuwataavaa vaiinti antua kaintema kero, tivorira uvavano koqemake variatanta rairake vaira.

²⁰ Karavano vaiinti auha mpiqa amitaintema kero, are koqe uva tirava ai muntuka koqema amitaanaro.

²¹ Vaiintivano ti vai uvava homa vo vaiinti arukero, vo vaiinti qaqi kaanaro. Vaiintivano koqemakero irikero tira uvara antuqa harirava koqemakero variqiro vuanaro.

²² Are nahenti vo varairera, vira nai koqe haikama varenara. Are mintiraro Noravano Kotiva ariara quaheharo ai koqema amitaanaro.

²³ Vehi vaiintivano qihaaqamakero airi monu vataa vaiintiara ti kahaqiane tivarovata, vi vaiintiva kia nai qihaaqamakero tiva amiraitiro, kia koqe uvaqohairo vira nai tiva ami vaira.

²⁴ Ai tonti vokika kia ai kahaqiraiti, ai qoraiqama amitevara. Ai tonti taruva ai qata vakaukavata naatarakero viva koqemakero ai kahaqianaro.

19

¹ Kia avu aato vataaka kia avuqavu i uvara tiraiti, hampi uva ti variantema kera, arevata mintirora. Koqemama are vehi vahara quqaa uva tivaqira vuana.

² Are vo kaiqa varena okarara kia kankomakera iriraitira, paparuqihara vi kaiqara varairera, vira kiama koqe ianaro.

Are paparuqama kera vi kaiqara varaterava hampiqama vuanaro.

³ Vokiaka hampi kaiqa vareha návano nái qoraiqama keha qumina Nora Kotirara arara ite vaimanta variara.

⁴ Airi monu airaira vataaka variamanta airi vaiinti vika tontiqi variara. Vehi variaka variamanta vika tonti vika qaqrake vuara.

⁵ Are *ko* avuqaa vo vaiintiara una uva tirera, are ruqemakera vina aarava kia vairamanta ai ruqutivara.

⁶ Autu vatauka vika quahama nimitaate ti, airi vaiinti vikara ugerara uva ti variara.

Vo haika vo haika parumakero nimi vai vaiintira airi vaiinti nahenti vira tontiqireka auti variara.

⁷ Vehi vaiintivano vaimanta vira navunaaka viva vainaini kia vuataa imanta variara. Viva vukaari utiharo vokiaka tontiqireva auti vaimantavata, vika kia variara.

⁸ Koqe avu aato varareva auti vairava viva nai vira kahaqianaro. Koqe okara virara koqe haikave ti vairava koqema kero variqiro vuanaro.

⁹ Are *ko* avuqaa vo vaiintiara una uva tirera, are ruqemakera vina aarava kia vairara are qoraiqama vinara.

¹⁰ Kia avu aato vataava airi airaira vatero koqe naavuqi variqiro virera, vira kiama koqe ianaro. Kaiqa vaiintivano nai nora vaiintiqaq raqikirera, vira anomakero nai kiama koqe ianaro.

¹¹ Koqe avu aato vataaka kia vaaka aara itaimanta variara. Are vovano ai qoraiqama amitainarara kia noraiqaakera irirera, vaiinti nahenti ai nora autuma amivara.

¹² Avuhainaa vaiinti arara ite vaiva vaireva, *raionivano* aantau arukareva noraiqaakero uva tira voqaarama vairo.

Viva vaiinti quahama amite vaiva vaireva, varavuvano ukau qaraakaiqama kaira voqaarama vairo.

¹³ Vira maaquvano hampi kaiqa varainara kaara nai qora qoraiqama kaanaro.

Vira naatavano enena tivorira uva tivaqiro vi vaiva vaireva, tirintuqavano naavuqi nti vaira voqaarama vairo.

¹⁴ Vira noka qoka naavuve airi airairave nái vainti ho amivarovata, Noravano Kotivaqai vira koqe nahenti amianaro.

¹⁵ Popohara vaiintivauvo, aavata vaitatera variqira vuane. Are mintiraro ai kara kia vairara are narara vainerave.

¹⁶ Are Kotira uva maara avataqira virera, are vukaiqama kera variqira vinarave. Are vira uvara qumina uvave tirera, are qutuma vinarave.

¹⁷ Are vehi variaka aqurihama nimitehara vika vo haika nimirera, are mintihara Nora Kotiraqai vi haikara viqama tenara. Viva virara iriharo ai koqe koqaama amianaro.

¹⁸ Ai maaquvano vaintika vaina entara vira utetaane. Are kia mintiraitira, vira qaqi kairaro qora kaiqa varaqiro viro anomakero qoraiqama virera, vira ai nina okarama varianaro.

¹⁹ Qaqi kairaro vaaka arara ite vairava nai qora koqaa varaare. Are vira kahaqirera, are mintiraro viva qaiqaa qaiqaavata ariara ti kahaqianarove tianaro.

²⁰ Vokika ai koqe avu aato amirave, koqe uva maara amirave, are avataqira virera, ai avu aatovano koqema vuuanaro.

²¹ Vaiintivano tiharo, Kaiqe te minti minti irerave tirarovata, Noravano Kotiva tirai uvavaqai aru vuuanaro.

²² Vokiaka koqema nimite vai vaiintira virara vaaenti nahenti quahe variara.

Are vehi vahihara *ko* avuqaa kia una uva tirera, vira nai koqe iroma varianaro. Are una uva tiharo *ko* aatara kairera, vira kiama koqe ianaro.

²³ Are Nora Kotira aatu qetehara vira uva iriqira virera, are vukaiqama kera qaqi variqira viraro kia maaravano ariqaa qovaraiqianaro.

²⁴ Anomakero popohe vai vaiintiva nai kauqu kara tanuqi vatero, kia viraqihairo kara varakero vuru nai noqi vataira.

²⁵ Are koqe okarara naarahina vaiintira tunaaraqohaira ruqutirera, vo haika vo haikara kia kankomake iri taveka vira tave, vikavata koqe avu aato varevara.

Are avu aato vataaka utetairera, vika avu aatovano vogavatama koqe iro varianaro.

²⁶ Nai qora kia koqe okara autu amitero, naavuqihairo nai nora atitama kai vaiintiva anomakero kaurira haika naiqaa vatero.

²⁷ Ti maaquo, are koqe uva maara kia qaiqaa iriataa irera, are mintihara vaakama ekaa koqe okara tauvaqa utu amitenara.

²⁸ Vaiintivano *ko* avuqaa una uva ti vaira kaara *iasivano* kia avuqavuqamakero uva rahe vaira.

Hiakaa i karara nampiqama kaantemake, qora kaiqa vare variaka nái qora kaiqa varerara quahe variara.

²⁹ Koqe okarara naarahihamo amiteka vika ntaihevara. Kaavuqohai raqaqaa hampi kaiqa vare vaika ntaihevara.

20

¹ Iha namari airi ne variaka vueraiqamavi hampi uva tiha riqireka auti variara. Avu aato vataava tiharo, Hauri te iha namari airi neha vueraiqaa vuarorave tiro, kia airi ne vaira.

² Avuhainaa vaiinti arara ite vaiva vaireva, *raionivano* noraiqaakero uva tira voqarama vairo. Are vo okara autinara kaara avuhainaara arara itairera, viva ai aruma kaanaro.

³ Kia avu aato vataaka vaakama riqi tirokira haika qovarama kevara. Riqi tirokira haika tauvaqa utu amite vae vaiintira nora autuma amivara.

⁴ Popohara vaiintivano kara uti entara kia nai kaiqa kora kero kara utira kaara viva kara qanti entara kia vo karavata qantu varaanaro.

⁵ Vaiintivano nai avu aatoqihairo iri vai okarava vaireva, varuvavano veva muntukara vaira voqarama vairo.

Varuqaqihairo mpaqi vaari kaantema kero, avu aato vataava vovano vi uvvara homa qovarama kero varaanaro.

⁶ Airi vaiinti tiha, Tenavu ai tontima vauro tiavarovata, vikaqihairo nai tavave quqaa vira tonti taruva vaivo? Vaiintivano vukaari utiharo tonti tarura rantake vaira.

⁷ Vika qova kia una uva tiraitiro, avuqavu okara avatairera, vira vaintivara koqemake vaivara.

⁸ Avuhainaa vaiintivano *ko* rahe vai entara viva vaaka vika avu aatoqi una uva tireka iritaara viraqamakero tavero avuqavu i vaira.

⁹ Kia vovano ho tiharo, Ti avu aatoqi kia qora okara voqavanovata vaivo. Te qora kaiqa varauua uvvara nunka taiqake takuquvi vauro, tianaro.

¹⁰ *Sikeriqa* hirite hampiqamake rairake nimiarave, hampiqamake vo haika avatamake nimiarave, Noravano Kotiva mintia okarara kia antuqia arivaro vaira.

¹¹ Are vainti haika auti okarara tavehara vikara homa koqe vaintive qora vaintive tinara. Vohaa qaramakera are noruqaaka auti okararavata tavehara rairakenara.

¹² Noravano Kotiva tinavuara uva iriate tiro aato autukero vatero, ekaa haika tavaate tiro avuvata autukero vataira.

¹³ Are ekaa enta vaitareva auti vairera, are vehiqama vinara. Are avu rampaikera himpira kaiqa varairaro airi kara variarire.

¹⁴ Vaiintivano vo haika koqaa ireva tiharo, Maa qora haikave. Te inaara monu ai ami vira vararerave, tivakero varero vuru nai kenuka numiqeharo tiharo, Ho tavaate. Te inaara monu aquke koqe haika maa varauro, tianaro.

¹⁵ Korivata, vo ori vo ori koqe ori vaivarovata, koqe avu aato vataava ti vai uvava koqe haika tarurama vairo.

¹⁶ Vovano *dinauqama* kero airaira varareva irara hauri are tihara, Are kia *dinau* varenara vira nai amirera, tenta una haikara vira amirerave, tirora. Are minti tiraro naantiara airaira qova are iana haikara varairera, te ariara huvigorave tirara.

¹⁷ Are una aaraqaahaira kara varairera, avuni vi karava hiakaa irarovata, naantiara vi karava nuqa voqaara ai noqi varianaro.

¹⁸ Are vo kaiqa varareva ihara avuni vorara koqe avu aato timiane tivakera, vi kaiqara varaae.

Kia paparuqhara iqoka raqiraitira, avuni vokikara koqe avu aato timiate tivakera iqoka raquane.

¹⁹ Ekaa uva viti viri tiva nimi vaiva vaakama are evaara vira tiva amina uvara voravata tiva amianaro. Virara iriharama airi uva ti vai vaiintiva vainaini kia vuane.

²⁰ Nai noka qokara vaaquqama vuate tira vaiintiva, ovavano konkiraqi qimpa vintemakero, qutu vuanaro.

²¹ Vaiintivano vira noka qoka qaqi vai entara vitanta i haikara vaaka riqiakero varairera, naantiara vitini vi haikava kiama vira koqema amitaanaro.

²² Kia tihara, Viva ti qoraiqama timitaira kaara naivata mintima amitarerave tiane. Nora Kotira veka vairaro viva ai avuqavuma amitaarire.

²³ *Sikeriqa* hirite hampiqamake rairake nimirave, hampiqamake maara avatamake nimirave, vi okarara Noravano Kotiva kia antuqa arivaro vaira.

²⁴ Tenavu maa vataraqaa variqi viha Noravano Kotiva kaama tai aararaqaa vuainarara ti, tenavu vi aararaqaa viha nana nana haikavano tinavuqaa qovaraiqainarara kia kankomake irunara.

²⁵ Kia paparuqama kera kauqu aqiqaa aqu kera tihara, Te maa haikara Kotira kaama amitarerave tiane. Hauri are naantiara tihara, Te kia minti tiataarave, tirora.

²⁶ Avuhainaava koqe avu aato vataava qora kaiqa vare vaika rantaker, vika kia aqurihama nimitaraitiro ntaihaanaro.

²⁷ Ovavano ataa intemakero, Noravano Kotiva tenavu avu aatoqi iritaunara qovaramek vaira.

²⁸ Avuhainaava vaiintiara muntuka vate okararave aqurihama nomite okararave avataqiro virera, viva vukaiqamakero raqikiqiro vuanaro.

²⁹ Qaraaka vaiinti kempuka voqavata vairara vaiinti nahenti quahe vajhavata, vika erera kauhi vataaka koqe avu aato vataara iriha nora autu nimi variara.

³⁰ Are qora okara autina vaiintira ruqutihara utetairera, are mintihara vira avu aato koqema kairaro viva vi okarara qaqiraker koqe okara avataqiro vuanaro.

21

¹ Vaiintivano nai antuqaqaa namari toruqu kaintema kero, Noravano Kotiva avuhainaava vaiinti avu aato kahaqiharo aqiqi uti vaivar viva vira antuqa avataqiro vi vaira.

² Tenavu tihia, Tenavu avuqavuqamake ekaa okara auti vauro ti vaurarovata, Noravano Kotiva tinavu avu aatoqiraara ekaa tuantikero rairaker tave vaira.

³ Tenavu koqe okarave avuqavu okarave avataqi vuariraro Noravano Kotiva virara quahaanaro. Vi okarava avuni vaivar Kotira *ofaa* iha quara amite variava vira naantiarinai vaira.

⁴ Nai hana vaiinti taveharo qumina vaiintive ti vai avurave, nariaraqai noraiqaake iri vai avu aatorar, vi haikara vataaka qora kaiqa vare variara.

⁵ Avuni koqemake irikeha kempukaiqamake kaiqa vareka vaivar vika kara airima varianaro. Kavai kavaima keha kaiqa vare variaka vika vehiqama vivara.

⁶ Una aaraqaahairo airi airaira varatairava paari tugema vintemakero, vahuqa variro tiaqa vuanaro. Vi airairava ai vita varero qutu vuaka varianaini muntu kaanaro.

⁷ Qora okara auti variaka vika kia avuqavu okara autuataa imanta nái kena vaiinti ntaihie varia okarava návóta raraun varero muntu aru taiqa kaanaro.

⁸ Hampi kaiqa vare variaka kia avuqavu aaraqaa ni variara. Kia uvavata vikaqaa vaika avuqavu okara avataqi vi variara.

⁹ Vira naatavano enena nai vaati atiharo tirori vairera, vira kiama koqe ianaro. Koqemama vira vaativano nai naavu koqera qaqi kero, haraara naavuqi oru varianaro.

¹⁰ Qora vaiinti vika qora okara autuataa imanta variara. Vika nái kenuka kia aqurihama nomite variara.

¹¹ Are koqe okarara naaraihina vaiintira ruqutirera, vo haika vo haikara kia kankomake iri taveka vira tave, vikavata koqe avu aato varevara.

Are avu aato vataaka koqe uva maara tiva nimiraro vika avu aatovano voqavatama koqe iro varianaro.

¹² Kotiva, avuqavu okaraqai auti vaiva viva qora okara autuaka nái naavuqi vaiha auti variara tave vairaa. Viva minti variaka vehi autu taiqa kaanaro.

¹³ Are vehi variaka ai aare uvvara kia iriataa irara nena aato tinta tairera, ho naantiara are vokikara ti kahaqiate tiramanta vika kiama ai uva irivara.

¹⁴ Vaiinti vovano ariara arara itairera, are vo haika vira evaara amiraro vira arara itairava humpama vuanaro.

¹⁵ *Iasivano* uva avuqavuqama kero rairakero tirera, koqe vaiinti nahenti virara quahewara. Qora okara auti vaika kia virara quaharaiti qetevara.

¹⁶ Vaiintivano koqe avu aato vare aarara qaçira kairera, qutu vuaka varia vatukava vira bekama varianaro.

¹⁷ Nai quahaainaraqai noraiqaakero iri vairava vehiqama vuanaro.

Iha namariarave koqe kararave antuqa arirava vairaro vira monu airaira kia airi varianaro.

¹⁸ Qora okara auti variaka avuqavu ni variakaqaa maara vateva viva náiqáama qovaraqianaro.

Avuqavu ni variaka kia qoraiqama viraiti ho vaimanta, vikaqaa muntuvi vaikavata kia qoraiqama vivara.

¹⁹ Vira naatavano enena nuntu nauntu tiharo tivorira uva tirera, vira kiama koqe ianaro.

Koqemama vira vaativano qaqrakero oru aahara vataini varianaro.

²⁰ Koqe avu aato vataaka naavuqi koqe karave koqe vahaverave ruvaaqumake vataava vairaa. Kia avu aato vataaka nái ia haikara vaaka namake variara.

²¹ Are nena kenuakara muntuka vatehara avuqavu okara vika autu nimitaqira virera, are vukaiqamakera variqira viraro ai kaiqavano koqe iro vairamanta vaiinti nahenti koqe autuvata ai nimivara.

²² Navutaaka airitahaa vatuka voqi vaivarovata, koqe avu aato vataa vaiinti vohaiqavano homa vika naatara kaanaro. Kempuka vaantaavura vaivo tiravata, viva homa ravantiaqa kaanaro.

²³ Kia paparuqama kero uva tiraitiro, nai noqaa koqemakero raqikirava kiama tivorira haika qovarama kaanaro.

²⁴ Koqe okara naaraihama amite variaka vika kia vo kiakara noraiqaake iriraiti, nariaraqai iriha, nái nutuqai tuahere variara.

²⁵ Popohara vaiintivano airaira varaataa ivarovata viva kia nai kauquqohairo kaiqa varareva auti vairaa. Mintiraro vi haikarara irira antuqava nai vira aruma kaanaro.

²⁶ Popohara vaiintivano ekaa enta vo haika vo haika varaainarara avu aato uti vaimanta, avuqavu ni variaka parumakeha nái airaira viti viri nimi variara.

²⁷ Noravano Kotiva qora okara auti variaka *ofaara* kia antuqa ariraro vairaa.

Vaiintivano qora kaiqa varaainarara iriharo Kotira *ofaa* autu amitairera, Kotiva vira anomakero nunurama amitaanaro.

²⁸ *Ko* avuqaa una uva tina vaiintiva qutuma vuanaro. Quqaa uva tina vaiintira vira qaqi kaivaro varianaro.

²⁹ Vo kiaka tinavuara koqe vaiintive tiate ti, qora kaiqa vare variaka vaiinti nahenti niyuqaa unaqaraiqama keha koqe kaiqa vare variara.

Avuqavu ni variaka kaiqavano koqemake variarire ti, aato irikeha nái kaiqa vare variara.

³⁰ Noravano Kotiva vo kaiqa varareva irera, kia ho vovano vira kuvai kaanaro.

Vaiinti koqe avu aatovanove, vo haika vo haika kankomake iri tavevave, nana nana okara avatevave, vi haikava vi haikava kia ho Noravano Kotiva varareva ina kaiqara kuvai kaanaro.

³¹ Ne iqoka raqireka airi ohi geramate entara ne kia ho ohi kempukaqohai navutaaka naatara kevara. Ne Nora Kotira kempukaqohai homa iqoka aatara kevara.

22

¹ Kia airi airaira varenarara noraiqaa kera iriraitira, vaiinti nahenti ai nora autu amirara noraiqaakera iriane. *Korive silvaave* koqe ori vaivarovata, koqe autuvano avuni nora haikama vairo.

² Airi airaira vataakavata vehi vaiinti nahentivata Noravano Kotiva autukero vataikama variara.

³ Koqe avu aato vataaka vo haikavano vika qoraiqama nimitaainara taveha, vira aatu kukeqavi variara. Kia kankomake vo okara vo okara iri tavaaka vi haikara tavehavata, qaqi vi haikava vainaini oru vivi, qoraiqamavi variara.

⁴ Are nena vara muntuvi vatainiqama kera Nora Kotira aatu qetehara variqira virera, are airi airaira vatera nora autuvata varera koqemakera variqira vinara.

⁵ Qora kaiqa vare variaka ni varia aararaqaa airi haikavano vaiinti qoraiqama nimitaarirava vairo. Are koqema kera variataa irera, kia vi aararaqaa vuane.

⁶ Are nena vaintiru koqemakero nuaina okarara umiqairaro viva noruqamaviro vi okarara avataqiro vuarire.

⁷ Airi monu vataaka vehi vaiinti nahenti raqiki variara. Are voraqihaira *dinau* varairera, are vi vaiintira qumina kaiqa vaiinti voqaarama vainara.

⁸ Vaiintivano qora kuvukanaa ututaiva qora karaqai qantintema kera, are vokika qora okara autu nimitairera, vi haikava ai ninaqaavata qovaraqirara are kia ho qaiqaavata vika qoraiqama nimitenara.

⁹ Are parumakera nena kara vehi variaka nimiane. Are mintiraro Kotiva ai koqema amitaanaro.

¹⁰ Nariaraqai noraiqaakero iriharo vo kiakara naaraihama nimite vai vaiintira vara qaqini kaivaro titorira uvave qora uvave taiqa vuarire.

¹¹ Avuqavu okarara muntuva vateharo koqe uvaqai ti vai vaiintiva vairaro avuhainaava vira tontiqama kaanaro.

¹² Noravano Kotiva koqe avu aato vo qara vo qara iraqua koqema kero raqikharo, viva una variaka uvvara kia ququa uvave tivakeharo vika uva qaqini varake vaira.

¹³ Popohara vaiintivano tiharo, Te vahaqaqai vuariraro *raionivano* ti harukaantorave.

Hauri te aaraini vuariraro vo vaiintivano ti haru kaantorave, tivakeharo „naavuqi“ vaira.

¹⁴ Vora vaatintiro ni vai nahentira ugerara uvavano vaireva, hiqainti voqaarama vairo. Nora Kotira arara ite vaiva vi vaiintiraqaa vairaro viva viraqi hiqintuanaro.

¹⁵ Vainti naati avu aatoqi airi hampi kaiqa vareva vaimanta, vika noka qoka nái vaintaira ruqutihua utetaivera, vika vi okarara qaqirama kevara.

¹⁶ Vaiintivano vehi variaka qoraiqama nimitero vika ia haikara vare vaivavata, vaiintivano airi airaira vataaka vo haika vo haika nimi vaivavata, vitanta náitantavata veiqqama vivara.

¹⁷ Koqe avu aato vataaka uva tira koqemakera irihara variane. Are nena aato ti timira te tiaina uvvara koqema kera avu aato utukera varaae.

¹⁸ Ho vi uvava ai avu aatoqi vairera, are homa vo vaiintivata vi uvvara tiva amiraro ai muntukaqihairo koqe iarire.

¹⁹ Are Nora Kotiraqaa muntuvira variane ti, te vate vi uvvara ai tiva amirera.

²⁰ Te 30 uvanavu qara ntuva taunara. Vi uvava ai koqe avu aato amirara are kankomakera vo okara vo okara iri tavenara.

²¹ Are vi uvvara irira, are ququa uva okara kankoma kera irinara. Mintiramanta vokika ququa okarara ai iraivera, are homa vika yutukera tiva niminara.

-1-

²² Kia vehi variakara qumina vaiinti nahentiqai variavo tivakehara, vika i haikara varaae. Vika *ko* avuqaa uvvara are kia vika ti uvarara qumina uvave tiane.

²³ Noravano Kotiva naivano vika auta ntuanaro. Vika i haikara muara vareka viva vika qoraiqama nimiteharo vika i haikara varaaanaro.

-2-

²⁴ Vaaka arara ite vaina vaiintira kia tontiqane. Inaara arara itaina vaiintira hampata kia variqira vuane. ²⁵ Hauri are mintiraro vira qora okaravano aiyata ravaaqavu kairara qoraiqama virora.

-3-

²⁶ Ho vo vaiintivano vo vaiintiqihairo viqa tairera, are kiama qumina nena kauqu aiqiqaa aqu kehara tihara, Viva kia vi monura koqaama kairera, te vira koqaama karerave tiane.

²⁷ Are minti tivatera kia vira vaaka amirera, vika ekaa are ina haikara ani vareha ai taintavata varevarave.

-4-

²⁸ Haaru ai kaivaqaukvara nái vataqaa o ntuva tera kiama nkaqu vuruvi arataane.

-5-

²⁹ Koqemakero kaiqa vare vai vaiintira tavaane. Naantiara vi vaiintiva kia qaqi vaiinti kaiqa vara nimitaraitiro, viva avuhainauka kaiqaqai vara nimitaanaro.

¹ Are nora vaiinti vontira kara nareva oquivi vahara raurihara variane. ² Are airi kara ne vaina vaiintiva vairera, vi vaiintira hampata vahara kia airi kara naane.

³ Viva nai hiakaa i kararaqohairo ti kuntama viri kaantorave tira, kia vira karara antuqa harirara variane.

-7-

⁴ Koqe avu aato irihara variane. Hauri are airi monu varenarara noraiqaakera irihara vukaari utihara kaiqa varerora. ⁵ Airi monuvano vaakama taiqa vuvariravama vairo. Memoravano ata varero naaruvaini vintemakero, vi monuva kia vukai vairo, vaakama taiqama vuanaro.

-8-

⁶ Are kiama nai airaira taataukero tuataina vaiintira hampata kara naane. Vira hiakaa ina karara kia antuqa arirara variane.

⁷ Are vira hampata kara nairera, viva ariara mintima tianaro: Ho qaqiqai karavata namarivata naane tiharovata, viva nai aatoqihairo ariara viva ti kara airi nama kaantorave tianaro.

⁸ Are vi vaiintiva vo okara vo okara autinara tavera tihara, te kia vira kara naataarave tira vuru vihikenara. Are ekaa virara uquerara uva tiva terava quminaqama vuanaro.

-9-

⁹ Kia koqe avu aato vataava ai uvvara qumina uvave tiantorave tira, kia koqe uva maara vira tiva amiane.

-10-

¹⁰ Haaru nái vataqaa o ntuva tera kia nkaqu vuruvi arataane. Viqa vainti i vatara kia vaaane.

¹¹ Noravano vika auta ntuva nimite vaiva kempukavano vika mantaraini vaharo ariqaa uva vataanaro.

-11-

¹² Koqe uva maara tira irihara variane. Are aato vatera koqe okara vo okara vo okara tira irireva autihara variane.

-12-

¹³ Are kiama qetehara nena vainti utetaane. Tunaaraqohaira vira ruqutiraro viva kiama qutu vuanaro.

¹⁴ Are mintina okarava vira kahaqiraro viva kia qutu viraitiro, qaqi varianaro.

-13-

¹⁵ Ti maaquo, are koqe avu aato irira varairera, te quaheha vairara. ¹⁶ Are nena noqihaira kia hampi uva tiraitira, avuqavu uva tiraro ti muntukaqihairo koqe ianaro.

-14-

¹⁷ Kia qora okara auti variaka tavehara, Mpo, tevata vika voqaantemake mintiataarave tiraitira, are Nora Kotira aatu qetehara virara noraiqaakera iriqira vuane.

¹⁸ Are mintirera, naantiara are kia qutiraitira, koqema kera variqira vinara.

-15-

¹⁹ Ti maaquo, ai avu aatovano kanko iarire tira, koqe okarara noraiqaakera irihara vira avataqira vuane.

²⁰ Airi *uainivata* karavata ne vaika hampata kia variane.

²¹ Airi *uaini* neha vueraiqiakave, airi kara ne variakave, vika vaitaqi vivi, vehiqamavi qunahina utataairaqai nonkivara.

-16-

²² Ai qova ai vatataivara variaravara tira, vira uva iriane. Ai nova kontaiqama vina entara kia vira qaqira karaitira, koqemakera viraqaa raqikiane.

²³ Kia quqaa uva tira qorrima karaitira, vi uvvara irireva autihara variane. Koqe avu aatove, koqe uva maarave, vo okara vo okara kankomake iri taverave, are vira vira varareva autihara variane.

²⁴ Vaiintivano avuqavu okaraqai avataqi viraro vira qova voqama keroma virara quaheharo varianaro. Vira maaquvano koqe avu aato vataava vairera, vira qova virara quaheharo varianaro.

²⁵ Virara irihara are koqe okara avataqira viraro ai noka qoka muntukavano koqe iramanta variate. Are mintiraro ai nova ai vatataiva ariara voqamakero quahaarire.

-17-

²⁶ Ti maaquo, ti uva koqema kera irihara, te koqemake koqe aaraqaa nunantema kera nuane. ²⁷ Hampi nario ni vai nahentivave, vo qoraintintiro ni vai nahentivave, vi nahentika vaireka, hiqainti voqaara variavaro, vaiintivano viraqi hiqintirava qoraiqama vuanaro. .

²⁸ Muara vaiinti kukeqavi vaiha vaiintivano aniainara veka variantemake, vi nahentika variamanta airi vaiinti vikaqaa naata vaati varaa okarara rae variara.

-18-

²⁹ Taukae nora maaraqi vaiha nariara ike mpo ti variavo?

Taukae antua uva tiha raqi variavo?

Taukae nai raqa numuara kaara vika vaata teqa taaqama taamanta variavo?

Taukae enena nuntu naantu ti variavo?

Tauka avuvanoe naare ahaa imanta variavo?

³⁰ „Ho kaiqe te vikara ai tiva nimiare.“ Airi *uainive* iha namarive ne variaka, vikama minti variavo.

³¹ Hauri are qaqi kairaro *uainivano kaapu* avutaqi koqema kero takuqiharo aera aera i vairava ai kuntama varairara are vira nairaro ai auntaini koqe iantora.

³² Are namakera vira qararaa toqaqi tavairaro *uqahivano/quaihavano* nkaqa kaintema kero, vi namariva ai qoraiqama amitaanaro.

³³ Mintiraro ai avu aato hampiqama virara are aahuva haika vo haika vo haikama tave vauro tivakehara hampi uva tinara.

³⁴ Sipivanu nora namaripi viharo qaki qaki i vaivaru vaiintivano viraqi kia koqemakero vaintema kera, are nena taintaqaa vailhara kia koqemakera vaitenara.

³⁵ Are mintimakera nena aatoqi irinarave: Vika ti haruamanta te kiama anomake qoraiqamavi vauro. Mpo, te taireve vaitaainaraqihai himpi *uaini* rantake qaiqaa nararave, tinara.

-19-

24

¹ Kia qora okara auti variaka tave hara tevata vika voqaantemake variataarave tiane. Kia mintia vaiintika hampata variqira vuane.

² Vika nai avu aatoqi vaiinti qoraiqama kerara iriha, noqihai antua uva ti variara.

-20-

³ Koqe avu aatovano vaiinti kahaqi vaivaru viva nai naavu kaqakero, viva vo okara vo okara kankoma kero iriro, nai vaintivaraqaa koqemakero raqiki vaira.

⁴ Mintima vai vaiintiva homa vo qara ina haikara koqe haika koqamakero nai naavuqi vatairaro varianaro.

-21-

⁵ Iqoka vaiinti koqe avu aato vataava kempuka vaiintivano vairaro, vo okara vo okara iri tavai vaiintiva voqavata kempukaiqiro koqe iro varianaro.

⁶ Are iqoka raqireva ihara, avuni iqoka raqi okarara taveka iraira vika koqe avu aato ai amivara.

Airi vaiinti avuhainaara koqe avu aato amivaro viva iqoka aatarama kaanaro.

-22-

⁷ Kaantaaqaini vai haikara kia ho varaintema kero, kia avu aato vataava avu aato vataaka ti varia uvara kia ho irianaro. Viva nora vaiinti ruvaaqumavi varianaini vailhoro no tinta tero vaira.

-23-

⁸ Vaiintivano ekaa enta qora okara autuainaraqai iriqiro virera, vaiinti nahenti virara qora okara auti vai vaiintirave tivara.

⁹ Kia avu aato vataaka varareka ia kaiqava qora kaiqama vairo. Nai hanauka naaraihama nimite vai vaiintira virara vaiinti nahenti kia antuqa arimanta variara.

-24-

¹⁰ Ho qora entavano ariqaa qovaraqirera, kempukaiqama kera variane. Are vi entaraqaa popohaira vairera, ai kempukavano inaaraqama varianaro.

-25-

¹¹ Quminaiqama kero kovano vaiinti vira aru kaate tirera, kia qaqi vairaitira, vi vaiintira ruaruuma amitaane.

¹² Hauri are tihara, Kia tinavu kaiqave tirora. Noravano ariqaa raqikiharo ai avu aatoqi ekaa rairea kero iri tave vaivo. Viva ai okara kankoma kero iri tavaivo. Ekaa vohaiqa vohaiqavano nai qora okarave koqe okarave autirara iriharо viva koqaa nimianaro.

-26-

¹³ Ti maapro, bivano nkurutai hanira naane. Vira koqe haika ai noqaa voqamakero hiakaa ianaro.

¹⁴ *Hani* hiakaa intemakero, koqe avu aato viva ai koqema kaanaro. Are koqe avu aato ranta kairera, are kia vaaka qutiraitira, koqema kera variqira vinara.

-27-

¹⁵ Qora vaiintivauvo, kia avuqavu okara autina vaiintira qoraiqama amitareva vira naavu vainanaini vaara autuane.

Kia vira naavu rakavu kera vira airaira varareva autuane.

¹⁶ Avuqavu ni variaka airi tataa hiqintivi, vika qaiqaa himpi variara. Mintiavar o qora entavano qora okara auti variakaqaa qovarama virera, vika ekaarama qoraiqama vivara.

-28-

¹⁷ Ai navutaavaa maaraqi vahiharo kia koqema kero vairera, kia virara huviqorave tiane. Viva kaavunti ruhiqau virera, kia nena muntukaqhahira virara quahaane.

¹⁸ Are virara quahairera, Noravano Kotiva kia ai quahama amitaraitiro, kia ai navutaara atianaro.

-29-

¹⁹ Are kia qora vaiinti vika qora okara autira virara noraiqaakera iriane. Kia vika tavehara tevata vika voqaantemake variataarave tiane. ²⁰ Vi vaiintika naantiara kia koqe enta rantaraiti, *raamuvano* qimpa vintemake, vika qutu vivara.

-30-

²¹ Ti maaquo, are Nora Kotira aatu qetehara avuhainaai vaiinti vevaaraini variane. Are vokiaka kia vitanta vevaaraini vaireka auti variaka hampata kia variane.

²² Oho, qora entavano vaakama vikaaqaa qovarama viro vika qoraiqama kaanarove. Noravano Kotivavata avuhainaavavata nai nana maarae vikaaqaa vatevarave?

Koqe avu aato vataaka uva voqavata tiara

²³ Koqe avu aato vataaka maa uvaravata tiara:

Are *iasivano* *ko* irihara kia vaiinti autuara irihara vira uva avuqavu iane. ²⁴ *Iasivano* qora okara autina vaiintira kahaqiharo kia ariqaa uva vaivo tirera, vaiinti nahenti virara kia antuqa ariramanta virara vaaquqama vuane tivara.

²⁵ Ho *iasivano* vahiharo qora okara autikara ququaama vika qora kaiqa varakaavo tirera, vahnenti vira quahama amiteha koqema amitevara.

²⁶ Kia ai una uva tiva amiraitiro, quqaa uva tiva amira vaiintiva viva ai tonti taruvama varianaro.

²⁷ Kia vaaka nena naavu naane kaqaraitira, avuni vata qerama kera naaho ututera, vira naantiara naavu kaqaane.

²⁸ Are *ko* avuqaa vahiharo kia qumina vo vaiintiqaa uva vataane. Kia viraqaa una uva vataane. ²⁹ Hauri are tihara, Vi vaiintiva ti qoraiqama timitaintemake, te naivata qoraiqama amitarerave. Viva ti mintima timitaintemake, te naivata mintima amitarerave tirora.

³⁰ Te niha vo vaiinti naaho tavaunara. Vi vaiintiva kia koqe avu aato vataava popohara vaiintivano vaivar ³¹ auqu vai ahaikavave vo nimirivanove vi naahora aquaavaro ori ohaavano naaho vira ututuma taiva ekaa hiqintira.

³² Te vi naahora tave virara airi avu aato iriqi vi, viraqaahai vo okarara kankomake irunara. ³³ Popohara vaiinti vika minti ti variara: Ho qaqi kaiqe tenavu voqavata vaitaare. Tenavu inaaraqia auraara varike himpuare, ti variara.

³⁴ Oho, ne minti ti vaivar vaakama ne vate haikava taiqavira, ne vehiqama vivarave. Muara vaiintivano ne ia haikara muara vara kaantema kero, ne vataa haikava kia vairamanta ne vehiqama vivarave.

25

¹ Maa uvara Soromonura uva maarama. Iutaa King Hesekiaara qara ntuva amite vau vaiintika maa uvara qara ntuvatora:

² Kotiva nai avu aatoqi hiniki haikara kukeqate vairara ti, tenavu vira nora autu ami vaunara.

Vo haika vo haika kukeqaviro vaira vira okara avuhainaaka rantareka auti variarara ti, tenavu vira nora autu nimi vaunara.

³ Tenavu verara naaruvave, vevara vata muntukave kia ho rantake tavaainantemake, tenavu avuhainaai vaiinti avu aatoqi vaira kia ho rantakarara.

⁴ Vika *silvaa* ori untake uvairiqi haikara qaqlini varake, koqe *silvaaqohai* homa tanu koqera autu kevara.

⁵ Vira voqaantemake, qora okara auti vaika qaqlini vara kaivera, avuhainaava avuqavu okaraqai avataqiro vahiharo koqemakero nai vaiinti nahentiqaqaa raqikiqiro vuanaro.

⁶ Are avuhainaai vaiinti avuqaa vahiharo kia nena mahuta tiane. Ariara nora vaiintive tiate tira, kia nora vaiinti vainaini oru himpira variane.

⁷ Hauri are nora vaiinti vatuka varera vairamanta naantiara viva nai anintaira vika ai qaqlini vara kaivara are kaurirora. Koqemama are qaqlini qumina vaiinti hampata

vairamanta naantiara vika ariara tiha, Are oru nora vaiinti hampata variane tivara. (Ruki 14:8-10)

Are tavairaro vo vaiintivano vo okara autirera,⁸ hauri are viva qora okara autivo tivakera vaaka vuru vi vaiintiraqaa uva vatehara ko amirora. Vo vaiintivano kankoma kero vi vaiintiva auti okarara tavairava ai uva aatara kairera, ho are nantie inara?

⁹ Are nena navunaa vaiintintira tirorima kera uva avuqavuqireva irera, ho nena vikantira avuqavuqiane. Kia viva ai evaara tiva amina uvvara voravata tiva amiane.

¹⁰ Hauri vokika ariara viva uva viti viri tiva nimi vaivave tivakeha ai kaurira haika amiha qora autu amivorua.

¹¹ Koqe avu aato tiva nimi varia uvava vaireva, *kori* oriqohai katari tava autuke *silvaa* oriqa *vahehema/vaataiqama* taara voqaarama vairo.

¹² Koqe avu aato vataava vo vaiinti kahaqiharo kia mintiataarave tiraro vi vaiintiva koqe uvama tiaro tirera, vi uvava *kori* ori vaataiqama taara voqaarama varianaro.

¹³ Kaiqa vaiintivano uva varero vuru avuqavu vora tiva amiraro vi uvava varakaiva quaheharo varianaro. Nora kuari itai entara naaho kaiqa vareha antai namarira naavaru rukukuqama nimitaira voqaarama vira noravano quahaarirava varianaro.

¹⁴ Vaiintivano vo airara ai amirerave tivakero kia vi haikara ai amiva vaireva, viva naaruva konkira arutaivaro nora uvai utivaro kia aaqu ntira voqaarama vairo.

¹⁵ Nora vaiinti vovano kia ai uva irireva autirera, are kia paparuqama kera uva tiraitira, qihaaqama kera tivaqira viraro vi vaiintiva ai uva irianaro. Maaqirivano ququerara haika vaharovata, homa vuhaari kinta kaanaro.

¹⁶ Are bivano nkurutai *hanira* rantakera, inaaraiqaqai naane. Are ari namakera vuru vihirora.

¹⁷ Are kia nena kana vaiinti naavuqi airi tataa vuane. Hauri are vira naavuqi qaiqaa qaiqaa vi vairaro vira popohairaro kia ariara antuqa aruantora.

¹⁸ Iqoka paipewano vevavanoe kaavuvanoe vaiinti qoraiqama kaintemakero, vaiintivano *ko* avuqaa nai hana vaiintiara una uva tirava vira qoraiqama kaanaro.

¹⁹ Qora enta qovaraiqirara kia una uva ti vai vaiintiraqaa muntuvi variane. Vi vaiintiva vaireva, aarai aiha viraqaa kia kara unuke naira voqaarama vairo. Viva aiqu qoraiqiraga kia ho nira voqaarama vairo.

²⁰ Are iqara autina entara vora utavaaqa ravaqu qaqini kairera, viva kia ariara quahaanaro. Are vora numuarraqi hore tutiqama tairera, viva kia ariara quahaanaro. Ho vira voqaara, vora muntuqa qoraiqina entara are quahaaina ihira vira tiva amitairera, viva kiama ariara quahaanaro.

²¹ Ai navutaaka karara antuqa ariramanta vaivera, vika kara nimiane. Vika namari naataa iramanta vaivera, vika namari nimiane. ²² Are mintiramanta vika kaurivaro Noravano Kotiva ai koqema amitaanaro.

²³ Uvaivano utiharo aaqu vare anintema kero, vorara tauvaqavaura uva tirava tivorira haika qovarama kaanaro.

²⁴ Vira naatavano enena nai vaatintiro tironaarori vairera, vira kiama koqe ianaro. Koqemama vira vaativano nai naavu koqera qaqi kero, haraara naavuqi oru varianaro.

²⁵ Antai namariva aunta rukukuqaintema kero, koqe vakaakavano vo vataihairo aniraro vaiintivano iriraro vira vaata rukukuqama amitaanaro.

²⁶ Avuqavu ni vai vaiintiva qora kaiqa vare variaka uva iriro vika avataqiro virera, viva ruvu namari kupaiqirave, namari kaeq variava qoraiqama virave, vira voqaarama varianaro.

²⁷ Vovano *hani* airi naivarao kia koqe intemakero, vaiintivano nai autu noraiqirage te nora autu varaare ti vai okarava kiama koqe ianaro.

²⁸ Vaiintivano nai arara itaira kia vara muntuvigama kairera, vaantaavura ravantiaqa kaara voqaara vaakama vo haikavano vira qoraiqama amitaanaro.

26

¹ Nora kuari itaina entara *taaru/kaampura* aaqu ntirerave, kara qantuke vare vai entara aaqu ntirera, vira kiama koqe ianaro. Vira voqaantemake vaiinti nahenti kia koqe avu atato vataa vaiinti nora autu amivera, kiama koqe ianaro.

² Taviviravano kia utaraitiro, qaqi atavarero ni vaintemakero, vovano koqe vaiintiara Kotiva ai qoraiqama amitaarire tira uvava kiama vivau varianaro.

³ Avuqavu vuarire ti, *retiqohai* ohi ruquti variarave, donki qia naaquntaqohai rumpa vare vi variarave, kia avu aato vataara kapipiqohai ruquti variara.

⁴ Kia avu aato vataava ariara hampi uva tirera, kia vira uva nai tiva amiane. Hauri arevata vi vaiintira aananterora.

⁵ Kia avu aato vataava ariara hampi uva tirara are nai tiva amihara, nai tinantemakera vira tiva amiane. Hauri viva tiharo te koqe avu aato vatauraukave tiantora.

⁶ Are vonaini uva varakareva ihara, kia avu aato vataa vaiintiara vi uvvara varera vuru tiva amiane tirora. Are mintihara nena aitutanta ekaara teqakaantema kera, nena qoraiqama kenara.

⁷ Aiqu qutu ntaviva kia ho nintema kero, kia avu aato vataava koqe uva maara kia ho tianaro.

⁸ Huruqaa veva qaqi rumpataivaro vaintemake, ne qumina kia avu aato vataara nora autu amivora.

⁹ Iha namari nero vueraiqaviva nai kauquqihairo aukurora qaqini varakareva hampiqi vaintema kero, kia avu aato vataava koqe uva maara hampima tianaro.

¹⁰ Vovano kia avu aato vataa vaiintive, aaraqaa qaqi aitare vi vaiintirave, virara ti kaiqa vara timitaane ti vairava vaireva, vaiintivano veva hampiara voqaara tutake vaira voqaarama vairo.

¹¹ Vairivano vuru vihikaira, qaiqaa anirantero oru naintema kero, kia avu aato vataava qaiqaa hampi kaiqa varaanaro.

¹² Kia avu aato vataava vairaque tenavu vira kahaqiarirava varianaro. Vovano te koqe avu aato vataukama vauro tina vaiintira tenavu kia ho vira kahaqirara.

¹³ Popohara vaiintivano tiharo, Te vahaaqaini vuariraro *raionivano* ti harukaantorave. Hauri te aaraini vuariraro *raionivano* ti haru kaantorave, tivakeharo „naavuqiqai“ vaira.

¹⁴ Qenti quantua viro tinta viro intema kero, popohara vaiintivano nai taintagaqa tuqantaa taqantaa iharo vaitatero vaira.

¹⁵ Popohara vaiintivano nai kauqu kara tanuqi vatero, kia viraqihairo kara varakero nai noqi vatero naira.

¹⁶ Popohara vaiintivano nariara tiharo, Te koqe avu aato vataukama vauro. Ti avu aatovano vaiinti 7navu koqe avu aato vatauka koqe uva tiaravata aatara kairave tira.

¹⁷ Vaiintivano qaakau vairi aatotanta utu varairera, oho, vi vairiva vira nkaqama kaanaro. Vira voqaara vaiintivano oru tirori variaka hampata tirori vairera, oho, vira kia ai kaiqa vaivo tivake vira ruqutivara.

¹⁸⁻¹⁹ Nai hana vaiinti unaqaraiqama amitero tiharo, Te qaqi ai virerama tiva amitauro ti vai vaiintiva vaireva, vueraiqi vaiintiva iha ite vai vevara hampiara voqaara ari vaira voqaarama vairo.

²⁰ Kia iha ahukorama kaavararo ihavano qimpa vintemake, ne tauvaqa vaura uva tira kia viti vira tiva nimivera, tirodira uvavano taiqama vuanaro.

²¹ Iha auruvano vaaka iha itakaintema kero, voqamakero tirori vai vaiintiva raqira haika qovaramake vaira.

²² Vaiintivano hiakaa i karara vaaka nampiqa kaintemake, tenavu tauvaqa vaura uva ti variara iriataa imanta iri vaunara.

²³ Qoraiqi tavera *peniqohairo* kukeqataivaro koqe iro vaintema kero, uquerara uvavano vira avu aatoqi qora okara auti vaira kukeqate vaira.

²⁴ Nai hana vaiinti iri qoraiqama amite vai vaiintiva uquerara uva virara tiharovata, nai avu aatoqi vira qoraiqama amitaaina uvvara qaqi iritaira. ²⁵ Vira uva ai iriataa iraravata, kia vira uvvara ququaave tiane. Mintia vaiintika avu aatoqi qora uvavanoqai mpiqaro vaira.

²⁶ Viva nai avu aatoqi vora iri qoraiqama amite vaira homa kukeqa teharovata, viva qora kaiqa vo kaiqa vo kaiqa varainara kia ho kukeqa tairamanta, vaiinti nahenti vira qora okara qoqama tavevara.

²⁷ Vovano aqu vuarire tiro, hiqainti quvi tairera, viva naima viraqi aqu vuanaro.

Nora ori onkaini venta kairaro otu viro vora rakavu kaarire tiro venta kairava, viva tuqantaa vairo naima rakavu kaanaro.

²⁸ Are vorara una uva tirera, are vira iri qoraiqama amiteravama vainara.

Uquerara uva tiha una uva ti vaira kaara vokiaka qoraiqamavi variara.

27

¹ Are hora nana haikavano qovarai qiajnara kia iri tavenarara tira, kia nena mahuta tihara te hora minti minti irerave tiane.

² Kairamanta vokika ai autu tuahera kaate. Hauri are nenavano nena autu tuahera kerora.

³ Orivano maara ntaivaro nuqa maaravanovata nora vaivararo, kia avu aato vataava vo maara qovarama kaiva nai nora maarama vaira.

⁴ Arara itaivarō vora ati vai vaiintiva kia vira aaqurihama amitaraitiro, vira qoraiqama kaanaro. Mintirarovata, „vira naatavano vo qoraintintiro nuainara kaara,“ vira voqamakero arara itairaro vainaraqaa nai tavave vira aqanto ho oru varianaro?

⁵ Ai tonti vovano qora okara autu kairera, koqemama are vira avuqaa vahara virara kia mintiaatarave tinara. Are mini evaara vairaro viva ai muntukavano virara vainara kia ho irianaro.

⁶ Koqemama ai tonti vovano ai kahaqireva iharo ai ruqutuanaro. Ai navutaava ani ai moqa kairera, oho, virara raurihara variane.

⁷ Are airi kara ho namakera vairaro ai antuqavano kia *haniara* varianaro. Are kara kia naraitira, narara vairera, are hunka vina karara nehara virara hiakaa i kararavema tinara.

⁸ Nai maaga kero vonaini oru vai vaiintiva vaireva, uvirivano nai naavu kero niaraini oru vaintema kero vairo.

⁹ Koqe vhahvera untavanove, okuvera untavanove ai quahama amitaintema kero, ai tontivano koqe avu aato amirava ai quahama amitaanaro.

¹⁰ Kia nena tontive, nena qora vira tontive, qaqlira kaane.

Nora maaravano qovaraiqina entara kia nena qata vakaukavarara ti kahaqiate tiraitira, oru nena tataaqaa vaina vaiintirara ti kahaqiane tiane. Ai tataaqaa vaiva vaaka ai kahaqiramanta ai qata vakauka niaraini vaika kia ho vaaka ani ai kahaqivara.

¹¹ Ti maaquo, koqe avu aato iri varia okarara avataqira viraro ti muntukaqihairo koqe iarire. Are mintirage te homa tiqaa una uva ntuvakeha tika náivata tiva nimirara.

¹² Koqe avu aato vataaka vo haikavano vika qoraiqama nimitaainara taveha, vira aatu kukeqavi variara. Kia kankomake vo okara vo okara iri tavaaka vi haikara tavehavata, qaqlira vi haikava vainaini oru vivi, qoraiqamavi variara. (22:3)

¹³ Vovano *dinauqama* kero vora airaira varareva irara hauri are tihara, Are kia *dinau* vira nai amirera, te tenta una haikara vira amirerave, tirora. Are minti tiraro naantiara airaira qova are ina haikara varairera, te ariara huviqoravema tirara.

¹⁴ Are vaaka toqaqi himpira nena tonti vauraqamakera naveraitihara Kotiva ai koqema amitaarire tirera, vi vaiintiva ariara kia quaharaitiro, viva tiriara qora uvama ti vaivo tanaro.

¹⁵ Vira naatavano enena tirorira uva tivaqiro vi vaiva vaireva, aaqu nti vaivaro tirintuqavano naavuqi nti vaira voqaarama vairo. ¹⁶ Uvai utira kia ho ravaaqavu kaintemakera, are kia ho vira uva taiqa kenara. Vahaveravano vai haikara kia ho totaantemakera, are kia ho vira uva taiqa kenara.

¹⁷ *Ainivan* nai kena *aini* kahaqiharo uvi anaintemakero, avu aato vataava vora avu aato vataara kahaqii vaira.

¹⁸ Vovano nai *fiki* katariqaa koqemakero raqikirava vira tava naanaro. Nai nora vaiintiqa koqemakero raqikirava koqe autuma varaanaro.

¹⁹ Vaiintivano namariqi taveharo nai virima tavaanaro. Viva nai avu aatoqi nai nana vaiintivano vairara kankomakero irianaro.

²⁰ Qutu vuaka varia vatukava airi vaiinti nahenti namaqiro viharovata, kia hove tiraitiro, qaiqaa qaiqaa voqavata nama kareva auti vaira. Vira voqaara, vaiintivano vo haika vatero kia ho vatauro tivakero, qaiqaavata vo haika vo haikara muntuka ntivaro varareva auti vaira.

²¹ Ihaqohai *korive silvaave* untake avatamake tave variara. Nora autu amiva vaiinti vira okara qovarama kaimanta vira okara tave variara. „Vo vaiinti nora autu amiavaro viva kia nai nora autuara iriraitiro, koqe kaiqa qaqliqai varaqiro vi vaira. Vo vaiinti nora autu amiavaro viva nai nora autuara iriharo qora kaiqa vare vaira.“

²² Are quminamia kia avu aato vataara kaavuqohairu ruqutuqira vinara. Are mintirarovata, viva qaqlqaima hampi kaiqa varaqiro vuanaro.

²³⁻²⁴ Monu airairavano kia ekaa enta varianaro. Avuhainauka raqikivavata kiama ekaa enta varianaro. Virara irihara koqemakera nena sipisipive, memeraave raqikiqira vuane.

²⁵ Vika kara neva ho variarire tira, ukau teqakera vuru ruuaquma kera vatairaro qaraaka ukauvano qaiqaa qampiqaarire. Aiqinaini vaina ukauravata teqakera ruuaquma kera vataane.

²⁶ Nena sipisipi kauki toqakera viraqohairu nena utavaaqa autukera vatera, nena memeraa vokika nimihara monu varera viraqohairu vata vo koqaa iane.

²⁷ Are memeraa naama kaqa kera nena vainti nahenti hampata nehara, nena kaiqa nahentivata nimiane.

28

¹ Kia vovano vika aru ntataqiro vimanta, qora kaiqa vare variaka nái qetakeha kante vi variara. *Raionivano* kia qetaraitiro, qaqi himpi vaintemake, avuqavu ni variaka qaqi himpi variara.

² Vo vataini variaka nái qora kaiqa kaara nai ari i vaivera, vo vaiinti vo vaiinti himpi vi vataraqaa raqikireka auti vaivara. Koqe avu aato iri okarara avataqiro vi vai vailintiva vi vataraqaa raqikiqiro virera, vi vatanaaka koqemake variqi vivara.

³ Vehi vaiinti vovano nai hanaukaqaa raqikiharo vika qoraiqama nimite vaiva vaireve, nora aaquvano ntiharo naaho maata qoraiqama kaira voqaarama varianaro.

⁴ Are Kotira uva qoririma kairera, are qora kaiqa vare variaka nutu tuahera kenara. Are Kotira uva iriqira virera, are mintihara vika qora okara taiqa kareva autinara.

⁵ Qora kaiqa vare variaka kia avuqavu okara iri tave variara. Nora Kotira uva avataqi vi variaka vika kankomake avuqavu okara iri tave variara.

⁶ Vaiintivano unaqaraiqama keharo airi airaira varairera, vira kiama koqe ianaro. Koqemama are vehi vaihara quqaa uvaqai tivaqira vuana.

⁷ Vira maaquvano Kotira uva avataqiro vi vaiva vaivaro vira avu aatovano koqe iro vaira. Iha namarive karave airi ne variaka airuqiharo ni vai vailintiva nai qora kaurira haika ami vaira.

⁸ Are vokiaka nimiana monura qaiqaa nena varareva ihara, airi *intares* monu naairera, kia koqe ianaro. Naantiara are vi monura kakakima kairaro, vovano parumakeharo vehi vaika nimi vairava vi monura varaanaro.

⁹ Are Kotiva uva vataira tauvaqa utu amitairera, viva are vira aarena uvarara qora uvave tivakeharo kia irianaro.

¹⁰ Avuqavu ni vai vailintira qora aaraqaa kuntama virivi kaira vaiintiva naima qoraiqama vuana.

Kia qora okaravanovata vikaqaa vaimanta variaka Kotiva vika koqe koqaama nimianaro.

¹¹ Airi monu vataava nariara tiharo, Te koqe avu aato vataukave tivarovata, vehi vaiintivano koqe okarave qora okarave rairake tave vaiva vira okara kankoma kero tavaanaro.

¹² Avuqavu ni variaka noraiqama vua entara vaiinti nahenti quaheha variara. Qora kaiqa vare variaka raqiki varia entara vaiinti nahenti vika naatu qeteha kukeqavi variara.

¹³ Nai qora kaiqa vare vaira kukegate vai vailintiva kiama koqema kero variqiro vuana. Nai qora okara tiva qovarama kero vi okarara tauvaqa utu amitairava vairaro Kotiva vira aaqurihama amitaanaro.

¹⁴ Nora Kotira aatu qeteharo vira uva iriqiro virava quaheharo varianaro. Nora Kotira uva kia irireva auti vairava viva qoraiqama vuana.

¹⁵ *Raionivano* noraiqaakero uva tirave, *beavano* kara rante vairave, vitanta naatu qete variantemake, vehi vaiinti nahenti avuhainaava qora okara avataqiro vi vaira aatu qete variara.

¹⁶ Kia koqe avu aato vataava noraiqama viro vaiinti nahentiqa raqikirera, viva nora maarama vikaqaa vataanaro. Qutaru monuara kia antuqa ariva viva vaiinti nahentiqa raqikiharo koqemakero variqiro vuana.

¹⁷ Vora arukaira vaiintiva anomia kero airi avu aato utiharo varianaro. Viva kia koqema kero variqiro viro vuru qutu vuana.

Kia vira kahaqiraiti, qaqi kaivarо mintiarire.

¹⁸ Avuqavu okara avataqiro vi vaira vaiintiva koqema kero variqiro vuana. Qora okara avataqiro vi vaira vaiintiva vaakama qoraiqama vuana.

¹⁹ Koqemakero kaiqa vareharo nai naahoqaa raqiki vaiva, viva airi karama qantuanaro. Naaho kaiqa qaqrakero vo kaiqa vo kaiqa qumina kaiqa vare vaiva vehiqama vuana.

²⁰ Avuqavu okara avataqiro vi vaina vaiintira Kotiva koqema amitaanaro. Te airi monu vaaka vararerave tina vaiintira Kotiva vira qoraiqama amitaanaro.

²¹ *Iasivano* uva avuqavu iharo hauri viva vaiinti autuara iriharo vira uva avuqavu iantora. Oho, vaiinti vokiaka qutaru monu inaaraiqa varareka iha, vaakama qora okara autivara.

²² Kampaiqama kero tuatai vaiintiva vaaka airi monu varareva autiharovata, viva naantiara nai vehi vaiintiqama vuainarara kia kankomakero irira.

²³ Vo vaiintivano qora okara autirara are vira atihara kia mintiataarave tirera, naantiara viva ariara koqeve tianaro. Are kia vira atiraitira, virara uquerara uvaqai tirera, naantiara viva kia ariara koqeve tianaro.

²⁴ Vaiintivano nai noka qoka ia haikara muara varero tiharo, Te kiama qora okara auturo, ti vaiva vaireva, vaiinti aruke vaira voqaarama vairo.

²⁵ Airi haika vatero qaiqaa voqavata varareva auti vai vaiintiva raqira haika qovaramake vaira. Nora Kotiraqaa muntuvi vaiva koqemakero variqiro vuuanaro.

²⁶ Nai irikero tiharo, Te homa tenta kahaqha variqi vireraye ti vai vaiintira avu aato kia ho vairo. Koqe avu aato avataqiro vi vai vaiintiva kia qoraiqama viraitiro, koqemakero variqiro vuuanaro.

²⁷ Vehi vaiinti nahenti airaira nimi vai vaiintiva kiama vo haikara aavoqianaro. Are vehi vaiinti nahenti taveharavata, kia vika kahaqirera, vokika ariara qora uvama tivara.

²⁸ Qora kaiqa vare variaka raqiki varia entara vaiinti nahenti vika naatu qeteha kukegavi variara. Vika qutu vuamanta avuqavu okara auti variaka noraiqamavi qaiqaa raqikiqiqi vivara.

29

¹ Ne airi tataa vaiinti vo uteteha vira ativarо viva kia ni uva irirera, vo enta viva vaaka qoraiqama viramanta ne vira kahaqi aarava kiama ho varianaro.

² Avuqavu ni variaka airitahaa varia entara vaiinti nahenti quaheha variara. Qora kaiqa vare variaka raqiki varia entara vaiinti nahenti mpo ike tivaqi vi variara.

³ Koqe avu aatora antuqa ari vaiintiva vaivarо vira qova virara quaheharо vaira. Hampi nari varia nahentika hampata ni vai vaiintiva nai monuve airairave ekaa aqu taaqa kaanaro.

⁴ Avuhainaa vaiintivano avuqavu okara avataqiro virera, vi vatanaaka kempukaiqamake vaivara. Avuhainaa vaiintivano qutaru monu naaruma keharо varairera, vira kaara vi vatanaaka qoraiqama vivara.

⁵ Vira hana vaiintivano qoraiqama uvarire tiro, viva virara uquerara uva ti vaira.

⁶ Vaaravano aantau ravaaqavu kaintemakero, qora kaiqa vare vai vaiintira kaiqavano nai ravaaqavuke vaira..

Avuqavu okara auti variaka quaheha ihi tivaqi vi variavaro „kia vo haikavano vika ravaaqavuke vaira..”

⁷ Avuqavu ni variaka vehi vaiinti nahenti uva koqemake raira nimiterara noraiqaake iri variara. Qora kaiqa vare variaka kia vika *ko* tirara noraiqaake iri variara.

⁸ Koqe okarara naarahi variaka nora vatukaqi vailha raqi tiorirа haika qovaramake variara. Koqe avu aato vatauka vaavaa tiha arara ite vaira humpamake variara.

⁹ Koqe avu aato vataava kia avu aato vataakkantiro *ko* tirera, kia avu aato vataava vira naarahama amiteharо tauvaqa vauraa uva tivaqiro viharо kia nai no tinta taanaro.

¹⁰ Vaiinti aruke variaka koqe kaiqa vare variaka iri qoraiqama nimite variara. Vika avuqavu ni variaka arukareka auti variara.

¹¹ Kia avu aato vataava nai arara ite vaira qoqaa qovarama kaivaro, koqe avu aato vataava nai arara ite vaira ravaaqavute vaira.

¹² Avuhainaa una uva ti vaika aato nimiharo vika uva irirera, vira kaiqa vaiintivata qora kaiqa varekama vaivara.

¹³ Vehi variaka variamanta vika qoraiqama nimite variakavata variavaro, Noravano Kotiva ekaa vika vika nivu nimi vaivama vairo.

¹⁴ Avuhainaa vеhi vaiinti nahenti uva avuqavuqama kero raira kero iri nimitarera, viva vukaiqama kero raqikiqiro vuuanaro.

¹⁵ Are nena vainti utetehara kapipiqohairа vira ruqutirera, viva koqe avu aato vataavama varianaro. Vainti naativano enena nai antuqa avataqiro nirera, nai nora kaurira haikama amianaro.

¹⁶ Qora kaiqa vare variaka raqiki entara, qora okaravano voqavatama varianaro. Mintiramanta avuqavu ni variaka qora okara auti variaka qoraiqamavi taiqavi entara tavevara.

¹⁷ Ai maaquvano vaintika vaina entara vira utetaane. Are mintiraro viva koqe okara autiraro ai muntukavano qihaaqirara quahaane.

¹⁸ Noravano Kotiva kia vaiinti nahenti uva tiva nimi entara vika qora okara vo okara vo okara auti variara. Kotiva tivatai uvаra iriqiro vi vai vaiintiva vaivarо Kotiva vira koqema amite vaira.

¹⁹ Are nena kaiqa vaiinti okara utetareva ihara, qumina are tihara, Viva ti uva irianarove tirora. Viva ai uva irirovata, kiama vataanaro.

²⁰ Vovano kia avu aato vataava vairera, tenavu vira kahaqiarirava varianaro. Kia irikero tiraitiro, paparuqama kero ti vai vaiintira tenavu kiama ho kahaqirara.

²¹ Ai kaiqa vaiintivano qaraaka vaiinti vaina entara are hogaramatera viva ai naarina haikara amiqira virera, naantiara viva ekaa are ina haikara vara taiqa kairara are mpo ikema tinara.

²² Arara ite vai vaiintiva raqi tivorira haika qovarama kaanaro. Vaaka arara ite vai vaiintiva airi qora kaiqa varaanaro.

²³ Vaiintivano nai autu tuaherake vaira kaara vaiinti nahenti kauri haika vira amivara. Nai autu vatainiqamavira vaiintivana nora autuma varaanaro.

²⁴ Are muara vaiinti vo kahaqirera, are mintihara nena qoraiqama kenara. Are *ko* avuqaa vahara quqaa vira kahaqunarave tirera, *iasivano ariqaa uva vataanarove*. Are kia te vira kahaqunarave tirera, Kotiva ariqaa nora uva vataanaro.

²⁵ Vaaravano aantau ravaaqavu kaintemakera, are vaiinti aatu qetehara variqira virera, are qoraiqama vinara. Nora Kotiraqaa muntuvi vairava koqemakero vairaro kia vo haikavanovata vira qoraiqama amitaanaro.

²⁶ Avuhainaava vika uva avuqavuqama nimitaarire ti, airi vaiinti vira tavareka auti variavarovata, Noravano Kotivaqai tinavu uva avuqavuqama kero raira timitaariravama vairo.

²⁷ Avuqavu ni variaka qora okara auti variakara kia antuqa arimanta variamanta, qora okara auti variaka avuqavu ni variakaravata kia antuqa arimanta variara.

30

¹ Maa uvara Iakera maaqu Aguriva tivatai uvavama vairo. Aguriva mintima tiro: Mpo, Kotio, ti popohaivaro ti kempuka kia vaimantama vauro.

² Mpo, ti avu aatovano kia koqe imantama vauro. Te vaiintivano avu aato irintemake iriataara vaimanta, te qaakau aantau iriantemake iri vauro.

³ Koqe avu aatovano kia ti avu aatoqi vaimantama vauro. Te Kotira okarara kia vogavata iri tavaunara.

⁴ Tavave naaruvinai oruntero qaiqaa orurantero vataini tuvirave? Tavave ekaa uvai ravaaqavu kero nai kauquqi totairave? Tavave nora namari varakero nai tavunaqi apuqama kero totairave? Tavave ekaa vata maata autukero vatairave? Are virara virara irirera, vira autuvata, vira maaqu autuvata ti tiva timiraqe iriara.

⁵ Ekaa Kotira uva quqaa uvaqaima vairo. Kainkevano iqoka vaiinti mantaaqa amitaintema kero, Kotiraini vina vaiintira Kotiva mantaaqa amitaanaro.

⁶ Kotira uvaqaa kia nena uvavata akukuma kera tihara, Maa Kotira uvama turo, tiane. Hauri viva ai atiramanta vaiinti nahenti ai tave ariara una vaiintive tivora.

⁷ Mpo Noravauvu, te taara haikara ai naaruarirara are kia kiave tiraitira, vi haikatanta te qaqi variaina entara ti timiane:

⁸ Are ti kahaqirage te kia una uva tiraati, quqaa uvaqai tiare.

Are kia ti qaqi kiraqte airi airaira vataakave, vehi vaiintive variare. Are kia mintiraitira, te vo enta vo enta kara naainaraqai ti timiane.

⁹ Hauri te airi airaira vateha ai tauvaqa utu amite ariara tiha, Noravano Kotiva viva tavave? tiarora. Hauri te vehi vaiinti vaiha vora airaira muara vareha tenta Variga ai autu vatainiqama kaarora.

¹⁰ Are kiama nora vaiinti vovano inaini oruntera vira kaiqa vaiinti vorara tauvaqavaura uva tiane. Hauri kaiqa vaiinti viva Kotira aarairaro Kotiva ai qoraiqama amitairaro nora uvavano ariqaa variantora.

¹¹ Vokiaka nái qokavarara tiha, Kotiva ni qoraiqama kaarire, tivakeha kia nái nokavarara koqeve tiva nimite variara.

¹² Vokiaka tiha, Tenavu koqe okaraqai auti vauraukave, ti variavarovata, qora okaravano anomakero vika avu aato qoraiqama kaimanta variara.

¹³ Vokiaka nariara tiha, Tenavu koqe vaiinti nahentive, tivakeha vokiaka taveha vikara qumina vaiinti nahentive tiha nunurama nimite variara.

¹⁴ Vokiaka aarai vaireva, paipeve ehaiive voqaa vaimanta vika maa vataraqaa vehi vaiinti nahenti qoraiqama nimiteha vika taiqa kareka auti variara.

¹⁵ Tuvogavano taara no vataava vaimanta vitanta tiha, Voqavata voqavata timiane, ti variara. (Hiparu uva: tuvoqaa raavurata tiha, voqavata voqavata timiane, ti variara.)

Ho vo haika 4navuvano vaiha, ekaa vinavuka tiha, Kia te hoqamake varauro, ti variara:

¹⁶ Qutu vuaka varia vatukavave.

Naahiar/Qururaiqama vi nahentivave.

Aahara vatavanove.

Iha ite vaivave.

¹⁷ Hauri are nena qorara qora uva tihara naaraihamma amitera, nena nora uvavata kia irirora.

Are mintirera, naantiara mati ne vai uvirika ai vaata naivarō *kotikotivano* ai avu vaurukero naanaro.

¹⁸ Uva okara 4navu vaimanta kia te vira okara kankomake irunara:

¹⁹ Memoravano virikanta ata vare vi ani vai okararave, memaruvano nora orivau vi ani vai okararave, *sipivano* nora namarivaura vi ani vai okararave, vaiinti muntukavano nahentiai vai okararave.

²⁰ Vira naatavano vo qoraintintiro ni okarava maantimama vairo: Viva vikantiro nuvakerō viraqaahairo namari tuntukero tiharo, Te kia qora okara auturo, ti vaira. (Hiparu uva: Te kara namake tenta no nunkake kia qora okara auturo, ti vaira)

²¹ Qora okara 4navu vaimanta vira kaara vataini variaka aiqu kauqu ntiri ntiri i vaimanta variara:

²² Qumina kaiqa vaiintivano avuhainaa vaiintiqama viro „vaiinti nahentiaqaa raqiki vai okararave„

Kia avu aato vataava airi kara ne vai okararave,

²³ Vaiinti kia antuqa arua nahentiva qorainti varai okararave,

Kaiqa nahentivanu nai nora nahenti vatuka varai okararave.

²⁴ Inaara haika 4navu variavarō vi haikara avu aatovano uri aatarakero vaira:

²⁵ Tompiqaara. Vi haikara kempuka kia nora vaivarovata, vika karara aavoqi entara iriha nái kara ruvaaqumake vate variara.

²⁶ Inaara aantau qiroka voqaava. Vi aantauva ugerara aantauvano vaiharovata, nai naavu ori onkaiqi kaqate vaira.

²⁷ Kaintaaqqa. Vika avuhainaa kia vaimantavata, vika avuqavumake nai tataaqa nai tataaqa vi ani variara.

²⁸ Kuveqa. Are homa nena kauquqohaira vira ravaaqavu kerava vaivarovata, vi haikava avuhainaa naavuqivata varianaro.

²⁹ Vo haika 4navu variamanta tenavu vi haikauka tave tiha, Ike, vi haikauka koqemake ni variavo, tunara:

³⁰ *Raioni*. Vira kempuka nora vaivarō viva kia vo aantau aatu qetaraitiro ni vaira.

³¹ Iqoka ohivano rauqe vaaqemaqiro ni vaira. (Vo uva: Qora kokoraaravano aiqu ke kauqu kemaqiro ni vaira.)

Memeraa qoravano vi ani vaira.

Avuhainaa vaiintivano nai iqoka vaiinti hampata vi ani vaira.

³² Are hamahama ihara nena autu tuaherakera qora okara autirava vairera, are qaigaavata mintiarorave tira, nena no tintatera, vi okarara qaqa kaane.

³³ Are purumakau naama vahavera vainara tugantaa taqantaama kairera, *batama* autu vuanaro. Are vo vaiinti aiqi rukavu kairera, naarevano ntaanaro. Are tirorira uva tivaqira virera, raqira haikavano qovarama vuanaro.

31

King Lemueliva tiva tai uvara

¹ Maa King Lemuelira uvama. Vira nova maa uva maarara vira tiva amura:

² Ti maaquo, te ai vatataunarara tiro, ti muntukavano ariara voqavatama vaivo. Te Kotira aarauraro viva ai ti timirave.

³ Kia nahenti hampata hampi nihara nena kempuka taiqa kaane. Vi nahentika avuhainauka qoraiqama nimite variakave.

⁴ Lemuelio, avuhainauka *uainive* vo iha namarive naivera, kia koqe ianaro.

⁵ Hauri vika vi namarira neha „Mosiva“ qara ntuva tai uvara taurukeha kia vehi vaiinti avuqavu okara autu nimitevora.

⁶ Aumakaa qutire ikave, nora maaraqi vaiha keke ti vaikave, vika vi namarira nimiate.

⁷ Qaqi kairamanta vika vi namarira neha vehi vairarave, nora maaraqi vairarave, tauru kaate.

⁸ Kia ho uva tiha nái auta ntika are vika kahaqihara uva tiane. Kia ho nái kahaqika are autua nimitaane.

⁹ Are vehi vaiinti nahenti auta ntiraro *kovano* vika uva kia hampi iriraitiro, avuqavu iriarire.

Koqe nahenti okarara tura

¹⁰ Kogema kero ni vai nahentira varareva iharo vaiintivano vukaari utiharo rantaanaro. Vi nahentiva koqe ori, vo ori vo ori uri aatarakero avuni vairo.

¹¹ Vira vaativano virara koqe nahentive tivakeharo viraqaa muntuvi vaharo kia vo haikarovata aavoqianaro.

¹² Vi nahentiva nai qaqi variqiro vi vai entara kia nai vaati qoraiqama amitaraitiro, koqe okaraqai autu amite vaira.

¹³ Viva vo naaqunta vo naaqunta kuvu kero vo qara vo qara i tavunara autuataa ivaro auti vaira.

¹⁴ Sipivano niaraihairo kara vara viri kaintema kero, viva niaraihairo oru kara vare vaira.

¹⁵ Vi nahentiva kia aatitairaqui vaaka himpiro, nai vaati vaintivarara kara unta nimitero, nai kaiqa nahenti kaiqa rairakero nimi vaira.

¹⁶ Vi nahentiva vata koqaa ireva iharo, vata vira koqemakero tavamakero, viraqaahairo viva vi vataro vare vaira. Viva nai kaiqa monu vatairaqohairo *uaini* kuvu koqaama varero naahoqi uti vaira.

¹⁷ Viva kempuka kauqu vataava kia popoharaitiro, kempukaiqama kero kaiqa vare vaira.

¹⁸ Vi nahentiva kankomakero irivaro viva varai kaiqava koqe iro vaivaro, viva *raamu* qumpikero entaqivata kaiqa varaqiro vi vaira.

¹⁹ Viva naivano naaqunta kuvukero viraqohairo tavuna autuke vaira.

²⁰ Viva vehi vaiinti nahentive, vo haikara aavoqiakave, nai i haikara parumakero nimi vaira.

²¹ Viva nai vaintaira koqe utavaaqa kempuka vaira autu nimitairara tiro, voqamakero *toqa/iqara* auti entara viva kia qetaraitiro vaira.

²² Viva *paraanke* autukero vaite taintara voqaa voqaa vuqitaira. Viva hanta tavuna koqerave naare tavuna koqerave vara kero nai utavaaqa autukero nonkutero vaira.

²³ Vi vatukaraqui variaka vira vaatiara koqe vaiintive tiavaro, viva nai hana qiata vaiinti ruvaaqumavi varianaini oquiviro vaira.

²⁴ Vi nahentiva utataarivata *retivata* autu kero vataimanta, koqaa kaiqa vare variaka koqaa i variara.

²⁵ Viva kempuka nahenti vaimanta vaiinti nahenti virara koqe nahentive tiavaro, viva naata qovaraiqaina entara aatu kia qeteharo vaira.

²⁶ Nai noqihairo koqe uva ti vaira. Viva vaiinti nahenti nai uva maara qihaaqamakero tiva nimi vaira.

²⁷ Viva koqemakero nai naavuqi variakaqaa raqikiharo kia popoharaitiro, nai kaiqa varatairaqahairo kara varakero ne vaira.

²⁸ Vira vaintaira quaheha nái norara koqeve ti variavaro, vira vaativano nai naata autu voqavata tuahera keharo virara mintima tiro: ²⁹ Airi nahenti koqe kaiqa vare variavaravata, arema vikavata uri aatarakera nai koqe kaiqa vare variaravama variaro, tiro.

³⁰ Vokia nahentika koqe uva ti variava nái qora okara autuara mantaaqake vaira. Nahenti koqe viri vaatavano kia vukai enta variqiro viro vuru taiqa vuanarove. Ne virara virara iriha, Nora Kotira aatu qeteharo vira uva iriqiro vina nahentira autu noraiqama kaate.

³¹ Vi nahentiva koqe okara auti vairave, koqe kaiqa vare vairave, ne virara iriha vira autu noraiqama kaate. Kairamanta ekaa vaiinti nahenti vi nahentirara koqe nahentive tiate.

AISAIAA (Isaiah - Aisaia)

¹ Emosira maaqu Aisaiaava qaqi vaharo taira voqaara tavo uvava maa vukuraqi vairo. „Noravano Kotiva nai uva okara Iutaa vaiinti nahentivata, Ieruharemi vaiinti nahentivata, tiva nimireva, tairakaa mintima keharo Aisaiaara tiva ami vaura.„

Auvuhainaa vaiintinavu Usiavave, Jotamuvave, Ahaasivave, Hesekiaavave, vinavuka Iutaqaa raqiki vau entara Kotiva Aisaiaara tairakaa uva tiva ami vaura.

Noravano Kotiva nai vaiinti nahenti nitu uvara

² Noravano Kotiva mintima tiro:

Naaruvavauvo, are aato vateharama ti uva iriane. Vatavauvo, arevata iriane.

Te raqikuna vaintika, vika vate noruqamavi, kia ti uva iriraiti, nái antuqaqaa ni variavo.

³ Purumakau vika nái qora viraqamake tave variamanta, donkivata nái qova kara nimi vai tanura kankomake tavaarave.

Vika minti variamantavata, ti vaiinti nahenti Isareri vika kia ti kankomake iri tavaraiti, kia ti viraqaqamake tavaavo, tiro.

Noravano Kotiva minti tura.

⁴ Oho, ne voqamake qora kaiqa vare varia vatanaaka variavaro niqaa nora uvavano vairave. Qora okara auti variaka, ne vika kuvuarama taakama variavo. Ne vaaku kaiqa voqamake vare variakave.

Noravano Kotiva ni Isareri Variqavano takuqu kero vaiva vaimanta ne vira qoririmake tauvaqa utu amitaarave.

⁵ Isareritarito, nantihae ne Kotira uva kia iriraiti, nenta antuqa avatareka auti variavo? Kotiva qaiqaa qaiqaa ni ruqutuarire tie, ne mintiaqi vi variavo?

Ne vaireka, qita teqaaqama kaa vaiintira voqaara variavaro ni muntukavanovata kia koqemakero vaimanta variarave.

⁶ Ne vaireka, numuaravano qjataqihairo ita varero ekaa vaata aiqo kauquvata ita kaivaro kia vo vaatavanovata qaqi vai vaiintira voqaarama variavo.

Vo numuara vo numuaravano vira vaataqaa ite vaivar kia vovanovata vira numuara hiqamakero rumpa amitaraitiro, kia vira numuaraqaa marahinavata aqu amitai vaiintira voqaara, ne qoraiqamavi variarave.

⁷ Navutaaka ni vata qoraiqamake, ni vatukavata ni naavu maaqavata iha gumpiarama kaavaro ita virave.

Ne tave variamanta vika ni naaho maata ekaa raru raarumake vare variarave.

⁸ Mpo, navutaaka Iutaa vatuka, vo vatuka vahi autu taiqa kaavaro Ieruharemi vatuka vohaiqavanoqai qaqi vaivo.

Haraara naavuvano *uani* naahoqive, naaqera naahoqive, nariaraa vaintema kero, Ieruharemi vatukavano nariaraama vaivo.

Navutaaka vo vatuka ututuma taantema kero, Ieruharemi vatukavano kia ho nai kahaqiariravama vaivo.

⁹ Mpo, Noravano Kotiva ekaa kempuka vataava kia tinavu vokurauka qaqi kaimanta vauraitiro, quqaama haaru Sodomivata Gomoravata vehiqamavi taiqa vuntemake, tenavuvata vahi autuvi taiqa vuraitiro.

¹⁰ Ne Ieruharemiqi variaka, nora vaiintive, qaqi vaiinti nahentive, ne haaru Sodomiqivata Gomoraiqvata variaka variantemake variavo.

Ho ne aato vatehama Nora Kotira uva iriate. Ne tinavu Variqavano tivatai uvara iriate.

¹¹ Noravano Kotiva niara mintima tivo: Ne vo *ofaa* vo *ofaa* iha quara timite variara virara kia ti hantuqa harivo. Ne sipisipive, vo quara aantauve, vi haikara vahaverave, vare vuru ti iha quara timite variara, vi haikara vi haikarara kia ti hantuqa harivaro vi haikava ti popohama timite vaivo.

Purumakau naati naareve, sipisipi naati naareve, memeraa naati naareve, kia te vi haikarara quaheha vauro.

¹² Nantihae ne vi *ofaara* vi *ofaara* vare, ti Naavu hohaa avutaqi vi ani variavo?

¹³ Te kia vi *ofaara* iriha ni kahaqainarara ti, ne qumina qaiqaavata vi *ofaara* viri ti timitevorave. Ne koqe munta ira iha quarate variava ti aiqini viva qora munta i vairave.

Ne qaqiqai qora kaiqa vare variara kaara ne qaraaka tora qovaraiqaina entarara iriha maara ti variarave, Maara Entaqaa maara ti variarave, vo maara vo maara ti

variarave, vi haikava vi haikava ti voqamakero popohama timite vaimanta te ne minti variara taveha kia quaheha vauro.

¹⁴ Ne qaraaka tora qovaraiqaina entarara iriha maara ti variarave, vo enta kaamateha maara ti variarave, kiama virara virara ti hantuqa harivo. Ekaa vi haikava vi haikava ti nora maara timivarо ti popohaimanta kia te vi maarara vararerave.

¹⁵ Ne nenta kauqu tutukeha ti haare entara kia te ni uva irirerave. Ne vaiinti arukaa naareva ni kauquqaa taatauviro vaira kaara, airi enta ne ti haaraiqevata, te tenta aato tintatarerave.

¹⁶ Ho iriate. Ne nenta avu aato muntuka hiqama kaate. Qora avu aatovanove qora okaravanove niqi vainara vara qaqini ke, kia qaqaavata qora okara autuate.

¹⁷ Koqe okarave, avuqavu ni vai okararave, ne vi okarara vi okarara kankomake iri tavamake, viraqaahai vi okararaqai avataqai vuate.

Nora maaravano vikaqi vai vaiinti nahentika kahaqama nimitaate.

Viga vaintive, tentoqa nahentive, ne vikaqaa koqemake raqiki vaimanta vokika vika qoraqama nimitaivera, ne vika auta ntua nimiteha vika kahaqama nimitaate.

¹⁸ Te Nora Kotika niara mintima ti: Aniqenavu vohaa ruvaaqumavi vaiha uva avuqavu qiare, turo.

Ihu naivaro aarai vankoraiqama kaintema kero, qora kaiqavano ni qoraqama kairave. Te ni hiqama nimitaari ne voqamake takuquvi vaina tavunara voqaara vaivarave.

¹⁹ Ne ti uva iriataa iramanta iriqi vivera, te ni koqema nimitaari ni naahoqi koqe karavano vairamanta vara keha nevarave.

²⁰ Ne te tiva nimiaina uvarara kia antuqa arira ti uva raqa kaivera, navutaaka ani ni aruma kevarave. Te Noravano Kotikama maa uvvara ni tiva nimuro, tura...

2

Naantiara maateraiqama nimitaainarara tura

¹ Emosira maaqu Aisaiaava vauvaro Noravano Kotiva naantiara Iutaavata Ieruharemi-vata vai okarara qovarama keharo vira tiva amura. Vi uvava maantimama vairo:

² Naantiara vo entavano qovaraiqira Nora Kotira Naavuvano vai ainqinava avuni uri aatarakero vairamanta hihai hihai ekaa vo vatanaa vo vatanaaka mini ruvaaqumavi vaireka vivarave.

³ Vi entara airi vo vatanaa vo vatanaaka mintima tivarave: Aniqenavu Nora Kotira ainqinaqaa orunte, Iekopira Variqa Naavuqi vuare. Tenavu mini vuariraro viva nai antuqa vaina okarara tinavu humiqairaqe tenavu vi uvvara iriqi viha vira aaraqaa koqemake vuare, tivaro Saioniqaahairo Kotiva uva maara tiva taiva vo vataini vo vataini vi anianarove. (Saioni = Ieruharemi)

⁴ Vi entara Noravano Kotiva ekaa vo vatanaa vo vatanaaka uva avuqavuqama nimitairamanta, vika koqemake variqi vivarave.

Vi entara vika nái iqoka paipeve vaantaarave varake vi haikaraqohai naaho kaiqa vare haikara autu kevarave.

Vi entara ekaa vo vatanaa vo vatanaaka kia iqoka riqireka auvihehavaa gera iraiti, kia qaiqaa iqoka riqi okarara nai umiqe nai umiqe ivara.

Noravano Kotiva uritarakero vairara tura

⁵ Mpo, ne Iekopira naintivarao, aniqenavu Noravano Kotiva ataama timite vaina aararaqaa koqemake nuare.

⁶ Isareri vika Iekopira naintivarao vahavata, vika vo vatanaaka tontiqamakeha vika qora okara auti variara avataqi vi variara. Kuari avu urinaihainaaka hepi kaiqave, uhi kaiqave, auti varia okarara, Isarerivata vika aanante vi okarara auti variara. Pirisia vika hampi okara auti variara, Isarerivata vi okarara auti variara. Vika minti variara kaara Noravano Kotiva vika qorrima kaira.

⁷ Silvaa orive, kori orive, ohive, iqoka kaarive, vi haikava vi haikava Isareri vataini mpiqaro vaivarao vi haikara kaara ntuvake tavaarirava kia ho vaira.

⁸ Isareri vataini una variqa maraqura/varaha, airi haikavano mpiqaro vaimanta, Isareri vika nái kauquqohai aututaa haikara vika nivuqaa vataini kankakaavi vaiha vi haikarara, Tinavu variqave, ti variara.

⁹ „Isareri“ vika minti variara kaara, vika nutuvano vatainiqama viramanta vika kaurira haika varevarave.

Noravauvo, are kia vika qora okara auti vai uvvara nunka nimitaanerama turo.

¹⁰Oho, vi entaraqaa Nora Kotira mpeqa okaravano takuqi vairava ataa i vairaro ni voqamakero naatu itairamanta ne aiqu autute kante ori onavuqive, vata ntomaviraqive, kukegavi variate.

¹¹ Vi entara nái nutu tuahere vaika Noravano Kotiva vika nutu vara vatainiqama kairamanta vika kaurira haika varaivaro Nora Kotira autuvanoqai uritarakero varianarove.

¹² Noravano Kotiva ekaa kempuka vataava vaharo, viva nai kaama taaina entaraqaa nái nutu tuahere vaikave, nái mahuta ti vaikave, tenavu nora vaiintive ti vaikave, viva vika vika vara vatainiqama kero qoraiqama nimitaanarove.

¹³ Lebanonini vaina *sidaa* katarira, vukai katari koqera viva vi entaraqaa ravantau kairamanta higintivarave. Basaanihainaa katari, kaantunave, oqivave, vi katariravata taiqa kaanarove.

¹⁴ Nora ainqinave, inaara ainqinave, viva ekaa vi ainqinara *ehauruma/humuqu* kairamanta avuqavu vaivarave.

¹⁵ Viva vi entara ekaa vatuka vaantaavuravata, vaantaavura *tauuavata*, rukavu raakavuma aqu kaanarove.

¹⁶ Vi entaraqaa viva ekaa *sipi*, airaira vare vi ani vai *sipirave*, voki *sipirave*, qoraiqama kairamanta taiqa vivarave.

¹⁷⁻¹⁸ Noravano Kotiva qovaraiqina entaraqaa viva vaiintivano ekaa vo okara vo okara auti vaiha nái autu tuahere vaika vara muntuvi vatainiqama kairamanta vika nora kaurira haika varevarave.

Vi entaraqaa una variqa autute haikavavata ekaa taiqa viraro Nora Kotira vira autuvanoqaima uritarakero varianarove.

¹⁹ Oho, vi entara viva himpiro maa vatarata qaki qakima kareva tuviraro Nora Kotira avuhainaara mpeqa okaravano takuqi vairava ataa i vairaro, vaiinti nahenti vika voqamake naatu ite vairamanta vika aiqu autute kante oru ori onavuqive, vata ntomaviraqive, kukegavi vaivarave.

²⁰ Vi entaraqaa vaiinti nahenti vika *silvaa* origohaiive, *kori* origohaiive, autuke vateha tinavu variqave ti vai haikara qaqira aqu kevarave. Vika vi haikara vi haikara vare muntu turuvavanove, kaankaaravanove, vainanainima aqu kevarave.

²¹ Oho, Noravano Kotiva himpiro maa vatarata qaki qakima kareva tuviraro vira avuhainaara mpeqa okaravano takuqi vairava ataa i vairaro vaiinti nahenti vika voqamake naatu ite vairamanta vika aiqu autute kante oru ori onavuqive, vatavano ntomaviraqive, kukegavi vaivarave.

²² Tenavu vaiintivano vairera, maa vataraqaa vahuqa variqi vi qutuarirauka vaunarara ti, tenavu qumina vaiintiara viva homa tinavu kahaqianarove tiarorave.

„Noravano Kotiva vivaqai tinavu ho kahaqiariravama vaivo, turo.„

6

Noravano Kotiva Aisaiaava paropeti kaiqa varaarire tiro vira aarora

¹ King Usiava qutu vu ihiraqi te Nora Kotira tavaunrarave. Te tavauraro viva vurura nai Avuhainaara Taintaqaao oquvi vauvaro vira vukai utavaaqavano ekaa Naavu viraqiqi kovaro vaura.

² Viva mintimakero taintaqaao vaumanta iha ite vau *enseli* vira qiataini vaura. *Enseli* vika vohaiqa vohaiqavano aroka 6navu vatauka vaiha, vika nái aroka taaraqantaqohai nái viri naavumate, qaiqaa taaraqantaqohai nái vaata naavumate, qaiqaa taaraqantaqohai ata vareha ni vaura.

³ *Enseli* vika nai aare nai aare iha tiha, Noravano Kotiva ekaa kempuka vataava vaireva, nai takuqvavave, nai takuqvavave, nai takuqvavave.

Vira mpeqa okaravano takuqi vaiva ekaa vata maata mpiqaviro vaivo, tura.

⁴ Vika minti tivakeha noraiqaake uva ti vauvaro nora origohai Naavu kaqatova qaki qaki uvvaro iha muravanovata Naavu viraqiqi mpiqa vura.

⁵ Mintumanta te tiha, Oho, te taiqa vuariravama vaivo. Te qora vaiintivanoma vauro. Ekaa te tenta noqihai ti vauna uvava qora uvaqai vaivaroi ti hampata varia vaiinti nahentika ti varia uvavavata qora uvaqaima vaivo.

Mintumantavata, vate te tenta avuqohai tinavu Avuhainaara Nora Kotira ekaa kempuka vataara tavauro, ⁶turaro *enseli* vikaiqahairo vovano *ofaa* taintaqaahairo iha ite vau aurira kotaaqohairo raaqukero varero te unanaini ata varero tuvuntero, ⁷iha auri viraqohairo ti noqaa autama kero tiharo, Ho tavaane. Te maaqohai ai no autama kauraro ekaa ariqaa vai uvava taiqama vivo. Are qora kaiqa varaana uvvara Kotiva nunka taiqama kaivo, tura.

⁸ Minti tumanta te vaiha iruraro Noravano *enselinavu* irero tiharo, *Te tarae atitaariraro vuanarove?* *Te tarae vara kaariraro ti uva varero vuanarove?* tumanta te tiha, Te maini vauro. Are ti tititairage te vuare,⁹ turaro Noravano ti tiva timiro tiharo, *Maa uvvara varera vuru vaiinti nahenti maantima kera tiva nimiane:*

Ne airi tataa maa uvvara irihavata, vira okara kia kankomake irivarave.

Ne te Kotika varaaaina kaiqara tavehavata, ne kia vi kaiqara okara kankomake tavevarave. tiro.

¹⁰ Noravano minti tivakero viva tiriara tiharo,

Are vaiinti nahenti avu aato hampiqama kairamanta kia ho iriate. Are vika aato tinta kera, vika avuvata qimpa kairamanta vika popoheha kia ti uva okara kankomake iri tavaate.

Hauri vika ti uva okara kankomake iri, nái qora kaiqa varera tiva qovaramake te unanaini aniqe te vika koqema nimitaari vika koqemake vaivorave, tiro.

¹¹ Ho viva minti tumanta te vira ireha tiha, Noravaubo, te vi kaiqara varaqi vi vuru, tarentae taiqa kararave? turaro viva ti tiva timiro tiharo, *Are ti uva vika tiva nimiqira viraro ekaa vika vatuka vo vatuka vo vatukavano qoraiqama viraro, vika naaho maatavata qoraiqama viraro, vika naavu vo naavu vo naavu kakupuqama viramanta kia vaiintivanovata viraqi vaivarave.* *Vi haikava vi haikava qovaraiqina entarama ai kaiqavano taiqaanarove.*

¹² *Te Noravano Kotika ekaa vi vaiinti nahentika nái vatukaqihai nititama kaari vika nái vatuka ke niarainima vivarave. Vika vimanta kiama vaiinti nahenti naka voqavanovata vi vataraaqa vaivarave.*

¹³ *Vaiinti nahenti taaraiqa qaqi vaivera, te naantiara vikavata taiqa karerave.*

Ho te mintiarirarovata, katari tuqaqihairo aimakau qaiqaa arakero qampiqaintemake, naantiara ti vaiinti nahenti vika qaiqaa qovaramavi airiqamavi vaivarave, tiro.
Noravano Kotiva Aisaiaaara minti tura.

40

Koqe entavano qovaraiqiaina uvvara tura

¹ Ni Variqavano tiharo, Ne ti vaiinti nahenti muntuka kukuqama nimitaate. Ti vaiinti nahenti muntuka kukuqama nimitaivo vika muntukavano qihaaqama viro variarie.

² Ne Ieruharemipi varia vaiinti nahentika kia nitiraiti, qihaaqamake vika tiva nimiiae: Navutaaka ni rumpa taamanta ne qoraiqamavi varia entava taiqama vivo.

Haaru Noravano ne qora kaiqa varaa uvavarara iriharo, viva kia vohaa tataaqai ni ruqufiraatiro, viva taara tataa ni rugutiharo qoraiqama nimitairara tiro, viva niqaa vatai uvvara ekaa nunkakero tauruma nimitaivo, tura.

³ Ho iriate. Uva vovano mintima tivo:

Qumina vataini Nora Kotira aara qerama amitaate.

Aahara vataini aara avuqavu autu amitaivaro tinavu Variqavano vivau vuarire.

⁴ Ne uqitaiqina vatara ntava mqiqa kaate.

Nora ainqinave, inaara ainqinave, teqa kaivaro vatavano avuqavu variarie.

Vatavano otiqete urunte inara *ehauruma/humuqu* kaivaro avuqavu variarie. (Ruki 3:4-6)

⁵ Mintimake vara taivaro Nora Kotira mpeqa okara takuqi vaiva qovarama viramanta, ekaa vataini vai vaiinti nahentika vira tavevarave.

Noravano Kotiva naima vi uvvara tivo, tiro. ⁶ Minti tivakero qaiqaa uvavano mintima tiro:

Are naverai tihara uva vo tiva qoqaiqama kaane, tumanta te tiha, Nana uvae te naverai tivake tirarave? turaro viva tiharo,

Ukauvano inaaraiqaqai variqiro viro vuru aaharaiqama vintemake, vaiinti nahentivata inaaraiqaqai variqi vi vuru taiqa vivarave.

Kaampi/Qinaara iratero koqema kero ataai iharo vuru tamunta viro hiqinti hiqinti intema kero, vaiinti nora autuvanovata vataini tuvi vuanarove.

⁷ Noravano Kotiva uvai vara kaivaro utiharo ukau aaharaiqama kaivaro *kaampi/qinaara* tavavano tamunteharo vataini hiqinti vairave.

Ho ukauvano vahuqa varikero taiqa vintemake, vaiinti nahentivata vahuqa varike taiqe variarave.

⁸ Ukauvano aaharaiqama vivaro *kaampi/qinaara* tavavanovata tamunteharo hiqinti vairave.

Mintivarovata, tinavu Variqa vira uvavano ekaa enta ekaa enta qaqi variqiro vuanarove, tura. (1 Pitaa 1:24, 25)

⁹ Are Saioniqi variaka koqe vakaaka vuru tiva nimi variara vaiintio, are ainqinaqaa oru vahira, maa uvvara vika tiva nimiane:

Are Ieruharemiqi variaka koqe vakaaka vuru tiva nimi variara vaiintio, noraiqaakera naverai tihara maa uvvara tiva qoqaiqama kaane.

Are kia qetaraitira, ekaa lutaatatai vai vatukaraqi variaka tiva nimihara mintima tiane: Ne tavaate. Ni Variqavano mainima vaivo, tiane.

¹⁰ Tavaate. Noravano Kotiva ekaa haikaqaa raqiki vaiva vaiinti nahentiqaa kem-pukaiqama kero raqikireva tuviharo, viva nai ruaruuma nimitai vaiinti nahentika hampata tuvi vaivo.

¹¹ Sipisipi qova nai sipisipiqa koqema kero raqikintema kero, viva nai vaiinti nahentiqaa raqikiqiro vuanaro.

Sipisipi qova nai sipisipi naati ravuku kero kaqa varero viharo vika noka koqema kero aara numiqaintema kero, viva nai valinti nahentiqaa koqema kero raqikianaro.

Noravano Kotiva nai uri aatarakero vairara tura

¹² Hoe vaiinti vovano ekaa nora namari kaqakero nai kauquqi tuataanarove?

Hoe vaiinti vovano nai kauquqohairo naaruva avatamakero tavaanarove?

Hoe vaiinti vovano kokuqi ekaa maa vataraqaa vai vataru ntuva mpiqa kaanarove?

Hoe vaiinti vovano nora ainqinave inaara ainqinave vara kero, *sikeriqaa* hirikero tavaanarove?

¹³ Nai tavave Nora Kotira avu aatoqi vai uvvara iri tavairave?

Nai tavave Nora Kotira koqe avu aato amirave?

¹⁴ Noravano Kotiva hoe vorara tiharo, Mpo, te kia iruna okarara ti humiqairaqe te tavaare, tianaro?

Vovano hoe virara maantima kera avuqavuqama kera nuane tianaro?

Nai tavave vo haika vo haika okarara vira tiva amianaro?

¹⁵ Taqu ataini namari titiqaiqatanta vaira voqara, Noravano Kotiva ekaa vo vatanaa vo vatanaaka taveharo vikara qumina haika variavo, ti vaira. Vikara qumina haika konkoma voqaarama variavo, ti vaira.

Viva ekaa nora namari avutaaqaa inaara vata vairara tiharo, Vira maaravano konkoma maara voqaarama vaivo, ti vaira.

¹⁶ Lebanoni nora nantaqihai ekaa vo katari vo katari ihatova teqake vare viri aqukumate, viraqaa ekaa aantauvahai Kotira iha quara amitaivera, vi *ofaava* Kotira avuqaa kia ho vairaitiro, qumina haikaqaima varianarove.

¹⁷ Ekaa naato vatanaaka nai airitaha vahivata, vika Nora Kotira avuqaa vaireka, taaraiqa voqaara variarave.

Viva vikara qumina haika voqaara variavo, ti vairave.

¹⁸ Kotiva tara voqaantemakero vaivave? Nai nana *maraqura/varaha* autuke vataara voqaarae vaivo?

¹⁹ Vaiintivanu una variqa *maraqura/varaha* autu kero vataivar, vovano *kori* ori kakanairima kero vatairaqohairo vira naavuma tero, *silvaqohai* aututaa *senira* varakero vi haikara *vaahemeha/vaataiqama* amite vairave.

²⁰ Vehi vaiinti vovano kia *korive silvaave* vataiva, viva *maraqura/varaha* autireva iharo, viva kia nteraina katarira varakero tiharo, Hauri te qora *maraqura/varaha* autuke vaaviarama taariraro hiqintuantorave, tivakeharo viva vi kaiqara kankomake tavaai vaiintirara autu timitaane ti vairave.

²¹ Vika mintiavarovata, ne kiae tinavu Variqara kankomake iriavo? Haaru kiae vovano virara ni tiva nimimanta iriarave? Maa vatara autu kero vatai Variqarara ne kiae virara kankomake iriavo?

²² Naaruuvavano vaivar, nai vira vuruvi verantogama kero avuhainaara taintaqaa oquiviro vaiva, „vivama tinavu Variqavano vaivo.“ Vira avuqaa vataini variaka vaireka, nai qumina haika, kainkori voqaara variara.

Vaiintivanu tavuna raira kaintemakero, viva naaruva autukero rairakaira. Vaiintivanu *seri* naavuqi vaireva vira vaaviarama kaintemakero, viva naaruva autukero vataira.

²³ Viva avuhainaauka nora kempuka vatauka vara muntuvi vatainiqamake vaivar, kia vika nutu voqavata vaira.

²⁴ Kuvukanaa utu taivar, tuqavano kia koqema kero vataqi otu vivaro nora uvaivano utiharo vira ravantau kaivaro aaharauqama vintema kero, viva vi vaiintika taiqake vaira. Uvaivano ahaka mare vuqaq aintemakero, viva vika qaqlini varakeharo taiqake vaira.

25 Nai turuaraini takugu kero vai Variqava ni irama nimitero tiharo, Tavave ti voqaantema kero vaivo? Vovano ti voqaantema kero vaiva vairove? tura.

26 Ho ne naaruvaini vuruvi tavaate. Opu makau tavave autukero vatairave?

Vaiinti taruva nai iqoka vaiinti ntita kero vikara mini mini oru variate tintemakero, Noravano entaqi opu makau vika nai nutu ntava keharo mini mini vuru ke vaimanta ite variara.

Viva ekaa kempuka vataava vairara tiro, vikaqihairo kia voqavanovata kakakima vi vaira.

27 Isarereri vatanaakao, nantihae ne Iekopira vaintivara vaiha nuntu naantu ti variavo? Ne tiha, Mpo, tenavu nora maaraqi vauraro Noravano Kotiva tenavu qoraiqama vi vaunara kia tave vaivo.

Vokiaka kia avuqavu okarara iriraiti, vika tinavu qoraiqama timite variavarovata, tinavu Variqavano tinavu qaqlira kero kia tinavu kahaqi vairave, ti variara.

28 Ne kiae virara kankomake iriarave? Haaru kiae vovanovirara ni tiva nimimanta iriarave? Noravano Kotiva vaireva, viva ekaa enta ekaa enta qaqlira variqiro vi vai Variqavama vaivo. Viva ekaa haikave vata maatave autu kero vataivave. Vira avuvano kia tauntairaro viva kia popoharaitiro, viva kempukavano variqiro vuuanarove. Kia vovanovata vira avu aatoqiraara ho iri tavaanarove.

29 Vaiinti nahenti kempukavano taiqa vimanta variaka viva vika kempukaiqama nimite vairave.

Viva ququerara vaiinti nahenti kahaqama nimite vaimanta vika kempukaiqamavi ho vairave.

30 Quvaaraa vaintive, qaraaka vaiintive, variqi vi vaivaro vika kempukavano taiqa viramanta vika popohama vivara. Vikavata kuntavaivaima vare kaavuntivara.

31 Vika mintimake vaivarovata, vaiinti nahenti Nora Kotirara viva tinavu kahaqiaravave ti variaka vaivaro vika kempukavano qaraakaiqama viramanta ho vaivara.

Memoravano kia vukaari utiraitiro, qihaaqama kero aroka rairakero ni vaintemake, vika koqemake variqi vivara.

Vika kantamaqi viha kiama aanaraiqvvara. Vika aara niha kiama popohevara.

52

Noravano nai vaiinti nahenti qaiqaa ntita kaainarara tura

¹ Ieruharemivaauvo, himpuane. Are himpira kempukaiqama kera variane.

Ne Kotiva nai kaama tai vatukaraqi variaka, ne koqe utavaaqa nonkute variate. Ho iriate.

Kia Kotira uva iria vatanaakave, kia kotataiqamake variakave, vika kia qaiqaa Ieruharemipi origetevarave.

² Ieruharemivaauvo, himpira konkomaavano ariqaa vainara rintatima kera nena avuhainaara taintaqaa oquvuane.

Ai rumpataas *senira*, nena auntaqihairaa ekaa qaqlira varakera himpira variane.

³ Noravano Kotiva nai vaiinti nahenti mintima tiro: Te haaru navutaakara kia koqaa naariraiti, ni qaqlira kauquqi kauramanta rumpataarave. Vira voqaantemake te kia vika koqaa nimiraiti, vika kauquqihai ni qaqlira kuvantu nimitarerave, tura.

⁴ Noravano Kotiva ekaa haikaqaa raqiki vaiva tiharo, Haaru ti vaiinti nahenti katu vare Isipini vahuqa vaireka vuara. Vira naantiara Asiria vika ti vaiinti nahenti rumpa vare vikaqaa nora maara vataarave.

⁵ Mintiamanta qaiqaa Babironivata vohaa qaramake kia ti koqaa timiraiti, ti vaiinti nahenti rumpa vare vuru kaarave. Vika ti vaiinti nahenti qaqlira qoraiqama nimiteha ti hutu qoraiqama timite variarave.

⁶ Ho yo enta anintairaqtte vi entaraqaa tenta autu qoqaiqama kaari ti vaiinti nahenti ti kempuka autuara kankomake irivarave. Vi entara te ekaa haikara vika tiva nimunarara iriha tiha, Ike, quqaama Noravano Kotiva naima vi uvvara tinavu tiva timirave tivarave. Noravano Kotiva minti tura.

⁷ Aiqina vau koqe vakaaka vare aniaina vaiintira vaiinti nahenti vira voqamake quahama amitevara.

Vi vaiintiva maateraiqamake vai uvvara Ieruharemipi variaka tiva nimireva mintima tiro:

Ne kuvantuvu vai entavama anintaivo. Ni Variqavano ni ruaruama nimiteharo, niqaa koqema kero raqikiqiro vi vaivo, tianarove.

⁸ Ho iriate. „Vo enta“ vatukaqaa maimaraara raqiki varia vaiintika voqamake quaheha naverai tivarave.

Vi entara vika nái avuqohai Noravano Kotiva Saionini orurantero tuvuainara tavevarave.

⁹ Ieruharemio, arevata ai avutaqi naavumaaqa rukavu raakavuma kaakavata, ne quaheha aakara nteha ihi tiate. Noravano Kotiva Ieruharemi kuvantu kero, nai vaiinti nahenti maara taiqa nimitero, vika muntuka kukuqama nimitaanarove.

¹⁰ Vi entara ekaa vata maata vaika niuvuqaa Noravano Kotiva nai mpeqa okara vira qoqaiqama kairamanta vika tinavu Variqavano nai vaiinti nahenti ruaruuma nimiteharo navutaaka kauquqihairo ntita vuru kaainara tavevarave.

¹¹ Ne ekaa Babironi mini ke aniate. Ne ani vaiha rauriha variate. Hauri ne kia kotataiqamake vaina haikara utu varevorave.

Haaru Kotira Naavuqiraa haika Babironini vare vuru kaara, *kaapuve* tanuve vo haikave, ne kotataiqamake vaika vi haikara vi haikara Babironiqihai qaiqaa vare vuru Ieruharemini kaate.

¹² Ne Babironihai kia paparuqamake aniate. Vaiintivano ruqemakero kante aninatemake, ne anivora.

Noravano Kotiva naima ni ntita varero avuni vuanaro. Ni Isarerri Variqavano ni naantiaraini anikavata antua nimitaanaro.

Kotira Kaiqa Vaiintivano maara varaainarara tura

¹³ Noravano Kotiva tiharo, Ti Kaiqa Vaiinti viva koqema kero ti kaiqa varaqiro viviro, vuru taigama kaanarove.

Vaiinti nahenti vira autu tuaheraivarо vira autuvano uritara keroma varianarove.

¹⁴ Vokika vira anomake qoraiqama amitaivarо vira viri vaatavano kia vaiinti viri vaata voqaara vairamanta vaiinti nahenti vira tave, vira aatu qeteha mpo ike tivarave.

¹⁵ Vika minti tihavata, vo enta vika vira taveha ravukuvi kauqu runkinkiri i vaimanta, avuhainaa vaiintinavuvata vira avuqaa vaiha, uva tirare ti, kia ho uva tivarave.

Vi entara vovano kia vika tiva nimiaina haikara vika tavevarave. Vika tota kia iru uvvara kankomake irivarave, tiro. Noravano Kotiva minti tura.

53

Kotira Kaiqa Vaiintiara voqavata tura

¹ Tenavu vakaaka vika tiva nimuraro, nai ta vaiintivave vikaqihairo tinavu uvvara quaaeve tirave?

Nai tavave vi vaiintira taveharo virara Nora Kotira kempukavano viraqi vaivo, tirave?

² Katarivano aahara vataqi tuqa aratero qampiqaintema kero, vira Kaiqa Vaiinti viva Nora Kotira avuqaa noruqama viro vaira.

Vira viri vaatavano vaireva, kia koqe viri vaata vairaitiro, kia avuhainaa vaiinti viri vaata voqaara vaimanta, tenavu vira tavauraro kia tinavu muntukavano virara vaimanta vaunara.

³ Vaiinti nahenti vira nunurama amiteha vira qoririma amitaara.

Vi vaiintiva variqiro vi vaivaro vira muntukavano qoraiqivaro viva airi maara varaqiro vi vaira.

Vaiinti nahenti kia vira tavaataa imanta vika nái viri kukeqa teha vira tauvaqa utu amitaara. Tenavu virara qumina vaiintivanoma vaivo tivakeha vira avu *rekaihai/aukihai* taveha, vitare vunara.

⁴ Vika vira mintimake qoraiqama amitaavarovata, vi vaiintiva tinavuqi vai maarara varakero naiqaa vataira. Tinavu muntuka qoraiqi vairave, aihavi vairave, viva tinavuara iriharo nai vi maarara varaira. Viva mintirara tenavu tiha, Huviqorave. Kotiva vira nai qora kaiqa kaarama mintima keharo vira ruquti vaivo, tunara.

⁵ Tenavu minti turarovata, tenavu Kotira uva raqakunara kaara vira vaata raqonta kaarave. Tinavu vaagu okara kaara vira kaavu umiqake vataarave.

Tinavu muntukavano paru i vaira koqemake variqi vuate ti, vira qorahaa ruqutuke vataarave.

Vira vaata teqa taaqama kaaraqaahai tenavu koqemavi vaunarave.

⁶ Sipisipinavu nái antuqaqaa ni variantemake, ekaa tenavu vohaiqa vohaiqavano tentanavu antuqaqaa ni vaunara.

Noravano Kotiva tentanavu qora kaiqa varauna uvvara tintanavuqaa vataataara vaivarovata, viva vi uvvara varakero nai „Kaiqa Vaiintiqa“, vataivarо varairave.

⁷ Vika vira kaiqa vaiinti qorahaa ruquti variavarovata, viva kia uvavata tirave.

Sipisipi naati aru kareka ravaaqavu vare vuru kaantemake, vika vira vitavare vuru kaarave. Sipisipi kaahi toqe vaivaro evaara vaintemake, vika vira Kaiqa Vaiintivata qoraiqama amitaavaroo viva kia uvavata tirave.

⁸ Quminaiqamake vira ravaaqavuke vare vuru kaavaro, svano vira arukaate timanta vira vitavare vuru arukaarave.

Vaiinti nahentiqihai kia vovanovata kankoma kero viva qutu vuaina okarara irirave. Vaiinti nahenti qora kaiqa vare varia uvara taiqa nimitaare tiro, viva qutu virave.

⁹ Viva kia qora kaiqa voqavata vararaitiro, kia una uva voqavata tiraitiro vaimanta, vika vira aruke, *kamaanira* uva raqakaa vaiintika aruke quntama taantemake, vira quntama taarave.

Viva qutu vimanta vira vaata vare airi airaira vatai vaiintira quntare iaraqi vuru vira vaata vataarave.

¹⁰ Noravano Kotiva mintima tiro: Te vaiinti nahenti qora kaiqa vare uvara nunka nimitaariira aarava ho variarire ti, te tenta Kaiqa Vaiinti vara kaariraro viva vaiinti nahentiara iriharo nora maara vareharo vuru qutu vuanarove.

Viva *„qaiqaa,* airi enta variqiro viharo tavairamanta naantiara vira vaintivara airima vaivarave.

Mintima kero viva te Noravano Kotika amiaina kaiqara koqema kero varaqiro vuanarove.

¹¹ Ho ti Kaiqa Vaiintivano mintiakero nora maara varaqiro vuaina entava taiqa viraro viva te kia quminaiqamake qutu vunarave tivakeharo voqama kero quahaanarove. Ti Kaiqa Vaiintivano avuquavu ni vaiva, viva ekaa vaiinti nahenti qora kaiqa vare uvara varakero naiqaa aqu varero qutu virage te vira kaiqarao ti, vika uva nunka nimirarerave.

¹² Qora kaiqa vare variaka aruke variantemake, vika ti Kaiqa Vaiinti aru kaivaro viva vaiinti nahentiara iriharo qutu vuataa iraro qutu vuanarove.

Viva mintima kero qutu virage te vira nora autu amiariraro viva nora vaiintinavuve, kempuka vaiintinavuve, vika avutaini nora autu vataavama varianarove.

Ti Kaiqa Vaiintivano airi vaiinti nahenti qora kaiqa vare uvara, naiqaa vara aqu varero, vikara iriharo ti haareharo vika uva nunka nimitaane tivakero vuru qutu vuanarove, tiro. Minti tura.

54

Ieruharemi vatukavano qaiqaa nora vatuka variainarara tura

¹ Noravano Kotiva mintima tiro: Ieruharemo, are *naahiaro/qurura* nahenti voqaraa variarava himpira ihi tiane.

Are kia nahentivano vainti vatareva iharo ke ke tintema kera tiraitira variarava himpira naverai tihara quahaqira vuane.

Are vairamanta ai vaintivara airitahaa vaiha, vaatiqaa vai nahentira vira vaintivaravata naataara kerara tira, are quahehara ihi tivaqira vuane.

² Naantiara ai vaintivara airitahaa vairara tira, are nena *seri* naavu voqavata tomaqa kairaro noraiqama vuarire. Kia inaaraiqa tomaqa karaitira, noraiqaakera tomaqa kaanerama turo.

³ Naantiara ai vatukaqi vaika, vika airiqamavi ekaa mantaraini raapamavi vaivarave.

Vi entara vika vo vatanaao vo vatanaaka nititama keha, vika vata varevarave.

Maa entara nuquhiqamaviro vai vatukara, vi entara vika vi vatukara vi vatukaraqi ani variqi vivarave.

⁴ Ieruharemo, kia qetaane. Are kiama qaiqaa kaurira haika varenarave. Kiama vovano ai autu qaiqaavata vatainiqama kaanarove.

Are haaru qaraaka vatukavano variaramanta ai avutaqi variaka hampi kaiqa varaara kaara are kaurira haika varaanara are vira tauruma kenarave.

Navutaaka ani ai avutaqi variaka rumpa vare vuru vo vataini kaavara are ehaara nahenti voqaraa nenaraa kia koqema kera varianara, virara are kia qaiqaa irinarave.

⁵ Ai autukero vataiva vivama vi entara ariqaa raqikianarove. Vira autu Noravano Kotiva ekaa kempuka vataavave.

Vaiintivano nai naataqaa koqema kero raqikintema kero, viva ariqaa koqema kero raqikiqiro vuanarove.

Isareru Variqavano takuqu kero vaiva, vivama ai ruaruama amitaanarove. Viva ekaa vata maataqaa raqiki vai Variqavama vaivo.

6 Isarerio, qaraaka nahenti vira vaativano qaqlira kaira voqaarama ne variavo. Nai vaativano vira qoririma kaivaro vira muntukavano qoraiqivaro noraiqama kero ike mpo tiharo vaintema ke, ne variavo.

Ne mintimake variavaro Noravano Kotiva ni Isarerio qaiqaa naarama kero tiharo,

7 Mpo, te inaara entaqai ni qaqlira kaunarave. Ti muntukavano voqamakero niara vaimantara ti, te qaiqaa ni naaramake ntitarerave.

8 Niara ti arara itaimanta te inaara enta ni tauvaqa utu nimitaunarave. Ho ti muntukavano niara ekaa enta vairara ti, te qaiqaa niara aaqurihamma nimirerave, tiro. Noravano Kotiva ni ruaruuma nimite vaiva vi uvvara tura.

9 Minti tivakero viva tiharo, Haaru Noaava vai entara te tenta kauqu ainqiqa aquke tiha, Te kia qaiqaa maa vataru huvura namariqohai qoraiqama karerave, tunarave.

Ho vatevata te vohaa qaramake kauqu ainqiqa aquke tiha, Te kia qaiqaa niara arara itairae kia ni qaiqaa nitih qoraiqama nimirerave, turo.

10 Ho nora ainqinavanove inaara ainqinavanove rapatutiro tuvirarovata, ti muntukavano niara vairava kia taiqa viraitiro, ekaa entama kempukaiqama kero varianarove.

Tenavu vohaa vaiha uva tiva taatauke tiha, Ne naantiara maateraiqamake vaivarare tura uvvara, te kia qaqlira karerave, tiro. Noravano Kotiva niara aaqurihamma nimite vaiva vi uvvara minti tirave turo.

Ieruharemi qaraakaiqama kaainarara tura

11 Noravano Kotiva mintima tiro:

Mpo, Ieruharemo, aaronavaano qoraiqama kaintemake, navutaaka ai qoraiqama amitaavara are qoraiqamavi variararo, kia vovanovata ai muntuka kukuqama amitaarirava vairave.

Ho te vo enta vo ori vo ori takuqinara varake vataqaa vuqite, viraqohai vi vatukara qaiqaa autu karerave.

12 Te takuqi vaina orira varake viraqohai ai vaantaavura autuke, naare ori voqama kero takuqi vainara varake viraqohai ai vaantaavura uritarakero vainara voqaa voqaa autu amite, voqamake aera aera i vaina orira varake viraqohai vaantaavura qenti autu amitarerave.

13 Ieruharemo, te Noravano Kotika, tentavano ai avutaqi vaika tenta okara numenthe kahaqiaro vika koqemake variqi vivarave.

14 Ho ne avuqavu okara autuqi viha, kempukaiqamake vaivarave.

Ne mintiaqi vivaro kia vovanovata ni vara muntuviqama kero ni qoraiqama nimiriraro, kia aatu itaaina haikava niqi qovaraiqiramanta ne koqemake variqi vivarave.

15 Vokika ni hampata raqireka anivera, ne kia tiriara tiha, Viva vika nititaimanta aniaovo tiate. Nai taukae ni hampata raqireka anivera, te vika ni kauquqi kaari ne vika naatara kevarave.

16 Auvihelhavaa auti varia okarara tave variaka, te vika autuke vatauraukama vauro. Te vi vaiintika avu aato nimi vauramanta vika ihavano voqama kero ite vairaqui *aini* untake ruqutu keha iqoka paipeve vo auvihelhavaave auti variarave.

Vika vo vatanaaka vehi autu taiqa kaate ti, te tentavano iqoka vaiinti vika autuke vatauraukama variavo.

17 Te mintimake autuke vataunarara tiro, vika aututaa auvihelhavaava kia voqavanovata ni qoraiqama nimitaanarove.

Niqa una uva oqike ti vai vaiintika uvavano kia ho aru vuanarove.

Te Noravano Kotika mintimakeha tenta kaiqa vaiinti nahentiqaa koqemake raqiki variari, vika iqoka ho aatarakeha vaivarave, tiro. Noravano Kotiva vi uvvara tura.

55

Kotiva nai vaiinti nahenti koqema nimi taainarara tura

1 Noravano Kotiva tiharo, Ne namari naata irauka, ne te unanaini ani namari naate.

Ne kia monu vataaka te unanaini ani kia monu aqu kairaiti, qaqi kara varaaate.

Ani *uainivata memeraa*, naamavata kia koqaa vainara qaqlira varaaate.

2 Hauri qumina kararaqaa nenta monu aqu kevorave. Ne kaiqa vareha varataa monura vi kararaqaa aqu kaivaro, qaqlira ni antuqa aruantorave.

Ne tiva iriha te tianante iate. Ne mintihama hiakaa i karara namaqi vivarave.

3 Ne te unanaini ani vaiha aato ti timiqe te uva tiari ne vi uvvara irihama koqemake variqi vuute.

Ne aniqe te ni hampata uva tiva taatauke vataariraro vi uvava ekaa enta variarire.

Ne mintiqe te kauqu ainqiqa aqukeha ni kaivaqara Devitirara tunantemake, niaravata muntuka vateha ni aaqurihamma nimitaare.

⁴Ti kempuka tavaate ti, te Devitira noraiqama kauraro viva nora vaiintivano vaiharo, vo vatanaa vo vatanaakaqaa raqikirave.

⁵Te Noravano Kotika ni Isarerri Variqavano takuquke vaurauka vaihamma, te vi entara nivata noraiqama kaariraro ni autuvano nora autu vairamanta ne kia tave vatanaaka naaraimanta, ekaa vika ne inaini kantema anivarave, tiro. Noravano Kotiva vi uvvara tura.

Maa entara Nora Kotira aaraate tura

⁶Naantiara ne kia ho Nora Kotira ranteva variainarara ti, maa entara viva ni aumanto vairara irihama ne vira aaraate.

⁷Ne qora kaiqa vare variaka, ne qora kaiqa qaquirake, kia qaiqaa qora kaiqa varerara aatoqi iriraiti, Noravano Kotiva inaini aniate.

Ne mintivaro tinavu Variqa viva ni aaqurihama nimiteharo vaakama ne qora kaiqa vare uvara nunka nimitaanarove.

⁸Noravano Kotiva mintima tiro: Tenta aatoqi iri vaurava, kia ne vaiinti nahenti iri variantemakero vairave. Te auti vauna okaravavata kia ne auti varia okarara voqara vairaitiro, nai vo qarama kero vairave.

⁹Vatavano miani vaivaro naaruvavano nai virini vaintema kero, te auti vauna okarava ne auti varia okarara aatarakero nai uritarakero vairave, te aatoqi iri vaurava ne iri variaravata aatarakero uritarakero vairave.

¹⁰Aaquvano ntuvu kaivaro kiama aaqu namarivano qumina tuvurantero naaruvaini viraitiro, vi namariva avuni vata putaiqama kaivaro naaho koqema kero qampiqeharo kara vaimanta vaiintivano qantu keha ne variarave. Vika voki karara varake neha, vokira kuvu varakeha uti variarave.

¹¹Ho aaquvano ntuvu kaintema kero, te tiaina uvava kia te iainanaini qumina oturantero uriraitiro, viva avuni te tainantema kero ianarove. Ti antuqavano mintiakero qovaraiqiane tiarira haikava vi haikavama qovaraiqianarove.

¹²Ti uvavano mintiainarara ti, ne naantiara quaheha Babironi kevarave. Vi entara te ni ntitake aniariraro ni muntukavano qihaaqiramanta ne anivarave.

Vi entara nora ainqinave, inaara ainqinave, vika ni quahama nimiteha ihi tivarave. Katari vikavata kauqu ruqutiba niara quahevarave.

¹³Vate auqu vai haikava qampiqe vairaqaqaa naantiara toqukeravano koqema kero qampiqaanarove.

Vate qumina nimirivano qampiqe vairaqaqaa naantiara okuvera katari voqavama qampiqaanarove.

Ekaa entama vi katariva vi katariva koqemakero vairamanta vaiinti nahenti vi katarika taveha, te Noravano Kotika kempuka kaiqa vara nimitaainarara kia tauru karaiti, vika virara qaqi iriqi vivarave, tiro.

Noravano Kotiva minti tura.

IEREMAIAA (Jeremiah - Jeremaia)

Kotiva nai uva tiva qoqaiqiarire tiro, Ieremaiaara aarora. Vi entara Ieremaiaava qaraaka vaiintivano vaiharo King Josaiava Iuttaaqaa raqiki vau entara Kotira uva 18 ihира vaiinti nahenti tiva nimiqiro viro, qaiqaa King Joahaasiva raqiki vau entara 3 torara vaiinti nahenti uva tiva nimiqiro viro, qaiqaa King Jehoiakimiva raqiki vau entara 11 ihира vaiinti nahenti uva tiva nimiqiro viro, qaiqaa Jehoiakiniva raqiki vau entara 3 torara vaiinti nahenti uva tiva nimiqiro viro, qaiqaa Sedekaiava raqiki vau entara 11 ihира vaiinti nahenti uva tiva nimiqiro vura. (627 BK – 586 BK = 40 ihи)

Vi entara Iuttaa vatanaaka una variqa, vo variqa vo variqa avataqi viha qora kaiqa vo kaiqa vo kaiqa vare vauvaro Ieremaiaava qaiqaa qaiqaa vikara tiharo, Ne qora aara kia qaqira kaivera, Noravano Kotiva vo vatanaaka qaqi kairamanta vika Ieruharemivata lutaata vata maatavataqoraiqama kevarave, tura.

Ho Ieremaiaava qaqi vau entara viva Kotira uva tiva nimi vauva vaura. Babironi vika King Nebukanesavaa nai iqoka vaiinti hampata Ieruharemivata vatuuka aatara kero, Kotira Naavu ihaqohairo tatoqa kero, Ieruharemivata vantaauravata rukavu raakavuma kora. Babironi vika Iuttaa vatamaata qoraiqamake, Iuttaa hini kuka aruke, hini kuka rumpa vare Babironi vataaini vuru kora.

Ieremaiaava naantiara Iuttaa vika Babironiqhai orurante nai maaqaini ani uvaravata vika tiva nimura.

Ho Ieremaiaava nai navunaaka Kotira uva tiva nimi vaumanta vika vira uva kia iriataa umanta kia irura. Vika vira naarahama amiteha, vira qoraiqama amite vauvarovata, Ieremaiaava qaqiqai Kotira uva vika tiva nimi vaura. Viva Kotirara tiharo, Ihavano ite vaintema kero, ai uvavano ti avutaqi itaqiro vi vaivo. Te ai uva kia vika tiva nimiraiti, evaara vairerave tiarera, kia te ho evaara vairarave, tura.

¹ Maa vukuraqi Kotiva uva qoqaiqama kero Ieremaiaara tiva amu uvvara, vo uva vo uva qara ntuvatova vairo.

Ieremaiaava Hilkiara maaquvano vauvaro Hilkiava Benaminira vata Anatoti vatukaini Kotira kaiqa vara amite vaukaqihairo vovano vaura.

² Hoqarero Emonira maaqu King Josaiava 13 ihinavuara Iuttaaqaa raqiki vau entara Noravano Kotiva nai uva qoqaiqama kero Ieremaiaara tiva amura.

³ Vira naantiara Josaiara maaqu King Jehoiakimiva raqiki vau entara Noravano qaiqaa voki uvaravata Ieremaiaara tiva amiqiro uvuvaro Josaiara maaqu vo, King Sedekaiava 11 ihира raqiki vau entava anintomanta, vi ihira 5 toraqaa navutaaka ani Ieruharemipi vau vaiinti nahentika naatarake rumpa vare, vo vataaini vuru komanta mini vaura.

Kotiva nai uva tiva qoqaiqiarire tiro, Ieremaiaara aarora

⁴ Noravano ti Ieremaiaakara tiharo,

⁵ Te ai nora auhaqi kia ai autu kauna entara ai kaama taunarave.

Ai nova kia ai vatatai entara te ariara viva ti uva qoqaiqama kero vo vatanaaa vo vatanaaka tiva nimianarove tunararave, tiro.

⁶ Minti tivera te vi uvara iri aqao ti, Mpo Noravauvu, are ekaa haikaaqaa raqiki variaravave. Te kia uva tiva qovaramake varia okarara kankomake irunararave. Te qaraaka vaiintima vauro, turarovata ⁷Noravano tiriara tiharo, Kia are nenara te qaraaka vaiintima vauro, tiane. Te vo vatanaaa vo vatanaaka varianaini ai atitaarirara are mini minima vuane. Te nana nana uva are vika tiva nimiane tiarirara are ekaa vi uvvara vika tiva nimiane.

⁸ Te ai vataake vaiha ai ruaruama amitaainarara tira, kia are vika aatu qetaane. Te Noravano Kotikama vi uvvara turo, tiro.

⁹ Minti tivakero Noravano nai kauqu tutukero ti noqaa vatero tiriara tiharo, Ho tavaane. Te tenta uva ai noqi vatauro. ¹⁰Vate te ai noraiqama kaarirara are ti autuqaa vo vatanaaa vo vatanaaka ti uva tiva nimiane.

Tuqa hampata ravaau kaantemake, te vika qoraiqama kaainararave, vika naavu maaqa ravantiaqa aqukaainararave, are vika tiva nimiane.

Vika vehiqama virararave, navutaaka vika naatara kerararave, are vika tiva nimiane.

Vika naantiara qaiqaa koqemake vairararave, vika naavu maaqa qaiqaa kaqake vairararave, are vika tiva nimiane. Noravano Kotiva minti tura.

Kotiva taara haika Ieremaiaara umiqora

¹¹ Minti tivakero Noravano ti irero tiharo, Ieremaiao, are nana haikae tavaara? tumanta te tiha, Te *amoni* katari kaarama tavaaro ti.

¹² Te minti turaro Noravano qaiqaa tiriara tiharo, Are avuqvavu tiaro. Ti uvavano ququa vi vau variarire ti, te vira aituti vauro, tiro. *

¹³ Qaiqaa Noravano ti irero tiharo, Are nana haikae tavaara? tumanta te tiha, Te tavauraro *noti* mantaraini nora kure vovano vaivaroviraqni namari nti vaivo. Vi namariva ntua varero maa mantaraini virivi rauru kareva auti vaivo, ti.

¹⁴ Minti turaro viva tiriara tiharo, Vi namariva ntuaqvi anintemta kero, *noti* mantarai-hairo maa vataraqaa variaka vehi autu taiqa kaarirava anianarove.

¹⁵ Te Noravano Kotika ekaa *noti* mantaraini varia watanaka naarama kaari vika maini anivarave. Avuhainaaka vika nái iqoka vaiinti hampata maini aninte, nái avuhainaai tainta Ieruharemi vaantaavura qentiana arate vi vatukara ututumate vaivarave. Vika Ieruharemi vaantaavura ututumate, voki vatukara Iutaini vainaravata ututuma tevarave.

¹⁶ Ti vaiinti nahenti ti tauvaqa utu timite, vika nái una variqa autuke vataa haikara *ofaa* autu nimiteha vikara quahama nimite variarave. Vira kaara te anomake vika qoraiqama nimirarerave.

¹⁷ Ho are himpira geramatera variane. Te ariara vi uvvara vi uvvara vika tiva nimiante tiarirara are ekaa vi uvvara vika tiva nimiante. Kiama are vika aatu qetaane. Are vika aatu qetairera, te anomake qetara haika ai amiarirara are vika nivuqaa anomakera getenarave.

¹⁸ Ho Ieremaiao, iriane. Te vate ai kempukaiqama kaarirara are kempukaiqamake aututaa vatukara voqaara vainarave. *Aini pohi* arataara voqaara, are paama tivakera vainarave. *Baraasiqohai* vaantaavura autu taavaro kempuka vaira voqaarama, are kempukaiqama kerama himpira vainarave. Are mintia kera vairamanta Iutaa avuhainaai vaiintive, vika qiata vaiintive, ti Kotika kaiqa vara timite varia vaiintikave, vaiinti nahentive, ekaa vika vika kiama ho ai vara muntuviqama kevarave.

¹⁹ Ekaa vika vika ai navutaiqihia kia ho ai aatarake ai vara muntuviqama kevarave. Te tentavano ainti vaiha ai ruaruama amitaainarave. Te Noravano Kotikama minti turo, tura.

2

Isareri vika Kotira tauvaqa utu amitora

¹ Noravano Kotiva vo uva ti tiva timiro tiharo, ² Oruntera maa uvvara Ieruharemiqi variaka tiva nimiramanta iriate:

Isarerio, ne haaru hoqare qaraaka vaiinti nahenti vaiha ti Nora Kotikara noraiqaaake iriarara te iritaunrarave. Qaraaka nahentivano nai vaatiara muntuka vataintemake, vi entara ni muntukavano tiriara vaimanta ne aahara vataini kia kara ututaa vataraqaa niha ti tivataqii amiarave.

³ Vi entara ne Isareri ti Nora Kotika vaiinti nahentiqai variarave. Avuni aquitai karara koqera voqaara ne ti vaiinti nahenti koqeka variarave. Ekaa vo vatanaaka ni qoraiqama nimitaaka te vikaqaa uva vatauramanta vika qoraiqama vuarave. Te Noravano Kotikama turo, tiro.

⁴ Minti tumanta te qaiqaa vaiinti nahentiara tiha, Ne Iekopira naintivarave, ne Isarerira naintivarave, ne Noravano Kotiva ti uvvara iriate. ⁵ Noravano Kotiva niara mintima tiro:

Nana kaarae ni kaivaquaka ti tauvaqa utu timite, hampi aaraqaa vuarave? Vika qumina haika una variqa aututaara avataqii vivi, vikavata quminaqama vuarave.

⁶ Te vika Isipiqhiai ruaruama nimitaurauka vauramanta vika kia tiriara noraiqaaake iriraiti, kia ti haaraarave. Te vika ruaruama nimiteha Isipiqhiai ntita vare, kia karavano ho qampiqai vataraqaa ntita vare anunrarave. Vi vataraqaa nuqqaai vaivaroviraqna nora onkaive, *ruvuve/mpumpive* vaivaroviraqna ntirave. Vi vataava konkira ari vainaini vaimanta kia vo kiaka vi vataraqaa vi aniraiti, kia nái naavu maaqa kaqate variarave.

⁷ Te vi vataroviraqna ntita vare ani, vuru koqe vata vainaini kaunrarave. Vikara koqe kara utuke naate, turamanta vika te nimuna vataroviraqna nimirarerave. Vika qora kaiqave qora okarave auti variaravaro ti vata viva qoraiqama virave.

⁸ Ti kaiqa vara timitaaka kia ti Nora Kotikara noraiqaaake iriraiti, vika ti uva maara vaiinti nahenti tiva nimiataara vaimanta kia tiriara kankomake iriarave. Qiata vaiinti vika kia ti vevaaraini vaireka auti variarave. Paropeti vaiinti vika una variqa Baalira

* ^{1:12:} Hiparu uva: Amoni katari kaara: shaked; aituti: shoked

autuqaa vaiinti nahenti uva tiva nimiha, vika una variqa *maraqura/varaha* quahama nimitaamanta vi haikauka kia vika ho kahaqiarave.

⁹ Mintimake ne Isareri qora okara auti variavera te Noravano Kotika qaiqaa niqaa uva vatarerave. Te niqaavata naantiara ni naintivara vikaqaavata uva vatarerave.

¹⁰ Ne kuari avu ruhunkinaini *airaani* vo Saiparusini orunte tavaate. Ne vokiaka kuari uruntainaini Arebia vataini orunte ne vika vika okara tuantike tavaate. Vi vatanaa vi vatanaaka kia ne qora okara auti variantemake, auti variarave.

¹¹ Vika variqa una variqa variamantavata, vi vatanaaka kia nái variqanavu qaqrake oru vo variqanavu tinauvu variqave ti variarave. Vika minti variamanta ti vaiinti nahenti vika ti nái Variqa ekaa kempuka vatauka qaqrake, una variqanavu kia ho vika kahaqika naare variarave.

¹² Oho, naruvavauvo, vika qora okara autuara kaara are oho oho tivakehara qetehara variane.

¹³ Ti vaiinti nahenti qora okara taaraqanta ti autu timitaarave:

Te qaqi variqi vi namarira kaqa nimi vaurauka vauramanta vika ti qoririma timitaarave.

Vika ori vauruke namari *taani* voqi voqi autuke vatovaro vi haikava tairi vuvaro namarivano viraqihairo ntava vurave.

Isareri nái okara kaara qoraiqama vura

¹⁴ Isareri vika kia rumpataaka voqaara variamantavata, navutaaka vika rumpataamanta vika paanaa kaiqa vaiinti nahenti variara.

¹⁵ *Raionivano noraiqaakero* uva tintemake, vika navutaaka noraiqaake aakara nte variara. Vika Isareri naaho maata qoraiqama nimite, vika vatuka, vo vatuka vo vatuka iha qumpiarama taavarо kia Isareri voqavanovata vi vatukaraqi vaivarо qumina naantaaka ntira.

¹⁶ Isipi iqoka vaiinti Memfisi vatukaqihaiive, Tapanesi vatukaqihaiive, ni Isareri qiaata rukavu kaarave.

¹⁷ Oho, Isarerio, nenta qora okara autuara kaara ne mintimake qoraiqama vuarave. Te Noravano Kotika ni Variqavano koqe aara ni numiqe vauramanta, ne ti qoririma timitaarave.

¹⁸ Ne nantihae Nairi Namari nareka Isipini vireka auti variavo? Vi vatanaaka kia ho ni kahaqivarave. Ne nantihae Iufaretisi Namari nareka Asiriaini vireka auti variavo? Vi vatanaakatanta kia ho ni kahaqivarave.

¹⁹ Nenta qora okara autuava vivama ninta ntaihaanarove. Ni aato kenko tira iriate: Ne ti Nora Kotika nenta Variqa tauvaqa utu timite, kia ti autu qetaara kaara ne hunkavi haikara ne variavo. Te Noravano Kotika ni Variqavano ekaa kempuka vatauka vi uvura turo, tiro.

Isareri vika hampi nariro ni vai nahentira voqaara variara

²⁰ Noravano Kotiva tiharo, Isarerio, ne haaru kia ti vevaaraini vaireka iha, ti qoririma kaarave. Ne kia ti uva avataqи viraiti, ne kia tiriara viva tinauvu Variqavano vaivo tiraiti, kia ti hutu tuahera kaarave. Ne ekaa ainqinaqaave, aumaqaara vai katarira okarainive, vaiha hampi nariro ni vai nahentira vo qorainti vo qorainti hampata nintemake, ne una variqa, vo variqa vo variqa nutu tuahere variarave.

²¹ Tota hoqare ne Isareri koqe *uaini* naaqunta voqaara variate ti, te *uaini* kuvu koqera varake ututaunarave. Ho nantiakee ne qoraiqamavi qaakau *uaini* naaqunta voqaaraiqama vuavo?

²² Ne qumina kempuka *hopuqhai* namari ntivorave. Vi *hopuva* kia ho ni qora uva nunqa nimitaanarove. Te ni qora okara qaqiqai tave vauro.

²³ Ne tiha, Kia qora kaiqavano tinauvu qoraiqama timitarave. Kia tenavu una variqa vo Baalira vo Baalira avataqи viha vika quahama nimitaanarave, ti variarave. Ne minti tivakeha una uva ti variarave.

Ne Hinomu Uqitaini qora kaiqa varaara iritate. Nahe kamerivano qora rantareva vi aintemake, ne una variqa, vo variqa vo variqa avataqи viha vikara quahe variarave.

²⁴ Qaakau ntonki nahevano aahara vataini qora rantareva aiqi tuahera kero uhiramqiro vintemake, ne una variqa avatareka auti variarave. Kia vovano vi ntonkira antuqa vainara ho ravaaqavu kaanarove. Viva naivano qoravano vainaini viramanta vika vaakama vira rantake viva inainai anivarave.

²⁵ Oho, Isarerio, hauri ne kantamaqи viha una variqa avataqи vivaro ni aiqu aiha viraro ni ainta aaharaqiantorave, tiro. Te minti turamanta ne kia ti uva iriraiti tiha, Qumina are tinauvu qioqama terorave. Tinauvu antuqavano vo vatanaaka variqarama vaivo. Tenavu vika avataqи viha vika quahama nimitarerave, tiarave.

²⁶ Noravano Kotiva tiharo, Muara vaiinti ravaaqavu kaavaro viva kaurira haika varaintemake, ne Isareri kaurira haikama varevararave. Isareri avuhainaukave, vika qjata vaiintive, ti Kotika kaiqa vara timite variakave, paropeti vaiintive, vaiinti nahentive, ne ekaa kaurira haikama varevararave.

²⁷ Ne katari vora quaheha tiha, Are tinavu qovave tivake, ori vora tiha, Are tinavu vatataaraukave ti variarave. Ne te unanaini aniataara vaimanta ti tauvaqa utu timitaarave. Qora entavano niqaa qovaraiqimanta ne vaaka tirira mpo are ani tinavu ruaruuma timitaane ti variarave.

²⁸ Ho ne aututaa variqauka tantoe variavo? Ne vika qaqi kaimanta ni ruaruuma nimitaate. Oho, Iutaa vataini airi vatukanavu vaintemake, ni una variqa airitaha variarave.

²⁹ Nana kaarae ne tiqaa uva vatareka auti variavo? Ne ekaa kia ti vevaaraini vaireka iha ti qoririma kaarave.

³⁰ Ne koqe aaraqaa vuate ti, te ni ruquti vaunarave. Te minturamanta ne kia vi aaraqaa viraiti, *raionivano* aantau arukaintemake, ne ti paropeti vaiintinavu arukaarave.

³¹ Isareri vaiinti nahenti maa entara variaka, ne te Noravano Kotika uva tainara iriate. Haaru te ni kaivaqaukavara aahara vatainive, konkira arinainive, ani variamanta te vika qaqrira kaunarave? Kiave. Ho vate nantihae ne tiha, Tenavu kia Kotiva vainaini virerave. Tenavu tentanavu vuataa ina aaraqaa virerave, ti variavo?

³² Varaata vovano nai vaataiqama taira taurue kaanarove? Nahenti vovano vaati varareva iharo nai vaataiqama taira taurue kaanarove? Vitanta kiama tauru kevarave. Oho, ti vaiinti nahenti nai airi enta variqi viha tirira tauru kaavo.

³³ Oho, Isarerio, hampi nariro ni vai nahentiva vo qorainti vo qorainti rantakai aarara kankoma kero iri tavaintemake, ne una variqa, vo variqa vo variqa avataqi vi okarara kankomake iri tavaarave. Mintima vairara ti, ne homa vokiakavata qora okara, vo okara vo okara numiqevarave.

³⁴ Ni utavaaqaaqaa vehi vaiinti nahenti naarevano rotau virave. Vi vaiinti nahentika kia ni qoraiqama nimitaraiti, kia ni naavu rukavuke muara varaamanta, ne qumina vika arukaarave. Ne vika arukaaka vahavata, ³⁵ ne tiha, Kia tenavu qora kaiqa varauto. Noravano Kotiva kiama tinavuara arara itaivo, tiarave. Oho, ne minti tiara kaara te Noravano Kotika nora uva niqaa vatarerave.

³⁶ Ne vo vatanaaka variqara tinavu kahaqiane tivake, viraqaaahai tuqantaavi qaiqaa vo vatanaaka variqara tinavu kahaqiane ti variarave. Asiria kia ho ni kahaqiantemake, Isipivita kia ho ni kahaqivarave.

³⁷ Nora toqaavu ariramanta ne Isipihai orurante anivararave. Ne vi vatanaakaqaa muntivi variaka te Noravano Kotika vika qoririma kaunarara ti, vika kia ho ni kahaqivarave, tiro.

3

Isareri vika kia Kotirara kempukaiqamake irura

¹ Noravano Kotiva tiharo, Vaiinti vovano nai naata qaqlira kairaro vi nahentiva vo vaiinti varairera, vira vaati avuniava kia ho qaiqaa vi nahentira varaanarove. Viva qaiqaa vi nahentira varairera, vira kaara vi vatava kia kotataiqama vairaitiro, anomakero qoraiqama vuanarove. *

Vi uvava mintima vaimantavata, ni Isareri muntukavano una variqa, vo variqa vo variqara vaimanta variaka ne qaiqaa te unanaini anireka auti variavo.

² Ne ainqinaini tavaate. Hampi nariro ni vai nahentira voqara ekaa vo ainqina vo ainqinaqaa ne una variqa, vo variqa vo variqa quahama nimiteha, hampi qare okarara avataqi vi variarave.

Hampi nariro ni vai nahentiva aara auvhahini oquvi vaharo qorainti veka vaintemake, ne una variqa quahama nimite variarave.

Arebia vataihainaaka aahara vataini vahira muara varareka auti variantemake, ne qora kaiqa varareka auti variarave.

Ne vo ainqina vo ainqinaqaa una variqa quahama nimiteha hampi qare okarara avataqi vuara kaara Isareri vatavano kia kotataiqama vairaitiro, anomakero qoraiqama viro vairave.

³ Ho vira kaara te aaqu ravaaqavu kauraro kia ntirave. Aaqua nti entara kia aaqu ntirave.

* **3:1:** Lo 24:1-4

Oh, hampi niro ni vai nahentiva kia kauriraitiro, kempuka viri aratero vaintemake, ne qora kaiqa varaara kaara toqaavu arira kauriha variataara vaimanta kia kauruavo.

⁴ Ne ti aareha tiha, Mpo, tinavu Qo, tenavu naatikaa vauna entara are tinavuqaa raqikiqira anianarave. ⁵ Kia tinavuara ekaa enta ai arara itaanarove. Are kia ekaa enta tinavu titinarave. Ne minti tiarave.

Minti tivakeha ne kia qora okara qaqlira karaiti, ne qora okara voqavata auti variavo, tiro. Noravano Kotiva minti tura.

Qora aara qaqlira kaate tura

⁶ King Josaiava Iutaaqaa raqiki vau entara Noravano Kotiva tiriara tiharo, Are Isareri varaa kaiqlira tavaanarae? Naata vaati varaa okarara raqakai nahentira voqaaqa, Isareri vika ekaa vo ainqina vo ainqinaqaave, ekaa aumagaqaava vai katarira okarainive, una variqa, vo variqa vo variqa quahama nimiteha hampi qare okarara avataqi vi variarave.

⁷ Ho te tiha, Vira aura Isarerivanu hampi qare okarara avata vuru taiqakero, viva qaiqaa te unanaini orurantero anianarove turarovata, viva kia mintirave. Iutaava vira nakaavavata naata vaati varaa okarara raqakai nahentiva vaharo viva nai aura Isarerivanu vare vai okarara tave vaira.

†

⁸ Vira nakaava Iutaava vaharo tavaimanta te vira aura Isareri qaqlira kauna *pepaara* ami, nai hampi niro ni okarara kaara vira atitama kaunarave. Vira nakaava Iutaava vira taveharovata, viva kia qetaraaitiro, vivavata hampi qare okarara avataqiro vi vairave.

⁹ Vira hampi qare okarara autiharo kia kauriraitiro, viva una variqa, origohai aututaarave, katariqohai aututaarave quahama nimitaqiro vi vaharo naivata Iutaa vataavata qoraiqama kaivarao kia kotataiqama viro vairave.

¹⁰ Vira nakaava Iutaava hampi qaramaqiro viviro, viraqaahairo kia te unanaini quqaa aniraitiro, viva unaqaraqama kero te unanaini anirave, tiro. Noravano Kotiva minti tura.

¹¹ Noravano Kotiva minti tivakero qaiqaa tiriara tiharo, Te tavauraro Isareri viva naata vaati varaa okarara raqa kaivaravata, vira nakaava Iutaava nai viravata uri aatarakero voqavata vi okarara raqa kairave.

¹² Ieremaia, are *noti* mantaraini oruntera Isareri vika mintima tiane: Isarerio, nahentivanu nai vaati qaqlirakero vo qorainti vo qorainti hampata hampti nintemake, ne ti qaqlira kaavo. Ho ne te unanaini orurante aniate. Te Noravano Kotika vaiinti nahenti aaqrurahama nimite vauraukara tiro, kia ekaa enta ti niara arara itaqiro vuanarove.

¹³ Ne qora okara autuara qoqaa tiva qovarama kaate. Ne kia ti Nora Kotika nenta Variqa vevaaranai vaireka autuarave, aumagaqaava vai katarira okaraini una variqa, vo variqa vo variqa quahama nimite variarave, te niara maa uvira iriqi vuate tunara kia iriarave, ne virara mintima tiate: Quqaa tenavu qora okara, vo okara vo okara autunarave, tiate. Te Noravano Kotika niara minti turo.

¹⁴ Ne ti vaiinti nahenti ti qaqlirake vuaka, ne qaiqaa te unanaini aniate. Te vo vatuka vo vatukaqhahai ni vohaiqa vohaiqa ntita vare, ni anku vo anku vo ankuqhahai taaraqanta ntita vare, tenta ainqina Saionini viri karerave.

¹⁵ Viraqaahai te qita vaiintinavu ti uva irika ni nimiariramanta vika koqe avu aato okara avataqi viha niqaa raqikivarave.

¹⁶ Vi entara ni kuvuarama teka airitahaa vataqi vaivarave. Vi entara te Noravano uva tiva taatautaua Vokiseva kia vaira kaara kia ne mpo ike tiraiti, virara tauruke kia qaraaka Vokise vo autivarave.

¹⁷ Vi entara ne Ieruharemiara Noravano Kotiva *oquiviro vaharo raqiki vai taintarave* timanta, vo vatanaa vo vatanaaka Ieruharemiqi ani ruvaaqumavi vahira ti hutu noraiqama timitevarave. Vi entara vika nai avu aatoqhai kempukaiqamake qora kaiqa varera qaqlirake, kia qaiqaa vi okarara autuqi vivarave.

¹⁸ Vi entara Isarerivata Iutaavata akukumavi vohaa vaivarave. Navutaaka vitanta *noti* mantaraini rumpa vare vuru kaa vataraqaaahai orurante, te vika kaivaqaukavara nimitauna vataraqaa qaiqaa ani vaivarave. Te vika vi vataraqaa maahota variate ti, te vika nimitaunarave, tiro. Noravano Kotiva minti tura.

Kotiva nai vaiinti nahentiara qora aara qaqlirake te unanaini aniate tura

¹⁹ Noravano Kotiva tiharo, Mpo Isarerio, te vo vatanaa vo vatanaakaqhahai ni nora autu nimi, koqe vata, ekaa vo vata vo vatauri aatara kero vaira, ni nimunarave. Te niara vika tiriara viva tinavu Qovave tivakeha kia ti qorrima karaiti, ti avataqi vuate, tunarave.

† 3:7: Ieremaiaava vau entara, navutaaka Isareri vata noti mantaraini vaura aatara kovaro sauti mantaraini Iutaa vatavanoqai qaqlira vaura.

²⁰ Te minti turamanta, Isarerio, vira naatavano vo qorainti vo qorainti hampata hampi nintemake, ne una variqa, vo variqa vo variqa quahama nimite variavo. Te Noravano Kotika niara mintima turo, tiro.

²¹ Vo ainqina vo ainqina qjataqaaahai iq'i rate variara iriate. Isareri vaiinti nahenti Nora Kotira nái Variqa tauruke hampi aaraqaa nuara kaara vika mini iq'i rateha nái una variqara ike mpo ti variara.

²² Ho ne Nora Kotira tauvaqa utu amite hampi aaraqaa ni variaka, ne viva inaini orurante anivarо viva ni koqema nimittaira ne kia qaiqaa hampi aaraqaa vuate.

Ne mintima tiate: Eo, viva tinavu Variqavano vaimantara ti, tenavu Noravano inaini virerave.

²³ Tenavu vo ainqina vo ainqinaqaa vaiha noraiqaake una variqa naare vaura okarava kia tinavu kahaqirave. Noravano Kotiva, vivaqai tinavu Isareri ruaruama timitaariravama vaivo.

²⁴ Mpo, tenavu qaraaka vaiinti vauna entaraqaaahai una variqa Baalira quahama amiteha kaurira kaiqa vare vaunarave. Tinavu kaivaqaukavarava vukaari utiha varaa haikara, sipisipive, purumakauve, nái maaqu raavurave, ekaa vi haikara vikavata tenavuvata qumina Baalira quahama amiteha *ofaa* autu amite vaunarave.

²⁵ Oho, tinavu kaivaqaukavata tenavuvata qaraaka vaiinti vauna entara mintimakeha tentanavu Variqa Nora Kotira uva ragaqani, vate maa entaravata qaqiqai ragaqani vaura. Vira kaara kaiqe noraiqaake kauriha konkomakanta variare, tiate. Ne Isareri mintimake nenta qora kaiqara Nora Kotira qoqaa tiva amiate.

4

¹ Mpo Isarerio, ne vi okararaqaaahai tuqantaa vivera, ne tuqantaavi orurante te unanaini aniate. Te vaaqu haikave tuna haikara una variqa *maraqura/varaha* aututaara qaqira aquke, kia qaiqaa hampi aaraqaa viraiti, ² avuqavu kaiqa varaivera, ne homa te Noravano Kotika ekaa enta ekaa enta qaqi variqi vi vaurauka autuqaa nenta uva kempukaiqama kevarave. Ne mintimanta ekaa vo vatanaa vo vatanaaka tiriara tiha, Tinavuvata koqerna timitaane, tivakeha ti hutu tuahera kevarave, tiro.

³ Ho iriate. Noravano Kotiva Iutaa vataini variakave, Ieruharemiqi variakave, vikara mintima tiro: Vaintivano kia auqu vai nimiriva vai vataraqi kara utiraitiro, viva qaraaka vata vaurukero kara utintemake, ne qora okara qaqirkake orurante te unanaini ani qaraaka avu aato varaate.

⁴ Ne te Noravano Kotika uva tiva taatau taunara iriqi vuate. Ne ququaqamake ti vaiinti nahenti variate. Ne kia mintivera, ne qora kaiqa varera kaara ti voqamakero arara itaanarove. Ti arara itairava qaqiqai itaqiro viraro kia vovano ho vira qimpa kaanarove, tiro.

Navutaaka Iutaa hampata raqireka auti vaura

⁵ Noravano qaiqaa tiriara tiharo, Aakara ntehara Iutaavata Ieruharemiqi variakavata mintima tiva nimiane: Ne vonaini vonaini *aanumaara/noma* vuaqa keha tiate, Kaiqe tenavu ekaa ruvaaqumavi vaantaavura vai vatukaraqi ruqemake kantama vuare.

⁶ Ne vutora virini hiritaimanta vaiinti nahenti vira tave Saionini kante vuate. Navutaaka tinavu harivorave ti, kia varike viraiti, kante oru kukeqaate. Te Noravano Kotika *noti* mantaraihai navutaaka ntita viri kaari vika ni qoraiqama nimiteha vehi autu kevarave, tiro.

⁷ *Raionivano* kukeqavi vairaqaqhairo anintero aantau arukareva autintemake, vo vatanaa vo vatanaaka ekaa haika vehi autuke variaka, vika nái maaqa ke ni Iutaa vata vehi autu taiqa kareka maini ani variavo. Oho, vika ekaa ni vatuka vehi autu kaivarо kia vovanovata vatuka voqи ho varianaro.

⁸ Nora Kotiva tinavuara arara itaiva kia taiqa viraitiro, qaqi ite arara vairara ti, ne kovaara utavaaqa nonkute iq'i rateha variata.

⁹ Noravano Kotiva tiharo, Vi entara avuhainaa vaiintivata vira qjata vaiintivata iqoka raqi kempukava kia vairamanta vaivarave. Ti kaiqa vara timitaai vaiintikavata paropeti vaiintivata voqamake qtehehva vaivarave, tiro.

¹⁰ Viva minti tivera te aqao ti, Noravaavu, are ekaa haikaaqaa raqiki variaravave. Mpo, are una paropeti vika qaqi kaaramanta vika, Iutaini variakave Ieruharemiqi variakave una uva tiva nimiteha tiha, Ne maateraiqamake variqi vivarave, ti variaravave. Oho, vika minti ti variamantavata, navutaaka tinavu harukareka ani variavo, tunara.

¹¹ Qora entavano anintairaro Noravano Kotiva Ieruharemiqi variaka maantima tiva nimianaro: Aahara vataihairo uvai vovano utuanarove. Vi uvaiva kia qihaaqama kero *uiti* rapa qaqtina vara karaitiro, viva ekaa haika tatoqa kaaina uvaivama varianarove.

¹² Te Noravano Kotika vara kaaina uvaiva nai kempuka uvaivano varianarove. Ti vaiinti nahenti qora kaiqa vare variara kaara te viraqohai vika ntaiharerave, tura.

¹³ Ho tavaate. Aaqu ntireva kumpora arutaintemake, navutaaka aara mpiqavi maini ani variavo. Nora vetoravano auva ntaintemake, vika iqoka kaari aiqvano noraiqaakero auva ntaiivo. Vika ohivano kante vaiva memoravano kante vairavata uri aatara kairave. Oho, tenavu kia ho vairarave.

¹⁴ Ne Ieruharemiqi variaka, nanti nanti entae nenta avu aatoqi qora kaiqa autireka ira qaqtina vivarave? Nenta muntuka hiqama kaivarao qora okaravano kia viraqi vairaro Noravano ni ntitaarire.

¹⁵ Daani vatukaqihaiive Efaraimu aiqinaihaiive vaiinti vonavu kia koqe vakaaka vare aniaivo.

¹⁶ Noravano vi vaiintikara tiharo, Iutaa vata auvahini varia vatanaakavata, Ieruharemiqi variakavata ne mintima tiva nimiate: Niara vataihai navutaaka maini ani variavo. Vika aninte, Iutaini vo vatuka vo vatuka ani ututumate iqoka riqireka noraiqaake uva tivarave.

¹⁷ Ieruharemiqi variaka ti Nora Kotika qoririmake kia ti vevaaraini vaireka auti variara kaara, te navutaaka qaqtina kaari vika vaiinti vonavu naahoqaa maimaraara raqikiantemake, Ieruharemi ututumate vaivarave.

¹⁸ Ne qora aara avataqi viha ti uva raqaqi vi variara kaara, navutaaka ni qoraiqama kareka anivarao. Ne nenta qora kaiqa vare variavama vi maarara qovarama kaivo. Vi maarava hunkavi haikara voqaara niqi vaharo ni muntuka raqonta kaira ne anomake qoraiqamavi vaivarave, tiro.

Noravano Kotiva minti tura.

Ieremaiaava nai navunaakara mpo ike tura

¹⁹ Oho, oho, ti muntukavano voqamakero qoraiqimanta antura ntiha vauro. Vi maarava tiki vaimanta te kia ho evaara vairarave. Te navutaaka *aanumaara/noma* vuaqaara iruro. Navutaaka iqoka raiqa uva *nontanta/otata* tiara te iruro.

²⁰ Oho, te tavauramanta navutaaka tinavu qoraiqama timite, qaiqaa qaiqaavata tinavu qoraiqama timite variavo. Navutaaka ekaa Iutaa vata maata qoraiqama kaavarao qoraiqama viro vaivo. Navutaaka vaaka qovaramavi, vate virave ti, vika tinavu s eri naavu maaga rampaikie qunahi qaahanimake aqu kaavo.

²¹ Mpo, nanti nanti entae navutaaka iqoka raquqi viha, iqoka *aanumaara/noma* vuaqaqi vivarave?

²² Te minti turaro Noravano Kotiva tiharo, Ti vaiinti nahenti hampi avu aato vataaka kia tiriara kankomake iriarave. Vika vainti naati kia avu aato vataaka voqaara vaiha kia vo haikaravata iri tavaarave. Vika qora kaiqa varaa okarara kankomake iri tave, koqe kaiqa varaa okarara kia iri tavaarave, tiro.

²³ Viva minti tumanta te tavauraro maa vatava qumina vauvaro kia vo haikavanovata viraqaa vauvaro naaruvinai kia vo haikavanovata ite vaura.

²⁴ Te aiqina vuruvi tavauramanta vika qakaa qakaa i vaumanta, qampara aiqina vika qakiha vuruvi virivi i vaura.

²⁵ Te tavauramanta kia maa vataraqaa vaiinti nahenti variamanta ekaa uvirivata ata vare vinuara.

²⁶ Te tavauraro kojekmake kara qampiye vai vatava aahara vataiqama vura. Ekaa vo vatuka vo vatuka qoraiqama viro vaivarao naavu maaqavata rampai kaavaro vaira.

Nora Kotira voqamakero arara ite vaivarora tiro, ekaa haikavano mintima kero vaira.

²⁷ Noravano Kotiva mintima tiro: Te ekaa maa vataro qoraiqama kaariraro qumina naantaaka ntuanarove. Ho te mintima kehavata, kia te ekaara maa vataro vehiqama karerave.

²⁸ Maa vatava iqi rateharo ike mpo tiraro naaruuvavano konkiraqama vuanarove. Te minti minti irerave tuna uvvara kia qaqrake vo uva tiainarave. Te kia tuqantaavi qaiqaa vo kaiqa vararerave turo, tiro.

²⁹ Navutaaka ohiqaa oquvi vaikave, huru veva totekave animanta, ekaa vo vatuka vo vatukaqti varika vika anii uvvara iri, qetake kantama vivara. Hini kika nantaqti kukeqareka vimanta, hini kika nora ori vainanaini vaarinte vivara. Ekaa vo vatuka vo vatuka qumina vairaro kia vaiinti vovanovata viraqi varianaro.

³⁰ Ieruharemi, are vehiqama vira taiqa vina entava aumanto vaivara are nanae auti variaro? Quminama are naare utavaaqa koqera nonkutera, *hankaaroro/kukakaara*

ruvutera, *kori* oriqohai aututaa haikara aqutera variaro. Quminama are nena avu auvahini vankora *peni* aqutera variaro. Are qumina mintima kehara nena vaataiqama tera variaro. Ai hampata ni variaka^{*} ai qoririmake, ai arukareka auti variavo.

³¹ Mpo, te iruraro nahentivano avuniqama kero vainti vatareva iharo keke tintema kero, vovano noraiqaakero keke ti vaivo. Viva Ieruharemive. Viva aanai aanai tiharo nai kauqu tutukero tiharo, Oho, te kia ho vairarave. Navutaaka ti harukareka iamanta te vika kauquqima vauro, tiro.

5

Iutaa vataini vauka Nora Kotira qoririma kora

¹ Noravano Kotiva tiharo, Ne Ieruharemipi vai aarara, vo aara vo aaraqaave, *maaketiqive*, vi aniba koqemake aitutumake tavaate. Ne vainti vo rantake tavaivarvo viva avuqavu kaiqa vareharo quqaa okara avataqiro virava vairera, te Ieruharemehi vehakuma amiteha, vaiinti nahenti viraqi variaka qora kaiqa vare uvaravata nunka nimitararave.

² Vika kauqu aqiqaa aqukeha ti Nora Kotika autuqaa tenavu mintirerave tivakeha, vika kia quqaa uva tiraiti, una uvaqai ti variarave, tiro.

³ Kotiva minti timanta te tiha, Mpo Noravauvo, vaiinti nahenti quqaa okara avataqiqi vira, virara ai antuqavano vaivo. Are maa vaiinti nahentika utetehara ruqutuaramanta vika kia qora okara qaqaq karaiti, kia ai uva iriarave. Are vika vehiqama kera ruhiqau kaaramanta vika kia koqe okara avatareka auti variarave. Vika kempukaiqamake qora aaraqaa viha tiha, Tenavu kia maa aarara qaqaqirake vo aaraqaa virerave, ti variara.

⁴ Vika minti tihamanta te tenta aatoqi irike tiha, Maaka vehi vaiinti nahentiqi variavaro vika avu aato kia vaivo. Vika kia Noravano Kotiva tivatai uvvara kankomake iriarave. Vika Variqavano ne minti minti iate ti uvvara vika kia iriarave.

⁵ Ho kaiqe te qjata vaiinti varianaini orunte uva vika tiva nimiare. Quqaae vi vaiintika Kotira aara kankomake iri tavaarave? Quqaae Kotiva vikara ne minti minti iate ti uvvara kankomake iriarave? ti.

Te minti tivake orunte tavauramanta vika Nora Kotira qoririmake kia tenavu vira vevaaraaini vairerave tivakeha kia vira uva iriara.

⁶ Ho vira kaara *raionivano* nantaqihairo ani aantau arukaintemake, navutaaka aninte vika arukevara. Qaakau vairivano aahara vataihairo ani sipisipi arukaintemake, navutaaka vika ani arukevara. Qaakau *pusi lepativano* vatuka aaqaini kukeqaviro vaharo vatuka kero aniaina vaiintira teqa taaqama kaintemake, navutaaka vika arukevara.

Ti navunaaka qora kaiqa varaa uvava uritara kero vaimanta vika qaiqaa qaiqaa Kotira tauvaqa utu amite variara kaara, viva qaqi kairamanta navutaaka mintimake vika ani vehi autu taiqa kevarwa.

⁷ Noravano Kotiva tiharo, Ieruharemio, ai vaiinti nahenti ti qoririmake, una variqa vo variqa nutu tuaherake variara kaara, te vika qora kaiqa varaa uvvara nunka nimitaaina aarava kia vaivo. Te karave vo haikave nimuramanta vika kia vo haikava aavoqiarave. Te mintima nimitaurmanta vika kia ti uva iriraiti, qaqiqai qora kaiqa varaqi viha, naata vaati varaa okarara raqake, oru hampi nari varia nahentika naavuqi ruvaaqi variarave.

⁸ Ohi qoranavu airi kara naaka vaante vaantemake nahe ohi hampata nireka auti variantemake, vaiinti vonavu vokiaka naata hampata nireka auti variarave.

⁹ Oho, vika mintimake qora okara avataqiqi vuara kaara, te vika ntaihama kaariravama vaivo. Iutaa vatanaaka ti qora okara autu timitaara kaara tentaqa vika aru vuntu karerave.

¹⁰ Te qaqi kaariramanta navutaaka Isareri naahoqi vi aniba *uaini* naaqunta teqa taaqama kaate. Vika kia *uaini* naaqunta ekaara teqa karaiti, qaqi kanta kaaraqai teqa kevarave. Vi kaarauka kia ti Nora Kotika vaiinti nahenti variarara ti, navutaaka vika teqa aqu kevarave.

¹¹ Isarerivata Iutaaavata una variqa avataqiqi vi vaiha nái anomake ti tauvaqa utu timitaarave, tiro. Noravano Kotiva minti tura.

¹² Vika Nora Kotira uva iriha vi uvarava una uvave tivake tiha, Noravano kia vo haikavata autuanarove. Kia qora entavano tinavuqaa qovaraiqianarove. Navutaaka kia maini anivarave. Karara aavoqi entava kia qovaraiqianarove.

¹³ Paropeti vika uvavano qumina uva aihoqai vaimanta vika kia Kotira uva tinavu tiva timi variarave. Kaivaro vika ti varia uvava nái qoraiqama nimitaarire.

* **4:30:** Uva tuqantaakero: Isipive vo vatanaakave hogare Ieruharemehi kahaqireka auti vaukara tura.

¹⁴ Vika minti ti variavaro Noravano Kotiva ekaa kempuka vataava tiriara tiharo, Ieremaiao, vaiinti nahenti minti ti variara kaara, ti uvavano ai noqihairo ihavano antauqa ita kaintema kero, vika ita kaanarove, tiro.

¹⁵ Minti tivakero Noravano Kotiva tiharo, Oho, Isareri vaiinti nahentio, te niaraini varia vatanaaka ntita viri kaariramanta vika ni hampata iqoka raquate. Vika kempuka vatanaaka vukaiqamake nái vataini variakave. Vika vo uva tiaka variarara ti, ne kia ho vika uva irivarave.

¹⁶ Vika aquke varia vevava vaiinti aruke vairave. Ekaa vika iqoka vaiinti vaireka, iqoka vaiinti tarauka variarave. ¹⁷ Ne kara ututerave, kara qantu vare vuru vaterave, vika taiqa kevarave. Vika ni maaqu raavura arukevarave. Ni sipisipive memeraave, purumakauve, vika aru taiqa kevarave. Ni *uaini* naahove, *fiki* katarive, vika vehi autu taiqa kevarave. Ne tiha, Tenavu vaantaaavura ututuma tauna vatukaraqi ho vairarave ti varia vatukara, vika iqoka vaiinti vi vatukara vi vatukara ekaa taiqa kevarave, tiro.

¹⁸ Noravano Kotiva minti tivakero viva tiriara tiharo, Navutaaka ani entara kia te ni Isareri ekaa taiqa karerave.

¹⁹ Naantiara vaiinti nahenti ai ireha tiha, Oho, nana kaarae tinavu Variqa Noravano tinavu mintima timitaivo? tivara, Ieremaiao, are vika mintima tiva nimiane: Vate maa entara ne nenta vataqaa vaiha ti Nora Kotika tauvaqa utu timiteha, vo vatanaaka una variqanavu vevaaraini variarave. Ho naantiara vira voqaantemake, ne huviqorama vo vatanaaka vataqaa vaiha vika vevaaraini vaivarave, tiro.

Kotiva nai vaiinti nahentiara rauriha variate tura

²⁰ Noravano Kotiva tiriara tiharo, Maa uvara Iekopira anku Iutaa vataini variaka tiva nimiane: ²¹ Ne kia avu aato vataaka maa uvara iriate: Ni avu vaimantavata, ne kia tave variarave. Ni aato vaimantavata, ne kia iri variarave.

²² Te Noravano Kotika vauramara ne ti aatu qeteha variataarave. Ne ti avuqaa vaivarao ni aiqu kauqu ntirintiri iataarave. Nora namarivano kia qaqini uritaraarire ti, te tentavano *nampisini* nuqa vataunarave. Nuqavano maahota vahilo nora namari kuvali taivaro namarivano nai miniqai vairave. Namarivano kumpetaqi uriharo auva nteharovata, kia ho nuqa uri aatara kero qaqini vaari ntaanarove.

²³ Te nora kempuka vataunarara iriha ne ti aatu qeteha variataara vaimanta, ne kia ti vevaaraini vaireka autiha ti tauvaqa utu timite variavo.

²⁴ Ne kara ho qantuate ti, te vi entara vi entara aazu varake vaunarave. Ne virara iriha ti aatu qeteha ti hutu tuahera kaataarave.

²⁵ Ho ne qora okara avataqi vi variara kaara te kia ni kojema nimitauraro aaquvano kia ntivaro ni karavano kia kojemakero qampiqairave. Ninta qora kaiqavano vi haikara ravaaqavuke vairave.

²⁶ Ti vaiinti nahenti avutana qora vaiinti vokiaka variarave. Vaiintivano uviri qantu kareva vaara vuitaintemake, vika vaiinti arukareka auti variarave.

²⁷ Uviri arukero rutantuaa utara mpiqa kaintemake, muara varataa haikava vika naavuqi mpiqviro vairave. Vika mintimake qora okara avataqi vi variavaro vika airairavano airi vaivaro vika kempuka voqavata vaimanta ²⁸ vika airi kara ne variavaro vika auhavanovata nora vairave. Vika qora kaiqa vare variava nai voqavata vairave. Vika qokavara qutu vua vaintika kia avuqavuqama nimiraraiti, vehi vaiinti nahenti nora maaragi variakavata kia kahaqama nimite variarave.

²⁹ Oho, vika mintimake qora okara avataqi vi variara kaara, te vika ntaihamaa kaariravama vaivo. Iutaa vatanaaka ti qora okara autu timitaara kaara tentaqa vika vuntu karerave.

³⁰ Oho, Iutaa vataini nai anomakero qora okara vovano qovaraiqivo.

³¹ Paropeti vaiinti vika kia ti Kotika uva tiraiti, una uvaqai vaiinti nahenti tiva nimi variarave. Ti Kotika kaiqa vara timite variaka vikavata nái autuqaa vaiinti nahentiqa raqiki variamanta vaiinti nahenti vikara hove ne mintimake tinavuqaa raqikiate ti variarave.

Ho ne qora okara auti vaira te taiqa kaari ne nantie ivarave? tiro. Noravano Kotiva minti tura.

6

Navutaaka Ieruharemi ututuma tora

¹ Benaminira ankuo, ne Ieruharemiqi-hai ruqemake vuate. Vaiinti nahenti ruqemake vuate ti, Tekoa vatukaqi *aanumaara/noma* vuqa kaate.

Beti-Hakeremi vatukaqi iha quaraimanta vaiinti nahenti iha mura tave kante vuate. Oho, *noti* mantaraihai kempuka vatanaaka ni vehi autu taiqa kareka ani variavo.

² Ieruharemi vaireva, koqe viri vaata vataa varaata voqaara vaimantavata, te navutaaka qaqi kaariramanta vika vira vehi autu taiqa kevarave.

³ Ieruharemi hampata iqoka raqireka avuhainaa vaiinti vonavu nái iqoka vaiinti ntita vare Ieruharemi aaqaini nái seri naavu maaqa vo kanta vo kanta kaqate vaivarave.

⁴ Vika nái iqoka vaiintiara mintima tivara: Ne iqoka raqireka qeramate variate. Kaiqe kuari avu qiataqaa uru ntairaeq raquare, tivarave. Vika minti tivake tavaivarova enta ire iramanta ⁵ tiha, Ho vase varike tenavu entaqi iqoka raqihha vika vaantaavura vona vona kempukaiqamake aututera vehi autu taiqa kaare, tivara.

⁶ Noravano Kotiva ekaa kempuka vataava vikara tiharo, Ne katari teqa vare, vaantaavura tataaqa vuru ntavate, vatavata varake ntavate, viraqaa vaarinte vaiha raquate. Maa vatukaraqi qora okaravano mpiqa viro vaira kaara te vira ruqutu karerave.

⁷ Aruvuqihairo namari aquvi aquvi intema kero, vi vatukaraqihairo qora okaravano qovaraiqi vairave. Nái kena vaiinti ntaihie varia vaiintika noraiqaake uva ti variara te iruro. Vika vo haika vo haika qoraiqamake variamanta vi haikauka kenko kaanko tiara te irunarave. Rovara varaaake, vaata teqa taaqama kaakave, te vikama tave vauro.

⁸ Ne Ieruharemiqi variaka rauriha variate. Ne kia ti uva irivera, te ni tauvaqa utu nimite, Ieruharemi qoraiqama kaariraro kia vovanovata viraqi ho varianarove, tiro. Noravano minti tura.

⁹ Noravano Kotiva ekaa kempuka vataava tiharo, Vaiintivanu *uaini* tava higiharo kia vogavata qaqi kaintemake, navutaaka ti vaiinti nahenti kia vogavata vehakuma karaiti, ekaama arukevarave. Virara irihara are ti uva qaiqaa Ieruharemiqi variaka tiva nimiramanta vikaqihai vohaiqa vohaiqvavano ti uva iriate, tiro.

¹⁰ Viva minti tumanta te aqao ti, Te ta vaiintikae ai uva tiva nimirarave? Nai tavave ti uva ho irianarove? Vika kia ti uva iriataa imanta nái aato tinta taavo. Vika ai Nora Kotira uvara qora uvamaa vaivo ti variavo. Vika kia quaheha ai uva irireka auti variavo.

¹¹ Mpo Noravaauvo, ai vaiinti nahenti qora kaiqa vare variara kaara ai arara ite vaintemera kero, tivata vikara arara ite vaira te kia ho vira qimpa kararave, turaro Noravano tiriara tiharo, Ho ai arara ite vairara are vaintaira aaraqaa vi anika nitiane. Qaraaka vaiinti ruvaaqumavi vaikavata nitiane. Vaative naatave, konta naampaive, navutaaka kia vika vehakuma nimitevarave.

¹² Maa vataraaqaa variaka qora kaiqa vare variara kaara te vika ruqutu kaariramanta vo kika vika naavuve naahove naatave varevarave, tiro. Noravano Kotiva minti tura.

¹³ Noravano qaiqaa tiharo, Nora vaiintive, vehi vaiintive, vika ekaa unaqaraiqama keha monu airaira varareka auti variarave. Paropeti vaiintivata, ti Kotika kaiqa vara timite variaka, vika vikavata vo haika varareka una okara avataqi vi variarave.

¹⁴ Ti vaiinti nahentiqa nora numuara vaimanta vika virara inaara numuaraqaima vaivo tivakeha kia vira rumpa nimite variarave. Vika vaiinti nahentiara tiha, Ne kia qetaate. Tenavu maateraiqihai koqemake variqi virerave, ti variamanta navutaaka qaiqai ani variarave.

¹⁵ Vika nái vaaqu kaiqa vare variara kaara kaurihae variavo? Aqao, vika vi kaiqara vareha kia kauriraiti, qora okara qaiqai avataqi vi variarave. Ho vira kaara vo kiaka kaavunti taiqa vuantemake, te vika ntaihamaa kaaina entaraqaa vikavata kaavunti taiqa vivarave, tiro. Noravano vi uvara tura.

Noravano tu uvara Isareri kia irura

¹⁶ Noravano Kotiva nai vaiinti nahentiara tiharo, Taara aara vainaraqaa himpite vaiha tavaate. Ne nenta ireha tave tiate: Haarua aara koqeva tantoe vaivo? tivake vi aararaqaa vuute. Ne vi aararaqaa vivi, ni muntukavano qihaaqama kero vainara ranta kevarave, tiro. Viva minti timanta ne aqao ti, Kia tenavu vi aararaqaa virerave, tiarave.

¹⁷ Vaiinti vonavu niqaa raqikiate ti, te vika kaamate niara tiha, Ne vaimanta navutaaka animanta vika ni *aanumaara/noma* vuqaqaa nimitaate, turamanta ne aqao kia tenavu noma uva irirerave tiarave.

¹⁸ Vika minti tiavera te Noravano Kotika tiha, Ekaa vo vatanaa vo vatanaaka iriate. Te tenta vaiinti nahentiqa vo haika qovarama kaainara ne tavaate.

¹⁹ Vatavaauvo, arevata iriane. Ti vaiinti nahenti kia ti uva iriraiti, vika te uva tiva taunaravata qoririmate kaara vira kaara, te navutaaka ntita viri kaari vika ti vaiinti nahenti qoraiqama nimitaate.

²⁰ Ti vaiinti nahenti Sabea vataihai koqe munta iaina haikara vare, niara vataihai koqe munta iaina haikara kaaqa voqaaravata vare tiha, Noravano vi haikarara quahaanarove, tiavarovata, kia ti hantuqvavano vi haikarara vairave. Ne ekaara kaintu iha quare *oaaarave*, vo *oaaave* autu timitera, ekaa vi haikarara kia te quahaainarave.

²¹ Ti vaiinti nahenti qora kaiqa vare variara kaara te qora haika qovarama kaari vika kuntavaivaima vare kaavu ntuate. Vika noka qoka nái vainti hampata qutu vivarave. Vika tataaqa variakave, vika tontive, ekaa vikavata qutu vivarave, tiro. Noravano minti tura.

Navutaaka noti mantaraihai anivarave tura

²² Noravano Kotiva tiharo, Ho tavaate. *Noti* mantaraini vai vataihai iqoka vaiinti maini ani variavo. Vika kempuka vatanaaka niaraini variaka iqoka raqireka qeramate variavo.

²³ Vika huruve iqoka paipeve tuateha, vaiinti qoraqama nimiterara quaheha, kia aqurihama nimite variakave. Vika nái ohigaa oquvi kante ani variavaro vika ohi aiquvano noraiqaakero auva nte vaimanta maini ani variavo. Vika Ieruharemi hampata iqoka raqireka vontaga nai naantiara nai naantiara nai variavo, tiro.

²⁴ Minti tumanta Ieruharemiqi vauka tiha, Oho, tenavu navutaaka ani varia vakaakara iruraro tinavu voqamakero aatu itaimanta qete vauraro tinavu kauqu irianta vivaro kia kempuka vaimantama vauro. Nahentivan vainti vatareva iharo voqamakero antura ntiharo keke ti vaintemake, tenavu keke tiha vauro.

²⁵ Oho, ti navunaa taario, navutaaka nái iqoka paipeqohai ni arukevorave ti, kia vatuka ke naahoqive aarainive vuate. Ekaa aqaini vo mantaraini vo mantaraini ni aatu ita nimitaaina haikavaqaima vaivo.

²⁶ Oho, ti navunaa taario, kovaara utavaaqa nonkute hantaqi oquvi variate. Ni vehi autu taiqa keka vaakama ani variavo. Vira noka qoka qorainti vainti vohainku vataataava qutu vimanta noraiqaake iqi rataantemake, ne navutaaka aniarara iriha iqi rateha variate.

²⁷ Noravano Kotiva tiriara tiharo, Ieremaiao, vaiintivano vo oriara koqe orie vaivo, qora orie vaivo tivakero ihaqohairo avatama kero tavaintema kera, are ti vaiinti nahenti ni varia aarara avatama kera tavaane, tiro.

²⁸ Minti tumanta te vika avatamake tave, Kotirara tiha., Oho, vika kia ai vevaaraini vaireka auti variavo. Vika kempukaiqamake nái antuqa vai aararaqaa ni variavo. Vika nái hana vaiinti nutu tuvi vuuarire ti, vikara una uva ti variavo. Vika kia koqe ori, *korive silvaave* voqaara vairaiti, vika *ainive baraasive* voqaara variavo.

²⁹ Ihavano voqamakero ite vaivar, qora orivano ravitaviro tuvitarero vuataara vaivar, qaqi vairave. Vira voqaara qora vaiinti nahenti qaqima vika avutana variavo.

³⁰ Vi vaiinti nahentika vaireka, qoririma kaa *silvaara* voqaara variara. Noravano Kotiva vika qoririma kaira.

7

Ieremaiaava Nora Kotira Naavu vaunaini uva tura

¹ Noravano Kotiva tirira tiharo, ²⁻³ Are oru ti Nora Kotika Naavu qentiana himpi vahihara maa uvvara vaiinti nahenti tiva nimiane: Ne Iutaa vaiinti nahenti maini maara tireka aniaka Isarerri Variqa Noravano Kotiva ekaa kempuka vataava niara ti uvvara iriate. Viva mintima tivo: Ne qora aaraqaa ni variara qaqirake koqe aaraqaa nivera, te ni qaqi kaariramanta ne maa vataraqaa homa variqi vivarave.

⁴ Vokiaka tiha, Nora Kotira Naavuvano maini vairara ti, navutaaka kia ho tinavu haatara kevarave, tivake ihi tiha, Maa vira Nora Kotira Naavuve, Maa vira Nora Kotira Naavuve, Maa vira Nora Kotira Naavuve, ti variarave. Hauri ne vika una uvvara quqaave tivorave.

⁵ Ho iriate: Ne qora aaraqaa ni variara qaqirake kia qaiqaa hampi kaiqa varaate. Ne koqe okara nai umiqe nai umiqemaaq vuate.

⁶ Vo vatanaaka ani ni hampata variakave, viqa vaintive, tentoqa nahentive, kia vika vikaqaa nora maara vataate. Kia qaiqaa maa vataraqaa vaiinti nahenti qumina arukaate.

Ne una variqa, vo variqa vo variqa avataqi viha nenta qoraiqamake vai okarara qaqira kaate.

⁷ Ne ekaa vi uvvara avataqi vivera, te ni qaqi kaariramanta ne maa vataraqaa koqemake variqi vivarave. Haaru te maa vataru ni kaivaqaukavaru nimi tiha, Ekaa enta maa vataava vaireva, ni vatama varianarove, tiavaunarave.

⁸ Ho te tavauramanta ne kempukaiqamake una uva iriqi vi variarave. Vi uvava kiama ho ni kahaqianarove.

⁹ Ne muara auti variarave, vaiinti aruke variarave, naata vaati varaa okarara raqe variarave, kauqu aqiqaa aquukeha una uva ti variarave, una variqa Baalira *ofaa* autu amite variarave, una variqanavu haaru ne kia vikara iri tavaaka, ne vikavata avataqi vi variarave.

¹⁰ Ne ekaa vaaqu okara vira autuqi vivi, viraqahai ne ti Naavuvano vainaini ani ti avuqaa vaiha tiha, Navutaaka kiama ani tinau qoraiqama kevarave. Tenavu homa vairarave, ti variarave.

¹¹ Maa naavura Nora Kotira Naavuve tiara ne virara nana naavue tiavo? Tenavu muara kaiqa vareha oru viraqi kukeqavi vairarave, ne virara mintie tiavo? Ho iriate. Ne qora okara auti variara te tavema vauro.

¹² Ho ne Siloqi oru tavaate. Haaru te uva tiva taatau tauna Vokiseva mini vaimanta ti vaiinti nahenti Isareri qora kaiqa varaara kaara te qaqi kauramanta navutaaka Vokise vira vare vuarave. *

¹³ Vate nevata qaqqai qora kaiqa, vo qara vo qara i kaiqara vare variavo. Airi tataa te niara vi kaiqara vare variara qaqira kaate turamanta ne kia ti uva irireka auti variavo. Te ni aareha qora aara qaqira kaate turamanta ne kia vo tiraiti, kia ti uva iriavo.

¹⁴ Vira kaara te haaru Siloqi autunantemake, tenta hutu vai Naavura qoraiqama karerave. Ne tiha, Vi Naavuva vaimantara ti, navutaaka kia ho tinau haatara kevarave tiarave. Te maa vatarua ni kaivaqaukavara nimunara, te viravata qoraiqama karerave.

¹⁵ Te ni qata vakaa Isareri nititama kaunantemake, ni Iutaavata tenta avuqahai nititama kaariramanta „navutaaka ni rumpa vare vo vataini vuru kevarave,“ tiro. Noravano Kotiva vi uvvara tura.

Iutaa kempukaiqamake una variqara avataqi vi vaurara tura

¹⁶ Noravano Kotiva tiriara tiharo, Ieremaiao, kia maa vaiinti nahentikara irihara ti haaraane. Kia mpo ike tiharo tiriara vika aaqurihama nimitaane tiane. Are mintirera, te kiama ai uva irirarave.

¹⁷ Iutaa vo vatuka vo vatukaqive, Ieruharemi vo aara vo aaraqaave, vika qora kaiqa vare variara are kiae tave variaro?

¹⁸ Vika vaintivara iha nuntu ruvaagumake variamanta, vika qokavara iha quarate variamanta, vika nokavara *porisi/voruhi* varake *bisiketi* auti variavo. Vika *bisiketi* varake *ofaa* autuke una variqa Naaruva Kuinirave ti varia variqara ami variavo. Ti popohama timitareka, una variqa vo variqa vo variqara *uaini ofaa* rauru nimite variavo.

¹⁹ Vika mintiha kia ti Nora Kotikavauve qoraiqama timite variavo. Vika mintiha nái qoraiqama nimiteha, kaurira haikavata vare variavo.

²⁰ Vika minti variara kaara te Noravano Kotika ekaa haikaqaa raqiki vaurauka tiha, Te kia maa vataraqaa variaka vehakuma nimirarerave. Ti noraiqakero arara ite vairaqe te vaiinti, aantauvahive, katarive, naahove, qoraiqama karerave. Ti arara ite vairava kia humpama viraitiro, qaqqi arara itaqiro vuuanarove turo, tiro.

²¹ Noravano Kotiva Iutaa vaiinti nahentiara tiharo, Te ni Isareri Variqa Noravano Kotika ekaa kempuka vatauka niara mintima ti: Ne hini *ofaa* ekaa kaintu iha quarake, hini *ofaa* nenta vira mati ne variarave. Ho qaqrake, ne nenta ekaa vo *ofaa* vo *ofaa* autira qaqqi naate.

²² Te ni kaivaqaukavara Isipiqihai ntita vare anuna entara kia te vikara ekaa kaintu iha quare *ofaarave* vo *ofaa* iha quara timitaate tiraiti,²³ te maa uvvaraqai kempukaiqamake vika tiva nimi tiha, Ne ti uva koqemake iriqi vi vaiqe te ni Variqa variariramanta ne ti vaiinti nahentima vaivarave. Ne koqemake variqi vuuate ti, te niara vi aarara vi aararaquaanuati tiariramanta ne viraqaa vuuate, tunarave.

²⁴ Te vikara minti turamanta vika kia ti uva avataqi viraiti, kia nái aato ti timiraiti, vika kempukaiqamake nái avu aatoqi qora kaiqa varera viraqai avataqi vuarave. Vika te unanaini aniataara vaimanta, ti tauvaqa utu timitaarave.

²⁵ Ni kaivaqaukavara Isipi ke ania entaraqahai te vo enta vo enta qaiqaa qaiqaa tenta kaiqa vaiinti paropeti vaiinti vara kauramanta vika ne Isareri ianaini ani variarave.

²⁶ Ti paropeti vika ti uva ni tiva nimiamanta ne kia vika uva iriraiti, kia nenta aatovata vika nimirarave. Ne kempukaiqaake qora okara avataqi vuavarne qora kaiqa varaava ni kaivaqaukavara varaaravata uri aatara kairave.

²⁷ Ho Ieremaiao, are ekaa maa uvvara ti vaiinti nahenti tiva nimiramanta vika kia ai uva irivarave. Are vikara qora aara qaqqira kaate tiramanta vika kia ai uva irivarave.

²⁸ Vika kia ai uva iriraiti, vika kia vira qaqqi kaavarvo vika okara avuqavu qirave. Vika quuqa okara kia avataqi vuavarne quuqa uvavavano kia vika noqihairo qovaraiqi vairave.

²⁹ Oho, Ieruharemiqi variakao, Nora Kotira arara itaivaro ni nai vaiinti nahenti qoririma kairara ti, ne nenta qiatu kauhi toqa aukue, oru aiqinaini vaiha qutuakara ihi tiara tiate.

* **7:12:** 1 Samueri 4:3-12; Ihi 78:60

³⁰ Noravano Kotiva tiharo, Iutaa vika ti tivuqaa qora okara auti variarave. Vika una variqa *maraqura/varaha* te vaaqu haikave tuna haikara ti Naavuqi vara vaaviarama taarave. Vika mintiha ti Naavu anomake qoraiqama kaavo.

³¹ Vika nái maaqu raavura *ofaa* iha quarareka Hinomu Uqitaini *ofaa* tainta vo Tofetini aututaarave. Kia te vikara mintiate tunarave. Vika mintimake vaaqu okara auti variara kia te tenta avu aatoqi iritauna haikarave.

³² Ho raurihi variate. Vo enta anintaira vaiinti nahenti kia qaiqaa vi vatara autu nteha Tofetive, Hinomu Uqitainive tiraiti, vika virara *Vaiinti Nahenti Airitahaa Arukaa Vatarave* tivarave. Naantiara navutaaka ni Iutaa vaiinti nahenti airithaha teqa taaqamake aru kaimanta vokika qutuvika vaata mini quntamaqi vivi, vi vatara mpiqa kaivaro kia hini vata qaqi varianarove.

³³ Hini kika qunte vatava kia vairamanta vika vaata qaqi vairamanta mati ne uvirikave, qaakau vairive, ani vika vaata ne vaivaro, kia vovano vika ruhaaqi kaarirava varianarove.

³⁴ Iutaini vo vatuka vo vatukaqive, Ieruharemipi vai aararaqaave, kia vovanovata varianarove. Vaiinti nahenti quaheha naaraihi varia uva *nontantarave/otatarave*, qaraaka naata vaati varaarara quaheha uva otata tiarave, ne kia viraqihai vi uvvara vi uvvara qaiqaa irivarave. Te vi uvvara vi uvvara tira taiqa kaariraro qumina naantaaka ntuanarove. Noravano Kotiva minti tura.

8

¹ Vi entara navutaaka Iutaa nora vaiinti quntama taanaini aninte, avuhainauka vuhaarive, vika qiata vaiinti vuhaarive, Kotira kaiqa vara amitaaka vuhaarive, paropeti vaiinti vuhaarive, vo vaiinti nahenti Ieruharemipi variaka vuhaarive, matipaqhiai mpaqiqi qaqini aqu kevarave.

² Vika vuhaantaari aqj kaivaro kirikairiro vairamanta kuari avuvanove, toravanove, opu makauvane vuhaantaari vika tavevarave. Maa vaiinti nahentika qaqi varia entara vika antuqavano naaruvaini vai haikarara vaimanta vikara *ofaa* iha quara nimite, vika naareha tinavu kahaqiate tivaqj viha, vi haikara autu tuaherake variarave. Ho kia vovano vuhaari vika nuntu ruvaaquma kero qaiqaa quntaraitiro, qaqi kairaro vairi raara voqaa voqaa vaintema kero, vika vuhaantaarivan varianarove.

³ Naantiara navutaaka qora vatanaa maaka hini kia arukeka te vo vatanaa vo vatanaaka varianaini raumpirima kaari vika mini vaiha mpo tiha, Tenavu kia qaqi vairaiti, haaru qutu vuataarave, tivarave. Te Noravano Kotika ekaa kempuka vatauka vi uvvara turo, tiro.

Iutaa qora okara avataqi viha kia kauruara

⁴ Noravano Kotiva tiriara maa uvvara ti vaiinti nahenti tiva nimiane tiro: Vaiinti vovanovao kaavu ntirava, viva kiae vaaka qaiqaa himpuanarove? Vaiinti vovanovao hampi aaraqaa virava, viva kiae orurantero anianarove?

⁵ Ho nantihae ti vaiinti nahenti kia orurante aniraiti, qaqiqai hampi aaraqaa vi variavo? Nantihae Ieruharemipi variaka kempukaqama keha nái una okara avataqi viha, kia tuqantaavi te unanaini orurante aniaivo?

⁶ Te vika uva irirera aato vatauramanta vika kia avuqavuqamake uva tiarave. Vikaqihairo kia vovanovao nai qora okara autira qaqira kero tiharo, Vi okarara kia avataqi vuataarave, ti vairave. Ohivano iqoka raquanaini kante vireva auti vaintemake, vika ekaa nái antuqavano vai aararaqaa vi variarave.

⁷ *Karoqera/Karontaarave*, qarorave, vonaini oru varike, nái maaqaini anirante vi entara kankomake iriarave. Vika vi ani entara te kaama nimitoramanta avuqavumake vi ani variarave. Vika mintiamanta, ti vaiinti nahenti te vikaqaa raqikuna okarara kia kankomake iriarave.

⁸ Ne Iutaini variaka tiha, Tenavu Noravano Kotiva tivatai uvvara vatauraukara ti, tinavu avu aatovano koqe iro vaimantama vauro, tiarave. Ho nantiak ee ne minti tiavo? Te tavauramanta uva maara okara ti variaka te tivatauna uvaraqaahai tuqantaake una uva vaiinti nahenti tiva nimi variarave.

⁹ Ne avu aato vataaka kaurira haika vare qete vaimanta naavutaaka ni rumpa kevarave. Ne ti uva qoririma kaarara tiro, ni avu aato kia koqe imanta variarave.

¹⁰ Vira kaara te qaqi kaariramanta vokika ni naaho maatave, ni naatavarave, varevarave. Te tavauramanta ekaa vaiinti nahenti monu airaira varareka auti variavo. Paropeti vaiintive, ti Kotika kaiqa vara timite variakave, ekaa vika vi haikara varareka una okara avataqi vi variavo.

¹¹ Ti vaiinti nahentiqaa nora numuara vaimanta vika virara inaara numuaraqaima vaivo tivakeha kia vira rumpa nimite variarave.

Vika vaiinti nahentiara tiha, Ne kia qetaate. Tenavu maateraiqihha koqemake variqi virerave, ti variamanta navutaaka qaqiqai ani variavo.

¹² Vika nái vaaku kaiqa vare variara kaara kaurihae variavo? Aqao, vika vi kaiqara vareha kia kauriraiti, qora okara qaqiqai avataqvi variarave. Ho vira kaara vo kiaka kaavunti taiqa vuantemake, te vika ntaihamaa kaaina entaraqaa vikavata kaavunti taiqa vivarave, tiro. Noravano vi uvura tura.

¹³ Oho, te Noravano Kotika vika vehi autu taiqa karerave. Vika *uaini* naaquntauqaa kia tava vairaro vika *fiki* katariaavata kia tava vairaro vira marevano tamuntero aqu ntuanarove. Te vo haika vo haika vika nimunara navutaakama varevarave, tura.

¹⁴ Vi entara Iutaini variaka mintima tivarave: Oho, tenavu qumina maini oquvi variarorave. Kaiqe himpi ruqemake vo vatuka vo vatuka vaantaavura ututumateraqi oru vailha qutu vuare. Tentanavu Variqa Noravano Kotiva tivatai uvura raqa kaunara kaara viva tinavu vehi autu taiqa karevave. Viva tinavuara qutu vuate tiro, uhi namari tinavu timivo.

¹⁵ Oho, tenavu qaqi maateraiqihha variqi virarave turaro kia vi entava anintaivo. Vo rovara vo rovaravano taiqaaina entava anianarove turarovata, voqamakero aatu itaaina haikava qovaraiqivo, tivarave.

¹⁶ Oho, navutaaka vaakama Daani vatukaini ani variamanta tenavu vika iqoka ohi kempukaiqaake aiho vare variara iruro. Vika kempuka ohivano noraiqaake aakara nteha *mpururu mpururu* tiavarao ekaa vatavano geteharo ntiri ntiri i vaivo. Tinavu vatave, ekaa vo haika vo haika tinavu vataqaa vairave, vo vatuka vo vatukave, vaiinti nahentive, navutaaka ekaa vi haikara nama kareka ani variavo, tivarave.

¹⁷ Noravano Kotiva tiharo, Ho tavaate. Te *quqahi/quaiha* vara kaari vika ni avutana vivarave. Ne vika qihaaqama nimite aarava kia vairamanta vika ni nkaqa kevarave.*

Ieremaiaara muntukavano qoraiqura

¹⁸ Mpo, ti muntukavano voqama kero qoraiqimanta vauraro kia ho vo haikavano ti muntuka qoraiqira kahaqama timitaanaro.

¹⁹ Ho iriate. Ti navunaaka niara vataini vahia keke tivaqvi viha tiha, Oho, Noravano Kotiva kiae Saionini nai Naavuqi vaivo? Nana kaarae Saioni Avuhainavaa qaqrakero vivo? tiavarao Noravano Kotiva nái tiva nimiro tiharo, Ne nantihae ti arara itaarire ti, nenta una variqa *maraqura/varaha* aututaara quahama nimiteha, vo vatanaaka una variqa kia ho ni kahaqaina haikaravata quahama nimite variavo? tiro.

²⁰ Minti tumanta vaiinti nahenti tiha, Kara quantua entava aitaravaro koqe kuarivano itai entavavata taiqa vivaro, Noravano kiaqai tinavu ruanuama timitairave, tura.

²¹ Oho, ti navunaaka qoraiqama vuara kaara ti muntuka voqamakero qoraiqimanta vauro. Te vi anihia iqí rataqvi vi vauraro aatu itai haikava ti ravaaqavu kaimantama vauro.

²² Mpo, Gileati vataini kiae koqe *marasini* vo vaivo? Kiae mini koqe *doktaa* vovano vaivo?

Numuaravano ti navunaakaqvi qaqi ite vaira nantiharoe „Kotiva“ kia *marasini* viraqaa aqu nimitairaro tavanta vuarire? ti.

9

¹ Mpo, ti qiatavano varuva namari voqaara vairaro, ti tivuvano aruvu namari voqaara variataarave. Mintimake vairaqe te entaqqvata aatitairaqaavata tenta navunaaka arukaakra ipi rata nimitaqvi virerave.

² Mpo, aahara vataini ti haraara naavu vo vairaqevauve, te tenta navunaaka maini ke mini oru variataarave. Vika ekaa naata vaati varaa okarara raqakaaka variavo. Vika ekaa kia Kotirara noraiqaake iriraiti, qora aaraqaqaai vi variavo.

³ Noravano Kotiva tiharo, Vaiintivano airi veva aqukaintemake, ti vaiinti nahenti noqihairo una uva, vo uva vo uva qovaraiqvi vairave.

Una uvavanoqvi maa vataraqaa raqiki vaimanta vika qora kaiqa vareha, qaiqaa qaiqaavata qora kaiqa vare variarave. Vika kia tiriara tinavu Variqave ti variarave.

⁴ Ni tontivara ni qoraiqama kevorave ti, rauriha variate. Kia nenta qata vakaaraqaa muntuvari variate. Ni qata vakaa vika niara una uva ti variamanta, ni tonti vika niqaa una uva oqikeha ti variarave.

⁵ Vira tontivano nai tontiara una uva ti vaivaro kia vovanovata quqaa uva ti vairave. Vika una uva tivaqvi vivi, anomake una uva ti varia okarara tavaarave. Vika qora okara autuqvi viha, kia ho vi okarara tutu kevarave.

⁶ Ieremaiaao, are una uva ti variaka avutana variaramanta vika tiriara, Viva kia tinavu Variqave tiarave, tiro.

* 8:17: quaiha: navutaaka

⁷ Minti tivakero Noravano Kotiva ekaa kempuka vataava tiharo, Ho tavaate. *Silvaa* ori hampata qora orivano variantorave tiro, ihaqohairo *silvaa* ori *unta/nuta* kaintemake, te tenta vaiinti nahenti avatamake tavarerave. Te nana aaraqaae tenta vaiinti nahenti utetararave? Kia vo aaravano vaivo.

⁸ Vika maaqirivano vaireve, vaiinti aruke vevara voqaara vairave. Vika nái noqihai una uvaqai ti variarave. Vika nái noqihai nái hana vaiintiara koqe uva tihavata, nái avu aatoqi vika arukerara irite variarave.

⁹ Oho, vika mintimake qora okara avataqi vi variara kaara, te vika ntaihama kaari-ravama vaivo. Iutaa vatanaaka ti qora okara autu timitaara kaara te tentaqa vuntu karerave. Noravano Kotiva minti tura.

¹⁰ Mpo, te ainqinavuara iqí rata nimiteha, ukauvano aaharaiqama viraravata iqí rata nimitarera. Vaiinti nahenti kia qaiqaavata mimi mini vi anivara.

Purumakau ukau neha aakara nte varia uvvara kia te qaiqa iruro. Uvirive aantau-vahive ekaa qetake ruqemake vi anima vuara.

¹¹ Noravano tiharo, Te Ieruharemi vatuka qoraiqama kaariraro viraqi vo kanta vo kanta orivanoqai kirkairiro varianarove. Te Itaini vo vatuka vo vatuka vehi autu taiqa kaariraro kia vovanovata mini ho vairamanta qaakau vairiqai mini vi anivarave, tiro.

¹² Viva minti tumanta te tiha, Tavave koqe avu aato vataava Kotira okara ho irianarove? Noravano Kotiva ta vaiintirae tiva amiraro vi vaiintiva tinavu vutukero Kotira okara tiva timianarove? Nantihae navutaaka maa vatara qoraiqama kaavaro aahara vataiqama vimanta kia vovano ho vi anianarove? ti.

¹³ Te minti turaro Noravano Kotiva ti tiva timiro tiharo, Ti vaiinti nahenti te uva tiva taunara qoririma kaara vira kaarave. Vika kia ti vevaaraini vairaiti, te uva maara tiva taunara kia avataqí vuvarave.

¹⁴ Vika kempukaiqamake nái avu aatoqi hampi kaiqa varera avataqi viha, nái kaivaqaukavara qora okara numiqantemake, vika una variqa Baalira *maraqura/varaha*, vo varaha vo varaha quahama nimite variarave.

¹⁵ Vika mintiara kaara te Isarerri Variqa Noravano Kotika ekaa kempuka vatauka tiha, Te hunkavi naahoravata uhi namarivata vika nimiasi neverave.

¹⁶ Te vo vatanaaa vo vatanaaka vataini vika raantaupirima karerave. Vika kaivaqaukavaravata yikavata kia yi vatanaakara kankomake irianaini te vika raantaupirima karerave. Te qaqi kaariraro iqoka paiprevano vika ntataqiro viharo vehi autu taiqa kaanarove, tiro.

Ieruharemiqí vauka iqí ratora

¹⁷ Noravano Kotiva ekaa kempuka vataava tiharo, Ne te tiaina uvvara iriha variate. Nahentinavu qutu vika iqí rata nimite vaika naaraate. Ne vika naaraimanta ani qutuvu ihira tiate, tumanta ¹⁸ vaiinti nahenti tiha, Mpo, vika naareha tiha, Kante aniate, tiate. Ne mpooqihira tiva timite vaiqe tenavu iqí rate variariraro tinavu tivuqihairo auquru voqamakero nteharo auruvu vaura otu vuarire, ti.

¹⁹ Iriate. Saioni vatukaqihai vaiinti nahenti iqí rate varia uva *nontantara/otatara* te iri vauro. Vika tiha:

Ohoh, tenavu qoraiqama vima vauro. Tenavu nora kaurira haikama varauro.

Navutaaka tinavu naavu maaqa rampai raampaiprima kaarara ti, tenavu maini ke vo vataini vuvariravama vaivo, ti.

²⁰ Minti tumanta te Ieruharemiqí vau nahentikara tiha, Ne Nora Kotira uva iriate. Ne nenta aato vira amiha, vira noqihairo tina uvvara kankomake iriate. Ne nenta raavuravara mpooqihira tiva nimiate. Ne iqí rate vai ihira nai tiva ami nai tiva ami maantima tiate:

²¹ Qutira haikavano tinavu avutana qovarama vivo. Tenavu vehi vaiinti naavuqihira kaukavane, nora vaiinti naavuqihira kaukavane, viva qaqqai tinavu rantakero arukaananarove. Viva vainti haika aaravau ruhe variaka arukero, qaraaka vaiinti *maaketiqi* ruvaaqumavi variakavata arukaivo.

²² Vairi raha vona vona vaintema kerove, *uiti* naahoqi teqake rumpake vataava vona vona vaintema kerove, vaiinti nahenti arukaaka vaatavano vona vona vaimanta vika vaata nuntu ruvaaqumake quntama teka kia variavo.

Noravano Kotiva vi uvvara vaiinti nahenti tiva nimiane tura.

²³ Noravano Kotiva tiharo,

Hauri koqe avu aato vataava nai mahuta tiharo, Te koqe avu aato vataukave tiantorave.

Hauri kempuka vaiintivano nai mahuta tiharo, Te kempuka vaiintima vauro tiantorave.

Hauri airi monu vataava nai mahuta tiharo, Te airi monu vatauka vauro tiantorave.

²⁴ Vovano maa okarara avateharo nai mahuta tiarirava homa varianaro:

Viva kankoma kero ti Nora Kotika iri tavero, ti vevaaraini variariravave. Viva kankoma kero irimanta te vaiinti nahenti koqema nimite vaunarave,
te vika aaqurihama nimite vaunarave,
te tenta avuqavu okara avataqi viha, vaiinti nahenti avuqavuqama nimite vau-
raukama vauro.

Vovano ti aanantero mintiaqiro virera, te vi vaiintirara quaheha vairarave, tiro.

²⁵ Noravano Kotiva tiharo, Vo enta amintairaqe te vi entaraqaa vo vatanaa vo vatanaaka qorainti nái vaata toqakekave, kia vaata toqakekave, ntaihamma karerave. Ekaa vika vika te tivatauna uvvara kia iri variarave.

²⁶ Isipive, Iutaave, Idomuve, Amonive, Moapive, aahara vataini variaka nái qiata kauhi qiquqamake toqakaakave, ekaa vika qorainti kia nái vaata toqakaaka variamanta, Isareri qorainti vika nái vaata toqakaaka vahivata, vika ekaa nái muntukaqihai kia qora kaiqa toqake qaqlini varakaaka variarave. Noravano Kotiva vi uvvara tura.

10

Noravano Kotivaqai quqaa Variqavano vairara tura

¹ Ne Isareri vaiinti nahentio, aato ti timiqe te Noravano Kotiva tivatai uvvara ni tiva nimiare.

² Viva tiharo, Hauri vo vatanaa vo vatanaaka qora okara avataqi vi variara nevata avataqi vivorave. Vika naaruvaini aahuva haika qovaraiqira taveha, voqamake geteha variarave. Hauri nevata vi haikara taveha getevorave.

³ Vika una variqa avate varia okarava kia vika kahaqiraitiro, qumina okaraqai vairave. Vika nantaqihai katari teqake vare aniavaro vovano *siseri* varakero viraqohairo katari viraqaa una variqa viri vaata nkauru kero autukero vatairave.

⁴ Mintima kero autu kaimanta vika *korive silvaave* varake viraqohai *maraqura/varaha* vaataiqamake vate, vi haikava hiqintuantorave ti, *niriqohai* arutaarave.

⁵ Uvirivano naahoqi kara naantorave tiro, naaho qova vaiinti varaha vaavi arataira voqaara, vi haikava kia ho uva tirave. Vi haikava kia ho nai niraaitiro, qaqi vaimanta vokiaka vira aqu vare vi variarave. Kia vi haikauka autu geteha variate. Vika kia ho ni qoraqama nimite, kia ho ni koqema nimitevarave. Noravano Kotiva minti tura.

⁶ Noravauvu, kia vovano ai voqaara vairave. Ai kempukavano uri aatarakero vaivarai ai autuvanovata nai nora autu vaivaro „vaiintivano ai autuqua nora kaiqa homa varaanarove.„

⁷ Are ekaa vo vatanaa vo vatanaaka Avuhainaava varianarara ti, ekaa vika ai autu geteha ai vevaaraini variatarave. Ekaa vo vatanaa vo vatanaaka avuhainaaukave, koqe avu aato vataukave, vikaqihairo kia vovanovata ai voqaantemra kero vaivo.

⁸ Vika nái avu aatoqi iritaa uvava qumina uvqaqai vaimanta vika hampi okara avataqi vi variara. Katariqohai una variqa aututaa haikava qumina katariqai vairara ti, vi haikava kia ho vaiinti nahenti koqe avu aato nimianaro.

⁹ Speni vataihai kakanairima taa *silvaa* orira vare, Ufasiqihai *kori* ori vare aniamanta, vi kaiqara kankomake tavaaka *maraqura/varaha* ori viraqohai naavuma kaamanta, vo kiaka tavuna kutaa okarara kankomake tavaaka naare tavunave ihiqa tavunave autuke viraqohai varaha nonku amitaara.

¹⁰ Vika *maraqura/varaha* autuke vataava qumina haika vaivara, Noravauvu, areqaima quqaa Variqavano variaro. Are Variqavano qaqi variqira vi variarava vahihara, are Avuhainaava ekaa enta qaqi variqira vinarave. Ai araravano ite vai entara maa vatava geteharo ntiri ntiri i vaira vo vatanaa vo vatanaaka ai autu getevorave.

¹¹ Isarerio, ne vo vatanaa vo vatanaaka maantimake tiva nimiare: Ni una variqa vika kia naaruvavata vatavata autuke vataakara ti, vo enta vika ekaarama vehiqamaví taiqa vivarave.

¹² Noravano Kotiva nai kempukaqohairo maa vatara autukero vatorave. Viva nai koqe avu aatoqohairo maa vatara autukero vatero, vaiintivano *seri* rairakero aqutaintemra kero, naaruvavata rairakero vatorave.

¹³ Viva tivaro naaruvavano karara tivaro nora aaqu nti vairave. Viva tivaro niara vataihairo tonavuvano kumpetaqiro anirave. Viva tivaro aaquakaavano uti vaivaro aaquvano nti vaivaro uvaivanovata uti vairave.

¹⁴ Una variqa avataqi vi variaka avu aato kia vaimanta vika vo haikaravata kia kankomake iri tave variara. Una variqa auti variaka vika una haikaqai auti variavaro kia aiho vareva vi haikaraqai vaimantara ti, vika kaurira haikama varevara.

¹⁵ Una variqa *maraqura/varaha* vaireva, qumina haikaqaima vairo. Ne ekaa vi haikara naaraihama nimitaataarave.

Noravano Kotiva ekaa vi haikara vehi autu taiqa kaaina entava anianarove.

¹⁶ Iekopira Variqavano kia una variqa voqaara vairaitiro, viva ekaa haika autukero vataiva vaiharo, viva Isareriera tinta vaiinti nahentima vaivarave tirave. Vi Variqara autu vaireva, Noravano Kotiva ekaa kempuka vataavave.

Navutaaka Isareriera qoraiqama nimito entara

¹⁷ Ieruharemi vaiinti nahentio, navutaaka maa vatukara ututuma taavo. Nenta vataa haikara utuvare vo vataini vireka irara qeramate variate.

¹⁸ Noravano Kotiva tiharo, Te maa vataraqaa variaka vonaini vara aqu karerave. Te qaqi kaarimanta navutaaka ani vika qoraiqama nimite rumpa vare vo vataini vuru kevarave, tiro.

¹⁹ Viva minti tumanta Ieruharemipi variaka ike mpo tiha, Oho, tenavu qoraiqama vuro. Nora maaravano tinavuqi vaivaro, nora numuaravano kia ho tavanta vuainara voqaarama vaivo. Oho, tenavu nora maarama varaqi virarave.

²⁰ *Seri* naavu maaqa ekaa qoraiqama vivaro vira tuatai kaantaukavata ekaa rapepaama vintema kero, Ieruharemivano qoraiqama vivo. Tenavu qaiqaa vi *seri* naavura vaavi arakarare turaro, kia vovano tinavu kahaqiarirava vaivo. Vaiinti nahenti kia vairaiti, vika ekaa vo vataini vuavo.

²¹ Tinavu qiaa vaiinti avu aato kia vaimanta vika kia Nora Kotirara tinavu kahaqiane ti variara kaara, vika kia koqema vi variamanta vaiinti nahenti kirikairimavi variavo.

²² Ho iriate. *Noti* mantaraihai iqoka vaiinti airithaa ani variavaro noraiqaakero auvante vaivo. Vika Iutaini vai vatukara, vo vatuka vo vatuka vehi autu taiqa kaivaro ahahra vatavanoqai vairamanta qaakau vairi vikaqai mini vi anivara.

Ieremaiaava Kotira aarora

²³ Noravaovo, tenavu maa vataraqaa vaiha, kia ho tenavu tentanavu variqi vuainaraqaa raqikirara. Kia tenavu ho tiha, Maa vataraqaa tenavu minti mintima enta variqi virarave, tirara.

²⁴ Mpo, Noravaovo, are tinavu utetehara, hauri ai arara itairara tinavu uteterorave. Are mintirera, tenau kia ho vairaiti, taiqama virarave.

²⁵ Vo vatanaka kia ai autu tuaherake variaka, are vikara arara itehara qoraiqama nimitaane. Tavaane. Vika tinavu ai vaiinti nahenti arukeha, vehi autu taiqa keha, tinavu vatavata qoraiqama kaavaro qumina vataqai vairave.

11

Isareriera uva tiva taatautora raqakora

¹ Noravano Kotiva qaiqaa tiriara tiharo, ² Te haaru uva tiva taatau taunara vira irira, are lutaini variakavata Ieruharemipi variakavata vi uvvara tiva nimiane.

³ Are vika tiva nimira tiharo, Isareriera Variqa Noravano Kotiva mintima tivo: Vovano te tiva taatau tauna uvvara kia iriqiro virera, vi vaiintiva qoraiqama vuuanarove.

⁴ Nora iha itairaqihai qaqini vara kaantemake, te ni kaivaqaukavara Isipihai ruaruama nimitaunarave. Vi entara te vikara tiha, Ne ti uva iriqi viha, ekaa vi uvvara avataqi vivera, te niara tinta vaiinti nahentive tivakeha ni Variqavano vairerave tunarave.

⁵ Ne ti uva iriqi vivera, haaru te tenta kauqu ariqaa aquakeha ni kaivaqaukavara Eparahaamirave, Aisaakirave, koqe vata, karavano koqemakero qampiqaina vatara nimirerave tuna uvvara vi vauma varianarove. Ho vate maa entara ne Isareriera vi vataraqaa variarave, tiro. Viva minti tumanta te tiha, Noravaovo, quqaama tiaro, tunara.

⁶ Te minti turaro Noravano Kotiva qaiqaa tiriara tiharo, Are Iutaini vo vatuka vo vatukainai oruntera, Ieruharemipi vi ani varia aarantuna oruntera, vaiinti nahenti tiva nimihara tiane: Te tiva taatau tauna uvvara ne iriha vi uvvara vi uvvara avataqi vuate.

⁷ Te ni kaivaqaukavara Isipihai ntite anuna entara te vikara tiha, Rauriha variate. Ne ti uva kia avataqi vivorave tunarave. Vi entaraqahai te ni Isareriera qaiqaa qaiqaa ti uva avataqi vuate tivaqai ani vaunarave.

⁸ Te vikara minti turamanta vika kia ti uva avataqi viraiti, vika kia nái aato ti timiraiti, vika kempukaiqamake nái avu aatoqi qora kaiqa varera viraqai avataqi vuarave. Te vika hampata uva tiva taatauke vataunara raqakaara kaara, te vika tota tunantemake te vika qaiqaa qaiqaa ntaihama kaunarave, tiro.

⁹ Noravano Kotiva tiriara qaiqaa tiharo, Te iruramanta Iutaini variakavata Ieruharemipi variakavata uva tiva taatauke tiha, Tenavu kia Kotira vevaaraini vairerave tiarave.

¹⁰ Vika ti qaqirake nái kaivaqaukavarava qora kaiqa varaara qaiqaa vare variavo. Vika kaivaqaukavarava kia ti uva iriantemake, vikavata kia ti uva irireka auti vaiha, una variqa, vo variqa vo variqa quahama nimite variavo. Te vika kaivaqauka hampata vohaa uva tiva taatauke vataunara Isarerivata Iutaavata raqa kaarave.

¹¹ Vira kaara te Noravano Kotika tiha, Te vikaqaa qora enta qovarama kaariramanta vika kia ho ruqemake vivarave. Vika tiriara ike mpo tiqevata, te kia vika uva irirerave.

¹² Iutaini vo vatuka vo vatukaqi variakavata, Ieruharemipi variakavata, qora entavano qovaraiqina entaraqaa oru nái *ofaa* autu nimite varia variqaukara ike mpo tiha timavu kahaqiate timantavata, vi haikauka kia ho vika kahaqivarave.

¹³ Oho, Iutaa vataini airi vatuka vaintemake, ni una variqa airitaha variarave. Ieruharemipi airi aara vaintemake, ne airi *ofaa* tainta autuke, te vaaqu haikave tuna variqara Baalira *ofaa* iha quara amite variarave.

¹⁴ Ieremaiao, kia maa vaiinti nahentikara irihara ti haaraane. Kia mpo ike tihara tiriara vika aaqurihama nimitaane tiane. Nora maaravano qovaraiqina entara vika ti haaraiqe te vika uva kia irirarave. tiro.

¹⁵ Minti tivakero Noravano Kotiva Iutaini variakara tiharo, Oho, ti muntukavano vai vaiinti nahentika qora kaiqa, vo kaiqa vo kaiqa vareha, nantihae ne ti Naavuqi *ofaa* autireka vi variavo? *Ofaa* mati vivaе ni kahaqirage te kia ni ntaihararave? Aqao, kiave. Te tavauramanta ne quahakema qora kaiqa vare variavo.

¹⁶ Haaru te niara koqe *orivi* katarivano airi tava iraira voqara variavo tunarave. Ho vate te vi katarira iha quara kaariraro ihavano noraiqakero iteharo takaa tiharo kanta kaara ekaa ita kairaro kinta kaantama vuuanarove.

¹⁷ Te Noravano Kotika ekaa kempuka vatauka ni maa vataraqaa ututaunarave. Ne Isarerivata Iutaavata qora okara avataqи viha Baalira *ofaa* iha quara amitaara kaara, ti vogaamakero arara itaimanta te niqaa uva vate tiha, Qora entavano niqaa qovaraiqianarove, turo, tiro.

Vokuka Ieremaiaara arukareka auti vaura

¹⁸ Noravano Kotiva tiriara tiharo, Raurihara variane. Vokiaka ai arukerara nai tiva ami nai tiva ami i variavo, tura.

¹⁹ Vaiintivano sipisipi naati arukareva kantaruma varaintemake, ti navutaaka ti arukareka auti variarara te kia kankomake irunarave. Vika tiha, Vaiintivano katari tava irataira hampata tuqu kaintemake, kaiqenavu vira vaaka arukaari vaiinti nahenti vira autu tauruke kia qaiqavata virara iritaate, tura.

²⁰ Vika minti tumanta te Kotira aareha tiha, Noravauvu, are ekaa kempuka vataavave. Are avuqavuqama kera vaiinti uva rahe variaravave. Are vaiinti nahenti avu aatoqi vai uvara avatama kera tave variaravave. Are tiqaa vuntu kehara vika qoraiqama nimitaane ti, te ai kauquqi vi vaiintika vatauro.

²¹ Anatoti vatukaqihainauka ti arukaataa imanta vika tiriara tiha, Are qaiqaa qaiqaa Nora Kotira autuqaa uva tirera, tenavu tentanavu kauquqohai ai arukarerave tiarave, ti.

²² Te Kotira aareha minti turaro Noravano Kotiva ekaa kempuka vataava tiharo, Vika minti ti variara kaara, iqoka paipevano vika qaraaka vaiinti arukaanarove. Vika maaku raavura narara variqi vivi, vuru qutu vivarave.

²³ Te vika ntaiharera vo enta kaama taunarave. Vi entava qovaraiqira kia Anatotihainaaka vovanovata qaqi vairamanta vika ekaama qutu vivarave, tiro.

12

Ieremaiaava Nora Kotira irora

¹ Noravauvu, te ariara ti uva avuqavuqama timitaane tierera, are koqema kera uva rahe variaravara tira, are ti uvavata avuqavuqama timitenarave. Ho are ti qaqi kairaqe te are vaiinti nahenti uva avuqavuqama nimiteni okarara ireha tavaare. Nantihae qora kaiqa vare variaka koqemake variqi vi variarave? Nantihae ariara kia noraiqaake iri variaka variavaro vikaqii kia nora maaravano vairave?

² Katarai vataqii ututaantemake, are vika maa vataraqaa vataaramanta, vika katarivano tuqa aratero koqe tava iraintemake, koqemavi variarave. Vika nái noqihai ai autu nte variavarovata, vika muntukavano kia ariara vairave.

³ Noravauvu, vika mintimake variavaravata, are ti okara kankoma kera iri tavaanarave. Te kaiqa vare vaunaravata, ti muntukavano ariara vairavata, are kankoma kera iri tavaanarave.

Oho, sipisipi arukareka rarau viri kaantema kera, are vi vaiintika rarau viri vatera, nena kaama tena entaraqaa vika arukaane.

⁴ Mpo, tinavu vatavano aaharaiqama vi-varo voqi voqi ukauvanovata tamunta viro vaivo. Nanti nanti entae mintima kero varianarove? Maa vataraqaa variaka qora kaiqa vare variara kaara aantauvahivata uvirivata quti variavo. Vaiinti nahenti tiha, Kotiva tenavu vare vauna kaiqara kia tave vaivo, tiarave, ti.

⁵ Te minti turaro Noravano Kotiva tiharo, Ieremaiao, are vaiinti hampata kantamaqì vihara aanaraiqama viramanta vika ai uri aatara kaivera, are nantiakerae ohi hampata ho kantenarave? Are vata nahai kanta vihara kaavuntirera, nantiakerae are Iotaani Namari auvahini vai nantaraqira vinarave?

⁶ Ho tavaane. Ai qata vakaave, ai qora naavuqi variakave, vika uva tiva taatauke ai qoraiqama amitareka auti variavo. Raurihara variane. Vika ugerara uva ariara tivara are kia vika uvra quqaa uvave tivakera, vikaqaa muntuvira variane, tiro.

Noravano nai vaiinti nahenti qoririma kora

⁷ Noravano Kotiva tiharo, Te Isareri tauvaqa utu nimitarerave. Te tenta kaama tauna vaiinti nahentika te vika qoririma karerave. Ti muntukavano vai vatanaaka, te vika navutaaka kauquqi karerave.

⁸ Raionivano nantaqi aantau arukareva noraiqaakero uva tintemake, te kaama tauna vaiinti nahentika ti navutaiqihà noraiqaake uva ti variarave. Vira kaara ti hantuqavano kia vikara vaivo.

⁹ Memorana vo uviri ututumate vira ari variantema ke, navutaaka ti vaiinti nahenti ututuma taavo. Ho qaakau vairivata naarama kairamanta vikavata ani vi uvirira naate.

¹⁰ Vo vatanaa vo vatanaaka avuhainauka nái iqoka vaiinti ntita vare ani, ti *uaini* naaho qoraiqama ke, ti naaho maata aiquqohai rahiti raahitima kevarave. Vika ti koqe vata qoraiqama kaivaro aahara vataiqama vuanarove.

¹¹ Vi vatava qumina vata vairaro kia vovanovata mini vairaro qumina naantaaka ntuanarove. Ekaa vi vatava mintima kero vairaro kia vovanovata virara ike mpo tiva amitaanarove.

¹² Oho, aahara vata ainqinaihai navutaaka airitahaa ekaa haika qoraiqama kareka ani variavo. Ekaa maa vataraqaa Nora Kotira iqoka paipenvao vi aniharo ekaa haika vehi auti taiqa kairaro kia vovanovata qaqi varianarove.

¹³ Ne Isareri *uiti* auru vataqi utute, kara qantu varaa entara qumina nimiriqai qantu varaarave. Ne vukaari utuke nora kaiqa varataavarao vi naahoraiqihairo kia vo karavata qovaraiqirave. Ho kauriha variate. Nora Kotira voqamakero arara itaira kaara ne Isareri ututaa karava qoraiqama vivo, tiro.

Noravano vo vatanaaka Isareri tataaqa vaukara tura

¹⁴ Noravano Kotiva tiharo, Isareri tataaqa varia vatanaakara te vakaaka tiva nimirerave. Te tenta vaiinti nahenti nimuna vatara vika qoraiqama kaara kaara, nimiri tuqa hampata ravau kaantemake, te vika nái vataqaahai ravau aquke, vika avutanahai Iutaa ruurama nimitarerave.

¹⁵ Te vika nái vataqaahai ravau aqukevata, naantiara te vika aaqurihama nimiteha, vi vatanaa vi vatanaaka ntita vare, qaiqaa nái vataqaave nái maaqainive, viri karerave.

¹⁶ Te mintiari vika kia qaiqaa Baalirara viva tinavu variqave tiraiti, vika tiriaraqai viva tinavu Variqavano vaivo tivera, viraqaahai te vikaravata ne ti vaiinti nahentive tirarave.

¹⁷ Nai ta vatanaaka kia ti uva iriqi vika vaivera, te vika nái vataqaahai ravauke vehi autu taiqa karerave, tiro. Noravano Kotiva vi uvra tura.

13

Noravano Ieremaiaarara oru tavuna varaane tura

¹ Noravano Kotiva tiriara tiharo, Are oru koqaa aqukera tavuna vo varera tavaarana rumpataane. Vi tavunara kia namariqi hiqaane, tivera ² te viva tuntemake tavuna vira varake tavaarana rumpataunara.

³ Te minturaro Noravano Kotiva qaiqaa tiriara tiharo, ⁴ Are tavuna nena tavaarana rumpataanara varera vuru Perataini ori ntoma viro vairaqui kukeqa taane, tumanta, ⁵ te viva tuntemake vuru kukeqa taunara.

⁶ Ho airi enta aitarovaro Noravano Kotiva qaiqaa tiriara tiharo, Himpira anirantera Perataini oru tavuna kukeqa taanara varaane, tumanta ⁷ te Perataini oru vata quvike tavuna kukeqa taunara varake tavauraro tavuna viva anomakero qoraiqama vumanta, te kia ho vira qaiqaa rumpa taarirava vaura.

⁸ Mintima vauvaro Noravano Kotiva tiriara tiharo, ⁹ Vira voqantemake, Iutaave Ieruharemipi variakave, nái nora autuara quahe variara te qoraiqama karerave.

¹⁰ Maa vaiinti nahentika qora kaiqa vare variaka vaiha, kia ti uva iriataa imanta kia iriarave. Vika nái avu aato kempukaiqamake taataute, una variqa avataqi viha vika nutu tuaherake variarave. Ho vika maa tavunava quminaiqama vintemake, vikavata quminaiqama vivarave.

¹¹ Vaiintivano tavuna nai tavaaranava rumpa taintemake, te Isarerivata Iutaavata tenta tataaga rumpa taunararave. Te vikara tiha, Vika ti vaiinti nahenti vaiha ti hutu tuaherake ti autu noraiqama kaate turamantavata, vika kia ti uva iriataa imanta kia iriarave, tiro.

Vataqhai aututaa taverara tura

¹² Noravano Kotiva tiriara tiharo, Ieremaiao, Isareri mintima tiva nimiane:

Ne *uaini* varake ekaa vira qihiake taveraqi *uaini* qihiake mpiqa kaataararave, tiane. Are minti tiramanta vika ariara tiha, Eqaane, tenavu vi okarara kankomake irunararave, tivararave.

¹³ Vika minti tivara are vika tiva nimira tihara, Noravano Kotiva mintima tivo:

Te ekaa maa vataraqaa variaka, avuhainauka Devitiva kuvuarama taikave, ti Kotika kaiqa vara timite variakave, paropeti vaiintive, ekaa Ieruharemipi variakave, te tenta arara itai *uainira* ekaa vika vikaq qihia aqu kaari vika vueraiqama vivarave.

¹⁴ Vaiintivano tave varakero vo taveeqaa rukavu kaintemake, te vika noka qokave vaintairave rukavu raakavuma karerave. Te kia vika aaqurihama nimitaraiti, kia vikara ike mpo tiraiti, te vika vehi autu taiqa karerave, tiro.

Navutaaka Iutaini vauka rumpa vare vuru korara tura

¹⁵ Viva minti tumanta te tiha, Iutaa vaiinti nahentio, nenta autu vatainai ke, Noravano Kotiva vi uvara tira koqemake aato vateha iriate.

¹⁶ Konkira arina entava qovaraiqira ne ainqinaini viha kuntavaivai iarorave ti, ne Nora Kotira nenta Variqa autu noraiqama kaate. Ne aatitaaina entara veka vaivarovata, viva vi entara tuqantaa kairaro anomakero konkira arina entava qovarama vuuanarove.

¹⁷ Ne Kotira uva kia irivera, te kukeqavi vaiha, ne nentara noraiqaake iriha nenta mahuta ti variara kaara niara iqí rata nimirerare. Navutaaka Noravano Kotiva i vaiinti nahentika rumpa varera kaara ti muntuka qoraiqiraqe te iqí rate variariraro auquruvano noraiqaakero ntaanarove, ti.

¹⁸ Noravano Kotiva tiriara tiharo, Are avuhainaa vaiintiara tiraro viva nai nokantiro náitānta avuhainaa tainta ke tuvuate. Vitanta avuhainaa tovaqavano vitanta qiatqaahairo hiqintiramanta „vitanta kia qaiqaa Iutaaqaa raqikivarave“, tiro.

¹⁹ Noravano minti tumanta te tiha, lutaatata *sauti* mantara Nekevini navutaaka ekaa vatuka ututuma taamanta ekaa vaantavura qentinavu tintaviro vaivarao kia ho vovano vira quantua kaarirava vairave. Oho, navutaaka ekaa Iutaa rumpa vare vo vatainai vuru kevarave.

²⁰ Ieruharemio, tavaane. Navutaaka *noti* mantaraihai anima variavo. Ai avutraqi varia vaiinti nahentika are vikaqaa koqema kera raqikiataarave. Are nena mahuta tihara, Vika ti vaiinti nahentive tiarauka, vika tantoe variavo?

²¹ Are vo vatanakara ti tontive tiarauka, vika ai aataarako kempukaiqamake ariqa raqikivarave. Vi entara are nana uvae tinarave? Oho, nahentivano vainti vatareva iharo noraiqaakero keke tintemaka kera, vi entara are noraiqaakera keke tinarave.

²² Are nena irehara tihara, Nana kaaraoe vi maarava tiqaa qovaraiqvivo? Tirera, te ai tiva amirerare. Are qora kaiqa, vo kaiqa vo kaiqa varaanara kaara vika ai *hikoti* qaqlini viqu aquke ai qoraiqama amitaarave.

²³ Hoe vankora vaata vataava eqara vaata kuqu vuuanarove? Hoe qaakau *pusi lepativano* nai vaata kaakantaarinara nunka kaanarove? Kia hove. Vira voqaantemake, ne qaiqaa qaiqaa qora kaiqa vare variaka kia ho vi kaiqara qaqirake koqe kaiqa varevara.

²⁴ Noravano Kotiva tiharo, Aahara vataihairo uvaivano *uiti* rapa vara raumpirima kaintemake, te ni vona vona raumpirima karerave. ²⁵ Ne ti tauruke una variqara vika tinavu ho kahaqivarave tiara kaara, te naantiara mintimakeha ni qoraiqama nimitaainarave.

²⁶ Ieruharemio, te Noravano Kotika ai *hikoti* utu rarau vuruvi nina qiataini kaari vika are toka vainara tavaiyara are kaurinarave.

²⁷ Ieruharemipi varia vaiinti nahentikao, ne anomake vaaqu kaiqa varaara te tavaunararave.

Vaiintivano vora naata hampata nireva auti vaintemakeve, ohivano nahe ohi hampata nireva *mpururu mpururu* tintemakeve, ne ainqinainive naahonive una variqa avataqi vi variara te tavaunararave. Oho, Ieruharemipi variakao, nanti nanti entae ne qaqiqai vi okarara avataqi vivarave? Ne vehi autuvi taiqavi entava aumantoma vaivo, tiro.

Noravano Kotiva minti tura.

14

Iutaini aaquvano kia ntu entarara tura

¹ Aaqu vukaiaqakero kia ntu entara Noravano Kotiva tiriara tiharo, ² Aaqu kia ntira kaara, Iutaini variaka iqi rate variavaro vika vatuka, vo vatuka vo vatukavano qoraiqama viro vairave. Vaiinti nahenti vata kanta vaiha iqi rate variamanta Ieruharemipi variaka keke tiha tinavu kahaqiane ti variarave.

³ Nora vaiinti vika nái kaiqa vaiinti namariara nititaamanta vika oru tavaavarori vauruke namari *taani* autu taaraqi kia namarivata vaira. Vika kia namari kaqaraiti, nái taqu qaqi vare aniarovo, vika muntuka qoraiqimanta ike mpo tiha nái qiata naavumate variarave.

⁴ Aaqu kia ntivarora tiro, vatavano aaharaiqama viro ave tairirave. Naaho qoka muntuka qoraiqimanta vika nái qiata naavumate variarave.

⁵ Ukau kia vaivarora tiro, *diaavano* nai naati qaraaka vatataira qaqirakero virave.

⁶ Qaakau donki vika oru ainqina aaharaiqama vinaini himpi vaiha, qaakau vairi namariara aanai aanai tiantemake, aanai aanai ti variavaro, vika avuvata qoraiqimanta kia koqemake tave variarave.

⁷ Ti vaiinti nahenti ti aareha tiha, Oho, Noravauvu, tenavu qora kaiqa varaurava tintanavuqaa uva vate vaivo.

Mintiariraravata, are nena nora autuara irihara tinavu kahaqiane. Oho, tenavu airi tataa ai tauvaqa utu amiteha ai uva raqake vauro.

⁸ Tenavu ariara vivaqaima tinavu kahaqiraravave turo. Tenavu qoraiqama vi vauna entara areqaima tinavu Isareriu ruaruama timitaaravama variaro. Nantiharae are tinavu vatainvo vatanaa vaiinti voqaara variaro? Nantiharae vaiintivano vo vatainvi vireva iharo aaraaini vohaa enta vaitero vintema kera, are kia maini tinavu hampata vahara tinavu kahaqireva auti variaro?

⁹ Nantiharae are kauqu iriata vi vaiintira voqaara variaro? Nantiharae are iqoka vaiinti kempuka taiqa vira voqaara variaro?

Mpo Noravauvu, quqaee are tinavu mantaraini variaro? Tenavu ai vaiinti nahentima vauro. Kia tinavu qaqira kaane, tiarave.

¹⁰ Ti vaiinti nahenti minti tiamanta te vikara tiha, Vika kia nái aiquqaa koqemake raqikiraiti, nái hampi nuataa i aararaqaa ni variarave. Vira kaara te Noravano Kotika vika qoririmake, vika qora kaiqa vare varia uvvara qaqi iriteha vika ntaiharerave, tiro.

¹¹ Noravano Kotiva minti tivakero tiriara tiharo, Hauri are maa vaiinti nahentikara irihara ti haarehara vika kahaqiane tiarovave.

¹² Vika kara auramate ti haaraige te kia vika ike mpo ti uvvara irirerave. Vika kaintu iha quare *ofaarave*, *uiti ofacave*, ti timireka auti vaise te kia vika *ofaara* quahama nimitaraiti, te iqoka paipewe, karara aavoqirave, qora rovarave, vara kaari vi haikava vika vehi autu taiqa kaanarove, tiro.

¹³ Viva minti tumanta te aqao ti, Mpo Noravauvu, are ekaa haikaqaa raqiki variaravave. Paropeti vaiinti vokiaka vaiinti nahentiara tiha, Kia iqokavano maa vataraqaa qovaraiqianarove. Kia karara aavoqi entava maini varianarove. Tenavu maa vataraqaa maateraiqamake variqi virerave, ti variarave, ti.

¹⁴ Te minti turaro Noravano Kotiva tiriara tiharo, Paropeti vaiinti vokiaka ti hutuqaa una uva ti variarave. Kia te vika kaamate vika nititaunarave, kia te tenta uvavata vika tiva nimunarave. Vika nái avu aatoqi iritaa uvarave, nái hampi taira voqaara tavaarave, vi haikara vaiinti nahenti tiva nimi tiha, Naantiara vi haikava vi haikava mintima kero qovaraiqianarove, ti varia uvava una uvaqai vairave.

¹⁵ Ho te Noravano Kotika paropeti vaiinti vokiaka ti hutuqaa una uva ti variakara mintima turo: Te kia vika kaamate vika nititauramanta vika nái tiha, Iqoka paipewanove, karara aavoqi entavave, kia maa vataraqaa qovaraiqianarove, tiarave. Ho te qaqi kaariraro iqoka paipewanovata karara aavoqi entavavata vi vaiintika arukaanarove.

¹⁶ Vaiinti nahenti vika uva iriaka, vikavata vaivaro vohaa qarama kero iqoka paipewanovata karara aavoqi entavavata vika arukaanarove. Navutaaka Ieruharemipi vatuka aaravau vika vaata aqu aquma kaivarao, vovano vika vaatave, vika naatavarava vaatave, vika maaqu raavura vaatave, varero quntama taarirava kia varianarove. Vika mintimake qoraiqamavi taiqa viqe te vikara huvigorave tiarovave, tiro.

¹⁷ Minti tivakero Noravano Kotiva tiriara tiharo, Ai muntukavano qoraiqinara vaiinti nahenti mintima tiva nimiane: Navutaaka ti navunaaka teqa taaqama kaamanta anomake qoraiqamavi variara kaara, te Ieremaiaaka iqi rate variariraro ti auguruvano kia taiqa viraitiro, qaqqai nteharo aatitairaqaavata entaqivata ti auruvuqaa tuvuunarove.

¹⁸ Te naahoni oru niha tavauraro navutaaka vaiinti arukaa vaatava, vo vaata vo vaatavano mini vaivo. Te nora vatukaqi oru niha tavauramanta vaiinti nahenti narara vaiha quti variavo. Te tavauramanta paropeti vaiintive, Kotira kaiqa vara amite variakave, vika qumina vi anihia vaiinti nahenti koqe avu aato tiva nimiva kia ho vaivo. „Minti tivakera nena muntukavano qoraiqinara vaiinti nahenti tiva nimiane, tiro.„

¹⁹ Noravano minti tumanta te tiha, Noravaauvo, are Iutaini variaka ekaarae qoririma kaaro? Ai antuqvano kia Saioniara vaivarase variaro? Nantiharae are tinavu teqa taaqama kaararo tinavu vaata tavanta uvarirava kia vaivo? Oho, tenavu maateraqa-make variqi virarare turarovata, kia vi entava anintaivo. Vo rovara vo rovaravano taiqaaina entava anianarove turarovata, voqamakero aatu itaaina haikavaqai qovaraiqi vaivo.

²⁰ Noravaauvo, tinavu kaivaqaukavara qora kaiqa varaa uvaravata, tentanavu qora kaiqa varauua uvaravata, qoqaa ai tiva ami vauro. Tenavu ekaa miqo maaqo ai uva raqa kaunarave.

²¹ Nena nora autuara irihara kia tinavu numurama timitaane. Ieruharemigi ai avuhinaa taintavano takuqi vairara irihara kia Ieruharemii kaurira haika amiane. Haaru are ti hampata vahira vohaa uva tiva taatau taanara iritehara kia vi uvra raqa kaane.

²² Vo vatanaa vo vataanaaka una variqa vika hoe aequa vara kaivaro ntuanarove? Kia hove. Naaruvavano nai irikero hoe aequa vara kaanarove? Kia hove.

Noravaauvo, are tinavu Variqavano vi haikara vi haikara vara keravama variaro. Virara irihama tenavu are tinavu ruaruuma timitenia entara veka vauro, tunara.

15

Iutaini variaka vehi autu taiqa korara tura

¹ Te minti turaro Noravano Kotiva tirira tiharo, Mosika Samuerika ti tivuqaa himpite vaiqevata, te kia vitantaro ti, maa vaiinti nahentikara ike mpo tiha aaqurihamma nimitrarare. Hauri vika ti tivuqaa vaivorave. Nititama kairamanta vuate.

² Vika tiha, tenavu tainie vuainerave? tivera, are vika mintima tiva nimiane. Noravano Kotiva niara mintima tivo:

Te ni hini kiaka nora rovaraqui qutu vuatera kaama taurauka, ne rovara vare qutu vivarave.

Te ni hini kiaka iqokaqi qutu vuatera kaama taurauka, iqokaqi qutu vivarave.

Te ni hini kiaka karara aavoqiraqi qutu vuatera kaama taurauka, karara aavoqiraqi qutu vivarave.

Navutaaka ni hini kiaka rumpa vare vuru vonaini kaatera ni kaama taurauka, ni rumpa vare vuru vo vataini kevarave.

³ Te ni vehi autu taiqa karera qora haika erakaimante vara karerave.

Te iqoka paise vara kaariraro ni arukaanarove.

Te vairi vara kaarimanta vika ni vaata rarau vuru viri kevarave.

Te uviri vara kaarimanta vika ni vaata neverarave.

Te aantau vahi vara kaarimanta viikavata ni vaata nama taiqa kevarave.

⁴ Hesekiaara maaqu Manaseva Iutaa vataqaa raqiki vaiva Ieruharemigi vaharo anomakero qora kaiqa vare vaira kaara, te vika mintimake qoraiqama nimitaari vo vatanaa vo vatanaaka vi uvra irivaro, vika naatu itairamanta vaivarave.

⁵ Ieruharemio, tavave ai mpo ike tiva amitaanarove? Tavave ai iqiqi rata amitaanarove? Tavave ariara iriharo oru ai irero tiharo, Are hoe variaro, kiae ho variaro tianarove?

⁶ Are ti qoririma timitehara, qaiqaa qaiqaa ti tauvaqa utu timitaanarare. Vira kaara te tenta kauqu tutuke ai vehi autu taiqa karerave. Are tirira popohaanarara ti, kia te qaiqavata ai aaqurihamma amitarerave, tiro.

⁷ Minti tivakero Noravano Kotiva tiharo, Uvavano utiharo *uiti* rapa raumpirima kaintemake, te Iutaini vai vatukaraqi variaka ekaa raumpirima karerave. Ne qaqiqai qora okara avataqi vi variara kaara, te ni tenta vaiinti nahentivata, ni vaintivaravata, vehi autu taiqa karerave.

⁸ Nora namari auvahini airi nuqa vaira viravata aatarake ni tentoqa nahenti nai airitahaama vaivarave.

Kuari avu qiatqaqa uruntairaqe te qaqi kaari ni vehi autu keka vaaka aninte ni Iutaa qaraaka vaiinti arukaimanta, vika nokavara iqiqi rata nimitheha voqamake geteha vaivarave.

⁹ Navutaaka vira maaqu 7 navu arukaivaro vika nova vi uvra iriro, viva voqamakero aanai aanai tiharo vuakaatauma vuanarove.

Kuari avuvano qiaataqaa uru vaiva vaaka aqu vintema kero, viva koqemakero variqiro vuaina entava vaaka taiqa vuanarove. Viva qaqi *naahiar/qurura* nahenti voqaara variainarara iriraro, vira muntuka qoraiqiraro kauriharo varianarove.

Ne Iutaa vo kiaka qaqi vaika te qaqi kaariraro iqoka paipevano nivata ekaama arukaanarove. Te Noravano Kotika minti turo, tiro.

Ieremaiaava nuntu nauntu tura

¹⁰ Oho, koqemama ti nova kia ti vatataataarave. Ekaa maa vatanaaka ti hampata tiroi vaiha, ti titi variarave. Te kia voraqi vo haika vigatauraro vovano kia tigihairo vo haikavata varairave. Mintimantavata ekaa vika tiriara tiha, Kotiva ai qoraiqama amitaarire, ti variarave, ti.

¹¹ Te minti turaro Noravano tiharo, Te ai antua amitaarirara are homa vainarave. Naantiari qora entavanove, nora maaravanove, niqi qovaraiqirage te qaqi kaariramanta ai navunaaka ai navutaiqi variaka ariara ike mpo tiha tinavu kahaqiane tivarave, tiro.

¹² Minti tivakero Noravano tiharo, Vaiintivano hoe *ainiqohai/baraasiqohai* aututaa *pohira* kinta kaanarove? Navutaaka *noti* mantaraihai aniaka, vika kempuka vaireva, *aini* voqaara vaikama variavo.

¹³ Ne maa vataraaqaa vona vona qora kaiqa varaara kaara, te navutaaka qaqi kaariramanta vika ani ni airairave, nora monu koqaama taa haikarave, varevarave.

¹⁴ Te qaqi kaariramanta navutaaka ni rumpa vare vuru ne kia tavaa vataraaqaa kaimanta, ne vika paanaa kaiqa varevarave. Ihavano itaintema kero, ti arara ite vaiva itaqiro viharo ni tatoqa kaanarove, tura.

Ieremaiaava qaiqaa nuntu nauntu tura

¹⁵ Noravauvu, te nora maaraqi vaunara are virara irianarave. Are tiriara irihara ti kahaqama timitaane. Ti qoraiqama timite variaka are nái qoraiqama nimitaane. Hauri are vika qihaaqama nimitaira vika ti harukevorave. Te ai uva tiva nimi vaunara kaara vika tiriara qorá uva ti variavo. Are virara iritaane.

¹⁶ Are nena uva ti tiva timiaramanta te iri, vi uvarara koqe kara voqaarama vaivo tivake ekaa vi uvare koqemake irunarave. Noravauvu, are ekaa kempuka vataava variaramanta te ai vainti vaunarara ti, ai uvavano ti muntuka koqema timitaimanta te quaheha vaunarave.

¹⁷ Ai kauquvano tiqaa vaimantara ti, te vainti nahenti kara neha quaheha naarihi varianaini kia oru oquvi vairaiti, te tentaraa kanta oquvi vaiha ti navunaaka qora kaiqa vare variara kaara ti arara itaimanta vaunara.

¹⁸ Nantivaroe vaiintivano anturanti vaintema kero, nora maaravano tiqi vaiva qaqi variqiro vi vaivo? Numuaravano kia ho tavantavira voqaara vi maarava qaqi vaivo. Mpo Noravauvu, aruvuhairo namarivano aaharaiqama vintema kera, are kiae qaiqaa ti kahaqinarave? ti.

¹⁹ Te minti turaro Noravano Kotiva tiriara tiharo, Are nena nuntu nauntu tinara qaqirakeri tiqaa muntuvi vairera, te ai qaqi kaarirara are qaiqaa ti kaiqa vaiintima vainarave.

Are qumina uva tinara qaqirakeri koqe uva vaiinti nahenti tiva nimirera, te qaqi kaarirara are qaiqaa ti paropeti vaiintivano vainarave. Hauri are vika vaintema kera vairorave. Qaqi kaira vika ai voqaantemake variate.

²⁰ Te vate ai kempukaiqama kaarirara are *baraasiqohai* aututaa vaantaavura voqaara vainarave. Ekaa vika vika ai navutaiqiha kia ho ai aatarake ai vara muntuviqama kevarave. Te tentavano ainti vaiha ai ruaruuma amitaainarave.

²¹ Te qora kaiqa vare variaka kauquqihai ai ruaruuma amitarerave. Nái hana vaiinti kia aaqrurihama nimite variaka kauquqihai te ai qaqini vara karerave, tiro.

Noravano Kotiva vi uvare tura.

16

Noravano Ieremaiaara qioqamatero kia nahenti varaane tura

¹ Qaiqaa Noravano Kotiva tiriara tiharo,² Are maini vaihara kia nahenti varatera vainti vatataira variate.

³ Te Noravano Kotika maa vataraaqaa vatataa vaintikaqaavata, vika noka qokqaavata qora haikavano qovaraiqia inara ai tiva amirerave.

⁴ Hini kiaka qora rovara vare vuru qutu vivaro, hini kiaka iqoka paipevano arukairaro, hini kiaka karara aavogi entava arukaanarove. Vika iqí rata nimite quntama teka kia vaivararo, vairi raara voqaa voqaa vaintema kero, vika vaatavano voqaa voqaa vairamanta, uviri aantau vahivano ani vika vaata nama kevarave.

⁵ Vaiinti nahenti qutu vina vaiintira iqi rata amite vai naavuraqi kia oriqetaane. Hauri are virara mpoqina ihira tivakera iqi raterorave. Te kia qaiqaa tenta vaiinti nahenti koqema nimitaraiti, te kia vikara muntuka vateha qaiqaa vika aaqurihama nimitarerave.

⁶ Nora vaiintive, vehi vaiintive, vika ekaa maa vataraqaa qutu vivaro, kia vovano vika quntama tero iqi rata nimitaanarove. Kia vovano vikara iriharo nai vuqa teqa aqu kaanarove. Kia vovano vikara iriharo nai qiata kauhi kovaara kaanarove.

⁷ Qutikara iqi rata nimiteka vaivaroo kia vovano karave namarive vika nimiraro vika muntukavano paru ianarove. Qutu vina vaiintira noka qoka vaivaroo, kia vovano vitanta muntuka kukuqama nimitaanarove.

⁸ Are vaiinti nahenti ruvaaqumavi vaiha nora kara ne vainaini kia vuane. Hauri are vika hampata oquivi vaihara karavata namarivata nerorave.

⁹ Te ni Isarerri Variqa Noravano Kotika ekaa kempuka vatauka niara mintima turo: Vaiinti nahenti quaheha naarihi varia uva *nontantave/otatave*, qaraaka naata vaati varaakara quaheha uva otata tiarave, ne kia viraqihai vi uvvara vi uvvara qaiqaa irivarave. Ne vate maa entara varia vaiinti nahentika ne naantiara nenta avuqohai tavaivaroo vi haikava qovaraiqianarove.

¹⁰ Ieremaiao, are vi uvara vaiinti nahenti tiva nimiramanta vika ai ireha mintima tivarave: Oho, nana kaarae Noravano Kotiva tinavuqaa uva vatero tiharo, Vi haikavama niqaa qovaraiqianarove tivo? Tenavu nana qora kaiqae vara kauro? Tenavu tentanavu Variqa Nora Kotira uvaqihai nana uvae raqa kauro? tivarave.

¹¹ Vika minti tivara are vikara Noravano Kotiva mintima tivo tiane: Ni kaivaqaukavara ti tauvaqa utu timite, una variqa avataqi viha vika nutu tuaherake variarave. Vika ti qorimata timite, te uva maara tiva taunara kia avataqi vuuarave.

¹² Vika mintimake qora okara avataqi vi variamanta, ne vikavata uri aatarake anomake qora okara avataqi vuavaroo, ne qora kaiqaa varaava ni kaivaqaukavara varaaravata uri aataro kairave. Ne kia ti uva iriha avataqi viraiti, ne kempukaiqamake nenta avu aatoqi hampi kaiqa varera avataqi vi variarave.

¹³ Ne mintiara kaara te maa vataraqaahai ni vonaini vara aqu karerave. Ne nenta kaivaqaukavara hampata kia vo vata kankomake iri tavaanaini oru vaiha, aatitairaquaata entaqivata una variqa, vo variqa vo variqa paanaa kaiqa vara nimitevarave. Ne mini oru vaivaqe te kia ni aaqurihama nimitarerave, tiro.

¹⁴ Minti tivakero Noravano Kotiva tiharo, Ho vo enta anintaira ne vi entara qaiqaa tiriara quaheha ti hutu tuaherevarave. Vi entara ne kia tiriara tiha, Viva qaqi vai Variqava Isipihiaro tinavu Isarerri ruaruuma timitairave tivarave.

¹⁵ Ne vi entara kia minti tiraiti, ne tiriara tiha, Viva qaqi vai Variqava *noti* mantaraini vai vatarave, vo vata vo vatave, vihairo tinavu ruaruuma timitairave tivarave.

Te vo vatanaa vo vatanaaka varianaini ni raumpirima kaunainaihai ni Isarerri ntita vare qaiqaa ni kaivaqaukavara nimuna vataraqaa viri karerave. Te Noravano Kotika minti turo, tiro.

Iutaa vika Nora Kotiraqaahai kia kukeqavi vaivarave tura

¹⁶ Noravano Kotiva minti tivakero tiharo, Ho vate maa entara te navutaaka ntita viri kaari vika ani vaiintivano vaheqohairo airi havuka ravaaqavu kaintemake, ni Iutaini variaka ravaaqavu kevarave.

Vira naantiara te qaiqaa navutaaka ntita viri kaari vika ani vaiintivano aantau rantakero ravaaqavu kaintemake, nora ainqinave, inaara ainqinave ori onavuqive, vaika ni Isarerri rantake ravaaqavu kevarave.

¹⁷ Ne Isarerri nana nana okara auti variara, te tenta avuqohai ekaa vira tave vauro. Ne kia tigaahai kukeqavi vaivarave. Te ekaa ne qora kaiqa vare variara tave vauro.

¹⁸ Vika nái una variqa *maraquraqohai/varahaqohai* te una vata qoraiqama kaarave. Vi haikava te vaaqu haikave tuna haikava, kia aiho varai haikava vaimanta vika vi haikaraqohai te vika nimuna vata qoraiqama kaarave. Vira kaara te vika nái qoraiqama nimite, qaiqaavata vika qoraiqama nimitarerave, tiro.

¹⁹ Viva minti tumanta te tiha, Noravauvu, are ti antua timite variarava vaihara ti kempukaiqama timite varianarave.

Nora maaravano tiqi vai entara are ti kahaqi varianarave. Naantiara ekaa naato vataihai vo vatanaa vo vatanaaka are varianaini aninte mintima tivarave: Tinavu kaivaqaukavara una variqaqai vataavaroo, vi haikava qumina haikaqai vaihara kia tinavu kaivaqaukavara kahaqirave.

²⁰ Hoe vaiinti vika nái variqa autu kevarave? Kiave. Vaiintivano aututaa haikava kia quqaa variqa variarave, ti.

²¹ Te minti turaro Noravano Kotiva tiharo, Virara irihama te vo vatanaa vo vatanaaka tenta kempuka okara numiqaari vika kankomake ti Nora Kotika autuara irivarave, tiro.

17

Iutaini vauka qora okara autura

¹ Noravano Kotiva tiharo, Iutaa vaiinti nahentio, vaiintivano *aini siseriqohairo* ori tanuqiraqaa uva gara ntuva taira voqaara, ne qora kaiqa varaa uvara ni muntukaqaa qara ntuva tero, *ofaa* tainta *komu* autu taaraqaavata qara ntuva taivo. Mintima tairara ti, ne nenta qora kaiqa varakaa uvara nunka keva kia ho varianarove.

² Una variqa *ofaa* taintave, una variqa nahenti Aseraara *pohi* ekaa ainqinaqaave, aumaqaara vai katarira okaraini arataarave, ne nenta kaivaqaukavara hampata vi haikaraqai noraiqaake iriha quahama nimite variarave.

³ Ne maa vataraqaa vona vona vaiha qora okara avataqi vi variara kaara te ni airairave, ne nora monu koqama taa haikarave, ni *ofaa* taintavano vai vatukarave, ekaa vi haikara te navutaaka nimiariramanta varevarave.

⁴ Nenta qora okara autuara kaara te maa vataro ni nimunara navutaaka varevarave. Te qaqi kaariramanta navutaaka ni rumpa vare vuru ne kia iri tavaa vataraqaa vuru kaimanta, ne mini vaiha vika paanaa kaiqa varevarave. Ihavano itaintema kero, ti arara ite vaiva qaqi itaqiro vuuanarove, tura.

Koqe okararavata qora okararavata tura

⁵ Noravano Kotiva tiharo, Ti tauvaqa utu timitero, vaiinti kempukara noraiqaakero iriharo viraqaa muntuvi vai vaiintira te vira qoraiqama amitarererave.

⁶ Vi vaiintiva vaireva, inaara katarivano aahara vataini vaira voqaarama varianarove. Horevano qoraiqama kai vataraqaa kia vo haikavanovata qampiqe vainaini vi katariva vaiharo kia koqemakero qampiqaintema kero, vi vaiintiva kia koqemakero variqiro vuuanarove.

⁷ Ti Nora Kotikara noraiqaakero iriharo, tiqaa muntuviro vaina vaiintira te vira koqema amitaainerarave.

⁸ Vi vaiintiva vaireva, koqe katari namarivano tuvinaini ututaa katarira voqaarama vaivo. Vi katarira tuqavano namari vainaini otu vi vaivaro, nora kuarivano itai entara viva kia getaraitiro vaivaro, vira marevanovata qaqi vukanaa vairave. Aaquivano kia vukaiqaakero nti entara vi katariva kia airi aato utiraitiro, viva vo ihi vo ihi koqemakero tava ire vairave.

⁹ Vaiinti avu aatovano vaireva, avuni voqama kero una kaiqa autuainerara iri vai haikava vaivaro, vira avu aato koqema amitaarira haikava kia vairave. Vaiintivano avu aato utinara nai tavave kankoma kero iri tavaanarove? ¹⁰ Te Noravano Kotika vaiinti muntukaqi tuantike tave, vaiinti avu aatovata avatamake tave vauraukama vauro. Te vaiinti vohaiqa vohaiqa avatamake taveha, viva koqemakero nirave, kia koqemakero nirave, virara iriha nai koqaa nimi vaunarave.

¹¹ Una okara avataqiro viharo airi monuve airairave vare vai vaiintiva vaireva, uviri vovano vora auru muara varakero rukohi kaira voqaarama viva vaivo. Vi vaiintiva maa vataraqaa variqiro viraro hini entavano taiqa viraro, ekaara vitini vira monuve airairave taiqa viramanta, vaiinti nahenti vi vaiintiva kia avu aato vataava vainara kankomake iri tavevarave, tiro.

¹² Viva minti tumanta te tiha, Noravauvu, ai Naavuvano vaireva, viva Avuhainaa taintavano takuqi vaira voqaara nai haaru Saioni Aiqinaqaa vairave.

¹³ Noravauvu, areqaima tinavu Isareru ruaruuma timiteravama variaro. Ai tauvaqa utu amite variaka vika ekaa kaurira haikama varevarave. Are Noravano qaqi variqi vi vai namarira nimi variarava variaramanta vika ai qoririma kaara vira kaara, vaiinti autu konkoma kanta qara ntuva taava nunka vintemake, vika taiqa vivarave.

¹⁴ Noravauvu, are ti rovara taiqa timitaireqe te qaiqaa koqema vuare. Are ti qoraiqama timite variaka kauquqihai ruaruuma timitaireqe te qaiqaa koqemake variare. Te ai autuqai tuaherake vauraukama vauru.

¹⁵ Oho, Isareru vika ti naaraihama timiteha tiha, Noravano qora enta tinavuqaa qovarama kareva auti vaivo tianara, viva tairentae vi entara qovarama kaanarove? Qaqi kairaro vi entava vate qovaraiqiarire, ti variavo.

¹⁶ Noravauvu, te kia ai vihi vaahi tiha, Vaaka vikaqaa qora enta qovarama kaane tunaravauve. Te kia tiha, Koqemama qora entavano vikaqaa qovarama vuuanarove, tunaravauve. Are virara kankoma kera irianarave. Ekaa te ti vauna uvaravata are kankoma kera iri tavaanarave.

¹⁷ Mpo, hauri are ti haatu itara haika timiraqe te voqamake qetaarorave. Qora entavano qovaraiqiraqe, te are inanaini kukeqavi vairerave.

¹⁸ Are qaqi kairamanta ti qoraiqama timite variaka kaurira haika varaate. Are ti vehakuma timitairaqe te kia kaurira haika varaare. Are qaqi kairamanta vika anomake qeteha variate. Are ti vehakuma timitairaqe te kia qeteha variare. Are qora enta vikaaqaa qovarama kehara vika vehi autu taiqa kaane turo, ti.

Maara Entaqaa kia kaiqa varaate tura

¹⁹ Noravano Kotiva tiriara tiharo, Ieremaiao, vaantaavuraqi genti vo, Iutaa avuhainauka vi ani varia qentira, virara *Vaiinti Nahenti Ia Qentirave* tianaini oru himpiti variane. Ieruharemiqi ekaa vaantaavura genti vonavuvata vainanaini himpi vahara ²⁰ mintima tiane:

Ne Iutaa avuhainaukave, ne ekaa Iutaa vaiinti nahentive, ne ekaa Ieruharemiqi variakave, ne ekaa maa qentinavuraqaa vi ani variaka Nora Kotira uva iriate.

²¹ Noravano Kotiva mintima tivo: Rauriha variate. Ne nenta qaqi variqi virara noraiqaake irivera, ne Maara Entaqaa kia vo haikavata aqu vare vi aniate. Kia Ieruharemiqi vai vaantaavuraqaa vi haikara aqu vare vi aniate.

²² Maara Entaqaa kia nenta naavuqihai vo haika aqu vare nuate. Kia vi entaraqaa kaiqavata varaate. Te ni kaivaqaukarara kempukaiqamake tunantemake, niaravata tiha, Ne Maara Entarara ti Kotika Entave tiate, turo.

²³ Te ni kaivaqaukavarara minti turamanta, vika kia ti uva iriataa imanta kia nái aatovata ti timiarave. Te vika uteteha avuqavuqiare turamanta vika kia ti uva iriraiti, kempukaiqaake qora okara avataqi vi variarave.

²⁴ Ho ne kia vika aanantaraiti, ti Nora Kotika uva koqemake iriha, kia Maara Entaqaa vo haika aqu vare vaantaavura qentiqihai vi aniraiti, vi entarara ti Nora Kotika entave tivakeha kia kaiqavata varaivera, ²⁵ ne ekaa entama Ieruharemiqi koqemake variqi vivarave. Ni avuhainauka Devitira ankuqiraaka vaiha, nái nora vaiinti hampata maa vatukara vaantaavura qentiqihai iqoka *kaariqive*, ohigaave, qaqi vi ani vaivarave. Ekaa Iutaini variakavata vi gentiraqaa vi ani vaimanta vaiinti nahenti ekaa enta Ieruharemiqi variqi vivarave.

²⁶ Iutaini vo vatuka vo vatuka, Ieruharemi tataaqa vaikave, Benaminira ankuvano vai vatarave, inaara ainqinavano kuari ruhunkinaini vairave, nora ainqinavano vainainive, Iutaa vata *sauti* mantara Nekevinive, vihai vihai vaiinti nahenti anivarave. Vika vo *ofaa* vo *ofaa*, ekaara kaintu iha quare *ofoonave*, *uiti ofaave*, koqeve ti *ofoonave*, vare koqe mutta iaina haikaravata vare, Nora Kotira Naavu vainaini viri kevarave.

²⁷ Ne kia ti uva iriraiti, ne kia Maara Entara ti Kotika entave tiraiti, ne vi entaraqaa Ieruharemi vaantaavura qentiqihai vo haika aqu vare vi anivera, te leruharemi genti iha quara kaariraro vi ihava avuhainaa naavu, vo naavu vo naavu ita kairamanta kia ho vokika vira qimpa keva varianarove, tiro.

Noravano Kotiva minti tura.

18

Ieremaiaava aaqataiqohairo tave auti vau vaiintira naavuqi vura

¹ Noravano Kotiva tiriara tiharo, ² Are himpira tave auti vai vaiintira naavuqi otu viraque te tenta uva mini ai tiva amiare, tiro.

³ Viva minti tumanta te tave auti vau vaiintira naavuqi otunte tavauraro vi vaiintiva tave vo aaqataiqohairo auti vaura.

⁴ Viva vi tavera autukero tavovaro, kia koqe uvapo, viva vi tavera qoraiqama kero, qaiqaa vira varakero, vo tave nai antuqaqaa autura.

⁵ Viva auti vauvaro Noravano Kotiva tiriara tiharo, ⁶ Ne Isarerio, tave auti vai vaiintiva aaqataiqohairo nai antuqaqaa autintemake, te kiae nivata varake autuainarave? Isarerio, tave auti vai vaiintira kauquqi aaqatai vaira voqaantemake, ne ti kauquqi variavo.

⁷ Ieremaiao, te vo enta vo vatanaakara tiha, Ne rauriha variate. Tuqa hampata ravaau kaantemake, te ni ravau karerave, ni vara muntuvii karerave, ni vehi autu taiqa karerave tiari ⁸ vi vatanaaka nái qora okara autira qaqlira kaivera, te kia tota tiainantemake vi vatanaaka vehi autu taiqa karerave.

⁹ Qaiqaa te vo enta vo vatanaakara tiha, Katari koqemakero vataqti ututaintemake, te ni kahaqiarne nora vatanaakama vaivarave tiari ¹⁰ vi vatanaaka kia ti uva iriraiti, qora okara avataqi vivera, te kia tota tiainantemake vi vatanaaka kahaqirerave.

¹¹ Virara irihara are Iutaini variakave, Ieruharemiqi variakave, tiva nimira tihar, Isareri Variqa Noravano Kotiva mintima tivo: Tavaate. Qora entavano niqaa qovaraiqiarire ti, te vira gera i vauro. Te ni ntaiharera qera i vauro. Ne vohaiqa vohaiqavano qora aaraqaa ni vaira qaqirake koqe aaraqaa niha koqe kaiqa varaate, tivo.

¹² Are minti tiramanta vika ai tiva ami tiha, Qumina are tinavu qioqirorave. Tenavu qaqiqai tentanavu vuataa ina aararaqaa virerave. Tenavu vohaiqa vohaiqavano kempukaiqamake tentanavu avu aatoqi hampi kaiqa varaataa inara avataqi virerave tivarave, tiro.

¹³ Noravano Kotiva qaiqaa tiharo, Ne vo vatanaa vo vatanaaka ireha tavaate. Ne tavaimanta vika kia Isareri qora okara auti variantemake, auti variarave. Isareri vika kia qorainti hampata hampi ni vai varaatara aanante variataara vaimanta, vika ti qaqirake una variqa, vo variqa vo variqa avataqi vi variarave.

¹⁴ Lebanomi ainqinaini *aisivano* kia ravita viraitiro, ekaa enta qaqiqai mini vairave. Nantaqihairo antai namariva tuviharo kia ekaara aaharaqama viraitiro, qaqiqai tuvi vairave.

¹⁵ Mintima vaimantavata, ti vaiinti nahenti ti tauru kaavo. Vika qumina *maraqura/varaha* autuke vataa haikarara quahama nimite, koqe muntavi haikara iha quara nimite variarave.

Vika haarua aara koqe aaraqaa vuataara vaimanta vika kuntavaivaima vare, hampi aara, vo aara vo aaraqaa vi variarave.

¹⁶ Vira kaaro vika vatavano qoraiqama viro qumina vataiqama vuanarove. Vokika vitare aitare iha vi vatara taveha, aiqi nunurama vare vi anivarave. Vika vira tave, ravukuvu ike mpo tiha nái kauqu runkinkiri ivarave.

¹⁷ Uvaivano kuari urunihairo utiharo konkoma vuaga kaintemake, te navutaaka avuquaahai vika raumpirima karerave. Vi entava qora entavano anintairae te kia vika kahaqiraiti, te vika tauvaqa utu nimitarerave, tiro.

Noravano Kotiva minti tura.

Vokuka uva tiva taatauke Ieremaiara qoraiqama amitareka auti vaura

¹⁸ Vaiinti vokuka tiha, Kaiqenavu Ieremaiara qoraiqama amitaaina aarara rantaare. Viva kia vairera, Kotira kaiqa vara amite variaka uva maara homa tinavu tiva timivarave. Koqe avu aato vataaka vika homa koqe avu aato tinavu tiva timivarave. Paropeti vaiinti vonavu homa Kotira uva tinavu tiva timivarave. Aniqenavu viraqaa uva vateha, kia qaiqaavata viva tina uvvara iriare, ti.

¹⁹ Vika minti tumanta te Kotira aareha tiha, Noravauvu, ti uva iriane. Tiqaa una uva ntuvake tiaka uvavata iriane.

²⁰ Te vika koqema nimitauramanta vira qiaata vika qora okaraqai ti autu timitaarave. Vika ti arukerara uva tiva taatauke vataarave*.

Hauri ai arara itairara are vika qoraiqama nimiterorave ti, haaru te ai avuqaa himpi vailha vikarao ti, ai aaraunara are virara iritaane.

²¹ Vika qora okara autu timitaara kaara are qaqi kairamanta vika vaintaira karara narara variqi vi vuru qutu vuate.

Qaqi kairaro iqoka paiprevano vika teqa taaqama kaarire.

Qaqi kairamanta vika naatavara tentoqaiqama vimanta, vika vaintivaravata kia variate.

Qaqi kairamanta vika naampaivara noro rovara vare qutu vuate.

Qaqi kairaro iqoka paiprevano vika qaraaka vaiinti arukaarire.

²² Qaqi kairamanta naavutaaka vaaka anintaimanta vika nái naavuqihai noraiqaake keke tivaqí viha, vogamake qeteha variate. Vika tiriara viraqí aqu vuarire ti, hiqainti quvike vataarave. Vika ti ravaaqavu kareka vaara vuike vataarave.

²³ Noravauvu, vika ti arukareka vo uva vo uva tiva taatauke vataara, are virara kankoma kera irianarave. Oho, kia vika qora kaiqa varaa uvvara nunka nimitaane. Kia vika qora uva tauru nimitaane. Ai arara qaqi ite vairara are navutaaka qaqi kairamanta vika ruqutu vataini aqukaivaro vika vaatavano ai avuqaa vata kanta variarire.

19

Tave rukayukorara tura

¹ Noravano Kotiva tiharo, Are himpira tave auti vaina vaiintira naavuni otuntera tave vo koqaama kera varaane. Tave vira varera oru qiaata vaiinti vokiakavata, ti Kotika kaiqa vara timite variakavata, tiramanta vika ai hampata vuate.

* **18:20:** Hiparu uva: Vika tiriara viraqí aqu vuarire ti, hiqainti quvike vataarave.

² Are vika ntita varera vaantaavura qenti vo, *Tave Rukavukaa Qentirave* tinaihairs vevanteria, Hinomu Uqitaini otuntera, te ai tiva amiaina uvara vika tiva nimiane.

³ Are vika mintima tiva nimiane: Ne Iutaa avuhainaukavata, ne Ieruharemiqi variakavata, Nora Kotira uva iriate. Noravano Kotiva ekaa kempuka vataava ni Isarerri Variqavano mintima tivo: Te naantiara ugita maa kanta nai voqamake qoraiqama nimitaaina haika qovarama kaariramanta vaiinti nahenti virara irika ike mpo tiha nai kauqu runkinkiri ivarave.

⁴ Ne Isarerri ti tauvaqa utu timiteha ugita maa kanta qora okara autuqi vi variara kaara te vi haikara qovarama karerave. Ne maini vaiha una variqa, vo variqa vo variqa *ofaa* iha quara nimitaarave. Vi variqukara ni kaivaqaukavaravata, Iutaa avuhainaukavata, nevata, kia tota vikara iriarave.

Ni vaintivara kia vo okaravata autuaka, ne qumina vika ugita maa kanta *ofaa* iha quara kaavaro vika naarevano mpiqa viro vairave.

⁵ Ne nenta vaintivara una variqa Baalira iha quara amitareka iha, *ofaa* tainta maini autuke vataarave. Kia te niara mintiate tunarave. Vika mintimake vaaqu okara auti variara kia te tenta avu aatoqi iritauna haikarave.

⁶ Ho rauriha variate. Vo enta anintaira vaiinti nahenti kia qaiqaa vi vatara autu nteha Tofetive, Hinomu Uqitainive tiraiti, vika virara *Airitahaa Arukaa Uqitarave* tivarave.

⁷ Ugita maa kanta ne Iutaavata Ieruharemiqi variakavata vo kaiqa vo kaiqa varareka aatoqi iritera te hampiqama kaariramanta ne kia ho varevarare.

Te navutaaka qaqi kaariramanta vika ani nai iqoka paipeqohai ni teqa taqamake arukaimanta uviri aantau vahi ni vaata ani nama kevarave.

⁸ Te Ieruharemi vatuka anomake qoraiqama kaariramanta vokika vatuka vira taveha voqamake geteha ike mpo tiha nai kauqu runkinkiri ivarave.

⁹ Te qaqi kaariramanta navutaaka ni arukareka ani Ieruharemi ututumate variqi vivaro ni karavata taiqa vuuanarove.

Mintiraro ni kara taiqa viramanta ne voqamake karara antuqa ariramanta vaiha, ne nenta maaqu raavurave, nenta hana vaiinti nahentive, vika vaata varakeha nevarave.

¹⁰ Ieremaia, are vi uvara tiva taiqa kera, viraqaaahira nina hampata ani vaiintika nivuqua vahira, tave vira rukavu kaane.

¹¹ Vira rukavu kera vikara mintima tiane, Noravano Kotiva ekaa kempuka vataava mintima tivo: Maa tavera rukavu kaivaro kia ho qaiqaa autintemake, te Ieruharemi vatukavata ni Iutaavata rukavu karerave. Vika ni vaata Tofetini maini quntamaqi vivi, ekaa vata mpiqa kaivaro kia hini vata qaqi varianarove.

¹² Te Tofeti ugita maa kanta qutuvika vaatagohai qoraiqama kaainantemake, Ieruharemi vatukavata viraqi variakavata vohaa qaramake qoraiqama karerave.

¹³ Iutaa avuhainaukavata Ieruharemiqi variakavata nai naavu qiatagaqaa vaiha, opu makaura variqave tivakeha koqe munta i haikara iha quara nimiteha, vo variqvata *uaini ofaa* qihia nimitaarave. Ho vira kaara qutuvika vaatavano ntreharo ekaa vika naavu maaqa qoraiqama kaanarove, tiro.

¹⁴ Noravano tiriria Tofeti Uqitaini otuntera vi uvara vika tiva nimiane tumanta te viva tuntemake otu vika tiva nimi, viraqaaahai te Tofeti mini ke oru Nora Kotira Naavuq maimaraara raqiki vauka qita vaiintivano vaura. Viva vaiharo te vaiinti nahenti tiva nimuna uvara iriro, viva tumanta ² vika ti ruqutuke rupitaitimake vate, ti kauqutantavata, aiqu vehatantavata katari ntoma toraqi veva nonkute taatautora. Vika Nora Kotira Naavu hohaa vaunaini qenti vo *Benaminira Qenti Vuruni Vairave* tunaini ti aiqu kauqu mintimake nonkuke vatora.

³ Vira qararaa Pasuriva ti qaqini vara komanta te virara tiha, Noravano Kotiva kia qaqaa ai autu nteharo Pasurirave tiraitiro, viva ariara *Ekaa Mantaraini Atu Itai Haikava Vaivo* * tivo.

20

Pasuriva Ieremaiaara qoraiqama amitora

¹ Kotira kaiqa vara amite vauva Imerira maaqu Pasuriva Nora Kotira Naavuq maimaraara raqiki vauka qita vaiintivano vaura. Viva vaiharo te vaiinti nahenti tiva nimuna uvara iriro, viva tumanta ² vika ti ruqutuke rupitaitimake vate, ti kauqutantavata, aiqu vehatantavata katari ntoma toraqi veva nonkute taatautora. Vika Nora Kotira Naavu hohaa vaunaini qenti vo *Benaminira Qenti Vuruni Vairave* tunaini ti aiqu kauqu mintimake nonkuke vatora.

³ Vira qararaa Pasuriva ti qaqini vara komanta te virara tiha, Noravano Kotiva kia qaqaa ai autu nteharo Pasurirave tiraitiro, viva ariara *Ekaa Mantaraini Atu Itai Haikava Vaivo* * tivo.

* 20:3: Hiparu uva: Magor-Missabib

⁴ Noravano Kotiva ariara tiharo, Te ai qaqi kaarirara are anomakera qete vairamanta ai tonti vikavata anomake qete vaivarave. Are vahara nena avuqohaira tave vaira navutaaka ekaa ai tontivara iqoka papeqohai arukevarave. Te Iutaini variaka Babironi avuhainaara kauquqi kaariraro viva hini kiaka arukero, hini kiaka rumpa varero Babironini vuru kaanarove.

⁵ Te qaqi kaariramanta navutaaka maa vatukaraqihai vaiinti nahenti ira koqe airarave, nora monu aquke koqaama taa haikarave, Iutaa avuhainauka ia haikara, korive silvae vo airarave, varevarave. Vika ekaa vi haikarara tenavu iqoka raiqaha varatauna haikarave tivake Babironini vuru kevarave.

⁶ Ho Pasurio, iriane. Navutaaka aivata ai naavuqi variakavata ni rumpa vare Babironini vuru kaivara are mini oru vahara qutu vinarave. Are nena tonti vikara unahaa tihara Kotiva mintima tivo tiarauka, vikavata mini qutu vimanta aivata vikavata vi vataraqaa quntama tevarave tivo, tura.

Ieremaiaava qaiqaa nuntu naantu tura

⁷ Noravauvu, te kia paropeti vaiinti variataa imanta vaurara are kempukaiqama kera tiaravera te vi kaiqara vare vauro. Ai kempukavano ti kempukavata uri aatarakero vairara tira, are ti aatara kaanarave. Ho vira kaara ekaa vaiinti nahenti ti naarahama timite variavo. Vika ekaa enta ti virera uva tiva timite variavo.

⁸ Vo vaka vo vaka te ai uva vika tiva nimi tiha, Navutaaka anivarave. Ni vehi autu taiqa kaaina entava anintaanarove. Noravauvu, te ai vakaaka vika tiva nimi vaunara kaara, vika kaurira haika ti timiha tiriara qora uvaqai ti variaro ti variarave.

⁹ Te tenta tiha, Kaiqe Nora Kotirara kia iriraiti, kia vira autuqaa vainti nahenti uva tiva nimirerave tiarera, ihavano ite vaintemaka kero, ai uvavano ti avutraqi itaqiro vuuanarove. Te ai uva kia qaiqaa vika tiva nimiraiti, evaara variare tiarera, kia te ho evaara vairarave.

¹⁰ Oho, te iruramanta airi vaiinti tiriara qetaarire ti, vika evaara evaara uva ti variarave. Ti aatu itara haika autu timite variaka ekaa vona vona variarave. Vika tiriara tiha, Kaiqe vira vaiinti nahenti nivuqaa qovarama kaare ti variarave.

Ti tonti vikavata tiha, Kaiqenavu vaiha tavaariraro viva hampi kaiqa vo vara kairaqe tenavu vira vara muntuvi ke tentanavuqaa vuntu keha vira qoraiqama amitarerave, tiarave.

¹¹ Noravauvu, vika ti qoraiqama timitareka autivaravata, are iqoka vaiinti kempukavano vaintemaka kera, are ti aaqanto varianarara ti, vika kuntavaivaima vare, kia ho ti haatara kevarave. Vika kaavungi voqamake kaurira haika varaivaro, vika autuvanovata vatainu tuvi viharo miniqai varianarove.

¹² Noravauvu, are ekaa kempuka vataaravave. Are avuqavuqama kera vaiinti nahenti avatama kera tave variaravave. Are vika avu aato muntukaqi vai okarara kankoma kera tave variaravave. Are mintima kera variaravara tira, are tiqaa vuntu kehara vika qoraiqama nimitaane ti, te a kauquqi vi vaiintiqatau.

¹³ Ne Nora Kotirara iriha ihi tiate. Ne ihi tihamma Nora Kotira autu tuahera kaate. Viva qora kaiqa vare variaka kauquqihairo nora maaraqi variaka ruaruuma nimite vaivama vaivo.

¹⁴ Oho, qaqi kairamanta ti vatatai entarara qora entave tiataarave. Ti nova ti vatatai entarara kia koqe entave tiate.

¹⁵ Vi entara vaiinti vovano vuru ti qora tiva amiro tiharo, Ai naatavano qorainti vaintima vattataivo. Vira ai maaquev, tivaro ti qova vi uvara iriro virara quaha kero vairave. Oho, ti qora vuru tiva ami vaiintiva qoraiqama viraqe te virara huvigorave tiataarave, turo.

¹⁶ Noravano Kotiva vo vatukanavu kia aaqurihama nimitaraitiro, vika qoraiqama nimitaintema kero, viva vi vaiintiravata qoraiqama amitairaqe te huvigorave tiataarave. Qaqi kairaro viva toqaqi iq'i rate uvara iriro, kuari avu qiaqaa uruntainaraqaa iqoka raqi uvara iriarire.

¹⁷ Te tenta nora auhaqi vauna entara viva ti haru kaataarave. Viva mintitirio, ti nora auhavano ti matipama vaitirio.

¹⁸ Oho, te tenta nora auhaqihai kia veva ntaataarave. Ti vatatai entaraqaahai te nora maara, vo maara vo maara varaqi ani vauraro ti muntukavano qoraiqmanta vauro. Te mintiaqi vivi, kaurihama qutu vuainarave, turo.

21

Noravano Ieruharemi vatuka navutaaka kauquqi kaanarove tura

¹ King Sedekaiava vaiinti taaraqanta Malakiara maaqu Pasuriravata, Kotira kaiqa vara amite vau vaiintira Maseaara maaqu Sefanaiaravata, varakomanta vitanta te vaunananini

aninte tiriara tiha,² Babironi vika King Nebukanesaava nai iqoka vaiinti ntita varero tinavu Iutaa hampata raqireva ani vaivo. Are Nora Kotira aarairaro viva tinavu kahaqiarire. Haaru Noravano tinavu kaivaqauka nora kaiqa vara nimitaintema kero, viva vatevata hoe nora kaiqa tinavu vara timitairaro Nebukanesaava vira tavero iqoka qaqirakerovo vuuanarove? ti.

³ Vitanta minti tumanta te vitantara tiha, Netanta oru Sedekaiara tiva amiate, Noravano Kotiva Isarerri Variqavano mintima tivo:

⁴ Babironi avuhainaava nai iqoka vaiinti hampata Ieruharemi ututumate vaivo. Ho te qaqi kaariraro ni auvihehavaavano quminaqama viro kia ho ni kahaqiraqe te navutaaka ntita vare maa vatukara avutaqi viri karerave.

⁵ Ti arara voqamakero ite vaimantara ti, te tentavano tenta kempukaqohai ni hampata raqirerave.

⁶ Te nora rovara vo vara kaariramanta maa vatukaraqi vaikavata aantauvhivata vi rovarara vare qutu vivarave.

⁷ Voki vaiinti nahentika vi rovarara vare qutu vivaro, iqoka paipenvano voki vaiinti nahenti aru kairamanta, voki vaiinti nahentika narara variqi vi, vuru qutu vivarave. Viraqahai te King Sedekaiara nai qiata vaiinti hampatave, vaiinti nahenti qaqi vaikave, Babironi King Nebukanesaara kauquqi kaariraro viva vika kia vehakuma nimiraitiro, kia vika aaqurihama nimiraitiro, viva vika ekaa arukaanarove. Te Noravano Kotika vi uvara turo, tiro.

⁸ Minta tivakero qaiqaa Noravano tiriara vaiinti nahenti mintima tiva nimiane tiro: Tavaate. Te ni taara aara numiqarerave. Ne vo aaraqaa nuvaqi viha qaqima variqi vivarave. Ne vo aaraqaa nuvaqi vivi, vuru qutuma vivarave.

⁹ Vokika Ieruharemi vatukaqi vaivaro iqoka paipenvano vika arukairamanta, vokika narara variqi vi, qutu vivaro, nora rovaravano vokika arukaanarove.

Vaiinti nahenti vokika Ieruharemi vatukaqihai aaqaini orunte Babironi iqoka vaiinti tira hove kia tenavu ni hampata raqirerave tika, vika kia qutu viraiti, qaqi vaivarave.

¹⁰ Te tenta uva kempukaiqamake tivate tiha, Te maa vatukara kia vehakuma amitaraiti, vira qoraiqama karerave tunarave. Te maa vatukara Babironi avuhainaara kauquqi kaariraro viva vira vehi autu taiqa kaanarove. Te Noravano Kotika vi uvara turo, tiro. Noravano tiriara vi uvara tura.

Noravano Iutaa avuhainaaukara tura

¹¹ Noravano tiriara tiharo, Are maa uvara Devitiva kuvuarama taika Iutaa avuhainaauka tiva nimiane: Ne te Noravano Kotika tuna uvara iriate.

¹² Ne vo enta vo enta toqaqi ko tiha avuqavuqamake vaiinti nahenti uva raira nimitaate. Vika ia haikara muara varaa vaiinti nahentika kahaqiate. Vika qoraiqama nimite variaka kauquqihai vika ruaruama nimitaate.

Ne kia avuqavuqamake uva raira nimitaivera, vira kaara ti voqamakero arara itaanarove. Ti arara itairava qaqqiqai itaqiro viraro kia vovano ho vira qimpa kaanarove, tiro.

¹³ Ieruharemio, are ori ainqina noraqaa vahira tihara, Navutaaka kia ho uru ti haatara kevarave. Vika kia ho ti vaantaavura rukavuke vatukaqi uriqetevarave, tianarave. Ho te tentavano ai hampata iqoka raqirerave.

¹⁴ Are qora kaiqa varaanara kaara te ai ruqutirerave. Te ai avuhaina naavu iha quara kaariraro ihavano vi naavuvata ekaa vo naavuvata ita kaanarove. Te Noravano Kotikama vi uvara turo, tiro.

22

Noravano Iutaa avuhainaaukara tura

¹ Noravano Kotiva tiriara tiharo, Are otu Iutaa avuhaina naavu vainaini otuntera maa uvara tiane:² Iutaa avuhaina vaiintio, are Devitira avuhaina taintaqua oquivira variaravave. Arevata, ari qiata vaiintivata, Ieruharemipi variakavata, Noravano Kotiva ti uvara iriate.

³ Noravano mintima tivo: Ne koqe okarave avuqavu vai okararave avataate. Vika i haikara muara varaa vaiintika ruaruama nimitaate. Vo vatanaaka ani ni hampata variakave, viqa vaintive, tentoqa nahentive, kia vika vikaqaa nora maara vataate. Kia vika qoraiqama nimitaate. Kia qaiqaa maa vataraqaa vaiinti nahenti qumina arukaate.

⁴ Ne te tunantemake ekaa vi uvara koqemake avataqi vivera, ni avuhainaauka Devitira ankuqirauka náí nora vaiinti hampata avuhaina naavu qenti maaqihai iqoka kaariqive, ohigaave, qaqima vi anivarave. Ekaa Iutaini variakavata vi qentiraqaa qaqima vi anivarave.

⁵ Ne kia te tunantemake ti uva avataqiqi vivera, te tenta autuqaa tiha, Te avuhainaa naavu maara anomake qoraiqama karerave. Te Noravano Kotikama minti turo.

⁶ Te avuhainaa naavu maarara koqe naavuve turaro ti muntukavano virara vaireva Gileeati vatave, Lebanoni aiqinave, voqaara vaintema kero, virara vaivo. Mintiveravata, te qaqi kaariraro vi naavuva qoraiqama viro aahara vataiqama vuanarove. Viva nuqiqi vatuka voqaarama varianarove.

⁷ Te vaiinti vonavu vara kaariramanta vika ai naavu vehi autu taiqa kareka nái rori vare, ai naavu posí sidaa katariqohai aututaara ekaa teqa taaqamake ihaqira aqu kevarave.

⁸ Naantiara airi vo vatanaa vo vatanaaka maa vatukaraqaa vitare aitare iha, nai ire nai ireha tiha, Oho, nana kaarae Noravano maa vatukara nora vatuka mintima kero qoraiqama kaivo? tivarave.

⁹ Vika minti timanta vokika nái tiva nimi tiha, Isareru vika Noravano Kotiva tiva taatautai uvvara qoririmake, una variqa, vo variqa vo variqa quahama nimiteha vika kaiqa vara nimite variara kaara mintima kairave, tivarave. Noravano tiriara Iutaa avuhainaa naavu vainaini otuntera vi uvvara tiane tura.

Ieremaiava King Joahaasirara tura

¹⁰ Iutaa vaiinti nahentio, King Josaiava qutu virara iriha, kia ne virara iqí rata amitaraiti, vira maaqu King Joahaasirara ne noraiqaake iqí rata amitaate. Navutaaka vira rumpa vare vuru vo vatainima kaavo. Viva kia orurantero maini ani nai vatatai vatara qaiqaa tavaanarove.

¹¹ Josaiara maaqu Joahaasiva nai qora vatuka varero Iutaa avuhainaava vaimanta navutaaka vira rumpa vare vuru vo vataini kaarave. Noravano Kotiva virara mintima tivo: Viva kia qaiqaa vihairo orurantero maini anianarove.

¹² Navutaaka vira rumpa vare vo vataini vuru kaanainima viva qutu vuanarove. Viva kia vihairo maa vatara qaiqaa ani tavaanarove, tirave.

Ieremaiava King Jehoiakimirara tura

¹³ King Jehoiakimio, te ariara ohoma tiva amitauro. Are kia avuqavu okara avataqira vihara nena avuhainaa naavu kaqa kaanarave. Are una okara avataqira vihara vi naavura qaiqaa tomaqa kera kaqa kaanarave.

Are nena navunaakara kempukaiqama kera vihi vaahi tiaramanta, vika vi naavura ai quminaiqamake kaqa amitaarave. Are vika koqaa nimiaataara vaivara kia nimianarave.

¹⁴ Are minti tianarave: Te tenta avuhainaa naavu nora naavu kaqarerave. Viraqi airi rumu vairaro airi uintua nora uintuavata vairaqe te porovaini sidaa katari kututera taataute, viraqi vuikaqohai vaataiqama karerave, tianarave.

¹⁵ Are kiae iriaro? Are airi sidaa katariqohai avuhainaa naavu koqera kaqa tairamanta vaiinti nahenti kia virara iriha ariara viva avuhainaava noravanoma vaivo tivarave. Are nena qova kaiqa varairara iritaane. Viva karavata namarivata neharo hoveqai tirave. Viva avuqavu okara avataqiro viharo vaiinti nahenti uvavata avuqavuqama kero raira nimite vairara tiro, viva koqema kero variqiro virave.

¹⁶ Viva ko tiharo vehi vaiinti nahenti koqemakero auta ntuvu nimitaimantara ti, Iutaa vika koqemake variqi vuarave. Ti Nora Kotika kankomake iri tavaaka mintimake vi okarara avataqi vi variarave.

¹⁷ Vika mintimake variaravarata, are nenaraqai noraiqaakera iri varianarave. Are una okara avataqira vihara, vo haika vo haika iara varareva ihara, kia ai qoraiqama amite variaka qumina vika aruke varianarave.

Are vikaqaa nora maara vatehara, vika qetara haika nimihara vika monuvata vare varianarave, turo.

¹⁸ Josaiara maaqu Jehoiakimiva Iutaa avuhainaava mintima kero qora okara avataqiro vira kaara, te Noravano Kotika virara mintima turo:

Jehoiakimiva qutu viramanta vokika kia virara mpo ti qata vakao tivakeha iqí rata amitevarave.

Vokika kia virara mpo tinavu avuhainaaao, tinavu nora vaiintio tivakeha iqí rata amitevarave.

¹⁹ Donki qutuvira vaata raraau vare Ieruharemi vaantaavura qentiaahai aaqaini qaqqira aqu kaantemake, Jehoiakimira vaatavata kia quntaraiti, vatuka aaqaini qaqqira aqukevarave, tivo, tiro.

Ieruharemi tura

²⁰ Noravano Kotiva tiharo, Ieruharemipi variakao, ni kahaqireka auti varia vatanaaka, ekaama navutaaka vika naatara kaarara ti, ne oru Lebanonî ainqina vainainive, Basaani vatainive, Abarimi Aiçinaqaave, vaarinte vaiha noraiqaake iqî rataate.

²¹ Ne koqemake variqi vi varia entara te niara rauriha variate turamanta ne kia ti uva iriataa imanta tiha, Tenavu kia ai uva irirerave tiarave. Haaru ne minti tivaqî ani, vate maa entaravata kia ti uva iriataa imanta kia iri variarave.

²² Ne qora okara, vo okara vo avataqi vi variari kaara ne nora kaurira haika varevarave. Uvavano utiharo vo haika qaçini vara aqu kaintemake, navutaaka ni qjata vaiintinavu qaçini vara kevarave. Ne vo vatanaakaqaq muntuvi vaiha vikara tinavu homa kahaqivarave tiaka, vikavata navutaaka rumpa vare vo vataini vuru kevarave.

²³ Uvirivano Lebanonini *sidaa* katariqi nai naavuqi vaharo te homa vauro tintemake, nevata tiha, Tenavu homa vauro ti variaka, ne vo enta nahentivano vainti vatareva iharo keke tinantemake, nevata noraiqaake keke tivaqî vivarave, turo, tiro. Noravano minti tura.

Ieremaiaava King Jehoiakinirara tura

²⁴ Te Noravano Kotika ekaa enta variqi vi vauraukama, te tenta kauqu aqiqaa aqukeha Jehoiakinira maaqu Jehoiakinira Iutaa avuhainaara mintima turo: Jehoiakinio, are qoraiqama kera ti vaiinti nahentiqaq raqiki varianarara ti, te ai nina avuhaina taintaqahai qaçini vara karerave.*

²⁵ Babironi vika King Nebukanesavaa nai iqoka vaiintiaravata, ai aru kareva auti vaivara are vika naatu qete variarauka, te vika kauquqi ai karerave.

²⁶ Te aivata, ai nova ai vataatairavata, maa vataraqaahai vo vataini vara aqu karerave. Vi vatava vaireva, kia nitanta noka vatataa vatava vainaini netanta mini variqi vi, vuru qutu vivarave.

²⁷ Are vi vataraqaahai vahara maa vatara ani tavaataa iraravata, kia ho qaiqaa maini aninarave, tiro.

²⁸ Noravano minti tumanta te tiha, Mpo, rukavukaa tavera aqukaavaroo kia vovano qaiqaa varaintema keroe, viva varianarove? Nana kaarae Noravano vira nai vaintaira hampata vika kia kankomake iri tavaa vataraqaahai vara aqu kaanarove?

²⁹ Mpo, Iutaa vatao, Iutaa vatao, Iutaa vatao, are Noravano ti uvvara iriane.

³⁰ Noravano Kotiva mintima tivo: Maa vaiintiva vatatai vaintikaqihairo kia vovanovata Devitira avuhaina taintaqaa oquiviro vaharo Iutaaqaa raqikiainarara tira, are vira uva vukuqi maantima kera qara ntua taane: King Jehoiakiniva kia vaintivata vatataivave. Mintima kera vira uva qara ntua taane, tiro. Noravano minti tura.

23

Avuhaina vaiinti koqeva Isareriqaa raqikiainarara tura

¹ Noravano Kotiva tiharo, Te qjata vaiinti vikara oho tiva nimitauro. Vika ti vaiinti nahentiqaahai kia koqemake raqikiraiti, vika qoraiqama nimiteha vika raumpirimake variarave.

² Te Isarerri Variqa Noravano Kotika tenta vaiinti nahentiqaahai raqiki variakara mintima turo: Sipisipi qova nai sipisipiqa koqema kero raqikintemake, ne ti vaiinti nahentiqaahai koqemake raqikiataara vaimanta, ne kia mintiraiti, ne vika ruhaaqike raumpirimake variarave. Virara iriha te ne qora kaiqa varaara kaara ni ntaiharerave.

³ Te tenta vaiinti nahentiqaahai vaharo vo vataini vo vataini raumpirima kaurauqaqihai hini kika qaçiqi vaika ruvaqumake ntita vare viri näi maaqaini karerave. Vika mini vaiha airi vainti vatake kuvuarama kaivarao airiqama vuanarove.

⁴ Vi entara te qjata vaiinti vonavu kaamataari vika ti vaiinti nahentiqaahai koqemake raqiki vaimanta vika kia qaiqaa vo haika aatu qete vaivaro, kia vikaqihairo vovanovata kakakima vuanarove.

⁵ Te Noravano Kotika mintima turo: Vo enta anintairaqe te vi entara katari kaaravano aimakau arataintemake, Devitira kuvuarama tainaraqihai vo kaama taariraro, viva avuhainaava vaharo koqe avu aatoqohairo maa vataraqaahai vika raqikiharo, avuqavu okara koqe okaraqai autu nimitaçiro vuanarove.

⁶ Viva Avuhainaava Vaiintivano vairamanta kiama Isarerivata Iutaa vatai qaiqaa navutaaka naatu qeteha variqi vivarave. Vika vi vaiintira autu nteha maantima tivarave: *Noravano Avuqavu Okara Tinavu Timite Vaivama Vaivo*, tivarave. tiro.

* ^{22:24:} Hiparu uva: Are ti kauqu taranaini vai vuqaraqaahai *ringi* vovanovata, te tenta vuqa viraqaahai ai qaçiniqaima vara karerave.

⁷ Minti tivakero Noravano Kotiva tiharo, Ho vo enta anintaira ne vi entara qaiqaa tiriara quaheha ti hutu tuahera kevarave. Vi entara ne kia tiriara tiha, Viva qaqi vai Variqava Isipihairo tinavu Isareri ruaruama timitairave tivarave.

⁸ Ne vi entara kia minti tiraiti, ne tiriara tiha, Viva qaqi vai Variqava *noti* mantaraini vai vatarave, vo vata vo vatave, vihairo tinavu ruaruama timitairave tivarave. Te vo vatanaa vo vatanaaka varianaini ni raumpirima kaunanaihai ni Isareri ntita vare qaiqaa ni kaivaqaukavara nimuna vataraqaa viri karerave. Te Noravano Kotika minti turo, tiro.

Ieremaiaava paropeti vaiinti vonavuara tura

⁹ Te paropeti vaiinti vo kiakara tirera. Vika hampiqama keha Kotira uva vaiinti nahenti tiva nimi variara kaara, ti muntukavano qoraiqimanta vauraro ti tivaatavanovata ntiri ntiri i vaimantama vauro. Airi *uaini* namakaiva vueraiqaviro tавentu vauntumaqi vi vaintemake, te vi ani vauro.

¹⁰ Nora Kotira qaqirake una variqa, vo variqa vo variqa avataqi vi variaka maa vataraqaa mpiqavi variavo*. Vira kaara Noravano Kotiva maa vatarara qoraiqama vuane tivaro aaharaiqama vivaro, sipsispive purumakauve kara neva kia vaivo. Paropeti vaiinti vika hampi aaraqaa viha, vika nái nora autuara iriha vaiinti nahenti kahaqama nimitaataara vaimanta, vika qoraiqama nimite variavo.

¹¹ Noravano Kotiva tiharo, Paropeti vaiinti vikavata, ti Kotika kaiqa vara timite variakavata, vika ti Nora Kotika kaiqara kia noraiqaake iri variarave. Te tavauramanta vika ti Naavuqvivata vaiha qaqiqai qora okara auti variarave.

¹² Vira kaara te vika qaqi kaariramanta vika vauriri ntaaina aararaqaa vivarave. Vi aarava konkiraiqira aarava vairamanta vika viraqaa viha kuntavaivaima vare kaavunti-varave.

Te vika ntaihaaaina entara kaama tauro. Vi entaraqaa te vika vehi autu taiqa karerave. Te Noravano Kotika vi uvura tiro.

¹³ Te haaru vaiha tavauramanta Sameriaqi varia paropeti vaiinti vika anomake vaaqu kaiqa vare variarave. Vika Baalira autuqaa ti vaiinti nahenti una uva tiva nimiha, hampi aaraqaa vika ntita vare vuarave.

¹⁴ Te tavauramanta Ieruharemipi varia paropeti vaiinti vika Sameriaqi variakavata uri aatarake nai anomake vaaqu kaiqa vare variarave. Vika naata vaati varaa okarara raqaqi viha kia tiriara noraiqaake iriraiti, una variqanavu avataqi vi variarave. Vika qaqiqai vaiinti nahenti una uva tiva nimi variarave.

Vika qora kaiqa vare variaka kahaqama nimite variamanta vika kia vi kaiqara qaqira karaiti, qaqiqai vare variarave. Te tavauramanta paropeti vika vaireka, Sodomi vatukaqi qora kaiqa vare vauka voqara variarave. Ieruharemipi variaka vaireka, Gomora vatukaqi qora kaiqa vare vauka voqara variarave.

¹⁵ Te Noravano Kotika ekaa kempuka vatauka paropeti vaiinti vika qora kaiqa vare variarara iriha mintima tiro: Te hunkavi kararavata uhi namarivata vika nimiari neverave. Ieruharemipi varia paropetika okara kaara, vaiinti nahenti kia ti Nora Kotikara noraiqaake iri varia okarava lutaavataini ekaa raapama virave.

¹⁶ Te Noravano Kotika ekaa kempuka vatauka ni Ieruharemipi variakara tiha, Paropeti vaiinti vika una uva ti variara ne kia iriate. Vika unahaa tiha naantiara ne homa vaivarave ti variarave. Vika kia te Noravano Kotika tenta noqihai tuna uvura ni tiva nimiraiti, vika nái avu aatoqihai hampi tairaa tavaa haikara ni tiva nimi variarave.

¹⁷ Te Noravano Kotika „Ieremaiaara“ tiva amuna uvura qorrima kaa vaiinti nahentika paropeti vika qaiqaa qaiqaa vika tiva nimi tiha, Noravano mintima tivo: Ne maateraiqihai vaivarave, tiarave. Nái avu aatoqi hampi kaiqa vare okarara avataqi vi variakara paropeti vikara tiha, Kia qora entavano niqaa qovaraiqianarove, ti variarave. Noravano Kotiva minti tura.

¹⁸ Te Ieremaiaaka tiha, Paropeti vaiinti vikaqihairo tavave Nora Kotira aaqanto vaharo vira uva kankoma kero irirave? Vikaqihairo kia voqavanovata vira uva kankoma kero iriro variarave.

¹⁹ Rauriha variate. Aaronaavano utintema kero, Nora Kotira arara itairava qovarama viraro viva qora kaiqa vare variaka qiata rukavuma kaanarove.

²⁰ Vira arara ite vairava kia vaaka taiqa viraitiro, qaqi itaqiro vi vairaro viva ekaa ntaihama kareva nai avu aatoqi iritainara taiqama kaanarove. Naantiara vo entanavu aitaraira ne viva autina okarara kankomake irivarave.

* **23:10:** Hiparu uva: Naata vaati varaa okarara raqe variaka maa vataraqaa mpiqavi variavo.

²¹ Noravano Kotiva tiharo, Te kia paropeti vika niti tauramantavata, vika nái irike vaante vaantemake vaiinti nahenti uva tiva nimireka vuarave. Te kia tenta uva vika tiva nimuramantavata, vika nái irike ti hutuqaa vaiinti nahenti uva tiva nimi variarave.

²² Vika ani ti aaqanto vaiha ti uva iriatirio, vika homa ti uva vaiinti nahenti tiva nimiatirio. Vika ti uva vaiinti nahenti tiva nimiatirio, ti vaiinti nahenti homa qora aara qaqirake kia qaiqaa qora kaiqa varaatirio.

²³ Te Noravano Kotika ni irama nimiteha turo: Te vohaanainiqai vaura Varigaukae vauro? Aqao kiave, te ekaa vataqaave naaruvaqaave raqiki vaura Varigaukama vauro.

²⁴ Hoe vovano voqi kukeqaviro vairaque te kiae vira tavaainarave? Aqao kiave, te Noravano Kotika ekaa naaruvinivata vatainivata mpiqake vauraukave.

²⁵ Paropeti vaiinti vika ti hutuqaa una uva vaiinti nahenti tiva nimi tiha, Tenavu taira tave vauraro Kotiva nai uva tinavu tiva timivo, ti variarave.

²⁶ Oho, nanti nanti entae vika una uva tivaqivi vararave? Vika nái avu aatoqi una uva iritaara viraqai vaiinti nahenti tiva nimi variarave.

²⁷ Vika kaivaqaukavarra ti Nora Kotika tauruke una variqa Baalira quahama amitaanmake, vika tiha, Kaiqe tenavu taira tavaunara vaiinti nahenti tiva nimiar i vika Kotirara tauru kaate, ti variarave.

²⁸ Paropeti vaiinti vovano taira vo tavarera, viva vokika taira vira tiva nimiharo qaqi qumina tiraqai tavauro tiarire. Paropeti vovano ti vakaaka irirava viva vi uvura vutukero vaiinti nahenti tiva nimiarire. *Uiti* auruvano koqe haika vaivaro vira rapavano qumina haika vairave.

²⁹ Ti uvavano vaireva, ihavano ite vaira voqaarama vaivo. Qaiqaa ti uvavano vaireva, hamavano ori rukavu raakavumake vaira voqaarama vaivo.

³⁰ Ho iriate. Paropeti vaiinti vika nái hana paropetiqihai una uva muara vare tiha, Noravano Kotiva mintima tivo ti variaka, te vika navutaiqama nimitauro.

³¹ Vokia paropeti vaiinti nái avu aatoqi vai uvaraqai tiha, Noravano Kotiva mintima tivo ti variaka, vikavata te navutaiqama nimitauro.

³² Vokia paropeti vaiinti unahaa tiha, Te taira tavauraro Noravano Kotiva mintima tivo ti variaka, te vikavata navutaiqama nimitauro. Te kia vi vaiintika nititaraiti, te kia vika kaamate vi uvara tiate tunaravauve. Vika nái una uva tiaraqohai ti vaiinti nahenti hampi aaraqaa ntite vi variarave. Vika una uvavano kia ti vaiinti nahenti kahaqi vairave. Te Noravano Kotika vi uvvara tiro, tiro.

³³ Noravano Kotiva tiriara tiharo, Ieremaiao, paropeti vovanoe, ti Kotika kaiqa vara timite vai vaiintiva vovanoe, ai rero tiharo, Nana maara ntai uvarae Noravano vate ai tiva amivo? tirera, are virara Noravano Kotiva ariara mintima tivo tiane: Are nenavano maara ntai uvavama variaro. Noravano Kotiva ai qaqla aqu kaanarove tivo, tiane.

³⁴ Paropeti vovanoe, ti Kotika kaiqa vara timite vai vaiintiva vovanoe, vaiinti vovanoe, tiharo, Nora Kotira vakaaka vaireva, maara ntai uvavama vaivo, tirera, te vi vaiintiravata vira naavuqi variakavata ntaiharerave.

³⁵ Ne nai ireha nai ireha mintima tiate: Noravano Kotiva nana uvae ai tiva amivo? Noravano nana uvae tivo? tiatarave.

³⁶ Hauri ne ti uva virara tiha, Nora Kotira vakaaka maara ntai uvava vaivo tivorave. Te minti tirara qioqama tauro. Vovano minti tirera, te qaqla kaariraro ti uvavano viraqaa nora maara voqaara varianarove.

Vaiintivano qumina uva tinarara, ne homa vi uvarara maara ntai uvarave tivarave. Te Noravano Kotika ekaa kempuka vatauka qaqla variqi vi vaura Varigauka vauramanta ne ti uva hampiqamake variavo.

³⁷ Ne homa orunte paropeti vaiinti vikara tiha, Nana uvae Noravano ni tiva nimivo? Noravano nana uvae tivo? tivarave.

³⁸ Ne minti timanta vika tiha, Nora Kotira vakaaka vaireva, maara ntai uvavama vaivo tivera, ³⁹ vira kaara te vika utuvare niaraini vara aqu karerave. Te vikavata vika kaivaqaukavarra nimuna vatukaravata niaraini vara aqu karerave.

⁴⁰ Te qaqla kaariramanta ne ekaa enta kaurira haika varaqivi vararave. Ne kia kaurira haika vira ho tauru kaivaro qaqla variqiro vuanarove, tiro. Noravano Kotiva minti tura.

24

Fiki katari tavara tura

¹ Babironi vika King Nebukanesaava Ieruharemi aatarakeri viraqihairo viva Iutaa avuhainaara Jehoiakimira maaqu King Jehoiakiniravata, Iutaa qiaata vaiinti vonavuvata, vo kaiqa vo kaiqa kankomake tave vaukavata, rumpa varero vuru nai vataini kora.

Mini vuru ko entara Noravano Kotiva ti taira voqaara humiqomanta te tavauraro Nora Kotira Naavu avuni rutantuto utara taaraqanta vaura.

² Uta voqi *fiki* katari tava koqeka, vaaka aqitoka vaumanta, uta voqi nteravu tavauka vaumanta kia ho vira neva vaura.

³ Te vi haikara tave vauraro Noravano Kotiva tiriara tiharo, Ieremaiao, are nana haikae tave variaro? tumanta te tiha, *Fiki* tavama tave vauro. Koqe *fiki* tava vika vaireka, nai koqekama variavo. Qora *fiki* tava vika vaireka, nterua vuvaro kia ho vika neva vaivo, ti.

⁴ Te minti turaro Noravano Kotiva tiriara tiharo, ⁵ Te Isareru Variqa Noravano Kotika mintima turo: *Fiki* tava koqeka vaireka, navutaaka Iutaa hini kiaka rumpa vare Babironini vuru kaaka voqaarama variavo.

⁶ Te vikaqaa koqemake raqikiqi vi, naantiara te vika qaiqaa ntita vare maa vataraqaa viri karerave. Te kia vika vara muntuviqama karaiti, te vika vara vuruviqama karerave. Kuvukanaa koqe vataqaa utu taantemake, te vika maa vataraqaa qaiqaa ntita viri ke, kia vika qaiqaa ravaau aqu karerave.

⁷ Te vika vo avu aato nimiari vika te Noravano Kotika vauna okarara kankomake iri, te unanaini kia unaqaraiqamake aniraiti, quqaiqamake anivaqe, te vika Variqvano variari vika ti vaiinti nahentima vaivarave.

⁸ Iutaa King Sedekaiavave, vira qiata vaiintive, Ieruharemiqi variaka hini kiakave, vokiaka ruqemake Isipini vuakave, hini kiaka Iutaini qaqi variakave, vika vaireka, nteravira kia ho ne *fiki* katari tavarava voqaara variarave.

⁹ Te vika qoraiqama nimitaara ekaa naato vatanaaka antuqvavano kia vikara varianrove. Te vika raumpirima kaari vo vataini vo vataini vika oru vaimanta vi vatanaaka vika qoraiqama nimiteha naaraihama nimiteha vikara vaaquqama vuate tivarare.

¹⁰ Te qaqi kaariraro iqoka paipevanove, karara aavooqi entavave, nora rovaravanove, vika aruqiro viharo vehi autu taiqa kairaro kia vovanovata maa vataro, te vika kaivaqaukavaravata vikavata nimuna vataraqaa varianrove turo, tiro. Noravano Kotiva minti tura.

25

Navutaaka noti mantaraihai anivarave tura

¹ Josaiara maaqu King Jehoiakimiva 4 ihihavuara Iutaqaa raqiki vau entara Noravano Kotiva Iutaini variakara vakaaka vo ti tiva timura. (Vi ihihavuara King Nebukanesaava avuniqama kero Babironi vataqaa raqiki vaura.)

² Noravano vi uvara ti tiva timumanta te ekaa Iutaini vaukaravata, ekaa Ieruharemiqi vaukaravata tiha, ³ Te 23 ihiara Noravano Kotiva ti tiva timi uvara ni tiva nimiqi vunarave. Amonira maaqu King Josaiava 13 ihiara Iutaqaa raqiki vau entaraqaaahai te vi uvara qaiqaa qaiqaavata ni tiva nimiqi anuramanta, ne kia ti uva iriataa imanta kia iriarave.

⁴ Noravano Kotiva qaiqaa qaiqaavata nai kaiqa vaiinti paropeti vika* ne varianaini varaa kaimanta, ne vika uvavata kia iriataa imanta kia iriarave.

⁵ Noravano Kotiva paropeti vika noqihairo tiharo, Ne vohaiqa vohaiqvavano nenta qora aaraqaa ni vairave, nenta qora okara avataqi vi vairave, qaqira kaate. Ne mintivera, te ni qaqi kaariramanta ne maa vataraqaa qaqi variqi vivarave. Maa vataraqaa maahota variate ti, te ni kaivaqaukavata, nivata maa vataro nimunaranave.

⁶ Ne kia una variqa, vo variqa vo variqa avataqi viha vika nutu tuahera kaate. Kia nenta kauquqohai aututaa haikara quahama nimitaivaro ti arara itaarire. Ne te tunante ivera, te kiama ni qoraiqama karerave, tunarave.

⁷ Te paropeti vika noqihai minti turamantavata, ne kia ti uva iriraiti, ne nenta kauquqohai aututaa haikara quahama nimitevariava te ninta okara kaara ti arara itairave. Ninta okara te ni qoraiqama karerave.

⁸ Ne mintiavera te Noravano Kotika ekaa kempuka vatauka niara mintima turo: Ne kia ti uva iriara kaara ⁹ te ekaa *noti* mantaraini varia vatanaakkavata, tenta kaiqa vaiinti Babironi avuhainaara Nebukanesaavaravata aarama karerave.

Te vika ntita vare aniariramanta vika ani iqoka raqihaa ni Iutaavata, ni tataaqa varia vatanaakkavata qoraiqama nimitevarave. Te nivata vikavata ekaa vehi autu taiqa kaariraro maa vatava anomakero qoraiqamaviro varianrove. Mintimake vaimanta vo vatanaaka maa vataro taveha, ravukuvi naaraihiha huviqorave tivakeha nái kauqu runkinkiri ivarave.

¹⁰ Vaiinti nahenti quaheha naaraihi varia uva *nontantarare/otatarave*, garaaka naata vaati varaarara quaheha uva otata tiarave, *uiti* auru rukavu raakavu iharo tuqantaa

* 25:4: Mikaara, Nahumira, Sefanaiiarave, vo paropeti vaiintive.

qanta i oriva auva ntairave, ne kia viraqihai vi uvvara vi uvvara qaiqaa irivarave. Te vi uvvara vi uvvara taiqa kaariraro qumina naantaaka ntuanarove. Entaqivata kia naavuqihairo ovavano iteharo varianarove.

¹¹ Maa vatava ekaara qoraiqama viraro qumina vataqaima vuuanarove. Ni tataqa varia vatanaakavata, Ne Isarerivata Babironi vika avuhainaa vaiinti vevaaraini 70 ihiara vaiha vira paanaa kaiqa vara amitevarave.

¹² Ho 70 ihi viva aitaraira te Babironiqi variakavata, vika avuhainaa vaiintivata, vika náivota qora kaiqa varerara iriha, vika vehi autu taiqa karerave. Te Babironi vatavata qoraiqama kaariraro aahara vataqaima viro ekaa enta qumina vatavanoqai varianarove.

¹³ Te Babironi vatanaakavata, vo vatanaa vo vatanaakavata, qoraiqama karerave tuna uvvara Ieremaiaava maa vukuraqi qara ntuva tero nai noqihairovata ni tiva nimi uvvara, te ekaa vi uvvara tintemake vika qoraiqama karerave.

¹⁴ Babironi vika ti vaiinti nahenti qora okara autu nimitaantemake, te vika náivota qoraiqama nimitarerave.

Vika Isareri rumpa kaamanta vika paanaa kaiqa vara nimitaantemake, naantiara vo vatanaa vo vatanaaka avuhainauka kempuka vaika Babironi náivata naatarake vara munutvi kaimanta, Babironi vika ekaa vika paanaa kaiqa vara nimitevarave, tiro. Noravano Kotiva minti tura.

Kotiva vo vatanaa vo vatanaaka ntaihainarara tura

¹⁵ Isareri Variqa Noravano Kotiva tiriara tiharo, Ti arara ite vai *uainiva* maa *kaapuraqi* mpiqama vivo. Te ai atitama kaarirara are ti kauquqihair *kaapu* vira varera, vuru ekaa vo vatanaa vo vatanaaka nimiramanta, vika ekaa vi *kaapuraqihai uaini* vira naate.

¹⁶ Vika *uaini* vira namake, aiqu poropere iramanta vueraiqama vivarave. Te iqoka paipe vika nivutana vara kaainara kaara vika mintimake variqi vivarave, tiro.

¹⁷ Viva minti tumanta te Nora Kotira kauquqihai vi *kaapura* vare ekaa vo vatanaa vo vatanaaka viva ti titama konaini vuru nimuramanta, vika ekaa vi *kaapuraqihai uaini* vira nora.

¹⁸ Te avuniqamake vi *kaapura* vare vuru Ieruharemipi vaukave, ekaa Iutaa vatukanavuqi vaukave, vika avuhainaukave vika qjata vaiintive nimuramanta vika vi *kaapuraqihai* nora. Vika anomake qoraiqamavi vaimanta vo vatanaaka vika taveha, ravukuvi naaraihiha huviqorave tivakeha vikara vaaquqama vuate tiate ti, te vi *kaapura* vika nimunara.

¹⁹ Te vi *kaapura* vare vuru Pero vaiinti Isipi avuhainaarave vira kaiqa vaiintive, vira qjata vaiintive Isipi vainti nahentive, ²⁰ vo vatanaa vo vatanaaka Isipini vaukave, nimuramanta vikavata nora.

Te vi *kaapura* vare vuru Usi vataini vauka avuhainaukave, Pirisia avuhainauka Asakeloninive, Gaasainive, Ekaroninive vaukavata, Asadotini hini kuka qaqi vaukavata, nimuramanta vikavata nora.

²¹ Te vi *kaapura* vare vuru Idomu vatanaakave, Moapi vatanaakave, Amoni vatanaakave, ²² Taiaa avuhainaarave, Saidoni avuhainaarave, nora namari hini mantaraini avuhainauka vaukave, nimuramanta vikavata nora.

²³ Te vi *kaapura* vare vuru Dedaaniqi vaukave, Temaaqi vaukave, Busiqi vaukave, vo vatanaaka nái tiriqaa qipuqamake kauhi toqakokave, ²⁴ ekaa Arebia avuhainaukave, vo vatanaaka aahara vataini vaukave, ²⁵ Simuri vataqaa raqikurave, Elaamu vataqaa raqikurave, Midia vataqaa raqikurave, ²⁶ ekaa *noti* mantaraini niarainivata vaintovata vau avuhainaukave, ekaa naato vatanaaka avuhainaukave, vi *kaapura* nimuramanta nora. Ho naantiara ekaanaini Babironi avuhainaava vi *kaapuraqihairo* naanarove.

²⁷ Noravano Kotiva tiriara tiharo, Are vika mintima tiva nimiane: Te Isareri Variqa Noravano Kotika ekaa kempuka vatauka niara mintima turo: Ne ti arara ite vai *kaapuraqihai* naate. Ne namaqi vivaro ni avu aatovano vueraiqama viramanta ne vuru vihike, vataini hiqintivi vaiha kia ho qaiqaa himpivarave. Te iqoka paipe ni nivutaini vara kaainara kaara ne mintimake vaivarave, tiane.

²⁸ Vika aqao kia tenavu vi *kaapuraqihai* narerave tivera, Noravano Kotiva ekaa kempuka vataava niara kempukaiqama kero tiharo, Ne vi *kaapuraqihai* naate tivo, tiane.

²⁹ Ho tavaate. Te avuni tenta vatuva Ieruharemipi variaka naane ntaiharerave. Vika ntaihamake, te kiae ni vo vatanaakavata ntaihainarave? Aqao, kiave. Te iqoka paipe aarama kaariraro, viva ekaa naato vatanaaka teqaa taaqama kaanarove. Te Noravano Kotika ekaa kempuka vatauka minti turo.

³⁰ Ho Ieremaiao, are ekaa te tuna uvvara vika tiva nimira mintima tiane: Noravano Kotiva naaruva veraraqaa vahilo *raionivano* aantau arieva noraiqaakero uva tintema kero, aakara ntaanarove. Naaruvavano karara tintema kero, viva nai vaiinti nahenti

goraiqama nimitareva iharo naaruvinai nai takuqi vai naavuraqihairo noraiqaakero uva tianarove. Vaiintivano nai aiqusohairo *uaini* tava nora tanuqi vataara rakaka viharo noraiqaakero aakara ntaintema kero, viva noraiqaakero uva tiramanta ekaa vataini variaka vira uva irivarave.

³¹ Vira uva *nontantavano/otatavano* maa vataraqaa hini vitini hini vitini ekaa vi anianarove. Noravano Kotiva ekaa vo vatanaa vo vatanaakaqaa uva vateharo *ko* tivakero iqoka paipeqohairo qora kaiqa vare variaka arukaanarove. Te Noravano Kotika minti turo tiro.

³² Noravano Kotiva ekaa kempuka vataava tiharo, Tavaate. Qora entavano vo vatanaakaqaa qovarama viro, viraaqahairo vo vatanaa vo vatanaakaqaa raapamaqiro vuuanarove. Niaraihairo maa vatara vitivano vainaihairo aaronaa noravano kumpetaqiro ani vaivo, tiro.

³³ Vi entara Noravano Kotiva teqa taaqama kero arukairauka vaatavano ekaa maa vataraqaa raapama viro hini vitiqahairo hini vitini taiqaanarove. Vika iqil rata nimiteha quntama teka kia vaivar, vairi raaravano voqaa voqaa vaintema kero, vika vaatavano voqaa voqaa varianarove.

³⁴ Ne qiata vaiintive, ne ti vaiinti nahentiqaqaa raqiki variakave, ne mpo ike tiha iqil rataate. Ne konkoma kanta kumparaa mparaqiqi vuante. Ni teqa taaqamake aruke entava anintaivo. Tave rukavukaara raumpirima kaantemake, ni vaatavano vo kanta vo kanta kirikairiro varianarove. ³⁵ Ne rugemake vi aarava kiama varianarove.

³⁶ Oho, qiata vaiinti vika ike mpo tiha iqil rate varia uvara iriate. Noravano Kotiva vika vata maata qoraiqamake vaivo.

³⁷ Nora Kotira voqamakero arara ite vairara tiro, sipisipi koqemake ne varia ukauva qumina vataiqama vuuanaro.

³⁸ *Raionivan* aantau arukareva nai kukeqaviro vairaqaqihairo anintaintema kero, Noravano Kotiva anintaivo. Vira araravano voqamakero ite vaivar viva navutaaka vara kairamanta vika iqoka raqihai maa vatara qoraiqama kaivaro aahara vataiqama vuuanaro.

26

Jeremaiaaraqaa uva vatora

¹ Josaiara maaqu King Jehoiakimiva avuni hoqarero Iutaaqaa raqiki vau entara ² Noravano Kotiva tiriara tiharo, Oru ti Naavu avuni vai vatukaraqaa himpira vahira, vaiinti nahenti Iutaa vo vatuka vo vatukaqihai maara tireka anika ti vakaaka vika tiva nimiane. Kia vo uvavata qaqlira karaitira, are te ai tiva amuna uvara ekaa vi uvarama vika tiva nimiane.

³ Are vi uvara vika tiva nimiramanta vika ai aato amiha ai uva irihae, qora aara qaqlira kevarave? Vika qora kaiqa, vo kaiqa vo kaiqa vare variara kaara te vika vehi autu taiqa karera auti vauro. Vika qora aara qaqlira kaivera, te kia mintirerave, tiro.

⁴ Maa uvaravata vika tiva nimiane: Noravano Kotiva mintima tivo: Ne kia nenta aato ti timiraiti, te tiva tauna uvaravata kia avataqiu vuuarave.

⁵ Te tenta kaiqa vaiinti paropeti vika ne ianaini qaiqaa qaiqaavata vara kauramanta, ne kia vika uvavata iriataa imanta kia iriarave.

⁶ Ho rauriha variate. Ne qaqlira mintiaqi vivera, te haaru Siloqi autunantemake, tenta Naavu qoraiqama karerave.

Naantiara ekaa vo vatanaa vo vatanaaka Ieruharemi vatukavano qoraiqama virara irihai nai kenukaa nitihai tiha, Ieruharemi qoraiqama vintemake, nevata vaaquqama vuuate tivarave, tiro.

⁷ Te Nora Kotira Naavu vainaini oru vi uvara turamanta Kotira kaiqa vara amitokavata, paropeti vaiinti vikavata, ekaa vaiinti nahentivata vi uvara irura.

⁸ Te Noravano Kotiva vaiinti nahenti tiva nimiane tu uvara ekaa tiva taiqa kauramanta Kotira kaiqa vara amitokavata, paropeti vaiintivata, ekaa vaiinti nahentivata ti ravaaqavuke tiha, Oho, are vi uvara tianara kaara ai arukaariravama vaivo.

⁹ Are nanthiharae Nora Kotira autuqaa tihara, Silo vatukavano qoraiqama vintemake kero, Nora Kotira Naavu maava qoraiqama viraro, Ieruharemi vatukavata qoraiqama viraro kia vovanovata viraqii varianarove tiaro? ti. Vika minti tivake ti ututumate vaura.

¹⁰ Mintumanta Iutaa qiata vaiinti avuhainaa naavuqii vauka vi uvara iri, vika himpi vi uvara avuqavu ireka Nora Kotira Naavu hohaini *Qaraaka Qentive* tunaini oru qentiana oquivi vaura.

¹¹ Mini vaumanta Kotira kaiqa vara amitokavata, paropeti vaiintivata, himpi qiata vaiinti vikaravata vaiinti nahentiaravata tiha, Maa vaiintira arukevaqaima vaivo. Viva

tiharo, Maa vatukava qoraiqama vuanarove, tivo. Viva ti uvara ne nenta aatoqohai iriavo, ti.

¹² Vika minti tumanta te qiata vaiinti vikaravata vaiinti nahentiaravata tiha, Noravano Kotiva naivano ti tititeharo tiriara ekaa vi uvara vika tiva nimiante tirave. Naivano tiharo, Ma Naavuva qoraiqama viraro Ieruharemi vatukavata qoraiqama vuanarove tirave.

¹³ Ne qora aara qaqrake kia qaiqaa qora okara avataqi viraiti, nenta Variqa Nora Kotira uva koqemake iriqi vivera, Noravano Kotiva qaiqaa vo avu aato varaanarove. Viva varareva ina okarara qaqrakero kia ni vehi autu taiqa kaanarove.

¹⁴ Ho te ni kauquqima vauro. Ne nana okarae koqe okara avuqavu okara vaivo tivake vi okarara avataqi viha tiqaa autuate.

¹⁵ Ho maa haikarara kankomake iringate. Ne ti arukaivera, ti qumina vaiinti arukera kaara, ti naarevano niqaavata, maa vatukaraqaavata, viraqi variakaqaavata varianarove. Noravano Kotiva naivano ti titaimanta te vira uva ni tiva nimuramanta iriavo, tiro.

¹⁶ Te minti turamanta qiata vaiinti vikavata vaiinti nahentivata himpi Kotira kaiqa vara amitokaravata paropeti vaiintiaravata tiha, Maa vaiintiva tinavu Variqa Nora Kotira autuqaa uva tinavu tiva timivo. Kia vira aruke uvava vaivo, ti.

¹⁷ Vika minti tumanta naampai vonavu nora autu vatauka himpi ekaa ruvaaqumavi vaukara tiha, ¹⁸ King Hesekiaava Iutaqaqaa raqiki vau entara Moreseti vatukaihaina paropeti Maikaava Iutaa vaiinti nahenti tiva nimo tiharo, Noravano Kotiva ekaa kempuka vataava mintima tivo:

Nantiara Saison vatukavano kaiqa korataa vataro voqaarama varianarove.

Ieruharemi vatukavano qoraiqama viraro orivanoqai viraqi vo kanta vo kanta kirikairiro varianarove.

Nora Kotira Naavuvano vaina aiqinaraqaa ahakavano urikuma vuanarove, turave.

¹⁹ Viva minti tumanta King Hesekiaava Iutaini vauka hampata Maikaara arue kaavo? Aqao kiave. Hesekiaava Nora Kotira aatu qeteharo vira aareharo tinavu aaqurihamta timitaane tuvaro, Noravano Kotiva qaiqaa vo avu aato varero, kia viva tuntema kero vika qoraiqama nimitorave. Oho, tenavu Ieremaiaara arukaainara kaara nai nana qora haikavanoe tinavuqaa qovaraiqianarove? tura.

²⁰⁻²⁴ Viva minti tuvaro nora vaiinti vo, Safaanira maaqu Ahikaamiva vivavata ti mantaraini vairara ti, qiata vaiinti vika kia vaiinti nahenti kauquqi ti komanta vika kia ti harukora.

(Vainti vo Semaiaara maaqu Uriaava Kiriati-Jearimi vatukaihainaava vivavata Nora Kotira autuqaa vaiinti nahenti vira uva tiva nimi vaura. Vi vaiintiva ti aanantero Ieruharemi vatukave Iutaa vatake qoraiqama vuainarara vaiinti nahenti tiva nimi vaura.

Viva minti ti vaumanta King Jehoiakimiva nai qiata vaiintivata, nai iqoka vaiintiqa raqikukavata Uriaara uva iri, King Jehoiakimiva vira arukareva auti vauvaro, vovano Uriaara virara tiva amuvaro Uriaava qetakero Isipini ruqema kero vura.

Viva mini vuvaro King Jehoiakimiva vaiinti vo Akabora maaqu Elanataanira atitama kovaro viva vo vaiintinavu hampata Uriaara ravaaqavu kareva vura.

Vira ravaaqavu vare vuru King Jehoiakimiva vaunaini kovaro viva vira arukaate tumanta, vika Uriaara aruke vira vaata vare vuru qaqi vaiinti nahenti quntama tonaini aqukora.)

27

Purumakau auntqaa rumpato katarirara tura

¹ King Josaiara maaqu Sedekaiava Iutaa avuhainaa vaiintiqama viro vau entara Noravano Kotiva tiriara tiharo, ² Are purumakau auntana rukitenka katarira* autukera reti naaquntaqohairae nena auntana rukitaane.

³ Viragaahaire are uva vara kairaro Idomuni, Moapini, Taiani, Saidonini avuhainauka varianaini vuarire. Avuhainauka uva vare ania vaiintika King Sedekaiara tavareka Ieruharemiqi ani variavo. Vi vaiintika ai uva homa vare vuru nái avuhainauka tiva nimivarave.

⁴ Are vikara maa uvara tiramanta vuru nái nora vaiintinavu tiva nimiante: Isareru Variqa Noravano Kotiva ekaa kempuka vataava mintima tivo:

⁵ Te tenta nora kempukaqohai maa vatarave, vaiinti nahentive, ekaa aantauvahive, autuke vataunarara ti, te tentavano tenta antuqagaa vi vatanaakave vo vatanaakave vi vataro vi vataraqaa raqikiate tirerave.

* ^{27:2:} Purumakauvano vira uva iriarire tiro, vaiintivano vira auntana katari rukitaira.

⁶ Ho te ekaa vo vatanaa vo vatanaaka varia vatara tenta kaiqa vaiinti Babironi King Nebukanesaara kauquqi kaariramanta ekaa vika vira vevaarainima vaivarave. Aantauvahivata vira vevaarainima vaivarave, turo.

⁷ Ekaa vi vatanaaka King Nebukanesaara vevaaraini vai, vira naantiara vira maaqu vo vevaaraini vai, qaiqaa vira naantiara vira nainti vo vevaaraini vaiha vika paanaa kaiqa vara nimitaqi ani vaivaro Babironi vano taiqaaina entava anintaarire. Vi entava anintaara avuhainaauka vonavu kempuka vaika Babironi aatarake viraqi vaika vara muntuviqama kaimanta vika paanaa kaiqa vara nimitavarave.

⁸ Ho te tavaariramanta vo vatanaaka kia King Nebukanesaara vevaaraini vaireka autiha, viva purumakau auntana rukitaina katarira voqaara nái auntaqaahai qaqini vara kaivera, te Noravano Kotika vi vatanaaka ntaiharerave turo. King Nebukanesaava vika vehi autu taiqa kaarire ti, te qaqi kaariraro iqoka paipavanove, karara aavoqi entavave, nora rovaravanove, vika aruqíro vuuanarove.

⁹ Ne virara irihama kia vokia vaiintika una uva iriate. Ni paropeti vaiintinavuve, vokiaka tenavu naantiara govaraiqiaina haikara ni homa tiva nimiainarave ti variakave, taira tave okarara ni tiva nimi variakave, varante varia nahentikave, *vure/quaha* vaiintive, vika vika tiha, Ne kia Babironi avuhainaara vevaaraini vaiha vira paanaa kaiqa varevarave, ti variarave.

¹⁰ Vika minti tiha una uvaqai ni tiva nimi variamanta ne vika vi uvvara iriara kaara navutaaka ni rumpa vare maa vataraqahai niaraini vuru kevarave. Te tentavano maihai ni ntata kaari ne vo vataini oru variqi vi, vehi autuvi taiqama vivarave.

¹¹ Te tavaariramanta nai ta vatanaakae tiha, Tenavu Babironi avuhainaara vaiinti vevaaraini vairerave tivake, viva purumakau auntana rukitaina katarira voqaara vika nái auntaqaa rukitaivera, te vi vatanaaka qaqi kaari vika nái vata maataqaa vaiha kara utu namaqi viha variqi vivarave. Te Noravano Kotika minti turo, tiro.

¹² Viva minti tumanta te vohaa vi uvaraqai Jutaa King Sedekaiiaravata tiva ami tiha, Ne Babironi avuhainaara vevaaraini vaiha, viva purumakau auntana rukitaina katarira voqaara nenta auntana vataate. Ne kia qutiraiti, qaqi variqi vireka ivera, ne viravata vira vaiinti nahentivata paanaa kaiqa vara nimitaqi vuate.

¹³ Hauri iqoka paipavanove, karara aavoqi entavave, nora rovaravanove, ari nina vaiinti nahenti hampata arukaantorave. Vo vatanaaka tiha, Tenavu kia Babironi avuhainaara vaiinti vevaaraini vairerave ti vaika Noravano Kotika vi haikaraqohairo vika vehi autu taiqa kaanarove tirave.

¹⁴ Kia paropeti vaiinti vokiaka ti varia uvvara iriane. Vika tiha, Ne kia Babironi avuhainaara vevaaraini vaiha vira paanaa kaiqa vara amitevarave ti variarave. Vika uvavano una uvaqaima vaivo turo.

¹⁵ Noravano Kotika tiharo, Te kia paropeti vaiinti vika kaamate vara kaunaravavue. Vika nái irike ti hutuqaa una uva ai tiva ami variarave. Are vika uva irirera, te arivata vikavata maa vataraqahai ntata kaari navutaaka ni arukevarave tivo, ti.

¹⁶ Te minti tivake viraqahai Kotira kaiqa vara amitokaravata, ekaa vaiinti nahentiaravata tiha, Noravano Kotika mintima tivo: Paropeti vaiinti vokiaka tiha, Kia airi enta aitaraira navutaaka Kotira Naavuqihai koqe haika, vo haika vo haika vare vuru Babironiqi vataara qaiqaa vare viri Ieruharemiqi kevarave, tiarave. Vika una uvaqai ni tiva nimi variarave.

¹⁷ Ne kia vika uva iriraiti, Babironi avuhainaara vevaaraini variate. Ne mintivera, ne kia qutiraiti, qaqi variqi vivarave. Hauri navutaaka Ieruharemi vatuska vehi autu taiqa kevarave.

¹⁸ Vi vaiintika quqaa paropeti vaiinti vaiha ti Nora Kotika uva quqaa ti variaka vaivera, vika qaqi kairamanta ti Nora Kotika ekaa kempuka vatauka aareha ike mpo tiha kia navutaaka qaqi kairamanta ani ai Naavuqihaiive, avuhainaara naavuqihaiive, Ieruharemiqihaiive, koqe haika tota vare vuavarovo hini qaqi vai haikaravata vare vuru nái maaqaini kaate.

¹⁹⁻²⁰ (Tota King Nebukanesaava Jehoiakinira, Iutaa qiaata vajintive, Ieruharemiqira qiaata vajintive, rumpa vare vu entara, viva Nora Kotika Naavuqihaiive kia ekaa haika varero vura. Viva *baraasiqohai* aututo *pohitantave*, *Varuva Nararive* tu taverave, *uuri kaarinavuve*, vo haika vo haikave, mini qaqi kora.)

²¹ Te Isarerai Variqa Noravano Kotika ekaa kempuka vatauka mintima turo: Ti Naavuqihaiive Iutaa avuhainaara naavuqihaiive, navutaaka qaqi kaa haikara ²² naantiara vika ekaa vi haikara vare vuru Babironini kevarave. Vi haikava mini vairaqe te vo enta vi haikara qaiqaa oru vararerave. Vi entara te vi haikara vare viri qoqaraanaini karerave. Te Noravano Kotika vi uvvara turo, tiro.

28

Paropeti vaiinti Hananiaarara tura

¹ King Sedekaiava 4 ihiara Iuttaaqaa raqiki vau entara 5 toraqa te Nora Kotira Naavu vaunaini vauraro Asura maaqu Hananiaava Gibeoni vatukaihaainaava Kotira kaiqa vara amitoka nivuqaavata, ekaa vaiinti nahenti nivuqaavata vahiaro tiriara tiharo:

² Isarerri Variqa Noravano Kotiva ekaa kempuka vataava tiharo, Babironi avuhainaava tinavu Isarerri auntaqaa purumakau auntana katari rukitaira voqaara te raqa karerave.

³ Taara ihi aitarairaqe te King Nebukanesaava ti Naavuqihairo vo haika vo haika varero vuru Babironini kai haikara, ekaa vi haikara qaiqaa vare viri maini qoqaraanaini kairerave.

⁴ Te vi haikaravata vare, vo kiaka rumpa vare vuru Babironini kaaka, Jehoiakimira maaqu Iutta King Jehoiakinirave, ekaa vo vaiinti nahentive, qaiqaa ntita vare maini viri karerave. Eo, Babironi avuhainaava ni Isarerri auntana purumakau auntana katari rukitaira voqaara te raqa karerave. Te Noravano Kotika minti turo, tiro.

⁵ Hananiaava minti tumanta te Kotira kaiqa vara amitokaravata, ekaa vaiinti nahenti Nora Kotira Naavu vaunaini himpi vaukaravata tiha, ⁶ Ho koqeve. Noravano mintirera, te hove tiataarave. Are tinantema kero, Noravano Kotiva nai Naavuqihai vare vua haikarave, vaiinti nahenti rumpa vare Babironini vuru kaakave, maini qaiqaa viri kairera, te hove tiataarave.

⁷ Are minti tiaraveravata, te vo uva tiarirara arevata vaiinti nahentivata iriate.

⁸ Nai haaru arevata tevata kia variavauna entaraqaahai paropeti vaiinti vika vaiinti nahenti tiva nimi tiha, Iqoka raqivave, qora entavanove, qora rovaravanove, vi vatanaaka vi vatanaakaqaa qovaraiqianarove, ti vaurave.

⁹ Paropeti vaiinti vovano tiharo, Tenavu maateraiqamake variqi vuainarave, tiramanta vaiinti nahenti vailha tavaivaro vira uvavano quqaa vi vau vairera, vika vi vaiintirara quqamaa Noravano Kotiva vira noqahaairo uva tiva tivaravate, tiro.

¹⁰ Te minti turaro Hananiaava anintero purumakau auntana rukitaa katarira ti auptanahairo qaqini varakero kinta kaantama kero ¹¹ vaiinti nahenti mini ruvaaqumavi vaukara tiharo, Noravano Kotiva mintima tivo: Taara ihi aitarairaqe te vohaa qaramake Babironi King Nebukanesaava purumakau auntana katari rukitaira voqaara vo vatanaaa vo vatanaaka auntana rukitaira kinta kaantama karerave tivo, tiro. Hananiaava minti tumanta te mini ke vunara.

¹² Ho vo entanavu aitarovaro Noravano tiriara tiharo, ¹³ Oruntera Hananiaarara mintima tiane: Noravano Kotiva ariara mintima tivo: Are purumakau auntana rukitaira katariqohai aututara kinta kaantama kaanarave. Ho te vira vatuka *ainiqohai* aututaaina haikara rukitarerave.

¹⁴ Te Isarerri Variqa Noravano Kotika ekaa kempuka vatauka mintima turo: Ekaa maa vatanaaka Babironi King Nebukanesaara vevaaraini variate ti, te *ainiqohai* auntana rukitaa haikara varake vika auntana rukitarerave. Te qaqi kaariramanta aantauvhahivata vira vevaaraini vaivarave turo, tiro.

¹⁵ Noravano tiriara minti tumanta te Hananiaarara tiha, Hananiao, iriane. Noravano Kotiva kia ai atitaivara, are maa vatanaaka una uva tiva nimiaramanta vika ai uvara quqaa uvave tiavo.

¹⁶ Are minti tianara kaara Noravano Kotiva ariara mintima tivo: Te maa vataraqaahai ai qaqini vara karerave. Are maa vaiinti nahentikara te Noravano Kotika Ieremaiaara noqihai tuna uvara kia iriate tianara kaara, are maa ihiraqima qutu vinarave turo, ti.

¹⁷ Ho vohaa vi ihira 7 toraqa Hanaiavaa qutu vura.

29

Ieremaiaava Babironini rumpa vare vuru kokara qara ntuva nimitora

¹ King Nebukanesaava Kotira kaiqa vara amitokave, paropeti vaiinti vikave, qjata vaiinti vikave, vaiinti nahenti vokukave, Ieruharemigihairo rumpa varero vuru Babironini kokara irihama te Ieruharemipi vailha qara ntuva nimitaunara.

² (Navutaaka Ieruharemii aatarake, King Jehoiakinirave, vira norave, avuhainaava naavuqi kaiqa varokave, Iutta qjata vaiintive, Ieruharemigihira qjata vaiintive, vo kaiqa vo kaiqa kankomake tave vaukave, airi vo vaiinti nahentive, rumpa vare vuru Babironini komanta te qara vira ntuva taunara.)

³ Vi entara Iutta King Sedekaiava Safaanira maaqu Elasaaravata, Hilkaara maaqu Gemariaaravata Babironi King Nebukanesaava vaunaini nititama kareva auti vaumanta te vi qarara vitanta nimunara. Te maa uvara qara ntuva taunara:

⁴ Isareri Variqa Noravano Kotiva ekaa kempuka vataava ekaa ni Ieruharemiqihai rumpa vare Babironini vuru kaakara mintima tivo:

⁵ Ne mini naavu maaqa kaigate vaiha kaiqa varake naaho maata ututeha nenta naahoqihai kara qantukeha naate.

⁶ Ne naata vaati varateha vainti vatataimanta variate. Nenta maaquvarara iriha, vika nahentira vara nimimanta vikavata vainti vataate. Mintima keha ne airi vatanaaka vaiha kia taaraiqa variate.

⁷ Te tentavano navutaaka qaqi kauramanta vika ni rumpa vare vuru ne vate varia vatukaraqi kaarara ti, ne mini vaiha vi vatukaraqi variaka koqemake kahaqama nimitaimanta vika koqemake variqi vuate. Ne ti Nora Kotika haaraiqe te vika koqemaka nimitaari vika koqemake variate. Vi vatukaraqi variaka koqemake vaimanta nevata koqemake variqi vivarave.

⁸ Te ni Isareri Variqa Noravano Kotika ekaa kempuka vatauka niara mintima turo: Ne kia qaqi kaimanta ni avutana variaka *vure/quaha* vaiintive, paropeti vaiintive, ni una uva tiva nimiate. Ne kia vika timanta vika qumina taira taverara ni tiva nimiate.

⁹ Vika ti hutuqaa una uva ni tiva nimi variarave. Kia te vika nititaunarave. Noravano Kotiva minti tivo.

¹⁰ Qaiqaa Noravano mintima tivo:

Babironi mini 70 ihiara variqi vivaque viraqaaahai te tenta kauqu aiqiqaa aquke tiva taurava vivau variarire ti, te ni ntita vare viri ninta maaqa maini karerave.

¹¹ Te Noravano Kotika niara iriha naantiara vara nimitaaina okarara kankomake irunrarave. Naantiara te kia ni qoraqama nimitaraati, koqema nimitaari ne koqemake variqi vivarave. Te ni kahaqama nimitaari ne koqe entavano niqaa qovaraiqiaainara vira veika variate. ¹² Vi entara ne ti aaqanto aivaiqi ti haaraiqe te ne ti haare uvvara iriainarave.

¹³ Vi entara ne ti rantareka iha, ti rantama kevarave. Eo, ne nenta avu aato muntukaqihai kempukaiqamake ti rantareka ivera, ¹⁴ te qaqi kaari ne ti rantama kevarave, turo. Te ni ekaa vo vatainive, vonaini vonainive, raumpirima kaunaraqihai ntita vare viri ninta maaqa maini qoqaraanaini karerave. Noravano Kotiva mintima tivo.

¹⁵ Ne tiha, Tenavu Babironiqi vauraukara iriharo Noravano Kotiva paropeti vaiinti vonavu tinavuni varakaivo ti variarave.

¹⁶ Ne minti ti variavarovata, Noravano Kotiva Devitira avuhainaa taintaqaa oquvi vairaravata, ni navunaaka Ieruharemiq'i variaka kia ni hampata Babironini vuru kaakaravata, mintima tivo:

¹⁷ Te Noravano Kotika ekaa kempuka vatauka vikara mintima turo: Te qaqi kaariraro iqoka paipavanove, karara aavoqi entavave, nora rovaravanove, vika aruqiro viramanta vika *fiki* tava nteria vimanta kia ho nera voqarama vaivarave.

¹⁸ Eo, te qaqi kaariraro iqoka paipavanove, karara aavoqi entavave, nora rovaravanove, vika aruqiro vuuanarove. Te vika mintimake qoraqama nimitaari ekaa naato vatanaaka antuqavano kia vikara varianarove. Te vika vo vataini vo vataini raumpirima kaari vika mini oru vaimanta vi vatanaaka vika qoraqama nimiteha naaraihamma nimiteha vikara vaaqugama vuate tivarave.

¹⁹ Vika kia ti uva iriara kaara te ekaa vi haikara vikaqaa qovarama karerave. Te tenta kaiqa vaiinti paropeti vaiintinavu vika ianaini qaiqaa qaquaavata vara kauramanta, vika kia ti uva iriarave. Babironini vuru kaaka nevata kia ti uva iriarave.

²⁰ Ho te ni Ieruharemiqihai kauramanta rumpa vare vuru Babironini kaaka, ne ekaa te Noravano tiaina uvvara iriate.

²¹ Te Isareri Variqa Noravano Kotika ekaa kempuka vatauka una paropeti vaiinti tanta Kolaiara maaqu Ahaapirarave, Maseaara maaqu Sedekaiararave, tiha, Vitanta ti hutuqaa una uva ni tiva nimi variara kaara te vitanta Babironi King Nebukanesaara kauquqi kaariraro viva ni nivuqaa vitanta arukaanarove.

²² Naantiara Ieruharemiqihai rumpa vare Babironini vuru kaaka nái kenauka nitiha mintima tivarave: Oho, Babironi avuhainaava Ahaapika Sedekaiaka ihaqohairo tatoqa kaintema kero, Noravano aivata mintima kairera, tenavu ariara huviqorave tiataarave tivarave.

²³ Vitanta ti vaiinti nahenti nivutaini vaiha voqamake qora kaiqa vare variarave. Vitanta náitanta hana vaiinti naatavara hampata hampi nuvakeha, ti hutuqaa una uva vaiinti nahenti tiva nimi variarave. Kia te vitantara minti tiate tunaravauve. Te Noravano Kotika vitanta qora okara auti variara kankomake iri tavaunuarave turo, tiro.

Noravano Semaiaarara tura

²⁴⁻²⁵ Isareri Variqa Noravano Kotiva ekaa kempuka vataava tiriara tiharo, Are maa uvvara Babironiqi vaira Nehelamaihainaa vaiinti Semaiaara tiva amiane: Are nena irikera

qara vo ntuva kera ekaa Ieruharemipi variakarave, ti Kotika kaiqa vara timite vai vaiintira Maseaara maaqu Sefanaiarave, ekaa ti Kotika kaiqa vara timite variakarave, ekaa vika qara vira tavaate tira, vara kaanarave. Are Sefanaiarara mintima tiaro:

²⁶ Are Kotira kaiqa vaiinti Jehoiadaara vatuka varera Nora Kotira Naavuqaa raqikiane tiro, Noravano Kotiva ai noraiqama kaivo. Are tavararo vuera vaiinti vovano te paropeti vaiintima vauro tirera, are vi vaiintira ravaaqavu kera, vira kauqtantavata, aiquidantavata, katari ntoma teraqi veta nonku taatau tera, auntanavata *ainiqohair* taatau taane.

²⁷ Ho nantivarae are kia Anatotihaina vaiinti Ieremaiaara ravaaqavu kera mintima kaanarave? Viva ni nivutana vahilo unaqaraiqama kero te paropeti vaiintima vauro ti vairave.

²⁸ Vi vaiintiva uva vara kaivaro tenavu Babironini vaurauka vaunananini anirave. Viva tiharo, Ne airi ihiara mini vaira kaara, ne naavu maaqa kaqate vaiha, kaiqa varake naaho maata ututeha, nenta naahoqihaina kara qantukeha naate, tivo. Semaiaava Ieremaiaarara minti tivo tura.

²⁹ Semaiaava qara vira vara kovaro Kotira kaiqa vara amite vau vaiintiva Sefanaiava vi qarara varero vi uvara ti kaara ntuva timitomanta irunara.

³⁰ Mintuvaro Noravano Kotiva tiriara tiharo, ³¹⁻³² Are qara vo vara kairamanta ekaa Isareri Babironini variaka tavaate. Te Noravano Kotika Semaiaarara mintima turo: Te viravata viva kuvuarama taikavata qoraiqama nimirarerave. Kia tevauve ne varianaini vira vara kauro. Viva paropeti vaiinti voqara ni uva tiva nimilharo ni kuntama virivi kaimanta, ne vira una uvvara quqaa uvave tiarave.

Viva niara te Noravano Kotika Ieremaiaara noqihai tuna uvara kia iriate tira kaara, viva kuvuarama taika ni nivutaini vaika taiqa vivaro, naivata qutu vuanarove. Tenta vaiinti nahentiara iriha koqema nimirarerave tuna haikara viva kia tavaraitiro, vaaka qutu vuanarove. Te Noravano Kotika niara minti turo, tiro.

30

Vo enta Noravano nai vaiinti nahenti ruaruama nimitaainarara tura.

¹⁻² Isareri Variqa Noravano Kotiva tiriara tiharo, Are te ekaa uva ai tiva amunara vukuqi qara ntuva taane.

³ Vo enta anintairaqe vi entaraqaa te tenta vaiinti nahenti Isarerivata Iutaavata rumpa vare vuru kaanaihai ntita vare viri qoqaraanaini te vika nái kaivaqaukavara nimuna vataraqaa karerave. Te Noravano Kotika minti turo, tiro.

⁴ Noravano Isareriaravata Iutaaravata tiharo, ⁵ Te iruramanta vo kiaka voqamake geteha aakara nteha oi aai ti variavo. Vika muntukavano kia qihaaqama kero vaimanta voqamake geteha variavo.

⁶ Ne nenta ireha tavaate. Qoraintivano hoe vainti vataanarove? Ho nantihae te tavauramanta nahentivano vainti vatareva iharo nai auha totaintemake, ekaa vaiinti vika nái auhaqaa kauqu vateha variavaro, vika virivanovata qutu vua vaiintika viri voqara vairave?

⁷ Oho, anomakero qora enta vovano qovaraiqianarove. Kia vi entara voqara vo entavano varianarove. Vi entara ti vaiinti nahenti anomake qoraiqamavi nora maaraqi vaivarave. Vika mintimake vaidevata, te ekaara vitini hini kiaka ruaruama nimirarerave.

⁸ Vi entara te Noravano Kotika ekaa kempuka vatauka navutaaka Isareri auntana katarirukitaara voqara kintake, seniqhai rumpataaravata kuvantu kaari, vika kia qaiqaavata vo vataanaaka paanaa kaiqa vara nimirtevarave.

⁹ Vika kia vi vataanaaka paanaa kaiqa vara nimiraraiti, ti nái Variqa Nora Kotika kaiqa vara timiteha, Devitiva kuvuarama tai vaiintira kaiqavata vara amitevarave. Te vi vaiintira noraiqama kaariraro vika Avuhainaava varianarove.

¹⁰⁻¹¹ Ho ne Isareri ti tinta vaiinti nahenti variakara ti, kia geteha variate. Ne qora kaiqa vare variara kaara te ni ntaihamma keha vo vataini vo vataini ni raumpirima kaunarave. Te ni hampata vauvo. Vo enta te ekaa vi vataanaaka vehi autu taiqake, viraqaahai te nivata ne kuvuarama tekavata ntita vare ninta vataini viri ke, niqaa koqemake raqikiqi vuari, ne kia qaiqaa geteha vaivaro, ni muntukavano qihaaqama kero varianarove. Te Noravano Kotika minti turo, tiro.

¹² Noravano Kotiva nai vaiinti nahentiara mintima tivo: Isarerivauvo, vika ni vaata teqa taaqama kaa numuarava kiama ho tavanta vuanarove.

¹³ Kia ni numuara rumpa nimitaairava vovano vaivo. Kia marasinivata vaivo. Ni numuaravano kia tavanta viramanta ne kia qaiqaa koqemake vaivarave.

¹⁴ Ni kahaqireka auti varia vatanaaka, vika ekaa niara tauruke, kia niara noraiqaake iri variarave. Ne qora kaiqa, vo kaiqa vo kaiqa vare variavaro nai nora uvavano niqaa vaira kaara, navutaaka ni ntaihama kaantemäke, tevata kia ni aaqurihama nimiraiti, ni ntaihama kaunarave.

¹⁵ Quminama ne nenta numuarara iriha ike mpo tivarave. Kia vovano vira rumpa nimitairaro tavanta vuuanarove. Ne qora kaiqa, vo kaiqa vo kaiqa vare variavaro nai nora uvavano niqaa vaira kaara te ni ntaihama kaunarave.

¹⁶ Ho ni qoraiqama nimite varia vatanaaka vaimanta vo vatanaaka vika náivata qoraiqama nimitevarave. Ni navutaaka vaimanta vo vatanaaka vika náivata rumpa vare vo vataini vuru kevarave. Igoka raqhiha ni airaira vare vuaka vaimanta vo vatanaaka nái airairavata varevarave. varevarave. Nora maara niqaa vataaka vaiqe te vikaqaa nora maara vatarerave.

¹⁷ Navutaaka ni Ieruharemigí variakara vehi vaiinti nahenti variaovo ti variara kaara, te naantiara ni vaata teqga taaqama kaara rumpa nimitaariraro tavanta viramanta ne koqemake vaivarave. Te Noravano Kotika minti turo, tiro.

¹⁸ Noravano Kotiva tiharo, Te naantiara Isarerí anku aaqurihama nimitaari vika qaiqaa nái vataqaa ani koqemake variqi vivarave. Vika Ieruharemí nuqihí vatumaiqama vira qaiqaa naavu maaqa kaqa kevarave. Vika avuhainaa naavu vainara viraqaa qaiqaa vo kaqa kevarave.

¹⁹ Vi entara Isarerí ihi tiha tiriara koqeve tivarave. Vika quaheha naaraihi ti uvara *nontanta/otata* qaiqaa vokika ho irivarave. Te vika koqema nimitaari vika kia taaraiqa vai vatanaaka vairaiti, airi vatanaakkama vaivarave. Te vika koqema nimitaariraro vika autuvano nora autu vairamanta vo vatanaaka kia qaiqaa vikara vehi vatanaakave tivarave.

²⁰ Vi entara Iekopira ankuvano haaru koqemake variqi vuntemake, qaiqaa vika koqemake variqi vivarave. Vika qoraiqama nimiteka te náivata qoraiqama nimitarerave.

²¹ Vika náiqaa raqikiqi vivaro vika hana vaiinti vovano vika qiata vaintiqama vuuanarove. Te vira aaramake vita viri kaariraro viva ti aaqanto ani varianarove. Kia te vaiinti vo aaraarerera, viva qeteharo kia ti aaqanto anianarove.

²² Vika ti vaiinti nahenti vaiqe te vika Variqavano vairerave. Te Noravano Kotika minti turo, tiro.

²³ Rauriha variate. Aaronaavano utintema kero, Nora Kotira arara itairava qovarama viraro viva qora kaiqa vare variaka qiata rukavuma kaanarove.

²⁴ Vira arara ite vairava kia vaaka taiqa viraitiro, qaqi itaqiro vi vairaro viva ekaa ntaihama kareva nai avu aatoqi iritainara ekaa taiqa kaanarove. Naantiara vo entanavu aitaraira ne viva autina okarara kankomake irivarave.

31

Naantiara Noravano Isarerivata Iutaavata ruaruuma nimitaainarara tura

¹ Noravano Kotiva tiharo, Vi entara te ekaa Isarerí vo anku vo anku Variqavano variari vika ti vaiinti nahenti vaivarave.

² Navutaaka naatu qetake aahara vataini rugema vuaka, naantiara te vika aaqurihama nimitaari vika mini vaivaro vika muntukavano qihaaqira vaivarave, tiro.

³ Vika niara vataini vaivaro Noravano Kotiva vika nivuqaa qovarama viro vikara mintima tianarove: Isarerivauvo, ti muntukavano niara ekaa enta vairara ti, te kia ni qaqira karaiti, niara noraiqaa ke iriqi virerave.

⁴ Isarerivauvo, te ni qaiqaa kempukaiqama kaari ne nora vatanaakkama vaivarave. Vi entara ne qaiqaa nenta *tamparini* tuateha rintatimaqi viha ihi ntavaqi viha quaheha vaivarave.

⁵ Vi entara ne qaiqaa Samaria ainqina vainaini *uaini* naaho maata autivarave. *Uaini* kuvi ututeka vika naantiara *uaini* tava iratainara hiqike neverave.

⁶ Vi entara Efaraimu ainqinaini maimaraara raqiki vaika aakara nteha tiha, Aniqenavu Ieruharemimi orunte tentanavu Variqa Nora Kotira autu tuahera kaare tivarave, tiro.

⁷ Noravano Kotiva qaiqaa tiharo, Ne Iekopira ankuara quaheha ihi tiate. Isarerí vatanaaka avuniqamake variarara iriha, aakara nteha ihi tiate. Nora Kotira autu tuahereha mintima tiate: Noravaavu, nena vaiinti nahenti ruaruuma nimitaane. Isarerí kia qutiraiti qaqi variaka, ruaruuma nimitaane, tiate.

⁸ Tavaate. Naantiara te *noti* mantaraini vai vataragaahaiive, maa vatara vitivano taiqainaihaiive, tenta vaiinti nahenti ruvaagumake ntita viri maini karerave. Vika orurante ani vaimanta vika nivutaini avu qimpa vikave, aiqu rarera vikave, vainti taiqama vikave, vainti vatareka ikave, vika vika nái airithaa anivarave.

⁹ Vika ti haareha iqi rata vare orurante ani vaiqe te vika koqe namari tuvinaini numiqeha, vikara kuntavaivai ivorave ti, avuqavu vaina aararaqaa vika ntita vare aniainarave. Te Isareri vika qokama vauro. Isareri* vika vaireka, ti maaqu kara hunka voqaara variarave.

¹⁰ Ne vo vatanaa vo vatanaaka te Noravano Kotika tiaina uvara iriate. Ne vi uvara nora namari hini mantaraini variakavata tiva nimiate: Te tenta vaiinti nahenti Isareri vo vatainai vo vataini raumpirima kaurauka qaiqaa ruvaaquma karerave. Sipisipi qova nai sipisipiqa koqema kero raqikintemake, te vikaqaa koqemake raqikirerave.

¹¹ Te Noravano Kotika navutaaka kempukaiqamake vika tuateraqihai Iekopira anku† qaqini vara karerave.

¹² Vika Saioni Aiqinaqaa ani vaiha aakara nteha quahe vaivarave. Vika te Noravano Kotika ekaa koqe haika nimiainarara iriha quaheha vaivarave. Te vika *uitive*, *uainive*, *orivi* vhahaverave, sipisipive, purumakauve, nimiainara virara irihama quahevarave. Naahovano putaqira koqemakero vaintemake, vika muntukavano kia qaiqaa qoraiqramanta koqemake vaivarave.

¹³ Vi entara varata vika quaheha ihi nte vaimanta qaraaka vaiintivata naampaivata quaheha vaivarave. Vi entara te vika muntuka kuquqama nimitaari vika kia qaiqaa ike mpo tiraiti, muntuka koqe iramanta vaivarave. Te vika muntuka paruma nimitaari vika quaheha vaivarave.

¹⁴ Vi entara ti kaiqa vara timite vaiintika airi kara *ofaa* iha quara timiteraqihai varakeha ne vaimanta, ti vaiinti nahentivata kia vo haikara aavoqiraiti, koqemake vaivarave. Te Noravano Kotika minti turo, tiro.

Noravano Isareri aaqurihama nimitora

¹⁵ Noravano Kotiva tiharo, Ramaa vatukaqihai noraiqaake mpoqia ihira tiva kehama iqi rate variavo. Reserivama nai vaintaira qutu vuakarama mpo ike tiharo iqi rate vaivo. Vira vaintaira kia voqavata qaqi variara kaara viva vo kiakara kia ani ti muntuka kukuqama timitatee tirave.

¹⁶ Mintiveravata, te Noravano Kotika tiha, Reserio, kia are qaiqaavata iqi rataraitira, nena avuqihairu auquru nunka kaane. Are iqi raterava kia quminaiqianarove. Ai vaintaira navutaaka vata mini ke are vainanaini orurante anivarave.

¹⁷ Are virara irihara vi entava qovaraiqainara veka variane. Naantiara are tavairamanta ai vaintaira vika orurante nái maaqa tanara maini anivarave. Te Noravano Kotika minti turo.

¹⁸ Te iruramanta Isareri vika ike mpo tiha, Noravauvu, qaraaka purumakau nái antuqaqa nuantemake, tenavu Isareri ni vaurara, are tinavu ruqutihara utetaanarara ti, tenavu ai uva irirera auti vauro. Are tinavu Variqa Noravano Kotiva varianarara tira, are qaqi kairae tenavu are vainanaini orurante aniare.

¹⁹ Tenavu qora aaraqaa vivi, viraqaaahai tenavu tiha, Oho, tenavu kia vi aararaqaa vuataarave tivake, tentanavu qora kaiqa varaunarara aato kenko timanta irunarave. Qaraaka vaiinti qora kaiqa varaantemake, tenavu qora kaiqa vare vaunarave. Virara irihama tenavu voqamake kauriha, muntuka qoraiqimanta tentanavu mimira ruquti vauro, tiarave.

²⁰ Isareri vika vaireka, ti maaqu koqera voqaarama variavo. Ti muntukavano vikara avuniqama kero vaivo. Vika qora kaiqa varaara kaara te votataa votataa vika ntaihamake vaurarovata, ti muntukavano vikara qaqiqai vaivo. Ti voqamakero vikara hantuq harimanta vaunarara ti, te vika aaqurihama nimirerave. Te Noravano Kotika minti turo, tiro.

²¹ Isareriyauvo, navutaaka maihai ni rumpa vare vua aarara iritaate. Ne orurante ani aarara kankomake tavareka iha, ne vo haika varake kanaa vataate. Ho orurante aniate. Nenta ke vua vatukaraqi qaiqaa ani variate.

²² Isareriyauvo, ne vaireka, ti raavura voqaarama variavo. Mintimake vahavata, ne ti tauvaga utu timitaarave. Nanti nanti entae ne qumina vi ani vaiha kia te unanaini orurante anivarave?

Ho te Noravano Kotika voqara i okarara qaraaka okara qovarama karerave. Kia vaiintivano nahentiqa maimaraara raqikiraro, nahentivano vaiintiqa maimaraara raqikianarove‡, tiro.

Naantiara Kotira vaiinti nahenti koqemake variqi virara tura

* **31:9:** Hiparu uva: Efaraimu † **31:11:** Iekopira anku: Isareri vaiinti nahenti ‡ **31:22:** Hiparu uvavano kia kankoma kero tiro.

²³ Isareri Variqa Noravano Kotiva ekaa kempuka vataava mintima tivo: Naantiara te tenta vaiinti nahenti Babironiqihai ntita vare Iutaini viri kaaina entara, vika nai vatuka nai vatukaini vahia qaiqaa Ieruharemiara mintima tivarave: Qaqi kaivaro Noravano Kotiva nai ainqina takuqi vaira koqema amitaarire. Vira Naavuvano ainqina viraqama vaivo.

²⁴ Vi entara Iutaini vaiinti nahenti vo vatuka vo vatukaqi variqi vimanta, naaho kaiqa varekave, nái sipisipiqa raqikiha vi ani vaikave, ekaa vika Iutaini koqemake variqi vivarave.

²⁵ Te vika kempuka kia vaika kempukaiqama nimiteha, karara narara vaika kara nimirerave.

²⁶ Te mintiari vaiinti nahenti koqemake vaiteraqihai quahake himpi viti viri tavevarave. ²⁷ Te Noravano Kotika mintima turo: Vo enta te qaqi kaarimanta vaiinti nahentivata aantau vahivata airitahaama Isarerinivata Iutainivata vaivarave.

²⁸ Tota te Noravano Kotika tenta vaiinti nahenti ravau aquke, vika naavu maaqa rampai raampairima aquke, vika naaho maatavata qoraiqama kaunarave.

Ho naantiara te vika qaiqaa nái vataini ntita viri kaari vika qaiqaa karakaqa utute, naavu maaqavata kaqake vaivarave.

²⁹ Vi entara anitairamanta vika kia qaiqaa minti tivarave:

Vika noka qoka *uaini* tava ahora naavarovata, vika vaintivara aarai vaikanta urirave.[§]

³⁰ Vi entara tau vaiintikae *uaini* tava ahora naivera, nái vika aaraima vaikanta uruanarove. Qora kaiqa vare vaika nái qora kaiqa varera kaara qutuma vivarave, tiro.

³¹ Noravano Kotiva qaiqaa tiharo, Vo enta anintairaqe te Isarerivata Iutaavatamake vohaa vahia qaraaka uva tiva taatau karerave.

³² Qaraaka uva viva vaireva, kia te haaru uva tiva taatau taunara voqaara varianarove. Haaru te vaiintivano nai naataqaa koqemakero raqikintemake, vika kaivaqaukavara Isipiqihai kauqu utu vare ntita vare anuramantavata, vika te uva tiva taatau taunara raqa kaarave.

³³ Naantiara te qaraaka uva Isareri hampata tiva taatau taarirava maantima kero varianarove: Te tenta uva maara vika avu aatoqi vate, vi uvura vika muntukaqi qara ntuvu tarerave. Te vika Variqavano variari vika tinta vaiinti nahentima vaivarave.

³⁴ Vi entara nora autu vataukave, kia autu vataukave, vika ekaa tiriara kankomake irirara ti, kia vovano nai hana vaiintiara tiharo, Are Nora Kotirara kankomakera iriataarave, tianarove. Te vika qora okara auti uvarave, qora kaiqa vare uvarave, nunika nimite kia qaiqaavata tenta aatoqi virara iritarerave. Te Noravano Kotika minti turo, tiro.

³⁵ Kuarivano aatitairaqaa itairaro toravata opu makauvata entaqi itaarire tiro, Noravano Kotiva ekaa kempuka vataava vi haikara autukero vataira. Viva nai kempukaqo-hairo nora namari qakimake vaivaro namarivano kumpetaqiro uriharo noraiqaakero auva nte vairia.

³⁶ Noravano Kotiva uva vatero tiharo, Kuarivanove, toravanove opu makauvanove, kia taiqa viraitiro, qaqi vaintemake, Isareri vatanaaka qaqi variqi vivarave.

³⁷ Kia vovano ho naaruva avatama kero tavero maa vataru tuqa veva muntukaraqi aratairavata kia ho ranta kero tavaanarove. Viva ho mintiraqevavue, te Isareri qora kaiqa vare uvura kaara vika qoririma kararave.

³⁸ Vo enta anintairia vi entaraqaa vika Ieruharemi qaiqaa autu kevarave. Vika Hananerira *tauaave tianaihai*, *vaantavura* autuqi vivi, Kaantara Vai Qentiva vainaini vuru taiqa kevarave.

³⁹ Viraqaahai vika naaqunta rarau kaivaro kuari ruhunkinaini inaara ainqina Garepive tianaini oruntero, viraqaahairo tuqantaaviro *sautini* Goave tianaini otu vuanarove.

⁴⁰ Sauti mantara mini ugita kanta, qutu vuaka vaatavata hantavata muntu aqu kaanaini, naantiara vi vatava Ieruharemi vatuka avutaqima varianarove. Kuarivano urinaini vai vatavave, ekaa Kidaroni Namari auvahini taiqai vatavave, *noti* mantaraini Ohi Qentive tianaini vuru taiqai vatavave, naantiara ekaa vi vatava Ieruharemi vatuka avutaqima varianarove. Ekaa vi vatava ti Nora Kotika kotata vatama varianarove. Navutaaka kia qaiqaa vi vatukara qoraiqama kevarave. Kia vira vehi autu taiqa kevarave, tiro. Noravano Kotiva minti tura.

32

Ieremaiaava vata vo koqaama kora

§ **31:29:** Vi uvura okara: Vika noka qokavara qora kaiqa varaara kaara, vika vaintivara qoraiqama vuarave.

¹ King Sedekaiava 10 ihiara Iuttaaqaa raqiki vau entara Noravano Kotiva uva vo ti tiva timurave. Vi ihira King Nebukanesaava 18 ihiara Babironiqaqaa raqiki vaumanta, ² vira iqoka vaiinti Ieruharemi vatuka ututumate vaumanta, te Iutaa avuhainaa naavu tataaqa karapuhi naavuqi vaunara.

³⁻⁵ Tota te Kotira uva qoqaiqama keha tiha, Noravano Kotiva mintima tivo: Sedekaiava Babironi avuhainaa vaiinti hampata iqoka raqireva autirera, viva kia ho vira aatara kaanarove. Te Babironi avuhainaa vaiinti qaqi kaariraro viva maa vatukara aatara kero varaanarove. King Sedekaiava kia ho rugemakero viramanta navutaaka vira ravaaqavuke vare vuru Babironi avuhainara kauquqi kaivaro, viva vira avuqaa vaiharo nai viri nai viri taveharo uva tianarove.

Nebukanesaava Sedekaiara rumpa varero vuru Babironini kairaro viva mini variqiro viraqe te vira qoraqama amitaaina entava taiqa vuanarove. Noravano Kotiva minti tivo, ti.

Te minti turaro King Sedekaiava vi uvvara iriro ti titiro tiharo, Oho, tavave ariara minti tivarae are vi uvvara vaiinti nahenti tiva nimiaro? tivakero vira kaara ti rumpa varero vuru karapuhiqi kora.

⁶ Ho te karapuhiqi vauraro Noravano Kotiva tiriara tiharo, ⁷ Ai varaqora Salumira maaqu Hanameliva ai tavareva anianarove. Viva vata vo Anatotini vatukaini vaira vora amiharo koqaa varareva iharo ariara mintima tianarove: Are ti qata vakaa taruva varianarara tira, are naane avuniqama kera vi vataro koqaa aqukera vareravama variaro, tianarove, tiro.

⁸ Ho Noravano tuntema kero Hanameliva te karapuhiqi vaunanaini anintero tiriara tiharo, Te vata vo Anatotini vataunara are vi vataro koqaa autu kera varaae, Are ti qata vakaa taruva varianarara tira, are koqaa aqukera nena vi vataro varaae, tuvaro ti aatovano kenko timanta te iruraro quqaa Noravano tiriara avuni vi uvvara tura.

⁹ Mintimanta te Hanameliva Anatotini u vataro koqaa irera sikeriqaa hirike 17 silvaa monu vira amunara.

¹⁰ Te vata vira varaua uvvara vo vaiintinavu nivuqaa vaha *pepaaqaa* qara ntuvate, tenta hutuvata viraqaa qara ntuvu tauramanta vika nái nutuvata *pepaa* viraqaa qara ntuvu tomanta, te vi *pepaa* ivaqohai taatauke, *silvaavata sikeriqaa* hirike vira maara avatamake Hanamelira amunara.

¹¹ Te vata varaua taara *pepaaqaa* qara ntuvake, vo *pepaa* ivaqohai taatauke, vo *pepaa* kia ivaqohai taatauke, viraqahai *pepaa* vitanta ¹² Neriaara maaqu Barukira amunara. Barukiva Maseara naintivano vaura. Te *pepaa* vitanta vira ami vauramanta vokuka nái nutu *pepaaqaa* qara ntuvu tokavata, Hananelivavata, ekaa vo vaiinti mini ruvaaqumavi oquvi vaukavata, vira tave vaura.

¹³ Te ekaa vika nivuqaa vaha Barukirara tiha, ¹⁴ Isarerri Variqa Noravano Kotiva ekaa kempuka vataava mintima tivo: *Pepaa maatanta* taatau tairavata, kia taatau tairavata, varera vuru aaqataiqohai aututaa taveraqi vatairaro airi ihiara kojemakero variarire.

¹⁵ Te Isarerri Variqa Noravano Kotika ekaa kempuka vatauka mintima turo: Naantiera Iutaini variaka qaiqaa maa vataraqaa ani vaha naavuve, kara naahove, *uaini* naahove, koqama keha varevarave, tiro.

Ieremaiaava Kotira aaro uvvara

¹⁶ Ho te vata varaua *pepaa* Barukira ami, viraqahai te Nora Kotira aareha tiha, ¹⁷ Noravauvu, are ekaa haikqaa raqiki variaravave. Are nena nora kempukaqohairu vatavatu naaruvavata autukera vataanarave. Kia vo kaiqa maara ntairava vairaravavue are kia ho varenarave. Are ekaa kaiqa homa varenarave.

¹⁸ Are nai airi vaiinti nahenti aaqurihama nimite variarava vaharavata, are vika noka qoka qora kaiqa varaa uvvara kaara vika vaintaira ruquti varianarave. Are Variqa noravano variararo ai kempukavata uritarero vaivaro ai autuvano vaireva, Nora Kotiva ekaa kempuka vataavave.

¹⁹ Are nena avu aatoqi nora kaiqa vo kaiqa kaiqa autinara iri varianarave. Tenavu tavaurara are vare variana kaiqara, nai nora kaiqama vaivo. Are ekaa vaiinti nahenti vare varia kaiqara tave varianarave. Are ekaa vaiinti nahenti nana nana okara auti varia irihara, vika vohaiqa nái koqaa nimi varianarave.

²⁰ Haaru are Isipini nora kaiqa aahuva kaiqa varaanarave. Are mintiaqira vira, maa entaravata are vi kaiqara Isareriniive, ekaa vo vatainive, vare varianarara tiro, ai autuvano nora autuma vaivo.

²¹ Are nora kaiqa, vo kaiqa vo kaiqa vararamanta navutaaka voqamake qete varia vara are nena vaiinti nahenti Isarerri Isipiqlihai ntita vare anianarave.

²² Are maa vatara koqe vata vika nimianarave. Are nena kauqu aiqiqaa aqukehara vika kaivaqaukavara vi vatara nimirerave tianarave.

²³ Vika ani maa vatara vare viraqaa vahivata, kia are tiva taana uvvara avataqi viraiti, are uva maara tiva tanara viravata kia iriqi vuvarave. Vira kaara vate maa entara are qora enta vikaqaa qovarama kaanarave.

²⁴ Ho tavaane. Navutaaka maa vatukara varareka auti vaiha, vika katari tegkake vare, vaantaavura tataqaq vuru ntavate, vatavata varake ntavate, viraqaa vaarinete vaiha raqireka auti variavo.

Oho, iqoka paipewano, karara aavoqi entavave, nora rovarawanove, tinavu aruqiro viramanta Babironi vika maa vatukara aatarake varevarave. Are vi haikava mintimakero qovaraiqianarove tianantema kero, vi haikava qovaraiqivara, arevata tave variaro.

²⁵ Noravauvu, are ekaa haikaaqaa raqiki variaravave. Babironi vika iqoka raqiba maa vatukara vareva aumanto vaivaravata, are tiriara minti tianarave: Are *silvaa* monu aqukehara vata vo koqaa iramanta vo vaiintivata vira tavaate, tianarave, ti.

²⁶ Te minti turaro Noravano Kotiva tiriara tiharo, ²⁷ Te Noravano Kotika ekaa maa vataraqaa variaka Variqavanoma vauro. Kia vo kaiqa maara ntairava vairaqaevave te kia ho varaainarave.

²⁸ Te maa vatukara King Nebukanesaaravata vira iqoka vaiintivata nimiari vika vira aatara kevarave.

²⁹ Babironi vika maa vatukara aatarake, vatuka viravata naavu maaqavata iha quara kevarave. Vaiinti nahenti nái naavu qiata vau oru una variqa Baalirara koqe muntavi haikara iha quara amiteha, una variqa vo kiakaravata *uaini ofaa* qihia nimite variara kaara, ti voqamakero arara itairave.

³⁰ Isarerivata Iutaavata vika tota entaqaaahai ti avuqaa vaiha qora okaraqai avataqi ani variarave. Vika nái kauquqohai „una variqa“ autuke vataa haikara kaara ti arara ite vairave. Te Noravano Kotika minti turo.

³¹ Maa vatukara hogare autuko entaraqaaahai viraqi variaka ti qoraiqama timitaqi ani variara kaara, ti arara itaimanta te vira vehi autu taiqa kaariraro kia qaiqaa ti avuqaa variaranarove.

³² Isarerivata Iutaavata qora kaiqa, vo kaiqa vo kaiqa vare variara kaara ti arara itairave. Vika avuhainaukave, vika qiata vaiintive, ti Kotika kaiqa vara timite variakave, vika paropeti vaiintive, Iutaini variakave, Ieruharemiqi variakave, ekaa vika qora kaiqaqai vare variarave.

³³ Vika te unanaini aniaataara vaimanta ti tauvaqa utu timite variarave. Te qaiqaa qaiqaa vika koqe okara numiqe vauramanta, vika ti uva kia iriataa imanta kia iriarave.

³⁴ Vika una variqa *maraqura/varaha* te vaaku haikave tuna haikara ti Naavuqi vara vaaviamarekate vataarave. Vika mintihi ta Naavu anamoke qoraiqama kaarave.

³⁵ Vika una variqa Baalira *ofaa* iha quara amitareka Hinomu Uqitaini *ofaa* tainta vo autuke, viraqaa nái maaqaa raavura una variqa Molekira iha quara amitaarave. Kia te vikara mintiate tunarave. Vika mintimake vaaku okara auti variara kia te tenta avu aatoqi iritaunarave. Vika vi okarara avataqi vuvara kaara Iutaini variaka qora kaiqa voqavata vare variarave, tiro.

Isareri koqemake variqi virara tura

³⁶ Noravano Kotiva tiriara tiharo, Ne ququaama tiha, Iqoka paipewano, karara aavoqi entavave, nora rovarawanove, tinavu aruqiro viraro Babironi avuhainaava maa vatukara aatarakero varaanarove, tiarave. Ho te Isareri Variqa Noravano Kotika vo uvavata tiarirara iriane.

³⁷ Ti voqamakero arara ite vaimanta te tenta vaiinti nahenti vo vataini vo vataini raumpirima karerave. Mintima kevata, naantiara te vika ruvaaqumake ntita vare qaiqaa maini viri kaari vika koqemake variqi vivarave.

³⁸ Te vika Variqavano variari vika ti vaiinti nahentima vaivarave.

³⁹ Te vika vohaa avu aato nimi, vohaa aaravata numiqaa vika ekaa enta ti aatu qeteha koqemake variqi vimanta vika kuvuarama tekavata naantiara koqemake variqi vivarave.

⁴⁰ Naantiara te qaraaka uva vika hampata tiva taatauke vataariraro vi uvava ekaa entama varianarove. Te kia vikaqaaahai tuqantaavi viraiti, qaqiqai vika koqema nimitaqi virerave. Vika kia qaiqaa ti tauvaqa utu timitate ti, te vika koqe avu aato nimiari vika ti aatu qeteha koqemake variqi vivarave.

⁴¹ Te quaheha vika koqema nimi tarerave. Vika maa vataraqaa tupaka variate ti, te vohaa avu aato vate vika qaiqaa ntita viri karerave.

⁴² Te Noravano Kotika mintima turo: Tota te maa vaiinti nahentikaqaa qora enta qovarama kauramanta vika qoraiqama vuarave. Ho naantiara te tenta kauqu aiqiqa aquke tiva tauna uvara iriha, vika koqema nimitaari vika koqemake variqi vivarave.

⁴³ Ne tiha, Noravano maa vataro Babironi kauquqi kaira kaara vi vatava aaharaiqama vimanta vaiintive, aantau vahive kia ho viraqi vaivarave, tiarave. Minti timantavata, naantiara vaiinti nahenti qaiqaa maa vataraqaa ani vaha vi vatara koqama keha varevarave.

⁴⁴ Vika silvaa monu aqukeha nái autuvata vo kika vika taveka nutuvata *pepaaqaa* qara ntuvateha, *pepa* vira ivaqohai taataukeha vata vira varevarave. Te tenta vaiinti nahenti nái vata qaiqaa nái nimiainarara ti, Ieruharemi tataaqa vai vatukaraqi vaikave, Benaminira ankuvano vai vataraqaa vaikave, Iutaini vai vatukaraqi vaikave, ainqinaini vai vatukaraqi vaikave, inaara ainqinaini vai vatukaraqi vaikave, Nekevini vai vatukaraqi vaikave, ekaa vika koqaa aqukeha vata vira varevarave. Te Noravano Kotika minti turo, tiro.

33

Noravano qaiqaa Isarereri koqema nimitarerave tura

¹ Te qaiqai Iutaa avuhainaa naavu tataaqa karapuhi naavuqi vauraro qaiqaa Noravano Kotiva tiriara tiharo, ² Ti hutu vaireva Nora Kotikave. Te maa vataro autuke vate, viraqaa ainqinave nora namarive autuke vataraukama vauro.

³ Are ti haarairage te nina tiva amiha are kia iri tavena haikara nora haika kukeqaviro vainara ai tiva amiare.

⁴ Te Isarereri Variqa Noravano Kotika mintima turo: Te tavauramanta Ieruharemiqi variaka navutaaka vaantaavura rukavuke viraqaa vaarintevorave ti, vika nái naavu vonavu rampaikе, Iutaa avuhainaa naavuvata hini rampaikе, viraqaahai orive katarive vare vuru vi haikaraqohai vaantaavura kempukaiqama kareka auti variarave.

⁵ Ho vika Babironi hampata iqoka raquqi viha qutu vivaro vika vaatavano vo naavu vo naavuqi mpiqa vuanarove. Ti voqamakero arara ite vairaqe te navutaaka qaqi kaari vika mintima kevarave. Ieruharemiqi variaka qora kaiqa, vo kaiqa vo kaiqa vare variara kaara te vika tauvaqa utu nimitarerave.

⁶ Te mintimake vika qoraiqama nimitevata, naantiara te maa vatukaravata viraqi vaikavata koqema nimitaari vika koqemake variqi vivarave. Te vi entara tenta vaiinti nahenti koqema nimitaari vika koqemake variqi viha kia navutaaka naatu qetevarave.

⁷ Vi entara te Iutaavata Isarerivata navutaaka rumpa vare vuru kaanaihai ntita vare maini viri kaari vika tota kempuka vatanakaava, qaiqaa kempuka vatanakaava variarave.

⁸ Vika ti uva raqa kaarave, qora kaiqa vare variarave, kia ti vevaaraini vaireka auti variarave, ekaa vi uvara te nunqa nimite taiqa karerave.

⁹ Vi entara te Ieruharemiqi vaika koqema nimitaaina okarara ekaa vo vatanaka iri, vika quaheha ti autu tuaherakeha noraiqama kevarave. Vika Ieruharemiqi vaika koqemake variqi vira taveha kauqu runkinkiri ivarave, tiro.

¹⁰ Noravano Kotiva qaiqaa tiharo, Maa entara vo kiaka maa vataro tiharo, Maa vataro anomakero qoraiqama viro aahara vata voqaara vaimanta kia vaiintivata aantau vahivat viraqi variarave, tiarave. Vika minti tivakeha quqaa uva ti variarave. Iutaini vai vatukaraqive, Ieruharemiqi vai aararaqaave, kia vaiintive aantau vahive vaivaro qumina naantaaka ntirave.

¹¹ Ho vi entara ne qaiqaa Isarereri quaheha naaraihi vai uvara *nontantave/otatave*, qaraaka naata vaati vareha quaheha ti uvara *nontantave/otatave*, irivarave. Ne irimanta vika ihi tihā koqeve ti *ofaara* vare ti Naavuni vuru kevarave. Vika maantimake ihi tivarave:

Kaiqenavu Nora Kotira ekaa kempuka vataarara koqeve tiare.

Vira okaravano koqe okaraqai vaivaro, vira muntukavano tinavuara ekaa entama variqiro vuanarove, tivarave.

Naantiara te maa vataraqaa variaka koqema nimitaari vika tota koqemake variqi vuantemake, qaiqaavata koqemake variqi vivarave. Te Noravano Kotikama minti turo, tiro.

¹² Te Noravano Kotika ekaa kempuka vatauka maantima turo: Maa entara maa vataraqaa kia vaiintive aantau vahive variavarō qumina naantaaka ntirave. Ho naantiara qaiqaa koqe ukauvano vairamanta sipisipiqa raqikika nái sipisipi mini vuru kaimanta ukau nevarave.

¹³ Naantiara Ieruharemi tataaqa vai vatukaraqive, Benaminira ankuvano vai vataraqaaave, Iutaini vai vatukaraqive, ainqinaini vai vatukaraqive, inaara ainqinaini vai

vatukaraqive, Nekevini vai vatukaraqive, mini mini sipisipiqa raqikika homa nái sipisipi qaiqaa kaara ntuvake tavevarave. Te Noravano Kotika minti turo, tiro.

¹⁴ Noravano Kotiva tiharo, Vo enta anintairaqe vi entaraqaa te kauqu ainqiqa aquke Isarerivata Iutaaravata tiva tauna uvava vi vauma varianarove.

¹⁵ Te vi entara katarivano aimakau arataintemake, Devitiva kuvuarama tainaraqihai vo kaama taariraro avuhainaava vahiaro maa vataraqaa vaika avuqavu okara koqe okaraqai autu nimitaqiro vuanarove.

¹⁶ Viva Avuhainaava Vaiintivano vairamanta kiama Isarerivata Iutaavata qaiqaa navuttaaka naatu qeteha variqi vivarave. Vika vi vaiintira autu nteha maantima tivarave: Noravano *Avuqavu Okara Tinavu Timita Vaivama* Vaivo, tivarave.

¹⁷ Te Noravano Kotika tenta kauqu ainqiqa aquke tiha, Ekaa enta Devitira ankuqhainaa vaiinti vovano Isarereri avuhainaava varianarove, tiro.

¹⁸ Ekaa enta Rivaira ankuqhainaa vaiinti vovanovata ti avuqaa vahiaro kaintu iha quare *ofaarave, uiti ofaave, vo ofaave*, autu timitaanarove, tiro.

¹⁹ Noravano Kotiva tiriria tiharo, ²⁰ Te kuarivata toravata vitanta hampata vohaa vaiha uva tiva taatau tauraro kuarivano aatitairaqaa ite vaivarovato entaqi ite vairave. Kia vovano te vitantara tiva taatau tauna uvvara nunka kaira vitanta hampiara voqaara iteverave.

²¹ Ho vira voqaantemake, te tenta kaiqa vaiinti Devitira hampata vohaa vaiha uva tiva taatau taunaraive, Rivaira anku hampata vohaa vahia uva tiva taatau taunaraive, vi uvvara kia ho vovano nunka kero vo uva tianarove. Ekaa enta Devitira ankuqiraa vaiinti vovano Isarereri avuhainaava vairaro, ekaa enta Rivaira ankuqiraa vaiinti vovanovata ti avuqaa vahiaro *ofaa* iha quara timitaanarove.

²² Te qaqi kaari Devitika Rivaika kuvuarama teka nai airitaha vaivarave. Opu makau naaruvaini nai airitaha variamanta ne kia ho kaara ntuvake tavaantemake, ne vitanta kuvuarama tekavata kia ho kaara ntuvake tavevarave, tiro.

²³ Qaiqaa Noravano Kotiva tiriria tiharo, ²⁴ Vo kiaka ti vaiinti nahentiara ti varia uvvara are irianarave? Vika tiha, Noravano Isarerivata Iutaavata kaamatero, viraqaaahairo viva vitanta qoririma kaivo, ti variarave. Vika minti tiha ti vaiinti nahentiara vehi vatanaakave, kia qaiqaa nora vatanaaka vaivarave ti variarave.

²⁵ Vika minti tiamantavata, te mintima turo: Aatitaivavata enta ivavata te uva vataunara naitaramake avataqi vuate ti, vitanta autuke vataunaraive. Naaruvavanovata vatavanovata vohaa aramake te uva vataunara avataqi vi variarave.

²⁶ Te vi haikara mintimake autuke vataunantemake, te Iekopika Devitika hampata vohaa uva tivake taatau taunara qaqi iriqi virerave. Te Devitira ankuqhainaa vaiinti vo kaama taariraro, viva Eparahaamivave, Aisaakivave, Iekopivave, kuvuarama taakaqaa raqikiqiro vuanarove. Naantiara te tenta vaiinti nahenti aaqurihamma nimitaari vika qaiqaa koqemake variqi vivarave turo, tiro. Noravano Kotiva minti tura.

34

Sedekaiarara raurihara variane tura

¹ King Nebukanesaava nai iqoka vaiintivata, vo vatanaaka vira vevaaraini vauka iqoka vaiintivata ntita varero, ani Ieruharemi vatukave, vira auvahini vau vatukaukave, vika hampata raqi vau entara, Noravano Kotiva tiriria qaiqaa uva tura.

² Isarereri Variqa Noravano Kotiva tiriria tiharo, Are Iutaa King Sedekaiava vainaini oruntera maa uvvara vira tiva amiane: Noravano Kotiva mintima tivo: Te maa vatukara Babironi avuhainaara kauquqi kaariraro viva vira iha quara kaanarove.

³ Are kia ho ruqema kera vinarave. Navutaaka ai ravaaqavuke vare vuru vira kauquqi kaivara are vira avuqaa vahira nai viri nai viri tavehara vikantira uva tinarave. Viraqaaahiro vika ai rumpa vare Babironini vuru kevarave.

⁴ Ho Iutaa avuhainaara vaiinti Sedekaiao, te Noravano Kotika ariara mintima turo: Iqoka paipewano kia ai arukaanarove. ⁵ Are qihaaqama kera qutu vinarave. Are qutu viramanta vika haaru ai kaivaqaukavarava avuhainauka koqe muntavi haikara iha quara nimitaantemake, aivata vi haikara iha quara amiteha iqqi rateha tiha, Mpo, tinavu avuhainaara vaiintivano qutu vivo, tivarave. Te Noravano Kotika ariara minti turo, tiro.

⁶ Noravano tiriria Sedekaiara vi uvvara tiva amiane tumanta te Ieruharemiqi vaiha vi uvvara King Sedekaiara tiva amunara.

⁷ Vi entara Babironi avuhainaara iqoka vaiinti Ieruharemi hampata iqoka raqihia, taara vatuka Lakisivata Asekaavata hampata raqi vaura. Navutaaka Iutaini iqoka raqihia ekaa vaantaavura vai vatukara naatarake, taaramo vatuka vinavuqakai qaqi vaura.

⁸ King Sedekaiava Ieruharemipi vauka hampata vohaa uva vatero tiharo, Tenavu tentanavu paanaa kaiqa vareka qaqi kuvantu karerave, tura.

⁹ Vika maantimake uva tiva tora: Ne kia nenta hana Isareri tuataimanta vika karapuhi vaiinti voqaara ni kaiqa vara nimitaate. Ne vika vaiintie nahentie ekaa kuvantu kaimanta qaqi variate, tura.

¹⁰ Minti tumanta ekaa qiata vaiintivata vaiinti nahentivata vi uvarara eo tivake tiha, Tenavu vi vaiinti nahentika kuvantu kia qaiqaa vika rumpa tarerave ti. Vika vi uvarara eo tivake nái paanaa kaiqa varoka kuvantu nimitora.

¹¹ Vika mintuma kevata, naantiari vika vo avu aato vare, vika kuvantu koka ntita vare qaiqaa viri ke tiha, Ne qaiqaa tinavu paanaa kaiqa varaate tura.

¹²⁻¹³ Mintuyaro Isareri Variqa Noravano Kotiva tirira tiharo, Maa uvara vaiinti nahenti tiva nimiane: Haaru Isipihainaaka ni kaivaqaukvara rumpa tomanta te vika ruaruuma nimite, vika hampata vohaa uva tiva taataute tiha, ¹⁴ Ni hana Hiparu vaiintie nahentie* ni paanaa kaiqa vara nimiteka 6 ihiaraqai ni kaiqa vara nimitevarave. 7 ihivano anintaira ne vika kuvantu kaimanta qaqi variate, tiavaunarave.

Te minti turamantavata, ni kaivaqaukvara kia vi uvira iriataa umanta kia irurave. „Vika kia nái qumina kaiqa vaiintie nahentie kuvantu nimitaraiti, qaqiqai vika tuate vaurave..”

¹⁵ Ho tuvana te tavauramanta ne qora okara autura qaqirake, vo avu aato vare, koqemake ti uva avataqi viha nenta hanauka Isareri kuvantu nimitarave. Vi entara ne ti Naavuvano vainaini ti avuqaa vailha uva vohaa vateha tenavu mintirerave, tiarave.

¹⁶ Ne minti tivakevata, ne qaiqaa vo avu aato vare, ti hutu qoraiqamake vataini muntuvi kaavo. Ne nenta vohaa uva tivake vataara raqake, ne vohaiqaa vohaiqayano nenta kuvantu kaamanta qaqi vua vaiinti nahentika qaiqaa ntita vare viri ke, vikara kempukaiqamake tiha qaiqaa tinavu paanaa kaiqa vara timitaate tiavo.

¹⁷ Vira kaara te Noravanó Kotika niara tiha, Ne ti uva raqa keha nenta hana Isareri kia kuvantu nimitaara kaara, tevata ni kuvantu karerave. Te ni kuvantu kaariraro iqoka paipevanove, karara avaoqiqi entavave, nora rovaravanove, ni aruqiro vuanarove. Te ni qoraiqama nimitaara ekaa naato vatanaaka niara vaaqu vatanaakave tivar, vika antuqavanovata kia niara varianarove.

¹⁸⁻²⁰ Iutaa qiata vaiintive, Ieruharemipi qiaata vaiintive, nora vaiinti avuhainaa naavuqi variakave, ti Kotika kaiqa vara timite variakave, vo vaiinti nahentive, ne ekaa ti tivuquaai vaiha vohaa uva tiva taatauke tiha, Tenavu vika kuvantu karerave tiarave.

Ne vi uvira kempukaiqama kareka iha, purumakau aruke vira vaata vuavu tavaaraqaa kahike hini hini vate, ne vira vaata avuta ntuna oru viha vi uvira tivataara avatarerave tiarave. Ne minti tiaravata, raqake kia vira avataqi vuarave.

Vira kaara te navutaaka qaqi kaari vika ne purumakau arukaantemake, nintavata arukevarave. Ni arukaivarо ni vaatavano qumina vairamanta uvirive qaakau aantau vahive ani ni vaata neverave.

²¹ Te Iutaa King Sedekaiaravata vira qiata vaiintivata navutaaka kauqugi kaariramanta vika arukevarave[†]. Vate maa entara Babironi avuhainaara iqoka vaiinti Ieruharemipi vahuqa qaqirake vuavo.

²² Ho naantiara te tiariramanta vika orurante ani maa vatukara qaiqaa ututumate iqoka raqihira vira aatarake iha quara kevarave. Te qaqi kaariramanta navutaaka ani Iutaini ekaa vatuka qoraiqama kaivaro kia vovanovata viraqiqi varianarove. Te Noravano Kotika minti turo, tiro.

35

Rekapira ankuara tura

¹ Josaiara maaqu King Jehoiakimiva Iutaaqaa raqiki vau entara Noravano Kotiva tirira tiharo, ² Are Rekapira ankuqihainaaka varianaini oruntera vika hampata uva tivakera vika ntita varera ti Naavu auvahini *rumu* voqi viri kera, *uaini* vika nimiramanta naate, tiro.

³ Minti timanta te orunte Rekapira ankuqihainaai vaiinti vo Jasaniaara vi uvira tiva amirera vunara. Jasaniaara qova ti amaqova Ieremaiaava vauvaro Ieremaiaara qova Habasiniaava vaura. Te Jasaniaarave vira qata vakaave vika maaquvarave ⁴ ekaa vika ntita vare viri Nora Kotira naavu *rumu* voqi kaunara. (Vi *rumuva* vaireva, Ikkadaliara maaqu paropeti vaiinti Hanaaniva nai avataqi vu vaiintika numiqe vau *rumuva* vaura.

* **34:14:** Vi entara vaiintivanoe nahentivanoe nái dinau taiqa karevae, vo maara kaara uva taiqa karevae, viva vo vaiintiari ai paanaa kaiqa vara amitaqi vuvariraro vi uvava taiqa vuvarire tivakero, vi vaiintira paanaa kaiqa vara amite vaura. † **34:21:** Jer 37:5, 11

Vira tataaqa qiata vaiinti vokuka u *rumuva* vauvaro, vira muntuvi Salumira maaqu Maseaava u *rumuva* vaura. Salumiva Kotira Naavu qentiqaa raqiki vau vaiintiva vaura.)

⁵ Te Rekapira ankuqhainauka vi *rumuraqi* ntita viri ke, *uaini* vo *kaapu* vo *kaapuqi* qihiake vika nimi tiha, Ho *uaini* vira naate ti.

⁶ Te minti turamanta vika aqao ti, Tenavu *uaini* kia naunarave. Tinavu kaivaqava vo, Rekapira maaqu Jonadaapiva kempukaiqama kero qioqama tero tiharo, Nevata ne kuvuarama tekavata *uaini* kia naate, turave.

⁷ Viva tiharo, Ne kia naavu maaqa kaqake vairaiti, kia kara naaho utiraiti, kia *uaini* naaho utiraiti, kia *uaini* naahovata koqaamake varaaete. Ne *seri* naavuqiqai variqi vuate, turo. Ne mintiaqi vivera, ne homa maa vataraqaa vi aninha kia vaaka qutiraiti, vukai enta qaqi variqi vivarave, turave.

⁸ Ho tenavu tentanavu kaivaqava Jonadaapiva uva maara tura koqemake avate vauvarave. Tenavu tentanavu naatave maaqu raavurare vika hampata kia *uaini* naunarave.

⁹ Tenavu kia naavu maaqa kaqate vairaiti, kia *uaini* naahove, kara naahove vataunarave.

¹⁰ Tenavu *seri* naavuqiqai variqi viha, ekaa tentanavu kaivaqava kempukaiqama kero tivato uvara avataqi vi vaunarave.

¹¹ Tenavu mintiaqi vurarovata, King Nebukanesaava iqoka raqireva animanta tenavu qeteha tiha, Anigenavu Ieruharemipi ruqemake oru variare. Hauri Babironi iqoka vailintivata, Siria iqoka vaiintivata tinavu arukevorave tivake Ieruharemini ani vauro, ti.

¹² Vika minti tuvaro Noravano Kotiva tiriara tiharo, ¹³ Te Isarerri Variqa Noravano Kotika ekaa kempuka vatauka mintima turo: Are oruntera Iutaini variakavata Ieruharemipi variakavata mintima tiva nimiane: Te Noravano Kotika ni irama nimiteha tiha, Ne nantihae ti uva kia iriraiti, te uva maara vataunaravata kia avataqi vuarave?

¹⁴ Haaru Rekapira maaqu Jonadaapiva nai vaintivar aqiqama teharo kia *uaini* naate tirara ti, vate maa entaravata viva kuvuarama taika vira uva iriha kia *uaini* naarave. Te tenta uva ni qaiqaa qaiqaa tiva nimi vauramantavata, ne kia ti uva avataqi vi variarave.

¹⁵ Te qaiqaa qaiqaa tenta kaiqa vaiinti paropeti vaiinti vika ne varianaini nititama kauramanta vika niara tiha, Ne ekaa qora aara qaqrake avuqavu i okarara avataqi vuate. Kia una variqa nutu tuaherakeha vika kaiqa vara nimitaate. Ne ti uva avataqi vivera, te ni qaiqaa qaiqaa tiva nimi vauramantavata, ne kia nenta aato ti timiraiti, kia ti uvavata iriarave.

¹⁶ Rekapira maaqu Jonadaapiva kuvuarama taika nái kaivaqara uva koqemake iriqi vuamantavata, ne kia ti uva iriavo.

¹⁷ Vira kaara te Isarerri Variqa Noravano Kotika ekaa kempuka vatauka tiha, Ne iriate. Te Iutaini variakaravata Ieruharemipi variakaravata tiva taunantemake, te ekaa qoqama nimtaaina haikara vikaqaa qovarama karerave. Te vikara uva turamantavata, vika kia ti uva iriarave. Te vika naarauramantavata, vika kia vo tiarave, tiro.

¹⁸ Noravano minti tumanta te Rekapira ankuura tiha, Isarerri Variqa Noravano Kotiva ekaa kempuka vataava niara mintima tivo: Ne nenta kaivaqava Jonadaapiva uva maara tiva tora koqemake iri, ekaa vira uva koqemake avataqi vuarave.

¹⁹ Virara irihama te Isarerri Variqa Noravano Kotika ekaa kempuka vatauka tiha, Rekapira maaqu Jonadaapiva kuvuarama taika vika kia taiqa viraiti, qaiqaa vaivaro ekaa enta vikaqihairo vovano ti kaiqa vara timitaarirava varianarove turo. Noravano Kotiva niara mintima tivo, tunara.

36

Barukiva Kotira uva qara ntuvato vukura King Jehoiakimiva iha quara kora

¹ Josaiara maaqu Jehoiakimiva 4 ihiara Iutaqaqa raqiki vau entara Noravano Kotiva tiriara tiharo, ² Quruqurumatai vukura varera viraqi te Iutaaravata, Isareriaravata, ekaa vo vatanaakaravata, ai tiva amuna uvvara qara ntuva taane. Are avuniqama kera te Josaiava vau entara ai tiva amuna uvvara vira naane qara ntuva tera, vira naantiara ekaa vo uvavata, maa entara ai tiva amunara viravata, qara ntuva taane.

³ Iutaini variakate naantiara vika qoraiqama nimtaaina uvvara, vo uva vo uva iri, vika qora aara qaqrake kevarave? Vika mintivera, te vika qora kaiqa, vo kaiqa vo kaiqa vare uvvara nunka nimitarerave, tiro.

⁴ Viva minti tumanta te Neriaara maaqu Barukira aaramake, Noravano ti tiva timu uvvara vira tiva amuraro Barukiva ekaa vi uvvara quruqurumato vukuraqi qara ntuva timitora.

⁵ Mintumanta te Barukirara tiha, Ti Nora Kotira Naavuqiara qioqama taarara ti, te kia ho mini virarave.

⁶ Ho vo enta vaiinti nahenti kara auramate entara, are Nora Kotira Naavu vainaini oruntera, ekaa Nora Kotira uva ai tiva amurara vukuqi qara ntuva taanara vira kaara ntiramanta, Iutaini vo vatuka vo vatukaihai anika vi uvvara iriate.

⁷ Ti voqamakero arara itairaqe te vika ntaihaaina uvvara iri, vika Nora Kotikara tinavu aaqurihamaa timitaane tivake, nái qora aaraqaa ni variara qaqrake tuqantaae vivarave? tiro.

⁸ Noravano minti tuvaro Barukiva te tunantema kero, Nora Kotira Naavuni oruntero vi vukuraqihairo Noravano Kotiva tu uvvara vaiinti nahenti kaara ntuva nimura.

⁹ Jehoiakimiva 5 ihi 9 torara Iutaqaaqaa raqiki vau entara vika Nora Kotira avuqaa vaiha kara aurama taare tivake vo enta kaamate Ieruharemipihaive, ekaa Iutaini vau vatukaraqihaiive, vaiinti nahenti Kotira Naavuvano vaunaini anura.

¹⁰ Vika aninte mini vauvaro Barukiva Nora Kotira Naavuqi *rumu* qentiana himpi vauharo, ekaa te vira tiva amuna uvvara vukuqihairo kaara ntuva nimitora. Vi *rumuva* Safaanira maaqu Gemariaara *rumuvano* vauvaro Safaaniva avuhainaa vaiinti uva qara ntuva amite vauvava viva vo, Semaiaara maaqu Delaaiva vo, Akabora maaqu Elanataaniva vo, Safaanira maaqu Gemariaava vo, Hananiaara maaqu Sedekaiva vo, nora vaiinti vo kuka vatamake, ruvaaqumavi viraqi vaura.

¹¹ Barukiva kaara nti vauvaro Gemariaara maaqu Safaanira nainti Mikaaiva ekaa Noravano Kotiva tu uvvara iriro, ¹² viraqaahairo viva mini kero avuhainaa naavu Elisamaara *rumuqi* otuntero tavomanta Elisamaava avuhainaa vaiinti uva qara ntuva amite vauvava viva vo, Semaiaara maaqu Delaaiva vo, Akabora maaqu Elanataaniva vo, Safaanira maaqu Gemariaava vo, Hananiaara maaqu Sedekaiva vo, nora vaiinti vo kuka vatamake, ruvaaqumavi viraqi vaura.

¹³ Vika *rumu* viraqi vauvaro Mikaaiva ekaa uva Barukiva vaiinti nahenti kaara ntuva nimito uvvara vikavata tiva nimumanta, ¹⁴ viraqaahai vika Netaaniara * maaqu Selemiara nainti Jehudira atitamake tiha, Are Barukirara mintima tiane: Are vaiinti nahenti kaara ntuva nimitaana vukura varera aniane tuvaro Jehudiva oru vira tiva amuvaro Barukiva vi vukura varero vika vaunaini anura.

¹⁵ Viva anumanta vika virara tiha, Are oquivira vi vukuraqihairo tinavu uva kaara ntuva timitaane, tuvaro Barukiva vuku viraqihairo vika uva kaara ntuva nimitora.

¹⁶ Viva kaara nti vaumanta vika vi uvvara iri, ravukuvu qeteha nai tave nai tave iha Barukirara tiha, Oho, kaiqe ekaa vi uvvara avuhainaa vaiinti vuru tiva amiare, tivake ¹⁷ vika vira ireha tiha, Are nantiakerae vi uvvara qara ntuva taaro? Ieremaiaava ai tiva ami vaivarae are vi uvvara qara ntuva taaro? tuvaro ¹⁸ Barukiva eo tiro, Viva ekaa vi uvvara tiva timi vaimanta te *inkiqohai* maa vukuraq qara ntuva taunarave, tiro.

¹⁹ Minta tumanta vika tiha, Netanta Ieremaiaaka oru kukeqavi variate. Kia vo vaiintiara tetanta mini oru vairerave tiate, tivake ²⁰ vika quruqurumato vukura vare vuru Elisamaava avuhainaa uva qara ntuva amite vaura *rumuqi* vate, viraqaahai vika avuhainaaava vaunaini orunte ekaa vi haikara vira tiva amura.

²¹ Avuhainaa vaiinti viva vika uva iriro, viraqaahairo Jehudiva vi vukura varaarire tiro, vira atitovaro Jehudiva oru Elisamaara *rumuqihairo* vuku vira varero orurantero ani vauharo uva vira kaara nti vaumanta avuhainaa vaiinti vivavata vira ututumate himpi vaukavata vi uvvara irura.

²² Vi entara 9 tora iqara auti vau entava vauvaro avuhainaa vaiinti viva nai naavuqi iha tataaqa vauharo iha taari vaura.

²³ Ho Jehudiva quruqurumato vukura viraqihairo uva vo kaara ntuva taiqa kovaro, avuhainaa vaiinti viva muhupaqohairo vi uvvara vukuqahairo teqakero ihaqira aqu kero, viraqaahairo qaiqaa qaiqaavata viva mintiaqiro viro, ekaa vi vukura iha quara taiqa kora.

²⁴ Avuhainaa vaiinti vivavata vira hampata vaukavata ekaa vi uvvara iri, vika qeteha ike mpo tivakeha nái uta vaqaq unahi aanahima kaataara vaimanta vika kia mintiraiti, qaqi vaura.

²⁵ Elanataaniva vo, Delaaiva vo, Gemaariaava vo, vinavuka avuhainaa vaiintiara mpo tiha vi vukura kia iha quara kaane tuvaro, viva kia vinavuka uva iriraitiro, ²⁶ nái maaqu vo Jeramelirave, Asarielira maaqu Seraaivarave, Apadelira maaqu Selemiarave vinavuka nititero tiharo, Nenavu oru Ieremaiaaka Barukika ravaaqavu kaate, tuvarovata Noravano titanta kukeqa komantara ti, vinavuka kia ho titanta ranta kora.

* **36:14:** Netaaniara qova Kusiva vaura.

²⁷ Ho King Jehoiakimiva te Barukira tiva amuna uvvara qara ntuva tai vukura iha quara kovaro Noravano Kotiva tiriara tiharo, ²⁸ Are quruquruma tai vukura vo varera, avuni tiva tauna uvvara, ekaa vi uvvara qaiqaa qara ntuva taane.

²⁹ Are uva vo vara kairaro Iutaa King Jehoiakimiva vira tavaarire. Virara mintima tiane: Noravano Kotiva ariara mintima tivo: Are quruquruma tai vukura vira iha quara kera Ieremaiaarara tihara, Viva nantiharoe maa vukuraqi qara ntuva tero tiharo, Naantiara Babironi avuhainaava ani maa vata maatara vehi autu taiqakero vaiintivata aantau vahivata aru taiqa kaanarove, tivo? tianarave.

³⁰ Ho te Noravano Kotika ai King Jehoiakimira tiva amirerave: Kiama are kuvuarama terava vovano Devitira avuhaina taintaaga oquiviro varianarove. Are qutu viramanta vika ai vaata vare muntu qumina kanta aqu kaivararo aatitairaqa kuarivano vira tatoqa kairaro entaqi iqaravano vira aruanarove.

³¹ Ne qora kaiqa vare variara kaara te ai nina vaintivaravata, nora vaiinti ai naavuqi kaiqa vare variakavata, ntaiharerave. Arevata, Ieruharemiqi variakavata Iutaini variakavata, ne ekaa ti uva kia iriara kaara, te tenta tiva taunantemake, te niqaa qoraiqama nimitaaina haikara qovarama karerave, tiro.

³² Noravano minti tumanta te quruqurumato vukura vo vare vuru ti uva qara nti vai vaiintira Barukira amuraro, viva ekaa te vira tiva amuna uvvara qaiqaa qara ntuva timitora. Viva avuni vau vukuraqihainaa uvavata, qaraaka uvavata te vira tiva amunara qara ntuva timitora.

37

Sedekaiava Ieremaiaara vo uvvara irora

¹ Babironi vika King Nebukanesaava Josaiara maaqu Sedekaiara noraiqama kovaro, viva Jehoiakimira maaqu Jehoiakinira vatuka varero Iutaa avuhainaava vaura.

² Vivavata, vira kahaqi vaukavata, vaiinti nahenti Iutaini qaqi vaukavata, Noravano Kotiva tu uvara te vika tiva nimunara kia iriataa imanta kia irura.

³ Vo enta King Sedekaiava Selemiara maaqu Jehukaliravata, Kotira kaiqa vara amite vau vaiintira Maseaara maaqu Sefanaiaravata, vara komanta vitanta te vaunananini aninte tiha, King Sedekaiava ariara tiharo, Tinavuara irihara Nora Kotira tinavu Variqa aarama timitairaro viva tinavu kahaqiarire tivo, tura.

⁴ Vi entara ti ravaaqavuke karapuhiqi ke entava kia anintomanta, te vaiinti nahenti nivutaini qaqi vi ani vaunara. ⁵ Vi entara Babironi iqoka vaiinti Ieruharemi ututumate vauka uva vo irumanta, Isipi iqoka vaiinti Isipi ke aaraini ani variavo tumanta vika vi uvvara ieruharemi ke nái vura.

⁶ Mintuvaro Isareru Variqa Noravano Kotiva tiriara tiharo, ⁷ King Sedekaiava vara kaitanta mintima tiva nimiane: Isipi avuhainaara iqoka vaiinti ni kahaqireka aaraini ani variaka, vika qaqrake anirante nái maaqaini vivarave.

⁸ Vika vimanta Babironi iqoka vaiinti qaiqaa orurante ani maa vatukara ututumate iqoka raqihua vira aatarake ihaqohai tatoqa kevarave.

⁹ Te Noravano Kotika niara rauriha variate turo. Hauri ne nenta una uva irike tiha, Babironi iqoka vaiinti vika kiama qaiqaa orurante anivarave tivorave. Naantiara vika qaiqaa orurante anivaravema turo.

¹⁰ Ne naantiara ekaa Babironi iqoka vaiinti naatara keva ho vairavauve, yikaqihai vokika vaata qoraiqama keka nái seri naavuqi qaqi vainavuka homa himpi ani maa vatukara iha quara kevarave. Noravano Kotiva minti tivo, ti.

Ieremaiaara ravaaqavuke karapuhiqi vuru kora

¹¹ Vi entara Isipi iqoka vaiinti aaraini ani vaura kaara Babironi iqoka vaiinti Ieruharemi ke vumanta, ¹² te kaiqe Ieruharemi ke, Benaminira vata vainaini orunte, tenta vata koqaama taunara oru varaa tivake, ¹³ Ieruharemi vaantaavura qenti vo Benaminira Qentive tunaini oruntauraro maimaraara iqoka vaiintiqa raqiki vauva Iriaava ti ravaaqavu kora.

Iriaava qova Selemiava vauvaro vira naaqua Hananiaava vaura. Iriaava ti Iutaini ravaaqavu kero tiharo, Are Babironi iqoka vaiinti varianaini ruqema kera vireva auti variaro, tiro.

¹⁴ Viva minti tumanta te aqao ti, Kia te Babironi iqoka vaiinti varianaini ruqemake vireravauve turarovata, Iriaava kia ti uva iriraitiro, viva ti ravaaqavu varero qiaa vaiinti vaunaini vuru kora.

¹⁵ Mintumanta vika Iriaava tu uvvara iruvaro arara itomanta vika vokuka tumanta ti kaavu ruqutuke vate, karapuhui naavuqi ti vuru kora. Vi naavuva Ionataaniva uva qara nti

vau vaiintira naavuvano vaumanta vika vi naavuva karapuhi naavu variarire ti, qaiqaa vira autukora.

¹⁶ Vi naavuraqi vata devanto nkauruke *rumu* vo autuke vatora viraqi vika ti muntu komanta te airi enta viraqi vaunara.

¹⁷ Te karapuhi viraqi vauraro vo enta King Sedekaiava tiriara tumanta vika tuvu ti tivita vare vira avuhainaa naavu vaunaini vuru kovaro viva evaara ti irero tiharo, Nora Kotira vakaaka vo vairove? tumanta te eo tivake tiha, Viva mintima tivo: Navutaaka ai ravaaqavuke Babironi avuhainara kauquqi kevarave, ti.

¹⁸ Te minti tivake vira ireha tiha, Te nana okarae autiha ai qoraiqama amite ai qjata vaiintie, vaiinti nahentie qoraiqama nimitaunara kaara are ti karapuhi naavuqi kaanarave? ti.

¹⁹ Ai paropeti vaiinti vo kiaka „una uva“ tiha, Babironi vika kia ai hampata iqoka raqivarave. Vika kia maa vataraqaa ani iqoka raqivarave, tiarave. Ho vate paropeti vaiinti vika tainie variavo?

²⁰ Nora vaiintio, te ariara mpo tiha, kia ti Ionataanira karapuhi naavuqi qaiqaa kaane. Are mintirera, te viraqi vaiha qutuma virarave.

²¹ Te minti turaro King Sedekaiava tumanta vika kia ti Ionataanira karapuhi naavuqi muntu karaiti, vika Iutaa avuhainaa naavu tataaqa karapuhi naavu vovano vaura viraqi ti vuru kora. Te viraqi vauramanta vika vo enta vo enta mpareti unte vau naavuraqihai mpareti vohaiqa vohaiqa vareha viri ti timi vaura. Mintiaqi vuvaro Ieruharemi vatukaqi ekaa mpareti taiqa yumanta kia qaiqaa ti timiva vaura.

38

Vika Ieremaiaara namari taani autu toraqi tutakora

¹ Erakaimaante Mataanira vaiintinavu, Mataanira maaqu Sefatiava vo, Pasurira maaqu Gedaliava vo, Selemiara maaqu Jehukaaliva vo, Malakiara maaqu Pasuriva vo, vinavuka te vaiinti nahenti tiva nimi vauna uvara irura.

² Te vaiinti nahentiara tiha, Noravano Kotiva mintima tivo: Niqihai vokiaka maa vatukaraqi vaivarao iqoka paiprevano vika arukairamanta, vokiaka narara variqi vi, qutu vivaro, vokiaka nora rovaravano arukaanarove.

Niqihai vokiaka maa vatukaraqihai aqqaqini orunte Babironi iqoka vaiintiara hove kia tenavu ni hampata iqoka raquataa ivo tika, vika kia qutu viraiti, qaqi vaivarave.

³ Te maa vatukara Babironi iqoka vaiinti kauquqi kaari vika vira aatara kevarave, tivo. ⁴ Te Noravano Kotiva vi uvara tivo turamanta vaiinti ⁴ navu vi uvara iri, orunte avuhainaa vaiintiara tiha, Maa vaiintira arukevama vaivo. Viva minti ti vaira kaara, tinavu iqoka vaiinti iqoka raqi kempukava kia vaimanta vaiinti nahentivata qeteha kia tenavu ho vairarave ti variarave. Viva kia maa vaiinti nahentika kahaqama nimiraitiro, vika qoraiqama nimirareva auti vaivo, ti.

⁵ Vinavuka minti tuvaro King Sedekaiava tiharo, Ho viva ninavu kauquqima vaivo. Te kiama ninavu ravaaqavu kararave, tumanta ⁶vinavuka ti ravaaqavu vare muntu ori vau-ruke namari *taani* autu toraqi naaquantaqohai ti rumpate tuta tutamaqi tuvi muntu viraqi kora. Vi *taaniva* vaireva, avuhainara maaqu Malakiara *taanivan* avuhainaa naavu naanteqaraini vaura. *Taani* viraqi kia namarivano vauvaro horavanoqai vaumanta te hora viraqi otini rupeqavi vaunara.

⁷⁻⁸ Te viraqi vauraro avuhainaa naavuqi kaiqa varova, Sudani vatanaa vaiinti Ebeti-Melekiva vinavuka ti *taaniqi* ko uvara iriro, viraqaahairo viva devantero oru avuhainavaa Benaminira Qentiana oquiviro vaunaini oruntero virara tiharo, ⁹Oho, ti nora vaiintivauvo, vinavuka qora kaiqa vareha vika Ieremaiaara *taani* vogi aqu kaavo. Viva viraqi narara vaharo qutuma vuanarove. Maa vatukaraqi karavano taiqa vuarirava aumaiqivo, tiro.

¹⁰ Ebeti-Melekiva minti tuvaro avuhainaa vaiinti viva tiharo, Ho are maihaira 30 vaiintinavu ntita varera oru Ieremaiaara *taani* viraqihira raraau qaqqini kairaro kia qutu vuarire, tiro.

¹¹ Minti tuvaro Ebeti-Melekiva vi vaiintinavuka ntita varero oru avuhainaa naavu airaira vato *rumuraqihairo* nihi utavaaqa vatora varero, te *taaniqi* vaunainaini oruntero naaquantaqohairo utavaaqa tuta tutamaqiro otu viro tiharo, ¹²Naaquantavano ai tuquantorave tira, nihi utavaaqa varakera nena akaqi vataane tumanta te viva tunte uramanta vika *taani* viraqihai ti raraau vaari qaqqini kora.

¹³ Ho vi entaraqaahai te avuhainaa naavu tataaqa karapuhi naavu vo vaura viraqi vaunara.

Sedekaiava qaiqaa Ieremaiaakantiro uva tura

¹⁴ Vo enta King Sedekaiava tumanta vika ti vita vare Nora Kotira Naavu *nampa* 3 gentivano vaunaini vuru kovaro mini King Sedekaiava tiriara tiharo, Te vo uva ai ireha tavarerave. Kia vo uva kukeqa karaitira, ekaa uva ti tiva timiane, tiro.

¹⁵ Viva minti tumanta te nai tiva ami tiha, Oho, te quqaa uva ai tiva amiarera, are ti aruma kenarave. Te koqe avu aato ai tiva amiarera, are kia ti uva avatenarave, ti.

¹⁶ Te minti turaro King Sedekaiava evaara nai kauqu ainqiqaa aqukero tiharo, Noravano Kotiva ekaa enta qaqi variqiro vi vai Variqava tinavu autukero vataira autuqaa te mintima turo: Te kia ai arukaraiti, ai arukareka auti variaka kauquqi kiama ai kaainarave, tiro.

¹⁷ Viva minti tumanta te Sedekaiarara tiha, Noravano Kotiva ekaa kempuka vataava ariara mintima tivo: Are Babironi avuhainaara iqoka vaiinti qiata vaiintinavuara hove kia ti ni hampata iqoka raquataa ivo tirera, vika ai vehakuma amiteha kia maa vatukaravata ihaqohai tatoqa aqu kaivara, are nena naavuqi variaka hampata kia quitiraitira, qaqi variqira vinarave.

¹⁸ Are kia vikara minti tiraitira, qaqi iqoka raqirera, te Babironi vika qaqi kaari vika maa vatukara ihaqohai tatoqa aqukaivara arevata kia vika kauquqihaira ruqema kera vinarave, tivo, ti.

¹⁹ Te minti turaro King Sedekaiava tiriara tiharo, Oho, te Iutaa vatanaaka ruqemake Babironi iqoka vaiinti mantaraini oru variaka naatu qete vauro. Hauri Babironi vika ti vi vaiintika kauquqi kaimanta vika ti qoraiqama timitevorave, tiro.

²⁰ Viva minti tumanta te vira nai tiva ami tiha, Babironi vika kiama ai vi vaiintika kauquqi kevarave. Mpo, are te Nora Kotira uva ai tiva amunara vira avataqira vuane. Are mintirera, are kia quitiraitira, koqema kera variqira vinarave, ti.

²¹ Are kia iqoka qaqrakera qaqqi Babironi hampata raqirera, Noravano Kotiva ti tairakaa humiqai haikava qovaraiqianarove.

²² Te maantimake taira tavauro: Ekaa nahenti ai avuhaina naavuqi qaqi variaka navutaaka vika ravaaqqavuke vare vuru Babironi avuhainaara qiata vaiintinavu nimiarave. Nahenti vika aitareha ariara tiha,

Ho koqeve. Are nena tonti vikaqaa muntuvi variarauka vika ai qora avu aato amivvara are vika uva avataqira vuanarave.

Vaiinti aiquvano horaqi rupeqa vintema kera, are nora maaraqi variaramanta ai tonti vika ai tauvaqa utu amite vuarave, tiarave. Te mintimake taira tavaunarave.

²³ Babironi vika ekaa ai naata vainti ravaaqqavuke vare vivarave. Are nenavata kia ho Babironi kauquqihaira ruqema kera viraro, Babironi avuhainaava ai rumpa taira, vika maa vatukara ihaqohai tatoqa kevarave, ti.

²⁴ Te minti turaro Sedekaiava tiriara tiharo, Are kia tetanta vate tuna uvvara voravata tiva amiane. Are voravata tiva amirera, are qutuma vinarave.

²⁵ Qiata vaiinti vika te ai hampata uva tunara virara irivera, vika are vainanaini orunte mintima tivarave: Are avuhaina vaiinti hampata uva tihara nana uvae netanta nai tiva ami nai tiva ami iavo? Are vi uvvara kukeqa kairera, tenavu ai aruma kararave, tivarave.

²⁶ Vika minti tivara are nai mintima tiva nimiane: Te virara mpo ike tiha kia ti qaqaa Ionataanira karapuhi naavuqi vuru kaane, tunarave tiane, tura.

²⁷ Ho vira naantiara qiata vaiinti vika te unanaini aninte ti iromanta te avuhainaava tuntemake vika tiva nimunara. Kia vovano tetanta avuhainauka tuna uvvara irurara ti, qiata vaiinti vika kia tiriaria vo uvavata tura.

²⁸ Ho te qaqqiavuha naavu tataaqa karapuhi naavu vauraqi variqi vuramanta navutaaka iqoka raqihia Ieruharemi vatuka varora.

39

Babironi iqoka vaiinti Ieruharemi varora

¹ King Sedekaiava 9 ihi 10 torara Iuttaaqaa raqiki vau entara Babironi King Nebukane-saava nai iqoka vaiinti ekaa ntita varero ani Ieruharemi vatuka aatara kareva vira ututuma tero vaura.

² King Sedekaiava 11 ihiara Iuttaaqaa raqiki vaumanta vi ihiara 4 tora 9 entaqaa navutaaka vaantaavura hini mantaraini rukavuke vatukaqi origetora.

³ Vika vatukaqi origete Babironi qiata vaiinti vika *Tavaarana Vai Qentirave* tunaini ko tireka oru oquivi vaura. Vika nutu vaireva:

Negali-Saresevave, Samiga-Nebovave, Sasekimavave, vo Negali-Saresevave, vinavuka vaura.

⁴ King Sedekaiava nai iqoka vaiintiaravata Babironi iqoka vaiinti anura tave, vika entaqi ruqemake vireka auti vaura. Avuhainaara kaqava tataaqqa vaantaavura taaraqanta vaunaini genti voqihai vika ruqiare vevante, Ieruharemi ke Iotani Uqitaini vireka vura.

⁵ Mini vumanta Babironi iqoka vaiinti King Sedekaiara avataqi vuvaro viva Ieriko Uqitaini otu vumanta Babironi iqoka vaiinti Sedekaiara ravaaqavu vare Nebukanesaava Hamati vataini Ripila vatukaqi vaunaini vuru kovaro Nebukanesaava viraqaa uva vatero ko amura.

⁶ Ho Sedekaiava tave vauvaro King Nebukanesaava vira maaquvara arukero ekaa Iutaa qiata vaiintivata arukero, ⁷ viraqahairo viva Sedekaiara avutanta vauru kero, Babironini vira vuru kaare tiro, *baraasi seniqohairo* vira aiqu kauqu rumpa tora.

⁸ Babironi iqoka vaiinti vika Ieruharemiqi avuhainaa naavuvata vaiinti nahenti naavuvata qumpiarama ke, Ieruharemini ori vaantaavura aututora viravata ekaa rukavu raakavuma aqukora.

⁹ Maimaraara raqikuka qiata vaiinti Nebusaradaaniva Ieruharemiqi qaqi vauka rumpa varero Babironini vuru kero, yokukavata iqoka raqu entara iqoka qaqrake Babironi mantaraini vauka, viva vikavata ntita varero Babironini vuru kora.

¹⁰ Viva ekaa vika Babironini vuru keharovata, Iutaa vataini vokuka anomake vehiqamavi kia vatawata vatoka, vika *uaini* naahovata vo naaho maatavata nimura.

¹¹ King Nebukanesaava tiriara iriharo maimaraara raqikuka qiata vaiinti Nebusaradaanirara tiharo, ¹² Are Ieremaiaara oru rantakera viraqaa koqemakera raqikiane. Kia vira qoraiqama amitaraitira, are vira antuqavano vaina haikara autu amitaane, tiro.

¹³ Minti tumanta Nebusaradaaniva nai vevaaraini qiata vaiinti votanta vauka Nebusabanika Negali-Sareseka vitantavarata, Babironi qiata vaiinti vonavuaravata, ¹⁴ tumanta Iutaa avuhainaa naavu tataaqqa karapuhi naavuqihai vika ti vita vare anura. Vika Iutaa vaiinti vo Gedaliaarara tiqaa koqemakera raqikihara vira vita varera nena maaqaini vuru kaane tumanta, „te kia Babironini viraiti,„ tenta navunaaka hampata Iutaini vaunara. Gedaliaara qova Ahikaamiva vauvaro vira naaqua Safaaniva vaura.

¹⁵ Ho te Iutaa avuhainaa naavu tataaqqa karapuhi naavuqi qaqi vauna entara Noravano Kotiva tiharo, ¹⁶ Are oruntera Sudani vatanaa vaiinti Ebeti-Melekira mintima tiva amiane: Isarerri Variqa Noravano Kotiva ekaa kempuka vataava mintima tivo: Te tota tunantemake, maa vatukara kia koqema amitaraiti, vira qoraiqama karerave, tunarave. Vi entava qovaraiqirara are vaihara tavenarave.

¹⁷ Ho vi entara te Noravano Kotika ai ruaruama amitaarimanta vokiaka are vika naatu getaarauka kauquqi kiama ai kevarave.

¹⁸ Te ariqaa koqemake raqiki variari vika kiama ai arukevarave. Are tiqaa muntuvu varianarara tira, are kia qutiraitira, qaqi variqira vinarave. Te Noravano Kotika minti turo, tiro.

40

Nebusaradaaniva Ieremaiaara kuvantu kora

¹ Babironi vika Ieruharemiqi vaukavata Iutaini vaukavata rumpa vare Bababironini vuru kareka auti vaiha, tivata *seniqohai* rumpa vare aaraini oru vi, Romaini oruntovaro maimaraara raqikuka qiata vaiinti Nebusaradaaniva ti viraqama kero tavero, ti kuvantu kora.

² Viva ti kuvantu kero tiriara tiharo, Ai Variqa Noravano Kotiva maa vatanaaka vehi autu taiqa kareva iharo vikara rauriha variate, tirave.

³ Ho vate viva nai tiva taintema kero, vika qoraiqama nimitaivo. Ai vaiinti nahenti Nora Kotira uva raqake, kia vira uva iriara kaara viva mintima kero vika qoraiqama nimitaivo.

⁴ Te vate ai kauquqi *seni* rumpataara qaqlini varake ai kuvantuma kauro. Are ti vataakera Babironini vuataa irera, homa mini oru vairage te ariqaa koqemake raqikiare. Are kia mini vuataa irera, kia mini vuane. Ho tavaane. Are maa vataraqaa variataa irera, homa nena antuqaaqaa taini taini vuataa irera vinarave.

⁵ Are maini variataa irera, are Ahikaamira maaqu Gedaliaava vainaini vuane. Viva ekaa Iutaa vatukaaqaa raqikiarire tiro, Babironi avuhainaava vira noraiqama kaivo. Are homa vikantira mini vaihara vira navunaaka hampata variqira vinarave. Nena muntukavano vainanaini qaqi vuane, tivakero viva karavata voki haikara koqe haikavata ti timiro ti qaqi komanta te bunara.

⁶ Te Gedaliaara hampata vairera Misipaa vatukaini orunte, vikanti mini vaiha vira navunaaka hampata variqi bunara.

Gedaliaava Iutaa vataqaa raqiki vaura

⁷ Iutaa iqoka vaiinti nái qiata vaiinti hampata kia Babironi hampata maateraiqamake vaireka auti vauka vaiha iruvaro, Babironi avuhainaava Gedaliaara noraiqama kero virara Iutaini anomake vehiqamavi vauka kia Babironini vuka vikaqaa raqikiane tura.

⁸ Vika vi uvvara iri Gedaliaava Misipaini vaunaini oruntora.

Qiata vaiinti vika vaireka:

Netaaniara maaqu Isamairiva, Kareaara maaqtanta Johanaanika Jonataanika, Tanihumetira maaqu Seraiaava, Netofahainaara Efaira maaqunavu, Makaa vataihainaava Jesaaniaava.

⁹ Vika nái vaiinti hampata oruntovaro Gedaliaava vikara tiharo, Te Kotira autuqaa niara tiha, Ne kia qetaraiti, Babironi vatanaaka vevaaraini variate. Ne maa vataraqaa vauha Babironi avuhainaara vevaaraini vaireka ivera, ne koqemake variqi vivarave.

¹⁰ Te Misipaa maini variari Babironi vika maini aniqe te niara iriha vika tiva nimirerave. Ne vaaka varaa vatukaraqi oru vauha *uaini* tavave, *fiki* katari tavave, hiqike vare, tava viravata *orivi* vahaveravata tave voqi voqi vataivaro airi enta variarire, tura.

¹¹ Vokuka Iutaihai ruqemake Moapinive, Amoninive, Idomunive, vo vatainive, vuka iruvaro Babironi avuhainaava Iutaa vokuka qaqi komanta vika kia Babironini viraiti, Iutaini qaqi vauvaro viva Gedaliaara noraiqama kovaro viva vikaqaa raqiki vaura.

¹² Vika vi uvvara iri, navutaaka vika raumpirima konaihai orurante, Iutaa vatainive Gedaliaava Misipaa vatukaqi vauraqi oru vauha, airi *uaini* tavave, *fiki* tavave, hiqike vate vaura.

¹³ Ho Kareaara maaqu Johanaaniva nai hana iqoka qiata vaiinti hampata „ahakaqi kukegavi vaunaihairo, oruntero Misipaini Gedaliaara tavareva vura. Viva mini oruntero ¹⁴ virara tiharo, Raurihara variane. Amoni vika King Balisiva Netaaniara maaqu Isamairira vara kaivaro viva ai arukareva ani vaivo. Are kiae virara iriaro? tiro. Minti tuvarovata, Gedaliaava kia Johanaanira uvara quqaa uvave, tura.

¹⁵ Mintuvaro Johanaaniva oru Gedaliaara evaara tiva amiro tiharo, Are ti qaqi kairaeq te Isamairira oru arukaare. Te mintima kaariraro kia vovanovata virara iriarire. Hauri Isamairira ai arukaira Iutaa ai hampata variaka raumpirima vimanta, Babironi aninte ekaa vo kiakavata Iutaini variaka arukevorave, tiro.

¹⁶ Viva minti tuvaro Gedaliaava aqao tiro, Are kia mintiane. Are Isamairirara tiana uvava kia quqaa uvama vaivo, tura.

41

¹ Isamairiva vaireva, avuhainaauka ankuqiraa vaiinti vovano vauharo, viva tota avuhainaara iqoka vaiinti qiata vaiinti vovano vaura. Vira qova Netaaniava vauvaro vira naaqua Elisamaava vaura.

Ho vi ihira ⁷ toraqaa Isamairiva vaiinti ¹⁰ navu ntita varero Gedaliaara tavareva Misipaini vura. Vika mini oru vauha Gedaliaara hampata kara ne vaura viraqihai ² Isamairira nai vaiinti ¹⁰ navu hampata himpi, nái iqoka paipe rarauke Babironi noraiqamako vaiintira Gedaliaara arukora.

³ Isamairiva Iutaa Misipaini vaukavata ekaa arukero, Babironi iqoka vaiinti mini vaukavata arukora.

⁴ Mintumanta vira qarara Gedaliaara arukora virara kia vovanovata irumanta ⁵ 80 vaiinti vonavu taaramo vatukaihai, Sekemive, Silove, Sameriave, vihai vihai anura. Vika aaraini anilha *uiti ofaa* vare, koqe munta i haikaravata vare, Nora Kotira Naavu vaunaini vireka iha, Ieruharemi qoraiqama vura kaara, nái okau muquke, nái utavaaqa unahi aahanimake, nái vaatavata teqa taaqamake vatora.

⁶ Ho Isamairiva tavomanta vika aaraini ani vauvaro viva vika ntita kareva Misipaa kero iqj rata varer vika ani vaunaini oruntero vikara tiharo, Ne Gedaliaara hampata ani uva mantaate tumanta ⁷ vika vatukaqi oruntovaro Isamairiva nai vaiinti hampata vikavata arukero vika vaata namari *taani* voqi aqukora.

⁸ Vika aruke vaumanta vaiinti kauqurutanta mpo tiha, Kia tinavu arukaate. Tenavu *uitive*, *baalive*, *orivi* vahaverave, *hanive*, ahakaqi vauvuke vatauro, tuvaro viva vinavuka kia vokuka hampata arukaraitiro, qaqi vehakuma kora.

⁹ Isamairiva ekaa vika arukoka vaatavata, Gedaliaara vaatavata, varakero namari *taani* voqi aqukora. Haaru Isarer King Basaava Iutaa hampata iqoka raji vau entara Iutaa King Asaava tumanta vika ori vauruke *taani* vira autuke vatora. Ho Isamairiva qutu vuka vaataqohairo *taani* vira mpiqa kora.

¹⁰ Mintima kero viraqaahairo viva ekaa Misipaini qaqi vauka, avuhainaara raavuravarave, voku vaiinti nahentikave ravaaqavu kero ntitora. Qiata vaiinti Nebusaradaaniva Gedaliaara noraiqama kero vikaqaa raqikiane tuka viva vika ravaaqavu varero Amoni vatainive vireva vura.

¹¹ Ho Kareaara maaqu Johanaaniva nai iqoka vaiinti hampata Isamairiva qora okara autuko uvara iriro, ¹² viva nai iqoka vaiinti ntita varero Isamairira hampata iqoka raqireva vura. Vika vira avataaqi vivi, Gibeoni Varuva vaura aumanto oruntomanta ¹³ Isamairiva ravaaqqavu vare ntite vuka tavomanta Johanaaniva nai iqoka vaiinti hampata ani vaumanta vika quahake ¹⁴ tuqantaavi viva aninaini kante vura.

¹⁵ Vika mintuvaro Isamairiva nai vaiinti 8 navu hampata ruqemakero Amoni vataini vura.

¹⁶ Ho Johanaaniva nai iqoka vaiinti hampata Isamairiva Misipaihairo ravaaqqavu kero ntite vuka, iqoka vaiintive, vaiintive nahentive vaintive, avuhainaa naavuqi kaiqa varokave, ntita varero Gibeoni mini kero ¹⁷ Isipini vireva vura. Vika aaraini oru viha Betarihemeti tataaqaa vatuka vo, Geruti-Kimihamaa mini orunte vaura.

¹⁸ Babironi vika Gedaliaava Iutaaqaa raqikiarire ti, vira noraiqama kovaro Isamairiva vira arukora kaara, vika Babironi naatu qetake, Isipini vireka auti vaura.

42

Vika Ieremaiaarara Kotira aarama timitaane tura

¹⁻² Ekaa iqoka qiata vaiinti Johanaanivave, Hosaaara maaqu Jesaaniaavave, yokukave, nora vaiinti nahentive, qaqi vaiinti nahentive, te unanaini aninte tiriara tiha, Mpo, are tenavu tianante iane. Are tenavu qaqi vauraukara irihara nena Variqa Nora Kotira aaraane. Tenavu hoqare airitahaa vaunarave. Ho are tavaane. Vate maa entara tenavu taaraqqaima vuaro.

³ Are nena Variqa Nora Kotira aarairaro viva tenavu vuaina aarara humiqeharo tenavu varaaina kaiqaravata tiva timiarire, ti. ⁴ Vika minti tumanta te tiha, Hove. Te ne tiantemake, ni Variqa Nora Kotira aaraariraro viva vonare tiraqe te kia vo uvavata kukeqa karaiti, te ekaa vi uvara ni tiva nimirerave, ti.

⁵ Te minti turamanta vika tiriara tiha, Ho tenavu Nora Kotira avuqaa vaiha tiha, Noravano Kotiva ai tiva amiharo tinavuara minti mintimake nuate tina uvara are tinavu tiva timiraqe tenavu ekaa vi uvara avataaqi virerave. Tenavu kia ekaa vi uvara avataaqi vuarer, Noravano Kotiva homa tinavuqaa uva vataanarove.

⁶ Tenavu vira uvara quahaarer, kia quahaarer, tenavu qaqiqai tentanavu Variqa Nora Kotira uva avataaqi virerave. Tenavu ariara vira aarama timitairaqe tenavu vira uva avataaqi viha koqemake variqi vuare, turo, ti.

⁷ Vika minti tuvaro 10 entanavu aitarovaro Noravano Kotiva ti uva tiva timumanta te iri, ⁸ viraqahai te Kareaara maaqu Johanaanirave, ekaa iqoka qiata vaiinti vira hampata vaukave, ekaa vo vaiinti nahentive, naaramake vi uvara vika tiva nimunara.

⁹ Te vikara mintima turo: Ne tiriara Isarerri Variqa Nora Kotira aarama timitaane tivakeha ti tititama kaarave. Ho viva niara mintima tivo: ¹⁰ Ne kia vo vatainivata oru vairaiti, mainiqai vaivera, te kia ni vara vataini muntuvi karaiti, te ni vara vuruviqama karerave. Kuvukanaa koqe vataqaa utu taantemake, te ni koqemra nimiteha, kia ni qaiqaa tuqavata ravau aqu kaantema karerave. Te niqaa qora enta qovaraiqama kaunara kaara ti muntukavano qoraiqimantama vuaro.

¹¹ Ne kia Babironi avuhainaara aatu qaqiqai qetaqi vuate. Te Noravano Kotika ni hampata vaiha vira kauquqihai ni ruaruama nimirarerave turo.

¹² Viva ni aaqurihama nimiteharo ni qaqi kairamanta ne nenta maaqaini ho anirante vuate ti, te ni aaqurihama nimirarerave. Ni Variqa Noravano Kotiva mintima tivo, ti.

¹³ Te minti tivake qaiqaa tiha, Ne nenta Variqa Noravano Kotiva ti uvara kia avataaqi viraiti, maa vataraqaa kia vaireka auti vaiha ¹⁴ tiha, Tenavu Isipini virerave. Tenavu mini oru vaivera kia qaiqaa iqoka raqireka *aanumaara/noma* vuajera iriraiti, kia qaiqaa karara narara variqi virerave tivera, ¹⁵ ne Iuttaa qaqi variaka Isarerri Variqa Noravano Kotiva ekaa kempuka vataava tina uvara iriate: Ne kempukaiqamake Isipini vireka auti vaiha mini oru vaivera, ¹⁶ ni aatu itaimanta qete varia haikava, iqoka paipevanove, karara narara vai entavave, vi haikava ni ntataqiro viviro, vuru Isipini ni aruma kaanarove.

¹⁷ Ekaa kempukaiqamake Isipini vireka auti variaka vika mini oru vaivarvo iqoka paipevanove, karara aavoqi entavave, nora rovaravanove vika aruma kaanarove. Kiamma voqavanovata qaqi varianarove. Te vikaqaa qora enta qovarama kaariraro vikaqihairo kia voqavanovata ruqemakero viramanta vika ekaama qutu vivarave.

¹⁸ Te Isarerri Variqa Noravano Kotika ekaa kempuka vatauka tiha, Tota ti voqamakero arara itaimanta te feruharemipi variaka qoraiqama nimitaunarare.

Ho vohaa qaramake ne Isipini oru vaivarvo ti voqamakero arara itairage ni qoraiqama nimirarerave. Vi vatanaaka ni taveha, niara vaaqu vatanaakave tivakeha, ni qoraiqama

nimiteha naaraihamma nimiteha niara vaaquqama vuate tivarave. Ne kiama qaiqaa orurante maa vataru ani tavevarave. Noravano Kotiva mintima tivo, ti.

¹⁹ Te minti tivake qaiqaa tiha, Noravano Kotiva ne Iutaini qaqi variakara tiharo, Kia Isipini vuate, tivo. Ho vate te niara rauriha variate turo.

²⁰ Ne nenta antuqa avataqi vivera, ne qutuma vivarave. Tota ne ti tititama keha tiha, Are tinavuara irihara tinavu Variqa Nora Kotira aarama timitaane. Are ekaa viva ai tiva amina uvvara tinavu tiva timirage tenavu vi uvvara avataqi vuare, tiarave.

²¹ Ho ni Variqa Noravano Kotiva ti tititharo vi uvvara vika tiva nimiane timanta, te vate vi uvvara ni tiva nimuramantavata, ne kia vira uva avataqi vireka auti variavo.

²² Oho, ne kankomake irate. Ne nenta muntukavano vaina vataraaqaa oru vaivarao iqoka paipevanove, karara aavooqi entavave, nora rovaravanove, ni aru taiqama kaanarove, tunara.

43

Vika Ieremaiaara vita vare Isipini vura

¹ Ho tinavu Variqa Noravano Kotiva ti tititharo vi uvvara vika tiva nimiane tumanta te ekaa vi uvvara tiva taipa kauramanta ² Hosaaara maaqu Asariavave, Kareara maaqu Johanaanivave, ekaa vo vaiinti nariaraqai noraiqaake iri vaukave, vika tiriaha tiha, Are unahaamaa tiaro. Tinavu Variqa Noravano Kotiva kiama qioqama tero tinavuara tiharo, Kia Isipini oru variate tiravauve.

³ Are Babironi kauquqi tinavu kairamanta vika tinavu arukaate tirove, tinavu rumpa vare Babironini vuru kaate tirove, Neriaara maaqu Barukiva ai vihi vaahi ti vaivo, ti.

⁴ Vika minti tivake Kareara maaqu Johanaanivave, ekaa iqoka qiata vaiintive, ekaa vaiinti nahentive, Noravano Kotiva tu uvvara raqake kia Iutaa vata mini vaura.

⁵ Vika kia Iutaini vairaiti, Johanaaniva ekaa iqoka qiata vaiinti hampata navutaaka ekaa vo vataini vo vataini Iutaa raumpirima koka orurante ani vauka ntitake Isipini vireka auti vaura.*

⁶ Vika mintimake qaiqaa Babironi qiata vaiinti Nebusaradaaniva noraiqama kova Gedaliaava raqiki vauka, vaiintive nahentive vantive, avuhainaura raavuravarave, Barukirave, ti Ieremaiaakave ekaa tinavuvata vika tivita vare Isipini vura.

⁷ Vika Noravano Kotiva tivato uvvara raqake kia vira avataqi viraiti, Isipini oru vivi, vatuvo to Tapanesini orunte vaura.

⁸ „Tapanesini Pero vaiinti naavu vo vaura.“ Ho te Tapanesini vauraro Noravano Kotiva tiriaha tiharo, ⁹ Iutaa vika ai tave vaivara are oru nora ori vonavu mpaqi varera vuru Pero vaiinti naavu qentiana vataqi quvikera quntama taane.

¹⁰ Mintima kera Iutaa vikara mintima tiane: Isareru Variqa Noravano Kotiva ekaa kempuka vataava mintima tivo: Te tenta kaiqa vaiinti Babironi vika King Nebukanesaara vara kaariraro viva maini anintero, nai avuhainaa tainta maa orira quntama taunaraqaa vatero, nai avuhainaa seru vo rairakero qiataini aquatanarove.

¹¹ Viva Isipi hampata iqoka raqireva maini anianarove.

Te vokiaka kaamate nora rovaravano vika aru kaanarove tiarirauka nora rovaravano vika arukaanarove.

Te vokiaka kaamate viva vika rumpa varero vuru nai maaqaini kaanarove tiarirauka viva vika rumpa varero vuru nai maaqaini kaanarove.

Te vokiaka kaamate iqoka paipevano vika arukaanarove tiarirauka iqoka paipevano vika arukaanarove.

¹² King Nebukanesaava Isipini ani vaiharo vika una variqa naavu maaqa ihaqohairo tatoqa kero, vika una variqa *maraqura/yaraha* aututaaravata varero vuuanarove. Sipisipiqa raqiki vaiintiva nai utavaaqaaqahairo ekaa taru nuntu kaintema kero, viva Isipiqihairo ekaa haika nuntu ruvaaquma varero, vora ntuvaqiro nai maaqaini anirantero vuuanarove.

¹³ Kuari avu quahama amite variaka vika maara naavuqori *pohinavuara* tiha variqa *pohive* ti variara, viravata viva rukavu raakavuma kero, Isipi vika una variqa naavu, vo naavu vo naavuvata ihaqohairo tatoqa kaanarove. Te Noravano Kotika minti turo, tiro.

44

Noravano Iutaa Isipini vaukara tura

¹ Noravano Kotiva Iutaa Mikadoli vatukaqi vaukarave, Tapanesi vatukaqi vaukarave, Memfisi vatukaqi vaukarave, Isipi *sauti* mantaraini vaukarave, maa uvara vika tiva

nimiane, tumanta ² te vika tiva nimi tiha, Isareri Variqa Noravano Kotiva ekaa kempuka vataava niara mintima tivo:

Te Ieruharemivata, ekaa Iutaini vai vatukaravata, qoraiqama nimitaunara ne tavaarave. Maa entaravata ekaa vo vatuka vo vatuka qoraiqama viro vaivar, kia voqavanovata vi vatukaraqi vaivar qumina naantaaka ntivo. ³ Vika qora kaiqa, vo kaiqa vo kaiqa vare variara kaara ti arara itairave. Vika una variqa autu tuahereha *ofaa* iha quara nimite variarave. Vikavata, nevata, ni kaivaqaukavaravata, una variqa vikara kia tota iri tavaarave.

⁴ Te tenta kaiqa vaiinti paropeti vaiinti vika varianaini qaiqaa qaiqaa nititama kauramanta vika tiha, Ne una variqa avataqi vi varia okarara qaqlira kaate. Noravano vi okarara vaaqu okarave tivar vira antuqavano anomakero kia virara vairave, tiarave.

⁵ Paropeti vaiinti vika minti tiamanta vika kia vika uva iriraiti, kia nái aatovata vika nimiarave. Vika kia qora kaiqa, vo kaiqa vo kaiqa vare variara qaqlira karaiti, qaqliqai una variqara *ofaa* autu nimitaqi vi variarave.

⁶ Vika minti variara kaara ti voqamakero arara itaiva ihavano itaintema kero, Iutaa vatuka, vo vatuka vo vatukave, Ieruharemi aara, vo aara vo aarave, ekaa tatoga kairave. Maa entaravata vi vatukava anomakero qoraiqama viro nuqihii vatukaqai vaivo.

⁷ Ho te Isareri Variqa Noravano Kotika ekaa kempuka vatauka niara mintima turo: Ne nantiahae nentavano vehi autu taiqa vireka auti variavo?

Ne vi okarara qaqliqai avataqi vivera, kia niqihairo Iutaa voqavanovata qaqlira varianarove. Ne vaiintive, nahentive, vaintive, vainti naative, ekaa vehi autuvi taiqa vivarave.

⁸ Ne nantiahae ti arara itaarire ti, maa vataraqaa ani vaiha, nenta kauquqohai aututaa haikara nutu tuahera keha, Isipi una variqavata *ofaa* iha quara nimite variavo? Ne mintiaqi viha nentavano nenta vehi autu taiqa vireka auti variavo. Naantiara ekaa vo vatanaaka niara vaaqu vatanaakave tivarave. Vika nai hana vaiinti atiha tiha, Iutaa vatanaaka vaaquqama vuantema kera, arevata vaaquqama vuane tivarave.

⁹ Ni kaivaqaukvara qora kaiqa varaarave, Iutaa avuhainauka nái naata hampata qora kaiqa varaarave, ne virara virara taurue kaavo? Ne nenta nahenti hampata Iutaa vatainive, Ieruharemi vo aara vo aaraqaave, qora kaiqa varaara, ne viraravata taurue kaavo?

¹⁰ Ho te tavauramanta ne haaruvata maa entaravata kia nenta vara muntuvike ti vevaaraini vairaiti, ne kia ti hutu tuahera karaiti, te uva maara tiva taunara viravata nenta kaivaqaukvara hampata kia avataqi vuarave.

¹¹ Ne mintimake variara kaara te Isareri Variqa Noravano Kotika ekaa kempuka vatauka niara mintima turo: Te kempukaiqamake tiha, nivata ekaa Iutaavata vehi autu taiqa karerave turo.

¹² Ne Iutaa hini kiaka qaqlira variaka kempukaiqamake Isipini oru vireka auti variarave. Ne ekaa Isipini qutu vivarave. Iqoka paipevanove karara aavoqi entavave ni arukaanarove. Nora autu vataa vaiinti nahentive, qaqlira qumina vaiinti nahentive, vireka iqoka paipevanove karara aavoqi entavave vika arukaanarove. Vokika niara vaaqu vatanaakave tiha, vika nai hana vaiinti atiha tiha, Iutaa vatanaaka vaaquqama vuantema kera, arevata vaaquqama vuane tivarave.

¹³ Te tota Ieruharemigí variaka qoraiqama nimitaunantemake, te qaqlira kaariraro iqoka paipevanove, karara aavoqi entavave, nora rovaravanove ne Iutaa Isipini variaka arukaanarove.

¹⁴ Ne Iutaa hini kiaka qaqlira Isipini variaka kia ho ruqemake vivarave. Ne Iutaini anirante oru vuataa iramantavata, kia mini viraiti, ne maini Isipiniqa variqi vivi, vuru qutu vivarave. Niqihai taaraqaqai mini anirante vivarave. Noravano Kotiva minti tivo, ti.

¹⁵ Te minti turamanta Iutaa airitaha Isipini *noti* mantaraihaive, *sauti* mantaraihaive, anuka ti uva irura. Vaiinti vokuka kankomake irumanta vika naatavara una variqara *ofaa* iha quara nimite vaura.

Ho vaiinti vikavata nahenti vikavata tiriara tiha, ¹⁶ Are tihara, Te Nora Kotira autuua vi uvara ni tiva nimuro, tiana uvvara tenavu vi uvvara kia iriataa imanta kia irirerave.

¹⁷ Tota tenavu vi okarara avataqi virerave tunara vira qaqliqai avataqi virerave. Tenavu tentanavu variqa Naaruva Kuiniara *ofaa* autu amiteha *uaini* rauru amitaqi virerave. Tota tinavu kaivaqaukave, tinavu avuhainaukave, tinavu qiata vaiintive, vikavata vohaa garamake Iutaini vaiha, Ieruharemi aara vau vi okarara auti vaurave. Vi entara tinavu karavano airi vaimanta tenavu koqemake vauraro kia vovanovata tinavu qoraiqama mitairave.

¹⁸ Ho tenavu qaqirake kia qaiqaa tentanavu variqa Naaruva Kuiniara *ofaa* autu amitaraiti, kia *uaini* rauru amitauna entaraqahai tenavu ekaa haikara aavoqi vauraro iqoka paipevanovata, karara aavoqi entavavata, tinavu aruke vaivo, ti.

¹⁹ Minti tivake nahenti vika qaiqaa tiha, Tenavu Naaruva Kuiniara *ofaa* autu amitarera iha, vira viri *bisiketiqaa* autuke untake, *uainivata* rauru amite vauramanta tinavu vaatavara vira taveha hote ti variarave, ti.

²⁰ Nahenti vika minti tumanta tevikavata ekaa vokukavata nai tiva nimi tiha, ²¹ Ni kaivaqaukave, ni avuhainaukave, ni qjata vaiintive, nevatave, Iutaa vatukainive, Ieruharemi aara vauve vaiha, una variqa *ofaa* autu nimite variavaro, Noravano Kotiva ne qora okara auti variara tavero, kia tauru kairave.

²² Ho Noravano Kotiva ne qora kaiqa varaarave, vaaqu okara avataqi vuarave, tava maqiro vivaro vira voqamakero popohaivaro vira kaara viva ni vata maata qoraiqama kairave. Vate maa entara vo vatanaka Iutaa vatavano qoraiqama virara iriha nai kenauka nitihia tiha, Iutaa vatavano qoraiqama vintemake, nevata vaaquqama vuute ti variarave. Iutaa vatavano aahara vataiqama vimanta kia vaiintivata mini variavaro qumina naantaaka ntivo.

²³ Ne una variqara *ofaa* iha quara nimiteha, Noravano Kotiva tiva tai uvava raqake, vira uva maara kia avataqi vuura kaara, ne tavaavaro qora enta viva niqaa qovarama virave, ti.

²⁴ Te minti tivake qaiqaa vikavata ekaa nahentivata tiva nimi tiha, Ne Iutaa vaiinti nahenti maini Isipini variaka Noravano Kotiva ti uvava iriate.

²⁵ Isarerri Variqa Noravano Kotiva ekaa kempuka vataava mintima tivo: Ne nenta naatavara hampata kauqu ainqiqa aquke Naaruva Kuiniara tenavu vira *ofaa* autu amiteha, *uainivata* rauru amitarerave tivake ne vi uvava tiantemake mintiarave. Ho koqeve. Ne nenta kauqu ainqiqa aqukeha tivataa uvava vi vau vaira ho nenta qaqiqai mintiaqi vuute.

²⁶ Ne mintihavata, te tenta kauqu ainqiqa aquke tuna uvava viravata iriate. Te tenta nora autuqaa mintima turo: Iutaa ani Isipini variaka kia qaiqaa nai uva kempukaiqama kareka tiha, Noravano Kotiva ekaa enta qaqi variqiro vi vaira autuqaa tenavu minti mintirerave tivarave.

²⁷ Te niqaa raqikiqi viha kia ni kojema nimitaraiti, ni qoraiqama nimitarerira niqaa raqiki vauro. Ne Iutaa Isipini variaka vaivaro iqoka paipevanove, karara aavoqi entavavate, ni aruqiro viramanta ne ekaa vehi autu taiqa vivarave.

²⁸ Iqoka paipe aatu qetake ruqemake Isipihi anirante Iutaini oru vika kia airivano viraiti, taaraqiqai vivarave. Vi entara ti uvavanoe vivau varianarove, ni uvavanoe vivau varianarove? Iutaa Isipini qaqi variaka vikama vi entara kankomake irivarave.

²⁹ Te Noravano Kotika vo haika qovarama kaarimanta ne vi entara vi haikara tave tiha, Oho, ququaama Noravano tiva taintema kero, viva tinavu qoraiqama timitaanarove, tivarave.

³⁰ Tota te King Sedekaiara Babironi vika King Nebukanesaara kauquqi kaunantemake, te vi entara Isipi avuhainaara Pero vaiinti Hofara vira navutaaka kauquqi kaariramanta vika vira arukevarave. Noravano Kotiva minti tivo, tunara.

45

Barukirara tura

¹ Josaiara maaqu King Jehoiakimivaera kaimante ihiara Iuttaaqaa raqiki vau entara Barukiva te vira tiva amuna uvava qara ntuva komanta ² viraqahai te virara tiha, Barukio, Isarerri Variqa Noravano Kotiva ariara mintima tivo:

³ Are tihara, Oho, te nora maaraqi vauraro Noravano maara voqavata tiqaa vataivo. Te keke ti vauraro ti kempukavano kia vaivaro ti muntukavanovata kia qihaaqama viro vaimanta vauvo tianarave.

⁴ Ho te Noravano Kotika maa entara te tenta naavu maaga kaqataunara ravantiaqa aqu karerave. Te tenta utu tauna haikara tuqa hampata ravaau aqu karerave. Te ekaa maa vataraqaa vi anihia mintima karerave.

⁵ Barukio, are nena vainarara irihara koqe haikarae rante variaro? Ho qaquirakera kia vi haikarara rantaqira vuane. Te ekaa maa vatainira variakaqaa qora enta qovarama kehavata, ai qaqi kaarirara are taini taini vireva ihara are kia qutiraitira, qaqi variqira vinarave. Te Noravano Kotika minti turo, tiro.

46

Navutaaka Isipi aatarakora

¹ Noravano Kotiva vo vatanaa vo vatanaaka qoraiqama nimitaaina uvara ti tiva timiharo ² avuni Isipiara naane ti tiva timura.

Josaiara maaqu Jehoiakimiva 4 ihiara Iuttaaqaa raqiki vau entara Babironi King Nebukanesavaa Iufaretisi Namari vaunaini Kaakemisi vatkaini vaiharo Isipi King Nekora iqoka vaiinti naatara kora. Ho Noravano Kotiva Isipi iqoka vaiintiara mintima tivo:

³ Isipi iqoka qiata vaiinti tiha, Ne nenta kainke tuata vare, iqoka raqireka nai naantiara nai naantiara vontaga vontaga vuate.

⁴ Ne ohiqaa vaiha iqoka raquaka, ne nenta ohi qerama vate, vika tauvaqaqaa vaarinte variate.

Ne nenta iqoka tovaqa aqute, vo antuqa vo antuqa avuqavu variate.

Ne nenta vaantaara uvi anake vate, nenta iqoka utavaaqavata nonkute variate.

⁵ Oho, te nana haikae tave vauro? Isipi iqoka vaiinti voqamake aatu itaimanta qetake, iqoka qaqrake anirante rugemake vuavo.

Ekaa mantaraini aatu itaaina haikavaqai vaimanta vika kia tuqantaa taqantaa tavaraiti, qaqqai kantamaqi vi variavo.

⁶ Oho, anomake kante variaka kia ho rugemake vivarave. Nora kempuka vataaka vikavata kia ho rugemake vivarave.

Vika *noti* mantaraini Iufaretisi Namari auvahianta kuntavaivaima vare kaavu nti variavo.

⁷ Taukae Nairi Namarivano nora huvura tuvintemake, vika nora vatanaaka autuvi variavo?

⁸ Vika Isipi vatanaakave. Vika Nairi Namarivano nora huvura tuvintemake, nora vatanaaka autuvi tiha, Huvura namarivano auvantaintema ke, tenavu ekaa vataaini naatara karerave. Tenavu ekaa vo vatanaa vo vatanaaka vatkave, vaiinti nahenti viraqi variakave, vehi autu taiqa karerave, tiavo.

⁹ Ho ne ohiqaa oquvi variaka kante iqoka raqireka vuate.

Iqoka *kaariqi* variaka nevata voqamake kantaate.

Iqoka vaiinti ne nai naantiara nai naantiara oru vuate.

Ne kainke tuate variaka, Sudani vataihaiive, Libia vataihaiive iqoka raqireka oru vimanta, Lidia vataihainaaka ne nenta huru tuata vare oru vuate.

¹⁰ Isipi vika iqoka raqireka oru vivarovata, vi entara Noravano Kotiva ekaa kempuka vataava naiqaa aru vuntu kaaina entava anintaivo. Vira iqoka paiprevano naare namaqiro viviro, mpiqa viraro kia qaiqaa voqavata naare naataa iraro varianarove.

Noravano Kotiva ekaa kempuka vataava navutaaka qaqi kairamanta vika *noti* mantaraini Iufaretisi Namari vainaini Isipi airitaha arukaimanta vika vaireka, Noravano Kotiva naivano *ofaa* autu kaira voqaara vaivarave.

¹¹ Isipivauvo, kia vahavera *marasini* vovano ai numuara kahaqiraro vira tavanta vuanarove. Gileattini koqe *marasini* vaivarovata, vi *marasiniva* kia ho ai numuara kahaqianarove.

¹² Navutaaka ai aatarake kaurira haika ai amira, virara ekaa vo vatanaao vo vatanaaka irivarave. Are keke tina uvara ekaa vataini vaika vira irivarave. Ai iqoka vaiinti vika navutaaka naatu qetake kante viha nai aiqu nai aiquqaa ntavate, kuntavaivaima vare vataini kaavu ntivarave, tiro. Noravano Kotiva minti tura.

King Nebukanesavaa Isipini aniainarara tura

¹³ Babironi vika King Nebukanesavaa ani Isipi hampata iqoka raqireva auti vau entara Noravano Kotiva maa uvara ti tiva timiro tiharo,

¹⁴ Are Isipini vai vatkara Mikadolique, Tapanesiqive, Memfisiqive, vahara viraqi variaka maa uvara vika tiva nimiane: Ne navutaaka hampata iqoka raqireka qeramate variate. Iqoka paiprevano vaakama ani ni tataqaq varia vatanaaka aruqiro vi vaivo.

¹⁵ Ho nana kaarae navutaaka ni iqoka vaiinti naatara kevarave? Te Noravano Kotika vika venta kaariramanta vika kia ho himpi vaivarave.

¹⁶ Vika qaiqaa qaiqaa nai aiquqaa nai aiquqaa ntavateha kuntavaivaima vare hiqinti tiha, Oho, kaiqenavu qaqrake tentanavu maaqaini kante vuare. Kaiqenavu rugemake vuariraro navutaaka iqoka paiprevano kia tinavu arukaarire, tivarave.

¹⁷ Vika qaqrake maaqaini aninte tiha, Pero vaiinti Isipi avuhainaava vaireva, viva qumina uva noraiqaakero ti vaivave. Viva vi entara tinavu kahaqitaaraa vaivaro kia kahagirave.

¹⁸ Te Noravano Kotika ekaa kempuka vatauka Avuhainaaka vikave. Te ekaa enta qaqi variqi vi vauna Variqauka tiha, Ni Isipi naatara kaarirava vovano anianarove. Tabo Aiqinavano vo ainqina vo ainqina uri aatara kero vaintema kero, vi vaiintira kempukavano

uritara keroma vaivo. Kaameli Aiqinavano nora namariqahairo uritara kero vaintema kero, vira kempukavano varianarove.

¹⁹ Ne Isipini variaka, navutaaka ni rumpa vare virara iriha, ne nenta vare vi haikara qeramake vataate. Vika Memfisi vatuka vehi autu taiqa keha naavu maaqa rukavu raakavuma kaivaro kia voqavanovata viraqi varianarove. ²⁰ Isipivano vaireve, purumakau nahe koqera voqaava vaivarovata, *noti* mantaraihairo mpora vovano vira nkaqa kareva anianarove.

²¹ Isipi vika vo vatanaa iqoka vaiinti monu koqaama taaka vaireka vika, purumakau naati koqeka voqaara variavo. Iqoka raqi entara vika kia himpi iqoka raqiraiti, vika ekaa qetake ruqemake vivarave. Vika qoraiqama vi entava aumaiqivo. Vi entara vika vehiqama vivarave.

²² Navutaaka iqoka raqireka kempukaiqamake animanta Isipi iqoka vaiinti vika memaruvano *sisi* tivakeharo qetakero vintemake, navutaaka naatu qetake vivarave. Katari tuqu taaquma kaantemake, navutaaka iqoka rori vare, Isipi iqoka vaiinti teqa taaqama kevarave.

²³ Isipi vatanaaka vaireka, airi katari nantagi vaira voqaara variamantavata, vika teqa taaqama kaaka nái airitahaama variavo. Kaintaaqa airitaha vaimantavata, navutaaka vikavata uri naatarake nái airitaha variarara tiro, vaiintivano kia ho vika kaara ntivarave.

²⁴ Isipi vatanaaka vaimanta *notihainauka* vika naatarake kaurira haika vika nimivarave. Te Noravano Kotika minti turo, tiro.

²⁵ Isarer Variqa Noravano Kotiva ekaa kempuka vataava mintima tivo: Tebesi vatukaqi variaka una variqa Emonirave, Pero vaiintive, ekaa Isipi vika una variqa vokirave, Isipi avuhainaukave, Pero vaiintiqa muntuvi variakave, te ekaa vika qoraiqama nimitarererave turo.

²⁶ Babironi vika King Nebukanesaava nai iqoka qiata vaiinti hampata Isipi vika arukareva auti vaira te vika kauquqi karererave.

Ho naantiara vo enta te Isipi vika qaqi kaariramanta vika tota variantemake, qaiqaa koqemake Isipiqa vaivarave. Te Noravano Kotika vi uvara tiva tauro, tiro.

Noravano naantiara nai vaiinti nahenti ruaruuma nimitaainarara tura

²⁷ Ho Isarerivaauvo, kia qeteha variate. Ne Iekopiva kuvuarama taika ti kaiqa vaiinti nahentima variavo. Naantiara te niara vataihai nivata, ne kuvuarama tekavata, ni rumpateka kauquqihai ruaruuma nimitarerave. Vi entara ne Iekopiva kuvuarama taika orurante ani nenta vataqaa maateraiqamake vaivarao, kia voqavanovata ni aatu itaaina haikara nimiramanta ne koqemake variqi vivarave.

²⁸ Te Noravano Kotika ne Iekopiva kuvuarama taika ti kaiqa vaiinti nahentiaro mintima turo: Te tentavano ni hampata vaunarave. Te ni raumpirima kauramanta ne vo vataini vo vataini variarave. Ho naantiara te vi vatanaa vi vatanaaka vehi autu taiqa kaaina entara te kia ni ekaara vehi autu taiqa karererave. Ne qora kaiqa varaara kaara te nivata ntaihainarave. Ho te kia hampiqama keha ni utetaraiti, avuqavugama keha ni utetarerave. Te Noravano Kotika minti turo, tiro.

47

Noravano Pirisia vatanaakara tura

¹ Tota kia Isipi vika Pirisia nora vatuka Gaasa hampata iqoka raqu entara, Noravano Kotiva Pirisia vatara vo uva ti tiva timura.

² Viva tiharo, Tavaate. *Noti* mantaraihairo huvura namarivano noraiqama kero tuvi vaivo. Vi namariva auvanteharo ekaa Pirisia vata naavurna kero, ekaa vatukave, vaiinti nahentive, vehi autu taiqa kaanarove. Vi vatanaaka voqamake vika naatu qeteha ike mpo tiha iqi ratevarave.

³ Vika navutaaka ohi aiguvalo auva ntaainararave, vika iqoka kaarivano karara karara tina iri „vika qetake aiqo autute kantama vivarave“. Vi entara vika noka qoka kia tuqantaavi nái vaintivara kahaqivaro, vika kauquvalo iri anta viraro, vika kempukavano kia varianarove.

⁴ Pirisia vatanaaka vehi autu taiqake entava anintaivo. Vika kahaqi varia vatanaaka Taiaave, Saidonive vikavata taiqivi entava anintaivo. Eo, te Noravano Kotika Pirisia vatanaaka Kariti *airani* qaqi variakavata vehi autu karererave.

⁵ Gaasa vatukaqi variaka iqi rateha nái qiaita kauhi muquke vaivarave. Asakeloni vatukaqi variaka vika kia ho uva tiraiti, evaara vaivarave. Ne uqitaini hini kiaka kia arukaamanta qaqi variaka, ne tarentae muntuka qoraiqimanta vaira qaqirake, kia qaiqaavata nenta vaata teqa taaqama ke vaivarave?

⁶ Ne tiha, Oho, tarentae Nora Kotira iqoka paipevano kia qaiqaavata tinavu aruqiro viraitiro, qaqi varianarove? Iqoka paipevauvo, qaqirakera nena utaqi qaiqaa otu vaihara auraara variane, ti variavo.

⁷ Ne minti tivarovata, iqoka paipevano kiama auraara varianarove. Te Noravano Kotika virara kempukaiqamake tiha, Are Asakeloni vatukaq'i variakavata nora namari auvahini variakavata qaqiqai aruqira vuane tunarave, tiro. Noravano Kotiva minti tura.

48

Noravano Moapiara tura

¹ Noravano Kotiva ekaa kempuka vataava Moapi vatanaakara mintima tivo:

Te Nebo vatukaq'i variakara oho tiva nimitauro. Navutaaka vika vehi autu taiqama kevarave.

Vika iqoka raqihā Kiriataimi vatukavata aatara kevarave. Vika kempuka vaantaavura aututaara viravata rukavu raakavumake, ravantiaqa aquke, viraq'i variaka kaurira haika nimivarave.

² Moapi vatanaaka nora autu vataa entava taiqa vivo.

Navutaaka Hesaboni vatukaq'i vaiha Moapi vatanaaka vehi autu taiqakera virara nai tiva ami nai tiva ami tiha, Aniqenavu Moapi vatanaaka aru taiqa kaare, tivarave.

Vika Matimemi* vatukaq'i variaka hampata iqoka raqi vaimanta vika anomake evaara vaivarave. Iqoka paipevano vikavata avataqiro viharo vika arukaanarove.

³ Ho iriate. Horonaimi vatukaq'ihai vaiinti nahenti mpo ike tiha, Oho, navutaaka ekaa maa vatukaraq'i vai haikara anomake qoraiqamake variavo, ti variavo.

⁴ Navutaaka Moapi vata maata vehi autu taiqa kaamanta naati vainti vika noraiqaake iq'i rate variavo.

⁵ Vika Luhiti vatukaini vua aararaqaa oru viha qaqiqai iq'i rataqi vi variamanta, Horonaimi otu vua aararaqaa vaiinti nahenti keke tivaq'i viha iq'i rate variavo.

⁶ Ho ruqemake vuate. Navutaaka ni arukevorave ti, kantama vuate. Ahara vatainai aakau donkivano kantaintemake, nevata kantama vuate.

⁷ Moapini variaka, ne nenta kempukarave nenta airairarave noraiqaake iriha, vi haikava homa tinavu kahaqianarove tiara kaara, navutaaka ni naatara kevarave. Vika ni una variqa Kemosira vare, vira pirisivata qjata vaiintivata rumpa vare nái maaqaini vuru kevarave.

⁸ Kia vo vatukavano qaqi varianarove. Navutaaka ekaa vo vatuka vo vatuka vehi autu taiqa kevarave. Vika uqita vata vevaini vairavata, uqita vata veraini vairavata, anomake qoraiqama kevarave. Te Noravano Kotika minti turo.

⁹ Navutaaka Moapi vata maata qoraiqama kerara iriha, ori vo mini vaavi arataate. Moapi vatainai ekaa vo vatuka vo vatuka anomakero qoraiqama viraro nuqih'i vatukaq'i vairaro kia vovanovata viraq'i varianarove.

¹⁰ (Popohaimanta Noravano vika nimitai kaiqara kia vareka vika vaaquqama vuate. Naarevano vika iqoka paipeqaa kia vairauka vikavata vaaquqama vuate.)

Moapi vehi autu taiqake entava aumaiqi vaivo tura

¹¹ Noravano Kotiva tiharo, Tota entaqahai Moapi vatanaaka koqemake variqi aniamanta navutaaka kia aninte vika rumpa vare nái maaqaini vuru kaarave. Vika vaireka, koqe uainivano nora kureq'i qaqi vaivarao kia vovano vira varakero vo votori vo votoriq'i qihia kaara voqaara vairave. Mintimake vaivarao uaini viva qaqi hiakaa ivaro vira muntavanovata qaqi koqe iro vairave.

¹² Moapi vika mintimake vaivarovata, vo enta anintairage te vi entaraqaa vaiinti vokika vara kaarimanta vika Moapi vatanaaka qoraiqama kevarave. Nora kureq'ihai uaini vo votori vo votoriq'i qihia, viraqahai votori vika rukavu raakavuma kaantemake, navutaaka Moapi vatanaaka qoraiqama kevarave.

¹³ Vi entara Moapi vika tavaivarao nái una variqa Kemosiva kia ho vika kahaqama nimitaira vika kaurivarave. Haaru Isarer'i vika Betelini purumakau naati maraqura/varaha autuke tinavu variqave tiavarao vi haikava kia ho vika kahaqama nimitaimanta vika kauruantemake, Moapi vikavata kaurivarave. †

¹⁴ Moapi vaiintivauvo, ne nantihae nenta mahuta tiha, Tenavu iqoka vaiinti tarukave.

Tenavu kia qetaraiti, kempukaiqaake iqoka raqi vauraukave, tiavo?

¹⁵ Naantiara navutaaka Moapi vata maata qoraiqamake, ekaa vo vatukavata naatara kevarave. Vika iqoka raqihā Moapi qaraaka vaiinti koqeka teqa taaqamake arukevarave. Te Avuhainauka Noravano Kotika ekaa kempuka vatauka vi uvare turo.

* **48:2:** Matimeni: Evaara † **48:13:** 1 King 12:28-29

¹⁶ Moapi qoraiqamavi entava aumaiqi vaivo. Vi entava vaakama anintaanarove.

¹⁷ Ne Moapi auvahini variaka vira nora autuara kankomake iriaka, Moapi vatanaaka qoraiqama virara iriha ne vikara iqi rata nimitaate.

Ne Moapiara mintima tiate: Mpo, navutaaka Moapi avuhainaara kauru kinta kaavo. Moapi kempukavanovata vira nora autuvanovata taiqa viro, kia qaiqaavata vaivo, tiate.

¹⁸ Ne Diboni vatukaqì variaka ne nenta nora autu vatera qaqrake, konkoma kanta tuvu variate. Moapi vehi autu taiqa keka vika ni hampatavata iqoka raqihà ni vaantaavura rukavu raakavuma aqukevarave.

¹⁹ Ne Aroe vatukaqì variaka oru aara auvahini himpi vaiha, vaiinti nahenti ruqemake vi variakara ireha tiha, Nana haikavanoe qovarama vimanta ne ruqemake vi variavo? tiate.

²⁰ Ne minti timanta vika niara mintima tivarave: Navutaaka Moapi aataru kaavaru vira kaara tinavu autu vatainiqama vivo. Mpo, ne tinavu hampata iqi rateha ike mpo tiate. Ne Anoni Namari auvahianta vi anihu aakara nteha mintima tiate: Navutaaka Moapi vata maata vehi autu taiqa kaavo, tiate.

²¹ Vika qora kaiqa varaara kaara te Noravano Kotika navutaaka qaqi kaari vika ugita vata veraini varia vatukauka maaka ntaihevarave:

Holoni, Jasa, Mefati, ²² Diboni, Nebo, Beti-Dibalataimi, ²³ Kiriataimi, Beti-Gamuli, Beti-Meoni, ²⁴ Kerioti, Bosara, ekaa Moapi vatainiv o vatuka vo vatuka niarainive aumantove vaika, te Noravano navutaaka qaqi kaari vika ekaa naatara kevarave.

²⁵ Moapi vatanaaka kempukavano taiqama vivo. Vika kia ho qaiqaa iqoka raqivarave. Te Noravano Kotika minti turo, tiro.

Noravano Moapi vika vara vatainiqama kaainarara tura

²⁶ Noravano Kotiva tiharo, Moapi viva kia ti Nora Kotika vevaaraini vaireva auti vaira kaara, ne ti arara ite vaina *uainira* vira amivaro nero vueraiqaa vuariere. Vira qaqi kaivaro viva nai vuru vihi taainaraqi kumparaa kaamparamaqiro viramanta vokika vira tave naaraihama amitaate.

²⁷ Moapivauvo, are Isareru naaraihama nimite varianara taurue kaaro? Are vikara muara vaiinti nahenti variavo tivakehara, vikara qora uva tihara nena qiatavata runkinkiri i varianarave.

²⁸ Ne Moapini variaka, ne nenta vatuka, vo vatuka vo vatuka ke, ori onkaiqi oru variate. Uviri vovano nai naavu onkai qoraiqiraqi kaqatero vaintemake, nevata mini oru variate.

²⁹ Moapi viva nai autu tuaherake vairave, nai mahuta ti vairave, viva aiqi nunuruma varero vo vatanaakara qumina vatanaakave ti vairave, tenavu ekaa virara irunarave.

³⁰ Te Noravano Kotika viva nariara noraiqaakero iri vairara kankomake irunarave. Ho viva nai mahuta ti vai uvava qumina uvaqaima vaivo. Viva vare vai kaiqavavata qumina kaiqaaqai varianarove, tiro.

³¹ Vira kaara te Moapipi variakara iqi rata nimirerave. Te Kiri-Heresiqi variakaravata ike mpo tiva nimirerave.

³² Te Jaseqì variakara iqi rata nimirerave. Te Sipimaqi variakara nai voqavata iqi rata nimirerave. Tota vi vatukaraqi *uaini* naaquntavano raapama viro viviro, vuru Qutu Vi Varuvura auvahianta oruntero, Jase Varuvainivata oruntero. Vate navutaaka ni *uaini* naaquntavata *fiki* katarivata qoraiqama kaavo.

³³ Moapi naaho maataqihai vaiinti nahenti kia qaiqaa quaheha kara qantuke vare variavo. Te vika ravaaqavu kauramata vika kia qaiqaa *uaini* tava aiquqohai ntava tatike quaheha aakara ntaraiti, vate vika aakara nteha ike mpoqai ti variavo.

³⁴ Moapi vatainiv, vo vatuka vo vatukaqihai vaiinti nahenti navutaaka naatu geteha noraiqaake aakara nteha ike mpo ti variavo. Hesaboniqive, Elealeqive, Jahasive, Soaaqive, Horonaimiqive, EkalatiSelisiaqive, vihai vihai ekaa vaiinti nahenti noraiqaake ike mpo ti variavo.

Nimirimi Namarianovata aaharaiqama viro, kia qaiqaa tuvivo.

³⁵ Moapini vo aiqina vo aiqinaqaa vaiha vika nái una variqara *ofaa* autu nimiteha, koqe unta i haikaravata iha qua rimaite variaka, te vika vehi autu taiqa karerave. Te Noravano Kotika minti turo, tiro.

³⁶ Vira muntuka qoraiqivarao aanumaara vuaje vai vaiintira voqaara, ti muntukavata qoraiqimanta te Moapi vikara iqi rata nimite vauro. Vira voqaantemake te Kiri-Heresiqi varia vaiintikaravata iqi rata nimite vauro. Ekaa vika vataa haikava taiqama vivo.

³⁷ Vika ekaa nái qiaa kauhi muquke, nái okauvata toqa aqu kaavo. Vika ekaa nái kauqu teqa taaqamake, kovaara utavaaqa nonkute variavo.

³⁸ Noravano Kotiva tiharo, Tave qoraiqira qaqa kero rukavu kaintemake, te Moapi vata qaqrake qoraiqama kauro. Vira kaara vi vatanaaka nái naavu qiatagaave, vaiinti nahenti ruvaaqumavi varia vatukarainive vaiha qaqaqai rate variavo.

³⁹ Oho, Moapi anomakero qoraiqama vivo. Viva kauriharo nai viri kukeqa tero tuqantaaviro vaivo. Ho iriate. Moapi variaka noraiqaake iqi rate variavo. Moapi vata auvahini varia vatanaaka vira taveha naaraihamma amite variavo. Vika viva qoraiqama viro vaira taveha, virara tinavu haatu ite vai haikarave ti variavo.

⁴⁰ Noravano Kotiva tiharo, Tavaate. Memoravano nai aroka rairakero vo haika arukareva kante otu vi vaivo.[‡]

⁴¹ Navutaaka Moapi hampata iqoka raqha vo vatuka vo vatuka vareha, vika kem-pukaiqamake aututaa vatukaravata varevarave. Nahentivano vainti vatareva iharo qetaintemake, vi entara Moapi iqoka vaiinti vikavata qeteha vaivarave.

⁴² Moapi vika nái autuaraqai noraiqaake iriha kia ti Nora Kotika vevaaraini vaireka auti variara kaara, te navutaaka qaqi kaariramanta vika Moapi vehi autu taiqa kevarave.

⁴³ Noravano Kotiva tiharo, Aatu itaaina haikavave, hiqainti quvike vataavave, vaara vuike vataavave, vi haikava ni Moapi vekama vaivo, tiro.

⁴⁴ Aatu itaaina haikaraqihairo rugema kero virava viva hiqainti quvi tainaraqi aqu vuanarove. Hiqainti quvi tainaraqihairo qaqini vaarintainara vaaravano vira ravaaqavu kaanarove. Te Moapini variaka qoraiqama nimitaaina entara vo kaama taunarara ti, te vi entaraqaa vika qoraiqama karerave, turo.

⁴⁵ Vaiinti nahenti vo kiaka rugemake Hesaboni vatuka aaqaini oru variavaro vika kempuka taiqa vimanta tavaavararo ihavano vi vatukara itakero Sihonira[§] avuhainaa naavuvata itakaira kaara, vika kia ho vatuka viraqi origeteva vairave.

Iha viva itaqiro viharo Moapi vika avu naavu tatoqa kero, vika nái mahuta ti variaka qiaa vuhaarivata tatoqa kaanarove.*

⁴⁶ Ne Moapini variakara te niara oho tiva nimitauro. Una variqa Kemosira autu tuaherake variaka, navutaaka vika ekaa vehi autu taiqake, vika maaqu raavuravata rumpa vare vuavo.

⁴⁷ Moapi vika mintimake qoraiqamavi variqi viqevata, naantiara vo enta te vika koqema nimitaari vika tota koqemake variqi vuntemake, qaiqaa koqemake variqi vivarave. Te Noravano Kotika Moapi vikara vi uvvara tiva taumarave, tiro.

49

Noravano Amo vatanaakara tura

¹ Noravano Kotiva Amo vatanaakara mintima tivo: Ne una variqa Molekira autu tuaherake variaka, ne nantihae Gaatira ankuvano ia vatarava? Ne Amo vatanaaka, nantihae Isareri vatuka, vo vatuka vo vatukaqai variavo? Isareri vika kuvuarama taaka airithahaama variavo. Vika homa te nái nimuna vataraqaa qaiqaa ani vaivarave.

² Ho vo enta anintairage te vi entaraqaa navutaaka nititama kaari vika ani iqoka raqha Amo vika nora vatuka Raba aatarake, viraqi vai naavu maaqara ekaa rukavu raakavuma ke, ihaqohai vira tataqaqai voi vatukara, voi vatuka vo vatuka ekaa tatoqa kevarave. Vi entara Isareri vika Amo kauquqihai nái vata qaiqaa ani varevarave.

³ Hesaboniqi variaka, ne noraiqaake ike mpo tiha iqi rataate. Navutaaka Ai vatuka vehi autu taiqa kaavo. Ne Raba vatukaqai variaka, nevata kovaara utavaaqa nonkute iqi rateha, nenta vaata teqa taaqamake variate. Navutaaka ani ni una variqa Molekira vare, vira *pirisivata*, vira nora vaintinavuvata rumpa vare nái maaqaini vuru kevarave.

⁴ Ne Amo vatanaaka kia ti vevaaraini vaireka auti vaiha, ne nenta monu airairara noraiqaake iriha tiha, Nai taukae iqoka raqha tinavu ho haatara kevarave? tiarave. Ho ne rauriha variate. Kia nenta mahuta tiate. Ni kempukavano taiqe vaivo.

⁵ Te Noravano Kotika ekaa kempuka vatauka mintima tiro: Te hihai hihai aatu itaaina haikara vara kaariramanta ne ekaa qetake kantama vivarave. Ne ekaa nenta qaiqai variqi virara iriha hampiara voqaara kante vaivarave, kia vovanovata ni iqoka vaiinti qaiqaa ruvaaquma kaanarove, turo.

⁶ Amo vika mintimake qoraiqama vi viqevata, naantiara vo enta te vika koqema nimitaari vika tota koqemake variqi vuntemake, qaiqaa koqemake variqi vivarave. Te Noravano Kotika Amo vikara minti tiva taumarave, tiro.

Noravano Idomu vatanaakara tura

^{‡ 48:40:} Uva tuqantaakero navutaaka Moapi hampata iqoka raqireka auti variarara tiro ^{§ 48:45:} Haaru Amo vika King Sihoniva Hesaboniqaa raqiki vaura. ^{*} **48:45:** Vo uva: Iha viva itaqiro viharo raapama viro ekaa Moapi vatavata vatukavata ita taiqa kaanarove.

⁷ Noravano Kotiva ekaa kempuka vataava Idomu vatanaakara mintima tivo:

Temaanini koqe avu aato vataaka kiae maa entara variavo? Idomu vataini vo kiaka kiae maa entara ni koqe avu aato nimi variavo? Koqe avu aato avataqi vua okarava Idomuqi taiqae vivo?

⁸ Ne Dedaaniqi variaka* vatuka viraqihai ruqemake oru kukeqavi variate. Te Isova kuvuarama taika ntaihaaina entava anintaimantara ti, te vika vehi autu taiqa karerave.

⁹ Vaiinti *uaini* tava hiqireka iha, kia ekaa tava hiqi karaiti, vika taaraiqa naaquntaqaa qaqi ke variarave. Muara vaiinti entaqi aniaaka, vika kia ekaa haika muara vara karaiti, vika nái antuqa vai haikaraqai vare variarave.

¹⁰⁻¹¹ Vika mintiqevata, te Isora ankuqihai ekaa haika vara karerave. Te vika kukeqavi varia vatukara qaqini vara kaari vika kia ho qaiqaa kukeqavi vaivarave. Vika viqa vaintive, tentoqa nahentive, te vikaqai qaqi vehakuma nimitaari vika tiqaa muntuvi vaivarave. Ekaa vo kiaka te vehi autu taiqa karerave.

¹² Te Noravano Kotika Idomu vatanaakara tiha, Kia vikaqaa uva vaivo tuna vatanaaka, te vikaravata ti arara ite vai *kaapuraqihai* naate tunarave. Te ni Idomu vatanaakara kiae naate tianarave? Aqao, te niaravata vi *kaapuraqihai* naate tivakeha ni ntaiharerave.

¹³ Te Noravano Kotika tenta hutuqaa tiha, Te navutaaka qaqi kaari vika ani nora vatuka Bosaraqi vai naavu maaqara rukavu raakavuma kaivaro nuqihiqai varianarove. Vokika vira taveha nái kauqu runkinkiriha tiha, Vi haikara tenavu tavauraro haatuma itaivo tivarave. Vika vira naaraihama amiteha nái hana vaiinti atiha tiha, Bosara vatukavanovata vira auvahini varia vatukaukavata ekaa enta nuqih vatuqaqai vaivarave, tiro. Noravano Kotika minti tura.

¹⁴ Te Ieremaiaaka tiha, Idomuvauvo, Noravano Kotiva vo uva ti tiva timivo. Viva vo vatanaa vo vatanaaka varianaini uva vara kero vikara mintima tivo: Ne nenta iqoka vaiinti ruvaaqumake Idomu hampata iqoka raqireka geramate variate, tivo.

¹⁵ Idomuvauvo, iriane. Noravano Kotiva ai kempuka taiqa kairamanta vokika ariara vehi vatanaave tivarave.

¹⁶ Ne tiha, Ekaa vo vatanaa vo vatanaaka tinavu aatu qete variavo tivakeha nenta mahuta ti variarave. Ne minti tihavata, ne nenta unahaama tiavo. Ne verara ori onkai vainainive ainqinaqaave vaiha tiha, Tenavu maini vaiha kia navutaaka naatu qetaainarave, tiarave. Ho iriate. Hevikavano verara kantaqaqini nai naavu kaqatainaini ne oru mini vaivera, te verara vihai ni vara vataini muntu karerave. Te Noravano Kotika minti turo.

¹⁷ Te Noravano Kotika tiha, Te Idomu vata maata anomake qoraiqama kaarimanta vokika vi vatara taveha voqamake qeteha ike mpo tiha nái kauqu runkinkiri ivarave.[†]

¹⁸ Haaru te Sodomivata Gomoravata vitanta tataaga vau vatukaukavata anomake qoraiqama kaunantemake, te Idomuvata qoraiqama kaariraro vi vataraqaa kia voqavanovata vairaro qumina naantaaka ntuanarove.

¹⁹ *Raionivano Iotani Namari* auvahini vai nantaraqihairo ukauni anintero vi anima sipisipi raumpirima kaintemake, tevata vaaka Idomu vatanaaka raumpirima kaari vika nái vata maata ke viqe, te vo vaiinti kaama taariraro viva vi vataraqaa raqikianarove.

Ho tavave ti voqaantema kero vaivo? Tavave tiriara aqao kia mintiane tianarove? Qiata vaiinti vovano hoe te vararerera iaina kaiqara kuval kaanarove?

²⁰ Virara irihama ne iri vaiqe te Idomu vatave, Temaanipi variakave, qoraiqama nimitarerera iaina uvvara ni tiva nimiare. Te qaqi kaari navutaaka ani vika nái naati vainti hampata ekaa rarau vare vonaini vuru ke, vika vata maatavata anomake qoraiqama kevarave.

²¹ Idomu vatanaaka vataini hiqintivaro nora auva ntairaro vatavano qaki qaki iramanta, vika ike mpo ti uvaravata Naare Namari vainaini vaika irivarave.

²² Ho tavaate. Memora vovano nai aroka rairakero vo haika arukareva kantero otu vi vaintemake, navutaaka Bosara hampata iqoka raqireka ani variavo. Vi entara nahentivano vainti vatareva iharo qetakero vaintemake, Idomu iqoka vaiinti qeteha vaivarave, tiro.

Noravano Damasikusiqi vaukara tura

²³ Noravano Kotiva Damasikusiqi vaukara mintima tivo: Taara vatuka Hamaatiqive, Apaatiqive variaka qora vakaaka iriara kaara vika qeteha variavo. Nora namarivano kia qihaaqama viro vaintema kero, vika muntukavano kia qihaaqama viro vaimanta variavo.

* **49:8:** Vika Arebia vatanaaka Idomu sauti mantaraini vaura. † **49:17:** Jer 19:8

²⁴ Damasikusiqi variaka kempukavano kia vaimanta vika ruqemake vireka auti variavo. Nahentivano vainti vatareva qeteharo antura nti vaintemake, vikavata qeteha antura nti variavo.

²⁵ Nora autu vataa vatuka Damasikusiqi variaka mpo ike tiha, Tota tenavu maaqi vaiha quaheha vaunarave. Navutaaka anira kaara tenavu ruqemake vuainarave, tiavo.

²⁶ Navutaaka ni qaraaka vaiinti vatuka vira aara vau arukevarave. Vika ni iqoka vaiinti ekaama arukevarave.

²⁷ Te Damasikusi vaantaavura ihaqohai tatoqa kaariraro ihavano ita varero BeniHadaat-tiva kempukaiqama kero kaqatai naavu maaqravata tatoqa kaanarove. Te Noravano Kotika ekaa kempuka vatauka minti turo.

Noravano Kedaa ankuaravata Haso vatukaravata tura

²⁸ Babironi vika King Nebukanesaava iqoka raqiharo Kedaa ankuvata Haso vatukavata naatara kora. Noravano Kotiva vikara mintima tivo: Ne Babironi iqoka vaiinti, iqoka raqiharo Kedaa anku kuari urinaini variaka vehi autu taiqa kaate.

²⁹ Ne vika *seri* naavu maaqave, vika sipisipive, vika naavuqi vai haikarave, vika kamerive, ekaa vi haikara nuntu ruvaaqumake varaate. Vi entara ne aakara nteha vikara mintima tiate: Oho, ekaa mantaraini aatu itaaina haikavaqai vaivo, tiate.

³⁰ Te Noravano Kotika ne Hasoqi variakara tiha, Kante ruqemake oru niaraini onavu vainanaini kukeqavi variate. Babironi vika King Nebukanesaava ni vehi autu taiqa kaaina uvara tivakero vataivo.

³¹ Te Noravano Kotika tiha, Ne Babironi iqoka vaiinti oru vi vatanaaka hampata iqoka raquate. Vi vatanaaka tiha, Tenavu homa vauro. Navutaaka kiama ho ani tinavu hampata iqoka raqivarave, tiavarovata, vaantaavuravano kia vika vatuka ututuma taivarao kia qentivata vairave.

³² Ne iqoka raqiharo Kedaa vikara kamerive, purumakauve, sipisipive, varaate. Te vi vatanaaka nai tiriqa kauhi qiquqamake toqataaka raumpirima kaari vika ekaa vona vona vi anima vivarave.

Te vika vehi autu taiqa keka qaqi kaariramanta vika hihai hihai ani vika qoraiqama kevarave.

³³ Haso vatukavano qoraiqama viro aahara vataiqama viramanta qaakau vairiqai viraqi ani vaivarave. Kia vovanovata vi vatukaraqi qaiqaa ani varianarove. Te Noravano Kotika minti turo, tiro.

Noravano Elaamu vatainiara tura

³⁴ Sedekaiava Iutaa avuhainaa vαιintigama viro vau entara Noravano Kotiva Elaamu vatainiara ti tiva timiro tiharo, ³⁵ Te Noravano Kotika ekaa kempuka vatauka mintima turo: Te Elaamu huru tuateha iqoka raquaka ekaa aru taiqa kaariraro vi vatanaaka iqoka raqiharo kempukava taiqa vuuanarove.

³⁶ Te ekaa mantaraihai navutaaka ntita vare viri kaari vika Elaamu hampata iqoka raqivarave. Viraqahai te Elaamu vatanaaka raumpirima kaari navutaaka vika rumpa vare ekaa naato vataini vika vuru kevarave.

³⁷ Navutaaka vika arukareka aniqe te Elaamu vatanaaka aatu itaaina haikara nimiari vika voqamake qete vaivarave. Ti voqamakero arara ite vairage te vi vatanaaka anomake qoraiqama nimitarerave. Te qaiqaa qaiqaa iqoka paipe vara kaariraro viva vika vehi autu taiqa kaanarove.

³⁸ Te vika avuhainauka nai qiata vaiinti hampata ekaa vehi autu taiqa ke, vika vatukavata vare vikaqaa raqikirerave.

³⁹ Elaamu vika mintimake qoraiqama nimitevata, naantiara vo enta te vika qaiqaa koqema nimitaari vika tota koqemake variqi vuntemake, qaiqaa koqemake variqi vivarave, turo. Noravano Kotiva minti tura.

50

Noravano Babironi vatanaakara tura

¹ Noravano Kotiva Babironi vatukavata vi vatanaakaravata ti tiva timiro tiharo,

² Are maa vakaakara kia kukeqa karaitira, vo vatanaa vo vatanaaka qoqaa tiva nimiare. Are vutora vo virini hiritairamanta vika vira tave, ai uva irireka aniate. Mintima tiane:

Navutaaka iqoka raqiharo Babironi vatuka aatarama kaavo. Vika una variqa Maadukira kaurira haika amiha vira kempuka taiqa kaavo. Babironi vika una variqave, *maraqurave/varahave*, kaurira haika varaavo.

³ Babironini *noti* mantaraini varia vatanaaka ani Babironi hampata iqoka raqiha vika vata maata qoraiqama kaivaro aahara vataiqama vuanarove.

Vaiintivata aantau vahivata qetake vi vataraqaahai ruqemake vivaro kia vovanovata qaiqaa vi vataraqaa varianarove, tiro.

Isareri vika nái maaqaini orurante anivarave tura

⁴ Noravano Kotiva tiharo, Vi entara Isarerivata Iutaavata ruvaaqumavi vaiha iqi rateha ti nái Variqa Nora Kotika rantareka anivarave.

⁵ Vika Saisonini vua aarava tantoe vaiyo tivakeha vi aararaqaa vireka auti vaivarave. Vika qaiqaa ti Nora Kotika hampata voaha vaiha uva tiva taatauke tiha, Tenavu kia vi uvara raqa karaiti, ekaa enta iriqi virerave, tivarave.

⁶ Ti vaiinti nahenti vika vaireka, ainqinaini sipisipi kakakima vuaka voqaara variarave. Sipisipi qoka vika ntita vare hampi aara numiqamanta vika vo ainqina vo ainqina vaura hampiara voqaara niha nái maaqaini auraara varia vataratauhaarave.

⁷ Vika mini ni variamanta nai taukae vika tavama keha, vika qoraiqama nimite variarave. Vika navutaaka tiha, Vika Nora Kotira nái kaivaqaukavarava virara noraiqaake iri varia Variqara, vira uva iriqi vuataara vaimanta, vika vira uva raqa kaarave. Mintiara kaara tenavu vika qoraiqama nimitaarerera, kia tinavuqaa uva varianarove, tiarave.

⁸ Ti vaiinti nahentivauvo, ne Babironi vatukaqihai ruqemake vuate. Babironi vika vata ke vuate. Memeraa qoravano nái kenuaka ntita varero avuni vintemake, nevata avuni viha, vi vataru mini ke vuate.

⁹ Te vo vatanaa vo vatanaaka kempuka vatanaaka, *noti* mantaraini variaka vihi vaahi tiari vika vohaaraqi avitumavi vaiha, Babironi hampata iqoka raqireka nai naantiara nai naantiara ani vaiha, Babironi vika hampata iqoka raqiha vika naatara kevarave. Vika iqoka vaiinti taruka veva tutakeva kia qaqiana viraitiro, vaiinti aruke vairave.

¹⁰ Navutaaka iqoka raqiha Babironi vata maata aatarake, viraqaahai iqoka vaiinti vika ekaa nái antuqvano vaina haikara Babironiqihai raqiake vare vivarave. Te Noravano Kotika minti turo, tiro.

Babironi vatukavano qoraiqama vuainarara tura

¹¹ Noravano Kotiva tiharo, Ne Babironi vatanaaka iriate. Ne haaru ti vaiinti nahenti vata maata qoraiqama keha quaha keha viraqihai nenta antuqvano vai haikara vare aniarave.

Purumakauvano koqe ukau vainaini vahairo quahaintemake, ne quahe variarave. Ohi qoranavu quaheha *mpururu mpururu* tiantemake, nevata quaheha variarave.

¹² Ne mintimake variavarovata, ne Babironi vatuka virara tinavu norave ti varia vatukava kaurira haika varairaro vira autuvanovata vataini tuvi vuanarove. Babironi vatavano vaireva, qumina vataqai vahairo aahara vataiqama viraro kia namarivata varianarove. Ekaa naato vatanaakaqihai ne vaireka, vehi vatanaaka vaivarave.

¹³ Ti Nora Kotika arara itainara kaara, kia vovanovata Babironi vatuka viraqi vairaro nuqihai vatukaiqama vuanarove. Vokika mini vitare aitare iha vatuka vira taveha vika voqamake qeteha ike mpo tiha nái kauqu runkinkiri ivarave.

¹⁴ Ne huru veva tuate variaka vontaqi vontaqi Babironi vatuka vira ututumate variate. Babironi vika ti Nora Kotika uva raqake variara kaara, ne kia hini veva qaqi tuataraiti, ekaa veva viraqohai vika ntaiahaate.

¹⁵ Ne vatuka vira ututumate vahai vonahai vonahai iqoka ragirara aakara ntaate.

Tavaate, vaantaavuravano voqi voqi rukavu raakavuma viro hijintiro vaimanta, Babironi vika tiha, Tenavu kiama ho raquainarave. Tenavu ni kauquqima vauro, tivarave.

Te Noravano Kotika vika tentaqaa vuntu karerave. Babironi vika vo vatanaaka qoraiqama nimitaantemake, ne vika tiqaa vuntu keha návata qoraiqama nimitaate.

¹⁶ Ne Babironi vataini kuvu kanaa uti variakave, kara qantu vare variakave, ekaama arukaate.

Ne vo vatanaaka Babironi vataini ani variaka, ne navutaaka iqoka paipe naatu qetake nenta maaqa nenta maaqaini kante vuate, tiro.

Isareri vika nái maaqaini orurante anirara tura

¹⁷ Noravano Kotiva tiharo, Isareri vika vaireka, *raioninavu* sipisipi ntataqi viha raumpirima kaaka voqaara variavo. Avuni Asiria avuhainaava* naane vika ravaaqavu kero nama kairave. Vira naantiara ekaanaini Babironi vika King Nebukanesaava Isareri vika vuhaari rukavu raakavuma kairave.

* 50:17: 2 King 17:6; 18:13

¹⁸ Virara irihama te Isareri Variqa Noravano Kotika mintima turo: Te tota Asiria avuhainaara qoraiqama amitaunantemake, te Babironi avuhainaara viravata Babironi vikavata qoraiqama nimitarerave.

¹⁹ Te Isareri ntita vare nái maaqaini viri karerave. Sipisipi ukau ho namake variantemake, vika Kaameli Aiçinainive, Basaani vatainive, verara Efaraimunive, Gileaa-tine, koqemake vaivarave.

²⁰ Vi entara te Isarerive Iutaave vehakuma nimi taura qaqi variaka vika uva nunka nimitaariraro kia vikaqaa uva vairamanta vo kikavata kia ho vikaqaa uva vatevarave. Te Noravano Kotika minti turo, tiro.

Noravano Babironi navutaakara tura

²¹ Noravano Kotiva Babironi navutaakara tiharo, Ne iqoka raqiba Merataimiqi variakave, Pekotiqi variakave aru ntataqi viha, vika ekaa aru taiqa kaate. Ne ekaa te tiva tauna uvara vira avataqi vuate. Te Noravano Kotika minti turo.

²² Vika iqoka raqiba Babironi vata anomake qoraiqama kaamanta, ekaa Babironi vatainivariaka iqoka raqi varia uva *nontantara/otatara* iriavo.

²³ Tota Babironi viva vaireva, nora *hama* voqaara vahiaro, viva ekaa vo vatanaaa vo vatanaaka ruqutuke vairave. Ho vate *hama* viva anomakero tairi taarima viro vaivo. Ekaa vo vatanaaa vo vatanaaka Babironi vika qoraiqama vuara tave, ravukuvi nái kauqu runkinkiri i variavo.

²⁴ Babironivauvo, are ti Nora Kotika hampata iqoka raquanara kaara, te ai ravaaqavu karera vaara vuike vataurara, are vira kia tavaraitira, viraqí aqu vuuanarave.

²⁵ Te Noravano Kotika ekaa haikaqaa raqiki vaurauka Babironi vataini vo kaiqa vararerar ihara ti, te tenta auvihehavaa vatauna naavura qenti quantuake, viraqihai te tenta arara ite vai auvihehavaara qaqqini vara veva kauro.

²⁶ Ne niara vatainivariaka, ani Babironi vika hampata iqoka raquate. Vika *uitive*, vo karave, ruvaaqumake vataa naavu maaqara rukavu raakavuma kaate. Vika vaantaavurave, naavu maaqave, rukavu raakavuma kaivaro vo kanta vo kanta orivanoqai kirkikairo variarire. Ne Babironi vatanaaka ekaa vehi autu taiqake, kia voqavata vehakuma nimitaate.

²⁷ Babironi iqoka vaiinti taruka[†] ekaa arukaate. Te vikara oho tiva nimitauro. Te Noravano Kotika vika qoraiqama nimitaaina entava anintaivo.

²⁸ (Iuttaa vo kiaka Babironi vataihai ruqemake Ieruharemini orunte tiha, Tinavu Variqa Noravano Kotiva Babironi vatanaaka qoraiqama nimiteharo nai Naavuqaa vuntu kaivo, tiavo.)

²⁹ Ne huru veva tuataaka naarama kaimanta vika Babironi vatuka ututuma taivaro kia viraqihairo vovano ho ruqema kero vuarire. Ne vika qora kaiqa varaara virara iriha, náváta qoraiqama nimitaate. Vika vokiaka qoraiqama nimitaantemake, náváta qoraiqama nimitaate. Vika nariaraqai noraiqaake iriha, te Isareri Variqavano takuquke vaurauka uva raqa kaarave.

³⁰ Vira kaara navutaaka vika qaraaka vaiinti arikaimanta vika Babironi viraqí vo aara vo aara vau hiqintivi vaivarave. Vi entara navutaaka Babironi iqoka vaiinti ekaama arukevarave.

³¹ Babironivauvo, are nena autuaraqai noraiqaakeri variaranara kaara te Noravano Kotika ekaa kempuka vatauka ai navutaiqama amitauro. Te ai qoraiqama nimitaaina entava anintaivo.

³² Babironivauvo, are nena mahuta ti variaravave. Ho are kuntavaivaima varera kaavuntiraro kia vovanovata ai kahaqirara are qaiqaa himpi vainarave. Te Babironini vo vatuka vo vatuka iha tuta kaariraro ihavano ekaa haika ita kaanarove.

³³ Te Noravano Kotika mintima turo: Babironi vika Isarerivata, Iutaavata qoraiqama nimiteha vikaqaa nora maara vate variarave. Vika Isarerivata, Iutaavata rumpateha kempukaiqamake tuateha, kia vika kuvantu kareka auti variarave.

³⁴ Vika mintiavarovata, Isareri ruaruama nimitaarrava vovano kempukavano vairove. Vira autu vaireva, Noravano Kotika ekaa kempuka vataavave. Viva nai vaiinti nahentti autua nimiteharo, Isarerini qaiqaa ntita varero vuru kairamanta vika koqemake auraara vaivarave. Viva Babironini variaka qoraiqama nimitaira vika kia ho koqemake auraara vaivarave.

³⁵ Te Noravano Kotika tiha, Te iqoka paipe[‡] qaqi kaariraro viva Babironi vatanaakkave, vika qiata vaiintive, vika koqe avu aato vataukave arukaanarove.

[†] 50:27: Hiparu uva: vika qora purumakau

[‡] 50:35: Iqoka paipe: navutaaka iqoka vaiinti

³⁶ Te iqoka paipe qaqi kaariraro viva Babironi una paropeti vaiintinavu arukaanarove. Vi vaiintika kia koqe avu aato vataukave.

Te iqoka paipe qaqi kaariraro viva Babironi iqoka vaiinti ekaa arukaanarove. Vika voqamake qeteha variavo.

³⁷ Te iqoka paipe qaqi kaariraro viva Babironi iqoka ohive, iqoka *kaarive*, vo vatanaaka iqoka vaiinti vika kahueka, vikavata aruma kaanarove. Nahenti qeteha variantemake, vika qeteha vaivarave. Navutaaka qaqi kaarimanta vika Babironi monu airairave ekaa vo haikave varevarave.

³⁸ Vi entara nora kuarivano itaqiro viharo ekaa Babironini vai namarira aaharaiqama kaanarove. Babironini una variqa, airitahaa mpinqavi variamanta vaiinti nahenti vika avataaqi viha vueraiqaaavi variavo.

³⁹ Babironi vatukaci kia qaiqaa vaiinti nahenti vaivaro, ekaa enta vi vatukava nuqhiqama viro varianarove. Aahara vataini varia aantau vahika, qaakau vairive, vukera voqaakave, vi haikavaqai mini variqiro vuuanarove.

⁴⁰ Haaru te Sodomivata Gomoravata vitanta tataqa vau vatukaukavata anomake qoraiqama kaunantemake, te Babironi vatuka qoraiqama kaariraro mini kia vovanovata vairaro qumina naantaka ntuanarove.

⁴¹ Ho tavaate. *Noti* mantaraihai iqoka vaiinti nai avuhainauka airitahaa hampata ani variavo. Vika kempuka vatanaaka iqoka raqireka ani variavo.

⁴² Vika huruve iqoka paipeve tuateha, vaiinti qoraiqama nimiterara quaheha, kia aqurihama nimite variakave. Vika ohiqaa oquvi vailha kante ani variavaro vika ohi aqvuvano noraiqaakero auva nte vaivo. Vika Babironi hampata iqoka raqireka vontaga vontaga nai naantiari nai naantiari ani variavo.

⁴³ Babironi vika avuhainaava navutaaka ani varia vakaakara irivar, vira aatu itaivaro qete vaivaro vira kauqu irianta vivaro vira kempukavata kia vaivaro vaivo. Nahentivano vainti vatareve iharo voqamakero antura ntiharo keke tintema kero, viva keke ti vaivo.

⁴⁴ *Raionivano* Iotani Namari auvahini vai nantaraqihairo ukauni anintero sipisipi raumpirima kaintemake, tevata vaaka Babironi vatanaaka raumpirima kaari vika nai vata maata ke vivage te vo vaiinti kaama taariraro viva vi vataraqaa raqikianarove.

Ho tavave ti voqaantemaka kero vaivo? Tavave tiriara aqao kia mintiane tianarove? Qiata vainti vovano hoe te vararerai aina kaiqara kuval kaanarove?

⁴⁵ Virara irihama ne iri vaiqe te Babironi vatukave, vika vata maatave, qoraiqama nimitaaina uvara ni tiva nimiare. Te qaqi kaari navutaaka ani vikavata vika naati vaintivata rarauvuru ke, vika vata maatavata anomake qoraiqama kevarave.

⁴⁶ Navutaaka Babironi naatara kaivaro uva *nontantavano/otatavano* noraiqaakero auva ntairaro vatavano qaki qaki i varianarove. Vi entara Babironi vika ike mpo ti uvaravata ekaa vataini vaika irivarave, tiro.

51

Noravano Babironi vatanaaka navutaiqura

¹ Noravano Kotiva tiharo, Te vo vatanaaka vahuru kaari vika Babironi vatanaaka navutaiqihia aaronavaano utintemake, Babironi vata maata qoraiqama kevarave.

² Te vo vatanaaka vara kaariramanta vika uvaivanu rapa vuqaq kaintemake, vika vata maata ekaa qoraiqama kevarave. Vi entara vika ekaa mantaraihai ani Babironi hampata iqoka raqivarave.

³ Ne Babironi vika navutaaka, nenta iqoka utavaaqa nonkute, nenta huru vuike vataate. Ne Babironi vika qaraaka vaiinti kia vehakuma nimiraiti, vika iqoka vaiintivata ekaa vehti autu taiqa kaate.

⁴ Ni vevavano vika aru kairamanta vika vo vatuka vo vatukaqive, vo aara vo aaraqaave, hiqintivi qutu vivarave.

⁵ Te Isarerri Variqavano takuquke vauraukave. Isarerivata Iutaavata ti uva raqa kaavarova vika qaa nora uva vaimantavata, te Noravano Kotika ekaa kempuka vatauka kia vika ekaara qaqla kaunarave.

⁶ Ne Isarerivata Iutaavata Babironi ke ruqemake vuate. Nivata arukevorave ti, kantama vuate. Hauri Babironi vika qora kaiqa varaara kaara navutaaka nivata arukevorave. Te Noravano Kotika tentaqa vuntu kaaina entava anintaivo. Te vika qora kaiqa varaarara iriha náivata qora koqaa nimiha huvigorave tirerave.

⁷ Tota te ekaa vo vatanaaka vo vatanaaka ntaiharera iha, Babironi vikara ne vi vatanaaa vi vatanaaka ntaihama timitaate tunarave. Babironi vika vaireka, te tenta kauquqi *kori kaapu* tuataunara voqaara variarave. *Kaapu* viraqti arara ite vai *uainiva* vaimanta ekaa vatanaaka *uaini* vira namakeha vueraiqama vuuarave.

⁸ Ho Babironi viva naivata vaakama hiqintiro qoraiqama vuanarove. Ne vira iq i rata amitaate. Oru *marasini* vare viri vira vaata teqa taaqama kaaraqaa aqu amitaate. Vira vaatavano hoe tavanta vuanarove?

⁹ Aqao, tenavu Isarerive Iutaave vira kahaqirare ti, tavauraro vira vaatavano tavanta vuarirava kia ho vaivo. Ho kaigenavu Babironi ke tentanavu maaqaini vuare. Noravano Babironi anomakero ruqutu keharo vehi autu kaivo. Viva qora kaiqa varai uvava nai uritara kero tonavuvano vainaini oru ntaivo.

¹⁰ Noravano Kotiva Babironi vika tinavu qoraiqama timitaara kaara, viva návota ntaihelaro tinavuqaa vuntu kaivo. Ho aniqe tenavu Ieruharemipi variaka tinavu Variqa Noravano Kotiva tinavu ruaruuma timitai uvvara vuru tiva nimiare. „Naantiara Isarerivata Iutaavata mintima tivarave..”

¹¹ Ne nenta veva viaru urohike, nenta kainkevata hirite variate. Noravano Kotiva Babironini variaka vehi autu taiqa kaaina uvvara iritero Midia vatainai variaka avuhainauka vahuri vaimanta vika Babironi hampata iqoka raqireka auti variavo. Babironi vika Nora Kotira Naavu qoraiqama kaarara iriharo viva viraqaa vuntu karevave.

¹² Ne vutora virini hiritaimanta navutaaka vira taveha, Babironi vatuku vaantavura rukavu raakavuma kaate. Maimaraara raqiki vaika vo kikavata ntita vuru vataimanta vatuka avutaqihai kia veante ruqemake vuate. Vaara autuke vataate. Noravano Kotiva tota nai tuntema kero, Babironi qoraiqama nimitarereva auti vaivo.

¹³ Babironiqi variakao, ne vaiureka, Iufaretisi Namariyano vainainive, inaara namari vo namari vo namariyano vainainive, variarave. Ne iqoka raqiba vo vatanaa vo vataaka koqe airaira ia haikara vare vuru nenta naavuqi vataarave.

Ho ne variqi vi vuru taiqe entava anintaivo. Naaqunta teqa kaantemake, navutaaka ne variqi vi entara taiqa kevarave.

¹⁴ Noravano Kotiva ekaa kempuka vataava nai autuqaa uva tiharo, Te iqoka vaiinti airithaa Babironi vataini ntita vuru kaariramanta vika kaintaaqa airithaa vaintemake vhaiha, iqoka raqiba Babironi vatanaaka naatarake vora ntivarave, tiro.

Nora Kotira autu tuahera kora

¹⁵ Noravano Kotiva nai kempukaqohairo maa vatara autukero vatorave. Viva nai koqe avu aatoqohairo maa vatara autukero vatero, vailintivano *seri* rairakero aqutaintema kero, naaruvavata rairakero vatorave.

¹⁶ Viva tivaro naaruvavano karara tivaro nora aazu nti vairave. Viva tivaro niara vataihairo tonavuvano kumpetaqiro ani vairave. Viva tivaro aazuakaavano uti vaivaro aqvavano nti vaivaro uvaivanovata uti vairave.

¹⁷ Una variqa avataqi vi variaka avu aato kia vaimanta vika vo haikaravata kia iri tave variarave. Una variqa auti variaka vika una haikaqai auti variavaro, kia aiho vareva vi haikaraqai vaimanta vika kaurira haikama varevarare.

¹⁸ Una variqa *maraqura/varaha* vaireva, qumina haikaqaima vaivo. Ne vi haikarara naaraihamu nimitataarave. Noravano Kotiva ekaa vi haikara vehi autu taiqa kaaina entava ani vaivo.

¹⁹ Iekopira Variqavano kia una variqa voqaara vairaitiro, viva ekaa haika autukero vataiva vaharo, viva Isareriera tiharo, Vika tinta vaiinti nahentima vaivarave, tirave. Vi Variqara autu vaireva, Noravano Kotiva ekaa kempuka vataavave.

Nora Kotira tipuqarara tura

²⁰ Noravano Kotiva Babironi vatanaakara mintima tivo: Ne vaiureka, ti tipuqara voqaara variavo. Te iqoka raqirera iha tipuqara viraqohai vo vatanaa vo vatanaaka ruqutu keha rumpintiri raampintirimaa ke vaunarave.

²¹ Te tipuqara viraqohai ohivata, vika tauvaqqaqaa vaiha ni variakavata, rumpintiri raampintirimaa kaunarave. Te tipuqara viraqohai iqoka *kaarivata*, vira aiqi utuakavata rumpintiri raampintirimaa kaunarave.

²² Te tipuqara viraqohai vaiintive, nahentive, naampaive, kontave, qaraaka vaiinti nahentive, ruqutuke vaunarave. Te tipuqara viraqohai quvaaraa vaiintive, varaatave, ruqutuke vaunarave.

²³ Te tipuqara viraqohai sipisipi qokave, sipisipive, ruqutuke vaunarave. Te tipuqara viraqohai naaho kaiqa vaiintive, vira kaiqa purumakauve, ruqutuke vaunarave. Te tipuqara viraqohai *kamaanira* vaiintive, qiafa vaiintive, ruqutuke vaunarave.

²⁴ Ho te Noravano Kotika tiha, Ne Isarerivata Iutaavata tave vaiqe, te Babironi iqoka vaiinti Ieruharemipi vaiha qora kaiqa varaara virara iriha, Babironi vatanaaka návota qoraiqama nimitarerave.

²⁵ Babironivauvo, are vaireve, ainqinavano ekaa vata maata qoraiqama kaira voqaarama variaro. Ho te Noravano Kotika ai navutaakama vauro. Te verara onkaiqihai ai utu vare aqu kaarirara are ihavano tatoqa kai ainqinara voqaarama vainarave.

²⁶ Babironi vatukavano anoma kero qoraiqama viraro viraqi naavu maaqa kaqataa oriva kirikairiro vairaro kia vovano ori viraqihairo vo ori varakero naavu kaqaanarove. Te Noravano Kotika minti turo, tiro.

²⁷ Ne vutora virini hiritaimanta navutaaka vira tave iqoka raquate. *Aanumaara/Noma* vuaga kaimanta vo vatanaa vo vatanaaka vira uva iri, Babironi vatanaaka hampata iqoka raqireka qeramate variate. Maa vatanaaka naaraate: Araraatave, Minive, Asakenaasive, timanta aniate. Iqoka qiata vaiinti vo kaama taivaro viva avuni viharo Babironi vika hampata iqoka raquarire. Kaintaaqa airitahaa vaintemake, ohi airitahaa vare animanta iqoka vaiinti vika tauvaqaqa vaarinte variate.

²⁸ Vo vatanaa vo vatanaaka naarama kaimanta vika qeramate Babironi hampata iqoka raquate. Midia vatanaa avuhainaukave, vika qiata vaiintive, vika vevaaraini varia vatanaakave, ekaa vika naarama kaimanta qeramate variate.

²⁹ Noravano Kotiva Babironi vata maata qoraiqama kareva auti vaivarora tiro, vi vatava geteharo ntiri ntiri i vaivo. Noravano uva vatero tiharo, Te Babironi vata maata qoraiqama kaariraro vi vatava aahara vataiqama viraro, kia vovanovata mini ho varianarove, tirave.

³⁰ Tavaate. Babironi vika iqoka vaiinti iqoka qaqrake, nái kempukaiqamake aututaa vatukaraqi qaqlima variavo. Vika kempukavano taiqa vimanta vika nahenti voqaara geteha variavo. Navutaaka vaantaavura qentinavu ekaa rukavu raakavumake, naavu maaqavata ihaqohai tatoqa kaavo.

³¹ Hihai hihai vokiaka vakaaka vare kante vuru avuhainaava vaiinti tiva ami tiha, Oho, navutaaka iqoka raqiba maa vatukara varaavo. ³² Vika namari taqe varianaini, voqi voqi vare, kapo vainaini vai ukaura qumpiarama kaamanta vira kaara tinavu iqoka vaiinti voqamake qete variavo, tiarave.

³³ Babironi vatuka viva vaireve, *uiti rirurumake/ ritatimake* vare varia vatukara voqaarama vaivo. Qamparakaama navutaaka *uiti* tegake ritatima kaantemake, vika ani Babironi qoraiqama kevarave. Te Isarerri Variqā Noravano Kotika ekaa kempuka vatauka mintima turo, tiro.

³⁴ Ieruharemini variaka mintima tiavo: Babironi vika avuhainaava tinavu haatara kero voqamakero tinavu qoraiqama timitairave.

Viva tinavu rumpa varero vonaini vuru kaimanta tenavu mini vairera, qumina kure voqaara vaunarave. Viva kunavano aantau nampiqama kaintema kero, tinavu nampiqama kairave. Viva tenavu vo haika vo haika koqe haika vataunara namakero, viraqaahairo tinavu vuru vihi kairave.

³⁵ Ieruharemiqi variaka tiha, Oho, Babironi vika tinavu qora okara autu timitaarave.

Ho qaqi kaimanta navutaaka vika náivota vohaa qaramake qoraiqama nimitaate. Qaqi kaivarō Babironi vika tinavu arukaa naareva vikaqaa variarire, ti variara.

³⁶ Vika minti tiavarō Noravano Kotiva Ieruharemiqi variakara tiharo, Ho iriate. Te ni mantaraini vaiha niqaa vuntu karerave. Te Babironini tuvi vai namarirave, aruvuhairo nte vai namarikave, ekaa aaharaqama karerave.

³⁷ Te Babironi vatuka qoraiqama kaariraro viraqi vo kanta vo kanta orivanoqai kirikairiro vaira qaakau vairiqai mini vi anivarave. Vokika vatuka vira taveha voqamake geteha ike mpo tiha nái kauqu runkinkiri ivarave. Kia vovanovata viraqi varianarove.

³⁸ Babironi vika qaraaka *raioninavu* noraiqaake uva tiantemake, uva ti variavo. *Raioni* naatinavu rairai tiantemake, vika uva ti variavo.

³⁹ Ho vika karara narara vaiqe te vika nivuqaa nora kara qerama nimitaari vika airi *uaini* namakeha vueraiqaaivi naarahamaqi vivi, vuru vaita aavata vivarave. Vika vaitaqi vivi, kia qaiqaavata himpivarave.

⁴⁰ Vaiintivano sipisipive memeraave arukareva ntita varero vintemake, te vikavata ntita vare vuru arukarerave, tiro. Noravano Kotiva minti tura.

Babironi vatuka qoraiqama vurara ihi tura

⁴¹ Naantiara Babironi vatukavano qoraiqama vuainarara iriha maantimake ihi tivarave:

Oh, navutaaka iqoka raqiba Babironi vatuka aatara kaavo.

Ekaa vo vatanaaka virara nai nora autu vataa vatukave tia vatukara navutaaka vira varaavo.

Oh, vate maa entara ekaa vo vatanaaka vi vatukara taveha tiha, Tinavu haatu ite vai haikava qovaraiqivo, tivarave.

⁴² Huvura namarivano auva nteharo ekaa haika aqukaintemake, navutaaka airitahaa Babironi vatukaqi raapamavi qoraiqama kevarave.

⁴³ Babironi vataini ekaa vo vatuka vo vatuka anomakero qoraiqama viraro, naavu maaqa kaqataa oriva vivaqai kirikairiro vairaro, kia vovanovata mini vairaro, kia vovanovata aaraini vi anianarove.

Noravano Babironi vika una variqa qoraiqama amitaainarara tura

⁴⁴ Noravano Kotiva tiharo, Te Babironi vika una variqa Belira* qoraiqama amitaariraro viva vo vatanaaka ia haikara muara varakero nampiqama kaira qaiqaa vuru vihi kaarire.

Naantiari vo vatanaa vo vatanaaka kia qaiqaa nai ofaa vare viva inaini vivarave. Vi entara Babironi vaantaavuravano hijintuanarove. ⁴⁵ Ti vaiinti nahenti, ne Babironi vatukaiqai ruqemake aniate. Ne nenta qaqi variqi virara iriha kante aniate. Hauri ti Nora Kotika arara itairava nivata qoraiqama kaantorave.

⁴⁶ Ne aaranahaina uva, vo uva vo uva iriha, kia qeteha variate. Vo ihi vo uvavano aaranahairo qovaraiqivaro, vo ihi vo uvavano qovaraiqi vairave. Nai ari nai ari i vai uvavave, avuhainaava vovano avuhainaara vo hampata iqoka raqi vai uvavave, vi uvava aaranahairo qaqiqai qovaraiqianarove.

⁴⁷ Ho vo enta anintaireqe te vi entaraqaa Babironi vika una variqa maraqura/varaha aututtaa haikara qoraiqama karerave. Te ekaa Babironi vataini variaka kaurira haika nimiari, navutaaka vika arukevo avara vo aaraqaa hijinti vaivarave.

⁴⁸ Noti mantaraihai vo vatanaaka Babironi vataini variaka vehi autu taiqa kareka animanta, vi entara naaruvavanove vatavanove ekaa viraqi varia haikaukave quaheha aakara ntevarareve.

⁴⁹ Babironi vika Isareri airitahaa aruke, ekaa vo vatanaa vo vatanaakavata arukaara kaara, vika hijinti taiqavi entava aumaiqivo.

⁵⁰ Ne Isareri kia Babironi vika iqoka paipenvano ni arukaika, kia Babironiqi varike viraiti, vaaka ruqemake kantama vuute. Ne niara vataini vahavata, ti Nora Kotikara noraiqaake iriha, leruharemi viraravata kia tauru kaate.

⁵¹ Ne Isareri tiha, Babironi vika Nora Kotira Naavuqi oriqete vira turuaraini qoraiqama kaara kaara, vo kiaka tinavuara qora uva tiamanta tenavu voqamake kauriha vauro, tiarave.

⁵² Ho vo enta anintaireqe te vi entaraqaa Babironi vika nai una variqa maraqura/varaha aututtaa qoraiqama karerave. Babironi vataini navutaaka teqa taaqama keka antura ntiha keke ti vaivarave.

⁵³ Babironi vika naaruvaini oru vaiha, kempuka naavu vo kaqake vaiqevata, te vokika qaqiqai nititaari vika vi naavurvavata vehi autu taiqama kevarave. Te Noravano Kotika minti turo, tiro.

⁵⁴ Ho iriate. Babironiqi vaiinti nahenti noraiqaake iqj rateha keke ti variavo. Navutaaka Babironi vata maata qoraiqama kaavarovo uva *nontantavano/otatavano* noraiqaakero vi ani vaiavo.

⁵⁵ Noravano Kotiva Babironiqi variaka vehi autu taiqa kaanarove. Huvura namarivano noraiqaakero auva ntaintemake, navutaaka Babironi vika hampata iqoka raqihaa noraiqaake aakara nte uvava Babironi vika keke ti uvaravata aatara kaanarove.

⁵⁶ Anomakero vehi autu nimitaairava vovano Babironi vika hampata iqoka raqireva anianarove. Viva Babironi iqoka vaiinti rumpa varero vika huruvata kinta kaantama kaanarove. Te Noravano Kotika, Variqavano qora kaiqa vare variaka ruquti vauraukave. Te Babironi vika ruqutiha avuqavumake nai koqaavata nimirerave.

⁵⁷ Babironi vika nora vaiintive, vika koqe avu aato vataakave, vika qiata vaiintive, vika iqoka vaiintive, te tenta arara ite vai *uaini kaapura* vika nimiariiramanta vika vi *uainira* namake vueraqaa vivarave. Viraqaahai vika ekaara vaita aavata vi, kia qaiqaavata himpivarave. Te Avuhainaauka Noravano Kotika ekaa kempuka vatauka minti turo.

⁵⁸ Babironi vaantaavura noraqora vaimantavata, navutaaka vira vataini ravantiaqa aquekevarave. Vaantaavura qentinavu nai vukai qentinavu vaimantavata, navutaaka ihaqohai viravata tatoqa aquekevarave.

Vo vatanaa vo vatanaaka vukaari utuke kaiqa vara taivaro vika kaiqavano qumi-naiqama vuanarove. Ihavano vika vo kaiqa vo kaiqa vara tera itama kaanarove. Te Noravano Kotika vi uvara turo, tiro.

Ieremaiaava uva vara kovaro Babironini vura

⁵⁹ King Sedekaiaava 4 ihiara Iutaqaa raqiki vau entara viva Babironini vireva uvapro vira kaiqa vaiinti vo, Neriaara maaqu Seraiaava vikantiro vura. Seraiaara naaqua

* **51:44:** Belira = Maadukira (Jer 50:2)

Maseaava vaura. Ho te Ieremaiaaka Seraiaara virara uva vara kera Iutaa Babironini variaka tiva nimiane tunara.

⁶⁰ Te vuku voqi naantiara Babironi vata maata qoraiqama vuaina uvvara, vo uva vo uva qara ntuva taunara ⁶¹ Seraiaara ami tiha, Are Babironini oruntera ekaa maa uvvara kaara ntuva kairamanta Isarer irika irtiate. ⁶² Minti tivakera Kotira aarehara tiane, Noravauvo, Are minti tianarave: Te maa vata maatara vehi auti taiqa kaariraro kia vaiintive, aantauvahive, viraqi vairaro ekaa enta viva qumina vatavanoqai varianarove tianarave, tiane.

⁶³ Ho Seraiao, are vuku viraqi vai uvvara kaara ntuva taiqakera, Kotiravata aarama taiqakera, ori vo varakera vuku viraqaa rumpakera varera muntu Iufaretisi Namariqi aqu kaane.

⁶⁴ Namariqi aqukera mintima tiane: Maa vukuva namariqi otinintemake, Babironi vikavata vataini tuvini kia qaiqaavata uritare vaivarave. Te Noravano Kotika vika qoraiqama nimitaari vika anomake kaavuntivarave, tiane.

Ho Ieremaiaava tu uvava maaqaahairo taiqero.

*Babironi iqoka vaiinti Ieruharemi varora
(2 King 24:18-25:7)*

52

¹ Sedekaiava 21 ihi varakova Iutaa avuhainaa vaiintiqama viro vahilo Ieruharemiqi 11 ihiara „Iutaqaqa“ raqiki vaura. Vira nova Hamataliva Lipina vatukaihainaava Jeremaiara raavuravano vaura.

² Jehoiakimiva qora okara autuntema kero, Sedekaiava vivavata Nora Kotira avuqaa qora okara auti vaura.

³ Iutaavata Ieruharemiqi vaukavata qora okara auti vaura kaara, Nora Kotira vogama kero arara itovaro viva ekaara vitini vi vaiinti nahentikara popohovaro vika nai avuqaahairo qaqqini vara kora.

Ho Sedekaiava kia Babironi avuhainaa vaiinti vevaaraini vaireva auti vaura kaara ⁴ Sedekaiava 9 ihi 10 tora Iutaqaqa raqiki vau entara Babironi vika King Nebukanesaava nai iqoka vaiinti ekaa ntita varero ani Ieruharemi vatuka ututumatero aaqaini vahilo nai seri naavu maaqa kaqatero vaura. Vika Ieruharemi vatuka ututumate viraqaa vaarinte raquare ti, vata quvike vuru vaantaavura tataaqna nte vaura.

⁵ Babironi vika Ieruharemi vatuka ututumate variqi anuvaro Sedekaiava 11 ihiara Iutaqaqa raqiki vau entara ⁶ vi ihira 4 tora 9 entaqaa Ieruharemiqi karavano ekaa taiqa uvavar vika kara neva kia vaura.

⁷ Vi entara Babironi vika vaantaavura hini mantaraini ravantiaqake vatukaqi oriqetora.

Mintumania iqoka vaiinti Ieruharemiqi vauka qetake entaqi vika ekaa ruqemake vura. Babironi vika Ieruharemi vatuka ututumate vaumantavata, avuhainara kaqava tataaqna qenti vo vaantaavura taaraqanta vaunaini vika ruqiare vevante, Ieruharemi ke Iotani Uqitaini vireka vura.

⁸ Mini vireka vumanta Babironi iqoka vaiinti King Sedekaiara avataqi uvavar viva Ieriko Uqitaini otu vumanta Sedekaiara vira iqoka vaiinti vika vira qaqrake ruqemake nariara nariara raumpirima vura.

⁹ Vika vumanta Babironi iqoka vaiinti Sedekaiara ravaaqavu vare Nebukanesaava Ripila vatukaqi vaunaini vuru kovaro viva viraqaa uva vatero *ko* tiva taiqa komanta ¹⁰ vika Sedekaiara maaqunavu ntita vare vuru Sedekaiara nai avuqaa aruke, Iutaa qiaata vaiinti vikavata ekaa arukora.

¹¹ Mintuma kovaro Nebukanesaava tumanta vika Sedekaiara avutantavata vauru kora. Vika vira avutanta vauruke *bareaasi seniqohai* vira aiqu kauqu rumpake vare vuru Babironiqi kovaro, viva mini karapuhi naavuqiqi variqiro viviro, vuru qutu vura.

*Kotira Naavu qoraiqama kora
(2 King 25:8-17)*

¹² King Nebukanesaava 10 enta 5 tora 19 ihiara Babironiqa raqiki vau entara, vaiinti vo Nebusaradaaniva Ieruharemini anura. Vi vaiintiva Nebukanesaaraqaa maimaraara raqiki vau vaiintiki qiaata vaiintivano vaura.

¹³ Viva Ieruharemini anintero, Nora Kotira Naavuvata avuhainaa naavuvata qumpiarama kero, ekaa Ieruharemiqi nora vaiinti vika naavuvata qumpiarama kero, ¹⁴ viraqaaahairo viva tumanta Babironi iqoka vaiinti vika Ieruharemi ori vaantaavura aututora ekaa rukavu raakavuma aqukora.

¹⁵ Nebusaradaaniva Ieruharemiqi qaqi vaukave, vehi vaiinti nahenti hini kukave, vo kaiqa vo kaiqa kankomake tave vaukave, rumpa varero Babironini vuru kora. Vokuka iqoka qaqirake Babironi vevaaraini vauka, viva vikavata ntita varero, Babironini vuru kora.

¹⁶ Viva ekaa vika Babironini vuru keharovata, Iutaa vokuka anomake vehiqamavi vauka vikaqai mini kero *uaini* naahoqaavata ekaa vo naahoqaavata raqikiate tura.

¹⁷ Babironi vika Nora Kotira Naavu avuni *baraasiqohai* aututo *pohitanta* aratora ravantiaqake rukavu raakavumake, Naavu naantegaraini *uiri kaarinavuvata* rukavu raakavumake, Varuva Namarive tu taverava *baraasiqohai* autu tora, viravata rukavu raakavumake, *baraasi* vira vare Babironini vuru kora.

¹⁸ Nora Kotira Naavuqi vira kaiqa vara amite vau haikara *baraasiqohai* aututora: kureve, havoreve, ova qimpaarave, tanuve, ekaa vo haika vo haikave, Babironi vika ekaa vi haikara vi haikara vare vura.

¹⁹ *Koriqohaise silvaaqohaive* aututo haikara, ihauri vaqitaa tanurave, vo tanu vo tanuve, ekaa vi haikara Nebusaradaaniva vare vura.

²⁰ Haaru Soromonuva Nora Kotira Naavuara iriharo aututo haikara, *baraasiqohai* aututo *pohitantavata*, Varuva Namarive tu taveravata, viraqaa vuntutaira purumakau *baraasiqohai* aututaara 12 navuvata, *uiri kaarivata*, *vika rukavu raakavumake* vare vura. *Baraasi* orivano voqamakero maara ntomantara ti, vika kia ho vira maara hirike tavora.

²¹ Kotira Naavu avuni *baraasiqohai* aututo *pohitanta* vukaivano vaireva, 8 mita vaura. Vitanta vaata ovenaaruma taiva vaireva, 5 mita 30 sentimita vaura. *Pohi* vitanta avutaqiqi kavaaka vauvaro vira pahivano vatoqiqama kero 8 sentimita vaura.

²² *Pohi* vitanta qiata *baraasiqohai* aututova vauvaro qiata vira vukaivano vaireva, 2 mita 20 sentimita vaura. *Baraasiqohai* airi *pomigraneti* tava ututumake naiqi naiqi vaataiqamake aututova vauvaro, vo *pohivata* vohaa qaramake vaataiqamake vatora.

²³ *Pohi* vo qiataini 100 *pomigraneti* tava aututova vaura. *Pohi* vira qiataini kaatara 4 navuqaa 96 *pomigraneti* tava autuke vatora.

Babironi vika Iutaa rumpa vare Babironini vuru kora

(2 King 25:18-21, 27-30)

²⁴ Nebusaradaaniva „Ieruharemiqi vahiaro,“ Kotira kaiqa vara amite vauka vika qiata

vaiinti Seraiaara ravaaqavu varero, Seraiaara vira vevaaraini vau vaiintira Sefanaira ravaaqavu varero, Kotira Naavu qentiqaa raqiki vauka taaramonavu ravaaqavu varero,

²⁵ Ieruharemiqi Iutaa iqoka vaiintiqa raqiki vau vaiintira vo ravaaqavu varero, Iutaa avuhainaara koqe avu aato ami vauka 7 navu ravaaqavu varero, Iutaa iqoka vaiinti naarama keharo vika nutu qara nti vau vaiintira vo ravaaqavu varero, Ieruharemiqi nora vaiinti 60 navuvata ravaaqavu kero varora.

²⁶ Nebusaradaaniva ekaa vi vaiintika ravaaqavu varero Babironi vika avuhainaava vaunaini Ripila vatukaqi ²⁷ Hamaati vataini vuru kovaro Babironi vika avuhainaava tumanta ekaa vika arukora. Ho Babironi vika mintimake „Iutaa vokuka aruke,“ vokuka rumpa vare näi vataihai vonaini vuru kora.

²⁸ Nebukanesaava maa vaiinti nahentika rumpa varero nai maaqaini vuru kora:

Viva 7 ihiara raqiki vau entara: Iutaa vatanaaka 3,023.

²⁹ Viva 18 ihiara raqiki vau entara: Ieruharemiqihairo 823.

³⁰ Viva 23 ihiara raqiki vau entara: 745.

Nebusaradaaniva ekaa vi vaiinti nahentika 4,600 rumpa varero Babironini vuru kora.

Jehoiakinira kuvantu kora

³¹ Ho Iutaa King Jehoiakiniva Babironiqi 37 ihiara karapuhiqama viro vau entara, Evili-Merodaakiva Babironi avuhainaava vaiintiqa viro, vi ihiara 12 tora 25 entaqaa viva Jehoiakinira koqema amiteharo vira karapuhiqihairo kuvantu kora.

³² Evili-Merodaakiva Jehoiakinira vikantiro koqe uva tivakeharo, vira koqe autuvata amuvaro, viva Babironiqi ekaa avuhainaaka vira hampata rumpatoka vikaqihairo Jehoiakinira autuvano avuni vaura.

³³ Jehoiakiniva qaqqini kuvantuviro vau entaraqaahairo viva karapuhi utavaaqa kia qaiqaa nonkiraitro, koqemakero vahiaro nai qaqqi vau entara Babironi avuhainaava naavuqi kara ne vaura.

³⁴ Jehoiakiniva koqema kero variarire tiro, Babironi avuhainaava tumanta ekaa Jehoiakiniva qaqqi vau entara vika vira monuve airairave ami vaura.

DANIERI (Daniel – Daniel)

Danieriva vau entaraqaahairo 600 ihi aitarovaro Ihuva vataini qovarama vura.

Ho Danieriva vau entara Babironihainaava King Nebukanesaava nai iqoka vaiinti hampata ani iqoka raquqiro viharo Ieruharemiqi vauka naatara kero vika airitahaa rumpa varero Danieriravata nai navunaaka hampata rumpa varero Babironini vuru kora.

Danieriva vi vatanaaka kaiqa vareharo viva una variqa nutu tuahere vauka hampata vaiharo kia Kotira uva qaqlira karaitiro, kempukaiqaa kero Kotira uva iriqiro viharo kia muaravata autraitiro, kia hampi kaiqavata vararaitiro, avuqavuqama kero kaiqa varaqiro vi vaura.

Maa vukuraqi Danierira uva Hini 1-6 vaivaro Hini 7-12 kia vairo.

Danierira nai navunaaka hampata rumpa vare Babironini vuru kora

¹ King Jehoiakimuvu Iutaini vaukaqaa taaramo ihiara raqikiqiro vuvaro, viraqaahairo King Nebukanesaava Babironi vatukaqaa raqiki vauva nai iqoka vaiinti hampata Iutaa vatanaaka ntaihareva anintora. Vika Ieruharemi vatuka ututumate ekaa vatuka viraqi vu aararavata kuaite vaura.

² Nebukanesaava vika ntaihareva anuvaro Noravano Kotiva vira qaqi kovaro viva iqoka raquqiro viharo Iutaqaa raqiki vaura King Jehoiakimura aatara kero, oru Kotira Naavuqi vato haikara, hini ku haikara varero vuru nai maaqaini nai una variqanavu naavuqi vatora.

³ Mintimakero viva nai avuhainaara naavuqi kaiqa vaiintiqa raqiki vaura Asapenaasirara tiharo, Iutaa vaiinti autu vataukave, avuhainaara vaiinti vira ankuqiraukave, are vikaqihaira qaraaka vaiinti vonavu ntita varera aniane. ⁴ Vinavuka vaatavano kia qoraigqama kero vairaitiro, koqe viri vaata vatauka vauha, vo kaiqa vo kaiqa ho taveka vauha, qaraaka sikuru okaravata vaaka tavekama variate. Mintimake koqe avu aato vateka vika homa ti avuhainaara naavuqi kaiqa vare vaivara, are tinavu Babironi uvavata qara nti okararavata vika numiqenarave, tiro.

⁵ King Nebukanesaava minti tivakero qaiqaa tiharo, Tenavu nora vaiintivano naaina kararave, *uainirave*, are vikavata nimiramanta namaqi vuate. Are vika tinavu okara taaramo ihiara numiqaqaa viramanta viraqaahai vika ti kaiqa varaqi vuate, tiro.

⁶ Minti tuvaro Asapenaasiva oru qaraaka vaiinti vonavu ntita vatora. Viva Iutaa ankuqihairo Danierira vo, Hananiaara vo, Misaelira vo, Asaraiaara vo, vinavuka ntitero anura. ⁷ Asapenaasiva qaraaka autu vinavuka ntava nimiteharo,

Danierirara *Beltesasaarave*,

Hananiaara *Sataraakirave*,

Misaelirara *Misaakirave*,

Asaraiaarara *Abetnegorave*, tura.

⁸ Mintuvaro Danieriva nai aatoqi irikero tiharo, Te kia Nebukanesaara karavata *uainivata* narerave. Vi karara Kotiva qioqama tai kararave, tivakero viva Asapenaasirara ti kahaqirage kia vi karara naare tuvaro ⁹ Kotiva Danierira kahaquvaro Asapenaasiva virara koqe vaiintive tivakeharo viva Danierira kahaqireva autiharo ¹⁰ Nebukanesaara aatu qeteharo Danierirara tiharo, Avuhainaava niara ne vi kararave vi namarirave viraqaima naate tiva tairave. Are kia vi kararave vi namarirave namaqira viraitira, naantiara are vira avuqaa oru vairaro viva ai viri vaata tavairaro kia koqe irera, vira kaara viva ti haruma kaanarave, tura.

¹¹ Ho Asapenaasiva Danieriravata vira navunaaka taaramonavuvata raqikiarire tiro, vo vaiinti kaamatova vaunaini Danieriva oruntero virara tiharo, ¹² Are kauqurutanta entama tinavu avatamakera tavareva, naaharavata qaqi namarivata tinavu timiraqe namaqi vuare.

¹³ Kauqurutanta enta aitarairara are tinavu viri vaatavata, Nebukanesaara kara neka viri vaatavata rairakera tavaane. Tavera, viraqaahira are tinavuvara ho vi karara namaqi vuate, kia vi karara namaqi vuate tiane, tiro.

¹⁴ Danieriva minti tuvaro viva ho mintima ivarave tivakero kauqurutanta enta varakero ¹⁵ tavovaro vinavuka viri vaatavano koqe iro vaumanta Nebukanesaara kara ne vaukavata naatara kora.

¹⁶ Mintuvaro viraqaahairo vi vaiintiva qaqi komanta vinavuka Nebukanesaara kara kia naraiti, naahoqai namaqi vi vaura.

¹⁷ Kotiva qaraaka vaiinti 4navu kahaqumanta vinavuka kankomake vi vatanaaka vukuqiraa kaiqave, vo okara vo okarave, tavamaqi viha ho tavora. Kotiva Danierira kahaquvaro viva vo vaiinti vo vaiinti taira tavora vira okara tuqantaakero yutukero nái tiva nimi vau vaintiva vaura.

¹⁸ Ho King Nebukanesaava taaramo ihi aitarairaque vi vaiintika tavaare tu entava anintovaro Asapenaasiva qaraaka vaiinti vika ntia varero Nebukanesaava vaunaini vuru kovaro ¹⁹ Nebukanesaava vika hampata uva tivaqiro viharo tavomanta Danierira vo, Hananiaava vo, Misaeliva vo, Asaraaava vo, vinavuka ekaa vo vaiintivata naatarake koqemake uva okara iri vauvau vauvaro viva vinavukara tiharo, Nenavuvata homa ti avuhainaara naavuqi kaiqa varevarave, tura.

²⁰ Nebukanesaava vinavuka vo uva vo uva irama nimiteharo tavomanta vinavuka koqe uvaqai vira nai tiva ami vaura. Viva tavovaro vinavuka avu aatovano koqema vauvaro vira vure vaiintive, quaha vare vaukave, hepi kaiqa tavokave, vika avu aatovata naataraka kora. Kia vi vataraqaa vinavuka avu aato aatarakaarirava vovano vaura.

²¹ Danierira Nebukanesaara kaiqa airi ihiara varaqiro viviro, Pesia avuhainaava King Sairusiva Babironi naatarako ihiraqaa kia qaiqaavata vira kaiqa varora.

2

Nebukanesaava taira tavora

¹ Nebukanesaava taara ihiara Babironiqa raqiki vau entara viva taira vo tavora. Viva taira tavero, viraqaaahairo airi avu aato utiharo kia ho vaitora.

² Kia ho vaitaraitiro, viva nai vure vaiintinavuve, quaha vare vaukave, hepi okara tavokave, opu makauqaa ampeqama keha naantiara qovaraiqaina haikara tave vaukave, vika vika naarama kero nai taira okara tiva timiate tumanta vika aninte King Nebukanesaara avuqaa himpite vauvaro ³ viva vikara tiharo, Te taira vo tave, viraqaaahai airi avu aato utiha vaunarave. Ne vira okara ti tiva timiqe iriare, tiro.

⁴ Minti tumanta opu makauqaa ampeqama keha tave vauka vika nái Araami uvaqihai tiha, Avuhainaao, are ekaa enta qaqi variqira vuane. Are taira tavaanara tinavu tiva timiraqe tenavu vira okara ai tiva amiare, ti.

⁵ Vinavuka minti tuvaro Nebukanesaava agao tiro, Te maa uvvara kempukaiqamake niara turo: Te taira tavaunara viravata vira okaravata ne ti tiva timiqe iriare. Ne kia ho ti tiva timivera, te tiari ni vaata vira-qaahai aiqu kauqu rumiki raamikimake, ni naavu maaqavata ruku raakurama kaivaro kirikairima vuanarove. ⁶ Te taira tavaunara viravata vira okaravata ne ho ti tiva timivera, virara iriha te vo haika vo haika ni nimi, nora autuvatama ni nimiainarave. Ho te taira tavaunara viravata vira okaravata ti tiva timiqe iriare, tiro.

⁷ Viva minti tumanta vika qaiqaa virara tiha, Mpo, avuhainaao, are taira tavaanara vira tinavu tiva timiraqe viraqaaahai tenavu vira okara ai tiva amiare, ti.

⁸⁻⁹ Vika minti tuvaro Nebukanesaava oho tiro, Te ni okara irima kauro. Ne tiha, Kaiqe tenavu una uva vira tiva amiqi vuariraro vo entanavu aitarairaro taira tavaarirava vi vau vairaro viva qutu viraque tenavu ho variare, ti variarave. Oho, te taira tavaunara ne kia ti tiva timivera, te ni ekaama arukararave. Te taira tavaunara ne ho ti tiva timivera, te niara tiha, Vika vira okaravata ho ti tiva timikama vaivarave, tiro.

¹⁰ Avuhainaava minti tumanta vika tiha, Aqao, are taira tavaanara, virara kia ho tenavu ai tiva amirarave. Kia maa vataraqaa vai vaiintiva vovanovata virara ho ai tiva amianarove. Avuhainaava vaiinti haaru vauka nái nantimake nora vaiinti vahavata, vika kia nái vure vaiintiarave, quaha vare vaukarave, opu makauqaa ampeqi vaukarave, vi uvvara vi uvvara tiva timiate ti vaurave.

¹¹ Mpo, avuhainaao, are tinavuara tenavu kia ho ai tiva amianina uvvara ti tiva timiate ti variaro. Kia vaiinti vovanovo ho ai tiva amianarove. Variqa vikaqaima vi uvvara ho ai tiva amivarave. Ho vika niaraini vaiha kia vaiinti hampata maa vataraqaa variavo, ¹² tuvaro Nebukanesaara voqama kero arara itovaro viva uva vaukarero nai iqoka vaiinti tara Babironiqa vo okara vo okara tave variaka ekaa aru taiqa kaate, tiro.

¹³ Minti tivakero uva vara komanta vira iqoka vaiintinavu oru vika arukareka ravaaqavuke ntiteha, Danieriravata vira navunaa vaiinti taaramonavuvata ravaaqavuke ntitora.

Kotiva Danierira taira vira okara umiqora

¹⁴ Iqoka vaiinti vikaqaa raqiki vauva Ariokiva avuhainaava tuntema kero, Babironiqa ekaa vo okara vo okara tave vau vaiintika ravaaqavukero ntiteha vauvaro, Danierira viva unaini oruntero koqemakero avu aato utukero vi vaiintira qihaaqama kero irero tiharo,

15 Nana kaarae avuhainaa vaiintivano tiharo vo vaiinti vo vaiinti arukaate tivo? tuvaro Ariokiva Danierira vi uvvara vutukero tiva amura.

16 Manti tuvaro Danieriva vaaka Nebukanesaava vaunaini oruntero tiharo, Mpo, avuhainaaao, are voqavata qaqi vairaqe te inaaraiqa varike viraqaahai are taira tavaanara vira okara ai tiva amiare, tiro.

17 Manti tivakero Danieriva anirantero nai naavuqi oruntero vi uvvara nai navunaa vaiinti taaramonavu Hananiaara vo, Misaelira vo, Asaraiara vo, tiva nimiro tiharo, 18 Nenavuvata Variqavano naaruvaini vaira aaraivarо viva tinavuara aaqurihama timiteharo avuhainaa vaiintivano taira tavaira tinavu qoqaa humiqairage te ho vira taira okara tiva amiariraro viva kia tinavuvata Babironi vaiinti vonavu hampata aru kaarire, tiro.

19 Danieriva manti tivakero entaqi taira vo tavora. Kotiva Nebukanesaava taira tavora vira Danierira qoqaa umiqovaro tavora. Mintuvaro viraqaahairo Danieriva Variqavano naaruvaini vaira vira autu tuahera keharo tiharo,

20 Kaiqenavu Kotira autu ekaa enta ekaa enta tuaheraqi vuare.

Vivaqaima ekaa vo okara vo okarara iri vaivave.

Vira kempukavano uritarakero vairave.

21 Viva hove tivarо vi entavave quara entave qovara i vairave.

Viva avuhainaa vaiinti vo kempuka amiharo, avuhainaa vaiinti vo vira kempuka taiqake vairave.

Vivama koqe avu aato vataaka koqe avu aato nimi vairave.

Vivama koqe avu aato nimimanta vo okara vo okara kankomake iri tave variarave.

22 Anoma kero kukeqavi vai uvvara viva qovaramake vairave.

Konkiraqi kukeqtatai haikara viva vira qaqi tave vairave. Viva vainaini voqamakero ataa i vaivaro vairave.

23 Kotio, are ti kaivaqaukavararaqaa raqiki variaravave.

Te ariara koqe tivakehamo ai autu tuahera ke vauro. Are koqe avu aato ti timihara, ti vaatavata kempukaiqama timitera iaro.

Tenavu ai aareha vo uva okara tinavu humiqaaane turara are tinavu uva irira, vi uvvara okara tinavu humiqararvera, te vi uvvara avuhainaa vaiinti ho tiva amirarave, tura.

Taira vira okara

24 Vo kaiqa vo kaiqa tave vauka Babironini vauka arukaane tiro, avuhainaaava vaiinti vo, Ariokira kaamatovaro Danieriva vi vaiintiva vaunaini oruntero tiharo, Kia vika arukaane. Are ti tivita varera vuru avuhainaa vaiintivano vainaini kairae te taira okara vira tiva amiare, tiro.

25 Danieriva manti tuvaro vaakama Ariokiva vira vita varero King Nebukanesaava vaunaini vuru kero virara tiharo, Iutaa vataihai rumpa vare aniakaqihai te vaiinti vo ranta kauro. Ho maa vi vaiintiva are avuhainaa vaiintivano taira tavaana okarara ai tiva amianarove, tiro.

26 Manti tuvaro avuhainaa vaiintivano Danierira vira autu vo Beltesasaara irero tiharo, Are hoe te taira tavaunara viravata, vira okaravata ti tiva timinarave? tiro.

27 Manti tuvaro Danieriva nai tiva amiro tiharo, Avuhainaaao, vure vaiintinavuve, quaha vaiintikave, hepi okara tave variakave, opu makauqaa ampeqi variakave, vikaqihairo kia vovano vi uvvara ai ho tiva amiarirava vaivo. 28 Variqa vovano naaruvaini vaiva, vivaqaima kukeqavi vai uvvara qoqaiqamake vaivave. Avuhainaaao, viva are taira tavaanara viraqohairo naantiara qovaraiqiaina haikara ai umiqairave. Ho are vaitehara taira vira tavaanara te vira ai tiva amirerave.

29 Avuhainaaao, are vaitehara taira tavehara naantiara qovaraiqiaina haikara tavaanarave. Kukeqavi vai uvvara vira okara qoqaiqamake vaiva, Kotiva, naantiara qovaraiqiaina haikara ai umiqairave.

30 Viva vi uvvara qoqaiqama kero ti humiqairave. Kotiva mintiharo, kia tiriara vira avu aatovano ekaa vaiinti avu aatovata uri aatarakero vaivama vaivo tiraitiro, viva ariara iriharо vi uvvara okara kankoma kero iri tavaarire tiro, vira ti humiqairave.

31 Avuhainaaao, are taira tavaararo ai avuqaa vaiinti maraqura/varaha nora qoravano takuqiharo vaivaro ai aatu voqamakero itairave.

32 Vaiinti viva vaireva, vira qiata kori ori koqera viraqohairo aututero, vira mimiravata kauquvata silvaa oriqohairo aututero, vira auhaini baraaasi oriqohairo aututero, 33 vira aiquantaa aini oriqohairo aututero, miani vira aiqu ataini ainiqohairovata aaqatai vataqohairovata aututairave.

³⁴ Are vi haikara tave variararo vate vira nora ori vovano, kia vaiintivano ventakai oriva naivano avataaviro onkaiqihairo tuviro miani vira aiqu ataa *ainiqohairovata* aaqataiqohairovata aututaira ruqutukero rukavu raakavuma kairave.

³⁵ Mintima kaivaro vaakama *ainivata*, aaqataivata, *baraasivata*, *silvaavata*, *korivata*, ekaa rukavu raakavuma vivaro konkomaiqama virave. Nora kuari itaivarao aaravau konkoma vaintema kero, vaiinti *maraqura/varaha* viva konkomaiqama vivaro, uvaivano utiharo konkoma vira vuqa kaivaro kia vaiinti *maraqura/varaha* viva voqavanovata qaqi vairave. Vi haikava ekaa taiqa vivaro vira ruqutukai orivaqai noruqamaqiro viviro, nora ainqina autuviro, ekaa vata maata mpiqakero vairave.

³⁶ Are taira vira mintimakera tavaanararave. Ho are qaqi kairaqe te taira vira okaravata ai tiva amiare. ³⁷ Avuhainaao, are ekaa hini avuhainaukavata naatara kera nai avuhainaava noravano varianararave. Kotiva naaruvaini vaiva, viva ai noraiqama kero nora kempukavata, nora autuvata, ai amirave. ³⁸ Ekaa vatainai variakave, ekaa aantauvahive uvirive, Kotiva vika ai kauquqi vataivara are vikaqaa raqiki varianararave. *Kori* qiatavano vaireva, arema vi qiatava variaro.

³⁹ Are raqikiqira viraro ai naantiara vo vatanaa vaiintivano noraiqamaviro raqikiqiro vuanarove. Viva raqikiqiro viharo kiama ai voqaantema kero kempukaiqama kero raqikianarove. Viva raqikiqiro viramanta viraqaahai vo vatanaaka naantiara qovarama vivaro vika avuhainaava, ekaa vo vata vo vataqaa raqikiqiro vuanarove. *Baraasiqohai* aututaira vira okara mintimama vaivo.

⁴⁰ Ekaanaini vo vatanaaka qovarama vivaro vika avuhainaava raqikiqiro vuanarove. *Aini* kempuka vaintema kero, viva kempukaiqama kero raqikiqiro vuanarove. *Ainivano* vo haika vo haika rauhaantima kaintemake, vika ekaa vo vatanaa vo vatanaaka avuni vaika naatarakeha vika kempukavata taiqakevarave.

⁴¹ Are tavaararo miani vira aiqu ataaavata kakahivata *ainiqohairovata* aaqatai vataqo-hairovata aututairave. Vira okara vaireva, vi vatanaaka raqikiqi vivi, viraqaahai rairavi hini kika kempukaiqamavi vaimanta hini kika kia kempukaiqamavi vaivarave. *Aini* aaqatai vataake autu taava kia kempuka vaintemake, vi vatanaaka raira vivaro vika kempuka hiniqai vairaro hini kia varianarove.

⁴² Vira aiqu kakahi *ainiqohairovata* aaqataiqohairovata aututaivaro vaintema kero, vi vatanaaka raqikiva hini kempuka vairaro hini kia kempuka varianarove.

⁴³ *Aini* orivata aaqataivata varakero aututaintemake, vi vatanaaka kia vohaa vatanaaka vairaiti, vika vo vatanaa vo vatanaaka vaiha kia vohaa vairaiti, vika rairavi vaivarave. *Ainivata* aaqataivata kia vohaa vaintemake, vikavata kia vohaa vaivarave. ⁴⁴ Naantiara vi vatanaaka raquqi vivaro naaruvaini vai Variqava avuhainaavaiinti vo qovarama kaanarove. Avuhainaava vainti viva raqikirava kia taiqa viramanta kia ho vo vatanaaka vira aatara kevarave. Viva ekaa vo vatanaa vo vatanaa vika avuhainaukavata naatara kero vika aru vehi autukero, viva ekaa enta ekaa enta raqikiqiro vuanarove.

⁴⁵ Are tavaararo nora orivano, kia vovano venta kaivaro naivano onkaiqihairo avataaviro tuviro miani vaiinti *maraqura/ varaha* ruqutu kero, *ainive*, *baraasive*, aaqataive, *silvaave*, *korive*, ekaa vi haikara rukavu raakavuma kairave.

Variqavano uritarakero vaiva, viva naantiara qovaraiqaina haikara ai tairaka umiqarave. Are taira tavaanara, te vira avuqavuqamake ai tiva ami, vira okaravata ququaama ai tiva amuro, tiro.

Avuhainaava vaiintivano Danierira koqaa amura

⁴⁶ Danieriva minti tuvaro King Nebukanesaava vatainai hiqinti viro Danierira quahama amitero nai kaiqa vaiinti nititero tihar, Danierira *ofaa* iha quara amite, koqe mura untavinara viravata quara amitaate, tiro.

⁴⁷ Minti tivakero viva Danierirara tihar, Ai Variqavano ekaa vo variqavata aatara kaiva vaiharo viva ekaa avuhainaava vainti vika Noravano vairave. Vivaqaima kia kankomake iri varia uvara qoqaa qovaramake vaivave. Te taira tavauna okarara are ti humiqaanarara ti, te ai Variqara minti tiro, tiro.

⁴⁸ Minti tivakero viva Danierira koqe haika, vo haika vo haika amiro, vira noraiqama kero Babironi *provinsiqa* raqikiane tivakero virara tihar, Te ai noraiqama kaarirara are ti koqe avu aato timi variaka vikaqaa raqikiharama variane, tiro.

⁴⁹ Minti tuvaro Danieriva nai navunaaka taaramonavu Sataraakirave, Mesaakirave, Abetnegorave, vinavukaravata iriharo avuhainaava vainti vira irovoro viva vinavukavata noraiqama komanta vinavuka Babironi *provinsiqi* vaiha vo kaiqa vo kaiqaqaa raqiki vauvaro, Danieriva naiqai avuhainaara naavuqi vaiharo vira kaiqaqaa raqikiharo vaura.

3

Nebukanesaava vaiinti maraqura/varaha vo autukora

¹ Vo enta King Nebukanesaava vaiinti *maraqura/varaha* nora qora vo *kori* oriqohai autu timitaate tumanta vira autu amitora. Vi haikava vaireva, virini 27 mita vauvaro tauriniara 3 mita vaura.

Nebukanesaava tumanta vika vi haikara vare vuru Babironi provinsi Dura Uqitaini vaavi ara amitora.

²⁻³ Mini vaavi ara amitovaro avuhainaara vaiintivano *maraqura/varaha* vira quahama amitareva iharo ekaa nai *kamaanira* kaiqa vaiinti naarama tora. Nai maaqunavuve, noraiqukave, vika muntuvi vaukave, *kamaanira* monuqaa raqiki vaukave, *iasikave*, vika muntuvi vau *iasikave*, ekaa vo *provinsi* vo *provinsiqaa* raqikukave, vikavata vaiha vi haikara vaavi ara amitora quahama amitaate tiro, King Nebukanesaava ekaa vika naarama tomanta hihai hihai vika aninte, *maraqura/varaha* vira avuqaa ruvaaqumavi vaura.

⁴ Vika ruvaaqumavi vauvaro avuhainaara uva vaiinti nahenti tiva nimi vauva, viva naveraitiharo, Avuhainaara vaiintivano niara mintima iate tivo: Ne vo vatanaaa vo vatanaaka, vo uva vo uva ti variaka, ⁵ ne vaiha iri vaimanta *aanumaara/noma* vuaqa kaimanta vokiakavata vo *musiki* vo *musiki* ruquti vaiha ihi hoqarama taimanta ne ekaa vatainai kankakaavi vaihami King Nebukanesaava *kori* vaiinti *maraqura/varaha* vaavi arataira, vira quahama amiteha vira autu tuaherahe variate.

⁶ Vovano kia vatainai kankakaaviro vira quahama amitero vira autu tuahera kairera, vi vaiintira vaakama ravaaqavuke nora iha itainaraqi aqu kaate, tiro.

⁷ Ho viva minti tumanta mini ruvaaqumavi vauka irumanta *musiki* hoqarama tomanta ekaa vo vatanaaa vo vatanaaka, vo uva vo uva ti vauka, vika vatainai kankakaavi vaiha King Nebukanesaava *koriqohairo* vaiinti *maraqura/varaha* vaavi aratora quahama amiteha vira autu tuaheraqi vi vaura.

Danierira navunaaka taaramonavuqaa uva vatora

⁸ Vi entara Babironi vatanaaka vonavu tiha, Kiae Iutaa vatanaakaqaa uva vataare, tivake vika orunte ⁹King Nebukanesaaraara tiha, Avuhainao, are ekaa enta qaqi variqira vuane. ¹⁰ Are avuhainaava vaihara vo uva vatera tiharo, *musiki* hoqarama taimanta ne ekaa vatainai kankakaavi vaiha *kori* vaiinti *maraqura/varaha* quahama amiteha vira autu tuahera kaate. ¹¹ Vovano kia kankakaa viro vira quahama amitarera, vi vaiintira ravaaqavuke nora iha itainaraqi aqu kaate, tianarave.

¹² Are minti tiaravata, Iutaa vatanaaka taaramonavu ai uva raqakaavo. Tota are Sataraakirave, Mesaakirave, Abetnegorave, noraiqama kaaramanta vinavuka Babironi *provinisiqaa* raqiki variarave. Vinavuka are avuhainaava tiva taana uvvara raqake kia ai variqanavu nutu tuahera karaiti, vinavuka kia vatainai kankakaavi vaiha are vaiinti *maraqura/varaha* vaavi arataanara quahama amitaavo, ¹³ tuvaro avuhainaava vaiinti vira voqama kero arara itovaro tiharo, Vi vaiintinavuka ravaaqavu vare ti avuqaa vuru kaate, tiro.

¹⁴ Mintuvaro viva vinavukara tiharo, Sataraakio, Mesaakio, Abetnego, quqaae te vatauna uvvara nenavu raqake kia ti variqanavu quahama nimiteha vika nutu tuahera karaiti, te *kori* vaiinti *maraqura/varaha* vaavi arataunara viravata ne kia vira avuqaa kankakaavi vaiha vira quahama amitaavo?

¹⁵ Oho, nenavu iri vaiqe te tiare. Aanumaarave, vo *musiki* vo *musikive*, rugutiha ihi hoqarama taimanta nenavu vaakama vatainai kankakaavi vaiha, vaiinti *maraqura/varaha* quahama amitehamo vira autu tuahera kaate. Nenavu kia mintivera, te tiari vaakama ninavu ravaaqavu vare nora iha itainaraqi aqukevarave. Vika ni mintima kaivaroe hoe variqa vovano ninavu ruaruama nimitaanarove? tiro.

¹⁶ Minta tumanta Sataraakivavata Mesaakivavata Abetnegovavata nai tiva ami tiha, Avuhainao, kia tenavu tentanavu auta ntirerave. ¹⁷ Tinavu nora iha itainaraqi aqu kaivera, tenavu kaiqa vara amite vauna Variqava viva homa tinavu ruaruama timitaanarove. Avuhainao, viva ai kauquqihairo homa tinavu ruaruama timitaanarove.

¹⁸ Viva tinavu qaqira kero kia ruaruama timitarer, maa uvvara kankoma kera iri vairaqe tiare. Avuhainao, kia tenavu ai variqanavu kaiqa vara nimitaraiti, are *kori* vaiinti *maraqura/varaha* vaavi arataanara, viravata kia tenavu kankakaavi vaiha quahama amitaraiti, kia vira autu tuahera karerave, ti.

Vinavuka arukaate tura

¹⁹ Minti tuvaro Nebukanesaava vinavukara nai voqama kero arara itovaro vira virivano naare ntanta uvaro viva nai kaiqa vaiintinavuara tiharo, Nora iha ite vairaqui qaiqaa qaiqaavata iha quarataivarо nai anomakero voqavata itaarie, tiro.

²⁰ Minti tivakero viva nai iqoka vaiinti anomakero kempuka vaukara tiharo, Ne taarama vinavuka rumpa vare muntu nora iha itairaqui aqukaate, tiro.

²¹ Minti tumanta viva tuntemake, vika Sataraakiravata Mesaakiravata Abetnegoravata rumpake kia vinavuka utavaaqave, vukai tavunave, tovaqave, qaqini vara karaiti, vi haikara hampata nora iha itoraqui muntu aqukora.

²² Avuhainaa vaiintivano kempukaiqama kero iha noraiqaake quarataate turara tiro, ihavano nai noraiqama kero ite vaumanta iqoka vaiinti vika taaramonavu muntu ihaqira aqukarare ti, vainto vuvaro, iha auruvano noraiqaa kero uriharo iqoka vaiinti vinavuka tatoqa aqukomanta ²³ naaquntaqohai rumpatoka Sataraakivavata Mesaakivavata Abetnegoravata iha avutaqai aquvura.

²⁴ Vinavuka iha avutaqai aquvuvuro Nebukanesaava vinavuka tavero vaaka himpiro nai kauqu runkinkiri iharo nai koqe avu aato ami vaukara tiharo, Quqaae tenavu taarama vaiintinavu rumpata naaquntava kia vaivaro ihavanovata vinavuka kiama tatoqake vaivo. Vaiinti vovata vaivaro vira virivano Variqa vaiinti viri voqaarama vaivo, tiro.

Taaramonavuara ihaqihai qaqini vaari ntaate tura

²⁶ Nebukanesaava minti tivakero viva oru nora sitopu vira qentiana vaharo naveraitharo, Sataraakio, Mesaakio, Abetnego, nenavu nai kantaqaq virini vai Variqara kaiqa vaiintinavuara variavo. Viraqihai qaqini aitarate, tumanta vinavuka qaqini aitarora.

²⁷ Mintumanta avuhainaa vaiinti maaqunavuve, *kamaanira* kaiqa vaiinti avuni vaukave, koqe avu aato ami vaukave, vika kia ihavano tatoqako vaiintinavuka tavareka ani ututumate vaura.

Vika tavovaro ihavano vinavuka qiata kaukivata kia aantauharama karaitiro, vinavuka utavaaqavata kia tatoqa komanta vika vinavuka uhiramake tavovaro kia vika vaataqaa-hairo iha muntavata ura.

²⁸ Mintuvaro Nebukanesaava tiharo, Kaiqenavu Sataraakira Misaakira Abetnegora vinavuka Variqa autu tuahera kaare. Vinavuka kempukaiqamake nai Variqara iriqi vuavaroma vinavuka Variqavano nai *enseli* vo atitaivaroma viva tuvuntero vinavuka ruaruama nimitaivo. Vinavuka te vatauna uvvara kia avataraiti tiha, Kia tenavu kankakaavi una variqa autu tuaherakaraiti, tenavu tentanavu Variqa autuqai tuaherakarerave, tivakeha kia nai qaqi variqi virara noraiqaake iriraiti, ne homa tinavu harukevarave tiarave, tiro.

²⁹ Nebukanesaava minti tivakero tiharo, Ho te qaraaka uva vo vataari iriate. Ekaa naato vatanaakaqhai nai taukae vo vatanaakae, vo uva tiakae, vika Sataraakira, Misaakira, Abetnego, vinavuka Variqara qora uva tivera, te tiari vika ravaaqavuke teqa taaqamake, vika naavu maaqavata rukuraakuramake vataate. Vi uvvara qaraaka uvama tivatauro. Vinavuka Variqa mpeqavano vaharo vinavuka ruaruama nimitaintema kero, kia vo variqavano ho mintianarove, tiro.

³⁰ Minti tivakero avuhainaa vaiinti viva Sataraakira Misaakira Abetnegora vinavuka noraiqama komanta vinavuka uri aatarake nora autu vare, Babironi *provinsiqi* vaiha *kamaanira* kaiqa varaqi vi vaura.

4

Nebukanesaava taira vovata tavora

¹ Ekaa vo vatanaa vo vatanaakave, ekaa vo uva vo uva ti variakave, vika vika iriate tiro, King Nebukanesaava maa uvvara varakero mintima tiro:

Te ni uva mantauro. ² Nai virini kantaqaqai vai Variqava nora kaiqa, vo kaiqa vo kaiqa ti humiqaimanta tavaunara, te vi uvvara ni tiva nimiari iriate.

³ Ike, Kotiva vo kaiqa vo kaiqa tinavu humiqe vaimanta tenavu vi kaiqara nora kaiqa tavehama kauqu runkinkiri i vauro. Vira kaiqavano vaireva, nora kaiqa mpeqa kaiqama vaivo. Viva ekaa enta ekaa enta raqikiqiro vuanarove.

Viva maa entara varia vaiinti nahentikaqaa raqikiqiro viviro, viraqaahairo viva ekaa naantiara naantiaraini qovaraiqi vaiinti nahentikaqavata raqikiqiro vuanarove.

⁴ Te Nebukanesaaka te tenta avuhainaara naavuqi vauraro kia vo haikavanovata ti qoraiqama timitaimanta te koqemakeha variqi vunarave. ⁵ Mintiaqi vi, vo enta te

vaiteha taira vo tavauraro ti voqamakero haatu itaimanta vaunarave. Te taira taveha ti voqamakero haatu itai haikara tavamaqì vunarave.

⁶ Te taira tave viraqaaahai himpi, Babironiqi ti koqe avu aato timi variakara taira vira okara tiva timiate ti, te vika naarauramanta ⁷ vure vaiintive, quaha vaiintive, opu makauqaa ampeqi variakave, hepi kaiqa vare variakave, vaana kaiqa vareha uva qovaramake variakave, vika vika ruuaqumavi ti aaqanto variamanta te taira tavaunara vika tiva nimuramanta vika kia ho vira okara ti tiva timiarave.

⁸ Ho ekaanaini Danieriva anintero ti aaqanto vaumanta te taira tavaunara viravata tiva amunarave. Te tenta variqa autu vora iriha, Danierirara *Beltesasaarave* tunarave. Te tavauraro tinavu variqanavu avu aatovano vi vaiintiraqì vairave.

⁹ Te Danierirara tiha, Beltesasao, are ti vure vaiinti vika qiata vaiintima variaro. Te kankomake iruraro kia tinavu qumina vaiinti voqaantemake varia variqauka, vinavuka aihovano ai avutaqima vaivo. Te tavaurara are ekaa kukeqtai uva okarara ho qovaramakeri ti variaravave. Te taira tavaunara ai tiva amiarirara are vira okara vuukera ti tiva timiane.

¹⁰ Te taintaqaqaa vaiteha maa tairara tavaunarave: Te tavauraro ti avuni nora katari vovano vairave. ¹¹ Vi katariva qampiqaqiro viviro ivaro, vira *amutuvano/turuvano* naaruvaini oruntaivaro ekaa vataini variaka vira ho taveva vairave.

¹² Vira marevano koqe mare vaivarō vira tavavata airi tava, ekaa vataini variaka ho hiqike neva vairave. Aantauvhivanō vira okaraini aumaqaaara variamanta, vo uviri vo uvirivano vira kantakaaraqì naavu kaqateha variamanta, ekaa qaqi variqì vi varia haikauka, vika vika vira tava hiqikeha ne variarave.

¹³ Te tenta taintaqaqaa vaiteha taira vira tavamaqì viha tavauraro naaruvaihairo *enseli* vo, maimaraara raqiki vaiva tuvuntero ¹⁴ neveraitiharo,

Ne maa katarira tuquke vira kantakaara teqà taaqamake, vira mare rapahiqamake, vira tavavata hiqike raantaupirima kaate.

Vira okaraini aumaqaaara varia aantauvhikave, uviri vika vira kantakaaraqì naavu kaqate variakave, ekaa vika ruhaaqi kaimanta vuate.

¹⁵ Ne katari vira tuquke, vira tuqaqaa *ainiqohaivata baraasiqohaivata* naavumate, tuqa vira qaqi kaivaro ukau hampata mini variarie.*

Vi „vaiintira“ qaqi kaivaro toqa varavuvano vira vaata putaiqama kaarire.

Vira qaqi kaivaro viva qaakau aantauvhali hampata niharo vika aanantero ukau namaqiro nuarire.

¹⁶ Vira qaqi kaivaro viva ⁷ ihiara kia vaiinti avu aato vararaitiro, aantauvhali avu aato varaarie.

¹⁷ Tenavu *enseli* maimaraara raqiki vaurauka vi uvvara tiva taatauke vataunarave.

Nai virin kantaaqaini vai Variqava, viva vaiharo avuhainauka vataini raqiki variakaaqaa raqiki vaiyave. Viva tarave nai amiataa i vaiintira, nora vaiintie, vehi vaiintie, kempuka vira amiraro viva noraiqama viro avuhainaava varianarove, tiarave.

¹⁸ Ho te taira tavauraura mintimakero vaivo, tiro. King Nebukanesaava minti tivakero viva Danierirara tiharo, Beltesasao, ho vira okara ti tiva timiraqe iriare. Ti koqe avu aato timi variakaaqihairo kia vovanovata vi uvvara ho ti tiva timivo. Kia tinavu qumina vaiinti voqaantemake varia variqauka, vinavuka aihovano ai avutaqì vairara tira, are homa vi uvvara okara ti tiva timinarave, tiro.

Danieriva taira okara vira tiva amura

¹⁹ Avuhainaa vaiinti viva nai taira tavora vira tiva amuvaro Danieriva, vira vo autu Beltesasaava, vi uvvara iriro vira okaravata kankoma kero irurara tiro, vira vaata qo itovaro viva uva tiarirava kia ho vaura.

Mintuvaro avuhainaa vaiinti viva virara tiharo, Beltesasao, are te taira tavauna okarara irihara kia qetaraitira, qaqi vira okara ti tiva timiane, tiro. Minti tuvaro Danieriva nai tiva amiro tiharo, Oho, avuhainaa, are taira tavaanara viravata, vira okaravata, kia ariqi vairaitiro, ai navutaakaqì variataarave.

²⁰ Are katarira tavaarava, vi katariva nora katari vaivarō vira *amutuvano/turuvano* naaruvaini oruntaivaro ekaa vataini variaka vi katarira ho taveva vairave.

²¹ Katari vira mare koqe mare vaivarō vira tavavata airitahaa vaivarō ekaa maa vataraqaa variaka vira ho neva vairave. Ekaa aantauvhali vira okaraini aumaqaaara variamanta vo uviri vo uviri vira kantakaaraqaa naavu kaqateha variarave.

* **4:15:** Katarira tiharo vaiintiara tuqantaakero ti vaura.

²² Avuhainaa, arema vi katariva, nora katari mpeqa katarivano variaro. Ai kempukavano noraiqamaqiro viviro imanta ekaa maa vataraqaa varia vaiinti nahentika ai kempuka tavaarave. ²³ Are tavaararo *enseli* vovano tuvuntero tiharo, Ne katari vira tuquke teqa taaqamake, vira tuqaqai qaqi ke, *ainivata baraasivata* varake vira tuqaqaa naavumate qaqi kaivarо ukauqi variarire. Ne vi vaiintira qaqi kaivaro toqa varavuvano vira vaata putaiqama kairaro vi vaiintiva qaakau aantauvahи hampata variqiro viharo 7 ihi vira kaarire, tirave.

²⁴ Avuhainaa, vi uvara okara maantimama vaivo: Nai virini kantaaqaini vai Variqava are naantiara variqira vina okarara tairakaai umiqairave. ²⁵ Vika valinti nahentiqihai ai ruhaaqi qaqini kaivara are qaakau aantauvahи hampata variqira vinarave. Are 7 ihiara variqira viharama purumakauvano ukau naintema kera, arevata ukau namaqira vihara, kia naavuqi vaitaraitira, ukauqiqai vaitaqira vi vairaro toqa varavuvano ai vaata putaiqama ke vairara variqira vinarave.

Are mintiaqira viraro 7 ihinavu aitarairaro ai avu aatovano kenko tirara viraqahaira are Kotirara mintima tinarave: Quqaama nai virini kantaaqaini vai Variqava, viva ekaa vaiintivano raqiki variaraqaa raqiki vaivave tiraro viva qaiqaa ai noraiqama kairara are avuhainaa vaiinti vainarave.

²⁶ *Enselivano* qaqi kaivaro tuqavano vataqi variarire ti uvara okara vaireva: Naantiara are Kotirara quqaama viva ekaa vataqaa raqiki vaivave tiraro viva qaiqaa ai noraiqama kairara are avuhainaa vaiinti vainarave.

²⁷ Avuhainaa, te koqe avu aato ai amiainara iriane. Qora aara qaqirakera koqe aaraqaa nuvaqira vihara vehi vaiinti nahentiara aaqrurahama nimitaane. Are mintiaqira virirae, are koqema kerama variqira vinarave, tiro.

²⁸ Danieriva tuntemakero vo enta King Nebukanesaava vauvaro ekaa vi haikava viraqaa qovaraiqura. ²⁹ Vooah ihi aitarovaro King Nebukanesaava Babironini nai avuhainaaara naavu qjata tanuqiraqaa niharo tiharo, ³⁰ Tavaate, Babironi vatukavano nora vatukama vaivo. Vaiinti nahenti ti mpeqa okara taveha ti hutu tuaherakaate ti, te tentavano maa vatukara autu kaunarave, tiro.

³¹ Viva vi uvara kia taiqa karaitiro, qaqi ti vauvaro naaruvhahiro uva vovano mintima tiro: King Nebukanesaao, te tiarirara iriane. Vate maa entarama Kotiva are raqiki variana kaiqara qaquinima vara kaivo.

³² Vaiinti nahenti vikaqihai ai qaqqini ruhaaqi kaivara are qaakau aantauvahи hampata vahira purumakauvano ukau naintema kera arevata ukau namaqira viraro 7 ihinavu aitarairire. Mintiraro ai avu aatovano kenko tirara are mintima tinarave: Quqaama nai virini kantaaqaini vai Variqava, vivama ekaa vaiintivano raqiki variaraqaa raqiki vaivave vaivo. Viva nai nimitaata i vaiintika vi kaiqara nimi vairave, tiro.

³³ Uvavano naaruvhahiro minti tuntemakero, vaaka mintura. Vi entaraqaa Nebukanesaava „vueraiqaa vumanta“ vika vaiinti nahentiqihai vira ruhaaqi qaqqini kovaro viva purumakauvano ukau naintema kero, ukau namaqiro vi vaura. Viva ukauqi vauvaro toqa varavuvano vira vaata putaiqama ke vauvaro vira kauhivano memora kauhui voqaara qampiqovaro vira kakahivano uviri kakahi voqaara vukai vaura.

Nebukanesaava Kotira autu tuahera kora

³⁴ „Nebukanesaava nai uva tivaqiro viharo tiharo,“ Te vueraiqamavi variqi vuraro 7 ihinavu aitaraimanta viraqahai te naaruva virini tave vauraro ti avu aatovano qaiqaa koqema vimanta vaunarave. Te nai virini kantaaqaini vai Variqara autuqai tuahera keha tiha,

Vivaqaima ekaa enta qaqi variqiro vi vaivave. Vivaqaima ekaa enta raqikiqiro vuuanarove.

Vaiinti nahenti qovaramavi variqi vi vuru taiqa vivaro viva raqikiarira okarava kia taiqa viraitiro, qaqi variqiro vuuanarove.

³⁵ Viva tenavu vataini vaura vaiinti nahentika taveharo vika qumina haika voqaarama variavo ti vairave.

Ekaa naaruvhaini variakave, ekaa vataini variakave, vika vira vevaaraini variavaro viva vikaqaa raqikiharo nai varaataa i kaiqara vira vairave.

Viva vo kaiqa varareva iraro kia vovano vira kauqu ho antuakanarove. Kia vovano virara nantiharae mintiaro tiraro qaqira kaanarove, turo.

Te Nebukanesaaka minti tivake Kotira autu tuahera kaunarave.

³⁶ Ti avu aatovano qaiqaa koqema vi entara vohaa vi entara „Kotiva, qaiqaa ti nora autuvata ti kempukavata timimanta te qaiqaa noraiqamavi avuhainauka vahia raqikiqiqi vi vaunarave. Vohaa vi entaraqaa ti koqe avu aato timi varia vaiintikavata, nora vaiinti

vonavuvata, ti rantake qaiqaa ti noraiqama kaamanta, te maa vataraqaa qaiqaa raqiki vaunarave. Ti kempukavano tota vaira viravata qaiqaa uri aatarakero vairave.

³⁷ Vate te Nebukanesaaka naaruvaini Avuhainaava vaira, vira autuma tuaherake vauro. Vira mpeqa okaravano uritarakero vairave, Viva ekaa kaiqa avuqavugama kero naitarama kero vare vairave. Nái autuqai tuaherake vaika, viva vika nutu homa vatainiqama kaanarove, tiro.

„Nebukanesaava minti tura..”

5

Belisasaava nora kara nora

¹ „Nebukanesaava qutu vuvaro vira maaqu Belisasaava vira vatuka varora. Vo enta entaqi King Belisasaava nai nora vaiinti 1,000navu naarama kero vika hampata nora kara namakero *uainivata* ne vaura.

² Vika *uaini* ne vuvaro Belisasaava nai kaiqa vaiinti vonavu nititero tiharo, Haaru ti qova, Nebukanesaava, Ieruharemimi Kotira Naavuqihairo vare anu *kaapura*, *silvaaqohai* aututaarave, *koriqohai* aututaarave, ekaa vi *kaapura* oru vara viri timiqe tevata tenta nora vaiintinavuvata tenta naatanavu vatamake viraqi *uaini* qihiakeha naare, tiro.

³ Belisasaava minti tumanta vika oru vi *caa p ura koriqohaiive*, *silvaaqohaiive*, aututo *caa p ura* vare viri nimumanta avuhainaava vivavata, ekaa vo kukavata vi *kaapura* varake viraqi *uaini* qihiakeha ne vaura.

⁴ Vika *uaini* namaqi viha una variqa, vo variqa vo variqa autu tuaheraqi vi vaura. *Koriqohaiive*, *silvaaqohaiive*, *ainiqohaiive*, *baraasiqohaiive*, katariqohai, qaqi oriqohaiive, aututo haikara vika Kotira *kaapuqi uaini* qihiake neha vi haikara autu tuahere vaura.

⁵ Minti vuvaro vate vira, vaiinti vuqa vovano qovarama viro uva vo, hanta poruvaqaa qara ntuvaqiro vi vaura.

Avuhainaava vuqa vira tave vuvaro ⁶ vira virivano vo qarama vuvaro viva voqama kero aatu itovaro aiqu kauqu ntiri ntiri i vuvaro vaura. „Vuqavano uva qara ntuva taiqa kero viraqaahairo tuquaakuma viro kia vaura..”

⁷ King Belisasaava neveraitiharo, Ti vure vaiintive, quaha vaiintive, hepi okara tave variakave, opu makau ampeqi variakave, ne ekaa vika naaramanta vaaka aniate, tumanta vika Babironini vo kaiqa vo kaiqa tavoka naarama komanta anuvaro avuhainaava vikara tiharo, Niqihairo vovano maa uvra ho kaara ntuva kero vira okaravata ti tiva timirera, te naare utavaaqa vo vira ami, *kori senivata* vira auntaqi ruvu amite, vira noraiqama kaariraro vi vaiintiva vo vataqaa raqikiqiro viharoma *nampa* 3 avuhaina vaiintivano varianarove, tiro.

⁸ Minti tumanta vira vure vaiintinavu vo kaiqa vo kaiqa tavoka aninte, vi uvra kaara ntuvake vira okara tiva amirare ti, tavavarro kia ho vaumanta vika qaqi vaura. ⁹ Vira kaara King Belisasaara voqama kero aatu itovaro vira virivano qaiqaavata vo qara i vuvaro vaumanta, vira nora vaiintinavu viraqi vauka kia vi uvra okarara ho tiva amiraiti, qaqi vaura.

¹⁰ Mintuvaro avuhainaava vaiinti vira nova voqi vahiaro uva *nontanta/otata* avuhaina vaiinti vivavata vira nora vaiintinavuvata ti vaura iriro, viva kara ne vau *rumura* viraqi oriqetero nai maaquara tiharo, Avuhainaao, are ekaa enta qaqi variqira vuane. Kia ai aatu itairaro ai viriyano vo qara i vairara variane.

¹¹ Are raqiki variana vataraqaa vaiinti vovano vaivarro viraqi variqanavu aihovano vairave. Haaru ai qova vahiaro tavaivarro vira avu aatovano variqanavu avu aato voqaara vairave. Ai qova King Nebukanesaava vi vaiintira noraiqama kaivarro viva vure vaiintive, quaha vaiintive, hepi okara tave variakave, opu makauqaa ampeqi variakave, vika qiaa vaiinti vairave.

¹² Vi vaiintiva vo okara vo kaiqa tave vaivave. Taira okarave, kukeqavi vai uvarave, kia kankomake iri varia uvarave, viva ekaa vi uvra okara vutukero tiarirava vairave. Are vo vaiinti atitairaro oru vira vita varero maini aniarire. Vira autu Danierirave. Ai qova vo autu nteharo Beltesasaaarave turave. Vi vaiintiva homa maa uvra okara ai tiva amianarove, tiro.

Danieriva vi uvra okara tiva amura

¹³ Minti tumanta vaakama oru Danierira vita vare vuru avuhainaava vaiinti avuqaa kovaro avuhainaava virara tiharo, Quqaae are Danierivave? Are ti qova ai maaqa Iutaihairo ravaaqavu varero viri kai vaiintivave? ¹⁴ Variqa vika aihovano ai avutaqai vaivara are vo okara vo kankomakera iriararo ai avu aatovano koqe avu aato vairave ti amanta irunarave.

¹⁵ Te tenta vure vaiintive, ti koqe avu aato timi variakave, naaramake maa uvara kaara ntuvake vira okaravata ti tiva timiate turamanta vika kia ho mintiavo. ¹⁶ Ariara viva homa kukegavi vai uvara okara qovaramake vairave, vokiaka kia kankomake iria uvara viva homa yutukero ti vairave, tiamanta irunarave. Are maa uvara kaara ntuvka kera, vira okaravata ho ti tiva timirera, te naare utavaaqa vo ai ami, *kori senivata* ai auntaqi ruvu amite, ai noraiqama kaarirara are *nampa* 3 avuhainaava vainarave, tiro.

¹⁷ King Belisasaava minti tuvoro Danieriva nai tiva amiro tiharo, Are ti timirera ina haikara nena qaqi tuatera, vi haikara vo vaiinti amiane. Te maa uvara qaqi kaara ntuvake, vi uvara okaravata ai tiva amirerave.

¹⁸ Avuhainaao, nai virini kantaaqaini vai Variqava, viva ai qora Nebukanesaara noraiqama kaivaro vira autuvata nora autu vaivarro viva nora vaiintivano vairave.

¹⁹ Kotiva vira noraiqama kaivarora tiro, viva avuhainaava vaiinti noravano vaimanta vo vatanaa vo vatanaakave, vo uva vo uva ti variakave, vira aatu qeteha variarave. Ai qova avuhainaava vaiharo vo vaiintinavu arukaataa ivaro vika aruke vairave. Viva vo vaiintinavu vehakuma nimitaataa ivaro viva vika vehakuma nimite vairave. Viva vo vaiintinavu autu noraiqama kaataa ivaro vika autu noraiqamake vairave. Viva vo vaiintinavu autu vatainai kaataa ivaro vatainai ke vairave.

²⁰ Viva variqiro viro, viraqahaairo viva nai mahutaqai tiharo nai tivatai uvaraqai avataqiro viharo, kia vo kiakaravata aqaurihama nimite vaira kaara Kotiva vira kempuka taiqakero, vira autuvata vatainiqama kaivarro vovano vira vataku varairave. ²¹ Quara qaqlini ruhaaqi kaantemake, vira vaiinti nahentiqihai ruhaaqi kaavarro vira avu aatovano aantauvahil avu aato voqara vaivarro viva qaakau donki hampata variqiro viharo purumakauvano ukau naintema kero, vivavata ukau neharo kia naavuqi vaitaraitiro, ahakaqi vaite vaivarro toqa varavuvano vira vaata putaiqama kaivarro vaita vairave.

Ai qova mintiaqiro vivaro, viraqahaairo vira avu aatovano koqe uvoro viva tiharo, Quqaama nai virini kantaaqaini vai Variqava vaiharo ekaa vaiinti nahentiqaa raqikiharo vivaqai vo vaiinti vo vaiinti noraiqamake vaimanta vika vaiinti nahentiqaa raqiki variarave. Kotiva qaqlini kai vaiintiva, vivaqai vaiinti nahentiqaa ho raqikiqiro vi vairave, tirave. ²² Ai qova minti tivakero nai autu vatainiqama kaivarro, are vira maaquvano virara iriharro viva intema kera mintiataara vaivarro kia are mintiraitira, nena autuqai tuahere variaro.

²³ Oho, are Noravano naaruvaqaa raqiki vaira autu vatainiqama kera, nena autuqai tuaherake variaro. Are vira Naavuqihai vare ania *kaapura*, vo *kaapu* vo *kaapu* maa *rumuraqi* vara viri kera, Kotira qoraiqama amitechera are nena nora vaiinti vikavata, nena naata vika vatamake, *kaapu* *viraq uaini* namaqi viha una variqa nutu tuaheraqii vuavo. *Koriqohaive*, *silvaqohaive*, *baraasiqohaive*, *ainiqohaive*, *katariqohaive*, qaqlini oriqohaive, aututaa haikava kia ho uva tiraitiro, kia ho uva iriraitiro, kia avu aato vatai haikava vaimanta ne una variqa vi haikara nutu tuaherake variaro.

Oho, Variqa vovano are qaqlini variqira vinarave, are qutu vinarave, are koqema vinarave, are qoraiqama vinarave, ekaa vi haikava vira kauquqi vaivarro, are kia vira autu tuahera karaitira, vira qoraiqama amite variaro. ²⁴ Vira kaarama viva vuqa vo varakaivarro vuqa viva maa uvara poruvaqaa qara ntuvka tairave.

²⁵ Maa uvara qara ntuvka taiva mintima tivo:

Mene Mene — Kaaranti Kaaranti

Tekel — Hirike

Parsin — Rairake

²⁶ Vi uvoro okara maantimakero vaivo:

Kaaranti: Kotiva are raqikiqira vina entanavura kaara ntuvakero taiqa kairave.

27 Hirike: Kotiva sikeriqaai ai hirikero tavaivarro ai maaravano kia ho vairave.

28 Rairake: Kotiva are raqiki variana vatara hini rairakero Midia vatanaaka nimiro, hini Pesia vatanaaka nimirave, tiro.

²⁹ Qara ntuvato uvoro vira okara Danieriva yutukero King Belisasaara tiva amuvoro viva vaaka nai kaiqa vaiinti tumanta vika naare tavuna vo varake Danierira nonku amite, vira autuqai *kori senivata* ruvu amitovaro Belisasaava vira noraiqama kovaro viva *nampa* 3 avuhainaava vaiintivano vaura.

³⁰ Vi entara entaqi vokuka King Belisasaara arukovaro ³¹ viraqahaairo Midia vatanaa vovano Dariusiva 62 ihi vara kova, vira vataku varero, vi vataraqaa raqikiqiro vi vaura.

¹ Dariusiva tiharo, Kaiqe te 120 vaiinti vonavu noraiqama kaari vika ti kahaqiha te raqikiaina vataro, vo vata vo vataqaa raqikiate, tiro.

² Minto tivakero viraqaahairo viva qaiqaa tiharo, Kaiqe te vaiinti taaramonavu kaama taari vinavuka 120 vikaqaa raqiki vaimanta vika kia muara vararaiti, avuqavuqama keha ti kaiqa vara timitaate, tivakero viva Danieriravata vaiinti votantavata kaama tora.

³ Ho Dariusiva tavovaro taaramo vinavukaqihairo Danierira kaiqavano uri aatarakero vauvaro, 120 vika kaiqavata uri aatarakero vaura. Minto varora tiro, avuhainaa vaiinti viva tiharo, Kaiqe Danierira qaiqaavata noraiqama kaariraro viva nora vaiinti vikaqaa raqikiarire, tiro.

⁴ Minto tivakero viva mintiare tiro, auti vaumanta vo vaiinti vitantavata, 120 vaiinti vikavata toihia tiha, Danierira tinavuqaa raqikiantorave. Kaiqenavu Danierira kaiqa ampeqamake taveha, vo uva rantake viraqaa uva vataare, tura.

Ho Danierira kia hampi kaiqa vararaitiro, kia qutaru monu vararaitiro, kia popoharо kaiqa vararaitiro, avuqavuqama keroqai kaiqa vare vaurara ti, vika kia viraqaa vate uvava ro ranta kora.

⁵ Viraqaa uva vateva kia vaumanta vika tiha, Viva qora kaiqa vare vairavauve, tenavu viraqaa uva ho vatararave. Ho Danierira vo variqa autu tuaherake vaivave. Kaiqenavu virara iriha uva vo rantake viraqaa vataare, ti.

⁶ Minto tivake vika vohaa ruvaaqumavi avuhainaa vaiintivano vauraqi orunte virara tiha, King Dariusio, are ekaa enta qaqi variqira vuane.

⁷ Tenavu vo provinsi vo provinsiqaa raqiki vauraukave, tenavu hininavu vika muntuvi vauraukave, tenavu hininavu kamaanira kaiqa vo kaiqa vo kaiqaqaa raqiki vauraukave, tenavu ekaa vohaa uva tivake vatauro.

Vi uvava maantimama vaivo: Are avuhainaa vaiintivano vahara uva vo vatera vaiinti nahenti vikara, Ne vohaa torara kia vo variqave vo vaiintive aaramaqi viraiti, tiqai haaramaqi vivaro vi torava taiqaarire. Ne vohaa tora viraqi vahia vo variqave vo vaiintive aarerera te qioqama tauro, tiane. Vovano are qioqama tena uvava raqa kairera, vira kaara are tiramanta vi vaiintira ravaaqavu vare muntu *raioni* varia *ruvuraqi* / *mpumpiraqi* vira aqu kaate.

⁸ Avuhainaao, Midia vatanaaka Pesia vatanaaka uva vate okarara iriharama are vi uvava vatera, nena autuvata vi uvaraqaa vatairaro vi uvava kempukaiqama viraro vovano vi uvava nunka kero vo uva vataarirava kia ho variarire, ti. ⁹Vika minto tuvaro King Dariusiva eo tivakero vi uvava vatero nai autuvata vi uvaraqaa qara ntuvatora.

¹⁰ Avuhainaava qaraaka uva vatora virara Danierira iriro viva nai naavuni oruntero vura. Naavu maarini *uintua* vovano Ieruharem mantaraini vauvaro Danierira oru *uintua* vaura mini qoqaa vaharo vo enta vo enta taaramo tataa tori kauru araviro Kotira aarontema kero, viva qaiqaavata vira aare vaura. ¹¹Viva Kotira aare vaumanta vi vaiintika orunte vira tavora.

¹² Vika tave, viraqaahai kante oru avuhainaa vaiintiara tiha, Quqaae are vo uva vatera nena autuvata vi uvaraqaa qara ntuvu taanarave? Are tihara, Ne ekaa vohaa torara kia vo variqave vo vaiintive aaramaqi viraiti, tiqai haaramaqi vivaro tora taiqaarire. Ne vohaa tora viraqi vahia ne vo variqave vo vaiintive aarerera qioqama tauro. Vovano ti uva raqa kairera, te tiari vika vira ravaaqavuke vare *raioninavu* variaraqi muntu aqukevarave, tianarave, ti.

Vika minto tuvaro avuhainaa vaiinti viva tiharo, Eo, te vi uvava quqaa vataunarave. Midia vatanaaka Pesia vatanaaka uva vataa okarara irihama te vi uvava vataunarave. Kia vovano vi uvava nunka kero vo uva vataarirava varianarove. Tevata kia ho vi uvava nunkake vo uva vataarirava varianarove, tiro.

¹³ Minto tumanta vika avuhainaa vaiintiara tiha, Iutaa vataihai ravaaqavu vare ania vaiintiva Danierira, viva kia ariara noraiqaakero irivo. Viva are uva vatera nena autu qara ntuvu taanara viraravata kia noraiqaakero irivo. Viva vo enta vo enta taaramo tataa nai variqa aaramaqiro vi vairave, ti.

¹⁴ Minto tuvaro avuhainaa vaiinti vira muntukavano qoraiquvaro viva Danierira kahaqiaina aarara rantakare tiro, qumina rantaqiro vuvaro kuarivano ruhunku vura.

¹⁵ Kuari aqu vumanta vika avuhainaa vaiintivano vaunaini orunte tiha, Avuhainaao, are iritaane. Midia vatanaaka Pesia vatanaaka uva vataa okarava maantima vairave: Avuhainaa vaiintivano vataina uvava, naie vo vaiintie kia ho vi uvava qaqini vara kevarave. Ekaarama vi uvava varianarove, ti.

¹⁶ Vika minto tuvaro viva Danierira kahaqiaina aarara rantehe tavovaro kia vauvaro avuhainaa vaiinti viva tumanta vonavu oru Danierira ravaaqavu vare muntu *raioni* vuraqai aqukora. Viraqi aqu kovaro avuhainaa vaiinti viva Danierirara tiharo, Mpo, are kaiqa vara amite variana Variqava, viva ai kahaqama amitaarire, tiro.

¹⁷ Minti tumanta vika ori nora varake *ruvu/mpumpi* nona tinta tovaro vovano evaara anintero ori qaqini varakero Danierira ruaruama amitaantorave tiro, avuhainaa vaiintivano vuka vatareva *iva/qume* viraqaa nai *ringiqohairo* ntavakero taatau tomanta, nora vaiinti vikavata nái *ringiqohai* mintura.

¹⁸ Ho avuhainaa vaiinti viva orurantero ani nai avuhainaara naavuqi vaharo kia vaituraitiro, kia kara naraitiro, kia nai *musiki* ruquti vauka naararaitiro, qaqi variqiro viro aatita kora. ¹⁹ Mintiaqiro viro aatita kero viva himpiro kantero *raioni* vika vaunaini oruntora.

²⁰ Mini oruntovaro vira muntuka qoraiquvaro aunta raqaivarо Danierira aarero tiharо, Mpo, Danierio, are qaqi variqiro vi vai Variqara kaiqa vara amite variarava variaro. Are enena kaiqa vara amite variara Variqava, viva ai ruaruamae, amitaivo kiae ruaruama amitaivo? tiro.

²¹ Minti tuvaro Danieriva nai tiva amiro tiharо, Avuhainao, are ekaa enta qaqi variqira vuane. ²² Ti Variqavano *enseli* vo atitaivarо viva tuyuntero *raioni* vika ti qoraiqama timitevorave tiro, vika no tinta kaivo. Ti Variqavano tavaimanta te vira avuqaa vaiha kia qora kaiqa vare vaunarave. Te kia aivata qora kaiqa vara amitaunarave. Virara iriharoma viva ti ruaruama timitaivo, tiro.

²³ Danieriva minti tuvaro avuhainaa vaiinti vira muntukaqihairo quahara haikavano qovariquvaro viva vaiinti vonavuara Danierira ori *ruvuqihai/mpumpiqihai* raraу vaari qaqini kaate tumanta vika viraqihai raraу vaari qaqini ke tavovaro kia vira vaata teqa taaqama kovaro vira vaatavano qaqi koqema kero vaura. Danieriva nai Variqara ti ruaruama timitaanarove turara tiro, Kotiva vira ruaruama amitora.

²⁴ Mintuvaro avuhainaa vaiinti viva vo vaiintinavu nititama kero tiharо, Danieriraaqaa uva vate vaiintika, ne vikavata vika naata vaintivata ravaaqavu vare, muntu *raioni* vairaqui aquakaate, tumanta viva tuntemake, ekaa vika ravaaqavuke muntu *raioni* vauraqi aqukora.

Aqukomanta vika kia vataqaa higintiraiti, qaqi kantaaqaini tuvi vaumanta *raioni* vaaka vutunte vika ravaaqavuke vuhaarivata kutu kautumake nama taiqa kora.

²⁵ Viraqaahairo avuhainaa vaiinti viva nai raqiku vaiinti nahentika vo vatainи vo vatainи vaukave, vo uva vo uva ti vaukave, vika vikaini qara varakero tiharо,

Te ni uva mantama nimitauro.

²⁶ Te niqaa raqiki vaurauka uva vo ni tiva nimiari ne vi uvara avataqi vuate. Ne vo vatainи vo vatainи vaiha Danierira Variqa aatu qeteha, virara noraiqaaake iriqi vuate, turo.

Viva qaqi variqiro vi vai Variqavave. Viva ekaa enta qaqi variqiro vuanarove.

Viva raqikiqiro vinara kia vovano vira vehiqamakero taiqa kaanarove.

²⁷ Viva vaiinti nahenti kahaqama nimiteharo ruaruama nimite vaivama vaivo.

Tinavuara nai okara kankomake tavaate tiro, viva nora kaiqa naaruvainivata maa vataraqaaavata vare vairave.

Viva *raioni* noqihairo Danierira ruaruama amitairave, tura. King Dariusiva minti tura.

²⁸ Ho vi entaraqaahairo Danieriva Dariusiva raqiki vau entaravata, Pesia vatanaa vaiinti Sairusiva raqiki vau entaravata, koqema kero variqiro vi vaura.

IONAA (Jonah - Jona)

Ionaava Kotira qaqirakero vonaini vura

¹ Amitaira maaqu lonaava vauvaro vo enta Noravano Kotiva vira tiva amiro ² tiharo, Are himpira nora vatuka Niniveni oruntera vi vatanaaka qora kaiqa vare varia uvara vika qoqaa tiva nimiane. Te tavauraro vika qora kaiqa vare varia okarava uritarakero vaivo, tiro.

³ Noravano Kotiva minti tuvaro Ionaava, Te kia mini virerave. Te qaqirake vonaini virerave tivakero, vo vatuka Tasisini vireva auti vaura. Viva Jopaini otuntero Tasisini vuaina *sipi* rantakero, *sipi* vira koqaa aqukero viraqi vaarintero tiharo, Te Nora Kotira qaqirake Tasisini oru vaierave, tura.

⁴ Ionaava minti tivakero *sipi* vaarintero vuvaro viraqaa hairo Noravano Kotiva tuvaro nora uvaivano nora namariqaa uti vauvaro aaronava novata uti vauvaro *sipivan* raqaviro taiga vuariraya aumaiqua.

⁵ Mintumanta *sipi* kaiqa varo vaiintika voqamake qete vaiha vinavuka nái variqa, vo variqa vo variqa naaramaqi vi vaiha, Tinavu kahaqiate, tivaqi viha, *sipivan* vuaqa ntaarire ti, vo *kaako* vo *kaako* viraqihai vara vaavi namariqi aqu aquma kora. Vika vo haika vo haika nora namariqi aquke vauvaro Ionaava *sipi* ataaqi otuntero vaita aavata viro vaura.

⁶ Viva vaite vauvaro *keptenivano* viva vaunaini otuntero tiharo, Nantivarae are qaqi vaite variaro? Himpira nena variqavata aarairaro viva tinavu kahaqiarire. Ai variqavano tinavuvara mpo ike tiva timiteharo tinavu vehakuma timitairera, kia tenavu gutu vuare, tiro.

⁷ Viva minti tumanta *sipi* kaiqa vare vau vaiintinavuka nai ire nai ireha tiha, Ta vaiintira kaarae maa okarava tinavuqaa qovaraiqivo? Kaiqe *satu* arukeha vi vaiintira autu ranta kaare, tivake vika *satu* arukeha tavovaro Ionaara autuvano qovarama vura.

⁸ Mintumanta vika tiha, Oho, are tinavu quqaa uva tiva timiraqe iriare. Ai okara kaarae maa okarava tinavuqaa qovaraiqivo? Are nana kaiqa varaaravave? Are taihairae aniaro? Ai maaqa tainie vaivo? Are ta vatanaavave? ti.

⁹ Vika minti tuvaro Ionaava vika nái tiva nimiro tiharo, Te Hiparu vatanaakave. Te Noravano Kotiva naaruvaini vai Variqara autu tuaherake vauraukave. Noravano Kotiva nora namarivata vatavata autukero vataivave, tiro.

¹⁰ Ionaava minti tivakero viva Nora Kotira uva qaqirakero vonaini vuare tu uvaravata vika tiva nimumanta iri, vika voqamake atuu itomanta tiha, Oho, are mintiharama qora kaiqama vara kaarao, ti.

¹¹ Vika minti tivake tavovaro nora namarivano voqavata *sipi* vira venta venta i vaumanta vika Ionaara ireha tiha, Tenavu ai nantia kaariraroe nora namarivano oti vaiqiro tirema kero varianarave? ti.

¹² Vika minti tuvaro Ionaava tiharo, Ne ti utu vare nora namariqi vara vaavi aqu kaivarao namarivano oti vaiqiro tirema variarire. Te virara kankomake irunarave. Te maini anunara kaarama aaronava vano niqi qovaraiqivo, tiro.

¹³ Ionaava minti tumanta vika kia vira namariqi aqu kaataa umanta vika tiha, Kaiqe namari rairaqui viha *sipi* vuru varuva auvhini kaare, tivake namari rairaqui viha tavovaro vika kaiqa varova kia ho aruvuvaro nora namarivano *sipi* vira qaqiqai anomakero venta venta i vaumanta ¹⁴ viraqaa hαι vika Nora Kotira aareha tiha, Oho, Noravauvu, tenavu aimi aare vauro. Tenavu maa vaiintira nora namariqi aqu kaarirara are kiama tinavuqaa uva vatehara tinavu haru kaane. Are tianantema keroma, aaronaa maava qovaraiqivo, ti.

¹⁵ Vika minti tivake Ionaara utu vare vara vaavi nora namariqi kovaro vaakama nora namarivano qaki qaki i vauva taiqa viro tirema kero vaura.

¹⁶ Mintumanta *sipi* kaiqa varoka voqamake qete vaiha vika vo *ofaa* Nora Kotira amiteha, nái kauqu ainqiqa aqukeha tiha, Mpo, tenavu ai kaiqaqai varaqi virerave, tura.

¹⁷ Ho Ionaara namariqi aqu kovaro Noravano Kotiva nora havuka vara kovaro vi havukava Ionaara nampiqama kovaro Ionaava taaramo enta entaqivata aatitoraqaa vata vira avutaqi vaura.

¹ Ionaava havuka auhaqi vahiaro nai Variqa Nora Kotira aarero ² tiharo, Noravauvu, te anomake qoraiqamavi vaurauka ai aauraurara are ti uva irira iaro.

Qutu vuaka varianaini te vaiha ai aareha ariara mpo ti kahaqiane turara are ti uva irira ti kahaqira iaro.

³ Are nora namariqi ti aqu kaaramanta te varuvaqi kupeqavi vauraro nora namari-vanu ti naavuma kero tiqaa kumpetaqi uriro takui vahiaro vi ani vairave.

⁴ Mintimanta te tiha, Oho, Kotiva nai avuqaahairo ti qaquirama kaivo. Mpo, te Kotira Naavu kia ho qaigaavata tavaainarave, turo.

⁵ Namarivano ti aqu kero raqutu kareva auti vaimanta te vauraro namarivano ti aqu ravaaqavu kaivaro namariqi vai ukauva ti qiatavau ovenaaruma kaimanta vaunarave.

⁶ Nora namariqi vai ainqinara vira auvoqi te otinuraro vevaraqi vai vatava ti ekaara ravaaqavu kareva auti vaimanta vaunarave.

Noravauvu, are ti Varigavano variaramanta te mini vaurara are nora varuvaqihaira ti tivita varaaramanta te kia qutu viraiti, qaqi vaunarave.

⁷ Noravauvu, te tiha, Mpo, te qutu vuarirava aumantoma vaivo, tivake viraqaahai te ariara irike ai aauraurara are nena Naavuqihaira ti uva irianarave.

⁸ Ike, una variqa autu tuherake variaka kia are aaqurihama nimitaana okarara iriarave.

⁹ Te kia vika voqaantemake vairaiti, te ihi tivakeha ariara koqeve tivaqi viha, vo *ofaa* vare ai iha quara amitarerave.

Te kauqu ainqiqaa aqukeha mintirerave tuna uvvara quqaa mintirerave.

Noravauvu, areqaima tinavu ruuaruma timiterava variaro, tiro.

¹⁰ Ionaava minti tivakero Nora Kotira aarovaro Noravano Kotiva tuvaro nora havukavano vuru aahara vataini Ionaara vihi kora.

3

Ionaava Niniveni oruntora

¹ Noravano Kotiva qaiqaa Ionaara tiva amiro ² tiharo, Are nora vatuka Niniveni oru vahara te ai tiva amuna uvvara vi vatanaaka tiva nimiane, ³ tuvaro Ionaava Noravano Kotiva tunte iro Niniveni vura.

Ninive nai nora vatukavano uvavarso vaiintivano vi vatukara ututuma kero taaramo entara vi anima kaarirava vaura.

⁴ Ho Ionaava Ninive vatukaqi oriqetero vohaa enta nuvakero, viraqaahairo viva naveraitiharo, 40 entanavu aitarairaro Kotiva maa vatukara vehi autu taiqa kaanarove, tiro.

⁵ Ionaava minti tumanta Niniveqi vau vaiinti nahentika tiha, Quqaama Kotiva mintianarove, tivake vohaa uva tivake tiha, Kaiqenavu tenavu ekaa vaiinti nahenti, nora vaiintivata inaara vaiintivata kara auramate, nihi utavaaqaqai nonku taariraro Kotiva tenavu qora aara qaqa kaainara tavaaraire, ti.

⁶ Minti tuvaro avuhainaa vaiintivano Niniveqi vauva, vivavata vi uvvara iriro viva nai avuhainaa taintaqaahairo himpiro nai koqe utavaaqa qaqlini varakero nihi utavaaqa nonkutero oru iha quarato hantaraqi oquiviro vaura. ⁷ Viva mintima kero vahiaro Niniveqi vau vaiinti nahentikaini uva varakero tiharo,

Te ni avuhainauka tenta nora vaiintinuataake ni qioqama teha niara mintima ti:

Ne ekaa kia kara naate. Vaiinti nahentive, purumakauuve, sipisipive, tenavu ni qioqama teha kia karavata namarivata naate, turo.

⁸ Ne ekaa kovaara utavaaqa nonkuteha, nenta purumakauqaave sipisipiqaaave, kovaara tavuna aqu nimiteha Kotira aaramaqi viha qora kaiqa, vo kaiqa vo kaiqa varera qaqrake, nai ruquti nai ruquti okararavata qaqa kaate.

⁹ Tenavu mintiariraro Kotiva tinavu arara itairava humpairaro viva tinavu vehi autu kareva inara qaqa kero, tinavu aaqurihama timitaanarove? tiro.

¹⁰ Avuhainaa vaiintivano minti tumanta ekaa vaiinti nahenti viva tunte uvvaro Kotiva tavomanta vika qora aara qaqa kora. Mintuvaro Kotiva tota tu uvvara qaqrakerovo vika aaqurihama nimiteharo kia vika vehi autu kora.

4

Kotiva vaiinti nahenti aaqurihama nimitora kaara Ionaara arara itora

¹ Kotiva vaiinti nahenti aaqurihama nimitora kaara Ionaara arara itovaro ² viva Kotira aarero tiharo, Noravauvu, te kia maini aniraiti, te tenta maaqaini variavauna entara quqaae te ariara viva mintianarove tiavaunarave? Virara irihama te qaqrake Tasisini ruqemake virera auti variavaunarave. Te kankomake irurara are vaiinti nahenti koqema

nimitehera vika aaqurihama nimite variara Variqavave. Ai araravano kia vaaka itaivaro ai muntukavano vaiinti nahentiaro voqama kero vaivara variaravave. Are vo haika kaara vaiinti nahenti vehi autu taiqa kareva ihara, vo avu aato irikehara kia vika vehi autu taiqake varianarave.

³ Oho, Noravauvo, ti qaqi kiraqe te qutu vuare. Koqemama te kia qaqi vairaiti, qutu vuataarave, tiro.

⁴ Ionaava minti tuvaro Noravano Kotiva aqao tiro, Kia virara ai arara itaarire. Ai arara itaarira haikava kiama ho vaivo, tiro.

⁵ Noravano minti tuvaro Ionaava Ninive vatuka mini kero vatuka aaqaini kuariavu urinaini oru oquiviro vaura. Viva haraara naavu kaqakero viraqi oquiviro vahiaro tiharo, Kaiqe vaiha tavaariraro nana haikavanoe Niniveqi qovaraiqianarove? tivakero vauvaro ⁶ Noravano Kotiva kuarivano vira tatoqa kaantorave tiro, viva tuvaro vaahi naaqlunta voqavaa qampiqatero Ionaara aqu amitovalo Ionaava vaahi virara quaha kero vira aumaqaaraqi koqema kero vaura.

⁷ Ionaava ho vauvaro vira qararaa Kotiva qaiqaa tuvaro toveqvano vaahi vira ne vauvaro vaahi viva tamunta vura. ⁸ Vaahivano tamunta vuvuro kuarivano uruvaro Kotiva kuahaara varakovaro uti vauvaro kuarivano noraiqaakero iteharo Ionaara qjata tatoqa kovaro vira kaara viva avu rira ura. Mintuvaro viva Kotira aareharo tiharo, Ti qaqi kiraqe te qutu vuare. Koqemama te kia qaqi vairaiti, qutu vuataarave, tiro.

⁹ Minti tuvaro Kotiva tiharo, Vaahivano tamuntavira kaarae ai arara itaivo? Ai arara itaarira haikava kiama vaivo, tiro.

Tuvaro Ionaava tiharo, Ti tirara itaarira haikava vairove. Ti tirara itairara tira, are ti qaqi kiraqe te qutu vuare, tiro.

¹⁰ Ionaava minti tuvaro Noravano Kotiva aqao tiro, Are kia vaahi vira ututera viraqaata raqikiraitira, are qaqi variararo vaahi viva naivano entaqi qampiqeharo noruqama viro vira qararaa entaqi tamunta vira, vira kaara are mpo ike ti variaro. ¹¹ Are vi haikara, qaqi qumina haikara mpo ike ti variaramantavata, te Ninivera mpo ike ti vauro. Ninive nora vatukavano vaimanta viraqi 120,000 vaiinti nahenti kia koqe okarave qora okarave ho rairake tavaaka variamanta sipisipivata purumakauvata airitahaa variamantara ti, te homa vikara ike mpo tiva nimitararave, tiro.

Noravano Kotiva minti turama.

MATIU

Matiuva Ihuva nurara tura

Ihu Karaitira anku

(Ruki 3:23-38)

¹ Ihu Karaitira anku maantima vaura:

Eparahaamivavata Devitivavata vitanta vira kaivaqaukatantama vaura.

² Eparahaamiva Aisaakira qova vauvaro

Aisaakiva Iekopira qova vauvaro

Iekopiva Iutaara vira qata vakaara qova vauvaro

³ Jutaava Peresika Saraaka qova vauvaro vitanta nova Temaava vaura.

Peresiva Hesaronira qova vauvaro

Hesaroniva Raamira qova vauvaro

⁴ Raamiva Aminadaapira qova vauvaro

Aminadaapiva Nasonira qova vauvaro

Nasoniva Saramonira qova vauvaro

⁵ Saramoniva Boaasira qova vaura. Boaasira vira nova Rehaapiva vaura.

Boaasiva Obetira qova vaura. Obetira vira nova Rutiva vaura.

Obetiva lesira qova vauvaro

⁶ Jesiva King Devitira qova vauvaro Devitiva Soromonura qova vaura. Soromonura nova tota Uraiaara naatavano vaura.

⁷ Soromonuva Rehoboamura qova vauvaro

Rehoboamuva Abiaara qova vauvaro

Abiaava Asaara qova vauvaro

⁸ Asaava Jehosafaatira qova vauvaro

Jehosafaativa Jehoraamura qova vauvaro

Jehoraamuva Usiaara qova vauvaro

⁹ Usiaava Jotaamura qova vauvaro

Jotaamuva Ahaasira qova vauvaro

Ahaasiva Hesekiaara qova vauvaro

¹⁰ Hesekiaava Manasera qova vauvaro

Manaseva Emonira qova vauvaro

Emoniva Josaiara qova vauvaro

¹¹ Josaiaava Jehoiakiniravata vira qatanavuvata qova vaura. Vi entara vo vatanaaka ekaa Isarerri vatanaaka rarauke ntita vare Babironini vuru kora.

¹² Jehoiakiniva Seatielira qova vauvaro

Seatieliva Serubabelira qova vauvaro

¹³ Serubabeliva Abiutira qova vauvaro

Abiutiva Eliakimira qova vauvaro

Eliakimiva Asora qova vauvaro

¹⁴ Asova Sadokira qova vauvaro

Sadokiva Akimira qova vauvaro

Akimiva Eliutira qova vauvaro

¹⁵ Eliutiva Eleasaara qova vauvaro

Eleasaava Mataanira qova vauvaro

Mataaniva Iekopira qova vauvaro

¹⁶ Iekopiva Iohepira qova vauvaro

Iohepiva Mariara vira vaativano vaura.

Mariava Ihura vatatora. Tenavu Ihurara Mesaihaarave tunara. „Karaitirave, Mesaiave, Kotiva atitai vaintirave, vohaa qaramakero vai uvara..”

¹⁷ Ihu Karaitira anku vaireva Eparahaamiraqaahairo Devitiraga vira kaivaqaukavara anku 14navu vaura. Devitiragaahairo vatuka vo Babironini rarauke ntita vare vuru ko entaraqaa vira kaivaqaukavara anku 14navu vaura. Babironini rarauke ntita vare vuru koraqaahairo Karaitiva qovaraiqu entaraqaa vira kaivaqaukavara anku 14navu vaura.

Iohepiva tavovaro Mariava vainti taiqama vura

¹⁸ Ihu Karaitira vatato okarava maantimama vairo: Vira nora Mariara Iohepira qaqi vaiririqama amitovaro kia vikantiro nuvaka Mariava tavovaro Kotira Maraqruravano vira vainti taiqama kora. ¹⁹ Viva vainti taiqama viro vauvaro vira vaativano Iohepiva koqe

vaiintivano vaiharora tiro, viva tiharo, Te vaiinti nahenti nivuqaa Mariara atitaariraro viva kaurira haika varaantorave. Kaiqe te vira evaara atitaariraro vuvarire, tiro.

²⁰ Iohepiva naiqai mintima kero iriro, vaiteharo taira tave vauvaro Noravano atitova *enseli* vovano qovarama viro tiharo, Devitira maaquo, Iohepio, kia qeteharama Mariara varaaane. Kotira Maraqravanoma vira vainti taiqama kaivo.

²¹ Ai naatavano qorainti vanti vuru vatatairara are vira autu reharama Ihurave tiane. Ihuva vaiinti nahenti kahagama nimiteharo vika qora kaiqa vare uvara nunka nimiteharo vika kuvantu nimitaainarara tira, are vira autu rehara Ihurave tiane, tiro.

²² Haaru Noravano nai paropeti vaiinti noqihairo tivato uvava vivauma variarire tiro, *enselivano* qovarama viro minti tura. Haaru Kotira uva qoqaiqamake vauva, paropeti vaiintivano mintima tiro:

²³ Naantiara kia vainti vataakero nina nahentiva vainti taiqama viro vainti vatataanarove. Vika virara Imanuerivave tivarave, tura. *(Aisaiaa 7:14)*

Imanuerira autu okara vaireva, *Kotiva tinavu hampata vairave*, tura.

²⁴ Iohepiva vaitoraqihairo himpiro viva Noravano atito *enseliva* tu uvara iriro viva tunte iro, Mariara qaqi varatora.

²⁵ Iohepiva Mariara qaqi varatero vaiharo viva kia vikantiro niraitiro vauvaro, Mariava qaqi variqi viro, vuru qorainti vanti vatavaro Iohepiva vira autu reharo, Ihurave, tura.

2

Vo okara vo okara tave vau vaiintinavuka Ihura oru tavora

¹ King Herotiva raqiki vau entara Mariava Betarihemini Iutia vataqaa vaiharo Ihura vatatora. Viva vira vatatero vaumanta opu makauqaa ampeqamakeha tave vau vaiintinavuka vevaihai kuari avu urinaihainaaka Ieruharemini ururora.

² Vinavuka Ieruharemini urure mini vauka ireha tiha, Vainti vo, Iutaa vatanaakaqaa raqikiaina vaintira tantoe vatataivaro vaivo? Tenavu kuari avu urinaini vaiha vira vaahoqura tavauro. Tenavu vi vaintira autu tuaherarera ururaukave, ti.

³ Vinavuka minti tuvaro King Herotiva vi uvara iriro, rantuqama viro airi avu aato uti vaura. Ekaa Ieruharemini vaukavata vi uvara iri vikavata airi avu aato utiha vauvaro ⁴ Herotiva Kotira kaiqa vara amite vau vaiinti vika noranavuvata, maara okara ti vau vaiintinavukavata, naaromanta vika ani ruvaaqumavi vauvaro viva vika irero tiharo, Taraqive vira nova *Mesaiaara* vatataaina vatukava vaivo? tiro.

⁵ Herotiva minti tumanta vika tiha, Betarihemini Iutia vataqaave. Haaru paropeti vovano maa uvara qara ntuvatero tiharo,

⁶ Betarihemini vatukao, Are Iutia vataini variaravave. Vaiinti nahenti ariara kia qumina vatukave tivarave.

Ariqihairo Nora Vaiintivano qovarama vuainarara ti, vaiinti nahenti ariara nora autu vataaa vatukavema tivarave.

Ariqihairo avuhainaa vaiinti vovano qovarama viro, viva Kotira vaiinti nahenti Isarerri vatanaakaqaa koqemra kero raqikiqiro vuanarove, turave. *(Maika 5:2)*

Haaru paropeti vaiintivano minti turara ti, tenavu tiha, Naantiara vi vaintira Betarihemini vataaanarove turo, ti.

⁷ Vika minti tuvaro Herotiva evaara vo okara vo okara tave vau vaiintinavuka naaramakero vinavukara tiharo, Tairentae vi vaahoqurava qovarama vivo? tiro.

⁸ Minti tumanta vinavuka vira tiva amuvaro iriro, viva vinavuka Betarihemini nititero tiharo, Nenavu vaaqikomake vi vaintira rantareka vuate. Nenavu vira rantake tavema vaakama tivata vira tiva timiqe tevata oru vi vaintira autu tuahera amitaare, tiro.

⁹ Herotiva minti tumanta vinavuka Herotira mini ke, oru vi vauvaro vinavuka kuari avu urinaini vaiha tavo vaahoqurava avuni viva naane oru viro vainti viva vauraqaa oru ravaaqavu viro vaura.

¹⁰ Vaahoqura viva viraqaa vaumanta vinavuka vaahoqura vira tave voqamake quahe vaura. ¹¹ Vinavuka naavuqi origete tavavaro vi vaintiruva nai nora Mariakantiro vaumanta vinavuka tavema vatakanta tori kauru aravi vaiha vira autu tuahereha vira quahama amitora. Vinavuka vira quahama amitema viraqahai vinavuka *kori* origohai aututo haikarave, koqe mura unta vuaina haikarave, koqe *ueri* vahaverave, vi haikara vi haikara utaqihai urequke amitora.

¹² Vi haikara urequke amite, mini vira hampata varike vaite vauvaro Kotiva tairakaa vinavuka tiva nimiro tiharo, Kia nenavu Herotira vuru tiva amiate, tumanta vinavuka himpi vo aaraqaa ururante nai maaqaini vurama.

Ihura vite ruqemake Isipini vurama

¹³ Vinavuka vuvaro Iohepiva vaite vauvaro Noravano atitova *enseli* vovano qovarama viro tairakaa vira tiva amiro tiharo, Himpira nena naatavata vaintivata ntita varera Isipi vataini aiqu aututera vuane. Mini oru vairaqe te naantiera vo uva ai tiva amiare. Herotiva ai vanti rantakero arukareva auti vaivo, tiro.

¹⁴ Minti tuvaro Iohepiva himpiro entaqiraara nai vaintivata nai naatavata ntita varero Iutia mini kero Isipini vura.

¹⁵ Mini oru variqiro vi vauvaro Herotiva qutu vura. Herotiva qutu vuvaro viraqaahairo haaru paropetivano tu uvava vivau vaura. Haaru viva Kotiva mintima tivo tiro: *Te Isipihai tenta Maaqu aaraariraro viva anianarove, tura.* (Hosea 11:1)

Herotiva tumanta airi vanti aru taiqakora

¹⁶ Herotiva vaiharo tavomanta kuari avu urinaihainaaka vira uva raqake kia tiva amiraiti vuvaro vira kaara vira voqamakero arara itovaro vaiharo oru vokuka nititero tiharo, Ekaa qoraanti vainti taara ihi varaakave, naati vainti kia taara ihi varaakave, Betarihemini variakavata, Betarihemni vira tataaqa variakavata, vika aru taiqa kaate, tiro. Viva vaahoquravano qovaraiqu entara kuari avu urinaihainaaka tiva amu uvvara iriharoo naati vainti taara ihi varaakavata, kia taara ihi varaakavata, aru taiqa kaate tura. ¹⁷ Vika aru taiqa kaate tuvaro haaru paropeti vaiinti Ieremaiaara noqihairo tu uvava vivauama vaura. Vi uvava mintima tiro:

¹⁸ Rama vatukaihairo noraiqaakero iqi rate vaina uvara vaiinti nahenti irivarave.

Tinavu taatova Reseriva nai naintivarara iqi rate vairaro vira naintivara kia qaiqaavata vairara ti, yokika vira muntuka kia ho kukuqama amitaivaro viva noraiqaakero iqi rate varianarove, tura. (Ieremaiā 31:15)

Isipihai orurante anura

¹⁹ Herotiva variro vuru qutu vuvaro Iohepiva Isipini vauvaro Noravano atitova enseli viva qaiqaa qovarama viro Iohepira tairakaa ²⁰ tiva amiro tiharo, Himpira nena vaintivata, vira noravata, ntita varera Isareru vata Iutia vataini anirantera vuane. Ai vainti arukareka iaka qutuma vuavo, tiro.

²¹ Minti tuvaro Iohepiva himpiro vaintivata, vira noravata, ntita varero Isarerini vireva viro.

²²Viva mini viharo iruvaro Akelausiva nai qora Herotira vatuka varero Iutiaqaa raqikin vauvaro Iohepiva vira aatu qetakero Iutiaini oru variarorave tiro. Manti tuvaro Kotiva tairakaa qaiqaa Iohepira tiva amuvaro viva kia Iutiaini viraitiro, qaqrakero ²³Karirini viro vatuka vo, Nasaretni nai naata vainti vataakero mini oru vaura.

Nasaretini oru vauvaro haaru Kotiva nai paropeti vaiintinavu noqihairo tu uvava vivauma vaura. Vi uvava Ihurara mintima tiro: *Vaiinti nahenti virara Nasaretihainaai vaiintive tivarave*, tura.

Ioniva namari nimi vauva tivato uvara

(*Maaki* 1:2-8; *Ruki* 3:1-18; *Ioni* 1:19-28)

3

¹ Vi entara Ioniva namari nimi vau vaiintiva anirero Iutiaini qumina vata kanta vaiharo vaiinti nahenti tiva nimiro tiharo, ² Kotiva vaiinti nahentiqa raqikiaina entava aumantoma vaimantara ti, ne nenta vaaqu kaiqa vare vaira qaqlira kaate, tiro. Ioniva minti tura.

³ Haaru Ioniva kia vau entara Aisaiaava paropeti vaiintivano vaiharo vi vaiintivava qovarama vuanarove tura. Aisaiaava Ionirara mintima tianarove turave:

Viva qumina vataini vaiharo naveraitiharo, Noravano vuaina aarara qerama amitema vira aara avuqavuqama amitaivaro viva vivauma ho vuarire tianarove, tura. (Aisaiaa 40:3)

„Aisaiaava haaru qumina vaka vi uvara tiva tovaro Ioniva anirero vi uvara tivatontemakero viharo vi uvara vaiinti nahenti tiva nimiqiro surama.„

⁴ Ionira utavaaqavano vaireva *kameri* quara kauki varakero aututo utavaaqava vauvaro viva *reti* naaquntavata tavaaranra rumpatora. „Viva kia karavata utukero naraitiro,“ viva korikavata, vaunkakavano namari nkurutoravata, vi kararagai neharo vaura.

⁵ Ioniva uva tiva nimi vaumanta vaiinti nahenti Ieruharemihaive, ekaa Iutiaihaiive, Iotani Namari hini hini mantaraihaive, vika hihai hihai ani ruvaaqumavi vайха⁶ vika nái qora kaiqa varora tiva qovaraiqamake vauvaro Ioniva Iotani Namariqi vaiharo vika namari nimi vaura.

⁷ Ioniva vika namari nimi vaiharo tavomanta Parasi vaiintinavuvata, Satiusi vaiintinavuvata, namari varareka viva unaini anuvaro viva vikara tiharo, Ne *ugahi/quaiha*

vaintima variavo. Kotiva vaiinti nahenti ntaihareva auti vaivarovava nivata ntaihaantorave ne aiqutute kantama vuate timantae ne maini te unanaini aniaivo?

⁸ Ne quaa qora kaiqa qaqa kareka auti vaivera, vate maaqaahai koqe kaiqaqai varaqi vuate. ⁹ Ne nenta auta ntiha tiha, Eparahaamiva tinavu kaivaqavave, tinavu qovave, vaimantara ti, tenavu homa vauro tivorave. Kotiva mintiatata irera, viva homa ni qaqira kero maa orinavuraqihairo Eparahaamira naintivara vara qovaraiqama kaanarove. ¹⁰ Kotiva katari tuqireva rori katari tuqiqi gerama taivo. Kia koqe tava iraina katarira viva teqqaqama kero ihaqi aqu kairaro ita vuuanarove, tiro.

¹¹ Ne qora aara qaqrake koqe aara vireka auti variamanta te ni qumina namarima aqu nimite vauro. Ti naantiaraini aniarirava ne namari varaaantema kero, Kotira Maraqua ni nimiro, iha itaainara voqaara viravata ni nimianarove. Viva Noravano ti haatara kaariravama anianarove. Te qumina vaiinti vaihara ti, te vira aiquni nonkutaainara kia ho vara vuruvi amitararave.

¹² Viva nai havore kauquqi tota varero raisi voqaara *riruruma/rirarima* kareva orurero *riruruma/rirarima* kero auru nai havoreqohairo vaqita varero vuru nai naavuqi vatero, viraqaahairo qumina rapa vaqita varero vuru kia qimpa vuaina iharaqi aqukairaro ita vuuanarove, tiro. Ioniva vi uvara turama.

Ioniva Ihura namari amura

(Maaki 1:9-11; Ruki 3:21-22)

¹³ Ioniva namari nimi vauvaro vi entara Ihuva Karirihiaro anintero Ioniva namari timiarire tiro, Iotani Namariqi Ioniva vaunaini otuntora. ¹⁴ Viva mini otuntovaro Ioniva Ihurara tiharo, Aqao, are namari ti timiataara vaivarama are tiriara namari ti timiane ti variaaro, tiro.

¹⁵ Ioniva minti tuvaro Ihuva Ionira nai tiva amiro tiharo, Vate homa ti qaqi kairage te ai namari varaa. Tetanta mintihama Kotiva titantara mintiate tina kaiqara ho varaaainarave, tiro. Ihuva minti tuvaro Ioniva eo tivakero Ihura namari amura.

¹⁶ Namari vira amuvaro Ihuva namariqihairo qaqqini vaarintovaro vaakama naaruvalo qantua vuvaro Ioniva tavovaro Kotira Maraqua ravano mirura voqaara tuviro Ihuraqaa tuvuntovaro ¹⁷ naaruvalihairo uvavano tiharo, Maa ti Maaquve. Ti muntukavano virarama vaivo. Te virara quahehamo vauro, tiro. Tura.

Sataaniva Ihura avateharo tavora

(Maaki 1:12-13; Ruki 4:1-13)

4

¹ Ihuva namari varovaro Sataaniva vira avateharo irama amitaarie tiro, Kotira Maraqua ravano Ihura vita varero kia vaiintivanovata vaunaini qumina vata kanta vuru kora. ² Vuru kovaro Ihuva mini vaiharo 40 entanavu variqiro viharo kia karavata naraitiro, qaqi narara vaura.

³ Ihuva 40 entanavuara narara vauvaro Sataaniva anirero virara tiharo, Are quaa Kotira Maaquvano vairera, maa orinavurara tiraro mpareti kuqu virara naane, tiro.

⁴ Minti tuvaro Ihuva nai tiva amiro tiharo, Aqao, Kotira vukuqi mintima qara ntuva tova tiharo,

Vaiintivano nai kara naainararaqai noraiqaakero iriqiro virava kia ho qaqi variqiro vuuanarove. Viva ekaa Kotira noqihairo tina uvvara iriqiro viharo homa qaqi variqiro vuuanarove, turave, tiro. (Lo 8:3)

⁵ Ihuva minti tuvaro Sataaniva vira vita varero Kotira vatuka Ieruharemini Kotira Naavu qita maariqaqa vuru kero vira viraqaa vara himpimatero ⁶ tiharo, Are quaa Kotira Maaquvano vairera, maaqaahaira mia vatakanta aquvuane. Kotira vukuqi mintima qara ntuva tova tiharo,

Kotiva ariarao tiro, viva tiramanta enseli vika ariqaa koqemake raqikivarave, turave. Are nena aiqutute ruteqa kerorave ti, enseli vika nái kauquqohai ai tuataqi vivarave turave, tiro. (Ihi 91:11-12)

⁷ Sataaniva minti tuvaro Ihuva nai tiva amiro tiharo, Aqao, Kotira vukuqi uva vo qara ntuva tova mintima tivo: *Noravano ai Variqavano vairara tira, kia vira avataane, turave, tiro.* (Lo 6:16)

⁸ Ihuva minti tuvaro Sataaniva vira vita varero ainqina noraqaa vuru kero ekaa avuhainaa vaiintinavu raqiki vau vata maataravata, vi vata maataraqaa kempuka haikaqohai aututo haikaravata umigero tiharo, ⁹ Are vatainai tori kauru aravira ti hutuqai tuahera timitairera, te ekaa maa vi haikara aimararave, tiro.

¹⁰ Minti tuvaro Ihuva nai tiva amiro tiharo, Aqao, Sataanio, niaraini vuane, Kotira vukuqi qara ntuva tova mintima tivo:

Noravano ai Variqavano vairara tira, are viraqai kaiqa vara amiteharama vira autuqai tuaheraqira vuane, turave, tiro. *(Lo 6:13)*

¹¹ Ihuva minti tuvaro Sataaniva vira mini kero yumanta *enseli* vika tuture Ihura koqemake kahaqama amitora.

Ihuva Karirini vaiharo nai kaiqa hoqarama tora
(Maaki 1:14-15; Ruki 4:14-15)

¹² Ihuva vaiharo irumanta Ionira ravaaqavuke vuru karapuhiqama kovaro viva „Iutiaini vaura mini kero“ anirantero Karirini vura.

¹³ Viva mini oruror kia nai maaqa Nasaretini vairaitiro, qaqira kero Kapenaumini variqiro vi vaura. Kapenaumi vatukavano Kariri Varuva auvahini vaura.

Vi vatava vaireva Sebuluniravata, Napataariravata naintivara vika vatavano vaura.

¹⁴ Ihuva mini oru vauvaro haaru Aisaiaava Kotira uva qoqaiqamako uvava vivauma vaura. Haaru paropeti vaiinti Aisaiaava mintima tiro:

¹⁵ Te Sebulunira vataravata, Napataarira vataravata, tirerave.

Vi vatava varuva auvahini vairave. Iotani Namari vaivarao vi vatava veranto vaimanta vi vatara Kariri vataqaa vo vatanaa vo vatanaaka variarave.

¹⁶ Vika konkiraqi variqi vi, viraqaaahai ovavano noraiqaakero itaainara tavevarave. Vika konkiraqi variavaro qutu sua okarava vika ravaaqavu kaimanta variavaro, viraqaaahairo ovavano iteharo aatita nimitaanarove, tura. *(Aisaiaa 9:1-2)*

¹⁷ Vi entaraqaaahairo Ihuva nai kaiqa hoqarama tero vaiinti nahenti tiva nimiqiro viharo tiro, Kotiva vaiinti nahentiqaa raqikiaina entava aumantogama virara ti, ne qora aara qaqira kaate, tiro. Turama.

Ihuva vaiinti taaraqanta taaraqanta naaramakero ntita varora
(Maaki 1:16-20)

¹⁸ Ihuva Kariri Varuva auvahianta aitareharo tavomanta vaiinti vovano nai qatantiro mini vaura. Vira vakaava Saimoniva vira autu vo Pitaava vauvaro vira qata Èntaruva vaura. Vitanta havuka kaiqa vare vautantara ti, vitanta namariqi vahe re vaura.

¹⁹ Vitanta vahe re vauvaro Ihuva vitantara tiharo, Netanta ti avataqi aniate. Netanta havuka vahe ravakeha varentemakema, netanta ti avataqi viha vaiinti nahentima ntitevarave, tiro. ²⁰ Ihuva minti tumanta vitanta vaakama náitanta vahe mini ke, Ihura avataqi vurama.

²¹ Vitanta vira vataake vuvaro Ihuva voqavata oru viharo tavomanta vaiinti votanta Sebedira maaqtanta Iemika Ionika vaura. Vitanta votuqi viha náitanta qora Sebedira vataaka vahe rugemavura haqire vauvaro Ihuva vitanta naarama komanta ²² vitanta vaakama náitanta votuvata náitanta qoravata mini ketanta Ihura avataqi vurama.

Ihuva rovara varokavata koqema nimitre vaura
(Ruki 6:17-19)

²³ Ihuva Karirini vo vatuka vo vatuka vi aniharo vika maara naavuqi oriqetero vaiharo vakaaka tiva nimiqiro Kotiva vaiinti nahentiqaa raqikiaina vakaakara, koqe vakaaka vika tiva nimiqiro viro, vo rovara vo rovara varokave, vo haika vo haikavano vaata qoraiqama kokave, viva vika vika koqema komanta ho vaura.

²⁴ Ihuva mintiaqiro vi vauvaro vira uvavano ekaa Siria vataini vi ani umanta vi vatanaaka nái vatukaihai vaiinti nahenti vo rovara vo rovara varokave, noraiqaake aiha vukave, vaana hampata vaukave, vaata raqikika raqikika u rovarara varokave, hini vaata qutu ravavu vaiintikave, vika ekaa vinavuka ntita vare Ihuva vaunaini vuru kovaro Ihuva vinavuka koqema komanta ho vaura.

²⁵ Ihuva aaraini vi vaumanta vaiinti nahenti Karirihaiive, Dekapolisi vatukanavuqihaiive, Ieruharemihaiive, Iutiaihaiive, Iotani Namari hini mantaraihaiive, vika hihai hihai ruvaaquumavi vira avataqi vura.

5

Ihuva ainqinaqaa vaiharo vakaaka tiva nimura

¹ Ihuva vaiharo tavomanta airi vaiinti nahenti ruvaaquumavi vauvaro viva ainqinaqaa oru oquivi vaumanta vira vaintinavuata viva vaunaini ruvaaquumavi vauvaro ² Ihuva vakaaka hoqaramatero viva nai vaintinavu tiva nimiro tiharo,

³ Te Kotiva i haikarara vehiqamama vauro ti varia vaiinti nahentika vika vaivaro Kotiva vikama koqema nimitaanarove. Kotiva vikaqaa raqikiqiro vi vairamanta vika vira vaiinti nahentima vaivarave.

⁴ Muntuka qoraiqira iqí rate variaka, vika vaivaro Kotiva vikama koqema nimitaanarove. Kotiva vikama muntuka kukuqama nimitaanarove.

⁵ Tiremakeha vaiha kia náivata qoraiqama nimite variaka vika vaivarava Kotiva vikama koqema nimitaanarove. Kotiva maa vatarava vika kaama nimitairara ti, vika vi vatarava varevarave.

⁶ Avuqavu ni vai okarara antuqa arira ni variaka, vika vaivarava Kotiva vikama koqema nimitaira vikama ho vaivarave.

⁷ Aaqurihama nimite varia vaiinti nahentika, vika vaivarava Kotiva vikama koqema nimitaanarove. Kotiva vikama aaqurihama nimitaira vaivarave.

⁸ Quqaaqamake Kotirraqi avataqi vi varia vaiinti nahentika, vika vaivarava Kotiva vikama koqema nimitaanarove. Vi vaiinti nahentika Kotira tavevarave.

⁹ Antuareha vaa vaa ti varia vaiinti nahentika, vika vaivarava Kotiva vikama koqema nimitaanarove. Kotiva vikarama ti vaintivarave tirama vika vaivarave.

¹⁰ Kotirrao tiha avuqavu ni variavarava vira kaara qoraiqama nimitaqi vi varia vaiinti nahentika, vika vaivarava Kotiva vikama koqema nimitaanarove. Kotiva vikaqaa raqikiqiro vi vaira vika vira vaiinti nahentima vaivarave.

¹¹ Ne ti tivataqi vi vaimanta vira kaara niara vaau uva tivaqi viha, ni qoraiqama nimitaqi viha, nana nana una uvae, qora uvae niara tivaqi vi vaivarava Kotiva virara iriharo ni koqema nimitaanarove.

¹² Ni qoraiqama nimitantemake, haaruwata vaiinti yokuka Kotira uva tiva qovaraiqu vaiintika qoraiqama nimite vaurave. Naantiara nivata mintimake qoraiqama nimite vaimanta ne nenta muntukaqihai voqamake quahaate. Kotiva ninta koqe kaiqara iriharo vira noqaa naaruvaini koqe haika ni kaama nimitairave.

*Ne hore voqaara variakarave tura
(Maaki 9:50; Ruki 14:34-35)*

¹³ Maa vataraqaa vaiinti nahenti variamanta ne vika avutana vaiha ne hore voqaara variavo. Horevano qoraiqama viro kia hiakaa irera, kia ho vira qaiqaa autu kairaro hiakaa ianarove. Horevano qoraiqama virera, qora horeve tivakero vira qaqla aqukaira vaiinti nahenti viraqaa aiqu ravaqi vi anivarave.

*Ne ova voqaara variakara tura
(Maaki 4:21; Ruki 8:16; 11:33)*

¹⁴ Maa vataraqaa vaiinti nahenti variamanta ne ova voqaara ataamakeha variavo. Vatuka vovano aiqina noraqaa vairaro kia vira ho mantaaqa kaanarove.

¹⁵ Kia vovano ova qumpikero kure varakero ovaqaa agute vairave. Aqao, ekaa naavuqi variakavata tavaate tiro, ova qumpikero kantaaqaini viri vate vairave.

¹⁶ Ne vira voqaantemake, vaiinti nahenti nivuqaa qoqaa niha ovavano ataa inantemake variqi vimanta vika ne koqe kaiqa vare vaira taveha, ni qova naaruvaini vaira vira autu tuaheraqi vuate.

Mosiva uva maara tivato uvarara tura

¹⁷ Ne nenta aatoqihai tiriara tiha, Viva Mosiva uva maara tivato uvaravata, paropeti vaiintinavu tivato uvaravata, vara qaqla kareva anivave, tivorave. Kia te vika uva qaqlini vara kareravauve. Vika tivato uvava qaqla vivau variarire ti, te anuraukave.

¹⁸ Te ni tiva nimirari iriate. Naaruvavanovata vatavanovata kia taiqaraitiro, qaqla variqiro viraro vi uvavavata qaqla variqiro vuanarove. Vi uvaraqihairo ekaa uapaa uvavanovata kia taiqa viraitiro, variqiro viraro ekaa haikavano qovaraiqama viro vivauma varianarove.

¹⁹ Mosivavata paropeti vaiintinavu tivato uvava vaivarava vovano vi uvaraqihairo inaara uva vo raqa kero vokikaravata tiharo, Ne vi uvava homa raqa kevarave, tirera, vi vaiintiva naaruvaini Kotiva raqikina vatukaraqaa oruntaaina entara vira autuvano qumina inaara autuqaima varianarove. Vo vaiintivano Mosira uvavata paropeti vaiinti uvavata iriqiro viharo vokikaravata tiharo, Vi uvava iriqi vuate, tirera, vi vaiintiva naaruvaini Kotiva raqikina vatukaraqaa oruntaaina entara vira autuvano nora autuma varianarove.

²⁰ Te mintimake ni tiva nimirerave. Parasi vaiintinavu, maara okara ti varia vaiintinavukavata, vika nái irike tiha, Tenavu Kotira uva iriha avuqavu ni vauraukave, ti variarave. Ne kia vika naatarake quqaiqamake koqe aaraqaa vivera, ne Kotiva raqikina vatukaraqaa kia ho vivarave.

*Vora aruke okarara tura
(Ruki 12:57-59)*

²¹ Haaru Mosiva ni kaivaqaukavarara tivato uvava ne vi uvava irurave. Vi uvava mintima tivo: Kia vora arukaane. Vora arukaira vaiintiva, viva uvama varaanarove, turave.

²² Viva minti tuva vaimantavata, kaiqe te qaiqaa vi uvara ni tiva nimiare. Nai qata vakaarara arara itairava, vi vaiintivavata vovano vora arukero uva varainantema kero, uva varaanarove. Te qaiqaavata ni tiva nimirerave. Nai qata vakaarara vaaquvanove tiaina vaiintira vira vita vare nora *kansoruvano* vainaini vuru kaivarо viraqaa uva vataaire. Nai qata vakaarara, Are vueraiqiara vaiintivave, kia ai avu aatovata vaivo, tira vaiintiva, vivavata vora arukero uva varainantema kero, uva varairaro vira muntu cutuvuuka varia vataraqi ihaqima aqu kaanarove.

²³ Vi uvara irihara are *ofaa* taintaqua vahira vo haika Kotira iha quara amitare iraro ai qata vaka vovano ariqaa uva vatairava qaqi vairera, ²⁴ nena *ofaa* haika qaqi tainta tataa mini kera, oru nena qata vakaantira vahira vi uvara naane avuqavuqama kera, viraqaha haira oru vi *ofaara* Kotira iha quara amitaane.

²⁵ Vovano ariqaa uva vatareva ai vita varero *ko* naavuqira vireva auti vairera, vikantira vaakama vi uvara avuqavuqama kaane. Are kia mintiraitira, *ko* naavuqi viraro *Iasivano* ariqaa uva vatero ai kiripu kauquqi kaira ai vita vare vuru karapuhiqi kevarave. ²⁶ Te tiarira iriane. Are kiama karapuhiqhairsa vaaka taiqenarave. *Iasivano* tina monura kia ekaa amiraitira, are kia ho vinarave, tiro. Ihuva turama.

Vora naata vataakero hampi okara autirara tura

²⁷ Ihuva minti tivakero viva vika tiva nimo tiharo, Haaru Mosiva tivato uvara vo uva ne irurave. Vi uvava mintima tivo: Kia vora vaatintirave vora naatantirave hampi nuane, turave. ²⁸ Kaiqe te qaiqaa ni tiva nimiare. Vaiintivano vo nahenti tavero aatoqihairoqai iriharo tiharo, Mpo, te vira vataake nuataarave, tivakero kia vikantiro niraitiro aatoqihairoqai mintima irirera, Kotiva virara tiharo, Are nahenti vataakera hampi nuaravave, tiharoma vira kaara vi vaiintiraqaa uva vataanarove.

²⁹ Virara irihara are hini avuqohaira avu auti vahira qora kaiqa vare vairera, qaiqaavata mintiaqi vuarorave tira, nena avu hini vira qaqira vaurukera aqukaane. Ai vaata ekaa nora iha itainaraqi aqukevorave, tira, kojemama are hini vaataqai qaqirakera variqi vinarave.

³⁰ Ai kauqu tararovano qora kaiqa vare vairera, mintiaqi vuarorave tira, vi kauqura qaqira teqa aqukaane. Ai vaata ekaa nora iha itainaraqi aqukevorave, tira, kojemama are hini vaataqai qaqirakera variqi vinarave.

Nai naata ekaara atitaaina okarara tura

³¹ Haaru Mosiva tivato uvava vovano mintima tiro: Vaiintivano nai naata qaqirakareva iharo nai naata qara amiro tiharo, Te vira qaqirama kauro, tivakeharo qara ami vairave, turave.

³² Kaiqe te qaiqaa virara ni tiva nimiare. Vira naatavano kia vo qoraintintiro hampi niraitiro vairaro, vira vaativano vo uva kaara vira qaqira kairaro vira naatavano vo qorainti varatairera, nai hoqarenaa vaati kaarama vi nahentiva naata vaati varaa okarara raqakaanarove. Vira qaraaka vaati vivavata vi nahentikantiro niharoma viva naata vaati varaa okarara raqa kaanarove. Kotiva mintima tianarove, tiro. Ihuva vi uvara turama.

Kauqu aiqiqaa aquke okarara tura

³³ Ihuva minti tivakero viva uva tiva nimiqi viro tiharo, Haaru Mosiva uva vo ni kaivaqaukavarara tivato uvara ne vi uvaravata iriarave. Minti turave: Are kauqu aiqiqaa aqukehara tihara, Kotira autuqaa te quqama mintirerave, tivateni uvara kia raqakaraitira, vi uvara tinantemakera autuane, turave.

³⁴ Ho kaiqe te qaiqaa ni tiva nimiare. Ne kauqu aiqiqaa aqukehama tenavu quqaa mintirerave tihamra kia Kotira autuqaa mintirerave tiate. Kia vo haika vo haika autu reha tiha, Tenavu quqaa mintirerave, tiate. Naaruvavano Kotiva oquvvaina taintava vairara ti, virara irihama kia naaruva autu reha tiha, Tenavu quqaa mintirerave, tiate.

³⁵ Kotiva nai aiq maa vataraqaa tututero vairara ti, virara irihama kia maa vataro autu reha tiha, Tenavu quqaa mintirerave, tiate. Ieruharemi vatukavano Avuhainaa Vaiinti noravano variaina vatukava vairara ti, virara irihama kia vi vatukara autu reha tiha, Tenavu quqaa mintirerave, tiate.

³⁶ Kia nenta qiata autu reha tiha, Tenavu quqaa mintirerave, tiate. Ne kia ho nenta qiata kaakiara ereraiqama vuane, konkiraqama vuane tivarave. Ne kia ho minti tirara ti, ne qumina nenta qiata autu reha, Tenavu mintirerave, tivorave.

³⁷ Ne vaiha mintireka ivera, qaqi eqoqai tivakeha mintiate. Kia mintireka ivera, qaqi kiaveqai tiate. Kia qumina vo uva vo uva tiha mintirerave tiate. Vo uva vo uvavano Sataaniraqihairo qovaraiqi vairave, tiro. Ihuva turama.

Vaiinti aruke munti okarara tura
(Ruki 6:29-30)

³⁸ Ihuva minti tivakero tiva nimiqi viro tiharo: Mosiva uva vo tivato uvara nevata iriarave. Vi uvava minti turave: Vovano ai avu qimpa kairara, are nai avu homa qimpa kenarave. Vovano ai aarai ruvihi kairera, are nai aarai homa ruvihi kenarave, turave.

³⁹ Vi uvava vaimantavata, kaiqe te ni qaiqaq tiva nimiare. Vaaqu vaiinti vovano ni qoraiqama nimitairera, kiama ne nai vira qoraiqama amitaate turo. Vovano ai auruvuta ruqema kairera, tuqanta viraro hini auruvutavata ruqema kaarire.

⁴⁰ Vovano ai *sioti* varareva ai vita varero *ko* naavuqí vuru kareva auti vairera, nena *sioti* amiharama vira qaqi kairaro ai tavuna vukaivata varaariere.

⁴¹ Vovano ai ravaaqavu kero tiharo, Ti airaira varera vuru aumaiqamake timitaane, tirera, vira airaira aqu varera niaraiqama kera vuru amitaane. ⁴² Vovano vo haikara ai irairera, vira amiane. Vovano vo haika vahuqa varareva irera, kia aqao kiave tiraitira, qaqi vira amiane, tiro. Ihuva minti tura.

Nenta navutaakara muntuka vataate tura
(Ruki 6:27-28, 32-36)

⁴³ Ihuva minti tivakero tiva nimiqi viro tiharo, Haaru ni kaivaqaukvara tu uvara ne iriarave. Vika minti turave: Nena navunaarara muntuka vataane. Nena navutaarara iri qoraiqama amitahara variane, turave.

⁴⁴ Kaiqe te ni qaiqaq vi uvara tiva nimiare. Nenta navutaakara muntuka vateha variate, turo. Ni qoraiqama nimitekara Kotira aaraivaro viva vika kahaqama nimitaarie. ⁴⁵ Ne mintihama nenta qova naaruvaini vaira ne vira vaintiqamama vivarave. Kotiva uva tivarо kuarivano iteharo koqe vaintivata, qora vaiintivata, ita nimiti vairave. Kotiva aqu atitaivaro aaquvano avuqavu ni vai vaintiravata, kia avuqavuqama kero ni vai vaintiravata ruva nimiti vairave. „Nevata nenta qova inantemake, koqe vaintivata qora vaintivata koqema nimitaqi vuate.“

⁴⁶ Niara muntuka vateka kia vikaraqai muntuka vataate. Niara muntuka vateka ne vikaraqai muntuka vataivera, Kotiva vira noqaa nana haikae ni nimianarove? *Takisi* vare variaka vika kia koqe vaiinti vahavata, vika nái kena vaiintiara muntuka vateha variarave.

⁴⁷ Ne nenta navunaakaraqai uva manteha vikaraqai quaheha vaivera, Kotira uva kia iriaka variantemake ne vaivarave. Ni kaiqavano vika kaiqa uri aatara kaataara vaimanta ne vika variantemakeqai variavo.

⁴⁸ Ni qova naaruvaini vaiva, viva kia qora kaiqvavata vararaitiro, avuqavuqai ni vairara ti, nevata avuqavuqamake niha variqi vuatema turo, tiro. Ihuva turama.

6

Vehi vaiinti nahenti kahaqama nimiti okarara tura

¹ Ihuva minti tivakero vika tiva nimiqiro viro tiharo, Ne vokika kahaqireka iha, evaara vika kahaqama nimitaate. Kia qoqaa tinavu mahuta tiate tiha vika kahaqama nimitaate. Ne mintiaqi viha vokika kahaqama nimitaivera, ni qova naaruvaini vaiva kia virara iriharo ni koqaa nimianarove.

² Are vovano vi uvara iriharo vo haika vehi vaiinti amireva ihara kukeqakera evaara vi haikara vira amiane. Kia vaiinti nahenti nivuqaa noraiqama kera aakara ntava kera amiane. Vo vaintinavu unaqaraiqama keha koqe kaiqa vare variaka, vika vehi vaiinti monu amire iha, kia vira kukeqake evaara amiraiti, vika vaiinti nahenti nivuqaa vahia *aanumaara/noma* vuageha maara naavuqie, nora aaraqaae, monu nimi variarave.

Vika kia vehi vaiintiara noraiqaae iriraiti, vika nariaraqai noraiqaae iriha vaiinti nahenti tinavu mahuta tiate ti, vehi vaiinti nahenti monu nimi variarave. Te ni tiva nimiairi iriate. Vi vaintinavu qaqi vaiinti nahenti quahama nimitera vi koqaaraqai varevarave. Mintivaro Kotiva kia vinavukavata quahama nimitaanarove.

³ Are vovano monue, vo haikae, vehi vaiinti amire ihara, kukeqakera amiraro ai aaqanto vairavavata kia vira tavaaire. ⁴ Are mintiraro vi haikava kukeqaviro ai aiqu tuvuni variarare. Are mintiraro ai qova ekaa kukeqake vare varia kaiqara tave valva, viva virara iriharo ai koqema amitaanarove.

Maantimakeha Kotiravata uva tiate tura

⁵ Ne Kotira aarareka iha, unaqaraiqama keha koqe kaiqa vare variaka Kotira aarantemake aarevorave. Vinavuka Kotira aarareka iha vaiinti nahenti tinavu taveha koqe vaiintive tiate ti, qoqaa maara naavuqie, aara kaantaqaave, vaiinti nahenti ruvaqumavi varianainive, vahia Kotira aare variarave. Te tiari iriate. Vinavuka qaqi

vaiinti nahenti quahama nimitera vi koqaaraqaima varevarave. „Kotiva kiama vinavuka koqaa nimianarove.“

⁶ Are vovano Kotira nena Qora aarareva iharama, kia qoqaa vaiinti nahenti nivuqua vairaitira, nena naavuqi nenaraa oriqetera qenti tintatera evaara vira aaraane. Äre mintiraro ai Qova ekaa vaiinti nahenti evaara vare varia kaiqara tave vaiva, vivama ai koqaa amianarove.

⁷ Ne Kotira aareha hauri ne kia Kotira uva iria vatanaaka aanarevorave. Vika tiha, Tenavu qaiqaa qaiqavata airi tataa tentanavu variqanavu naare variari vinavuka tinavu uva ho irivarave, ti variarave.

⁸ Ne kia vika aanaraate. Ne kia Kotira iraa entara Kotiva naane ne aarantaa haikarara kankomakero iri tavairave. ⁹ Ne maantima keha Kotira aaraate:

Tinavu Qo, are naaruvaini variaravave.

Tenavu koqemake ai autu takuqi vaira tuahere vauro.

¹⁰ Are tinavuqua raqikina entava vaaka aniarire.

Naaruvaihainaaka ai antuqa avataqi vintemake, are tinavu kahaqiraqe tenavu vataini vauraukavata ai antuqa avataqi vuare.

¹¹ Tenavu vate kara naainara tinavu timiane.

¹² Vokiaka tinavu qoraiqama timitaamanta vira kaara kia tenavu nai iri qoraiqama nimitaraiti, vika uva qaqira kaunantema kera, arevata tinavu uva nunka timitaane.

¹³ Qora kaiqvano tinavu avataantorave tira, are tinavu antua timitairaqe tenavu kia varaare.

Are tinavu kahaqi vairaro Sataaniva kia tinavu qoraiqama timitaarie.

[Are avuhainaava mpeqaiqama kera raqiki variaravave.

Ai autuqai viriniqamäqi vuariraro ai autuvano qaqi vairaraiqamaqiro variqiro vuanarove. Quqaave.]

Minti tivakeha ne Kotira aaraate, tiro. Ihuva turama.

¹⁴ Minti tivakero Ihuva vika tiva nimiqiro viharo tiharo, Vovano vovano ni qoraiqama nimitairamanta ne kia näi qoraiqama nimitaraiti, vika uva qaqirama kauro tivera, ni Qova naaruvaini vaiva, ninta uvavata qaqirama kauro tianarove. ¹⁵ Ne vika qora kaiqa vare uvara kia qaqira kauro tivera, ni Qovavata ne qora kaiqa vare uvara kiama qaqira kauro tianarove, tiro.

Kotirara iriha kara auramate okarara tura

¹⁶ Minti tivakero Ihuva tiharo, Ne kara auramatareka iha, kia koqe kaiqa unaqaraiqama keha vare varia vaiintika variantemake iate. Vinavuka kara aurama teha vaiinti nahenti vinavukara mpo ike kia kara ne variakave tiate ti, vinavuka ua viri arateha aara maata vi ani variarave. Te tiari iriate. Vi vaiintika kia vo koqaavata varevarave.

¹⁷ Are vovano kara aurama tareva ihara, evaara kara aurama taane. Vaiinti nahenti ariara qaqima kara ne vaivo tiate tira, nena viri hiqama kera qiata qaahi ntuva kera evaara kara aurama taane.

¹⁸ Are evaara mintiraro ai Qova ekaa evaara kukeqake vare kaiqara tave vaiva, vivama nina koqaa amianarove.

Airaira onaana ruvaaqumake okarara tura

(Ruki 12:33-34)

¹⁹ Kia maa vataraqaa vайha airi airira onaana ruvaaquma kaate. Airaira onaana maa vataraqaa ruvaaqumake vataavarvo toveqivanove, tuviravanove, uvairivanove, vi haikara vi haikara qoraiqamake vairave. Vi haikara vi haikara varareka muara vaiintinavu naavu rukavuke oriqete muara vare variarave.

²⁰ Ne koqe kaiqa vare vaivarvo naaruvaini ni airaira onaana ruvaaqumavi variarire. Naaruvaini kia oqokavanove, tuviravanove, uvairivanove, vi haikara vi haikara qoraiqamake vairave. Kia minni muara vaiintivano naavu rukavuke muara vare variarave.

²¹ Ne maa vataraqaa airaira onaana ruvaaquma kaivera, ni muntukavano maa vataraqaa vaina haikararaqai vairamanta vaivarave. Ni airaira onaanavano naaruvaini ruvaaqumavi vairera, ni muntukavano naaruvaini vaina haikararaqai vairamanta vaivarave.

Avuvano ekaa vaata ataama amite vairara tura

(Ruki 11:34-36)

²² Avuvano ova voqaarama vairave. Ai avuvano koqe avu vairera, ekaa ai vaatavano ruvaaharo varianarove. ²³ Ai avuvano qora avu vairera, ai vaatavano konkiraqama vuanarove. Ai vaatavano kia ruvaaharaitiro, konkiraqama viro vairera, te ariara ohoma tiva amitararave.

*Kotiraravata monuaravata tura
(Ruki 16:13)*

²⁴ Kaiqa vaiinti vovano kiama ho vohaa vaka nora vaiinti taaraqantaqaa kaiqa varaanarove. Viva mintirera, vira muntukavano vorara vaiharo kiama vorara varianarove. Viva vora uvaqai iriharo, vora uva qoririma kaanarove. Are kiama ho Kotiravata monuvata vohaa vaka kaiqa vara amitaqira vinarave, tiro.

*Kia vo haika vo haikara avu aato utuate tura
(Ruki 12:22-31)*

²⁵ Vi uvara irihama te niara mintima ti: Ne qaqi variqi virave, ne kara nerave, namari nerave, nenta vaata nonkirave, kia vi haikara vi haikarara airi aato utivaro ni muntukavano qoraiqiarire. Ne qaqi variqi viva avuhainaa haikavano vaivarao ne kara neva naantiaraihainaa haikavano vaivo. Ni vaatavano avuhainaa haikavano vaivarao ne nonki utavaaqava naantiaraihainaa haikavanoma vaivo.

²⁶ Viri kanta ata vare ni varia uvirika tavaate. Uvirivano kia kara utukero qantu varero naavuqi vuru vate vairave. Uviri vika variavaro ni qova naaruvaini vaiva viqaqaa raqiki vaimanta kara ne variarave. Uvirivano qumina haika voqaara variamanta ne vaiinti nahenti vahia uviri vika naatara kaarara tiro, Kotiva kiae niqaa koqema kero raqikanarove?

²⁷ Niqihairo ta vaiintivae te vaaka qutu vuvarorave tivakeharo nai qaqi variaina entara vonavu tomaqa kaanarove? „Kia vaiinti vovano ho mintianarove.“

²⁸ Ne nantihae utavaaqa nonkirara avu aato utiha variavo? Ahakaqi qampiqe vai maurakanaara tavaate. Vi maurakanaaka kia naaqunta varake nái utavaaqa autiraiti, vika koqemake qampiqeha variarave.

²⁹ Haaru King Soromonuva utavaaqa koqeraqai nonkutero vauvarovata, viva nonkuto utavaaqa kia ahakaqi vai maurakanaaka iteharo ruvaahaira aatarake vaurave.

³⁰ Kotiva vivama ahakaqi vai maurakanaaka koqema nimite vairave. Vi haikava vate vahuqa vairamanta hura iha tuta kaivaro ita taiqa vuanarove. Ho Kotiva qumina ahakaqi vai haikaravata koqema amite vaiva vaiharora tiro, viva ni vaiinti nahentiqa raqikiharo viva kiae nivata koqema kero utavaaqa nonku nimitaanarove? Ike, ne Kotirarea kempukaiqamake iriha, viva mintima timitaanarove tiataarave.

³¹ Kotiva ni kahaqama nimite vairara ti, ne kia airi avu aato utuqi viha tiha, Nana karae nararave? Nana namarie nararave? Nana utavaaqaqae nonkirarave? tivaqii vuate.

³² Kotirara kia iri varia vaiinti nahentika, vika minti tivaqii viha vi haikara vi haikara rantaqi vi variarave. Ne kia vika aanaraate. Ni Qova naaruvaini vaiva ne vi haikara vi haikara aavocqira kankomakero iri tave vaivama vaivo.

³³ Kotiva niqaa raqikiainarave, Kotiva niara avuqavu varia vaiinti nahentikave tianarave, virara noraiqamake iriqi vuate. Ne virara naane noraiqaake iriqi vivaro Kotiva viva ne rante vai haikara, ekaa vi haikara vi haikara ni nimianarove.

³⁴ Hura qovarai qianinara kia airi avu aato utuate. „Ne vate maa entara variakave..“ Hura vai vaiinti nahentika vika hura qovaraiqaina haikarara airi avu aato utiha vaivarave. Vate qovaraiqaina maararaqaa kia hura qovaraiqaina maarara akukuma taate, tiro.

*Kia vora kaiqara pupiteha rahaate tura
(Ruki 6:37-38, 41-42)*

7

¹ Ihuva minti tivakero viva vika tiva nimiqiro viharo tiharo, Kotiva ninta kaiqvata rahakero tavero qora kaiqave tiantorave ti, ne kia vora kaiqara pupiteha qora kaiqave tiate. ² Ne vora kaiqa raheha vira kaiqvano minti mintima vaivo tivaro Kotiva ninta kaiqvata rahakeharo minti mintima vaivo tianarove. Ne vokiaka autu nimitentema kero, Kotiva vohaa qarama kero nintavata autu nimitaanarove.

³ Are nantihae vata antaarauru vana ai qata vakaara avuqi viqetaira taveharama kia nina avuqi nora katari hanka viqetaira tavera iarao?

⁴ Nora katari hankavano ai avuqi viqetero vivara nantihae nena qata vakaarara kaiqare ai avuqihai vata antaarauru qaqlini veqa kaare ti variarao? Kia minti tiataarave.

⁵ Are unaqraiqama kehara koqe kaiqa vare variaravave. Tota nora katari hanka nena avuqihairaa naane veqa kera, viraqahaira koqemakera taveharama nena qata vakaara avuqihairavata vata antaarauru qaqlini veqa kenarave.

⁶ „Vokia vaiintinavuka vairi quara voqaara variarave.“ Kia Kotira takuqira haika vika nimiate. Ne mintivera, vika tuqantaavi ni qoraiqama kevarave. Ne koqe haikave tia haikara kia vika nimiate. Ne mintimanta vika vi haikara ntava rahitama kevarave.

Ihuva Kotira aare okarara tura
(Ruki 11:9-13)

⁷ Ne Kotira aarehamo vo haikara naarivaro viva vi haikara ni nimiarire. Ne rantaqi viha oru ranta kaate. Ne qenti kuekue ivaro Kotiva qantua nimitaarire.

⁸ Kotira vi haikarara naarika homa varevarave. Vi haikara rantaqi vika homa ranta kevarave. Qenti kuekue i vaiintika qantuarama nimitaanarove.

⁹ Niqihairo ni maaqu povano qamaara naariraro vira qova nai maaqu qumina orihuae amianarove. „Aqao, vira qova kia mintianarove.“ ¹⁰ Qaqaa vira maaquvano nai qora havukara naariraro vira qova memarue amianarove? „Aqao, viva kia mintianarove.“

¹¹ Ne kia koqe vaiinti nahenti vahavata, ne nenta vainti koqe haikaqai nimi variarave. Ni Qova Kotiva vo? Ni Qova naaruvinai vaiva ni aatarakero uritarero vo haika vo haika naari vai vaiintika mantaqumakero nora haika koqe haikaqaima nimianarove.

¹² Ne vokiakara minti mintimake koqema timitaate tintemake, ne vohaa qaramake vika náivata minti mintima nimitaqi vuute. Te vi uvvara tihamo te Mosivavata paropeti vaiintinavuvata tivato uvvara vira okarama turo.

Taara qentiera tura
(Ruki 13:24)

¹³ Qenti taaraqanta vairave. Qenti vo, inaara qentivano vaivaro qenti vo, nora qentivano vaivo. Ne inaara qenti minaqai vuute. Vaiinti nahenti ekaara taiqa vinainiara vua aarava vaireva, nora aaravano vaivaro vi aararaqaahainaa qentivata nora qentivano vaimanta airi vaiinti nahenti qenti viraqaa vi variarave.

¹⁴ Vaiinti nahenti ekaa enta koqemake qaqqi variqi vi varianaini vua aarava vaireva, muaque aaravanoqaima vaivaro vira qentivata inaara qentivano vaimanta vaiinti nahenti vohaiqa vohaiqavanoqai vi aararaqaa ranteha vi variarave.

Unaqaraiqamake ti varia vaiintikara tura
(Ruki 6:43-44; 13:25-27)

¹⁵ Vaiintinavu unaqaraiqama keha tiha, Tenavu Kotira uvama ni tiva nimi vauraukave ti varia vaiintika, vika naatu rauriha variate. Vika vaireka, sipisipi aanaramake variavarovata, vika avutaqi qaakau vairi voqaara variarave.

¹⁶ Ne vika vare vai kaiqara tavehama, ne anomake vika qora okaravata ho tavevarave. Vaiintivano *uaini* tava hiqireva viva kia tauveraqaahairo hiqi vairave. Viva *fiki* tava hiqireva kia auqu vai katariraqaahairo hiqi vairave.

¹⁷ Vira voqaantemakero, koqe katarivano koqe tavaqai ire vaivaro qora katarivano qora tavaqai ire vairave. ¹⁸ Koqe katarivano kiama qora tava iraanarove. Qora katarivano kiama koqe tava iraanarove. ¹⁹ Katari kia koqe tava iraainara vira teqakero ihaqira aquke variarave.

²⁰ Ho te vaaka tuna uvvara qaiqaa ni tiva nimirerave: Ne vi vaiintika vare vai kaiqara taveha ne anomake vika qora okaravata tavevarave, turo.

²¹ Vaiinti nahenti tiriara, Noravauvu, Noravauvu, ti variakaqihai kiama ekaa vika Kotiva raqikina vatukaraqi ho vivarave. Ti Qova naaruvinai vaira vira uva iriqi vi variaka, viqaqaima vira vatukaini ho vivarave.

²² Naantiara ekaara entaqaa vaiinti nahenti airitaha tiriara tiha, Mpo, Noravauvu, Noravauvu, ai autu rehama Kotira uva ti variavaunarave. Ai autu rehama vaiinti avutaqihai vaana nitite variavaunarave. Ai autu rehama kia tavaa kaiqara, vo kaiqa vo kaiqa vare variavaunarave, tivarave. ²³ Vika minti tigevata, Te kia ni tavaunarave. Ne vaaku kaiqa vare variaka tiqaahai niaraini vuatema, tirarave.

Naavu taaraqantara tura
(Ruki 6:47-49)

²⁴ Ti uva iriro te tunantemakero vare vaina vaiintira okara ni tiva nimirerave. Vi vaiintiva avu aato vataa vaiintivano kempuka naavu kaqataina vaiintira voqaarama varianarove.

²⁵ Vi vaiintiva kempuka oriqa nai naavu kaqa taivarora tiro, aaquvano ntivaro huvura namarivanove, uvalvanove naavu vira venta aqukarare tirovata, kia ho venta kaivaro hiqintirave.

²⁶ Ti uva iriro qaqrakeharo kia te tunantemakero ni vaina vaiintira okara ni tiva nimirerave. Vi vaiintiva kia avu aato vataa vaiintivano nai naavu nuqa kanta kaqa taaina vaiintira voqaarama varianarove.

²⁷ Vi vaiintiva nai naavu nuqakanta kaqa taivarora tiro, aaquvano ntivaro huvura namarivanove, uvaivanove, vira naavu venta aqukaivaro naavuvano pau tivaro hiqintiro raputama virarama turo, tiro.

²⁸ Ihuva vi uvara vi uvara vika tiva nimi taiqa komanta vaiinti nahenti mini ruvaaqumavi vauka nái kauqu runkinkiri iha tiha, Ike, aahuva uva vo qarama keroma tinavu tiva timi vaivo. ²⁹Viva kia maara okara ti varia vaiintinavuka tiantema kerovauve tinavu tiva timi vaivo. Viva nora vaiintivano tiantema keroma ti vaivo, ti tura.

8

Numuaravano vaata ite vau vaiintira koqema amitora

(Maaki 1:40-44; Ruki 5:12-14)

¹ Ihuva vakaaka tiva nimi taiqa kero ainqina vira mini kero vihairo tuvi vaumanta vaiinti nahenti vira avataqiqi tuvi vaura. ²Vira avataqiqi tuvi vauvaro vaiinti vovano numuaravano vaata ne vau vaiintiva oru Ihura avuqaa tori kauru araviro tiharo, Nora Vaiintio, are ti kahagiataa irera, are homa ti numuara nunka timitenarave, tiro.

³ Minto tuvaro Ihuva nai kauqu viavi vira vaataqaa vatero tiharo, Te ai kahaqiataa ivera mintima amitarerave. Te ai numuarara tavanta vuarire turo, tuvaro vaata ne vau numuarava vaakama tavanta vuvaro viva ho vaura.

⁴ Viva ho vauvaro Ihuva vira tiva amiro tiharo, Kia vora tiva amiraitira, oru viraro Kotira kaiqa vara amite vai vaiintiva ai vaata tuantikero tavaarire. Viraqaahaira are Mosira maara uva tivatorara iriharama *ofaa* vo quarairamanta vaiinti nahenti ariara tiha, Quqama vira vaatavano koqema vivo, tiate, tiro. (Wkp 14:1-22)

Ihuva aami vaiinti vira kaiqa vaiinti koqema kora

(Ruki 7:1-10)

⁵ Ihuva minti tivakero Kapenaumini vuvaro Romeni vaiintivano 100 iqoka vaiintiqaa raqiki vauva anirero Ihurara mpo tiharo, ⁶Noravauvu, ti kaiqa vaiinti vaata qutu ntava vivaro voqamakero antura ntiharo naavuqi vaivo, tiro.

⁷ Minto tuvaro Ihuva tiharo, Aniqetanta viva inaini orunte te vira koqema kaare, tiro.

⁸ Minto tuvaro iqoka vaiinti viva aqao tiro, Nora Vaiintio, te koqe vaiinti variariravauve are ti naavuqi ho vinarave. Are maini vahira virara koqema vuarire tiraro viva koqema vuarire.

⁹ Te iqoka vaiinti vahira tintaqaa raqiki varia vaiintika uva iri vaunarave. Te ai aanaramake vaiintiqaa raqiki vauraukave. Te iqoka vaiinti vorara vuane turaro viva virave. Te vorara aniane turaro viva anirave. Te tenta kaiqa vaiintiara mintiane turaro viva mintirave, tiro.

¹⁰ Iqoka vaiintiqaa raqiki vauva minti tuvaro Ihuva ike tivakero tuqantaaviro vaiinti nahenti vira avataqiqi anukara tiharo, Te ni tiva nimiari iriate. Te Isareriqi vi anilha kia te maa vaiintiva tiriara kempukaiqaakero iri vai vaiintira voqaara vo tavaunarave, tiro.

¹¹ Maa uvvara iriate. Naantiara vonaihai vonaihai vo vatanaaka airitaha Kotira vatukaqi vahira vika ni kaivaqaukvara Eparahaamirave, Aisaakirave, Iekopirave, vinavuka hampata kara nevarave.

¹² Vika mintimake vaimanta maa vatanaaka tenavu Kotira vaiinti nahenti vauraukave ti variaka, vikavata vi karara oru naare timantavata, vika ravaaqavu vare aaqaini vaati aqukaimanta vika konkira arinanaini vahira iqi rataqiqi viha vika nái aarai tenti aneha vaivarave, tiro.

¹³ Ihuva minti tivakero iqoka vaiinti vira tiva amiro tiharo, Nena naavuni vuane. Are tiriara viva ti homa kahaqama timitaanarove tianarara tiro, ai uvavano vivauma varianarove, tiro. Minto tuvaro vi kuari avuraqaa vira kaiqa vaiinti rovaravano taiqa vuvaro ho vaura.

Pitaara aintaantara koqema kora

(Maaki 1:29-31; Ruki 4:38-39)

¹⁴ Ihuva Pitaara naavuqi oru vaharo tavovaro Pitaara aintaantara vira vaata iha ite vauvaro tintaqaa vaitatero vauvaro ¹⁵Ihuva oru vira kauqu utu varovaro vira rovaravano vaaka taiqa vuvaro vi nahentiva himpiro vira kara qera i vaura.

Vaiinti nahenti airitaha koqema kora

(Maaki 1:32-34; Ruki 4:40-41)

¹⁶ Ihuva mini vauvaro enta umanta vi vatanaaka vaanavano avutaqi vauka ntita vare Ihuva vaunaini vuru kovaro Ihuva uvaqohairo vaana vika nititama komanta qaqini aitare vuvaro Ihuva nihavuka ekaa koqema komanta ho vaura.

¹⁷ Ihuva mintiaqiro vuvaro Aisaiaava paropeti vaiintivano haaru vetanto entaqaa vaharo tivato uvava vivauma vaura. Aisaiaava Ihura okarara mintima tiro: *Vi vaiintiva tinavu rovara taiqa timitaanarove. Viva tinavu aiha vina haikara koqema timitaanarove, tura.* (Aisaia 53:4)

*Ihuva avataqi vireka auti vaukara tura
(Ruki 9:57-60)*

¹⁸ Ihuva tavomanta vaiinti nahenti airitahaa ruvaaqumavi vira utute vauvaro viva tiharo, Kaiqenavu varuva namari taqa vare vutuni hini mantaraini oru variare, tiro.

¹⁹ Ihuva minti tivakero mini vire uvavar vauinti vovano maara okara ti vau vaiintiva orurero Ihurara tiharo, Maara ti variara vaiintio, te ai vainti vairerave. Are taini tainie vinanaini tevata ai avataqi virerave, tiro.

²⁰ Vi vaiintiva minti tuvaro Ihuva vira tiva amiro tiharo, „Are ti avataqira vire ihara paparuqirorave.“ Qaakau vairivano nái ntoma taaraqi vaite variarave. Uvirivano nái *navuqi/naavuqi* vaite variarave. Te Vataini Vatatai Vaintika te vaitaaina naavuva kia vaivo, tiro.

²¹ Ihuva minti tuvaro vira avataqi ni vau vaiintiva vovano tiharo, Nora Vaiintio, kairage te tenta qora naane oru quntamake aitare ai avataqi vuare, tuvaro ²² Ihuva aqao tiro, Ti tivataqira aniane. Kairamanta qutuvi vaiintika nái qutuvi vaiintika quntama taate, tiro.

*Aaronaavano uti vauvaro Ihuva vira atuvaro taiqa vura
(Maaki 4:36-41; Ruki 8:22-25)*

²³ Ihuva minti tivakero votuqi vaariromanta vira vaintinavuvata vira vataake votuqi vaarie vurama.

²⁴ Vika namari vaura vi vauvaro vaakama aaronaaavano varuva namariqaa noraiqamakero utiharo namari ventaqi uri vi vauvaro namarivano votu aqu ravaaqavu kareva auti vauvaro Ihuva viraqi qaqi vaite vaura. ²⁵ Ihuva viraqi vaite vaumanta vira vaintinavu Ihuva vaitonaini oru vira vauraqamake tiha, Noravauvu, himpira tinavu ruuaruma timitaane. Tenavu namariqi aqu vuarirava aumaiqivo, ti.

²⁶ Vika minti tuvaro Ihuva vaitoraqihairo himpiro tiharo, Ne nana haikarae voqamake geteha variavo? Ne tiriara kempukaiqaake iriataara vaimanta kia mintiavo, tiro. Minti tivakero Ihuva himpiro aaronaaavata namarivata atuvaro namarivano otiniro kia anaraiqavata qakiraitiro, tirema vaura.

²⁷ Tirema vaumanta vira vaintinavu tave, kauqu runkinkiriha tiha, Ike viva nana vaiintivanoe vaivo? Aaronaavanavata namarivanavata vira uva iri vairave, tura.

*Ihuva vaiinti taaraqantaqihairo vaana nititama kora
(Maaki 5:1-17; Ruki 8:26-37)*

²⁸ Vika minti tivake votuqi vima oru hini mantaraini Gadaraanini oruromanta vaiinti taaraqanta vika otu ntitakora. Vitanta vaana hampata vau vaiintitanta vaiinti quntama to onavuraqi vaha vitanta voqamake vaiinti ruqutireka auti vaumanta vaiinti nahenti vitanta naatu qeteha kia vitanta vau aararaqaa ní vaura.

²⁹ Vitanta ori onavuqihai otu Ihura vitake naveraitiha, Are Kotira Maaquvanove. Titanta nantirevaa aniarao? Titanta ruqutuina entava kia aniraivara, are titanta vaaka ruqutirevae aniarao? ti.

³⁰ Vitanta minti tuvaro vutu kanta quara airitahaa auhiri ne vaumanta ³¹ vaiinti taaraqanta avutaqi vau vaanauka Ihurara mpo tiha ti, Are tinavu tititama kairae tenavu quara vutunavuka avutaqi oru variare, ti.

³² Minti tuvaro Ihuva ho vuate tumanta vika aitare oru quaranavuqi vumanta, viraqaaahai quara vika ekaa aiqu autute kante onkai qoraiquraqi otu ravara aquvi namariqi qutu taiqa vura.

³³ Quara vika namariqi aquvi qutu taiqa vumanta quaraqaa raqiki vauka vira tave, aiqu autute kante otu vi haikava qovaraqurara tiva qoqaiqamake, vaanavano avutaqi vau tantaravata tiva qoqaiqama komanta ³⁴ ekaa vi vatukaraqihainaaka Ihura vitareka orure Ihurara mpo tiha, Kia tinavu maaqaini variane. Maihaira himpira nena vuane, ti tura.

*Ihuva vaata qutu rava vu vaiintira koqemakora
(Maaki 2:1-12; Ruki 5:17-26)*

¹ Vika minti tuvaro Ihuva votuqi vaarirero anirantero namari taqa varero nai vatukaini vura.

² Mini oruromanta vaiinti vonavu vaata qutu ravavu vaiintira tainta vare Ihuva vaunaini vuru kovaro Ihuva irumanta vi vaiintinavuka náiqqi tiha, Quqaama vi vaiintira koqema kaanarove, tu vaiintinavuka vauvaro viva vaata qutu ravavu vaiintirara tiharo, Ti maaquo, ai muntuka paruirara variane. Are Kotira uva raqa kaanara vi uvvara te ai nunkama amitauro, tiro.

³ Ihuva minti tumanta maara okara ti vau vaiintinavuka aqao tivake nai tiva ami nai tiva amiha tiha, Maa vaiintiva minti tiharoma Kotira qora uvama tiva amite vaivo, ti.

⁴ Vika minti tuvaro Ihuva vika nái avu aatoqi iru uvvara iriro vikara tiharo, Nantihae ne qora uva nenta avu aatoqi mintimake iriavo? ⁵ Ne tiriara tiha, Viva qumina vaiintivano vaiharora tiro, kia ho nai kena vaiintivano Kotira uva raqa kaainara nunka amitaanarove, tiarave. Ho vo kaiqa vo? Hoe te maa vaiintira vaata „koqemake, virara himpira nuane tiarave? Ne ti tiva timiqe tiriare, tiro.

⁶ Ihuva vika mintimta irama nimitero vikara tiharo, Te Vataini Vatatai Vaintika vauraro ti noraiqama kaimanta te homa vataini vaiha vaiintivano Kotira uva raqa kaaina uvvara nunka amitararave. Ne ti uvvara quqaa uvave tiate ti, te maa vaiintirara mintirerave, tiro. Minti tivakero Ihuva vaata qutu ravavu vaiintirara tiharo, Himpira nena tainta utu varera nena maaqaini vuane, tiro.

Minti tuvaro vi vaiintiya himpiro nai maaqaini yumanta ⁷⁻⁸ vaiinti nahenti mini ruvaaqumavi vauka vi kaiqara tave, qeteha Kotira autu tuahera keha tiha, Ike, Kotivama vi vaiintira kempukaiqama kaivaro vi kaiqara vare vaivo, ti vaura.

Ihuva Matiura aaramakero vita vatora

(Maaki 2:13-17; Ruki 5:27-32)

⁹ Viraqaahairo Ihuva oru viro tavovaro vaiinti vo, Matiuva *takisi* vare vau naavuraqi oquiviro vauvaro viva virara tiharo, Ti tivataqira aniane, tuvaro Matiuva himpiro vira avataqiro vurama.

¹⁰ Vira avataqiro vuvaro Ihuva nai vaintinavu hampata oru Matiura naavuqi kara ne vaumanta airi vaiinti *takisi* vare vaukavata, qora kaiqa vare vaukavata, vikavata Ihura vataake kara ne vaura. ¹¹ Kara ne vaumanta Parasi vaiintinavu vika tave Ihura vaintinavu aqao ti, Nantiharoe ni Noravano *takisi* vare variakavata, qora kaiqa vare variakavata, vika hampata kara ne vaivo? ti.

¹² Vinavuka minti tuvaro Ihuva tiharo, Qaqi varia vaiintika kia *doktaavano* vainaini vi variarave. Rovara varaa vaiintikaqai *doktaavano* vainaini vi variarave. ¹³ Tenavu avuqavu ni vauraukave tia variaka kia te vika naarareru anuraukavauve. Te qora kaiqa vare varia vaiinti nahentika naarareru anuraukavave. Kotira vukuqi qara ntuvato uvava Kotirara mintima tivo:

Vaiintivano quara aantau aru timite vairara kia ti muntukavano vaivo.

Vaiintivano vorara mpo ike tiva nimiteha kahaqama nimite vairara, virarama ti muntukavano vaivo, turave. (Hosea 6:6)

Ne vi uvvara aatoqi vate, iriqi viha vira okara kankomake tavaate, tiro.

Kara aurama te okarara Ihura irora

(Maaki 2:18-22; Ruki 5:33-39)

¹⁴ Ihuva minti tumanta Ionira vaintinavu Ihuva vaunaini orure vira ireha tiha, Tenavu-vata, Parasi vaiintinavu vata, kara auramateha vaunaru vare. Nantihae ai vaintinavu kara kia aurama taraiti, qaqi ne variarave? ti.

¹⁵ Minti tuvaro Ihuva vinavuka tiva nimiro tiharo, Vaiintivano nahenti varaaina entara vira navunaaka vira hampata vaiha iqí ratevarave? „Aqao, vi entara vika quaheha vaivarave.“ Vo enta anintaira vikaqihai nahenti varaaina vaiintira vara qaqini kairamanta vi entaraqaaahai vira navunaaka iqí ratehamra kara aurama tevarave, tiro.

Haarua okararavata qaraaka okararavata tura

¹⁶ Minti tivakero Ihuva uva vo tuqantaakero tiva nimiro tiharo, Vovano nihi utavaaqa qunahivira haqirireva iharo, kiama qaraaka tavuna toqakero viraqaa taatautero haqire vairave. Qaraaka tavuna taatautero haqirairaro vira qeqoqama viraro utavaaqa no-raiqaakero qunahi vuantorave tiro, kia minti vairave.

¹⁷ Qaiqaa tinerave. Kia vovano qaraaka *uaini* tatikero memera paha haqirama taira haaruaraqi qahiarake vate vairave. Vovano mintirera, qaraaka *uainivano* ntrehararo paha vira rakavu kairaro *uainivano* ntavama yuuanarove. Vaiintivano kia minti vairave. Memera paha qaraaka haqirama taira varakero viraqai qaraaka *uaini* qahiarake vataivararo *uainivanovata* pahavanovata ho vairave, tiro.

Maara naavuqaa raqiki vau vaiintiraravata nahenti voraravata tura

(Maaki 5:22-43; Ruki 8:41-56)

¹⁸ Ihuva minti ti vauvaro maara naavuqaa raqiki vau vaiintiva vovano oru Ihura avuqaa tori kauru araviro tiharo, Ti raavuravano vatema qutu vivo. Are anira nena kauqu viraqaa vuru vatairaro viva qaiqaa qaqi himpuarire, tiro. ¹⁹ Viva minti tuvaro Ihuva himpiro nai vaintinavu hampata vi vaiintira avataqiro viro.

²⁰ Aarana vi vauvaro nahenti vovano tora rovara vareharo 12 ihi varako nahentiva Ihura tauvaqaini oru viharo Ihura utavaaqa viti autama kora. ²¹ Vi nahentiva nai tivakero iriro tiharo, Te vira utavaaqa viti ho autama kaarer, ti rovaravano vaaka taiqa viraqe te homa vairarave, tivakero Ihura utavaaqa viti autama kora.

²² Autama kovaro Ihuva tuqantaa viro vira tavero tiharo, Ti raavuravauvu, muntuka paru i vaira variane. Are tiriara ti kahaqiariravave tiararoma ai vaata koqema vivo, tuvaro vi nahentiva vi entaraqaahairo koqema viro vaura.

²³ Ihuva oru viro maara naavuqaa raqiki vau vaiintira vira naavuqi oriqetero tavomanta vokuka vira igi rata amitareka aanumaara vuage vaumanta noraiqaake igi rataiqi vi vauvaro ²⁴ Ihuva tiharo, Ne vinuate. Maa nahenti vaintiruva kia qutu vivo. Viva qaqi vaitema vaivo, tumanta vika vira uvara naaraihamma amitora.

²⁵ Naaraihamma amitovaro Ihuva vika nititama veva vahaqaqaini kero vi nahenti vaintiruva qutu vuraqi oriqetero vira kauqu utu varovaro vi nahentiruva qaiqaa qaqi himpura.

²⁶ Ihuva minturara tiro, vi uvava ekaa vi vataraqaa vi anumanta ekaa vi uvara irura.

Ihuva avu qimpavu vaiintitanta rampai nimitora

²⁷ Ihuva viraqihairo aarana vumanta vaiinti taaraqanta avu qimpavutanta vira avataqi viha vira aaramaqi viha tiha, Devitira Maaquo, titantara mpo ike tiva timitaane, ti.

²⁸ Vitanta minti tivaqiqi vuvuaro Ihuva naavuqi oriqetero vaumanta vitanta viva vaunaini orurovaro Ihuva vitanta irama nimitero, Netanta tiriara quqaae viva titanta tivu rampai timitaanarove tiavo? Tige iriare, tumanta vitanta tiha, Eo, Noravauvo, ariara quqaavema turo, ti.

²⁹ Vitanta minti tuvaro Ihuva vitanta nivuqaa nai kauqu vatero tiharo, Netanta tiriara quqaa mintianarove tiavera nitanta nivu rampai nimitararave, tuvaro ³⁰ vitanta avu rampai vumanta vitanta ho tavora. Vitanta ho tave vauvaro Ihuva vitanta kempukaiqama kero tiharo, Kia vi uvara voravata tiva amiate, tura.

³¹ Ihuva minti tumantavata, vitanta qaqrake, oru vi uvara voka voka ekaa tiva nimiqi vi vauvaro vi uvava vi vataraqaa vi anima vura.

Kia ho uva tu vaiintira Ihuva koqema kora

³² Vitanta vumanta vo vaiintinavu nai hena vaiinti vo vita vare Ihuva vaunaini vuru kora. Vaanavano vi vaiintira avutaqi vauvarora tiro, viva kia ho uva tumanta vira vita vare Ihuva vaunaini vuru kovaro ³³ Ihuva vaana vira atitovaro vi vaiintiva ho uva tumanta vaiinti nahenti mini ruvaaqumavi vauka kauqu runkinkiri iha tiha, Ike, tenavu Isarerri vatanaaka kia vi kaiqara nora kaiqa qovaraiqi vaira tavaunarare, ti.

³⁴ Vika minti tumanta Parasi vaiintinavu aqao, ti. Vaana avuhainaava vira kahaqi vaivarohu Ihuva vaana nitite vairave, tura.

Ihuva vaiinti nahenti aaqurihama nimitora

³⁵ Ihuva nora vatuka inaara vatuka niharohu maara naavuqi oriqetero vaharo Kotiva vaiinti nahentiqa raqikiaina vakaakara koqe vakaaka tiva nimiqiro viharo, vo qara vo qara u rovarara varokavata koqema nimitaqiro vi vaura.

³⁶ Viva mintiaqiro vi vaumanta vaiinti nahenti airitahaa viva unaini ruvaaqumavi vaiha vi ani vauvaro Ihura muntukavano vikara qoraiquvaro viva vika tavero tiharo, Ike, sipisipiqa raqiki vai vaiintiva kia vaimanta sipisipi vika hampi vi ani iantemake, maa vaiinti nahentika kia ho nai kahaqiraiti, nora maara vare vi ani variavo, tivakero Ihuva vika aaqurihama nimitora.

³⁷ Ihuva vaiinti nahenti aaqurihama nimitero nai vaintinavuara tiharo, Tavaate, airi kara iratero mpeqaiqamaviro vaimanta kara qantu vare ani vaiintika kia airi variavo.

³⁸ Ne naaho Qora aaraivaro viva kaiqa vaiinti vonavuvata nititaira kara qantu vare aniate, tura.

*Ihura vainti 12navu nutuara tura
(Maaki 3:13-19; Ruki 6:12-16)*

10

¹ Ihuva nai vainti 12navu naarama ruvaaquma kero vinavuka vaiinti nahentiqa hai vaana nititeha vo rovara vo rovara vareka koqema nimitate tiro, viva vinavuka noraiqama kora.

² Viva noraiqamako vaiintika nutu maantimama vairo:

Avuni Saimonira—vira vara autu Pitaara,
vira qata Entararua,
Sebedira maaqu Iemira,

Iemira qata Ionira,

³ Piripira, Batolamura, Tomaasira,
Matiura takisi vare vau vaiintira,
Arafiusira maaqu Iemira,
Tadiusira,

⁴ Saimonira—vira autu vo Selotira,
Iutaasi Ikeriotira—viva Ihura navutaaka nivuqaa qovarama kaarira vaiintiva vaura.

Ihuva nai vainti 12navu kaiqa nimiro nititomanta vura

(Maaki 6:7-13; Ruki 9:1-5)

⁵ Ihuva nai vainti 12navu nititeharo uva tiva nimiro tiharo, Ne aaraini vihama kia vo vatanaa maaqaini vuate. Kia Sameria vaiinti nahenti vatukainivata vuate.

⁶ Ne kia mini mini viraiti, ne Isarerri vatanaaka nenta navunaaka varianainiqai vuate. Sipisipinavu hampi vi anihaka kakakima vuantemake, vika kakakima vuarave.

⁷ Ne oru vaiha mintima tiva nimiate. Kotiva niqaa raqikiarirava ni aumantoma aniraivo, tiate. ⁸ Ne rovara vareka koqema nimiteha, ne qutu vika qaiqaa qaqi vara himpima keha, ne vaata ne vaina numuarava vaiinti arinara, vira nunka nimiteha, ne vaiinti avutaqai vaina vaanaravata atitaivaro qaqini aitare vuarire. Te kia niara monu naariraiti qaqi ni noraiqama kaunarara ti, nevata vaiinti nahenti qaqima koqema nimitaqai vuate.

⁹ Kia *kori* monuve, *silvaa* monuve, uvairi monuve, ruva vare vuate. ¹⁰ Ne aaraini vireka iha kia kara utaqi ruva vare, vo utavaaqave, aiqu nonkirave, kauruve, vi haikara vi haikara kia vararaiti, qaqima vuate. Ne kahaqama nimitare ika vikama niqaa raqikivarave.

¹¹ Ne nora vatukainie, inaara vatukainie, orurema ni quahama nimitaaina vaiintira rantake vira naavuqiqai variqi vima vi vatukara mini kema vuate.

¹² Ne naavuqi origetare iha, viraqi vaika uva manteha tiha, Ni muntukaqihai paru i vaira variate, tiate. ¹³ Ne minti timanta viraqi vaika ni koqemake ntita vataivera, Kotiva vika muntuka paruma nimitaarire. Vika kia ni koqemake ntita vataivera, Kotiva nintaqaima muntuka paruma nimitaanarove.

¹⁴ Vo vatukaihainaaka kia ni quahama nimite ni uvavata irivera, ne nenta aiquuaahai vi vatukaihaina konkoma rintatike vimanta, „vika ne vikara qoririma nimiterara tavaate..”

¹⁵ Te ququaama ni tiva nimiari iriate. Ni uva kia iri vaiinti nahentika Kotiva vikaqaa nora uvama vataanarove. Vetanto entaqaa Sodomini vaukavata, Gomoraini vaukavata, vaaqu kaiqaqai vare vaurave. Naantiara ekaara entaqaa Kotiva *ko* tiharo vi vatanaakaqaa inaara uvaqai vatero, kia ni uva iri vaiinti nahentika vikaqaa nora uva vataanarove, tiro. Ihuva minti tura.

Vaiinti nahenti vira vaintinavu qoraiqama nimitare urara tura

¹⁶ Ihuva minti tivakero viva tiharo, Ne maa uvvara iriate. Te ni nititaari ne sipisipi voqaa vaintinavu qaakau vairi voqaa vainaini vivarave. Virara irihama ne memoruvano koqemakero taveharo ninantemake niha, miruravano kia nai henara arinantemake, nevata kia vora qoraiqama amitaraiti nuate.

¹⁷ Ne vo vaintinavu raurihama variate. Vika ni ravaaqavu vare vuru nái *kansoru* naavuqi ke niqaa uva vatevarave. Ne maara naavuqi vaimanta ni kaavu numiqake vatevarave.

¹⁸ Ne ti kaiqa vare vaimanta vira kaara ni ravaaqavu vare vuru nora vaiinti avuqaavata, avuhainaaka nivuqaavata, vuru kevarave. Ni vuru kaimanta ne vika nivuqaa vaiha, vikavata vo vatanaa vo vatanaakavata ti hutuqai tiva qovaraiqama nimiate.

¹⁹⁻²⁰ Vi entara ni ravaaqavu vare vuru kaira kia noraiqamake iriha tiha, Nana nana uvae tirarave? tiate. Ne vi entara kia nenta aatoqihai irike tiraiti vaivaro, ni Qora vira Maraqravano ni noqaahairo uva tianarove.

²¹ Naantiara vokika nái qatae nái vakaarae qovarama kaimanta arukevarave. Vika qoka nái vainti qovarama kaimanta arukevarave. Vika vaintinavu nái noka qoka navataiqihama vika arukaate timanta arukevarave.

²² Ne ti kaiqa vare vaimanta vira kaara ni iri qoraiqama nimitevarave. Mintiaqi vivaro kia vaaka popohanaara iraitiro, vo enta vo enta kemukaiqaa kero ti uva iriqiro vi vaira vaiintiva, viva vairaro Kotiva virama vita varaanarove.

²³ Ne vi vatukaraqi vaimanta ni qoraiqama nimiteha ni arukareka autivera, ne aiqu aututema vo vatukaini vuate. Te tiari iriate. Ne vatuka vatuka vi anihaka tikaaka Isarerri vaiinti nahenti tiva nimiqi viha vi kaiqara kia taiqa karaiti qaqi varaqi vi vaiqe, te Vataini Vataini Vaintika qaiqaa orurante tuvirerave.

²⁴ *Sikuru* vaintivano kiama nai *tisaara* aatarakero vaivar, kaiqa vaiintivanovata kia nai nora vaiintiqaq raqiki vairave.

²⁵ *Sikuru* vaintivano variqi viro nai *tisaara* aanantama viro, viraqaahairo viva te homa vohaa qaramavi vauro tianarove. Kaiqa vaiintivano variqi viro nai nora vaiinti aanantama viro, viraqaahairo viva te ho vohaa qaramavi vauro tianaro. Vika te niqaa raqiki vauraukara tiha, Are vaana avuhainaavaa Belsebuliva variarao tiarave. Vika tiria minti ti variarara ti, ike, vika ni ti vaintinavuaravata nana nana qora uvama tiva nimitevarave, tiro.

Kotira aatuqai geteha variate tura
(Ruki 12:2-7)

²⁶ Ne vi uvara irihama kia vaiinti aatu geteha variate. Vovano tavaantorave ti, vate aqute varia haikara, naantiara ekaa vi haikara vi haikara ravaqaakero qoqama vataanarove. Vate kukeqate varia haikara naantiara qoqaiqama kairaro qoqama varianarove. ²⁷ Vate te konkiraqi vaiha ni tiva nimi vauna uvvara, ne naantiara aatitainaraoqaa vaiha tiva nimiate. Vate te evaara tiva nimi vauna uvvara, vi uvvara naantiara vatukaqaa vaiha neverai tivakeha tiva nimiate.

²⁸ Ni maraqura kia ho arukaraiti, ni vaataqai aruke vaiintikara kia vika naatu qetaate. Ne Kotira aatu geteha variate. Kotiva vaiinti vaatavata vira maraquravata nora iha itainaraqi ho aqukairaro ita taiqa vuvariravama vaivo.

²⁹ Ho quqaae vaiintivano inaara monu vohauru aqukeharo uapaa uviri taaraqanta vare vairave? Ne uapaa uvirive tia haikara Kotiva viragaavata raqikiharoma, viva kia hove tirera, vi uviriva kia ho vataqaa hiqiruanarove. ³⁰ Kotiva niqaa raqikiharoma ni okara ekaa tave vaiva, viva ni qiaa kaukivata ekaa kaara ruva tairave.

³¹ Kotiva airi uapaa uviri raqikiharovata, viva niara ne uviri vika aatara kaakave tirara ti, ne kia qeteha variate, tiro.

Kia qetaraitiro Ihura vaintima vauro tiainarara tura
(Ruki 12:8-9)

³² Ihuva minti tivakero tiva nimiqi viharo tiharo, Vaiinti vovano vaiinti nahenti nivuqaa vaharo tiriara tiva qovaraqaakero tiharo, Te vira vaintima vauro, tirera, tevata ti Qova naaruvinai vaira avuqaa vaiha virara tiva qovaraqaake vi vaiintivavata ti vaintima vaivo tirarave.

³³ Vovano vaiinti nahenti nivuqaa vaharo tiriara aqao kia vira vaintima vauro tirera, tevata ti Qova naaruvinai vaira avuqaa vaiha nai vi vaiintiraravata aqao kia ti vaintima vaivo tirarave, tiro.

Vaiinti nahenti raira karerave tura
(Ruki 12:51-53; 14:26-27)

³⁴ Minta tivakero Ihuva tiharo, Ne tiriara tihama viva tuvu vaimantara ti, vaiinti nahenti vataini vaika maateraqiha variqi vivarave tiavo. Ne mintie tiavo? Aqao, te vataini tuvu vaunara ti, vataini vaika ti navutaiqiha vaivar, nora iqokavano qovaraqianarove.

³⁵ Ti kaara vira maaquvano nai qokantirove, vira raavuravano nai nokantirove, vira naaqutuvano nai tonanokantirove, navutaiqiha vaivarave. ³⁶ Ti kaara vo vaiintivano vairamanta vira naavuqi vaika, vikama vira navutaiqiavarave.

³⁷ Vovano tiriara muntuka vaineravata aatarakero nai norarave, nai qorarave, voqavata muntuka variarirava, vi vaiintiva kiama ho ti vainti varianarove. Vovano tiriara muntuka vaineravata aatarakero nai maaquarave, nai raavururave, voqavata muntuka variarirava, vi vaiintiva kiama ho ti vainti varianarove.

³⁸ Vovano kia nai aruke hirite katarira vara aqu varero ti naantiara aniariva, viva kiama ho ti vainti varianarove.

³⁹ Vaiintivano nai vataini qaqi variqiro vuainararaqai noraqaakero iriqiro vi variariava, vi vaiintiva ekaarama qutu vuanarove. Vaiinti vovano tiriara iriqi viharo vuru qutu virava, vi vaiintiva ekaa enta qaqi variqiro vuanarove.

Vira noqaa koqe koqaa varerara tura
(Maaki 9:41)

⁴⁰ Te ni nititaariraro vaiinti vovano ni quahama nimiteharo viva tivata quahama timitaanarove. Viva ti quahama timiteharo Kotiva ti tititairavata quahama amitaanarove.

⁴¹ Kotira uva qoqaiqama kero tiva nimi vaira vaiintiva, paropeti vaiintivano anintairaro vo vaiintivano vira uva irireva quahairera, Kotiva paropeti vaiinti koqema amitainantema kero, vi vaiintiravata koqema amitaanarove. Avuqavuqaa keharo ni vaira vaiintiva anintairaro vo vaiintivano virara avuqavuqaa kero ni vai vaiintirave

kaiqe vira quahama amitaare tirera, Kotiva avuqavuqaa kero ni vaina vaiintira koqema amitainantema kero, vi vaiintiravata koqema amitanarove.

⁴² Vo vaiintivano ti vainti inaara vainti tavero virara Ihura vaintive tivakero quahama amiteharo antai namarira kaqakero amirera, Kotiva kia vi vaiintira qaqira karaitiro, vira noqaa koqemakero nai amianarove, tiro. Ihuva turama.

Ioniva nai vanti vonavu nititomanta Ihura irora
(Ruki 7:18-35)

11

¹ Ihuva vi uvvara nai vaintinavu tiva nimi taiqa kero viva mini kero, vakaaka vaiinti nahenti tiva nimireva, Karirini vatuka vatuka nireva viro.

² Ihuva mini vuvaro Ioniva ,namari nimi vau vaiintiva, karapuhiqi vaharo iruvuaro Kotiva atito vaiintiva nora kaiqa vare vuvaro viva nai vanti vonavu nititomanta vinavuka oru Ihura ireha ti, ³ Kotiva atitairaro naantiara anianarove ti varia vaiintiva quqaa are maa vivave? Tenavu vo vaiinti vekaiqihae vairarave? ti.

⁴ Vinavuka minti tuvaro Ihuva vinavuka nai tiva nimo tiharo, Nenavu maini ani vaiha tavaarave, iriarave, anirante Ionira vuru tiva amiate. ⁵ Avu qimpa vuaka qaiqaa qaqi tave variavo. Aiqu qoraiqama vuaka qaqi ni variavo. Numuaravano vaata ne vai vaiintika tavanta vimanta variavo. Aato tinta vuaka qaiqaa ho iriavo. Qutu vuaka qaiqaa qaqima himpi variavo. Vehi vaiinti nahenti Kotira vakaaka koqe vakaaka ani iri variavo. Vi uvvara vi uvvara vuru Ionira tiva amiate.

⁶ Tiriara kia taara aato iriraitiro, kempukaiqama kero vohaa avu aatoqai iriqi vi vaira vaiintiva, vivama quaheharo varianarove, tiro.

⁷ Ihuva minti tumanta Ionira vaintinavu anirante vire uvuaro Ihuva vaiinti nahenti ruvaaqumavi vauka Ionirara tiva nimo tiharo, Ne haaru nana haika tavarekae qumina vatainvi vi vaurave? Uvavano utiharo vavikero virivikero i vau ukaura tavarekae vurave?

⁸ Ne kia vira tavareka viraiti, nana haika tavarekae vurave? Koqe utavaaqa nonkuto vaiintira tavarekae vurave? Aqao, koqe utavaaqa nonkute varia vaiintika kiama qumina vatakanta variarave. Vi vaiintinavuka avuhaimaara naavu koqe naavuqiqai variarave.

⁹ Ne nana haika tavarekae vurave? Kotira uva qoqaiqama kaaina vaiintira paropeti vaiinti tavarekae vurave? Eo, virave. Ho kaiqe te ni tiva nimiari iriate. Ne vi entara paropeti vaiinti aatarako vaiintira tavorave. ¹⁰ Kotira vukuqi Kotiva Ionirara mintima tiro:

Tavaane, ti uva tiva nimiaina vaiintira te atitaariraro viva naane ai avuni viharo ai aara qerama amitanarove turave, tiro. *(Mal 3:1)*

¹¹ Ihuva minti tivakero viva vikara tiharo, Kaiqe ni tiva nimiari iriate. Vataini vatatai vaiinti nahentika variavaro Ioniva namari nimi vau vaiintiva ekaa vika naatara kaivama vaivo. Ioniva mintimakero vaivarovata, naantiara Kotira raqikiaina vaiinti nahentikaqihairo inaara vaiinti vovano Ionira vira aataraa kaariravama varianarove.

¹² Ioniva namari nimi vau vaiintiva qovaraiqu entaraqaahai airi vaiinti vika Kotira vatukaini vireka kempukaiqama keha variqi ani, vate maa entaravata minti variarave.

¹³ Haaru paropeti vaiintinavuvata, Mosivavata, Kotira uva qoqaiqama keha vi haikava vi haikava mintimakero qovaraiqianarove tivake, minti tivaqti vi vauvaro Ioniva qoqarama vurave.

¹⁴ Ioniva vaireva viva ni kaivaqava Elaitaava qaiqaa vataini qovarama vuarira vaiintivama vaivo. Ne vi uvarara quqaave tivera, ne Ionirara viva Elaitaavave tivarave.

¹⁵ Ni aato vairera, vi uvvara okara kankomake iriate, tiro.

¹⁶ Ihuva minti tivakero tiharo, Maa entara varia vaiinti nahentika, vika nana voqaarae variavo? Te nana uvavave vatake/uvqaqae ntuvake tiari ne vi uvvara ho irivarave? Kaiqe ni tiva nimiari. Vainti haika vatukaqaa ruhareka oquvi variantemake variavo. Vainti haika nái hana vainti naarama keha tiha, ¹⁷ Tenavu aanumaara vuage vauramanta ne ihi ntaataara vaimanta ne kia ihi ntaavo. Tenavu ruhehamo iqí rate ihira ti vauramanta ne iqí rataataara vaimanta kia iqí rataavo, tiarave. Maa entara varia vaiinti nahentika vika voqaarae variavo.

¹⁸ Ioniva anirero kara auramatero kia uainivata nomanta vika virara tiha, Viva vaana hampatai vaiintivave, turave.

¹⁹ Te Vataini Vatatai Vaiintika anire karavata namarivata nehama anuramanta vika tiriara tiha, Vira tavaate. Viva voqamake kara ne vaivave. Viva *uaini* neharo vueraiqaaavi vaivave. Viva *takisi* vare variakavata, qora vaiintinavuvata, tontiqamate vaivave, ti variarave. Vika tiriara minti ti variarave. Ho uvavano koqe uva vairera, vi uvvara iriqi virava tavairaro koqe uvqaqaima varianarove, tiro.

*Vi vatanaaka vi vatanaakara oho tiva nimitora
(Ruki 10:13-15)*

²⁰ Ihuva vatuka vonavuqi airi kaiqa nora kaiqa vara nimitomanta vi vatanaaka kia qora aara qaqlira karaiti vauvaro Ihuva tiva nimiyo tiharo, ²¹ Ne Korasinini variakave, ne Besaidaini variakave, te ni ohoma tiva nimitauro. Te ni nivuqaa nora kaiqa varauvantemra kero, haaru vovano nora kaiqa Taiaa vatanaakave, Saidoni vatanaakave, vara nimitaitirio, vi vatanaaka vaakama kovaara utavaaqa nonkute, vika hanta varake nái vaataaqa aque qora aara vaakama qaqlira kaatiro.

²² Te ni nivuqaa nora kaiqa varauramanta ne kia qora aara qaqlira kera kaara, ekaara entaqaan Kotiva ko tiharo Taiaa vatanaakaqaavata Saidoni vatanaakaqaavata inaara uva vatero, niqaa nora uvama vataanarove.

²³ Ne Kapenaumiqi variaka tiha, Kotiva tinavu noraiqama kairae naaruvinai virarave, ti variarave. Aqao, kiave. Kotiva ni vara aqukaira ne vevanto qutu vika vainaini miniqaima otu vaivarave. Te ni nivuqaa nora kaiqa varauvantemra kero, haaru vetano entaqaan vovano Sodomiqi vaharo vi vatanaaka nora kaiqa vara nimitaitirio, vi vatanaaka qora aara qaqlira kovaro Kotiva kia vi vatukara vehi autu karaitiro qaqlima kaivarao maa entara vaitiri.

²⁴ Te ni nivuqaa nora kaiqa varauramanta ne kia qora aara qaqlira kera vira kaara naantiara ekaara entaqaan Kotiva ko tiharo Sodomi vatanaakaqaavata inaara uva vatero ni Kapenaumi vatanaakaqaavata inaara uva vataanarove, tiro.

*Ihuva nai Qora aarora
(Ruki 10:21-22)*

²⁵ Ihuva minti tivakero vi entara Kotira aarero tiharo, Ti Qo, are naaruvaqaavata vataqaavata raqiki variaravave. Are vi haikara vi haikara kukeqa tera nora vaiintinavu ekaa okara tavaa vaiintika kia numiqaraitira, vi haikara vi haikara qaqlira vaiinti numiqe varianarara ti, te ai autu viriniqama kauro. ²⁶ Eo, ti Qo, ai antuqvano mintiataa ivarama mintira iaraao, tiro.

²⁷ Ihuva minti tivakero tiharo, Ti Qova tiriara arema ekaa haikaqa raqikiane tirave. Kiama qaqlira vaiintivano ti vira Maaqu okarara iri tavaarave. Ti Qova naiqaima ti okarara iri tavairave. Kiama qaqlira vaiintivano ti Qora okarara iri tavaarave. Te vira Maaquvanoqaima vira okarara iri tavaunarave. Te taukae tiva nimiataa iraqe tiva nimirirauka, vikavatama ti Qora okarara kankomake iriqi vivarave, tiro.

Tini anika auraara variate tura

²⁸ Ihuva minti tivakero tiharo, Ne nora maara vare variavaro ni vaata popohama vimanta variakara te niara tirera, Ne te iainanaini aniqe te ni vuaqa rava nimitaari ne auraara variate, turo.

²⁹⁻³⁰ Ne te iainanaini anire ti uva aqu vareha vuate. Te tenta kaiqa ni numiqe variari ne ti kaiqaqai varaqi vuate. Te ni qihaaqama nimite vauraakave. Kia te tenta hutuara noraiqaake iri vauraakave. Te mintima vauraakara ti, ne homa ti vataake auraara vaivarave. Te tenta kaiqa ni nimirirava kia maara ntaanarove. Ti kaiqavano vuaga ntairamanta ne homa varevarave, tiro. Ihuva turama.

12

*Maara entara tura
(Maaki 2:23-28; Ruki 6:1-5)*

¹ Vi entara Ihuva maara entaqaan naaho avutaqi *qantivi/kakuma* voqaara *uiti* qampiqo-raqi ni vaumanta vira vaintinavu antuqa arumanta *uiti* tava raqake, *tutiqamakeha*, vira auru ne vaura. ² Ne vaumanta Parasi vaiintinavu vira tave Ihurara tiha, Nena vaintinavu tavaane. Maara Entaqaan qioqamataa kaiqara vinavuka vare variavo, ti.

³ Vika minti tuvaro Ihuva nái tiva nimiyo tiharo, Haaru ni kaivaqava Devitivavata, vira vataake nukavata, karara antuqa arumanta vauvaro Devitiva vi entara auti okarara ne kiae kaara ntuvake iriarave?

⁴ Vi entara Devitiva Kotira Naavuqi oriqetero mpareti Kotira amitora varakero neharo nkuikeri nai vataake anukavata hini nimumanta norave. Kotira kaiqa vara amite vau vaiintikaqai vi karara naataara vauvaro Devitiva qumina vaiintivano vi karara neharora tiro, vi uvvara raqa korave.

⁵ Ne Mosira uva vo kiae kaara ntuvake iriavo? Kotira kaiqa vara amite varia vaiintika Maara Entaqaan Kotira Naavuqi vo kaiqa vo kaiqa vare variarave. Vika Maara Entaqaan vi kaiqara varaqi viha qioqama taa uvvara raqa keha variavaro uvavano kia vikaqaqaa vairave.

6 Ne Kotira Naavuara noraiqaake iri variara te virara ni tiva nimirerave. Kotira Naavu viravata aatara kaurauka, te mainima vauro.

7 Kotira vukuqi mintima tiro:

Vaiintivano quara aantau aru timite variarara, kia ti hantuqa harimanta vauro.

Vaiintivano vorara mpo ike tiva amiteharo kahaqama amite vaira, virara ti hantuqa harimanta vauro, turave. *(Hosea 6:6)*

Ne vi uvara okara kankomake iriha nuatirio, ne kiama qaqi vaiintiqaa qumina uva vate variatirio. ⁸ Te Vataini Vatatai Vaintikama vauro. Te tentavano Maara Entaqaaavata raqiki vauraukara ti, te homa vi entaraqaa tenta varaataa ina kaiqara vararerave, tiro. Ihuva turama.

*Ihuva vaiinti vo kauqu koqema kora
(Maaki 3:1-6; Ruki 6:6-11)*

9 Ihuva vi vatara mini kero oru viro vika maara naavu voqi oru vaura. ¹⁰ Oru vauvaro vaiinti vovano vira kauqu tapara vuva vaumanta viraqiqi vauka Ihuraqaa uva vatareka auti vaiha vira irama amiteha tiha, Vaiintivano Maara Entaqaa nai kena vaiinti vaata koqema amitairera, viva mintiharo tinavu maara uva raqae kaanarove, kiae raqa kaanarove? ti.

11 Vika minti tuvaro Ihuva nái tiva nimiro tiharo, Niqihairo vo vaiinti sipisipivano Maara Entaqaa maiqaqi aqu viraro vi vaiintiva nai sipisipi hoe Maara Entaqaa vira mpaqi vaari qaqqini kaanarove, kiae mpaqi vaari kaanarove?

12 Ho iriate. Vaiintivano sipisipi aatara kairara tiro, viva Maara Entaqaa vaiinti vo koqema amitairera, kiama Mosira maara uva raqa kaanarove. Mintiharoma viva koqe kaiqama varaanarove, tiro.

13 Manti tivakero Ihuva vaiinti virara tiharo, Nena kauqu rantuta kaane, tuvaro nai kauqu rantutu kovaro vira kauquvano koqema viro hini kauqu voqaara vaura. ¹⁴ Maara Entaqaa vira kauqu koqema komanta Parasi vaiintinavu vevaru naavu mini ke, Ihura aruke uvara nai tiva ami nai tiva ami i vaura.

Haaru vetanto entaqaa Kotiva Ihura okarara tura

15 Vinavuka vira arukareka uva ti vauvaro Ihuva vinavuka uva iriro vi vatukara mini kero yumanta vaiinti nahenti airitaha vira avataqiqi vuvaro Ihuva vikaqihairo aihavuka airitaha ekaa koqema kora. ¹⁶ Mintimakero koqema nimitero viva vika qioqamatero tiharo, Ne kia te vare vauna kaiqara vo vaiinti nahenti tiva nimiate, tiro.

17 Ihuva minti tivakero mintiaqiro vuvaro haaru Aisaiaava vetanto entaqaa tu uvava vivauma vaura. Aisaiaava Kotiva mintima tivo tiro:

18 Ti kaiqa vaiinti tavaate. Te vira kaama tauna vaiintirave. Ti muntukavano virara vaimanta virara quaheha vauro.

Te tenta Maraqura viraqata vataariraro viva avuqavu qiaina okarara ekaa vo vatanaaka tiva nimianarove.

19 Viva kia antua uva vo vaiintiara tiraitiro, viva kia qumina noraiqamakero aakara ntavaqiro viramanta vaiinti nahenti aara vau vi anika kiama vira uva irivarave.

20 Kunkura/Vuraa ravanka viro variainara viva kiama ekaara kinta kaanarove. Ovavano qimpare iharo veru veru i vainara viva kia ekaara qimpa kaanarove. „Uva vitanta okara vaireva: Viva ququerara vaiinti nahentiqaa kiama maara voqavata vataanarove.“

Viva mintiharo qihaaqama kero variqiro viraro avuqavu qiaina okarava uritarakero varianarove.

21 Ekaa vo vatanaa vo vatanaaka vira autu irihama vivaqai tinavu kahaqi vaivama vaivo tivarave, tura. *(Aisaiaa 42:1-4)*

Kotiva mintima tivo tivakero haaru Aisaiaava minti tura.

Vaana avuhainaava Ihura kahaqi vaivo tura

(Maaki 3:20-30; Ruki 11:14-23; 12:10)

22 Ihuva vaumanta vokuka vaiinti vo vita vare anura. Vaanavano vira avutaqiqi vauvarora tiro, vi vaiintiva avu qimpa vuva vaharo kia uvavata tiraitiro vauvaro Ihuva vira koqema kovaro vi vaiintiva ho tavero ho uvavata tura.

23 Mintumanta vaiinti nahenti mini ruvaaqumavi vauka vi kaiqara tave ravukuvi Ihurara tiha, Ike, maa Ihuva Devitira Maaquvanoe vaivo? ti.

24 Vika minti tumanta Parasi vaiintinavu vi uvara iri aqao ti, Belsebuliva avuhainaava vaanavano Ihura kahaqi vaivarora tiro, viva vaana nitite vaimanta vika aitare vi variavo, ti.

25 Parasi vaiintinavu minti ti vauvaro Ihuva vinavuka nái aatoqi iru uvara iriro vinavukara tiharo, Vohaa vatanaavano vaiha tuqavuvi nai ari nai ariha variqí vivera,

vika vaakama taiqa vivarave. Ta vatanaakave, vo vatuka vo vatukaqiraakave, vo naavu vo naavuqi vaikave, vika mintiaqi vivera, vika vaakama taiqa vivarave.

²⁶ Sataaniva raqiki vai vaanauka tuqavuvi nai ari nai ari i vaivera, Sataaniva kia vikaqaa raqikiqi vi vairaro vira kempukavanovata kiama ho varianarove. ²⁷ Ne tirira tiha, Belsebuliva vira kempukaiqama kaivarora tiro, viva vaana nitite vaivo, tiarave. Ho ni avataqi vi varia vaiintika vonavu vikavata vaana nitite variarave. Tavave vinavuka kempukaiqama kaimantae vinavuka minti variavo? Ho iriate. Ni avataqi vi varia vaiintika vika ni uva rahake taveha hampi uvavema tivarave.

²⁸ Kotira Maraquravano ti kempukaiqama kaimanta te vaana nitite vauro. Vi uvava qucaa uva vaimantara ti, ne virara irihama Kotiva tinavuqaa raqikiaina entava aniraivo tiate.

²⁹ Te qaiqaavata ni tiva nimirerave. Naavu gova kempuka vaiintivano vairaro muara vaiintivano kia vira avuni rumpa tairera, viva vira naavuqihairo kia ho muara varaanarove.

³⁰ Kia ti hiquantakaa ni vai vaiintiva ti navutaiqama timite vai vaiintivama vaivo. Kia ti kahaqiharo ti sipsipi ruvaaquma timitai vaiintiva, vi vaiintiva ti sipsipi raantaupirimake vairave.

³¹ Te tiari ne iriate. Vaiinti nahenti ekaa qora kaiqa vare uvvara tira homa Kotiva nunka nimitaanarove. Mintirarovata, nai Maraqurara qora uva tiva amitera kiama nunka nimitaanarove.

³² Vaiinti povano ti Vataini Vatatai Vaintikara qora uva tiva timitainara, Kotiva vi vaiintira uva homa nunka amitaanarove. Mintirarovata, nai Maraqurara qora uva tiva amitairaro Kotiva maa entaravata, naantiara entavata, kiama vi vaiintira uva nunka amitaanarove.

*Qora katarivano qora tavaqai ire vairave tura
(Ruki 6:43-45)*

³³ Katarivano koqe katari vairera, vira tavavanovata koqe tavaqaima varianarove. Katarivano qora katari vairera, vira tavavanovata qora tavaqaima varianarove. Vaiintivano vira tava taveharoma, vi katariva qora katarima vaivo, maa katariva koqe katarima vaivo, tianarove. ³⁴ Ne *uqahivano/quaihavano* vatatai vaintikama variavo. Ne qora vaiintiqaima vahia ne nantiakaa koqe uva ho tivarave? Nana nana haikavano vira avu aatoqi mpiqaro vainara, vaiintivano vi haikaraqaima nai noqahairo tianarove.

³⁵ Nai avu aatoqi koqe kaiqa varaarirava vaivarora tiro, koqe vaiintivano koqe kaiqaqai vare vairave. Qora vaiintivano nai avu aatoqi qora kaiqa varaarirava vaivarora tiro, viva qora kaiqaqai vare vairave.

³⁶ Te tiari iriate. Ekaara entaqaas Kotiva *ko* tiharoma maa entara ne nana nana uvae qumina uva tivaterara iriharo viva niara mintima tianarove: Ne nantihae vi uvvara tivatorave? tianarove. ³⁷ Ne maa entara koqe uvaqai tivaqai vivera, vi entara ninta uvavanoma ni kuvantu nimitaanarove. Ne maa entara qora uva tivaqai vivera, vi entara ninta uvavanoma ninta rumpa taanarove, tiro. Ihuva turama.

*Ihurara nora kaiqa tinavu humiqaane tura
(Maaki 8:11-12; Ruki 11:29-32)*

³⁸ Ihuva minti tivakero vaumanta Parasi vaiinti hininavuvata, maara okara ti vau vaiintinavukavata, Ihurara tihamma, Maara ti variara vaiintio, nora kaiqa vo tinavu tivuqaa vara kairaqe tenavu taveha, ariara ququaama Kotiva vira atitairave tiare, ti.

³⁹ Vinavuka minti tuvaro Ihuva tiharo, Qora kaiqa vare variakave, Kotirara qumimaqamake ni variakave, vikaqaima nora kaiqa humiqairaqe tave ququaave tiare ti variarave. Kia te ni nivuqaa nora kaiqa vo vararerave. Kotiva haaru ni kaivaqara paropeti vaiinti Ionaaraqaa mintuma kontemba kero, Kotiva tigaavata mintianarove. Virara irihama ne tiriara Kotiva atitaiavave tivarave.

⁴⁰ Nora havukavano vira nampiqama kovaro Ionaava taaramo enta entaqivata aatitoraqavata havuka araraqi vaurave. Viva mintuntemake, te Vataini Vatatai Vaintika taaramo enta vata muntukaqi variqi virerave.

⁴¹ Ionaava vuru Ninive vatukaqi vauka Kotira vakaaka tiva nimumanta vi vatanaaka vaakama vira uva iri, qora aara qaqrake vaurave. Naantiara ekaara entaqaas vi vatanaaka Kotira vataake vahia niqaa uva vatehama mintima tivarave: Tenavu Ionaara uva irihama qora aara qaqrira kaavaunarave. Ionaaravata aatarako vaiintiva ne vaunaini oruromanta ne vira uva kia irurave, tivarave.

⁴² Vetanto entaqaas ni kaivaqava Soromonuva vo okara vo okara tave vauva vauvaro avuhainaa nahenti Sebaihainaava vira uva irireva vevara nai niaraihairo uru Soromonura uva irurave. Vi nahentiva minturara tiro, vivavata naantiara ekaara

entaaqaa niqaa uva vateharo mintima tianarove: Te niara aaraihai Soromonura uva irirera uruavaunarave. Ne haaru vauvaro Soromonuravata uri aatarako vaiintiva vovano vaumanta ne vira uva iriataara vaumanta ne kia vira uva irurave tianarove, tiro. Ihuva turama.

Vaana okarara tura

(Ruki 11:24-26)

⁴³ Ihuva minti tivakero tiharo, Vaanavano vaiinti vaata avutaqihairo qaqini aitarero aa-hara vatavaura viharo kaiqe auraara variare tivakero, tavaivarao kia auraara variainaara vaivarao ⁴⁴ viva nai tiharo, Kaiqe te orurante vaaka kauna naavura vi vaiintira avutaqi oru qaiqaa variare, tivakero oru tavaivarao vi naavura hiqama kero rupikero avuqavuqama kero vataivarao ⁴⁵ vi vaanava oru vaana 7navu vika uritarake qora kaiqa voqavata vare variaka ntita varero, qaiqaa oru vi vaiintira avutaqi vairave.

Hoqarero vi vaiintiva vaana vohaiqa vataakero vaiharo qoraiqama viro vairave. Naantiara viva airi vaana hampata vaiharo anomakero qoraiqama viro vairarama turo. Maa entara qora kaiqa vare variaka, vikavata vi vaiintira aanare voqamake qoraiqamavi variqi vivarave, tiro.

Ihura navunaaka vira tavareka anura

(Maaki 3:31-35; Ruki 8:19-21)

⁴⁶ Ihuva vi uvvara vaiinti nahenti ruvaaqumavi vauka tiva nimi vaumanta vira novavata vira qatanavuvata anire vira uva tiva amireka vahaqaqaini himpite vauvaro ⁴⁷ vovano Ihura vuru tiva amiro tiharo, Ai novavata ai qatanavuvata ai uva tiva amireka ani vahaqaqaini variavo, tiro.

⁴⁸ Viva minti tuvaro Ihuva tiharo, Tavave ti nova vaivo? Taukae ti qata vakaukavara variavo? tiro. ⁴⁹ Minti tivakero Ihuva nai kauqu tutukero aave vateharo nai vaintinavu nimiqeharo tiharo, Maakama ti novave ti qata vakaukavarama variavo.

⁵⁰ Ti Qova naaruvinai vaira vira uva iriha ni variaka, vikama ti qata vakaave, ti aura nakaave, ti nokave, variavo, tiro.

Auru qintato vaiintirara tura

(Maaki 4:1-9; Ruki 8:4-8)

13

¹ Vohaa vi entaraqai Ihuva naavu mini kero vevarero nora varuva namari auvahianta oru oquiviro mini vairare tumanta ² vaiinti nahenti airitahaa viva vauraqaa ruvaaqumavi vauvarora tiro, viva qaqira kero oru votuqi vaarirero viraqi oquiviro vaiharo namariqaa vaumanta vaiinti nahenti vataini namari auvahianta vauvaro ³ Ihuva vika vo uva vo uva tuqantaakero tiva nimura.

Viva mintima tiro: Vaiinti vovano kara auru qintareva vurave. ⁴ Viva auru qintaqai vuvavar hini auruvano aara auvahini hiqiruvaro uvirivano ani nama aqukorave.

⁵ Auru hininavu ori vataqaa hiqiruvaro vatavano kia vevantogama kero vauvarora tiro, auruvano hiqiriro vaaka qampiqa tovaro ⁶ tuqavano kia vevanto otu vurara tiro, kuarivano ururero iteharo vaaka aaharuqama korave.

⁷ Mintuvaro auru hininavu auqurora nimirivano qampiqoraqi hiqiriro, nimiri vataakero qampiqa tovaro nimirivanu mantaqa kovarora tiro, kia ho qampiqorave.

⁸ Mintuvaro auru hininavuvano koqe vataqaa hiqiriro koqema kero qampiqeharo vuru koqe tava airi tava iratorave. Airi tava iratomanta hini kuka aatarake voqavata airi tava iratomanta qaiqaa hini kukavata aatarake airi tava voqavata iratorave. ⁹ Ni aato vairera, vi uvvara okara iriate, tiro.

Vo uvaqaa tuqantaakeharo tiva nimu okarara tura

(Maaki 4:10-12; Ruki 8:9-10)

¹⁰ Ihuva vi uvvara tuqantaakero tiva nimumanta vira vaintinavu viva unaini anire vira ireha tiha, Are nantiharae vaiinti nahenti kia uva vutuke tiva nimiraitira, uva tuqantaakera vika tiva nimi variarao? ti.

¹¹ Vira vaintinavu minti tuvaro Ihuva vika nái tiva nimiro tiharo, Kotiva vaiinti nahentiqaa raqikiaina uvvara kukeqataira, vi uvarara Kotiva niaraqai vika qaqi kaira vi uvvara okara iriate tivakero, qaqi vaiinti nahentiaria kia vi uvvara iriate turave. Minti turara ti, te uvra tuqantaake vika tiva nimi vaunarave.

¹² Kotira uva iriarirava variqiro vi vairaro Kotiva vira kahagiraro vira uva vogavatama irianarove. Viva mintimakero variqiro viharo Kotira uva airiqamakero irianarove. Kotira uva kia iriarirava variqiro vi vairaro, viraqaahairo Kotiva viva inaaraiqa iritaaina uvvara qaqini vara kaanarove.

13 Vaiinti nahenti tavehavata, kia anomake tave variarave. Vika uva irihavata, kia aato kenko timanta iri variarave.

Vika mintiarara ti, te uva tuqantaake vika tiva nimi vaunarave.

14 Vaiinti nahenti minti variarara tiro, haaru vetanto entaqaa Aisaiaava Kotira uva qoqaiqamako uvava maa entara vivauma vaivo. Viva mintima tiro:

15 Maa vatanaaka vika avu aatovano kempukaiqama viro vaivo. Vika kia Kotira uva iriataa imanta, nái aato tintate nái avu qimpateha variarave.

Vika kia mintiataarave. Vika nái avuqohaivata nái aatoqihaiavata ti uva iri tave ti haaraatirio, te vika homa kahaqama nimitaauraitirio, turave. *(Aisaiaa 6:9-10)*

16 Ho nenavu avuqohai kankomake tave variarara ti, ne quahehama variavo. Nenavu aatoqihai anomake iriarara ti, ne quahehama variavo.

17 Te quqaa tiari iriate. Haaru vetanto entaqaa airi paropeti vaiintinavuve, koqe aaraqaa ni vau vaiintikave, vika ne tave varia haikara tavaataa imantavata, kia ho tavorave. Vika ne iri varia uvvara iriataa umantavata, kia ho irurave, tiro.

Auru qintatora vira okarara tura

(Maaki 4:13-20; Ruki 8:11-15)

18 Minti tivakero Ihuva nai vaintinavu tiva nimiro tiharo, Nenavu iri vaiqe te auru qintato vaiintiraqaa uva tuqantaake tuna okarara ninavu tiva nimiare.

19 Kotiva vaiinti nahentiqaa raqikiaina uvara vaiinti vovano vi uvara kia kankoma kero iriraitiro vaivaroo, Sataaniva anirero vira avu aatoqihairo vi uvara qaqlini raqia aqukairave. Vi vaiintiva auruvano aara auvahini higirura voqaarama vaivo.

20 Auru hininavu ori vataqaa higirura vira okara vaireva maantimama vaivo: Vaiinti nahenti vonavu Kotira uva iri, vi uvarara quahake variavaro ²¹ viraqaaahairo uvavano vika avu aatoqi kia vukaiqamakero vaimantara ti, vokiaka vi uvara kaara vika qoraiqama nimite variamanta vika tinavu harivorave tivakeha qaqrake variarave.

22 Auru hininavuvano auqurora nimiriqi higirura, vira okara vaireva maantimama vaivo: Vaiinti nahenti vonavu Kotira uva iri, viraqaaahai vika maa vataraqahainaa haikarara noraiqaake iriqi viha, monu airaura vareraraqai iriqi vi variavaro vi haikava vika ravaaqavuke vaimanta vika Kotira uva iriara qumimaqamake variavaro vikaqihairo kia koqe kaiqavanovata qovaraiqi vairave.

23 Auru hininavu koqe vataqaa higirura vira okara vaireva maantimama vaivo: Vokiaka Kotira uva kankomake iri, viraqaaahai vika koqe kaiqa Kotira vara amitaqi vi variamanta, vokiaka Kotira uva iriqi viha vika uri naatarake voqavata koqe kaiqa vara amitaqi vi variamanta, qaiqaa vokiaka vika naatarake Kotira uva iriqi viha koqe kaiqa Kotira vara amitaqi vi variarave, tiro. Ihuva minti turama.

Ihuva nimiriqaa uva tuqantaakero tiva nimura

24 Ihuva vahiaro vo uva tuqantaakero vaiinti nahenti tiva nimiro tiharo, Kotiva vaiinti nahentiqaa raqikiarirava maa uvvara voqaarama vaivo: Vaiinti vovano *uiti* auru koqera nai naahoqi qintatorave.

25 Auru qintatero viva oru entaqi nai navunaaka hampata vaita vauvaro vira navutaava anirero viva *uiti* qintatoraqi qora nimirivata qintatorave. „Vi nimiriva vaireva vira kaqive mareve *uiti* kaqive mareve vohaa qaramakero vaivarovata, vira tavaqai kia vohaa qaramakero vairave.“ Vira navutaava nimiri qintatero vuvuro ²⁶ *uitivanovo* nimiri vataakero vohaaraqi qampiqatero inaaraiqakaa tava iratareva auti vaumanta vira kaiqa vaiintinavu tavovaro vi nimiriva *uiti* vataakero vohaa qampiqa tero vaurave.

27 Mintima vaumanta vira kaiqa vaiintinavu vira tave, oru naaho qora ireha tiha, Nora vaiintio, are kiae koqe auru qinta taarao? Taihairoe qora nimirivata viraqi qovaraiqivo? ti.

28 Minti tuvaro viva oho tiro, Ti navutaavama ti naahoqi vi nimirira qinta taivo, tumanta vira kaiqa vaiintinavu vira ireha tiha, Hoe tenavu vi nimirira qaqlini raru kararave? tuvaro ²⁹ viva aqao tiro, Kia mintiate. Ne nimiri raru keha *uitivata* raru kevorave.

30 Qaqi kaivaroo *uitivanovata* nimirivanovata vohaaraqi qampiqaaire. *Uitivanovo* mpeqqaiqama virage te ti kara qantu vare anikara mintima tirerave: Ne vi nimirira naane teqake rumpa vare vuru iha quara timitema, viraqaaahai *uiti* vira teqakema vuru ti kara naavuqima timitate tianarove, tiro. Ihuva vi uvvara maantimakero tuqantaakero vika tiva nimura.

Masteti auruara uva tuqantaakero tura

(Maaki 4:30-32; Ruki 13:18-19)

³¹ Ihuva vaiharo vo uva tuqantaakero vaiinti nahenti tiva nimiro tiharo, Kotiva vaiinti nahentiqa raqikiarirava vaireva: *masteti* auru voqaarama vaivo. Vaiintivano *masteti* auru varero vuru nai naahoqi ututorave.

³² Vi auruva inaara auruqaima vairarama turo. Mintima vaivarovata, vi aurura utaivarvo qampiqä tero ekaa vo naaho vo naaho uri aatarakero katari voqaara vaimantara ti, uvirinavu vira kaaraqira ho *navu/naavu* kaqateha variaravema turo, tiro. Ihuva vi uvvara tuqantaakero tiva nimura.

Kaupititirara uva tuqantaakero tura

(Ruki 13:20-21)

³³ Ihuva vaiharo vo uva tuqantaakero vaiinti nahenti tiva nimiro tiharo, Kotiva vaiinti nahentiqa raqikiarirava vaireva, kaupititira voqaarama vaivo. Nahentivano mpareti untareva iharo *porihi/voruhi* varakero vira noqa vuarire tiro, kaupititira varakero *porihi/voruhi* vataakero tuqantaa kaivarvo kaupititiravano *porihi/voruhi* hampata avituma viro ekaa mpareti ntera kaivarvo noqavi vairave, tiro. Ihuva vi uvvara tuqantaakero tiva nimura.

Ihuva uva tuqantaakero tu okarara

(Maaki 4:33-34)

³⁴ Ihuva vaiinti nahenti vo uva vo uva tiva nimireva viva kia yutukero tiva nimiraitiro, viva uva tuqantaakeroqai tiva nimiqiro vi vaura. ³⁵ Viva minti tivaqiro vuvaro haaru vetanto entaqaa paropeti vaiintivano tu uvava vivauma vaura. Vi uvava mintimama tiro:

Te vaiinti nahenti uva tiva nimirera kia yutuke tiva nimiraiti, uva tuqantaakeqai tiva nimirerave.

Maa vatara autukero vato entaraqaaahai variqi anihia kia kankomake iru uvvara, te vi uvvara okara ni tiva nimirerave, tura. (Ihi 78:2)

Haaru vetanto entaqaa paropeti vaiintivano Ihurara mintima tura.

Qora nimiri uiti naahoqi qintato okarara tura

³⁶ Ihuva vaiinti nahenti uva tuqantaakero tiva nimiqi viro viraqaaahairo viva vaiinti nahenti mini kero naavuqi yumanta vira vaintinavu viva vauraqi orure tiha, Are vaaka tianara vira navutaava nimiri vira naahoqi qintato uvvara, vi uvvara okara tinavu tiva timirage iriare, ti.

³⁷ Vira vaintinavu minti tuvaro Ihuva vinavuka tiva nimiro tiharo, Vaiinti vovano koqe auru qintato vaiintira okara vaireva, te Vataini Vatatai Vaintika maa vikave.

³⁸ Vi vaiintira avutaqi vau vatava vaireva, ekaa maa vatavama vaivo. Koqe auruvano vaireva, Kotira uva iria vaiinti nahentikama variavo. Qora nimirivano vaireva, kia Kotira uva iria vaiinti nahentika Sataanira vaintima variavo.

³⁹ Vira navutaava nimiri qintato vaiinti vaireva, viva Sataanivave. Kara qantu entava vaireva, ekaara enta naantiara maa vatava taiqa vuaina entavama vaivo. Kara qantu vare anu vaintika vaireka, vika *enselinavuve*.

⁴⁰ Vira kaiqa vaiintinavu nimiri raruke rumpake vuru iha quara amitonemake, naantiara ekaara entaqaa mintimake qovaraiqianarove.

⁴¹ Te Vataini Vatatai Vaintika ekaara entaqaa tenta *enseli* vika nititaari vika otu te raqikiaina vataraqaaahai ti vaintinavu qoraiqama nimite vai vaiinti nahentikavata, ekaa qora kaiqa vare vaikavata vaaqu kaiqa vare vaikavata rumpake ⁴² vare vuru nora iha itainaraqi aqru kaimanta vika ihaqi vaaqu iqi rataqi viha nai aarai tenti aneha vaivarave.

⁴³ Vika mini vuru aqukaimanta avuqavuqamake ni vai vaiinti nahentika kuarivanu itainantemake, itaqi vivaro Kotira vika Qova vikaqaa raqikiqiro viramanta vika variqi vivarave. Ni aato vairera, vi uvvara okara kankomake iriate, tiro. Ihuva minti turama.

Koqe airaira vataqi kukeqato uvarara tura

⁴⁴ Ihuva vaiharo uva vo vaiinti nahenti tuqantaakero tiva nimiro tiharo, Kotiva vaiinti nahentiqa raqikiarirava vaireva, nora monuve airairave vataqi kukeqa tora voqaarama vaivo. Vataqi vi haikara kukeqa tovaro vauvaro vaiinti vovano vira ranta qovarama kero tavero, quahakero vi haikara qaiqaa kukeqa tero, oru vi vatara varareva ekaa nai vatai haikaraqohairo koqaama kero vi vatara varorave, tiro.

Kau vukaariara tura

⁴⁵ Ihuva minti tivakero viva uva vo tuqantaakero tiva nimiro tiharo, Kotiva vaiinti nahentiqa raqikiarirava vaireva, vaiintivano kau vukaari varareva rantaqiro vi vaura voqaarama vaivo. ⁴⁶ Vi vaiintiva vi haikara vi haikara varareva viharo tavovaro vo vaiintivano kau vukaari nai voqavata koqe ura vatovaro viva vira varareva iharo oru nai

vato haikaraqohairo ekaa koqaa autukero monu varero vuru amiharo vi kau vukaarira varorave, tiro.

Havuka vahera tura

⁴⁷ Ihuva minti tivakero viva uva vo tuqantaakero tiva nimo tiharo, Kotiva vaiinti nahentiqaa raqikiarirava vaireva, vaiintinavu varuvaqi vahe aqukaamanta airi havuka viraqi otigete ntuva vuara voqaarama vaivo.

Vahe varuvaqi aqukaamanta havuka airitahaa viraqi otigete ⁴⁸ mpiqa vuamanta vaiintinavu vahe vira raraue vare vuru qaqaini ke, viraqihai nuntuqi viha koqe havuka varakeha utaqi ruva vate, qora havuka varakeha qaqira aqukaarave.

⁴⁹ Naantiaria ekaara entaqaas vira voqaarama varianarove. Vi entara *enseli* vika tuvure vaiinti nahenti rairaqi viha avuqavuqaake ni vaika qaqi ke, qora kaiqa vare vai vaiinti nahentika ⁵⁰ ntita vare vuru nora iha itainaraqi aqukaimanta vika viraqi vahia iqii rataqi viha nái aarai tenti aneha vaivarave, tiro.

⁵¹ Ihuva minti tivakero viva nai vaintinavu irero tiharo, Te vi uvara vi uvara ni tiva nimunara ne hoe iriavo? tumanta vinavuka eo tuvaro ⁵² viva vinavuka tiva nimo tiharo, Kotira haaruua uva okara tiva nimi varia vaiintikaqihairo vovano Kotiva vaiinti nahentiqaa raqikiaina uvaruar qquaave tivakero Kotira vaintiqama vuvarirava, vi vaiintiva vaireva, naavu qora voqaarama vaivo. Vi vaiintiva nai naavuqihairo vo haika vo haika, haaru vato haikaravata, qaraaka vato haikaravata, vare vairave, tiro.

Nasaretiqihainaaka Ihura qoririma amitora

(Maaki 6:1-6; Ruki 4:16-30)

⁵³ Ihuva vo uva vo uva tuqantaakero vaiinti nahenti tiva nimi taiqa kero viva vi vatukara mini kero ⁵⁴ nai maaqaini anirantero oru maara naavuqi vahiaro vo uva vo uva tiva nimumanta vaiinti nahenti ravukuvi tiha, Ike, vi vaiintiva taihairoe koqe avu aato vareroe koqe uva ti vaivo? Tavave vira noraiqama kero kempuka amivaroe viva nora kaiqa vare vaivo? ti.

⁵⁵ Vika minti tivake aqao ti, Vi vaiintiva tainta auti vai vaiintira maaquvanoma vaivo. Mariava vira novama vaivo. Iemivavata, Iohepivavata, Saimonivavata, Iutaasivavata, vinavuka vira qatanavuma variavo. ⁵⁶ Vira auranavu maini tinavu hampatama variavo. Taihairoe viva vi kaiqara vi kaiqara okara tavairave? ti.

⁵⁷ Minti tivake vika Ihurara tiha, Viva kia nora vaiintive. Viva qumina maa vatanaavaqaima vaivo, tivakeha vira qoririma amitora.

Vika minti tuvaro Ihuva vika tiva nimo tiharo, Paropeti vaiintivano vo vataini oru vairamanta vi vatanaaka virara nora vaiintive tivake vira quahama amitevarave. Viva nai maaqaini vairamanta vira navunaaka virara qumina maa vatanaavaqaima vaivo tivake kiama virara nora vaiintive tivarave, tiro. ⁵⁸ Ihuva minti tivakero vi vatanaaka kia virara kempukaiqamake irurara tiro, Ihuva mini vahiaro nora kaiqa taaraiqaqai vara nimitora.

14

Ionira arukora

(Maaki 6:14-29; Ruki 3:19-20; 9:7-9)

¹ Vi entara Herotiva Kariri vataqaa raqiki vahiaro, vaiinti nahenti Ihurara ti vau uvara vivavata irura.

² Herotiva iriro nai kaiqa vaiintinavu tiharo, Oho, vi vaiintiva Ionivave. Ioniva namari nimi vau vaiintiva qutu vunaihairo qaiqaa qaqi himpiro ni vaivo. Viva qaiqaa qaqi himpiro ni vahiarora tiro, viva nora kaiqa ho vare vaivo, tiro.

³⁻⁴ Tota Herotiva nai qata Piripira naata Heroti-Namarira varatovaro Ioniva Herotira tiva amiro tiharo, Are nena qata naata kia varaataara vaivararama varaaraao, tuvaro vi uvvara kaara Herotiva vaiinti vo atitovaro Ionira ravaqaqvav kero vira rumpa varero vuru karapuhiqi kora.

⁵ Herotiva Ionira arukaataa uvoro, vaiinti nahenti Ionirara paropeti vaiintive turara tiro, Herotiva vika naatu qeteharo kia vira arukora.

⁶ Mintuvaro Herotiva nai vatato entava qovaraiquvaro vi entaraqaa viva vaiinti vonavu naarama komanta ani ruvaqaumavi vauvaro Heroti-Namarira raavuravano vika ihi rava nimite vauvaro Herotiva vira tavero, voqamakero quahama amiteharo ⁷ nai kauqu aiqiqaa aqukero tiharo, Nana haikarae ai muntukavano vainara, virara tiva timiraqe ai amiare, tiro.

⁸ Herotiva minti tuvaro vi varaataava nai nora irovoro vira nova maa uvara tiane tuvaro vi varaataava Herotirara tiharo, Namari nimi vai vaiintira Ionira qiaata vaaka tanuqira vara viri timiane, tiro.

⁹ Minto tuvaro King Herotira muntukavano qoraiquvaro viva vaaka kauqu aiqiqaa aqukero tivato uvararavata, kara nareka anu vaiintikaravata iriharo, viva vaiinti vo atitero vi varaatava tinantema kaane tuvaro ¹⁰ vi vaiintiva oru karapuhiqihairo Ionira auntu teqa kora. ¹¹ Teqa kero vira qiata tanuqi varero vuru vi varaatara amuvaro viva varero vuru nai nora amura.

¹² Mintumanta Ionira avataqi ni vau vaiintika ani vira vaata vare muntu quntama te, viraqahai vika vuru Ihura tiva amura.

*Ihuva inaara kara 5,000 vaiinti nimura
(Maaki 6:31-44; Ruki 9:10-17; Ioni 6:1-13)*

¹³ Ionirara Ihura vuru tiva amuvaro Ihuva vi uvvara iriro vi vatukara mini kero votuqi vaarirero nai vaintinavu vataakero nariaraa vaireva qumina vataini vumanta vaiinti nahenti airitahaas vi uvvara iri, vo vatuka vo vatukaihai vataqaa Ihura avataqi vura.

¹⁴ Ho Ihuva orurero votuqihairo vaavirero tavomanta vaiinti nahenti airitahaas ruvaaqumavi vauvaro viva vikara aaqurihamma nimitero vikaqihai nihavu vaiinti nahentika vaata koqema nimitora.

¹⁵ Ihuva mini variqiro vuvaro kuarivano tuvi vumanta vira vaintinavu viva unaini orure tiha, Maini qumina kantave. Entama vuantorave. Vaiinti nahenti nititaira oru vatukanavuqihai kara koqamake naate, ti.

¹⁶ Vira vaintinavu minti tuvaro Ihuva aqao tiro, Kia vika nititaimanta vuate. Nentanavu vika kara nimimanta naate, tumanta ¹⁷ vinavuka aqao ti, Tenavu tavauraro maini mpareti kauqurunavuvata havuka taaraqantavataqaima vavivo, ti.

¹⁸ Vira vaintinavu minti tuvaro Ihuva vi karara vara viri timiate tivakero ¹⁹ vaiinti nahentiara ukau kanta oquivi variate tivakero viva mpareti kauqurunavu varakero, havuka taaraqantavata varakero, naaruvaini taveharo Kotirara koqema iarao tivakero mpareti nkukero vi karara nai vaintinavu nimumanta vira vaintinavu vaiinti nahenti ekaa rairake nimumanta ²⁰ vika ekaa ho nora. Ekaa vaiinti nahenti ho nomanta viraqahai vira vaintinavu rutantuto utara, nora utanavu vare, vika neha raukuto karara nuntuke utaqi ntuvaqi vi, uta 12navu mpiqa kora.

²¹ Vi entara 5,000 vaiinti vi karara nomanta nahentivata vaintivata airitahaas, vi karara nora.

*Ihuva varuva namari vaura aiqu ntavaqiro vura
(Maaki 6:45-52; Ioni 6:16-21)*

²² Ihuva kara nimiro viraqahairo nai vaintinavu nititero tiharo, Votuqi vaarire ne naane varuva namari hini mantaraini oru vi vaise te vaiinti nahenti nititaari nái maaqa nái maaqa vuate, tiro.

²³ Minto tivakero viva vaiinti nahenti nititama kero, viraqahairo Kotira aarareva verara ainqinaqaa vuvaro entama vuvaro viva mini oru nariaraa vaura. ²⁴ Mini vauvaro votuvano varuva avutaaqaa vuvaro uvaivano vika virera unaihairo anuvarora tiro, namarivano votu venta ventamaqi ani vaura.

²⁵ Uvai uti vauvaro namarivano votu venta ventamaqi vi vauvaro aatitareva au-maiquvaro Ihuva varuva vaura aiquqahairo ntava varero viro vika unaini vura. ²⁶ Vika unaini vumanta vira vaintinavu tavovaro viva varuva vaura aiquqahairo ani vaumanta vika voqamake aatu itomanta noraiqaake qete vahia oi ti tiha vaanavanove ti vauvaro

²⁷ Ihuva vaaka vikara tiharo, Muntuka paru i vaira variate. Tema anuro. Kia qetaate, tiro.

²⁸ Ihuva minti tuvaro Pitaava tiharo, Noravaavo, are quqaa viva irera, are tiriaravata tirage tevata aiquqahai namari vaura are inanaini vuare, tiro.

²⁹ Pitaava minti tuvaro Ihuva tiharo, Ho aniane, tiro. Tuvaro Pitaava votuqihairo vaavirero varuva vaura aiquqahairo Ihuva unanaini viro.

³⁰ Viva mini viharoma ho virare tivakero tavovaro uvaivano voqamakero uti vauvaro vira tavero, viva qetovaro vira aiquvano namariqi otiqetareva uvaro viva Ihurara naverai tiharo, Noravaavo, ti kahaqiane, tuvaro ³¹ Ihuva vaakama nai kauqu tutukero vira utu varero tiharo, Are tiriaraqai kempukaiqama kera iriataarave. Are nantivare taara aato iriara? tiro.

³² Ihuva minti tivakero vikantiro votuqi vaari rovaro uvaivano vaaka taiqa vura.

³³ Mintuvaro vira vaintinavu votuqi vauka Ihura quahama amiteha vira autu tuaherake tiha, Are quqama Kotira Maaquvano variarao, tura.

*Ihuva Kenesareti vatanaaka niha vuka koqema kora
(Maaki 6:53-56)*

³⁴ Vinavuka minti tivake votuqi varuva taqa vare Kenesaretini orurora.

³⁵ Mini oruromanta vi vatanaaka Ihura viraaqamake tave, uva varakomanta ekaa aumanto vau vatukaraqihai aihavu vaiinti nahentika ntita vare vuru Ihuva vaunaini vate, ³⁶ Ihurara mpo tiha, Qaqi kaira vika ai utavaaqa vitianta utu varaivaro vika vaata koqema vuarire, tumanta Ihura utavaaqa utu varoka koqema vi vaura.

15

*Naaqu taatoka uvvara tura
(Maaki 7:1-13)*

¹ Parasi vaiintinavuvata, maara okara ti vau vaiintinavukavata, Ihura tavareka Ieruharemiqihai anire Ihura ireha tiha, ² Nantihae ai vaintinavu tinavu kaivaqaukavara uva maara tivatora raqake variavo? Ai vaintinavu kia kauqu hiqama karaiti, kara ne variarave, ti.

³ Vika minti tuvaro Ihuva nái tiva nimiro tiharo, Ne vo? Ne nantihae Kotiva tivatavu uvara kia iriraiti, nenta uvaqai iriqi vi variarave? ⁴ Kotiva mintima tiro: *Nena noka qoka koqe oraqaqai autu nimitaane. Nai noka qokara vaaqu uva ti vaina vaiintira arukaate, turave.*

⁵ Mintima Kotiva tivato uvava vaimanta ne vi uvara kia iriraiti, nenta irike ne tiha, Vaiintivano nai noka qokara tiharo, Te nitanta kahaqihai nimire iaina monura kia nitanta nimiraiti, te vi monura Kotira amitarerave tirera, ⁶ vi vaiintiva homa nai noka qoka kia kahagiraitiro, qaqi varianarove, ti variarave. Ne hampi uva minti tivakeha ne Kotira uva qumimaqama keha nenta kaivaqaukavara tivato uvvara viraqqai vaiinti nahenti tiva nimi variarave.

⁷ Ne unaqaraiqama keha koqe kaiqa vare variakave. Aisaiaava haaru vaharo niara avuqavuqama kero uva qara ntuva torave. Aisaiaava Kotira uva qoqaiqama keharo Kotiva mintima tivo tiro:

⁸ Maa vatanaaka noqihai ti hutu tuahere variavaro vika muntukavano kia tiriara vaimanta variarave. ⁹ Vika vaiintivano nái qumina uva maara tiva nimia uvvara vi uvaraqai ti variarara ti, vika quminama ti hutu tuahere variavo, turave. *(Aisaiaa 29:13)*

Aisaiaava haaru vetanto entaqaa niara minti turave, tiro.

*Nana haikavanoe vaiinti qoraiqama ke vairave? tura
(Maaki 7:14-23)*

¹⁰ Ihuva minti tivakero vaiinti nahenti naarama kero vikara tiharo, Maa uvvara irihama kankomake iriate. ¹¹ Vaiintivano kara neva, vi karava kia vaiinti avu aato qoraiqamake vairave. Nai avu aatoqihairo qovaraiqaavi vai haikava, vi haikavaqai vi vaiintira qoraiqamake vairave, tiro.

¹² Ihuva vi uvvara tivakero vaumanta vira vaintinavu viva unaini orure tiha, Are kiae iriarao? Parasi vaiintinavu are vaaka vaiinti nahenti tiva nimiana uvarara irihama, vika kia quaharaiti, qora uvave ti variavo, ti.

¹³ Vinavuka minti tuvaro Ihuva tiharo, Oho, Parasi vaiinti vika vaireka, vika ti Qova naaruvinai vaiva kia ututai karara voqara variarave. Qora kara tuqa vataakero raru kaintemakero, viva vika qaqira kaanarove, tiro.

¹⁴ Minti tivakero viva Parasi vaiintinavu tiharo, Kia vikara noraiqaake iriate. Viqa avu qimpa vimanta vaiha, avu qimpa vuaka vonavuvata aara numiqareka auti variakave. Avu qimpa vira vaiintiva avu qimpa vina vaiintira vo vitakero aara umiqareva auti vairera, vitanta oraqi aqu vivarave, tiro.

¹⁵ Ihuva minti tuvaro Pitaava tiharo, Vaaka uva tuqantaakera vaiinti nahenti tiva nimiana uvvara tinavu tiva timiraqe vi uvvara okara iriare, tuvaro ¹⁶ Ihuva tiharo, Ike, nenavuvata kiae kankomake iriavo?

¹⁷ Ne kiae tavaavo? Vaiintivano kara naivaro vi karava „kia vira avu aatoqi viqetaraitiro,“ vira araraqiqai otu variro, viraqaahairo qaqini tuvitare vairave. ¹⁸ Vira noqihairo ti vai uvava, vi uvavama avu aatoqihairo anireharo vira qoraiqamake vairave.

¹⁹ Vaiinti avu aatoqihairo vaaqu haikara iriarirava qovaraiqi vairave. Vaiinti arukaarijavave, vora qorainti vataakeroe vora naata vataakeroe hampi nuariravave, hampi qaramaqiro nuariravave, muara autuariravave, una uva tiariravave, vora autu vataaini tuvuarire tiro una uva tiariravave, vi haikava vi haikava viraqihairo qovaraiqi vairave.

²⁰ Vi haikava vi haikava avu aatoqihairo anireharo vaiinti qoraiqama kaivarо „Kotiva vi vaiintirara qora vaiintive ti vairave.“ Vaiintivano kauqu kia hiqama karaitiro kara naarirava kia vira vara qoraiqama kaanarove, tiro.

*Ihuva vo vatanaa nahenti kahaqama amitora
(Maaki 7:24-30)*

²¹ Ihuva minti tivakero vi vatara „Kenesareti“ mini kero vatuka taaraqanta Taiaavata Saidonivata vau vataraqaa oru vaura.

²² Mini oru vauvaro vi vataraqaaahairo Kenaani nahenti vovano Ihuva vaunaini orurero Ihurara naveraitiro tiharo, Nora Vaiintio, Devitira Maaquo, tiriara mpo ike tiva timitaane. Vaanavano ti raavura avutaqai vaivaro viva anomakero qoraiqama viro vaivo, tiro.

²³ Vi nahentiva minti tuvaro Ihuva kiaqai uvavata tiraitiro vauvaro, vira vaintinavu viva vaunaini orure tiha, Mpo, vi nahentira kahaqiraro vaaka vuarire. Viva tinavu tivataqai aniharo tinavu haare vaivaro tinavu popohama timitaivo, ti.

²⁴ Vinavuka minti tuvaro Ihuva aqao tiro, Isareri vatanaaka sipisipi voqaara kakakima vuavaroo Kotiva ti tititaimanta te vi vatanaakaqai kahaqama nimitarera tuvuraukave, tiro.

²⁵ Ihuva minti tuvaro vi nahentiva ani Ihura avuqaa hiqirivi vahiaro tiharo, Nora Vaiintio, ti kahaqama timitaane, tuvaro ²⁶ Ihuva aqao tiro, Hauri te vaintivano i karara varake vairi aqu nimitaaronrave, tiro.

²⁷ Ihuva „uva tuqantaakero, minti tuvaro vi nahentiva tiharo, Nora Vaiintio, ququaama tiarao. Ho vaintivano kara viti aqukaira vairi vika ani ne variarave, tiro.

²⁸ Nahenti viva minti tuvaro Ihuva tiharo, Nahentivauvo, are tiriara kempukaiqaa kerama iriarao. Are tinantemake, te mintima amitarerave, tiro. Ihuva minti tuvaro vate viraqai vira raavurvavano koqema viro vaura.

Ihuva vaiinti nahenti airitahaa koqema kora

²⁹ Ihuva vi vatara mini kero Kariri Varuva auvahianta oru viro aiqinaqaa vaarirero oquviro vaumanta ³⁰ vaiinti nahenti airitahaa viva unaini orurora. Vika niha vukavata ntita vareha aiqu qoraiqaa vurave, avu qimpa vurave, vuhaari rareru vurave, no tinta vurave, vo rovara vo rovara varokave, vika vika ntita vare vuru Ihura aiqu taraini kovaro viva vika ekaa koqema kora.

³¹ Ihuva vika koqema komanta vaiinti nahenti tavomanta no tinta vuka ho uva tumanta, vuhaari rareru vuka qaqi avuqavu vaumanta, aiqu qoraiqaa vuka qaqi numanta, avu qimpa vuka qaiqaa qaqi tave vaumanta, vaiinti nahenti vika tave voqamake ravukuvi kauqu runkinkiri iha Kotira autu tuahereha tiha, Tinavu Variqavano koqema kero tinavu Isareriqaa raqiki vaivo, tura.

Ihuva 4,000 vaiinti kara nimura

(Maaki 8:1-10)

³² Ihuva nai vaintinavu naarama kero tiharo, Te vaiinti nahenti uki variakara aaquri-hama nimite vauro. Vika taaramo enta ti vataake variqi vihami vika nái kara nama taiqa kaavo. Te vika nái maaqaini qaqi nititama kaari vika narara viha aarana *vuakaatama/vuakaatauma* vi hiqintivorare, tiro.

³³ Ihuva minti tumanta vira vaintinavu tiha, Maini qumina kantave. Taihaie tenavu kara varake vika nimirarave? Vaiinti nahenti airitahaa maini variavo, ti.

³⁴ Vinavuka minti tuvaro Ihuva vinavuka irero tiharo, Nanti nanti mparetie ntuva taavo? tumanta vinavuka tiha, Mpareti 7navuvata, inaara havuka taaraiqavatama, ntuva tauro, ti.

³⁵ Vira vaintinavu minti tuvaro Ihuva vaiinti nahentiara vatakanta oquvuate tivakero ³⁶ mpareti 7navuvata havuka taaraiqavata varakero Kotirara koqema iārao tivakero vi karara nkuikero raira kero nai vaintinavu nimumanta vinavuka varake vaiinti nahenti nimiqi vumanta ³⁷ vika ekaa vi karara ho nora. Ho neha hini kara qaqi kora vira vaintinavu nuntu vare rutantuto utara 7navu mpiqa kora.

³⁸ Vi karara vaiinti 4,000navu ne vaumanta, nahentivata vaintivata airitahaavano nora.

³⁹ Vika kara nama kovaro Ihuva vika nái maaqa nái maaqa nititama komanta vuvaro viva votuqi vaarirero varuva taqa varero Magadaani vatainivura.

*Nora kaiqa tinavu humiqaane tura
(Maaki 8:11-13; Ruki 12:54-56)*

16

¹ Ihuva mini vumanta Parasi vaiintinavuvata, Satiusi vaiintinavuvata, Ihuva vaunaini orure, kaiqe vira avateha tavaare tivake Ihurara tiha, Are nora kaiqa vo tinavu tivuqaa qovarama kairage tenavu taveha, ariara ququaama Kotiva vira atitairave tiare, ti.

² Vi vaiintinavuka minti tuvaro Ihuva vinavuka tiva nimiro tiharo, Ne erainaini tavaavaro naaruvaini vehohaaraqimanta ne tiha, Hura uvihaanarove, ti variarave.

³ Ne toqaqi tavaavaro naaruvaini kumporaiqimanta tiha, Vate aequi ntuanarove, ti

variarave. Ne naaruvaini tavehama kuari itaaina okararave, aaqu ntuaina okararave, ho tavehavata, ne nantihae maa entara qovaraiqiaina okarara kia kankomake iri tavaavo?

⁴ Qora kaiqaqai vare variaka Kotirara qumimaqamake variaka, vikama nora kaiqa humiqairaqe ai okarara quqaave tiare ti variarave. Kia te tenta okara vika numiqeha nora kaiqa vo vararerave. Kotiva haaru ni kaivaqara Ionaara mintuma kontema kero, Kotiva tivata mintima kaanarove. Viraraqai irihama ne ti okara kankomake iriha ne tiriara Kotiva atitai vaiintivave tivarave, tiro. Ihuva minti tivakero vi vaiintinavuka mini kero surama.

*Parasi vaiintinavuaravata Satiusi vaiintinavuaravata rauriha variate tura
(Maaki 8:14-21)*

⁵ Ihura vaintinavu tauruke kia mparetivata ruva vararaiti, qaqi varuva namari taqa vare vura. ⁶ Ihuva tiharo, „kaupititiravano avituma viro mpareti ntera kaivaro noqa vi vairave.“ Parasi vaiintinavuvata Satiusi vaiintinavuvata vika kaupititira voqaarama variavo. Nenavu vikara rauriha variate, tiro.

⁷ Ihuva minti tumanta vinavuka Ihuva tuqantaakero vika tiva nimu uvvara kia iriraiti, nai tiva ami nai tiva ami iha tiha, Nana uvae tivo? Mpareti kia vare anunara, vira kaarae minti tivo? tura.

⁸ Minti ti vauvaro Ihuva vinavuka ti vau uvvara iriro tiharo, Ike, tiriara noraiqaake iriataara vaimanta ne inaaraqama tiriai variavo. Ne nantihae mpareti kia vare aniara kaara nai tiva ami nai tiva ami i variavo?

⁹ Kiae ni aato kenko timanta iriavo? Te mpareti kauqurunavu varake nkuike 5,000 vaiinti nimiavauna entaraqaa ne vika neha ko karara nuntu vareha nanti nanti utanavue mpiqa korave? Kiae ne virara iritaavo?

¹⁰ Te 4,000 vaiinti mpareti 7navu nimiavauramanta vika neha kora ne nuntu vareha nanti nanti utanavue mpiqa korave? Ne kiae viraravata iritaavo? ¹¹ Te vaaka tuna uvvara ne nantihae kia aato kenko timanta iriavo? Te niara uva tuqantaake tunara kia mparetieravauve turo. Te niara tiha, Parasi vaiintinavuvata Satiusi vaiintinavuvata vika kaupititira voqaara variamantara ti, nenavu vikara rauriha variatema turo, tiro.

¹² Ihuva minti tumanta vinavuka aato kenko tumanta iruvaro Ihuva kia mpareti unte kaupititirara rauriha variate tiraitiro, viva Parasi vaiintinavuvata Satiusi vaiintinavuvata tivataa uvarara, virarama rauriha variate tivo, tura.

*Pitaava Ihura okarara tura
(Maaki 8:27-30; Ruki 9:18-21)*

¹³ Ihuva vatuka vo Sisaria Pripai aqanto anirero nai vaintinavu irama nimitero tiharo, Ti Vataini Vatatai Vaintikara qaqi vaiinti nahenti ta vaiintirave tihae ti variavo? tiro.

¹⁴ Minti tumanta vinavuka tiha, Vokiaka ariara viva Ioniva namari nimi vauvave ti variamanta, vokiaka ariara viva tinavu kaivaqava Elaitaavave ti variamanta, vokiaka ariara tinavu kaivaqava Ieremaiaavave vo paropeti vaiintivanove qaiqaa qovarama viro vaivoma ti variavo, ti.

¹⁵ Vinavuka minti tuvaro Ihuva nainavu irero, Ho nentanavu vo? Nentanavu tiriara ta vaiintirave ti variavo? tiro.

¹⁶ Ihuva minti tuvaro Saimoni Pitaava Ihura tiva amiro tiharo, Are Mesaaavano—Kotiva atitai vaiintivave. Variqavano Kotiva qaqi variqiro vi vaivara are vira Maaquvanoma varira iarao, tiro.

¹⁷ Pitaava minti tuvaro Ihuva Pitaarara tiharo, Are Ionira maaqu Saimonivave. Are tiriara minti tiararo Kotiva ai koqema amite vaivo. Kia qaqi vaiintivano ti okarara ai tiva amivara irianarave. Ti Qova naaruvaini vaiva, vivama ti okarara ai qoqaiqama amivara irianarave.

¹⁸ Te ariara mintima tirerave: Ai autu *Pitaarave—Orirave*. Ho te maa oriraqaa tenta naavu kaqa tarerave. Vi naavuva vaireva, ti vaiinti nahenti vi naavukama vaivarave. Outira haikavanovata kia vi naavura ho aatara kaanarove.

¹⁹ Te *ki* ai amiarirara are qenti quantua nimitaira vaiinti nahenti Kotiva raqikiananaini vivarave. Are vataini vahira nana nana haikarae qora haika qioqama tairaro Kotivavata naaruvaini vahira ai uva iriharo vohaa qarama keroma qioqama taanarove. Are vataini vahira nana nana haikae kia qioqama tairaro Kotivavata naaruvaini vahira ai uva iriharo vohaa qarama keroma vi haikara kia qioqama taanarove, tiro.

²⁰ Ihuva minti tivakero nai vaintinavu kempukaiqama kero tiva nimiro tiharo, Kia vokavata te Mesaaavano vaunrarara tiva nimiate, tiro.

*Ihuva nai qutu vuainarara tiva nimura
(Maaki 8:31-9:1; Ruki 9:22-27)*

²¹ Vi entaraqaahairo Ihuva nai vaintinavu hoqarama kero nai qutu vuainarara vutu kero tiva nimiro tiharo, Te Ieruharemini oru vuari mini nora vaiintinavuvata, Kotira kaiqa vara amite varia vaiintika vika noranavuvata, maara okara ti varia vaiintinavukavata, vika ti qoraiqama timitaqi vi vase te aihavina haikara varaqi vuari ti harukaiqe te qutuvi taaramo enta varike qaiqaa qaqi himpirerave, tiro.

²² Ihuva minti tuvaro Pitaava vira vita vuru avuhini kero virara aqao tiro, Nora Vaiintio, Kotiva vika kiama qaqi kaira vika ai mintima kevarave, tiro.

²³ Pitaava minti tuvaro Ihuva tuqantaa viro Pitaara atiharo tiharo, Sataanio, niaraini vuane. Kia ti aara kuval timitaane. Are kia Kotiva irintema keravauve iri variarao. Are qumina vaiintivano irintema kerama iri variarao, tiro.

²⁴ Manti tivakero Ihuva nai vaintinavu tiva nimiro tiharo, Ti tivataqiro aniarira vaiintiva, viva nai muntukavano vainara qaqira kero, nai aruke hirite katarira vara aqu varero ti naantiaraini aniarire. ²⁵ Nai vataini qaqi variqiro vuainaraqai noraiqakero iriqiro vi variarirava, vi vaiintiva ekaarama qutu vuanarove. Vaiintivano tiriara iriqiro viharo vuru qutu vuarirava, vi vaiintiva ekaa entama qaqi variqiro vuanarove.

²⁶ Vaiintivano vataini variqiro viharo ekaa airaira ruvaquma kero vatero viraqaahairo qutu viraro vira airairavano nantiakeroe vira ho kahaqianarove? Kia hove. Viva kia ho vo koqaa autu kero qaiqaa qaqi variqiro vuanarove.

²⁷ Te Vataini Vatatai Vaintikama vauro. Te naantiara qaiqaa naaruvhai mpeqavano orurante tuvirerave. Vi entara ti Qora koqe okaravano tigaahairo ataa i vairaqe te *enseli* vika hampatta tuvu vaiha ekaa vaiinti nahenti kaiqa varerara irihama vika nái koqaa nimirerave.

²⁸ Te ququa tiari iriate. Vaiinti hininavu maini himpite variaka vinavuka kiama qaqi qutu vivarave. Te Vataini Vatatai Vaintika noraiqamavi te avuhainaa vaiintiqamavi variari vinavuka ti tavama kema qutu vivaravema turo, tiro.

*Ihura vaatavano aahuva vaata kuqu vura
(Maaki 9:2-13; Ruki 9:28-36)*

17

¹ Ihuva minti tuvaro ⁶ enta aitaravararo Ihuva Pitaaravata, Iemiravata, Iemira vira qata Ioniravata, vinavuka ntita varero ainqaqaqaa nariaaranavu mini vasekira vura. ² Ho vika mini vaiha tavovaro Ihura vaatavano aahuva vo vaata kuquviro vauvaro vira virivano kuarivano itaintema kero, ataa iharo vauvaro vira utavaaqavanovata takuqiharo voqamakero hantaiqiharo vaura.

³ Vira vaatavano mintimakero kuquviro vaumanta vira vainti taaramonavu vaiha tavomanta Elaitaaka Mosika vika kaivaqaukatanta qovaramavi vaiha Ihura vataake uva ti vaura.

⁴ Vitanta Ihura vataake uva ti vauvaro Pitaava Ihurara tiharo, Noravauvo, koqemama tenavu ai vataake maini vauro. Are hove tirera, tenavu haraara naavu taaramonavu ariara vo, Mosirara vo, Elaitaaraarar vomake, kaja nimitaare, tiro.

⁵ Pitaava vi uvava qaqiqai ti vauvaro tonavuvano takuqiharo hantaiqiharo hihipaama vauvaro uvavano tonavuqiharo tiharo, Maara ti Maaquve, ti hantuqa hari vai vaintirave. Te virara quahema vauro. Nenavu vira uvaqai iriate, tiro.

⁶ Uvavano minti tumanta vira vainti taaramonavu voqamake aatu itomanta vata kanta hiqirivi, viri vataini ke vauvaro ⁷ Ihuva orurero nai kauqu vinavukaqaa vatero tiharo, Maakao, himpuate. Kia qeteha variate, tumanta ⁸ vinavuka vuruvi tavovaro Ihuvaqai vauvaro kia vaiinti vovanovata vaura.

⁹ Ho vinavuka ainqaqaahai tuvi vauvaro Ihuva vinavuka tiva nimiro tiharo, Vaaka tavaa haikara kia yokavata tiva nimiante. Te Vataini Vatatai Vaintika naantiara te qutu vuainaraqihai qaiqaa qaqi himpi variari homa nenavu vi entaraqaahai vi uvava tiva nimiqi vuate, tiro.

¹⁰ Ihuva minti tumanta vinavuka vira ireha tiha, Maara okara ti varia vaiintika minti tiarave: Elaitaava tinavu kaivaqava naanema qovarama vuanarove, ti variarave. Vika nantihae minti ti variarave? ti.

¹¹ Minti tuvaro Ihuva tiharo, Ho vika quqaama ti variarave. Elaitaava avuni ekaa haika naitaramakero avuqavu vatareva qovaraiqianarove. ¹² Ho te ni tiva nimuro: Elaitaava vaaka avuni anirorave. Viva ani vaumanta vo vaiintinavu kia vira viraqaqamake tavaraiti, vika hampi okara autuataa umanta vi okarara vira autu amitorave. Vi vaiintinavuka ti Vataini Vatatai Vaintikavata mintimake qoraiqama timitevarave, tiro.

¹³ Ihuva minti tuvaro vinavuka aato kenko tumanta iruvaro Ihuva Elaitaaraqaa uva tuqantaakero Ioniva namari nimi vau vaiintirara tura.

*Ihuva vaintiqihairo vaana atitovaro vura
(Maaki 9:14-29; Ruki 9:37-42)*

¹⁴ Vinavuka ainqinaqaahai tuvunte tavomanta airi vaiinti nahenti ruvaaqumavi vauvaro vaiinti vovano oru Ihura avuqaa tori kauru araviro tiharo,¹⁵ Nora Vaiintio, ti maaquara mpo ike tiva amitaane. Viva noraiqamakero vueraiqama viro qoraiqamavi vaivo. Airi entama ihaqi aqu viro namariqi aqu viro i vaivo.¹⁶ Te vira vita vare ai vaintinavu varianaini vuru kauramanta vinavuka vira koqema karare tihavata, kia ho vira koqema kaavo, tiro.

¹⁷ Vi vaiintiva minti tuvaro Ihuva tiharo, Ne maa entara varia vaiinti nahentika ne hampi aaraqaaqai ni variakave. Ne Kotirara kempukaiqamake iriataara vaimanta kia iriavo. Ike, ne ti popohama timite variamanta te nanti nanti entae ni hampata variqi virerave? Te nanti nanti entae ni kahaqirerave? Ho vi vaintira vita vare te iainaini aniate, tiro.

¹⁸ Minti tumanta vi vaintira vite anuvaro Ihuva vaana vira atiharo atitama kovaro vainti vira avutaqihairo qaqlini aitarero vuvaro viraqaahairo vira vaata koqema vuvaro ho vaura.

¹⁹ Ho vauvaro vira naantiara Ihuva nariaraa vaumanta vira vaintinavu orure ireha tiha, Tenavu vi vaanara atitaurarovata, nantiharoe kia tinavu uva irivo? ti.

²⁰ Vinavuka minti tuvaro Ihuva tiharo, Nenavu Kotirara iriqi vi variava kia ho vaivarora tiro, vaana viva kia aitarairave. *Masteti* auruve, „qamaqara auruve,“ inaara auruqai vairave. Nenavu Kotirara iriqi vi variava vi aurura voqara vairera, nenavu homa nora kaiqa varehama maa ainqinaraa maihira vutuni vuane tivaro ainqinavano mini vuanarove. Ne mintimakeha Kotirara iriqi vivera, ne ekaa kaiqa homa varevarave, tiro.²¹ [Ne kia Kotira aararaiti, kia karavata aurama taraiti, ne kia ho vi vaanauka nititevarave, tiro.] Ihuva turama.

*Ihuva nai qutu vuainerara qaiqaa tiva nimura
(Maaki 9:30-32; Ruki 9:43-45)*

²² Ihura vaintinavu Kariri vatainai ruvaaqumavi vauvaro Ihuva vinavuka tiva nimiro tiharo, Vovano ti Vataini Vatatai Vaintika qovaraiqama kaira ti ravaaqavu vare²³ vaintinavu kauquqi vuru kaimanta ti harukaiqe te qutuvi taaramo enta varikema qaiqaa qaqi himpirerave, tiro. Minti tumanta vira vaintinavu muntukavano qoraiqumanta vaura.

Takisi aqukorara tura

²⁴ Ihuva nai vaintinavu vataakero Kapenaumini oruromanta Ieruharemini Kotira Naavuqaa raqikiha takisi vare vauka anire Pitaara ireha tiha, Ninavu nora vaiintivanovatae takisi vira aquke vairave? tuvaro²⁵ Pitaava eo tiro, Vivavatama takisi aquke vairave, tiro.

Minti tivakero Pitaava naavuqi vuvaro Ihuva naane Pitaara irama amitero tiharo, Saimonio, vatainai variaka vika avuhainaaka ta vatanaakaqihai takisi vare variarave? Nai navuunaakaqihiae, vo vatanaakaqihiae vare variarave? Tiraqe iriare, tiro.²⁶ Ihuva minti tuvaro Pitaava tiharo, Vika vo vatanaakaqihai takisi vare variarave, tiro.

Tuvaro Ihuva tiharo, Tenavu kia vo vatanaaka vairaiti, tenavu Kotira navunaaka vaihara ti, tenavu takisi aquarirava kiama ho varianarove.²⁷ Ho vika tinavu titivorave. Virara iriharama oru varuvaqi *huku naaqunta/pirima* aqukairaro tota aruvina havukara mpaqi kera vira no *ampahu/ampihau* kera viraqihaira monu varakera tiriaravata nenaravata takisi aquane, tiro. Minti turama.

18

*Tinavuqihairo tavave noravano varianarove tura
(Maaki 9:33-37; Ruki 9:46-48)*

¹ Vi entara Ihura vaintinavu Ihuva vaunaini orure tiha, Tinavuqihairo tavave Kotiva raqikinaraqi vaharo avuniqama viro varianarove? ti.

² Vinavuka minti tuvaro Ihuva vainti naati aaramakero vinavuka nivuqaa vainti vira himpimatero³ tiharo, Te quqaa uva tiari iriate. Nenavu kia hampi avu aato iri variara qaqlake kia naati vainti voqaraqama vivera, ne kia Kotiva raqikinaraqi ho vivarave.

⁴ Kotiva raqikinaraqi vaiinti vovano nai autu vatainiqamakero maa vaintirura voqara variarirava, vivama avuniqama kero vuanarove.⁵ Vaiinti vovano maa vaintirura quahama amitaintema kero, viva tivatama quahama timitaanarove.

*Vokika qora aara numiqevorave tura
(Maaki 9:42-48; Ruki 17:1-2)*

⁶ Maa vaintirura voqaara ti uva irirava vairaro vaiinti vovano anirero qora aara vira umiqairera, vira kaara vi vaiintira uvavano nai nora uvama varianarove. Koqemama kia vi vaintirura qora aara umiqai entaraqaa vi vaiintira auntaqi nora ori kantarumake nora varuva namariqi aquakaataarave, tiro.

⁷ Oho, vataini vai vaiinti nahentika qora kaiqa varaate tiro, vo haika vo haikavano vika avataanarove. Qora kaiqa qovarama kaaina vaiintirara oho tiva amitauro. [Naantiara vi vaiintiva tavaanarove.]

⁸ Ai kauquvanoe ai aiquvanoe qora kaiqa varairera, vira teqa kera aqukaane. Viraqaa-haira vohaa kauquqai vairavae, vohaa aiquqai vairavae, naantiara homa qaqi variqira vinarave. Qora kaiqa varehara taara kauque, taara aique, vairava vairamanta kia qimpe vaina iharaqi ai aqukevorave.

⁹ Are hini avuqohaira avu auti vahihara qora kaiqa vare vairera, qaiqaavata mintiaqi vuarorave tihara, nena avu hini qaqira vauru kera aqukaane. Are kia qora kaiqa vararaitira, vohaa avuqai vairava naantiara homa qaqi variqira vinarave. Are taara avu vairava qora kaiqa varaqira viramanta ai nora iha itainaraqi aqukevorave.

¹⁰ Ne rauriha variate. Maa vaintinavuka vainti naati variamanta ne vikaqihai voruara goririmakeha qumina vaintiruve tivorave. Vika enselinavuka vikarao tiha, naaruvaini ti Qora aaqantoma variarave, tiro.

Sipisipi kakakima vurara uva tuqantaakero tura

(Ruki 15:3-7)

¹¹ Ihuva minti tivakero viva tiharo, [Te Vataini Vatatai Vaintikama te kakakima vua vaiinti nahentika rantareru tuvuraukave.] ¹² Ne maa uvvara tainara nantimake irivarave? Vaiinti vovano 100 sipisipi vatairava tavairaro sipisipi vovano kakakima virera, viva kiae 99 sipisipi hininavu ho vaika ainqaqa mini kero, kakakima vina sipisipira rantareva vuuanarove? ¹³ Te quqaa uva tiari iriate. Viva virara rantaqiro viviro ho ranta kairera, viva tiharo, Kakakima vira tenta ranta kauro, tivakero voqamakero vira quahama amiteharo 99 sipisipinavu kia kakakima vikara kia noraiqama kero quahama nimitaanarove.

¹⁴ Vira voqaara ti Qova naaruvaini vaiva maa vaintinavukaqihairo vonkuvano kakakima vuantorave tiharo vairave, tiro.

Ai qata vakaa vovano ai qoraiqama amitaainarara tura

¹⁵ Ai qata vakaa vovano qora kaiqa ai vara amitairera, oru vira vataakera vahihara nentatantaqai vi uvvara avuqavu qiate. Viva ai uva ho irirera, netanta koqemake vohaanaiqamavi vaivarave. ¹⁶ Viva kia ai uva irirera, oru vaiinti vohaiqae taaraqantae ntitia varaira vitantavata ani vaiha ai uva irihama ho quqama tivo tivarave.

¹⁷ Mintiaqi vivaro vi vaiintiva ninavu uvavata kiaqai irirera, viraqaa-haira ekaa Kotira vaiinti nahenti ruvaaquma kera nena uva tiva nimiane. Vi vaiintiva Kotira vaiinti nahenti ruvaaquma tekara kia irirera, ne nentaaqahai vi vaiintira ekaara atiteha tiha, Are kia Kotira uva iria vaiintika voqarama variarao. Are takisi vare varia vaiintinavuka voqarama variarao, tiate.

¹⁸ Te tiari iriate. Ne vataini vaiha nana nana haikae qora haika qioqama taivaro Kotivavata naaruvaini vahiharo ne qioqama tera viraqaima vivavata qioqama taanarove. Ne vataini vaiha nana nana haikae kia qioqama taivaro Kotivavata naaruvaini vahiharo vi haikara kia qioqama taanarove, tiro.

¹⁹ Ihuva minti tivakero tiharo, Te qaiqaa tiari iriate. Niqihai vaiinti taaraqantavano vohaa avu aato vateha Kotira iraivarao ti Qova naaruvaini vaiva vitanta tintema kero nimianarove. ²⁰ Taaraqantae, taaramonavue, ti kaiqarao tiha ruvaaquma vivera, ho te vinavuka avutanama vairerave, tiro.

Nai kena vaiintiara kia aaqurihamo amito vaiintirara tura

²¹ Ihuva minti tuvaro Pitaava oru Ihura irero tiharo, Nora Vaiintio, ti qata vakaa vovano qora kaiqa vara timitaqi virera, te nanti nanti tataae virara kia ariqaa uva vataraiti, qaqirama kauro, tirarave? Te 7 tataae minti tirarave?

²² Pitaava minti tuvaro Ihuva tiharo, Kia te ariara 7 tataaqai vira uva qaqira kaane tiraiti, te ariara vira uva vo tataa vo tataa 500 tataa vira uva qaqira kaane turo, tiro.

²³ Kotiva vaiinti nahentikaqaa raqikiarirava maa uvvara voqarama vaivo. Avuhainaa vaiinti vovano nai kaiqa vaiintinavu nimu monura tenta qaiqaa vararerave turave.

²⁴ Minti tivakero hoqaramakero vare vaumanta vira kaiqa vaiinti vo naane vita vare viva uraqi vuru kovaro vi vaiintira amu monuva nai uritarero nora monu 10 milion kinaa vauvaro vi vaiintiva ekaa vi monura nama taiqa korave.

²⁵ Mintimakero vira kaiqa vaiintivano ekaa vi monura namakero kia ho nai amiarirava vauvarora tiro, avuhainaa vaiinti viva tiharo, Oho, vi vaiintiravata, vira naata vaintivata,

viva onaana ina haikaravata, ekaa vi haikara vokika nimiha monu varake tinta timiqe te tenta amuraro namakaira tenta vira varare, tiro.

²⁶ Viva minti tuvaro vira kaiqa vaiintivano tori kauru araviro mpo ike tiro, Are vairaque te vi monura rantaqi vivi, ekaa rantake nina amiare, tiro. ²⁷ Minti tuvaro avuhainaa vaiinti viva vira aaqurihamama amitero tiharo, Ho te ariara mpo ike tiva amitehamama ai amurara namakaana monura kia tinta timiane turo. Qaqira kera nena homa vinarave, tiro.

²⁸ Minti tiva kovaro vira kaiqa vaiintivano vevarero tavovaro vira hana kaiqa vaiinti vovano 10 kina amuva vauvaro oru vi vaiintira aunta raquthiaro nai monu naariharo tiharo, Te ai amuna monura vaaka tinta timiane, tuvaro ²⁹ vira kana kaiqa vaiintivano tori kauru araviro mpo ike tiro, Are vairaque te vi monura rantaqe ai amiare, tuvaro ³⁰ vira hana kaiqa vaiintivano kia vira uva iriraitiro, nai hana vaiinti karapuhiqi kero tiharo, Te ai amuna monura ekaa tinta timirage ai kuvantu kaare, tiro.

³¹ Minti tivakero nai hana vaiinti karapuhiqama komanta vira kaiqa vaiinti hininavu tave, virara qorahaama autivo tivake, vika náiqai tiva vare vuru nái nora vaiinti tiva amurave.

³² Vira vuru tiva amuvaro vira nora vaiintivano nai kaiqa vaiinti aarama kero tiva amiro tiharo, Are vaaku kaiqa varaara vaintiva variarao. Are tiriara mpo ike tiva timitaane tiaramantara ti, te nora monu ai amurara namakaanara ekaa qaqa kehama kia tinta timiane tunarave. ³³Te ari aaqurihamama amitaunantem a, arevata nena hana vaiinti aaqurihamama amitaataara vaivarra kia mintira iarao, tiro.

³⁴ Minti tivakero avuhainaa vaiinti vira voqamakero arara itovaro nai kaiqa vaiinti ontoananavu, vaiinti ntaihe vauka nimiro tiharo, Viva karapuhiqi variqi viharo ekaa vira amiaavauna monura tinta timiarire turave, tiro.

³⁵ Ihuva minti tivakero nai vaintinavu tiva nimiro tiharo, Ne nenta hana vaiinti uva kia qaqa karaiti qaqqai iriqi vivera, ti Qova naaruvaini vaiva ninta uvavata qaqqai iriqi vuanarove, tiro.

Ihuva turama.

*Nai naata qaqa kaainarara tura
(Maaki 10:1-12; Ruki 16:18)*

19

¹ Ihuva vi uvvara tiva nimi taiqa kero Kariri mini kero Iutiaini Iotani Namari hini mantaraini vumanta ² vaiinti nahenti airitahaa vira avataqi vuvaro viva mini vaharo aihavuka kogema nimite vaura.

³ Ihuva mini vaumanta Parasi vaiintinavu viva vaunaini orure Ihurara hampi uva tiarie ti, vira irama amiteha tiha, Hoe vaiintivano nai hampi uva iriharo nai naata qaqa kaanarove? Viva mintirera, tinavu maara uva raqae kaanarove, kiae raqa kaanarove? Are tirage iriare, ti.

⁴ Minti tuvaro Ihuva tiharo, Nenavu kiae Mosiva qara ntuvato uvvara kaara ntuvake iriavo? Vi uvvara maantimama vaivo:

Naaruvavata vatawata autukova, Kotiva hoqarero vaiinti autireva, vaiintivata nahentivata autukero tiharo, ⁵ Te mintima kaunarara tiro, vaiintivano nai noka qoka kero nai naatantiro avituma viraro vitanta vaatavano vohaa vaatama varianarove, turave.

(Okara 2:24)

⁶ Vitanta kia vo vaata vo vaata vairaiti, vitanta vaatavano vohaa vaataqaima vairave. Ho Kotiva vivama vaativata naatavata avitumakero vohaa tampama kairara tiro, hauri ovovano vitanta raira kaantorave, tiro.

⁷ Ihuva minti tumanta vinavuka tiha, Quqaama Kotiva minti turave. Ho nantiharoe Mosiva vo uva tiva torave? Mosiva tivato uvava vo maantimama vaivo:

Vaiintivano nai naata qaqa kareva iharo, viva homa ai qaqa kauro ti uvvara qara ntuvakero, nai naata amiharo vira atitamake vairave, ^{} turave. Mosiva nantiharoe vi uvvara tivatorave? ti.*

⁸ Vinavuka minti tuvaro Ihuva vinavuka nái tiva nimiro tiharo, Mosiva vaharo tavomanta ni kaivaqaukavarra kia Kotira uva iriataa umanta vauvaro viva qaqa komanta vika vi okarara avataqi vurave. Tota hoqarero vata aututo entara kia vi okarara vaurave.

⁹ Te niara mintima tiro: Nahentivano kia vo qorainti vataakero niraitiro vairare, vira vaativano vo uva kaara qumina vira qaqa kero vo nahenti varairera, vi vaiintiva qaraaka nahentintiro niharoma naata vaati varaa okarara raqama kaanarove tiro, tiro.

¹⁰ Ihuva minti tivakero vaumanta vira vaintinavu Ihurara tiha, Ike, vaiintivano naata varaarira okarava mintima vairera, koqemama vaiintivano kia naata vararaitiro, qaqi variarire, ti.

¹¹ Vira vaintinavu minti tuvaro Ihuva tiharo, Kia ekaa vaiintivano te vaaka tuna uvarara ho kankomake irivarave. Kotiva vika avu aato kahaqi vaimanta variaka, vikaqaima vi uvara kankomake irivarave.

¹² Hini vaiintinavu kia ho naata vare variarave. Hini vaiintinavu nái vatataa entaraqaahai vika vaatavano kia ho vaimantara ti, kia ho naata vare variarave. Hini vaiinti variamanta vokiaka vika vaata qoraiqama kaamantara ti, vika kia ho naata vare variarave. Hini vaiinti Kotiva vaiinti nahentiqaa raqikiainarara iriha te Kotira kaiqarao tiha ehaara vairerave tivakeha variarave. Kairamanta vi uvara ho iri vareka vi uvara iriqi vuate, tura.

Ihuva vanti haikaqaa nai kauqu vateharo koqema nimitora

(Maaki 10:13-16; Ruki 18:15-17)

¹³ Ihuva vaumanta vaiinti nahenti vika nái vanti ntita vare Ihurara vikaqaa nai kauqu vateharo Kotira aarama nimitaarire tivakeha Ihuva vaunaini vuru karare tumanta Ihura vaintinavu vika qioqha niti vaura.

¹⁴ Mintuvaro Ihuva aqao tiro, Qaqi kaimanta te iainanaini aniate. Kia vika aara kuval nimitaate. Vaiinti nahenti maa vaintika voqaantemake Kotirara irika, vikama Kotiva raqikiaina vatukaraqi vaivarave, tiro. ¹⁵ Ihuva minti tivakero nai kauqu vanti haikaqaa vateharo, vika koqema nimitero vura.

Qaraaka vaiintivano airi airaira vatora

(Maaki 10:17-31; Ruki 18:18-30)

¹⁶ Vo enta vaiinti vovano Ihuva vaunaini orurero tiharo, Maara ti variara vaiintio, te nana koqe kaiqae Kotira vara amitaqi vihae te naantiara koqemake ekaa enta qaqi variqi virarave? tiro.

¹⁷ Manti tuvaro Ihuva tiharo, Are nantiharae koqe kaiqara ti irehara tiarao? Kotiva vohaiqavano koqeva vairave. Are naantiara koqemakera ekaa enta qaqi variqira vireva irera, Kotiva tivato uvaraqai iriqira vuane, tiro.

¹⁸ Ihuva minti tuvaro vi vaiintiva irero tiharo, Kotiva tivato uvaraqihai te nana nana uvae iriqi virarave? tuvaro Ihuva vira tiva amiro tiharo, Kotiva tivato uvaraqihairaa maa uvarama iriane:

Kia vaiinti vo arukaane. Kia vora naatantira muara nuane. Kia muara varaaane. Kia vorara una uva tiane.

¹⁹ Nena noka qoka koqe okaraqai autu nimitaane. *(Katu Varora 20:12-16)*

Are nenara muntuka vatenantema kera, nena kana vaiintiaravata muntuka vatehara variane, turave. *(Wkp 19:18)*

Kotiva vi uvara tivatora iriqira vuane, tiro.

²⁰ Ihuva minti tuvaro vi vaiintiva tiharo, Te vi uvara vi uvara tianara iriha avataqi vi vaunarave. Nana kaiqae te varaaataara vaimanta kia varauro? tiro.

²¹ Manti tuvaro Ihuva tiharo, Are ho vaira vaiintiva vairera, oru nena iana haikara nimirara monu varera vuru vehi vaiinti nahenti nimiraro naaruvinai ai koqaavano variarire. Mintimakera ti tivataqira aniane, tiro.

²² Ihuva minti tuvaro vaiinti viva vi uvara iriro airi airaira vatovara tiro, kia Ihura uva iriraitiro, qaqira kero vira muntukavano qoraiquvaro vurama.

²³ Vuvaro Ihuva nai vaintinavu tiharo, Te tiari iriate. Airi airaira vate vaiintika Kotiva raqikina vatukaraqi vukaari utihama vivarave. ²⁴ Te qaiqaa ni tiva nimiari iriate. „Kamer ivano uga noqí ho ruqiarhaarirava vairavauve, airi airaira vataaina vaiintiva vivavata Kotiva raqikiaina vatukaraqi ho vuunarove, tiro.

²⁵ Ihuva minti tumanta vira vaintinavu vi uvara iri ravukuvu kauqu runkinkiri iha tiha, Ike, „airi airaira vateka kia Kotiva raqikinaraqi ho vivera,“ Kotiva nai ta vaiintikae nititaanarove? ti.

²⁶ Manti tuvaro Ihuva vinavuka aitutuma tavero tiharo, Vataini variaka vika nái kempukaa kiama ho vivarave. Kotiva kahaqira vika ho vivarave. Kotiva ekaa kaiqa vare vaivama vaivo, tiro.

²⁷ Manti tuvaro Pitaava tiharo, Tavaane, tenavu ai avataqi virera iha, ekaa haika mini ke qaqima anuro. Mintunarara ti, tenavu nana koqaae varaainarave? tiro.

²⁸ Pitaava minti tuvaro Ihuva vinavukara tiharo, Te tiari iriate. „Kia te ne kaiqa vara timitera tauru kaainarave.“ Ekaa haika qaraakaiqama kaaina entaraqa, te Vataini Vataini Vaintika tenta avuhainaa tainta takuqi vairaqua oquvi variari nenavuvata ti vainti

12navu ti tivataqi ni vaika, tainta 12navuqaa oquivi vaiha Isarerি anku 12navu uvama avuqavu qivarave.

²⁹ Nai maaqae, nai qata vakaarae, nai aura nakaarae, nai noka qokae, nai vaintie, nai naaho maatae, mini kero ti kaiqarao tiro virava, vi vaiintiva naantiara koqaa vareharo kia voahaa tataaqai vararaitiro, nai airi tataama varairaro, viraqaahairo Kotiva virara are ekaa entama qaqi variqira vinarave tianarove.

³⁰ Vate vaiinti nahenti airtahaa avuni variaka, naantiara vika tuvitare ekaanainima vaivarave. Vate ekaanaini variaka, naantiara vika uritare avunima vaivarave, tiro.

20

Uaini naahora uva tuqantaakero tura

¹ Kotiva vaiinti nahentiqaa raqikiarava maa uvara vogarama vaivo. Airi vata vato vaiintiva vaaka toqaqi himpiro nai *uaini* naaho ututoraqi kaiqa varaate tiro, kaiqa vaiintinavu rantareva vurave. ²Viva vika rantareva vuva oru vo vaiintinavu ranta kero tiharo, Nenavu vate kaiqa vara timitaiqe ni vohaiqa vohaiqa voahaa kinaa voahaa kinaama nimirarave, tumanta eo tuvaro nai naahoqi vika ntita vuru korave.

³ Vuru kero vauvaro ⁹ *kiroki* quvaro viva *maaketi* vatukaqi viro tavomanta vaiinti vonavu qumina vauvaro ⁴ viva vinavukara tiharo, Nenavuvata oru ti naahoqi kaiqa vara timitaiqe te koqaa avuqavu ni nimiare, tiro. ⁵ Minti tumanta vinavukavata mini vauvaro viva 12 *kiroki* avata, 3 *kiroki* avata, vaiinti vonavuvata vaaka ntitonemakero ntitorave.

⁶ Mintiaqi vauvaro erovaro *vero* aruarirava aumanto vauvaro naaho qova qaiqaa *maaketi* viro tavomanta vo vaiintinavu mini qaqi himpite vauvaro vinavuka irero tiharo, Nenavu nantihae vate kia kaiqa vararaiti, qumina variavo? tumanta ⁷ vinavuka vira tiva ami tiha, Kia vaiinti vovano ti kaiqa varata timantave, tuvaro viva tiharo, Ho nenavuvata oru ti naahoqi ti kaiqa vara timitate, tiro.

⁸ Minti tivakero vauvaro enta ire uvapo naaho qova nai kaiqaqaa raqiku vaintirara tiharo, Kaiqa vaiinti ekaa naarama kera vika monu nimiare. Naantiara vitini ania vaiintika are vika naane monu nimiqira vihara, vaaka toqaqi avuni ania vaiintika ekaanainima vika monu nimiare, tiro.

⁹ Minti tuvaro viva erovaro *vero* qaa anu vaiintika monu nimiqi vihara voahaa kinaa voahaa kinaa nimiro, ¹⁰ mintiaqiro vihara vaaka toqaqi anu vaiintika monu nimireva umanta vinavuka tiha, Tinavu monu voqavatama timianarove, tuvaro viva vinavukavata voahaa qarama kero voahaa kinaa voahaa kinaaqai nimura.

¹¹ Voahaa qaramake nimumanta vinavuka vi monura vare naaho qorara nuntu nauantu tiha, ¹² Aqao, *vero* qire imanta ania vaiintika inaara kaiqaqai varakema voahaa kinaa voahaa kinaa varavao. Tenavu vaaka toqaqi anurauka nora kuari itairaqa kaiqa vare vaurara are naantiara ania vaiintika nimianantema keraqaima tinavuvata timira iarao. Nantiharae mintira iarao? ti.

¹³ Vinavuka minti tuvaro naaho qova vaiinti vorara tiharo, Ti vaiintio, kiama te ai qoraiqama amitaua. Ho quqaae te ariara vate kaiqa vara timitairaqe voahaa kinaama ai amirerare turara are eo tianarave? ¹⁴ Ho nena koqaa varera vuane. Ekaanaini ntitauna vaiintikavata te voahaa qaramake nimunarovare. ¹⁵ Tinta monu vaimantara ti, te homa tenta antuqaqaa amiataa ina vaiintira amirerare. Te parumake tenta monu vo vaiintinavu nimurara kia karu ntuvu timitaataarave turave, tiro.

¹⁶ Ihuva vi uvapo tuqantaakero tiva nimiro tiharo, Vira voqarama ekaara vitini variaka naantiara uritare avunima vaivarave. Avuni variaka naantiara tuvitare ekaara vitima vaivarave, tiro.

Ihuva taaramo tataa nai qutu viro himpuainarara tura

(*Maaki 10:32-34; Ruki 18:31-33*)

¹⁷ Ihuva Ieruharemini vireva aaraini vihara nai vainti 12navuqai ntita varero vo kanta vuru kero tiva nimiro tiharo, ¹⁸ Tavaate, tenavu Ieruharemini virerama vi vauvo. Te Vataini Vataini Vaintika mini oruraari ti qovaramake vuru Kotira kaiqa vara amite varia vaiintika vika noranavuvata, maara okara ti varia vaiintikavata, vainaini vuru kaimanta vika tiriara vira arukaate tivake ¹⁹ ti tivita vare vo vatanaaka kauquqi vuru kaimanta vika ti naaraihamu timiteha kapipiqhohi ruteqake vate, viraqaahai vika vuru katariqaa ti niriqohai haruke hiritaiqe te qutu vima, taaramo enta varikema, qaiqaa qaqi himpirerave, tiro. Ihuva turama.

Iemika Ionika nova Ihura irora
(*Maaki 10:35-45*)

20 Vi entara Sebedira maaqutanta nova nai vaintitanta ntita varero oru Ihura avuqaa tori kauru araviro vaiharo Ihura vo haikara irora.²¹ Mintuvaro Ihuva vira irero tiharo, Nana haikarae ai antuqa arivo? tiro.

Minti tuvaro nahenti viva tiharo, Naantiara are avuhainaa vaiintivano vaihara are ti maaqutanta noraiqama kairaro vovano ai kauqu tanaraini vairaro vovano ai kauqu kaanaaqaini variarire, tiro.

²² Nahenti viva minti tuvaro Ihuva vira maaqutantara tiharo, Netanta vi uvara okarara kia iriraiti, ti ire variavo. Te ahavina namarira naainara netantavata hoe nevarave? tumanta vitanta, Homa nararave, ti.

²³ Vitanta minti tuvaro Ihuva tiharo, Ququaama te namari naainara netantavata nevarave. Ti kauqu tanarainivata, kaanaaqainivata oquivi vai vaiintitanta kia ti kaiqa vaivo. Ti Qova vaiinti taaraqanta henoqama kero vatai vaiintitanta, vitantama mini oquivi vaivarave, tiro.

²⁴ Ihuva minti tumanta vira vainti hini 10navu vi uvara iri, vitanta vakaaka nitura. ²⁵ Vinavuka vitanta niti vauvaro Ihuva ekaa miqo maaqo naarama kero aqao tiro, Vo vatanaaka raqikiqi vi varia okarara ne iriarave. Vika avuhainaaka uritare vaiha, vi kaiqara maa kaiqara vara timitaate ti variarave. Vika qiaa vaiintinavuvata tiha, Ne tinavu uvaqai iriqi vuate, ti variarave.

²⁶ Nenavu kia vika aanaraate. Niqihairo vovano noraiqireva irera, viva ni paanaa kaiqa vara nimiteharoma noraiqama vuunarove. ²⁷ Niqihairo vovano uritarero avuni vaireva irera, viva qaqi paanaa vaiintivano vaiharo ni kaiqa vara nimitaanarove.

²⁸ Te Vataini Vatatai Vaintikama vauro. Tevata kia vainti nahentiara ti paanaa kaiqa vara timitaate ti tuturaukavauve. Te vaiinti nahenti kaiqa vara nimitaqi vi, airi vaiinti nahenti kahaqama nimiteha, vikara irihama qutu virerave tivake tuturaukave, tiro. Ihuva turama.

Avu qimpavu vaiintitanta avu rampaikora

(Maaki 10:46-52; Ruki 18:35-43)

²⁹ Ihuva nai vaintiaravata Ieriko mini kero, oru vi vaumanta vaiinti nahenti airithaa Ihura avataqvi vi vaura.

³⁰ Mintumanta vaiinti taaraqanta avu qimpavutanta aara auvhini oquivi vaiha iruvaro Ihuva aitare vaumanta vitanta naveraitihatanta, Nora Vaiintio, Devitira Maaquo, titantara mpo ike tiva timitaane, ti vaura.

³¹ Vitanta minti ti vaumanta vaiinti nahenti vitanta nitiha tiha, Evaara variate, tumanta vitanta kia vika uva iriraiti, noraiqake neveraitihatanta, Nora Vaiintio, Devitira Maaquo, titantara mpo ike tiva timitaane, ti vaura.³² Vitanta minti ti vauvaro Ihuva ani himpitero vaiharo tiharo, Te nitanta nantire uramantae aniamo? tiro.³³ Minti tumanta vitanta vira tiva ami tiha, Nora Vaiintio, titanta tivu rampai timitaanerama ai aare vauro, ti.

³⁴ Minti tuvaro Ihuva vitanta aqurihama nimitero vitanta avuqaa nai kauqu viti vatovaro vitanta avu vaakama rampai vumanta vitanta ho tave, viraqahai Ihura avataqvi vura.

21

Vaiinti nahenti Ihura quahama amite vauvaro viva Ieruharemini vura

(Maaki 11:1-11; Ruki 19:28-40; Ioni 12:12-19)

1 Ihuva nai vaintiaravata oru vuvuvaro Ieruharemi aumanto vaumanta vinavuka Beta-pasini Orivi Aiqina auvoqi vau vatukaraqi orurovaro Ihuva nai vanti votanta nititero² tiharo, Netanta viti vatukaraqi orure vaakama *donki* kantarumake nai naati vataake vatera tavevarave. Oru vitanta kuvantuke vare maini viri timiate.³ Vaiinti vovano nitanta irairera, mintima tiate: Titanta Noravano *donki* virara timanta anuro, tiate. Netanta minti tivaro viva nitantara ho tota vare vuru amiatema tianarove, tiro.

⁴ Haaru vetanto entaqaa paropeti vaiintivano tu uvava vivauma variarire tiro, Ihuva minti tura. Haaru paropeti vaiintivano Kotira uva qoqaiqama keharo mintima tiro:

⁵ Ne Ieruharemi vatanaakara mintima tiate: Ni avuhainaa vaiintivano ne varianaini anima vaivo.

Viva qihaaqama kero donki tauvaqaaqaa ani vaivarо vi donkiva qaraaka donki-vanoma vaivo, tura. (Sek 9:9)

⁶ Viva tu uvava vivauma variarire tiro, Ihuva nai vaiinti taaraqanta nititomanta vitanta Ihuva tuntemake, mini orure⁷ *donkivata* vira naativata vare virike, vira vaintinavu nái utavaaqa *donkitantaqaa* vuqí nimitovaro Ihuva viraqaa vaarirero oquivi vaura.

⁸ Oquvi vaumanta vaiinti nahenti vika nái utavaaqavata aara vaura vuqi amitomanta vaiinti nahenti vokuka katari mare teqa vare aara vaura vuqi amitora. ⁹ Vuqi amite Ihura avuni vi vau vaiinti nahentikavata vira naantiara ani vau vaiinti nahentikavata naveraitiha,

Devitira Maaqu autu tuahera kaate. Noravano nai autuqaa ani vai vaiintira koqema amite vaivo. *(Ihi 118:26)*

Variqavano nai virini vaira, vira autu tuahera kaate, ti.

¹⁰ Minti tivaqи vuvaro Ihuva Ieruharemiqи yumanta ekaa vi vatanaaka kante vitare aitare iha tiha, Ike, ta vaiintivae ani vaivo? tumanta ¹¹ vaiinti nahenti vokuka tiha, Maa vaiintiva Ihuvave. Viva paropeti vaiintivano Nasareti vatuka Karirihairo anivave, ti.

Kotira Naavuqihairo monu kaiqa vare vauka vara veva kora

(Maaki 11:15-19; Ruki 19:45-48; Ioni 2:13-22)

¹² Ihuva Kotira Naavu avutaqи oriqetero tavomanta koqaa auti vau vaiintika viraqи koqaa kaiqa vare vauvaro viva vika rauntu veva vahaqaqaini kero, monu *senisiqи* vau vaiintika tainta vara venta aqukero, uviri nimiha monu vare vau vaiintika taintavata vara venta aqukora.

¹³ Venta aqukero vikara tiharo, Kotira vukuqi qara ntuvato uvava mintima tivo: *Vaiinti nahenti ti naavuara Kotira aare varia naavurave tivarave*,^{*} turave. Oho, ne variavarora tiro, maa naavuva muara vaiinti kukeqavi vaha uki varia naavuva voqaarama vaivo, tiro.

¹⁴ Ihuva minti tivakero viraqи vaumanta avu qimpavu vaiintikavata, aiqu kauqu rareru vukavata, viva vauraqи ruvaaqumavi vauvaro Ihuva vika koqema komanta ho vaura.

¹⁵ Ihuva vaiinti nahenti nora kaiqa vara nimite vaumanta vainti haika Kotira Naavu avutaqи vaha „virara quaheha“ naveraitiha, Devitira Maaqu autu tuahera kaate, ti vaumanta Kotira kaiqa vara amite vau vaiintika vika noranavuvata, maara okara ti vau vaiintikavata, vi haikara vi haikara tave, vika arara itomanta Ihurara aqao ti,¹⁶ Are kiae vainti haika hampi uva t'i variara iriara? tuvaro Ihuva tiharo, Eo, te iruro. Nevata vo, ne kiae Kotira vukuqi maa uvvara kaara ntuvake tavaarave? Minti tirave:

Are vainti haikavata, naama ne variakavata, kahaqiarananta vika ai autu koqemake tuahereha variavo, turave, tiro. *(Ihi 8:2)*

¹⁷ Ihuva minti tivakero viva vika mini kero vevarero vi vatukaravata mini kero Betanini entaqи vaireva viro.

Ihuva tuvaro fiki katari tamunta vura

(Maaki 11:12-14, 20-24)

¹⁸ Vira qararaa toqaqи Ihuva orurantero Ieruharemini viharo karara antuqa aruvoro viharо¹⁹ tavovaro „qakaaka voqaara“, *fiki* katari aara auvahini vauvaro viva oru vira tava hiqikero narare tiro, tavovaro marevanogai vauvaro viva vi katarira tiva amiro tiharo, Are kia qaiqaavata tava irenarave, tuvaro viraqaaahairo vi katariva vaaka tamunta viro aaharuqama vura.

²⁰ Vi katariva aaharuqamaviro vaumanta Ihura vaintinavu vira tave ravukuvu ike tiha, Nantiakeroe katari viva vaaka aaharuqama vivo? ti.

²¹ Vinavuka minti tuvaro Ihuva tiharo, Te tiari iriate. Nenavuvata kia taara aato iriraiti, Kotirara kempukaiqama keha iriqи viha, nenavu homa te *fiki* katariara tunantemake tivarave. Nenavu kia vi kaiqaraqai varevarare.

Nenavu nora kaiqa, vo kaiqa vo kaiqa homa varevarare. Nenavu maa aiqinarara tiha, Tuvitarera varuvaqи aqiujuane, tivarо homa mintianarove.

²² Ike, ne Kotira aareha ne nana nana haikarae irehama Kotiva quqaama vi haikara timianarove tiraqaaahaima ne ho varevarare, tiro.

Tavave ai noraiqama kaivarae vi kaiqara vare variarao? tura

(Maaki 11:27-33; Ruki 20:1-8)

²³ Ihuva minti tivakero orurantero Kotira Naavu vaunaini oru vahilo vainti nahenti uva tiva nimi vaumanta Kotira kaiqa vara amite vau vaiintika vika noranavuvata, Ituaa vatanaa nora vaiintinavuvata, vika viva uraqи orure Ihura atiha tiha, Are ta vaiintiva vahiharae maa kaiqara vare variarao? Tavave ai noraiqama kaivarae are maa kaiqara vare variarao? ti.

²⁴ Vika minti tuvaro Ihuva nái vika tiva nimi ro tiharo, Kaiqe te naane ni irama nimitaari ne te tiaina uvvara ho tiva timivera, te tenta noraiqamavи vaha maa kaiqara vaarainaravata ni tiva nimiare.

* 21:13: Ais 56:7

²⁵ Tavave Ionira noraiqama kovaroe viva vaiinti nahenti namari nimi vaurave? Kotivae, qaqi vaiintivane, vira noraiqama kovaroe minti vaurave? Ne ti tiva timiqe iriare, tiro.

Ihuva minti tumanta vika nai tiva ami nai tiva amiha tiha, Tenavu nana uvae tirarave? Tenavu tiha Kotiva vira noraiqama korave tiarerera, viva tinavuara ne nantihae Ionira uvava kia quaaave tiavo tianarove. ²⁶ Tenavu tiha qaqi vaiintivano vira noraiqama korave tiarerera, tenavu vaiinti nahenti ruvaaqumavi variaka naatu qetararave. Ekaa vaiinti nahenti Ionirara paropeti vaiintivano vaurave ti variarave, ti.

²⁷ Vika nariara nariara minti tivake Ihurara tiha, Nai tavave Ionira noraiqama korave? Kia tenavu virara kankomake irunarave, tuvaro Ihuva tiharo, Ne minti tiaveria tevata tinta noraiqama kaimanta maa kaiqara vare vaunarara kia ninta tiva nimirerave, tiro.

Maaq taaraqantara tura

²⁸ Ihuva minti tivakero tiharo, Maa uvara tire iainara ne nana aatoe irivarave? Vaiinti vovano qorainti taaraqanta vatatorave. Vira qova nai maaqu avuhainaa vaintiara tiharo, Ti maaquo, vate oru te *uaini* utu taunaraqi kaiqa vara timitaane, tuvaro ²⁹ viva aqao tiro, Kia ti vuataas ivera kia virerave, tivakero viva vaiharo qaiqaa avu aato utukero nai qova tuntemakero vurave.

³⁰ Viva uvuvaro vira qova nai maaqu voraravata oru vohaa uvaqai tuvaro viva eqqai tivakero kia mini viraitiro, qaqira kero vaurave, tiro.

³¹ Ihuva vi uvvara tivakero vika irama nimitero tiharo, Vitantaqihairo tavave nai qora uva irurave? tumanta vika tiha, Vira vakaava avuhainaava nai qora uva irurave, ti.

Vika minti tuvaro Ihuva tiva nimiro tiharo, Ho iriate. *Takisi* vare variakavata, hampi narira ni varia nahentikavata, vika ni naatarake Kotiva raqikiraqi vika naane vi variarave.

³² Haaru Ioniva anirero avuqavu ni aarara ni numiqarare tumanta ne vira uvvara kia quaaave ti vaurave. *Takisi* vare variakavata, hampi narira ni varia nahentikavata, Ionira uvvara quaaave ti vaurave. Ne vaiha tavomanta vika Ionira uvvara quaaave tumanta ne kia vika unte urave. Ne vo avu aato utuke qora aara qaqirake Ionira uvvara quqaa uvave tistaara vaumanta ne kia mintiraiti vaurave, tiro.

Uaini ututoraqi kia kogemake raqiku vaiintikara tura

(*Maaki 12:1-12; Ruki 20:9-19*)

³³ Ihuva minti tivakero tiharo, Ne iri vaiqe te vo uva tuqantaake ni tiva nimiare. Vata vato vaiintiva *uaini* uttero, auvahianta hoohah aratero, vata quvikero *uaini* tava tatiainara aututero, maimaraara harara tainta autukero vatero, viraqaahairo niara vataini vireva iharo yokuka tiya nimiro tiharo, Ne ti *uaini* naahoqaa raqiki timite vaiqe te niaraini vuare, tivakero viva niaraini vo vataini vurave.

³⁴ Mini oru vauvaro *uaini* hiqi entava anirovaro viva nai kaiqa vaiinti vonavu nititero tiharo, Oru ti naahoqaa raqiki timite variaka vuru timanta *uaini* tintavata hiqi timitaate, tumanta vinavuka mini vurave.

³⁵ Mini vumanta vira naahoqaa raqiki amite vau vaiintika vira kaiqa vaiintinavu vinavuka ravaaqavuke, vo vira kaavu umiqake vate, vo vira aruke, vo vira orikatu utu vare vira ruqutuke vatorave.

³⁶ Mintuvaro naaho qova nai kaiqa vaiinti vonavu hogare nititonavukavata naatara kero vonavuvata nititomanta, vira naahoqaa raqiki amite vau vaiintika hogare vonavu qoraiqama nimitontemake, vikavata vohaa qaramake qoraiqama nimitorave.

³⁷ Mintuvaro naaho qova naantiara ekaanaini nai maaqu vohaiqa attero tiharo, Vika ti maaqu taveha, virara ti maaquvanove tivakehama vira koqema amitevarave, turave.

³⁸ Minti tivakero vira atitovaro vumanta vira naahoqaa raqiki amite vau vaiintika vira maaqu tave, nai tiva ami nai tiva amihha tiha, Maa vaiintiva vira qova qutu viraro nai qora vatawata airairavata varaariravama vaivo. Aniqe vira arukaariraro vira naahovano tinavuniqama vuarire, ti. ³⁹ Vika minti tivake vira ravaaqavu vare naahoqihai aaqaini vira vaati aquke arukorave, tiro.

⁴⁰ Ihuva minti tivakero vika irama nimitero tiharo, Minturara tiro, naaho qova nai maaqu arukora kaara nantie ianarove? tiro.

⁴¹ Minti tumanta vika Ihurara tiha, Naaho qova vaaku vaiintinavu ntaihamakero vehi autukero, viraqaahairo viva vokika nai naaho nimiramanta vika vira naahoqaa raqikihama *uaini* hiqi entara naivata hiqi amitevarave, ti.

⁴² Vika minti tuvaro Ihuva vikara tiharo, Ne kiae Kotira vukuqi maa uvvara kaara ruva keha tavaarave? Vi uvava mintima tiro:

Ori naavu kaeheha vo ori, kia koqe orive tivake qaqirakaa oriva, vi oriva naaquraiqama vivo.

Noravano vi orira noraiqama kairara ti, tenavu vira kaiqa tave tiha, Voqaraa kaiqave, turo, turave.
(Ihi 118:22-23)

⁴³ Te vi uvvara irihama niara mintima turo: Ne vira Maaqu qoraiqama amitera kaara Kotiva kia niara ti vaiinti nahentive tianarove. Viva ni qaqa kero vo vatanaakara vika ti vaiinti nahenti vase te viqaqaa raqikiqi vi variari vika koqe kaiqa vara timitevarave, tianarove. ⁴⁴ [Vi oriraqaa kaavu ntirava rukavu raakavuma vuuanarove. Vi oriva virihairo vaiinti voqaa hiqiri virera, vi vaiintira ruqutu kero konkomaiqama kaanarove, tiro.]

⁴⁵ Ihuva minti tumanta Kotira kaiqa vara amite vau vaiintika vika noranavuvata, Parasi vaiintinavuvata, vaisha aato kenko tumanta iri vuvaro Ihuva *uaini* naahoqaa raqiki amite vau vaiintikara tiharoma uva tugantaakero nai vikara tumanta ⁴⁶ vika vira ravaaqavu vareko amirare ti, tavomanta vaiinti nahenti viraqi ruvaaquamavi vauka Ihurara paropeti vaiintivanove tumanta vika naatu qeteha kia vira ravaaqavu kora.

Nahenti varaimanta kara nerara tura
(Ruki 14:15-24)

22

¹ Ihuva qaiqaa vaiinti nahenti uva tiva nimireva vo uva vo uva tugantaakero tiva nimura.

² Viva vo uva tugantaakero tiharo, Kotiva vaiinti nahentiqaa raqikiarava vaireva, avuhainaa vaiinti vovano nai maaquvano nahenti varaainarara iriharo kara gerama vatora voqarama vaivo.

³ Avuhainaa vaiinti viva nai kaiqa vaiintinavu nititero tiharo, Nenavu orunte te naarama tauna vaiinti nahentika timanta ani kara naate, tumanta vika vuru tiva nimumanta vika kia aniatiaa umanta kia anurave.

⁴ Kia anuvaro avuhainaa vaiintivano kaiqa vaiinti vonavu nititero tiharo, Te naarama tauna vaiinti nahentikara mintima tiate: Te kara henogama vatauro. Tenta *purumakau* vonavuvata, *purumakau* naati koqera vovata, aruke teqa taaqamake vatauro. Ti maaquvano nahenti varaainanaini ani vaiha vi karara naate, tiate, tiro.

⁵ Viva minti tumanta viva naaramato vaiinti nahentika kia vira uva iriataa umanta vika nai kaiqaqai varaqi vi vaura. Vovano nai naahoqii vuvaro vovano nai koqaa kaiqa varareva vumanta ⁶ vonavu avuhainaa vaiinti vira kaiqa vaiintinavu ravaaqavuke ruqutuke arukorave.

⁷ Mintiuvoro avuhainaa vaiinti vira voqamakero arara itovaro viva nai iqoka vaiinti nititomanta vika vuru nai kaiqa vaiintinavu aruko vaiintika náivota aruke, vika vatukave naavuve iha qumpiarama taiqa korave.

⁸ Viraqahairo avuhainaa vaiintivano nai kaiqa vaiintinavu qaiqaa naaramakero tiharo, Nahenti varaaaina karara henogama vatauro. Te vaiinti nahenti naarama taurauka vika kaiqavano kia aru vimanta vika ti kara neva kia ho vaivo. ⁹ Ne vika qaqirake oru vo aara vo aarantuna viha, ekaa vaiinti nahenti ne rantakeka naaraimanta, ani vikavata te kara naainara naate, turave.

¹⁰ Minti tumanta vira kaiqa vaiintinavu aaraini viha ekaa koqe vaiinti nahentive qora vaiinti nahentive rantatoka, ekaa vika ruvaaquamake ntita vare vuru komanta vika kara no naavuraqi mpiqa vurave.

¹¹ Vi entara naata varaaaina karara nareva anu vaiintiva qentiana anirovaro qentiana raqiki vauva vira tavuna rumpa amitovaro vi vaiintiva vira nonkutero oru oqu vi vaurave. Avuhainaa vaiinti tavuna rumpato vaiintika, vikaraqai ho viraqi oqu vuate ti vaura..

Vika vira naavuqi mpiqa vuvaro avuhainaa vaiintivano tavovaro vaiinti vovano kia vira tavuna rumpatero vauvaro ¹² viva vi vaiintirara tiharo, Ike, ti vaiintio, are kia ti tavuna rumpa vararaitira, are nantiakerae maaqi uriqetera iarao? tuvaro vi vaiintiva kia ho uva turave.

¹³ Viva tirema vauvaro avuhainaa vaiintivano nai kaiqa vaiintinavu tiva nimiro tiharo, Maa vaiintira aiqu kauqu rumpa vare muntu vahaqaqaini konkira ari vairaqui aquakaate. Viva mini vaharo iqi rathearo nai aarai tenti aneharo varianarove, turave, tiro.

¹⁴ Ihuva vi uvvara tivakero viva tiharo, Kotiva airi vaiinti nahenti naarama tainaraqihairo taaraiqaqaima ntita varaanarove, tiro.

Takisi aqirara Ihura irama amitora
(Maaki 12:13-17; Ruki 20:20-26)

¹⁵ Ihuva minti tiva komanta Parasi vaiintinavu viraqihai vevare oru ruvaaquamavi vaiha tiha, Nana uvae Ihura irama amitaariraro viva hampi uva tianarove? Kaiqe maa uvara irama amitaare, tivake ¹⁶ vika nai avataqi nu vaiintika vonavu nititeha,

Herotira navunaaka vonavuvata nititomanta vika Ihuva vaunaini orure tiha, Maara ti variara vaiintio, are maara okara tiva timiaramanta tenavu tavaurara are quqaa uva ti variaravave. Are kia vaiinti aatu getaraitira, nora vaiintiaravata, qumina vaiintiaravata, vohaa qarama keraqai ti variaravave. ¹⁷ Ho tenavu maa uvvara tainara are nantie tinarave? Tenavu Kotira uva iriha hoe tenavu Romeni vatanaaka vika avuhainaa vaiinti Sisaara *takisi* aqu amitararave? „Vi vatanaaka kia Kotira uva iri variakave.“ Virae *takisi* aqu amitararave kiae aqu amitararave? ti.

¹⁸ Vika minti tuvaro Ihuya irumanta vika virara hampi uva tiarire tivake minti tuvaro Ihuya tiharo, Ne unaqaraiqama keha koqe kaiqa vare variakave. Ne nantihae tirirara hampi uva tiarire tiha minti ti variavo? ¹⁹ *Takisi* aqi vai monura vohaiqa humiqaiqe tavaare, tiro.

Minti tumanta vi monura vohauru amuvaro ²⁰ viva vika irama nimitero tiharo, Monu viraqaa taro virivata autuvatae vaivo? tiro.

²¹ Minti tumanta vika tiha, Sisaarave, tuvaro Ihuva vikara tiharo, Virara irihama ne Sisaava ina haikara nai amiate. Kotiva ina haikara nai amiate, tiro.

²² Ihuva minti tumanta vika vira uva iri tiha, Ike, viva tinavu uvavata aatara kero koqe uvqaqima tivo, tivakeha kauqu runkinkiri i vaiba vira mini ke surama.

*Satiusi vaiintinavu Ihura irama amitora
(Maaki 12:18-27; Ruki 20:27-40)*

²³ Vi entara Satiusi vaiintinavu Ihuva vaunaini orurora. Vi vaiintinavuka nái maara uvara iriha tiha, Vaiintivano qutu viraqihairo kia ho qaiqaavata himpuanarove, ti vau vaiintika orure Ihura ireha tiha, ²⁴ Maara ti variara vaiintio, tinavu kaivaqava Mosiva maara uva tiva timiharo minti turave: Vaiintivano kia vainti vataraitiro qutu viraro, vira qatavanoe vira vakaavae vira naata varatero vainti kuvuarama amitaanarove, turave.

²⁵ Tenavu tiarirara iriane, Haaru maini qata vakauka 7navu vaurave. Vinavuka vakaava avuhainaava nahenti vo varatero kia vaintivata vataraitiro, qutu vuvarora tiro, vira qata vovano naantiaraihainaava vira naata varatero ²⁶ vivavata qaqi variqi viro vuru qutu vurave. Viva qutu vuvaro vitanta tavaaraihainaava vi nahentira varatero kia vaintivata vataraitiro, qaqi variqiro viro vuru qutu vurave. Mintiaqi vi, ekaa qata vakaa vinavuka vi nahentira varate kia vaintivata vataraiti, ekaa qumina qutu vurave.

²⁷ Qumina qutu vuvaro nahenti vivavata variqiro viro qutu vurave.

²⁸ Naantiara vaiinti nahenti qaiqaa qaqi himpi vai entaraqaa vi nahentiva tara naatae varianarove? Viva qaqi vau entara qorainti 7navu varatorave, ti.

²⁹ Satiusi vaiintinavu minti tuvaro Ihuva vika nái tiva nimo tiharo, Ne Kotira uva qara ntuva tora kia kankomake iriarave. Ne Kotira kempukaravata kia iriarave. Kia iri tavaakara ti, ne hampi uvama ti variavo. ³⁰ Naantiara vaiinti nahenti qutu viraqihai qaiqaa qaqi himpi variqi vi entara kiama naata vaati vare okarava varianarove. Vika *enselinavu* naaruvaini variaka voqaantema kema vaivarave, tiro.

³¹ Ihuva minti tivakero viva tiharo, Vaiinti nahenti qaiqaa qaqi himpi okarara te ninta irama nimitarerave. Ne kiae Kotira vukuqi maa uvvara qara ntuva tora kaara ntuvake iriarave? Kotiva minti turave:

³² Te Kotika ai kaivaqauka Variqavano vauro. Te ai kaivaqaukavara Eparahaamiraqaave, Aisaakiraqaave, Iekopiraqaave, raqiki vauraukave, turave. *(Katu Varora 3:6)*

Ho iriate. Kotiva qutu viro taiqavi haikaraqaa kia raqikiqiro viraitiro, viva qaqi variqiro vi vai haikaraqaa raqiki vaivama vaivo, tiro.

³³ Ihuva minti tumanta vaiinti nahenti mini ruvaaqumavi vauka vira uva iri ravukuvi tiha, Ike, Ihuva okara uvama tinavu tiva timi vaivo, ti.

*Kotiva avuni vatai uvarara tura
(Maaki 12:28-31; Ruki 10:25-28)*

³⁴ Parasi vaiintinavu iruvaro Ihuva Satiusi vaiintinavu tu uvvara aatara komanta vika ruvaaqumavi vauraqihairo ³⁵ vaiinti vovano maara okara kankoma kero ti vau vaiintiva Ihurara hampi uva tiraqe viraqaa uva vataare tiro, uva vo Ihura irama amitero tiharo, ³⁶ Maara ti variara vaiintio, Kotiva vo uva vo uva tiva toraqihairo nana uvavanoe avuni vai uvava vaivo? tiro.

³⁷ Minti tuvaro Ihuva vira tiva amiro tiharo,

Are nena Variqa Nora Kotirara ekaa nena muntukaqihairave, nena maraquraqihairave, nena avu aatoqihairave, antuqa arirara variane, turave. *(Lo 6:5)*

³⁸ Ho vi uvava avuni vaharo noraiqamakero vairave.

³⁹ Vi uvara naantiaraini nora uva voma vaivo. Vi uvava avuni vai uvara voqaarama vaivo. Vi uvava mintima tiro:

Ninara antuqa arinantema kera nena navunaa vaiintiaravata antuqa arirara variane, turave. (*Wkp 19:18*)

⁴⁰ Vi uvatantavano okara uva naaqura arataara voqaara vaivaro ekaa vo uva vo uva Mosiva tivato uvavave, paropeti vaiintinavu tivato uvavave, kiari voqaara vaharo vi uvatantaqaa hirivi vairave, tiro. Ihuva turama.

Ihuva Mesaiaa okarara irama nimitora

(*Maaki 12:35-37; Ruki 20:41-44*)

⁴¹ Parasi vaiintinavu mini ruvaaqumavi vauvaro Ihuva vika irama nimitero tiharo, ⁴² Ne Kotiva atitaina vaiintira *Mesaiaara* ne nana aato irihae variavo? Viva ta ankuraqihairoe qovaraiqianarove? tiro. Ihuva minti tumanta vika tiha, Viva tinavu kaivaqara Devitira ankuiqihairo qovaraiqianarove. Viva Devitira naintivanoma varianarove, ti.

⁴³ Vika minti tuvaro Ihuva tiharo, Nantiakeroe *Mesaiaavano* Devitira nainti varianarove? Haaru vetanto entaqaa Devitiva vauvaro Kotira Maraquivavano vira kahaquvaro Devitiva *Mesaiaara* tiharo, Viva ti Noravanove, turave. Devitiva mintima tiro:

⁴⁴ Noravan ti Nora Vaiintiara tiharo, Are uritarera ti kauqu tanaraini oquivi vairaque te ai navutaaka aru naatara nimitaarirara are vikaqaata nena aiqu ntava taane, turave. (*Ihi 110:1*)

Devitiva minti turave, tiro.

⁴⁵ Ihuva minti tivakero qaiqaa vika irama nimitero tiharo, Devitiva *Mesaiaavano* qovaraqiaqianarara tiharo, Ti Nora Vaiintive, turave. Devitiva minti turara tiro, nantiakeroe *Mesaiaavano* Devitira nainti ho varianarove? tiro.

⁴⁶ Ihuva minti tumanta vika nái tiva amirare ti uvava ranteha tavovaro kia vaumanta, vika vi entaraqaahai qetakeha kia uva vovata vira irama amite vaura.

Parasi vaiintiaravata maara okara ti vau vaiintikaravata tura

(*Maaki 12:38-39; Ruki 11:43-46; 20:45-46*)

23

¹ Ihuva minti tivakero vaiinti nahenti mini ruvaaqumavi vaukaravata nai vaintinavuaravata tiharo, ² Maara okara ti varia vaiintikavata, Parasi vaiintinavu, Mosiva tivato uvara koqe uva ni tiva nimi variamantara ti, ³ ne vika uva iriqi vuate. Ne vika uva irihama kia vika nintemake nuate. Vika niara ne minti maantimake iate tivakeha, vika nái kia vi uvara avataraiti, hampi ni variarave.

⁴ Ike, vika nora maara ntai uvara rumpake vaiinti nahentiqaa aqu nomiteha, vika kia nái kauqu vonku tutuke vaiinti nahenti kahaqí variarave.

⁵ Vaiinti nahenti vika taveha quahama nimitaate ti, Parasi vaiintinavu vika nivuqua kaiqa vare variarave. Vika Mosiva qara ntuvato uvara apuqamake taquqi nonkuke nái tiriqaavata kauqu kaataraqaaavata rumpateha, vukai tavuna koqe tavuna rumpa vare vaiinti nahenti vika tavaate ti, vatukavau ni variarave.

⁶ Vika ovata ne variaraqaa oru vaiha vaiinti nahenti vikara nora vaiintive tiate ti, vaiinti taruka variaraqaa vika oquiviha variarave. Vika maara naavuqi oriqete koqe taintaraqai antuqa arimanta viraqaa oquiviha variarave. ⁷ Vaiinti nahenti vika koqemake uva manteha, Maara uva ti variara vaiintio, tiate ti, vika *maaketiqi* vi ani variarave.

⁸ Nevata vika voqaante ivorave. Vo vaiintinavu ni uva manteha niara tiha, Maara ti variara vaiintio, tivera, ne vikara hauri minti tivorave. Tenavu qata vakaqaqaima vauro. Tinavu maara uva tiva timi vaiva vohaiqavanoma vaivo, tiate. ⁹ Ni Qova vohaiqavano naaruvaini vairara ti, kia vataini variaina vaiintira vorara tinavu Qorave tiate.

¹⁰ Ne vo vaiintiara tinavu avuhinaa vaiintive tivorave. Ne tiha, *Mesaiaavano* Kotiva atitaina vaiintiva, vivaqaima tinavu avuhinaa vaiintivano vaivo, tiate. ¹¹ Niqihairo vovano nora vaiinti vaireva irera, vi vaiintiva ni kaiqa vara nimitaarie.

¹² Nai autuqai viriniqamake vairava vairaro Kotiva vira autu vatainiqamama kaanarove. Nai autu vatainiqamake vairava vairaro Kotiva vira autu viriniqamama kaanarove, tiro.

Maara okara ti vau vaiintikaravata Parasi vaiintinavuvaravata oho tiva nimitora

(*Maaki 12:40; Ruki 11:39-52; 20:47*)

¹³ Maara okara ti varia vaiintikavata, Parasi vaiintinavu, ne unaqaraqigama keha koqe kaiqa vare variakave. Te dintara oho tiva nimitauro. Vaiinti nahenti Kotiva raqiki vairaqi virare ti amanta ne vika nivuqua qenti vara muntuvi tinta nimite variavo. Ne nenta kia Kotiva raqiki vairaqi oriqete viraiti, ne vokiakavata kia qaqi kaimanta viraqí vivarave.

¹⁴ [Maara okara ti varia vaiintikavata, Parasi vaiintinavuvata, ne unaqaraiqama keha koqe kaiqa vare variakave. Te nintara oho tiva nimitauro. Ne tentoqa varia nahentika naavu airaira muara vareha ne tiha, Vovano tinavu vaau kaiqa taveharo tinavuara qora vaiintive tiantorave, tivakeha ne vaiinti nahenti nivuqaa vaha vukaiqaake Kotira aare variarave. Oho, vira kaara niqaa uva uritareroma varianarove.]

¹⁵ Maara okara ti varia vaiintikavata, Parasi vaiintinavuvata, ne unaqaraiqama keha koqe kaiqa vare variakave. Te nintara oho tiva nimitauro. Ni nora iha itainaraqi aqukevama vaivo.

Vaiinti vonkuvuvan vi uvara avataqiro vuarire tiha, ne vo vataini vo vataini vi anihā vaiinti vonku rantake, vi vaiintira nenta qora okara umiqe variarave. Ho vi vaiintiva ni uva avataqiro viharoma nai qora kaiqa voqavata uritarakero varaira kaarama, vi vaiintira nora iha itainaraqi aqukeva nai voqavatama varianarove.

¹⁶ Ne avu qimpa vuaka vaha ne vokiaka aara numiqareka auti variakara, te nintara oho tiva nimitauro. Ne vaiinti nahenti maara okara tiva nimiha minti ti variarave: Vaiintivano Kotira Naavu autu reharo nai kauqu ainqiqa aqukero tiharo, Te minti mintirerave, tirera, viva minti tina uvava kiama vira tuataanarove. Vaiintivano Kotira Naavuqi vai *kori* oriara autu reharo nai kauqu ainqiqa aqukero tiharo, Te minti mintirerave, tirera, viva nai tinantemakero vi haikara autuarire, ti variarave.

¹⁷ Ni avu aato kia vaimanta ne avu qimpa vuaka ne hampiqama kehama ti variavo. Nana haikavanoe avuniqamakero vaivo? *Kori* orivanove, Kotira Naavuvanove? *Kori* orivanove Kotira Naavuqi vaivarora tiro, Kotira Naavuvanovi *kori* orira vara kotataiqamake vairave*. Mintirara tiro, Kotira Naavuvanovi avuniqamaka keroma vaivo.

¹⁸ Qaiqaa ne maara uva vo hampiqamakeha vaiinti nahenti tiva nimi tiha, Vaiintivano Kotira *ofaa* taintara autu reharo nai kauqu ainqiqa aqukero tiharo, Te minti mintirerave, tirera, viva tira uvava kiama vira tuataanarove. Vaintivano taintaqaa *ofaa* haika vateharo vi *ofaara* autu reharo nai kauqu ainqiqa aqukero tiharo, Te minti mintirerave tirera, viva nai tinantemakero vi haikara autuarire, ti variarave.

¹⁹ Oho, ne avu qimpa vuaka kia vo okara vo okara ho tave variavo. Vi taintaraqaa vatai *ofaava* kia vi taintara aatara kero avuni vai haikava vairave. Kotira Naavuqi vai taintava avuniqamakero vaiharora tiro, vi *ofaara* vara kotataiqamake vairave.

²⁰ Vaiintivano kauqu ainqiqa aqukeharo vi taintara autu reharo viva tainta viravata, tainta viraqaa vai haikaravata, autu re vairave.

²¹ Vaiintivano nai kauqu ainqiqa aqukeharo Kotira Naavu autu reharo viva kia naavu autuqai rero viva naavu autuvata, naavuqi vaira Kotira autuvata, raivo.

²² Vaiintivano nai kauqu ainqiqa aqukero naaruva autu reharo viva kia naaruva autuqai raraitiro, viva Kotiva oquvuaina taintara autuvata, vi taintaraqaa oquvi vaira Kotira autuvatama re vaivo.

²³ Maara okara ti varia vaiintikaravata, Parasi vaiintinavuaravata, te nintara oho tiva nimitauro. Ne unaqaraiqamake koqe kaiqa vare variakave. Ne uapaa naaho *haakave/haanave*, meruve, raira keha Mosiva tivato uvira iriha, 10navuqihai hini naaho 9navu nenta tuateha, hini naaho vohaiqa Kotira amite variarave. Ne vi uvira uapaa uva iriha, ne nora uvavata kia iri variarave. Avuqavuqamake *ko* ti varia okararave, aagurihama nimite varia okararave, Kotirara kempukaiqamake iri varia okararave, ne vi uvira vi uvarara kia iri variarave. Ne uapaa uva iriha vi uvaravata nora uvavata, iriqi vuataarave.

²⁴ Ne avu qimpa vuaka vaha ne vokiaka aara numiqareka auti variakave. Ne namari nare iha tavaavarao vauvaari vovano namariqi vaimanta ne vira qaqini varakehavata, *kameri* quara vovano viraqii vaira viravatama keha nampiqamake variarave.

²⁵ Maara okara ti varia vaiintikavata, Parasi vaiintinavuvata, te nintara oho tiva nimitauro. Ne unaqaraiqama keha koqe kaiqa vare variakave. Ne *kaapuvata* tanuvata pahainiqai hiqamake variakave. Ne nenta pahainiqai hiqamate variavaro ni avutaqi vaireva, vaiinti ruqutu kevave, muara varevave, nentara irikeha varevave, vi haikavaqai niqi mpiqaro vaivo.

²⁶ Ne Parasi vaiintinavuo, ni niwu qimpa vimanta variavo. Ne *kaapuvata* tanuvata avutaqi naane hiqama kaivaro pahainivatuhiqama vuarire.

²⁷ Maara okara ti varia vaiintikavata, Parasi vaiintinavuvata, te nintara oho tiva nimitauro. Ne unaqaraiqama keha koqe kaiqa vare variakave. Vaiinti quntama taaraqaa hanta *peni* aqutaantemake, ne variarave. Hanta *peni* aqutaa katarira vonavu taveha tiha, Kogema iro vaivo, tiavarovata, vataqi qutuvua vaiintika vuhaarivanovata nterai haikavavata, vi haikavaqai vairave. ²⁸ Vira voqara vaiinti nahenti ni aaqaini taveha

* 23:17: koqemakero hiqama amite vairave.

koqe vaiintive tiavaravata, ni avutaqi vaireva, unaqaraiqama keha koqe kaiqa vare variavavata, qora kaiqa vare variavavata, mpiqaro vairave.

²⁹ Maara okara ti varia vaiintikavata, Parasi vaintinavuvata, te nintara oho tiva nimitauro. Ne unaqaraiqama keha koqe kaiqa vare variakave. Ni kaivaqaukavara paropeti vaiintinavu arukeha quntama toraqaa ne koqemakeha ori ntava nimite variarave. Ni kaivaqaukavara avuqavuqamake nu vaiintika arukeha quntama toraqaa ne koqemakeha *vahehemavaataiqama* nimite variarave.

³⁰ Ne vika naintivarara tiha, Tenavu haaru vetanto entaqaa variavauraitirio, kiama tinavu kaivaqaukavara aananet paropeti vaiintinavu aru kaavauraitirio, ti variarave. ³¹ Ne tiha, Tinavu kaivaqaukavara paropeti vaiintinavu arukoka tenavu maa vika naintivarama vauro, ti variarave. Ne minti tiavarao nenta tia uvava, vivama ninta tuataivo. ³² Ho ninta kaivaqaukavara qora kaiqa vara hogaramatora, ne vi kaiqaraqai varaqi vi vuru taiqa kaate.

³³ Ne *uqahivanoma/quaihavanoma* variavo. Ne *uqahi/quaiha* naatinavuma variavo. Kotiva ni *ko* tivakero nora iha itainaraqi aquakanarove. Kia ne viraqihai ruqemake vi avara ho varianarove.

³⁴ Te tiari iriate. Te paropeti vaiintinavuve, koqe avu aato iri vai vaiintikave, koqe uva tiva nimi vai vaiintikave, nititaari ne vonavu arukeha, vonavu katariqaa hiriteha, vonavu maara naavuqi kaavu numiqaakeha vika vo vatuka vo vatukaqihai aru ntata kaimanta vi anima ivarave.

³⁵ Haaru vo vaiintinavu aruko uvavata niqaama varianarove. Hogaramakero Abeliva avuqavu ni vau vaiintira arukomanta viraqaaahai avuqavu ni vau vaiintika, vo vaiinti vo vaiinti aruka arukamaqi ani, Berekiaara maaqu Sekaraiaara viravata arukorave. Vira arukareka, Kotira Naavuvano vauvaro *ofaa* taintavano vauvaro Sekaraiaava vira tavaarara vaumanta arukorave. Ho ekaa vika vika aruko uvava niqaama varianarove. ³⁶ Te tiari iriate. Ekaa vi vaiintika aruke uvava vate maa entara varia vaiinti nahentikaqaaama varianarove, tiro.

Ihuva Ieruharemiara mpo tura
(Ruki 13:34-35; 19:41-44)

³⁷ Ihuva minti tivakero tiharo, Mpo, Ieruharemihainaakao, Ieruharemihainaakao, ne Kotira paropeti vaiintinavu aruke variakave. Kotiva nititai vaiintika aniamanta ne ori mpaqikeha vika ruqutuke variakave. Kokoraaravano nai naati aroka raira aqutainantemake, te qaiqaa qaiqaavata niara mpo tivakeha niqaa raqikirare turamanta ne kia ti qaqi karaiti, ti qoririma timite variavo.

³⁸ Vira kaara ne Kotira Naavu kaqateva quminaqama viro varianarove. ³⁹ Te tiari iriate. Ne maa entaraqaahai kia ti tavaraaiti vase te qaiqaa tuvu ntaari ne vi entaraqaahai ti kankomake taveha tiha, Nora Kotira autuqaa tuvina vaiintira Kotiva koqema amitaarire, tivarave, tiro. Ihuva minti turama.

Kotira Naavu rampai aqukerara tura
(Maaki 13:1-2; Ruki 21:5-6)

24

¹ Ihuva minti tivakero Kotira Naavu mini kero vireva umanta vira vaintinavu tiha, Kotira Naavu koqera maa tavaane, tuvaro ² Ihuva eo tiro, Ne maa entara maa naavuravata vi haikara vi haikaravata tave variarave. Te tiari iriate. Naantiara ori naiqaa naiqaa rukiteva kiama varianarove. „Naantiara navutaaka ani,“ ekaa maa naavura rampaikae naavu kaqato orira, vo ori vo ori vara aqu kaivarо, kia ori voqavanovata qaiqaa naiqaa naiqaa varianarove, tiro.

Naantiara airi maara qovaraiqiainarara tura
(Maaki 13:3-13; Ruki 21:7-19)

³ Ihuva minti tivakero oru Orivi Aiqinagaqaa oqivi vaumanta vira vaintinavu nái viva unaini evaara orure vira ire tiha, Ŧaaka tiarava tarentae qovaraiqianarove? Nana haikayano qovarama virage tenavu viraqaa ampeqamake taveha ariara viva qaiqaa tuvuina entava aumantoma vaivo, maa vataro taiqaaaina entava aumantoma vaivo, tirarave? ti.

⁴ Vinavuka minti tuvaro Ihuva tiharo, Vovano ni una uva tiva nimiainarara raurihama variate. ⁵ Naantiara airi vaiinti qovaramavi ti hutu reha Kotiva ti tititaimanta anuraukave timanta airi vaiinti nahenti vika una uvarama quqaa uvave tivarave.

⁶ Ne vaivar oqoka raqi uvava qovaraiqiramanta ne kia qetaate. Iqokara ti vai uvava aaranahairo aniramanta kia qetaate. Iqoka raqi haikava naane minti minti i vaira ne virara iriha hauri vi entava aniraivo tivorave. Vi haikava naanema qovaraiqianarove.

⁷ Vo vatanaaka vo vatanaaka hampata raqivarave. Avuhainaa vaiinti vovano avuhainaa vaiinti vo vataakero raquanarove. Vo vataini vo vataini karara narara vai entava varianarove. Vo vataini vo vataini vaturavano utuanarove.

⁸ Vainti vatareve tota aiha vinantema keroma, avuni maara raaina entava qaqi hoqarama taiwo, tiate.

⁹ Vi entara ni ravaaqavu vare vuru vokika kauquqi kaimanta ni qoraiqama nimitaqi viha ni arukevarave. Vi entara ekaa vo vatanaaa vo vatanaaka niara Ihura vaintive tihamma vira kaara vika ni iri qoraiqama nimitevarave. ¹⁰ Vi entara tiriara quqaa vivave tika airitahaa ti qaqirake vika naiqaa naiqaa kauqu aave vateha nai navunaaka qovaramake vaivarave. Vika nai iri qoraiqama amite nai iri qoraiqama amite i vaivarave.

¹¹ Vi entara airi vaiinti qovaramavi vaha te Kotira uva qoqaiqamake vauraukave tivakeha vainti nahenti airitahaa unaqaraiqama nimite vaivarave. ¹² Vi entara qora kaiqavano uritarero vairamanta airi vaiinti nahenti vokikara muntuka vate okarara qaqira kevarave.

¹³ Vi entara kia popohanaara iraitiro, kempukaiqama kero Kotira aaraqaa variqiro viro vuru taiqa kaaina vaiintira, virama ekaara entaqaa Kotiva vitaanarove.

¹⁴ Kotiva vaiinti nahentiqaa raqikiaina vakaakara tiva nimiqi vimanta vo vatanaaa vo vatanaaka vi uvura ekaa irivar, ho viraqaahairo ekaara entavano aniraanarove, tiro.

*Nai voqamakero qoraiqaina haikava qovaraiqianaro
(Maaki 13:14-23; Ruki 21:20-24)*

¹⁵ Ihuva minti tivakero viva tiharo, Naantiara ne tavaivaro vaagu haikavano, voqamakero nai vehi autu nimitaaina haikava qovarama vuuanarove. Haaru vetanto entaqaa paropeti vaiinti Danieriva^{*} vi haikarara turave. Ne tavaivaro Kotira Naavu turuaraini kia qaqi vaiintivanovata ho oriqete vai rumuraqi vi haikava himpite varianarove. (Maa uvura kaara rihara vi uvura okara kankomake iriane.) ¹⁶ Viva mini himpite vairamanta Itutia vataini vaika himpi veraini aqina vainainima kantama vuute.

¹⁷ Vi entava anintairaro naavu qentiana vairava hauri nai naavuqi vaaka origetero vo haika varaantorave, viva vi haikara vi haikara qaqirakero kantama vuarire.

¹⁸ Vovano naahoqi kaiqa vare vairava hauri nai vaaqauta varareva anirantero vuantorave. Viva qaqi kantama vuarire.

¹⁹ Vi entara nahentinavu vainti taiqama vikave, vainti naama nimi vai nahentikave, ohu, vi entara vika qoraiqama vivarave.

²⁰ Kia koqe kuari itaaina entaraqaave, Maara Entaqave, vi entava anintairera, ne vukaari utihama ruqemake vivarave. Virara irihama, ne Kotira aaraivaro koqe kuari itaaina entaraqa vi entava anintairamanta ne ho ruqemake vuute.

²¹ Oho, naantiara vi entava anintairaro nora maaravano qovaraiqiramanta vaiinti nahenti anomake qoraiqamavi variqi vivarave. Tota maa vataru aututo entaraqaahairo kia vo maaravano vira voqaara qovaraiqurave. Naantiaravata vi maarava kia qaiqaavata qovaraiqianarove.

²² Vi entava vukai enta vairamantavauve, ekaa vaiinti nahenti taiqa vivaro kia vovanovata qaqi varianarove. Ho Kotiva nai kaamatai vaiinti nahentikara iriharoma vi entara iqumaga kaanarove.

²³ Vi entara vovano niara *Mesaiaavano* mini mainima vaivo, tirera, kia vira uvura quqaave tiate.

²⁴ Vi entara vo vaiinti vo vaiintivano qovaramavi unahaa tiha, Te *Mesaiaavanove*, tiraro vo vaiintivano, Te Kotira uva qoqaiqamake vaura vaiintikave, tivaqvi vi vaivarave. Airi una vaiinti mintimake qovaramavi una kaiqa varaqi viha Kotiva nai kaamatai vaiinti nahentikara vikavata tinavu avataqvi vuute ti, nora kaiqa aahuva kaiqa vo kaiqa vo kaiqa vara qovaramake vaivarave.

²⁵ Ho iriate. Ne kia vi vaiintika uvara quqaa uvave tiate ti, te maa entara vaiha naantiara qovarama vuaina okarara vate ni tiva nimi vauru.

²⁶ Vi uvura iriqi vivaro naantiara vovano ni tiva nimiharo tiriara viva qovarama viro qumina kanta vaivo tirera, kia mini ti tavareka vuute. Ni tiva nimiharo tiriara vi naavuraqi kukeqavi vaivo tirera, kia vira uvara quqaa uvave tiate. ²⁷ Aaquakaa utiharo ekaa naaruva ataama kaintemake, te Vataini Vatatai Vaintika qoqama tuvirerave.

²⁸ Ta mantarainie qutu vuarira vaatava vainara, viraqaaama memoravano ruvaaquma vivarave, tiro.

* 24:15: Dan 9:27; 11:31; 12:11

*Ihuva nai qaiqaa vataini tuvuainarara tura
(Maaki 13:24-27; Ruki 21:25-28)*

²⁹ Ihuva minti tivakero tiharo, Naantiara nora maara vareha antura nti entava taiqa viraro vi entaraqaahairo:

Vaakama kuari avuvano konkiraqama viraro toravanovata kia itairaro vaahoquravonovata, opu makauvanovata, hiqiri hiqiri i vairaro naaruvaini vaira haikava vahiaro hampiqama kero qaki qaki i varianarove. *(Aisaiaa 13:10; 34:4)*

³⁰ Vi entara vaiinti nahenti naaruvaini ampeqamake taveha tiriara oho viva tuvireva gera i vaivo tivarave. Vika minti tivakeha ekaa vatamaata vaika qeteha iki ratevarave. Vika mintiaqi viha tave vase te Vataini Vatatai Vaintika naaruvaihai tonavuqaa tuvi variariraro ti mpeqa okaravano voqamakero takuqi vairaqe te tenta kempuka vataake tuvirerave.

³¹ Vi entara *aanumaaravano/nomavano* noraiqaakero uva tirage te tenta *enselinavu* nititaari vika vataini tuvunte, hihai hihai Kotiva nai kaamatiai vaiinti nahentika ekaama ruvaaqumake ntitevarave, tiro.

*Ihuva fiki katariqaa ampeqamake tavaate tura
(Maaki 13:28-31; Ruki 21:29-33)*

³² Ihuva minti tivakero tiharo, Ne fiki katariqaaahai avu aato varaate. Vi katarira mare aqu ntuvu vivaro, viragaahahai qaiqaa qaraaka ankuri ntareva auti vaimanta ne viraqaa ampeqamake taveha tiha, Nora kuarivanu itaaina entava aumantoma vaivo, ti variarave.

³³ Vira voqaantemake, naantiara qovarama vuaina haikarara tunara, ne viraqaa ampeqamake tave tiriara tiha, Viva tuvuaina entava aumantoma vaivo, tivarave. ³⁴ Te quqaama turo. Maa entara vaika kia taiqa vivaro ekaa vi haikarara te turava vivauma varianarove.

³⁵ Naaruvavanovata vatavanovata taiqa viraro ti uvavanoqaima kia taiqa viraitiro, qaqlima variqiro vuanarove, tiro.

*Kia vovano te tuvuaina entarara iritaivo
(Maaki 13:32-37; Ruki 17:26-30)*

³⁶ Ihuva minti tivakero tiharo, Te tuvuaina entava nana entaqaae, nana kuari avuqaae, varianarove? Kia vaiinti vovanovata virara irirave. Kia *enselinavu* naaruvaini variaka virara iriarave. Te tentavata Vataini Vatatai Vaintika vaiha kia virara irunarave. Kotiva ti Qova, viva naiqaima vi entarara iritiravare.

³⁷ Noaava qaqi vau entara vaiinti nahenti mintuntemake, naantiara te Vataini Vatatai Vaintika tuvuaina entaraqaa vaiinti nahenti vohaa qaramake variqi vivarave.

³⁸ Vi entara kia huvura namarivano aqu ravaaqavuko entara vaiinti nahenti karavata namarivata namaqi viha naata vare vauvaro Noaava namariqaa vuaina naavuraqi oriqetero vauvaro ³⁹ huvura namarivano ventaqiro virini uri vumanta vika vaiha avu aato kenko tumanta tiha, Ike, tenavu taiqa vuaina entavama aniraivo, tuvaro huvura namarivano vika ekaa aqu ravaaqavu korave. Te Vataini Vatatai Vaintika orurante tuvuaina entaraqaavata vaiinti nahenti vira voqaantemake, nai kaiqaraqai iriqi vi vase te tuvirerave.

⁴⁰ Vi entara vaiinti taaraqanta naaho kaiqa vare vaivaroh vohaiqa naaruvaini vita varero, vo mini kairaro varianarove. ⁴¹ Vi entara nahenti taaraqanta kara tainti uti vaivaroh vohaiqa naaruvaini vita varero, vo mini kairaro varianarove. ⁴² Ne ni Noravano tuvuaina entara kia iriakara ti, ne taveha rauriha variate.

⁴³ Ho maa uvara kankomake iriha variate: Naavu qova vahiaro muara vaiintivano aniainarara iriharo viva maimaraara raqiki vaitirio, muara vaiintivano kia ho vira naavuqi oriqetero muara varaitirio.

⁴⁴ Vi uvvara irihama nevata henoqamate variqi vihami tivek variate. Ne ti Vataini Vatatai Vaintikara kiama tuvuanarove ti entara, vi entaraqaama te tuvirerave, tiro.

*Koqe kaiqa varai vaintiraravata qora kaiqa varai vaintiraravata tura
(Ruki 12:41-48)*

⁴⁵ Ihuva minti tivakero tiharo, Kaiqa vaiinti vovano nai nora vaiintiara noraiqaakero iriharo koqema kero kaiqa vara amite vai vaiintiva, viva nana vaiinti voqaae vaivo? Viva maantima vaira kaiqa vaiintivama varianarove:

Vira nora vaiintivano niara aara vireva iharo vi vaiintira noraiqama kero tiharo, Arema kaiqa vaiintinavuqaa raqikhara vo enta vo enta kara rairakehara nimiane, tivakero ⁴⁶ oru aaraini niro orurantero ani tavairaro vira kaiqa vaiintivano viva tinantema kero kaiqa vare vairera, vira kaiqa vaiintivano voqama kero quahaanarove.

⁴⁷ Ho te quqaa tiari iriate. Vira nora vaiintivano mintima tianarove: Te qaiqaa ari noraiqama kaarirara are ekaa te iaina haikaraqaama raqikiqira vinarave, tianarove, turo.

⁴⁸ Vira kaiqa vaiintivano qaqla kero kia mintiraitiro, qora kaiqa vaiintivano vaiharo nai irikero tiharo, Aqao, ti nora vaiintivano kiama vaaka orurantero anianarove, tivakero ⁴⁹ viraqaahairo nai kena kaiqa vaiintinavu ruqutu kero vatero, oru iha namari ne vaika hampata karavata namarivata namaqiro vi vairaro ⁵⁰ vo enta vira nora vaiintivano vi entaraqaa kiama anianarove tiaina entaraqaa orurantero ani vira kaiqa tavero ⁵¹ nai kaiqa vaiinti vira voqamakero kaavu umiqakero vatero, vira atitama kero tiharo, Unaqaraiqama keha koqe kaiqa vare varia vaiintika qora vatukaqi vainaini arevata mini vuane, tiraro viva mini vaiharo iqi rateharo aarai tenti aneharo varianarove, tiro. Ihuva turama.

25

Varaata kauqurutantara tura

¹ Ihuva minti tivakero viva tiharo, Ekaara enta anirairaro Kotiva vaiinti nahentiqa raqikiarirava vaireva, varaata kauqurutanta voqaarama varianarove.

Varaata kauqurutanta entaqi vailha nahenti varare u vaiintira vataake kara nareka iha, vinavuka nái *raamunavu* vare vira vita kareka vurave.

² Varaata hini kauqurunavu kia koqe avu aato vataaka vaumanta hini kauqurunavu koqe avu aato vataaka vaurave. ³ Kia koqe avu aato vataaka nái *raamunavu* varevata, kia vahavera taquvata vararaiti vurave. ⁴ *Raamuqai* vare vumanta koqe avu aato vataaka nái *raamuqia* vahavera taquvata vare vurave. ⁵ Nahenti varaaina vaiintira vitareka vuvoro vi vaiintiva kia vaaka aniomanta vinavuka avu tauntomanta vaitate vaurave.

⁶ Varaatanavu vaitate vauvaro enta tavaarana vovano naveraitiro tiharo, Nahenti varaaina vaiintiva anima vaivo. Aniqenavu oru vira vita kaare, tumanta ⁷ varaata kauqurutanta himpi nai *raamu* nai *raamu* qera i vaurave.

⁸ Kia koqe avu aato vatauka nai kenukara tiha, Ike, tinavu *raamunavu* qimpavireva auti vaivo. Nenavu vahavera tinavuvata timige tentanavu *raamuq* qihiaare, turave.

⁹ Tumanta vinavuka aqao ti, Vahavera nivata nimiariraro kia ho variantorave. Ne kante oru vahavera vare vainaihia nenta koqaa aqukeha vahavera varaate, tumanta ¹⁰ vinavuka vahavera varareka anirante vuvoro nahenti varo vaiintiva anirorave. Viva aniomanta varaata kauqurunavu ho geramatoka vira vataake naavuqi oriqete kara ne vauvaro genti tintatorave.

¹¹ Qenti tintatomanta vahaverara vuka orurante anire tiha, Nora vaiintio, nora vaiintio, genti quantua timitaane, tuvaro ¹² nahenti varo vaiintiva aqao tiro, Kia te ni tavauraukave, turave, tiro.

¹³ Ihuva vi uvvara tivakero tiharo, Vi uvvara irihama ne ekaara entavano aniainarara kia iriarara ti, nevata rauriha geramateha variate, tiro. Ihuva tura.

Nai kaiqa vaiinti taaramonavu monu nimurara tura

(Ruki 19:11-27)

¹⁴ Ihuva minti tivakero uva vo tugantaakero tiva nimo tiharo, Ekaara enta anintairaro Kotiva vaiinti nahentiqa raqikiarirava maa uvvara voqaarama varianarove: Nora vaiinti vovano niara aaraini vireva viharo nai kaiqa vaiintinavu naarama kero tiharo, Te una haikaraqa raqiki timitaate, tivakero vurave.

¹⁵ Viva viharo nai kaiqa vaiintinavu monu rairakero nimireva iharo, viva vika nái kaiqa vare okarara iriharo monu rairakero nimurave. Vora 5,000 kinaa amiro, vora 2,000 kinaa amiro, vora 1,000 kinaa amiro, viraqaahairo niara aarainiara vurave.

¹⁶ Viva vuvoro 5,000 kinaa varo vaiintiva vi monuraqohairo koqaa kaiqa varaqiro viharo kaiqa vareharo 5,000 kinaa voqavata vara vatorave.

¹⁷ Viva mintuvaro 2,000 kinaa varo vaiintiva vivavata kaiqa vareharo 2,000 kinaa voqavata vara vatorave.

¹⁸ Mintuvaro 1,000 kinaa varo vaiintiva kia koqaa kaiqa vararaitiro, oru vata quvikero vi monura kukeqatero qaqi vaurave.

¹⁹ Ho airi entanavu aitarovaro vinavuka nora vaiintivano orurantero anirero monu nimura avuqavu qireva urave. ²⁰ Avuqavu ireva uvoro 5,000 kinaa varo vaiintiva anirero vi monura vataakero 5,000 kinaa voqavata vara amiro tiharo, Nora vaiintio, are tiriara 5,000 kinaaga raqiki timitaane tiaramanta te vi monuraqohai koqaa kaiqa varehamma 5,000 kinaa voqavata vara vatauro, tiro.

²¹ Manti tuvaro vira nora vaiintivano nai tiva amiro tiharo, Are tiriara noraiqaakera iriharama koqemakera mintiarao. Are inaara haikaraqa koqema kera raqiki timitaanarara

ti, te ai noraiqama kaarirara are nora haikaqaa raqikinarave. Ho anira ti vataakera vahihara quahehara variane, tiro.

²² Manti tuvaro 2,000 kinaa varo vaiintivavata anirero tiharo, Are 2,000 kinaaqaa raqiki timitaane tianarave. Ho tavaane, te 2,000 kinaa voqavata vara vatauro, tuvaro ²³ vira nora vaiintivano tiharo, Are tiriara noraiaqakera iriharama koqema kera mintiarao. Are inaara haikaqaa koqema kera raqiki timitaanarara ti, te ai noraiqama kaarirara are nora haikaqaa raqikinarave. Ho anira ti vataakera vahihara quahehara variane, tiro.

²⁴ Manti tuvaro vira kaiqa vaiintivano 1,000 kinaa varovo anirero tiharo, Nora vaiintio, are kaiqara vuana vaina ti variara vaiintiva varianarara irunarave. Are vo vaiinti ututaa karara hampi qanti variaravave. Are vo vaiinti qintataa kuvukanaara hampi vare variaravave.

²⁵ Virara irihama te ai aatu qeteha kia koqaa kaiqa vararaiti, te are monu timianara vataqi kukeqate quminama vauro. Ho tavaane. Are timiana monura qaqi tuataunara nena varaane, tiro.

²⁶ Viva minti tuvaro vira nora vaiintivano nai vira tiva amiro tiharo, Oho, are qora kaiqa vaiintivanoma variarao. Are popohara kaiqa varaara vaiintivama variarao. Are tiriara tihara, Are vo vaiinti ututaa karara hampi qanti variaravave. Are vo vaiinti qintataa kuvukanaara hampi vare variaravave, tianarave. Are tiriara mintimae tiarao?

²⁷ Manti tivakehara are nantivarae kia ti monu vuru *benki* naavuqi timitaarao? Are *benki* naavuqi vi monura vataaraitirio, te orurante ani vaiha vi monura vataake *interes* monuvatama varauraitirio, tiro.

²⁸ Manti tivakero vorara tiharo, Vi vaiintiraqihair 1,000 kinaa amunara vara kera 10,000 kinaa vataina vaiintira amiane. ²⁹ Koqema kero airi haikaqaa raqiki timite vaina vaiintir te voqavata amiariraro viva tuqima keroma varaarire. Kia te una haikaraqaa koqemakero raqiki timite vaina vaiintirqaahai te viva ina haikara ekaama vara qaqini kararave, tiro.

³⁰ Vira nora vaiintivano minti tivakero tiharo, Ho qora kaiqa vaiinti vira vuru aaqaini aquakaivaro konkraigiraqi iq'i rateha nái aarai tenti aneha varianaini variarire, turave, tiro. Ihuva vi uvvara tuqantaakero tiva nimura.

Ekaara entaqaa ko tianinara tura

³¹ Ihuva minti tivakero tiharo, Ho naantiara te Vataini Vataatai Vaintika Avuhainaa Vaiintiqamavi tenta *enselinavu* hampata tuvunte te avuhainaara taintaqaa oquvi vaiha vaiinti nahenti uva avuqavu qirerave.

³² Te mintimake variari ekaa maa vata maataraqaa vaika ti tivuqaa ruvaaqumavi vase te vika taaraqantaqaa raira karerave. Sipisipi qova nai sipisipivata memeravata raira kareva iharo, ³³ sipisipi nai kauqu tanaraini vita vuru vatero memera nai kauqu kaanaaqaini vita vuru vataintemake, te vataini vaika taaraqantaqaa raira karerave.

³⁴ Te mintimake Avuhainaa Vaiinti vaiha tenta kauqu tanaraini vaikara tiha, Aniate. Ne ti Qova koqema nimitakama variavo. Haaru maa vafara aututo entaraqaa Kotiva ni nai kaama tero qerama vatai vatukaraqi ani variate.

³⁵ Ti karara hantuqa harimanta variavauramanta ne ti timurave. Ti namari naataa umanta ne ti timurave. Te vo vatanaa vaiinti variavauramanta ne ti quahama timiteha nenta naavuqi ti tivita vuru korave. ³⁶ Ti utavaaqa kia vaumanta ne ti timurave. Te rovara vare variavauramanta ne koqemake tiqaa raqikurave. Te karapuhiqi varivauramanta ne ani ti favorave, tirarave.

³⁷ Te minti tiari avuqavuqamake ni vai vaiinti nahentika tiriara mintima tivara, Nora Vaiintio, taireve tenavu ai tavaurara are karara antuqa arivara variaramanta tenavu ai amunarave? Ta entarae tenavu ai tavaurara namari naataa ivara variaramanta tenavu ai amunarave? ³⁸ Ta entarae ariara vo vatanaa vaiintive tivake ai quahama amiteha tentanavu naavuqi ai vita vuru kaunarave? Ta entarae ai utavaaqa kia vaimanta tenavu ai amunarave? ³⁹ Ta entarae tenavu tavaurara are rovara varaanarave? Ta entarae tenavu ai tavarera karapuhiqi vunarave? tivarave.

⁴⁰ Vika minti tige te Avuhainaa Vaiintivano vaiha nái vika mintima tiva nimirarave: Te tiari iriate. Ne ti qatanavuqihai vehi vaiinti vo kahaqihia, ne tivata kahaqama timitorave, tirerave.

⁴¹ Te minti tivake tenta kauqu kaanaaqaini vaikara minti tirerave: Kotiva ni qoraiqama nimitaarira vaiinti nahentika, ne tiqaaahai vuate. Kotiva Sataaniravata, Sataanira *enselinavuaravata*, iriharo kia qimpa vuaina ihara qeramake vatairaqi nevata vuate.

⁴² Ti karara hantuqa harimanta variavauramanta ne kia ti timurave. Ti namari naataa umanta variavauramanta ne kia ti timurave.

⁴³ Te vo vatanaaka variavauramanta ne kia ti quahama timiteha nenta naavuqi ti tivita vuru korave. Ti utavaaqa kia vaumanta ne kia ti timurave. Te rovara vareve, te karapuhiqi variavauramantave, ne kia ani ti favorave, tirarave.

⁴⁴ Te minti tiari vikavata mintima tivarave: Nora Vaiintio, taireve tenavu tavauraro ari antuqa arivara varianarave? Taireve ai namari naataa ivara varianarave? Taireve are vo vatanaa vaiintivano varianarave? Taireve ai utavaaqa kia vairave? Taireve are rovara varaanarave? Taireve are karapuhiqi varianarave? Taireve are minti minti i variaramanta tenavu kia ho ai kahaqunarave? tivarave.

⁴⁵ Vika minti tige te maantimake tirerave: Te tiari iriate. Ne ti qatanavuqihai vehi vaiinti vo kia kahaqihia, ne tivata kia kahaqama timitorave, tirerave.

⁴⁶ Te minti tivake nititaari vika ekaa enta antura riha variqi vi koqaara varaimanta, avuqavuqamake ni vai vaiinti nahentika vika ekaa enta koqemake qaqi variqi vi koqaara varevarave, tiro. Ihuva turama.

Ihura aruke uvarara tura

(Maaki 14:1-2; Ruki 22:1-2; Ioni 11:45-53)

26

¹ Ihuva vi uvara vi uvara tiva nimi taiqa kero nai vaintinavuara tiharo, ² Nenavu iriarave. Taara enta aitarairaro haaru vetanto entaqaa *enselivano* qaqi vehakuma nimitorara iriha ovata naaina entava aniraanarove. Vi entaraqaa ti Vatainai Vatatai Vaintika vuru navutaaka kauquqi kaimanta ti katariqaa hiritevarave, tiro.

³ Ihuva vi uvara tivakero vaumanta Kotira kaiqa vara amite vau vaiintika vika noranavuvata, Iutaa vaiinti nora vaiintinavuvata, vika Kaiapaasira naavuqi ruvaaqumavi vaura.

Kaiapaasiva Kotira kaiqa vara amite vau vaiintika vika qiata vaiintivano vaumanta ⁴vika vira naavuqi ruvaaqumavi vauha Ihura evaara ravaaqavu vare yuru aruke uvarara nai tiva ami nai tiva amiha tiha, ⁵ Ovata ne entaraqaa vaiinti nahenti nivuqaa vira ravaaqavu kaariraro iqoka raqirava qovarama vuantorave, tura.

Ihuraqaa vahavera aqu amitora

(Maaki 14:3-9; Ioni 12:1-8)

⁶ Ihuva Betanini Saimonira naavuqi oru vaura. Haaru vaata ne vau numuarava Saimonira ari vaura. ⁷ Ho Ihuva vi vaiintira naavuqi oru vauvaro vo nahentivano viraqi uriqetero nora monu aquto vahaverara koqe muntaira ori taquqi vaura varero Ihuva taataqaa kara ne vauraqi orurero vahavera Ihura qjataqaa aqu amitora.

⁸ Vira qjataqaa aqu amitomanta Ihura vaintinavu vira tave, vi nahentira atiha tiha, Nantiharoe vi vahaverara qumina taiqa kaivo? ⁹ Vi vahaverara nimiharo nora monu varero vehi vaiinti nahenti nimiatarare, ti.

¹⁰ Vinavuka minti ti vauvaro Ihuva vinavuka uva iriro tiharo, Nenavu nantihae vi nahentira ati variavo? Viva mintiharoma ti koqema timite vaivo. ¹¹ Vehi vaiinti nahenti vika vo enta vo enta ni hampata variqi vi vaiqevata, te kia ni hampata airi enta variqi virarave. ¹² Maa nahentiva vahavera aqu timiteharo ti vaata quntama tera gerama timite vaivo. ¹³ Te quqaa tiari iriate. Naantiara ne ti uva vakaaka vaiinti nahenti ekaa vataamaata vika tiva nimiqi vi anilha, maa nahentiva vahavera aqu timitai uvaravata vika tiva nimiravare, tiro.

Iutaasiva Ihura navutaaka kauquqi tutu kaainarara tura

(Maaki 14:10-11; Ruki 22:3-6)

¹⁴ Ihuva minti tuvaro Ihura vainti 12navuqihairo vo vaiintivano vira autu Iutaasi Ikeriotiva vevarero Kotira kaiqa vara amite vau vaiintika vika noranavu vaunaini orurero ¹⁵ vika irero, Te Ihura ni kauquqi kaari ne nana koqaae ti timivarave? tumanta vika *silvaa* monu 30navu kaara ntuvake amuvaro Iutaasiva vi monura varero ¹⁶ vi entaraqaaahiro Ihura vika kauquqi kaaina aarara rante vaura.

Ihuva nai vaintiaravata vehakuma nimito karara nora

(Maaki 14:12-21; Ruki 22:7-14; Ioni 13:21-30)

¹⁷ Kia Noqavu Mparetira Ovata ne varia entanavuva aniomanta avuhainaa entaqaa vira vaintinavu Ihuva vaunaini anire tiha, Taraqie tenavu oru gerama amitaarirara are Vehakuma Nimito Entarara irihara vi karara nendarave? ti.

¹⁸ Vinavuka minti tuvaro Ihuva tiharo, Nenavu Ieruharemini oru vaiinti vorara mintima tiate: Tinavu maara tiva timite vai vaiintiva tiharo, Ti entavano aniraivo. Te tenta vaintiaravata ai naavuqi Vehakuma Nimito Karara narerave tivo tiate, tiro. ¹⁹ Ihuva minti tumanta vira vaintinavu Ihuva tuntemake, vi karara gerama vatora.

²⁰ Qerama vatovaro entuvaro Ihuva nai vaintinavu hampata oquiviro kara ne vaura.
²¹ Kara neharo tiharo, Te tiari iriate. Niqihairo vovano navutaaka nivuqaa ti qovarama kaanarove, tiro.

²² Minti tuvaro vira vaintinavu muntuka qoraiqumanta vinavuka vohaiqa vohaiqavano Ihura ireha tiha, Noravauvu, are tiriarae ti variarao? Kia te vikavauve, tivaqi vi vaura.

²³ Minti tivaqi vi vauvaro Ihuva tiharo, Mpareti varakero tintiro tanuqi vaati quntama kaaina vaiintiva, vi vaiintivama ti qovarama kaanarove. ²⁴ Haaru Ti Vataini Vataatai Vaintika mintimake haruke uvvara qara ntuva tova vivauma varianarove. Mintimakero vairaqevata, ti qovarama kaaina vaiintirara oho tiva amitauro. Oho, koqemama vira nova kia vira vata taataarave, tiro.

²⁵ Ihuva minti tuvaro Iutaasiva vira qovarama kaarirava Ihura irero tiharo, Maara ti variara vaiintio, are tiriarae ti variarao? tuvaro Ihuva tiharo, Eo, te ariarama turo, tiro.

Mparetiaravata uainiaravata tiva tora

(Maaki 14:22-26; Ruki 22:15-20; 1 Korinti 11:23-25)

²⁶ Ihura vaintinavu kara ne vauvaro Ihuva mpareti varakero Kotirara koqema iarao tivakero nkuikero nai vaintinavu nimiro tiharo, Maa karara varake naate. Maa mparetiva ti vaatama vaivo, tiro.

²⁷ Minti tivakero viva *uaini kaapu* varakero Kotirara koqema iarao tivakero vinavuka viti nimiro tiharo, Ne ekaa maa namarira naate. ²⁸ Maa namariva ti naarema vaivo. Kotiva vaiinti nahenti hampata voahaaraqi avitumavi vaireva qaraaka uva tiva taatautaaina uvava kempukaiqama vuvarire tiro, ti naarevano vi uvvara kempukaiqama kaanarove. Ti harukaivarao ti naarevano nteharo airi vaiinti nahenti kahaqiharo vika qora uva nunka nimitaanarove.

²⁹ Te tiari iriate. Maa entaraqaahai te kia *uaini* qaiqaa naraiti variqi vi, ne ti Qova raqikiainaraqi ti vataake oru vai entaraqaa, te ni hampata vaiha qaraaka *uaini* nararave, tiro.

³⁰ Ihuva minti tivakero nai vaintinavu hampata Kotirara ihi tivakero vevarero Orivi Aiqaqaa vurama.

Pitaava tire i uvara Ihuva nai tiva amura

(Maaki 14:27-31; Ruki 22:31-34; Ioni 13:36-38)

³¹ Vinavuka mini vuvaro Ihuva vinavuka tiva nimiro tiharo, Nenavu vate entaqi ti maini kema, aiqu autute kantama vivarave. Kotira vukuqi qara ntuvato uvava vate vivauma varianarove. Mintima tiro:

Kotiva Sipisipi Qora vira ruqutu kaira sipisipi vika qetake raantaupirima vivarave, turave. (Sek 13:7)

³² Ho naantiara ti vara qaiqaa qaqi himpima kairaqe te naane ni nivuni Karirini virerave, tiro.

³³ Ihuva minti tuvaro Pitaava aqao tiro, Ekaa maaka ai maini ke aiqu autute kantama vivera, teqaima ainti vairerave, tiro.

³⁴ Pitaava minti tuvaro Ihuva tiharo, Te tiarirara iriane. Vate entaqi kokoraaravano kia uva tirara are taaramo tataama tiriara kia vira tavaunarave tinarave, tiro.

³⁵ Ihuva minti tuvaro Pitaava aqao tiro, Ai vataake tivata harukaivera, te kia ariara kia vira tavaunarave tirerave, tiro. Pitaava minti tumanta Ihura vainti hininavuvata vi uvvaraqaai tura.

Gesemanikaqava ututoraqi Ihuva vura

(Maaki 14:32-42; Ruki 22:39-46)

³⁶ Viraaqahairo Ihuva nai vaintiaravata oru viro kaqava ututora, Gesemanive turaqi orurero nai vaintinavu tiharo, Nenavu maini oquivi vaiqe te vuruni oru Kotira aaraare, tivakero ³⁷ Pitaaravata, Sebedira maaqutantavata, vinavukaqai ntita varero mini vuvaro vira avu aato kia koqe uvavar vira muntukavanovata qoraiquvaro ³⁸ viva taaramonavuara tiharo, Ti muntukavano voqamakero qoraiqimanta vaurarora tiro, vi maarava ti haatara kareva auti vaivo. Nenavu maaqaa ti vataake vaiha avu viti viri ihama aitutihia variate, tiro.

³⁹ Minti tivakero viva inaaraiqaka vutuni viniro, virihairo oru vataaini hiqiri viro Kotira aareharo tiharo, Mpo, ti Qo, are hove tirera, te ihavina namarira naaina *kaapura* are vi *kaapura* qaqini vara kaane. Te minti tiariraravata, are kia ti muntuka vainara avataqira viraitira, are nena muntuka vainara avataqira vuane, tiro.

⁴⁰ Ihuva minti tivakero orurantero nai vainti taaramonavu konaini ani tavomanta vinavuka avu taumontamata vaite vauvaro viva Pitaarara tiharo, Mpo, nantihae nenavu

kia ti vataake inaaraiqa vohaa *auaqai* vaiha avu rampai keha viti viri aitutihā variavo? ⁴¹ Sataaniva ninavu avataantorave ti, aitutihā Kotira aareha variate. Ninavu maraquarevanu mintiataa ivaro ni vaata kempukavano kia ho vaivo, tiro.

⁴² Ihuva minti tivakero qaiqaa vinavuka mini kero oru qaiqaa Kotira aareharo tiharo, Mpo, ti Qo, are maa *kaap ura* qaqqini vara kerava kia ho vairera, te nina muntuka vainara avatararerave, tiro.

⁴³ Minti tivakero qaiqaa orurantero ani tavovaro vira vaintinavu avu taumontomanta vaitateqai vaura. ⁴⁴ Vinavuka vaite vauvaro Ihuva qaiqaa vinavuka mini kero oru viro Kotira taaramo tataa aareharo vaaka tuntema kero, vohaa qarama kero qaiqaavata tura.

⁴⁵ Kotira aarama taiqakero Ihuva orurantero taaramonavuara tiharo, Ike, nenavu auraara vaihae vaite variavo? Ho tavaate. Ti entavano aniraivo. Ti Vataaini Vatatai Vaintika ravaaqavu vare vuru qora kaiqa vare variaka kauquqi tutake entavama aniraivo. ⁴⁶ Ho himpiqenavu vuare. Ti qovarama kaarira vaiintiva anima vaivo, tiro.

Ihura ravaaqavu kora

(Maaki 14:43-50; Ruki 22:47-53; Ioni 18:3-12)

⁴⁷ Ihuva vi uvvara ti vauvaro vira vainti 12 navuqihairo Iutaasiva orurora. Vira vataake airi vaiinti iqoka paepaeve kaavuve tota vare orurora. Kotira kaiqa vara amite vau vaiintika vika noranavuvata, lutaata nora vaiintinavuvata, vinavuka vi vaiintika nititonomanta vika Iutaasira vataake anura.

⁴⁸ Iutaasiva Ihura qovarama kaainarara avuni vika mintima tiva nimo: Te oru vira uva manteha moqa kaaina vaiintira virave. Ne virama oru ravaaqavu kaate, tiro.

⁴⁹ Iutaasiva minti tivakero vika hampata Ihuva vaunaini vaaka orurero tiharo, Maara ti variaria vaiintio, vaiharave, tivakero vira moqa kero.

⁵⁰ Vira moqa kovaro Ihuva tiharo, Ti vaiintio, nana haikara aninara vaaka autune, tumanta Iutaasira hampata anuka oru nai kauquqohai Ihura ravaaqavu tovaro ⁵¹ viragaahairo Ihura vainti vovano iqoka paepae nai utaqihairo raraukero viraqohairo vaiinti vo vira aato teqa aqukora. Kotira kaiqa vara amite vau vaiintika qita vaiinti vira paanaa vaiinti aato teqa aqukora.

⁵² Teqa aqukovaro Ihuva virara, Aqao, kia mintiane. Nena iqoka paepae veva nai utaqi nonku taane. Iqoka paepae toteha raqi vaika vauvaro iqoka paepaevano nai vika aru kaanarove. ⁵³ Are kiae kankomakera iriarao? Te tenta Qora aareha ti kahaqama timitaane tiarerava, viva vaakama iqoka *enseli* airithaha 12 ankunavu nititairamanta tuvivarave. ⁵⁴ Te minti tiari vika tuvivera, nantiakeroe haaru qara ntuvato uvava quqaa vivau varianarove? tiro.

⁵⁵ Ihuva minti tivakero viragaahairo Iutaasira vataake anu vaiintikara tiharo, Ike, Ne kamaanira vataake iqoka raqi vaiintira ravaaqavu karekae iqoka paepaevata kaavuvata vare aniaivo? Te vo enta vo enta Kotira Naavuqi vaiha vaiinti nahenti vakaaka tiva nimi vauramanta ne vi entara kia ti ravaaqavu kaarave. ⁵⁶ Haaru vetanto entaqaa paropeti vaiintinavu vi haikava qovarama vuainarara qara ntuvato uvava vivauma variarire tiro, vate maa haikava qovarama vivo, tiro.

Ihuva minti tumanta vika vira ravaaqavu komanta vira vaintinavu vira mini ke, aiqu autute vurama.

Nora vaiintinavu nivuqaa Ihura vuru kora

(Maaki 14:53-65; Ruki 22:54-55, 63-71; Ioni 18:13-14, 19-24)

⁵⁷ Vira vaintinavu ruqernake vumanta Ihura ravaaqavu toka vira vita vare Kotira kaiqa vara amite vau vaiintika vika qita vaiintivano vauraqi Kaiapaasira naavuqi vuru komanta vi naavuraqi maara okara ti vau vaiintinavukavata, lutaata vaiinti noranavuvata, uki vaura.

⁵⁸ Ihura vita vuru ke vauvaro Pitaava niaraihairo vika avataqi viro Kotira kaiqa vara amite vau vaiintika vika qita vaiinti Kaiapaasira naavu vatukaini orurero avutaqi vaiharo vi haikava qovarai qiainqara tavareva maimaraara raqiki vau vaiintinavuka hampata oquvi vaura.

⁵⁹ Pitaava vahaqaqaini vaumanta naavuqi Kotira kaiqa vara amite vau vaiintika vika noranavuvata, ekaa viraqi uki vau vaiintikavata, vika Ihura arukareka viraqaa una uva vatarare tuvoro ⁶⁰ kia uva vaumanta qumina vi uvvara rante vaumanta vo vaiinti vo vaiinti himpite Ihuraqaa qumina uva, vo uva vo uva ti vaura. Minti ti vaumanta ekaanaini vaiinti taaraqanta himpi ⁶¹ Ihurara tiha, Maa vaiintiva minti timanta tetanta irunarave. Viva tiharo, Te homa Kotira Naavu rampai aqueke viraqahai taaramo entaqai vaiha vi naavura qaiqaa kaqa taiqa kararave tirave, ti.

⁶² Vitanta minti tuvaro Kotira kaiqa vara amite vau vaiintika vika qita vaiintivano himpiro Ihurara tiharo, Vitanta mintimama ariqaa uva vateha ti variavo. Are vo? Vi

uvara irihara náitntara nana uvae tinarave? tuvaro⁶³ Ihuva kia uva tiraitiro, evaara vauvaro qaiqaa qiata vaiinti viva Ihurara tiharo, Te Kotira avuqaa vaiha vira autu rehamaa ariarama quqaa uva tiane turo. Quqaae are *Mesaaavano* Kotira Maaquvano variarao? tinavu tiva timirage iriare, tiro.

⁶⁴ Viva minti tuvaro Ihuva tiharo, Are tianara te maa vikave. Te tiari ne iriate. Ne naantiara tave vaseqte te Vataini Vatatai Vaintika noraiqamavi Kotira mpeqavano variainanaini vira kauqu tanaraini oquivi vaiha tonavuqaa tivirerave, tiro.

⁶⁵ Ihuva minti tuvaro Kotira kaiqa vara amite vauka vika qjata vaiintivano nai utavaaga qunahi qaanaahima kero tiharo, Oho, viva Kotira avuqaa vaiharo vaaqu uvamaa tivo. Vo vaiintinavu viraqaa uva vateka qumina aaraorarave. Tavaate. Ne iri variavaro viva Kotira avuqaa vaiharo vaaqu uva tivo. ⁶⁶ Vira kaara ne Ihurara nana uvae tivarave? Tiqe iriare, tiro.

Minti tumanta vika tiha, Vira vaaqu kaiqavano uritara kero vaivo. Vira kaara vira arukevaqaima vaivo, ti. ⁶⁷ Vika minti tivake oru Ihura viriqi taara vihike, ni kauqu rumpa vare vira ruqutuke, aatovata ruqema aqukeha⁶⁸ ruheha tiha, *Mesaaao*, are quqaa uva quoqaiqamake variara vaiintiva vairera, ai arina vaiintira autu rairage iriare, ti.

Pitaava Ihurara kia tavaunarave tura

(*Maaki 14:66-72; Ruki 22:56-62; Ioni 18:15-18, 25-27*)

⁶⁹ Naavuqi mintiaqi vi vauvaro Pitaava vahaqaqaini vatukaqaa oquivi vauvaro kaiqa nahenti vovano Pitaara aumanto viro virara tiharo, Arevata Ihura Karirihainaara vataakeria ni variaravave, tiro.

⁷⁰ Viva minti tuvaro Pitaava vika nivuqaa vaiharo aqao tiro, Are tiana uvara kia te irunavarave, tiro.

⁷¹ Viva minti tivakero oru hohaa qentiana vauvaro kaiqa nahenti vovano vira tavero mini himpi vaukara tiharo, Maa vaiintiva Ihura Nasaretihainaara vikantiro vaivave, tiro.

⁷² Minti tuvaro Pitaava kauqu aqiqaa aqukero tiharo, Kia te vi vaiintira tavaunarave, tiro.

⁷³ Minti tivakero inaaraiga vaumanta mini himpiti vauka Pitaava vaunaini orure virara tiha, Ihura vaintinavu vi vatanakaaka variavara quqaama arevata vohaa vi vatanavaqaqaima variarao. Vika ti varia auntara voqaarama ai auntavanovata vaivo, ti.

⁷⁴ Vika minti tuvaro Pitaava kauqu aqiqaa aqukero tiharo, Te kia quqaa uva tiarera, Kotiva homa ti ruqutuanarove. Te quqaama turo. Ne ti varia vaiintira kia te vira tavaunarave, tiro.

Pitaava minti tuvaro vaakama kokoraaravano uva tuvaro⁷⁵ viraqaahairo Ihuva Pitaara tiva amu uvava vira aatoqi ntua vura. Ihuva Pitaarara minti turave: Kokoraaravano kia uva tirara are taaramo tataama tiriara kia vira tavaunarave tinarave tu uvara iriro, viva aaqaini uvuvaro vira muntukavano qoraiquvaro iqi ratora.

Ihura Paireatava vaunaini vuru kora

(*Maaki 15:1; Ruki 23:1-2; Ioni 18:28-32*)

27

¹ Vira qararaa toqaqi Kotira kaiqa vara amite vau vaiintika vika noranavuvata, Iutaa nora vaiintinavuvata, vika Ihura arukerara vohaa uva tiva vate² viraqaahai vika Ihura seniqohai rumpa vare vuru Paireatava vauraqi kora.

Paireatava Romeni vatanakaaka kamaanira nora vaiintivano vaura.

Iutaasiva qutu vura

(*Kaiqa Varora 1:18-19*)

³ Iutaasiva Ihura qovaramako vaiintiva tavomanta vika ko tihamaa Ihurraqaa uva vatemaa vira arukareka auti vauvaro viva oho kia te mintiataara vaimanta mintunarave tivakero, 30 silvaa monu varero orurantero Kotira kaiqa vara amite vau vaiintika vika noranavuvata, Iutaa vaiinti noranavuvata, vika vauraqi orurero tiharo,⁴ Te qora kaiqa varehamaa qaqi vaiinti kia qora kaiqa vare vai vaiintira vita vuru ni kauquqi tuta kaurama ne vira arukareka auti variavo, tiro. Tivakero monu vika ni nimirare tumanta vika aqao ti, Kia tinavu kaiqavauve. Vi haikara nina kaiqama vaivo, ti.

⁵ Vika minti tuvaro Iutaasiva monu vira varero Kotira Naavuqi vuru aqukero viro. Viraqaahairo viva oru naaqunta varakeria nai auntaqi vatero taaqikuma vura.

⁶ Iutaasiva monu viraqti aqukero vumanta Kotira kaiqa vara amite vau vaiintika vika noranavu vi monura nuntu vare tihamaa, Maa monuva qutaru monuma vaivo. Hauri tenavu vira vare Kotira Naavuqi monu vate varia rumuraqi vuru vateha maara uva raqa kaarorave.

⁷ Tave autireka vare varia vatava qaqlima vaivo. Kaiqenavu maa monura aqukeha vi vatara varaare. Tenavu vi vatara maa monuraqohai koqaamake vataari vo vatanaaka maini qutu viqe vi vataraqi vika quntama taare, ti.

Minti tivake vi monura aqukeha ⁸ vi vatara koqaama torara ti, maa entara vaiinti nahenti vi vatarara *Naare Rauri Vatarave* ti variara.

⁹ Kotira Naavuqaa raqiki vauka minturara tiro, haaru vetanto entaqaa Ieremaiaava paropeti vaintivano qara ntuvato uvava vivuma vaura. Ieremaiaava mintima tiro:

Isarer iatanaaka hininavu vohua uva vateha 30 silvaa monuara qutaru monuve ti vaira, ¹⁰ vi monura aqukehama tave auti vai vatara varevarare. Noravano ti uva tiva timinantemake, vika vi vatara varevarare, tura. *(Sek 11:12-13)*

Paireatava Ihura irama amitora
(*Maaki 15:2-5; Ruki 23:3-5; Ioni 18:33-38*)

¹¹ Viha Ihura vita vare *kamaanira* vaiinti Paireatava vauraqi vuru kovaro Ihuva vira avuqaa himpiti vauvaro Paireatava vira irama amitero tiharo, Quqaae are Iutaa vatanaaka avuhainaa vaintivano variarao? tuvaro Ihuva tiharo, Are tianara te maavikave, tiro.

¹² Ihuva minti tumanta Kotira kaiqa vara amite vau vaintika vika noranavuvata, Iutaa vainti noranavuvata, vika vo uva vo uvaqaa ntuvakeha Ihura ati vauvaro viva kia vika nái tiva nimiraitiro, evaara vaura.

¹³ Ihuva tirema vauvaro Paireatava qaiqaa Ihura irero tiharo, Vika airi uva ariqaa ntuvakeha ti variavara, are kiae vika ti varia uvvara iriarao? tuvaro ¹⁴ Ihuva kia uva voqavata vika nái tiva nimiraitiro, kia uvavata tuvaro Paireatava *kamaanira* nora vaintivano virara voqamakero ravuku vura.

Ihura katariqaa arutaate tura
(*Maaki 15:6-15; Ruki 23:13-25; Ioni 18:39-19:16*)

¹⁵ Vo ihi vo ihi Vehakuma Nimito Karara no entaraqaa *kamaanira* nora vaintivano vainti nahenti quahama nimitareva karapuhi vainti vo kuvantu nimite vaura. Vainti nahenti vi vaintira kuvantu timitaane tuvaro vi vaintira kuvantu nimite vaura.

¹⁶ Vi entara karapuhi vainti vo, vira autu Barabasiva qora vaintivano vaumantara ti, airi vainti nahenti vi vaintira autu irura. Karapuhi vainti vo kuvantu ke atite vau okarava mintima vaumanta ¹⁷ vi entaraqaa vainti nahenti virara iriha uki vauvaro Paireatava vika irero tiharo, Te tarae ni kuvantu nimitararave? Te Barabasirae, Ihura virara *Mesaiaave* ti varia vaintira virae ni kuvantu nimitararave? tiro. ¹⁸ Paireatava irumanta nora vaintinavu Ihura toma amitechara ti, vika vira vuru Paireatara kauquqi tutakora.

¹⁹ Paireatava *ko* naavuqi oquivi vauvaro vira naatavano uva varakero tiharo, Aqao, vi vaintiva kia qora kaiqa varainaraqaa qumina are viraqaa uva vaterorave. Vira qaqi atitairaro vuarire. Te entaqi viraqaa taira tavauraro ti qoraiqimanta vauro, tiro.

²⁰ Vira naatavano minti tumantavata, Kotira kaiqa vara amite vau vaintika vika noranavuvata, Iutaa vainti vika nora vaintinavuvata, vainti nahenti kempukaiqamake tiva nimi tiha, Barabasirae kuvantu timitera, Ihurama tira arukaate tiate, ti.

²¹ Mintumake vihi tuvaro Paireatava vainti nahenti irero tiharo, Vi vaintitantaqihai ta vaintirae ni kuvantu nimitararave? tiro.

Minti tumanta vika tiha, Barabasirae, ti.

²² Vika minti tuvaro Paireatava aqao, tiro, Ihura virara ne *Mesaiaave* tiarave. Vira vo? Te vira nantie irarave? tiro. Minti tumanta ekaa vika tiha, Vira kaira katariqaa arutaate, ti.

²³ Vika minti tuvaro Paireatava qaiqaa vika irero tiharo, Nana kaarae? Viva nana qora kaiqae varakaivo? tumanta vika noraiqaaake naveraitiha, Vira kaira katariqaa arutaate, ti.

²⁴ Vainti nahenti minti ti vauvaro Paireatava tavovaro vira uvavano kia ho vauvaro viva tiharo, Vainti nahentiqihairo raqi okarava qovarama vuantorave, tivakero namari tanuqi qihia kero vainti nahenti nivuqaa vahiaro nai kauqu hiqama keharo tiharo, Ho tavaate. Vira aruke uvava kiama tiqaa varianarove. Vi uvava nintaqama varianarove, tiro.

²⁵ Minti tumanta vainti nahenti ekaa tiha, Hove, vira aruke uvava tinavuqaavata, tinavu vaintiqaavatama varianarove, ti.

²⁶ Vika minti tuvaro Paireatava vikara iriharoma Barabasirae kuvantu nimitero, nai iqoka vaintinavuara tumanta vika Ihura ruteqake vatovaro, viraqaaqihairo viva vira katariqaa arutaate tiro, vika kauquqi tutakora.

Iqoka vaiintinavu ruheha Ihura ruquti vaura
(Maaki 15:16-20; Ioni 19:2-3)

²⁷ Paireatava nai iqoka vaiintinavu kauquqi Ihura tutakomanta vika vira vita vare vuru kamaanira naavyuqi ke, vika nái kena iqoka vaiintinavu ekaa ruvaaqumake Ihura vara avutaqi vate vira ututumate vaiha ²⁸ vira utavaaqa qaqini varake vira vireraiqama amitareka avuhainaa vaiinti naare tavuna nonku amitora.

²⁹ Viraqaahai vika auqu vai naaquntara varake uquramake avuhainaa vaiinti tovaqa voqaara kahemake Ihura qiataqaa aqu amite, vira kauqu tanaraini kauru tota amite, viraqaahai vika Ihura avuqaa tori kauru aravi tiha, Iutaa Avuhainaa Vaiintio, vaiharave? tivake ³⁰ viraqaa taara vihike kauru vira kauquqi tota amitora varake, viraqohai vira qiata rukavuke vaura.

³¹ Mintiaqi viha naaraihama amite vaura taiqake, viraqaahai naare tavuna nonku amitora ravaqaake nai utavaaqa nonku amite, vira katariqaa hiritareka vita vare vurama.

Ihura katariqaa hiritora
(Maaki 15:21-32; Ruki 23:26-43; Ioni 19:17-27)

³² Iqoka vaiintinavu Ihura vire aaraini viha, vika vo vaiinti Sairinhainaara vira autu Saimonira aarana tavamake, virara kempukaiqamake tiha, Are Ihura katari aqu varera vuru amitaane, tura.

³³ Minti tivake vika qumina vatakanta Gorogotave tunaini Ihura vuru kora.

Gorogota maa uvaraqihai tirera Qiata-Vuhaariqaave tunaini Ihura vuru ke, ³⁴ hunkavu namari vataake tuqantaato uainira vira amuvaro Ihuva vi namarira neharo tavero, kia noraa.

³⁵ Ihuva kia nomanta vika vira katariqaa niriqohai arute vira utavaaqa varake, satu ruhamaqi viha vira utavaaqa rairake vare, ³⁶ viraqaahai vika oquivi vaiha vira aitutihaa vaura.

³⁷ Ihura qiataini uva vo, vira *ko* tiva amito uvara qara ntuvate katariqaa arutovaro vi uvava mintima tiro:

Ihuva maava Iutaa Avuhainaa Vaiintive, tiro.

Vi garava mintima vaura.

³⁸ Vika Ihura vataake vaiinti votanta arutora. Vitanta vo vaiinti ruqutu keha muara haika vare vau vaiintitanta vaumanta vika vaiinti vo Ihura kauqu tanaraini arute vo vira kaanaaqaini arutora.

³⁹ Mintimake arutomanta vaiinti nahenti vitare aitare iha nai aru runkinkiriha mauru kumiki amiteha Ihura qora uva tiva amite tiha, ⁴⁰ Oho, Kotira Naavu rampaike taaramo enta te kaiqa varehama qaiqaa kaqa taisq kararave tianara vo? Ho are Kotira Maaquvano vairera, nena kahaqiane. Katariqaahtira viavi ntaane, ti vaura.

⁴¹ Vika minti ti vaumanta vika aanare Kotira kaiqa vara amite vau vaiintika vika noranavuvata, maara okara ti vau vaiintika, vikavata naaraihama amiteha tiha, ⁴² Viva vokiaka kahaqa nimiteharo nai kia ho kahaqivo. Vi vaiintiva Isarerri vatanaaka Avuhainaa Vaiintivanoma vaivo. Kaiqe tenavu vaiha tavaariraro viva nai katariqaahtairo viquiviro vataini tuvirera, tenavu virara quqaave tiare. ⁴³ Viva nariara tiharo, Te Kotirara kempukaiqamake iriqi vi vauraukave. Te Kotira Maaquvanove ti vaivave. Kaiqenavu vaha tavaariraro Kotiva vira ruaruuma amitaainara tavaare, ti.

⁴⁴ Vika minti ti vaumanta vika aanare muara vaiintitavata vira vataake arutotanta vira qora uva tiva amite vaura.

Ihuva qutu vura
(Maaki 15:33-41; Ruki 23:44-49; Ioni 19:28-30)

⁴⁵ Mintuvaro kuarivano qiataqaa uru rovaro viraqaahtairo konkiraiquva ekaa vi vataraaqaa taaramo kuari avuara variqiro vura.

⁴⁶ Kuarivano vitiniqaa viro 3 *kiroki* quvaro Ihuva nai uvaqihairo naveraitiro, Eloi, Eloi lama sabakanive—Kotio, Kotio, nantiharae are ti qaqla kera iarao? tiro.

⁴⁷ Ihuva minti tumanta vokuka mini himpite vauka vira uva iriha tiha, Viva Elaitaara tinavu kaivaqara aare vaivo, tuvaro ⁴⁸ vovano kantero namari nunko haikara varero, hunkvaa *uainiraq* quntama varero, kairiqa nkahi kero viraqiqi rukitero, viva naarire tiro, vira noqiqi vira vatora.

⁴⁹ Mintumanta vokuka tiha, Kaiqe vaiha tavaariraro Elaitaava vira kahaqireva tuvirerave, kia tuvirerave tavaare, ti.

⁵⁰ Vika minti tuvaro Ihuva qaiqaa nora uva tivakero qutu vura.

⁵¹ Ihuva qutu vuvaro Ieruharemini Kotira Naavuqi kaankuka voqaara nora tavuna virini hiritova virihairo avutavau qunahiqi tuviro miani muntuvi kovaro vaturavano

utuvaro nora ori, vo ori vo orivano nkahi nkaahima vuvaro ⁵² haaru vaiinti haqake quntamato oriva, vo ori vo orivano qantua vumanta Kotira vaiinti nahenti qutu vuka airitahaa viraqihai qaqi himpi vaiha ⁵³ Ihura qaiqaa qaqi vara himpimako entaraqaahai vika Kotira vatuka Ieruharemini oru qovarama vumanta airi vaiinti nahenti vika tavora.

⁵⁴ Iqoka vaiinti noravano nai iqoka vaiintinavu hampata Ihuraqaa raqiki vaiha tavovaro vaturavano utuvaro vo haika vo haikavano qovarama vumanta tave, viraqahai vika voqamake qeteha tiha, Oho, ququaama maa vaiintiva Kotira Maaquvano vairave, tura.

⁵⁵ Ihuva qutu vumanta nahenti vonavu niaranto vaiha vutu tave vaura. Vi nahenti-navuka Karirihai Ihura avataqi viha vira kaiqa vara amite vaunavuka vaura.

⁵⁶ Vinavukaqihairo Mariava Makataaraa vatumakainavaa vauvaro Mariava Iemika Iosika nova vauvaro Sebedira maaqutanta novavata vaura.

Ihura quntama tora

(Maaki 15:42-47; Ruki 23:50-55; Ioni 19:38-42)

⁵⁷ Enta ire uvaro Arimatiahainaava airi airaira vate vau vaiintiva orurora. Vira autu Iohepiva viva Ihura avataqiro vi vau vaiintiva vaura.

⁵⁸ Vi vaiintiva Paireatava vauraqi orurero Ihura vaata timiraqe quntama taare tuvaro Paireatava nai iqoka vaiinti nititero tiharo, Oru Ihura vaata vira vara amiate, tuvaro ⁵⁹ Iohepiva oru vira vaata katariqahairo viqu muntuvi kero, qaraaka tavuna varakero vira apuqama kero ⁶⁰ nai qutuvira quntama taate tiro qaraaka ori vo vaurutoraqi muntu Ihura vera vatero, nora ori vo vira venta varero ori vaurutora vira nona tintatero vura.

⁶¹ Viva vumanta Mariava Makataaraihainaavavata, vira qamaqova vo Mariavavata, vitanta oquvi vauvaro vutura hini mantaraini Ihura quntama to oriva vaura.

Ihura quntama tonaini maimaraara raqikura

⁶² Vira qararaa Saarareqaa Kotira kaiqa vara amite vau vaiintika vika noranavuvata, Parasi vaiintinavuvata, oru Paireatara vataake ruvaaqumavi vaiha ⁶³ virara tiha, Nora vaiintio, tenavu iruraro vi vaiintiva una vaiintivano nai qaqi vau entara tiharo, Te taaramo enta varikema, qaiqaa qaqi himpirerave turave. Viva minti turara tira, ⁶⁴ are iqoka vaiinti nititaira vika vira quntama taaraqaa taaramo enta vaiha raqikiqi vuate. Hauri vira vaintinavu oru vira vaata viraqihai muara vara vuru ke, vaiinti nahentiara tiha, Viva qaiqaa qaqlima himpiro vaivo, tivorave. Vinavuka vi uvvara tivarovi uvava viva avuni una uva tiva tairavata aataro kaanarove, ti.

⁶⁵ Vika minti tuvaro Paireatava tika viva nimiro tiharo, Ho ne iqoka vaiintinavu ntita vare oru vira quntama taaraqaa koqemake raqikiate, tiro. ⁶⁶ Viva minti tumanta vika mini ke, oru qentiana tintato oriraqaa voqaramake vuka autute iqoka vaiintinavuara tiha, Maini vaiha maimaraara raqikiate, tura.

Ihuva qutu vuraqihairo qaiqaa qaqi himpura

(Maaki 16:1-10; Ruki 24:1-10; Ioni 20:1-18)

28

¹ Saarareqaa Iutaa Maara Enta taiqovaro vira qararaara ruvaahama vumanta Santeqaa Mariava Makataaraihainaavavata, vira qamaqova vo Mariavavata, vitanta Ihura quntama toraqi tavareka vurama.

² Vuvaro vaakama vaturavano noraiqaakero uti vauvaro Noravano atito *enseliva* naaruvaihairo tuvu tintato orira qaqlina vena vavikero vi oriraqaa oquvi vaura.

³ Vira virivanu vaireva, aaquakaa utira voqaraa vauvaro, vira utavaaqa vaireva uromura tonavu voqaraa vaura.

⁴ Mintima vaumanta maimaraara vau vaiintinavuka vira tave, voqamake aatu ite vaumanta aiqu kauqu ntiri ntiri vaumanta vinavuka qutuvuaka voqantemake vaura.

⁵ Vinavuka mintimake vauvaro *enseli* viva nahentitantara tiharo, Kia qetaate. Te iruramanta netanta Ihura katarigaa arutaa vaiintira rantareka aniaivo. ⁶ Viva kiama maini vaivo. Viva nai tiva nimintema kero, qaiqaa qaqlima himpivo. Ani vira veta vataaraqi tavaate. ⁷ Tavetanta, netanta kante oru vira vaintinavu mintima tiva nimiate: Viva qutu viraqihairo qaiqaa qaqlima himpiro viva naanema ni nivuni Karirini vi vaivo. Nenavu mini oruntema vira tavevarave. Minti tivake tiva nimiate, tiro.

⁸ *Enseli* viva minti tumanta nahenti vitanta vira quntamatora mini ke, vitanta qetehavata, voqamake quaheha Ihura vaintinavu vuru tiva nimireka kantama vura.

⁹ Vitanta kante vauvaro vaakama Ihuva vitanta ntikero tiharo, Vaihave, tumanta vitanta quaheha oru hiqirivi vaiha vira aiqu utu vare vira quahama amiteha vira autu

tuaherake vauvaro ¹⁰ Ihuva vitantara tiharo, Kia qetaate, vuru ti qatanavuara mintimataite: Ne Karirini oruntema ti tavaate tiate, tiro.

Maimaraara raqikunavuka tu uvvara

¹¹ Ihuva minti tumanta nahenti vitanta aaraini qaqi vi vaumanta maimaraara raqikunavuka iqoka vaiinti hininavu anirante Ieruharemini vi, vuru Kotira kaiqa vara amite vau vaiintika vika noranavu ekaa haika qovaraiqurara tiva nimura.

¹² Tiva nimumanta viraqaaahai Kotira kaiqa vara amite vau vaiintika vika noranavu oru nora vaiinti vonavu hampata ruvaaqumavi vaiha uva vohaa tiva vate, viraqaaahai iqoka vaiintinavu nora monu nimiha tiha, ¹³ Nenavu mintima tiate: Tenavu entaqi vaite vauramanta vira vaintinavu ani vira vaata muara vare vuavo, tiate. ¹⁴ Paireatava vi uvvara irirera, tenavu homa vo uva vuru vira tiva amiari nenavu kia vi haikara kaara uva varevarave, ti.

¹⁵ Vika minti tumanta iqoka vaiintinavu vikaqihai utaru monu vare vika tuntemake, vi uvvaraqai vaiinti nahenti tiva nimi vaura. Maa entaravata Iutaa vatanaaka Ihurara vi uvvaraqai viti viri tiva nimi variara.

Ihuva nai vainti nivuqaa qovarama vura

(Maaki 16:14-18; Ruki 24:36-49; Ioni 20:19-23; Kaiqa Varora 1:6-8)

¹⁶ Ihura vainti 11navu Karirini ainqinaqaa oru variate tunaini orure ¹⁷ tavovaro Ihuva mini vaumanta vira quahama amiteha vira autu tuahereha vaura. Vira autu tuaherevaumanta vira vainti hininavu virara taara aato iriha tiha, Quqaa vivae vaivo? ti vaura.

¹⁸ Ihuva vika aaqanto orurerero tiharo, Kotiva ti noraiqama kaimanta te naaruvaqaavata vataqaavata ekaa haikaqaavata raqiki vauraukave. ¹⁹ Ne ekaa vata maata vaika vuru tiva nimimanta vika ti vaintiqama vuate. Vika ti vaintiqama vimanta ne namari nimihamati Qora autuvata, ti vira Maaqu hutuvata, Kotira Maraqura autuvata rehamma namari nimiante.

²⁰ Mintihama ekaa ni tiva nimuna uva vakaakara vikavata tiva nimiha vi uvarama iriqi vuate tiate. Ho iriate. Te kia ni qaqira karaiti, ni hampata variqi vuariraro maa entava maa vatava taiqa vuarire, tiro. Ihuva turama.

MAAKI

Maakiva Ihuva nu uvarara tura

*Ioniva namari nimi vau vaiintiva vaiinti nahenti tiva nimu uvara
(Matiu 3:1-12; Ruki 3:1-18; Ioni 1:19-28)*

¹ Ihu Karaitiva Kotira Maaquvano vaira. Vira uva koqe uva vira okara vaireva maantimama vairo:

² Haarua entaqaa Aisaiaava Kotira uva qoqaiqama kero qara ntuva tero tiharo,
Ho tavaate. Ti uva vaiinti nahenti tiva nimiaina vaiintira te vira atitaariraro viva ai
avuni viharo ai aara gerama amitaanarove. *(Mal 3:1)*

³ Vi vaiintiva qumina vataini vaharo naveraitiharo, Ne Noravano vuaina aarara
gerama amitema vira aara avuqavuqama amitaivaro viva vivauma ho vuuarie tianarove, tura.
(Aisaiaa 40:3)

⁴ Kotiva vira kahaquvaro Aisaiaava hoqarerero vetanto entaqaa mintima vi uvara qara
ruva tovaro airi ihi aitarovaro vo enta Ioniva qumina vataini qovarama vura. Qumina
vataini qovarama viro Ioniva vaiinti nahenti namari nimiharo vika tiva nimiro tiharo,
Nenta qora kaiqa vare vaira qaquirake namari varaivaro Kotiva ne qora kaiqa vare vai
uvara nunka nimitaarire, tiro.

⁵ Ioniva minti ti vaumanta Iutia vataihaiive, Ieruharemi vatukaihaiive, ekaa vi
vatanaaka hihai hihai viva uva tunaini vivi otu Iotani Namariqi vahira vika nai qora kaiqa
vare vaura tiva qovaramake vauvaro Ioniva vika namari nimi vaura.

⁶ Ionira utavaaqavano vaireva, *kameri* quara kauki varakero aututo utavaaqava
vauvaro viva viraqai nonku tero *reti* tavaarana rumpa tero vaura. Ioniva kia karavata
utukero naraitiro, viva korikavata vaunkakavano nkuruto namariravata vi kararaqai
neharo vaura.

⁷ Ioniva vaiinti nahenti tiva nimiro tiharo, Ti naantiaraini aniaina vaiintiva viva
mpeqavanoma ti haatara kero nora vaiintima varianarove. Viva nora vaiinti vaimanta
te qumina vaiinti vahara ti, kia ho te kankakaavi vira aiqu naaqunta qantu amitararave.

⁸ Te qaqi namarima ni nimi vauro. Viva Kotira Maraqua ni nimianarove, tiro. Ioniva
minti turama.

*Ioniva Ihura namari amura
(Matiu 3:13-17; Ruki 3:21-22)*

⁹ Vi entara Ihuva Nasareti vatuka Kariri vataihairo anirero otu Ioniva vaunaini vuvaro
Ioniva Iotani Namariqi vaharo namari Ihura amura.

¹⁰ Namari Ihura amuvaro Ihuva namariqihairo qaqqini vaarirero vaaka vuruvi tavovaro
naaruuvavano qantua vuvaro viraqihairo Kotira Maraqravano mirura voqaara tuviro
tuvu Ihuraqaata vaura.

¹¹ Ihuraqaata vauvaro uvavano naaruvhahiro mintima tiro: Are ti Maaquvano
variario. Ti muntukavano ariarama vaivo. Te ariara quahema vauro, tiro.

*Sataaniva Ihurara qora kaiqa varaarie tiro, vira avatora
(Matiu 4:1-11; Ruki 4:1-13)*

¹² Uvavano naaruvhahiro minti tuvaro vaakama Kotira Maraqravano Ihura vita varero
qumina vataini kia vaiintivata vau-naini vuru kora.

¹³ Vuru kovaro Ihuva mini vaharo 40 entanavu varakovaro Sataaniva Ihurara qora
kaiqa varaarie tiro, vira avatora. Ihuva mini qaakau aantau ni vaunaini vaumanta
enselinavu tuvre vika viraqaata koqemake raqikiqi vi vaura.

*Ihuva Karirini nai kaiqa hoqarama tora
(Matiu 4:12-17; Ruki 4:14-15)*

¹⁴ Vi entara yokuka Ionira ravaaqavu vare karapuhiqi vuru kovaro Ihuva Karirini viro
oru mini vaharo Kotira vakaaka koqe vakaaka vi vatanaaka tiva nimiro tiharo, ¹⁵ Vi
entava aniraivo. Kotiva niqaa raqikiaina entava aumantoma aniraivo. Nenta qora kaiqa
vare vaira qaquirake, te koqe vakaaka ni tiva nimiaina ne vi uvara iriqi niha nuate, tura.

*Ihuva Saimonika Entaruka naarora
(Matiu 4:18-20)*

¹⁶ Ihuva minti tivakero Kariri Varuva auvahini aitareharo tavovaro Saimoniva nai qata
Entarukantiro vaharo vahe re vaura. Vitanta havuka kaiqa vare vautantara ti, vitanta
namariqi vahe re vauvaro ¹⁷Ihuva vitantara tiharo, Netanta ti naantiara ti tivataqaniate.

Netanta havuka vahe ravakeha varentemake, netanta ti tivataqi viha vaiinti nahentima ntitevarave, tiro.

¹⁸ Ihuva minti tumanta vitanta vaakama náitanta vahe mini ke, Ihura avataqi surama.

*Ihuva Iemika Ionika naarora
(Matiu 4:21-22)*

¹⁹ Vitanta vira vataake vuvaro Ihuva inaaraiqaka oru viharo tavomanta Sebedira maaqtanta Iemika Ionika votuqi vaiha vahe ruqemavura haqire vai.

²⁰ Vitanta vahe haqire vauvaro Ihuva vaaka vitanta naaromanta vitanta vira uva iri nái qora Sebediravata, vira kaiqa varo vaintikavata, votuqi mini ketanta Ihura avataqi surama.

*Ihuva vaana atitovaro aitarero vura
(Ruki 4:31-37)*

²¹ Vitantavata Ihuva vataake vuvaro Ihuva oru viro Kapenaumini orurero mini vaharo Maara Entaqaa maara naavuqi oriqetero vaharo viraqi vaiinti nahenti vauka vakaaka tiva nimiro. ²² Ihuva vakaaka vaiinti nahenti tiva nimi vaumanta vika nái kauqu runkinkiri iha tiha, Ike, aahuva uva vo qarama keroma ti vaivo. Viva kia maara okara ti varia vaiintinavuka tiantemavauve ti vaivo. Viva nora vaiintivano tiantema keroma ti vaivo, tura.

²³ Minti tuvaro Ihuva maara naavu viraqi vauvaro vaanavano vira avutaqi vau vaiintiva naavuqi ururero oi oi tiharo, ²⁴ Ihuo, are Nasarethainaavave. Are tinavu nantirevae aniarao? Are tinavu vehiqama karevae aniarao? Te ai okara iri tavaunarave. Kotiva ai atitaivara are Kotira kaiqaqai vare variaravave, tiro.

²⁵ Minti tuvaro Ihuva vaana vira atiharo tiharo, Evaara variane. Vi vaiintiraqihaira qaqlini aitarera vuane, tiro. ²⁶ Ihuva minti tuvaro vaana viva voqamakero vi vaiintira qaki qakimakero oi oi tivakero qaqlini aitarero viro.

²⁷ Qaqlini aitarero vumanta viraqi ruvaaqumavi vauka kauqu runkinkiri iha nai tiva ami nai tiva ami iha tiha, Nana haikavanoe qovarama vivo? Maa uvara qaraaka uvave. Vi vaiintiva mpeqa uva tiharoma vaanananuvata nititaimanta vinavuka vira no iri variarave, tura. ²⁸ Vika minti tivaga vi anumanta ekaa Kariri vataaini vau vaiinti nahentikavata vi uvvara irura.

*Ihuva Saimonira aintaantara koqema kora
(Matiu 8:14-15; Ruki 4:38-39)*

²⁹ Ihuva maara naavuqihairo vevarero, viraqaahairo viva Iemika Ionika ntita varero Saimonika Entaruka naavuqi viro.

³⁰ Saimonira aintaantara vaata iha ite vauvaro naavuqi taintaqua vaite vaumanta vinavuka Ihura virara tiva ami.

³¹ Ihura virara tiva amuvaro Ihuva vira oru tavero vira kauqu utu varero vaaviarama kero. Mintuma kero vira vaaviarama kovaro vira vaata koqema vauvaro vi nahentiva himpiro ho vaharo vika kara qera i vaura.

*Ihuva airi vaiinti nahenti nihavuka koqema kora
(Matiu 8:16-17; Ruki 4:40-41)*

³² Ihuva vi vatukaraqi vauvaro kuarivano ruhunku vauvaro entama vumanta vaiinti nahenti nihavukavata, vaanavano avutaqi vaukavata, ntita vare Ihuva vaunaini vuru kora.

³³ Vuru komanta ekaa vi vatanaakkavata Ihuva vau naavura qentiana ruvaaqumavi mpiqavi vauvaro ³⁴ Ihuva vaiinti nahenti airitaha vo rovara vo rovara varoka koqema nimitovaro vika rovara taiqa yumanta ho vauvaro vaanavano vaiinti avutaqi vau vaanara vo vaiinti vo vaiintiqihairo nititama komanta vika aitare vura.

Vika aitare vi vauvaro Ihuva vaana vika qioqamatero tiharo, Ne kiama uva tivarave, tiro. Vaana vika vira viraqqamake tavovarora tiro, Ihuva minti turama.

*Ihuva Karirini vi aniharo vakaaka tiva nimura
(Ruki 4:42-44)*

³⁵ Vira qararaa kia aatitovaro Ihuva himpiro vevarero oru kia vaiintivanovata vaunaini Kotira aarareva viro.

³⁶ Mini Kotira aarareva vauvaro Saimoniva nai kena vaiinti hampata vira rantareva viro. ³⁷ Oru vi oru Ihura rantake vinavuka tiha, Ekaa vi vatukaihainaaka ai rantareka ani variavo, ti.

³⁸ Vinavuka minti tuvaro Ihuva aqao tiro, Varaiqenavu vo vatuka vo vatuka niha vakaaka vaiinti nahenti tiva nimiare. Te vakaaka vika tiva nimirera anuraukave, tiro.

³⁹ Ihuva minti tivakero vinavukavata ntita varero Karirini vi aniharo vika maara naavuqi origetero vaiharo vaiinti nahenti vakaaka tiva nimiharo hini ku vaiinti nahentika avutaqihairo vaanavata nititama komanta aitare vura.

Numuaravano vira vaata ne vau vaiintira koqema kora
(Matiu 8:1-4; Ruki 5:12-16)

⁴⁰ Ihuva vakaaka tiva nimiqiro vi vauvaro vaiinti vovano vira vaata numuaravano ne vau vaiintiva Ihuva vaunaini orurero tori kauru araviro Ihurara mpo ike tiharo, Are ti kahagiataa irera, are homa ti numuara nunka timitenarave, tiro.

⁴¹ Minta tuvaro Ihuva vi vaiintirara mpo ike tiva amiteharo nai kauqu viavi vira vaataqaa vatero tiharo, Te mintiataa ivera ai mintima amitarerave. Te ai vaatara kogema vuarire turo, tuvaro ⁴² vira vaata ne vau numuarava vaakama tavanta vuvaro viva ho vaura.

⁴³ Viva ho vauvaro Ihuva vi vaiintirara kempukaiqaakero tiharo, ⁴⁴ Kia vokavata tiva nimiraitira, oru viraro Kotira kaiqa vara amite väira vaiintiva ai vaata tuantikero tavaarire. Viraqaahaira are Mosiva maara uva tivatorara iriharama *ofaa* vo iha quarairamanta vaiinti nahenti vira tave, ariara ququaama vira vaata koqema vivo tiate, tiro.

⁴⁵ Ihuva minti tuvaro vi vaiintiva kia Ihuva tunte iraitiro, vi uvvara viti viri tiva nimumanta ekaa vaiinti nahenti vi uvvara iruvaro vira kaara Ihuva vo vatuka vo vatuka qoqaa vuarirava kia ho vauvaro viva qaqlira kero kia vatukaini viraitiro, qumina kanta variqiro vumanta vaiinti nahenti hihai hihai vira tavareka anura.

Ihuva vaata qutu ravavu vaiintira koqema kora
(Matiu 9:1-8; Ruki 5:17-26)

2

¹ Ihuva Karirini nuva taiqa kero anirantero Kapenaumini oru vaumanta vi vatanaaka Ihuva ani vaivo tu uvvara iri² vika airitaha oru Ihuva vau naavuraqi ruvaaqumavi vaha naavuvata mpiqa kovaro qentianavata mpiqa vuvaro vovanovata viraqi origetaarirava kia vaura. Mintima vauvaro Ihuva naavu viraqi vaharo nai vakaaka vika tiva nimi vaura.

³ Ihuva vika tiva nimi vaumanta vaiinti vonavu nái kena vaiinti vo vira vaata qutu ravavura tainta vare anura. Erakaimante vaiintinavu vira tainta vare ⁴ Ihuva vau naavuraqi aumanto virare ti, tavomanta vaiinti nahenti airi viraqi mpiqavi vaumanta vinavuka naavuqi origeteva kia ho vaura. Kia ho vaumanta vinavuka qaqlirake naavu qiata tanuqiraqaa vaarie vi vaiintira naavu qiataqaa vara vaari vate, Ihuva naavu avutaqi vaumanta vinavuka Ihuva vaura maariraqaa naavu qiata ntomake. Naavu qiata ntomake viraqaahai aihavu vaiintira taintaqaa vatora tutamaqi tuvi muntu naavu avutaqi Ihuva vauraqaa vatora.

⁵ Vatovaro Ihuva irumanta vi vaiintinavuka náiqai tiha, Ququaama maa vaiintira Ihuva ho koqema kaanarove, tu vaiintinavuka vauvaro Ihuva vaata qutu ravavu vaiintirara tiharo, Ti maaquvauvo, are Kotira uva raqa kaanara te vi uvvara ai nunkama amitauro, tiro.

⁶ Ihuva minti tumanta maara okara ti vau vaiintinavuka viraqi vauka iriqi viha tiha, ⁷ Aqao, vi vaiintiva nantiharoe minti tivo? Viva minti tiharoma Kotira qoraiqama amite vaivo. Kiama qumina vaiintivano vaharo nai kena vaiintiara tiharo, Are Kotira uva raqa kaanara ai nunkama amitauro, tianarove. Kotiva vivaqaima ho minti tianarove, ti.

⁸ Vika nái aatoqi mintimake iruvaro Ihuvavata vaakama vika nái avu aatoqi iru uvvara iriro tiharo, Ne nantihae nenta avu aatoqi mintimake iriavo?

⁹ Ne tiriara tiha, Viva qumina vaiintivano vaharora tiro, kia ho nai kena vaiintivano Kotira uva raqa kaainara nunka amitaanarove, tiarave. Ho vo kaiqa vo? Hoe te maa vaiintira vaata ,koqemake, virara himpira nena tainta utu varera nuane tirarave? Ne ti tiva timiqe iriare, tiro.

¹⁰ Ihuva mintima tivakero vika irama nimitero vikara tiharo, Te Vataini Vataatai Vaintika vauraro Kotiva ti noraiqama kaimanta te homa vataini vaha vaiintivano Kotira uva raqa kaaina uvvara nunka amitararave. Ne ti uvvara quqaa uvave tiate ti, te maa vaiintirara mintirerave, tiro.

Minta tivakero Ihuva vaata qutu ravavu vaiintirara tiharo, ¹¹ Himpira nena tainta utu varera nena maaqaini vuannerama turo, tiro.

¹² Minta tumanta ekaa vaiinti nahenti vira tave vauvaro vi vaiintiva himpiro vaaka nai tainta utu varero vumanta vika ravukuvu kauqu runkinkiri i vaha Kotira autu tuahereha tiha, Maa kaiqara aahuva kaiqave kia tavauna kaiqarave, ti vaura.

Ihuva Rivaira aarora

(Matiu 9:9-13; Ruki 5:27-32)

„Vi entara takisi vare vau vaiintika vonavu takisi vareha hini monu vika nái tuate hini monuqai vika nái nora vaiinti nimi vaura. Mintumanta qumina vaiinti nahenti takisi varo vaiintikara tiha, Ekaa vika muara vaiintiqaima variavo, tura..”

¹³ Ihuva Kapenaumini varikero, viharo ururantero Kariri Varuva auvahini yumanta vaiinti nahenti airitahaa viva vaunaini ruvaaqumavi vauvaro Ihuva uva vakaaka vika tiva nimo.

¹⁴ Viraqaahairo viva oru viharo tavovaro Rivaiva, Arafiusira maaquvano, takisi naavuqi oquiviro vaharo takisi vare vauvaro Ihuva virara tiharo, Ti tivataqira aniane, tiro. Minto tuvaro Rivaiva himpiro Ihura avataqiro vurama.

¹⁵ Ihuva oru Rivaira naavuqi vaharo nai vaintiaravata kara ne vaumanta airi vaiinti takisi vare vaukavata, vo vaiinti vikara qora kaiqa vare variakave tukavata, vika vi naavuraqi ruvaaqumavi vaha kara ne vaura.

¹⁶ Ihuva vi vaiintinavuka hampata kara ne vaumanta Parasi vaiinti maara okara ti vaunavuka tavovaro Ihuva takisi vare vaukavata, qora vaiintive tu vaiintinavukavata, vika hampata kara ne vaumanta vika Ihura vaintinavu ireha tiha, Ihuva nantivaroe qora kaiqa vare varia vaiintika hampata kara ne vaivo? ti.

¹⁷ Parasi vaiintinavu minti tuvaro Ihuva vika uva iriro tiharo, Qaqi varia vaiintika kia doktaava vainaini vi variarave. Rovara varaa vaiintikaqai doktaava vainaini vi variarave. Tenavu avuqavu ni vauraukave ti variaka kia te vika naarerera anuraukavauve. Te qora kaiqa vare varia vaiinti nahentika naarerera anuraukave, tiro. Turama.

Kara auramate okarara tura

(Matiu 9:14-17; Ruki 5:33-39)

¹⁸ Vi entara Ionira avataqi ni vau vaiintinavukavata, Parasi vaiintinavuvata, kara auramate vaumanta vaiinti vonavu Ihura ireha tiha, Ionira avataqi ni varia vaintinavukavata, Parasi vaiintinavuvata, kara auramate variavo. Ho nantihae ai avataqi nua vaintinavuka kia kara aurama taraiti, qaqi kara ne variavo? ti.

¹⁹ Vika minti tuvaro Ihuva tiharo, Vaiintivano nahenti varaaina entara vira navunaaka vira hampata vaha kara aurumae tevarare? Aqao, viva vika hampata vairamantara ti, vika qaqima kara nevarave.

²⁰ Vo enta anintaira vikaqihai nahenti varaaina vaiintira qaqini vara kaimanta vi entaraqaahai vira navunaaka „iqi ratehamā“ kara aurama tevarave, tiro.

²¹ Minti tivakero Ihuva vo uva tugantaakero vika tiva nimo tiharo, Vovano haaruva utavaaqa ntomavira haqirireva iharo, viva kiama qaraaka tavuna varakero toqakero viraqaa taataukero haqirirave. Vovano mintirera, qaraaka tavunavano qeqoqama viraro utavaaqavano noraiqaakero rapema vuanarove.

²² Te qaqaa tirerave. Qaraaka *uaini* tatikero kia vovano memera paha haqirama taira haaruara varakero qaraaka *uaini* viraqai qahiarake vate vairave. Vovano mintirera, qaraaka *uainivano* nterehero paha vira rakavu kairaro *uainivano* ntava viraro memera pahavanovata qoraqama vuanarove. Vaiintivano memera paha haqirama taira qaraakaqai varakeharo viraqai qaraaka *uaini* qahiarake vate vairave, tiro.

„Ihuva vi uvvara tugantaakero tu uvvara okara mintimama vairo: Vira voqaara nevata kiama haaruara okaravata qaraaka okaravata vohaaraqi virivi tampamake vataate, tiro. Ihuva minti tura..”

Maara entara tura

(Matiu 12:1-8; Ruki 6:1-5)

²³ Vo enta Maara Entaqaa Ihuva nai vaintinavu hampata naaho avutaqi *qantivi/kakuma* voqaara *uiti* ututovaro qampiqorai ni vaumanta vira vaintinavu oru vihamma *uiti* tava rahiqike namaqi oruvi vaumanta ²⁴ Parasi vaiintinavu vinavuka tave Ihurara tiha, Are vinavuka tavaane. Maara Entaqaa qioqamataa kaiqara vinavuka vare variavo, ti.

²⁵ Parasi vaiintinavu minti tuvaro Ihuva vika nái tiva nimo tiharo, Haaru ni kaivaqava Devitivavata, vira vataake nukavata, karara antuqaa arumanta vauvaro Devitiva vi entara auti okarara ne kiae kaara ntuvake iriarave? ²⁶ Abiataava Kotira kaiqa vara amite vau vaiintika vika qiaa vaiintivano vau entaraqaa Devitiva Kotira Naavuqi oriqetero mpareti Kotira amito karara varakero neharo nkuikeri nai vataake anukavata hini nimumanta norave. Kotira kaiqa vara amite vau vaiintikaqai vi karara naataara vauvaro qumina vaiintihaavano vi karara neharora tiro, vi uvvara raqa korave, tiro.

²⁷ Ihuva minti tivakero tiharo, Kotiva vaiintiara iriharo maara ti entava varianarove turave. Kotiva kia maara ti entarara iriharo vaiinti autu tairavauve.

²⁸ Te Vataini Vatatai Vaintika vauro. Te tentavano Maara Entaqaaavata raqiki vau- raukara ti, te homa vi entaraqaa tenta varaataa ina kaiqara vararerave, tiro. Ihuva turama.

3

*Maara entaqaa Ihuva vaiinti kauqu taparavura koqema kora
(Matiu 12:9-14; Ruki 6:6-11)*

¹ Vo enta Ihuva maara naavuqi oriqetero tavovaro vaiinti vovano vira kauqu hini taparavuva vaumanta ² viraqiqi vau vaiintika hininavu tiha, Kaiqe vaiha tavaariraro Ihuva vaiinti kauqu taparavira vate Maara Entaqaa koqema kairera, vira kaara tenavu viraqaa uva vataare, ti.

³ Vinavuka minti tivake Ihura aituti vauvaro Ihuva kauqu hini taparavu vaiintirara tiharo, Vaiinti ayutana himpitera variane, tuvaro vi vaiintiva himpitero vika avutana vauvaro ⁴ Ihuva vinavuka irama nimitero tiharo, Tenavu tentanavu maara uva irihama Maara Entaqaa nana nana kaiqae ho varaainarave? Tenavu vi entaraqaa vaiinti vo kahaqamae amitararave? Vira qoraqamae amitararave? Maara Entaqaa tenavu vaiinti vo kahaqiariraro viva qaqqie varianarove? Tenavu qaqrake vi vaiintira arue kararave? tiro.

Ihuva minti tumanta vika kia kia vira uvavata nai tiva amiraiti, evaaraqai vauvaro ⁵ Ihuva tavomanta vika kia vi vaiintirara mpo ike tiva amitaraiti, vika nai viri kempuka arate vauvaro vira kaara Ihura muntukavano qoraquivaro viva vika aitutuma tavero vikara arara itovaro vi vaiintirara tiharo, Nena kauqu rantuta kaane, tuvaro viva nai kauqu rantuta tovaro vira kauquvano tota vauntema kero, koqema viro naitarama viro vaura.

⁶ Vira kauquvano koqema vumanta Parasi vaiinti vinavuka maara naavuqihai vevare oru Herotira avataqai nuka hampata ruvaaqumavi vaiha vinavuka Ihura nantiakkee arukararare tiha virara nai tiva ami nai tiva ami i vaura.

Vaiinti nahenti hihai hihai oru Ihura tavora

⁷ Ihuva nai vaintinavu ntita varero varuva auvhini oru vaumanta vaiinti nahenti airitaha Kariri vataihainaakave, Iutia vataihainaakave, ⁸ Ieruharemi vatukaihainaakave, Itumia vataihainaakave, Taiaa vatukaihainaakave, Saidoni vatukaihainaakave, Iotani Namari vutu mantaraihainaakave, vika Ihuva vo kaiqa vo kaiqa vare vaurara iri, vika Ihuva vaunaini namari auvhini ani uki vaura.

⁹ Airi vaiinti nahenti uki vauvarora tiro, Ihuva nai vaintinavuara tiharo, Vaiinti nahenti ti venta kevorave. Nenavu votu qerama vataiqe te viraqiqi vaarinte variare, tiro.

¹⁰ Ihuva vaiinti nahenti airitaha koqemā komantara ti, nihavu vaiinti nahentika airitaha vira utu varareka auti vahara ti, nai ventake nai ventake i vaura.

¹¹ Vika nai ventake nai ventake i vaumanta vaiinti nahenti vonavu vaanavano vika nivutaqi vauka, vika Ihura tave vira avuni hiqirivi vaiha naverai tiha, Are Kotira Maaquvanove, ti. Vaanavano vika nivutaqi vau vaiintika minti tuvaro ¹² Ihuva vika qioqamatero tiharo, Ne kia ti autu nteha vokikara tiha, viva vi kaiqara vi kaiqara varairo tiate, tiro.

Ihuva vaiinti 12 navu ntitora

(Matiu 10:1-4; Ruki 6:12-16)

¹³ Ihuva mini varikero vurura aiqinaqaa oru vaharo nai muntuka vau vaiintikagai naaromanta vika oru vauvaro ¹⁴ Ihuva 12 vaiintinavu kaama tero vikara te vika nititaari vika ti uva vare vaiinti nahenti tiva nimiqi vuate tivakero, vika noraiqama kero viraqaaahairo vikara tiharo, Nenavu ti airuqihai variate ti, te ni noraiqama kauro. Te ni nititaari ne ti uva vaiinti nahenti tiva nimiate. ¹⁵ Nenavu vaana nititaimanta vika aitare vuate ti, te tenta kempuka ni nimirevare, tiro.

¹⁶ Ihuva maa vaiintinavuka ntitora:

Saimonira—Ihuva Saimonira vira vara autu ntava tero tiharo, Pitaarave, tiro.

¹⁷ Iemika, Ionika—Vitanta Sebedira maaqutanta vaura. Ihuva vitantara vara autu ntava tero tiharo, Boanesisitantave, tura. (*Boanesisi* maa uvaraqhah tirera, *Naaruva Karara Ti Vairave*, ti.)

¹⁸ Entarura

Piripira

Batolamura

Matiura

Tomaasira

Iemira—viva Arafiusira maaqu

Tadiusira

Saimonira—vira autu vo Selotira

¹⁹ Iutaasi Ikeriotira—vi vaiintiva naantiara Ihura ravaaqavu kaate tiro, vira qo-varaiqama kaarira vaiintiva vaura.

Ihuva vi vaiintinavuka 12 navu ntitora.

Vokuka Ihurara vueraiqaaivi vaiintivva vaivo tura

(Matiu 12:24-32; Ruki 11:14-23)

²⁰ Ihuva nai vaintinavu ntita varero maaqaini vumanta qaiqaa airi vaiinti nahenti vira tavareka ruvaaqumavi vauvaro Ihuva nai vaintinavu hampata kara naarirava kia vauvaro vinavuka vaumanta ²¹ Ihura navunaaka vi uvara iri Ihurara tiha, Ike, viva vueraiqamama vivo. Kaiqe tenavu vira oru vita kaare, tivake vura.

²² Maara okara ti vau vaiintika vonavu Ieruharemihai tuture mintima ti, Belsebuliva avuhinaa vaanavano Ihura avutaqima vaivo. Belsebuliva vira avutaqi vaharo vira kahaqi vaivaro Ihuva vaiintiqihairo vaana nitite vairave, ti.

²³ Vika minti tuvaro Ihuva vika naaromanta aumanto anuvaro viva uva vo tuqantaakero vikara tiharo, Sataaniva nantiakeroe nai kenara atitairaro aitaraanarove?

²⁴ Vohaa vatanaaka rairavi nai ari nai ari i vaiha kia ho vaivarave. ²⁵ Vohaa navunaaka rairavi nai ari nai ari i vaiha kia ho vaivarave.

²⁶ Sataaniva raqiki vai vaanauka rairavi nai ari nai ari i vaivaro Sataaniva kia vikaqaa raqikiq viraro vika mpeqavano taiqaanarove. ²⁷ Naavu qova kempuka vaiintivano vairaro muara vaiintivano kia vira avuni rumpa tairera, viva vira naavuqihairo kia ho muara varaanarove.

²⁸ Te quqaa vakaaka tiari iriate. Vaiinti nahenti nana nana qora kaiqa vare vai uvarave, qora uva vokara tiva nimite vai uvarave, Kotiva homa ekaa vi uvvara vi uvvara qaqi nunika nimitaanarove.

²⁹ Mintiharovata, nai Maraqrara qora uva tiva amitera Kotiva maa entaravata naantiara entavata vi uvvara kiama nunika amitaanarove, tiro. Ihuva minti tura.

³⁰ Vika Ihurara tiha, Vaanavano vira avutaqi vaharo vira kahaqi vairave, turara tiro, Ihuva vi uvvara minti tura.

Ihura navunaaka vira tavareka anura

(Matiu 12:46-50; Ruki 8:19-21)

³¹ Ihuva minti tumanta vira novavata, vira qatanavuvata, anire vahaqaini ani himpite vaiha tiha, Ihura tivarо tuvuarire, tumanta ³² vaiinti nahenti airithaa Ihura tataaqa ututumavi oquvi vauka vaiha Ihura tiva ami tiha, Ai novavata, ai qatanavuvata, vahaqaini ani vaiha aimaa aare variavo, ti.

³³ Vika minti tuvaro Ihuva vika irama nimitero tiharo, Tavave ti nova vaivo? Tauka taukae ti qata vakauka variavo? tiro.

³⁴ Minti tivakero vira tataaqa oquvi ututumavi vauka aitutuma tavero tiharo, Maakama ti novave ti qata vakaukave variavo. ³⁵ Ti Qova naaruvaini vaira vira uva iriha ni variaka, vikama ti qata vakaave, ti aura nakaave, ti nokavarave, variavo, tiro.

Vaiintivano kara auru qintato vakaakara tura

(Matiu 13:1-9; Ruki 8:4-8)

4

¹ Qaiqaa Ihuva varuva auvahini oru vaharo vaiinti nahenti uva vakaaka tiva nimirare tumanta vaiinti nahenti airithaa ruvaaqumavi vira ututumavi vauvarora tiro, viva qaqira kero votuqi vaarirero viraqo oquiviro namariqaa vaumanta vaiinti nahenti vutuni namari auvahianta vaura.

² Vika namari auvahianta vauvaro Ihuva votuqi vaharo vo uva vo uva tuqantaakero vika tiva nimura.

³ Ihuva tiharo, Te tiari iriate. Vaiinti vovano kara auru qintareva vurave. ⁴ Viva auru qintaqiqi vuvuro hini auruvano aara auvahini hiqiruvaro uvirivano ani nama aqu korave.

⁵ Mintuvaro auru hininavuvano ori vataqaa hiqiruvaro vatavano kia vevantogama kero vauvarora tiro, auruvano hiqiriro vaaka qampiqa tovaro ⁶ tuqavano kia vevanto otu vuvvarora tiro, kuarivano ururero iteharo vaaka aaaharuqama korave.

⁷ Mintuvaro auru hininavuvano augurora nimirihiqiriro nimiri vataakero qampiqa tovaro nimirivano ravaaqavu kovaro kia tavavata irorave.

⁸ Mintuvaro auru hininavuvano koqe vataqaa hiqiruvaro karavano koqema kero qampiheharo vuruvi koqe tava iratorave. Vokuva airi tava iratovaro vokuva vuruvi aatara kero voqavata iratovaro vokuva vuruvi viravata aatara kero airi tava voqavata

iratorave, tiro. ⁹ Ihuva vi uvvara tuqantaakero tiva nimi taiqa kero vaiinti nahentiara tiharo, Ni aato vairera, vi uvvara okara iriate, tiro.

*Ihuva uva tuqantaakero tiaina okarara tura
(Matiu 13:10-17; Ruki 8:9-10)*

10 Ihuva uva tiva nimi taiqa komanta vaiinti nahenti nai maaqa nai maaqa vuvaro Ihuva nariaraa vaumanta vira vainti 12 navuvata, yokukavata, viva vaunaini anire Ihuva vaaka uva vo tuqantaakero tu okarara kia iriraiti, vika virara Ihura irovoro ¹¹ Ihuva vika tiva nimiro tiharo, Kotiva vaiinti nahentiqaa raqikaina uvvara kukeqataira, vi uvarara Kotiva niara vika qaqi kaira vi uvvara okara iriate tivakero, qumina vaiinti nahenti aaqaini vaikara vi uvvara okara kia yutukera tiva nimiane timantara ti, te vi uvvara vi uvvara tuqantaake vika tiva nimiqi virerave.

¹² Te uva tuqantaake tiari vaiinti nahenti tavehama kia kankomake tavevarare. Vika ti uvvara aato tara iha kia anomake irivarare. Vika ti uva irihama vika nái qora kaiqa qaqira kaivarovauve Kotiva vika nái qora kaiqa vare vai uvvara nunka nimitaanarove, tiro. *(Aisaiaa 6:9-10)*

*Kara auru qintato vakaakara vira okara Ihuva yutukero tura
(Matiu 13:18-23; Ruki 8:11-15)*

13 Ihuva minti tivakero vinavukara tiharo, Ne vo? Te vi uvvara tuqantaake tuna okarara ne kiae iriavo? Ne kia vi uvvara okara irivera, te naantiaravata uva tuqantaake tiaina uvvara ne nantiakee ho irivarare?

¹⁴ Te vaaka uva tuqantaake tuna okarara tirerave. Vaiinti vovano kara auru qintatora vi uvvara okara vaireva Kotira uvama vaivo.

¹⁵ Auru aaraqaa hiqiru uvvara vira okara vaireva vaiinti nahenti hininavu vi aurura voqaara variarave. Vi vaiinti nahentika Kotira vakaaka iriavararo vaakama Sataaniva anirero vika avu aatoqihairo vi uvvara vara qaqini kairave.

¹⁶ Hini vaiinti nahenti ori vataqaa hiqiru aurura voqaara variarave. Vinavuka Kotira vakaaka iriqi vi, vi uvvarara quahamake variavaro ¹⁷ vi uvava vika avu aatoqi vahuqaqai vaimanta vi vaiinti nahentika kia vairaraiqamaqi variqi viha vi uvvara iriraiti variamanta, vi uvvara kaara vokiaka vika qoraiqama nimitareka auti variamanta vika tinavu harivorare tiha Kotira uva vaakama qaqirake varia vaiinti nahentika variarave.

¹⁸ Hini vaiinti nahenti auquro nimirivano qampiqoraqi qintato aurura voqaara variarave. Vi vaiinti nahentika Kotira uva iri ¹⁹ viraqaaahai vika vataihainaa haikara noraiqaake iriqi viha monuarave, airairarave, quaha keha vi haikara varareka iriqi viha Kotira uva qaqira kaavaro Kotira uvavano kia vi vaiinti nahentikaqai vairaraiqamaqiro vi vaimanta variarave.

²⁰ Vika minti variamanta hini vaiinti nahenti koqe vataqaa qintato aurura voqaara variarave. Vi vaiinti nahentika Kotira uva iri vi uvarara ququaave tivake, vi uvvara iriqi viha koqe kaiqa Kotira vara amitaqi vi variarave. Vokia vaiinti nahentika vi uvvara iriha koqe kaiqa Kotira vara amitaqi vi variamanta, qaiqaa vokia vaiinti nahentika vika naatarake uritare voqavata Kotira kaiqa koqemake vara amitaqi vi variamanta, qaiqaa vokia vaiinti nahentika vika kaiqavata naatarake uritare Kotira kaiqa voqavata koqemake vara amitaqi vi variarave, tiro. Ihuva turama.

*Ihuva ovara uva tuqantaakero tura
(Ruki 8:16-18)*

21 Ihuva minti tivakero uva vo tuqantaakero tiharo, Ova qumpikero tainie vuru vate vairave? Kureqohairo mantaaqa keroe vate vairave? Vaitaaina taintara ankaraaraqie vate vairave? Aqao, kia mintiraitiro, ova qumpi kero tuahera kero qoqaa qaqiraqaa vuru vate vairave.

22 Naantiara ekaa kukeqate haikara qoqaaqama kaanarove. Ekaa vauvute haikara qoqaaqama qovarama kaanarove.

²³ Ni aato vairera, vi uvvara okara te tainara kankomake iriate, tiro.

²⁴ Ihuva minti tivakero viva tiharo, Ne uva vakaaka irira anomakeha iriate. Ne vokika vi kaiqara vara nimitentema kero, Kotiva vohaa qarama kero vi kaiqara nintavata vara nimiteharoma vogavata nimianarove.

²⁵ Kotira uva irirava variqi viraro Kotiva vira kahaqiraro viva vira uva voqavatama irianarove. Kotira uva kia irirava variqi viraro viraqaaahairo nana haika viva tuatainara qaqini vara kairaro viva qaqi quminama varianarove, tiro.

Auru qampiqaaainarara uva tuqantaakero tura

²⁶ Minti tivakero Ihuva uva vo tuqantaakero vika tiva nimiro tiharo, Kotiva raqikinara maa uvvara vira voqarama vaivo. Vaiintivano auru qintatero ²⁷ viraqaaahairo viva vo

entanavu vaitaqi vi vaivaro auruvano nai naqavu viro rakavu viro qampiqe vairave. Vaiintivano auruvano qampiqaina okarara kia iriraitiro ivaro²⁸ auruvano vataqi vaharo naivano qampiqairave. Auruvano rakavu viro turu verakero vuru tava iratavaro tava mpeqaqirave.

²⁹ Mpeqqaqivarora tiro, vaiintivano paipe varero oru tava teqa vare vairave, tiro.

Masteti auruara uva tuqantaakero tura

(Matiu 13:31-32; Ruki 13:18-19)

³⁰ Ihuva minti tivakero uva tiva nimiqiro viro mintima tiro: Kotiva vaiinti nahentiqa raqikiarirava nana voqaarae vaivo? Virara irihama nana uvae tuqantaake tirarave?

³¹ Ho vira *masteti* auru voqaarama vaivo. *Masteti* auruvano nai inaara auruqaima vaivarovat, vi aurura varakero vataqi utu taivaro³² qampiqe tero vo naaho vo naaho aatarakero uritarero katari voqaara vaivaro vira kaaravata nora kaara vaivaro uvirivano ani vira aumaqaaraini mantaaqavi variaravema turo, tiro.

³³ Minti tivakero Ihuva vi uvvara voqaara vo uva vo uvavata tuqantaakero tiva nimiqi viro vaiinti nahenti ho iri uvaraqa tiva nimura.

³⁴ Viva vaiinti nahenti tiva nimireva kia yutukero tiraitiro, uva tuqantaakeroqai tiva nimiqi yumanta vaiinti nahenti nai maaqa nai maaqa vuvaro Ihuva nariaraa nai vaintinavu hampata vaharo ekaa vi uvvara okara yutukero vinavuka tiva nimura.

Aaronaa uti vauvaro Ihuva tuvaro taiqa vura

(Matiu 8:23-27; Ruki 8:22-25)

³⁵ Vi entara entama vuvaro Ihuva nai vaintinavuara tiharo, Varaiqenavu nora namari maa taqa varenavu yutuni hini mantaraini vuare, tiro.

³⁶ Minti tumanta vira vaintinavu vaiinti nahenti ruvaaqumavi vauka mini ke, Ihuva vau voturaqi vaarire vira vita vare yumanta votu vonavuvata vira vataake yurama.

³⁷ Yikka namariqaa votuqi vi vauvaro vaakama aaronaaavano varuva namariqaa nora utiharo namari ventaqi uri vi vauvaro namarivano votuqira vaarirero mpiaq kareva auti vauvaro³⁸ Ihuva votu vekaini turu ntuva kero vaite vaumanta vira vaintinavu Ihuva vaitonaini oru vira vauraqamake tiha, Maara ti variara vaiintio, tenavu namariqi aquvi *kupeqa/rupeqa* vuarirava aumaiqivo. Kiae are virara noraiqaake iriarao? ti.

³⁹ Vinavuka minti tuvaro Ihuva vaitonaihairo himpiro aaronaa atiharo varuva namariara, Qaqi variane, tuvaro uvaivano taiqa vuvaro namarivano otiniro kia inaaraiqvata qakiraitiro, tirema vaura.

⁴⁰ Mintima vauvaro Ihuva nai vaintinavuara tiharo, Nana aatus qete variavo? Nenavu kiae tiriria kempukaiqaake iriavo? tiro.

⁴¹ Ihuva minti tumanta vira vaintinavu geteha kauqu runkinkiri iha tiha, Maa vaiintiva ta vaiintivave? Aaronaaavanovata, namarivanovata, vira uva iri vairave, ti tura.

5

Ihuva vaiinti vo vira avutaqihairo vaana atitama kora

(Matiu 8:28-34; Ruki 8:26-39)

¹ Vira vaintinavu minti tivake votuqi vi, Kariri Varuva taqa vare hini mantaraini Gerasa vatainai orurora. ² Vinavuka orurovaro Ihuva votuqihairo vaavirero mini vauvaro vaiinti vovano ori onavuqihairo vevvarero otu Ihura vitakora.

³⁻⁴ Vi vaiintiva vaiinti qunte vau ori onavuraqi variqiro vi vauvaro vaanavano vira avutaqi vauva vaumanta yokuka *seni* naaqunta varake vira rumpa tora. Vira rumpa tovaro vi vaiintiva airi *seni* naaquntaqohai aiqu kauqu rumpatora raqikiharo ruqema kora. Qaqiqa qaqiavata vira rumpa karare tuvaro viva *seni* naaqunta ruqeqaama kero, ainiqohai vira aiqu rumpatora rukavu korara tiro, vovano vira rumpa kaarirava kia ho vaura. Vira kempuka aatara kaarirava kia ho vauvaro⁵ vi vaiintiva entaqivata, aatitoraqaaavata, vaiinti qunte vau ori onavuraqi vi aniharo oi oi tivaqiro viro aiqina vauravata niharo oi oi tivaqiro viharo origohairo nai vaata teqa taaqamaqiro vi vaura.

⁶ Vi vaiintiva vaharo niaraihairo Ihura tavero kantero oru vira aiquidaraini tori kauru araviro vaharo⁷ naveraitiharo, Ihuo, Variqa Kotiva nai virini vaiva vaivara are vira Maaquvano variarao. Tiriaria nantiarire tira are aniarao? Are Kotirara irihara kia ti haruanerama turo, tura.

⁸ Ihuva avuni vi vaiintirara tiharo, Qora vaanavauvo, vi vaiintiraqihairo aitarera vuane, tuvarora tiro, vi vaanava minti tura.

⁹ Minti tuvaro Ihuva vi vaanarara nena autu raane tuvaro vaana viva nai autu reharo tiharo, Ti hutu Airitahaakave. Tenavu airinavuma maa vaiintiraqi vauro, tiro.

¹⁰ Minti tivakero vi vaanava qaiqaavata airi tataa Ihurara mpo tiharo, Kia tinavu maa vataraqaahaira tititaane, tiro.

¹¹ Minti tuvaro vi entara quara airitahaan vuruni auhiri ne vaumanta ¹² vaana vika Ihurara mpo ike tiha, Are qaqi tinavu tititairae tenavu quara avutaqai oriqete variare, tuvaro ¹³ Ihuva vika qaqi komanta vaana airitahaan vi vaiintiraqihai aitare oru quara avutaqai oriqete vaumanta viraqaaahai quara 2,000 navu ekaa kante onkai vauraqai otu ravara namariqai aqu vuvaro namarivano vika raqutu komanta qutu taiqa vura.

¹⁴ Quaravano namariqai aquvi qutu vumanta quaragaqaa raqiku vaiintinavuka tave viraqaaahai aiqu autute kante maaqaini orure nora vatukaini vuru vi uvvara tiva qoqaiqamake, aarainivata viha viti viri tiva nimiqi vumanta vi vatanaaka vi haikara tavareka anire ¹⁵ Ihuva vaunaini ani tavovaro vaaka vaana airitahaan vira avutaqai vau vaiintiva qaqi oquviro utavaaqa nonkutero vauvaro vira avu aatovanovata kankoma vuvaro vaumanta vika vira tave getora.

¹⁶ Vika vi vaiintirae tave geteha vaumanta vaiinti vonavu vaaka vi haikara tavoka vika tiva nimihia tiha, Ihuva mintima kaivaro vi vaiintiva koqema vivo, tivake quaranavu uvavata vika tiva nimumanta ¹⁷ vi vatanaaka voqamake geteha Ihurara mpo tiha, Tinavu maaqa maihairsa nena vuane, ti vaura.

¹⁸ Vi vatanaaka minti tuvaro Ihuva votuqira qaiqaa vaarire vauvaro vaaka vaanavano avutaqai vau vaiintiva Ihurara mpo ike tiharo, Kaireqe tevata ainti vuare, tiro.

¹⁹ Minti tuvaro Ihuva aqao tiro, Kia tintira aniane. Are nena maaqaini oru vaharama Noravano ai koqema kero kahaqama amitaainarara vuru nena navunaakavata tiva nimiane. Noravano ariara mpo tiva amitaina uvaravata tiva nimiane, tiro.

²⁰ Ihuva minti tuvaro vi vaiintiva Ihuva tuntema kero, mini kero oru Dekapolisi vatukanavuqi oru niharo Ihuva nai koqema amitorara vaiinti nahenti tiva nimi vauvanta ekaa vira uva iri vauka vi uvvara iriha vika nai kauqu runkinkiri i vaura.

Jairusiva Ihura oru vita kora

(Matiu 9:18-26; Ruki 8:40-56)

²¹ Vi vatanaaka Ihurara kia tinavu maaqaini variane tuvaro Ihuva votuqi anirantero namari taqa varero varuva namari hini mantaraini vumanta mini vaiinti nahenti airitahaan ruvaaqumavi viva vaunaini ututumavi vaura.

²² Ho vika viva vaunaini ututumavi vauvaro vaiinti vovano vi vatukaraqi maara naavuqaa raqiki vauva, Jairusiva amirero Ihura tavero vira aiquidataraini hiqiri viro Ihurara ²³ mpo ike tiharo, Ti raavurauruvano qutu vuvarirava aumaiqivo. Are anira nena kauqu viraqaa vatairaro vira rovaravano taiqa viraro ho qaqi variarire, tiro.

²⁴ Vi vaiintiva minti tuvaro Ihuva vikantiro vura.

Nahentivano Ihura utavaaqa viti autama kora

Ihuva Jairusikantiro aaraini oru vi vaumanta vaiinti nahenti airitahaan vira avataqai viha hihai hihai vira venta ventamaqi vi vauvaro ²⁵ nahenti vovano tora rovara varova vikaqira vaura. Vi nahentiva 12 ihinavuara tora rovara varaqiro viharo voqamakero aihavi vauvaro ²⁶ vo doktaa vo doktaaka vikara ti kahaqiate tiro, monu nimumanta vinavuksa kia vira kahaqiraiti, vira vaata qoraiqama keha vira monuqai qumina namake vauvaro vaura.

²⁷⁻²⁸ Vi nahentiva vaiinti nahenti nivutaini vahiaro Ihuva kaiqa varorara iriro, Ihura naantiaraini aniharo nai tivakero iriro tiharo, Te homa vira utavaaqaqai autama kaariraro ti rovaravano vaaka taiqa vuanarove, tiro. Nahenti viva minti tivakero Ihura utavaaqa autama kovaro ²⁹ vaakama vira naare ntova aaharauqama vuvaro viva iruvaro vira vaatavano ho vaura.

³⁰ Vi nahentira vaatavano koqema vuvaro vaakama Ihuva iruvaro nai kempuka hinivan vira vaataqihairo aitarero vuvaro viva tuqantaaviro vaiinti nahenti vira avataqai ani vauka irero tiharo, Tavave ti utavaaqa autama kaivo? tiro.

³¹ Ihuva minti tumanta vira vaintinavu tiha, Nai tavave ai autama kaivo? Tavaane, vaiinti nahenti airitahaan ai venta ventamaqi vi variavo, ti.

³² Minti tuvaro Ihuva qaqqai vaiinti viri vira ranta kareva aituti vauvaro ³³ nahenti viva nai vaata koqema amitorara iriharo qeteharo aiqu kauqu ntiri ntiri i vauvaro oru Ihura aiquidataraini hiqiri viro vi uvvara ekaa uva qoqaa tiva amuvaro ³⁴ Ihuva vi nahentirara tiharo, Ti raavuravaavo, are tirirara viva ti ho kahaqianarove tiararoma ai vaata koqema vivo. Homa ai muntukavano paru i vairara vuane. Ai rovaravano taiqama vivo, tiro.

Jairusira raavura koqema kora

³⁵ Ihuva minti ti vaumanta vaiintinavu Jairusira naavuqihai ani Jairusira vitake virara tihamo, Ai raavuravano qutuma vivo. Maara ti vai vaiintira kia qaiqaa ravaaqavu kaane, tuvaro ³⁶ Ihuvavata vinavuka uva iriro maara naavuqaa raqiki vau vaiintirara tiharo, Kia qetaane. Tiriara kempukaiqama kera irihara variane, tiro.

³⁷ Ihuva minti tivakero viva Pitaaravata, Iemiravata, Iemira qata Ioniravata, vinavuqaqai ntita varero ³⁸ Jairusira naavuqi oruroro tavomanta vaiinti nahenti no-raiqaaq mpo ike tiha iq'i rate vauvaro ³⁹ Ihuva naavuqi oriqetero tiharo, Nana haikarae ne iq'i rate variavo? Vi nahenti vaintiva kia qutu vivo. Viva qaqi vaitema vaivo, tiro.

⁴⁰ Ihuva minti tumanta vaiinti nahenti Ihura uvvara naaraihamma amite vauvaro Ihuva vira kaara ekaa vaiinti nahenti vara veva vahaqaqini kero nahenti vaintiru vira nok aqavata, taaramonavu nai vataake anukavata, vinavuqaqai ntita varero vo rumuqi vi nahenti vaintiva qutu vumanta vato rum uraqi oriqetero ⁴¹ vira kauqu utu varero nai uvaqihairo tiharo, *Tarita kum*—Maa nahenti vaintiruvaavo, te ariara himpuane turo, tiro.

⁴² Ihuva minti tuvaroma vi nahenti vaintiruva vaaka himpiro ni vaura. Viva 12 ihi varakova himpiro ni vaumanta vinavuka vira tave ravukuvu voqamake kauqu runkinkiri i vauvaro ⁴³ Ihuva vinavuka nitiharo tiharo, Ho nenavu maa haikara tavaanara kia vo vaiinti nahentivata tiva nimiate. Maa nahentirura karaqai amiate, tiro. Ihuva turama.

Nasaretihainaaka Ihura qoririma amitora
(Matiu 13:53-58; Ruki 4:16-30)

6

¹ Ihuva vi vatara mini kero nai maaqa „Nasaretiini„ vumanta vira vaintinavu vira vataake vurama.

² Ihuva nai maaqaini oru vaharo Maara Entaqaa oru maara naavuqi uva vakaaka tiva nimi vaumanta vi naavuraq'i vaiinti nahenti airitahaa ruvaaqumavi vauka vira uva iriha kauqu runkinkiri i vaiha tiha, Ike, vi vaiintiva taini vaharoe vi uvvara vi uvvara okara iritairave? Viva vi okarara vi okarara ti vaira nana uva okara vaivaroe ti vaivo? Ta vaiintiva vi kaiqara okara umiqaivaroe viva nora kaiqa vare vaivo? ³ Viva tainta auti vai vaiintivaqaima vaivo. Viva Mariara maaquvanove. Vira qatanavu Iemiva Iosiva Iutaava Saimoniva variarave. Vira auravanavata maini variarave, ti. Minti tivaqi viha Ihura navunaaka virara qumina vaiintive tivake vira qoririma amitora.

⁴ Vika vira mintima amite vauvaro Ihuva vikara tiharo, Paropeti vaiinti Kotira uva tiva nimi variarirava vo vataini oru vairamanta vi vatanaaka virara quaheha vira nora autu amivarave. Vi vaiintiva nai maaqaini vaharo nai aura qata hampata vairamanta vira navunaaka virara qumina maa vatanaavaqaima vaivo tivake kiama virara nora vaiintive tivarave, tiro.

⁵ Minti tivakero vaiinti nahenti Ihurara qumina vaiintive tura kaara Ihuva kia ho nai vatukaini nora kaiqa varaarirava vauvaro viva nai kauqu nihavuka taararaqaaqai vato-varo vinavuka rovara taiqa vura. ⁶ Vira navunaaka virara kia ho tinavu kahaqiariravave tura kaara Ihuva ravukuviro airi avu aato utiharo vaura.

Ihuva nai vainti 12 navu vo vatuka vo vatukaini nititorara tura
(Matiu 10:5-15; Ruki 9:1-6)

Vi vatukaraqaahairo Ihuva himpiro vo vatuka vo vatuka variqi viharo vaiinti nahenti nai vakaaka tiva nimiqiro vi vaura.

⁷ Ihuva nai vainti 12 navu naarama ruvaaquma kero taaraqanta vona nititero taaraqanta vona nititero mintiaqiro viro ekaa nai vainti vinavuka nititama kora.

Viva vinavuka nititeharo vikara vajintiqihai vaana nititamanta qaqini aitaraate tiro, viva vika kempuka nimiyo tiharo, ⁸ Nenavu aaraini vireka ihama kia karave utave monuve vo airairave ruva vararaiti, kauruqai kauquqi tota vare vuate.

⁹ Ne homa aiqu nonkira viraqai nonku vare vuate. Kia sioti taaraqanta vararaiti, sioti vohaiqaqai nonku vare vuate, tiro.

¹⁰ Ihuva vi uvvara tivakero maa uvaravata vinavuka tiva nimiyo tiharo, Nenavu oru vimanta vi vatanaaka niara quaheha ni ntitaivera, nenavu vohaa naavuqiqai variqi vima vi vatukara mini kema vuate. ¹¹ Nenavu oru vimantama vi vatanaaka kia ninavu quahama nimiteha kia ninavu uvavata irireka autivera, vika nai qora okara ni autu nimitera tavaate ti, ne nenta aiquqaahai vi vatukaqihainaa konkomma rintatike vuate, tiro.

¹² Ihuva minti tivakero nititomanta vira vaintinavu orure vaiinti nahenti tiva nimiha tiha, Ne qora aara qaqrake koqe aaraqaqai vuate, ti.

¹³ Vika minti tivaqi viha vaiinti avutaqi vau vaanauka nititomanta qaqini aitare vumanta nihavu vaiintika airitahaa vika vahavera aqu nimiteha koqema nimitomanta ho vaura.

*Namari nimi vau vaiintira Ionira arukora
(Matiu 14:1-12; Ruki 9:7-9)*

¹⁴ Mintumanta ekaa vi vatanaaka Ihurara nai tiva ami nai tiva ami i vauvarora tiro, King Herotiva „Kariri vataqaa raqiki vauva“, vivavata Ihura autuara irura.

Vaiinti nahenti hini kuka Ihurara mintima ti, Vi vaiintiva Ionivave. Ioniva namari nimi vau vaiintiva qutu vunaihairo qaiqaa qaqi himpiro ni vaharora tiro, viva nora kaiqa ho vare vaivo, ti.

¹⁵ Hini kuka minti ti vaumanta hini vaiinti nahenti aqao ti, Vi vaiintiva tinavu kaivaqava Elaitaava qaiqaa qovaraiqaa vivo, ti. Minti tumanta vokuka Ihurara tiha, Ihuva haaru enta vau paropetika voqarama vaivo, ti.

¹⁶ Vaiinti nahenti Ihurara minti ti vauvaro Herotiva vi uvvara iriro tiharo, Oho, vi vaiintiva namari nimi vau vaiintiva vaivo. Te tiavauraro vaiinti vo, auntu teqa aquko vaiintiva Ioniva, vivama qutu vunaihairo qaiqaa qaqi himpiro ni vaivo. Viva qutu vunaihairo qaiqaa qaqi himpiro ni vaharora tiro, viva nora kaiqa ho vare vaivo, tiro.

¹⁷⁻¹⁸ Tota Herotiva nai qata Piripira naata Heroti-Namarira varatero vauvaro Ioniva anirero airi tataa Herotirara tiharo, Are nena qata naata kia varaataara vaivarama varaaraao, tuvaro vira kaara Herotiva nai naata Heroti-Namarirarao tiro, viva vaiinti vonavu nititomanta vika Ionira oru ravaaqavuke rumpa vare vuru karapuhiqama kora.

¹⁹ Ionira karapuhiqi vuru kovaro Herotira naata Heroti-Namariva vaharo Ioniva virara tu uvvara kaara toma amiteharo Ionira arukaare tuvaro, vira arukaarira aarava kia ho vaura. ²⁰ Ioniva koqe vaiintivano avuqavu ni vaurara tiro, Herotiva virara iriharo vira aatu geteharo kia vira arukaate tiro. Minti tivakero Herotiva Ioniva ti vau uvvara virara quaheharovata, vi uvvara taara aato iriharo vaura.

²¹ Mintiaqi vuvaro vo enta Heroti-Namariva Ionira arukaarira aarava ho vaura. Vi uvvara okara maantimama vairo:

Herotiva nai vatato entara iriharo vi entaraqaa nora vaiinti kara nimireva vika naaraora. Viva nora vaiintinavuve, nai iqoka vaiintiqaa raqiki vaukave, airi airaira vato vaiintikave, viva vika vika naarama kero kara nimura.

²² Viva vika kara nimumanta ne vauvaro Heroti-Namarira vira raavuravano ani vika ihi rava nimitora. Viva ihi re vaumanta Herotivavata viva kara nimu vaiintikavata vi varaataara quahama amite. King Herotiva vi varaatarara quaheharo vira irero tiharo, Nana haikarae ai muntukavano vainara, virara tiva timiraqe te ai amiare, tiro.

²³ Minti tivakero viva kauqu aiqiqaa aqukero tiharo, Te quqaama turo. Are nana haikara tirage te homa ai amirarave. Hini vata te raqikaina vataro, are tirage te vi vataro rairake homa ai amirarave, tiro.

²⁴ Herotiva minti tuvaro vi varaataava viraqihairo vevarero oru nai nora irero tiharo, Te nana haikarae tiariraro ti timianarove? tiro.

Minti tuvaro vira nova tiharo, Are mintima tiane. Namari nimi vai vaiintira Ionira qiata timiane tiane, tiro. ²⁵ Vira nova minti tuvaro vira raavuravano kantero orurero King Herotira naariharo tiharo, Namari nimi vai vaiintira Ionira qiata vaaka tanuqira viri timiane, tiro.

²⁶ Vi varaataava minti tuvaro King Herotiva voqamakero muntuka qoraiquvarovata, viva vaaka kauqu aiqiqaa aqukeharo tu uvvara iriharo kara nareka anu vaiintikaravata iriharo, Te vi varaataara tiva amuna uvvara raqa kaarorave, tivakero ²⁷ viva karapuhi vaiintiqaa raqiku vaiintira vo vaaka atitero tiharo, Ionira auntu teqakera vira qiata vara vuru timiane, tuvaro viva oru karapuhiqi vaharo vira auntu teqa aqukero ²⁸ vira qiata tanuqi varero vuru vi varaataara amuvaro viva varero vuru nai nora amura.

²⁹ Mintumanta Ionira avataqi ni vau vaiintinavuka vi uvvara iri vinavuka ani Ionira vaata vare muntu quntama kora.

*Ihuva inaara kara airiqamakero 5,000 vaiinti nimura
(Matiu 14:13-21; Ruki 9:10-17; Ioni 6:1-14)*

³⁰ Ihuva noraiqamako vaiintinavuka aaraini ni orurante Ihuva vaunaini ani ruvaaqumavi vahira vika nai aaraini niha kaiqa varoravata, vika vaiinti nahenti tiva nimu uvaravata, Ihura tiva amura.

³¹ Vika vira tiva amumanta vi entara vaiinti nahenti airitahaa Ihura tavareka vi ani vaumantara ti, Ihuvavata vira vaintinavuvata kia ho kara naraiti vaura. Mintuvaro Ihuva tiharo, Varaiqenavu oru qumina kanta variari nenavu mini vahira auraara variate, tiro.

³² Ihuva minti tivakero vinavuka ntita vareror votuqi vaarirero qumina kanta vireva vurama. ³³ Vinavuka mini ke vumanta airi vaiinti nahenti vinavuka tave tiha, Vinavuka vate vi mantarainima vivarave, tivake vika vo vatuka vo vatukaihai kante varuva auvahianta vatavau Ihuva vireva unaini vaaka vika naane orurora.

³⁴ Vika naane orurovaro Ihuva vika naantiara orurero votuqihairo vataini vaavirero vaiinti nahenti airitaha ruvaaqumavi vauka tavero vikara aaqurihama nimitero tiharo, Ike, vaiintivano sipisipiqa raqiki vaiva kia vaimanta sipisipi hampi vi ani iantemake, maa vaiinti nahentika hampi vi ani variavo, tiro. Minti tivakero mini vaiharo Ihuva uva vaaka vika tiva nimi vaura.

³⁵ Ihuva uva tivaqi vuvaro kuari avu vitini tuvi vumanta Ihura vaintinavu viva vaunaini orure tiha, Kuari avuvano vitini tuvi vivo. Maini qumina kantave. ³⁶ Are vaiinti nahenti maaka nititara oru vo vatuka vo vatuka niha monu nimiha kara varaate. Vika kia kara ruvavare aniaqave, ti. ³⁷ Vira vaintinavu minti tuvaro Ihuva aqao tiro, Nenavu vika kara nimiata, tiro.

Tumanta vinavuka Ihura ireha tiha, Tenavu nora monu 200 kinaae aqukeha kara varake vika nimirarave? ti.

³⁸ Minti tuvaro Ihuva vinavuka irero tiharo, Nanti nanti mparetie ruvavare aniaovo? Oru tavaate, tumanta vinavuka oru tavamake viri vira tiva ami tiha, Mpareti vohaa kauquraqaima vaivo. Havuka taaraqantaqaima vaivo, ti.

³⁹ Vira vaintinavu minti tuvaro Ihuva vaiinti nahenti tiva nimiro tiharo, Ne ekaa ukau kanta vo kanta oquivi variate, tiro. ⁴⁰ Minti tumanta vika vo kanta 100 navu oquivi vaumanta vo kanta 50 navu oquivi, mintiaqi vi ekaa vaiinti nahenti oquivi vaura.

⁴¹ Oquivi vauvaro Ihuva mpareti kauqurunavuvata, havuka taaraqantavata, varakero naaruvinai taveharo Kotirara koqema iarao tivakero, mpareti nkuihero viti nai vaintinavu nimiro tiharo, Ho ne vare vika vuru nimimanta ekaa naate, tivakero havuka taaraqantavata raira kero ekaa vaiinti nahenti nimumanta ⁴² ekaa vika ho nora.

⁴³ Ho nomanta Ihura vaintinavu viraqaahai rutantuto utara nora uta varake, vaiinti nahenti mparetivata havukavata neha kora nuntu vare utaqi ruvaqi vi, 12 utanavu mpiqa kora.

⁴⁴ Vi entara 5,000 vaiinti airitaha vi karara nora.

Ihuva varuva namari mare/turu vaura aiqu ravaqiro anura
(Matiu 14:22-33; Ioni 6:16-21)

⁴⁵ Ihuva kara nimiro viraqaahairo vaakama nai vaintinavu nititero tiharo, Nenavu naane votuqi vaarire varuva namari hini mantaraini taqa vare Besaida vatukaini oru vi vaiqe te vaiinti nahenti nititaari vika nái maaqa nái maaqa vuate, tiro. ⁴⁶ Tumanta vinavuka votuqi vaarire vuvaro Ihuva verara aiqinaqaa Kotira aarareva oru vura.

⁴⁷ Ihuva Kotira aarareva mini vuvaro entama vumanta votuqi vuka namari tavaara kanta oru vi vauvaro Ihuva nariaraa vataini mini vaura.

⁴⁸ Ihuva qaqlini mini vaiharo tavovaro uvaivano vinavuka vireka unaihairo aniharo votu vente vaumanta vinavuka votuqi vauka vukaari utiha namari rairaqui vi vaura. Vinavuka vukaari utiha namari rairaqui vi vauvaro aumaiqakaa aatitareva uvapo Ihuva vinavuka ntita kareva varuva vaura aiqunaahairo rava varero anura.

49-50 Viva aniharo vinavuka ai naatara kaare tumanta vinavuka tavovaro Ihuva varuva vaura aiqunaahairo rava varero ani vaumanta vinavuka voqamake aatu itomanta vika virara vaanave tihama qeteha oi oi ti vaura.

Vinavuka oi oi ti vauvaro Ihuva vaaka vinavukara tiharo, Muntuka paru i vaira variate. Tema anuro. Kia qetaate, tiro.

⁵¹ Minti tivakero Ihuva votuqi vaarirero vinavuka hampata vauvaro uvaivano taiqa vi tirema vaumanta vinavuka voqamake ravukuvi kauqu runkinkiri i vaura.

⁵² Ihuva mpareti taaraqa airiqama kero vaiinti nahenti nimumanta no okarara vira vaintinavu kia virara iriraiti, vika kia Ihura okarara kankomake irura.

Ihuva Kenesareti vataini oru vaiharo nihavuka koqema kora
(Matiu 14:34-36)

⁵³ Vinavuka oru vi varuva namari hini mantaraini Kenesareti vataini orure vaavire votu rumpate ⁵⁴ vi mantaraini vire umanta vi vataanaaka Ihura viraqaqamake tave, Ho Ihuva anivo, ti. ⁵⁵ Minti tivake vika kante oru vutuhai vuruhai aihavu vaiinti nahentika taintanavu vare Ihuva mini vaivo tunaini muntu kora.

⁵⁶ Ihuva vi vataaraqaa vaiharo vo vatuka vo vatuka niharo inaara vatukave, nora vatukave, naahogi vau vatukaraqive, Ihuva mini mini ni vaumanta vi vataanaaka vika nái vatukaihai nihavu vaiinti nahentika tainta vare vuru vatukaqaa vate, Ihurara mpo ike tiha, Hoe nihavi varia vaiinti nahentika ai utavaqaqaa viti autama kevarave? tuvaro Ihuva hove tumanta ekaa vira utavaqaqaa autama ko vaiinti nahentika koqema vura.

*Kotiva tivatai uvava vaiinti uva aatara kero vairave, tura
(Matiu 15:1-9)*

¹ Parasi vaiintinavuvata maara okara ti vau vaiintinavukavata Ihura tavareka Ieruharemihai ani Ihuva vaunaini ruvaaqumavi vaiha ²tavomanta Ihura vainti hininavu vaiha Parasi vaiinti uva maara tu okarara qaqirake, kia kauqu hiqama karaiti, kara ne vaura.

³ Vi entara Parasi vaiintinavuvata ekaa Iutaa vatanaakavata nái kaivaqaukavara tivato uva maarara iriha minti mintima keha vika nái kauqu hiqe vaura. Vika kia kauqu mintimake hiqama karaiti, vika kia kara ne vaura. ⁴Vika oru *maaketiqi* nuvake ani vaiha, kia nái kauqu mintimake hiqama karaiti, vika kia kara nora. Vika kaivaqaukavara *kaapu* hiqe okararave, tanu hiqe okararave, vi uvvara vi uvvara tiva nimura iriqi viha minti vaura.

⁵ Vika vi uvvara iriqi ni vaukara ti, Parasi vaiintinavuvata, maara okara ti vau vaiintinavukavata, Ihura ireha tiha, Tinavu kaivaqaukavara uva maara tiva torara ai vaintinavu vi uvvara qumimaqamake kia iriraiti, qaqi kara ne variavo. Vinavuka nantihae minti variavo? ti.

⁶ Minti tuvaro Ihuva vika nái tiva nimiro tiharo, Nenavu unaqaraiqama keha Kotira kaiqa vare variakave. Aisaiaava haaru enta vaiharo niara avuqavuqama kero qara ntuva torave. Aisaiaava Kotira uva qoqaiqama keharo Kotiva mintima tivo tiro:

Maa vatanaaka noqihai ti hutu tuahere variavaro vika muntukavano kia tiriara vaivo.

⁷ Vika maara tihamma vika nái kaivaqaukavara uvaqai vaiinti nahenti tiva nimihara ti, vika qumina ti hutu tuahere variavo, ti tura. *(Aisaiaa 29:13)*

Aisaiaava Kotiva tu uvvara mintima kero qara ntuva torave. ⁸ Kotiva niara minti mintima iate ti uvvara, ne vi uvvara qumimaqamake qaqi vaiinti tivataa uvaraqai iriha ni variarave, tiro.

⁹ Minti tivakero Ihuva vika tiva nimiro tiharo, Ho koqema iavo. Kotiva minti minti iate tu uvvara, ne vi uvvara qoririma keha ni kaivaqaukavara tivato uvaraqai iriha ni variakave. ¹⁰ Mosiva Kotiva tivato uvvara iriharo viva niara tiharo, *Nena noka qoka koqe okaraqai autu nimitaane. Nai noka qokaa uva ti vaina vaiintira arukaate*, turave.

¹¹ Mintima Kotiva tivato uvava vaimanta ne vi uvvara kia iriraiti, nenta irike ne tiha, Vaiintivano nai noka qokara tiharo, Te nitanta kahaqicha nimire iaina monura kia nitanta nimiraiti, te vi monurara Kotira amitaaina monurave tirarave. Vaiintivano minti tirera, ne tiha, ¹² vi vaiintiva homa nai noka qoka kia kahaqiraitiro, qaqi varianarove, tiarave.

¹³ Ne hampi uva minti tiha ne Kotira uva qumimaqamake keha nenta kaivaqaukavara tiva nimu uvvara viraqai vaiinti nahenti tiva nimi variarave, tiro.

*Nana haikavanoe vaiinti qoraiqama kaivaro Kotiva virara kia koqe vaiintive tianarove? tura
(Matiu 15:10-20)*

¹⁴ Minti tivakero Ihuva vaiinti nahenti ruvaaqumavi vauka qaiqaa naarama kero vikara tiharo, Ne ekaa te tire iaina uvvara kankomake irihama variate.

¹⁵ Vaiintivano ne vai karava, vi karava kia ho vaiinti avu aato qoraiqamake vairave. Nai avu aatoqihairo qovaraiqaavi vai haikava, vi haikavaqai vi vaiintira qoraiqamake vairave. ¹⁶ Ni aato koqe aato vairera, ne vi uvvara okara kankomake iriate, tiro.

¹⁷ Ihuva minti tivakero vaiinti nahenti ruvaaqumavi vauka mini kero naavuqi oru vaumanta vira vaintinavu viva vaaka uva tuqantaakero karara tu uvvara okara vira irovoro ¹⁸ Ihuva tiharo, Ike, ne vi uvvara kiae kankomake iriavo? Karavano aaqaihairo vaata avutaqai vi vai haikava kia ho vaiinti avu aato qoraiqama kaanarove.

¹⁹ Vi karara naivaro kia vira avu aatoqiqi vietetaraitiro, vira araraqiqai otu variro ho viraqihairo qaqini tuvitarairave, tiro.

(Ihuva tu uvvara vira okara mintimama vairo: Ne ekaa kara homa naivaro Kotiva vira kaara kia niara qora vaiintive tianarove, tura.)

²⁰ Ihuva minti tivakero uva vo tiharo, Avu aatoqihairo qovaraiqi haikava, vi haikava vi haikava vaiinti avu aato qoraiqama kairave.

²¹ Vaiinti avu aatoqihairo vaaqu kaiqa varaarira okarava qovaraiqivo. Quvaaraavanovata varaatavanovata hampi nuarira okarava viraqihairoma qovaraiqivo. Muara varaarira okarava viraqihairoma qovaraiqivo. Vaiinti arukaarira okarava viraqihairoma qovaraiqivo. Vora qoraintintirove, vora naatantirove, hampi nuarira okarava viraqihairoma qovaraiqivo.

²² Vora airairara muntuka ntiraro varaarira okarava viraqihairoma qovaraiqivo. Monuve airairave vateharo qaiqaa qaiqaa voqavata vataare tivakeharo varaarira okarava viraqihairoma qovaraiqivo. Una uva tiariravave, nai vaata hampi qohaama keharo ni variariravave, vora airairara tivata timiataarave tiharo vira toma amitaariravave, vaiinti vora autu vataini tuvi vuvarire tiro, una uva tiariravave, te nora vaiintima vauro tiariravave, hampi ruhaainararaqai iriqi nuariravave,²³ vi okarava vi okarava vaiinti avu aatoqihairo qovaraiqama vira vira avu aato qoraiqama kaivararo vira kaara Kotiva virara qora vaiintive ti vairave, tiro.

*Vo vatanaa nahentivanu Ihurara kempukaiqamakero irurara tura
(Matiu 15:21-28)*

²⁴ Ihuva minti tivakero vi vatara mini kero oru vo vataini Taiaa vatukavata Saidoni vatukavata vau vataraga oru vaura. Viva mini oru vaiharo vi vatanaaka te maini aniainarara irvorave tiro, oru vo naavuqi vauvarovata, nahenti vovano Ihuva anurara vaaka irura.

²⁵ Vi nahentira raavura avutaqi vaanavano vauvaro vi nahentiva Ihuva vauraqi orurero Ihura aiquidataraini hiqiri viro vaura.²⁶ Vi nahentiva kia Iutaa vatanaa nahenti vairaitiro, viva Siria vataini Fonisia vatukaqi vataotu nahentiva vaura. Viva Ihurara tiharo, Mpo, ti raavuraqihairo vaana atitairaro qaqqini aitararire, tiro.

²⁷ Nahenti viva minti tuvaro Ihuva nai tiva amiharo uva tuqantaakero tiharo, Aqao, kaiqe te tenta vaintaira naane kara nimire. Hauri te vaintivanu ina karara varake vairi aqu nimitaarorave, tiro. „Ihuva uva tuqantaakero tu uvvara okara mintimama vairo: Viva tiharo, Kaiqe te Iutaa vatanaaka naane kahaqiare. Hauri te vo vatanaaka naane kahaqiarorave, tiro.“

²⁸ Tuvaro vi nahentiva tiharo, Nora Vaiintio, are quqaama tira iarao. Ho vairinavu tainta ankaraaraqai vahia vaintivanu kara viti aqukaira ho ne variarave, tiro.

²⁹ Nahenti viva minti tuvaro Ihuva tiharo, Koqema tiarao. Are minti tiaraveria te vaana vira atitauraro qaqqini aitararivo ai raavurvavano homa vaivo. Ho nena maaqaini vuane, tiro.

³⁰ Ihuva minti tuvaro nahenti viva nai maaqaini anirantero viro orurero tavovaro vira raavurvavano taintaqua ho vaite vauvaro vaanavano vi nahenti vaintiruraqihairo qaqqini aitarero vurama.

Ihuva aatovata novata tintavu vaiintira koqema kora

³¹ Ihuva vatuka vo Taiaini variro viraqahairo Saidonini oru variro vihairo virantero Dekapolisi vatukanavu vara mini kero Kariri Varuva namari vainaini tuvurora.

³² Mini tuvurero vaumanta vokuka vaiinti vo vita vare Ihuva vaunaini vuru kora. Vi vaiintira aato tinta vuvaro viva uvavata kia tu vaiintiva vaumanta vika vira vita vare muntu Ihuva vaunaini ke Ihurara mpo tiha, Nena kauqu viraqaa vatairaro ho variarire, ti.

³³ Vinavuka minti tuvaro Ihuva vi vaiintira vitero vaiinti nahenti mini kero oru nariaraatanta vahia Ihuva nai vuqa vi vaiintira aatona vatero viraqahairo taara vihikero taara vi vaiintira maaqiriqaa vatero³⁴ naaruvaini taveharo ae tiro, nai uvaqihairo tiharo, Epatave—Qantuaraane, tiro.

³⁵ Minti tuvaro vira aato tinta vuva vaakama ho qantua vuvaro viva ho iriro vauvaro vira maaqirivanovata ho vuvaro vi vaiintiva vutukero uva ti vaura.

³⁶ Mintuvaro Ihuva vira navunaakara kempukaiqama kero tiharo, Maa haikara tavaanara kia voravata tiva amiate, tiro.

Ihuva minti tumanta vika Ihuva tu uvvara kia iriraiti, vi uvvara viti viri ekaa vaiinti nahenti tiva nimiqi vi vaura.

³⁷ Vika viti viri vi uvvara tiva nimiqi vumanta vi uvvara iruka ike tiha kauqu runkinkiri i vahia tiha, Viva ekaa kaiqa koqema kero vare vaivave. Aato tinta vuaka viva koqema kaimanta ho iri variarave. Kia uva ti variaka viva koqema kaimanta vika ho uva ti variarave, tura.

8

Ihuva qaiqaavata inaara kara airiqama kero nimura

(Matiu 15:32-39)

¹ Vi entara vaiinti nahenti airitahaa Ihura tavareka ani ruvaaqumavi vaura. Vika kia karavata ruva vararaiti, ani uki vauvaro Ihuva nai vaintinavu naarama kero tiharo,² Te vaiinti nahenti uki variakara aaqurihama nimite vauro. Vika taaramo enta ti vataake variqi viha vika nái vare ania karara nama taiqa kaavo.³ Te vika nái maaqaini nititama

kaari vika narara viha aarana *vuakaatama/vuakaatauma* vi hinqintivorave. Vika hini kiaka niaraihaiavata anikave, tiro.

⁴ Ihuva minti tumanta vira vaintinavu aqao ti, Maini qumina kantave. Taihae tenavu kara varake vika nimirarave? ti.

⁵ Vika minti tuvaro Ihuva vinavuka irama nimitero tiharo, Nenavu nanti nanti mparetie ntuvu taavo? tumanta vinavuka tiha, Mpareti 7 navu ntuvu tauro, ti.

⁶ Vira vaintinavu minti tuvaro Ihuva vaiinti nahentia vatakanta oquvuate tivakero mpareti 7 navu varakero Kotirara koqema iarao tivakero vi karara nkuihero nai vaintinavu nimiro ne vaiinti nahenti nimiate tiro. Tumanta vinavuka vaiinti nahenti uki vauka nimura.

⁷ Nimuvaro Ihuva inaara havukanavuvata vatora varakero Kotirara koqema ira iarao tivakero tiharo, Ne havukavata rairake nimiate, tiro.

⁸ Minti tumanta vinavuka kara vira varake vika nimumanta vaiinti nahenti vika ho nora. Ho neha hini kara qaqi kora vira vaintinavu nuntu vare rutantuto utara 7 navu mpiqa kora. ⁹ Vi entara 4,000 vaiinti nahenti airitaha vi karara ho nora.

¹⁰ Ho Ihuva vaiinti nahenti mintima kero kara nimiro vika nititama kero viraqaaahairo viva nai vaintiaravata votuqi vaarirero varuva taqa varero Damanuta vataini vura.

Parasi vaintinavu Ihurara nora kaiqa tinavuvata humiqaane tura

(Matiu 16:1-4; Ruki 12:54-56)

¹¹ Ihuva Damanuta vataini viro oruromanta Parasi vaiintinavu Ihuva vaunaini oru vi orure Ihura titorima amitareka vira avateha tavaare tivake tiha, Are nora kaiqa vo tinavu tivuqa varairete tenavu taveha, ariara quqaama Kotiva vira atitairave tiare, ti.

¹² Vinavuka minti tuvaro Ihura muntukavano qoraiquvaro viva ae tiro, Vate varia vaiinti nahentika nantihae tiha, Nora kaiqa vo tinavu humiqairaque tenavu tave ai okarara quqaave tiare, ti variavo? Te quqa uva tiari iriate. Vate maa entara vaika vaiqe te kia tenta okara vika numiqehama nora kaiqa vo vararerave, tiro.

¹³ Ihuva minti tivakero qaqira vinavuka mini kero votuqi vaarirero anirantero varuva hini mantaraini taqa varero vurama.

Parasi vaiinti kaiqa aatu rauriha variate tura

(Matiu 16:5-12)

¹⁴ Varuva namariqaa oru vi vaumanta Ihura vaintinavu mpareti tauruke kia ruva vararaiti, mpareti vohaiqaqai votuqi vare anuvaro ¹⁵ Ihuva uva vo tugantaakero vinavukara tiharo, „Kaupititiravano avituma viro mpareti ntera kaivaro noqa virave.“ Parasi vaiintinavuvata Herotivavata vika kaupititira voqaarama variavo. Nenavu vika naatu rauriha variate, tiro.

¹⁶ Minti tumanta vira vaintinavu Ihuva tugantaakero vato uvara okarara kia iriraiti, nai tiva ami nai tiva amiha tiha, Nana uvae tivo? Mpareti tauru kaunara vira kaarae minti tivo? ti.

¹⁷ Minti ti vauvaro Ihuva vinavuka tu uvara iriro tiharo, Ne nantihae mpareti tauru kaara vira kaara nai tiva ami nai tiva ami i variavo? Kiae ni avu aato kenko timanta iriavo? Ni avu aato tinta vimantae kia ho iriavo? ¹⁸ Ne avu vataaka kiae ho tavaavo? Ne aato vataaka kiae ho iriavo? Te kaiqa varaunarara ne taurue kaavo? ¹⁹ Te 5,000 vaiinti nahenti mpareti vohaa kauquru nkuike nimitaavauna entaraqaa kia no karara nuntu vareha, ne nanti nanti rutantuto utarae mpiqa korave? tiro.

Ihuva minti tumanta vika tiha, Ho vi entara tenavu uta 12 navu mpiqa kaavaunarave, ti.

²⁰ Vinavuka minti tuvaro Ihuva qaiqaa tiharo, Ho te 4,000 vaiinti mpareti 7 navu nimitaavauna entaraqaa, kia no karara nuntu vareha, ne nanti nanti utae mpiqa korave? tiro.

Minti tumanta vinavuka tiha, Ho tenavu uta 7 navu mpiqa kaavaunarave, ti.

²¹ Vika minti tuvaro Ihuva tiharo, „Nenavu te vi kaiqara varaunarara iriataara vaimanta kia iriarave. Nenavu mpareti kia vararaiti vohaiqaqai vare aniarara ti, ne quminama nai tiva ami nai tiva ami i variavo.“ Ni aato kenko tira ti okarara kankomake iriataara vaimanta ne kiae ti okarara kankomake iriavo? tiro.

Ihuva vaiinti vo avu qimpavura rampai amitora

²² Ihuva nai vaintiaravata oru viro Besaida vatukaini orurero mini vaumanta vokuka avu qimpavu vaiintira vita vare Ihuva vaunaini vuru ke Ihurara mpo tiha, Are maa vaiintiraqaa nena kauqu vatairaro vira avu rampai viraro ho tavaarire, ti.

²³ Minti tuvaro Ihuva avu qimpavu vaiintira kauqu utu varero vira vita varero vatuka aqaimini vuru kero mini vaiharo vira avuqaa taara vihikero nai kauqu viraqaa vatero vira irero, Are vo haika hoe tavaaraao? tiro.

²⁴ Ihuva minti tuvaro vi vaiintira avu rampai vireva uvaro viva vutuni vutu tavero tiharo, Te vaiinti tave vauramanta vika vi anihama vika katarivano vi anintemake ni variavo, tiro.

²⁵ Minti tuvaro Ihuva qaiqaavata nai kauqu vira avuqaa vatovaro vi vaiintiva aitutuma tave vauvaro vira avuvano kojemakero rampai vuvaro viva ekaa haika anoma kero ho tavora. ²⁶ Vi vaiintiva kojemakero ekaa haika ho tavovaro Ihuva vira atitero tiharo, Are kia aniranteria vi vatukaraqaa viraitira, nena maaqaini vuane, tiro. Ihuva turama.

Pitaava Ihura okarara tura

(Matiu 16:13-20; Ruki 9:18-21)

²⁷ Viraqaahairo Ihuva nai vaintinavuaravata oru Sisaria Piripai aumanto vau vatukanavuraqi viro. Mini aaraini viharo Ihuva nai vaintinavu irero tiharo, Vaiinti nahenti tiriara ta vaiintirave tihae ti variavo? tiro.

²⁸ Minti tumanta vinavuka tiha, Vokiaka ariara viva Ioniva namari nimi vau vaiintivave ti variamanta, vokiaka ariara viva tinavu kaivaqava Elaitaavave ti variamanta, vokiaka ariara viva tinavu kaivaqava paropeti vaiinti vovano qaiqaa qovarama viro ni vaivo ti variavo, ti.

²⁹ Vinavuka minti tuvaro Ihuva vinavuka irero tiharo, Ho nentanavu vo? Nentanavu tiriara ta vaiintirave tihae ti variavo? tiro. Minti tuvaro Pitaava tiharo, Are *Mesiaavano—Kotiva atitai vaiintivama* variarao, minti tiva kehama ti vaunarave, tiro.

³⁰ Minti tuvaro Ihuva vinavukara kempukaiqamakero tiharo, Kia vokavata vi uvvara tiva nimiate, tiro.

Ihuva naantiara nai qutu vuainarara tiva nimura

(Matiu 16:21-28; Ruki 9:22-27)

³¹ Minti tivakero Ihuva uva hoqarama tero viva naantiara nai qutu vuainarara vinavuka tiva nimiro tiharo, Te Vataini Vatatai Vaintika vaiha aira aiha vuaina haikara vararerave. Nora vaiintivanovata, Kotira kaiqa vara amite varia vaiintika vika noranavuata, maara okara ti varia vaiintikavata, vika tiriara qumina vaiintive tiha ti qoririma timitevarave. Vika mintihama ti harukaiqe te qutuvi taaramo enta varima qaiqaa qaqi himpirerave, tiro.

³² Ihuva vi uvvara vutukero qoqaa vinavuka tiva nimuvaro Pitaava vira vita vuru auvahini kero virara aqao tiro, Kia minti tiane, tuvaro ³³ Ihuva tuqantaa viro nai vaintinavu tavero Pitaara atiharo tiharo, Sataanio, niaraini vuane. Are kia Kotiva iritaintema keravauve iri variarao. Are qumina vaiintivanu irintema kerama iri variarao, tiro.

³⁴ Ihuva minti tivakero vaiinti nahenti uki vaukavata nai vaintinavuvata naarama kero vika tiva nimiro tiharo, Ti tivataqiro aniarira vaiintiva, viva nai muntuka vaina haikara qaqla kero, nai aruke hirite katarira vara aqu varero ti naantiaraini aniarire.

³⁵ Nai vataini qaqla variainararaqai noraiqaakero iriqiro vi variarirava, vi vaiintiva ekaarama qutu vuanarove. Vaiintivanu tiriara iriqiro viharo ti kaiqa varareva ti uva iriqiro viharo vuru qutu vuarirava, vi vaiintive ekaa entama qaqla variqiro vuanarove.

³⁶ Vaiintivanu vataini variqiro viharo ekaa airaira ruvaaquma kero viraqaahairo qutu viraro vira airairavano nantiakeroe vira ho kahaqianarove?

³⁷ Vaiintivanu qutu viro nana koqaae amiharo qaiqaa qaqla variqiro vuanarove?

³⁸ Maa entara vataini varia vaiinti nahentika qora kaiqa varehama Kotira qaqla kaavo. Vaiinti vovano ti kaarave ti uva kaarave kaurira haika ti timirera, te Vataini Vatatai Vaintika naantiara te tuvuaina entaraqaa naivata kaurira haika vara amirarave. Vi entara ti Qora mpeqa okaravano tiqaaahairo ataa i vairaqe te takuqi vai *enselika* vataake tuvirerave. Vi entara te vi vaiintira nai qoririma amitararave, tiro. Ihuva turama.

9

¹ Ihuva minti tivakero tiharo, Te quqaa tiari iriate. Vaiinti hininavu maini himpite variaka, vinavuka kia qumina qutu vivarave. Vinavuka Kotiva vaiinti nahentiqa raqikiaqaa tavama kema, qutu vivarave, tiro.

Ihura vaata aahuva vaata kuqu vura

(Matiu 17:1-13; Ruki 9:28-36)

² Ihuva minti tuvaro 6 enta aitarovaro Ihuva Pitaaravata, Iemiravata, Ioniravata, vinavukaaqai ntita varero aqinaqaa nariaraanavu vaireka vurama. Mini orure vauvaro

vinavuka nivuqaa Ihura vaatavano vo vaata koqe vaata kuqu vuvaro³ vira utavaaqavanovata takuqiharo voqamakero hantaiqiharo vaura. Vaiinti vovano kia ho hiqama kairaro mintima kero takuqu vuanarove.

⁴Vira vaata mintima kuqu vuvaro vaumanta vira vainti taaramonavu vaiha tavomanta Elaitaaka Mosika vinavuka kaivaqaukatanata qovaramavi vaiha Ihura vataake uva ti vaura.

⁵Vitanta Ihura vataake uva ti vauvaro Pitaava Ihurara tiharo, Maara ti variara vaiintio, koqemama tenavu ai vataake maini ururaukama vauro. Are hove tirera, tenavu haraara naavu taaramonavu ariara vo, Mosirara vo, Elaitaarara vomake, kaqa nimitaare, tiro.

⁶Vinavuka voqamake naatu ite vauvarora tiro, Pitaava nana uvae tirare tiharo vi uvaraqtai tura.

⁷Minti tuvaro tonavuvano qovarama viro hihipaama viro vinavuka mantaqa komanta avutaqi vauvaro uvavano tonavuqihairo tiharo, Maara ti Maaqu, ti hantuqa hari vai vaintivama vaivo. Nenavu vira uvaqai iriate, tiro. ⁸Minti tumanta vira vaintinavu vaaka tuqantaa taqantaa iha tavovaro kia vaiinti vovanovata Ihura tataaqa vauvaro Ihuva nariaraaqai vaura.

⁹Mintumanta vinavuka ainqinaqahai tuvi vauvaro Ihuva vinavukara kempukaiqaa kero tiharo, Nenavu vaaka tavaara vi haikara kia vokavata tiva nimiate. Ne qaqrake vaiqe te Vataini Vatatai Vaintika naantiara te qutu vuainaraqihai qaiqaa qaqi himpi variari ho vi entaraqaahai virara nenavu vaiinti nahenti tiva nimiqi vuate, tiro.

¹⁰Ihuva minti tumanta vinavuka Ihuva tuntemake, kia vokavata vi uvvara tiva nimiraiti, vilka naiqai nai tiva ami nai tiva amiha tiha, Ihuva nai qaiqaa qaqi himpuainarara ti uvvara nana uvae tivo? ti.

¹¹Minti tivake vinavuka Ihura ireha tiha, Maara okara ti varia vaiintika mintima tinavu tiva timiha tiarave. Elaitaava tinavu kaivaqava viva naanema qovaraiqianarove, ti variarave. Vika nantihae minti ti variarave? ti.

¹²Vinavuka minti tuvaro Ihuva vinavuka nai tiva nimo tiharo, Ho vika quqaama ti variarave. Elaitaava naane ekaa haika avuqavuqama kero qaiqaaroqarama kareva tuvuarirava vaivo. (Mal 4:5)

Ti Vataini Vatatai Vaintikara vo? Nana uvae tiriara vukuqi qara ntuva tova vairave? Tiriara viva airi aiha vina haikara varaqiro viramanta viraqahai vika vira qorirama kehama qumina vaiintive tivarave tiro, vukuqi mintimake qara ntuva torave. ¹³Ho te niara tiha, Elaitaava vaaka avuni ani vaurarama turo. Viva ani vaumanta vo vaintinavu hampi okara autuataa umanta vi okarara vira autu amitorave. Kotira vukuqi qara ruva tontemake, vika vira mintima amitorave, tiro.

Ihuva vaintiqihairo vaana atitama kovaro aitarero vura

(Matiu 17:14-21; Ruki 9:37-43)

¹⁴Ihuva minti tivakero vinavuka hampata tuvura. Vinavuka Ihuva vainti hininavu konaini tuvu tavomanta vaiinti nahenti airitahaa ruvaaqumavi vaumanta maara okara ti vau vaintinavuka mini vauha Ihura vaintinavu hampata tirori vaura.

¹⁵Vinavuka tuvuromanta mini ruvaaqumavi vauka vaakama Ihura tave voqamake ravukuvi kante oru vira uva mantovaro¹⁶ Ihuva nai vainti hininavu irero tiharo, Nenavu nana kaarae vika hampata tirori variavo? tiro.

¹⁷Minti tuvaro vaiinti nahenti ruvaaqumavi vauraqihairo vaiinti vovanovana vira tiva amiro tiharo, Maara ti variara vaiintio, vaanavano ti maaqu avutaqi vaivaro viva kia ho uva timantara ti, te are iananaini vira vite anuro. ¹⁸Vaanavano ti maaqu ravaaqavu keharo vira vataini aquaivararo hiqirivararo vira noqihairo taaraparaqai raivararo viva nai aarai tenti ane vaivararo vira vaatavano raqikivi vaivo. Te ai vaintinavuvaana atitaivararo aitare vuarie turamata vika vira attaavarovata, kia ho aitarero virave, tiro.

¹⁹Vi vaiintive minti tuvaro Ihuva vi uvvara irero tiharo, Ne maa entara varia vaiinti nahentika Kotirara qumimaqa ihama kia virara iriavo. Ike, ne ti popohama timite variamanta te nanti nanti entae ni hampata variqi virerave? Te nanti nanti entae ni kahaqirerave? Ho vi vaintira vita vare te iainaini aniate, ²⁰tumanta vi vaintira vite anuvaro vaana viva Ihura tavamakero vi vaintira voqamakero raqikivi raqikivi uvvaro viva vatakanta hiqiri viro tuqantaa taqantaa i vauvaro taaraparavano vira noqihairo re vaura.

²¹Minti vauvaro Ihuva vira qora irero tiharo, Tairentae maa vira hoqarama kero mintivo? tiro. Minti tuvaro vira qova tiharo, Ti vainti vira naatirukahairo mintiaqiro virave. ²²Vaanavano vira arukarare tiro, vira vara ihaqira aqukero, namariqira aqukero i vairave. Are tinavu ho kahaqirava vairera, tinavuara mpo ike tiva timiteharama tinavu kahaqiane, tiro.

²³ Manti tuvaro Ihuva aqao tiro, Are tiharo, Tinavu ho kahaqirava vairerave tianarave. Are kiae iriarao? Kotirara kempukaiqaakero irirava ekaa kaiqa ho varaanarove, tiro.

²⁴ Tuvaro vainti vira gova vaakama tiharo, Ho te Kotirara iriqi vi vaurava kiama ho vaivo. Arevata ti kahaqiraqe te Kotirara kempukaiqama keha iriqi vuare, tiro.

²⁵ Manti tuvaro Ihuva tavomanta vaiinti nahenti ruvaaqumavi vauka hihai hihai aumanto anuvuaro Ihuva vaana vira atiro tiharo, Are kia uva tiara vaanavave. Are aato tintavi vaanavave. Are vi vaintiraqihaira aitarera vuane. Kia qaiqaavata vi vaintiraqivi getera variane, tiro.

²⁶ Manti tuvaro vaana viva oi oi tiharo voqamakero vi vaintira raqikikero raqiki aqukero iharo aitarero vuvaro vainti viva aavata qutu vura voqaara vaumanta vaiinti nahenti tihamo, Viva qutuma vivo, ti.

²⁷ Tuvaro Ihuva vira kauqu utu varero vira vara vaaviarama kovaro vi vaintiva ho himpiro vaura.

²⁸ Vi vaintiva ho himpiro vauvaro Ihuva viraqaahairo naavuqi oru vauvaro vira vaintinavu oru vira evaara ireha tiha, Tenavu vi vaanara atitaurarovata, nantivaroe tinavu no kia irivo? ti.

²⁹ Vinavuka manti tuvaro Ihuva vikara tiharo, Mintina vaanara kia ne ho qaqi atitaivaro vuanarove. Ne Kotira aarehama atitaivaro ho aitarero vuanarove, tiro. Ihuva turama.

Ihuva qaiqaavata nai qutuaina uvara nai vaintinavu tiva nimura

(Matiu 17:22-23; Ruki 9:43-45)

³⁰⁻³¹ Viraqaahairo Ihuva nai vaintiaravata oru viro vi vatara vara mini kero Karirini oru viro. Mini viharoma vakaaka vutukero nai vaintinavu tiva nimireva iharora tiro, viva vovanovata tenavu vuaina okarara iriantorave tiro, evaara vura. Ihuva nai vaintinavu tiva nimiro tiharo, Vovano ti Vataini Vatatai Vaintika qoqaiqama kaira ti ravaaqqavu vare vαιinti kauquqi vuru kaimanta ti harukaiqe te qutuvi taaramo enta varikema qaiqaa qaqi himpirarave, tiro.

³² Ihuva manti tumanta vira vaintinavu kia vi uvara okara kankomake iriraiti, viva tura aatu qeteha vika kia vi uvara okarara iramake irura.

Tavave tinavuqihairo nora vaiintiqama viro varianarove? tura

(Matiu 18:1-5; Ruki 9:46-48)

³³ Vinavuka oru vi Kapenaumini orurovaro Ihuva naavu voqi oru vaharo nai vaintinavu irero tiharo, Nenavu aarana anihā nana uva tivaqī anihae tirori variavo? tiro.

³⁴ Viva manti tumanta vinavuka kia uva tiraiti, evaara vaura. Vinavuka aarana anihā mintima ti, Tavave tinavuqihairo avuniqamaviro varianarove? ti. Manti turara ti, vika kauriha kia Ihura vi uvara tiva amura.

³⁵ Vinavuka kia uva tuvaro Ihuva oquiviro nai vainti 12 navu naarama kero tiva nimiro tiharo, Kaiqe te avuni nora vaiintiqama vuaina okarara ni tiva nimire. Vi vaintiva vaiinti nahenti naantiaraini vaharo vika paanaa haika vareharo variaina vaiintivama varianarove, tiro.

³⁶ Ihuva manti tivakero viva vainti naatiru vita varero vinavuka nivuqaa vara himpi-matero viraqaahairo vi vaintirura ravukutero tiharo, ³⁷ Vaiinti vovano tiriarao tiro, maa vaintirura voqaara vaharo voravata quahama amiteharo viva tivata quahama timitaanarove. Viva mintiharoma Kotiva ti tititairavata quahama amitaanarove, tiro. Ihuva turama.

Vo vaiintivano Ihura autu reharo kaiqa varora

(Ruki 9:49-50)

³⁸ Ihuva vi uvvara tuvaro Ioniva tiharo, Maara ti variara vaiintio, tenavu tavauraro vaiinti vovano ai autu reharo vaana atite vairave. Vi vaiintiva kia tinavu hampata ai avataqī ni vī vaiintiva vaimantara ti, vira qioqama tauro, tiro.

³⁹ Manti tuvaro Ihuva aqao tiro, Kia vi vaiintira qioqama kaataarave. Vovano ti hutu reharo nora kaiqa vareharo viva viraqaahairo kiama vaaka tirirā qora uva tianarove.

⁴⁰ Vaiintivano kia tinavu kaiqa vara qoraiqama timitaarirava vairera, vi vaiintiva tinavu kahaqama timitaariravama varianarove, tiro.

⁴¹ Te tiari iriate. Ne namariara naataa ivaro vovano niara vika Ihura vaintive tiharo namari ni nimirera, Kotiva kia vi vaiintira tauru karaitiro, naantiara vira noqaa koqemakero amianarove, tiro.

Ora aara vora umiqevorave tura

(Matiu 18:6-9; Ruki 17:1-2)

⁴² Ihuva manti tivakero vainti naatiru vaaka ravukutorara tiharo, Maa vaintirura voqaara ti uva irirava vairaro vaiinti vovano anirero qora aara vira umiqairera, vira kaara

vi vaiintira uvavano nai nora uvama varianarove. Kojemama kia vi vaintirura qora aara umiqai entaraqaa vi vaiintira auntaqi nora ori kantarumake nora varuva namariqi aquakaataarave, tiro.

⁴³ Vi uvara irihara ai kauqu hinivano qora kaiqa vare vairera, vira teqa aqukaane. Kojemama vohaa kauquqai vairava naaruvalini vira qaqi variqira vinarave. Are qora kaiqa vareharama taara kauqu vairava vairaro kia qimpaina iharaqi ai aqukaantorave.

⁴⁴ [Vi vataraqi iviruqavano qutu vuaka vaata qaqi namaqi vi vaivaro ihavanovata kia qimpia viraitiro, qaqima itaqiro vi vairave.]

⁴⁵ Ai aiqu hinivano qora kaiqa vare vairera, vira teqa aqukaane. Kojemama vohaa aiquqai vairava naaruvalini oru vaira qaqi variqira vinarave. Are taara aiqu vairava vairaro ai nora iha ite vainaraqi aqukaantorave.

⁴⁶ [Vi vataraqi iviruqavano qutu vuaka vaata qaqi namaqi vi vaivaro ihavanovata kia qimpia viraitiro, qaqima itaqiro vi vairave.]

⁴⁷ Ai hini avuvano qora kaiqa varairera, ho nena avu hini vaurukaane. Kojemama are vohaa avuqai vairava Kotiva raqikina vatukaraqi oru vira qaqi variqira vinarave. Ai avu taaraqanta vairava qora kaiqa vare vairaro naantiara ai nora iha itainaraqi aqukaantorave.

⁴⁸ Vi vataraqi iviruqavano qutu vuaka vaata qaqi namaqi vi vaivaro ihavanovata kia qimpia viraitiro, qaqima itaqiro vi vairave. *(Aisaiaa 66:24)*

⁴⁹ Hore karaqaa aataintema kero, naantiara ihavano ekaa vaiinti nahenti ita kaanarove.

⁵⁰ Hore koqe haikave. Horevano qoraiqama viro kia hiakaa irera, kia ho vira qaiqaa autu kairaro hiakaa ianarove. Ho ne hore koqera voqaara vaiha, muntuka parumakeha nariara nariara koqema nimitaqi vuate, tura.

10

Nahenti qaquirake okarara Ihuva vika tiva nimura

(Matiu 19:1-12; Ruki 16:18)

¹ Ho Ihuva vi vataro mini kero lutia vataini oru viro Iotani Namari taqa varero Iotani Namari hini mantaraini vura. Mini oru vaumanta qaiqaa vaiinti nahenti airitaha viva vaunaini uki vauvaro ho Ihuva tota tuntema kero, qaiqaa vakaaka vika tiva nimura.

² Ihuva mini vaumanta Parasi vaiintinavu viva vaunaini orure Ihurara hampi uva tiariре ti, vira irama amite tiha, Hoe vaiintivano nai naata qaqira kaanarove? ti.

³ Tuvaro Ihuva vika nái irama nimitero tiharo, Haaru ninavu kaivaqava Mosiva nana uva okarae tiva taatautorave? tiro.

⁴ Ihuva minti tumanta vinavuka tiha, Ho Mosiva uva okara mintima tiva taatautorave: Vaiintivano nai naata qaqira kareva iharo qara ntuva kero nai naata amiro tiharo, Ho ai qaqira kauro, tiharoma atitaanarove turave. Mosiva mintima vi okarara tiva taatautorave, ti.

⁵ Vinavuka minti tuvaro Ihuva tiharo, Mosiva vайharo tavomanta ni kaivaqaukavara kia vaaka Kotira uva irireka auti vaukama vaurave. Vika mintiakе vauvarora tiro, ho Mosiva vi uvvara tiva taatautorave.

⁶⁻⁷ Tota hoqarero kia mintima vaurave. Tota Kotiva naaruvalata vatawata autu kero vatero tiharo, Te vaiintivata nahentivata vohaa autuke vataunara tiro, vaiintivano nai noka qoka kero, nai naatantiro avitumavi variqi vihatanta, vitanta vohaa vaatama vauvarave, turave. ⁸ Vitanta kiama vo vaata vo vaata vairaiti, vitanta vohaa vaataqaima vairave. ⁹ Ho Kotiva vivama vaativata naatavata avitumakero vohaa tampama kairara tiro, hauri vovano vitanta raira kaantorave, tiro.

¹⁰ Ihuva minti tivakero naavuqi oru vaumanta vira vaintinavu Ihura vi uvvara okarara irovoro ¹¹ Ihuva vinavuka tiva nimiro tiharo, Vaiinti vovano nai naata qaqira kero vo nahenti varairava, vi vaiintivata mintiharoma nai naata qoraiqama amitero qaraaka nahentintiro niharoma naata vaati varaa okarara ragama kaanarove.

¹² Vira vogaara nahentivano nai qorainti qaqira kero qaraaka qorainti varairava, vi nahentivavata qaraaka qoraintintiro niharoma muarama vikantiro nuuanarove, tiro.

Ihuva vainti haikagaa nai kauqu vateharo koqema nimitora

(Matiu 19:13-15; Ruki 18:15-17)

¹³ Ihuva vaumanta vaiinti nahenti vika nái vainti ntita vare Ihuva nai kauqu vikaqaa vataaire ti, Ihuva vaunaini vuru karare tumanta Ihura vaintinavu vika tave vika qioqihā niti vaura.

¹⁴ Mintuvaro Ihuva tavero vinavuka nái nitiro tiharo, Aqao, vainti haika qaqi kaimanta te iainanaini aniate. Kia vika aara kuvali nimitaate. Vaiinti nahenti maa vaintika

voqaantemake Kotirara irika, vikama Kotiva raqikiaina vatukaraqi vaivarave. ¹⁵ Te quqaa uva tiari iriate. Vaiintivano kia vainti naati voqaantema kero, Kotira uva iriraitiro vairava, vi vaiintiva kia Kotiva raqikina vatukaraqi ho vuanarove, tiro.

¹⁶ Minti tiyakero vainti haika vika ravuku kero nai kauqu vikaqaa vateharo vika koqema nimitora.

Airi airaira vate vau vaiintirara tura

(*Matiu 19:16-30; Ruki 18:18-30*)

¹⁷ Ihuva aaraini vireva uvare vainti vovano kantero oru Ihura irero tiharo, Are maara ti variara vaiintiva koqevave. Te nana koqe kaiqae Kotira vara amitaqi vihae te naantiara ekaa enta koqemake qaqi variqi virarave? tiro.

¹⁸ Minti tuvaro Ihuva vira nai tiva amiro tiharo, Are nantiharae tiriara vaiinti koqevave tiarao? Kotiva vivaqaima koqeva vairave. ¹⁹ Are Kotiva tiva taatauto uvare irianarave. Vira uva mintimama vaivo:

Kia vora arukaane.

Kia vora naatantira muara nuane.

Kia muara autuane.

Kia una uva tiane.

Kia unaqaraigama kehara vora airaira varaane.

Nena noka qoka koqe okaraqai autu nimitaane, turave.

(*Katu Varora 20:12-16*)

Kotiva tiva taatauto uvava mintimama vaivo, tiro.

²⁰ Ihuva minti tuvaro vi vaiintiva tiharo, Maara ti variara vaiintio, te vainti naatika vhaih ekaa vi uvare iriqi vivima vate maa vauro, tiro.

²¹ Minti tuvaro Ihura muntukavano vi vaiintirara vauvaro vira taveharo tiva amiro tiharo, Are vohaa kaiqaaqai varaataarave. Oru nena vatena haikara nuntu kera nimihara koqaa varerama vuru kia airaira vataa vaiinti nahentika rairakera nimiraroma naaru-vaini ai koqaa variariire. Mintima kera viraqaaahairo ti tivataqira aniane, tiro.

²² Ihuva minti tuvaro vi vaiintiva vi uvare iriro ua viri aratero vaura. Viva airi airaira vatovara tiro, kia Ihura uva iriraitiro, qaqira kero vira muntukavano qoraiquvaro vurama.

²³ Vi vaiintiva vuvaro Ihuva nai vaintinavu viti viri aitutuma tavero tiharo, Airi airaira vate vaiintika Kotiva raqikina vatukaraqi vukaari utihama vivarave, tiro.

²⁴ Minti tumanta vira vaintinavu vi uvare iri tiha, Ike, Ihuva nana uvae tivo? tuvaro Ihuva qaiqaavata vi uvare tiharo, Ti vaintinavuvauvo, vaiinti nahenti vukaari utihama Kotiva raqikina vatukaraqi vivarave.

²⁵ *Kamerivanu uqa noqì ho ruqiararirava vairavauve, airi airaira vataaina vaiintiva vivavata Kotiva raqikiaina vatukaraqi ho vuanarove, tiro.*

²⁶ Ihuva minti tumanta vira vaintinavu vira uvare airi aato iriha tiha, Ike, „airi airaira vateka kia Kotiva raqikinaraqi ho vivera,“ Kotiva nai ta vaiintikae ntitaanarove? ti.

²⁷ Vira vaintinavu minti tuvaro Ihuva vinavuka aitutuma tavero tiharo, Vataini variaka vika nái kempukaaqaa kiama ho vivarave. Kotiva kahaqira vika ho vivarave. Kotiva ekaa kaiqa vare vaivama vaivo, tiro.

²⁸ Minti tuvaro Pitaava tiharo, Ho tavaane. Tenavu ai avataqai virera iha, ekaa haika mini ke qaqima anuro, tiro.

²⁹ Pitaava minti tuvaro Ihuva vinavukara tiharo, Te quqaa tiari iriate. Kia te ne kaiqa vare vaira tauru kararave. Vaiinti vovano nai naavu maaqae, nai qata vakaarae, nai aura nakaarae, nai noka qokae, nai vaintairae, nai naaho maatae, mini kero tiriarao tiro, ti kaiqarao tiro virava ³⁰ viva vira noqaa koqaa vareharo kia vohaa tataaqai varaanarove.

Viva maa entara vi koqara vareharo airi tataavata varaanarove. Vi vaiintiva vi haikara vi haikara mini kero virava airi naavuve, airi qata vakaave, airi aura nakaave, airi nokavarave, airi vaintintive, airi vatave, vi haikara vi haikara airi haikama varaanarove. Vi vaiintiva vairamanta vira kaara hini vaiinti vira qoraiqama amitaqi vivaro varianarove. Ho vi vaiintiva naantiara ekaa enta qaqi variqiro vuanarove.

³¹ Vate vaiinti nahenti airitahaa avuni variaka naantiara vika tuvitare ekaanainima vaivarave. Vate ekaanaini variaka naantiara vika uritare avunima vaivarave, tiro.

Ihuva taaramo tataa nai qutu vuainarara tura

(*Matiu 20:17-19; Ruki 18:31-34*)

³² Vinavuka Ieruharemini vireka aaraini vi vauvaro Ihuva naane nariaraa avuni vi vaura. Ihuva avuni vi vaumanta vira vaintinavu virara airi aato iriqi vi vaumanta vonavu Ihura avataqai vi vau vaiinti nahentikavata vika qeteha ani vaura.

Aaraini vinavuka mintima vi vauvaro viraqaaahairo Ihuva nai vainti 12 navuqai ntita vo kanta vuru kero, naantiara náiqaa qovara iaina okarara vinavuka qaiqaa tiva nimiro

tiharo,³³ Nenavu iriate. Tenavu Ieruharemini oru variari vo vaiintinavu ti Vataini Vatai Vaintika ravaaqavu vare vuru kaimanta Kotira kaiqa vara amite varia vaiintika vika noranavuvata, maara okara ti varia vaiintikavata, vika tiriara vira arukaane tivake ti tivita vare vuru Romeni vatanaaka kauquqi tuta kaimanta vika ti haru kevarave.

³⁴ Vi vatanaaka ti naaraihama timite, tiqaa taara vihite, *reti* naaquntaqohai ti kaavu humiqake vate, ti harukaiqe te qutu virarave. Te qutuva taaramo enta varikema, qaiqaa qaqi himpirerave, tiro. Ihuva nai vaintinavu minti tivakero tiva nimura.

Iemika Ionika náitanta noraiqama virara Ihura irora

(Matiu 20:20-28)

³⁵ Sebedira maaqtanta Iemika Ionika Ihuva vaunaini orure Ihurara ireha tiha, Maara ti variara vaiintio, are vo haika tetanta tunara mintima kera timitaanerama anuro, ti.

³⁶ Tuvaro Ihuva vitantara tiharo, Te nitanta nantie irarave? tiro.

³⁷ Tumanta vitanta tiha, Naantiara are mpeqaiqihara vaiinti nahentiqa raqikihara nora vaiinti taintaqa oquivi vahara are titanta noraiqama kairaro titantaqihairo vovano ai kauqu tanaraini vairaro vovano ai kauqu kaanaaqaini variarire, ti.

³⁸ Minti tuvaro Ihuva aqao tiro, Netanta kia kankomake iriraiti, vi uvarara ti iraavo. Te alha vuaina namarira *kaapuqihai* naainara, hoe netanta nevarave? Te alha vina namarira varare iainara, netantavata hoe varevarave? tiro.

³⁹ Minti tumanta vitanta tiha, Tetanta homa mintirarave, tuvaro Ihuva vitanta tiva nimiro tiharo, Quqaama te namari naainara netantavata nevarave. Quqaama te namari varaainara netantavata varevarare.

⁴⁰ Naantiara ti kauqu tanarainivata ti kauqu kaanaaqainivata oquivi vai vaiintitantara kia ti kaiqa vaivo. Ti Qova vaiinti taaraqanta qeramatai vaiintitanta, vitantama mini oquivi vaharave, tiro.

⁴¹ Minti tumanta Ihura vainti hini 10 navu vi uvvara iri vira kaara Iemika Ionika nitura.

⁴² Vinavuka vitanta niti vauvaro Ihuva vinavukavata vitantavata naarama kero ho eqaate tiro, Vo vatanaaka raqikiqi vi varia okarara ne iriarave. Vika avuhainaaka uritare vahia vi kaiqara maa kaiqara vara timitate ti variarave. Vika nora vaiintinavu tiha, Te nora vaiintivano vaunarara ti, ne ti uvaqai iriqi vuate, ti variarave.

⁴³ Nenavu kia vika aanaraate. Niqihairo vovano noraiqireva irera, viva ni paanaa kaiqa vara nimitharoma noraiqama vuarire. ⁴⁴ Niqihairo vovano uritarero avuni vaireva irera, viva qaqi paanaa vaiintivano vaharo ni kaiqa vara nimitaarire.

⁴⁵ Te Vataini Vatai Vaintikama vauro. Tevav kia vaiinti nahentiara ti paanaa kaiqa vara timitate ti turuaukavauve. Te vaiinti nahenti kaiqa vara nimitaqi vi, airi vaiinti nahentiara iriha qutu virerave tivake turuaukave, tiro. Ihuva turama.

Ihuva Batimiasira avu rampaikora

(Matiu 20:29-34; Ruki 18:35-43)

⁴⁶ Ihuva nai vaintiaravata oru viro Ierikoni orurero vi vatukara vara maini kareva auti vaumanta vaiinti nahenti airitahaa vira avataqi vi vauvaro avu qimpavu vaiintiva Batimiasiva, Timiasira maaquvano airaira naariharo timiate ti vau vaiintiva aara auvhagini oquivi vaura.

⁴⁷ Viva mini vaharo irumanta vokuka tiha, Ihuva Nasaretihainaava aitare vi vaivo, tuvaro Batimiasiva iriro viraqaahairo viva noraiqaakero Ihura aareharo tiharo, Ihuo, Devitira Maaquo, are tiriara mpo ike tiva timitate, tiro.

⁴⁸ Viva minti ti vaumanta airi vaiinti nahenti vira atiha tiha, Evaara variane, tuvaro viva kia vika tu uvvara iriraitiro, qaiqaavata noraiqaakero naveraitiharo, Devitira Maaquo, tiriara mpo ike tiva timitate, tiro.

⁴⁹ Minti tivaqi vi vauvaro Ihuva ani viraqaa himpitero tiharo, Vira aaraivaro aniarire, tumanta vika avu qimpavura aarehama tiha, Ho quahehara variane. Himpuanne. Viva aama aaraivo, ti.

⁵⁰ Minti tuvaro vaiinti viva nai vaaqauta ajutora ravaqaakero qaqlini mini kero himpiro Ihuva himpitero vaunaini vuvuro⁵¹ Ihuva vira irero tiharo, Te ai nantire urarae aniarao? tiro. Minti tuvaro avu qimpavu vaiintiva tiharo, Maara ti variara vaiintio, ti tivu rampai kaanerama te anuro, tiro.

⁵² Minti tuvaro Ihuva vira tiva amiro tiharo, Ho vuane. Are tiriara viva ti ho kahaqianarove tiararoma ai avu koqema vivo, tiro. Minti tuvaro vira avuvano vaaka rampai vuvuro viva ho tavero. Vira avuvano ho vauvaro viva Ihura avataqiro viva vu aararaqa vurama.

Vaiinti nahenti Ihura quahama amite vauvaro viva Ieruharemiqi vura

(Matiu 21:1-11; Ruki 19:28-40; Ioni 12:12-19)

11

¹ Ihuva nai vaintiaravata oru vuvaro Ieruharemi aumanto vaumanta vinavuka Betapasini Orivi Aiqina auvoqi vau vatukaraqì orurovaro Ihuva nai vanti votanta nititero ² tiharo, Netanta viti vatukaraqì vuate. Netanta orure tavaivaro vi vatukaraqì *donki* qaraaka kantaruma teva varianarove. Vi *donkiraqaa* kia vaiintivanovata vira tauvaqaqaa oquivi vailha ni variarave. Netanta oru *donki* vira ranta kema, kuvantu kema maini vare vuru timiate. ³ Vovano nitantara nana haikae vare variavo tirera, netanta mintimama tiva amiate, Titanta Noravano *donki* maarara timanta anuro. Maa *donkiva* inaaraipa vira vataakero variraroma, qaiqaa varakairaro orurantero anianarove, tiate, tiro.

⁴ Ihuva minti tumanta vitanta vi vatukaraqaa orure tavovaro *donkivano* aaraqaa gentiana kantaruma tovaro vaumanta vitanta vira kuvanti vaumanta ⁵ vaiinti vonavu mini himpite vauka tiha, Netanta nantirekae vira kuvanti variavo? ⁶ tumanta vitanta Ihuva vaaka tu uvvara vinavuka tiva nimumanta ho vira vare vuate ti.

⁷ Minti tumanta vitanta qaraaka *donki* vare vuru Ihura amura. Vuru ami vira vaintinavu nái utavaaqa *donki* tauvaqaqaa vuqi amitovaro Ihuva viraqata vaarirero ouquiviro aaraqaa vura.

⁸ Aaraqaa oru vi vaumanta vaiinti nahenti Ihurara quaheha nái utavaaqa aaraqaa vuqi amitomanta vaiinti nahenti hininavu naahoqihai katari mare teqa vare vuru aaraqaa vuqi amitora.

⁹ Mintiaqi vi, Ihura avuni vi vau vaiinti nahentikavata, vira naantiara ani vau vaiinti nahentikavata, naverai tiha,

Kaiqenavu vira autu tuaheraare. Noravano nai autuqaa ani vai vaiintira koqema amite vaivo. *(Ihi 118:26)*

¹⁰ Tinavu kaivaqava Devitiva mpeqaiqama kero raqikuntema kero, vivavata raqikiqi vuainarara tiro, Kotiva vira koqema amite vaivo. Variqavano nai virini vaira, vira autu tuahera kaate, ti.

¹¹ Vika minti tivaqi vuvaro Ihuva oru viro Ieruharemini orurora. Orurero Kotira Naavu nora naavuqi oriqetero viraqì vau haikara tavamakero, vevarero enta ireva uvapo Ihuva nai vanti 12 navu hampata ururantero Betanini otu vaura.

Fiki katarivano kia tava irorara tura

(Matiu 21:18-19)

¹² Vira qararaa vinavuka Betanihai oturante uri vauvaro Ihura karara antuqa aruvaro

¹³ viva tavovaro vutuni *fiki*, vira tava ne katariva vauvaro vira mare airi vaura. Vira tava vairera hiqike naare tivakero, tavovaro kia vira tava iraaina entava vauvarora tiro, marevanoqai vaura.

¹⁴ Marevanoqai vauvaro Ihuva *fiki* katariara tiharo, Ho naantiara kia vovanovata ai tava ho hiqi naanarove, tiro. Minti tumanta vira vaintinavuvata vi uvvara irura.

Ihuva Kotira Naavu nora naavuqi vura

(Matiu 21:12-17; Ruki 19:45-48; Ioni 2:13-22)

¹⁵ Ihuva nai vaintiaravata oru viro Ieruharemini orurero Ihuva qaiqaa Kotira Naavuqi oriqetero tavomanta koqaa auti vau vaiintika viraqì vailha koqaa kaiqa vare vaura. Mintiuvoro viva vika rauntu veva vahaqaqini kero, monu *senisiqi* vau vaiintika taintanavu vara venta aqukero, uviri nimicha monu vare vau vaiintika taintanavuvata vara venta aqukero.

¹⁶ Mintima kero viva tiharo, Maini kiama aara vaivo. Kia airaira vareha maini vitare aitare iate, tiro.

¹⁷ Minti tivakero viva uva vo vika tiva nimiro tiharo, Kotira vukuqi mintima qara ntuvato uvava vaivo:

Ekaa vatanaaka vika ti naavuara Kotira aare varia naavurave tivarave, turave. *(Aisaiaa 56:7)*

Oho, ne variavarora tiro, maa naavuva muara vaiinti kukeqavi varia naavura voqaarama vaivo, tiro.

¹⁸ Ihuva minti tumanta Kotira Naavuqi vailha Kotira kaiqa vara amite vau vaiintika vika noranavuvata, maara okara ti vau vaiintikavata, vika Ihura uva iri, vi uvvara kaara Ihura aruke aarara rantareka auti vaura. Vika tavomanta qaqi vaiinti nahenti Ihuva tu uvavarava quaheha kauqu runkinkiri i vaumanta vika virara irihà Ihura aatu qeteha vaura.

¹⁹ Ihuva Ieruharemini variqiro vuvaro enta ire uvapo viva nai vaintiaravata Ieruharemi mini kero vurama.

Fiki katari tamunta vura
(Matiu 21:20-22)

²⁰ Vira qararaa toqaqi oturante urihama vira vaintinavu tavovaro *fiki* katarivano vira kaaravata tuqavata aaharaiqama vuva vauvaro ²¹ Pitaava Ihuva vi katarirara tivato uvava iritero Ihurara tiharo, Ike, maara ti variara vaiintio, tavaane. *Fiki* katarivano are atiarava tamunta vivo, tiro.

²² Minti tuvaro Ihuva vinavuka tiva nimo tiharo, Te tiari iriate. Nenavu Kotirara kempukaiqama kehama iriqi nuate. ²³ Nenavu mintiaqi viha maa ainqinaraa tiha, Tuvitarera varuvaqi aquuvane, tivarave. Ne minti tihama kia taara aato iriraiti, quqaama mintianarove, tivera, Kotiva ninavu kahaqiraro ainqinavano tuvitarerero varuvaqi aquuvanarove.

²⁴ Virara irihama te niara mintima tirerave. Nenavu vo haika varareka Kotira aareha tiha, Kotiva quqaama vi haikara ti timianarove, tihama nenavu nana nana haika vararekave ti haikara ho varevarare.

²⁵ Nenavu himpite vihaih Kotira aare vaivaro vo vaiintivano ninavu qoraiqama nimitaaina uvava qaqi vairera, ne vi vaiintira uva naane nunka amitema Kotira aaraate. Nenavu mintivaro ninavu Qova naaruvaini vaiva nenavu qora kaiqa vare uvaravata homa ni nunka nimitaanarove. ²⁶ [Nenavu kia vo vaiinti uva nunka nimitaivera, ninavu Qova naaruvaini vaiva kiama ni uvavata ho nunka nimitaanarove], tiro.

Tavave ai noraiqama kaivarave? tura
(Matiu 21:23-27; Ruki 20:1-8)

²⁷ Ihuva minti tivakero nai vaintinavuvaravata oturantero Ieruharemini uru vaura. Ihuva qaiqaa Kotira Naavuqi oriqetero viraqi ni vaumanta Kotira Naavuqi vihaih Kotira kaiqa vara amite vau vaiintika vika noranavuvata, maara okara ti vau vaiintikavata, Iutaa vatanaa nora vaiintinavuvata, vika Ihuva vaunaini orure ²⁸ Ihura atiha vira ireha tiha, Are ta vaiintiva vaiharae maa kaiqara vare variarao? Tavave ai noraiqama kaivarae are maa kaiqara vare variarao? ti.

²⁹ Vika minti tuvaro Ihuva vika nai tiva nimo tiharo, Kaiqe te naane ni irama nimitaari ne te tiaina uvara ho tiva timivera, te tenta noraiqamavi vihaih maa kaiqara varaainararavata ni tiva nimiare. ³⁰ Tavave Ionira noraiqama kovaroe viva vaiinti nahenti namari nimurave? Kotivae, qaqi vaiintivanoe, vira noraiqama kovaroe minturave? Ne virara ti tiva timige te iriare, tiro.

³¹ Ihuva minti tumanta vika nai ire nai ire iha tiha, Tenavu nana uvae vira tiva amirarave? Tenavu tiha, Kotiva Ionira noraiqama korave, tierera, Ihuva tinavuara, Ne nantihae Ionira uvara kia quqaave tiavo? tianarove. ³² Qaiqaa vate tenavu tiha, Vaiintivanoqai Ionira noraiqama korave, tierera, vi uvavavata kia ho varianarove, tura. Qaqi vaiinti nahenti Ionirara Kotira uva qoqaiqamako vaiintivave turara ti, vika qaqi vaiinti nahenti naatu qeteha kia minti tura.

³³ Vika nariara nariara minti tivake viraqaahai Ihurara tiha, Nai tavave Ionira noraiqama korave? Kia tenavu virara kankomake irunarave, ti.

Vika minti tuvaro Ihuva vikara tiharo, Ne minti tiavera, te tinta noraiqama kaimanta maa kaiqara vare vaunarara kia nintavata tiva nimirerave, tiro. Ihuva turama.

12

Uaini ututoraqi kia koqemake raqiku vaiintikara tura
(Matiu 21:33-46; Ruki 20:9-19)

¹ Ihuva minti tivakero vo uva tuqantaakero vika tiva nimo tiharo, Vaiinti vovano *uaini* ututero, vira auvahi-anta hohaa ututuma aratero, vata quvikero *uaini* tava tatiainara aututero, maimaraara naavu hararaa kaqakero vatorave.

Mintima kero niara vataini vireva iharo vokuka tiva nimo tiharo, Ne ti *uaini* naahoqaa raqiki timite vase te niaraini vuare, tivakero viva niaraini vo vataini vurave.

² Mini oru vauvaro *uaini* hiqo entava anirovaro viva nai kaiqa vaiinti vo atitero tiharo, Are ti naahoqaa raqiki timite variaka vuru tiramanta vika *uaini* tintavata hiqi timitaate, tuvaro mini yumanta ³ vira naahoqaa raqiki amite vau vaiintika vira kaiqa vaiinti vira ravaaqavuke kaavu umiqake vate, kia *uaini* viravata hiqi amitaraiti, qaqi atitovaro anirantero vurave.

⁴ Qaqi anirantero vuvaro naaho vira qova nai kaiqa vaiinti vo atitovaro vumanta vira naahoqaa raqiki amite vauka vi vaiintiravata qiaita ntuvake kaurira haika vira amurave.

⁵ Mintuvaro naaho qova nai kaiqa vaiinti vo atitovaro vumanta vira arukorave. Ho mintiaqi vi, hini nai kaiqa vaiinti nititoka kaavu numiqake vate, hini kuka arukorarama turo.

⁶ Ho mintiaqi vi, vira kaiqa vaiintinavu taiqa kovaro vaiinti vohaiqqaqai vaurave. Vi vaiintira vira qova nai maaquara antuqa ari vau vaiintiva vauvaro vira qova viravata naantiara ekaanaini atitero tiharo, Vika ti maaqu tavamake virara tinta maaquve tihamra vira koqema amitevarave, turave.

⁷ Minti tivakero vira atitovaro mini yumanta vira naahoqaa raqiki amite vau vaiintika vira tave, nai tiva ami nai tiva amiha tiha, Vira qova qutu viraro maa vaiintiva nai qora vatavata, airairavata, varaariravama vaivo. Anige vira arukaari raro vira naahovano tinavuniqama vuarire, turave. ⁸ Vika minti tivake vira ravaaqavuke aruke vira vaata naahoqihai aqagaine vaati aqukorave, tiro.

⁹ Ihuva minti tivakero vika irama nimitero tiharo, Minturara tiro, naaho qova nai maaqu arukora kaara nantie ianarove? Naaho qova anirero nai naahoqaa raqiki varia vaiintika aru taiqakero, vo vaiintinavuara ti naahoqaa raqiki timitaatema tianarove, tiro.

¹⁰ Ihuva minti tivakero viva vikara tiharo, Ne kiae Kotira vukuqi maa uvvara kaara ntuvu keha iriarave? Vi uvava mintima tiro:

Ori naavu kageha vo ori, kia koqe orive tivake qaqira kaa oriva, vi oriva naaquraiqama vivo.

¹¹ Noravano vi orira noraiqama kairara ti, tenavu vira kaiqa tave tiha, Vogaraa kaiqave, turo, turave. (Ihi 118:22-23)

Kotira vukuqi mintima qara ntuvu torave. Ne kiae vi uvvara kaara ntuvake iriarave? tiro.

¹² Ihuva minti tumanta Iutaa nora vaiintinavu aato kenko tumanta iri vuvaro Ihuva uaini naahoqaa raqiki nimito vaiintikara tiharo uva tuqantaakero vikara tumanta vira ravaaqavu vare vuru ko amirerave tura. Minti tivakehavata, vaiinti nahenti viraqiqi ruvaaqumavi vauka tinavu titivorave tivake, vika naatu qeteha Ihura mini ke vurama.

Takisi aqirara Ihura irama amitora

(Matiu 22:15-22; Ruki 20:20-26)

¹³ Iutaa vaiinti vonavuvu varike viraaahai vika Parasi vaiinti vonavuvata, Herotira navunaka vonavuvata, nitieha tiha, Ne Ihura irama amitaivaro viva hampi uva tirage tenavu viraqaa uva vataare, tura.

¹⁴ Minti tumanta vi vaiintinavu Ihuva vaunaini orure ugerara uva tiha, Maara ti variara vaiintio, tenavu tavarara are koqe uvaqai ti variaravave. Are kia vaiinti aatu getaraitira, nora vaiintiaravata, qumina vaiintiaravata, vohaa qarama keraqai ti variaravave. Are vaiintivano Kotira avataqi vi aarara avuqavu tinavu tiva timi variaravave. Ho maa uvvara okara tinavu tiva timiraqe iriare. Tenavu Kotira uva iriha hoe tenavu Romeni vatanaaka vika avuhainaa vaiinti Sisaara *takisi* amirarave? „Romeni vatanaaka kia Kotira uvavata iriakave.“ Vira avuhainaa vaiintie *takisi* amirarave, kiae amirarave? ti.

¹⁵ Vika minti tuvaro Ihuva tavomanta vika noqihai ugerara uva tihavata, vika avu aatoqihai Ihura qoraiqama amitareka auti vauvaro Ihuva tiharo, Nantihae nenavu tiriara hampi uva tiarire ti, minti tiavo? Ho monu vo varakaiqe te tavaare, tiro.

¹⁶ Ihuva minti tumanta vika monu vohauru vira vara amuvaro viva vika irama nimitero tiharo, Monu viraqaa tara virie vaivo? Tara autue vaivo? tiro.

Minti tumanta vika tiha, Sisaarave, tuvaro ¹⁷ Ihuva vikara tiharo, Virara irihama ne Sisaava ina haikara nai amiate. Kotiva ina haikara nai amiate, tiro. Ihuva minti tumanta vika vira uva iri tiha, Ike, viva tinavu uva aataara kero koqe uvaqai tivo, tivake kauqu runkinkiri i vaura.

Satusi vaiintinavu Ihura irama amitora

(Matiu 22:23-33; Ruki 20:27-40)

¹⁸ Satusi vaiintinavu Ihuva vaunaini orurora. Satusi vaiintinavu nái maara uvvara irihama tiha, Vaiintivano qutu viro ho viva ekaara qutu viro kia qaigaa ho himpuanarove, ti vaura. Minti ti vau vaiintika orure ¹⁹ Ihura irama amite tiha, Maara ti variara vaiintio, tinavu kaivaqava Mosiva maara uva tiva timiharo mintima qara ntuvu torave: Vaiintivano kia vainti vataraitiro, qutu viraro vira qatavanoe vira vakaavae vira naata varatero vainti kuvuarama amitaanarove, turave.

²⁰ Tenavu tiarira are iriane. Haaru qata vakauka 7 navu vaurave. Vinavuka avuhainaava nahenti varatero kia vainti vataraitiro qutu vuvarora tiro, ²¹ vira qatavano naantiarilhainaava vira naata varatero vivavata kia vainti vataraitiro, qaqi variqiro viro vuru qutu vurave. Viva qutu vuvaro vitanta tavaaraihainaava vi nahentira varatero kia vaintivata vataraitiro, qutu vurave.

²² Ho mintiaqi vivi, ekaa vinavuka vi nahentira varate kia vainti vataraiti, ekaa vinavuka qaqi qutu vurave. Vika qutu vuvaro nahenti vivavata variro vuru qutu vurave.

²³ Ho naantiara vaiinti nahenti qaiqaa qaqi himpi vai entaraqaa vi nahentiva tara naatae varianarove? Viva qaqi vau entara qorainti 7 navu varatorave, ti.

²⁴ Satiusi vaiintinavu minti tuvaro Ihuva vika nái tiva nimiro tiharo, Ne Kotira uva qara ntuva tora kia kankomake tavaakave. Ne Kotira kempukara kia iriakave. Kia iri tavaakara ti, ne hampi uva tiavo.

²⁵ Naantiara vaiinti nahenti qutu viraqihai qaiqaa qaqi himpi variqi vi entara kiama naata vaati vare okarava varianarove. Vika naaruvaini vai enselika voqaantema kema vaivarave, tiro.

²⁶ Ihuva minti tivakero viva tiharo, Vaiinti nahenti qutu vika qaiqaa qaqi himpi okarara te ni irama nimitarerave. Ne kiae Kotira vukuqí Mosiva maa uvvara qara ntuva tora kaara ntuvake iriavo? Kotiva mintima turave:

Te Kotika ai kaivaqauka Variqavano vauro. Te ai kaivaqaukavara Eparahaamiraqaaave, Aisaakiraqaaave, Iekopiraqaaave, raqiki vauraukave, turave.

²⁷ Ho iriate, Variqa Kotiva kia qutuvi taiqavi varia haikaraqaa raqiki vaiva vairavauve. Kotiva qutuvi qaiqaa himpi qaqi variqi vi varia haikaraqaa raqiki vaivama vaivo. Ne nenta avu aatoqihai vaiinti nahenti qutuvi qaiqaa qaqi himpi okarara hampi irikehama viraqahai hampi uva ti variarave, tiro.

*Nana uvae Kotiva avuni vatai uvava vaivo? tura
(Matiu 22:34-40)*

²⁸ Ihuva Satiusi vaiintinavu hampata uva ti vauvaro maara okara ti vau vaiintiva orurero vauharo iruvaro Ihuva Satiusi vaiintinavu uva aatara kero koqe uvaqai ti vauvaro vi vaiintivavata Ihura irama amitero tiharo, Kotiva tiva taatauto uvaraqihairo nana uvavanoe avuni vai uvava vaivo? tiro.

²⁹ Minti tuvaro Ihuva vira tiva amiro tiharo, Maa uvavama avuni vai uvavama vaivo. Mintima qara ntuva torave:

Isareri vatanaaka ne iriate.

Tinavu Variqa Noravano Kotiva vohaiqavanoqaima vaivo.

³⁰ Are nena Variqa Nora Kotirara ekaa nena muntukaqihairave, ekaa nena maraquaqihairave, ekaa nena avu aatoqihairave, ekaa nena mpeqaqohairave, antuqa arirara variane, turave. *(Lo 6:5)*

³¹ Vi uvava vaivaro vi uvvara naantiaraini okara uva vo vaivo. Mintima tivo:

Ninara antuqa arinantema kera, nena navunaa vaiintiaravata antuqa arirara variane, turave. *(Wkp 19:18)*

Ho taara uva vi uvatanta avuni vai uvatantama vaivo. Kia vo uvavano vi uvatanta aatara kairave, tiro.

³² Ihuva minti tuvaro maara okara ti vau vaiintiva Ihurara tiharo, Maara ti variara vaiintio, are koqema kera avuqavu uvama tiarao. Are quqaama tihara, Variqa Kotiva vohaiqavanoqai vaivaro kia vo variqavanovata vaivo, tiarao.

³³ Quqaama are tihara, Vaiintivanu muntukaqihairove, maraquaqihairove, avu aatoqihairove, mpeqaqohairove, Kotirara voqamakero antuqa ari vairaroma varianarove. Vaiintivanu nariara antuqa arinantemakero, nai navunaa vaiintiaravata antuqa ariraro varianarove, tiarao. Vi uvatanta tiarava avuni vai uvatantama vauharo, vi uvava Kotira kaiqa vara amiteha quara aantau aruke iha quara amite varia uvara aatarakero vairave, tiro.

³⁴ Minti tuvaro Ihuva tavovaro vi vaiintiva koqema kero tuvaro Ihuva vira tiva amiro tiharo, Kotiva raqikiarirava ai aumantoma vaivo, tiro.

Ihuva minti tumanta vo vaiintinavu Ihurara viva tinavu uva aatara kaantorave ti, kia vira qaiqaavata uva irama amitaraiti, qaqrake tirema vaura.

*Ihuva Mesaiaa okarara vika irama nimitira
(Matiu 22:41-46; Ruki 20:41-44)*

³⁵ Ihuva Kotira Naavuqí vauharo vaiinti nahenti uva tiva nimiqiro viro tiharo, Maara okara ti varia vaiintika tihama, *Mesaiaavano* Kotiva atitaarira vaiintiva Devitira ankugíhairo qovaraiqianarove, tiarave. Vika nantiakée vi uvava ho tivarave? ³⁶ Haaru enta Kotira Maraquravano kahaquvaro Devitira nai minti turave:

Noravano ti Nora Vaiintiara tiharo, Are uritarera ti kauqu taranaraini oquivi vairage te ai navutaaka aru naatara nimitaari vikaqaa nena aiqu ntava taane, turave. *(Ihi 110:1)* Devitiva minti turave.

³⁷ Devitiva *Mesaiaavano* qovaraiqianarara tiharo, Viva ti Nora Vaiintive, turave. Devitiva minti turara tiro, nantiakeroe *Mesaiaavano* Devitira nainti ho varianarove? tiro.

Ihuva minti ti vaumanta qaqi vaiinti nahenti airitaha ruvaaqumavi vauka vira uva iriha vika quaheha vaura.

Maara okara ti vau vaiintikara tura

(Matiu 23:1-36; Ruki 11:37-54; 20:45-47)

³⁸ Ihuva uva tiva nimiqi viro tiharo, Vo vaiintinavu maara okara ti varia vaiintikara, ne vikara raurihama variate. Vaiinti nahentiara vika tinavu taveha uva manteha quahama timitaate ti, vika vukai tavuna koqe tavuna rumpa vare vaiinti nahenti nivuqaa *maaketiqi* vi ani variarave. ³⁹ Vika maara naavuqi oriqete qora tainta qaqirake, oru koqe taintaqaqai oquivi variarave. Vika ovata naaraqaa vaha vaiinti nahenti vikara nora vaiintive tiate ti, vaiinti taruka oquivi variaraqaa vikavata oru oquivi variarave.

⁴⁰ Vika tentoqua varia nahentika naavu airaira muara vareha tiha, Vovano tinavu vaauqai kaipa taveharo tinavuqaa qora vaiintive tiantorave ti, vika vaiinti nahenti nivuqaa Kotira kaiqiqamake aare variarave. Oho, vira kaara vikaqaa uva uritareroma varianarove, tiro.

Vehi nahentivano inaara monuqai Kotira amitora

(Ruki 21:1-4)

⁴¹ Ieruharemimi Kotira Naavu vaunaini taqu vo vaumanta viraqira vaiinti nahenti Kotira kaiqara iriha monu aqi vaura.

Ho Ihuva uva tivakero oru vi taqura tataaqa oquivi vaharo tavomanta vaiinti nahenti nái monu vi taquraqai aqi vauvaro Ihuva vika tave vaura. Viva oquivi vaharo tavomanta airi airaira vatoka airi monu viraqi vaavi aqukeha vi vaura. ⁴² Akuke vauvaro vehi nahenti tentoqavanovata anirero monu uapaara taarauruqai vaati aqu kora.

⁴³ Monu uapaara taarauruqai viraqi vaati aqukovaro Ihuva nai vaintinavu naarama kero tiva nimiyo tiharo, Tavaate. Vehi nahenti tentoqua nahentivano aqukai monuva ekaa airaira vataaka aqukaa monuravata aatara kaivo. ⁴⁴ Airi airaira vate variaka vika nái monu hini monuqai taquqi aqukaavo. Vi nahentiva vehi nahentivano vaharovata, viva nai vatai monura ekaa vi monura taquqi aqu kaivarao kia viva nai kara varaarira monuva hinivanovata vaivo, tiro. Ihuva turama.

Kotira Naavu rukavu raakavuma kerara tura

(Matiu 24:1-2; Ruki 21:5-6)

13

¹ Ihuva Kotira Naavuqihairo vevarovaro vira vainti vovano tiharo, Ike, maara ti variara vaiintio, tavaane. Maa naavura koqe naavuve. Vo ori vo ori nora oriqohai varake kaqataa naavu koqe naavuma vaivo, tiro.

² Viva minti tuvaro Ihuva vira tiva amiro tiharo, Vate are nora naavu vo naavu vo naavu tave variarao. Oho, naantiara navutaaka ani, ekaa maa naavura rampaike naavu kaqato orira, vo ori vo ori vara aqu kaivaro kia ori voqavanovata nai tauvaqaqaa nai tauvaqaqaa varianarove, tiro.

Ihuva naantiara airi maara haikavano qovarama vuanarove tura

(Matiu 24:3-14; Ruki 21:7-19)

³ Ihuva minti tivakero oru Orivi Aiqinaqaa oquivi vaura. Orivi Aiqina hini mantaraini vauvaro vuturaga Kotira Naavu hini mantaraini vaura. Mintima vaumanta Pitaavavata, Lemivavata, Ionivavata, Entaruvavata, vinavuka Ihuva vaunaini orure evaara vira ireha tiha, ⁴ Are vaaka Kotira Naavuara tianara taintae mintianarove? Nana nana haikae qovaraiqirage tenavu vi haikaraqaa ampeqamake taveha vi entava aniraarirava aumantoma vaivo tirarave? Are tinavu tiva timiraqe iriare, ti.

⁵ Vika minti tuvaro Ihuva vika tiva nimiyo tiharo, Vovano vi uvvara ni una uva tiva nimiantorave ti, ne virara raurihama variate. ⁶ Naantiara airi vaiinti anire ti hutu reha tiha, Kotiva ti tititaimanta anuraukave. Te maa vikave, timanta airi vaiinti nahenti vika una uvvara quqaa uvave tivarave.

⁷ Ne vaivaro iqoka raqi uvava qovaraiqiramanta kia qetaate. Iqokara ti uvava aaranahairo aniramanta kia qetaate. Iqoka raqi haikava naane minti minti i vaira, hauri ne virara iriha vi entava aniraivo tivorave. Vi haikava naanema qovaraiqianarove.

⁸ Vo vatanaava vo vatanaara vataakero raquananarove. Avuhainaa vaiinti vovano nai kena avuhainaa vaiinti hampata raquananarove. Vo vataaini vo vataaini vaturavano utuanarove. Vo vataaini vo vataaini karara voqamake narara i entava varianarove. Vi haikava vi haikava qovarama viramanta hauri ne tiha, Ekaara enta aniraivo, tivorave. Nahentivano vainti vatareva tota hoqarerero aihavinantemake, ne maara variaina entava qaqi hoqarama taivo, tiate.

⁹ Vi entara ne aitutumaqi viha raurihama variate. Vokika vika ni ravaaqavu vare vuru nái *kansoru* naavuqi vuru ke niqaa uva vatevarave. Ne maara ti vai naavuraqi vaimanta vika ni kaavu numiqake vatevarave. Ne ti kaiqa vare vaimanta vira kaara vika ni ravaaqavu vare vuru nora vaiinti avuqaave, avuhainaa vaiinti avuqaave, vuru kaimanta ne ti uva ho tiva qovarama kevarave.

¹⁰ Ne ti uva koqe uva ekaa vo vatanaaka tiva nimiqi vimanta vika ekaa iriate. ¹¹ Naantiara vika ni ravaaqavu vare vuru *ko* tireka ivaro, kiama ni aiqu kauqu ntiramanta tiha, Nana nana uvae tirarave, tiate. Vi entara kia nenta aatoqihai irike tiraiti vaivarvo, Kotira Maraqravano ni kahaqiharo ne vi uvvara tiate tira, ne vi uvaraqai tiate.

¹² Naantiara vokika vika nái qatae nái vakaarae qovarama kaimanta arukevarave. Vika qoka nai vainti qovarama kaimanta arukevarave. Vika vaintinavu nái noka qoka navutaiqihama vika arukaate timanta vika arukevarave.

¹³ Vi entara ekaa vainti nahenti niara Ihura vaintive tihama vira kaara vika ni iri qoraiqama nimitevarave. Vi entara kia popoharaitiro, kempukaiqaakero ti aaraqaa variqi viharo vuru taiqa kaaina vaintira, virama ekaara entaqaa Kotiva vitaanarove.

Vogamakero qoraiqiaina haikava naantiara qovaraiqiainarara tura

(Matiu 24:15-28; Ruki 21:20-24)

¹⁴ Naantiara ne tavaivaro vaaqu haikavano vehi autu kaarira haikava qovarama viro vaintivano qioqama tainaini viva miniqaima himpitero varianarove. (Maa uvvara kaara riraro aato kenko tirara iriane.) Naantiara vi entara vi haikava qovarama viramanta vainti nahenti Itutia vataini vaika vika himpi aiqu autute veraini ainqina vainainima vuuate.

¹⁵ Vi entara naavu gentiana vairava hauri nai naavuqi vaaka origetero vo haika varaantorave. Viva vi haikara vi haikara qaqrakero kantama vuarire. ¹⁶ Vovano naahoqi kaiqa vare vairava hauri nai vaaqauta varareva anirantero vuuantorave, viva qaqlima kantama vuarire.

¹⁷ Vi entara nahentinavu vainti taiqaa vikave, vainti naama nimi vai nahentikave, oho, vi entara vika qoraiqama vivarave.

¹⁸ Kia koqe kuari itaaina entava variantorave ti, ne Kotira aaraivaro vi entaraqaa koqe kuari itaaina entava vairava ne ho kante vuate.

¹⁹ Oho, naantiara vi entava qora entavanove, maara ntaaina entavave, uritarero vairamanta vainti nahenti vogamake qoraiqama vivarave. Hoqarero Kotiva maa vataro aututo entaraqaahairo kia vo maaravano vira voqara qovarama vurave. Naantiaravata vi maarava kia qaiqaavata qovaraiqianarove. ²⁰ Vi entava vukai enta vairamantavauve, ekaa vainti nahenti taiqa vivaro kia vovanovata ho qaqi varianarove. Ho Noravano Kotiva nai kaama tai vainti nahentikara iriharoma vi entara iquqama kaanarove.

²¹ Vi entara vokika niara *Mesaiaavan* mini mainima vaivo tivera, kia ne vika uvvara quqaave tiate. ²² Vi entara vo vainti vo vaintivano qovaramavi unahaa tiha, Te *Mesaiaavan*, tiraro vo vaintivano, Te Kotira uva qoqaiqamake vaura vaintikave, tivaqi vi vaivarave. Airi una vainti mintimake qovaramamavi una kaiqa varaqi viha Kotiva nai kaama tai vainti nahentikara vikavata tinavu avataqi vuate ti, nora kaiqa aahuva kaiqa vo kaiqa vara qovaramake vaivarave.

²³ Vika mintiaqi vimanta vi entara ne raurihama variate. Ne vi vaintika uvara quqaa uvave tivorave ti, te vate maa uvvara naantiara qovarama vuaina okarara ni tiva ními vauro, tiro.

Ihuva nai orurantero tuvuainarara tura

(Matiu 24:29-31; Ruki 21:25-28)

²⁴ Ihuva minti tivakero tiharo,

Naantiara nora maara raaina entava taiqa viraro vi entaraqaahairo kuari avuvano konkiraiqama viraro toravanovata kia itairaro

²⁵ vaahoquravanovata, opu makauvanovata, hiqiri hiqiri vairaro naaruvali vaira haikava vaharo hampiqama kero qaki qakianarove. *(Aisaiaa 13:10; 34:4)*

²⁶ Vi entara te Vataini Vatatai Vaintika naaruvaihai tonavuqaa tuvi variari ekaa maa vataraqaa vaika ti tavevarave. Ti mpeqa okaravano vogamakero takuqi vairaqe te kempukavano tuvirerave.

²⁷ Te tuvu vaiha tenta *enseli* vika nititaari vika otu vataini vaiha Kotiva nai kaama tai vainti nahentika hihai hihai ruvaaqumake ekaa ntitevarave, tiro.

Ihuva fiki katariara uva tuqantaakero tura

(Matiu 24:32-35; Ruki 21:29-33)

²⁸ Ihuva minti tivakero tiharo, Ne fiki katariqaahai avu aato varaate. Vi katarira mare aqu ntuvu vivaro, viragaahairo qaiqaa qaraaka ankuri ntareva auti vaimanta ne viraqaa ampeqamake taveha tiha, Nora kuarivano itaaina entava aumantoma vaivo, ti variarave.

²⁹ Vira voqaantemake, naantiara qovarama vuaina haikarara tunara ne viraqaa ampeqamake tave tiriara tiha, Viva tuvuaina entava aumantoma vaivo, tivarave. ³⁰ Te quqaama turo. Maa entara vaika kia taiqa vivaro ekaa vi haikarara te turava vivauma varianarove.

³¹ Naaruvavanovata vatavanovata taiqa viraro ti uvavanoqaima kia taiqa viraitiro, qaqlima variqiro vuanarove, tiro.

*Kia vovanovata te tuvuaina entarara kankoma kero iritairave tura
(Matiu 24:36-44)*

³² Ihuva minti tivakero tiharo, Te tuvuaina entava nana entaqaae, nana kuari avuqaae, varianarove? Kia vaiinti vovanovata virara irirave. Kia naaruaini varia *enselika* virara iriarave. Te Vataini Vatatai Vaintika vaiha tentavata kia virara irunarave. Kotiva ti Qova, viva naiqaima vi entarara iritairave.

³³ Vi entava qovaraiqaina okarara ne kia irihara ti, ne taveha rauriha geramate variate.

³⁴ Vi entava aniraainarara te nana uvaqaa tuqantaake ni tiva nimirarave? Ho maa uvra voqaarama vaivo. Nora vaiintivano niara aara vireva iharo nai kaiqa vaiintinavuara tiharo, Te uvari ne vi kaiqara vi kaiqara vare vase te orurante aniare, tivakero viva vo kaiqa vo kaiqa vika nimiro vo vaiintiara tiharo, Are qentiana vaharama maimaraara raciqihara variane, tivakero ho vurave.

³⁵ „Ihuva minti tivakero nai vaintinavu tiva nimiro tiharo,“ Vi uvra irihama nevata taveha rauriha variate. Tairentae vika nora vaiintivano niara aara vinanaihairo orurantero anianarove? Enta ire inainie? Enta tavaarae? Kokoraaravano uva tinaraqaae? Aatita vinaraqaae anianarove?

³⁶ Viva vaaka orurantero anirero tavaira hauri ne vaite vaivorave.

³⁷ Virara irihama te ninavuaravata ni ekaukaravata mintima turo: Ne koqemake taveha variate turo, tiro.

*Nora vaiintinavu Ihura aruke uvarara qaiqaa tura
(Matiu 26:1-5; Ruki 22:1-2; Ioni 11:45-53)*

14

¹ Vo ihi vo ihi vi vatanaaka Vehakuma Nimito Kararavata, Kia Noqavu Mparetiravata, iriha vi entaraqaa vi karara nora. Vi entara vi karara neva taara enta qaqi vaumanta Kotira kaiqa vara amite vau vaiintika vika noranavuvata, maara okara ti vau vaiintikavata, vika ruvaaqumavi vaiha Ihura ravaaqavu vare vuru aruke uvara nai tiva ami nai tiva amiha ² vika mintima ti, Tenavu Vehakuma Nimito Karara naaina entaraqaa vaiinti nahenti „nivuqaa“ Ihura ravaaqavu kaari vira kaara vika raqivorave, tura.

*Nahenti vovano vahaverera Ihura qiataqaa aqu amitora
(Matiu 26:6-13; Ioni 12:1-8)*

³ Vi entara Ihuva Betanini Saimonira naavuqi oru vaura. Saimoniva tota vauvaro vaata ne vau numuarava vira arura. Ihuva vi vaiintiara naavuqi oru kara ne vauvaro nahenti vovano uriqetero Ihura koqema amitareva *naadi* vahaverera koqe untavura, nora monu aquko vahaverara ori taquqi varero, taqu auntana rukavu kero vahaverera Ihura qiataqaa vuru qihakero aqu amitero.

⁴ Vira qiataqaa qihakero aqu amitomanta hini kuka vi naavuraqi vauka arara itomanta nai tiva ami nai tiva amihi tiha, Aqao, nantivaroe vi vahaverara qumina aqu amitaivo?

⁵ Vi vahaverara nimiharo 300 *silvaa* monu varakero vehi vaiinti nahenti nimiataarave, ti. Vika minti tivake nahenti vira ati vaura.

⁶ Vika vira ati vauvaro Ihuva vikara tiharo, Qaqi kaivaro vi nahentiva variarire. Ne vi nahentira nantihae ati variavo? Viva mintiharoma ti koqema timite vaivo. ⁷ Vehi vaiinti nahenti kia airaira vateka vo enta vo enta ni hampata variqi vivarave. Ne vo enta vika kahaqitaa ira homa kahaqivarave. Teqaima kia ni hampata airi enta variqi virarave.

⁸ Vi nahentiva nai ho varaaaina kaiqara iriharo viva vi kaiqara varavo. Te qaqi vauua entaraqaa viva naane vahaverera aqu timiteharo ti tivaata quntama tera qerama timite vaivo.

⁹ Te quqaamia tiari ne iriate. Naantiara ti uva vakaaka ekaa vo vatanaaka tiva nimihi viha maa nahentirara irihama viva vate ti mintima timitaina uvararavata tiva nimimanta vika irivarave, tiro.

Iutaasiva Ihura qovarama kareva vevarero vura
(Matiu 26:14-16; Ruki 22:3-6)

¹⁰ Ihuva minti tuvaro vira vainti 12 navuqihairo vovano Iutaasi Ikeriotiva naavu viraqihairo vevarero Ihura qovarama kaainarara tiva nimireva vuva oruntero vuru Kotira kaiqa vara amite vau vaiintika vika noranavu tiva nimumanta ¹¹ vika vira uvara quahake nái aiqiqaa kauqu aquke tiha, Are minti tiaraveria tenavu monu ai amirerave, tuvaro viraqahairo Iutaasiva Ihura vika kauquqi tuta kaaina aarara rante vaura.

Ihuva nai vaintinavu hampata vehakuma nimito karara nora
(Matiu 26:17-25; Ruki 22:7-14, 21-23; Ioni 13:21-30)

¹² Kia Noqavu Mparetira Ovava ne varia entanavuva aniromanta hogare enta, vi entara sipisipi naati aruke ne entaraqaa, vira vaintinavu Ihura ireha tiha, Taraqie tenavu oru qerama amitaarira are Vehakuma Nimito Entarara irihara vi karara nenanarave? ti.

¹³ Vinavuka minti tuvaro Ihuva nai vainti taaraqanta nititero tiharo, Netanta nora vatuka Ieruharemini oru vivaro vainti vovano namari taqu kaqa varero aaraqaa anirava ani nitanta ntita kaanarove. Ho netanta vira avataqi vivaro ¹⁴ viva naavuqi oriqtetaira netantavata viraqi oriqtetira naavu qorara mintima tiate, Maara ti vai vaiintiva ariara tiharo, Ta *rum uraqie* te tenta vaintinavu hampata Vehakuma Nimito Karara nararave, tivo, tiate.

¹⁵ Netanta minti tivaro viva nitanta nora *rumu*, maari kanta vaina *rum ura* taintavata viraqi vainara nitanta numiqaira ho netanta vi *rum uraqira* kara qerama vataate, tiro.

¹⁶ Ihuva minti tumanta vitanta nora vatukaini orunte tavavarova ekaa haikavano Ihuva tuntemakero vivauma vaumanta vitanta Vehakuma Nimito Karara oru viraqi qeramake vatora.

¹⁷ Vi karara qerama vatovaro entuvaro Ihuva nai vaintinavu vataakero uriro ¹⁸ vi naavuraqi kara neharo tiharo, Te tiari iriate. Niqihairo vainti vovano navutaaka nivuqaa ti qovarama kaanarove, tiro.

¹⁹ Minta tuvaro vira vaintinavu muntuka qoraiqumanta vinavuka vohaiqa vohaiqavano Ihura ireha tiha, Are tiriarae tiarao? Kia te vikavauve, tivaqi vi vaura.

²⁰ Vika minti tivaqi vi vauvaro Ihuva vika tiva nimiyo tiharo, Ni 12 navuqihairo vainti vovano nai mpareti varakero ti vataakero tanuqi vaati quntama kero naaina vaintiva, vi vaintivama ti qovarama kaanarove.

²¹ Haaru vetanto entaqaa ti Vataini Vatatai Vaintika haru kerara mintima qara ntuvatovare. Vi uvava vate vivauma varianarove. Ti Vataini Vatatai Vaintika qovarama kaaina vaintira te virara mpo tiva amitau. Oho, koqemama vira nova kia vira vata taataarave, tiro.

Mparetiaravata uainiaravata tivatora
(Matiu 26:26-30; Ruki 22:15-20; 1 Korinti 11:23-25)

²² Minti tumanta kara ne vauvaro Ihuva mpareti varakero Kotirara koqema iarao tivakero nkukero nai vaintinavu nimiyo tiharo, Maa karara varaate. Maa mparetiva ti vaatama vaivo, tiro.

²³ Minti tivakero viva *uaini kaapu* varakero Kotirara koqema iarao tivakero viti nimumanta ekaa vinavuka *kaapu* viraqihai namari nora.

²⁴ Namari ne vauvaro Ihuva tiharo, Maa namariya ti naarema vaivo. Ti harukaivaroti naarevano Kotiva „qaraaka“ uva tiva taatau taainara kempukaiqama kaanarove. Ti naarevano nteharo airi vaiinti nahenti kahaqianarove.

²⁵ Te tiari ne iriate. Vate maa entaraqahai te kia *uaini* qaiqaavata naraiti, qaqrake variqi vi, naantiara Kotiva raqikinaini oru vaiha vi entara qaiqaa qaraaka *uaini* nerarave, tiro.

²⁶ Ihuva minti tivakero nai vaintinavu hampata Kotirara ihi tivakero vevarero Orivi Aiqinaqaa vurama.

Pitaava naantiara tiaina uvara Ihuva nai vira tiva amura
(Matiu 26:31-35; Ruki 22:31-34; Ioni 13:36-38)

²⁷ Vinavuka mini vuvaro Ihuva vinavuka tiva nimiyo tiharo, Naantiara nenavu ti maini kema aiqu autute vivarave. Kotira vukuqi qara ntuvato uvava vate vivauma varianarove. Mintima turave:

Kotiva sipisipi qora vira ruputu kaira sipisipi vika qetake raantaupirima vivarave, turave. (Sek 13:7)

²⁸ Ho naantiara ti vara qaiqaa qaqi himpima kairaqe te naane ni nivuni Karirini virerave, tiro.

²⁹ Minti tuvaro Pitaava aqao tiro, Naantiara ekaa maanavuka ai maini ke aiqu autute viqevata, teqaima ainti maini vairerave, tiro.

³⁰ Pitaava minti tuvaro Ihuva tiharo, Te tiarira are iriane. Vate entaqi kokoraaravano kia taara tataa uva tirara are taaramo tataama tiriara kia vira tavaunarave tinarave, tiro.

³¹ Ihuva minti tuvaro Pitaava kempukaiqaakero aqao tiro, Kia te ariara kia tavaunarave tirarave. Ai vataake ti harukaqevata, kia te minti tirerave, tiro. Pitaava minti tumanta Ihura vainti hininavuvata vohaa vi uvaraqai tura.

Geseman i kaqava ututoraqi Ihuva vurama

(Matiu 26:36-46; Ruki 22:39-46)

³² Viraaqahairo Ihuva nai vaintiaravata oru viro kaqava ututora, Gesemanive turaqi orurero nai vaintianavuara tiharo, Nenavu maini oquivi vaiqe te vuturraqi oru Kotira aaraare, tivakero ³³ Pitaaravata, Iemiravata, Ioniravata, vinavukaqai ntita varero vurama.

Vinavuka ntita varero oru vuvaro vira avu aato kia koqe uvapo vira muntukavanovata qoraiquvaro ³⁴ viva vinavukara tiharo, Ti muntukavano voqamakero qoraiqimanta vaunarara tiro, vi maarava ti haatara kareva auti vaivo. Nenavu maaqaa ti vataake vaiha avu viti viri ihama aitutiha variate, tiro.

³⁵ Minti tivakero viva inaaraiqaka vutuni viniro, vatakanta hiqiri viro Kotira aarerero tiharo, Vo aara vairera, te kia maara ntaina aararaqaa viraiti, vo aaraqaa virerave, tiro.

³⁶ Ihuva minti tivakero viva tiharo, Mpo ti Qo, are ekaa kaiqa ho vare variaravave. Te ihavina namarira naaina *kaapura* are vi *kaapura* qaqini vara kaane. Te minti tiariraravata, are kia ti muntuka vainara avataqira viraitira, are nena muntuka vainara avataqira vuane, tiro.

³⁷ Ihuva minti tivakero orurantero nai vanti taaramonavu konaini ani tavomanta vinavuka avu taumontonta vaite vauvaro viva Pitaaraara tiharo, Saimonio, are vaitee variarao? Mpo, nantihae ne taaramonavu ti vataake inaaraiqaa vaiha kia avu rampai keha viti viri aitutiha variavo?

³⁸ Sataaniva ninavu avataantorave ti, aitutiha Kotira aareha variate. Ninavu maraquravano mintiataa ivaro ni vaata kempukavano kia ho vaivo, tiro.

³⁹ Minti tivakero Ihuva qaiqaa vinavuka mini kero oru Kotira aareharo viva vaaka tu uvava vi uvaraqai qaiqaavata tiro.

⁴⁰ Minti tivakero qaiqaa orurantero ani tavovaro vira vaintinavu avu taumontonta vaitateqai vaura. Ihuva anironmanta vinavuka himpi kauriha Ihura tiva ami uvava kia vaumanta vauvaro ⁴¹ Ihuva qaiqaavata oru Kotira aarama taiga kero orurantero ani tavomanta vinavuka qaiqaa vaite vauvaro Ihuva tiharo, Ike, nenavu auraara vaihae vaite variavo? Ho tavaate. Ti utuvare entava aniraivo. Ti Vataini Vataatai Vaintika vika ti ravaaqavu vare vuru qora kaiqa vare vai vaiintika kauquqi tuta kevarave. ⁴² Ho himpiqenavu vuare. Ti qovarama kaarira vaiintiva anima vaivo, tiro.

Iutaasiva Ihura qovarama kora

(Matiu 26:47-56; Ruki 22:47-53; Ioni 18:3-12)

⁴³ Ihuva vi uvava ti vauvaro vira vanti 12 navuqihairo Iutaasiva orurora. Iutaasiva oruromanta vira vataake airi vanti iqoka paipewata, kaavuvata, tota vare orurora. Kotira kaiqa vara amite vau vaiintika vika noranavuvata, maara okara ti vau vaiintikavata, Iuta nora vaiintinavuvata, vika vi vaiintika nititonmanta vika Iutaasira vataake anura.

⁴⁴ Anuvaro Iutaasiva Ihura qovarama kareva iainarara vikara mintima tiro: Te oru vira uva manteha moqa kaaina vaiintira virave. Ne vira ravaaqavu kema paama tivake tuata varema vuru kaate, tiro.

⁴⁵ Iutaasiva minti tivakero vika hampata orurero viva vaakama Ihuva vaunaini orurero tiharo, Maara ti variara vaiintio, tivakero vira moqa kero.

⁴⁶ Iutaasiva Ihura oru moqa komanta Iutaasira vataake anuka oru nái kauquqohai Ihura ravaaqavu tovaro ⁴⁷ Ihura tataaga vira vanti vovano iqoka paipe nai uteqihairo rarau varero viraqohairo vaiinti vo vira aato teqa aqukora. Kotira kaiqa vara amite vau vaiintika vika qiaa vaiinti vira paanaa vanti aato teqa aqukora.

⁴⁸ Vira paanaa vanti aato teqa aqukovaro Ihuva Iutaasira vataake anu vaiintikara tiharo, Ike, ne *kamaanira* vataake iqoka raqi vaiintira ravaaqavu karekae iqoka paipewata kaavuvata vare aniaivo? ⁴⁹ Te vo enta vo enta Kotira Naavuqii vaiha vaiinti nahenti vakaaka tiva nimi vauramanta ne vi entara kia ti ravaaqavu kareka auti variarave. Kotira vukuqi tiriara mintiainarara qara ntuva tova vate vi uvava vivauma varianarove, tiro.

⁵⁰ Ihuva minti tumanta vika vira ravaaqavu komanta vira vaintinavu ekaa vira mini ke, qetake aiqu autute kantama vura.

⁵¹ Vaiinti vohaiqavano qaraaka vaiinti viva tavuna vohaiqaqai rumpatova vi vaiintivaaqai Ihura avatacqvi vaumanta vika vira tave oru viravata ravaaqavu karare ti,⁵² vira tavunaqai rapema kovaro vi vaiintiva tokavano kantama vura.

Iutaa nora vaiintinavu nivuqaa Ihura vuru kora

(Matiu 26:57-68; Ruki 22:54-55, 63-71; Ioni 18:13-14, 19-24)

⁵³ Vira vaintinavu aiqu autute qetake vumanta vika Ihura vita vare Kotira kaiqa vara amite vau vaiintika vika qiata vaiintivano vauraqi vuru komanta Kotira kaiqa vara amite vau vaiintika vika noranavuvata, Iutaa nora vaiintinavuvata, maara okara ti vau vaiintikavata, vika ekaa vi naavuraqi ruvaquamavi vaura.

⁵⁴ Ihura vita vuru ke vauvaro Pitaava niaraihairo qjata vaiinti naavu vatukaini orurero hoahaa aaqaihairo avutaqvi vaatirero viro oru vi naavuraqaa maimaraara raqiki vau vaiintinavuka hampata oquvi vaiharo iha taari vaura.

⁵⁵ Pitaava mini vahaqaini vaumanta Kotira kaiqa vara amite vau vaiintika vika noranavuvata, ekaa nora vaiinti viraqi uki vau vaiintikavata, vika viraqi vaiha Ihura arukareka Ihuraqaa uva vataare tuvaro kia vi uvava vaumanta qumina vi uvarara rante vaura.⁵⁶ Kia uva vaumanta airi vaiinti himpite Ihuraqaa una uvaqai ti vauvaro vika uvavano kia vohaa uva vairaitiro, vo uva vo uvaqai vaura.

⁵⁷ Mjnti tivaqvi vumanta vokuka Ihuraqaa mintima una uva tiha,⁵⁸ Ihuva minti timanta tenavu irunarave. Viva tiharo, Te Kotira Naavu vaiintivano nái kauquqohai kaqatora, te vi naavura rampaile taaramo enta vaiha qaiqaa naavu vira kaqarerave. Vi naavuva kia vaiintivano kauquqohairo kaqa taaina naavuva varianarove turave, ti.⁵⁹ Vi vaiintika vi uvaravata tihamia kia vohaa uva tiraiti, vo uva vo uvaqai turama.

⁶⁰ Mjnti tuvaro Kotira kaiqa vara amite vauka vika qjata vaiintivano vika nivuqaa himpitero Ihura irero tiharo, Vika mintima ariqaa uva vateha ti variavo. Are vo? Vika uvvara nana uvae nái vika tiva niminarave? tiro.

⁶¹ Tuvaro Ihuva kia uvavata tiraitiro, evaara vauvaro qaiqaa qjata vaiinti viva vira irero tiharo, Quqaae Kotiva ai ataiavara are tinavu kahaqirava Mesaiavavano variarao? Quqaae are Kotira Maaqavano variarao? Tinavu tiva timirage iriare, tiro.

⁶² Viva minti tuvaro Ihuva tiharo, Te maa vikave. Ne naantiara tavaiqe te Vataimai Vataatai Vaintika noraiqamavi Kotiva mpeqavano variaiananaini vira kauqu tanaraini oquvi vaiha tonavuqaa tuvirerave, tiro.

⁶³ Ihuva minti tuvaro Kotira kaiqa vara amite vauka vika qjata vaiintivano nai utavaaqaa qunahi qaannahima kero tiharo, Oho, vo vaiinti viraqaa uva vataaina vaiintira qumina aarevorave.⁶⁴ Tavaate. Ne iri variavaroo viva Kotira avuqaa vaiharo vaaqu uva Kotirara tivo. Vira kaara ne Ihurara nana uvae tivarave? Ne tige iriare, tiro. Minti tumanta vika tiba, Vira vaaqu kaiqavano uritaravo. Vira kaara vira arukevqaqima vaivo, ti.

⁶⁵ Mjnti tivake hini kuka oru Ihuraqaa taara vihike viraqaaqhai Ihuva kia ho tavaarire ti, vira viri tavunaqohai naavumate vira vataake ruheha vira ruqemakeha tiha, Tavave ai arivo? Kia tavaraitira, ai arina vaiintira autu rairaqe iriare, ti. Mintiaqi viha Ihura qoraiqama amitomanta kiripunavuvata vira vite viha kauquqohai vira ruqutuqí vurama.

Pitaava Ihurara kia tavaunarave tura

(Matiu 26:69-75; Ruki 22:56-62; Ioni 18:15-18, 25-27)

⁶⁶ Naavuqvi Ihura qoraiqama amitaqvi vauvaro Pitaava vahaqaini vatukaqaa oquvi vauvaro qjata vaiinti vira kaiqa nahenti vovano aitareharo tavovaro⁶⁷ Pitaava iha taariharo vauvaro vira aitutiharo tiharo, Ae, are Ihura Nasarethainaara vikantira variaravave, tiro.

⁶⁸ Tuvaro Pitaava aqao tiro, Are nana uvae tiarao? Are tiana uvara te kiama iruro, tiro. Pitaava minti tivakero oru qentiana vauvaro kokoraaravano uva tura.

⁶⁹ Pitaava mini vauvaro kaiqa nahenti viva qaiqaa vira taveri mini himpite vaukara tiharo, Vi vaiintiva vira navunaa vaiintive, tuvaro⁷⁰ Pitaava aqao kiave tiharo vaura.

Mjnti tivakero inaaraipa vaumanta mini himpite vauka vika Pitaarara tiha, Ihura vaintinavu Kariri vatanaaka variavara quqaama arevata vohaa vi vatanaavama variarao, ti.

⁷¹ Vika minti tuvaro Pitaava kauqu aqiqaa aqukero tiharo, Te kia quqaa uva tiariraro Kotiva homa ti haruanarove. Te quqaama turo. Ne ti varia vaiintira kia te vira tavaunarave, tiro.

⁷² Mjnti tuvaro vaakama kokoraaravano qaiqaa uva tuvaro Pitaava viraqaaqhai Ihuva vaaka tiva amu uvvara irikora. Ihuva mintima Pitaara tiva amiro tiharo, Vate entaqvi kokoraaravano kia taara tataa uva tirara are taaramo tataama tiriara tihara, Kia te vira tavaunarave, tinarave tu uvvara irikovaro vira muntukavano qoraiquvaro iqi ratora.

*Ihura Paireatava vaunaini vita vuru kora
(Matiu 27:1-2, 11-14; Ruki 23:1-5; Ioni 18:28-38)*

15

¹ Vira qararaa toqaqi Kotira kaiqa vara amite vau vaiintika vika noranavuvata, Iutaa nora vaiintinavuvata, maara okara ti vau vaiintikavata, ekaa *kansoru* vaiintinavuvata, vika ruvaaqumavi vaiha vika nái auti okarara tiva avuqavuqaake Ihura seniqohai rumpa vare Paireatava *kamaanira* vaiinti nora vaiintivano vauraqí vita vuru kora.

² Vita vuru kovaro Paireatava Ihura irero tiharo, Quqaae are Iutaa vatanaaka avuhainaa vaiintivano variarao? tuvaro Ihuva tiharo, Are tianara te maa vikave, tiro.

³ Minta tumanta Kotira kaiqa vara amite vau vaiintika vika noranavu vo uva vo uva kaara Ihura ati vauvaro ⁴Paireatava vika uva iriharo qaiqaavata Ihura irero tiharo, Are kiae vika nái vo uva tiva niminarave? Vika airi uva ariqaa vateha ti variavo, tiro.

⁵ Minta tuvaro Ihuva kia uva tiraitiro, evaara vauvaro Paireatava airi aato utiharo vaura.

Paireatava Ihura katariqaa arutaate tura

(Matiu 27:15-26; Ruki 23:13-25; Ioni 18:39-19:16)

⁶ Vo ihi vo ihi Vehakuma Nimito Karara no entaraqaa *kamaanira* avuhainaa vaiintivano vaiinti nahenti quahama nimiteharo karapuhi vaiinti kuvantu kero atitovaro maaqaini vura. Vaiinti nahenti vi vaiintira kuvantu timitaane tuvaro vi vaiintirraqai kuvantu nimitora. ⁷ Vi entara vaiinti vonavu *kamaanira* hampata raqura kaara karpupuhiqí vauvaro vi vaiintinavukaqihairo vovano vira autu Barabasiva vaiinti arukora kaara vivavata karapuhiqí vaura.

⁸ Ho vi entaraqaa vaiinti nahenti karapuhi vaiinti vo kuvantu kaainarara iriha uki vauvaro ⁹Paireatava vika irero tiharo, Te karapuhi vaiinti tarae ni kuvantu nimitararave? Ne ti tiva timiqe iriave, tiro. ¹⁰ Paireatava irumanta Kotira kaiqa vara amite vau vaiintika vika noranavu Ihuva noraiqama vuantorave tiha vira toma amitehara ti, vika vira vuru vira kauquqi tutakora.

¹¹ Paireatava karapuhi vaiinti tarave ni kuvantu nimitararave tivakero vaiinti nahenti ire vaumanta Kotira kaiqa vara amite vau vaiintika vika noranavu oru vaiinti nahenti nivutana himpiti vaiha vikara kempukaiqamake tiha, Kia Ihura kuvantu timitaraitira, Barabasira tinavu kuvantu timitaane, tumantara ti, vaiinti nahenti Barabasira tinavu kuvantu timitaane tura. ¹² Vika minti tuvaro Paireatava qaiqaa vaiinti nahenti irero tiharo, Ne Ihurara Iutaa vatanaaka Avuhainaa Vaintive tiarave. Te vi vaiintirara nantie irarave? tiro.

¹³ Minta tumanta vika naveraitiha, Vira kaira katariqaa arutaate, ti. ¹⁴ Vika minti tuvaro Paireatava vika qaiqaa irero tiharo, Viva nana qora kaiqa autu kaimantae ne minti tiavo? tumanta vika qaiqai noraiqaaq naveraitiha, Vira kaira katariqaa arutaate, ti.

¹⁵ Vika minti tuvaro Paireatava vaiinti nahenti quahama nimitarava Barabasira kuvantu nimitero viraqahairo nai iqoka vaiintinavuara Ihura kaavu umiqakaate tumanta vika vira kaavu umiqakovaro viraqahairo vira katariqaa arutaate tiro, Paireatava nai iqoka vaiintinavu kauquqi Ihura tutakora.

Iqoka vaiintinavu Ihura ruhama amitora

(Matiu 27:27-31; Ioni 19:2-3)

¹⁶ Paireatava nai iqoka vaiintinavu kauquqi Ihura tuta komanta vika vira vita vare vuru *kamaanira* naavu avutaqi ke vika nái kena iqoka vaiinti ekaa naarama ruvaaqumake

¹⁷ vika Ihura ruhama amiteha avuhainaa vaiinti tavuna naare tavuna varake Ihura aqu amite viraqahai auqurua naaqunta varake uquramake, avuhainaa vaiinti tovaqa voqaara kahemake Ihura qiatqaa aqu amitora.

¹⁸ Mintimake vika nái kauqu tiriqaa aquukeha uva virera tiva amiteha tiha, Iutaa Avuhainaa Vaiintio, vaiharave? ti.

¹⁹ Minti tivake vika kairiqaqohai vira qiat ruqemake, viraqaa taara vihike, vira avuqaa tori kauru aravi vaiha vireraqama keha quahama amite vaura.

²⁰ Vika mintimake ruhama amitaqi vivi taiqake, viraqahai vika naare tavuna agu amitora ravaqaake vira utavaaqa nonku amite, vira katariqaa hiritareka Ihura vite vurama.

Ihura katariqaa niriqohai aruke hiritora

(Matiu 27:32-44; Ruki 23:26-43; Ioni 19:17-27)

²¹ Iqoka vaiinti Ihura katariqaa hiritareka iha, vira vita vare vatuka aqaini aarana vi vauvaro vaiinti vovano vira autu Salmoniva vihairo nora vatukaini virare tumanta

vika vira ravaaqavuke virara kempukaiqamake tiha, Are Ihura katari aqu varera vuru amitaane, tuvaro Saimoniva vira katari aqu varero vuru amitora.

Saimoniva Sairini vataihainaava viva Arekisantaka Rufusika vitanta qova vaura.

²² Vika Ihura vita vare vuru qumina vata Gorogotave tunaini kora. *Gorogota* maa uvvaraqhahai tirera, *Qiata Vuhaaripaavema* tirera.

²³ Mini vuru ke, hunkavu namarira vataake tuqantaato *uainira* Ihura vira amuvaro viva kia vi namarira nora.

²⁴ Kia nomanta vika vira katariqaa niriqohai arute, vira utavaaqa varake, satu ruhamaqi viha nariara nariara vira utavaaqa rairake varora.

²⁵ Toqaqi kuarivano 9 *kiroki* umanta Ihura niriqohai katariqaa arutora. ²⁶ Vira niriqohai katariqaa arute Ihura qiataini uva vo, vira *ko* tiva amito uvara qara ntuvake katariqaa arutora. Arutovaro vi uvava mintima tiro:

Iutaa Avuhaina Vaiintive, tiro.

Vi uvava mintimake qara ntuvu tora.

²⁷ Vika Ihura katariqaa niriqohai arute Ihura vataake vaiinti votantavata arutora. Vitanta vaiinti ruqutihā muara vare vau vaiintitanta vaumanta vika vaiinti vo Ihura kauqu taranaini arute, vo Ihura kaanaaqaini arutora.

²⁸ [Ihura vataake vitanta arutorara tiro, Kotira vukuqi uva vo qara ntuvu tova vivauma vaura. Vi uvava mintima tiro:

Viva qora vaiinti vataakero vairamanta vaiinti nahenti viraravata qora vaiintive tivarave, tura.

Haaru mintima qara ntuvu tora.]

²⁹ Ihura niriqohai katariqaa arutomanta vaiinti nahenti vitare aitare iha nái aru runkirkiraha maurus kumiki amiteha Ihura qora uva tiva amiteha tiha, Oho, are tihara, Te Kotira Naavu rampaikē taaramo enta vaiha qaiqaa kaqa taiqa kararave, tianara vo?

³⁰ Ho nena kahaqiane. Nena katariqaahairo viquivira viavi ntaane, ti.

³¹ Vika minti ti vaumanta vika aanare Kotira kaiqa vara amite vau vaiintika vika noranavuvata, maara okara ti vau vaiintikavata, vika anire Ihura naaraihama amiteha tiha, Viva vokiaka kahaqaa nimiteharo nai kia ho kahaqivo. ³² Viva Kotira atitai vaiintiva *Mesaiiaavanove*, Isarerī vataanaaka Avuhaina Vaiintivanoma vaivo, tihamanta irunarave. Ho kaiqe tenavu vaiha tavaariraro viva nai katariqaahairo viquiviro vataaini tuvirera, tenavu ho virara quqaa vivave tiare, ti.

Vika minti tumanta vika aanare muara vaiintitanta Ihura vataake arutotanta vitanta-vata vira qora uva tiva amite vaura.

Ihuva qutu vura

(Matiu 27:45-56; Ruki 23:44-49; Ioni 19:28-30)

³³ Mintuvaro kuari qiataga uru rovaro viraqaaahairo konkiraiquva ekaa vi vataraqaa taaramo kuari avuara variqiro vura.

³⁴ Kuarivano vitiniqaa viro 3 *kiroki* quvaro Ihuva nai uvaqihairo naveraitiro, *Eloi, Eloi, lama sabakitan!*—Kotio, Kotio, nantihae are ti qaqira kera iarao? tiro.

³⁵ Ihuva minti tumanta mini himpite vauqaqhahai vokuka vira uva iriha tiha, Viva Elaitaara tinavu kaivaqara aare vaivo, tuvaro ³⁶ vaiinti vovano kantero namari nunko haikar varero hunkaiqamavu *uainiraq* quntamakero kairiqā vitiqaa taatautero vira Ihura nona vatero tiharo, Kaiqe vaiha tavaariraro vira kahaqireva tuvirerae, kia tuvirerae tavaare, tiro.

³⁷ Minti tuvaro Ihuva noraiqamakero oi tivakero qutu vura.

³⁸ Ihuva qutu vuvaro mini Ieruharemini Kotira Naavuqi kaankuka voqaara nora tavuna virini hiritova virihairo avutavau qunahiqi tuviro miani qunahi muntuvi taiqa vura.

³⁹ Igoka vaiinti avuhainaava Ihura aruto katarira tataqa vaharo tavovaro Ihuva noraiqakero oi tivakero qutu vuvaro viva tiharo, Oho, quqaama maa vaiintiva Kotira Maaquvano viava qutu vivo, tiro.

⁴⁰ Mintuvaro Ihuva qutu yumanta nahentinavu niaranto vaiha tave vaura. Vinavuka hininavuvano vaireka Mariava Makataara vatukihainaava vauvaro, Mariava qaraaka vaiinti Iemiravata Iosiravata vitanta nova vauvaro, Salomevavata mini vaura.

⁴¹ Vi nahentinavuka Ihuva Kariri vatainī nu entara vira avataqī niha vira kahaqama amito nahentinavuka vaumanta nahenti vonavuvata mini vaura. Vika tota Ieruharemini Ihura hampata vuka, vikavata mini vaura.

Ihura quntama tora

(Matiu 27:57-61; Ruki 23:50-55; Ioni 19:38-42)

⁴²⁻⁴³ Entama vire uvaro vaiinti vo Iohepiva Arimatis vatukaihainaava anirora. Vi vaiintiva koqe vaiinti *kansoru* vaiintivano vaiharo Kotiva raqikiaina entava aniainarara veka vau vaiintiva anirero, vira qararaa Iutaa vatanaaka maara tu entarara iriharora tiro, viva kia qetaraitiro, oru Paireatarara tiharo, Ho Ihura vaata are ti timirage te vare vuru quntama taare, tiro.

⁴⁴ Minti tuvaro Paireatava Ihuva vaaka qutu vurara airi aato iriharo iqoka vaiinti vo aaramakero Ihuva vaaka qutu vurara irovoro vi vaiintiva tiharo,⁴⁵ Eo, viva qutuma vivo, tuvaro Paireatava Iohepirara tiharo, Homa vira vaata varakera vuru quntama tenarave, tiro.

⁴⁶ Paireatava minti tuvaro Iohepiva monu aqukero hanta tavuna varero Ihura vaata katariqaahairo viqu muntuvi kero, hanta tavuna viraqohairo apuqama kero muntu vaiinti quntareva ori vaurutoraqi Ihura vera vatero, viraqahairo nora ori vo venta varero ori qentiana viri tinta tora.

⁴⁷ Mariava Makataaraihainaavavata, vira qamaqova Iosira novavata, vitanta tave vaumanta Ihura oriqi vera vatora.

Ihuva qutu vuraqihairo qaiqaa qaqi himpura
(Matiu 28:1-8; Ruki 24:1-12; Ioni 20:1-10)

16

¹ Saarareqaa Iutaa vatanaaka maara tu entava taiqomanta Mariava Makataaraqihainaa nahentivanovata, vira qamaqova Iemira novavata, Salomevavata, vi nahentivanukta monu aqukeha koqe untavu haikara vare, Ihura vaataqaa aqu amitareka vurama.

² Santeqaa toqaqi kuarivano muani ururomanta vinavuka Ihura quntama toraqi vireka vura.

³ Aarana viha vinavuka nai ire nai ireha tiha, Tenavu mini oruraariraro tavave nora ori qentiana tintataara qantua tinavu timitaanarove? Vi oriva nora orima vaivo, ti.

⁴ Vinavuka minti tivake oruvi orure tavovaro vi orira venta vavi kovaro qantuararo vaura.

⁵ Mintima vaumanta vinavuka orure oriqi origete tavovaro vaiinti vo, qaraaka vaiintivano hanta utavaaqa nonkuto vaiintiva viraq hini mantaraini oquivi vaura. Viva viraq vaumanta vira tave vinavuka qete vauviro⁶ vi vaiintiva vinavukara tiharo, Kia geteha variate. Ihura Nasaretihainaavaaiinti katariqaa arutaara, ne virarae rante variavo? Viva kia maaqi vaivo. Viva qaiqaa qaqlima himpivo. Nenavu tavaate. Maini vira vataaraqi kia vaivo.

⁷ Ho maa uvara vare vuru vira vaintinavuvata Pitaaravata tiva nimiate: Viva naanema ni nivuni Karirini vi vaivo. Nevata mini oruntema, vira tavevarave. Tota viva qaqi vaharo vi uvara ni tiva nimura, vate vivauma vaivo. Minti tivake vi uvara tiate, tiro.

⁸ Viva minti tumanta vinavuka getehara ti, Ihura quntama toraqihai vevare kante viha kia voravata vi uvara tiva amiraiti vurama.

Ihuva Mariava Makataaraqihainaa nahenti avuqaa qovarama vura
(Ioni 20:11-18)

⁹ [Ihuva Sante toqaqi qutu vuraqihairo qaiqaa qaqi himpivo hoqarero viva Mariava Makataaraqihainaa nahenti avuqaa naane qovarama vura. Haaru Ihuva vi nahentira avutaqihairo vaana⁷ navu nititomanta aitare vu nahentira vira avuqaa qovarama vuvuro¹⁰ Mariava vuru Ihura vaintinavu tiva nimireva viro oru tavomanta vinavuka Ihurara iq'i rate vaura.

¹¹ Iqi rate vauvaro viva vika vuru tiva nimo tiharo, Ihuva qaiqaa qaqlima himpivo vaivo. Te tenta avuqohai vira tavauro, tiro. Minti tumanta vinavuka kia vira uvara quqaa uvave tura.

Ihuva nai vainti taaraqanta nivuqaa qovarama vura
(Ruki 24:13-35)

¹²⁻¹³ Viraqahairo Ihuva nai vainti votanta nivuqaa qovarama vura. Ihura viri vaata kia tota vauntemakero vaumantara ti, vira vaiintitanta kia vaaka vira viraqamake tavora. Vitanta aaraini vi vauvaro Ihuva qovarama vumanta vitanta vira tave, orurante ani vokuka tiva nimumanta vinavuka kia vitanta uvaravata quqaa uvave tura.

Ihuva nai vainti 11 navu nivuqaa qovarama vura

(Matiu 28:16-20; Ruki 24:36-49; Ioni 20:19-23)

¹⁴ Ho naantiara ekaanaini Ihura vainti 11 navu kara ne vauvaro Ihuva vinavuka nivuqaa qovarama vura. Ihuva qaqi himpitero vaumanta vokuka vira tave vuru Ihura vaintinavu tiva nimumanta vinavuka vi uvarara kia quqaa uvave ti vauvarora tiro, vira kaara Ihuva

naivano vinavuka nivuqaa qovarama viro vinavuka nitiharo tiharo, Nenavu vi uvarara quqaave tiataara vaimanta nenavu kempukaiqama kehama kia quqaa uvave tiavo, tiro.

¹⁵ Ihuva minti tivakero vinavuka tiva nimiro tiharo, Ne ekaa vata maata vi anilha ekaa vaiinti nahenti maa uvara koqe uva tiva nimiate. ¹⁶ Ti uvara quqaave tivakero namari varaaaina vaiintira, virama Kotiva ho vitaanarove. Ti uvara kia quqaave tiaina vaiintira Kotiva kia vira vitaraitiro, viraqaa uvama vataanarove.

¹⁷ Ti uvara quqaave tika, vikama maa kaiqara nora kaiqa ho varevarave. Vika ti hutu rehama vaiinti avutaqihai vaana nititaimanta aitare vivarave. Vika aahuva uva, vo uva vo uva tivarave. ¹⁸ Vika *uqahi/quaiha* utu varaivaro vi haikava kia ho vika ntaihaanarove. Vika uhi namari naivaro uhi namarivano kia ho vika qoraiqama kaanarove. Vika nái kauqu rovara varekaqaa vataimanta vika koqema vivarave, tiro. Ihuva minti turama.

Kotiva Ihura naaruvaini vita varora

(Ruki 24:50-53; Kaiqa Varora 1:9-11)

¹⁹ Ihuva Noravano nai vaintinavu uva tiva nimi taiqa kovaro Kotiva vira naaruvaini vita varovaro viva mini oru Nora Kotira kauqu tanaraini oquivi vaurama.

²⁰ Ihuva naaruvaini vumanta vira vaintinavu ekaa vata maata niha Ihurara vaiinti nahenti tiva nimiqi vi vauvaro Ihuva Noravano vika kahaqi vaumanta vika kaiqa mpeqa kaiqa uritaro kaiqara vare vaumantara ti, vaiinti nahenti tavovaro vika uva quqaa uvaqai vaura.]

RUKI

Rukiva Ihuva nu okarara tura

¹ Nora vaiintio, Tiopiraasio,
Ihuva tinavu avutaini vaharo vo kaiqa vo kaiqa varorara airi vaiintinavu vi uvvara qara ntuva torave.

² Tota vo vaiintinavu nái nivuqohai vi haikara vi haikara tave, viraqaaahai vinavuka tinavu tiva timumanta airi vaiinti vi uvvara qara ntuva torave. ³ Nora vaiintio, tevata vi uvvara okaraqihai irirerave tivake, airi enta iramaqi viha vi uvvara ho kankomake iri, arevata iriane ti, maa uvvara okaravata, tavaaravata, amutuvata, qara ntuva vatarerave. ⁴ Vo vaiintinavu ai tiva amu uvvara vi uvvara koqema kera iriane ti, tevata maa uvvara ai avuqavu tiva amirerave.

Sekaraiaaka Elisabetikara tura

⁵ King Herotiva Iutia vataqaa raqiki vau entara vaiinti vovano Sekaraiaava Kotira kaiqa vara amite vau vaiintiva vaura. Viva Abisaara vohaa ankuvano vauvaro vira naata Elisabetiva vivavata Eronira vohaa ankuvano Kotira kaiqa vara amite vau ankuva vaura.

⁶ Sekaraiaaka Elisabetika vitanta Kotira avuqaa avuqavuqamake nihama Kotira maara uva ekaa iriqi vi vaura.

⁷ Mintiaqi vihatanta vitanta kia vaintivata vatora. Elisabetiva qaqi *naahiara/quru-raqama* viro kia vanti vataraitiro, qaquitanta variqi vi, konta naampaiqama vura.

⁸⁻⁹ Vo enta Kotira kaiqa vara amite vau vaiintinavuka vonavu Kotira Naavuqi kaiqa vara vuru taiqake oru maaqaini vaumanta Sekaraiaavavata, vira kana vaiintinavuvata, vinavuka vika kahaqamake Kotira kaiqa varareka anirora. Vika kaiqa varareka iha, *satu arukeha kaiqa rairakema Sekaraiaarara tiha*, Are Kotira Naavuqi vaharama mura koqe unta irava oru vuvarire tira, vi haikara iha quara amitaane, tuvaro Sekaraiaava Kotira Naavuqi nariaraa oriqetero unta vu haikara varakero ihaqaa quarareva viro. ¹⁰ Viva vi naavuraqi vaharo vi kaiqara vare vaumanta qaqi vaiinti nahenti vahaqakanta ukivi vahai Kotira aareha vaura.

¹¹ Vika Kotira aare vauvaro Sekaraiaava naavuqi vauvaro vaakama Noravano atito *enseli* viraqi qovarama viro mura autuina taintara tataaqa kauqu tanaraini himpitero vauvaro ¹² Sekaraiaava vira tavero ravuku viro qete vaura.

¹³ Qete vauvaro *enseli* viva tiharo, Sekaraiaao, kia qetaana. Are Kotira aarehara iraana uvvara Kotiva irivo. Ai naatavano Elisabetiva qorainti vanti vatataanarove. Are vi vaintira autu reharama Ionirave tiane. ¹⁴ Vi vaintira vatatairara ai muntukaqihairo koqe i vairara are quahehara vairamanta airi vaiinti nahentivata vi vaintirara quahevarave.

¹⁵ Vi vaintiva noruqama viro Kotira avuqaa Nora vaiintivana varianarove. Viva *uainivata* iha namari vokiravata kia naanarove. Vira vataatina entaraqaaahairo Kotira Maraquravano viraqaa raqiqiyo vuuanarove. ¹⁶ Maa vatanaka Isarer ihaqaa airivano vira uva irihama, qora aara qaqrake anirante nái Variqa Nora Kotira aaraqaa vivarave.

¹⁷ Kotiva ai vainti attairaro viva naane avuni oru vaharo, ni kaivaqava Elaitavaa mpeqa kaiqa varontema kero, viva mpeqa kaiqa vareharo airi vaiinti nahenti kahaqiramanta vika qora aara qaqrake kevarave. Ionira uva irihama vika qokavara antua uva tira qaqrake, nái maaquvara hampata qaiqaa vohaa vaivarave. Ioniva uva tiva nimira vika hampi avu aatoqaa ni vaira qaqrake, avuqavuqamake iriqi ni vai okararaqaa nivarave. Ioniva vaiinti nahenti qerama nimitaira vika Nora Vaiintivano tuvuainara veka variate, tiro.

¹⁸ Minti tuvaro Sekaraiaava *enseli* tiharo, Aqao, are tiana uvarara te nantiake quaaave tirarave? Te tenta naatanti konta naampaiqama vuro, tiro.

¹⁹ Sekaraiaava minti tuvaro *enseli* viva nai tiva amiro tiharo, Te Gebarielikave. Te Kotira aaqanto himpite vauraukave. Kotiva ti tititaimanta te koqe vakaaka ai muntu tiva amuro. ²⁰ Ho iriane. Are ti uvvara kia quaaave tianara kaarama ai novano tinta virara are kia ho uva tinarave. Are mintimakera variqira viraro te uva tiva taarirava qovaraiqama viraro ai naatavano vainti vatatairara vi entarama qaiqaa are uva ho tinarave, tiro.

²¹ *Enseli* viva minti ti vaumanta vahaqaini vau vaiinti nahentika Sekaraiaara veka vahama tavovaro naavuqira vukaiqama kero vaumanta vika airi avu aato utiha tiha, Nantiharoe kia viva vaaka vevaraivo, ti vaura. ²² Minti tivake vauvaro Sekaraiaava veva romanta vika tavovaro viva uva tirare tiro, kia ho uva tura.

Viva kia ho uva tumanta vika tiha, Ike, Sekaraiaava viraqi vaivarovo haikavano vira avuqaa qovarama vivaroma vira novano tinta vivaro kia ho uva tivo, ti. Vika minti

tuvaro Sekaraiaava kia ho uva tiraitiro, kauquqohairoqai aave vateharo vaura. ²³ Viva vo entanavu mini varikero nai kaiqa vuru taiqa kero anirantero nai maaqa oru vauvaro ²⁴ vira naatavano Elisabetiva vainti taiqama vura.

Elisabetiva vainti taiqama viro viva kauquru toranavuara naavuqiqai kukeqaviro vaura. ²⁵ Viva tiharo, Noravano ti aaqurihama timitaivo. Totaa enta te kia vanti vataraiti, kauriha variavaunarave. Vate maa entara te vanti taiqama vi kia kauriraitima vauro, tiro. Elisabetiva minti turama.

Gebrieliva naaruvalhairo muntu Mariara tiva amura

²⁶ Elisabetiva vanti taiqama vuvaro ⁶ toranavu aitarovaro Kotiva qaiqaa *enseli* Gebrielira atitovaro viva Nasareti vatuka Kariri vataini ²⁷ Iohepira vaiririqama amito nahentira qaraaka nahenti vakaaka tiva amireva tuvurora. Iohepira ankuvano vaireva, Devitira vira kaivaqara vohaa anku vaura. Iohepira vaiririqama amito nahentira autu Mariara.

²⁸ *Enseli* viva tuvurero naavuqi oriqetero Mariarara tiharo, Ho vaiharave? Are Noravano quahama amitai nahentivama variarao. Viva antiroma vaivo, tiro.

²⁹ Tuvaro Mariava vira uva iriro noraiqamakero avu aato utiro tiharo, Nantivaroe tiriara viva minti tivo? tiro.

³⁰ Tuvaro *enseli* viva tiharo, Mariao, kia qetaane. Kotiva ariara quahe vaivo. ³¹ Ho are iriane. Are vanti taiqamavira qorainti vanti vatatera vira autu reharama Ihurave tinarave. ³² Viva noruqama viro nora vaiintima varianarove. Virarama Kotiva nai virini naaruvaini vaira vira Maaquvema tivarave. Noravano Kotiva Devitira nai vira kaivaqava raqikina kaiqarama vira amianarove. ³³ Ai vaintivano Iekopira vohaa anku vikaqaa ekaa enta ekaa enta raqikiqiro vuanarove. Viva raqikina kaiqava kia taiqaanarove, tiro.

³⁴ Gebrieliva minti tuvaro Mariava vira irero tiharo, Kia te qorainti varauraukama vauro. Ho nantiakee te mintirarave? tiro.

³⁵ Mariava minti tuvaro *enseli* viva tiva amiro tiharo, Kotira Maraqravano aintiro vairaro Kotira mpeqavano ai mantaaqa amitaanarove. Are vataterava Kotira kaiqaqai varaarira vaintiva vairamanta ekaa vika virara Kotira Maaquvema tivarave, tiro.

³⁶ Minti tivakero viva tiharo, Ai varanakaava Elisabetiva kontaiqamaviva vaharovata, viva vanti taiqama vivo. Viva qorainti vanti vatataanarove. Vi nahentirara *naahihara/qururaiqama* virave tiavaroma viva vanti taiqama vivaroma ⁶ toranavu aitaraiavo.

³⁷ Kotiva ekaa kaiqa vare vaivama vaivo, tiro.

³⁸ *Enseli* viva minti tuvaro Mariava tiharo, Te Kotira kaiqaqai vareha variariraukama vauro. Are tinantema kero Noravano tiriara mintianarove, tuvaro viraqahairo *enseli* viva tuvurantero vurama.

Mariava Elisabetira vuru tiva amura

³⁹ *Enseli* viva tuvurantero vuvaroma Mariava vaaka himpiro Iutiaini vatuka vo, ainqina vauraqi Elisabetira vi vakaakara tiva amireva kantama vura. ⁴⁰ Oru viro oru Sekaraiaara naavuqi oriqetero Elisabetira uva mantero. ⁴¹ Uva mante vauvaroma Elisabetira vaintivano auhaqihairo qakuvaroma Kotira Maraqravano Elisabetira kempukaiqama kero kahaquvaro ⁴² viva naveraitiro tiharo, Airi nahenti variavarovata, Kotiva ariqaima koqema amitaivo. Are vatatenava vaintiravata Kotiva koqema amitaanarove. ⁴³ Mpo, are ti Nora Vaiinti vira nova vaharovata, ti qumina nahentima tavareva uruarao.

⁴⁴ Are vaaka ti uva mantaaramanta te ai uva iri vauraro vaintivano ti auhaqihairo qakivo. ⁴⁵ Noravano vi vakaakara ai tiva amivara are vira uvara quqaa vivauma varianarove tianarara tiro, Kotiva ai koqema amitaivara quahehara variarao, tiro.

Mariava ihi tiharo Kotira autu tuaherakora

⁴⁶ Elisabetiva minti tuvaro Mariava Kotira autu tuahereharo tiharo,
Te tenta muntukaqihaima Nora vira autu tuahera kauro.

⁴⁷ Viva ti Variqavano ti kuvantu timitaariva vaivarora tiro, ti maraqravano quaheharo vaivo.

⁴⁸⁻⁴⁹ Te Kotira kaiqa nahenti qumina nahentia vauraro Kotiva tiqai koqema timitarave.

Kotiva mpeqavano vaharo nora kaiqa ti mintima timitarira ti, vate variakavata, naantiaa vaikavata, tiriara Kotiva noraiqama kero vi nahentira koqema amitairavema tivarave.

Kotira autuvano takuqi vai autuvama vairave.

⁵⁰ Haaruvata, vatevata, naantiaravata, Kotirara iri vai vaiintika Kotiva vikama aaqurihama nimitaanarove.

⁵¹ Vika nái autuqai tuahera kaaka ruvaaqumavi qora kaiqa varareka auti variavaro Kotiva nai mpeqa kauqu tutukero vika raantaupirima kairave.

⁵² Kotiva nora vaiinti vika inaaraiqama kaivaro qaqqiqama vuavaro, viva qumina vaiinti vatainiqamavi variaka ntita vataimanta vika noraiqamavi variarave.

⁵³ Karara antuqa ari variaka variavaro Kotiva vika kara nimimanta namakeha ho variarave.

Kotiva airi haika vataa vaiintika nititama kaimanta vika kia vo haikavata vararaiti, qaqi qumina vuuarave.

⁵⁴⁻⁵⁵ Kotiva nai kauqu ainqiqa aqukai uvvara avataqi viharo viva tinavu Isareru vaiinti nahenti kahaqai vairave.

Viva haaru Eparahaamirara tiharo, Te aivata ai vaintivata ekaa enta ekaa enta aaqurihama nimitarerave, tu uvvara kia tauru kairave, tiro.

⁵⁶ Mariava minti tivakero Elisabetikantiro variqi viro, taaramo tora varakero ururantevo nai maaqaini vurama.

Elisabetiva Ionira vatatora

⁵⁷ Elisabetiva vainti vataaina entava anirovaro viva vi entara qorainti vainti vatatora.

⁵⁸ Viva vira vatatomanta vira navunaakkavata, vi vatanaakkavata, iruvaro Noravano Elisabetira koqemaa amitomanta vika ani Elisabetira vataake vainti vira quahama amitareka anura.

⁵⁹ Vika ani vauvaro 8 entanavu aitarovaro vi vaintira qorainti vainti vaumontara ti, vira vaata toqa kareka ruvaaqumavi vaiha vika vira autu rehama nai qora autu Sekaraiaarave tirare tuvaro ⁶⁰ vira nova aqao tiro, Tetanta vira autu reha Ionirave tirerave, tiro.

⁶¹ Elisabetiva minti tumanta vika tiha, Kia ai ankuqihairo vovano vi autura re vairave, ti.

⁶² Vika minti tivake Sekaraiaarara kauquqohai aave vateha irehama ti, Are nena maaquna nana autue rava tenarave? tuvaro ⁶³ Sekaraiaava kauqu aave vateharo *pepaa* vara timiate tumanta *pepaa* vara amuvaro Sekaraiaava *pepaa* viraqaa qara riharo, Vira autu Ionirave, tiro.

Mintima qara ruva tomanta vika vi auturara ravukuvi. ⁶⁴ Ravuku vuvaro vaakama Sekaraiaara novano quantua vuvaro viva uva ho tiro. Viva uva ho tiharoma Kotira autu tuaherero.

⁶⁵ Minti ti vaumanta vira navunaaka voqamake qetora. Mintuvuvaro vi uvava ekaa verara Iutia ainqina vataini vi anumanta ⁶⁶ vika nai tiva ami nai tiva ami iha tiha, Vi vaintiva nana vaiintivanoe varianarove? ti. Vika tavovaro Noravano kahaqai vauvaro vi vaintiva vaura.

Sekaraiaava ihi tura

⁶⁷ Kotira Maraquravano vira qora Sekaraiaara kempukaiqama kero kahaquvaro viva mintima tiro:

⁶⁸ Noravano tinavu Isareru Variqavano tinavu nai vaiinti nahenti kahaqiharo kuvantu kareva anirara ti, kaiqenavu vira autu tuaheraare.

⁶⁹ Noravano tinavu kaivaqara Devitira ankuqihairo vira nainti vo vara himpima kaivaro vi vaintiva mpeqqavano vaiharo tinavu kuvantu timitaariravama vaivo.

⁷⁰ Haaru Noravano nai paropeti vaiintinavu noqihairo mintima tivo:

⁷¹ Ni navutaaka ni arukevorave tima, te ni kahaqirerave. Ni qoraiqama nimite vaika niqaa ragikivorave tima, te ni ruaruuma nimitarerave, turave.

⁷² Noravano tinavu kaivaqaukavarara tiharo, Te ni aaqurihama nimitarerave. Te ni hampata vaiha uva tiva taatau taavaunara kia taurukararave, turave.

⁷³⁻⁷⁴ Noravano kauqu ainqiqa aqukero tinavu kaivaqara Eparahaamirara tiharo, Naantiara are vataterauka vika navutaaka arukevorave tima, te vika ruaruuma nimitarerave.

Te vika ruaruuma nimitari vika kia navutaaka aatu qetaraiti, ⁷⁵ vika qaqqi variqi viha ti tivuqaa vaiha ti kaiqaqai koqemake vareha avuqavu nuate turave, tiro.

⁷⁶ Sekaraiaava minti tivakero viva nai vainti naatiara tiharo,

Ti vaintivauvo, naantiara vaiinti nahenti ariara mintima tivarave: Kotiva naaruvinai vaiva vi vaiintira kahaqai vaivaro viva Kotira uva ti vaivo, tivarave.

Noravano anireva irara avuni are naane orurera vira aara gerama amitenarave.

⁷⁷ Kotiva vaiinti nahenti qora kaiqa vare uvvara nunka nimitiharero vika kuvantu nimitaaina uvvara, are naane vi uvvara vaiinti nahenti tiva niminarave.

⁷⁸ Kotiva tinavuara noraiqamakero aaqurihama timiteharoro tiro, viva naaruvinai hairo ataama nimitaaina vaiintira atitairaro viva tenavu variainanaini tuvuanarove.

⁷⁹ Viva tuvurero tenavu konkiraqiraq qutu vire urauka ataama timitaanarove. Viva tinavu tivita varairaqe tenavu maateraiqiaina aararaqaa koqemake nuvaqí vuare, tiro.

Sekaraaava minti turama.

⁸⁰ Minti tuvaro vira maaquvano noruqama vuvaro vira maraquravanovata kem-pukaiqiro vaura. Viva qumina vatainai variqiro viro noruqama viro, viraqaahairo viva Isareri vatanaaka nivuqaa qovarama vura.

2

Mariava Ihura vatatora

(Matiu 1:18-25)

¹ Vi entara Romeni avuhainaa vaiinti Sisa Ogatusiva *takisi* varareva tiharo, Ekaa vo watanaa vo watanaaka ne nenta autu vataate, tumanta ²⁻³ ekaa vaiinti nahenti nái maaqa nái maaqaini autu vatareka vurama. (Kuiriniusiva Siria vataqaa raqiki vau entara, vika vi entaraqaa hoqaramake autu vatora.)

⁴⁻⁵ Vaiinti nahenti vohaiqa vohaiqvano nái autu vatareka vuvaro Iohepiva Nasareti-hairo himpiro viva nai amito nahentira Mariaravata vita varero Kariri mini kero Iutiaini viro, Devitira vatuka Betarihemi autu vatareva vurama.

Iohepiva nai kaivaqara Devitira vohaa ankuvano vaiharora tiro, viva mini vurama.

Iohepiva Mariara vita varero vuvaro Mariava vainti taiqamaviro airi tora aatara kero vainti vataaina entava aumanto vauvaro ⁶⁻⁷ viva Iohepikantiro oru viro Betarihemi orurora.

Betarihemi orurero tavomanta airi vaiinti nahenti autu vatareka anuka ani ekaa naavu mpiqa kovaro Mariava purumakauvano kara no naavuraqi oru vaura. Oru viraqi vaiharo qorainti vainti hoqarenaa vainti vatatero, vira apuqama kero purumakauvano kara no tanuraqi vaati vaita kora.

Sipisipiqa raqiki vauka vi vaintira oru tavora

⁸ Mariava vainti vataatomanta entaqi vaiinti vonavu vi vataraqaa ukauni vahama vika sipisipiqa raqiki vaura.

⁹ Vika entaqi sipisipiqa raqiki vauvaro Noravano atito *enseliva* vaakama vika nivuqaa qovarama vuvaro Kotira takuqi vai haikava noraiqama kero aatite vaumanta sipisipiqa raqiki vau vaiintika vira tave, voqamake geteha vaura.

¹⁰ Vika mintimake gete vauvaro *enseli* viva tiva nimiro tiharo, Ne kia qetaate. Te koqe vakaaka ni tiva nimireru tuvuro. Vi vakaakara ekaa vaiinti nahenti irihama quahemaha vaivarave. ¹¹ Vate ni kaivaqara Devitira vatakagi vainti vo vataivo. Vi vaintiva ni kuvantukero ntitaariravave. Viva Karaitiva ni Noravanove. ¹² Ne maantimake taveha ti uvvara ququaave tivarave: Ne oru vi oru tavaivaro vi vaintira vatakeri apuqama kero, purumakauvano kara ne vai tanuraqi vaati vaita kainarama tavevarave, tiro.

¹³ *Enseli* viva minti tumanta vaakama *enseli* iqoka raqi vauka airitaha qovaramavi vahama vika Kotira autu tuahereha tiha,

¹⁴ Tenavu Kotiva nai virini vaira vira autu tuahere vauro.

Vatainai Kotiva quahama nimite vai vaiintika muntuka paru ihama vaivarave, ti.

¹⁵ *Enseli* vika minti tivake naaruvaini tuvurante vumanta sipisipiqa raqiki vau vaiintika nai tiva ami nai tiva amiha tiha, Viqenavu Betarihemi Noravano uva tiva timinara oru tavaare, ti. ¹⁶ Vinavuka minti tivakema vika vaaka anirante vatkaini vurama.

Oru tavovaro Iohepiva Mariakantiro vauvaro vaintiruvano purumakauvano kara no tanuraqi vaite vaura.

¹⁷ Vaite vaumanta sipisipiqa raqiki vau vaiintika vira tave tiha, *Enseli* vovano maa vaintirara tinavu minti mintimakero tiva timivo, tura.

¹⁸ Minti tumanta ekaa vaiinti nahenti vi uvvara iri airi avu aato utilha vaura.

¹⁹ Mariava vi uvvara aatoqi vatero niharovata, virara iriqiro ni vaura.

²⁰ Sipisipiqa raqiki vau vaiintika vainti vira tave, orurante aniha vika *enselivano* tu uvarara ququaave tivakeha, vika vaaka tave irurara irihama Kotira autu tuaheraqi anura.

Ihura autu ravatora

²¹ Ihura vatatoraro 8 entanavu aitarovaro viva qorainti vainti vaumantara ti, vira vaata toqake entava aniromanta vi entaraqaa vira autu rehma, Ihurave, turama. Haaru qumina enta, Mariava kia vainti taiqaa vu entara *enselivano* vi autura amiate turara iriha vi autura ravatora.

Kotira Naavuqi vura

²² Mariava vainti vatatero Mosiva maara tivato uvarara iriharoma vo entanavu varikero vira vaata hiqama vuarira entava aniromanta vitanta Iohepika Ihura vita vare

Nora Kotira amireka Ieruharemini vura. ²³ Noravano maara tu uvara qara ntuva tova mintima tiro:

Ekaa qorainti vanti hogare vatarena vaintira Nora Kotira amiraro vira vanti variarire. ²⁴ Vi entara are Kotira Naavuqi orurera uviri taaraqanta mirura voqaatanta amiraro Kotira iha quara amitaarire, tura. *(Wkp 12:1-8)*

Mariaka Iohepika vi uvara irihama Ieruharemini vura.

²⁵ Ieruharemini oru vauvaro mini vaiinti vovano vira autu Simioniva vaura. Vi vaiintiva avuqavu ni vau vaiintiva, viva Kotira autu tuahere vau vaiintiva vahiaro viva Isareri vatanaaka kahaqaina vaiintirara ampeqiharo vira veka vaura.

Mintima vauvaro Kotira Maraqravano vikantiro vahiaro ²⁶ hoqarero vira tiva amiro tiharo, Are kia qaqi qumina qutu viraitira, are Noravano atitaaina vaiintira *Mesaiara* vira tavera, viraqahairae are qutu vinarave, tura.

²⁷ Kotira Maraqravano minti tuvaro Simioniva variqiro vuvaro vi entara Kotira Maraqravano vira vitakovaro Kotira Naavuqira vumanta Ihura noka qoka maara uva irihama Ihura vita vare Kotira Naavuqi vuvaro ²⁸ Simioniva vanti vira tavero, vira ravukukero qaqa varero Kotira autu tuahereharo tiharo:

²⁹ Noravauvu, are tota tianara vate vivauma vaivo.

Are homa ti nena kaiqa vaiinti tititairae ti muntukaqihairo koqe i vairae vuare.

³⁰⁻³¹ Ekaa vo vatanaa vo vatanaaka vira tavaate tira, are tinavu kahaqaina vaintira atitaaramanta te vate tenta tivuqohai vira tavauro.

³² Ovavano ataama nimitaintema kero, vi vaintiva qumina vo vatanaa vo vatanaaka ai aara koqemakero numiqeharo ataama nimitaanarove.

Vi vaiintiva ai vaiinti nahenti Isareri vatanaaka kahaqiraro vika nutuvano virini qiarie, tiro.

³³ Simioniva minti tumanta Ihura noka qoka ravukuvi tiha, Ike, nana uvae viva Ihurara tivo? tuvaro ³⁴ Simioniva Kotira aareharo tiharo, Are vitantavata, vitanta vaintivata koqem nimitaaane, tiro. Minti tivakero viva vira nora Mariara tiva amiro tiharo,

Iriane. Hini Isareri vika hiqirivi qoraiqama vimanta hini Isareri vika himpi koqemake variqi vuate tiro, Kotiva maa vaintira kaama tairave.

Kotiva nai okara vaiinti nahenti kankomake tavaate tiro, viva vira atitairave. Mintiramantava, airi vaiinti nahenti vira qoririma amitevarave.

³⁵ Mintivarao viva airi vaiinti nahenti avu aatoqi vaina uvvara qovarama kaanarove.

Iqoka paepaevano raqontainantema kero, mpo ike tira haikava ai muntuka qoraiqama amitaanarove, tiro.

³⁶ Simioniva Mariarara minti tuvaro paropeti nahenti vovano Kotira uva qoqaiqama keharo ti vau nahentiva Anaavavata mini vaura. Vira qova Panueriva Asera vohaa ankuvano vaura. Anaava tota qorainti varatero 7 ihi varakovaro ³⁷ vira vaativano qutu vuvaro, viva viraqahairo tentoqa vahiaro kontaqama viro airi ihi 84 ihi varakero, viva vo enta vo enta Kotira Naavuqi orureharo entaqivata aatitoraqaaavata kara auramatero Kotira autu tuahereharo Kotira aare vaura.

³⁸ Mintuvara tiro, Anaava vi entara Kotira Naavuvaunaini orurero Ihura tavero, Kotirara koqema iaraqo tivakero, vokuka mini vaiha Kotiva Ieruharemini varika ruaruama nimitaaena entara veka vaukara Ihura okarara vika tiva nimura.

³⁹ Anaava minti tumanta Iohepika Mariaka Noravano maara uva tivatora ekaa iri taiqake, vitanta vaintivatamake tururante oqaraanaini nai maaqa Kariri vata Nasaretini vurama. ⁴⁰ Mini oru vauvaro vainti viva noruqama viro kempuka vanti vauvaro vira avu aatovano koqema vauvaro Kotiva vira koqema amitora.

Ihuva 12 ihi varakero Kotira Naavuqi vurama

⁴¹ Ihura noka qoka vo ihi vo ihi verara Ieruharemini oru vaiha vehakuma nimito entaraqaa kara namakeha orurante maaqaini tuvi vaura. ⁴² Vo ihi vo ihi mintiaqi vi vauvaro Ihuva 12 ihi varakovaro vehakuma nimito karara ne entava aniomanta vitanta Ihura vataake haaru mintuntemake, qaiqaa Ieruharemini vi karara nareka vurama.

⁴³ Vitanta Ihura vataake oru vi orure mini vo entanavu Ieruharemini vaiha vi karara namake tiha, Kaiqe maaqaini tururante vuare, tivake vuvaro Ihuvaqai Ieruharemi mini vauvanta vira noka qoka kia virara iriraiti vura. ⁴⁴ Vitanta tiha, Viva vaakama ti navunaa vokiaka hampata vivo, tivake ururante maaqaini vireka vohaa enta aaraini otu vura. Vitanta vohaa enta aaraini otu viha, Kaiqe vira rantake tavaare, tivake nai navunaaka unaini otu ranteha tavovaro ⁴⁵ kia Ihuva vika hampata vauvanta Mariaka Iohepika qaiqaa tururante Ieruharemini vira rantareka vurama.

⁴⁶ Vitanta Ieruharemini tururante vi, taaramo entanavu Ihurara rantaqi viha tavovaro viva Kotira Naavuvaunaini vaura. Viva viraqai vahiaro nora vaiinti luta maara okara

tiva nimi vau vaiintika, vika avutana oquivi vahiaro vaiinti noranavu uva tura iriharo viva vinavuka irama nimite vaura.

⁴⁷ Ihuva nora vaiintinavu avutana oquivi vaumanta nora vaiintinavu uva ti vauvaro Ihuva vika uva irikeharo, viva vika nái tiva nimumanta vika Ihura uva vira iri ravukuvu kauqu runkinkiri iha tiha, Vaiinti noravano uva tintemakero maa vaintiruva uva ti vaivo, ti.

⁴⁸ Vika minti ti vaumanta vira noka qoka vihai oturante urure tavovaro Ihuva nora vaiintinavu hampata viraqi oquivi vaumanta vitanta vira tave ravukuvura. Vira nova tharo, Mpo, ti maaquvauvo, nantiharae are titantara mintima timitaara? Titanta ai noka qoka muntukavano qorai-qimanta tetanta ariarama rantaqi vi ani uvuaro, tiro.

⁴⁹ Vira nova minti tuvaro Ihuva aqao tiro, Netanta nantihae ti rante variavo? Netanta kiae iriavo? Te tenta Qora kaiqa varaariraukama uvuaro, tiro. ⁵⁰ Ihuva minti tumanta vitanta kia vi uvuaro okara kankomake iruva.

⁵¹ Kia kankomake iruvaro Ihuva viraqihairo himpiro nai noka qoka vataakero ururante vevara Nasaretini otu vaura. Otu mini vahiaro vitanta uvaqai iriqiro vahiaro, kia vitanta uva raqa karaitiro vaura. Vira nova Ihuva tu uvuaro ekaa vi uvuaro nai aatoqi qaqi iritero niharovata iriqiro ni vaura. ⁵² Ihuva ho noruqama uvuvaro vira avu aatovanovata kankoko iro vaumanta Kotivavata vaiinti nahentivata vira tavovaro koqe iro vaura.

*Ioniva vaiinti nahenti vakaaka tiva nimura
(Matiu 3:1-12; Maaki 1:2-8; Ioni 1:19-28)*

3

¹ Romeni avuhainaa vaiinti Taiberiusiva raqikiqi viharoma 15 ihi vara kovaro vi entara Pontius Paireatava *kamaanira* avuhainaa vaiintivano vahiaro Iutia vataqaa raqiki vauvaro Herotiva Kariri vataqaa raqiki vauvaro Herotira qatavano Piripiva, Ituria vataqaavata Tarakonitisi vataqaavata raqiki vauvaro Lisaniasiva Abilene vataqaa raqiki vaura.

² Mintumanta Anaasivavata Kaiapaasivavata vitanta noraiqamavi Kotira kaiqa vara amite vau vaiintikaqaa raqiki vaura. Vi entarama Sekaraiaara maaquvano Ioniva qumina vataini kia vaiintivano vaunaini vauvaro Kotiva virara ti uva vaiinti nahenti tiva nimiane tuvaro ³ Kotiva tuntema kero, Ioniva Iotani Namarivano tuvunaini vi aniharo vakaaka vaiinti nahenti tiva nimiro tharo, Qora aaraqaa nira qaqrake namari varaivarо Kotiva ne qora kaiqa vare vai uvuaro nunka nimitaarie, tiro. Ioniva minti ti vaura.

⁴ Haaru qumina vaka paropeti vaiinti Aisaiaava mintima tiro:

Vaiinti vovano qumina vataini vahiaro neveraitiro tharo,

Noravano aniaina aarara qerama amiteha vira aara avuqavuqama amitaivaro viva vivauma ho aniarire.

⁵ Ne uqitaiqiraqi vata ntava mpiqake, nora aiqinave, inara aiqinave, ne vira teqa kaivarо aara avuqavu variarire.

Aara rare raarerо inara teqa kaivaro avuqavuma viro variarire. Aara otiqetero ururero inara ehauruma/humuqu kaivaro vohaa avuqavuqai variarire.

⁶ Ekaa naato vataini variaka Kotiva vaiinti nahenti kuvantu nimitero nttaaaina okarara tavevarare, tura. *(Aisaia 40:3-5)*

Aisaiaava haaru qumina vaka vi uvuaro tiva tovaro, Ioniva anirero vohaa qaramakero vi uvuaro tura.

⁷ Ioniva minti ti vaumanta vaiinti nahenti airivano Ionira vira namari varareka viva unaini anirovaro Ioniva vika tiva nimiro tharo, Ne *uqahi/quaiha* vaintairama variavo. Kotira arara ite vaivaro vaiinti nahenti ntaihareva auti vaivo. Tavave ninavuvata aruantorave aiqu autute kantama vuate timantane ne maini te unanaini aniaivo? ⁸ Ne quqaqiqamake qora kaiqa qaqlira kareka autivera, koqe kaiqaqai varaqi vuate. Ne nenta tiha, Eparahaamiva tinavu kaivaqavave, tinavu qovave, vairara ti, tenavu ho vauro, tivorave. Kotiva mintiataa irera, viva homa ni qaqlira kero maa orinavuraqihairo Eparahaamira naintivara vara qovaraiqama kaanarove.

⁹ Kotiva katari tuqireva rori katari tuqaqima qeramakero vataivo. Kia koqe tava irainara viva teqaaqama kero ihaqiquaqi aqua kairaro ita vuanarove, tiro.

¹⁰ Ioniva minti tumanta mini ruvaqumavi vauka vira ireha tiha, Ike, vi uvuaro are tianara tenavu iriha nantie irarave? ¹¹ Tuvaro viva vika tiva nimiro tharo, Vaiinti vovano sioti taaraqanta vatairava kia vatainaravata vonku amiarire. Vaiinti vovano kara vatairava kia vatainaravata rairakera amiane, tiro.

¹² Minti tumanta *takisi* vare vau vaiintika namari varareka anuka vira ireha tiha, Maara ti variara vaiintio, tenavu vo, nantie irarave? ¹³ tuvaro Ioniva vika tiva nimiro tharo, Ne

takisi varehama kamaanira uva irihama avuqavuqamake takisi varaate. Kia nenta irike qumina voqavata varaate, tiro.

¹⁴ Ioniva minti tumanta iqoka vaiintinavu vira ireha tiha, Tenavu vo, nantie irarave? tuvaro Ioniva vika tiva nimiro tiharo, Kia oru vorara ari ruqutu kaarorave tiha monu timiane tiate. Kia qumina voraqaa uva ntuvake vataate. Ne *aami* kaiqa varehama nenta vare monura viraraqaima hove tiate, tiro.

¹⁵ Ioniva minti ti vaumanta vaiinti nahenti mini ruvaaqumavi vauka Kotiva atitaaaina vaiintira, *Mesaiaara* vira vekaiqihā vaukara ti, vika nai ireha nai ireha tiha, Maa vaiintivae *Mesaiaavano* vaivo? ti.

¹⁶ Vika minti ti vauvaro Ioniva iriro vika nái tiva nimiro tiharo, Te qumina namariqai ni nimi vauro. Noravano ti aataraariravama ti naantiara ani vaivo. Te qumina vaiintivano vahihara ti, te vira aiqū nonkutai naaquntara kia ho qantu amitararave. Ne namari varaaantema kero, viva Kotira Maraqrura ni nimiharo, nai iha itaainara voqaara viravata ni nimianarove.

¹⁷ Viva nai *havore* kauquqi tota varero *uiti raisi* voqaara *riruruma/ritatima* kero, nora nai *havoreqohairo* vaqita varero vuru nai naavuqi vatero viragaahairo qumina rapavata vaqita varero vuru kia qimpa vuaina iharaqi aqu kairaro ita vuuanarove, tiro.

¹⁸ Minti tivakero vaiinti nahenti vira uva ariate tiro, Ioniva vi uvaravata vo uva vo uvavata, vika tiva nimiharo Ihuva aniaina vakaakara koqe vakaakavata, vika tiva nimura.

Herotiva Ionira karapuhiqama kora

¹⁹ Herotiva Kariri vataqaa raqiki vauvaro Ioniva Herotira atiharo tiharo, Herotiva kia nai qata naata Heroti-Namarira varaataarave. Viva qora kaiqa viravata, airi qora kaiqa vokiravata varaiyo, tiro.

²⁰ Ioniva minti tuvaro Herotiva qora kaiqa voqavata vareharo Ionira karapuhiqama kora.

Ioniva Ihura namari amura

(*Matiu 3:13-17; Maaki 1:9-11*)

²¹ Hoqarero Ioniva kia karapuhiqi vau entara, viva vaiinti nahenti namari nimiharo Ihuravata namari amura. Viva namari vira amuvaro Ihuva Kotira aare vauvaro naaruuvavano qantuara vuvvaro ²²Kotira Maraqravano mirura voqaara ata varero tuviro, tuvu Ihuraqaata utama vuvvaro uvavano naaruuhairo mintima tiro: *Are ti Maaquma variarao. Ti muntukavano ariarama vaivo. Te ariara quahema vauro*, tura.

Ihura kaivaqaukavara nutu

(*Matiu 1:1-17*)

²³ Ihuva ihi 30navu varakero viragaahairo nai kaiqa hoqarama kero varaqiro vumanta vaiinti nahenti virara Iohepira maaquve tura.

Iohepira Helira maaquvano vauvaro

²⁴ Heliva Mataatira maaquvano vauvaro

Mataativa Rivaira maaquvano vauvaro

Rivaira Melkira maaquvano vauvaro

Melkira Janaira maaquvano vauvaro

Janaiva Iohepira maaquvano vauvaro

²⁵ Iohepira Matatiaasira maaquvano vauvaro

Matatiaasiva Amosira maaquvano vauvaro

Amosiva Nahumura maaquvano vauvaro

Nahumuva Esilira maaquvano vauvaro

Esilira Nagaira maaquvano vauvaro

²⁶ Nagaiva Maatira maaquvano vauvaro

Maatativa Matatiaasira maaquvano vauvaro

Matatiaasiva Semenira maaquvano vauvaro

Semeniva Josekira maaquvano vauvaro

Josekiva Jodaara maaquvano vauvaro

²⁷ Jodaava Joanaanira maaquvano vauvaro

Joanaaniva Resaara maaquvano vauvaro

Resaava Serubabelira maaquvano vauvaro

Serubabelira Seatielira maaquvano vauvaro

Seatieliva Nerira maaquvano vauvaro

²⁸ Neriva Melkira maaquvano vauvaro

Melkiva Adira maaquvano vauvaro

Adiva Kosaamura maaquvano vauvaro
 Kosaamuva Elamataamura maaquvano vauvaro
 Elamataamuva Erura maaquvano vauvaro
²⁹ Eruva Iosuaara maaquvano vauvaro
 Iosuaava Eliesera maaquvano vauvaro
 Eliesevo Iorimura maaquvano vauvaro
 Iorimuva Mataatira maaquvano vauvaro
 Mataativa Rivaira maaquvano vauvaro
³⁰ Rivaiva Simeonira maaquvano vauvaro
 Simeoniva Iutaara maaquvano vauvaro
 Iutaava Iohepira maaquvano vauvaro
 Iohepiva Jonaamura maaquvano vauvaro
 Jonaamuva Eliakimira maaquvano vauvaro
³¹ Eliakimiva Meleaara maaquvano vauvaro
 Meleaava Menaara maaquvano vauvaro
 Menaava Matataara maaquvano vauvaro
 Matataava Nataanira maaquvano vauvaro
 Nataaniva Devitira maaquvano vauvaro
³² Devitiva Iesira maaquvano vauvaro
 Iesiva Obetira maaquvano vauvaro
 Obetiva Boasira maaquvano vauvaro
 Boasiva Saramonira maaquvano vauvaro
 Saramoniva Nasonira maaquvano vauvaro
³³ Nasoniva Aminadaapira maaquvano vauvaro
 Aminadaapiva Ataminira maaquvano vauvaro
 Ataminiva Aanira maaquvano vauvaro
 Aaniva Hesaronira maaquvano vauvaro
 Hesaroniva Peresira maaquvano vauvaro
 Peresiva Iutaara maaquvano vauvaro
³⁴ Iutaava Iekopira maaquvano vauvaro
 Iekopiva Aisaakira maaquvano vauvaro
 Aisaakiva Eparahaamira maaquvano vauvaro
 Eparahaamiva Teraara maaquvano vauvaro
 Teraava Nahora maaquvano vauvaro
³⁵ Nahova Serukira maaquvano vauvaro
 Serukiva Reura maaquvano vauvaro
 Reuva Pelekira maaquvano vauvaro
 Pelekiva Ebera maaquvano vauvaro
 Ebева Selaava maaquvano vauvaro
³⁶ Selaava Kainaanira maaquvano vauvaro
 Kainaaniva Apaksaatira maaquvano vauvaro
 Apaksaativa Semura maaquvano vauvaro
 Semuva Noaara maaquvano vauvaro
 Noaava Lamekira maaquvano vauvaro
³⁷ Lamekiva Metuselaara maaquvano vauvaro
 Metuselaava Enokira maaquvano vauvaro
 Enokiva Jaretira maaquvano vauvaro
 Jaretiva Mahalalelira maaquvano vauvaro
 Mahalaleliva Kenaanira maaquvano vauvaro
 Kenaaniva Enosira maaquvano vauvaro
³⁸ Enosiva Setira maaquvano vauvaro
 Setiva Adaamura maaquvano vauvaro
 Adaamuva Kotira maaquvano vaura.

Sataaniva Ihura avatora
(Matiu 4:1-11; Maaki 1:12-13)

4

¹ Ioniva Ihura namari amuvaro viraqaahairo, Kotira Maraquravano Ihuraqi mpiqavu-varo Ihuva tuvirantero Iotani Namari mini kero vuvaro Kotira Maraquravano vira vita varero kia vaiintivanovata vaunaini qumina vatainivuru kora.

² Vuru kovaro Ihuva 40 entanavuara mini vauvaro Sataaniva Ihurara qora kaiqa varaarire tiro, Ihura avatora. Ihuva 40 entanavu mini variqiro viharo kia karavata naraитiro, narara vaura.

³ Ihuva narara vauvaro Sataaniva anirero virara tiharo, Are quqaa Kotira Maaquvano vairera, maa orinavurara tiraro *mpareti kuqu virara naane, tiro.*

⁴ Minti tuvaro Ihuva nai vira tiva amiro tiharo, Aqao, Kotira vukuqi qara ntua tova mintimama tivo:

Vaintivano kara naainararaqai noraiqaakero iriqiro virava kia ho qaqi variqiro vuuanarove. *(Lo 8:3)*

⁵ Ihuva minti tuvaro Sataaniva viraqaahairo vira vita varero virini „aqinaqaa, orini vahiaro ekaa vaintivano naato vataqaa raqikura vira umiqeharo tiharo, ⁶ Ekaa maa haikava ti timitai haikavama vaivo. Te maa haikara vo vaiinti amiataa irera, te homa vira amirarave. Te homa maa haikara ai amiariraro ai autuvano noriqama virara are vi haikaraqaa raqikiqira vinarave. ⁷ Are ti hutuqai tuahera timitairera, te homa ekaa maa haikara maa haikara ai amirarave, tiro.

⁸ Minti tuvaro Ihuva Sataanira nai vira tiva amiro tiharo, Aqao, Kotira vukuqi qara ntua tova mintimama tiro:

Variqavano Kotiva Noravano vairara tira, are viraqai kaiqa vara amiteharama vira autuqai tuaheraqira vuane, turave, tiro. *(Lo 6:13)*

⁹ Minti tuvaro Sataaniva Ihura qaiqaa vita varero Ieruharemimi viro Kotira Naavu qiatia nai veraraqaa Ihura vara vaari himpimatero tiharo, Are quqaa Kotira Maaquvano vairera, are maaqahaahira vatakanta aquviane. ¹⁰ Kotira vukuqi mintima qara ntua tova tiharo, *Kotiva tiramanta enseli vika ariqaa koqemake raqikivarave, turave.* ¹¹ Qaiqaavata tiharo, *Are nena aiqu oriqaa ruteqa kerorave ti, enseli vika nái kauquqohai ai totaqi vivarave, turave, tiro.* *(Ihi 91:11-12)*

¹² Sataaniva minti tuvaro Ihuva nai vira tiva amiro tiharo, Aqao, Kotira vukuqi maa uvavama vaivo: *Noravano ai Variqavano vairara tira, are kia vira avataane, turave, tiro.* *(Lo 6:16)*

¹³ Minti tuvaro Sataaniva Ihura qumina avateharo tavero, kaiqe vo enta vira qaiqaa avateha tavaare tivakero, Ihura qaqira mini kero vurama.

Ihuva Karirini nai kaiqa hoqarama tora

(Matiu 4:12-17; Maaki 1:14-15)

¹⁴ Sataaniva vuvaro Kotira Maraqurovano Ihura kempukaiqama kovaro viva anirantero Karirini oru vaura. Mini oru vau uvara ekaa vi vataraqaa vau vaiinti nahentika irura.

¹⁵ Ihuva vika maara naavu voqi voqi oriqetero variqiro viharo uva tiva nimi vaumanta ekaa vaiinti nahentii virara koqe vaiintive ti vaura.

Nasaretihainaaka vira qoririma amitora

(Matiu 13:53-58; Maaki 6:1-6)

¹⁶ Ihuva Karirini oru niharo nai tota vainti naatiruka vau vatukara Nasaretni orurero Maara Entaqaa maara naavuqi vi vauntemakero, qaiqaavata Ihuva maara naavuqi viro. Viraqi oru vahiaro viva Kotira vuku kaara rireva himpuvaro ¹⁷ Paropeti vaiinti Aisaiaava qara ntuvato vukura amuvaro Ihuva vuku vira uruquruma tora kuvantu vantuma kero, maa uvara qara ntuvatora rantakero kaara riharo tiharo,

¹⁸ Te koqe vakaaka vehi vaiinti nahenti tiva nimirera uraro Noravano ti qiataqaa vahvera qihiakeharo ti noraiqamakero ti vara kaimanta te anuraro vira Maraqurovano tintiro vahiaro ti kahaqi vaivo. Viva ti titieharo mintima vaiinti nahenti tiva nimiane turave: Ni rumpataas vaiinti nahentika ne homa qaqi vivarave, tiane. Avu qimpa vika ne ho avu rampaikae tavaate, tiane. Ni qoraqama nimitaamanta maaraqai variaka ne homa qaqi vivarave, tiane.

¹⁹ Noravano vaiinti nahenti quahama nimitaaina entava aniraainara, are virara vaiinti nahenti tiva nimiane.

Vi uvara vi uvara mintimakera tiva nimiane, turave, tiro. *(Aisaiaa 61:1-2)*

²⁰ Aisaiaava qara ntuvato uvara Ihuva kaara ntua kero, viraqaahairo vuku qaiqaa uruquruma kero vaiinti vovano vukuqaa raqikura vira viti amiro oru oquiviro. Ihuva oru oquiviro vaumanta maara naavuqi ruvaaqumavi vauka viraqai aituti vauvaro ²¹ Ihuva vika tiva nimiro tiharo, Vaaka te kaara ntua kauramanta iria uvava vate quqaa vivauma vaivo, tiro.

²² Ihuva minti tumanta vika virara tiha, Ihuva koqe vaiintive. Ike, vira noqihairo koqe uvama ti vaivo, ti. Minti tivakevata, qaiqaa vika aqao ti, Vi vaiintiva Iohepira maaquvanoqaima vaivo, ti.

²³ Vika minti tuvaro Ihuva vikara tiharo, Vaiinti nahenti vo uvaqaa ntuvake tiha, *Are doktaavano vairera, nenavano nena vaata koqema kairae tavaare*, ti variarave. Ho ne vi uvvara iriha tiriavarata mintie tivarave? Ne qaiqaa maa uvvara tiriara tivarave: Are Kapenaumini vahara varaana kaiqarara tiamanta irunavarave. Ho are maaqi nena vatukaqi vahara vi kaiqara nora kaiqa varaiqe tenavuvata tavaare, tivarave. Ne tiriara mintie tivarave? tiro.

²⁴ Minti tivakero Ihuva vika tiva nimo tiharo, Paropeti vaiintivano nai maaqaini vairamanta vira navunaaka kia vira uva irivarave.

²⁵ Ho ne iri vaise te uva vo ni tiva nimiare. Haaru ni kaivaqava Elaitaava qaqi vau entara maini Isareri vatainai nora kuari itaqi vuvaro taaramo ihi 6 toranavuara kia aagu ruvaro karavata kia vauvaro nora antuqa arumanta vi entara tentoqa nahenti airinavu mini vaurave. ²⁶ Vika mini vauvaro Kotiva kia Elaitaara vi nahentinavuka vaunaini atitaraitiro, viva Elaitaara atitovaro vo vatanaa tentoqa nahentivano Sarefatu vatuka Saidoni maaqaini vau nahentira kahaqireva vurave.

²⁷ Haaru ni kaivaqava vovano, Elisaava paropeti vaiintivano vau entara, vi entara maini Isareri vatainai airi vaiintinavu numuaravano vaata ne vau vaiintika vauvaro Elisaava kia vinavukaihairo vo vaiinti kahaqiraitiro, viva vo vatanaa vaiintiqai Ne-maanira Siria vataihinaa vaiintiqai kahaquvaro vira numuaravano tavanta vurave, tiro.

²⁸ Ihuva minti tumanta maara naavuqi ruvaaquamavi vauka vi uvvara iruvaro arara itomanta ²⁹ vika himpi Ihura raraau vare vevare vatuka aqqaai vita vare vura.

Nasareti vatukavano ainqinaqa vaumantara ti, vika ainqinaqa vaarire Ihura viraqaahai onkaiqi venta aqukarare tuvaro ³⁰ Ihuva vaiinti nahenti nivutanahairo qaqi vitarero vinura.

*Ihuva vaanavano avutaqi vau vaiintira koqema kora
(Maaki 1:21-28)*

³¹ Ihuva Karirini vau vatukara Kapenaumini otuntero mini vaharo Maara Entaqaa vαιinti nahenti vakaaka tiva nimi vaumanta ³² vika Ihura uva iriha nái kauqu runkinkiri iha tiha, Ike, viva nora vaiintivano uva tiantema kero, kempukaiqama kero uva ti vaivo, ti.

³³ Vika minti ti vauvaro vaanavano vira avutaqi vau vaiintiva naveraitiro tiharo, ³⁴ Ihu, are Nasareti hainaavave. Are tinavuara nantima karevae aniarao? Are tinavu vehiqama karevae aniarao? Te ai okara iri tavaunavarave. Kotiva ai atitaivara are Kotira kaiqaqai vare variaravave, tiro.

³⁵ Minti tuvaro Ihuva vaana vira atiharo tiharo, Evaara variane. Vi vaiintiraqihairo qaqlini aitarera vuane, tiro.

Ihuva minti tuvaro vaana viva vaiinti nahenti nivuqaa vi vaiintira vara kero aqo kovaro viva vatakanta hiqiruvaro vaana viva kia vi vaiintira qoraiqama amitaraitiro, viraqihairo qihaaqamakero aitarero qaqlini vura.

³⁶ Vaana viva aitarero qaqlini vumanta mini ruvaaquamavi vauka ravukuvi kauqu runkinkiriha nái tiva ami nái tiva amiha tiha, Viva tara autuqaa uva tivaroe vaana viva qaqlini aitarero vivo? Viva nora vaiintivano uva tintema kero ti vaimanta, vaananavu vira uva iriha, vika qaqlini aitare vi variarave, ti.

³⁷ Vika vi uvvara minti tivaqai vi anumanta ekaa vi vatukara aaqanto vaukavata vi uvvara irura.

*Pitaara aintaantara koqema kora
(Matiu 8:14-15; Maaki 1:29-31)*

³⁸ Ihuva maara naavuqihairo veverero Saimonira naavuqi oru vauvaro Saimonira aintaantara vaatavano iha ite vauvaro vaumanta vika oru Ihurara vira kahaqiane tuvaro

³⁹ Ihuva oru vi nahentira tataaqa himpitero vaharo rovara atitama kovaro rovaravano taiqua uvvara vi nahentira vaaka himpiero vika kara qera i vaura.

*Ihuva vαιinti nahenti airitahaa koqema kora
(Matiu 8:16-17; Maaki 1:32-34)*

⁴⁰ Mintuvuaro kuarivano ruhunki vaumanta vi vatanaaka nai navunaaka vo rovara vo rovara varoka ntita vare Ihuva vaunaini vuru kovaro viva nai kauqu voqaa voqaa vateharo vika koqema nimite vaura.

⁴¹ Vaananavuvata airi vαιinti nahenti nivutaqhahai aitare vihama naveraitiha, Are Kotira Maaquvanoma variarao, ti. Vika minti tiha Ihuva *Mesaiaavano* vau okarara kankomake irurara tiro, Ihuva vika nitiro tiharo, Ne evaara variate, tiro. Turama.

*Ihuva Iutaa vatanaaka vakaaka tiva nimura
(Maaki 1:35-39)*

⁴² Vira qararaa aatitovaro Ihuva vi vatukara mini kero qumina kanta vumanta vaiinti nahenti vira rantareka vi, oru vira rantake kia vonaini vuane tivake, vira ravaaqavu karare tuvaro ⁴³ Ihuva aqao tiro, Te Kotiva raqikiaina uvvara koqe vakaaka vo vatuka vo vatuka niha vaiinti nahenti tiva nimirerave. Kotiva vi kaiqara varaane tiro, ti tititaimanta tuvuraukave, tiro.

⁴⁴ Minti tivakero Ihuva Iutia vataini vi aniharo vika maara naavuqi vaharo vi vakaakara vaiinti nahenti tiva nimi vaura.

5

Ihuva tuvaro Saimoni Pitaava airi havuka varora

(Matiu 4:18-22; Maaki 1:16-20)

¹ Vo enta Ihuva Kenesareti „Kariri“ Varuva auvahianta himpiro vaumanta airi vaiinti nahenti Kotira uva irireka nai vente nai vente iha vaura.

² Manti vauvaro Ihuva tavovaro votu taaraqanta namariqihai auvahini vuru vatotanta vaura. Havuka kaiqa vare vauka votutanta mini ke, vahe hiqareka vuvaro votu vitantaqai mini vauvaro ³ Ihuva oru Saimonira votuqi vaarirero Saimonirara tiharo, Nena votu maa inaaraiqa venta kairaro namariqaa yutuntoqama virage te viraqi vahia uva tiva nimiare, tiro. Minti tivakero viva votuqi oquiviro vaharo vaiinti nahenti vakaaka tiva nimi vaura.

⁴ Ihuva vakaaka vaiinti nahenti tiva nimi taiqa kero viva Saimonirara tiharo, Nenavu varuva avutaini votu venta vuru vate, vahe vaavi varuvaqiqi quntama te viraqihai havuka varaaete, tiro.

⁵ Minti tuvaro Saimoniva aqao tiro, Noravauvu, tenavu qumina entaqi havuka varare ti, vukaari utiha kia havuka voqavata varauunarave. Ho are minti tiaravera tenavu ai uva iri, vahe varake vaavi quntama tarerave, tiro.

⁶ Saimoniva minti tivakero vivavata vokukavata vahe vaavi namariqiqi quntama tovaro havuka airitaha vaheqiqi otigete mpiqa vuvaro maara rovaro vahevano rapema vireva auti vaumanta ⁷ vika nai navunaaka vo votuqi anukara kauqu katu ntiha tiha, Kante ani tinavu kahaqiate, tumanta vikavata ani havuka vaheqihai varakeha vi votutanta mpiqa komanta vi votutanta maara reha namariqiqi rupeqa vuaqara i vaura.

⁸ Saimoni Pitaava tavovaro mintimakero vauvaro viva oru Ihura avuqaa tori kauru araviro virara tiharo, Noravauvu, te qora kaiqa vare vaura vaiintikave. Are ti qaqrakera vuane, tiro. ⁹ Pitaava minti tivakero vivavata vira vataake vaukavata havuka airi varorara kauqu runkinkiri i vahia airi avu aato uti vaura.

¹⁰ Sebedira maaqtantaa Iemika Ionika vitantavata Saimonira vataake havuka kaiqa vare vautanta, vitantavata airi havuka tave kauqu runkinkiri i vaura.

Mintuvaro Ihuva Saimonira tiva amiro tiharo, Kia qetaane. Vate maa entaraqahaira are havuka varenantema kera, naantiara vaiinti nahentivata ntitenarave, tiro.

¹¹ Ihuva minti tumanta vika votu namari auvahini raraau vuru vate, ekaa haika qaqrakera mini ke, Ihuraqai avataqiqi vura.

Ihuva numuaravano vaata ne vau vaiintira koqema kora

(Matiu 8:1-4; Maaki 1:40-45)

¹² Vo enta Ihuva vo vatukaqiqi oru vauvaro numuaravano vira vaata ne vau vaiintiva mini vauva Ihura tavero, oru vira avuqaa hiqiriviro nai viri viavi vataini vatero Ihurara mpo tiharo, Noravauvu, are ti kahaqiatataa irera, are homa ti numuara nunka timitenarave, tiro.

¹³ Minti tuvaro Ihuva nai kauqu viavi vira vaataqaa vatero tiharo, Te mintiataa iverama ai mintima amitarerave. Te ai numuarara tavanta vuarire turo, tuvaro vira vaata ne vau numuarava vaakama tavanta vuvaro viva ho vaura.

¹⁴ Ho vauvaro Ihuva vira qioqamatero tiharo, Kia voravata tiva amiraitira, oru viraro Kotira kaiqa vara amite vaira vaiintiva ai vaata tuantikero tavaarire. Viraqahahira are Mosiva maara uva tivatorara iriharama *ofaa* vo iha quarairamanta vaiinti nahenti vika arara tiha, Quqaama vira vaatavano koqema vivo, tiate, tiro.

¹⁵ Ihuva minti tuvarovata, vaaka vi uvava vi anumanta airi vaiinti nahenti vi uvvara iri vika tiha, Kaiqe tenavuyata Ihuva vainanaini oru vira uva iriariraro viva tinavu aiha viraaravata koqema timitaarire, tivakeha viva unaini oru ruvaaqumavi vaura.

¹⁶ Mintuvaro Ihuva vaiinti nahenti mini kero vatete Kotira aarareva kia vaiintivanovata vaunaini vi vaura.

Vaata qutu rava vu vaiintira Ihuva koqema kora

(Matiu 9:1-8; Maaki 2:1-12)

¹⁷ Vo enta Ihuva vakaaka tiva nimi vaumanta Parasi vaiintinavuvata, maara okara ti vau vaiintinavukavata, vira uva irireka ruvaaqumavi vaura. Vi vaiintinavuka hihai hihai

ekaa Karirini vau vatukaraqaahaiive, ekaa Iutiaini vau vatukaraqaahaiive, Ieruharemi-haiive, hihai hihai anuka ani viva unaini oquivi vaura. Mintimake ani ruvaaqumavi vauvaro Noravano Ihura kempukaiqama kovaro viva vaiinti nahenti niha vuka kojema nimitaaria kempukava ho vaura.

¹⁸ Vaiinti vonavu anire vinavuka vo vaiinti vira vaata qutu rava vu vaiintira tainta vare anura. Vinavuka vira tainta vare anire tiha, Kaiqe tenavu naavuqi origete Ihura avuqaa maa vaiintira vuru kaare, tivake tavomanta ¹⁹ vaiinti nahenti airitahaa vaumanta vika vi vaiintira vitavare origeteva kia ho vaura. Kia ho vaumanta vika qaqrake naavu qiaataqaa vi vaiintira vara vaari vate, naavu qiaata ntomake vi vaiintira taintaqaanaa naaqunta rumpate, viraqaahai vinavuka vi vaiintira naaqunta rumpa tora vira tutamaqi tuvi muntu vaiinti avutana Ihuva vauraqaa vatora.

²⁰ Vinavuka vi vaiintira muntu vatovaro Ihuva irumanta vinavuka náiqai tiha, Quqaama Ihuva vi vaiintira vate kojema kaanarove, tu vaiintinavuka vauvaro Ihuva vi vaiintirara tiharo, Ti vaiintivauvo, are Kotira uva raqa kaanara vi uvvara te ai nunkama amitauro, tiro.

²¹ Minti tumanta maara okara ti vau vaiintinavukavata, Parasi vaiintinavuvata, nai tiva ami nai tiva amiha tiha, Aqao, maa vaiintiva ta vaiintivae? Viva minti tiharo Kotirama qoraiqama amite vaivo. Kiama qaqi vaiinti vovano nai kena vaiintiara tiharo, Are Kotira uva raqa kaanara te nunkama amitauro, tianarove. Kotiva nai vivaqaima ho minti tianarove, ti.

²² Vika minti tuvaro Ihuva vika nái aatoqi iru uvvara irirora tiro, viva vika irama nimitero tiharo, Nantihae ne nenta avu aatoqi mintimake iriavo? ²³ Ne tiriara tiha, Viva qumina vaiintivano vaiharora tiro, kia ho nái kena vaiintivano Kotira uva raqa kaainara nunka amitaanarove, tiarave. Ho vo kaiqa vo? Hoe te maa vaiintira vaata [koqemake, virara himpira nuane tirarave? Ne ti tiva timiqe iriare, tiro.

²⁴ Ihuva mintimakero vika irama nimitero vikara tiharo, Te Vataini Vatatai Vaintika vauraro ti noraiqama kaimanta te homa vataini vahi vaiintivano Kotira uva raqa kaainara nunka amitararave. Ne ti uvvara quqaa uvave tiate ti, te maa vaiintiraqaa mintirerave, tiro. Minti tivakero Ihuva vaata qutu rava vu vaiintirara tiharo, Himpira nena tainta utu varera nena maaqaini vuanerama turo, tiro.

²⁵ Minti tuvaro vi vaiintiva vika nivuqaa vaaka himpiro nai vaito taintara utu varero Kotira autu tuaheraqiro viharo nai maaqaini vurama. ²⁶ Viva vumanta viraqí ruvaaqumavi vauka noraiqamake ravukuvu kauqu runkinkiri iha vika qeteha Kotira autu tuahereha tiha, Ike, nana kaiqave? Tenavu vate aahuva vo qara i kaiqara tavauro, ti vaura.

Ihuva Rivaiva aarora (Matiu 9:9-13; Maaki 2:13-17)

²⁷ Ihuva evantero tavovaro *takisi* vare vau vaiintiva vira autu Rivaiva *takisi* vare vau naavuqaq oquiviro vauvaro Ihuva vira tiva amiro tiharo, Ti tivataqira aniane, tiro.

²⁸ Minti tuvaro Rivaiva himpiro ekaa nai kaiqa varo haikara qaqlira mini kero Ihura avataqiro vurama.

²⁹ Ho viragaahairo Rivaiva nai naavuqi Ihura kara unta amitomanta *takisi* vare vauka airinavuvata, vo vaiintinavu vatamake, vira naavuqi ruvaaqumavi oquivi vaiha kara ne vaura.

³⁰ Viraqí vaumanta Parasi vaiintinavuvata, maara okara ti vau vaiintinavuka Parasi vaiinti uva irukavata, vika orure Ihura vaintinavuara turoqareha tiha, Ne nantihae *takisi* vare varia vaiintikavata, Kotira uva raqake varia vaiintikavata, vika hampata kara ne variavo? ti.

³¹ Minti tuvaro Ihuva vika nái tiva nimo tiharo, Qaqi varia vaiintika kia *doktaavano vainaini* vi variarave. Aihavuakaqai *doktaavano vainaini* vi variarave. ³² Tenavu avuqavu ni vauraukave tia vaiinti nahentika, kia te vikara qora aara qaqlira kaate tirera turvuraukavauve. Te qora kaiqa vare varia vaiinti nahentika nararera turvuraukave, tiro.

Kara aurama terara tura

³³ Minti tumanta vika Ihurara tiha, Ionira avataqi ni variakavata, Parasi vaiinti uva iri variakavata, vika kara aurama teha Kotira aare variavo. Vika minti variamanta ai avataqi ni varia vaiintika kia mintiraiti, qaqlima karavata namarivata ne variavo, tuvaro

³⁴ Ihuva vika nái tiva nimo tiharo, Nahenti varaariria vaiintiva nai navunaaka hampata vairamanta hoe ne vikara kara auramate variate tivarave? ,Kiama ho minti tivarave.,

³⁵ Vo enta anintaira vi entaraqaa nahenti varaarina vaiintira nai navunaakaqaihai qaqlini vara kaimanta vi entaraqaahaima vira navunaaka [iqi ratehama] kara aurama tevarave, tiro.

³⁶ Minti tivakero Ihuva uva vo tuqantaakero vika tiva nimiyo tiharo, Haarua utavaaqa qunahivira haqirareva iharo, kia qaraaka utavaaqa toqakero haaruaraqaa taatau taanarove. Vovano mintirera, viva qaraaka utavaaqa qoraiqama kaanarove. Qaraaka tavuna toqa tairavavata haarua tavunavanovata kia vohaa varianarove.

³⁷ Te qaiqaa tirerave. Kia vovano qaraaka *uaini* tatikero memera paha haqirama taira haaruaraq qahiarake vate vairave. Vovano mintirera, qaraaka *uainivano* ntreharo haarua paha kempukaiqamavira, vira rakavu kairaro *uainivano* ntava viraro pahanovata qoraiqama yuanarove.

³⁸ Mintiantorave tiro, vaiintivano qaraaka memera paha haqirama taira varakero qaraaka *uaini* viraqi qahiarake vate vairave.

³⁹ Haarua *uaini* ne vai vaiintiva kia qaraaka *uainiara* antuqa arirave. Viva tiharo, Haarua *uainiqaima* homa vaivo, tirave, tiro. Ihuva minti turama.

Ihuva Maara Enta okarara tura

(Matiu 12:1-8; Maaki 2:23-28)

6

¹ Vo enta Maara Entaqaa Ihuva nai vaintiaravata naaho avutaqi *qantivi/kakuma* voqua *uiti* ututoraqi ni vaura. Ni vaiha vira vaintinavu *uiti* tava raqake kauquqi tuiqamakeha auru vira ne vaura.

² Ne vaumanta Parasi vaiintinavu vinavuka tave aqao ti, Tenavu Maara Entaqaa qioqamatauna kaiqara vinavuka vare variavo, ti.

³ Vika minti tuvaro Ihuva vika nái tiva nimiyo tiharo, Haaru ni kaivaqava Devitivavata, vira vataake anukavata, antuqa arumanta vauvaro Devitiva vi entara auti okarara ne kiae kaara ntuvake iriarave?

⁴ Vi entara Devitiva Kotira Naavuqi oriqetero mpareti Kotira amitora varakero neharo nkuikero nai vataake anukavata hini nimumanta norave. Kotira kaiqa vara amite varia vaiintikaqai vi karara naataara vaivaro Devitiva qumina vaiintivano neharo vi uvare raga korave, tiro.

⁵ Ihuva minti tivakero viva vika tiva nimiyo tiharo, Te Vataini Vatatai Vaintika vauro. Te tentavano Maara Entaqaa vata raqiki vauraukara ti, te vi entaraqaa tenta varaataa ina kaiqara homa vararerave, tiro. Ihuva turama.

Maara Entaqaa Ihuva vaiinti kauqu taparavura koqema kora

(Matiu 12:9-14; Maaki 3:1-6)

⁶ Vo enta Maara Entaqaa Ihuva maara naavuqi oru vaharo vakaaka tiva nimi vauvaro vaiinti kauqu tanaravano taparavuva viraqi vaura.

⁷ Vi vaiintiva vaumanta maara okara ti vau vaiintinavukavata, Parasi vaiintinavuva, vaiha vika Ihurajaa uva vatarare ti, uvare ranteha tiha, Kaiqe vaiha tavaariraro Ihuva vate Maara Entaqaa vaiinti kauqu tapara vinara koqema kairera, vira kaara tenavu viragaa uva vataare, tivake vika Ihura aituti vaura.

⁸ Aituti vauvaro Ihuva vika nái aatoqi iru uvare kankomakero iriro kauqu taparavu vaiintirara tiharo, Are maini vaiinti avutana ani himpitera variane, tuvaro vi vaiintiva ani vaiinti avutana himpitero vauvaro ⁹ Ihuva vikara tiharo, Te ni irama nimitaari ne ti tiva timiate. Tenavu tentanavu maara uva irihama Maara Entaqaa nana nana kaiqae ho varaainarave? Tenavu vi entaraqaa vaiinti vo kahaqamae amitararave, vira qoraiqamae amitararave? Maara Entaqaa tenavu vaiinti vo hoe kahaqiariraro viva qaqi varianarove, tenavu vi vaiintira arue kararave? tiro.

¹⁰ Minti tivakero Ihuva ekaa vaiinti viraqi vauka aitutumakero tavero vi vaiintirara tiharo, Nena kauqu rantuta kaane, tiro. Tuvaro nai kauqu rantuta kovaro vira kauquvano vaaka koqema viro naitarama vura.

¹¹ Vira kauqu koqema vuvuaro vika virara voqamake arara itomanta nai tiva ami nai tiva amiba tiha, Tenavu Ihura nantimae kararave? ti vaura.

Ihuva nai vainti 12navu ntitora

(Matiu 10:1-4; Maaki 3:13-19)

¹² Vi entara Ihuva Kotira aarareva ainqinaqaa oru vaharo entaqi Kotira aaramaqiro vi vauvaro ¹³ aatita vuvuaro viva nai avataqi nu vaiintika naarama kero vikaqihairo vaiinti 12navu ntitakero vika noraiqama kero vikara ne *aposorive-ne* ti uva vuru viri tiva nimi vaiintikama vaivarave, tiro.

¹⁴ Ihuva maa vaiintinavuka ntitora:

Saimonira—Ihuva vira vara autu ntava teharo Pitaarave tura,
Entarura—viva Saimonira qata,

Iemika Ionika,
 Piripira,
 Batolamura,
¹⁵ Matiura,
 Tomaasira,
 Iemira—viva Arafiusira maaqu,
 Saimonira—vira autu vo Selotira,
¹⁶ Iutaasira—vira qora autu Iemira,
 Iutaasi Ikeriotira—viva naantiara Ihura vara qovarama kaarirava vaura.

Ihuva vaiinti nahenti airitahaa koqema nimitora
(Matiu 4:23-25; Maaki 3:7-12)

¹⁷ Ihuva vi vaiintinavuka ntita varero aiqinaqaahairo orurantero uqitaini tuvu himpitero vaumanta vira avataqi ni vauka airitahaa mini vaumanta, Iutia vata vo vatuka vo vatukaqihaiive, Ieruharemiqihaiive, vevara *nampis* ini Taiaavata Saidonivata vi vatukatantaqihaiive, airi vaiinti nahenti hihai hihai vikavata ruvaaqumavi mini vaura.
¹⁸ Vika tiha, Kaiqe tenavu vira uva iri variariraro viva tinavu rovaravata taiqa nimitaarireti vaura. Vaanavanu vikaqiqi vauka, vikavata anirovaro Ihuva vaana vika nititama komanta vika koqemavi vaura.

¹⁹ Ihuva mintiaqiro vuvaro viraqihairo vira kempukavano oru vaiinti nahenti airitahaa koqema nimitomantara ti, ekaa vaiinti nahenti vira autama kareka auti vaura.

Ihuva vakaaka vika tiva nimura
(Matiu 5:1-12)

²⁰ Ihuva nai avataqi ni vauka aitutiharo vikara mintima tiro:

Ne vehi vaiinti nahenti variaka ne quahehama variate. Kotiva niqaa raqiki vairamanta ne vira vaiinti nahentima vaivarave.

²¹ Vate karara antuqa ari vaiinti nahentika ne quahehama variate. Ne naantiara kara naivaroi ni vikokama ianarove.

Vate iqii rate varia vaiinti nahentika ne quahehama variate. Ne naantiara naaraihama vaivarave.

²² Ne ti Vataini Vataiatai Vaintika ti avataqi vi vaimanta vika vira kaara ni navutaiqivarave, ni qoririma nimitavarave, niara qora uva tivarave, niara qora kaiqa vare variavo tivarave. Niara minti minti timanta ne quahehaqai variate. ²³ Vika ni mintima nimitaimanta vi entara ni koqaa, nora koqaa naaruvali vainarara irihama, nenta muntukaqihai voqamake quahaate. Haaru vika kaivaqaukavaravata paropeti vaiintinavu vohaa qaramake qoraiqama nimitie vaurave.

²⁴ Ne airi airaira vataaka ne maa entara koqemavi variavo.

Oho, naantiara ne tavevarave.

²⁵ Oho, ne maa entara kara ho ne variaka, ne naantiara vaivaro ni karara antuqa ariramanta variqi vivarave.

Oho, ne vate naaraihama variaka, ne naantiara vaivaro ni muntukavano qoraiqira ne iqii rataqi vivarave.

²⁶ Oho, vate maa entara vaiinti nahenti niara quaheha ni nutu tuaherake variaka, te niara rauriha variate turo.

Haaru vohaa qaramake ni kaivaqaukavarava una uva tu paropetikara quaheha vika nutu tuaherake vaurave.

Nenta navutaakara muntuka vataate tura
(Matiu 5:38-48)

27 Vate ne ti uva iri variaka te ni tiva nimirerave. Ne nenta navutaaka vikarama muntuka vataate. Ni qoraiqama nimitie vaika vaimanta ne vikama koqema nimitaate. ²⁸ Niara qoraiqama vuute tiha niara qora uva tiva nimite vaika, ne vikara Kotira aareha, Kotio, vika koqema nimitaane, tiate. Ni qoraiqama nimitekara irihama Kotira aaraivaro viva vika kahaqiarire.

²⁹ Vovano ai auruvuta ruqema kairera, tuquantaa viraro hini auruvutavata ruqema kaarie. Vovano ai tavuna vo raqia varairera, viva ai tavuna voqavata varareva irara, kia virara eqaane tiane.

³⁰ Vovano vo haikara naaru iramanta ne qaqqai vira amiate. Vovano ne vate haikara varairera, kia qaqqaa naarumake varaaate. ³¹ Ne vokiakara minti mintimake koqema timitaate tintemake, ne vohaa qaramake vika naivata minti mintima nimitaqui vuute.

³² Niara muntuka vateka ne kia vikaraqai muntuka vataate. Niara muntuka vatekara ne vikaraqai muntuka vataivera, Kotiva kia virara iriharo ni quahama nimitaanarove.

Ne kiae tavaarave? Qora kaiqa vare variaka vika vaiha vika nariara muntuka vataa vaiintikaraqai muntuka vataarave.

³³ Ne ni koqema nimitekaraqai nái koqema nimitaivera, Kotiva kia virara iriharo ni koqema nimitaanarove. Ne kiae tavaarave? Qora kaiqa vare variakavata mintimake nai koqema nimite nai koqema nimite i variarave.

³⁴ Ne tiha, Viqatauraro vaaka timina vaiintira viraqai nai amirerave. Viqatauraro kia vaaka timina vaiintira vira kia nai amirerave tivera, Kotiva kia virara iriharo ni koqema nimitaanarove. Ne kiae tavaarave? Qora kaiqa vare variaka tiha, Viqatauraro vaaka timina vaiintiraqai nai amirerave, tivakeha nai ami nai ami i variarave.

³⁵ Kia ne vika voqaante iate. Ne nenta navutaakara muntuka vatehamma vika koqema nimitaate. Vovano niara monue, airairea, timirage naantiara nina amiare tirera, ne vira qaqi hampiara voqaara amihama kia ninta naantiara qaiqaa nimirara noraiqaake iriate. Ne mintiaqi vivaro Kotiva ni kaiqara iriharo ninta vira noqaa koqema kero nimianarove. Qora vaiintivanoo kia vo vaiintiara koqema iarao ti vai vaiintiravata, qora kaiqa vare vai vaiintiraravata, miqo maqaq Kotiva vika koqema nimite vairave. Kotiva koqe kaiqa mintima kero vare vairara ti, nevata mintivera, ne ququaama Kotiva naaruvinai vaira vira vaintima vaivarave.

³⁶ Ni qova Kotiva aaqurihamma nimite vaintemake, nevata nariara nariara aaqurihamma nimiteha variate.

Ne ko iria vaiintika voqaantemake vaivorave tura

(Matiu 7:1-5)

³⁷ Ne ninta kaiqavata rahakero tavero qora kaiqave tiantorave ti, ne kia vora kaiqara pupitheha qora kaiqave tiate. Ne vorara nora okarama viraqai vaivo tivera, Kotiva nintaravata nora okarama nintaqai vaivo tianarove. Ne vorara tiha, Are ti qoraiqama timitaanara te vira tauuke kia irirerave, tivera, Kotivavata nintara tiharo, Ne ti uva raqa kera te virara tauruma kararave, tianarove.

³⁸ Ne vokika nimivaro Kotiva nintavata nimianarove. Kotiva kia inaaraiqakero ninta nimianarove. Viva qihia tairaro mpiqa viraro raturu kairaro otiniraro qaiqaa voqavata nonku mpiqa kero noqaa ruaqairikero ninta nimianarove. Ne vokika vi kaiqara vara nimitemente kero, Kotiva vohaa qarama kero mintimakero vi kaiqara nintavata vara nimitaanarove, tiro.

³⁹ Ihuva minti tivakero viva uva vo tuqantaakero vika tiva nimo tiharo, Avu qimpavina vaiintiva kiama ho avu qimpavina vaiintira vo, kauqu utu varero aara umiqaanarove. Viva mintirera, vitanta oraqi hiqirivarave. ⁴⁰ *Sikuru* vaintivanoo kiama nai *tisaara* aatarakero vairave. *Sikuru* vaintivanoo uva iriqiro viharo ekaa okara kankomakero tavero, viraqaaahairo nai *tisaakantiro* vohaa qaramakero vairave.

⁴¹ Are nantiharae vata antaarauruvano ai qata vakaara avuqi vigetaira taveharama kia nina avuqi nora katari hanka viqetaira tavera iarao? ⁴² Nora katari hankavano ai avuqi vigetero vaivara nantiharae nena qata vakaarara tihara, Ti qata vakaao, kairage ai avuqihai vata antaarauru qaqlini veqa kaare, ti variarao? Kia minti tiataarave. Are unaqaraiqamakera koqe kaiqa vare variaravave. Tota nora katari hanka nena avuqihairaa naane veqa kera, viraqaaahairo kankoma kera taveharama nena qata vakaara avuqihairavata homa vata antaarauru qaqlini veqa kenarave.

Qora katarivano qora tavaqai ire vairave tura

(Matiu 7:15-20; 12:33-35)

⁴³ Koqe katarivano kia qora tava ire vairave. Qora katarivano kia koqe tava ire vairave.

⁴⁴ Vaiintivanoo katarai tava taveharo vi katarira kankomakero autu re vairave. Vaiintivanoo kifiki katarai tava hiqireva viva kia auqu vai katariraqaaahairo hiqi vairave. Viva *uaini* tavavata hiqireva kia tauveraaahairo hiqi vairave.

⁴⁵ Koqe vaiintivanoo nai avu aatoqihairo koqe kaiqa varaariravaqai vaivarora tiro, viva koqe kaiqaaqai vare vairave. Qora vaiintivanoo nai avu aatoqihairo qora kaiqa varaariravaqai vaivarora tiro, viva qora kaiqaaqai vare vairave.

Nana nana haikavano vira avu aatoqi mpiqaro vainara, vaiintivanoo vi haikaraqaima nai noqaahairo tianarove.

Naavu taaraqantara uva tuqantaakero tura

(Matiu 7:24-27)

⁴⁶ Ne nantihae tiriara Noravaauvo, Noravaauvo, tihama kia ti uva iri variavo? ⁴⁷ Te unanaini anirero ti uva iriharo te tianantemaa kero ti uva iriqiro vina vaiintira, virara ni tiva nimirerave.

⁴⁸ Vi vaiintiva naavu kempukaiqamakero kaqa taira voqaarama varianarove. Viva naavu kaqareva iharo nai vata vevanto quiviqiro viro, otu oriqaat kataro naavu kaqatairave. Kaqa taivaro vo enta huvura namarivano tuviharo naavu venta karare tivaro naavu koqema kero oriqaat kaqa taivarora tiro, vi naavura kia ho rakikiaqa kairave.

⁴⁹ Ti uva iriharo qaqla kero kia te tunantemra kero ti uva iriqiro vina vaintira, vi vaiintiva qora naavu kaqatai vaiintira voqaarama varianarove. Vi vaiintiva kataro kia koqema kero arataraitiro, qaqla qumina vataqaa naavu kaqa taivaro huvura namarivano tuviharo naavu vira rakikiaqa kaivaro naavuvano vaakama raputama viro ekaa qoraiqama virarama turo, tiro. Ihuva vi uvvara turama.

7

Ihuva Romeni iqoka vaiinti kahaqura

(Matiu 8:5-13)

¹ Ihuva vaiinti nahenti uva tiva nimi vuru taiqa kero viva vika mini kero Kapenaumini vura.

² Viva mini vuvaro Romeni vaiinti vovano 100 iqoka vaiintiqa raqiki vauva mini vauvaro vira kaiqa vaiintivano aihavuvaro viva qutuarirava aumanto vauvaro Romeni vaiinti viva kaiqa vaiinti virara antuqa aruvarora tiro, ³ viva Ihurara iriro, Iutaa nora vaiintinavu nititero tiharo, Ne Ihura oru tivaro viva ani ti kaiqa vaiinti koqema amitaarie, tumanta ⁴vinavuka Ihuva unaini orure Ihurara mpo tih, Romeni vaiintivano koqe vaiintima vaivo. Are vira oru kahaqiane. ⁵ Vi vaiintiva tinavu vaiinti nahentiara antuqa ari vai vaiintivave. Viva naivano tinavu kahaqiharo maara naavu vo kaqa timitairave, ti.

⁶ Vika minti tuvaro Ihuva vika hampata oru viro naavu aumanto orurovaro Romeni vaiinti viva nai navunaaka nititero tiharo, Ne oru Ihura tiva amiate. Noravaavo, are vukaari utukera maini anirarave. Te koqe vaiinti variariraravauve are ti naavuqi ho aninarave. ⁷ Te koqe vaiinti vahavauve are inanaini ho oru virarave. Are mini vaharama ti kaiqa vaiintiara koqema vuane tiraro viva koqema vuari.

⁸ Te iqoka vaiinti vahavauve are tintaqaa raqiki varia vaiintika uva iri vaunaratave. Tevata vo vaiintinavuqaa raqiki vauraukama vauro. Te iqoka vaiinti vorara vuane turaro viva virave. Te vorara aniane turaro viva anirarave. Te tenta kaiqa vaiintiara mintiane turaro viva mintirave, tivakero vika nititomanta vura.

⁹ Romeni vaiinti viva minti tivakero nai navunaaka nititomanta vika vuru Ihura vi uvvara tiva amuvaro Ihuva, Ike, tivakero tuqantaa viro viva vaiinti nahenti vira avataqai anukara tiharo, Te ni tiva nimiari iriate. Vi vaiintiva vo vatanaa vaiintivano vaimantavata, te Isareriqi vi aninha kia te maa vaiintiva tiriara kempukaiqaakero iri vai vaiintira voqaara vo tavaunaratave, tiro.

¹⁰ Minti tumanta Romeni vaiintivano nititoka anirante vira naavuqi orure tavovaro vira kaiqa vaiintivano koqema viro vaura.

Tentoqa nahenti maaquara tura

¹¹ Naantiara inaaraigakaa varikero Ihuva vatuka vo, vira autu Nainini vumanta vira vaintinavuvata airi vaiinti nahentivata vira vataake vura.

¹² Ihuva vi vatukara vaantaavura gentiana orurero tavomanta vatukaqihai vaiinti nahenti qutuvu vaiintira tainta vare vira quntarerave tivake anura. Tentoqa nahenti vira maaqu vohaiqavanoqai vauva qutu vumanta airi vaiinti nahenti vi nahentira vataake anuvaro ¹³ Noravano Ihuva vi nahentira tavero muntukaqihairo mpo ike tiva amitero virara tiharo, Kia iqii rataane, tiro.

¹⁴ Minti tivakero Ihuva oru *kukuta/kirikera* utu varomanta vaiintinavu *kukuta/kirikera* vare anuka ani himpiti viraqaa vauvaro Ihuva tiharo, Qaraaka vaiinti maavao, te ariara himpuanema turo, tuvaro ¹⁵ qutuvu vaiintiva himpiro vaavarama viro uvavata tuvaro Ihuva vi vaiintira vira nai nora amura.

¹⁶ Mintuvaro vika ekaa voqamake aatu itomanta Kotira autu tuahereha tih, Paropeti vaiinti noravano tinavu avutaini qovarama vivo. Kotiva tinavu nai vaintinavu kia tauru kaivo, tura.

¹⁷ Ihuva vi entara kaiqa varo vakaakava ekaa Iutia vatainivata Iutia aumanto vauvatukara mini minivata vi anima umanta ekaa irura.

Ionira vainti taaraqanta oru Ihura irora

(Matiu 11:2-19)

¹⁸ Ihuva mintiaqai viharo vo kaiqa vo kaiqa vare vaumanta Ionira vaintinavu vuru Ionira virara tiva amuvaro viva nai vainti taaraqanta naarama kero tiva nimiro tiharo,

¹⁹ Netanta oru Nora Vaiinti vira irehamma mintima tiate: Kotiva atitairaro naantiara anianarove ti vaiintiva quqaa are maa vivave? Tenavu vo vaiinti vekaiqihae vairarave? tiate, tiro.

Ioniva minti tivakero vitanta nititomanta ²⁰ vitanta Ihuva vaunaini orure tiha, Ioniva namari nimi vai vaiintiva titanta tititeharo ariara mintimake ireha tavaate tivo: Naantiara anianarove tia vaiintiva, quqaa ho maa are vivave? Tenavu qaqi vo vaiinti vekaiqihae vairarave? tiate, timanta tetanta anuro, ti.

²¹ Vitanta minti tuvaro vi entara Ihuva airi vaiinti nahenti vo rovara vo rovara varokave, vaana hampata vaukave, vika koqema nimiteharo avu qimpa vuka airitahaavata vika avu rampaikomanta vaura.

²² Ihuva Ioniva nitito vaintitanta tiva nimo tiharo, Netanta maini ani vaiha taverave, irirave, anirante vuru Ionira tiva amiate. Avu qimpa vuaka qaiqaa qaqi tave variavo. Aiqu qoraiqama vuaka qaqi ni variavo. Numuaravano vaata ne vai vaintikita tavanta vimanta variavo. Aato tinta vuaka uva qaiqaa ho iriavo. Qutu vuaka qaiqaa qaqima himpi variavo. Vehi vaiinti nahenti Kotira vakaaka koqe vakaaka ani iri variavo. Vi uvara vi uvara netanta vuru minti tivakema Ionira tiva amiate. ²³ Tirira kia taara aato iriraitiro, kempukaiqama kero vohaa avu aatoqai iriqi vi vaira vaiintiva, vivama quaheharo varianarove, tiro.

²⁴ Ihuva minti tumanta Ioniva nitito vaintitanta anirante vuvaro Ihuva vaiinti nahenti mini ruvaaqumavi vauka Ionirara vika irama nimitero tiharo, Ne haaru nana haikae tavareka qumina vataini vi vurave? Uvai utiharo vavikero virivikero i vau ukaura tavarekae vurave? ²⁵ Ne kia vi haikara tavareka viraiti, nana haikae tavareka vurave? Koqe utavaaqa nonkuto vaintira tavarekae vurave? Aqao, koqe utavaaqa nonki varia vaintinavuka kia qumina kanta variarave. Vi vaintinavuka avuhainaara naauva koqe naavuqiqai variarave. ²⁶ Ne nana haikae tavareka vurave? Kotira uva qoqaiqama kaaina vaintira paropeti vaiinti tavarekae vurave? Eo, virave. Ho kaiqe te ni tiva nimiari iriate. Ne vi entara paropeti vaiinti aatarako vaintira favorave. ²⁷ Kotira vukuqi Kotiva Ionirara mintima tiro:

Tavaane, ti uva tiva nimiaina vaintira te atitaariraro viva naane ai avuni viharo ai aara qerama amitaanarove, turave, tiro. (Mal 3:1)

²⁸ Ihuva minti tivakero viva vikara tiharo, Kaiqe te ni tiva nimiari iriate. Vataini vatatai vaiinti nahentikaqihairo Ionivama vika ekkaa naatara kaivama vaivo. Ioniva mintimakero vaivarovata, Kotiva raqiki vaiinti nahentikaqihairo nai inaara vainti vovano Ionira aatara kaariravama vaivo, tiro.

²⁹ Ihuva minti tumanta qaqi vaiinti nahentivata, *takisi* vare vaukavata, vika Ionira namari varoka vahara ti, vika Ihura uvara iriha tiha, Ququaama Kotiva avuqavuqamakero vaivave, ti.

³⁰ Vika minti tumanta Parasi vaintinavuvata, maara okara ti vau vaintinavukavata, vika kia Ionira namari vararerave tukara ti, vika Kotiva inaini vi aarara tauvaqa utu amitora.

³¹ Vika mintimake vauvaro Ihuva tiharo, Maa entara varia vaiinti nahentika vika nana voqaarae variavo? Kaiqe ni tiva nimiare. ³² Vika vainti haika vatukaqaa ruhareka oquvi variantemake variavo. Vainti haika ruhehamma nai kena vainti naareha tiha, Tenavu anumaura vuage vauramanta ne ihi ntaataara vaimanta ne kia ihi ntaavo. Tenavu ruhehamma iqi rate ihira ti vauramanta ne iqi rataataara vaimanta ne kia iqi rataavo, tiarave. Maa entara varia vaiinti nahentika vika voqaara variavo.

³³ Ioniva namari nimireva anirero viva kara auramatero kia *uainivata* nomanta ne virara tiha, Viva vaana hampata vai vaintivave, tiarave. ³⁴ Ne Ionirara minti tiamanta viraqaahai te Vataini Vatatai Vaintika anire, te karavata namarivata ne vaurauka anuramanta ne tiriara tiha, Vi vaintira tavaate. Viva inaara kara ne vaivave. Viva *uaini* neharo vueraiqaaavi vaivave. Viva *takisi* vare variakavata, qora vaintinavuvata, toniqamate vaivave, tiarave.

³⁵ Ho uvavano koqe uva vairera, vi uvara iriqi virava tavairaro koqe uvaqaima varianarove, tiro. Ihuva turama.

Nahenti vovano Ihuraqaa vahavera aqu amitora

³⁶ Vo enta Parasi vaiinti vovano Ihurara tiharo, Anira ti naavuqi oru kara naane, tuvaro Ihuva vira naavuqi kara nareva viro oru viraqiqi oquvi vaharo kara ne vaura.

³⁷ Viraqiqi kara ne vauvaro vi vatukaraqiqi nahenti vovano airi vaiinti hampata hampi ni vau nahentiva Ihuva Parasi vaiinti naavuqi kara ne vaurara irura. Irilo vi nahentiva ori taquqi vahavera koqe untavura varero ³⁸ Ihuva aiqu tututero taurini vuru ruva viro vaharo kara ne vauraqiqi oru viro, vira aiquidaraini iqi rateharo vauvaro vira auquruvano

Ihura aiquqaa hiqiri vi vauvaro vi nahentiva nai vukai qia kauhiqohairo vira aiquqaa auquru hiqintura nunkeharo vira aiqu *moqakeharo/noqakeharo* vahavera untavura vira aiquqaa aqu amitora.

³⁹ Aqu amite vauvaro Parasi vaiinti viva Ihurara anira ti naavuqi kara naane tu vaintiva tavero nai aatoqi irikeharo tiro, Ihuva paropeti vaiintivano variare titirio, viva vira utu varai nahentira okarara kankomakero iriro, viva qora kaiqa varairaravata iritirio, tiro.

⁴⁰ Parasi vaiinti viva nai aatoqi mintima iruvaro Ihuva virara tiharo, Saimonio, te uva vo ai tiva amirerave, tuvaro Saimoniva tiharo, Maara ti variara vaiintio, ho tiva timiraqe iriare, tiro.

⁴¹ Tuvaro Ihuva vira tiva amiro tiharo, Vaiinti taaraqanta vohaa vaiintiqaahai monu varareka uvaro viva vo vaiinti 100 kinaa amiro vo vaiinti 10 kinaa amurave.

⁴² Amumanta vitanta vira monu vare vuru namake nai amiva kia ho vaumanta vauvaro viva vitantara tiharo, Nitanta nimitauna monura kia te tinta timiate tirarave. Qaqirama kauro, turave, tiro.

Ihuva minti tivakero viva Saimonira irama amitero tiharo, Vi vaiintitantaqihairo tavave monu nimina vaiintira virara noraiqama kero quahama amitaananrove? tiro.

⁴³ Ihuva minti tuvaro Saimoniva tiharo, Ho nora monu 100 kinaa varai vaiintivama noraiqama kero virara quahaanarove, tiro. Minti tuvaro Ihuva tiharo, Are avuqvavuma tira iarao, tiro.

⁴⁴ Ihuva minti tivakero viva tugantaa viro Saimonirara tiharo, Are maa nahentira tavaane. Te ai naavuqi ani vaurara kiama are namariqohaira ti hiqu hiqama timitaraitira iararo, maa nahentiva nai auquruqohairo ti hiqu hiqama timitero, nai qia kauhiqohairo ti hiqu nunka timitaivo.

⁴⁵ Ti uva manteharama are kia ti *moqa/noqa* kairaitira iararo, maa nahentiva te ani ntaunaraqaahairo ti hiqu *moqaqiro/noqaqiro* vi vaivo.

⁴⁶ Are vahavera kia ti qjataqaa aqu timitaraitira iararo, maa nahentiva untavi vahaverara ti hiquqaa aqu timite vaivo.

⁴⁷ Virara irihama te ariara mintima tirerave: Nahenti maava Kotira uva airi uva raqa kaiva vaimanta te vira airi uva nunka amitaunara tiro, maa nahentiva anomakero ti quahama timite vaivo. Te vo vaiinti inaara uvaqai nunka amitaariraro vi vaiintiva inaaraiqaqai ti quahama timitaanarove, tiro.

⁴⁸ Ihuva minti tivakero viva nahenti vira tiva amiro tiharo, Are Kotira uva raqa kaanara, ekaa vi uvara te ai nunkama amitauro, tiro.

⁴⁹ Ihuva minti tumanta naavuqi kara nareka oquvi vauka nai tiva ami nai tiva amiha thia, Maa ta vaiintiae vahiaro Kotira uva raqakanara nunka amitauro tivo? ti.

⁵⁰ Vika minti ti vauvaro Ihuva nahenti virara tiharo, Are tiriara kempukaiqama kera iriarava, vivama ai kuvantu amitaivo. Ari muntukavano paru i vairara nena maaqaini vuane, tiro.

Ihuva minti turama.

8

Nahenti vonavu Ihura avataqiqi vura

¹ Viraqahairo vo enta Ihuva vo vatuka vo vatuka niharo Kotiva vaiinti nahentiqaahaiqiaina vakaakara, koqe vakaaka tiva nimiqiro vumanta vira vainti 12navu vira vataake vumanta ² nahentinavuvata vira vataake vurama. Vi nahentinavuka tota vaana hampata vaukave, aihavu nahentikave, vauvaro Ihuva vika koqema nimitomanta vika Ihura avataqiqi vurama.

Mariara virara Makataaraihainaavave tu nahentiva vauvaro tota Ihuva viraqahairo vaana 7navu nititama komanta aitare qaqini vu nahentiva vauvaro ³ vo nahenti Joanaava vauvaro vira vaativano Kusaava nora vaiintivano vahiaro Herotira *opisi* naavuqi kaiqa vare vauva vaura. Vo nahenti Susaanavavata, airi nahentivata, Ihura vira avataqiqi viha vika nai monu aqukeha Ihuravata vira vaintinavuvata kahaqamaqi vi vaurama.

Ihuva auru qintato vaiintirara uva tuqantaakero tura

(Matiu 13:1-9; Maaki 4:1-9)

⁴ Vo vatuka vo vatukaihai vaiinti nahenti Ihuva vaunaini ani ruvaaqumavi vauvaro Ihuva uva vo tuqantaakero vika tiva nimiro tiharo,

⁵ Vaiinti vovano kara utireva auru qintaqiro vurave. Viva qintaqiro vuvaro auru hininavuvano aaraqaa hiqirumanta vaiinti nahenti vi aniba aiquqohai auru vira rahitama kovaro uvirivano ani nama aqukorave.

⁶ Auru hininavu ori vataqaa hiqiruva vaaka qampiqa tovaro aahara vatavano vauvarora tiro, vaaka aaharuqama vurave.

⁷ Mintuvaro auru hininavuvano auquorota nimirivano qampiqatoraqi hiqiriro, nimiri vataakero qampiqa tovaro nimirivano vira ravaaqavu kovaro kia ho qampiqorave.

⁸ Mintuvaro auru hininavu koqe vataqaa hiqiruva koqema kero qampiqeharo vuru airi tava 100 tava iratorave, tiro. Ihuva uva vo tuqantaakero minti tivakero vika tiva nimo tiharo, Ni aato vairera, vi uvara okara iriate, tiro.

⁹ Ihuva minti tivakero vaumanta Ihura vaintinavu Ihuva tu uvarara ireha tiha, Vaaka uva vo tuqantaakera tianara, vira okara tinavu tiva timirage iriare, tuvaro ¹⁰ Ihuva vika tiva nimo tiharo, Kotiva vaiinti nahentiqa raqikiaina uvara kukeqatai uvara, vi uvarara Kotiva niara vika qaqi kaira vi uvara okara iriate tivakero, qaqi vaiinti nahentiara vi uvara okara kia yutukera tiva nimiante tirara ti, te vi uvara tuqantaake vika tiva nimunarave.

Te uva tuqantaake vika tiva nimiari vika irihama kia vira okara kankomake irivarave. Vika ti uvara aato tara i vaiha kia anomake vira okara irivarave, tiro. (*Aisaiaa 6:9*)

¹¹ Ihuva minti tivakero viva nai vaintinavu tiva nimo tiharo, Te vaaka uva vo tuqantaake tiva nimunara vira okara ni tiva nimirerave. Auru vira vaireva Kotira uvama vaivo.

¹² Auru aaraqaa hiqirura, vi aurura okara vaireva vaiintinavu Kotira uva iriavaro Sataaniva anirer tiharo, Vika vi uvarara quqaave tivarot Kotiva vika kuvantu kero ntitaantorave, tivakero vika avu aatoqihairo vi uvara qaqlini vara aqukairave.

¹³ Auru hininavu ori vataqaa hiqirura, vi aurura okara vaireva mintimama vaivo: Vaiinti nahenti Kotira uva iriha vi uvarara quahake variavaro uuvavano kia vika avu aatoqi variqiro vimanta variavaro vovano tiharo, Kaiqenavu qora kaiqa varaa, timanta vika vira uva iriha Kotira uva qaqlina ke variarave.

¹⁴ Auru hininavu auquorota nimirivano qampiqa toraqi hiqirura, vi aurura okara vaireva vaiinti nahenti Kotira uva iri, viraqahai vika vataini vo maara vo maara vairara iriqi viha, vika nai airaira varerarave, vika nai vataini vaiha quaherarave, vi haikararaqai noraiqamake iriqi viha, vika Kotira uva qaqlake kia koqe tavavano irataintemake irataarave.

¹⁵ Auru hininavu koqe vataqaa hiqirura, vi aurura okara vaireva vaiinti nahenti Kotira uva avu aatoqihai iriqi viha, vika kempukaiqamake vi uvarara iriqi viha vuru koqe tava, airo tava irataintemake irataarave, tiro.

Ihuva ovara uva tuqantaakero tura

(*Maaki 4:21-25*)

¹⁶ Ihuva minti tivakero maa uvara vaiinti nahenti tiva nimo tiharo, Vaiinti vovano ova qumpikero kia kure varakero ova viraqaa aqute vairave. Viva kia ova vira varero tainta ankaraaraqai veta vate vairave. Vaiintivano ova qumpikero vo vaiintinavuvata naavuqi uriqete tavaate tiro, viva ova kantaaqaini vate vairave.

¹⁷ Vate maa entara kukeqate haikara, vi haikara vi haikara naantiara qovarama kero qoqaaqaima kaanarove. Vate maa entara mantaaqate haikara, naantiara vi haikara vi haikara rantakero qoqaa qaqlina kanta vuru kaanarove.

¹⁸ Vo haika vataaina vaiintira Kotiva vira voqavatama amianarove. Vaiinti vovano kia vo haika vataraitiro, nai irikero tiharo, Te inaara haikama vatauro tiainara, Kotiva ekaa viva ina haikara vara qaqlima kaanarove. Kotiva mintiainarara ti, ne vi uvarara iriha rauriha variate, tiro.

Ihura navunaaka vira tavareka anura

(*Matiu 12:46-50; Maaki 3:31-35*)

¹⁹ Ihuva mini vaumanta vira novavata vira qatanavuvata vira tavareka aniomanta airi vaiinti nahenti ruvaaqumavi naavuqi vaumantara ti, vinavuka kia ho Ihura aaqanto viraiti, vahaqaini vaura.

²⁰ Vinavuka vahaqaini vauvaro vovano Ihura tiva amiro tiharo, Ai novavata ai qatanavuvata vahaqaini ai tavarekama ani variavo, tuvaro ²¹ Ihuva viraqi ruvaaqumavi vaukara tiharo, Kotira uva iriha ni variaka, vikama ti novave, ti qata vakaukavarave, variavo, tiro. Turama.

Ihuva aaronaaqa qio tuvaro tirema vaura

(*Matiu 8:23-27; Maaki 4:35-41*)

²² Vo enta Ihuva nai vaintiaravata votuqi vaarirero Ihuva vikara tiharo, Kaiqenavu varuva nora maa taqa varenavu yutuni hini mantaraini vuare, tivakero vika hampata

mini vura. ²³ Vika namariqi vi vauvaro Ihuva votuqi vaitaviro vauvaro, viraqaaahairo aaronaavano noraiqamakero utiharo namari ventaqiro uri vauvaro namarivano votuqi mpiqe vaumanta vika namariqi aquviva aumaiqiro vaura.

²⁴ Vika namariqi aquviva aumaiqumanta Ihura vaintinavu Ihuva vaitonaini oru vira vauraqamake tiha, Noravauvu, Noravauvu, tenavu namariqi rupeqa vuarirava aumaiqivo, tuvaro Ihuva himpiro aaronaaravata namariaravata ho eqaane tuvaro aaronaavano ruqema vuvuro namarivano otiniro tirema vaura.

²⁵ Namarivano otiniro tirema vauvaro Ihuva nai vaintinavuara tiharo, Ne tiriara kempukaiqamake iriataarave, tumanta vika qeteha kauqu runkinkiri iha tiha, Maa vaiintiva ta vaiintivave? Viva uva tivarо aaronaavanovata namarivanovata vira uva iri vairave, ti. Vika minti turama.

Ihuva vaana hampata vau vaiintira koqema amitora

(Matiu 8:28-34; Maaki 5:1-20)

²⁶ Vika votuqi vivi, hini mantaraini Gerasa vataini orurora. Kariri vatavano hini mantaraini vauvaro Gerasa vatavano vutuni hini mantaraini vaura. ²⁷ Vika mini orurovaro Ihuva votuqihairo vaavi rovaro vo vaiintivano vi vatukaraqihairo vaana hampata vauva oru Ihura vita kora. Vi vaiintiva airi enta variqiro viharo kia utavaaqavata nonkiraitiro, kia naavuqvavata vaitaraitiro, viva vaiinti qutu vuka ori onavuqi vate vauraqiqi vaitaqiro vi vaiintiva vaura.

²⁸ Viva Ihura tavero oi tivakero Ihura avuqaa ani hiqiriviro vahiaro naveraitiro tiharo, Ihuo, Variqavano nai virini vaira, are vira Maaquvano variarao. Are tiriara nantiarire tirae aniarao? Te ariara mpo tihama kia ti ruqutuane turo, tiro.

²⁹ Ihuva vaanara vi vaiintiraqihairo qaqqini aitarera vuane turara tiro, vaanavano minti tura. Vi vatanaaka vi vaiintirara qaqqi nuantorave tivakeha vira seniqohai aiqu kauqu rumpake vatovarovata, vi vaiintiva vika *seni* rumpatora ruqeqaama keharo uvaro vaanavano vi vaiintira aiqu utuqiro qumina vataini vi ani vaura.

³⁰ Mintuvaro Ihuva vaana vira irero, Nena autu raane, tuvaro viva Ihura tiva amiro tiharo, Ti hutu Airitahaakave, tiro. Airi vaanavano vi vaiintira avutaqiqi vaurara tiro, viva minti tura. ³¹ Vaana vika Ihurara mpo tiha, Kia tinavu *Ruvuqira/Mpumpiqira* tititaae, ti.

³² Minti tivakero tavavaro quara airinavu vuruni aumanto ainqinaqaa auhiri ne vaumanta vaananavu mpo tiha, Tinavu tititairage tenavu quara avutaqiqi oru variare, tuvaro Ihuva hove tumanta ³³ vaananavu vi vaiintiraqihairo qaqqini aitare oru quara vika avutaqiqi viqetomanta, viraqaaahai quarananavu ekaa kantamaqiqi otu vi onkaiqiqi aquvi nora namariqira otu ravara aqu vuvuro namarivano vika raqutu taiqakora.

³⁴ Quarananavu namariqi aquvi qutu vumanta quaraqaa raqiki vau vaiintinavuka vi haikara tave, viraqaaahai aiqu autute kante vi oru nora vatukaqiqi vau vaiinti nahentika ekaa viti viri tiva nimumanta ³⁵ vi vatanaaka vira tavareka oru vi, Ihuva vaunaini orure tavavaro vaiintiqihairo airi vaana atito vaiintiva utavaaqaa nonkutero Ihura aiquidataraini oquviro vuvuro vira avu aatovanovata kankoma vuvuro vaumanta vika vaiinti vira tave getora.

³⁶ Vika vira tave qete vaumanta vaiinti hininavu vaaka tavoka, vika tiva nimiha tiha, Ihuva minti mintima kaivarо vi vaiintiva koqema vivo, ti. ³⁷ Vika minti tumanta Gerasa vataanaaka mini ruvaqumavi vauka voqamake qeteha Ihurara tiha, Oho, ho maihaira nena vuane, tuvaro Ihuva votuqi vaarirero vurama.

³⁸ Viva vireva uvaro viraqihairo vaananavu aitaro vaiintiva Ihurara mpo tiharo, Kairae te ai vataake vuare, tuvaro ³⁹ Ihuva aqao tiro, Are nena maaqaini oru vaihara Kotiva ai koqema kero kahaqama amitairara nena navunaaka vi uvvara tiva nimiiane, tiro. Minti tivakero Ihuva vira atitovaro viva nai vatukaini orurero Ihuva nai koqema korara tiva nimiqiro vi vaurama.

Jairusiva Ihura oru vitakora

(Matiu 9:18-26; Maaki 5:21-43)

⁴⁰ Ihuva anirantero varuva namari hini mantaraini oruromanta vaiinti nahenti vira veka mini ruvaqumavi vauka vira quahama amitora. ⁴¹ Mintuvaro vaiinti vovano vira autu Jairusiva maara naavuqaa raqikuva orurero Ihura aiquidataraini hiqiriviro mpo tiro, Ti naavuni aniane. ⁴² Ti raavura vohaiqa urava ihi 12navu varaiva, viva qutuarirava aumaiqivo, tiro.

Nahentivano Ihura utavaaqa viti autama kora

Minti tuvaro Ihuva Jairusira vataakero vumanta airi vaiinti nahenti Ihura avataqiqi viha nai ventake nai ventake i vaura.

⁴³ Minti vauraqihairo nahenti vovano tora rovara varovi variqiro viharo 12 ihinavuara vaiharo vo *dokta* vo *dokta* aka oru tavero ani tavero iharo nai monu taiqa kovaro kia vovanovata vira kahaquvaro vira rovaravano qaqi variqiro vi vauvaro ⁴⁴ vi nahentiva vaiinti nahenti avutaini Ihura tauvaqaini oru viharo Ihura utavaaqa viti autama kovaro vira rovaravano vaaka taiqa vura.

⁴⁵ Taiqa vuvaro Ihuva nai vaintinavu irero tiharo, Tavave ti autama kaivo? tumanta vika aqao kiama tenavu te tuvoro Pitaava tiharo, Noravaauvo, airi vaiinti nahenti ai tataaqa anihama nai vente nai vente i variavo, tuvaro ⁴⁶ Ihuva aqao tiro, Vovano ti autama kaivo. Te iruraro ti kempuka hinivano tiquihairo aitarero vivo, tiro.

⁴⁷ Ihuva minti tuvaro nahenti viva tiharo, Oho, Ihuva tiriara irirove, tivakero aiqu kauqu ntiri ntiri i vauvaro orurero Ihura aiquidaraini hiqiriviro vaiinti nahenti nivuqua vahiharo Ihura tiva amiro tiharo, Ti rovaravano taiqa vuarire ti, tema ai utavaaqa autama kauro. Te mintima kauraro ti rovaravano vaakama taiqa vivo, tiro.

⁴⁸ Minti tuvaro Ihuva vira tiva amiro tiharo, Ho ti raavuravauvo, are tiriara ti kahaqiariravave tiararoma ai rovaravano taiqa vivo. Homa ai muntukavano paru i vairara vuane, tiro.

Ihuva Jairusira raavura koqema kora

⁴⁹ Ihuva minti ti vauvaro Jairusira naavuqihairo vaiinti vo atitova anirero Jairusira tiva amiro tiharo, Ai raavuravano qutuma vivo. Maara ti vai vaiintira kia ravaaqavu kaane, tuvaro.

⁵⁰ Ihuva vi uvvara iriro Jairusirara tiharo, Kia qetaane. Are tiriara kempukaiqama kehara iri vairaro ai raavuravano ho variarire, tiro.

⁵¹ Minti tivakero Ihuva vira naavun orurero qumina vaiinti nahenti nititeharo vahaaqaini otu variate tivakero, Pitaaravata, Ioniravata, Iemiravata, vanti vira noka qokavata, vinavukaqai ntita varero nahenti vaintiru qutu vumanta vatoraqi vura.

⁵² Ekaa vaiinti nahenti vi vaintira turaqi vahia virara iq'i rate vauvaro Ihuva tiharo, Kia virara iq'i rataate. Vi nahenti vaintiva kiama qutu vivo. Viva qaqi vaitema vaivo, tiro. ⁵³ Minti tumanta vika vi nahenti vaintiru qutu vura tavokara ti, vika Ihura uvvara naarahihama amitora. Mintuvaro Ihuva nahenti vanti qutu vura vatora viraq'i oriqetero ⁵⁴ vi nahenti vaintira kauqu utu varero vira aarero tiharo, Maa vaintiruva, himpuane, tiro.

⁵⁵ Ihuva minti tuvaro vi nahenti vaintiru maraqravano qaiqaa naiqaa aintovaro viva vaaka himpura. Ihuva mintimakero, viraqaaqihairo viva viraq'i vaukara ho kara vira amiate tiro. ⁵⁶ Minti tumanta vira noka qoka voqamake kauqu runkinkiri i vauvaro Ihuva vitantara tiharo, Vate maa haikara tavaara kia voravata tiva amiate, tiro. Ihuva minti turama.

9

Ihuva nai vainti 12navu kaiqa nimiro nititomanta vura

(Matiu 10:5-15; Maaki 6:7-13)

¹ Ihuva nai vainti 12navu naarama ruvaaquma kero vinavuka vaintiqihai vaana nititeha rovara varekavata koqema nimitaate tiro, Ihuva vinavuka noraiqama kero kempuka nimiro tiharo, ² Ne oru Kotiva raqikina vakaakara vaiinti nahenti tiva nimihama rovara varekavata koqema nimitaate, tiro.

³ Minti tivakero viva tiharo, Ne vireka iha, kia kauruve, utave, karave, monuve, vo utavaaqave, vo haikavata vararaiti, qaqima vuate. ⁴ Ne oru vimanta ta vatukaraqihiae niara quahake ni ntitaivera, ne mini vohaa naavuqiqai variqi vi, viraqaaahai vi vatukara mini kema vuate.

⁵ Ne oru vimanta ta vatukaraqihiae kia ni quahake ntitaivera, vika nai qora okara ni autu nimitera tavaate ti, ne nenta aiquqaaahai vi vatukaraqihainaa konkoma rintatike vuate, tiro.

⁶ Ihuva minti tumanta vira vaintinavu vo vatuka vo vatuka vi anihia Kotira vakaaka, koqe vakaaka vaiinti nahenti tiva nimiqi viha rovara varokavata koqema nimite vaura.

Herotiva Ihura okarara aato tara i vaura

(Matiu 14:1-2; Maaki 6:14-16)

⁷ Ihuva nai vaintinavu hampata vi kaiqara vi kaiqara vare vauvaro vi uvava vi anuvaro Herotiva Kariri vataqaa raqiki vauva, vivavata vi uvvara iriro Ihura okarara aato taramaqiro vi vaumanta hini vaiintinavu tiha, Ioniva namari nimi vau vaiintiva qutu vuraqihairo qaiqaa qaqi himpiro ni vaivo, tumanta ⁸ hini vaiintinavu tiha, Aqao, tinavu kaivaqava, Elaitaava qaiqaa qovaraiqama vivo, tumanta hini vaiintinavu aqao ti, Haarua paropeti vaiinti vovano qaiqaa qaqi himpiro ni vaivo, tura.

⁹ Vika minti ti vauvaro Herotiva nariara tiharo, Te Ionira aunta haaru teqa kaavaunara-ave. Vaiinti nahenti vo uva vo uva ti varia vaiintiva, viva ta vaiintivae vaivo? tiro. Minti tivakero viva Ihura tavareva auti vaura.

Ihuva kara airiqama kero 5,000 vaiinti nimura
(Matiu 14:13-21; Maaki 6:30-44; Ioni 6:1-13)

¹⁰ Ihuva nitito vaiintinavuka oru mini nini, orurante anire vika nái niha kaiqa varo vakaakara Ihura tiva amuvaro iriro, viraqaahairo Ihuva vokuka mini kero nai vaintinavuqai ntita varero vatuka vo, Besaidaini vumanta ¹¹ mini ko vaiinti nahentinavuka iruvaro Ihuva Besaidaini vireva vumanta vikavata vira avataqai miniara vura. Vikavata Ihura avataqai vuvaro Ihuva vika tavero, vikara quahama nimiteharo mini qumina kanta vaiharo Kotiva raqikiaina vakaakara vika tiva nimiharo rovara varokavata kojema nimite vaura.

¹² Ihuva mintiaqiro vuvaro kuari avuvano tuvi vumanta Ihura vanti 12navu Ihuva unaini anire tiha, Vaiinti nahenti nititairamanta vika vaiinti vainaini vatuka vatuka vaiteha kara vara naate. Maini qumina kantave, ti.

¹³ Minti tuvaro Ihuva aqao tiro, Ne nentanavu vika kara nimiante, tiro. Tumanta vinavuka Ihura tiva ami tiha, Tenavu mpareti kauqurunavuvata, havuka taaraqanta-vataqaima, ntua tauro. Airi vaiinti nahentima variavo. Tenavu nora monu aqukehae vika kara vara nimirarave? ti.

¹⁴ Vaiinti 5,000navu mini vauvaro Ihuva nai vaintinavuara tiharo, Nenavu vaiinti nahentiara timanta vo kanta 50navu oquvi vaimanta, vo kanta 50navu oquvi variqi vi, mintiakie timanta oquvi variate, tiro.

¹⁵ Tumanta vira vaintinavu Ihuva tuntemake vikara tumanta ekaa mintimake oquvi vauvaro ¹⁶ Ihuva mpareti kauqurunavuvata, havuka taaraqantavata, varakero naaru-vaini taveharo Kotirara kojema iarao tivakero, mparetivata havukavata nkuikero nai vaintinavu nimiro tiharo, Nenavu vare vaiinti nahenti nimiqi vuate, tiro.

¹⁷ Tumanta vika vare vaiinti nahenti mini oquvi vauka nimumanta vika ekaa ho nomanta, viraqaahai Ihura vaintinavu rutantuto utara vare, vaiinti nahenti kara ho neha hini kara viti qaqi raukutora, vira nuntuke uta 12navu mpiqa kora.

Pitaava Ihura okarara tura
(Matiu 16:13-20; Maaki 8:27-30)

¹⁸ Vo enta Ihuva nariaraa vaiharo Kotira aare vaumanta vira vaintinavu viva unaini anirovaro Ihuva vinavuka irama nimitero tiharo, Qaqi vaiinti nahenti tiriara ta vaiintirave tihae ti variavo? tumanta ¹⁹ vinavuka tiha, Vokiaka ariara viva Ioniva namari nimi vau vaiintivave ti variamanta, vokiaka ariara viva Elaitaavave ti variamanta, vokiaka ariara viva haarua paropeti vaiintivano qaiqaa qaqi himpiro ni vaivo ti variarave, ti.

²⁰ Vinavuka minti tuvaro Ihuva vinavukara tiharo, Ho nentanavu vo? Nentanavu tira-ara ta vaiintirave tihae variavo? tuvaro Pitaava vira tiva amiro tiharo, Are Mesaiavano—Kotiva atitai vaiintivama variarao, tiro.

²¹ Pitaava minti tuvaro Ihuva vinavuka qioqamatero tiva nimiro tiharo, Ne vi uvara vo vaiintivata kia tiva nimiante, tiro.

Ihuva nai qutu vuainarara tura
(Matiu 16:20-28; Maaki 8:30-9:1)

²² Ihuva minti tivakero nai vaintinavu tiva nimiro tiharo, Te Vataini Vatatai Vaintikave. Te aiha vina haikara varaqi vuariramanta Iutaa nora vaintinavuvata, Kotira kaiqa vara amite varia vaiintika vika noranavuvata, maara okara ti varia vaiintikavata, vika tiriara qumina vaiintive tiha ti goririma timitevarare. Vika mintihama ti harukaiqe te taaramo enta vari, qaiqaa qaqi himpirarave, tiro.

²³ Minti tivakero Ihuva vinavuka ekaa tiva nimiro tiharo, Ti tivataqiro aniarira vaiintiva, viva nai muntuka vaine haikara qaqa kero, nai aruke hirite katarira vara aqu varero vo enta vo enta ti naantiaraini aniarire.

²⁴ Nai vataini qaqi variqiro vuainararaqai noraiqaakero iriqiro vi variarirava, vi vaiintiva ekaarama qutu vuanarove. Vaiintivano tiriara iriqiro viharo vuru qutu vuarirava, vi vaiintiva ekaa entama qaqi variqiro vuanarove.

²⁵ Vaiintivano vataini qaqi variqiro viharo ekaa airaira ruvaaquma kero vatero, viraqaahairo qutu viro raumpirima virera, vira airairavano nantiakeroe vira ho kahaqianarove?

²⁶ Vaiinti vovano ti kaarave, ti uva kaarave, kaurira haika ti timirera, te Vataini Vatatai Vaintika naantiara te tuvuaina entaraqaa naivata kaurira haika vara amirarave. Vi

entara ti Qora mpeqa okaravano tiquahairo ataa i vairaqe te takuqi vai enselika vataake tuvirerave. Vi entara te vi vaiintira naivata qoririma amitararave.

²⁷ Te quqaama turo. Vaiinti hininavu vate maini himpite variaka, vinavuka kiama qumina qutu vivarave. Vinavuka Kotiva vaiinti nahentiqa raqikainara tavama kema, qutu vivarave, tiro.

Ihura vaatavano aahuva vaata qovaraiqama vura

(Matiu 17:1-13; Maaki 9:2-13)

²⁸ Ihuva vi uvvara tiva nimi taiqa kero vohaa *uiki* varakero viva Pitaaravata, Ioniravata, Iemiravata, vinavukaqai ntita varer Kotira aarareva ainqinaqaa oru vura.

²⁹ Viva Kotira aare vuvaro vira virivano, vo viri kuquuvuvaro vira utavaaqavano hantaiqiharo takuqi vaumanta ³⁰ vaakama vaiinti taaraqanta qovarama vi, vira vataake uva ti vaura. Vitanta autu Mosika Elaitaaka.

³¹ Vitanta qovarama vuvaro kuari vehohaara voqaava vitanta ututuma tomanta vitanta Ihura vataake uva tivaqi viha Ihuva vuaina aararavata Ihuva Ieruharemini qutu vuainararavata tivaqi vura.

³² Ti vaumanta Pitaavavata, vira kena vaiintitantavata, avu tauntomanta vaitake himpi tavovaro Ihura vaatavano vo qaramaviro koqema vuvaro vira mpeqa okaravano takuqi vaumanta vaiinti taaraqanta Ihura vataake himpite vaura.

³³ Vi vaiintitanta Ihura mini ke vireka uvare Pitaava Ihurara tiharo, Noravaauvo, koqemama tenavu ai vataake maini vauro. Are hove tirera, tenavu haraara naavu taaramonavu kaqake ariara vo, Mosirara vo, Elaitaarara vomake, kaqa nimitaare, tiro. Pitaava kia nai tu uvvara okara kankoma kero iriraitiro, viva hampiqamakero vi uvvara tura.

³⁴ Pitaava minti ti vuvaro tonavuvano qovarama viro, hihipaama viro vika avutaiqama komanta Ihura vaintinavu virara qeteha vuvaro ³⁵ uvavano tonavuqihairo tiharo, Maara ti Maaquve. ³⁶ Ti kaiqa vara timitaarire ti, te vira kaama taunarave. Ne vira uvama iriate, tiro.

³⁶ Tonavuqihairo vi uvvara tiva taiqa komanta vinavuka tavovaro Ihuva nariaraa vaumanta vira vaintinavu evaara variha, vi entara tavo haikarara kia vo vaiintivata tiva nimura.

Ihuva vo vaintiqihairo vaana atitovaro vura

(Matiu 17:14-21; Maaki 9:14-29)

³⁷ Vira qararaa vinavuka ainqina mini ke, otu vumanta vaiinti nahenti airitahaa urure Ihura vita kora.

³⁸ Vira vita kovaro vaiinti vovano vaiinti nahenti nivutaqihairo Ihura naveraitiro tiharo, Maara ti variara vaiintio, te ariara mpo tihama ti maaqu ani tavaane turo. Ti maaqu vira vohaiqaqive. ³⁹ Vaanavano oti tivakeharo vaakama ti maaqu ravaaqavuke vaivar viva aiqu kauqu raqikika raqikika i vaivar taaraparavano vira noqahairo re vairave. Mintiaqi viharo vaananavano kia vaaka vira tuta karaitiro, qaqi vukaiqamakero vira aruqiro vi vairave. ⁴⁰ Te ai vaintinavuara mpo tihama, Vaana vira atitaivaro qaqlini vuarire, turamanta vika vira atitaavarovata, kia ho aitarero virave, tiro.

⁴¹ Vaiinti viva minti tuvaro Ihuva tiharo, Ne maa entara varia vaiinti nahentika ne koqe aaraqaqai nuataara vaimanta ne kia avuqavu aaraqaa ni variavo. Ne Kotirara qumimaqama kehama kia virara iriavo. Ike, ne ti popohama timite variamanta te nanti nanti entae ni hampata variqi virerave? tiro.

Minti tivakero viva vaiinti virara tiharo, Nena maaqu vita varera maini aniane, tuvaro ⁴² vaiinti viva nai maaqu vita varero ani vuvaro vaanavano vira maaqu ruqutu kovaro viva vatakanta hiqiruvaro vira vaata raqikivi raqikivi i vuvaro Ihuva vaana vira atiharo atitama kero, vainti vira koqema kero nai qora amura.

⁴³ Vira nai qora amumanta ekaa vaiinti nahenti kauqu runkinkiri iha tiha, Ike, Kotira mpeqavano voqavatama vaivo, tura.

Ihuva nai qutu vuainarara qaiqaa tiva nimura

(Matiu 17:22-23; Maaki 9:30-32)

Vaiinti nahenti Ihuva vo kaiqa vo kaiqa varorara kauqu runkinkiri i vuvaro ⁴⁴ Ihuva nai vaintinavuara tiharo, Te ni tiva nimirera iaina uvvara kiama ne tauru kaate. Vovano ti Vatainai Vaintika qovarama kaira ti ravaaqavu vare nora vaiintinavu kauquqi vuru kevarave, tiro.

⁴⁵ Ihuva minti tumanta vira vaintinavu kia vi uvvara okara kankomake irura. Ihura vaintinavu vi uvvara kia kankomake iriate tiro, vi uvvara okaravano kukeqa viro vaumanta vinavuka qetehama kia vi uvvara okarara Ihura irora.

Tinavuqihairo tavave avuhainaa vaiintivano varianarove? tura
(Matiu 18:1-5; Maaki 9:33-37)

⁴⁶ Ihura vaintinavu vo enta titorira uvaiqiha tiha, Tavave tinavuqihairo avuniqamaviro varianarove? ti vauvaro ⁴⁷ Ihuva vika nái aatoqi iru uvara vivavata iriro, viraqaahairo Ihuva vainti naati voru vita varero vara viri nai tataaqaini himpimatero ⁴⁸ vika tiva nimiro tiharo, Vaiinti vovano tiriarao tiro, maa vainti naatira quahama amiteharo viva tivatama quahama timitaanarove. Viva ti quahama timiteharo Kotiva ti tititairavata quahama amitaanarove. Niqihairo ni naantiaraini inaara autu vairava, vivama ni nivuni vaharo nora autu vataava varianarove, tiro.

Vo vaiintivano Ihura autuqaa kaiqa varora
(Maaki 9:38-40)

⁴⁹ Ihuva minti tuvaro Ioniva tiharo, Nora Vaiintio, tenavu tavauraro vaiinti vovano ai autuqaa vaana atite vairave. Vi vaiintiva kia tinavu hampata ai avataqí ni vai vaiintiva vaimantara ti, vira qioqama tauro, tiro.

⁵⁰ Minta tuvaro Ihuva Ioniravata, nai vainti vonavuvata, tiva nimiro tiharo, Aqao, vaiintivano kia tinavu kaiqa vara qoraiqama timitaarirava vairera, vi vaiintiva tinavu kahaqama timitaariravama varianarove, tiro. Ihuva turama.

Sameria vatanaaka Ihura kia quahama amitora

⁵¹ Ihura vita varero naaruvaini vuaina entava aumanto anirovaro Ihuva Ieruharemini vuaina avu aatova vauvaro viva mini vireva vi aararaqaa viro.

⁵² Aaraini viharo Ihuva nai vaintinavu naane nititomanta vinavuka avuni vi, oru Sameria vatanaaka vatkaini orure Ihuva vaitaaina naavura gerama amitarare tumanta vi vatanaaka tiha, ⁵³ Aqao, Ihuva Ieruharemini vuariravara tiro, kia ho maini vaitaanarove, tura.

⁵⁴ Minta tumanta Ihura vaintitanta Iemika Ionika vi uvara iruvaro vitanta arara itomanta Ihurara tiha, Noravauvo, are hove tiraqe tetanta naaruvaini naverai tiariraro ihavano tuvu maa vatanaaka tatoqa kaarire, ti.

⁵⁵ Vitanta minti tuvaro Ihuva tuqantaaviro vitanta nitiharo tiharo, Kia minti tiate, tiro. ⁵⁶ Ihuva minti tivakero nai vaintiaravata vi vatkara mini qaqrakeri vo vatkaini vurama.

Ihura avataqi vireka auti vau vaiintikara tura
(Matiu 8:19-22)

⁵⁷ Vinavuka aarana vi vauvaro vainti vovano orurero Ihurara tiharo, Te ai vaintiqama virevare. Are taini tainie vinanaini tevata ai avataqí virevare, tiro.

⁵⁸ Minta tuvaro Ihuva vira tiva amiro tiharo, „Are ti tivataqí vireva ihara paparuqa irorave., Qaakau vairivanu nai ntoma tairaqi vaite vairave. Uvirivano nai navuqi/naavuqi vaite vairave. Te Vataini Vatatai Vaintika vaitaaina naavuva kia vaivo, tiro.

⁵⁹ Ihuva minti tivakero viva vo vaiintiara ti tivataqira aniane tuvaro vi vaiintiva tiharo, Nora Vaiintio, kairage te tenta qora naane oru quntamake aitare ai avataqí vuare, tuvaro ⁶⁰ Ihuva aqao tiro, Kairamanta qutuvi vaiintika nái qutuvi vaiintika quntama taate. Are kia mintiraitira, Kotiva raqikiaina vakaakara vainti nahenti tiva nimiqira vuane, tiro.

⁶¹ Ihuva minti tuvaro vo vaiintivano tiharo, Nora Vaiintio, te ai avataqí virevare. Are hove tiraqe te tenta navunaaka inaini vuarirauka oru vika kauqu nimi, ho vuro tivake aniare, tiro.

⁶² Minta tuvaro Ihuva virara aqao tiro, Vaiinti vovano kaiqa korareva viharo kia avuniqai tavamaqiro viraitiro, viva tuqantaaviro quminaini viti viri tavamaqiro virava, vi vaiintiva kia ho Kotiva raqikiaina uvara vainti nahenti tiva nimianarove, tiro.

10

Ihuva 72 vaiintinavu nititomanta vura

¹ Noravano minti tivakero viva vaiinti vonavu 72navu noraiqama kero vinavuka nititero tiharo, Nenavu taaraqanta taaraqanta vihamma, te virera iaina vatkara, vo vatkua vo vatkaini nenavu naane ti tivuni vuate, tiro.

² Ihuva minti tivakero viva uva vo tuqantaakero vika tiva nimiro tiharo, Airi kara iratero mpeqaiqamavi vaimanta kara qantu vare ani vaiintika kiama airi variavo. Ne Naaho Qora aaraivarо viva kaiqa vaiinti vonavuvata nititaira vuate. ³ Ho ne vuate. Te ni nititaari ne sipisipi naati voqaara vaiintinavu qaakau vairi voqaara vainaini vivarave.

⁴ Ne vihamma kia monuve, utave, aiqu nonki haikarave, vare vuate. Aaraini vihamma kia qumina vo vaiinti vo vaiinti hampata uva mantamaqì viraiti, qaqi vuate.

⁵ Ne naavuqi orure naavuqi vaikara uva manteha mintima tiate: Kotiva ni quahama nimitairaro ni muntukaqihairo paru i vaira variate, tiate. ⁶ Ne minti tivake tavaivaro vaiinti vovano vi uvvara quahairera, Kotira aareha vi vaiintira kojema amitaane tiate. Tavaivaro vo vaiintivano vi uvarara kia quahairera, kia vo uvavata vira tiva amiate.

⁷ Kaiqa vaiintivano nai kaiqa varairaqahairo nai koqaa ho vare vairara ti, ne vatukaqi oru viha, vohaa naavuqiqaima variqi vimanta vika nái nimi namari kararaqaima neha variate. Kiama vo naavuqi vo naavuqi nihamma kara naate.

⁸ Ne vo vatukaini oru raimanta vi vatanaaka ni quahama nimiteha niara tinavu vataake variate tivera, vika nimi kararaqai neha ⁹ vi vatukaraqi aihavi vaiinti nahentika kojema nimite vi vatanaakara tiha, Kotiva vaiinti nahentiqaa raqikiarirava ni aumanto aniraivo, tiate.

¹⁰ Ne vo vatukaini oru raimanta vi vatanaaka kia ni quahama nimiraiti, niara kia tinavu vataake variate tivera, ne vika qaqirake aaraqaa oru himpite vailha ¹¹ mintima tiva nimite: Kotiva vaiinti nahentiqaa raqikiaina entava aumanto anirai uvvara ni tiva nimiare turamanta, ne tinavu qorrima timitaara kaara, tenavu tentanavu aiququaahai ni vatukaqiraa konkoma nunkake kia qaiqaavata orurante anirerave, tiate. ¹² Naantiara Kotiva ekaara entaqaa *ko* tiharoma vikaqaa uva vatairava Sodomii vatanaakaa uva vatainraravata aatara kaanarove.

Vaiinti nahenti Ihura qorrima amitokara mpo tiva nimiritora
(Matiu 11:20-24)

¹³ Ne Korasinini variakave, ne Besaidaini variakave, te niara ohoma tiva nimite vauro. Te ni nivuqaa nora kaiqa varauvantema kero, haaru vovano nora kaiqa Taiaa vatanaakave, Saidoni vatanaakave, vara nimitaitirio, vi vatanaaka vaakama kovaara utavaaqa nonkute, vika hanta varake nái vaataqaa aque qora aara vaakama qaqira kaatirio. ¹⁴ Ekaara entaqaa Kotiva *ko* tiharoma vikaqaa uva vatairava Taiaa vatanaakaqaaave, Saidoni vatanaakaqaaave uva vatainraravata aatara kaanarove.

¹⁵ Ne Kapenaumiqi variaka tiha, Kotiva tinavu noraiqama kairaeqaa naaruvaini virarave, ti variarave. Aqao, kiave. Kotiva ni vara aqukaira ne vevanto qutu vika vainaini miniqaima otu väivarave, tiro.

¹⁶ Ihuva minti tivakero nai vaintinavu tiva nimiro tiharo, Ni uva irira vaiintiva, vi vaiintiva ti uvavata irianarove. Ni qorrima nimitaira vaiintiva, vi vaiintiva tivata qorrima timitaanarove. Ti qorrima timitaara vaiintiva, vi vaiintiva Kotiva ti tititairavata qorrima amitaanarove, tiro.

Ihuva 72vaiintinavu nititoka qaiqaa orurante anura

¹⁷ Ihuva minti tivakero vaiinti 72navu nititomanta vika mini oru nini, viraqaaahai quahake orurante Ihuva vaunaini anura. Vika anire Ihura tiva ami tiha, Ike, Noravauvo, tenavu ai autuqaa vaananavuvata nititauramanta vika tinavu uva iriha qaqini aitare variarave, ti.

¹⁸ Vika minti tuvaro Ihuva vika tiva nimiro tiharo, Te tavauraro Sataaniva naaruvai-hairo aaquakaa voqaara utukero hiqirivo. ¹⁹ Ne iriate. Te ni noraiqama kauramantara ti, ne vaivar uqahive/quaihave, vaiinti nkaqe vai toveqikave, vika vaimanta ne vika vaura qaqima aiqu ntavaqii nivarave. Ne homa ti navutaara Sataanira, kempuka aatara kaivaro kiamma vo haikavanovata ni qoraiqama nimitaanarove. ²⁰ Vaananavuvano ni uva iriha aitarerara, kia ne virara quahaate. Ni nutu naaruvaini qara ruva taainara, ne virara iriha quahaate, tiro.

Ihuva quahora

(Matiu 11:25-27; 13:16-17)

²¹ Ihuva minti tuvaro Kotira Maraquravano vira kempukaiqama kovaro viva voqamakero quaheharo Kotirara tiharo, Ti Qo, are Noravano naaruvqaavata vataqaavata raqiki variaravave. Are vi haikara vi haikara kukeqa tera nora vaiintinavu ekaa okara tavaa vaiintika kia numiqaraitira, are vi haikara vi haikara qaqi vaiinti numiqe varianarara ti, te ai autuma viriniqama kauro. Eo, ti Qo, ai antuqvavano mintiataa ivarama mintira iaraa, tiro.

²² Ihuva minti tivakero viva tiharo, Ti Qova tiriara ekaa haikaqaa raqikiiane tirave. Qaqi vaiintivano kiama ti vira Maaqu okarara iri tavaarave. Ti Qova viva naiqaima ti okarara iri tavaarave. Qaqi vaiintinavu kia ti Qora okarara iri tavaarave. Te vira Maaquvanogai vira okarara iri tavaunarave. Taukae te vika tiva nimiataa iraqe tiva nimirirauka, vikavatama ti Qora okarara iri tavevarave, tiro.

²³ Ihuva minti tivakero tuqantaaviro nai vaintinavuqai evaaraiqama kero tiva nimiro tiharo, ²⁴ Ne maa entara tave variarara quahaate. Haaru nora vaiintive, paropeti

vaiintive, avuhainaa vaiintive, vika ne tave varia haikara tavaataa imantavata, kia ho tavorave. Vika ne iri varia uvvara iriataa umantavata, kia ho irurave, tiro. Ihuva vi uvvara turama.

Nai navutaara kahaqu vaiintirara tura

²⁵ Maara okara ti vau vaiintiva vovano anirero Ihuva hampi uva tiarire tiro Ihurara tiharo, Maara ti variara vaiintio, te nana kaiqae koqe kaiqa vara kaainaraqaahiae ekaa enta ho qaqi variqi virarave? tiro.

²⁶ Tuvaro Ihuva nai vira irama amitero tiharo, Kotira maara uva qara ntuva tova nana uvae tivatorave? Vira okara nantimae vaivo? tiro.

²⁷ Tuvaro vi vaiintiva tiharo, Vi uvvara maantimake qara ruva torave:

Are nena Variqa Nora Kotirara ekaa nena muntukaqihairave, ekaa nena avu aatoqihairave, ekaa nena maraqraqihairave, ekaa nena kempukaqohairave, viraragai antuqa arirara variane. (*Lo 6:5*)

Ninara antuqa arinantema kera, nena navunaa vaiintiaravata antuqa arirara variane, turave, tiro. (*Wkp 19:18*)

²⁸ Manti tuvaro Ihuva tiharo, Are mintiaqira viharama ekaa enta qaqi variqira vinarave, tiro.

²⁹ Ihuva minti tuvaro maara okara ti vau vaiintiva Ihura uva aatara karare tiro tiharo, Aqao, tavave ti navunaa vaiintivano vaivo? tiro.

³⁰ Tuvaro Ihuva vo uva tugantaakero vira tiva amiro tiharo, Vaiinti vovano Ieruharemi-hairo vatuka vo, Ierikoni vireva otu vurave. Viva aaraini otu vi vaumanta muara vaiintinavu vira ravaaqavuke vira utavaaqa rugemake vare, vira aavata ruqutuke vate vuvuro vi vaiintiva qutuviro ruhiqau viro aaraqaa vaurave.

³¹ Viva aaraqaa mini vauvaro Kotira kaiqa vara amite vau vaiintiva vira navunaava, vohaa vatanaaya vi aararaqaa tuviharo tavovaro vi vaiintira ruqutuke vatova vauvaro viva qaqi aara hini auvahiantaqaa tuvitarero vurave.

³² Vi vaiintiva qaqi tuvitarero vuvuro vira voqaantema kero, Rivaira vohaa ankuqiraa vaiinti vovano, vivavata Kotira kaiqa vara amite vau vaiintiva tuvurero, vi vaiintiva tuvu vira vini ainima kero tavero, viraqaaqhairo vivavata qaqrakero tuvitarero vurave.

³³ Vi vaiintivavata qaqi tuvitarero vuvuro vo vatanaa vaiinti, Sameria vatanaa vaiintivavohaa vi aararaqaaqai tuviharo vi vaiintira tavero virara mpo ike tiva amitero ³⁴ vira aqamoto oru vahaveraqohairovata, *uainiqohairovata*, vira vaata teqa tora hiqama kero rumpa amitero, vira utu vaaviarama kero nai *donkigaa* vaari vatero, vira vita varero monu aquakeha vaite vau naavuraqii vuru koqaama kero viraqata raqiki vaurave.

³⁵ Raqiki kero, vira qararaa viva vireva iharo *silvaa* monu taaraqanta nora monutanta naavu qora amiro tiharo, Are vi vaiintiraaqaa koqema kera raqiki vairaqe te mini oru ni, orurante ani are virara voqavata aqukena monura nina qaqaa amiare, turave, tiro.

³⁶ Ihuva minti tivakero maara okara ti vau vaiintira irama amitero tiharo, Muara vaiintinavu vi vaiintira aavata ruqutuke vate vuvuro viva aaraini vaumanta taaramo vaiintinavu vira tuvu tavorave. Taaramo vaiinti vinavukaqihairo tavave vira navunaa vaiinti voqaara vaurave? tiro.

³⁷ Manti tuvaro maara okara ti vau vaiintiva tiharo, Virara mpo ike tiharo kahaqu vaiintirave, tiro. Manti tuvaro Ihuva vira tiva amiro tiharo, Arevata vi vaiintira voqaante iane, tiro. Ihuva minti turama.

Ihuva Mataaka Mariaka oru tavora

³⁸ Ieruharemini vi vau aararaqaa Ihuva nai vaintinavu hampata viharo vo vatukaini orurovaro nahenti vo, vira autu Mataava Ihura quahama amiteharo nai naavuqi vita varero vuru kora.

³⁹ Vuru kovaro Ihuva viraqii vahiharo uva okara vitanta tiva nimiqiro vuvuro Mataara auravano, vira autu Mariava Ihura aiqutaraini oquiviro vahiharo vira uva iriqiro vi vaura.

⁴⁰ Mariava iriqiro vi vauvaro Mataava kara geramateharo airi kaiqa naiqai vareharora tiro, viva Mariarara qora avu aato utiharo Ihuva unaini orurero tiharo, Noravauvu, ti auravano qumina vahiharo kia ti kahaqimanta te tentaraama maa karara qera i vaura. Are kiae virara noraiqaakera irira iarao? Are vira tiva amiraro viva ani ti kahaqiarire, tiro.

⁴¹ Mataava minti tuvaro Noravano vira nai tiva amiro tiharo, Mataao, Mataao, are vo haika vo haikara noraiqaakera iri variararo ai muntuka qoraiqvvara variarao.

⁴² Are vohaa haikaraqai noraiqaakera iriataarave. Mariava avuqavuqama kero anirero vi haikarara iri vaimantara ti, te kia vira atitararave, tiro. Ihuva turama.

11

*Ne maantimake Kotira aaraate tura
(Matiu 6:9-15; 7:7-11)*

¹ Vo enta Ihuva vonaini oru vaiharo Kotira aare vaura. Viva Kotira aarama taiqa kovaro vira vainti vovano tiharo, Noravauvu, Ioniva nai vaintinavuara maantima keha Kotira aaraate turave. Arevata tinavu tiva timiraqe tenavuvata avuququmake Kotira aaraare, tiro.

² Minti tuvaro Ihuva vinavuka tiva nimiro tiharo, Ne maantima keha Kotira aaraate: Tinavu Qo,

tenavu ai autu takuqi vaира tuahere vauro.

Are tinavuqaa raqikina entava vaaka aniarire.

³ Tenavu kara naainara vo enta vo enta tinavu timiane.

⁴ Vokiaka tinavu qoraiqama timitaamanta tenavu kia nai iri qoraiqama nimiraiti, vika uva qaqira kaunantema kera arevata tenavu ai uva raqa kaaina uvara nunka kera tauru timitaane.

Are kia qaqi kairaro qora kaiqavano tinavu avataarie.

Minti tivakeha Kotira aaraate, tiro.

⁵ Ihuva minti tivakero nai vaintinavuara tiharo, Te vo uva tuqantaake tirerave. Niqihairo vovano enta tavaarana nai navunaara qentiana orurero tiharo, Ti vaiintio, qamaa taaramonavu timiane.

⁶ Ti tonti vovano niara aarihairo ti naavuqi aniraivarо kara kia vaimantave, tiraro vira navunaava tiharo, Qaqira kera vuane. ⁷ Te qenti paama tivake tintate tenta vaintairaravata vaitema vauro. Kia te himpi kara ai amirarave, tianarove.

⁸ Minti tiraro viraqaaahairo vira navunaava vuavimakero naari vairaro qaiqaa qaiqavata viva minti tivaqiro vuantorave tiro, kara vira amianarove. Viva kia virara ti navunaarave tivakerovauve kara vira amianarove. Viva vuavimakero ti vainara, virara iriharoma viva himpi vi karara vira amianarovemа turo.

⁹ Virara irihama te ni tiva nimirari iriate. Ne Kotira aarehama vo haikara naarivaro viva vi haikara ni nimirire. Ne rantaqi viha oru ranta kaate. Ne qenti kuekue ivaro Kotiva qantua nimitaarie. ¹⁰ Kotira vi haikarara naarika homa varevarave. Vi haikara rantaqi vika homa ranta kevarave. Qenti kuekue i vaiintika qantuarama nimitaanarove.

¹¹ Ni vanti qokavaraqihairo tavave vira maaquvano havuka ti timiane tirara are memaru nena vanti aminarave? ¹² Ai vaintivano kokoraara auru ti timiane tirara are vanti nkaqaaina toveqirae vira aminarave? ¹³ Aqao, ne kia koqe vaiinti vahavata, ne nenta vanti koqe haikaqai nimi variarave. Ho Kotiva vo? Ni qova Kotiva naaruvaini vaivave nivata aatarra kero uritarero paruma kero koqe haika vanti nahenti nimi vaivama vaivo. Vovano vira Maraqrurara naariraro Kotiva paruma kero nai Maraqrurara vira amianarove, tiro. Ihuva turama.

*Belsebuliva Ihura kahaqi vaivo tura
(Matiu 12:22-30; Maaki 3:20-27)*

¹⁴ Kia uva tu vaanava vaiinti vo avutaqi vauvaro vaiinti vivavata kia uva tura. Viva mintima vauvaro vo enta Ihuva vi vaiintiraqihairo vaana vira atitovaro qaqini aitarero vauvaro, viraqaaahairo vaiinti viva ho uva tumanta vaiinti nahenti ruvaququmavi vauka vira tave, ike tiha kauqu runkinkiri iha vaura.

¹⁵ Mintumanta hini kuka aqao ti, Belsebuliva avuhainaa vaanavano Ihura kahaqi vauvaro Ihuva vaana nitite vaivo, ti.

¹⁶ Vika minti tumanta vanti vonavuvata Ihura avateha tavareka auti vaya Ihurara tiha, Are nora kaiqa vo tinavu tivuqaa varairaqe tenavu taveha, ariara ququaama Kotiva vira atifairave tiare, tura.

¹⁷ Vika minti tuvaro Ihuva vika nai aatoqi irito uvara iriro, viva vika tiva nimiro tiharo, Vohaa vatanaaka vaya ihuva tuqavuvi nai ari nai ari iha variqi vivera, vika vaakama taiqa vivarave. Vohaa naavuqi vaika rairavi nai ari nai ariha variqi vivera, vika kia ho vaivarave.

¹⁸ Sataaniya raqiki vaika rairavi nai ari nai ari ihera, vika kia ho vaivarave. Ne tiriara tiha, Belsebuliva vira kempukaiqama kaivarora tiro, viva vaana nitite vaivo, tiarave.

¹⁹ Ho vo vaiintinavu ni avataqi vi variaka, vikavata vaana nitite variarave. Tavave vinavuka kempukaiqama kaimantae vinavuka mintiavo? Ho iriate. Ni avataqi vi varia vaiintika, vikama ni uva rahake tavehama hampi uvaveqaima tivarave.

²⁰ Kotiva ti kempukaiqama kaimanta te vaana nitite vaunarave. Vi uvava quqaa uva vaimantara ti, ne virara irihama Kotiva tinavuqaa raqikiaina entava aniraivo tiate.

²¹ Kempuka vaiintivano huru kaavu vaqa ntuva vatero nai naavuqaa raqikiharo vaivarō viva vatai onaanava ho vairave. ²² Mintimakero vaivarō kempuka vaiinti vovano vira aatara kaarirava anirero vikantiro raqiharo vira aatara kero, naavu qova huru kaavu toteharo ho raqirerave ti haikara viraqahairo raqakero varero, vira onaana rairakero voka voka nariara nariara nimianarove.

²³ Kia ti hiquantaka ni vai vaiintiva ti navutaiqama timite vai vaiintivama vaivo. Kia ti hampata ti sipisipi ruvaaquma timite vai vaiintiva, vi vaiintiva ti sipisipi raantaupirima kaariravama vaivo.

Ihuva vaana okarara tura

(Matiu 12:43-45)

²⁴ Vaanavano vaiinti vaataqihairo aitarero viva aahara vatavaura viharo, kaiqe auraara variqi vuare tivakero tavaivaro kia auraara variaina aarava vaivarō viva tiharo, Kaiqe te orurante vaaka kauna naavuraqvi vi vaiintira avutaqvi oru qaiqaa variare, tivakero ²⁵ oru tavaivaro vi naavura hiqama kero rupikero avugavuqama kero vataivaro ²⁶ vi vaanava oru vaana 7navu vika uritarake qora kaiqa voqavata vare variaka ntita varero, qaiqaa oru vi vaiintira avutaqvi vairave. Hoqarerō vi vaiintiva vaana vohaiqa vataakero vaharo qoraiqama viro vairave. Naantiara viva airi vaana hampata vaharo anomakero qoraiqama viro vairarama tiro, tiro.

Quahe okarara Ihuva tura

²⁷ Ihuva minti tuvaro vaiinti nahenti ruvaaqumavi vaukaqihairo vo nahentivano Ihura aarero virara tiharo, Ike, ai vatakero naama ami nahentiva, viva voqamakero quaheharo vaivo, tiro.

²⁸ Manti tuvaro Ihuva aqao tiro, Kotira uva iriha avataqvi ni vai vaiinti nahentika, vikama quaheha vaivarave, tiro.

Nora kaiqa tinavu humiqane tura

(Matiu 12:38-42; Maaki 8:12)

²⁹ Ihuva minti tumanta vaiinti nahenti vokukavata vira uva irireka ani ruvaaqumavi vauvaro Ihuva vika tiva nimiro tiharo, Maa entara varia vaiinti nahentika ne qora kaiqaqai vare vaiha Kotirara qumimiqamakne ni variarave. Vika nora kaiqa tinavu humiqairaqe tenavu vira taveha, ariara quqaa vivave tiare, ti variarave. Ho kia te ne tintemake mintirerave. Kotiva haaru ni kaivaqara Ionaara untema kero, Kotiva naantiara tivata mintima kaanarove. Viraraqai irihama ne kankomakete ti okarara irivarave.

³⁰ Haaru Ninivehainaaka Ionaava vare vau kaiqara tave Ionaarara tiha, Kotiva vira attitavaro vi kaiqara vare vairave, turave. Te Vataini Vataatai Vaintikama vauro. Ne maa entara varia vaiinti nahentika ti okarara kankomakete iriate ti, te Ionaava untemake irerave.

³¹ Haaru ni kaivaqava Soromonuva koqe avu aato vauva, viva vo okara vo okara tave vauva vauvaro avuhainaa nahenti Sebainainaava vira uva irireva vevvara nai niaraihairo uru Soromonura uva irurave. Vi nahentiva minturara tiro, viva naantiara ekaara entaqaa vaharo niqaa uva vateharo niara mintima tianarove: Te niaraihai Soromonura uva irirera uruavauniarave. Ne haaru vauvaro Soromonuravata uri aatarako vaiintiva vovano vaumanta ne vira uva iriataara vaumanta ne kia vira uva irurave, tianarove.

³² Haaru Ionaava Kotira vakaaka tiva nimumanta Ninive vatanaaka qora aara qaqlira korave. Vi vatanaaka minturara ti, vika naantiara ekaara entaqaa niqaa uva vatevarave. Vika niara mintima tivarave: Tenavu Ionaara uva iriha viraqahai qora aara qaqlira kaavauniarave. Ne vauvaro vovano Ionaaravata uri aatarako vaiintiva Kotira vakaaka ni tiva nimi vaumanta ne kia vira uva irurave, tivarave.

Ai avuvano vaata ovama vaivo tura

(Matiu 5:15; 6:22-23)

³³ Vovano ova qumpikero kia mantaaqainaini vate vairave. Viva kia kure varakero viraqohairo aqute vairave. Vaiinti nahenti vira naavuqvi oriqeteha ho tavaate tiro, viva ova qumpikero virini kantaaqaini vate vairave.

³⁴ Avuvano ova voqara iteharo vaata ruvaahama amite vairave. Ai avuvano koqe avu vairera, ekaa ai vaatavano ruvaaharo varianarove. Ai avu qora avu vairera, ekaa ai vaatavano konkiraqama vuanarove.

³⁵ Ho mintirira raurihara variane. Hauri ai vaataqvi aatitaa ina haikava kia vairaro konkiraqaina haikavaqai viraqvi variantorave. ³⁶ Ai vaataqvi kia konkiraqaina haikava voqavanovata vairaro aatitaarira haikavaqai vairera, ai vaatavano ekaama ova voqan-tema kero, koqema kero iteharo varianarove, tiro.

*Parasi vaiintinavuara tura**(Matiu 23:1-36; Maaki 12:38-40; Ruki 20:45-47)*

³⁷ Ihuva minti tivakero vaiinti nahenti uva tiva nimi taiqa kovaro Parasi vaiinti vovano ani tintira kara naane tuvaro Ihuva vikantiro oru kara nareva oquivi vaura.

³⁸ Oquivi vauvaro Parasi vaiinti viva tavovaro Ihuva kia kauqu hiqama karaitiro, kara nareva auti vauvaro viva vira tavero ravuku vura.

³⁹ Vira kaara ravuku vuvaro Noravano Ihuva vira tiva amiro tiharo, Vaiintivano *kaap u* vata tanuvata hiqeharo qumina pahainiqai hiqaintemake, ne kia nenta avu aatoqi hiqaraiti, ne nenta vaatainiqai hiqe variarave. Ni avu aatoqi vo airaira vo airaira varevavata, qora kaiqa vare okaravavata, mpiqaro vairave.

⁴⁰ Ne vueraiqha variakave. Kotiva ni vaata autu taiva, vivama ni avu aatovata autukairave. ⁴¹ Ne nenta vo airaira vo airaira vate haikara varake vehi vaiinti nimivaro ni avu aatovanovata homa takuqiro varianarove.

⁴² Ne Parasi vaiintinavu naantiara qoraiqama virara, te virara irihama niara oho tiva nimitauro. Kotiva uva maara vo tiva taira, ne vi uvvaraqai irihama ne avuqavuqamakeha nana nana naahoe rairake 9navu nenta vare vohaiqa Kotira amite variarave. Ne vi uvvaraqai irihama Kotira uva maara, nora uva ne kia iriha avate variarave. Avuqavu *ko* ti okararave, Kotirara muntuka vate okararave, ne vi uvvara vi uvvara qaqrake kia noraiqaake virara iriarave. Ne Kotira uva inaara uvaqai irihama, vira uva nora uvavata iriataara vaimanta kia iri variarave.

⁴³ Ne Parasi vaiintinavu naantiara qoraiqama virara, te virara irihama niara oho tiva nimitauro. Ne maara naavuqai oriqeteha koqe taintaraqai antuqa arimanta viraqaaqai oquivi vaireka auti variarave. Vaiinti nahenti niara nora vaiintive tivakeha ni uva mantaaate tiha, ne *maaketiqi* qumina vi ani variarave.

⁴⁴ Ne naantiara qoraiqama virara, te virara irihama niara oho tiva nimitauro. Ne nana haika voqaarae variavo? Vaiinti quntama taa vatara kia tavaraiti, qumina vatave tiha vaiinti nahenti vira ventaaqaa vau vi ani i variarave. Ne vira voqaantemake variavo. Vaiinti nahenti kia ni vaagu kaiqa tavaraiti, ni viri vaataqai tavehama niara koqe vaiintive ti variamanta ne variavo.

⁴⁵ Ihuva Parasi vaiintinavuara minti tuvaro maara okara ti vau vaiintiva aqao tiro, Maara ti variara vaiintio, are Parasi vaiintinavuara minti tiharama are tinavuaravata qora uva ti variarao, tiro.

⁴⁶ Viva minti tuvaro Ihuva vira nai tiva amiro tiharo, Ne maara uva okara ti variaka, nevata naantiara qoraiqama virara, te virara irihama niaravata oho tiva nimitauro. Ne qaqi vaiinti nahentiara vi uvvara vi uvvara iriqi vuote ti variamanta, vika vukaari utiha ne maara ntai uvvara viqaqaa vataara aqu vare vi variamanta ne nenta kauqu kia voqvata tutuke vika kahaqi variarave.

⁴⁷ Ne naantiara qoraiqama virara, te virara irihama niara oho tiva nimitauro. Ni kaivaqaukavara Kotira uva ti vau vaiintika paropeti vaiintinavu aruke quntama toraqaan ne ori varake koqemake vaheheqamate variarave. ⁴⁸ Ne mintihama ne nenta kaivaqaukavarara koqemama vika arukorave ti variarave. Ni kaivaqaukavara Kotira uva ti vaiintinavu paropeti vaiintinavu aruke quntamato vataraqaa ne vahehema nimite variarave.

⁴⁹ Ne minti variarara tiro, Kotiva ekaa haika tave vaiva tiharo, Te paropeti vaiintinavuve *aposori* vaiintinavuve nititaari vika hininavu aruke hininavu aru ntataqi viha qoraiqama nimitevarave, tirave.

⁵⁰ Maa vatara qovaramako entaraqaahai Kotira paropeti vaiintinavu aruqi ani ani vate maa entara aruke uvava, ekaa vi uvava ni vate maa entara variakaqama varianarove.

⁵¹ Hoqarero Abelira arukomanta viraqaahai paropeti vaiintinavu aruqi vivi, vuru Sekaraaaraavata arukorave. Sekaraaara arukareka iha mura quarato taintava hini mantaraini uvavaru Kotira Naavu hini mantaraini vaumanta vira avutana arukovaro vira naarevano ntorave. Ho vika paropeti vaiinti ekaa arukora kaara Kotira maa entara varia vaiinti nahentikaqaa vi uvvara vataanarove.

⁵² Ne maara okara ti varia vaiintinavu, ne naantiara qoraiqama virara, te virara irihama niara oho tiva nimitauro. Kotira uva okaravano vaimanta ne vi uvvara vare varia kira totehama kia vi qentira qantuake oriqete vi uvvara okara tave variarave. Ne nenta kia vi qentira qantuake tavaraiti, ne vokiaka vireka iaravata kuvali nimite variarave, tiro.

⁵³ Ihuva minti tivakero naavuqihairo vevaromanta maara okara ti vau vaiintinavuavata, Parasi vaiintinavuavata, vika nirara itomanta Ihurara qora uvama ti vaivo tivake vika tiha, Aniqe tenavu qaiqaavata vira iraariraro viva qora uva tirera, vira *koqira* vita vataare, ti. ⁵⁴ Minti tivake vika Ihurara hampi uva tiarire ti, vo uva vo uva Ihura irama amite vaura.

12

*Parasi vaiintinavu una kaiqara rauriha variate tura
(Matiu 10:26-27)*

¹ Mintumanta airi tauseni vaiinti nahenti Ihura tavareka anire nai ventake nai ventake iha, nai aiqiu nai aiqiu ratatiaqaqi vi vaura. Manti vauvaro Ihuva nai vaiintinavu naane uva tiva nimiro tiharo, Kaupititiravano qamaa vohaiqa qoraiqama kaivaro nteria viro viraqaaahairo ekaa qamaa nteria vintemake, Parasi vaiintinavu nivata qoraiqama nimitevorave. Vika koqe kaiqa varauro tiva keha vaiinti nivuqaqai unaqaraiqama keha vare varia kaiqaramara turo. Ne vika voqaantae iarorave tivakeha rauriha variate.

² Vovano tavaantorave tiro aquataina haikara, naantiari ekaa vi haikara vi haikara ravaqaakero qaqi kantama kaanarove. Vate vo haika vo haika kukeqate varia haikara naantiari qogaiqama kairaro qoqama varianarove. ³ Ne konkiraqi vaiha ti vai uvara naantiari vokika aatitainaraqaaama vaiha irivarave. Ne naavuqi qenti tintate vaiha evaara evaara ti vai uvara, naantiari vi uvara naavu qentiqaaahairo naveraitianarove.

*Kotira aatuqai qeteha variate tura
(Matiu 10:28-31)*

⁴ Mpo, ti navunao, te tainara iriate. Ni vaataqai arukekara, kia vika naatu qetaate. Vika ni aruke kia ni maraquravata ho arukevarave. ⁵ Ne tararae qeteha vaivarave? Kaiqe te ni tiva nimire. Ne Kotira aatuqai qeteha variate. Viva kempukavano vaharo vaiinti arukeharo viraqaaahairo homa vira nora iha itainaraqi aqukaariravama vaivo. Eo, te niarama turo, Ne Kotira aatuqai qetehama variate, turo.

⁶ Quqaae vaiintivano monu taarauru aquukeharo uapaa uviri kauqurunavu vare vairave? Ho iriate. Kotiva uapaa uviri vonkuvata kia tauru karaitiro, viraqaaavata raqiki vairave. ⁷ Kotiva niqaa raqikiharoma ni okara, ekaa okara kankomakero tave vaiva, viva ni qiaa kaukivata ekaa kaara ntuva tairave. Kotiva airi uapaa uviri raqikiharovata, viva niara ne uvirivata aatarake variakave tirara ti, ne kia qeteha variate, tiro.

*Ihura autu tiva qovarama kerara tura
(Matiu 10:19-20; 10:32-33; 12:32)*

⁸ Te tiari iriate. Vaiinti vovano vaiinti nahenti nivuqaa vaharo tiriara tiva qovaraiqaakero tiharo, Te vira vaintima vauro, tirera, te Vataini Vatatai Vaintika naantiari tevata Kotira *enseli* vika nivuqaa vaiha, nai virara tiva qovaramakeha tiha, Vi vaiintiva ti vaintima vaivo, tirarave. ⁹ Vo vaiintivano vaiinti nahenti nivuqaa vaharo tiriara aqao kia vira vaintima vauro tirera, te Vataini Vatatai Vaintika naantiari tevata Kotira *enseli* vika nivuqaa vaiha nai vi vaiintiraravata aqao kia ti vaintima vaivo tirarave.

¹⁰ Vaiinti nahenti ti Vataini Vatatai Vaintikara qora uva tivatera, Kotiva vika uva homa nunkama nimitaanarove. Mintiharovata, nai Maraqrara qora uva tiva amitera, Kotiva kia vika uva nunka nimitaanarove.

¹¹ Naantiari ti kaarama ni rumpa vare vuru maara naavuqive, *kamaanira* avuqaave, avuhainaa vaiintinavu nivuqaave, vuru kaimanta vi entara kia ne qetehama nana uvae tirarave tiate. ¹² Vi entara Kotira Maraqravano ni kahaqiharo minti minti tiate tiramanta ne vi uvvaraqai vika tiva nimiate, tiro.

Airi airaira vato vaiintirara uva tuqantaakero tura

¹³ Ihuva minti tuvaro vaiinti nahenti ruvaqumavi vauraqihairo vaiinti vovano Ihurara tiharo, Maara ti variara vaiintio, ti qova qutu vire iharo ti tinta vakaakantiro nai onaana vataira rairakero timitarave. Mintivarо ti vakaava vi haikara naiqai totero kia tivata raira timivo. Are virara tiraro viva vi haikara tivata raira timiarire, tiro.

¹⁴ Minti tuvaro Ihuva vira nai tiva amiro tiharo, Aqao, maa vaiintio, tavave ti noraiqama kaimantae te nitanta uva ho avuqavu irarave? tiro.

¹⁵ Manti tivakero Ihuva ekaa vaiinti nahenti tiva nimiro tiharo, Ne rauriha variate. Ne airi airairave, airi monu varerave, vi haikara noraiqaake iriha variqi vivarave. Ne tiha, Airi airaira vateha homa variqi virarave, tivorave. Kia airairavano ni kahaqira ne ho koqemake qaqi variqi vivarave, tiro.

¹⁶ Ihuva minti tivakero viva uva vo tuqantaakero vika tiva nimiro tiharo, Airi airaira vato vaiintiva kara utukero airi kara qantu varero ¹⁷ naiqai tivakero iriro tiharo, Te maa karara ta naavuraqie vatararave? Ekaa ti naavuqi karavano mpiqama vivo, turave.

¹⁸ Manti tivakero viva tiharo, Kaiqe te ekaa naavu rampaikе qaqaa nora naavu, vo naavu vo naavu kaqake viraqi ekaa karavata airairavata vataare. ¹⁹ Te vi kaiqara vara vuru taiqake mintima tirarave: Te koqemakema vauro. Airi karave airi airairave vaimanta te airi ihiara auraara variqi viha maa kararavata *uainiravata* namaqi viha koqemake variqi virarave, turave.

²⁰ Vi vaiintiva minti tuvarovata, Kotiva vira tiva amiro tiharo, Kia ai avu aatovata vaivave. Vate maa entara entaqima are qutu vinarave. Are qutu viraro vovanoma ai airaira, tenta totarerave tiana airairara varaanarove, turave, tiro.

²¹ Ihuva vaiinti nahenti mintima kero vi uvvara tiva nimi taiqakero viva tiharo, Vo haika vo haika ruvaaquma kero vataainarara noraiqaakero iriqiro vi vaina vaiintira, Kotiva virara tiharo, Are vataana haikara qumina haikaqaive. Te tavaurara are vehi vaiintiqaima variarao. Are quminama qutu vinarave, tianarove, tiro. Ihuva turama.

Kia vi haikarara noraiqaake aato utuate tura
(Matiu 6:25-34)

²² Minti tivakero Ihuva nai vaintinavuara tiharo, Vi uvvara irihama te niara mintima ti: Ne qaqi variqi virave, ne kara nerave, nenta vaata nonkirave, kia vi haikara vi haikarara airi aato utivar ni muntukavano qoraiqiarire. ²³ Ne qaqi variqi viva avuhainaa haikavano vaivaro ne kara ne vai haikava naantiarihainaa haikavanoma vaivo. Ni vaatavano avuhainaa haikavano vaivaro ne nonkute utavaaqaava naantiarihainaa haikavanoma vaivo.

²⁴ Ne uvirira iriha variate. Uvirivano kia kara utukero qantu varero nai naavuqi vuru vate vairave. Uviri vika variavaro Kotiva vikaqaa raqikiharo vika kara nimi vairave. Ho ne vaiinti nahenti uvirivata aatara kaakara tiro, Kotiva niqaa koqema kero raqikiqiro vuanarove. ²⁵ Niqihairo ta vaiintivae te vaaka qutu vuarorave tivakeharo nai qaqi variaina entara vonavu tomaqa kaanarove? „Kia vaiinti vovano ho mintianarove.“ ²⁶ Ne vi kaiqara inaara kaiga kia ho vare variarara ti, ne nantihae vo haika vo haikaravata airi avu aato utuqi vi variavo?

²⁷ Ahakaqi qampiqa vai *kaampiraara/qinaarara* iriha variate. Vi haikava kia naaqunta varakero nai utavaaqa autraigiti, koqemake qampiqa vairave. Haaru King Soromonuva utavaaqa koqeraqai nonkutero vauvarovata, viva nonkuto utavaaqaava kia ahakaqi vai *kaampivano/qinaaravano* iteharo ruvaahairaa aatarake vaurave.

²⁸ Kotiva vivama ahakaqi vai haikara koqema nimite vairave. Vi haikava vate variqiro viramanta hura iha tuta kaivarita taita vuanarove. Ho Kotiva qumina ahakaqi vai haikara koqema nimite vaiva vairarora tiro, viva ni vaiinti nahentiqa raqikiharo kiae nivata utavaaqa nonku nimitaanarove? Ike, ne Kotirara kempukaiqamake iriha, viva mintima timitaanarove tiataarave.

²⁹ Kotiva ni kahaqama nimite vairara ti, ne kia airi avu aato utiha tiha, Nana karae nararave? Nana namarie nararave? tivaqi vuate. ³⁰ Vataini variaka kia Kotirara iria vaiinti nahentika vika mintimake variqi viha, vi haikara vi haikara vararekaqai auti variarave. Ne kia vika aanaraate. Ni Qova ne aavoqi haikarara iriharoma vaivo.

³¹ Ne avuni Kotiva niqaa raqikiainara virara naane noraiqaake iriqi viha, Kotira kaiqa vare vaivaro Kotiva kara viravata, utavaaqa viravata, ni nimirire, tiro.

Naaruvaini koqaa ruvaaquma terara tura
(Matiu 6:19-21)

³² Ihuva minti tivakero qaiqaa tiharo, Nenavu vaireka ne ti sipisipinavuma variavo. Ne kia qetaate. Kotiva ni qova niara quaheharo vaivara tiro, viva naantiara niqaa raqiki vairamanta ne viva raqikiaina vatukaraqi vaivarave. ³³ Nenta vate airairara nimiha monu vare, vehi vaiinti nahenti vuru nimiate. Kia nenta koqaa vaaka taiqaaina *pausiraqi* vataate. Nenta koqaa naaruvaini kia taiqaaina *pausiraqi* vataimanta kia muara varaivaro kia toveqivanovata vira nama taiqa kaanarove.

³⁴ Ne maa vataraqaa koqaa onaana ruvaaqumaqi vivera, ne maa vataraqaa vaine haikararaqai noraiqaake iriqi vivarave. Ni koqaa onaana naaruvaini ruvaaqumavai vairera, ne naaruvaini vaine haikararaqai noraiqaake iriqi vivarave.

Qeramate rauriha variate tura
(Matiu 24:42-44)

³⁵ Ne himpi utavaaqa nonkute vaiha ova qumpite qeramateha variate. ³⁶ Ne kaiqa vaiinti maanavuka aanareha variate. Vira kaiqa vaiintinavu nai nora vaiinti veka geramate variavaro vika noravano nahenti iraanaini oru niniro vihairo orurantero ani qenti kue kue iharo tavaimanta vira kaiqa vaiintinavu vaakama qenti qantua amitaarave. „Nevata qenti qantuvarareka geramateha variate.“

³⁷ Vika noravano anirero tavaimanta vira kaiqa vaiintinavu kia vaitaraiti, geramate vaivaro viva ani vika tavero vika quahama nimitaanarove. Viva vika quahama nimiteharo viva kara nimiria utavaaqaara nonkutero nai kaiqa vaiintinavuara tiharo, Ne oquvi vaiqe te kara ni nimirare, tivakero kara vika nimianarove.

³⁸ Koqemama vika noravano ani tavairamanta vira vaiintinavu kia vaitaraiti, qaqi himpi geramate vaivaro enta tavaarave, kokoraaravano uva tinaraqaave, vika noravano orurantero aniraanarove.

³⁹ Ho maa uvvara kankomake iriha variate: Naavu qova vaiharo muara vaiintivano ainainarara iritirio, muara vaiintivano kia ho vira naavuqi oriqetero muara varaitirio.

⁴⁰ Vi uvvara irihama nevata henoqamate variqi vihamma ti veka variate. Ne ti Vataini Vatatai Vaintikara kiama tuvuanarove ti entara, vi entaraqaama te tuvirerave, tiro.

Kaiqa vaiinti taaraqantaqaa uva tuqantaakero tura

(Matiu 24:45-51)

⁴¹ Ihuva minti tuvaro Pitaavaa tiharo, Noravaauvo, are uva tuqantaakera tianara, vi uvvara tinavuaraqiae tiarao, ekaa vaiinti nahentiaravata iriharae vi uvvara tiarao? tiro.

⁴² Pitaavaa minti tuvaro Noravano tiharo, Koqe avu aato vataaa vaiintivano nai nora vaiintiara noraiqaakero iriharo kaiqa vara amite vaira vaiintiva, viva nana vaiinti voqaarae varianarove?

Viva maantima vaina kaiqa vaiintira voqaarama varianarove: Vira nora vaiintivano niara aara vire iharo vi vaintira noraiqama kero virara tiharo, Arema vo kaiqa vaiintinavuqaa raqikiharama vo enta vo enta kara rairakehara vika nimiane, tivakero ⁴³ oru aaraini niro orurantero ani tavairaro vira kaiqa vaiintivano viva uva tinantema kero kaiqa vare vairera, viva virara voqama kero quahaanarove. ⁴⁴ Ho te quqaa tiari iriate. Vira nora vaiintivano mintima tianarove: Te qaiqaa ari noraiqama kaarirara are ekaa te iaina haikaraqaama raqikiqira vinarave, tianarove, turo.

⁴⁵ Vira kaiqa vaiintivano qaqla kero kia mintiraitiro, viva nai irikero tiharo, Aqao, ti nora vaiintivano qakoma keroma orurantero anianarove, tivakero viraqahaahiro nai kena kaiqa vaiinti nahentivata ntaihamaqiro viro, airi kara namaqiro viharo iha namarivata neharo vueraiqiharo mintiaqiro vi vairera, ⁴⁶ vo enta vira nora vaiintivano vi entaraqaam kiamaa anianarove tiaina entaraqaam orurantero ani vira kaiqa tavero nai kaiqa vaiinti vira voqamakero kaavu umiqakero vatero, vira atitama kero tiharo, Are kia ti uva iriaka vainaini vuane, tianarove.

⁴⁷ Kaiqa vaiinti vovano nai nora vaiintivano kaiqa varaane tina uvvara iriro qaqla kero kia gerama tero vi kaiqara varairaro vira kaara vira nora vaiintivano vira qorahaama ruqutukero kaavu umiqake vataanarove.

⁴⁸ Kaiqa vaiinti vovano nai nora vaiintivano kaiqa varaane tina uvvara kia kankomakero iriraitiro, vivavata qora kaiqa varairera, vira kaara vira noravano vira inaaraiqaqai ruqutuanarove.

Airi haika vareka vaivaro Kotiva vikara airi haika tinta timiate tianarove. Airi haika voqavata varaina vaiintiva vairaro Kotiva virara airi haika voqavata tinta timiane tianarove.

Te vaiinti nahenti raira karera tuvuraukave tura

(Matiu 10:34-36)

⁴⁹ Te iha tuta kaariraro itaarire ti, vataini tuvuraukave. Ike, te vi ihara vaaka tuta kauraitirio, te virara hovema turaitirio.

⁵⁰ Te namari vo varareruna una namarira kiama varauro. Te vate vira veka vauraro ti voqamakero maara ntaimanta vauro. Te mintimake variqi vi viraqahaahai vi namarira vare te ho vairarave. „Ihuva vi uvvara minti tiharoma uva tuqantaakero vika nai vira qoririmake arukaivarо qutu vuainarara tura.“

⁵¹ Ne tiriara tihama, Vaiinti nahenti vataini vaika maateraiqamavi variate tiro viva tuvirave, ti variarave? Aqao, kia te virara iriha tuvuraukavauve. Vaiinti nahenti rairavi variate ti, te tuvuraukave.

⁵² Maa entaraqaahai vohaa naavuqi vainavuka kauqurunavu rairavi taaraqanta vohaiqavano navutaiqihaa taaraqanta vataake raqivarave. Taaraqantavano navutaiqihaa taaraqanta vohaiqaa vataake raqivarave. ⁵³ Vira qova nai maaquntiro navutaiqiraro vira maaquvano nai qokantiro navutaiqianarove. Vira nova nai raavurantiro navutaiqiraro vira raavuravano nai nokantiro navutaiqianarove. Vira tonanova nai naaqutuntiro navutaiqiraro vira naaqutuvano nai tonokantiro navutaiqianarove, tiro.

Maa entara qovaraiqiainaara vira okarara tura

(Matiu 16:2-3)

⁵⁴ Ihuva minti tivakero vaiinti nahenti ruvaaqumavi vauka tiva nimiro tiharo, Ne tavaavaroo tonavuvano vihairo anirero noteharo hinkura ari vaimanta ne tiha, Aaqu rirevave, tiavaroo aagu rirave. ⁵⁵ Ne tavaavaroo kuaharavano uti vaimanta ne tiha, Uvihaanarove, tiavaroo uvihairave.

⁵⁶ Ike, ne unaqaraiqama keha koqe kaiqa vare variakave. Ne vi haikara vi haikara ho ampeqamake tave, nantihae ne vate maa entara qovaraiqiaina okarara kia ampeqamake tavaavo?

*Nena ko vaakama avuqavuqama kaane
(Matiu 5:25-26)*

⁵⁷ Ne nantihae kia nentavano rahake nana uvavano avuqavu vaivaro nana uvavano kia avuqavu vaivo ti variarave? ⁵⁸ Vovano ariqaa uva vatero *ko* naavuqi ai vita varero vireva irera, vikantira aaraini viharama vaaka vi uvara avuqavu *qiane*. Hauri viva ai vita varero *iasivano* inanaini vuru kairaro *iasivano* ai kiripu kauquqi kairaro vuru ai karapuhipi aqukaantorave.

⁵⁹ Te tiariori iriane. Are kiama karapuhiqihira vaaka taiqenarave. *Iasivano* tina monura kia ekaa amiraitira, are kia ho vinarave, tiro. Ihuva turama.

13

Qora aara qaqlira kaate tura

¹ Vi entara vaiinti vonavu anire Ihura tiva ami tiha, Karirihainaia vaiintinavu Kotirara *ofaa* iha quara amitaare tuvaro, *kamaanira* kaiqa varai vaiintiva, Paireatava anirero vi vaiintinavuka arukovaro vi vaiintinavuka naarevanovata, vinavuka vaaka aruko aantaura vira naarevanovata, vohaarraqi avitumavi ntorave, ti.

² Vika minti tuvaro Ihuva tiharo, Karirihainaia vaiintinavu mintimake qutu vurara ti, ne nantimake vi haikarara iriavo? Ne tiha, Vinavuka vaaku kaiqavano ekaa Kariri vatanaa vaiinti vika vaaku kaiqavata uri aatara kaira vira kaara vinavuka mintimake qutu vurave, tiavo?

³ Kiave. Kaiqe te ni tiva nimiare. Nevata kia qora aara qaqlira kaivera, nevata vinavuka aanaramake qutuma vivarave.

⁴ Haaru vatumu vo Siromini ori naavu vukaiqamake vaavi kaqato naavuva raputama viro hiqiriro vaiinti 18navu ruqutu taiqa korave. Vi vaiintinavuka vo? Ne vinavukara nana uvae tiavo? Ne tiha, Vinavuka qora kaiqavano Ieruharemihainaaka qora kaiqavata uri aatara kovaro vira kaara naavu viva raputama viro vika ruqutu taiqa korave, tiavo?

⁵ Aqao, kiave. Kaiqe te ni tiva nimiare. Nevata kia qora aara qaqlira kaivera, nevata vinavuka aanaramake qutuma vivarave, tiro.

Fiki katariara uva tuqantaakero tura

⁶ Ihuva minti tivakero viva vinavuka vo uva tuqantaakero tiva nimo tiharo, Vaiintivano nai naaho ututoraqi *fiki* katari vo ututorave. Vi vaiintiva katari ututero variro vo enta kaiqe oru vira tava hiqike naare tivakero oru tavovaro kia vi katariva tava irorave.

⁷ Kia tava irovoro nai kaiqa vaiinti avuhainaara tiharo, Tavaane. Te taaramo ihiara vi anihia maa katariva tava iraainarara tavauraro kia iraivo. Are vira teqa qaqliram aqukaane. Vi katariva qaqi vaharo koqe wata qumina taiqa kaantorave, tuvaro ⁸ vira kaiqa vaiintivano aqao tiro, Vohaa ihiara vira qaqi kairaqe te vira okaraqi nterainava vatara quvike quntama taairaro tava iraarie. ⁹ Vo ihi tavairaro tava irairera, are vira qaqi kaane. Kia tava irairera, are homa teqa kenarave, turave, tiro. Ihuva vi uvara tuqantaakero turama.

Ihuva Maara Entaqaa nahenti vo koqema kora

¹⁰ Vo enta Maara Entaqaa Ihuva maara naavu voqiqi vaharo vaiinti nahenti uva tiva nimi vauvaro ¹¹ nahenti vovano viraqiqi vaura. Vi nahentiva vauvaro vaanavano viraqiqi vauva vira aihavi haikara amuvaro nahenti viva 18 ihinavuara variqiro viharo rovara vare vaura. Vira tauvaqavano kia vaaviarama vairaitiro, qaqiqai kankakaama viro vaura.

¹² Vi nahentiva mintimakero vauvaro Ihuva vira tavero vira aaramakero tiharo, Nahentivauvo, te ai rovara taiqama amitauro, ¹³ tivakero viva nai kauqu nahenti viraqaa viti vatovaro vi nahentiva vaakama vaaviarama viro vaharo Kotira autu tuahere vaura.

¹⁴ Kotira autu tuahere vauvaro Ihuva Maara Entaqaa vi nahentira koqema korara tiro, vira kaara maara naavuqaa raqiki vau vaiintira vira arara itovaro viva vaiinti nahentira tiharo, Aqao, kaiqa vare varia entava 6navuma vaivo. Vovano ni vaata koqema nimitaarie ti, ne vi entanavuraraqaa aniate. Kia Maara Entaqaa aniate, tiro.

¹⁵ Vi vaiintiva minti tuvaro Noravano Ihuva vira nai tiva amiro tiharo, Ne unaqaraiqama keha koqe kaiqa vare variakave. Ne ekaa vaiba Maara Entaqaa nenta purumakauve, *donkive*, naavuqihai ruhaaqi vare vahaqaimi veva keha namari nimi variarave. ¹⁶ Maa nahentiva, viva ni kaivaqara Eparahaamira naintivano vaivaro Sataaniva 18 ihinavuara vi nahentira rumpa tairave. Homa Maara Entaqaa te vira kuvantu amitararave, tiro.

¹⁷ Ihuva minti tumanta vira navutaaka Ihura uva iriha kauri vaura. Vika mintumantavata, qaqi vaiinti nahenti Ihuva kaiqa varorara iriha Ihura quahama amitora.

Masteti auruara uva tuqantaakero tura
(Matiu 13:31-32; Maaki 4:30-32)

¹⁸ Ihuva tiharo, Kotiva vaiinti nahentiqa raqikiarirava nana haika voqaarae vaivo? Ne vira okara iringti ti, te nana haikaqaae tuqantaake tirarave?

¹⁹ Ho te *masteti* auru inaara auruara tuqantaake tirerave. Vaiintivano *masteti* auru naahoqi qinta taivararo qampiqaviro katari voqaara vaivararo uvirivano vira kaaraqaa utama viharo vairave, tiro.

Mpareti noqa virara uva tuqantaakero tura
(Matiu 13:33)

²⁰ Ihuva minti tivakero viva qaiqaa tiharo, Kotiva raqikiarirava nana haika voqaarae vaivo? ²¹ Viva kaupititira voqaarama vaivo. Nahentivano mpareti untareva iharo *porihi/voruhi* varakero vira noqa vuarire tiro, kaupititira varakero *porihi* vataakero tuqantaa kaivararo kaupititiravano *porihi* hampata avituma viro ekaa ntera kaivararo noqa vi vairave, tiro.

Ihuva inaara gentiara tura
(Matiu 7:13-14, 21-23)

²² Ihuva minti tivakero Ieruharemini vu aararaqaa viharo nora vatukaqvata, inaara vatukaqvata, koqe uva vakaaka vi vatanaaka tiva nimiqiro vi vaura. ²³ Manti tiva nimiqiro vuvaro vaiinti vovano tiharo, Nora Vaiintio, naantiara Kotiva tinavu vaiinti nahentiqihairo kia airi ntitaraitiro, taaraiqae ntitaanarove? tiro.

Viva minti tuvaro Ihuva ekaa vika tiva nimiro tiharo, ²⁴ Naaruvaini vi varia gentiva inaara qentiqaima vaivo. Ne vukaari utukehama vi gentianara vuate. Te ni quqaama tiva nimuro. Airi vaiinti nahenti viraqiqi virare tihavata, kia ho vivarave.

²⁵ Hauri naavu qova himpiro qenti tinta tairamanta ne vahaqaqaini vaivorave. Ne vahaqaqaini vaiha qenti kuekue iha tiha, Mpo, Noravauvu, qenti qantua timitaane, tivaro viva tiharo, Aqao, te kia ni tavauraaukave. Ne ania okarara kia iri tavaunaranave, tianarove. ²⁶ Viva minti tairamanta ne tiha, Aqao, tenavu ai vataake kara nauraaukave. Are tinavu vatukaqiqi vahihara tinavu uva tiva timi variaraukave, tivaro viva qaiqaa tiharo, ²⁷ Aqao, te kia ni tavauraaukave. Ne ania okarara kia iri tavaunaranave. Ne vaagu kaiqa vare variaka ti aqantohai vinuate, tianarove. Naavu qova niara mintima tianarove, tiro.

²⁸ Ihuva minti tivakero tiharo, Ne naantiara tavaimanta ni kaiyaqaukavara Eparahaamivavata, Aisaakivavata, Iekopivavata, ekaa paropeti vaiintinavuvata, Kotira vatukaqiqi vaimanta ne aqqaini vaiha iqiqi rateha nenta aarai tenti aneha vaivarave.

²⁹ Naantiara vaiinti nahenti ekaa hihai hihai ani Kotiva raqikina vatukaraqi ukuvi vaiha kara neverarave. ³⁰ Vate naantiaraini variaka, vika uritare avunima vaivarave. Vate avuni variaka vika naantiarainima tuvitare vaivarave, tiro. Ihuva turama.

Ihuva Ieruharemi vatanaakara mpo ike tiva nimitora
(Matiu 23:37-39)

³¹ Ihuva minti tumanta Parasi vaiintinavu anire Ihurara tiha, Himpira aitarera vo vatukaini vuane. Herotiva ai arukareva auti vaivo. Are maini vairaro ai arukaantorave, ti.

³² Vika minti tuvaro Ihuva vika nai tiva nimiro tiharo, Ne qaakau vairi vira vuru tiva amiate. Te vatevata huravata vaana nititamaqi viha vaiinti nahenti koqema nimitaqi virerave. Mintiaqi vihami hura mora vira qararaa tenta kaiqa vuru taiqa karerave. Ne mintima vira tiva amiate.

³³ Te vatevata, huravata, moravata, aaraini vatavau virerave. Kia qumina vataini paropeti vaiinti aru kevarave. Ieruhareminima vira aru kevarave.

³⁴ Mpo, Ieruharemhainaakao, Ieruharemhainaakao, ne Kotira paropeti vaiintinavu aruke variakave. Kotiva nititai vaiintika aniamanta ne ori mpaqikheha vika ruqutuke variakave. Kokoraaravano nai naati aroka raira aqutainantemake, te qaiqaa qaiqaavata niara mpo tivakeha niqaa raqikirare turamanta ne kia ti qaqi karaiti, ti qoririma timite variavo.

³⁵ Vira kaara Kotiva ni qaqira kairaro ni vatukaqiqi kia vaiinti voqavanovata vairaro qumina vataqaima varianarove. Te tiari iringti. Ne maa entaraqaahai kia ti tavaraiti vaiige te qaiqaa tuvu ntaari ne vi entaraqaahai kia ti kankomake taveha tiha, Nora Kotira autuqaa tuvina vaiintira Kotiva koqema amitaarire, tivarave, tiro. Ihuva minti turama.

14

Aiqu kauqu noqavu vaiintira Ihuva koqema kora

¹ Vo enta Maara Entaqaa Ihuva Parasi vaiinti nora vaiinti naavuqi kara nareva vumanta viraqi vauka viraqaa avu vate vaura.

² Mintuvaro Ihuva tataaqa vaiinti vovano vira aiqu kauqu noqa vuva vauvaro Ihuva vi vaiintira tavero, ³ maara okara ti vau vaiintinavukavata, Parasi vaiintinavuvata, irama nimitero tiharo, Tenavu Maara Entaqaa vaiinti kahaqihā vira vaata koqema kaarera, tenavu mintihae tentanavu maara uva raqae kararave, kiae raqa kararave? Ne tiqe iriare, tiro.

⁴ Ihuva minti tumanta vika kia uva voqavata tiraiti vauvaro, Ihuva vi vaiintira vitakero vira vaata koqema amitero vira atitovaro vura. ⁵ Vuvaro Ihuva viraqi vaukara tiharo, Niqihairo ni maaqvanove, ni purumakauvanove, maiqaqi aqu virera, ne kiae Maara Entaqaa vira raraa vaari qaqini kevarave? tiro.

⁶ Ihuva vikara minti tumanta vika nái vira tiva ami uvava kia vaumanta tirema vaura.

Kia nenta autu tuaheraate tura

⁷ Ihuva naavu viraqi vaiharo tavomanta kara nareka anuka hininavu koqe taintaqaqaqai oquviha vaireka auti vauvaro Ihuva uva vo tuqantaakero vika tiva nimo tiharo, ⁸ Vaiintivano nahenti irare iharo ariara anira kara naane tirara are kia oru koqe taintaqaqa vaaka oquvuanne. Are viraqaa oquvi vairaro hauri naavu qova nora vaiinti vo aarama kero ⁹ ariara tiharo, Tuvitarairaro nora vaiintivano vi taintaraqaa oqu vuarire, tiantorave. Viva minti tirera, are viraqihaira kauriharama naantiaraini otu qumina kantama oquvi vainerave.

¹⁰ Kia mintiraitira, maantimakera iane: Kara nareva iharo ai aarama tairara oru vaiinti nahenti naantiaraini oquvi variane. Are mintimakera vairaro naavu qova naiyano anirero ariara tiharo, Ti tontivauvo, kia mini variane. Ani koqe taintaqaqa maini oqu vuane, tirara are oru koqe taintaqaqa oquvi vairaro vaiinti nahenti viraqi vaika ariara nora vaiintivema tivarave.

¹¹ Nai autuqai virini tuahere vairava vairaro naantiara Kotiva vira autu vatainiqama kaanarove. Ti hutu vataini qiarire tirava vairaro naantiara Kotiva vira autu viriniqama kaanarove, tiro.

¹² Ihuva minti tivakero vo vaiintivano anira ti naavuqi kara naane tu vaiintirara tiharo, Are vaiinti nahenti kara nimireva ihara kia nena tontive, nena qata vakaukavarave, nena navunaakave, airi airaira vatekave, kia vika naaraane. Are mintimake vai vaiintika naarama kairera, vika virara iriha ai nina aaramake kara amivarave.

¹³ Are vaiinti nahenti kara nimireva ihara vehi vaiinti nahentive, aiqu kauqu rarera vikave, avu qimpa vikave, vika naaraane.

¹⁴ Are mintima vai vaiinti nahentika naarairera, are vika homa kara quminaqama kera niminarave. Are vika mintima kera nimiraro Kotiva virara iriharo nina quahama amitaanarove. Naantiara koqe vaiinti nahenti qaiqaa qaqi himpima kaaina entaraqaa Kotiva virara iriharo nina koqaa amianarove, tiro.

Nora kara nimire tu vaiintirara uva tuqantaakero tura

(Matiu 22:1-10)

¹⁵ Ihuva minti tuvaro vo vaiintivano viraqi kara ne vauva viva Ihurara tiharo, Ike, naantiara Kotira vatukaini oru vaiha kara neha vaika vika quahehama vaivarave, tiro.

¹⁶ Vi vaiintiva minti tuvaro Ihuva vo haikaqaa uva tuqantaakero vi vaiintirara tiva amiro tiharo, Vaiinti vovano nora kara qerama vatero airi vaiinti nahenti naarama kero vi entara ani ti hampata kara naate, turave. Minti tivakero vauvaro ¹⁷ vi entava anirovaro viva nai kaiqa vaiinti atitero tiharo, Te naarama tauna vaiinti nahentika are vika oru tiramanta aniate. Ekaa kara qeramake vataavo tiane, turave.

Tuvaro vira kaiqa vaiintivano vuru vika tiva nimumanta ¹⁸ vika vohaiqa vohaiqvano tiha, Mpo, vo haikavano ti antua kaimanta te kia ho mini virarave, turave. Avuniqama kero vaiinti vovano naane vira kaiqa vaiintiara tiharo, Te vata qaraaka koqaaamake varauro. Te oru vira tavarerave. Mpo, te kia ho ainti virarave, tuvaro ¹⁹ vaiinti vovano tiharo, Aqao, te kaiqa vare vau purumakaura kauqurutanta monu aqukeha vara vatauro. ²⁰ Te oru kaiqa vareha purumakaura vinavuka kaiqa varera avatamake tavarera vuro. Mpo, te kia ho ainti mini virarave, tuvaro vovano tiharo, Aqao, te vateqaima nahenti varatauro. Mpo, te kia ainti ho virarave, tiro.

²¹ Ekaa vika mintimakeqai tuvaro vira kaiqa vaiintivano orurantero viri nai nora vaiinti vika tu uvara tiva amuvaro naavu qora vira arara itovaro nai kaiqa vaiintiara tiharo, Kantera aniranteria oru vatukaini nora aaraqaahairave, inaara aaraqaahairave,

vehi vaiintivata, aiqu kauqu rarera vikavata, avu qimpa vikavata, aiqu rentuqaa rentuqaamaqi ni vaikavata, vika vika ntita varera aniane, tiro turave.

²² Tuvaro viva tunte iro anirantero oru vika ntita varero anirero tiharo, Are tianantemake, te vika ntita vare anuraro hini taintavano qaqlima vaivo, turave.

²³ Minto tuvaro vira noravano nai kaiqa vaiintiara tiharo, Are qaqlaa anirantera vatuka mini qaqlira kera, oru aaraqaahairave, naahoqihairave, vaiinti nahenti kempukaiqama kera raraus varera aniramanta vika ti naavu ani mpiqa kaate. ²⁴ Te niara ekaa mintima turo. Te tota hoqare naaraura vaiinti nahentikaqihairo kiama ho voqavanovata ani ti kara naanarove, turave, tiro. „Ihuva minto tiharoma vi uvvara tuqantaakero vi naavuraqiqi vauka tiva nimura.„

Ihura avataqiro vireva auti vau vaiintirara tura
(Matiu 10:37-38)

²⁵ Vaiinti nahenti airitahaa Ihura avataqiqi vi vauvaro Ihuva tuqantaa viro vika tiva nimiro tiharo, ²⁶ Vaiinti vovano ti vaintiqama vireva te iainanaini anirava, viva nai noka qokave, nai naata vaintive, nai qata vakaarave, nai vataini qaqla variqiro vuainararave, noraiqaakero iriqiro viharo, kia tiriara noraiqaakero iriarirava vairera, vi vaiintiva kiama ti vainti ho varianarove.

²⁷ Vovano kia nai aruke hirite katarira aqu varero ti tivataqiro anirera, viva kiama ho ti vainti varianarove.

²⁸ Niqihairo vaiinti vovano nora naavu kaqareva iharo viva tota oquiviro vahiaro avu aato utukero katariarave, pohiarave, homa monu aqirarave tivakero, vira naantiara naavu kaqe vairave.

²⁹ Viva kia mintirera, *pohi* aratero naavu hoqarama tero monuvano kia vairaro kia ho kaqa taiqa kaanarove. Kia ho kaqa taiqa kaira vokika vi naavura taveha vira naaraihama amiteha tiha, ³⁰ Ike, viti vaiintira tavaate. Vi vaiintiva naavu hoqarama tero kia ho kaqa taiqa kairave, tivarave.

³¹ Te vo uvavata tirerave. Avuhainaa vaiinti vovano avuhainaa vaiinti vo vataakero raqireva iharo, viva tota avuni oquiviro vahiaro nai iqoka vaiintinavu kaara ntua kero, hoe vira aatara kararave, kiae ho vira aatara kararave, ti vairave. Viva tavaimanta vira iqoka vaiinti 10,000 vaiintinavuqai variamanta vira navutaara iqoka vaiintinavu 20,000 vaivera, viva ti haatara kaantorave tivakero mintima tianarove:

³² Ti navutavaa niaraini vairage te vainti vo atitaariraro viva vira vuru tiva amiro tiharo, Tenavu maateraiqirerave, tianarove, tiro.

³³ Ihuva minto tivakero viva tiharo, Vira voqantemake, „ne kia paparuqiqi ti avataqiqi aniate.„ Ne kia nenta i haikara ekaa haika qaqlira karaiti, ne kia ho ti vainti vaivarave.

Ihuva horera uva tuqantaakero tura
(Matiu 5:13; Maaki 9:50)

³⁴ Hore koqe haikave. Horevano qoraiqama viro kia hiakaa irera, tenavu kia ho vira qaqlaa autu kaariraro hiakaa ianarove. Tenavu vira qaqlrama aqu kararave.

³⁵ Mintima vai horeva kia ho vata kahaqiraro karavano koqemakero qampiqaanarove. Karavano koqemakero qampiqaarire ti, kia tenavu vi horera purumakau raha vataake vatararave. Ni aato vairera, vi uvvara okara kankomake iriate, tiro. Ihuva turama.

Sipisipi kakakima vurara uva tuqantaakero tura
(Matiu 18:12-14)

15

¹ Vo enta *takisi* vare vaukavata, qora kaiqa vare vaukavata, Ihura uva irireka anire vauvaro ² Parasi vaiintinavu, maara okara ti vau vaiintikavata, nuntu nauntu tiha, Aqao, maa vaiintiva qora kaiqa vare varia vaiintika quahama nimiteharo vika hampata kara ne vaivo, ti. ³ Vika minto tuvaro Ihuva vo uva tuqantaakero vinavuka tiva nimiro tiharo,

⁴ Niqihairo vaiinti vovano 100 sipisipinavu vatairava tavairaro vonkuvano kakakima virera, vi vaiintiva nantie ianarove? Viva 99 sipisipinavu avutagi kero, sipisipi vonkuvano kakakima vinara rantareva vuanarove. Virara rantaqiro viviro, oru rantakero vittaanarove.

⁵ Vira rantakero quahakero vara vaari nai kururuqaa aqu varero ⁶ vuru maaqaini kero nai navunaaka naaramakero tiharo, Ne ani ti vataake quahela variate. Ti sipisipinavu kakakimavira tenta vira ranta kauro, tianarove.

⁷ Te tiari iriate. Vira aanaramake 99 vaiinti nahenti kia qora aara nika vaimanta naaruvaini variaka vikara quahela vaivarave. Ho naaruvaini variaka tavaivaravo vohaa

vaiintivanqai qora aara qaqlira kairera, naaruvaini variaka virara iriha nai voqavata quaheha vaivarave.

Monu kakakima vurara uva tuqantaakero tura

⁸ Te qaiqaa vo uva tuqantaake tirerave. Nahentivano silvaa monu kauqurutanta vataiva tavaivaro silvaa monu vohaiqavano kakakima virera, viva nantie ianarove? Viva ova gumpikero naavuqi rupikero virara voqi voqi rantaqiro viharo vira rantakero varaanarove.

⁹ Viva monu vira rantakero varero nai tontinavuvata, nai navunaakavata, naaramakero tiva nimiro tiharo, Ti vataake ani quaheha variate. Te monu kakakima kaunara, vira rantake varrauro, tianarove.

¹⁰ Te tiari iriate. Vira aanarama kero, qora kaiqa varaira vaiintiva qora aara qaqlira kairera, virara iriha Kotira enseli vika quaheha vaivarave, tiro.

Vo vaiinti vira maaqu kakakima vuraqaa uva tuqantaakero tura

¹¹ Ihuva minti tivakero viva tiharo, Vaiinti vovano qorainti vainti taaraqanta vatatavaroma ¹² vira vainti naantiaraihainaava nai qorara tiharo, Naantiara ti timireva ina onaanara vate maa viraqai tinta timiane, tiro. Tuvaro vira gova onaana rairakero nai maaqtanta nimurave.

¹³ Vitanta nimuvavar vira maaqu naantiaraihainaava inaaraqiqai variro, nai onaana vokuka nimiharo monu varero niara maaqa viro, oru mini qora vaiinti hampata vaharo monu vare vura vuru nama taiqa korave.

¹⁴ Vare vuru nama taiqa kovaro viraqaaahairo noraiqama kero karara antuqa aru entava anirovaro viva vehiqamaviro vaharo ¹⁵ oru vi vataraqaaahainaava vaiinti voqaa kaiqa varorave. Kaiqa vare vauvaro virara oru quara kara nimiane tuvaro ¹⁶ viva quara kara nimi vaurave.

Viva quara kara nimiharo tiharo, Ike, tentavata quara kara viti nimunara naataarave, tuvarovata, vovano vi vaiintira kara amiarirava kia vauvaro ¹⁷ viva narara vaharo uvapo aato kenko tuvaro iri vuvaro viva nai tivakero iriro tiharo, Ti qora kaiqa vare varia vaintika airi variavaro karavata airiqimanta neha variamanta te maini vahia narara vauvo. ¹⁸ Kaiqe te himpi tenta gova inanaini anirante vuare. Te orure tenta qorara minti tirerave: Mpo qao, te Kotiravata aivata qora kaiqa vara nimitaunarave. ¹⁹ Vira kaara te kia ai vainti koqeka ho vairarave. Ho are ti vara muntuvi vatainiqama kairaqe te ai kaiqa vaiintinavu voqantemake variare. Te minti tivake tirerave, tiro.

²⁰ Minti tivakero himpiro nai gova unaini vura. Nai qora naavu aumanto anuvaro vira gova niaraihairo vira vutu tavero quahakero kantero ou nai maaqu ravaaqavutero vira kukuehoro vauvaro ²¹ vira maaquvano tiharo, Mpo qao, te Kotiravata aivata qora kaiqa vara nimitaunarave. Te vira kaara kia ai vainti koqeka ho vairarave, tiro.

²² Minti tuvaro vira gova nai kaiqa vaiintinavu tiva nimiro tiharo, Kante ne oru utavaaqa koqeraqaima vara viri vira amiate. Kaantava iraravata vara viri uku amitaate.

²³ Purumakau naati koqera aruke unta amitaate. Vate maaka vira quahama amitarerave.

²⁴ Ti maaquvano qutu vivo turaroma qaqi aniraivo. Ti maaquvano kakakima vivo turaroma qaqi qovarama vivo, tiro. Minti tivakero nai maaqu quahama amiteharo tavaaruqama amitorave.

²⁵ Vira tavaaruqama amite vauvaro vira vakaava kaiqaqihairo naavu aumanto anirero irumanta ²⁶ ihi re vauvaro viva nai qora kaiqa vainti vo irovoro viva vira mintima tiva amiro: ²⁷ Ai qatavano vetaihairo aniraivaro ai gova vira tavaivaro viva koqemakero qaqi anintaivarora tiro, virara quaheharo purumakau naati koqera arukero unta amitaivo.

²⁸ Minti tuvaro vira vakaara voqamakero arara itovaro tomakero tiharo, Kia te naavuvi virerave, tivakero vahaqaini vauvaro vira gova vevarero aarovaro viva mintima tiro:

²⁹ Te airi ihiara variqi vihama ai kaiqa vaiinti voqantemake, ai kaiqa varehamma kia te vo entavata ai no raqa karaiti vaunarave. Te tenta toni quahama nimirare turaravata, are kiama memera naati vonku ti ruqutu timira iarao. ³⁰ Ai maaqu maava hampi narira ni varia nahentikaqaa are iana haikara varero vuru aqu taiqa kero anivarama are quminama purumakau naati koqera ruqutukera amira iarao, tiro.

³¹ Minti tuvaro vira gova aqao tiro, Ti maaquvauvo, are vo enta vo enta ti vataakera variaravave. Te una haikara ekaa airaira tentatanta unarave. ³² Ai qatavano qutu vivo turaroma viva qaqi aniraivo. Viva kakakima vivo turaroma qaqi qovarama vivo. Mintirara ti, tenavu vate vira quahama amitarerave, turave, tiro. Ihuva vi uvvara tuqantaakero turama.

16

Kaiqa vaiinti vovano qora kaiqa varorara uva tuqantaakero tura

¹ Ihuva nai vantinavu tiva nimiro tiharo, Haaru airi monu vato vaiintiva vauvaro vovano vira kaiqa vareharo viva vato haikaraqaa raqiki vaurave. Viva u haikaraqaa raqikiharo vauvaro vovano anirero tiharo, Are iana haikaraqaa raqiki vai vantiva are ianara hini namake vaivo, tuvaro ² monu vato vaiintiva vira aaramakero tiharo, Are nana varakaana uvvare te iruro? Are te una haikaraqaa raqikiharo varena haikara qara ruva timitairaqe te tavaare. Are kia ho te una haikaraqaa qaiqaavata raqikiqira vinarave. Are taiqama vinarave, turave.

³ Manti tuvaro vira kaiqa vaiinti viva naiqai iriro tiharo, Mpo, ti noravano te kaiqa varaunaraqaahairo ti taiqama kaanarove. Te nantie irarave? Kia te kempuka vaiinti vahavauve ora ho quvirarave. Te vorara vorara mpo tiha, Monu timiate, tivagi viha kauruarorave, tiro. ⁴ Manti tivakero viva tiharo, Kaiqe te vate manti manti iariraro ti noravano ti kaiqaqaahairo tititama kairamanta vaiinti nahenti vonavu tiriara quaheha vika nái naavuqí ti tivita vataate, tiro.

⁵ Manti tivakero vika nái nora vaiintiqihai monu vareha naantiara amiare tu vaiintika naarama kero, avuni anu vaiintira naane irero tiharo, Ti nora vaiintivano i haikara varaanara nantima haikae ainqi qaqi vaivo tuvaro ⁶ viva tiharo, Viva tigi vahavera taqu 100navu vataivama qaqi vaivo, tuvaro viva vato haikaraqaa raqiki vau vaiintiva qaraqi ruvakero vira amiro tiharo, 100 viraqihaira 50 qaqa kera 50 qai qaraqi ruva taane, tiro. ⁷ Manti tivakero vo vaiintiara tiharo, Are vo? Aiqi vataira nanti nantimae qaqi vaivo? tuvaro viva tiharo, *Uiti* auru 100 utama qaqi tigi vaivo, tuvaro viva qara amiharo 100 viraqihaira 20 qaqa kera 80 qai qaraqi ruva taane, tiro.

⁸ Viva vato haikaraqaa raqikiharo muara vare vau vaiintiva mintiaqiro vuvaro vira nora vaiintivano vira kaiqa tavero tiharo, Ike, vaiinti vika vira tonti variate tiro, viva koqe avu aato vareharo manti vaivo, turave, tiro. Ihuva manti tivakero viva tiharo, Vataihainaa okara iria vaiintika, vika koqaa kaiqa vareha vika kia hampiara voqaara vi kaiqara vararaiti, vika avu aato utuqi viha vi kaiqara vare variarave. Mintimake kaiqa vare variaka, vika koqaa kaiqa vareha, ova itainaini varia vaiintika naatarakeha kaiqa vare variarave, tiro.

⁹ Ihuva manti tivakero viva tiharo, Te tiari iriate. Vataihainaa okara iria vaiintika aquke varia monura, ne vi monura varake aqukeha vaiinti tontiqiate. Ne mintiaqí vivaro monu taiqa viramanta ne ekaa enta qaqi variqi vi naavuraqí vivaro ni quahama nimitaanarove.

¹⁰ Vaiintivano inaara kaiqa vareharo viva vi kaiqara avuqavuqama kero varairera, vi vaiintiva nora kaiqavata vareharo homa avuqavuqama kero varaanarove. Vaiinti vovano inaara kaiqa vareharo muara varairera, vi vaiintiva nora kaiqavata vareharo muara varaanarove.

¹¹ Ne vataihainaa monu kia avuqavuqamake aqu karaiti, hampiqamake aquqi vivera, Kotiva niara mintima tianarove: Ne naaruvaini vai haikaraqaavata kiama ho raqikivarave, tianarove. ¹² Ne vo vaiintivano vatai haikaraqaa kia koqemake raqikivera, Kotiva niara, Ne nenta vate haikaraqaavata kia koqemake raqikivarave, tiharoma kia vi haikara ni nimanarove.

¹³ Kaiqa vaiinti vovano kiama ho vohaa vaka nora vaiinti taaraqantaqaa kaiqa varaanarove. Viva mintirera, vira muntukavano vorara vaiharo kiama vorara varianarove. Viva vora uvaqai iriharo, vora uva qoririma kaanarove. Ne kiama ho Kotiravata monuvata vohaa vaka kaiqa vara nimitaqi vivarave, tiro.

Ihuva maara uva okarara tura

¹⁴ Ihuva manti tumanta Parasi vaiintinavu vi uvvara iruvaro vika muntukavano monuarraqai vaumantara ti, vika Ihuva tu uvarara naarahama amitora.

¹⁵ Naarahama amitoro Ihuva vika tiva nimiro tiharo, Vika niara avuqavu ni varia vaiintikave tiate ti, ne vaiinti nahenti nivuqaa avuqavu ni variarave. Ne mintiavararo Kotiva ni muntukaqi vaaqai kaiqa vaira tave vairave. Vataini varia vaiintika tiha, Vi haikava koqe haikama vaivo, ti varia haikarara Kotiva vi haikarara tiharo, Qora haika qumina haikaqaima vaivo, ti vairave.

¹⁶ Haaru kia Ioniva vau entara Mosira maara uvavanovata, paropeti vaiinti maara uvavanovata, vi uvavaqai vaurave. Mintiaqí vi vauvaro viraqaaahairo Ioniva vaiinti nahenti namari nimu vaiintiva anirero viva qaraaka uva koqe uva Kotiva niqaa raqikiaina uvvara tivaqiro vumanta viraqaaahai ekaa vaiinti nahenti kempukaiqama keha Kotira vatukaini vireka auti variarave.

¹⁷ Ho ne iriate. Haarua maara uva qaqima vaivo. Naaruvavanovata vatavanovata taiqa viraro Kotiva tivatav uavava, nora uvavanovata upaa uvavanovata kia taiqa viraitiro, qaqima varianarove.

*Nahenti qaqrake okarara Ihuva tura
(Matiu 5:31-32; 19:9; Maaki 10:11-12)*

¹⁸ Vaiinti vovano nai naata qaqrira kero vo nahenti varairava, vi vaiintiva qaraaka nahentintiro niharoma muarama vikantiro nuanarove. Vira voqaraa nahentivano nai qorainti qaqrira kero qaraaka qorainti varairava, vi nahentivavata qaraaka qoraintintiro niharoma naata vaati varaa okarara raqama kaanarove, tiro.

Rasarusirara tura

¹⁹ Ihuva minti tivakero viva vika tiva nimiro tiharo, Vaiinti vovano airi airaira vatova koqe utavaaqaqai nonkutero vo enta vo enta hiakaa u kararaqai neharo vaurave.

²⁰ Viva vi kararaqai neharo vaumanta vaiinti vo, vira autu Rasarusira vita vare vuru airi airaira vato vaiintira naavu qentiana kovaro vaurave. Vi vaiintiva kia vo airairavata vatova vehi vaiintivano vauvaro numuaravanoqai ekaa vira vaataqaa ite vauvaro ²¹ val haro viva airi airaira vato vaiintiva kara neharo viti aqukora viraqai nuntu naare tivakeharo vaurave. Minti tivakero vauvaro vairivano vitare aitare iharo vira numuara mpui mpaai vaurave.

²² Kia vo airairavata vato vaiintiva qutu vumanta *enseli* vika vira vita vare vuru Eparahaamiva nai kaivaqava vaunaini vuru korave. Vuru kovaro airi airaira vato vaiintiva vivavata variro, qutu vumanta vataqi quntama tovaro ²³ viva qutu vuaka varianaini vaharo antura riharo vaurave. Mini vaharo viva vuruvi tavovaro Rasarusiva Eparahaamikantiro quaheharo niaraini vaurave.

²⁴ Mini vauvaro viva Eparahaamira ararer tiharo, Eparahaamio, tinavu qo, tiriara mpo ike tiva timitaane. Are Rasarusira atitairaro viva nai vuqa oru namariqira vaavi quntama varero muntu ti maaqiriqaa vatairaro ti maaqiri humpama timitaarire. Te nora iha itairaqi vahai antura riha vauvo, tiro.

²⁵ Viva minti tuvaro Eparahaamiva aqao tiro, Ti maaquo, are iriane. Are tota qaqi vauna entara koqe haika vatoraro Rasarusiva qora haikaqai vatorave. Vate viva maini vaharo quaheharo vaivara are mini vahara antura rihara variarao. ²⁶ Are qaiqaavata iri vairage te uva voqavata ai tiva amiare. Te vaunananainivata, are varianananainivata, vira avutana onkai noravanoma vaivo. Maihairo mini vuantorave vihairo maini aniantorave tiro, onkai norama avutana vatairave, tiro.

²⁷ Eparahaamiva minti tuvaro vi vaiintiva qaiqaa Eparahaamirara tiharo, Mpo, tinavu qo, te ariara mpo ike turo. Rasarusira atitairaro viva ti qora naavuqi oturero ²⁸ ti qata vakauka kauqurunavu variaka tiva nimiarire. Vikavata maini te variananaini aihavira vatukaini anivorave, tiro.

²⁹ Viva minti tuvaro Eparahaamiva aqao, tiro. Mosivavata, paropeti vaiintinavuvata, haaru qara ntuvatu uvava vairove. Vika vi uvava homa irivarave, tiro. ³⁰ Minti tuvaro qaiqai vau entara airi airaira vato vaiintiva qaiqaa tiharo, Kiave, tinavu qo, Eparahaamio, qutu virava anirantero vuru tiva nimira vika vira uva irihama qora aara qaqrira kevarave, tiro.

³¹ Viva minti tuvaro Eparahaamiva aqao tiro. Vika Mosira uvavata, paropeti vaiintinavuvata, kia irivera, vika qutu virava anirantero vuru tina uvaravata kia ho irivarave, turave, tiro. Ihuva minti turama.

*Qora kaiqara tura
(Matiu 18:6-7, 21-22; Maaki 9:42)*

17

¹ Ihuva nai vaintinavu tiva nimiro tiharo, Vaiinti nahenti Kotira uva raqakeha qora kaiqa varaate tiro, quqama vo haika vo haikavano qovarama vuanarove. Qora kaiqa qovarama kaaina vaiintira te virara oho tiva amitauro.

² Naati vaintiru qora aara umiqaira vaiintiva vairaro vi vaiintira uvavano nai nora uvava varianarove. Koqemama kia vi vaintiru qora aara umiqai entaraqaa vi vaiintira auntaqai nora ori kantarumake nora varuva namariqii aquakaataarave.

³ Virara iriha ne qora kaiqa varaorave tiha raurihama variate. Are tavairaro ai qata vakaa vovano qora kaiqa ai vara amitairera, virara kia mintiane tiane. Viva ariara tiharo, Mpo, kia te qaiqaavata mintirerave, tirera, are tihara, Vi uvava vatemaa qaqirama kauro, tiane. ⁴ Are tavairaro viva vohaa enta 7 tataa qora kaiqa ai vara amitero viraqaaahairo oru

ariara mpo kia virara iriraitira, tauru kaane tirera, are eo tivakera 7 tataa virara tihara, Te kia ariqaa uva vataraiti, vi uvara qaqira tauru amitauro, tiane, tiro.

Kempukaiqamakero Kotirara iriqiro vuainarara tura

⁵ Ihuva minti tumanta vira vainti 12navu tiha, Tenavu Kotirara iriqi vuarirava noraiqiro voqavata variarire, tira are tinavu kahaqiane, ti.

⁶ Vika minti tuvaro Noravano vika tiva nimo tiharo, Ne Kotirara iriqi viva inaaraiaqai vairera, ne nana nana nora kaiqae ho varevarave. Ne Kotirara iriqi viva masteti auru „qamaqara auru voqaara“ vairera, ne homa viti katarirara tiha, Nena tuqa airantera raruvinra muntu nora namariqi qampiqaae, tivaro vi katariva ni uva irianarove, tiro. Ihuva turama.

Kaiqa vaiintivano nai kaiqa varaainarara tura

⁷ Ihuva tiharo, Te vo uva tuqantaake tirerave. Ninavuqihairo vovano vairaro vira kaiqa vaiintivano vira kaiqa vareharo oru vata quviroe, sipisipiqa raqikiroe, vi kaiqara varu taiqa kero vihairo anirairaro vira noravano nana uvae virara tianarove? ⁸ Viva kia nai kaiqa vaiintiara tiharo, Vaaka ani nena kara naane, tianarovauve. Vi vaiintiva qaqi kaiqa vaiintivanoqai vaivarora tiro, vira noravano mintima tianarove: Tota ti kara naane qerama vatera tavuna rumpa varera kara vara viri timiraqe te naane nama kaarirara vira naantiara nena kara naane, tianarove.

⁹ Kaiqa vaiinti viva nai nora vaiinti uva avataqiro viharo kaiqa vara amitaivaro, vira nora vaiintivano kia virara iriharo koqema iarao tianarove.

¹⁰ Vira aanare nevata Kotira uva avataqi viha ekaa vira kaiqa vara vuru taiqake mintima tiate: „Kia tentanavu autu tuaheraariva vaivo.“ Tenavu qaqi kaiqa vaiintiqa vairaha ti, tenavu viva tinavuara vi kaiqara varaae ti kaiqaraqaima vara kaunarave tiate, tiro. Ihuva turama.

Numuaravano vaata ne vau vaiintika Ihuva koqema kora

¹¹ Ihuva Ieruharemini viharo Sameria vata hini mantaraini vaura, vira avutana viharo ¹²vatuka voqi vireva umanta vaiinti kauqurutanta Ihura oru vitakora. Qora numuaravano vika vaata ne vau vaiintika vutura niaraihai aakara nteha tiha, ¹³Ihuo, Noravauvu, qaqi tinavuara mpo ike tiva timitaane, ti vaura.

¹⁴ Vika minti tuvaro Ihuva vika tavero tiva nimo tiharo, Kotira kaiqa vara amite varia vaiintika vainaini oru vimanta vinavuka ni vaata tuantike tavaate, tumanta vika Ihuva tuntemake, aaraini viha tavovaro vika numuaravano tavanta vuvaro vika vaatavano koqema vumanta vika ho vaura.

¹⁵ Vika ho vuavaro vikaqihairo vohaiqavanoqai nai numuara tavantavura tavero, anirantero aakara ntavaqiro viharo Kotira autu tuaheraqiro vura. ¹⁶ Tuaheraqiro viro oru Ihura aiquidaraini hiqiri viro vairaho Ihura quahama amite vaura.

Vi vaiintiva Sameria vatanaa vaiintivano vuavaro Ihuva virara tiharo, ¹⁷ Te vaiinti kauqurutanta koqema nimitaunarave. Vaiinti 9navu tainie vuavo? ¹⁸ Nantiharoe maa vaiintiva vo vatanaa vaiintivanoqai Kotira autu tuaherareva orurantero anivo? tiro.

¹⁹ Minti tivakero Ihuva vi vaiintirara tiharo, Are homa himpira vinarave. Are tiriara ti kahaqiariravave tiararoma ai vaatavano koqema vivo, tiro. Ihuva turama.

Kotiva raqikiainarara tura

(Matiu 24:23-28)

²⁰ Parasi vaiinti hininavu oru Ihura ireha tiha, Kotiva vaiinti nahentiqa raqikiarirava tairentae qovaraiqianarove? tuvaro Ihuva vika tiva nimo tiharo, Viva qovaraiqianara ne kia avuqohai ho tavevarave. ²¹ Kia vovano Kotiva raqikiainara tavero minima vaivo mainima vaivo tianarove. Kotiva vaiinti nahenti avutaqi vairaho vikaqaa raqikiararove, tiro.

²² Minti tivakero Ihuva nai vaintinavuara tiharo, Vo enta aniraira ne vi entaraqaa ti Vataini Vatatai Vaintika mintima tivarave: Ike, tinavu Ihura tavaataama ivo. Ihuva vohaa enta tinavu hampata vairaqe tenavu hovema tirarave, tivakehama ne kia ho ti tavevarave. ²³ Vi entaraqaa vaiinti vonavu niara tiha, Ihuva minima vaivo. Mainima vaivo, timanta ne kia vika uva iriha vika avataqi vuate.

²⁴ Aaquakaa utiharo ekaa naaruva ataama kainantema kema, te Vataini Vatatai Vaintika qoqaa orurante tuvirerave.

²⁵ Vate maa entara vai vaiinti nahenti nora maara naane avuni ti timiteha ti qorirma timitaivage te qako qoqaa tuvirerave.

²⁶ Noaava qaqi vau entara vaiinti nahenti mintuntemake, naantiara te Vataini Vatatai Vaintika tuvuaina entaraqaa vaiinti nahenti vohaa qaramake variqi vivarave.

²⁷ Noaava vau entara vaiinti nahenti karavata namarivata namaqi viha naata vaati varaqi vi vauvaro Noaava namariqi vuaina naavuraqi oriqetero vauvaro huvura namarivano ekaa vika ruqutu taiqa korave.

²⁸ Te tuvuarira entava vaireva, Rotiva vau entara voqaarama varianarove. Rotiva vau entara vaiinti nahenti karavata namarivata namaqi vi, vika nái kogaa kaiqa varaqi vi, naata vaati varaqi vi, kara utuqi vi, naavu kaqaqi vi, minti mintimaqi vuvuro

²⁹ Rotiva Sodom i watukaihairo vuvuro naaruvalihairo ihavanovata *salfa* * orivanovata aauq voqaantem aker, riharo vi vatanaaka ekaa ita taiqa korave. ³⁰ Te Vataini Vatatai Vaintika qovaraiqaina entarama vaiinti nahenti minti mintimaqi viha nái kaiqaqai varaqi vi vaivarave.

³¹ Vi entara vaiintivano naavu naanteqaraini vairava nai airaira varareva naavuvi origetaantorave. Vaiintivano naahoqi kaiqa vare vairava anirantero naavuvi vuantorave. ³² Rotira naatavano hampiqama viro taiqa vurara ne iritaate. ³³ Vi entara te qutu vuarorave tiro, nai qaqi variqiro vuainarara noraiqamakero iriqiro vi variarirava qutuma vuunarove. Kia nai qutuainarara noraiqaakero iriqiro vi variarirava viva qaqi variqiro vuunarove.

³⁴ Vi entara entaqi vaiinti taaraqanta taintaqaa vaite vauvaro vohaiqaqai naaruvaini vita varero, vo mini kairaro varianarove.

³⁵ Vi entara nahenti taaraqanta kara tainti utuke vauvaro vohaiqaqai naaruvaini vita varero, vo mini kairaro varianarove. ³⁶ [Vaiinti taaraqanta naahoqi kaiqa vare vauvaro vohaiqaqai naaruvaini vita varero, vo mini kairaro varianarove,] tiro.

³⁷ Ihuva minti tumanta vira vaintinavu vira ireha tiha, Tairentae vi haikava qovarama vuunarove? tuvaro Ihuva vo uva tuqantaakero vika tiva nimiro tiharo, Ta mantarinie qutu vuarira vaatava vainara, viraqama memoravano ruvaaqumaviha vaivarave, tiro.

18

Tentoqa nahentiaravata Iasiaravata tura

¹ Ihuva nai vaintinavuara Kotira aaramaqi viha kia popoheha qaqira kaate tiro, maa uvara tuqantaakero vika tiva nimiro tiharo, ² Haaru *iasivano* vo vatukaaqaa vaharo viva kia Kotira aatu getaraitiro, kia nai kena vaiintiaravata noraiqaakero iri vau vaintiva vaurave. ³ Viva vauvaro tentoqa nahenti vovanovata vi vatukaraqi vaurave. Vi nahentiva enena orurantero *iasi* vaiintivano vaunaini anirero tiharo, Vo vaiintivano ti qoraiqama timitaanarara irihara are ti uva avuqavuqama timitaane, turave.

⁴ Minti tivaqiro vi vauvaro airi enta *iasi* vaiintivano kia vira kahaqiataa uvaro kia vira kahaqurave. Mintiaqiro vaharo *iasi* vaiintivano virara ekaara tiharo, Te Kotiraravata vaiintiaravata kia noraiqaake iri vauraukave. ⁵ Tentoqa nahenti maara kia kahaqiataa imanta vauraro viva enena te unanaini ani vairave. Viva mintiaqiro vi vairaro ti popohama timitaantorave ti, kaiqe te vira uva vaaka avuqavuqama amitaare, turave, tiro.

⁶ Noravano Ihuva uva tuqantaakero minti tivakero tiharo, Tavaate. Qora *iasivano* kia vi nahentira kahaqiataa uvarovata, vira kahaqurave. ⁷ Kotira vaiinti nahenti aatitainaraqaavata, entaqivata, vira aaramaqi vi vauvaro Kotiva kiae vika uva iriro tiharo: ⁸ Vaiinti taaraqanta Kotira Naavu vaunaini Kotira aarareka vurave. Vo Parasi vaiintivano vuvuro vo *takisi* vare vau vaiintiva vurave.

Parasi vaiintiaravata takisi vare vau vaiintiraravata uva tuqantaakero tura

⁹ Ihuva minti tivakero tiharo, Vaiinti vonavu tiha, Tenavuqaima koqe vaiinti vauvau ni vauraukave. Vo vaiintinavu qora vaiintiqaima variavo, ti variarave. Kaiqe te minti ti varia vaiintikara maa uvvara tuqantaake tiare, tivakero vika tiva nimiro tiharo: ¹⁰ Vaiinti taaraqanta Kotira Naavu vaunaini Kotira aarareka vurave. Vo Parasi vaiintivano vuvuro vo *takisi* vare vau vaiintiva vurave.

¹¹ Vitanta Kotira Naavuni orunte vauvaro Parasi vaiintivano oru nariaraa vokanta vaharo Kotira aareharo tiharo, Kotio, te kia vo vaiinti voqaara vauraukara ti, te ariara koqema iarao turo. Kia te vo vaiinti aanare monu muara vare vauraukave. Kia te hampi ni vauraukave. Kia te vora naatanti hampi ni vauraukave. Kia te *takisi* vare vau vaiintira vitira voqaara vauraukave. ¹² Te vohaa *uikiqi* vauha ai kaiqara iriha taara enta

* ^{17:29:} *Salfa* orivano ite vauvaro vogamakero hunkavi vai aihova qovaraiqi vairia.

kara auramateha vauraukave. Te kaiqa vareha varauna monura rairake, kauqurutanta vataunara qihai vohaiqa ai kaiqara iriha avuqavu ai amite vauraukave, turave.

¹³ Parasi vaiintivano minti ti vauvaro *takisi* vare vau vaiintiva niarakanta himpiro vaharo, kauriharo kia vuruvi tavaraitiro, nai mimira ruqutiharo tiharo, Oho, Kotio, te vaaqu vaiintima vauro. Are tiriara mpo ike tiva timitaane turave, tiro.

¹⁴ Minti tivakero Ihuva vika tiva nimiro tiharo, Te tiari iriate. Kotiva Parasi vaiintivano tu uvara kia iriraitiro, *takisi* vare vau vaiintira vira uvagai iriro viva qora kaiqa varo uvaravata nunka amitovaro vi vaiintiva nai naavuni anirantero vurave.

Nai autuqai viriniqama kaina vaiintira Kotiva vi vaiintira auto vatainigamama kaanarove. Nai autu vara vatainigamama kaaina vaiintira Kotiva vira auto viriniqamama kaanarove, tiro. Ihuva turama.

Ihuva vainti naatinavu koqema nimitora

(Matiu 19:13-15; Maaki 10:13-16)

¹⁵ Vaiinti nahenti nai vainti naati ntita vare Ihuva nai kauqu vikaqaa vataarire tivake aniomanta Ihura vaintinavu vika qioqha niti vaura.

¹⁶ Vika minti tuvaro Ihuva vainti naati nai unaini naaramakero tiharo, Vainti naati maaka qaqi kaimanta te iainanaini aniate. Kia vika aara kuval nimitate. Vaiinti nahenti maa vaintika voqaantemake Kotirara irika, vikama Kotiva raqikiaina vatukaraqi vaivarave. ¹⁷ Te quqaa uva tiari iriate. Vaiintivano kia vainti naati voqaantemake kero, Kotira uva irirava kiama Kotiva raqikina vatukaraqi ho vuanarove, tiro.

Airi airaira vate vau vaiintirara tura

(Matiu 19:16-30; Maaki 10:17-31)

¹⁸ Ihuva vauvaro Iutaa qiata vaiinti vovano vira irero tiharo, Are maara ti variara vaiintiva koqevave. Te nana koqe kaiqae Kotira vara amitaqi vihae te naantiara koqemake ekaa enta qaqqi variqi virarave? tiro.

¹⁹ Minti tuvaro Ihuva nai tiva amiro tiharo, Are nantiharae tiriara vaiinti koqevave tiarao? Kotiva vivaqaima koqeva vairave. ²⁰ Are Kotiva tivato uvara irianarave. Vira uvavano maantima tirave:

Kia vora naatantira muara nuane. Kia vora arukaane.

Kia muara varaane. Kia una uva vo vaiintiqa vataane.

Nena noka qoka koqe okaraqai autu nimitaane, turave. (Katu Varora 20:12-16)

Are vi uvara tivatora viraqai iriqira vuane, tiro.

²¹ Ihuva minti tuvaro vi vaiintiva tiharo, Te vainti naatiruka ekaa vi uvvara iriqi ani ani, vate maa entaraqaa aniantauro, tiro.

²² Minti tuvaro Ihuva vira uva iriro vira qaiqaa tiva amiro tiharo, Are vohaa kaiqaaqai varaataarave. Nena ekaa airaira vatenara nimihara monu varakera, kia airaira vateka vuru rairakera nimiraro naaruvinai ai koqaa airairavano variarire. Mintima kera, viraqaaahira ti tivataqira aniane, tiro.

²³ Minti tuvaro vi vaiintiva airi airaira vatovara tiro, vira muntukavano qoraiquvaro vaura.

²⁴ Vira muntukavano qoraiquvaro vauvaro Ihuva vira tavero tiharo, Airi airaira vate vi vaiintika vukaari utihama Kotiva raqikina vatukaraqi vivarave. ²⁵ *Kamerivano uqa noqi ho ruqiaraarirava vairavauve, airi airaira vataaina vaiintiva vivavata Kotiva raqikiaina vatukaraqi ho vuanarove, tiro.*

²⁶ Minti tumanta vaiinti nahenti vi uvvara iri, Ihura ireha tiha, Ike, „airi airaira vateka kia Kotiva raqikinaraqi ho vivera,“ Kotiva nai ta vaiintikae ntitaanarove? ti.

²⁷ Vika minti tuvaro Ihuva vika nai tiva nimiro tiharo, Vataini vaika nai kempukagohai kiama ho Kotira vatukaqi vivarave. Kotiva kahaqiramanta vika homa vivarave. Kotiva ekaa kaiqa ho vare vaivama vaivo, tiro.

²⁸ Minti tuvaro Pitaava tiharo, Tavaane. Tenavu ai avataqi virera iha, tentanavu una haikara ekaa mini ke qaqlima anuro, tiro.

²⁹ Minti tuvaro Ihuva tiharo, Eo, ququaama tira iarao. Ho te tiari iriate. Vaiintivano Kotiva raqikiaina kaiqarara iriharo nai maaqa mini kero nai naatave, nai qata vakaukave, nai noka qokave, nai vaintairave, viva vika vikavata mini kero Kotira kaiqa varareva viraro. ³⁰ Kotiva vi vaiintiva vi haikara mini kainara iriharo, vi vaiintira maa entara airiqama kero amianarove.

Mintiraro vi vaiintiva naantiara ekaa enta qaqqi variqiro vuanarove, tiro.

Ihuva nai qutu vuainarara qaiqaa tura

(Matiu 20:17-19; Maaki 10:32-34)

³¹ Manti tivakero Ihuva nai vainti 12navuqai ntita vo kanta vuru kero tiva nimiro tiharo, Iriate. Te Vataini Vatatai Vaintikama vauro. Tenavu Ieruharemini oru vuariraro haaru paropeti vaiintinavu tiriara qara ntuvato uvava, ekaa vi uvava quqaa vivauma varianarove.

³² Tenavu Ieruharemini oruraari vika ti ravaaqavu vare vuru vo vatanaaka kauquqi nimimanta vi vatanaaka ti naarahama timite, tiriara qora uva tiva timite, tiqaa taara vihi timitevarave.

³³ Mintiaqi viha vika ti kaavu humiqake vate, ti harukaiqe te qutuvi taaramo enta variariraro, Kotiva ti qaiqaa qaqi vara himpima kairage, te qaqi variqi virerave, tiro.

³⁴ Ihuva minti tumanta vira vantinavu kia vira uva kankomake iriraiti vaura. Vi uvava okaravano kukeqa viro vaumanta vika tiha, Ihuva nana uvae ti vaivo? Kia tenavu vira uva kankomake iruro, tura.

Ihuva avu qimpavu vaiintira rampai amitora

(Matiu 20:29-34; Maaki 10:46-52)

³⁵ Ihuva Ieriko aumanto vuvaro vaiinti vovano avu qimpa vuva aara auvahini oquiviro vaharo airaira naarihoro timiate ti vau vaiintiva vaharo irumanta ³⁶ airi vaiinti nahenti vihai aitareha vi vauvaro viva vika irero tiharo, Tavaate. Nana haikavaneo govareiqimantave? tumanta ³⁷ vika vira tiva ami tiha, Ihuva Nasaretihainaava uritare vaivo, tura.

³⁸ Vika minti tuvaro viva naveraitiro tiharo, Ihuo, Devitira Maaquo, tiriara mpo ike tiva timitaane, tiro.

³⁹ Minti tumanta vaiinti nahenti vira avuni vauka vira atiha tiha, Are evaara variane, tuvaro viva vika uva kia iriraitiro, qaiqaavata qaqiqai noraiqaakero naveraitiharo, Devitira Maaquo, tiriara mpo ike tiva timitaane, tiro.

⁴⁰ Minti tuvaro Ihuva oru viraqaa himpitero vaharo avu qimpavu vaiintira vira vite maini te iainanaini aniate tumanta vika vira vite aumanto vuru kovaro Ihuva vi vaiintira irero tiharo, ⁴¹ Te ai tantire urarae aniarao? tiro. Minti tuvaro viva tiharo, Noravaavo, are ti tivu rampaikaanerama te ai aarauro, tiro.

⁴² Minti tuvaro Ihuva vira tiva amiro tiharo, Ho avu rampaikera tavaane. Are tiriara ti kahaqiariravave tiararoma ai avu rampai vivo, tiro.

⁴³ Minti tuvaro vaakama vira avuvano rampai vuvaro viva ho tavero, viraqaaahairo viva Kotira autu tuahereharo Ihura avataqiro vumanta vaiinti nahenti mini ruvaaqumavi vauka, vikavata vi haikara tave Kotira autu tuahere vaura.

19

Sakiusira uva

¹ Ihuva Ierikoni orurero vatukaqi vi vauvaro ² takisi vare vau vaiintinavuqahiario qita vaiintivano airi airaira vato vaiintiva Sakiusiva mini vaura. ³ Vi vaiintiva iruvaro Ihuva aitare vauvaro viva tiharo, Ihuva nai ta vaiintivave, tivakero vira tavarare tumanta airi vaiinti nahenti ruvaaquma vuka Ihura mantaaqa kovaro viva iqu vaiintivano vaiharora tiro, kia Ihura ho tavora.

⁴ Kia ho vira tavaarirava vauvaro viva naane kantero Ihuva vireva u aararaqaa orurero Ihura tavareva katari kantakaara vauraqi qaramaviro vaura. ⁵ Viraqi vauvaro Ihuva anirero vuruvi Sakiusira tavero virara tiharo, Vaaka vataini vaavi raane. Vate te ai naavuqi oru vairerave, tiro.

⁶ Manti tuvaro Sakiusiva vaaka vaavi rero voqamakero quahakero Ihura vitero nai naavuqi vuru komanta ⁷ vaiinti nahenti vira taveha nuntu nauntu tiha mintima ti: Vi vaiintiva qora vaiinti muara vaiinti naavuqima vivo, ti.

⁸ Vika minti tuvaro Sakiusiva himpitero Nora Vaiinti Ihura tiva amiro tiharo, Noravaavo, iriane. Te ariarao tiha tenta vatauna onaanara rairake hini vehi vaiinti nahenti nimirerave. Vo vaiintinavu tiriara tiha, Are takisi vareharama are vi monura voqavata varaanarave tivera, te kia vohaa tataaqai vika nai nimiraiti, te vika erakaimaante tataama nimirerave, tiro.

⁹ Sakiusiva minti tuvaro Ihuva vika tiva nimiro tiharo, Te vate maa naavuraqi anire tavauramanta ne qora aara qaqrake Kotira aaraqaa vireka auti variavo. Maa vaiintiva Eparahaamira vohaa ankuvanoma vaivo.

¹⁰ Te Vataini Vatatai Vaintika vaiha, te kakakima vi vaiintika ranta kaariraro Kotiva vika ntitaarire ti anuraukave, tiro. Ihuva minti turama.

Nai kaiqa vaiinti 10navu monu nimurara uva tuqantaakero tura
(Matiu 25:14-30)

11 Ihuva uva vaiinti nahenti tiva nimumanta vika vira uva iri vauvaro Ihuva Ieruharemi aumanto ani vaumontara ti, vaiinti nahenti nái irike tiha, Kotiva vira kempuka amiraro viva noraiqama viro tinavuqaa raqikiarira entava aumaiqivo, ti vaura.

Vika nái irike minti ti vauvaro ¹² Ihuva maa uvvara tuqantaakero vika tiva nimiro thiharo, Nora vaiinti vovano tiharo, Te niaraini vo vatainori variari ti noraiqama kaiqe te avuhainaia vaiintiqamavi, viragaahai te orurante maini anirerave, turave. ¹³ Nora vaiinti viva minti tivakero, viva vireva iharo nai kaiqa vaiinti kauqurutanta naarama kero 20 kinaa 20 kinaa nimiro vika tiva nimiro tiharo, Maa monuraqohai oru koqaa kaiqa vare vaiqe te orurante anirerave, turave.

¹⁴ Minti tivakero vumanta vi vataraqi vauka vira navutaiqiha vaiinti vonavu nititeha tiha, Nenavu vira naantiaraini oru viha vaiinti nahentia mintima tiate: Hauri vi vaiintiva avuhainaia vaiintiqama viro viva orurantero tinavuqaa ani raqikiantorave, tiate, turave.

¹⁵ Vi vatanaaka minti tivake vauvaro nora vaiintivano vo vatainori vaumanta vira noraiqama kovaro viva avuhainaia vaiintiqamaviro orurantero anirero viva nai kaiqa vaiinti haaru monu nimuka naarama kero tiharo, Te monu ni nimunaraqahai ne nanti nanti monue voqavata vara vataavo? turave.

¹⁶ Minti tuvaro vira kaiqa vaiinti vovano naane anirero tiharo, Noravauvu, are 20 kinaa timiaramanta te viraqohai kaiqa varakema 200 kinaama vara vatauro, turave. ¹⁷ Minti tuvaro nora vaiinti viva virara tiharo, Are koqema kehara kaiqa varaara. Are inaara kaiqa koqemakera varaaramantara ti, te nora kaiqavata ai amirarave. Te ai noraiqama kaarirara are vatuka kauqurutantaqaama raqikinarave, turave.

¹⁸ Minti tuvaro vira kaiqa vaiinti vovano anirero tiharo, Noravauvu, are 20 kinaa timianaraqohai te kaiqa varakema 100 kinaama vara vatauro, tuvaro ¹⁹ vi vaiintirara tiharo, Te ai noraiqama kaarirara are vatuka kauqurunavuqaa raqikinarave, turave.

²⁰ Minti tuvaro vira kaiqa vaiinti vovano anirero tiharo, Noravauvu, are 20 kinaa timianara maa nena qaqi varaane. Te vi monura tavunaqi apuqamake kukeqa taunarave. ²¹ Are kaiqara vuana vaina ti variara vaiintiva variaramantara ti, te ai aatu qeteha vauro. Are voka ia haikara hampi vare variaravave. Are voka kara ututaara oru hampi qanti variaravave, turave.

²² Minti tuvaro nora vaiinti viva tiharo, Oho, are qora kaiqa vaiintima vaira iarao. Te nina uva virara irihama ariqaa uva vatarerave. Are tirira tihara, Are kaiqara vuana vaina ti variaravave. Are voka ia haikara hampi vare variaravave. Are voka kara ututaara oru hampi qanti variaravave, tianarave. ²³ Minti tiharama are nantiharae kia vi monura *benki* naavyuqi vuru vatera iarao? Are mintiaraitirio, te orurante ani vaiha vi monuraravata, viva kaiqa aututairia *interes* monuvata, monu vatamake homa varauraitirio, turave.

²⁴ Minti tivakero viva mini himpite vau vaiintikara tiharo, Ne vi vaiintiraqahai vira 20 kinaa raqiake vare vuru 200 kinaa vataina vaiintira amiate, tumanta ²⁵ vika aqao ti, Vi vaiintiva airi monu 200 kinaama vataivo, tuvaro ²⁶ viva tiharo, Te tiari iriate. Vo haika vate vaiintika vikama voqavata varevarave. Kia vo haika vataira vaiintiva vairaque viva ina haikara inaara haikavata te qaqqinima vara kararave, turave.

²⁷ Minti tivakero viva tiharo, Vo vaiintinavu ti navutaiqiha tirira viva tinavuqaa raqikiantorave tia vaiintika, ne vika ravaaqavu vare ti tivuqaa vuru ke aru taiqa kaate, turave, tiro. Ihuva vi uvvara tuqantaakero turama.

Vaiinti nahenti Ihura quahama amite vauvaro viva Ieruharemiqi vura
(Matiu 21:1-11; Maaki 11:1-11; Ioni 12:12-19)

²⁸ Ihuva minti tivakero nai vaintiaravata Ieruharemin viharo viva naane avuni vura.

²⁹ Viva avuni vumanta Betapasivata, Betanivata, Orivi Aiqina auvoqi vau vatukatanta aumanto vauvaro Ihuva nai vainti taaraqanta nititero tiharo, ³⁰ Netanta viti vatukaraqi vuute. Netanta orure tavaivarovi vauvatukaraqi *donki* qaraaka kantaruma teva varianarrove. Vi *donkiraqaa* kia vaiintivanovata vira tauvaqaqaa oqu viha ni variarave. Netanta oru *donki* vira ranta kema, kuvantu kema maini vare vuru timiate.

³¹ Vovano nitanterara tiharo, Nantihae netanta vira qanti variavo? tirera, netanta mintima nai vira tiva amiate: Titanta Noravano virara timanta anuro, tiate, tiro.

³² Ihuva minti tivakero vitanta nititomanta vitanta orure tavavarovo Ihuva tuntemakero vivauma vaura. ³³ Vitanta *donki* qanti vaumanta *donki* vira qokavarana vitanterara tiha, Netanta nantihae vira kuvanti variavo? tumanta ³⁴ vitanta tiha, Titanta Noravano virara timanta anuro, ti. ³⁵ Vitanta minti tivake *donki* vira kuvantuke vare vuru Ihura amura.

Vuru Ihura ami, vika nái utavaaqa *donki* vira tauvaqaqaa vuqi amite Ihura kahaquvaro Ihuva viraqaata vaarirero oquvi vaharo vura.

³⁶ Ihuva *donkiqaa* oquviro aaraini vi vaumanta vaiinti nahenti Ihura quahama amitareka vika nái utavaaqaa ravaqaake aara vaura vuqi amite vauvaro ³⁷ Ihuva Ieruharemi aumanto Orivi Aiqinaqaahairo vu aararaqaa oru romanta vira avatacqí nuka airitahaa ruvaaqumavi aakara ntavaaqi viha Ihura kaiqa tavorara iriha quaheha Kotira autu tuahereha vaura. ³⁸ Vika Kotirara tiha,

Noravaavu, avuhainaa vaiintivano nina autuqaa aninara koqema amitaane. (*Ihi 118:26*)

Kotiva naaruvalihairo tinavu maateraiqama timitaarire. Kotira mpeqa okaravano nai virini uritarakero takuqiharo vairara ti, kaiqe tenavu vira autuqai tuahera kaare, ti.

³⁹ Vaiinti nahenti minti tivaqí vi vaumanta Parasi vaiintinavu vika hampata vauka Ihurara aqao tiha, Maara ti variara vaiintio, nena vaintinavu evaara variate tiane, tuvaro ⁴⁰ Ihuva vika nái tiva nimo tiharo, Vika evaara vaivera, aaraqaa vai orika vika naveraitiha ti hutu tuaherama kevarave, tiro.

Ihuva Ieruharemiqi vaukara iqi rata nimitora

⁴¹ Ihuva minti tivakero Ieruharemini aumanto anirero nora vatuka vira tavero vira iqi rata amitero tiharo, ⁴² Mpo, are maateraiqhara vi vaina aarara tavaataara vaivara are kia tavaanarave. Vi aarava kukeqa vivarara tira, are kia vira tavaarao.

⁴³ Naantiara vo enta anintaira ai navutaaka aninte vika ai vaantaavura tataaqa vata ntavaaqi uri, ekaa virante airante ututumate, ekaa vatuqaqí vi aararavata kuvaita, ekaa hihai hihai ani ai arireka auti vaivarave.

⁴⁴ Vika ai aatarake aivata, ai avutaqai vai vaiinti nahentikavata, ekaa aru taiqa kevarave. Vate Kotiva ai kahaqjaina entava vaivaravata, are kia virara kankomakera iiriario. Vira kaara ai vehi autukeha ekaa ori tampamake vatora ekaa ravantiaqa aqukaivaro kiama vogavanovata qaqi varianarove, tiro.

Ihuva Ieruharemi vaukara minti tura.

Ihuva Kotira Naavuqi koqaa kaiqa vare vauka nititama kora

(*Matiu 21:12-17; Maaki 11:15-19; Ioni 2:13-22*)

⁴⁵ Ihuva minti tivakero Kotira Naavuqi oriqetero tavomanta koqaa varareka kaiqa auti vau vaiintika viraqí vi kaiqara vare vauvaro Ihuva vika raantu veva vahaqaini kero tiharo, ⁴⁶ Kotira vukuqi Kotiva mintima turave: *Vaiinti nahenti ti naavuara Kotira aare varia naavurare tivarave, turave.* (*Aisaiaa 56:7*)

Oh, ne minti variavarora tiro, maa naavuva muara vaiinti kukeqavi vahia uki varia naavuraiqama vivo, tiro. ⁴⁷ Ihuva minti tivakero viraqaahairo Kotira Naavuqi oru vo enta vo enta vahiaro vaiinti nahenti vakaaka tiva nimiqiro vi vaura.

Mintiaqiro vumanta Kotira kaiqa vara amite vau vaiintika vika noranavuvata, maara okara ti vau vaiintikavata, nora vaiinti vonavuvata, vika Ihura arukarare ti, tavomanta ⁴⁸ qaqi vaiinti nahenti ekaa vika Ihura uva irireka auti vaumantara ti, nora vaiintinavu vira aruke aarara ranteha tavovaro kia ho vaura.

20

Ihurara tavave ai noraiqama kaivarae are vi kaiqara vare variarao tura

(*Matiu 21:23-27; Maaki 11:27-33*)

¹ Vo enta Ihuva Kotira Naavuqi Kotira vakaaka koqe vakaaka vaiinti nahenti tiva nimi vaumanta Kotira kaiqa vara amite vau vaiintika vika noranavuvata, maara okara ti vau vaiintinavukavata, nora vaiinti vonavuvata, vika anire ² Ihura atiha tiha, Are ta vaiintiva vaharae maa kaiqara vare variarao? Tavave ai noraiqama kaivarae are maa kaiqara vare variarao? Are tinavu tiva timirage iriare, ti.

³ Vika minti tuvaro Ihuva tiharo, Kaiqe te naane uva vo ni irama nimitaare. ⁴ Tavave Ionira noraiqama kovaroe viva vaiinti nahenti namari nimi vaurave? Kotivae, qaqi vaiintivanoe, vira noraiqama kovaro viva minturave? Ne ti tiva timiqe iriare, tiro.

⁵ Ihuva minti tumanta vika nai ire nai ire iha tiha, Tenavu nana uvae tirarave? Tenavu tiha, Kotiva vira noraiqama korave, tiarera, viva tinavuara tiharo, Ne nantihae Ionira uvara kia quqaave tiavo, tiantorave. ⁶ Tenavu tiha, Qaqi vaiintivano vira noraiqama korave, tiarera, vira kaara vaiinti nahenti, maa naavuraqí ruvaaqumavi variaka ori utu vare tinavu avauta ruqutu kevorave. Qaqi vaiinti nahenti maaka Ionirara tiha, Viva paropeti vaiintivano vaurave, ti variarave, ti.

⁷ Vika minti tivake Ihura tiva ami tiha, Nai tavave Ionira noraiqama korave? Kia tenavu virara kankomake irunarave, ti.

⁸ Vika minti tuvaro Ihuva vika nái tiva nimo tiharo, Ne minti tiavera tevata tinta noraiqama kaimanta maa kaiqara vare vaunarara kia nintavata tiva nimirerave, tiro.

*Uaini naaho ututorara uva tuqantaakero tura
(Matiu 21:33-46; Maaki 12:1-12)*

⁹ Ihuva minti tivakero uva vo tuqantaakero vaiinti nahenti tiva nimiro tiharo, Vaiintivanu *uaini* naahoqiqi ututero viraqaaahairo niara vataini vireva iharo vokuka tiva nimiro tiharo, Ne ti *uaini* naahoqaa raqiki timite vaiqe te vuare, tivakero nai maaqa mini kero airi enta vo vataini vaireva vurave.

¹⁰ Mini oru vauvaro *uaini* hiqaina entava anirovaro viva nai kaiqa vaiinti vo atitero tiharo, Oru ti naahoqaa raqiki timite varia vaiintika vuru tiva nimiramanta vika *uaini* tintavata hiqi timitaate, turave. Minti tuvaro vira kaiqa vaiintivano mini vumanta vika vira kaiqa vaiinti ruqutuke kaavu umiqake vatovaro viva kia *uainivata* vararaitiro, qaqi orurantero anurave. ¹¹ Viva qaqi orurante anuvaro viva nai kaiqa vaiinti vo atitovaro vumanta vika viravata ruqutuke kaurira haika amuvaro vivavata qaqi orurantero anurave.

¹² Mintuvaro naaho qova nai vainti vo atitovaro vumanta vira naahoqaa raqiki amite vauka vira tave nai tiva ami nai tiva amiha tiha, Maa vira maaquvanoma anivo. Kaiqe vira arukaariraro vira naahovano tinavuniqama vuarire, turave.

¹³ Mintuvaro naaho qova tiharo, Te virara nantie irarave? Kaiqe te tenta maaqu, tinta hantuqa vainara atitaairaro viva viramanta virara nai vira maaquvanove tivakeha vira koqema amitaate, turave.

¹⁴ Minti tivakero viva nai maaqu atitama kovaro vumanta vira naahoqaa raqiki amite vauka vira tave nai tiva ami nai tiva amiha tiha, Maa vira maaquvanoma anivo. Kaiqe vira arukaariraro vira naahovano tinavuniqama vuarire, turave.

¹⁵ Minti tivake vika naahoqihai aqquani vira vara vaati aquke arukorave, tiro.

Ihuva vi uvarara tuqantaakero minti tivakero vika irama nimitero tiharo, Minturara tiro, naaho qova nai maaqu arukora kaara nantie ianarove? ¹⁶ Naaho qova anirero nai naahoqaa raqiki varia vaiintika aru taiqakero, vo vaiintinavuara ti naahoqaa raqiki timitaatema tianarove, tiro.

Ihuva minti tumanta vaiinti nahenti mini ruvaaqumavi vauka aqao ti, Kiama viva mintianarove, tuvaro ¹⁷ Ihuva vika taveharo vika irama nimitero tiharo, Maa uvava Kotira vukuqii qara ntuvatora vira okaravano nana uvae vaivo? Ne ti tiva timiqe iriare:

Ori naavu kaeheha vo oriara, kia koqe orive tivake qaqrakaa oriva, vi orivama naaqraiqama vivo, turave. *(Ihi 118:22)*

¹⁸ Vi oriragaqaa tuantapo iro hiqiri virava rukavuma vuanarove. Vi oriva virihairo vaiinti voqaa hiqiri virera, vi vaiinti ruqutu kero konkomaiqama kaanarove, tiro.

¹⁹ Minti tumanta maara okara ti vau vaiintikavata, Kotira kaiqa vara amite vau vaiintika vika noranavuvata, vika tiha, Viva vi uvvara tiharoma tinavuarama uva tuqantaakero ti vaivo, ti. Minti tivake vika Ihura ravaaqqavu karare tihavata, qaqi vaiinti nahenti naatu qeteha kia ho Ihura ravaaqqavu kora.

*Sisaara takisi aqu amiterara Ihura irama amitora
(Matiu 22:15-22; Maaki 12:13-17)*

²⁰ Vika vaiinti nahenti naatu qeteha kia Ihura ravaaqqavu karaiti, vika qaqi kantahai vira aitutiha vaiinti vonavu nitite tiha, Ne oru qaqi vaiinti voqaa vaha, vira uva iriqi vivaro viva hampi uva tirera, ani tinavuvata tivita kaiqe tenavu *kamaanira* vuru tiva amiariraro ani Ihura ravaaqqavu kaarire, ti.

²¹ Vika minti tivake vaiinti vonavu nititomanta vinavuka orure Ihurara mintima ti: Maara ti variara vaiintio, tenavu tavaurara are vaiinti nahenti avuqavu uvaqai tiva nimi variaravave. Are nora vaiintiaravata, qumina vaiintiaravata, vohaa qarama keraqai uva tiva nimi variaravave. Are vaiintivano Kotira aaraqaa vuainarara avuqavuqama kera tinavu tiva timi variaravave. ²² Are maa uvvara tinavu tiva timiraqe iriare. Tenavu Kotira uva irihama hoe tenavu Romeni vatanaaka vika avuhainaa vaiinti Sisaara *takisi* aqu amitararave? ti.

²³ Vika minti tuvaro Ihuva irumanta vika virara hampi uva tiarire tivake minti tuvaro Ihuva vika tiva nimiro tiharo, ²⁴ Ho nenavu monu vo vara kaiqe tavaare, tiro. Tumanta vika monu vara kovaro tavero tiharo, Monu viraqaa taro virie vaivo? Tara autue vaivo? tiro. Minti tumanta vika tiha, Vira Sisaarave, tura.

²⁵ Tuvaro Ihuva vika tiva nimiro tiharo, Virara irihama ne Sisaava ina haikara nai amitaate. Ne Kotiva ina haikara nai amitaate, tiro.

²⁶ Ihuva minti tumanta vika Ihurara vaiinti nahenti hampi uva tiva nimirire ti, tavovaro kia viva hampi uva tumanta vika Ihuva tu uvvara iri tiha, Ike, viva tinavu uvavata aatara kero koqe uva tivo, tivakeha kauqu runkinkirimake viraqaaahai qaqrake tirema vaura.

*Satiusi vaiintinavu Ihura irama amitora
(Matiu 22:23-33; Maaki 12:18-27)*

²⁷ Vaiinti vonavu Satiusi vaiintinavu vika nái maara uva iriha tiha, Vaiintivano qutu viro ekaarama qutu vuanarove. Viva kiama qaiqaavata ho qaqi himpuanarove, ti vau vaiintika orure Ihura irehamo tiha, ²⁸ Maara ti variara vaiintio, tinavu kaivaqava Mosiva maara uva tinavu tiva timiharo mintima qara ntuvu torave: Vaiintivano kia vainti vataraitiro, qutu viraro vira qatavanoe vira vakaavae vira naata varatero vainti kuuvuarama amitaanarove, turave.

²⁹ Tenavu tiarirara iriane. Haaru qata vakauka 7navu vaurave. Vinavuka avuhainaava nahenti varatero kia vainti vataraitiro qutu vuvarora tiro, ³⁰ vira qata naantiaraihainaava viva vira naata varatero vivavata kia vainti vataraitiro, qaqi variqi viro qutu vurave. ³¹ Viva qutu vuvaro vitanta tavaaraihainaava vi nahentira varatero kia vainti vataraitiro, qaqi variqi viro vivavata qutu vurave. Mintiaqi vi, ekaa vi ankuka vi nahentira varate kia vainti vataraiti, ekaa qaqi qumina qutu vurave.

³² Qumina qutu vuvaro nahentivanovata variro qutu vurave. ³³ Naantiara vaiinti nahenti qaiqaa qaqi himpi vai entaraqaa vi nahentiva tara naatavanoe varianarove? Viva qaqi vau entaraqorainti 7navu varatorave, ti.

³⁴ Satiusi vaiintinavu minti tuvaro Ihuva vika nái tiva nimiro tiharo, Vataini varia vaiinti nahentika nai varate nai varate i variarave. ³⁵ Naantiara Kotiva hini vaiinti nahentiera ne koqe vaiinti nahentive tivakeharo vika qaqi himpima kairamanta qaqi variqi vika, vika kia nai varate nai varate ivarave.

³⁶ Vika *enselinavu* voqaara vaihama kia qaiqaa qutu vivarave. Kotiva vika nái quntama teraqaahairo qaiqaa qaqi varo himpima kaainarara ti, vika Kotira vaintima vaivarave.

³⁷ Vaiintivano qutu viro qaiqaa qaqi himpuaina okarara ni kaivaqava Mosiva qara ntuvu torave. Kotiva iha ite vau katariraqihairo Mosirara uva tu entara Mosiva Nora Kotirara mintimakero qara ntuvu tero tiharo: *Varigavano vaireva, viva Eparahaamiraqaa-vata, Aisaakiraqaavata, Iekopiraqaavata, raqiki vaivama vaivo*, turave.

³⁸ Ho iriate, Varigavano Kotiva kia qutu viro taiqavi haikaraqaa raqiki vaivama vairavauve. Viva qaqi variqi vi vai haikaraqaa raqiki vaivama vaivo. Vaiintivano qutu vivaro Kotiva qaqi vai vaiintiraqaa raqikintema kero, viva vira maraquraqaavata raqiki vairave, tiro.

³⁹⁻⁴⁰ Ihuva minti tumanta maara uva okara ti vauka hininavu qeteha tiha, Tenavu Ihura vo uva irama amitaariraro tinavu uva aatara kaantorave, tivake Ihurara tiha, Maara ti variara vaiintio, are koqe uva vika nái tiva nimira iarao, tivake qaqirake tirema vaura.

*Ihuva Mesaiaara okarara vaiinti nahenti irama nimitora
(Matiu 22:41-46; Maaki 12:35-37)*

⁴¹ Ihuva vika irama nimitero mintima tiro: Vaiinti hininavu tiha, Kotiva atitaarira vaiintiva *Mesaiaavano Devitira* anku vohaa anku vaiintiqaima varianarove, ti variarave. Nantihae vika minti ti variavo?

⁴² Devitiva nai ihi qara ntuvato vukuraqi nai tiharo:

Noravano ti Nora Vaiintiara tiharo,

Are uritarera ti kauqu tanaraini oquivi vairaqe ⁴³ te ai navutaaka aru naatara nimitaarirara are vikaqaa nena aiqu ntava taane, turave. *(Ihi 11:1)*

⁴⁴ Devitiva haaru mintima qara ntuvu torave. Devitiva *Mesaiaavano* qovaraiqiainarara tiharo, Viva ti Nora Vaiintive, turave. Devitiva minti turara tiro, nantiakeroe *Mesaiaavano* Devitira nainti ho varianarove? tura.

*Maara okara ti vau vaiintika qora kaiqara rauriha variate tura
(Matiu 23:1-36; Maaki 12:38-40; Ruki 11:37-54)*

⁴⁵ Ihuva vika irama nimotomanta vaiinti nahenti ruvaagumavi vauka vira uva iri vauvaro Ihuva nai vaiintinavuara tiharo, ⁴⁶ Nenavu maara okara ti varia vaiintikara rauriha variate. Vaiinti nahenti vika taveha uva manteha quahaate ti, vika vukai tavuna koqe tavuna rumpa vare vaiinti nahenti nivuqaa *maaketiqi* vi ani variarave. Vika maara naavuqi oriqete qora tainta qaqirake oru koqe taintaqaqai oquivi variarave. Vika ovata naaraqaa vaiba vikara nora vaiintive tiate ti, vaiinti taruka oquivi variaraqaqai vikavata oru oquivi variarave.

⁴⁷ Vika tentoqa kaa nahentika naavuvata, airairavata, muara vareha tiha, Vonavu tinavu vaaku kaiqa taveha tinavuara qora vaiintive tivorave, ti, vika vaiinti nahenti nivuqaa Kotira vukai aare variarave. Oho, vira kaara vikaqaa uva uritareroma varianarove, tiro.

Ihuva turama.

21

*Vehi nahentivano Kotira kaiqara iriharo inaara monu taquqi aqukora
(Maaki 12:41-44)*

¹ Ihuva Kotira Naavu vaunaini vaiharo tavomanta airi airaira vato vaiintika anire Kotira kaiqara irihama nora monu taquqira vaati aquke vaura. ² Vika minti vauvaro Ihuva vaiharo tave vauvaro tentoqa nahenti vehi nahentivano anirero vivavata taquqira monu uapaara taarauruqai vaati aqu kora.

³ Viraqi vaati aqukovaro Ihuva tiharo, Ho tavaate. Vehi nahenti tentoqavano aqukai monuva ekaa airaira vataaka aqukaa monuravata aatara kaivo. ⁴ Airi airaira vate variaka vika nai monu hiniqai taquqi vaati aqukaavo. Vi nahentiva vehi vaiharo nai vatai monura ekaa aqu kaivar, kia viva nai kara varaarira monuva hinivanovata vaivo, tiro. Ihuva turama.

*Kotira Naavu rampai taiqakerara tura
(Matiu 24:1-2; Maaki 13:1-2)*

⁵ Ihura vainti vonavu Kotira Naavuara tiha, Vi naavura tavaate. Vira koqe naavuve. Vaiinti nahenti Kotirara irihama monu aqukaamanta koqe ori, vo ori vo ori varake koqe naavu kaqataa naavuva vairave, ti.

⁶ Vinavuka minti tuvaro Ihuva tiharo, Ne vate maa naavura tave variarave. Oho, ⁷ Naantiara navutaaka ani, ekaa maa naavura rampaikе naavu vira kaqato orira, vo ori vo ori vara aqu kaivar kia ori voqavanovata nai tauvaqaaqaa nai tauvaqaaqaa varianarove, tiro.

*Naantiara airi maaravano qovarama vuainarara tura
(Matiu 24:3-14; Maaki 13:3-13)*

⁷ Ihuva minti tumanta vika tiha, Maara ti variara vaiintio, tarentae mintianarove? Nana nana haikavanoe qovaraiqiraqe tenavu vi haikaraqaa ampeqamake taveha vi entava aniraarirava aumantoma vaivo tirarave? Are virara tinavu tiva timiraqe iriare, ti.

⁸ Minti tuvaro Ihuva vika tiva nimiro tiharo, Vovano virara ni una uva tiva tiva nimiantorave tiha ne raurihama variate. Naantiara vainti airithaa anire ti hutu reha tiha, Kotiva ti tititaimanta anuraukave. Te maa vi vaiintikave. Ho vi entava aniraivo, tivarave. Vika minti timanta ne kia vika avataqi vuate. ⁹ Ne vaiha irivaro vo vatanaava vo vatanaara vataakero iqoka raqiramanta ne kia qetaate. *Kamaanira* hampata iqoka raqimanta ne kia qetaate. Vi haikava naanema qovaraiqiramanta ne kiama tiha, Ekaara entavano aniraivo tiate, tiro.

¹⁰ Ihuva minti tivakero viva qaiqaavata tiva nimiro tiharo, Vo vatanaava vo vatanaara vataakero raquanarove. Avuhainaa vainti vovano avuhainaa vainti vo vataakero raquanarove. ¹¹ Naantiara ekaa vatainai vaturavano noraiqama kero utuanarove. Karara nararaiqi entava vo enta vo enta varianarove. Rovaravano aruaina entava varianarove. Naantiara naaruvaini aatu itaaina haikava vo haika vo haikavano qovarama viramanta vainti nahenti vi haikara ampeqamake taveha tiha, Ike, nana haikavano qovaraiqirevae minti vaivo, tivarave.

¹² Kia vi haikava vi haikava qovaraiqiaina entara vika ni naane ravaaqavuke qraiqama nimitevarave. Vika ni ravaaqavu vare vuru maara naavuqi *ko* tivake, ni karapuhiqama kevarave. Ne ti kaiqa vare yaimantara ti, vika ni ravaaqavu vare nora vainti nivuqaave, avuhainaa vaintinavu nivuqaave, vuru kevarave.

¹³ Mintima vare ni vuru kaivaro vi entarama ne ti uva vika tiva nimiva varianarove. ¹⁴ Vika *ko* nimire imanta ne kia airi avu aato utiha tiha, Nana uvaqohiae tenta auta ntiha tirarave, tiate, ¹⁵ Tema vi entara ni kahaqari ne koqemake kempuka uva ho tivarave. Ne vi uvava minti mintimake timanta ni qoraiqama nimiteka kia ho ni uva aatara kevarave.

¹⁶ Naantiara niqaa uva vataate ti, ni noka qokave, ni qata vakaukavarave, ni vohaa ankuve, ni tontinavuve, vikama ni qovaraiqamake vaimanta ni ravaaqavuke varave. Ni ravaaqavuke ni vonavu vama kevarave. ¹⁷ Vi entara ekaa vainti nahenti niara Ihura vaintive tihamra vika ni iri qoraiqama nimitevarave. ¹⁸ Vika mintimata ne kia qetaate. Ne homa vaivarave. Kia ni qjata kauki voqavanovata kakakimaviro taiqa vuanarove. ¹⁹ Ne kempukaiqamake variqi vivera, ne homa ekaa enta qaqi variqi vivarave, tiro.

*Ieruharemi taiqake entarara tura
(Matiu 24:15-22; Maaki 13:14-20)*

²⁰ Minti tivakero Ihuva tiharo, Ne vo enta tavaimanta iqoka vaintinavu Ieruharemi vautuka ututuma taimanta ne tiha, Ieruharemi taiqaaaina entava aumanto vaivo, tiate.

²¹ Vi entara Iutiaini vaika himpi aiqu autute aiqina vainaini ruqemake vuate. Vi

entara Ieruharemiqi vaika himpi kante viraqihai ruqemake vuate. Vi entara Ieruharemi auvahianta vaika nora vatukaqi kia vuate.

²² Vi entara vaiinti nahenti nái qora kaiqa varera kaara Kotiva vika ntaihaanarove. Vi entara haaru Kotira vukuqi vikara qara ntuvato uvava vivauma varianarove.

²³ Vi entara nahentinavu vainti taiqaa vikave, vainti naama nimi vai nahentikave, oho, vi entara vika qoraiqama vivarave. Vi entara maa vataraqaa vaika nora maaraqi vailha vogamake qoraiqamavi variqi vivarave. Vi entara Kotira arara itairaro maa vatanaaka ntaihamaa kaanarove.

²⁴ Vi entara iqoka vaiintinavu anire vika nái iqoka papipeqohai maa vatanaaka hininavu aruke, hininavu rumpa vare vo vataini vo vataini vuru kevarave. Vi vatanaaka kia Kotira uvavata iriaka Ieruharemiqi vi aninha rahitama kevarave. Vika Ieruharemini variqi vi vaivaroo „Kotiva hove tina entaraqaa, vika Ieruharemiqaa raqiki entava taiqa vuanarove.

Ihuva nai qaiqaa tuvuainarara tura

(*Matiu 24:29-31; Maaki 13:24-27*)

²⁵ Naantiara naaruvaini vogara ina haikava qoraiqianarove. Kuarivanove, toravanove, opu makauvanove, vi haikava vi haikava aahuvaliqiro vairamanta vaiinti nahenti tave tiha, Oho, nana haikavaneo qovaraiqireva auti vaivaro vi haikava vi haikava minti vaivo? tivarave. Naantiara vevara nora namarivano noraiqaakero qaki qakiharo taku takaa ti vairaro vataini vaika vo vatanaa vo vatanaaka namari vira aatu vogamake qetehama vaivarave.

²⁶ Naantiara naaruvaini vaira haikava vaiharo hampigama kero qaki qaki i vairamanta vaiinti nahenti vira tavehama nantie ianarove tivakehama qetehama avu rira ira hiqiri vaivarave.

²⁷ Minti vaira ekaa maa vata maataraqaa vaika tave vase te Vataini Vatatai Vaintika naaruvaihai tonavugaa tuvi variari vika ti tavevarave. Te vahehema taarira haikava vogamakero takuqiharo hantaiqi vairage te kempukavano tuvirerave. ²⁸ Naantiara vi haikara vi haikarara tunara hogarama tairamanta ne kia qetaraiti, ne qaqi himpi qiaa tuaherake vaaviaramavi vailha tiha, Tinavu kuvantu timitaaina entava aumantoma vaivo tiate, tiro.

Ihuva fiki katariara tura

(*Matiu 24:32-35; Maaki 13:28-31*)

²⁹ Ihuva minti tivakero viva uva vo tuqantaakero tiva nimiro tiharo, Ne *fiki* katariaravata vo katariaravata iariate.

³⁰ Ne tavaavarro *fiki* qaraaka ankuri ntaimanta ne tiha, Nora kuari itaaaina entava aumantoma vaivo, ti variarave. ³¹ Vira voqaantemake, naantiara qovarama vuaina haikarara tunara ne viraqaa ampeqamake tave tiriara tiha, Kotiva tinavuqaa raqikiarira entava aumantoma vaivo, tiate.

³² Te quqaama turo. Maa entara vaika kia taiqa vivaro ekaa vi haikarara te turava vivauma varianarove. ³³ Naaruvavanovata vatavanovata taiqa viraro ti uvavanoqaima kia taiqa viraitiro, qaqlima variqiro vuanarove, tiro.

³⁴ Ne rauriha variate. Ne airi karavata iha namarivata namaqi viha, vataini vai haikarara noraiqaake iriqi vivorave. Ne mintiaqi vivaro vi entava anintaira ne kia geramate vaivorave. ³⁵ Vi entava qovaraiqireva vaara tintainantemaka kero, ekaa vataini vaika ravaqaqvaa kaanarove. ³⁶ Ne rauruqi vihamo Kotira aaraivarо viva ni kempukaiqama nimittaria ne naantiara anina haikara ho aataro kevarave. Ne vi haikara ho aatarake naantiara ti Vataini Vatatai Vaintika tinavuqaa ho himpite vaivarave, tiro.

³⁷ Ihuva minti tivakero viva vo entanavu vaiharo Kotira Naavu vaunaini kuariqaa vaiinti nahenti vakaaka tiva nimiro entaqi Orivi Aiqinaqaa oru vaitora. ³⁸ Viva mintiaqiro vumanta vaiinti nahenti vaaka toqaqira himpi Kotira Naavu vaunaini vira uva irireka ani ruvaqaumavi vaura.

22

Vika Ihura arukareka auti vaura

(*Matiu 26:1-5, 14-16; Maaki 14:1-2, 10-11; Ioni 11:45-53*)

¹ Kia Noqavu Mparetira ovata no entava anirora, virarama Vehakuma Nimito Entarave tu entava aniomanta ² Kotira kaiqa vara amite vau vaiintika vika noranavuvata, maara okara ti vau vaiintikavata, vaiinti nahenti naatu qeteha, vika Ihura evaara aruke aarara rante vaura.

³ Minti ti vauvaro Iutaasi Ikeriotiva, viva Ihura vainti 12navuqihairo vovano vauvaro Sataaniva vira avu aatoqi viqetovaro viraqaahairo Iutaasiva Ihura qovarama kareva auti vaura.

⁴ Iutaasiva himpiro oru Kotira kaiqa vara amite vau vaiintika vika noranavuvata, Kotira Naavuqaa raqiki vau kiripukavata, viva vika tiva nimiyo tiharo, Te minti mintimiqi vuurima ne Ihura ravaaqavu kaate, tiro.

⁵ Minti tumanta vinavuka quahake tiha, Tenavu ai monue amirarave? tuvaro Iutaasiva eo tivakero „monu varero,⁶ vi entaraqaahairo viva tiharo, Kaiqe te tavaarira kia airi vaiinti nahenti Ihura vataake vase vi entara te vira uqetake qovarama kaare, tiro.

Ihuva tumanta Vehakuma Nimito Karara gerama vatora

(Matiu 26:17-25; Maaki 14:12-21; Ioni 13:21-30)

⁷ Iutaasiva minti tivakero vauvaro Kia Noqavi Mparetira ne varia entava anirora. Vi entaraqaa haaru enselivano kia Isareru kaivaqaukavara arukaraitiro, vika vehakuma nimitero aitarkeri Isipi vaintiqai aruko, entarara irihama vi vatanaaka sipisipi naati aruke ne entava anirora.

⁸ Anirovaro Ihuva Pitaaka Ionika nititero tiharo, Netanta oru Vehakuma Nimito Karara gerama taiqe tenavu oru naare, tumanta ⁹ vitanta vira ireha tiha, Taraqie tetanta vi karara gerama tararave? ti.

¹⁰ Minti tuvaro Ihuva tiharo, Ho iariate. Netanta vatukaini oru vivaro vaiinti vovano namari taqu kaqa varero aaraqaa anirava ani nitanta ntita kaanarove. Ho netanta vira avataqi vivaro viva nai naavuqi orietaira netantavata viraqi oriqete ¹¹ naavu qorara mintima tiate, Maara ti vai vaiintiva ariara mintimama tivo: Te ta rum uraqie tenta vaintinavu hampata vaiha Vehakuma Nimito Karara nararave? tivo, tiate.

¹² Netanta minti tivaro viva nora rumu, maari kanta vaina rumura taintavata viraqi vainara nitanta numiqaira ho netanta vi rumuraqira kara gerama vataate, tiro.

¹³ Ihuva minti tumanta vitanta himpi orure tavovaro ekaa haikavano Ihuva tuntemakero vivauma vaumanta vitanta Vehakuma Nimito Karara oru viraqi geramake vatora.

Ihuva nai vaintinavu hampata kara nora

(Matiu 26:26-30; Maaki 14:22-26; 1 Korinti 11:23-25)

¹⁴ Vitanta kara geramake vatovaro enta umanta Ihuva nai noraiqamako vaiintinavuka hampata vi rum uraqi kara tainta tataqa oquivi vaura.

¹⁵ Viva vika tiva nimiyo tiharo, Te aiha vira haika vararerera ihama, maa karara Vehakuma Nimito Karara ni hampata vaiha naataa imanta nererave. ¹⁶ Maa entaraqaahai kia te Vehakuma Nimito Karara maini qaiqaavata nererave. Naantiara Kotiva raqikiarira entava anintairamanta ne vi entara maa karara ne okarara kankomake irikiae viraqaahai te qaiqaa vi karara nererave, tiro.

¹⁷ Ihuva minti tivakero viva *uaini kaapu* varakero Kotirara koqema ira iarao tivakero tiharo, Maa *kaapura* varake ne ekaa viraqi naate.

¹⁸ Maa entaraqaahai kia te *uaini* naraiti, qaqi variqi vuariraro naantiara Kotiva raqikiarira entava anintairaque te vi namarira qaiqaa nererave, tiro.

¹⁹ Minti tivakero viva mpareti varakero Kotirara koqema ira iarao tivakero mpareti vira nkuikero nai vaintinavu nimiyo tiharo, Maa ti vaatama vaivo. Te niarao ti, vira ni nimuro. Te vate minti iainantemake, nevata naantiara mintimake maa karara neha tiriara iriha variate, tiro.

²⁰ Minti tivakero mpareti varakero namakero vohaa qaramakero namari *kaapuvata* varakero nimiyo tiharo, Te niarao ti, te maa namarira qihia nimitauro. Kotiva vaiinti nahenti hampata voahaaniqama vireva qaraaka uva tiva taatau taainara, vi uvava kempukaiqama vuarire tiro, ti naarevano nteharo vi uvava kempukaiqama kaanarove, tiro.

²¹ Minti tivakero Ihuva tiharo, Tavaate, ti qovarama kaarira vaiintiva maini vaharo ti vataakero kara ne vaivo. ²² Ti Vataini Vatatai Vaintika ti harukerara ho Kotiva tiriara vi aararaqaa vuane tiva tairave. Ti harukaate tiro, ti qovarama kaaina vaiintirara te oho tiva amitauro. Vi vaiintiva nai voqamakero qoraiqama vuanarovema turo, tiro.

²³ Ihuva minti tumanta vira vaintinavu nai ire nai ireha tiha, Aqao, nai tavave tinavuqihairo vi kaiqara ho mintimakero varaanarove? tura.

Tavave tinavuqihairo nora vaiintivano varianarove tura

²⁴ Ihura vaintinavu vaiha tiha, Tavave tinavuqihairo nora vaiintivano varianarove? tivakeha nai ati nai atiha vauvaro ²⁵ Ihuva tiharo, Maa vataraqaa variaka avuhainaaka,

vika nái vaiinti nahentiqa raqikihama tiha, Te nora vaiintivano vaunarara ti, ne ti uvaqai iriha tiriara koqe vaiintive tiate, ti variarave.

²⁶ Nenavu kia vika aanaraate. Niqihairo vaiintivano nora vaiinti vaireva irera, viva inaara vaiinti voqaantema kero variarire. Niqihairo vaiintivano niqaa raqikireva irera, viva vo vaiinti paanaa kaiqa vara amitai vaiintira voqaara variarire.

²⁷ Ta vaiintivave nora vaiintivano vaivo? Vaiintivano oquiviro vaharo kara ne vai vaiintiva, vive nora vaiintivano vaivo? Vira kaiqa vaiintivano kara ami vaiva, vi vaiintivave nora vaiinti vaivo? Aqao, vaintivano oquiviro vaharo kara ne vai vaiintiva, vi vaiintivama nora vaiintivano ma vaivo. Ho te ni avutana vahia kia te niara ti kaiqa vara timitaate tiraiti, te ni kaiqa vara nimite vauraukave, tiro.

²⁸ Ihuva minti tivakero viva tiharo, Vo vaiintivano vo haikavanoe ti qoraiqama timite variamantavata ne kia ti qaqla karaiti, ne ti vataakeqai variqi vi variarave. ²⁹ Ti Qova ti noraiqama kaimanta te vaiinti nahentiqa raqikiqi virerave. Te ti Qova inantemake, ninavuvata noraiqama kaarira ³⁰ ne naantiara ti vatukaini vahia ti vataake karavata namarivata namaqii viha vohaa taintaqaa oquivi vahia ne Isareri anku 12navu uvama avuqavu qivarave, tiro.

Ihuva Pitaarara tura

(Matiu 26:31-35; Maaki 14:27-31; Ioni 13:36-38)

³¹ Ihuva minti tivakero Pitaarara tiharo, Saimonio, Saimonio, iriane. Sataaniva niara kaiqe te vika avateha tavaare tivaro Kotiva ho mintiane tirave. ³² Te Kotira aarehama ariara vira kahaqiraro viva ariara kempukaiqama kero iriqiro vuarire tunarave. Are naantiara qaiqaa tiriara iriqira viharama nena qata vakaukavara kempukaiqama nimi-taane, tiro.

³³ Ihuva minti tuvaro Pitaava tiharo, Aqao, Noravauvu, te ariara irihama te karapuhiqi varainararavata, qutu vuainararavata qeramate vauro, tiro.

³⁴ Pitaava minti tuvaro Ihuva vira tiva amiro tiharo, Pitao, te ai tiva amiarirara iriane. Are taaramo tataama tiriara kia vira tavaunarave tiraro kokoraaravano uva tianarove, tiro.

³⁵ Minti tivakero Ihuva nai vaintinavu tiva nimiru tiharo, Tota te ni nititauramanta ne monuvata, utavata, aiqu nonkiravata, kia vararaiti, qaqi vurave. Ne vi entara vo haikara aavo qurave? tumanta vika tiha, Kiave, ti.

³⁶ Minti tuvaro Ihuva tiharo, Vate maa tavave uta vatairava, viva viravata vo utavata varero vuarire. Kia iqoka paipe vatairava nai vukai tavuna nimiharo koqaa varero iqoka paipe varaarire. ³⁷ Te ni tiva nimiru iriate. Haaru tiriara qara ntuvato uvava vivauma varianarove. Vi uvava tiriara minti turave: Vaiinti nahenti virarama viva qora kaiqa vare vaivave tivarave, turave. Vi uvava haaru qara ntuva tova vate vivauma varianarove, tiro.

³⁸ Ihuva minti tumanta vira vaintinavu tiha, Noravauvu, maini tavaane. Iqoka paepae taaraqantama vatauro, tuvaro Ihuva hove tiro.

Ihuva oru Orivi Aiqinaqaa vaharo Kotira aarora

(Matiu 26:36-46; Maaki 14:32-42)

³⁹ Ihuva minti tivakero viva naavuqihairo vevarerero nai vaintinavu hampata Orivi Aiqinaqaa vo enta vo enta vuntemakero, qaiqaa viro. ⁴⁰ Mini orurero viva nai vaintinavu tiva nimiru tiharo, Ne Sataanira uva iriha qora kaiqa varaarorave tiha, Kotira aareha variate, tiro.

⁴¹ Minti tivakero Ihuva vinavuka mini kero inaaraiqaka vutunto viniro tori kauru araviro Kotira aarerero tiharo, ⁴² Ti Qo, te aihavi namarira naaina *kaapura*, are vi *kaapura* qaqini vara kaane. Ho kia ti hantuqa avataraitira, are nena antuqa avataane, tiro.

⁴³ Minti tuvaro naaruvalihainaa *enseli* vovano qovaraiqama viro Ihura kempukaiqama amitovaro ⁴⁴ Ihuva vauvaro vira muntukavano noraiqama kero qoraiquvaro Ihuva kempukaiqama kero Kotira aaramaqiro vi vauvaro Ihura toqaavuvano naare voqaara reharo vataini hijirura.

⁴⁵ Minti vauvaro Ihuva Kotira aarama taiqakero himpiro orurantero ani nai vaintinavu tavomanta vinavuka muntuka qoraiquva vinavuka kempuka taiqa komanta vaitate vaura. ⁴⁶ Vinavuka vaite vauvaro Ihuva vikara tiharo, Mpo, ne nantihae vaite variavo? Himpi Kotira aaraivaro viva ni kahaqira ne kia qora kaiqa varaae, tiro.

Ihura ravaaqavu kora

(Matiu 26:47-56; Maaki 14:43-51; Ioni 18:1-11)

⁴⁷ Ihuva mini nai vaintinavu hampata uva qaqi ti vaumanta airi vaiintinavu anirora. Ihura vainti 12navuqihairo Iutaasiva airi vaiinti ntita varero viva naane vika avuni Ihuva vaunaini anirero, Ihura moqa kareva auti vauvaro ⁴⁸ Ihuva tiharo, Iutaasio, are ti moqa

keharae ti Vataini Vatatai Vaintika navutaaka nivuqaa ti qovarama karevae auti variarao? tiro.

⁴⁹ Ihuva minti tumanta vira vaintinavu vira vataake vauka tavomanta vika Ihura ravaaqavu kareka auti vaumanta vinavuka Ihurara tiha, Noravauvu, tenavu iqoka paipeqohai vika ntaiharerave? ti.

⁵⁰ Vinavuka minti tuvaro vinavukahihiro vovano Kotira kaiqa vara amito vaiintika qiatu vaiinti vira paanaa vaiinti aato teqa aqukora. Vira kauqu tanaraini vau aatora teqa kovaro hiciru.

⁵¹ Hiqiruvaro Ihuva aqao kia qaiqaavata mintiane tivakero vi vaiintira aatoqaa nai kauqu vatovaro qaiqaa vira aatovano naitarama viro vaura.

⁵² Kotira kaiqa vara amite vau vaiintika vika noranavuvata, Kotira Naavuqaa raqiki vau kiripuka vika qiatu vaiintinavuvata, nora vaiinti vonavuvata, vika Ihura ravaaqavu kareka anukara Ihuva tiharo, Ne *kamaanira* vataake iqoka raqi vaiintira ravaaqavu karekae iqoka paipevata kaavuvata vare aniaivo?

⁵³ Te ni hampata vo enta vo enta Kotira Naavuqi variqi vi vauramanta ne kia ti ravaaqavu kaarave. Ho vate maa entava ni entama vaivo. Vate konkiraiqi vaira haikava raqikiqiro vuuanarove, tiro.

Pitaava Ihurara kia vira tavaunarave tura

(Matiu 26:69-75; Maaki 14:53-54, 66-72; Ioni 18:12-18, 25-27)

⁵⁴ Ihuva minti tumanta vika vira ravaaqavu vare vivi, Kotira kaiqa vara amite vau vaiintika vika qiatu vaiinti naavuqira vuru kovaro Pitaava niaraihairo vika avataqiro viviro, orurero tavovaro ⁵⁵ vahaqaini vatuka avutuqia iha quarate vauvaro vivavata mini viraqaa vauka hampata iha taariharo vaura.

⁵⁶ Mini vauvaro kaiqa nahenti vovano tavovaro Pitaava iha taari vauvaro viva vira aitutuma tavero tiharo, Maavavata Ihukantiro vaivave, tuvaro ⁵⁷ Pitaava aqao tiro, Maa nahentio, kia te vira tavaunarave, tiro. ⁵⁸ Minti tivakero mini variqiro vuvuro qaiqaa vaiinti vovano Pitaara tavero tiharo, Arevata vira vaintivanoma variarao, tiro. Tuvaro Pitaava tiharo, Maa vaiintio, kia te vikavauve, tiro.

⁵⁹ Minti tivakero variqiro vuvuro inaaraiqakaa qaiqaa vaiinti vovano kempukaiqaakero tiharo, Vi vaiintiva Karirihainaa vaiintivano vaivara tiro, viva quqaama vikantiro vaivave, tiro. ⁶⁰ Viva minti tuvaro Pitaava aqao tiro, Maa vaiintio, are tiana uvara kia te ho iruro, tiro. Minti tuvaro vaakama kokoraaravano uva tura.

⁶¹ Kokoraaravano uva tuvaro Noravano tuquantaa viro Pitaara avuana tavovaro Noravano tu uvava vira aatoqia ntuvu vura. Tota Noravano tiharo, Are taaramo tataa tiharma tiriaria kia vira tavaunarave tiraro kokoraaravano uva tianarove, tura.

⁶² Vi uvava Pitaara aatoqia ntuvu vuvuro viva aaqaini vaatirovoro vira muntukavano qoraiquvaro ipi rateharo vaura.

Ihura naaraihamu amiteha vira ruqtura

(Matiu 26:67-68; Maaki 14:65)

⁶³ Mintumanta Ihura ravaaqavu varo vaiintika Ihura naaraihamu amiteha vira ruqtuhiha

⁶⁴ Ihuva kia vika tavaaire ti, vika vira avu naavumate Ihura ruqtuhiha vira irama amite tiha, Paropeti vaiintio, tavave ai arivo? Are kia tinavu tavaraitira, tinavu tiva timirage iriare, tivake ⁶⁵ vika qora uva, vo uva vo uva vira tiva amite vaura.

Kansoru vaiintinavu nivuqaa Ihura vuru kora

(Matiu 26:59-66; Maaki 14:55-64; Ioni 18:19-24)

⁶⁶ Mintiaqiai vuvuro aatita vumanta Kotira kaiqa vara amite vau vaiintika vika noranavuvata, maara okara ti vau vaiintikavata, vika ruvaaqumavi vaumanta Ihura vita vare vika nai *kansoru*vano vaunaini vuru komanta ⁶⁷ vika tiha, Quqaae are *Mesaiavane*? Are tinavu tiva timirage iriare, ti.

Vika minti tuvaro Ihuva tiharo, Te ni tiva nimiarira ne kia ti uvava quqaave tivarave. ⁶⁸ Te ni irama nimitaari ne kiama ti qaiqaa tiva timivarave. ⁶⁹ Ho maa entaraqahai te Vataini Vatatai Vaintika vaiha Kotiva mpeqavano vainanaini vira kauqu tanaraini oru oquivi vairerave, tiro.

⁷⁰ Minti tumanta vika tiha, Quqaae are Kotira Maaquvanoe variarao? tuvaro Ihuva vika nai tiva nimiro tiharo, Ne tiantemake te maa vikave, tiro. ⁷¹ Ihuva minti tumanta vika tiha, Oho, viraqaata uva vatareka i vai vaiintika qumina naarevorave. Qaqira kaate. Virama nai noqihairo qora uva vira timanta tenavu iruro, tura.

Paireaatava vaunaini Ihura vuru kora

(Matiu 27:1-2, 11-14; Maaki 15:1-5; Ioni 18:28-38)

23

¹ Minti tivake vika ekaa himpi Ihura vita vare Paireatava vaunaini vuru ke ² Ihuraqaa uva vateha mintima ti: Tenavu tavauraro maa vaiintiva qaqi vaiinti nahenti qora aara numiqeharo vikara kia avuhainaa vaiinti Sisaara *takisi* amiata ti vairave. Viva nariara tiharo, Te Noravanove. Te vaiinti nahentiqa raqikiarirauka *Mesaiaavanoma* vauro, ti vaivo, ti.

³ Vika minti tuvaro Paireatava Ihura irero tiharo, Quqaae are Iutaa avuhainaa vaiinti vano variarao? tuvaro Ihuva tiharo, Are tianara te maa vikave, tuvaro ⁴ Paireatava Kotira kaiqa vara amite vau vaiintika vika noranavuaravata, vaiinti nahenti ruvaaqumavi vaukaravata, vikara tiharo, Aqao, te tavauraro maa vaiintiva kia *kamaanira* uva raqakai vaiintivama vaivo, tiro.

⁵ Paireatava minti tumanta vika voqavata kempukaiqamake tiha, Vaiinti nahenti *kamaanira* vataake raquate tiro, viva antua uva vika tiva nimi vaivama vaivo. Viva hoqarama kero vevara Karirihairo vi uvvara minti tiva nimiqiro uriro maini uru ntaivo, ti.

Herotiva vaunaini Ihura vuru kora

⁶ Vika minti tuvaro Paireatava vi uvvara iriro viva tiharo, Quqaae maa vaiintiva Karirihainaavave? tiro. ⁷ Minti tivakero viva iruvvaro Ihuva Karirihainaava vauvaro Herotiva vi vatanaakaqaa raqiki vauvarora tiro, Paireatava Ihura atitomanta vika Herotiva vaunaini Ihura vita vare vuru kora. Vi entara Herotiva Ieruharemini oru vau entara.

⁸ Ihura Herotiva vaunaini vita vuru kovaro Herotiva quahora. Herotiva Ihura kaiqara iriro, airi enta vira tavareva vaiharo Ihuva ti tivuqaa vaiharo nora kaiqa varairage tavarerave tivakero quaha keharo ⁹ oru Ihura airi uva irama amitovarovata, Ihuva kia uva voqavata vira nai tiva amiraitiro evaaraqai vaura.

¹⁰ Kotira kaiqa vara amite vau vaiintika vika noranavuvata, maara okara ti vau vaiintikavata, vika himpote oru kempukaiqamake Ihuraqaa uva vatomanta ¹¹ viraqaahai Herotivavata, vira iqoka vaiintinavuvata, Ihurara qora uva tiva amiteha naarahama amitaqi viha, nora vaiinti tavuna vira nonku amite, viraqaahai Ihura qaiqaa vitavare Paireatava vaunaini vuru kora.

¹² Tota Herotika Paireataka vaiha vitanta nai navutaiqi nai navutaiqiha vaura. Vi entaraqaahai vitanta tontiqamavi nariara nariara quahehatanta vaura.

Ihura ho arukaane tura

(*Matiu 27:15-26; Maaki 15:6-15; Ioni 18:39-19:16*)

¹³ Paireatava Kotira kaiqa vara amite vau vaiintika vika noranavuvata, nora vaiinti vonavuvata, qaqi vaiinti nahentivata, naarama ruvaaquma kero ¹⁴ vika tiva nimiro tiharo, Ne maa vaiinti ravaaqavu vare te unanaini vuru ke tiha, Maa vaiintiva qaqi vaiinti nahenti qora aara numiqe vaivo, tiarave. Ne minti tiamanta te ni nivuqaa vaiha vi uvvara avuqavu iha tavauraro maa vaiintiva kia ne tiantemakero qora kaiqa varaivave.

¹⁵ Herotivavata mintimakero tavero qaqi vira atitaivaro te unanaini qaiqaa anivo. Ho iringate. Vi vaiintiva kia qora kaiqa vo vara kaimantavauve tenavu virara irihama vira ho arukaariraro qutu vuanarove. ¹⁶ Ho kaiqe te tiari vira kaavuqai umiqake vate, atitaivaro qaqi vuarire, tiro.

¹⁷ [Vo ihi vo ihi Vehakuma Nimito Karara no entaraqaa Paireatava vaiinti nahentiara iriharo karapuhi vaiinti vohaiqa qaqi kuvantu kovaro maaqaini vi vaura.] Paireatava Ihurara vira kaavu umiqake vate atitaivaro qaqi vuarire tumanta ¹⁸ ekaa mini ruvaaqumavi vauka aqao ti, Vira arukaane. Are tinavuara iriharama Barabasira kuvantu kairaro maaqaini vuarire, tura. ¹⁹ (Barabasiva *kamaanira* vataakero vi vatukaraqi raqura kaaravata, vaiinti arukora kaaravata, karapuhiqama tovaro vauvaro) ²⁰ Paireatava Ihura kuvantu kareva autiharo qaiqaa vaiinti nahenti ruvaaqumavi vauka irora.

²¹ Viva vika iromanta vika kia vira uva iriraiti, noraiqaake naveraitiha, Vira kaira katariqaa arutaate. Vira kaira katariqaa arutaate, ti vaura.

²² Vika minti ti vauvaro Paireatava taaramo tataa vika irero tiharo, Nana kaarave? Maa vaiintiva nana qora kaiqae vara kairave? Te vira uva avuqavu iha tavauraro kia viraqaa qora uva vaivo. Kia tenavu qumina uva kaara vaiinti vo arukararave. Kaiqe te tiari vira kaavuqai umiqake vate, kuvantu kaivarao qaqi vuarire, tiro.

²³ Minti tumanta vika noraiqamake naverai tivaqti viha kempukaiqamake tiha, Vira kaira katariqaa arutaate, ti. Minti tivaqti vuvaro vika uvavanoqai uritarovaro

²⁴ Paireatava vika uva iriro, vika tuntemakero ho vira arukaate tura.

²⁵ Kamaanira vataakero raqiharo, vaiintivata arukora kaara, karapuhiqama tovaro vauvaiintira, Paireaatava vi vaiintira kuvantu kero, viraqaahairo viva vaiinti nahenti antuqaa vairara iriharo Ihura iqoka vaiintinavu kauquqi kora.

Ihura katariqaa niriqohai arutora

(Matiu 27:32-44; Maaki 15:21-32; Ioni 19:17-27)

²⁶ Paireaatava Ihura iqoka vaiintinavu kauquqi komanta vika Ihura vite vihamma aaraini vi vauvaro vaiinti vo, Saimoniva Sairinihainaava, viva nora vatukaqi vuare tivakero anumanta, iqoka vaiinti vika vira ravaaqavuke Ihuva aquto katarira varake vi vaiintiraqaa aqu amite vira vuana vaina tuvaro, viva katari vira aqu varero Ihura naantiara vurama.

²⁷ Mintumanta vaiinti nahenti airithaa Ihura avataqi vurama. Vika avutaqihai nahenti vonavu viha Ihurara mpooqira ihi tivakeha iqi rata amite vauvaro ²⁸ Ihuva nahenti vinavuka unaini tuqantaviro vinavuka tiva nimiro tiharo, Ieruharemihainaah nahentinavuo. Kia tiriara iqi rataate. Nentaravata nenta vaintivararavata iqi rataate.

²⁹ Naantiara vo entanavu anintaira vi entaraqaa nahenti vokikara *naahiaru/quru-riqama* vi nahentikave, kia vainti vate nahentikave, kia vainti naama nimi nahentikave, vikara tiha, Neqaima varavara tira, qaqi vuate tivarave.

³⁰ Vi entara vaiinti nahenti ainqinanavu naareha tiha, Tinavuqaa hiqintuate, tivarave. Vika inaara ainqinanavu naareha tiha,

Tinavuqaa aqu ravaaqavu kaate, tivarave.

(Hosea 10:8)

³¹ Te qaraaka katari voqaara vauramanta vika mintima keha ti qoraiqama timite variavo. Mpo, naantiara ne aahara katari voqaara vaimanta vika nana nana qora kaiqae ni vara nimitavarave, tiro.

³² Minti tumanta iqoka vaiintinavu karapuhii vaiinti taaraqantavata Ihura vataake arukareka ntita vare vurama.

³³ Vika vivi qumina vatuka, *Qiata Vuhaarive* tu vatukaraqaa orure, Ihura katariqaa niriqohai aruke hirite, qora kaiqa varotantavata aruke hini hini hiritora.

³⁴ Hiritovaro Ihuva Kotira aarero tiharo, Ti Qo, vika qora kaiqa vare uvara nunka nimitaane. Vika mintihama vika nai qora kaiqa vare varia okarara kia iriavo, tiro.

Minti tumanta iqoka vaiintinavu *satu ruhamaqi* viha Ihura utavaaqqa rairakeha varora.

³⁵ Vira utavaqa rairakeha varomanta qaqi vaiinti nahenti mini himpiti vauka tave vaumanta Iutaa vaiinti noranavu Ihura naaraihama amite tiha, Viva vokiaka kahaqi vaivave. Viva quqaa Kotiva kaamataiva *Mesaiavano* vairera, viva homa nai kahaqianarove, ti.

³⁶ Vika minti tumanta iqoka vaiintinavuvata Ihura naaraihama amiteha *uaini* hunkavura viri amiha vira naane tivake virara tiha, ³⁷ Are quqaa Iutaa vatanaakaqaa raqikiara vaiintiva vairera, ho are nenavano nena kahaqiane, tura. ³⁸ Vika uva vo Ihura qiataini katariqaa qara ntuvake vatova vi uvava mintima tiro:

Maa Vaiintiva Iutaa Avuhainaa Vaiintive, tura.

³⁹ Mintima qara ntuvato uvava vauvaro muara vaiinti vovano hini mantaraini katariqaa arutova, vivavata Ihurara qora uva tiharo, Are quqaae *Mesaiavano* variarao? Ho nenavano nena kahaqihara titantavata kahaqiane, tiro.

⁴⁰ Minti tuvaro muara vaiinti vovano hini mantaraini arutova eqaane tiro, Are kiae Kotira aatu qetehara variarao? Vika titanta aanaramake viravata aruke hiritaavo. ⁴¹ Vika homa titanta mintima taavo. Vika tintatanta muara kaiqa kaarama titanta arutaavo. Vi vaiintiva kia qora kaiqvata varaiwave, tiro.

⁴² Viva minti tivakero Ihurara tiharo, Ihuo, ai avuhainaa vaiintiqama kaaina entara triiaravatama iritaane, tiro.

⁴³ Viva minti tuvaro Ihuva virara tiharo, Te ai tiva amiarirara iriane. Vate are vatuka koqeraqi ti vataakerama vainerave, tiro.

Ihuva qutu vura

(Matiu 27:45-56; Maaki 15:33-41; Ioni 19:28-30)

⁴⁴ Ihuva minti tivakero vauvaro kuarivano qiataqaa ururovaro, viraqaahairo ekaa vi vataraqaa konkiraqama tero viviro, 3 *kiroki* eronaini taiqa vura. ⁴⁵ Ieruharemihainaah Naavuqi kaankuka voqaara tavuna nora hiritora. Vi tavunava vauvaro Ihuva qutu vireva uvaro vi tavunava vaakama avutaqaahairo nai qunahi vura. ⁴⁶ Mintuvaro Ihuva katariqaa vaiharo noraiqakero naveraitiro tiharo, Ti Qo, ti Maraqura varaaane, tiro. Minti tivakero viva qutu vura.

⁴⁷ Ihuva qutu vauvaro iqoka vaiintinavuqaa raqiki vau vaiintiva Ihuva mintura tavero Kotira autu tuahera kero tiharo, Quqaama maa vaiintiva avuqavu ni vai vaiintivave, tura.

⁴⁸ Minti tumanta vi haikara tavareka ruvaaqumavi vauka, vikavata vaiha vi haikara vi haikara qovaraiqura tave, viraqaahai vika nái maaqaini anirante vihamma, muntuka goraiqumanta nái mimira ruqutu keha vurama.

⁴⁹ Vika vumanta Ihura vaiinti nahentivata, nahenti vonavu Karirihai vira avataqi anukavata, vika niara kanta vaiha vi haikara qovaraiqura tave vaura.

Ihura quntama tora

(Matiu 27:57-61; Maaki 15:42-47; Ioni 19:38-42)

⁵⁰⁻⁵¹ Vaiinti vo vira autu Iohepiva Arimatiā vatuka Iutaa vataihainaava, viva koqe vaiinti avuqavu ni vau vaiintiva vaiharo, viva Kotiva raqikiaina entarara aitutharo vira veka vaura. Viva *kansoru* vaiintivano vaiharo viva kia vo *kansoru* vaiintinavu uvara eo tiraitiro, viva vika kaiqaravata kia quahéharo vaura.

⁵² Vi vaiintiva Paireatava vaunaini orurero tiharо, Ihura vaata ti timiraqe quntama taare, tiro. ⁵³ Minti tivakero viva oru Ihura vaata katariqaahairo viqu muntuvi kero hanta tavuna varakero viraqohairo vira vaata apuqamakero muntu qaraaka ori vaurutoraqi kia vo vaiintivata quntama toraqi vira quntama tora.

⁵⁴ Vi entara vaiinti nahenti tiha, Hura Maara Entaqaa .kaiqa varaororave, tivakeha, vi haikara vi haikara Paraireqaa qera qaaramake vate vau entava vaura.

⁵⁵ Minti vaumanta nahenti vonavu vinavuka tota Karirihai Ihura avataqi ni vau nahentinavuka Iohepira vataake oru Ihura quntama toraqi orunte, Iohepiva minti mintima kero Ihura vaata vuru vatora tave, ⁵⁶ viraqaahai anirante nái naavuni oru vahama koqemakero untavi vau vahaveraravata, vo haika vaiinti vaataqaa aqu amite haikaravata, qeramake vatora. Vinavuka vi haikara qeramake vate, nái maara uvara iriha Maara Entaqaa qaqi vaura.

24

Ihuva qaiqaa qaqi himpura

(Matiu 28:1-10; Maaki 16:1-8; Ioni 20:1-10)

¹ Vi nahentinavuka koqemakero untavi vau haikara qeramake vate, vinavuka Saarareqaa varike, Santeqaa vaaka toqaqi himpi vi haikara vare Ihura quntama tonaini orure tavovaro ² qentiqaa nora ori tintatora venta auvahini vatovaro vaura.

³ Vaumanta vin avuka oriqete tavovaro Nora Vaiinti Ihura vaatavano kia viraqi vaura.

⁴ Kia viraqi vaumanta vinavuka airi avu aato uti vaumanta vaakama vaiinti taaraqanta qovaramavi takuqi vau utavaaqaqara nonkutetanta vinavuka tataaqa himpite vaura.

⁵ Vitanta himpite vaumanta vi nahentinavuka voqamake qeteha nái viri vatainiquamate vaumanta vi vaiintitanta tiha, Nenavu nantihae qaqi variqiro vi vai vaiintirara cutu vuaka vataaraqi rante variavo? ⁶ Viva kiama maini vaivo. Viva qaiqaa qaqlima himpivo. Tota viva Karirini vайharо ni tiva nimu uvvara ne vi uvvara qaqqie iritaavo? ⁷ Viva vi entara minti turave: Te Vataini Vataiati Vaintika variariraro qora kaiqa vare varia vaiintika ti ravaaqaqvaa kaate tiro, vovano ti qovarama kaira vika katariqaq niriqohai ti arutaiqe te cutuvi taaramo enta varike qaiqaa qaqi himpirerave turave, ti.

⁸ Vitanta minti tuvaro Ihuva tu uvava vi nahentinavuka aatoqi ntuvu vumanta ⁹ vira quntama tora mini ke, anirante Ihura vainti 11navuvata vokukavata vuru tiva nimireka vura. ¹⁰ Vi nahentinavuka autu vaireva, Mariava Makataaraihainaavave, Joanaavave, Iemira nova Mariavave, vi nahentinavuka vi haikara tave anirante vi uvvara vare Ihura vainti noranavu vuru tiva nimumanta ¹¹ vika tiha, Aqao, ne una tiavo. Kia tenavu virara ho quaaqe tirarave, ti.

¹² Vika minti tuvaro Pitaava vaaka himpiro kantero Ihura quntama tonaini viro orurero kankakaama viro vera tavovaro tavunavanoqai vauvaro Ihura vaatavano kia viraqi vaura. Kia vauvaro viva anirantero maaqaini viharo nai oru tavo haikarara airi avu aato utuqiro vurama.

Emeusiniara vu vaiintitantara tura

(Maaki 16:12-13)

¹³ Vohaa vi entaraqa Ihura vainti taaraqanta vatuka vo Emeusive tunainiara vura. „Kuvaria vauvaro Ovura vaira vira voqaara Ieruharemivata Emeusivata vaura.“ ¹⁴ Vitanta aaraini viha Ihura aruko uvarara tivaqvi vi vaura.

¹⁵ Vitanta vi uvarara tivaqvi vi vauvaro Ihuva nai anirero vitanta vataakero oru vi vaumanta ¹⁶ vitanta kia vira viraqamake tavaraiti, vo vaiintive tuvaro ¹⁷ Ihuva vitantara tiharо, Netanta anicha nana uvae tivaqvi ani variavo? tiro.

Minti tumanta vitanta viraqaa himpite vauvaro vitanta muntukavano qoraiqumantua vauvaro¹⁸ vitantaqihairo Kiliopaasiva Ihura irero tiharo, Maa entara airi vaiintinavu ani Ieruharemini variavara are vohaiqavanoqiae tuvana qovaraiqi uvvara kia iriarao? tiro.

¹⁹ Minti tuvaro Ihuva vitanta irero tiharo, Nana uvave? tumanta vitanta tiha, Ihura Nasaretihainaara uvave. Vi vaiintiva paropeti vaiintivano vaiharo Kotira avuqaavata, vaiinti nahenti nivuqaavata, nora kaiqa vareharo koqe uvaqai ti vaivave.

²⁰ Viva minti vai vaiintira Kotira kaiqa vara amite varia vaiintika vika noranavuvata, tinavuqaa raqiki variakavata, vika vira *kamaanira* kauquqi kaavaro viva vira arukaate timanta vira katariqaa niriqohai aruke hiritaarave. ²¹ Tenavu tota vi vaintirara tiha, Viva vo vatanaaka kauquqihairo tinavu Isareris vatanaaka kuvantu timitaariravave, tunarave. Uva vovatama vaivo. Vira arukaavaro vate taaramo entaiqama vivo.

²² Vate tetanta nahentinavu tia uvvara iri ravukuma vuro. Vinavuka vaaka toqaqi vira quntama taaraqi orure kia vira vaata tavaavo. ²³ Vinavuka anirante vuru tinavu tiva timi tiha, *Enseline* navu tinavu aaqant qovaramavi tinavuara viva qaqima himpiro vaivo tiavo, tiarave. ²⁴ Vinavuka minti tiamanta tinavuqihai vokia vaiintinavuka vira quntama taaraqi orunte tavaavarovaaka nahentinavu tiantemakero vira vaatavano kia viraqivairave. Vinavukavata kia Ihura tavaarave, ti.

²⁵ Vitanta minti tuvaro Ihuva vitanta tiva nimiro tiharo, Kiae nitanta avu aatovata vaivo? Haaru paropeti vaiintinavu tivato uvvara netanta vi uvarara ququaave tiataara vaimanta netanta nantihae kia vaaka vi uvarara ququaave tiavo?

²⁶ Netanta kiae iriavo? *Mesaiaavano* aiha vina haikara naane varaqiro viro, viraqaa-hairo noraiqama viro kempuka vaiintivonomava varianarove, tiro.

²⁷ Minti tivakero Ihuva *Mesaiaa* okarara Kotira vukuqi qara ntuvatora vitanta tiva nimireva iharo, hoqarero Mosira uva naane tiva nimiro, paropeti vaiintinavu uvavata tiva nimura.

²⁸ Vi uvvara minti tivaqiro vi vauvaro vitanta vireka u vatuvara aumantogama vuvaro Ihuva iriharovata voqavata qaqiqai vireva auti vaumanta²⁹ vitanta aqao ti, Inaaraqakaa enta irevave. Are qaqlira kera titanta vataakera vaitaane, tuvaro vitanta vataakero vaireva naavuqi vura.

³⁰ Viva viraqii oru vaiharo kara taintaqaavita vataakero oquiviro Kotirara kogema iharo tivakero mpareti nkuihero nimuvoro³¹ vitanta avu aatovano kenko tuvaro irivumanta vitanta vira viraqamake tavora.

Vitanta vira viraqamake tavovaro Ihuva vitanta nivuqaahairo tuqaakama vura.

³² Ihuva vitanta nivuqaahairo tuqaakama vumanta vitanta nai tiva ami nai tiva amihatanta tiha, Ike, viva aarana aniharo Kotira vukuqihainaa uva titanta tiva timi vaivarotitanta muntukaqihairo voqamakero koqe i vairave, ti.

³³ Minti tivake vitanta vaaka himpitanterante Ieruharemini oru Ihura vainti 11navu rantaake tavomanta vinavuka vo vaiintinavu vataake ruvaqaumavi vohaaraqi vahaaraqitiha,³⁴ Noravano quqaama qaiqaa qaqi himpivo. Viva qovarama vivaro Saimoniva vira tavairave, tumanta³⁵ vitanta aaraini viha tavoraravata vika tiva nimura. Vitanta tiha, Viva mpareti nkui kaimanta viraqaahai tetanta Nora Vaiinti vira viraqamake tavauro, ti tura.

Ihuva nai vaintinavu nivuqaa qovarama vura
(Matiu 28:16-20; Maaki 16:14-18; Ioni 20:19-23)

³⁶ Vitanta Ihura vainti hininavu uva tiva nimi vauvaro vaakama Ihuva nai vika nivuqaa qovarama viro vika tataaqa himpiro vaiharo tiharo, Ni muntukaqihairo paru i vaira variate, tiro.

³⁷ Minti tumanta vika voqamake qeteha vaananavoma qovarama vivo tuvaro³⁸ Ihuva vikara tiharo, Ne nantihae ravukuvitete variavo? Nantiharoe taara avu aato utuava niqi vaivo?³⁹ Ti kauquvata aiqvavata tavaate. Te maa vikave. Ne ti autamake tavaate. Te vaiintima vauro. Kia vaanavano ti aanarero mativata vuhaarivata vatairave, tiro.

⁴⁰ Minti tivakero viva nai kauquvata aiqvavata vika numiqomanta⁴¹ vika voqamake quaheha kauqu runkinkiri iha tiha, Quqaae nai viva qaqlira viva? tuvaro Ihuva vika irero tiharo, Te naaina karara vokira vairove? tumanta⁴² vika havuka unta tora hini vira amuvaro⁴³ viva vika nivuqaa vaiharo varakero nora.

⁴⁴ Ihuva havuka namakero vika tiva nimiro tiharo, Tota ni hampata vaha te maa uvvara ni tiva nimunarave. Haaru Mosivavata, paropeti vaiintinavuvata, Ihi vukuqi qara ntuvatotokavata, tiriara qara ntuvato uvava, vi uvava naantiara vivauma varianarove, tunarave, tiro.

⁴⁵ Minti tivakero vika Kotira vukuqi qara ntuvato uvvara kankomake iriate tiro, viva vi uvvara vi uvvara tiva nimiro tiharo,⁴⁶ Maa uvvara qara ntuvatotorave. *Mesaiaavano*

aihavina haikara naane varaqiro viro vuru qutuviro, taaramo enta varikero qaiqaa qaqi himpuanarove, turave.

⁴⁷ Ne viraqaahai ti hutuqaa vaiinti nahenti tiva nimiqi viha tiha, Nenta qora aara qaqlira kaivaro Kotiva ne qora kaiqa vare vai uvara nunka nimitaarire, tiate. Ne vi uvara Ieruharemini naane hoqaramake tiva nimi, viraqaahai vo vatanaa vo vatanaaka tiva nimiqi vuate.

⁴⁸ Nenavu nenta avuqohai vi haikava vi haikava qovaraiqira tavaarave.

⁴⁹ Ti Qova nai kauqu aiqiqaa aqukero tiharo, Tenta Maraaura ni nimirerave, tiva tainara, tema orini vira atitaariraro tuvuarire. Ne maa vatukaraqira variqi vivaro naaruvalhairo viva tuvuntero niqi vaiharo ni kempukaiqama nimitaarire, tiro.

Ihura naaruvalvini vita varora

(*Maaki 16:19-20; Kaiqa Varora 1:9-11*)

⁵⁰ Ihuva minti tivakero viva vika ntita varero Ieruharemi mini kero Betanini orurero nai kauqutanta tuahera kero vinavuka koqema nimitora.

⁵¹ Viva vinavuka koqema nimiteharo vinavuka mini kovaro Kotiva Ihura naaruvalvini vita varora.

⁵² Ihuva naaruvalvini vumanta vira vaintinavu Ihura autu tuaherake, muntukavano koge umanta anirante Ieruharemini vura.

⁵³ Vika mini oru vaiha Kotira Naavuqi vo enta vo enta Kotira autu tuaheraqvi vaura.

IONI

Ioniva Ihuva nurara tura

Ihura okara

¹ Tota hoqarero Uvavano vaura. Vi Uvava Variqa Kotikantiro vaura. Vi Uvava nai Kotiva vaura.

² Tota hoqarero vi Uvava Kotikantiro variqiro vura. ³ Uva viva Kotikantiro variqiro viharo ekaa vo haika vo haika autukero vatora. Vovano vo haikavata autuarirava kia vauvaro Uva vivaqai ekaa haika autukero vatora.

⁴ Uvavano vauvaro viraqima ekaa enta qaqi variqi vi okaravavata vaura. Vi Uvava ovavano itaintemakero, vataini variaka koqema kero ataama nimite vairo. ⁵ Vi ovava itaqiro vi vaivaro kiama konkira ari vai haikava vira qimpa kaira.*

Ioniva namari nimi vau vaiintiva Ihura okarara tura

⁶ Kotiva vaiinti vo attitora vira autu Ionira. ⁷ Vaiinti nahenti „Ihurara“ viva quqaa ovavanove tiate tiro, Ioniva vika vira okarara tiva nimireva anirora.

⁸ Ioniva nai kia vi ovava vairaitiro, viva vi ovarara vaiinti nahenti tiva nimireva anura.

⁹ „Ihuva“ quqaa ovavano ekaa vaiinti nahenti ataama nimitareva vataini aniainarara Ioniva tiva nimi vaura.

Ihura qorrima amitora

¹⁰ Ihuva maa vataro autukero vatova vataini tuvumanta maa vatanaaka kia vira viraqamake tavaraiti, virara kia vivave ti. ¹¹ Viva nai navunaaka unaini aniomanta vira navunaaka kia vira quahama amitaraiti, vika vira qorrima amitora.

¹² Mintumantavata, vokuka vira quahama amite virara quqaa vivave ti vauka viva vika noraiqama komanta vika Kotira vaintiqamavi vaura. ¹³ Kiama vaiinti nahenti nai vainti vataataantemta kevauve vika Kotira vaintiqamavi, kiama qaqi vaiinti antuqqaahai vika Kotira vaintiqamavi, Kotiva naivano vaiinti nahenti nai vaintiqama kaira.

¹⁴ Ho Uvavano tinavu hampata vaireva vainti vaata varero, maa vataraqaa vaumanta tenavu vira mpeqa okara takuqi vaira tavaunara. Viva vira maaqu vohaiqavano vauvarora tiro, vira Qova nai mpeqa okara vira amura. Tenavu tavaavauraro vi vaiintiva koqema nimiteharo aaqurihama nimiteharo quqaa Uvaqai ti vau vaiintiva vaura.

¹⁵ Ioniva vaiinti nahenti tiva nimiro tiharo, Te haaru ni tiva nimi tiha, Vaiinti vovano ti naantiaria aniarirava ti haatara kaanarove, turava ho maa vivave. Tevata kia qovaraiquna entara viva haaru qaqi variqiro vi vaurave. Mintima vaharora tiro, viva ti haatara kero viva Noravanoma vaivo, tiro. Ioniva minti tura.

¹⁶ Ihuva vogamakero tinavu aaqurihama timite vaivara tiro, viva tinavu aaqurihama timiteharo qaiqaa qaiqaavata tinavu koqema timite vairave.

¹⁷ Haaru Kotiva nai uva maara tiva tora qara ntuvakero Mosira amura. Vate maa entara Ihu Karaitiva Kotiva inaihairo tuvurero, Kotiva aaqurihama timite vai okarara quqaa okara tinavu tiva timira.

¹⁸ Kiama qumina vo vaiintivano Variqa Kotira viri tavairave. Vira Maaquvano nai Qora aaqanto vaiva, vivaqaima nai Qora okara qoqaiqama kaimanta tenavu kankomake tavaunara.

Ioniva Ihurara vaiinti nahenti tiva nimura

(Matiu 3:1-12; Maaki 1:1-8; Ruki 3:1-18)

¹⁹ Ioniva Ihurara tiva nimu uvava maantimama vairo: Ioniva aniomanta Iutia vaiinti noranavu Ieruharemini vauka vaiinti vonavu nititomanta Kotira kaiqa vara amite vau vaiintikavata, Rivaira vohaa anku vaiinti vonavuvata, vika orure Ionira ireha tiha, Are ta vaiintivave? Are quqaae tinavu *Mesaiavaanove?* ti.

²⁰ Vika minti tuvaro Ioniva kia uva kukeqa karaitiro, qoqaa vutu kero vika tiva nimiro tiharo, Aqao, kia te Kotiva atitai vaiintika *Mesaiavaanovave* vauro, tiro.

²¹ Tumanta vika vira qaiqaa ireha tiha, Are te kia vikave tianara vo? Are tavave? Are tinavu kaivaqava Elaitaavae variarao? ti.

Vika minti tuvaro Ioniva, Aqao, te kia vikavavu, tiro. Tumanta vika qaiqaa vira ireha tiha, Are ta vaiintivave? Tenavu paropeti vainti vo, viva qovaraiqiaainara vira vekama vauro. Are vi vaiintivave? tuvaro Ioniva aqao kiaveqai tiro.

²² Minta tumanta vika tiha, Are ta vaiintivave iaro? Are tinavu tiva timiraqe tenavu anirante tinavu tititaaka ariara vuru tiva nimiare. Are nenara ta vaiintivave tinarave? ti.

* 1:5: 1 Ion 1:1

²³ Tuvaro Ioniva haaru paropeti vaiinti Aisaiaava qara ntuvato uvarara iriharo vika tiva nimiro tiharo,

Te qumina kanta vahama naveraitiha, Ne aara avuqavuma taivaro Noravano vi vaura aniarire ti vaurauka, te maa vi vaiintikama vauro, tiro. (*Aisaiaa 40:3*)

Haaru paropeti vaiinti Aisaiaava qara ntuvato uvarara iriharo Ioniva minti tura.

²⁴ Ioniva minti tumanta Parasi vaiintinavu nititoka tiha, ²⁵ Are tinavuara tihara, Te kiama *Mesaiava*va vouro, te kiama Elaitaakave, te kiama paropeti vaiintive, tianarave. Ho are nantiharae te qumina vaiinti vauro tiharama, namari nimi variarao? ti.

²⁶ Vika minti tuvaro Ioniva vinavuka nái tiva nimiro tiharo, Te qumina namariqaima ni vaiinti nahenti nimi vauro. Vovano ni avutana vai vaiintira, ne kiama vira kankomake tavaavo. ²⁷ Viva ti naantiara aniariravave. Te inaara vaiinti vauraro viva nora vaiinti vaimantara ti, te kiama ho vira aiqu rumpa taina naaquntara kuvantu amitararave, tura.

²⁸ Ioniva Iotani Namari hini mantaraini, Betanini vaharo namari nimi vau entara vi uvara tura.

Ioniva Ihurara Kotira Sipisipi Naative tura

²⁹ Vira qararaa Ioniva vaharo tavovaro Ihuva vihairo ani vauvaro viva tiharo, Ho tavaate. Vi vaiintiva Kotira Sipisipi Naative. Viraqaama Kotiva ekaa vataini vaika qora kaiqa vare okarara taiqa nimitaanarove. ³⁰ Te haaru tiha, Vaiinti vovano ti naantiara aniarirava ti haatara kaanarove, tunarave. Te kia govaraiqiavauna entara viva haaru qaqi variqiro vuvave. Mintima vaharora tiro, viva ti haatara kero Noravano varianarove, tuna vaiintiva, ho maa vi vaiintivave. ³¹ Tota kia te vira viraqaqamake tavaunarave. Ne Isareri vatanaaka vira viraaqamake tavaate ti, te maini ani namari ni nimi vaunarave, tiro.

³² Minti tivakero Ioniva Ihurara vika qoqaa tiva nimiro tiharo, Te tavauraro Kotira Maraquaravano uviri vo, mirura voqaara tuviro, tuvu viraqaatama vaurave. ³³ Tota te kia Ihura viraaqamake tave vauraro Kotiva ti tititaimanta te namari ni nimi vauraro Kotiva ti tiva timiro tiharo,

Tavariraro ti Maraquaravano otu viro viraqaata vaine vaiintira ho virarama vivave tiane. Viva kia qaqi qumina namari nimianarove. Viva vaiinti nahenti ti Maraqua nimianarove, tirave.

³⁴ Kotiva ti vi uvvara minti tiva timimanta te vi haikara kankomake tave, virara te maa vaiintiva Kotira Maaquve turo, tiro.

Ihuva vo vaiintinavu naane ntitora

³⁵ Vira qararaa Ioniva nai vainti taaraqanta vira avataqi nutanta hampata himpitero vaharo ³⁶ tavovaro Ihuva aitarero vuvaro Ioniva vira vutu tavero, nai vaintitanta tiva nimiro tiharo, Tavaate. Vi vaiintiva Kotira Sipisipi Naative, tiro. ³⁷ Minti tumanta Ionira avataqi nutanta Ioniva tu uvvara iri, viraqaahai vitanta tuqantaavi Ihura avataqi vura.

³⁸ Ihura avataqi vuvaro Ihuva tuqantaa viro tavomanta vitanta vira avataqi anuvaro viva vitantara tiharo, Netanta nanarae aniaivo? tumanta vitanta tiha, *Rabao-Maara ti variara vaiintio*, are taini variaravave? tuvaro ³⁹ Ihuva tiharo, Ho netanta ani tavaate, tiro.

Minti tumanta vitanta vira vataake vi, oru viva vauraqai variqi vi eromanta anirante vura. ⁴⁰ Vi vaiintitantaqihairo vaiinti vo Entaruva, Saimoni Pitaara qatavano vaura.

⁴¹ Vitanta Ihura mini ketanta Entaruva nai vakaara ranta kero vira tiva amiro tiharo, Tetanta Kotiva atitai vaiintira *Mesaiaa* vira rantake tavauro, tiro.

(*Mesaiave, Karaitirave*, vohaa autuma vairo.)

⁴² Vira rantake tavauro, tivakero Entaruva nai vakaara vita varero Ihuva vaunaini vuru kovaro Ihuva vira tavero tiharo, Are Ionira maaqu Saimonivave. Te ai autu rehamma *Sifaasirave*, tirerave, tiro.

Sifaasirave, Pitaarave, vohaa autuma vairo. „Maa uvvaraqaihai vi autura tirera *Orirave*ti.“

Ihuva Piripika Nataanika naarora

⁴³ Vira qararaa Ihuva Karirini virerave tivakero oru Piripira ranta kero virara tiharo, Are ti naantiaraini aniane, tiro.

⁴⁴ Piripiva Besaida vatukaihainaavama vaura. Entaruka Pitaaka vitantavata vohaa vi vatukaraqiraukama vaura.

⁴⁵ Ihuva Piripirara minti tuvaro Piripiva Nataanira ranta kero vira tiva amiro tiharo, Haaru tinavu kaivaqava Mosiva maara uva qara rihero vi vaiintirara tivatomanta paropeti vaiintinavuvata vi vaiintiva naantiara anianarove tivake qara ntuvato vaiintira,

ho vate vi vaiintirama te tavauro. Viva Ihuva Iohepira maaquvano Nasaretihainaavave, tiro.

⁴⁶ Viva minti tuvaro Nataaniva tiharo, Aqao. Hoe koqe vaiintivano mintina vatukaraqihairo qovaraiqianarove? tiro. Tuvaro Piripiva tiharo, Ho are nenavano oru tavaane, tiro. ⁴⁷ Tivakero oru vuvaro Ihuya tavomanta vitanta ani vauvaro Ihuva tiharo, Tavaane. Quqaama vi vaiintiva Isareri vaiintivanoma vaivo. Kia vi vaiintiraqi una uuvavata vaivo, tiro.

⁴⁸ Minti tuvaro Nataaniva Ihura irero tiharo, Nantiakerae are ti okarara ho irira iarao? tuvaro Ihuva vira tiva amiro tiharo, Piripiva kia ai aaraivaka are *fiki* vira okaraqivi variaramanta te ai tavaunarave, tiro.

⁴⁹ Minti tuvaro Nataaniva tiharo, Ike, maara ti variara vaiintio, are Kotira Maaquvanove. Are Isareri vatanaaka avuhainaavave, tiro.

⁵⁰ Minti tuvaro Ihuva tiharo, Are *fiki* okaraqivi variaramanta te ai tavaunarave tunaraqaahairee are tiriara quqaa vivave tiarao? Naantiara are nora haika, vo haika vo haika vira aataraainara tavenarave.

⁵¹ Te quqaama turo. Naantiara are vailha tavairaro naaruvavano qantuara viramanta viraqihai Kotira *enselinavu* te Vataini Vatatai Vaintika variainanaini oru vi tuviha vaivarave, tiro. Ihuva turama.

2

Nahenti ironaini Kenaat vatukaqi vura

¹ Enta taaraqanta aitaromanta Karirini vatuka vo Kenaaqi nahenti irareka ² vauvaro Ihura novavata mini vaumanta vi vatanaaka Ihuravata, vira vaintinavuvata, naaromanta vinavukavata mini vura.

³ Vinavuka oru vailha kara ne vauvaro *uaini* namari taiqa vuvaro Ihura nova Ihura tiva amiro tiharo, *Uaini* taiqama vivo, tiro.

⁴ Tuvaro Ihuva aqao tiro, Nahentivauvo, ai kaiqa vo kaiqama vaivarо ti kaiqa vo kaiqama vaivo. Te tenta kaiqa varaaaina entava kiama qovaraiqivo, tiro.

⁵ Minti tuvaro Ihura nova kaiqa vaiintinavu tiva nimiro tiharo, Viva nana kaiqae niara varaaete tiramanta, ne viva tinantemake varaaete, tiro.

⁶ Iutaa vatanaaka vika nái maara uva iriha minti mintima keha vika nái viri vaata hiqama kora. Ho virara iriharo namari taqu 100 *lita* 6navu vi naavuraqivi vatova vauvaro Ihura nova ne viva tinantemake varaaete, tuvaro ⁷ Ihuva kaiqa vaiinti vika tiva nimiro tiharo, Ho vi taqunavuraqivi qaqi namariqohai ekaa kaqa mpiqa kaate, tumanta qaqi namari kaqa vare vuru qahiare vauvaro ekaa taqu noqaa mpiqa vura. ⁸ Mpíqa vauvaro Ihuva qaiqaa tiharo, Ho taquqihai kaqa vare vuru karaqaa raqiki vai vaiintira amivaro neharo tavaareire, tiro.

⁹ Minti tumanta vinavuka taquqihai vi namarira kaqa vare vuru karaqaa raqiki vau vaiintira amuvoro vi vaiintiva qaqi namarivano *uainiqama* vura neharo tavovaro koqe uvaro viva kiama namari vira kaqo uvvara iriraitiro vaumanta, vira kaiqa vaiintinavuqaima virara irura. Mintuvaro karaqaa raqiku vaiintiva neharo tavovaro koqe *uaini* vauvaro quaha kero nahenti varo vaiintira aarama kero ¹⁰ vira tiva amiro tiharo, Ike, vokiaka koqe *uaini* naane vaiinti nahenti nimiamanta nama taiqa kaamanta naantiara qora *uaini* nimi variarave. Are kia vika iantemaka kera nimira iarao. Te tavaurara are vo *uaini* avuni nimira, viraqaahaire koqe *uaini* naantiara nimira iarao, tiro. Minti turama.

¹¹ Ihuva Kariri vataini Kenaaqi vailharo qaqi namari varakero *uaini* tuquantaa nimitora. Viva vi kaiqara naane avuni hoqarama tero, viraqaahairo vo kaiqa vo kaiqa nora kaiqa varaqiro vurama. Viva vi kaiqara varomanta vira vaintinavu vira kaiqa tavehama Ihura okara mpeqa okarara kankomake iri, virara ho quqaa vi vaiintiva tinavu kahaqiaravama vaivo ti tura.

¹² Ihuva *uaini* tuquantaa nimitero viraqaahairo vivavata, vira novavata, vira qatanavavata, vira uva irukavata, mini ke Kapenaumini oru vo entanavu vaura.

Ihuva Kotira Naavuqi vura

(Matiu 21:12-13; Maaki 11:15-17; Ruki 19:45-46)

¹³ Vehakuma Nimito Karara no entava umanto vauvaro Ihuva Ieruharemini viro ¹⁴ oru Kotira Naavuqi oriqetero tavomanta vokuka viraqivi koqaa kaiqa vareha purumakauve, sipisipive, uvirive, nimiha monu vare vaumanta vonavu tainta tataaqa oquivi vaiha *kamaanira* monu vareha Kotira Naavuqiraa monu vo monu nimi vaura.

¹⁵ Mintiaqivi koqaa kaiqa vare vauvaro Ihuva vika tavero kapipi varakero viraqihairo purumakauvata, sipisipivata, Kotira Naavuqihairo ruhaaqivi veva vahaqaini kero, monu nimi vau vaiintika taintavata utu tuquantaa aqukero vi monuravata rantaupirima

kerō, ¹⁶ uviri nimiha monu vare vau vaiintikavata nitiharo tiharo, Ne vi haikara vi haikara maaqihai vare vevare vuate. Ne kia ti Qora Naavu *maaketi* naavuqama taate, tiro.

¹⁷ Ihuva minti tuvaro vo uva Kotira vukuqi qara ntuvato uvava vira vaintinavu aatoqi ntuvu vumanta irura. Vi uvava mintima tiro: *Te ai Naavuara noraiqaake iriqi vuarirava iha itaintema kero, tigi ite vaivo*, tura. (Ihi 69:9)

¹⁸ Ihuva mintumanta Iutaa vaiinti noranavu tiha, Aqao, tavave ariara tivarave are mintira iarao? Are nana nora kaiqa vo tinavu tivuqaa vara qovarama kairaqe tenavu vira tave, ariara viva ho mintianarove tirarave? ti.

¹⁹ Vika minti tuvaro Ihuva tiharo, Ne maa naavura rampai kaiqe te taaramo enta variqi vihamā qaiqaa kaqa kararave, tiro.

²⁰ Minti tumanta Iutaa vaiinti noranavu tiha, Aqao, maa naavura kaqeha 46 ihi airi ihiara kaqaqi vi vuru kaqa taiqakaa naavurave. Are hoe taaramo entaqai vi naavura qaiqaa kaqa taiqa kenarave? tura.

²¹ Vika minti tuvaro Ihuva kia vutukero qaqi naavuara tiraitiro, viva nai vaatara uva tuqantaakero tura. „Ne ti harukaiqe te taaramo enta varike qaiqaa qaqi himpirarave, tiro.“ ²² Naantiara Ihuva qaiqaa qaqi himpi vau entara vi uvava vira vaintinavu aatoqi ntuvu vumanta vika irura. Kotira vukuqi qara ntuvato uvaravata, Ihuva vi entara tu uvaravata, iriha vika Ihurara ququaave tura.

Ihuva ekaa vaiinti avu aatoqiraa okara iri tave vauva vaura

²³ Vehakuma Nimoto Karara no entaraqaa Ihuva Ieruharemini vaumanta vaiinti nahenti airitahaa vira kaiqa nora kaiqa taveha Ihurara ho quqaa vivave ti. ²⁴ Vaiinti nahenti virara quaheha minti ti vauvaro Ihuva vaiinti nahenti okarara kankoma kero iriharora tiro, viva kia vika turara noraiqaakero irura. ²⁵ Ihuva vaiinti nahenti vika nái aatoqi iru okarara kankoma kero irurara tiro, kia vovano qumina vika okarara vira tiva amiarirava vaura.

3

Nikotimaava Ihura oru tavora

¹ Parasi vaiinti vo vira autu Nikotimaara. Nikotimaava Iutaa vatanaaka vika nora vaiinti vovano vaura. ² Viva vo enta entaqi Ihura oru tavero tiharo, Maara ti variara vaiintio, tenavu tavauraro Kotiva ai atitaivarara tira, are maara uva ti variarava anira iarao. Kia Kotiva ai kahaqiarie titirio, are kiama ho nora kaiqa varaaraitiro, tiro.

³ Viva minti tuvaro Ihuva vira tiva amiro tiharo, Te quqaa uva tiarirara iriane. Vaiinti noruqama vinara kia qaiqaavata vatatairera, viva kiama Kotiva raqikina vatukara ho tavaanarove, tiro.

⁴ Tuvaro Nikotimaava tiharo, Nantiakeroe noruqama vina vaiintira qaiqaa vatataanarove? Viva hoe qaiqaa nai nora auhaqi vietairarave vira qaiqaa vatataanarove? tiro.

⁵ Minti tuvaro Ihuva vira nai tiva amiro tiharo, Te quqaa uva tiarira iriane. Qumina namariqi vatatairava vairaro kia Kotira Maraquravano vira qaiqaa vatatairarerave, viva kiama ho Kotiva raqikina vatukaraqai vuanarove. ⁶ Vaata vataava vaata vataaraqaima vatate vairave. Kotira Maraquravano maraqura vataaraqai vatate vairave.

⁷ Te ni qaiqaa qaraakaiqama kero vatataarire tuna uvvara virara kia are ravuku vuane.

⁸ Te uva vo tuqantaake ai tiva amirerave. Uvaivano utiharo vona vona nai antuqaqaa vi vairave. Uvaivano uti vaivara are kia vira tavaraitira, are vira uva *nontantaqai/otataqai* irianarave. Are viva viro aniro i okarara kia irira tavaaraao. Ho Kotira Maraquravano vatatai okarara vohaa qaramakero vaivo, tiro.

⁹ Ihuva minti tuvaro Nikotimaava vira irero tiharo, Nantiakeroe mintianarove? tuvaro ¹⁰ Ihuva tiharo, Are Isarerri vatanaaka maara uva tiva nimi variarava vaiharae vi uvvara kia kankomakera iriarao? ¹¹ Te ququaama turo. Tenavu kankomake iri tavauna haikara ni tiva nimi vauramanta ne kia tinavu uvvara ququaave tiarave.

¹² Te vataihainaa haikara ni tiva nimuramanta ne virara kia quqaa uvave tiarave. Ne minti tiavera te naaruvalhainaa haikara tiarira nantiakée ne vi uvvara ho ququaave tivarave? ¹³ Kia vaiinti vovano Kotiva vainaini naaruvalini virave. Ti Vataini Vatataika teqaima naaruvainivata variavaurauka, te vihaima turvaukave.

¹⁴ Haaru ni kaivaqava Mosiva qumina vataini ni vau entara memaru maraqura *baraasi* origohairo autukero vira katariqaa arutero tuahera korave. „Vaiinti nahenti vira tave kia qutu vuate tiro, Mosiva minturave.“ (Kaaranura 21:6-9.)

Ho Te Vataini Vatataika te variarira haaru Mosiva memaru maraqura autukero tuahera kontema kema, tivata katariqaa tuahera kevarave. ¹⁵ Mintiramanta vaiinti nahenti tiriara

quaae vivave tika kia qutu vi taiqa viraiti, vika ekaa enta ekaa enta qaqi variqi vivarave, tiro. Ihuva minti turama.

¹⁶ Varioq Kotiva vataini variakara voqamakero muntuka vateharora tiro, viva nai Maaqu vohaiqa vatataira tinavu timiro. Mintirara ti, vaiinti nahenti vira Maaquara quaae tika kia qutuvi taiqa viraiti, vika ekaa enta ekaa enta qaqi variqi vivara.

¹⁷ Kotiva nai Maaqu vataini attovaro viva kia vainti nahentiqaa uva vatareva tutvitaraitiro, viva vika kuvantu kero ntitareva tutvura.

¹⁸ Vovano vira Maaquara quaae vivave tirava, vivama kia uva varaanaro. Vovano vira Maaquara kia vivave ti vaiva, viva vaakama uva varaiwo. Viva Kotira Maaqu vohaiqara kia quaae vivave tira kaara, Kotiva ko tiva taiqakero viraqaa uva vatero.

¹⁹ Maa haikara kaara uva varianaro: Ovavano vataini tuvimanta vaiinti nahenti kia vira quahama amitaraiti, vika konkira ariraraqai quahe vai. Vaiinti nahenti kaiqavano qora kaiqa vaimantara ti, vika kia vi ovarara quahama amite.

²⁰ Qora kaiqa vare vaiva ova vira navutaiqiharoma kia ovavano vainaini viro. Ovavano iteharo te vaaku kaiqa varaunara qovarama kaantorave tivakero, kia ovavano vainaini viro. ²¹ Viva mintimama vaivaru quaae kaiqa vare vai vaiintiva kia getaraitiro, ovavano vainaini viro. Viva vivaro ovavano iteharo vira kaiqa ataama amitaimanta vaiinti nahenti tavaavaro vi vaiintiva Kotira uva avataqiro viharo Kotira kaiqa vare vaira.

Ioniya namari nimi vauva Ihurara vaiinti nahenti tiva nimura

²² Viraqahai Ihuvavata vira vaintinavuvata „Jeruharemi mini ke“ Jutia vata vo, qumina vataini vi. Ihuva nai vaintinavu vataakero oru mini vaharo vaiinti nahenti namari nimi vaura.

²³ Namari nimi vauvaro Ionivavata vatuka vo, Salimi tataaqa Ainonini vaharo namari nimi vaura. Ioniya nora namari vaunaini vaumanta vaiinti nahenti mini ruvaaqumavi vauvaro Ioniva vika namari nimi vaura. ²⁴ Vi entara kia Ionira rumpa vare karapuhi naavuqi vuru kora.

²⁵ Vi entara Iutaa vaiinti vovano vaharo Ionira uva iru vaiintika hampata namari hiqe okarara tirori vaura. Mintumanta vika Ioniva vaunaini orure tiha, ²⁶ Maara ti variara vaiintio, tota are Iotani Namari hini mantaraini vaiinti vontira vaharama are virara vivave tunarave. Ho tavaane. Vi vaiintiva vivavata namari nimi vaimanta airithaa viva inaini vi variavo, ti.

²⁷ Minto tuvaro Ioniya tiharo, Ho Kotiva naaruvali vaya vaiinti vo kia vo haika amirera, vi vaiintiva kiama ho vi haikara varaanarove. ²⁸ Nevata te tota tunarara iriarave. Te tiha, Kiama te Mesaiaavanovauve vauro. Ti tititaimanta te naane vira avuni anuraukave, tunarave.

²⁹ Nahenti varaarirava vivama nahenti varairave. Vi vaiintira tontivano himpi vaharo vira uva iriharo quahairave. Ho vi vaiintiva quahaintema kema, te Ihurara quahauro.

³⁰ Ihura autuvano uritarero voqavata noraiqama viraro ti hutuvano vataini qiarire, tiro. Ioniya minti turama.

Ihuva naaruvali vaharo tuvuaina okarara tura

³¹ Ihuva mpeqavano virihairo tuvivara tiro, viva ekaa haika aatara kaivama vairo. Vataihainaava vataihairo anivara tiro, viva vataihaina haikaraqai ti vaira. Ihuva naaruvali vaharo tuvivara tiro, viva ekaa vataihaina haika aatarakaivama vairo.

³² Viva nai tavai haikara nai iri haikara qoqaa tiva nimi vaimanta vaiinti nahenti vira uvava kia quaae tiraiti, vira uva qoririma amite variara.

³³ Ho vaiinti vovano kia Ihura uva qoririma amitaraitiro, vira uvava quaae uvave ti vai vaiintiva, viva minti tiharoma Kotira uvaravata quaae uvama vaivo tiro.

³⁴ Kotiva Ihura atitaivaro viva Kotira uvaqai ti vaira. Kotiva vira atitareva iharo, nai Maraqura amiharo kiama inaaraiqa amiraitiro, viva noraiqamakero amivarora tiro, ho viva Kotira uvaqai ti vaira.

³⁵ Vira Qova nai Maaquara voqamakero antuqa arivarora tiro, viva ekaa haika nai Maaqu amivaro viva vi haikaraqaa raqikiqiro vi vairo.

³⁶ Vovano vira Maaquara quaae tirava kia ekaara qutu viraitiro, qaqi variqiro vuanaro. Vovano kia vira uvava quaae tirava vairaro Kotira arara itairava viraqaa varianaro.

4

Ihuva Sameria vatanaa nahenti hampata uva tura

¹ Vi entara Parasi vaiintinavu iruvaro Ihuva airi vaiinti nahenti ntitaqiro viharo namari vika nimiharoma Ionira aatara kora. ² (Ihuva kiama naivano vika namari nimiraitiro

umanta vira vaintinavuvano vaiinti nahenti vika namari nimura.)³ Parasi vaiinti vi uvara iruvarora tiro, Ihuva viraqaaahairo Iutia vata mini kero vetara Karirini viro.

⁴ Karirini vireva vu aarava vaireva Sameria vata avutana vauvarora tiro,⁵ Ihuva vi aararaqaa viharoma inaara vatuka vo, vira autu Sikaave tunaini oru ntora. Vata vo, haaru Iekopiva nai maaqu Iohepira amu vataro vira tataaqa vaura.

⁶ Haaru Iekopiva namari nareva quivitova mini vauvaro Ihuva niara aara ani kovaro popohovaro viva namariara quivitora vira tataaqa oquiviro vaura. Oquiviro vauvaro kuarivano qiatagaqaa uri vauvaro⁷ Sameria nahenti vovanu namari kaqareva anuvu Ihuva namariara naataa uvaro vi nahentirara tiharo, Namari kaqa timiraqe naare, tiro.

⁸ Ihura vaintinavu vaakama kara varareka vatkaini vuvuro⁹ Ihuva viraqaa vaharo minti tuvaro Sameria nahentivano aqao tiro, Are Iutaa vaiintivano variaramanta te Sameria nahentima vauro. Are nantivarae tiriara namari kaqa timiraqe naare tiarao? tiro. Iutaa vatanaakavata Sameria vatanaakavata nai toma amite nai toma amite i vaurara tiro, nahentivano minti tura.

¹⁰ Minti tuvaro Ihuva nahenti vira nai tiva amiro tiharo, Are Kotiva ai amireva iaina haikaravata, ti okaravata, kankomakera irianaravauve, are ti irairaqe te qaqi variqi vina namari ai amirarave, tiro.¹¹ Vi vatanaaka ruvu namariara *qaqi vai namarirave* tura.

¹¹ Ihuva te qaqi variqi vina namariara ai amirarave tuvaro vi nahentiva kia kankoma kero vira uva iriraitiro, viva ruvu namariarave tivo tiro.¹² Viva tiharo, Nora Vaiintio, namari vevantoma vaivara are kiama namari taquvata vatera iarao. Taraqihairae qaqi variqi vi namariara are tianara kaqenarave?

¹² Tinavu kaivaqava Iekopiva nora vaiintivano vaurave. Are vo? Vira aatara kaaravae variarao? Viva naivata nai vaintinavuvata nai purumakau sipisipi vataakero maa namari ne vaurave, tiro.

¹³ Minti tuvaro Ihuva tiharo, Vovano maa namariara neharo viva qaiqaa qaiqaavata namari naataa iraro naanarove.¹⁴ Ho vovano te amiaina namariara nairaro kiama qaiqaavata namari vira naataa iraro varianarove. Te namari amiariraro vi namariva vaiinti avutaqihairo ruvu voqaara nteharo iraro vi vaiintiva kia qutu viraitiro, qaqi variqiro vuanarove, tiro.

¹⁵ Ihuva minti tuvaro vi nahentiva tiharo, Nora vaiintio, ho vi namariara timiraqe te naarirao kia qaiqaa namari naataa iraqe kia qaiqaavata maaqihai kaqake naare, tiro.

¹⁶ Tuvaro Ihuva tiharo, Ho are nena vaativata oru aarama varera oruranteria maini tuvuane, tiro.

¹⁷ Minti tuvaro nahenti viva tiharo, Aqao, te kia vaatiqama vuraukave, tiro. Tuvaro Ihuva tiharo, Are quqaama tihara, Te kia vaatiqama vuraukave, tiarao.¹⁸ Are kauquru tataa vaatiqama vuaravave. Vate are vaiinti vo varatera variarava, viva kiama ai vaati tanava vaivo. Are quqaama tiarao, tiro.

¹⁹ Minti tuvaro nahentivano tiharo, Nora vaiintio, te irurara are paropeti vaiintivano variarao. Kotiva ai kahaqivara minti ti variarao.²⁰ Ho tinavu Sameria vatanaa kaivaqaukavara maa ainqinaraqaa vahama Kotira autu tuahere vaurave. Minti ti vaumanta ne Iutaa vatanaaka aqao tiha, Ieruharemi miniqaima vahia Kotira autu tuaheraataarave, ti variarave. Ne Sameria vatanaaka tinavuara minti ti variarave, tiro.

²¹ Nahenti viva minti tuvaro Ihuva tiharo, Are ti uvara quqaave tiane. Enta vo anintaira ne vi entaraqaa ti Qora autu tuaherareka iha, kiama maa ainqinaraqaa uru vaiha Kotira aarevarave. Kiama Ieruharemhai Kotira aarevarave.

²² Ne Sameria vatanaaka Kotira okarara kia kankomake iriraiti, ne hampiqama keha vira aare variarave. Vaiinti nahenti kuhvantu nimitaarira vaiintiva Iutaa vatanaakaqihairo qovaraiqiainarara ti, tenavu Kotira okarara kankomake irihama, vira autu tuaherehama vira avuqavuqama keha aare vaunarave.

²³ Enta vo anariarava vate vi entava govarama vivo. Vi entaraqaa Kotira Maraqravano vaiinti nahenti kahaqiramanta vika kankoma keha Kotira okarara irihama vika quqaiqama keha vira autu tuahera kevarave. Mintima vai vaiinti nahentika ti hutu tuahera kaate tiro, ti Qova vikarama rante vaivo.

²⁴ Kotiva vaireva viva Maraqravano vairara ti, vira Maraqravano kahaqi vai vaiinti nahentika vikaqaima Kotira okarara kankomake iriha, quqaiqama keha vika ho Kotira autu tuahera kevarave, tiro.

²⁵ Minti tuvaro nahenti viva tiharo, Kotiva atitaaina vaiintiva *Mesaiavano* aniaina uvarara titamanta te irunarave. Vi entava anintairaro viva ekaa haika okarara tinavu tiva timianarove, tiro.

²⁶ Tuvaro Ihuva nahenti vira tiva amiro tiharo, Ho ainti uva ti vaurauka te maa vikave, tiro.

²⁷ Ihuva vi uvara minti ti vaumanta Ihura vaintinavu vatukaihai orurante ani tavovaro Ihuva Sameria vatanaa nahentintiro uva ti vaumanta vika virara ravukuvi.

Vika mintimake ravukuvi uvaro, vikaqihairo kia vovano vi nahentirara tiharo, Are nana haika vararevae aniarao? tiro. Vikaqihairo kia vovano Ihurara tiharo, Are nantiharae vikantira uva ti variarao? ti.

²⁸ Kia vinavuka minti tiraiti, vinavuka qaqrake uvema vauvaro nahentivano himpiro nai namari taqu mini kero, anirantero vatukaini vaiinti nahenti vuru tiva nimireva oruntero tiharo, ²⁹ Vaiinti vo ami tavaate. Viva te varaua okarara ekaa qovarama kero ti tiva timivo. Quqaae viva Kotiva atitare i vaiintiva *Mesaiavano* vaivo? tiro. ³⁰ Minta tumanta vaiinti nahenti vika nái vatuka mini ke, Ihuva vaunaini vurama.

³¹ Nahentivano nai navunaaka tiva nimireva anirantero vumanta Ihura vaintinavu virara tiha, Maara ti variara vaiintio, ho maa karara vara kera naane, tuvaro ³² viva tiharo, Te kara vo vataunara ne virara kia iriavo, tumanta ³³ vira vaintinavu nai tiva ami nai tiva ami iha tiha, Vovanoe vaaka kara vuru vira amivaroe viva minti tivo? tuvaro ³⁴ Ihuva vinavuka tiva nimiro tiharo, Te ti „Qova,“ ti tititaira vira antuqa vai kaiqara vare vuru taiqa kaarirava, vi kaiqava ti karama vaivo, tiro.

³⁵ Minta tivakero Ihuva vikara tiharo, Ne tiha, Erakaimantema tora aitarairaro karavano mpeqaiqiraqe ho qantu varaainarave, tiarave. Ho kara ututaaraqi aitutihā tavaate. Maa entara karavano mpeqaiqamama vivo. Ne ho qantu varevarave.

³⁶ Kara qantu varava nai kaiqa vara tairaqahairo koqaa varairave. Viva qantu vate vai karava ekaa enta qaqi variqiro vuuanarove. Kara utiravavata, kara qantu vara vatairavavata, vitanta vohaa vahitahantquaheha vaivarave.

³⁷ Uva vovata tiava quqaa uvama vaivo: Vaiinti vovano kara naahoqi utu taivarovo vovano kara qantu vare vairave. ³⁸ Te ni nititehama tiha, Vovanoe kaiqa varakero ututai karara, ne vi karara oru qantu varaaate, turo. Vokiaka vukaari utiha kara ututaara, ne vi karara ho qaqi qantu varevarave turo, tiro.

Sameria vaiinti nahenti airitahaa Ihurara quqaa vivave tura

³⁹ Ihuva nai vaintinavuara minti ti vauvaro nahentivano anirantero nai navunaaka vaunaini orurero tiharo, Viva te haaru autuna okarara ekaama ti tiva timivo, tiro. Nahenti viva minti tumantara ti, Sameria vaiinti nahenti vi vatukaraqihainaaka airitahaa Ihurara ho quqaa vivave ti.

⁴⁰ Vika minti tivake Ihuva vaunaini anire Ihurara mpo tiha, Kia are vaaka vuane. Tinavu hampata voqavata varikera vuane, tuvaro Ihuva vika hampata taara enta vaitakero vurama.

⁴¹ Ihuva vika hampata taara enta vaharo nai vakaaka vika tiva nimumentara ti, vi vatanaka vonavuvata airitahaa Ihurara ho quqaa vivave ti tura.

⁴² Vika vi nahentirara tiha, Kia vaaka are „Ihuara,“ tinavu tiva timianaraqaahaiavauve, tenavu virara quqaae turo. Tentanavu ani vira uva irihara ti, vate tenavu kankomake iruraro Kotiva vira atitaivarovo viva ekaa maa vataraqaa vaika kuvantu nimitaariravama vaivo, ti. Vika minti turama.

Ihuva kamaanira kaiqa vaiinti vo vira vainti koqema kora

⁴³ Ihuva mini taara enta vaitero viraqahairo nai maaqa Karirini viro. ⁴⁴ Ihuva nai tiharo, Paropeti vaiintivano nai maaqa vaivarovo vira autuvano kia nora autuma vaivo, tura.

⁴⁵ Ihuva Karirini vumanta vi vatanaka vira quahama amite vaura. Vikavata Ve-hakuma Nimito Karara No Entaraqaa Ieruharemini oru vaiha Ihuva nora kaiqa varora tavorara ti, vira quahama amite vaura. ⁴⁶ Vira quahama amite vauvaro Ihuva qaiqaa Kenaani viro. Viva mini tota vaharo qaqi namari varakero *uaini* namariqama kora.

Viva mini anuvaro *kamaanira* kaiqa vaiinti noravano vauvaro vira maaquvano nora rovara vareharo Kapenaumini vaura. ⁴⁷ Ihuva Iutiaihairo Karirini anivo tura iriro, vi vaiintiva Ihuva anunaini orurero virara tiharo, Hoe are anira ti maaqu taverava viva rovara varainara taiqa kairaro koqema variarire? tiro. Vira vaintivano qutu vuarirava aumanto vauvaro viva minti tura.

⁴⁸ Minta tuvaro Ihuva virara tiharo, Ne kia nora kaiqa, vo kaiqa vo kaiqa tavaraiti, kiama ne tiriara quqaa vivave tivarave, tiro.

⁴⁹ Minta tuvaro *kamaanira* kaiqa vaiinti viva tiharo, Noravauvu, ti maaquvano qutu vuanatorave. Vaaka aniane, tuvaro ⁵⁰ Ihuva tiharo, Ho nena maaqaini vuane. Ai maaquvano kia gutu viraitiro, qaqima varianarove, tiro. Tuvaro *kamaanira* kaiqa vaiinti viva Ihuva uva tiva amurara quqaa uvave tivakero, nai maaqaini ururantero vurama.

⁵¹ *Kamaanira* kaiqa vaiinti viva aaraini vi vaumanta vira kaiqa vaiintinavu „maaqaihai uru vira vitake viha vira tiva ami tiha, Ai maaquvano koqemama vivo, ti.

⁵² Tuvaro viva vinavuka irero, Nana kuari avuqaae vira vaatavano koqema vivo? tumanta vinavuka tiha, Enta eraivaro 1 *kirok* ima vira vaata iha itaiva taiqa vivo, ti.

⁵³ Minti tuvaro vira qova iruvaro vi kuari avuraqaa Ihuva vira tiva amiro tiharo, Ai maaquvano kia qutu viraitiro, qaqima varianarove, tura. Minti turara tiro, *kamaanira* kaiqa vaiinti vivavata vira navunaakkavata Ihurara quqaa vivave turama.

⁵⁴ Ihuva Iutiaihairo ani Karirini vaiharo vi kaiqara avuni varovavata, maa kaiqara varovavata, taara kaiqaiqama vura.

5

Ihuva maaraqaa vaiinti vo koqema kora

¹ Virqaahairo Iutaa vatanaaka ovata no entava vo anirovaro Ihuva Ieruharemini viro.

² Ieruharemini vaantaavura qenti vo, Sipisipi Qentive tuva vaura. Vira tataaqa varuva namari vo vira autu Betesata Namari vaura. Namari auvahianta haraara naavu kauqurunavu vauvaro ³haraara naavu vinavuraqi rovara varoka airitaha viraqi vaura. Avu qimpa vukave, aiqu qoraiqama vukave, aiqu kauqu tapara vukave, vika vika vaiha namarivano qakaa qakaa iainara vira vekama vaura. ⁴ [Vohaa enta vohaa enta *enseli* vovano tuvunteharo namari qaki qaki umanta rovara varokaqhairo vovano naane avuni namariqi otu vuvuro viva nana nana rovarae varova taiqa vura.]

⁵ Ho vaiinti vovano airi ihi 38 ihiara rovara varo vaiinti vivavata haraara naavuqi vaura. ⁶ Viraqi vauvaro Ihuva vira tavero iruvaro vi vaiintiva airi ihi rovara varaqiro vuvuro vira irero, Ai vaatavano koqemae vuanarove? tiro.

⁷ Tuvaro rovara varo vaiintiva viva tiharo, Nora Vaiintio, namarivano qakaa qakaa ivaro vovano ti kahaqama varero muntu namariqi kaarirava kia vaimanta, te naane avuni otu virare turamanta vokiaka naane otu vi variarave, tiro.

⁸ Tuvaro Ihuva vira tiva amiro tiharo, Himpira nena taari utu varera nena aiquidantaqahaire nuane, tuvaro vaakama vira vaata koqema vuvuro ⁹ vi vaiintiva himpiro nai taari utu varero nai aiquidantaqahaire niro. Vi entara Iutaa Maara Entaqaa Ihuva mintima kora.

¹⁰ Ihuva Iutaa Maara Entaqaa mintima korara ti, vira kaara Iutaa vaiinti noranavu vaiinti koqema vura vira atiha tiha, Vate Maara Entaqaae. Are nena taari utu varera vuanarara tinavu maara uvavano qioqama tairave, ti.

¹¹ Vika minti tuvaro viva tiharo, Aqao, vaiinti vovano ti koqema kaiva tiriara nena taari utu varera nuane tiverama te minturo, tiro.

¹² Minti tumata Iutaa vaiinti noranavu tiha, Ta vaiintivae ariara himpira nena taari utu varera nuane tivo? Vira autu raane, tuvaro ¹³vaata koqema vu vaiintiva kia vira autu irura. Mini airi vaiinti nahenti vauvaro Ihuva vaakama vuvarora tiro, vi vaiintiva kia Ihura autu ho irura.

¹⁴ Vira autu kia iriraitiro vauvaro, Ihuva naantiara vaiharo tavovaro vi vaiintiva Kotira Naavuqi vauvaro Ihuva vira tiva amiro tiharo, Ho tavaane. Ai vaata koqema vivo. Vo haika qora haikavano avuni vai rovarara vira aataraarirava ai aruantorave tira, kia qaiqavata qora kaiqa varaqira vuane, tiro.

¹⁵ Tuvaro vi vaiintiva viraqihairo vevarero viro Iutaa vaiinti noranavu vuru tiva nimiro tiharo, Vira autu Ihurave. Vivama ti tivaata koqema kaivo, tiro.

¹⁶ Tumanta vika iruvaro Ihuva Maara Entaqaa vira koqema korara ti, vira kaara vi entaraqahai Ihura qoraiqama amite vaura.

¹⁷ Mintuvaro Ihuva vika tiva nimiro tiharo, Ti Qova ekaa enta kaiqa varaqiro vi vaimanta tevata kaiqa varaqi vi vauro, tiro.

¹⁸ Tumanta vi uvura kaara Iutaa vaiinti noranavu voqamake vira arukareka auti vaiha tiha, Tota Ihuva tenavu Maara Entara tuna uvura raqa kaivo. Ho vira naantiara viva Kotirara ti Qorave tivo. Viva qumina vaiintivano vaiharo viva variqa Kotikantiro vohaa vaireva auti vaivo, ti.

Ti Qova varai kaiqarama tevata varauro tura

¹⁹ Iutaa vaiinti noranavu minti tuvaro Ihuva vika tiva nimiro tiharo, Te quqaa tiari iriate. Te vira Maaquvano vaiha kiama tenta irike vi kaiqara vi kaiqara ho varaainarave. Ti Qova kaiqa vare vaimanta te tavaunara, te vi kaiqaraqaima vare vauro. Ti Qova minti minti i vaimanta te vira Maaquvanavata minti minti i vauro.

²⁰ Ti Qora muntukavano ti nai Maaquara vaivarora tiro, viva nai vare vai kaiqara ekaa kaiqa ti humiqivo. Naantiara ti Qova humiqairage te maa kaiqara aatara kaaaina kaiqarama varaainarave. Te vi kaiqara vi kaiqara varaari ne vira tavema voqamake ravuku vivarave.

²¹ Ti Qova qutu vuaka qaiqaa qaqi vara himpimake vaivave. Ti Qova mintinantemake, te vira Maaquvanovata vaiha tinta muntukavano vaina vaiinti nahentika qaqi vara himpima kaari vikavata qaiqaa qaqi variqi vivarave. ²² Ti Qova kiama vaiinti nahenti avateharo ko tianarove. Viva vi kaiqara ti timimanta te vira Maaquvanovata vaiha tentavano *ko* tirerave. ²³ Viraqaahai vaiinti nahenti ti Qora autu tuaherentemake, vika ti vira Maaqu hutuvata tuaherevarave. Vovano kia ti vira Maaqu hutu tuaherairava kiama ti Qova ti tititaira vira autuvata tuaheraanarove.

²⁴ Te quqaa tiari iriate. Vovano ti uva iriro ququaama Kotiva vira atitairave tirava, vivama ekaa enta ekaa enta qaqi variqiro vuuanarove. Viva kiama uva varaanarove. Viva maa entara kiama ekaara qutu viraitiro, viva ekaa enta qaqi variqiro vuariravama varianarove.

²⁵ Te quqaa tiari iriate. Vo enta qovaraiqiarirava aumantoma vaivo. Vi entaraqaa qutu vika, vika ti Kotira Maaqu uva irivarave. Ti uva iriaka homa qaqi variqi vivarave.

²⁶ Qaqi variqi vi okarava ti Qoraqima vaivo. Ho ti Qova nai ti vira Maaqu noraiqama kaivarao qaqi variqi vi okarava tiqvavatama vaivo. ²⁷ Ti Vatainai Vataataikara tiro, ti Qova ti noraiqama kaimanta te vatainai vai vaiinti nahentika vika *ko* tirerave. ²⁸ Ne kia te tainai uvarara ravukku vuate. Enta vo amintairage te vika naaraari vataaqi quntamate vaiinti nahentika ti uva iri, ²⁹ nái quntamate teraqhai himpivarave. Hini kika koqe kaiqa vareka himpi qaqi variqi vivarave. Hini kika qora kaiqa vareka himpi nora uvama varevarave.

Vaiinti vokuka Ihura okarara tura

³⁰ Kia te tenta irike vo kaiqa vo kaiqa ho varaainarave. Te ti Qora muntukavano vai kaiqarama vare vaunarara ti, te avuqavuqamake vaiinti nahenti uva avateha ti vauro.

³¹ Te tentavano tenta okarara tierera, vovano ti uvvara kia quqaa uvave tianarove. ³² Ho ti okarara tiva nimi vaiva vovano vaivo. Te kankomake iruraro viva tiriara tiva nimi vai uvava quqaa uvama vaivo. ³³ Ne tota vaiintinavu nititomanta vika otu Ionira ti okarara irovoro Ioniva ti okarara vutu kero vika tiva nimurave. ³⁴ Qaqi vaiintivano ti okarara tainarara kia te virara noraiqaake iruro. Kotiva ni kuvantukero ntitaarire ti, te vi uvvara niti tiva nimuro.

³⁵ Ioniva vaiharo ova voqara ite vaumanta ne vaiha vi ovava ataa iainarara vahuqaqai quahama amitorave. ³⁶ Ioniva vaiinti nahenti tiriara tiva nimurave. Ho vo haikavanovata Ionira uva aatarakero vutukero tiriara ni tiva nimi vaivo. Ti Qova kaiqa timimanta te vi kaiqara vare vaurava, ho vi kaiqava ti okarara ni numiqe vaivo. Vaiinti nahenti te kaiqa vare vaunara tavehama, homa ti Qova ti tititairara kankomake irivarave. ³⁷ Ho ti Qova ti tititairava, vivama ti okarara ni tiva nimi vaivo. Ne kiama vira uva iri, vira virivata tavaarave. ³⁸ Viva ti tititaimanta te tuturamanta ne kiama tiriara quqaa vivave tiavarora tiro, Kotira uvavano kiama ni avu aatoqi vaimanta variavo.

³⁹ Ne tiha, Kaiqe Kotira vukuqi aitutumake tave ekaa enta ekaa enta qaqi variqi vuare, ti variarave. Ho vi vukuraqi vai uvava ti okarara ni tiva nimi vaimanta ⁴⁰ ne kia te vaunananaini aniamanta te qaqi variqi vi okarara ni nimuro. Ne aniantara vaimanta kia aniaavo.

⁴¹ Kiama te vaiintiqaahai nora autu varaainarave. ⁴² Te ni kankomake tavauro. Kia ni muntukavano Kotirara vaivo. ⁴³ Kotiva ti Qova ti tititaimanta te tenta Qora autu vare anuramanta ne ti quahama timitaataara vaimanta ne kia ti quahama timitaavo. Ho vovano nai irikero nai nora autu varero anintairera, ne vaakama vira quahama amitevarave. ⁴⁴ Ne nenta nai autu nai autu tuahererera noraiqamake iriha, kia Kotiva ni nutu tuaheraainarara noraiqamake iriavo. Mintihama nantiabee ne tiriara quqaa vivave tivarave? „Vira kaara ne kia ho minti tivarave.“

⁴⁵ Naantiara tenta qora avuqaa vaiha kiama tevano niqaa uva vataainarave. Mosiva ni kaiqaqava, vivama niqaa uva vataanarove. Ne Mosirara viva tinavu kahaqianarove tiarave. Ho naantiara vivama niqaa uva vataanarove. Mosiva qara ntuvato uvava tiriara timanta ne virara kia quqaae tiarave. ⁴⁶ Ne Mosirara uvvara quqaa uvave tiatirio, ne ti uvaravata quqavema tiatirio. ⁴⁷ Ne vira uvvara kia quqaa uvave tivakeha, nantiabee ne ti uvaravata quqaa uvave tivarave? Ne kia ho mintivarave, tiro. „Ihuva vi uvvara Iutaa nora vaiintinavu tiva nimura.“

*Ihuva kara airiqama kero raira nimura
(Matiu 14:13-21; Maaki 6:30-44; Ruki 9:10-17)*

² Oru mini vaumanta vaiinti nahenti airitahaa tavovaro Ihuva aihavuka kojema komanta virara iriha Ihura avataqi vuvaro ³ Ihuva nai vaintinavu hampata oru aihaini oquiviro vaura. ⁴ Vi entara Iutaa vatanaaka Vehakuma Nimito Karara ovata no entava aumanto vaura.

⁵ Ihuva nai vaintinavu hampata oquiviro vaiharo tavomanta vaiinti nahenti airitahaa vira avataqi anuka, ani uki vuvaro Ihuva Piripira irero tiharo, Tenavu taihai monuqohai kara koqaamake vi vaiinti nahentika nimiari nevarave? tiro.

⁶ Ihuva naivano vika kara nimiaina okarara irihar, viva Piripira qaqi avateharo tavareva minti tura.

⁷ Minto tuvaro Piripiva tiharo, Aqao, 200 kinaa aqukeha kara varake rairake nimiari vika inaaraiqa inaaraiqaqaima varevarave. Airi vaiinti nahentima maini variavo, tiro.

⁸ Tuvaro Ihura vainti vovano Entaruva Saimoni Pitaara qatavano tiharo, ⁹ Quvaaraa vainti vovano maini vaivo. Viva *baaliqohai* untataa mparetira kauqurunavu vatero havuka taaraqantavata vataivo. Airi vaiinti nahentima variavo. Nantiakeroe vi karava ho varianarove? tiro.

¹⁰ Minto tuvaro Ihuva nai vaintinavu tiva nimo tiharo, Ne vaiinti nahenti timanta vata kanta oquivi variate, tiro. Minto tuvaro mini koqe ukau vaunaini vaiinti nahenti oquivi vaura. Vaiinti vika vaireka 5,000navu airitahaa oquivi vaumanta „nahentivata airitahaavano mini oquivi vaura.„

¹¹ Vika oquivi vuvaro Ihuva mpareti varakero Kotirara kojema iarao tivakero, vaiinti nahenti oquivi vauka rairakero nimo, havukavata varakero vooha qaramakero oquivi vauka raira nimumanta vika varake ho ne. Vika naataa untemake, vi karara ho nora.

¹² Vika ho nomanta Ihuva nai vaintinavu tiharo, Vika kara neha ataara qaqrakera nuntu ruvaaque. Karavano quminaqiantorave, tumanta ¹³ vira vaintinavu vaiinti nahenti *baali* mpareti kauqurunavuqahai neha ataara aqukora nuntu vareha rutantuto utara 12navu nora utanavu mpiqa kora.

¹⁴ Mpiqa komanta ho vaiinti nahenti mini vauka tavovaro Ihuva nora kaiqa vara komanta tiha, Paropeti vaiintivano vataini tuvuanarove tiava, ho quqaa maa vi vaiintivave, ti. ¹⁵ Vika minti ti vuvaro Ihuva kankomakero irumanta vaiinti nahenti virara tiha, Kaiqe vira noraqama kaariraro viva tinavu Avuhainaa Vaiintivano variarire, tiha Ihura ravaqaqvavu kareka auti vuvaro Ihuva vi uvava iriro, vika mintivorave tivakero qaqla mini kero tuvurantero qaiqaa ainqaqa nariaraa oru vaireva vura.

Ihuva varuva mare/turu vaura aiqu ntavaqiro vura
(Matiu 14:22-33; Maaki 6:45-52)

¹⁶ Ihuva mini vuvaro enta ire umanta vira vaintinavu namari auvahini oture ¹⁷ votuqi vaarire anirante Kapenaumini vi. Mini vuvaro anomia entuvaro ¹⁸ Ihuva kia tuvumanta vika varuvaqaa vi vuvaro aaronavaano voqama kero utiharoma varuva namari ven-taqiro vi ani vaura.

¹⁹ Ventaqi vi ani vaumanta vira vaintinavu namariqaa viha, namari rairaqa rairaqa viha 5 kilomitave 6 kilomitave varake varuva namari tavaaranava viha, tuqantaavi tavovaro Ihuva varuva vaura aiquqaahairo ntavaqiro aniro votu aumanto aniomanta vika vira tave, vira aatu voqamake qete vaura.

²⁰ Voqamake qete vuvaro Ihuva vika tiva nimo tiharo, Kia qetaate. Tema anuro, tiro. ²¹ Tumanta vika Ihurara ho votuqi vaariraane tuvaro viva vaari rovaro votuvano vaakama vika vire unaini orurora.

Vaiinti nahenti Ihura rantareka vi vaura

²² Vira qararaa vaiinti nahenti varuva namari hini auvahini vauka tavovaro votuqohiqavano vaumanta vika iruvaro Ihuva kia vihairo nai vaintinavu hampata votuqi vaarirero vumanta vira vaintinavu kia Ihuravata vita vararaiti, vika naiqai votuqi vura.

²³ Vika mintiakie iri vaumanta Taiberiasi vatukaihai votu vonavu ani tota Ihuva karara kojema iarao tivakero, raira nimumanta nonaini vira aumanto anumanta ²⁴ vo vaiinti nahentinavu mini vauka tavovaro Ihuvavata vira vaintinavuvata kia vaumanta vika vi votunavuraqi vaarire Kapenaumini Ihura rantareka vura.

Ihuva naaruvaihainaa mparetiara tura

²⁵ Vika Ihura rantareka vi, oru varuva namari hini auvahini Ihura rantake tiha, Maara ti variara vaiintio, are taireve maini anira iarao? tuvaro ²⁶ Ihuva tiharo, Te quqaa tiari iriate. Ne mpareti ho naarara irihama ti rante variavo. Ne kia ti kaiqa okara kanko kaankomake tavaara virara irihavauve ti rante variavo. ²⁷ Ho kiama ne nteraaaina karara varareka kaiqa varaate. Vi karara qaqrakema ekaa enta ekaa enta qaqi variqi vuaina

karara vira vararekama kaiqa varaate. Vi karara te Vataini Vatataika vaiha ni homa nimirarave. Kotiva ti Qova vivama ti noraiqama kaivera, te homa mintirarave, tiro.

²⁸ Ihuva minti tumanta vika vira irema, Tenavu Kotira kaiqa vararerera iha nantima kehae varaainarave? ti. ²⁹ Tuvaro Ihuva vika tiva nimo tiharo, Kotiva niara maa kaiqara varaate ti vaivo. Viva atitai vaiintira virara quqaa vivave tiate tiha vira kaiqa varaate tivo, tiro.

³⁰ Ihuva minti tumanta vika tiha, Ho nana kaiqae humiqairaqe tenavu vira tave ai okarara quqaaave tirarave? ³¹ Are nana kaiqae nora kaiqa vara timitairaqe tenavu tavaare? Tinavu kaivaqauka haaru qumina vataini vaiha naaruvaihainaara *manaa* kara norave. Virarama Kotira vukuqi qara ntuva tova mintima tivo. Viva naaruvaihainaara kara nimivo, turave, ti.

³² Vika minti tuvaro Ihuva tiharo, Te quqaa tiari iriate. Vi entara kiama Mosiva quqaa naaruvaihainaara kara vika nimurave. Ti Qova, vivama naaruvaihainaara kara quqaa nimiarirava vaivo.

³³ Vataini variakara vika qaqi variqi vuate tiro, naaruvaihairo vataini tuvu vai vaiintiva, vi vaiintivama Kotira karavano vaivo, tiro.

³⁴ Ihuva minti tumanta vika tiha, Nora Vaiintio, ho vi karara ekaa enta ekaa enta tinavu timiane, ti. ³⁵ Minti tuvaro Ihuva vika tiva nimo tiharo, Vaiinti nahenti ti namaqi viha qaqi variqi vuate ti, te maa vi karaukama vauro. Te variaiananaini anirava kiama karara antuqa aruanarove. Tiriara quqaa vivave tirava kiama namariara antuqa aruanarove.

³⁶ Te vaaka tiha, Ne ti tavehavata, kia tiriara quqaa vivave tiavo, tunarave. ³⁷ Ti Qova ti kaama timitaaina vaiinti nahentika, vika te iainanaini anivarave. Vika te iainanaini aniqe kiama te vika qoririma nimitararave. ³⁸ Te naaruvaihai kia tenta irike varataataina kaiqara vararerera tuvuraukavaave. Te ti tititaira muntuka vai kaiqara vararerera tuvuraukave. Ti tititaira Kotira muntuka mintimama vaivo: ³⁹ Viva vaiinti nahenti ti timitairaukaqihai te vonku kakakima kaarorave. Te vikaqaa raqikiqi vivi, ekaara entaqaa vika vara himpima kaarira qaqi variqi vivarave.

⁴⁰ Qaiqaa ti tititaira muntuka mintimama vaivo: Ekaa vaiinti nahenti ti vira Maaqu tave quqaa vivave tika, vikama qaqi variqi vivarave. Te ekaara entaqaa vika vara himpima kaari vika qaqi variqi vuate. Ho ti Qora muntukavano mintimama vaivo, tura.

⁴¹ Ihuva vaaka turara tiharo, Te naaruvaihai tuvura imparetikave, tura kaara Iutaa vaiinti noranavu vira toma amiteha nuntu naantu tiha, ⁴² Aqao, viva Ihuva Iohepira maaquve. Vira noka qoka tenavu tavaunarave. Ho nantivaroe viva te naaruvaihai tuvuraukave tivo? ti.

⁴³ Vika minti ti vauvaro Ihuva tiharo, Eqaate. Ne kia vi uvara tunarara nuntu naantu tiate. ⁴⁴ Ti Qova ti tititaira kia vaiinti vo vitairera, vi vaiintiva kiama te iainanaini ho anianarove. Ti Qova ntitairaukaqaima te iainanaini anivarave. Ho vika aniqe te ekaara entaqaa vika vara himpima kaari vika qaqi variqi vivarave. ⁴⁵ Haaru paropeti vaiinti vovano mintima qara ntuva tero tiharo,

Naantiara Kotiva ekaa vaiinti nahenti numiqe vaira vika vira kaiqa tavevarave, turave. (*Aisaiaa 54:13*)

Ti Qova kaiqa numiqaarirauka ti Qora uva irika, vikaqaima te iainanaini anivarave.

⁴⁶ Ho kiama vaiinti vovano ti Qora tavaiva vairave. Te ti Qova Kotiva vainaihai tuvuraukara ti, teqaima vira tavaunarave.

⁴⁷ Te quqama turo. Tiriara quqaa vivave tira vaiintiva qaqi variqiro vuanarove. ⁴⁸ Qaqi variqi vuate ti, te vaiinti nahenti vika karama vauro.

⁴⁹ Ni kaivaqauka qumina vataini vaiha naaruvaihainaara kara, *manaave* tu karara namaqi viha vuru qutu vurave. ⁵⁰ Ho kara vovano naaruvaihairo tuvirave. Vi karara naarirava kiama ekaara qutu vuanarove.

⁵¹ Ho tema vi karaukama uro. Te qaqi variqi vi karauka naaruvaihai tuvuraukave. Vovano maa karara nairava, viva qaqi variqiro vuanarove. Te kara amihama tenta mative tenta vaatave amirarave. Vataini vaika qaqi variqi vuate ti, vi karara vika nimirarave, tiro.

⁵² Ihuva minti tumanta Iutaa vaiinti noranavu náiqai tiroriha tiha, Viva nantiakeroe nai mative nai vaatave tinavu timiraqe nararave? ti.

⁵³ Tuvaro Ihuva vika tiva nimo tiharo, Te quqama turo. Te Vataini Vatataika te variarira ne kia ti mativata ti naarevata naivera, ne kia qaqi variqi vivarave.

⁵⁴ Ti mativata ti naarevata nairava, viva qaqi variqiro virage te ekaara entaqaa vira qaqi vara himpima kararave.

⁵⁵ Ti mativano kara tanara vaivaro ti naarevanovata namari tanarama vaivo. ⁵⁶ Ti mativata ti naarevata nairava viva tiqi vairaque te viraqima vairarave.

⁵⁷ Ti Qova viva qaqi variqiro vi vaiva vaiharo viva ti tititaimanta te viva qaqi variqiro viraqaaahai tevata maini tuvu qaqi variqiro vuro. Ho vira aanarero vaiintivano ti namaqiro virava tigaahairo qaqi variqiro vuanarove.

⁵⁸ Ho te vi karauka naaruvalihai tuvuraukave. Ni kaivaqaukavara kara vo *manaa* namaqvi, qumina qutu vurave. Ho kia te vi karara voqaaravauve vauro. Maa karara ti kara nairava ekaa enta qaqi variqiro vuanarove, tiro.

⁵⁹ Ihuva Kapenaumini maara naavuqi vaiharo vi uvvara minti tura.

Ihura avataqi nuka vonavu vira qaqrake vura

⁶⁰ Ihuva minti tumanta vira avataqi nuka vonavu vaiha vi uvvara iri aqao ti, Vi uvvara maara rai uvarama ti vaivo. Tavave vi uvvara ho irianarove? Kiama tenavu vi uvvara ho irirarave, ti.

⁶¹ Vika evaara minti ti vauvaro Ihuva kankoma kero irumanta vira avataqi nuka virara nuntu naantu tiha vira ati vauvaro Ihuva tiharo, Te tuna uvvara kaarae ne tiriara nuntu naantu ti variavo? ⁶² Ho te Vataini Vatataika vaiha te naantiara tuvurante qoqaraanaini naaruvali oru variarira, ne te tuvurante oru vuainarara tavamake, vi entara ne nantie ivarare?

⁶³ Vaiintivano maraqura vataava vaivarso vira maraquravano viraqiqi vaivarora tiro, vi vaintiva qaqima vaivo. Vira maraquravano kia vaivarso vira vaatavano kia ho vira kahaqiraro qaqi variqiro vuanarove. Ho te vaaka tunarara kia te qumina vaataravauve turo. Te maraqura okarara ni tiva nimuro. ⁶⁴ Te qaqi variqiro vi okarara vaaka ni tiva nimunarave. Te minti turamanta ne himinavu kia ti uvvara quqaa uvave tiavo, tiro.

Ihuva hoqarenaa entaqaahairo vaiharo kankoma kero irumanta vaiinti vonavu naantiara virara kia quqaa vivave tika vaura. Ihuva qaqi enta iruvaro vaiinti vovano vira navutaka vuru tiva nimiriravama vaura.

⁶⁵ Vika minti minti i okarara kankoma kero iriro Ihuva vika tiva nimiro tiharo, Te virara irihama avuni niara tiha, Kia ti Qova hove tirera, vovano kia te iainanaini ho anianarove, tunarave, tiro.

⁶⁶ Minti tumanta Ihuva tu uvvara kaara vira avataqi nuka airitahaa toma amiteha vira qaqrake anirante vi. Vika kia qaqaaavata vira avataqi nura.

⁶⁷ Mintuvaro Ihuva nai vainti 12navu irero, Nevata vo? Ne ti qaqrake anirante virekave iavo? tiro.

⁶⁸ Tuvaro Saimoni Pitaava tiva amiro tiharo, Nora Vaiintio, tenavu ta vaitintiva inainie virarave? Arema qaqi variqiro vi okarara ti variaravave. ⁶⁹ Tenavu ariara quqaa vivave tihama, kankomake tavaurara are Kotira takuqira vaitintivano Kotiva inaihira tuvuaravave, tiro.

⁷⁰ Minti tuvaro Ihuva vika tiva nimiro tiharo, Ho tema ni 12navu naaramake ntita varauvalave. Niqihairo vaiinti vonkuvalo vaanavano viraqiqi vaivo, tiro.

⁷¹ Ihura vainti 12navuqihairo Iutaasiva Saimoni Ikeriotira maaquvalo naantiara Ihura govarama kaainarara iriharo Ihuva minti tura.

7

Ihura qatanavuara tura

¹ Viragaahai Iutaa vaiinti noranavu vira arireka auti vauvarora tiro, Ihuva kia Iutia vataini niraitiro, qaqira kero Kaririniqai ni vaura.

² Vi entara ovata no entava vovano aumanto vairo. Vira autu *Haraara Naavu* ovatave tura. „Haaru vira kaivaqaukavara qumina vataini vaihamo haraara naavuqiqai vau entarara irihama vi ovatara nora..” (*Wkp 23:33-43; Lc 16:13-15*)

Ovata no entava aumanto anintomanta ³ Ihura qatanavu tiha, Ho maa vatara maini kera vetara Iutiaini oru viramanta ai avataqi nikia aikaiqaa tavaate. ⁴ Vovano nai autu viriniqiqiare tiro, kia nai kaiqa kukeqa kairave. Are quqaa vi kaiqara vi kaiqara vare vairera, homa orurera qoqaa vahara vi kaiqara vi kaiqara varaira vika ekaa ai tavaate, ti. ⁵ Vira qatanavu Ihurara kia quqaa vivave tihara ti, minti tura.

⁶ Minti tuvaro Ihuva vinavuka tiva nimiro tiharo, Ti entavano kiama qovaraiqivo. Ne homa qaqi qumina enta vivarave. ⁷ Vataini variaka kia ni navutaiqivarave. Te vika kaiqara qora kaiqave ti vauramantara ti, vika ti navutaiqamaqi vi variavo. ⁸ Ne ovata nare inaini vuute. Te mini vuaina entava kia anintaimantara ti, te vate kia mini virerave, tiro.

⁹⁻¹⁰ Ihuva minti tivakero Karirini mini vaumanta vira qatanavu ovata nare unaini vuvaro Ihuva variro ho vivavata mini viro. Viva kiama qoqaa viraitiro, kukeqa viro mini vura. ¹¹ Mini vumanta ovata nonaini Ieruharemini Iutaa vaiinti noranavu virara aitutihia tiha, Viva tantoe vaivo? ti vaura.

¹² Minti ti vaumanta qaqi vaiinti nahenti uve uve Ihurara vo uva vo uva ti vaura. Hini kuka virara tiha, Koqe vaiintive, tumanta hini kuka virara tiha, Aqao, viva vaiinti nahenti hampi aaraqai numige vai vaiintivave, ti.

¹³ Iutaa vatanaaka nora vaiintinavu naatu qeteha vika kiama qoqaa Ihurara minti tura. Vikaqihairo kia vovanovata qoqaa yutukero tiraitiro, evaara evaaraqai ti vaura.

¹⁴ Mintuvaro ovata no entava hininavu taiqa yuvuvaro Ihuva orurero nora naavu Kotira Naavuqi oru vaiharo nai vakaaka vaiinti nahenti tiva nimiro. ¹⁵ Tiva nimi vaumanta Iutaa vaiinti noranavu vira uva iri ravukovi tiha, Viva kia tinavu hampata sikuru tivave. Nantiakeroe viva vo uva vo uva okara ho ti vaivo? ti.

¹⁶ Minti tuvaro Ihuva tiharo, Kia te tenta uvavauve ni tiva nimi vauro. Kotiva ti tititaira vira uvama ni tiva nimi vauro, tiro. ¹⁷ Ihuva minti tivakero viva vika irama nimitero tiharo, Kotira muntuka vairara iriharo vira kaiqa varaataa iarirava, vivama ti uva ho rairakero tiharo, Viva Kotira uvama ti vaivo, viva nai uvama ti vaivo, tianarove.

¹⁸ Vovano nai irikero uva ti vai vaiintiva, viva nai autuaraqai iriharo vaivo. Vovano viva atitairara iriharo vira autuqai tuahera amite vaiva, vi vaiintiva quqaa uva ti vaivar o kiamuna uvavanovata viraqiqi vaivo. ¹⁹ Ho quqaae ni kaivaqava Mosiva Kotiva uva maara minti mintiate tu uvava ni tiva nimurave? Ho kia niqihairo vonkuvanovata vi uvava avataqiqi vi vairave. Viraqaaehai ne nantihae ti haru kareka auti variavo? tiro.

²⁰ Ihuva minti tumanta mini ruvaaqumavi vauka tiha, Are vueraiqaa vuarao. Tavave ai aru kareva auti vaivo? ti.

²¹ Tuvaro Ihuva tiharo, Te „Maara Entaqaa, nora kaiqa vohaiqa vara kauramanta ne virara ravukovi tiriara qorahaama autuaraao tiarave. ²² Ni kaivaqava Mosiva maara uva tiharoma qorainti vaintiara vira vaata toqa kaate. „Qorainti vainti vatatairaro 8 enta aitarairara vira vaata toqa kaane,“ turave. Ho kiama Mosiva hoqarero vi uvava turave. Vira kaivaqaukavara vi uvava avuni tiva torave. Ho ne vi uvava irihama 8 entanavu aitarairaqaa kaiqa entaqaaave, Maara Entaqaaave, qorainti vainti vaata toqake variarave.

²³ Mosira uva raqa kaarorave tihama ne Maara Entaqaa qorainti vainti vaata toqa nimite variarave. Minti variamanta te Maara Entaqaa aihavi vaiintira koqema kauramanta ne nantihae vira kaara ti titi variavo?

²⁴ Ne tiqaa uva vatareka iha, kiama paparuqama keha nenta uva okarara irihama tiqaa uva vataate. Ne quqaa uva okarara avuqavuqamake irihama tiqaa uva vataate, tiro.

Ihuva quqaa Kotiva atitai vaiintivae vaivo? tura

²⁵ Ihuva minti ti vaumanta Ieruharemii vatanaaka hininavu Ihurara tiha, Vi vaiintirae vika arukareka auti variavo? ²⁶ Ho tavaate. Viva qoqaa vaharo uva ti vaimanta vika kia ani virara vo uvavata tiva amitaavo. Quqaae vika Ihurara viva *Mesaiavane* tiavo? ²⁷ Ho tenavu Ihuva ani vatukara kankomake iruro. Viva Nasaretihairo anivave. *Mesaiavano* qovarama viraro kiama tinavuqihairo vonkuvano viva taihairoe aniaina okarara ho irianarove, ti.

²⁸ Vika minti ti vauvaro Ihuva Kotira Naavuqi vakaaka tiva nimi vaharo naveraitiharo vika irama nimitero tiharo, Quqaae ne ti kankomake tavaavo? Quqaae ne te vihai anuna okarara iriavo? Ho kiama te tenta irike anuro. Ti tititaiva viva quqaa kaiqa vare vaivave. Ne kia virara kankomake iriarave. ²⁹ Te vira kankomake iri tavaunarave. Vivama ti tititaimanta te viva inaihai tutvurukave, tiro.

³⁰ Ihuva minti tumanta vi uvava kaara vira ravaaqavu karare tihavata, kia ho ravaaqavu kora. Vira aruke entava kia aniomantara ti, vika kia ho vira ravaaqavu kora.

³¹ Mintumanta vaiinti nahentiqihai airitahaa Ihurara quqaa vivave ti. Vika mintima ti: Ihuva nora kaiqa vare vaivo. *Mesaiavano* aniarirava viva Ihura kaiqa hoe aatara kaanarove, kiae ho aatara kaanarove? „Kia ho vira aatara kaanarove..“ Ihuva naivano *Mesaiavano* vaivo, ti.

Parasi vaiintinavu nái kiripunavu nititora

³² Parasi vaiintinavu vaiha irumanta vaiinti nahenti ruvaaqumavi vaiha Ihurara evaara minti ti vaumanta Parasi vaiintinavuvata, Kotira kaiqa vara amite vau vaiintika vika noranavuvata, vika nái kiripunavu nititomanta vika Ihura ravaaqavuke karapuhiqama kareka vi.

³³ Vika mini yuvuvaro Ihuva vaiinti nahentiaara tiharo, Te ni hampata inaaraiqakaa varikema, viraqaaehai ti tititaiva inaini virerave. ³⁴ Vi entara ne ti rantareka ihavata, kiama ho ti ranta kevarave. Te oru variainanaini ne kia ho vivarave, tiro.

³⁵ Minti tumanta Iutaa vaiintinavu nai ire nai ire iha tiha, Viva tainie viraqie tenavu kia ho vira ranta kararave? Viva Giriki vatuka vonavuqi Iutaa vatanaaka hininavu variainanaini minie uva vika tiva nimireva virevave? ³⁶ Viva nariara tiharo, Ne ti rantareka

ihavata, kiama ti ho ranta kevarave. Te oru variainanaini ne kia ho vivarave, tivo. Viva nana uvae tivo? Kiama tenavu vi uvvara okara kankomake iruro, ti.

Qaqi variqi vuaina namariva ni muntukaqihairo ravaqiro vuanarove tura

³⁷ Minti ti vauvaro ovata no entava ekaara entavano anirora. Vi entarara nora entave tura. Ekaara entavano anirovaro Ihuva vi entaraqaa vahiaro oru himpiro naveraitiro tiharo, Namari naataaa irava te variainanaini homa anianarove.

³⁸ Kotira vukuqi qara ntuvato uvava tiriara mintima tivo:

Tiriara quqaa vivave tirava vairaro vira muntukaqihairo ruvu namari voqara qaqi variqi vuaina namariva voqamakero raanarove, turave, tiro. (*Aisaiaa 44:3*)

³⁹ Ihuva himpi vahiaro uva tuqantaakero Kotira Maraqua nimiainarara iriharo tiva nimiro. Vaiinti nahenti Ihurara quqaa vivave tika Kotira Maraqua varerara ti vaura. Vi entara Ihuva kia qutu viro qaiqaa qaqi himpiro naaruvaini vurara tiro, kia Kotira Maraqua nimiaina entava vaura.

Vaiinti nahenti tuqavuvi vaura

⁴⁰ Ihuva minti tumanta vaiinti nahenti ruvaaqumavi vauka airitaha tiha, Ho quqaama Ihuva paropeti vaintivano vaivo. Kotiva vira kahaqi vaivarо viva vira uva ti vaivo, ti.

⁴¹ Tumanta vonavu tiha, Viva *Mesaiaavanove*. tumanta vonavu aqao ti, *Mesaiaavano* kia Kariri vataihairo qovaraiqianarove. ⁴² Kotira vukuqi *Mesaiaarara* qara ntuvu tova mintima tivo: *Mesaiaavano Devitira vohaa anku vairaro Betarihemin Devitira vatukaqima vira vatataanarove*, turave, ti. (*Maika 5:2*)

⁴³ Minti tiha vaiinti nahenti ruvaaqumavi vauka hininavu Ihurara quahe vaumanta hininavu kia virara quahe vaura. ⁴⁴ Hininavu vira karapuhiqama kareka auti vaura. Ho vi entara kia vikaqihairo vonkuvanovata Ihura utu varora.

Kiripunavu qaqi orurante anura

⁴⁵ Kiripu vaiintinavu vaaka nititoka amirante Kotira kaiqa vara amite vau vaiintika vika noranavuvata, Parasi vaiintinavuvata unaini vi oruromanta vika tiha, ⁴⁶ Ne nantihae qaqi aniaovo? Ne vira vita vare anitaarare, ti. Tumanta kiripunavu tiha, Kia qumina vaiintivano uva tintema kero viva uva ti vaivo, ti.

⁴⁷ Tumanta Parasi vaiintinavu tiha, Ho nevata vira una uvvara quqaa uvave tiavo?

⁴⁸ Tavave tinavu nora vaiintinavuqihairoe, Parasi vaiintinavuqihairoe, Ihurara quqaa viva *Mesaiaavano* vaivo tivo? Kiama tinavuqihairo vovanovata minti tivo.

⁴⁹ Qaqi vaiinti nahenti ruvaaqumavi variaka kia Mosira uva maara ho iriarara ti, vira kaara Kotiva vika qoraiqama nimitaanarove, ti.

⁵⁰ Parasi vaiintinavu minti ti vauvaro Parasi vaiinti vonkuvano Nikotimaava, viva entaqi Ihura oru tavova, viva aqao tiro, ⁵¹ Tenavu tentanavu uva maarara irihama kia ko tiraati, qumina vaiintiqaa uva vataarorave. Tenavu *ko naane tiataarave, tiro*.

⁵²⁻⁵³ Minti tumanta vika tiha, Arevo? Are Kariri vataihaire aniaravave? Are Kotira vukuqi tavaane. Are viraqti tavairaro kiama Kariri vataihairo paropeti vaiintivano ho anianarove, ti. [Minti tivake nai naavu nai naavuqi vuvaro Ihuva Orivi Aiqinaqaa oru vaura.

8

Hampi nu nahentirara tura

¹⁻² Vira qararaa vaaka toqaqi Ihuva orurantero Kotira Naavuvano vau vatkara avutaqiqi vumanta vaiinti nahenti airitaha viraqti oru ruvaaqumavi vauvaro Ihuva oquiviro vahiaro uva tiva nimi vaura.

³ Tiva nimi vaumanta maara okara ti vau vaiintikavata, Parasi vaiintinavuvata, vika nahenti vo vita vare anura.

Vi nahentiva vaati varatova vo vaiintintiro ni vaumanta vika vira tavamake vira ravaaqavu vare Ihuva vaunaini vuru vaiinti nahenti nivuqaa vira vara himpimate Ihurara tiha, ⁴ Maara ti variara vaiintio, maa nahentiva vaati varataiva vo vaiintintiro ni vaimanta vira ravaaqavu vare are iananaini anuro. ⁵ Mosira maara uvavano mintima tivo: Nahentivanon mintirera, ne ori varake oriqohai vira ruqutuqi vivaro qutu vuarire, turave. Ho arevo? Nana uvae virara tinarave? ti.

⁶ Ihurara hampi uva tiraqe tenavu Ihuraaqaa uva vataare tiha vika minti tuvaro Ihuva kia uva tiraitiro, kankankaama viro nai vuqaqohairo vataqaa qara ri vaura. ⁷ Qara ri vaumanta vika himpi vaiha, vo uva vo uva Ihura ire vauvaro Ihuva vaaviarama viro vikara tiharo, Niqihairo vovanov kia qora kaiqvata varairava, viva naane ori varakero vira ruqutuarire, tiro.

⁸ Ihuva minti tivakero viva qaiqaa kankankaama viro vataqaa qara ri vaumanta ⁹ vika vi uvara iri vohaiqa vohaiqavano viraqihai qaqrake vura. Naampainavu naane avuni vumanta qaraaka vaiintinavu vika naantiara vi. Vika Ihura mini ke vuvaro Ihuva nariaraa vairo.

¹⁰ Ihuva vaaviarama viro tavovaro nahentivano nai konaini nariaraa himpimatero vuvaro Ihuva tiharo, Vika tantoe variavo? Kiae vovano ariqaa uva vataarirava vaivo? tuvaro nahentivano tiharo, ¹¹ Nora Vaiintio, kia vogavanovata maini vaivo, tuvaro Ihuva vira tiva amiro tiharo, Ho tevata kia ariqaa uva vatarerave. Ho are vuane. Are virava oru vaiharama kiama qaiqaavata qora kaiqa varaqira vuane, tiro. Turama.]

¹² Ihuva vaiharo qaiqaa vaiinti nahenti tiva nimo tiharo, Ovavano ataa intemake, te maa vataraqaa varia vaiinti nahentika ataama nimite vauraukama vauro. Ti tivataqiro anirava kiama konkiraqinaraqi niraitiro, viva aatitainaraqaa niharoma quqaama qaqi variqiro vuuanarove, tiro.

¹³ Ihuva minti tumanta Parasi vaiintinavu tihamo, Ho are nena autu tuahere variarao. Minti ti variarao ai uvavano qumina uva una uvaqaima vaivo, ti.

¹⁴ Vika minti tuvaro Ihuva aqao tiro, Te vihai tenta kaiqara tihamo kiama qumina una uva turo. Te tenta vihai anuna okarara kankomake irunarave. Te tenta vuaina okararavata kankomake irunarave. Mintunarara tiro, ti uva quqaa uvama vaivo. Te vihai anuna okararavate, te maihai vuaina okararavate, ne kia kankomake iriavo. ¹⁵ Ne ko tihamo ne qaqi vaiinti avu aato vaintema keha ko ti variarave. Vate te kia ko tivakeha vaiintiqa uva vatauro. ¹⁶ Te ko tiarera, homa ko avuqavu tirarave. Te ko tiha kiama tentaraa ko tirarave. Te ko tiariraro ti Qova ti tititaiva, viva tintiro vaiharo ti kahaqi vairage te avuqavu koqai tirarave.

¹⁷ Ni maara uva qara ntuva tova mintima tivo: Vaiinti taaraqanta uva tihamo vohaa uva tivera, ho vitanta uvavano quqaa uvama varianarove, turave. ¹⁸ Ho te tenta uvara quqaa uvave tiariraro ti tititaiva ti Qova, vivavata ti uvara quqaa uvaveqaima tianarove, tiro.

¹⁹ Ihuva minti tumanta vika tiha, Ai qova tantoe vaivo? tuvaro Ihuva tiharo, Ne kia ti okarara kankomake iriakara ti, ne kia ti Qora okaravata kankomake iriakave. Ne tiriara kankomake iriatirio, ne homa ti Qoraravata kankomake iriatirio, tiro.

²⁰ Ihuva Kotira Naavuqi monu vate vau *rum uraqi* vaiharo vi uvara tiro. Tuvaro vira aruke entava kia anirovarora tiro, kia vovano vira karapuhiqama kora.

Ihuva nai qorara tura

²¹ Ihuva qaiqaa vika tiva nimo tiharo, Ho te vuari ne qumina ti rantaqi vihamo, ne nenta qora kaiqa airante qutu vivarave. Te vuainanaini ne kia ho vivarave, tiro.

²² Minti tumanta Iutaa vaiinti noranavu tiha, Viva nana uvae tivo? Viva nai tiharo, Te vuainanaini ne kia ho vivarave, tivo. Viva naivano nai arukarevae autiharo minti ti vaivo? ti.

²³ Mitti tuvaro Ihuva tiharo, Ne miahainauka variamanta te virihainaukama vauro. Ne maa vataraqahai anikave. Te kia maa vataraqahai anuraukavauve.

²⁴ Te vaaka niara tiha, Ne nenta qora kaiqa airante qutu vivarave, tunarave. Te qaqi variqo vuraukama turo. Ne kia te tunara vi uvvara quqaave tivera, ne qora kaiqa vare uvava qaqima niqi vairamanta ne vira airante qutu vivarave, tiro.

²⁵ Minti tumanta vika Ihura ireha tiha, Ho are ta vaiintivave? tuvaro Ihuva vika tiva nimo tiharo, Te hoqare ni tiva nimurauka te maa vikama uro. ²⁶ Te niqaa vataarira uvava, vo uva vo uva vaimanta kiama te vi uvvara tirerave. Ti tititaiva uva vo ti tiva timimanta iruna uvvara, te vi uvvaraqai vaiinti nahenti vataini vaika tiva nimirerave. Ti tititaiva quqaa uvavaqai ti vaivave, tiro.

²⁷ Ihuva nai qorara minti tumanta vika kia kankomake irura. ²⁸ Vika kia vira uva kankomake iruvaro Ihuva qaiqaa vikara tiharo, Te Vataini Vatatai Vaintika vaiha, te variari ne ti katariqaa, tuahera kaivarо viraqahairo ni aatovano kenko tiramanta ne ti okarara ho kankomake irihama, tiriara ho viva qaqiqai variqiro vivave tivarave. Ne vi entara te kiama tenta irike kaiqa vare vauna uvvara ni tiva nimunara kankomake irivarave. Vi entara te tenta qora vira noqai iriha ni tiva nimuna uvvara ne kankomake irivarave. ²⁹ Ti tititaiva tintiro vaiharo viva kia ti qaqira kaanarove. Ti tititaiva tintiro vaimanta te vira mutukavano vai kaiqara vare vauraro viva tiriara quaheharoma kia ti qaqira kaivo, tiro.

³⁰ Ihuva minti ti vaumanta hinikuka airitahaavano Ihurara quqaa vivave ti.

Quqaa uvavano ni kuvantu kaanarove tura

³¹ Iutaa vaiinti hininavu virara quqaa vivave tuvaro Ihuva vikara tiharo, Ho ne ti uva iriqi nivera, ne quqaama ti tivataqii nika vaivarave. ³² Ne mintiaqi viha quqaa uva kankomake iriqi vivaro quqaa uvavano ni kuvantu kaira ne ho variate, tiro.

³³ Ihuva minti tumanta vika aqao ti, Tenavu tentanavu kaivaqara Eparahaamira naintivarama vauro. Kiama vo vaiintivano tinavu kantaruma taimanta vira kaiqa vare vaurauka vauro. Ho nantivarae are tinavuara ni kuvantu kaarira ne ho qaqi variate tiarao? ti.

³⁴ Vilka minti tuvaro Ihuva tiharo, Te quqaama turo. Ne vaaku kaiqa vare variavaro ni vaaku kaiqavano ni rumpa taimanta ne vira kaiqaqai vare variarave.

³⁵ Naavu qova vairaro qumina kaiqa vaiintivano kiama ekaa enta vikantiro variqiro viraro nai vira maaquvanqaima vikantiro maahotama variqiro vuanarove. ³⁶ Ho te vira Maaquvanqaima ni kuvantu kaarira ne quqaama qaqi variqii vivarave. ³⁷ Ne Eparahaamira naintivara variamanta te virara irunarave. Ne mintima vaihavata, ne ti uvava qumina uvave tihamaa ti harukareka auti variavo.

³⁸ Te tenta Qokanti vaiha vi haikara tavaunara ni tiva nimi vauro. Ne nenta qora vataake vaiha tavaa kaiqara, ne vi kaiqarama vare variavo, tiro.

³⁹ Ihuva minti tumanta vika tiha, Tinavu qova Eparahaamivave, ti. Tuvaro Ihuva tiharo, Ne quqaa Eparahaamira vaintinti variare tiatirio, ne vira kaiqa varaatirio. ⁴⁰ Kotiva quqaa uva timanta te vi uvava irunara ni tiva nimuramantavata, ne ti haru karekaqai auti variavo. Eparahaamiva kiama ne iante urave. ⁴¹ Ne nenta qova varai kaiqaraqai vare variavo, tiro.

Minti tumanta vika tiha, Kia tenavu aaranahainaava vaiintivauve. Tinavu qova Kotiva vivaqaive, ti.

⁴² Tuvaro Ihuva tiharo, Kotiva ni qova variare titirio, ne te Kotiva inaihai tuvu maini vaunarara irihama tiriara muntuka vataatirio. Kia te tenta irike tenta kaiqa vararerata tuvuraukavauve. Kotiva ti tititaimanta te vira kaiqa vararerata tuvuraukave. ⁴³ Ne nantihae te tuna uvava kia kankomake iriavo? Kiae te ni tiva nimiare. Ne kia ti uvava antuqa arimanta ne ti uva kia irireka auti variavo.

⁴⁴ Sataaniva ni qova vaimanta ne vira muntuka vai kaiqaraqai vare variarave. Hoqarenaa entaqaaahairo Sataaniva vaiharo vaiinti aruke vauva vairave. Quqaa haikavanove, quqaa kaiqavanove, kia viraqi vaivarora tiro, viva kiama quqaa uva ti vairave. Viva ekaa una haika vira qova vaiharora tiro, viva uva tiharo una uvaaqai ti vairave. ⁴⁵ Ne Sataanira vainti variamantara ti, te quqaa uva turamanta ne ti uvava kia quqaa uvave ti variavo.

⁴⁶ Niqihairo tavave tiriara qora kaiqa varaivo tianarove? Ne kiama tigaa qora uva ho vatevarave. Te quqaa uva ti vauramanta ne ti uvava quqaave tiataara vaimanta, ne kia ti uvava quqaave ti variavo. Nantihae tiriara minti ti variavo? Kiae te ni tiva nimiare. ⁴⁷ Kotiva vatatai vaintika vira uva iri variarave. Ne kia vira vainti vahara ti, ne vira uva kia iri variavo, tiro.

Eparahaamiva kia vau entara te variavaunarave tura

⁴⁸ Ihuva minti tumanta Iutaa vaiinti noranavu tiha, Tenavu ariara Sameria vataihainaava vueraiqaa vivo tuna uvava, vi uvava quqaa uvama viavo, ti.

⁴⁹ Minti tuvaro Ihuva aqao tiro, Kiama te vueraiqaa vuro. Te tenta qora autu tuahere vauramanta ne ti hutu qoraiqama timite variavo. ⁵⁰ Ho kia te tenta hutuara noraiqamake iruro. Ti hutu tuaheraiva vovano vaivo. Viva avuqavu ko ti vaivave. ⁵¹ Te quqaa tiari iariate. Ti uva iriqi nirava kiama qutu vuanarove, tiro.

⁵² Ihuva minti tumanta Iutaa vaiinti nora vaiintinavu tiha, Minti tiaramanta tenavu tavaurara are vueraiqaa vuanaro. Tinavu kaivaqava Eparahaamiva qaqi variqiro viro vuru qutu vurave. Paropeti vaiinti vovano vovano qaqi variqii vi vuru ekaa qutu vurave. Vika ekaa mintima qutu vuvvara are nantiharae tihara, Ti uva iriqiro nirava kiama qutu vuanarove, tiarao? ⁵³ Tinavu kaivaqava Eparahaamiva nora vaiintivano variqiro viro, vuru qutu vurave. Are kia ho Eparahaamirara tihara, Te vira aatara kauraukave, tinarave. Paropeti vaiinti vikavata variqii vi, vuru qutu vi vaurave. Are nena ta vaiintiae variarao? ti.

⁵⁴ Minti tuvaro Ihuva tiharo, Te tenta hutu tuaherake variarirarovauve ti hutuvano qumina varianarove. Ti hutu tuahera kaiva, viva ti Qovave. Ne virarama Kotira tinavu Variqave tiavo. ⁵⁵ Ne kia vira iri tavaarave. Te tiha, Kia vira iri tavaunarave tiarirarovauve, ti uvavano ni uva aanarero una uvaaqai varianarove. Ho te vira iri tavaunarave, te vira uva iri vauraukave. ⁵⁶ Te vatainai tuvire una entara ni kaivaqava Eparahaamiva ti quahama timitorave. Te vatainai tuvire unara viva tavovaro vira muntukavano koqe uvapo vaurave, tiro.

⁵⁷ Ihuva minti tumanta Iutaa vaiinti noranavu tiha, Aqao, are kiama airi ihi 50 ihi varakaraitira, qaraaka vaiintivano vaiharama are tihara, Te ni kaivaqara Eparahaamira tavauraukave, tiarao, ti.

⁵⁸ Tuvaro Ihuva tiharo, Hoqare kia ni kaivaqava Eparahaamiva qovarama vu entara te qaqi variqi vuavauraukave, tiro. ⁵⁹ Ihuva minti tumanta vika ori utu vare vira aru kareka auti vauvaro Ihuva kukeqa viro Kotira Naavuqihairo vevarero vurama.

9

Ihuva avu qimpavu vaiintira rampai amitora

¹ Ihuva aaraini oru viharo tavovaro vaiinti vovano nai nora auhaqihairo avu qimpavu vaiintiratavatova vaura.

² Viva vaumanta Ihura vaintinavu Ihura ireha tiha, Maara ti variara vaiintio, tavave Kotira uva raqa kovaroe vira kaara maa vaiintiravu nai nora auhaqihairo qimpa virave? Naie, vira noka qokae mintiakaavo? ti.

³ Minti tuvaro Ihuva aqao tiro, Kia nai Kotira uva raqa kora kaaravauve vira avu qimpa vurave. Kia vira noka qoka Kotira uva raqa kora kaaravauve vira avu qimpa vurave. Ne vi vaiintiraaqahai Kotira kempuka kaiqa varainara tavaate tiro, vira avu qimpa vurave.

⁴ Ti tititaira vira kaiqa tenavu aatitainaraqaa varaqi virerave. Entama viraro kia vovano ho kaiqa varaanarove. ⁵ Ovavano itaintemake, te vatainai vaiha itaqi vuari vatainai vaika ho tavevarave, tiro.

⁶ Minti tivakero Ihuva vataqaa taara vihikero taaraqohairo vata vira horaiqama kero, viti avu qimpa vura vira avuqaa taatau amitero tiharo, ⁷ Otu Siromi Varuvaqī—Atitai Varuvaraqī—muntu nena viri hiqane, tiro. Minti tuvaro vi vaiintiva Ihuva tunte iro muntu nai viri hiqama kovaro vira avu rampai vuvaro viva vihairo oturantero ho tavamaqiro uriro.

⁸ Viva ho tavamaqiro uri vaumanta vira tataqaa naavuqi vauka tavovaro aarana oquiviro vahiaro airaira ti timiate ti vau vaiintivu ho qaqi tavamaqiro uri vaumanta vika vira tave tiha, Maa ta vaiintivave ivo? Aarana oquiviro vahiaro airaira ti timiate ti vau vaiintivu, maa vivave ivo? ti.

⁹ Vika minti tumanta vokuka tiha, Ho maa vivave, ti. Tumanta vokuka aqao ti, Vovanove. Vira vira voqara vaiva urivo, tuvaro vi vaiintiva naivano ururero tiharo, Ho te maa vikave, tiro.

¹⁰ Minti tumanta vika vira ireha tiha, Nantia kaivaroe ai avu rampai vivo? ti.

¹¹ Tuvaro viva vika tiva nimiro tiharo, Vaiinti vo vira autu Ihurave. Viva vataqaa taara vihikero horaiqama kero ti tivuqaa taatau timitero tiriara tiharo, Siromi Varuvaqī muntu nena viri hiqane, timanta te muntu vi namariqa tenta viri hiqama kauraro ti tivu rampai vimanta te ho tavamaqiqi ururo, tiro.

¹² Minti tumanta vika vira qaiqaa ireha tiha, Viva taini vivarae are uruarao? ti. Tuvaro viva tiharo, Nai viva tainie vivo? Kiama te tavauro, tiro.

¹³ Tumanta vika tota avu qimpavu vaiintira vita vare vuru Parasi vaiintinavu vaunaini kora. ¹⁴ Ihuva Maara Entaaqaa hora taatau kero vi vaiintiravu rampai kora. ¹⁵ Vika Parasi vaiintinavu vaunaini vira vuru komanta Parasi vaiintinavu vi vaiintira ireha tiha, Nantia kaivaroe ai avu rampai vivo? tuvaro viva tiharo, Viva hora varakero ti tivuqaa taatau timitaimanta te muntu tenta viri namariqa hiqama kauraro ti tivu rampai vimanta te ho tavauro, tiro.

¹⁶ Viva minti tumanta Parasi vaiinti hini kuka tihamu, Oho, vi kaiqara varava Maaraqaa tinavu uva raqa keharo varavara tiro, viva kia Kotiva inaihairo tuvavave, ti.

Tumanta hini kuka tihamu, Aqao, nantiakeroe qora vaiintivano vi kaiqara nora kaiqa ho varaanarove? ti. Minti tivake hininavu vo uva tumanta hininavu vo uva ti vaura.

¹⁷ Qaiqaa Parasi vaiintinavu vira ireha tiha, Are tiharo, Viva ti tivu rampai kaivo, tianarave. Vi vaiintirara are nana uvae tiarao? tuvaro vaiinti viva tiharo, Viva paropeti vaiintivanove, tiro.

¹⁸ Minti tumanta Iutaa vaiinti noranavu kia vira uvara quqaave tiraiti, vi vaiintirara tiha, Are unahaa tiharama ti tivu tota rampai vurave tiarao. Haaru kia ai avu qimpa vurave, ti. Minti tivake vi vaiintiravu noka qoka naarora. ¹⁹ Naaromanta vitanta anumanta vika vitanta ireha tiha, Quqaae maa vaiintira nitanta maaquve? Quqaae vira nai nora auhaqihairo avu qimpa vurave? Nantia kaivaroe vira avu rampai vivaroe ho tavaivo? ti.

²⁰ Tumanta vira noka qoka tiha, Maa vaiintiravu quqaame titanta maaquve. Vira avu haaru auhaqihairo qimpa vurave. ²¹ Nai nantia kaivaroe vira avu rampai vivo? Nai tavaave vira avu rampai kaivo? Viva noruqama virave. Ne homa vira nai ireha tavaate.

Viva naivano homa ni tiva nimianarove, ti. ²² Vitanta Iutaa vaiinti noranavu naatu getehama minti tura. Iutaa vaiinti noranavu tota avuni uva vate tihama, Vaiinti vovano Ihurara *Mesaiaavano* tinavu kahaqiarirava anivave tiantorave. Vovano minti tirera, vira kaara vira atitama kaariraro maara naavuqihairo ekaarama veverero vuinarove, tura.

²³ Minti tivakeha uva tivatorara ti, vira noka qoka Iutaa vaiinti noranavu naatu getehama tiha, Viva noruqama virave. Nentavano vira nai ireha tavaate, ti.

²⁴ Vitanta minti tumanta vika qaiqaama haaru avu qimpavu vaiintira aaramake virara tiha, Are Kotira avuqaa vaihara quqaa uvaqai tiane. Tenavu tavauraro Ihuva Kotira uva raqakai vaiintivave, ti.

²⁵ Tuvaro vi vaiintiva tiharo, Ihuva nai Kotira uva raqakai vaiintivae koqe vaiintie te kiama vira okara irunarave. Ti tivu qimpa vura rampai kaira te viraraqaima irunarave, tiro.

²⁶ Tumanta vika vira ireha tiha, Ihuva ai nantie ivo? Viva nantiakeroe ai avu rampai kaivo? ti.

²⁷ Tuvaro viva tiharo, Te vi uvvara ni vaaka tiva nimuramanta ne kia vi uvvara irireka auti variavo. Nantihae ne vi uvvara qaiqaa irirekave? Nevata vo? Nevata vira vainti vairekae qaiqaa qaiqaa vi uvvara ti ire variavo? tiro.

²⁸ Minti tumanta vika vira noraiqamake atiha tiha, Arema vira vainti vahihara vira uva iriaravave. Tenavu tentanavu kaivaqara Mosira uva iriqi vi vauraukave.

²⁹ Kotiva Mosiraqaa uva tiva taatautora vira tenavu iriqi vunarave. Tenavu Ihurara vi vaiintiva qumina vaiintive tunarave. Tenavu kiama viva vihairo ani okarara irunarave, ti.

³⁰ Vika minti tuvaro viva kauqu runkinkiri iharo tiharo, Ike, ti tivu rampai timitai vaiintiva, viva vihairo ani okarara ne kiae iriavo? ³¹ Tenavu iruraro Kotiva kiama qora vaiinti uva iri vairave. Kotiva nai uvaqai iriha ni varia vaiintika vika uvaqai iri vairave. Vira autu tuahere variaka Kotiva vika uvaqai iri vairave. ³² Haaru maa vatara hoqaramato entaraqahairo kia vaiinti vovano nai nora auhaqihairo avu qimpa vura rampai amitorave. ³³ Ihuva kia Kotiva inaihairo tuvuare titirio, kiama ti tivu ho rampai timitaitirio, tiro.

³⁴ Vi vaiintiva minti tumanta vika virara tihama, Ai vatatoraqahairo are qora vaiintivanoqai variqira aniaravave. Are vo? Are tinavuvatae maara uva tiva timinarave? ti. Minti tivake vika vaiinti vira rara vare maara naavuqihai veva vahaqaqaini aqukora. ³⁵ Vira vahaqaqaini vara veva aquko uvvara iriro Ihuva vi vaiintira ranta kero virara tiharo, Are Vataini Vatatai Vaintirarae quqaa vivave tiarao? tiro.

³⁶ Tuvaro vaiinti viva Ihura irero tiharo, Nora Vaiintio, viva ta vaiintivave? Are ti tiva timirage te virara quqaa vivave tiare, tiro.

³⁷ Tuvaro Ihuva vira tiva amiro tiharo, Are tave variana vaiintika, te maa vikama ariara ti vauro, tiro.

³⁸ Minti tuvaro viva tiharo, Nora Vaiintio, quqaama are vivave, tiro. Tivakero viva Ihura avuqaa tori kauru araviro vira quahama amite vaura.

³⁹ Vira quahama amite vauvaro Ihuva tiharo, Te vaiinti nahenti raira karera vataini tuvuraukave. Avu qimpa vika tavaatera tuvuraukave. Qaqi avu auti vaika avu qimpa vuatera tuvuraukave, tiro.

⁴⁰ Minti tumanta Parasi vaiintinavu vi uvvara iri Ihura ireha tiha, Tinavu tivuvatae qimpa vivo? ti.

⁴¹ Tuvaro Ihuva vika tiva nimiro tiharo, Ni nivu qimpa vuare titirio, kia niqaa uvavano vaitirio. Ne Kotira okara kia tavaraiti, viraqahai ne tiha, Tenavu Kotira okara ho tavaunarave, ti variarave. Ne minti ti variarara tiro, vira kaara niqaa uvama vaivo, tiro. Ihuva minti tura.

10

Ihuva sipisipiara uva tuqantaakero tura

¹ Ihuva uva vo tuqantaakero tiva nimiro tiharo, Te quqaa uva tiari iriate. Vaiinti vovano sipisipi avutaqti vireva kia sipisipi qentiana oriqetaraatiro, qaqrakerohohaa vona vaatirero vi vaiva, vi vaiintiva muara autuarira vaiintivave, vaiinti ruqutiharo vi haikara variai vαιintivave.

² Vaiinti vovano sipisipi qentiana oriqetero vi vaiva, vi vaiintiva quqaa sipisipi qovama vaivo. ³ Qentiaqaa raqiki vaiva vira tavero ho qenti qantua amitaivarо viva nai sipisipinavu naareharo vika autu ravaqiro vimanta vira sipisipinavu vira uva viraqamake iriha vira avataqi vi variarave.

⁴ Mintiavaro viva aqaina nai sipisipinavu ntita vuru kero viva avuni vi vaimanta vira sipisipinavu nai qora vira uva viraqamake irihara ti, vira avataqi vi variarave. ⁵ Vira

sipisipinavuvano kia vo vaiinti avataqi vivarave. Vika vo vaiinti vira uva kia viraaqamake irihara ti, vi vaiintira aatu qetake vi variarave, tiro.

⁶ Ihuva minti tivakero uva tuqantaakero tiva nimumanta vika vi uvvara okara kia iriraiti vaura.

Ihuva te koqemake sipisipiqa raqikuraukave tura

⁷ Vika kia iriraiti vauvaro Ihuva qaiqaa vika tiva nimo tiharo, Te quqaama turo. Tema sipisipi vika qentivano vauro. ⁸ Ti tivuni ania vaiintika vika muara autuakavata, vaiinti ruqutiha muara varaakavata, variamanta sipisipinavu kia vika aunta iriarave. ⁹ Avutraqi vi qentira te maa vi qentikama vauro. Tiqaa vaatirero uritaraaina vaiintira ti Qova vira vitaanarove. Tiqaa uritare tutvitaro irava homa kara ranta naanarove. ¹⁰ Muara varai vaiintiva muara vareharo sipisipi aru taiqa kareva anirave. Te sipisipiarao tiha sipisipi vika qaqi variqi vihamo koqemake variate ti, te anuraukave.

¹¹ Te sipisipi qoka koqekave. Sipisipi qova koqeva vaharo nai sipisipi arukevorave tiharo antuaqiro viro, kai te vikara irihama qutu vuare tivakero qutirave. ¹² Vovano kia sipisipi qova tanava, viva qaqi kaiqa vaiintivano vaharo tavaivaro qaakau vairivano ani vaivarovo viva qetakero qaqira kero kantama vivaro, qaakau vairivano vira sipisipi vo arukero hini kiaka raantaupirma kairave. ¹³ Vira kaiqa vaiintivano qaqi kaiqa vaiintivano vaharora tiro, viva kia sipisipi vikara noraiqaakero iriraitiro, qetakero virave.

¹⁴ Te sipisipi qoka koqeka vaiha te tenta sipisipi viraaqamake tavauramanta ti sipisipinavu tivata viraaqamake tavaarave. ¹⁵ Vira aanarero ti Qova ti kankoma kero tavaimanta tevata vira kankomake tavaunarave. Ho ti sipisipi arukevorave ti, te vikara irihama qutu virerave.

¹⁶ Sipisipi vonavu vika kia maa avutaraqi vaika, vikavata te una sipisipikave. Vika ti uva irige te vika ntita vare vuru kaarira ti sipisipinavu hampata vohaaraqi variate. Vika vohaaraqi vaiqe te vika qoka vohaiqavanoqai vairerave.

¹⁷ Te vikara irihama qutu vi qaiqaa qaqi himpirerave. Te mintiainarara tiro, ti Qova tiriara muntuka vataivo. ¹⁸ Te kia hove tiariraro kiama vovano ti ho haru kaanarove. Te tenta qutu vuataa irage te qutu virerave. Te qutu vuaina okararave, te qaiqaa qaqi himpuaina okararave, ti kaiqama vaivo. Ti Qova tiriara minti mintiane ti uvvara, te vi uvvara vararerave, tiro.

¹⁹ Minti tumanta qaiqaa Iutaa vaiinti noranavu vi uvvara iri rairavi hininavu vo uva tumanta hininavu vo uva tura.

²⁰ Airitahaatiha, Vueravano viraqiqi vaivaro minti tivo. Viva vueraiqaa vivo. Nantihae ne vira uva iriavo? „Kia vira uva iriate“, tumanta ²¹ vonavu tiha, Aqao, vueraiqaa viva kiama vi uvvara ho tianarove. Vueravano kia ho avu qimpa vira rampai kaanarove, ti. Minti turama.

Iutaa vaiinti noranavu qaiqaa Ihura arireka auti vaura

²² Ieruhareminni haaru Kotira Naavu Quahama Amito Entarara iriha ovata no entava anirovaro vi entara kuarivano kia noraiqaakero ite vaura.

²³ Vi entaraqaa Ihuva Kotira Naavu vaunaini vaharo Soromonura Haraarave turaqi ni vaumanta ²⁴ Iutaa vaiinti noranavu viraqiqi ruvaaqumavi Ihurara tiha, Are uva vo vaaka tinavu tiva timiatarave. Tavakae tinavu tiva timinarave? Are quqaa Mesaiaavano vairera, vutukera tinavu tiva timiraqe tenavu iriare, ti.

²⁵ Vika minti tuvaro Ihuva tiharo, Te vaaka ni tiva nimuramanta ne kia ti uvara quqaave tiavo. Ti Qova ti noraiqama kaimanta te vira kaiqa vare vaunarave. Ho te varaua kaiqava ti okarara ti vaivo. Ne ti kaiqa tavaarara irihama ne ti okararavata iriataarave.

²⁶ Ne kia ti sipisipinavu vahara ti, ne kiama ti uvvara quqaave tivarave.

²⁷ Te tenta sipisipinavu viraaqamake tavaunarave. Vika ti uva viraaqamake irihama ti avataqi ni variarave. ²⁸ Te ekaa enta qaqi variqi vira vika nimiari vika kia qutu vivarave. Kiama vovano ti kauquqihairo ti sipisipinavu raqikero varaanarove.

²⁹ Ti Qova ti sipisipi timitaiva, viva mpeqavano ekaa haika aatarakaiva vaharo ti sipisipiqa raqiki vaivarora tiro, kia vovano vira kauquqihairo ho raqikero varaanarove. ³⁰ Tetanta Qoka vohaaama vauro, tiro.

³¹ Ihuva minti tumanta Iutaa vaiinti noranavu vi uvvara kaara Ihura aavata ruqutu kaare ti, ori utu varovaro ³² Ihuva vikara tiharo, Ti Qora koqe kaiqa, vo kaiqa vo kaiqa te ni numiqaunarave. Te nana kaiqa varauuna kaarae ne origohai ti haru kareka auti variavo? tiro.

³³ Minti tumanta Iutaa vaiinti noranavu Ihurara tiha, Kia tenavu ai kaiqa koqera kaara origohai ai aru kareravauve. Are vi uvvara tiharama Kotira qora uva tiva amite variarao.

Are qaqi vaiintivano vaiharama are Variqa Kotikantira vohaa vaireva auti variarao. Are mintianara vira kaarama tenavu ori varake ai aru karerave, ti.

³⁴ Vika minti tuvaro Ihuva tiharo, Ne Kotira vuku vataaraqi uva vo qara ntuva tova vaivo. Ne kiae vi uvvara kankomake tavaavo? Kotiva vaiinti vokukara mintima tivo: Ne variqa vaiintinavuve, turave.

(*Ihi 82:6*)

³⁵ Tenavu iruraro Kotira uva kia una uvavata vairave. Kotiva nai uva ti vauvare vaiintinavukara qaqi qumina vaiintinavuara variqa vaiintinavuve turave. ³⁶ Ho Kotira tiriara vataini vuane tivakero ti tititaimanta te vataini tuvu vahama, niara te Kotira Maaquvanove turamanta ho ne nantihae tiriara tiha, Are Kotirama qora uva tiva amite variarao, tiavo?

³⁷ Te kia tenta Qora kaiqa varaariravave ne kia tiriara quqaa vivave tivarave. Te tenta Qora kaiqama vare vauro.

³⁸ Ne kia tiriara noraiqaake irivera, ne te kaiqa vare variainarara noraiqaake irihama tiriara quqaa vivave tiate. Ne minti tivaro ni aatovano kenko tira irihama ti Qova tiki vainaravata ne kankomake irivarave. Te viraqi variainarara ne kankomake irivarave, tiro.

³⁹ Minti tumanta vika qaiqaa vira karapuhiqama kareka auti vauvaro Ihuva vika kauquqihairo ruqemakero qaqi tuvitarero viro.

⁴⁰ Ihuva tuvitarero viro otu Iotani Namari hini mantaraini, Ioniva tota vaharo namari nimunaini viro, otu mini vaura.

⁴¹ Ihuva mini otu vaumanta airi vaiinti nahenti viva vaunaini anire tiha, Ioniva kia nora kaiqa varo vaiintiva vaharo Ihurara tinavu tiva timurave. Ho tenavu tavauraro Ioniva ekaa uva maa vaiintirara tinavu tiva timuva quqaa uvaqaima vaivo, ti. ⁴² Minti tivakema mini vauka airitaha Ihurara quqaa viva tinavu kahaqiarira vaiintivave tura.

11

Rasarusiva qutu vura

¹ Vaiinti vovano vira autu Rasarusiva Betanihainaava nora aiha viraara varero vaumanta vira auratanta Mariaka Mataaka vitantavata mini vaura. ² (Mariava koqe *ueri* vahavera Ihuraqaa aqua amitero nai qita kaahiqohairo vira aiqu nunka amitaarirava vaura.)

³ Ho vitanta vakaava rovara varomanta vitanta Ihuva vaunaini uva varake mintima ti: Nora Vaiintio, ai muntukavano vai vaiintiva nora rovara varavio, ti.

⁴ Minti tivaketanta uva vara kovaro Ihuva vi uvvara iriro tiharo, Rasarusiva noraiqaakero aiha vivo. Ho viva kiama qutu vuanarove. Ne Kotira mpeqa kaiqa tavamake vira autu tuahera kaate tiro, vi rovarava vira arivo. Ne ti Kotira Maaqu mpeqa okara kankomake tavaate tiro, vi rovarava vira arivo, tiro.

⁵ Ihuva Mataararavata, Mariararavata, Rasarusiraravata, voqamakero antuqa aruvaro vaharo ⁶vi uvvara iriro, viva kiama vaaka viraitiro, qaqlira kero taara entavata mini vaura.

⁷ Mini varikero viraqaaahairo nai vaintinavuara tiharo, Ho varaiqenavu lutiaini vuare, tiro.

⁸ Minti tumanta vira vaintinavu aqao ti, Maara ti variara vaiintio, ninau Jutaa vaiinti noranavu ori varake ai aavata ruqutu kareka auti variarave. Are mini qaiqaa virevae auti variarao? ti.

⁹ Minti tuvaro Ihuva tiharo, Vo enta vo enta kuarivano aatitairaqaahiro ho itairave. Vaiintivano aatitairaqaahiro ni vaiva kuarivano itairaqaahiro niharora tiro, ho taveharo kia kuntavaivaima varero kaavu nti vairave. ¹⁰ Kuarivano kia itaivararo entaqi ni vaiva kuntavaivaima varero kaavu nti vairave, tiro.

¹¹ Ihuva minti tivakero qaiqaa tiharo, Tinavu tonti Rasarusiva vaitama vivo. Te vira oru vauraqama karerave, tiro.

¹² Minti tumanta vira vaintinavu tiha, Nora Vaiintio, viva qaqi vaitavi vairera, viva koqemama vuanarove, ti.

¹³ Minti tivake vika kia kankomake iruvaro Ihuva uva tuqantaakero Rasarusiva qutu vurara tura. Vika tiha, Ihuva Rasarusirara qaqi vaitema vaivo tivo, ti.

¹⁴ Vika mintima aato iruvaro viraqaaahairo Ihuva yutukero vika tiva nimiro tiharo, Rasarusiva qutuma vivo. ¹⁵ Ho te niarao ti, ne tiriara quqaa vivave tiate ti, te Rasarusira kia vaaka oru tavaunaraquaheha vauro. Ho varaiqenavu viva qutu vinaini oru vuare, tiro.

¹⁶ Minti tuvaro vira vainti vovano Tomaasiva, vira vara autu Taapiva, viva nai kena vaintinavuara tiharo, Ho varaiqenavu maara ti vai vaiintira vataake vuare. Iutaa vainti noranavu vira arukaiqe tenavuvata vira vataake qutu vuare, tiro.

Ihuva Betani vatukaini vura

¹⁷ Minti tuvaro Ihuva oru viro orurero irumanta Rasarusira qutu vumanta quntama tovaro erakaimaante enta aitarora. ¹⁸ Betani vatukavano Ieruharemi aumanto 3 kilomita vira voqaaraqai vauvaro ¹⁹ Ieruharemihairo vi vatanaaka airitaha Mariaka Mataaka muntuka kuquqama nimiteha Rasarusirara iqj rata amitareka anura.

²⁰ Ani vauvaro Mataava iruvaro Ihuvavata vihairo aaraini ani vauvaro viva Ihura vita kareva viharo Mariara naavuqi mini kero oru viro orurero ²¹ Ihurara tiharo, Nora Vaiintio, are maini variare tiaraitirio, ti vakaava kiama qutu vitirio. ²² Ho vate are Kotirara nana nana haikaraa naarihara timiane tinara Kotiva vi haikara homa ai amianarove. Te virara irunarave, tiro.

²³ Tuvaro Ihuva Mataara vira tiva amiro tiharo, Ai vakaava qaiqaa qaqlima himpuuanarove, tuvaro ²⁴ Mataava tiharo, Ho ekaara entaqama viva ekaa vainti nahenti hampata qaiqaa qaqlima himpuuanarove. Te viraravata irunarave, tiro.

²⁵ Tuvaro Ihuva tiharo, Vainti nahenti qutu vuakaqihai qaiqaa qaqlima himpimake vaurauka, te maa vikama vauro. Vainti nahenti qaqlima variqi vi varia okarara nimi vaurauka te maa vikama vauro. Tiriria quqaave tira vaintiva, viva qutu viro naantiara qaiqaa qaqlima himpimo variqiro vuanarove. ²⁶ Qaqlima variqiro viharo tiriria quqaave vivave tirava kiama qutu vuanarove. Ho are virara quqaave tiarao? tiro.

²⁷ Tuvaro Mataava tiharo, Ho Noravauvu, quqaama tiarao. *Mesaiaavano* Kotira Maaquvano vataaini tuvira iarava, are quqaave maa vivave, tiro.

Ihuva Rasarusirara iqj ratora

²⁸ Minti tivakero Mataava anirantero nai aura aarama kero evaara vira tiva amiro tiharo, Maara ti vai vaiintiva aniraivo. Viva ariarama iraivo, tiro. ²⁹ Tuvaro Mariava vi uvara iriro himpimo kantero oru Ihura vita kareva vura.

³⁰ Ihuva Mataava vaaka vira vitakonaini vaharo kia vatukaini vaaka aniraitiro vauvaro ³¹ Mariava vira vita kareva vumanta Iutaa vatanaaka vira muntuka kuquqama amitareka anuka tavovaro Mariava naavu qihairo vevarero kantamaqiro vumanta vika tiha, Ho Rasarusira quntama taanaini iqj ratareva vivo, tivake vikavata himpi Mariava avata vare vi.

³² Vira avata vare vuvaro Mariava oru viro Ihuva vaunaini orurero, Ihura tavero oru vira aiqutaraaini hiqiri viro vaharo tiharo, Nora Vaiintio, are maini variare tiaraitirio, kiama ti vakaava qutu vitirio, tiro.

³³ Tuvaro Ihuva tavovaro viva iqj rate vaumanta Iutaa vainti nahenti vira vataake anuka, vikavata iqj rate vauvaro Ihura muntukavano qoraiquvaro viva mpo ike tiro tiharo, ³⁴ Vira taraqie quntama te iavo? tumanta vika Ihurara tiha, Anira oru tavaane, tuvaro ³⁵ Ihuva iqj rate vaura.

³⁶ Iqj rate vaumanta vainti nahenti tiha, Ho tavaate. Viva voqamakero Rasarusirara antuqa arivaroi iqj rate viavo, ti.

³⁷ Tumanta vonavu tiha, Viva avu qimpa vura ho rampai kaivave. Ihuva vi entara maini variare titirio, Rasarusiva qutue vitirio, kiae qutu vitirio? ti.

Ihuva Rasarusira qaqlima vara himpima kora

³⁸ Minti tuvaro Ihuva qaiqaa mpo ike tivakero viro vira quntama tonaini oruroro. Vika oriqira vira veta vate, ori vo varake gentiana tinta tonaini orurero Ihuva tiharo, ³⁹ Ho ori vira qaqlima vara kaate, tuvaro qutu vura vira auravano Mataava aqao tiro, Noravauvu, vira quntama taavaro erakaimaante enta aitaravaro vira vaata ntera viro untama ivo, tiro.

⁴⁰ Tuvaro Ihuva Mataaarara tiharo, Te vaaka ai tiva amuna uvara iriane. Are tiriria quqaave vivave tirera, are Kotira mpeqa okara takuqi vainara tavenarave, tunarave. Kiae te vaaka ariara minti tunarave? tiro.

⁴¹ Ihuva minti tumanta vika ori qaqlima vara kovaro Ihuva virini taveharo tiharo, Ti Qo, are tiriria ekaa enta ekaa enta iri varianara te virara irihama ariara koqema iarao tiro.

⁴² Are tiriria ekaa enta ekaa enta iri varianara ho runarave. Are ti tititaanarara vainti nahenti kankomake iriate ti, te vikara irihama ai aarauro, tiro.

⁴³ Ihuva minti tivakero viva navveraitiro tiharo, Rasarusio, himpimo vevaraane, tuvaro

⁴⁴ Rasarusiva qutu vuva qaiqaa qaqlima himpimo, vira aiqo kauqu uquramate vira qiatavata tauriqohai apuqamatova viraqihairo vevarero. Viva vevarovaro Ihuva vika tiva nimiro tiharo, Vira kuvantu kaivaro ho variarire, tura.

*Iutaa vaiinti noranavu Ihura aruke uvara tura
(Matiu 26:1-5; Maaki 14:1-2; Ruki 22:1-2)*

⁴⁵ Manti tumanta Iutaa vatanaaka Mariara tavareka anuka airitahaa vi kaiqara tave Ihurara quqaa vivave ti. ⁴⁶ Tumanta hininavu qaqirake Ihura kaiqara vuru Parasi vai-intinavu tiva nimumanta ⁴⁷ Parasi vaiintinavuvata, Kotira kaiqa vara amite vau vaiintika vika noranavuvata, vika *kansoru* vaiintinavuvata naaramake vohaaraqiqi ruvaaqumavi vaiha vika tiha, Vi vaiintiva nora kaiqa, vo kaiqa vo kaiqa vare vaivo. Tenavu vira nantimae kaainarave? ⁴⁸ Tenavu vira qaqi kaarerar, viva mintiaqiro viramanta vaiinti nahenti ekaa virara quqaa vivave tivarave. Manti tivaro tinavuqaa raqiki variaka Romeni vatanaaka tinavu vataake raqihia Kotira Naavu rampai aquke, tinavu vaiinti nahenti ekaa aru vehi autu kevorave, ti.

⁴⁹ Manti tuvaro vi vaiintinavukaqihairo Kotira kaiqa vara amite vau vaiintika vika qiata vaiinti Kaiapaasiva himpiro. Vi ihiraqi viva qiata vaiintivano vaiharo viva himpiro tiharo, Ne kia avu aatovata vaikave. ⁵⁰ Romeni vatanaaka tinavu Iutaa vatanaaka ekaa ruqutu vehi autu kevorave ti, koqemama ne qaqi kaivaro vaiinti vohaiqavanoqai qutu viramanta ekaa vaiinti nahenti ho variate, tiro.

⁵¹ Kaiapaasiva vi ihiraqi qiata vaiintivano vaiharo vi uvara tiharo te tenta irikema turo tiro. Viva kia kankomake iruvaro Kotiva vira kahaquvaro viva Ihuva Iutaa vatanaa vaiinti nahentiара iriharo qutu vuainarara tura. ⁵² Ihuva kiama Iutaa vatanaakaraqai iriharo qutu vuarirava vauravauve. Kotira vainti ekaa raumpirimivi vaika, vikavata ntita varero vuru vohaaraqiqi ruvaaquma tareva Ihuva qutu vuarirava vaura.

⁵³ Kaiapaasiva tiharo, Koqemama ne qaqi kaivaro vaiinti vohaiqavanoqai qutu viramanta ekaa vaiinti nahenti ho variate tumanta, vi entaraqaahai lutaanora vaitintinavu Ihura aruke uvarara ti vaura. ⁵⁴ Manti ti vauvarorora tiro, Ihuva Iutia vataini kia qoqaa niraitiro, qaqira mini kero oru Efaraimu vatuqa qumina vata tataaqa mini oru nai vaitintinavu hampata vaura.

⁵⁵ Mini vauvaro Iutaa vatanaaka Vehakuma Nimito Karara ovata no entava aumanto vaumanta hihai hihai vaiinti nahenti verara Ieruhareminiqai oru vi. Mini oru vaiha vi entara veka vaiha, vika nái maara okarara iriha namari tuntuke utavaaqa hiqamake vaura.

⁵⁶ Vika vaiha Ihurara aitutumaqi niha oru Kotira Naavuqiqi ruvaaqumavi nai ire nai ireha tiha, Ihuva hoe uru ovata naanarove, viva qeteharo kiae uruanarove? ti.

⁵⁷ Manti ti vaumanta Parasi vaiintinavuvata, Kotira kaiqa vara amite vau vaiintika vika noranavuvata, vika vaiinti nahenti tiva nimi tiha, Ne tavaivaro Ihuva urirera, viri tinavu tiva timiqe vira karapuhiqama kaare, tura.

12

*Mariava Ihuraqaa untavyu vahaverara aqu amitora
(Matiu 26:6-13; Maaki 14:3-9)*

¹ Vehakuma Nimito Karara ovata no entava aumanto vauvaro 6 entanavuqai qaqi vauvaro Ihuva qaqaa Betanini tota vaiinti vo Rasarusiva qutuvura qaqi vara himpima kovaro vaunaini vura. ² Mini vumanta vi vatanaaka Ihura kara unta amitovaro Mataava vi karara vara vuru nimumanta Rasarusivavata vo vaiinti nahentivata Ihura hampata kara tainta tataaqa oquivi vaura.

³ Vika mini oquivi vauvaro Mariava vahaverera taqu vo varero anura. Vahaverera taqu vira nora monu aqúko *ueri* vahaverera vira autu *naadí* vauvaro Mariava taqu vira varero vi vahaveraraqohairo Ihura aiquqaa aqu amitero viraqaaqohairo nai qiata kaukiqohairo vira aiqu nunka amitovaro vahaverera unta koqeva naavu vira ekaa mpiqa kora.

⁴ Naavu vira mpiqa kovaro Ihura vaintinavuqihairo vovano Iutaasi Ikeriotiva Ihura qovarama kaarirava, viva aqao tiro, ⁵ Vi vahaverera vokika nimiharo 300 *silvaa* monu varakero vi monura vira vehi vaiinti nahenti nimiataara vaivaroma, quminama ai aiquqaa aqu amitaivo, tiro.

⁶ Iutaasiva kia vehi vaiinti nahentiара ike mpo tiva nimitaraitiro, viva muara vaiintivano vaiharora tiro, manti tura. Viva Ihura vaintinavu monu utaqaa raqikiharo vi utaraqihairo kukeqa keharo vinavuka monu muara vare vaura.

⁷ Iutaasiva tiharo, Monu vira vehi vaiinti nahenti nimiataara vaivarova quminama ariqaa vahaverera aqu amiteraroma taiqa kaivo, tuvaro Ihuva tiharo, Kia vi nahentira atiane. Viva vahaverera tiqaa aqu timiteharo, ti quntama te entarara qerama timite vaivo.

⁸ Vehi vaiinti nahenti vo enta vo enta ni hampata variqi vivarave. Ne qaqi entaqaa vika homa kahaqivarave. Te kiama ni hampata vo enta vo enta variqi virarave, tiro.

Nora vaiintinavu Rasarusiravata arukareka auti vaura

⁹ Ihuva minti tivakero vaumanta Iutaa vatanaaka airitahaa iruvaro Ihuva Betanini vaumanta vika Ihuravata Ihuva qaqi vara himpimako vaiintira Rasarusiravata tavareka otu Betanini ruvaaqumavi vaura.

¹⁰⁻¹¹ Iutaa vatanaaka airitahaa Ihuva Rasarusira qaqi vara himpima korara irihama, nai nora vaiintinavu mini qaqrake, otu Ihurara quqaa vivave ti vaumanta vira kaara Kotira kaiqa vara amite vau vaiintika vika noranavu Rasarusiravata aruke uvara ti vaura.

Ihuva donki tauvaqaqaa Ieruharemimi vura

(Matiu 21:1-11; Maaki 11:1-11; Ruki 19:28-40)

¹² Vira qararaa vaiinti nahenti airitahaa Vehakuma Nimito Karara nareka anuka iruvaro Ihuva Ieruharemimi aaraini uri vaura. ¹³ Uri vaumanta vika vira quahama amitareka toqera mare voqaara teqa vare, vira vita kareka vihamma naveraitiha,

Kaiqenavu vira autu tuahera kaare. Noravano nai autuqaa ani vai vaiintira kogema amitaivo. *(Ihi 118:26)*

Tinavu Isareru vatanaakaqaa raqikiaina vaiintira Kotiva koqema amitaivo, ti.

¹⁴ Vika minti tivaqiqi vuvaro Ihuva *donki* qaraaka rantakeri Kotira vukuqi tuntema kero, vira tauvaqaqaa oquvi vaharo Ieruharemimi vura.

Haaru Kotira vukuqi virara mintima qara ntuvu tova vaura:

¹⁵ O Saioni vatukaihainaakao, kia qetaate. Ho tavaate. Niqaa raqikiarirava aniharoma, viva qaraaka donki tauvaqaqaa oquvi vaharo ani vaivo, tura. *(Sek 9:9)*

¹⁶ Vi uvava vukuqi vaumanta vi entara Ihura vaintinavu kia vi uvava okara kankomake irura. Naantiara Ihura qutuviro qaiqaa qaqi himpuaina entaraqaa vi uvava vika aatoqi ntuvu vimanta irike tiha, Vi uvava Ihuva *donki* tauvaqaqaa Ieruharemimi vuainarara turave, ti tura.

¹⁷ Ihuva Rasarusira oriqi quntama toraqihairo aarama kero vira qaqi vara himpima komanta vaiinti nahenti mini Ihura vataake vauka vi kaiqara tave, viti viri voka voka tiva nimumanta ¹⁸ viraqaahai vaiinti nahenti airitahaa Ihuva nora kaiqa varorara irihama, Ihura otu vita kora.

¹⁹ Vika Ihura quahama amitareka mini vumanta Parasi vaiintinavu nai tiva ami nai tiva ami iha tiha, Ho tavaate. Tenavu vira qoraiqama amitaarira aarava kiama ho vaivo. Ekaa vaiinti nahenti vira avataqiqi vi variavo, tura.

Giriki vatanaaka vonavu Ihura oru tavora

²⁰ Giriki vatanaaka vonavuvuvi ovatara nehamu Kotira autu tuaherareka Ieruharemimi vi oru vaura. ²¹ Oru vauvaro Ihura vainti vo Piripira Besaida vatuka Kariri vataihainaarrara tiha, Ti vaintio, tenavu Ihura tavarerave, tuvaro ²² Piripiva vuru Entaruravata tiva amiro vitanta Entaruka vuru Ihura tiva amura.

²³ Tiva amuvaro Ihuva tiharo, Te Vataini Vatatai Vaintikave. Ti hutu noraiqiaina entava aniraivo. ²⁴ Te quqaama tiari iriate. *Uiti* auru kiama vataqiqi ututaivaro auru viva nariaraa vohaiqavano vairave. *Uiti* auru vataqiqi ututaivaro auruvano takavu viro turu verakero viraqaahairo auruvano taiqa virave. *Uiti* auruvano mintima kero taiqa vinaraqaahairo homa airi tava qovaraiqianarove.

²⁵ Ho vaiintivano maa vataraqaa nai qaqi variqiro vuainararaqai noraiqama kero iriqiro virava, viva ekaarama qutu vuanarove. Vaiinti vovano kia nai qaqi maa vataraqaa variqiro vuainarara noraiqakero iriqiro virava, vi vaiintiva ekaa entama qaqi variqiro vuanarove.

²⁶ Taukae ti kaiqa varaataa irauka, hauri vika qumina qaqi varaqi vivorave. Vika ti avataqiqi aniate. Vika mintihama te variainanainima vikavata ho vaivarave. Vika mintimake ti kaiqa vara timite vaivaro ti Qova vika nutu noraiqama kaanarove.

Ihuva nai qutu vuainarara tura

²⁷ Ho maa entara ti muntuka qoraiqimanta vauro. Tenta Qorara te nana uvae tirarave? Ti Qo, vi entara aniraantorave. Vi entara qaqlira kaane. Mintie tirarave? Aqao, te kia minti tirerave. Te vi entarara irihama tuvuraukave. Vi entaraqaa antura ruvaqiqi vuare tivakeha te tuvuraukave.

²⁸ Ti Qo, nena autu noraiqama kaane, tiro. Minti tuvaro naaruvaihairo uvavano tiharo, Te tentu hutu noraiqama kauro. Te tenta autu qaiqaavata noraiqama karerave, tiro.

²⁹ Minti tumanta vaiinti nahenti ruvaaqumavi mini himpite vauka vi uvava iri tiha, Naaruvavanoma uva tivo, tumanta hini kuka tiha, Aqao, *enselivanoma* virara uva tivo, ti.

³⁰ Tuvaro Ihuva tiharo, Kia viva tiriarao tirovauve uva tivo. Viva niarao tiroma uva tivo. ³¹ Ho maa entava vataini vaika *ko* tiaina entavave. Maa entara vataini variakaqaa raqiki vaira Sataanira mpeqa raqa kaaina entarave. ³² Vataihai ti tuahera kaiqe te vaiha

ekaa vaiinti nahenti rarauru kaari vika te variainanaini anivarave, tiro. ³³ Ihuva vi uvara tiharoma nai qutu vuaina okarara vika tiva nimura.

³⁴ Minti tumanta mini ruvaaqumavi vauka aqao ti, Kotira vukuqi qara ntuvu tova tiharo, *Mesaiaavano* Kotira mpeqavano ekaa enta qaqi variqiro vuanarove turave. Are nantiharae nenara tiharo, Ti Vataini Vatatai Vaintika tuahera kevarave, tiarao? „Are nena qutu vinarara tianara tenavu vi uvara kia ho iruro.“ Are tiharo, Ti Vataini Vatataikave, tianarave. Are ta vaiintivave? ti.

³⁵ Tuvaro Ihuva tiharo, Inaararaqai ovavano ni hampata vaharo itaqiro vuanarove. Konkiraqi ni vaiva kia nai tainie vuaina aarara kankomakero irirara ti, ne konkira ariraqi nuarorave ti, ne ovavano qaqi ite variainaraqaa niha variate.

³⁶ Ovavano qaqi vaina entaraqaa ne vi ovara quqaa vivave tivake virara iriqi vihamanu. Minti tihamo ne ova vaintivara vahama, nevata ovavano itaainantemake itaqi vivarave, tiro.

Ihuva vi uvara tivakero viraqaahairo kia vika nivuqaa vairaitiro, kukeqaviro vaura.

Iutaa vaiintinavu Ihurara kia quqaa vivave tura

³⁷ Ihuva vika nivuqaa vaharo nora kaiqa, vo kaiqa vo kaiqa varomanta vika tavevata vira qaqrake kia virara quqaa vivave tura. ³⁸ Vika virara kia quqaa vivave tuvarora tiro, vi entara Aisaiaava haaro uva tivatova quqaa vivau vaura. Haaru Kotiva vaiinti vo Aisaiaava kahaqvaro Aisaiaava paropeti vaiintivano vaharo, qumina enta vaharo vi uvara qoqaa tiva nimiro tiharo,

Nora Vaiintio, tavave tinavu uvara quqaave tivo? „Kia vovano quqaave tivo.“ Nora Vaiintivano nora kaiqa vara kaivaro tavave vira kaiqa kankoma kero tavaivo? „Kia voqavanovata vira kankomakero tavaivo.“ tura. (*Aisaiaa 53:1*)

³⁹ Aisaiaava minti turara ti, vika kia Ihurara quqaa vivave tura. Aisaiaava qaqua Mesaihaarara tiharo:

⁴⁰ Vi vaiintika qora aara qaqrake tiriara tinavu kahaqiane tivorave tivakero, Kotiva vika avu aato tinta kaimanta vika kia avuqohai ho tave, vika kia aatoqihai ho iriavo, tura. (*Aisaiaa 6:10*)

⁴¹ Aisaiaava haaro vaharo *Mesaiaara* mpeqa okara takuqi vaira taveharora tiro, viva virara tiva nimura.

⁴² Vi entara Iutaa nora vaiintinavuqihai vokuka tiha, Quqaama Ihuva vivave, ti. Minti tiha vika Parasi vaiinti naatu qetake qaqrake kia qoqaa vahia vi uvara tiraiti, Maara naavuqihai tinavu ekaara tititama kevorave ti, vika kia vi uvara qoqaa tura.

⁴³ Vika kia Kotiva vika quahama nimitaainarara noraiqaake iriraiti, vika qaqi vaiintivano quahama nimitaainararaqai noraiqaake iri vaura. Ho vika viraraqai irihara ti, vika kia qoqaa Ihurara quqaa vivave tura.

Ihura uvavano ko tianarove tura

⁴⁴ Ihuva naveraitiharo tiva nimiro, Tiriara quqaa vivave tirava kiama tiriaraqai quqaave tianarove. Viva ti tititaira viraravatama quqaave tianarove. ⁴⁵ Vaiintivano ti taveharo ti tititairavatama tavaanarove.

⁴⁶ Tiriara quqaa vivave tirava konkiraqi nuantorave ti, te ova voqaara vira ataama amitarera vataini tuvuraukave. ⁴⁷ Te kia vataini variakaqaa uva vatarera tuvuraukavauve. Vataini vaika ho variate ti, te tuvuraukave. Ti uva iriro raqa kairava vairaque kia tevauve viraqaa uva vatararave. ⁴⁸ Ti qoririma timitaaina vaiintiraqaaave, ti uva raqa kaaina vaiintiraqaaave, vovano viraqaa uva vataanarove. Te tiva tauna uvava ekaara entaqaqa viraqaa uva vataanarove.

⁴⁹ Te kiama tenta irike uva ni tiva nimuro. Ti Qova minti minti tiane tivakero ti tititaimanta te vira uva muntu ni tiva nimuro. ⁵⁰ Te kankomake iruraro ti Qora no irirava ekaa enta qaqi variqiro vuanarove. Ho ti Qova minti minti tiane ti uvara, te vi uvara ni tiva nimuro, tiro. Ihuva minti tura.

13

Ihuva nai vaintinavu aiqu hiqama nimitora

¹ Vehakuma Nimito Karara ovata no entava vohaa entaqai qaqi vauvaro Ihuva vaharo iruvaro nai vataihairo tuvurantero nai Qova vaunaini oru vuaina entava aumanto vaura. Mintima vauvaro Ihuva vaharo nai vainti nahenti vataini vaukara voqamakero antuqa aruvaro iriharo vaura. Viva vikara antuqa aruvaro iriqi viviro, vuru qutu vura.

² Entama vuvaro Ihuva nai vaintinavu hampata kara ne vauvaro vira vainti vovano Iutaasi Ikeriotiva Saimonira maaqvano vauvaro Sataaniva Ihura qovarama kaarire tiro, Iutaasira vira aatoqi qora uva vatovaro Iutaasiva Sataanira uva irura. ³ Iutaasiva

mintimakero iri vauvaro Kotiva ekaa haika Ihura kauquqi vatora virara Ihuva kankoma kero iriro. Ihuva Kotiva unaihairo tuvuva, viva qaiqaa Kotiva unaini tuvurantero vuainara viraravata kankoma kero irura.

⁴ Ho viva vaiharo kara no taintaraqaahairo himpiro nai utavaaqqa hini ravaqaakero *tauri* avuni rumpa varero oru ⁵ tanuqi namari qihia varero oru nai vaintinavu aiqu hiqama nimiteharo *tauri* rumpa toraqohairo namari aiquqaa nunkakero aaharaiqama nimitero.

⁶ Mintiaqi viharo Saimoni Pitaava vaunaini anirovaro Pitaava aqao tiro, Nora Vaiintio, are hiqvatae hiqama timitareva auti variarao? tuvaro ⁷ Ihuva tiharo, Vate te maa kaiqara varaurara are kiama virara kankomake iriarao. Naantiara are virara kankomakera irinarare, tiro.

⁸ Tuvaro Pitaava tiharo, Aqao, are nora vaiintivano vaihara mintina kaiqara vara timiterorave. Are kiama ti hiq ho hiqenarave, tiro.

Pitaava minti tuvaro Ihuva tiharo, Kia te ai aiqu hiqama amitaarer, are kiama ti vainti vainarare, tiro. ⁹ Minto tuvaro Saimoni Pitaava tiharo, Nora Vaiintio, are mintirera, kia ti hiqquqai hiqama timitaraitira, ti kauquvata ti qiatavata hiqama timitaane, tiro.

¹⁰ Tuvaro Ihuva tiharo, Namari tutukero vairava qaiqaa qumina tuntuantorave. Viva nai aiquqai hiqama kaarire, tiro. Ne ekaa homa variavaro vohaiqavanoqai niqihairo kia ho vaivo, tiro. ¹¹ Ihuva nai vainti vovano navutaaka tiva nimiaina vaintirara iriharо minti tura. Ne ekaa ho variavaro niqihairo vohaiqavanoqai kia ho vaivo, tiro.

¹² Ihuva minti tivakero vika aiqu hiqama nimitero qaiqaa oru utavaaqqa ravaqaakora nonkutero nai vaura qoqaraaraqaa oquiviro vaiharo vika tiva nimo tiharo, Ho te maa kaiqara ni vara nimitaunara ne hoe vira okarara iriavo? ¹³ Ne tiriara Nora Vaiintive, maara ti vai vaiintirave tiavo. Te mintima vaunara ti, ne homa tiriara minti tivarave. ¹⁴ Ho te ni Nora Vaiinti, maara ti vaura vaiintika vaiha, te ni paanaa kaiqa vara nimitehamra ni aiqu hiqama nimitauro. Nevata ti aanare vaiha nai aiqu hiqama amite nai aiqu hiqama amite iate. ¹⁵ Ne te iainante iate ti, te ni paanaa kaiqa vara nimitauro.

¹⁶ Te quqaa tiari iriate. Kaiqa vaiintivano viva kia nai nora vaiinti aatara kairave. Vo haikara atitaivaro oru vi vaiintiva, viva kia nai atitai vaiintira vira aatarake vairave.

¹⁷ Ne vi uvvara okara kankomake iriqi vihama vi kaiqara mintimake varaqi vivera, ne quahehamra variqi vivarave.

¹⁸ Ho kia te ni ekakara turo. Te tenta kaama tauna vaintika te vika viraqamake tavaunarave. Vika okaravata irunarave. Maa entara Kotira vukuqi haaru uva vo qara ntuvu tova vate vivauma varianarove. Mintima tiro:

Vaiinti vovano tintiro vaiharo ti kara nero viraqaahairo tuqantaa viro ti qoraiqama timitaanarove, turave. *(Ihi 41:9)*

¹⁹ Niqihairo vaiinti vovano ti qoraiqama timitaanarara te vate ni tiva nimi vauvo. Viva naantiara ti qoraiqama timitaira ne vaiha, vate te tiva nimunarara irihama ho tiriara quqaa vivave tivarave.

²⁰ Te quqaa tiari iriate. Vaiinti vovano te atitaaina vaintira quahama amiteharo viva tivata quahama timitaanarove. Viva ti quahama timiteharo Kotiva ti tititairavata quahama amitaanarove, tiro.

Vovano Ihura nai navutaa kauquqi kaainarara tura

(Matiu 26:20-25; Maaki 14:17-21; Ruki 22:21-23)

²¹ Ihuva minti tivakero vauvaro vira muntukavano qoraiquvaro viva uva yutukero tiva nimo tiharo, Te quqaa tiari iriate. Niqihairo vovano ti harukaate tiro, vuru tiriara navutaaka tiva nimianarove, tiro. ²² Minto tumanta vira vaintinavu aira aato iriha vika nai tave nai tave iha tiha, Ihuva ta vaiintirarae vi uvvara tivo? ti.

²³ Minto ti vauvaro Ihura voqamakero antuqa aru vaiintiva viva Ihura tataaqa oquiviro vaura. ²⁴ Oquiviro vauvaro Saimoni Pitaava virara kauqu katu riharo tiharo, Are Ihura irehara tavaane. Ta vaiintivae mintianarove, tiane, tuvaro ²⁵ vi vaiintiva Ihuraqaa muntuvu vaiharo Ihura irero tiharo, Nora Vaiintio, viva ta vaiintivave? tiro. ²⁶ Tuvaro Ihuva tiva amiro tiharo, Te mpareti viti tanuqi vaati quntamake vaiinti vo amiaina vaiintira, ho vi vaiintiva vivave, tiro. Tivakero mpareti viti varakero tanuqi vaati quntama kero Iutaasi Ikeriotira amiro.

²⁷ Amuvaro Iutaasiva kara viti varavaro Sataaniva Iutaasira avu aatoqi vijetovaro Ihuva Iutaasirara tiharo, Ho kantera nena vararerina kaiqara varaa, tiro. ²⁸ Minto tumanta vira vaintinavu hininavu kara taintaqaa oquivi vaukaqihairo kia vovanovata vira uva okara ho irura. ²⁹ Vika tiha, Iutaasiva monuqaa raqiki vaiva vaivaro Ihuva hura ovata naaina karara iriharо oru varaarire tiharoe tivo? Viva vehi vaiinti monu muntu

nimiarire tiharo e tivo? ti. ³⁰ Vika minti ti vauvaro Iutaasiva mpareti viti amura varero veverarero viro. Viva entaqi vura. (Ioni 9:5, 11:9-10, 12:35-36 tavaane.)

Ihuva qaraaka maara uva tiva nimura

³¹ Iutaasiva veverarero vuvuvaro Ihuva tiharo, Te Vataini Vatainai Vaintikave. Vate ti mpeqa okaravano takuqi vaiva qovarama vivo. Vate te Kotira mpeqa okara takuqi vaira qovarama kauro. ³² Te Kotira mpeqa okara takuqi vaira qovarama kaarerera, Kotiva viva ti mpeqa okara takuqi vairavata qovaramama kaanarove. Viva vaakama mintianarove.

³³ Ho ti vaintinavuvuavo, te ni hampata inaaraiqaqai varike vuarira ne naantia quminama tiriara rantevarare. Te Iutaa vaiinti noranavu tiva nimunantemake, nivata vi uvaraqa tiva nimuro. Te vire iainanaini ne kia ho vivarave, tunarave.

³⁴ Te vate qaraaka maara uva ni tiva nimiari ne iriate. Ne voqamake nariara nariara antuqa arira variate. Te niara muntuka vataainantemake, ne nariara nariara muntuka vateha variate. ³⁵ Ne nariara nariara antuqa arira vaimanta vaiinti nahenti ni tavehamma vika niara tiha Ihura vaintive tivarave, tiro.

Pitaava te Ihura kia tavaunarave tainarara Ihuva tura

(Matiu 26:31-35; Maaki 14:27-31; Ruki 22:31-34)

³⁶ Ihuva minti tuvaro Saimoni Pitaava vira irero tiharo, Nora Vaiintio, are taini virevave tiarao? tuvaro Ihuva tiharo, Te vire iainanaini maa entara are kia ti tivataqira ho vinarare. Varikera naantiarama ti tivataqira vinarave, tuvaro Pitaava tiharo, ³⁷ Nora Vaiintio, nantihae te kia maa entara ai avataqi ho virarave? Te ariarao tiha, homa qutu virarave, tiro.

³⁸ Tuvaro Ihuva tiharo, Quqaae are tiriarao tira, qutu vinarave? Te quqaa tiarirara iriane. Kokoraaravano kia uva tirara are taaramo tataama tiriara kia vira tavaunarave tinarave, tiro.

14

Kotiva inaini vua aarava Ihuvama

¹ Ihuva nai vaintinavu tiva nimo tiharo, Kia tiriara irivaro ni muntukavano qoraqiarire. Ne Kotirara kempukaiqamake iriqi vintemake, tiriara vata kempukaiqamake iriqi vuute. ² Ti Qova maqaqaini airi vo naavu vo naavu vaimanta te niara iriha oru qerama nimitarer a vuro. Kia mintima vaitirio, kiama te ni tiva nimuraitirio. ³ Te oru ni qerama nimite orurante tuvu ni ntitake, tenta vairera variainanaini vuru ni kaari, nevata te variainanaini vaivarave. ⁴ Te virera una aarara ne kankomake iriarave, tiro.

⁵ Tuvaro Tomaasiva aqao tiro, Nora Vaiintio, kiama tenavu are vireva iana aarara kankomake irunarave. Ho nantiabee tenavu are vireva ina aarara ho kankomake tavararave? tiro.

⁶ Tomaasiva minti tuvaro Ihuva vira tiva amiro tiharo, Kotiva inaini vi varia aarava vaireva, te maa vi aaraukama vauro. Quqaa okaravano vaireva, te maa vikama vauro. Vaiintivano kia vo aaraqaa rantero ti Qova inaini ho vuanarove. Teqaima ti Qova inaini vi varia aaraukama vauro. ⁷ Ne ti kankomake tavaakara ti, ne ti Qoravata kankomake tavevarave. Vate maa entaraqaahai ne ti Qoraravata kankomake iri tavaakama variavo, tiro.

⁸ Minti tuvaro Piripiva tiharo, Nora Vaiintio, ho nena Qora humiqairage tenavu tave ho tavauro tiare, tuvaro ⁹ Ihuva vira tiva amiro tiharo, Piripio, te ni hampata vukai enta vaurara are kiae ti kankoma kera tavaara? Ti tavaiva ti Qoravatama tavaivo. Are nantihae tiriara nena Qora tinavu humiqaaane tiarao?

¹⁰ Piripio, te tenta Qoraqii vauraro ti Qova tiqima vaivo. Are kiae vi uvarara quqaave tiarao? Te ni tiva nimuna uvara kia tenta aatoqihai irikehavauve ni tiva nimuro. Ti Qova tiqii vaharoma nai kaiqa vare vaivo. ¹¹ Te tenta Qoraqii vauraro ti Qova tiqima vaivo. Vi uvararama quqaave tiate. Ne kia tiriara irivera, ne te kaiqa varau nara virara iriha tiriara quqaa vivave tiate.

¹² Te quqaa tiari iriate. Tiriara quqaa vivave tivakero iriqiro virava, viva vaharo te kaiqa varau namenta kero kaiqa varau naranove. Te tenta Qova inanaini vuaninara tiro, vira kaiqavano ti kaiqa aataraanarove. ¹³ Ne ti kaiqarao tiha homa ne vi haikarave, vi kaiqarave, ti iraiqe te ni nimirarave. Ne ti Qora mpeqa okara takuqi vaira tavaate ti, te vira Maaquvano mintirerave. ¹⁴ Ne ti kaiqarao tiha vi haikarave vi kaiqarave iraivera, te ni nimirarave.

Kotiva nai Maraqua vara kairaro tuvuarire tura

¹⁵ Ni muntukavano tiriara vairera, ne ti uvaqai iriqi vuate. ¹⁶ Ne mintiqe te tenta Qora iraariraro viva ni kahaqainara Kotiva nai Maraqua quqaa uvaqai ti vaira varakairaro viva ni hampata ekaa enta ni airuqireva tuvu varianarove.

¹⁷ Qaqi vainti nahenti vataini variaka kia ho Kotira Maraqua tavevarave. Vira okaravata kia ho irivarave. Vika kia tavehara ti, vika kia vira ho varevarave. Ne vira tavaara maa entara viva ni hampatama vaivo. Naantiara viva niqirama varianarove.

¹⁸ Kia te ni maini ke vuari ne *iqa/viqa* vainti voqaara nentaraa vaivarave. Te ni kaainanaini qaqaa orurante tuvirerave.

¹⁹ Inaaraipa te variarira qaqi vataini variaka kia ti ho tavevarave. Neqaima ti tavevarave. Te qaqi variqi vuarirauka vaunarara ti, nevata qaqi variqi vivarave. ²⁰ Vi entara te tenta Qoraqi vaunarave, ne tiqui variarave, te niqi vaunarave, ne virara virara kankomake irivarave.

²¹ Ti uva iriro viraqaaahairo kia qaqira karaitiro iriqiroqai virava, viva vairaro vira muntukavano tiriara quqama varianarove. Tiriara muntuka vairava vairaro ti Qora muntukavanovata virara vairaro ti muntukavanovata vi vaiintirara varianarove. Te vhaihvi vi vaiintira tenta okara qoqaa umiqarerave, tiro.

²² Tuvaro Iutaasiva kia Iutaasi Ikeriotiva vo Iutaasiva, tiharo, Nora Vaiintio, nantiharae are nena okara kia vataini variaka numiqaraitira, tinavuqai humiqenarave? tiro.

²³ Iutaasiva minti tuvaro Ihuva tiharo, „Vataini variaka kiama tiriara muntuka vataavo.“ Vaiinti vovano tiriara muntuka vatairava, viva ti uva iriqiro viraro ti Qora muntukavano viraravata vairaqe tetanta Qoka vi vaiintira vataake oru vairerave. ²⁴ Vaiinti vovano kia tiriara muntuka vaiva, vi vaiintiva kia ti uva avataqiro vuuanarove. Te ni tiva nimuna uvvara kia tenta irikevauve ni tiva nimunarave. Te ti Qoraqaaahai vi uvvara vare muntu ni tiva nimunarave.

²⁵ Te vate ni hampata vauna entara maa uvvara ni tiva nimuro. ²⁶ Te vuariraro ti Qova ni kahaqainara nai Maraqua varakairaro viva ti kaiqara iriharo tuvu vahiaro, ekaa haikara ni numiqeharo ni avu aatovata kahaqira ne te tuna uvvara kia taurukaraiti, ho irivarave.

²⁷ Te virerave. Te vihama niara muntuka paru ira variate turo. Maa vatanaaka nai uva mante nai uva mante iha tihama, muntuka paru ira variate ti variarave. Vika minti tihia qumina uvaqai ti variarave. Te niara muntuka paru ira variate tuna uvava kiama quamina uvave. Kiama nenta muntuka kaivaro qoraiqiramanta qeteha variate.

²⁸ Te ni maini ke oru vi orurante tuvuainarara nti tiva nimuna uvvara ne vaaka iriarave. Ti Qova ti haataararirava vairara ti, ni muntukavano tiriara quqaa vairera, te tenta qova inanaini vuainarara ne quaheha vaivarave. ²⁹ Vi haikava vi haikava naantiara minti minti iainarara te vate ni tiva nimuro. Ho naantiara ne tavaivaro vi haikava vi haikava minti minti ira, ne tiriara viva ti uvava vate quqaa vivauma vaivo tivarave.

³⁰ Ho maa entara vataini variakaqaa raqiki vaiva, Sataaniva, ani vaimantara ti, vira kaara te kia ni hampata vukai uva tirarave. Vira kempukavano kia ti ho haatara kaanarove. ³¹ Ti muntukavano ti Qorara vainara vataini vaika vira tavaate ti, te ti Qora noqai iriqi virerave. Ho varaiqenavu maaqihai vevar vuare, tiro. Ihuva turama.

15

Ihuva uaini naaquntara uva tuqantaakero tiva nimura

¹ Ihuva uva vo tuqantaakero nai vantinavu tiva nimiro tiharo, Te *uaini* naaqunta nora koqeka vauraro ti Qova *uaini* qaqira raqiki vaiva vaimanta ne *uaini* naaqunta kaarama variavo.

² Ti Qova tavaivaro kaara vovano kia tava iraivaro viva vira teqa qaqira aqukero oru tavaivaro vo kaaravano koqema kero tava iraivaro voqavata iraarie tiro, viva vira ruhoqakero hiqama kero vatairave. ³ Ne vaaka ti uva iriakara ti, ne homa hiqama vuaka variavo.

⁴ Ne tiqui vaiqe te niqi variare. Naaqunta kaaravano qaqi kanta vairava kia ho tava iraanarove. Kaaravano noraqaa vairava homa tava iraanarove. Mintintemake, ne kia tiqui vaivera, ne kia ho koqe kaiqavata varevarave.

⁵ Tema *uaini* nora vauramanta ne mare kaarama variavo. Ti vataakero vairaqe te vira vataake variarirava, vivama koqe tava airi tava iraanarove. Ne kia ti vataake taatauvu vairaiti ne nentaraa vaivera, ne kiama vo kaiqavata ho varevarave.

⁶ Naaqunta kaara qaqira teqa kaivaro aaharuqama vinantema kero, ti vataakero kia vaina vaiintira ti Qova qaqira kaanarove. Naantiara viva teqakero qaqira kaaina kaarara raupi varero ihaqira aqukairaro ita taiqa vuuanarove.

⁷ Ne ti vataake vohaa vaivaro ti uvavano ni avu aatoqi vairera, ne Kotira aarehama nenta muntuka vainara iraivarо viva ni nimianarove. ⁸ Ne ti uva iriqi viha *uaini* naaqunta voqaara airi tava koqe tava iraivarо ti Qora autuvano takuqi vaiva noraiqiarire. Ne mintiaqi viha ne ququaama ti vaintima vaivarave.

⁹ Ti Qora muntukavano tiriara vaintemakero, ti muntukavanovata niara vaivo. Ti muntukavano niara variainarara iriha, ne ti uvaqai iriqi vuate. ¹⁰ Te ti Qora no iriqi vi vauraro vira muntukavano tiriara vaivo. Nevata te mintunantemake, ti uva iriqi vivera, ti muntukavanovata niara variqiro vuanarove. ¹¹ Ti muntukaqihairo koqe inantemakero, ni muntukaqihairovata koqe iramanta anomake quaheda variate ti, te maa uvara ni tiva nimuro.

¹² Te uva vo tiari ne vi uvvara iriqi vuate. Ti muntukavano niara vainantemake, nevata nariara nariara muntuka vateha variate.

¹³ Kia nai qaqi variainarara noraiqaakero iriraitiro, nai navunaakarao tiro qutu vina vaintira muntukavano vaireva, nai noraiqaakero uritarero vaivo.

¹⁴ Ne ti uva iriqi vivera, ne ti navunaakama vaivarave. ¹⁵ Qaqi kaiqa vaintivano vaiharo kiama nai nora vaintivano minti minti iaina okarara irirave. Virara irihama kia te niara ti kaiqa vaintive tivaqiq virerave. Te niara ti navunaakave tivaqiq virerave. Te ti Qora uva ekaa ni tiva nimunarara ti, te niara ti navunaakavema turo.

¹⁶ Nevauve ti kaama taavo. Tema ni kaama taunarave. Katarivano koqe tava irainantemake, nevata koqe tava mpeqa tava irate variate ti, te ni kaamate noraiqama kauro. Ne koqe tava iraqi viha nana nana haikarae ti hutuqaa irera, ti Qova ni nimianarove.

¹⁷ Te maa uvaravata niara kempukaiqamake turo: Ne vaiha nariara nariara muntuka vateha variqi vuate.

Vataini vaika ni navutaiqivarave tura

¹⁸ Vataini vaika qora kaiqa vareka ni navutaiqihama kia niara antuqa arira vaivarave. Ho iriate. Vika ti naane navutaiqama tokara ti, vika nivata navutaiqivarave. ¹⁹ Ne vatalihainaa vainti vaimantavauve vika niara tintanavu navunaakave tivakeha niara antuqa arira vaivarave. Te vataini variakaqihai ni naarama kauramanta ne ti vaintinavu variavo. Vate ne kia vika vanti variamanta vika vira kaara ni navutaiqihai vika kia niara antuqa ntaihaimanta variavo.

²⁰ Te vaaka tunara iriate. Kia kaiqa vaintivano nai nora vainti aatara kairave. Vataini variaka ti qoraiqama timitaakara ti, vika nivata qoraiqama nimitevarave. Vika ti uva irihavauve ni uvavata ho irivarave.

²¹ Ne ti vainti variamantara ti, vika vira kaara nivata qoraiqama nimitevarave. Ti tititairara kia kankomake iriarara ti, vika mintivarave. ²² Te kia muntu vika tiva nimuraitirio, vika qora kaiqa varaara kaara vikaqaa kia uva vaitirio. Te muntu vika tiva nimunarara tiro, viraqaahairo vika aqao kia are vi uvvara tinavu tiva timianarave tiva kia ho varianarove.

²³ Vaintivano ti navutaiqiharo ti Qoravata navutaiqianarove. ²⁴ Vo kaiqa kia vika ho varaa kaiqara, te vi kaiqara vika nivuqaa vaiha vare vaunarave. Kia te minturaitirio, kia vikaqaa uva vaitirio. Vika ti kaiqa tave „ququaave tiataara vaimanta“ titanta Qoka navutaiqiaivo.

²⁵ Vika mintima variavaro uva vo haaru qumina vaka qara ntuva tova vate vivauuma vaivo. Mintima tiro: *Kia uva vaimanta vika qumina uva kaara ti navutaiqiaivo, turave.*

(Ihi 35:19)

²⁶ Ho ni kahaqiarirava vovano tuvuraanarove. Viva Kotira Maraquravano quuaa uvaqai ti vaiva, viva Kotiragaahairo tuvuraanarove. Te vira ti Qoragaahai atitaariraro viva tuvu vaiharo tiriara ni tiva nimianarove.

²⁷ Nevata tota enta ti vataake variqi vuakara ti, ne tiriara vo vatanaa vo vatanaaka tiva nimiate.

16

¹ Ni naantiara popohairamanta ti uva qaqla kevorave ti, te vi uvvara vi uvvara vate ni tiva nimuro.

² Naantiara vika ni nitihama maara naavuqihai nititama veva kevarave. Vo enta ani ntairamanta vika ni aruke tiha, Tenavu Kotira kaiqa vare vauro, tivarave. ³ Vika tiriavarava ti Qoraravata kia kankomake iriakara ti, vika mintivarave.

⁴ Ho te vate maa entara naantiara ni qoraiqama nimiterara tiva nimi vauro. Naantiara vika minti minti imanta ne vi entara te maa uvvara tunara aatoqi ntuva viramanta irivarave. Tota te ni hampata vaihara ti, kia te vi uvvara vi uvvara ni tiva nimunarave.

Ihuva Kotira Maraquaravano varaaaina kaiqarara tura

⁵ Ho inaaraiqaqai varike te ti tititaiva inaini virerave. Te mini virerave turamantavata, kia niqihairo vovano tiharo, Are taini virevae auti variarao? tivo. ⁶ Ne te vaaka ni tiva nimunarara irihama ni muntuka qoraiqmanta variavo. ⁷ Ho te ququaama turo. Ne koqemake variate ti, te virerave. Te kia vuariraro ni kahaqiarirava kia ho tuvuanarove. Te oru vi vira varakaariraro viva ne vainaini tuvuarire.

⁸ Kotira Maraquaravano tuvu vaharo viva vataini vaika taaramo haikara vika tiva nimianarove:

(1) vika qora kaiqarave,

(2) koqe kaiqa okararave,

(3) Kotiva ko tiaina okararave, tiva nimianaro.

(1) Vika gora kaiqra:

⁹

Vataini variaka kia tiriara quqaa vivave tiarara tiro, Kotira Maraquaravano vika nái vaaqu kaiqa okarama numiqaanarove.

¹⁰

(2) Koqe kaiqa okarara:

Te tenta qova inanaini vuari ne kia ti qaiqaa taverara tiro, viva vaharo koqe kaiqa okara ni numiqaanarove.

¹¹

(3) Kotiva ko tiaina okarara:

Maa entara maa vataraqaa raqiki vaiva Sataaniva nora uva varairara tiro, Kotira Maraquaravano vaharo Sataanira uva okara vataini vaika tiva nimianarove. „Kotira Maraquaravano mintimakero taaramo haikara tiva nimianarove.“

¹² Te ni vo uva vo uva tiva nimiarirava vaimantavata, te vate kia vi uvvara tirerave. Te vate vi uvvara tiarerar, ne kia vi uvvara ho irivarare.

¹³ Quqaa uvaqai ti vaira Maraquarava tuvurero, viva vaharo ni ntita varero koqe aara numiqeharo quqaa okara ekaa okaravatama ni numiqaanarove. Viva kia nai irikero ni tiva nimiraitiro, viva ti Qova tina uvaraqai ni tiva nimianarove. Naantiara vi haikava vi haikava minti mintima kero qovaraiqainara, viraravata viva ni tiva nimianarove.

¹⁴ Viva te uva tiainara viravata ni tiva nimiainarara tiro, ti hutuvano noraiqianarove.

¹⁵ Ekaa ti Qova i haikara te una haikaravatama vaimantara ti, te vaaka tiha, Kotira Maraqua viva te una haikarara iriro vara kero ni tiva nimianarove, tunarave. ¹⁶ Ho inaaraiqaqai ne varike kia ti tavevarave. Viraaahai inaaraiqaqai ne varike ti qaiqaa tavevarave, tiro.

Ne mpo ike tivaqi vi, viraqaahai ne qaiqaa quahevarave tura

¹⁷ Ihuva minti tumanta vira vainti hini kuka nai tiva ami nai tiva ami iha tiha, Viva nana uva tivo? Viva tiharo, Inaaraiqaqai ne varike kia ti tavevarave, tivakero qaiqaa tiharo, Inaaraiqaqai ne varike ti tavevarave tivo. Minti tivakero viva nai qova inaini vuainararae tivo? ¹⁸ Viva tiharo, Ne inaaraiqaqai varikeve ti uvvara, kia tenavu vi uvvara kankomake iruro, ti.

¹⁹ Minti ti vauvaro Ihuva irumanta vika vi uvvara vira irareka auti vauvaro viva tiharo, Te vaaka tunarara ne inaaraiqaqai varike kia ti tavevarave viraqaahai inaaraiqaqai varike ti qaiqaa tavevarave tunarave. Ne vi uvararae nai ire nai ire i variavo?

²⁰ Ho te ququaqai tiari iriate. Ne iqiq rataqai viha ke ke tivaqi vimanta vataini vaika quahegaima vaivarave. Ni muntukavano qoraiqmanta variqi vivaro viraqaahairo ni muntukavano koqe i vairamanta vaivarave. ²¹ Nahentivano vainti vataarirava aumanto vaivarora tiro, viva ke ke tivaqiro virave. Ho vi nahentiva vainti vatakero viraqaahairo te vainti vatakauro tivakero, quaheharo nai ke ke tira taurukairave.

²² Nevata mintima ivarave. Maa entara ni muntukavano qoraiqira vaivarave. Ho naantiara te ni oru tavaariraro ni muntukavano koqe ira ne ho vaivararo vovano kia ho ni qoraiqama kairaro ni muntukavano qoraiqianarove.

²³ Naantiara vi entara vahai ne vo haikara ti ireva kiama varianarove. Te ququaama turo. Vi entara ne ti Qora aarehama nana nana haikarae vira iraivararo viva ti kaiqarave, ti hutuarave, iriharoma ni nimianarove. ²⁴ Tota ne vahai kia ti kaiqarave, ti hutuarave, iriha ti Qora irorave. Maa entaraqaaahai ne ti Qora iraivararo ni nimiraro ni muntukavano koqe iarire, tiro.

Ihuva vata maqaahainaa okara aatara kairara tura

²⁵ Te uva tugantaakehama vo uva vo uva ni tiva nimunarave. Ho enta vo aniraiqe te vi entara kia uva tugantaake ni tiva nimiraiti, te ti Qorara ni tiva nimirera uva vutuke ni tiva nimirerave.

²⁶ Vi entava anintaira homa ne ti hutu reha ti Qora iraivararo ni nimianarove. Kia tevano niara iriha tenta qora iraainarave. „Ne nentavano vira homa irevarave..“

²⁷ Ti Qova niara muntuka vaivaro vairara ti, nentavano homa vira iraivarao ni nimianarove. Ne tiriara tiha, Are Kotiva vainaihairs tuvuaravave, tiavarao ni muntukavano tiriara vaimanta variarara tiro, ti Qovavata niara muntuka vaivo.

²⁸ Te tenta qova inaihai vatainai tuvuraukave. Te inaaraiqakaa maa vatara maini ke, tenta qova inanaini qoqaraanaini virerave, tiro.

²⁹ Minti tumanta vira vantinavu hove ti, Vate are kia uva tuqantaa kera tinavu tiva timiraitira, are vutukera tinavu tiva timi variarao.

³⁰ Vate tenavu irurara are kankomakera ekaa haikara iriarava variararora tiro, kiama vovano uva vo ai irama amitaarirava varianarove. Vate tenavu tiha, Quqaama are Kotiva inaihairs tuvuaravave, turo, ti.

³¹ Minti tuvaro Ihuva tiharo, Ho vateve ne ti okarara iriavo? ³² Enta vo aumanto vaira vi entara ni vara raumpirima kaimanta ne qetehama, nenta maaqa nenta maaqa vi anima vivaque te tentaraa vairarave. Ho ti Qova tintiro vairara ti, vi entara kiama te ququa tentaraa vairarave.

³³ Ne ti hampata vaivaro ni muntukavano qihaaqamakero variarire ti, te vi uvara ni tiva nimuro. Ne vatainai vaimanta vika ni qoraiqama nimitevarave. Ho tiriara iriha kempukaiqamake variqi vuote. Tema vatainai vai okarara aatara kauraukave, tiro. Ihuva turama.

17

Ihuva Kotira aareharo tura

¹ Ihuva vi uvara tivakero viva virini naaruvaini taveharo Kotira aareharo tiharo, Qao, vate maa ti entama aniraivo. Ho are ti mpeqa okara takuqi vaira qoqaiqama timitairaqe te ai Maaqu vaiha, nina mpeqa okara takuqi vaira vaiinti nahenti numiqaare.

² Vaiinti nahenti timiarauka te vika kahaqamaqi vuari vika ekaa enta qaqi variqi vuote tira, are ti noraiqama kaaramanta te vaiinti nahenti ekaa vikaqaa raqiki vahama te vika Noravano vauro.

³ Vaiinti nahenti ekaa enta qaqi variqi vi okarava mintima vaivo: Vaiinti nahenti ariara kankomake iriha tiha, Kotivaqaima quqaa Variqa vohaiqvano vaiharo viva Ihura atitaivo, tika, vikama qaqi variqi vivarave. ⁴ Te vatainai vaiha kaiqa timianara vara vuru taiqa kauro. Mintima keha te ai mpeqa okara takuqira vaiinti nahenti numiqauro.

⁵ Ho ti Qo, haaru kia maa vatava vau entara te ainti variqi vuavauraro ti mpeqa okaravano takuqi vaiva vaurave. Ho vate ti mpeqa okara takuqi vaira vika numiqaira vika tavaate. ⁶ Are vataihainaa vaiintinavu timiarauka, te vika ai okara numiqaunarave. Vi vaintika nena iarauka variavara are vika ti timiarananta vika vaiha ai uva iriqi vi variarave. ⁷⁻⁸ Uva tiva timianara te vika tiva nimuramanta vika vi uvavarao koqe uvave tiarave. Vika iriamanta quqaama te are iananaihai tuvuramanta vika tiriara quqaa Kotiva vira atitaivo tiarave. Minti tiarara ti, vika kankomake iriavaro ekaa haika are ti timianara, vi haikava are iananaihairo tuvirave.

⁹ Ho te vika kahaqirera vikara irihama ai aare vauro. Kiama te ekaa vaiinti nahenti vatainai variaka kahaqireravavue ai aare vauro. Are vaiinti nahenti ti timiarananta vika nena iarauka variarara ti, te vikaraqai irihama ai aarauro.

¹⁰ Te uraukavata are iaraukavatama variavo. Are iarauka te uraukavatama variavo. Vika vaiha ti mpeqa okara takuqi vaira vokiaka numiqa variavo.

¹¹ Te kia maa vataraqaa vairaiti vuari, vikama maa vataraqaa vairarave. Te are iananaini virerave. Ho ti Qo, kia ariqi qora okaravano vaivara are nenaraiqamakera variaravave. Nena mpeqa autuara iriharama vaiinti nahenti timianaraqaa raqikharama vika antuaraqira vira, vika tetanta vohaaqra vohaaqra, vikavata vohaa variate.

¹² Te vika hampata vahama are nena kempuka autu ti timianara vi kempukaraqohai te vika antuaraqir vuraro kia vikaqihairo voqavanovata kakakima vivo. Vaiinti vohaiqavanoqai kakakima vivo. Viva kakakima vuainarara haaru qaqi enta vovano virara qara ntuvu torara tiro, maa entara vi uvava vivauma vaivo.

¹³ Ho te ainti oru vairera auti vauro. Ti muntukavano koqe inantema kero, vika muntukavanovata koqe iarire ti, te vatainai vaiha maa uvara minti ti vauro.

¹⁴ Te ai uva vika tiva nimuramanta vika vatainai variaka nua aarara qaqrake, vika ti aanare kia vatainai varia vaiintika iantemake variavo. Vika mintima variamantara ti, vatainai variaka vika iri qoraiqama nimite variavo.

¹⁵ Ho te ai aarehama ariara kia vika vataihairs ntitaaneravavue tiro. Aqao, te ariara vikaqaa raqikiqviraro qora kaiqa vare vaiva, Sataaniva vika kia ho qoraiqama nimitaarire, turo.

¹⁶ Vika ti aanare kia vatainai varia vaiintika voqaantema variavo. ¹⁷ Are ququa uvaqohair vika kahaqira vika ai aaraqaaqai variqi vuote. Ai uva ququa uvama vaivo.

¹⁸ Are vataini ti tititaara tuvunantemake, tevata tenta vaintinavu vo vataini vo vataini nititaari vika ai uva tiva nimiqi vuate.

¹⁹ Ho te vikara irihama te vo kaiqa vo kaiqa qaqrake vohaa kaiqaqai varareravauraukave. „Te vikara irihama qutu vuataa iraqe qutu virera vauro.“ Vika ququaama ai kaiqa vohaa kaiqaqai vareka variate ti, te mintirerave.

²⁰ Kia te vikaraqai irihama ai aarauro. Naantiara vokika vika uva tira irihama tiriara ququa vivave tika, vikaravata irihama ai aarauro. ²¹ Vikavata vohaa variate ti, te ai aarauro. Are tiqi variaramanta te ariqima vauro. Ti Qo, vika titanta voqaara variate tira, are vika kahaqira vikavata titantaqai variate. Vataini variaka tiriara qucaa Kotiva vira atitavave tiate tira, are ti vaintinavu kahaqira vika vohaa variate.

²² Are ti hutu noraiqama kaaramanta te vohaa qaramake vika nutuvata noraiqama kauro. Vika titanta voqaara vohaa variate ti, te vika nutuvata noraiqama kauro. ²³ Are tiqima vairaqe te vikaqai variari vika vohaa vahama anomake vohaa vaivarave. Vika mintima vaimanta qaqi vaiinti nahenti vataini variaka are ti tititaanarara kankomake irivarave. Ai muntukavano tiriara vaintemanta kero, ai muntukavano ti vaintinavuvaravata variainara viraravata vika kankomake irivarave.

²⁴ Ti Qo, haaru kia maa vatava vau entara are tiriara muntuka vateharara tira, are ti noraiqama koraro ti mpeqa okara takuqi vauva vaumanta variavaunara. Are vaiinti nahenti ti timiarauka vikavata ti mpeqa okara takuqi vaira tavaate ti, te tiha, Te variainanaini vikavata variate, turo. ²⁵ Mpo, ti Qo, are avuqavuqama kera variaravave. Qaqi vaiinti nahenti vataini variaka kia ai okara iri tavaamanta teqaima ai okara iri tavaunara. Are ti tititaanara virara ti vainti maanavuku ho iriavo.

²⁶ Te vika ai okara tiva nimunara. Ai muntukavano tiriara variainantemake, vikavata vorara vorara muntuka vataqiqi vi vaise te vika hampata vohaa variqiqi vuare ti, te vika ai okarara voqavata qaqi tiva nimiqi virerave, tiro. Ihuva nai qora aareharo minti turama.

*Ihura ravaaqavu kora
(Matiu 26:47-56; Maaki 14:43-51; Ruki 22:47-53)*

18

¹ Ihuva mintima kero nai qora aarama taiqakero nai vaintinavu vataakero oru viro Kitaroni Namari taqa varero oru *orivi* katari kaqava ututoraqi vaura.

² Ihuva airi enta nai vaintinavu hampata mini oru ruvaaqumavi vaurara tiro, Iutaasiva Ihura vira navutaaka kauquqi kaarirava virara kankoma kero irura.

³ Iutaasiva virara iriro vuru Kotira kaiqa vara amite vau vaiintika vika noranavuvata, Parasi vaiintinavuvata, tiva nimumanta vika *kamaan* ira kiripunavuvata, nai kaiqa vaiintinavuvata Iutaasira amuvaro Iutaasiva vika ntita varero vumanta vika ovavata *raam uvata* qumpi vare, huru kaavuvata vare Ihuva vaunaini vivi orurora.

⁴ Mini orurovaro Ihuva vaharo vika minti minti irara kankomakero iriharo vutu ntero vika irero, Ne tararae rante variavo? tiro.

⁵ Minti tumanta vika tiha, Tenavu Ihura Nasaretihainaara rante vauro, ti. Tuvaro Ihuva vika tiva nimiyo tiharo, Te maa vikama vauro, tiro. Minti tuvaro Iutaasiva vaaka vira navutaaka tiva nimuva, vivavata Ihura aruke vaiintika hampata himpi tero vaura.

⁶ Ihuva te maa vikave tumanta vika tukiarimake getake vatakanta higirivi. ⁷ Vatakanta higiruvaro Ihuva qaqaa vika irero, Ne tararae rante variavo? tumanta vika qaqaa tiha, Ihura Nasaretihainaara, tuvaro ⁸ Ihuva tiharo, Te vaaka ni tiva nimunara. Ho te maa vikama vauro. Ne ti rantarera anivera, maa vaiintinavuka qaqi kaimanta vuate, tiro. ⁹ Tota Ihuva nai qorara tiharo mintima tiro: Vaiintinavu timianara kia te vonku kakakima kauro, tura. Vira uvavano qucaa vivauma variarire tiro, viva tiharo, Maa vaiintinavuka qaqi kaimanta vuate, tiro.

¹⁰ Minti tuvaro Pitaava nai iqoka paipe varero anura qaqini rara varero viraqohairo Kotira kaiqa vara amito vaiintika qiata vaiinti vira paanaa vaiinti ruqutiharo vira aato kauqu tanarane vaura teqa aqukora. Kaiqa vaiinti vira autu Malakusira.

¹¹ Pitaava vira aato teqa kovaro Ihuva Pitaarara tiharo, Nena iqoka paipe vara veva nai utaqi nonkutaane. Te ti Qova namari ti timiainara homa te vira nararave, tiro. „Ihuva vi uvaraqohairo uva tuqantaakero nai aihavina haikara varero vuru qutu vuainarara tura.“

Ihura vita vare vuru Anaasiva vaunaini kora

¹² Ihuva minti tumanta Romeni iqoka vaiintinavu nai qiata vaiinti vataake anumanta Iutaa kiripu vinavukavata anire, Ihura ravaaqavuke vira rumpake ¹³ vita vare Anaasiva vaunaini naane avuni vuru kora. Anaasiva viva Kaiapaasira airaaviva vauvaro Kaiapaa-siva vi ihiraqiqi Kotira kaiqa vara amite vau vaiintika vika qiata vaiintivano vaura.

¹⁴ Tota Kaiapaasiva nai Iutaa *kansoru* vaiintinavu tiva nimo tiharo, Koqemama ne qaqi kaivarо vaiinti vohaiqvanoqai qutu viramanta ekaa vaiinti nahenti ho variate, tu vaiintivama vaura.

Pitaava Ihurara kia vira tavaunarave tura
(*Matiu 26:69-70; Maaki 14:66-68; Ruki 22:55-57*)

¹⁵ Ihura Anaasiva vaunaini vita vuru komanta Saimoni Pitaavavata Ihura vainti vovanovata vitanta Ihura avataaqi vura.

Pitaara vataakero anu vaiintira viri Anaasiva viraqaqamakero tavo vaiintiva vaiharora tiro, viva Ihura avataaqiro viharo Anaasira vatuka avutaqи oriqetora.

¹⁶ Vi vaiintiva naane avutaqи oriqetovaro Pitaava hohaa aaqaini qentiana vauvaro Ihura vainti Anaasiva viraqaqamake tavo vaiintiva naavuqi oriqetero, veveraro vuru qentiqaa raqiki vau nahentira Pitaarara tiva amuvaro viva Pitaara otu vita varero vuru avutaqи kora.

¹⁷ Avutaqи Pitaara vuru kovaro vauvaro vi nahentira qentiqaa raqiki vauva Pitaarara tiharo, Arevata vi vaiintira vaintie variarao? tuvaro Pitaava aqao kiave tiro. ¹⁸ Minti tivakero vaumanta kiripunavuvata Anaasira kaiqa vaiintinavuvata vaiha antomanta iha quarate iha taari vauvaro Pitaavavata mini vaharo iha taari vaura.

Anaasiva Ihura irama amitora
(*Matiu 26:57-67; Maaki 14:53-65; Ruki 22:66-71*)

¹⁹ Pitaava mini iha taari vaumanta Ihura vita vare voqi vuru kovaro Kotira kaiqa vara amite vau vaiintika vika qiata vaiintivano Ihura vaintinavuaravata, Ihuva vaiinti nahenti tiva nim uvaravarata irovoro ²⁰ Ihuva nai vira tiva amiro tiharo, Te qoqama vahama vaiinti nahenti uva tiva nimunarave. Te ekaa enta vaiinti nahenti uva tiva nimirera Iutaa vatanaaka ukuvi vauraqи, maara naavuqive, Kotira Naavuqive, vaiha te vika uva tiva nimunarave. Kia te kukegavi vaiha vika uva tiva nimunaravauve. ²¹ Ho nana kaarae are ti ire variarao? Are ti uva iriaka vika iraataarave. Te uva vika tiva nimunara are vikama iraane. Vika te tuna uvvara iriakave, tiro.

²² Minti tuvaro kiripu vovano viraqi vauva Ihura auruvu ruteqa kero tiharo, Are kia mintima kera tinavu qiata vaiintiara tiane, tiro.

²³ Minti tuvaro Ihuva vira tiva amiro tiharo, Ti uvavano hampi uva vairaravauve are virara tiramanta ekaa vaiintivata irivarave. Ti uvavano avuqavu vaivara nantivarae are ti qumina ruquqira iarao? tiro.

²⁴ Ihuva minti tivakero vira naaquntaqohai rumpatova vauvaro, Anaasiva viraqaqahiro vira atitomanta vika Kotira kaiqa vara amite vau vaiintika vika qiata vaiinti Kaiapaasiva unaini vita vare vuru kora.

Pitaava qaiqaa kia Ihura tavaunarave tura
(*Matiu 26:71-75; Maaki 14:69-72; Ruki 22:58-62*)

²⁵ Ihuva mini vuvaro Pitaava voqi vaharo iha taari vaumanta mini vauka vira ireha tiha, Arevata vira vaintie variarao? tuvaro Pitaava tiharo, Aqao, kiave, tiro.

²⁶ Pitaava minti tuvaro vaiinti vo, qiata vaiinti vira kaiqa vaiintivano Pitaava aato teqakora vira kena vaiintivano Pitaarara tiharo, Quqaae te ai tavaurara are vikantira kaqava ututaaraqи variarao? tiro.

²⁷ Tuvaro Pitaava qaiqaa aqao kiave tiro. Minti tivakero iruvaro vaakama kokoraaravano uva tura.

Ihura Pairaatava unaini vita vare vuru kora
(*Matiu 27:1-2, 11-14; Maaki 15:1-5; Ruki 23:1-5*)

²⁸ Vika Kaiapaasira mini ke, Ihura vita vare nora vaiinti *kamaanira* naavuqi vuru kora. Vika vaaka toqaqi mini vi orure vika Iutaa vatanaaka vahara ti, kia vira naavuqi oriqetaraiti, vahaqaqiniqai vaura. Vika nai tiha, Tenavu vo vatanaa naavuqi oriqetaariraro tinavu tivaata qoraiqama virage kiama ho Vehakuma Nimito Entaraqa ovata ho nararave, ti. ²⁹ Minti tivake vika vahaqaqini vauvaro Pairaatava *kamaanira* qiata vaiinti vika tavareva veveraro vikara tiharo, Nana uvavanoe maa vaiintiraqaavaimantae ne vira vita vare aniaivo? tiro.

³⁰ Pairaatava minti tumanta vika tiha, Maa vaiintiva kia qora kaiqa varaitirio, tenavu kiama ho are ianannaini vite anuraitirio, ti. ³¹ Vika minti tuvaro Pairaatava aqao tiro, Nenta maa vira vite nenta Iutaa vatanaa okarara irihama vira *ko* amiate, tiro. Minti tumanta Iutaa vatanaaka vika aqao ti, Tenavu qaqi qumina vaiinti vaiha, vaiinti aruke vira kaara uva varaarorave. „Arema *kamaaniva* variarao. Are homa tiramanta vira arukevarave„ ti.

³² Vika minti tuvaro Ihuva vika maantimake ti haru kevarave tu uvava quqaa vivauma vaura.

³³ Iutaa vaiinti noranavu minti tuvaro Paireatava nai naavu, *kamaanira* naavuqi oriqetero, Ihura aarama kovaro viraqi oru vuvaro vira irero tiharo, Quqaae are Iutaa Avuhainaa Vaiintivano variarao?

³⁴ Tuvaro Ihuva tiharo, Nena irikerae vi uvara tiarao? Vo vaiintivanoe tiriara ai tiva amivarare are minti tiarao? tiro.

³⁵ Ihuva minti tuvaro Paireatava tiharo, Te Iutaa vaiintivanova uve. Nina navunaaka Iutaa vatanaakavata, Kotira kaiqa vara amite varia vaiintika vika noranavuvata, vikama ai vite maini aniaivo. Are nana haika vara kaaramantae vira kaara ai vite aniaivo? tiro.

³⁶ Minti tuvaro Ihuva tiharo, Te raqikiarirava kiama vataini vaivo. Vira maini vataini vaitirio, ti kaiqa vaiintinavu tiriara Iutaa vatanaa vaiinti vira rumpevorave tiha iqoka raquatirio. Ho te raqikiarirava kiama maa vataraqaa vaivo, tiro.

³⁷ Ihuva minti tuvaro Paireatava tiharo, Ho quqaae are vaiinti nahentiqaa raqiki variaravave? tiro.

Tuvaro Ihuva tiharo, Quqama te vaiinti nahentiqaa raqiki vauraukave. Te vikaqaa raqikirera uraro ti vataini vatataimanta vaunarave. Quqaa okara vaiinti nahenti tiva nimirera te vataini tuvuraukave. Quqaa uva iriataa irava ti uvama irianarove, tiro.

³⁸ Ihuva minti tuvaro Paireatava tiharo, Quqaa uva vaireva vira nana uvae vaivo? tiro.

Paireatarara Ihura katariqaa arutaane tura
(Matiu 27:15-31; Maaki 15:6-20; Ruki 23:13-25)

Paireatava minti tivakero viva veveraro Iutaa vatanaa vaiinti uki vauka tiva nimiro tiharo, Te tavauraro kia vira aruke okarava voqavanovata viraqi vaivo, tiro.

³⁹ Minti tivakero viva tiharo, Ho ni okara vo mintimama vaivo: Ne Vehakuma Nimito Karara ovata ne entaraqaa, te karapuhi vaiinti vohaiqa niara irihama vira kuvantu nimite vaunarave. Vi okarara irihama hoe te Iutaa vatanaaka avuhainaa vaiintie ni kuvantu nimitararave? tiro.

⁴⁰ Minti tumanta vika qaiqaa naveraitiha, Aqao, kia vi vaiintirave. Vo vaiinti vira autu Barabasira vira kuvantu timitaane, tura. Ho Barabasiva vaiinti ruqutiharo vika monu vare vau vaiintiva vaura.

19

¹ Vika minti tuvaro qaiqaa Paireatava tiharo, Ihura vita vare vuru naaquntaqohai vira ruqutute, tumanta vika vira naaquntaqohai ruqutuke vatora.

² Mintimake vate, viraqaahai Paireatara vira iqoka vaiinti oru tauvera varake avuhainaa vaiinti tovaqa voqaara kahemake vira qiataqaa aqu amite, naare tavunavata varake rumpa amite, ³ vika viva vaunaini orure vira vireraiqamake tiva amiteha tihā, Iutaa Avuhainaa Vaiintio, vaiharave? tivakema nai kauquqohai vira viri ruqemake vaura.

⁴ Vika vira mintima kovaro Paireatava qaiqaa veveraro Iutaa vaiinti uki vaukara tiharo, Ho tavaate. Te tavauraro kiama viva qora kaiqa vare vaivama vaivo. Nevata vira tavaate ti, te vira vara veva vahaagaini karerave, tiro.

⁵ Minti tuvaro Ihuva qiataqaa tauvera aqu amite naare tavuna rumpa amitora airantero vevaravararo Paireatava tiharo, Ho tavaate, maa vi vaiintirave, tiro.

⁶ Minti tumanta Kotira kaiqa vara amite vau vaiintika vika noranavuvata, kiripunavuvata, Ihura tave vika naveraitiha, Vira kaira katariqaa arutaate. Vira kaira katariqaa arutaate, ti.

Minti tuvaro Paireatava tiharo, Ho nenta vira vite vuru katariqaa arutaate. Te tavauraro viva kia qora kaiqa varaverā, te kiama viraqaa qumina uva vatararave, tiro.

⁷ Tumanta vika tiha, Aqao, viva tenavu uva vataunava vo raqakairave. Vira kaarama viva qutu vuvariravama vaivo. Nai viva tiharo, Te Kotira Maaquve tirave, ti.

⁸ Minti tuvaro Paireatava vi uvara iriro voqamakero getero, ⁹ viva tuturantero *opisi* naavuqi oriqetero Ihura irero tiharo, Are taihainaavae aniarao? tiro. Tuvaro Ihuva kia uva tiraitiro, uve vaura. ¹⁰ Uve vauvaro Paireatava tiharo, Are nantivarae kia uva ti tiva timireva auti variarao? Arevo, kiae tirirā iriarao? Te nora autu vataukave. Te homa ai kuvantu kararave. Te homa tiari ai katariqaa arutevararave, tiro.

¹¹ Minti tuvaro Ihuva Paireatara tiva amiro tiharo, Kotiva virini vaiva kia ai mpeqa amitirio, are kiama ho ti haatara kaaraitirio. Vaiinti vovanovati tivitero vuru ai kauquqi kai vaiintira vira qora kaiqavano ai qora kaiqa aatara kaivo. Vira kaara nora uvama vi vaiintirajaa varianarove, tiro.

¹² Ihuva minti tuvaro Paireatava viraqaahairo Ihura kuvantu kareva auti vaumanta Iutaa vaiinti uki vauka naveraitiha, Are vira kuvantu kairaro qaqi virera, are kiama

avuhainaa vaiinti Sisaara tontivano vainarave. Vovano nariara tiharo, Te avuhainaa vaiintima vauro, tirava, viva Sisaara navutaavama varianarove, ti.

¹³ Tuvaro Paireataava vi uvara iriro oru Ihura vita varero vevarero ko iru taintaraqaa oru oquiviro vaura. Vi taintara vau vatarra autu rehama, *Ori Ravatairave*, tura. Iutaa vatanaa uvaqihai virara *Gabatave*, tura.

¹⁴ Vehakuma Nimito Karara nareka u entava vira qararaa vauvaro kuari avuvano qjataqaa vauvaro Pairaatava oru vi taintaraqaa oquiviro Iutaa vatanaaka uki vauka tiva nimiro tiharo, Ho nenta avuhainaa vaiinti tavaate, tiro.

¹⁵ Tumanta vika naveraitiha, Vira kaira arukaate. Vira kaira arukaate. Tiramanta vira katariqaa arutaivarо qutu vuariре, ti.

Minti tuvaro Paireaatava vika irero tiharo, Te tiari ni avuhainaa vaintie katariqaa nirigohai aru taivaro qutu vuunarove? Virarae ni muntuka vaivo? tiro.

Minti tumanta Kotira kaiqa vara amite vau vaiintika vika noranavu tiha, „Viva kia tinavu avuhainaa vaiintivanovaave vaivo.“ Ai noravano Sisaava vivaqaima tinavu Avuhainaa Vaiintivano vaivo, ti.

¹⁶ Minta tuvaro vika vira katariqaa arutaate tiro, Paireaatava Ihura vika nimumanta vira iqoka vaiintinavu vira vitora.

Ihura niriqohai katariqaa arutora

(Matiu 27:32-44; Maaki 15:21-32; Ruki 23:26-43)

Vira iqoka vaiintinavu vira vita vare vuvaro¹⁷ Ihuva nai hirite katarira aqu varero vumanta vika Ihura vita vare maa uvaraqihai *Qiata Vuhaariqaave* tunaini vi. Iutaa vatanaa uvaqihai *Gorogotave* tunaini oru ntora.

¹⁸ Mini orunte Ihura aiqu kauqu niriqohai katariqaa arute katari vira vataqi vaavi aratora. Vira vaavi arate vaiinti votantavata katariqaa arute vitantavata hini hini aratovaro Ihuva vitanta avutana vaura.

¹⁹ Ihura katariqaa hiritovaro Pairaatava uva vo qara ntuva kero vuru Ihura aruto katarira qiataini arutora. Maantimake uva qara ntuva tora:

Ihuva Nasaretihainaava Iutaa Avuhainaa Vaiintive, tura.

²⁰ Ihura katariqqa hiritu vatu kava Ieruharemi vira tataaqa vaumantara ti, vi vatanaaka airitahaavano ani Ihura taveha vi uvaravata kaara riha tavora. Vi uvvara taaramo uvaqihai luta uvaqihaiive, Romeni uvaqihaiive, Giriki uvaqihaiive, qara ruva tora.

²¹Kotira kaiqa vara amite vau vaiintika vika noranavu vi uvvara tave, Paireatarara aqao ti, Are kia virara Iutaa vatanaaka Avuhainaa Vaiintive tivakera qara ruataarave. Are maantima kera qara ruataarave: Vi vaiintiva nai tiharo, Te Iutaa vatanaaka Avuhainaa Vaiintive tirave. Minti tivakera qara ruataarave, ti. ²²Tuvuro Paireatava tiharo, Te qara ruva taurava homa qaqi mintimakero varianarove, tura.

Ihura utavaaqa rairake varora

²³ Iqoka vaiintinavu Ihura katariqaa hirite viraqaahai vira utavaaqa vare erakaimantenavuqa raira vate, iqoka vaiinti erakaimantenavuvano vaihara ti, vovano vota varovaro vovano vota varovaro mintiakre vare, vira siottivata tavovaro vira virinihai vo-haanaihai kutatora vaumanta iqoka vaiintinavu tiha, Maara qunahi kaarorave. ²⁴ Kaiqe virara satu ruhamaqi vuvariraro tinavuqihairo vonkuvano virauta varaarie, ti. Minti turara tiro, vo uvavano haaru qumina vaka qara ntuva tova vate vivauma vairo. Mintima tiro;

Ti utavaaqa rairake varevarave. Ti sioti vukainta varareka satu ruhamakehama varevarave, tiro. Minti turama. *(Ihi 22:18)*

Ihuwa nai norara tura

²⁵ Ihura katariqaa hiritomanta nahentinavu ani vi katarira tataaqa himpite vaura. Ihura novavata, vira nora auravanovata, Kilopaasira naatavano Mariavavata, Mariava Makataaraihainaavavata, nahenti vinavuka Ihura hirito katarira tataaqa ani himpite vauvaro ²⁶ Ihuva tavomanta vira novavata vira avataaqiro nu vaiintiva vovano, virara voqamakero antuqa aru vaiintivavata vaura. Vitanta mini vauvaro Ihuva nai norara tiharo, ²⁷ Nahentivauvo, maa vaiintirara ti maaquev tiane, tiro. Tivakero nai kaiqa vaiinti virara voqamakero antuqa aru vaiintirara tiharo, Maa nahentirara ti norave tiane, tiro. Minti tuvaro vi entaraqaahairo vira kaiqa vaiintivano Ihura nora vitero nai naavuqi vuru kero viragaata kogema kero raqikiharo vaura.

Ihuva qutu vura

(Matiu 27:45-56; Maaki 15:33-41; Ruki 23:44-49)

²⁸ Ihuva vi uvara tivakero viva iruvaro vira kaiqavano taiqa vura. Viraqahaairo vo uva haaru qumina vaka qara ntuva tova vivauma variare tiro, viva tiharo, Ti namari naataama ivo, tiro.

²⁹ Minti tuvaro *uaini* hunka vura kureqi vauvaro namari nunko haikara varakero vi namariraqi quntama kero katari vitiqaa rutaqukero vira nona vuru taatau tovaro ³⁰ Ihuva hunka vu namarira vira nero viraqahaairo viva tiharo, Ho taiqama vivo, tivakero viva nai anu rorairama tero nai maraqura atitovaro vuvuro viva qutu viro.

Vaantaaraqohairo Ihura taaqeni ranteqa kora

³¹ Viva qutu vuvaro vira qararaa Maara Enta Vehakuma Nimito Karara no entava nora entama variainarara ti, Iutaa vatanaaka tiha, Hura vaiintinavu qutu vika vinavuka vaata katariqaa qaqi variantorave, tivake oru Paireatarara tiha, Are tira vinavuka aiqu kinta kira vinavuka vaaka qutu vimanta viqu vare vuru quntama taate, ti.

³² Tuvaro Paireatava eo tumanta vira iqoka vaiintinavu anire vaiinti Ihura hini mantaraini hiritora vira aiquidanta naane kintake, vaiinti vo, Ihura hini mantaraini hiritora vira aiquidantavata kintake, ³³ oru Ihura aiquidantavata kinta karare ti, tavovaro viva vaaka qutu vumanta vika qaqrake kia vira aiquidanta kintakora.

³⁴ Iqoka vaiinti vovano oru vaantaaraqohairo Ihura taaqeni ranteqa kora. Ranteqa kovaro vaakama naarevanovata, qaqi namarivanovata viraqihairo reharo tuvura.

³⁵ Ho te maa qarara ruva taurauka vi entara vaiha te quqaama vi haikara vi haikara tavaavaunarave. Ne vi uvarar quqaave tiate ti, te vi haikara quqaama tavaavaunara nivata tiva nimuro. ³⁶ Ihura aiquidanta kia kinta kovarora tiro, haaru qumina vaka qara ntuvato uvava quqa vivauma vaura. Haaru qara ntuva tova mintima tiro:

Vika kia vira vuhaari vonkuvata kinta kevarave, tura.

(Ihi 34:20)

³⁷ Qaiqaa uva vo haaru qara ntuva tova tiharo:

Vika nai vaantaaraqohai ranteqate vaiintira tavevarare, tura.

(Sek 12:10)

Ihura quntama tora

(Matiu 27:57-61; Maaki 15:42-47; Ruki 23:50-56)

³⁸ Mintuvaro vaiinti vovano vira autu Iohepiva viva Arimatiahainaava, viva tota Iutaa vaiintinavu naatu qeteharo kukeqa keharo Ihura avataqiro ni vau vaiintiva, viva oru viro Paireatarara tiharo, Ihura vaata timirage quntama taare, tiro. Tuvaro Paireatava tiharo, Ho vira oru varakera quntaane, tuvaro Iohepiva oru Ihura vaata viqukero varora.

³⁹ Varovaro Nikotimaava, viva tota entaqi Ihura oru tavova, vivavata koqe vahavera katari koqera untavuravata vohaaraqi tuqantaaake vatora varora. Vira maaravano vaireva 30 kilo vaura varero Iohepikantiro mini viro. ⁴⁰ Vitanta Ihura vaata viqu vare hanta tavuna varake koqe untavura vataake vira vaata apuqama kora. Iutaa vatanaaka vaiinti qunte okarava mintima vaurara ti, vitanta mintura.

⁴¹ Ihura hiritonaini kaqava ututova vauvaro viraqi qaraaka ori vaurutora vaiinti quntevo vaura. Vira qaraaka vaurutova vauvaro tota kia vaiinti vovata viraqi quntora.

⁴² Ho vira qararaa Iutaa vatanaa Maara Enta varianarove tivake, vi orira aumanto vaumontara ti, viraqima vitanta Ihura muntu quntama tora.

Ihuva qaiqaa qaqi himpura

(Matiu 28:1-8; Maaki 16:1-8; Ruki 24:1-12)

20

¹ Ho Sanqeaa toqaqi kia aatitovaro nahenti vovano Mariava Makataaraihainaava oru viro Ihura oriqi quntama toraqi orurero tavovaro ori qentiqaa tintatora qaqini vara kovaro vaura.

² Qaqini vara kovaro vauvaro vi nahentiva orurantero kantero Ihura vaintitanta Saimoni Pitaavavata, vo vaiinti Ihura virara voqamakero antuqa aru vaiintivavata, vitanta vaunaini anirero vitanta tiva nimiro tiharo, Vika origihai Nora Vaiinti vara veva kaamanta tenavu kiama vira vaata vataara tavauro, tiro.

³ Minti tumanta Pitaavavata, vaiinti vo vivavata, Ihura oriqi vatonainiara vura.

⁴ Vitanta kantamaqi viha vovano Pitaara aataro kero viva naane oriqi Ihura quntama tonaini orurero. ⁵ Viva naane orurero kiama oriqetaraitiro, vahaqaini vahiaro kimaarama vira vera tavovaro origira vira uguramato tavunavaqai viraqi vaura.

⁶ Vi tavunavaqai viraqi vauvaro ho naantiara Saimoni Pitaava anirero viva kia vahaqaini vairaitiro, viva vaakama oriqi oriqetero tavovaro vira uguramato tavunavaqai vauvaro ⁷ vo tavunavata, Ihura qiata naavumatovavata, qaqi viraqi vairo. Vi tavunava kia vo tavuna vataakero vohaaraqaa vairaitiro, nariaraa vokanta vaura.

⁸ Mintima vauvaro vo vaiintivano vaaka anuva, vivavata oriqetero vi haikara tava-makero, viraqaahairo aato kenko tuvaro Ihura okarara kankoma kero iriro ho ququa vivave tiro. ⁹ (Tota vitanta vaiha vukuqi Ihuva qutu viro qaiqaa qaqi himpuainarara qara ntuvato uvvara kia kankomake irura. Kia kankomake iriqi vi ho vi entara virara kankomake irura.) ¹⁰ Ho vi haikara tave viraqihai vitanta Pitaaka anirante maaqaini vura.

Mariava Makataaraihainaava Ihura tavora

(*Maaki 16:9-11*)

¹¹ Vitanta maaqaini vuvaro Mariava Ihura quntama toraqi anirero vahaqaini vaharo iqi rate vairo. Viva iqi rateharo kimaarama viro origi vera tavomanta ¹² *enseli* taaraqanta viraqi vaura. Vitanta hanta utavaaqa nonkutotana vauvaro vovano tota Ihura vaata vauraqaa qiatani oquivro vauvaro vovano vira aiqutaraini oquivro vaura.

¹³ Vitanta Mariara ireha tiha, Nahentivauvo, nana kaarae iqi rate variarao? tuvaro viva tiharo, Vika ti Nora Vaiinti maaqihai varakaamanta te vika vira vuru tainie kaavo tima, virara iqi rate vauvo, tiro.

¹⁴ Mariava minti tivakero viva tuqantaaviro tavovaro Ihuva vira naantiaraini himpi vauvaro viva kia vira viri viraaqamakero tavaraitiro, vo vaiintivanove tuvaro ¹⁵ Ihuva vira irero tiharo, Nahentivauvo, nana kaarae iqi rate variarao? tiro. Are tararae rante variarao? tiro. Ihuva minti tuvaro Mariava nai aatoqi iriro tiharo, Vi vaiintiva maa kaqavaragaqa raqiki vai vaiintivave, tiro. Tivakero virara tiharo, Are vira vara vuru kerava vairera, vira vuru kenanaini ti tiva timirage te oru varaa, tiro.

¹⁶ Minti tuvaro Ihuva virara tiharo, Mariao, tiro. Tuvaro Mariava tuqantaa viro Ihura viraqaqamakero tavero Ihurara nai Iutaa uvaqihairo tiharo, *Rabonaio*, tiro. Maa uvaqihairo tireva, Maara ti variara vaiintio, tiro.

¹⁷ Mariava minti tuvaro Ihuva tiharo, Ho kia ti utu varaa. Te kiama tenta qova inaini tuvurante vuro, tiro. Minti tivakero viva vira tiva amiro tiharo, Are ti qatavarana vuru tiva nimiane. Tiriara minti mintima kerama tiva nimiane. Te virini ti Qovavata ni Qovavata, ti Variqavanovata ni Variqavanovata inanaini tuvurante virerave, tivo tiane, tiro.

¹⁸ Minti tuvaro Mariava Makataaraihaina nahentivano orurero vuru Ihura vaintinavu tiva nimiro tiharo, Te Nora Vaiinti vira tavauro. Viva tiriara minti mintimakera niara tiva nimiane tivo, tiro.

Ihuva nai vaintinavu nivuqaa qovarama vura

(*Matiu 28:16-20; Maaki 16:14-18; Ruki 24:36-49*)

¹⁹ Vi Santeraqaa entumanta Ihura vaintinavu Iutaa nora vaiinti naatu qetehama vo naavuqi ruvaaqumavi qentinavu kairimiqamate viraqi vaura. Vika viraqi vauvaro vaakama Ihuva vika nivuqaa qovarama viro vika nivutana himpitero vaharo vika uva manteharo tiharo, Ho ni muntukaqihairo paru i vaira variate, tiro.

²⁰ Minti tivakero viva nai kauqu niriqohai raqontatora vika numiqero nai taageni ranteqatoravata vika numiqora. Mintumanta vira vaintinavu vira tavovaro vika muntukaqihairo koqe umanta vika virara quahe vaura.

²¹ Quahe vauvaro Ihuva qaiqaa uva mantero tiharo, Ni muntukaqihai qihaaqira variate. Ti Qova ti tititainantemake, te nivata nititarerave, tiro. ²² Minti tivakero viva vikaqaata nai aiho vuaqakero tiharo, Ho Kotira Maraqura varaa. ²³ Ne vo vaiinti qora kaiqa uva qaqlira kaivera, vira qora kaiqa uvavano taiqama vuanarove. Ne vo vaiinti qora kaiqa uva qaqlira iritaivera, vira qora kaiqa uvavano qaqlima varianarove, tiro. Ihuva minti tura.

Tomaasiva Ihura tavora

²⁴ Ihuva nai vaintinavu unaini anirero viraqi vauvaro vi entara vira vainti vovano 12navuqihairo kia vikaravata vaura. Vira autu Tomaasira vira vara autu Taapirave tura.

²⁵ Ihuva vuvaro Tomaasiva vihairo aniomanta Ihura vaintinavu vokuka Tomaasira tiva ami tihia, Tenavu Nora Vaiinti Ihura tavauro, ti.

Tuvaro Tomaasiva aqao tiro, Te kia vira kauqu niri arutaara tave, te kia tenta kauqu viraqi vate, vira taaqen i raqonta tairaqvata te kia tenta kauqu viraqi vataraiti, te kia ni uvvara quqaave tirarave, tiro.

²⁶ Tomaasiva minti tivakero vauvaro vohaa *uiki* aitaromanta Ihura vaintinavu, Tomaasivavata, vika qaiqaa naavuqi vaiha ekaa qenti kairimiqamate viraqi vauvaro Ihuva qaiqaa qovarama viro vika nivutana himpitero vaharo uva mantero tiharo, Ni muntukaqihai qihaaqira variate, tiro.

²⁷ Tivakero viva Tomaasirara tiharo, Ho nena kauqu rantutakera ti kauquqi veta kehara tavaera, ti taaqenivata ahukera tavaane. Kia taara aato iriraitira, tiriara kempukaiqama kera vohaa aatogai iriqira vuane, tiro.

²⁸ Minti tuvaro Tomaasiva tiva amiro tiharo, Are ti Noravanove ti Variqavano variarao, tiro. ²⁹ Minti tuvaro Ihuva vira tiva amiro tiharo, Tomaasio, are ti taverama viragaahaira tiriara quqaave tiarao. Ho taukae kia ti tavaraiti, tiriara quqaa vivave tika, vika quahehama vaivarave, tiro. Ihuva tura.

Maa vukura okarara tura

³⁰ Ho Ihuva nai vaintinavu nivuqaa vaharo nai okara numiqareva nora kaiqa, vo kaiqa vo kaiqa vare vaura. Ho te Ionika Ihuva varai kaiqara hini kaiqaqai maa vukuraqi qara ntuvu te.

³¹ Ne Ihurara quqaama viva tinavu kahaqiarirava vaivo, quqaama viva Variqa Kotira Maaqvano vaivo tivake virara kempukaiqaake iriqi viha ekaa enta qaqi variqi vuate ti, te Ionika maa uvvara qara ruva taunarama.

21

Ihura vainti 7navuvano qaiqaa vira tavora

¹ Vo enta Ihura vaintinavu Taiberiasi Varuva namari Karirini vauvaro Ihuva qaiqaa vika nivuqaa qovarama vumanta vira vaintinavu vira tavora.

Maantimama vi uvava vairo:

² Vira vaintinavu Saimoni Pitaavave, Tomaasiva vira vara autu Taapivave, Kenaa vatuka Karirihainaa vaiinti Nataanivave, Sebedira maaqtantave, Ihura vainti votantavave, vinavuka mini voharaqiqi vaura.

³ Saimoni Pitaava vinavukara tiharo, Ho te vahe varema havukara vuro, tumanta vinavuka tiha, Tenavuvata ai vataake mini virerave, ti. Minti tivake otu votuqi vaarire viraqiqi vahia entaqi havukara vahe quntamaqi viha kia havuka voqavata varora.

⁴ Mintiaqiqi vuyaro aatitareva umanta vika tavovaro Ihuva varuva auvahianta himpitero vaumanta vika kia vira viraqamake tavaraiti, vo vaiintive tuvaro ⁵ viva vikara tiharo, Ti vaintinavuvauvo, kiae havuka vare iavo? tiro.

Minti tumanta vika tiha, Kiama varauro, tuvaro viva tiharo, ⁶ Ho nenta vahe kauqu tanaraini aqukeha havuka varaaate, tiro.

Minti tumanta vika vahe kauqu tanaraini aqukeha tavovaro havukavano airitahaa vaheqiqi mpaqa vuvaro nora maara romanta vika kia ho vahe mpaqaqii vaari votuqi vateva vaura.

⁷ Vika kia ho vahe votuqi vaari vatovaro Ihurara voqamakero antuqa aru vaiintiva viva Pitaara tiva amiro tiharo, Vi vaiintive tinavu Noravanove, tiro.

Minti tuvaro Saimoni Pitaava vi uvava iriro nai *sio* qaqqini varatora vara nonku varero votuqihairo vaavirero namariqiqi aquviro namari nako aru varero Ihuva vaunaini vumanta hini kuka votuqi vaura.

⁸ Varuva namari auvahini kia niaraini vairaitiro, aumanto 100 *mita* vaumanta vika votuqi vahia havuka vahe mpaqa vura raraugiqi vi, varuva auvahini orurora.

⁹ Varuva auvahini votu vuru vate votuqihaii vaavinte vika tavovaro ihavano ite vauvaro viraqata havuka ite vauvaro mparetivanovata mini vaura.

¹⁰ Mintima vauvaro Ihuva vikara tiharo, Havuka vara vataaraqihai vo kira vare aniate, tiro.

¹¹ Minti tuvaro Saimoni Pitaava votuqi vaarirero vahe vira rarau varero varuva namari auvahini vuru kero. Airi havuka 153navu vaheqiqi vauvaro vahevano ruqema vuataara vauvarovata, kiae ruqema vura.

¹² Mintima vauvaro Ihuva vikara tiharo, Ho ani kara naate, tumanta vika vaaka Nora Vaiinti viraqamake tavorara ti, vika qeteha kia virara are tavave tura.

¹³ Kia minti tiraiti vauvaro Ihuva mparetivata havukavata vika nimumanta nora.

¹⁴ Ihuva nai qutu vuraqaaahairo qaiqaa qaqi himpiro nai vaintinavu nivuqaa qovarama vumanta vika vira tavora.

Vi entara taaramo tataa vika nivuqaa qovarama vura.

Ihuva Pitaarara tura

¹⁵ Vika kara nama kovaro Ihuva Saimoni Pitaara irero tiharo, Saimonio, Ionira maaqvauvo, quqaae are maa vaiintinavukaqihairo tiriara muntuka vataarava voqavata vaivo? tiro.

Minti tuvaro Pitaava tiharo, Nora Vaiintio, quqaave. Ti ariara hantuqa harira virara are irianarave, tiro.

Tuvaro Ihuva tiharo, Ho ti sipisipi naatinavu kara nimiane, tiro.

¹⁶ Minti tivakero Ihuva qaiqaa vira irero tiharo, Saimonio, Ionira maaquvauvo, quqaae ai muntukavano tiriara voqavata vaivo? tiro.

Tuvaro Pitaava tiharo, Nora Vaiintio, quqaave. Ti ariara hantuqa harira virara are irianarave, tiro.

Viva minti tuvaro Ihuva tiharo, Ho ti sipisipinavuqaa raqikiane, tiro.

¹⁷ Minti tivakero Ihuva qaiqaavata tiharo, Saimonio, Ionira maaquvauvo, quqaae ai muntukavano tiriara voqavata vaivo? tiro.

Ihuva taaramo tataa tiharo, Quqaae ai muntukavano tiriara voqavata vaivo turara tiro, Pitaara muntukavano qoraiqama vuvaro viva tiharo, Noravauvo, are ekaa haika tave variaravave. Ti ariara hantuqa harira are virara irianarave, tiro.

Minti tuvaro Ihuva Pitaarara tiharo, Ho ti sipisipinavu kara nimiane, tiro.

¹⁸ Ihuva minti tivakero Pitaara tiva amiro tiharo, Te quqaa tiarirara iriane. Tota are garaaka vaiinti vahara are tavuna nonku varera nena vuataa inaini vuanarave.

Naantiara are naampaiqama vira nena kauqu tututairaro vovano ai utavaaqaa nonku amitero ai vita varero, kia are vuataa inanainima ai vita varero vuanarove.

¹⁹ Ihuva vi uvvaraqohairo maantima kero Pitaava Kotira autu tuahera keharo qutu vuanarove, tura. Ihuva vi uvvara tivakero viva Pitaara tiva amiro tiharo, Are ti tivataqira aniane, tiro.

Ihuva nai vainti vonkuara uva tura

²⁰ Minti tuvaro Pitaava tuqantaa viro tavovaro Ihuva voqamakero antuqa aru vaiintiva vitanta naantiaraini aniro. Vi vaiintiva tota vika entaqi kara ne vauvaro Ihura mimiraqaa muntuvu vaharo Ihura irero, Nora Vaiintio, ta vaiintivae navutaaka ariara tura nimianarove, tu vaiintiva anirovaro ²¹ Pitaava vira tavero virara Ihura irero tiharo, Noravauvo, ho vi vaiintira vo? Vi vaiintiva nantie ianarove? tiro.

²² Pitaava minti tuvaro Ihuva vira tiva amiro tiharo, Te vi vaiintirara tiha, Are qaqi variqira viraqe te qaiqaa vatainai tuvuare, tiarera, kia vi haikara ai kaiqama varianarove. Nena vaharama ti tivataqira aniane, tiro.

²³ Ihuva minti tumanta vira vaiintinavu vi uvvara hampiqamake iri mintima ti, Ihuva tiharo vi vaiintiva kiama qutu vuanarove, tivo, tura.

Ho Ihuva kia minti tiraiufigo, viva tiharo, Te vi vaiintirara are variqira viraqe te vatainai tuvuare tiarera, kiama vi haikara ai kaiqa varianarove, tiro. Ihuva minti tura.

Ioniva maa uvvara qara ntuva tova taiqora

²⁴ Ho maa uvvara ni tiva nimuna vaiintika te maa vikave. Te Ihura avataqni vi vauva vaiintika vahama vi haikara vi haikara tavama kema, viraqahai maa uvvara qara ruva taunarave. Ekaa maa uvvara te tuna uvvara quqaa uvaqaima vaivo turo.

²⁵ Ihuva varo kaiqarara te hini uvaqai qara ntuva taunarave. Ekaa vira uva vohaiqa vohaiqa qara ntuva taivera, airi vukuvano vaharo maa vataro mpiqa kaanarove. Ho te viqanama turo.

KAIQA VARORA

Rukiva Ihuva noraiqamako vaiintinavuka kaiqa varorara tura

¹ Tiopiraasio,

Te tota ari qara amitehama Ihuva kaiqa varorave, Ihuva uva tiva nimurave, ekaa vi uvara ai tiva amiavaunara. ² Ihuva kaiqa hogarama tero varaqiro viro vuru nai kaiqa taiqa kovaro viraqaahairo Kotiva vira naaruvaini vita varora, viraravata ai tiva amiavaunara.

Ihuva naaruvaini vire uvaro Kotira Maraquiravano vira mpeqaiqama kovaro Ihuva nai noraiqamako vaiintinavuka vo uva vo uva tiva nimurave.

³ Ihuva nai qutuvu entaraqaahairo 40 enta maa vataraqaa qaqi variqiro viharo airi tataa nai vaintinavu nivuqaa qovarama viharo vaumantara ti, vika tavovaro Ihuva kia qutu vuka voqaara vairaitiro, viva ququaama qaqi vau vaiintivama vaura. Vika vira tave vauvaro Ihuva vika hampata vaiharo uva tiva nimiqiro viharo Kotiva raqikiainarara vika tiva nimura.

⁴ Vira vaintinavu ruvaaqumavi vauvaro Ihuva vinavuka tiva nimiro tiharo, Kia Ieruharemiqihai vuate. Ti Qova vo haika ni nimiaainara virara ni tiva nimunara, vira veka variate. ⁵ Ioniva vaiinti nahenti qumina qaqi namari nimurave. Inaara entanavu aitaraira ne Kotira Maraqura varevarave, tiro. *(Matiu 3:11)*

Ihuva naaruvaini tuvurantero vura

(Maaki 16:19-20; Ruki 24:50-53)

⁶ Ihuva nai noraiqamako vaiintinavuka vira vataake ruvaaqumavi vaiha vika Ihura ireha tiha, Noravauvo, are maa entarae avuhainaa vaintiqama vira, haaru tinavu kaivaqaukavara Isareriqaa raqikuntema kera, are Isareriqaa qaiqaa raqikiqira vinarave? ti.

⁷ Vika minti tuvaro Ihuva vika tiva nimiro tiharo, Aqao, vi entava qovaraiqia inara kia ni kaiqama vaivo. Ti Qova naivano nai autuqaa vi entara vi entara kaama tero, vi haikara vi haikara qovarama kaanarove.

⁸ Ne vaivarо Kotira Maraquiravano tuvurerо niqi vaiharо ni kempukaiqama nimtaarire. Mintira ne kempukaiqamake maa kaiqara varaqi vuate. Ne ti okarave, ti kaiqave, tavaakara ti, ne tota Ieruharemini vaiha tiriara vaiinti nahenti tiva nimi, viraqaahai oru Iutia vataini vaiha tiriara tiva nimi, viraqaahai vetara Sameria vataini oru vaiha vi vatanaakavata tiriara tiva nimi, viraqaahai ekaa naato maaqaini vi anihа tiriara tiva nimiqi vimanta vikavata ekaa ti okarara iriate, tiro.

⁹ Ihuva vika minti tiva nimi taiqa komanta vika tave vauvaro Ihuva vataihairo oru vuvavarо tonavuvano vira vitaqiro viro virini oru vumanta vika kia vira ho qaiqaavata tavora.

¹⁰ Ihuva vika mini kero virini oru vumanta vika naaruvaini aitutiha vaumanta vaakama vaiinti taaraqanta qovaramavi vitanta hanta utavaaqa nonkutotanta vika tataaqa himpi vaura.

¹¹ Vitanta vikara tiha, Karirihainaa vaiintinavu vauvaro, nantihae ne naaruvaini aituti variavo? Ihura vatemata vita varavarо naaruvaini oru vimanta ne tavaavo. Ho viva vate oru vianantemа kero, naantiara Ihuva vihairo qaiqaa mintimakerо oruranterо tuvuanarove, tura.

Vovano Iutaasira vatuka varaarire ti autu vatora

¹² Vitanta minti tumanta Ihuva noraiqamako vaiintinavuka Orivi Aiqinaqaahai orurante Ieruharemini vura. Orivi Aiqina vaireva Ieruharemi aumanto 1 kilomita vaura.

¹³ Ihura vaintinavu orurante Ieruharemini tuvure vika nai vau naavuraqi oriqete, tainta naavu verantoiqи oru vaura.

Pitaavave, Ionivave, Iemika Entarukave, Piripika Tomaasikave, Batolamuka Matiukave, Arafiusira maaqu lemivave, Saimoni Selotivave, Iemira maaqu Jutaasivave, vaura.

¹⁴ Vinavuka vi naavuraqi ruvaaqumavi vaiha Kotira vatete vatete aaramaqi vi vumanta nahentinavuvata, Mariava Ihura novavata, Ihura qatanavuvata, vika hampata viraqi vaiha Kotira aareha vaura.

¹⁵ Vi entara Ihura vainti 120navu ruvaaqumavi vi naavuraqi vauvaro Pitaava vinavuka nivuqaa himpitero tiharo, ¹⁶ Ti qata vaka ukavarao, Iutaasiva Ihura navutaaka aara numiqomanta vika Ihura oru ravaaqavu korave.

Haaru qumina vaka Kotira Maraqravano vaiinti vo, Devitira, tinavu kaivaqara, kahaguvaro viva Iutaasirara uva qara ntua torave. Maa entara vi uvava quqaama vivauna vaivo.

¹⁷ Iutaasiva tota tinavu Ihura vainti 12navu vataakero vaharo, vivavata tinavu hampata kaiqa varaqiro viro, viraqaaahairo viva qaqrakeri Ihura arukaate tiro, vira qovarama komanta¹⁸ vika qutaru monu autuke vira amuvaro viva vi monura varero oru vata koqama varero, viraqaaahairo vi vataraqaa nai auntu taaqikumakero hiqiruvoro vira arara rakavuviro qaqqini tuvitarovaro qutu vurave.

¹⁹ Ekaa Ieruhareminainaaka vi uvava iri, viva vata varorara *Akedamave—Naare ntai vatarave*, ti variavo.

²⁰ Ihi vukuqi Iutaasirara haaru paropetivano tinavu kaivaqava qara ntua tova mintima tiro:

Vira naavu qumina vairaro kia vovanovata viraqi varianarove, turave. (*Ihi 69:25*)
Vo uva qara ntua tova mintima tiro:

Vovano viva raqikialna kaiqara varaanarove, turave. (*Ihi 109:8*)

²¹⁻²² Kaiqe vi uvarara irihama tenavu vaiinti vo noraiqama kaariraro vi vaiintiva Iutaasira vatuka varaari. Tavave Iutaasira kaiqa ho varaanarove?

Vaiinti vovano viva tinavu aanarerio Ioniva namari nimu entaraqaaahairo Nora Vaiinti Ihura avataqiro viharo Ihura kaiqa tavamaqiro viro Ihura naaruvaini vita varora tavairava, vi vaiintiva Iutaasira kaiqa homa varaanarove. Viva tinavu vataakero vaharo qaqqi vaiinti nahenti Ihuva qaiqaa qaqqi himpi uvava vika tiva nimiarire, tiro.

²³ Pitaava minti tumanta vika vaiinti autu taaraqanta vatora. Vaiinti vo, Sabaasira maaqu Iohepira vira vara autu Jatusirave, vaiinti vo, vira autu Matiasirave, vitanta autu vatora.

²⁴ Vitanta autu vate vika Kotira aarehama tiha, Noravauvu, are ekaa vaiinti avu aatoqiraara iri tavaaravave. Maa vaiintitantaqihairo ta vaiintirarae ai muntukavano vaivo? ²⁵ Are vi vaiintira humiqairaqe tenavu vira noraiqama kaariraro viva Iutaasira vatuka varerero vira kaiqa varaari. Iutaasiva vi kaiqara qaqla kero huviqora qora vatkaini vivo, ti.

²⁶ Vika minti tivake vovano vora autu vatovaro vovano vora autu vatovaro mintiaqi vi, tavovaro Matiasira autuvano aatara komanta vira noraiqama kovaro Matiasiva Ihuva noraiqamako vaiintika hampata voharaaqi avituma viro vika hampata kaiqa varaqiro vura.

2

Kotira Maraqravano tuvuro entara

¹ Enta vo, Pentikosi ovata no entava aniromanta ekaa Ihura vainti vika naavu vohainkuqiqai ruvaaqumavi vaura.

² Vika viraqi ruvaaqumavi vauvaro vaakama naaruvaihairo uvavano aaronavavano uva tintema kero, uva tivaqiro tuviro vika vau naavura mpiqa kora. ³ Naavu vira mpiqa vauvaro vika tavovaro iha auru voqaaqa qovarama viro raire viro, raireqii viharo ekaa vaiinti nahenti viraqi vauka vohainku vohainku qiatagaata oru vaavi vaura.

⁴ Vinavuka qiatagaata oru vaavi vauvaro Kotira Maraqravano ekaa vinavuka avu aatoqira mpiqa viro, vinavuka maaqiri tuqantaa komanta vo uva vo uvaqihai ti vaura.

⁵ Minti ti vaumanta Iutaa vatanaa vaiintinavu vo vataihai vo vataihai Ieruharemini anuka, vika Kotira uva iruka ⁶ vikavata vaiha nora uva iri, nana haikavane uva tivo tivake, hihai hihai ani uki vaiha tavomanta Ihura vaintinavu Kotira Maraqravano maaqiri tuqantaa koka vo uva vo uvaqihai tiha vo vatanaa vo vatanaaka uvaqihai ti vaumanta vinavuka vika tu uvarara voqamake ravukuvi.

⁷ Vika ravukovi kauqu runkinkiri i vaiha tiha, Ike, vi uvava vi uvava ti variaka Karirihainaakaqaive. ⁸ Nantiabee vinavuka tinavu uva ho iri vare, vo uva vo uvaqihai ti variavo?

⁹ Tenavu vo vataihai vo vataihai ururaukave. Paatiave, Midiae, Elaamive, Mesopotemiave, Iutiave, Kapadosiave, Pontusive, Esiave,¹⁰ Farigiaavata Pampiriavatave, Isipive, Libia Sairini tataaqave, Romive, tenavu vihai vihai ururaukave.

¹¹ Tenavu hininavu Iutaa vatanaa vaiinti nahentima vauro. Tenavu hininavu vo vatanaa vaiha tentanavu maara uva qaqrakeri Iutaa vatanaa maara uva iriqi vuraukave. Karitive, Arebiave, vihai vihainaka maini variavo. Tenavu maini vaiha tave vauramanta vinavuka tinavu uva, vo uva vo uvaqihai tihamma Kotira kaiqa voqaraa kaiqara ti variavo, ti.

¹² Minti tivake vika voqamake ravukuvi kauqu runkinkiri i vaiha vika nai ire nai ireha tiha, Ho nantima kaimantae vinavuka minti tiavo? ti.

¹³ Tumanta vokuka naaraihama nimiteha tiha, Aqao, vinavuka qaraaka *uaini* namakema minti ti variavo, ti.

Pitaava vika uva tiva nimura

¹⁴ Vika minti ti vauvaro Pitaava Ihuva noraiqamako vaiintika 11navu hampata himpiro naveraitiharo vika tiva nimiro tiharo, Ne Iutaa vaiintivauvo, nevata, Ieruharemini uru variakavata, ne iriate. Te uva tiari ne ti uva iriate, tiro.

¹⁵ Ne tiha, Vika *uaini* namake minti ti variavo, tia uvava kia quqaa uvave. Vate toqaqiqave. „Toqaqi kia *uaini* ne varia kuari avuqaave.“ ¹⁶ Haaru qumina vaka paropeti valinti vovano vira autu Ioeriva Kotira uva tiharo vi haikava vi haikava qovaraiqianarove turave. Viva haaru tu uvava vate vivauma vaivo. Ioeriva haaru mintimakero qara ntuva tero tiharo,

¹⁷ Kotiva mintima tivo:

Naantiara ekaara enta aumanto vairaqe te tenta Maraqura vaiinti nahenti nimirerave. Viragaahai ni maaquvanovata, ni raavuravanovata, ti vakaaka tivarave.

Ni qaraaka vaiinti qaqi vaiha taira voqaara tavevarave.

Ni naampai vaiinti taira tavehamo ti okarara tivarave.

¹⁸ Ti kaiqa vare vaiinti nahentika vika vaise te tenta Maraqura nimiarira vika ti vakaaka vaiinti nahenti tiva nimivarave.

¹⁹ Te nora kaiqa vararerave. Te vatainivata vaiha nora kaiqa aahuva kaiqa naaruva virinivata, vata mianivata vararerave. Ekaara enta aumanto vairaro naarevanove, ihavanove, iha muravanove, qovaraiqiramanta tavevarave.

²⁰ Noravano tuvuaina entava aumanto vairaro kuarivano konkiraiqama viraro toravanovata naare voqaarama vuuanarove.

²¹ Vi entara Noravaauvo ti kahaqiane tika Noravano vika kahaqiramanta vika ho varivarave, turave. *(Joel 2:28-32)*

Ioeriva Kotira uva tiharoma minti turave.

²² Ho Isareri vaiinti nahentivauvo. Te tiari iriate. Ihuva Nasaretiainaava vauvaro Kotiva vira kahaqamaqvi vi vauvaro viva nora kaiqa, mpeqa kaiqa varomanta ne Kotiva vira atito okarara kankomake iri tavorave. Viva vi kaiqara vi kaiqara ni niyuqaa varomantara ti, ne vi kaiqara vi kaiqara ho tavorave. ²³ Ho Kotiva nai minti minti iaina okarara irihiaro Ihura ni nimumanta ne vira ravaaaqavuke katariqaa niriqohai aruke hiritorave. Ne vira arukareka iha vo vatanaakara vira aru timitate tumanta Romeni vatanaaka Ihura aru nimitorave. ²⁴ Ho qutuvi haikava Ihura kia ho ravaaaqavu kaainarara tiro, Kotiva vira kuvantu kero vira qaiqaa qaqi vara himpima korave.

²⁵ Haaru Devitiva tinavu kaivaqava virara mintima turave:

Te tavauraro Noravano tintiro vaiharo viva ti kauqu tanaraini vaimantara ti, kia te geteha vairarave.

²⁶⁻²⁷ Viva mintima variqiro vi vairara tiro, ti muntukavano koqe i vaimanta te tenta nogihai quaheha uva tivaqvi vi, te koqe entavano qovaraiqiaiinara vekama vairerave.

„Noravaauvo,“ te ari takuqira vaiinti vaunarara tira, are kia qutuvika vainaini ti qaqira karaitira, are kia ti vaata qaqi kairaro nteraaire.

²⁸ Are qaqi variqvi vi aarara, vo aara vo aara ti humiqlera ianarave. Te ari aqamoto variarirara are ti muntuka koqema timitäraque te quaheha varainarave. *(Ihi 16:8-11)* Haaru tinavu kaivaqava Devitiva vi uvvara turave.

²⁹ Ho ti qata vakao, te Devitirara ni vutuke tiva nimirerave. Viva qutu vumanta vataqvi quntama torave. Vira quntamato vatava maa entara qaqima vaivo.

³⁰ Kotiva Devitira kahaquvaro viva Kotira uva turave. Kotiva nai kauqu aiqiqaa aqukeharo Devitirara tiharo, Naantiara are kuvi aramatenaraqihairo vovano ai aanarero Avuhainaa Vaiinti kaiqa varaanarove, tuvaro Devitiva vi uvvara iritorave.

³¹ Vi uvvara iriteharoma Devitiva *Mesaiavano* qaiqaa qaqi himpuaina okarara tiharo, Kotiva kiama vira qutu vuaka vi vainaini kaanarove.

Vira vaatavanovata kiama nteraanarove, turave. *(Ihi 16:10)*

³² Ho Ihuva qutu vauvaro Kotiva vira qaiqaa qaqi vara himpima komanta tenavu vira tavaunarave. ³³ Haaru Kotiva vaiinti nahenti kahaqiharo nai Maraqura nimirerave turagaata Ihuva oruntovaro Kotiva vira noraiqama kovaro Ihuva vira kauqu tanaraini oquvi vaivaro Kotiva nai Maraqura Ihura amivaro varero muntu vaiinti nahenti nimirave. Nimimantama ne vate vira taveha iriavo.

³⁴ Devitiva kia viva nai naaruvaini viraitiro, viva tiharo,

Noravano Kotiva ti Nora Vaiintiara tiharo,
Maini ti kauqu tanaraini oquvi vairaque

35 te ai navutaaka aru naatara nimitaarirara are nena aiqu vikaqaata ntava taane, turave. *(Ihi 110:1)*

Devitiva minti turave. ³⁶ Viva minti turara ti, ne Isarerihainaaka iriate. Ne Ihura katariqaa niriqohai arutaara, virama Kotiva noraiqama kaivaro viva *Mesaiaava* Nora-vano vaivo. Ne virama arukaarave, tiro.

³⁷ Pitaava minti tumanta vaiinti nahenti vi uvvara iri muntuka voqamakero qoraiqumanta vika Pitaaravata Ihura vainti vonavuvata ireha tiha, Mpo, tinavu qata vakaao, tenavu nantie irarave? ti.

³⁸ Tuvaro Pitaava vika tiva nimiro tiharo, Ne vohaiqa vohaiqavano vaiha nenta qora kaiqa vare vaira qaqla kaate. Qaqirake Ihura autuqaa namari varaivaro Kotiva ni qora kaiqa uva taiqa kaarire. Ne mintivarо Kotiva nai Maraqua qaqi ni nimira ne varevarave. ³⁹ Kotiva nai kauqu aqiqaa aqukero tiharo, Tenta Maraqua vaiinti nahenti nimirerave turave. Kotiva vi uvvara minti tiharoma viva niaravata, ni vaintivararavata, iriharo turave. Ekaa vaiinti nahenti niara vataini variakaravata iriharo turave. Noravano Kotiva tinavu Variqavano nai naarama taaina vaiinti nahentika ekaa nai Maraqua nimianarove, tiro.

⁴⁰ Pitaava minti tivakero viva vo uva vo uvavata tiva nimiro tiharo, Te niara mpo turo, hauri Kotiva ni maa vaiinti nahentika „Ihura arukoka“ hampata ntaihaantorave ti, ne qaqlaqamake variate turo, tiro.

⁴¹ Minti tumanta vaiinti nahenti airita-haavano vi uvarara quahake quqaave tivakeha namari varora. Vi entara airitahaa 3,000navuvano Ihura vaintiqamavi vika vohaa vaura.

Ihura vaintinavu nai kahaqi nai kahaqi vaura

⁴² Vika Ihuva noraiqamako vaiintika hampata variqi viha vika uva tura iriqi viha, vika nai kahaqi nai kahaqi i vaiha, vika voharaaqi kara neha, vika voharaaqi nai kohira vaura.

⁴³ Ihuva noraiqamako vaiintinavuka vaiha nora kaiga mpeqa kaiqa vare vaumanta vaiinti nahenti vinavuka kaiqa tave kauqu runkinkiri iha vaura.

⁴⁴ Ihurara quqaave tivake virara kempukaiqamake iriqi vi vauka voharaaqi vaiha nai kahaqi nai kahaqi viha nai vato airairaravata nai ami nai ami iha vaura.

⁴⁵ Vika nai vatave, airairave, voka nimiha monuvata varake tavomanta nai kenauka vehi vaumanta monu vira rairakeha vikavata nimura.

⁴⁶ Vika vo enta vo enta Kotira Naavuqi oru ruvaaqumavi varike, viraqaahai oru vo naavu vo naavuqi voharaaqi ruvaaqumavi vaiha, muntuka parumake vaiha, quaheha kara nora.

⁴⁷ Mintiaqi viha vika Kotira autu tuahere vaumanta qaqi vaiinti nahenti vitini virini vauka vikara quaheha vaura. Vo enta vo enta Noravano vo vaiinti vo vaiinti kahaqumanta vika quqaa Ihurara vivave tivake Ihura vaintinavu hampata voharaaqi avitumavi vaura.

3

Vaiinti aiqu rarera vura koqema kora

¹ Vi vatanaaka vo enta vo enta Kotira aarareka eronaini 3 *kiroki* Kotira Naavu vaunainiara vi vaura. Minturaqaa vo enta Pitaavavata Ionivavata Kotira Naavuniara vura.

² Vitanta Kotira Naavuniara viha qenti vo, vira autu Voqaraa Qentive tunaini orure tavovaro vaiinti vovano aiqu rarera vuva qentiana mini vaura.

Vira aiqu nai nova watato entaraqaahairo rarera vuva vaumanta vira navunaaka vo enta vo enta vira rauku vare vi qentiraqaa vuru kovaro viva vo enta vo enta qentiana vaharo Kotira Naavuniara vukara monuve airairave ti timiate tiharo naari vaura.

³ Vaiinti viva qenti mina vaharo tavomanta Pitaaka Ionika gentiana origetareka uvaro viva vitantara tiharo, Mpo, netanta qaqi vo haika ti timiate, tiro.

⁴ Tumanta vitanta vira avuana taveketanta uvaro, Pitaava tiharo, Ho maini titanta tavaane, tiro.

⁵ Minti tuvaro vi vaiintiva vitantara vo haikae ti timireka tiavo tivakero vitanta tave vauvaro ⁶ Pitaava tiharo, Kia te monuvata vatauro. Te vo haika vataainara ai amirerave. Ihu Karaitira Nasaretihainaara autuqaa te ariara himpira nuane turo, tiro.

⁷ Minti tivakero Pitaava vi vaiintira kauqu tanara utu varero kahaquvaro viva himpuvaro vaakama vira aiqu ataavanovata aiqu aurokavanovata kempukaiqama vura.

⁸ Kempukaiqama vuvaro viva nai aiquidantaaahairo himpiro vi aniharo tavovaro vira aiquidantavano koqemaviro vuvaro, viraqaahairo viva vitanta hampata quaheharo ravukuvu raukvimaqiro vaharo Kotira autu tuahereharo Kotira Naavuniara vura.

⁹ Mini vumanta vaiinti nahenti ruvaaqumavi vauka tavovaro viva nai niharo Kotira autu tuahereharo vaumanta ¹⁰ vika vira viraqamake tave tiha, Ike, maa vaiintira tavaate. Vi vaiintiva Kotira Naavu Voqaraa Qentive tianaini vailharo airaira ti timiate ti vai vaiintiva qaqi naima ni vaivo, ti. Vika minti tivake vi vaiintiva koqema vurara voqamake ravukuvi kauqu runkinkiri i vaura.

Pitaava Kotira Naavu vaunaini vailharo vakaaka tiva nimura

¹¹ Vi vaiintiva Pitaaka Ionika totaqiro ni vaumanta vaiinti nahenti ravukuvi kante vinavuka Kotira Naavu naanteqaraini Soromonura Haraararave turaqi vura.

¹² Viraqi vuvaro Pitaava vaiinti nahenti tavero tiharo, Ho Isareru vatanaa vaiinti nahentio, nantihae ne virara ravuku vuavo? Nantihae ne tinavu aituti variavo? Ne tiha, Vitanta naitanta kempukaqohiae, vitanta Kotira aaraqaaq koqemake nuaraqaahaie, vi vaiintira kahaqama kaavaroe viva ho ni vaivo tiavo? Aqao, kiave.

¹³ Ho Variqavano tinavu kaivaqaukavara Eparahaamiraqaave, Aisaakiraqaave, Iekopiragaave, raqiki vaiva, viva Ihura nai kaiqa vaiinti takugi vairra noraiqama komanta ne vi vaiintira ravaaqavu vare vuru Pairaatara amuvaro Pairaatava vira kuvantu karare tumantavata, ne tiha, Kia vira kuvantu kaane, turave.

¹⁴ Viva Kotira takuqiraa vaintivano avuqavu ni vau vaiintiva vaumanta ne virara kia kuvantu timitaane tiraiti, ne vaiinti vo, viva vaiinti aruko vaiintira, vira kuvantu timitaane turave. ¹⁵ Ne vira arukareka, viva qaqi variqi vi okarara numiqe vai vaiintira arukorave. Ho Kotiva vi vaiintira qutu viraqihairo qaqua qaqi vara himpima kaimanta tenavu vi haikara quqaiqamake tavaunarave.

¹⁶ Vate tetanta vira autoara irihama, Ihuva Kotira mpeqa vaintivano ququaama titanta kahaqianarove tivakema maa vaiintira, ne tave varia vaiintira vira aiqu kempukaiqama kauro. Ququaama tetanta turo. Tetanta Ihurara ququaama viva homa titanta kahaqianarove tihamma maa vaiintira ni nivuqaa koqema kauro.

¹⁷ Ti qata vakaukavara, te iruramanta nevata, niqaa raqiki variakavata, kia Ihura okarara kankomake iriraiti, Ihura arukorave. ¹⁸ Haaru Kotiva ekaa paropeti vaiinti noqihairo nai mpeqa vaintivano aihavina haikara varaqiro viro vuru qutu vuainarara ni tiva nimumanta irura, vi uvava vate maa vivauma vaivo.

¹⁹ Virqaahai Kotiva ne gora kaiqa vare vai uvara nunka nimitaarire ti, ne vaaqu aaraqaahai tuqantaavi Kotira aaramaqi vivaro Noravano ni hampata variqiro viharo ni muntuka koqema nimitaarire.

²⁰ Ne Kotira aaramaqi vivaro viva qaqua Ihura atitairaro tuvuarire. Kotiva niarao tiro, ni kahaqireva Ihura noraiqama kairave.

²¹ Ihuva naaruvaini mini variqiro viraro ekaa haika qoqaraaqama kero qaqua autuaina entava aniraarire. Haaru Kotiva nai paropeti vaiinti voka voka kahaqamaqiro vi vaumanta vika vi uvvara turave.

²² Mosiva ni kaivaqava mintima turave:

Ti tititainantema kero, Noravano Kotiva ni Variqavano paropeti vaiinti vo atitaanarove. Vi vaiintiva ni anku vohaa ankuqiraavama varianarove. Viva anintero ekaa uva tinara ne iriate.

²³ Vaiinti vovano kia vira uva irirava vairaro Kotiva vi vaiintira nai vaiinti nahentiqaahairo qaqlini varakero vehi autukaanarove, tiro. *(Lo 18:15, 18-19)*

Mosiva minti turave.

²⁴ Ho ekaa paropeti vaiintinavu Samuerivave, vira naantiara vaukave, vika Kotira uva tihamma maa entara qovaraiqaina haikarara turave. ²⁵ Ho ne vaiha ne paropeti vaiinti vika naintivarai variararo tiro, haaru Kotiva ni kaivaqaukavara hampata vailharo kauqu aqigaa aqukero tiva taatauto uvara, vi uvara niaravata iriharo turave. Kotiva ni kaivaqara Eparahaamira tiva amiro tiharo,

Are kuvuva ira vaiinti nahentikaqhairo vaiinti vovano ekaa vataini vaika koqema nimitaanarove, tiro. *(Okara 22:18)*

²⁶ Virara iriharo Kotiva niara vika qora aara qaqlina kaate tiro, nai Kaiqa Vaiinti noraiqamakero viva ni naane kahaqiarire tiro, vira ne ianaini atitovaro tuvirave, tiro.

4

Pitaaka Ionika karapuhiqama korara tura

¹ Pitaaka Ionika vaiinti nahenti qaqlina uva tiva nimi vaumanta Kotira Naavuqi Kotira kaiqa vara amite vau vaiintikavata, vika kiripunavuqaa raqiku vaiintivavata, Satiusi vaiintinavuvata, vika vika vitanta uva ti vaunaini anirora.

² Satiusi vaiintinavu vauvaro vika maara ti vau okarava maantimama vairo: Vika tiha, Kia qutu vira vaintiva ho qaiqaa qaqi himpuanarove, ti vaura. Minti ti vaurara ti, vika Pitaaka Ionika Ihuva qaiqaa qaqi himpivo tu uvara kaara vika arara ite vaura.

³ Arara itomanta vika orure vitanta ravaaqavu vare eromantara ti, vika hura ko tirarave tivake, qaqi vitanta karapuhiqi ntita vuru vatora. ⁴ Karapuhiqi ntita vuru vatomanta qaqi vaiinti nahenti vika Pitaaka Ionika vaaka uva tiva nimurara noraiqamake iri, vi uvarara quqaa uvave tivake Ihura vaintiqamavi vaura. Ihura vainti airiqamavi 5,000 vaiinti nahenti airitahaa vaura.

⁵ Vira qararaa Iutaa qiata vaiintinavuve, nora vaiinti vonavuve, maara uva okara ti vau vaiintikave, vika vika Ieruharemini *ko* tireka ruvaaqumavi. ⁶ Mini Kotira kaiqa vara amite vau vaiintika vika qiata vaiinti Anaasivavata vaumanta Kaiapaasivavata, Ionivavata, Arekisantavavata, vira navunaaka vokukavata vaura. Vika ekaa ruvaaqumavi vaiha *ko* tireka iha ⁷ vika Ihuva noraiqamako vaiintitantara ntita vare animanta tinavu tivuqaa himpi variate tumanta ntita vare anumanta vitanta ireha tiha, Ho nantiabee netanta vi kaiqara vare iavo? Nana haikavanoe nitanta mpeqaqama kaimantae netanta mintiavo? Tara autuqaae netanta mintiavo? ti.

⁸ Vika minti tivake irovoro Pitaava Kotira Maraqruravano vira avutagi vauvaro viva tiharo, Ne vaiinti nahentiqa raqiki variakao, Isareri vatanaa vaiinti nora vaiintinavuvuvo, ⁹ tetanta aiqu qoraiqaa vi vaiintira koqema amitaunara ne vira kaarae titanta irama timitareka auti variavo? Tetanta nantimake vi vaiintira avuqavuqama kaunara, virarae ne titanta ire variavo? ¹⁰ Nevata ekaa Isareri vatanaa vaiinti nahentivata iriate. Ihu Karaitira Nasaretihainaara ne vira katarigaa hiritovaro qutu uvuro Kotiva vira qaiqaa qaqi vara himpimo ko vaiintira, tetanta vira autu rava kauraro vivama titanta kahaqimanta tetanta maa vaiintira koqema amitauraro viraqaahairo vate viva ni nivuqaa himpitero ho vaivo.

¹¹ Kotira vukuvano vo uva tuqantaakero Ihurara mintima tivo:

Ne naavu kaqeha ori vo qaqira kaava, vi orivama naaquraiqama vivo, turave. (*Ihi 118:22*)

¹² Ihuva vi naaquravama vaivo. Kotiva tinavu tivitaarire tiro, Ihuvaqaima tinavu ho kahaqiarirava vaivo. Kotiva kiama vo vaiinti atitairaro vi vaiintiva tinavu kahaqiarirava varianarovuve. Ihuva vivaqaima tenavu vataaini variarirauka kahaqiharo kuvantu timitaarivama vaivo, tiro.

¹³ Pitaava minti tumanta *kansoru* vaiintinavu ruvaaqumavi vauka tavomanta Pitaaka Ionika vika nivuqaa vaiha kia qetaraiti uva ti vaura. Vitanta kia *sikuru* tu vaiintitanta vairaiti, mpeqa uvaqai ti vaumanta vika vitanta uva iriha kauqu runkinkiri i vaura. Vika kankomake irumanta vitanta Ihura hampata vau vaiintitantama vaura.

¹⁴ Vika vitantaqaa uva vatarare ti, tavovaro vitanta koqemako vaiintiva Pitaaka Ionika tataqaq himpitero vaumanta vika kia ho vitantaqaa uva vateva vaura. ¹⁵ Kia ho uva vitantaqaa vateva vaumantara ti, vika vitantara tiha, Netanta oru vaiqe tenavu maa uvara avuqavu qiare, tumanta vitanta yumanta vika vi uvarara nai tiva ami nai tiva ami tiha, ¹⁶ Vi vaiintitantara tenavu nantie irarave? ti. Vitanta nora kaiqa varaamanta ekaa Ieruharemihainaaka vitanta kaiqa irikaamanta tenavu vitanta kaiqa kia ho kukeqa kararave. ¹⁷ Hauri maa uvava vi animanta vo vatanaa vo vatanaaka ekaa vitanta kaiqa vare okarara irivorave. Kaiqe tenavu vitanta qioqama keha kia Ihurara voka voka tiva nimiate tiare, ti.

¹⁸ Minti tivake vika qaiqaa vitanta naaramake tiha, Ho netanta kia qaiqaavata vaiinti nahenti Ihurara tiva nimiate. Tenavu vi uvara tira qioqama tauro, ti.

¹⁹ Vika minti tumanta Pitaaka Ionika aqao ti, Tetanta ni uva iriha Kotira uva qaqa kaariraro Kotiva titantara hove tianarove? Ne nentavano nenta avu aatoqihai irikeha tiva timiqe iriare. ²⁰ Tetanta variqi viha tentantara avuqohai tavaunarave, aatoqihai irunarave, kia ho kukeqa kararave. Tetanta vi haikarara ekaa tiva nimirerave, ti. ²¹ Minti tumanta *kansoru* vika voqavata kempukaiqamake vitanta qioqamate, viraqaahai vitanta kuvantuke nititonanta vura. Pitaaka Ionika vaiinti koqemakorara iriha qaqi vaiinti nahenti Kotira autu tuahere vaurara ti, qumina uva vitantaqaa vataarorave ti, karapuhiqihai qaqi vitanta kuvantu kora. ²² Vitanta aiqu rarera vu vaiintira koqemako vaiintiva kiama qaraaka vaiintima vairaitiro, viva 40 ihinavu varako vaiintivama vaura.

Ihura vaintinavu Kotira aare vaura

²³ Vika Pitaaka Ionika kuvantu komanta vitanta orurante nai navunaaka vaunaini oru vaiha Kotira kaiqa vara amite vau vaiintika vika noranavu tu uvaravata, vonavu tu uvaravata, vika tiva nimura.

²⁴ Tiva nimumanta vi uvara iri, vika ekaa Kotira aareha mintima ti:

Noravaavo, are ekaa haika autu kera vataaravave. Naaruvave, vatave, nora namarive, ekaa haika naaruvainive, vatainive, namariqive, vai haikara areqai autu kera vataanarave.²⁵

²⁵ Haaru tinavu kaivaqava Devitiva ai kaiqa vaiintivano vauvaro ai Maraqueravano vira kahaquvaro viva minti turave:

Nantihae vo vatanaa vo vatanaaka Kotirara arara ite vaimanta variavo? Nantihae maa vatanaaka qumina okara kaara tiva vare Kotira raqu amitareka auti variavo?

²⁶ Ekaa vatanaa avuhainaa vaiinti, vika ruvaaqumavi auvihehavaa yaqa ntuva vare, Kotiravata, viva noraiqama kai vaintiravata raqu amitareka auti variavo, turave. (*Ihi 2:1-2*)

²⁷ Ho Kotio, vi uvvara tivatonara vate vivauma vaivo. Are Ihura naaruvaihira atitoraro viva kia qora kaiqa vararaitiro, ai kaiqaqai vara amitaqiro vumanta Herotivavata, Pontius Paireatavavata, vitanta maa vatukara Ieruharemimi ruvaaqumavi vahitatanta, vo vatanaakavata, Isareru vaiinti nahentivatamake, vika vaiha Ihura qoraiqama kareka auti vaurave. ²⁸ Ho vika kia irurave. Haaru vika kia vau entara are naane tihara, Tinta kempukaqohai vika tinta antuqa vai kaiqaraqai vareha vika minti mintima vira amitevarave tianantemake, vika Ihura qoraiqama amitorave.

²⁹ Ho Noravaavo, vika tinavuaravata ni qoraiqama nimitarerave tia uvara iriane. Are tinavu kahaqiraqe tenavu ai kaiqa vaiintinavu vaiha kia qetaraiti, ai uva tiva nimiare.

³⁰ Nena kauqu tutukera tinavu kahaqiraqe tenavu vaiinti nahenti aihavika koqema nimitaare. Are tinavu kahaqiraqe tenavu Ihura ai kaiqa vaiinti koqera vira autuqaa nora kaiqa mpeqa kaiqaqai varaqi vuare, tura.

³¹ Vika minti tivake Kotira aarovaro vaakama viraqi vau naavuva qaki qaki uvoro Kotira Maraqueravano viraqi vauka kempukaiqama komanta viraqaahai vika kia vaiinti naatu qetaraiti, Kotira uva vika tiva nimiqi vi vaura.

Vika vohaaraqi vaura

³² Ho vi entara Ihurara quqaa vivave tuka vohaaraqi vaiha vika vohaa avu aato muntukaqai vateha vaura. Kiama vovano nai vato airairara naiqai paama tivakero tote vaura. Vika nai vato airairara rairakeha voka voka hampi nimi vaura.

³³ Minti vaumanta Ihuva noraiqamako vaiintinavuka mpeqaiqamake Ihuva Noravano qaiqaa qaqi himpi uvvara vaiinti nahenti tiva nimiqi vi vaura. Tiva nimiqi vi vauvaro Kotiva vika koqema nimitomanta ³⁴ vika vaiha koqemake nai kahaqii nai kahaqii i vauvaro kiama vovanovata vehi vaura. Vaiintivano naavuve, vatave, vatomka vi haikara voka nimiha monu varakeha vuru Ihuva noraiqamako vaiintinavuka nimura.

³⁵ Vika nimumanta vinavuka vi monura rairakeha kia airi haika vatomka vehi vaiinti tuqimake nimiha, airi haika vatomka inaaraiqamake nimiqi viha, mintimake vika vaiinti nahenti vi haikara nimura.

³⁶⁻³⁷ Mintiaqi vuvaro viraqaahairo vovano vira autu Iohepiva, viva Rivaira vohaa ankuvano vaura. Viva Saiparusini vatatova nai u vataro voka nimihamo monu varakero monu ekaa varero vuru Ihuva noraiqama konavuka nimura.

Ihuva noraiqamako vaiintinavuka vi vaiintira vara autu ravateha virara Banabaasir-ave—*Vora Kahaqiaina Vaiintirave*, tura.

5

Ananaiaasika Safairaakara tura

¹ Vaiinti vovano vira autu Ananaiaasiva nai naata Safairaaka ntiro vaura. Vitanta naitanta u vataro vonku, vo vaiinti amiha monu varora.

Ananaiaasiva hini monuara tenta totarerave ² tuvaro vira naatavanovata vi uvara iruvaro Ananaiaasiva hini monuqai varero oru Ihuva noraiqamako vaiintinavuka aiquutaraini vuru vatero tiharo, Te tenta naatanti tentatanta vata vonku vo vaiinti amiha monu varauuna ekaa vi monura te ni nimuro, tiro.

³ Tuvaro Pitaava aqao tiro, Ananaiaasio, Sataaniva ariqaa raqiki vaivara are vira uva iriharama Kotira Maraquerara unahaa tiarao. Nantiharave? Are nena vata vo vaiinti amiha monu varauuna hini monu nena rairakeru vaterama unahaa tiharma, Te ekaa vi monura niqai nimuro, tiarao.

⁴ Tota kia vi vataraaqaahaira koqaa varauuna entara vi vatava ai vatavano vairave. Viraqaahaira vi vataro vo vaiintiqi kehara monu varauararo vi monuva ai monuvano vairave. Ho nantiharae hini monu nena totera, hini monuqai tinavu timiharama tinavuara unahaa tihara, Ekaa vi monura niqai nimuro, tiarao? Are kia tinavu qumina vaiintiaravauve unahaa tiarao. Are minti tiharama Kotirara unahaa tiarao, tiro.

⁵ Minti tuvaro Ananaiaasiva vi uvara iriro vaakama hiqiriro qutu viro. Qutu vumanta ekaa vi uvara iruka voqamake qete vaura. ⁶ Viva qutu vumanta qaraaka vaiintinavu oriqete vira vaata apuqamake vare, viraqihai vevare muntu quntama tora.

⁷ Vira vaata quntama tovaro kuarivano inaaraiqa uru rovaro taaramo kuariavu aitarovaro vira naatavano kia vi uvara iriraitiro, vivavata viraqihai oriqetero.

⁸ Viva viraqihai oriqetovaro Pitaava virara tiharo, Ho netanta vata vo vaiinti amiha monu varaa, vi monuraqae varavao? Are tiraqeve, tuvaro viva, Eo, vi monuraqaima varauro, tiro.

⁹ Minti tuvaro Pitaava tiharo, Ho nantihae netanta vi uvara una uva tirerave tivake Kotira Maraqurara una uva tiavo? Ho tavaane. Ai vaati muntu quntama taaka vika gentiana variavo. Vika aivata vare muntu quntama tekama variavo, tiro.

¹⁰ Tuvaro vi nahentiva vi uvara iriro vaakama hiqiriro qutu viro. Qutu vumanta qaraaka vaiintinavu oriqete tavovaro vivavata qutu vumanta vira vaatavata vare muntu nai vaati tataaqa quntama tora.

¹¹ Quntama tomanta ekaa Ihura vainti vi haikara taveha voqamake qete vaumanta ekaa vi uvara irukavata voqamake qete vaura.

Nora kaiqa varorara tura

¹² Mintumanta Ihuva noraiqamako vaiintinavuka vaiinti nahenti kahaqireka nora kaiqa vo kaiqa vo kaiqa vare vaura. Vo enta vo enta Ihura uva iruka Kotira Naavu naanteqaraini Soromonura Haraaraqi ruvaaqumaviha vaura.

¹³ Vika mini ruvaaquamavi vaumanta qaqi vaiinti nahenti vikara koqekave tivakeha, qetakeha niarakanta vaiha kia vika hampata ruvaaquamavi vaura. ¹⁴ Vi entara vaiintivata nahentivata airitahaa Nora Vaiinti Ihurara ququaave tivake Ihura vaintiqamavi vohaarraqi avitumavi vaura.

¹⁵ Ihuva noraiqamako vaiintinavuka nora kaiqa varaqi vi vaumanta vi vatanaaka ni-havuka ntita vareha vuru aaraini taariqaave, taintaaave, vateha tiha, Pitaava aitareharo viva kia ni utu varairera, vira maraquravano aniharo ni hininavuqaa mantaaqa kaarire, tivakeha ntita vuru vatora.

¹⁶ Hihai hihai vo vatuka vo vatukaihai vaiinti airitahaavano, vika nái aihavu vaiinti nahentikave, cueravano avutaqi vaukave, ntita vare Ieruharemini vuru komanta Ihuva noraiqamako vaiintinavuka vika vika koqema nimitora.

Ihura vaintinavu qoraiqama nimitorara tura

¹⁷ Vika mintiaqi vumanta Kotira kaiqa vara amite vau vaiintika vika qiata vaiintinavata, vira navunaaka Satiusi vaiintinavuvata, vika vaiha tavomanta airi vaiinti nahenti Ihuva noraiqamako vaiintinavuka uva iri vaumanta vira kaara vika tomake vaiinti nahenti tinavu uvaqai iriataarave tura. ¹⁸ Vika minti tivake oru Ihuva noraiqamako vaiintinavuka ravaaqavu vare vuru karapuhiqama kora.

¹⁹ Viraqihai vuru kovaro entaqi Noravano atito *enseliva* karapuhi qenti qantuakero Ihuva noraiqamako vaiintinavuka ntita varero muntu vahaqaqaini kero tiva nimiro tiharo, ²⁰ Ne oru Kotira Naavuqi himpi vaiha vaiinti nahenti qaraakaqamake qaqi variqi vi okarara tiva nimiate, tiro. ²¹ Minti tumanta vinavuka viva tuntemake vira qararaa atitia vumanta vinavuka oru Kotira Naavuqi vaiha vainti nahenti vi uvara tiva nimura.

Vinavuka mini oru viraqihai vrumanta Kotira kaiqa vara amite vau vaiintika vika qiata vaiintivanovata, vira navunaakavata, vika ruvaaquamavi Iutaa vaiinti nora vaiinti *kansoru* vaiinti, vo vaiinti vo vaiintivata naaramake tiha, Aniqenavu maaqi ruvaaquamavi vaiha uva avuqavu qiare, tivake vika ukuru vaiha Ihuva noraiqamako vaiintinavukara oru ntita vare aniate tumanta ²² oru ntitarare ti, tavomanta vinavuka kia karapuhi naavuqi vaumanta vika orurante *kansoru* vaiintinavu vaunaini viri tiva nimi tiha, ²³ Tenavu karapuhi naavuqi orure tavauraro qenti *roki* arutaamanta kiripu vaiintinavuvano vahaqaqaini qentiana maimaraara raqiki variamanta tenavu qenti qantuake tavauraro kia voqavanovata karapuhi naavu vira avutaqi vaivo. Ekaama vuavo, ti.

²⁴ Minti tumanta Kotira Naavuqaa maimaraara raqikuka vika qiata vaiintivanovata, Kotira kaiqa vara amite vau vaiintika vika noranavuvata, vika vi uvara iri tiha, Nantiakée vi vaiintinavuka vuavo? ti.

²⁵ Minti ti vauvaro vaiinti vovano uriqetero vika tiva nimiro tiharo, Iriate, ne karapuhiqama kaaka, vinavuka Kotira Naavuqi vaiha vaiinti nahenti uvama tiva nimi variavo, tiro.

²⁶ Minti tumanta maimaraara vaiintinavuqaa raqikuva nai kaiqa vaiintinavu hampata oru Ihuva noraiqamako vaiintinavuka qaiqaa ntita vare anura. Qaqi vaiinti nahenti ori utu vare harivorave tivake, vika qihaaqamake vinavuka ntita vare anura.

²⁷ Vika vinavuka ntita vare vuru *kansoru* vaiinti nivuqaa himpima kovaro Kotira kaiqa vara amite vau vaiintika vika qiaata vaiintivano vinavukara tiharo, ²⁸ Tenavu ninavuara kiama Ihurara vaiinti nahenti tiva nimiate, turo. Virara anomake qioqama taunarave. Ho tavaate. Nenavu ekaa Ieruharemimi vi aniba vika vi uvvara tiva nimi variavo. Nenavu Ihura arukaa uvvara tinavuqaa vatareka auti variavo, tiro.

²⁹ Minto tuvaro Pitaavavata, Ihuva noraiqamako vaiintinavuka vokukavata, tiha, Tenavu kia qaqi vaiinti uva iriqi viraiti, tenavu Kotira uvaaqi iriqi virerave.

³⁰ Ne Ihura niriqohai katariqaa aruke hiritovaro viva qutuvuvaro viraqahaaro tinavu kaivaqaukavararaaqaa raqiqi vai variqava, Kotiva vira qaigaa qaqi vara himpima korave. ³¹ Kotiva vira qaqi vara himpima kero vira noraiqama kaiarov maa entara viva Kotira kauqu tanaraini mpeqavano tinavu kahaqiariravama vaivo.

Tenavu Isareri vatanaaka vaiha qora aara qaqlira karera iiarlaro viva tinavu kahaqianarove. Viva mpeqavano vaharo homa tenavu qora kaiqa varaaina uvvara nunka timitaanarove. ³² Tenavu tentanavu tivuqohai tavauna haikara, tenavu vi haikarara tivaqiqi virerave. Kotira Maraqueravanovata, vi haikararaqai tivaqiro vuanarove. Kotiva nai uva iriqi ni variakaqai nai Maraqua nimi vairave, ti.

³³ Minto tumanta *kansoru* vaiintinavu vi uvvara iri, voqamake arara itomanta vika vinavuka arukareka auti vaura.

³⁴ Vinavuka arukareka auti vauvaro *kansoru* vaiinti vovano vira autu Gamarieriva, viva Parasi vaiinti maara uva okara ti vauva, vaiinti nahenti virara koqe vaiintive ti vauva, viva *kansoru* naavuqiqi himpiro Ihuva noraiqamako vaiintinavukara tiharo, Vinavuka maaqihai vara veva kaate, tiro.

³⁵ Minto tivakero viva *kansoru* vaiinti vika tiva nimo tiharo, Ne Isareri vaiintivauvo, ne rauriha nenta varareka i kaiqara qakomake aato irikeha varaaete. ³⁶ Haaru vaiinti vovano vira autu Tiudaasiva qovarama vurave. Viva te noravanove tumanta airi vaiinti 400 vaiinti vira aiukaa avataqiqi viha, *kamaanira* hampata raqirare tumanta *kamaanira* vaiintinavu vi vaiintira arukomanta vira avataqiqi nuka ekaa qetake ruqeqaamake vi anima vurave. Mintuvaro vi vaiintira kaiqavano quminaqama vurave.

³⁷ Ho qaigaa ekaa autu vare vau entara vovano vira autu Iutaasiva Karirihainaava qovarama viro vaumanta vaiinti airitahaavano vira avataqiqi vumanta ho viravata aruke, vira avataqiqi nukavata raumpirima korave.

³⁸ Ho haaru aruko vaiintitantara irihama ne maa vaiintinavuka kia utu vararaiti, qaqi kaimanta variate. Vika kaiqavano qaqi vaiinti kaiqa voqara vairera, vika kaiqavano quminaqama vuanarove. ³⁹ Vika kaiqavano Kotiraqahaaro qovaraiqiqi kaiqava vairera, kiama nenavu vi vaiintinavuka ho naatara kevarave. Ne hauri mintiha Kotira vataake raqviorave, tiro.

⁴⁰ Gamarieriva minti tuvaro vira uvavano kempukaiqumanta vika vira uva iri, viraqahaai Ihuva noraiqamako vaiintinavuka naaramake, vika vinavuka kaavuqai numiqake vate tiha, Kia qaqlira Ihura autu ravaqiqi viha voka voka tiva nimiate, tivake vinavuka kuvantu kora.

⁴¹ Vika vinavuka kuvantu komanta Ihuva noraiqamako vaiintinavuka vevare Kotira autu tuahereha tiha, Kotiva tinavuara vika Ihura autuara irihama kaurira haika vareha kempukaiqumake vaivarave timantara ti, tenavu voqamake quaheha vauro, ti.

⁴² Viraqahaai vinavuka vo enta vo enta Kotira Naavuqive, qaqi vaiinti naavuqive, variqiqi viha koqe uva Ihuva viva tinavu kahaqiarira vaiintivave tu uvvara vaiinti nahenti tiva nimiqiqi vi vaura.

6

Kahaqi vau vaiintika 7navu noraiqama kora

¹ Vi entara Ihura vainti airiqamaqi vi vaumanta vikaqihai vokuka tirori vaura. Iutaa vaiintinavu Giriki uva tuka vaiha Iutaa vaiinti nai Hiparu uva tuka hampata tirorimaqi viha tiha, Vo enta vo enta monu rairaqqi viha vehi vaiinti nahenti nimiha ne kiama tinavu nahenti tentoqia variakavata nimiavo, ti.

² Minto tumanta Ihuva noraiqamako vaiintinavuka ekaa Ihura vainti hinikukavata ruvaaqumake tiha, Tenavu Kotira uva tiva nimiaina kaiqara qaqlirake monu raira kaaina kaiqaraqai varaqi vuuarorave.

³ Tinavu qata vakaukavarao, vaiinti 7navu koqe avu aato vataaka Kotira Maraqueravanotu uvvara koqemake iriaka, ne vinavuka ntita vare anige tenavu vinavuka vi kaiqara nimiari varaaete. ⁴ Vinavuka vi kaiqara vare vase tenavu Kotira aaramaqi viha Kotira uva vaiinti nahenti tiva nimiqiqi vuare, ti.

⁵ Minti tumanta vaiinti nahenti ruvaaqumavi vauka ekaa vinavuka uvvara quahake vi kaiqara vareka kaamatora. Vika maa vaiintinavuka kaamatora:

Sitivenirave—Sitiveniva Ihurara kempukaiqama kero iriqi vuvaro Kotira Maraquravano vira muntukaqi vauvaro viva vira uva ekaa uva iriqiro vura.

Piripirave, Parokorusirave, Nikanorave,

Timonirave, Pamenaasirave,

Antiokihainaava Nikolaasirave – Nikolaasiva viva tota vo vatanaava vaharo nai naaqua taatora okara qaqira kero Iutaa vatanaaa okarave kaiqave varero ho viraqahaaho Ihura uvavata iriro Ihura vaintiqama vura.

⁶ Ho vi vaiintinavuka kaamate ntita vare Ihuva noraiqamako vaiintinavuka unaini viri komanta vinavuka Kotira aareha nai kauqu vi vaiintinavukaga vatora.

⁷ Ho Ihura vaintinavu Kotira uva tiva nimiqi vuvaro vi uvava voqavata viro aniro umanta airi vaiinti nahenti vi uvvara irura. Ieruharemimi Ihura vainti airiqama vumanta Kotira kaiqa vara amite vau vaiintika airitahaavanovata Ihurara ho vivave tivake Ihura vaintiqama vura.

Sitivenira karapuhiqama kora

⁸ Ho Sitiveniva Kotirara kempukaiqama kero iriqiro vuvaro Kotira kempukavano viraqi vau vaiinti vaharora tiro, viva vaiinti nahenti nivutanaa vaharo Kotira kaiqa nora kaiqa, vo kaiqa vo kaiqa varaqiro vura. ⁹ Mintumanta vaiinti vonavu Sitivenira vataake tirorireka anura. Vi vaiintinavuka vo uva iruka nai maara naavuara *Kuvantukaa Vaiintira Naavuve* tura. Vi vaiintika Iutaa vainti vahia vika Sairinihainaakavata, Arekisantiahainaakavata, Silisiahainaakavata, Esiahainaakavata, vaura.

Vika Sitivenira vataake tirorireka anuvaro ¹⁰ Kotira Maraquravano Sitivenira kaahuvaro vira uvavano kempuka uva vaumontara ti, vi vaiintinavuka kia ho vira uva aataro kora. ¹¹ Vira uva kia ho aataro karaiti, vinavuka vaiinti vonavu qutaru monu nimiha tiha, Nenavu Sitivenirara unahaa tiha mintima tiate, Sitiveniva Mosiraravata Kotiraravata qora uva ti vaimanta tenavu irunrarave, tiate, ti.

¹² Ho vika mintumake una uva tumanta Iutaa nora vaiintive, maara uva okara ti vau vaiintikave, vika vi uvvara iri oru Sitivenira ravaaqavu vare vuru *kansorunavu* ruvaaqumavi vauraqi kora.

¹³ Viraqi ke vaiinti vonavu una uva tiate ti, vika vinavukavata naaromanta vinavuka Sitivenirara tiha, Maa vaiintiva enena Kotira Naavuara qora uva ti vairave. Viva Mosiva maara uva tivatorara qora uva ti vairave.

¹⁴ Tenavu airi vaiinti vaunaraqaama viva vi uvvara mintima keharo tirave: Ihuva Nasaretihainaava maa naavuara Kotira Naavu rampai aquakaanarove, tirave. Ihuva Mosira maara uva qaqira kero qaraaka uva tinavu tiva timianarove, tirave. Sitiveniva vi uvvara vi uvvara mintima keharo timanta irunrarave, ti.

¹⁵ Minti ti vaumanta *kansorunavu* naavuqi vauka vahia Sitivenira tavovaro vira virivano koqe vira *enseli* vira voqaantema kero vaura.

7

Sitiveniva nai auta ntuaina uvvara tura

¹ Vinavuka una uva minti tiha Sitiveni raqaa uva vate vauvaro Kotira kaiqa vara amite vau vaiintika vika qiaa vaharora tiharo, Ho vinavuka uvavano ququa uvae vaivo? tuvaro ² Sitiveniva tiharo, Ti qata vakaukavata, ti qokavaravata, ne iri vaise te tiare. Haaru Eparahaamiva tinavu kaivaqava viva kia Haraanini vu entara viva Mesopotemia vataaini vauvaro Variqavano voqamakero takuqi vaiva Kotiva qovarama viro ³ Eparahaamira tiva amiro tiharo, Nena navunaakavata, nena maaqavata, qaqira maini kera te ai umiqaaina vataraqaa vuane, turave.

⁴ Minti tuvaro Eparahaamiva Karadia vataaini vaura mini kero katu varero oru Haraanini vaurave. Ho vira qova qutu vuvaro Kotiva qaiqaa tuvaro Eparahaamiva maa vataara ne varianaini anurave.

⁵ Vi entara Kotiva kiama Eparahaamira maa vataara amurave. Eparahaamiva nai aiqu ntavato vataara kia voqavata amurave. Vi entara Kotiva kauqu aqiqaa aqukero Eparahaamira tiva amiro tiharo, Ho maa vataara te naantiara ai amirerave. Maa vataara ai vataara varianarove. Arevata nena kuvuaramateraukavata vika vataara varianarove, turave. Ho vi entara Kotiva aqiqaa kauqu aqukero tu entara kia Eparahaamiva vainti vato entara ⁶ Kotiva maa uvvara tiva amiro tiharo, Naantiara are kuvuuarerauka ai naintivara vo vataaini oru vaimanta vi vataanaaka ai naintivara qoraiqama nimitaqi vi vaimanta ai naintivara airi ihi 400 ihi vi vataraqaa variqi vivarave.

⁷ Ho vi entaraqaahai te ai naintivaragaqaa raqikika vikaqaa uva vatehama vika ntaihararave. Te vika ntaihama kaarira viragaahai ai naintivar vi vataragaahai katu vare ani maa vataragaqaa vaiha ti hutu tuaheraqi vivarave, turave. ⁸ Kotiva minti tivakero nai kauqu aiqiqaa aquko uvarara Eparahaamivavata vira naintivata iritaate tiro, Kotiva qorainti vainti vaata toqaaaina okarara Eparahaamira amurave. Viraqaaahairo Eparahaamiva nai vainti Aisaakira vatatovaro 8 enta aitarovaro vira vaata toqa amitorave. Aisaakiva Iekopira qova vauvaro Iekopiva tinavu kaivaqaukavara 12navu vika qova vaurave.

⁹ Ho tinavu kaivaqaukavara variqi vi, vinavuka nai qata Iohepira toma amitheha vira qoraiqama kareka vira ravaaqavuke vo vatanaaka nimihama monu varomanta Iohepira ravaaqavu vare vuru Isipini korave. Mini vuru kovaro Iohepiva vo vatanaa vaiintiqaqaa quminaiqama kero vira paanaa kaiqa vare vauvaro Kotiva kia virara tauru korave. (*Okara 37:27-28*)

¹⁰ Kotiva kia Iohepirara tauru karaitiro, vira ruaruama amitero vira kahaqamaqiro vuvaro viva ho vaurave. Pero vaiintivano Isipi vataqaa raqikuva Iohepira aarovaro viva vira avuqaa oru vauvaro Kotiva vira avu aato kahaquvaro Pero vaiintivano virara koqe vaiintive, avu aato vataa vaiintive tivakero vira noraiqama kero tiharo, Te avuhainauka variarirara are ti naantiaraihainaava vaharama ti naavuqaavata, ti vataqaaavata raqikiane, turave.

¹¹ Ho vi entara karara nararaiqu entava Isipinivata, Kenaaninivata, vaumanta vaiinti nahenti qoraiqamavi vaumanta tinavu kaivaqaukavara vikavata kia ho kara norave. ¹² Mintuvaro Iekopiva iruvaro *raisi* voqaa karavano Isipini vauvaro viva nai maaqu tinavu kaivaqaukavaranaavu mini nititomanta karara vurave.

¹³ Vinavuka mini taara tataavu entaraqaao Iohepiva vutukero vika tiva nimiro tiharo, Te ni qatavanoma vauro, tuvaro Pero vaiintivano Iohepira navunaakara iriro vika quahama nimite vauvaro ¹⁴ Iohepiva uva vara kero nai qorara tiharo, Arevata, nena nahenti vaintairavata, ekaama ntitera maini Isipini aniate, tumanta vaiinti nahenti 75navuvano Isipini vurave.

¹⁵ Iekopiva katu varero Isipini oru variqiro viro qutu vumanta tinavu kaivaqaukavaravata mini variqi vi vuru qutu vurave. ¹⁶ Vinavuka qutu vumanta vika vinavuka vaata vare Sekemi vata mini vuru Eparahaamiva monu aqukomanta Hamora vatanaaka vata amuraq'i quintama torave.

¹⁷ Ho airi ihi aitarovaro Kotiva haaru nai aiqiqaa kauqu aqukeharo Eparahaamirara ai naintivara kahaqirerave tu entava aumanto vaumanta vaiinti nahenti katu vare Isipini vuka airiqama vuvaro ¹⁸ vaiinti vo, avuhainaa vaiintivano kia Iohepirara iru vaiintiva qovarama viro Isipiqaqaa raqiki vaurave.

¹⁹ Viva kia tinavu kaivaqaukavaraqaa avuqavuqama kero raqikiqiro viraitiro, viva tinavu kaivaqaukavara qoraiqama nimitaqiro viharo tiharo, Ne vainti vataate vaintika qaqira aqu kaimanta vika qutu vuuate, turave.

²⁰ Isipiqaqaa raqikuva Pero vaiintivano minti tuvaro tinavu kaivaqava vovano vi entara Mosira vatatovaro viva voqaraa vaintiru vauvaro vira nova kia vira qaqira karaitiro, taaramo toranavuura naavuqi vira kukeqa tero viraqataa raqikiqiro viro, ²¹ viraqaaahairo vira vita varero namari auvahini vuru kukeqa tovaro mini vauvaro Pero vaiinti vira raavuravano vira rantakero, Te vira virirerave, tivakero nai vaintiqaqaa raqikuntema kero viraqaaavata raqikiqiro vurave.

²² Viraqaa raqikiqiro vuvaro Mosira ekaa Isipi vatanaa okarave kaiqave umiqovaro Mosira kaiqavanovata, viva tu uvavavata anomakero koqema kero vaurave.

²³ Ho Mosira tinavu kaivaqava 40 ihi varakero viva tiharo, Kaiqe tenta navunaaka Isarerri vatanaaka oru tavaare, tivakero ²⁴ oru tavovaro Isipi vaiinti vovano Mosira navunaara vo goraiqama amite vauvaro Mosira nai navunaara vira kaara Isipi vaiinti vira arukero viraqaa muntu korave. Mosira nai irikero tiharo, ²⁵ Ti navunaaka tiriara mintima tivarave. Tinavu kahaqiarire tiro, Kotiva vira atitaivaro anivave. Vika tiriara vi vaiintiva qora kaiqaaahairo tinavu kuvantu timitaariravave tivarave, tiro. Mosira vika minti tivarave tumantavata, vira navunaaka kia virara minti turave.

²⁶ Mintuvaro vira qararaa Mosiva tavomanta vira navunaaka, Isarerri vaiintitantavano raqi vauvaro Mosiva oru vitantara tiharo, Eqaate. Netanta iriate. Netanta vohaa vaiintitantave. Netanta vohaa okaravanove. Nantihae netanta raqi variavo? tuvaro ²⁷ vaiinti vovano nai kena vaiinti ari vauva Mosira ventakero tiharo, Tavave ai vara noraiqama kero tinavuqaa raqikiane tivarae aniarao? ²⁸ Are enta Isipi vaiinti vo arukaanantema kera, tivata harukarevae auti variarao? tiro. ²⁹ Tuvaro Mosira vi uvvara iriro qetakero ruqemakero Isipihairo kantama viro oru vo vataini Midianini vaurave. Mini vaharo viva qorainti vainti taaraqanta vatatorave.

³⁰ Mini variqiro vuvaro 40 ihi aitarovaro Mosiva qumina vataini Sainai Aiqina tataaqia niharo tavovaro katari vo iha ite vauvaro viraqihairo *enselivano* qovarama vurave.

³¹ Qovarama vuvaro Mosiva virara ravuku viro vainto oru katari iha ite vaura tavaare tivakero iruvaro Noravano uva vira tiva amiro tiharo, ³² Te *Variqavanove*. *Te ni kaivaqaukavara Eparahaamirave*, *Aisaakirave*, *Iekopirave*, *vikaqaa raqiki vauraukave*, tuvaro Mosiva voqamakero aatu itovaro vira aigu kauqu ntiri ntiri uvare vi haikara tavaarorave tuvaro ³³ Noravano vira tiva amiro tiharo, *Are himpira variana vatarava* *tira*, *nena aiquaa nonku tenara qaqini varakera variane*. ³⁴ *Te tavauramanta Isipi vatanaaka ti vaiinti nahenti qoraiqama nimite variavo*. *Ti vaiinti nahenti ke ke tiara irihama te vika kahaqirera tuvuro*. *Ho anirage te ai Isipi vataini atitaare*, turave.

³⁵ Ho tota Isareri vatanaaka vika vira qoririmake tiha, Tavave ai vara noraiqama kero tinavuqaa raqikiene tivarae aniarao tu vaiintira, Mosira, Kotiva vi vaiintira noraiqama kero tinavu kaivaqaukavara kahaqiharo vikaqaaata raqikiarire tiro, vira atitorave. *Enselivano* iha ito katariraqi vaharo Mosira Kotira uva tiva amuvoro ³⁶ Mosiva vuva oru nora kaiqa varaqiro viharo tinavu kaivaqaukavara Isipihairo ntita varero Naare Namari taqa varero nora kaiqa varaqiro viro oru qumina vataini 40 ihinavu niharo nora kaiqa varaqiro vurave. Mintima kero viva tinavu kaivaqaukavara Isipihairo ntita viri maini korave.

³⁷ Ho vi vaiintiva Mosiva Isareri vatanaaka vika tiva nimo tiharo, Kotiva ti titiatainantema kero, vaiinti vo atitairaro vi vaiintiva Kotira uva tianarove. Vi vaiintiva niqihairo qovarama vuanarove, turave. ³⁸ Tinavu kaivaqaukavara kia vaiintivanovata vau vataro qumina vataini variqi vuvaro Mosiva vika hampata vaurave. Viva tinavu kaivaqaukavara hampata vauvaro *enselivano* Sainai Aiqinaqaa vaharo Mosira tiva amuvoro viva Kotira uva qaqi variqi vi vai uvare varero muntu vi uvare tinavu kaivaqaukavara tiva nimurave.

³⁹ Viva Kotira uva varero muntu tinavu kaivaqaukavara tiva nimumanta vika kia vi uvare irirerave tiha Mosira uva qoririmake qaiqaa Isipiniara vuataa umanta vaurave. ⁴⁰ Ho Kotiva vira aarovaro Mosiva Sainai Aiqinaqaa vaarirero vaumanta vika Eronirara tiha, *Are variqa vonavu autu timitaoramanta vinavuka tinavu tivuni viha tinavuqaa raqikiata*. Mosiva tinavu Isipihairo vita varero aniva viva nai tainie vivo? turave.

⁴¹ Minti tivake vika purumakau naati maraqurahaa autuke vi haikarara variqave tivake vi haikara quahama amitareka *ofaa* iha quara amite nai kauquqohai aututo haikara, vi haikara autu tuaherakeha ovata norave. ⁴² Mintuvaro Kotiva vika tavero tauvaqa utu nimitero tiharo, Ho ne nenta qora kaiqaqai varaqi vuate, tumanta vika qumina naaruvalihaina haika opu makau vi haikara vi haikarara variqavanove tivakeha quahama nimite vaurave. Paropeti vukuqi Kotiva mintima turave:

Isareri vatanaa vaiinti nahentivauvo, ne 40 ihinavu qumina vataini niha ne kia tirira iriha sipsipive, purumakauve, aruke iha quara timitoravauve.

⁴³ Aqao, ne nenta vo haika vo haika aututo haikarara iriha, quara arukeha iha quara nimite vaurave.

Ne qumina vataini niha, una variqa vo, vira autu Molekira, vira seri naavu aqu vareha ni vaurave.

Opu makau vo, vira autu Refanira, ne viraravata tinavu variqave tiha, vira maraqurahaa autuke vira vareha ni vaurave.

Ho vira kaara te ni niaraini vo vataini, Babironi vatuka vira tauvaqaini vai vataraqaa ni tititaarira mini vuaterave, turave. *(Amos 5:25-27)*

Kotiva minti turave.

⁴⁴ Ho tinavu kaivaqaukavara qumina vataini kia vaiintivanovata vau vataraqaa variqi viha, Kotira Naavu, *seri* naavuqai vareha vurave. Vi naavurara Kotiva Mosirara maanti maantima kera aututaane tuvaro autotorave. ⁴⁵ Vira naantiara tinavu kaivaqaukavara vi naavura nai qokavarqaahai vare, oru tuataqi viha Iosuaara vataake oru vi vauvaro Kotiva vo vataanaa vo vatanaaka qaqini vara komanta tinavu kaivaqaukavara vika naatarake vika vata maatavata varorave. Ho vi *seri* naavuva Kotira Naavuvano vi vataraqaa variqiro vuvaro tinavu kaivaqava Devitivavata vau entava anirorave.

⁴⁶ Vira entavano anirovaro Kotiva Devitirara quaheharo vauvaro Devitiva Kotirara tiharo, Are tinavu kaivaqara Iekopiraqaa raqiki variaravave. Hoe te ai naavu kaqa amitararave? tuvaro Kotiva aqao tiro, Ai maaquvano naavu vira kaqa timitaarire, tuvaro ⁴⁷ vira maaqu Soromonuva Kotira Naavu vira kaqa amitorave.

⁴⁸ Ho iriate. Kotiva viva mpeqavano naaruvaini vaiva viva kiama qaqi vaiintivano kaqataa naavuraqi vairavauve. Kotiva nai paropeti vaiinti vo tiva amiro tiharo,

⁴⁹ Naaruuvavano vaireva, te oquivi vaiha ekaa haikaqaa raqikiaina taintavama vaivo. Vatavano vaireva, te aiqu viavi vataariravama vaivo. Ne nana naavue ti kaqa timitevarave? Kiama te variaina naavura ne ho kaqa tevarave. Kia te ho qumina naavuqi vairarave.

⁵⁰ Quqaama te tenta kauquqohai ekaa haika autuke vataunarave, turave.

(*Isaiah 66:1-2*)

Kotiva minti turave, tiro.

⁵¹ „Sitiveniva minti tivakero viva vikara tiharo,“ Ne Kotira uva kia iriataa imanta kia iri variarave. Ni avu aato munukavano una variqaraqai vaivo. Ni munukavano kiama Kotirara vaivo. Ne nenta kaivaqaukavara aanare, Kotira Maraqrurara kia antuqa arimanta variavo.

⁵² Ni kaivaqaukavara Kotira uva ti vau vaiintika ekaa vika qoraiqama nimitorave. Kia vika voqavata vehakuma nimitaraiti, ekaa qoraiqama nimitorave. Kotira uva ti vau vaiintika haaru qumina vaka Kotira uva tiha mintima tiva torave, Kotira kaiqa vaiintivanu avuqavu ni vairava vatainu tuvuanarove, tumanta ni kaivaqaukavara minti tu vaintika aru kontemake, nevata avuqavu ni vai vaiintiva vatainu tuvimanata ne viravata qoraiqama amite vira aruke iavo. ⁵³ *Enselinavu* Kotira uva maara ni tiva nimiamanta ne Kotira uva maara iriataara vaimanta ne kia vika uvavata iriavo, tiro.

Oriqohai Sitivenira arukora

⁵⁴ Sitiveniva minti tumanta *kansoru* vaiintinavu vira uva iruvaro vika voqamakero arara itomanta vika nái aarai *tentiri tiha/teti aneha*, maurus nkaqeheh vauvaro ⁵⁵ Kotira Maraqruravano Sitivenira viraqaa raqikhoro vira kempukaiqama kovaro Sitiveniva naaruvaini aitutiharo tavavaroo Kotiva u haikava iteharo takuqi vauvaro Ihuva Kotira kauqu tanaraini himpitero vauvaro ⁵⁶ viva tiharo, Ho tavaate, naaruuvavano qantua viro vaimanta te tave vauraro Ihuva Vataini Vatatai Vaintiva, viva Kotira kauqu tanaraini kempukavano himpitero vauvaro, tiro.

⁵⁷ Sitiveniva minti tumanta vika tiha, Tenavu viva Kotirara qora uva tinara iriarorave tiha, nái kauquqohai aato tintate aakara ntavaqi viha, kante oru ⁵⁸ Sitivenira rarae vare nora vatuka aaqaini muntu ke, origohai vira ruqutu aavata kora.

Sitiveniraqaa vaaka una uva tuka ori aqire iha, vika nái vukai tavuna qaqlini varake vuru ⁵⁹ qaraaka vaiinti vo, vira autu Sorura aqifataraini vataate, oru Sitiveniraqaa ori aqireka vuvaro Sitiveniva aakara nteharo tiharo, Ho Noravauvu, Ihuo, ti maraqura vitaane, tivakero ⁶⁰ viva tori kauru araviro noraiqaakero naveraitiro tiharo, Noravauvu, kia vika qora kaiqa kaara vikaqaa uva vataane, tiro. Minti tivakero viva qutu vura.

8

¹ Ho Sitivenira ruquti vauvaro Soruva vata vaharo vira huviqorama arukevarave tura.

Soruva Ihura vainti aru taiqa kareva auti vaura

Ho vika Sitivenira aruke vi entaraqaahai vika Ihura vaintinavu voqamake qoraiqama nimitaqi viha Ihura vaintinavu Ieruharemini vauka raumpirima komanta vika qetake lutia vataini vo vatuka vo vatukaini vi, Sameriaainivata oru vumanta Ihuva noraiqamako vaiintinavukaaqai Ieruharemini vaura.

² Vaiinti vonavu Kotira uvara noraiqaake iri vauka Sitivenira vaata vare noraiqaake iqiqataaqi viha muntu quntama tora.

³ Vira quntama tovaro Soruva Ihura kaiqave, uvave, taiqa kareva autiharo viva oru vo naavu vo naavuqihairo Ihura vaiinti nahentive, vaintive, rarae varero karapuhiqi ntita vuru ke vaura.

Sameriaini Ihura uva vuru tiva nimura

⁴ Soruva mintiaqiro vumanta Ihura vaintinavu raumpirima koka vika Ieruharemhii vo vatuka vo vatuka nihamma Ihura vakaaka tiva nimi vauvaro ⁵ Piripivavata vevara Sameriaini otu vo vatukaqai vaharo vi vatanaaka tiva nimi tiharo, Ihuva viva *Mesaiaavano* vaivo. Viva Kotiva atitai vaiintivave, ⁶ tumanta vaiinti nahenti iruvaro viva koqe uva tiva keharo nora kaiqavata vare vaumantara ti, vika tiremake vaiha koqemake vira uva iri vaura.

⁷ Vika vira uva iri vaumanta vaananavuvano noraiqaake uva tivakeha vo vaiinti vo vaiintiqihai qaqlini aitarovaro Piripiva airi aihavuka, vika vaata kia ho qakukave, aiqu qoraiqama vukave, vikavata koqema nimite vaura. ⁸ Mintiaqiro vumanta vi vatukaihainaaka voqamake quaheha vaura.

⁹ Vi vatukaihainaaka vaiinti vovano vira autu Saimoniva vaura. Vi vaiintiva *vure/quaha* kaiqa varaqiro vumanta Sameria vatanaaka vira kaiqara kauqu runkinkiri i vauvaro

viva tiharo, Te nora vaiintivanove,¹⁰ tumanta vi vatanaaka nora vaiintivata, inaara vaiintivata, vira uvara noraiqamake iriqi viha, vi vaiintirara viva variqavano kempuka kaiqa varavaive tuvaro¹¹ vi vaiintiva airi enta *vure/quaha* kaiqa, vo kaiqa vo kaiqa varaqiro vumanta vi vatanaaka vira kaiqara kauqu runkinkiri i vaura.

¹² Minti vauvaro Piripiva anirero koqe vakaaka Kotiva raqikainararave, Ihurara viva *Mesaiavano* vairarave, vika tiva nimumanta vika vi uvarara quqaave tivake vaiintivata nahentivata vika namari varora.¹³ Saimoniva vivavata vi uvarara quqaave tivakero vivavata namari varero, viraqahaairo viva Piripikantiro variqiro viharo Piripiva nora kaiqa varorara viva nai kauqu runkinkiri i vaura.

¹⁴ Ho Ihuva noraiqamako vaiintinavuka Ieruharemini vaiha irumanta Sameria vatanaaka Kotira uvara quahela variavo tumanta vinavuka Pitaaka Ionika nititomanta¹⁵ vitanta otunte vi vatanaaka hampata vaiha vi vatanaakara Kotira Maraqua varaate ti, Kotira aarora.

¹⁶ Vi entara vi vatanaaka tenavu Ihura vainti vairerave tuka namariqai vareha kia Kotira Maraqua varavata varora.¹⁷ Mintumanta Pitaaka Ionika Kotira aareha nai kauqu vikaqaa vatomanta vika Kotira Maraqua varora.

¹⁸ Mintuvaro Saimoniva tavomanta Ihuva noraiqamako vaiintitanta nai kauqu vaiintiqa vatomanta vi vaiintika Kotira Maraqua varovaro Saimonivavata tave vauvaro vira muntukavano ntuvaro viva monu varero vitanta nimireva autiharo¹⁹ tiharo, Monu maa vareha tivata noraiqama kaiqe tevata tenta kauqu vaiintiqa vataari vika Kotira Maraqua varaate, tiro.

²⁰ Viva minti tuvaro Pitaava vira tiva amiro tiharo, Ai uvavano qora uvama vaivo. Nena monu hampata qumina taiqa vuane. Kotira Maraqua kiama monu aqukehara varenarave. Kotiva nai Maraqua vaiinti nahenti qaqi aaqaama nimi vaivo.²¹ Kotiva tavaivarao ai avu aato muntukavano qora avu aato muntukama vaivo. Mintima vaivarara tira, are kia ho tenavu varaaaina kaiqara varenarave.

²² Ho nena qora kaiqa varenara qaqlira kaane. Vira qaqlira kera Kotira aarairaro Kotiva hove tirera, are qora kaiqa varena uvava taiqa vuanarove.²³ Te tavaurara are vogamakera muntuka nti variara vaiintivave. Qora kaiqavano ai ravaaqavu kaivara are qora kaiqa vare variarao, tiro.

²⁴ Pitaava minti tuvaro Saimoniva Pitaaka Ionikara tiharo, Oho, netanta tiriarao tihama, Kotira aaraivarao netanta ti uvava kia vivaura variarire, tiro. Saimoniva vitantara minti tura.

²⁵ Pitaaka Ionika vaiinti nahenti Ihura uvave Ihura okararave tiva nimi ke viraqaahai vitanta tururante verara Ieruharemini vura. Vitanta mini viha Sameriainivata vatuka vatuka niha Ihura vakaaka koqe vakaaka tiva nimipi vura.

Piripiva muntu Itiopia vaiinti tiva amu uvara

²⁶ Ho Piripiva Sameriaini vauvaro Noravano atito *enseliva* Piripira tiva amiro tiharo, Are himpira vevara Ieruharemhira Kesaini vi vai aararaqaa otu vuane, tura. Vi aarava vaireva kia airi vaiintivano vi ani vau aarava vaura.

²⁷⁻²⁸ *Enselivan* minti tuvaro Piripira himpiro viro oturero tavovaro Itiopia vatanaa vaiinti vovano aara viraqaa vaura. Vi vaiintivata nora vaiintivano vaharo viva nai avuhainaa nahentiera vira autu Kandesira vira kaiqa varaqiro viharo monuqaave *takis* kaiqaqaaave raqiki vauva, viva oru Ieruharemini Kotira autu tuahera kero, viraqaahai ururantero vevara nai maaqaini vireva aaraini vura.

Viva aaraini viharo iqoka kaariqi oquvi vaiharo Aisaiaava paropeti vaiintivano qara ntuvato uvara kaara ruvaqiro vi vaura.²⁹ Vi vukuqai kaara ruvaqiro vi vauvaro Kotira Maraqravano Piripira tiva amiro tiharo, Oru iqoka kaari vitaakee, tuvaro³⁰ Piripiva kantero oru iruvaro vi vaiintiva Aisaiaava paropetivano qara ntuvu toraqi kaara ri vauvaro Piripiva vira irero tiharo, Are kaara ri hara vi uvara okara hoe iriarao? tiro.

³¹ Minti tuvaro viva tiharo, Kia vovano ti kahaqiraqe te nantiabee maa uvara okara ho irirarave? Are maaqi vaarirera tintira oquvi vahara ti kahaqiane, tiro.

³² Ho vi vaiintiva Aisaiaara vukuqaihoro maa uvara kaara ruvaqiro vi vaura:

Sipisipi arukareva i vaivarao sipisipivano kia uva tintema kero, vivavata kia uva tivo. Sipisipi naati kauki toqake vaivarao sipisipi naativano kia uva tintema kero, vivavata nai navutaaka nivuqaa vaharo, kia uva tivo.

³³ Vira qoraqama amitehama kia vira uvavata uteta amitaavo. Vira arukaavarao taiqa virara ti, viva kuvuvara irauka kia ho vaivarao kia vovano virara tiva nimiariravavata varianarove, tura. *(Aisaia 53:7-8)*

³⁴ Ho vi vaiintiva vi uvara kaara ruva kero Piripira irero tiharo, Maa uvara ta vaiintirarae turave? Paropeti vaiinti Aisaiaava nariarae turave? Vorarae turave? tiro.

³⁵ Tuvaro Piripiva tiva amiro tiharo, Vi uvara Ihurara tiva tairave, tivakero viraqaa-hairo viva Ihura okara koqe uva vira tiva amiqiro vura. ³⁶ Aaraini tiva amiqiro viharo varuva namari vaunaini orurovaro Itiopia vaiinti viva tiharo, Ho tavaane. Namari maa virama vaivo. Are hove tirera, te namari varaare, tiro.

³⁷ [Minti tuvaro Piripiva vira tiva amiro tiharo, Are nena avu aato muntukaqihaira ququaave tirera, homa namari varenarare, tuvaro viva tiharo, Ho te ququaama Ihurara viva Kotira Maaquve turo, tiro.]

³⁸ Minti tivakero nai kaiqa vaiintiara tiharo, iqoka kaari ravaaqavu tairaro maaqaa variarire, tivakero vitanta Piripika namariqi otuntetanta uvaro Piripiva namari vira amura. ³⁹ Vira amiro, vitanta namariqihai qaqlini vaarirovaro viraqaa-hairo Kotira Maraqravano Piripira vita varero vuvaro Itiopia vaiintivano kia vira qaiqaavata tavaraitiro, viraqaa-hairo viva quahaqiro vrurama.

⁴⁰ Viva vuvaro Kotira Maraqravano Piripira vita varero vuru vatuka vo, Asadotini kovaro Piripiva vi vatukara kankoma kero tavora. Viraqaa-hairo viva vatuka vatuka variqiro viharo Ihura uva tiva nimiqiro viharo vatuka vo Sisariainivata orurora.

9

Soruva Ihura vaintiqamavura

(22:4-16; 26:9-18)

¹ Ho Soruva Ieruharemini vaharo Ihura vaintiqama vukara antua uva tiharo vika aru kaaina uvaravata tivagiro viharo iri tavokiaro oru Kotira Naavugi Kotira kaiqa vara amite vau vaiintika vika qiata vaiintiara tiharo, ² Qara vo ti timirage te Damasikusi nora vatukaini muntu qara vira maara naavuqaa raqikika nimiari vika tavaimanta Ihura vainti Ihura Araaqaa nika vaivera, te vika vaiintive, nahentive, rumpa vare Ieruharemini vuru karapuhiqama kaare, tiro. ³ Minti tivakero Soruva qara varero Damasikusini viro.

Ho aaraini Damasikusi aumanto vuvaro vaaka naaruvalhairo ovavano aauqakaa voqaara Soruva vi vaunaini utu kora. ⁴ Utu kovaro Soruva vatakanta hiqiriro iruvaro uva ovavano vira aarero tiharo, Soruo, Soruo, nana kaarae are ti qoraiqama timite variarao? tiro.

⁵ Minti tuvaro Soruva irero, Noravauvu, are tavave? tuvaro uvavano mintima tiro: Te Ihukave. Te are qoraiqama timite variaraukama vauro, tiro. ⁶ Minti tivakero tiharo, Ho himpira vatukaini viraro ovavano are minti minti inarara ai tiva amiarire, tiro.

⁷ Uvavano minti tumanta Soruva vataake anuka uva *nontantaqai/otataqai* iri kia vaiinti virivata tavaraiti, vika qaqlini minto vahai qeteheha kia uvavata ho tura.

⁸ Vika kia ho uvavata tuvaro Soruva vatahairo himpiro tavarare tuvaro vira avu qimpa vuvaro kia ho tavero. Kia ho tavomanta vira vataake anuka vira kauqu utu vare Damasikusini muntu kora. ⁹ Vira muntu kovaro Soruva mini taaramo enta avu qimpa vuva vaharo viva namarivata karavata kia nora.

¹⁰ Soruva mintimakero vauvaro Ihura vainti ovavano Damasikusini vaura. Vi vaiintira autu Ananaiaasiva, viva vaharo taira tave vauvaro Noravano vira aarovaro viva tiharo, Noravauvu, te mainima vauro, tuvaro ¹¹ Noravano Ananaiaasira tiva amiro tiharo, Vatukaini aara vo, vira autu Avuqavu Aarave tianaini orurera Iutaasira naavu gentiania vaiinti vo Sorurara irehara tavaane. Vi vaiintiva Tasusihainaavave. ¹² Soruva ti haareharo taira taveharo vaiinti vo vira autu Ananaiaasiva anirero virara ho tavaarire tiro, nai kauqu viraqata vataivaro viva ho tavaivo. Mintimama Soruva taira tave vaivo, tiro.

¹³ Noravano minti tuvaro Ananaiaasiva taira qaqlini tavaqiro viharo tiharo, Aqao, airi vaiintima vi vaiintira okara ti tiva timiamanta irunarave. Vi vaiintiva Ieruharemini vaharo ai vainti avuqavu ni variaka airithaa qoraiqama nimitte vairave. ¹⁴ Kotira kaiqa vara amite varia vaiintika vika noranavu Soruva qara amiavaro viva vi qarara varero maini Damasikusini ai autu re varia vaiinti nahentika rumpa kareva autiharo anivo, tiro.

¹⁵ Ananaiaasiva minti tuvaro Noravano vira mintima tiva amiro tiharo, Ho kia qetehera mini vuane. Vi vaiintiva ti kaiqa vaiintivano variarire ti, te vira kaama taunarare. Viva ti kaiqa vaharo viva vo vatanaa vo vatanaa avuhainaa vaiintive, nora vaiintive, kia Iutaa vatanakave, Iutaa vaiinti Isareru vatanakave, viva vika vika ti hutuara tiva nimianarove.

¹⁶ Naantiara Soruva tiriarao tiro, ti kaiqa varaqiro viharo, vira kaara aihavina haikarave, maara raaina haikarave, vo haika vo haika varaanarove. Ho vi okarara tenta vira tiva amirerave, tiro.

¹⁷ Kotiva tairaka minti tuvaro Ananaiaasiva orurero Soruva vau naavuraqi oriqetero nai kauqu viraqaa vateharo vira tiva amiro tiharo, Ti qatao, Soruo, are aaraini

aniharama tavaarava Noravano Ihuva vivama ti tititaivo. Are qaiqaa ho tavairaro Kotira Maraqravanovata ai avutaqi mpeqaiqiharo variarire tiro, viva ti tititaimanta anuro, tiro.

¹⁸ Minti tuvaro vaakama Sorura avuqihairo havuka parepaqa voqaara ravaqaavairo hiqiruvaro viva ho taveharo himpiro. Soruva himpuvaro Ananaiaasiva viraqaahairo namarivata aqu amitora. ¹⁹ Sorura namari aqu amitovaro viraqaahairo karavata ho nero. Kara namakero viva qaiqaa kempukaiqama viro ho vaura.

Soruva Damasikusiqi vaiharo Kotira uva tiva nimura

Mintuvaro Soruva Damasikusiqi vo entanavu Ihura vaintinavu hampata vaura. ²⁰ Mini vaiharo viva vaaka vo maara naavu vo maara naaruqi oriqetero Ihurara vika tiva nimiro tiharo, Quqaama Ihuva Kotira Maaquvano vaivo, tiro. ²¹ Minti tumanta vika vira uva iri vauka ravukuvu nai ire nai ireha tiha, Quqaae vi vaiintiva Ieruhareminini vaiharo Ihura vainti qoraiqama nimite vaivave? Quqaae viva Ihura vainti rumpa varero Kotira kaiqa vara amite varia vaiintika vika noranavu vuru nimireva auti vaiharo maini anirero vaivo? ti.

²² Minti ti vauvaro Soruva ti vau uvava voqamakero kempukaiqamaqiro vuvaro Soruva tiharo, Ihuva vivama Mesaiaavanove, tivakero vo uva vo uvaqihairo Ihuva Mesaiaavano variaina okarara vika numiqomanta, Iutaa vaiintinavu Damasikusini vauka vika vira uva aatara karare ti, tavovaro Sorura uvavanoqai vika uva tura aatara kora.

²³⁻²⁴ Minti vauvaro vo entanavu aitaromanta Iutaa vaiintinavu ruvaaqumavi vайha Sorura aruke arara rante vайha, entaqivata, kuariqaavata, vaantaavura qentiqaa maimaraara raqiki vaura.

Minti vauvaro Soruva vika nái vira aru kareka auti vau uvvara irumanta ²⁵ vira avataqi nuka vira kahaqihama rutantuto utaraqi vira ntuvake, vaantaavura avutaqihai vaati aaqaimi ke tuta tutamaqi tuvi muntu kovaro vurama.

Soruva Ieruhareminini vura

²⁶ Soruva Ieruhareminini oru viro Ihura vainti vonavu hampata avituma virare tumanta vika aqao ti, Are kia Ihura vainti variarao, tivake Sorura aatu qetehaqai vaura.

²⁷ Vira aatu qeteha vauvaro Banabaasiva vira kahaqireva anirero Sorura vita varero vuru Ihuva noraiqamako vaiintinavuka vaunaini kero Banabaasiva Sorura okarara vika tiva nimiharo viva Soruva aaraini viharo Ihura tavo uvaravata vika tiva nimiro, Ihuva Sorura uva tiva amuraravata tiva nimiro, viva Soruva Damasikusini vaiharo Ihura autu reharo kempukaiqama keharo Ihurara vi vatanaaka tiva nimuraravata tiva nimiro. Banabaasiva Sorura okarara mintimakero vika tiva nimumanta vika viraqaahai hove tura.

²⁸ Vika hove tuvaro Soruva vika hampata variqiro viharo Ieruhareminivata nihar kia qetaraitiro, Nora Vaiinti autu ravakeharo vira uva vi vatanaakavata tiva nimi vaura.

²⁹ Mintiaqi viharo viva oru Iutaa vaiintinavu Girikhai anuka hampata tirori vaumanta vika vira aruke uvvara nai tiva ami nai tiva amiha vaura.

³⁰ Mintumanta Ihura vaintinavu Sorura qata vakaukavara vi uvvara iri, vika Sorura vita vare muntu Sisariaini ke, vira atitovaro viva nai maaqa Tasusini vura.

³¹ Soruva mini otu vaumanta Ihura vaintinavu Iutiaini vaukave, Karirini vaukave, Sameriaini vaukave, vika ho maateraiqihai vauvaro vi entara kia vovanovata vika qoraiqama nimite vaumanta vika Ihura kaiqa kempukaiqamake varaqi viha vika Kotirara noraiqaake iriqi vuvaro Kotira Maraqravanovata vika kahaqihai vaumanta Ihura vaiinti nahenti airiqamavi vaura.

Pitaava vo vatuka vo vatuka vura

³² Ho Pitaava Ihura vainti kahaqireva vo vatuka vo vatuka viro. Mini niharoma viva Ihura vainti vonavu vatuka vo, Lidaini vauka otu tavareva vura. ³³ Pitaava mini otureru tavovaro vaiinti vovanovata vira autu Ainiaasiva vaura. Vi vaiintira vaatavano kia ho qakuvaro viva 8 ihinavuara taintaqaaqai vaiteharo vauvaro Pitaava otureru virara tiharo, ³⁴ Ainiaasio, Ihu Karaitiva homa ai koqema kaanarove. Are himpira nena tainta avuquavu iane, tuvaro vi vaiintiva vaakama himpiro.

³⁵ Vaaka himpumanta Lidaihainaakavata, Seronihainaakavata, tavovaro vi vaiintiva qaqi himpiro vaumanta viraqaahai vikavata Ihura vainti vaireka Kotira aarora.

³⁶ Vo vatuka Jopaini Ihura vaintiqihairo nahenti vovanovata vira autu Tabitaava vaura. Vira autu Giriki uvaqihai tireka Dokaasirave tura. Dokaasiva koqe nahentivano vaiharo vehi vaiinti vo vaiinti vo vaiinti kahaqireva kaiqa vara nimite vau nahentivama vaura.

³⁷ Ho vi entara vi nahentiva rovara vareharo vuru qutu vuvaro vira navunaaka vira vaataa hiqamake vo *rumu* verantooqи vuru vatora. ³⁸ Jopaini vauka iruvaro Pitaava au-manto Lidaini vaumanta vika vaiinti taaraqanta mini nititehamha tiha, Netanta Pitaarara mintima tiate: Kantera maini tenavu iainanaini aniane, tiate, tumanta vitanta vuru Pitaara tiva amuvaro ³⁹ Pitaava himpiro vitanta vataakero aniro.

Pitaava aniomanta vika vira vita vare verara nahenti vatoraqi oriqetovaro Pitaava tavomanta airi nahenti tentoqa vauka viraq'i vaiha Pitaava vaunaini oru iqi rate-hama Dokaasiva qaqi vau entara vika autu nimito utavaaqara vukai utavaaqave, vo utavaaqave, Pitaara umiqe vaura.

⁴⁰ Pitaara umiqovaro Pitaava ekaa viraqi vauka vahaaqaini nititama veva kero viva viraqi vaiharo tori kauru araviro Kotira aarora. Kotira aaramakero viva tuqantaa viro qutu vurara tiharo, Tabitaao, himpuane, tuvaro vi nahentiva qutu vunaihairo avu rampaikero Pitaara tavero ho viraqaahairo qaiqaa qaqi himpiro vaaviarama vuvaro ⁴¹ Pitaava nai kauqu tutukero vira kahaqovaro viva ho himpiro. Ho himpuvaro Pitaava Ihura vaintinavuvata, tentoqa nahentinavuvata, naarama kero qutuvu nahentira numiqomanta vika tavovaro vi nahentiva qaiqaa qaqi himpiro vaura.

⁴² Vi nahentiva qaiqaa qaqi himpiro vau uvava vi anumanta Jopaihainaaka vi uvvara iri, viraqqaahai airi valiinti nahenti Nora Vaiinti Ihurara ququaave tura.

⁴³ Ho Pitaava Jopaini airi enta vaiharo Saimonira naavuqi vaura. Saimoniva purumakau pahaqohairo kaiqa varo vaiintiva vaura.

10

Pitaaka Koniriasikara tura

¹Sisariaini vaiinti vovano vaura. Vira autu Koniriasiva „viva kia Iutaa vaiinti vairaitiro,„ viva Romeni vaiintivan vaiharo 100 iqoka vaiintiqaan raqiki vaumanta vi vaiintinavuka Itari vataihai anumantara ti, vikara Itarihainaaka iqoka vaiintive tura.

² Koniriasiva Kotira aare vau vaiintiva vaiharo nai naata vaintairavata Kotira autu tuahereha vaura. Viva Iutaa vaiinti nahentinavu vehi vauka parumakeharo nimiqiro viharo Kotira enena aaramaqiro vi vaura.

³ Ho vo enta eronaini kuari avuvano 3 kiroki quvaro Koniriasiva qaqi vaiharo taira voqaara tavero. Taveharoma viva kankoma kero tavovaro Kotiva atito enseliva oriqetero virara tiharo, Koniriasio, tiro. Tuvaro viva enseli aatu qeteharo ⁴ vira taveharo tiharo, Noravaavo, nanave? tuvaro enseli viva tiharo, Are Kotira aaraana uvavarave, are vehi viainti nahenti kahaqi varianarave, Kotiva mintianarara ariara iriharо quahesaroma vaiyo.

⁵ Ho vaiintinavu nititaira vika Jopaqihai vaiinti vo, vira autu Saimoni Pitaara oru vitake aniate. ⁶ Pitaava vaiinti vontiro vaivo. Vi vaiintiva Saimoniva purumakau pahaqohairo kaiga vare vaiva, viva nai naavuqi vetara nora varuva auvahini vaivo, tiro.

⁷ Minti tivakero *enselivan* vuvaro Koniriasiva viva tuntema kero, nai naavuqi kaiqavarovaltta naarama kero iqoka vaiinti vo, viva Kotira aare vau vaiintira nai kahaqivau vaiintira viravata aarama kora. ⁸ Koniriasiva vi vaiintinavuka naarama kero vaakataira voqaara tavorara vinavuka tiva nimiro ho vinavuka Jopaini nititora.

⁹ Nititomanta vinavuka vivi, vira qararaa aarana vi vauvaro Jopa vatukavano aumanto vauvaro Pitaava Jopaini vaiharo kuari avu qiataqaa uri vuvaro viva Kotira aarareva naavu qiata tanuqira vaarirero vaura.

¹⁰ Mini vaiharo karara antuqa aruvaro viva kara qera iainara veka vaiharo Pitaavavata qaqi vaiharo taira voqqaara tavero.

¹¹ Pitaava taira voqaara tavovaro naaruuvavano qantua vuvaro viraqihairo tavunauta, taari voqaara hini viti hini viti tota varero tuvuqata tuvuqata tiro tuvurora.

¹²Tavuna virauta tutamaqiro tuvuvaro Pitaava tavovaro tavuna vi kanta vo aantau vo aantau vahi vaura. Quarave, memaruve, uvirive, vi haikava vi haikava tavuna vi kanta vauvaro ¹³ uvavano Pitaarara tiharo, Ho himpira vi haikara vi haikara arukera naane, tiro.

¹⁴ Minti tuvaro Pitaava aqao tiro, Noravauvo, kiave. Te tentanavu maara okarara irihama vi haikarara qora haikave tivakeha kia nauna haikarave, tiro.

¹⁵ Minti tuvaro uvavano qaiqaa tiharo, Kotiva koqe haikave tina haikara, kia are virara qora haikave tiane, tiro. ¹⁶ Tuvaro Pitaava vohaa taira voqaara viraqai taaramo tataa tavovaro viraqaaahairo tavunautavano tuvurantero naaruvaini vura.

¹⁷ Mini vuvaro Pitaava taira voqaara tavora vira okarara aato tara iharo vaumanta Koniriasiva nitito vaiintinavuka vi vatukara mini amire Saimonira naavu rantake oru

vi naavura qentiana vaiha¹⁸ aareha tiha, Saimoniva vira autu vo Pitaarave tiava, maa naavuraqie vaivo? ti.

¹⁹ Ho minti tuvaro Pitaava naavu qiataqaa vaharo viva taira voqaara tavorara aato tara iharo vauvaro Kotira Maraquravano vira tiva amiro tiharo, Tavaane, vaiinti taaramon-avu ai rantareka vetaihai aniamo. ²⁰ Ho himpira otu vinavuka ntita kera kia qetaratira, vinavuka hampata qaqi vuane. Tema vinavuka vetaihai maini nititauramanta ai vitareka aniamo, tiro.

²¹ Minti tuvaro Pitaava vi vaiintinavuka ani vaunaini oturero tiharo, Nenavu rante varia vaiintika te maa vikave. Nenavu nanarae maini aniamo? tiro.

²² Tumanta vinavuka tiha, Vetaini vaiinti vo Koniriasiva, viva 100 iqoka vaiintiqaa raqiki vaivave. Viva avuqavu ni vai vaiintiva Kotira autuqai tuahere vaivave. Mintimanta ekaa Iutaa vaiinti virara koqe vaiintive ti variarave. Ho vi vaiintiva tinavu maini tititaimanta anuro. Koniriasiva vaivarotu Pitaava tivavaro vira tiva amiro tiharo, Are Pitaara aarairaro viva ai naavuqi ani vairara are vira uva iriane, tirave. „Minti tivakero enselivano vivaro Koniriasiva tinavu maini tititaimanta anuro., ti.

²³ Vinavuka minti tuvaro Pitaava tiharo, Ho maaqi ti hampata vaitaiqe huranavu vuare, tiro. Tivake vaite vira qararaa Pitaava himpiro vinavuka hampata yumanta Ihura vainti vonavu Jopaihainaakavata Pitaara vataake vura. ²⁴ Pitaava vinavuka hampata oru viro aarana vaitero vira qararaa viva vetara Sisariaini orurero tavovaro Koniriasiva vira veka vaharo nai navunaakavata nai tontinavuvata naaromanta vikavata Pitaara veka vaura.

²⁵ Vika vira veka vauvaro Pitaava orurero naavuqi origetovaro Koniriasiva oru vira vitakero vira avuqaa hiqiri viro vataini vaharo Pitaara autu tuahere vaura. ²⁶ Viva Pitaara autu tuahere vauvaro Pitaava tiharo, Aqao, kia ti hutu tuaheraane, tivakero Koniriasira vara himpimakero vira tiva amiro tiharo, Himpira variane. Kia te variqavauve. Te qaqi vaiintima vauro, tiro.

²⁷ Ho Pitaava Koniriasikantiro uva tivaqiro vaharo naavuqi origetero tavomanta airi vaiinti nahenti naavu viraqiqi vauvaro²⁸ Pitaava vikara tiharo, Nenavu iriarave. Tenavu Iutaa vatanaaka vauraro tinavu uva maara okaravano qioqama taimanta kia tenavu vo vatanaaka hampata variqi vi vaunarave. Kia vika naavuqvata origete vaunarave. Tenavu tiha, Vika vaaqu okaravano tinavu ravaaqavu kairage tenavu kia koqemavi variarorave, tihai tenavu tentanavuqai variqi vi vaunarave. Ho tinavu Iutaa maara okaravano mintima qioqama taivar, viraqaahairo Kotiva vo okara tairaqaahairo ti humiqaivaro ti aatovano kenko timanta te irunarave. Kotiva kia vo vatanaakara qora vatanaakave timanta tevano vikara qora vatanaakave tiarorave. Hauri te tiha, Vo vatanaaka hampata variainaqahaairo vo haikavano ti qoraiqama timitaanarove, tiarorave.

²⁹ Kotiva mintima kero ti tiva timimanta viraqaahai ne vo vatanaaka ti haaraamanta kia te taara aato iriha mini vairaiti, te vaakama ne ianaini anunarave. Ho nana haikarae ne ti haaraavo? Ne tige iriare, tiro.

³⁰ Pitaava minti tuvaro Koniriasiva vira tiva amiro tiharo, Tuvana taara enta aitarovaro maa kuari avurqaqa 3 kiroki eronaini te tenta naavuqi vaiha Kotira aare variavauraro vaakama ti tivuqaa vaiinti vovano qovarama viro himpiro vaurave. Vira utavaaqavano takuqiro vauva³¹ viva tiriara tiharo, Koniriasio, are Kotira aare variana uvarave, are vehi vaiinti nahenti kahaqiqi varianarave, Kotiva virara iriharo ariara quaheharoma vaivo.

³² Ho vaiinti vonavu vetara Jopaini nititaira vinavuka vainti vo, vira autu Saimoni Pitaara oru vita vare maini aniate. Pitaava vaiinti vontiro vaivaro vi vaiintira autu Saimonirave. Viva purumakau pahaqhahairo kaiqa vare vaiva vaivaro vira naavuvano nora varuva namari avuhini vaivo, turave.

³³ *Enseli* viva minti tivera te tota oru ai vita kaate ti vaiintinavu nititairo. Te vinavuka nititauramanta oru vuavarama are tiriara tira anira iarao. Ho Kotiva tave vaimanta tenavu maaqiqi ruvaqumavu vauro. Ho Noravano ariara vika maa uvvara tiva nimiane ti uvvara are vi uvvara tinavu tiva timiraqe tenavu iriare. Tenavu ai vekama vauro, tiro.

Pitaava vika uva tiva nimura

³⁴ Koniriasiva minti tuvaro Pitaava tiharo, „Te tuvana taira voqaara tavaunaraqaahairo, vate ti aato kenko timanta te iruraro Kotiva kia vi vatanaa vi vatanaaka okarara noraiqaakero iri vairave.“ ³⁵ Ho nai ta vatanaavave vira uva iriqiro vaharo avuqavu nira vaiintiva vairaro Kotiva vi vaiintirara noraiqaakero iriharo virara quaheharo varianarove.

³⁶ Ho Kotiva Ihu Karaitira atitovaro viva tenavu Iutaa vatanaakave, Isareru vatanaakave, vaunananini ani variqiro vaharo Kotira koqe vakaaka vaiinti nahenti

maateraiqiha variate ti uvvara viva tinavu tiva timurave. Ihu Karaitiva ekaa vaiinti nahenti vika Nora Vaiintivano, vivama vi uvvara tinavu tiva timimanta tenavu irunarave.

³⁷ Nenavuvata vi uvvara iriarave. Vi uvava maantimama vaivo: Hoqarero Ioniva vaiinti nahenti namari nimiharoma Kotira uva vika tiva nimuvaro viraqaahairo Ihuva Karirini nai kaiqa hoqarama tero nora kaiqa varaqiro viro Iutiainiyata vi kaiqara varaqiro vurave.

³⁸ Kotiva noraiqamako vaiinti Ihuva Nasaretihainaava vauvaro Kotira Maraqurvano vira kempukaiqama kovaro viva vi aniharo vaiinti nahenti nihavuka kojema nimitaqiro vurave. Kotiva vira kahaqi vauvarora tiro, viva Sataaniva rumpato vaiinti nahentika kuvantu komanta vika ho vaurave.

³⁹ Tenavu vira vaintinavu vira vataake variqi viha ekaa viva Iutia vataaini kaiqa varorava, Ieruharemini kaiqa varoravata, ekaa tavaavaunaruva. Ho vika vira katariqaa aruke hiritovaro qutu vurave.

⁴⁰ Viva qutu viro taaramo enta vara kovaro Kotiva vira vara qaqi himpima kovaro viva qaqqaa qaqi himpurave. ⁴¹ Vi entara kia ekaa Iutaa qaqi qumina vaiinti nahenti vira tavorave. Vaiinti nahenti tiva nimiata tiro, Kotiva tinavu haaramatainavuka, tenavuqai vi entara vira tavaavaunaruva. Ihuva qutu vuraqihairo qaqqaa qaqi himpimo vaumanta tenavu vira vataake vahia karavata namarivata naavaunaruva.

⁴² Ho Ihuva tinavu tititeharo uva tinavu tiva timimanta tenavu maa vi vakaakara, koqe vakaaka vaiinti nahenti tiva nimi vaunaruva. Kotiva noraiqama kaiva Ihuva, vivama ekaa vataaini qaqi variakave, qutu vuakave, viva vika uva uteteharo *ko* tianarove.

⁴³ Haaru paropeti vaiinti ekaa vika Ihura okarara tihama mintima ti: Vira autuvano nora autu vaivarora tiro, viva virara ququa vivave ti vaiinti nahentika vika uvavata nunka nimitaanarove turave, tiro.

Qaqi qumina vatanaaka Kotira Maraqurvana varora

⁴⁴⁻⁴⁶ Pitaava vika qaqqaa tiva nimiqiro vi vauvaro Kotira Maraqurvano Pitaara uva iri vau vaiinti nahentikaqaata tuvuntomanta viraqahai vika vo uva vo uvaqihai tivaqiqi viha Kotira autu tuahere vaura. Minti vaumanta Ihura vainti vonavu, vinavuka Iutaa vatanaa vaiintinavu Pitaara vataake Jopaihai anuka, vinavukavata viraqiqi vahia tavovaro Kotiva nai Maraqurvana vo vatanaa qaqqaa vatanaaka nimumanta vika aahuva uva vo uva vo uvaqihai Kotira autu tuahere vaumanta Iutaa vaiintinavu virara voqamake ravuku vuvuro viraqahairo Pitaava tiharo, ⁴⁷ Maa vaiintinavuka tenavu varauantemake, Kotira Maraqurvana varavaao. Tavave namari varera qioqama taanarove? Homa vikavata namari varevarave, tiro.

⁴⁸ Minti tivakero viva tiharo, Ihu Karaitira autu rehama namari vika nimiata, tumanta vika namari nimura. Namari nimumanta vi vatanaaka Pitaarara tiha, Vo entanavu tinavu hampata maini varikera vuane, tuvaro Pitaava vo entanavu vika hampata mini vaura.

11

Pitaava oturantero Ieruharemini urura

¹ „Pitaava Sisariaini vaumanta“ Ihuva noraiqama konavukavata, Ihura vainti Iutia vataaini vaukavata, irumanta vo vatanaaka kia Iutaa vatanaaka Kotira uva iriha Ihura vaintiqama vumanta „vira kaara Iutaa vaiintinavu Ihura vainti hininavuara nuntu naantu ti vaura.“

² Pitaava oturantero Ieruharemini ururomanta vika hininavu vaata toqako okarara iruka Pitaara atiha tiha, ³ Aqao, kia tinavu vaata toqa kaaina okarara iria vaiintika variavara are vika naavuqi oriqetera vika hampata kara nera ianarave. Are kia mintiataarave, ti.

⁴ Minti tuvaro Pitaava vi uvvara okaraqaahairo hoqaramatero tiharo, ⁵ Te Jopaini Kotira aare vahia taira voqaara tavaunaruva. Te tave variavauraro tavunautavano naaruvaihairo tuvurave. Vi tavunara hini hini vitiqaa totaqiro tuvuqata tuvuqata tiro, te iavaunaini tuvuromanta ⁶ te tavaavauramanta tavuna viraqaatama quarave, aantauve, memaruve, uvirive, ekaa vi haikara vi haikara vi haikara arukera naane tumanta ⁷ uvavano tiriara tiharo, Pitaao, himpira vi haikara vi haikara arukera naane tumanta ⁸ te tiha, Aqao, Noravaavo, kia te ho mintirarave. Te tentanavu maara okarara irihama kia kojemakero vai haikarave, qoraiqamakero vai haikarave, kia nauna haikarave, ⁹ tiavauraro uvavano naaruvaihairo qaqqaa tiriara tiharo, Kotiva koqe haikave tinara kiama are vi haikarara qora haikave tiane, turave.

¹⁰ Minti tumanta te mini vahia vohaa qaramake taira voqaara taaramo tataa tave iavauraro viraqaahairo qaqqaa vi tavunara naaruvaini tuvurantero varero vurave.

¹¹ Mini vumanta te tavaavauramanta vaiinti taaramonavu vo vatanaa vaiintinavu Sisariaihairo nititoka ti tivita kareka te variavauna qentiana orurovaro ¹² Kotira

Maraquravano tiriara kia qetehara vinavuka hampata vuane tumanta te vinavuka hampata vuavauramanta vaiinti vonavu Ihura vainti 6navu Jopaihainaaka ti vataake vumanta tenavu Koniriasira naavuqi oru raavauraro¹³ Koniriasiva mintimakero tinauv tiva timiro tiharo, *Enselivan*o ti naavuqi qovarama viro tiriara tiharo, Vaiinti vonavu nititaria vinavuka oru vaiinti po vira autu Saimoni Pitaara vita kaivarо¹⁴ viva maini anirero arivata ai navunaakavata vakaaka tiva nimiramanta ne vi vakaakara iriqi vivaro Kotiva ni ntitaarire, turave.

¹⁵ Minti tumanta te viraqi vaiha vakaaka qaqqiqai vika tiva nimiavauraro Kotira Maraqravano haaru tinavuqaa tuvintema kero vikaqaavata tuvuntorave. ¹⁶ Mintuvaro haaru Ihuva Noravano uva tinavu tiva timito uvava ti aatoqi ntuvu vurave. Haaru Ihuva tiharo, Ioniva namariqai ni nimivo. Ho naantiara Kotiva nai Maraqravata ni nimianarove, turave.

¹⁷ Tenavu Iutaa vatanaa vaiinti vaiha Ihurara quqaama viva Kotira Nora Vaiintive turaro Kotiva nai Maraqura tinavu timintema kero, viva vo vatanaakavata vohaa qarama kero nimirave. Ho Kotiva mintima kero nai Maraqura vo vatanaakavata nimirara ti, te ta vaiintika vaihae te Kotira qioqama kararave? tiro.

¹⁸Pitaava vi uvara vika vutukero tiva nimumanta vika tirorira uva qaquirake Kotira autu tuaherake tiha, Ike, Kotiva kia tinavuaraqai iriraitiro, viva vo vatanaaa vo vatanaakaravata iriharo tiharo, Vikavatama nái qora aara qaqira kaivera, vika ekaa enta ekaa enta qaqi variqi vivarave, tivo, ti tura.

Ihura vaintinavu vo vataini vo vataini vura

¹⁹ Ho Sitivenira aruke Ihura vaintinavu qoraiqama nimiteha raumpirima ko entaraqaahai Ihura vainti airitahaavano vo vatuka vo vatkaini vura. Hininavu niaraini otu vi Fonisia vatainive, Saiparusi vatainive, vatuka vo Antiokinive, otu vaiha nai navunaaka Iutaa vatanaakaqai Ihura vakaaka tiva nimi vaura.

²⁰ Vika nái Iutaa vatanaakaqai tiva nimi vaumanta vokuka Saiparusihainaakavata, Sairinihainaakavata, otu Antiokini vaiha vo vatanaakavata vakaaka tiva nimihā Nora Vaiinti Ihurara tiva nimuvuro ²¹ Noravano kahaqumanta airi vaiinti, Giriki vatanaaka-vata nái haarua okara qaqrake tuqantaavi Nora Vaiintiara quqaa vivave tura.

²² Mintumanta Ihura vaiinti Ieruharemini vauka irumanta vi vatanaaka airi vaiinti Ihura okarara iriha Kotira aaramaqi vi vaumanta Ieruharemini vauka Banabaasira atitovaro vika kahaqireva vevara Antiokini vura.

²³ Outero tavovaro Kotiva vi vatanaaka aaqurihama nimiteharo vika kahaquvaro Banaabaasiva quahakero vikara kempukaiqama kero tiharo, Ho ne Nora Vaiinti Ihuraraqai aato iriqi viha nuate, tiro.

²⁴ Banabaasiva koqe vaiintivano vauvaro Kotira Maraquravano vira avutaqi anomakero vauvaro Banabaasiva voqamakero Ihura uva iriqiro viharo viva airi vaiinti kahaqumanta vika Nora Vaiinti Ihura vaintiqama vura. ²⁵ Banabaasiva Antiokihairo oru Tasusini Sorura vita kareva viro ²⁶ oru vira rantakero vita varero Antikini vura. Mini vahatanta vitanta Ihura vaintinavu airitahaa ruvaaqumake vohaa ihiara uva vakaaka vika tiva nimiqi vura. Antikini vau vaiintikaqaa naane hoqaramate Ihura vaintinavuara *Kirisitenive* tura.

²⁷ Ho vi entara Ieruharemihai paropeti vaiintinavu Antiokini otu vauvaro
²⁸ vikaqihairo vaiinti vovano vira autu Agabusiva himpiro Kotira Maraqruravano
 vira kahaquvaro viva vakaaka tiva nimiro tiharo, Naantiara ekaa Romeni kamaaniva
 raqikina vata maatara karara nararaiqi entava qovaraqianarove, tiro. (Vi vaiintiva tu
 uvaya King Kalodiusiya raqiki vau entara vivauma vaura.)

²⁹ Agabusius kia kara ho variaina entava aniraanarave tumanta Ihura vaintinavu avu aato utiha tiha, Kaiqe tenavu ekaa monu vohaanta vohaanta ruvaaqumake vare, vuru tinavu qata vakaukavara Iutiaini variaka nimiare, ti. Minti tivake airi monu vatoka airi monu ruvaaqumake vatomanta inaara monu vatoka inaara monu ruvaaqumake vate, ³⁰ mintiaqi viha vika monu ruvaaqumake vate, vi monura vare Soruravata Banabaasiravata nimumanta vitanta oru Ihura vaintiqaa raqikuka Iutiaini vauka vuru nimura.

12

Herotiva Ihura vanti hininayu goraiigama nimitora

¹ Vi entara King Herotiva Ihura vainti vonavu qoraigama nimitareva auti vaura.

² Herotiva tumanta Ionira vakaara Iemira ravaaqavuke iqoka paipeqohai vira aunta teqakora.

³ Iemira aunta teqa kovaro Herotiva tavomanta Iutaa vaiinti noranavu Ihura vainti vo arukorara quaheha vauvarora tiro, viva oru Pitaaravata ravaaqavu kora.

Vi entara ovata vo, Kia Noqavu Mparetira No Entava vauvaro ⁴ Herotiva Pitaara ravaaqavu kero karapuhi naavuqi vita vuru kero viva Pitaarara karapuhiqihairo ruqema kero vuantorave, tiro, viva iqoka vaiinti 16navu rairakero tiharo, 4navuvano naane viraqaa raqikiqi vi, tutitaraimanta qaiqaa hini 4navuvano viraqaa raqikiqi vuate. Mintiaqi vuate, tiro. Herotiva tiharo, Vehakuma Nimito Karara ovata naaina entava taiqa viraque te Iutaa vaiinti noranavu vika nivuqaa Pitaara qovaramake *ko* tirerave, tiro.

⁵ Minti tuvaro Pitaara karapuhi naavuqi rumpa tovaro vaumanta Ihura vaintinavu vo naavuqi ruvaaqumavi vaiha Kotiva Pitaara kahaqiarire ti, Kotirara mpo ike tiha vira aaramaqi vi vaura.

Pitaara kuvantu kora

⁶ Pitaava karapuhiq variqiro vuvuro Herotiva tiharo, Hura te vira *ko* tirerave, tuvaro Pitaava entaqi vaite vaumanta iqoka vaiinti taaraqanta vira hini hini vauvaro Pitaara seniqohairo vitanta kauqu hampata rumpa tovaro vaumanta iqoka vaiinti votantavano vahaqaini qentiana raqiki vaura.

⁷ Mintima vauvaro vaakama Noravano atito *enseliva* Pitaara avuqaa qovarama viro himpitero vauvaro naavuqi ataa i vauvaro *enseli* viva Pitaara kururu utu varero qakiharo vira vauraqama kero tiharo, Tota himpuane, tuvaro viraqahairo *senivano* Pitaara kauquqihairo hiqirura.

⁸ Hiqiruvaro *enseli* viva tiharo, Nena utavaaqqa nonku varera suvata nonkuane, tiro. Tuvaro Pitaava tuntema kovaro *enseli* viva tiharo, Ho nena vukai tavunavata aqu varairaqe tetanta vuare, tuvaro ⁹ Pitaava *enseli* vira avataqiro viro karapuhi naavuqihairo vevarero viro. Mini viharo nai tivakero iriro tiharo, Kia te ququaavuve vi vauro. Te tairama tave vauraro ti maraquravanoma vi vaivo, tiro.

¹⁰ Minti tivakero Pitaava *enseli* vira avataqiro viro maimaraara vaiintitanta naatara kero viro, vo maimaraara vaiintitavata qentiana vautanta naatara kero vahaqaini otu viro, vaantaavura genti nora, *aini* genti tinta tonaini otu rovaro vi qentivavata nai quantua vumanta vitanta viraqihai vevare aaraqaa vura. Otu vihatanta uvapo vaakama *enselivano* Pitaara mini kero vura.

¹¹ Vuvaro Pitaava nariaraa vauvaro viraqahairo vira avu aatovano kenko tuvaro viva tiharo, Ike, te ququaama tuvuro. Ququaama Noravano nai *enseli* atitavaro viva ti kahaqihairo Herotiva ti karapuhi rumpa tairaqihairo qantu kaivo. Iutaa vaiinti ti qoraiqama timitareka auti variavaro viva ti kahaqama timitaimanta tuvuro, tiro.

¹² Pitaava nai aatoqi mintimakero iriqiro viharo oru naavu vo, Ioni Maakira vira nora Mariara naavu, viraqiqi airi vaiinti nahenti ruvaaqumavi vaiha Kotira aare vauraqi orurora.

¹³ Pitaava orurero genti kuekue uvapo kaiqa nahenti vovano, vira autu Rodaava genti quantua kareva anirero ¹⁴ Pitaara aunta viraqama kero iriro, viraqahairo viva voqamakero quahakero, qumimaqama kero kia genti quantua karaitiro, viraqiqi ruvaaqumavi vauka vuru tiva nimiro tiharo, Pitaava ani vahaqaini qentianama vaivo, tiro.

¹⁵ Minti tumanta vika tiha, Eqaane, ai avu aato hampiqama vivarama vi uvapo tira iarao, tuvaro viva kempukaiqama kero tiharo, Te ququaama turo. Viva vahaqaini qentianama ani vaivo, tumanta vika oho ti, Pitaara arukaavaro *enseli* vovano viraqata raqikiva, vivama qentiana ani vaivo, ti.

¹⁶ Minti tuvaro Pitaava qaiqaa qaiqaavata genti kuekue i vaumanta vika genti quantuake tavoparo viva ququaama ani vaumanta vika voqamake ravukuvu vauvaro ¹⁷ Pitaava nai kauquqohairo vika qioqama keharo kia uva tiate tiro. Tivakero Noravano karapuhi naavuqihairo nai kahaqu okarara viva vika tiva nimiro. Vika tiva nimikero Pitaava tiharo, Ho Iemiravata, tinavu qata vakaukavata, vi uvapo tiva nimiate, tivakero viva vo naavuqi vireva viro.

¹⁸ Ho Pitaava vumanta vira qararaa aatita vumanta iqoka vaiintinavu Pitaaraqaa raqiku vaiintinavuka tavoparo Pitaava kia karapuhi naavuqi vaumanta vinavuka voqamake ravukuvu qumina virara rantaqi vi aninha tiha, Oho, Pitaava nantia keroe ruqema kero vivo? ti. ¹⁹ Minti tivakero vuvuro Herotiva virara ranteha tavaate tumanta vinavuka virara qumina rantamaqi viha tavoparo kia vauvaro Herotiva vi iqoka vaiintinavukaqaa nora uva vatero *ko* tivakero Pitaava ruqema kero vura kaara vinavuka ekaa arukora.

Vinavuka arukero Herotiva Iutia mini kero otu Sisariaini vaireva vurama.

Herotiva qutu vurara tura

²⁰ Herotiva Sisariaini otu vaiharo Taiaihainaakavata, Saidonihainaakavata, hampata tirori vaiharo vika toma nimite vaumanta vi vatanaaka vi uvapo avuqavu ireka Herotiva

vaunaini anura. Vika mini vaiha King Herotira kaiqa vaiinti vo tontiqama kovaro vi vaiintira autu Balatusiva Herotira kaiqa vaiinti noravano vaumanta vika vira tontiqamake vira tiva ami tiha, Tenavu maateraiqihā vairerave. Hauri tenavu tiroriha maaqihai kara kia varaarorave, tuvaro Balatusiva Herotira vi uvara tiva amura.

²¹ Vira tiva amuvaro Herotiva enta vo kaamatero tiharo, Vi entaraqaa vi uvara avuqavu irerave, tivakero viva vi entaraqaa avuhainaa vaiintivano vahai nai utavaaqā koqera nonkutero oru nai nora tainta, avuhainaa taintaqaa oquivi vahairo vi vatanaaka uva tiva nimi vaumanta „vika viva utataari koqera nonkutore taveha, vira uvavat iriha, voqamake virara quahakema naverai tivaqī viha Herotirara tiha,²² Viva kia qaqi vaiintivano vahairo uva ti vaivo. Viva variqa vaiintivanoma uva ti vaivo, tuvaro²³ Herotiva vikara kia aqao Kotivagai Variqavano vaivo tiraitiro, viva ne quqaave minti tiavo tuvaro, vira kaara vaakama Noravano atito *enseliva* vira ruqutu kovaro iviruqavano vira vaata nama kovaro viva qutu vura.

²⁴ Herotiva qutu vumanta Ihura vaintinavu Kotira uva tivaqī vumanta airi vaiinti nahenti vi uvara iriqi viha Ihura vaintiqamavi vira vaintinavu hampata avitumavi vohaaraqī vaura.

²⁵ Banabaasika Soruka monu nimitora vare Ihura vaintinavu Ieruharemini vauka vuru nimi, viraqaaahai vitanta vaiinti vo Ionira vira autu vo Maakiravata vita vare orurante Antiokini vura.

13

Banabaasika Soruka vo vataini nititama kora

¹ Antiokini Ihura vaintinavuqihai vonavu paropeti vaiinti vaumanta vonavu Kotira okara vo okara vo okara tiva nimi vauka vaura: Banabaasivave, Simioniva vira vara autu Vankorarave, Lusiusiva Sairinhainaaavave, King Herotira vara qata Manaenivave, Soruvave, vinavukia kaiqara vareha Ihura vaintinavu kahaqamaqī vi vaura.

² Vo enta vika Kotira autu tuaherareka iha, vika ruvaaqumavi vahai kara auramate Kotira aare vauvaro Kotira Maraqravano vika tiva nimiro tiharo, Banabaasika Soruka vo kaiqa varaate ti, te vitanta naarama tauro. Ho vitanta ti kaama timitate, tiro.

³ Kotira Maraqravano minti tumanta vika qaqiqa kara auramate Kotira aaramake, viraqaaahai vika vitantaqaa nai kauqu vate vitanta vo vataini nititonmanta vura.

Vitanta Saiparusini vura

⁴ Vitanta nititovaro Kotira Maraqravano vitanta aara numiqomanta Banabaasika Soruka vatuva vo Serusiaini vi oture viraqaaahai nora *sipiqa* vaarire varuva namari taqa vare varuva avuitaini vauvatara Saiparusini vura.

⁵ Vi vataraaqā orure vitanta oru vatuva vo Salamisini Iutaa vatanaa vaiinti maara naavuqi vahai Kotira uva vika tiva nimura. Ioni Maakivavata vitanta kahaqireva vitanta hampata vura.

⁶ Banabaasika Soruka Saiparusini vatuva vatuva nihatanta vakaaka tivaqī nimiqi vi, oru hini mantaraini vatuva vo, Pafosini orure tavovaro *vure/quaha* auti vau vaiintiva vovano mini vaura. Vira autu Ba-Ihuva viva Iutaa vaiintivano nai unahaa tiharo, Te Kotira vakaaka tiva qovaramake vauraukave, tiro. ⁷ Minti tiharoma viva *kamaanira* nora vaiinti tontiqama tero vaura. *Kamaanira* nora vaiinti vira autu Segiusi Paulusiva viva koqe avu aato vataa vaiintivano vahairo, viva Kotira uva irireva Banabaasiravata Soruravata naarora.

⁸ Viva vitanta naarovaro Ba-Ihuva vira vara autu Vureva, vivavata vahairo nora vaiintiara kia vitanta Ihurara ti vai uvara iriane tura. ⁹ Minti tuvaro Soruva vira autu vo Poruva Kotira Maraqravano vira avutaqī kempukaiqama amitovaro viva *vure/quaha* vaiinti vira taveharo virara tiharo, ¹⁰ Are Sataanira vaintivanove. Ekaa koqe haikavano vaivaravata, are vira navutaaavama variarao. Una uvave, vaauq kaiqave, vi haikavaqaima ai avu aatoqima vaivo. Are Kotira uva vo okara vo okarara hampi uva ti variaravave. Hampi uva qaqira kaataara vaivara are qaqiqa vi uvara ti variarao. ¹¹ Ho iriane. Noravano ai ruqutu kairaro ai avuvano qimpa vuarire. Viraqaaahairā are huravata moravata variqira vihara kia kuari ho tavenarave, tiro. Minti tuvaro Ba-Ihuva tavovaro vira avuvano konkiraqama vuvaro viraqaaahairo viva aaraini vihara tiharo, Ti kauqu utu vare aara humiqaate, tivaqiro vi vaura.

¹² Poruva minti tuvaro Ba-Ihuva avu qimpa kovaro *kamaanira* nora vaiintivano vi haikara tavero, viva Poruka Banabaasika tu uvarara quqaave tivakero kauqu runkinkiri iharo Nora Vaiinti Ihura uvara koqe uvave tura.

Vata vo Pisiriaini vura

¹³ Poruvavata vira vataake anukavata Pafosi mini ke, *sipiqi* oru vi Pampiriaiini vatuka vo Pegaini orurora. Mini orurovaro vikaqihairo Ioni Maakiva vika mini kero orurantero Ieruharemini vura. ¹⁴ Viva vumanta vinavuka oru vi Pega vatuka vara mini ke, Pisidia vataini oru vi vo vatuka Antiokini orure mini vaiha Maara Entaqaa vinavuka oru Iutaa maara naavuqi oriqete oquivi vaura. ¹⁵ Vi vatanaaka Mosiva qara ntuvato uvvara kaara riha paropetivano qara ntuvato uvaravata kaara ntuvake, viraqaahai maara naavuqaa raqikuka vaiinti vo atitovaro viva vinavuka irero tiharo, Tinavu qata vakaao, tinavu kahaqiarira vakaakava vairera, ne tinavu tiva timiqe iriarte, tiro.

¹⁶ Minta tuvaro Poruva himpiro kauqu virini aqukero vika tiva nimiro tiharo, Isareri vaiinti nahentivauvo. Ne vo vatanaaka Kotira autu tuahere variaka nevata iriate.

¹⁷ Kotiva Isareri vaiinti nahenti Variqavano, viva haaru tinavu kaivaqaukavarara tiharo, Ne ti vaiinti nahentima vaivarave, turave. Viraqaahairo ti kaivaqaukavara Isipini vau entara Kotiva vika kahaqi vaumanta vika airiqama vuvaro viraqaahairo Kotiva nai kempukaqohairo vika Isipihairo ntita varero ¹⁸ vuru komanta vika 40 ihi variqi viha qumina vataini nuvaro Kotiva kia vika qaqlira karaitiro, vikaqaa koqemakero raqikiqiro surave.

¹⁹ Mintiaqiro viharo vika kahaqumanta vika Kenaanini vi aninha nái navutaaka 7 vatanaaka aru taiqa kovaro Kotiva Kenaani vata vira tinavu kaivaqaukavara nimumanta 20 vika vi vataraaqaa 450 ihiara variqi surave.

Vi entara Kotiva tinavu kaivaqaukavararaqaa raqikiate tiro, vo vaiinti vo vaiinti noraiqamake vaumanta vika vahia Isareriaqaa raqikiqi vi vaura. Mintiaqiro vi vauvaro Samueri vau entavataqo qovaraiqama surave. Kotiva Samuerira noraiqama kovaro viva Kotira uva tiva nimi vaumanta ²¹, viraqaahai tinavu kaivaqaukavara popohamavi Samuerirara aqao ti, Vaiinti vo noraiqama kairaro viva avuhainaa vaiintivano vahiaro tinavuqaa raqikiarire, tuvaro, Kotiva vika uvvara eo tivakero Benaminira ankuqihairo vaiinti vo, Kisira maaqu vira autu Sorura nimuvaro King, Soruva 40 ihi variqiro viharo tinavu kaivaqaukavararaqaa raqikiqiro surave.

²² Viraqaahairo Kotiva Sorura qoririma amitero Devitiva vika avuhainaa vaiintivano variarire tiro, vira noraiqama korave. Kotiva Devitirara quaheharo mintima tiro: Ti muntukavano Iesira maaqu Devitirara vaivo. Viva ti muntukavano vaina kaiqara homa vara timitaanarove, turave.

²³ Kotiva tiharo, Devitira okaraqihairo Isareri vatanaaka kuvantu nimitaarira vaintiva qovaraiqianarove, turave. Kotiva minti tu uva vaura Ihuva qovarama surave. ²⁴ Kia Ihuva nai kaiqa hoqararo entara Ioniva naveraitiharo Isareri vaiinti nahenti vika tiva nimiro tiharo, Qora aara qaqlirake namari varaaate, turave. ²⁵ Minti tivaqiro viro nai kaiqa taiga kaaina entava aumanta vauvaro Ioniva tiharo, Ne tiriara ta vaintirave tiavo? Ne *Mesaiaara* veka variara kia te maa vikavauve. Ho tavaate. Viva ti naantiarainima ani vaivo. Te qaqlira vaintivano vahiaro ti, kiama ho vira aiqo nonku taina naaquntara kuvantu amitararave, tiro. Ioniva Ihurara minti turave.

²⁶ Ho ne ti qata vaka Eparahaamira naintivaravata, ne vo vatanaaka Kotira autu tuahere variakavata, ne ekaa iriate. Tenavu kuvantuvi koqema variainarara iriharo, Kotiva tinavu maa uvvara vara kaivaro tuvivo. ²⁷ Ieruharemini variakavata, vikaqaa raqikiakavata, vo Maara Entaqaa vo Maara Entaqaa paropeti vaiinti qara ntuvato uvvara kaara rihavata, kia kankomake iriavaro vi uvava Ihurara tumanta vika Ihurara vira arukaateqai tuvaro, viraqaahairo haaru paropeti vaintivano uva tivatova vivauma surave.

²⁸ Vika Ihura arukareka auti vaiha tavovaro kia uva viraqaa vaumantavata, vika kempukaiqihai Paireataara vihi vaahi tiha vira arukaane turave. ²⁹ Viraqaahai vika Kotira vukuqi Ihurara minti minti ivarave tuntemake, vika Ihura mintima komanta katariqaa-hai vira viquke oriqi quntama torave. ³⁰ Quntama tovaro Kotiva qutu vuraqihairo Ihura qaqlira qaqlira vara himpima kovaro ³¹ Ihuva airi enta vataini ni vaumanta Karirihai Ieruharemini Ihura vataake vuka vira tavorave. Vika maa entaravata nái tavorara Isareri vaiinti nahenti tiva nimi variavo. ³² Tetanta Banabaasikavata vi vakaakara koqe vakaaka ni tiva nimirera anuraukave. Kotiva haaru tinavu kaivaqaukavara tiva nimiro tiharo, Naantiara niara ti, te minti minti irarave, tu uvava vate vivauma vaivo. ³³ Tenavu tinavu kaivaqaukavara naintinavu vauraro Kotiva tinavu kahaqireva Ihura qaqlira vara himpima kairave. Haaru Kotiva Ihu vuku Hini 2 viraqii Ihurara mintima tiro:

Are ti Maaquvanoma vaira iara. Vate te ai Qokama vauro, turave. (*Ihi 2:7*)

³⁴ Ihuva qutu vuvuro Kotiva vira qaqlira qaqlira vara himpima kovaro Ihuva kia qaqlira qutu viro nteria vuarivavama vaivo. Haaru Kotiva Ihurara maa uvvara tiva torave:

Te kauqu aiqiqaa aqukeha ni kaivaqara Devitirara tiavaunantemake, te nivata koqema nimiteha takuqina haikara nimitarerave, turave. (*Aisaiaa 55:3*)

³⁵ Ihi vukuqi vo uva maantima turave:

Are kia ti nena takuqi vaina vaintira vaata qaqi kairaro qumina nteraanarove. (*Ihi 16:10*)

³⁶ Devitiva tinavu kaivaqava Kotira kaiqa varaqiro viro vuru qutu vumanta quntama tovaro ntera virave. ³⁷ Ho Kotiva qutuvura qaqi vara himpima kai vaiintiva, Ihuva kia qumina ntera virave.

³⁸⁻³⁹ Ti qata vakaao, ne iriate. Ne qora kaiqa vare uvvara Ihuvaqaima ho taiqa nimitaanarove. Tetanta vi vakaakara ni tiva nimirera anuraukave. Ne Mosira uva iriqi viva kiama ne qora kaiqa vare uvvara ho taiqa nimiraitiro, vi uvava niqaa qaqiqaima vairamanta ne rumpaviqai vaiha kiama ho qaqini kuvantuvi vaivarave. Ihurara ququa vivave tirava, vivaqaima qaqini kuvantuvi ho varianarove.

⁴⁰ Ho ne rauriha variate. Hauri paropeti vaiintivano Kotira uva qara ntuvato uvava niqi variantorave. Vi uvava mintima vaurave:

⁴¹ Ne ti uvvara naaraihama timite vaiintika, ne maini tavaate.

Ne te vararer aina kaiqarara kauqu runkinkiri variqi viha vuru qutu vuante. Ne qaqi variqi vi entara te vararer aina kaiqara varaari ne vi kaiqarara kia ququaave tivarave.

Vovano vi kaiqara okarara yutukero ni tiva nimiramantavata, ne kia ququaave tivarave, tura. (*Hab 1:5*)

Kotiva mintima turave, tiro.

⁴² Poruva vi uvvara tiva nimo ritanta Banabaasika maara naavuqihai vire umanta vi vaiinti nahentika tiha, Ho netanta vo enta Maara Entaqaa qaiqaa ani vaiha vi uvvara voqavata tinavu tiva timiate, ti.

⁴³ Miti tuvaro vitanta uva tivaqiqi vuva taiqa vumanta airi vaiinti Iutaa vatanaa vaiinti, vo vatanaa vaiinti Iutaa maara okara irukave, Poruka Banabaasika avataqi vumanta vitanta vika uva tiva nimi tiha, Kotiva ni aaqurihamma nimitaaina uvvara iriqi vuante, tura.

⁴⁴ Miti tumanta vo Maara Entaqaa vi vatukaraqi vauka airitaha Kotira uva irireka ruvaaqumavi vaura. ⁴⁵ Ruvaaqumavi vaumanta Iutaa vaiintinavu tavomanta vo vatanaaka airitaha ruvaaqumavi vaumanta Iutaa vaiinti vira kaara toihia tiha, Hauri vo vatanaakavata tinavu hampata ruvaaqumavi vaivorave, tivake Poruva tu uvarara una uvave tivakeha virara qora uva tiva amite vaura.

⁴⁶ Miti ti vaumanta Poruka Banabaasika kia qetaraiti, kempukaiqama kehatanta tiha, Tetanta ni Iutaa vatanaaka naane vi vakaakara tiva nimuro. Tetanta vira homa minturo. Viraqaaahai tetanta tavauramanta ne vi uvarara qoririmake iavo. Ne ekaa enta ekaa enta qaqi variqi vi uvarara kia ni antuqa arimanta variavo. Vira kaara tetanta ni Iutaa vatanaaka qaqirake vo vatanaaka vi vakaakara tiva nimirerave. ⁴⁷ Noravano titanta titieharo mintima tivo:

Are vo vatanaaa vo vatanaaka kahaqira vika koqe aaraqaa vivaro Kotiva vikavata ntitaarire ti, te ovavano iteharo ataa inantemake, ai atitauro, turave. (*Aisaiaa 49:6*)

Noravano minti turave, tiro.

⁴⁸ Poruka Banabaasika minti tumanta vo vatanaaka vi uvarara quahake Nora Vaiinti Karaitira uvvara koqe uvave tura. Vaiinti nahentinavu ekaa enta qaqi variqi vuante tiro, Kotiva ntitaarirauka, vikama Poruka Banabaasika uva iriha Ihurara ququaave tura.

⁴⁹ Ho Nora Vaiinti uvavano ekaa vi vataraqi viro aniro umanta ekaa vi uvvara irura.

⁵⁰ Mintumanta Iutaa vaiintinavu tomake, vi vatanaaka nora nahentinavu Kotira autu tuahere vaukavata, nora vaiintinavuvata, una uva tiva nimilu vika vihi vaahi tumanta vika Poruka Banabaasika qoraigama nimiteha nái vataihai vitanta nititama kora.

⁵¹ Mintumanta vika nái qora okara vitanta autu nimitora kaara Ihuva noraiqamako vaiintitanta náitanta aiquqaaahai konkoma rintatike, vi vataro mini ke, vo vatuka Aikoniaini vurama. ⁵² Ho Ihura vaintiqamavi Antiokini vauka vauvaro Kotira Maraquravano vika kempukaiqama komanta vika muntukaqihairo quaheharo vaura.

14

Poruka Banabaasika Aikoniaini vaura

¹ Poruka Banabaasika Aikoniaini orure vitanta Antiokini tota untemake, oru Iutaa vatanaaka maara naavuqii naane vaiha uva kempukaiqamake tiva nimumanta Iutaa vaiinti nahenti airitahaavata, vo vatanaa vaiinti nahenti airitahaavata, Ihurara ququa vivave tivake Ihura vaintiqamavi vohaarraqi avitumavu vaura.

² Mintumanta Iutaa vaiinti vonavuvano kia Ihurara ququa vivave tuka oru una uvaqohai vo vatanaa vika avu aato vara hampiqama komanta vika Poruka Banabaasikara qora avu aato utu nimitora. ³ Mintumantavata, Poruka Banabaasika airi enta mini vaiha kia

getaraiti, Noravano vaiinti nahenti koqema nimitaaina vakaakara tiva nimiqi vuvaro vaiinti nahenti vitanta uvura quqaa uva vaivo tiate ti, Noravano vitanta kempukaiqama komanta vitanta nora kaiqa, vo kaiqa vo kaiqa vika nivuqaa varaqi vura.

⁴ Vi vatukaihainaaka rairavi hini kuka Poruka Banabaasikaini qumanta hini kuka Iutaa vaiinti vilkaini qura.

⁵ Viraaqahai vo vatanaakavata, Iutaa vatanaakavata nái nora vaiintinavu hampata Poruka Banabaasika qoraiqama nimitareka iha, ori utu vare vitanta ruqutireka auti vaumanta ⁶ vitanta vi uvura vaaka iri, viraaqahai vitanta ruqemake kante vetara Likoniaini oru vaura. Mini vaiha vatuka taaraqanta Lisatarainivata, Debenivata, vi vatukatanta ututumake vau vatukara mini minivata ⁷ oru niha, Ihura vakaaka tiva nimiqi vura.

Vitanta Lisatarainivata Debenivata vaura

⁸ Lisataraini vaiinti vovano aiqu rarera vuva oquiviro vaura. Vi vaiintira nova vatato entaraqaahairo vira aiqu rarera vuvaro kia ho nuarirava vaura.

⁹ Viva oquiviro vaiharo Poruva Ihurara ti vau uvara iri vauvaro Poruva vi vaiintiva Ihuva ququaama ti hiqo koqema timitaanarove tura iriro, Poruva vira viti taveharo ¹⁰ virara noraiqama kero tiharo, Himpira nena aiquqaa variane, tuvaro viva vaaka himpiro nai ni vaura.

¹¹ Viva nai ni vaumanta vaiinti nahenti ruvaaqumavi vauka Poruva vi kaiqara varora tave, vika nái Rikonia uvaqihai naveraitiha, Ike, naaruvhainaa variqatanta vaiinti kuquvi tinavu hampata vaireka maini tuvuraava, ti.

¹² Minti tivake vika Banabaasirara nai avuhainaa variqa autu vo ravateha *Seusirave* ti. Poruva uva ti vau vaiintiva vaumantara ti, virara variqa autu vo *Hemesirave* tura.

¹³ *Seusira* aare vau naavuva vatuka aaqaini vauvaro viraqaahairo *Seusira* kaiqa vara amite vau vaiintiva purumakau qoranavu ruhaaqi varero, maurakanaa auntaaqi ruvu nimiteravat varero aniromanta vaiinti nahenti ruvaaqumavi vauka purumakau Poruka Banabaasikara aru nimireka auti vaura.

¹⁴ Mintumanta vitanta vika nimire u okarara aato kenko tumanta iri, hauri vika mintivorave tivake, vitanta nai utavaaqa qunahi qaannahimake vaiinti nahenti ruvaaqumavi vauka avutana kantamaqi viha naveraitiha, ¹⁵ Mpo, ti vaiinti nahentivauvo, eqaate. Tetanta ni aanare qaqi vaiintitantaqaima vauro. Tetanta Ihura vakaaka koqe vakaaka ni tiva nimirera anuro. Ne una variqa qaqrake quqaa Variqa autu tuaheraate ti, tetanta maini anunarave. Kotiva qaqi variqiro vi vai variqava, vivaqaima naaruvavata, vatavata, nora namarivata autu kero ekaa haikavano vataaqi vairavata, naaruvaini vairavata, namariqi vairavata autu kero vatairave. ¹⁶ Haaru Kotiva ekaa vaiinti nahenti qaqi komanta ekaa vatanaaka nái vuataa u aararaqaqaqai vi vaurave.

¹⁷ Kotiva ekaa vatanaaka qaqi komanta vuvarovata, viva nai variqavano vai okarara ne kankomake tavaate tiro, viva vo haika vo haikaqohairo ni koqema nimeite vaurave. Viva aequo vara kaivaro koqema keharo rivaro karavano koqema kero qampiqeharo mpeqaiqimanta ne quahehama neha variavo, ti.

¹⁸ Poruka Banabaasika minti tumantavata, vaiinti nahenti mini ruvaaqumavi vauka kia vitanta uvura noraiqaake iriraiti, vitantara variqa vaintitantave tivake, purumakau aru nimireka auti vaumanta vitanta vukaari utiha kia mintiate tivaqti vumanta vika qaqrake kia aru nimitora.

Ori utu vare Porura aavata ruqutu kora

¹⁹ Vira naantiira Iutaa vaiinti vonavu Antiokihaiavata, Aikoniaihaiavata, anire vinavuka antua uva tumanta qaqi vaiinti nahenti vinavuka uva iriha quqaave tivake oru ori utu vare Porura aavata ruqutuke viraqaahai vika tiha, Ho vira ruqutu kauraro qutuma vivo, tivake vika vatukaihai Porura raraau vare vivi vaati aaqaini aqukora.

²⁰ Porura aaqaini aquke vumanta Ihura vaintinavu ani Porura tataaqa ututumavi vauvaro, viraqaahairo Poruva qaqi himpiro vatukaini oru viro. Vira qararaa viva Banabaasikantiro mini kero vatuka vo Debe mini vura.

Vitanta orurante Antiokinia anura

²¹ Vitanta Debeni ani vaiha Ihura vakaaka tiva nimi vaumanta airitaha Ihura vaintiqama vumanta viraqaahai vitanta orurante Lisataraini vi, Aikoniaini vi, Pisitia vatainai vau vatukara Antiokinivata vura. ²² Vitanta vo vatuka vo vatuka nihatanta Ihura vainti mini vauka vika muntuka kempukaiqama nimeiteha vikara vihi tiha, Ihuraraqai iriqi vuate. Tenavu Kotira vatukaini vuarirauka airi maara varaqi vihamo mini ho oru ntaainarave, ti.

²³ Minti tivake vitanta Banabaasika vo vatuka vo vatuka niha vaiinti noraiqamake tiha, Nenavu *elda* vaiinti vaiha Ihura vaintiqaa raqikiqi vuate, tivake vinavuka hampata vaiha kara auramate Kotira aareha tiha, Are maa vaiintinavuka Ihurara ququaave tia vaiintikaqaa koqema kera raqikiqira vuane, ti.

²⁴ Minti tivake vitanta Pisidia vata mini ke, vata vo Pampiria mini oturora. ²⁵ Vi vatara mini vaiha oru vatuka vo, Pekaini vaiha Ihura vakaaka tiva nimi, viraqaahai vitanta vevara vatuka vo Ataliaini oturora.

²⁶ Mini oture viraqaahai vitanta *sipiqi* vaarire nora namarivau oru vi, oqaraanaini Antiokini vura.

Tota Ihura vaintinavu Antiokini Kotira aareha tiha, Poruka Banabaasika kahaqira vitanta vo vatanaa vo vatanaaka vataini Ihura kaiqara tiva nimiate, tunaini náitanta kaiqa vuru taiqa ketanta oqaraanaini anirante vura.

²⁷ Vitanta vo vatanaa vo vatanaaka vataini nini oqaraanaini Antiokini orure, viraqaahai vitanta Ihura vainti mini vauka ruvaaqumake náitanta nu uvara tiva nimi tiha, Vo vatanaa vaiinti nahentivata Ihurara ququaave tiate tiro, Kotiva vika aaravata qantua nimitairave.

²⁸ Minti tivake vitanta Ihura vaintinavu hampata vukaiqamake mini vaura.

15

Poruka Banabaasika Ieruharemini vura

¹ Poruka Banabaasika Antiokini vaumanta Iutiaihai vaiinti vonavu anire Ihura vainti vo vatanaaka tiva nimi tiha, Ne kia Mosiva tuntemake, nenta vaata toqa kaivera, Kotiva kia ho ni ntitaanarove, ti.

² Mintimake tiva nimi vaumanta Poruka Banabaasika vi uvarara aqao tivake vika hampata vogamake tirori vaura. Vi uvare kaara tirori vaumanta Antiokini vauka vohaa uva vatare Poruka Banabaasikavata, vokukavata, nititeha tiha, Nenavu oru Ieruharemini Ihuva noraiqama kai vaiintinavuka hampata vaiha vi uvare avuqavu iate, ti.

³ Minti tivake nititomanta aaravau viha vinavuka vo vatanaaka Ihurara quqaa vivave tu uvare Ihura vainti Fonisiaini vaukavata, Sameraini vaukavata, tiva nimiqi vumanta vikavata vi uvare iri voqamake quaheha vaura. ⁴ Vinavuka tiva nimiqi vivi Ieruharemini oruromanta ekaa Ihura vaiinti nahentivata, Ihuva noraiqamako vaiintinavukavata, Ihura vaiinti nahentiqaa raqiki vau vaiintikavata, ekaa vika vinavuka quahama nimitomanta Poruka Banabaasika vo vatuka vo vatuka niha Kotiva kahaqumanta vitanta nora kaiqa varaqi vurara tiva nimura.

⁵ Vinavuka minti ti vaumanta Ihura vainti vonavu vika Parasi maara uva iruka himpi tiha, Aqao, tenavu Iutaa vaiinti vaiha Mosira maara uva irihama tentanavu vaata toqa kaaina okararave, Mosiva tivato uvarave, iriqi vuraukave. Vo vatanaaka Ihura uva iriaka, vikavata Mosiva tuntemake, nái vaata toqake Mosira uvavata iriqi vuataarave, ti.

⁶ Minti tumanta Ihuva noraiqamako vaiintinavukavata, Ihura vaiinti nahentiqaa raqiki vaukavata, vi uvare avuqavu ireka ruvaaquma vura.

⁷ Ruvaaqumavi vaiha vika airi uva tivaqi vi vauvaro Pitaava himpiro vika tiva nimiro tiharo, Ti qata vaukavarao, nevata haaru tavorave. Kia Iutaa vatanaakaqai Ihura uva iriate tiro, Kotiva niqihairo ti noraiqama kero vi uvare vo vatanaakavata tiva nimiane tiro, ti tititama korave. ⁸ Kotiva ekaa vaiinti nahenti avu aato muntukaqi tave vaiavave. Viva nai Maraqua tinavu timintema kero, vo vatanaakavata nimi vairave. Mintirara ti, tenavu tavauraro Kotiva vo vatanaakaravata quaheharoma vairave.

⁹ Kotiva kiama tinavu vo qarama timitero vika vo qarama nimitaivo. Vikavata tinavuvata vohaa qaramaqaima timitaivo. Tinavu aanare vo vatanaakavata Ihurara quqaa vivave tiarara tiro, Kotiva vika qora uvavata nunka nimitairave.

¹⁰ Tinavu kaivaqaukavaravata, tenavu tentanavuvata, Mosira uva vara aqu vare nirera tavauraro maara ntorave. Ho nantihae ne vi uvare vo vatanaakaqaa aqu nimitareka auti variavo? Ne mintihama Kotira avatarekama auti variavo. Ne kia mintiatarave.

¹¹ Tenavu tavauraro Ihuva Noravano tinavuaravata aqurihama timitairaqaahairo Kotiva tinavu tivitairave. Ho tinavu tivitaintema kero, Kotiva vo vatanaaka vikavata homa ntitaanarove, tiro.

¹² Pitaava minti tumanta viraqi ruvaaqumavi vauka manamana voqara vaiha vika Banabaasika Poruka uva iri vaumanta vitanta himpi, vitanta vo vatanaaka vaunaini ni vauvaro Kotiva kahaqumanta vitanta náitanta nora kaiqa varaqi nurara vika tiva nimura.

¹³ Vitanta tiva nimi taiqa kovaro Iemiva himpiro tiharo, Ti qata vakaao, ti uva iriate.

¹⁴ Kotiva vaiinti nahenti vonavu nai autu tuahera kaate tiro, oru vo vatanaakaqihairo

vonavu ntito uvvara, Pitaava vi uvvara vaaka tinavu tiva timirave. ¹⁵ Ho paropeti vai-intinavu haaru qara ntuvato uvavavata, Pitaara uvavanovata, avuqavu vohaa uvaqaima vaivo. Haaru minti turave:

¹⁶ Noravano tiharo, Naantiara te anirante ni kaivaqara Devitira naavu raputama vura vira qaiqaa kaqrerave.

Vi haikara vi haikara nteravinara qaraakaiqamake vira qaiqaa vaaviarama karerave.

¹⁷ Te mintiari vaiinti nahenti vo vatanaa vo vatanaaka ti Nora Vaiinti ranta kevarave.

Vika ti vainti variate ti, te vo vatanaakaqihai naarama taarirauka vikama ti Nora Vaiinti rantakevarave, turave.

¹⁸ Nai haaru Noravano vi uvvara qovarama korave, turave, tiro. (Amos 9:11-12)

¹⁹ Iemiva minti tivakero viva tiharo, Ho te mintimama iruro. Vate vo vatanaaka hininavu qora aara qaqrake Kotira aaraqaa vi variaka variamanta hauri tenavu vikaqaa vo maara vataarorave. ²⁰ Kaiqe tenavu vikara qaraqihai minti mintima tiva nimiare:

Ne kia qumina una variqanavu nimite karara naate.

Ne vaiinti nahenti kia hampi muara nuate.

Kia aunta raqutute aantau vahira naate.

Kia naarevata naate.

Vi uvaraqai qara ntuva taarira vika tavaate. ²¹ Vo vatanaaka vi uvvara iriqi vivera, kiama Iutaa vaiinti mini vaika vika hampata tirorivarave. Iutaa vatanaaka vo vata vo vataqaa vuaka vaiha vo Maara Enta vo Maara Entaqaa Mosira uva kaara ruvaqi vi variarave. Vo vataku vo vataku Mosira uva tiva nimiaka variavo, tiro.

Vo vatanaakara qara ntuva tora

²² Iemiva minti tumanta Ihuva noraiqama konavukavata, Ihura vaiinti nahentiqaas raqiki vaukavata, ekaa viraqi ruvaqumavi vaukavata, vohaa uva vate tiha, Kaiqe tinavuqihai vaiinti votanta kaama taari vitanta Poruka Banabaasika hampata viha tenavu maaqi vahira tiva tauna uvvara vevara Antiokini variaka muntu tiva nimiante, ti.

Minti tivake vaiinti taaraqanta kaama tora. Vaiinti vo vira autu Iutaasira vira vara autu Basabaasiravata, vaiinti vo vira autu Sillaasiravata, vitanta kaama tora. Vitanta Ihura vaiinti nahenti vikaqihai nora vaiintitantama vaura.

²³ Vitanta kaamate vika vo vatanaaka qara nimiteha mintima ti:

Tenavu Ihuva noraiqama kainavukavata, Ihura vaiinti nahentiqaas raqiki varia vaukavata, tenavu ni qata vaukavara vahama ni uva mantauro.

Ne vo vatanaaka Antiokini variakave, Siria vataini variakave, Silisia vataini variakave, ne tinavu qata vaukavara variakara tenavu ni uva mantauro.

²⁴ Tenavu iruramanta tinavuqihai vo vaiintinavu muntu hampi uva ni tiva nimiamanta ne vi uvvara kaara qumimaqa i variavo. Kia tenavu vika nititauramantavauve vika ni tiva nimiavo. Vika nái irike minti tiavo. ²⁵ Viraqahai tenavu ruvaqumavi vohaa uva vateha mintima turo: Kaiqenavu vaiinti vonavu nititaari vinavuka tinavu muntuka vai vaiintitanta Poruka Banabaasika hampata vuate, turo.

²⁶ Poruka Banabaasika kia náitanta arukerara noraiqaaake iriraiti, vitanta tinavu Nora Vaiinti Ihu Karaitira kaiqa vara amitaqi vi variarave.

²⁷ Maihai tenavu Iutaasika Sillaasika nititaari vitanta tenavu vohaa uva vateha qara ntuvatauna uvvara, maa uvvara náitanta noqihaiavata ni tiva nimiante.

²⁸ Kotira Maraqravanovata, tenavuvata, maa uvvara vohaa uva vatauro. Tenavu kia airi qumina uva tiha niqaa maara voqavata vatarerave. ²⁹ Maa uvaraqai ne iriqi nuate:

Una variqanavu nimite karara kia naate.

Kia naare naate.

Kia aunta raqutute aantau vahira naate.

Kia vora hampata hampi muara nuate.

Ne vi uvvara iriqi niha ho koqemake nivarave.

Ho viqanama tenavu turo, ti.

³⁰ Minti tivake vi vaiintitanta nititomanta vitanta vevara Antiokini otu Ihura vaintinavu mini vauka ruvaqumake qara varora nimumanta ³¹ vika qara viraqi kaara ntuvake iri, noraiqaaake vi uvarara quahake koqe uvama qaraqi vaivo. Vi uvava tinavu kahaqaina uvarave, ti.

³² Minti tivake Iutaasika Sillaasika Kotira uva tiva qoqaiqamake vautanta koqe vaukaka vaukaiqamake vika tiva nimiha vika kempukaiqama nimitora.

³³ Minti tivake Ieruharemihai tuvurotanta airi enta mini Antiokini vaumanta viraqahai Ihura vaintinavu mini vauka vitantara Kotiva nitanta koqema nimiteharo nitanta muntuka paruma nimitaare tivake, náitanta nititoka unaini vara komanta vura.

³⁴ [Sillaasivaqai Antiokini variataa uvapo mini voqavata vaura.]

³⁵ Poruka Banabaasika vitantavata airi enta Antiokini vaiha, vitantavata vokukavata Noravano tivato uvara vaiinti nahenti tiva nimiha vaura.

Poruka Banabaasika tirorimake rairavura

³⁶ Poruka Banabaasika Antiokini variqi vuvaro vo entanavu aitarovaro Poruva Banabaasirara tiharo, Varaiqetanta oqaraanaini oru viha vo vatuka vo vatuka ti qata vakaikavara tavaare, tiro. Haaru tetanta Noravano tivatai uvara tiva nimuna vaiinti nahentika vika hoe variavo kiae ho variavo? tiro.

³⁷ Poruva minti tuvaro Banabaasiva Ioniravata vitakero vireva auti vaura. Ionira autu vo Maakira, ³⁸ Banabaasiva vira vitakero vireva auti vauvaro Poruva aqao tiro, Kiama vira koqe ianarove. Haaru tenavu vo vatuka vo vatuka niha vakaaka tiva nimiqi ni variavauraro vi vaiintiva titanta vataakero niharoh Pampiriahairo popohovaro qaqira kero anirantero vurave, tiro.

³⁹ Minti tivaketanta vitanta nora tirorima ketanta raira vura.

Raira vuvaro Banabaasiva Maakiravata vitakero nariaraatanta vona vireka iha, *sipi voqi vaariretanta Saiparusini* vurama.

⁴⁰ Vitanta mini vuvaro Poruva Sailaa sira vitora. Vitanta vire umanta vira qata vakaianavu Ihura vaintinavu vitanta kauqu nimiha tiha, Noravano nitanta aaqurihamma nimite vairamanta nuate, ti.

⁴¹ Minti tuvaro Poruva Siria vatainivata Silia vatainivata viharo viva Ihura vaintinavu mini vauka vika muntuka kempukaiqama nimitaqiro vurama.

16

Poruka Sailaa sika Timotiravata vita vare vurama

¹ Poruva oru viro Debenivata Lisatarainivata orurovaro Ihura vanti vovano vira autu Timotiva mini vaura. Vira novavata Ihura vanti vaiharo viva Iutaa vatanaa nahenti vauvaro vira qova vo vatanaa Giriki vatanaava vaura.

² Ihura vaintinavu Lisataraini vaukavata Aikoniaaini vaukavata Timotirara koqe vaiintive tuvaro ³ Poruva vi vaiintiravata vitakero vireva auti vauvaro Timotira qova vo vatanaa, Giriki vatanaava vaiharo kia Timotira vaata toqa amitova vauvarora tiro, Poruva vira vaata toqa amitero.

Poruva tiharo, Iutaa maini variaka Timotira qova Giriki vatanaava vairara iriarave. Hauri vika Timotirara kia vaata toqa amitai vaiintirave tivorave, tivakero Poruva Timotira vaata toqa amitero viraqahaairo vita varero viro.

⁴ Vinavuka mini viha vo vatuka vo vatuka Ihura vaintinavu vakaaka tiva nimiha tota Ihura noraiqamako vaiintinavukavata, Ihura vaiinti nahentiquaa raqiki vau vaiintikavata, vika Ieruhareminni vaiha „vo vatanaaka Ihura vaintiqama vuaka vo uva avataqai vuate tivato uvara, tiva nimiqi viha vi uvaraqaai iriqi nuate tura. ⁵ Minti tivaqi viha vinavuka Ihura vaintinavu voqi voqi vauka kahaqumanta vika Ihura uva kempukaiqamake iriha airiqama vura.

Poruva taira voqaara tavora

⁶ Poruvavata vira vataake anukavata orure vuvaro hini mantaraini Karesia vata vauvaro hini mantaraini Farigia vata vaumanta vika avutana Esia vatainivata oru vi vauvaro Kotira Maraquiravano qioqama tero vikara kia Esia vatainivata vuru uva tiva nimiante tura. ⁷ Tumanta vika oru vi Misia vatainivata orurovaro Bitinia vata aumanto vaumanta mini virare tuvaro Ihura Maraquiravano qioqama tero vikara kia mini vuate tumanta ⁸ vika Misia vata avutana otu vi, vatuka vo Taroaasi mini oturoro.

⁹ Mini oture entaqira Poruva vaiteharo taira voqaara tavovaro Masedonia vatanaa vaiinti vovano himpiro Porura aareharo tiharo, Nora namari taqa varera Masedonia maini ani vaihara tinavu kahaqiane, tiro.

¹⁰ Minti tuvaro Poruva taira voqaara vira tavero, viva himpiro vokukavata, „te Rukikavata“ make, mintima ti: Kotiva Masedonia vatanaaka nai vakaaka vuru tiva nimiante, tivo, ti. Minti tivake tenavu mini virera henogama vate.

Piripaini vura

¹¹ Viraqahaai tenavu *sipi* viarire Taroaasi vara mini ke, nora namari vaura avuqavu oru vi, namari avutaqaa vau vataara Samotaresi mini orure, vira qararaa tenavu qaiqaa *sipi* viarire namari vaura oru vi vatuka vo Neapolisi mini oruraavaunara. ¹² Viraqahaai *sipi* viarire vi vatukara vara mini ke, vata vaura verara vatuka vo, Piripai mini oru vuavaunara. Masedonia vataqihairo Piripai vatuka avuhainaa vatukavano vaumanta Romeni vatanaaka naane vi vatukara qovarama kora. Tenavu Piripaini orure mini vo entanavu variavaunara.

¹³ Mini vaiha Maara Entaqaa tenavu vatukaqihai vaantaavura qentiana otitare aaqaini otu vi, namari auvahianta Iutaa vatanaaka Kotira aare varia vatukava varianarove tivake, otu namari auvahianta oquvi vaiha mini nahentinavu ruvaaqumavi vauka uva tiva nimi variavauraro ¹⁴ nahenti vovano vira autu Lidiava viva Taiatairihainaava naare tavuna nimiharo monu vare vau nahentiva vaura.

Vi nahentiva vo vatanaava vaiharo Iutaa vatanaaka maara uva iriharo Kotira autu tuahere vau nahentiva vauvaro Noravano vira avu aato kahaquvaro viva Poruva tivato uvara kankoma kero iiriro ¹⁵ viraqaahairo vivatava vira naavuqi vaukavata namari varora. Namari varero viva tinavuara tiharo, Te ni Nora Vaiintiara quqaa vivave turo. Ne tiria tiha, Are quqaama Ihura vaintima variarao, tivera, ne ti naavuqi ani variate, tiro. Minti tuvaro vira uvavano kempukaiqumantaa tenavu vira naavuqi oru variavaunara.

Poruka Sailaasika karapuhiqama kora

¹⁶ Vo enta tenavu qaiqaa lutaatava vatanaaka Kotira aare vau vatukara mini vire iavauraro kaiqa varaata vovano anirero tinavu tivita kero. Tinavu tivita kovaro vaanavano vi varaataara avutaqi vahiaro vira kahaquvaro viva naantiara qovaraiqaina haikarara vainti nahenti tiva nimi vaura. Vaiinti nahenti naantiara qovaraiqaina haikarara irireka iha, vika airi monu vi varaataaraqaa raqiku vaintinavuka numumanta vinavuka airi monu vare vaura.

¹⁷ Vi varaataava Poruravata tinavuvata avataqiro viharo naveraitiharo, Maa vaiintinavuka Naaruvalini Uritarakero Vai Variqara vira kaiqa vare varia vaintinavukave. Vitanta Kotiva ni qaqi kuvantu kero ntitaaina vakaakara tiva nimireka aniaqave, tiro. ¹⁸ Vi varaataava airi enta tinavu avataqiro viharo vi uvara tivaqiro vuvaro Porura voqamakero popohovaro viraqaahairo vi varaataara avutaqi vau vaanarara tiharo, Te Ihu Karaitira autu rehamma ariara vi varaataaraqihairaa qaqqini aitarera vuane turo, tiro. Minti tuvaro vaakama vaanavano vi varaataara avutaqihairo qaqqini aitareror viro.

¹⁹ Vaanavano viraqaahairo aitarero vumanta vi varaataaraqaa raqiku vaintinavuka tavovaro vika monu varo aarava taiqa vumanta vinavuka tiha, Kia tenavu qaiqaa vi varaataava uva tinaraqaahai monu ho varaainarave, tivake vinavuka arara itomanta Poruka Sailaasika ravaaqavuke raraau vare *ko* tireka nora vaiintinavu ruvaaqumavi vaunaini vuru kora.

²⁰ Vika vitanta vuru ke, Romeni qiaata vaiintinavu tiva nimi tiha, Maa vaiintitanta Iutaa vatanaakave. Vika tinavu vatukaqii ani vaiha antua ti variavo. ²¹ Tenavu Romeni vatanaaka qioqama tauna uvara, vitanta vi uvara tinavu tiva timi variavo, ti.

²² Vinavuka minti tumanta vainti nahenti mini ruvaaqumavi vauka Poruka Sailaasika ruquti vaumanta vika qiaata vaiintinavu oru Poruka Sailaasika utavaaqa qaqqini vara aquke tiha, Vitanta kaavu numiqa kaate, ti. ²³ Minti tumanta vitanta ruqutuke rupitaitimake vate, viraqaahai vitanta karapuhi naavuqi vuru aquke karapuhi naavuqaa raqiku vaintirara tiha, Vitanta paama tivakera rumpa taane, ti.

²⁴ Minti tuvaro karapuhi naavuqaa raqiki vau vaintivaa vika tuntema kero karapuhi naavu, nai avutaqi vau kavaqaaraqii vitanta vara vera aqukero vitanta aiqu vehatanta katari ntoma toraqi veva nonkutero taatautora.

²⁵ Mintumanta vitanta viraqii vaiha entaqiraara Kotira aare vaiha ihi tivaqi viha, Kotira autu tuahere vaumanta karapuhi vainti vonavu vitanta uva iri vaura. ²⁶ Mintuvaro vate virave tiro, taturavano utiharo karapuhi naavu voqamakero qaki qaki i vauvaro karapuhi qentinavu ekaa qantua vuvaro ekaa karapuhi vaintiqaahairo *seni* naaquntavano kuvantu viro higirura.

²⁷ Mintuvaro karapuhi naavuqaa raqiki vau vaintivaa vaitonaihairo himpiro tavovaro ekaa qenti qantua vuvaro viva oho tiro, Ekaa karapuhi vainti maaqihai ruqemake vinuavo. „Vira kaara tiqaa raqiki vaiva ti haruma kaanarove,“ tivakero viva nai iqoka paepae utaqihairo urequ kero viraqohairo naivano nai arukareva auti vauvaro ²⁸ Poruva noraiqama kero naveraitiro tiharo, Kia nena arukaane. Tenavu ekaa qaqqima maaqi vauro. Kia karapuhi vainti vonkuvanovata ruqema kero vivo, tiro.

²⁹ Minti tuvaro karapuhi naavuqaa raqiki vau vaintivaa vo vaintiara tiharo, Ova qumpi kera vara vira timiraqe tavaare, tivakero kantero viraqii origetero Poruka Sailaasika niyuqaa vatakanta higiriviro aiqu kauqu ntiri ntiri i vauvaro vaura.

³⁰ Viraqaahairo viva himpiro vitanta ntita varero vevantero vitanta irero tiharo, Taaraintio, te nantima kaariraroe Kotiva ti kuvantu timitaarire? tiro.

³¹ Minti tumanta vitanta vira tiva ami tiha, Are Ihura tinavu Nora Vaiintiara quqaa viva „ti kuvantu timitaariravave“ tiane. Minti tiraroma Noravano aivata ai vaintairavata kuvantukero ntitaarire, ti. ³² Minti tivake vitanta Noravano tu uvara viravata vira naavuqi vaukavata tiva nimura.

³³ Vitanta vinavuka tiva nimuvaro viraqaaahairo karapuhi naavuqaa raqiki vau vaiintiva vaaka vitanta ntita varero vuru vitanta teqa taaqamato vaatara hiqama nimitero, viraqaaahairo vivavata vira naavuqi vaukavata namari varora.

³⁴ Namari vare viraqaaahairo karapuhi naavuqaa raqiki vaiintiva qaiqaa vitanta ntita varero vuru nai naavuqi kero vitanta karavata nimo. Kara nimo vivavata, vira naavuqi vaukavata, Kotirara vogamake quaheta vaura.

³⁵ Vira qararaa toqaqi Romeni qiata vaiintinavu nái kiripunavu nititeha tiha, Vi vaiintitanta kuvantu kaira vuate, ³⁶ tumanta vinavuka vuru karapuhi naavuqaa raqiki vau vaiintira tiva amuvaro viva Porura tiva amiro tiharo, Qiata vaiintinavu uva varake nitanta Sailaasika kuvantu kaira vuatema tiavo. Ho nitanta muntukavano paru ira maaqihai vuate, tiro.

³⁷ Minto tuvaro Poruva kiripunavuara aqao tiro, Enta ni qiata vaiintinavu kia avuqavu ko tiraiti, vika vaiinti nahenti nivuqaa titanta kaavuqohai ruqutuke vate, viraqaaahai vika titanta maaqi karapuhiqama kaavo. Ho tetanta kia qumina vaiintitantama vauro. Tetanta Romeni autu varauraukave. „Haaru titanta noraiqama kaamanta Romeni vatanaakaiqamayi vauraukave.“

Ho vate vika titanta evaara tititareka auti variavo. Kiavuma tetanta qaqi virerave. Romeni qiata vainti vika náima ani titanta kuvantu kevarave, tiro.

³⁸ Poruva minto tumanta kiripunavu vuru Romeni qiata vaiintinavu tiva nimumanta vika Poruka Sailaasika tetanta Romeni vatanaaka vauro tu uvarara iri vika qetora. ³⁹ Vika getake oru vitantara ike mpo tiva nimite qihaaqamake tiva nimi tiha, Oho, tenavu kia mintiataarave, tivake vitanta karapuhiqihai nititake vitantara ho maa vatukaraqihai nenta qaqi vuate, ti.

⁴⁰ Minto tumanta Poruka Sailaasika karapuhi naavu mini ke, oru Lidiara naavuqi Ihura vaintinavu tave, vitanta vika muntuka kempukaiqama nimiteha koqe uva tiva nimi, viraqaaahai vitanta vi vatukara mini ke vurama.

17

Tesaronaikaini vura

¹ Vitanta Piriipai mini ke, oru vatuka votanta Ampipolisivata, Apoloniavata, mini ke, vatuka vo Tesaronaika mini oturora. Vi vatukaraqi Iutaa maara naavu vovano vaura.

²⁻³ Poruva viva tota vo vatukaini vaiharo Maara Entaqaa mintuntema kero, vi naavuraqivata oriqetero. Poruva taaramo Maara Entaqaa vaiharo viraqi ruvaaqumavi vauka vakaaka tiva nimo. Vika vira uva kia ho aatara kaate tiro, viva *Mesaiavavano* aiha vira haika varero vuru qutu viro qaiqaa qaqi himpuainarara Kotira vukuqihairo ranta keharo vika tiva nimiqiro viro tiharo, Ihuva maava te vate ni tiva nimuna vaiintiva, ho vivama *Mesaiavavano* viavo, tiro.

⁴ Minto tumanta Iutaa vainti nahenti vonavu quqaama tiarao tivake Poruka Sailaasika avataqi vumanta, Giriki vatanaa vainti airinavuvano Iutaa maara uva iruka, vikavata quqaave tivake Poruka Sailaasika avataqi vumanta, nora autu vato nahentinavukavata, vitanta avataqi vura.

⁵ Vika quqaave tumanta Iutaa vaintinavu tavomanta vo vatanaa vainti nahentinavuata Poruka Sailaasika avataqi vumanta vika vira kaara toma nimiteha oru aaranahai vehi vainti kia koqe vaintinavu rantake ruvaaqumake vikara vihi vaahi tumanta vi vaintinavuka oru ekaa vi vatukaraqi vaukavata vihi tumanta ekaa vihainaaka oru Jasonira naavuqi oriqete, Poruka Sailaasika rantake vitanta raraau vare vuru vainti nahenti nivuqaa kareka auti vaura.

⁶ Vitantara qumina viraqi ranta tavomanta kia vaumanta viraqaaahai vika Jasoniravata Ihura vainti vonavuvata ravaaqavuke raraau vare vuru vi vatukaraqaa raqiki vaintinavuka nivuqaa ke naveraitiha, Ekaa naato vata maata maa vaintinavuka niha antua uva tivaqi viha, vika maini tinavu vatukainavata aniarave. ⁷ Aniavarao maa vaintiva Jasoniva vinavuka quahama nimitero nai naavuqi ntita vuru kaivo. Tinavu avuhainaa vainti Romenihainaava vaimanta vika ekaa kia vira uva iriraiti, vira uva raqake tiha, Tinavu avuhainaa vainti vovano Ihuvaqaima vaivo, tiavo, ti.

⁸ Vika minto tumanta vi vatukaraqaa raqiki vaukavata, vainti nahenti mini ruvaaqumavi vaukavata, vi uvava iri, noraiqamake uva naveraiti tivaqi vi vaura.

⁹ Minto vaumanta vi vatukaraqaa raqiki vauka tiha, Jasoniravata vo vaintinavuvata ho minto mintima monu aquikeha nenta maaqaini vuate, tivake vinavukaqihai monu vare vinavuka kuvantu komanta vinavuka nai maaqaini vurama.

Berianini vura

¹⁰ Vika kuvantu komanta vuvaro enta umanta Ihura vaintinavu vi vatukaraqi vauka vaakama Poruka Sailaasika vatuka vo Beriaini nititama komanta vitanta mini vurama. Vitanta Beriaini orure oru Iutaa maara naavuqi origete vaiha vakaaka tiva nimura.

¹¹ Vi vatanaaka kia Tesaronaikaihainaaka voqaara vairaiti, vika qaraaka uva Poruva tu uvvara iriataaqai umanta vika vira uva iriha vika vo enta vo enta Poruva ti uvvara quqaa uva variainara vika náivono rantake tavareka iha, Kotira vukuqi vi uvvara rantake kaara riha vaura.

¹² Mintiaqi yumanta Iutaa airitahaavano Ihurara quqaa vivave tumanta, Giriki nahenti vokuka nora autu vatoka vikavata Ihurara ququaave tumanta, Giriki vaiinti airitahaavata virara ququaave tura.

¹³ Airi vaiinti nahenti Ihura uvvara ququaave tumanta Iutaa vaiintinavu Tesaronaikaini vauka iruvaro Poruva Beriaini Kotira uva tiva nimi vaumanta vira kaara vika nái maaqa mini ke, Beriaini orure antua uva tiha vehi vaiinti kia koqe vaiintinavu ntita vare vinavuka vihi tumanta Porura qoraiqama amitareka autu vaura. ¹⁴ Mintumanta Ihura vaintinavu mini vauka hauri Porura avorarove tivake vaakama Porura vita vare vevaini atitama komanta Sailaasika Timotikaqai kia viraiti, Beriaini vaura.

¹⁵ Mini vaumanta vo vaiintinavu Porura vita vare muntu Ateni, nora vatukaini ke viraqaahai vinavuka oturante Beriaini urure vuru Sailaasika Timotika tiva nimi tiha, Poruva nitantara tiharo, Ne vaakama maini te variainanaini tuvuate, tivo, tura.

Poruva Atenini vaurara tura

¹⁶ Vira muntu ke vuvaro Poruva Ateni mini nariaraa vahiaro vatukavau niharo tavovaro vi vatanaaka airi haika origohai autuke vi haikarara tinavu variqave tivake vato haikava vuvaro vira kaara Porura munukavano qoraiquvaro vaura.

¹⁷ Poruva vi haikara vi haikara tavero viraqaaahairo viva Iutaa maara naavuqi oru vahiaro Iutaa vatanaakavata, vo vatanaa vaiinti nahenti Kotira aare vaukavata, vakaaka tiva nimiro, viraqaaahairo viva vo enta vo enta *maaketiqi* oru vahiaro vaiinti nahenti vitare aitare i vauka uva vakaaka tiva nimi vaura.

¹⁸ Poruva vika tiva nimi vaumanta vo maara uva iruka *Epikuria* okaravata, *Sitoiki* okaravata, iruka anire, vika Porura vataake uva ti vaura. Vonavu nai kenauka irama nimiteha tiha, Mamaa inaara uva ti vai vaiintiva, nana uvae ti vaivo? ti.

Tumanta vokuka tiha, Viva vo vatanaaka variqanavu okararae ti vaivo? tura. Poruva Ihuva gutu viro qaiqaa qaqi himpuainarara tiva nimi vaumantara ti, vika minti tura.

¹⁹ Vika minti tivake Porura vita vare *kansomru* ruvaaqumavi vaunaini, Areopagusive tunaini vuru ke Porurara tiha, Are qaraaka uva vaiinti nahenti tiva nimi variana uvvara tinavuvata tiva timiraqe iriare. ²⁰ Tenavu ai uva iruraro vi uvava vo qarama ivo. Are vi uvvara okarara tiraque iriare, tura.

²¹ Atenihainaakavata, vo vatanaakavata vi vatukaraqi vaukavata, kia kaiqa vararaiti, qumina vahia uvaqai ti vau vaiintika vaiha, vika qaraaka uva qovaraiqura irireka iha, vika nai tiva nai tiva ami iha vaura.

²² Vika vi uvvara okara irirerave tuvaro Poruva *kansomrunavu* ruvaaqumavi vauka nivuqaa himpiro tiva nimiro tiharo, Ne Ateni vaiintinavuuvauvo, te tavauramanta ne voqamake maara okara vo okara vo iriqi vi variakave.

²³ Te maini ni vatukavau niha tavauramanta nenta variqa iha quara nimite varia taintava airitahaama vaivo. Te vo taintavata tavauro. Viraqaatama maa uvvara qara ntuvu taava mintima tivo:

Maa taintara tenavu kia iri tavauna variqarara irihama tainta autu amitaunarave tiarave.

Ne Variqa vira kia iri tavaara, ne quminaiqamake vira aare variara, te vate virara ni vutuke tiva nimirerave.

²⁴ Variqa vira autu Kotirave. Kotiva vatavata ekaa vataihaina haikavata, autukero vataivama vaivo. Viva Noravano naaruvaqaavata, vataqaavata, raqiki vaivarava tiro, viva kia vaiintivano kaqataa naavuraqi variqiro vi vairave.

²⁵ Kotiraaahai ekaa vaiinti nahenti aihovata, ekaa vo haikavata, vare variarara ti, hauri vaiinti nahenti tiha, Kotiva vo haikara aara ntaivo. Kaiqe kaiqa vara amitaariraro viva ho variarire, tivorave.

²⁶ Kotiva haaru qorainti vaiinti vohaiqa tinavu kaivaqara autu kovaro viqanaqaahai ekaa vaiinti nahenti qovarama vuvaro Kotiva vika ekaa naato maaqa variate tiro, vika nititama korave. Kotiva vaiinti nahenti autukero tiharo, Vi vatanaaka vi entara vi vataraqaa vaivarave, vi entara vi vatanaaka vi vataraqaa vaivarave, tivakero vika kaimanta variarave. ²⁷ Vika Kotira rantareka *autautama/tupaupauma* keha rantaate tiro,

Kotiva vaiinti nahenti qovarama komanta vaurave. Ho Kotiva kia tinavu niaraiqama kero vaivo. ²⁸Vovano Kotirara mintima tiro:

Kotiva qaqi variqiro vi vairara ti, tenavuvata qaqi vi aniha, qaqi variqi vuariraukama rauo, tirave.

Ni vukuqi qara ri varia vaiintika mintima ti:

Tenavū vira vaintairama vauro, tiarave.

²⁹ Ho tenavuvata vira vaintaira vahira ti, hauri tenavu tiha, Kotiva vaireva, viva vαιintivano kori orie, silvaa orie, vo orie, varakeha autu taa haikara voqaara vairave tiarorave. ³⁰ Haaru vaiinti nahenti kia Kotirara kankomake iriraiti, hampi kaiga vare vauvaro, Kotiva kia vika ntaiharaitiro, viva avuqohairoqai vika tavama nimite vaurave. Ho maa entara Kotiva ekaa vainti nahenti qora aara qaqlira kaate ti vaivo. ³¹ Kotiva uva vateharo tiharo, Vo enta ko tiaina entavama varianarove, tirave. Vi entaraqaama Kotiva noraiqama kai vaintiva avuqavuqama kero ko tiharoma maa vataraaqa vai vainti nahentika uva irianarove. Ne vi vaintirara kankomake iriate tiro, Kotiva vira qutu vuraqihairo qaiqaa qaqi vara himpima korave, tiro.

³² Poruva Ihuva qutu uvuaro qaiqaa qaqi vara himpimako uvarara tumanta hini kuka vi uvara iriha naaraihama amitomanta hini kuka tiha, Vo vaka are vi uvvara qaiqaavata tiraqe tenavu iriare, ti. ³³ Minti tuvaro Poruva vika mini kero vurama. ³⁴ Vumanta vaitinti vonavu vira avataqvi viha, Kotira vaintiqama vura. Vo vaintivano Dionisiusiva, viva nora vaitinti Areopagusi *kansoru* vaitintivano vauvaro nhahenti vovano vira autu Damarisiva vitantavata, vonavuvata, Porura avataqvi vurama.

18

Poruva Korintini vura

¹ Viragaahairo Poruva Ateni mini kero vatuka vo Korintini vura.

² Mini orurero viva Iutaa vaiinti Pontaasihainaara vira autu Akuilaara ranta kora. Haaru King Kalodiusiva ekaa Iutaa vatanaaka kia Romi vatukaqi variate tivakero ekaa nititamako entara, Akuilaava nai naata Prisilaara vita varero Romi vatuka Itari mini kero vi entara Korinti vatukaini ani vaura. Poruva vitanta tavareva vitanta vaunaini vurama.

³ Vivavata vitantavata seri naavu haqiraa kaiqara tavokara ti, vinavuka vohaaraqi vaiha vi kaigara vare vaura.

⁴ Poruva vi kaiqara vareharo viva vo Maara Enta vo Maara Entaqaa Iutaa maara naavuqi oriqetero vaharo Iutaa vatanaakavata, Giriki vatanaakavata, Ihura uvara quqaa uvave tiate tiro, viva vika uva tiva nimi vaura.

⁵ Mintumanta Sailaasika Timotika Masedoniaihai oturovaro viraqaahairo Poruva vo kaiqa varora qaqlira kero, vo enta vo enta Ihura vakaaka vaiinti nahenti tiva nimiqiro vi vaura. Viva Iutaa vatanaaka tiva nimiro tiharo, Ne *Mesaiaara* veka variara ho Ihuva maa vivave, tiro.

⁶ Tumanta vika vi uvara kia iriraiti, vi uvara kaara Porura qoraiqama amiteha virara qora uva tuvaro Poruva aqao tivakero, nai utavaaqaaqahaairo konkoma rintati kero tiharo, Naantiara Kotiva ni qaqlira kairamanta ne kakakima vivera, vi uvava kia tigaavavae varianarove. Vate ni Iutaa vaiinti qaqlirake, te qumina vatanaaka varianaini virerave, tiro.

⁷ Minti tivakero Poruva viraqaahairo vika mini kero vaiinti vo, vira autu Titiusi Jatusira naavuqi oru vairo. Titiusi Jatusiva Kotira aare vau vaiintiva vauvaro vira naavuvano Iutaa maara naavu tataaqa vaura. ⁸ Vo vaiintivano vira autu Kirispusiva, viva maara naavuqaa raqiki vauya vivavata, nai naavuqi vaukavata, Nora Vaiintiara ququa vivateura. Korinti vatanaaka airitahaa Porura vakaaka iri, ququa uvave tivake namari varora.

⁹⁻¹⁰ Mintiaqi vuvaro Poruva entaqi vaiteharo taira voqara tavovaro Noravano vira tiva amiro tiharo, Te ai vataake vaunarara tira, are kia qetehara ti vakaaka tiva nimiane. Kia evaara variane. Maa vatanaaka airi vaiinti nahenti ti vaintima variamantara tii, viraqahai te ariqqa raqiki variariraro kia vovano ai ho aruanarove, tiro. ¹¹ Minti tuvararua tiro, Poruva vohaa ihi vara kero vo ihi hinivata mini vaiharo vi vatanaaka Kotira uva tiva nimigiro vi vaaura.

¹² Poruva mintiaqiro vumanta vi entara vika vaiinti vo, Galiora noraiqamake tiha, Are Romeni nora vaiinti vovano vaihara Akaia vataqaa raqikiane, tuvaro Galiova noraiqama viro vaura. Viva vaumanta Iutaa vaiinti vonavu ruvaaqumavi vaiba tiha, Kaiqe Porura qoraiqama amitaare, tivake oru Porura ravaaaqumavi varve vuru *ko ti* vau naavuva vaunaini kema Galiorar tiha, ¹³ Maa vaiintiva vaiinti nahentiara maanti maantima keha Kotira autu tuaheraate tiharama tinayu. Iutaa, maara uva ragakae vaiyo, ti.

¹⁴ Vika minti tuvaro Poruva uva tirare tuvaro Galiova naane Iutaa vaiintinavuara aqao tiro, Maa vaintiva vaaku kaiqave, qora kaiqave, vareharo *kamaanira* uva raqa kaitirio, te homa vira kaara ni uva iruraitirio. ¹⁵ Ne nenta uvarave, nenta nutuarave, nenta maara okararave, irihama te unanaini aniaivo. Vi uvava ninta kaiqa vairara ti, kia ti vi uvara iriataa ivo. Ne nenta vaiha vi uvara avuqavu iate, tiro. ¹⁶ Galiova minti tivakero viva tumanta vira kaiqa vaiintinavu Iutaa vika *ko* naavuqihai raraau veva aqukora.

¹⁷ Veva aquke viraqaahai vika oru Sotenisira Iutaa maara naavuqaa raqiki vau vaiintira ravaaqavuke *ko* naavu qentiana vaiha vira kaavu umiqake vatora. Mintuvarovata, Galiova kia virara noraiqaakeri irura.

Poruva anirantero Antiokini vura

¹⁸ Poruva Korintini Ihura vaintinavu hampata airi enta mini variro, viraqaahairo Prisilaaravata, Akuilaaravata, ntita varero Korinti mini kero *sipi* vaarirero Siria vataini viro. Viva vireva iharo viva vo vatuka Senkaraiaini oturero nai kauqu aiqiqaa aqukero Kotirara uva tiva torara iriharo nai qjata kauhi ekaa toqakero vura.

¹⁹ Ho vinavuka oru vima Epasaasini orure Poruva Prisilaaka Akuilaaka mini kero oru Iutaa maara naavuqi oriqetero Iutaa vaiinti hampata uva tiro. ²⁰ Vika hampata uva tumanta vika Porurara tiha, Tinavu hampata vukaiqamake variqira vuane, tuvaro Poruva aqao tiro, Te vate kia ni hampata vukaiqamake vairerave, tiro. ²¹ Tivakero viva vireva iharo vika tiva nimiro tiharo, Naantiara Kotiva hove tina entara ni hampata ani vairarave, tiro. Tivakero viva *sipi* voqi vaarirero vurama.

²² Viva vuva Sisariaini orurero, viraqaahairo viva *sipi* vira vaavirero viviro oru veraini Ieruharemini Ihura vaintinavu vauka uva mantamakero, viraqaahairo ururantero Antiokini otu vaura. ²³ Viva mini vo entanavu varikero, viraqaahairo viva Farigia vatainivata, Karesia vatainivata, vo vatuka vo vatukaqii niharo Ihura vaintinavu mini mini vauka kempukaiqama nimitaqiro vura.

Apolosiva Epasaasiqvata Korintiqivata kaiqa varora

²⁴ Poruva vika kempukaiqama nimitoraro Iutaa vaiinti vovano vira autu Apolosiva, viva Arekisantaria vatukaihainaava, viva Epasaasini oru vaura. Viva koqema keharo vaiinti nahenti uva vakaaka tiva nimiharo viva ekaa Kotiva qara ntuvato uvaravata kankomakero tavo vaiintivama vaura. ²⁵ Vovano Nora Vaiinti avataqii vuaina aarara vira umiqovaro, viraqaahairo viva vihi vaahi tiharo kempukaiqamakero vaiinti nahenti Ihura varo kaiqara tiva nimiqiro vura. Viva tiva nimiharovata, viva naivano haaru Ionira uvaqai iriro Ionira namariqai varo vaiintiva vaura.

²⁶ Apolosiva Epasaasini orurero Iutaa maara naavuqi orurero viva kia qetaraitiro vakaaka tiva nimi vaumanta Prisilaaka Akuilaaka vira uva iri, vira vita vare náitanta naavuqi vuru ke Kotiva inaini vuaina aarara Ihura uva avuqavuqamake vutuke vira tiva amura.

²⁷ Avuqavuqamake tiva amuvaro iriro, viraqaahairo Akiaiata vatainavu vireva umanta Ihura vaintinavu Epasaasini vauka vira kahaqiha qara amiha tiha, Ne Ihura vaintinavu Akiaiata variaka maa vaiintirara koqe vaiintive tivakema vira vitaate, tivake qara amura. Amuvaro Apolosiva vi qarara varero vuru nimiro, viva mini vaiharo vaiinti nahenti Kotiva koqema nimitoroma Ihura vaintiqama vuka kahaqama nimite vaura.

²⁸ Viva vaiinti nahenti nivuqaa vaiharo Iutaa vaiintinavu hampata uva tivaqiro viharo viva Kotira vukuqihainaava uvaqohairo Ihura *Mesaiaavano* variaina okarara vika vutukero numiqovarora tiro, vira uvavanoqai kempukaiquvaro Iutaa vaiintinavu tuuvvara aatara kora.

19

Poruva Epasaasini vaura

¹ Apolosiva Korintini vauvaro Poruva verara vo vataini oruniro Epasaasini oturero tavomanta Ihura avataqii nuka mini vaura. ² Vika mini vauvaro viva vika irero tiharo, Ne haaru Ihurara ququaave tu entara ne Kotira Maraquarava vareve iavo? tiro. Tumanta vika tiha, Kia tenavu Kotira Maraquarava vaivo tia uvarara irunarave, ti.

³ Tuvaro Poruva vika irero, Mintihama ne nana namarie varaavao? tumanta vika tiha, Tenavu Ionira namarima varaavauraukave, ti.

⁴ Tuvaro Poruva vika tiva nimiro tiharo, Vaiinti nahenti qora aara qaqlira kaate tiro, Ioniva vika namari nimurave. Ioniva vika tiva nimiro tiharo, Ti naantiaraini aniaina vaiintira ne virara quqaa viva *Mesaiaavano* vaivo tiate, turave, tiro.

⁵ Poruva minti tumanta vika vi uvvara iruvaro, viraqaahairo Poruva Nora Vaiinti Ihura autu reharo namari vika nimiro, ⁶ nai kauqu vikaqaa vatovaro Kotira Maraquarava

vikaqaa tuvuromanta, viraqaahai vika vo uva vo uvaqihai tivaqi viha Kotira uva tiva qovaraiqi vaura.⁷ Vi vaiintinavuka vaireka 12navuvano vaura.

⁸ Poruva Iutaa vaiinti maara naavuqi oru taaramo torara vaiharo kia getaraitiro, vika Kotiva vaiinti nahentiqa raqikiaina uva okarara kankomake iriate tiro, viva vo uva vo uvaqohairo vika tiva nimi vaura.⁹ Viva mintima kero tiva nimi vaumantavata, vokuka nái avu aato kempukiaqamake kia Poruva tu uvarara quqaave tiraiti, vaiinti nahenti nivuqaa vaha Porurara tiha, are Nora Vaiinti Aaraqaa ni variarara tianara, vira qora uvaqaima vayo, ti. Vika minti tuvaro Poruva vika ekaa mini kero Ihura vaintinavuqai ntita varero viro vo naavuqi, Tiranusira *sikuru* naavuqi oru vaiharo vakaaka vo enta vo enta vika tiva nimi vaura.

¹⁰ Mintiaqiro viharo taara ihi varakero Kotira uva vakaaka tiva nimumanta ekaa Esiaini vauka Iutaa vaiintive, vo vatanaa vaiintive, Nora Vaiinti Ihura uva ho irura.

Skevaara maaqunavuara tura

¹¹ Kotiva Porura kahaquvaro viva nora kaiqa aahuva kaiqa, vo kaiqa vo kaiqa varora.¹² Mintumanta Porura utavaaqave, *hankasipive*, vare vuru rovara varokaqaave, vaanavano avutaqi vaukaqaave, viti vika vaataqaa votomanta rovara varoka koqema vumanta vaanavanovata vaiinti avutaqihai aitare yumanta vika koqemavi vaura.

¹³⁻¹⁴ Mintumanta Iutaa vaiinti vonavu vinavuka vo vatuka vo vatuka niha vaana nititareka auti vau vaiintinavuka vaura. Vi vaiintinavuka Skevaara maaqu 7navuvano vauvaro vinavuka qova Iutaa maara uva iriharo Kotira kaiqa vara amite vau vaiintiva noravano vaura. Vira maaqunavu Porura kaiqa tavamake, Porura aanare viva varo kaiqara vikavata varareka autiha tiha, Kaiqe tenavuvata Ihura autu reha vaana nititaari aitare vuate, ti. Manti tivake vinavuka vaiinti avutaqi vau vaanarara avateha mintima ti: Tenavu Poruva autu nte vai vaiintira autu, Ihura autu rehama ariara vi vaiintiraqihair aqini aitarer vuane turo, ti.

¹⁵ Vinavuka minti tuvaro vaanavano vinavukara tiharo, Te Ihurara irunarave. Te Poruraravata irunarave. Te kia niara irunarave. Nenavu taukave? tiro.¹⁶ Manti tuvaro vaanavano viraqi vau vaiintiva vinavukaqaav vi aaqu viro, ai aaqu viro iharo, vinavuka ntaihamaqiro viharo vika utavaaqanavu qaqini rararata aqu komanta vinavuka naavuqi-hai tuvitare tokavano naare vaata vatamake aiqu autute kantama vurama.

¹⁷ Mintima komanta ekaa Iutaa vatanaakave, vo vatanaakave, Epasaasini vauka vi uvava iri voqamake qeteha Nora Vaiinti Ihura autu tuahereha vaura.¹⁸ Ihura vaiinti nahenti airitahaa vika haaru nái qora kaiqa varorara vaiinti nahenti nivuqaa vaha tiva qovaraiqama ke vaura.

¹⁹ Mintumanta airi vaiintinavu vika tota vaana kaiqave, *vure/quaha* kaiqave, varoka vi kaiqara qaqrake vikavata nái vukuve, nái quaha kaiqa varo airairarave, vare vaiinti nahenti nivuqaa vuru iha quara taiqakora. Nora monu 50,000 kinaa aquukeha varato vukurave, vaana kaiqa vare vau vukurave, ekaa vi haikara iha quara taiqa kora.²⁰ Ho mintimake vi vatanaaka ekaa qora kaiqa qaqrake Kotira uva iriqi uvavarro Kotira uvavano vi vatanaaka kempukiaqama nimitora.

Epasaasini Porura uva kaara noraiqamake antua uva ti vaura

²¹ Viraqaaahairo Poruva tiharo, Kaiqe te Masedonia vatavata Akaia vatavata oru vara maini ke, Ieruharemini vuare. Te mini vuariraukama naantiara nora vatuka Rominivata virerave, tiro.²² Manti tivakero Poruva nai kahaku vaiintitanta Timotika Eratusika nititama komanta vitanta Masedoniaini vuvaro Poruvaqai Esiaini vo entanavu mini vaura.

²³ Mini vauvaro vi entara Epasaasini Kotiraini vi Aarara kaara tirorira haikavano qovaraiqura.

²⁴ Vi vatanaaka nái una variqa nahenti Atemisirara iriha maara naavu kaqa amitora., Mintuvuvaro vaiinti vovano vira autu Demitariusiva, viva *silvaa* ori varakero viraqohairo Atemisira naavu kaqontema kero, inaara naavu maraqurahaa airitahaa autukero, vaiinti nahenti vi naavura nimiharo monu vare vaura. Viva nai kaiqa vaiintinavu hampata vi kaiqara vareharo airi monu vare vaura.

²⁵ Demitariusiva nai kaiqa vaiintinavu vata, vokuka vi kaiqara voqara varokavata, ruvaqauma kero vikara tiharo, Maa vaiintinavukao, tenavu maa kaiqara vareha vi-raqaaahai airi monu vare vaunarave.²⁶ Ne Poruva varai kaiqara tavaarave. Poruva tiharo, Ne nenta kauqugohai aututaa haikava kia quqaa variqavano vairave, tivo. Manti tirara ti, airi vaiinti nahenti Epasaasihainaakave, Esia vataihainaakave, vira uvava quqaa uvave tiarave.²⁷ Poruva qaqqai manti tivaqi vi vairera, vaiinti nahenti tinavu kaiqara qumina kaiqa una kaiqaveqaima tivarave. Kia tinavu kaiqa viraraqai manti tivarave.

Vika variqa nahenti Atemisira naavuaravata qumina naavuve tivakeha Atemisira qaqira kevarave. Manti tivera, Atemisiva kia tinavu variqa noravano varianarove. Vate ekaa Esia vatanaakavata, ekaa vataini variakavata, vira autu tuahere variarave, tiro.

²⁸ Demitariusiva minti tiharo vihi vaahi tumanta vaiinti nahenti ruvaaquamavi vauka noraiqamake antua aantua tiha vika nái una variqa virara naveraitiha, Atemisiva Epasaasini vai variqava, viva noravanove, ti vaura. ²⁹ Manti tivake vi uvvara tivaqi vumanta ekaa vi vatanaaka antua aantua ti vaura. Antua uva tivaqi viha vika oru vo vaiintitanta Gaiusika Aritaakusika ravaaqavukora. Vitanta Masedonia vataihainaa vaiintitanta Porura vataake anutanta ani vaumanta vika vitanta ravaaqavu vare vuru vaiinti nahenti ruvaaquamavi vaunaini kora.

³⁰ Vitanta vite vuru kovaro Poruva vivavata vaiinti nahenti ruvaaquamavi vaunaini virare tumanta Ihura vainti vonavu vira qioqamate tiha, Are kia ho mini vinarave, tumanta ³¹ nora vaiinti vonavu Porura tontiqama tokavata uva varake kempukaiqamake Porurara tiha, Are kia maini ruvaaquamavi vainaini aniane. Vika ai viraaqamake tavevorave, ti.

³² Manti tumanta vaiinti nahenti ruvaaquamavi vauka antua aantua tivaqi vi vaura.

Airi vaiinti nahentivanu vika kia ruvaaqu okarara iriraiti, viraqaahai vika hini kuka naveraitiha vo uva tumanta hini kuka naveraitiha vo uva ti vaura. ³³ Mintiaqi vumanta Iutaa vaiintinavu vika nái navunaa vaiinti vo, vira autu Arekisantara vihi vaahi tiha, Are vaiinti nahenti nivuqaa himpira uva tiane, tuvaro Arekisantava himpiro kauqu viriniqaakero uva tirare tumanta ³⁴ vika tavovaro viva Iutaa vaiintivano vaumanta vika kia vira uva iriraiti, nai variqara naveraitiha, Atemisiva Epasaasini vaiva, viva noravanoveqai tiha vaura. Vi uvaraqaqai qaiqaa qaiqaa tivaqi viha 2 *aua* vara kora.

³⁵ Vika minti tivaqi vi vauvaro viraqaahairo *kusikusivano* himpiro vaiinti nahenti vuatarama komanta tirema vauvaro tiharo, Epasaasi vaiintinavuvuavo, tenavu Epasaasi-hainaaka tentanavu variqa Atemisiraqaa koqemake raqiki vauna uvvara ekaa kankomake iriarave. Naaruvalihairo aahuva orivano maaqi hiqirira tenavu viraqaavata raqiki vaunaranra ekaa iriarave. ³⁶ Kia ho vovano vi uvarara una uvave tianarove. Virara irihama ne qaqi evaara vaila, kia paparuqamake vo okara vo okara qora okara autuate. ³⁷ Vi vaiintitanta kiama tinavu variqa naavuqihai vo haika muara varakaavo. Vitanta kiama tinavu variqa nahentiara qora uvavata tiva amitaavo. Vitanta kiama qora kaiqa vara kaamanta ne vitanta maini vîte aniamo.

³⁸ Demitariusivavata, vira kaiqa vaiintinavuvata, vo vaiintiqa uva vatareka auti vaivera, *ko* ti vai entaraqaa homa vika vi vaiintiraqaa uva vatevarave. *Ko* ti varia kaiqaraqaa raqiki variqaa variavo.

³⁹ Niqi vo uvavano vairera, homa ne ekaa nora vaiinti ruvaaquamavi vairaqaa vi uvvara avuqavuqamake tiate. ⁴⁰ Ne qumina uva kaara raqireka auti variavo. Naantiara vi uvvara okarara *kamaaniva* tinavu irairaqe tenavu kia ho vo uva tirarave. Hauri naantiara *kamaaniva* tinavuara tiharo, Ne qumina vi entara raquarave, tivakero tinavuqaa uva vataantorave, tiro.

⁴¹ *Kusikusivano* minti tivakero mini ruvaaquamavi vauka nititama komanta vinurama.

20

Masedoniainivata Karikinivata vura

¹ Ho nora antua uva tuva taiqa vuvaro Poruva Ihura vaintinavu naaromanta viva unaini anuvaro viva uva tiva nimiharo vika muntuka paruma nimitero, ho kauqu nimiro vika mini kero Masedonia vataini vura.

² Viva Masedoniaini vatuka vatuka niharohi Ihura vaintinavu mini vauka vo uva vo uva tiva nimiro vika muntuka kempukaiqama nimitero viraqaahairo viva vevara Kariki vataini otu viro. ³ Viva taaramo torara Karikini varikero, viraqaahairo viva Siriaini *sipi* virare tiro irumanta Iutaa vaintinavu vira arieka auti vauvarora tiro, Poruva qaqira mini kero qaiqaa tuvurantero verara Masedoniaini vura.

⁴ Pirusira maaqu Sopateva Beriaihainaava Porura vataakero vumanta vaiinti vonavuvata Porura vataake vura. Tesaronaikaihainaa vaiintitanta Aritaakusika Sekuntsikave, Debehainaa vaiinti Gaiusivave, Esia vataihainaatanta Tikkusika Tarofimusikave, Timotivave, Porura vataake vurama.

⁵ Vinavuka naane avuni vuka oru Taroasini tinavu veka vaumanta ⁶ tenavu vatuka vo, Piripaini variavauraro Kia Noqavu Mparetira ovata no entava taiqa vumanta viraqaahai tenavu *sipi* vare vivi kauquru enta varake Taroasini orure mini ⁷ entanavu variavaunara.

Poruva Iutikusira qaiqaa qaqi vara himpima kora

⁷ Santeqaa tenavu kara narera ruvaaqumavi variavauraro Poruva vaiinti nahenti ruvaaqumavi vauka uva vakaaka tiva nimi vaura. Viva hora vuariravara tiro, viva vukai uva tiva nimiqiro vi vauvaro enta tavaaraiqama vura. ⁸ Viva tiva nimiqiro vi vaumanta tenavu naavu veranto vaukanta ruvaaqumavi variavauramanta airi ova qumpike viraqi vatatovaro ⁹ qaraaka vaiinti vovano Iutikusiva *uintuaqaa* oquiviro vauvaro Poruva uva tivaqiro vi vauvaro Iutikusiva avuvano taunta vuvaro viva vaita aaavata viro, verara nai tauvaqaqaa nai tauvaqaqaa kaqato naavura taaramoqahairo vevara vata kanta hiqirura. Hiqiruma vika otu utu vare tavovaro viva qutuma vura.

¹⁰ Qutu vuvaro Poruva otu viraqaata nai aaquviro vira kaanaauruma tero tiharo, Ne kia getaate, viva qaqlima vaivo, tiro.

¹¹ Manti tuvaro qaraaka vaiinti viva qutu vuraqihairo qaiqaa qaqi himpuvaro, Poruva tuvurantero qaiqaa veraraqaa oru vaiharo mpareti nkui kero vika hampata namakero, viraqaahairo qaiqaa vukai uva voqavata viraqi vauka hampata tivaqiro viro aatita kero, viraqaahairo Poruva vika mini kero vurama. ¹² Vumanta vika qaraaka vaiinti viva qaqi himpura vita vare vika nai maqa vuvaro vika muntukavano koqe umanta vaura.

Poruva vatuka vo Miletusini vura

¹³ Poruva Taroaasini vaumanta tenavu naane *sipi* vaarinte, vatuka vo Asosini orure, mini Porura veka variavaunara.

Poruva avuni tiharo, Ne mini oru ti veka vaiqe te vatavaura orunte, ni ntita kaare, tiro. ¹⁴ Poruva viro tinavu tivita komanta tenavu vira vita vare vatuka vo, Mitirinini oru raavaunara.

¹⁵ Ho viraqaahai tenavu vivi, vira qararaa varuva avutaqaa vau vataro vo, Kiosi aumanto orure viraqaahai vivi, varuva avutaqaa vau vataro vo, Samosivata vi aatarake, vira qararaa vatuka vo, Miletusini oru raavaunara.

¹⁶ Poruva tiharo, Pentikosi ovata nare ia entara te Ieruharemini oruraarirava ho vairera, te vaaka mini virerave. Virara irihama te Esia vataini vukaiqamake variarorave ti, te kia Epasaasini virerave, tiro.

Poruva Epasaashainaa vaiinti noranavu ekaara uva tiva nimura

¹⁷ Poruva minti tumanta tenavu Miletusini oru raavauraro Poruva Ihura vaintiqaqaa raqiki vauka vira ani tavaate tiro, uva vara kovaro Epasaasini vura. ¹⁸ Uva vara kovaro vika unaini vumanta vika anirovaro Poruva vika tiva nimi tiharo, Te haaru Esiaini vaiha ni hampata kaiqa varavauna okarara ne iri tavaarave. ¹⁹ Kia tinta autuvano noraiqiarire ti, te kaiqa varavaunaranave. Iutaa vaiinti ruvaaqumavi vaiha ti qoraiqama titimareka auti variamanta te vukaari utiha, iqi rataqi viha, Nora Vaiinti Ihura kaiqa varaqi viha uva vakaaka ni tiva nimiqiu vuavaunaranave. ²⁰ Ne virara iri tavaarave. Ne tavaamanta te ekaa ni naavuqai vi aninha ni nivuqaa qoqaa vaiha, kia vo uva kukeqaraiti, te ni kahaqiaina uvaraqai tiva nimiavaunaranave.

²¹ Te Iutaa vaiintinavuaravata, vo vatanaakaravata, kempukaiqaake uva tivaqiqi viha mintima tiavaunaranave. Vaaku kaiqa vare aarara qaqirake Kotiva inaini aninha Ihura quqaa tinavu Nora Vaiinti quqaa vivave tiate, tiavaunaranave. ²² Ho vate te Kotira Maraqravano tiriara mini vuane tinantemake, te Ieruharemini mini virerave. Ieruharemini vuariraro nana haikavanoe tiqaa qovaraiqianarove? Kia te iruro. ²³ Te maa haikararaqaima irunarave. Te vo vatuka vo vatuka vi ani vauraro Kotira Maraqravano tiriara tiharo, Raurihara variane. Naantiara ai karapuhiqama kevavata, maara vareravata, ai vekama varianarove, tirave.

²⁴ Te Ihuva Noravano titimai kaiqara, vi kaiqara vi kaiqaraqai vara vuru taiqa karerave. Viraqaahai te kia maa vataraqaa qaqi variqiqi vuainarara noraiqaake irirarave. Te Kotiva vaiinti nahenti aqurihama nimitaaina uvara koqe vakaaka, vi uvaraqai tiva nimiqiu virerave.

²⁵ Te Kotiva raqikiaina uvara ne varianaini niha tiva nimunaranave. Te vate kankomake irunarave. Ne naantiara kiama qaiqaa ti viri tavevarave. ²⁶⁻²⁷ Kia te vo uva kukeqake vo uvaqai ni tiva nimiavaunaranave. Te ekaa Kotira uvarave, kaiqarave, ni tiva nimiavaunaranave. Te vate maa uvvara vutuke ni tiva nimiari iriate. Te Kotira uva ekaa uva ni tiva nimiavaunaranaro tiro, naantiara niqihairo vovano kakakima virera, kia vira uvavano tiqaa varianarove.

²⁸ Kotira Maraqravano ni noraiqama kaimantara ti, ne nentagaavata, Kotira vaiinti nahentiqaavata, koqemake raqikiqiqi vuate. Kotira nai Maaqqu naareqohairo vi vaiinti nahentiqaqaa raqikiqiqi vuate. ²⁹ Te vuariramanta qora uva ti vai vaiintika qaakau vairi voqaara anire ni qoraiqama nimitevarave. Te virara irunarave.

³⁰ Naantiara niqihai vaiinti vonavu qovaramavi, Ihura vaiinti nahentiara vika tinavuqai avataqi vuate ti, vika hampi uva una uva vika tiva nimiqi vivarave.

³¹ Virara irihama ne rauriha variate. Te taaramo ihi vaiha aatitairaqaavata, entaqi-vata, niara noraiqamake iriha auquru rauru kehama ni vohaiqa vohaiqa koqe aara numiqaavaunarave. Ne virara irihama kia tauru kaate.

³² Te vate vire ihama Kotiva niqaa raqikiarire ti, vira aarauro. Kotiva ni aagurihama nimitaaina uvara iriqi vuate. Vira uvavano ni kahaqamaqiro vira ne naantiara ekaa Kotira vaiinti nahenti hampata vaiha koqemake vaivarave. ³³ Te ni hampata variavauna entara kia ti muntukavano vora silvaa oriarave, kori oriarave, utavaaqaarave, ntimanta variavaunarave.

³⁴ Ne tavarare. Vi entara kia te niara ti kahaqiate tiraiti, te tenta kauquqohai kaiqa varaqi viha tenta karavata, utavaaqaqvata, varake ti vataake vaukavata kahaqamaqi vi variavaunarave.

³⁵ Te ekaa kaiqa varehama koqe aaraqai ni numiqaavaunarave. Tenavu mintimake kempukaiqamake kaiqa varakehama vehi vaiinti nahentivata koqemake kahaqaina okarara ni numiqaunarave. Tenavu mintiaqi vihama Ihuva Noravano tivato uvarara aatoqi iritaare. Ihuva mintima tiro: Vaarimakero voka voka nimi vaina vaiintiqua-haarirava uritarakero vairaro varaaina haikarara quahaainaravata aatarakaanarove, turave, tiro.

³⁶ Poruva vi uvara minti tiva nimi taiqa kero viva nora vaiinti hampata tori kauru araviro vaiharo Kotira aarerero. ³⁷ Kotira aaromanta vika iq'i rateha vira kuquqama amiteha vira moqake ho vuane ti. ³⁸ Poruva vaaka vika tiva nimi roti tiharo, Kiama ni vira qaiqaavata tavararave tura kaara, vika muntukavano qoraiqumanta vika Porura vita vare *sipi* muntu kora.

21

Poruva Ieruharemini vura

¹ Vika Porura muntu komanta tenavu vikara vuro tivake Porura vita vare *sipi* vuavaunara.

Tenavu *sipi* vaarire avuqavu tuvi, varuva avutaqaa vau vatara, Kosini tuvu varike, vira qararaa vata vo, Rodesini orure viraqaahai vatuka vo, Pataraini vuavaunara.

² Mini orure tavaavauraro vo *sipivano* Fonisiaini vireva umanta tenavu viraqi vaarire vuavaunara.

³ Tenavu viha tavaavauraro varuva avutaqaa vau vatava, Saiparusi kauqu kaanaaqaini vuamanta otitare otu vi, Siria vatainai otu raavauraro vatuka vo, Taiaini *sipivano* nai varato airairara muntu oqikareva umanta ⁴ tenavuvata mini vaavire oru Ihurara quqaave tuka rantake vika hampata mini vohaa *uiki* variavaunara. Vika hampata variavauraro Kotira Maraqravano vika kahaqumanta vika Porurara tiha, Kia Ieruharemini vuane, ti.

⁵ Tumanta tenavu mini variavauraro tenavu vuaina entava aniomanta vuavaunara. Tenavu vire iavauramanta Ihura vaiintinavu nahenti vaintiaravata tinavu vatukaihai tivita vare muntu namari auvhini komanta tenavu ekaa tori kauru aravi vaiha Kotira aarama kaavauramanta ⁶ viraqaahai vika kauqu tinavu timumanta tenavu vika nái kauqu nimi *sipi* vaarire vuavauramanta vika tuvurante nái maaqaini vurama.

⁷ Vika vumanta tenavu Taiaa vara mini ke, oru vatuka vo, Toremesini orure tinavu qata vakauka mini vauka uva mantamake vika hampata vohaa enta mini varike, ⁸ vira qararaa *sipi* qaiqaa vaarire oru vi, Sisariaini orure mini vaiha Piripiva Kotira vakaaka ti vau vaiintira naavuqi oru variavaunara. Tota Ieruharemini vaiha vaiinti ⁷navu vara himpimake Kotira kaiqa varaa tui vau vinauvukaqihairo Piripiva vovano vaura.

⁹ Piripira raavura ⁴navu vaiha vinavuka kia vaativata vararaiti, qaqi vaiha Kotira uva qovaraiqamakeha ti vauka vaura.

¹⁰ Tenavu vika hampata Sisariaini vo entanavu variavauraro vaiinti vo, vira autu Agabusiva Iutia vataihairo tuvurora. ¹¹ Vivavata Kotira uva qovaraiqama kero ti vau vaiintiva vaiharo viva tenavu variavaunainai tuvurero Porura *reti* varakero viraqohairo nai aiqu kauqu rumpatero tiharo, Kotira Maraqravano mintima tivo: Naantiara Iutaa vaiintinavu Ieruharemini variaka maa *retiraqohai* vira qora maantimake vira aiqu kauqu rumpake vo watanaka nimivarave tivo, tiro.

¹² Minta tumanta tenavuvata, mini vaukavata, vi uvara iri Porurara mpo ike tiha, Kia Ieruharemini vuane, ti. ¹³ Minta tiavauraro Poruva aqao tiro. Hauri ne iq'i rataqi vivaro ti muntukavano qoraiqiantorave. Kiama ti karapuhiqama kerara haatu itaivo. Te Nora Vaiinti Ihurara ti, te Ieruharemini qutu vuainararavata geramatema vauro, tiro.

¹⁴ Minti tumanta tenavu kia vira uva ho aatara kaarirava vaumanta tiha, Ho Noravano nai varataa ina kaiqara varaarire, tiavaunara.

¹⁵ Minti tivake tenavu vo entanavu mini varike tentanavu airaira gera qaaramake vare, viraqaahai verara Ieruharemini vuavaunara. ¹⁶ Ihura vainti Sisariaihainaaka vonavu tinavu tivita vare vuru tenavu variaina naavura, Nesonira naavuqi kora. Nesoniva Saiparusihainaava viva haaruqama kero Ihurara quaaave tu vaiintiva vaura.

Poruva Iemira oru tavora

¹⁷ Tenavu Ieruharemini oru raavauramanta tinavu qata vakaukavara Ihura vaintinavu mini vauka tinavu quahama timiteha tinavu tivita kora. ¹⁸ Vika tinavu quahama timiteha tinavu tivita kovaro vira qarara Poruva tinavu hampata Iemira tavareva viro. Vumanta Ihura vainti nora vaiintinavuvata Iemira hampata vauvaro ¹⁹ ho Poruva vika uva mantamakero, viraqaahairo uva vo, Kotiva vira kahaqi vauvaro viva nai vo vatanaa vo vatanaaka nora kaiqa vara nimitaqiro vu uvvara vika tiva nimiro.

²⁰ Poruva vi uvvara ekaa tiva nimumanta vika vi uvvara iri, Kotira autu tuaherake Porurara mintima ti: Ho ti qatao, tavaane. Airi Iutaa vaiintitahaa, vo *tauseni* vo *tauseninavu* Ihura vaintiqamavi, vika Mosira uvavata noraiqamake iriqi vi variakama variavo. ²¹ Vokiaka vika una uva tiva nimiha ariqaa oqikeha maantima ti variavo: Poruva Iutaa vaiinti vo vataini vo vataini variakara tiharo, Ne Mosira uva qaqira kaate. Kia ne nenta qorainti vainti vaata toqaate. Kia Iutaa vatanaaka maara okara iriqi vuate, ti vairave, tiavo. ²² Ariqaa vi uvvara vi uvvara oqike ti varia vaiintinavuka are Ieruharemini oruntea uvarara vikavata irivarave. Viraqaahairo are nantie inarave?

²³ Kaiqe tenavu ai tiva amiarirara are tenavu tainantema kera iane. Vaiinti erakaimaantenavu vinavuka nai kauqu ainqaa aquukeha Kotirara tiha, Tenavu quqaqamake mintirerave, tivake tivataavo. ²⁴ Are vinavuka ntita varera Kotiva vaata muntuka hiqama nimitaaaina okarara iriqira viharama vuru taiqa kera, are viraqaahairo vinavuka kahaqiharama monu aquakaira vinavuka qjata ekaa ntugu qaqini kaate. Are mintiaqira vira vaiinti nahenti ai tave, vokiaka ariqaa oqike tivate uvarara una uvaqaima vaivo tivarave. Are minti minti irera, vaiinti nahenti tavaivara are Mosira uva okara iriqira vi variaravama vainarave.

²⁵ Vo vatanaa vo vatanaaka Ihura vaintiqama vuaka haaru tenavu maa uvvara qara ntuvake tiva nimilavaunarave. Vi entara qaraqi mintima tunarave: Kia una variqa amite karara naate. Kia naare naate. Kia aunta raqutute aantau vahira naate. Kia hampi muara nuate, tiavaunarave, ti.

²⁶ Vika minti tuvaro Poruva eo tivakero vi vaiintinavuka ntita varero vira qararaa vinavuka hampata vaharo vaata muntuka hiqaaina okarara iriqi viro, viraqaahairo Kotira Naavuqi oriqetero Kotira kaiqa vara amite vau vaiintika tiva nimiro tiharo, Tenavu vi entanavura maaqi vaiha, vaatave muntukave hiqaaina okarara iriqi viha vuru taiqa kararave. Viraqaahai tenavu variari nenavu tinavu kahaqihama *ofaa* vo Kotira vara amitaate, tiro.

Kotira Naavu vaunaihai Porura ravaaqavu kora

²⁷ Vi entara 7 entanavu taiqaarirava umanto vaumanta Iutaa vaiinti vonavu Esia vataihainaaka tavavararo Poruva Kotira Naavuvano vaunaini vaumanta vinavuka vira tave, viraqaahai antua uva tivaqiqi viha vaiinti nahenti naarama vare oru Porura ravaaqavu vare naveraitiha, ²⁸ Isareri vaiintivarao, ani tinavu kahaqiate. Maa vaiintiva vonaini vonaini niharo Isareri vatanaakarave, Mosira uva okararave, maa Kotira Naavuarave, qora uva ti vai vaiintiva vaimanta tenavu vira ravaaqavu kauro. Ho vate viva vo vatanaa vaiintinavu ntita varero Kotira Naavu vainaini vuru kaimanta vinavuka vo vatanaa vaiinti vahara ti, vika Kotira Naavu takuqira qoraiqama amitaavo, ti.

²⁹ Tota vinavuka tavavararo vo vatanaa vaiinti vovano Epasaasihiainaava vira autu Tarofimusiva Porukantiro vatukavaura ni vaumanta vinavuka tiha, Poruva vi vaiintiravata vita varero Kotira Naavuni vivo, tura. ³⁰ Vinavuka nai irike una uva Poruraqa oqitomantara ti, ekaa Ieruharemini vauka hihai hihai kante oru ruvaaqumavi vaiha Porura ravaaqavuke Kotira Naavu vaunaihai raraue vare aaqaini veva kora. Aaqqaini veva komanta Kotira Naavuqaa raqikuka vaakama qenti tinta tora.

³¹ Vaiinti nahenti ruvaaqumavi vauka Porura arukareka auti vauvaro vaiinti vovano uva varakero tiharo, Ekaa Ieruharemini variaka arara itai okararama qovaramate iavo, tuvaro ³² Romeni iqoka vaiintiqaa raqiki vau vaiintiva nai qjata vaiintinavuve, nai iqoka vaiintinavuve, ntita varero kantero vaiinti nahenti ruvaaqumavi vaiha naveraiti vaunaini viro.

Mini vumanta vaiinti nahenti vi vaiintiravata, iqoka vaiintinavuvata, tave viraqaahai Porura kia qaiqaavata aruvaro iqokaqaa raqiki vau vaiintiva oru

Porura tuatero tiharo, *Seni taaraqantaqohai* vira rumpataate, tiro. Minti tivakero viva irero tiharo, Maa ta vaiintirave? Maava nana vara kaimantae ne vira ruquti variavo? tiro.

³⁴ Minti tumanta viraqi ruvaaqumavi vauka kia vohaa uva tiraiti, vo uva vo uva ti vauvaro iqoka vaiintiqaa raqiki vau vaiintiva kia vika uva okara anomakero iriraitiro, Porurara tiharo, Vira vita vare iqoka vaiintinavu naavuqi vuru kaate, tiro. ³⁵ Tumanta vika vira vita vare vi naavuraqi vi vau iriraqaa orure tavomanta vaiinti nahenti voqamake vira arukareka auti vaumanta iqoka vaiintinavu vira avuta ntuva vare vumanta ³⁶ vaiinti nahenti Porura avataqi viha, vihi vaahi tiha vira arukaate ti vaura.

Poruva nai auta ntu uvara tura

³⁷ Mintiaqi yumanta iqoka vaiintinavu Porura naavuqi vuru karare tuvaro Poruva igoka vaiintiqaa raqiki vau vaiintira irero, Hoe te ai hampata uva tirarave? tuvaro viva tiharo, Ike, are Giriki uvavata iriaravave? ³⁸ Te ariara tiha, Viva Isipi vatanaa vaiintive, tunarave. Vi vaiintiva haaru *kamaanira* vataakero raqire iharo 4,000 iqoka vaiinti ntita varero qumina vataaini raqireva auti vaurave, tiro.

³⁹ Minti tuvaro Poruva aqao tiro, Te Iutaa vaiintima vauro. Ti Tasusi Sirisiaini vatataikave. Tasusi nora vatuka vaimanta te vi vatanaakama vauro. Hoe te vaiinti nahenti uva tiva nimirarave? tiro.

⁴⁰ Tuvaro iqoka vaiintiqaa raqiki vau vaiintiva hove tuvaro Poruva naavu qentiana himpimo kauqu virini aqukero vuatarama komanta vaiinti nahenti tiremake evaara vauvaro Poruva vika nái Hiparu uvaqihairo uva tiva nimi vaura.

22

¹ Poruva mintima tiro: Ti qata vakaukavarao, ti qokavarao, ne iriate. Ne tigaa uva vataara ninta tiva nimirerave, tiro. ² Minti tumanta vika iruvaro Poruva nái uva Hiparu uvaqihairo ti vaumanta vika voqavata tiremake vauvaro Poruva nai auta ntuaina uvara tiharo mintima tiro:

³ Te Iutaa vaiintima vauro. Ti Tasusi Sirisia vataaini vatatakave. Te Ieruharemi maaqi noruqama vuraukave. Gamarieriva nora vaiintivano ti tiva timimanta te ekaa tinavu kaivaqaukvara maara okara iriavaunarave. Mintiaqi viha te kempukaiqaake Kotira avataaqi vuavaunarave. Vate ne Kotira avataaqi quantemake, tevata Kotira avataaqi vuavaunarave.

⁴ Vi entara te kia Ihura vaintiqama vuavauna entara te Ihura aaraqaa ni vauka qo-raiqama nimiteha vika aruke, vaiintivata nahentivata ravaaqaqvavu keha vuru karapuhiqi aquke variavaunarave.

⁵ Kotira kaiqa vara amite varia vaiintika vika qjata vaiintivanovata, ekaa *Kansoru* vaiintinavuvata, vika vi uvarar quoqavema tivarave. Vinavuka Damasikusini vau qata vakaukavarara qara ntuvake ti tumumanta te vi qarara vare vaiinti nahenti *seniqohai* oru rumpa vare vuru Ieruharemini kaarira vika ntaihaate tivake vuavaunarave.

Poruva nai Ihura vaintiqaa vurara tura

(*Kaiqa Varora 9:1-19; 26:12-18*)

⁶ Ho te vi qarara vare aarana viha tavaavauraro Damasikusini aumanto vauvaro kuarivano qjataaqaa uritaromanta te vi variavauraro vaakama naaruvalihairo ovavano aauquakaa voqaara te vuavaunanaini utu komanta ⁷ te vataaini hiqirivi iriavauraro uvavano tiriara mintima tivo: Soruo, Soruo, nantiharae ti qoraiqama timite variarao? turave.

⁸ Tumanta te tiha, Noravauvu, are tavave? tiavauraro viva tiharo, Te Nasaretiainaaka Ihukave. Are ti qoraiqama timite variaraukama vauro, tiro. ⁹ Minti tumanta ti vataake anuka kia vi uvava iriraiti, vika ova itoraqai favorave.

¹⁰ Mintumanta te Nora Vaiinti vira ireha tiha, Te nantie irarave? tiavauraro Noravano tiriara mintima tivo: Himpira oru vira Damasikusini oru vairaro vo vaiintivano are Kotira kaiqa varenarara ai tiva amiarire, turave. ¹¹ Minti tuvaro nora ovavano itovarora tiro, ti tivu qimpa vumanta kia te ho tavaavauramanta ti vataake anuka ti kauqu utu vare tivita vare vuru Damasikusini korave.

¹² Mini kovaro vaiinti vovano vira autu Ananaiaasiva, viva maara uva iri vau vaiintiva Mosira okara uva koqema kero iru vaiintiva, ekaa Iutaa vaiinti Damasikusini vauka virara koqe vaiintive ti vauva, ¹³ viva te variavaunanaini anirero ti tataaqaa himpitero vauharo tiharo, Ti qata Soruo, qaiqaa nena avuqohai tavaane, tuvaro vaakama ti tivu qimpa vuva qaiqaa hogqaa vivera te vi vaiintira kankomake tavaavaunarave.

¹⁴ Mintivera variavauraro viva tiharo, Tinavu kaivaqaukvara Variqavano Kotiva ariara vira antuqavano vainarara iriane tiro, ai vara himpimo kaivo. Avuqavu ni vai vaiintira Kotira kaiqa vaiinti Ihura are vira tavehara vira uvaqai iriqira vuane tiro, Kotiva

ai vara himpima kaivo. ¹⁵ Are Ihura kaiqa tavenaravata Ihura okara irinaravata, ekaa vaiinti nahenti tiva niminarave. ¹⁶ Are nana vekae variarao? Himpira Ihura autu rehara namari varairaro viva ai vaaku kaiqa nunka amitaarire, turave.

Kotiva Porurara vo vatanaaka ti uva tiva nimiane tura

¹⁷ Ananaiaasiva minti tumanta te viraqaahai himpi anirante Ieruharemini vi, Kotira Naavuqi oru Kotira aareha taira voqaara tavaavaunaru. ¹⁸ Vira tave variavauraro Noravano tiriara tiharo, Vaaka himpira Ieruharemi maini kera vuane. Are ti uva maa vaiinti nahentika tiva nimiramantavata vika kia ho irivarave, turave.

¹⁹ Minti tumanta te thima, Noravauvu, vika haaru ti kaiqa okara iri tavorave. Te haaru maara naavu vo naavu vo naavuqihai ariara iriqi vi vau vaiinti nahentika raraau vareha vuru karapuhiqama keha vika ntaihe variavaunaru. ²⁰ Haaru vika ai uva tiva nimi vau vaiintira Sitivenira arukomanta tevata vi entara vika utavaaqaaqaa raqiki vailha ho tevata vira arukaate tiavaunaru, ti. ²¹ Minti tiavauraro Noravano tiriara tiharo, Ho himpira vuane. Te niara vataini, vo vatanaaka vainaini ai atitarerave, turave, tiro.

²² Poruva minti tivaqiro vumanta mini ruvaaqumavi vauka vika vira uva iriqi vuvaro Poruva vo vatanaakara uva tumanta viraqaahai vika arara itomanta oi aai tiha neveraitiha, Vira vite vuru arukaate. Minti tina vaiintiva kia ho qaqi variqi vuataarave, tura.

²³ Minti tivake vika oi aai tiha nai utavaaqa aqu aqu iha konkomavata varake aqu aqu iha vauvaro ²⁴ Romeni iqoka vaiinti vika noravano Porurara nai iqoka vaiintinavu tiva nimiro tiharo, Vira vita vare vuru naavuqi kaate. Viva nana varakaimantae vaiinti nahenti noraiqaake uva ti variavo? Viva vi uvvara okara qovarama kaarire ti, ne kaavuqohai vira ruqutuate, tiro.

²⁵ Minti tumanta vika Porura rumpate vira ruqutirare tuvaro Poruva nora vaiinti vo vira tataaqa himpitero vau vaiintira irero, Are *kamaanira* okara iriharama are hoe kia ko tiraitira, Romeni vaiinti qumina ruqutinarave? tiro.

²⁶ Poruva minti tuvaro nora vaiinti viva vi uvvara iriro oru nai nora vaiinti tiva amiro tiharo, Are nantie inarave? Vi vaiintiva Romeni vaiintivanoma vaivo, tiro.

²⁷ Minti tuvaro vika nora vaiintivano Poruva vaunaini anirero vira irero, Are quqaae Romeni vaiintivano variarao? Are tirage iriare, tiro. Minti tuvaro Poruva eo tiro.

²⁸ Tuvaro nora vaiinti viva tiharo, Te nora monu aqueha Romeni vaiintiqama vunarave. Arevo, nantiakerae Romeni vaiintiqama vuanarave? tuvaro Poruva tiva amiro tiharo, Ti noka qoka Romeni vaiintiqama vuarara ti, tevata Romeni vaiintima vauro, tiro.

²⁹ Poruva minti tumanta vaiinti vonavu Poruva uva tiariре ti, vira ruqutireka auti vauka vaakama qaqrake vuvaro vika nora vaiintivanovata getakero tiharo, Oho, Poruva Romeni vaiintivano vaimanta te vira *seniqohai* rumpatauro. Te kia mintiataarave, tiro.

Porura vita vare kansoru vaiinti nivuqaa vuru kora

³⁰ Vika nora vaiintivano minti tivakero viva Iutaa vaiintinavu Poruraqaa uva vato okarara kankoma kero irireva auti vaharo vira qararaa Porura *seniqohairo* rumpatora qaqlini kuvantu kero uva vara kovaro Kotira kaiqa vara amite vau vaiintika vika noranavuvata, ekaa *kansoru* vaiintivata, vika ruvaaqumavi vauvaro viva Porura vita varero vika nivuqaa vuru himpima kora.

23

¹ Poruva himpiro *kansoru* vaiinti navu aitutuma taveharo viva vika tiva nimiro tiharo, Ti qata vakaao, te Kotira avuqaa nihama kia una kaiqa varaurarora tiro, kia ti toqaavu harivo, tiro.

² Minti tuvaro Kotira kaiqa vara amite vau vaiintika vika qita vaiinti Ananaiaasiva Porura tataaqa vau vaiintika tiva nimiro tiharo, Porura no ruqema kaate, tuvaro ³ Poruva tiharo, Kotira ninavata ruqutuanarove. Are qora katari hanta *peni* aqutaara voqaarama variarao. Are Kotira uva maara irihara avuqavu *ko* tiataara vaivara are Kotira uva raqa keharama ti ruqutuate tiarao, tiro.

⁴ Poruva minti tumanta vaiintinavu vira tataaqa vauka tiha, Are Kotira kaiqa vara amite varia vaiintika qita vaiintiara qora uva ti variarao, ti. ⁵ Minti tuvaro Poruva aqao tiro, Ti qata vakaao, kia te viva qita vaiintivano vaira virara iriraitima turo. Kotira vukuqi mintima tivo:

Kia vaiinti nahentiqaa raqikina vaiintirara qora uva tiate, turave. *(Katu Varora 22:28)*

Te vi uvvara irunarave, tiro.

⁶ Poruva minti tivakero viva tavomanta vaiinti hininavu Satiusi vaiinti maara okara iruka vaumanta vaiinti hininavu Parasi vaiinti maara okara iruka vauvaro Poruva

kansoru vaiinti tiva nimo tiharo, Ti qata vakao, te Parasi vaiinti maara okara iruraukave. Ti qovavata Parasi vaiinti maara okara iri vau vaiintiva vaurara ti, tevata vira maaquvano mintima vauraukave. Vaiinti qutika qaiqaa qaqi himpi okarara te virarama quqaa uvavema ti vaunarave. Ho vi uvvara kaara vate ne tiqaa uva vate iavo, tiro. ⁷Poruva minti tumanta Parasi vaiintivata, Satiusi vaiintivata, viraqaahai himpi rairavi nai ati nai ati iha vaura.

⁸ Satiusi vaiintivano ti vau okarava maantimama vairo: Vaiintivano qutu viro kiama qaiqaa ho qaqi himpuanarove. Kiama *enseli* vika variavo. Kiama maraqura haikavanovata vaivo, ti vaura.

Satiusi vaiintivano maara ti vau okarava mintima vauvaro Parasi vaiintivano maara ti vau okarava maantimama vairo: Vaiintivano qutu viro qaiqaa qaqi himpuanarove. *Enseli* vikavata variavo. Maraqura haikavanovata vaivo, tura. Vika ekaa vi uvvara vi uvvara quqaa uvave tura.

⁹ Parasi okaravano mintimakero vaurara ti, vika voqamake naverai tivaqvi viha vi vaiintinavukaqihai Parasi vaiintinavu maara okara ti vauka himpi kempukaiqamake tihia, Aqao, tenavu tavauraro kia maa vaiintiva qora kaiqa varavave. Quqaae haaru vi entara maraqura vovanoe, *enseli* vovanoe, vira tiva amurave? ti.

¹⁰ Vika minti tivake noraiqamake tirorimaqvi vuvaro Romeni iqoka vaiinti noravano geteharo tiharo, Hauri vika hihai hihai ani Porura rarauriha vira vaata rapapaama kevorave, tiro. Minti tivakero viva nai iqoka vaiintinavu nititero tiharo, Otu Porura vika variaraqihai vita vare vuru iqoka vaiinti naavuqi kaate, tiro.

¹¹ Minti tumanta vira otu vita vare naavuqi vuru kovaro entaqi Poruva vauvaro Noravano qovarama viro vira tataqaq himpitero vahilo vira tiva amiro tiharo, Kia qetaane. Kempukaiqama vira variane. Are maini Ieruharemini vahila, ti okarara vika tiva nimianantema kera, naantiara are niaraini nora vatuka Rominivata oru vaharama, ti okarara mintimakehara tiva niminarave, tiro. Noravano minti tura.

Iutaa vaiintinavu Porura aru kerara tura

¹² Vira qararaa toqaqi Iutaa vaiinti vonavu ruvaaqumavi vahila vohaa uva tiva taatauke vatora. Vika kauqu aiqiqaa aqukeha mintima ti: Vate tenavu namarivata karavata kia naraiti, Porura aruke viraqaahai karavata namarivata narerave, tura.

¹³ Vaiinti 40navuvano minti tivake uva tiva taatauke vate ¹⁴viraqaahai vika oru Kotira kaiqa vara amite vau vaiintika vika noranavu tiva nimi tihia, Tenavu uva vo tiva taatauke vatemata kauqu aiqiqaa aqukeha Porura aruke viraqaahai karavata namarivata narerave, turo.

¹⁵ Nevata, *kansoru* vaiintivata, uva vara kaivaro Romeni vaiinti noravano vainaini viraro viva Porura vara kairaro maini tuvuvarire. Ne Romeni vaiintiara mintima tiate: Tenavu Porura irama amiteha vira uva okara voqavata irirerave, tiate. Ne mintimake unaqaraiqamake tiqe tenavu aaraini vaara autute variariraro viva tuvirage vira arukaare, ti.

¹⁶ Vika uetake minti tuvaro Porura aura vainti qoraintivano vika ueto uvvara iriro, viva oru viro iqoka naavuqi Poruva vauraqi vuru vi uvvara Porura tiva amura.

¹⁷ Tiva amuvaro Poruva iqoka vaiintigaa raqiki vaura vo aarama kero vira tiva amiro tiharo, Quvaaraa vainti maa vita varera nora vaiintivano vainaini vuru kairaro viva vo uva vira tiva amiarire, tiro.

¹⁸ Tuvarroma viva vira vita varero vi vaiintiva vaunaini vuru kero tiharo, Karapuhi vaiinti Poruva tiriara maa vaintira vita varera are inanaini vuru kairaro vo uva ai tiva amiarire, tivo, tiro.

¹⁹ Minti tuvaro nora vaiinti viva vi vaintira kauqu utu varero vita varero nariaraakanta vuru kero vira irero, Are nana uva ti tiva timirevae aniarao? tiro.

²⁰ Tuvaro quvaaraa vainti viva vira tiva amiro tiharo, Iutaa nora vaiintinavu minti tivake uva taatauke vataavo. Vika hura ariara Porura vitera *kansoru* vaiintinavu vainaini virage tenavu Porura uva okara anomake iramake irirerave tivarave. ²¹ Vika minti tivara are kia vika uva iriane. Vaiinti 40navuvano vika aaraini kukeqavi vahila Porura arukareka vaara autute variavo. Vika kauqu aiqiqaa aqukeha tihia, Tenavu kara kia naraiti, Porura aruke viraqaahai karavata namarivata nareravema, tiavo. Vika minti tivake qeramate ai vekama variavo, tiro.

²² Quvaaraa vainti viva minti tuvaro nora vaiinti viva vira tiva amiro tiharo, Are ti tiva timiana uvvara kia vo vaiintivata tiva nimiane, tiro. Tivakero quvaaraa vainti vira atitovaro vurama.

Porura Felikisiva vaunaini atitora

²³ Quvaaraa vainti vira atitovaro uvuaro nora vaiinti viva nai iqoka vaiintiqaa raqiki vau vaiintika taaraqanta naarama kero tiva nimiro tiharo, Iqoka vaiinti 200navu ntita vataate. Ohiqaa niha raqi vaiintika 70navu ntita vataate. Vaantaara tuateka 200navu ntita vataate. Vika qeramake vatatem Sisaria vatukaini 9 *kiroki* entaqima vuate.

²⁴ Poruravata *ohi* vo qerama amitaivaro viva viraqaata oquivi vaira vita vare nora *kamaan* iva Felikisiva vainanaini muntu kaivaro viva koqema kero mini otu ntaarire, tiro. ²⁵ Nora vaiinti viva minti tivakero qara ntuvake tero mintima tiro:

²⁶ Te Kalodiusi Lisisiska te maa uvvara qara ntuvake vara kaariraro are nora kamaaniva vainanaini vuare.

Te ai uva mantama amitauro.

²⁷ Iutaa vaiintinavu maa vaiintira ravaaqavuke aru kareka auti variamanta te iruraro viva Romeni vaiintivano vaimantara ti, te iqoka vaiinti ntita vare oru vi vaiintira vika kauquqihai qaqqini vara kaunarave. ²⁸ Vika vi vaiintiraqaa uva vataa okarara kankomake iriare ti, te vira vita vare vuru vika nái kansoru varianaini ke mini vaiha ²⁹ tavauraro kia vira aruke okaravavata, vira karapuhiqamake okaravavata viraqaat vaivo. Vika nái maara uva kaaraqai viraqaat uva vataavo. ³⁰ Viraqaahairo vovano ti tiva timiro tiharo, Iutaa vaiintinavu Porura uetake aruke uvvara ti variavo timanta te kaiqe are inanaini vira atitaariraro vuare turo. Minti tivake te Poruraqaa uva vataa vaiintikara ne ariara inanaini oru vaiha vi uvvara tiate turo, tiro.

³¹ Nora vaiinti viva mintimakero qara ntuvake tomanta iqoka vaiintinavu nái noravano tuntemake, Porura vita vare entaqi otu vi, vatuka vo, Antipatarisini muntu kora.

³² Vira qararaa vataqaat vu vaiintinavuka oturante maaqaini urumanta *ohiqaa* vukaqai

³³ Poruravata qaravata vare Sisariaini *kamaanira* noravano vaunaini muntu kora.

³⁴ Muntu kovaro *kamaanira* vaiintivano qara vira kaara ntuvake tavero Porura irero, Are ta mantaraihainaavave? tiro. Tuvaro Poruva te Sirisiaihainaakave, tiro.

³⁵ Minti tuvaro viva tiharo, Ariqaa uva vataare iaka tuvuntaivaqe te vi uvvara irirerave, tiro. Minti tivakero viva Herotira naavu noraqii Porura vita vera kero tiharo, Ne vi vaiintiraqaaata maimaraara raqikiate, tiro. Turama.

24

Iutaa vaiinti noranavu Poruraqaa uva vatora

¹ Kauquru entanavu aitarovaro Kotira kaiqa vara amite vauka qiata vaiinti Ananaisiva nora vaiintinavuvata ntitakero, ekaa *ko* okara anomia kero iri vau vaiintira Teturusiravata vitakero, Sisariaini Porura vataake *ko* tireka vura. Vika otunte *kamaanira* avuqaa vaiha Poruraqaa uva vatora.

² Vika Teturusira aarovaro Teturusiva Poruraqaa uva vateharo mintima tiro:

Nora vaiinti Felikisio, are tinavuqaa koqema kera raqiki variaravera tenavu maat-eraiqihai vauro. Haaru tenavu hampiqi vaurara are viraqaahairo anintera tinavu kaiqa koqema kera avuqvavuma kera varu timitaara. ³ Are mintiaramanta tenavu vo vatuka vo vatukaini vaurauka ari kaiqara voqamake quahe yaiha ariara koqema iaro turo. ⁴ Ho tenavu ai vukaiqamake ravaaqavu taarorave. Are tinavu aqurihama timitairaqe tenavu inaara uvaqai ai tiva amiare.

⁵ Tenavu tavauraro maa vaiintiva voqamakero raqua okarara qovaraiqamake vai vaiintivama vaivo. Viva vo vataini vo vataini niharo Iutaa vatanaa vaiinti raquate tiro, antua uva tivaqiro ni vairave. Viva tinavu maara okara vira qaqqira kero vo okara, Nasaretihainaaka ti varia okarara, viraqaa raqikhairo avuniqama kero vi vai vaiintivama vaivo. ⁶ Viva tinavu variqa Kotira Naavuqi niharoma vira qoraiqama kareva auti vaivave. Viva Kotira Naavu qoraiqama amitareva autimanta tenavu vira ravaaqavu kauro. Tenavu tentanavu maara uvvara iriha *ko* tirare turaro ⁷ Romeni noravano Lisisiva anirero kempukaiqama kero tinavu kauquqihairo vira vitairave. ⁸ Lisisiva tiharo, Poruraqaa uva vataare ika ariara inanaini vuate tirave. „Minti timanta tenavu maini tuvuntauro.“ Are Porura nai irairaro viva nai noqihairo tenavu virara *ko* tirera iaina uvvara tirara are iriane, tiro.

⁹ Teturusiva minti tumanta Iutaa vaiinti ekaa vikavata Poruraqaa uva vatehama Teturusiva quqaa uvama tivo, tura.

Poruva nai auta ntiharo uva tiva nimura

¹⁰ Vika minti tuvaro nora *kamaanira* vaiintivano Poruva uva tiarire tiro, *aruqohairo/ anuqohairo* tiane tuvaro Poruva himpiro mintima tiro:

Te irurara are airi ihi vahara maa vataraqaa raqikharama *ko* ti variaravave. Virara irihama te ariara quahehama tenta auta ntiha uva tirerave. ¹¹ Te ninau Ieruharemimi tenta maara uva tirera 12 entanavu aitaraimanta mini oruntaunarave. Are vo vaiintivata

irairaro viva te tiaina uvarara ququaaveqaima tianarove. ¹² Kia Iutaa vaiinti vokiaka ti tavaavera te Kotira Naavu vainaini vaiha te vo vaiinti vataake antua uvavata tiavaunarave. Vika kia tavaavera te maara naavu voqive, vatuka voquaave vaiha, vaiinti nahentiara iqoka raquate tunarave.

¹³ Vika tiqaa quminama uva vataavo. Vovano vika uvvara ququaave tiarirava kiama ho varianarove. Vika qumina uva ntuvakema tiqaa vataavo.

¹⁴ Vika hini uva tiriara tivataa uvavaqaima quqaa uvama vaivo. Quqaama te tentanavu kaivaqaukavara Variqa autu tuaherara iha, te uva okarara irihama vira autu tuahere vauro. Vika vi aararavata, vi okararavata, una okaraveqai ti variarave. Ho te vi okarara irihama kia te tinavu kaivaqaukavara uva okara qaqlira karaiti, te Mosira uva maarave, paropeti vaiintinavu qara ntuvato uvarave, vi uvarara quqaa uvaveqai turaukave.

¹⁵ Viti vaiintika tihamo, Naantiara Kotiva ekaa vaiinti nahenti qora kaiqa vareka qutu vikave, koqe kaiqa vareka qutu vikave, qaiqaa qaqlira himpima kaanarove, tia uvarara tevataa viti vaiintika aanare vi uvarara quqaa uvave ti vaunarave. ¹⁶ Te vaiinti nahenti nivuqaave, Kotira avuqaave hampi nuarorave tiha, te koqe avu aatoqaaqai ni vaunarave.

¹⁷ Te Ieruharemihai vonaini vo ihinavu varike, viraqaaahai kaiqe tenta maaqaini oru tenta navunaaka Iutaa vaiinti nahenti tave, vikara monu nimitera nimi, viraqaaahai Kotira quahama amitaare tunarave.

¹⁸⁻¹⁹ Minto tivake te orunte tentanavu maara uva iriha vaatave muntukave hiqaaina okararavata iriqi viha Kotira Naavu avutaqi vaiha, kia airi vaiinti hampata vairaiti, kia te vokiaka hampatavata tiroriraiti, vi okararaqai iriqi vi vauramanta Iutaa vatanaa vaiintinavu Esia vatalhainaaka ti rantake tavorave. Ho uva vairera, vi vaiintinavuka ai avuqaa aninte tiqaa nana uvae vatera tiate.

²⁰ Vika nái uva kia tivera, viti vaiintinavuka homa vi uvvara tivarave. Te tota *kansoru* vaiintinavu nivuqaa himpite vauramanta vika vi entara nana qora kaiqae tiqi qovaramake tave uvvara vairera, homa vika ai tiva amivarave. ²¹ Te vi entara *kansoru* vaiintinavu nivuqaa himpite maa uvvaraqai tiavaunarave. Naantiara Kotiva vaiinti nahenti qutu vika qaiqaa qaqlira himpima kaanarove tuna uvvara ne vira kaarae tiqaa uva vatareka auti variavo? ti tiavaunarave, tiro.

²² Poruva minti tuvaro Felikisiva Ihura vaiintinavu nu okarara iruvvara tiro, viva tiharo, Ho vate homa iruro. Ieruharemihairo nora vaiinti Lisisasiva nai tuviraqe te vi uvvara voqavata irirerave, tiro.

²³ Minto tivakero viva nora vaiinti vo tiva amiro tiharo, Poruraqaa raqiqiqira vuane. Kia vira paama tivakera rumpataane. Viva vairamanta vira tontinavu homa vira kahaqireka ani tavevarave, tiro.

Felikisiva Porura aarora

²⁴ Felikisiva minti tivakero vo entanavu oru mini varikero, viraqaaahairo nai naata Drusilakantiro aniro. Drusilava Iutaa nahentivano vauvaro vikantiro anirero tiharo, Porura aarairaro aniarire, tuvaro Poruva anirero Ihura uva okara vitanta tiva nimuvaro Felikisiva vi uvvara iri vaura.

²⁵ Vitanta iri vauvaro Poruva Ihura uva tivaqiro viharo viva avuqavuqama keha ni okararave, kia vaaka arara itaaina okararave, Kotiva *ko* tiaina entararave tiva nimuvaro Felikisiva vi uvvara iruvvara aatu itovaro tiharo, Homa iruro. Ho vuanerama turo. Naantiara kia kaiqa vaina entara ai qaiqaa aararerave, tiro.

²⁶ Felikisiva minti tivakero viva Porurara viva utaru monu ti timiraqe te vira atitaari-raro nai maaqa vuarire tivakero, viva nai aatoqi mintima irikeharo vo enta vo enta Porura aarama kero vikantiro uva ti vaura.

²⁷ Mintiaqiro vauvaro taara ihi aitarovaro vo vaiintivano Pokiusi Fetusiva Felikisira vatuka varero vi kaiqara varareva anirovaro Felikisiva nai vurama. Felikisiva Porura vaaka atitaataara vauvarovata, viva Iutaa vatanaa vaiintinavu tiriara koqe vaiintive tiate tiro, Porura qaiqai karapuhiqi kovaro vaura.

Poruva avuhainaa vaiinti noravano Romini vauva ti uva iriarire tura

25

¹ Fetusiva anirero vi vataraqaa raqi kireva taaramo enta ani Sisariaini vari kero, viraqaaahairo verara Ieruharemini viro.

² Mini oru romanta Kotira kaiqa vara amite vau vaiintika vika noranavuvata, nora vaiinti vonavuvata, viva unaini orure Poruraqaa uva vateha kempukaiqamake tiha,

³ Mpo, are tinavu kahaqihara tiramanta Porura vita vare Ieruharemini urivaqe *ko* tiare, ti. Vika Porura arukareka aaraini vaara autireka iha, minti tura.

⁴ Vika minti tuvaro Fetusiva vika nái tiva nimiro tiharo, Poruva Sisariaini karapuhiqima vaivo. Te inaaraiaq varike ururante Sisariaini virerave. ⁵ Ne nenta nora vaiintinavuara timanta vinavuka ti hampata vikama, vi vaiintiraqaa nana uvavano viraqaa vairerama, otu ko tiate, tiro.

⁶ Fetusiva minti tivakero viva vika hampata 8 entave 10 entave mini varikero, viraqaaahairo ururantero Sisariaini oturero vaiharo vira qararaa viva *ko* ti vau naavuraqiqi oru vaiharo Porurara vite aniate tiro. ⁷ Tumanta Porura vita vare oruromanta Iutaa vaiintinavu Ieruharemini tukuka Porura vara ututumate viraqaa airi uva vate vaura. Vika Poruqaa uva vatovarovata, kia vika uvvara quqaa uvave ti aarava vaura.

⁸ Vika minti tuvaro Poruva nai auta ntiharo tiharo, Te kia qora kaiqa varauraukave. Te kia Iutaa maara uvavata raqa kaunarave. Te kia Kotira Naavu qoraiqama amitaunarave. Te kia Romeni avuhainaa vaiinti Sisaara qora uva tiva amitaunarave, tiro.

⁹ Poruva minti tuvaro Fetusiva Iutaa vaiintinavu nariara koqe vaiintive tiate tiro, Porura irero tiharo, Are Ieruharemini vuataa irera, are mini viraqe te mini oruntema ai uva avuqavu iare, tiro.

¹⁰ Minta tuvaro Poruva aqao tiro, Te vate himpi vauna naavura maa vira *kamaanira ko* naavugima vauro. Te maaqi variarirara are *ko* tiataarave. Kia te Iutaa vaiinti qora kaiqa vara nimitaunarave. Arevata virara irianarave. ¹¹ Te *kamaanira* uva raqa kaariravauve ti ho haru kevarave. Vika tiqaa vate uvava una uva vairera, kia ti vika nimira vika ti qumina haru kaate. Te nora vaiinti avuhainaava Sisaava vainanaini vuariraro viva ti *ko* iriarire, tiro.

¹² Minta tuvaro Fetusiva nai *kansoru* vaiintinavu hampata uva tiva varero viraqaaahairo Porurara tiharo, Are tiharo homa Sisaava ti uva iriarire tianarara ti, te ai atitaarirara nena viraro viva ai uva iriarire, tiro tura.

Porurara Agiripaaravata tiva amura

¹³ Vo entanavu aitarovaro Fetusiva qaraakaiqama kero ani vauvarora tiro, King Agiripaava nai naata Benaisikantiro Sisariaini Fetusira uva mantareva tuvurora.

¹⁴ Vitanta tuvure vo entanavu mini vauvaro Fetusiva Porura uva King Agiripaara tiva amiro tiharo, Tota Felikisiva vaiharo viva vaiinti vo karapuhiqi kaiva qaqiqai viraqiqi vaivo. ¹⁵ Te Ieruharemini oru vauramanta Kotira kaiqa vara amite varia vaiintika vika noranavuvata, Iutaa nora vaiintinavuvata, vi vaiintiraqaa uva vatehama tiriara vi vaiintira arukaane tiarave.

¹⁶ Vika minti tiamanta te vika nái tiva nimi tiha, Aqao, tenavu Romeni vaiinti vaiha, vo okara iri vauraukave. Kia tenavu hoqare *ko* naane tiraiti, kiama qumina nora uva vaiintiqa vatararave. Vaiinti vogaa uva vateka ani vaiha vi vaiintiraqaa uva vataivaro vivavata nai auta ntuaina uvvara tirage iri, viraqaaahai tenavu *ko* rahakararave, tunarave. ¹⁷ Te minti turamanta vika maini te unanaini *ko* tireka tuvuromanta te kia varike tiraiti, te hora vi uvvara avuqavu qirerave tivake vira qararaa te *ko* tire iha vi vaiintira vite aniate turamanta vira vite aniamanta te iruramanta ¹⁸ kiama vika himpi tiha, Vi vaiintiva minti mintima kero *kamaanira* uva raqa kairave, tiarave.

¹⁹ Vika kia minti tiraiti, vika qumina nái maara uva tiara vira kaara tirorihama qumina vi vaiintiraqaa uva vataarave. Qutuvi vaiintira vo, Ihurara tirori variavaro Poruva aqao tiro viva qaqima vaivo tirave. ²⁰ Vika minti tiamanta te vaiha kia vi uvvara okara anomia irikauro tivake Porurara tiha, Are oru Ieruharemini vairage te mini oru ai uva okara iriare, turaro ²¹ Poruva tiharo, Aqao, Romeni avuhainaava Sisaava ti uva iriarire timanta, te Porurara tiha, Vira karapuhi naavuqi kaivarо vairage te vo enta Sisaava vainanaini vira atitaariraro vuarire tunarave, tiro.

²² Fetusiva minti tuvaro Agiripaava tiharo, Te tentavano vi vaiintira uva iriataa iraque irirerave, tiro. Tuvaro Fetusiva tiharo, Homa, are hora vi vaiintira uva irinarave, tiro.

²³ Minti tumanta vira qararaa Agiripaaka Benaisika anumanata vaiinti nahenti vitantara nora vaiintitamata aniaivo tivakeha quaha quahamaqi vrumanta nora vaiintinavu Sisariaini vaukavata, iqoka vaiinti noranavuvata, vitanta hampata oru vi, uva iri vau naavuraqiqi oriqetovaro Fetusiva tumanta vika Porura vita vare anuvaro Fetusiva tiharo, ²⁴ King Agiripao, arevata maaqi variakavata iriate. Maa vaiintira tavaate. Ekaa Iutaa vika maini variakave, Ieruharemini variakave, maa vaiintiraqaa uva vataateha te unanaini vi uvvara vare aniarave. Vika noraiqaake uva naveraitiha, Vi vaiintiva vukaiqaakero qaqi variqiro vuantorave, tiarave.

²⁵ Vika minti tiamanta te *ko* tiha tavauraro vi vaiintiva kia qora kaiqa varairara ti, vira aru keva kia ho vairave. Ho nai viva tiharo, Sisaava ti uva iriarire, tirave.

Minti timanta te vira Sisaava vainanaini atitaare tivake kauraro viva vairave. ²⁶ Te Porurara uva qara ntuvake Sisaara amitarare ti, tavauraro vi uvava kia avuqavu vairave.

King Agiripao, virara irihama te vi vaiintira vita vare ariara viva vira uva iriarire ti, te vira ai avuqaavata, ekaa maaqi variaka nivuqaavata, vita viri kauro. Nevata vi uvvara iriqi vi vaivave te Sisaaraini vi uvvara qara ruva amitaare. ²⁷ Kia te vi vaiintira uva avuqavuqamake viva minti mintimama qora kaiqa varaivo tiraiti, qumina vira atitaariraro kiama koqe ianarove, tiro.

26

Poruva Agiripaara avuqaa vaiharo nai auta ntu uvvara tura

¹ Fetusiva minti tuvaro Agiripaava Porurara tiharo, Nena uva homa tinarave, tiro. Minti tuvaro Poruva nai kauku virini aqukero nai auta ntu uvvara maantima kero tiro:

²⁻³ King Agiripao, Iutaa vaiintinavu tigaa uva vataara virara te vate tenta auta ntuaina uvvara tirerave. Are tinavu Iutaa okarave, tenavu tiror vauua uvarave, irianarara ti, te ari avuqaa vaiha tiainarara quaheha vauro. Mintimake te vi uvvara ai tiva amiqi vuvarirara are kia popoharaitira iriane, turo.

⁴ Te haaru vaintiruka vaiha tenta maaqaini variqi vi, vira naantiara Ieruharemini avuqavu variqi vuavaunara ekaa Iutaa vaiinti virara iri kaarave. ⁵ Vika ti kaiqa okarara ari ihiaa iri tavamakaarave. Parasi vaiintinavuqai noraiqamake tinavu maara uva iriantemake, vi entara tevata vi uvvara iriqi viha, tevata Parasi vaiintivano vaiha variqi vuavaunarae. Iutaa vaiintinavu uva tiataa ivera, vika vi uvarara quqaa uvave tivake ho ai tiva amivarave.

⁶⁻⁷ Tenavu Iutaa vatanaaka vairera 12 ankunavuvano vaunarae. Ho tenavu ekaa Kotiva tivato uvvara *Mesaiaavano* qovaraiqianarove tivato uvvaraqai iriqi viha entaqive, kuariqaave, vi uvava qovaraiqianara veka vaiha Kotira autu tuaheraqi vi vaunarae. Nora vaiintio, tevata vi uvvara veka vauramanta vira kaara Iutaa vaiinti quminama tigaa uva vataarave. ⁸ Ne nantihae tiha, Kotiva kia ho qutu vika qaqi vara himpima kaanarove, tiavo?

⁹ Te tota Nasarethihinaa vaiinti Ihurara qora vaiintive tivakeha vira avataqi ni vauka qoraiqama nimirera auti varia vaunarae. ¹⁰ Te Ieruharemini mintiaqi vi variavauramanta Kotira kaiqa vara amite varia vaiintika vika noranavu ti noraiqama komanta te Kotira vainti airitaha ravaaqavu vare karapuhiqi vuru ke, tevata vokuka hampata vaiha kauku verake tiha, Homa vi vaiinti nahentika arukaate, tiavaunarae.

¹¹ Te vi entara ari tataa maara naavu voqi voqi origeteha vika ntaihamaqi viha tiha, Ne Ihura uva qaqaia kaate, ti variavaunarae. Ti vogamakero arara ite vaumanta te Ihura vainti vonaini vaukavata ntaiharera auti variavaunarae.

Poruva nai Ihura vaintiqama vurara tura

(*Kaiqa Varora 9:3-19; 22:6-16*)

¹² Te Ihura vainti ntaiharera auti variavauramanta Kotira kaiqa vara amite varia vaiintika vika noranavu ti noraiqamake qaravata timumanta te vare Damasikusi vatukainiara vuavaunarae. ¹³ Ho nora vaiintio, iriane. Te aaraini vi variavauraro kuarivano qiataqaa vaumanta tavaavauraro ovavano naaruvaliharo voqamakero iteharo kuari itairavata aatarakero iteharo te vuavaunananainvata, ti hampata vuka unainivata, noraiqama kero itorave.

¹⁴ Itomanta tenavu ekaa vataini hiqirivi vaiha iriavauraro uvavano tinta Hiparu uvagihaio tiriara tiharo, Soruo, Soruo, nantihares ti qoraiqama timitera iarao? Are mintiharama are nenama qoraiqamake variarao, tumanta te tiha, ¹⁵ Noravauvu, are tavave? tiavauraro Noravano tiharo, Te Ihuka are qoraiqama timite variaraukuma vauro. ¹⁶ Ho are himpira nena aiquaa ntavatera variane. Are ti kaiqa vaiinti varianerama te ai avuqaa qovarama vuro. Are vate ti tavena uvarave, naantiara te vo kaiqara ai tiva amiaina uvarave, are vokika tiva niminarave.

¹⁷ Ti navunaaka Iutaa vatanaakave, vo vatanaakave, vika vika vaiqe te vikaqaahai ai ruaruuma amitaqi vuvarirara are qaqi vainarave. Te ai atitama kaarirara are vo vatanaa vainti nahenti vainaini vinarave. ¹⁸ Are qumina vatanaa vaiinti nahenti nivu rampai nimiramanta vika konkira arinanaini kaiqa varera qaqrake ova itaainanaini ani koqe kaiqa vareha Sataaniva vikaqaqa raqikianara qaqrake Kotirara tinavuqaa raqikiane tiate ti, te ai atitauro. Are mintiramanta vika tiriara iriqi viqe te vika vaaqu kaiqa qaqla kaari vikavata Kotira vainti vokika hampata vohaa variate, turave. Ihuva tiriara minti turave.

Poruva nai kaiqa varorara Agiripaara tiva amura

¹⁹ King Agiripao, uvavano tiriara minti tumanta te kia naaruvalini iri tavauna haikara qaqla karaiti, te uvavano tuntemake, ²⁰ hogaramake te Damasikusini naane orure mini vaiha vi uvvara tiva nimi, viraqaahai Ieruharemini orure vi uvvara tiva nimi, viraqaahai

Iutia vataini oru vaiha vo vatuka vo vatuka niha ekaa tiva nimi, viraqaahai vo vatanaa vo vatanaaka tiva nimiqi vuavaunarave. Te vika maantimakema tiva nimuro: Ne qora aara qaqrake tuqantaavi Kotira aaraqaa vuate. Kotira aaramaqi viha Kotira kaiqaqai varaqi vuate, ti vaunarave.²¹ Te vi uvaraqqai turamanta vira kaara Iutaa vaiintinavu te Kotira Naavuqi vauramanta ti ravaaqavuke ti haru kareka auti vaurave.

²² Vika mintiavaro Kotiva ti kahaqamaqi vimanta te vate ni nivuqaa himpite vaiha vi uvara nora vaiintive, inaara vaiintive, tiva nimi vauro. Kia te vo uvavauve ti vauro. Paropeti vaiintivata, Mosivavata, uva tivatora vohaa uva viraqaima tevata tivaqvi vi vauro. ²³ Vika minti turave: Naantiara *Mesaiaavano* nai vaataini aiha viraara varero vuru qutu viro, viraqaaahairo viva naanema avuniqama kero qaiqaa qaqi himpiro varianarove. Iutaa vaiintive, vo vatanaa vaiintive, konkira ariraqi variaka ova itaañara tavaate tiro, viva avuni qaiqaa qaqi himpiro varianarove, turave, tiro.

²⁴ Poruva minti tuvaro Fetusiva Porurara neveraitiro tiharo, Poruo, ai avu aatoqihairo hampiqivo. Are vo okara vo okara *sikuru* tiara aataro kaararo vira kaara ai avu aatoqihairo hampi qivara are airi hampi uva tivaqira vi variarao, tiro.

²⁵ Manti tuvaro Poruva aqao tiro, Nora vaiinti Fetusio, ti tivu aatoqihairo hampiqivauve te vi uvara turo. Ti tivu aatovano ho vaivera te quqaa uvama turo. ²⁶ King Agiripaao, are vi uvara okara irianarara ti, kia te getehavauve vi uvara ai tiva amuro. Ihura vaintinavu kia kukeqavi vaiha vi uvara ti variarave. Vika vaiinti nahenti nivuqaa vaiha vi uvara ti variarava arevata vi uvara irianarave. ²⁷ King Agiripaao, quqaae are paropeti vaiintinavu ti uvarara quqaa uvama vaivo tiarao? Te irurara are vika uvara quqaa uvama vaivo tiarao, tiro.

²⁸ Poruva minti tuvaro Agiripaava Porurara tiharo, Are inaara kuari avuqaa tiharama tiriara Ihura vainti variarire tiraeminti tiarao? tiro.

²⁹ Tuvaro Poruva tiharo, Te inaaraiqamakeve, vukaiqamakeve tiha te arevata ekaa maaqi variakavata ti voqaantemake variate ti, te Kotira aare vauro. Ti voqaara variate tihamia kia te tinta rumpate *senira* viraravauve turo. Te Ihura vainti vaunantemake, nevata Ihura vainti variaterama turo, tiro.

³⁰ Poruva minti tuvaro avuhainaa vaiinti vivavata, *kamaanira* vaiintivanovata, Benaisivavata, vira hampata oquvi vaukavata, himpi ³¹ vahaqaqaini vevare vika nai tiva ami nai tiva ami iha tiha, Kia maa vaiintiva qora kaiqavata vara kaimantara ti, vira karapuhiqama kevave, vira arukevave, kia variataarave, tura.

³² Manti tuvaro Agiripaava Fetusirara tiharo, Kia vi vaiintiva Sisaava ti *ko* tianarove tiare titirio, are homa virara qaqi vuane tiaraitirio, tura.

27

Poruva nora vatuka Romini sipiqli vura

¹ Vika uva tiva vate tinavuara Itari vataini vuate ti, vika Poruravata vo karapuhi vaiintinavuvata ntita vare vuru vo iqoka vaiintinavuvano vikaqaa raqkiate ti, Juliusira amura. Juliusiva iqoka vaiinti 100navuqaa raqiki vauvama vaura.

² Vi vaiintiva karapuhi vaiintinavu ntita varomanta tenavuvata Adaramitihainaaka *sip* iqira vaarie Esiaini virera vuavaunara. Vaiinti vo, Aritaakusiva viva Masedonia vata Tesaronaikaihainaava, vivavata tinavu hampata vura.

³ Vira gararaa vatuka vo Saidonini oru raavaauraro Juliusiva Porura quahama amitero tiharo, Maini vaihara homa nena navunaaka oru tavaira vika ai kahaqiba vo airairave karave ai amiate, tuvaro Poruva viva tunte ura. ⁴ Mintumanta ho viraqaahai tenavu Saidoni mini ke, qaiqaa *sipiqli* vi variavauraro *sipivano* mini virare tuvaro uvaivano hampi aaraqaaahairo uti vuavarora tiro, qaqira kero namari avutaqaa vau vataro vo, Saiparusini hini mantaraini kia uvaivano utunaini yumanta tenavu ⁵ Sirisia Namari vara mini ke, Pampiria Namarivata vara mini ke oru vi, vatuka vo Mairaini Lisia vataini oruraavaunara.

⁶ Tenavu Mairaini oruraavauraro karapuhi vaiintiqaa raqiki vauva *sipi* vo rantakora. Vi *sipiva* Arekisantariaihainaa *sipivano* Romini vuare tu *sipiva* vauvaro vira rantakero viraqaaahairo viva tinavu tivita varero vuru vi *sipiraqi* kora.

⁷ Vi *sipiraqi* komanta tenavu vi *sipiraqi* viha uvai kaara qihaa qihaaqamake vi variavauvaro vo entanavu aitaromanta tenavu vukaari utuqi vivi, oru vatuka vo, Nidusi aumanto oruraavaunara. Mini orure avuqavu virare tiavaurarovata, uvaivano kempukaiquman-tara ti, qaqirake taurini vi utu vare, Karitini virante vata vitianta, vira autu Salamoneve tiara, vira vara mini ke, ⁸ viraqaahai vukaari utuqi viha nuqa aukihataa qako qakomaqivi, Koqe Kantave tianaini oruraavaunara. Mini orure tavaavauraro Lasea vatukavano aumanto vaura.

⁹ Tenavu airi enta mini variqi vuavauraro Iutaa vatanaaka Kara Auramate Kia No Entava vi entavavata aitarovaro uvaivano noraiqaakero uti vau entava ani rovarora tiro, ekaa *sipivano* qaqirake kia vi anura. Vi entava ani rovaro Poruva himpiro vika tiva nimiro tiharo, ¹⁰ Ne maa vaiintika iriate. Tenavu maaqihai vuariraro „aaronaaavano nora utiharo, *sipi* tuqantaa kairaro *sipi* vo haika vo haika vate haikava taiqa viraqe tenavuvata taiqa vuarorave. „Kaiqenavu kia viraiti, maini variare,“ tiro.

¹¹ Poruva minti tumanta *sipi* vira gouvata, vira varaqiro ni vau vaiintivavata, vitanta tiha, Homa tenavu virarave, tuvaro iqoka vaintinavuqaa raqiku vaintiva, vivavata vitanta uvaqai iriharo kia Porura uva iriraitiro tiharo, Homa tenavu virarave, tiro.

¹² Vaiinti airitahaavano *sipi* vauka tiha, Nora uvaivano utirera, *sipivano* kia maini ho varianarove. Kaiqenavu vatuva vo, Finikisini tumutumu qinanaini ho vuarera, mini virarave. Mini oru variariraro uvihairaqe Romi vatuvali vuare, tura.

Finikisini *sipivano* variaiananaini koqe iro vaavaro kia uvaivano uti vaunainiara ti, vika minti turama. Finikisi vatuvali varuva avutaqaa vau vataro Karitini vaura.

Nora aaronaaavano utura

¹³ Vika minti tuvaro vo enta koqe uvaivano utumanta vika homa virare tivake, *ankaavano* *sipi* ravaaqavuto haikara vara vaari *sipi* ke, vika kia nora namariqaa viraiti, qaqirake Kariti nuqa aukihataaqai vi vaura.

¹⁴ Aukihataa qakomake virare tuvaro, nora uvaivano vata vihairo utiharo ¹⁵ *sipi* vira ventaqiro vihairo vataihairo hampi venta komanta tenavu *sipi* tuqantaake avuqavu virare tiavauraro uvaivanoqai kempukaiqama kero *sipi* venta varero taurini hampi ventaqiro vura.

¹⁶ Uvaivano hampi ventaqiro vuvaro tinavu tivita varero vumanta tenavu inaara vata vo, nora namari avutaqaa vau vataro Kaudaini oruraavauraro vi vatava antua kovaro *sipivano* tumutumu qinanaini oru vaura. Tenavu tumutumu qinanaini orure mini vaiha tenavu vukaari utihama inaara votuvano vekaini vaura ¹⁷ vira ravuku vare vaari *sipi* ke, viraqaaahai naaqunta varake viraqohai nora *sipi* viraqaa quru qurumake rumpatora. Mintumanta *sipi* qaa raqikuka tiha, *Sipivano* hampi vihairo Afirkaini namari aqaini vuantorave ti, vika *seri* quru qurumake vuruvi rumpatovaro *sipivano* qakomakero vi vaura.

¹⁸ Mintuvaro uvaivano noraiqama kero qaqiqai utiharo namari vente vauvaro vira qararaa tavovaro airi maaravano *sipi* vaiva *sipi* ravaaqavu kairaro *sipivano* kupeqa vuantorave tihamo, vika *sipi* vato airairara varake, namariqi vara vaavi qaqira aqu aqumakeha tavovarovata, *sipivano* kiaqai hoqamakero vaura. ¹⁹ Kia hoqamakero vaumanta vira qararaa taaramo entaaqaa *sipi* qaa airaira serive, kiarive, vo haika vo haikave, vika nái kauquohai varakeha namariqi qaqira vara vaavi aqu aquma kora.

²⁰ Mintumanta tenavu airi enta viha kia kuarivata opuvata tavaraiti vuavauraro aaronaavanogai noraiqamakero utuqiro vi vaumanta tenavu tiha, Tinavu kahaqiarirava kia ho vaivo, Tenavu mintumaaqai vi vuru taiqama virarave, tiavaunara.

²¹ Tenavu airi enta mintiaqai viha kia karavata naraiti, variavauraro Poruva vaiinti vika avutaini himpiro tiharo, Ne maa vaiintikao, ne ti uva iriha Kiritini variataarave. Ne ti uva iri mini variatirio, kiama ne *sipi* vataa haikava kakakima viraitiro, qaqima vaitirio. ²² Ho te niara kia qetaraiti, kempukaiqamake variate, turo. Kia tinavuqihairo vaiinti vonkuvalo kakakima vuanarove. *Sipivanoqaima* taiqa vuanarove.

²³ Kotiva virini vaira te vira vaintivano vahia te vira auto tuahere vauraukama vauro. Ho entaqi Kotira *enseli* vovano ti tivuqaa himpitero vahiaro ²⁴ mintima ti mutu tiva timivo; Poruo, kia qetaana. Are avuhainaa vaiinti Sisaara avuqaa himpitera vainerave. Ho iriane. Kotiva ariarao tiro, viva ai vataake *sipi* variakavata kahaqira ne homa vaivarave tivo. Kotiva mintima ti tiva timivo.

²⁵ Ho maa vaiintikao, virara irihama kia qeteha variate. Kotiva ti tiva timimanta te ni tiva nimunantema kero, Kotiva quqaama ni kahaqianarove. ²⁶ Ho tenavu vuariraro *sipivano* oru *airaani* vata voqataa taatau vuanarove, tiro.

²⁷ Poruva minti tuvaro ¹⁴ enta aitarovaro uvaivano Mediterenia Varuvavau tinavu qaqi ventaqiro vi vaumanta enta tavaarana *sipi* kaiqa vare vau vaiintika tiha, Vatavano aumantoma varianarove, tura.

²⁸ Minti tivake vika namari avatareka naaqunta varake ori kantarumake namariqi vaavi tutu kovaro otu viro vataqaa otu aravumanta tavovaro vatavano aumanto 40 *mita* vaumanta oru viha qaiqaa avateha tavovaro vatavano 30 *mita* aumanto vaura.

²⁹ Mintumanta vika avatamake tave, qetehama tiha, Tenavu entaqi vaiha voqavata oru vuariraro *sipivano* oriqaave, vataqaaave, viro taatau vuantorave tivake, viraqaaahai

vika *ankaa* 4navu *sipi* vekaqaahai kantarumake namariqi tutake tiha, Vaaka kuari vara kairaro itaarire, tura.

³⁰ *Sipi* kaiqa vare vau vaintika tiha, Kaiqenavu tentanavuqai evaara ruqemake vuare, tivake inaara votu vira nora *sipiqaahai* vara vaavi ke, naaquntaqohai vira tuta tutamaqi vi, namari *mareqaata/turuqaata* kareka auti vaiha unahaa tiha, Tenavu inaara votuqai vaiha nora *sipi* avuni vuru *ankaa* vatarerave, ti.

³¹ Vika minti tuvaro Poruva vika tavero nora vaiinti viravata, iqoka vaiinti vikavata, tiva nimiro tiharo, *Sipi* kaiqa vare varia vaintika kia maa *sipiraqaa* vaiha raqikivera, nenuvu kiama ho vaivarave, tiro.

³² Poruva minti tumanta iqoka vaiintinavu oru inaara votu kantarumato naaquntara teqa aqukovaro inaara votuvano hiqiriro namariqi otu ravara aquvura.

³³ Mintuvaro aatitareva uvaro Poruva vika vihi tiharo, Ne kara naate. Ne airi enta 14 enta variqi vihamma kia karavata naavo. ³⁴ Virara irihama te ni vihi tiha, Kara naate, turo. Kara naivaro ni vaatavano ho variarire. Kia ni qjata kauhi vonkuvano kakakima vuanarove. Ne ekaa homa maihai qaqi qara vare hiniqaraini oru vaivarave, tiro.

³⁵ Poruva minti tivakero mpareti varakero vika nivuqaa vailharo Kotirara koqema iarao tivakero kara nero. ³⁶ Poruva mintumanta vika tavovaro vika muntukaqhairovata koqe umanta vikavata kara varake nora.

³⁷ Tenavu *sipi* vairera 276 vaiintinavuvano variavaunara. ³⁸ Ho tenavu kara ho nema, viraqaahai *sipi* maara ntaantorave tima ekaa qaqi vau karara qaqlira namariqi vara vaavi aqu kaavaunara.

Sipivano taiqa vura

³⁹ Atatia vumanta *sipi* kaiqa varo vaintinavuka vutu vo vata tave, Vi vatara kia tavauna vatarave ti. Vika tavovaro nuqavano auvahianta koqe iro vaumanta mini *sipi* vuru karare ti, ⁴⁰ viraqaahai *ankaa* naaqunta teqa aquke *ankaanavu* namariqi ke, aqiqi utu vare vu katarira viraqaa rumpato naaquntaravata teqa aquke, uvaivano ventaqi vuarire ti, *seri* vo rairake rumpate nuqakanta virare ti, ⁴¹ oru vuvaro *sipivano* oru nuqaaqa taatau vura. *Sipi* aqivano paama tivakero taatau vuvaro vira vekavano hampi raqikiviro vailharo raqa vireva auti vaura.

⁴² Mintumanta iqoka vaintinavu tiha, Karapuhi vaiinti hininavu namariqi nako aruqi vi, hini mantaraini orunte vihai mini ruqemake vinivorave. Kaiqe tenavu karapuhi vaiinti ekaa arukaare, tura.

⁴³ Minti tuvaro vika raqiki vauva Porurara iriharo Poruravata arukevorave tiro, qioqama tero kia karapuhi vaiinti arukaate tiro. Tivakero vikara tiharo, Namari nako aruqi nika, vika naane homa namariqi aquvi nako aruvare vi, qaqini oru ntevarare.

⁴⁴ Kia namari nako arika ne vihamma katarive, *sipiqaahaina* haika raqainarave, vira tota varemia namari *marevaura/turuvaura* vima qaqini oru ntaate, tiro. Vika noravano minti tumanta vika ekaa namari auvahini ho oruntovaro Poruva vaaka uva tiva nimuva quqaa vivauma vaura.

28

Poruva varuva avutaaqa vau vatara Maltaini vaura

¹ Tenavu kia vaiinti vovata virivi qaqlira karaiti, tenavu ekaa koqemake hoqai namari auvahini aniraavauraro vovano tinavuara tiharo, Maa vatara Motaa vatave, turave.

² Ho tenavu mini ani raavauramanta vi vatanaaka tinavu tivita vare koqemake tinavuqaa raqikura. Aaqu ntuvaro antomanta vi vatanaaka iha quarake tinavu tivita vare iha quara tonaini vuru kora.

³ Mintuvaro Poruvavata iha vaqita varero vuru quarare tuvaro iha vogamakero iteharo totoquvaro tiro, *uqahivano/quaihavano* ihaqiqi vaunaihairo vutu ntero Porura kauquqaa unutero vaura.

⁴ Vi vatanaaka tavovaro vi *uqahiva/quaihava* Porura kauquqaa unutero vaumanta vika tiha, Oho, vi vaiintiva vaiinti aruke vai vaiintivama varianarove. Viva nora namariqi kia qutu viraitiro, aniraivaro tinavu variqavano vi vaiintiva vaiinti arukaiva naivata qutu vuarire tiro, *uqahi/quaiha* vara kaivarо oru viraqaa unu taivo, tura.

⁵ Vika nai irike minti tuvaro Poruva nai kauqu runkinkirima kovaro *uqahi vano/quaihavano* kia Porura qoraiqama amitaraitiro, ihaqira aqu vumanta ⁶ vi vatanaaka Porurara tiha, Vira kauquvano noqa viraro qutuma vuanarove. Kaiqe vaiha tavaare, tivake variqi viha tavovaro kia Porura vaatavano vo qara uvavarо Poruva qaqi vaumanta vika vo uva tiha, Ike, vi vaiintiva variqa vaiinti vovanoma vaivo, ti tura.

⁷ Tenavu mini variavauraro vaiinti vovano Pubiusiva vata vo aumanto vau vatara qova vaura. Vi vaiintiva nora vaiintivano vailharo vi vataraqaa raqiki vauvara tiro, viva tinavu

tivita varero vuru nai naavuqi kero tinavuqaa koqema kero raqikiqiro vuvaro taaramo enta aitarora.

⁸ Mintiaqi vuvaro Pubiusira vira qora aiha vuvaro taintaqaa vaura. Vira vaata iha iteharo raha ratotoqa autiharo vauvaro Poruva viva vauraqi oriqetero Kotira aareharo vi vaiintira kahaqiane tiharo nai kauqu viraqaa vatero vira koqema kovaro vira vaatavano koqema vura.

⁹ Poruva mintumanta vira tavamake, vi vataraqaa vau vaiintika aiha viraara varoka ekaa Poruva unaini anirovaro Poruva vikavata koqema nimitora. ¹⁰ Ho Poruva mintumanta tenavu virera iavaauramanta vi vatanaaka quaheha airi airaira tinavu timumanta vare, vo *sipi* vaarire vuavaunara.

Poruva nora vatuka Romini orurora

¹¹ Tenavu vi vataraqaa variqi vi taaramo tora varake, viraqaahai tenavu vo *sipi* vaarire vi. Vi *sipiva* Arekisantariaihainaaka *sipivano* vauvaro vira autu Variqa Vainti Taapive tura. Nora uvaivano utuvaro vi *sipiva* vi vataraqaa vaharo uvihaaina entaraqaa vuare tivakero vaumanta, ho tenavu viraqi vaarire oru ¹² vatuka vo, Sirakusini orure mini taaramo enta vai.

¹³ Viraqaahai qaiqaa *sipi* virante airantemaa vivi, vatuka vo, Regiumini orure. Vira qararaa tavaaauraro uvaivano koqema kero utumanta tenavu *sipi* vivi, taara enta viha vatuka vo, Puteorini oruraavaunara. ¹⁴ Mini orure tavaaauramanta Ihura vainti vi vatukaraqi vauka vika tinavuvara vohaa *uiki* varike vuate tumanta tenavu mini vika hampata varike, ho vihai vatavau oru vi nora vatuka Romini oruraavaunara.

¹⁵ Tenavu Romini oruraavauramanta tinavu qata vakaukvara Ihura vaintinavu tenavu oruraavaunara iri, vika tinavu tivita kareka Apiusi Maaketive tunainivata, Taaramo Naavu Vaite Varia Naavurave tunainivata anire, tinavuvara rante vaura. Vika anuvaro Poruva vika tavero Kotirara koqema iarao tuvaro vira muntukaqihairovata koqema kero quahe vaura.

Poruva Romini oru ntero mini vaura

¹⁶ Ho tenavu Romini oruraavauraro *kamaaniva* Porura kia kempukaiqama kero rumpataraitiro, virara mintima tiro: Are vo naavuqi nenaraa vairaro iqoka vaiinti vovano ariqaa raqikiari, tiro tura.

¹⁷ Poruva taaramo enta varikero, viraqaahairo viva Iutaa vaiinti noranavu naaromanta vika Poruva vaunaini ani ruvaaqumavi vauvaro Poruva vika tiva nimirosi tiharo, Ti qata vakaukvara, iriate. Kia te tenta navunaaka qoraiqama nimitaavaunarave. Kia te tinavu kaivaqaukvara tinavu tiva timito uva okarara raqa kaavaunarave. Kia te mintiraiti, Jeruharemini variavauramanta qumina ti karapuhiqamake Romeni vaiinti kauquqi ti korave.

¹⁸ Ti vuru komanta Romeni vaiinti vika ti iramaqi viha iruvaro kia te qora kaiqa varauna uvava vaimantara ti, vika tiha, Viva qora kaiqa varainaravauve tenavu vira arukararave. Tenavu iruraro kia viva qora kaiqa varai uvvara tinavu tiva timivo, turave. Romeni vaiinti vika minti tivake ti qaqi titareka auti vaumanta ¹⁹ Iutaa vaiintinavu aqao kia vira kuvantukera atitaane tumanta vira kaara te tiha, Sisaavama ti uva avuquqavu iriare, tiavaunarave. Te minti tihamia kia te tenta navunaakaqaa uva vatarera auti vaihavauve te Sisaarara tunarave.

²⁰ Te vi uvarara irihama virara ni tiva nimirera ni naarauro. Tenavu Isarerri vaiinti nahenti vaiha Kotira mpeqa vainti vekama vauro. Ho vate vi vaiintira kaarama *seniqohai* ti rumpa taavo, tiro.

²¹ Poruva minti tumanta Iutaa vatanaa vaiinti mini ruvaaqumavi vauka tiha, Kia Iutiaihai ariara vo uvavata tiva tova animanta irunarave. Kia tinavu qata vaka vovano vihairo anirero ariara qora uvavata timanta irunarave. Tenavu qumimaqama vauro. ²² Tenavu maa uvaraqai irunarave. Iutaa vaiinti vonaini vonaini variaka tiha, Ihura vaintinavu vaireka vika qora vaintive, ti variarave. Are tiharo, Te Ihura vaintive, tianarara tira, ho are nena noqihairi vi uvvara tiraqe iriare, tura.

²³ Vika minti tivake Porurara tiha, Kaiqe vo enta kaamate vi entaraqaa ai uva iriare, tivake vi entara kaamato entaraqaa Iutaa vaiinti airitahaavano Porura uva irireka vira naavuqi anire vauvaro Poruva toqaqi uva hogarama kero tiva nimirosi vi vauvaro kuari avuvano uritarero ruhunkuvaro Poruva qaqiqai vi uvvara tivaqiro vi vaura. Kotiva vikaqaa raqikiaina uvvara Poruva tiva nimirosi tiharo, Mosivave, paropeti vaiintinavuve, Ihura okarara vi uvvara vi uvvara tiva torave. Ne vi uvvara irihama Ihura okararavata kankomake iriataarave. Ne vi uvarara quqaave tiate, tiro.

²⁴ Poruva minti tumanta hini kuka quqaama tiarao tumanta hini kuka kia vira uvara quqaave tura. ²⁵ Vika vo uva vo uva tivakeha qaqirake nai maaqa nai maaqa vura. Vika

vireka uvapro Poruva tiva nimiro tiharo, Haaru Kotira Maraquravano ninavu kaivaqara paropeti vaiinti vo, Aisaiaara kahaquvaro²⁶ viva mintima ni okarara avuqavu tiva torave:

Maa vatanaakara mintima uva vuru tiva nimiane, turave.

Ne maa uvvara iriqi vihavata, kia anomake irikevarave.

Ne tavamaqi vihavata kia kankomake tavevarave.

²⁷ Maa vatanaaka avu aatovano tinta vimanta vika kia ti uva iriataa imanta variarave.

Vika ti uva iriarorave ti, nai aato tintataarave.

Vika ti okara tavaarorave ti, nai avu qimpate variarave.

Vika nái aatoqihai ti uva koqemake iriha ti haaraiqevauve te Kotika vika kahaqiha koqema nimitrarare, turave. *(Aisaiaa 6:9-10)*

Aisaiava Kotira uva minti turave, tiro.

²⁸ Poruva minti tivakero viva lutaai vaiintinavu tiva nimiro tiharo, „Kotiva vaiinti nahenti kuvantu kero ntitaaina uvvara ni tiva nimunara iriataara vaimanta ne kia iriavo. Ho iriate, Kotiva tiharo, Vi vakaakara vo vatanaakkavata tiramanta vika vi uvvara ho irivarave turave, tiro.

²⁹ [Poruva minti tumanta lutaai vatanaa vaiintinavu vi uvvara kaara nái tirorima vare vura.]

³⁰ Poruva taara ihiara nariaraa vi naavuraqi vailharo naavu qora koqaa amiharo viraqi vailharo viva ekaa vaiinti vira tavareka anuka quahama nimite vaura.

³¹ Viraqi vailharo viva Kotiva vaiinti nahentigaa raqikiaina uvvara tiva nimi vaura. Poruva kia qetaraitiro, tiva nimiqiro vi vauvaro kia vo vaiintivanovata vira qioqama amitovaro Poruva Nora Vaiinti Ihu Karaitira uva vika tiva nimiqiro vi vaurama.

ROMENI

Poruva Romeni vatanaaka qara ruva nimitora

Ihura qaigaa qaqi vara himpima kovaro naaruuvaimi oru uuvavar 25 ihie 30 ihie aitarovaro Poruva maa uvvara qara ruva tora. Viva Romeni vatanaaka nora vatuva Romiqi vauka oru tavareva iharo maa qarara naane vara kovaro vura. Romeni vatanaaka Ihura vaintiqama vuka Kotiva vika kuvantu kero n titaaaina okarara kankomake iriate tiro, Poruva maa uvvara qara ruva nimitora.

¹ Te Poruka Ihu Karaitira kaiqa vaiintivano vaihamma maa qarara ni nimite. Kotiva ti kaama tero Karaitira vakaaka koqe vakaaka vaiinti nahenti tiva nimiqira vuane tiro, ti noraiqama kaira.

² Haaru Kotiva nai kauqu ainqigaa aqukero tiharo, „Te maantimake vaiinti nahenti kahaqamake ntitaainarave,“ tumanta paropeti vaiintinavu vi uvvara koqe vakaaka Kotira vukuqira qara ntuvu tora.

³ Kotiva vaiinti nahenti kahaqaina vakaakara tiharo nai Maaquara turama. Vira Maaqu vata ihainaa okaravano vaireva, viva vaintiqama viro Devitira vohaa okaravano vaura.

⁴ Vira Maaqu naaruuvahinaa okaravano vaireva, viva Kotira Maaquvano vaura. Vi okarava Kotiva tinavu humiqareva nai kempukaqohairo Ihura qutu vuraqihairo qaigaa qaqi vara himpima korara ti, tenavu tavauraro viva quqaa Kotira Maaqu Ihu Karaitiva tinavu Noravano vaira.

⁵ Karaitiva ti aaqrurahama timitero noraiqama kaimanta te vira autuqaa ekaa vo vatanaa vo vatanaaka Karaitira uvvara quqaave tivakeha iriqi vuate ti, te vira uva tiva nimiqi vi vaunara.

⁶ Nevata Ihu Karaitira vaintiqama vuate tiro, Kotiva nivata naarama taira. ⁷ Virara irihama te ni Romiqi variakara maa qarara ruva nimite. Kotira muntukavano niara vaivaru niara ti vaiinti nahenti variate tiro, ni naarama taira.

Kotiva tinavu Qovavata, Noravano Ihu Karaitivavata, ni aaqrurahama nimite koqema nimitaivaro ni muntukaqihairo paru i vairamanta variata.

Poruva Kotirara koqema iarao tura

⁸ Ihu Karaitiva ti kahaqi vaimanta te tota hoqare niara mintima tirera: Ekaa vo vataini vo vataini variaka vika niara koqemake Karaitira uva iriqi vi variavo ti amanta irunarara ti, te niara irihama Kotirara koqema iarao ti vaunara.

⁹ Te koqe vakaaka Kotira Maaquara valinti nahenti tiva nimiqi vi vauraroma ti maraqravanavata vi kaiqara varaaataa i vaimanta te vare vaunara. Te quqaqamake niara iriha vatete Kotira aaramaqi vi vaunara, Kotiva naima virara kankoma kero irira.

¹⁰ Te Kotira aareha mintima ti: Are hove tirera, ti aara uqaurama timitairage te oru ni tavaare, ti vaunara.

¹¹ Te Kotira okara vo ni tiva nimiari ne kempukaiqaake Kotira aaraqaa nuvaqi vuate ti, te ni tavaataa imantama vaunara. ¹² Te oru ni tavaariraro ne Ihurara kempukaiqamake iriqi viva ti kahaqirage te Ihurara kempukaiqamake iriqi vuarirava nivata kahaqiarira. Nevata tevata Ihurara kempukaiqamake iriqi vi vaunarara ti, te ni oru tave, viraqahai nevata tevata homa nai kahaqi nai kahaqirara.

¹³ Ti qata vakaao, te vuaina okarara ne kia kankomake irivora. Te airi enta ni oru tavarare tiavauraro vo haikavano ti ravaaqvavu kaivera kia ni oru tavaavaunara. Te vo vatanaa vo vatanaaka Kotira aara numiqauantemake, te ni hampata oru vaiha ni kenaukavata tiva nimiari vikavata Kotira aaraqaa vuate ti, te ni tavarera auti vaunara.

¹⁴ Kotiva ti tititaimantara ti, te nora vatanaakavata qumina vatanaakavata, koqe avu aato vataakavata kia koqe avu aato vataakavata, ekaa vika vika te Karaitira uva tiva nimiari raukama vauro. ¹⁵ Mintimake te ni Romiqi variakavata Karaitira uva koqe vakaaka vuru ni tiva nimiataa ivera vaunara.

Karaitira uva kempuka uvama vaivo tura

¹⁶ Karaitira uva koqe vakaaka vaivaru Kotira kempukavano vi uvaraqi vaimantara ti, te vi uvarara kia kauri vaunara. Vaiinti nahenti vi uvarara quqaa uvave tivaro vi uvvara kempukavano homa vika kuvantu nimitaanaro. Tenavu vi uvvara luttaa vatanaaka naane tiva nimiqi vi, viraqahai ekaa naato vatanaakavata tiva nimiqi virera.

¹⁷ Karaitira koqe vakaakavano vaireva, Kotiva tinavu avuqavuqama timitaaina okarara qovaraiqi vaira. Tenavu „Karaitirara“ quqaave tivake virara kempukaiqamake iriqi vi variariraro Kotiva virara iriharo tinavu vika avuqavuqamake ni variakave tianarove.

Kotira vukuqi qara ruvatova tiharo, *Kotirara kempukaiqamake iriqi vi variaka, vikaqaima qaqi variqi vivarave, tura.*

(Hab 2:4)

Ekaa maa vatanaaka Kotira tauvaqa utu amiarara tura

¹⁸ Kotiva naaruvaliharo maa uvara qovarama kero: Vataini variaka Kotira tauvaqa utu amiteha, vaaqu kaiqa varaqi viha quqaa uva iri varia aarara kuval nimite variarara tiro, vira kaara Kotira voqamakero arara ite vaira.

¹⁹ Kotiva kia nai okara kukeqa karaitiro, qoqaa qovarama korara ti, vataini variaka vi haikara ho tave variara.

²⁰ Tota Kotiva maa vatara autu komanta vi entaraqaahai vaiinti nahenti Kotiva aututo haikara ho tavamaqi vi variara. Ekaa vi haikara vi haikara ho tavehara ti, vika Kotira okara, kia ho avuqohainvata tave varia okarara, Kotira kempukavano ekaa enta ekaa enta qaqi variqiro vi vai okararare, viva Variqavano vai okararare, vika vi okararavata kankomake iriara. Vika kankomake iriarara ti, vataini variaka aqao kia vi okarara irunarave tivera, vika kia ho vo uva tiha nai auta ntivarare.

²¹ Vataini variaka Kotira okara kankomake iriqi viha, vira quahama amiteha virara Variqave tiataara vaimanta vira qaqrake qumina haikaraqai avu aatoqi iriqi vi variavaro vika avu aatovano qumimaqama vimanta konkiraqiraqi variqi vi variara.

²² Vika Kotira qaqrake tiha, Tenavu homa vo okara vo okara kanko kaankomake tave vauraukave tiavarovata, vika avu aatovano hampiqama vimanta variarare.

²³ Vika ekaa enta qaqi variqiro vi vai Variqara, vira autuqai tuahera kaataara vaimanta vika vira tauvaqa utu amiteha, kia qaqi variqiro vi vai haikara, vaiinti maraqurave, aantau maraqurave, uviri maraqurave, memaru maraqurave, vi haikaraqai autuke vate, vi haikara autuqai tuaherake variara.

²⁴ Vataini variaka minti variarara tiro, Kotiva vira kaara vika qaqrake kero tiharo, Ho nenta mintimaqi vuate. Nenta vaaqu kaiqa varaataa inara varaqi vuate, timanta vika nai hanauka hampata hampi niha, nai vaata qoraigamake variara.

²⁵ Vika Kotira quqaa uva qaqrakeka, una uvara quqaa uvave ti variara. Vika Kotiva aututai haikara autuqai tuahera keha vi haikaraqai kaiqa vara nimiteha, ekaa vi haikara autukero vatai Variqara vira qaqrake variara.

Ho Kotiva vivaqai ekaa haika autukero vataiva vaimantara ti, tenavu vira autuqai ekaa enta tuaheraqai virera. Quqaave.

²⁶ Vika mintiaqi vi variarara tiro, vira kaara Kotiva vika qaqrake kaimanta vika nai varaataa i kaiqara, kaurira kaiqaqai vare variara. Nahentinavu kia qorainti hampata niraiti, nai kana nahenti hampata hampi ni variamanta ²⁷ qoraintivata kia nahenti hampata niraiti, vika nai hana qorainti hampata hampi ni variara. Mintiaqi viha qorainti vika nai hanauka hampata kaurira kaiqaqai varaqi vi variavaro vira kaara Kotiva vika ruquti vaharo huviqorave ti vaira.

²⁸ Vataini variaka tiha, Tenavu quminaiqamake Kotirara iriqi virerave, ti variavaron tiro, vira kaara Kotiva vika qaqi kovaro vika avu aatovano qoraigama vimanta vika qora kaiqaqai varaqi vi variara. Vika vi kaiqara kia varaataara vaimanta vi kaiqaraqai vare variara.

²⁹ Nana nana qora kaiqa, vo kaiqa vo kaiqavano vataini variaka avu aato muntukaqai mpiqaro vaimanta vika vi kaiqara varaqi vi variara. Vika vovano vatai haikara tavaavararo muntuka nti vaimanta variara. Vika voka voka qoraigama nimite variara. Vora autuvano uritaraира kaara vika ti autuvata mintiaatarave, tivakeha toihia variara. Vika nai kana vaiinti aruke variara. Vika iqoka riqi variara. Vika una uva ti variara. Vika vora qoraigama amitareka una ti variara. Vika vora vora turoqare variara.

³⁰ Vika vo vaiinti autu vatainiqama vuarire ti, qora uva ti variara. Vika Kotira navutaiqama amite variara. Vika nariara nariara qora uva ti variara. Vika nai mahutaqai ti variara. Vika kaiqe qaraakaiqamake vaaqu kaiqa varaare tivakeha vare variara. Vika nai noka qoka no raqakeha ni variara.

³¹ Kia vika avu aato vaimanta variara. Vika kauqu aiqiqaa aqukeha tivataa uvara raqake variara. Vika muntukavano kia vokiakara vaimanta variara. Kia vika vokiakara mpo ike tiva nimite variara.

³² Kotiva uva vateharo tiharo, Vi kaiqara vareka qutuma vivarave, tu uvvara kankomake irihavata, vika kia vi uvarara noraiqamake iriraiti, vika nai hanauka qora kaiqa vare variakaravata tiha, Nevata ho koqe kaiqaqaima vare variavo, ti variara.

¹ Are vo vaiintivano nena henara kaiqa tavera, vira kaiqara qora kaiqave, ti variana vaiintira, te ninaravata tirera: Arevata viva kaiqa varaintema kera qora kaiqa vare variaravara tira, are kiama ho nena auta ntihara vo uva tinarave. Ariqaavata vohaa garama kero uva vaivo, turo.

² Tenavu kankomake iruraro Kotiva mintimake qora kaiqa vare variakaqaa avuqavuqama keharo uva vate vaira. ³ Are nena henarara viva qora kaiqa vare vairave thihara, arevata vira voqaantema kera qora kaiqa vare variaravave. Are mintiharama hauri are tihara, Kotiva kia tiqaa uva vataanarove, tirora.

⁴ Are qora kaiqa vare varianara vira koqaa Kotiva kia ai vaaka amiraitiro, viva vukaiqamakero ai mpo ike tiva amite vaira, are virara kiae noraiqaakerira iarao? Ariara viva qora kaiqa qaqla kero koqe aaraqaa vuarire tiro, Kotiva mintima amite vaira. ⁵ Kotiva mintima amite vaivara are kia qora okara qaqla karaitira, kempukaiqama kera qora okaraqai autoqira vi variarao. Are mintiaqi vi varianarara tiro, Kotiva avuqavuqamakero ko tina entaraqaa viva nai arara itaina okarara qovaraiqama keharo ariqaa voqavatama uva vataanarove.

⁶ Vi entaraqaa Kotiva ekaa vaiinti nahenti vataini vaiha vare vai kaiqarara iriharo vika ekaa nái koqaa nimianaro. ⁷ Hini kiaka vika koqe okara autoqí viha tiha, Kotivama ti noraiqamakero ti hutu viriniqaakeri ti kahaqiraqe qaqi variqi vuare, ti variaka, Kotiva vikama quahama nimiteharo koqema nimitairamanta vika ekaa enta ekaa enta qaqi variqi vivara.

⁸ Hini kiaka vika nariaraqai iriha Kotira quqaa uva qoririma keha kia iriraiti, qora aaraqaa ni vaika vaivaro vira kaara Kotira arara itaina okarava vikaqaa noraiqama kero varianaro. ⁹ Ekaa qora kaiqa vare vaika vika aarante haikaravata nora maara vare haikaravatama varevara. Iutaa vatanaaka vika naane varaimanta vika naantiara ekaa vo vatanaakavata varevara.

¹⁰ Ekaa koqe kaiqa vare vaika vaivaro Kotiva vika koqema nimitero, vika nutu viriniqama nimitero, vika muntukavata paruma nimitairamanta varevara. Kotiva Iutaa vatanaaka vika naane koqema nimitero, vika naantiara vo vatanaakavata koqema nimitairanaro.

¹¹ Kotiva kia vaiinti autuara iriharo ko tiraitiro, viva ekaa vaiinti nahenti ko vohaa garama keroma rairaanaro.

¹² Vo vatanaaka Kotiva Mosiraqaa tivato uvara kia iriaka vaivaro, vi uvava kia vikaqaa uva vatairaro Kotiva vika nái qora kaiqa vare okarara kaara ko vikaqaa vatairamanta vika raumpirima vivara. Iutaa vatanaaka Kotiva Mosiraqaa tivato uvara irihavata, vi uvava raqake variara kaara, vi uvava vikaqaa uva vataanaro.

¹³ Kotiva Mosiraqaa tivato uvara quminaiqama kero iri vaina vaiintira, Kotiva kiama vi vaiintirara avuqavu ni vai vaiintirave tianaro. Vaiinti vovano vi uvara iriro avataqiro ni vaina vaiintira, Kotiva vi vaiintirara avuqavu ni vai vaiintivave tianaro.

¹⁴ Vo vatanaaka Kotiva Mosiraqaa tivato uvara kia vare variaka vaiha, vika nái irike tihia, Kaiqe koqe okara avataqí vuare, tivera, vika Kotira uva iri variaka voqaa nitemake vaivara.

¹⁵ Vika mintiaqi vi vaivaro Kotira uvavano vika muntukaqvata avu aatoqivata qara ntuvu taantema kero varianaro. Vo vatanaaka koqe kaiqa vare variavaro vika avu aato muntukaqhairo, Koqe kaiqama vare vauro, ti vaimanta variara. Vika qora kaiqa vare variavaro vika avu aato muntukaqhairo, Qora kaiqama vare vauro, ti vaimanta variara.

¹⁶ Te vaiinti nahenti Karaitira koqe vakaaka tiva nimi vaunantema kero, naantiara ekara entaqaa Kotiva Ihu Karaitirara ko tiane tiraro viva ekaa vaiinti nahenti nái avu aatoqi kukeqake irite vai uvara qovarama keharo avuqavuqama kero ko nimianaro.

Poruva Iutaa vatanaakara tura

¹⁷ Are nenara tihara, Te Iutaa vatanaakave, tiana vaiintirara tirera. Are tihara, Kotiva Mosiraqaa tivato uvara kia vo vatanaakaini vara karaitiro, viva vi uvara tinavu Iutaa vatanaakaini vara kairara tiro, Kotiva tinavu Iutaa vatanaakaraqaima quahe vaivo, tivakehara nena mahuta ti varianara.

¹⁸ Kotiva Mosiraqaa tivato uvava kankoma kero Kotira antuqa ai umiqe vairara tira, are koqe aaraqaa nina okararave, qora aaraqaa nina okararave, kankomakera irianarave.

¹⁹ Mintima kera irianarara tira, are kia koqe aaraqaa ni varia vaiintikara tihara, Te homa vika aara numiqqainarave, ti varianarave. Konkiraqi varia vaiintikara are tihara, Te homa vika ataama nimitaainarave ti varianarave.

²⁰ Kia koqe avu aato vataukara are tihara, Te homa koqe okara ni numiqarerave, ti varianarave. Quvaaraa vaintiara are tihara, Te homa ni tisaavano vairarave, ti

varianarave. Are tihara, Kotiva Mosiraqaa tivato uvava ekaa vi okarara vi okarara ti humiqaimantara ti, te homa mintimake vokiaka kahaqamaqi virarave, ti varianarave.

²¹ Are vokiaka vi uvara okara tiva nimihara nena vo? Are nenavata vi uvara okara kankomake iritaataarave. Are vikara tihara, Ne kia muara varaate, tivakehara are nenavatae muara vare varianarave?

²² Are tihara, Kia naata vaati vare okarara raqa kaate tivakehara nena vo? Are kiae vora vataakera hampi ni varianarave? Quaae are una variqanavuara qora haikave tivakeharavata, vinavuka naavuqihira vo haika muara vare varianarave?

²³ Are quaae nena mahuta tihara, Kotiva Mosiraqaa tivato uvara tinavu Iutaa vatanaakaini vara kairave, tivakehara are vi uvara raqake variaramanta vira kaara vo vatanaaka Kotira autu vara muntuvi vatainigamakeha qoraiqama amite variarave? ²⁴ Kotira vukuqi mintima tiro: *Iutaa vatanaaka okaraqaa vo vatanaaa vo vatanaaka Kotira autu qoraiqama amite variarave, ti tura.* (*Aisaia 52:5*)

²⁵ Ai vaata toqa kaava vaireva, are Iutaa vatanaavama variarao. Ho are Mosiraqaa tivato uvara avataqira virera, ai vaata toqa keva homa ai kahaqianaro. Are Mosiraqaa tivato uvara kia avataqira virera, ai vaata toqa keva kiama ai kahaqirara are vo vatanaaka vogaarama vainara.

²⁶ Vo vatanaava kia vira vaata toqakaa vaiintiva vaiharo, Mosiraqaa tivato uvara koqemakero avataqiro virera, Kotiva vi vaiintirara Iutaa vatanaaa vaata toqakaa vaiintira vogaarama vaivo tianaro.

²⁷ Ne Iutaa vatanaaka Mosiraqaa tivato uvara qara ntuvatora tuateha, vaata toqake okararavata avataqi vi vahia, ne vi uvara raqake variarave. Vira kaara naantiara vo vatanaaka kia vika vaata toqakeka Kotira uva iriqi vi vaika, vikama niqaa uva vatevarave.

²⁸⁻²⁹ Vira vaata toqakaava viva kia Iutaa vatanaaa taruvama vaira. Nai avu aato muntukaqihairo qora kaiqa teqakai vaiintiva, vivama Iutaa vatanaaa taruvave, Kotira vainti taruvave, vaira. Kia Kotiva Mosiraqaa tivato uvava vira avu aato muntukaqi hiqama kaivaro, Kotira Maraqravano vira avu aato muntukaqi hiqama kaira. Kia qaqi vaiinti nahentivauve vi vaiintira nora autu amivara. Kotiva vivama vira nora autu amianaro.

3

Qora okaravano kia ho koqe okara aatara kaanarove tura

¹ Ne ti ireha tiha, Ho nana haikae Iutaa vika vataamanta vo vatanaaka kia vataarave? Nantiakero vaata toqake okarava vika kahaqianarove? tivera, ² te nintara mintima ti: Ho Iutaa vika ekaa vo vatanaaka naatarake vo haika vo haika vate variarave. Avuniqamake vika Kotiva tivato uvara qara ntuvatora tote variarave, tirara.

³ Quqaama Kotiva nai uva Iutaa vika nimumanta hininavu vi uvara kia iriraiti, kia Kotirara kempukaiqamake iriqi vi vaura. Vika mintiaqi vi vaurara ti, hauri ne tiha, Kotiva nai kauqu aqiqaa aqukeharo tivato uvara qaqira kaivo, tivora.

⁴ Kiavuma ne ho minti tivara. Ekaa vaiinti nahenti una uvaqai ti variaka variavaro, Kotivaaqai quqaa uva tivaqiro vi vaivama vairo. Kotira vukuqira qara ntuvu tova Kotirara mintima tiro:

Ekaa ai uvavano avuqavu uvaqai vairara tira, vaiinti vovano ariqaa uva vatarerave tirera, ai uvavano vira uvavata aatara kero varianarove, tura. (*Ihi 51:4*)

⁵ Te qaqi vaiinti tiantemake, ni irama nimirarer: Tenavu qora kaiqa vare vaurava Kotiva avuqavuqama kero vare vai okarara vara qovaramake vairara tiro, Kotiva tinavuqaa uva vateharo kiama avuqavuqama kero vataivo. Tenavu mintie tirarave?

⁶ Aqao, kiavuma tenavu ho minti tirara. „Tenavu qora kaiqa vare vaurava kia Kotira kahaq i vairara tiro, vira kaara Kotiva homa tinavuqaa uva vataanaro.“ Kotiva kia avuqavuqama kero ko ti vaiva vaitirio, viva nantiakeroe naantiara ekaa naato vatanaaka ko tiva nimitaanarove?

⁷ Vaiinti vovano mintima tianaro: Tinavu una uvavano Kotira quqaa uva qovaramake vivaaro Kotira autuvano viriniqi vairera, nana kaarae Kotiva tenavu qora kaiqa varau-nara kaara tinavuqaa uva vataanarove? tianaro.

⁸ Oho, are mintima vaina uvara avataqi virera, are hampi uva vovata mintima tinara: Kaiqe tenavu qaqqai qora okara autuqi vi variariraro, viraqaaahairo koqe okaravano qovariqiarire, tinara. Vokiaka tinavuara unahaa tiha, Nenavu vi uvara minti ti variavo, ti variara kaara Kotiva vikaqaa uva vatairaqe te vikara huviqorave tirara.

Ekaa naato vatanaaka Kotira uva raqake variara

⁹ Ho tenavu Iutaa vatanaakae koqe vaiinti nahenti vauramanta ekaa vo vatanaakae vaaku kaiqa vare variaka variavo? Aqao, kiavuma mintima vairo. Te vaaka tunara,

Iutaa vatanaakavata, ekaa naato vatanaakavata, variavaro qora kaiqavano vika ekaa ravaaqavuke vaira.¹⁰ Kotira vukuqi mintima tiro:

Kia vaiinti vovanovata avuqavuqama kero ni vaiva vairave. Kia voqavanovata vairave.

¹¹ Kia vaiinti vovanot Kotira okara kankomakero tave vaiva vairave. Kia vaiinti vovanot tiharo, Kaiqe te Kotira rantake tavaare, ti vaiva vairave.

¹² Ekaa vatainvariaka Kotira aaraqaahai tuqantaavi hampi okaraqai vare variarave. Kia vaiinti vovanot Kotira kaiqa koqema kero vare vairave. Kia vovanovata minti vairave. (*Ihi 53:1-3*)

¹³ Kia rahrima taa matipara voqaara vaiinti nahenti novano aaqaa viro vairave. Vika maaqiriqaahairo una uvavano qovaraiqi vairave. (*Ihi 5:9*)

Quqahi/ Quaiha uhivano vaiinti qoraiqamake vaintemake, vika uvavano vaiinti qoraiqamake vairave. (*Ihi 140:3*)

¹⁴ Vokiaka vaaquqama nimite vai uvavaqai vika noqaahairo qovaraiqi vairave. (*Ihi 10:7*)

¹⁵ Vika vaaka vaiinti arukareka auti variarave.

¹⁶ Vika vi aniarqaahairo qoraiqamake nimite vai haikavave, iqi rate vai haikavave, vi haikavaqai qovaraiqi vairave.

¹⁷ Vika maateraiqama nimite varia okarara kia iri tavaarave. (*Aisaiaa 59:7-8*)

¹⁸ Vika Kotira aatu qetakeha nuataara vaimanta kia Kotira aatu qete variarave, tura. (*Ihi 36:1*)

Kotira vukuqi ekaa vaiinti nahentiara minti tura.

¹⁹ Tenavu kankomake irunarave: Mosiraqaa tivato uvava, vo uva vo uva vaimanta vi uvava iri variaka ekaa vi uvvaraqai iriqi vuataara vaimanta vika vi uvvara raqake variari. Kiama vovanovata ho tiharo, Te qora kaiqa vare varia okarara kia irunarave, tianaro.

Ekaa naato vatanaaka Kotira uva raqake variarara tiro, vira kaara Kotiva ekaa vikaqaa uva vataanaro.

²⁰ Ekaa vaiinti nahenti Mosiraqaa tivato uvvara raqakeha kia ho iriqi vi variarara tiro, Kotiva kiama voqaravata are avuqavu ni variara vaiintivave tianaro. Mosiraqaa tivato uva maarava vaireva, tenavu tentanavu qora kaiqa vare vauna okaraqai humiqe vairave.

Kotiva vaiinti nahenti avuqavuqama nimi taaina okarara tura

²¹ Vate Kotiva vaiinti nahenti uva taiqa nimiteharo avuqavuqama nimitareva, kia Mosiraqaa tivato uva maarara iriraitiro, viva qaraaka okara vara qovarama kaira. Viva mintimakero qaraaka okara qovarama kaainara haaru Mosivavata, paropeti vaiintinavuata, vi uvvara tinavu tiva timura.

²² Vaiinti nahentiqihai ekaa Ihu Karaitirara quqaa vivave tivake virara kempukaiqamake iriqi vi variaka variavaro, Kotiva vika uva taiqa nimiteharo vikara avuqavuqamake ni variakave tianaro. Kia vaiinti nahentiqihairo vovanot vo qaramakero vairo. Ekaa vaiinti nahenti vohaa qaramakeqai variara.

²³ Tenavu ekaa Kotira uva raqake kia hoqamake vaunarara ti, tenavu kia ho Kotiva vainanaini voqaraanaini oru variariraukama vaunara.

²⁴ Tenavu mintimake vaurarovata, Kotiva tinavuara aaqurihama timiteharo Karaitiva tinavu kuvantu timitaaina okarara iriharo, aaqaa tinavu avuqavuqama timitaira.

²⁵ Tinavuara vika qora kaiqa vare vai uvvara taiqa nimitaare tiro, Kotiva Ihu Karaitira kaamatero tinavu timivaroh Ihura naare ntava uvvaro qutu vura. Tenavu kempukaiqamake Ihura kaiqara iriqi vuariraro Kotiva tinavu qora kaiqa uva nunkama timitaanaro. Haaru vaiinti nahenti qora kaiqa vare uvavaroh Kotiva kia vika vaaka ruqutiraitiro, vika qora kaiqa varora avuqai tavamaqiro viro, maa entara vaiinti nahenti avuqavuqama nimi taaina okarara qovarama kaira.

²⁶ Kotiva kia vaiinti nahenti qora kaiqa vare varia uvvara quminaqama kero nunka nimitaraitiro, viva Ihura kaiqara iriharo naitarama kero vaiinti nahenti uva nunka nimiteharo avuqavuqama nimitaara. Vaiintivane nahentivanoe Ihu Karaitirara quqaa vivave tiraro Kotiva vira avuqavuqama amitaanaro.

²⁷ Ho tenavu nana uva irihae tentanavu mahuta tiraro? Kia vi uvava vairo. Nana haikavane tinavu kahaqianaro? Kiama tenavu Mosiraqaa tivato uva maarara iriarirava tinavu ho kahaqianaro. Tenavu Ihurara quqaa vivave tiarirava, vivaqaima tinavu ho kahaqianaro. ²⁸ Te mintima turo: Vaiintivane Mosiraqaa tivato uva maarara iriqiro viraro Kotiva kiama virara iriharo vira qora uva nunka amitaanarovauve. Aqao, vaiintivane Ihurara quqaa vivave tivakero virara kempukaiqama kero iriqiro vi vairaro

Kotiva virara iriharo vira uva nunka amitero vi vaiintirara, Avuqavu ni vai vaiintirave, tianaro.

²⁹ Kotiva vaireva viva Iutaa vatanaaka vika Variqavanoqiae vairo? Viva kiae vo vatanaaka Variqavanovata vairo? Aqao, viva ekaa naato vatanaaka Variqavanovatama vairo.

³⁰ Kotiva Variqa vohaiqavanoqaima vaira. Iutaa vatanaava Ihurara quqaa vivave tiraro Kotiva vira uva nunka amitero vira avuqavuqama amitaanaro. Vira voqaantema kero, vo vatanaavavata Ihurara quqaa vivave tiraro Kotiva vira uvavata nunka amitero viravata avuqavuqama amitaanaro.

³¹ Tenavu Ihurara kempukaiqamake iriqi viha Mosiraqaa tivato uva maarara qumi-maqamae kararave? Aqao, tenavu Ihurara kempukaiqamake iriqi vihara ti, Mosiraqaa tivato uvaravata koqemakema iriqi virara.

4

Poruva Eparahaamira kaiqara tura

¹ Eparahaamiva viva tinavu Iutaa vatanaaka kaivaqava vaura. Te nana uvae vira kaiqara tirara? ² Kotiva Eparahaamiva kaiqa vara amitorara iriharo virara are avuqavu ni variara vaiintivave tiare tutirio, Eparahaamiva homa nai mahuta tutirio.

³ Kotira vukuqi Eparahaamirara nana uvae qara ntuvu tora? Mintima tiro: Eparahaamiva Kotira uvara quqaave tuvarora tiro, Kotiva virara, Are avuqavu ni variara vaiintivave, turama.

⁴ Kaiqa vaiintivano vora kaiqa vara amitaivaro, vira noravano, kia quminaiqama kero koqaa amiraitiro, viva kaiqa vara tairara iriharo koqaa ami vaira.

⁵ Tenavu kia kaiqa vaiinti vira voqaantemake vai. Tenavu kia ho Kotira kaiqa vara amitaariraro viva kaiqa koqara iriharo tinavu uva nunka timitaanarovauve. Kotiva vaiinti nahenti qora kaiqa uva nunka nimite vaiva vahiro viva tenavu Ihurara quqaa vivave tiaina uvarara iriharo tinavu avuqavuqama timite vaira.

⁶ Devitivavata vohaa qaramakero Kotiva kia vainti kaiqara iriraitiro, vira qora kaiqa varai uvava nunka kero avuqavuqama amitariraro vi vaiintira muntukavano koqema kero variainarara tura. Devitiva mintima tiro:

⁷ Kotiva vika uva nunka nimiteharo tauru nimitaainarara ti, vira uva raqakeka quaheha vaivarave.

⁸ Noravano kia vi vaiintiva qora kaiqa varaainarara iri amitaraitiro, viraqaa kia uva vaivo tina vaiintiva quaheharo variarire, tiro. (*Ihi 32:1-2*) Devitiva vi uvara tura.

⁹ Kotiva vaiinti vira uva nunka amitariraro quaheharo variainarara Devitiva tu uvava Iutaa vatanaakaraqiae iriharo tiva tairave? Aqao, vo vatanaaka vikaravatama vi uvava tiva tairave. Te vaaka Eparahaamirara tunara iriate.

Eparahaamiva Kotira uvara quqaave tuvaro Kotiva virara avuqavu ni variara vaiintivave turave. (*Okara 15:6*)

¹⁰ Kotiva taireve Eparahaamirara minti tura? Eparahaamiva nai vaata toqako entarae Kotiva minti tura? Aqao, Eparahaamiva kia nai vaata toqako entara Kotiva virara minti tura.

¹¹ Tota kia nai vaata toqako entara Eparahaamiva Kotirara, Are quqaa uvama tiarao, tuvaro Kotiva vi entaraqaa vira avuqavuqama amitora. Vira avuqavuqama amitero vira naantiara vo enta vaiinti nahenti Eparahaamira avuqavuqama amitorara iritaate tiro, Kotiva qorainti vaata toqake okarara qovarama kovaro Eparahaamiva nai vaata toqakora. Ho kia nai vaata toqako entara Kotiva Eparahaamira avuqavuqama amitora.

Minturara ti, kia nai vaata toqa karaiti, Kotirara quqaave tiavaro Kotiva vika avuqavuqama nimitai vaiinti nahentika, homa Eparahaamirara tinavu qorave tivara. ¹² Nai vaata toqakaaka, vikavata vaiha nai vaata toqakerara kia noraiqamake iriraiti, vika tinavu kaivaqara Eparahaamira aanare Kotirara quqaave tivaqi vihara ti, vikavata Eparahaamirara tinavu qoravema tivara. Eparahaamiva kia nai vaata toqako entara Kotirara iriqiro vi vaurama.

Kotiva nai kauqu ainqaa aqukero tivato uvarara tura

¹³ Kotiva nai kauqu ainqaa aqukeharo Eparahaamirara tiharo, Are nena vainti naintivaravarata vaivarao ekaa naato vatavano ni vatama varianarove, tura.

Kotiva vi uvara tiharo kia Eparahaamirara, Viva te Mosiraqaa uva maara tivataunara ho irivo, tivakero minti turavauve. Viva kia minti tiraitiro, Eparahaamirara tiharo, Viva ti uvara quqaave timantara ti, te virara irihama vira avuqavuqama amitarerave, tivakero minti turave.

¹⁴ Mosiraqaa tivato uvara iriqi vi vaika kia ho ekaa naato vata varevara. Vika ekaa mintimake varare ika vaivarovaave, Ihurara quqaa vivave ti varia uvava qumina uva vairaro, Kotiva nai kauqu ainqiqa aqukeharo Eparahaamirara tu uvavavata qumi-naiqama vuuanaro.

¹⁵ Kotiva Mosiraqaa tivato uvava vaivarora tiro, vaiintivano vi uvara raqa kairaro vira kaara Kotira arara itairaro vi vaiintiraqaa uva vataanaro. Qioqama tai uvava kia vairera, kiamia vovano ho vi uvara raqakaanaro.

¹⁶ Eparahaamiva Kotira uvara ququaave tuvarora tiro, Kotiva nai kauqu ainqiqa aqukero Eparahaamiravata vira naintivaravata uva tiva nimitora. Kotiva vika quminaiqama kero koqema nimitarева minti tivatorara tiro, vi uvava ekaa Eparahaamira naintivarraqaa-vatama varianaro. Mosira uva maara iriakavata, ekaa vo vatanaakavata, vika Eparahaamira aanare Kotirara iriqi vivaro Kotiva koqema nimitaaina uvava vikainivatama varianaro. Tenavu ta vatanaa ta vatanaae Kotirara kempukaiqamake iriqi vuarer, tenavu homa Eparahaamirara viva tinavu qovave tiariraro Kotiva Eparahaamirara tivato uvava tinavunivatama varianaro.

¹⁷ Kotira vukuqi Kotiva Eparahaamirara mintima tiro:

Are vo vatanaa vo vatanaa vika kaivaqavama vainarave, tura. *(Okara 17:5)*

Eparahaamiva Kotira avuqaa vaharo vira uvara quqaa uvave tura. Eparahaamiva tiharo, Kotiva Variqavano viva homa qutuvika qaiqaa qaqi vara himpima kaanarove. Kotiva Variqavano vaharora tiro, viva tiraro homa kia vaira haikava qovarama vuuanarove, turama.

¹⁸ Eparahaamiva kia ho vainti vataarirava vaharovata, viva Kotirara kempukaiqaakero iriqiro viharo tiharo, Te homa vainti vatararave, tivakero viraqaaahairo Eparahaamiva vo vatanaa vo vatanaa vika kaivaqava vaura. Kotiva Eparahaamira tiva amiharo tiharo, Ai naintivara airitahaama vaivarave, tu uvava quqaa vivauma vaura.

¹⁹ Vi entara Eparahaamiva kia vainti vataraitiro, 100 ihi varakero anomakero naam-paiqama viro viva kia nai vaatavano naampaiqama vurara noraiqaakero iriraitiro, viva kia nai naata Seraava kontaiqama vurara noraiqaakero iriraitiro, viva Kotiraraqai kempukaiqaa kero iriqiro vi vaura.

²⁰ Viva Kotiva nai kauqu ainqiqa aqukeharo quqaa te mintirerave tu uvarara una uvave tiarorave tivakero, viva Kotirara kempukaiqama kero iriqiro viharoma Kotira autu tuahera kero tiharo, ²¹ Kotiva nai kauqu ainqiqa aqukero tivatai uvava vivauma varianarove. Kotiva vainti ti timianarove, tivakero ²² Kotirara kempukaiqama kero iriqiro vuvaro Kotiva virara iriharo Eparahaamirara tiharo, Ai qora uva nunka amiteha, ariara avuqavu ni varianra vaintirave tirarave, tura.

²³⁻²⁴ Kotiva Eparahaamirara tiro, vi uvara minti tura. Kotiva tinavuaraao tiro, tinavuavata mintima tianaro. Tenavuvata Eparahaamira aanare Kotirara kempukaiqaake iriqi vuvariraro Kotiva homa tinavuvata avuqavuqama timitaanaro. Noravano Ihuva qutu vuvaro Kotiva vira qaiqaa qaqi vara himpima korara ti, tenavu Kotirara kempukaiqamake iriqi vi vaunara.

²⁵ Kotiva Ihura atitovaro Ihuva tinavu qora kaiqa kaara qutu vuvaro viraqaaahairo tinavu avuqavuqama timitaaina okarara iriharo Kotiva Ihura qaiqaa qaqi vara himpima kora.

5

Kotiva tinavu avuqavuqama timitaaina okarara

¹ Kotiva Ihura qaiqaa qaqi vara himpima korara ti, tenavu Ihurara quqaa vivave turaro Kotiva tinavu uva taiqa timitero avuqavuqama timitaira. Tinavu Noravano Ihu Karaitiva kaiqa vara amitorara iriharo Kotira araraqaihairo paru i vaivaro tinavu maateraiqama timitaaimanta tenavu Kotira vataake voharaqai tampamavi vaunara.

² Tenavu Ihurara quqaa vivave turaro Kotiva tinavu koqema timitaaina aarava qovarama vimanta vaunara. Tenavu mintiaqi viha naantiara Kotira mpeqa okara takuqi vaira tavaainara vekaiqiharo ti, tinavu muntukaqihairo koqe i vairaqe vairara.

³ Maara vaina entaravata tinavu muntukaqihairo koqe i vairaqema vairara. Tenavu maara aatarake viraqaaahai kempukaiqaavi variqi viha ⁴ kia ugerara vaiinti nahenti vairaiti, tenavu kempuka vaiinti nahentima vairara. Mintimake vaiha tenavu Kotira vataake oru variainara virara vekaiqihairo. ⁵ Tenavu mintiaqi vi variariraro Kotiva kia tinavu qaqira kairae kaurira haika varaainarave. Kotiva nai Maraqura tinavu timivaro vi Maraqurava tinavu muntukaqai vaimantara ti, tenavu Kotira muntukavano tinavuara vai okarara kankomake irunara.

⁶ Tenavu qora vaiinti nahenti vaiha tentanavu kahaqiarira aarava kia ho vauvaro Kotiva nai kaamato entaraqaa Karaitira vara kovaro viva tinavu qora vaiinti nahentiarao

tiro qutu vura. ⁷ Kiama airi vaiintivano vo vaiinti kahaqireva qutu vuuanaro. Vohaiqa vohaiqavanoqaima koqe vaiinti kahaqireva qutu vuataa iraro qutu vuuanaro.

⁸ Tenavu minti urarovata, Kotiva kia mintiraitiro, viva maantima kero tinavuara nai muntuka vaira humiqero: Tenavu qaqqiqa qora kaiqa vare variavauraro Kotiva nai Maaqu atitovaro viva tinavuara iriharo qutu vura. ⁹ Ihura naare ntava vurara iriharo Kotiva tinavu uva taiqa timitero avuqavuqama timitaimanta vaunarara ti, tenavu kankomake iruraro Karaitiva tinavu ruaruama timitairaro Kotira arara itaarirava kiama tinavuqaa varianaro.

¹⁰ Tenavu Kotira navutaaka variavauraro vira Maaquvano tinavuara iriharo qutu vurara ti, tenavu Kotira vataake vohaa tampamavi vaunara. Maa entara tenavu Kotira vataake vohaa tampamavi vaunarara tiro, vira Maaquvano qaqi variqiro vi vaiva tinavu vogavata kahaqama timitaqiro vi vairaro Kotiva tinavu tivitaanaro.

¹¹ Kia vi uvavaqai vaivarao maa uvavavatama vairo: Tinavu Noravano Ihu Karaitiva tinavu kahaqama timitaimanta tenavu Kotira vataake vohaa tampamavi vahira ti, tenavu tentanavu muntukaqhai Kotirara quaheha vaunara.

Adaamura okararavata Ihura okararavata tura

¹² Tota vaiinti vohaiqvano Kotira no raqa kovaro viraqqaahairo qora kaiqa vare okarava vataini qovarama vuvaro qutuvi okararavata qovarama vumanta viraqqaahai ekaa vaiinti nahenti qora kaiqa vare vaurara ti, vika ekaa qutuvi okararavata varora.

¹³⁻¹⁴ Tota Kotiva nai uva maara kia Mosira tiva amu entara qora kaiqvano naane vataini vaura. Kotiva nai uva maara kia Mosira tiva amu entara vi uvara raqake okarava kia vaumantavata, vaiinti nahenti qora kaiqa varaqi viha vuru qutuvi vaura. Adaamuva vau entaraqqaahairo vaiinti nahenti qutuvi varia okarava qovaramaviro aniro Mosiva vau entaravata vaura. Vi entara Adaamuva Kotira no raqa kero variqiro viro vuru qutu vumanta vaiinti nahenti kia Adaamuva Kotira no raqa kontemake raqakoka, vikavata variqi vi vuru qutuvi vaura.

Adaamuva hoqarenaa vaiintivano vauvaro vira naantiara qovaraiqiarira vaiintiva „Ihuuvavata“ hoqarenaa vaiintivano vaura.

¹⁵ Vitanta kia vohaa qaramake vaura. Adaamuva Kotira no raqakova vauvaro Ihuva Kotiva vaiinti nahenti koqema nimitaaina okarara vara qovarama kova vaura. Vohaa vaiinti Adaamuva Kotira no raqa korqaahai airi vaiinti nahenti qutuvi variara. Vaiinti vo, Ihu Karaitiva Kotiva vaiinti nahenti aaqurihamma nimiteharo koqema nimitaaina okarara qovarama kovaro vi okararaqqaahairo Kotiva airi vaiinti nahenti koqema nimite vaimanta vika koqemavi variara.

¹⁶ Qaiqaavata tirera. Tota vaiinti vohaiqvano qora kaiqa varakova vo qaramakero vaivarao Kotiva vaiinti nahenti koqema nimitaaina okarava vo qaramakero vairo:

Hoqarero vaiinti vohaiqvano Kotira no vohaa tataa raqa kovaro viraqqaahairo Kotiva viraqaa uva vatero tiharo, Are qutuma vinarave, tura.

Ho vaiinti nahenti airi tataa Kotira uva raqake vauvarovata, Kotiva vika qaqi koqema nimiteareva iharo vika avuqavuqama nimitaaina okarara vara qovarama kora.

¹⁷ Tota vaiinti vohaiqvano qora kaiqa vara kovaro viraqqaahairo qutuvi okarava vaiinti nahentiqa raqikiqiro vi vaumantia vika qutuvi vi vaura. Mintiaqi vi vauvaro viraqqaahairo Ihu Karaitiva vohaiqvano qutuvi varia okarara aatarra kora. Mintirara ti, Kotiva qaqi koqema nimiteharo niqaa kia uva vatarerave tina vaiinti nahentika, vika qaqi Karaitira vataake variqi viha raqikiqi vivara.

¹⁸ Vi uvvara okara mintimama vairo: Tota vaiinti vovano qora kaiqa vohaiqa vara korqaahairo Kotiva ekaa vaiinti nahenti vikavata qutu vivarave tumanta ekaa vaiinti nahenti qutuvi vi vaura.

Vo vaiintivano avuqavu kaiqa vohaiqa vara korqaahairo Kotiva ekaa vaiinti nahenti avuqavuqama nimitaaina okarara vara qovarama kora. Mintirara ti, vaiinti nahenti vika homa qaqi variqi vivara.

¹⁹ Tota vaiinti vohaiqvano Kotira no raqa korqaahai airi vaiinti nahenti qoraiqamavi qora kaiqa varaqi vi vaura. Vira voqaara vaiinti vohaiqvano Kotira no iriqiro vuraqqaahairo Kotiva airi vaiinti nahentiara ni uva nunka taiqa nimiteha ni avuqavuqama nimitarerave ti vaira.

²⁰ Vaiinti nahenti nái qora kaiqa vare okarara kankomake tavaate tiro, Kotiva Mosiraaqaa nai uva maara varakora. Mintuvaro vaiinti nahenti qora kaiqvano uri aatarakero vaivarovata, Kotiva koqema nimiteharo aaqurihamma nimitaarira okarava viva voqavata uri aatarakero vaira.

²¹ Tota qora kaiqvanoqai vaiinti nahenti ravaaqavu kovaro qutuvi okarava vikaaqaa raqikiqiro vi vaumantia vika qutuvi vi vaura. Maa entara Kotiva tinavu koqema

timiteharo aaqurihama timitaaina okarava tinavuqaa raqikiqiro vi vairo. Tinavu Noravano Ihu Karaitiva tinavu kahaqama timitorara tiro, Kotiva tinavu avuqavuqama timitaimanta tenavu ekaa enta qaqi variqi vuariraukama vai.

6

Tenavu Karaitira vataake qutu vunara

¹ Vi uvara irihama tenavu nana uvae tirara? Tenavu mintie tirara: Kaiqe qora kaiqa qaqqai varaqi vi variariraro Kotiva voqavata koqema timiteharo aaqurihama timitaarire. Tenavu mintie tirarave?

² Aqao, tenavu qutu vuaka voqaara vauraro kia qora kaiqvano qaiqaa tinavuqaa raqiki vairo. Hauri tenavu qaiqaa qora kaiqa qaqqi varaqi vuarora.

³ Ne kiae maa uvara iriavo? Tenavu Ihura vaintiqamavi namari vareha, tenavu vi entara Ihu Karaitira vataake vohaa tampamavi vaiha tenavu viva qutu vuntemake qutu vuavaunara.

⁴ Tenavu namari varaavauramanta Ihu Karaitira quntama tontemake, tinavuvata vira vataake quntama tora. Viraqaahairo Ihura Qova nai kempuka takuqi vairaqhairo Ihura qaiqaa qaqqi vara himpima kontema kero, viva tinavuvara vika qaraakaiqamavi qaiqaa qaqqi variqi vuate tiro, viva tinavuvata qaqqi vara himpima kora.

⁵ Tenavu Ihura vataake vohaa tampamavi vaiha qutu vunara. Vi uvava quqaa uva vairara ti, tenavu quqaama Ihura vataake vohaa tampamavi vaiha qaiqaa qaqqi himpirira. ⁶ Tenavu kankomake irunara. Tinavu avu aatoqi qora kaiqa varaarira kempukava taiqa vuarire tiro, tinavu haarua avu aato Karaitira vataakero katariqaa arutora. ⁷ Qutuviva qutu virara tiro, qora kaiqa varaarira kempukava kia qaiqaavata viraqaa raqiki vairo.

⁸ Karaitiva qutu vimanta tenavuvata vira vataake qutu vuraukara ti, quqaama tenavu Karaitira vataake qaiqaa qaqqi himpi variqi virara.

⁹ Tenavu kankomake iruraro Karaitiva qutu vuraqihairo Kotiva vira qaiqaa qaqqi vara himpima korara tiro, viva kia ho qaiqaavata qutu vuariravama vairo. Kia qutira okaravano viraqaa qaiqaa ho raqikianaro. ¹⁰ Ihuva qora okara kempuka taiqa kareva vohaa tataagai qutu vurara tiro, maa entara viva qaqqi variqiro viharo Kotira vataakero vohaa variqiro vi vairo.

¹¹ Vira voqaara nevata mintima tiata: Tenavu qutu vuarirauka voqaara variariraro qora kaiqa kempukavano kia tinavuqaa ho raqikianarove. Tenavu Ihu Karaitira kempukaa Kotira vataake qaqqi variqi virerave, tiata.

¹² Virara irihama ne qutuvu vaatara vatauka vaiha, kia qaqqi kaivaro qora okaravano niqaa raqikiramanta ne vi kaiqara varata. ¹³ Ne kia nenta kauque, aique, nana vaatae, qaqqi kaivaro qora kaiqa varara. Ne qutu vuaraqihai qaiqaa qaqqi variqi vi variaka voqaantemake variarara ti, ne Kotira kaiqa varareka nenta kauque, aique, vo vaatae, viraqohai avuqavuqamake koqe kaiqaqai vara amitaqai vuata.

¹⁴ Mosiraqaa tivato uva maarava kia maa entara niqaa raqiki vaivaro Kotiva vaiinti nahenti koqema nimiteharo aaqurihama nimitaaina okarava viva niqaa raqiki vairara tiro, hauri qora kaiqa kempukavano niqaa raqikiqiro vuantora.

Avuqavu kaiqaqai varaqi vuate tura

¹⁵ Tenavu nantie irarave? Kotiva vaiinti nahenti koqema nimiteharo aaqurihama nimite vai okarava tinavu kuvantu kaivaro Mosiraqaa tivato uvava kia qaiqaa tinavuqaa raqiki vairara ti, tenavu hoe qaqqi kaiqa varaqi virarave? Aqao, kia hove.

¹⁶ Ne kiae iriavo? Ne vo vaiintiara ai kaiqa vararerave tivaro vi vaiintava niqaa raqiki vaira ne vira kaiqa vaiintima vaivara. Ne qora kaiqa varaveria, qora kaiqvano niqaa raqiki vaira ne vira kaiqa vaiinti vaiha vira kaiqaqai varaqi vi vuru qutu vivara. Ne Kotira uva iriqi vivera, Kotiva niqaa raqikiqiro vi vaira ne vira kaiqa vaiinti vaivaro Kotiva ni avuqavuqama nimitaanaro.

¹⁷ Ne haaru vauvaro qora kaiqvano niqaa raqikiqiro vi vaumanta viraqaahai vokuka quqaa uva ni tiva nimurumanta ne ekaa vi uvara koqema iriqi vi variara. Te virara irihama Kotirara koqeve turo.

¹⁸ Qora kaiqvano ni rumpatairaqihairo Kotiva ni kuvantu kaivaro vate maa entara avuqavu ni vai okarava ni rumpataimanta ne vira kaiqa vaiinti nahenti variara.

¹⁹ Ne ti uva kia irivorare ti, viraqaahai te qaqqi vaiintivano niara uva tiantemake ti vauro. Haaru qora okaravano niqaa raqiki vau entara ne qora kaiqa varaataa umanta qora kaiqa vareha tiha, Tenta vaataqohai homa vi kaiqara varaainarave, tivakeha qora kaiqa vo kaiqa vo kaiqa vare vaura.

Vira voqaara ne maa entara tiha, Koqe okaravano tinavuqaa raqiki vaiqe tenavu quqaa Kotira vainti vairerave, tivakeha nenta vaataqohai koqe kaiqaqai varaqi vuata.

²⁰ Haaru qora okaravano niqaa raqiki vaumanta ne vira kaiqa vaiinti vauvaro koqe okaravano kia niqaa raqiki vaurave. ²¹ Ne haaru qora kaiqa vare vaurara iriha vate maa entara kauriha variara. Ne vi kaiqara varaqi vi vauraqaahai nana koqe haikae varorave? Vi kaiqara varaqiro vi vairava variqiro viro vuru ekaarama qutu vuanaro.

²² Ho vate maa entara ne kuvantu vuavarro qora okaravano kia niqaa raqiki vaimanta ne Kotira kaiqa vaiintima variara. Viraqaahai ne nana koqe haikae varevara? Ne mintiaqiqi viha „kia hampi kaiqa vararaiti,“ Kotira kaiqaqai varaqi viha, viraqaahai ne ekaa qaqi variqi vivara.

²³ Qora okaravano nai kaiqa vaiinti qutu vuaina koqaaraqai nimi vaivarovata, Kotiva Nora Vaiinti Ihu Karaitira kaiqarao tiro, quminaiqama kero aaqaa ekaa enta qaqi variqi vuaina okarara tinavu timira.

7

Poruva nahentivano vaati varaainarara tura

¹ Ti qata vakaao, ne uva maara iriakara ti, ne iriavaro vaiinti vano qaqi variqiro vi vai entara vi uvava viraqaa raqikiqiro vi vaira. Viraqaahairo vaiintivano qutu vina entara vi uvava kiama ho qaiqaa viraqaa raqikiqiro vuanaro.

² Ho nahenti vare okarara iriate: Nahenti ira amitaivaro tinavu uva maaravano vi nahentirara tiharo, Vi vaiintiva ai vaativanoma vaivo, tivaro vi nahentiva nai vaati vira varatero vaira. Vira vaativano qaqi variqiro vi vai entara viva vira naatavanoma vairo. Vira vaativano qutu vuaina entara tinavu uva maaravano kiama vi nahentira tuataanaro.

³ Vira vaativano qaqi vaina entara vi nahentiva vo qoraintintiro hampi nirera, vi nahentirara naata vaati varaa okarara raqama kaivo tivara. Vira vaativano qutu viraro tinavu uva maaravano kia vi nahentira qioqama tairaro vi nahentiva vo qorainti varairera, kia virara naata vaati varaa okarara raqa kaivo tivara.

⁴ Ti qata vakaao, nevata vira voqaara variavo. Ihu Karaitira katariqaa hiritovaro qutu vumanta nevata vi entara vira vataake qutu vurara tiro, vate Mosiraqaa tivato uvava kiama ho ni tuataivo. Kotiva Karaitira qaiqaa qaqi vara himpima korara ti, ne Karaitrainiqama vuaka variavo. Ne mintimake vahara ti, ne Kotira kaiqa vara amitaqiqi vikama vaivara.

⁵ Haaru qora okaravano tinavuqaa raqiki vau entara Mosiraqaa tivato uvava vo okara vo okara qioqama tomanta tenavu vi okarara iriqi viha muntuka ntumanta tenavu qioqamato okararaqai varaqi vi variavaunara. Vi okarara mintimake varaqi vi vaunaraqaahairo qutu vuaina okaravaqai qovarama vi vaura.

⁶ Haaru Mosirara tivato uvava tinavuqaa raqikiqiro viharo tinavu rumpa tomanta variavaunara. Viraqaahai tenavu „Karaitira vataake,“ qutu vuavaunarara tiro, vate vi uvava kia tinavuqaa raqiki vaimanta tenavu qaqi vaunara. Tenavu kuvantivi qaqini vahia kia haaru uva okara qara ntuva tora iriha Kotira kaiqa vararaiti, tenavu qaraaka uva okarara iriha vauraro Kotira Maraquravano tinavu kahaqi vaimanta Kotira kaiqa vare vaunara.

Kotiva Mosiraqaa tivato uvara okarara tura

⁷ Haaru Mosiraqaa tivato uva maarava kia tinavu ho kahaqi vaurara ti, tenavu vi uvarara qora haikave tirara? Tenavu mintie tirara? Aqao, kiavuve. Vi uvava kia variare titirio, tenavu kia ho qora kaiqa okarara kankomake iruraitirio. Vi uvava tiharo, Kia vora airairara muntuka ntuane, turave. Vi uvava kia minti titirio, ti muntukavano hampi haikara ntuaina okarara te kia ho iruraitirio.

⁸ Te vi uvara iriqi vuataara vaumanta te variavauraro qora kaiqa varaarira okaravaqai ti avu aatoqi vaumantara ti, te tiha, Kaiqe te vi uvara raqa kaare, tivake viraqaahai vo haika vo haikara ti muntuka nti vaumanta te variqi vi vaunara. Mosiraqaa tivato uvava kia variare titirio, vovano vi uvara raqa kaivarо qora kaiqa kempukavano kiama viraqaqavaitirio.

⁹ Haaru Mosiraqaa tivato uvara kia iriavauna entara te qumina qaqi variqi vi variavaunara. Te mintimake variqi vi variavauraro Kotiva qioqamato uvava aniomantata te vi uvara iriavauraro ti avu aatoqihairo qora kaiqa varaarira okarava qovarama vumanta te Kotira uva raqake, ¹⁰ vira kaara te qutu vuavaunara. Kotiva qioqamato uvava ti kahaqi vaimanta te qaqi variqi vuataara vaumanta tentavano vi uvara raqa kaavaunara kaara te qutu vuavaunara.

¹¹ Te Kotiva qioqamato uvara iriavauraro ti avu aatoqihairo qora okaravano tiriara unahaa tiharo, Homa vi uvara raqa kenarave, tumanta te Kotiva qioqamato uvara raqa kaavauraro vi uvava ti harukora.

¹² Mosiraqaa tivato uva maarava vaireva, kia qora uvavauve vairo. Vi uvava Kotira koqe uva maarama vairo. Kotiva qioqama tai uvava vaireva, nai Kotira okara koqe okaravata, viva avuqavuqama kero ni vai okararavata tinavu humiqe vaira.

¹³ Vi uvava koqe uva vaimantara ti, te vi uvara kaarae qutu vunarave? Aqao, kiavuve. Te vi uvura raqake qora kaiqa vare vaunara kaara te qutu vuaina haikara varunara. Ti avu aatoqihairo qora kaiqa varaarira okarava koqe uva raqa kaane tira kaara te qutu vuaina haikara vare, viraqaahai te kankomake tavauraro qora kaiqa okaravano vaireva, vaaqu okaraqaima vairo. Kotiva qioqama teharo kia mintiane tu uvava ti humiqomanta te qora kaiqa okara kankomake tavauraro vi okarava nai qora kaiqaqaima vairo.

Qora okaravano tinavu avu aato ravaaqavu kaainarara tura

¹⁴ Tenavu kankomake irunara. Mosiraqaa tivato uvava vaireva, Kotira okara tinavu humiqe vaira. Vi uvava mintima kero vaimantavata, te vataihainaa okarara iriqi vi vauraukama vai. Qora okaravano ti rumpa taimanta te vira kaiqa vaiintiqai vaunara.

¹⁵ Te tenta vare vauna kaiqara kia anomake irunara. Ti varaataa i kaiqara vi kaiqara kia vararaiti, te kia varaataa i kaiqara vi kaiqaraqai vare vaunara.

¹⁶ Te kia qora kaiqa varaataa imantavata, vi kaiqaraqai vare vahara ti, te kankomake iruraro Mosiraqaa tivato uvava koqe uvaqaima vairo.

¹⁷ Te qora kaiqa varehama kia tentavauve vi kaiqara vare vai. Ti avu aatoqihairo qora kaiqa varaarira okarava, vivama vi kaiqara vare vairo.

¹⁸ Te tavauraro koqe kaiqa varaarira okarava kia ti avutaqi vaira. Te tenta avu aato muntukaqiarama turo. Te tenta muntukaqihai koqe kaiqa varaataa imanta vi kaiqara varare tihavata, kia vare vaunara.

¹⁹ Te tiha, Kaiqe koqe kaiqa varaare, tivakehavata, vi kaiqara kia vare vaunara. Te tiha, Aqao, kia qora kaiqa vararerave, tivakehavata, qora kaiqa vira qaqqai vare vaunara.

²⁰ Te kia varaataa i kaiqara varaerera, ho kia tentavauve vi kaiqara varainara. Qora okaravano ti avu aato muntukaqai viva, vivama vi kaiqara vi kaiqara vare vairo.

²¹ Viraqaahai te kaiqa varaaina okarara tavauraro maantimama vairo: Te koqe kaiqa varare turarovata, qora okaravano aara kuval timite vaimanta te qora kaiqaqai vare vaunara.

²² Te tenta muntukaqihai Kotira uva okarara quaheha tiha, Kaiqe vi uvara iriqi vuure, turarovata, ²³ ti avu aatoqihairo qora kaiqa varaarira okarava navutaiqiharo te koqe kaiqa varare unaravata uri aatara kero ti rumpa taimanta vaunara.

²⁴⁻²⁵ Te tenta muntukaqihai Kotira kaiqa vainti vairera auti vaurarovata, ti vaatavano vaaqu kaiqaqai varareva auti vaira. Ike, mpo, te voqamake qoraiqamavi vauro. Ti vaatavano qora kaiqa varaaina vaatava ti ravaaqavu kaimanta te vira kaara qutu vuarorave. Tavave ti ruuaruma timitairaqe te qaqqini kuvantuvi vairaro? Ho Ihu Karaitiva tinavu Noravano, vivaqaima ti ruuaruma timitaariravama vaivo. Te virara irihama Kotirara koqema iarao tivakehama vira autu tuaherake vauro.

8

Kotira Maraquravano vaiinti nahenti kahaqainarara tura

¹ Vi uvara okara maantimama vairo: Vaiinti nahenti Ihu Karaitira vataake vohaa tampamavi vaika vaivarao kiama uvavano vikaqaa varianaro.

² Qora okaravanovata, qutuvi okaravavata, tinavu rumpa taivaro Kotira Maraquravano tinavu kuvantu timiteharo tinavuqaa raqikiqiro vi vaimantara ti, tenavu Karaitira vataake vohaa vahaa qaqqi variqo vuaraukama vaunara.

³ Tota tinavu avu aatovano qora avu aato vauvarora tiro, Mosiraqaa tivato uvava tinavu kahaqiarirava kia ho vaura. Ho Kotiva vaiinti nahenti kahaqireva nai maaqu vara kovaro viva tenavu qora kaiqa vare vaurauka voqaara vaharo kia qora kaiqavata vararaitiro, tinavuara iriharao tenavu qora kaiqa varauna uvara taiqa kareva qutu vurara tiro, Kotiva qora okara kempuka aatarakora.

⁴ Mosiraqaa tivato uvava minti mintimake nuate tuvaro Kotiva tinavuara vi uvava vikaqai vaira vilka naii vaatavano qora kaiqa varaataa inara kia vararaiti, tinta Maraquravano tina uvavaraiqai iriqi vuute tiro, Kotiva tinavu uva Karaitiraqaa vatovaro qutu vura.

⁵ Nai avu aatoqihairo qora kaiqaqai varaataa ira vaiintiva vairaro qora kaiqa varaarira okarava vi vaiintiraqaa raqikiqiro vuanaro.

Nai avu aatoqihairo Kotira kaiqaraqai iriqi vi vaira vaiintiva vairaro Kotira Maraquravanoqai vi vaiintiraqaa raqikiqiro vuanaro.

⁶ Nai avu aatoqihairo qora kaiqa varaarira okarava viraqaa raqikiqiro vi vairaro vi vaiintiva ekaarama qutu vuanaro. Kotira Maraqravano viraqaa raqikiqiro vi vairaro nai avu aatoqihairo Kotira kaiqaqai varaarira vaiintiva variqiro vi vairaro vira muntukaqihairo paru i vairaro viva ekaa enta qaqi variqiro vuanaro.

⁷ Qora kaiqaqai varaataa ira okarava vaiintiqa raqikiqiro vi vairaro vi vaiintiva Kotira navutavaama varianaro. Vi vaiintiva kia Kotira uva ho iriraitiro, vira uva raqa keharo ni varianaro. Viva Kotira uva iriqiro vuarira okarava kia viraqi varianaro.

⁸ Qora kaiqaqai varaataa ira okarava vaiinti nahentiqa raqiki vairera, vika kia ho Kotiva antuqa arina kaiqara varevara.

⁹ Ho Kotira Maraqravano niqi vairera, Kotira Maraqravano niqaa raqiki vairaro ni avu aatovano qora kaiqa varaataa ira okarava kia ho niqaa raqikianaro. Karaitira Maraqravano kia vo vaiintiqira vairera, vi vaiintiva kia Karaitirainiqama vi varianaro.

¹⁰ Karaitiva niqi qaqi variqiro virera, ni vaatavano qora kaiqa kaara qutu vuarirava vairarovat, Karaitiva ni avuqavuqama nimitairara tiro, ni maraquravano qaqi variqiro vuariravama varianaro.

¹¹ Ho Kotira Maraqravano niqi vairera, Kotiva Ihura qaiqaa qaqi vara himpima kontema kero, viva nivata qaiqaa qaqi vara himpima kaanaro. Vira Maraqravano niqi qaqi variqiro vi vaiva, viva ne qutuvi vaatara vara himpima kairaro qaiqaa qaqi variqiro vuanaro.

¹² Ti qata vakao, vi uvara irihama hauri tinavu avu aatovano qora kaiqa varaataa inara tenavu varaqi vuarora.

¹³ Ne ninta avu aatovano qora kaiqa varaataa inara varaqi vivera, ne ekaarama qutu vivara. Kotira Maraqravano ni kahaqi vaira ne qora kaiqa aru qaqiqama kaivera, ne ekaa enta qaqi variqi vivara.

¹⁴ Ekaa vaiinti nahenti Kotira Maraqravano ti vai uvara iriha ni variaka, vikama Kotira vainti variara. ¹⁵ Kotiva nimi Maraqrava kia ni rumpataira ne qeteha variate tiraitiro, viva ni nimi Maraqrava ni viri kaimanta ne Kotira vaintiqamavi variara. Mintirara ti, tenavu Kotirara tiha, *Aba—Qao*, ti vaunara.

¹⁶ Kotira Maraqravano tinavu maraqura kahaqi vaivaro tinavu maraquravano tiharo, Tenavu Kotira vaintima vauro, ti vaira.

¹⁷ Tenavu Kotira vainti vaihara ti, tenavu Kotiva nai vaintiara kaama tai haikara varaariraukama vai. Tenavu Karaitira vataake vohaa vaihara ti, tenavu Kotiva Karaitira kaama amitai haikara varaariraukama vai. Tenavu maa entara Karaitira aanare aihavi haikara varaqi vivi, naantiara Karaitira aanare tenavuvata noraiqamavi Karaitira vataake koqemake qaqi variqi virara.

Tenavu naantiara koqemake qaqi variqi vuainarara tura

¹⁸ Te mintimake irunarave: Naantiara Kotiva tinavu noraiqamakero koqema timitaaina entava qovarama vuainara veka vaihama, te vate maa entara aihavi haikara varaqi vuainararave, maara varaqi vuainararave, kia vi haikarara noraiqaake iriqi virara.

¹⁹ Ekaa Kotiva autukero vatai haikauka tinavu nai vaintaira noraiqamava kaaina entava vaaka qovarama vuarire tivakeha vira vekama vai.

²⁰ Maa entara Kotiva autukero vatai haikauka variqi vivi, vuru qoraiqamavi taiqavi variara. Kia vi haikava nai irikero minti vairave. Kotiva tivarora tiro, minti vairave. Ho Kotiva aututai haikava kiama ekaa enta mintiaqiro vuanaro. ²¹ Naantiara Kotiva kuvantu kaaina entara vi haikava vi haikava kia nteraraitiro, qaqi variqiro vuanaro. Naantiara Kotiva autukero vataina haikauka vaireka, vika tenavu vira vaintiravano variinantemake, kuvantuvi koqemake qaqi variqi vivarave.

²² Tenavu kankomake irunarave:

Nahentivano vainti vatareve aiha vivaro keke tintemake, ekaa Kotiva autukero vatai haikauka vika nái kuvantu nimitaaina entara vira veka valha keke tivaqí viha, maa entaravata vika qaqqiqai keke ti variara.

²³ Kia vi haikaukaqai keke ti variara. Kotiva nai Maraqua avuni tinavu timimanta varaurauka, tenavuvata kekema ti vai. Tenavu Kotiva tinavu viriaina entarave, viva tinavu vaata kuvantu kaaina entarare, vi entara veka vaihama, tenavuvata vate maa entara keke ti vaunara.

²⁴ Ihuva tinavu kuvantu timitaiera ti, tenavu tiha, Naantiara Kotiva tinavu vaata qaiqaa qaqi vara himpima kero tinavu tivitaanarove, tivake tenavu vi entara vekama vai. Maa entara tenavu kia tavaaina haikava qovaraiqianara vira vekama vai. Tenavu vi haikara tavehavauve vi haikara veka kia vairara. ²⁵ Tenavu kia vi haikara tavaraiti tiha, Ququaama vi entava qovaraiqianarove, tivakeha viraqaahai tinavu muntukavano paru i vaimanta vi entara veka aitutihama vai.

²⁶ Tenavu uquerara vaiinti nahenti vaurarora tiro, Kotira Maraqravano tinavu kahaqiqi vairo. Tenavu Kotira aararerai iha tentanavu muntukaqihai vi haikara iritaurarovala, novano kia koqema kero vi haikara tiva qovaramake vaira. Tenavu minti vauraro Kotira Maraqravano tinavu kahaqiharo Kotira aarama timite vaira. ²⁷ Viva minti ti vaivaro Kotiva tinavu muntukaqi aitutumakero tave vaiva viva nai Maraqravano ti vai uvare iriqiro vi vaira. Vira Maraqravano Kotira antuqavano vai haikarara iri vairara tiro, viva tinavu Kotiva nai vaintaira kahaqiarire tiro, vira Maraqravano Kotira avuqavuqama kero aare vaira.

²⁸ Tenavu kankomake irunarave: Nai antuqavano vaina kaiqara varaaate tiro, Kotiva naarama tai vaiinti nahentika, Kotirara muntuka vataaka, vika vaivaro vo haika vo haikavano vikaqaa qovaraiqirera, kiama vi haikava vi haikava vika qoraiqama nimitairaro Kotiva vi haikara varakero vi haikaraqohairo vika koqema nimitaqliro vuanaro.

²⁹ Haaru vaiinti nahenti kia vau entara qumina enta Kotiva tiharo, Te vi vaiinti nahentika naarama kaari vika ti vaintiqamavi tinta Maaqu voqaara variate tiro, vika nai kaama tora. Kotiva vika nai kaama tero tiharo, Ti Maaquvano vika vakaava vaira vika vira aura qatama vaivarave, tura. ³⁰ Kotiva haaru minti tiva torara tiro, viva tinavu nai kaama tai vaiinti nahentika haarama taira. Viva tinavu haarama kero, tinavuqaa uva vairavata taiqa kero avuqavuqama timitero, tinavuara vika ti vataake vohaa variate tiro, tinavu noraiqama kero nora autu timira.

Kotira muntukavano tinavuara variainarara tura

³¹ Kotiva tinavu mintima timitarira ti, tenavu nana uvae virara tirara? Kotiva tinavu kahaqireva auti vairara tiro, tavave tinavu navutaiqiharo qoraiqama timitaanaro? Kia vovano ho mintianaro.

³² Kotiva nai Maaqu kia tuataraitiro, paruma kero tinavu timirara tiro, viva kiae ekaa haikavata tinavu paruma kero timianaro?

³³ Tavave tinavu Kotiva nai kaama tairaukaqaa uva vataanaro? Kia vovano ho mintianaro. Kotiva naima tinavu uva nunka timiteharo tinavu avuqavuqama timite vaira.

³⁴ Tavave tinavuqaa uva vateharo tinavuara nenta qora kaiqa varera kaara qutu vivarave tianaro? Kiama vovano ho minti tianaro. Ihu Karaitiva tinavuara iriharo qutu vura. Ihuva kia ekaara qutu viraitiro, viva qutu vuraqihairo qaiqaa qaqi himpiro vate viva Kotira kauqu tanaraini vahilo tinavuara iriharo Kotira aarama timite vairo.

³⁵ Karaitiva mintirara tiro, tavave tinavu Karaitiraqahairo raira kairaro Karaitira muntukavano tinavuara kia varianaro? Kia vovano ho mintianaro. Maara vaina entarave, tioririra entave, yukaari utiha nuaina entarave, vonavu tinavu qoraiqama timite entarave, karavano kia vaina entarave, kia utavaaqa variaina entarave, vo haika aatu qetaaina entarave, iqoka raqi entarave, vi haikava vi haikava qovarama viro kia ho tinavu raira kairaro Karaitira muntukavano tinavuara varianarove.

³⁶ Te tunantema kero Kotira vukuqi mintima tiro:

Tenavu ai vainti vaunarara ti, ekaa vo enta vo enta tinavu harukareka auti variarave. Sipisipinavu arukareka auti variantemake, navutaaka tinavu arukareka auti variarave, tura. *(Ihi 44:22)*

³⁷ Vika mintimake tinavu qoraiqama timite vaivaravata, Ihura muntukavano tinavuara vairara ti, tenavu homa ekaa vi haikara vi haikara aataraqi virara.

³⁸⁻³⁹ Te maa uvare kankomake irunara: Kotira muntukavano tinavuara vaivaro viva Karaitira tinavu timivarao Ihu Karaitiva tinavuqaa raqiki vairara tiro, kia vo haikavano Kotira muntukavano tinavuara vaineraqahairo raira kaanaro. Tenavu qutuariravave, qaqi variqi vuvariravave, kia tinavu ho raira kaanaro. *Enselinavuve, vaanananavuve, vika kia tinavu ho raira kevarave. Vate vai haikavavata, naantiara variaina haikavavata, kiama ho tinavu raira kaanaro. Naaruvaini variakave, vataini variakave, Kotiva vo haika autukero vataivave, ekaa vi haikava kiama ho Kotira muntukavano tinavuara vainara raira kevaravema, turo.*

9

Poruva nai navunaaka Isareri vatanaakara tura

¹ Te Karaitira vainti vahira ti, quqaa uvaqai ti vaurauka. Kotira Maraqravano ti muntukaqi raqiki vaimantara ti, te kia una uva ni tiva nimirera.

²⁻³ Te tenta vohaa naare Iutaa vikara iriha, voqamake mpo ike tiva nimite vauraro ti voqamakero vikara muntuka qoraiqimanta variqi vi vaunara. Mpo, ti navunaakarao tiro, ti Karaitiraqahairo teqa kairamanta Iutaa vika ti vatuka varaiqe te hove tiataara.

⁴ Kotiva Isareri vatanaakaraqai tiharo, Te ni naarama kaari ne ti vaintiqama vivarave, tivakero nai takuqi vai okararavata vika numiqomanta tavora. Kotiva vohaa vi vatanaakaraqai tiharo, Te mintiakeha niqaa raqikiqi virerave, tivakero Kotiva vika nai uva maara tivatora Iutaa vika nimura. Kotiva vohaa vi vatanaakaraqai tiharo, Maantimakeha ne ti autu tuaheraqi vuate, tura. Kotiva vohaa vi vatanaakaraqai kauqu aiqiqaa aquukeharo tiharo, Te ni minti mintima nimirerave, tura.

⁵ Kotiva minti tumanta haaru nora autu vataa vaiintinavu Isareri vatanaaka vika kaivaqaukvara vaura. Karaitivatava vohaa Iutaa vika ankuqihairo qovarama vura.

Karaitiva avuhainaava ekaa haikaqaa raqiki vaiva, viva Variqavano vairara ti, tenavu ekaa enta vira autu tuaheraqi virerave. Te ququaama turo.

Kotiva vaiinti nahenti nai kaama taaina okarara tura

⁶ Ho Isareri vatanaaka kia Kotira uva iri variara kaara hoe tenavu Kotira uvavano kia aruvivo tirara? Kia tenavu minti tirara. Isareri vatanaakaqihairo kia Kotiva ekaa vika nai kaamate vaika variara.

⁷ Eparahaamira naintivara vika kia ekaa Kotira vanti variara. Kotiva Eparahaamirara mintima tiro: *Ai maaqu Aisaakira vaintivara vikarama te kauqu aiqiqaa aquke tiha, Ai naintivara vaivarave, tura.*

⁸ Vi uvvara okara mintimama vairo: Kia Eparahaamiva kuvuarama tairauka vika Kotira vanti vaivara. Eparahaamiva tintemake, Kotirara ququaama tiarao tika, vikama Kotira vaintima vaivarava. ⁹ Kotiva kauqu aiqiqaa aqukero Eparahaamirara mintima tiro: *Vi entara te orurante tuvuariraro ai naatavano Seraava qorainti vanti vatataanarove, tura.*

¹⁰ Kia vi uvavaqai vairo. Vo uvavanovatama vairo. Nahenti vo Rebekaara maaqutanta uvavarita vintata qova vohaa vaiinti tinavu kaivaqava Aisaakiva vaura.

¹¹⁻¹² Rebekaava vanti taiqama viro kia vi vaintitanta vatato entara vitanta kia koqe kaiqave qora kaiqave varo entara, Kotiva naane uva vatero tiharo, *Vira vakaava nai qata kaiqa vara amitaqiro vuuanarove, tura.* *(Okara 25:23)*

Kotiva kia vitanta kaiqa varerara iriraitiro, viva nai antuqa avateharo vira qataqai nai kaama tora. ¹³ Kotira uva qara ntua toraqi mintima tiro: *Iekopirara ti hantuqa vaivarava Isorara kia ti hantuqa harivo, tura.* *(Mal 1:2)*

¹⁴ Kotiva minti turara tenavu nana uvae tirara? Kotiva kia avuqavuqamakero uva ti vaivama vaivo, tirara? Aqao, tenavu kia ho minti tirara.

¹⁵ Haaru Kotiva Mosira tiva amiro tiharo, *Te vi vaiintirara ike mpo tiva amitaataa iraque te virara ike mpo tiva amitararave. Te maa vaiintirara aaqurihamma amitaataa iraque te vira aaqurihamma amitararave, tura.*

(Katu Varora 33:19)

¹⁶ Virara iriharo kiama qumina vaiinti vovano tiraro Kotiva virara mpo ike tiva amitaanaro. Kiama vaiinti vovano Kotira koqe kaiqa vara amitairaro virara iriharo mpo ike tiva amitaanaro. Kotiva nai antuqa avateharo vi vaiintira mpo ike tiva amite vaira.

¹⁷ Mosiva qara ntua toraqi Kotiva Isipi avuhainaa vaiintiara mintima tiro: *Are ti kempuka tavaira ekaa vo vatanaa vo vatanaakavata ti hutuara iriate ti, te ai noraiqama kaurara are avuhainaa vaiintiqama vira variarao, tura.* *(Katu Varora 9:16)*

¹⁸ Kotira okara maantimakero vairo: Kotiva nai antuqa avateharo vo vaiinti aaqurihamma amite vaira. Viva nai antuqa avateharo vo vaiinti avu aato tinta kaivarao vi vaiintiva kia vira uva iri vaira.

Kotiva aaqurihamma nimitaaina okararavata vira arara itaaina okararavata tura

¹⁹ Kotira okara mintima vaivaravo vovano niqihairo tiriara aqao tiharo mintima tianaro: Kotira antuqavano mintima vairera, nantivaroe viva tinavuqaa uva vate vaivo? Tavave nai antuqa avateharo Kotira antuqa qaqira kararave? tianaro.

²⁰ Niqihairo vo vaiintivano minti tirera, te nai vira mintimake tiva amirera: Are qumina vaiinti varianarara tira, are kiama ho Kotirara minti tinarave. Aaqatai vata varakero aututai taveva kia ho tiharo, Aqao, nantiharae are maantima kera ti aututaara? tianaro. Kiama ho tavevano minti tianaro.

²¹ Tave autuaina vaiintiva homa nai antuqaaqaa tave autuanaro. Viva aaqatai vata varakero tave taaraqanta autireva iharo tiharo, Kaiqe vo tave koqera autuke, viraqaaahai qaqi tave vovata autu kaare, tianaro. Viva homa nai antuqaaqaa minti tianaro. *Vira voqara kiama tenavu Kotirara aqao kia mintiataarave tirara.*

²² Vaiinti nahenti hinivano vaiha vika qora kaiqa vare variara kaara Kotira arara itaivarovo vika nai kempuka numiqareva iharovata, viva vika kia vaaka aru taiqake vaira. Viva vika naantiara aru taiqama kaanaro. Ho Kotiva nai antuqaaqaa homa mintianaro. ²³ Kotiva hini vaiinti nahenti tinavuara aaqurihamma timitechero tiharo, Te vika noraiqama kaari vika ti vataake vohaa variqi vivarave, ti vaira. ²⁴ Kotira antuqavano

mintimakero vairara tiro, viva kia tinavu Iutaa vatanaaka hininavuqai kaama taraitiro, viva vo vatanaaka hininavuvata, naarama kero nai kaama taira.

²⁵ Haaru paropeti vaiinti Hoseaava qara ntuva teharo Kotiva mintima tivo tiro:

Vo vatanaaka kia ti vaiinti nahenti variaka, te vikarama ti vaiinti nahentive tirarave. Ti muntukavano kia vikara vai vatanaakara, vikaravatama ti muntukavano varianarove. (Hosea 2:23)

²⁶ Vika kia Kotira vaiinti nahenti variavo tia vatanaaka, naantiara vi vatanaakara mintima tivarave: Vika qaqi variqiro vi vai Variqara vaiinti nahentima variavo, tivarave, tura. (Hosea 1:10)

Vi uvvara qara ntuva tova vaivaro vo uvavatama vairo.

²⁷ Haaru paropeti vaiinti vo, Aisaiaava naveraitiharo Isareri vatanaakara mintima tiro:

Naantiara Isareri vatanaaka nora namari auvahianta airi nuqa vaintemake, vika airitahaa vaivarovata, Kotiva kia ekaa vika kuvantukero ntitaraitiro, viva inaara vaiinti nahentinavuqaima kuvantukero ntitaanarove.

²⁸ Noravano vaakama ko tiva taiqakero vatainai vaika nái koqaa nimianarove, tura. (Aisaiaa 10:22-23)

²⁹ Minti tivakero haaru Aisaiaava qaiqaa vo uvavata tiharo:

Noravano Kotiva ekaa kempuka vataava kia tinavuqihairo inaara vaiinti nahenti vonavu vehakuma nimitaitiro, Kotiva Sodomi vatanaakavata Gomora vatanaakavata vehi autu kontemakero, tinavuvata vehima autu kaitiro, tura. (Aisaiaa 1:9)

Isareri vika kia Ihurara quqaa vivave tura

³⁰ Vi uvvara okara mintimama vairo: Vo vatanaaka vika kia tiha, Kaiqe Kotira aaraqaa vuare, ti variaka variqi vi, viraqaaahai vika Ihurara quqaa vivave tiavarro Kotiva vika avuqavuqama nimite vaira. ³¹ Isareri vaiinti nahenti vika tiha, Kaiqe Mosiraqaa tivato uva maarara iriqi vuare, tivake kia vi uvvara iriqi viraiti variavaro, vira kaara Kotiva kia vika avuqavuqama nimite vaira.

³² Nantimantae Isareri vika hampigama vuavo? Vika tiha, Tenavu kaiqa vare variainarara iriharo Kotiva tinavuara avuqavu ni variakavema tianarove, tivakeha vika kia Karaitirara noraiqaake iri variara. Vaiintivano origaahairo kuntavaivai intemake, vika Karaitiraqaaahai kuntavaivaima vare kaavu nti variara.

³³ Kotira vukuqi mintima tiro:

Ho tavaate, te Saioniqi „Jeruharemipi“, ori vo ntava taari vi oriraqaaahai vaiinti nahenti kuntavaivaima vare kaavu ntivarave. Vi orirara quqaa vivave tirava kiama kauruanarove, tura. (Aisaiaa 8:14)

10

¹ Mpo, ti qata vakao, Kotiva „ti navunaaka, Isareri vatanaaka kuvantukero nttaainarara ti muntukavano voqamakero vaimantara ti, te virara Kotira aare vaunara.

² Te tavauramanta vika voqamake Kotira kaiqa vara amitareka auti vahavata, kia Kotira okara kankomake iriraiti, vika qumina minti variara.

³ Kotiva vaiinti nahenti avuqavuqama nimi taaina okarara vika kia kankomake iriraiti, vika nái irike tiha, Kaiqe tenavu Mosiraqaa tivato uvvara avataqi vi variariraro Kotiva tinavu avuqavuqama timitaarire ti variara. Minti tivakeha vika Kotiva avuqavuqama nimitaaina okarara qoririmake variara.

⁴ Mosiraqaa tivato uvava vauvoro Karaitiva anirero vi uvvara aatara korara tiro, nai taukae Karaitirara quqaa vivave tika vaivaro Kotiva vika avuqavuqama nimitaanaro.

Kotiva ekaa vaiinti nahenti kuvantu nimitareva auti vairo

⁵ Mosiraqaa tivato uvava vaiinti nahenti avuqavuqiaina okarara mintima tiro: *Vi uvvara kia voqavata raqa karaitiro, ekaa vi uvvara iriqiro vi vairo vaintivaaqaima homa qaqi variqiro vuuanarove, tura.* (Wkp 18:5)

⁶ Vi uvava mintima vaivarovata, Karaitirara kempukaiqamake iriqi vi vaivaro Kotiva vika avuqavuqama nimitaaina okarava maantimama vairo: Ne hauri tiha, Tavave Karaitira vitakero tuvireva naaruvaini oru vuuanarove? tivorave.

⁷ Ne hauri tiha, Tavave qutuvika vainaihai Karaitira otu vitakero urireva vuuanarove? tivora. „Karaitiva naaruvaihai tuviro muntu qutu vuraqihairo qaiqaa qaqi himpiro vaivaro tiro, viva ni aumantoma vairo.“

⁸ Karaitira uvavano ni aumanto vaharo ni noqive muntukaqive vairo. Tenavu Karaitirara kempukaiqaake iriqi viha nuate tuna uvvara ni tiva nimi vaunara. Tenavu mintima ti:

⁹ Ne nenta noqihai qovaramake tiha, Quqaama Ihuva Noravano vaivo, tivakeha ne nenta muntukaqihai tiha, Quqaama Kotiva Ihura qutu vuraqihairo vara himpima

kaivaro viva qaiqaa qaqi himpiro vaivo, tivera, Kotiva virara iriharo ni kuvantu keharo ntitaanaro.

¹⁰ Ne nenta muntukaqihai vi uvarara ququaave tivarо Kotiva ni avuqavuqama nimitaanaro. Ne vi uvаra noqihai qovaramake tivarо Kotiva ni kuvantu keharo ntitaanaro.

¹¹ Kotira vukuqи mintima tiro: *Karaitirara quqaa vivave tirava kiama kauruanarove, tura.* (Aisaiaa 28:16)

¹² Iutaa vatanaakave, vo vatanaa vo vatanaakave, miqо maaqо vika kia vo qaramake variarara ti, ekaa vika ho vi uvаra tivara. Noravano „Karaitiva“ vivaqaima ekaa miqо maaqо vikaqaa raqiki vaira. Vira aareha tinavu kahaqiane ti vaika, Noravano vika kahaqiharo voqavata vika koqema nimitaanaro.

¹³ Kotira vukuqи mintima tiro: *Tauka taukae Nora Vaiinti aarehama virara tinavu kahaqiane tivarо viva vika homa ekaa kuyantu kero ntitaanarove, tura.* (Joel 2:32)

¹⁴ Karaitirara kia quqaa vivave tiaka, vika nantiake vira aareha tinavu kahaqiane tivara? Karaitira autuara kia iriaka, vika nantiakеe virara quqaa vivave tivara? Vovano kia Karaitira uva vika vuru tiva nimirera, nantiakеe vika vi uvаra ho irivara?

¹⁵ Kia vo vaiintinavu nititaivera, vinavuka nantiakеe vuru vika tiva nimivara? Kotira vukuqи mintima tiro: *Koqe vakaaka viri tiva nimi vaina vaiintira vaiinti nahenti vira quahama amitevarave, tura.* (Aisaiaa 52:7)

¹⁶ Tenavu koqe vakaaka Karaitira uva tiva nimuramanta kia ekaa vika vi uvarara ququaave ti variara. Haaru tinavu kaivaqava Aisaiaava tiharo, *Noravauvо, tenavu vakaaka vika tiva nimuramanta vika kia tinavu uvаra quqaaive tivо, tura.* (Aisaiaa 53:1)

¹⁷ Tenavu kankomake irunara: Karaitira vakaaka vora tiva ami vainaraqaahairo vaiintivano vi uvаra iriharo Karaitirara quqaa vivave tianaro.

¹⁸ Te ni irama nimiteha tiha, Iutaa vatanaaka Karaitira vakaaka kiae iriarave? turo. Minti tivake te ninta tiva nimi tiha, Aqao, vika vi uvаra iriarave, tirara. Kotira vukuqи mintima tiro: *Vika ekaa naato vatainи vi anihа tiva nimiavaro vika uvavano vi animanta ekaa vatainи variaka vika uva iriarave, tura.* (Ihi 19:4)

¹⁹ Te qaiqaavata ni irama nimite tiha, Haaru Karaitirara tu uvаra kiae Isarerі vika vi uvаra okara iriarave? turo. Vika ho iriarave. Vika kaivaqava Mosiva vika tiva nimiro tiharo,

Kotiva mintima tivo: Ne vo vatanaakara qumina vatanaakave ti variaka, te vikara ti navunaakave tiari ne vika toma nimiteha, Kotiva tinavuaraqai ti navunaakave tiataarave tivarave, tura. Ne kia avu aato vataa vatanaakave ti variakara, te vika koqema nimitaariraro ni araravano itaanarove, turave. (Lo 32:21)

²⁰ Mosiva minti tuvoro vira naantira Aisaiaava kia qetaraitiro, mintima tiro:

Kotiva mintima tivo: Kia ti rantareka auti variaka, vikama ti ranta kaavo. Kia tiriara ire variaka, vika nivuqaama te qovarama vunarave, tura. (Aisaiaa 65:1)

²¹ Kotiva Isarerі vatanaakara mintima tiro:

Te vo enta vo enta ni kahaqirera tenta kauqu ratuta kauramantavata, ne ti qaqirake kia ti uva iriraiti, ti tauvaqа utu timite variavo, tura. (Aisaiaa 65:2)

11

Kotiva Isarerira ike mpo tiva nimi taainara

¹ Te vaaka tuna uvarara irihama te ni irama nimirerа: Quqaae Kotiva nai navunaaka Isarerі vatanaaka qoririma nimitairave?

Aqao, kiama viva vika qoririma nimitaivo. Te Isarerі vikama vauro. Eparahaamiva ti kaivaqava vairave. Te Benaminira vohaa ankuma vauro, turo.

² Kotiva hoqarero Isarerі nai kaama taika kia vika qoririma nimitaira. Kotira vukuqи Elaitaarara qara ntuvato uvаra ne kiae kankomake iriarave? Vi entara Elaitaava Isareriqaa uva vatareva Kotirara mintima tiro:

³ Noravauvо, Isarerі vika paropeti vaiinti airitaha arukaavo. Quara arukeha ari iha quara amite varia taintanavura vika ekaa rampai aqukaavo. Te ai paropeti vaiinti vohaiqaqai vauramanta vika tivata haru kareka auti variavo, tura. (1 King 19:10, 14)

⁴ Elaitaava minti tuvoro Kotiva nai vira nana uvae tiva amura? Kotiva aqao tiro, *Te 7,000 vaiintima kaamate ntita vatauro. Vi vaiintika una variqa Baalirara kia tori kauru ara amitoka variakave, tura.* (1 King 19:18)

⁵ Haaru mintuntema kero, maa entaravata Kotiva vaiinti nahenti aaqurihamma nimite vaivarа tiro, viva kia ekaa Isarerі vika qoririma karaitiro, viva hininavuqai aaqurihamma nimiteharo vika nái kaama taira.

⁶ Kotiva kia vaiinti nahenti koqe kaiqa vara amite variarara iriraitiro, viva qaqi aaqaa vika aaqurihamma nimiteharo nái kaama taira. Kotiva vika kaiqara iriharo nai kaama taatirio, viva kiama quqaa vika aaqurihamma nimitaitirio.

⁷ Viraqaahai tenavu nana uvae tirara? Mintima tirara: Isareri vika Kotiva quahama nimitaaina aarara vukaari utuqi viha rantake tavarare ti, kia ho rantake tavaarave. Kotiva nai kaama taika, vikaqaima vi aarara rantake tavaara. Vika rantake tavaamanta Isareri vika hininavu avu aato tinta vimanta kia Kotira uva kankomake iriara.

⁸ Kotira vukuqi mintima tiro:

Kotiva Isareri vatanaakara tiharo, Te vika avu aato vara hampiqama kauramanta vika vetanto enta untemake, vate maa entaravata kia ho iri tave variarave, tura. (*Lo 29:4*)

⁹ Minti tuvaro Devitivavata mintima tiro:

Vika ruvaaqumavi kara namaqi vi vaivaro vika nái karavano vaara vuitaara voqaara vika utu varaiqe te vikara huviqorave tiataarave. Vika kaavu ntivar are vika ntaihairaqe te vikara huviqorave tiataarave.

¹⁰ Are vika nivu qimpa kairamanta vika kia ho qaiqaavata tavaate. Vika ruqutu kairamanta vika kia koqemake himpi viraiti, varuvarumaqi viqe te vikara huviqorave tiataarave, tura. (*Ihi 69:22-23*)

Isareri vika naantiara aato kenko tira irivarave tura

¹¹ Te qaiqaa ni irama nimitarerai: Isareri vatanaaka Karaitira qaqrake kuntavaivai iaka, vika ekaarae kaavu ntua vuavo? Aqao, kiave. Vika Karaitira tauvaqa utu amitaaraqaahai vo vatanaa vo vatanaaka Kotiva vaiinti nahenti kuvantu nimiteharo ntitaaina uvara iri variara. Vo vatanaa vo vatanaaka vi uvara iriqi vi vaimanta Isareri vika tave, taara neha tiha, Vika variantemake tenavuvata variataarave, tivara.

¹² Vate maa entara Isareri vika Karaitira tauvaqa utu amitaaraqaahai vo vatanaa vo vatanaaka Karaitira uva iri koqemavi variara. Isareri vika qora aaraqaa vi variaraqaahairo Kotiva vo vatanaa vo vatanaaka koqema nimite vaira. Ho naantiara Isareri vika qora aara qaqrake Karaitira uva irivarо, ike, vi entara Kotiva vaiinti nahenti koqema nimitaarinava nai uritara keroma varianarove.

¹³ Te ni vo vatanaakara maa uvara ti vauro. Tiriara vo vatanaa vo vatanaaka tiva nimiane tiro, ti tititaimanta te vi kaiqarara noraiqamake iriqi vi vaunara.

¹⁴ Te ni vo vatanaaka tiva nimiqi vuari tinta navunaaka Isareri vika hininavu taara neha tiha, Ike, tenavuvata vi uvara iriataarave. Kaiqe vi uvara iriqi vuare, tivaro Kotiva vika kuvantu kero ntitaarire ti, te voqavata ni vo vatanaaka tiva nimiqi virerave.

¹⁵ Kotiva Isareri vika qoririma nimitairaqaahairo vo vatanaa vo vatanaaka Kotira vataake vohaa tampamavi vai okarava qovarama viro. Ho naantiara Kotiva Isareri vika qaiqaa ntitaainaraqaahairo koqe okaravano qovarama vuanaro. Vika qutu vuraqihai qaqqaa qaqi himpi vaintemake variqi vivarave.

¹⁶ Mpareti vitivano Kotiraini vairera, nora mparetivanovata Kotirainima varianaro. Katari tuqavano Kotiraini vairera, ekaa kantakaaravanovata Kotirainima varianaro.

¹⁷ „Eparahaamira naintivara vika vaireva, orivi katari voqaara variara. Eparahaamiva vaireva, katari tuqa voqaara vaimanta vira naintivara vaireka, vika kantakaara voqaara variara.“ Kotiva vi katarira hini kaaranavu teqa qaqqini kero, qaakau kataripaqaahairo kaara vo teqa varero viraqira viri akukuma tivaro vivavata vi kataripaqaahairo namari vareharo ho vaira. Ne qaakau katari kaara akukuma taira vira voqaarama variavo.

¹⁸ Ne mintimake tomaqa tai kaarauka vahama hauri ne nenta mahuta tiha vo kaara teqa kairara, Ne qumina kaaraqaive, tivora. Ne nenta mahuta minti tivera, ne maa uvara iriata: Ne qumina kaaravanoqai vailha kia tuqa kara amiavaro tuqavanoma ni kara nimi vaivo.

¹⁹ Ne tiha, Tinavu vatuka kataripaqa ho variarire tiro, Kotiva vo kaara vo kaara teqa aqukairave tivera, te nintara mintima tirara:

²⁰ Ne ququaama tiavo. Isareri vika Kotirara kia ququaave tiavaro vira kaarama Kotiva vika teqa aqukairave. Ne Kotirara ququaave tiavaro Kotiva ni tomaqa tairave. Virara irihama kia nenta mahuta tiraiti, qeteha variata.

²¹ Isareri vika katari kaara tanara vailha vika kia Karaitirara quqaa vivave tiarara tiro, Kotiva vira kaara kia vika vehakuma nimitaraitiro, vika teqa aqukairave. Ne kia katari kaara tanara variavo. Nevata kia Karaitirara kempukaiqamake iriqi vivera, Kotiva nivata kia vehakuma nimitaraitiro, katari noraqaaahairo nivata tegama aqukaanarove.

²² Ne Kotiva ike mpo tiva nimite vai okararavata, Kotira arara ite vai okararavata, iriata: Vokiaka Kotira aara qaqqira kaavaro Kotiva vikara arara ite vaivaro vaira. Ne vokiaka Kotira uva iri variavaro Kotiva virara iriharo ni koqema nimite vaira. Ne mintiaqivi vivera,

Kotiva ni koqema nimitaqiro vuanaro. Ne vira aara qaqlira kaivera, Kotiva katari kaara teqaintema kero, nivata tegama aqukaanaro.

²³ Isareri vatanaakavata vika qora aara qaqlirake Karaitirara quqaave tivera, Kotiva vika homa qaiqaa katariqi tomaqa kaarirava vaiharora tiro, viva vika qaiqaa naitarama kero tomaqa kero vataanaro.

²⁴ Kotiva ni vo vatanaaka qaakau orivi katariaahairo ni tegakero vuru koqe katariaaa ni tomaqa taira. Kotiva Isareri vika koqe katariaahairo teqa qaqlina kairara tiro, viva vo enta homa qaiqaa vika vara tomaqa kaanaro.

Kotiva ekaa naato vatanaaka aaqurihama nimitaanaro

²⁵ Ti qata vakaao, Ne nenta mahuta kia tiate ti, Kotiva vo uva kukeqataira ne kia iriara, te vi uvara ni qoqaa tiva nimirer: Isareri vika kiama ekaa enta Ihura qoririmake vavara. Naantiara vo vatanaaa vo vatanaaka nanti nanti vaiinti nahenti Kotira vaintiqamavi hogama vivaro, vi entaraqaahairo Kotiva Isareri vika kuvantu kero qaiqaa ntitaanaro.

²⁶ Kotiva vika kuvantukero ntitaaina uvarara Kotira vukuqi mintima tiro:

Vaiinti nahenti kuvantu nimitaarirava Saioni vatukaqhairo qovarama vuanarove. Viva lekopira naintivara kahaqi vaira vika kiama qaiqaa Kotira uva qoririma kevarave.

²⁷ Haaru te kauqu aiqiqaa aqukeha tiha, Te vika qora kaiqa vare uvara taiga kararave tivataavauna uvava quqaa vivauma varianarove, tura. (*Asaiaa 59:20-21*)

²⁸ Isareri vika hini kiaka Karaitira uvara kia quqaa uvave tivakeha Kotira navutaiqama amite variarara ti, ne vo vatanaaka Karaitira uvara quqaave ti variara. Ho Kotiva Isareri vika haaru nai kaama tero nai kauqu aiqiqaa aqukero vika kaivaqaukavara tiva nimu uvarara iriharo vikaravata muntuka vataira.

²⁹ Kotiva te vi vatanaaka tenta kaamate vika koqema nimitarerave turara tiro, viva kiama vi uvara tivataira qaqlira kero vo uva tianaro.

³⁰ Haaru ne vo vatanaaka Kotira uva raqakoka vauvaro viraqaahai Isareri vikavata Kotira uva raqa korara tiro, Kotiva vika ianaihairo tuqantaa viro niara ike mpo tiva nimite vaira.

³¹ Vira voqaara Kotiva niara mpo ike tiva nimite viraqaahai Isareri vika Kotira uva raqaqi vi variara. Ho vika Kotira uva raqaqi vi vaivarao naantiara Kotiva vikaravata mpo ike tiva nimitaanaro.

³² Ekaa vataini variaka Kotira uva raqake variara kaara Kotiva vika rumpa taimanta variara. Vika rumpavi vaiqe te naantiara vikara mpo ike tiva nimitarerave tivakero mintura.

Kotira autu tuahera kaare tura

³³ Iki, Kotira koqe okaravanove, Kotira avu aatovanove, Kotiva kanko kaankoma kero iri vai okaravave, vi haikava mpiqaviro namarivan veva muntukaraqi vaintema kero devantogama viro vaivo. Kotiva avuquvugama kero iri vaina uvara tavave vira okara kankoma kero irianarove? Tavave viva kaiqa varaaaina okararavata kankoma kero irianarove? ³⁴ Kotira vukuqi mintima tiro:

Nai tavave Noravano Kotiva nai aatoqi irite vai uvara iri vairave? Nai tavave Kotira avu aato amianarove? (*Asaiaa 40:13*)

³⁵ Nai tavave Kotirara te aiqi viqataunara tinta timiane tianarove? tura. (*Jop 41:11*)

³⁶ Kotivaqai ekaa haika autu kero vataivama vairo. Kotiva vaivarora tiro, ekaa haikavano qaqi variqiro vi vaira. Ekaa haikavano vaireva, Kotiva i haikavaqaima vairo. Mintimakero vaimantara ti, kaiqenavu Kotira autuqai ekaa enta ekaa enta tuaheraqi vuare, turo. Quqaave.

12

Tenavu Kotira kaiqa vara amitaainarara tura

¹ Ti qata vakaao, Kotiva tinavuara voqamakero aaqurihama timite vairara ti, te niara vihi tiha, Ne qaqi varaqi viha *ofaa* amintemake, nenta vaata Kotira amiata. Ne nenta vaataqohai Kotira kaiqaqai vara amite vaivarao viva ni quahama nimitaarira. Ne mintiaqai viha quqaama Kotira autu noraiqama kevara.

² Kia vataini variaka hampi ni variantemake niraiti, ne hampi avu aato iri vairavata qaqlira kaivaro Kotiva ni avu aato qaraakaiqama nimitaarira. Viraqaahai ne homa Kotira antuquvano vaina okarara avataqai vivara. Ne mintimakero varaqi viha ne koqe kaiqa Kotiva quahama nimitaaaina kaiqarave, naitaramake vare kaiqarave, vi kaiqaraqai varevara.

³ Kotiva ti aaqurihama timitero koqema timitaimanta te ni kahaqiarirauka vahara ti, te ni vohaiqa vohaiqara mintima ti: Kia ne nentara tiha, te nora valintima vauro tiraiti,

mintima tiata: Kotiva ti kahaqi vaimantara ti, te Kotirara kempukaiqamake iriqi viha te vi kaiqara vi kaiqara varaqi virerave, tiate.

⁴ Tenavu kankomake irunara. Vaiinti vaatavano vaireve, kauquve, aiqeve, vo vaata vo vaatave, vaivaro vo vaatavano vo kaiqa vare vaivaro vo vaatavano vo kaiqa vare vaira.

⁵ Vira voqantemake, tenavu airi vaiinti nahenti Karaitira vataake vohaa vaiha tenavu vohaa vaata voqara tampamavi vaunara.

⁶ Kotiva tinavu koqemake timiteharo nai kempuka, vo kempuka vo kempuka tinavu timimanta tenavu hininavu vo kaiqa varaarirauka vauramanta hininavu vo kaiqa vo kaiqa vare vaika variara.

Kotiva vo vaiinti vo kempuka amiharo ti uva vaiinti nahenti tiva nimiane tiarirava, vi vaiintiva Kotirara kempukaiqama kero iriqiro viharo vaiinti nahenti Kotira uva tiva nimiarira. ⁷ Kotiva vaiinti nahenti kahaqaina kempukara vo vaiinti amirera, vi vaiintiva vi kaiqara koqemakero varaarira. Kotiva vaiinti nahenti koqe aara numiqaina kempukara vo vaiinti amirera, vi vaiintiva vi kaiqara koqemakero varaarira.

⁸ Kotiva vaiinti nahenti avu aato kempukaiqama nimitaaina kempukara vo vaiinti amirera, viva mintiaqiro viharo vaiinti nahenti kahaqiarira. Kotiva vaiinti nahenti parumakero nimiaina kempukara vo vaiinti amirera, vi vaiintiva nai ina haikara paruma kero rairakero nimiarira. Kotiva vaiinti nahentiqaa raqikiaina kempukara vo vaiinti amirera, vi vaiintiva kia popoharaitiro, koqema kero vaiinti nahentiqaa raqikiqiro vuarira. Vora kahaqaina kempukara vo vaiinti amirera, viva quaha keharo vora kahaqiarira.

⁹ Kia unaqaraiqamake nenta kenaukara, ti muntukavano niarama vaivo tiraiti, quqaiqama keha vikara muntuka vataata. Ne vaagu kaiqa tauvaqa utu amitheko qe kaiqaqai paama tivake totaqi vuata. ¹⁰ Ne Karaitirainiqama vuaka vaiha, ne qata vaka aura nakaagamavi vahara ti, nariara nariara muntuka vateha ne vora koqema nimite vai okarara autu nimitaqui vuata.

¹¹ Ne kia popohanaara iraiti, quahaqi viha kempukaiqamake Kotira kaiqa vara amitaata. ¹² Ne Karaitira veka vaivaro ni muntukaqihairo koqe i vaira variata. Maara vaina entara kia popoharaiti, ni muntukaqihairo paru i vaira variqi vuata. Ne ekaa enta vatete Kotira aaramaqi vuata. ¹³ Kotira vaiinti nahenti vokiaka kia vo haika vataivera, ne nenta i haikara rairake vikavata nimiata. Vokika niaraihai aarana anivera, ne koqemake vikaaqaa raqikiata.

¹⁴ Vokika ni qoraiqama nimitaivera, ne Kotira aaraivarо viva vika koqema nimitaaria.

¹⁵ Quaheha vaika vaimanta ne vika hampata vaiha quaheha variata. Iqi rate vaika vaimanta ne vika hampata vaiha iqi rateha variata. ¹⁶ Ne kia tiroiriraiti, qihaaqamake vaiinti nahenti hampata variqi vuata. Hauri ne tiha, Te nora vaiintima vauro. Te kiama qumina vaiinti hampata vairerave, tivora. Quaheha qaqi vaiinti nahenti hampata variqi vuata. Hauri ne nenta mahuta tiha, Te ekaa okarara iri tave vauraukave, tivora.

¹⁷ Vokika ni qoraiqama nimitaimanta ne kia nai vika qoraiqama nimitaata. Vaiinti nahenti koqe kaiqave ti vai kaiqara, ne vi kaiqaraqai varaata. ¹⁸ Maateraiqihai vai aarava vairera, ne vi aararaqai avataqai viha, nariara nariara maateraiqihai variata. ¹⁹ Ti navunao, kia nentavano nentaaqaa aru vuntuate. Ne qaqi kaivaro Kotiva naivano arara itairaro niqaa aru vuntu nimitaaria. Kotira vukuqi Noravano mintima tiro:

Aru vuntua okarava vaireva, tinta kaiqama vaivo. Tentavano vika aru vuntu kararave, tura. *(Lo 32:35)*

²⁰ Ne vi uvvara irihama ne tavaivarо ni navutaara karara antuqa ariraro vairera, ne vira kara amiata. Vira namari naataa irera, namari amivarо naariara. Ne mintivera, viva nai qora kaiqa varainarara iriharo ni nivuqaa kaurira haikama varaanaro. *(Uva Maara Koqera 25:21-22)*

²¹ Qora kaiqvano ni aatara kaantorave tivakeha, ne koqe kaiqaqhohai qora kaiqa vira aatara kaata.

13

Tenavu kamaanira uva iriqi vuainarara tura

¹ Ne ekaa kamaanira uva koqemake iriqi vuata. Kia vo kamaaniva nai irikero qovarama vivaro, Kotiva tivaro kamaaniva qovarama vi vaira. Ekaa vataini Kotiva tivaro kamaaniva qovaramavi vairo.

² Vovano kamaanira uva raga kairava, viva Kotiva noraiqama kaira uvama raga kaanaro. Mintiraro vira kaara Kotivavata vi vaiintiraqaa uva vataanaro.

³ Koqe aaraqaa ni varia vaiintika, vika kiama kamaanira uva aatu qetevara. Qora aaraqaa ni varia vaiintika, vikama vi uvvara aatu qetevara. Ne kiae kamaanira aatu

getaraiti variqi vivarave? Ho koqe kaiqaqai varaqi vi vaivaro *kamaaniva* ni quahama nimitaarira.

⁴ *Kamaaniva* vaireva, viva Kotira kaiqa vaiintivano vaiharo ni koqema nimitaarirava vaira. Ne qora kaiqa varaivera, *kamaanira* aatu qeteha variata. Viva iqoka paipe kia qumina totaraitiro, viva ninta qora kaiqa varera kaara ni ntaihaanarove. *Kamaaniva* qora kaiqa vare vai vaiintika ruqutu kaarire tiro, Kotiva naivano *kamaanira* qovarama taira. ⁵ Virara iriha ne koqemake *kamaanira* uva iriqi vuata. Viva tinavu haruantorave tiha, ne kia vira uva raqakarati vaivaro, ni avu aatovanovata koqemakero variarira.

⁶ *Kamaanira* kaiqa vaiinti vikavata Kotira kaiqa vaiinti variamantara ti, ne *takisi* avuqavuqama keha aqukaimanta vika nái kaiqa ho varaqi vuata.

⁷ Ni vaiintiarave, vatarave, vo haikarave, *takisi* aque tivera, vi *takisira* avuqavuqama keha aqu nimitaata. Ne *Kamaanira* vaiinti vinavuka vevaaraini vaiha, vika koqema nimite vai okarara autu nimitaqi vuata. *Kamaanira* vaiinti vovano nora vaiinti vairera, ne virara nora vaiintive tiha variata.

Ne vokiakara muntuka vateha variqi vuate tura

⁸ Kia qaqi kaivaro vovano niqira viqatairava qaqi variqiro vuarira. Ne nenta qata vakaukara muntuka vate vaiva, vivaqaima niqira ekaa enta qaqi variqiro vuarira. Nai kana vaiintiara muntuka vate vaiva vaireva, viva Kotiva tivatai uvvara ho iriqiro vi vaivama vairo.

⁹ Kotiva tivatai uvava vaireva, kia naata vaati vare okarara raqakaane, kia vora arukaane, kia muara varaae, kia vora airairara muntuka ntuarire, ti vairave. Ho vi uvavavata ekaa voki uvavavata maa uvvara avutaqima vairo: *Are nenara muntuka vatenantema kera, nena navunaararavata muntuka vataane.* (Wkp 19:18)

¹⁰ Nai kena vaiintiara muntuka vatairava kiama vira qoraiqama amitaanaro. Nai kenaukara muntuka vate vaira vaiintiva vaireva, viva avuqavuqama kero Kotiva tivatai uvvara ekaa uvama iriqiro vi vairo.

¹¹ Ne maa entara qovaraiqaina haikarara iriha, vi uvvara koqemake avataqi vuata. Ne vaiteraqihai himpi vai entavama aniraivo. Tota tenavu Ihurara quqaave tiavauna entara Kotiva tinavu kuvantu kero tivitaaina entava kia aumanto vaura. Vate maa vi entava aumantoma aniero.

¹² Enta i vaiva taiqareva auti vaivaro aatitaarirava qovarama vireva auti vairo. Kaiqe tenavu virara iriha, konkiraqi vaiha varaqi vi vauna kaiqara qaqrake, ataainaraqaahinnaa auvihhehavaa totaqi vuari. ¹³ Kaiqe tenavu ataainaraqaata avivinamake nuari.

Hauri tenavu hampiara voqaara ruvaaqumavi vaiha iha namari namaqi viha vueraiqiarora. Hauri tenavu hampi qaramaqi nuarora. Hauri tenavu qora kaiqa vareha ruhe tutiqaarora. Hauri tenavu nai ati nai ati iarora. Hauri tenavu vora airaira kaara nai toma amite nai toma amite iarora.

¹⁴ Ne Nora Vaiinti Ihu Karaitirara noraiqaake iriqi vivaro viva ni kainke voqaara variarira. Ni avu aatovanovata hampi kaiqa varaae okarara qaqrake kia virara iriqi nuata.

14

Kia nenta qata vakaukvara pupita nimitaata

¹ Ne tavaivaro ni qata vovano kia kempukaiqama keharo Ihura avataqiro vi vairera, ne kia vira qaqa karaiti, vi vaiintirara tinavu hampata ani variane tiata. Minti tivakema kia qumina viva nai avu aatoqi iritaaina uvvara kaara tiroriha variata.

² Ihura vainti vovano tiharo, Te homa ekaa kara nararave, tivaro vovano kia kempukaiqamakero iri vai vaiintiva tiharo, Hauri te vo kara naarorave tivakeharo qumina naahoqai ne vaira.

³ Ekaa kara ne vaira vaiintiva kia ekaa kara ne vaina vaiintirara qora vaiintive tiantora. Qaiqaa kia ekaa kara ne vaira vaiintiva, vivavata ekaa kara ne vaina vaiintirara qora vaiintive tiantora. Kotiva vitanta kuvantu kero ntitaarirava vaimantara ti, vitanta minti tivora.

⁴ Are ta vaiintiva vaharae vo vaiinti kaiqa vaiintiara qora kaiqa vaiintive tiarao? Kia vira ai kaiqavauve vairo. Viraqataa raqiki vaira Nora vainti nai vira kaiqama. Viva nai tiharo, Ti kaiqa vaiintivano koqe kaiqa vaiintive, qora kaiqa vaiintive tianaro. Noravano vira kempukaiqama amite vaivarora tiro, viva vira variqiro vuuanaro.

⁵ Ihura vainti vovano tiharo, Vi entara nora enta Maara Entave, vi entara qumina entave, ti vaivaro vovano tiharo, Aqao, ekaa enta vohaa qaramakero vaivo, ti vaira. Ho ne vi uvvara vi uvvara kankomake irikehamra quqaa uva vainara vi uvvaraqai iriqi vuata.

⁶ Vaiinti vovano vi entarara nora entave tivakeharo viva Nora Vaiintiara iriharo minti ti vaira. Vovano ekaa kara ne vaiva, viva vi karara Kotirara koqema iarao tivakero neharora

tiro, vivavata Nora Vaiintiara iriharo ne vaira. Vovano vi karara naarorave ti vaiva, vivavata Kotirara kojema iarao tivakero vo kara neharora tiro, vivavata Nora Vaiintiara iriharo ne vaira.

⁷ Tenavu qaqi variqi vuaina entarave, tenavu qutu vuaina entarave, kia tenavu tentanavu antuqa avataqi virera.

⁸ Tenavu qaqi variqi vuarera, tenavu Nora Vaiintiara iriha variqi virera. Tenavu qutu vuarera, tenavu Nora Vaiintiara iriha qutu virera. Virara irihama tenavu qaqi variqi vuaina entarave, qutu vuaina entarave, tenavu Nora Vaiinti Karaitiva ikaqaima vaunara.

⁹ Virara iriharo Karaitiva te Noravano qaqi vaikaqaavata, qutu vikaqaavata, raqikiqi virerave tivakero, viva vuru qutu viro, viraqihairo qaiqaa qaqi himpiro vaira.

¹⁰ Virara iriharama are nana kaarae nena qata vakaara kaiqara qora kaiqave tiarao? Are nantiharae nena qata vakaarara tihara, Te vira aatarake koqe vaiintima vauro tiarao? Ho iriate. Naantiara Kotiva *ko* tiaina entaraqaa tenavu ekaa vira avuqaa himpite varainarave.

¹¹ Kotira vukuqi Noravano mintima tiro: *Te qaqi variqi vi variavaunara ti, naantiara ekaa vaiinti nahenti ti tivuqaa vaiha tori kauru ara timite tiha, Quqaama are Variqavano ekaa enta qaqi variqi vi variaravave, tivarave, tura.* (Aisaiaa 45:23)

¹² Tenavu ekaa vohaiqa vohaiqavano Kotira avuqaa vailha tentanavu kaiqa varaaina okarara qovaramake vira tiva amirara.

Ai kaiqa kaara vovano qora kaiqa varaantora

¹³ Vi uvvara irihama kaiqe tenavu vora kaiqa kia rahake tavaraiti, minti tiare: Te autuaina kaiqara kaara vovano kuntavaivaima varero qora kaiqa varaantorave tivakeha, qaqrirake kia vi kaiqara vararerave, tiata.

¹⁴ Te Nora Vaiinti Ihukanti vailha te maa uvarara quqaa uvama vaivo tunara: Vo kara vo karavano vaivarao kia vo karavano Kotira avuqaa qora kara vairave. Vi uvvara vaimanta te vo uvavata tirera: Vaiinti vovano nai irikero tiharo, Vi karara qora kara vaimanta te neha Kotira uva raqa kaarorave, tirava, vi vaiintiva mintimakero iriqiro viharo vi karara nairera, viva vi karara neharo Kotira uva raqa kaanarove.

¹⁵ Ne vo kara ne vaivarao ni qata vovano niara tiharo, Vika kia vi karara naataarave, tiramanta ne vi karara qaqi ne vaivera, ne mintiha nenta qata vira qoraiqama kaivaro ni muntukavano kiama ni qata virara varianaro. Karaitiva ni qata viraravata iriharo qutu vurara ti, hauri ne hampiqamake kara vira neha nenta qata vira qoraiqama amitevora.

¹⁶ Virara irihama ne ekaa kara ho neka vailhavata, nenta qata virarao ti, kia ekaa kara naata. Hauri ne minti vaivarao viva niara qora kaiqa vare variavo tiantora.

¹⁷ Kotiva tinavuqaa raqiki vaiva, viva tenavu namarive karave naainarara kia noraiqaakero iriraitiro, viva maa haikarara avuni vai haikarave ti vaira: Tenavu avuqavu nuainarare, tinavu muntuka qihaaqiraqe nuainarare, Kotira Maraquravano tinavu kahaqi vairaro tinavu muntukaqihairo koqe i vairaque varainarare, Kotiva vi haikarara avuni vai haikarave ti vaira.

¹⁸ Vaiinti vovano mintimakero Karaitira kaiqa vara amitaqiro viraro Kotiva vira quahama amite vairamanta vaiinti nahentivata virara koqe vaiintive tivara.

¹⁹ Virara irihama kaiqe tenavu muntuka qihaaqama nimitaaina okarara avataqi viha nai kempukaiqama amite nai kempukaiqama amitemaqi vuari.

²⁰ Hauri tenavu kara naainararaqai noraiqaake iriqi vuariraro Kotira kaiqavano qoraiqama vuantora. Ekaa vo kara vo kara koqe kara vaivaravata, vo vaiintivano tenavu kara naainarara kaara qoraiqama vuantorave tivakeha, kia tenavu ekaa kara narerave.

²¹ Ni qata vovano qora kaiqa varaantorave ti, koqemama ne quarave, *uainive*, vo karave, kia naraiti vaivara.

²² Ne vi karara homa naariraro kiama tinavuqaa uva varianarove tivera, vi uvvara kia vokikavata tiva nimiraiti, qaqi kaivaro nintaqvata Kotiraqvata variarira. Vaiinti vovano tiharo, Te homa vi kaiqara varaariraro kia toqaavu haruanarove, tira vaiintiva quahehero varianarovo.

²³ Vaiinti vovano vo kara nareva iharo tiharo, Kotiva maa kararae qioqama taivo, kiae qioqama taivo? tivakero taara aato utiharo vi karara namakairera, Kotiva viraqaa uva vataanaro.

15

Vokika kempukaiqama nimite okarara tura

¹ Tenavu Kotira aaraqaa kempukaiqamake ni variarirauka vaiinti nahenti kia koqe make Kotira aaraqaa ni vaika, vika kahaqama nimitaqi vuari. Hauri tenavu tentanavuqai koqemake variqi vuainarara iriqi vuarora.

² Tenavu vohaiqa vohaiqvano tentanavu navunaa vaiintiarao ti, vika vohaiqa vohaiqa kempukaiqama nimitaqi vuari vika koqemake Kotira aaraqaa nuata.

³ Karaitivavata kia nai varataa i kaiqarara iriharo vararaitiro, viva Kotira antuqa ari kaiqaraqai vare vaura. Kotira vukuqi mintima tiro: *Vika ariara qora uva ti variava tivatama qoraiqama timite vaivo*, tura. (Ihi 69:9)

⁴ Tenavu kia popohanaara iraiti, kempukaiqamake Kotira aaraqaa niha tinavu tivitaina entara vira vekama varianarara ti, haaru Kotira uva ekaa uva qara ntuvatora.

⁵ Tinavu vika kia popohanaara iraiti kempukaiqamake variate tiro, Kotiva tinavu kahaqama timite vaivama vairo. Viva ni kahaqi vaira ne Ihu Karaitiva ninantemake, nuvagi viha vohaa uvaqai tivaqvi vuata. ⁶ Ne vohaa uvaqai tivaqvi viha vohaa avu aatoqai iriqi viha Ihu Karaitira tinavu Nora Vaiinti vira Qora Kotira autu tuaheraqi vuata.

Karaitira uvavano vo vatanaakaravatama vairo

⁷ Karaitiva ni quahakero ntitaintemake, nevata quahake nai vite nai vite i vaivaro Kotira autuvano noraiqama vuarira. ⁸ Te ni tiva nimirera: Kotiva kauqu aiqiqaa aqukero Iutaa vika kaivaqaukavaraqaa tivato uvvara vivau variarire tiro, Karaitiva vika kaiqa vara nimitareva vataini tuvura.

⁹ Vo vatanaaa vo vatanaakavata Kotiva vika aaquruhama nimitaaina okarara iriha vira autu tuahera kaate tiro, Ihuva vataini tuvura. Kotira vukuqi mintima tiro: *Te vo vatanaaa vo vatanaaka nivutana vaiha ai autu tuahera karerave*. Te ihi tivaqvi viha ai autu tuahera karerave, tura.

(2 Samueri 22:50)

¹⁰ Kotira vukuqi qaiqaa vo uvavata tiharo: *Ne vo vatanaaa vo vatanaaka vaiha ne Kotiva nai kaama tai vaiinti nahentika vika hampata vohaa vaiha quaheda variate*, tura. (Lo 32:43)

¹¹ Minti tivakero qaiqaa voqavata tiharo: *Ne vo vatanaaa vo vatanaaka vaiha nenta Nora Vaiinti vira autu tuahera kaate. Ne ekaa naato vataini vaika*, nevata vira autu tuahera kaate, tura. (Ihi 11:1)

¹² Vi uvvara Kotira vukuqi vaivaro Aisaiaavavata mintima tiro: *Iesira okaraqaahairo vaiinti vovano qovarama vuanarove. Vi vaiintiva noraiqama viro ekaa vo vatanaaa vo vatanaakaa raqiki vaira vika viraqaa muntuvi vaiha tiha*, Viva tinavu kahaqama timitaariravama vaivo, tura.

(Aisaia 11:10)

¹³ Kotiva Karaitira noraiqama kairara ti, ne virara tiha, Karaitiva tinavu kahaqama timitaariravama vaivo, ti variara. Ne Karaitirara iriqi vi vaivaro Kotiva ni kahaqama nimite vaira ni muntukaqihairo paru i vaira ne koqemavi vaiha nuata. Kotira Maraqravano ni kempukaiqama nimite vaira ne Karaitira vataake vohaa vai entara vira veka variata.

Poruva vo vatanaaka kaiqa vara nimitorara tura

¹⁴ Ti qata vakao, te ni okarara tenta irike tirera ne koqe vaiinti nahentive turo. Ne koqe aaraqaa ni varia okarara kankomake iri variakave turo. Ne homa nai kahaqama amite nai kahaqama amite i variakave turo.

¹⁵ Te minti tihavata, kia qetaraiti, te maa qararaqi hini uva kempukaiqamake nini qara ntuvu nimitauro. Kotiva ti aaquruhama timiteharo ¹⁶ tiriara are Ihu Karaitira kaiqa vaiintiqamavi vahira vo vatanaaa vaiinti nahenti kahaqiane timantara ti, te kia qetaraiti niara minti tunarave. Kotira quahama amitevra Kotira Naavuqi kaiqa vara amitai vaiintiva quara aru amite vaintemake, tevata Kotirara viva ni quahama nimitaarire ti, te ni Kotira uva koqe vakaaka tiva nimiqi vi vaunara. Te vi uvvara ni tiva nimi vauraro Kotira Maraqravano ni kahaqama nimite vaimanta ne Kotira vaiinti nahenti koqeka variara.

¹⁷ Te Karaitira vataake vohaa vaiha Kotira kaiqa vara amite vaunarara quahe vaunara.

¹⁸ Kia te tenta kaiqa vara amitaunarara mahuta tiraiti, te Karaitiva tiki vahilo vare vai kaiqara virara mahuta tirera. Karaitiva ti kahaqi vaimanta te vira uva tiva nimiqi vi vauramanta viraqaahai vo vatanaaa vo vatanaaka Kotira uva iriqi viha vira avataqi vi variara.

¹⁹ Kotira Maraqravano ti kempukaiqama kaimanta te kia tavaa kaiqara, nora kaiqa, vo kaiqa vo kaiqa varaqi viha vi uvvara tiva nimiqi vi vaunara. Te Ieruharemihai hoqaramate vo vatuka vo vatuka ekaa Karaitira uva vaiinti nahenti tiva nimiqi vivi, Iririkumi vataini oru ntaunara.

²⁰ Te tiha, Kaiqe te Karaitira uva kia iria vatanaaka varianaini niha tiva nimiqi vuare, tunara. Vo vaiintivano naane Karaitira uva tiva nimianaini hauri te qaiqaa tiva nimiarorave tivake, qaraaka vaiinti nahenti kia Karaitira uva iriaka varianaini vuru tiva nimirera auti vaunara.

²¹ Kotira vukuqi mintima tiro: *Kia virara tiva nimi vaika, vika homa Kotira kaiqa tavevarave. Kotira uva kia iriaka, vika vi uvvara kankoma kema irivarave, tura.*

(Aisaiaa 52:15)

Poruva Romini vuainarara tura

²² Te qaraaka vatanaaka vi uvvara tiva nimiqi viha, vo enta vo enta nivata oru tavarare turarovata, kaiqavano ti ravaaqavu kaimanta kia ni oru tavaunara. ²³ Te airi ihiara ni tavarera auti vaurauka vaiha, vate maa entara maini te ekaa kaiqa vara vuru taiqa kaunarara ti, te homa ni oru tavarara. ²⁴ Te Speni vataini oru vihamma nivata oru vari nimitema virara. Te ni hampata quaheha vari nimitaqi vuari ne viraqaahai ti kahaqama timitaige te Spenini vuainara.

²⁵ Vate te Ieruharemini Kotira vaiinti nahenti mini variaka oru kahaqama nimitarera vuainarara ti, vate te kiama ni tavarera virera.

²⁶ Ihura vainti Masedoniaini variakavata, Akaiaini variakavata, tiha, Kaiqe tenavu Ihura vaiinti nahenti Ieruharemini vehiqamake variaka kahaqiare, tivake vika ruvaaquma taa monura te vare vuru nimirera.

²⁷ Vika quahakeha vi monura ruvaaquma kaataa imanta ruvaaqumataara. Iutaa vatanaaka vo vatanaakaqi viqatora vira nái nimi variara. Haaru Iutaa vatanaaka Ihura uva vo vatanaaka vuru tiva nimurara ti, vo vatanaaka homa virara iriha vika nái airaira ruvaaqumake Iutaa vatanaaka nimivara.

²⁸ Ho te vika ruvaaqumataa monura vare vuru ekaa vi monura nimi, viraqaahai te Spenini virera. Mini vihamma nivata oru vari nimitema virera. ²⁹ Te maa uvvara kankomake irunara: Te oru ni hampata variariraro Karaitiva voqavata ni koqema nimitaira ne koqemavi vaivara.

³⁰ Ti qata vakao, te tinavu Nora Vaiinti Ihu Karaitira autuara irihama, te Kotira Maraqravano tinavuara muntuka vatairara irihama, te niara vihi tiha, Ne ti kaiqara iriha nevata Kotira aare vaivaro viva ti kahaqiarire, turo.

³¹ Ne Kotira aare vase te Ieruharemini oruntaari Iutaa vatanaaka Ihura uva kia iriaka, vika kia ti qoraiqama timitaige te Ihura vaiinti nahenti mini variaka ho kahaqiaro vika ti kaiqara quahama timitaata.

³² Te mintiariraro Kotiva tiriara ne vainaini ho vinarave tirera, ti muntukaqihairo koqe i vairaqe te ni hampata oru mini vari nimitarara. ³³ Vaiinti nahenti muntuka paruma nimite vai Variqava, vivama ni hampata variqiro vuarire. Ququaave.

16

Poruva uva manteharo tu uvvara

¹ Te nahenti vo Fibira atitaariraro viva ne inaini oru vuanaro. Vi nahentiva tinavu auranakaa vaharo vatuka vo Senkariaini Ihura vaintivara kahaqama nimite vai nahentivama vairo.

² Vi nahentiva ne vainaini oruntaira ne Ihura vaintivara variarara ti, koqema kema vi nahentira quahama amitehama vita varaaata. Vi nahentiva airi vaiinti nahentivata, tivata, kahaqama timite vairara ti, nevata vira kahaqama amitaivaro ho variarira.

³ Ne Prisilaaravata, vira vaati Akuilaaravata, uva mantama timitaata. Te vitanta hampata Ihu Karaitira kaiqa vohaa kaiqa varaqi vuavaunara. ⁴ Haaru vitanta kia náitonta qaqi variqi virara noraiqaake iriraiti, ti kahaq'i vaura. Kiama teqai vitanta quahama nimite vaunara. Ekaa Ihura vaintivara vo vataini vo vataini variaka, vikavata vitantara quahama nimite variara.

⁵ Ihura vainti vonavu vitanta naavuqi uki variaka, ne vinavukaravata uva mantama timitaata.

Ne ti qata vakaa koqera Epenetusira uva mantama timitaata. Vi vaiintiva naane Esiaihairo Ihura vaintiqama vura.

⁶ Mariaravata uva mantama timitaata. Vi nahentiva niarao tiro vukaari utiharo ni kaiqa vara nimite vaira.

⁷ Ne Andaronikusika Juniasika uva mantama timitaata. Vitanta ti voqara Iutaa vatanaa vaitintitanta variara. Vitanta ti vataake karapuhiqi variqi vurama. Ihura noraiqamakai vaiintinavuka vitantara koqe vaiintitantave ti variara. Vitanta naane avuniqamake Ihura vaintiqama vuamanta te vitanta naanttiara Ihura vaintiqama vunara.

⁸ Ne Ampiriusira uva mantama timitaata. Vi vaiintiva Ihura vaintivano vairara tiro, ti muntukavano virara vaimanta vaunara.

⁹ Ne Ubanusira uva mantama timitaata. Viva tinavu aanarero Karaitira kaiqa vare vaira. Stakisiravata uva mantama timitaata. Viva ti qata vakaa koqevama vairo.

¹⁰ Ne Apelesira uva mantama timitaata. Tenavu tavauraro viva Karaitirara iriqiro viharo kia popohai vaiintivama vairo. Ne Aristobusira naavuqi variakavata uva mantama timitaata.

¹¹ Ne Herotionira uva mantama timitaata. Viva ti navunaa vaiintivanoma vairo. Nasisusira naavuqi Ihura vaintivara variakavata uva mantama timitaata.

¹² Taara nahenti Trifinaaka Trifosaaka vitantavata ne uva mantama timitaata. Vitanta Nora Vaiinti kaiqa koqemake vare variara. Nahenti vo Pesisiravata uva mantama timitaata. Vi nahentiva koqemaka kero Nora Vaiinti kaiqa vare vaira.

¹³ Rufusira uva mantama timitaata. Viva koqemaka kero Nora Vaiinti avataaqiro vi vaira. Vira noravata uva mantama timitaata. Tevata vira norara ti norave ti vaunara.

¹⁴ Ne Asinkiritusirave, Firigonirave, Hemesirave, Patrobaasirave, Hemaasirave, vinavuka uva mantama timitaata.

Vinavuka hampata variakavata uva mantama timitaata.

¹⁵ Ne Filologusiravata, Juliaravata, Nereusiravata vira auravata, Olimpaasiravata, ekaa vinavuka hampata Kotira uva iriha variakavata, ne vika uva mantama timitaata.

¹⁶ Ne uva mantehama koqemake nai kauqu nai kauqu nimiha variata. Ekaa Ihura vaintivara maihai niara irihama ni uva mantama nimite variata.

Poruva ekaara uva tura

¹⁷ Ti qata vakaao, te niara kempukaiqamake tiha, Vo vaiintinavu ni hampi uva tiva nimi vaimanta ne vika uva iriqi viha rairavi hampi aara vivorave ti, vikara rauriha variata. Vi vaiintinavuka tenavu ni tiva nimi vauna uvvara qaqrakeha vo uva ti variara. Ne vinavukaqaihai qaqi kanta variata.

¹⁸ Minti varia vaiintika kia tinavu Nora Vaiinti Karaitira kaiqa vararaiti, vika nái varaataa i kaiqara hampi kaiqa vare variara. Vika hiakaa i uvarave, uquerara uvave ti variamanta kia kankomake iria vaiintika vika una uvvara quqaa uvave ti variara.

¹⁹ Ne kempukaiqaake Ihurara iriqi vi varia okarara ekauka iriarara ti, te virara iriha niara quahe vaunara. Ne koqe kaiqa vo kaiqa vo kaiqa varaqi viha qora okara tauvaqa utu amitaqi vi vaige te virara hovema tirara.

²⁰ Kotiva vaiinti nahenti muntuka paruma nimite vai Variqava, viva inaaraiqakaa varikeri Sataanira mpeqa taiqa kaivaro ne homa vira aatara kevarave. Tinavu Noravano Ihura ni koqemaka nimiteharo aaqurihamu nimite vaira variata.

²¹ Timotiva ti vataakero kaiqa vare vaiva, vivavata ni uva mantama nimitero. Ti voqaara Iutaa vatanaa vaiintinavu Lusiusivavata, Jesonivavata, Sosipatevavata, vinavukavata ni uva mantama nimite vai.

²² Te Tetiusika maa qarara ntuvate vaurauka tevata Nora Vaiinti autuqaa ni uva mantama nimite vai.

²³⁻²⁴ Gaiusivavata ni uva mantama nimitero. Te Poruka maini vira naavuqi vauramanta ekaa Ihura vaintivara viraqi ruvaaqumavi variara. Eratusivavata ni uva mantama nimitero. Viva maini nora vatukaqi *kamaanira* monuqaa raqiki vai vaiintivama vairo. Tinavu qatavano Kuatusivavata ni uva mantama nimite vairo.

Poruva Kotira autu tuahereharo tura

²⁵ Kaiqenavu Kotira autu tuahera kaari. Kotiva homa ni kahaqi vairamanta ne kempukaiqamake te Karaitira vakaaka ni tiva nimunara iriqi vivara. Vi uvava haaru vukai entaiqama kero kukeqa viro vauvaro ²⁶ maa entara vi uvvara qoqaa qovarama kaivaroma vairo. Paropeti vaiintinavu vi uvvara qovarama kaavararo Kotiva ekaa enta qaqi variqiro vi vaiva, viva tiharo, Ekaa naato vatanaaka vi uvvara tiva nimimanta vika quqaave tivake iriqi vuate, tura.

²⁷ Ihu Karaitiva tinavu Avuhainaa Vaiintivano vaimanta tenavu vira vainti vahara ti, kaiqenavu Kotira autu tuahera kaari. Viva Variqa vohaiqavano ekaa okara iri tave vaivama vaira. Quqaama turo.

1 KORINTI

Poruva Korinti vatanaakaini avuniqamakero qara vara kora

Ihura qaiqaa qaqi vara himpima kovaro naaruvaini oru vauvaro 25 ihie 30 ihie aitarovaro Poruva maa uvvara qara ruva tora. Vi entara Korinti nora vatukavano vauvaro Poruva naane vi vatanaaka Karaitira uva tiva nimumanta vi vatanaaka hininavu Ihura vaintiqamavi vaura. Vi vatanaaka Ihura vaintiqamavi variqi viha tirorihua tuqavuvi vaiha kia koqemake Karaitira uva iriqi vi vauvarora tiro, vira kaara Poruva maa qarara ruva nimitora.

¹⁻² Te Poruka, Kotira antuqavano ti haarama kero ti noraiqama kaimanta te Ihu Karaitira uva vaiinti nahenti tiva nimi vauraukama vai. Ne Kotira vaiinti nahenti Korintiqi variakara iriha, te tinavu qata vakaa Sostenikanti ni qara nimite.

Ne kia qora kaiqa vararaiti, Kotira vaiinti nahenti koqeka variate tiro, Kotiva ni naarama kaivaro Ihu Karaitiva ni koqema nimi taimanta ne Kotira vaiinti nahenti variara. Ekaa Kotira vaiinti nahenti Nora Vaiinti Ihu Karaitira autu re variaka vonaini vonaini variavaro Ihu Karaitiva vikaqaavata niqaavata raqikiqiro vi vaira.

³ Tinavu Qova Kotivavata, tinavu Noravano Ihu Karaitivavata, ni koqema nimiteha aquruhama nimitaivaro ni muntukaqihairo paru i vaira variata.

Poruva Kotirara koqema iarao tu uvava

⁴ Kotiva Ihu Karaitira kaiqara iriharo ni aquruhama nimiteharo ni koqema nimi tairara irihama, te ekaa enta Kotirara koqema iarao tivaqvi vi vai.

⁵⁻⁶ Tenavu Karaitira uva ni tiva nimiavauramanta ne kempukaiqama keha vi uvava iriqi viha Karaitira vataake vohaa variarara tiro, Kotiva ni kahaqama nimi taimanta ne koqe uva, vo uva vo uva okara kankomake iri, ne Karaitira uva vutukeha tiva nimikama variara.

⁷ Ne mintimake varia vaiinti nahentikara ti, ne tinavu Nora Vaiinti Ihu Karaitiva qovaraiqiaina entara veka avu autiha variavaro, Kotiva niara koqe kaiqaqai varaae tiro, viva nai kempuka, vo kempuka vo kempuka kia voqavata ravaaqavu taraitiro, ekaa kempuka ni nimira.

⁸ Tinavu Noravano Ihu Karaitiva qovaraiqiaina entaraqaa niqaa kia uva vairamanta ne vi entaraqaa koqemake variate tiro, Karaitiva ni kahaqama nimitaqi viramanta ne kia popohanaara iraiti, koqe aaraqaa variqi viha vuru taiqa kevara.

⁹ Kotiva kia vo uva tiraitiro, viva nai tinantemra kero ianarove. Niara vika nai Maaqu Ihu Karaitira tinavu Nora Vaiinti vataake vohaa taatauvi variate tiro, viva ni naaraира.

Ne tuqavuvi vo uva vo uva tivorave tura

¹⁰ Ti qata vakaao, tinavu Noravano Ihu Karaitiva ti noraiqama kaimantara ti, te niara mpo turo, Ne kia tuqavuvi vairaiti, vohaa uvaqai tivaqvi viha vohaa uvaraqai eo tiha variata. Ne vohaa vaiha, vohaa uvaqai iriqi viha, Kotira kaiqa vohaa varaqi vuuta.

¹¹ Ti qata vakaao, nahenti vovano vira autu Kloeva vaimanta vira naavuqi variaka ti tiva timiha niara vika tirorihama variavo tiamanta irunarare.

¹² Vinavuka niara mintima ti: Ne vokiaka tiha, Tenavu Porura avataqi ni vauraukave, tiamanta vokiaka tiha, Tenavu Apolosira avataqi ni vauraukave, tiamanta vokiaka, Tenavu Pitaara avataqi ni vauraukave, tiamanta vokiaka, Tenavu Karaitira avataqi ni vauraukave, ti variavo tiamanta irunarare.

¹³ Ike, ne vi uvava tihama ne hoe Karaitira tuqavuke hini hini varevarave? Niarao ti, vika ti Porukae katariqaa hiritorave? Ne namari vareha ti Poruka autu rehae namari varavaao?

¹⁴ Te ni nivutaini vaiha vaiinti taaraqantaqai Krispusiravata Gaiusiravata vitantaqai namari nimunarare. Te kia airi vaiinti namari nimiraiti, vaiinti taaraqantaqai namari nimunarara irihama, Kotirara koqema iarao ti.

¹⁵ Te vaiinti taaraqantaqai namari nimunarara ti, ne kiama ho tiha, Tenavu Porura vaintiqaima vauro, tivara. ¹⁶ Ho te vonavuvata namari nimunara tauru kauro. Quqaama te Sefanaasiravata, vira naavuqi variakavata, namari nimunarare. Ni nivutaihai vo vaiintinavuvata namari nimunara kia iritauro.

¹⁷ Karaitiva kia vaiinti nahenti namari nimiane tiro ti tititairavauve. Viva tirriara nai vakaaka koqera vaiinti nahenti tiva nimiane tiro, viva ti tititaira. Ne Karaitira katariqaa hirito uvarara qumina uvave tivorave ti, te kia vatalhainaa uva okarara irihavauve vi uvava ni tiva nimunara.

Karaitiva Kotira kempukavanove tura

¹⁸ Hini vaiinti nahenti vika ekaara taiqavika vahara ti, Karaitira katariqaa arutovaro qutuvu uvarara vika tiha, Qumina uvaqaive, ti variara. Tenavu kia vika tiantemake tiraiti, tenavu Kotiva kuvantu kero tivitaarirauka vahara ti, tenavu Karaitira katariqaa arutovaro qutuvu uvarara tiha, Kotira kempuka uvavanoma vaivo, tunara.

¹⁹ Kotira vukuqi haaru Kotiva mintima tiro:

Naantiara vo okara vo okara iri tave vaika vaiqe te vika uva aatara kaariraro vika uvavano quminaqama vuunarrove.

Airi uva okara iriqi vi vaika vaiqe te vika avu aato hampiqama kararave, tura. (Aisaiaa 29:14)

²⁰ Airi okara iri varia vaiintikave, vo sikuru vo sikuru tavaa vaiintikave, vora uva aatara keha ti varia vaiintikave, vikara vo? Vi vaiintika variamanta te vikara nana uvae tirara? Vika ekaa vataihainaa uvaqai ti variarara tiro, Kotira uvavano vika uva aatara kaivaro vika uvavano qumina uvaqaima vaira.

²¹ Kotiva ekaa okara iri vaiva, vivama maa uvara okara qovarama kaivaro vi uvava maantimama vairo: Kia vaiintivanu vataihainaa okara, vo okara vo okara irinaraqaa-hairo Kotira okara ho kankoma kero irianarove. Tenavu Karaitirara ni tiva nimi vauna uvara, vi uvarara vo vaiinti nahenti qumina uvave ti varia uvara, vaiinti nahenti vi uvarara quqaa uvave tivera, Kotiva vika ntita varairamanta vika kia ekaara qutu vivara.

²² Iutta vatanaaka tiha, Vaiinti vovano nora kaiqa varairaqe tenavu vira kaiqa tave, vi vaiintirara Kotiva atitai vaiintirave tivakeha vira avataqi vuare, ti variamanta Giriki vatanaaka tiha, Vaiinti vovano vo kaiqa vo kaiqa okara humiqairaqe vira tave, viraqaahai vi vaiintira avataqi vuare, ti variara.

²³ Tenavu vo? Tenavu vaha Karaitira katariqaa aruke hiritaa uvara, vi uvaraqai tivaqi virera. Tenavu vi uvava Iuttaa vatanaaka tiva nimirare turamanta vika vi uvarara tiha, Qora vaiintiqai katariqaa hirite variarave. Ni uva qora uvave, ti variara. Tenavu vi uvava Giriki vatanaaka tiva nimirare turamanta vika vi uvarara, Qumina uvave kia uvaiqi uvarave, ti variara.

²⁴ Vika minti ti variamanta, tenavu Kotiva haarai vaiinti nahentika vaiha Iuttaa vatanaakave, Giriki vatanaakave, vo vatanaakave, tenavu iruraro Karaitiva Kotira mpeqa vaiintivanu tinavu kahaqiariravama vairo. Viva ekaa Kotira uva, kempuka uva tinavu tiviariravama vairo.

²⁵ Vo vaiinti nahenti Karaitira uvara qumina uvave ti variavaro vi uvava Kotira uvavano vaiharora tiro, vaiintivanu ekaa vataihainaa okarara ti variaravata aatara kaira. Kotira uva virara ugerara uvave ti variava, vi uvava vaiintivanu kempuka uva tiaravata aatara kaira.

²⁶ Eo, ti qata vakaao, ne nantimake vau vaiinti nahentikae vauvaro Kotiva ni naarorave? Virara iritechama variata. Vi entara ni nivutaini kia vo okara vo okara iri tave vau vaiintika vaurave. Vi entara ni nivutaini kia nora autu vataaka airi vaurave. „Vi entara Kotiva kia ni nutu noraiqama vurara iriharo ni naarama torave.“

²⁷ Vataihainaa uva okarara iri varia vaiintika vika Karaitira arukaa uvarara qumina uvave ti variara. Vika minti ti variavarovata, Kotiva vi uvava varakero vi uvaraqohairo vika kaurira haika nimira. Kempuka vaiinti nahenti kaurira haika varaae tiro, Kotiva ugerara vaiinti nahenti kaama tero, vikara ti vaiinti nahentima vaivarave, tiro.

²⁸ Vataini variaka vo vaiinti nahentiara kia tinavu vikara hantuqa harivo, kia koqe vaiinti nahenti qumina vaiinti nahentive ti variakara, Kotiva vi vaiinti nahentikaaqai varakero vikaqohairo vataini variaka avuni vai haikarave ti varia haikara quminaqaa-make vaira. ²⁹ Kotiva nai minti vairara tiro, vovano nai mahuta tiarirava kia ho varianaro.

³⁰ Kotiva naima ni ntita varero vuru kaimanta ne Karaitira vataake vohaa variara. Kotiva Karaitiraqihairo nai koqe avu aato tinavu humiqaimanta tavaunara. Kotiva Karaitiraqaa-hairo tinavu uva nunka timiteharo tinavu avuqavuqama timitaimanta tenavu Kotira vaiinti nahentiqama vi, tenavu kuvantuvi qaqini vaunara.

³¹ Tentanavu kahaqiarirava kia vauvaro Karaitiva mintimakero tinavu kahaqama timitorara ti, tenavu Kotira vukuqi qara ntuvato uvara kankomake irunara. Vi uvava mintima tiro:

Vaiintivanu kia nai kaiqara iriharo mahuta tiarire. Viva Noravano kahaqama amitai kaiqarara iriharo vira mahutaqai tiarire, tura. (Aisaiaa 40:13)

¹ Haaru te ne vaunaini anire Kotiva kukeqatai uvara ni qoqaa tiva nimirera iha, kia te hiakaa iaina uvara ni tiva nimiraiti, kia te vataihainaa uva okararavata ni tiva nimiavaunara.

² Vi entara te ni nivutaini vaiha vohaa uvaqai tivaqiqi virererave tivake, kia vo uva vo uva ni tiva nimiraiti, te Ihu Karaitira katariqaa aruto uvaraqai ni tiva nimiavaunara.

³ Haaru te ni nivutaini ani vaiha ugerara vaiinti variavauraro ti aiqo kauqu ntiri ntiri i vaumanta te getehe variavaunara.

⁴ Te vakaao ni tiva nimiha kia te vaiintivano uva tivaro hiakaa intemake ni tiva nimiraiti, te ti variavauraro Kotira Maraqravano ti kahaqiqi vauvaro ti uvavano kempuka uva vaumanta ne tavora.

⁵ Niara vika kia vataihainaa okara iriqi viraiti, Kotiva mpeqa kaiqa varai okarara irih Karaitirara quqaa vivave tiate ti, te Karaitira katariqaa aruto uvaraqai ni tiva nimiavaunara.

Kotira avu aatoqihainaa uvara tura

⁶ Kotira aaraqaa kempukaiqaake ni vai vaiinti nahentika vaiqe tenavu homa noraiqamakero vaina uvara vika tiva nimirara. Tenavu noraiqamakero vaina uvara tihamaa kia vataihainaa uvaravauve ti vauro.

Maa vataraqaa raqiki varia vaiintikta vataihainaa uva okarara ti variaka, vika variqi vi taipa vivaro vika uvavanovata taisqama vuanaro.

⁷ Kia tenavu vika ti varia uvara ni tiva nimiraiti, tenavu nora uva Kotiva kukeqatai uvara koqe uva, vi uvarama ni tiva nimi vai. Haaru kia maa vataro autuko entara Kotiva vi uvara iriro, tinavuaro tiro vira kukeqatero tiharo, Naantiara te vi uvara qoqaiqama kaariraro vi uvava vaiinti nahentika kahaqama nimi tairamanta vika ti vataake naaruvaini koqemake variqi vivarave, tura.

⁸ Maa vataraqaa raqiki varia vaiintikta qihairo kia vohaiqavanovata vi uvara okara ho irirave. Vika Kotira uva nora uva iriare tiatirio, vika kiama Kotira takuqi vai haikaraqaa raqiki vai vaiintira katariqaa arutaatirio.

⁹ Kotira vukuqi mintima tiro:

Kia vaiintivano avuqohairo tavai haikarave, kia vaiintivano aatoqihairo iri haikarave, kia vaiintivano nai aatoqihairo irikero tiharo vi haikava ho varianarove ti haikarave,

Kotiva vi haikara vi haikara qerama kero nariara muntuka vataa vaiinti nahentikara iriharo vatairave, tura. *(Aisaiaa 64:4)*

¹⁰ Kotiva nai Maraqua atitaivaro vira Maraqravano Kotiva kukeqatai uvara „kia maa vataraqaa raqiki variaka tiva nimiraitiro“, viva tinavuqai tiva timi vaira. Kotira Maraqravano ekaa haika taveharo Kotiva kukeqatai okararavata ekaa tave vaira.

¹¹ Ta vaiintivave vo vaiintivano nai aatoqi iriaina uvara ho irianaro? Kia vo vaiintivano vora aatoqi vaina uvara ho irianaro. Vaiintivano vaivaro vira avutaqai vai maraqravura vivaqaima vira aatoqi vai uvara ho iri vairave. Vira voqaantema kero, Kotira Maraqravanoqai nai Kotira okara ho iri vaira.

¹² Tenavu kia maa vataraqahainaa maraqua varaunarave. Kotiva tinavuara vika te koqema nimitaaina okarara kankomake iriate tiro, viva nai Maraqua tinavu timimanta varaunara.

¹³ Tenavu Kotira Maraqua varauraukara ti, tenavu kia vaiintivano vataihainaa okara tiva timi uvara ni tiva nimiraiti, tenavu Kotira Maraqravano tiva timi vai uvarama ne Kotira Maraqua varaaka tiva nimi vai.

¹⁴ Vo vaiintivano kia Kotira Maraqua varaira vaiintiva Kotira Maraqravano tiaina uvara kia ho irianaro. Viva vi uvarara qumina uvaveqaima tianaro. Kotira Maraqua varaira vaiintiva, vivaqaima Kotira Maraqravano tiaina uvara ho irianaro.

¹⁵ Kotira Maraqua varaira vaiintiva vaiharo viva ekaa okara avateharo vira koqe okarave, qora okarave, tianaro. Viva ho minti ti vaivaro qumina vaiintivano kia vi vaiintira okara ho avataanaro. ¹⁶ Vira voqaara Kotira vukuqi mintima tiro:

Nai tavave Nora Kotira avu aatoqi vai uvara iri tave vairave? Nai tavave Kotira avu aato ami vairare? *(Aisaiaa 40:13)*

Mintivarovata, Kotira Maraqravano tinavuqi vairara tiro, Karaitira avu aatovanovata tinavuqi vaira.

3

Korinti vatanaka tuqavu vura kaara Poruva vika nitura

¹ Ti qata vakaao, te vaiinti nahenti Kotira Maraqua varaaka uva tiva nimunantemake, nivata tiva nimirare turamanta ne kia iriarave. Te vataihainaa okararaqai iri varia

vaiintika inaara uva tiva nimunantemake, te nivata inaara uvaqai tiva nimi vaunara. Te tavauramanta ne Ihurara ququaave tu entaraqaahai kia noruqama viraiti, naati vainti voqaara variarave.

²⁻³ Noruqamavi vaiintira kempuka kara amintemake, te kempuka uva ni tiva nimirare ti, tavauramanta ne naati vainti voqaara variamantara ti, te naamaqai ni nimi vaunara. Qumina vaiinti nahenti maa vataraqaa variaka kia koqemake nuantemake, nevata ni variarara ti, ne maa entara naamaqai neka variara.

Ne nai toma amite nai toma amite, nai ati nai atiha variara. Ne mintiaqi viha ne vaiinti nahenti vataihainaa okarara iri variaka nuantemake ni variara.

⁴ Ike, ne nai ati nai ati i vaiha ne tuqavu vuavarvo niqihairo vovano tiharo, Te Porura avataqi vi vauraukave, ti vaivarvo vovano tiharo, Te Apolosira avataqi vi vauraukave, ti vairave. Ne minti tivaqi viha, ne vataihainaa okarara iri variaka voqaara kia koqemake ni variavo.

⁵ Apolosiva viva ta vaiintivae vaivo? Te Poruka te ta vaiintikae vauro? Tetanta Kotira kaiqa vare vauraukatantaqaima vai. Ne titanta kaiqaqaahai Ihurara ququaave ti variara. Tetanta Apolosika Noravano timitai kaiqarama vare vai.

⁶ Te Poruka kuvu utuqiqi vuraro Apolosiva namari qihiarraqi vivaro Kotivama vi kuvura vara qampiqa kairave.

⁷ Kara kuvu utu taivavata, namari kaiqa qahiaravavata, vitanta qumina vaiintitantama vai. Kotiva vi karara qampiqa kaivara tiro, vivama Noravano vairo.

⁸ Kara kuvu utu taivavata, namari qihiaravavata, vitanta vohaa qaramakema vai. Naantiara Kotiva vitanta náitánta kaiqa varerara iriharo koqaa nimianaro.

⁹ Tetanta Apolosika Kotira kaiqa vaiinti vauramanta ne Kotira naahove, Kotira Naavuve, voqaarama variavo.

¹⁰ Kotiva ti koqema timiteharo kempuka timimantara ti, kankomakero naavu kaqe okarara tave vai vaiintivana hoqarama taintemake, te naane Karaitira uva ni tiva nimi vaunara.

Ne Kotira vaiinti nahenti koqeka Kotira Naavu voqaara variate ti, te naane naaqura aratauraro viraqaahai vo vaiinti vo vaiintivano vi naavura kaqe variara. Vi naavura kaqe variaka vika paparuqama keha kaqevora.

¹¹ Te naaqura arataunara hauri vo vaiintivano nkaqukero vo katari arataantora. Te naaqura aratauna katariva vaireva, vira Ihu Karaitiram.

¹² Te naaqura arataunaraqaa vo vaiintivano koqe haika varakero vi naavura kaqaqiro vuanaro. Viva *kori* orie, *silvaa* orie, vo ori koqerae, varakero vi naavura kaqe vairaro vovano katarie, navuhie, taque, vi haikaravata varakero vi naavura kaqaanarove.

¹³ Mintiaqi vi vaivarvo naantiara ekaara entaqaa Kotiva vo vaiinti vo vaiintivano kaqatera qoqaiqama kairaro qoqama varianaro. Vi entara ihavano itakaintema kero, Kotiva vo vaiinti vo vaiintivano kaiqa varerara qovarama kero avateharo tavaanaro.

¹⁴ Ihavano viva naavu kaqataira kia itakairera, vi vaiintiva nai koqaa varaanaro. ¹⁵ Ihavano vi vaiintira naavu ekaa itakairera, vi vaiintira naavuvano ekaarama ita taiqa vuanaro. Mintiraro vaiintivanoqai ihaqihairo ruqemakero vevaraiva voqaara qaqi varianaro.

¹⁶ Ne kiae iriavo? Ne Kotira vaiinti nahenti vaiha Kotira Naavu voqaara vohaa naavuqai variavaro Kotira Maraqravano ni nivutaqi vaimanta variara.

¹⁷ Ne Kotira Naavu takuqi vai naavuka variavora tiro, vovano vi naavura qoraiqama kairera, Kotiva vi vaiintira naivata qoraiqama kaanaro.

¹⁸ Ne nentara una uva tirara quqaa uvave tivora. Niqihairo vo vaiintivano nariara tiharo, Te vataihainaa okara, vo okara vo okara kankomake iruraukave tirera, te vi vaiintirara tiha, Are vi uvava qaqira kera Kotira uvaqai iriqira uvane. Are mintiramanta qumina vaiinti nahenti ariara kia avu aato vataavave tivaro Kotiva ariara koqe avu aato vataavave tianarove, tirara.

¹⁹ Vata maaqaahainaauka avu aato iri varia uvarara Kotiva tiharo, Vi uvava qumina uvaqai, ti vaira. Kotira vukuqi mintima tiro:

Vataihainaaka avu aato vataaka vo vaiintinavu qoraiqama kareka auti variavarovat, Kotiva qaqi kaivaro vika nái qora avu aato utuava nái qoraiqamake vairave. (*Jop 5:13*)

²⁰ Vi uvava vaivarvo vo uvavanovata mintima tiro:

Noravano kankomakero iri tavaivaro vataihainaa okarara avu aatoqi iri variava qumina uvaqaima vairave, tura. (*Ihi 94:11*)

²¹ Ne vi uvava irihama hauri ne tiha, Tavaate, tenavu maa vaiintirave vi vaiintirave avataqi ni vauraukave tivora. Ekaa vo haika vo haikavano ne ia haikavama vairo.

²² Kotiva ni kahaqireva viva ti Porukave, Apolosirave, Pitaarave, ni nimirave. Maa vatarave, qaqi variqi vi okararave, qutuvi okararave, haarua entave, naantiara entave, ekaa vi haikava vi haikavavata ne ia haikavaqaima vaimanta ²³ ne Karaitiraini variavaro Karaitiva Kotirainima vairo.

4

Te Karaitira kaiqa vaiinti vauraukave tura

¹ Ne tinavu kaiqara iriha tinavuara mintima tiata: Nenavu Karaitira kaiqa vaiintinavu Kotiva kukeqatai uvvara tiva qovaraiqi varia vaiintinavukama variavo, tiata. Kotiva vi kaiqaraqaa raqikiate tiro, tinavu noraiqama kaira.

² Vora kaiqa vare vai vaiintiva nantiakeroe kaiqa varaanaro? Vi vaiintiva quqaiqama kero nai nora vaiinti kaiqa vara amitaqiro vuuanaro. Tevata mintimakeha Karaitira kaiqa vara amite vaunara.

³ Te Kotira kaiqa vaiinti vaiha ni Kotira vaiinti nahenti kaiqa vara nimite variari neve, voovanove, ti kaiqa rahake taveha tiha qora kaiqave, koqe kaiqave, tivera, kia te virara noraiqaake irirera. Tevata tenta kaiqara iriha kia koqe kaiqave, qora kaiqave, tirera. ⁴ Te tenta kaiqara ho vaivo ti vaunara. Te minti tiarirarovata, Noravanoqaima ti kaiqa ho rahakero taveharo virara koqe kaiqave qora kaiqave tianaro.

⁵ Virara irihama ne paparuqihu vora kaiqara koqe kaiqave, qora kaiqave, tivora. Ne qaqrake vaivarao Noravano qaiqaa tuvuvainara veka variata. Viva vi entaraqaa vaiintivano konkiraqira vaharo kukeqakero varaina kaiqara qovarama kero, vaiintivano nai aatoqi iri vaina uvaravata vara qovarama kaanaro. Vi entara Kotiva vika vohaiqa vohaiqa nái kaiqa varerara iriharo quahama nimiteharo koqe kaiqave qora kaiqave tianaro.

Vika nái autu tuahere vaurara Poruva vika nitura

⁶ Ti qatao vakaao, te niara irihama tentatanta Apolosikara uva tuqantaake tunara. Ne vi uvvara irihama Kotira uva qara ntuvatora kia aatara karaiti, kia tuqavu viha vo vaiinti autu viriniqaa keha vo vaiinti autu vatainiqaa keha variata.

⁷ Ti qatao, tavave ariara are nora vaiintivano variarao tivo? Ho quqaae are ekaa haika vataanara Kotiva ai amivo? Are ekaa haika vataanara Kotiva ai amirara tira, quminama are nena mahuta ti variarao.

⁸ Korinti vatanaa maakao, quqaae ne Kotiva i haikara ekaa vataavao? Quqaae ne airi airaira vataaka variavo? Tenavu kia ni kahaqiraiti vauramanta quqaae ne nentaraa vaiha noraiqamavi avuhainaa vaiintiqamavi variavo? Vi uvava quqaa uva vairavauve, tenavuvata noraiqamavi vaiha ni hampata raqikiqi virarave.

⁹ Te tenta irike minti tirera: Tenavu Karaitira uva ni tiva nimi vaurauka vaurarovata, Kotiva tinavu varakero vaiinti nahenti naantiarinima vatero. Kovano tiharo maa vaiintinavuka ntita vare vuru qaqi vaiinti nahenti nivuqaa arukaate tintemake, tenavu ekaa vaiinti nahenti nivuqaavata, enseli nivuqaavata vauramanta vika quminama tinavu tave variavo.

¹⁰ Tenavu Karaitirarao ti, vira uva tiva nimi vauramanta qaqi vaiinti nahenti tinavuara vinavuka kia avu aato vataa vaiintinavuka variavo ti variarave. Vika tinavuara minti ti variamanta ne ekaa uva irikaaka voqaara Karaitira uva iri variarave. Tenavu ugerara vaiinti vauramanta ne kempuka vaiinti voqaara variarave. Tinavu autuvano vatainiqaa vivaro ni nutuvano viriniqaa vimanta variarave.

¹¹ Tenavu Karaitirarao ti, haaruvata, vate maa entaravata, kararavata namariaravata nora hantuqa hari vaimanta vaunarave. Tinavu utavaaqaa qunahi qaannahima vimanta vaunarave. Tinavu qoraiqamake kaavu humiqake variamanta vaunarave. Tenavu kia ho vohaa vatukaini vairaiti, tenavu vo vatuka vo vatuka ni vaunarave.

¹² Tenavu tentanavu kauquqohai vukaari utiha kaiqa vare vaunara. Vokiaka tinavuara vaaquqama vuate ti variamanta tenavu kia nariara vaaqu uva tiraiti, tenavu Kotirara vi vaiintinavuka koqema nimitaane ti vaunara. Tinavu qoraiqama timite variamanta tenavu kia Kotira kaiqa qaqira karaiti, tenavu qaqiqai vira kaiqa varaqi vi vaunara.

¹³ Vokiaka tinavu autu vataini qiarire ti, una uva tiamanta tenavu kia nái una uva tiva nimitaraiti, tenavu vi vaiintika koqe uvaqai tiva nimi vaunara.

Tenavu Karaitirarao ti mintimake vauramanta nteravi karara qaqira kaantemake, quminama vaiinti nahenti tinavu qoririmake variara. Maa entaravata vika tinavuara vehi vaiintiqaima variavo ti variara.

¹⁴ Te maa uvvara qara ntuvatehamma kia kaurira haika ni nimireravauve qara nti vai. Ne ti vaintaira koqeka vaivaro ni aato kenko tira iriate ti, te maa uvvara qara nti vai.

¹⁵ Airi vaiinti 10,000 vaiintie niqaa raqiki vaiha niara maantimake Karaitira kaiqa varaqi vuate, tivera, maa uvura iriata. Vika mintimake variamantavata, te ni qoka vohaidavanoma vauro. Te tota Karaitira uva koqe vakaaka ni naane tiva nimihara ti, te ni qokaiqamake variavaunarave.

¹⁶ Te ni qoka vaihara ti, niara mpo tiha, Te Kotira aaraqaa nuainantemake, nevata vi arararaqaa nuate, turo.

¹⁷ Ne mintimake nuate ti, te Timotira atitaariraro viva vuru ti vakaaka ni tiva nimiarire. Viva Nora Karaitira kaiqa quqaqama kero vare vaimanta te virara ti maaquve ti vauraro ti muntukavano virara vairave. Te Kotira uva vo vatuka vo vatuka niha tiva nimi vauna uvura Timotiva vi uvura nivata tiva nimianaro.

¹⁸ Ne hini kiaka tiriara tiha, Viva geteharo kia ho maini tinavu tavareva anianarove, tivakeha nenta nutuqai viriniqihā variara.

¹⁹ Noravano hove tirera, te homa ni tavarera mini vaaka virara. Te orunte vaiha vika nái autu viriniqihā variaka vika okara tavarera. Kia te vika uvaqai iriraiti, te vika nana kempuka vateravata tavarera.

²⁰ Kotiva raqikina vaiintiva vaireva, viva kia qumina noqihairoqai uva tivaqiqi viraitiro, viva koqemakero Kotira kaiqavata varaqiro vuanaro.

²¹ Te ni oru tavaainarara ni muntukavano nantimae vaivo? Ne kia avuqavu nira kaara te ni ntaiharera kapipivatae vare virarave? Ne avuqavuqamake nirara iriha, te niara muntuka vatehamā qīhaaqamakehae virarave? Ho nenta tiqe iriare.

5

Niqihairo vaiinti vovano hampi ni vai okarara tura

¹ Uvavano vi animanta te iruraro quara vairivanu nuantemake ni varia okarava ni avutana qovarama vivo. Ike, Kotira uva kia iri variaka vi kaiqarara qora kaiqave tiha kia vare variarave. Vovano uva tiva timimanta te iruraro vaiinti vovano nai qora vira naata varatairave.

² Viva ni nivutaini mintiaqiro ni vaimanta ne nana haikara irihae nenta mahuta ti variavo? Ne kia nenta mahuta tiraiti, ne iqi rateha vi vaiintira nenta ruvaaqumavi variaraqihai atitama kaataarave.

³⁻⁴ Vate ti vaatavano niaraini vaivarovata, ti maraquravano ni hampatama vairo. Ho te ni hampata qoqaa vaunantemake, te tinavu Nora Vaiinti autuqaa vi vaiintira uvura irihama te vaakama *ko* tiva taiqa kauro.

Noravano ti kahaqi vaivaro ti maraquravano ni hampata vohhaaragi ruvaaqumavi vairaro Noravanovata tinavu hampata vairamanta ⁵ ne vi vaiintira nentaqihai atitaivaro viva nariaraa vaiharo Sataanira kaiqa varaqiro vuari.

Ne mintivaro vi vaiintiva nai vaataqohairo Sataanira kaiqa varaqiro viraro aato kenko tiraro qora kaiqa qaqla kairaro viraqahairo Ekaara Entaqaa vira maraquravano ho vairaro Noravano vira naaruvaini vitaarira.

⁶ Ne hampiqaakeha nenta mahuta ti variara. Ne kaupititira okarara kiae iriavo? Kaupititira inaaraqavano karaqaa vairera, vaakama vi kararaqahairo ekaa karavata nterā kaanarove.

⁷ Vi vaiintiva kaupititira voqaara vairara ti, ne vaaka vira atitaivaro viva qora kaiqa varairava kia ni nivutana vaira ne ho variqi vuata. Hauri ne vira qaqla kaivaro vira qora kaiqavano nivata qoraiqama nimitaantora.

Vehakuma Nimito Entaraqaa Karaitiva tinavu sipisipi naati *ofaa* voqaara vaumanta vira arukorara ti,⁸ kaiqenavu Vehakuma Nimito Karara neha, kaupititira vataake untataa mparetira voqaara, qora kaiqave qora okarave qaqlake, kia kaupititira vataake untataa mparetira voqaara, koqe kaiqave quqaa kaiqave varaqi viha vi karara naare.

⁹ Haaru te nini qara vo varake niara mintima ti: Vaiinti nahenti hampi qaramaqi ni variaka hampata kia vohhaaragi variate, tiavaunara.

¹⁰ Ho te vi uvura tihamā kia te vataihaina okarara iri variakara tunaravauve. Airi airairara muntuka ntimanta variakarave, muara vare variakarave, una variqa autu tuahere variakarave, minti varia vaiinti nahentika maa vataraqaa mpiqavi variamantara ti, ne kia ho vika maa vataraqahai maini ke vivarave.

¹¹ Te tiavauna uvura okara maantimama vairo: Vaiinti vovano tiharo, Te Ihura vainti ni qata vakaama vauro tivakeharovata, viva hampi qaramaqiro ni vairave, viva airi airairaraqai muntuka ntivaro vare vairave, viva una variqa autu tuahereharo ni vairave, viva vora autu vataini qiarire tiharo una uva ti vairave, viva iha namari neharo vueraiqaaviro ni vairave, viva muara auti vairave, vi kaiqara vi kaiqara vare vairava

niara te ni qata vakaama vauro tirera, ne qaqrake kia vi vaiintira vataake vairaiti, kia karavata vira hampata vaiha naate. Ti uva okara tota tiavaunara mintimama vairo.

¹²⁻¹³ Qumina vaiinti nahenti aaqaini variaka variamanta kia te vika uva avuqavu qireravauve. Vika uva avuqavu qianara kia ti kaiqavauve, vira nai Kotivama vika uva avuqavu qianaro. Ho ne kia qumina vaiinti nahenti variavo.

Ne Ihura vaiinti nahentima variavo. Hauri niqihairo vovano qora kaiqa varairamanta ne tiha, Kaire qaqirake kia vi uvvara avuqavu qiare, tivora. Ne vaaka vi uvvara avuqavu qiaita. Kotira vukuqi qara ntuvato uvvara irihama te niara mintima ti:

Vaiinti vovano ni nivutaini vaharo vaaku kaiqa varaina vaiintira ne vira nentaqihai atitaivaro vuvarire, turo. *(Lo 13:5)*

6

Uva vairera, nenta vi uvvara avuqavu qiate tura

¹ Niqihairo vovano nai qata vakaaraqaa uva vatare iharo, hauri viva kia Kotira uva iriakara vi uvvara avuqavuqama timitaate tiantora. Viva ne Kotira uva irikara ti uva vira avuqavuqama timitaate tiari.

² Ne kiae iriavo? Naantiara Kotira vaiinti nahenti vika vaiha, maa vataraqaa vaika uva avuqavuqama nimitevara. Ne naantiara maa vataraqaa vaika uva avuqavuqama nimiteira kia vaiha ne kiae maa entara inaara uva ho avuqavu qivara?

³ Ne kiae iriavo? Naantiara tenavu *enseli* vika uvavatama avuqavu qianarave. Tenavu minti iiarauka vahara ti, tenavu vataini vaina uvaravata avuqavu qiarirava voqavatama varianaro.

⁴ Niqihairo uva vo qovaraiqirera, ne vi uvvara avuqavu qire iha, hauri ne qumina vaiinti aaqaini vaina vaiintira, kia Ihura autu tuahere vaina vaiintirara vi uvvara avuqavuqama timitaane tivora.

⁵ Ne mintihama ne kauruataarave. Ni qata vakaa taaraqantae nai ati nai ati ivera, kiae ni nivutaini koqe avu aato vataa vaiinti vohaiqavano ho vi uvvara avuqavu qiarirava vairo? ⁶ Niqihairo koqe avu aato vataa vaiinti vovano vi uvvara vi uvvara ni avuqavuqama nimitaataara vaimanta ni qata vakaa vika vi uvvara vareha qumina vaiinti kia Kotira uva iriaka ianaini vi variara.

⁷ Ne naiqaa naiqaa *ko* vate variamanta te tavauramanta ne Kotira uva qaqrake vira aaraqaavata kia koqemake ni variara. Ni qata vakaa vovano ni qoraiqama nimitarirera, ne qaqi kaivaro viva mintiari. Ni qata vakaa vovano ne ia haikara muara varairera, ne qaqi kaivaro viva mintiari.

⁸ Ne mintiataara vaimanta ne *ko* tiha nai qoraiqama amite nai qoraiqama amite, nai muara autu amite nai muara autu amite i variavo. Ike, vika ni qata vakaa variamanta ne mintiakeha vika qoraiqama nimite variavo.

⁹ Ne kiae maa uvvara iriara? Vaaku kaiqa vare vaika kia Kotiva raqikinaraqi ho vivara. Vo vaiintivano niara vo uva una uva tiantora. Hampi qaramaqi nikave, una variqa autu tuahere vaikave, naata vaati okara raqake vaikave, nai kena qorainti nai kena nahentive vika hampata hampi ni vaikave, ¹⁰ muara auti vaikave, airi airairara muntuka ntimanta vare vaikave, iha namari neha vueraiqaa ni vaikave, vora autu vataini qiarire tiha una uva ti vaikave, vora airairara una tiha muara vare vaikave, vi kaiqara vi kaiqara vare vaika kia Kotiva raqikinaraqi ho vivara.

¹¹ Haaru ne hini kiaka vi kaiqara vi kaiqara vare vaura. Ne minti varia vaiinti nahentika vauvaro Kotiva niara nai kaiqaqai varaqi vuante tiro, viva ni avu aato muntuka hiqama nimitero. Viva Nora Vaiinti Ihu Karaitira kaiqaravata nai Maraqruravata iriharo, ni avuqavuqama nimitora.

Tenavu qaiqaa vaaku kaiqa varaqi vuvaro

¹² Vovano tiharo, Karaitiva ti kuvantu kaimanta te kuvantuvi vahara ti, te ekaa kaiqa vo kaiqa vo kaiqa homa vare variariraro Kotiva kia ti qioqama taanarove tirera, te nai mintima tiva amirera: Are ekaa kaiqa ho vare vairarovata, kia ekaa vi kaiqava ai kahaqianarove, tirera.

Te ekaa kaiqa ho varaarirauka vahavata, kia te ekaa kaiqa varaqi virera. Te ekaa kaiqa vare variariraro hauri kaiqa vovano ti ravaaqavu kero tiqaa raqiqiqiro vuantora.

¹³ Vovano tiharo, Karavano vaiinti vaantavoraqi vuvarirava vaivarova vaantavoravano kara naarirava vairave tirera, te virara minti tirera: Ho vi haikava vahuqaa haikavanoqai vairara tiro, naantiara Kotiva karavata vaiinti vaantavoravata taiqama kaanarove, tirera. Vi haikava vahuqaa haikavanoqai vaivarova vaiintivano kia vahuqaa haikavano vairo. Mintirara tiro, vaiintivano nai vaataqohairo hampi nuaina kaiqara varaantora.

Vaiintivano nai ekaa vaataqohairo Karaitira kaiqaqai varaqiro viraro Karaitiva vira vaataqaa raqikiqiro vuanaro.

¹⁴ Kotiva Nora Vaiinti Ihura, qaqi vara himpima korara tiro, viva vi kempukaraqohairo tinavuvata qaqi vara himpima kaanaro.

¹⁵ Ne kiae iriara? Ni vaata vo vaata vo vaatavano vaireva, Karaitira vaatama vairo. Hoe oru Karaitira vaataqahaaho vaata vo varakero hampi nariro ni vaina nahentira vaataqaa tampama kairaro varianaro? Kiama ho mintianaro.

¹⁶ Ne kiae iriara? Vaiintivano hampi nariro ni vaina nahentira vataakero ni vairaro vitanta vaatavano vaireva, vohaa vaatama varianaro. Kotira vukuqi mintima tiro: *Vitanta vaatavano vohaa vaatama varianarove, tura.* (*Okara 2:24*)

¹⁷ Tinavu Nora Vaiinti vataakero vohaa vairava vairaro vitanta maraquravano vohaa maraqurama varianaro.

¹⁸ Hampi qaramaqi ni vai okararaqaahai ne qaqlini ruvaihaavi variate. Vaiintivano qora kaiqa vokira vareharo nai vaata pahainiqi vare vairave. Vovano nahentie vaintie vataakero hampi niharoma nai vaata avutaqiqi qoraqamake vairave.

¹⁹ Ne kiae iriavo? Ni vaatavano vaireva, Kotira Maraquravano variqiro vi vai naavuvama vairo. Kotiva nai Maraqura ni nimivaro vira Maraquravano ni muntukaqiqi variqiro vi vaira. Ne kia nentaaqaa raqikiqiqi viha variaravauve. Ne Kotiraini variakama vai. ²⁰ Kotiva nai Maaqu ni nimiro ni koqaama tairara ti, ne Kotirainima variaka vaiha ne nenta vaataqohai Kotira autuqai tuahera kaata.

7

Naata vaati vare okarara tura

¹ Ne ti ireha qara ntuvu taa uvvara te ninta vi uvvara tiva nimirera. Homa vaiintivano nahenti kia vararaitiro, qaqi variqiro vuanaro. ² Te vi uvvara tiha tavauramanta maa entara airi vaiinti nahenti hampi qaramaqi ni variamanta te virara irihama nevata vika voqaante ivorave tihamta te vo uva mintima ti: Qaqi kaimanta ekaa vaiinti nahenti vika naata vaati varateha variate, turo.

³ Vira vaativano nai nahenti antuqa kia qioqama taraitiro, vira koqema amitaarira. Vira naatavanovata vohaa qarama kero mintima variarira. Vitanta nai koqema amite nai koqema amite iha variata.

⁴ Nahentivano kia naiqai nai vaataqaa raqiki vaivaro vira vaativanovata vira vaataqaa raqiki vaira. Vira voqaantemba kero, vira vaativano kia naiqai nai vaataqaa raqiki vaivaro vira naatavanovata vira vaataqaa raqiki vaira.

⁵ Te vaatiaravata naataravata maa uvvara tirera: Netanta naata vaati vaiha kia nentatanta vaata nai qioqama amite nai qioqama amite iata. Netanta vohaa uva tiva vate tiha, Kaiqetanta vaata qioqamate vo entanavu Kotira aaramaqi vuare, tivera, homa mintivara. Netanta mintiaqiqi viha vuru taiqake, viraqaaahai homa qaiqaa vohaaraqi vaivaro. Hauri netanta rairayi vaivaro Sataaniva nitanta avataira netanta vo nahentie vo qoraintie vataake hampi nivora.

⁶ Ne ti ireha qara ntuvu taarara ti, te niara homa ne naata vaati varaate turo. Te kia vi uvvara kempukaiqaake vateha ne vi uvvaraqai avataqiqi vuateravauve turo. Te qaqi vi uvava ninta kahaqiarire tima, minti turo.

⁷ Ekaa vaiinti nahenti ti voqaantemake vaseqe te hove tiataara. Ho te iruraro Kotiva vo avu aato vaiinti vo amivaro vi vaiintivano nahenti varatero vaivaro Kotiva vo avu aato vo vaiintie vo nahentie amivaro viva ehara variqiro vi vaira.

⁸ Te kia naata vaati varaaakaravata, tentoqa nahentiaravata tirera: Ne ti voqaantemake qaqi variqiqi vaseqe te hove tiataara. ⁹ Qoraintie nahentie kia ho qaqi variataa iyeria, homa naata vaati varevara. Hauri qaqi vaivaro qoraintiarae, nahentiarae, voqama kero muntuka ntiramanta ne vira airante qaqi variqiqi vivora.

¹⁰ Naata vaati varaaakara te maa uvvara tiva nimirera: Maa uvvara kia tenta irike turo. Noravano tiva tairama. Viva nahentiara mintima tiro: Nahentivano kia ho nai vaati qaqira kero vuanarove.

¹¹ Viva nai vaati qaqira kero virera, vi nahentiva kia ho vo qoraintie varaanarove. Viva nai vaati qaqira kero viva nariaraa oru vaiha tavero tiharo, Kaiqe tenta vaativano vainanaini anirante vuare, tirera, homa anirantero nai vaativano vainanaini vuanarove, tiro. Minti tivakero tinavu Nora Vaiintivano vira qoraintiaravata mintima tiro: Vaiintivano nai naata kia ho qaqira kaanarove, tiro.

¹² Te vokiakara maa uvvara tirera: Maa uvava kia tinavu Nora Vaiintivano tivatairavauve. Te tentama vi uvvara tirera. Ihura vainti vovano vairaro vira naatavano

kia Ihurara quqaave ti vaira nahentiva vaharo nai vaatiara tiharo, Kia ai qaqira karaiti, ai vataake variqi virerave tirera, kia vira vaativano vira qaqira kaarira.

¹³ Nahenti vovano Ihura vainti vairaro vira vaativano kia Ihurara quqaave ti vaira vaiintiva vaharo nai naatara tiharo, Kia ai qaqira karaiti ai vataake variqi virerave tirera, kia vira naatavano vira qaqira kaarira.

¹⁴ Vira vaativano kia Ihurara quqaave ti vaira vaiintiva vaharo nai naatanti vohaaraqi variqiro viraro Kotiva vira naatara iriharo vi vaiintirara, Quqaama viva vira vaativano vaivo, tianaro. Nahenti vovano kia Ihurara quqaave ti vaira nahentiva vaharo viva nai vaativano Ihurara quqaave tina vaiintikantiro vohaaraqi variqiro viraro Kotiva vira vaatiara iriharo vira nahentia, Viva quqaama vira naatavano vaivo, tianaro. Kotiva kia minti tiravauve vitanta vaintevia qumina vaiinti nahenti kia Ihura uva iriaka vatataa vaintira qumina vainti voqaara varianaro. Ho vitanta vaintivano Ihurara quqaave tia vaiinti nahentitanta vainti voqaarama varianaro.

¹⁵ Kia Ihurara quqaave ti vairava vaharo nai naatae, nai vaatie, qaqira kero vireva auti vairera, homa vira qaqi kairaro vuanaro. Viva qaqira kero vireva auti vairera, vira naatavano, vira vaativano, Ihurara quqaave ti vairava homa vira tuta kairaro vuanaro. „Viva kia tuta kairaro vireva, vitanta nai ati nai atiha variqi vivora.. Nai qihaaqama amite nai qihaaqama amite iha variqi vuate tiro, Kotiva tinavu haarama taira.

¹⁶ Virara irihama te vokiaka vika naatae vaatie kia Ihura uva iriakara mintima tirera: Nenta vaatie, nenta naatae, niara iriha Ihura vaintiqamae vivarave, kiae Ihura vaintiqama vivarave? Ne vika kahaqiqi okarara kia ho kankomake iriavo.

Kotiva ni vo kaiqa vo kaiqa nimira qaqira kevorave tura

¹⁷ Haaru ne vauvaro Kotiva ni naaramato entara vi entaraqaa Noravano kaiqa vohaiqa vohaiqa rairakero ni nimurara irihama te niara tiha, Ne vaiha nana nana kaiqae totera viraraqai iriqi vuate, turo. Te vatuka vatuka niha Ihura vainti mini variakavata vi uvvaraqai tiva nimiqi vi vaunara.

¹⁸ Iutaa vaiintivano Kotira uva iriro Ihura vaintiqama virava, vi vaiintiva haaru nai vaata toqakaara kaara kauruantora. Vo vatanaa vaiintivano Kotira uva iriro Ihura vaintiqama virava, vi vaiintiva kia nai vaata toqa kaarira.

¹⁹ Vaata toqe okararave, kia vaata toqe okararave, vi okarava kia vaiinti kahaqiaina okaravama vairo. Ne vi okarara kia noraiqamake iriata. Kotira uva koqemake iriqi vira, viraraqai noraiqaake iriqi vuata.

²⁰ Ne nana kaiqae varaqi vi vauvaro Kotiva ni naarama tora? Ho ne vi kaiqaraqai varaqi viha Kotira kaiqa varaata.

²¹ Vi entara vo vaiintivano nai kaiqa varaane tiro, ai rumpa tovara are vira kaiqae vare vauraro Kotiva ai aarora? Ho kia ai rumpa tairara noraiqaakera iriana. Ai kuvantu kareva auti vaira aarava ho vairera, are homa qaqi vinara.

²² Noravano vo vaiinti rumpa taina vaiintira aarama tairaro vi vaiintiva nai rumpavi variainarara kia noraiqaakero irianaro. Te vi vaiintirara mintima tiane tirara: Are tihara, Karaitiva Sataaniraqaahairo ti kuvantu kaimanta qaqini vauro, tihara variqira vuane. Vira voqaara kia rumpa taira vaiintiva qaqi vaiintivano vairaro Noravano vira aarama tairaro vi vaiintiva Karaitiva vira rumpa taina vaiintivama varianaro.

²³ Kotiva koqaa autukeharo Karaitira ni nimitomanta ne kuvantu vurara ti, hauri vaiintinavu ni qaiqaa rumpa taira vika kaiqa vareha Kotira kaiqa kia ho varevora. ²⁴ Ti qata vakaao, Kotiva ni naaramato entara vi entaraqaa ne vo kaiqa vare vaura, ne vi kaiqaraqai varaqi viha Kotira vataake vohaa vahira koqe aaraqaqai nuata.

Poruva varaata quvaaraaravata, tentoqa nahentiaravata, tura

²⁵ Te ni varaata quvaaraara tirerama: Ho niara Noravano kia uva vo tiva taimanta irunara. Noravano ti aqurihamma timiteharo ti noraiqama kaimanta te vira kaiqa vaiinti vauraukara ti, te niara tenta irike tiaina uvara ni tiva nimiari ne ti uvara homa muntuka qihaaqama keha quqaa uvave tivara.

²⁶ Maa entara qora enta maara vai entava vaimantara ti, te virara irihama ni qoraintiara mintima ti: Ne vate maantimake vaira mintimakeqai variqi vuate, turo.

²⁷ Are nahenti varataarava vairera, kia vira qaqira kenarara iriane. Are ehaara variarava vairera, kia nahenti varenarara iriane. ²⁸ Are nahenti varairera, kiama are Kotira uva raqa kenara. Homa varenara. Varaatavano variqiro viharo, viragaahairo oru qorainti varairera, vivavata kiama Kotira uva raqa kaanaro. Homa varaanaro. Maa entara naata vaati vare variaka nora maarama varaqi vivara. Te virara irihama nevata mintivorave tihama niara kia naata vaati varaaate, turo.

²⁹ Ti qata vakaao, te tuna uvara okara maantimama vairo: Tenavu vataini variaina entava inaaraqama vairo. Virara irihama niqihai nahenti vare variaka vika kia nahenti varateka voqaara variqi viha Kotira kaiqara noraiqaake iriqi vuata.

³⁰ Ne kia vataini airi enta qaqi variqi virara irihama niqihai iqi rate variaka, vika kia iqi rateka voqaara variqi viha Kotira kaiqara noraiqaake iriqi vuata. Vira voqan-temake, niqihai naaraihi variaka vika kia naaraihika voqaara variqi viha Kotira kaiqara noraiqaake iriqi vuata. Qaiqaa, niqihai airara koqaamake vare variaka, vika kia airaira vateka voqaara variqi viha Kotira kaiqara noraiqaake iriqi vuata.

³¹ Ne monu kaiqae, koqaa kaiqae, vareha kia vi kaiqarara noraiqaake iriqi viha variata. Maa vatavavata maa vataraqaa kaiqa vare vai okaravavata taise vaivarava viva taiqaina entava aumanto vairara ti, ne virara iriha Kotira kaiqaraqai noraiqaake iriqi viha variqi vuata.

³² Ti hantuqavano mintimama vairo: Kia ni muntukavano vataini vaina haikarara voqamakero variarira. Quvaaraa vaiintivano vaharo viva tinavu avuhainaa vaiinti quahama amitareva vira kaiqaraqai noraiqaakero iriqiro vuanaro.

³³⁻³⁴ Nahenti varate vai vaintiva nai naata quahama amitareva auti vaharora tiro, viva kia Kotira kaiqaraqai iriraitiro, viva maa vataraqaa vai haikararavata iriqiro vi vairo.

Varaatavanoe, kia iratai nahentivae, vaharo viva tinavu avuhainaa vaiinti kaiqaraqai iriqiro vi vairo. Viva nai maraquragohairovata nai vaataqohairovata vira kaiqaaqai varaqiro vi vairo. Vaati vataa nahentivano vaharo viva nai vaati quahama amitareva auti vaharora tiro, viva maa vataraqaa vai haikarara noraiqaakero iriqiro vi vairo.

³⁵ Te maa uvara tihamia kia te ni ravaaqavu kareravauve minti ti. Te ni kahaqirerama minti ti. Niara koqe aaraqaa niha kia vo kaiqa vo kaiqara iriraiti, Kotira kaiqaraqai iriqi vuate ti, te minti tunara.

³⁶ Vaiinti vovano tiharo, Te quvaaraavano vaiha vo nahentinti hampi nuarorave, tiarira vaiintiva homa naata varaanaro. Viva mintiharo kiama Kotira uva raqa kaanarove.

³⁷ Vaiinti vovano tiharo, Kia te nahenti vararerave. Te homa ehaara vaiha qaqi variqi virarave, tivakero mintiaqiro viharo kempukaiqaa kero variqiro virava, homa vi vaiintiva qaqi variqiro vuanaro.

³⁸ Nahenti varaaataarirava viva koqe irarovata, kia nahenti vararaitiro qaqi ehaara vairava, viva voqavatama koqe ianaro.

³⁹ Vira vaativano qaqi vairera, vira naatavano nai vaatintiroqai variqiro vuanaro. Vira vaativano qutu virera, vi nahentiva homa nai antuqa vaina qoraintira varaanaro. Viva vo qorainti varare iharo Ihurara quaaave ti vaina vaiintira viraqaima ho varaarire.

⁴⁰ Te tenta irike vi nahentirara tihamia, Vi nahentiva kia qaiqaa qorainti varairera, viva quaheharo variqiro vuanarove, turo. Te minti tiariraro Kotira Maraqravanovata te tuna uvara vohaa uvaqaima tianarove turo.

8

Una variqanavu nimite karara tura

¹ Ne ti ireha tiha, Hoe tenavu *maaket i* qihai una variqanavu nimite karara monu aquukeha varake nararave, kiae ho nararave? ti varia uvara te virara ninta tiva nimirera: Hauri ne paparuqamake tiha, Homa tenavu vi uvara okara iruro. Homa minti mintirerave, tivora. Ne vi okarara ho iruraukave tihamia ne nenta nutuqai tuaherevora. Kia minti ti uvvaraqohai vi uvvara avuqavu qita. Ne nariara nariara muntuka vatehama vi uvara vi uvvara avuqavu qita.

² Vaiinti vovano vi uvara okara hiniqai iriro tiharo, Te ekaa vi uvara okara ho iruraukave, tiantora. ³ Kotirara muntuka vataaina vaiintiva vairaro Kotiva vi vaiintira viraqamakero tavero virara ti vaintive tivakeroma vira kahaqianaro.

⁴ Vi uvara irihama te una variqanavu kara nimite varia okarara tirera: Tenavu kankomake iruramanta una variqanavu vaireka, vika qumina haikaqaima variavo. Tenavu kankomake iruraro Variqa vohaiqavanoqaima vairo.

⁵ Vokiaka tiha, Naaruvainivata maa vataraqaaavata airi variqa variamanta noravanove ti varia haikavavata airitahaa vahia tinavuqaa raqiki variarave, ti variara.

⁶ Vika minti ti variamantavata, tenavu tiha, Variqa vohaiqavanoqaima vaivo, viva Kotiva tinavu Qovama vairo. Viva ekaa haika autukero vataiva vaimanta tenavu vira vainti vahia qaqi variqi vi vaunara. Nora vaiinti vohaiqavanoqaima Ihu Karaitiva vairo. Kotiva Karaitira noraiqama kaivaro viva ekaa haika autukero vataira. Karaitiva vaimantara ti, tenavu ho qaqi variqi vi vaunara. Tenavu vi uvara irihama una variqanavuara qumina haikaqaiive ti vaunara.

⁷Tenavu vi uvvara iri vaurauka vauramanta ekaa vaiinti nahenti kia tenavu iruna uvvara iri variara. Hini kiaka vika tota una variqara iri vauka, vika Ihura vaintiqamavi, vika maa entaravata una variqa nimitaa karara neha vika tiha, Oho, maa karara una variqa nimitaa kararave. Vi karava qoraiqama timitaantorave, ti variara. Vika airi aato iriha vi karara namake viraqahai vika tiha, Oho, tinavu toqaavuma harivo. Kia vi karara naataara vaimanta namakauro, ti variara.

⁸Vika minti ti variamanta tenavu iruraro Kotiva tenavu naaina karara kia noraiqaakero iri vaira. Tenavu vi karara naariraro Kotiva kiama virara iriharo tinavu quahama timitaanarovaavue. Tenavu nana nana karae neha, nana nana karae auramataariraro kia vi haikava tinavu vo qarama timitairaqe tenavu koqemake Kotira vainti vairarave.

⁹Vi uvava mintima vairara ti, ne homa vo kara vo kara neha kia toqaavu haika varevara. Ne vo kara vo kara nekavata rauriha variata. Ne vo kara vo kara ho neka variamanta ni kenuka Ihura vainti himinavu vaiha aato tara iha tiha, Tenavu hini kara naariraro toqaavu haruanatorave, ti variamanta ne vika nivuqaa ekaa kara neha vika qoraiqama nimitevora.

¹⁰Ti uva okara maantimama vairo: Are vovano tihara, Homa ekaa kara naariraro kiama ti toqaavu haruanarove, ti vairava oru una variqa maara naavuqi kara ne vairaro ai qata vakaa vovano uquerara vaiintivano vi karara kia ho nararave ti vaira vaiintiva ai tavero, viraqahairo vivavata vi karara nairaro toqaavu ariraro tiharo, Kia naataarama nauro, tianarove. Ho vira kaara vi vaiintiva Kotira uva raqama kaanaro.

¹¹Vi vaiintiva mintirera, are ekaa kara homa nararave tina uvvara kaara vi vaiintiva hiqintuanaro. Karaitiva kia niaraqai iriharo qutu viraitiro, viva ni qata vakaa viraravata iriharo qutu vura. ¹²Are vi karara nairaro ai qata vakaa vovano uquerara vaiintivano hampi aato iriharo kara nairera, are kia viraqai qoraiqama amitenara. Are Karaitiravata qoraiqama amitera vira uvavata raqama kenara.

¹³Virara irihama te vo kara neha tavaariraro vi karara kaara ti qata vakaa vovano hiqintirera, te kia vi karara qaiqaavata namaqai virerave.

9

Ihura kaiqa vareharo kia koqaa varorara tura

¹Ho quqaama kia vovano ti rumpa taimanta te qaqlima vauro. Quqaama tiriara Karaitira uva tiva nimiarire tiro, ti noraiqama kaimanta vauraukama vai. Ihuva noraiqama kai vaiintika anare quqaama te tinavu Nora Vaiinti Ihura tavaauraukama vai. Quqaama te Nora Vaiinti vira kaiqa vare vauramanta ne ti kaiqaahai vira vaintiqamavi variara.

²Vokiaka tiriara tiha, Are kia Ihuva noraiqama kai vaiintiva variarao tivera, ne kia minti tiraiti, ne quqaama tiriara Ihuva vira noraiqama kai vaiintivama vaivo tivara. Quqaee ne vi uvvaraai tivara? Ne ti kaiqaahai Kotira aaraqaa vi variarara tiro, vovano virara iriharo tiriara quqaama Noravano vira noraiqama kaivo tianaro.

³Vo vaiintinavu tiqaa uva vataivera, te nái vika minti tiva nimirera: ⁴Te Kotira kaiqa vare variariraro tavave ti qioqama tairaqe te karave namarive kia ho narara?

⁵Ihuva noraiqama kaika vonavuvata, Ihura qatanavuvata, Pitaavavata, vika nahenti varate variqi vi variarara tiro, tavave qioqama tairaqe te kia vika voqantemake, Ihurara quqaave tina nahentira vo varate, vira vita vare vatuka vatuka variqi virara?

⁶Tetanta Banabaasika Kotira kaiqa varehamma kia vaiinti nahentiara kara timiate tiraiti, tentatanta kauquqohai kaiqa varakeha tentatantaqaa raqiki vaunara. Ihuva noraiqamako vaiintinavukaqihai tetantaqai minti vaunara.

⁷Ike, *aami* vaiintivano *aami* kaiqa vareharo nai monue aqukeharo vi kaiqara vare vaira? Aqao, viraqaa raqiki vai vaiintiva vira monu ami vairave. Vaiintivano *uaini* utu tairaro tava irairaro viva kiae nai utu tainaraqahairo tava hiqikero naanaro? Eo, viva homa mintianaro. Sipisipiqa raqiki vaiva, viva kiae nai sipisipi naama ho naanaro? Kia vovano vira qioqama amitanaro.

⁸Maa uvvara tihama te kia vaiintivano ti varia uvarara irihavaavue ti vauro. Kotira vukuqvivata vi uvvara okara vohaa qarama keroma vairo. ⁹Kotiva Mosiraqaa tivato uvava mintima tiro:

Uiti auru ravaqaa uvarire tiro, purumakauvano vi vaura aiqo ravaqiro vi ani vairara vira no kia rumpa taane. Vira no qaqi kairaro naivata uiti mareve, kaqive, ho naarire tura. *(Lo 25:4)*

Kotiva vi uvvara purumakauraqiae iriharo turave? ¹⁰Kotiva vi uvvara tuqantaakero tinavuvata kahaqirevae turave? Eo, viva tinavuvata kahaqireva vi uvvara tivatorave. Vi

uvara okara maantimama vairo: Kara utireva iharo vata kora taira vaiintivavata, kara qantu varero anira vaiintivavata, vitanta naantiara vi karara homa tetantavata nararave tivara. Vi uvara okara mintima vairara ti, vitanta homa nevara.

¹¹ Vaiintivano kara kuvu vataqi utinatemake, tenavu naane Kotira uva ni aato muntukaqiqi vataavaunara. Vaiintivano kara qantu varainantemake, tenavu kiae niqaahai kara naainarare, vaata nonkuainarare, varaainarare? ¹² Vaiinti vokiaka niqaahai vi haikara varevo ho vairera, tenavu niqaahai varaarirava voqavatama varianaro. Tenavu niqaahai ho vi haikara vi naaruma varaarirava vaimantavata, kia naaruma keha varaunara. Tenavu qaqrake niara vo haikavano kuvai nimitaira ne Karaitira uva kia iriqi vivorave tivake, viraqaahai tenavu kia niara vi haikara timiate tiraiti, tenavu tentanavuqua raqikiqi viha maavaravata varaqi viha Karaitira uva ni tiva nimiqi vi variavaunara.

¹³ Ne kiae iriara? Ieruharemini Kotira Naavuqi Kotira kaiqa vara amite variaka, vika vi naavuraqihai nai kara varakeha ne variara. Mini Kotira quara aantau aruke unta amite variaka vika hini quara aantau náivata ne variara. Vika vi karara hini ne variavaro Kotiva kia vika qioqamate vairave.

¹⁴ Vira voqantemra kero, Noravano nai uva tiva nimi varia vaiintikara uva vatero tiharo, vika náivano naiqaa raqikivorave. Vika vi uvara iriha quqaave ti variaka, vikama vi vaiintinavukaaqaa koqemake raqikimanta variate, tura.

¹⁵ Vi uvava vaimantavata, te Karaitira uva ni tiva nimi vaiha, kia te niara monu airairave karave timihe ho ni hampata variqi vuare tiavaunara. Te maa qarara ruva nimiteha kia te ne vi haikara timiateravauve ti vauro. Te niqihai vi haikara kia naarumake varaanarara irihama, te tenta mahuta ti vai. Niqihairo vovano vi haikara ti timirera, te tenta mahuta ti vauna uvava quminaiqama vuunaro. Mintiantorave ti, te qutu vuataarave.

¹⁶ Te vaiinti nahenti Karaitirara uva tiva nimiqi viha kia te ho tenta mahuta tirara. Noravano tiriara vi uvara tiva nimiane tirara ti, te vi uvaraqai vaiinti nahenti tiva nimiariravama vairo. Te vi uvara kia tiva nimiraiti, qaqrake variarera, oho te tentaraa goraiqamama vuro tirara.

¹⁷ Kia te tenta irike tiha, Kaiqe Karaitira uva tiva nimiqi vuare, tunaravauve. Te minti tihavauve vi uvara tiva nimi vaunaraara iriha, homa koqaa varaainarave. Kotiva ti kaamatero vi uvara tiva nimiane timantara ti, te vi uvara tiva nimiqi vi vaunara.

¹⁸ Te mintiaqi viha nana koqaae virara vare vaunara? Kia te vo koqaavata vare vaunara. Ti koqaa vaireva, vo qara i koqaavama vairo. Te Karaitira uva vaiinti nahenti tiva nimihama kia monu airaira timiate tivaqi vi vaurava, vivama ti koqaama vairo. Te Karaitira uva ni tiva nimiha monu airaira ho varaataara vaimantavata, te kia mintiraiti, qaqrake kia koqaa vare vaurava, vivama ti koqaama vairo.

¹⁹ Kia vo vaiintivano ti rumpa taimanta te vira kaiqa vaiintiqamavi vauraukavauve. Te qaqi vaiinti vahavata, vaiinti nahentiqihai airitahaa Ihura vaintiqama vuate ti, te ekaa vaiinti nahenti vika kaiqa vaiintiqamavi vaunara.

²⁰ Te Iutaa vatanaaka hampata vaiha vika Ihura vaintiqama vuate ti, Iutaa vatanaa vika Mosira uva okara iriha variqi vuantemake, tevata variqi vunara. Te kia Mosira uva vevaaraainiqamake ni vaurauka vahavata, vika Karaitira uva iriate ti, te Mosira uva okara vevaaraainiqamake ni vai.

²¹ Vira voqantemake, te vo vatanaaka hampata vaiha qumina vatanaaka kia Mosira uva okara iriraiti variqi vuantemake, tevata vika Ihura aaraqaa vuate ti, te vika aanantamake variqi vunara. Te mintiake variqi viha kia te Kotiva tivatai uvara qaqrake karaiti, te Karaitiva tivatai uvara iriqi vi vaunara.

²² Uquerara vaiinti nahenti variamanta te vika hampata vaiha vikavata Ihura vaintiqama vuate ti, tevata uquerara valinti voqara vaunara. Ekaa vo qara vo qaramake varia vaiinti nahentika Ihura vaintiqama vuate ti, te ekaa vika variantemake, tevata variqi viha vakaqi kaiqa varaqi vi vaunara.

²³ Te Karaitira uva koqeqe uva irihara ti, mintiaqi vi vaunara. Te mintiaqi vi variariraro Kotiva tivata vokikavata koqemake timitaireti, mintiaqi viha Karaitira uva tiva nimiqi vi vaunara.

Tenavu kempukaiqamake kantaainarara tura

²⁴ Ne kiae iriara? Airi vaiinti kantamaqi viha nai aatarake nai aatarake i variaraqihairo vohaiqavanoqai koqaa vare vairave. Nevata Ihura aaraqaa viha koqaa varareka kempukaiqamake kantamaqi vuata.

²⁵ Nai aatarake nai aatarakemaqi viha koqaa varare iaka, vika vaatavano ho variarireti, vika qumina quahe variara qaqrake, aiqo kauqu avaqamake vate, viraqaahai vika nai

aatarake nai aatarake kantamaqi vi variara. Vika koqaa vaireva, maurakanaa qiataqaa aqu amitaivaro tamuntaa vuaina haikavaqaima vairo.

Tenavu kia vika voqaantemake qumina koqaa vararerera Kotira aaraqaa viraiti, tenavu tentanavu ekaa enta qaqi variqi vuaina koqaarara irihama koqemake Kotira aaraqaa ni vaunara.

²⁶ Virara irihama kia te Kotira aaraqaa hampiara voqaara niraiti, te avuqavuqamake aiqu ntavaqji vi vaunara. Kauquqohairo raqi vai vaiintiva nai kauqu qumina aqukaintemake, tevata mintiarora.

²⁷ Te Karaitira uva vokiaka tiva nimiqi vuariraro vo haika kaara ti qaqini vara kaantorave ti, te tenta vaataqaa koqemake raqikiqi vuariraro tinta antuqa avataqi vuarire ti, vira ruqutuqi vi vaunara.

10

Kia una variqa nutu tuaherakaate tura

¹ Ti qata vakao, tinavu Iutaa vata naaka kaivaqaukavara qumina vataqaa nuvaqi vi vuru qoraiqamavu uvarara ne tauru kevora. Vi entara Kotiva vika kahaqama nimitovaro tonavuvano ekaa vikaqaa maimaraara raqikiqiro viharo aara numiqe vaumanta ekaa vika nora namari ho taqa vare vura. ² Vika ekaa tonavuqvata namariqvata Mosira avataqiqi vurara ti, vika ekaa vi entara Mosira namari varoka voqaara vaura.

³ Vika ekaa qumina vataini variqi viha, kia karavata namarivata vaunaini nihamma Kotiva nimu karara aahuuwa kara namaqi vi vaura. ⁴ Vika ekaa Kotiva nai nimu namarira namaqi vi vaura. Vika vi vataraqaa nuvaqi viha, Kotiva nai nimu namarira origihai ne vauvaro Karaitiva vi namarira nimihamo nai vi orira voqaara vika hampata variqiro vura.

⁵ Kotiva tinavu kaivaqaukavaraga mintiakero koqemakero ekaa vikaqaa raqikiqiro vumanta ekaa vika vira uvaqai iriataara vaumanta vika airitahaa qaqrake vira uva raqa kovaro vira kaara Kotiva kia vika quahama nimitomanta vika qutu vuvaro vika vaatavano qumina vataini raumpirimavi vaura.

⁶ Haaru Iutaa vika kaivaqaukavara Kotira uva kia iriraiti variqi vurara irihama, tenavuvata mintimake variqi vuvaro. Vika muntukavanato qora kaiqara vauntemakero, tinavu muntukavanavata mintiantora.

⁷ Vika hininavu una variqa autu tuahere vauntemake, tenavuvata mintiarora. Kotira vukuqi qara ntuva tova vikara mintima tiro: *Vaiinti nahenti oquvi vaiha karavata namarivata namake, viraqaahai vika hampi ruhe tovevo iha vaurave, tura.*

(Katu Varora 32:6)

⁸ Vi entara vikaqihai vonavuvano hampi qaramaqi vura kaara Kotiva vika ntaihomanta vohaa enta airi vaiinti nahenti 23,000 qutu vura. Tenavuvata vika untemake iaroro.

⁹ Vika hininavu Kotira avateha tavontemake, tenavuvata vika aanaraarora. Vikaqihai vonavuvano Kotirara viva kia tinavuqaa koqema kero raqiki vaivo tivake Kotira avateha tavarare tuvaro vira kaara Kotiva *uqahi/quaiha* vara kovaro vi vaiinti nahentika aru taiqa kora.

¹⁰ Vikaqihai vonavuvano Kotirara nuntu nauntu tivaqi vuvaro vira kaara *Vaiinti Aruke Vai Enseliva* tuviro vika ruqutu vehiqama kora. Virara irihama tenavuvata vika aanaraarora.

¹¹ Tinavu kaivaqaukavara mintiakero hampi ni vuvaro Kotiva vika ntaihamake vaura. Tenavu ekaara enta aumanto vaimanta vauraukara vi uvvara iriha rauriha variate tiro, Kotira vukuqi vi uvvara qara ntuva tora.

¹² Vi uvvara irihama taukae tiha tenavu Kotira aaraqaa kempukaiqamake ni vauro ti variaka rauriha variata. Nevata qora kaiqa vareha hiqinti qora aaraqaa vivora.

¹³ Niara qora aaraqaa vuante tiro, airi haikavano ni avatareva auti vaira. Vi haikava kia niqai avatareva autiraitiro, vi haikava ekaa vaiinti nahenti avatareva auti vaira. Minti vaivaroo Kotiva niara noraiqamakero iriqiro vi vaiva, viva hampi kaiqavano ni aatarakaantorave tiro, ni kempukaiqama nimite vaira ne qora aaraqaaahai ruqemake koqe aaraqaa viva homa varianaro.

Una variqa autu tuaherake okarara tura

¹⁴ Ti navunaataario, vi uvvara irihama una variqa autu tuaherake vai okarara tauvaqa utu amitaate. ¹⁵ Ne koqe avu aato vataaka vahara ti, ne nentavano ti uva rahake taveha, koqe uvave, qora uvave, tiata. ¹⁶ Tenavu ruvaaqumavi vaiha *uaini* varake Kotirara koqema iarao tivake *kaapuqihai* vi namarira neha Karaitiva tinavuara irihamo nai naare raurukorara irihama vi namarira ne vaunara. Tenavu mparetivata nkuike neha Karaitiva tinavuara tiro nai vaata timurara iriha vi karara ne vaunara.

¹⁷ Mpareti vohaiqavanoqai vaimanta tenavu vohaa mpareti viqanaqaahai nkuike ne vaunarara ti, tenavu airi vaiinti nahenti vaiha tenavu vairera, vohaa vaatama vauro. ¹⁸ Ne Isarer i vatanaaka okarara iriata. Vika Kotira quara aantau aru amiteha, vika vi kararavata neha vika Kotira vataake vohaa vaireka minti variara.

¹⁹ Ti uva okaravano nantimakeroe vairo? Ti uva maantima keroe vairo? Una variqavano quqaa vaivaroe vaiintivano vira kara amitairaro viva vira hoe kahaqianaro? Aqao, ti uva okaravano kia mintima vairo. ²⁰ Kia Kotirara iri variaka, vika kia Kotira quara aantau aru amitaraiti, vika vaananavu aru nimite variara. Ne kia Kotirara iri variaka hampata vaiha vika vaana aru nimite karara neha, nevata vaana vataake vohaa vaivora.

²¹ Ne Nora Vaiinti vira *kaapuqihai* vira namari namake, viraqaahai oru vaananavu *kaapuqihai* nevora. Ne kia ho Nora Vaiinti taintaqaahai kara namake, viraqaahai oru vaananavu taintaqaahai vataake nevora.

²² Nora Vaiinti vira arara itaantorave ti, tenavu kia vaananavu hampata vohaaraqi variare. Kia tenavu tentanavu Nora Vaiinti aataraka kauraukama vai. Hauri tenavu tiha, Tentanavu Nora Vaiinti aatarake kempuka vaiintima vauro, tiarora.

Tenta koqemake variqi vuainararaqai iriarorave tura

²³ Kia tinavu qioqama timitaimanta tenavu ekaa kaiqa ho varaariravama vairo.

Mintiarirarovata, kiama ekaa kaiqavano tinavu ho koqema timitaanarrove. Kia tinavu qioqama timitaimanta tenavu ekaa haika ho varaariraukama vai. Mintiarirarovata kia ekaa haikavano tinavu ho kahaqianarrove. ²⁴ Vaiintivano kia nai koqema kero variqiro vuainararaqai iriqi viraitiro, viva vokikavata koqemake variqi viraravata iriqiro vuarira.

²⁵⁻²⁶ Kotira vukuqi mintima tiro:

Vatavanovata, vataihainaa karavanovata vaireva,

Noravano i haikaraqaima vairave, tura.

(*Ihi 24:1*)

Ekaa karavano Kotiva i haikava vairara ti, ne homa ekaa kara nevama vairo. Virara irihama ne homa *maaketiqihai* kara koqaama vareha nevarave. Ne vi karara koqaama vareha, kia virara ire ire iha tiha, Taihairoe vi karara varakero viri vataivo tiraiti, qaqi vi karara hampi koqaama vareha viri naata.

²⁷ Vovano kia Kotira uva iri vaira vaiintiva niara ti vataake ani kara naate tira ne mini vira vataake oru kara nareka vivera, ne kia ire ire iha tiha, Taihairoe vi karara varakero viri vataivo? tiraiti, qaqi hampi naata. ²⁸ Ne ekaa kara nareka ivaro vovano niara tiharo, Aqao, vi karara una variqanavu aru nimittaa karavama vaivo, tirera, kia vi karara naata. Toqaavu aruantorave tivakeha, vi vaiintiraravata iriha, kia vi karara naata. ²⁹ Kia te ni toqaavu aruarire tivauve turo. Te vi vaiintira toqaavu aruantorama turo. Viva ni tiva nimiharo vi karara una variqa aru amitaa karara vaivo tiramanta ne vi karara naivaro vi vaintiva tiharo, Vika vi karara kia naataara vaimanta naavaro ti toqaavu harivo, tiantora.

Te niara minti tiariraro vovano mintima tianaro, ³⁰ Aqao, te ekaa karara Kotirara koqema iaro tivake naariraro hauri vovano tiriara are qorahaama autuaro tivakero tiqaa uva vataantorave, tianaro.

³¹ Vovano tinta tiva timiharo minti tirera, te qaiqaa nai vira tiva amiha mintima tirara: Are karave, namarive, neharama nana nana kaiqae vareharama, Kotira autuvanoqai noraiqama vuarire tiharama variqira vuane, tirara. Ne virara irihama ni kena vaiinti toqaavu ntaihaantorave ti, rauriha variata.

³² Iutaa vatanaakave, Giriki vatanaakave, Ihura vainti vokiakave, ne vikara irihama, vi vatanaaka tinavu okaraqaahai higintivorave tiha rauriha variqi vuata.

³³ Ne te iainante iata. Te vo kaiqa vo kaiqa varehama ekaa vaiinti nahenti quahama nimitarer aauti vauraukama vai. Kotiva vika ekaa ntitaarire ti, te kia tenta koqemake variqi vuainarara iriraiti, te vika koqemake variqi virara noraiqaake iriha variqi vi vaunara.

11

¹ Te Karaitiva nuvaqiro vuntemake ni vaunara rara ti, nevata te iainantemake nuvaqi vuata.

Nahenti qiata naavuma terara tura

² Te ni vo uva vo uva tiva nimivaunara ne kia qaqla karaiti, ne ekaa vi uvira iriqi vi variarara ti, te niara quahema vauro.

³ Ho ne maa uvira kankomake iriate: Karaitiva ekaa vaiintiqaa raqiki vaivama vaivaro, vira vaativano nai naataqaa raqiki vaivama vaivaro, Kotiva Karaitiraqaa raqiki vaivama vaivaro.

⁴ Karaitiva ekaa vaiintiqa raqiki vairara ti, virara irihama ne ruvaaqumavi vaivaro niqihairo vaiinti vovano Kotira aarareva iharoe, Kotira uva ni tiva nimireva iharoe, himpirera, vi vaiintiva kiama nai qjata naavuma taarira. Viva nai qjata naavuma tero ni nivutana himpiro vairera, vi vaintiva Karaitira kauri haikama amianaro.

⁵ Te qaigaa tirera. Vira vaativano nai naataqaa raqiki vairara ti, ne ruvaaqumavi vaivaro niqihairo nahentivano Kotira aarareva iharoe, Kotira uva ni tiva nimireva iharoe, himpirera, vi nahentiva nai qjata naavuma taarira. Nahentivano kia nai qjata naavuma taraitiro, ni nivuqaa himpiro uva tirera, vi nahentiva nai vaati kaurira haikama amianaro. Mintira nahentiva vaireva, ehaiqohairo nai qjata ekaara muqukai nahentiva voqarama varianaro.

⁶ Ike, nahentivano nai qjata kia naavuma tairera, viva nai qjata toqa kaataarave. Nahentivano tiharo, Te tenta qjata toqakeve, muqukeve, kaurira haika varaarorave tirera, viva nai qjata naavuma taarira.

⁷ Kotiva vaiinti nai voqara autukero vatero nai autu noraiqama kaarire tiro, vira autukora. Minturara tiro, vaiintivanu Ihura vaiinti nahenti nivuqaa uva tiharo, kiama nai qjata naavuma taarira. Kotiva vaiintiqaahairo nahenti autukero vatero vaiinti autugai noraiqama kaarire tiro, nahenti autukorara tiro, nahentivano nai qjata naavuma taarira.

⁸ Kotiva vaiinti autukareva viva kia nahentiqaahairo vira autu karaitiro, viva vaiintiqaahairo nahenti autukora. ⁹ Kotiva kia nahentiara iriharo vaiinti autu kairaitiro, viva vaiintiara iriharo nahenti autu amitora. ¹⁰ Kotiva vaiintiara iriharo nahenti autu amitorara tiro, nahentivano nai vaatiara viva tijqa raqiki vaivave tivakeharo nai qjata naavuma taanaro. Viva nai qjata naavuma tairamanta *enseli* vikavata vira taveha virara tiha, Nai vaati uva iri vai nahentiravema, tivara.

¹¹ Tenavu Nora Kotira vaiinti nahenti vaunarara tiro, nahentivano kia ho nariaraa variqiro viraro vaiintivanovata kiama ho nariaraa variqiro vuanaro.

¹² Nahentivano vaireva, viva hogareru vaiintiqaahairo qovarama vurave. Vaiintivano vaireva, nahentivano vira vatataivaru qovarama vi vairave. Ho mintiharovata, ekaa haikavano Kotiraqaahairo qovaramavi vaira.

¹³ Kaiqe te maa uvvara tiari nentavano rairake taveha, hove kia hove tiata. Nahentivano kia nai qjata naavuma taraitiro, vaiinti nahenti nivuqaa himpiro Kotira aarareru, vira koqeve ianarove, kiae koqe ianarove?

¹⁴ Nevata vaiinti nahenti okarara iriha minti ti variarave: Vaiinti qjata kauhivano vukai vairera, viva kauruataarave, ti variara. ¹⁵ Nahenti qjata kauhi vukai vairera, vira koqema ianarove. Vira qjata kauhi vukaivano vira qjata aqu amitaarire tiro, Kotiva vira amitaira.

¹⁶ Ti uva aatara kareva auti vaina vaiintirara te virara minti tirera: Nahentivano vaiinti nahenti nivuqaa Kotira uva tiva nimireva iharo nai qjata kauhi naavuma taarire. Te vi uvvaraqa tiva nimiqi vi vauramanta Ihura vainti vonaini vonaini variaka, vikavata vi uvvaraqa iri variara. Kia tenavu vi uvvara qaqrake vo uva iriqi viraiti, vi uvvaraqa iriqi virera.

Tinavu Nora Vaiinti kara hampiqama keha ne vaurara tura

¹⁷ Te niara vi kaiqara vi kaiqara maantimake varaqi vuate tihamu, te ne vo kaiqa vare variarara iriha kiama niara quaheha vai. Te iruramanta ne maara tireka ruvaaqumavi variaraqaahai koqemake variataara vaimanta kia koqemake variarave.

¹⁸ Te hoqare maa uvvara naane tirera. Minti tiamanta irunara: Ne maara uva tireka ruvaaqumavi vaiha ne tiroriha rairavi variara. Niara vi uvvara tiamanta te vi uvvara irihama vi uvvara hini uva quqaa uvvama varianarove tunara.

¹⁹ Niqihai vonavuvano tiha, Tinavu uvaqaima avuqavu uva vaivo, tiamanta vonavuvano tiha, Tinavu uvaqaima avuqavu uva vaivo, ti variarave. Ne mintimake rairaviraqaahai ne avuqavumake Kotira uva iri varia vaiinti nahentika viraaqamake tavevara.

²⁰ Ne ruvaaqumavi vaiha tinavu Nora Vaiinti kara naitaramake naataara vaimanta ne hampiqama keha vira kara ne variara. ²¹ Ne ruvaaqumavi variaraqaahai vonavu nai ia karara kia vokiaka rairake nimiraiti, vika naiqoi paparugamake ne variamanta vokiaka kia kara iaka narara variara. Vokiaka narara variamanta vokiaka airi *uaini* namakeha vueraiqaaavi variara.

²² Ike, ne kia naavuqi variakave? Ne nenta naavuqi vaiha karavata namarivata nama taiqake, viragaahai oru maara tireka ruvaaqataara vaimanta, ne kia minti variara. Ne ruvaaqumavi vaiha, ni nivutaini vehi vaiinti nahenti variaka kia kara raira nimiraiti, nentaqai ne variavaro vira kaara vika toqaavu arimanta variara. Ike, vikavata Kotira vaiinti nahenti variamanta ne vika kaurira haika nimi variarave. Te ni kaiqara irihama

vira kaara nana uvae niara tirara? Te ni quahamae nimitararave? Aqao, kiama ni quahama nimitarara.

*Tinavu Nora Vaiinti kara naitaramake naate tura
(Matiu 26:26-29; Maaki 14:22-25; Ruki 22:14-20)*

²³ „Kaiqe te qaiqaa Noravano tu uvara ni tiva nimiri. „Tinavu Nora Vaiintivano naivano vi uvara ti tiva timumanta te vi uvara nivata tiva nimunara.

Vi uvava maantimama vairo: Iutaasiva vira qovarama kareva u entaraqaa Noravano Ihu Karaitiva nai vaintiaravata kara neharo mpareti varakero ²⁴ Kotirara koqema iarao tivakero mpareti vira nkuikeru nai vaintinavu nimiyo tiharo, Maara ti vaatama vaivo. Niarao tima, te vira ni nimuro. Ne tiriaria irihama vi mparetira namaqi vuate, turave.

²⁵ Ho voohaa qaramaker, viva *uaini kaapuvata* varakero tiharo, Maa namariva ti naareve. Kotiva vaiinti nahenti hampata voaharaqi avituma vireva, qaraaka uva tivataainara kempukaiqama vuarire tiro, ti naarevano vi uvara kempukaiqama kaa-narove. Tiriaria irihama ne vi namarira namaqi vuate, tura.

²⁶ Ihuva minti turara ti, ne ruvaaqumavi vaiha vi mparetiravata, vi namariravata, namaqi viha ne Noravano tinavuara iriharo qutu vurara vaiinti nahenti tiva nimi variara. Ne mintiaqi vi vaivaroo Noravano orurantero tuvuarira.

Vovano paparuqama keharo vi karara naantora

²⁷ Vi uvava mintima vairara tiro, vovano qora kaiqa varaqiro viharo Nora Vaiinti vira mparetivata vira namarivata nairera, viva Nora Vaiinti vira vaatavata vira naarevata qoraiqama amitairaro vira kaara viraqata uvama varianaro.

²⁸ Mintiarorave tiro, vaiintivane, nahentivanoe, nai avu aatoqi qora kaiqa vare variaina okarava variantorave tivakero nai avatama kero tavero, viraqaaahairo vi mparetiravata, vi namariravata, ho ne vaira.

²⁹ Vovano paparuqama kero neharo kia Noravano tinavuara iriharo qutu vurara iriraitiro, qumina mparetivata namarivata ne vauro tirera, vira kaara vi vaiintiva uvama varianaro. ³⁰ Ne ruvaaqumavi vaiha hampiqama keha vi karara ne variarara ti, vira kaara ne hininavu ugerara vaiinti nahenti variamanta hininavu aihavi haikara vare variamanta hininavu qutuvi variarave.

³¹ Tenavu vi karara nare iha avuni tentanavu avu aatoqi qora kaiqa varaaina okarava variantorave ti, tentanavu rahake tave, viraqaaahai tenavu homa vi karara vi namarira naariraro kiama tinavuqaa uvavano varianaro.

³² Tinavuara maa vataroqaa variaka hampata vaiha nora uva varevorave tiro, Noravano tinavu kaiqa avatamakero tavamaqiro viharo, tinavuara avuqavu aaraqaaqai nuate tiro, tinavu ruqutuqiro vi vaira.

³³ Ti qata vakao, vi uvava irihama ne tinavu Nora Vaiinti kara nareka iha, ne vokika veka vaimanta vikavata ani ni hampata voohaa ruvaaqumavi vaimanta vi karara naata.

³⁴ Vovano karara antuqa arirera, viva nai naauvuqi naane kara namakero viraqaaahairo ruvaaqiraqi aniarira. Ne mintimakeha naitaramake ruvaaqumavi vaivaroo Kotiva kiama niqaa uva vataanaro. Ho naantiara te ne inaini orure vo uvavata ni tiva nimirera.

12

Kotira Maraquravano vo kempuka vo kempuka vaiinti nahenti nimi vairara tura

¹ Ti qata vakao, Kotira Maraquravano vo kempuka vo kempuka ni raira nimitaaina okarara ne hampi iriqi vivora.

² Ne nenta haaru ni vau okarara iriarave. Haaru ne kia Kotirara iru entara qora kaiqavano ni vara hampiqama komanta ne oru una variqanavu maraqura kia ho uva tu haikara quahama nimite vaura.

³ Ne vi entara kia Kotira Maraqurara iriraiti, hampi ni vaurara irihama te maa uvara ni tiva nimirera. Kotira Maraquravano vaiintiqa raqiki vairera, vi vaiintiva kiama ho tiharo, Kairaro Ihuva vaaqumama vuarire, tianaro. Kotira Maraquravano kia vaiintiqa raqiki vairera, vi vaiintiva kiama ho tiharo, Ihuva viva Noravano vaivo, tianaro. Kotira Maraquravano viraqaa raqiki vaira vaiintiva, vivaqaima ho minti tianaro.

⁴ Kotira kaiqa, vo kaiqa vo kaiqa varaate tiro, Kotira Maraqura voohaa vivaqaima vi kempukara rairakero vaiinti nahenti nimi vaira. ⁵ Kotira kaiqa vo kaiqa vo kaiqa vare variavaro Nora Vaiinti voohaa vivaqaima vaiinti nahentiqa raqiki vaira. ⁶ Vaiinti nahenti vo kaiqa vo kaiqa vokiaka vara nimite variavaro Kotiva voohaa vivaqaima vika avu aato koqema nimite vaimanta minti mintimake vare variara.

⁷ Ekaa Kotira vaiinti nahenti koqemake variqi vuate tiro, Kotira Maraquravano vo qara vo qara i kaiqara vaiinti nahenti numiqe vaira. ⁸ Kotira Maraquravano vo kempuka vo

vaiinti amivaro vi vaiintiva koqe avu aato iriqiro vi vai vaiintiva vaharo koqe uva tiva nimiqiro vi vaira. Kotira Maraqura vohaa vivaqai vo vaiinti vo kempuka amivaro viva Kotira uva okara tiva nimiqiro vi vaira.

⁹ Kotira Maraqura vohaa vivaqai vo kempuka vo vaiinti amivaro viva voqamakero Kotirara iriqiro viharo quqaama Kotiva vi kaiqara vi kaiqara ho varaanarove ti vaira. Kotira Maraqura vohaa vivaqai vo kempuka amivaro vi vaiintivae, vi nahentivae, ahuvua vaiinti nahentika koqema nimite vaira.

¹⁰ Kotira Maraquravano vo kempuka amivaro vovano nora kaiqa aahuva kaiqa vare vaira. Viva vo kempuka vora amivaro viva Kotira uva qovarama keharo vutukero tiva nimi vaira. Vora vo kempuka amivaro vi vaiintiva vaharo vovano tivatai uvvara iriqiro viharo avatamakero tavero tiharo, Maa uvvara Kotiva tivatai uvarave, vi uvvara vaanavano tivatai uvarave, ti vaira. Vohaa viva vo kempuka vora amivaro vi vaiintivae, vi nahentivae, aahuva uva vo uvaqahairo ti vaira. Vohaa vivaqai vo kempuka vora amivaro viva aahuva uva ti vai vaiintira uva ho tuqantaakero iriro, viraqaaahairo vaiinti nahenti vutukero vi uvvara tiva nimi vaira.

¹¹ Kotira Maraqura vohaa vivaqai mintiaqiro viharo vo kempuka vo kempuka rairakero nimi vaira. Viva nai antuqaaqaa rairakero nimiqiro vi vaira.

Tenavu Karaitira vaata vohaa vaatama vauro tura

¹² Vaiinti vaatavano vohaiqa vaivarovata, airi vataqaahainaa haikavano viraqaa vaira. Mintima kero airi vataqaahainaa haikavano vaivarovata, vohaa vaatavanoqaima vaira. Vira voqaantema kero, Karaitira vaatavano vaireva, vohaa vaatavano vaimanta tenavu vira vaataqaahainauka airitaahaama vaunara.

¹³ Tenavu Iutaa vatanaakave, vo vatanaakave, rumpataa vaiinti nahentikave, qaqi vaiinti nahentive, vahavata, tenavu vohaa Maraquraqai varauanara. Ho tenavu vohaa Maraqura vare, viraqaaahai Karaitira vaata, vohaa vaataqai vaunara. Vohaa Maraqura-vanqai tinavu ekaa kempukaiqamake vaimanta vaunara.

¹⁴ Vaiinti vaatavano vohaiqa vaivarovata, airi vaataqaahainaa haikavano viraqaa vaira. ¹⁵ Vainti aiqvano tiharo, Te kia kauquvano vaunarara ti, te kia vaataqaahainaukave tirera, vira uvavano qumina uvama varianaro. Aiqu vivavata vaataqaahainaa haikavano vaira. ¹⁶ Vaiinti aatovano tiharo, Te kia avuvano vaunarara ti, te kia vaataqaahainaukave tirera, vira uvavanovata qumina uvama varianaro. Aato vivavata vaataqaahainavaama vairo.

¹⁷ Vaiinti vaata vaireva, vira vaatavano avuqai vairera, nantiakeroe vaiintivano uva ho irianarove? Vaiinti vaata vaireva, vira vaatavano aatoqai vairera, nantiakeroe ho uhiraanarove? ¹⁸ Tinavu vaatavano kia mintiakero vaimanta vaunara. Kotiva tinavu vaiinti vaata autiharo vi haikava kauquma varianarove, vi haikava aiquuma varianarove, tivaqiro viharo vaiinti vaata autukora.

¹⁹ Vaiintivano vaireva, kauquvanqai vairera, aiqvanoqai vairera, nantiakeroe ekaa vaatavano ho varianarove? ²⁰ Ho vaiinti vaatavano vaireva, vohaa vaatavano vaivaro airi vaataqaahainaa haikavano viraqaaata vaira.

²¹ Vaiinti vaatavano mintimakero vaivarora tiro, avuvano kia ho kauquara tiharo, Te tentaraa ho vairerave. Kiama ai kaiqa vaivo, tianaro. Qiatavanovata kia ho aiqura tiharo, Te tentaraa ho vairerave. Kiama ai kaiqa vaivo, tianaro.

²² Tinavu vaiinti vaatavano kia mintimakero vaimanta vaunara. Tenavu vo vaataqaahainaa haikara uqerai haikarave ti vaurava, vi haikava kia vairera, tenavu kiama ho koqemake vairara.

²³ Hini vaatara kia koqe irave ti vaunara, viraqaa tenavu koqemake raqiki vaunara. Hini vaatavano qoqaa variantorave ti vaunara, viraqaa koqemake tenavu utavaaqaqohai naavuma amite vaunara.

²⁴ Hini vaatara tenavu koqerave tivakeha kia naavuma taraiti, qaqi ke vaunara. Kotiva vaiinti vaata koqema kero tampama tairara tiro, vaiintivano nai vaataqaa raqikiharo hini vaatara kia koqe irave ti vaira, viraqaa koqema kero raqikiqiro vi vaira.

²⁵ Vaiinti vaatavano mintima vairara tiro, ekaa vaataqaahainaa haikavano kia rairaviro nai kaiqaqai vararaitiro, ekaa vi haikava vohaaqai vaharo nai kahaqai nai kahaqai vaira.

²⁶ Vaatavano hini mantaraini aiha virera, ekaa vaatavanomma virara ike mpo tivara. Vaatavano hini mantaraini koqema vairera, ekaa vaatavanovata quaheharo varianaro.

²⁷ Vaiinti vaataqaara tuqantaake tuna uva okarava maantimama vairo: Ne Karaitira vohaa vaatama variavo. Ne vaireka, vira vaataqaahainaa haika vohaiqa vohaiqvano variara.

²⁸ Kotiva nai vaiinti nahenti naarama kero vo kaiqa vo kaiqa nimiharo vo kempuka vo kempukavata nimura.

Avuni viva vo vaiintinavu noraiqama kero tiharo, Nenavu avuni vaiha Karaitira vakaaka vaiinti nahenti tiva nimiqi vuate tivakero, viva vonavu noraiqama kero tiharo, Ne avuni varia vaiintinavuka vika naantiaraini vaiha te qoqaiqama kaaina uvara vaiinti nahenti tiva nimiqi vuate tivakero, viva vo vaiintinavu noraiqama kero tiharo, Ne vika naantiara vaiha ti vaiinti nahenti ti kaiqa numiqaimanta vika koqemake ti aaraqaa vuate tivakero, viva vonavu noraiqama kero vikara tiharo, Ne nora kaiqa kia vaiinti nahenti tave kaiqara varaqi vuate tivakero, viva vonavu noraiqama kero vikara, Ne aihavi vaiinti nahentika koqema kaate tivakero, vonavu noraiqama kero vikara, Ne vaiinti nahenti kahaqama nimitaqi vuate tivakero, viva vonavu noraiqama kero vikara, Ne vo kaiqa vo kaiqaqaa raqikiqi vuate tivakero, vonavu noraiqama kero vikara, Ne vo uva aahuva uvaqihai tivaqiqi vuate, turave.

²⁹ Kotiva kia nai vaiinti nahenti ekaa vika vohaa qarama kero vohaa kaiqa nimirave. Ne kia ekaa ho avuni vaiha vaiinti nahentiqaa raqikiqi viraiti, ne kia ekaa ho Kotira kaiqa qoqaiqama kaaina uvvara vaiinti nahenti tiva nimiqi viraiti, ne kia ekaa ho Kotira kaiqa vaiinti nahenti numiqaraiti, ne kia ekaa ho nora kaiqa vare vairaiti, ³⁰ ne kia ekaa ho aihavi vaiinti nahentika koqema karaiti, ne kia ekaa ho aahuva uvaqihai tivaqiqi viraiti, ne kia ekaa ho aahuva uva ti uvvara tuqantaake vi uvvara okara vaiinti nahenti tiva nimiraiti variara. Aqao, Kotiva rairakero vo qara vo qara i kaiqara ni vohaiqa vohaiqa nimirave.

³¹ Ne Kotira kaiqa varareka iha, ne avuni noraiqama kero variaina kempukara virara naane ni muntukavano variarira.

Ho kaiqe te voqamake koqe aaraqaa vi okarara ni tiva nimiari.

13

Vokikara muntuka variainarara tura

¹ Vokikara muntuka vate okarara te virara ni tiva nimirera. Vi okarava vaireva, avuni vai okaravama vairo. Te vataihainaa uva vo uva ho tiha, *enseli* vika uvavata ho ti variarirarovata, ti muntukavano kia voka vokara vairera, te vo uva vo uva tiarirava qumina uvaqaima varianaro. Ti uvavano qumina *vero* auva ntairave, *taaqa/quvaa* auva ntairave, vira voqaarama varianaro.

² Te Kotiva qoqaiqama kaaina uvvara vo uva vo uva ho vaiinti nahenti tiva nimihave, te ekaa uvave, ekaa kukeqa taina uvavarave, vi uvvara vi uvvara iri variarirarovata, ti muntukavano kia voka vokara vairera, te qumina vaiintiqaima vairara.

Te Kotirara kempukaiqamake iriha ainqina vo vara venta vuru vutunto kaarirava ho vairarovata, ti muntukavano kia voka vokara vairera, te qumina vaiintiqaima vairara.

³ Te Kotirara iriha ekaa tenta airaira vehi vaiinti nahenti nimi, tenta qaqi kaariraro ihavano ti vaata ita kairarovata, ti muntukavano kia voka vokara vairera, vi haikava kiama ti kahaqiraqe te qumina mintiainara.

⁴ Nariara nariara muntuka vate okarava maantimama vairo: Vira muntukavano voka vokara vaira vajintiva vaireva, viva kia vaaka arara itaraitiro, koqemakero qihaaqamakero vaiinti nahenti kahaqianaro. Vi vaiintiva kiama vo vaiintivano airi airaira vatainarara toma amitaanaro. Vi vaiintiva kiama nai mahuta tiraitiro, viva kiama nai autuvata tuahera kaanaro.

⁵ Voka vokara muntuka vairava kiama kaurira haika vora vara amitaanaro. Viva kiama nariaraqai iriqiro vuanaro. Viva kiama qumina haika kaara arara itairaro varianaro. Viva kiama vovano vira qoraiqama amitai uvarara iriqiro viraitiro, viva vi uvvara tauruma amitaanaro.

⁶ Voka vokara muntuka vairava kiama vokika qora kaiqa vare vairara quahama nimitaraitiro, viva quqaa okararaqaima quaheharo varianaro.

⁷ Voka vokara muntuka vairava kiama popohanaara iraitiro, viva Kotirara kempukaiqama kero iriqiro viharo, viva Kotira veka viharo Kotira aaraqaa kempukaiqama kero variqiro viharo maaravano qovaraiqina entara Kotira kiama qaqa kaanaro.

⁸ Voka vokara muntuka vate okarava kiama taiqa viraitiro, qaqaqima variqiro vuanaro. Kotira uva tiva nimi vai okarava vahuqaqaima varianaro. Aahuva uva ti vai okarava taiqaima vuanaro. Ekaa haikara iri tave vai okaravavata kiama qaqa variqiro vuanaro.

⁹ Tenavu maa entara Kotira okarara kia ekaa kankomake iriraiti, tenavu hiniqai iri tavaunara ti, tenavu vi uvvara hiniqai vaiinti nahenti tiva nimi vaunara.

¹⁰ Naantiara tenavu mpeqaiqama vuaina entava qovarama virage vi entaraqaa tenavu kia hini iri tavaraiti, tenavu mpeqaiqamavi vaiha vi haikara vi haikara okara kankomake iri tavaainara.

¹¹ Haaru te naatirukaa vaiha te taaqa vainti uvaqai vi variavauraro ti avu aatovano taaqa vainti avu aatoqai vaura. Vate te vaiintiqamavi vaiha taaqa vainti okara vira qaqirakema vai.

¹² Vira voqaantemake vate tenavu Kotira vaiinti nahenti taaqa vainti voqaara vaiha Kotira okarara kia anomake iri tave vaunara. Vaiintivano *memontaaraqihairo/inupiqihairo* kia koqema kero vo haika vo haika tavaintemake, tenavuvata Kotira okara tave vaiha kia kankomake ekaa tave vaunara.

Naantiara tenavu kia *memontaaraqihai/inupiqihai* tавентемаке таварайти, qaqi qoqama таварара. Te maa entara hini uvaqai iri tave vaurauka vaiha naantiara ekaa uva kankomake iri tavarara. Kotiva ti okara kankomake таваинтемаке, naantiara te tenta okaravata kankomake таварара.

¹³ Taaramo okaranavuma qaqi variqiro vuhanaro. Kotirara kempukaiqamake iriqi vi vai okarava vaivaro, Kotira veka vaiha quaheha variqi vi vai okarava vaivaro, voka vokara muntuka vate vai okaravavata vairo. Vinavukaqihairo voka vokara muntuka vate vai okarava, vivama avuniqamakero vairo.

14

Kotira Maraqravano kempuka nimiainarara tura

¹ Virara irihama ne voka vokara muntuka vate okarara vira naane avuniqamake vataata. Ho Kotira Maraqravano vo kempuka vo kempuka nimiainarara iriha, vira varaataa ira varaqi vuata. Vaiinti nahenti Kotira vakaaka tiva nimi vai kempukara, vi kempukarara avuniqamake iriqi viha, vi kempukara timiane tiata. „Kia aahuva vo uvaqihai ti vai kempukarara avuniqamakeha iriqi viha vira timiane tiata.„

² Kotira Maraqravano vo kempuka vo vaiinti amiraro viva viraqohairo aahuva vo uva tivaqiro virera, vaiinti nahentivano kia vira uva ho iriraiti vaivaro, Kotivaqaima vira uva ho irianaro. Kotira Maraqravano vi vaiintira kahaqi vairaro viva kukeqa taina uvaraqai tivaqiro vuhanaro.

³ Vo vaiintivano kia aahuva vo uvaqihairo tiraitiro, yutukero Kotira vakaaka tiva nimi vairera, vaiinti nahentivano vira uva koqemake iri vaivarora tiro, vi vaiintiva homa vika kahaqama nimitero, vika kempukaiqama nimitero, vika muntuka kuquqama nimitaanaro.

⁴ Ne ruvaaqumavi vaivaro vo vaiintivano Kotira uva aahuva vo uva ti vairava uva tirera, vi uvava nai viraqaima kahaqama amitaanaro. Kia vo uvaqihairo tiraitiro, yutukero Kotira vakaaka tiva nimi vairaro vi vaiintira uvavano ekaa Kotira vaiinti nahentima kahaqama nimitaanaro.

⁵ Kotira Maraqravano vo kempuka ni nimira ne aahuva vo uva vo uvaqihai ti vaiva ho vairera, te virara iriha ni quahama nimitehavata, Kotira Maraqravano vo kempuka ni nimira ne Kotira vakaaka yutuke tiva nimi vaiva ho vairera, te virara voqamake ni quahama nimitarara.

Kotira vakaaka yutukero tiva nimi vaina vaiintira uvavano ni ekaa homa kahaqianaro. Vo vaiintivano aahuva uva vo uvaqihairo tivaqiro viraro kia vovano vira uva ho tuqantaakero ni tiva nimirera, vira uvavano kiama ni kahaqianaro.

⁶ Ti qata vakaao, te orure ni aahuva vo uvaqihai tiva nimi variarerera, vi uvava kiama ni ho kahaqianaro. Te orure Kotira uvave, Kotira okara kukeqa taina uvarave, ne Kotira aaraqaa nuvaqi vi vai uvarave, yutukeha ni tiva nimirera, vi uvava homa ni kahaqianaro.

⁷ Te tiremake manamana vai haikara aanumaarave, *kitaave*, vi haikarara tuqantaake tirera. Aanumaara hampiqama kero vuaqairaro viva kiama koqema kero uva tianaro. *Kitaavata* hampiqamake ruqutiraro kiama koqema kero uva tianaro.

⁸ Iqoka vaiintivano hampiqama kero *aanumaara/noma* vuaqairera, iqoka raqi vai vaiintika kiama ho qeramate vaivara.

⁹ Vira voqaantemake, ne aahuva vo uvaqihai tivaqai viha kia yutuke tivera, tavave ni uva ho irianaro? Ne kia yutuke tivera, ni uvavano qumina uvaqaima varianaro.

¹⁰ Maa vataraa vo vatanaa vo vatanaaka uvavano airi vaivaro kia vo uvavano qumina uva vaivaro ekaa vi uvava yaireva, okara vai uvavaqaima vaira. ¹¹ Vaiintivano tiriara vo uvaqihairo tirage te kia iriarera, te vi vaiintirara vo vatanaa vaiintivema tiriara vivavata tiriara vo vatanaa vaiintivema tianaro.

¹² Nevata ruvaaqumavi vaiha aahuva vo uvaqihai tivaqai vivera, ni uvavano vo vatanaaka uva voqaaqaima varianaro. Ho Kotira Maraqravano nimiaina kempukara ne vaante vaantemake varareka auti vaihara ti, ne Kotira ireha tiha, Kempuka vo timiraqe

tenavu nai kahaqama amite nai kahaqama amitemaqi vuare, tiata. Vi kempukara varerara muntuka vateha variata.

¹³ Kotira Maraqravano vaiinti vo kempuka amiraro viva aahuva vo uvaqihairo tivaqiro viharo vi uvvara okara kia iriraitiro, hauri viva ne ruvaaqumavi vairaqui vi uvvara tiantora. Vi vaiintiva Kotira irairaro vira kahaqiraro vi uvvara okara vutukero vaiinti nentiva nimiririra.

¹⁴ Te aahuva vo uvaqihai Kotira aare variariraro ti muntukavanovata Kotira aare vairaro, ti avu aatovano kia ho vi uvvara irianaro. ¹⁵ Minti vairaqa te nantie irara? Te tenta muntukaqihai aahuva uva tivaqiqi viha Kotira aare vaiha, te tenta avu aatoqohaivata vutuke tivaqiqi viha Kotira aararerera. Te tenta muntukaqihai ihi tivaqiqi viha, tenta avu aatoqohaivata irikeha vutuke ihi tivaqiqi virera.

¹⁶ Ne aahuva vo uvaqihai Kotirara koqeve tivaqiqi vi vaivaro ni muntukavanoqai vi uvvara ho iri vairarovata, ni avu aatovano kia ho irianaro. Ne minti tivaqiqi vi vaivaro vonaihainaa vaiintivanoo ni nivutana uru vaharo ni uva kia iriraitiro, viva nantiakeroe ni uvvara quqaave tianaro? ¹⁷ Ne aahuva vo uvaqihai tivaqiqi viha Kotirara koqeve tivaqiqi vi vaivaro ne koqe uva ti vaiva nintaqaima kahaqiharo kiamma ni kana vaiinti ho kahaqianaro.

¹⁸ Te nivata naatara keha aahuva vo uvaqihai airi tataa Kotira aaramaqi vi vaunaraara irihama, te Kotirara koqeve ti vaunara. ¹⁹ Kotira vaiinti nahenti ruvaaqumavi vairaqui, hauri te airi uva aahuva vo uvaqihai ti variari vika kia irivorave ti, te vilka ho iri uvvara inaaraqatantaqai vutuke tiva nimiriraro vi uvava vika homa kahaqianaro.

²⁰ Ti qata vakaao, naati vaintivanoo kia vaauq kaiqa vararaitiro koqemaa kero vaintemake, nevata kia vaauq kaiqa vararaitiro koqemaa variata. Mintimake vaiha, kia naati vaintivanoo avu aatoqiqi uva iriqiro vinantemake iriqi viraiti, ne noruqama vuaka avu aato irintemake iriha variata. ²¹ Kotira vukuvi Kotiva mintima tiro:

Vo uva ti vai vaiintika noqihai te maa vatanaaka tenta uva tiva nimirerave. Te vo vatanaaka noqihai uva tiari maa vatanaaka kia ti uva ho irivarave, tura. (*Aisaiaa 28:11, 12*)

²² Kia qaqi qumina vaiinti nahentiara iriraitiro, Kotira vaiinti nahenti vika vira kempuka tavaate tiro, Kotira Maraqravano vokiaka vo kempuka nimimanta vika aahuva vo uvaqihai ti variara.

„Vi uvava vaivaro vo uvavata maantimama vairo: „Qaqi qumina vaiinti nahentiara vika Kotira kempuka tavaate tiro, Kotira Maraqravano vaiinti vonavu vo kempuka nimimanta vika qaqi vaiinti nahenti Kotira vakaaka tiva nimi variara.

²³ Ne ruvaaqumavi vaiha aahuva uva vo uva vo uvaqihai tivaqiqi vi vaimanta kia Kotira uva iri varia vaiinti nahentika vikavata uru ni hampata vaivera, vika ne uva ti vaira irihama niara vueraiqama vuavo tivara.

²⁴ Ne ruvaaqumavi vairaqui Kotira uva vutuke tiva nimiriqi vi vaivaro vovano qaqi qumina vaiintivanoo, kia Kotira uva anomakero iri vaina vaiintivae, vivavata ni hampata vairera, ne ti vai uvava vira kahaqiraro viva tiharo, Ike, te vaauq aaraqaa ni vauraukama vauro, tianaro.

²⁵ Minti tivakero viva nai kukeqa taina uvaravata tiva qovarama kero viva hiqiriviro Kotira autu tuahereharo tiharo, Quqaama Kotiva ni nivutana vaivo, tianaro.

Maantimake Kotira uva maara tivaqiqi vuave tura

²⁶ Ti qata vakaao, ti uva okara maantimama vairo: Ne ruvaaqumavi vaivaro niqihairo vovano ihi vo tirerave tiraro, vovano Kotira uva maara tiva nimirerave tiraro, vovano Kotiva qoqaiqama kaaina uvvara tiva nimirerave tiraro, vovano aahuva vo uvaqihairo ni tiva nimi vairaro vovano vi uvvara okara ni tiva nimianaro. Ne mintiaqi viha nai kahaqiqi nai kahaqihai variata.

²⁷ Niqihai airi vaiinti nahenti aahuva vo uva tivaqiqi vivora. Taaraqantae, taaramonavue, homa aahuva vo uvaqihai tivaqiqi vivara. Vinavuka aahuva vo uvaqihai tireka iha, vohaiqa vohaiqavano tivaqiqi vi vaivaro vovano vinavuka uva tuqantaakero vira okara ni tiva nimi vaira ne ho iriata. ²⁸ Vinavuka uva tuqantaakero ni tiva nimirirava kia vairera, vinavuka evaara variata. Vinavuka nariaraiqamake vaiha Kotira hampata aahuva vo uvaqihai tivaqiqi vuata.

²⁹ Taara vaiintie, taaramo vaiintie, Kotira vakaaka ni tiva nimireka auti vaivera, ne vinavuka qaqi kaimanta tiata. Vinavuka vakaaka ni tiva nimi vaimanta ne vinavuka uva okara rairake iriqi viha variata. ³⁰ Vovano himpiro Kotira uva tiva nimi vairaro vovano oquviro vairava tiharo, Kaiqe tevata Kotiva ti tiva timi uvvara ni tiva nimirerave, avuni tiva nimi vairava nai uva vaaka taiqa kairaro viraqahairo vovano ni tiva nimiririra.

³¹ Ne mintiakeha vohaiqa vohaiqavano Kotira uva tivaqiqi viha ne ekaa nai kahaqiqi nai kahaqamaqiqi viha, nai kempukaiqama amite nai kempukaiqama amitemaqi vuata.

³² Kotira kempuka varaira vaiintiva viva nai noqaa koqemakero raqikiqiro viharo Kotira uva tiva nimiqiro vuunaro.

³³ Kotiva kia hampiara voqaara kaiqa vararaitiro, viva avuqavu naitarama kerogai kaiqa vare vairara ti, nevata kia hampiara voqaara maara uva tiraiti, avuqavuqama keha tiata.

Kotira vaiinti nahenti vo vatuka vo vatuka ruvaaquma vi variantemake, ³⁴ nevata maara tireka ruvaaqumavi vaiha kiama nahenti vika qaqi kaimanta uva tiata. Mosiva tivato uvava tiharo, Nahentivano kiama avuniqamakero varianarove, tura.

³⁵ Nahenti vika uva okara kankomake irireka iha, maaqaini vaiha nai vaativara vi uvvara okara iraata. Ne ruvaaqumavi vairaqi nahenti vovano himpiro uva tirera, vi okarava kiama koqe qianaro. ³⁶ Ike, Kotira uvavano ni Korinti vatanaakaqaahairoe avuni qovarama vurave? Vi uvava niqiae kahaqireva qovarama vurave? Kiave.

³⁷ Vovano nariara tiharo, Te Kotira uva ti vauraukave. Kotira Maraqravano vo kempuka timimanta te vauraukave tirera, vi vaiintiva ti uvarara quqaavema tiarira. Viva te ti vauna uvarara, Noravano tivatai uvaravema tiarira. ³⁸ Vi vaiintiva ti uvvara kia noraiqaakero irirera, ne vi vaiintira uva kia iriata.

³⁹ Ho ti qata vakaao, Kotira uva vakaaka vaiinti nahenti tiva nimi kempukara, vi kempukara ni varataa iramanta variata. Niqihairo vovano aahuva vo uvaqihairo ni tiva nimireva auti vairera, kia vira qioqama amitaraiti, virara homa tinarave tiata.

⁴⁰ Ne ruvaaqumavi vaiha kia hampiara voqaara Kotira uva maara tiraiti, koqemake naitaramake tivaqiqi viha variata.

15

Karaitiva qutu vuraqihairo qaiqaa qaqi himpurara tura

¹ Ti qata vakaao, te Karaitira vakaaka ni tiva nimiavaunaraqaiqaa ni tiva nimiari ne vi uvvara irihama variata. Te tota vi uvvara ni tiva nimiavauramanta ne vi uvarara quqaa uvave tivake, vi entaraqaahai ne vi uvarara kempukaiqamake iriqi vi variara.

² Karaitira vakaaka ni tiva nimiavaunara ne vi uvvara kia tuta karaiti, koqemake tuataqi viha variqi vivera, vi uvava ni kahaqiraro Kotiva kia ni qaqira karaitiro ni nttaanaro. Ne vi uvvara kia koqemake tuataqi vivera, ne haaru quqaave tu uvava kia ni ho kahaqianaro.

³ Vi uvvara ti tiva timumanta te vi uvarara avuhainaa uvavano vaivo tivake vi uvvara ni tiva nimiavaunara. Te niara mintima ti: Tenavu qora kaiqa vare vauna uvava nunka taiqa vuarire tiro, Karaitiva tinavuara iriharo qutu vura. Kotira vukuqi haaru qara ntuvato uvava tuntemakero, viva gutu vura. *(Aisaiaa 53:5-12)*

⁴ Karaitiva qutu vumanta vataqiqi quntama tovaro taaramo enta varakero, viraqaaahairo qaiqaa qaqi himpura. Kotira vukuqi haaru qara ntuvato uvava tuntemakero, viva qaiqaa qaqi himpura.

⁵ Karaitiva qutu vuraqihairo qaiqaa qaqi himpiro oru Pitaara avuqaa qovarama viro, viraqaaahairo viva nai vainti 12navu nivuqaavata qovarama viro, ⁶ viraqaaahairo nai vainti airitahaa 500navu nivuqaavata qovarama vumanta vika vira tavora. Vate maa entara vi vainti nahentika hininavu qutu vuamanta hini airinavuma qaqi vai.

⁷ Ihuva nai vainti vika nivuqaa qovarama viro, viraqaaahairo Ihuva Iemira avuqaa vata qovarama viro, viraqaaahairo ekaa nai noraiqamako vaiintinavuka nivuqaavata qovarama vumanta vika vira ekaa tavora.

⁸ Karaitiva mintiaqiro viro, ekaanaini ti tivuqaavata qovarama vumanta tavaavaunara. Vainti vo vatatai entava aitaraiwaro vira naantiara vatataintemake, te naantiaraini Karaitira vaintiqama vuunara. ⁹ Ihuva noraiqama kai vaiintikaihai te vairera, uapaa vaiintivanoqai vuunara. Tota te Karaitira avataqi ni vau vaiinti nahentika anomake qoraiqama nimitaqi vi variavaunarara ti, kia tiriara Karaitiva vira noraiqama kai vaiintirave tiataara.

¹⁰ Ho Kotiva ti aaqurihama timiteharo koqema timitaimantara ti, te mintimake nora vaiinti vuunara. Kotiva ti koqema timitaimanta kia te qaqi qumina vairaiti, Karaitiva noraiqama kai vaiintinavukaqaihai te voqavata kempukaiqamake kaiqa vare vuunara. Ho kia te tenta kempukaqaahai vira kaiqa varaqi vi vuunara. Kotiva ti koqema timiteharo nai kempuka timimantara ti, te vira kaiqa varaqi vi vuunara. ¹¹ Teve, vinavukave, Karaitira vakaaka ni tiva nimi vuunara, kia te virara noraiqaake irirara. Tenavu miqo maago vohaa uvaqai ni tiva nimi variavauramanta ne vi uvarara quqaave turara ti, te virarama noraiqaake iri vai.

Tenavu qutu vuainaraqaihai qaiqaa qaqi himpuainarara tura

¹² Tenavu vakaaka ni tiva nimiha Karaitiva qutu vuraqihairo qaiqaa qaqi himpivo tiavaunara. Ho ne hininavu nantihae tiha, Qutuvi vaiinti nahentika kia ho qaiqaa qaqi himpivarave, ti variavo?

¹³ Quqaa qutu vuaka kia himpuare tiatirio, kiama Kotiva Karaitira qaiqaa qaqi vara himpima kaitirio. ¹⁴ Kotiva kia Karaitira qaiqaa qaqi vara himpima kaare titirio, tenavu quminama uva ni tiva nimi vauramanta ne quminama Karaitirara quqaa vivave tiatirio.

¹⁵ Ike, tenavu ni tiva nimihama quqaama Kotiva Karaitira qaiqaa qaqi vara himpima kaivo tuna uvava, vi uvava kia quqaa uva vairarovauve, vovano tinavuara tiharo, Kotiva kia Karaitira qaiqaa qaqi vara himpima kairave. Ne Kotirara una uvaqaima ti variavo, tianaro.

¹⁶ Kotiva kia ho qutu vuaka qaiqaa qaqi vara himpimake vaiva variare titirio, viva kiama ho Karaitiravata qaiqaa qaqi vara himpima kaitirio. ¹⁷ Kotiva kia Karaitira qaiqaa qaqi vara himpima kaare titirio, ne Karaitirara quminama quqaave tiavaru niqaa uva vaiva kia taiqa viraitiro, qaqima vaitirio. ¹⁸ Kotiva kia Karaitira qaiqaa qaqi vara himpima kaare titirio, vaiinti nahenti Karaitirara quqaave tivake vuru qutu vuaka, vikavata kia qaiqaa qaqi himpiraiti, ekaarama taiqa vuatirio.

¹⁹ Tenavu Karaitira veka variqi vi vuru qumina qutuvi kia qaiqaa qaqi himpuarirauka varierera, vira kaara homa maa vataraqaa variaka tinavu naaraihamma timiteha ike mpo tiva timitevara.

²⁰ Vika kiama ho vira kaara tinavu naaraihamma timitevara. Karaitiva qutu vuvaro Kotiva vira quqaama qaiqaa qaqi vara himpima kora. Kara ututaivarо hoqare irataiva naane mpeqaiqama vintema kero, Karaitiva naane qutu vuraqihairo qaiqaa qaqi himpurara ti, Karaitirara quqaave tivake qutuvika, vikavata naantiara qaiqaa qaqima himpivara.

²¹ Tota vaiinti vohaiqaqaahairo qutuvi okarava qovarama vurama. Qaiqaa vohaa qarama kero, vainti vohaiqaqaahairo qaqi himpi variqi vi okarava qovarama viro.

²² Tenavu ekaa Adaamura vaintivara vaihara ti, tenavu ekaa qutu vuaraukama vaunara. Vohaa qaramake, tenavu Karaitira vaintiqamavi vaihara ti, naantiara tenavu ekaa qaiqaa qaqi himpi variqi virara.

²³ Naantiara kia tenavu hampiara voqaara qaiqaa qaqi himpiraiti, tenavu naitaramake vohaiqa vohaiqvano qaiqaa qaqi himpirara. Karaitiva naane qutu vuraqihairo qaiqaa qaqi himpurara ti, Karaitiva qaiqaa vataini orurante tuvuaina entaraqaa vira vaiinti nahenti vika qaiqaa qaqima himpi vaivara.

²⁴ Vika qaiqaa qaqi himpi vaivaro, viraqaahairoma taiqaaina entava aniraanaro. Vi entaraqaa Karaitiva mpeqaiqama keharo vo vatanaa vo vatanaaka *kamaanira* taiqa kero, ekaa vo haika vo haikavano vira navutaiqi vai haikara naatara kero, ekaa kempuka vatekavata naatara kero vuru nai Qora Kotira kauquqi kero tiharo, Te ekaa vi haikara naatarama kauro. Are ekaa vi haikaraqaa homa raqikiqira vinarave, tianaro.

²⁵⁻²⁶ Karaitiva mpeqavano vaihara nai navutaaka aatara aataramaqi viviro, vuru ekaanaini Karaitiva qutuvi vai okararavata aatara kairaro vi okarava kiama qaiqaavata varianaro.

²⁷ Kotira vukuqi mintima tiro:

Kotiva ekaa haika Karaitira vevaarainiqama kairaro Karaitiva ekaa vi haikaraqaa raqikiqiro vuanarove, tura. *(Ihi 8:6)*

[Karaitiva ekaa vi haikaraqaa raqikiqiri viharoma viva kiama Kotiva nai vira noraiqama kainaraqaa raqikianaro.]

²⁸ Naantiara Karaitiva ekaa vi haikaraqaa raqikiqiro viharo viva nai vira Maaquvano vaihara Kotira vevaarainiqama viro vairaro Kotiva Karaitiraqaaavata ekaa haikaraqaaavata raqikiqiro vuanaro.

²⁹ Karaitiva qaiqaa qaqi himpu uvava kia quqaa uva vairavauve, vokiaka qutu vuakara iriha quminama namari vare variara. Qutu vuaka kia qaiqaa qaqi himpivarave tia uvava quqaa uva vairavauve, vokiaka quminama vika kahaqireka namari vare variara.

³⁰ Kia tenavu qutu vuainaraqihai qaiqaa qaqi himpi vaireravauve, tenavu ekaa enta quminama tinavu qoraiqama timite variaka varianaini vi ani vaunara.

³¹ Ti qata vakao, Ihu Karaitiva niqaavata tqaavata raqiki vaimanta te niara quahe vaunara ti, te vutuke ni tiva nimirera: Vo enta vo enta ti haruke ruhiqauri variamanta vauro.

³² Kia tenavu qutu vuainaraqihai qaiqaa qaqi himpi variainaravauve, quminama te Epasaasini vaiinti vonavu hampata qaakau aantau vahi voqaara raquqi vi variavaunara. Kotiva qutu vika kia qaiqaa qaqi vara himpimake vaiva vairavauve, kaiqenavu hurae morae qutuainarara kia noraiqaake iriraiti, karavata iha namarivata namaq'i virara.

³³ Hauri vokika niara una uva timanta ne vika uva avataqi vivora. Uvavano mintima tiro:

Vaiintivano vaaqu vaiintinavu hampata variqiro viharo vivavata vaaqu vaiintiqama vuanarove, tura. *(Aisaiaa 22:13)*

³⁴ Virara irihama ni avu aatovano kenko tira vaaqu kaiqa varera qaqira kaata. Niqihai vaiinti vonavu kia Kotira okarara iriraiti, hampi uva ti variara kaara vikavata nevata kauruataarave.

Qaiqaa qaqi himpuaina okarara tura

³⁵ Vovano maantima kero ti iraanaro: Nantiakeroe Kotiva qutu vika qaiqaa qaqi vara himpima kaanarove? Nana vaata vataukae qutu vika qaiqaa qaqi himpivarave? tianaro. Vovano minti tirera, te nai vira maantimake tiva amirera: ³⁶ Ai avu aato qumimaqamae vivo? Are kiae iriarao? Are auru vataqi ututairaro auruvano kia takuma viro nuhiqama virera, karavano kia ho qampiqaanarove.

³⁷ Are *uiti* aurue vo aurue utihara, are kiama nora vira airantera ntavakera utiraitira, auruqaima utinara. ³⁸ Kotiva tivaro vo auruqihairo nai vi karava qampiqa vivaro, vo auruqihairo nai vo karavano qampiqa vi vaira. *Vira voqaantemake*, tenavu qutu vuainaraqihai qaiqaa qaqi himpi variariraro tinavu vaatavano voqarama keroma varianaro.

³⁹ Vaiinti vaatavanovata, aantau vahi vaatavanovata, kia vohaa qaramakero vaira. Vaiinti vaatavanove, aantau vahi vaatavanove, uviri vaatavanove, havuka vaanti vaatavanove, nai vo vaata vo vaatama vaira.

⁴⁰ Naaruvinai vai haikava vo vaata vo vatavaro vataini vai haikava vo vaata vo vaatama vaira. Naaruvinai itai haikava voqarama kero ataa iharo vatavaro, vataini vai haikava voqarama kero ataa iharo vaira. ⁴¹ Kuarivano iteharo voqarama kero ite vatavaro, toravano voqarama kero ite vatavaro, opu makauvano vo qara vo qarama kero ite vaira.

⁴² Vi haikava vi haikava vo qara vo qarama kero vairaro vira voqaantemake kero, naantiara tinavu vaatavanovata qutu vuainaraqihairo qaiqaa qaqi himpiro aahuva vo qarama keroma varianaro. Tinavu vaata vataqi quntama taavararo nteraaaina vaatavama vairo. Naantiara tinavu qaiqaa qaqi himpima kaaina vaatava qaraaka vaatavano kia nteraaaina vaatavama varianaro.

⁴³ Tinavu vaata vataqi quntama taavararo uquerara vaata kia koqe vaatama vairo. Naantiara tinavu qaiqaa qaqi himpima kaaina vaatava kempuka vaatavano koqe vaatama varianaro. ⁴⁴ Tinavu vaatavano maa vataraqaa variare tiro autukairara ti, vi vaatara vata maini quntama te variara. Naantiara tinavuara naaruvinai variate tiro, naaruvinai variaina vaatava qaiqaa vara himpima kaanaro. Maa vataraqaa variaina vaatava vatavaro naaruvinai variaina vaatavavata vaira. ⁴⁵ Vi uvarara Kotira vukuqi mintima tiro:

Kotiva hoqarencaa vaiinti Adaamura autu kovaro viva himpiro qaiqiro vi vaurave, tura. *(Okara 2:7)*

Vi vaiintiva mintima vauvaro vira naantiara vaiinti vovano Karaitiva ekaa vaiinti nahentiera qaiqiri variqi vuate tiro, qovarama viro vaura.

⁴⁶ Kia vaiinti nahentivano naaruvinai variqi vi okarara naane qovarama karaitiro, vika vataini variqi vira naane qovarama kero, viraqaahairo naantiarama naaruvinai variqi vi okarara qovarama kaanaro.

⁴⁷ Hoqarencaa vaiinti Adaamuva vaireva, vira vataqohairo autu kovaro maa vataraqaa vaura. Vira naantiara vaiinti vovano Karaitiva naaruvhairo vataini tuvurero vaura.

⁴⁸ Maa vataraqaa variaka vaireka, vika vataqohairo aututo vaiintira voqaarama variara. Naaruvinai vaika vaireka, vika naaruvhairo tuvi vaaqarama vaavara.

⁴⁹ Maa entara tenavu vataqohairo aututai vaiintira Adaamura voqaara vaunara. Naantiara tenavu naaruvhaina vaiinti Karaitira voqaarama vairara.

⁵⁰ Ti qata vakaao, te ni tiva nimirera. Vaiinti nahenti maa vaatara vataake vaika, vika kiama Kotiva raqiki vaina vatukaraqi ho vivara. Kia ntere vaina vatukaraqi nteraaaina vaiintiva kiama ho vuunaro.

⁵¹ Kaiqe te Kotiva kukega taaina uvara vo ni tiva nimiari. Kiama tenavu ekaa qutu viraiti, tenavu hininavu qaiqiri variqi viha, viraqaahai vaakama tenavu ekaa voqaramake qovaramavi vairarave.

⁵² Tenavu hininavu variariraro naantiara ekaara entaqaa *aanumaara/noma* vuaqairaro Kotiva qutu vika qaiqaa qaqi vara himpima kaira vika viraqaahai kia qaiqaavata qutuvi nteraa viraiti, qaiqiri variqi vivara. Tenavu ekaa vi entaraqaa voqaramake qovaramavi vairara.

⁵³ Tenavu nteraaaina vaatara vatauka variqi vivi, vi entaraqaahai kuquvi, kia nteraaaina vaatara vatauka vaiha qaqi variqi virera. Tenavu qutu vuaina vaatara vatauka variqi vivi, vi entaraqaahai kuquvi, kia qutu vuaina vaatara vatauka qaqi variqi virera.

⁵⁴ Tenavu nteraaaina vaatara vatauka kuquvi, kia nteraaaina vaatara vare, viraqaahai qaqi variqi virera. Tenavu qutu vuaina vaatara vatauka kuquvi, kia ho qutu vuaina vaatara vare, viraqaahai qaqi variqi vuariraro vi entara haaru qara ntuvato uvava vivauma varianaro.

Vi entara vi uvava tinantemake tenavu mintima tirara:

Qutira okaravano tuvi taraiarov Kotiva vira aatara kairave.

⁵⁵ Qutira okaravauvu, are iriane. Are vaiinti arukera aatara ke variana kempukava tainie vaivo?

Ai aaraivano vaiinti nkaqe vaiva tainie vaivo?

(Hosea 13:14)

⁵⁶ Maa entara vaiinti nahenti vaaku kaiqa vare variarara tiro, qutuvi okarava vaiinti nahenti nkaqe vaira. Vaiinti nahenti Kotiva tivato uvvara raqake variarara tiro, qora kaiqa kempukavano vaiinti nahentiqa raqiqiyo vi vaira.

⁵⁷ Ho tinavu Noravano Ihu Karaitiva quti varia okarara aatara kero qaiqaa qaqi himpirara tiro, Kotiva tinavuvata kempukaiqama kaimanta tenavu homa quti varia okarara aatarake qaiqaa qaqi himpi vairara. Virara irihama tenavu Kotira autu tuahereha virara koqemave ti vaunara.

⁵⁸ Ti qata vakao, ne vi uvvara irihama kempukaiqaavi variqi viha variata. Ne maa uvvara iriarave. Ne Nora Vaiinti kaiqa vara amite vaivarao kiama ni kaiqa vovano quminaiqama vuuanaro. Virara irihama ne kempukaiqamake vira kaiqa vara amitaqiu vuata.

16

Iutaa vatanaaka monu nimireka urara tura

¹ Kotira vaiinti nahenti Iutia vataini variaka kia koqemake variakara irihama ne vika kahaqireka monu ruvaaquma kerara tirera: Te Karesia vataini vaiha Ihura vaiinti nahenti mini variaka tiva nimi vaunantemake, nivata tiva nimiari nevata vika inte iata. ² Vo Sante vo Santeqaa ne vohaiqa vohaiqvano nenta monu hini qaqi vataqi vivaro airiqamakero variarira. Ne mintiaqi vi valqe te ne inaini orure kia niara qaiqaavata monu ruvaaquma timiate tirara.

³ Naantiara te ne inaini oruraari ne vaiinti vonavu autu ti timiqe te vinavuka qara nimiha nititaari vika vi monura varemava feruharemini vuru nimiata.

⁴ Vi entara te Ieruharemini vo kaiqa varaarirava vairera, vinavuka ti vataake homa mini vivara.

Poruva nai nuainarara tura

⁵ Te Masedonia maaqaini vatuka vatuka nuariraukara ti, te mini naane nuvake, naantiara ni oru tavarera. ⁶ Ni hampata oru vaiha te yukai entae, kuari kia noraiqaakero itaaina entarae, ni hampata vaiha qaiqaa taini taini virera iari nevata ti kahaqiqe te mini mini virara. ⁷ Kia te vo vatumainiara viha ni hampata vahuqa vaireravauve. Noravano hove tirera, te ni hampata vukaiqamake vairera.

⁸ Ho te vate Epasaasi mainiqai variqi vuariraro Pentikosi ovata ne entava aniraarire.

⁹ Maini te vo vaili vo vaiinti Kotira aara numiqairarava airi vaimantara ti, te mainiqai variqi virera. Te maini Kotira kaiqa vare vauramanta airi vaiinti tinavu navutaiqama timite variamantavata, te Karaitira vaiinti nahentiarao ti, mainiqai vairera.

¹⁰ Timotiva te varauantema kero, Nora Vaiinti vira kaiqa vare vairara tiro, viva ne vainaini oru ntairera, ne vira quahama amitehama vira vitaata. ¹¹ Virara irihama hauri niqihairo vovano Timotirara qumina vaiintive tiharo vira tauvaqa utu amitaantora. Ne Timotirara viva Karaitira kaiqa vaiintivano vaivo tivakeha vira kahagamake aaraini vuru kaivarao viva koqema kero te iainanaini aniarira. Te viravata tinavu qata vakauka vonavuvata vekama vauro.

¹² Te tinavu qata vakaa Apolosirara tirera. Te vo enta vo enta niara irihama virara mintima ti: Tinavu qata vakauka vonavu Korintini vire ika are vinavuka hampata mini vuane, tivake vuana vaina turaro viva kia vate mini vuataaivaro kia viro. Naantiara aaravano ho vairera, viva ne inaini vuuanaro.

Poruva ekaara uva tura

¹³ Ne rauriha taveha variata. Ne Karaitirara ququaave tiraqaa kempukaiqaake variata. Kia qetaraiti, vaiinti tarukama variata. Kempukaiqaavi variata. ¹⁴ Nariara nariara muntuka vateha ekaa kaiqa varaqi vuata.

¹⁵ Ne Sefanaasiraravata, vira naavuqi variakaravata, kankomake iriara. Te haaru Akaiaini vaiha Karaitira uva vi vatanaaka tiva nimiavauramanta vika naane ququaave tivake, viraqaahai voqamake Kotira vaiinti nahenti kahaqireka autiha variara. Ti qata vakaao, te niara ike mpo tihamo mintima ti: ¹⁶ Ne vi vaiintinavukavata, vinavuka hampata kaiqa vare variakavata, vevaaraini vaiha, vika uvama iriqi vuata.

¹⁷ Niqihai Sefanaasivavata, Fotunatusivavata, Akaikusivavata, te unanaini aniamanta te vinavukara quahehama vauro. Te kia ni tavauraro ti muntukavano qoraiqimanta vauramanta vinavuka te vaunanaini anire ni uva tiva timiamanta iri, te virara quahehama vauro.

¹⁸ Vinavuka ni muntuka koqema nimitaantemake, vinavuka maini ani vaiha ti muntukavata koqema timitaamanta vauro. Ne minti vai vaiintika nutu viriniqama kaata.

¹⁹ Karaitira vaiinti nahenti Esiaini vona vona variaka niara irihama ni uva mante variavo. Akulaaka vira naata Prisilaaka vitantavata, vitanta naavuqi ruvaaqumavi variakavata, vinavuka Nora Vaiinti autuara irihama ni uva mantama nimitaavo.

²⁰ Tinavu qata vakauka maini variaka, vikavata ni uva mantama nimite vai. Ne nai uva mante nai uva mante iha, nai kauqu ami nai kauqu amiha variata.

²¹ Ho te tenta kauquqohai maa uvvara qara ntuvate:

Te Porukama ni uva mantama nimitauro.

²² Nora Vaiintiara kia muntuka vataira vaiintira kaivaro viro ekaara vehiqama vuarire. *Marana ta—Mpo, Nora Vaiintio, vaaka orurantertu tuvuane.*

²³ Tinavu Noravano Ihuva ni koqema nimitaarire.

²⁴ Nevata tevata Ihu Karaitirainiqama vuraukara ti, ti muntukavano niara vaimantama vauro.

2 KORINTI

Poruva Korinti vatanaakaini vo qara naantiara vara kora

Poruva vohaa ihi varakero Masedoniaini vaharo Korinti vatanaaka qara vovata ntuvu nimitora. Poruva vi vatanaaka Kotiva nai noraiqama kovaro Ihu Karaitira kaiqa vare vau okarara tiva nimiharo maa uvvara qara ruva nimitora.

¹ Te Poruka. Kotiva timanta te noraiqaavi Ihu Karaitira vakaaka tiva nimi vauraukama vai. Tetanta tinavu qata vakaas Timotikanti ne Kotira vaiinti nahenti Korintiqi variakaravata, ekaa Kotira vaiinti nahenti Akaiaini variakaravata, ni qara nimite.

² Tinavu qova Kotivavata, Noravano Ihu Karaitivavata, ni koqema nimiteha aaqurihama nimitaivaro ni muntukaqihairo paru i vaira variata.

Poruva Kotirara koqema iarao tura

³ Kaiqenavu Kotirara koqema iarao tiha vira quahama amitaari. Viva Variqavano vaharo tinavu Nora Vaiinti Ihu Karaitira vira Qovama vairo. Kotiva tinavu Qova vaivaro ekaa aaqurihama timitaaina okaravavata, muntuka kuquqama timitaaina okaravavata, viraaqahairo qovaraiqi vaira. ⁴Tinavu vo maara vo maara vare vaiha mpo ike ti vauraro Kotiva tinavu muntuka kuquqama timite vaira. Kotiva tinavu muntuka kuquqama timite vaimantara ti, tenavu tavaari vaiinti nahenti vo maara vo maara vare vaise, tenavuvata Kotiva tinavu muntuka kuquqama timite vainantemake, vaiinti nahenti vika muntukavata kuquqama nimitaari.

⁵ Karaitiva aihavi haikara varaqiro vimanta tenavu vira vataake vohaa vaiha aihavi haikara varaqi vi vaunara. Vira voqaa Kotiva Karaitira muntuka kuqu-qama amitainantemra kero, Kotiva tinavu muntukavata kuquqama timitaanaro.

⁶ Kia tenavu quminavauve aihavi haikara vare vaunara. Kotiva ni muntuka kuquqama nimitero ni ntitaarire ti, tenavu aihavi haikara vare vai. Tenavu aihavi haikara vare vauraro Kotiva tinavu muntuka kuquqama timitaimantara ti, tenavuvata homa ni muntukavata kuquqama nimiteha tiha, Tenavu ni aanare aihavi haikara varaunarave. Nevata kempukaiqaake variate, tirara.

⁷ Ne tinavu aanare aihavina haikara varaqi vivera, Kotiva tinavu muntuka kuquqama timitainantemra kero, ni muntukavata kuquqama nimitaanaro. Tenavu virara iriha niara tiha, Ne kia popohanaara iraiti, kempukaiqaake variqi vuatema, turo.

⁸ Tinavu qata vakaao, tenavu haaru Esiaini niha maara vare variavauna uvvara ne kia anomake irivora. Vi entara nora maara, vo maara vo maara tinavuqaa vate vaumanta tenavu tiha, Ike, kia ho vi maarara vare qaqi vairaraiti, qutuma virarave, tiavaunara.

⁹ Vi entara tenavu tiha, Oho, tenavu kia qaqi vairaraiti, qutu vuarira entavama aniravo, tiavaunara. Tenavu minti tivake tavaavauraro tentanavu kahaqiarira aarava kia ho vaumanta viraqaahai tenavu Kotiva qutu vua vaiinti nahentika qaqi vara himpiimake viva, vivaqai tinavu ho kahaqianarove tivake, viraraqai kempukaiqamake iriqi vi variavaunara.

¹⁰ Vi entara tenavu qutu vuarirava aumanto vauvaro Kotiva tinavu viraqihairo ruaruama timitora. Kotiva vi entara tinavu ruaruama timitontemra kero, naantiaravata Kotiva tinavu mintima timitaanaro. Tenavu Kotiraqaaata muntuvu vaiha tiha, viva qaquaqaiqamake tinavu kahaqama timitaqiro vuanarove, turo.

¹¹ Nevata tinavuvara iriha Kotira aaramaqi vivaro viva tinavu kahaqama timitaarire. Airi vaiinti nahenti tinavuvara iriha Kotira aarama timitaivera, Kotiva tinavu koqema timiteharo kahaqama timitaaira viraqaahai airi vaiinti nahenti Kotira quahama amitevara.

Poruva kia Korintini vurara kankoma kero vika tiva nimura

¹² Tenavu vaiinti nahenti nivuqaa ni vauraro kia vo haika kaara tinavu toqaavu harimanta tenavu koqemake vika nivuqaa ni vaunarara ti, tenavu virara iriha quaheha koqeve ti vaunara. Tenavu vaiinti nahenti nivuqaa niha kia unaqaraiqaake vikaqihai vo haika vararerave tiraiti, tenavu Kotiva tinavu koqema timite vainerara iriha, Kotira kaiqaqai varaqi viha avuqavugamake ni vaunara. Tenavu vo vaiinti nahenti nivuqaa-vata, ni nivuqaavata, niha mintiaqi vi vaunara.

¹³⁻¹⁴Tenavu ni qara nimiteha kia qumina vo uva ni tiva nimiraiti, ne ho iri vai uvvaraqai tiva nimi vaunara. Ne vate maa entara tinavu uva hiniqai iriaka vaiha, naantiara ne tinavu uva ekaa irivera, te virara hovema tirara. Ne tinavu uva kankomake iriqi vi, naantiara Noravano Ihuva tuvuaina entaraqaa ne tinavu quahama timitaiqe tenavu nintavata quahama nimirarara.

¹⁵⁻¹⁶ Tota te niara homa vika ti tavehama ti quahama timitevarave tivake, te ni tavarera auti vaiha mintima ti: Kaiqe Masedoniaini viha ni ori tave, qaiqaa vihai orurante anihai ni ai tavaarimanta ne taara tataa ti tavaiqe te ni koqema nimitaari, viraqaahai ne ti tivita vare aaraini vuru kaiqe te Iutiaini virererave, tiavaunara.

¹⁷ Te minti tivake ni oru tavarare tivakevata, kia vuavaunara. Tota te ni unaqaraiqamake oru tavararerave tiavaunara? Vovano vataihinaa uva okarara iriharo tintemake, tevata taara uva tihae eo mintirerave, kia mintirerave, ti variavaunarave?

¹⁸ Te Kotira quqaa okarara irihama tenta kauqu ainqiqa aquukeha tiha, Kia tenavu niara unahaa tiha, Eo mintirerave, kia mintirerave, tivaqi viha ni tiva nimi variavaunarave, turo. ¹⁹ Sailaasivavata, Timotivavata, tevata, tenavu ni nivutana vaiha Ihu Karaitira vakaaka ni tiva nimi variavaunara. Ho Ihu Karaitiva Kotira Maaquvano kia unaqaraiqama keharo taara uva tiraitiro, viva vohaa uva quqaa uvaqai ti vaivara tiro, viva te mintirerave tivakeharo quqaa minti vaira.

²⁰ Kotiva nai kauqu ainqiqa aquukeharo te mintirerave tivatai uvvara, ekaa vi uvava vivauma variarie tiro, Karaitiva qovarama vura. Karaitiva qovarama viro Kotira kaiqa varaqiro vurara ti, tenavu Karaitira kaiqara irihama Kotirara ai uva quqaa uvama vaivo tivakeha vira autu tuahere vaunara.

²¹ Kotiva naima nivata tinavuvata kempukaiqama timitaimanta tenavu Karaitira vataake vohaaqa variqi vi vaunara. Tinavuara nai kaiqa vara timitaate tiro, Kotiva naima tinavu noraiqama kaira.

²² Kotiva tinavu nai kaama tero viraqaahairo nai uvavano kempukaiqama vuarire tiro, viva nai Maraqua tinavu muntukaqi vataira. Vira Maraquaravano tinavu muntukaqi vaimantara ti, tenavu tiha, Quqaama Kotiva naantiara tinavu tivitaanarove, ti vaunara.

²³ Te Kotira autuqaa quqaa uvaqai tirera. Te oru Korintini vaiha vo uva kaara ni nitiariraro ni muntukavano qoraiqiantorave ti, te qaqirake kia mini vuavaunara. ²⁴ Kia tenavu nora vaiinti voqaantemake vaiha niara kempukaiqaake vi uvvara vi uvvara avataqi vuote tireravauve. Aqao, tenavu tavauramanta ne Karaitira uva ho iriqi vi variara. Ne Karaitira uva iriha quahela variate tivakeha, tenavu ni kena vaiintiqaai vaiha ni hampata kaiqa varaqi virera auti vaunara.

2

¹ Vi uvarara irihama, te vo uva kaara ni oru nitiariraro ni muntukavano qoraiqiantorave ti, te qaqirake kia ni oru tavarera mini vuavaunara. ² Te ni oru nitiariraro ni muntukavano qoraiqirera, viraqaahairo tavave ti muntuka koqema timitairaqe te quahela vairara? Kiama vovano ti muntuka koqema timitairava varianaro. Ne ti muntuka koqema timiti variakara ti, hauri te ni nitiariraro ni muntukavano qoraiqiramanta vaiha ne kia ti muntuka koqema timitevora.

³ Te virara irihama haaru ne vaunaini qara vo vara kaavauraro vurama. Te niara tiha, Ti muntuka koqema timite variaka variavaro ti muntukavano qoraiqiantorave tivake, te kia ni oru mini tavaraiti, qaraqai nini vara kaavauraro vurave. Ti muntukavano koqema kero variaina entara ni muntukavanovata kogemakeroma varianarove, tunarave.

⁴ Te vi uvvara qara nti variavauraro ti muntukavano qoraiqi vaumanta te iq'i rateha qara ntuva taavaunara. Te qara nthihamia kia ni muntukavano qoraiqiarire ti, qara ntuva taavaunara. Ti muntukavano niara voqavata vaira, virara ne kankomake iriate tivake, te ni qara ntuva nimitavaunara.

Vo vaiinti uva taiqa kaate tura

⁵ Ni nivutana vaiinti vovano qora kaiqa varovaro vira kaara kia ti muntukavanoqai qoraiqumanta variavaunarave. Ekaa ni muntukavanovata vira kaara qoraiqumanta vaurave. Ho kia te qaiqaavata vi vaiintirara kempuka uva tirerave.

⁶ Te tavauramanta niquihai airi vaiintinavu vi vaiintiva qora kaiqa varai koqaara amurara ti, te tiha, Ho kia qaiqaavata vira qoraiqama amitaate. Homa autu amitaavo, turo. ⁷ Vate ne vira uva taiqake tauru amitauro tivakeha, vira muntuka kuquqama amitaata. Ne kia mintivararo hauri vira muntukavano qoraiqiraro vi vaiintiva tiharo, Kia te koqe aaraqaa qaiqaavata ho nirarave, tiantora. ⁸ Te niara mpo tiha ne vi vaiintirara quqaama tinavu muntukavano ariara vaivoma tiate turo.

⁹ Te niara ti uva koqemake irivarare, kiae koqemake irivarare, tivakeha ni qara ntuva nimitavaunara. ¹⁰ Ne vo vaiinti qora kaiqa uva taiqake tauru amitauro tivera, tevata tauruma amitauro tirara. Niquihai vovano qora kaiqa varairera, te niara tiha, te Karaitira avuqaa vaiha vi vaiintira qora kaiqa uva taiqama amitauro tirara. ¹¹ Tenavu Sataaniva una kaiqa vare vai okarara tavaunarara ti, viva tinavu haatara kaantorave tivakeha, vora uva kia qaqi iriqi viraiti, tenavu vaakama vira uva taiqa amitarara.

¹² Te Karaitira vakaaka tiva nimirera vatuka vo Taroaasini orure tavaavauraro Noravano vi vatanaaka avu aato qerama timitovorora tiro, te uva vika tiva nimiarira aarava ho vaura. Ho vaumanta te mini vukaiqamake vairare tivake, ¹³ tavaavauraro ti qata vakaa Taitaasiva kia vaumanta vira kaara te airi aato iriha kaiqe „te vira rantarera, Masedoniaini vuare tivake, vi vatanaakara te vuro tivake vuavaunara.

Ihura aanare tenavuvata homa aatara kararave tura

¹⁴ Ike, Kotiva minti minti i vairara irihama, te vira quahama amite uvuaro. Navutaaka naatara kaa vaintinavuka vaiinti nahenti vika tinavu tave quahama timitaate tivakeha vatuka vau vi ani variantemake, Kotiva tinavuvata tivita varaimanta tenavu Karaitira vataake vi ani vaunara. Tenavu Karaitira vakaaka tiva nimiqi vi vauraro vira uvavano tinavuqaahairo koqe untavi haikara voqaara vi ani vaimanta airi vaiinti nahenti vi uvuara iri variara.

¹⁵ Tenavu Karaitira vakaaka vaiinti nahenti tiva nimi vauraro Kotiva tinavuara tiharo, Ne Karaitiraqaahairo koqe untavi vai haikara voqaarama variavo, tira. Minti timanta Kotira vatukaini vire iakavata, Sataanira vatukaini vire iakavata, vika vi untara uhire variara. ¹⁶ Hini vaiinti nahenti vi untara uhireha tiha, Oho, qutu vuaka untave tivakeha vika Sataanira vatukaini vikama variara. Hini vaiinti nahenti vi untara uhireha tiha, Koqe untave tivakeha vika Kotira vatukaini qaqi variqi vikama variara.

Ike, maa kaiqara nora kaiqama vairo. Tavave ho varaanarove? „Avuqavu ni vaira vaiintiva, vivaqaima vi kaiqara ho varaanaro.“

¹⁷ Vo vaiintinavu koqaa vareraraqai iriha vika Karaitira uva vaiinti nahenti tiva nimi variamanta tenavu kia vika iantemake iraiti, tenavu Kotiva tititama kaika vira avuqaa vaiha, vira uva quqaiqamake vaiinti nahenti tiva nimi vaunara.

3

Kotiva qaraaka uva tivatairara tura

¹ Tenavu vi uvuara tihamma kiama qaiqaa tenavu tentanavu hutu viriniqaa kareravauve. Vo vaiintinavu kaiqa varareka iha nai nora vaiintiara tiha, Qara timirage vare vuariraro vo vaiintivano te kaiqa varaaaina okarara tavaarie, ti variara. Ho kia tenavu minti tirera. Ne tinavu okara ho iriarara ti, tenavu qumina mintiarora.

² Ne nenta tinavu qara voqaarama variavo. Tinavu muntukaqaama ni qara ntua taimanta vaiinti nahenti vi qarara kaara ntihama tinavu okarara homa irivara.

³ Tenavu Karaitira vakaaka ni tiva nimiavauramanta ne vi uvuara irurara ti, ne ti qara voqaarama variara. Karaitiva ni uva qara ntiharo, kia *inki namariqohairo* qara ntua taraitiro, viva qaqi variqiro vi vai Variqara vira Maraquaqohairo ni uva qara ntua taira. Viva kia qumina oriqa vi uvuara qara ntiraitiro, viva ni vaiinti nahenti muntukaqaqa vi uvuara qara ntua taira.

⁴ Karaitiva tinavu kempukaiqama timitaimantara ti, tenavu Kotira avuqaa vайа muntuka qihaaqamake vi uvuara vi uvuara ti vaunara. ⁵ Tenavu tavauraro Kotira kaiqa varaarikaiqamake vi uvuara vi uvuara ti vaunara. Karaitiva ni uva qara ntiharo, kia *inki namariqohairo* qara ntua taimanta kempukava kia tinavuqi vaivaro, Kotiva nai tinavu kempukaiqama timite vairara ti, tenavu tentanavu mahuta tiarirava kia vairo.

⁶ Kotiva tinavu kahaqiharo tinavu kempukaiqama timitaimanta tenavu Kotiva vaiinti nahenti hampata vohaa vaireva qaraaka uva tivataira vaiinti nahenti tiva nimi vaunara. Tenavu vaiinti nahenti tiva nimiha kia Mosiva qara ntuvato uvuara vika tiva nimiraiti, tenavu Kotira Maraqua vare okarara vika tiva nimi vaunara.

Kotiva Mosiraqaa tivato uvuara kia ho iriqi vi variaraqaahairo qutuvi haikava qovaraiqi vairava. Minti variamantavata, Kotira Maraqua vare variaka vika ekaa enta qaqi variqi vivara.

⁷ Tota Kotiva oriqa qara ntua kero Mosira amu uvuara, vaiinti nahenti kia ho iriraiti, vika qutuvi variara. Kotiva Mosira vi uvuara tiva ami vauvaro Kotira mpeqa okaravano takuqiharo Mosira viri ataama amite vaura. Mosiva vi uvuara varero vaiinti nahenti konaini tuvuntomanta vika vira viri tavarare tuvaro „kuari avu itaintemakero“, vika avu ari vaumanta vika kia ho Mosira viri tavora. Mintiaqiro viro, Mosira virivano takuquqiro vi vauva taiqa vura.

⁸ Ho Kotiva nai Maraqua nimi vai uvava totaa uvavata aatarakairara tiro, vi uvava voqavata vaiinti nahenti ataama nimitaqiro vuanaro.

⁹ Kotiva Mosiraqaa tivato uvuava takuquqiro viharovata, vi uvava vaiinti nahenti qutuvi vauvaro qutu vuateqai ti vaira. Kotira qaraaka uvavano vaiinti nahenti avuqavuqama nimite vairara tiro, vi uvava voqavata takuqiharo vika ataama nimitaqiro vuanaro.

¹⁰ Kotira qaraaka uvavano nai uritara kero voqaara uva vairara ti, tenavu vira haarua uva kempukara kia noraiqaake iriqi virara.

¹¹ Kotiva Mosiraqaa tivato uvava vahuqa vauvaro vi uvava takuquqiro vi vauva vahuqaqai vaura. Kotira qaraaka uvavano kia taiqa viraitiro, qaqi variqiro vi vairaro vira takuqiro vaivavata kia taiqa viraitiro, qaqlima variqiro vuanaro.

¹² Tenavu Kotiva qaraaka uva tivataira irihama kia ekaara qutu viraiti, qaqi variqi vuainarara ti, tenavu kia qetaraiti, muntuka qihaaqamake vaunara. ¹³ Kia tenavu Mosira aanantarerera. Isareri vika vira virivano takuquqiro vi vaiva taiqa vuainara tavevorave tiro, Mosiva tavuna varakero nai viri mantaaqa kero aque vaura.

¹⁴ Ho Isareri vika vauvau vika avu aatovano kia kanko umanta vaura. Maa entaravata vi vatanaaka Kotiva haaru vato uvara kaara ntiha, kia vi uvara okara kankomake iri variara. Mosiva nai viriqaqaa aquto tavunara voqaara Kotira uva mantaaqa nimite vaimantara ti, vika vi uvara kaara ntiha kia kankomake iri variara. Vika náivano vi tavunara qaqlima varakeva kia ho vaivaro Karaitiva vivaqaima vi tavunara qaqlima ravaqaa nimitaariravama vairo.

¹⁵ Haaruvata maa entaravata Isareri vika Mosiraqaa tivato uvara kaara nti variavaro tavuna voqaava vika avu aato mantaaqa nimite vaimanta vika kia Ihurara kankomake iri variara.

¹⁶ Ho vaiintivano nai vaaqu kaiqagaahairo tuqantaa viro Nora Vaiinti vira aarairera, viva vi tavunara vira avu aatoqahaahairo qaqlima ravaqaima amitaanaro. ¹⁷ Te Nora Vaiintiara tiha te vira Maraqrura ti vaunara. Tinavu Nora Vaiinti Maraqruravano vaiinti muntukaqai vairera, vi valintiva vairaro qora okaravano kia vira rumpa tairaro viva qaqlima kuvantu viro varianaro.

¹⁸ Tenavu Ihu Karaitira vainti vauraro kia tinavu viriqaqaa tavunavano mantaaqa timitaamanta tenavu *memontaara/inipi* voqaara vauraro vira mpeqa okaravano tinavuqaa-hairo ataa iharo vairo.

Noravano tinavu ataama timitaqiro vi vairaro Kotira Maraqruravano tinavu vara qaraakaiqama kairaqe tenavu tentanavu Nora Vaiinti vira voqaantemake variainara.

4

Karaitira vakaaka vutuke vaiinti nahenti tiva nimi vaunarave tura

¹ Kotiva tinavu aaqurihama timiteharo tinavu noraiqama keromaa uvara vaiinti nahenti tiva nimiate timantara ti, kiama tenavu popohamake vika tiva nimiqa virera.

² Tenavu vaiinti nahenti tiva nimihama, vaiintivano kukeqa viharo kaurira kaiqa vare vai okarara tauvaqa utu amiteha kia unaqaraiqamake vi uvara tiraiti, tenavu kia Kotira uva hampi tuqantaa qantamake tiraiti, tenavu Kotira avuqaa vaiha vira uva vutuke tiva nimi vauramanta vaiinti nahenti tinavu uva iri variavaro vika avu aato muntukavano tinavu uvara quqaa uvave ti vaimanta variara.

³ Tenavu Karaitira vakaaka vutuke vaiinti nahenti tiva nimiqa vi vauramanta vaiinti vokiaka vi uvara okara kia ho irivera, vika kakakima vikama vailhara ti, kia tinavu uva ho irivara. ⁴ Vika variavaro una variqavano Sataaniva maa vataraqaa raqiki vaiva vika avu aato tinta kaimantara ti, vika Karaitira uvara kia quqaa uvave ti variara. Karaitira vakaakavano vika avu aato ataama nimitaantorave tiro, Sataaniva vika avu aato vara hampiqamake vaira. Karaitivavata Kotivavata vitanta vohaa qaramake variara.

⁵ Kia tenavu niqaa raqikirera tentanavu uvavauve ni tiva nimi vaunara. Tenavu ni tiva nimihama Ihu Karaitiva, vivaqaima Noravano vaivo ti vaunara. Tenavu Ihurara tiha ni kaiqa vara nimirarerera auti vaurukama vai. ⁶ Tota konkira ariro vauvaro aatitaane tu Variqava, vivama maa entara tinavu muntuka avu aatoci ataama timitaamanta tenavu tentanavu avu aato muntukaqohai Kotira mpeqa okaravano Karaitira viriqaahairo ataa i vaimanta tavaunara.

Tenavu tave voqaara vaunarara tura

⁷ Tenavu aaqatai vata varakero aututai tavera voqaara vauraro Kotira uva nora uvavano tinavuqai vaira. Tenavu tave voqaara ugerara vaiinti vauramantara ti, vaiinti nahenti tavaavararo tenavu ti vauna uvava kia tinavuqihairo qovarama vi vaira. Vi uvava uritarakero kempuka uva vaimantara ti, vaiinti nahenti tavaavararo vi uvava Kotiraqaaahairo vai uvavama vairo.

⁸ Hihai hihairo vo maara vo maaravano tinavu qoraiqama timite vaharovata, kiama anomakero tinavu qoraiqama timite vairo. Vo enta vo enta airi haikavano tinavu avu aato vara hampiqama kareva auti vaimantavata, kia tenavu Kotira kaiqa qaqlime vauvano.

⁹ Vaiinti nahenti tinavu navutaiqihha tinavu tivataqi vi variavaro Kotiva kia tinavu qaqira karaitiro, viva tinavu kahaqi vaimanta variqi vi vaunara. Vo kiaka tinavu hari variamantavata, kia tenavu ekaara taiqavi vaunara.

¹⁰ Tenavu vauramanta Ihura arukontemake, ekaa enta tinavu vaatavata hari variamanta tenavu hove ti vaunara. Tenavu mintimake variari vainti nahenti Ihuva himpiro qaqi variqiro vi vai kempukara tinavu vaataqaaqai ho tavevara.

¹¹ Tenavu Ihurao ti, vira kaiqa vare vauramanta vika vira arukontemake tinavuvata arukareka auti variamanta vaunara. Mintiaqi vi vauramanta ne tavaavarovina tinavu vaatavano taiqa vuainaraqai Ihuva qaqi variqiro vi variarirava vaimanta vaunara.

¹² Qutuvi okarava tinavuqiqi qovaraiqireva auti vaivarovata, qaqi variqi vi vai okarava niqi variqiro vi vaira. ¹³ Kotira vukuqi vai uvava mintima tiro:

Te Kotirara viva ququaama ti kahaqianarove ti variavaunara ti, te vi uvara nivata tiva nimiqi vi vaunarave, tura. *(Ihi 116:10)*

Tenavuvata vi vaiintira aanare Kotirara ququaave tivakeha vira uva ni tiva nimi vaunara. ¹⁴ Tenavu iruraro Nora Vaiinti Ihura qaiqaa qaqi vara himpima kaiva, viva naantiara tinavuvata qaiqaa qaqi vara himpima kero nivata tinavuvata vita vuru kairaque tenavu ekaa Ihura aqantio vairara.

¹⁵ Tenavu niarao tiha ni kahaqirera aihavi haikara varaqi vi vaunara. Tenavu mintiaqi vi variari ne Kotiva ni koqema nimitaaina uvira iriqi viha airiqama vimanta, ne airi vaiinti nahentiqamavi vaiha Kotira quahama amitaivaro Kotira autuvano virini qiarira.

¹⁶ Virara irihama tenavu kia popohanaara iraiti, maa kaiqara varaqi virera. Tinavu vaata kempukano taiqavi vaivarovata, tinavu muntukavano vo enta vo enta qaraakaqamaqiro vi vaimanta vaunara.

¹⁷ Vo maara vo maaravano tinavu qoraiqama timitaqiro vi vaiva vahuqaqai vaimanta tenavu vi maarara vi maarara aataraqi vivi, naantiara tenavu uritarake koqemake naaruvinai ekaa enta qaqi variqi virera. Virara irihama tenavu kia maa entara maara varaqi vuainarara noraiqaake iriqi virera.

¹⁸ Tenavu avuqohai vataini vai haikara tave vaunara, kiama virara noraiqaake iriqi virera. Vi haikava vi haikava vahuqa variaina haikavaqaima vairo. Tenavu kia avuqohai ho tave vauna haikava naaruvinai vai haikara, virara noraiqaake iriqi virera. Kia avuqohai tave vaura haikava, vi haikava vi haikava ekaa enta qaqi variqiro vuanaro.

5

Tinavu tivaatavano haraara naavu voqaarama vaivo tura

¹ Tinavu vaatavano vaireva haraara naavu voqaara vaimanta tenavu vi vaatara vataake vaiha vataini qaqi variqi vi vaunara. Tenavu kankomake iruraro tinavu haraara naavu rampai kaivaro, naaruvinai tinavu naavu vo varianaro. Vi naavu kia vaiintivano kauquqohairo kaqa tai naavu vaivarovina Kotiva vi naavurave vaatarave autu timitairara tiro, vi vaatava ekaa entama qaqi variqiro vuanaro.

² Maa entara tenavu naaruvinai vina vaatara irihama vi vaatara oru vararerave tiha, maa vaatara vataake variqi viha keke ti vaunara. ³ Tenavu toka variarorave tivakeha vi vaatara nonkute vairera.

⁴ Tenavu maa vaatara haraara naavuqiqi voqaara variqi viha keke tivaqi vi vaunara. Kia tenavu tentanavu vaata qaqira karera auti vauraukavauve. Vaiintivano haarua utavaaqaqaa qaraaka utavaaqa nonku tainantemake, tenavu tentanavu haarua vaataqaa qaraaka vaata nonkirera. Mintiariraro tinavu quti vaira vaatava kuquviro qaqi variqiro vi variarirava vaatavama varianaro.

⁵ Tinavu vika mintiake qaqi variqi vuate tiro, Kotiva tinavu vaata geramakero vataira. Kotiva minti tivakero tinavu nai kaama tero tivatai uvava kempukaiqama vuarire tiro, viva nai Maraqura naane avuni tinavu timimanta varauvina.

⁶ Tenavu maa vaatara vataake vaiha kia getaraiti, muntuka qihaaqamake vaunara. Tenavu maini maa vaatara vataake variqi vuarera, tenavu kiama ho naaruvinai Noravano vainanaini virara. ⁷ Maa entara tenavu kia tentanavu avuqohai vira tavaraiti, vira uvvaraqai quqaa uvave tivakeha variqi vi vaunara. ⁸ Tenavu muntuka qihaaqama keha variqi vi vauraukama vai. Tenavu maa vaatara maini ke, oru naaruvinai tentanavu maaqa tanaraini Nora Vaiinti hampata variataama iro. ⁹ Ho tenavu maa vaatara vataake variarerave, naaruvinai oru variarerave, tenavu Ihura antuqaaqai variqi virera.

¹⁰ Naantiara Karaitiva taintaqaao oquviro vaharo *ko* tire iraqe tenavu ekaama vira avuqaa himpite vairara. Vi entara viva tinavu vohaiqa vohaiqa vaata vataake vaiha kaiqa varaavauna uvara avuqavu qianaro. Koqe kaiqa varaina vaiintira nai koqaa koqema kero amianaro. Qora kaiqa varaina vaiintira vira nai koqaa qora koqama amianaro.

Vaiinti nahenti Kotira vataake vohaaraqi variate tura

¹¹ Noravano ko tiaina entarara irihama tenavu qeteha, vaiinti nahentia vira uva iriqi vuuate ti vaunara. Kotiva tenavu avuqavu kaiqa vare vauna okarara tave vairave. Nevata tenavu vare vauna okarara kankomake tavaivera, te virara hovema tirara.

¹² Tenavu tentanavu okarara tihamia kia tentanavu autu viriniqama karera auti vaunaravauve. Tenavu vi uvava ni tiva nimiari ne tinavu okarara quahama timiteha, viraqaaqai vaiinti vonavu hampi uva ti variaka ne vinavuka nái uvavata tiva nimikama vaivara. Vi vaiintinavu vaiinti vira vataaraqai noraiqaake iriqi viha, kia vaiinti avu aato muntukara noraiqaake iriqi vi variara.

¹³ Hini kiaka tinavuara vueraiqaa vuavo ti variaka, vika homa nai minti tivara. Tenavu Kotirarao tiha mintiaqi vi vaunara. Hini kiaka tinavuara koqe avu aato vataukave tiha homa minti tivara. Tenavu niarao tiha mintiaqi vi vaunara.

¹⁴ Karaitira muntukavano tinavuara vaimantara ti, tenavu vira kaiqaqai vare vaunara. Vi uvava okara vaireva maantimama vairo: Tenavu ekaa qutu vuataara vaimanta vauraro Karaitiva vaiinti vohaiqavano tinavu ekauka vatuka varero vuru qutu vurara ti, tenavu ekaa vira hampata qutu vuraukama vai.

¹⁵ Viva tinavu ekaukara iriharo qutu vurara ti, tenavu maa vataaraqaa variqi viha tentanavuaraqai iriqi vuarora. Tenavu Karaitirara iriha vira kaiqa vara amitaqi viha maa vataaraqaa variqi vuari. Viva tinavuara tiro qutu viro qaiqaa qaqi himpiro vairara ti, tenavu mintiaqi vuari.

¹⁶ Maa entara kia tenavu qaiqaa vataihainaa uva okarara iriha vo vaiintiara qora vaiintive, koqe vaiintive, tivaqai virera. Tota tenavu vataihainaa okarara iriha Karaitirara qumina vaiintive tiavaunara. Maa entara kia qaiqaa tenavu minti tivaqai virera.

¹⁷ Karaitira vataakero vohaa vaiva vaireva, viva qaraakaiqamavi vai vaiintivama vairo. Vi vaiintiva haaru hampi nu okarara qaqira kero, qaraaka ni okarara varaqi vi vaivama vairo.

¹⁸ Kotivama vi vaiintira qaraakaiqama kaivarao vaira. Tenavu Kotira navutaaka variavauraro Kotiva tinavuara nai vataake vohaa variate tiro Karaitira varakorara ti, tenavu Karaitira kaiqaqaa vira vaintiqamavi variavauraro Kotiva tinavu kaamatero vi kaiqara timimanta tenavu viva vaiinti nahenti vataake vohaa varaina uvara vika tiva nimiqi vi vaunara.

¹⁹ Vi uvava okara maantimama vairo: Kotiva vataini variaka qora kaiqa kaara kia vikaqaa uva vataraitiro, viva Karaitira kaiqara iriharo vaiinti nahenti vataake maateraiqireva auti vaira. Vi uvava vaiinti nahenti tiva nimiate tiro, Kotiva tinavu kaamatero noraiqama kaimanta tenavu vuru vaiinti nahenti vi uvava tiva nimi vaunara.

²⁰ Tenavu Karaitira autuqaa vira uva vare anuraro Kotiva naivano tinavu noqaahairo ni uva tiva nimi vaintemake, tenavu vira uva ni tiva nimi vaunara. Tenavu Karaitira autuqaa ike mpo tiha, Kotira qaqi kaivarao ni hampata vohaa maateraiqiharo variarire ti vaunara.

²¹ Karaitiva kia qora kaiqa vararaitiro vauvaro Kotiva tinavuara tiro, tinavu qora kaiqa uva Karaitiraqaa vuru vatovaro Karaitiva tinavu qora kaiqa uva varero vuru qutu vurara ti, tenavu Karaitira vataake vohaa vauraro Kotiva kia tinavuqaa uva vataraitiro, tinavu avuqavuqama timitaimanta vaunara.

6

Tenavu ni kahaqirera airi maara varaqi vi vaunarave tura

¹ Tenavu Kotira vataake kaiqa vare vaurauka vaiha tenavu niara ike mpo tiha, Kotiva ni aaqurihamma nimiteharo koqema nimite vai okarara, hauri ne virara qumina haikave tivorave, turo. ² Kotiva mintima tiro:

Te ni aaqurihamma nimiteha koqema nimitauna entaraqaa te ne uva tiara irunarave.

Te ni kuvantuke ntitauna entaraqaa te ni ntitaunarave, tura. *(Aisaiaa 49:8)*
Ho iriate, Vate Kotiva ni aaqurihamma nimiteharo koqema nimitaaina entavama vaivo. Vate Kotiva ni kuvantu kero ntitaaina entavama vaivo, turo.

³ Ne tinavu kaiqara iriha tinavuqaa uva vatevorave tivakeha tenavu kia hampi kaiqa vare vaunara. ⁴ Tenavu kia mintiraiti, vo enta vo enta tenavu variqi viha ne tinavuara vika Kotira kaiqa vaiinti tarukama variavo tiate ti, tenavu avivinamake variqi vi vaunara. Mintimake variqi viha aihiav haikara vare vauna entarave, maara vare vauna entarave, tinavu qoraiqama timite varia entarave, tenavu kia popohanaara iraiti, kempukaiqamake variqi vi vaunara.

⁵ Tinavu navutaaka tinavu kaavu humiqake vateve, tinavu karapuhiqi verakeve, tinavu ututeha ruqutuke vateve, mintiaqi vi variamanta tenavu vukaari utiha kaiqa varaqi

vihave, entaqi kia koqemake vaitaqi vihave, karara voqamake hantuqa hari vaimanta variqi vihave, mintiaqi vihavata, tenavu kia popohanaara iraiti, kempukaiqaake variqi vi vaunara.

⁶ Ne tinavuara vika Kotira kaiqa vaiinti tarukama variavo tiate ti, tenavu koqe kaiqaqai varaqi viha, koqe avu aatoqai iriqi viha kia vaaka arara itaraiti, vokiakavata koqema nimitaqi vi vaunara. Kotira Maraqravano tinavuqi vaimantara ti, tenavu vaiinti nahentiaq quqaa muntuka vateha variqi vi vaunara.

⁷ Quqaa vakaakaqai tenavu tiva nimiqi vi vaunara. Kotira nai vira kempukaoqohai tenavu vira kaiqa vare vaunara. Vaiintivano huru veva totainantemake, tenavu kauqu tanarainivata, kaanaaqainivata, Kotiva avuqavu ni vai okarara totaqi vi vaunara.

⁸ Hini kiaka tinavu hutu viriniqamake variamanta hini kiaka tinavu hutu vatainiquamake variara. Hini kiaka tinavu hutu tuahera keha tinavuara koqe vaiintive ti variamanta hini kiaka tinavuqaa qora uva vate variara. Vika tinavuara una uva ti variakave tiamantavata, tenavu quqaa uvaqai ti vauraukama vai.

⁹ Hini kiaka tinavuara kia ni tavaunarave ti variamanta hini kiaka tinavuara ni tavaunarave ti variara. Hini kiaka tinavuara qutu vuavo ti variaveravata, tenavu qaqi variqi vi vaunara. Vika tinavu ruqutuqi vihavata, kia tinavu ekaara aru taiqake variara.

¹⁰ Vo haika vo haikavano tinavu muntuka qoraiqama timite vaimantavata, tenavu quahakeqai variqi vi vaunara. Tenavu vehi vaiinti vahavata, tenavu uva tunaraqaahai airi vainti nahenti koqe haika vare variara. Tenavu kia airaira vatarauaka vahavata, tenavu naaruvaini airi airaira vataaraukama vai.

¹¹ Mpo, Korinti vatanakao, tenavu kia vo uva kukeqaraiti, ekaa uva qoqaa ni tiva nimi vaunarave. Tinavu muntukavano ekaa niarama vaivo. ¹² Tinavu muntukavano niara vaimanta tenavu kia ni toma nimiraiti vauramantavata, neqai tinavu toma timite variarave.

¹³ Te tenta vainti tiva nimi vaunantemake, nivata tiva nimi vaunara. Tinavu muntukavano niara vainantemake, nevata tinavuara muntuka vataata.

Ihurara kia quqaave tika hampata kia variqi vuate tura

¹⁴ Ne Ihura uva iriaka hauri ne kia Ihura uva iriaka hampata vohaaraqi vahia nai varate nai varate ivora. Nantiakeroe koqe haikavanovata qora haikavanovata vohaa tampamaviro variqiro vuanaro? Kia ho mintianaro. Nantiakeroe aatitairavavata, konkiraqiravavata, vohaa tampamaviro variqiro vuanaro? Kiama ho mintianaro.

¹⁵ Karaitivavata Sataanivavata nantiakkee vitanta vohaa uva vatevarave? Karaitirara quqaave tiravavata, kia Karaitirara quqaave tiravavata, vitanta hoe vohaa avu aato iriqi vivarave?

¹⁶ Hoe Kotira Naavuqi una variqanavu maraqravata vuru vataivaro varianarave? Aqao, Kotiva qaqi variqiro vi vaiva vaimanta tenavu vira naavuma vauro. Kotiva nariara mintima tiro:

Te tenta vainti nahenti vataake vairera vika nivutaini variqi viha te vika Variqavano variari vika ti vainti nahentima vaivarave, tura. (Wkp 26:12)

¹⁷ Viva minti tivakero Noravano qaiqaa mintima tiro:

Ne qaqi vainti nahenti mini ke, ne nentaraiqamake ani variate. Ne qora haika kia utu vararaiti, variqi vi vaise te ni ntita varaare. (Aisaiaa 52:11)

¹⁸ Te ni qoka variari ne ti maaqu raavurama vaivarave. Te Noravano ekaa kempuka vatarauaka minti tunarave, tura. (2 Samueri 7:14)

7

¹ Ho ti navunaaao, Kotiva nai kauqu aqiqaa aqukero vi uvvara tiharo tinavuara iriharo tiva tairara ti, kaiqenavu tentanavu vaataqaave muntukainive qoraiqama timitaaina haikara hiqamake, Kotira aatu qetaqi viha koqe kaiqaqai varaqi vuari.

Ti muntukavano niara koqe imanta vaunarave tura

² Mpo, ne kia tinavu toma nimiraiti, tinavuara muntuka vateha variata. Kia tenavu vo vainti qoraiqama amitevaunarave. Kia tenavu vo vaintivano i haikara unaqaraiqamake vare vaunarave.

³ Ho te minti tihia kia niqaa uva vatareravauve. Te vi uvarara vaaka ni tiva nimunara: Tinavu muntukavano niara noraiqaakero vairara ti, ne qaqi variqi vi entarave, ne qutuvi entarave, tenavu ni hampatama variqi virera.

⁴ Ti muntukavano niara qihaaqama kero vaimantara ti, te kia qetaraiti, tenta uva vutuke ni tiva nimi vauro. Te ni mahutaqai ti vaunara. Maaravano tiqaa qovaraiqi vaimanta kia te virara noraiqaake iriraiti, niara iriha ti muntukaqihairo koqe i vaimanta voqavata quaheha vaunara.

⁵ Tenavu Masedoniaini orure qaqi mini vairare tiavaurarovata, hihai hihairo maara-vano qovaraiqi vauvaro tinavu muntukavano qete vaumanta variavaunara. ⁶ Ho Kotiva muntuka qoraiqi vai vaiintika muntuka kuquqama nimita vaiva, viva vi entara tinavu muntukavata kuquqama timiteharo Taitaasira tenavu variavaunaini atitovaro orurora.

⁷ Kia tenavu Taitaasiva ururoraraqai quahaunara. Viva ni hampata vaumanta ne vira muntuka kuquqama amito uvara Taitaasiva tinavu tiva timimanta tenavu vi uvararavata iriha quaheha vaunara. Taitaasiva ne tinavu tavaataa imanta varia uvara, vi uvaravata tinavu tiva timimanta irunara. Ne anomake mpo ike tiha, Kia tenavu mintiataara minturo, tia uvaravata, ne tiriara noraiqaake iri variararavata Taitaasiva tiva timimanta irunara. Taitaasiva ekaa vi uvvara tiva timimanta iruraro ti muntukavano voqamakero quahae vaimantama vaunara.

⁸ Tota te qaraqihai ni tiva nimuna uvvara kaara ni muntukavano qoraiqumanta vaurara ti, te vi entara tiha, Vi qarara kia ni nimi taataara vaimanta ni nimitauro, tiavaunara. Ho viraqaaahai te tavauraro ni muntukavano vahuqaqai qoraiqurara ti, te vi qarara vara kaavaunara kia qaiqaavata mpo ike tiraiti, ⁹ te virara quahehama vauro.

Vi qarava ni muntuka qoraiqama nimitora, kia te virara quaheha vairaiti, te ni muntukavano qoraiquraqaaahai ne qora aara qaqirakora, virarama te quaheha vaunara. Kotiva qaqi kovaro ni muntukavano mintimakero qoraiqama vurara ti, tenavu tura uvava kia ni qoraiqama nimitora.

¹⁰ Vaiintivano muntuka qoraiqiraro tiharo mpo, Kotira uva kia raqa kaataara raqa kauro, tirava qora aara qaqira kairaro Kotiva vi vaiintira homa kuvantukero vitaanaro. Vaiinti vovano qumina vataihainaa uva okarara iriqiro vi vairaro vira muntukavano qoraiqirava kiama vira kahaqama amitairaro viva ekaarama qutu vuuanaro.

¹¹ Ho tavaate. Kotiva qaqi kovaro ni muntukavano qoraiqama vurara ti, ne kia vi vaiintiva qora kaiqa varora qaqi karaiti, ne vaakama qora okara vira nenta avutaqihai taiqa kareka auti vaiha vi vaiintira ati vaura. Ne tiha, vi vaiintira qora kaiqa kaara Kotiva tinavuqaavata uva vataantorave tivakeha ne tiriara viva maini tinavu hampata vaiharo vi uvava avuqavuqama timitarage hove tiataarave ti variara. Ho ne minti mintima keha vi uvvara kempukaiqama keha avuqavuqi variamantara ti, te tavauraro ni okaravano koqe okaraqaima vaira.

¹² Te tota vi uvvara qara ntihama kia te qora kaiqa varo vaiintirara iriraiti, kia te vi vaiintiva qoraiqama amito vaiintiraravata iriraiti, qara ntuva nimitaavaunara. Ne Kotira avuqaa vaiha tinavuara ni muntukavano voqamakero vairara kankomake iringati ti, te vi uvvara ni qara ntuva nimitaavaunara.

¹³ Ne ti qaraqihainaa uva ho iriarara tiro, tinavu muntukavano koqe imanta vaunara.

Tenavu Taitaasira atitaavauraro ne varianaini vumanta ne vira muntuka qihaaqama amitovaro vira muntukaqihairo koqe i vaurara ti, tenavu viraravata irihama quaheha vaunara. ¹⁴ Te ni mahuta Taitaasira tiva amiavauraro viva ni hampata vaiharo tavomanta ne quqaa mintimake varia vaiinti nahentika variarara ti, kia te kaurira haika vare vaunara. Tenavu quqaa uvqaai ni tiva nimiteha, ni mahutavata tiva amiavauna uvaravata Taitaasiva tavovaro ekaa vi uvava quqaa uvqaaima vaura.

¹⁵ Taitaasiva ne varianaini oruromanta ne vira quahama amiteha vira vevaaraini vaiha vira uva koqemake iri vaurara tiro, Taitaasira muntukavano niara voqavata vaira.

¹⁶ Virara iri vauraro ti muntukavano niara paru iro vaimantara ti, te quahae vaunara.

8

Parumakeha nenta qata vakaa kahaqiate tura

¹ Ti qata vakao, vaiinti nahenti Masedoniaini vo vatuka vo vatukaqi variaka Kotiva vika koqema nimitaimanta varia uvvara, ni tiva nimiari iringati.

² Vihainaa vaiinti nahenti variqi uvvaro nora maaravano vi vaiinti nahentika avatareva qovaramavi vaumanta vi vatanaaka vehi vaiinti nahenti kia airi airaira vataaka vaihavata, vika Kotirara quahaqi viha, viraqaaahai vika vokuka kahaqireka kia nai u haikara tuqaramake tuataraiti, paruma keha tinavu timumanta tenavu vare muntu vokuka nimiavaunara.

³ Te ququaama turo. Vika vokuka kahaqireka iha, ho monu nimihevata, vika qaiqaa voki monuravata tinavuqaa vara komanta tenavu vare muntu nimiavaunarama turo. Kia te kempukaiqamake tiavaramanta vika naiwano mintiataa umanta mintiakeha nimurave.

⁴ Vika naiwano tinavuara mpo tiha, Tenavuvata Kotira vaiinti nahenti vokiaka Iutiaini variaka kahaqama nimitarerave, tura. ⁵ Tenavu hoqare vikara tiha, Vika inaara monu tinavuqaa vara kaiqe tenavu vare muntu nimirerave, tivake tavaavauramanta vi vatanaaka airi monu tinavuqaa vara komanta tenavu vare muntu nimiavaunara. Vi

vatanaaka tota Kotira kaiqaqai vararerave tivakeha vika ekaa nái naane Kotira ami, viraqaaahai vika tinavuara tiha, Ne tinavu Kotira kaiqa vara amite vai aarara humiqaiqe varaare, tura.

⁶ Masedonia vatanaaka mintima keha Iutiaini variaka kahaqireka monu nimurara ti, tenavu Taitaasirara tiha, Are Korintini avuni hoqarama kera monu ruvaaquma kareva vuanarara tira, are qaiqaa mini anirantera, vi kaiqara aaqurihamma nimitenia kaiqara, monu varena kaiqara vuru taiqa kaane, ti. Minti tivake tenavu Taitaasira ne varianaini atitehama vuana vaina ti vauro.

⁷ Ne vo kaiqa vo kaiqa koqema keha vare variakave. Ne Karaitirara kempukaiqaake iriqi vi variakave. Ne vira uva koqemake ti variakave. Ne vira uva okara kankomake iri variakave. Ne voka voka kahaqireka auti variakave. Ne tinavuara muntuka vateha variakave. Ne minti minti variarara ti, te niara tiha, Ne Iutiaini variaka aaqurihamma nimitureka iha, paruma keha nenta monu nimiata, turo.

⁸ Minti tihamo te kia niara kempukaiqamake monu kaate turo. Vaaka te Masedonia vatanaaka koqemake nái monu nimia okarara ni tiva nimuro. Te minti tihamo ni muntukavano quqaiqama kero vokiakara vainara avatamake tavarera.

⁹ Tinavu Noravano Ihu Karaitiva tinavu aaqurihamma timitero koqema timitora, nevata virara iriara. Viva ekaa vo haika vo haika vate vaiva vaharovata, viva niarao tiro nai vehiqama vura. Viva vehiqama vuraqaaahai ne ekaa naaruvaini vai haikara varekama variara.

¹⁰ Kia te niara kempukaiqamake tiraati, tenta irike niara mintima ti: Tuvana ihi ne naane monu ruvaaquma kareka hoqarama tora. Ne naane mintiataa umanta minturara ti, ne vi kaiqara varaqi vi, vuru taiqa kaata.

¹¹ Ho vate te niara tiha, Vi kaiqara varaqi vi, vuru taiqa kaate, turo. Hoqare ne vi kaiqara varareka iha quahontemake, vi kaiqara vara vuru taiqa kaate, turo. Ne monu airi vataivera, airi monu nimiata. Ne kia airi monu vataivera, inaara monuqai nimiata.

¹² Ne inaara monuqai vateka vi monura parumake nimivera, Kotiva kiama niara nora monu nimiataararev tiraitiro, virara hovema tianaro.

¹³⁻¹⁴ Kia tenavu niqaa nora maara vatehama niara nora monu nimiata tivakeha vo vatanaakara inaara monuqai nimiata ti vauro. Ne maa entara airi haika vateka vaiha homa rairake kia airi haika vateka kahaqivara. Naantiara ne kia airi airaira vateka vaimanta vika vi entara airi airaira vateka vaiha nintavata kahaqivara. Ne mintimake nai kahaqi nai kahaqamaqvi viha homa nevata vikavata vohaa qaramake vaivara.

¹⁵ Ne monu rairake nimi okarara irihama Kotira vukuqi haaru qara ntuvato uvvara iriha variata. Kotira vukuqi mintima tiro:

Ariqamake manaa kara nuntu varoka neva hoqai vauvaro kia ariqamake manaa kara nuntu varoka vika nevavata vohaa qarama kero hoqai vaurave, tura. *(Katu Varora 16:18)*

Taitaasivavata ne ianaini virevave tura

¹⁶ Kotiva Taitaasira kahaqama amitaivarо vivavata tinavu aanarero ni kahaqireva quahakero kahaqianaro. Taitaasiva minti vaimantara ti, tenavu Kotirara koqeve ti vaunara.

¹⁷ Tenavu Taitaasirara ni kahaqiarire turaro viva vi uvarara quaha kero, viraqaaahairo viva ni kahaqiaataa ivaro tiharo, Te vika oru tavarerave, tiro.

¹⁸ Ho tenavu vaiinti vovata atitaariraro viva Taitaasira vataakero vuanaro. Viva koqema kero Karaitira vakaaka tiva nimi vai vaiintivava vaimanta Kotira vaiinti nahenti vo vatuka vo vatukaini variaka virara koqe vaiintive ti variara.

¹⁹ Ho vo uvavatama vairo. Vi vaiintivava tinavu airuqama timiteharo tinavu kahaqi vairage tenavu ruvaaquma monura vare Juhuremini, vuru kaare ti, vika vira kaama taara. Kotira autuvano virini qiarire ti, tenavu vi monura varakeha rairake vaunara. Mintihama tenavu vehi vaiinti nahentiara noraiqaake iri vaunara nivata numiqarera.

²⁰ Naantiara vokika tinavuara monu varakeha hampi rairake nimi variavo tivorave ti, vi vaiintira Taitaasira vataake atitarera. ²¹ Tenavu avuqavuqamake vi kaiqara vi kaiqara varaqi virera. Kia tenavu Kotira avuqaaqai vaiha mintiraiti, tenavu ekaa vaiinti nahenti nivuqaaavata vaiha mintiaqi virera.

²² Tenavu vitanta nitihama vaiinti vovata atitarera. Tenavu airi tataa vi vaiintira avateha tavararo viva vaiinti nahenti ho kahaqiariravama vairo. Vira muntukavano niara qihaaqama kero vaivarora tiro, viva quaha keharo ni kahaqiariravama vairo.

²³ Te Taitaasirara tirera. Viva ti vataakero kaiqa vare vai vaiintivava vairo. Viva ti vataakero vaiharo ni kahaqiaataa ivaro ni kahaqi vaira. Te vo vaiintitanta vaaka tunatantara tirera. Ihura vaiinti nahenti vo vatuka vo vatukaini variaka vitanta tinavu

kahaqama timiteha ni kahaqiate ti, vika vitanta vara himpimake kaamateha nitite. Vitanta kaiqa vareraqaahairo Karaitira autuvano noraiqama vuanaro.

²⁴ Vinavuka ne vainaini oruraimanta ne vinavuka ntitake kojema nimitaivaro te niara tuna uvava vivauma variarira. Ne vinavuka kojema nimitaimanta Ihura vaiinti nahenti vonaini vonaini variaka niara tiha, Quqaama ni muntukavano tinavuara vaivo, tivara.

9

Parumake monu nimi okarara tura

¹ Ne Kotira vaiinti nahenti kahaqama nimite varia okarara ho iri tavaarara ti, te vi okarara qumina qaiqaa ni tiva nimirera qara ntuarora.

² Te tavauramanta ni muntukaqihairo vogamake vika kahaqiataa imanta ne Iutiaini variaka kahaqi variara. Te ni mahuta Masedonia vaiinti nahenti tiva nimiha tiha, Akaiaini variaka tuvana ihiara vaiha monu qeramakeha Iutiaini variaka nimireka auti variarave, tiavaunara. Te minti tivake ni mahuta tiavaunara ti, Masedonia vatanaakaqihai airithaa vikavata quaha keha monu qerama vatareka auti variara.

³ Te vi vatanaaka tiva nimiha ni mahuta tiavauna uvava qumina uva variantorave ti, ne te tainantemake qerama vate variate ti, vaiinti vonavu ne vainaini nititaari vivara.

⁴ Te kia vinavuka naane nititaraiti, te Masedonia vaiintinavu hampata ne vainaini oru vi tavaari ne kia vi haikara ruvaaqumake qerama vataivera, te niara vika monu qeramake vatevarave tuna uvava qumina uva vairamanta te vira kaara kaurira haika varaaari nevata kaurira haikama varevarave.

⁵ Mintiantorave ti, kaiqe te maa vaiintinavuka naane nititaari vinavuka tinavu avuni orure, ne vi monura rairake nimirerave tivataara, vinavuka vi monura ruvaaquma vataiqe tenavuvata mini oruntarerera. Ne mintima keha vi monura qerama vataiqe te orunte tiha, Kia niara kempukaiqaake turamanta ne mintiavo, tirara. Te niara, Vika paruma keha monu tigaq varaa kaamanta muntu nimuro, tirara.

⁶ Maa uvara kankomake iritaata. Kara taaraiaqaa ututairava kara taaraiqaqaima qantu varaanaro. Airi kara ututairava airithaaqama qantu varaanaro. ⁷ Vi okarara irihama monu paruma keha nimiata. Ne vohaiqa vohaiqavano aato irikeha te vi monura homa nimirerave tivakeha vi monura nimiata. Ne kia nimiataa ira nimivora. Ne tinavuara vinavuka kempukaiqamake nimiata tiaverama nimuro tivora. Vaiinti vovano quaha keharo nimi vai vaiintira Kotira muntukavano virarama vairo.

⁸ Kotiva homa ni tuqimakero kojema nimitaqqi viramanta, ne kia vo haikaravata aavoqiraiti, ne ekaa enta vokikavata ho kahaqihai koqe kaiqa vara nimitaqqi vivara.

⁹ Kotira vukuqi mintima tiro:

Vehi vaiinti nahenti paruma keharo nimi vaiva vairamanta viva koqe kaiqa vara nimitie vai kaiqara kia tauru karaiti, ekaa enta iriqi vivarave. tura. *(Ihi 112:9)*

¹⁰ Vaiintivano kara utukero qantukero naare tiro, Kotiva kuvukanaa ami vaiva, vivama ni kahaqi vairamanta ne koqe kaiqa voqavata varaqi vivarave.

¹¹ Kotiva ni airi haika nimiramanta viraqaahai ne airi haika vateha homa vo enta vo enta paruma keha vaiinti nahenti kahaqama nimitaqqi vivara. Ne mintimaqqi vimanta airi vaiinti nahenti Kotirara koqeve tivaqqi vivara.

¹² Ne Kotira vaiinti nahenti kaiqa vara nimitaqqi viha ne kia vikaqai kahaqama nimitaqqi vivara. Ni kaiqaqahai airi vaiinti nahenti Kotirara koqeve ti okarava uri aatara keroma varianaro.

¹³ Ne vaiinti nahenti kaiqa vara nimitaqqi vimanta vokika ni okara kankomake taveha Kotira autu tuahereha vika niara mintima tivara: Ike, vika Karaitira uvava quqaave tivake vi uvava koqemake iriqi vi variakave, tivara. Vika niara tiha, Vika tinavuvata vokiakavata paruma keha nai ia haikara rairake timi variakavema, tivara.

¹⁴ Vika minti tivaqqi viha niara tiha, Kotiva vika uritarakero koqemaka nimitie vaivo, tivake niara iriha muntuka vateha Kotira aaramaqi vivara.

¹⁵ Kotiva nai Maauquritarakero vai vaiintira tinavu timirara ti, kaiqenavu Kotirara koqeve tiha vira quahama amitaqqi vuari.

10

Hampi uva ti vau vaiintinavuka Poruva nai vika tiva nimura

¹ Ne hini kiaka tiriara tiha, Poruva tinavu aaqanto vaharo qeteharo qihaaqama keharo uva ti vairave. Viva niaraini vaharo kempukaiqama keharo uva ti vairave, ti variara. Ne minti ti variara te virara ninta tiva nimirera. Karaitiva kia arara itaraitiro, qihaaqamakero uva ti vairara ti, tevata qihaaqamake vahaa nintavata tiva nimirera.

² Te ni minti tiva nimiha tavauramanta niqihai vo vaiintinavu tinavuara tiha, Vinavuka vataihainaa uva okarara irihama kaiqa vare variavo, ti variara. Ho ne rauriha variate. Vika mintimake hampi uva ti variara kaara te homa ne vainaini orure kempukaiqamake uva tirarave. Te kempukaiqamake uva tiataa iraqevata, te kia mintimake tirerave.

³ Quqaama tenavu maa vataraqaa variqi vi vaunara. Tenavu maa vataraqaa variqi vihavata, kiama maa vataraqahainaa auvihehavaa varakeha iqoka raquqi viraiti, ⁴ tenavu aahuva auvihehavaa varakeha viraqohai qora haika vataake raquqi vi vaunara. Kotiva nai auvihehavaa timimanta tenavu viraqohai iqoka raquqi viha qora okara kempuka vo kempuka vo kempuka aataraqi vi vaunara. Vaiinti vovano tinavu uva aatara kareva una uva tirera, homa tenavu Kotira kempukaqohai vira uva aatara karara.

⁵ Vaiinti nahentiara Kotira okarara kankomake irivorave ti, vo uva vo uva okaraqohai kuval nimite vaivera, tenavu Kotira kempukaqohai homa vi uva okarara vara quminaiqama karara. Nana nana hampi uvavano tinavu avu aatoqi vaimanta tenavu Kotira kempukaqohai vi uvara vi uvara qaqini varake Karaitira uvaqai iriqi vi vaunara.

⁶ Tenavu ni veka vaiha tavaari ne tinavu uva ho iriqe, viraqahai tinavu uva kia iri vaiintika vika vo okarama numiqa kararave.

⁷ Nenta tave haikara kankomake tavaata. Niqihairo vovano nariara tiharo, Te Karaitira vaintima vauro tirera, vi vaiintiva kankomakero irikero tinavuvaravata mintima tiarira: Vinavukavata Karaitira vaintinavu variavo, tiarira. Vi vaiintiva vaintemake, tenavuvata Karaitira vaintiqamavi vaunara.

⁸ Tinavu Noravano tinavu noraiqama kaimantara ti, tenavu niqaa raqikiqi vi vaunara. Kia te ni qoraiqama nimiratera niqaa raqikiqi viraiti, te ni kahaqama nimiratera niqaa raqiki vaunara. Te minti unarara ti, te niqaa raqikiaina uvara qaiqaa qaiqaavata tiva nimiqi viha, kiama kaurirarave.

⁹ Te kia ni naatu itaarireravauve vo uva vo uva nini qara ntuva nimite vaunara. ¹⁰ Vokiaka ti hutu wataini qiarire ti tiriara tiha, Poruva qaraqihairoqai kempuka uva ti vaivo. Viva tinavu tivuqaa ugerara vaiinti vaiharo ugerara uva qumina uvaqaima ti vairave, ti variara.

¹¹ Vi uvara ti variaka aato kenko tira iriata. Tenavu niaraini vaiha qaraqihai tunantemake, tenavu ni nivuqaavata vaiha vohaa vi uvaraqai tirerave.

¹² Vi uvara ti variaka nái nutuqai tuahera keha tenavu nora vaiintima vauro ti variamantavata, tenavu getakeha kia vika tiantemake ti vaunara. Vika nái uvaqai iriha, náiqoi taveha tenavu koqe vaiintima vauro ti variara. Minti ti varia vaiintika kia avu aatovata vaimanta variara.

¹³ Hauri tenavu vo vaiinti kaiqara iriha tentanavu autu tuahera kaarora. Kotiva tinavu titimitai kaiqaraqai tenavu tivaqí virera. Kotiva ni nivutaini kaiqa varaaate tivera, tenavu ni nivutaini vaiha vi kaiqara vare vaunara, viraraqai tivaqí virera. ¹⁴ Kia tenavu Kotiva qioqama tora raqake ne varianaini oru vuavaunaravauve. Kotiva tinavu kaamatero tititomantara ti, tenavu koqe vakaaka Karaitira vakaaka vuru ni tiva nimiavaunara.

¹⁵ Kotiva tinavu titimitai kaiqara kia tenavu vira aatarake vo vaiintinavu kaiqa vare variarara iriha, tentanavu hutu tuaherakarara vunavaravauve. Tenavu Kotiva tinavu titimitai kaiqaraqai varaqi viha niara tiha, Vika koqemake Karaitira uva iriqi vi vaiqe viraqahai tenavu vika nivutaini nora kaiqa vo kaiqa ho vararave, ti vaunara.

¹⁶ Ne kempukaiqaake Karaitira uva iriqi vi vaiqe tenavu homa ni mini ke, vo watain Karaitira uva tiva nimirera virara. Vovano naane Karaitira kaiqa vara amitaira hauri virara tenavu tentanavu mahuta tiha vi kaiqara tenavuma vara tauro tiarora. ¹⁷ Kotira vukuqi mintima tiro:

Vaiintivano nai kaiqara iriharo nai mahuta tiantorave. Vi vaiintiva Kotiva vo kaiqa vo kaiqa vare vainerara iriharo Kotira mahuta tiva amitaqiro vuarire, turave. (*Ieremaiaa 9:24*)

¹⁸ Vaiinti vovano nariara tiharo, Ti kaiqa koqe kaiqama vaivo, tirera, vira uvavano qumina uvaqaima varianaro. Noravano vaiinti vorara tiharo, Ai kaiqa koqe kaiqama vaivo, tirera, vi vaiintira kaiqavano koqe kaiqama varianaro.

11

Una uva maara ti variaka uva iriqi vivorave tura

¹ Ne ti qaqi kaiqe te inaaraiaq tenta mahuta tiari. Ne ti qaqi kaiqe maa uvara tiari.

² Kotiva intemake, tevata ne hampi aaraqaa vivorave tivake, niqaa raqikiqi vi vaunara. Koqemakero vai varaaata qorainti amitaantemake, te ni qorainti vohaiqa kaama nimite, ni ntita vare Karaitiraini vuru karera.

³ Te ni Karaitiraqaa iratarera auti variariraro vovano ni qoraiqama nimitaantora. Haaru vetanto entaqaa memaruvano ugerara uva tuvaro Evaava vira una uvara quqaa uvave tuntemake, nevata vo vaiinti una uvara quqaa uvave tivake, viraqaahai kia Karaitira uva iriqi vivora. Te virara qetehama vai.

⁴ Vo vaiintinavu ni nivutaini anire Karaitirara hampi uva ni tiva nimi variamanta ne kia vika qioqama karaiti, qaqi kaimanta tiate ti variara. Vinavuka kia tenavu vutuke Karaitirara tunantemake tiraiti, vinavuka vo Karaitirara ni tiva nimi variara. Ne Kotira Maraqua varaka variamanta vika vo maraqua rura hampi uva ni tiva nimiha, vika kia Karaitira vakaaka vutuke ni tiva nimiraiti, virara hampi uvagai ni tiva nimi variamanta ne vikara kia qioqama karaiti, quaheha qaqi kaimanta tiate ti variara.

⁵ Ho iriate. Vo vaintinavu unaqaraiqamake tiha, Kotiva tinavu noraiqama kaimanta tenavu avuniqamake vauro ti varia vaiintika variamanta, kiama te vinavuka vevaaraini vauro.

⁶ Kia te koqemake uva ti varia vaiintika uva tiantemake uva tihavata, te Kotira uva okara kanko kaankomake iri vauraukara ti, te vo enta vo enta vira uva vutuke ni tiva nimi variavaunara.

⁷ Te Kotira uva koqe vakaaka ni tiva nimirama kia koqaa ni naariraiti, vi entara te ni nutu viriniqama keha tenta hutu vatainiqama ke variavaunara. Te mintiaqi vi variavaunara ne virara qora kaiqama vare vaivo tivarare? Kia ho minti tivara.

⁸ Vi entara te ni nivutaini kaiqa vareha kia te ni monuvata naariraiti, variavauramanta Kotira vaiinti nahenti vo vataini variaka koqaa ti timi vaumanta te muara vaiinti voqaantemake, vika monu vareha ni nivutaini vaiha Kotira kaiqa varaqi vi variavaunara.

⁹ Vi entara ni nivutaini variqi vuavauraro ti monu taiqa vumanta kia te niara ti kahaqiqate tiraiti, variavauramanta ti qata vakaukvara Masedoniaihai viri vo haika vo haika kia vataavauna haikara kahaqama timitonanta varavaunara. Haaru mintuantemake, naantiaravata maara ni nimitaorarove tiha kia te vo haikaravata naarirerave tirara.

¹⁰ Te Karaitira quqaa uva ti vaurauka vaiha tenta kauqu ainqqaa aquke tiha, Te tenta mahuta tihama te kia niqihai vo haikavata naari vaunarave, turo. Kia ho Akaia vataihaina vaiinti vovano vi uvara qioqama kaanarove.

¹¹ Ti muntukavano kia niara vaimantae te minti turo? Aqao, Kotiva kankoma kero rivaro ti muntukavano niara vaimantama vaunara.

¹² Vo vaintinavu unahaa tiha, Kotiva tinavu noraiqama kaimanta vira kaiqa vare vauro, ti variaka, vika vaiinti nahenti nivuqaa vaiha nai nutu tuahera kareka auti vaiha, tinavu hampata vohaa vai aararavata rante variara. Vi aarava variantorave ti, te kia ni monu naariraiti, qaqi variqi virera. Te mintimiqi vuari vika kia ho tiha, Tenavu Porura aanare niqihai monu varakeha Kotira kaiqa vare vauro, tivara.

¹³ Karaitiva kia vi vaiintinavuka noraiqama kaimanta vinavuka unahaa tiha, Karaitiva tinavu noraiqama kaikave, tivakeha unaqaraiqama keha vira kaiqa varaqi vi variara.

¹⁴ Kia te vi vaiintinavuka una kaiqara ravuku virara. Sataanivavata unaqaraiqama keharo *enseli* koqeva ataa intemakero ni vaira. ¹⁵ Vi vaiintinavuka vira kaiqa vaiintinavu variarara ti, vinavuka Sataanira aanare unaqaraiqama keha avuqavu ni varia vaiintika aanare ni variara. Vinavuka hampi kaiqa varera kaara nai qora koqaa varaiqe te huviqorave tirara.

Porura qoraiqama amitaqi vi vaurara tura

¹⁶ Te ni tiva nimuna uvara qaiqavata vi uvara ni tiva nimirera. Kia vovano tiriara kia avu aato vataa vaiintive tiarira. Ne tiriara kia avu aato vataa vaiintive tivera, ne ti qaqi kaiqe te kia avu aato vataa vaiintika vaiha te tenta autu tuahera kaare.

¹⁷ Te tenta autu tuahera karera iha, kia Noravano [Karaitiva, tinantemake tireravauve. Te kia avu aato vataa vaiinti voqaara vaiha tirera.

¹⁸ Airi vaiinti vataihaina okarara iriha nai mahuta ti variarara ti, tevata vika aanare tenta mahuta tirera.

¹⁹ Ho quqaama ni avu aatovano koqe avu aato vaimantara ti, ne quahakeha kia avu aato vatauka hampi uva ti variara irireka auti variara. ²⁰ Ike, te tavauramanta vaiinti vonavu anire niara tinavu paanaa kaiqa varaate tivakeha, ne ia monuravata airairavata varake namakeha, niara vihi vaahi tivaqiqi viha, ni auruvuta ruqemake variamanta ne vinavuka qaqi ke variamanta minti variarave. Ne vi vaiintika qioqama kaataara vaimanta ne kia minti variarave.

²¹ Ike mpo, te kaurihama qoqaa ni tiva nimirerave: Tenavu ni hampata variavauna entara tenavu ugerara vaiintinavu vaihara ti, tenavu kia vi vaiintinavuka aanante ni qoraiqama nimite variavaunara.

Vo vaiintinavu nái mahuta tiha nái nutu tuahereha variarara ti, kaiqe kia qetaraiti, tevata vika voqaantemake tiari. Te minti tihama kia avu aato vataa vaiinti voqaara tirera.

²² Vi vaiintinavuka nai mahuta tiha, Tenavu tentanavu kaivaqaukavara uva Hiparu uva ti vauraukave, ti variara. Ho tevata Hiparu uva ti vauraukave.

Vinavuka tiha, Tenavu Isareri vatanaaka vauraukave, ti variara. Ho tevata vohaa vi okaraukaqaima vauro.

Vinavuka tiha, Tenavu Eparahaamiva kuvuarama taikave, ti variara. Ho tevata mintima vauraukave.

²³ Vinavuka tiha, Tenavu Karaitira kaiqa vaiintima vauro, ti variara. (Te minti tihama kia avu aato vataa vaiinti voqaantemake ti vai.)

Vinavuka tenavu Karaitira kaiqa vaintima vauro ti variara. Ho te vinavukavata uri aatarake Karaitira kaiqa vainti tarukama vauro. Te vinavukavata uri aatarake vukaari utiha Karaitira kaiqa vare vaunara.

Te vinavuka uri aatarake qaiqaa qaiqaavata Karaitira kaiqa vare vauramanta vira kaara ti airi tataa karapuhiqama ke variamanta variqi vi vaunara.

Ti airi tataa kaavu humiqake variamanta vaunara. Airi enta te qutu vuarirava aumanto vaimanta vaunara.

²⁴ Te Karaitira kaiqa vare variavauramanta Iutaa nora vaiintinavu kauquru tataa ti tauvaqaini 39 tataa retiqohai ruqutuqi vi vaumanta variavaunara.

²⁵ Taaramo tataa Romeni vatanaaka kapipiqohai ti kaavu humiqake vatora. Vo enta vo vatanaaka ti oriqohai harukareka ruqutuqi vi vaura. Te taaramo tataa sipiqi namari vaura vi variavauraro sipivano namariqi aquvi vaura. Sipi vovano namariqi aqu vumanta te vohaa enta aatitoraqavata entaqipata varuva namariqi variavaunara.

²⁶ Te Karaitira kaiqa vareha vo vataini vo vataini ni variavaurararo huvura namarivano ti raaqu varero ruhiqauke vaura. Muara vaiintinavu aaraini ti veka vaiha ti harireka auti vaura. Tinta vohaa vatanaaka Iutaa vaiinti vonavu ti harireka auti vaura. Vo vatanaakavata ti harireka auti vaura.

Te nora vatukaqi ni variavauramanta ti harireka auti vaura. Te qumina aaraini ni variavauramanta ti harireka auti vaura.

Te varuva namari vaura ni variavauramanta ti harireka auti vaura.

Vo vaiintinavu tiriaria unahaa tiha ai qata yakaukave tivakeha ti harireka auti vaura. Te mintiaqi viha Karaitira kaiqa varaqi vi variavaunara.

²⁷ Te vukaari utiha Karaitira kaiqa varaqi viha entaqi airi tataa kia vaitaraiti, Karaitira kaiqa varaqi vi variavaunara. Airi enta te karavata namarivata kia naraiti variqi vi variavaunara. Airi enta ti utavaqaq kia vauvaro iqaravano hari vaumanta variavaunara.

²⁸ Kia vi haikava vi haikavaqai maara timi vaimanta vare vaunara. Vo enta vo enta Karaitira vaiinti nahenti voqiqi voqiqi variaka vikaqaa te raqikiqi vi vauraro vi maaravavata tiqaa vaimanta vaunara.

²⁹ Vikaqihairo vo vaiintivano tiharo, Te kia kempukaiqaake Kotira aaraqaa ho virarave, tirera, te virara ike mpo tiha muntuka qoraiqirage vairara. Vovano Kotira aaraqahaairo hiqintiro qora kaiqa varairera, te viraravata iriariraro ti muntukavano qoraiqirage vairara.

³⁰ Te tenta mahuta tiarira aaravaqai vairera, te tenta uquerara vaiinti vaunara, viraraqai iriha tenta mahuta tivaqiqi virera. ³¹ Kotiva Variqavano vahiaro tinavu Nora Vaiinti Ihu Karaitira vira Qovama vaimanta te vira autuqai ekaa enta tuaheraqi virera. Ho viva kankomakero iri vaimanta te kia niara una uvavauve ti vai.

³² Ne te uquerara vaiinti vauna okarara iriate ti, te maa uvvara ni tiva nimirera; Haaru te Damasikusi nora vatukaqi variavauraro King Aretaasira vira vevaaraini vau vaiintiva tiriara vira ravaqaqvavu vare vuru karapuhiqama kaate tivakero vaiinti vonavu nititomanta vinavuka vaantaavura qentiana vaiha tiriara ampeqiqi vaumantavata, ³³ vokuka ti nora uta rutantutoraqi ntuvake vaantaavura ntoma tonaihai vaati aqaini ti tutu tutamaqiqi tuvi muntu komanta te viraqahaai ruqemake vuavaunara.

12

Kotiva Porura umiqo haikarara tura

¹ Te tenta mahuta tivaqiqi vi variai naraqaahai kia koqe haikavano qovaraiqiragevata, te tenta mahutaqai tivaqiqi virera. Vo vaiintinavu una maara uva ni tiva nimihama nái mahuta ti variarara ti, tevata tenta mahutaqai tiarira aaravama vairo. Ho kaiqe te Noravano tairakaa qovaramako haikara tavaavaunara ni tiva nimiri.

² Haaru te Karaitira vaintivano variavauraro Kotiva ti raraukero tivita varero nai virini naaruvinu vuru kora. Ti maraquaqiae vuru korave, te vaata vataake variavauraroe ti

tivita varero vuru korave, kia te virara kankomake iruro. Kotivaqaima nai virara irivo. Vi entaraqaahai variqi vuavauraro 14 ihinavu aitarora.

³ Kotiva ti tivita varero nai vatuka koqe naini vuru komanta tavaavaunara. Vi entara ti maraquravanoqae vurave, vaata vataakae vuavaunarave, te kiama virara kankomake iruro. Kotivaqaima virara irivo. ⁴ Ti tivita varero nai vatuka koqenaini vuru komanta te mini vaiha vo haika vo haika iriavauna haikara kia te ho noqihai tiva nimiarirava vairo. Ti qioqama taimanta kia te vi haikarara ho ni tiva nimiaina.

⁵ Te mini vaiha vi haikara vi haikara iritaavaunarara irihama, te tenta mahuta tiataa imantavata, kia te minti tirera. Te ugerara vaiinti variainarara viraraqai irihama tenta mahuta tirera.

⁶ Te naaruvinai vaiha iruna haikarara tenta mahuta tiarerera, kia te avu aato kia vataa vaiintika uva tiantemake tiraiti, te quqaa uvaqaima tirara. Ho kia te naaruvinai vaiha iruna haikarara tenta mahuta tivaqvirera. Te minti tiariraro hauri vaiinti vovano tiriara ike viva nora vaiintivano vaivo tiantora. Ne ti kaiqvavata ti uvavata iri taveha viraqahai ne homa ti okaravata kankomake tavevara.

Auquvano ranteqaintema kero Porura ari vaurara tura

⁷ Kotiva ti tivita varomanta te koqe haika, vo haika vo haika tavaavaunarora tiro, Kotiva tiriara tiharo, Poruva nariara tiharo, Te nora vaiintima vauvo, tiantorave, tivakero Kotiva ti vaataini aihavi haikara qovarama kora. Vi haikava auquvano ranteqaintema kero, ti tivaata hari vaimanta vaunara. Sataaniva atitai *enseliva* vi haikaraqohairo ti qoraiqama timite vaimanta vauraukara ti, te naaruvinai tavauna haikarara tenta mahuta tivaqvi vuvarora.

⁸ Te Nora Vaiintiara taaramo tataa mpo tiha vi haikara qaqqini vara kairaqe ho variare turaro ⁹ viva aqao tiro, Are mintiaqira vi vairaqe te homa ai koqema amitaqvirarave. Are ugerara vaiinti variqira vi vairaqe viragaahai te homa ai kempukaiqama amitaqvirarave, tiro. Viva minti tivera te aihavi haikara varaqi viha ugerara vaiinti variqiu vuainarara viraraqai iriha tenta mahuta tivaqvirera. Te mintiaqvi vi vauraro Karaitiva ti kempukaiqama timite vaimanta variqiu vi vaunara.

¹⁰ Te Karaitirarao ti, te ugerara vaiinti variqiu vuainarara kia noraiqaake iriqvirera. Vokika tiriara vaaqu uva ti vairave, te vukaari utiha vi variainarare, ti qoraiqama timite vaiqe variainarare, maara varaqi vuainarare, te Karaitirarao tiha kia vi haikara vi haikarara noraiqaake iriqvirera. Te ugerara vaiinti variqiu vi variariraro Karaitiva viraqahairo ti kempukaiqama timitaqiro vi vairaqe variqiu virera.

Poruva Korinti vatanaakara noraiqama kero irura

¹¹ Te tenta mahuta tihama te kia avu aato vataa vaiintivano tintemake ti vauro. Ho ni kaara te minti tivaqvi vi vaunara. Ne ti kaiqara koqe kaiqave tiataara vaimanta ne kia minti ti variara. Ne tiriara qumina vaiintive tivera, maa uvara iriata: Ne vo vaiintinavuara tiha, Vinavuka Karaitiva noraiqama kai vaiintikave, ti variaka, te vinavuka kaiqvavata aatarake vauraukama vai.

¹² Karaitiva ti noraiqama kaimanta te quqaiqamake vira kaiqa vaiintima vauro. Te ni nivutaini vaiha kia popohanaara iraiti, vo kaiqa vo kaiqa nora kaiqave, kia tavaa kaiqarave, vare variavauramanta ne ti kaiqa taveha tiriara ququaama Kotiva vira noraiqama kero atitaivo tivakeha, ti okara kankomake tavaataarave.

¹³ Te Karaitira vaiinti nahenti vo vataini variakaqaa koqemake raqiki vaiha niqaae kia koqemake raqiki vaunarave? Aqao, te vikaqaavata niqaaavata vohaa qaramake raqikiqi vi vaunara. Te ni maara nimiarorave tivakeha, te ni kia karave vo haikave naari vaunara. Te kia minti tiriati, niqaa qaqqi koqemake raqikiqi vi vaunara. Ike mpo, te nivata vi maaraa niimiataarave?

¹⁴ Te ni taara tataa oru tavamake, qaiqaa taaramoqamake ni oru tavarera henoqi vauro. Kia te niqaa maara vatareravauve ni oru tavarera. Kia ni monu airairara ti hantuqa hariro. Ni vaiintiara ti hantuqa harimanta te ni oru tavarera. Vaintairavano nai noka qokaqaa raqikiqi vi variaravauve. Vinavuka noka qoka vikaqaa raqikiqi vi variara. Ho ne ti vaintairama variavo.

¹⁵ Te ni kahaqirera quahakema tenta una haikaravata tenta kempukavata taiqa kaainarave. Ike, ti muntukavano niara voqavata vairera, ni muntukavano tiriara muntuvu keroe varianarove?

¹⁶ Te kia ni maara rava nimitauna uvarara, ne vi uvarara ququaave tiataara. Ne hini kiaka tiriara tiha, Poruva unaqaraiqama keharo tenavu una haikara vare vaivo, ti variara. ¹⁷ Nantiabee te mintunarave? Te vo vaiintinavu ne varianaini nititauramanta vinavukae ne ia haikara varaavo? Aqao, vinavukavata kia mintiarave.

¹⁸ Te Taitaaasirara mpo tiha ne varianaini vuane tivake, vira vataake Karaitira vainti vonavu nititauramanta vinavuka Taitaaasira vataake vuarama. Taitaaasivae orurero unaqaraiqama keharo ne ia haikara varairave? Kia viva mintirave. Tetanta Taitaaasika vohaa kaiqaqai vare vauraukara ti, kia unaqaraiqama keha vora airaira vare vaunarave.

¹⁹ Tenavu maa uvvara tihama kia tentanavu auta ntihavauve ti vauro. Ti navunao, tenavu Karaitira vainti vahama Kotira avuqaa vahama uva ti vai. Tenavu ni kempukaiqama nimiratara ekaa vo kaiqa vo kaiqa vara nimite vauraukama vai.

²⁰ Te vo haika aatu qeteha vaunara. Te ni orure tavaarimanta ne qaqi qora okara vare vaivera, te kia ni quahama nimitaarimanta nevata te ni nitiaina uvvara kaara kia ti tavaataa imanta vaivorave.

Te ne vainaini orure hampi okara, vo okara vo okara tavaarora. Nai ati nai ati i vai okararave, nai toma amite nai toma amite i vai okararave, arara itai okararave, nai tuqavu amite nai tuqavu amite i vai okararave, nariara nariara qora uva ti vai okararave, nai turoqama amite nai turoqama amite i vai okararave, te nora vaiinti vauro ti vai okararave, nariara nariara vo uva vo uva tivaqi viha kia vohaa uva ti vai okararave, te vi okarara vi okarara ne vainaini orure tavaarora. Te vi haikara tavaarorave tiha qetehama vauro.

²¹ Te orure tavaari ne vovano vovano vora naata vataakeve, vora vaati vataakeve, hampi nuvaqi viha, varaatave naakeve vikavata hampi nuvaqi viha kia nái qora kaiqa, vo kaiqa vo kaiqa qaqlira karaiti, qaqlira varaqi vi vaivera, vira kaara Kotiva kaurira haika ti timirage te ni kaara vogamakema iqí ratararave. Te vi okarara tavaarora.

13

Poruva Rauriha variate, tura

¹ Te ni taara tataa oru tavamake, qaiqaa taaramoqamake ni oru tavarera. Kotira vukuqi maa uvvara mintima tiro:

Taara vaiintie taaramoqamake nái nivuqohai tavaivaro vo vaiintivano qora kaiqa varairera, ne vi vaiintinavuka uvvara quqaa uvave tivakehama vi vaiintiraga (Lo 19:15)

² Te taara tataa ni oru tavaavauna entaraqaa ni hampata vaiha qora kaiqa vare varia vaiinti nahentikaravata, ekaa vokiakaravata, te kempukaiqamake vika qioqama teha uva tiva nimiavauna. Te vate niaraiqamake vaiha qaiqaa vi uvvara tirera. Te anirante ne vainaini orure tota qora kaiqa vare varia vaiinti nahentikaravata, vokiaka qora kaiqa vare variakavata, kia te vika vehakuma nimirara.

³ Ne tiriara tiha, Quqaae Karaitiva vira noqihairo ti vaivo, kiae ti vaivo? tiha ti avateha tavareka auti variarara ti, te orure qora kaiqa vare variaka kia qihaaqama nimirara. Te orure mintiari ne ti okara kankomake tavevara. Karaitiva kia ugerara vaiintivano vaharo nai okara ni numiqe vairo. Karaitiva kempuka vaiintivanoma vaharo viva nai okara ni numiqe vairo.

⁴ Haaru viva ugerara vaiinti vaumanta vira katariqaa aruke hiritovaro Kotiva vira kempukaiqama kovaro maa entara viva qaiqaa qaqlira himpilo kempukavano variqiro vi vairo. Karaitiva haaru ugerara vaiintivano vauntemake, tenavuvata ugerara vaiintima vai. Kotiva tinavuvata kempukaiqama timitaqi vi vairaqe tenavu Karaitira vataake vohaa variqi viha ni kaiqa vara nimitaqi virera.

⁵ Ne Karaitira uva koqemake iriqi vi vai okarara avateha tavaata. Ne hoe tiha, Ihu Karaitiva tinavu muntukaqai vaivo, tivara? Ne kia ho minti tivera, ne kia Karaitira uva iriakama vaivara.

⁶ Ne tinavu avateha tavaiqe tenavu quqaa Karaitiva noraiqamake kai vaiintika variarera, tenavu ni uvvara hovema tirara.

⁷ Tenavu Kotira aareha niara vika kahaqai vaira vika kia qora kaiqa vararaiti, avuqavuqamake variqi vuote ti vaunara. Minti tihama tenavu tentanavu kaiqara hoe aruvivo kiae ho aruvivo, virara kia noraiqaake iriraiti, tenavu ne Kotira avuqaa avuqavuqamake ni vaira virara noraiqaake iri vaunara. ⁸ Quqaa uvavano vaimanta kia tenavu vira ho aatarake vo uva tirara. Tenavu vi uvvaraqai kahaqamake avataqai virera.

⁹ Ne kempuka vaiinti nahenti variqi vuote ti, tenavu homa ugerara vaiinti variqi virara. Tenavu niara mpeqaiqamavi vaiha anomake Kotira vaiinti nahenti variate ti, tenavu Kotira aare vaunara.

¹⁰ Te oru ni hampata vaiha ni noraiqaake nitiarorave tivake, te niaraiqamake vahama maa garara ntuva nimite. Noravano ti noraiqama kaimanta te niqaa raqikiqi vi vauraukama vai. Noravano kia tiriara ni qoraiqama kaarire tiraitiro, viva ni kempukaiqama nimitaarire tiro, ti noraiqama kaimanta te niqaa raqikiqi vi vaunara.

Poruva uva mantama nimitora

¹¹ Ti qata vakaao, ti uva ho taiqero. Ne naantiara anomake koqe vaiinti nahentiqama virara irihama vate maa entaraqahaai koqe kaiqaqai varaqi vuate. Te tuna uvvara iriqi vuata. Vohaa uvaqai avataqi vuata. Ni araraqihairo paru i vaira variqi vuata. Ne mintiaqi vivaro niara muntuka vate vai Variqava, ni araraqi paruma nimite vai Variqava, vivama ni hampata variqiro vuano.

¹² Ne Kotira vaiinti nahenti vahara ti, ne koqemake nai uva mante nai uva mante iha variata. ¹³ Kotira vaiinti nahenti maini variaka ni uva mantama nimite vai.

¹⁴ Ho Noravano Ihu Karaitiva ni koqema nimitaqi viraro Kotiva niara muntuka vateharo variqiro viraro vira Maraquravano ni hampata vohaa variqiro vuarira.

KARESIA

Poruva Karesia vatanaaka qara ruva nimitora

Ihura qaqi vara himpima kovaro naaruvaini oru vauvaro 25 ikie aitaromanta Karesia vatanaaka hininavu Karaitira uvava quqaave tivake vaumanta vo vaiintinavu orure vikara tiha, Ne Karaitira uvaqai iriqi vivorave. Ne Karaitira uva iriha Iutaa vatanaa maara uva Kotiva Mosiraqaa tivatora, vi uvaravata iriqi vuate, ti vaura. Vinavuka hampi uva minti ti vauvaro vira kaara Poruva maa uvvara qara ruva teharo Karesia vatanaakara kempukaiqama kero tiharo, Karaitira uvaqai iriqi vuate, tura.

¹ Te Poruka maa qarara nini vara kauro. Kia qaqi qumina vaiintivano ti noraiqama kero ti tititaimanta te vaiha Karaitira uva ni tiva nimiqi vi vauraukavauve. Aqao, Ihu Karaitivavata, tinavu Qova Kotiva Karaitiva qutu vuraqihairo qaiqaa qaqi vara himpima kaivavata, vitanta ti noraiqamake tititaamanta te Karaitira uva vaiinti nahenti tiva nimiqi vi vauraukama vai.

² Tevata, Kotira vainti vonavu ti vataake maini variakavata, tenavu niara Kotira vaiinti nahenti Karesiaini variaka ni uva manteha mintima ti: ³ Kotiva tinavu Qovavata, Noravano Ihu Karaitivavata, ni koqema nimiteha aaqurihama nimitaivaro ni muntukaqihairo paru i vaira variata.

⁴ Tenavu maa vataraqaa vaiha vaaku kaiqaqai varaqi vi variavauraro Karaitiva tinavu kahaqireva tinavuva vaaku kaiqavano vika ravaaqavu kaantorave tiro, viva tinavuva iriharo tinavu qora kaiqa uvavano nunka vuarire tiro, qutu vura. Tinavu Qova Kotiva Karaitira atitovaro Karaitiva Kotira no iriqiro viviro vuru qutu vura.

⁵ Ho Kotiva Karaitirara tinavu kahaqiarire tiro Karaitira atitorara ti, kaiqe tenavu ekaa enta Kotira autu tuaheraqvi vuari. Quqaave.

Karaitira uvaqai iriqi viha Kotira aaraqaa vuate, tura

⁶ Kotiva Karaitira kaiqara iriharo ni koqema nimitareva ni naarama taimanta ne Karaitira uva iriqi vivi, viragaahai ne Karaitira uva vaakama qaqrake tiha, Kaiqe vo uva koqe vakaaka iriqi vuare, tivakeha variara. Ne minti ti variarara ti, te vogamake tenta kauqu niara runkinkiri iha tiha, Ike, vika quqaee minti ti variavo? ti vaunara.

⁷ Kia koqe vakaaka vo vaimanta ne vi uvvara iriqi viha Kotira aaraqaa ho vivarave. Vo vaiintinavu Karaitira uva kia avuqavuqamake tiraiti, vinavuka vi uvvara rakakaarimake vo uva ni tiva nimiha ni avu aato vara hampiqamake variara.

⁸ Tenavue, *enseli* vovanoe, tota tenavu ni tiva nimiavauna uvvara qaqrakerovo uva ni tiva nimirera, Kotiva viragaata uva vatairaro viva vaaku vaiinti nahenti rumpavivainaini viraqe te virara huviqorave tirara.

⁹ Te qaiqaa vaaka tunantemake niara tirera: Tenavu Karaitira uva ni tiva nimiavauramanta ne vi uvvara quqaa uvave tiarave. Ne minti tiarara tiro, vo vaiintivano niara vi uvvara qaqrake vo uva iriqi vuate tirera, Kotiva viragaata uva vatairaro viva vaaku vaiinti nahenti rumpavivainaini viraqe te virara huviqorave tirara.

¹⁰ Kia qumina vaiintivano ti quahama timitaarire tivauve, te vi uvvara turo. Aqao, Kotiva ti quahama timitaarire ti, te vi uvvara tunara. Kia te vaiinti nahenti ti quahama timitaate tivauve, Karaitira kaiqa vare vaunara. Te mintiare turaitirio, te kiama Karaitira kaiqa vaiinti vauraitirio.

Ihu Karaitiva Porura aarama kero noraiqama kora

11-12 Ti qata vakaao, te koqe vakaaka Karaitira uva vaiinti nahenti tiva nimi vauna uvava vaireva, vi uvava kia vaiintivano nai irikero tivatai uvaravauve. Kia vaiinti vovanoe nai irikero vi uvvara okara ti humiqaavauve te vaiinti nahenti tiva nimi vai. Aqao, Ihu Karaitiva nai vivama vi uvvara qovarama kaimanta te vi uvvaraqai vaiinti nahenti tiva nimi vaunara.

¹³ Te Iutaa vaiintivano vaiha haaru Iutaa vika maara okara Kotiva Mosiraqaa tivato uvvara, vi uvvaraqai te kempukaiqamake iriqi vi variavaunara, ne virara iriarave. Te vi entara Ihura uva iri varia vaiinti nahentikara hampi uva iri variakave tivakeha vikara kia mpo tiva nimiraitai, vika vehi autu karera auti variavaunara.

¹⁴ Te Iutaa vaiintivano vaiha vi entara te Iutaa vika maara okara iriqi viha te tenta kana vaiinti vikavata naatarake vi uvvara nai kempukaiqamake iriqi vi variavaunara. Tinavu kaivaqaukavara tivato uvvara, te vi uvvaraqai avu aatoqi vateha iriqi vi variavaunara.

¹⁵ Ho haaru kia ti vatato entara Kotiva ti aaqurihama timiteharo nai kaama tero tiriraa Poruva ti kaiqa vaiintima varianarove tivakero, ¹⁶ viragaahairo nai kaamato entaraqaa

tiriara Poruva vo vatanaa vo vatanaaka, ti vakaaka tiva nimiarire tiro, viva nai Maaqu qovarama komanta te vira tavaavaunara.

Te Kotira Maaqu tave viraqaahai kia te vo vaiinti vo vaiinti Ihura okarara iramake iriraiti,¹⁷ kia te Ieruharemini Ihuva noraiqamako vaiintinavuka tavarera viraiti, te vi entara qaqaikake Arebia vataini naane oru vari, viraqaahai orurante Damasikusini ani variavaunara.¹⁸ Te mini variavauraro taarama ihi aitaromanta te Pitaara oru tavarera Ieruharemini vira vataake taara *uikiara* variavaunara.

¹⁹ Vi entara kia te Ihuva noraiqamako vaiintinavukaqihai vonkuvata tavaraiti, te Ihura qata Lemiraqai tavaavaunara.

²⁰ Te Kotira avuqaa vaiha tenta kauqu ainqaa aquukeha niara mintima ti: Maa qarara ntuva taurava kiama una uva vairaitiro, quqaa uvama vaivo, turo. ²¹ Te Ieruharemini varike, viraqaahai Sirisainivata Sirisainivata oru variavaunara.

²² Vi entara Ihura vainti Iutiaini variaka kia ti viri kankomake tavaraiti,²³ vika vokuka tiriara tu uvvaraqai irura. Vokuka tiriara tiha, Vi vaiintiva haaru Ihurara quqaave tivorave tivakeharo, tinavu Ihura vainti qoraiqama timitareva auti vaurave. Viva tota Karaitira uva ekaa taiqa kareva auti vauva vate maa entara viva vi uvvaraqai vaiinti nahenti tiva nimiqiro vi vairave,²⁴ tivake vika tiriara iriha Kotira autu tuahere vaura.

2

Poruva Ihuva noraiqamako vaiintika oru tavora

¹ Ihi 14 navu aitaromanta te Banabaasikanti anirante qaiqaa Ieruharemini vire iha vo vatanaa vaiinti Taitaasiravata vita vare vuavaunara.

² Kotiva uva vo qoqaiqama kero tiriara Ieruharemini vuane tumantara ti, te mini vuavaunara. Te mini orure vaiha nora vaiintinavuve ti variaka, vinavuka hampata ruuvaqumavi vaiha te Karaitira uva minti mintima keha vo vatanaaka tiva nimi variavauna okarara vinavuka tiva nimiavaunara. Nora vaiinti vinavuka tiriara hampi uvama vo vatanaaka tiva nimi variarao tivake ti ravaaqavu kevorave ti, te vinavuka vi uvvara okara utukute tiva nimiavaunara.

³ Vi entara Taitaasiva ti vataakero anu vaiintiva, viva Giriki vatanaavano vaumantavata, vika kia vira vaata toqa amitaate tiraiti, qaqi kovaro vaura.

⁴ Hini vaiintinavu una uva tiha, Tenavuvata Ihura vaintive, tunavuka, vinavukama tiriara tiha, Aqao, are Taitaasira vaata toqa kaataarave, tura. Vi vaiintinavuka tinavu kaiqa okara ampeqamakeha tavareka anu vaiintinavuka vaura. Iutaa maara uvavano tinavu rumpa taivarohu Karaitira tinavu kuvantu timitaimanta tenavu qaqini vaunarara ti, vinavuka tinavu ne Iutaa maara uvavata iriqi vuataarave tivakeha qaiqaa tinavu vi uvvaraqohai rumpa kareka auti vaura.

⁵ Ho ne Karaitira uva, quqaa uvaqai iriqi vuate ti, tenavu vinavuka uva kia inaaraiqvata iriraiti vaunara.

⁶ Vi entara te Ieruharemini oru variavauramanta nora vaiintinavuve ti variaka vinavuka ti nana uvae tiva timura? (Kia te vaiintivano noraiqama vuainarara noraiqaa ke iki. Kotiva kia vaiinti autuara iriharo vi vaiintiva koqe vaiintive vi vaiintiva qora vaiintive ti vaira.) Ho vi entara nora vaiinti vinavuka ti nana uvae tiva timura? Vinavuka kia tiriara are vo uvavata tiataarave tiraiti, tiriara ai uvavano hoqai vaivo tura.

⁷ Vinavuka minti tivake tavavaro Pitaava noraiqama viro Iutaa vatanaaka Karaitira uva tiva nimi vaintema kero, Kotiva tivata noraiqamako komanta te vo vatanaaka Karaitira uva tiva nimi variavaunara. ⁸ Iutaa vatanaaka tiva nimiarire tiro, Pitaara noraiqama kaiva Kotiva, vohaa vivaqaima tivata noraiqama kero are vo vatanaaka ti vakaaka tiva nimiane, tura.

⁹ Nora vaiintinavuve ti varia vaiintinavuka Lemivavata, Pitaavavata, Ionivavata, vinavuka tiriara tiha, Quqaama Kotiva ai noraiqama kaivara are vi kaiqara varaqira vi varianarare, tivake vinavuka titanta Banabaasika kauqu timura.

Vinavuka titanta kauqu timiha tiha, Netanta vo vatanaaka hampata kaiqa varaqi vi vaise tenavu tentanavu Iutaa vatanaaka hampata kaiqa varaqi vuare, tura.

¹⁰ Vinavuka vohaa uvaqai titanta tiva timi tiha, Netanta vehi vaiinti nahentiara tauru kevorave, tumanta te tiha, Eo, ti antuqavano vika kahaqiataa imanta kahaqirerave, tiavaunara.

Poruva Pitaara atiharo avuqavuqura

¹¹ Ho vo enta Pitaava Antiokini anirero mini vaharo vo haika hampiqama komanta vira kaara te vaiinti nahenti nivuqaa vaiha Pitaara atiavaunara. Vi uvvara okara ni tiva nimirera:»

¹² Vi entara avunigama kero Pitaava Ihura vainti vo vatanaaka kia vaata toqakoka hampata kara ne vaumanta viraqaahai Iemiva Ieruharemihairo nitito vaiintinavuka anirovaro Pitaava vo vatanaaka mini kero tiharo, Hauri Iutaa maara okara iriaka ti tave titivorave, tivakero viva vo vatanaaka vika mini kero nariara kanta vaiharo kara ne vaura.

¹³ Pitaava mintumanta Iutaa vaiinti vonavuvata Pitaava untemake, tinavuvata titivore rave tivake kia vo vatanaaka hampata vaiha kara nora. Vika mintihama unaqaraiqamake koqe kaiqa vare vauvaro Banabaasivavata vika aanantero kia vo vatanaaka hampata vaiharo kara nora.

¹⁴ Vinavuka mintumanta te tavaavauramanta kia avuqavuqamake Karaitira uva iriqi vi vaumanta te ekaa vika nivuqaa himpite vaiha Pitaarara mintima ti: Aqao, are Iutaa vaiintivano Ihura vaintigama vuararora tiro, kiama Iutaa maara okaravano ai tuataivo. Are nena mintimakera vaihara nantiharae are vo vatanaakara Iutaa maara okara iriqi vuate ti variarao? Are kia mintiataarave, tiavaunara.

Ihurara quqaa vivave tikaqaima Kotiva avuqavuqama nimitaanaro

¹⁵ Tinavu vatatomanta tenavu Iutaa vatanaaka vaiha tenavu vo vatanaakara tiha, Kotiva Mosiraqaa tivato uvava kiama ho vika kahaqiraro qora kaiqa vare vai uvava qaqlima vikaqiqi varianarove, ti variavaunarave.

¹⁶ Ho vate tenavu kankomake iruraro Iutaa vaiinti vovanovata Kotiva Mosiraqaa tivato uvava iriqiro virarovata, Kotiva kiama vira uva ho taiqa amitaanaro. Ihu Karaitira uva iriqiro vi vaina vaiintira Kotiva vira uvaqaima taiga amitaanaro.

Tenavuvata Kotirara viva tinavu uvavata taiqa kaarire ti, Ihu Karaitirara quqaave ti vaunara. Kia vaiinti vovanu Iutaa maara okara iriqiro viraqaahairovauve Kotiva virara are avuqavu ni variara vaiintivave tiravauve. Vaiintivano Karaitirara viva ti kahaqiariravama vaivo tiraqaahairo Kotiva vira uva taiqa kero avuqavuqama amite vaira.

¹⁷ Kotiva tinavu avuqavuqama timitaarire ti, tenavu Karaitirara quqaave ti vaunara. Tenavu Karaitirara quqaave turaro aato kenko tiro irivimanta tenavu Iutaa vatanaaka vahavata, vo vatanaaka qora kaiqa varaqi vi variantemake, tenavuvata qora kaiqa varaqi vi vaunara. Ihuva tinavu kaiqa vara timitairaqaahairoe tinavuqi qora kaiqa qovarama vivo? Aqao, vovano minti tirera, viva hampi uvama tianaro.

¹⁸ Haaru te Iutaa maara okara iriqi vuare tivake, qora kaiqaqai varaqi vi variavaunara. Ho te qaiqaa vi uvava iriqi vuarera, te qaiqaa qaqlima qora kaiqa varaqi virara.

¹⁹ Ho Iutaa maara okaravano tiqaa raqikiqiro yumanta, viraqaahai te Kotira antuqa avataqi viha qaqi variqi virerave tivake, te „Karaitira vataake“ qutu vuavaunara. Mintunarara ti, Iutaa maara okaravano kia qaiqaavata tiqaa raqikiqiro vi vaira.

²⁰ Te qutu vuavauraro, Karaitiva tigi qaqi variqi vi vaimantara ti, vate te qaqi variqi vi vaunara. Karaitiva tiriara muntuka vateharo qutu vurara ti, te Karaitirara quqaa viva Kotira Maaqvanove tivake virara iriqi viha qaqi variqi vi vaunara.

²¹ Karaitiva mintima timitaimantara ti, kia te viva aaqurihama timiteharo kogema timitaainara qaqira karara. Iutaa maara okaravano tinavu ho kahaqama timitaitiro, Kotiva virara iriharo tinavu avuqavuqamama timitaitiro. Mintiare titirio, Karaitiva quminama qutu vitirio.

3

Kotira Maraqua varerara tura

¹ Aqao, Karesia vatanaakao, ni avu aatovata kia vaimanta variakave. Tavave ni avu aato hampiqama kaimantae ne hampti uva iriqi vi variavo? Te vutukema Karaitira katariqaa aruto uvara ni tiva nimuramanta ne kiae kankomake iriavo?

² Ne uva vohaiqa ti tiva timiqe iriare. Ne Iutaa maara uva iriqi vihae ne Kotira Maraqua vare iavo? Ne Ihu Karaitirara quqaave tivakehae Kotira Maraqua vare iavo? Ne vira okara ti tiva timiqe iriare.

³ Ni avu aato kia vaimantae variavo? Ne Ihu Karaitirara quqaave tivakehamta Kotira Maraqua varorave. Hoqare ne kia nenta kahaqiraiti vauvaro Kotira Maraquaravano ni kahaqumanta ne Ihura vaintigamavi variqi vura. Viraqaahai ne nantihae hampti avu aato iriha Kotira Maraqua qaqirake, ne nenta qaiqaa kahaqireka auti variavo?

⁴ Haaru ne Ihura vaintigamavi variqi vi vaumanta vokuka ni qoraiqama nimite vaumanta ne vi entara kia popohanaara iraiti, kempukaiqamake variqi vi vaura. Haaru ne mintumake variqi vi vaurara hauri maa entara ne tauruke hampti uva iriqi vivora.

⁵ Kotiva kia ne Iutaa maara okara iriqi burara iriharo nai Maraqura ni nimiravauve. Ne Karaitira uvvara quqaa uvave turara tiro, Kotiva nai Maraqura ni nimuvaro viva ni hampata vaimanta ne nora kaiqa vo kaiqa vo kaiqa vare variara.

⁶ Eparahaamirara tu uvvara iriha variata. Eparahaamiva Kotirara are quqaama mintinarave tuvarora tiro, Kotiva virara tiharo, Te ariara avuqavu ni variara vaiintivave tirarave, tura. ⁷ Eparahaamiva tunttemake, Kotirara ququaave ti varia vaiinti nahentika, vikama quqaa Eparahaamira vaintivara vaivarave.

⁸ Karaitiva naantiara vaiinti nahenti kahaqainarara iriharo Kotiva haaru Eparahaamirara vi uvvara tivatora. Vi uvvara Kotira vukuqi qara ntua tova mintima tiro:

Are kuvuarama tenaraqaahairo vaiinti vovano ekaa naato vatanaaka koqema nimitaanarove, tura. *(Okara 12:3)*

⁹ Eparahaamiva Kotirara ququaave tivakero virara kempukaiqaakero iriqiro vi vaurara tiro, Kotiva vira koqema amitora. Ho Kotiva Eparahaamira koqema amitontema kero, viva ekaa vaiinti nahenti virara kempukaiqamake iriqi vi variakavata koqema nimitaanaro. ¹⁰ Kotira vukuqi mintima tiro:

Mosiva ekaa maara okara qara ntuvato uvava vaivaro vaiintivano kia ekaa vi uvvara iriraitiro, hini uva qaqla kairera, Kotiva vira qoraiqama amitaanarove, tura. *(Lo 27:26)*

Kotira vukuqi minti tirara tiro, vovano tiharo, Kaiqe te Mosira uvaqai iriqi vuare, tirava qoraiqamama vuanaro.

¹¹ Mosira maara okara iriqiro vi vainaraqaahairo, kiama Kotiva vi vaiintira uva nunka amitaanaro. Qaiqaa Kotira vukuqi mintima tiro:

Kotirara kempukaiqamake iriqi vi vaika vikaqaima qaqla variqi vivarave, tura. *(Hab 2:4)*

¹² Mosira maara okara iriqi vi varia aarava vo aaravano vaivaro, Karaitirara iriqi vi varia aarava vo aaravano vaira. Vi aaratanta kia vohaa qaramake variara. Kotira vukuqi mintima tiro:

Mosira maara okara ekaa iriqiro vi vairava, vi vaiintivaqaima qaqla variqi vuuarove, tura. *(Wkp 18:5)*

¹³ Tenavu Mosira maara okara kia ekaa avataqi vi vaunara kaara tenavu qoraiqama vuataara vauvarovata, Karaitiva tinavu vatuka varovaro Kotiva vira qoraiqama amitora. Kotira vukuqi mintima tiro:

Katariqaa hiritre vaintirai Kotiva vira qoraiqama amitaanarove, tura. *(Lo 21:23)*

¹⁴ Kotiva haaru Eparahaamira koqema amiteharo tu uvava ekaa vo vatanaa vo vatanaakaqla variarire tiro, Ihu Karaitiva qovarama viro vaaquqama vura. Karaitiva vaaquqama vurara ti, tenavu Karaitirara quqaa viva tinavu kahaqiaravama vaivo turaro Kotiva nai tiva taintemakero, nai Maraqura tinavu timimanta varaunara.

Kotiva nai kauqu aiqiqaa aqukero tivato uvara

¹⁵ Ti qata vakaao, ne te tuna uvvara kankomake iriate ti, te vo uvaqaa vatake/ntuvake ni tiva nimirera: Vaiintivano nai qutuaina entarara iriharo qara ntuvakero vatero tiharo, Te qutu vuariraro vi vaiintivama ti onaana varaarire, tivakero nai autuvata qara viraqaa vatero variqiro viviro vuru qutu vivaro vira uvavano ho vivau vairaro kia vovano vi uvvaraqla hini uva qaqla vara kaanaro. Kia ho vovano vo uvavata vira uvaqaa tomaqa taanaro.

¹⁶ Vira voqaantema kero, Kotiva nai kauqu aiqiqaa aqukero Eparahaamirara tiharo, Te ariaravata are kuvuarama tenararavata irihama maa uvvara tiva tauro, tura. Kotiva kiama tiharo are kuvuarama teraukave tiraitiro, viva are kuvuarama tenarave fiharoma vainti vohaiqara tivatora. Karaitiva kia vatainai tuvu vau entara Kotiva Eparahaamirara are kuvuarama tenarave tiharoma Karaitirara tivatora.

¹⁷ Te tuna uvvara okara maantimama vairo: Kotiva Eparahaamiraqaa uva tiva taatau tovaro 430 ihinavu aitarovaro, viraqaaahairo Kotiva qaqla nai uva maara Mosiraqaa tivatora. Ho naantiara Mosiraqaa uva maara tivatova kia ho avuni Eparahaamiraqaa tivato uvvara nunka kairaro qaqla varianaro.

¹⁸ Kotiva kiama Mosiraqaa tivato uvvara iriharo vaiinti nahenti koqema nimite vairavauve. Viva mintiare titirio, viva tota Eparahaamiraqaa tivato uvava qumina uvaqaima vaitirio. Kotiva hoqarero Eparahaamiraqaa tivato uvarara iriharo vaiinti nahenti koqema nimite vairo.

¹⁹⁻²⁰ Kotiva Mosiraqaa uva maara tivatora vo? Nantivaroe Kotiva vi uvvara Mosira tiva amurave? Ho vaiinti nahenti vika nái vaaqu okara kankomake tavaate tiro, Kotiva vi

uvara tomaqa kero vatora. Vaiinti nahenti vi uvara iriqi vi vaivaro te kaama taaina vaiintiva Eparahaamiva kuvuarama tairaukaqihairo qovaraiqama vuarire, tura.

Kotiva nai uva maara maantima kero tiva nimura: Kotiva vi uvara *enselinavu* naane tiva nimumanta viraqaahai vika Mosira muntu tiva amuvaro viraqaahairo Mosiva vi uvara vaiinti nahenti muntu tiva nimura. Kotiva Eparahaamira uva tiva amireva iharo kia vo vaiintiara tiharo, Are Eparahaamira muntu tiva amiane, tiraitiro, viva naivano Eparahaamira muntu tiva amura.

Kotiva mintima kero Mosiraqaa nai uva maara tivatora

²¹ Quqaae Kotiva avuniqama kero Eparahaamiraqaa tivato uvara nunka kareva Mosiraqaa uva tivatorave? Aqao, kia minturave. Kotiva Mosiraqaa uva maara tivatova vaivaro kia vaiinti vovano vi uvara ho koqema kero iriqiro vuarirava vairave. Vaiinti vovano vi uvara ho iriqi vuaro titirio, Kotiva vi vaiintirara, Are avuqavu ni variara vaiintivave. Are ekaa enta qaqi variqira vinaravema, titirio.

²² Kotira vukuqj kia minti tiraitiro, maantima keroma tiro:

Qora kaiqavano ekaa naato vatanaakavata ravaaqavu kairara ti, vika ekaa qora kaiqajai varaqi vi variarave, tura.

Ho Ihu Karaitirara quqaa vivave ti vaiinti nahentika, vikajaima ho vaivara. Kotiva Eparahaamiraqaa tivato uvava Karaitirara kempukaiqama kero iriqiro vi vaina vaiintiara vairaro Kotiva vi vaiintirama koqema amitaanaro.

²³ Hoqare kia tenavu Karaitirara kempukaiqamake iri variavauna entara Mosiraqaa tivato uva maarava tinavu rumpa tomanta variavauraro viraqaahairo Karaitiva qovarama vura.

²⁴ Karaitirara kempukaiqamake iriqi vi variariraro Kotiva tinavu uva taiqa kero avuqavuma timitaarire tiro, Mosiraqaa uva maara tivatova tinavuqaa raqikiqiro vi vaura.

²⁵ Karaitiva qovarama yumanta tenavu virara kempukaiqamake iriqi vi vaunarara tiro, vate Mosiraqaa uva maara tivatova kiama tinavuqaa qaiqaavata raqikiqiro vi vairo.

²⁶ Ne Ihu Karaitirara quqaa vivave tivake virara kempukaiqamake iriqi vi variarara ti, ne Ihu Karaitira vataake vohaa vahia Kotira vaintiqamavi variavo. ²⁷ Ne namari vare viraqaahai ne Karaitira vataake vohama variavo. Ne minti variarara tiro, ni avu aatovano Karaitira avu aato voqaarama vaira.

²⁸ Ne Karaitirara quqaave tiakara ti, ne kia vo qara vo qaramake variavo. Iutaavanove vo vatanaavanove, rumpatai vaiintivave qumina vaiintivanove, qoraintivanove nahentivanove, ne Ihu Karaitira vainti variarara ti, ne vohaa qaramake variavo.

²⁹ Ne Karaitrainiqama vuarara ti, ne Eparahaamira vaintivara variara. Kotiva Eparahaamirara ai vaintivara koqema nimitarerave tu uvava, vi uvava niqivatama varianaro.

4

Tenavu Kotira vainti vaunarara tura

¹ Vi uvara okara maantimama vairo: Vaintiruvano naantiara nai qova ina haikara varaarirava vaivarovata, viva inaara vaintiru vahiarora tiro, viva nai qora kaiqa vaiinti vika voqaantemaka kero vairo. ² Viva vaintiru vahiaro vo vaiintinavu vevaaraini variqiro vi vairaro vira qova kaamataina entava anintiraro vi haikara nai varaanaro.

³ Vi vaintira voqaantemake, tenavuvata variavauraro vataihainaa uva okaravano tinavu rumpa tero tinavuqaa raqikiqiro vi vaura. ⁴ Mintiaqiro vi vauvaro Kotiva kaamato entava anirovaro Kotiva nai Maaqu atitovaro nahenti vovano vira vatavaro vivavata Mosiraqaa tivato uvaraqai iriqiro vi vaura. ⁵ Ho vi uvava kia vika ravaaqavu kaira vika Kotira maaquve raavurave variate tiro, Ihuva tinavuara iriharo qutu viro tinavu kuvantu timitora.

⁶ Tenavu quqaama Kotira maaquve raavurave vaunarara tiro, Kotiva nai Maaqu Maraqura tinavu timivarao viva tinavu muntukaqi vahiaro nai Qorara, *Aba—Qao*, ti vaira.

⁷ Kotira Maraquravano ai muntukaqi vairara tira, are maa entara kia rumpatai vaiintiru voqaara vairaitira, are Kotira maaquvanove raavuravanove variarao. Are mintima kera varianarara tiro, Kotiva nai Maaqu amina haikara aivatama amianaro.

Poruva Karesia vatanaakara noraiqama kero irura

⁸ Haaru ne Kotirara kia iru entara una variqanavu ni rumpateha niqaa raqiki vaumanta ne vika kaiqajai vara nimite vaura. ⁹ Maa entara ne Kotirara kankomake iriarave—ho kaiqe te vi uvara avuqavu tiare: Maa entara Kotiva niara kankomakero irirave. Ho Kotiva niara koqema kero iri vaimanta ne nantihae vira qaqrake haarua okara, ququerara okara

kia ni ho kahaqiaina okarara iriqi viha vi okarava qaiqaa tinavuqaa raqikiqi vi vairaqe vira kaiqa vara amitaare ti variavo?

¹⁰ Ne Iutaa uva maara raqakaarorave tivakeha vo enta kaamateha vi entaraqaave, vi toraraqaave, vi ihiraqaave nora maara ti varia entarave ti variarave. ¹¹ Oho, ne minti varia okarara te qetehama vauro. Hauri te niqi kaiqa vara nimitaarirava quminaiqama vuantorave.

¹² Ti qata vakaao, te niara mpo ike tiha, Ne te variaintemake variate, turo. Te Iutaa vainti vaurarovata, vika uva maaravano kia ti ravaaqavu kaimanta te ni vo vatanaaka voqaantemake vaunara.

Ne haaru kia ti qoraiqama timite vaura. ¹³ Ne kankomake iriara. Te tota ni hampata vaiha nora rovara varaqi viha Karaitira vakaaka ni tiva nimiavaunara. ¹⁴ Vi entara ti rovaravano noraiqamakero qoraiqumanta ne kia ti qaqa karaati, ne vukaari utiha koqemake tiqaa raqikiqi vi vaura. Vi entara ti vitareka Kotira *enseli* vitontemake ti vitora. Ike, ne vi entara Ihu Karaitira vitontemake ti vitita kora.

¹⁵ Vi entara ne tiriara noraiqaake quahé vaura. Nantimantae maa entara ne kia mintiavo? Ike, te quqaama turo. Ne vi entara ti kahaqireka iha nenta avuvata homa vauruke ti timiatirio. ¹⁶ Vate te quqaa uva ni tiva nimi vauramanta ne vira kaarae ti navutaiqi variavo?

¹⁷ Vo vaiintinavu nái maara uva ti variara virara ne eo tiate ti, vika niara unaqaraiqamake noraiqaake iriqi viha, vika kia ni koqema nimitaraka auti variara. Ne ti uva qaqa kireka vika uvaqai iriqi vuate ti, vika ni tiva nimi variara.

¹⁸ Vo vaiintinavu ni quqaa kahaqireka autivera, vika homa niara noraiqamake irivara. Te ni hampata variaina entarave, kia ni hampata variaina entarave, vika homa mintivarai.

¹⁹ Ti vaintinavuvauvu, ne te vatataurauka voqaarama variara. Ne mpeqaqamavi Karaitira vainti variate ti, te qaiqaa ni vatarera nahentivano vainti vatareva antura ntintemake, tevata niara iriha antura nti vai.

²⁰ Mpo, vate te ni hampata variarera, te hove tiataara. Te ni hampata vahavauve, vo uva homa qihaaqamake tirara. Te maini niaraini vaiha nantiabee vika kahaqiainarave tivakeha noraiqaake niara aato utiha vaunara.

Poruva Hagaaka Seraakara uva tuqantaakero tura

²¹ Ne Mosira uva maara iriqi viha vira vevaaraini vaireka auti variaka te ni irama nimitarera. Ne vi uvara okara ho kankomake iriarave?

²² Eparahaamirara mintima tiro: Vira maaqu taaraqanta vaura. Vira kaiqa nahenti rumpatova vira maaqu vo vatatovaro vira nahenti vovano qaqi vauva vira maaqu vo vatatora.

²³ Rumpato nahentiva nai vainti qaqi nahenti vatontemakero vatatovaro, qaqi vau nahentiva nai vainti vo qarama kero vatatora. Kotiva Eparahaamirara kauqu aqiqaa aqukero tiharo, Are qorainti vaintima vatenarave, tu uvaraqaahairo vi nahentiva qorainti vainti vatatora.

²⁴ Vi nahentitanta haaru Kotiva uva taaraqanta tiva taataukero vatotanta voqaara vaura. Nahenti vo, vira autu Hagaava vaireva, viva Kotiva Sainai Aiqinaqaa vaiharo Mosiraqaa tivato uvara voqaarama vairo. Hagaava rumpato nahentiva vaurara ti, vira naintivaravata rumpa tokaqai vaura.

²⁵ Te Sainai Aiqinavano Arebia vataini vairara qaiqaa uva tuqantaake tirera. Vi aqinqinava vaireva, Hagaavama vairo. Ieruharemi vatukara uva tuqantaake tirera. Ieruharemi vatukavano vaireva, Hagaara naintivarama vairo. Ieruharemi vatukaini variaka variavaro Mosira uva maaravano vika rumpa taimanta variara. Vika Hagaara naintivara voqaara rumpataikaqai variara.

²⁶ Ieruharemi vatuka vovano naaruvainima vairo. Vi vatukararavata uva tuqantaake tirera: Vi vatukava vaireva, viva qaqi vai nahentiva Seraavama vairo. Vi vatukava vaireva, tinavu novama vairo. ²⁷ Kotira vukugui virara mintima tiro:

Nahaiarama/Qururaiqama vuara nahentio, are quahéhara variane. Are kia ke ke tiraitira, kia vaintivata vataraitira vaihara, are quaha quaha ihihi tivacira vuane.

Kia vainti vatai nahentira vaintivara airitaha variavarora tiro, vi nahentiva vaa-tiqaa varia nahentika uri naatara kairave, tura. *(Aisaiaa 54:1)*

²⁸ Ti qata vakaao, Kotiva kauqu aqiqaa aqukero Eparahaamirara are vainti vatenarave turaqaahairo Aisaakira vatatorave. Vira aanare nevata Kotiva nai kauqu aqiqaa aqukero turaqaahairo Kotira vaintiqama vi variara.

²⁹ Vi entara qaqi vatato vaintiva, Isamairiva vaiharo Kotira Maraqravano kahaquvaro vatato vaintira Aisaakira qoraiqama amite vaura. Maa entaravata tenavu Kotira

Maraqura varaurauka vauramanta Mosira maara uva iriaka tinavuvata qoraiqama timitareka auti variara.³⁰ Ho Kotira vukuqi nana uvae virara tiro? Mintima tiro:

Rumpatai nahentira atitairaro nai vaintintiro vuarire. Vira vaintivano nai qova ina haikara kiama ho varaanarove.

Qaqi vai nahentira maaquvanoqaima nai qova ina haikara ho varaanarove, tura. (*Okara 21:10*)

³¹ Ti qata vakao, vira voqaara kia tenavu rumpatai nahentira vira vaintivara vairaiti, tenavu qaqi vai nahentira vira vaintivarama vauro. [Mosira uva maaravano kia tinavu rumpa taivararo Karaitira uvavano tinavuqaa raqiki vaira.]

5

Ne qaiqaavata rumpavi vaivorave tura

¹ Tinavuara kia rumpa viraiti, qaqi nuvaqi vuate tiro, Karaitiva tinavu kuvantu timitaира. Ne qaqqini varia vaiinti nahentika vaihara ti, ne kia vo vaiinti qaqi kaivaro ni qaiqaa rumpa taarire.

² Te Poruka ni tiva nimiari iriata. Hauri ne tiha, Iutaa uva maara iri varia vaiintika tinavu vaata toqa timitaige tenavu ho vairarave, tivora. Ne minti tivera, Karaitiva kia ni ho kahaqiariravama varianaro.

³ Te qaiqaake kempukaiqamake ni tiva nimirera: Vaiintivano tiharo, Kaiqe te Iutaa uva maara iriakara tiari ti tivaatavata toqa timitaate tirera, ekaa Mosira uva maaravano vira ravaaqavu kairaro viva ekaa vi uvava avataqiro vuariravaqaima varianaro.

⁴ Niqihai vokiaka tiha, Tenavu Mosira uva maara iriqi vuariraro Kotiva tinavu avuqavuqama timitaarie, ti variaka, ne Karaitiraqaaahai teqavi qaquinima variavo. Ne qaqqini teqavi variavaro Kotiva kiama ni aaqurihama nimitaharo ni koqema nimite vairave.

⁵ Tenavu Karaitirara iriqi vi vauraro Kotira Maraqravano tinavu kahaqama timite vaimanta tenavu Kotiva tinavu avuqavuqama timitaaina entara vekama vai.

⁶ Tenavu Ihu Karaitira vataake vohaa vaunarara tiro, vaata toqake okaravave, kia vaata toqake okaravave, vi okarava vi okarava kiama tinavu vo qarama timitaanaro. Tenavu Karaitirara iriqi viha vorara vorara muntuka vataaina okarava, vi okarava avuniqamakero nora haikama vairo.

⁷ Tota ne koqemake Kotira uva iriqi vi variavaro tavave ni ravaaqavu kaimantae ne qoraiqamavi quqaa uva qaqrake ni variavo? ⁸ Kotiva ni naarama taiva timantavauve ne hampi ni variara.

⁹ Uva vovano minti tirave: Kaupititira inaaraiqvano qamaa vitiqaa vairera, ekaa qamaavano nterama vuanarove, tirave.

¹⁰ Ho nevata tevata Karaitira vataake vohaa vauraukara ti, te niara muntuka qihaaqamake mintimake iruro: Ne vo uva qaqrake kia iriqi viraiti, te tiaina uvarara quqaa uvave tivakeha variqi vivarave, turo.

Nai ta vaiintivae ni avu aato vara hampiqamake vaira, Kotiva nai viraqaa uva vataanarove.

¹¹ Ti qata vakao, te Karaitira uva voka voka tiva nimiqi viha, kia te vaiinti vaata toqake okararavata tiva nimiqi vi vaunaravauve. Te vi uvava tiva nimiqi vuraitirio, kia vo vaintinavu ti qoraiqama timitaatirio.

Te vi uvava tunara kaaravauve Iutaa vaiintinavu ti qoraiqama timite variarave. Te tenta uvaaqaa vaiinti vaata toqake okararavata tomaqake tiva nimuraitiro, Iutaa vaiintinavu tiriara quaheha kiama ti qoraiqama timitaatirio.

¹² Oho, ni avu aato vara hampiqama keha nenta vaata toqa kaate ti variaka, vi vaintinavu nai tava ekaara itikaivave te huviqorave tiataara.

¹³ Ti qata vakao, ne kia rumpavi vairaiti, qaqi variqi vuate tiro, Kotiva ni naarama taira. Ne kuvantuvu varia vaiinti nahentika vaiha, hauri ne tiha, Kaiqe haarua muntukavano vaina kaiqara vaaqu kaiqa varaqi vuare, tivora. Ne kuvantuvu varia vaiinti nahentika vaiha, ne nariara nariara muntuka vateha koqe kaiqaqai nai vara amite nai vara amitemaqi vuata.

¹⁴ Te Kotiva Mosiraqaa tivato uva maarara qeqoqamake mintima tirara:

Ne nentara muntuka vatentemake, nenta navunaa vaiintiaravata muntuka vateha variate, tirara. (*Wkp 19:18*)

¹⁵ Ne quara vairi voqaara vaiha nai atti nai atti iha raquanara iha vaivora. Ne rauriha variata. Ne mintiaqi viha ne nentama taiqa vivara.

Koqe aaraqaa nirara tura

¹⁶ Te niara mintima ti: Ne Kotira Maraqura qaqi kaivarо viva ni koqe aara nunaqairamanta ne koqemake variqi vuate. Ne mintiaqi vivera, ne kiama qaiqaa haarua muntukavano hampi kaiqa vare vainara varevarave, turo.

¹⁷ Tinavu haarua muntukavano vare vai kaiqava vo qaramakero vaivaro Kotira Maraquravano vare vai kaiqava vo qaramakero vairo. Vitanta nai navutaiqi nai navutaiqiha variarara ti, tenavu kia ho tentanavu koqe kaiqa varaataa ina kaiqara ho varaaинarо.¹⁸ Kotira Maraquravano ni ntikero aara numiqairera, ne homa Kotira kaiqa raqiqi vi vaivaro Mosira uva maavarano kiama niqaa raqikiqiro vuano.

¹⁹ Ni haarua muntukavano vare vai kaiqara ne virara iriara. Vi uvava maantimama vairo: Hampi qaramaqi ni vairave, voravata hampi ruherave, hampi narira ni vairave, una variqa autu tuaherake vairave, uhiakaa auti vairave, navutaiqi vairave, iqoka raqiqi vairave, vora toma amiterave, arara ite vairave, vika nai nutuqai tuahere vairave, iqoka raqiqiha tuqavu vi vairave,²¹ vora airairara muntuka nti vairave, iha namari namake vueraiqama vi vairave, ruvaquamavi variaraqaahai vueraiqaaavi vaiha aakara nteha hampi uva ti variarave, ekaa vi kaiqara vi kaiqara haarua muntukavano vare vai kaiqavama vairo.

Te hoqare ni tiva nimunantemake, te qaiqaavata ni tiva nimirera: Vi kaiqara vi kaiqara vare variaka kiama Kotiva raqikina vatukaraqи ho vivarave, turo.

²² Ho Kotira Maraquravano vare vai kaiqava kia mintimakero vairo. Kotira Maraquravano vaiinti nahentiqa raqikiqiro vi vaimanta vika maantima vaina kaiqaraqaima varevara: Nariara nariara muntuka vate vairave, muntukaqihairo koqe i vairave, araraqihairo paru i vairave, kia arara ita nimitaraiti qihaaqama nimite vairave, vora kahaqи vairave, avuqavu ni vairave, naata vaati koqemake variqi vi okararave,²³ vika kia nai nutu tuahere vairave, vika nai vaataqaa koqemake raqiqi vairave, ekaa vi kaiqava vi kaiqava Kotira Maraquraaqahairo qovaraiqi vairara tiro, vaiintivano vi kaiqara varaqiro vi vairera, kiama vo uvavano vira ravaaqqavu kaanaro.

²⁴ Tenavu Karaitirainiqama vurauka. Tinavu haarua muntukavano vaaqu kaiqa varaainarave, qora okara varaainarave, tenavu tentanavu haarua muntuka varake Karaitira aruto katariraqaa vi muntukara eekaara aru taiga kaunara.

²⁵ Kotira Maraquravano tinavu qaiqaa qaqi vara himpima kaimanta tenavu qaqi variqi vi vaunarara ti, kaiqe tenavu vira qaqi kaariraro viva tinavuqaa raqikiqiro vi vairaqe tenavu vira kaiqaqai varaqi vuari.

²⁶ Kaiqe tenavu kia tentanavu mahuta tiraiti, kia nariara nariara arara itaaina uvara tiraiti, vovano koqema kero kaiqa varaainarara kia nai toma amite nai toma amitemaqi vuari.

6

Ne nai kahaqi nai kahaqamaqi viha maara varaqi vuate tura

¹ Ti qata vakaao, niqihairo vo vaiintivano qora okara autu kairera, kia vi vaiintira kahaqivarо viva anirantero qaiqaa Kotira aaraqaa vuarira. Hauri Sataaniva nivata avataira ne „vi vaiintira aanare“ qora kaiqa varevorave ti, nevata rauriha variata.

² Maara vaina entara ne nai kahaqi nai kahaqamaqi vuata. Ne mintiaqi vivera, ne Karaitiva tivatav uvara koqemakemava atavaqи vivara.³ Vainti vovano kia nora autu vava tiharo, Te nora vailintima vauro, tirera, viva nai unama tianaro.

⁴ Ne vohaiqa vohaiqvano nenta kaiqa varera avateha tavaata. Vaiintivano nai kaiqa avatamakero tavairaro koqe kaiqa vairera, viva homa nariara tiharo, Te koqe kaiqama vare vauro, tianaro. Hauri viva vo vaiinti kaiqa avatamakero tavero tiharo, Vira kaiqavano qora kaiqa vaivaro ti kaiqa koqe kaiqama vaivo, tiantora.

⁵ Kia vora kaiqara noraiqaake iriraiti, ne nenta kaiqa varera vira maara nenta varaqi vuata. ⁶ Kotira vakaaka ni tiva nimi vaina vaiintira nenta koqe haika vatera viravata rairakeha amiata.

⁷ Ne Kotirara hampiqamake irivora. Ne una uva tivera, Kotiva kiama ni una uvara quqaa uvave tianaro. Vaiintivano nana kuvukanaa ututainara naantiara nai vi kararaqaima qantuano.

⁸ Vira voqaantemaa kero, vaiintivano nai muntukavano hampi varaaina kaiqaraqai varaqiro virera, viva naantiara qutu vuaina haikaraqaima varaanaro. Vaiintivano Kotira Maraquravano varaaina kaiqara varaqiro virera, naantiara viva ekaa enta qaqi variqiro vuaina haikarama varaanaro.

⁹ Ho kaiqe tenavu vi uvara iriha kia popoharaiti, koqe kaiqaqai varaqi vuari. Kuvukanaa utu tairava kiama vaaka qantu kero vararaitiro, viva variqiro viraro karavano mpeqaiqama viraro qantu kero varaanarove. Vira voqaara tenavu vate kia popohanaara

iraiti, koqe kaiqa varaqi vivi, naantiara vo enta tenavu koqemake Kotira vataake variqi virara.

¹⁰ Virara irihama tenavu vo vaiinti kahaqiarira aarava vairera, kaiqenavu vi vaiintira kahaqiarri. Tenavu ekaa vaiinti nahenti kahaqihavata, Karaitira vaiinti nahenti vika voqavata kahaqama nimitaari.

Poruva ekaara uva tura

¹¹ Ne tavaata. Tenta kauquohai nora qarama niarao ti, ntuva tauro.

¹² Vokiaka lutaai vaiinti tinavu quahama timitaate ti, vika niara kempukaiqamake vaata toqa kaate ti variara. Vika tiha, Tenavu Karaitira katariqaa aruto uvvara ti variari lutaai vika tinavu qoraiqama timitevorave, ti variara.

¹³ Vika vaata toqake okarara noraiqaake irihavata, vika kia Mosira uva maara avataaqi vi variara. Ne vika uva iriha vikara ho tinavu vaatavata toqa timitaate tivera, vika niara tinavu uva avataaqi vuavo tivakeha nai mahuta tivarave.

¹⁴ Ho te kia tenta mahuta tiraiti, te katariqaa aruto vaiintira, Nora Vaiinti Ihu Karaitira vira autuqai tuaheraqi virera. Karaitira katariqaa arutovaro qutu vurara ti, tevata vira vataake qutu vunara. Te qutu vunarara tiro, vataini vai haikava kia ti ho tuate vairaque kia te vataini vai haikarara muntuka vataaqi virera.

¹⁵ Vaata toqake vai okaravave, kia vaata toqake vai okaravave, vi okarava qumina haikaqaima vairo. Tinavu avu aato muntukavano qaraakaiqama vuaina okarava, vi okaravama nora haikama vairo. ¹⁶ Vika nái avu aato muntukaqihai qaraakaiqamavi Kotira uva iriakara te vikara mintima turo: Kotiva vika ekaa aaqurihamma nimitairaro vika muntukaqihairo paru i vaira variqi vuata. Vi valinti nahentika quqaa Kotira vainti nahenti Isarerri vaiinti nahentima variara.

¹⁷ Te tenta uva taiqa karera mintima ti: Te Ihura kaiqa vare vauramanta vira kaara ti ruqutuke vate teqataa vaaraquva ti vaataqaa qaqi vairara ti, hauri ne ti vataake tirorira uva tivora.

¹⁸ Ti qata vakao, Ihu Karaitiva tinavu Noravano ni ekaa koqema nimitaarie. Quqaave.

EPASAASI

Poruva Epasaasi vatanaaka qara ruva nimitora

Ihura arukovaro qutu viro qaiqaa qaqi himpiro naaruvinai oru vauvaro 30 ihe aitarovaro Poruva karapuhiqi vairaro maaq qarara ruva tora. Epasaasiqi vaukavata vo vaiinti nahentivata Ihu Karaitira mpeqa okarara kankomake iri, Karaitiva vika koqema nimitoraravata iriha koqe aaraqaa nuvaq vuate tiro, Poruva maa qarara ruva nimitora.

¹ Te Poruka. Kotira antuqaaqaa te noraiqamavi Ihu Karaitira uva vaiinti nahenti tiva nimi vauraukama vai. Kotira vaiinti nahenti Epasaasini variaka Ihu Karaitirara kempukaiqamake iriqi vi variaka, te maa uvvara ni qara ruva nimite.

² Tinavu Qova Kotivavata, Noravano Ihu Karaitivavata, ni koqema nimiteha aaquri-hama nimitaivaroi muntukaqihairo paru i vaira variata.

Kotiva tinavu koqema timitaainarara tura

³ Aniqe tinavu Variqa autu tuaheraq vuari. Viva tinavu Nora Vaiinti Ihu Karaitira Qova vaira. Tenavu Karaitira vataake vohaa vaurarora tiro, Kotiva tinavu koqema timiteharo tinavu nai aaraqaa viha nai kaiqa vara amitaate tiro, viva ekaa naaruvalhainaa kempuka tinavu timira.

⁴ Tota hoqarerio kia maa vataro autuko entara Kotiva tinavuara vika Karaitira vataake vohaa vaiha ti tivuqaa kia qora kaiqa vararaiti ti, koqe kaiqaqai varaqi vuate tiro, tinavu nai kaama tora. Kotiva tinavuara muntukaa vateharora tiro,⁵ viva haaru tinavu nai kaama tero tinavuara tiharo, Te Karaitira kaiqara irihama vika tinta vaintiqama vuate ti, te vika virikarerave, tura. Kotira antuqavano mintimakero vauvarora tiro, viva te mintirerave tura.

⁶ Kotiva kia tinavu koqaa naariraitiro, nai Maaqu nai muntukaa vaira tinavu aaqaa timirara ti, kaiqenavu viva tinavu aaqurihamaa timiteharo koqema timitairara iriha vira autu tuahera kaare.

⁷ Ike, Kotiva aaqurihamaa timiteharo koqema timite vai okarava nai voqavata vairave. Karaitira naare ntava uvvaro qutu vuraqaahairo Kotiva tinavu qora uva nunka timitamanta tenavu qaqini kuvantuvi vaunara.

⁸ Kotiva aaqurihamaa timiteharo koqema timite vai okarava mintimakero vaivarora tiro, viva tinavu koqe avu aato timi vaimanta tenavu vo okara vo okara ho kankomake tave vaunara. ⁹ Kotiva haaru vairaro Karaitivaqaima ti hantuqa harina kaiqara vara timitaanarove tivakero nai varareva irite vai okarara kukeqa taira, vi okarara viva qoqaiqama kaimanta tenavu iri tavaunara.

¹⁰ Vi okarara qoqaiqama kaiva vaireva, maantimama vairo: Naantiara Kotiva kaama taina entava anintairaro Kotiva naaruvinai vaikavata, vataini vaikavata, hihai hihairo ruvaqaquma kero Karaitira noraiqama kairaro viva avuniqama kero vairaro viva ekaa vikaqaavata, ekaa haikaqaavata, raqikiqiro vuanaro.

¹¹ Tinavu Iutaa vatanaakara Karaitira vataake vohaa variate tiro, Kotiva avuniqamakero tinavu naane nai kaama torara tiro, viva haaru tivatontema kero ekaa vi haikava qovaramaviro vaira.

¹² Mintirara ti, tenavu Iutaa vatanaaka naane Karaitirara tinavu kahaqiariravama vairo tivake, Kotira mpeqa okara takuqi vairaro irihama vira autu tuahere vaunara.

¹³ Ne vo vatanaaa vo vatanaaka nevata quqaa vakaaka, Kotiva ni kuvantukero ntitaaina uvvara iri virara quqaave tivake, nevata Kotira vaiinti nahentiqamavi Karaitira vataake vohaa variara. Ne Karaitirara quqaave tiavarora tiro, Kotiva nai kauqu aiqiqaa aqukero tivato uvvara kempukaiqama vuarire tiro, viva nai Maraqua nivata nimura.

¹⁴ Kotiva nai Maraqua tinavu timirara ti, tenavu kankomake iruraro viva naantiara tinavu kuvantukero tivitaaina entaraqaa viva tinavu timireva tivataina haikara ekaama timianaro. Virara irihama kaiqenavu Kotira mpeqa okara takuqi vairaro iriha vira autu tuahera kaari.

Poruva Kotira aaro uvarara tura

¹⁵ Ne Nora Vaiinti Ihu Karaitirara kempukaiqaake iriha Kotira vaiinti nahentiara muntukaa vateha variamanta irunaranai ti,¹⁶ te niara iriha Kotirara votataa votataa koqema iarao tivaqiqi viha Kotira aareha vaunara.¹⁷ Te niara iriha tinavu Qova takuqukero vaira aareva vaunara. Viva tinavu Nora Vaiinti Ihu Karaitira Variqavano vaira. Viva mintima kero vaimantara ti, te vira aarehama niara, Vika nena Maraqua nimiraro ai Maraqravano vika avu aato koqema nimiteharo ai okara voqavata qovarama kaira vika kankomake tavaate, ti vaunara.

¹⁸ Kotiva nai vaiinti nahentiara iriharo kaama nimitai haikava, vi haikava uritarero nai voqaraa haikavano vaivaro Kotiva paruma keharo ni koqema nimitaaina okarara ni aato kenko tira ne iri, vi entara veka variate ti, te Kotira aareha vaunara.

¹⁹⁻²⁰ Kotira kempukavano uritara kero voqavata vaivama vairo. Tenavu Karaitirara quqaave tivake virara kempukaiqaake iriqi vuainarara tiro, Kotiva homa nai kempuka tinavu timiariravama vairo. Ne vi uvaravata kankomake iriate ti, te niara iriha Kotira aarama nimite vaunara. Kotiva kempukaiqaake kero Karaitiva qutu vuraqihairo qaiqaa qaqi vara himpima kero naaruvaani nai kauqu tanaraini vita yuru kora. Kotiva kempukaiqaame kero Karaitira kahaqintema kero, tinavuvata kahaqiariravama vairo.

²¹ Karaitiva Kotira kauqu tanaraini oquivi vaharo viva uritarero ekaa naaruvaani avuniqamake variakaqaave, ekaa noraiqama vuakaqaave, ekaa nora autu vataukaqaave, raqiki vaivama vairo. Maa entara nana nana nora autu vatauka variarave, naantiara enta nana nana nora autu vateka vaivarave, viva vika vikaqaama raqikiqiro vuuanaro.

²² Kotiva ekaa haika Karaitira vevaarainiqama kero vataivaro Karaitiva ekaa vi haikaraqaa raqiki vairo. Kotiva Karaitira mintima kero noraiqama kaivaro viva qiataiqama viro Noravano vaiharo tinavu nai kaamatai vaiinti nahentikaqaa raqiki vairo.

²³ Karaitiva tinavu qiataiqama kero vaimanta tenavu vira vaatama vaunara. Tenavu Karaitira vohaa vaata vauraro Karaitiva tinavuqi avituma viro vohaa vaivaro ekaa haikaqpiq vaiva, „Kotiva, naima Karaitiraqpiq vairo.

2

Kotiva tinavu qaiqaa qaqi vara himpima kaira

¹ Haaru nevata Kotira uva raqake qora kaiqaqai vare vauvarora tiro, ni avu aato muntukavano kia Kotirara irumanta ne qutu vuaka voqaraa vaura.

² Vi entara ne vataihainaa uva okara iriqi vi vauvaro vaana avuhainaava viva niqaa raqiki vaura. Vi vaanava Kotira uva raqake variakaqaqaa raqiki vaivama vairo.

³ Tenavu Iutaa vatanaakavata qora kaiqa varehama Kotira uva raqake variavaunara. Vi entara nevata tenavuvata vairi quara voqara niha tentanavu avu aatoq hampi kaiqa varaainararaqai iriqi ni variavaunara. Vi entara tenavu vo vatanaa vo vatanaaka aanare hampi kaiqa varaainararaqai iriqi vi variavauraro vira kaara Kotira arara itova tinavuqaa vaura.

⁴⁻⁵ Tenavu qora kaiqa varehama Kotira uva, vo uva vo uva raqa kaavauraro vira kaara tinavu avu aato muntukavano kia Kotirara vaumanta tenavu qutu vuavaurauka voqaraa variavaunara. Minturarovata, Kotira muntukavano tinavuvara voqavata uritara kero vaivaro viva aaqurihamma nimite vai okaravavata uritara kero vairara tiro, Kotiva tinavuvara vika Karaitira vataake vohaa variate tiro, tinavuvata qaqi vara himpima kora. Ho iriate, Kotiva ni aaqurihamma nimiteharo koqema nimite vai okararaqohairo ni kuvantu nimitaira.

⁶ Viva tinavu Karaitira vataake qaqi vara himpima korara tiro, viva tinavu noraiqama kairage tenavu Ihu Karaitira vataake naaruvaani viha raqikiqiu vuarirukama vai. ⁷Ekaa vaiinti nahenti qovaraiqika Kotiva aaqurihamma nimiteharo koqema nimite vai okarara kankomake tavaate tiro, Kotiva Karaitiraqohairo tinavu aaqurihamma timiteharo koqema timitaira.

⁸ Ne nenta kahaqi aarava kia vauvaro Kotiva ni aaqaa aaqurihamma nimiteharo koqema nimitairara ti, ne Karaitirara quqaave tiavaro Kotiva ni kuvantu kero ntita varaira.

⁹ Kotiva kia tenavu kaiqa vara amitaunarara iriraitiro, viva qaqi aaqaa mintimakero koqema timitairara ti, kiama ho tenavu tentanavu mahuta tiarirava vairo.

¹⁰ Tenavu Kotiva autukero vatai vaiinti nahentika vaunarara ti, Kotiva tinavuvara vika Ihu Karaitira vataake vohaa viha koqe kaiqa, haaru qeramakero vatai kaiqara varaqi vuate tiro, tinavu autukero vataira.

Tenavu Karaitira vataake vohaa vaunarara tura

¹¹ Ne iriate. Ne vo vatanaaka variamanta Iutaa vatanaaka nai vaata toqake variaka vika niara tiha, Ne kia vaata toqake variakave ti variara.

¹² Nenta haaru variqi vu okarara iriate. Vi entara ne kia Karaitirara iriraiti, niarakanta vauvaro Kotiva Isarer iikaraqai tinta vaiinti nahentika tivakeharo niara vo vatanaakave ti vaura. Kotiva nai kauqu aiiqiqaa aqukero Isarer iera tiharo, Te ni minti mintima nimitarerave, tivakero kia niara vi uvara tiraitiro umanta, ne kia Kotiva koqema nimitaaina okarara iriraiti, ne hampi variqi viha kia Kotirara iriqi vi vaura.

¹³ Vi entara ne niaraiqamake vauvarovata, vate maa entara Karaitira naarevano nititakero Kotira aaqanto yuru kaira.

¹⁴ Karaitiva naivano tinavu Iutaa vatanaakavata ni vo vatanaakavata maateraiqama timitaimanta tenavu vohaa vatanaaqamavi vaunara. Haaru tenavu navutaiqi variavauna okarava vaireva, vaantaavuravano tavaaranana vaiharo tinavu hini antuakero ni hini antuakero vauntemakero vaura. Ho Karaitiva vaantaavura vira nkaqu qaqini kaira.

¹⁵ Tinavu Iutaa vatanaakavata ni vo vatanaakavata vira hampata tampamavi vohaarraqi maateraiqiha variate tiro, Karaitiva qutu viro Mosiraqaa tivato uva maarara, kia mintiane kia maantiane ti vai uvura ekaa taiqa kora.

¹⁶ Karaitiva katariqaa qutu viro vainti nahenti navutaiqi varia okarara ekaa taiqa kora. Viva tinavu Iutaa vatanaakavata ni vo vatanaakavata vohaanaiqama kero, Kotira aaqanto vuru kaira.

¹⁷ Ekaa vainti nahenti muntukaqihai paru i vaira maateraiqiha variqi vuante tiro, Karaitiva anirero nai vakaaka ne niaraini variakavata, tenavu Iutaa Kotira aumanto vauraukavata tiva timira.

¹⁸ Karaitiva niaravata tinavu Iutaaravata iriharo qutu vurara ti, nevata tenavuvata Kotira Maraqua vohaa Maraquaqai vare, vira Qora aaqanto homa vairara.

¹⁹ Vi uvura vaivarora tiro, maa entara Kotiva kia niara vo vatanaakave tiraitiro, niaravata tinavuaravata ti vainti nahentive ti vaimanta nevata tenavuvata Kotira vainti nahenti vohaa vainti nahentima vai.

²⁰ Nevata tenavuvata vairera, naavu kaqataara voqaarama vai. Karaitiva noraiqamakai vaintinavukavata, paropeti vaintinavuvata, vika vaireka, naavu kaara arataira voqaara variara. Vika mintimake variavaro Ihu Karaitiva vaireva, naaqua avutqaqa arataara voqaarama vairo.

²¹ Ihu Karaitiva naaquravano vairara tiro, vi naavura koqema kero akukuma taivaro vi naavuva noraiqamaqiro viharo nai Kotira naavu koqevama varianaro.

²² Nevata Karaitira vataake vohaa variarara ti, ne vi naavura kiari aumo voqaara variavaro Kotiva nai Maraqua vataakero vi naavuraqiqi qaqi variqiro vuuanaro.

3

Poruva vo vatanaaka kaiqa vara nimiterara tura

¹ Ho te vi uvura Ihu Karaitira vakaaka ni vo vatanaaka tiva nimi vaunara kaara ti karapuhiqi rumpataamanta vaunara.

² Kotiva nai aaqurihamma nimiteharo koqema nimitai uvura ni vo vatanaaka tiva nimiate tiro, viva ti kaama taira. Ho quqaae ne ti kaamatai uvarara iriara?

³ Kotiva nai kukeqatai uvura qoqaa ti tiva timimanta te vi uvura haaru ni inaaraiqa tiva nimirera qara ruva nimitaavaunara.

⁴ Ne vi uvura kaara rivera, te Karaitirara kukeqatai uvura irunantemake, nevata homa kankomake irivara. ⁵ Kotiva kia vi uvura qovarama komantara ti, haaru vau vainti nahentika kia vi uvura okara irura. Maa entara Kotira Maraquaqavano Ihuva kaamatero noraiqamako vaintikave, paropeti vaintinavuve, vi uvura qoqaa vika tiva nimura.

⁶ Vi uvura kukeqato uvava maantimama vairo: Kotiva kia Iutaa vatanaakaqai koqema nimitarevave tivakero, viva vo vatanaa vo vatanaakavata Karaitira koqe vakaakara quqaave tiate tiro, viva vikavata koqema nimitareva auti vairo. Ekaa vo vatanaakavata Iutaa vatanaakavata vaireka, vika „Ihura vaata“ vohaa vaataqaima vaivara. Kotiva nai kauqu aiqiqaa aqukero Karaitirara Iutaa vatanaaka tiva nimi uvava, vi uvava vo vatanaa vikaqvavatama varianarove, tura.

⁷ Kotiva ti kempukaiqama timiteharo ti aaqaa qumina koqema timitero ti noraiqama kaimantara ti, te Karaitira vakaaka vainti nahenti tiva nimiqi vi vaunara. ⁸ Te Kotira vainti nahenti ekaa vika vevaaraini vaurarovata, Kotiva ti aaqurihamma timiteharo koqema timiteharo vo vatanaa vo vatanaaka Karaitira vakaaka tiva nimiane tura. Ike, Karaitira okaravano uritara kero vairara ti, kia tenavu vira okara ekaa ho kankomake irirarave.

⁹ Kotiva ekaa haika autukero vataiva haaru vaiharo nai varareva irite vai okarara kukeqatero variqiro viviro, viraqaaqahiro te vi uvura qoqaiqama karerave tivakero, viva triaria vi uvura vainti nahentika tiva nimiqira vuane tura.

¹⁰ Kotiva naaramatai vainti nahentika vaireka, vika Iutaa vatanaakavata vo vatanaakavata variarara ti, naaruvaini raqiki variakavata naaruvaini kempuka vataakavata tiha, Ike Kotira avu aatoqi koqe okara, vo okara vo okara mpiqaro vaivaro iri vaivave, ti variara. Vika vi okarara tavaate tiro, Kotiva nai kukeqatai uvura qoqaiqama kora.

¹¹ Haaru Kotiva nai varareva irite vai okarava vivau variarire tiro, viva Ihu Karaitira atitovaro Karaitiva tinavu Nora Vaiintivano vi kaiqara vara taiqa amitora. ¹² Minturara

ti, tenavu Karaitirara quqaa vivave tivake Karaitira vataake vohaa vaiha tenavu kia qetaraiti, muntuka qihaaqamake Kotira aaqanto homa virara.

¹³ Vi uvava mintima vaimantara ti, te niara mpo ike tiha, Te aihavira haika niara vare vaunara kia ni muntukavano qoraiqiramanta variate, turo. Ni nutuvano viriniqiarire ti, te aihavi haikara varaqi vi vaunara.

Poruva vikara iriharo Kotira aarama nimitora

¹⁴ Virara irihama te tori kauru aravi vaiha Kotira tinavu Qora aareha vaunara.

¹⁵ Kotiva tinavu Qova vaimantara ti, ekaa vira vainti naaruvinai variakavata, vataini variakavata, virara tinavu Qorave ti variara.

¹⁶ Kotira okaravano uritara kero takuqi vaimantara ti, te Kotira aarehama niara mintima ti: Kotio, nena Maraquaqohaira vika avu aato muntukaqi kempukaiqama nimitairia¹⁷ vika Karaitirara kempukaiqamake iriqi vivaro Karaitiva vika muntukaqi variqiro vuarire. Karaitiva vika muntukaqi vaira vika nariara nariara muntuka vateha, katari koqeva nai tuqa paama tivakero vataqira aratero vainantemake, vika kempukaiqamake variate ti, te Kotira aarevaunara.

¹⁸⁻¹⁹ Ne mintimake kempuka vainti nahenti vaiha viraqaahai ne ekaa Kotira vainti nahenti hampata vohaa vaiha ne homa Karaitiva niara muntuka vate vai okarara kankomake tavevara.

Karaitiva niara muntuka vate vaiva voqavata uritara kero, tuvitara kero, noraiqama kero vairara tiro, kia tinavu qumina vainti avu aatovano vi okarara ho kankoma kero irianaro. Ne vi okarara tavaate ti, te Kotira aarevaunara. Ne Karaitiva niara muntuka vate vai okarara kankomake tave variqi vi vaivaro, Kotiva ekaa kaiqa vare vaiva ni avu aato muntukaqi mpeqaiqama kero variqiro vuunaro.

²⁰ Kotira kempukavano tinavuqi vaimantara ti, tenavu nana nana kaiqarae Kotira iraairaro Kotiva vi kaiqara vi kaiqara vara timiteharo nai uritara kero vo kaiqa vo kaiqavatama vara timitaanaro. Kia tenavu avu aatoqi iritaaina haikaravata viva homa vata.

²¹ Ho kairamantha Kotira vainti nahenti maa entara vaikavata, naantiara enta vaikavata, vika Karaitira vataake vohaa vaiha Kotira autu tuaheraqivi vuute.

Quqaave.

4

Tenavu Karaitira vaata vohaa vaata vauraukave tura

¹ Te tentanavu Nora Vaiinti kaiqa vare vauramanta vira kaara ti karapuhiqi rumpa taamanta vaiha te ni vihi tiha, Kotiva nivata naarama tairara ti, ne koqemake vira aaraqaa nuvaqvi vuute, turo.

² Ne nenta kenauka vevaaraini vaiha vika qihaaqama nimitaqi viha, kia vaaka popoharaiti, nariara nariara muntuka vateha nai kahaqiqi nai kahaqamaki vuata.³ Niara vohaa variate tiro, Kotira Maraquaqavano ni vara tampama kairave. Ne virara irihama hauri tenavu rairavi variarorave tiha kempukaiqamake keha voharaaqi koqemavi vairara iriha variate.

⁴ Tenavu Ihu Karaitira vaata vohaiqavano vauraro Kotira Maraqua vohaiqavanoqaima tinavuqi vairo. Kotiva ni naarama kero ni koqema nimitaaina entara, ne vi entara vohaa enta vira veka vaiha variara. ⁵ Karaitiva tinavu Noravano vohaiqama vairo. Tenavu koqe vakaaka vohaiqaraqai kempukaiqamake iriqi vi vaunara. Tenavu vira autu vohaiqara iriha namari varauunara.

⁶ Variqa vohaiqavanoqai vaharo viva ekaa vainti nahenti Qova vaharo ekaa vikaqaa raqiki vavuva vairo. Viva ekaa vainti nahenti muntukaqi kaiqa varaqiro vaharo viva ekaa vikaqai variqiro vi vaira.

⁷ Tenavu vohara vainti vahavata, kia vohaa kaiqaaqai vare vaunara. Karaitiva tinavu vohaiqa vohaiqara vi kaiqara maa kaiqara varaate tivaqiro vaharo tinavu kempukaiqama timite vaimanta tenavu vo kaiqa vo kaiqa vare vaunara. ⁸ Kotira vukuqi mintima tiro: *Viva naaruvinai tuturante vaharo rumpa taaka airitahaa ntita vuru kairave. Viva vainti nahenti koqe haika, vo haika vo haika raira nimirave, tura.* (*Ihi 68:18*)

⁹ Viva naaruvinai tuturantero vi okarara nana uvae vairo? Vira okara maantimama vairo: Karaitiva hoqarerero naaruvinaihoro tutuntero vata muntukaini vaura. ¹⁰ Maa vataraqaa tuvu vauva vohaa vivaqaima nai naaruva maini kero, nai oritara kero vaharo ekaa haikaqaa raqiki vairaro viva variaina okarava mpiqakero varianaro.

¹¹ Hini vaintinavu avuniqamake variate tiro, Karaitiva vinavuka kaama tero, hini vaintinavu Kotira uva qoqaiqama kaate tiro, vinavuka kaama tero, hini vaintinavu ti

uva tiva nimiqi vuate tiro, kaama tero, hini vαιintinavuara ti vaiinti nahentiqa raqikiha ti uva okara tiva nimiqi vuate tiro, kaama tora.

¹² Vinavukara Kotira vaiinti nahenti qerama kaimanta vika koqemake Kotira kaiqa vara amitaqi viha Karaitira vaata vaiha kempukaiqaavi variate tiro, Karaitiva vinavuka kaama teharo vo kempuka vo kempuka nimira.

¹³ Tenavu mintimake Kotira kaiqa vara amitaqi viha tenavu ekaa vohaa vaiha Karaitirara kempukaiqaake iriqi vivi, viraqaahai tenavu Kotira Maagu okara kankomake tavarara. Vi entara tenavu kia ahora vαιinti nahenti vairaiti, tenavu Karaitiva vainantemake, mpeqa vaiinti nahentima vairara.

¹⁴ Vi entara kiama tenavu naati vainti voqaara vairara. Namarivano kumpeteharo vo haika vuru aqukero viri aqukero intemakerove, uvaivano utiharo vo haika venta varero vutuni maini intemakero, naati vaintivano vo uva iriro ququaave tivakero vaakama qaqrakero qaiqaa oru vo uvvara ququaave ti vairave. Viva mintiaqiro vi vaimanta una uva ti varia vaiintika unaqaraiqamake hampi uva, vo uva vo uva ti variavaro viva vika uvaravata qucaa uvaveqai ti vairara.

¹⁵ Tenavu kia mintiraiti, tenavu qucaa uvaqai tivaqai viha nariara nariara muntuka vateha koqemake noruqamavi vaiha tenavu tentanavu Qiata Vaiinti Karaitira vataake vohaaraqi vairera.

¹⁶ Karaitiva tinavu qiatavano vaiharo tinavu nai vaataqaa raqiki vaimanta tenavu vira vaata vaiha tenavu koqemake vohaaraqi vairera. Vaiinti vaatavano vo vaata vo vaata vaivarao ho noruqe vaira. Vira voqaantemake, tenavu Karaitira vohaa vaatavano vaiha tenavu tentanavu kaiqa, vo kaiqa vo kaiqa varaqi viha nariara nariara muntuka vateha variqi vi, viraqaahai tenavu anomake mpeqaiqamavi vairara.

Qaraaka aaraqaa nuate tura

¹⁷ Vi uvvara irihama te Nora Vaiinti vira autuqaa niara kempukaiqaake mintima ti: Kotira uva kia iria vαιinti nahentika vika qumina uvaqai nái aatoqi iriqi viha variqi vi variarave. Ne vika voqaantemake variqi vivorave.

¹⁸ Vika avu aatovano konkira ari vairaraqai vaimanta variara. Vika kempukaiqamake Kotira uva kia irireka autiha variarara ti, vika vαιinti nahenti Kotira hampata qaqi variqi vi okarara kia iriara.

¹⁹ Vika vaaqu kaiqa vareha kauruataara vaimanta kia kauriraiti, qaqiqai vaaqu kaiqa varaqi vi variara. Vaiinti nahenti hampi ni varia okarara, vi okararaqai vika noraiqaake iriqi viha, vika voqavata vaaqu kaiqa varareka auti variara.

²⁰ Vovano Karaitira okarara ni tiva nimumanta ne tavovaro Karaitira okaravano vaireva kia mintimakero vairara.

²¹ Karaitira uva qucaa uva ni tiva nimumanta ne vi uvvara iriarara ti, ²² ne Karaitira vainti vaiha haaruua avu aato vaaqu kaiqa varerara iriqi vi vai avu aatora qaqira kaata. Ne haaru vaiha nenta avu aatoqai unaqaraiqama keha vaaqu kaiqa vare varia okarava ni taiqa kareva auti vaumanta vaura. ²³ Ne Karaitira vainti vaihara ti, ne haaruua avu aato qaqirake qaraaka avu aato iriqi vuuta.

²⁴ Ne haaruua vaiinti vaira qaqirake qaraaka vαιintima vauro tivakeha variata. Kotiva niara vika avuqavuqamake niha tinta kaiqaqai varaqi viha tinta voqaara variate tiro, ni qaraakaiqama kero autu kaira.

²⁵ Ne vi uvvara irihama una uva ti vai okarara qaqira kaata. Tenavu ekaa Karaitira vohaa vaata vauraukaa ti, ne quqaa uvaqai nai tiva ami nai tiva ami iata.

²⁶ Vo uva kaara ni arara itairera, kia ne qaqi kaivaro ni arara itaira vaaqu kaiqa varata. Ni arara itairava vukai variqiro viraro kuari avu tuvi vuantora.

²⁷ Hauri ni arara itairava vukai variqiro viraro Sataaniva niqi qora kaiqa vara qovarama kaantora.

²⁸ Ne haaru muara auti variaka maa entara nevata Karaitira vaintiqama virara iriha, ne muara auti vaira qaqirake, ne nenta kauquqohai kaiqa varaqi viha vehi vαιinti nahenti kahaqama nimiteva ho variarira.

²⁹ Kia qaqi kaivaro qora uvavano ni noqaahairo qovaraiqiarira. Ne koqe uvaqai tivaqai vivaro ni uvavano vokika kahaqiramanta vika koqemake variata. ³⁰ Kotira Maraqruravano niqi vaira ne kia vira maara vara amitaata. Kotiva ni nai kaama teharo nai Maraqrura nivata nimirara ti, ne kankomake iriavaro Kotiva ekaara entaqaa ni qaqini kuvantu nimitaarirauka variara.

³¹ Toma nimite vai okararave, arara ite vai okararave, mauqa nteha tirori vai okararave, uva vaaru ti vai okararave, vi okarara vi okarara qaqira kaata. ³² Kotiva Karaitira kaiqara iriharo ni qora uva nunka nimitaintemake, nevata nariara nariara

qora uva ti vaira tauruke qaquirake, nariara nariara mpo ike tiva nimiteha koqema nimitaqi vuata.

5

Tenavu aatitairaqaqaa variqi vuainarara tura

¹ Kotiva niara muntuka vataimanta ne vira vainti variakara ti, ne vira aanantamake variqi vuata.

² Karaitiva niara muntuka vateharo variqiro vinantemake, nevata nariara nariara muntuka vateha variqi vuata. Vaiintivano Kotira quahama amitareva koqema kero ahiamunta vinara iha quara amite vainantema kero, Karaitiva tinavuara muntuka vateharo qutu vuvaro Kotira virara iriharo tinavu quahama timitora.

³ Ne Kotira vaiinti nahenti variarara tiro, vaiinti nahenti hampi ni vai okarava ni nivutaini variantora. Vaiinti nahenti hampi ruhe tovevo i vai okaravave, nai vaata nai vaata qohaama keha ni vai okaravave, ni nivutaini variantora. Vora airairara muntuka nti vai okarava ni nivutaini variantora. Ne kia vi haikarara uva inaaraiqavata tiata.

⁴ Ne Kotira vaiinti nahenti variaka kia uva varauve, vehi uvave, vireraiqamake nahentiara hampi uva ti vairave, vi uvvara vi uvvara kia tiata. Ne vi uvvara vi uvvara ti vaira qaqirake Kotira quahama amite vai uvaraqai tivaqi vuata.

⁵ Maa uvvara quqaa uvama vairo: Hampi muara ni vai vaiinti nahentikave, hampi ruhe tovevo i vai vaiinti nahentikave, vora airairara muntuka nti vaira vaiinti nahentikave, vika Karaitivavata Kotivavata raqiki vai vatukaraqi kiama ho vivara. Vora airairara muntuka nti vaiva, viva kia Kotirara noraiqaakero iriraitiro, viva airaira varaainararaqai noraiqaakero iriqiro viharo vi haikaraqai quahama amite vaira.

⁶ Vo vaiintinavu anire niara hampi kaiqa varaaate tivera, ne kia vinavuka qumina una uva tira iriata. Vaiinti nahenti Kotira uva raqakeha vaqqu kaiqa vare variara kaara Kotira arara itairava vikaqaa varianaro. ⁷ Virara irihama ne qora kaiqa vare vaika hampata tampamavi vaiha, qora kaiqa varaqi vivora.

⁸ Haaru nevata konkiraqi variqi vi vaura. Maa entara ne Karaitira vaiinti nahentiaavi vahara ti, ne aatitairaqaqaa variqi vi variara. Virara iriha vaiinti nahenti aatitainaraqaa nintemake nevata nuata.

⁹ Vaiinti nahenti aatitainaraqaa variqi vivera, vika koqe okara, vo okara vo okara autuqi vivara. Vika avuqavuqamake niha, quqaa uvaqai tivaqi vivara. ¹⁰ Ne Nora Kotira quahama amite okarara rantaqai viha, vi kaiqara varaqi vuata.

¹¹ Vaiinti nahenti konkiraqi vaiha qumina kaiqa vare variaka hampata kia vairaiti, vikaqaaahai niara kanta variata. Ne vika vare vai kaiqara qoqaa qovarama kaimanta vaiinti nahenti anomake vika kaiqa tavaata. ¹² Ike, te kaurira haika varaororave tivake, vika kukeqavi vaiha vare varia kaiqara kia ni tiva nimirera.

¹³⁻¹⁴ Ovavano vo haika ataama kairaro vi haikava qoqaa variaainarara tiro, konkiraqi vaina haikara ovavano ataama kairaro vira qora okaravano qoqama varianaro. Haaru virara uvavano mintima tiro:

Are vaite variarava himpuane. Are qutu vuanaraqihaira qaiqaa qaqi himpiraro Karaitiva ai ataama amitaarie, tura.

¹⁵ Vi uvvara irihama ne rauriha variqi vuata. Hauri kia avu aato vataaka variantemake, ne variqi vivora. Koqe avu aato vataaka variantemake variqi vuata.

¹⁶ Qora kaiqa vare variaka airitahaa maa entara variarara ti, ne rauriha kia qumina vairaiti, koqe kaiqaqai varaqi vuata.

¹⁷ Hauri ne kia avu aato vataaka variantemake variqi vivora. Avu aato kankomake iriqi viha Kotira muntukavano vaina kaiqaraqai varaqi vuata.

¹⁸ Kia iha namari neha vueraiqiata. Ne mintiaqi vivera, ne qoraiqamama vivara. Ne qaqi kaivarо Kotira Maraqravano niqi vaharo niqaa raqikiarira. ¹⁹ Ne ruvaaqumavi vaiha Kotirara ti vai ihirave, maaraqaa ti vai ihirave, Kotira autu tuahere vai ihirave, tivaqi vuata. Nenta muntukaqihai ihi tivaqi viha Nora vira autu tuaheraqi vuata. ²⁰ Tinavu Nora Vaiinti Ihu Karaitira autuqaa, ne ekaa haikara tinavu Qora Kotirara koqema iarao tivakeha variqi vuata.

Poruva naata vaati varekara tura

²¹ Ne Karaitirara tinavu Noravano vaivo tivakeha „vira vevaaraini“ variarara ti, ne nenta kenaika vevaarainivata variata.

²² Ni naatavarara tirera: Ne Nora Vaiinti vira vevaaraini vaintemake, ne nenta vaativara vevaaraini variata.

²³ Karaitiva tinavu nai vaiinti nahentiaqaa raqiki vaintema kero, vaativanovata nai naataqaa raqikiqiro vuanaro. Karaitiva tinavu Kotira vaiinti nahentiara ne ti vaatama

variavo tivakero tinavu kuvantu timitaira. ²⁴ Tenavu Kotira vaiinti nahenti Karaitira vevaaraini vaunantemake, ne vika naatavara nenta vaativara vevaaraini vaiha vika ekaa uva tira iriqi vuata.

²⁵ Ni vaativarara tirera: Karaitiva Kotiva haarama tai vaiinti nahentikara muntuka vateharo qutu burara ti, nevata mintimake nenta naatavarara muntuka vateha variata.

²⁶ Tinavuara Kotira kaiqaqai varaqi vuate tiro, Karaitiva namariqohairovata, nai uvaqohairovata tinavu hiqama timitaira.

²⁷ Vaiintivano kia vaaraqu vaata vataa nahentive, kia taupegero otigete urunte i vaatara vataa nahentive, koqe nahentiqai varaintema kero, Karaitiva tinavuara vika Kotira kaiqaqai variqi vi vaivarao kia vikaqaa uva variarire tiro, tinavu hiqama timitaiva naantiara viva tinavu varaanaro. tiro, tinavu hiqama timitaiva naantiara viva tinavu varaanaro.

²⁸ Nai vaataqaa koqema kero raqikintema kero, vaiintivano nai naataqaa koqema kero raqikiarira. Vaiintivano nai naataqaa koqema kero raqiki vaiva viva naiqaavata koqema kero raqiki vaivama vairo.

²⁹⁻³⁰ Vaiintivano kia nai vaata qoraiqama amitaraitiro, viva nai vaata kara amiharo viraqaa koqema kero raqiki vairo. Vira voqantemake, tenavuvata Karaitira vaata vau-narara tiro, Karaitiva tinavu nai vaiinti nahentiqaa raqiki vaimanta vaunara. ³¹ Kotira vukuqi mintima tiro:

Kotiva vaiintiara iriharo nahenti autu amitairara tiro, vaiintivano nai noka qoka kero nai naatantiro avituma viraro vitanta vaatavano vohaa vaatama varianarove, tura. (*Okara 2:24*)

³² Te tenta irike vi uvara okara mintimama vaivo ti: Vaiinti nahenti nai varate nai varate i varia okarava nora uvama vairo. Vaiintivano nahenti varainantema kero, Karaitiva tinavu Kotiva haarama tai vaiinti nahentika varaanaro.

³³ Ho ne vika vaativara ne vohaiqa vohaiqavano nenta vaataqaa koqemake raqikintemake, nenta naatavararaqaaavata koqemake raqikiqii viha vikara muntuka vateha variata. Ne vika naatavaravata nenta vaativarara koqe vaiintive tivakeha vika uvaqai iriqi vuata.

6

Noka qokaravata vaintairaravata tura

¹ Te ni vaintairara tirera: Noravano ni noka qokara niqaa raqikiqii vuate tirara ti, ne nenta noka qoka uvama iriqi vuate. Ne mintiaqi viha avuqavuqama kema nivara.

² Haaru Kotiva uva vateharo mintima tiro: *Nena noka qoka koqe okaraqai autu nimitaane*, tura. Kotiva vi uvara tiharoma nai kauqu aiqiqaa aqukero vo uvavata tampama kero ³ mintima tiro: *Koqemakero vataini variqro viharo vukai enta maa vataraaqaa variqvirerave tirava nai noka qoka koqe okaraqai autu nimitaarie*, tura. (*Katu Varora 20:12*)

⁴ Te ni vainti qokavarara tirera: Ni vaintaira arara itaantorave ti, kia ne vika qoraiqama nimitaata. Ne kia nenta vaintaira qoraiqama nimitaraiti, koqemake vikaqaa raqikiqii viha tinavu Nora Vaiinti uva vira vikavata tiva nimiqi vimanta vika koqe aaraqai vuata.

Kaiqa vaintiaravata vikaqaa raqikikaravata tura

⁵ Te ni rumpataa vailinti nahentikara tirera: Ne nenta nora vaiinti aatu qeteha vikara nora vaiintive tivakeha koqemake vika kaiqa vara nimitaata. Ne Karaitira uva avataqvi vintemake, vika uvavata iriqi vuata.

⁶ Ne nenta nora vaiinti kaiqa vareha vikara tinavu quahama timitaate ti, hauri vika ni vuqaaqai vaiha koqe kaiqa vare vaivora. Vika kia ni hampata vai entaravata vika kaiqa koqemake varaqi vuata. Ne Karaitira kaiqa vaiinti vauraukave, Kotira uva iriqi vi vauraukave, tivakeha koqemake vika kaiqa varaqi vuata.

⁷ Ne vo vainti kaiqa vara amitaqii viha, quaha keha vika kaiqa varaqi vuata. Kia qaqi vaintiara ti, kaiqa vararaiti, Karaitirara ti, vika kaiqa vara nimitaata.

⁸ Maa uvarama iritaata: Kaiqa vainti rumpa tekave, qaqi vaikave, vika koqe kaiqa, vo kaiqa vo kaiqa varerara iriharo Noravano Karaitiva vika nai koqaa nimianaro.

⁹ Ne nora vainti kaiqaqaa raqiki variakara tirera: Nevata koqemake nenta kaiqa vaintiqaqaa raqikiqii vuata. Ne vika rauqi nimiteha ntaihareka auti vaivora. Ne maa uvara iritaata: Niqaavata ni kaiqa vaintiqaavata raqiki vaiva vohaiqavano naaruvinima vairo. Viva naantiara uva avuqavu qiharoma kia vainti autuara iriharovaavue uva avuqavu qianaro.

Kotira auvihehavaara tura

¹⁰ Ho te tenta uva taiqa karera mintima ti: Nora Vainti vira kempukaqaa ne kempukaiqamake variqi vuata. ¹¹ Sataaniva unaqaraiqama keharo ni aatara kaantorave tivakeha, ekaa Kotira auvihehavaa tuateha kempukaiqamake himpite variata.

¹² Kia tenavu qaqi vaiinti hampatavauve raquqi vi vaunara. Tenavu nora autu vataukave, nora kempuka vataukave, vika hampata raquqi vi vaunara. Maa vataraaqa konkiraqi vahia raqiki varia vaanaukave, naaruvaini Sataanira *enselive*, vika hampata raquqi vi vaunara.

¹³ Virara irihama ne Kotira iqoka utavaaga nonkute vaivaro qora entavano qovarama vira, ne Sataanira vataake iqoka raquqi viha ne kia qetake viraiti, ne kempukaiqamake kainke arateha raquqi vuata.

¹⁴ Ne kempukaiqamake himpi vaiha, Kotira quqaa uva varake, hoquka tavaarana rumpa taantemake rumpataate. Iqoka vaiintivano nai mimiraini naavuma taintemake, avuqavu ni varia okarara varake nenta mimiraini naavuma taata.

¹⁵ Karaitira koqe vakaaka arara paruma nimite vai vakaakara *su aiquqaa* nonku taantemake, nonku taata.

¹⁶ Kempukaiqaake Karaitirara iriqi vi vaiva, viva ni kainke voqaara vaira ne vo enta vo enta vira hiriteha Sataanira iha ite vaina vevara qimpa kaata.

¹⁷ Kotiva ni qora kaiqaqaahairo kuvantu kero ntita varairia, iqoka tovaqa qiataqaa aquataantemake, vara aquataata. Iqoka paipe tuataantemake, Kotira Maraqravano i paipera vira Kotira uva, vira taatauke tuataata.

¹⁸ Ekaa enta Kotira vatete aareha variata. Kotira Maraqravano niara vi haikara vi haikarara Kotira iraate ti vai uvare, ne vi uvarara Kotira iraata. Ne kia popohanaara iraiti, avu rampaike viti viri tavamaqi viha, ekaa Kotira vaiinti nahentiara iriha Kotira aarama nimitaata.

¹⁹ Tiriaravata Kotira aarama timitaata. Ne Kotira aaraivarot Kotiva ti kahaqiraqe te maaqi vaiha kia qetaraiti, muntuka qihaaqama keha Kotiva kukeqa tai uvare Karaitira uva qoqaiqamake tiva nimiqi vuari.

²⁰ Vi uvare vaiinti nahenti tiva nimiqi vuane tiro, Karaitiva ti noraiqama kaimanta vaunara. Kotira uva vaiinti nahenti tiva nimunara kaara ti rumpa taamanta te maaqi karapuhiqi vaunara. Ne virara iriha Kotira aaraivarot ti kahaqiraqe te kia qetaraiti, muntuka qihaaqama keha Karaitira uva kempukaiqaake tiva nimiqi vuari.

Vitihainaa uvare tura

²¹ Tinavu qata vakaa Tikikusiva, viva Karaitirara kempukaiqama kero iriqiro viharo vira kaiqa vare vaiva, viva tenavu variqi vuaina vakaakara ni tiva nimira iriate. ²² Ne tenavu variaina vakaakara iriha kia qetaraiti, muntuka paru ira variate ti, te vira atitaariraro viva vuru ni tiva nimianaro.

²³ Tinavu Qova Kotivavata, Noravano Ihu Karaitivavata, vitanta ni kahaqimanta ni araraqihairo paru i vaira variata. Vitanta ni kahaqimanta ne nariara nariara muntuka vateha variata. Vitanta ni kahaqimanta ne vitantara kempukaiqaake iriqi vuata.

²⁴ Ekaa vaiinti nahenti vika Nora Vaiinti Ihu Karaitirara kia popohanaara iraiti, virara muntuka vateha variqi vi variakara, Kotiva ekaa vika aaqurihamma nimiteharo koqema nimi taarirerama turo.

PIRIPAI

Poruva Piripai vatanaaka qara ruva nimitora

Ihura qaqi vara himpima kovaro naaruvaini oru vauvaro 30 ihie aitarovaro Poruva Ihura uva tiva nimiqiro vura kaara vira karapuhiqi kovaro vaiharo maa qarara ruva tora. Ihura vainti nahenti Piripaiqi vauka Porura kahaqireka monu vara kovaro Poruva vi monura varero vikara koqema iavo tiharo maa qarara ruva nimitero. Poruva vika vihi vaahi tiharo vikara vohaa vaiha variqi viha Karaitira uvaqai iriqi viha kia una vaiinti maara uva tira iriqi vuate tiro, maa uvvara qara ruva nimitora.

¹ Te Poruka. Tetanta Timotika Ihu Karaitira kaiqa vaiintitanta vaiha niara Kotira vaiinti nahenti Piripaiqi variakaravata, nora vaiintinavu niqaa raqiki variakaravata, vokiaka ni kaiqa vara nimite variakaravata, tetanta niara ne Karaitira vataake vohaa variakave tivakeha ni maa qarara nimite.

² Kotiva tinavu Qovavata, tinavu Noravano Ihu Karaitivavata, ni koqema nimiteha aaqurihama nimitaivarо ni muntukaqihairo paru i vaira variata.

Poruva Kotirara koqema iarao tu uvvara

³ Ti aatoqi niara ntuva vimanta te niara irihama Kotirara koqema iarao tivaqi vi vaunara.

⁴ Kotiva ni kahaqama nimitaarire ti, te airi tataa Kotirara quahake vira aare vaunara.

⁵ Ne tota Karaitira uva iru entaraqaahai Karaitira kaiqa ti vataake varaqi viha kia qaqira karaiti, vate qaqi varaqi vi variarara ti, te niara irihama Kotirara quaheha vai.

⁶ Te niara maa uvvara kankomake irunara: Kotiva niara koqe vaiinti nahenti variate tiro, viva ni muntukagi kaiqa hoqarama taivara tiro, viva niqi vahiaro vi kaiqara varaqiro viro, vuru Ihu Karaitiva tuvuaina entaraqaa taiqa kaira ne vi entaraqaa koqe vaiinti nahentima vaivara.

⁷ Te niara aato iriqi vihara ti, te homa maa uvvara niara tirara: Te maa entara karapuhiqi vauna entarave, te qaqlini vaiha Karaitira uva tiva nimiha kia qumina uvave kempuka uvave ti vauna entarave, ne vi entara vi entara ti vataake vohaa variqi vi variavaro Kotiva nivata tivata noraiqama kero koqema timite vaimanta tenavu vira kaiqaqai vare vaunara.

⁸ Karaitira muntukavano niara voqavata vaintema kero, ti muntukavanovata niara voqavata vaimanta te ni oru tavaataa imantama vaunara. Kotivavata ti uvvara ququaavema tianaro.

⁹ Te mintimake niara irihama Kotira aare vaunara. Te Kotira niara aareha mintima ti: Kotio, are vika kahaqira vika vorara vorara muntuka vateha variqi viha, vika avu aatovano kenko tira vo kaiqa vo kaiqa okara kankomake iriha, vi kaiqara vi kaiqara ho avatamake taveha, ¹⁰ qora kaiqa qaqirake koqe kaiqaqai varaqi viha naantiara vika Karaitiva tuvuaina entaraqaa koqemake vaivaro vikaqaa kia uva variarire, ti vaunara.

¹¹ Kotiva ni mintima keharo kahaqamaqiro viramanta ne Ihu Karaitira vataake vohaa variqi vivaro ni kaiqavano koqe kaiqaqai vairamanta vaiinti nahenti ni kaiqara iriha Kotirara mpeqavano vaivo tivakeha vira autu tuaheraqi vivara.

Poruva nai karapuhiqi vaurara tura

¹² Ti qata vakaao, te karapuhiqi vauna uvvara ni tiva nimirera. Ti rumpa taamanta te maaqi vaurava kia te Karaitira uva tiva nimi variaina aararavauve tinta tero. Karaitira uva tiva nimirira aarava noraiqaakero quantuaroma vairo. Tota te qaqlini variavauna entara te Karaitira uva vo vaiintinavu tiva nimirira aarava kia ho vaumanta, viraqaahai ti rumpa taavaro maa entara vi aarava homa vairo.

¹³ Ti rumpake maaqi Sisaara karapuhu naavuqi kaamanta vauramanta viraqaahai iqoka vaiintinavu maa naavuraqaa raqiki variakavata, ekaa vo vaiintinavuvata, vika kankomake iriamanta te Ihu Karaitira kaiqa vaiinti vaunara vira kaara maaqi vaunara.

¹⁴ Ti rumpa taamanta maaqi vauramanta viraqaahai Karaitira vaiinti nahenti airitahaa virara iriha, vika kia qetaraiti, muntuka qihaaqamake Kotira uva vaiinti nahenti tiva nimiqi vi variara.

¹⁵ Quqaama vaiinti vonavu ti kaiqara qora avu aato utiha ti haatara kareka auti vaiha Karaitira uva tiva nimiqi vi variara. Vika minti ti variamanta vo vaiintinavu kia minti tiraati, vinavuka koqema keha Karaitira uva tiva nimiqi vi variara.

¹⁶ Vi vaiintinavuka tiriara muntuka vatehara ti, vika te maaqi vauna okarara kankomake iriara. Vika kankomake iriavaro Kotiva ti qaql kaimanta te maaqi vaiha Karaitira uvaqaa raqiki vaunara.

¹⁷ Te vaaka tuna vaiintika, vika kia Karaitirara iriraiti, vika nariaraqai iriha Karaitira uva vaiinti nahenti tiva nimiqi vi variara. Vika kia koqe avu aato utuke tiraiti, vika Poruraqaa uva voqavata variarire tivakeha Karaitira uva tiva nimi variara.

¹⁸ Vika minti ti variarara kia te noraiqaake irirara. Vokiaka ti qoraiqama titimarekave, vokiaka ti kahaqama titimarekave, vika Karaitira vakaaka vaiinti nahenti tiva nimivera, te virarama quahela vairara. Eo, te viraara quahaqi virerave.

¹⁹ Ne tiriara iriha Kotira aarama timite variavarao Ihu Karaitira Maraqravanovata ti kahaqama timite vaimantara ti, te tiha, Quqamaa ti kuvantu kaiqe te qaqini oru vairarave, ti vaunara.

²⁰ Ti muntukavano voqamakero maa haikarara vaimanta vaunara: Te kia vo haika varainara kaara kaurira haika vararaiti, te vatevata ekaa entavata Karaitira kaiqa kempukaiqamake varaqi viha te qaqi variqi vuarerave, qutu vuarerave, vaiinti nahenti ti kaiqara iriha Karaitira autuqai tuahera kaate.

²¹ Te tenta qaqi variqi vuainarara mintima ti: Te qaqi variqi vuarera, te Karaitiraraqai iriqi virerave. Te qutu vuarera, te Karaitira vataake variainarara voqamake quahaainarave.

²² Te vaata vataake maini qaqi variqi vuarerera, te ni homa kahaqainara. Ike, ti muntukavano nana haikarae varianaro? Te vataaini qaqi variqi vuainarare? Te qutuvi naaruvinai vuainarare?

²³ Te virara taara aatoma iri vai. Te Karaitira vataake oru variainara, virara ti noraiqaakero hantuqa harimanta vai. ²⁴ Ho te minti tivakehavata, te ni kahaqiarirava qaqi vaimantara ti, te niarao ti, te vataaini vaata vataake qaqi variqi virera.

²⁵ Te ni kahaqama nimitaarirava qaqi vaimantara ti, te tiha, Te kia vaaka qutu viraiti, te ekaa ni hampata variqi viha ni kahaqiarimanta ne Karaitirara kempukaiqamake iriqi viha quaheha variate, tunara.

²⁶ Ne mintimake vasege naantiara te ni hampata qaiqaa oru variari ne tiriara voqamake quahehama Ihu Karaitira autu tuaherevara.

²⁷ Ne Karaitira uva iriakara ti, ne Karaitira vaiinti nahenti vaiha avuqavuqama kehaqai nuata. Ne mintimake variqi vi vasege te ni oru tavaarerera, kia ni oru tavaarerera, te homa niara tiha, Vika vohaa avu aatoqai iri vohaaraqi vaiha, vika vohaa vaaqaaqai voqara vaiha, Karaitira uva totaqi viha kempukaiqaake vi uvara tiva nimiha ²⁸ kia vika nái navutaaka naatu qetaraiti variqi vi variarave, tirara.

Ne mintimake vaimanta ni navutaaka nái vehi autu kaainarara kankomake iri tavaivarao Kotiva, naima ni kahaqama nimiteharo kuvantu nimitaariravama vairo.

²⁹ Kotiva niara Karaitirara quqaa vivave tiate tiro ni kaama taiva, viva niara vika Karaitira kaiqa varaqi viha aihavira haikavata varaqi vuate tiro, ni kaama taira.

³⁰ Ho nevata ti vataake vohaaraqi vaiha iqoka raquqi vivara. Ne avuni vaiha tavomanta te Karaitira autuqaa aihavira haika vare variavaunara. Ne maa entaravata tavaamanta te vohaa qaramake vukaari utuqai viha qaqiqai nora maara varaqi vi vaunara.

2

Vohaa uvaqai tivaqai vuate tura

¹ Ne Karaitira vataake vohaa variqi vi variara ti, ne kempukaiqaake variqi vi variara. Karaitiva niara muntuka vate vairara tiro, viva ni muntukavata kukugama nimite vaimanta variara. Kotira Maraqravano niqi vairara ti, ne vira vataake vohaa variara. Ne nariara nariara koqema nimiteha nariara nariara ike mpo tiva nimitaqi vi variara.

² Ne mintimake varia vaiinti nahentika vaivera, ne tiriara viva noraiqaakero quahaarire ti, vohaa uvaqai tivaqai vuata. Vohaaraqi vaiha nariara nariara muntuka vateha variata. Ne vohaa avu aato muntuka vateha, vohaa aaraqaaqai nireka autiha variata.

³ Ne vo kaiqa vo kaiqa varareka iha, kia ne nenta nora autu varerarare, nenta mahuta tirarave iriraiti, qaqi ekaa vi kaiqara varaqi vuata. Ne mintiaqi viha nenta nutu vatainigama keha vo vaiinti autuqai tuaheraqai vuata.

⁴ Kia nenta kaiqa varerararaqai iriqi vuata. Ne vo vaiinti vo vaiinti kaiqa vareraravata iriha, vikavata kahaqama nimiteqai vuata. ⁵ Ihu Karaitiva nai avu aatoqai irintemake, nevata vi avu aatoraqai iriqi vuata.

⁶ Ihu Karaitira avu aatovanovata Kotira avu aatovanovata vohaa qaramakero vauvarovata, viva kia Kotikantiro vohaa qaramakero variainarara iriraitiro, ⁷ viva nai nora autu qaqi vatero, Kotira kaiqa vara amitareva iharo vaiintiqama viro vaiintivano vaura.

⁸ Viva vaiintiqama viro qovarama viro vaharo nai autu vatainigama Kotira uvaqai iriqiro viro vuru qutu vura.

Vika vaaqu vaiinti arukontemake, vira katariqaa arutovaro qutu vura.

⁹ Viva nai autu qaqi vatero Kotira uvaqai iriqiro viro vuru qutu vurara tiro, Kotiva vira qaiqaa qaqi vara himpima kero, vira vara viriniqamakero ekaa nutu vara vatainiqama kero nora autuqai vira amivaro Ihura autuvanoqai viriniqaaviro noraiqama kero vaira.

¹⁰ Vira autuvano nora autu vairara tiro, naantiara Ihura autu rava tairamanta ekaa naaruvaini vaikave, vataini vaikave, vataqi vaikave, vika vira autuara iriha tori kauru aravi vaiha ¹¹ Ihu Karaitirara vivaqaima Noravanove tivara.

Vika minti tiha Kotira tinavu Qora vira autu tuahera kevara.

Ne ovavano itaintemake variqi vuate tura

¹² Ti navunao, vi uvara irihama Karaitirara tiva nimuna uvara iriqi vuata. Te ni hampata vauna entara ne vi uvara iriqi vuara. Te maa entara maini niaraini vaunarara ti, ne nentaraa vaiha ne voqavata vi uvara iriqi vuata. Ne Kotiva ni naaruvaini ntitaainarara iriha qeteha aiqu kauqu ntiri ntiriha Kotira kaiqaqai varaqi vivaro ni ntitaarira.

¹³ Kotiva niara vika tinta antuqa vaina kaiqara varaaate tiro, vivama ni muntukaqi vaharo ni kahaqi vaimanta ne vira kaiqa vare variara. ¹⁴ Ne vo kaiqa vo kaiqa varaqi viha kia nuntu naantu tiraiti, kia tiroriraiti, vi kaiqara varaqi vuata.

¹⁵ Ne mintiakе variqi vi vaivarо kia vo uvavano niqaa vaira ne koqe vaiinti nahentima vaivarо. Ne koqe vaiinti nahenti vaivarо ni muntukaqi kia vo nava naavavata vaira ne Kotira vaiinti nahenti maa vataraaqaa variqi viha hampiqamake, kia avuqavuqaaheha ni vai vaiinti nahentika nivutaini variqi vivara. Entaqi opu makauvano itainantemake, ne vi vaiinti nahentika nivutaini vaiha ova voqaara itaqi viha ¹⁶ qaqi variqi vi vai uvara vika tiva nimiqи vuata. Ne mintiaqи vivera, ekaara enta Karaitiva qovaraiqiaina entaraqaa te ni quahama nimiteha tenta ni vara nimitavauna kaiqava kiama quminaiqivo tirara.

¹⁷ Ne koqemake Karaitirara iriqi vuate ti, te ni kahaqirera auti vaiha tenta naare rauruke qutu vuarera, te niarao ti, quahama qutu virara. ¹⁸ Te ni kahaqihа qutu vuarera, ne te qutu vuainarara kia muntukaqoraiqira vairaiti, ne te iainantemake quahaaqai variata.

Poruva Timotira atitaainarara tura

¹⁹ Tinavu Noravano Ihuva hove tirera, te Timotira ne vainaini atitaariraro vuanaro. Viva mini oru vaharo ni vakaaka iriro maini viri ti tiva timiraro ti muntukaqihairo koqe iraqa variari.

²⁰ Kia Timotira aanantai vaiintiva vovano vaivo. Viva ti aanantero niara noraiqaakero iri vai vaiintivama vairo. ²¹ Ekaa hini vaiinti kia Ihu Karaitira kaiqaravata iriraiti, vika nai kaiqa varareraqai iriqi vi variara. ²² Nevata tavaavarо Timotira kaiqavano koqe kaiqaqaima vairo. Vaiintivano nai qora vataakero koqemakero kaiqa varaintema kero, viva ti vataakero koqemakero kaiqa vareharо Karaitira uva tiva nimiqiro vi vaira.

²³ Te maini variqi vuaina okarara kankomake iri, viraqaahai aara ho vairera, te Timotira atitaariraro ne ianaini vuanaro. ²⁴ Quqaa Noravano ti aara autu timitairaqe tevata inaaraipa varike ni oru tavaainara, virara te muntuka qihaaqimanta vai.

Poruva Epafroditusirara tura

²⁵ Te tinavu qata Epafroditusirara mintima ti: Viva ne vainaini anirantero vuarire tunara. Viva ti airuqiarire ti, ne haaru vira atitovaro viva ani maini vaharo ti vataakero vohaa kaiqa varaqiro vi vaura. ²⁶ Viva maini vaharo niara nora aato iriqiro viharо, ni qaiqaa tavareva auti vairo. Viva rovara varai uvara nevata iriarara tiro, vira muntukavano qoraiqivaro vairo.

²⁷ Quqama viva haaru rovara varero qutu viro ruhiqau viro vauvarо viraqaahairo Kotiva vira aqurihama amitovaro viva qaqi koqema vura. Viva qutu vuare titirio, te nora maarama varauraitirio. Kotiva tiriaravata aqurihama timitomanta te kia vi maarara varavaunaara.

²⁸ Vi vaiintiva vuarira aaravavata ho vairaque te vaaka vira atitaariraro viva ne vainaini oruraira ne vira qaiqaa taveha quahama amitaata. Viva mini viraro ti maaravanovata qihaaqiraro tinta vaataiqiraque variari.

²⁹⁻³⁰ Ne ti kahiqi aarava kia ho vauvarо viva niqihairo ti kahaqama timitareva maini anirero, Karaitira kaiqarao tiro, qutu viro ruhiqau vurara ti, ne virara iriha minti vaiintikara koqe vaiintive tivakeha vika quahama nimitaata.

¹ Ti qata vakaao, te maa uvara taiqa karera niara mintima ti: Ne Nora Vaiinti Karaitira vataake vohaa variarara ti, ni muntukaqihairo koqe i vaira quaheha variqi vuata. Kia te popohanaara iraiti, vi uvara qara ntuva taunara qaiqaa ni tiva nimirera. Vi uvava ni kahaqama nimitaira ne ho variqi vuata.

² Vaaqu kaiqa vare variaka, vika qaakau vairi voqaara vaiha vaiinti vaata toqa taaqamake rapepaama kareka auti variaka naatu rauriha variata. ³ Kotiva tinavu muntukaqihairo qora okara toqa kaivaro vira Maraquravano tinavu kahaqi vaimanta tenavu Kotira autu tuahere vaunarara ti, tenavuqai Kotiva quqaiqama kero toqa kaikama vauro. Mintirara ti, tenavu kia vaata toqake okarara noraiqaake iriraiti, tenavu Ihu Karaitira vataake vohaa variaina okarara noraiqaake iri vaunara.

⁴ Vaiinti vaata toqake okarava ho vaiinti kahaqiragevauve, te vi okarava tivata kahaqama timitaivo tirara. Vi vaiintinavukaqihairo vovano tiharo, Te noraiqamake vi okarara iriqi vi vauraukave, tirera, haaru tevata ekaa vi okarara avataqi vi vauraukara ti, te vi vaiintira uri aatarama kauraitiri.

⁵ Ti vatatovaro 8 entanavu aitarovaro ti vaata toqa korave. Ti noka qoka vaireka, vitanta Isareru vatanaaka Benaminira vohaa ankuvano vaurara ti, tevata anomake Hiparu vatanaaka vaunara. Te Parasi vaiinti vaiha Mosiraqaa uva maara tivatora kempukaiqamake avataqi vi variavaunara.

⁶ Te vi uvara kempukaiqamake iriqi vihara ti, te Ihura vaiinti nahenti qoraiqama nimiteha ntaihamaqi vi variavaunara. Te Mosiraqaa tivato uvara avuqavuqaa keha iriqi vi variavauraro kia vovano tiriara vi uvara vonku raqa kaarao tiarirava vaumanta te ekaa vi uvara koqemake iriqi vi variavaunara.

⁷ Vi entara te tiha, Vi haikava vi haikava ti kahaqi vaimanta vauro, ti variavaunara. Maa entara te Karaitirarao ti, te vi haikarara qumina haika, kia ti kahaqaina haikarave ti vaunara.

⁸ Kia te lutaan maara okara viraraqai tiraiti, te Karaitirarao ti ekaa vo haika vo haikara qumina haikaqai vaivo ti vaunara. Ihu Karaitiva ti Noravano vaharo tiqaa raqiki vairara ti, te viraraqai noraiqaake iriqi viha ekaa vo haika vo haikara qumina haikaqaike tivakeha qaqira kaunara. Te Karaitira vataake vohaaraqi vairerave tivake, te ekaa vo haika vo haikara qumina vehi haikave ti vaunara.

⁹ Tota te tiha, Kaiqe te Mosiraqaa tivato uvara iriqi vuariraro Kotiva ti avuqavuqama timitaarie, tivake tavauraro Kotiva kia virara iriharo ti avuqavuqama timitaarie aarava vaumanta viraqaaahai te Karaitirara quqaa vivave turaro Kotiva te Karaitirara quqaave tunara iriro, viraqaaahai viva te qora kaiqa vare vauna uvara nunka timitero avuqavuqama timitaimanta vaunara.

¹⁰ Te Karaitirara anomake irirera. Karaitiva qutu vuraqihairo kempukavano qaiqaa qaqi himpiro variqi vinantemake, tevata mintimake qaqi variqi virera.

Karaitiva aihavira haika varaqiro vinantemake, tevata vikanti voharaaqi vaiha mintimaqi virera. Viva vuru qutu vinantemake, tevata variqi vi vuru qutu virera.

¹¹ Kotiva Karaitira qaiqaa qaqi vara himpima kontema kero, tivata qaqi vara himpima kaarire ti, te mintimaki virera.

Kotira aaraqaa kanterara tura

¹² Maa entara te kia ho tiha, Te ekaara mpeqa vaiintiqamavi vauro, tirara. Karaitiva tirirara are mintimakera vaina vaiintivama vainarave tivakero ti tivita vatairara ti, te mintimake variainarara irihama, kempukaiqamake vira aaraqaa vi vauro.

¹³ Ti qata vakaao, maa entara kia te vi vaiintiqama bunara. Te haaru nuna okarara qaqirake kia iriraiti, qaraaka haika naantiara qovaraiqainara vi haikara varaaianarara iriha, vira vararerera kempukaiqamake variqi virera.

¹⁴ Vaiintinavu nai aatarake nai aatarake kantamaqi vintemake, tevata Kotiva ti timire ina koqaara vararerera avuqavu aaraqaa kantamaqi vi vaunara. Kotiva Ihu Karaitira kaiqara iriharo naaruvaihairo vi koqaara ti timireva haare vaira.

¹⁵ Tenavu Karaitirara kempukaiqamake iriqi vuarirauka vi uvvaraqaai iriqi vuari. Ne hini kiaka vo uva iriqi vivera, Kotiva ni avu aato koqema nimitaira nevata avuqavuqamake vi uvara iriqi vuata. ¹⁶ Kaiqe tenavu koqemake ni vauna okarara iriqi viha, vi okarara avataqi vuari.

¹⁷ Ti qata vakaao, te ni vaunantemake, nevata nuvaqi vuata. Tenavu vika numiqeha maantimake nuate tuna uvara iri variaka, ne vika nintemake nuata.

¹⁸ Airi enta ni tiva nimi vauna uvara te qaiqaavata iqj rateha vi uvara ni tiva nimirera: Vaiinti nahenti airitahaa tiha, Kotira aaraqaa homa ni vauro, tivakeha vika hampi aaraqaa ni variarara ti, vika Karaitira aruto katarira navutaiqama amite variara.

¹⁹ Vika Kotiraraqai iriqi vuataara vaimanta vika nái vaatavano antuqa ariraraqai iriqi vi variara. Vika nái vaau kaiqa vare variarara kauriha variataara vaimanta vika nái mahutaqai ti variara. Vika maa vataraqaa vai haikararaqai noraiqaake iriqi vi variara. Vika mintiaqi vi variarara ti, vika vehi autuvi taiqama vivara.

²⁰ Tenavu kia vika voqaantemake vairaiti, tenavu naaruvinaiara tinavu maaqa tanarave ti vaunara. Tenavu naaruvalihairo tinavu tivitaarirava Noravano Ihu Karaitiva tuvuinain vira vekama avu auti vaunara. ²¹ Vi entara viva nai kempukaqohairo ekaa haika nai yevaarainiqama kero, tinavu ugerara vaata, taiqa vuaina vaataravata kuqu kairaro nai vaata takuqiaina vaatara voqaarama varianaro.

4

¹ Ti qata vakao, virara irihama ne Nora Vaiinti Karaitira vataake vohaa vaiha kempukaiqamake variata. Niara ti hantuqa harimanta ni tavaataa imantama vauro. Ne variavaro ti muntukaqihairo koqe i vaimanta vauro. Te kaiqa vara nimitaunaraqaahai ne mpeqaiqamavi variarara ti, ne vaireka, ti koqe koqaa voqaarama variavo.

Ekaara uva tura

² Te nahentitanta, Iuodiaka Sintikeka uva tiva nimirera. Mpo, netanta Karaitira aura nakaas variarara ti, nenta vohaa uvaqai tivaqti vuate, turo.

³ Ho Kahaqio, are nena autuara iriharama vi nahentitanta kahaqama nimitaana. Tota te Karaitira uva tiva nimi vauramanta vi nahentitanta ti vataake vaiha vohaa kaiqa vare vaura. Vi entara Kalemenivavata, hini kiakavata ti vataake vohaa kaiqa vare vaura. Kotiva vinavuka nai kaama tero vinavuka nutu nai vukuq qara ruva tairara ti, vinavuka ekaa enta qaqi variqi vi vaikama vai.

⁴ Ne Nora Vaiinti Karaitira vataake variakara ti, quaheha variata. Te qaiqaa niara tirera: Quaheha variate, turo. ⁵ Ne ekaa vaiinti nahenti qihaaqama nimitaqi vimanta vika ni koqe okara tavaata. Noravano aumantoma vaivo.

⁶ Kia vi haikara vi haikarara noraiqaake iriqi vuata. Ne kia vo haika vataivera, Kotira aarehamma vi haikarara ireha tavaata. Ne vi haikarara Kotira irehama koqema iarao tivaqti vuata. ⁷ Ne mintiaqi vi vaivarao Kotiva muntuka paru i vaina okarara ni nimianaro. Tenavu qaqi qumina vaiinti vaihara ti, kia ho Kotiva muntuka paruma nimite vai okarara kankomake iri tavarara. Nenavu Ihu Karaitira vataake vohaa variqi vi vaivarao Kotiva ni muntuka paruma nimitaaina okarara ni avu aato muntukaqi raqikiqiro vuanaro.

⁸ Te maa uvvara taiqa karera niara mintima ti: Vo okara vo okara koqemakero vainara, ne vi okararaqai aatoqi iriqi vuata. Quqaa vaina okararave, koqema kero vaina okararave, avuqavu vaina okararave, kia nava naavavata viraga vaine okararave, takuqi vaine okararave, koqe autuvano vaine okararave, vi haikara vi haikararaqai iriqi vuata.

⁹ Te ni tiva nimuna uvvara ne iriarave, te kaiqa vare vaunara ne tavaarave, virara virara irihama ne himpi, vi kaiqara vi kaiqara varaqi vuata. Ne mintiake variqi vivaro vaiinti nahenti muntuka paruma nimite vai Variqava, viva ni hampata vaira ne koqemake variqi vivara.

Piripai vatanaka Porura kahaqama amitorara tura

¹⁰ Airi enta aitaromanta ne qaiqaa tiriara noraiqaake iri timite variarara ti, te Nora Vaiinti vataake vohaa vaiha noraiqaake quaheha vauro. Ququaama ne haaruvinaiara noraiqaake iri timiteha kahaqireka auti vauvaro vi entara ne ti kahaqi aarava kia ho vaumanta vaura.

¹¹ Kia te vo haika varaainarara irihavauve vi uvvara turo. Aqao, vo haika vo haika vai entarave, kia vai entarave, kia te virara noraiqaake iriqi viraiti, te muntuka qihaaqamake variqi vi vaunara.

¹² Te minti mintimake variaina okarara kankomake tavaunara. Te vo enta vehi variqi vunarave, vo enta airi haika vateha variqi vunarave, te mintiaqi vihara ti, muntuka parumake varia okarara kankomake irunara. Kara vaine entarave kia vaine entarave, utavaaqa vaine entarave kia vaine entarave, te kia virara noraiqaake iriraiti, qaqi muntuka qihaaqamake variqi virarave.

¹³ Karaitiva ti kempukaiqama timitairaqe te homa ekaa haika varaqi virara.

¹⁴ Te minti tihavata, ne ti kahaqama timitorara iriha quahehama vauro. Vi entara te nora maaraqi variavauramanta koqemama ne ti kahaqama timitora.

¹⁵ Ne Piripaihainaaka kankomake iriara. Ne Karaitira uva avunigamake iri vau entara te Masedonia mini kaavauramanta vi entara Ihura vaiinti nahenti vonavu kia ti kahaqumanta, neqai ti kahaqihia monu timurave. ¹⁶ Te vo vatuka Tesaronaiqaqvata oru variavauramanta ne vo tataa vo tataa ti kahaqama timite vaura.

¹⁷ Kia ne ti vo haika timiate tivauve, te maa uvara turo. Ne ti koqemake kahaqama timitaara Kotiva virara iriharo ninta hiniqamakero nimiaina koqaara, te virara noraiqaake iri vauro.

¹⁸ Vate te homa vi haikara vi haikara tuqimake vatauro. Ne Epafroditusira vara kaavaro viva ti timitaa haikara vara viri timimanta te vare, vi haikara tuqimakema vatauro. Vi haikava vaireva, koqe untavi haikara, Kotira *ofaa* amitaara voqaara vairara tiro, Kotiva ni quahama nimite vaira. ¹⁹ Tenavu Karaitira vataake vohaa vaunarara tiro, Kotiva ti Variqavano ekaa koqe haika vate vaiva, viva vi haikara vi haikara ni nimira ne Karaitira kaiqa koqemake varaqi vuata.

²⁰ Kaiqenavu Kotira tinavu Qora vira autu ekaa enta tuaheraqi vuariraro vira mpeqa okaravano takuquqiro vuarire. Te quqaama turo.

Uva manteharo tura

²¹ Ekaa Kotira vaiinti nahenti Karaitira vataake vohaa variaka te ni uva mantama nimitauro. Tinavu qatanavu ti hampata variaka, vikavata ni uva mantama nimitaavo. ²² Ekaa Kotira vaiinti nahenti maini variakavata ni uva mantama nimiteha, maini Kotira vaiinti nahenti avuhainaa vaiinti Sisaara naavuqi kaiqa vare variaka, vikavata noraiqamake ni uva mantama nimitaavo.

²³ Noravano Ihu Karaitiva ni aaqurihamma nimiteharo koqema nimitaira ni muntukaqihairo koqe i vaira variate, turo.

KOROSI

Poruva Korosi vatanaaka qara ruva nimitora

Ihura qaqi vara himpima kovaro naaruvaini oru vauvaro 30 ihie aitarovaro Poruva karapuhiqi vaiharo maa qarara ruva tora. Korosini vauka hininavu Karaitira uvara quqaave tivake vaumanta vaiinti vonavu orure vika una uva tiva nimi vauvaro vira kaara Poruva maa qararaqti Karaitira mpeqa okarara Korosiqi vauka vutukero tiva nimura.

¹⁻² Te Poruka. Kotira antuqaqaa te noraiqamavi Ihu Karaitira uva vaiinti nahenti tiva nimi vauraukama vai.

Tetanta Timotika ni Kotira vaiinti nahenti Korosiqi variakama qara nimite. Ne Karaitira vataake vohaa vahia viraraqai aatoqi iriqi vi variarara ti, ne tinavu qata vakaukavara variara.

Kotiva tinavu Qova ni aaqurihamma nimiteharo koqema nimitairaro ni muntukaqihairo paru i vaira variata.

Poruva Kotirara koqema iarao tura

³⁻⁴ Ne Ihu Karaitirara quqaave tivake virara kempukaiqaake iriqi viha ne ekaa Kotira vaiinti nahentia muntuka vateha variarara ti, tetanta tinavu Nora Vaiinti Ihu Karaitira Qora Kotira aarehamma niara koqema iarao tivaqi vi vaunara.

⁵ Tota enta Karaitira uva quqaa vakaaka ni tiva nimumanta ne naaruvaini ni koqema nimitaaina uvarara iri, ne vi entara veka vahia, Karaitirara kempukaiqaake iriqi viha nariara nariara muntuka vateha variara.

⁶ Tota ne Karaitira uva koqe vakaaka iri ne Kotiva ni aaqurihamma nimiteharo koqema nimitaaina okarara kankomake iri, viraqaahai katarivano koqe tava irataintemake, ne koqe kaiqa varaqi vi variara. Karaitira uvavano ekaa naato vataini vi ani vaimanta vi vatanaakavata vi uvara iri, viraqaahai vikavata ni aanare koqe kaiqa varaqi vi variara.

⁷ Vo vaiintivano Epafraasiva Karaitira uva okara ni tiva nimiqi vi vaimanta ne koqemake vi uvara iriara. Vi vaiintiva titanta kena kaiqa vaiintivano vaiharo viva titanta kahaqama timiteharo vaiinti nahenti uva tiva nimi vaira.

⁸ Kotira Maraquarevano ni kahaqimanta ne nariara nariara muntuka vataqi vi varia uvara Epafraasiva vi uvaravata viri titanta tiva timimanta irunara.

⁹ Titanta niara tiva timimantara ti, vi entaraqaaahai tetanta kia vo enta niara tauru karaiti, ekaa enta niara iriha Kotira aaramaqi vi vaunara. Kotiva ni avu aato koqema kaira ne Kotira kaiqa okara ho iriqi viha Kotira antuqa kankomake taveha ho vari vaiinti nahentika variate ti, tetanta niara iriha Kotira aaramaqi vi vaunara.

¹⁰ Kotiva mintima kero ni kahaqiqi vaira ne vira aaraqaa koqemake nuvagi viha, ne koqe kaiqa, vo kaiqa vo kaiqa vare vaivar Noravano niara quaheharo variarire. Ne mintiaqiqi viha katarivano koqe tava irataintemake, nevata koqe kaiqa, vo kaiqa vo kaiqa varaqi viha Kotira okarara voqavata iriqi vivara.

¹¹ Kotira mpeqa okaravano takuqi vaiva voqavata vairara ti, tetanta vira aareha niara vika kempukaiqama nimitaane ti vaunara. Kotiva ni kempukaiqama nimitairae ne kia vaaka popoharaiti, ne kempukaiqamavi vahia, qihaaqamake variqi vi vaivaro ni muntukaqihairo koqe i vaira variqi vuata.

¹² Kotiva nivata hoqama nimitairara ti, naantiara nevata Kotira vaiinti nahenti vokika hampata Kotira vatukaa ataite vainaini homa vivara. Virara irihama ne tinavu Qora Kotirara koqema iarao tivaqi vuata.

¹³ Tota tenavu variavauraro konkiraiku haikava tinavu ravaaqavu komanta tenavu konkiraikuraqi variavauraro Kotiva viraqihairo tinavu ruaruama timitero tinavu tivita vareru vuru nai Maaqu nai muntuka vaiva raqiki vainaini kaira.

¹⁴ Vira Maquarevano kaiqa vara amitoraqaaahai tenavu qaqini kuvantuvi vauraro Kotiva tinavu qora kaiqa uva taiqa kero nunka timitairae.

Karaitira okarara tura

¹⁵ Tenavu kia ho tavaarirava Variqa Kotivavata, tenavu ho tavaarirava Karaitivavata, vitanta vohaa qaramake variara.

Karaitiva Kotira Maaqu kara hunkavano avuni vaivaro ekaa haika autukero vatai haikava vira vevaarainima vairo.

¹⁶ Kotiva Karaitira noraiqama kovaro viva naaruvavata, vatavata, ekaa vo haika vo haikavata, autukero vatora.

Vaiintivano kia ho tavaaaina haikarave, ho tavaaaina haikarave, vataini raqiki variakave, naaruvaini raqiki variakave, viva vika vika autukero vataira.

Ekaa haikavano Karaitiva ina haikava variarire tiro, Kotiva Karaitira noraiqama kovaro viva ekaa haika autukero vataira.

¹⁷ Hoqarero ekaa haikavano kia vau entara Karaitiva qaqi variqiro vi vaura.

Maa entara Karaitiva qaqi variqiro vi vairara tiro, ekaa haikavano avuqavu naitarama kero variqiro vi vaira.

¹⁸ Karaitiva tinavu qiatavano vaimanta tenavu vira vaiinti nahenti vairera, vira vaatavanoma vaunara.

Viva hoqarero qaqi variqiro vi vairara ti, tenavu vira vaiinti nahentivata qaqi variqi virera.

Karaitiva ekaa haika aatarakero avuniqama kero oru variarire tiro, Kotiva qutu vuraqihairo vira naane qaiqaa qaqi vara himpima kora.

¹⁹ Kotiva naivano tiharo, Kaiqe te ekaa tenta kempuka vataake Karaitiraqi variqi virerave, tuvuro Kotira kempuka okaravano ekaa Karaitiraqi vaura.

²⁰ Kotiva naaruvinive vatainive vai haikara vataakero maateraiqih voaharaqi tampamavi variare tivakero, nai Maaqu atitovaro viva vuru katariqaa nai naare raurukero qutu vuvaro vira naarevano ekaa vatanaaka maateraiqama komanta vika Kotira vataake voaharaqi variqi vi variara.

²¹ Haaru ni avu aato muntukaqi qora kaiqa vare okaravaqai vaumanta ne qora kaiqaqai vare vaurara ti, ne Kotira navutaaka vaiha Kotiraqahai niaraqamake vaura.

²² Ne Kotira navutaaka vuvaro Karaitiva vaiintiqamaviro vaharo niara iriharo qutu vurara tiro, vate maa entara Kotiva niara ti navunaakave, ti vaira. Karaitiva niara vika koqe vaiinti nahentiqai vaivaro qora kaiqavano kia niq'i vairaro qora uvavanovata kia niqaa variarire tiro, viva niara iriharo qutu viro, viraqahairo viva ni ntita varero Kotira aqamoto vuru kaira.

²³ Tota Karaitira vakaaka ni tiva nimura ne kempukaiqamake vi uvvara iriqi viha Kotiva ni koqema nimitaaina entara vira veka variqi vi variara. Hauri vovano ni hampiqama kaira ne koqe vakaaka iriara qaqlira kevora.

Ekaa vataini varia vaiinti nahentika vi uvvara koqe vakaaka iriate ti, „Kotira kaiqa vaiintinavu“ vi uvvara tiva qovaramake variara. Te Porukavata vi uvvara tiva qovarama karera Kotira kaiqa vaiintiqama vuraukama vai.

Poruva nai kaiqa varorara tura

²⁴ Te niarao ti, aihavira haika tenta vaataini vare vaunara te virara quahema vauro. Karaitiva Kotira vaiinti nahentiara vika ti vohaa vaatama variavo tivakero vikarao tiro, aihavu haikara varaqiro vura. Aihavira haika hinivan qaqi vaimantara ti, te Karaitira kahaqamake vira kaiqa vareha aihavina haikara tenta vaatainivata varaqi vuariraro hogama viro taiqa vuarire.

²⁵ Kotiva tiriara nai vaiinti nahentiqai kaiqa varaarire tiro, ti noraiqama kaimanta te vira vakaaka kia voqavata qaqlira karaiti, ekaa vi uvvara ni tiva nimi vaunara.

²⁶ Haaru enta vi uvvara kukeqavi vaumanta tinavu naaquo taatokave, kaivaqaukavarave, vetanto vetanto vaukave, vika vika kia vi uvvara irura. Vate maa entara Kotira vaiinti nahenti vi uvvara iriate tiro, vi uvvara qovarama kaira.

²⁷ Vo vatanaa vo vatanaaka vira mpeqa okara takuqi vaira tavaate tiro, Kotiva nai kukeqatai uvvara nai vaiinti nahentiara iriharo qovarama nimitaira. Kotiva kukeqatai uvvara vira okara maantimama vairo: Karaitiva ni muntukaqi variqiro vi vairara ti, naantiara nevata Kotira vataake vohaa vaiha Kotiva takuqi vaina haikara inara varevara.

²⁸ Kotiva kukeqatai uvvara mintima vaimantara ti, tenavu Karaitira vakaaka ekaa vo vatanaa vo vatanaaka tiva nimiq'i viha, ekaa koqe okarara iriha vi uvvara tiva nimiq'i vi vaunara. Vika Karaitira vataake vohaa vaiha kia ugerara vaiinti nahenti vairaiti, vika vohaiqa vohaiqavano kempuka vaiinti nahentiqai vaiha Kotira avuqaa hogamake oru variate ti, tenavu Karaitira uva vakaaka vika tiva nimiq'i vi vaunara.

²⁹ Vaiinti nahenti mintimake variate ti, Karaitiva kempuka timira viraqohai te kempukaiqama keha kaiqa varaqi viha vi kaiqara vare vaunara.

2

Una uva kia iriqi vuate tura

¹ Kaiqe te vukaari utuqi viha nivata, Laodisiaqi variakavata, vokiaka kia ti viri tavaakavata, kahaqama nimitaqi vi vaunarara tiva nimiari. ² Ni muntukaqihairo paru iramanta ne nariara nariara muntuka vateha vohaa vaiha variqi vuate ti, te ni kahaqama nimitaqi vi vaunara. Te ni kahaqama nimitaqi vuari ne Kotira uva kankomake iriha vi uvarara quqaa uvaqaima vaivo tivakeha, Kotiva Karaitirara kukeqatai uvvara anomake iriqi vuata.

³ Kotiva nai okara koqe okara, vo okara vo okara Karaitiraqi kukeqa taivarō Karaitiva ekaa vi okarara qovarama kaimanta tenavu tave vaunara. ⁴ Vo vaiintivano un-aqaraiqama kero ni koqe uva tiva nimira ne vira uvare quqaa uvave tivorave ti, te virara irihama maa uvare ni tiva nimi vai.

⁵ Vate te kia ni hampata vaata vataake vaurarovata, ti maraquravano ni hampatama vairara ti, te ni kaiqara iriha quahehama vai. Ne vohaa uvaqai tivaqī viha, Karaitirara kempukaiqaaake iriqi vi variarara ti, ti muntukavano koqe imanta niara quahehama vai.

Karaitira hampata vohaaraqi variqi vuate tura

⁶ Tota ne Ihu Karaitirara viva tinavu Noravanove tia uvare iriha, ne Karaitira vataake vohaaraqi variqi viha qaqi variqi vuata.

⁷ Katarivano koqe vataqi tuqa aratero qampiqaintemake, nevata noruqamavi Karaitira vataake vohaa variqi vuata. Karaitirara ni tiva nimu uvare iriqi viha kempukaiqamake variqi vuata. Mintiaqi viha Kotirara koqema iaraq tivaqī vuata.

⁸ Vovano vataihinaa uva okarara ni tiva nimiharo vi uvaraqohairo ni ntuvu aquakaantorave ti, ne rauriha variata. Vi uvava vaireva, vaiintivano nāi avu aatoqihai irikeha ti varia uvavave, maa vataraaqa raqiki varia vaanaukara ti varia uvavave, vaivaro kia vi uvava Karaitiraqihairo qovarama vi vaira.

⁹ Karaitiva vaiinti vaata vataakero vaivaro Variqavano qaqi variqiro vi vai okarava, ekaa vi okarava Karaitiraqi vairara ti, ¹⁰ ne Karaitira vataake vohaa variqi viha ne hoqamake vai vaiinti nahentikama variqi vivara. Naaruvinavata vatainivata ekaa haikaqaa raqiki variaka variavaro Karaitiva uritara kero ekaa vika avuniqama kero vairo.

¹¹ Ne Karaitira vataake vohaaraqi avitumavi variavaro viva kia Iutaa vika nāi qorainti vainti vaata toqake variantemaka kero, ni vaata toqa karaitiro, viva ne hampi vare varia kaiqara vira kempuka ni muntukaqihairo teqa kaira.

¹² Ne namari varo entara ni Karaitira vataake vohaa quntama tora. Ni quntama tomanta ne Kotiva Karaitira qutu vuraqihairo qaiqaa qaqi vara himpimako kempukara virara ne kempukaiqamake iriqi uvuvarora tiro, Kotiva Karaitira vataakero nivata quntama toraqihairo qaiqaa qaqi vara himpima kora.

¹³ Haaru ne qora kaiqa vare vauvaro ni muntukaqihairo kia qora kaiqa vira kempuka teqa nimitomantara ti, ne qutu vuaka voqaara vaura. Ho maa entara Kotiva Karaitira vataakero tinavu qaiqaa qaqi vara himpima kero ekaa tinavu qora kaiqa uva nunka timitaira.

¹⁴ Tenavu Kotira uva, vo uva vo uva raqake variavauraro vira kaara tinavuqaa nora uva vauvaro Kotiva vi uvare varakero vuru Karaitira hiritu katariraqaa arutovaro Karaitiva tinavuara iriharo qutu viro tinavuqaa vai uvare taiqa timitora.

¹⁵ Karaitiva tinavuqaa vai uvare taiqa timitorara tiro, viva vaiinti nahenti nivuqaa vaharo Sataaniravata, vira kena avuhainaa vaanaukavata, vika mpeqa raqakero naatara kero kaurira haika vika nimura.

¹⁶ Karaitiva minturara ti, hauri ne kaivaro vovano ni ravaaqavu keharo niara haarua uva maara iriha ne vi karara vi namarira neverave tiantora. Vi entara vi entara nora entave ne vi entaraqaa minti minti iate tiantora. Qaraaka tora qovaraiqinaraqaa ne minti minti iate tiantora. Iutaa Maara Entaqa ne minti minti iate tiantora. Vovano qovarama viro niara minti minti iate tiharo ni ravaaqavu kaantorave.

¹⁷ Ekaa vi haikava vaireva, maraquravanoqai vaivaro Karaitiva vaireva, viva quqaa vaatavano vaira.

¹⁸ Vokiaka niara tiha, Kaiqe tentanavu autu vatainiqamaqi viha *enseli* vika autuqai tuaheraqi vuare, tivera, hauri ne vika uva avataqī viha hampiqama vivora. Vi vaiintika tenavu taira tavauaukave tivakeha gumina vataihinaa okarara iriqi viha vika nāi autuqai tuaheraqi vi variara. ¹⁹ Vi vaiintika Karaitira qaqrake kia vira vataake vohaa variqi vi variara.

Karaitiva tinavu qita voqaara vaimanta tenavu vira vaata voqaara vaunara. Vaatave, aiqū kauquve, aururuve, vi haikava vi haikava qita vataake tampamaviro vairera, homa vaiintivano noruqaanaro. Vira voqaara tenavu Karaitira vataake vohaa tampamavi variarera, tenavu vira vohaa vaata vaha homa noruqama virara. Tinavuara vika mintiaqī viha noruqama vuate tiro, Kotira antuqavano vaira.

²⁰ Ne Karaitira vataake qutu uvuvarora tiro, vataihinaa okara vo okara vo okaravano kia niqaa ho raqiki vaimanta ne qaqini kuvantivi variara. Ne qaqini kuvantivi variarara ti, ne nantihae vataihinaa okarara qaiqaa noraiqaake iriqi vi variara? ²¹ Vokiaka nai irike tiha, Kia vi haikara utu varaate. Kia vi karara neha tavaate. Kia vi haikara auteha tavaate, ti variara. Vika minti ti variamanta ne nantihae vika uva iri variavo?

²² Vika minti ti varia haikava, vi haikava vahuqaa haikavano vaivaro vaiintivano vi haikara vara kaivaro taiqa vuarira haikavaqaima vaira. Qumina vaiinti vika nái irike vokiaka tiva nimi tiha, Tinavu uvaqai avataqai vuate, ti variara.

²³ Airi vaiinti nahenti vika qioqamataa uvarara koqe uvave tiavarovata, vi uvava kia koqe uva vaira. Vaiintivano vi uvava iriqiro viharo nai autu vatainiqamaqiro viharo, kara auramaqiro viharo, nai vaata ruqutuqiro vi vairera, vi okarava kia vira ho kahaqama amitairaro viva qaqqaima haarua muntukavano vare vai kaiqara varaqiro vuanaro.

3

Kotiva Karaitira vataakero tinavu qaqi vara himpima kora

¹ Kotiva Karaitira vataakero ni qaqi vara himpima kaimanta variakara ti, ne naaruvaini vaina haikarara noraiqaake iriqi vuata. Naaruvaini Karaitiva Kotira kauqu tanarainima oquiviro vaira.

² Naaruvaini vaina haikarara noraiqaake iriqi viha kia vataini vaina haikarara noraiqaake iriqi vuata. ³ Ne Karaitira vataake qutu vuarara ti, ne Karaitiraqi kukeqavi qaqi variqi viha Kotiravata vohaarraqi variara.

⁴ Karaitiva qaqi variqiro vi vairara ti, nevata qaqi variqi vi variara. Viva naantiana qovaraiqaina entara ne vira vataake qoqaa vaiha, viva mpeqaiqama kero koqema kero variqiro vinantemake, nevata koqemake variqi vivara.

⁵ Vi uvava irihama ni haarua muntukavano vare vaina kaiqara, hampi qaramaqi ni vai okararave, vainti nahenti nai vaata hampi qohaamake vairave, vorara avu auti vairave, qora kaiqa varareka auti vairave, airaira vareraraqai iriqi vi vairave (airaira vareraraqai iriqi vi variaka, vika una variqa autu tuahere variaka voqaara vaiha Kotira qaqrake variarave), ne ekaa vi okarara aru taiqa kaivaro taiqa vuarira.

⁶ Vi kaiqara vi kaiqara vare variara kaara Kotira arara itaarirava vikaqaama varianaro.
⁷ Vika minti variantemake, nevata haaru vaiha minti vaura.

⁸ Vate maa entara ne ekaa qora okara auti vaira qaqla kaata. Arara itaaina okararave, mantoqara tivake raqireka auti vai okararave, vorara navutaiqi vai okararave, vi okarara vi okarara qaqla kaata. Qora uva ti vaivave, uva vaaru ti vaivave, ni noqihairo qovaraiqiantora.

⁹ Haaru ni avu aato muntukavano qora avu aato muntuka vaumanta ne hampi aaraqaaqai ni vaura. Viraqaahai ne vi aarara qaqlrakorara ti, kia nariara nariara una uva tivaqai vuata.

¹⁰ Maa entara Kotiva ni avu aato muntuka qaraakaiqama kairara ti, ne koqemake variqi vivaro Kotiva ni avu aato qaraakaiqama nimitaqui vi vaira, ne Kotira nai voqaara vaiha Kotira okaravata koqemake tavevara.

¹¹ Kotiva ni qaraakaiqama kero autu kairara tiro, viva kia niara tiharo, Are vo vatanaavave are lutaata vatanaavave, are vaata toqa kai vaiintivave are kia vaata toqa kai vaiintivave, are nora vatanaavave are inaara vatanaavave, are rumpa tai vaiintivave are qaqi variara vaiintivave, tianarovauve. Kotiva kia ni rairakero minti tiraitiro, niara ne Karaitira vataake vohaa variakavema tianaro. Karaitiva ekaa Kotira vaiinti nahenti vataakero vohaa variqiro vi vaivama vairo.

¹² Kotiva niara muntuka vateharo niara vika ti vaiinti nahenti vaiha tinta kaiqaqai varaqi vuate tiro, Kotiva ni nai kaama taikama variara. Ne mintimake variakara ti, ne nariara nariara mpo ike tiva nimiteha nariara nariara koqema nimitaqui vuata. Kia nenta autu tuaheraqai viraiti, qihaaqama nimitaqui viha kia vaaka popoharaiti, variqi vuata.

¹³ Ne kia nai ati nai atiraiti, qaqi nai kahaqai nai kahaqamaqai vuata. Niqihairo vovano nai qata vakaa voraqaa uva vatareva auti vairera, vi vaiintirara vaaka nena qata vakaa virara hove ai uva qaqla kauro kia uva vaivo tiane tiata. Tinavu Noravano Karaitiva ni uva nunka keharo tauru nimitaintemake, nevata nai uva nai uva nunka keha tauru nimitaata.

¹⁴ Ne vi kaiqara vi kaiqara koqe kaiqa varaqi viha nariara nariara muntuka vateha variata. Ne mintiaqui vivera, ne vohaa vailintima variqi vivara.

¹⁵ Karaitiva ni muntukaqai paruma nimite vaimanta variarara ti, ni muntukaqihairo paru i vaira variqi vuata. Ne mintimake variqi viha Karaitira vaata vohaa vaata voqaara variqi vuate tiro, Kotiva ni naarama taira. Virara irihama ne Kotirara koqema iarao tivaqai vuata.

¹⁶ Kaivaro Karaitira uvavano ni avu aato muntukaqai mpinqakero vairamanta ne vi uvavaqai iriqi viha variqi vuata. Koqe avu aato irikeha Kotira uva okarara nai tiva ami nai tiva amiha, koqe aara nai umiqe nai umiqe iha variata.

Kotirara quaheha ihi tiva amitaata. Kotira uva vokira iriha ihi tiantema keha tivaqи vuata. Nenta muntukaqihai Kotirara koqeve tivakeha ihi tivaqи vuata.

¹⁷ Ne ekaa kaiqa varaqи vihae, ne ekaa haika autuqi vihae, ne ekaa uva tivaqи vihae, Nora Vaiinti Ihura autuara iriqи viha mintiaqи vuata. Nora Vaiinti Ihura autuqaa tinavu Qora Kotirara koqemaa iarao tivaqи vuata.

Maantimake variqи vuate tura

¹⁸ Ni naatavarara tirera: Nora Vaiinti vira vainti variarara ti, ne nenta vaativara vevaaraini variata.

¹⁹ Ni vaativarara tirera: Ne nenta naatavara kia qoraiqama nimitaraiti, vikara muntuka vataqи viha variqи vuata.

²⁰ Te ni vaintairira tirera: Ne nenta noka qoka noqai vo enta vo enta iriha variata. Ne mintiaqи vivaro Noravano virara iriharo niara quaheharoma varianaro.

²¹ Te ni vainti qokavarara tirera: Ne kia nenta vaintaira vatete nitate. Ne mintiaqи vivera, vika kaurira haika vareha kia koqe kaiqa ho varevara.

²² Te ni rumpataa vaiinti nahentikara tirera: Ne nintaqaa raqiki varia vaiintika vika ti uvvara avataqи vuata. Kia ni quahama nimitarire ti, ne vika nivuqaaqai vahia koqe kaiqa vara nimitaraiti, ne Nora Vaiinti Karaitirara noraiqaaake iriqи viha vika kaiqa avuqavuqamake vara nimitaata. ²³ Ne ekaa vo kaiqa vo kaiqa varehama ne Nora Vaiinti kaiqama vare vauro tivakahama vi kaiqara varataata ira varaqи vuata.

²⁴ Maa uvvara iriata: Noravano niara iriharo kaama tai haikara, naantiara vi haikava ni koqama varianaro. Ne Nora Vaiinti Karaitira kaiqa vara amite varia vaiinti nahentikama variavo.

²⁵ Qora kaiqa varaqiro vi vairava vairaro naantiara Kotiva vira qora kaiqara iriharo nai koqaa amianaro. Kotiva kia vaiinti autuara iriharo uva avuqavuqamake vairara vairo.

4

¹ Te ni kaiqa vaiintiqa raqiki variakara tirera: Ne avuqavuqamake nenta kaiqa vaiintiqa raqikiqи vuata. Nintaqaa vataqи vaiva naaruvali vairara ti, virara irihama nenta kaiqa vaiintiqa koqemake raqikiqи vuata.

Maa uvaravata iriqи vuate tura

² Kia popoharaiti, vatete Kotira aaramaqi vuata. Kia avu taunteha vira aararaiti, avu aatoqi irikeha Kotira aaramaqi viha virara koqemaa iarao tivaqи vuata. ³ Ne Kotira aaraivaro viva vo aara tinavu qantuara timitaiqe tenavu Karaitira uva kukeqatora tiva qovaramaqi vuare. Vi uvvara tiva nimiqи vunara kaara ti seniqohai rumpa taamanta maini karapuhiqи vauro.

⁴ Ho Kotira aarama timitaiqe te vutuke Karaitira uva vaiinti nahenti tiva nimiqи vuari ho iriata.

⁵ Ne vo vaiinti nahenti kia Karaitira uva iriaka hampata vahia koqe avu aato iriqи viha avuqavuqama keha nuata. Ne tavaivaro vika Karaitira uva tiva nimi aarava ho vairera, ne Karaitira uva vika tiva nimiata.

⁶ Ne vika hampata uva tiha kia vika popohama nimitaaina uvvara tiraiti, vikara koqe uvqai timanta vika vo uvvara ni irama nimitaivera, ne homa vika nai tiva nimivara.

Ekaara uva tura

⁷ Tikikusiva vivama ti vakaaka ni tiva nimianaro. Viva tinavu qata vakaaka koqeva vaharo avuqavuqama keharo tenavu varauka kaiqara Karaitira kaiqa vare vaivama vairo. ⁸ Te vira atitaariraro viva ne inaini orurero tinavu vakaaka ni tiva nimiraro ni muntukaqihai paru i vaira variata.

⁹ Te viravata Onesimusiravata nititaari vitantama vivara. Onesimusiva tinavu qata vakaaka koqeva vaharo viva quqaiqama kero ekaa kaiqa vare vaivama vairo. Viva ni navunaa vaiintima vairo. Vitanta orure maihainaa vakaaka ni tiva nimivara.

¹⁰ Aritaakusiva viva ti vataake rumpataa vaiintiva, viva ni uva mante vaivaro Banabaasira vira vara qata Maakiva, vivavata ni uva mante vairo. Te vaka niara tiha, Maakiva ne vainaaini oru virera, ne vira quahama amiteha vira vitaate, tiavaunara.

¹¹ Iosuava vira vara autu Iasitaasivave ti varia vaiintiva, vivavata ni uva mante vairo. Ituta vataanaqihai vi vaiintinavu taaramonavuqai Ihura vaintiqamavi, ti vataake vahia Kotiva raqikiaina uvarara noraiqaaake iriqи viha, ti koqemake kahaqama timitaqи vi variata.

¹² Epafrasivavata ni uva mante vairo. Vivavata ni navunaava vaharo Ihu Karaitira kaiqa vaiintima vairo. Viva niara iriharo Kotira kempukaiqama kero aarama nimite

vaira. Viva niara Kotira aareharo tiharo, Kotio, are vika kahaqira vika kia popohanaara iraiti, kempukaiqamake variqi viha, kia taaqa vainti vairaiti, kempuka vaiinti nahenti vaiha ai noqai koqemake iriqi vuate, ti vaira.

¹³ Te tavauraro vi vaiintiva kempukaiqama kero kaiqa varaqiro viharo nivata Laodisi-aini variakavata, Hiraporisini variakavata, kahaqi vaira.

¹⁴ Rukiva tinavu koqe *doktaava* vivavata, Demaasivavata ni uva mantama nimite variara.

¹⁵ Tinavu qata vakaa Laodisiaini variakavata ne vika uva mantama timitaate. Vo nahenti Nimpaaaravata vira naavuqi ruvaaqumavi variakavata uva mantama timitaata.

¹⁶ Ne maa qarara kaara ntuvake, viraqaahai Kotira vaiinti nahenti Laodisiaini variaka nimimanta vikavata kaara ntuvake tavaata. Mintiakema te Laodisia vatanaakara qara vara kaunara, ne vi qararavata varake kaara ruata.

¹⁷ Ne Akipusirara mintima tiata: Noravano ai amitai kaiqara, ekaa vi kaiqara vi kaiqara vara vuru taiqa kaane, tiata.

¹⁸ Te Porukama, ho tenta kauquqohai qara ruva nimiteha ni uva mante vauro. Ti karapuhiqi *seniqohai* rumpa taamanta vaunarara ne kia virara tauru kaata.

Kotiva ni aaqurihama nimiteharo koqema nimitaarire turo.

1 TESARONAIKA

Poruva Tesaronaikaa vatanaakara avuniqamakero qara vara kora

Ihura qaqi vara himpima kovaro naaruvalini oru vauvaro 20 ihie aitarovaro Poruva maa uvare qara ruva tora. Poruva Tesaronaikaini vauka Karaitira uva tiva nimumanta vika hininavu Karaitira uvare quqaave tivake iriqi vi vaura. Vika Ihura vaiinti nahenti variqi yumanta vira kaara vokuka vika qoraiqama nimitaqi vuvaro Poruva vikara kia popoharaiti, kempukaiqaake variqi vuuate tiro, maa uvare qara ruva nimitora. Poruva Karaitiva tuvuvalina entararavata vika tiva nimura.

¹ Te Poruka. Tevata Sialaasivavata Timotivavata tenavu ne Kotira vaiinti nahenti Tesaronaikaini variaka qara nimite. Ne tinavu Qova Kotivavata, Ihu Karaitiva tinavu Noravanavata ikama variara. Kotiva ni aaqurihama nimiteharo koqema nimitairaro ni muntukaqihairo paru i vaira variata.

Vika Karaitirara iriqi vurara tura

² Tenavu vo enta vo enta Kotirara niara koqeve tivakeha, ni nutu rehama vira aaramaqi vi vaunara.

³ Tenavu Kotira avuqaa vaiha ne vare varia kaiqara kia tauru karaiti, tenavu iruramanta ne Karaitirara quqaa vivave tivake viraqaahai vira kaiqa vara amitaqi vi variara. Ni muntukavano Karaitirara vaimantara ti, ne koqemake vira kaiqa vare variara. Ihu Karaitiva tinavu Nora Vaiintivano tuvuvalinarara, ne vira vekaiqihai kia popohanaara iraiti, variqi vi variara.

⁴ Tinavu qata vakaao, tenavu kankomake iruraro Kotira muntukavano niara vaivaro niara ti vaiinti nahenti variate tiro, viva ni nai kaama taira.

⁵ Tota tenavu Karaitira vakaaka ni tiva nimiauvalamanta ne vi uvarara kia qumina uvave tiraiti, ne vi uvarara kempuka uvave tuvaro Kotira Maraquravano ni kahaqama nimitomanta ne vi uvarara quqaa uvave tivake kempukaiqamake vi uvare iriha vaura. Vi entara tenavu niarao ti, ni nivutana vaiha koqemake avuqavu ni variavaunarara ne riariara.

⁶ Vokuka ni qoraiqama nimiteha niara kia vi uvare iriate tumanta ne kia vika uva iriraiti, Karaitira uvareqai quqaave tuvaro viraqaahairo Kotira Maraquravano ni muntuka koqema nimitomanta ne quaheha vaiha tenavu unantema keha Karaitira tinavu Nora Vaiinti avataqi vi vaura. ⁷ Ne mintiaqi vi vaumanta Karaitirara quqaave tiaka Masedoniaini variakavata, Akaiaini variakavata, vika ni taveha tiha, Kaiqe tenavuvata vika aanare mintiaqi vuare, tivake mintiaqi vurama.

⁸ Ne Karaitira uva iri viraqaahai vora vora tiva nimiqi vuvaro vi uvava niqaahairo vi aniharo Masedoniaini oru viro Akaiaini oru viro viraqaahairo ekaa vataini viro aniro urara ti, ekaa vi vatanaaka niara tiha, Vika koqemake Kotira uva iriqi vi variarave, ti variara. Niqaahairo vi uvava viro aniro urara ti, tenavuvata vi uvare vika qumina tiva nimiarora.

⁹ Haaru ni hampata vaiha minti minti iavauna uvare, vi uvare tenavu Akaiaihainaakave Masedoniaihainaakave tiva nimire turamanta vi vatanaaka vi vatanaaka vika nai vaaka vi uvare iriakara ti, vika tinavu vi uvare tiva timiamanta irunara. Vi entara tenavu ni hampata otu variavaulamanta una variqara iriha autuke vato haikara qaqrakire, tuqantaavi quqaa Variqvano qaqi variqiro vi vaira, Kotira viraqai kaiqa vara amitareka autiha vaura.

¹⁰ Mintumanta ne vira Maaquvano naaruvalihairo qaigaa orurantero tuvuvalina veikaiqihai variara, vi uvare vi uvare vika nai tinavu tiva timiamanta irunara.

Vira Maaquvano qutu vuvaro Kotiva vira qaigaa qaqi vara himpima kova, Ihuva, vivama tinavu ruaruuma timitaariravama vairo. Naantiara Kotira arara itairaro *ko* tiaina entaraqaa tinavuqaavata uva vataantorave tiro, Ihuva tinavu ruaruuma timitaanaro.

2

Poruva nai hoqarero Tesaronaikaini kaiqa varorara tura

¹ Ti qata vakaao, tota tenavu ni hampata oru vaiha ni kahaqura kaiqava kia qumi naiqura. Ne virara iriarave. ² Tota kia ne varianaini oru vuavauna entara tenavu Piripaini variavaulamanta vi vatanaaka tinavu qoraiqama nimitomanta tenavu aihavira haika varavaunara, ne vi uvararavata iriara. Tenavu Piripai vara maini ke, ne varianaini otu raavaulamanta airi vaiinti tinavu qoraiqama nimitheha kia vi uvare tiate

ti vauvaro Kotiva tinavu kempukaiqama timitomanta tenavu kia qetaraiti, Kotira uva Karaitira vakaaka ni tiva nimiavaunara.

³ Tenavu vaiinti nahenti uva tiva nimiha kia hampi uvvara iriha tiva nimiraiti, kia vora vataake hampi ni uvvara tiva nimiraiti, kia tenavu vaiinti nahenti unaqaraiqama karera vika una uva tiva nimi vaunarovauve.

⁴ Aqao, Kotiva tinavu avatama kero tavero, ne homa ti koqe vakaaka vaiinti nahenti tiva nimiqi vivarave tiverama, tenavu viraqaahai vaiinti nahenti vi uvvara tiva nimi vaunara. Tenavu kia vaiinti nahenti tinavu quahama timitaate ti, vi kaiqara varauvaravauve. Kotiva tinavu quahama timitaarie tivakera, tenavu vira vakaaka vaiinti nahenti tiva nimi vaunara. Tenavu tentanavu avu aatoqi irite vauna uvvara Kotiva ho avatama kero tave vaivama vairo.

⁵ Ne tinavu okara tavama kaara. Tota tenavu ni maaqaini ani vaiha kia qumina ugerara uva ni tiva nimi variavaunara. Kotivavata tave vaimanta tenavu kia niara tiha, Kaiqe ugerara uva tiva nimiha vika airaira varaare, tiraiti, ⁶ tenavu kia niarave, vokarave, tinavu hutu tuahera kaate tivariavaunara.

⁷ Tenavu Karaitiva noraiqama kaika vaiha ho niara vihi vaahi tiha tinavu paanaa haika vara timitaate tiarira aarava vaumantavata, tenavu kia mintiraiti, vi entara tenavu ni hampata qihaaqamake vaiha ni kaiqa vara nimiti variavaunara. Vainti nova nai vaintiqaan koqema kero raqikintemake, tenavuvata niqaa koqemake raqikiqi vi variavaunara.

⁸ Vi entara niara tinavu hantuqa harumanta tenavu Kotira uva Karaitira vakaaka ni tiva nimi variavauraro tinavu muntukavano niara vogavata vaumantara ti, tenavu vogamake ni kahaqirera auti variavaunara.

⁹ Tenavu vi entara vukaarti utiha kaiqa vare variavaunara, ne virara kankomake iriara. Tenavu Kotira uva Karaitira vakaaka ni tiva nimiqi viha hauri ni maara nimirorave tivakeha, kuariqaavata entaqivata vukaari utuqi viha tenavu kaiqa varaqi vi variavaunara.

¹⁰ Ne Karaitira uvvara ququaave tumanta tenavu ni nivutaini variqi vuavauramanta nevata Kotivavata tavomanta tenavu koqemake avivinamake ni nivutana variqi vi variavaunara. ¹¹ Vainti qova nai vaintiqaan koqema kero raqikintemake, tenavuvata ni vohaiqa vohaiqaqaa koqemake raqikiqi vi variavaunara.

¹² Niara vika popoheworave ti, tenavu ni avu aato kempukaiqama nimiti, ni muntuka kukuqama nimiti, niara tiha, Mpo, ne koqe aaraqaaqai nuvaqi vi vauvaro Kotiva ni quahama nimitaarie tivariavaunara. Ne Kotiva nai raqikina vatukaraqi oru vaiha nai mpeqa okara takuqi vaira tavaate tiro, Kotiva ni naarama tairara ti, tenavu vi uvvara vi uvvara ni tiva nimi variavaunara.

¹³ Tenavu Kotira uva ni tiva nimiavauramanta ne vi uvarara kia qaqi qumina vaitintivano tivatavare tiraiti, vi uvvara Kotiva tivatai uvvara tura. Ne minti turara ti, tenavu Kotirara koqema iarao tivaqi vi vaunara. Ho quqaama vi uvava Kotira uvama vairo. Ne vi uvarara ququaavave tavarao vi uvava niqi vaharo ni kahaqama nimitaqliro vi vaira.

¹⁴ Tinavu qata vakaao, Iutiaini Kotira vaiinti nahenti vika Ihu Karaitirara ququaave tumanta vira kaara nái navunaaka vika qoraiqama nimitaqli vi vaumanta vika nora maara varaqi vi vaura. Vika aanare nevata Karaitirara ququaave tiamanta vira kaara ni navunaaka nivata qoraiqama nimiti variamanta nevata nora maara varaqi vi variara.

¹⁵ Iutaa vikama Nora Vaiinti Ihura arukora. Haaru entavata Iutaa vohaa vikaqai paropeti vaiintinavuvata arikora. Maa entaravata vohaa vikaqai Karaitira uva kaara tinavuvata qoraiqama timite variara. Iutaa vika mintiaqli viha, Kotiva kia vika quahama nimitaaina kaiqara varaqi viha, ekaa vo vatanaaka navutaiqama nimiti variara.

¹⁶ Kotiva vaiinti nahenti kuvantu nimitaaina vakaakara vo vatanaaka tenavu tiva nimirare turamanta Iutaa vika tinavu aara kuvaikareka auti variara. Vika minti variavarao vika qora okaravano uritara kero vauvaro vira kaara Kotira arara itaiva vikaqaatama vairo.

Poruva qaiqaa vika oru tavaainarara tura

¹⁷ Ti qata vakaao, Iutaa vaiintinavu tinavu qoraiqama timiteha ni nivutaihai tinavu tititama komanta vira kaara tenavu vo entanavu niara muntuka qoraiqumanta *iqa/viqa* vainti vogara vaiha, ni vogamake tavaataa umanta niara aato iriqi viha variavaunara. Tenavu vi entara kaiqe anirante ni oru tavaare tivake ¹⁸ ne varianaini vuaina aarara ranteha tavauraro kia vaura. Te Poruka vo tataa vo tataa anirante ni oru tavarare tiavaurarovata, Sataaniva tinavu aara kuval timite vaura.

¹⁹ Mpo, tenavu niara iri vauraro tinavu muntukaqihairo koqe i vaimantama vaunara. Tenavu kaiqa vara nimitaunaraqaahai ne mpeqaiqamavi variarara ti, ne vaireka, ti koqe koqaa voqaarama variara. Ho naantiara tinavu Noravano Ihu Karaitiva qaiqaa tuvuaina entaraqaa tenavu ni mahuta tirera.

²⁰ Ququaama, tenavu niara iri vauraro tinavu muntukaqihairo koqe i vaimanta tenavu ni mahuta tivaqi vireravema turo.

3

Poruva Tesaronaikaini Timotira atitorara tura

¹ Tenavu anirante ni Tesaronaikaini vatanaaka oru tavarare ti, ne varianaini vuaina arara qumina rantaqì vivi qaqrake tiha, Hauri maini vukai vaha ni vakaaka kia iriarorave. Kaiqe maini Atenini vaha ² Timotira atitaariraro viva ni oru tavaarire, tiavaunara.

Timotiva tinavu vataakero Kotira kaiqa vareharo Karaitira uva koqe vakaaka vaiinti nahenti tiva nimi vaivama vairo. Timotirara viva oru ni muntuka kempukaiqama nimitaira ne Kotira uva koqemake iriqi vuate ti, vira atitaavauraro viva ne ianaini vurama.

³ Vaiinti vonavu ni qoraiqama nimitaqi vi vaivaro niqihairo vovano popohairaro Kotira aara qaqla kaantorave ti, te Timotira atitaavauraro viva ne ianaini vurama. Nevata tenavuvata Ihura vainti vaunarara ti, tinavu qoraiqama timite entava qovaraiqanara ne virara iriara.

⁴ Tota tenavu ni hampata vaiha naantiara tinavu miqo maaqo qoraiqama timite uvara ni tiva nimiavauramanta ne vi uvara irura. Ho ne tavaavararo ququaama vate vi haikava vivauma qovaraiqamaqiro vi vairo.

⁵ Ni qoraiqama nimitaqi vi vase te maini qumina variarorave tivake, kaiqe te Timotira atitaariraro viva ne inaini vuarire tiavaunara.

Niara Kotira uva iriqi vie variavo, kiae iriqi vi variavo. Hauri Sataaniva vikara qora kaiqa varaate tiramanta vika vira uva iriha tinavu uvavata tenavu vikaqi kaiqa vara taunaravata qaqla kevorave tivake, Timotira atitaavaunara.

Timotiva ni vakaaka vuru tiva timimanta irunara

⁶ Timotiva ne ianaihairo orurantero vate virama ni koqe vakaaka viri tiva timimanta irunara. Viva niara tiharo, Vika Kotirara kempukaiqamake iriqi vi variavo. Vika nariara nariara muntuka vatehama variavo. Vika tinavuara iriqi viha tinavuara quahehama variavo, tiro. Tenavu ni tavaataa imanta vaunantemake, vikavata niara tinavu tavaataa imanta variavoma tivo, tiro. Timotiva niara minti minti timanta irunara.

⁷ Ti qata vakaao, tenavu maini vaha ekaa vi maaraara varaqi vi vauraro Timotiva ne Ihurara kempukaiqamake iriqi vi varia uvara tinavu tiva timivarо tinavu muntukaqihairo koqe imanta vauro. ⁸ Ne kia popohairaiti, koqemake Nora Vaiinti aaraqaa nuvaqi vi variavera, tenavu virara irihama koqemake qaqi variqi vi vaunara.

⁹ Timotiva vi vakaakara tinavu tiva timivarо tinavu muntukaqihairo voqamakero koqe imanta tenavu Kotira avuqaa vaiha voqamake quahe vaunarara ti, tenavu Kotira quahama amitaaina okarava nai uritarakero vaivo, turo.

¹⁰ Ho tenavu qaiqaa ni oru taveha ne Kotira uva hini uva kia iriara, vi uvaravata ni tiva nimiari ne Kotira uva ekaa uva iriqi vuate ti, kuaripaavata entaqivata ne vainaini vuaina arara Kotirara humiqaane tivakeha vira aaramaqi vi vaunara.

¹¹ Tinavu qova Kotivavata, tinavu Noravano Ihu Karaitivavata, vitanta vi aarara humiqaige te hovema tirara.

¹² Ne qaqi kaivarо tinavu Noravano ni kahaqi vaira ne nariara nariara muntuka vateha, ekaa vaiinti nahentiaravata muntuka vateha variata. Ne mintiaqi vivera, tenavu niara muntuka vataunantemake, nevata vorara vorara muntuka vatehama vaivara.

¹³ Viva ni kahaqi vairaro ni muntukaqihairo kempukaiqiro vairaro naantiara Ihuva Noravano nai vaiinti nahenti vataakero tuviramanta vi entara kia vo uvavanovata niqaa vaira nevata koqe vaiinti nahenti vaiha homa tinavu Qora Kotira avuqaa himpite vaivara.

4

Koqe aaraqaa nirara tura

¹ Ti qata vakaao, tota tenavu ni hampata vaiha ni tiva nimiha maantimake koqe aaraqaa nuvaqi vivaro Kotiva niara quaheharo variarire tiavauramanta ne vi uvara iriqi vi vaura. Ho tinavu Nora Vaiinti Ihura autuqaa tenavu niara kempukaiqamake mpo ike tiha, Ne voqavata uritarake Kotira aaraqaa koqemake nuvaqi vuaterama, turo.

² Tinavu Noravano Ihuva tinavu noraiqama komanta tenavu vira autuqaa vo uva maara ni tiva nimiavaunara, ne vi uvvara kankomake iriara.

³ Kotira antuqavano maantimama vairo: Ne kia hampi qare okararaqaa niraiti, koqe aaraqaqai nuvaqi vuate, tirave. ⁴ Virara irihama ne vohaiqa vohaiqvano tenta vaataqohai qora kaiqa varaorave tivakeha, koqemake nenta vaataqaa raqikiqi vuata. ⁵ Vo watanaka kia Kotira uva iriaka hampi qaramaqi nuantemake nevata nivora.

⁶ Kia Ihura vainti vovano nai kenara qoraiqama amiteharo vira naantitiro hampi nuarire. Viva mintirera, vira kaara Noravano naima vi vaiintira ruqutuanaro. Tenavu haaru kempukaiqaaake vi okarara qaqa kaate ti, vi uvvara ni tiva nimiavaunara.

⁷ Kotiva kia tinavu vaiinti nahentiara nariara nariara hampi nuate tiro, tinavu haarairavauve. Tinavuara vika vaiinti nahenti koqeka variqi vuate tiro, tinavu haaraira.

⁸ Tenavu ni vi uvvara tiva nimi vaunara qorrima kaarirava kia vaiinti qorrima karaitiro, viva Kotiva nai Maraqua ni nimi vaira, virama qorrima kaanaro.

⁹ Kotiva nariara nariara muntuka vate okarara ni numiqomanta ne vi uvvara koqemake iriarara ti, tenavu qumina vi uvvara qaigaa qara ntua nimitaarora. ¹⁰ Ne nariara nariara muntuka vateha ekaa Ihura vaiinti nahenti Masedoniaini variakaravata muntuka vate variara. Ne mintiaqi vi variarara tenavu ni vihi tiha qaigaa voqavata mintiaqi vuatema turo.

¹¹ Ni araraqihairo paru i vaira tiremake niha variata. Kia qumina vora kaiqa oru tave ani tave iraiti, ne nenta kaiqaqai varaqi vuata. Tota ni tiva nimiavaunantemake, ne nenta kauquqohai kaiqa varakeha kara varake namaqi vuata.

¹² Ne mintiaqi viha ne homa nentavano nentaqaa raqikiqi viha kia qumina oru vokikara kararave, vo haikarave, naariraiti variqi vi vaimanta, vo vaiinti nahenti kia Ihura uva irika, vika ni kaiqa tavehama niara koqe vaiinti nahentive tivara.

Tinavu Noravano qaigaa tuvuainarara tura

¹³ Ti qata vakaao, vaiinti nahenti ekaara qutuvi kia ho qaigaa qaqi himpirarave ti variaka muntukavano qoraiqintemake, ni muntukavanovata qoraiqiantorave ti, tenavu putu vuaina okarara te ni vutuke tiva nimirera.

¹⁴ Ihuva putu vuraqihairo qaigaa qaqi himpi okarara tenavu virara ququaave tunarara ti, tenavu tiha, Vaiinti nahenti Ihurara ququaave tika, vika putu viraqihairo Kotiva vika qaqi vara himpima kaira vikavata Ihura vataake orurante tuvivarave, ti vaunara.

¹⁵ Tinavu Noravano tinavu tiva timi uvvara nivata tiva nimirera: Tinavu Noravano qaigaa tuvuaina entaraqaa tenavu qaqi variqi vuarirauka kia tenavu naane viraiti, tenavu putuvika vika naantiarainima virara.

¹⁶ Vi entara Kotiva noraiqama kero uva tiraro *enseli* noravano neveraitiraro Kotira *aanumaaraqohairo/nomaqohairo* vuaqiararo tinavu Noravano viva naima naaruvaihairo tuvuanaro. Mintiraro Karaitirara quqaa vivave tivakehuru putuvika, Kotiva vika naane qaqi vara himpima kairamanta ¹⁷ vira naantiara tinavuqihai qaqi vai vaiinti nahentika, vika putuvika hampata ruvaaqumavi oru tinavu Noravano tonavuqaa tuvuainara vira vita kareka virini vivara. Tenavu oru tinavu Nora Vaiinti vitake viraqahai ekaa enta vira vataake qaqi variqi virara.

¹⁸ Ni muntukaqihairo koqe i vaira variate ti, ne vi uvvara nai tiva ami nai tiva amiha variata.

5

Ihuva tuvuainara veka geramate variate, tura

¹ Ti qata vakaao, ekaa vi haikava qovaraiqaina okarara ne kankomake iriarara ti, tenavu vi uvvara qumina qaigaa ni qara nimifeha vi entarave maa entarave tiarora.

² Ne kankomake iriavaro muara vaiintivano entaqira evaara anintema kero, Noravano vata ne kia virara tuvuanarove ti entarama tuvuanaro.

³ Naantiara vaiinti nahenti tiha, Vate koqe enta tenavu koqemake variqi virerave, ti entaraqaa vaakama vika vehi autu kaaina entava qovaraiqiramanta vika anomake qoraiqama vivara. Nahentivano vainti vatarevava taata toqaivaroi alha vinantema kero, vi entava vaaka qovaraiqama viraro vaiinti nahenti ruqemake vi aarava kia ho varianaro.

⁴ Ti qata vakaao, ne kia konkiraqi variarara ti, muara vaiintivano evaara anintema kero vi entava qovaraiqiantorave ti, ne geramate variata. ⁵ Ne ovavano itainaini varia vaiinti nahentikama variara. Ne kuari iteharo aatitainaini variakama variara. Nevata tenavuvata kia enta iraqive, konkiraqiqive, vauraukavauve.

⁶ Virara iriha hauri tenavuvata vo vaiinti nahenti aanare vaite variarora. Kaiqenavu himpi vaiha avu viti virimake taveha variqi vuari.

⁷ Entaqira vaiinti nahenti vaite variara. Entaqira vaiinti nahenti iha namari namaqi viha vueraiqi variara. ⁸ Tenavu kia vika voqaantemake vairaiti, tenavu aatitairaqa ni vaura vaiinti nahentika vahara ti, kaiqenavu avu viti virimake taveha variqi vuari.

Iqoka vaiintivano nai mimiraini naavuma taintemake, kaiqenavu Ihurara kempukaiqamake iriqi viha nariara nariara muntuka vataqi vuaina okarava tinavu naavuma taiqe variqi vuariraro, Kotiva tinavu tivitaaina entara veka variarirava viva tinavu iqoka tovaqa voqaara variarira.

⁹ Kotira arara itaarirava tinavuqaa variarire tirovauve, viva tinavu nai kaama taira. Tenavu Ihu Karaitira tentanavu Nora Vaiintiara iriqi vuariraro viva tinavu kuvantu kero vitaarire tiro, Kotiva tinavu nai kaama taira.

¹⁰ Karaitiva tinavuara iriharo qutu vurara ti, tenavu qutu vuarerave, qaqi variqi vuarerave, viva tuvirage tenavu vira hampata ekaa enta qaqi variqi virera.

¹¹ Ne vi uvira irihama vate iantemake, ne nai kahaqi nai kahaqihā nai kempukaiqama amite nai kempukaiqama amitemaqi vuata.

Ekaara uva tura

¹² Tenavu niara ike mpo tiha, Ni nivutaini kaiqa vare varia vaiintinavukara, ne vinavukara tinavu nora vaiintive tivakeha, vinavuka koqe okara autu nimitaqa vuata. Tinavu Noravano vinavukara ni koqe aara numiqaqi vuate tiro, vinavuka noraiqama kaira. ¹³ Vinavuka ni kaiqa vara nimite variarara ti, ne vinavukara koqe vaiintive tivakeha nenta muntuka vinavukara vataata. Ne vohaa vanti vaiha nariara nariara muntuka qihaaqama nimiteha variqi vuata.

¹⁴ Tinavu qata vakao, tenavu ni vihi tiha, Kia kaiqa vararaiti, popohe vai vaiintika ne vika nitimanta kaiqa varaata. Vo haika vo haikara qete vai vaiintika kahaqimanta vika kempukaiqaaake Kotira kaiqa varaata. Ihura uva kia koqemake iriraiti, ni vai vaiintika, ne vika kahaqimanta koqemake Ihura uva iriqi vuata. Kia kempukaiqamake vihi vaahi tiraiti, qihaaqamake vainti nahenti kahaqamaqi vuata.

¹⁵ Ne rauriha variata. Vaiinti vovano vora qoraiqama amitairaro viva kiama nai vira qoraiqama amitaarira. Ne vo enta vo enta nariara nariara koqemaqi viha, ekaa vainti nahentivata koqema nimitaqa vuata.

¹⁶ Ne ekaa enta quaheha variqi vuata. ¹⁷ Ne ekaa enta Kotira aareha variata. ¹⁸ Kia koqe entaqai Kotirara koqeve tiraiti, qora entavata Kotirara koqeve tivaqi vuata. Ne Ihu Karaitiva ika variarara tiro, Kotira antuqavano niara mintiaqi vuatema tiro.

¹⁹ Kotira Maraqravano ni muntukaqaï vaharo ni kahaqi vaira, ne vira kaiqa kuval kevora. ²⁰ Kotira Maraqravano vainti vo kahaqiraro viva Kotira uva qoqaiqama kairera, kia vira uvira qumina uvave tiata.

²¹ Ne ekaa haika avatamake tavaivararo koqe haika vairera, vi haikaraqai tuataqa vuata.

²² Ekaa qora kaiqa vare vairaqhai qaqqini variata.

²³ Vaiinti nahenti muntuka paruma nimite vai Variqava, viva nivata kahaqama nimitaira ne vira kaiqaqai varaqi vuata. Kotiva niqaa raqiki vairaro ni maraqravanovata, ni avu aato muntukavanovata, ni vaatavanovata, koqemakero variqiro viraro Ihu Karaitiva tinavu Noravano tuvuaina entaraqaa kia niqaa uva variarire. ²⁴ Kotiva nai uva tivate vaira kia qaqrakero vo uva ti vaivara tiro, viva ququaama ni mintimakero kahaqama nimitaanaro.

²⁵ Ti qata vakao, ne tinavuaravata irihama Kotira aaramaqi vuata. ²⁶ Ne Ihura vanti vokika koqemake uva manteha nai kauqu ami nai kauqu amiha variata.

²⁷ Te Nora Vaiinti autuqaa niara vihi tiha, Ne maa qarara kaara rimanta ekaa tinavu qata vakaukavaravata ho iriate, turo.

²⁸ Tinavu Noravano Ihu Karaitiva ni aaqurihama nimiteharo koqema nimitaira ne koqemake variqi vuata.

2 TESARONAIKA

Poruva Tesaronaikaa vatanaakara vo qara naantiara vara kora

Ihura qaqi vara himpima kovaro naaruvaini oru vauvaro 21 ihie aitarovaro Poruva maa uvvara qara ruva tora. Tesaronaikaini vauka hininavu Karaitiva qaigaa tuvuaina entara veka vaiha kaiqa qaqrake qumina vauvaro vira kaara Poruva vikara kempukaiqama kero tiharo, Qaqi kaiqa varaqi viha Karaitiva qaigaa tuvuaina entara veka variate, tura. Vika kaiqa varaae tivakero maa uvvara qara nimitora.

¹ Te Poruka. Tevata, Sailleasivavata, Timotivavata, tenavu ne Kotira vaiinti nahenti Tesaronaikaini variakara ni qara ruva nimite. Ne tinavu Qova Kotivavata, Ihu Karaitiva Noravanovata ikama variara.

² Tinavu Qova Kotivavata, tinavu Nora Vaiintivano Karaitivavata, ni aaqurihamma nimiteharo koqema nimitaivaro ni muntukaqihairo paru i vaira variata.

Kotirara koqeve tura

³ Ti qata vakao, tenavu niara irihama vo enta vo enta Kotirara koqema iarao tiariravaqaima tinavuqi vaimanta vaunara. Ne Karaitirara ququaave tivake viraqaaahai voqavata virara kempukaiqamake iriqi vi variarara ti, tenavu homa niara Kotirara koqema iarao tivaqvi virara. Nariara nariara muntuka vataa okarava niqi voqavata vairara ti, tenavu homa niara Kotirara koqema iarao tivaqvi virara.

⁴ Ne mintiaqvi variarara ti, tenavu Kotira vaiinti nahenti vokiaka nivutana vahia ni mahuta ti vaunara. Ne Ihura vaiinti nahenti variamanta vira kaara vonavu ni qoraiqama nimite variamanta ne nora maara vareha ne kia popoharaiti, kempukaiqamake Karaitivara iriqi vi variarara ti, tenavu ni mahuta ti vaunara.

⁵ Ne maara varaqi vi variarara Kotiva virara kia tauru karaitiro, viva vaiinti nahenti uva avuqavuqama kero iri vaiva vaimantara ti, ne Kotiva raqiki vainaini vireka iha, nora maara varaqi vi vaivarovat Kotiva niara vika ti vatukaini ho uru vaikavema tianaro.

⁶ Kotiva avuqavuqama kero uva iri vaivara tiro, ekaara entaqaa, viva ni qoraiqama nimiteha maara niqaa vate variaka návota qoraiqama nimiteharo vikaqaa maara vateharo ⁷ nivata tinavuvata maara qaqqini varakero vuqa rava timitaanaro. Vi entaraqaa Noravano Ihuva naaruvaihairo nai *enseli* kempukanavu hampata qovaraiqama viro nora iha itaainara hampata tuvurero ⁸ Kotirara kia iri vai vaiinti nahentikave, Ihu Karaitira vakaakara qumina uvave ti vai vaiinti nahentikave, vika vika ruqutuanaro.

⁹ Viva vi vaiinti nahentika nititama kaira vika Nora aaqantohai niaraini nariara kanta oru vahia ekaa enta vaaquqamavi variqi viha, kia Nora Vaiinti mpeqa okara takuqi vairavata ho tavevara.

¹⁰ Vi entara Ihuva tuviraro virara ququaave ti vaiinti nahentika vira autu noraiqama keha tuahera kevara. Tenavu Ihurara ni tiva nimuramanta ne ququaave tiakara ti, nevata vi entara vi vaiinti nahentika nivutaini vaivara.

¹¹ Tenavu virara irihama Kotiva ni kahaqama nimitaarire ti, vo enta vo enta Kotira niara aare vaunara. Niara koqe aaraqaa vuate tiro, Kotiva ni naarama tairara iriha tenavu Kotira aarama nimite vaunara. Ne Karaitirara kempukaiqamake iriqi viha koqe kaiqaqai varaqi vi vaivarovat Kotiva ni kempukaiqama nimitaire ne vi kaiqara vi kaiqara ho varaqi vuate ti, tenavu Kotira aare vaunara.

¹² Ne mintimake koqe kaiqa varaqi vi vaivarovat tinavu Nora Vaiinti Ihura autuvano virini qiraro ni nutuvanovata virini qiarira. Kotivavata, Noravano Ihu Karaitivavata, ni aaqurihamma nimiteharo koqema nimitaqvi vi vaira ne homa mintiaqvi vivara.

2

Kotira uva voqamakero raqa kaaina vaiintirara tura

¹ Ihu Karaitiva tinavu Noravano tinavu ruvaaquma kareva tuvuaina entarara ni tiva nimirera. Te niara ike mpo tiha ² kia vo vaiintinavu hampi uva ti variara iriate turo. Hini vaiintinavu unahaa tihia, Noravano orurante tuvuaina entava vaakama qovaraiqivo, ti variara. Ne vika uvvara qeteha noraiqaake irivora. Kia vi entava qovarama vivo.

Taihairoe vi uvvara qovaraiqama vivo? Vovano unahaa tiharo, Kotiva uva qovarama keharo minti tivo? Vovano tiharo tinavuara minti tiarave. Tinavuara vi uvvara qara ntuvu taarave, ti variamantae minti ti variavo?

³ Kia qaqqi kaivarovo vaiintivano vo uva vo uvaqohairo ekaara entara ni una uva tiva nimiari. Naantiara enta airi vaiinti nahenti Kotira qoririma amite vaivarovat

vovano, Kotira uva raqa kaarira vaiintiva qovarama viro variqiro viraro, viraqaaahairo Karaitiva tuvuaina entava ho aniraanaro. Kotira uva vataira raqa kaaina vaiintiva, viva naane avuni qovarama viro variqiro viro, Sataanira vatukaini raumpirima vuvaravama varianaro.

⁴ Vi vaiintiva naantiara qovarama viro vaiinti nahentivano variqave ti vai haikarave, vika autu tuherake vai haikarave, vi haikarara qumina haikave, te ekaa vi haikaravata atara kauraukave tivakero, viva oru Kotira Naavuqi oquiviro vaiharo nariara te Kotikave tianaro.

⁵ Ne kiae vi uvvara qaqi iritaavo? Te haaru ni hampata vaiha ekaa vi uvvara ni tiva nimiaavaunara.

⁶ Kotira vatai uvvara raqa kaaina vaiintiva vaaka qovarama vuantorave tiro, vo haikavano vira ravaaqavuke vaira. Vira ravaaqavu kai haikarara ne kankomake iriara. Kotira nai kaama taina entarama qora vaiinti viva qovarama vuanaro.

⁷ Maa entara Kotira vatai uvvara raqe variaka kia qoqaa vaiha qora kaiqa vararaiti, vika kukeqavi vaiha qora kaiqa vare variara. Ho qora vaiinti vira ravaaqavuke vaiva naantiara ekaara viniraro ⁸ viraqaaahairo qora vaiinti viva Kotira vatai uvvara raqa kaarirava vaakama qovarama vuanaro. Vi vaiintiva qovarama viro qoqaa vaiharo vaagu kaiqa varaqiro vi vairaro, viraqaaahairo tinavu Noravano Ihuva qovarama viraro vira mpeqa okaravano takuqi vaivavata, nai noqihairo aiho vuaqa kaariravavata, vi vaiintira taiqakero vehi autu kaanaro.

⁹ Kotira vatai uvvara raqa kaaina vaiintiva qovarama viraro Sataaniva vira kem-pukaiqama kairaro viva unaqaraiqama kero vo kaiqa vo kaiqa, nora kaiqa kia tave kaiqara varaqiro vuanaro.

¹⁰ Viva mintiaqiro viramanta Sataanira aaraqaa ni vai vaiinti nahentika vaivaro viva unaqaraiqama kero vo uva vo uva vika tiva nimiqiro vi vaira vika vira uvvara quqaave tivara. Vi vaiinti nahentika kia Karaitira uva quqaa uvvara antuqa arimantara ti, vira kaara vika Sataanira vatukaqi vi vaiinti nahentika vaivaro Kotira kia ho vika kuvantu nimitaanaro.

¹¹ Vira kaara Kotira vika avu aato vara hampiqama kairamanta vika una uvvara quqaa uvavema tivara.

¹² Ekaa vaiinti nahenti Kotira quqaa uvvara una uvave tivake vaagu kaiqara quaha quaha i vaika, Kotira vikaqaa uva vateharo vikara Sataanira vatukaqi vivarave tianaro.

Kotira ni nai kaama torara tura

¹³ Ti qata vakaao, ne Noravano niara muntuka vataikama variavo. Vira Maraqura kempukaiqaa ne Kotira vaiinti nahenti koqeka variqi viha, quqaa uva iriqi vi vaivaro ni kuvantukero ntitaarire tiro, Kotira haaru hogarer ni nai kaama tora. Minturara ti, tenavu vo enta vo enta Kotirara koqema iarao tivaqi vuvaravama vairo.

¹⁴ Tinavu Noravano Ihu Karaitiva mpeqavano aatite vainaini nevata mini oru variqi vuute tiro, Kotira ni naarama taira. Kotira ni naarama tai uvvara iriate ti, tenavu Karaitira vakaaka ni tiva nimi vaunara.

¹⁵ Ti qata vakaao, vi uvvara irihama nevata kempukaiqamake vaiha, tenavu ni tiva nimuna uvvaraqai paama tivake tuataqi vuuta. Noqihiae qaraqihiae ni tiva nimuna uvvaraqai paama tivake tuataqi vuuta.

¹⁶⁻¹⁷ Tinavu Noravano Ihu Karaitivavata Kotira tinavu Qovavata tinavuara muntuka vataimanta vaunara. Tinavuara vo enta vo enta kempukaiqaavi vaiha vira vataake oru vai entara vekaiqiate tiro, Kotira tinavu aaqurihama timiteharo koqema timitairia. Kaivarava viva ni muntuka kempukaiqama nimite vaira ne kempukaiqaavi vaiha koqe kaiqaqai varaqi viha koqe uvvaraqai tivaqi viha variata.

3

Tinavuara iriha Kotira aarama timitaate tura

¹ Ti qata vakaao, te ekaara uva vo ni tiva nimirera: Ne Kotira aare vaivaro tinavu Nora Vaiinti uvavano vaaka vi ani vaira, vo vatanaaa vo vatanaaka ne tintemake, vikavata vi uvvara quqaa koqe uvavete tiata.

² Kia ekaa vaiinti nahenti Karaitira uvvara quqaave ti variarara ti, ne qaiqaavata Kotira aare vaivaro vaagu kaiqave, qora kaiqave, vare variakaqihairo viva tinavu ruuaruma timitaarie.

³ Noravano nai uva vataira avataqiro vi vaivama vairo. Sataaniva ni ravaaqavu kero qoraiqama kaantorave tiro, viva ni kempukaiqama nimiteharo ni antuara nimitaanaro.

⁴ Nora Vaiintivano tinavu muntuka qihaaqama timitaimantara ti, tenavu tiha, Homa ne tenavu ni tiva nimuna uvaravata, ni tiva nimire iaina uvaravata, iriqi vivarave, turo.

⁵ Noravano Karaitiva ni kahaqi vaira ne Kotiva niara muntuka vate vaina okarara kankomake iriqi viha, viva nai kempukaiqama kero variqiro vintemake, nevata kempukaiqamake variqi vuata.

Hauri niqihai vokiaka kia kaiqa varevorave, tura

⁶ Ti qata vakaao, Nora Vaiinti Ihu Karaitira autuqaa tenavu maa uvvara kempukaiqamake niara mintima ti: Ne tavaivaro ni qata vaka vovano popoheharo kia kaiqa vararaitiro, viva tenavu niara maantimake kaiqa varaate tuna uvvara kia iriraitiro, qumina variqiro virera, ne kia vi vaiintira aaqanto variate, turo.

⁷ Ne kankomake iriara. Tenavu iainantemake, nevata mintiataara vaimanta ne hininavu kia minti variara. Tenavu ni nivutana vaiha kia popoharaiti, koqemake kaiqa vare variavaunara. ⁸Tenavu ni hampata vaiha kia qumina kara vararaiti, monu aqukeha vare variavaunara. Tenavu ni maara nimiarorave tivakeha aatitoraqaaavata entaqivata vukaari utiha kaiqa varaqi viha monu aqukeha kara varake ne variavaunara.

⁹ Vi entara tenavu niqihai kara naaruarirava ho vaumantavata, tenavu kia mintiavaunara. Ne tinavu kaiqa taveha tenavu iainante iate ti, kia niara karave, vo haikave, naari variavaunara. ¹⁰Tenavu ni hampata vaiha ni uva maara tiva nimiha mintima ti: Kaiqa kia varaina vaiintira kiama kara amiate, tiavaunara.

¹¹ Tenavu iruramanta niqihai vaiinti vonavu popoheha kia kaiqa vararaiti, vinavuka qumina vaiha vo vaiinti vo vaiinti kaiqara turoqare variara.

¹² Nora Vaiinti Ihu Karaitira autuqaa tenavu uva vateha vi vaiintinavukara kempukaiqaake tiha, Kia qumina vi aniraiti, avivinamake vaiha kaiqa vareha kara namaqi vuata, turo.

¹³ Ho ti qata vakaao, ne koqe kaiqa varehamma kia popohaata. ¹⁴Tenavu maa qararaqti uva tiva taunara vovano kia avataqi virera, ne vi vaiintira viraqaqamake tavema, kia vira aaqanto vaivaro viva kaurira haika varaarira. ¹⁵Kia vi vaiintira navutaiqama amitaraiti, ne virara tinavu qata vakaave tivakeha virara raurihara variane tiata.

Ekaara uva tura

¹⁶ Noravano muntuka paruma nimite vaiva viva ni kahaqi vaira ne ekaa vo kaiqa vo kaiqa varaqi vi vaivaro ni muntukaqihairo paru i vaira variqi vuata. Noravano ekaa ni hampata variqiro vi vaira variata.

¹⁷ Ho te ni uva mantarereta tenta kauquqohai tenta hutu qara ntuva tauro, Te Poruka.

Tenta hutu qara ntuva taunara ne tavehamma quqaama Poruva tinavuni qara ruva timitarirevare tivara.

¹⁸ Tinavu Noravano Ihu Karaitiva ni aaqurihamma nimiteharo koqema nimitaqiro vira variqi vuata, turo.

1 TIMOTI

Poruva Timotiraini avuniqamakero qara vara kora

Ihura qaqi vara himpima kovaro naaruvaini oru vauvaro 35 ihie aitarovaro Poruva qaiqaa karapuhipi vaiharo maa uvara qara ruva tora. Timotira qova Giriki vaiintivanu vauvaro vira nova Iutaa nahentivanu vauvaro Timotiva Porura vakaaka iriro Karaitira uvara quqaave tivakero Porura avataqiro viharo vira kahaqamaqiro vi vaura. Timotirara viva koqema kero Karaitira uva vaiinti nahenti tiva nimiqiro viharo una uva maara kia iriraitiro variqiro vuarire tiro, Poruva Timotira maa uvara qara ruva amitora.

¹ Te Poruka. Kotiva tinavu kuvantu kero tivitaariravavata, Ihu Karaitiva tenavu vira tavaainara veka variariravavata, vitanta tiamanta te noraiqamavi Karaitira uva vaiinti nahenti tiva nimi vauraukama vai.

² Te maa qarara ai Timotira ruva amite. Are Ihu Karaitirara quqaave tianarara ti, te ariara ti maaquve ti vaunara. Tinavu Qova Kotivavata, tinavu Noravano Ihu Karaitivavata, ai aaqurihama amiteha koqema amite vaivaro ai muntukaiqihairo paru i vairara variana.

Una uva maara tiva nimi vau vaiintikara tura

³ Te Masedoniaini virera ihama ariara mpo Epasaasini variane tunantemake, te qaiqaavata ariara miniqai variane, turo. Vo vaiintinavu mini vaiha hampi uva maara vaiinti nahenti tiva nimi variaka, are vinavukara qioqama kehara kia minti tiate tiana.

⁴ Vika vuri/uri uvaqai tivaqai viha nái naaqi taato kaivaqaukavara vika anku nutuqai iriqi viha viraqaahai tioriora uvaqai qovaraiqamake variara. Are vikara kia minti tiate tiana. Vi uvava kiama Kotira kaiqa kahaqianaro. Vaiintivanu Ihu Karaitirara kempukaiqaa kero iriqiro vi vaiva, vivama Kotira kaiqa kahaqi vairo.

⁵ Vaiinti nahenti nariara nariara muntuka vataate ti, te ariara vi vaiintinavuka qioqama kaane tunara. Vaiinti nahenti Karaitira uvvara kia taara aato iriraiti, vira uva quqaqamake iriqi viha, Kotira avuqaa koqe kaiqaqai varaqi vi vai okararaqaahai vika nariara nariara muntuka vataqi vivara.

⁶ Hini vaiintinavu vi okarara qaqirake qumina uvaqai tivaqai vi variara. ⁷ Vika tiha, Kaiqe tenavu Mosiraqaa tivato uvvara vaiinti nahenti tiva nimire, tivakeha vika vi uvvara kankomake iriaka voqaara vaiha, vika vi uvaravata, vo uva nái ti varia uvvara okaravata, kia kankomake iri variaka variara.

⁸ Tenavu kankomake irunara: Mosiraqaa tivato uvava vaireva, koqe uva vaivaro vaiintivanu vi uvvara naitarama kero iriqiro viharo kiama Kotira uva raqa kaanaro.

⁹ Tenavu vo uvaravata kankomake irunara: Kotiva kia nai uva avuqavuqamake iri varia vaiinti nahentikara iriharo vi uvvara Mosiraqaa tiva taraitiro, vira uva raqakeha qora kaiqa vare varia vaiinti nahentikara iriharo Kotiva vi uvvara Mosiraqaa tiva tora.

Vaiinti nahenti kia Kotirara iri variakave, vaaqu kaiqa vare variakave, Kotira uva qaqirake vataihainaa okarara iri variakave, nai noka qoka aruke variakave, vora aruke variakave,¹⁰ vaiinti nahenti hampi qare variakave, nai kana vaiinti vataake hampi ni variakave, vaiinti muara ravaaqavuqakeha voka nimi variakave, una uva ti variakave, nai kauqu ainqiqa aquakeha una uva ti variakave, quqaa uva tauvaqa utu amiteha hampi kaiqa, vo kaiqa vo kaiqa varaqi vi variakave, vikara iriharo Kotiva nai uva maara vatora.

¹¹ Quqaa uva vaireva Karaitira uvama vairo. Kotiva vaiinti nahenti koqema nimite vaiva, viva ti noraiqama kero vi uvvara, nai voqaraa uva vaiinti nahenti tiva nimiane timanta te tiva nimi vaunara.

Kotiva Porura aaqurihama amitorara tura

¹² Ihu Karaitiva tinavu Noravano, vivama ti kempukaiqama timitero tiriara viva homa ti uva tiva nimiqiro vuunarove tivakero ti noraiqama kaimanta te vira kaiqa vare vaunara ti, te virara koqema iarao ti vaunara.

¹³ Quqaama te haaru Karaitirara qora uva tiva amiteha vira vaintinavu qoraiqama nimitaqai viha vika ntaihamaqi vi variavaunara. Vi entara te Karaitirara kia kankomake iriraiti, tenta hampi kaiqa vare variavauna okararavata kia iriavaunara tiro, Kotiva ti aaqurihama timotimanta te Karaitirara quqaa vivave tiavaunara. ¹⁴ Tinavu Noravano Ihu Karaitiva voqamakero ti aaqurihama timiteharo koqema timitaimanta, viraqaahai te virara kempukaiqaake iriqi viha virara muntuka vateha vaunara.

¹⁵ Maa uvvara quqaa uva tivataara, vaiinti nahenti virara quqaa uvave tivakeha homa iriqi vivara: *Viva qora kaiqa vare varia vaiinti nahentika kuvantu nimitairaro Kotiva*

vika ntitaarire tiro, Ihu Karaitiva vataini tuvirave. Ike, qora kaiqa vare varia vaiinti nahentikaqihai te anomake voqavata qora kaiqa vare vauraukama vuaro.

¹⁶ Te minti vaura vaiintika vauraro Ihu Karaitiva vaiinti nahentira paruma nimitaaina okarara tavaate tiro, viva ti naane aaqurihama timitaira. Ihu Karaitiva ti vaaqu vaiinti naane aaqurihama timitairara irihama, vaiinti nahenti aato kenko tira iri vimanta vika tiha, Ike, Karaitiva Porura aaqurihama amitainantema kero, viva tinavuvata aaqurihama timitairaqe tenavuvata ekaa enta qaqi variqi vuare, tivara.

¹⁷ Ekaa enta qaqi variqiro vi vai Avuhainaava, kia qutuarira okaravavata viraqi vaiva, tenavu vira kia ho avuqohaivata tavaarirava vaiva, viva nai vohaiqavanoqai Variqavano vaira. Viva mintimakero vairara ti, kaiqenavu ekaa enta vaha vira quahama amiteha vira autuqai tuaheraqi vuare. Quaaave.

¹⁸ Ti maaqu Timotio, haaru vo vaiintinavu ai tiva amiha Kotiva ariara mintima tivo tu uvarara irihama, te maa uvaravata ai tiva amirera: Are Kotira aaraqaa viharama qora kaiqa vare vaika ai aatarara kevorave tivakehara koqe iqoka vaiinti voqara variqira vihara, qora kaiqa vi aataraka aatarakamaqira vuane, turo.

¹⁹ Kotira aaraqaa vihara Karaitirara kempukaiqaakera iriqira vihara koqe kaiqaqai vare vairaro kia ai toqaavu aruarire. Vokia vaiintika koqe aara qaqrake qora kaiqa vareha toqaavu aruainarara vika kia noraiqaake iri variavaro vira kaara vika Karaitirara iriqi vuava qoraiqama vi vaira.

²⁰ Himeneusivavata Arekisantavavata vitanta mintiake koqe aara qaqrake qora kaiqaqai varaqi vi variara. Vitanta kia Kotirara qora uva tivaqti vuate ti, te vitanta Sataanira kauquqi kaunara.

2

Kotira aare okarara tura

¹ Te hoqare ari vihi tiha, Ne ruvaaqumavi vaiha Kotiva nivata, ekaa vaiinti nahentivata kahaqiarire ti, vira aarehamma virara koqeve tivaqti vuata.

² Avuhainaava vaiintive, *kamaanira* vaiintive, ekaa noraiqamavi vai vaiintikave, vikaravata irihama ne Kotira aaraivarava viva vika kahaqiarira. Ne mintiaqi viha Kotira aare vaivarava Kotiva vika kahaqira vika tinavuqaa koqemake raqiki vaiqe viraqaaahai tenavu ho variariraro tinavu muntukavano paru iharo qihaaqamake vairaque tirema vaiha Kotira kaiqa vareha koqe aaraqaaqai vuari.

³ Mintimake Kotira aare varia okarava koqe i vaivarava Kotiva virara quahe vairo.

⁴ Kotiva ekaa vaiinti nahentira quqaa uva okara kankomake iriqi vuate tiro, viva vika kuvantu nimitaariravama vairo.

⁵ Variqa vohaiqavanoqai vaivarava tavaaranahainaa vaiinti vohaiqavanoqai vaharo, vaiinti nahenti Kotira vataake vohaa variate tiro, viva vika avutana vaira. Vi vaiintiva Ihu Karaitiva.

⁶ Viva ekaa vaiinti nahentira kuvantu nimitaare tiro, qutu vura. Viva Kotiva tivato entaraqaa qutu viharo Kotiva vaiinti nahenti kuvantu kero ntitaaina okarara qovarama kora.

⁷ Vi vakaakara vaiinti nahenti tiva nimiane tiro, ti noraiqama kero tititaimanta te ekaa vo vatanaaka kia Iutaa vatanaaka vi vakaakara quqaave tivake iriqi vuate ti, vika tiva nimiqi vi vaunara. Kia te una tiraiti, te quqaa uvama ti vauro.

⁸ Virara irihama ti hantuqavano maantimama vairo: Ekaa vatumaini varia vaiintika vika kia arara itairamanta kia titoriraiti, Kotira kaiqaqai vara amiteha, nái kauqu virini tuaherakeha Kotira aaramaqi vivara.

Poruva nahentira tura

⁹⁻¹⁰ Te nahentira tirera: Nahenti vika kia nái vaata hampi qohaama keha vairaiti, koqemake naavumateha variata. Kia vo qara vo qaramake qiata kauhi vuntaraiti, kia *kori* oriqohai aututaa haikarave, nora monu aquataa *hankaarorove/kukukaarave*, nora monu vaina utavaaqarave, varake nonkutaata. Nahentivano te Kotira autu tuahere vauraukave tirera, viva koqe kaiqa, vo kaiqa vore vairava, vivama vira *vahehemavaataiqama* taina haikavama varianaro.

¹¹ Ne ruvaaqumavi vaimanta nahenti vika kia uva tiraiti, nái vara muntuvi vatainiqamake vaiha uva iriqi vuata.

¹² Kiama nahentivano himpiro vaiinti nahenti Kotira uva tiva nimiarira. Kiama nahentivano noraiqamaviro vaiintiqa raqikiarira. Te vira qioqama taunara. Nahentivano evaarama variarira.

¹³ Kotiva Adaamura naane autukero vatero, vira naantiara Evaara autukero vatora.

¹⁴ Adaamuva Sataanira uvvara kia quqaa uvave tuvaro nahentivano Sataanira uvvara quqaa uvave tivakero Kotira uva raqa kora.

¹⁵ Ho nahentivano Ihurara kempukaiqama kero iriqiro viharo, vorara vorara muntuka vateharo, Kotira kaiqa varaqiro viharo, kia nai autu tuahera karaitiro, variqiro viharo vainti vataqiro vi vairaro Kotiva vira kuvantu amitaanaro.

3

Kotira vaiinti nahentiqaan raqikikara tura

¹ Maa uvvara quqaa uva tivataara, vaiinti nahenti virara quqaa uvave tivakeha homa iriqi vivara:

Ihura vaiinti nahentiqaan raqiki varia kaiqava koqe kaiqa vaivarora tiro, homa vaiinti vovano vi kaiqara varaaataa iraro varaanaro.

² Ihura vaiinti nahentiqaan raqiki variarira vaiinttiva avuqavuqama keharo nuarira vaiintivama variari. Nahenti vohaiqa varataariravama variari. Kia namari neharo vueraiqiarira vaiintivama variari. Viva nai avu aato vaataqaa koqema kero raqikiqiro vuvariravama variari. Vaiinti nahenti vi vaiintirara koqe vaiintive ti vaivama variari. Viva koqema keharo niaraihainauka nai naavuqi ntita vateharo kara nimi variariravama variari. Vi vaiinttiva Kotira uva okara vaiinti nahenti koqemakero numiqe variarira vaiintivama variari.

³ Vi vaiinttiva kia iha namari neharo vueraiqiarira vaiintivama variari. Viva kia vaaka arara itairaro vaiinti nahenti ruqtuariravama variari. Vi vaiinttiva qihaaqama kero kahaqi variarira valintivama variari. Vi vaiinttiva kia monuara noraiqama kero muntuka ntuarira vaiintivama variari.

⁴ Viva nai naata vaintiqaaavata koqema kero raqikiariravama variari. Vira vaintaira vira uva koqemake iriqi vi vaiintivama variari.

⁵ (Nai naata vaintiqaa kia koqema kero raqiki vai vaiinttiva nantiakeroe Ihura vaiinti nahentiqaavata koqema kero raqikiqiro vuanaro? Kia ho mintianaro.)

⁶ Kia Ihura vainti qaraaka vaiintivano noraiqama viro Ihura vaiinti nahentiqaan raqikiqiro vuari. Hauri viva noraiqama viro te nora vaiintima vauro tiantora. Viva mintiaqiro viraro vira kaara Kotiva Sataaniraqua uva vatontema kero, viraqaavata uva vataantora.

⁷ Vi vaiinttiva vaireva, koqe vaiintivano vairamanta ekaa qaqi vaiinti nahentivata vi vaiintirara koqe vaiintivema tivara. Viva kia mintira vaiinttiva vairera, qaqi vaiinti nahenti virara qora vaiintive tivaro vira kaara Sataaniva vi vaiintira ravaaqaqvavu kairaro qora aaraqaama vuanaro.

Ihura vaiinti kahaqi vaikara tura

⁸ Ihura vaiinti nahentiqaan raqiki vaira vaiintira aanante vira kahaqi vaika, vinavukavata koqe vaiintiqai variata.

Vinavuka avuqavu niha nái uva tivatera avataqi viha quqaa uvaqai ti vaika variata. Vinavuka kia airi *uaini* ne vaika variata. Vinavuka kia monuara voqamakero muntuka nti vaika variata.

⁹ Vinavuka koqe avu aatoqaa niha, vutuke quqaa uva Kotiva qovaraiqamakora tiva nimiqi vuata.

¹⁰ Are vinavuka noraiqama kareva iharama vinavuka kaiqa naane avatama kera tavaana. Are tavaira vinavuka vi kaiqara koqemake varaveria, are vinavuka noraiqama kaira vinavuka Ihura vaiinti nahentiqi kaiqa varaqi vuata.

¹¹ Vinavuka naatavaravata koqe nahentima variata. Vinavuka naatavararanavu vaiha kia vora turoqare vora turoqare i uvvara tivaqiqi viraiti, vinavuka avu aato koqe iro vaira variqi viha vinavuka ekaa kaiqa nimira kia hampi vararaiti, avuqavuqama keha vare vai nahentikama variata.

¹² Ihura vaiinti nahentiqaan raqiki vaina vaiintira vira kahaqi vaiva, vivavata nahenti vohaiqa vataavama variari. Vi vaiinttiva koqema kero nai vaintairaqaaavata nai naavuqi vaikaqaavata raqikiqiro vuvarirava variari. ¹³ Naantiaraihainaa vaiinti vinavuka noraiqamavi Ihura vaiinti nahentiqi koqemake kaiqa varaveria, vinavuka nutuvano viriniqira vinavuka kia qetaraiti, vinavuka nai Karaitirara kempukaiqamakere iriqi vi vai okarara tiva nimiqi vivara.

Kotira uva kukeqatorara tura

¹⁴⁻¹⁵ Te inaaraiqa varike ai oru tavarera auti vaunara. Vo haikavano ti ravaaqaqvavu kairaque kia vaaka oru ai tavaarorave ti, te maa qarara ai ruva amite. Are Kotira vaiinti

nahenti nantimake variqi vi vai okarara kankomakera iriane ti, te maa qarara ai ruva amite.

Vira vaiinti nahenti vaireka, vika Kotiva qaqi variqiro vi vaira naavuqi variaka voqaarama variara. Paama tivakero naavu kaara arataiva naavu aqu amite vaintemake, Kotira vaiinti nahenti vira quqaa uvaqaa koqemake raqikiqi vi variara.

¹⁶ Ike, Kotiva nai uva qovaraiqamako uvava nora uvama vairo. Vi uvava maantimama vairo:

Karaitiva vaiinti vaata vataakero vataini qovaraiqama vumanta vaiinti nahenti vira tavorave. Kotira Maraqravano vira quqaa okara qoqaiqama komanta enseli vikavata vira tavorave. Vo vatanaa vo vatanaaka vira uva tiva nimura iri, virara quqaa vivave turave. Kotiva vira vita kovaro viva naaruvaini turave.

4

Poruva una uva maara tu vaiintikara tura

¹ Kotira Maraqravano tutukero maa uvvara mintima tiro: Naantiara vaiinti vonavu Karaitirara iriqi vi vai okarara qaqrake, vinavuka vaananavu una uva tiva nimi vai uvaraqai iriqi vivarave, tira. ² Vi vaintinavuka maa entara qovaramavi quqaa uva ti variaka voqaara una uvaqai tivaqiqi vi variavaro vika toqaavu aruataara vaimanta vika kia kauriraiti, qora kaiqaqai vare variara.

³ Vinavuka vaiinti nahenti qioqama teha kia naata vaati varaaate, vi karara vi karara kia naraiti qaqi variqi vuate, ti variara. Vika minti ti variavaro Kotira uvavano kia mintima kero vairo.

Tinavuara ekaa vi karara vi karara naate tiro, Kotiva vo kara vo kara autukero vataira. Virara irihama tenavu Karaitirara quqaave tivake Kotira quqaa uva iriqi viha tenavu homa vo kara vo karara Kotirara koqema iarao tivakeha namaqi virara.

⁴ Ekaa Kotiva autukero vatai karava koqe karaqaima vairo. Tenavu vo kara kia qioqama taraiti, ekaa karara Kotirara koqema iarao tivakeha homa namaqi virara.

⁵ Kotiva tivarо kara qovarama virara ti, tenavu Kotirara koqema iarao tivakeha homa tenavu ekaa karara koqe karaqai vaivo tivakeha narara.

Ihu Karaitira kaiqa koqemakera varaqira vuane tura

⁶ Are vi uvvara vi uvvara Ihura vaiinti nahenti tiva nimiqira virera, are Ihu Karaitira kaiqa valinti koqevama vainara. Are mintiaqira vi vairaro Kotira quqaa uvavano ai kara voqara vairara are koqema kera Kotira aaraqaa vinara.

⁷ Vo uva *vuri/uri* uva hampiqama keha una variqara ti varia uvarave, kontavano hampi uva ti variarave, are ekaa vi uvvara tauvaqa utu amitaana. Are Kotira aaraqaa koqemakera ni vainara, virara noraiqaakera iriqira vuana.

⁸ Vaiintivano aaraini niharo nai aiqu kauqu rantutaarirava vi haikava vira vaataqaima kahaqianaro. Vaiintivano Kotira aaraqaa niharo kempukaiqama kero ni vairava vira maraquravata kahaqama amitaanaro. Are Kotira aaraqaa vo enta vo enta kempukaiqaa kera ni vairaro ai avu aato muntukaqihairo ho vairara are maa entaravata, naantiara naaruvaini vaina entaravata, homa variqira vinara.

⁹ Maa uvvara quqaa uva tivataara, vaiinti nahenti virara quqaa uvave tivakeha homa iriqi vivara.

¹⁰ Tenavu tiha, Qaqi variqiro vi vai Variqava, Kotiva, viva tinavu kahaqiarirava vaivo, ti vaunarara ti, tenavu vukaari utiha vira kaiqa varaqi vi vaunara. Kotiva ekaa vaiinti nahenti kuvantu nimite vaiva, viva Ihurara quqaave ti vaiinti nahentika kuvantuma nimitaanaro.

¹¹ Maa uvvara ai tiva amunara are vaiinti nahenti tiva nimiqi vihara, vi uvvara iriqi vuate tiana. ¹² Vokika ariara tiha, Tavaate, viva qaraaka vaiintivanoqaima vaivo. Kia vira uva irirerave, tivera, are kia vika qaqi kaira minti tivaqiqi vuata. Ihura vaiinti nahenti ariara koqe vaiintive tiate tira, are koqe uvaqai tivaqira vihara avivinama kera variqira vuana. Vorara vorara muntuka vataqira vuana.

Kotirara kempukaiqaa kera iriqira vuana. Hampi ni vai okarara tauvaqa utu amitehara variqira vuana. Are mintiaqira vi vaira vaiinti nahenti vikavata ai aanante koqemake variqiqi vivara.

¹³ Are ti veka vaharama maa kaiqara varaqira vuana: Vaiinti nahenti ruvaaquma kera vika nivuqaa himpi vahara Kotira uva kaara ruva nimitera, vi uvvara iriqi vuate tivakera, vi uvvara okaravata avuqavuquma kera tiva nimiqira vuana.

¹⁴ Haaru *elda* vaiintinavu nái kauqu ariqaa vateha Kotira uva vo ai tiva qovarama amuvara are viraqaahaira Kotira kempuka vo varonara. Kotiva vi kempukara ai amitaira are kia tauru karaitira, virara iriqira vuana.

¹⁵ Ekaa vi haikarara tunara are vi kaiqaraqai varaqira vi vairamanta ekaa vaiinti nahenti ai kaiqa taveha virara anomake koqe kaiqave tiata.

¹⁶ Are raurihara variane. Are koqe aaraqaqai viharama koqe uvaqai vaiinti nahenti tiva nimiqira vuana. Are mintiaqira virera, Kotiva aivata ai uva iri vaikavata kuvantu nimitero ntitaanaro.

5

Maantimakera Ihura vaiinti nahentiqaa raqikiane tura

¹ Are tavairaro Ihura vainti naampai vovano kia koqe aaraqaa virera, kia vira noraiqaakera atiraitira, nena qorara qihaaqama kera tinantema kera, vi vaiintiraravata tiraro koqe aaraqaa vuarira. Qaraaka vaiintiara tireva, nena qata vakaarara tinantema kera, vikaravata minti tiana.

² Nahenti kontara tireva, nena norara tinantema kera, vikaravata minti tiana. Qaraaka nahentiara tirera, nena aura nakaarara tinantema kera, vikaravata minti tiharama avivinama kera variqira vuana.

³ Tavairaro tentoqa nahentiqaa raqikika kia vaivera, are vira koqe okarama autu amitaane. ⁴ Tentooqa nahenti vairamanta vika vaintairave, vika naintivarave vaivera, vika homa viraqaa raqikivara. Vika nai noka qokave, naaqo taatokave, haaru nai vika raqikirara iriha, vate vika nai nokaaqave, nai taatokaqaaave, raqikiqi vuata. Vika mintiaqi viha, Kotira kaiqa vare vaivaro Kotiva vikara quaheraroma varianaro.

⁵ Tentooqa nahentivano nariaraa vairava, viva Kotira vekaiqiharo variqiro viharo, entaqivata aatitairaqaavata Kotirara ti kahaqiarire tiro, vira aaramaqiro vuanaro.

⁶ Tentooqa nahenti vovano nai quahaainararaqai iriqiro vi vaiva vaireva, vi nahentiva qaqi variqiro viharovata, viva qutuvi nahentira voqaarama vairo.

⁷ Are maa uvara vaiinti nahenti tiva nimiraro vikaqaa kia uvavano vaira koqemake variqi vuata. ⁸ Vaiinti vovano nai vaiinti nahentiqaa kia koqemra kero raqiki vairera, vi vaintivita Karaitira uvvara qumina uvavema tianaro. Vi vaintivita kia Kotira uvara quqaave ti variaka vikavata naatarakero anomakero qora valintivonoma varianaro.

⁹ Are tentoqa nahenti autu vatareve iharama, tavairaro nahenti vovano qorainti vohaiqaqai varatero vairava anomra kontaiqama viro 60 ihi vara kairera, vira autuqai vataana.

¹⁰ Vi nahentirara koqe kaiqa vare vai nahentirave ti vai nahentivama variari. Vi nahentiva koqemra kero nai vaintairaqa raqikiqiro vi vaimanta noruqama vi nahentivama variari. Vi nahentiva koqemra kero niarahainauka nai naavuqi ntita vatero kara nimi vaira nahentivama variari. Vi nahentiva Kotira vaiinti nahenti kaiqa vara nimite vaira nahentivama variari. Viva maaraqi vai vaiinti nahentika kahaqama nimite vaira nahentivama variari. Viva koqe kaiqa, vo kaiqa vo kaiqa varaqiro vi vaira nahentivama variari. Minti vai nahentika autuqai vataate tiana.

¹¹ Qaraaka tentoqa nahentiara kia vika autu vataate tiana. Vi nahentika Karaitirara noraiqaake iriqi vi, viraqaahai vika qaiqaa vaati varaataa iramanta Karaitira kaiqa qaqriram kevara. ¹² Vi nahentika hoqare nai kauqu aqiqaa aqukeha tivate uvara qaqrakera kaara uvama varevara.

¹³ Qaraaka tentoqa nahenti okara vaireva, maantimama vairo: Vika kia kaiqa vararaiti, qumina vailha voqi voqi qumina vi ani vailha vora turoqarama amite vora turoqarama amite i variara. Vika vokiaka kaiqaravata qumina irikeha tivaqvi vi variara. Vika kia voka tiva nimi varia uvara viraqai tiva nimi variara.

¹⁴ Qaraaka tentoqa nahentivano mintiantorave ti, te virara tiha, Are qaiqaa qorainti varatera vainti vataqi vihara viraqaa raqikiqira vuane, turo. Vi nahentiva mintirera, tinavu navataiqama timite variaka kiama ho vi nahentira kaara tinavuqaa uva vatevara.

¹⁵ Te tavauramanta tentoqa nahenti hininavu koqe aara qaqrake tuqantaavi Sataanira aaraqaqai vi variara.

¹⁶ Nahenti vovano Ihura vainti vailharo tavairaro vira naavuqi tentoqa nahenti vovano vairera, viva viraqaa raqikiqiro vuari. Viva mintiramanta Ihura vainti nahenti vokika homa tentoqa nahenti vonavu nariaraa vaikaqaa raqikiqi vivara.

Nora valintinavu Kotira kaiqa koqemake varekara tura

¹⁷ Elda valintinavuqihai vonavu koqemake vi kaiqara vare vaivera, are tiramanta vika vi valintinavu koqaa voqavata nimiata. Vo valintinavu kia popoharaiti, kempukaiqama keha Kotira uva tiva nimiqi viha, vi uvara okaravata vutuke vika numiqe varia valintinavukara, te avuniqamake vinavukara iriha mintima turo.

¹⁸ Kotira vukuqi mintima tiro:

Uiti auru rakavuarire tira, are purumakau vita vatairaro uiti vi vaura aiqu ravaqiro vi anina purumakaura vira no rumpa terorave. Vira no qaqi kairaro purumakauvano vi kaiqara vareharo homa vi karara hini naanarove, tura. *(Lo 25:4)*

Kotira vukuqi uva vovano mintima tiro:

Vora kaiqa vara amitaira vaiintiva homa nai koqaa varaanarove, tura. *(Ruki 10:7)*

¹⁹ Vaiinti vohaiqavanoqai *elda* vaiinti voqaa uva vatareva auti vairera, kia vi vaiintira uva iriana. Vaiinti taaraqantae, taaramonavue, tiha tenavu tavauraro vi vaiintiva qora kaiqa varairo tivera, are vinavuka uvama iriane.

²⁰ Are tavaira nora vaiintinavu quqaa qora kaiqa vara kaivera, are vinavuka ntita varera vaiinti nahenti nivuqaa vaharama vinavuka nitiana. Are mintiramanta hini vaiinti nahenti vira taveha, vika qeteha hauri tenavuvata mintiarorave tivakeha variata.

²¹ Timotio, te Kotira avuqaavata, Ihu Karaitira avuqaavata, *enselinavu* nivuqaaavata vahama, te ariara kempukaiqamake tiha: Te ai tiva amuna uvava are vi uvava tiva nimiqira vihara kia vo vaiintiara ti navunaarave tivakera vi uvava qihaaqama kera vira tiva amiraitira, vo vatanaa vaiinti kempukaiqama kera tiva amiane, turo.

Are nena navunaakavata vo vatanaa vaiintivata vohaa qarama kera uva tiva nimiana.

²² Kia paparuqama kehara nena kauqu vo vaiintiqa vatehara vira noraiqama kairaro Kotira kaiqa varaarira.

Hauri are mintiraro vi vaiintiva kia koqema kero Kotira kaiqa varairaro arigaavata uva variantora. Vokiaka qora kaiqavano aivata utu varaantorave tira, are koqe kaiqaqai varaqira vuana.

²³ Kia qaqi qumina namariqai namaqira vuana. Rovaravano vo enta vo enta ai ari vairara tira, are *uaini* inaaraqai nairaro ai vikokavano ho variarira.

²⁴ Hini vaiintinavu qoqaa vahira qora kaiqa vare variavaro uvavano vaaka vikaqaa qovaraiqi vaira. Hini vaiintinavu kukeqavi vahira qora kaiqa vare variavaro vika qora kaiqa vare varia uvava naantiarainima qovaraiqianaro.

²⁵ Vira voqaara vaiinti nahenti koqemake vare varia kaiqava qoqama vairo. Kukeqavi vaharo koqe kaiqa vare vairava vairaro naantiara vira koqe kaiqavanovata qoqama varianaro.

6

Qumina kaiqa vaiintiara tura

¹ Te ne rumpataa vaiinti nahentikara tirera. Ne nintaqaa raqiki vaina vaiintira koqe okara autu amiteha vira uva iriqi vuata. Ne mintiaqi vi vaivarovo vovano kiama vira kaara Kotirara qora uva tianaro. Vovano kiama ho tinavu maara uvaravata qora uvave tianaro.

² Niqaa raqiki vaira vaiintiva Ihura vainti vairera, viva ni qata vakaavama vairara ti, ne kia qora okara vira autu amitaraiti, ne voqavata koqemake vira uva iriqi viha vira kaiqa vara amitaata. Vi vaiintivata Ihurara ququaave tivakero Kotirara muntuka vatairara ti, ne koqemake vira kaiqa vara amiteha vira kahaqamaqi vuata. Timotio, are vi uvava vaiinti nahenti tiva nimiqira vuana.

Una uva maara ti varia vaiintikara tura

³ Vaiinti vovano anirero tinavu Noravano Ihu Karaitiva quqaa tu uvava qaqira kero, viva tenavu iriqi vi vauna uvaravata qaqira kero vo uva maara tirera,⁴ vi vaiintiva nai autuaraqai iriharora tiro, viva kia uva maara okara kankomakero iri vai vaiintivama varianaro.

Mintimake varia vaiintika avu aatoqi tivorira uvave, antua uvave tivaqaima varianaro. Vika mintimake ti varia uvava kaara vaiinti nahenti nai toma amite nai toma amitemaqi vihave, nai ati nai ati ihave, nariara nariara qora uva ti variarave, nariara nariara qora avu aato utuqi vi variara.

⁵ Vaiinti nahenti vi uvava iriqi vi variavaro vika avu aatovano qoraiqama vimanta Kotira uva quqaa uva qaqrake, vo uva vo uva ti variara kaara nai ati nai ati i variara. Vika nai irike tiha, Kaiqe Kotira avataqi vuaina aararaqaaahai monuve, vo haika vo haikave varaa, ti variara.

⁶ Vaiintivano Kotiva ami haikarara ho vatauro tivakero quahairera, ququaama viva Kotira aaraqaa vinararaqaaahiro koqe haika airi haika vataavama varianaro.

⁷ Tenavu vatainai qovaraiqama vuna entara kia vo haikavata vare anunara. Tenavu maa vataro maini ke vuaina entara kia vo haikavata ho vare virara.⁸ Virara irihama tenavu tavaariraro karave, utavaaqave, ho vairera, tenavu virara homa vatauro tiari.

⁹ Monu airaira vareraraqai noraiqaaake iri variaka variavaro vika avatara haikavano ravaqaqvavu kaimanta vika hampi kaiqa varaataa imanta qora kaiqa, vo kaiqa vo kaiqa vare variara. Mintiaqi viha vira kaara vika qoraiqamavi ekaara vehiqama vi taiqa vivara.

¹⁰ Vaiinti nahenti monuara voqavata muntuka ntimanta iriqi vi variaraqaahairo ekaa qora kaiqa, vo kaiqa vo kaiqavano qovarama vi vaira. Te tavauramanta vaiinti vonavu monuara voqamake muntuka ntimanta, vira kaara vika Ihura uva qaqla kaavaro vo maara vo maaravano vika ravaaqavu kaivaro vika muntukavano qoraiqama vimanta variara.

Poruva ekaara uva tura

¹¹ Ho Timotio, are Kotira vaiintivano varianarara tira, ekaa qora okara aatu ruqema kera kantama vuana. Are avuqavu variaina okarara iriqira vuana. Kotira aaraqaqai nuvaqira vuana. Ihurara kempukaiqaakera iriqira vuana. Vorara vorara muntuka vatehara variana. Kia popoharaitira, kempukaiqaakera variqira vuana. Vaiinti nahenti qihaaqama nimitaqira vuana.

¹² Vaiintinavu kantamaqi viha nai aatarake nai aatarake iantema kera, nena ekaa enta qaqla variqir vina koqaara vararerave tivakehara kantamaqi vuana. Are mintima kera kantamaqira vuane tiro, Kotiva ai aarama taira. Haaru Kotiva ai aaro entara are airi vaiinti nahenti nivuqaa vahira te Kotira aaraqaqai virerave tianara.

¹³ Kotiva vaivarora tiro, ekaa haikavano qaqla variqiro vi vaira. Ho te Kotira avuqaavata, Pontius Paireatava vaunaini vahiro koqema kero vira tiva amu vaiintira Ihu Karaitira avuqaavata, vahama ariara maa uvvara kempukaiqamake turo:

¹⁴ Te ariqaa tiva tauna uvaraqaa koqemakera raqikiqira vihara kia hampi vo uva vi uvaraqaa tomaqa taraitira, koqema kera vi uvaraqaa raqikiqira vi vairaro ekaara entaqaa tinavu Noravano Ihu Karaitiva qovaraiqiarira.

¹⁵ Naantiara Kotiva tivataaina entaraqaa Ihu Karaitiva qaiqaa qovaraiqama vuanaro. Ike, Kotiva voqamakero koqema nimite vaiva, vivaqaima ekaa haikaaqaa raqiki vaivama vaira. Viva ekaa avuhainaa vaiinti vika Avuhainaaavama vaira. Viva ekaa nora vaiintive nora enselive, vika Noravanoma vairave.

¹⁶ Vivaqaima ekaa enta qaqla variqiro vi vaiva vahiro viva voqamakero aatite vairaqi variqiro vi vaivarova vovano vira aqqanto vuarira aarava kia vaivaro vira tavai vaiintiva kia vaivaro vira tavaarira vaiintivavata kia varianaro. Viva mintimake vairara irihama, kaiqenavu vira autuqai noraiqama keha virara ekaa enta ekaa enta kempukavano variqiro vuarire tiare. Quqaama turo.

Airi airaira vatekara vokikavata rairake nimiate tura

¹⁷ Maa vataraqaa airi airaira vateka are vika tiva nimiramanta vika kia nái nutu tuahereha tenavu nora vaiinti nahenti vauro tiata. Vikara kia nenta airaira vahuqa variaina haikarara noraiqaake iriqi viraiti, Kotiraraqai noraiqaake iriqi vuate tiana. Tinavuara koqemake variqir vuate tiro, Kotiva ekaa haika paruma keharo tinavu timi vaira.

¹⁸ Are airi airaira vatekara koqe kaiqa, vo kaiqa vo kaiqa varaqi vuate tiana. Are vikara nenta airaira hini paruma keha rairake vokavata nimiate tiana.

¹⁹ Vika mintiaqi vi vaivarova naantiara naaruvaini vika koqaavano geramaviro vaira, viraqahai vika quqaiqamake qaqla variqir vi okararavata vare, qaqla variqir vivara.

Kotiva ai ami kaiqaraqaa koqemakera raqikiane tura

²⁰ Timotio, Kotiva ai ami kaiqaraqaa koqemakera raqikiqira vihara vi kaiqara varaqira vuana.

Hini vaiintinavu kia Kotirara iriraiti, vika nái irikeha tiha, Maara uvavano vaireva vira okaravano maantimama vaivo, tivakeha qumina uvaqai ti variara. Are vi uvvara ti variaka tauvaqa utu nimitaana.

²¹ Hini vaiinti nahenti vika uvvara quqaa uva okarave tivakeha vika Kotira aara qaqlirake hampi aaraqaqai ni variara.

Kotiva ni aqqurihamu nimiteharo koqema nimitaira variate, turo.

2 TIMOTI

Poruva Timotiraini vo qara naantiara vara kora

Ihura qaqi vara himpima kovaro naaruvavini oru vauvaro 36 ihie aitarovaro Poruva karpuhiqi vahiaro maa uvava qara ruva tora. Vi entara Porura arukeva aumaiqi vauvaro Poruva virara iriharo Timotirara vihi tiharo, Koqema kera Karaitira uva iriqira vuane, tivakeharo maa uvava qara ruva amitora.

¹ Te Porukama. Kotira antuqavano timanta te noraiqamavi Ihu Karaitira uva tiva nimi vauraukama vai. Kotiva nai kauqu ainqaa aqukero tinavuara Ihu Karaitira vataake vohaa qaqi variqi vuate ti uvava, te vi uvava vaiinti nahenti tiva nimi vaurauka.

² Timotio, te ariara ti maaqu koqevave turo. Kotiva tinavu Qovavata, Ihu Karaitiva tinavu Noravanovata, vitanta ai koqema amiteha ai aaqurihama amitaivaro ai munukaqihairo paru i vairara variana.

Kotir oqeve tura

³ Ti kaivaqaukavara untemake, tevata Kotira kaiqa koqe avu aatoqaa vara amitaqi vi vaunara. Te mintiaqi viha Kotirara koqema iaro tivaqi viha entaqivata aatitairaqaavata ai kahaqiarire ti, vira aaramaqi vi vaunara.

⁴ Ai avuqihairo auguru ntairara te qaqlima irite vauro. Te ai tavaariraro ti munukavano koqe iariре tima vauro. ⁵ Are kia una tiraitira, Kotirara kempukaiqamakera iriqira vi varianara, viravarata te qaqlima irite vauro. Ai taatova Rohivavata, ai nova Junisivavata, vitanta Kotirara kempukaiqamakera iriqi vuantema kera, arevata iriqira vi variarao, turo.

⁶ Virara irihama haaru te ariqaa kauqu vate variavauraro Kotiva nai kempuka vo ai amura are virara tauru kerorave turo. Vaiintivano iha vuaqa kaivaro qaiqaa itaintema kera, are vi kempukaraqohaira qaiqaa Kotira kaiqa varaqira vuana.

⁷ Kotiva kia tinavuara qetaate tiro nai Maraqua timiravauve. Tinavuara vika kempukaiqamake variqi viha nariara nariara munukra vataqi viha, vika naiqaa naiqaa koqemake raqikiqi vuate tiro, nai Maraqua tinavu timira.

⁸ Virara iriharama kia kaurihara tinavu Nora Vaiintiara vaiinti nahenti tiva nimiqira vuana. Te Karaitira kaiqa kaara karapuhiqi vaunararavata are kia kauruana. Are ti aanarerara airi maara varaqira viharama Kotira vakaaka koqera tiva nimiqira vuana. Are mintiaqira viraro Kotiva ai kempukaiqama amitaqiro vuanaro.

⁹ Kotiva tinavu kuvantu timitero tinavuara nai vaiinti nahenti variate tiro, tinavu haarama taira. Kia tenavu koqe kaiqa vara amitaunara iriharova vauve tinavu haarama taira. Viva nai tiva taira avateharo tinavu aaqurihama timitero koqema timitaaira. Kia maa vataru autukero vato entara Kotiva tiharo, Naantiara te Ihu Karaitira kaiqara irihama vaiinti nahenti aaqurihama nimiteha koqema nimitarerave, tura.

¹⁰ Kotiva minti tivakero vauvaro maa entara Ihu Karaitiva tinavu kuvantu timitaarirava vatainvi qovarama vurara ti, tenavu Kotiva tinavu koqema timitaainarara kankomake irunara. Karaitiva ekaara qutuvi varia okarara vira kempuka taiqa kairara ti, tenavu Karaitira vakaaka koqera iriqi viha tenavuvata homa ekaa enta qaqi variqi virara.

¹¹ Vira vakaaka koqera tiva nimiarire tiro, Kotiva ti noraiqama kaimanta te vi uvava vaiinti nahenti tiva nimiqi viha vi uvava okaravata tiva nimiqi vi vaunara.

¹² Te vi uvava tiva nimiqi vi vauramanta vira kaara vokiaki ti qoraiqama timite variamanta te vi maarara vareha kia te noraiqaae virara iriha kauriraiti, te quqaave tuna vaiintira okara kankomake irunara ti, te munukra qihaaqama keha tiha, Viva homa ti timitaaina haikaraqaa raqikiqiro vi vairaro ekaara entavano qovaraiqiarire, ti vaunara.

¹³ Te quqaave uva ai tiva amunara iriharama vi uvvaraqai tuataqira vihara vaiinti nahenti tiva nimiqira vuana. Vi uvava iriharama Karaitirara kempukaiqaa kera iriqira viharama vorara muntuka vatehara variana. ¹⁴ Vaiintivano koqe airairaqa raqikintema kera, are Karaitira uva tiva amunaraqaa koqema kera raqikiqira vuana. Kotira Maraqravano tinavuqi variqiro vi vaiva, viva ai kahaqi vairara are vi uvvaraqa raqikiqira vuana.

¹⁵ Figelusivavata, Hemosenivavata, ekaa Esia vatainvi variakavatamake, ti qaqlimake vua uvvara are irianarave. ¹⁶ Onesiforusiva ti seniqohai rumpa taamanta vaunarara kia kauriraitiro, vo tataa vo tataa ti koqema timite vairara ti, te Kotirara vi vaiintiravata, vira naavuqi variakaravata, aaqurihama nimitaane turo.

¹⁷ Vi vaiintiva kia ti rumpataarara noraiqaakero iriraitiro, tiriara Romini voqi voqi rantaqiro viviro, oru ti ranta kaira. ¹⁸ Ho Noravano ekaara entaqaa vi vaiintira aaqurihama amitaarire. Te Epasaasini variavauraro vi vaiintiva ti airiqama kero kahaqama timitorara are viraravata irianara.

2

Koqe iqoka vaiinti voqaara variqira vuane tura

¹ Ti maaquo, Ihu Karaitiva tinavu aqurihama timitero koqema timite vairara tira, are kempukaiqaakera variqira vuana. ² Te airi vaiinti nahenti nivuqaa vailha ai tiva ami vauna uvvara are irianara, vi uvvara Kotira aaraqaa koqemake ni varia vaiintika tiva nimiramanta vikavata vi uvvaraqaa koqemake raqikiqii viha vokikavata tiva nimiqi vuata.

³ Are Ihu Karaitira vainti vailhara koqe iqoka vaiinti voqaara vailhara, are tinavu aanantero vo maara vo maara vareharama kempukaiqaa kera variqira vuana. ⁴ Iqoka vaiintivano vailhoro naiqaa raqiki vai vaiintira quahama amitareva autiharo viva kia qumina vo kaiqa vo kaiqa vararaitiro, viva iqoka raqi vai kaiqaraqai varaqiro vi vaira.

⁵ Vo koqaa varareka kantamaqui viha nai aatarake nai aatarake vi variakaqihairo vovano kia koqemake kantaa okarara iriraitiro, hampiqama kero vo aaraqaa virera, viva kia ho vo koqaa varaanaro.

⁶ Vaiintivano vukaari utiharo kaiqa varakero kara ututaiva, viva naanema vi karara qantukero naariravama vairo. ⁷ Are te tiva amuna uvvara iriqira vi vairaro Noravano ai kahaqirara are ekaa vi uvvara anomakerama irinara.

⁸ Maa uvvara iriqira vuane: Ihu Karaitiva Devitira okara vohaa ankuvano qutu vuraqihairo qaiqaa qaqqi himpura. Te vi uvvara koqe vakaaka tiva nimiqi vi vaunara. ⁹ Te mintiaqi vi vauramanta vira kaara vaauq kaiqa varai vaiintira rumpa taantemake, ti seniqohai rumpa taamanta te vi maarara varaunara. Vika tiqai ho rumpa teha, Kotira uva kiama ho seniqohai rumpa tevara.

¹⁰ Vokiaka ti qoraiqama timite variamanta, te Kotiva nai kaama tai vaiinti nahentikara iriha, vikavata Karaitira uva irivarot Kotiva vika ntita varaira ekaa enta Kotira vataake qaqqi variqi vuate ti, te vo maara vo maarara kia noraiqaake iriraiti, varaqi vi vaunara.

¹¹ Maa uvvara quqaa uva tivataara, arevata vi uvvara iriqira vuana:

Tenavu Karaitira vataake qutu vuavaurauka variarera, naantiara tenavu vira vataake homa qaqqi variqi virarave.

¹² Tenavu kia popohnaara iraiti, kempukaiqaake variqi vuarera, naantiara tenavu Karaitira vataake vailha, raqikiqii virerave. Tenavu Karaitira tauvaqa utu amitaarera, vivavata tintanavu tauvaqama utu timitaanarove.

¹³ Tenavu vira uva iriqi vivi, qaqqira kaarerera, viva nai tiva taaina uvvara kia qaqqira karaitiro, qaqqaima vi uvvara iriqiro vuanarove. Viva kiama ho nai uva qaqqira kero vo uva tianarove.

Quqaa uvaqai tuataqira vuane tura

¹⁴ Ekaa vi uvvara vi uvvara tiva amunara qaiqaa qaqqavata vaiinti nahenti tiva nimiqira vuana. Are Kotira avuqaa vailharama vaiinti nahenti tiva nimihiara vikara kia qumina vo uva vo uva kaara tioriha variate tiana. Tiorira uvavano kia vaiinti nahenti kahaqiraitiro, vika vara raumpirimama kaanarove.

¹⁵ Are Kotira kaiqa koqema kera varaqira vi vairaro Kotiva ariara koqe kaiqa vaiintive tirara are kia kaurira haika vararaitira, are avuqavuqama kera vira quqaa uva vaiinti nahenti tiva nimiqira vuana.

¹⁶ Vataihainaa okarara iriha qumina uva ti variaka hampata kia variana. Vi uvava vaiinti raru kero Kotira aaraqahairo niarantogama kaanaro. ¹⁷ Qora numuaravano vaata ne vaintemakero, vi uvava vaiinti qoraiqama kaanaro. Himeneusivavata Filetusivavata vitanta vi uvvara tiva nimi variaka variara.

¹⁸ Vitanta quqaa uva ti varia aarara qaqrake tuqantaavi hampi vo uva ti variara. Vitanta tiha, Ekaa vaiinti nahenti qutu viraqihai qaiqaa qaqqi himpi entava vaakama qovarama viro aitaraiivo, ti variamanta Ihura vainti hininavu vitanta uvvara quqaa uvave tivakeha vira kaara vika qoraiqama vuarave.

¹⁹ Ho naavu kaara vataqai paama tivakero arataintema kero, Kotiva nai uva paama tivakero arataira. Viraqataa maa uvvara qara ntuvu taiva mintima tiro: *Noravano nai i vaiinti nahentika viraqama kero tavairave, tira. Qara vovano tiharo, Noravano tiqaa raqiki vaivave ti vairava, vi vaiintiva vaauq kaiqa qaqqira kero koqema kero variqi vuarire, tiro.*

²⁰ Nora naavu voqi vo qara vo qara i tanuva vairo. *Kori oriqohaiive, silvaa oriqohaiive, aututaa tanuva vaivarao aqatai vataqohaiive, katariqohai aututaa tanuvavata vairo.* Hini

tanu varakeha nora entaqaaqai kara viraqi raaquke ne variara. Hini tanu qumina entaqaa varakeha kara viraqi raaquke ne variara.

²¹ Vaiintivano vaaku kaiqa qaqlira kairava, vi vaiintiva vaireva, nora entaqaa varake viraqi raaquke ne varia tanuva voqaarama varianaro. Tinavu Noravano vi vaiintirara homa viva ti kaiqa nora kaiqa, vo kaiqa vo kaiqa varaanarove tianaro.

²² Quvaaraa vainitive, qaraaka vaiintive, vika nái vaatavano hampi varaataa iramanta vare vai kaiqara are tauvaqa utu amira, avuqavuqama kera variqira vuana. Are Karaitirara kempukaiqaakera iriqira vihara, vorara vorara muntuka vatehara, araraqihira paruma nimitaqira vuana. Mintiaqira viharama vokiaka nái muntukaqihai quqaiqamake Nora vaiinti aare variantema kera, arevata vira aaramaqira vuana.

²³ Vaiintinavu qumina uva tiha tirori vaivara are kia vika hampata variana. Vika minti tivaqi vi vairaqihairo raqira haikavanoqaima qovaraiqianaro.

²⁴ Karaitira kaiqa vaiintivano vaireva, viva kiama vora vataakero raquqiro viharo tirorimaqiro vuano. Viva vorara vorara qihaaqama nimitaqiro viharo, kia arara itaraitiro, koqema kero uva okara tiva nimiqiro vuano.

²⁵ Vika vira uvvara qumina uvave tivakeha kia iri vaika, viva qihaaqama kero vika uva avuqavu qiali. Viva mintiaqiro vi vairaro Kotiva vira uva kia iri vaika kahaqirera, vika vi vaiintira uvvara quqaa uvave tivakeha, qora uva qaqrake Karaitira uvvaraqai quqaave tivara.

²⁶ Aantauvano vaaraqaa aruvintema kero, Sataaniva maa entara vika ravaaqavu kaimanta vika vira uvaqai iriqi vi variara. Vika aatovano kenko tira irivivera, vika homa Sataanira kauquqihai ruqemake qaqini vivara.

3

Poruva ekaara entanavuvara tura

¹ Maa uvvara iriana. Ekaara entavano aumanto anintaira vaiinti nahenti qoraiqamavi vaiha nora maaraqai variqivi vivara.

² Vi entara vainti vika nariaraqai iriqi viha monu vareraqai noraiqaake iriqi viha, vika nái mahuta tiha nái nutuqai viriniqamaqi vi vaivara. Vika vokikara vaaku uvaqai tiva nimite vaivara. Vika nái noka qoka uva raqake vaivara. Vovano vika kahaqama nimitaarara kia quahama amitheko qemera iaro tiraiti, uveqai vaivara. Vika Kotiraravata vira kaiqaravata kia noraiqaake iriraiti, qumina variqivi vivara.

³ Vika kia voraravata muntuka vataratai, kia vorara aaqurihama amitaraiti, vora autu vatainai tuvi vuarire ti, vika una uva ti vaivara. Vika kia ho nai vaataqaa koqemake raqikiki viraiti, qaakau vairi voqaara nai hena vaiinti vaakama qoraiqama nimitevara. Vika koqe okaravata koqe kaiqavata, navutaiqi vaivara.

⁴ Vika qutaruqama keha navutaaka kauquqi nái navunaaka vuru kevara. Vika paparupuqama keha hampi kaiqa varevara. Vika nariaraqai quaheha te nora vaiintima vaura tivara. Vika nái quaheraraqai iriqi viha, kiama Kotirara noraiqamake irivara.

⁵ Vika nái noqihai tiha, Tenavu Kotira avataqai vi vauro, tivakehavata, vika Kotira kempukavano vaiinti qaraakaiqama nimite vai okarara qoririma kevara. Naantiara minti vai vaiintika qovarama vivara are vika naatu qetakera kia vika aqqanto oru variana.

⁶ Minta varia vaiintika oru kia koqe avu aato vataa nahentinavuara vika tinavu uvaqai iriqi vuute ti, vika naavuqi oru variamanta vi nahentika vika hampi uvvara quqaa uvave ti variara. Vi nahentika nái qora kaiqa kaara nora maaraqai variakara ti, vika nái vaatavano antuqa ari vai kaiqaraqai avataqai vi variara. ⁷ Vika vo uva vo uva kankomake irirerave tivakehavata, Kotira uva quqaa uva okara kia kankomake iri variara.

⁸ Haaru Mosiva vau entara taara vaiintitanta Janesika Jamparesika Mosira navutaiquntemake, maa entara vi vaiintinavuka Kotira uva quqaa uva okarara navutaiqihai variara. Vi vaiintinavuka variavaro vinavuka avu aato hampi qama vimanta vinavuka unahaa tiha, Tenavu homa Kotira aaraqaa vi vauro, ti variara.

⁹ Ho vinavuka kia vukaiqamake mintiaqivi vivara. Haaru vaiinti nahenti Janesika Jamparesika hampi okara qovaramake tavontemake, vaiinti nahenti vi vaiintinavuka hampi okaravata qovaramake tavevara.

Kotira uva kempukaiqama kera tuataane tura

¹⁰ Are ti vataakera vaihara te vaiinti nahenti tiva nimuna uvvara kankoma kera irianara. Te koqemake, ni vaunarave, te varareraiaina okararave, are virara virara kankomakera irianara. Te Karaitirara kempukaiqaake iri vaunarave, te qihaaqamake vaiinti kahaqama nimite vaunarave, te vaiinti nahentiara muntuka vate vaunarave, are ekaa virara virara kankoma kera irianara. Te kia popoharaiti, kempukaiqamake variqivi vaunarave,

¹¹ vokiaka qoraiqama timite variamanta vukaari utiha variqi vi vaunarave, are virara virara irianarave.

Te Antiokinivata, Aikoniainivata, Lisatarainivata, variqi vi variavauramanta vi vatanaaka voqamake ti qoraiqama timite vaumanta te aihavu haikaravata varaavaunara, are virara viraravata irianara. Vi vatanaaka voqamake ti qoraiqama timite vauvaro Noravano vikaqihairo ti ruaruama timiteharo qaqqini vara kora.

¹² Quqaama, ekaa vaiinti nahenti Ihu Karaitira vataake voohaa vaha Kotira aaraqaa vi vaimanta vokika vika qoraiqama nimitaqvi vaimanta vaivara.

¹³ Qora kaiqa vare vaikave, Kotira kaiqa unaqaraiqama keha vare vaikave, vika qora kaiqa varaqvi viha uritarake voqamake qora kaiqaqai varaqvi vivara. Vika hinikika unaqaraiqama nimite vaimanta vokika naivota unaqaraiqama nimite vaivara.

¹⁴ Ho are kia vika voqaantemake varianara. Are koqe uva maara irihara vi uvarara quqaa uvave ti varianara, vi uvaraqai iriqira vuana. Tenavu vi uvara ai tiva amunarara tira, are tinavu okaravata ho irianara.

¹⁵ Are vainti naatiruka vahara Kotira vukuqi vai uvava iriqira vuanarave. Vi uvava ai kahaqivaro ai avu aatovano kanko kaankoma vivara are Ihu Karaitirara quqaave tianarara tiro, Kotiva ai kuvantu kero vitaarirama vairo.

¹⁶ Ekaa Kotira vukuqi vai uvava Kotira Maraqravano vaiinti kahaqvi vaimanta qara ntuva tora. Vi uvava vaiinti nahenti kahaqaina uvavama vairo. Vi uvaraqaahairo vaiintivano quqaa uva okara ho kankomakero irianaro. Vi uvaraqaahairo vaiintivano nai vaaqi kaiqa varaainarara avu aato kenko tiraro ho irianaro. Vi uvaraqaahairo koqe aara nuaina okarara ho irianaro. Vi uvava vaiinti nahenti kahaqvi vaira vika avuqavuqamake variqi vivara.

¹⁷ Vi uvava mintima vairara tiro, Kotira kaiqa vaiintivano Kotira vukuqi vai uvava iriqiro viharo, viraqaahairo viva qerama tero vaharo homa koqe kaiqa varaqiro vuanaro.

4

Kempukaiqama kera Karaitira uva tivaqira vuane tura

¹ Ihu Karaitiva naantiara qutu vikavata, qaqqi vaikavata, vika uva avuqavu qianaro. Viva naantiara Avuhainaa Vaiintivano vaharo ekaa valinti nahentiqaa raqikireva tuvuanaro. Virara irihama te Kotira avuqaavata, Ihu Karaitira avuqaavata, ariara kempukaiqamake mintima ti:

² Karaitira vakaaka valinti nahenti tiva nimiqira vuana. Valinti nahenti quahake vi uvava iriverave, kia quahake iriverave, qaqqi vi uvava vika tiva nimiqira vuana. Are kempukaiqaa kera vi uvava tiva nimiqira viraro ai uvavano vika uva aatarakaira vika ai uvava quqaa uvave tiata. Vika hampi aara ni vai okarara qoqaa tiva nimiqira vira, vika vi aarara qaqqirake Kotira aaraqaa vuata. Vi uvava tiva nimiharama kia paparuqaa kera tiva nimiraitira, qihaaqama kera avuqavuqama kera vi uvava vi uvava tiva nimiqira vuana.

³ Vo entavano qovaraiqira vi entaraqaa valinti nahenti kia quqaa uva irireka auti vaivara. Vika nai iriataa i uvaraqai irireka auti vaha vika hampi okarara tiva nimi vai valinti ntita vare tiha, Tinavu iriataa ina uvaraqai tiva timiqe iriare, tivara. ⁴ Vika quqaa uva ti vaira tauvaqa uti amiteha, qumina *vuri/uri* uvaqai iriqi vivara.

⁵ Vika mintiaqi vi vaivara are kia mintiraitira, ai avu aatovano koqema vairara variqira vuana. Ai qoraiqama amite vaivara are aiha vina haikara varaqira vihara kempukaiqaakera variqira vuana. Karaitira uva tivaqira vihara, Kotiva ai amitai kaiqara ekaa vi kaiqara varaqira vuana.

Te qutuaina entava aumantoma vaivo tura

⁶ Te maa vataro maini ke vuarirava aumantoma vairo. Kotira *ofaa* amiteha *uaini* ekaara qihia taiqa kaintema kero, ti naarevanovata rauru viraqe tevata taiqa virerave.

⁷ Vo haika varareka kanteha nai aatarake nai aatarake iantemake, te vataini vaha koqemake tenta kantamaqi vuna aarara vuru taiqake. Te Karaitira uva kempukaiqamake tuataqi vi vauvana.

⁸ Te vi aararaqaa koqemake kantamaqi viha vuru taiqa kaunarara ti, te koqaa varainara vira vekaqaima vauro. Noravano ekaa valinti nahenti uva avuqavuqama kero raire vaiva, viva ekaara entaqaa vaharo tinta koqaa timiharoma tiriraa are avuqavu aaraqaa ni variaravate tianaro. Viva vi uvava kia tiriaraqai tiraitiro, viva ekaa valinti nahenti nai qaiqaa qovaraiqiaina entara vira veka vaikavata vi uvava tiva nimianaro.

Poruva ekaara uva tura

⁹ Are ti ani tavera aarava vairera, vaakama ani ti tavaane. ¹⁰ Demaasiva maa vatarqaahainaa haikara voqamakero antuqa arivarao ti qaqqira kero Tesaronakaini

vurave. Kareseniva Karesiaini vivaro Taitaasiva Delimaasi vataini vivaro ¹¹ Rukiva vohaiqavanoqaima ti vataakero vaivo. Are maini anireva iharama Maakiravata vitakera aniana. Viva koqema kero ti kahaqiariravama varianaro. ¹² Te Tikikusira atitauraro Epasaasini virave.

¹³ Are maini anireva iharama ti vaqaauta Taroaasini Kapusira naavuqi kaavaunara viravata vara viri timiana. Vukunavuvata vara viri timiana. Vo vukunavuvata aantau pahaqohairo aututaa vukuravata virara noraiqaakera aatoqi iritehara vara viri timiana.

¹⁴ Arekisantava *ainiqohairo* vo haika vo haika auti vai vaiintiva ti voqama kero qoraiqama timitora. Virara iriharo Noravano vira nai koqaa amianaro. ¹⁵ Arevata vi vaiintira aatu raurihara variana. Tenavu vaiinti nahenti tiva nimuna uvvara viva kempukaiqama kero vi uvvara navutaiqi vairaa.

¹⁶ Tota tigaa uva vatomanata *ko* ti variavauraro kia vovano ti vataake vaiharo ti kahaqura. Ekaa ti qaqrake vumanta te tentavano tenta auta ntuavaunara. Ho te Kotira aarehamaa kia vi vaiintinavuka nai qora kaiqa vara timitora kaara ntaihaane ti vaunara.

¹⁷ Te tentaraa vaiha tenta auta nti variavauraro Noravano ti vataakero vaiharo ti kempukaiqama timitoramanta te Karaitira uva ekaa uva vo watanaaka tiva nimiavauramanta vika ti uva irura. Tinavu Noravano *raioni* noqihairo ti ruaruama timitora.

¹⁸ Tiriara qora kaiqavano vira aatara kaantorave tiro, Noravano ti ruaruama timitaqiro viviro, ti tivita varero vuru naaruvaini nai vatkaini nai vataake variarire tiro, vuru ti kaanaro. Ho kaiqe tenavu vira autu ekaa enta tuaheraqi vuare. Quqaave.

Ekaara uva manteharo tura

¹⁹ Are Prisilaaravata, vira vaati Akullaaravata, uva mantama timitehara, Onesiforusiravata vira naavuqi variakavata uva mantama timitaane.

²⁰ Eratusiva kia maini aniraitiro, Korintinima vairo. Tarofimusiva rovara varomantara ti, te vira Miletusini kaa vaunara. ²¹ Ti tavareva iharama hauri are varikera kia koqe kuari itaaina entara anirora. Are vaaka anima aarava ho vairera, vaakama ani ti tavaane.

Eubulusivavata, Pudenisivavata, Linusivavata, Kalodiavavata, ekaa tinavu qata vakaukavararanavuvata, ai uva mantama amite variaavo.

²² Tinavu Noravano „Karatitiva, ai muntukaqi variarira. Viva ni ekaa aaqurihamma nimiteharo koqema nimitaira variatema, turo.

TAITAASI

Poruva Taitaasiraini qara vara kora

Ihura qaqi vara himpima kovaro naaruvaini oru vauvaro 36 ihie aitarovaro Poruva karapuhiqi vaharo maa uvvara qara ruva tora. Taitaasiva kia lutaai vaiintivano Ihura vaintiqama viro vauvaro Poruva virara maantima kera vaiinti nahenti Kotira aara numiqaane tivakero Taitaasira qara ruva amitora.

¹ Te Poruka Kotira kaiqa vaiinti vauraukama. Kotiva ti noraiqama kaimanta te Ihu Karaitira uva tiva nimiqi vi vauraukama vai.

Kotiva nai kaama tai vaiinti nahentika Karaitirara kempukaiqaake iriqi viha quqaa uva okara iriqi vuate tiro, Kotiva ti tititaira.

² Kotiva kia una uvavata ti vaiva, haaru kia maa vatara autukero vato entaraqaa nai kauqu ainqiqa aqukero tiharo, Tenta kaama taaina vaiinti nahentika vika ekaa enta qaqi variqi vivarave, tura. Virara irihama te vaiinti nahenti tiva nimiqi viha, Ne Kotirara kempukaiqaake iriqi viha vi entara veka variate, ti vaunara.

³ Kotiva nai tivato entaraqaa Ihu Karaitiva tuvurero Kotira uva qaraaka uva qovarama kora. Kotiva tinavu kuvantu timitaarirava, viva tiriara vi uvvara vaiinti nahenti tiva nimiqira vuane tivakero ti noraiqama kaimanta te vi uvvara vaiinti nahenti tiva nimiqi vi vauraukama vai.

⁴ Taitaasio, te maa uvvara aima qara ruva amitauro. Tetanta Karaitira uva vohaa uvaqai iriqi vi vauraukara ti, te ariara ti maaquve tunara. Kotiva tinavu Qovavata, Ihu Karaitiva tinavu kuvantukero tivitaariravavata, ai koqema amiteha aaqruruhama amitaivarai ai muntukaqihairo paru i vairara variana.

Elda vaiinti vonavu noraiqama kaate tura

⁵ Ariara avuqavuqama kera qaqi vaina kaiqa taisa kera, vo vatuka vo vatukaqihairo elda vaiinti vonavu noraiqama kaira vinavuka Ihura vaiinti nahentiqa raqikiqi vuate ti, te Karitini ai ke vuavaunara. Ho te mini vaiha ai tiva amiavauna uvvara iritaana.

⁶ Are elda vaiinti noraiqama kareva ihara maantima vaina vaiintira noraiqama kaana: Vi vaiintiva kia vo uvavata viraqaa vatevama variari. Vi vaiintiva nahenti vohaiqaqai varataira vaiintivama variari. Vi vaiintira vaintaira Karaitira uva iriqi viha vikavata kia hampi aaraqaa niraiti, nai noka qoka noqai iriqi vuata. ⁷ Vi vaiintiva Kotira kaiqaqaa raqikiqiro vuainarara tiro, qora kaiqa varaarira uvava kia viraqaa variari.

Vi vaiintiva kiama nai uvaraqai koqe uvave tivaqiro vuari. Vi vaiintiva kiama vaaka arara itaira vaiintiva variari. Kia ih namari nero vueraiqiarira vaiintiva variari. Kia vaiinti ari vaira vaiintiva variari. Kia monuara muntuka ntuarira vaiintiva variari. ⁸ Vi vaiintiva niara aaraihai anika koqemakero raqikiarira vaiintivama variari. Viva koqe okarara antuqa arira vaiintivama variari.

Viva naiqaa koqemakero raqikiarira vaiintivama variari. Viva avuqavuqama kero ni vaira vaiintivama variari. Viva kia qora kaiqa vararaitiro, Kotira kaiqaqai varaira vaiintivama variari. Viva nai kaiqa naitarama kero varara vairia vaiintivama variari.

⁹ Quqaa uva vira tiva amira, vi vaiintiva vi uvvara paama tivakero tuataqiro uvarira vaiintivama variari. Viva mintira vaiintiva vaharo vokikavata kahaqama nimitaqiro viharo hampi uva ti vaiintika uvavata naatara kaira vika nái hampi uva okara kankomake riata.

Una uva maara tiva nimi vaukara tura

¹⁰ Airi vaiinti vika kempukaiqamake Jutaa maara okara iri variaka, vika tinavu uva qoririma keha qumina uva una uvaaqai ti variara.

¹¹ Vika monuaraqai iriha hampi uva ti variamanta vira kaara vo naavuqi vo naavuqi variaka hampiqi variarara tira, are vika qioqama tehara evaara variate tiana.

¹² Kariti vatanaa vainti vovano naantiara qovaraiqiaina haikarara tiva nimi vau vaiintiva haaru vaharo nai navunaakara mintima tiro: *Karithainaaka inaara una uva ti variakave. Vika quara vairi voqara ni variarave. Vika kara voqamake ne vaiha kaiqara popoheha variakave, tura.*

¹³ Haaru vi vaiintiva, tivato uvava quqaa uvama vairo. Virara iriharama vi vatanaaka kempukaiqaakera tiva nimira tiharo, Qora uva qaqrake Karaitira uva kempukaiqamake iriqi vuate, tiana.

¹⁴ Iutaa vatanaaka qumina *vuri/uri* uva tiva tera kia iriate, tiana. Vo vaiintinavu quqaa uva qoririma keha nái irike qioqama te vai uvaravata kia iriate, tiana.

¹⁵ Koqe haikaraqai avu aatoqi iri vai vaiintiva vaharo viva ekaa haikara koqe haikaqaive ti vaira. Qora kaiqaraqai iriqiro viharo kia Karaitirara ququaave ti vai vaiintiva kia vo haikaravata koqe haikave ti vaira. Vira avu aatovanovata vira muntukavanovata qoraiqama vivaro vaira.

¹⁶ Minti varia vaiintika vika nái noqihai tiha, Tenavu Kotirara iruraukave, ti variavarovata, vika kaiqavano Kotira qoririmake varia okarara qovaramake vaira. Vika minti varia vaiintika variarara ti, tinavu antuqavano kiama vikara vairo. Vika Kotira uva raqake variakara ti, vika kia ho koqe kaiqa voqavata varevara.

2

Koqe uva maarara tura

¹ Are kia vi vaiintika aanantaratira, are koqe uva maara avataqira vihara vaiinti nahenti vi uvaraqaai tiva nimiqira vuana.

² Naampai vika maantima kera tiva nimiana: Ne kia iha namari neha vueraiqiraiti, koqe avu aatoqai iriqi vihamma nenta vaata muntukaaqoqemake raqikiqi viha Karaitira uva anomake iriqi viha, vorara vorara muntuka vateha variqi viha, kia popohanaara iraiti, kempukaiqama keha Kotira aaraqaa variqi vuate, tiana.

³ Nahenti kontavata maantima kera tiva nimiana: Ne Kotira nahenti konta variarara ti, avivinamake variqi viha, kia vora autu tuvi vuarire ti, qora uva tivaqiqi vuate. Kia airi *uaini* naivaru ni ravaaqavu kaarire. Ne qaraaka nahenti koqe okara numiqaimanta⁴ vika koqemake nái vaativarave, nai vaintairave, vikara muntuka vateha variate.⁵ Vika náiqaa koqemake raqikiqi viha, kia hampi niraiti, naavu maataqaa koqemake raqikiqi viha, nai vaati uvaqai iriqi vi vaivaro vovano vika kaiqa taveharo kia Kotira uvara qora uvave tiarira.

⁶ Qaraaka vaiintiaravata mintima tiana: Ne koqemake nenta vaataqaa raqikiqi vuate, tiana.

⁷ Taitaasio, are vo kaiqa vo kaiqa vareharama koqe kaiqaqai vare vaira qaraaka vaiintinavu ai kaiqa taveha vikavata mintimake koqe kaiqaqai varaqi vuata. Are vaiinti nahenti Kotira aara numiqeharama kia noqihairaqi tiraitira, vika tiva nimina uvara nenavata avataqira vuana. Kia vi uvara vireraiqama kera tiva nimiraitira, vivinama kera tiramata ai uvara nora uva quqaa uvave tiata.

⁸ Are avuqavu vaina uvaraqaai tiva nimiqira vi vairaro vovano ai uvara kia qora uvave tiarira. Minti tivaqira vi vairamanta tinavu navutaiqi vaika tinavuara qora uva tiva kia vaira vika nái kauruata.

⁹ Rumpa taamanta quminaiqamake kaiqa vara nimite varia vaiintika maantimake tiva nimiana: Nintaqaa raqiki vaina vaiintirara kia qora uva tiraiti, vira quahama amitheha vira uvama iriqi vuate.¹⁰ Kia viva vataina haikara muara vararaiti, ne vira kaiqa koqemake varaqi vi vaivaro vi vaiintiva niara koqe vaiintive tivakero Kotiva tinavu kuvantu kaiva tivatai uvaravata koqe uvave tiarire, tiana.

¹¹ Tenavu irunara. Ekaa vaiinti nahenti kuvantuvi ho variate tiro, Kotiva nai aaqurihama nimiteharo koqema nimitaaina okarara qovarama kairave.¹² Vi okarava tinavu mintima keroma humiqero: Tenavu Kotirara kia iriaka variantemake kia vairaiti, vataihainaa haikara kia hantuqa harira vairaiti, tentanavuqaa koqemake raqikiqi viha, avuqavuqamake variqi viha maa entara Kotirara noraiqaake iriqi viha variqi vuari.

¹³ Tenavu mintiaqi viha tinavu koqema timitaaina entara veka variari. Vi entara tinavu kuvantu timitaairia Variqava Ihu Karaitiva qovaraiqiraro vira mpeqa okaravano takuqi vairaro qoqaa tuvuanaro.

¹⁴ Vaagu kaiqavano tinavu ravaaqavu kaantorave tiro, viva tinavuara iriharo tinavu kuvantu timiteareva qutu vura. Viva tinavuara kaiqe te vika ruaruuma nimiteha vika hiqama nimitaari vika ti vaiinti nahenti vaiha koqe kaiqaqai varaqi vuate tiro, qutu vura.

¹⁵ Ho are vi uvarara vaiinti nahenti tiva nimiqira vuana. Are Kotira vaiinti nahentiqa raqiki variaravara tira, are kempukaiqama kera vikara minti maantiate tivaqiqi vihara, kia qaqi kairaro vo vaiintivano ariara qumina vaiintive tiarira.

3

Maantimake Kotira aaraqaa vuate tura

¹ Vaiinti nahenti mintima tiva nimiane: *Kamaanira* kaiqa vaiintive, *kamaaniva* noraiqamakai vaiintikave, vika uva kia raqa karaiti, vika uva iriqi vuate. Nana nana koqe kaiqae vainara vaakama qeramateha vi kaiqara varareka autiha variate.

² Kia una uva tivaro vora autuvano vataini tuvi vuarire. Kia raqi tiroriraiti, nariara nariara quahama nimiteha variate. Kia nenta autu viriniqiraiti, qihaaqama nimiteha variqi vuate, tiana.

³ Are kankomake irianara. Haaru tenavuvata kia koqe avu aato iriraiti, Kotira uva raaqakeha, hampi okaraqaan ni variavaunara. Vi entara hampi nuarira okaravave, hampi quahaarira okaravave, vi okaravaqai tinavu ravaaqavu komanta tenavu variavaunara. Vi entara tenavu vokuka qoraqama nimiteha toma nimite variavaunara. Tenavu vokuka navutaiqama nimite variavauramanta vika tintanavuvata navutaiqama timite vaura.

⁴ Tenavu mintiaqi vi variavauraro Kotiva tinavu kuvantu timitaarirava, viva nai koqema timitaainarare, nai muntuka tinavuara vataainarave, qovarama kero⁵ tinavuara hampi variqi vivorave tivakero, viva tinavu kuvantu timitora. Viva kia tenavu koqe kaiqa, vo kaiqa vo kaiga varavaunarara iriharo tinavu kuvantu timitaraitiro, viva nai aaqrurahama timite vai okarara iriharo tinavu kuvantu timitora. Viva tinavu hiqama kaimanta tenavu qaraaka vaintiqama vuraro, vira Maraquravano tinavu qaraakaiqama kaimanta tenavu variqi vi vaunara.

⁶ Ihu Karaitiva tinavu kuvantu timite vaiva tinavuara kaiqa varatorara iriharo, Kotiva nai Maraqura paruma kero tinavu timi vaira.

⁷ Kotiva aaqrurahama timiteharo koqema timitairaqaahairo tinavu uva taiqa vimanta tenavu vira vaintiqamavi vaiha, vikanti ekaa enta qaqi variqi vuaina entara vira veka vaunara.

⁸ Vi uvava quaa uvama vairo. Are vi uvvara kempukaiqama kera tiva nimiqira vi vaira, Kotirara quqaave ti vai vaiinti nahentika koqe kaiqa varerara noraiqaake iriqi viha, vi kaiqaraqai varaqi vuata. Vika mintiaqi viha homa vo vaiinti vo vaiinti kahaqamaqvi vivara.

⁹ Qumina tirori vai uvarave, vika nái kaivaqaukavara ankuaraqai noraiqaake iri vai uvarave, tamoqara uvave, Mosiraqaa tivato uvvara kaara tirori vairave, vi uvvara vi uvvara ti vaika vainaini kia vuana. Vi uvvaraqaahairo kiama vaiinti kahaqiarirava qovaraiqiraro kiama koqe haikavanovata qovaraiqianaro.

¹⁰ Vaiinti vovano Ihura vaiinti nahenti rairakareva tirori vairera, are vi vaiintirara kia mintiane tiane. Qaiqaa vo tataavata kia mintiane tiraro viva kia ai uva irirera, vi vaiintira tauvaqa utu amitaana.

¹¹ Are kankomakera irianara. Minti varia vaiintika hampiqama vuavaro vika qora kaiqavano nái vika qora kaiqa okara qovaramake vaira.

Ekaara uva tura

¹² Te Atemaasirave Tikikusirave are inanaini vara kaarirara are vaakama Nikoporisini te oru variaiananaini vuane. Kuarivano kia koqema kero itaina entara te mini oru vairera.

¹³ Senaasiva *ko* okara anomakero iri vai vaiintivavata, Apolosivavata, vitanta niara aaraini vireka auti variara. Ho are vitanta kahaqama nimittaira vitanta kia vo haikara aavooqiraiti, koqemake vuata.

¹⁴ Hauri tinavu vaiinti nahenti qumina vaiha kia kaiqa varavarao karave, vo haikave, kia variantorave tira, are vikara koqemake kaiqa varaqi vi vaivaro ekaa vi haikava ho vairamanta ne ho variqi vuate, tiana.

¹⁵ Ti vataake variakavata ni uva mantama nimite vai. Karaitira uva kempukaiqamake iriqi viha tinavuara muntuka vate variakara are uva mantama timitaana.

Kotiva ni aaqrurahama nimiteharo koqema nimittaira variate, turo.

PIRIMONI

Poruva Pirimoniraini qara vara kora

Ihura qaqi vara himpima kovaro naaruvaini oru vauvaro 30 ihie aitarovaro Poruva karapuhiqi vaharo maa uvvara qara ntuva tora. Pirimoniva nora vaiintivano Ihura vainti vauvaro vira rumpato kaiqa vaiintiva Onesimusiva nai kaiqa qaqla kero ruqema kero Romini oruntero mini vaharo Porura noqihairo Karaitira uva iriro vi uvaravarquaave tivakero Porura vataakero vauvaro Porura Onesimusira Pirimoniva vaunaini atitareva iharo maa uvvara Pirimonira qara ntuva amitora.

¹ Te Poruka. Ihu Karaitiva ti rumpa taimanta vaurauka. Tinavu qata vaka Timotiva ti vataakero vaimanta te maa uvvara ai Pirimonira qara ruva amite. Are titanta tontivano vahara titanta aananteria Kotira kaiqa vaiintivanoma variarao.

² Te Ihura vaiinti nahenti ai naavuqiqi ruvaaqumavi variakaravata, tinavu aura nakaa Apiaravata, tinavu kena iqoka vaiinti Akipusiravata, maa uvvara qara ruva nimite.

³ Kotiva tinavu Qovavata, Nora Vaiinti Ihu Karaitivavata, ni aaqurihama nimiteha koqema nimitaimanta ni muntukaqihairo paru i vaira variata.

Poruva Pirimoniva Karaitira uva irurara tura

⁴ Pirimonio, te Kotira aareha vo enta vo enta te ariara iriha Kotirara koqema iarao ti vaunara. ⁵ Te irurara are Kotira vaiinti nahenti ekaa vikara muntuka vatehara are kempukaiqaakera Nora Vaiinti Ihu Karaitirara iriqira vi varianarave.

⁶ Are Karaitira uva vo vajinti vo vaiinti tiva nimiqira vuane ti, te Kotira aare vaunara. Are mintiaqira viharama Karaitira tinavu koqema timitaaina okarara, vo okara vo okara anomakeria tavenara. ⁷ Are vokiakara muntuka vate variarava ti koqema timitaararo ti muntukavanovata koqe imanta vaunara. Are minti variara okarava ekaa Kotira vaiinti nahenti muntuka koqema nimite vaimanta variara.

Are Onesimusira ike mpo tiva amitaanerama turo

⁸ Pirimonio, are minti variara vaiintiva variaramanta te Karaitira autuqaa homa kempukaiqaake ariara ti uvagai iriane tiarirava vaimantavata, kia te minti tirerave.

⁹ Te ariara muntuka vatehara ti, te ariara qihaaqamake tirera. Te Poruka naampaiqamavi vahia Ihu Karaitira kaiqa kaara ti rumpa taamanta vaurauka, ¹⁰ te ariara qihaaqamake tihamma mintima ti:

Onesimusira ti maaqura ike mpo tiva amitaane, turo. Ti seniqohai rumpa taamanta maini karapuhiqi vauraro viva ai qaqla kero ruqema kero maini anintero vaharo viva Karaitirara quqaave tivakero viraqaaahairo viva ti maaquqama virave.

¹¹ Vi vaiintiva tota ai kia koqema kero kahaqiqi vau vaiintiva vaura. Vate maa entara viva Karaitirara quqaave vivave tirara tiro, viva tivata aivata koqema kero kahaqiarira vaiintivama vairo.

¹² Te vate are iananaini Onesimusira atitaariraro viva anirantero vuunaro. Viva ti muntukavano vai vaiintiva vaimanta te vira atitehama tenta muntuka voqara atitaariraro vuunaro. ¹³ Te Karaitira uva tiva nimiqiqi vi vauramanta vira kaara seniqohai ti rumpa taamanta vaunara. Te maini maaqiqi vahia ariara tiha, Are kia ho anintera ti kahaqinarave tivake, Onesimusirara viva ai vatuka varero maini vaharo ti kahaqianarove, tivake vira maini ravaaqqavu kaataa imantavata, ¹⁴ are kia hove tinarara irihama, te qaqlake kia virara maini variane turo. Te kempukaiqaamake tiarirara hauri are qumina eo tirora. Are eo tiataa irera, are ti uvvara homa eo tinara.

¹⁵ Quqaama Onesimusiva ai qaqla kero ruqema kero kia maini ani vukai enta vairave. Ho viva ai qaqla kero ruqema kero vinalihairo viva Ihura vaintiqama virara tiro, viva ekaa enta aintiro homa qaqla variqiro vuunaro.

¹⁶ Are vate maa entaraqaaahairo kia vi vaiintirara vira te rumpa tauna vaiintirave tiraitira, are minti tiana: Onesimusiva uritarero Karaitira vaintiqama virara ti, te virara tinavu qata vakaaravema tirarave, tiana. Te vi vaiintirara muntuka vaimanta virara ti qatave ti vaunara. Arevata homa vi vaiintirara tihara, Viva ti kaiqa vaiinti koqeva vaharo Karaitira vainti vairara tiro, viva ti qatavano ma viva, tiana.

¹⁷ Are tiriara ti hana vaiintive tirera, are ti quahama mitenitatemera kera, Onesimusiravata quahama amitaane. ¹⁸ Onesimusiva haaru ai hampiqama amitorave, viva aqihairo vo haika varero kia qaqla hinigama kero nina amurave, vi uvava qaqla vairera, vira autu nunka kera ti hutuqai vatairaqte te virara iriha nina koqaa naantiara amiari.

¹⁹ Ho tavaane, te tenta kauquqohaima maa uvvara qara ntuva tauro:
Te Poruka vi koqara nina amirerave turo.

Te ququaama turo. Are ti kaiqaqaahaira Kotira vaintiqama vuanara vi *dinaurara* tiataa imantavata, kia virara tirera.

²⁰ Oho, Pirimonio, ti qatao, Nora Vaiintiara irihara, te tuna uvvara iriane. Are Karaitira vataakera vohaa vahara ti qatavano varianarara tira, ti muntuka koqema timitairaqe quahaari.

²¹ Te maa uvvara qara ntihama ariara viva ti uva avataanarovema turo. Te ariara tihia, Viva tiriara quaheharo te tuna uvaravata, kia te tiaina uvaravata, nai irikero autuanarove, turo.

²² Te inaara uva voqavata tirera. Te are variananaini vuainarara iriharama, are naavu vo qerama timitairaqe te vuare. Ne tiriara iriha Kotira aare varia uvvara viva homa irianarove tivake, te ni oru tavaainarara noraiqaake iri vauro.

Ekaara uva tura

²³ Epafraasiva ti vataakero vaharo ai uva mantama amite vairo. Viravata Ihu Karaitira kaara rumpa taavarao ti vataakero vairo.

²⁴ Maakivavata, Aritaakusivavata, Demaasivavata, Rukivavata, vinavukavata ai uva mantama amite variara.

Vinavuka te varauna kaiqara vohaa kaiqa vare variakama vai.

²⁵ Noravano Ihu Karaitiva viva ni aaqurihamma nimiteharo koqema nimitaira variate, turo.

HIPARU

Hiparu vatanaakaini qara vara kora

Ihura qaqi vara himpima kovaro naaruvaini oru vauvaro 40 ihie aitarovaro vaiinti vovano maa uvvara qara ruva tora. Maa uvvara qara ruvato vaiintira autu tenavu kia irunara. Vi vaiintiva Poruvae, Rukivae, Apolosivae, Sailaasivae, vo vaiintivanoe, maa uvvara qara ruva tora? Kia tenavu virara kankomake irunara. Iutaa vatanaaka Ihura vaintiqama vuka Ihu Karaitiva uritara kero oru mpeqavano vai okarara kankomake iringate tiro, vi vaiintiva maa qarara Iutaa vatanaaka ruva nimitora. Vi vatanaakara Iutaaave, Hiparuve, ti variara.

Karaitiva Noravano uritara kero vai okarara tura

¹ Haaru Kotiva tinavu kaivaqaukavarava uva tiva nimireva viva paropetinavu noqihairo airi tataa nai uva, vo uva vo uva qoqaiqamake vaura.

² Kotiva mintimakero tiva nimiqiro viviro, maa entara ekaanaini vai entaraqaa viva nai Maaqu atitovaro vira Maaquvano vira uva qoqaiqama kaimanta tenavu irunara. Kotiva nai Maaqu noraiqama kovaro viva naaruvavata vatavata autu kero vatora. Kotiva ekaa haika nai Maaqu kaama amitorara tiro, viva ekaa haikaqaa raqikiariravama vaira.

³ Kotira mpeqa okaravano nai vira Maaquqvata ataai i vaira. Vira Maaqu okaravanovata, vira Qora okaravanovata, vohaa qaramakero vaira. Vira Maaquvano tivatai uvaraqahairo ekaa naaruvainivata, vatainivata, vai haikava qaqi variqiro vi vaira. Vira Maaquvano vaiinti nahenti qora kaiqa vare varia uvvara nunka nimitero oru naaruvaini Kotiva ekaa kempuka vataiva vainaini vira kauqu tanaraini oquiviro vaira. ⁴Kotiva virara ti Maaquve tirara tiro, vira Maaquvano ekaa enselinavuuri naatara kero vaivaro vira autuvanovata vika nutuvata uri naatara kero vaira.

⁵ Kotiva nai Maaquaraqai tiharo,

Are ti Maaquvano variaravera te vate are ti Maaquvano variana okarara qovarama kauro. *(Ihi 2:7)*

Kotiva kia enselinavuuri vi uvvara tiraitiro, nai Maaquaraqai vi uvvara tura. Kotiva qaiqaa nai Maaquara tiharo,

Te vira Qoka variariraro viva ti Maaquvano varianarove, tura. *(2 Samueri 7:14)*
Minti tiharoma Kotiva kia ensel inavuuri vi uvvara tiraitiro, nai Maaquaraqai vi uvvara tura.

⁶ Kotiva nai Maaqu avuhainaara vataini varakare iharo mintima tiro:

Ekaa enseli vika vira autuqai tuaheraqi vuute, tura.

(Lo 32:43)

⁷ Kotiva ensel inavuuri okarara mintima tiro:

Viva enselinavu autukomanta vika uvaivano utintemake, kantamaqi vi ani variarave. Vika iha auruvano itaintemake iteha, ti kaiqa vare variarave, tura. *(Ihi 104:4)*

⁸ Ensel inavuuri minti tivakero Kotiva nai Maaquara tiharo,

Kotio, are avuhainaara vaiintivano vahihara are ekaa enta ekaa enta vaiinti nahentiqaa avuqavuqamaka kera raqikiqira vinarave.

⁹ Avuqavuqamaka ni varia okarara ai muntukavano vaivaro qora kaiqa vare varia okarara kia ai muntukavano vairave.

Are mintianarara tiro, Kotiva ai Variqavano ariqaa vahavera aquteharo ai noraiqama kaivara are nena kena vaintinavuqhairs voqama kera quahe variarao. *(Ihi 45:6-7)*

¹⁰ Kotiva qaiqaa nai Maaquara tiharo,

Noravaavu, are haaru hoqarama kera maa vataru tuqa aratonarave. Ai kauquvano naaruvavata autukero vatorave.

¹¹ Naaruvavanovata vatavanovata variqi vi vuru taiqa vivaravata, areqaima ekaa enta qaqi variqira vinarave. Utavaaqavano nihiqama viro taiqa vintema kero, naaruvavanovata vatavanovata taiqa vuanarove.

¹² Qaraaka utavaaqa nonkireva iharo haarua utavaaqa raqantu kero vataintema kero, are naaruvavata vatavata taiqa kenarave.

Viva taiqa viraravata, are haaru varianantema kero, vohaa vivaqaima ekaa enta qaqi variqira vinarave. *(Ihi 102:25-27)*

¹³ Kotiva kia enselinavuuri tiraitiro, nai Maaquaraqai maa uvvara tiharo,

Are uritarera tinta kauqu tanaraini oquivi vairage te ai navutaaka aru naatara amitaarirara are vikaqaata nena aiqu ntava taane, tura. *(Ihi 110:1)*

¹⁴ *Enseli* vika okara vaireva, vika maraqura haikavano vaiha Kotira kaiqa vara amite variara. Kotiva vika nitite vaimanta vika Kotiva kuvantu nimitaaina vaiinti nahentika kahaqama nimite variara.

2

Kotiva tinavu tivitaaina uvarara tura

¹ Vira Maaqu Ihuva *enselinavu* avuni uritara kero vairara ti, tenavu vira uva irunara kia popoharaiti, kempukaiqamake iriqi vuare.

² Tota Kotiva *enselinavu* nititonanta vika Kotira uva okara Mosira tiva amitovalo vi uvava nora uva vauvaroraa ti, yokuka vi uvvara raqa kora kaara Kotiva vika avuqavuqama kero nái koqaa nimi vaura.

³ Ho Kotiva naantiara uva vo, nai vaiinti nahenti aaqurihama nimiteharo kuvantu nimitaaina uvara qovarama kaira. Tenavu vi uvarara qumina uvave tivakeha vi uvara qaqla kaareran, nantiakaa tenavu ruqemake aiou autute vuariraro Kotiva kia tinavu ruqutuanarove? Nora Vaiinti viva vi uvvara naane tiva qovarama komanta vi uvvara iriaka tinavuvata tiva timiamanta irunara. Tenavu tavauraro vi uvava quqaa uvama vairo.

⁴ Kotira uvara quqaa uvave tiate tiro, Kotiva nai uva tiva nimi vauka kempukaiqama nimitonanta vika nora kaiqa, aahuva kaiqa varaqi vi vaura. Kotiva nai Maraqura nimiataa uvaro vaiinti nahenti nimi vaumanta vika vo kempuka vo kempuka vareha vaura.

Ihuvaqaima tinavu kuvantu timitaarirava vaivo tura

⁵ Naantiara qaraaka vatavano qovaraiqainarara tunara, vi entara Kotiva kiama *enselinavu* vi vataraqaa raqikivarave, tianaro. ⁶ Kotira vukuqi maa uvavama vairo:

Kotio, are nantiharae vaiinti nahentiara noraiqaakera iriqira vi variarao? Nantiharae are qumina vaiinti nahentiqaavata koqema kera raqiki variarao?

⁷ Vaiinti nahenti vika *enseli* vevaaraini vahuqaqai variate tira, are vika autukera vatera, viraqaaahairo are vika noraiqamakera, nora autuvata nimianarave.

⁸ Are vaiinti nahenti noraiqama kaaramanta vika ekaa are autukera vataana haikaqaa raqiki variarave, tura. *(Ihi 8:4-6)*

Vi uvara okara maantimama vairo: Kotiva vaiinti nahenti noraiqama kaira vika vo haikaqaa raqikiva kia vairamanta vika ekaa haikaqaa raqiki vivara. Vate maa entara vaiinti nahenti ekaa haikaqaa raqikiva kia vaivarovata, naantiara vi uvava vivauma varianaro.

⁹ Minti vaivarovata, maa entara tenavu Ihurara kankomake irunara. Kotiva tinavu aaqurihama timitareva Ihura vara kovaro Ihuva *enseli* vevaaraini vahuqa variqiro viro tinavu ekaukara iriharo qutu vuvoro, viraqaaahairo Kotiva vira noraiqamakero nora autuvata vira amura.

¹⁰ Ekaa haika qovarama kaivaro variqiro vi vaiva, Kotiva, viva avuqavu okaraqai avataqiro viharoma, nai vaintaira airitaha nai hampata ataa i vainaini variate tiro, Ihura varakovaro viva aihavi haikara varaqiro viro vuru qutu vura. Viva mintima kero Kotiva amito kaiqara naitarama kero taiqa amitorara tiro, viva tinavu kuvantu kero Kotiva vainanaini tivita varero vuru kaariravama vairo.

¹¹ Ihuva tinavu qora kaiqa nunka timite vaiva vaimanta tenavu viva tinavu qora kaiqa nunka timitaika vaunarara tiro, Kotiva vaireva, Ihura vira Qovavata tinavu Qovavatama vairo. Mintima vaivarora tiro, Ihuva tinavuara kia kauriraitiro, tinavuara ti vaiinti nahentive ti vaira.

¹² Viva tiharo, *Kotio, ai okarara tenta vaiinti nahenti tiva nimiqi virerave. Te vika ruuaquamavi vainaini ai autu tuahereha ihi tivaqiqi virerave, tura.* *(Ihi 22:22)*

¹³ Qaiqaa viva tiharo, *Te Kotirara kempukaiqamake iriqi viha, viraqaa muntuvi vairarave, tura.* *(Aisaiaa 8:17)*

Qaiqaavata viva tiharo, *Tavaate. Te maini vauramanta Kotiva ti timitai vaintika ti hampata variarave, tura.* *(Aisaiaa 8:18)*

¹⁴ Ho tenavu vira vaintinavu vaata vatauka vaunarara tiro, Ihuva Sataaniva vaiinti nahenti aruke vai kempukara taiqakareva vivavata vaiintiqama viro, tinavu aanarero vaata vataava variqiro viro vuru qutu vura.

¹⁵ Vaiinti nahenti vika nái qutirava aatu qete vauva vika ekaa enta rumpa tomanta vauvaro Ihuva vi vaiinti nahentika kuvantu nimitareva vaiintiqama viro vuru qutu vura.

¹⁶ Ihuva kia *enselinavu* tiharo, vataini qovarama viraitiro, viva vataihainaa vaiinti nahenti Eparahaamira ankuarao tiro, viva vaiintiqama vura.

¹⁷ Viva tinavu aaqurihama timiteharo, Kotirara kempukaiqaakero iriqiro viharo Kotira kaiqa vara amitaarira vaiintiva Noravano vairerave tiro, Ihuva tinavu nai aura qata

voqaantema kero vaiintiqama viro, vaata vataava variqiro vura. Viva Kotira kaiqa vara amitaqiro viharo Kotiva tinavu qora kaiqa nunka timitaarire tiro, tinavuara iriharo qutu vura.

¹⁸ Ihuva vaiintiqama viro vauvaro qora kaiqavano viravata avatamaqiro vuvaro vira kaara viva aihvira haika varaqiro vurara tiro, qora kaiqavano tinavuvata avatareva auti vairaro Ihuva tinavu homa kahaqiraqe „tenavuvata kia qora kaiqa varaainara.„

3

Ihuva Mosiravata aatarakero nora vaiinti vaura

¹ Ti qata vakao, ne Kotira vaiinti nahenti variara. Kotiva naaruvaini vaiva nivata naarama taimanta ne variara. Te vaaka tuna uvvara irihama niara ne Ihurara noraiqaake iriqi vuate turo. Ihuva vaireva, Kotiva vira noraiqamakero atitai vaiintivama vairo. Kotiva tinavu uva nunka timitaarire tiro, Ihuva tinavuara iriharo Kotira kaiqa vara amito vaiintivaa Noravano vaura. Ho tenavu vira uvama qovaramake tiva nimiqi vi vaunara.

² Haaru Mosiva ekaa Kotira vaiinti nahentiqa raqikiqiro viharo vira uvaqai iriqiro viharo kaiqa vara amitaqiro vi vauntema kero, Ihuvavata Kotira uvaqai iriqiro viharo vira kaiqa vara amitaqiro vi vaura.

³ Naavu kaqa tai vaiintivaa avuni vaivaroo viva kaqa tai naavuva vira naantiaraini vaintemaa kero, Ihura autuvano avuni vaivaroo Mosira autuvano vira naantiaraini vairo.

⁴ Ekaa naavu vaireva, vaiintivana kaqa tai naavuvuva vairo. Ho vira voqaantema kero, Kotiva naaruvavata vatavata autu kero vataivama vairo.

⁵ Mosiva Kotira kaiqa vaiintivana vaharo Kotira uvaqai iriqiro viharo vaiinti nahentiqa raqikiqiro vi vaura. Viva vi kaiqara varaqiro viharo naantiara qovaraiqaina vaiintirara tiva nimiqiro vi vaura.

⁶ Mosiva qaqi kaiqa vaiinti vauvaro Karaitiva Kotira Maaqu tanavama vairo. Karaitiva Kotira Maaqu tanava vaharo Kotira noqai avataqiro viharo vira vaiinti nahentiqa raqikiqiro vi vaira. Tenavu kempukaiqaakeha Karaitirara iriqi viha, Kotiva tinavu koqema timitaaina entara vira veka variqi vuarera, tenavuvata homa tiha, Tenavu Kotira Naavuvi vauna vaiinti nahentikama vauru, tirara.

Ne Kotira uvvara popohairaa qaqira kevorave tura

⁷ Kotira vukuqi Kotira Maraqravano tivatai uvvara iriata. Vi uvava mintima tiro:

Vate ne Kotira uva iriate. ⁸ Ni kaivaqaukavarava ti Kotikara viva kia tinavuqaa raqikianarove tivakeha, vika qumina vataini variqi viha ti avatamake tave vauntemake, nevata nenta avu aato kempukaiqamate vira uva kia iriraiti, variqi vivorave.

⁹ Te ni kaivaqaukavarava ⁴⁰ ihinavuara kaiqa vara nimitaqi vi variavauramanta vika kia ti kaiqara noraiqaake iriraiti, vika qaiqaa qaiqaa ti avatamakeha tavarekaqai auti vaurave.

¹⁰ Vika mintiaqivi vaura kaara ti tirara itomanta vikara tiha, Vika ekaa enta hampi aaraqaqai vireka auti vahaa, kia ti aaraqaa vireka auti variarave.

¹¹ Vikara ti tirara itomanta te tenta kauqu aiiqiqaa aqukeha tiha, Vira kaara vika kiama ho vata vo te nimitaainaraqaa oru auraara vaivarave, tiavaunarave, tura. (*Ihi 95:7-11*)

¹² Ti qata vakao, ne rauriha variata. Ni avu aato muntukavano vaaquqama vira, ne Kotira uvvara kia quqaa uvave tivakeha, tuqantaavi qaqi variqi vi vai Variqara, Kotira tauvaqa utu amitevora.

¹³ Vate maa entara ne Kotiva inaini vi entavama vairo. Qora kaiqavano ni unaqaraiqama kaantorave ti, ne maa entara nai kempukaiqama amite nai kempukaiqama amitemaqi vuata.

¹⁴ Tota enta tenavu Karaitirara ququaave tivake virara kempukaiqaake iriqi vuavaunatemake, variqi vuarera, tenavu homa Karaitira vataake variqi virara. ¹⁵ Te qaiqaa Kotira vukuqi tu uvvara tirera:

Vate ne Kotira uva iriate. Ni kaivaqaukavarava ti Kotikara viva kia tinavuqaa raqikianarove tuntemake, nevata nenta avu aato kempukaiqamate vira uva kia iriraiti, variqi vivorave. (*Ihi 95:7-8*)

¹⁶ Tauka taukae Kotira uva irihavata, virara kiama tinavuqaa raqikianarove tura? Vika tinavu kaivaqaukavarave. Mosiva vika Isipiqihairo ntita vuru koka, vikama vi uvvara turave.

¹⁷ Kotiva tauka taukarae arara itovaro 40 ihi navuara variqiro vura? Viva tinavu kaivaqaukavarara arara itovaro vaurave. Tinavu kaivaqaukavarava qumina vataini variqi viha, nái qora kaiqa varora kaara mini hiqintivi qutu vurave.

¹⁸ Kotiva kauqu aiqiqaa aqukero tiharo, Vika kia ti hampata oru auraara vaivarave, tu uvvara, Kotiva taukarae vi uvvara tura? Viva tinavu kaivaqaukavarara turave. Vika Kotira uva kia iriqi vi uvvara kaara Kotiva minti tura.

¹⁹ Tenavu tavauramanta vika kia Kotira uvvara quqaa uvave tura kaara vika kia ho Kotiva tu vataraqaa auraara vaireka vura.

4

Kotira vaiinti nahenti auraara vairara tura

¹ Haaru Kotiva kauqu aiqiqaa aqukero tiharo, Ti vaiinti nahenti ti vataake oru auraara vaivarave tura. Virara iriha kaiqenavu rauriha variari. Hauri niqihairo vovano vo aaraqaa vi utu varero kia mini oru auraara variantora.

² Tenavu vate irunantemake, tinavu kaivaqaukavaravata haaru Kotira uva iri uvvara. Vika Kotira uva iruvarovata, vi uvava kia vika kahaqura. Vika vi uvvara iri, kia quqaa uvave tura kaara vi uvava kia vika ho kahaqura. ³ Tenavu Kotira uva iriqi vuvarirauka homa Kotira vataake auraara vairara. Kotira vukuqi vaiinti nahenti Kotira uva raqa kaakara mintima tiro:

Ti tirara itaimanta te tenta kauqu aiqiqaa aquukeha tiha, Vira kaara vika kiama ho vata vo te nimitaainaraqaa oru auraara vaivarave, tiavaunarave, tura. (*Ihi 95:11*)

Kotiva haaru maa vataro autukero vato entaraqahairo nai auraara vata vo qeramakero vatoraravata, vi uvvara turama. ⁴ Kotira vukuqi Kotiva auraara vau entarara mintima tiro:

Kotiva 6 entanavuara kaiqa varaqiro viro vuru taiqa kero 7 entaqaa viva auraara vaurave, tura. (*Okara 2:2*)

⁵ Kotiva vi entaraqaa auraara vaurara ti, Kotira vaiinti nahentivata auraara variqi vivara. Kotira uva iri qaqrake ni varia vaiinti nahentikara Kotira mintima tiro:

Vika kiama ho vata vo te nimitaainaraqaa oru auraara vaivarave, tura. (*Ihi 95:11*)

⁶ Kotira uvvara quqaa uvave ti vainti nahentika, vikama Kotira qaqi kaira vika auraara vainaini vivara. Haaru tinavu kaivaqaukavarara Kotira uvvara kia quqaa uvave tura kaara vika kia vi vataraqaa auraara vaireka vura.

⁷ Ho mintuvarovata, Kotiva qaqaa vo enta kaamatero tiharo, Maa entaraqaa ti uva iariate, turave. Viva tinavu kaivaqara Devitira noqihairo mintima tiro:

Vate ne Kotira uva irivera, kia nenta avu aato kempukaiqamate vira uva kia iriraiti, variqi vivorave, tura. (*Ihi 95:7-8*)

⁸ Haaru tinavu kaivaqaukavarara qumina vataini variqi viha vuru qutu vuvaro Iosuaava vika vaintaira ntita varero vuru Isareru vataini korave. Kotira auraara vai vatarara tiharo, kia Isareru vataravauve tiro. Viva Isareru vatarara tutirio, viva kiama naantiara Devitira noqihairo vo entavano qovaraiqainarara tutirio.

⁹ Kotiva 7 entaqaa auraara vauntemake, tenavu Kotira vaiinti nahentivata auraara vairara.

¹⁰ Kotiva nai kaiqa vuru taiqa kero auraara vauntemake, Kotira vaiinti nahenti vikavata nai kaiqa vuru taiqake oru Kotira vataake auraara variqi vivara.

¹¹ Virara irihama kaiqenavu Kotira vataake auraara vaierarev tivake, kia popoharaiti, kempukaiqamate variqi viha mini vuari. Tinavu kaivaqaukavarara Kotira uva raqakora kaara kia Kotiva kaamato vataraqaa auraara vaireka vura. Tinavuqihairo vovano vika aaanaraantora.

¹² Kotira uvavano vaireva, kempukaiqamate kero qaqi variqiro vi vai uvavama vairo. Igoka paipe taara avaivano vaira voqara, vira uvavano uritarakero voqamakero vaihe vaira. Igoka paipewano vaata toqa kero vuhaarivata mativata raira kaintema kero, Kotira uvavano vainti avu aato muntukagi vainara qoqaiqama kero vi vaiintira avatamakero tavero, vira avu aato muntukagi vai uvavarara qora uvave koqe uvave, ti vaira.

¹³ Kia vo haikavano Kotira avuqaa kukeqa viro vaira. Nana nana haikavano naaruvainie vatainie vai haikava, ekaa vi haikava Kotira avuqaa qoqaa vaira. Naantiara tenavuvata vira avuqaa vaiha tentanavu vare vauna kaiqara tiva qovarama kehama vira tiva amirera.

Ihuva tinavuara iriharo Kotira kaiqa vara amitaariravama vairo

¹⁴ Ho tinavuara iriharo Kotira kaiqa vara amite vai vaiintiva noravano vaireva, viva Kotira maagu Ihuvave. „Viva Kotira kaiqa vara amitaqiro viro,“ naaruvaini Kotira aqaqanto oru vairara ti, kaiqenavu vira uva irunara kempukaiqamate iriqi vuari.

¹⁵ Tinavuara iriharo Kotira kaiqa vara amite vai vaiintiva noravano tenavu ugerara vaiinti nahenti vauna okarara kankoma kero iri vairara tiro, nana nana qora kaiqavano

tinavu avataintema kero, vohaa vi kaiqava Ihuravata avatovaro Ihuva kia qora kaiqa vogavata varora.

¹⁶ Ihuva minti vaiintiva vairara ti, kaiqenavu kia getaraiti, qihaaqamake „Kotiva, tinavu aaqurihamma timiteharo koqema timite vaira aaqanto oru vuvariraro tenavu maara varaaina entara viva tinavu aaqurihamma timiteharo tinavu koqema timitaarira.

5

Kotira kaiqa vara amite vai vaiintirara tura

¹ Te Kotira kaiqa vara amite varia vaiintika vika nora vaiinti okarara tirera. „Kotiva Rivaira ankuara tiharo.“ Ne vaiinti vo noraiqama kaivaro vi vaiintiva ni vaiinti nahenti qora kaiqara iriharo, quara aantau arukeharo iha quara timitaqiro viharo kaiqa vara timitaanarove, tura.

² Vi vaiintivavata ugerara vaiintivano vaiharora tiro, viva tavairaro vira kena vaiinti vovano Kotira uva vo kia kankomakero irirerave, hampi kaiqa varairerave, viva homa qihaaqama kero nai kenara vira kahaqianaro. ³ Vi vaiintiva ugerara vaiintivano vaiharora tiro, viva kia vaiinti nahenti qora kaiqaraqai iriraitiro, viva nai qora kaiqaravata iriharoma quara aantau arukero Kotira iha quara amite vaira.

⁴ Vi vaiintivata kia nai irikero noraiqama viro vi kaiqara vare vairavauve. Kotiva vi vaiintirata kaivaqara Eronira aarama kero noraiqama kontema kero, Kotiva vi vaiintiravata aaramakero noraiqama kaira. ⁵ Vira voqaantemata kero, Karaitiva kia nai irikero noraiqama viro tiharo, Te vi kaiqara vaiinti nahenti vara nimitarerave, turavauve. Kotiva nai vira Qova vira noraiqama kero virara mintima tiro:

Are ti Maaquma variarao. Te vate are ti Maaquvano variana okarara qovarama kauro, tura. *(Ihi 2:7)*

⁶ Qaiqaa Kotira vukuqi Karaitirara mintima tiro:

Merikisitekira voqaantemata kera, are ekaa enta ekaa entama Kotira kaiqa vara amitenava vaiintivama vainarave, tura. *(Ihi 11:04)*

⁷ Ihuva vataini vau entara viva keke tivaqiro viharo iqi rataqiro viharo Kotira aaramaqiro vura. Viva Kotirara te qutu vuvarirara are homa ti kahaqinarave tivakero kia nai autuara iriraitiro, Kotira noqai avataqiro vurara tiro, Kotiva vira uva irurave.

⁸ Ihuva Kotira Maaquvano vaiharovata, viva alihavu haikara varaqiro vi vaurara tiro, viva koqema kero Kotira no avataqiro vura.

⁹ Viva mintiaqiro viharo alihavu haikara varaqiro viro, vuru ekaa Kotiva amito kaiqara taiqakovama vaura. Ihuva mintima kero taiqa korara ti, vaiinti nahenti vira uva avataqivi vi vaika vaivarota Kotiva vika kuvantu nimitaira vika ekaa entama qaqi variqi vivara.

¹⁰ Kotiva Ihura noraiqama kero tiharo, Merikisitekiva vaiinti nahenti qora kaiqara iriharo ti kaiqa vara timitontemata kero, Ihuvavata vaiinti nahenti qora kaiqara iriharo ti kaiqa vara timitaanarove, tura.

Tenavu taaqa vainti voqaara variqi vuvarorave tura

¹¹ Tenavu maa uvvara airiqamake ni tiva nimirare ti, tavauramanta ne qakomake iriqi vi variamantara ti, tenavu vukaari utihama maa uvvara ni tiva nimi vai. ¹² Ne airi enta maa uvvara iriqi viha, vokiakavata tiva nimiataara vaimanta ne kia Kotira uva kankomakero iri variarave. Vira kaara tenavu vi uvvara qaiqaa okaraqihai ni tiva nimiarirava qaqiqaimavairo. Ne maa entara kempuka kara naataara vaimanta naamaqai ne varriara.

¹³ Naamaqai ne vaiva, viva vainti naativanova vairo. Viva vainti naativano vairara tiro, viva kiama koqe aaraqaa nuaina okarara kankomakero iriro.

¹⁴ Kempuka karavano vaireva, noruqama vuaka karama vairo. Noruqama vuaka qora okaravata koqe okaravata rairake tavamaqi vi variarara ti, vika homa koqe okaraqai avataqivi vivara.

6

¹ Vi uvvara iriha kaiqenavu Karaitira uva okara irunara mini ke, oru tavaaranavata amutunivata vaina uvvara iriqi vuari. Hoqare ne qora kaiqa vare vauvaro ne ekaara qutu viva vaumanta ne vi aararaqahai tuqantaavi Kotirara iriqi vi vaura.

² Ne namari varovaro vo vaiintivano nai kauqu niqaa vatomanta ne Kotira Maraqura varora. Ne Kotiva vaiinti nahenti qaiqaa qaqi vara himpima kaaina uvvara irura. Ekaara entaqa Kotiva ko tainaravata ne irurave. Vi uvava vi uvava okara uvama vairo. Ho kia tenavu vi uvvaraqai iriqi virerave. ³ Kotiva qaqi kairera, tenavu tavaaranavata amutunivata vaina uvvara iriqi virera.

⁴ Kotira aaraqaa viha viraqahai vi aarara qaqirake variaka, nantiabee vika qaiqaa vi aararaqaa ho vivara? Vika konkiraiqiraqi variavaro vika avu aatovano qantua vimanta

vika Kotiva koqema nimitaaínara tave, vika Kotira Maraqua vare,⁵ vika avatamake tavaavaró Kotira uvavano koge uvaqai vaimanta vika Kotiva naantíara qovaraiqaina kempukara hini vi okarara tavaara.

⁶ Ekaa vi haikara vi haikara tave variaka, vika Kotira aaraqaa vi vaira qaqla kaivera, vika mintiha Kotira Maaku qaqlaa katariqaa aruteha ekauka niyuqaa vira kaurira haika vara ami variarara tiro, vika qaqlaa anirante Kotira aaraqaa viva kiama ho varianaro.

⁷ Kotira uva iriqi vi varia vaiinti nahentika vaireka, koge vata voqaara variara. Aaquavano riharo vi vataraqi otu vi vaivaro vi vataraqahaairo koge karavano qampiqa vaivaro Kotira vi vataro koqema amite vaira.⁸ Vo vataqaahairo auqu vai naaquntavavata nimirivataqai qampiqa vairera, Kotira vi vatarara qora vatavema tianaro. Vi vataraqi qampiqaate vai haikara iha tutu kairaro itama vuuanaro.

⁹ Ti navunao, te qora vataravata koge vataravata tihamá kia niaravauve ne qora vata voqaara variavo turo. Tenavu niara tiha, Vika kempukaiqaake koge aaraqaa vi vaivaro Kotira vika ntitaanarove, tunara.¹⁰ Kotira kia ni hampiqa nimiraitiro, viva ni avuqavuqama nimiteharo ne vira kaiqa vara amite variara kiama tauru kaanaro. Ne Kotirara muntuka vateha nenta kena vaiinti nahenti, Kotira vaiinti nahenti kahaqama nimitorarave, maa entaravata kahaqama nimite variararave, Kotira kiama virara virara tauru kaanaro.

¹¹ Ne virara veikalqiva vivau variarire ti, ne vataini vaiha Kotira aaraqaa kempukaiqaake variqi vi vuru taiqa kaata. Niara mintimake variqi vuate ti, tinavu antuqavano vaimanta vaunara.

¹² Vokiaka Kotirara kempukaiqamake iriqi viha, qihaaqamake variqi vivi, Kotira vika nái kaama nimitai haikara vaararave. Nevata kia popoharaiti, vika intemake variqi vivera, tenavu hovema tirara.

Kotira tivatai uvarara tura

¹³ Kotira tinavu kaivaqara Eparahaamirara te ai mintima amitarerave tiharoma Kotira nai vira uri aatarakero variarirava vovano kia vauvarora tiro, viva nai autuqaa tiharo,¹⁴ Te ai koqema amitaqí vuarirara are kuvuaramaqira virauka airitahaama vaivarave, tura.

¹⁵ Kotira minti tuvaro Eparahaamiva nai muntuka parumakero Kotira veka variqiro uvuaro Kotiva kauqu aqiqaa aqukero tivato uvava vivau vauvaro Eparahaamiva qorainti vainti vatatora.

¹⁶ Vaiintivano uva vo tivatareva iharo, tirorira haikavano qovaraiqiantorave tiro, viva nai uva kempukaiqama kareva nora vaiinti autuqaa te mintirerave ti vaira.

¹⁷ Eparahaamira vaintairia tiriara viva vi uvara tiva taira qaqla kero vo uva tiantorave tiro, Kotivavata nai tivato uvara nai autuqaa kempukaiqama kora.

¹⁸ Kotira nai uva tivateharo nai autuqaa te mintirerave turara tiro, vira uvavano kia ho una uva varianaro. Mintima vaimantara ti, tenavu ruqemake Kotira inaini oru vaurauka, tenavu Kotira tivatai uvara irihama kia qetaraiti, muntuka kempukaiqamake variqi viha, vira uvavano vivau variaina entara vira vekama vairera.

¹⁹ Kotira tivato uvava vivau variainarara irihama tenavu kia qumina vi aniraiti, tenavu kempukaiqaake Kotira aaraqaa variqi vuari. Kotira uvavano vivau variaina entarara irihama tenavu homa Kotira Naavuqi tavunauta tintataara voqaara ravaqaake, Kotira turuaraini oru vairara.

²⁰ Ihuva tinavu kahaqama timiteharo viva naane Kotira turuaraini oru vaura. Haaru Merikisitekiva Kotira kaiqa vara amite vau vaiintiva noravano vauntema kero, Ihuvavata ekaa enta Kotira kaiqa vara amitaqiro vi vaivama vairo.

7

Merikisitekira okarara tura

¹ Merikisitekiva avuhainaa vaiintivano vaiharo vatuka vo, Saremigaa raqikiqiro viharo viva vaiinti nahentíara iriharo virini vai Variqara, Kotira kaiqa vara amite vau vaiintiva vaura.

Vo enta Eparahaamiva iqoka raquqiro viharoma nora vaiinti avuhainaa vaiintinavu vuru naatara kero, anirantero aaraini vi vauvaro Merikisitekiva Eparahaamira vitakero nai kauqu tuaherakero virara tiharo, Kotira ai koqema amitaarire,² tuvaro Eparahaamiva iqoka raqiharo airaira varatora rairakero kauqurutanta vatoraqihairo Merikisitekira vohaiqa amura.

Merikisitekira autu okaravano maantimama vairo: *Avuhainaa Vaiintivano Avuqavuqamakero Ni Vaivave*. Viva Saremigaa raqiki vaurara tiro, vira autu okaravano maantimama vairo: *Maateraiqaakeharo Raqiki-Vaivave*.

³ Merikisitekira noka qokave, vira ankuve, kia vika nutu qara ntuvatorara ti, tenavu kia virara irunara. Vira vatato entarave, viva qutuvu entarave, viravata kia qara ntua torara ti, tenavu kia virara irunara. Vi vaiintiva Kotira Maaqu aanantero vaiinti nahentiara iriharo ekaa enta Kotira kaiqa vara amitaqiro vuuanaro.

⁴ Merikisitekiva nora vaiintivano vau okarara iriha variata. Eparahaamiva tinavu kaivaqaukavarava noravano iqoka raquqiro viharo navutaka naatara kero vika airaira raqakero varero, vi airairara kauqurutanta vatoraqihairo Merikisitekira vohaiqa amura. Merikisitekiva nora vaiintivano vauvarora tiro, Eparahaamiva mintiakero vira amura.

⁵ Rivaira ankuqihai Mosira uva okara irihama Kotira kaiqa vara amitaqi viha qaqi vaiinti nahentiara nenta airaira rairake kauqurutanta vateraqihai vohaiqa tinavu timiate tiha airaira vare variara. Vika nai navunaaka Eparahaamira ankuqihai vi airairara vare variara.

⁶ Merikisitekiva kia Rivaira vohaa ankuvano vairaitiro vaharo, Eparahaamiva nai airaira rairakero vatoraqihairo vohaiqa varero virara tiharo, Kotiva ai koqema amitaarire, tura. Kotiva nai kauqu aqiqaa aqukeharo uva tivato vaiintiva, Eparahaamiva vauvaro Merikisitekiva nai vi vaiintirara Kotiva ai koqema amitaarire, tura.

⁷ Kiama qumina vaiintivano nora vaiintiara tiharo, Kotiva ai koqema amitaarire, ti vairavauve. Nora Vaiintivano qumina vaiintiara tiharo, Kotiva ai koqema amitaarire ti vaira. Merikisitekiva nora vaiintivano vaharora tiro, viva Eparahaamirara tiharo, Kotiva ai koqema amitaarire, tura.

⁸ Rivaira vohaa ankuqahainaa vaiintinavu noraiqaavi Kotira kaiqa vara amitaqi vi variaka, vika vaiinti nahenti airaira rairake kauqurutanta vataaraqihai vohaiqa vare variara. Rivaira ankuqahainaa variqi vi vuru qutuvu vaikama variara. Merikisitekiva Eparahaamiva rairakero vatoraqihairo vohaiqa varora. Kotira vukuqi Merikisitekira ankuuara viva qaqi variqiro vuaina vaiintivave turara tiro, Merikisitekira ankuvano Rivaira anku aataara kora.

⁹⁻¹⁰ Te Merikisitekira ankuuara irihama vo uvavata tirera. Rivaiva Kotira kaiqa vara amite vau vaiinti vaumantara ti, vaiinti nahenti vika nai airaira rairake kauqurutanta vatoraqihai Rivaira vohaiqa ami vaura. Eparahaamiva airaira rairakero kauqurutanta vatoraqihairo Merikisitekira amu entara Rivaira kia vatavaro nai kaivaqara Eparahaamira vaataqi vaura. Vi entara Rivaiva nai kaivaqara Eparahaamira vaataqi vaharora tiro, vivavata Eparahaamira vataakero vaharo Merikisitekira vi airairara amura. Rivaiva Merikisitekira airaira amurara tiro, Merikisitekira ankuvano Rivaira anku aataara kora.

¹¹ Mosiraqaa uva maara tivato entara Kotiva Rivaira anku kaamatero tiharo, Vi ankuqahainaa vaiintivanoqai ti kaiqa vara timitaate, tivakero Eronira noraiqama kovaro viva vi kaiqara varora. Rivaira vohaa ankuqahainaa vaiinti vika vaiha vaiinti nahentiara iriha Kotira kaiqa vara amitaqi vi vauvaro vika kaiqavano kia ho aruvu kaiqava vaura. Vika kaiqavano ho aruvitiro, Kotira kaiqa vara amite vai vaiintiva Ihuva kiama qovarama vitirio. Ihuva qovarama viro viva kia Eroniva Kotira kaiqa vara amitontema kero Kotira kaiqa vara amitaraitiro, viva Merikisitekira Kotira kaiqa vara amitontema kero Kotira kaiqa vara amite vaura.

¹² Rivaira ankuvano vira kaiqa vara amitaqi vu okarara Kotiva qaqlini vara kero Ihurara vivama ti kaiqa vara timitaarira vaiintiva varianarove turara tiro, Kotiva Mosiraqaa tivato uvaravata qaqlini varakero, qaraaka uva tivataira vira vatukana vatora.

¹³ Tinavu Noravano Ihuva kiama Rivaira ankuqihairo qovarama vura. Kiama Ihura ankuqihairo vovano Kotira Naavuqi Kotira kaiqa vara amitaarirava vaura. ¹⁴ Tenavu iruraro Ihuva lutaai vika ankuqihairo qovarama vura. Mosiva kiama lutaai ankuqahainaa vaiintivano Kotira kaiqa vara amitaqiro vuuanarove turave.

¹⁵ Ihuva kiama Rivaira ankuqahainaa vaiintivano Kotira kaiqa vara amitaantema kero vara amitaraitiro, viva Merikisitekira vara amitontema kero, Kotira kaiqa vara amitareva qovaraqama vurara ti, tenavu kankomake tavauraro Kotiva Rivaira ankuuara tu uvara qaqlini varakora.

¹⁶ Vo vaiintinavu Rivaira vohaa anku vaukara ti, vika Kotira kaiqa vara amitaqi vi vaura. Ihuva kia vika voqantema kero nai ankuuara iriraitiro, viva kempukavano ekaa enta qaqlini variqiro vuuarirvara tiro, viva Kotira kaiqa vara amitaqiro vi vaura. ¹⁷ Kotira vukuqi Ihurara mintima tiro:

Merikisitekira voqantema kera, are ekaa enta ekaa entama Kotira kaiqa vara amiteni vaiintivama vainarave, tura. *(Ihi 110:4)*

¹⁸⁻¹⁹ Rivaira ankuqahainaa vaiintinavu Kotira kaiqa vara amitaqi viha kia ho vaiinti nahenti qora kaiqa vare vai uvvara nunka nimitovaro vika kaiqavano ugerara kaiqaqai vauvarora tiro, Kotiva Mosiraqaa tivato uvvara qaqlini varakero qaraaka uva qovarama

kora. Mosiraqaa tivato uvvara avataqiro ni vau vaiintiva vauvaro vi uvava kia ho vira kahaqi vaura. Qaraaka uvavano uritara kero vairara ti, tenavu qaraaka uva iriqi vihama homa Kotira aumanto oru vairara.

²⁰ Kotiva Rivaira ankuqhainaa vaiinti kaama teharo viva kia nai kauqu ainqiqa aqukero tiraitiro, viva Ihura kaama teharo nai kauqu ainqiqa aqukora. ²¹ Kotiva nai kauqu ainqiqa aqukorqaahairo Ihuva vaiinti nahentiara iriharo Kotira kaiqa vara amitaqiro vi vaura. Kotiva Ihurara mintima tiro:

Te ai Noravano vahia tenta kauqu ainqiqa aqueke tiha, Are ekaa enta ti kaiqa vara timitaqira vinarave. Kia te vate tiva taaina uvvara qaqrake vo uva tirarave, tura. (*Ihi 110:4*)

²² Kotiva nai kauqu ainqiqa aqukero Ihurara minti turara ti, tenavu iruraro Kotiva qaraaka uva tiva taatautaiva haarua uva tiva taatautora aatara kero uritara keroma vairo.

²³ Rivaira ankuqhainaa vaiintinavu haarua uva tivatora iriqi viha Kotira kaiqa vara amitaqiqi vivi qutuvu variamanta vo vaiinti vo vaiinti airi vaiinti vi kaiqara varaqi vi vaura.

²⁴ Qaraaka uvavano qovarama vivaro Ihuva ekaa enta qaqqi variqiro vuainarara tiro, kia yovano vira vatuka varero vi kaiqara varaanaro. ²⁵ Ihuva ekaa enta qaqqi variqiro vuainarara ti, vaiinti nahenti virara tinavu kahaqama timitaane ti vaivarviva ekaa enta vikara Kotira aarama nimitaqiro vuanaro. Ihuva minti vaivara tiro, viva vaiinti nahenti kahaqama nimitaarirava ho vaivarviva Kotira viha ho kuvantukero ntitaanaro.

²⁶ Ihuva Kotira kaiqa vara amite vahia tenta noravano vahiaro Kotira kaiqaqai vara amiteharo kia qora kaiqara vararaitiro, koqe kaiqaqai vare vairo. Viva kia qora kaiqa vare variaka hampata vairaitiro, viva naaruvaini uri aatara kero nai verantoqama keroma vairo. Ihuva mintima kero vaivara tiro, viva tinavuvara iriharo homa Kotira kaiqa vara amitaqiro vuanaro.

²⁷ Rivaira ankuqhainaa vaiintinavu vo enta vo enta Kotira kaiqa vara amitaqiqi viha, vika nai qora kaiqara naane iriha quara aantau Kotira iha quara amite, vira naantiara vaiinti nahenti qora kaiqara iriha quara aantau Kotira iha quara amite vaura.

Ihuraqiqi kia qora kaiqavano vauvarora tiro, viva kia nariara naane iriharo Kotira kaiqa vara amitaraitiro, viva kia vo enta vo enta quara aantau Kotira iha quara amitaqiro vairaitiro, viva vaiinti nahenti qora kaiqara iriharo vohaa tataaqai Kotira kaiqa vara amiteharo vuru qutu vura.

²⁸ Mosiraqaa tivato uvvara irihama vika Rivaira ankuqhainaa vaiintinavu noraiqamake nenavu tinavuvara irihama Kotira kaiqa vara amitaqiqi vuate, tumanta vi vaiintinavuka qaqqi uquerara vaiintinavu vaiha vi kaiqara varaqi vi vaura. Kotiva Mosiraqaa uva tivato entara vira naantiera Kotiva nai kauqu ainqiqa aqukeharo nai autuqaa tiharo, Ti Maaquvano ti kaiqa vara timitaqiro vuanarove, tivakero vira noraiqama kovaro vira Maaquvano ekaa vi kaiqara amitaairava vara vuru taiqa kairara tiro, viva ekaa enta Kotira kaiqa vara amitaariravama vairo.

Ihuva tinavuvara iriharo naaruvaini Kotira kaiqa vara amite vaivama vairo

8

¹ Te tuna uvvara okara vaireva maantimama vairo: Tinavuvara iriharo Kotira kaiqa vara amitaqiro vi vahia tenta noravano vairo. Vi vaiintiva naaruvaini vahia tenta naaruvaini Kotira kauqu tanarainima oru oquiviro vairo.

² Rivaira ankuqhainaa vaiintinavu Kotira kaiqa vara amitaqiqi viha vaiintivano kauqujohai kaqato naavura Kotira Naavuve turaqi kaiqa vare vaura. Ihuva naaruvaini vahiaro Kotiva kaqatai naavura Kotira Naavu tanaraqi Kotira kaiqa vara amitaqiro vi vairo.

³ Vaiinti nahenti Rivaira ankuqhainaa vaiinti vo vira noraiqama kareka iha virara tiha, Are tinavu kahaqama timitaqira vihara nora vaiintivano vahiaro quara aantau arukera Kotira iha quara amitaqira vuane, ti variara. Vika minti tiavarvo vi vaiintiva quara aantau arukero Kotira iha quara amitaqiro vi vairo. Ho tinavuvara iriharo Kotira kaiqa vara amitaqiro vi vahia tenta, vivavata Kotira kaiqa vara amiteharo vo haika Kotira amiariravama vaura. „Vi haikava vaireva, nai vira vaatama vaura.“

⁴ Mosiraqaa tivato uvvara iriha Rivaira ankuvano Kotira Naavuvi vahia Kotira kaiqa vara amitaqiqi vi variarara tiro, Ihuva vatainai vairaitiro, viva kiama vi kaiqara varairaitiro.

⁵ Rivaira ankuqhainaa vaiintinavu Kotira kaiqa vara amite variava vaireva, kia kaiqa tanarama vairo. Vika kaiqavano maraqrurahaqai vaivarviva naaruvainima kaiqa tanavama vairo. Ihuva naaruvaini vahiaro Kotira kaiqa vara amitaqiro vahiaro kaiqa tanarama vare vairo. Vira voqantemaka kero, haaru vetanto entaqaas Mosiva Kotira Naavu

kaqareva auti vauvaro Kotiva tiharo, Are ainqinaaqaa ti vataakera variaramanta te ai umigeha maantima kera naavu kaqane tunantema kera kaqane, tura.

⁶ Kotiva Ihura noraigama kaivaro viva Kotira kaiqa vara amitaqiro viharo Rivaira ankuqhainaa vaiinti vika kaiqavata aatara kaivaro vira kaiqavano uritarakero avunima vairo.

Rivaira ankuqhainaa vaiinti vika haaru vohaa uva tiva taataukero vato uvaraqqai iriha, Kotira kaiqa vara amitaqi vi variara. Kotiva nai kauqu ainqiqa aqukero tiva taatauto uvava iriharo Ihuva Kotira kaiqa vara amitaqiro vi vaurara tiro, vi uvava haaru vohaa uva tiva taataukero vato uvaravata uri aatarakero avunima vairo.

⁷ Haaru vohaa uva tiva taataukero vato uvava ho vaitirio, Kotiva kiama vi uvava qaqini varakero uva qovarama kaitirio. ⁸ Kotiva tavomanta vaiinti nahenti kia Mosiraqaa tivato uvava koqemake avataqi vi vaurara tiro, viva mintima tiro:

Naantiara vo entanavu anirairaqe te Isareri vatanaakave Iutaa vatanaakave vika hampata vohaa vaiha qaraaka uva tiva taatau karerave.

⁹ Vi uvava vaireva, kia te haaru vika kaivaqaukavara hampata vohaa vaiha tiva taatau tauna uvava voqaaara varianarove.

Haaru te vika kaivaqaukavara kauqu utu vare Isipi vataihai ntita vare viha, te vika hampata vohaa vaiha uva tiva taatau tauramanta vika ti uva iriqi vuataara vaumanta vika qaqirake kia ti uva iriqi vi vaura kaara te vika qoririma kaavaunarave.

¹⁰ Ho naantiara te Isareri vatanaaka hampata vohaa vaiha qaraaka uva vo tiva taatauke vatarerave.

Kia te vi entara tenta uva maara oriqa qara ntua taraiti, vi entara te vi uvava vika avu aatoqi vate, vika muntukaqi qara ntua nimirerave. Te vika Variqavano variari vika ti vaiinti nahentima vaivarave.

¹¹ Naantiara vi entara nora vaiintivata inaara vaiintivata tiriara kankomake iriqi virara ti, vika kiama nai kena vaiinti nahenti tiva nimivarave. Vi entara vika ekaama tiriara kankomake irivarave.

¹² Vi entara te vika aaqurihama nimitheha vika qora kaiqa vare vai uvava nunka tauru nimirerave, tura. (*Ieremaiaa 31:31-34*)

¹³ Kotiva vi uvava minti tiharoma qaraaka uva tiva taatau taainarara tura. Viva minti tiharoma hoqarenaa uva tiva taatautora haaru uvaqama kaira. Ho haaruanaa haikavano haaruaqamaqiro viharo vaakama taiqa vuanaro.

9

Haarua uva iriha Kotira kaiqa vara amitaqi vurara tura

¹ Haaru Kotiva vohaa uva tiva taatau kero vato uva okarara tirera. Kotiva Mosiraqaa uva maara tiva tovaro Mosiva vaiinti nahentiara minti mintimake Kotira autu tuaheraqi vuote tumanta, vi uvava iriha Kotiraini naavu vo kaqa amitora. Vi naavuva maa vataraqaa vaura.

² Vi naavuva vaireva *seriqohai* kaqato naavuva vaura. *Rumu* taaraqanta variarire tiro, tavaarana tavunaqohairo tintatero avuni vau *rum ura* koqe haikaqai vai *rumurave* tura. *Viraqi* ova qumpike vato taquva vauvaro tainta vo vauvaro Kotira unta amito mparetiravata vaura.

³ *Tavunaqohairo* tavaarana tintatora vira naantiaraini vai *rum urara* Kotira turuarinive tura. Kotira turuaravano vaurara tiro, *viraqi* qioqama tovaro kia qaqi vaiintivano oriqete vaura.

⁴ Vi *rum uraqi* tainta vo *kori* oriqohai aututo taintara viraqaa koqe untavu haikara iha quarate vau taintava vauvaro vokise vo, *kori* ori ruqututoraqhai viraqaa taatauto vokiseva vaura. Vi vokiseqira Kotiva Mosiraqaa tiva taatauto uvava qara ntuvato oritanta vauvaro, *manaa* tu karara nonkuto taquvavata viraqai vauvaro, Eronira kauruvanovata vaura. Vi kauruva haaru mare verakero qampiqo kauruva vaura.

⁵ Vi haikava vi haikava vi vokiseraqi vauvaro vokiseqaa hini vitini hini vitini *enseli* maraqura taaraqantavano vaura. Vitanta nai arokatanta airatetanta aave vateha Kotiva maini maaqima vairo tiha vaura. Vitanta mintimake vauvaro vokise vira avu tavaaraqaa Kotiva vaiinti nahenti aaqurihama nimitie vai kantave tura.

Kotiva vaiinti nahenti qora kaiqa vare vai uvava nunka nimirerare tiro, vo ihi vo ihi vohaa tataa Kotira kaiqa vara amito vaiintiva avuhainaava naare kaqa varero vi *rumuragi* oriqetero vuru vokise avutana naare *raintu/ruanainori* vaura. Ho kia te voki uvaravata qaiqaa maa qararaqi tirera.

⁶ Kotira kaiqa vara amite vau vaiintika vo enta vo enta avuni vau *rumuraqi* oriqete kaiqa vareha Kotira turuaraini kia oriqete vi vaura. ⁷ Vika nora vaiintivano, vivaqaima vo ihi vohaa tataa vo ihi vohaa tataaqai, viraqi oriqete vaura.

Vi entaraqaa vi vaiintiva kia qaqi qumina viraqi oriqetaraitiro, viva naare kaqa varero viraqi vura. Viva nai qora kaiqaravata, vainti nahenti qora kaiqaravata, iriharoma Kotiva tinavu uva nunka timitaarie tiro, viva Kotira turuaraini oriqetero vuru naare *raintu/ruanainorima* kareva vura.

⁸ Vi vaiintiva mintiakeharo Kotira kaiqa vara amitaqiro vi vauvaro Kotira Maraquravano tinavu humiqaimanta tenavu kankomake iruraro vaiinti nahentivano Kotiva inaini vi aarava kia vi entara vaura. Kotira Naavu qaqi vataini vauvaro haarua okaravanovata qaqi vauvaroraa tiro, vi aarava kia vaura.

⁹ Maa entaravata haarua uva iriha quara aantau Kotira iha quara amite varia kaiqava kia vainti nahenti kahaqi vaimanta vainti nahenti kia ho variavaro vika avu aato muntukavano qoraiqi vaimanta variara.

¹⁰ Vaiinti nahenti haarua uva maara avataqi viha, vika vo qara vo qarama keha karave namarive namaqi vi variara. Minti variavaro vi haikava kia vika avu aato muntuka hiqama nimiraitiro, vaataqai kahaqama nimite vai haikava vaira. Kotiva Mosiraqaa tivato uvarara tiharo, Vi uvava vahuqaqai vairaro qaraaka uvavano qovarama vuarire, tura.

Qaraaka uvara tura

¹¹ Kotiva tinavu koqema timitaaina haikara qovaraiqama kareva Karaitiva Kotira kaiqa vara amite vai vaiintiva noravano tuvurero, viva kia vaiintivano kaqatai naavuraqi Kotira kaiqa vara amitaraitiro, viva uritarero naaruvaini vai naavuraqi Kotira kaiqa vara amitareva oru vaura.

¹² Karaitiva naaruvaini Kotira turuaraini kia airi tataa viraitiro, viva vohaa tataama viraqi vura. Viva kia memera naareve, purumakau naareve, kaqa varero viraqi viraitiro, viva nai naare raurukoraqaaahairo Kotira turuaraini vurara tiro, viva tinavu kuvantu kaivaroo qora kaiqavano kia ho tinavu qaiqaavata rumpa taanaro.

¹³ Haarua uva okara iriharo Kotira kaiqa vara amite vau vaiintiva memera naarevata, purumakau naarevata, purumakau naati iha quaratovaro hantaiqama vura viravata, vaqitakero vainti nahentiqa *raintu/ruanainorima* kero vikara tiharo, Ne hiqama vuavo, ti vaura. Viva mintiharo kia vika avu aato muntukaqi hiqama nimiraitiro, viva vika pahainiqai hiqama nimite vaura.

¹⁴ Haarua uva okaravano mintima vauvaro Karaitiva vi okarara uri aatara kero nai naareqohairo tinavu hiqama timitora.

Kotira Maraquravano ekaa enta qaqi variqiro vi vaiva Karaitiragi vauvaro Karaitiva kia qora kaiqa vararaitiro, Kotira kaiqa vara amitaqiro viro vuru qutu vurara tiro, vira naarevano homa tinavu avu aato muntukaqi hiqama timitaraje tenavu kia qora kaiqa varaqi vi vuru qutu viraiti, tenavu qaqi variqiro vi vai Variqara kaiqa vara amitaqi vuari.

¹⁵ Karaitiva Kotira qaraaka uva qovarama kai vaiintivama vairo. Kotiva nai kauqu aiqiqaa aqukeharo tiharo, Te naarama taaina vainti nahentika koqema nimitaari vika ekaa enta koqemake qaqi variqi vuate, turara tiro, Karaitiva vi uvava quqaa vivau variarire tiro, qovarama vura.

Haaru Kotiva Mosiraqaa vohaa uva tiva taataukero vato uvara vainti nahenti kia ho avataraiti, qora kaiqaqai varaqi vi vauvaro Kotiva vika qora uva nunka nimirareva iharo qaraaka uva tiva taatau tovaro Karaitiva vainti nahentiarao tiro vuru qutu vura.

¹⁶⁻¹⁷ Vaiintivano qaqi vai entara viva tiharo, Te qutu vuarimanta vi vaiintika vi vaiintikama te iana haikara ho varevarave, tivakero vi uvara qara ntuvate vaira. Qara ntuvu tairaro viva qaqi variaina entaraqaa kiama vainti vovano viva ina haikara ho varaanaro. Viva qutu viraroma avuni tivataina uvava quqaa vivau varianaro.

¹⁸ Vira voqantema kero, Kotiva haaru vohaa uva tiva taataukero vato uvara quara aantau naareqohairo kempukaiqamake vaura.

¹⁹ Vi entara tota Kotiva Mosiraqaa tivato uvara, ekaa vi uvara Mosiva vainti nahenti tiva nimi taiqakero, viraqaaahairo purumakau naati arukoravata, memera naati arukoravata, vira naare varakero qaqi namari vataakero tuqantaakero, sipisipi kauki ahaqo ravato naaquntara varakero, aukuvera mare vitiqaata rumpatero naareqi quntama varero, vuru Kotira uva qara ntuvato vukuraqaavata, vainti nahentiqaavata, *raintu/ruanainorima* kora.

²⁰ Viva naare Kotira vukuqaavata, vainti nahentiqaavata, *raintu/ruanainorima* kero tiharo, Kotiva uva tiva taatautero niara, Vi uvara iriqi vuate, timanta ne tiha, Tenavu vi uvara iriqi virerave, tiarave. Kotiva tiva taatautai uvavavata ne tia uvavavata

kempukaiqama vuarire ti, te maa naarer *raintumake/ruanainorimake* ni aqu nimitauro, tura.

²¹ Mosiva minti tivakero mintiaqiro viharo naare kaqa varero vuru Kotira Naavuqua *raintuma/ruanainorima* kero vi naavuraqi vau haikaraqaavata naare *raintuma/ruanainorima* kora. ²² Haarua uva okarara iriharo vo haika vo haikara hiqama vuarire tiro, naare *raintuma/ruanainorima* kero hiqama amite vaura. Kia vo haika arukaivaro vira naare ntava viraro qutu virera, Kotiva vaiinti nahenti vika nái qora kaiqa vare vai uvara nunka nimitaariara aravar aia ho varianaro.

Karaitiva nai naare raurukero qutu vura

²³ Kotira Naavu vataini kaqatoravata, vi naavuraqi vau haikaravata, qaqi vaiintivano kaqake aututo haikavaqaima vaura. Kotiva i haikara tanava naaruvainima vairo.

Vaiintivano Kotira Naavu vataini vauravata, vi naavuraqi vau haikaravata, hiqama amitareva viva quara aantau naare varakero *raintuma/ruanainorima* kero aqu amite vaura.

Naaruvaini vai haikara, kia ho quara aantau naareqohairo hiqama amitaarirava vairo. Uritara kero vai vaiintira naarevanoqaima vi haikara ho hiqama amitaariravama vairo.

²⁴ Karaitiva Kotira turuaraini vireva viharo, viva kia vaiintivano nái kauquqohai kaqato naavuraqi viraitiro, viva naaruvaini Kotira turuara tanava vainaini vura. Karaitiva mini oru vaharo tinavu kahaqama timite variariravama vairo.

²⁵ Kotira Naavuqi kaiqa vara amite vai vaiintiva noravano vo ihi vohaa tataa, vo ihi vohaa tataaqai quara aantau naare kaqa vareharo Kotira Naavu turuaraini vi vaira.

Karaitiva kia mintiraitiro, viva Kotiva vaiinti nahenti qora kaiqa vare vai uvara nunka nimitaarire tiro, kia vo tataa vo tataa qutiraitiro, viva vohaa tataaqai qutu vura.

²⁶ Viva qaiqaa qaiqaa qutuare titirio, viva maa vatara autuko entaraqaahairo airi tataama aihavira haika varaqiro vitirio.

Maa entara taiaqaina entava aumaiqi vauvaro Karaitiva kia mintiraitiro, viva Kotiva vaiinti nahenti qora kaiqa vare vai uvara nunka nimitaarire tiro, viva vohaa tataaqai qutu vireva qovarama vura.

²⁷ Maa vataraqaa varia vaiinti nahentika variqi vivi, vika vohaa tataaqai qutu vivaro Kotiva vikaqaa uva vateharo *ko tianaro*.

²⁸ Karaitiva Kotiva vaiinti nahenti qora kaiqa vare vai uvara nunka nimitaarire tiro, vivavata vohaa tataaqai qutu vura. Karaitiva mintima kero qutu vurara tiro, Kotiva vira kaiqara iriharo homa vaiinti nahenti qora kaiqa vare vai uvara nunka nimitaarirovama vairo.

Naantiara Karaitiva qaiqaa vataini tuvuaina entara viva kia vaiinti nahenti qora kaiqara iriharo tuvuanarovauve. Vi entaraqaa viva nai veka vai vaiinti nahentika ntita kareva tuvuanaro.

10

Karaitiva vohaa tataaqai vaiinti nahentira iriharo qutu vura

¹ Kotiva Mosiraqaa tivato uvava vaireva, kia vaata tanara voqaara vairaitiro, maraqrurahaa voqaarama vairo.

Mintima vairara ti, vaiinti nahenti vi uvara iriqi viha kia kankomake Kotiva koqema nimitaaina okarara iri variara. Mosiraqaa tivato uvvara iriqi viha, vo ihi vo ihi quara aantau Kotira iha quara amitaqvi vau okarava Kotira aumanto vireka ia vaiinti nahenti avu aato muntukaqi kia ho hiqama nimite vaura.

² Kotira iha quara amite vau quara aantauva vaiinti nahenti avu aato muntukaqi ho hiqama nimitaitiro, vaiinti nahenti qora kaiqa vare vau uvava nunka vumanta vika kia qaiqavata vo ihi vo ihi quara aantau Kotira aruke iha quara amite variatirio.

³⁻⁴ Purumakau qora arukaa naarevave, memera arukaa naarerave, kiama ho vaiinti nahenti qora kaiqa vare vai uvara nunka nimitaanaro. Mintirara ti, vaiinti nahenti vo ihi vo ihi quara aantau aruke Kotira iha quara amitaqvi viha, avu aato kenko tumanta tiha, Oho, tenavu qora kaiqa vare vauna uvava qaqlima vaivo, ti vaura.

⁵ Kotira iha quara amite vau quara aantauva kia vaiinti nahenti ho kahaqama nimite vaurara tiro, Karaitiva maa vataraqaa tuvireva iharo Kotirara mintima tiro:

Ai iha quara amite varia quara aantaurave, ai amite varia kararave, vi haikara vi haikara kia ai muntukavano vaivara variarao. Mintiharama are tini vaata vo geramakera timitaarao.

⁶ Ekaara kaintu iha quara amite varia quara aantaurave, vaiinti nahenti nái qora kaiqara iriha ai amite varia quara aantaurave, virara virara are kia quahehara varianarave.

⁷ Minti variaramanta te ariara tiha, Kotio, te mainima vauro. Haaru tiriara qara ntuvato uvava tuntemake, te ai muntukavano vai kaiqara vara amitarera vauro, tura. (*Ihi 40:6-8*)

⁸ Kaiqe te hini uva tunara qaiqaa tiari. Haaru Kotiva Mosiraqaa uva tiva taatautero thiaro, Ne quara aantau ti iha quara timitaqi vuate, tu uvava vauvarovata, Ihuva Kotirara mintima tiro: *Ai iha quara amite varia quara aantaurave, ai amite varia kararave, vi haikara vi haikarara kia ai muntukavano vaivara variarao. Ekaara kaintu iha quara amite varia quara aantaurave, vaiinti nahenti nai qora kaiqara iriha ai amite varia quara aantaurave, virara virara are kia quahehara varianarave, tura.*

⁹ Ihuva minti tivakero viva te vaaka tunarara tiharo, *Kotio, te mainima vauro. Te ai muntukavano vai kaiqara vara amitarera vauro, tura.* Ihuva minti tiharoma viva Kotiva Mosiraqaa tivato uvvara qaqini varakero, vo uva vira vatukana qovarama kora.

¹⁰ *Vi uvvara okara mintimama vairo; Karaitiva Kotira muntukavano vai kaiqara varaqiro viharo vuru vohaa tataa nai vaata amiro qutu vurara tiro, Kotiva tenavu qora kaiqa vare vauna uvvara nunka timitaarira aarava homa varianaro.*

¹¹ Maa entara Rivaira ankuqhainaa vaiintinavu himpite vahia ekaa enta haaru okarara iriha Kotira kaiqa vara amitaqi vi vahia, airi tataa quara aantau Kotira iha quara amite variara. Mintiaqi vi variavarovata, vinavuka Kotira kaiqa vara amite variava kiama ho tinavu qora kaiqa uva nunka timitaanaro.

¹² Kotiva tinavuara vika qora kaiqa vare uvvara nunka nimitaarire tiro, Karaitiva ekaa entara iriharo vohaa tataaqai qutu viro, viraqaahairo viva oru Kotira kauqu tanaraini oquiviro vaura. ¹³ Maa entara viva mini variqiro vi vairaro Kotiva vira navutaaka aatara amitairaro viva nai aiqu vikaqaa ntava taanaro.

¹⁴ Ihuva Kotira kaiqa vara amiteharo vohaa tataa vaiinti nahentiara iriharo qutu viharo Kotira vaiinti nahenti avu aato muntuka anomakero hiqama nimitorara ti, vika ekaa enta Kotira vaiinti nahentima variqiv vivara. ¹⁵ Kotira Maraquravanovata Kotira okarara tinavu qoqaa tiva timi vaira. Viva haaru paropeti vaiinti kahaquvaro vi vaiintiva tiharo,

¹⁶ Kotiva mintima tivo: Ho naantiari te Isarerri vatanaaka hampata vohaa vahia qaraaka uva vo tiva taatauke vatarerave. Kia te vi entara tenta uva maara origaa qara ntuvu taraiti, vi entara te vi uvvara vika muntukaqi vate, vika avu aatoqi qara ntuvu nimitarerave. (*Teremaiaa 31:33*)

¹⁷ Qaiqaavata Kotiva mintima tiro:

Vaiinti nahenti qora kaiqa vare vai uvarave, vika ti uva raqake vai uvarave, vi uvvara vi uvvara te nunka tauru nimitarerave, tura. (*Teremaiaa 31:34*)

¹⁸ Kotiva vaiinti nahentiara ne qora kaiqa vare varia uvvara ekaa nunka nimitaunarave tirara ti, vika qumina nai qora kaiqara iriha Kotira vo haika iha quara amitevora.

Kaiqe Kotira aaqanto vuare tura

¹⁹ Ti qata vakaao, Ihuva tinavuara iriharo nai naare raurukero qutu vuvaro Kotiva tinavu uva nunka timitairara ti, tenavu homa Kotira turuaraini virara.

²⁰ Tota Kotiva vainaini vi varia aarara kaankukaqohairo kuvai tovaro Ihuva vaata vataakero variqiro viro, tinavuara iriharo vuru qutu viharora tiro, viva vi kaankukara qaqini varakero, Kotiva vainainiara qaraaka aara autu timitora.

²¹ Ihuva Kotira kaiqa vara amite vai vaiintiva noravano vaharo tinavu Kotira vaiinti nahentiqaa raqiki vairara ti, ²² kaiqenavu muntuka koqe vi vairage Kotirara kempukaiqamake iriqi viha, vira aaqanto qihaaqamake vuari. Tinavu avu aato muntuka qoraiqama vimanta vauraro Ihura naarevano tinavu avu aato muntuka hiqama timitaivaro namari koqeva tinavu vaataini hiqama timitaira.

²³ Kotiva kia nai kauqu ainqiqa aqukero tivatai uvvara qaqirakerovo uva ti vaiva vairara ti, aniqenavu kempukaiqamake Kotiva tinavu koqema timitaaina entara veka variqi vuari.

²⁴ Kaiqenavu tentanavu kena vaiinti nahentiara noraiqaake iriqi viha nariara nariara muntuka vateha koqe kaiqaaqai varaqi vuari. ²⁵ Aniqenavu ruvaaqumavi vahia Kotira uva iritaainara kia qaqira karaiti, tuqarake tuataara. Vokiaka kia ruvaaqumavi vahia Kotira uva irireka auti variantemake, tenavuvata mintiarora. Kaiqenavu tenavu tentanavu kenauka kempukaiqama nimiteha kahaqamaqi vuari. Karaitiva tuvuaina entava auma auma i vairara irihama voqavata mintiaqi vuari.

²⁶ Tenavu Kotira quqaa uva iri, viraqaahai Kotira tauvaqa utu amite qora kaiqa qaqi varaqi virerave tiarera, qaiqaa tinavuara iriharo Kotira kaiqa vara amitaarira *ofaava* vovano kiama varianaro.

²⁷ Tenavu mintiarera, tenavu voqamake qeteha Kotiva *ko* tiaina entara vekavata, ihavano voqamakero iteharo Kotira navutaaka tatoqa kaaina entara vekavata variari-ravaqaima varianaro.

²⁸ Mosiraqaa tivato uvare raqako okarava maantimama vairo: Vaiintivano vi uvare raqa kairamanta valiinti taaraqantae, taaramonavue, tiha, Tenavu tave vauraro quqaama vi valintiva mintivo, tivera, vika kia vi valintira aqurihama amitaraiti, vaakama vira arukevara.

²⁹ Haaru vohaa uva tiva taataukero vato uvare okaravano mintima vaurara tiro, te garaaka uva qoririma kaaina valintirara ohoma tiva amitaainarave. Vi uvare qoririma kai valintiva mintiharoma Kotira Maaqu tauvaqa utu amiteharo virara qumina valintivema tiro. Karaitira naarevano Kotiva qaraaka uva tiva taatautaira kempukaiqama kero vi valintira qora uva nunka amitaiva vaivarovata, vi valintiva virara qumina naarevema tiro.

Vaiinti nahenti aqurihama nimiteharo koqema nimite vai Maraqrara, vi valintiva vira qora okaraqai autu amite vaira. Oho, vi valintira ruqutukaaina okarava nantiakeroe varianaro?

³⁰ Tenavu kankomake iruraro Kotiva maa uvare tiva tero tiharo, *Tenta nai vira muntu karerave*. *Tenta nai vira koqaa amirerave*, tivakero qaiqaa tiharo, *Te Noravano tenta valinti nahentiqaa uva vateha ko tirerave*, tura. *(Lo 32:35-36)*

³¹ Valintivano nai qora kaiqa varaira kaara Kotiva qaqi variqiro vi vaira kauquqi ntuvu virera, te virara voqamake oho tiva amitararave.

Virara irihama kaiqe Karaitira kempukaiqaaake iriqi vuare tura

³² Tota Kotira uvavano ni avu aato muntukaqai ataama nimitomanta vau entarara iritaata. Vi entara ne Kotira uva iriqi vi vaumanta vokuka ni qoraiqama nimite vaumanta ne aihamu haikara varaqi vihavata, ne kempukaiqamake variqvi vi vaura.

³³ Vo enta ne valinti nahenti nivuqaa vaumanta vokuka ni qora uva tiva nimiteha ni qoraiqama nimite vaumanta, vo enta vokuka ni kena valinti nahenti qora uva tiva nimiteha qoraiqama nimite vaumanta ne nenta kena valinti nahenti kahaqama nimite vaura.

³⁴ Vi entara Karaitira kaara ni kena valinti nahenti karapuhiqama tomanta ne kia getaraiti, oru vika hampata vahia vikara ike mpo tiva nimite vaura. Vi entara ni airairave, ni vataave, vi haikara niqahairaqia varomanta ne kia virara noraiqaaake iriraiti, ne tiha, Tinavu airairava uritara kero vai airairava, naaruvaini kia taiqaraitiro, qaqi variqiro vuanarove, tivakeha quaheqai vaura.

³⁵ Vi entara ne muntuka parumakeha variqvi vi vaurara iritehama, ne maa entaravata muntuka parumakeha variqvi vi vaivarov Kotiva ni kaiqara iriharo vira koqaa ninta nimiariira. ³⁶ Ne kia popoharaiti, kempukaiqama keha variqiro vivera, ne homa Kotira antuqa vaina kaiqara varaqi vi vaivarov Kotiva nai kauqu aqiqaa akukero tivato uvava niqira vivuma varianaro. ³⁷ Kotira uvavano mintima tiro:

Inaraiaq varikero naantiari tuvuarira valintiva viva kia varikero tuviraitiro, viva vaakama tuvuanarove.

³⁸ Avuqavu ni vai valintirara Kotiva mintima tiro: Vi valintiva tiriara kempukaiqama kero iriqiro viharoma qaqi variqiro vuanarove. Vi valintiva ti aaraqahairo tuqantaaviro qaqira kero virera, kia te vira quahama amitarerave, tura. *(Hab 2:3-4)*

³⁹ Ho tenavu kia Kotira aaraqahai tuqantaavi kakakima vuariraukama vai. Tenavu Kotira uvare quqaave tivakeha vi uvare kempukaiqamake iriqi vuariraro Kotiva tinavu tivitaariraukama vai.

11

Tenavu Kotira uvare quqaave tivakeha iriqi vuaina okarara tura

¹ Tenavu Kotirara kempukaiqama keha iriqi vuaina okarava maantimama vairo: Tenavu kia taara avu aato iriraiti, Kotiva koqema timitate i haikava quqaama qovarama vuanarove tivakeha, vira veikama vairara. Maa entara kia avuqohai tave vauna haikava vaimanta tenavu quqaiqama kero vi haikava vi haikava vaivo ti vaunara.

² Haaru vetanto vau entara Kotira valinti nahenti vira uvare quqaave tivakeha variqvi vi vaurara tiro, Kotiva vikara quaheharo vaura.

³ Haaru Kotiva tuvaro vira uvavano naaruvavata vatavata autukero vatora. Vi uvarara tenavu tiha, Quqaa Kotiva minturave, tivakeha vaunara. Viva vi entara kia ho valintivano tave vai haikara varakero viraqohairo valintivano ho tavaaina haikara autukero vatora.

⁴ Haaru Abeliva Kotira uvvara quqaave tivakero, sipisipi naati arukero Kotira iha quara amito haikava Keniva Kotira amito haikaravata uri aatarakero vaura. Abeliva Kotira uvvara quqaave tuvaro Kotiva virara tiharo, Are avuqavu ni variara vaiintiva variarao, tivakero Abeliva amito haikarara quahama amitora. Abeliva haaru qutu vuyarovata, viva Kotirara quqaave tu uvvara „maa entaravata vaiinti nahenti nai tiva ami nai tiva ami i variarara tiro“, vira uvavano kia taiqa viraitiro, qaqqai variqiro vi vairo. (*Okara 4:4*)

⁵ Haaru Enokiva Kotira uvvara quqaave tivakero Kotirara iriqiro vi vaurara tiro, viva kia qutu vuyuro Kotiva vira qaqqi naaruvaini vita varomanta kia vaiintivano vira ho rantakora. Kotira vukuqi qara ntuvato vaiintiva Enokirara mintima tiro: Enokiva kia naaruvaini vu entara viva koqema kero Kotirara iriqiro vi vaurara tiro, Kotiva vira quahama amitorave, tura. (*Okara 5:24*)

⁶ Vaiintivano kia Kotira uvvara quqaave ti vairava vairaro, Kotiva kiama vi vaiintira quahama amitaanaro. Vaiintivano tiharo, Quqaama Kotiva vaivo. Quqaama te vira rantarera vuariraro viva ti koqema timitaanarove ti vairava, vivaqaima Kotiva vainanaini ho vuanaro.

⁷ Kotiva Noaarara tiharo, Raurihara variane. Qora haikavano vi entara qovarama vuanarove, tuvaro Noaava kia vi haikara vi haikara tavaraitiro, Kotira uvvara quqaave tivakero, namari vaura vuaina naavura kaqakero, nai vaiinti nahenti hampata vi naavuraqi variqiro viharo ho vaura. Noaava Kotira uvvara quqaave tuvaro Kotiva vira kena vaiinti nahenti vataini vaukaqaa uva vateharo vika ruqutu taiqa kero Noaarara avuqavu ni vai vaiintirave tura. (*Okara 6:9*)

Eparahaamira tura

⁸ Haaru Kotiva Eparahaamira aarama kero tiharo, Nena maaqa maini kera vo vataini oru vairage naantiara vi vataro ai amiariraro ariniqama vuarire, tuvaro Eparahaamiva vi vataro kia tavaraitiro, Kotira uvvara quqaa uvave tivakero nai maaqa mini kero vurama.

⁹ Eparahaamira Kotira uvvara quqaave tivakero Kotiva nai kaama amito vataraqaa oru variqiro viharo, viva vo vatanaavano vaharora tiro, kia maahota naavu kaqa taraitiro, seri naavuqiqai voqi voqi variqiro vumanta vira maaqu Aisaakivavata, vira nainti Iekopipavata, vitantavata tiha, Kotiva maa vatarara tu uvava titantaqii vaharo maa vatava titanta kaama tai vatavama vaivo, tivakeha vi vataraqaa seri naavuqiqai variqii vi vaura.

¹⁰ Vi entara Eparahaamiva seri naavuqi variqiro viharo viva naaruvaini maahota variaina vatukara veka vaura. Vi vatukara Kotiva naivano te maantimake autirerave tivakero autai vatukavama vairo. (*Okara 12:1-10*)

¹¹ Eparahaamira naata Seraava kontaiqama viro viva vainti vataarirava kia ho vauvoro viva kia virara noraiqaakero iriraitiro, viva tiharo, Kotiva tiriara viva vainti vatataanarove tiva, viva quqaa uvaqai ti vaivave, tivakero variro, naantiara viva vainti taqama viro vainti vatavara. (*Okara 21:1-7*)

¹² Mintuvaro Eparahaamira naampaiqama viro qutuarirava aumaiqu vaiintira, vira vohaiqaaahairo vainti airitaha qovaraiqama vura. Vira vaintivara vaireka, opu makau airi vaintemakeve, namari auvahianta vai nuqava airi vaintemake, airitaha variara.

¹³ Te vaaka tuna vaiinti nahentika Kotira uvvara quqaave tivakeha Kotiva nái kaamato haikara vo haika vo haika kia vararaiti, vuru qutu vura. Vika quqaa vi haikava naantiara qovaraiqianarove tivakeha quaheha vaura. Vika maa vatarara tihā, Quqaama tenavu vo vatanaaka maa vataraqaa vahuqa vairera vauraukave, tura. ¹⁴ Vika nái maaqa tanara rantake mini vihara ti, minti tura.

¹⁵ Vika Eparahaamira tota mini ko vatarara kia vi vatarara anirante vireka vauravauve. Vika mini anirante vireka autuare tiatirio, homa vika mini vi aarava vaitirio.

¹⁶ Vika kia mini virara iriraiti, vika uritarakero vai vataraqaa vuataa umanta vaura. Vika Kotirara kempukaiqaake iriqi viha naaruvaini vai vataro veka vaurara tiro, Kotiva vi vataro qerama nimitero tiharo, Te kia kauriraiti, te vika Variqavano vaiha vikaqaa raqikiqi virerave, tura.

¹⁷⁻¹⁸ Eparahaamira Kotiva tivato uvarara quqaa uvave tivakeharo nai maaqu arukero iha quara amitareva auti vaura.

Kotiva nai kauqu ainqaqqaa aqukero Eparahaamirara tiharo, Ai maaqu Aisaakiraqaaahairo ai autuvano qaqqi variqiro vuanarove, tivakero variqiro viro, vo enta Eparahaamira avatamake tavareva virara tiharo, Nena maaqu arukera iha quara timitaane, tuvaro Eparahaamira Kotira uva iriro nai maaqu aru amitareva autiharo tiharo, Kotiva tiriara nai kauqu ainqaqqaa aqukero tivato uvava quqaa uvaqaima varianarove.

¹⁹ Te tenta maaqu vira aru amitaariraro Kotiva vira homa qaiqaa qaqi vara himpima timitaanarove tivakero, nai maaqu arukareva auti vauvaro Kotiva kia vira arukaane tuvaro Eparahaamiva nai maaqu qutu vuraqihairo qaiqaa qaqi himpuvaro vita varontema kero, vira vita varora.

(Okara 22:1-19)

Aisaakira, Iekopira, Iohepira, vinavukara tura

²⁰ Aisaakiva Kotiva tivato uvarara quqaa uvave tivakero naampaiqama viro, nai qutu vuarira entava aumaiquvaro viva nai kauqu Iekopiraqaavata Isoraqaavata vateharo vitanta koqema nimiteharo vitantara tiharo, Quqaama Kotiva naantiara nitanta minti mintima kero koqema nimitaanarove, tura.

²¹ Iekopivavata Kotiva tivato uvarara quqaa uvave tivakero naampaiqama viro nai qutu vuarira entava aumaiquvaro viva nai kauqu Iohepira maaqutantaaqaa vateharo, koqema nimiteharo vitantara tiharo, Quqaama Kotiva minti mintima kero nitanta koqema nimitaanarove tivakero, nai kauruqaa muntuviro vaiharo Kotira autu tuahera kora.

(Okara 49:22-26)

²² Iohepivavata Kotiva tivato uvarara quqaa uvave tivakero, naampaiqama viro nai qutu vuarira entava aumaiquvaro viva Kotira uva vo qoqaiqama kero tiharo, Quqaama Isareri vaiinti nahenti naantiara Isipiqihai anirante vivarave. Vi entara vika mini vireka iha, ti vuhaarivata maa vataraqihai mpaqi vare vuru mini quntama kaate, tura. (Okara 50:25)

Mosirara tura

²³ Vira noka qoka Mosira vatate tavovaro viva koqe vaintivano vaumanta vitanta Pero vaiintivano qorainti vainti vatatera arukaate tu uvvara raqake kia qetaraiti, Kotirara quqaama viva tinavu kahaqama timitaariravama vaivo tivake Mosira taaramo tora vira kukeqaqi vi vaura.

(Katu Varora 2:1-10)

²⁴ Mosiva noruqama viro Kotira uvvara quqaa uvave tivakero viva aqao tiro, Ne kia tiriara Perora raavuravano viritai vaintirave tiate, tivakero ²⁵ viva tiharo, Hauri te Isipi vatanaaka hampata qora kaiqa varaqi viha vahuqa quaheha variqi vuarorave. Te kia mintiraiti, te tenta navunaaka, Kotira vaiinti nahenti hampata vaiha, vika vataake maara varaqi virerave, tura.

(Katu Varora 2:15)

²⁶ Isipini vau onaanara koqe airaira, vo airaira vo airairara Mosiva kia virara noraiqaakero iriraitiro, viva Kotiva noraiqama kero atitaaina vaintira, virara noraiqaakero iriqiro viharo tiharo, Te tenta vaiinti nahenti hampata variari Isipi vatanaaka homa ti kaurira haika timiqi vivarave, tura. Kotiva naantiara naaruvaini nai vira koqaa amiainarara iriqiro viharora tiro, viva minti tura.

²⁷ Mosiva kempukaiqama kero Kotirara iriqiro viharora tiro, viva Isareri vaiinti nahenti ntita varero Pero vaiintivano arara itaainarara kia qetaraitiro, Isipi mini kero vura.

Vaiintivano avuqohairo Kotira tavaarirava kia vaivarovata, Mosiva Kotira avuqohairo tavamaqiro vi vauntemakero, viva Kotirara kempukaiqama kero iriqiro viharo, kia qaqlira kero anirantero viraitiro, Isipi mini kora.

(Katu Varora 12:31-42)

²⁸ Mosiva Kotiva tu uvvara quqaave tivakero, enselivano Isareri vatanaaka hoqare qorainti vainti vatatoka, kia arukaraitiro qaqlir vehakuma nimitaarire tiro, sipisipi naati arukero vira mati namakero vira naare varakero vo qentti vo qentiqaa aqutora. (Katu Varora 12:13)

Isareri vaiinti nahenti airitahaa Kotira uvvara kempukaiqamake iriqi vi vaurara tura

²⁹ Isareri vatanaaka kempukaiqaake Kotirara iriqi viharo ti, vika aahara vatavau vuntemake Naare Namarive tu namarira ho taqa vare vurama. Vika taqa vare vumanta Isipi vatanaaka Isareri vatanaaka untemake virare tuvaro nora namarivano vika ekaa aqu ravaaqavu kora.

(Katu Varora 14:15-31)

³⁰ Isareri vatanaaka kempukaiqaake Kotirara iriqi vurara tiro, vika Ieriko vatukaini ori vaantaavura tataaqa 7 entanavuara ututuma kovaro ori vaantaavura vuvatova naivano ravantau vura.

(Iosuua 6:2-25)

³¹ Nahenti vovano hampi nariro ni vau nahentiva Rehaapiva Kotirara kempukaiqaakero iriqiro vi vaurara tiro, viva nai navutaa vaiintitanta, Isareri vaiintitanta kahaqama nimitora. Vi nahentiva Kotirara quqaave tuvarora tiro, Kotiva vira kahaqama amitomanta Isareri iqoka vaiinti Kotira uva raqakoka ekaa arukeha kia viravata arukora. (Iosuua 2:1-16)

³² Ho te tau vaiinti nahentikarae tivaqi virara? Gideonirave, Baraakirave, Samsonirave, Iepataarave, Devitirave, Samuerirave, paropeti vaiintinavuve, te kia maa qararaqihai vukaiqaake vikara ho tirara.

³³ Vika Kotira uvara quqaa uvave tivakeha, virara kempukaiqaake iriqi vi vaurara ti, vika iqoka raquqi viha vo vatanaa vo vatanaaka naatarake vaura. Vika avuqavu nuvaqi vi vauvarora tiro, Kotiva nai kauqu ainqaa aqukeharo nimirerave tu haikara nimi vaura. Vokuka Kotirara kempukaiqaake iriqi vihara ti, vika *raioni* no tintatovaro kia vika ari vaura.

³⁴ Vokuka Kotirara kempukaiqaake iriqi viha noraiqaakero iha ite vaura qimpake vaura. Navutaaka vokuka arukarare tumanta vika ho ruqemake aiqu autute vi vaura. Vokuka ugerara vaiinti nahenti vaihavata, Kotirara kempukaiqaake iriqi vi vaurara ti, kempukaiqamavi vaura. Vika Kotirara kempukaiqaake iriqi vi vaiha, iqoka raquqi viha, vo vatanaa vo vatanaaka vika iqoka vaiinti naatarake vaura.

³⁵ Haaru nahenti vonavu kempukaiqaake Kotirara iriqi vi vauvarora tiro, Kotiva vika vaintinavu qutuvuka qaiqaa qaqi vara himpima nimite vaura.

Haaru vokuka Kotirara kempukaiqaake iriqi vi vaumanta vika navutaaka vika ravaagavuke tiha, Ne Kotira tauvaqa utu amitaige ni qaqi kaari variate, tumanta vika kia nai navutaaka turara iriraiti, vika qutuvi Kotira vataake koqemake variqi virara noraiqaake irihama, kia Kotira tauvaqa utu amitomanta vira kaara vika navutaaka vika ruqutuvi viha ruqutu taiqake vaura.

³⁶ Kotira vaiinti nahenti Kotirara kempukaiqaake iriqi vi vaumanta vira kaara hini kuka vika naaraahama nimiteha, hini kuka kaavu numiqake vateha, hini kuka rumpa vareha karapuhiqi vuru ke vaura.

³⁷ Vokuka vika oriqohai ruqutuvi viha vuru aruke vaura. Navutaaka vukai so varakeha viraqohai vokuka vaata tavaaraqaa teqa aquke vaura. Vika vokuka iqoka paipeqohai aruke vaura.

Vokuka vehiqamavi kia koqe utavaaqa vataraiti, sipisipi pahave memerave paha varakeha nonkuteha vi ani vaumanta vika navutaaka vika qoraiqama nimiteha vika rauntuke vaura.

³⁸ Vinavuka kia vaiintivanovata vaunaini vi anihia vaura. Vinavuka ainqinavuve, ori onavuqive, vata ntoma viraqive, vi anihia vaitaqi vi vaura. Ike, vataini vauka vinavukara koqe vaiinti nahentive tiataara vaumanta vinavuka qoraiqama nimite vaura.

³⁹ Vi vaiinti nahentika haaru vaiha Kotira uvara quqaave tivakeha Kotirara kempukaiqaake iriqi vi vaurara tiro, Kotiva vika quahama nimiteharo koqe vaiinti nahentive ti vauvarovata, viva nai kauqu ainqaa aqukeharo tu haikara kia vika varora.

⁴⁰ Haaru Kotiva tinavuaravata iriharo uva vo vatero thiaro, Te kia haaru vau vaiinti nahentika naane koqema nimirerave. Haaru vau vaiinti nahentikavata, naantiara vai vaiinti nahentikavata, vika vika vohaaraqiqi vaise te vika koqema nimitaari vika ho vai vaiinti nahentika vaivarave, tura.

12

Tenavu Karaitirara kempukaiqamake iriqi vuare tura

¹ Ho haaru vaiinti nahenti airithaa Kotira uvara quqaave tivakeha kempukaiqaake virara iriqi vi vaura. Maa entara vi vaiinti nahentika airithaa tinavu ututumate vaiha tinavu aituti variamantara ti, kaiqenavu vika nivuqaa vaiha kia popohanaara iraiti, koqemake Kotira aaraqaa viha nai aatarake nai aatarakemaci vuari.

Vika nivuqaa vaiha vo haika vo haikavano tinavu ravaaqavuke vai haikaravata, qora kaiqavano tinavu paama tivakero tuate vai haikaravata qaqla vara aquke, kia popoharaiti, koqemake nai aatarake nai aatarakemaci vuari.

² Kaiqenavu kantamaqi viha Ihuraqai tavamaqi vuari. Viva naane avuni viharo Kotirara kempukaiqaakero iriqiro vivara tiro, viva homa tinavuvata kahaqama timitairaqe tenavuvata vira aanare Kotirara kempukaiqaake iriqi viha vuari. Ihuva katariqaa qutu vireva umanta vira naaraahama amiteha kaurira haika amuvaro viva kia virara noraiqaakero iriraitiro, viva naantiara quaha kero variaina entarara iriharo tinavuarao tiro qutu vura. Maa entara viva uritarer Kotira kauqu tanarainima vairo.

³ Karaitiva vataini vaumanta qora kaiqa vare vau vaiintika anomake virara qora avu aato vateha qoraiqama amite vaura. Karaitira mintuntemake nivata qoraiqama nimitaivera, kia popoharaiti, kempukaiqama kema variqi vuata.

⁴ Ho qora kaiqa vare variaka ni qoraiqama nimite vaihavata, vika kia ni aruke variara.

⁵ Vo uva qara ntuva tora ne tauru kevora. Vi uvaraqiqi Kotiva niara ti maaqu raavurave thiaro mintima tiro:

Ti maaquo, Noravano Kotiva ariara viva avuqavu nuarire tiro, ai ruqutirarama are virara irihara variane. Viva ai atirarama kia popohehara muntuka qoraiqirara variane.

⁶ Kotiva nai antuqa ari vai vaiintirara qora aaraqaa qaiqaa vuantorave tiro, viva vi vaintira ruqutuqiro viharo atiqiro vi vairave. Viva ti maaquve ti vaina vaiintira ruqutuqiro vuanarove, tura. *(Uva Maara Koqera 3:11-12)*

⁷ Kotiva ni qaqi ruqutuqiro vi vairamanta, ne kempukaiqaake vaha Kotiva tinavu nai vaintairama ruqutuqiro vi vaivo tiata. Tara vaintie vira qova virara avuqavu nuarire tiro, kia vira ruqutukero utetaanaro? Vira qova nai maaquara avuqavu nuarire tiro, vira qaqiqa ruqutuqiro viharo utete vaira.

⁸ Kotivavata nai vaintaira ruqutuqiro viharo utete vaira. Viva kia nivata ruqutuqiro viharo utetairera, ne kiama vira vaintaira tarauka vairaiti, ne aaranahaina vaintairama vaivara.

⁹ Maini vataini tinavu qokavara tinavuvata ruqutuviha utete variamanta tenavu kia vika toma nimitaraiti, vikara koqe vaiintiveqai ti vaunara. Virara irihama tenavu tinavu qova Kotiva naaruvaini vaira, vira uva voqavata iriqi viha ekaa enta qaqi variqi vuari.

¹⁰ Tinavu qokavara vataini variaka vahuqa valha vika nai irikeha tinavu ruqutuke utete variara. Kotiva tinavu koqema timitateva iharo, tinavuvara vika nai takuqukero vainantemake variqi vuate tiro, tinavu ruqutuqiro viharo utete vaira.

¹¹ Vira qova nai vaintiru ruqutuqiro viharo utetaqiro vi vaivaro vi vaintiruva tiharo, Ike, ti vaatavano voqamakero aiha vivo, ti vaira. Minti tivaqiro viro viva noruqama viro, koqe vaiintivanoma varianaro. Vi vaiintiva ruqutukero utetairaqaahairo paru iarira vaiintiva vaharo avuqavu nuarira vaiintivama varianaro.

¹² Kotiva niara avuqavumake variqi vuate tiro, ni ruqutiharo utete vaimantara ti, kia aiqu kauqu raqantaate qumina vairaiti, aiqu kauqu raututa keha kempukaiqamake variata.

¹³ Ne Kotira aaraqaa avuqavumake variqi vi vaivaro ugerara vaiinti vovano Kotira aaraqaa rentuqaa rentuqamaqiro viharo, kia kuntavaivaima varero kaavu ntiraitiro, kempukaiqama kero ni avataqiro viharo variqiro vuanaro.

Qora kaiqa varaarorave tivakeha rauriha variate tura

¹⁴ Ne variqi viha antua uvavano qovaraiqantorave tivakeha ekaa vaiinti nahentia qihaaqama nimitaqi vuata. Ne kia qora kaiqa vararaiti, Kotira kaiqaqai varareka autiha variata. Kia Kotira kaiqa vararaitiro variqiro vi vairava, kiama ho Nora Kotira tavaanaro.

¹⁵ Hauri niqihairo vovano Kotiva vira aaqurihama amitetharo koqema amite vaira qaqira kero Kotira toma amitaantora. Hunkavi haikava kara qoraiqamake vaintema kero, niqihairo vo vaiintivano vo maara qovaramakero ni qoraiqama nimitaantorave tivakeha rauriha variata.

¹⁶ Hampi qaramaqi ni varia okaravave, Kotirara kia iri varia okararave, ni avutaini qovarama vuantorave tivakeha rauriha variata. Tinavu kaivaqava Isova minti vau vaiintiva vaura.

Viva avuni hoqare vatato vaintiva vaharo nai qatara tiharo, Kara timiraqe te ariarama avuni hoqare vatatai vaintiva vaivo tiarirara are ti qova ti koqema timiteharo tiaina uvaravata varenarave, tuvaro vira qatavano nai vakaara kara vira amuvaro nora.

¹⁷ Vi karara namakero vira naantiara vo enta viva nai qorara tiharo, Are ti koqema timitenia uvava tiva timiraqe te tenta vaintairavata koqemake variqi vuare, tuvaro vira qova kia mintiraitiro vira qoririma kovaro Isova iqii rataqiro viharo, tota nai qatara tivato uvava nunka karare tiro, tavovaro vi uvava nunka kaarira aarava kia ho vaura. *(Okara 27:30-40)*

Haarua uvaravata qaraaka uvaravata tura

¹⁸ Ne kia Kotira haarua uva iriaka vairaiti, ne vira qaraaka uva iriaka variara. Haaru Kotiva nai tivato uvava qovarama kareva auti vaumanta ni kaivaqaukavara Sainai Aiqina auvoqi oru ruvaaqumavi vaha tavovaro ihavano noraiqaakero itaqiro vi vauvaro viraqaahairo konkira aru uvavarao aaronavaanovata uti vaura.

¹⁹⁻²⁰ Minti vauvaro *aanumaaravano/nomavano* noraiqaakero uva tuvaro uvavano naaruvalhairo mintima tiro: Vaiintivanove, aantau vahivanove, maa aiqinara uru utu varairera, vira origohai ruqutu kaate, tura.

Uvavano minti tumanta vaiinti nahenti voqamake aatu itomanta ike mpo tiha, Kia qaiqaavata uva tiane, ti vaura.

²¹ Mosivavata vi haikava vi haikava qovaraiqura tavero tiharo, Oho, ti aiqu kauqu ntiri i vaimanta voqamake getehama vauro, tura.

²² Ho ne qaraaka uva Kotiva tivatora iriakara ti, ne kia nenta kaivaqaukavara voqantemake Sainai Aiqinaqaa viraiti, ne vo aiqinaqaa oruntaaka variara. Vi aiqinara

autu Saioni Aiqinave, Kotira vatuka Ieruharemi naaruvaini vai vatukarave, ne mini oruntaara. Vi vatukaraqima Kotiva qaqi variqiro vi vaiva vairo. *Enseli* airitahaa variamanta qaiqaa kaatavanovata viraqi ruvaaqumavi vaiha Kotira quahama amitaqi vi varianaini, ne mini oruntaara.

²³ Kotiva avuni hoqare vatatai vaiinti nahentika ruvaaqumavi varianaini ne oruntaara. Vi vaiinti nahentika nutu naaruvaini qara ruva taavaroma vairo. Ekaa vaiinti nahenti uva avuqavu qiarirava Kotiva vainaini ne mini oruntaara. Vataini avuqavu ni varia vaiinti nahentika vika mahaquravano vainaini ne mini oruntaara. Kotiva vika kahaqama nimtaimanta vika ho varia vaiinti nahentika variara.

²⁴ Ihuva Kotiva qaraaka uva tiva taatautaira qovarama kai vaiintiva vainaini ne mini oruntaara. Ihuva tinavuara iriharo nai naare raurukero qutu vurara tiro, Kotira qaraaka uvavano kempukaiqama viro vairo. Keniva Abelira arukovaro Abelira naarevano nteharo vira noqaa nai aru muntu kaane ti vaura. Ihura naarevano nteharo kia virara nai noqaa aru muntu kaate tiraitiro, vaiinti nahenti qora kaiqa vare vai uvara nunka nimtaimanta tiro, Ihura naarevano Abelira naare aataro kora.

²⁵ Vi uvira irihama rauriha variata. Maa entara Kotira uva qaraaka uva ni tiva nimi vaina vaiintira qoririma amitevora. Haaru Mosiva qaqi vaiintivano vaiharo Kotira haarua uva vaiinti nahenti tiva nimumanta vika kia vi uvira avataqi vuvaro vira kaara Kotiva vika ruquti vaura. Maa entara Ihuva naaruvaihainaa vaiintivano Kotira uva tinavu tiva timi vaira tenavu kia iriarera, tenavu ruqemake vuarira aarava kia ho varianaro.

²⁶ Kotiva nai haarua uva qovaraiqama kareva u entara Kotiva uva ti vauvaro vatavano qakiharo vaura. Maa entara Kotiva nai kauqu ainqaa aqukero tiharo, Naantiara te qaiqaa uva tiha, kiama te vataqaq kaki iraiti, te naaruvavatama qakainarave, tura.

²⁷ Kotiva qaiqaave tu uvira okara vaireva maantimama vairo: Kotiva tota vaharo tuvaro vatavata naaruvavata qovarama vura. Naantiara viva qaiqaa tiraro vatavanovata naaruvavanovata taiqa virarovata, Kotira vatuka kia ho qakaina vatukava qaqima varianaro.

²⁸⁻²⁹ Tenavu kia ho qakaina vatukaraqi vuvariraukara ti, kaiqenavu Kotirara koqema iarao tivaqi vuari. Kotiva tinavu Variqavano vaireva, ihavano tatoqa kainantema kero vaiinti ruqutuke vaivama vaira. Minti vairara ti, kaiqenavu vira aatu qeteha koqemakeha vira autu tuaheraqiqi vuari.

13

Maantimake nivaro Kotiva niara quahaarire

¹ Ne qata vakaa aura nakaa vaiha nariara nariara muntuka vataqi vuata. ² Vonaihai anika, nenta naavuqi koqemake ntita vate okarara kia qaqa karaiti, iriteha variata. Haaru *enseli* vonavu vataini qovarama vumanta vokuka vinavukara qaqi vaiintinavuve tivakeha vinavuka koqemake ntita vate kara nimura.

³ Ne nenta kena vaiinti nahenti karapuhiqama taakara tauru kevora. Nevata karapuhiqama taaka voqaara vaiha vikara mpo ike tiva nimiteha kahaqama nimtaata. Ni kena vaiinti nahenti qoraiqama nimite variamanta variaka, vikaravata iriteha variata. Vikavata nevata vohaa qaramake variara.

⁴ Naata vaati vare varia okarara koqe okarama vaivo tiata. Vira vaativanovata vira naatavanovata naitontaraqqai aatoqi iriqi viha variata. Vora naata vaati vataake hampi ni vaika Kotiva vikaqaa uva vataanaro. Hampiara voqaara qaramaqi ni vaika, Kotiva vikaqaa vataanaro.

⁵ Ne variqi viha kia monu vareraraqai noraiqaaake iriqi vuata. Ne nana nana haika vaterara homa vi haikara vatauro tiata. Kotiva tinavuara mintima tiro: Te kia ni qaqa karaiti, te ni hampata variqi virerave, tura.

⁶ Kotiva minti turara ti, kaiqenavu kia qetaraiti, muntuka qihaaqamake Kotirara mintima tiare:

Kotiva ti kahaqama timite vaiva vaimantara ti, te kia vaiintivano qoraiqama timitaainarara qeteha virerave, tiare. *(Ihi 118:6-7)*

⁷ Haaru ni qita vaiintinavu Kotira vakaaka ni tiva nimi vaura, ne vinavuka uva tauru kevora. Vinavuka Kotira uvira quqaa uvave tivakeha kempukaiqaaake Kotirara iriqi viha vuru qutu vurara iriteha nevata vinavuka inte iata.

⁸ Ihuva haaru vauntemakero vatevata naantiaravata viva vohaa qaramakero varianarove.

⁹ Ne avuqavu aaraqaa nuvaqi viha, kia aahuva uva, vo uva vo uva avataqi vuata. Ne variqi viha hauri tiha, Kaiqe vi karara kia naraiti, vi kararaqai namaqi vuare, tivora.

Kara ne varia okarava kia ho vaiinti nahenti kahaqiramanta vika koqe aaraqaa vivarave. Kotiva ni aaqurihama nimiteharo koqema nimite vaiva ni kempukaiqama nimitaira ne homa variqi vivara.

¹⁰ Kotira Naavuqi variaka, vika vo *ofaa* taintaqaa vaiha Kotira kaiqa vara amite variarara ti, vika kiama tinavu *ofaa* taintaqaaahai ho kara nevara.

¹¹ Kotira kaiqa vara amite variaka qjata vaiintivano Kotiva vaiinti nahenti qora kaiqa vare uvara nunka nimitaarire tiro, quara aantau arukeharo vira naare Kotira Naavu turuaraini vuru *raintumake/ruanainorimake* vaimanta vonavu quara aantau vira vaata vare muntu vatuka aaqaini keha iha quarake variara.

¹² Ihuva Kotiva vaiinti nahenti qora kaiqa vare uvara nunka nimitaarire tiro, vivavata vatuka aaqaini qutu viro nai naareqohairo vaiinti nahenti avu aato muntukaqi hiqama nimitora.

¹³ Viva vatuka aaqaini qutu vurara ti, kaiqe tenavuvata vatuka aaqaini otu vira hampata vaha kaurira haika vira vataake varaare. ¹⁴Kia maa vataraqaa tenavu maahota variaina vatukava vairo.

Naantiara qovaraiqiaina vatukararama tenavu aitutumaqi vi vaunara.

¹⁵ Karaitira kaiqara iriha kaiqenavu *ofaa* vo, tentanavu noqihai Ihuva tinavu Noravano vaivo tivakeha Kotira autu tuaheraainā uvara, vi *ofaara* Kotira vara amitaqi vuare.

¹⁶ Mintiaqi viha ne koqe kaiqa varaqi viha nai kahaqama amite nai kahaqama amitemaqi vuata. Ne mintiaqi vi vaivaro Kotiva virara koqe *ofaave* tivakeharo niara quaheharo varianaro.

¹⁷ Niqaa raqiki varia vaiintika uva ne koqemake iriqi viha vika vevaaraini variata. Naantiara vika Kotira avuqaa oru vaha niqaa raqikiqi vi vai uvara vuru Kotira tiva amirara ti, vika kia popoharaiti, niqaa koqemake raqikiqi vi variara. Ne vika uva iriqi vivera, vika quahehamma nái kaiqa varaqi vivara. Ne vika uva kia iriqi vivera, ne vika maara nimimanta vika kiama ho ni kahaqivara.

¹⁸ Tinavu iriha Kotira aarama timitaata. Tenavu koqe kaiqaqai ekaa enta vararerata auti vauraukara ti, tenavu koqe avu aatoqaa kaiqa vare vaunara.

¹⁹ Vi uvura irihama te niara mpo tiha, Ne Kotira aaraivaro viva vaaka ti tititama kairaqete te vainaini vuare, turo.

²⁰⁻²¹ Ho vaiinti nahenti muntuka paruma nimite vai Variqava, ni vo haika vo haika nimiramanta ne vira antuqa vaina kaiqara ho varaqi vuata. Viva Karaitira kempukaiqohairo ni kempukaiqama kairamanta ne Kotiva quahama nimite vaina vaiinti nahentika variata.

Ihuva Sipisipi Qova Noravano tinavu nai sipisipiqa raqiki vaiva vaharo, viva Kotira qaraaka uvavano ekaa enta qaqi variqiro vuainara nai naareqohairo kempukaiqama korara tiro, Kotiva vira qaqi vara himpima kora. Ho kaiqe Ihu Karaitira autu ekaa enta ekaa enta tuaheraqi vuare. Quqaave.

Ekaara uva tura

²² Te qeqo uvaqai ni qara ntuva nimitehara ti, te niara vihi tiha, maa uvarama iriqi vuate turo.

²³ Maa uvaravata iriata. Tinavu qata vakaa, Timotiva karapuhiqihairo taiqueroma. Viva vaaka maini anirera, te vikantima ni oru tavarera.

²⁴ Ne nentaqaa raqiki varia vaiintikaravata, ekaa Kotira vaiinti nahenti vokiakavata uva mantama timitaata. Ni qata vakaukavara Itarihainauka ni uva mantama nimite variara.

²⁵ Kotiva ni aaqurihama nimiteharo koqema nimitaqi viramanta ne variqi vuate, turo.

IEMI

Iemiva qara vara kora

Ihura arukovaro qutu viro qaiqaa qaqi himpiro naaruvinai oru vauvaro 10 ihie 15 ihie aitarovaro Iemiva maa uvvara qara ntua tora. Iemiva Ihura qatavano vaiharo Ihura vaitinti nahenti Ieruharemini vaukaqaa raqiki vaura. (*Kaiqa Varora 12:17, 15:13*)

Ieruharemhiah ntata raumpirima komanta vo vataini vo vataini otu vau vaitinti nahentika koqe aaraqaa kempukaiqamake variqi vuate tiro, Iemiva maa uvvara qara ntua tora. Ihuva ntita vato vaiintinavuka 12 navuqihairo vo vaitinti vira autu Iemiva vira qamaqova vaura. Ne vi vaitintirara vohaa vivave tivora.

¹ Te Iemika. Kotivavata, Noravano Ihu Karaitivavata, variamanta te vitanta kaiqa vaitintivanoma vai. Isarerি anku 12 navuqihai vo vataini vo vataini raumpirimavi otu variakarama te ni uva mantauro.

²⁻³ Ti qata vakaao, ni avatareva vo haika vo haikavano qovaraiqi vairera, kia ni mutukavano qoraiqira vairaiti, ne vi entara tiha, tenavu quahehaqai vairerave tiata.

Tenavu Ihurara kempukaiqaake iriqi viha avatara haikavata aataraqi vuainaraqaaahai tenavu voqavata kempukaiqamavi Kotira aaraqaa homa virara.

⁴ Ne avatara haika aataraqi vivi, viraqaaahai ne kia ahora vaitinti nahenti vairaiti, ne anomake norugamavi vaitinti nahentika variqi viha, kia vo haikara aavoqivara.

⁵ Kotiva kia kampaiqi vaiva, viva vo haika nimiharo kia nitiraitiro, paruma keharo nimi vaiva vairara tiro, niqihairo vovano kia koqe avu aato vatairera, viva Kotira irairaro Kotiva vira koqe avu aato amiarira.

⁶ Hauri niqihairo vovano taara aato iriharo Kotira aaraantora. Viva quqaama Kotiva ti kahaqianarove tivakeharo Kotira aaraarira. Taara aato iri vaiva nana haika voqaarae vairo? Vi vaitintiva vaireva, uvaivano namari venta vuruvike virivike ira voqaarama vaira. ⁷⁻⁸ Vi vaitintiva taara aato utiharo vo aaraqaa vuru rauqi egero vo aaraqaa vira rauqi egero i vaiva vairara tiro, hauri viva Kotirara ti kahaqianarove, tiantora.

Vehi vaitintiaravata airi airaira vatai vaitintiraravata tura

⁹ Tinavu qata vaka vovano vehi vaitinti vairaro Kotiva vira noraiqama kairera, viva quhaari. ¹⁰ Tinavu qata vaka vovano airi airaira vatairava vira avu aato kenko tiraro tiharo, Ti airaira qumina haikave. Te vehi vaitintiqaima vauro, tinarara iriharo quahaanaro. *Kaampivano/Qinaaravano* inaaraiqa itaqiro viro, aqu ntua vi vaintema kero, airi airaira vate vaira vaitintivavata inaaraiqa varikero taiqa vuanaro.

¹¹ *Kaampivano/Qinaaravano* koqema kero ite vaivaro nora kuari iteharo tatoqa kaivaro aqu ntua vi vaira. Tota koqemakero ite vaiva qumina aqu ntua vi vaintema kero, airi airaira vate vaira vaitintivavata nai kaiqa varaqiro viro, vuru quminama qutu vuanaro.

Qora kaiqavano vaitinti avataainarara tura

¹² Vaiintivano Kotira aaraqaa viharo tavairaro avatara haikavano vira avatairaro viva kia popoharaitro kempukaiqama kero variqiro virera, Kotiva virara iriharo vira koqema amiteharo virara, Are ekaa enta qaqi variqira vinarave, tianaro. Kotiva nai kauqu aiqiqaa aqukero tiharo, Tiriara muntuka vate vai vaitinti nahentika ekaa enta qaqi variqi vivarave, turara tiro, viva minti tura.

¹³ Qora kaiqavano vo vaitinti avatairera, hauri vi vaitintiva tiharo, Kotiva ti avate vairo, tiantora. Qora kaiqavano Kotira kia ho avate vaira. Kotiva kia vo vaitintiara qora kaiqa varaaire tiro, vira avate vaira.

¹⁴ Maantima kero qora kaiqavano vaitinti hampiqamake vaivar qora kaiqa vare vaira: Vaiintivano nai avu aatoqihairo qora kaiqa varaainarara iriqiro vivaro nai avu aatoqihairo irite vai uvava vira kuntama varero ¹⁵ vi kaiqara varaaane ti vaivaro qora kaiqa vare vaira. Viva qora kaiqa varaqiro viro, vira kaara vuru qutu vuaina haikara varero vuru qutu vi vaira.

¹⁶⁻¹⁷ Ti qata vakaao, Kotiva kia vaitintivano qora kaiqa varaaire tiro, vira avataanarove. Vovano una uva minti tirera, ne vira uvvara quqaa uvave tivora. Ekaa koqe haikavano Kotiva inaihairo tuvi vaira. Ekaa naaruvinai ite vai haikara autukero vataiva, Kotiva, viva koqe haikaqai tinavu timi vaivama vairo. Naaruvinai ite vai haikava itakero qimpakero i vaivarovata, Kotivaqai qaqi itaqiro vi vaivama vairo.

¹⁸ Kotiva tinavuvara vika ti vaintima vaivarave tumanta tenavu vira quqaa uvvara quqaave tivake, vira vaitintiqamavi vaunara. Avuni iratero aqutatai tavara voqara tenavu hoqare vira vaitintiqamavi vaunara.

Ne Kotira uva qumina iriha vira kaiqavata kia varevorave tura

¹⁹ Mpo, ti qata vakaao, ne maa uvara iritaata: Ne vovano tina uvara naane vaaka iri, viraqaaahai qakomake nenta uva tiva amiata. Kia vaaka arara itaira tioriata.

²⁰ Vaiintivano vaaka arara itainaraqaahairo kiama Kotiva avuqavuqi vaira okarava qovaraiqianaro. ²¹ Vi uvarara irihama ne hampi ni vai okararave, ekaa qora kaiqa vare vai okararave, qaqlira kaata. Ne nenta autu vara muntuvi vatainiqamake Kotiva ni avu aatoqi vataina uvara, vi uvara iriqi vi vaivaro Kotiva ni kuvantu nimitaarira.

²² Ne Kotira uva iriha qumina vahia kia vira kaiqa vararaiti, ne nentara unahaa tiha tenava homa vauro tivora. Ne vira uva iriha vi uvava tintemake niha kaiqa varaata.

²³ Vaiintivano Kotira uva iriharovata, kia vira kaiqa vararaitiro qumina vaiva, vi vaiintiva *memontaaraqihairo/inupiqihairo* nai viri tavehara te maantimake vauraukave tivakero, viraqaaahairo vaaka nai viri tavaira tauruke vaira.

²⁴ Vi vaiintiva *memontaaraqihairo/inupiqihairo* nai viri tavehara te maantimake vauraukave tivakero, viraqaaahairo vaaka nai viri tavaira tauruke vaira.

²⁵ Vaiintivano Kotiva mpeqa uva tivataira anomakero iriqiro viharo kia tauru karaitiro, qaqlira iriqiro vi vairava vairaro Kotiva vira kuvantu amiteharo viva ekaa kaiqa vare vainara koqema amitaanaro.

²⁶ Vaiinti vovano te Kotira uva iri vaura vaiintikama vauro tivakeharo kia nai nogaa koqemakero raqikiqvirera, vira uvavano una uvaqai vairaro viva te Kotira uva iri vauraukuma vauro ti vai uvavavata qumina uvaqaima varianaro.

²⁷ Maantima kero vaiintivano Kotira tinavu Qora vira aaraqaa avuqavuqama kero niharo vira autu tuaheraanaro: Vi vaiintiva viqa vaintinavuvata, tentoqa nahentinavu maara vare vaikavata, oru kahaqama nimitaarira vaiintivama varianaro. Viva minti-aqiro viharo vataihainaa okaravano ti ravaaqavu kaantorave tivakeharo avuqavu ni vaira vaiintivama varianaro. Minti vaina vaiintirara Kotiva tiharo, Quqaa viva ti aaraqaa ni vai vaiintivavema, tianaro.

2

Ekaa vaiinti nahenti vohaa qarama nimitaate tura

¹ Ti qata vakaao, tinavu Noravano Ihu Karaitiva viva ekaa naaruvinai vai haikaraqaa raqiki vaiva vaimanta ne vira uva iriqi viha, vo vaiinti taveha qora vaiintive tivakeha vo vaiinti taveha koqe vaiintive tivora.

² Ne ruvaaqumavi vainaini tavaivaro vovano nai kauquqi *kori* oriqohai autute *ringira* hampakumatero koqe utavaaqa nonku tairava anintairaro vehi vaiinti vovano nai utavaaqa nihiqama vinara nonku tairava, vivavata anintairera, ³ hauri ne koqe utavaaqa nonkina vaiintirara tiha, Koqe tainta maini oquvuanne, tivake vehi vaiintiara, Mini qaqlira himpiti variane. Qaqi vatakanta oquvira variane, tivora.

⁴ Ne mintima keha vaiinti raira kevora. Ne mintimake vaiinti raira kaivera, ne qora ko raire vai vaiintira voqaara vahia, qora okarara irihama mintivarave.

⁵ Ti qata vakaao, te tiari iriata. Kia airaira vataa vaiinti nahenti variamanta vataini variaka vikara ne vehi vaiinti nahentive ti variavarovata, Kotiva vi vaiinti nahentika kaamate vaira. Vika Ihurara kempukaiqaake iriqi vivi, Kotira vatuka varevara. Kotiva nai kauqu aiqiqaa aqukero tiharo, Tiriara muntuka vate vai vaiinti nahentika vikama ti vatuku varevarave, tura.

⁶ Vehi vaiinti nahenti mintimake variamanta ne vika nutu vara vatainiqamake variarave. Taukae ni airi maara nimiqi viha, ni rarau vareha ko iri variaka nivuqaa vuru ke variarave? Airi airaira vataaka, vika minti variarave. ⁷ Ne Ihura vainti variamanta airi airaira vataaka, vikama Ihura autuara qora autuve ti variarave.

⁸ Kotiva avuhainaava maa uvara tiva taiva mintima tiro:

Ninara antuqa arinantema kera vo vaiintiaravata antuqa arirara variane, tura. (*Wkp 2:8*)

Ne vi uvara iriqi vivera, ne avuqavuqamake variqi vivara. ⁹ Ne vo vaiinti koqe okara autu amite, vo vaiinti qora okara autu amite i vaivera, vira kaara Kotiva niara ne ti uva raqa kaavo tivakero niqaa uva vataanaro.

¹⁰ Vaiintivano Kotiva tivatai uvara ekaa iriqiro viharo vohaiqaqai raqa kairera, Kotiva vira kaara tiharo, Are ti uva vohaiqaqai raqa kehara ekaa uvama raqa kaarao, tianaro.

¹¹ Kotiva tiharo, Kia naata vaati vare okarara raqa kaate, turave. Kotiva vi uvara tuva, viva qaiqaa vo uvavata tiharo, Kia vora arukaane, turave. Ne kia naata vaati vare okarara raqa karaiti, vaiintiqai aru kaivera, ne Kotira uva raqa kekama vaivarave.

¹² Ihuva ni kuvantu kaimanta ne vira vainti variarara ti, ne koqe uva tivaqvi viha koqe kaiqaqai vare vaivaro Kotiva kia niqaa uva vataarira.

¹³ Ne maa entara kia vorara vorara aaqurihamma nimitaivera, naantiara Kotiva ko thiharoma nintavata kiama aaqurihamma nimitaanaro. Ne vorara vorara aaqurihamma nimitaivera, homa ne ko aatara kevara.

Ne Ihura uva iriqi viha hauri vi uvara kia avataqi vivorave tura

¹⁴ Ti qata vakaao, ne tavaivarao vaiinti vovano, Te Ihurara kempukaiqamake iriqi vi vauraukave, tivakeharo kia koqe kaiqa varaqiro virera, vira uvavano quminaiqama viraro Kotiva kiama vi vaiintira kuvantu kero vitaanaro.

¹⁵ Ne tavaivarao niqihairo ni qata vakaave, aura nakaa vovano kia ho utavaaqave karave vatairera,¹⁶ ne vira kia kahaqiraiti, qumina virara tiha, Koqe kara nehara koqe utavaaqa nonkuane, ti vai uvava kia ho vira kahaqianaro.

¹⁷ Vira voqaara ne kia voka voka kahaqivera, ni kaiqavano kia koqe kaiqa vairamanta ne Ihurara quqaa vivave ti vai uvava qumina uvaqaima varianaro.

¹⁸ Vovano ti uva aatara kareva auti vaharo mintima tianaro: Homa vaiinti vovano Ihurara kempukaiqama kero iriqiro vi vairaro vaiinti vovano koqe kaiqaqai varaqiro vuanarove, tirera, te nai vira minti tiva amirera: Are nantiakerae kia vora kahaqiraitira, kia koqe kaiqa vararaitira, Ihurara kempukaiqama kera iriqira vinarare? Te voka voka kahaqama nimitaqui vi vaha Ihurara kempukaiqamake iriqi vi variarirara are homa ti uvavano quqaa uva variainarara tavenarave, tirara.

¹⁹ Are quqaama Variqa Kotiva vohaiqavanoqai vaivo, tianara. Are koqemama minti tira. Ho tovevaana vikavata quqaama Variqa Kotiva vohaiqavanoqai vaivo ti variara. Vika minti tivakehama voqamake aiqo kauqu ntiri ntiri i vaimanta qeteha variara. ²⁰ Ai avu aatovano hampiqama vivara variarao. Ai avu aato kenko tirara iriane. Are kia voka voka kahaqama nimitaraitira, kia koqe kaiqavata vare vairera, are Ihurara quqaa vivave ti vaira uvava qumina uvaqaima varianaro.

²¹ Tinavu kaivaqava Eparahaamiva Kotira uva iriharo nai maaqu Aisaakira varakero Kotira iha quara amitareva auti vauvaro Kotiva vira kaiqa tavero tiharo, Te ariara avuqavu ni variana vaiintirave turo, tura. Kotiva Eparahaamira kaiqara iriharo minti turama. *(Okara 22)*

²² Are kiae tavera? Eparahaamiva Kotira uvvara quqaave tivakero viraqaahairo viva tuntema kero koqe kaiqa varora.

Eparahaamiva Kotira uvvara quqaave tu uvavavata, viva koqe kaiqa varovavata, vitantavano nai kahaqi nai kahaqamaqi vi vaura. Viva koqe kaiqa varoraqaahairo viva Kotirara quqaave tu uvava ho vaura.

²³ Eparahaamiva mintiaqiro vurara tiro, Kotira vukuqi qara ntuvato uvava vivau vaura. Mintima tiro:

Eparahaamiva Kotira uvvara quqaave tuvoro Kotiva tiharo, Are ti uvvara quqaa uvave tiaramenta te are tiana uvvara irihama ariara avuqavu ni variana vaiintirave turo, tura. *(Okara 15:6)*

Virara iriharo Kotiva Eparahaamirara tiharo, Viva ti tonti vaiintima vaivo tura.

²⁴ Ne vi uvvara irihama maa uvvara okara kankomake iriata: Vaiintivano kia koqe kaiqa vararaitiro tiharo, Te Kotira uva iri vauro, ti vaina vaiintira Kotiva kia vi vaiintirara avuqavu ni vai vaiintirave tianaro. Vaiintivano Kotira uva iriqiro viharo koqe kaiqavata vare vaina vaiintira, virara Kotiva avuqavu ni vai vaiintiravema tianaro.

²⁵ Haaru hampi nariro ni vau nahentiva Rehaapiva Isarer iqoka vaiintitanta ampe-qireka anutanta nai naavuqi kukeqakero, vitanta kahaqumanta vitanta ho evaara vo aaraqaa ruqemake anirante vurara tiro, Kotiva Eparahaamirara tuntemakero, Rehaapira kaiqaravata iriharo virara, Viva avuqavu ni vai nahentirave, tura. *(Iosuua 2)*

²⁶ Tenavu irunarave. Vaiinti maraqravano kia vira vaata hampata vairaro vira vaatavano qumina qutu vuaina vaatavama varianaro. Vira voqantemakero Ihurara quqaa vivave ti vai uvava kia koqe kaiqa hampata vairera, vi vaiintiva Ihurara quqaa ve ti variarirava qumina uvaqaima varianaro.

3

Nenta maaqiriqaa koqemake raqikiqi vuate tura

¹ Ti qata vakaao, tenavu Kotira maara okara tiva nimi vauna vaiintinavuka variariraro naantiara Kotiva tenavu vare vauna kaiqara voqavata anomakero rairakero tavaanarove. Virara irihama hauri niqihai airi vaiinti vi kaiqara varareka auti vaivora.

² Airi enta tenavu ekaa avuqavuqaakeha kaiqa vararerave tivakehavata, hampiqamake vare vaunara. Vaiintivano kia ekaa kaiqa hampiqamakero vararaitiro vairera, vi vaiintiva kia ahora vaiintivano vairaitiro, viva mpeqa vaiintima varianaro. Viva nai vaataqaa koqema kero raqiki vaira vaiintivama varianaro.

³ Tenavu vire iainanaini *ohivano* vuarire ti, tenavu *aini* inaaraiqa vira noqi aequ amite naaquntaqaa utu varauraro *ohi* norahaavano tenavu vire una aararaqai vi vaira.

⁴ Ne *sipiaravata* iriata. *Sipi* norauhaavano vaivarovo uti vaivarovo *sipi* aeqi inaarauqohairo tuqantaa kaivarovo *sipivano* vaiintivano vire i aararaqaa vi vaira.

⁵ Vira voqaantema kero, vaiinti maaqiri inaarauruvano valharovata, nora kaiqa vare vaira. Ho tavaata. Iha auru inaarauruvano itaqiro viharo nantave ahakave ekaa itake vaira.

⁶ Vaiinti maaqirivano qora uva tiharo iha auru itaintema kero, vo haika vo haika qoraiqamake vaira. Qora uvavano maaqiriqaahairo qovaraiqi valharo ekaa vaata qoraiqamake vaira Sataanira vatukaqihairo ihavano anirero vaiinti maaqiriqaa ite vaivarovo viva variqiro viharo qora kaiqa vo kaiqa vare vaira.

⁷ Vaiintivano ekaa aantau vahive, memaruve, havukave, ekaa vi haikara tumuntaari rava ho vaivarovata, ⁸ viva nai maaqiri tumuntaarirava kia ho vaira. Maaqirivano vaireva, viva nai varaaataa ivaro qora kaiqa vare vai haikavama vairo. Vaiinti aruke varia uhikaava maaqiriqima mpiqe vaira.

⁹ Tenavu maaqiri viraqohai Nora Kotira tinavu Qorara quaheha variaina uvara tivake, viragaahai qaiqaa qoqaraa maaqiri vohaa viraqohai vaiinti vo Kotiva nai voqaraa autukero vatairara vaaquqama vuane ti vaunara.

¹⁰ Ike, vohaa noqihairo quahe vaira uvavavata, qora uva tiva amite variaina uvavavata anire vaira.

Ti qata vakaao, tinavu noqihairo kia mintiataarave. ¹¹ Hoe aruvuqihairo koqe namarivanovata hunkavi namarivavata nte varianarove? Kia hove.

¹² Kaivuvano kia kampu tava irate vairave. Tauveravano kia kaivu irate vairave. Are hunkavi namariva nte vairaqaqhira kia ho koqe namari kaqenarave.

Koqe uvaravata koqe avu aatoravata tura

¹³ Niqihairo vaiinti vovano koqe uva iri vai vaiintivave, koqe avu aato vai vaiintiva vairo? Vi vaiintiva kia nai autuara noraiqaakero iriraitiro, viva koqemakero variqiro viharo koqe kaiqa vare vairamanta vaiinti nahenti vira kaiqa tavehamma virara koqe vaiintive tivara.

¹⁴ Vaiintivano vo vaiinti koqema amitaainara kaara ne vira toma amiterave, ne nentaraqai iriha nora vaiinti vairerave tivakeha, nai aatarake nai aatarake i vairave, ne minti minti ivera, ne kia ho nentara tiha, Tenavu koqe vaiinti nahentima vauro, tivara. Ne minti tiha ne nenta qora kaiqa varerara una uva tivora.

¹⁵ Vi avu aatova kia naaruvalihairo qovaraiqiraitiro, viva vataihairo qovaraiqama vi vaira. Sataaniva vi avu aatora qovaraiqamake vaivarovo vaiintivano vi avu aatora irikeharo qora kaiqa vare vaira.

¹⁶ Vo vaiintivano vo vaiinti koqema amitaainara kaara vaiinti nahenti vira toma amite vaiha vika nariaraqai iriha, nora vaiinti nahenti vairerave ti varianaini maa haikavavata varianaro: Hampi okara vare vaivave, qora kaiqa vo kaiqa vare vaira mini varianaro.

¹⁷ Vataihaina okaravano mintima vaivarovata, naaruvalihairo Kotira avu aatovano vo avu aatoma vairo. Avuniqamakero vira avu aatovano vaireva, koqe avu aatoqai vaivarovo vaiintivano vi avu aatora avataqiro virava koqe kaiqaqai varaqiro vuanaro. Viva kia antua uva tiraitiro, qihaaqama nimitaqiro viharo, kia nai uvaqai iriraitiro, viva vo vaiinti uvavata iriqiro vuanaro. Viva vorara vorara ike mpo tiva nimitaqiro viharo viva vika koqema nimitaqiro vuanaro. Viva viravata voravata vohaa uvaqai tiva nimitaqiro vuanaro. Viva kia unaqaraiqaa keharo Kotira kaiqa vara amitaanaro.

¹⁸ Tenavu vokiaka qihaaqama nimitaqi viha vohara vainti variaina okararaqahairo avuqavuqamake nuaina okaravavata qovaraiqianaro.

4

Vataihaina okarara antuqa ari vairara tura

¹ Ne variavaro taraqihairoe antua uvavanove, iqoka raqi vai uvavave anire vairo? Kaiqe te ni tiva nimiasi. Ni avu aatoqihairove ni muntukaqihairove qora kaiqa, vo kaiqa vo kaiqa varevaqai anireharo niqaa raqikireva auti valharo ni avutaqvata iqoka raquqiro vi vaira.

² Ne vo haika vo haika varareka auti vaiha kia ho vi haikara vare viragaahai ne tiha, Kaiqe vaiinti arukeha vi haikara varaare, ti variara. Ni muntukavano vo haikara nti vaimanta ne vi haikara kia vararaiti, vira kaara ne antua uvaqai tivaqai viha, iqoka raqi variara.

Ne ni muntukavano vai haikara Kotira iraataara vaimanta ne kia virara iraraiti, ne kia vi haikara vare variara.³ Ne Kotira aareha, hampiqama keha vira ire variarara tiro, Kotiva kia vi haikara ni nimi vaira. Ne nenta qumina quaheraraqai iri vaiha Kotira aare variara.

⁴ Nai qoraanti qaqlira kero vo qoraintintiro hampi ni vai nahentira voqaara ne variara. Ne kiae iriavo? Ne vataini vai haikaraa tontiqihama ne Kotira navutaiqama amite variavo. Vata maqaahainaa haikara iriqiro viharo vi haikara tontiqi vairava, viva Kotira navutavama varianaro.

⁵ Kotira vukuqi vi uvarara qara ntuvatora ne virara qumina uvave tivora. Mintima tiro: *Tinavuara Kotiraraqai muntuka vataate tiro, Kotiva nai Maraqua tinauvu timirave, tura.*

⁶ Kotiva tinavuara vika qora kaiqa aatara kaate tiro, viva tinavu aaqurihama timiteharo koqema timite vaiva vaira. Kotira vukuqi mintima tiro: *Nai autuaraqai iri vaina vaiintira Kotiva qoririma amitaanarove. Kia nai autuara iri vaina vaiintira Kotiva vira aaqurihama amiteharo vira koqema amitaanarove, tura.* (*Uva Maara Koqera 3:34*)

⁷ Ne nenta autu vatainiqaa keha Kotira vevaaraini variata. Sataaniva ni naatara kaantorave ti, ne kempukaiqamake variqi vivaro viva ni mini kero aiqu aututero kantama vuari.

⁸ Ne Kotira aumanto oru vaivaro Kotiva ni aumanto variarira. Vaiintivano nai kauquqaahairo painaama hiqama kainantemake, ne qora kaiqa vare vaika nenta muntuka hiqama kaivaro qora kaiqavano kia niqi variarira. Ne Kotira avataaqi vuro tivakeha taara aato iri variaka, nevata nenta muntuka hiqama kaata.

⁹ Ne nenta qora kaiqa vare vairara kia naaraihiha quaheha vairaiti, ne vira kaara ni muntukavano qoraqidira iqi rateha variata.¹⁰ Ne Nora Kotira avuqaa nenta autu vatainiqama kaivaro Kotiva ni autu noraiqama kaarira.

Ne nenta navunaaka pupitevorave tura

¹¹ Ti qata vakaao, ne kia nai turoqarama amite nai turoqarama amite iha variata. Nai qata vakaara turoqarama amiteharo pupite vaiva, viva *iasira* voqaara vaharo Kotiva tivatai uvaravata pupite vairave.

*„Niqihairo vovano minti vairera, te virara mintima tirara: „Are mintimaqira viharama are *iasira* voqaara Kotira uva rairakehara vira uva kia avataqira vi variarao.*

¹² Kotiva nai vivaqai vi uvvara tivatairave. Nai vivaqai vaiinti nahentiera koqe vaiintive qora vaiintive ti vairave. Nai vivaqai *ko* tivakeharo vaiinti vehakuma amite vairave, vira aru taiqake vairave. Are ta vaiintiva vaharae nena kena vaiinti nahentiera pupitehara variarao? tirara.

Hura qovaraiqiaina haikara ne vate kia kankomake iriarave tura

¹³ Ne hini vaiintinavu tiha, Kaiqe vateve hurave tenavu nora vatuka voqi oru vaiha, vohaa ihiara monu kaiqa varaqi viha airi monu varaare, ti variaka, ne iri vaise te ni uva vo tiva nimiari.

¹⁴ Hura qovaraiqiaina haikaraa ne kia kankomake iri variara. Ne qaqi variqi vi variava nana haika voqaarae vairo? Kaiqe te virara ni tiva nimiari. Tonavuvano toqaqi hihipaama viro inaaraiqa varikero ruqema vira voqaara ne qaqi variqi vi variava vira voqaarama vairo.¹⁵ Virara irihama ne kia te minti minti irerave tiraiti, ne mintima tiata: Kotiva tirirara hove tirera, te minti mintirerave, tiata.

¹⁶ Vate ne nenta nutuqai viriniqi vaiha ne nenta mahutaqai ti variavo. Minti ti varia okarava qora okarama vairo.

¹⁷ Vaiintivano tiharo, Vi kaiqara koqe kaiqa varaataara vaimanta te qaqlirake kia vararerave ti vairava, vi vaiintiva Kotira uva raqama kaanaro.

5

Airi airaira vataakara tura

¹ Ne airi airaira vate variaka maa uvvara iriata: Oho, ne naantiara voqamake qoraiqamavi entarara irihama, maa entara iqi rataqi vihamma ike mpo tivaqji vuate.

² Ni onaanavano nterea vuariravama vaivo. Oqokavano ni utavaaqa nama kaariravama vaivo.³ Ni *kori* orive, ni *silvaa* orive, uvairiqama vuariravama vaivo. Naantiara uvairiqama vuarirava niqaa uva vateharo iha auruvano itainantemaa kero, ni vaata namaqiro viharo taiqa kaanarove. Ne airaira ruvaaqumake vaterara iriqi viha, maa vataraa taiqa kaaina entarara kia iriraiti variavo.

⁴ Tavaate: Ni kaiqa vaiintinavu ni kara qantu nimite variamanta ne monu nimihama hini monu tuate hini monuqai vika nimi variarave. Ne minti variamanta ni kaiqa

vaiintinavu vira kaara ike mpo ti variavaro Kotiva naaruvaini iqoka vaiintiqaa raqiki vaiva, viva vika uva iri vairave.

⁵ Ne vatainai vaiha koqe haika, vo haika vo haika vateha ne nentaraqai iriqi viha, nenta quaheraraqai iri variarave. Ne airi kara namaqi vi variavaro ni vaatavano noruqe vaimanta nentavano nenta aruke entara qeramate variavo.

⁶ Qora kaiqa kia vare varia vaiintika variamanta ne qumina vikaqaa uva vateha vika aruke variarave. Vika kia ni qoraiqama nimite variamantavata, ne qumina vika aruke variarave.

Ihura veka vaiha muntuka paruma keha variate tura

⁷ Ti qata vakaao, ne Noravano qaiqaa tuvuainara veka vaiha muntuka paruma keha vaivaru tuvuarira. Ne kara ututai vaiintirara irihama variata. Viva kara ututero kia vaaka qantukero naraitiro, viva qaqi vahilo aequo veka vaivaro koqe aequovano rivaro kara qampiqaaviro mpeqaiqama vivaro viva oru qantu varero viri ne vaira.

⁸ Nevata vira voqaara Ihura veka vaiha muntuka paruma keha variata. Noravano tuvuaina entava aumanto vairara ti, ne kempukaiqamake variqi vuata.

⁹ Kotiva niqaa uva vataantorave ti, ne kia nuntu nauntu tiraiti, kia nai ati nai ati iata. Nora *Iasivano* anirero qentiana vahilo urigetareva auti vairo.

¹⁰ Ti qata vakaao, haaru paropeti vaiintinavu Kotira autuara iriha kia qetaraiti, vira uva tiva nimiqi vi vauka, ne vikara iriteha variata. Vika aihavu haikara vareha muntuka paruma kehaqai vaura. Nivata qoraiqama nimite entara nevata aihavina haikara vareha muntuka paruma keha paropeti vaiintinavu iriha, nevata vika variqi vi vauntemake variqi vuata.

¹¹ Haaru paropeti vaiintinavu qoraiqama nimite vaumanta vika kia Kotira kaiqa qaqla karaiti, kempukaiqamake vare vaurara ti, tenavu vinavukara tiha, Vika Kotiva koqema nimite vau vaiintikave, tunara.

Iopuva tinavu kaivaqava, vivavata muntuka paruma kero vau vaiintivama vaura. Ne vi vaiintirara iriara. Iopuva nora maara varo entara kia Kotira qaqla karaitiro, viva muntuka paruma kero variqiro vi vauvaro, viraqaahairo Noravano Kotiva vira koqema amiteharo vira qaiqaa noraiqama kora. Noravano anomakero tinavuara ike mpo tiva timiteharo aqurihama timite vaivama vairo.

Kauqu aiqiqaa aqukaaina okarara tura

¹² Ti qata vakaao, kaiqe te Kotiva anomakero qioqama taina uvvara ni tiva nimiasi. Ne kauqu aiqiqaa aqukeha uva tirera, kiama naaruvaihainaa haika autuqaave, vataihainaa haika autuqaave, vo haika autuqaave tiraiti, ne uva tivaqvi vihamo, eo tivera, eoqai iata. Ne kiave tivera kiaveqai tiata. Ne minti tivaro Kotiva kiama niqaa uva vataanaro.

Kotira aare kempukarara tura

¹³ Niqihairo vaiinti vovano nora maaraqi vairera, vi vaiintiva Kotira aaraarira. Vovano quaheharo vairera, viva ihi tiharo Kotira autu tuahera kaarira.

¹⁴ Niqihairo vovano rovara varairera, viva *elda* vaiintinavu naarama kairamanta vika ruvaaqumavi vaiha tinavu Nora Vaiinti autuqaa vahavera viraqaa aqu amiteha, Kotira aarama amitaata.

¹⁵ Ne mintiake Kotira aareha tiha Kotiva quqaama vira koqema kaanarove tivaro Kotiva vira koqema kaarira. Noravano vira rovara taiqa amiteharo viva qora kaiqa varaaina uvavarata nunka amitaanaro.

¹⁶ Ne vi uvvara irihama kia nenta qora kaiqa vare uvvara kukeqa karaiti, vi uvvara qoqaa tiva qovaramake nai tiva ami nai tiva ami iata. Ne mintiaqi viha nariara nariara iriha Kotira aaraivaro viva ni rovara taiqa nimitaarira. Avuqavu ni vai vaiintiva Kotira aare vai uvava, kempuka vaivaro Kotiva vi uvvara iri vaira.

¹⁷ Tinavu kaivaqava Elaitavaa, vivavata tinavu aanarerero qaqi vaiintivana vaura. Viva kia aequo ruarire tiro, Kotira kempukaiqama kero aarovaro Kotiva vira uva iruvoro aequovano taaramo ihi hini ihi tavaaranavata varakero kia aequo rura.

¹⁸ Kia aequo ruvaro viraqaahairo Elaitavaa aequo ruarire tiro, Kotira qaiqaa aarovaro naaruvaihairo nora aequo ruvaro karavano koqema kero qampiqa. (*1 King 17:1; 18:41*)

Vaiintivano koqe aara qaqla kaainarara tura

¹⁹ Ti qata vakaao, niqihairo vovano quqaama uva qaqla kero qora aaraqaa nireva viraro viraqaahairo vovano vira vitero koqe aaraqaa vuru kaaina vaiintirara tirera. ²⁰ Vira kahaqama amitairaro qora aara qaqla kero orurantero aniaina vaiintiva kiama ekaara qutu vuanaro. Kotiva vi vaiintiva qora kaiqa varaaina uvvara, vo uva vo uva nunkama amitaanaro.

1 PITAA

Pitaava avuniqamakero qara vara kora

Ihura arukovaro qutu viro qaiqaa qaqi himpiro naaruvaini oru vauvaro 30 ihie 35 ihie aitarovaro Pitaava maa uvvara qara ruva tora. Vi entara Iutaa maara uva iruka Ihura vaiinti nahenti qoraiqama nimite vaumanta Ihura vainti airitahaa Ieruharemiqihaiive, Iutuhiave, tinavuvata harivorave tivakeha, viragaahai katu vare vo vataini vo vataini vaireka surama. Vika mini mini vaumanta Iutaa vaiinti mini vaukavata, vaiinti vonavuvata, vika qoraiqama nimite vaura. Ihura vaiinti nahenti Ihura kaara maara vareha popohevorave tiro, Pitaava vika kahaqireva maa uvvara qara ruva tora. Ihura vainti 12navuqihairo Pitaava vovano vaura.

¹ Te Pitaaka. Ihu Karaitiva ti noraiqama kaimanta te vira kaiqa vare vauraukama vai.

Ne vaiinti nahenti raumpirimavi Pontiaasinive, Karesiainive, Kapadosiainive, Esainive, Bitiniaiinive, otu variakara irihama, te maa qarara ni nimite.

² Haaru Kotiva tinavu Qova ne kia vau entara niara ti vainti variate tiro, ni nai kaama tora. Niara koqe vaiinti nahentiqai variate tiro, nai Maraquira ni nimura. Niara Karaitira uvaqai iriqi vuante tiro, Karaitira naarevano ni hiqama nimitora.

Ho Kotiva ni koqema nimitairaro ni muntukavano anomakero paru i vaira variata.

Naaruvaini koqemake vairara tura

³ Kaiqenavu Kotira autu tuahera kaari. Viva Variqavano vaiharo tinavu Nora Vaiinti Ihu Karaitira Qovama vairo.

Kotiva tinavuara ike mpo tiva timiteharo tinavu qaraakaiqama timitero, tinavuara vika ekaa enta qaqi variqi vuante tiro, viva Ihu Karaitiva qutu vuraqihairo qaiqaa qaqi vara himpima kora.

Kotiva Ihu Karaitira qaiqaa qaqi vara himpima korara ti, tenavu naantiara Kotiva tinavu tivitairage vikanti qaqi variqi vuaina entara vekama vai.

⁴ Kotiva vo haika vo haika koqe haikaqai tinavu kaama timitai haikava naaruvaini vairara tiro, vi haikava kia ho ntera viro taiqa vuanarove.

⁵ Ne Kotirara kempukaiqaake iriqi vi variavaro Kotira mpeqavano ni maimaraara utu nimite vaimanta variara. Kotiva niqaa raqiqiqiro viviro, ekaara entaqaa vaiinti nahenti kuvantu nimiteharo ntitaaina okarara qerama taarirava qovaraiqianaro.

⁶ Ne vi uvvara iriqi vivaro maa entara nana nana haikavanoe qovarama viro ni qoraiqama nimitairera, ne kia vira kaara vo uva tauru karaiti, qaqi irite quahehaqai variqi vuata.

⁷ Vi haikava vi haikava ni qoraiqama nimitaqi vi vairaro Kotiva ne virara iriqi vi vai okarara homa avateharo tavaanaro. *Kori* orivano taiqa vuaina haikava viavaro vaiintivano vira avateharo tavareva ihaqohairo avateharo tave vaira.

Kori orivano qumina oriqai viavaro ne Kotirara iriqi vi variava, vivama uri aatarakero viavaro Kotiva virarama noraiqaakero iri vairo. Vaiintivano *kori* ori avatainantema kero, Kotiva ne nai virara iriqi vi variara avatama keharo tave vaira.

Vo haika vo haikavanoe qoraiqama nimitaqi viramanta ne Kotiraraqai kempukaiqaake iriqi vivera, naantiara „Kotiva“ Ihu Karaitira qovarama kaaina entaraqaa ni autu tuahera kero ni noraiqama kero ni quahama nimitaanaro.

⁸ Ne Ihu Karaitira kia tavaaka variavaro ni muntukavano virara vaira. Ne vatevata kia vira tavaaka vaiha ne virara kempukaiqaake iriqi vi variara.

Ne Ihurara mintimake iriqi viha ne voqavata virara quaheha variarara tiro, ne nenta noqihai virara koqe uva vokiravata tiva kia ho varianaro.

⁹ Ne Ihurara kempukaiqamake iriqi vi varia okararaqaahairo ni maraquira kuvantu kaarira haikava qovaraiqianaro.

¹⁰ Haaru paropeti vaiintinavu Kotiva vaiinti nahenti kuvantu kero ntitaaina okarara anomake irireka auti valha Kotira uva, vo uva vo uvvara aato tara iha vaura. Kotiva vika kahaqumanta vika Kotiva ni koqema nimitare iaina uvvara qoqaiqamake ti vaura.

¹¹ Karaitira Maraqravano vikaqi vaharo vika tiva nimiro tiharo, Karaitiva aihavira haika varaqiro viro, viragaahairo viva noraiqama viraro vira autu virini qianarove, tumanta vika vi uvvara qara riha aato tara iha tiha, Tairentae mintianarove? Ta vaiintivae minti mintianarove? ti vaura.

¹² Vika iruvaro vika qaqi vau entaraqaa vi haikava qovaraiqiarirava kia vaura. Vate ne varia entaraqaaama vi haikava qovaraiqama viro.

Kotiva nai Maraqura naaruvalihairo atitovaro viva vaiintinavu kahaqumanta vinayuka vi uvara koqe vakaaka ni tiva nimumanta ne irura. Ike, *enselinavuvata* vi uvara okara anomake iriataa imanta variara.

Ne koqemake vaiha koqe kaiqaqai varaqi vuate tura

¹³ Vi uvara irihama qeramate avu viti virihama variata. Ni avu aato koqema vaira variata. Ihu Karaitiva qovarama viro ni koqema nimitaaina entara vira veka vaiha viraraqai iriqi vuata.

¹⁴ Ne Kotira vainti vaiha ne vira uvama iriqi vuata. Haaru ne Kotira uva kia iriraiti vau entara, ne nenta muntukavano vau haikara qora haikaqai varareka autiha vaura. Hauri ne maa entaravata mintiaqi vivora.

¹⁵ Kotiva ni naarama kero ntita varava, viva kia qora kaiqa vararaitiro, koqe kaiqaqai vare vairara ti, nevata kia qora kaiqa vararaiti, Kotira aanare koqe kaiqaqai varaqi vuata.

¹⁶ Kotira vukuqi Kotiva mintima tiro:

Te koqe kaiqaqai vare vaunarara ti, nevata koqe kaiqaqai varaqi vuate, tura. (Wkp 11:44-45)

¹⁷ Kotiva kia vaiinti autuara iriharo vi vaiintiva nora vaiintive vi vaiintiva inaara vaiintive tiraitiro, viva vaiinti koqe kaiqarave qora kaiqarave iriharo uva avvuqavuqamake vaira. Ne virara irihama Kotira aarehama are ti Qovave tihama vataini vaiha Kotira aatu qeteha variqi vuata.

¹⁸ Haaru ne ni kaivaqaukvara tiva nimu uvaraqai iriha ne qumina hampi aaraqaqai ni vauvaro Kotiva niara te vika kuvant kaari qaqqini aitare vuate tiro, viva ni koqaa ireva kia qumina taiqaaina haikara *silvaa* orive, *kori* orive, viraqohairo koqaa autiraitiro,

¹⁹ Karaitira naareqohairo ni koqaa autu taira.

Karaitira naarevano ekaa vo koqaa vo koqaa aatara kaira. Sipisipi naati kia vira vaata qoraiqura koqe vaata vataara arukontemake, Karaitira arukora.

²⁰ Haaru kia maa vatara autuko entara Kotiva Karaitira kaamatero variqiro viro, maa entara niara iriharo Karaitira vara qovarama kora.

²¹ Karaitiva ni kahaqainarara ti, ne Kotirara kempukaiqaake iriqi vi variara. Kotiva Karaitiva qutu vuraqihairo qaqqi vara himpima kero, vira autu virini tuahera kaate tiro, vira noraiqama kora.

Kotiva Karaitira mintima korara ti, ne tiha, Quqaama Kotiva tinavuvata mintima kaanarove, ti variara.

Nenta qata vakaukara muntuka vataate tura

²² Ne Kotira uva quqaa uva iriqi vuavarora tiro, ni avu aato hiqama vivaro ni muntukavanovata ni qata vakaukara vaimanta variara. Ne mintimake vaiha ne nenta qata vakaukavarara quqaiqamakeha muntuka vateha variata.

²³ Ne vaireka qaiqaa qaraakaiqama kero vatataikama variara. Kiama qutu vuarira haikava ni qaiqaa vatatairave. Kotira uvavano qaqqi variqiro vi vai uvava, vivama ni qaiqaa vatataira. Vi uvava ekaa entama qaqqi variqiro vuanaro. ²⁴ Kotira vukuqi mintima tiro:

Ukauvano variqiro viro vuru aaharuqama vinantemake, vaiintivata variqi vi, vuru ekaarama taiqa vivarave.

Kaampivano/Qinaaravano iratero iteharo koqema kero ataa iharo vuru tamunta viro hijinti hijinti intema kero, vaiinti mpeqa okaravata taiqa vuanarove.

²⁵ Kotiva tina uvavaqaima ekaa enta qaqqi variqiro vuanarove, tura. (Aisaiaa 40:6-8) Ho Kotira koqe vakaaka ni tiva nimumanta ne vi uvara irura.

2

Kotira uvavano ni karama vaivo tura

¹ Ne Kotira uva iri variaka vaihara ti, ne qora kaiqa ekaa qaqlira kaata. Kia una tiata. Kia unaqaraiqama keha koqe kaiqa varata. Vo vaiintivano koqemakero variainarara kia toma amitaata. Kia vo vaiintiara una uva ntuvake tivarо vira autuvano vataini qiarira.

² Qaraaka vatatai vaintava naatiruvano naamara antuqa arinantemake, nevata Kotira vainti qaraaka vaiha Kotira uvara antuqa arira variata. Kotira uvavano ni koqe naama vogarama vairo. Vi naamara koqe naama nehamna ne koqemake noruqama vivaro Kotiva ni kuvantukero ntitaarira. ³ Kotira vukuqi mintima tiro:

Ne Kotira kaiqa vareha tavaavarо Kotiva ni koqema nimite vaivama vaivo, tura. (Ihi 34:8)

⁴ Ne Noravano Karaitiva vainaini aniata. Karaitiva qaqi variqiro vi variarira Naaquravama vairo. Qaqi vaiintinavu virara kia koqe naaqurave tivakeha vira qorrima kaavaro Kotiva naima vira kaama tero virara ti koqe Naaqura voqaraavama vaivo, tiro.

⁵ Qaqi variqi vi varia naavu kaarara voqaarama nevata variavaro Kotiva niqohairoma nai naavu kaqe vairo. Ne vi naavuraq'i vaiha Kotira kaiqa vara amite vai vaintika vaiha Kotiraini koqe kaiqa vara amitaq'i vuata. Ne mintivaro Kotiva Karaitirarao tiro, ni kaiqara quahaanaro. ⁶ Kotira vukuq'i Kotiva mintima tiro:

Tavaate, te tenta kaama tauna Naqurara koqera Saioni vatuka avutana arataunaru. Viraqaa muntuvi vairava kiama kaurira haika varairaro vira muntukavano qoraiqiraro varianarove, tura. *(Aisaiaa 28:16)*

⁷ Ne Karaitirara quqaa vivave tivakeha viraqaa muntuvi variaka, ne tiha, Karaitiva tinavu koqe Naaqura voqaraarave, ti variara. Vokiaka kia Karaitirara quqaa vivave tiaka, vika viraqaahai kuntavaivaima vare kaavu nti variara. Kotira vukuq'i hairo mintima tiro:

Vika naavu kaqeheh tiha, Vi orirara qora orive, tivakeha qorrima amitaa oriva, vivama Naqurairqama vivo, tura. *(Ihi 118:22)*

⁸ Kotira vukuq'i hairo vo uvavata mintima tiro:

Maa oriraqaaahai vaiinti nahenti kuntavaivai i variarave. Maa nora oriraqaaahai vika kaavu nti variarave, tura. *(Aisaiaa 8:14)*

Vika kia Kotira uvara quqaa uvave ti variarara ti, vika kuntavaivai i variara. Haaru Kotiva vikara mintima ivarave tiva tora.

Ne Kotiva nai kaama taikama variavo

⁹ Ne kia vika voqaantemake variavo. Kotiva niara tinta vaiinti nahenti variate tiro, ni nai kaama taikama variavo. Noravano Kotiva vaimanta ne vira kaiqa vara amite vaintikama variavo. Ne koqe kaiqaqai vare varia vaiinti nahentikama variavo. Ne Kotira navunaakama variavo. Viva niara te vika koqema nimitaaina uvara vo vaiinti nahentivata tiva nimiate tiro, Kotiva ni konkiraqihairo naarama varero vuru ovavano koqemakero ataa i vainaini kaimantama variavo.

¹⁰ Ne tota enta qumina vaiinti nahenti vaura. Vate maa entarama ne Kotira vaiinti nahenti variara. Tota enta Kotiva kia ni aaqurihama nimitomanta vaura. Vate maa entara Kotiva ni aaqurihama nimitalimanta variavo.

Tenavu Kotira kaiqa vaiintima vauro tura

¹¹ Mpo, ti navunao, ni maaqa tanara kia maa vataraqaa vaira. Ne maini vaiha ne vo vatanaaka voqaara variara. Ne virara irihama ni vaatavano qora kaiqa varaataa inara kia varaata. Ni vaatavano ni maraquravata aatarakero viraqata raqikireva auti vaimanta variavo.

¹² Kia Kotira uva iri variaka vaimanta ne vika nivuqaa avuqavuqama keha nuata. Ne mintiaq'i vimanta vika ni turoqareha una uva tivera, vika uvavano kia ho varianaro. Vika uvavano kia ho vairamanta vika ni koqe kaiqa taveha, Noravano tuvina entaraqaa vika Kotira autu tuaherevara.

¹³ Ne tinavu Nora Vaiinti Karaitirarao tiha, ekaa *kamaanira* kaiqa vaiinti vevaaraini variata. *Kamaanira* kaiqa vaiinti avuhainaara vira uva iriq'i viha, ¹⁴ *Kamaanira* noraiqama kai vaiintika ne vika uvavata iriq'i vuata. *Kamaanira* uva raqake vaika ruqutihä, *kamaanira* uva iriha avate vaika quahama nimitaate tiro, *kamaanira* nai naantiaraihainaa vaiinti vonavuvata noraiqamake vaira.

¹⁵ Kotira antuqavano niara mintimama vairo: Ne koqe kaiqaqai vare vaivarao kia avu aatovata vaika niara hampi uva tiva kia ho vairamanta vika evaara vaivara.

¹⁶ Ne kuvantuvi variakara ti, ne nentara mintima tiate: Tenavu kuvantuvi vaurauka hauri qaiqaa vaaqu kaiqa varaororave, tiate. Ne Kotiva rumpatai vaiinti nahentika voqara vaiha nuata.

¹⁷ Ne vaiha ekaa vatanaakara koqe okaraqai autu nimitaata. Ne nenta kenauka Ihura vaiinti nahentiara muntuka vateha variata. Ne Kotira autu qeteha variqi vuata. *Kamaanira* avuhainaa vaiintiara nora vaiintive tiata.

Karaitiva aihavira haika varainantemake nevata varaate tura

¹⁸ Te ni kaiqa vaiintiara tirer. Ne koqemake kaiqa vareha nenta nora vaiinti uva iriq'i vuata. Ninta noravano ni koqema nimiteharo niara vi kaiqara varaate tirera, vira uvaqai iriq'i vuata. Ninta noravano kia ni koqema nimiteharo niara vi kaiqara varaate tirera, vi uvaravata qaqiqaima iriq'i vuata.

¹⁹ Ne mintimake variqi vivaro Kotivama ni quahama nimitaanaro. Ne Kotira uva iriq'i vi vaivarao vaiinti vovano qumina haika kaara ni qoraiqama nimitairera, ne aihavina haikara vareha kempukaiqamake vaivarao Kotiva virara iriharo ni koqema nimitaarira.

²⁰ Ne vaaqu kaiqa varera kaara ni ruqutimanta ne kempukaiqamake vaivera, Kotiva kiama virara iriharo ni koqema nimitaanaro. Ne koqe kaiqaqai vare vaivaro vira kaara ni ruqutimanta ne kempukaiqamake vaivera, Kotiva virara iriharo ni koqema nimitaanaro. ²¹ Ne mintiaqi vuate tiro, Kotiva ni naarama taira. Karaitiva niarao tiro, aihavira haika varorave. Viva niara te iainantemake, nevata mintiate tiro, viva minturave.

²² Karaitiva kia qora kaiqavata varovaro vira nogihairo kia una uvavanovata qovaraiqura. ²³ Vika Karaitirara qora uva tuvaro viva kia nái vikara qora uva tura. Karaitiva aihavira haika vareharo kiama vorara tiharo, Naantiara ninavata qoraiqama amitarave tiraitiro, Karaitiva Kotiraraqai noraiqama kero iriharo tiharo, Kotiva avuqavuqama kero *ko ti* vaiva, vivama ti kahaqianarove, tiro tura.

²⁴ Tinavuara vika kia qora kaiqa vararaiti koqe aaraqai vuate tiro, Karaitiva tinavuara o tiro, tenavu qora kaiqa varauna uvvara varero vuru katariqaa qutu vura. Karaitira vaata teqa taaqama kaaraqaahai ne koqemavi variavo. ²⁵ Sipisipivano hampi nintemake, haaru nevata koqe aaraqaahai hampiqama keha ni vaura. Vate maa entara ni ntita varaimanta ne anirante ni maraquaqaa maimaraara raqiki nimite vai Vaiintira vira avataqvi variara.

3

Naata vaati vare okarara tura

¹⁻² Te ne vaati varaaakara tirera. Ne nenta vaativara uvaqai iriqi vuata. Ne mintiaqi vi vaimanta ni vaativara kia Kotira uva irika, vika ni koqe kaiqa tave tiha, Kaiqe tenavuvata vika aanare Kotira uva iriqi vuare, tivara. Ne nenta vaativarara vo uvavata tiva kia vairamanta vika ne koqe kaiqa varera tave, ne nenta qoraintiaraqai iriqi vira tave, vika mintima tivara.

³ Ne koqe nahenti vaireka iha, viri vaata vaheheeqi vai haikarave, qjata vunterave, nenta vaata rugirave, nenta vaataqaa nonkute haikarave, vi haikara vi haikarara kia noraiqaake iriata.

⁴ Ne kia mintiraiti, nenta muntukaqi vaheheqirara noraiqaake iriata. Ni muntuka avu aatoqihairo ne koqemake vaheheeqi haikava qovaraiqianaro. Nai muntukaqihairo qjahaqqamakero variaina nahentira, Kotiva vi nahentirama quahama amiteharo koqe nahentive tianaro.

⁵ Haaru Kotirara noraiqamake iri vau nahentinavuka vaiha Kotiva kauqu aqiqaa aqukero tivato uvvara iriteha, vinavuka nái vaativara uvaqai iriqi vi vauva, vivama vinavuka vaheheqamate vau haikavama vaura.

⁶ Tinavu kaivaqava Seraava mintimakero vau nahentiva vaura. Viva nai vaati Eparahaamira uva iriqiro viharo virara tiharo, Are ti nora vaintiyanoma variarao, tura. Ne nahenti koqe kaiqaqai vareha kia vo haika aatu qetaivera, ne Seraara raavuravarama vaivara.

⁷ Vira aanare ne vika vaativaravata koqemake nenta naatavararaqaa raqikiqi vuata. Kotiva ni koqema nimitaintema kero, viva ni naatavara koqema nimitairamanta vikavata ekaa enta qaqi variqi vivarave. Virara irihama ne nenta naatavarara vika vaatavano kia kempuka vaata vaivo tivakeha, vika koqe okaraqai autu nimitaata.

Ne nenta naatavararaqaa mintimakera qaqikiqi vivera, kiama vo haikavano ni ravaaqavu kaira ne homa Kotira aaramaqi vivara.

Ne vohaara vaiintiqai variate tura

⁸ Te maa uvvara taiqa karera iha mintima ti: Ne koqemake vahhaara vaiintiqai variata. Ne nariara nariara mpo ike tiha variata. Ne Kotira vainti vahhara ti, nariara nariara muntuka vateha variata. Kia nenta autu virini qiraiti, nariara nariara aaqurihama nimitahe variata.

⁹ Vovano ni qoraiqama nimitairera, kiama ne vira nai qoraiqama amitaata. Vovano niara vaaquqama vuate tirera, kiama ne vira nariara vaaqu qianarave tiata. Kotiva niara koqemavi variate tiro ni naarama tairara ti, ne vi vaiintirara tiha, Kairaro Kotiva ai koqema amitaare, tiata. ¹⁰ Kotira vukuqi mintima tiro:

Koqema kero vahhara airi enta qaqi variqiro vuarira vaiintiva, vi vaiintiva qora kaiqa qaqira kero kia una uvavata tiarire.

¹¹ Vi vaiintiva qora kaiqa tauvaqa utu amitero koqe kaiqaqai varaqiro vuarire. Viva vaiinti nahenti muntuka paru i vai okarara kempukaiqama keharo avataqiro vuarire.

¹² Noravano avuqavuqama kero ni vai vaiintira nai avuqohairo tavamaqiro viharo, vi vaiintiva Kotira nai aare vai uvvara iri tave vairave.

Qora kaiqa vare varia vaiinti nahentika Kotiva vika tauvaqa utu nimite vairave, tura. (*Ihi 34:12-16*)

¹³ Ne kempukaiqama keha koqe kaiqaqai varaataa ivera, kia vovano ni qoraiqama nimitaanaro. ¹⁴ Mintivarovata, vovano ni qoraiqama nimitaira ne aihavira haika varaqi vivera, ne quahehaqai variata. Ni qoraiqama nimite vai vaiintika aatu kia geteha variata. Vika niara qora uva tira aatuvata kia geteha variata.

¹⁵ Ne nenta muntukaqihai Karaitirara vivaqaima tinavu Noravanove tiate. Qeramate vaivaro vovano niara ne nana uvae iriqi vi variavo tirera, ne Karaitirara iriqi vi vai uvara vira tiva amiata.

¹⁶ Ne vi uvara vira tiva amire iha, vi vaiintira qihaaqama amite, koqe okaraqai autu amitaata. Ne avuqavuqamake koqe kaiqaqai varaqi vi vaimanta vo vaiintinavu unahaa tiha ni kaiqara qora kaiqave tivera, vika ne Karaitira uva koqemake iriqi ni vai okarara tave, nái kaurira haika varevara.

¹⁷ Tenavu koqe kaiqa varaqi vi variariraro Kotiva qaqi kairamanta vokika tinavu qoraiqama timitaiqe tenavu aihavira haika varaarerera, vira koqema ianarove. Tenavu qora kaiqa varaqi viha aihavira haika varaererera, vira kiama koqe ianarove.

Karaitiva tinavu vatuka varero vuru qutu vura

¹⁸ Tenavu qora kaiqa vare vaurauka qutu vuataara vauvaro, Karaitiva avuqavu ni vaiva tinavu vatuka varero vuru qutu vura. Viva mintimakero vohaa tataa qutu viro, tinavu uva ekaara taiqakero tenavu Kotiva vainaini vuaina aarara ruvaama timitaira. Karaitiva tinavu vaiinti voqara vaumanta vira arukovaro vira vaatavano qutu vuvoro nai Maraqravano vira qaiqaa qaqi himpima kovaro vaura.

¹⁹ Viraqaahairo Karaitiva otu rumpato maraqurauka vaunaini vahilo nai vakaaka vika tiva nimura.

²⁰ Haaru Noaava vau entara vika Kotira uva raqake vauvaro Kotiva kia vika vaaka ruqutu karaitiro, variqiro vuvoro Noaava namariqaa vuaina naavura kaqa taiqa kovaro huvura namarivano aqu ravaqaqvavu kovaro Kotiva vaiinti nahenti 8navuqai kahaqama nimitonmanta vinavuka ho vaura.

²¹ Vira aanare tenavu qora aara qaqirake namari vare, viraqaahai koqe aaraqaa vi vaunara. Tenavu namari vare vauraro kia namarivano tinavu vaata hiqama timite vairave. Tenavu namari vareha tiha, Kaiqe qora aara qaqirake Kotira aaraqaqai vuure, tiha namari vare vaunara. Tinavuara Kotira aaraqaa vuate tiro, Ihuva qutu vuraqihairo qaiqaa qaqi himpura.

²² Ihuva qutu vuraqihairo qaiqaa qaqi himpiro viraqaahairo naaruvaini vura. Maa entara viva Kotira kauqu tanaraini vaimanta naaruvaini ekaa *enselinavuve*, ekaa noraiqama vuakave, ekaa kempuka vataakave, vira vevaarainima variara.

4

Nevata aihavira haika vare aarava varianarove tura

¹ Karaitiva vaiintiqama viro vahilo aihavu haikara varaqiro vurara ti, nevata tiha, Tenavuvata homa aihavina haikara varaqi virarave, tiata. Vovano qora kaiqa varaarorave tiro, aihavira haika varaqiro vi vaiva kiama qaiqaavata qora kaiqa varaqiro vuuanarove.

² Ne virara iriha vataini qaqi variqi viha nenta qora kaiqa varaataa inara qaqirake, Kotira antuqa arina kaiqaraqai varaqi vuata.

³ Kotira uva kia iria vaiinti nahentika aanare nevata haaru hampi niha nenta varaataa u kaiqara qora kaiqaqai varaqi vi vaura. Ho vi kaiqara varaqi vi vaunara viraqaa taiqairaque kia qaiqaavata vi kaiqara vararerave tiata. Vi entara ne hampi qaramaqi ni vaurave. Ni muntukavano hampi haikaraqai vaumanta vaurave. Ne iha namari neha vueraiaqavi vaurave. Ne voqamake karavata namarivata narekaqai ruvaaguuma viha vaurave. Ne qaqi vaiintivano aututo haikarara variqave tihamu, vi haikara autuqai tuahereha vaurave. Ne haaru minti mintimaki viha qoraiqamavi vaurave.

⁴ Vate maa entara ne vi kaiqara qaqirake variamanta kia Kotira uva iria vaiinti nahentika niara nevata tenavu iainantemake iate tiamanta ne vika uva kia iriraiti variamanta, vika ravukivi vira kaara niara qora uva tiva variara.

⁵ Ho iriata. Vika naantiara nái vaaqu kaiqa varera tiva qovaraiqama kevarave. Vi entara ekaa uva avuqavu qiarirava Kotiva vahilo ekaa qaqi vaikave, ekaa qutu vikave, viva vika uva rahakero avuqavu qianaro.

⁶ Virara iriharo Karaitiva haaru qutu vulkavata koqe uva tiva nimura. Haaru Noaava vau entara, vaiinti nahenti vika Kotira uva raqa kovaro Kotiva vika arukomanta qutu vura. Vika maraquravano Kotiva qaqi vaintema kero qaqi variqi vuate tiro, Karaitiva, vikavata koqe uva tiva nimura.

Ekaara entavano aumaiqurara tura

⁷ Ekaa haikavano taiqaaina entava aumantoma vairo. Ne virara iriha koqemake nentaqaa raqikiqi viha, avu viti viri iha geramate variata. Ne mintiaqi vi vaiha homa Kotira aaramaqi vivara.

⁸ Avuni maa uvvara naane iriata: Ne nariara nariara voqamake muntuka vateha variata. Ne mintiaqi vivaro Kotiva ne airi vaaku kaiqa vare uvvara tauru kaanaro.

⁹ Koqemake nenta naavuqi nenta qata vakaukavara Ihura vainti ntita vate kara niimiata. Nimihamma kiama nantu naantu tiraiti, qaqi karaqai niimiata.

¹⁰ Kotiva ni koqema nimiteharo ni vohaiqa vohaiqa vo kempuka vo kempuka nimirara ti, ne vohaiqa vohaiqvano vi kempukara nimiraqohai koqemake nai kahaqi nai kahaqi itata.

¹¹ Vaiintivano maara uva tireva iharo Kotira uvaqaima tianaro. Vaiintivano vora kaiqa vara amitareva iharo tiharo, Kotiva ti kahaqi vairaque te vira kempukaqaa ho ai kaiqa vara amitararave, tianaro. Ne mintiaqi vivaro Ihu Karaitiraqaahairo Kotira autuvano noraiqiarira. Kotira mpeqa okaravano takuqi vaivavata Kotira kempukavanovata ekaa entama qaqi variqiro vuunarove. Te ququaama turo.

Aihavira haika vareha koqe aaraqai nuate tura

¹² Ti vaiinti nahentivauvo, ihaqohairo avatainantema kero, vo haika vo haikavano ni avate vaimanta ne variara. Ho kia ne ravukuvi tiha, Nantiharoe vi haikava qoraiqama timite vaivo? tiata.

¹³ Ne mintima tiata: Karaitiva aihavira haika varairara irihama, tenavuvata vira kahaqihā aihavira haika varaqi vi vauro, tiata. Ne minti tivake variqi vivaro Karaitira mpeqa okaravano takuqi vaiva qovarama vuaina entaraqaa ni muntukaqihairo koqe iramanta vaivara.

¹⁴ Ne Karaitira avataqni vaimanta vira kaara niara vaaquvanove tivera, ne quaheqaqima variata. Vika niara vaaku uva timanta ne homa tiha, Kotira Maraqura voqaraava tinavu hampata vaimanta vauro, tivakeha ne quaheha variata.

¹⁵ Hauri ne vaiinti arukera kaarave, ne muara autira kaarave, ne *kamaanira* uva raqakera kaarave, ne vo vainti kaiqara qumina antua uva tira kaarave, vira vira kaara ni goraigama nimitaimanta aihavira haika varevorave.

¹⁶ Ne Karaitira vaintinavu vaira kaara ne aihavira haika varaver, ne kiama kaurira haika varauro tiata. Mintima tiata: Tenavu Karaitira vaintinavu vahihara ti, tenavu Kotira autu tuaheraqi virerave, tiata.

¹⁷ Kotiva ko tainaa entava anirairaro tinavu nai uva iriarirauka uva naanema avuqavu qianaro. Viva hogareru tinavu uva naane avuqavuqama kero, ike, vira naantiara kia vira uva irika ko tiharoma, nana nana uvae vikaqaa vataanaro?

¹⁸ Kotira vukuqi mintima tiro:

Avuqavu ni vai vaiinti nahentika vukaari utiha vo maara vo maara varaqi vivaro Kotiva vika kuvantu kero ntitaanarove.

Kia Kotira uva irika qora kaiqaqai vare vaika, oho, vika qora aaraqaa nini, naantiara vika tainie vuru taiqa vivarave? tura. (*Uva Maara Koqera 11:31*)

¹⁹ Kotira antuqavano niara homa vika aihavira haika varaqi vivarave tirera, ni muntukavano Kotirara qihaaqamakero vairamanta ne koqe kaiqaqai varaqi vuata. Kotiva tinavu autukero vataiva kiama nai kauqu ainqiqa aqukeharo tivatai uvvara tauru kaanarove.

5

Kotira vaintiqaa raqikukara tura

¹ Te ni *elda* vaiintinavuara tirera. Tevata ninavu aanare Ihura vaiinti nahentiqaa raqiki vauraukama vai.

Karaitiva aihavu haikara vare vaumanta te vaiha tenta avuqohai tavaavaunarama. Naantiara vira mpeqa okaravano takuqi vaiva qovaraiqaina entaraqaa tevata vaiha tenta avuqohai tavarerave. Te ni nora vaiintinavu vihi tiari iriata.

² Sipisipi qova koqemakero nai sipisipiqaqaa raqikintemake, nenavuvata Kotiva vaiinti nahenti ni nimitaqaaqaa raqikiqi vuata. Kotira antuqavano niara vi kaiqara varaate tirara ti, ne kia popoharaiti, vikaqaa raqikiataa iramanta raqikiqi vuata. Kia koqaara iriha vikaqaa raqikiqi viraiti, nenavu Kotira kaiqama vara amite vauro tivakeha, quahakeha vikaqaa raqikiqi vuata.

³ Kotiva ninavuara ti vaiinti nahentiqaa raqiki timitaate tirara ti, kia nenavu nora vaiinti vauro tiha vika vihi vaahi tivaqiqi viraiti, nenavu avuni vaiha koqe kaiqa vare

vaimanta vaiinti nahenti ninavu kaiqa tavehama ni aanare vikavata koqe kaiqaqai varaqi vuata.

⁴ Ne mintiaqi vi vaivaro naantiara sipisipi Qova Avuhainaava qovaraiqiaina entaraqaa viva tuvurero nai ni noraiqama kaira ne noraiqama vivaro ne noraiqama viva qaqi variqiro vuunarove.

Qaraaka vaiintinavuara tura

⁵ Ne qaraaka vaiintivata koqemake nenta nora vaiinti vevaaraini vaiha vika uva iriqi vuata. Ne vaiinti nahenti ekaa kia nenta autuara noraiqaake iriraiti, ne nai kahaqi nai kahaqamaqi vuata. Kotira vukuqi mintima tiro:

Nai autuaraqai iri vaina vaiintira Kotiva qoririma amitaanarove. Nai autu vatainiqama kaina vaiintira Kotiva vira aaqurihamma amiteharo vira koqema amitaanarove, tura.

(*Uva Maara Koqera 3:34*)

⁶ Ne vi uvara iriha kia nenta nutu tuahera karaiti, Kotira kempuka vevaaraini vaivaro naantiara viva nai tiva taaina entaraqaa ni nutu tuahera kaarire.

⁷ Kia qumina vo haika vo haikara noraiqaake iriqi vivaro ni muntukavano qoraiqiarira. Kotiva niara noraiqama kero iri vairara ti, ne ekaa vi uvara Kotira tiva amivarao Kotiva ni kahaqiarira.

⁸ Ne avu viti virimake taveha rauriha variata. *Raionivano noraiqaakero uva tivaqiro* viharo vaiinti aruke nareva auti vaintema kero, ni navutaava Sataaniva vi ani vaira.

⁹ Ne iriamanta ekaa ni qata vakaukavara vonaini vonaini variaka ni aanare Ihura kaara ahavira haika vare variarara ti, nevata Kotira uvaqai iriqi viha kempukaiqamake vaiha kia Sataanira uva iriata.

¹⁰ Ne ahora vaiinti nahenti vaiha aihavina haikara vahuqa varaqi vivaro Kotiva naima ni kempukaiqama nimitaanaro. Kotiva ni kempukaiqama kaimanta ne kempuka vaiinti nahentiqai vahama avuqavu variqi vivara. Kotiva tinavu kahaqireva koqema timite vaiva, vivama niara vika Karaitira vataake vohaa vaiha kempukaiqamake ekaa enta variqi vuate tiro, ni naarama taira. ¹¹ Kotiva ekaa enta variqiro vi vairaro vira mpeqavanovata qaqi variqiro vuunarove. Quqaave.

Ekaara uva tura

¹² Te niara inaara uva tiva nimirera uraro Sillaasiva vi uvara qara ruva timitaimanta te ni nimite. Te Sillaasirara viva ti qatavano koqemakero ti kahaqamaqiro vi vai vaiintiva vaivo tunara.

Ni muntuka koqe iramanta variate ti, te maa qararaqi Kotiva ni koqema nimitaainai okarara ni tiva nimunara. Kotiva ni koqema nimitairara irihama, ne kempukaiqamake varaqi vuata.

¹³ Kotira vaiinti nahenti Babironini variaka ni aanare Kotiva nai kaama tai vaiinti nahentika vahara ti, vika ni navunaaka vahama ni uva mante vai. Te ti maaquve tuna vaiintiva Maakiva, vivavata ni uva mante vairo.

¹⁴ Ne Ihura vainti vaiha nariara nariara muntuka vateha koqemake nariara nariara uva mantaata.

Ne Karaitira vataake vohaa variakara mintima turo: Ni muntukavano paru i vaira variate, turo.

2 PITAA

Pitaava vo qara naantiara vara kora

Ihura qaqi vara himpima kovaro naaruvaini oru uavararo airi ihi aitarovaro Pitaava maa uvvara qara ruva tora. Ihura vaiinti nahenti koqemake vira uva iriqi viha kia una maara tivau vaiintika uva ivate tiro, Pitaava maa qarara vikaini vara kora.

¹ Te Saimoni Pitaaka. Ihu Karaitiva ti noraiqama kero tititaimanta te vira vakaaka tivaqa viha vira kaiqa vaiinti vaunara. Te niara irihama maa uvvara qara ntuva nimite.

Tinavu Variqa Ihu Karaitiva tinavu tivitaarira vaiintiva, viva tinavu avuqavuqama timitarara ti, ne tinavu aanante koqe vakaaka uritarakero vai vakaakara iriqi vi variara.

² Ne Kotira okaravata, Nora Vaiinti Ihura okaravata, kankomake iriakara ti, Kotiva ni koqema nimiteharo aaqurihama nimite vairaro ni muntukaqihairo paru i vaira variqi vuata.

Kotiva tinavu nai kaama tairara tura

³ Kotira kempukavano Karaitiraqi vaivararo Karaitiva tinavuvara vika vi kempukaraqohai kia qora kaiqa vararaiti, Kotira kaiqa vara amiteha koqemake variqi vuate tiro, tinavu kempukaiqama timitaranta vaunara.

Kotiva tinavuvara nai mpeqa okaravano takuqi vaira tave, nai koqe okararavata kankomake tavaate tiro, tinavu haarama taira.

⁴ Kotiva nai kauqu ainqiqa aqukeharo tinavuni nora uva voqaraa uva tivakero vatairara ti, tenavu vi uvara iriqi vihami, kia vataihainaa haikara muntuka ntuvaqa viha vaaquqama viraiti, Kotiva koqema kero variqiro vinantemake, variqi virera.

⁵ Ne vi uvvara iriqi viha Kotirara kempukaiqamake iriqi viha koqe kaiqaqai varareka autiha variata. Ne koqe kaiqa vareha koqe okara, vo okara vo okara kankomake tavareka autiha variata.

⁶ Ne koqe okara tavamaqi viha ne nenta vaataqohai qora kaiqa varaorave tivakeha nenta vaataqaa koqemake raqikiqi viha variata. Ne mintiaqi viha kia popoharaiti, kempukaiqaake Kotira aaraqaa nuvaqi vuata. Ne mintiaqi viha Kotira voqaantemake vaireka autiha variata. ⁷ Ne mintiaqi viha nenta kena vaiinti nahenti koqema nimitaqi vuata. Ne mintiaqi viha nariara nariara muntuka vateha variata.

⁸ Ne mintiaqi vivera, ni kaiqavano kia qumina kaiqa vairaitiro, koqe kaiqaqai vairamanta ne tinavu Nora Vaiinti Ihu Karaitira okara kankomake tavamaqi vivara.

⁹ Vaiinti vovano kia mintiaqiro vi vaiva, vi vaiintiva avu qimpavi vaiintira voqaara vaharo kia Kotira uva okara kankomakero tave vaira. Vi vaiintiva Karaitira haaru viva qora kaiqa varo uvvara nunka amiteharara kia iriraitiro, qumimaqama keharo vairo.

¹⁰ Ti qata vakao, Kotiva ni naarama kero nai kaama tai uvava quqaa vivau variarireti, ne Kotira kaiqa voqavata varaqi vuata. Ne mintiaqi viha kia hampi aaraqaa vivera, ¹¹ ne tinavu Noravano Ihu Karaitiva tinavu kuvantu timitaarirava raqiki vaina vatukaraqi ekka enta homa qaqi variqi vivara.

¹² Ne quqaa uva kempukaiqamake iriqi vi variara, te virara irunarave. Ho te qaqiqai ne vi uvvara iriqi vuate tivaqa virera. ¹³ Te qaqi variqi vuaina entara homa vi uvvara qaiqaa qaiqaavata ni tiva nimiqi vuariravama varianaro.

¹⁴ Ti vaatavano haraara naavu voqaarama vairo. Inaaraiqa varikema tenta vaata maini ke naaruvaini virera. Tinavu Noravano Ihu Karaitiva vataini vaharo te qutu vuaina okarara vutukeroma tiva timimanta irunarave.

¹⁵ Te qutu vuaina entaragaahai ne kia ti uva tauru karaiti, koqemake iriqi vuate ti, te qaiqaa qaiqaavata ni tiva nimiqi virerave.

Karaitira mpeqa okaravano ataa i vairara tura

¹⁶ Tinavu Noravano Ihu Karaitiva mpeqavano tuvuainarara ni tiva nimiha kia tenavu tentanavu irike vuri/uri uva ni tiva nimiraiti, tenavu tentanavu tivuqohai Karaitira mpeqa okara tavaavaunara, virara ni tiva nimi variavaunara.

¹⁷ Karaitira Qova uritarakero naaruvaini ataa i vainaini mpeqavano vaiva, Kotiva nai Maaqu Ihura ataama amiteharo vira autu noraiqamakero tiharo, Maara ti Maaquma vaivo. Ti muntukavano virara voqavata vaimanta te virara quahehama vauro, tura.

¹⁸ Haaru Kotiva minti tumanta tenavu vi entara Kotiva vau aiqinaraqaa Ihura vataake vaiha Kotiva naaruvaihairo tu uvvara iriavaunara.

¹⁹ Tenavu vi haikara vi haikara tavaavaunara ti, tenavu paropeti vaiintinavu haaru tivato uvarara quqaa uvaqaima vaivo ti vaunara. Nevata vi uvarara noraiqaake iriqi

vivera, ne homa vaivara. Ovavano konkiraqi itaqiro viviro aatitare ivaro vaahoquravano itaintemakero, Ihura uvavano ni muntukaqi ataama nimite varianaro.

²⁰ Ne paropeti vaiintinavu tivato uvvara irihama maa uvvara naane kankomake iriha variata: Paropeti vaiintivano qara ntuvato uvava vukuqi vaira, hauri vaiinti vovano nai irikero tiharo, Vi uvvara okara minti mintimama vaivo, tiantora.

²¹ Kia paropeti vaiintinavu nái irikevauve vi uvvara vi uvvara tura. Kotira Maraquravano paropeti vaiintinavu kahaqama nimite vaumantara ti, vika Kotira uva tiva qoqaiqamake vaura.

2

Una paropeti vaiintinavu tura

¹ Haaru una paropeti vaiinti vonavu vaiinti nahenti avutaini vauntemake, maa entaravata una uva maara ti vaika ni avutaini qovaramavi vaivara. Vinavuka evaara qovaramavi vaiha una uva maara tiva nimi vaiva vaiinti nahenti qoraiqama nimitaanaro. Noravano Ihuva vinavuka qaqtini kuvantu nimitaira viravata vinavuka qoririma kevarave. Vira kaara vinavuka vehi autuviva vaakama qovaraiqianaro.

² Vinavuka kaurira kaiqa varaqi vi vaimanta airi vaiinti nahenti vinavuka avataqi vi vaimanta vaiinti nahenti vonavu vika qora kaiqa tave tiha, Oho, Karaitira uva iri varia arara qora aaraqaima vaivo, tivara.

³ Una uva maara ti vaika, vinavuka unaqaraiqamakeha ni monu varareka auti vaiha nái irike ni una uva tiva nimivara. Kotiva haaru minti vau vaiintikara uva vateharo *ko* tiva taiqakorara tiro, vinavuka vehi autu kaairava kia vaitaraitiro, qaqi ani vairo.

⁴ Haaru *enseli* vonavu Kotira uva raqakovaro Kotiva kia vika vehakuma nimitaraitiro, vika nái qora kaiqa varora kaara nora iha iteharo konkiraqi vairaqi vara vaavi aqukora. Vika mini rumpa tomantia vahia Kotiva *ko* taina entara vekama variara.

⁵ Haaru vetanto enta vau vaiinti nahentika Kotirara kia irura kaara Kotiva kia vika vehakuma nimitaraitiro, viva tuvoro huvura namarivano vika ekaa vehi autukora. Vi entara Noaava avuqavu ni vai okarara vaiinti nahenti tiva nimi vaurara tiro, Kotiva viravata vira navunaaka 7navuvata vehakuma nimitomanta ho vaura. (Okara 6-9)

⁶ Haaru Sodomiqi vaukavata Gomoraqi vaukavata vaaqu kaiqa vare vaura kaara Kotiva vi vatukatanta ihaqohairo tatoqa taiqa kovaro karampaavanoqai vaura. Naantiara Kotirara kia iri vaiinti nahentika taiqa kaaina okarara tinavuaravata kankomake iriate tiro, Kotiva vika mintima kero taiqakora.

⁷ Kotiva vi vatukatanta vehi autukareva iharo viva Rotiraqai ruaruama amitora. Rotiva koqe vaiintivano Sodomiqi variqiro viharo tavomanta viraqi vau vaiintika vo uva vo uva raqakeha hampi qaramaqi ni vauvaro Rotira muntukavano qoraiquvaro vaura.

⁸ Rotiva koqe vaiintivano vahiaro vo enta vo enta vi vatanaaka hampata variqiro viharo vika vaaqu kaiqa vare vaura nai avuqohairovata nai aatoqohairovata iri tavovaro vira muntukavano qoraiquvaro vaura.

⁹ Haaru Kotiva mintiaqiro vurara ti, tenavu kankomake iruraro Kotiva koqe vaiinti vika maaraqihairo qaqi ruaruama nimiteharo qora vaiinti vika ntaihamake vaivama vairo. Kotiva qora kaiqa vare variaka qaqi totaqi viro, naantiara *ko* taina entaraqaa vika *ko* tiva taiqa kaanaro.

¹⁰ Vaiinti vonavu Kotira uva kia iriraiti, vora uvavata kia iriraiti, vika nái antuqavano vare vai kaiqaraqai varaqi viha vaaqu kaiqaaqai vare variavaro vira kaara Kotiva vikaqaa nora uvama vataanaro.

Te una uva maara ti varia vaiintika okarara tirera. Vika nariaraqai noraiqaake iriqi viha, kia nora vaiinti vevaaraini vairaiti, vikara qumina vaiintive tivakeha vika kia getaraiti, *enselinavuaravata* qora uvaqai ti variara.

¹¹ Vika minti ti variamanta, *enseli* vika vi vaiintika uri aatarake nora kempuka vataaka vahavata, vika Kotira avuqaa vahia tiha, Hauri tenavu vokiakaqaa uva vataariraro vika nutuvano vataaini qiantorave, ti variara.

¹² *Enseli* vika minti ti variamanta una uva maara ti varia vaiintika kia kankomake iri varia haikarara qora uvaqai ti variara. Vika qaakau quara vairi voqaara kia avu aatovata iriraiti, vika nái antuqaaqai avataqi vi variara. Qaakau quara vairi arukentema kero, naantiara vi vaiintikavata aru taiqa kaanarove.

¹³ Vi vaiintika nai kenuaka qoraiqama nimite variantema kero, naantiara Kotiva vika náivatá qoraiqama nimitaanaro. Vaiinti nahenti kuarigaa ruvaaqumavi viha ovata ne variamanta vi vaiintika airi karavata iha namarivata neha tiha, Maantimake namaqiqi viha quaha quaha iha vairerave, ti variara. Vika mintimake ni hampata vahia, nai una kaiqa vare variarara quaha quahamaqiqi viha kaurira haika ni nimi variara.

¹⁴ Vi vaiintika vo enta vo enta vokiaka naatavarara avu auti vaiha vika hampata nireka auti variara. Mintiaqi viha vika qora kaiqa kia qaqira karaiti, qaqiqai vare variara. Vi vaiintika uqerara vaiinti nahenti mintamaqi vi variamanta vi vaiinti nahentika vaaquqama vi variara. Vora airairara muntuka nti vai okarara vika vi okarara anomake tave variakama variara. Vika mintiaqi vi variara kaara Kotiva vikara vaaquqama vikama variavo, tiro.

¹⁵ Vi vaiintika koqe aara avuqavu ni varia aarara qaqirake hampi aaraqaaqai ni variara. Haaru vetanto entaqaa Beora maaqu Balaamiva hampi aaraqaa ni vauntemake, vi vaiintikavata vohaa vi aararaqai nireka auti variara. Balaamiva monu varaainarraqai iriharo vaaqu kaiqa varareva auti vauvaro ¹⁶ viraqaaahairo vira *donkivano* kia uvavata ti vauva, vi entara vaiintivano uva tuntema kero, uva tiharo vira atuvaro Balaamiva vaaqu kaiqa varare ura qaqira kero kia varorave.

(Kaaranatura 22:25)

¹⁷ Una uva maara ti varia vaiintika vika nana haika voqaarae variavo? Vi vaiintika ruvu namarivano aaharauqama vira voqaara variavo. Nora uvaivanu utiharo tonavu raaquta varero vi ani intemake, vi vaiintika variavo. Oho, anomakero konkira ari vai vatukara Kotiva vikaini qeramakero nimitaira.

¹⁸ Vi vaiintika nái mahuta tivaqí viha qumina uvaqai ti variara. Vi vaiintika vaiinti nahenti hampi kaiqa qaqirake koqe aaraqaa vireka auti variakara tiha, Ne homa nai muara autu amite nai muara autu amite iivarave, tivakeha vinavuka vi vaiinti nahentika kuntama vare vi variamanta vika qaiqaa hampi kaiqa vareha qoraiqamavi variara.

¹⁹ Vi vaiintika tiha, Tinavu uvavano ni kuvantu nimitaira ne homa variqí vivarave, ti variavarovata, vika qora kaiqavano nái rumpa taimanta variara. Nana nana qora kaiqavano vaiinti vo ravaaqavu kairaro vi vaiintivu kaiqaraqai varaqiro virera, vi kaiqava vira anomakero ravaaqavuma kaanaro.

²⁰ Qora kaiqavano tinavu rumpa taimanta vauraro Ihu Karaitiva tinavu Noravano tinavu kuvantu kaimanta tenavu ho qaqini vaunara. Vovano Ihura uva iriro kuvantu viro variqiro viro, viraqaaahairo qaqirakero qaiqaa qora kaiqa varaqi virera, qora kaiqavano vira anomakero ravaaqavu kaanaro.

²¹ Vaiinti vonavu avuqavu ni varia okarara avataqi vi, viraqaaahai vi uvvara takuqi vai uvvara qaqirake qoririma kaivera, te vi vaiintikara oho tiva nimitararave. Koqemama vi vaiintika avuniqamake vi uvvara kia iraiti, qaql variataara.

²² Vi vaiintikara maa uvava mintima tiro:

Vairivano vuru vihikero, qaiqaa anirantero nai vuru vihitaira ne vairave, tura.

Qaiqaavata vo uvavano mintima tiro:

Quara hiqama taava qaiqaa anirantero hora hinkora nti vairave, tura. (*Uva Maara Koqera 26:11*)

„Vaiintivano qora aara qaqira kero qaiqaa anirantero qora aaraqaa vuaina okarara mintimama vairo.„

3

Karaitiva qaiqaa orurantero tuvuainarara tura

¹ Ti vaiinti nahentivauvo, te hoqare qara vo ni nimitema, qaiqaa maa vo qaravata ni nimite vauro. Ne ti qara taaraqanta kaara riha, koqe uvaqai nenta aatoqi iriqi vuate ti, te qara ruva nimitaunara.

² Haaru Paropeti vaiintinavu Kotira uva qoqaiqamake vau uvarara iritaate ti, te ni qara ruva nimitaunara.

Tinavu kuvantu kai vaiintiva Noravano tinavu nai noraiqamako vaiintikara mintimake variqí vuate tu uvvara, tenavu vi uvvara ni tiva nimiavaunara. Ne vi uvaravata kia qaqira karaiti, qaqi iriqi vuate ti, te maa uvvara ni qara ruva nimitaunara.

³ Avuniqamake ne maa uvara iritaata: Naantiara ekaara enta aumanto vaira airi vaiinti qovaramavi vaiha vika nái qora kaiqa varataa inaraqai varaqi viha, ni naaraihama nimitevarave.

⁴ Vika ni naaraihama nimiteha mintima tivara: Naantiara te orurante qaiqaa vataini tuvirerave tu vaiintiva tantoe vaivo? Tinavu kaivaqaukavara variqí vi, vuru qutuvu entaraqaaahairo maa entaravata ekaa haikavano vohaa qaramakero variqiro vi vaimantama vauro. Tota maa vataro autukero vatoraqaaahairo mintiaqiro vi vaimantama vauro, tivara.

⁵ Vi vaiintika minti tihama Kotiva maa vataro autukero vato uvvara, vi uvvara kia irireka auti vaihama minti tivara. Haaru Kotiva tuvaro naaruvavanovata vatananovata qovarama vura. Vi entara namarivano ekaa vata mantaaqa kero vauvaro Kotiva tuvaro

namariqihairo vatavano qaqini qovarama viro vauvaro namarivano vata ututuma kero vaura.⁶ Vira naantiara Kotiva vataini vauka namariqohairo ruqutu vehiqama kora.

⁷ Naantiaravata Kotiva qaiqaa tiraro ihavano naaruuvavata maa vataravata tatoqa taiqa kaanaro. Maa entara Kotiva nai naantiara *ko* tiaina entarara iriharoma naaruvaqaavata vataqaavata raqikiqiro vi vairaro vi entava qovaraiqiraro Kotiva qora vaiinti nahenti *ko* tiva taiqakero, viraqaaahairo viva vika vehi autu taiqakero naaruuvavata vatavata ihaqohairo tatoqa taiqa kaanaro.

⁸ Ti vaiinti nahentivauvo, maa uvara tauru kevora: Noravano Kotiva 1,000 ihiara ti tivuqaas vaireva, vohaa enta voqaarama vaivo ti vaira. Viva vohaa entara 1,000 ihi voqaarama vaivo ti vaira.⁹ Haaru Noravano Kotiva nai kauqu ainqiqa aqukero te mintirerave tu entaraqaaahairo airi ihi aitare vaurara hauri ne virara tiha, Ike, Kotiva qakoma kero mintianarove, tivora. Kotiva ekaa vaiinti nahentiqihairo vonkuvano kakakima vuantorave. Vika ekaa qora aara qaqa kaate tiro, viva qakomakero *ko* tireva auti vairo.

Naaruuvavata vatavata taiqa vuainarara tura

¹⁰ Muura vaiintivano evaara aninanteema kero, Noravano tuvuaina entava qovaraiqianaro. Vi entaraqaa naaruuvavano noraiqamakero karara tivakeharo tuqaakama viraro, ihavano ekaa vataini vaina haikara ita vuru taiqa kairaro maa vatavavata, ekaa viraqaa vaira haikavavata, kia qaiqaavata varianaro.

¹¹⁻¹² Vi haikava vi haikava mintimakero taiqa vuainarara ti, ike, ne maa entara nantimake variqi vihae vaivarao? Ne Kotira entara vekaiqihia kia qora kaiqavata vararaiti, koqemake variqi viha Kotirara noraiqaake iriqi vi vaivama vairo. Ne mintiaqvi vi vaivaro vi entava vaakama qovaraiqiarire. Vi entava qovaraiqama viraro ihavano naaruva tatoqa taiqa kairaro vataini vaira haikavavata, naaruvaini vaira haikavavata iteharo ravita viro taiqa vuuanaro.

¹³ Mintiaqiro vi vairage tenavu Kotiva nai kauqu ainqiqa aqukeharo tivato uvava vivau variainara vekama vairara. Vi entaraqaa tenavu qaraaka naaruuvavanovata, qaraaka vatavanovata, qovaraiqainara vira tavehama quaheha vairara. Avuqavu ni vai vaiinti nahentika virara tiha, Tinavu maaqa tanaravema, tivara.

¹⁴ Ti vaiinti nahentivauvo, vi entara veka vahama, Kotiva niara kia qora kaiqa vare variakave, koqe vaiinti nahentiqai variavo tivakero ni paruma nimitaarire ti, ne maa entara koqemake variqi vuata.

¹⁵ Tinavu Noravano qakoma kero tuvuainarara mintimake iriteha variata: Viva qakoma kero tuvireva iharo airi vaiinti nahenti nái qora kaiqa varera qaqa kaiqe vika ntitaare tivakeharoma viva kia vaaka tuvivo, tiata. Kotiva tinavu qata vakaa Porura kahaquvaro vivavata minti tivakero koqe uva qara ntuvakero ni tiva nimura.

¹⁶ Poruva vi uvvara okarara tireva viva vo qara vo qaraqi minti ti vaira. Viva qara ntuvate vai uvvara hini uvavano nora uva vaimantara ti, vaiinti vonavu, kia koqe avu aato vatauka, vi uvvara okara kia kankomake iriraiti, hampiqaakeha ti variara.

Vi vaiintinavuka kia vohaa uva iriraiti, vika vo uva vo uva iri variakara ti, vika Porura uvavata, Kotira vukuqi vo uva vo qara ruva toravata, kia kankomake iriraiti, vi uvvara okaravata hampiqaakeha ti variara. Vika minti ti variara kaara nái hampiqamavi taiqa vivara.

¹⁷ Ho ti vaiinti nahentivauvo, ne vi vaiintika okara kankomake tave variarara ti, ne rauriha variata. Kotira uva kia iri varia vaiintika hauri hampi uva tivaqvi viha ni kuntama vare hampi aaraqaa vivorave ti, ne Kotira aaraqaa kempukaiqamake variqi vuata.

¹⁸ Ihu Karaitiva tinavu Noravano tinavu kuvantu kaivama vairo. Viva ni aaqurihama nimiteharo koqema nimitaqvi viramanta ne vira vaintaira vaiha vira okarara voqavata kankomake iriqi viha noruqamaqvi vuata.

Aniqenavu vatevata, ekaa entavata, vira autu noraiqamake tuheraqvi vuare. Ququaave.

1 IONI

Ioniva avuniqamakero qara vara kora

Ihura qaqi vara himpima kovaro naaruvinai oru vauvaro airi ihi 60 ihie aitarovaro Ioniva maa uvvara qara ruva tora. Ihu Karaitiva quqaq vaiintiqama viro vatainai variqiro vu okarara iriate tiro, Ioniva vi uvaravata, Kotirara muntuka vate okararavata, tiva nimiharo qara ruva tora.

Ioniva Ihu Karaitirara tu uvvara

¹ Nai tota entaqaaahairo qaqi variqiro vi vau vaiintira, tenavu vi vaiintirara ni tiva nimirera. Tenavu vi vaiintira tentanavu avuqohai tave, viva uva turavata iriavaunara. Tenavu vira tavamaqì viha tentanavu kauquqohai vira utu varavaunara. Tenavu tavauraro viva tivato uvaraqaaahairo ekaa haikavano variqiro viharo qaqi variqiro vi vaira.

² Qaqi variqiro vi varia okarava viraqi vaivaro viva tinavu tivuqaa qovarama viro vaimanta tenavu tavaunara. Tenavu vira tavaunara ti, niara mintima ti: Ekaa enta qaqi variqiro vi vaiva, tinavu Qokantiro variqiro viro, maa vataraqaa qovarama vumanta tenavu vira tavaunarama turo.

³ Tenavu vira Qoravata vira Maaqu Ihu Karaitiravatamake vohaaraqi koqemake vайха variqì vi vaunara. Nevata vohaa qaramake tinavu hampata vohaaraqi koqemake vайха variqì vuata ti, tenavu vira tave, vira uvavata iriavaunara ni tiva nimi vaunara. ⁴ Ne tinavu hampata anomake quahaate ti, tenavu maa uvvara qara ruva nimite vaunara.

Ovaqaa nuate tura

⁵ Tenavu maa uvvara Karaitiva tinavu tiva timi uvvara nivata tiva nimirera: Kotiva vaireva, ovavano vaivaro kia konkira ariva voqavanovata viraqi vaira. ⁶ Tenavu konkiraiqi vaina aararaqaa ni vайха tiha, Tenavu Kotira hampata koqemake vohaa variqì vi vauro, tierera, tinavu uvavanovata tenavu kaiqa varaariravata, unaqaima varianaro.

⁷ Kotiva ovaqaa vaintemake tenavuvata ovaqaa vайха nuarera, quqaama tenavu vohaaraqi vайха nariara nariara koqema nimitaqì viha variqì vuariraro Kotira Maaqu Ihura naarevano tenavu qora kaiqa varaaaina uvvara nunkakero hiqama timitaqiro vuanaro.

⁸ Tenavu tiha, Kia tenavu qora kaiqa vare vaunarave, tierera, tenavu tentanavu unahaa tieriraro kia quqaq uvavanovata tinavuqi varianaro.

⁹ Tenavu tentanavu qora kaiqa vare variaina uvvara qoqaa tiva qovarama kaarer, Kotiva tinavu avuqavuqama timite vaiva, viva nai tivataira avateharo, quqaama tinavu qora kaiqa uva nunka timiteharo tinavu avu aato hiqama timitaqiro vuanaro.

¹⁰ Kotiva ekaa vaiinti nahentiara qora kaiqa vare variakave ti vairara ti, tenavu tiha, Kia qora kaiqa vare vaunarave, tierera, tenavu minti tivakeha Kotirara viva una uva ti vaivave tieriraro Kotira uvavano kiama tinavuqi varianaro.

2

Ihuva tinavu kahaqama timitaariravama vaivo tura

¹ Ti vaintivaravauvo, ne kia qora kaiqa varaaate ti, te maa uvvara qara ri vai. Tinavuqi hairo vaiinti vovano qora kaiqa varairera, Ihu Karaitiva avuqavu ni vaiva, viva Kotira nai Qora aaqanto vaharo vi vaiintirara iriharo, nai Qorara mpo ike tiraro „vi vaiintira uva nunkama amitaarira“. ² Kotiva tinavuara qora kaiqa vare vai uvvara nunka nimitaarire tiro, Ihuva tinavuara iriharo qutu vura. Ihuva kia tenavu qora kaiqa vare vaunararaqai iriharo qutu viraitiro, viva ekaa maa vataraqaa variaka qora kaiqaravata iriharo qutu vura.

³ Tenavu Karaitiva tivatai uvvara iriqi vuarer, tenavu homa vira vaintima vauro tirara. ⁴ Vovano Karaitiva tivatai uvvara kia iriqiro viraitiro, te vira vaintima vauro tirera, vi vaiintiva una uva ti vai vaiintiva vairaro kia quqaq uvavanovata vi vaiintiraqi varianaro.

⁵ Karaitira uva iriqiro vi vai vaiintiva vaireva, quqaq Kotirara muntuka vate vai vaiintivama vairo. Maantimake tenavu Karaitikanti vohaa variqì vuaina okarara kankomake irirara; ⁶ Tenavu Karaitiva ni vaunteemake nuarera, tenavu homa tiha, Tenavu Karaitikanti vohaa variqì vi vauraukave, tirara.

Qaraaka uva avataqì vuate tura

⁷ Ti navunaa, te maa uvara qara riha kia qaraaka uva avataqi vuateravauve turo. Te haaru uvaravatama ti vauro. Ne haaru hoqaramake Ihurara quqaave tu entara vi uvara irura. „Kotiva haaru tiharo nariara nariara muntuka vataate tu uvara ne vi uvara irura.“

⁸ Vate te qaiqaa vi uvara qaraaka uva voqaantemake, qara ntuvake ni tiva nimirera. Karaitiva vi uvara iriqiro viharo niara noraiqaakero muntuka vatora. Nevata vi uvara iriha, nariara nariara muntuka vateha variarara ti, ne konkiraqiraqi ni varia entava taiqa vivaro ova tanava ite vai entava qovaramaviro vairo.

⁹ Vaiinti vovano nai kena vaiinti iri goraiqama amite vaiva tiharo, Te ovagaan ni vauraukave tirera, viva qaqqai konkiraqi ni vaivama varianaro.

¹⁰ Vaiinti vovano nai kena vaiintiara muntuka vateharo ni vaiva, vi vaiintiva ovaqaa ni vaivaro vira kaiqaahairo kia vovano qora kaiqa varero hiqintuanaro.

¹¹ Vaiinti vovano nai kena vaiinti iri qoraiqama amite vaiva, vi vaiintiva konkiraqi niharo konkiraqi aararaqaa nuvaqiro vi vairo. Konkiraqiva vira avu qimpa kaivarora tiro, vi vaiintiva nai vuaina aarara kia ho tavaraitiro, hampi vi vaira.

¹² Ti vaintivaravaauvo, Kotiva Karaitira kaiqarao tiro, viva ne qora kaiqa vare varia uvara nunka nimitairara ti, te ni qara nimite vauro.

¹³ Ne vainti qokavaravaauvo, totaa entaqaaahairo qaqqi variqiro vi vau vaiintira ne vi vaiintirara kankomake iriarara ti, te nivata qara nimite vauro. Ne quvaaraa vaintivauvo, ne Sataanira aatarakaarara ti, te maa qarara nivata nimite vauro.

¹⁴ Ti vaintivaravaauvo, ne tinavu Qorara kankomake iriarara ti, te nivata qara nimite vauro. Ne vainti qokavaravaauvo, totaa entaqaaahairo qaqqi variqiro vi vau vaiintira ne vi vaiintirara kankomake iriarara ti, te nivata qara nimite vauro. Ne quvaaraa vaintivauvo, ne kempukaiqaakeha variqi vi variavaro Kotira uvavano ni aato muntukaqi vaimanta ne Sataanira aatarake variarara ti, te ni qara nimite vauro.

¹⁵ Maa vataraqaaahaina okaravanovata maa vataraqaaahaina haikavanovata vairara, kia vi haikarara muntuka ntiramanta variata. Vaiinti vovano vataihaina haikaraqai muntuka vatairera, vi vaiintiva tinavu Qora Kotirara kia muntuka vataanaro.

¹⁶ Vaiinti nahenti nai quaheraraqai iriqi vi vai okararave, vo haika taveha virara muntuka nti vai okararave, airi airaira vateha mahuta ti vai okararave, ekaa vi okarava vi okarava kia tinavu Qova inaihairo tuviraitiro, nai vataihaina okarqaahairo qovaraiqi vairo.

¹⁷ Maa vatavavata, maa vataraqaaahaina haikara muntuka nti vaivavata, ekaa vi haikava vi haikava taiqa viraro Kotira uva iriqiro vi vaira vaiintiva, vivaqaima ekaa enta qaqqi variqiro vuanaro.

Karaitira navutaarara tura

¹⁸ Ti vaintivaravaauvo, ekaara entavano aumantoma ani vaivo. Ihu Karaitira vira navutava qovaraiqianarove ti vari uvara ne iriara. Maa entara Karaitira navutaaka airtahaa qovaramavi variavera tenavu kankomake iruraro ekaara entavano aumantoma vairo.

¹⁹ Karaitira navutaaka tota tenavu Ihura uva iri vaurauka hampata variqi vi, viraqahai vika tinavu qaqirake vuara. Vika tinavu hampata vohaa vaiinti variare tiatirio, vika maa entara tinavu hampata vohama variqi vuatirio. Vika tinavu qaqirake vuamantara ti, tenavu kankomake tavauramanta vika kia tinavu hampata vohara vaiinti variara.

²⁰ Ho ne Kotira Maraqua varaaka vahara ti, ne ekaa Kotira uva quqaa uva kankomake iriara.

²¹ Te kia niara tiha, Ne kia quqaa uva kankomake iriakave, tunaravauve. Ne Kotira uva quqaa uva kankomake iriarara ti, te maa uvara ni qara ruva nimite vauro. Kia Kotira uva quqaa uvaqaaahairo una uvavano ho qovaraiqianarove. Ne virara kankomake iriara.

²² Tavave una uva ti vaiva vaivo? Ihurara viva kia Mesaiavano vaivo ti vaiva, vi vaiintivama vairo. Vi vaiintiva minti tiharoma Ihura navutaiqama amiteharo vira Qoravata vira Maquavata qoririma amite vairo.

²³ Vaiintivano Kotira Maqu Ihura qoririma amiteharo vira Qoravata qoririma amite vairo. Vaiinti vovano Ihurara quqaa viva Kotira Maquvave tirava, vi vaiintiva vira Maqu vataakero vohaa vaharo vira Qora vataakerovata vohama varianaro.

²⁴ Tota hoqare avuni irito uvara ne vi uvaraqai koqemake iriqi vuata. Vi uvava niqira qaqqi variqiro vi vairera, ne vira Maquvata vira Qoravata vitanta hampata voharaqaq variqi vivara. ²⁵ Vira Maquvano tinavuara vika mintiaqi viha ekaa enta qaqqi variqi vuate tiro, nai kauqu aiqiqaa aqukero tivatora.

²⁶ Vaiinti vonavu ni kumbata vare qora aaraqaa vuru kareka auti variakara irihama, te maa uvara ni qara ruva nimite.

²⁷ Ho ne Kotira Maraqua varaakama variara. Kotira Maraqravano ni muntukaqi vaharo ni numiqa vairara tiro, qumina vovano Kotira okarara ni numiqaantora. Kotira

Maraquravano ekaa vo okara vo okara ni numiqeharo kia una uvavata ni tiva nimiraitiro, quaa uvaqai ni tiva nimi vaira. Kotira Maraquravano ni tiva nimi vai uvvara iriqi viha, Karaitira vataake vohaa variqi vuata.

²⁸ Ti vaintivaravauvu, Karaitira vataake vohaa variqi viha variata. Tenavu mintiake variqi vi variariraro naantiara Karaitiva qovaraiqina entara tenavu kia qetake kauriraiti, vira avuqaa muntuka qihaaqama kema vairara.

²⁹ Karaitiva kia qora kaiqavata vararaatiro, avuqavu ni vai okarara, ne virara kankomake iriakara ti, ne tayaivaro vo vaiintivano Karaitira voqaantema kero avuqavu ni vairera, ne homa vi vaiintirara Kotira vaintive tivara.

3

Tenavu Kotira vaintima vauro tura

¹ Ike, nantuma keroe Kotira muntukavano tinavuara vaivo? Kotiva tinavu Qova tinavuara voqamakero muntuka vateharora tiro, viva tinavuara ne ti vaintairama variavo ti vaira. Quqaama tenavu vira vaintairama vai. Vataihainaa okarara iri varia vaiinti nahentika Kotirara kia kankomake iri variarara ti, vika tinavu okararavata kia kankomake iri variara.

² Ti navunao, vate tenavu Kotira vaintairama vai. Naantiara tenavu nana vaiinti voqaarae vairara? Kia tenavu vi okarara kankomake iriraiti, maa uvaraqai kankomake irunara: Naantiara Karaitiva qovarama vina entara tenavu vira anomake tavaainarara ti, tenavu vira voqaantemake vairera. ³ Ekaa vaiinti nahenti vi entara vekaiqiha variaka, qora kaiqa varaorarave ti, Karaitiva koqema kero nintemake, vikavata koqemake nireka autiha variara.

⁴ Ekaa vaiinti nahenti qora kaiqa vare variaka, vika Kotiva tivatai uvvara raqake variara. Kotiva tivatai uvvara raqake vaiva, vivama qora kaiqa vare vaira.

⁵ Ne kankomake iriavaro Karaitiva vaiinti nahenti qora kaiqa vare vai uvvara nunka nimitareva qovarama vura. Karaitiva kia qora kaiqavata vare vaivama vairo.

⁶ Vikantiro variqiro vuarirava kia qora kaiqavata varaqiro vuanaro. Qora kaiqa varaqiro vi vai vaiintiva, viva kia Karaitira tavaraitiro, vira okararavata kia kankoma kero iri vaira.

⁷ Mpo, ti vaintivaravauvu, kia qaqi kaivaro vovano ni kuntama varero hampi aaraqaan vuarire. Vaiinti vovano avuqavu kaiqa vare vai vaiintiva, vi vaiintiva avuqavu ni vai vaiintivama vairo. Vi vaiintiva Karaitiva nintema kero avuqavu ni vaivama vairo.

⁸ Sataaniva hoqare entaqaaahairo qora kaiqaqai varaqiro vi vairara tiro, qora kaiqa vare vai vaiintiva Sataanira vaintima vairo. Kotira Maaquvano Sataanira vaaku kaiqa ekaara vehi autukareva maa vataraqaa qovarama vura.

⁹ Vaiintivano Kotira vainti vaivaro Kotira avu aatovano vi vaintiraqi vaivarora tiro, vi vaiintiva kia ho vaaku kaiqa varaqiro vuanaro. Kotiva vira Qova vaivarora tiro, vi vaiintiva kia ho vaaku kaiqa varaqiro vuanaro.

¹⁰ Tenavu nantiakee vi vaiintiva Kotira vainti vaivo, vi vaiintiva Sataanira vainti vaivo, tirara? Maantimakema tenavu vira viraqamake tavarara: Kia avuqavu kaiqa varaqiro vuariravave, kia nai kena vaiintiara muntuka vataariravave, minti variaka kiama Kotira vainti vaivarave tirara.

Nariara nariara muntuka vataate tura

¹¹ Ne tota hoqare iru uvava, vi uvava tinavuara mintima tiro: Ne nenta kenaukara muntuka vateha variate, tura.

¹² Tenavu haaruva vaiinti Kenira aanaraarora. Vi vaiintiva Sataanira vainti vaharo nai qata arukora. Nana kaarae Kenira nai qata arukorave? Maa haikara kaarave: Kenira kaiqavano qora kaiqa vauvaro vira qata kaiqavano koqe kaiqa vaura kaara viva nai qata arukora.

¹³ Ti qata vakao, Kenira aanare vataihainaa okara iri variaka ni navutaiqama nimite vaivera, kia ne virara ravuku vuata.

¹⁴ Tenavu tentanavu kena vaiintiara muntuka vate vaunarara ti, tenavu kia ekaara qutu vuarirauka vairaiti, tenavu ekaa enta qaqi variqi vi variariraukama vai. Nai kena vaiintiara iri qoraiqama amite vaiva, ekaara qutu vuariravama vairo.

¹⁵ Nai kena vaiintiara iri qoraiqama amite vaiva, viva vora aruke vai vaiintira voqaarama vairo. Ne kankomake iriarave. Vora aruke vaiva, vi vaiintiva kia ekaa enta qaqi variqiro vuariravama vairo.

¹⁶ Ihuva tinavuara iriharo qutu vuataa ivaro qutu vurara ti, tenavu vira muntukavano tinavuara vairara kankoma irunara. Ihuva mintirara ti, tenavuvata vira aanare tentanavu kenaukara iriha qutu vuataa iraque qutu vuariravama vairo.

¹⁷ Vaiinti vovano airi airaira vate vairava tavairaro vira kia vaiinti vovano kia ho karave airairave vatairava vairaro virara kia aaqurihama amitairera, nantiakeroe vi vaiintiva ti muntukavano Kotirara vaivo tianaro?

¹⁸ Ti vaintivaravaauvo, tenavu kia tentanavu kena vaiinti kahaqiraiti, qumina noqihai tiha, Ti muntukavano ti kena vaiintiara vaivo, tiarora. Tenavu tentanavu kena vaiinti kaiqa vara nimiteha, viraqahai tinavu muntukavano vikara vaivo tiarirava homa varianaro.

¹⁹ Tenavu tentanavu kena vaiinti kahaqama nimitaqi vuarera, tenavu tentanavu quqaa okaraqaa variqi vuainarara kankomake iri, naantiara tenavu Kotira avuqaa vaiha kia qetaraiti, muntuka qihaaqamake vairara.

²⁰ Tinavu muntukavano tinavuqaa uva vatero tiharo, Ne kiama Kotira vainti variavo, tirera, Kotiva tinavu avu aato muntuka aatara kero ekaa haika tave vaiva, viva tinavuara ne ti vaintima variavo tianaro.

²¹ Mpo, ti navunao, tinavu muntukavano kia tinavuqaa uva vatairera, tenavu kia qetaraiti, Kotira avuqaa vaiha muntuka qihaaqama kema vairara.

²² Tenavu viva tivatai uvara iriqi viha Kotira antuqavano vai kaiqara varaqi vuarera, tenavu nana nana haikarae Kotira iraairiraro viva vi haikara homa tinavu timianaro.

²³ Kotiva tivatai uvava maantimama vairo: Ne Ihu Karaitirara quqama viva Kotira Maauque tivakehama virara kempukaiqaake iriqi vuate. Ihu Karaitiva niara ne nariara nariara muntuka vatehava variate ti uvava, vi uvara iriqi vuate, tura.

²⁴ Vaiinti vovano Kotira uva avataqiro ni vaiva, vi vaiintiva Kotira vataakero vohaa variqiro vi vaivararo Kotiva vi vaiintira vataakero vohaa variqiro vi vaira.

Kotiva nai Maraaura tinavu timirara ti, tenavu homa tiha, Kotiva tinavu hampata vohaa variqiro vi vaimanta vaunarave, tirara.

4

Ne vaanavano tina uvarara Kotira uvave tivorave tura

¹ Mpo, ti navunao, una vaiinti airitaha vo vata vo vataini niha tiha, Te paropeti vaiintivanove, ti variara. Vaiinti vovano anirero niara minti tirera, hauri vira uvava kaaka quqaave tivora. Ne vira kaiqa avatamake tavaata. Kotira Maraauravano vira kahaqi vaivaroe viva minti tivo, vaanavanoe vira kahaqi vaivaroe viva minti ti vaivo, tiata.

² Ne Kotira Maraauravano ti vaina uvava maantimakema kankomake irivara. Ne vaiinti vo avateha tavaivararo viva tiharo, Quqama Ihu Karaitiva Kotiva inaihairo tuvuntero vaiintiqama vurave, tirera, ne virarama tiha, Quqama Kotira Maraauravano vi vaiintira kahaqi vaivaroi vi uvava ti vaivo, tiata.

³ Ne vo vaiinti avateha tavaivararo viva Ihura okarara una uvave tirera, ne vi vaiintirara mintima tiata: Kotira Maraauravano kia vira kahaqi vaivararo viva una uvaqaima ti vaivo. Vaanavanoe Sataaniva vainenaihairo vi vaiintira uva qovaraiqamake vaivo, tiata. Karaitira navutaiqama amite val okarava aniainarara ne virara iriara. Vate maa entara una vaiintinavu Karaitira navutaaka vaakama qovaramavi Sataanira uva ti variara.

⁴ Mpo, ti vaintivaravaauvo, ne Kotiva ikama variavo. Kotira Maraauravano ni muntukaqai vaiva, viva mpeqavano vaiharo vaanavanoe kahaqi vaimanta una uva ti varia vaiintika naatara kairara ti, nevata vi vaiintika naatara kaarave.

⁵ Vokiaka maa vataragaahainaa uva okaraqai iriqi vi variakara ti, vinavuka vi okarararaqai vaiinti nahenti tiva nimi variamanta vika aato nimiha vinavuka uva avataqai vi variara.

⁶ Tenavu kia vinavuka voqaantemake vairaiti, tenavu Kotiva ikama vaunara. Maantima kehama tenavu vo vaiinti vo vaiinti uva iriha, rairakeha tiha, Vi vaiintiva Kotira vaintive, maa vaiintiva kia Kotira vaintive, tirara. Kotira okara irireka auti variaka, vika tinavu uva irivara. Kia Kotira okara irireka auti variaka, vika kia tinavu uvavata irivara.

Kotira muntukavano vairara tura

⁷ Mpo, ti navunao, kaiqe nariara nariara muntuka vatehava variari. Val okarava Kotiva inaihairo tuvira. Vorara vorara muntuka vateharo ni val vaiintiva, vi valintiva Kotira vaintime val. Vi vaiintiva homa Kotira okarara kankomake irunarave tianaro.

⁸ Kotiva vaireva, viva vorara vorara muntuka vate vaivama vairo. Viva minti vairara tiro, vaiinti vovano vorara vorara kia muntuka vate vairava, vi valintiva kiama Kotira okarara kankomake irianaro.

⁹ Kotira muntukavano tinavuara vaira maantimakero tinavu humiqero: Tinavuara vika ti Maauquaahai qaqa variqi vuate tiro, Kotiva nai Maauqua vohaiqa vataini atitovaro viva tinavuara iriharo qutu vura.

¹⁰ Kotiva muntuka vate vai okarava maantimama vairo: Tenavu Kotirara kia muntuka vataavauraro vivaqai tinavuara muntuka vateharora tiro, tinavu vaaqu kaiqa varaina uvara nunka timitaareire tiro, nai Maaqu varakovaro viva tinavuara iriharo qutu vura.

¹¹ Mpo, ti navunao, Kotira muntukavano tinavuara mintima kero vairara ti, tenavuata mintimakeha nariara nariara muntuka vateha variari.

¹² Kiama povano Kotira viri tavaiva vaivarovata, tenavu nariara nariara muntuka vateha variqi vuarerera, Kotiva tinavu vataakero variqiro vi vairaro tinavu muntukavano quqaama Kotirara varianaro. ¹³ Kotiva nai Maraqua tinavu timirara ti, tenavu homa tiha, Tenavu Kotira vataake variqi vi vauraro Kotiva tinavu hampata variqiro vi vairave, tirara.

¹⁴ Tenavu vira Maaqu tentanavu avuqohai tavauraukara ti, tenavu nivata tiva nimi tiha, Tenavu vatainai variariraukara kuvantu timitaareire tiro, vira Qova nai Maaqu atitovaro tuvurave, ti vaunara.

¹⁵ Ta vaiintivae Ihurara quqaama viva Kotira Maaquvano vaivo tirera, Kotiva vi vaiintira vataakero variqiro viraro viva Kotira vataakero variqiro vuanaro.

¹⁶ Tenavu tavauraro quqaama Kotira muntukavano tinavuara vairo. Kotiva vaireva, viva vorara vorara muntuka vate vaivama vairo. Vorara vorara muntuka vateharo variqiro vi vairava, viva Kotira vataakero variqiro vi vairaro Kotiva vira vataakero variqiro vuanaro.

¹⁷ Tenavu mintiakе variqi vuariraro viraqaahairo tinavu muntukavano Kotirara quqaam vairage tenavu maa vataraqaa vaiha Karaitiva ni vauntemake nirara. Tenavu mintimake nuvaqи vuarera, naantiara Kotiva *ko* tiaina entaraqaa tenavu kia qetaraiti, muntuka qihaaqama kehama vairara.

¹⁸ Quqaa muntuka vate vai okarava aatu ite vai okarara qaqlini varake vairara tiro, Kotirara muntuka vate vairava kiama Kotira aatu qetaanaro. Kotiva nai qora kaiqa kaara ti ruquuantorave tiro, Kotira aatu qete vairava, vi vaiintiva kia ho quqaiqama kero Kotirara muntuka vataariravama varianaro.

¹⁹ Kotiva naane tinavuara muntuka vate vairara ti, tenavuvata nariara nariara muntuka vateha vaunara.

²⁰ Vaiinti vovano tiharo, Ti muntukavano Kotirara vaivo, tivakeharo, nai kena vaiinti-ri iri goraiqama amite vairera, vi vaiintira uvavano una uvaqaima varianaro. Vaiinti vovano nai avuqohairo tavaaina vaiintirara kia muntuka vatairera, nantiakeroe viva nai avuqohairo kia ho tavainara Kotirara muntuka vataanaro?

²¹ Karaitiva tinavuniara maa uvara tivatero tiharo, Kotirara muntuka vate vairava nai kena vaiintiaravata muntuka vataareire, tura.

5

Vataihainaa okara aatara kaainarara tura

¹ Tau vaiinti nahentikae Ihurara tiha, Viva quqaama *Mesaiaavano* vaivo, ti variaka, vika Kotira vaintima vaivaro Kotiva vika Qovama varianaro. Vira Qorara muntuka vate vairava, vira vaintairaravatama muntuka vataanaro.

² Tinavu muntukavano Kotirara vairage tenavu Kotiva tivatai uvara avataqi vuarerera, tenavu homa tiha, Ti muntukavano Kotira vaintairaravata vaivo, tirara.

³ Tenavu Kotiva tivatai uvara iriqi vuarerera, tenavu homa tiha, Ti muntukavano Kotirara vaivo, tirara. Tenavu kiama vukaari utuqi viha Kotiva tivatai uvara iriqi virara.

⁴ Tenavu Kotira vainti vahara ti, homa vataihainaa okara aatara karara. Tenavu Ihurara kempukaiqaake iriqi viha homa vataihainaa okara aatara karara.

⁵ Ta vaiintivae vataihainaa okara ho aatara kaanaro? Ihurara quqaa viva Kotira Maaquvano vaivo ti vairava, vivama homa vataihainaa okara aatara kaanaro.

Ihu Karaitira okarara tura

⁶ Ihu Karaitiva vatainai tuvurero namari varero nai naare raurukero qutu vura. Viva kia namariqai vararaitiro, viva nai naare raurukero qutu vura. Kotira Maraquaqavanove quqaa uvaqai ti vaiva vaharora tiro, vivavata Ihura okarara tiva qovaramake vaira.

⁷ Taaramonavuvano Ihura okarara tiva qovaramake variara. ⁸ Kotira Maraquaqavanove, Ihuva namari varovave, Ihura naarevano katariqaa ntava vuvave, vinavuka taaramon-avuvano Ihura okarara voohaa uvaqai ti variara.

⁹ Qumina vaiintivano tiva qovaramake vai uvarara tenavu vira uvara quqaave ti vaunara. Kotiva tiva qovarama kai uvara qumina vaiinti uvavata aatarakero vairara ti, tenavu Kotiva Ihurara viva ti Maaquvano vaivo tu uvara voqvata virara quqaave tirara.

¹⁰ Kotira Maaqua quqaa vivave ti vaiva vaivaro vira muntukaqihairovata vi uvarara quqaa uvama vaivo ti vaira. Kotira uvara kia quqaa uvave ti vai vaiintiva, vi vaiintiva

Kotirara una uva ti vaivavema tianaro. Kotiva Ihurara ti Maaquve tu uvarara, vi vaiintiva kia quqaa uvave tirara tiro, viva Kotirara una uva ti vaivavema tianaro.

¹¹ Kotiva tiva qovaramake vai uvava maantimama vairo: Tinavuara vika ekaa enta qaqi variqi vuuate tiro, Kotiva nai Maaqu tinavuara iriharo vara kaira. Qaqi variqi vi varia okarava nai vira Maaquqi vairara tiro, ¹² vira Maaquntiro variqiro virava qaqi variqiro vuanaro. Kia Kotira Maaquntiro variqiro virava kiama qaqi variqiro vuanaro.

Tenavu qaqi variqi vuaina okarara tura

¹³ Te ne Kotira Maaquara quqaa vivave ti variaka, ne ekaa enta qaqi variqi vi varia okarara kankomake iriate ti, te maa uvara ni qara ruva nimite vauro.

¹⁴ Tenavu Kotira antuqavano vaina okarara iriha nana nana haikarae vira iraarera, viva tinavu uva homa irianaro. Viva tinavu uva iri vaiva vaimantara ti, tenavu muntuka parumake Kotira aare vaunara.

¹⁵ Kotiva tinavu uva iri vaiva vaimantara ti, tenavu kankomake iruraro viva tenavu vira iraaina haikara tinavu ho timiariravama vairo.

¹⁶⁻¹⁷ Ne tavaivaro Kotira vainti ni qata vakaa vovano kia vira kaara ekaara qutu vuaina kaiqara qora kaiqa vara kairera, ne vi vaiintirara Kotira aaraivaro Kotiva vira kahaqama amitairaro vi vaiintiva qaqi variqiro vuarira.

Kia te kempukaiqaakero vaaqu aaraqaa ni vai vaiintiraravauve turo. Qora kaiqa vo vaiintivano vira vara kairera, viva homa Kotira aaraanaro. Qora kaiqa vo vaiintivano vara kairera, vi kaiqara varainara kaara viva ekaarama qutu vuanaro. Te vi kaiqara varakaaina vaiintirara kia Kotira aarama amitaate turo.

¹⁸ Tenavu kankomake tavaunarave. Kotira vaintivano kiama qaqqai vaaqu kaiqa varaqiro vuanaro. Kotira Maaquvano viraqaa koqemakero raqiki vairara tiro, Sataaniva kiama vira qoraiqama amitaanaro.

¹⁹ Tenavu kankomake irunarare. Tenavu Kotira vaintaira vauramanta qaqi vataini varia vaiinti nahentika kia Kotira uva iri variaka variavaro Sataanivama viqaqaa raqiki vairo.

²⁰ Tenavu qaiqaa kankomake irunarare. Kotira Maaquvano vataini tuvuntero tinavu avu aato kahaqama timitaimanta tenavu quqaa Variqavano vairara kankomake irunara. Tenavu vira Maaqu Ihu Karaitira vataake variqi viha, tenavu quqaa Kotiravata variqi vi vaunara. Kotiva quqaa Variqavanoma vairo. Viva quqaa ekaa enta qaqi variqiro vi vai okaravama vairo.

²¹ Mpo, ti vaintivaravauvo, rauriha variate. Kia una variqanavu vainaini variate, turo.

2 IONI

Ioniva tavaaraihainaa qara vara kora

Ihura qaqi vara himpima kovaro naaruuvaini oru vauvaro airi ihi 60 ihie aitarovaro Ioniva maa qarara ruva tora. Nahenti vovano nai vaintaira vataakero kia una maara uva avataaqi viraitiro, koqemakero Karaitira uva iriqiro vuarire tiro, Ioniva maa uvvara qara ruva amitora.

¹ Te Kotira vaintiqaqaa raqiki vaurauka ariara Kotiva nai kaama tai nahentiraravata, ai vaintairavata, qara nimitauro. Tevata ekaa Kotira uva quqaa uva iri variakavata tenavu niara muntuka vatehama vauro.

² Kotira uva quqaa uvavano tinavuqi vairara ti, tenavu niara muntuka vateha vauro. Vira uvavano tinavuqi qaqlima variqiro vuanaro.

³ Tenavu quqaa uva iriqi viha nariara nariara muntuka vateha variqi vi variariraro Kotiva tinavu Qovavata, vira Maaqu Ihu Karaitivavata, vitanta tinavu koqema timiteha aqurihama timiteha muntuka paruma timitiqaqee variari.

Nariara nariara muntuka vateha variate tura

⁴ Tinavu qova tiharo, Quqaa uvaqai iriqi viha nuate, tivatai uvvara ai vanti hininavu viva tuntemake ni variarara ti, te virara quahé vuanara.

⁵ Are koqe nahentivauvo, te uva vo tivataira ai tiva amiarirara iriana. Kia te Kotiva qaraaka uva vo tivataira ai tiva amireravauve. Tenavu haaru hoqare vaiha maa uvvara iriavaunara. Vi uvarara irihama mpo, kaiqenavu nariara nariara muntuka vateha variare.

⁶ Tenavu Kotiva tivatai uvvara iriqi vuarera, tenavu homa tiha, Kotirara muntuka vatauro, tirara. Kotiva tivatai uvvara maantimama vairo: Nariara nariara muntuka vateha nuate, turave.

Una uva ti variakara tura

⁷ Una uva ti varia vaiintika airitaha vo vataini vo vataini vi ani vaiha, Ihu Karaitirara tiha, Viva kia naaruuvalhairo quqaa vaiintiqama viro tuvivave, ti variara. Minti ti vai vaiintiva una uvaqai ti vaharo Karaitira navutaavama vairo.

⁸ Ne vi uvvara ti varia vaiintikara rauriha variate. Hauri ne vika una uvvara quqaa uvave tivaro ne tota Ihura kaiqa vara amiteva quminaiqama vuantora. Ne Karaitira kaiqaqai vara amitaqiq vivi, ne nenta kaiqa vare koqaara ekaa varaata.

⁹ Vaiinti vovano kia Karaitira uva koqema kero tuataraitiro, qaqlira kero vo uva iriqiro virera, Kotiva kia ho vikantiro varianaro. Vaiinti vovano Karaitira uva koqema kero tuataqiro virera, Kotiva nai Maaqu vataakero vikantiro variqiro vuanaro.

¹⁰ Karaitira uva kia koqema kero tiva nimiraitiro, vo uva ti vaina vaiintiva ni hampata vaireva anirera, kia vira quahama amiteha nenta naavuqi vita vataata. Kia vi vaiintira uva mantama amitaata.

¹¹ Vi vaiintira uva mantairava, vivavata vi vaiintiva kaiqa varaintema kero, qora kaiqama varaanaro.

Vitiuhainaa uvara tura

¹² Te airi uva ni tiva nimiarirava vaimantavata, kia te qaraqihai vi uvvara ni tiva nimirera. Te tentavano oru ni hampata vaiha ni tiva nimiare tivakema vai. Ne ti hampata quahéha variate ti, te ni hampata oru vaiha vi uvvara ni tiva nimirera.

¹³ Ai aura Kotiva nai kaama tai nahentira vira vaintaira maini variaka ai uva mantaavo.

3 Ioni Ioniva ekaara qara vara kora

Ihura qaqi vara himpima kovaro naaruvalini oru vauvaro airi ihi 60 ihie aitarovaro Ioniva maa uvvara qara ruva tora. Vaiinti vovanano Kaiaasiva vauvaro Ioniva virara koqema kera Ihura vaiinti niara aaraihai ani vaikaqaa raqikiqira vuane tivakero, vo vaiinti Diotrefesirara qora kaiqa vare vaivo, Demitariusiva koqe kaiqa vare vaivo tivakero, qara vara kora.

¹ Ka iaasio, te Ionika Kotira vaintiqaa raqiki vauraukama maa uvvara ai qara ruva amite. Mpo, Kaiaasio, quqaama ti muntukavano ariara vairo.

² Ti qatauvauvo, are kia rovara vararaitira, koqema kera variqira vuane ti, te ariara irihama Kotira aare vaunara. Te iruraro ai avu aato muntukavano Kotirara koqema kero vaivarava varianara.

³ Tinavu qata vakaukavara are iananaihai maini anire ariara viva koqema kero quqaa uva tuataqiro vi vaivo tihamanta te vi uvvara iriha quaheha vauro. Ho te irurara are Kotira uva quqaa uvaqai iriqira vi variaravama variarao.

⁴ Ti vaintivarara vika quqaa uvaqai iriqi vi variavo ti varia uvvara iri, te nai voqavatama quaheha vairara.

Kaiaasirara koqe kaiqa vare variarao tura

⁵ Ti vaiintio, are tinavu qata vakaukavara kahaqama nimitehara, kia viri tavaaraaukavata kahaqama nimiteharama koqema kerama kaiqa vare varianara.

⁶ Ai muntukavano vikara vairara vika tinavu tiva timiamanta tenavu Ihura vaiinti nahenti maini vaurauka irunara.

Minti varia vaiintika Kotira kaiqa vaiinti variarara tira, are koqema kera karaqohairave, vo haikaqohairave, vika kahaqama nimite vaira aaraini vuata.

⁷ Hauri kia Ihura uva iria vaiinti nahentika tinavu kahaqivorave tivake, vika vatuka vatuka vi aninha Karaitira autuqaa vira uva tiva nimiqi vi variara.

⁸ Vika mintiaqi vi variarara ti, tenavu vika quahama nimiteha ntita vate kahaqama nimitaariravama vairo. Tenavu vika kahaqama nimitiaqi viha, vikavata tenavuvata vohaa kaiqa vare variariraro quqaa uvavano ho vi anianaro.

Diotrefesirara qora kaiqa varavo tura

⁹ Ne Ihura vaiinti nahenti mini variakaini, te nini qara vara kauraro oru vivarovata, Diotrefesiva viva avuniqamakero vaireva auti vaharo kia tinavu uva iri vairo.

¹⁰ Naantiara ne vainaini orure te vira qora kaiqa vara qovarama karerave. Viva tinavu hutu vatainiqama kaare tiro, una uva tinavuara ti vairo.

Viva kia vi kaiqaraqai vararaitiro, viva tinavu qata vakaukavara vo vatuka vo vatukaini vi ani variakara kia quahama nimitaraitiro, viva tavaavarovo vovanano vikara quaha kero ntita vatareva auti vaivarovo viva vira qioqama kero tiharo, Are vika ntita vatairera, vira kaara are kiama tinavu hampata maara tinarare, tivakeharo voka voka antuare vaira.

Demitariusiva koqe kaiqa varorara tura

¹¹ Ti vaiintio, kia qora kaiqa vare variaka iante iraitira, koqe kaiqa vare variaka iante iana. Koqe kaiqa vare vai vaiintiva Kotira vaintima vairo. Qora kaiqa vare vai vaiintiva kia Kotira okara tave vaivama vairo.

¹² Ekaa vaiinti nahenti Demitariusirara koqe vaiintive ti variara. Vika tavaavarovo vi vaiintiva ququqama keharo Kotira kaiqa vara amite vaira. Tenavuvata vi vaiintirara koqe vaiintive tunarara tira, are kankomake iriraro tinavu uvavano quqaa uvaqaima varianaro.

Ekaara uva manteharo tura

¹³ Te airi uva ai tiva amiarirava vaimantavata, kia te qaraqihai ai tiva amirera.

¹⁴ Te inaaraipi varike ai viri oru taveha ai vataake uva tirera. ¹⁵ Kotiva ai muntuka paruma amitairara variana. Ai qata vakaukavara maini variaka ai uva mantama amitaavo. Ti qata vakaukavara mini variakara are uva mantama timitaana.

IUTI Iutiva qara ruva tora

Ihura qaqi vara himpima kovaro naaruvaimi oru vauvaro 40 ihie 50 ihie aitarovaro Iutiva maa uvvara qara ruva tora. Iutiva Ihura qatavano vaiharo vaiinti nahenti kia una uva maara iriqi viraiti, koqemake Ihu Karaitira uvaqai iriqi vuate tiro, maa uvvara qara ruva tora.

¹ Te Iutika Ihu Karaitira kaiqa vaiintivano vauraro Iemiva ti qatavanoma vairo.

Te Kotiva naarama tai vaiinti nahentikara maa uvvara qara ruva nimitauro. Kotira tinavu Qora muntukavano niara vaivarro Ihu Karaitiva niara koqe aaraqaa vuate tiro, niqaa maimaraara raqiki vairo.

² Kotiva ni aaqurihama nimitairaro ni muntukaqihairo paru i vaira vaiha nariara nariara muntuka vateha variata. Ne voqavata mintiaqi vuata.

Una uva maara ti vau vaiintikara tura

³ Ti navunaavaavo, te Kotiva nivata tinavuvata kuvantu kero tivitaaina okarara qara ntuvu nimitarerave tivakevata, „te vo uvvara irihama“ vo uva qara ntirera. Te ni vihi tiarimanta ne Karaitira uva kempukaiqaake tuataqi viha iriqi vuate ti, vo uva qara ntuvu nimitarerera.

Kotiva Karaitiva tinavu kahaqiaina okarara tinavu vohaa tataaqai humiqorara ti, tenavu vira vaiinti nahenti vaiha vo uvavata kia tiva nimiqi viraiti, avuqavuqamake vira uvaqai tiva nimiqi virera.

⁴ Hini vaiintinavu evaara ni avutana oru variara. Haaru Kotira vukuqi qara ntuvu tova tiharo, Minti varia vaiintikaga Kotiva nora uva vataanarove, tura. Vi vaiintinavuka kia Kotirara noraiqaake iriraiti, Kotiva tinavu aaqurihama timiteharo koqema timitaaina uvarara, vinavuka hampi tuqantaake tiha, Tenavu homa naitaramake naata vaati vare varia okarara qaqrake hampi ni varia okarara avataqi vuare, ti variara. Vika minti tivakeha tinavu Noravano Ihu Karaitiva tinavuqaa raqiki vaira qoririma amite variara.

⁵ Haaru maa uvvara ne irura qaiqaavata ni tiva nimirera: Haaru Kotiva nai vaiinti nahenti Isipiqihairo ruuaruma nimiteharo variqiro yumanta vo enta viqaqihai vokuka Kotira uvvara kia quqaa uvave tuvaro vira kaara Kotiva kia vika vehakuma nimitaraitiro, vika vehi autu kora.

⁶ Ne *enselinavu* iriteha variata. Haaru Kotiva *enseli* vokuka noraiqama komanta vika popohomanta nái maqaqa qaqrake vo kaiqa varare tuvaro, vira kaara Kotiva vika konkiraquraqi *seniqohairo* rumpa tomanta vaura. Vika mini variqi vi, ekaara entaqaa nora uvama varevara.

⁷ Ne Sodomivata, Gomoravata, vi vatukatanta tataaqi vau vatukanavuvaravata, iritaata. Vi vatukanavuraqi vau vatanaaka *enselinavu* voqantemake, vaaqu kaiqa vare vaura. Vi vatanaaka naata vaati vare varia okarara qaqrake, vika quara vairi voqara hampi nuvagi vi vaura. Vira kaara Kotiva kia qimpe vai iharaqohairo vika ekaa tatoqa aqukora. Kotiva niaravata mintiantorave tivakeha rauriha variata.

⁸ Ni avutana vaiha una uva maara ti varia vaiintinavuka vika hampi taira tave varia okarava nái vaata qoraiqamake vaimanta vika nora vaiintinavu ti varia uvaravata kia avataqi viraiti, naaruvaihainaa vaiintiaravata tauvaqa vauraa uva tiva nimiti variara.

⁹ Haaru Maikeriva *enseli* vika noravano vaiharo Sataanira vataakero Mosira vaata varaainarara kaara tirori vaiharo Sataanirara tiharo, Hauri tentavano ari atiha tauvaqa vauraa uva tiarorave. Kairaro Noravano Kotiva nai ai atiarire, tura.

¹⁰ Maikeriva *enseli* noravano minti tu uvava vaimantavata, ni avutana vaiha una uva maara ti varia vaiintinavuka vo uva vo uva okara kia kankomake iriraiti, vika ekaa vi uvarara qora uvaqai tivakeha tauvaqa vauraa uva ti variara. Vika quara vairivano vare vai okararaqai kankomake iri tave variaka variara. Ho vi vaiintinavuka vi okarara avataqi vi vaivaro vi okarava vika nái vehi autu taiqakaanaro.

¹¹ Te vikara ohoma tiva nimitauro. Vika Keniva nuntemake, hampi aaraqaa ni variara. Haaru Balaamiva monu varaainarara iriharo vaiinti nahentira una variqa autu tuahera kaate tuntemake, maa entara vi vaiintinavukavata monuqai varareka auti variara. Haaru Koraavavata Mosira navutaiqama amiteharo vira vatuka varare tuvaro Koraara arukontema kero, vi vaiintinavuka aru taiqa kaanaro.

¹² Ne nariara nariara muntuka vatehamu ruvaqumavi variamanta vi vaiintinavuka, qora vaiintinavu ni nivutana qora numuara voqara vaiha vika nariaraqai iriha kara ne variara.

Vi vaiintinavuka vaiha qumina tonavu voqaara variara. Uvaivano tonavu vira vuaqa vuqamaaqi vi vaivaro kia viraqihairo aaqvata nti vai tonavura voqaara vi vaiintinavuka variara. Katari marevano ekaa aqu ntuvu viro kia tavavata iraraitiro, qumina vai katarira voqaara vi vaiintinavuka variara. Katari tuq'a rarukaavaro ekaara aaharauqama vira voqaantemake, vi vaiintinavuka variara.

¹³ Namari aintaakaqaahairo aquvhitaro taarapara raunti vaintemake, vi vaiintinavuka kaurir kaiqavano qoqaa vaira. Vi vaiintinavuka opu makauvano vi ani vaira voqaara variara. Voqamakero konkira ari vai vatukaraqi ekaa enta variqi vuate tiro, Kotiva vi vaiintinavukara iriharo vi vatukara qerama kero vataira.

¹⁴ Adaamuva hoqarenaa vaiintivano vanti vo vatatovaro vi vaiintiva vanti vo vatatovaro mintiaqiro vuvaro Enokira 6 vano vatatovaro viva 7 ankuvano vaura. Enokiva vi entara vaiharo Kotira uva qoqiqama kero tiharo, Tavaate, naantiara Noravano takuqi vai enselika airitahaat ntit varero ¹⁵ ekaa vaiinti nahenti uva avuqavuqireva tuvuanarove. Vaiinti nahenti Kotira qoririma amiteha virara qora uva ti vaika ntaihareva tuvuanarove tura. Enokiva haaru vi uvvara turama.

¹⁶ Una uva maara ti varia vaiintika nuntu naantu tivaqi viha, qumina vokaqaa uva vate variara. Vika nái hampi varaataa i kaiqaraqai vare vaiha nai autuqai tuaheraqi vi variara. Vika nái koqema variqi virara noraiqaake iriqi viha, vokiaka uqerara uvaqai tiva nimite variara.

Karaitira uva kempukaiqamake tuataqi vuate tura

¹⁷ Ti navunaaao, vika minti tivaqi vi vaimanta ne kia vika voqaante iata. Tinavu Noravano Ihu Karaitiva noraiqamako vaiintinavuka ti varia uvvara ne iritaata.

¹⁸ Vinavuka mintima ti:

Ekaara enta aumanto aniraaina entaraqaa vokika qovaramavi, vika Kotira aaraqaa ni vaika naarahama nimiteha, vika kia Kotirara noraiqaake iriraiti, vika nái hampi aaraqaa nuataa iramanta ni vaivarave, tura.

¹⁹ Vi vaiintinavuka ni Ihura vaiinti nahenti raira kareka auti variara. Kia Kotira Maraqravano vika kahaqi vaimanta vika vi kaiqara varaqi vi variaravauve. Vairi quaravano ni variantemake, vika nái antuqavano varaataa i kaiqaraqai varaqi viha ni variara.

²⁰ Ti navunaaao, kia ne vika nintemake nuata. Ne Karaitira uva iriaka variavaro Karaitira uvavano vo uva vo uvavata aatara kero koqe uvaqai vairara ti, ne kempukaiqamake vi uvaraqai iriqi vuata. Kotira Maraqravano ni kahaqi vairamanta ne Kotira aareha variata.

²¹ Ne Kotira uva iriqi vi vaivaro Kotiva niara muntuka vatairamanta variata. Ne mintiaqi viha tinavu Nora Vaiinti Ihu Karaitira veka vaivaro viva ni aaqrurahama nimitairamanta ne ekaa enta qaqi variqi vivara.

²² Karaitira uva kia kempukaiqamake iriraiti, taara avu aato uti vaika, vikara ne mpo tiva nimiteha kahaqama nimitaqi vuata.

²³ Vaiinti ihaqihairo mpaqi qaqini aqu kainantemake, ne vi vaiinti nahentika kahaqama nimitaqi vimanta qora aaraqaa kia vuata.

Ne vo vaiinti nahenti kahaqireka iha, vika qora kaiqavano nintavata hampiqama kaantorave ti, ne qakomake tavamaqi viha vika kahaqama nimitata. Vika qora kaiqavano painaamaiqi utavaaqara voqaara vainara ne utu varevora.

Kotirara koqema iarao tura

²⁴ Kotiva homa nai kempukaqohairo niqaa maimaraara raqikiqiro vi vairamanta ne kia hiqintivi qora kaiqa varevara. Naantiara vo uvavano kia niqaa vairaro viva ni ntita varero vuru nai kempukavano takuqi vainanaini kairamanta ne voqamake quaheha vaivara.

²⁵ Viva Varipa vohaiqavano vaiharo tinavu Nora Vaiinti Ihu Karaitira kaiqara iriharo tinavu kuvantu timiteharo tivitaarirava vairara ti, kaiqenavu vira autu tuahera kaare. Viva nai uritara kero avuhainaava vaivaro, vira kempukavanovata uritara kero vaivaro, viva ekaa haikaqaa raqikiqiro vi vaivama vairave.

Haaru viva mintiaqiro vi vaurave. Vate maa entaravata viva mintiaqiro vi vairave. Naantiara viva ekaa entavata mintiaqiro vuanarove. Quqaave.

QOQAIQAMA KORA

Kukeqato uvara Karaitiva qovaraiqama kero Ionira tiva amura

Ihura qaqi vara himpima kovaro naaruvinai oru vauvaro airi ihi 60 ihie aitarovaro Ioniva maa uvara qara ruva tora. Vi entara vokuka Ihura vaiinti nahenti qoraiqama nimitaqi vi vauvaro Ioniva Ihura vaiinti nahenti vikara kia popoharaiti, koqemake Ihu Karaitira uva iriqi vuate tiro, maa uvara qara ruva nimitora. Ioniva kia vaitaraitiro, qaqi vaharo taira voqaara tavamaqiro viharo vo haika vo haikavano naantiara qovaraiqaina haikara tavero, vi uvara qara ruva nimitora.

¹ Naantiara inaaraiga varikero minti mintimakero qovaraiqaina haikarara nai kaiqa vaiintinavu kankomake iringate tiro, Kotiva maa uvara Ihu Karaitira tiva amuvaro viva vi uvara qovarama kora.

Ihu Karaitiva *enseli* vo atitovaro viva mutnu ti tiva timumanta te Ionika Ihu Karaitira kaiqa vaiintivano vahia² tairo voqaara taveha vi haikara vi haikara tavaavaunara iritheha qara ntuvu taunara. Te maa uvara ququaama Kotira vakaakama vaivo, ququaama Ihu Karaitiva vi haikara vi haikara ti tiva timumanta iriavaunarama turo.

³ Maa uvava vivau variaina entava aumaiqi vairara tiro, maa uvara kaara ntuvu kero tave vinaa vaiintira Kotiva vira koqema amitaanaro. Maa uvara iri vai vaiinti nahentika, vikavata maa uvarara noraiqaake iriqi vivera, Kotiva vikavata koqemama nimitaanaro.

Vatuka 7navuqi vaukara uva mantora

⁴ Kotira vaiinti nahenti Esiaini vatuka 7navuqi variakara te Ionika ni uva mantauro. Kotiva qaqi variqiro vi vaivama vairo. Haaruvata viva qaqi variqiro vi vauvama vaura. Naantiaravata viva qaqi variqiro viharo tuvuariravama vairo. Kotiva ni aaqurihamma nimiteharo koqema nimitaqiro viharo ni muntuka paruma nimite vaira variata. Kotiva nai avuhainaa taintaqaa oquivro vaimanta vira aruqaa maraqua 7navu variakavata ni koqema nimite vaivarao ni muntukaqihairo paru i vaira variata.

⁵ Ihu Karaitivavata ni aaqurihamma nimiteharo koqema nimitaqiro vi vairaro ni muntukaqihairo paru i vaira variata. Ihu Karaitiva kia popoharaitiro, koqema kero Kotira okara tinavu tiva timi vaiva, viva naane avuniqama kero qutu vuraqihairo qaiqaa qaqi himpiro variqiro vi vairo. Avuhainaa vaiinti vo vaiinti vo vaiinti vataini variavaro viva vika Avuhainaa Vaiintivanoma vairo.

Vira muntukavano tinavuara vaivaroma vairo. Viva tinavuara iriharo qutu vurara tiro, Kotiva tenavu qora kaiqa vare vauna uvvara nunka timitaimanta tenavu qaqini kuvantuvu vaunara.

⁶ Ihu Karaitiva tinavu noraiqama kaimanta tenavu vira Qora Kotira kaiqa ho vara amitaqi vuariraukama vaunara. Viva mpeqavano vaharo ekaa enta qaqi variqiro vuuanarove. Kaiqenavu vira autu tuahera kaare. Ququaave.

⁷ Ho tavaate. Viva tonavuqaa vaharoma qaiqaa orurante tuvuanarove.

Ekaa vaiinti nahenti vira tave vaivaroma tuvuanarove.

Vira vaata ranteqato vaiintika, vikavatama vira tave vaivaroma tuvuanarove.

Vi entara ekaa naato vatanaaka vira taveha iriqi ratevarave. Vi haikava ho mintima ianarove. Ququaave.

⁸ Kotiva Noravano ekaa kempuka vataava tiharo, Te hogare avuni variavaunante make, te naantiara ekaanainivata variariraukama vauro, tiro. Kotiva maa entaravata qaqi variqiro vi vaivama vairo. Haaruvata viva qaqi variqiro vi vauvama vaura. Naantiaravata viva qaqi variqiro viharo tuvuariravama vairo.

Ioniva taira voqaara tavorara tura

⁹ Te Ionika ni vakaukama vauro. Nevata tevata Ihura vataake vohaa variqi vi vaunara. Te ni hampata variqi viha aihavi haikarave, maara haikave, varaqi vi vaurarao Kotiva tinavuqaa raqiki vaimanta nevata tevata kempukaiqaake variqi vi vaunara.

Te Kotira uva vaiinti nahenti tiva nimiqi viha Ihuva qoqaiqamako uvaravata vaiinti nahenti tiva nimiqi vi variavaunara kaara ti rumpa vare vuru varuva avutaini vai vataro Patimosini kora.

¹⁰ Te mini vahia tinavu Nora Vaiinti autu tuaherake varia entaraqaa variavauraro Kotira Maraquravano tigaa raqiki vaumanta te iriavauraro ti naantiaraihairo *aanu-maara/noma* vuqa kaavaro uva tuntemakero, uvavano noraiqaaker¹¹ mintima tiro: Are tavena haikara qara ntuvu kera vi qarara vara kairaro Kotira vaiinti nahenti

vatuka 7navu vainaini vuarire. Vi vatukanavura autu vaireva Epasaasive, Simenave, Pekamaamuve, Taiatairave, Saadisive, Filatepiave, Laodisiave, tura.

¹² Minti ti vaumanta te vi uvara ti vau vaiintira tavarare ti, tuqantaavi tavaavauraro ova qumpike vatovaro ite vau haikava 7navu *kori* oriqhairo aututo haikava vauvaro 13 vira avutana vaiinti viva vaura.

Vira virivanu vaireva, te Vataini Vatatai Vaintika vauro tu vaiintira viri voqaara vaura. Viva vukai tavuna nonkutova aiqu ataini tuvitarovaro viva mimiraini *kori* oriqhairo aututo hoqukara rumpatero vaura.

¹⁴ Vira qjata kauki vaireva, hanta uromurave, vahi vontauve, voqaara vauvaro vira avuvano iha voqaantema kero ite vaura.

¹⁵ Vira aiquidanta vaireva, *baraasi* ori untake ravitake kojemake autuke tutiqama kaavarvo voqamakero takuqiharo ataa i vaira voqaara vaura. Mintiro vauvaro vira uva *notanta/otata* vaireva, namarivano aintaakaqaahairo aquvi aquvhilo tintemakero ti vaura.

¹⁶ Mintiro vauvaro viva nai kauqu tanaraqi opu 7navu tuatovaro iqoka paipe taara mantaraini vaihaiva, vira noqihairo vihiviro vaura. Mintiro vauvaro vira virivanu vaireva, kuarivano voqamakero ikaraqaa taintema kero, ite vaura.

¹⁷ Te vi vaiintira tave hiqirivi qutuvu vaiintira voqaara vira aiqu taraini variavaunara. Te mintimavi variavaunara viva nai kauqu tanara ti vaataqaa vatero tiharo, Kia qetaane. Te hoqare avuni variavaunantemake, te naantiara ekaanainivata variariraukama vauro.

¹⁸ Te qaqi variqi vi vauraukama vauro. Ho tavaane. Tota te qutu vuraukama vate qaqi variqi viha ekaa enta qaqi variqi virerave. Te noraiqamavi viha tema tiariraro vaiintivano qutu vuanarove. Tema tiariraro vaiintivano qora vataini nora iha itainaraqi vuanarove.

¹⁹ Are tavena haikara qara ntuva taane. Vate maa entaravata, naantiara entavata govaraiqiaina haikara, qara ntuva taane.

²⁰ Are ti kauqu tanaraini opu 7navu tavaanaravata, ova qumpike vataara *kori* oriqhohai aututaa haikara 7navu tavaanaravata, vi haikara vi haikara okara kukeqataira te vutuke qoqaa ai tiva amiarirara iriane.

Opu 7navu okara vaireva, vika *enseli* 7navu variarave. *Enseli* 7navu vika Kotira vaiinti nahenti varia vatukara 7navuqaa raqiki variarave. Ova qumpike vataara 7navu tavaanara vira okara vaireva, vi haikava Kotira vaiinti nahenti varia vatukara 7navuve, tura.

2

Epasaasi vatukaini vaukara uva tura

¹ Minti tivakero viva tiharo, Epasaasiqaa raqiki vai *enselirara* mintimakera qara ntuva taane: Te opu 7navu tenta kauqu tanaraqi tuate vauraukama vauro. Te ova qumpike vataaa haikara *kori* oriqhohai autu taara 7navu avutana ni vauraukama, te niara tiha:

² Ne „Epasaasini varia vaiinti nahentika“ kaiga vare variara te tavaunarave. Te tavaunaramanta ne vukaari utiha kaiqa varaqi viha kia popoharaiti, kempukaiqaake variqi vi variarave. Te tavaunaramanta ne qora vaiintinavu kia quahama nimitaraiti, vika nititamake variarave. Qora vaiinti vonavu qovaramavi tiha, Tenavu Ihuva noraiqama kainavukave, tumanta ne vika avatamake tavomanta vika una vaiintinavuqai vaurave.

³ Te tavaunaramanta ne tiriarao ti, maara varaqi viha kia popoharaiti, kempukaiqaake variqi vi variarave.

⁴ Ne mintimake variamantavata, te vo uva kaara ni nitirerave. Tota enta ni muntukavano tiriara voqamakero vaurave. Maa entara ni muntukavano kia noraiqakero tiriara vaivo.

⁵ Vate ni kaiqavano virihairo vataini hiqintira virarama iritaate. Nenta qora kaiqa vare vaira qaqrake hoqare koqe kaiqa varontemake varaate. Ne kia nenta qora kaiqa qaqrira kaivera, te ne inaini orure ne ova qumpike vate haikara vira qaquinima vara kararave.

⁶ Ho te vo uvvara iriha ni quahama nimitarerave. Te unantemake nevata Nikoraasi vatanaaka vare varia kaiqarara qora kaiqama vaivo, ti variarara ti, te ni quahama nimitaunara.

⁷ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate. Vaiinti vovano qora kaiqa aatara kero vairage te vi vaiintirara are Kotira Naahoqi oru vaharama qaqi variqi vi vai katari tavara hiqikera homa nenanrave tirarave, tura.

Simena vatukaini vaukara uva tura

⁸ Minti tivakero viva tiharo, Simenaqaa raqiki vai *enselirara* mintima kera qara ntuvu taane: Te avuni hoqare variavaunantemake, te naantiara ekaanainivata variariraukama vauro. Te qutu vunaraqihai qaiqaa qaqi variqi vi vauraukama vauro.

⁹ Te tiari iriate. Te tavauramanta ne nora maara vare variavaro ni onaana airairavata kia vaimanta ne vehi vaiinti nahenti variarave. Ho ni onaana airaira airtahaa naaruvinima vaivo. Te iruramanta Iutaa vaiinti vonavu tiha, Tenavu Iutaa vaiintive Kotira vaintima vauro, tivakeha niara qora uva tiva nimite variarave. Vika kia qucaa Iutaa vaiinti vairaiti, Sataanira vainti variarave.

¹⁰ Nora maaravano qovaraiqira kiama qeteha variate. Iriate. Sataaniva ni avate vaira ni hininavu karapuhiqi vita vuru kevarave. Ne kauqurutanta enta viraqi variqi vimanta ni qoraiqama nimite vaimanta ne kia ti qoririma kaate. Ni anomake ruqutuqi viha vuru arukareka ivera, ne tiriara kempukaiqaake iriqi vi vase te virara iriha qaqi variqi vi koqaa ni nimiari ne koqemake qaqi variqi vivarave.

¹¹ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate. Vaiintivano qora kaiqa aataraqiro viro, vuru qutu viraro, naantiara qaiqaa putu vuarira haikava kia vira ho ravaaqavu kaanarove, tura.

Pekamaamu vatukaini vaukara uva tura

¹² Minti tivakero viva tiharo, Pekamaamuqaa raqiki vai *enselirara* mintima kera qara ntuvu taane: Te iqoka paipe taara mantaraini vahairava tavauraukama vauro. Te tiari iriate.

¹³ Ne varianaini te tavaunarave. Ni vatukaqi airi vaiinti nahenti Sataanira uva iriqi viha vira kaiqa vare variamanta ne mini vaiha tiriara kempukaiqaake iriqi vi variarave. Sataanira kaiqa vare variaka airtahaa variavaro niqihairo vovano Antipaasiva koqemakero ti uva tiva nimi vaura kaara vira arukomanta viraqaahai ne kia getaraiti, tiriara kempukaiqaake iriqi vi variarave.

¹⁴ Ne mintiaveravata, te vo uva kaara ni nitirerave. Ni nivutaini vaiinti vonavu Balaamiva hampi uva tivatora avataqi vi variarave. Haaru vetanto entaqa Balaamiva vaiinti vo vira autu Balaakira tiva amiro tiharo, Maantima kera Isareri vika kuntama kaira vika are una uva tinara irihama, una variqa nimite karara namaqi viha hampi nai qare nai qaremaqi viha vaaqugama vuute, turave.

¹⁵ Ni nivutaini vaiinti vonavuvata hampi uva ti variamanta ne vika uva iri variarave. Vi vaiintinavuka Nikoraasi vatanaaka hampi uva tivatara avataqi vi variarave.

¹⁶ Ne vi uvvara qaqirake koqe uvaqai iriqi vuute. Ne kia mintivera, te ne vainaini orure ni nivutana hampi uva ti variaka hampata tenta noqihainaa iqoka paipeqohai raqirerave.

¹⁷ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate. Ho qora kaiqa vuru aataraka kaaina vaiintira, te vi vaiintira *manaa* kara kukeqa taunara hini ami, hanta orivata vira amirerave. Te qaraaka autuvata vi oriraqa qara ruva amitaariraro vi vaiintiva naiqai vi autura ho kankomakero irianarove, tura.

Taiataira vatukaini vaukara uva tura

¹⁸ Minti tivakero viva tiharo, Taiatairaqaa raqiki vai *enselirara* mintima kera qara ntuvu taane: Te uva tiari iriate. Te Kotira Maaquvanoma vauro. Ti tivuvano iha voqaantemaka kero ite vaimanta vauraukave. *Baraasi* ori untake ravitake koqemake autuke tutiqama taavaro voqamakero takuqi vaintema kero, ti hiquantavano attaa i vaimanta vaunarave.

¹⁹ Te ni kaiqa tave vaunarave. Te tavauramanta ne nariara nariara muntuka vateha variarave. Ne Kotiraraqai kempukaiqamake iriqi viha vora vora kahaqama nimite variarave. Ne kia popoharaiti, kempukaiqamaqi vi variarave. Tota ne Kotira kaiqa vara amite vauravata aatarake, vate ne vi kaiqara voqavata vare variarave.

²⁰ Ne mintiaqi vi variamtavata, te vo uva kaara ni nitirerave. Nahenti vovano vira autu Jesebeliva nariara tiharo, Te Kotira uva qoqaiqamake vaura nahentikave, tivakero ni nivutana vaiharo hampi uva tiva nimi vaimanta ti kaiqa vaiinti vonavu vira uva iriha hampi qare okarara avataqi viha, una variqa amitaa kararavata ne variarave.

²¹ Vi nahentirara vi kaiqara qaqira kaane tivake vira vekaiqi vaurarovata, viva kia vi kaiqara qaqira kaataa ivaro qaqiqai varaqiro vi vairave.

²² Vira kaara te vi nahentira ruqutu kaariraro viva noraiqaakero aihavina haikara varaqiro vuanarove. Vira vataake hampi ni varia vaiintika, vikavata kia vi okarara qaqira kaivera, te vikavata ruqutu kaari vika noraiqaake aihavina haikara varaqi vivarave.

²³ Te mintimake vi nahentira vaintaira aru kaamanta Kotira vaiinti nahenti voqi voqi variaka ti okara kankomake iri tavevarave. Vaiinti nahenti nai avu aatoqi irite vai uvarave, vika vare vai kaiqarave, te ekaa vi haikara kankomake iri tave vaunarave. Vika nai qora kaiqa vare vairara iriha, te vika vohaiqa vohaiqa nai koqaa nimirerave. Ti okara mintimakero vairave.

²⁴ Ne hininavu Taiatairaini variaka kia vi nahentiva hampi uva ti vaira iri variarare. Vo uva Sataaniva kukeqtatai uvarave ti variara, vi uvaravata ne kia avataaqi vi variarare. Ne minti variarara ti, te kia vo maara niqi vatarerave. ²⁵ Ne koqe haika tuataara, vi haikara paama tivakeha tuataaqi vi vaiqe te tuvuare.

²⁶ Kempukaiqama kero qora kaiqa vuru aatara keharo ti muntukavano vaina kaiqaraqai varaqiro vi vaina vaiintira, te vira noraiqama kaariraro viva vo vatanaaa vo vatanaakaqaa raqikiqiro vuanarove.

²⁷ Ti Qova mintimakero ti noraiqama kaimanta te raqikiqiqi vi vaunantemake, vikavata vo vatanaaa vo vatanaakaqaa raqikiqiqi vivarave.

Viva aini kauru tuateharo viqaqaa raqikiqiro viharo, tave kure rukavu kaantemakero, viva vi vatanaaka vi vatanaaka ruqutuqiro vuanarove. (*Ihi 2:9*)

²⁸ Te vi vaiintika noraiqamake toqaci aatite vaina vaahoquraravata vika nimirerave.

²⁹ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate, tura.

3

Saadisi vatukaini vaukara uva tura

¹ Minta tivakero viva tiharo, Saadisiqaa raqiki vai *enselirara* mintima kera qara ntua taane: Te vakaaka tiari iriate. Te Kotira Maraqura 7navu tuate vauraukama vauro. Te opu 7navu tuate vauraukama vauro. Te ne vare varia kaiqara iri tavaunarave. Vokiaka niara qaqi variqi vi variakave ti variamantavata, te niara qutu vuakavema turo.

² Avu rampaikie himpi variate. Hauri ne Kotira vara amite kaiqava ekaara quminaiqama viro taiqa vuantorave ti, ne vi kaiqava qaqi variqiro vi vaira kempukaiqaaake varaqi vuate. Te tavauraro ni kaiqavano Kotira avuqaa kia aruvi kaiqavama vaivo.

³ Ni kaiqavano mintima vairara ti, haaru vika ni tiva nimumanta ne irito uvvara, vi uvvara iriteha vi uvvaraqai avataaqi viha qora kaiqa qaqlira kaate. Ne kia avu rampaikie himpi vaivera, te muara vaiintivano evaara aninantemake, ni ntaiharera anirerave. Ne kiama te aniaina entarara irivarave.

⁴ Ne hini kiaka Saadisiqaa variaka kia nenta utavaaqaa painaamaiqama kaavo. Ni kaiqavano ho vairara ti, ne homa hanta utavaaqaa nonkute ti vataake variqi vivarave.

⁵ Ho kempukaiqama kero qora okara vuru aatara kaaina vaiintira, vi vaiintira autu, vaiinti nahenti qaqi variqi vi vaika nutu qara ntuvate vukuraqihai kia te qaqlira nunka karaiti, hanta utavaaqavata vira nonku amitarerave. Te tenta Qora avuqaa vata, vira *enselinavu* nivuqaavata, virara tiha, Vi vaiintiva ti vaintima vaivo, tirerave.

⁶ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate, tura.

Filatepia vatukaini variakara uva tura

⁷ Minta tivakero viva tiharo, Filatepiaqaa raqiki vai *enselirara* mintima qara ntua taane:

Te tiari iriate. Hampi okarave, qora okarave, kia tigi vaimanta te koqemakeqai vaunrarave. Quqaa okaraqai tigi vaimanta vaunrarave. Devitiva haaru tuato kira tema vi kira tuatauro. Te vi *kiraqohai* qenti qantua kaariraro kia vovano qaqlira ho aru taanarove. Te vi *kiraqohai* qenti aru taariraro kia vovano ho qantua kaanarove.

⁸ Te ne vare varia kaiqara tavaunrarave. Te ni nivuni qenti vo qantua nimitauraro vaira, kia vovano ho vira tinta taanarove. Te tavauraro ni kempuka inaaraqia vaimantavata ne kia ti qoririma timitaraiti, ti uva qaqi iriqi vi variarare.

⁹ Iutaa vaiinti vonavu tiha, Tenavu Iutaa vatanaakaqai Kotira vaintima vauro, ti variaka, vi vaiintika Sataanira vaiinti, una uva ti varia vaiintikama variarare. Te vi vaiintika ravaqaqvavare vuru ni aiqutaraini kaari vika hiqirivi vaiha tiriara quqaa vira muntukavano niara vaivarao vaivo tivarare.

¹⁰ Te niara kia popoharaiti, kempukaiqamaqai vuate tiavauramanta ne ti uva koqemake iriqi vuarara ti, te koqemake niqaa raqikiariraro nora maara qovaraiqiaina entara kia vi maara na niqaa qovaraiqiarire. Vi entara nora maaravano qovarama viro ekaa naato vatanaaka avataaqi viramanta vika anomake qoraiqama vivarave.

¹¹ Te tuvuaina entava aumantoma vaivo. Nenta vate haikara paama tivake tuataaqi vuate. Nenta koqe kaiqa vare vaira vira noqaa nimiainaara hauri vovano niqihairo vira raqia varaantorave.

¹² Kempukaiqamaqiro viharo qora kaiqa vuru aatara kaaina vaiintira, te vi vaiintira varake ti Variqa naavuqii arataariraro kempuka naavu kaara variarire. Vi vaiintiva Kotira Naavu viraqii vahaaqaini veva ntaraitiro, viva viraqii qaqi variqiro vuanarove.

Te vi vaiintiraqaa ti Variqa autu Kotira autu qara ruva amite, Kotira vatuka autuvata vi vaiintiraqaa qara ruva amitararave.

Vi vatukava Ieruharemi qaraaka vatuka varianarove. Vi vatukava naaruvinai Kotiva vainaihairo tuvu varianarove. Vi vatukara autu vi vaiintiraqaa qara ruva amite, ti hutu qaraaka autuvata vi vaiintiraqaa qara ruva amitararave. Kempukaiqaqi viha qora kaiqa vuru aatarake vai vaiinti nahentikaaqaa mintimakeha qara ruva nimitaqi virerave.

¹³ Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate, tura.

Ihura vaiinti nahenti Laodisia vatukaini variakara uva tura

¹⁴ Minti tivakero viva tiharo, Laodisiaqaa raqiki vai *enselirara* mintima qara ntua taane:

Te tiari iriate. Te ekaa Kotira uvvara ququaave ti vauraukave. Te ekaa Kotira kaiqa tavaunara vutuke ni tiva nimi vauraukave. Ekaa Kotiva aututai haikara te vira okaravanoma vauro.

¹⁵ Te ne vere varia kaiqara tavaunarave. Te tavauramanta ne kia anomake antai namarirave, anomake iha itai namarirave, voqaara variavo. Ne ahakavi namarira voqaara variavo. Ne anomake antai namarirave, anomake iha itai namarirave, vira voqaara vaiqeveauve te niara hovema tirarave. ¹⁶ Ne ahakavi namarira voqaara variarara ti, te ni tenta noqihai vuru vihi kararave.

¹⁷ Ne tiha, Tenavu airi haika vataurauka homa vauro. Tenavu kia qumina vo haikara aara ntararave, ti variarave. Oho, ne minti tihamma ne vehi variara kia kankomake tave variarave. Oho, ni aqurihamma nimitevaaqaima viavo. Ne vehi vaiinti nahentiqaima viavo. Ni utavaaqa kia vaimanta variavo. Ni avu qimpa vimanta variavo.

¹⁸ Te niara uva tiva nimiha mintima ti: Ne tigaahai koqaa iate, turo. *Kori* ihaqohairo hiqama kai orira koqe ori, vi orira nenta monu aqukeha tigaahai varavaaro ni koqaa airi variarire. Ne toka valha kauriha variarara ti, tigaahai hanta utavaaqa vareha nenta vaataqaa nonku taate. Tigaahai *marasini* varake ni nivuqaa aquitaivarao rampai viramanta ne koqemake tavaate.

¹⁹ Ti muntukavano vai vaiinti nahentikara koqemake variqi vuate ti, te vika nititeha vika ruqutuqì vi vaunarave. Virara irihama ne qora kaiqa qaqrake, ti kaiqa koqe kaiqaqai quqaqqama keha varaqi vuate.

²⁰ Ho iriate. Te vahaqaqaini qentiana vahia genti kuekue iha vauro. Vaiinti vovano ti uva iriro genti quantu timitairera, te vi vaiintira naavuqi oriqete vi vaiintira vataake kara ne variariraro vi vaiintiva ti vataakero vahiaro kara naanarove.

²¹ Kempukaiqaqiro viharo vuru qora kaiqa aataraka kaaina vaiintira, te vi vaiintira noraiqama kaariraro viva ti vataakero ti avuhainaa taintaqaa oquvi vahiaro raqikiqiro vuanarove. Te qora kaiqa aatarake mpeqvavano vahiaro ti, te tenta Qora avuhainaa taintaqaa oquvi vahia vira vataake raqikiqi vi vaunara. Kempukaiqamaqì viha vuru qora kaiqa aatarake vaiinti nahentikti ti aanare vahia ti kauvai taranaraini oquvi variqi vivarave.

²² Ni aatovano vairera, Kotira Maraquravano Kotira vaiinti nahenti tiva nimi vaina uvvara iriate, tura. „Viva minti tumanta te Ionika taira voqaara taveha vira uva iriavaunara.„

4

Naaruvaini Kotiva oquvuaina taintara tavorara tura

¹ Te Ionika vahia taira voqaara vovata tavaavaunarave. Te naaruvaini aituti vahia tavaavaunaro qentivano quantuaviro vauvaro uvavano *aanumaaravano/nomavano* tuntemakero, tota ti tiva timu uvava qaiqaa tiriara tiharo, Maini uru vairaqe naantiara vo okara vo okaravano qovaraqiaina haikara te ai umiqare, tura.

² Uvavano minti tuvaro vaakama Kotira Maraquravano ti kempukaiqama komanta te vahia tavaavaunaro ti tivuni avuhainaa tainta vauvaro viraqaata vovano oquviro vaura.

³ Viva taintaqaa oquviro vauvaro vira virivano takuqi vahiaro nora monu aqukaa orira vira autu *iasipaave*, vo ori naare ori vira autu *konilianive*, vi oritanta takuqi vaintema kero vira virivano takuqi vaura. Vi vaiintiva avuhainaa taintaqaa oquviro vauvaro ontantavano vira tainta ututumatora. Vuhanaa ori *emaraali* orivano takuqi vaintema kero, vi ontantava takuqiharo vaura.

⁴ Avuhainaa taintavano mintima kero vauvaro 24 avuhainaa taintanavuvata vi taintara ututumate vaumanta vi taintanavuraqaa 24 vaiinti, nora vaiintinavu oquvi vauvaro vika utavaaqqavano hanta utavaaqa vauvaro vika qiataqaa *kori* oriqohai aututo tovaqara aqute vaura.

⁵ Mintuvaro avuhainaa tainta vira avutanahairo aaquakaavano uti vauvaro naaruvalo uva tuntema kero, uva karara ti vauvaro vi taintara avuni ova 7navu qumpike vatovaro vaura. Vi ovanavuva vaireva, Kotira Maraqura 7navu vaura. ⁶ Mintuvaro avuhainaa tainta avuni varuva namarivano *karaasi* voqaara vauvaro viraqi revantovata taveva ho vaura.

Mintuvaro avuhainaa tainta tataaqa qaqi variqi vi vauka 4navu tainta vira utute vauvaro airi avuvano vinavuka avunivata, tauvaqainivata, mpiqa kero vaura. ⁷ Vinavuka vaireka, vovano *Raioni* voqaara vauvaro, vovano *purumakau* naati voqaara vauvaro, vovano vauvaro vira viri vaiinti viri voqaara vauvaro, vovano memoravano ata varero ni vaira vira voqaara vaura.

⁸ Qaqi variqi vi vauka 4navu vauvaro vika vohaiqa vohaiqa aroka 6navu vauvaro avu airitahaavano vika aroka ventaaqainivata vevaarainivata mpiqa kero vaura. Mintiro vaumanta vi haikauka kia inaaraipi auraara vairaiti, aatitoraqaavata entaqivata qaqqai ihi tivaqi vi vailha mintimi ti:

Noravano Kotiva ekaa kempuka vataivave. Vira okaravano vaireva, koqe okaraqai vairave, koqe okaraqai vairave, koqe okaraqai vairave.

Viva haaru qaqi variqiro vi vauvama vaivo. Viva qaqi variqiro vi vaivama vaivo. Viva naantiara qaqi variqiro vi variarirava tuvuanarove, ti vaura.

⁹ Qaqi variqi vi vauka minti tivaqi viha avuhainaa taintaqa oquvi vau vaiintira vira mpeqa okarava viriniqama keha vira autuvata tuaheraqi viha virara koqeve tiva amite tiha, Viva ekaa enta qaqi variqiro vi varianarove, tivaqi vi vaura.

¹⁰ Qaqi variqi vi vauka minti tivaqi vi vaumanta nora vaiinti 24navuvata vatakanta hiqirivi viha avuhainaa taintaqa oquvi vau vaiintira autu tuahereha tiha, Viva ekaa enta qaqi variqiro vi varianarove, tivakeha nai tovaqa aqutora ravaqaa keha avuhainaa tainta aqutaraqini aquke vaura. Mintiaqi viha vika tiha,

¹¹ Are Variqavano tinavuqaa raqiki variaravave. Are ekaa haika autukera qovarama kaaravave. Menti varianarara ti, tenavu ai quahama amiteha tiha, Ai okaravano mpeqa okarama vaivo. Ai autuvano viriniqama viro vaivo.

Ai kempukavano uritara keroma vaivo. Are uva tianaraqaahairo ekaa haikavano qovarama viro qaqi variqiro vi vairave, ti vaura.

5

Naaruvaini vau vukurara tura

¹ Vika minti tivaqi vi vaumanta te Ionika vaiha tavaavauraro avuhainaa taintaqa oquviro vauva vahiaro nai kauqu tanaraini uruqurumato vukura tuate vauvaro vi vukura avunivata tauvaqainivata uva qara ntuvatova vaura. Vi vukuraqi kaara ntuvake tavevorave tiro, iva varakero ravitakero taatau kova 7navu vaura.

² Vuku mintimake vaumanta te vaiha tavaavauraro *enseli* vo, mpeqvano naveraitiro tiharo, Ta vaiintive koqe vaiintivano vahiaro maa vukura varakero iva taatau taira ravaqaavu kaanarove? tiro.

³ Viva minti tuvoro iva ntava kero taatauto vukura ravaqaa kero tavaaina vaiintirara qumina naaruvainivata, vatainivata, vata vevainivata, rantovaro kia vovanovata vaura.

⁴ Qumina rantaqiro viviro tavovaro koqe vaiinti vovano iva ravaqaa kero vi vukura avutaqi tavaarirava kia vaura kaara te noraiqaake iqi rate variavaunara.

⁵ Te qaqqai iqi rate variavauraro vaiinti vovano 24 vaiintinavuqihairo tiriara tiharo, Kia iqi rataane. Ho tavaane. Vaiinti vo, Iutaara ankuqihainaava, viva *Raioni* voqaa vaiinti, Devitira Naintivano, viva noraiqama viro qora kaiqa aatara kero mpeqvano viro. Vi vaiintiva homa iva 7navu taatau tora ravaqaa kero vi vukura rairakero tavaanarove, tiro.

⁶ Menti tumanta te vaiha tavaavauraro avuhainaa tainta tavaarana Sipisipi Naativano himpi vauvaro qaqi variqi vi vauka 4navu vira ututumate vaumanta, nora vaiinti 24navuvata vira ututumate vaura. Mintimake vaumanta te vaiha tavaavauraro vi sipisipi arukovaro qutuvu sipisipira voqaara mini vahiaro himpitero vauvaro vira qiataini *okepa/pomu* voqaara 7navu vauvaro vira avuvata 7navu vaura. Vi haikava 7navu vaira vira okara vaireva, Kotira maraqura 7navu vaura. Maraqura vinavuka okara vaireva, Kotiva nai Maraqura 7navu nititomanta vataini tuvu vi animake, oturante uru vau maraquranavuka vaura.

⁷ Mintuvaro Sipisipi Naati viva oru vi taintaraqaa oquviro vaura kauqu tanaraihairo vuku vira varora.

⁸ Sipisipi Naati viva vuku oru qaqqini varakomanta qaqi variqi vi vauka 4navuvata, nora vaiinti 24navuvata, vika Sipisipi Naati vira avuni hiqirivi vaura. Vika hiqirivi

vaiha naaqunta kantarumake ruquuti varia *kitaara* voqaara tuate, *kori* origohai aututo tanuravata tuate vaura. Vi tanuraqi iha quarovaro koqe untavi vau murava vaura. Vi murara okara vaireve, Kotira vaiinti nahenti Kotira aare variavaro oru vi vai murava voqaara vaura.

⁹ Minta vaumanta nora vaiinti 24navu Sipisipi Naatiara qaraaka ihi vo tiha:

Ai arukaavaro ai naarevano ntava viraqohair are Kotiraini vaiinti nahenti kuvantu amitaanarara tira, are vi vukura iva taatautera ho ravaqaa kera vi uvvara taveravama variarao.

Kotira vaiinti nahenti ekaa naato vata maataqihaiive, ekaa naato vo uva vo uva ti variakaqihaiive, ekaa naato vo vaata vo vaata vataukaqihaiive, qovaraiqivarave.

¹⁰ Are vika noraiqama kera Kotirainiqama kaanarara ti, vika Kotira kaiqa vara amitaqii viha maa vataraqaa raqikiq vivarave, tura.

¹¹ Vi vaiintinuva minti tumanta te vaiha iriavauramanta *enseli* airi *tauseni* vaumanta qaiqaa hini vo *tauseni* vo *tausenivata* vahua uva ti vaura. *Enseli* vika airitaha avuhainaa taintavata, qaqqi variqi vi vauka 4navuvata, nora vaiinti 24navuvata, ututumate vaiha ¹² ihi tivaqii viha noraiqaaake naveraitiha Sipisipi Naati arukorara mintima ti:

Ai kaiqavano koqe kaiqa uritara kero vairara ti, tenavu ai autu noraiqamake tuaheraqi virerave. Are ekaa haikaqaa raqiki variaravave. Are ekaa airaira vataava variararo ai avu aatovano koqe avu aato vaivara are mpeqavano variarao. Ai autuvano nora autu vaivaro ai mpeqa okaravano takuqi vaivara variarao, tura.

¹³ *Enseli* vika minti tumanta te vaiha iriavauramanta Kotiva aututai haikava ekaa haikavano, naaruvaini vau haikavave, maa vataraqaa vau haikavave, vata vevanto vau haikavave, nora namariqi vau haikavave, ekaa vi haikava vi haikava ihi tivaqii viha mintima ti:

Avuhainaa taintaqaa oquiviro vairavata, Sipisipi Naati viravata, tenavu vitanta autu noraiqaaake tuaheraqi virerave. Vitanta autuvano koqe autu vaivaro vitanta mpeqa okaravano, takuqi vai okaravama vaivo. Vitanta ekaa enta kempukaiqama keha qaqqi variqi vivarave, tura.

¹⁴ Ekaa haikavano minti tuvaro qaqqi variqi vi vauka 4navu tiha, Ququaave, tumanta nora vaiinti 24navu vatakanta hiqirivi vaiha vitanta quahama nimiteha vitanta nutu tuahere vaura.

6

Sipisipi Naati viva iva taatautora ravaqaa kora

¹ Mintiaqi vi vaumanta te vaiha tavaavauraro Sipisipi Naati viva iva 7navu taatau toraqihairo vohaiqa ravaqaa kovaro viraqaaahairo qaqqi variqi vi vauka 4navuqihairo vovanu naaruvavano uva tuntema kero, tiharo, Aniane, tura.

² Minta tumanta te vaiha tavaavauraro hanta *ohivano* ti tivuqaa vauvaro vira tauvaqaa vovano oquiviro huru tuatero vaura. Viva *ohiqaa* vaumanta vira avuhainaa tovaqa amuvaro viva iqoka raquqiro viharo navutaaka aatara kareva vura.

³ Viva vuvuro Sipisipi Naati viva iva vo vira naantiaro ravaqaa komanta te iriavauraro qaqqi variqi vi vauka 4navuqihairo vovanu, Aniane, tuvaro ⁴ viraqaaahairo naare *ohivano* qovarama viro vauvaro vira tauvaqaaqata vau vaiintira, vataimai vaikara iqoka raquqi viha nai aruke nai aruke iate tiro, vira kempuka amiro, nora iqoka paipevata amura.

⁵ Amuvaro Sipisipi Naati viva *nampa* 3 iva ravaqaa komanta te iriavauraro qaqqi variqi vi vauka 4navuqihairo *nampa* 3 vano aniane tuvaro konkira *ohivano* qovaramavi vauvaro vira tauvaqaaqata vauva nai kauquqi maara rahake tave vau *sikerira*, tuate vaura.

⁶ Tuate vaumanta te iriavauraro qaqqi variqi vi vauka 4navuqihairo uvavano vaiinti uva voqaara tiharo, Ne *uiti* auru varareka iha vohaa enta kaiqa varate monura ekaa aqukehama, ne kia airi *uiti* varararo, vohaa *kaapuqi* kaqate *uitiraqai* varevarave. Ne *baali* auru varareka iha, taaramo *kaapuqi* kaqatera varevarave. Ne *orivi* vahaveravata *uainivata* qumina rauru kevorave, tiro.

⁷ Minta tuvaro Sipisipi Naati viva *nampa* 4 iva taatautora ravaqaa komanta te vaiha iriavauraro qaqqi variqi vi vauka 4navuqihairo *nampa* 4 vano aniane tura.

⁸ Minta tumanta te tavaavauraro ohi vo, vira vaatavano *aapia/aamia* ntaiha ite vauvaro vira tauvaqaaqata oquiviro vaura vira autu *Quti Varia Vuariravave* tura. Viva vauvaro vira naantiaraini vovano vira autu *Quti Varia Vatuukava* vira avataqiro aumanto ani vaura.

Vitanta anintovaro vitanta kempuka nimiro tiharo, Netanta vatainai vai vaiinti nahentika 4navuqaa rairake vate, taaramonavu qaqqi ke, vohaiqa aruqi vi, vuru taiqa kaate.

Mintima keha vika arukaate: Netanta raquqi viha hini kiaka iqoka paipeqohai arukeha, hini kiaka narara vai entara qovarama kairaa qutu vuate. Hini kiaka rovaraohai arukeha hini kiaka qaakau aantau vahiqohai aru kaate, tura.

⁹ Minta tuvaro Sipisipi Naati viva *nampa* 5 iva taatautora ravaqaa komanta te vaiha tavaavauraro *ofaa* tainta vovano vauvaro, vi taintara vevaqi vaiinti nahenti qutu vuaka maraqura airitahaa vaura. Vi vaiinti nahentika qaqi vau entara Kotira uva koqemake iriqi viha vaiinti nahenti tiva nimiqi vi vaumanta vira kaara vika arukora.

¹⁰ Vika maraquranavu viraqi vaiha naveraitiha, Noravauvu, are ekaa kempuka vataava variararo qora haikavano kia ariqi vairave. Are avuqavuqaakera variqira vi variaravave. Vataini varia vaiinti nahentika tinavu haru kaamanta maaqi vauro. Nanti nanti entae aitarairara are vika *ko* tivakehara vika nái ntaihanerare? tura.

¹¹ Minta tumanta hanta tavuna ekaa vi maraqurauka nimi tiha, Ne inaaraiqa vaimanta haaru ni aru kontemake, ni kena kaiqa vaiinti nahentive, ni qata vakuakavarave, vikavata aru kaate. Vika minti mintimake ni kenauka aru kaivaro Kotiva vikaqaa aru muntu kaanarove, ti.

¹² Minta tumanta te vaiha tavaavauraro Sipisipi Naati viva *nampa* 6 iva taatautora ravaqaa kovaro viraqaaahairo vaturavano voqamakero uti vauvaro, kuari avuvano mantaqaqa viro vankora tavuna voqaara konkiraiqama vuvaro, toravano naare voqaara naare parunkaiqama viro vaura.

¹³ Mintuvaro uvaivano utiharo katari qakaama kaivaro *fiki* katari tava aqutavira hiqiri hiqirintema kero, opu makauvano naaruvaihairo vataini hiqiri hiqiri i vaura.

¹⁴ Mintumanta te vaiha tavaavauraro vuku uruquruma vintema kero, naaruvavano uruquruma viro *tuqaaka/uqaarama* viro taiqa vuvaro, vataini vo ainqina vo ainqinavano nai vaura qaqirake voqi voqi oru vauvaro, varuva avutaaqa vo vata vo vata vauva ekaa nai vauraqihai himpi voqi voqi oru vaura.

¹⁵ Mintuvaro vataini vauka avuhainaa vaiintinavuve, vokukaqaa raqiki vaukave, iqoka vaiintiqaqaa raqiki vaukave, airi airaira vatkave, nora vaiintive, karapuhi vaiintive, qaqi vau vaiintikave, vika vika ekaa voqamake qetake kukeqa vireka ori onavuqive, *ruvuqive/mpumpiqive*, nora ori ainqinaini vauraqive, vi ani vaura.

¹⁶ Vi vaiinti nahentika ainqinavata, oriaravata, naveraitiha, Rapatutira tinavuqaa aquvira kukeqa timitaate. Avuhainaa taintaaqaq oquiviro vaiva tinavu tavaantorave. Sipisipi Naativanovata arara itairaro tinavu tavaantorave.

¹⁷ Oho, Kotira arara itaivarо *ko* tiaina entava qovarama vivo. Tavave maa entara ho varianarove? tura.

7

Isareri vaiinti nahenti 144,000navuara tura

¹ Te vi haikara tave, viraqaaahai te vaiha tavaavauramanta *enseli* 4navu maa vataro kaantaa 4navuqaa himpite vaiha, maa vataraqaa uti vai uvaira 4navuara vata vau rave, nora namari vaurave, katariqaaave, kia utuarire ti, *enseli* vinavuka uvai 4navu ravaaqavute vaura.

² *Enseli* vinavuka uvai 4navu ravaaqavute vaumanta te vaiha tavaavauraro *enseli* vovano kuari avu urinalihairo uri vaiharo, qaqi variqiro vi vai Variqava nai vaiinti nahenti viraaqama kero tavaaina haikara nai kauquqi tuata varero uri vaura. Viva uriharo *enseli* 4navu Kotiva vatavata nora namarivata qoraiqama kaate tiro kempuka nimukara mintima tiro:

³ Nenavu vatavata, nora namarivata, katarivata, qoraiqama kareka auti variaka qaqi vaise te naane Kotira kaiqa vaiinti nahenti tiriqaqaa qara ntuvake viraaqama nimitaqi viha vuru taiqa kaari, viraqaaahai nenavu varareka i kaiqara varaate, tiro.

⁴ Minta tumanta te vaiha iriavauraro Isareri 12 ankunavuqihairo 144,000 vaiinti nahenti viraaqama teharo vika tiriqaqaa qara ntuvake tira. Maa vaiinti nahentika viraaqama tira:

⁵ Iutaara ankuqihairo 12,000 vaiinti nahentive,
Rubenira ankuqihairo 12,000 vaiinti nahentive,

⁶ Gaatira ankuqihairo 12,000 vaiinti nahentive,

⁷ Asera ankuqihairo 12,000 vaiinti nahentive,

Napataarira ankuqihairo 12,000 vaiinti nahentive,

Manasera ankuqihairo 12,000 vaiinti nahentive,

⁸ Simionira ankuqihairo 12,000 vaiinti nahentive,

Rivaira ankuqihairo 12,000 vaiinti nahentive,

Isakaara ankuqihairo 12,000 vaiinti nahentive,

⁹ Sebulunira ankuqihairo 12,000 vaiinti nahentive,

Iohepira ankuqihairo 12,000 vaiinti nahentive,

Benaminira ankuqihairo 12,000 vaiinti nahenti tiriqaqaa qara ntuvake tira.

Ekaa naato vataihai vaiinti nahenti ruvaaqumavi vaurara tura

⁹ Mintumanta te vaiha tavaavauramanta vaiinti nahenti airitahaa vauvarora tiro, vika kaara riharo minti mintima vaiinti nahenti variavo tiarirava kia ho vaura. Vi vaiinti nahentika ekaa naato vatanaaka, konkirave, egarave, vo vatanaa vo vatanaakave, vo uva vo uva ti vaukave, vika avuhainaa tainta avuqaavata, Sipisipi Naati vira avuqaavata himpite vaura. Vika hanta utavaaqa nonkute vaiha nai kauquqi nai kauquqi nivu mare voqaara tuate vaiha ¹⁰ naveraitaha:

Nai avuhainaa tainta oquiviro vaiva tinavu Variqavanovata, Sipisipi Naati vivavata, vitanta tinavu kuvantuke tivitaatantama variavo, ti.

¹¹ Minti tumanta ekaa *enseli* vika avuhainaa taintavata, nora vaiinti 24navuvata, qaqi variqi vi vauka 4navuvata, ututumate himpite vaiha, viraqaahai vika vatain hiqirivi nai viri vatainiqamake avuhainaa tainta avuqaa vaiha Kotira autu tuaherakeha mintima ti:

¹² Quqaave. Ho kaiqenavu tinavu Variqa autu viriniqaa kaare. Vira mpeqa okaravano takuqi vaivarao vira avu aatovano koqe avu aatooqai vairave. Kaiqenavu virara koqeve tivaqi viha, vira autu noraiqama kaare. Vira kempukavano uritara kero vaivarao viva kempukavano ekaa enta qaqi variqiro vuariravama vaivo. Quqaave, tura.

¹³ *Enseli* vika minti tuvaro nora vaiinti 24navuqihairo vovano ti irama timitero tiharo, Maa vaiinti nahentika airitahaa hanta utavaaqa nonkute variaka vo? Vika taukave? Vika taihai an variavo? tumanta ¹⁴ te tiha, Nora vaiintio, arema vikara irianarave, tiavauraro viva tiharo, Maa vaiinti nahentika vatain vaumanta vokuka anomake vika qoraigama nimitaqi vi vaumanta vika nora maaraqi variqi vi vauraqihai aniaqave. Vika nai utavaaqa Sipisipi Naati naareqohai hiqama korara tiro, vika utavaaqaavano hantaiqama vurave.

¹⁵ Vika mintimake variarara ti, vika Kotira avuhainaa tainta avuqaa vaiha aatinaraqaavata, entaqivata, Kotira kaiqa vara amitaqi viha Kotira Naavuqi variqi vi variavaro avuhainaa tainta oquiviro vaiva vika maimaraara utu nimitte vairave.

¹⁶ Vika mini variqi vivaro kia qaiqaavata kararavata namariaravata antuqa aruanarove. Vika mini vaivarao kuarivanove, vo haikavanove, kia ho vika tatoqa kaanarove.

¹⁷ Sipisipi Naati viva avuhainaa tainta avutana vaiva, viva sipisipi qova koqeva vaharo vika ntita varero vuru ruvu namarivano, qaqi variqiro vi variaina namariva yainanaini vuru kaira nevarave. Mintivarо Kotiva vika nivuqihairo auquru nunka nimitairia vi vaiinti nahentika kia qaiqaavata iqи ratevarave, tura.

8

Nampa 7 iva taatautora ravaqaa korara tura

¹ Minti tumanta te vaiha tavaavauraro Sipisipi Naati viva *nampa 7* iva taatautora ravaqaa kovaro viraqaahairo naaruvaini kia vovanovata uva tuvaro ekaa haikavano tiremakero manamana vaura.

Inaaraiqi mintiaqiro vumanta ² viraqaahai te tavaavauramanta *enseli* 7navu Kotira avuqaa himpite vauka vauvaro vika *aanumaara/noma* 7navu nimumanta varora.

³ Nimumanta varovaro *enseli* vovano nai kauquqi *kori* tanu tuata varero ani *ofaa* tainta vo, *kori* tainta tataaqa himpitero vaura. *Ofaa* tainta viva avuhainaa tainta vira avuni vauvaro *enselivano ofaa* tainta vira tataaqa himpitero vauvaro vovano iha quara tero koqe untavi haikara vokiravata vira amiro tiharo, Kotira vaiinti nahenti Kotira aare variavaro oru vi vai uvvara vataakera are maa haikaravata iha quaraane, tuvaro ⁴ *enselivano* vi tanura tuatoraqihairo iha mura koqe untavuvavata, Kotira vaiinti nahenti Kotira aare vau uvavavata, Kotira avuqaa oru vi vaura.

⁵ Mintuvaro viraqaahairo *enseli* viva *ofaa* tainta oquiviro iha aur varakero nai tanuqimpiqakero tanu vira vatain vaavi aqukora. Aqukovaro naaruvavano karara karara ti vauvaro aauquaavano utu aqu utu aquke i vauvaro vaturavanovata uti vaura.

Anumaara/Noma vuaqorara tura

⁶ Mintumanta viraqaahai *enseli* 7navu nai *aanumaara/noma* 7navu tuateha vuaqareka auti vaura.

⁷ Vinavukaqihairo vovano naane nai *aanumaara/noma* vuaqa kovaro *taaruvanovata/kaampuravanovata* ihavanovata naare vataakero vatain aaqu rintema kero hiqiri hiqiri i vaharo maa vataro vohaa mantaraini vatavata katarivata ita taiqa kero, taara mantaraini qaqi kero, ekaa ukauvata ita taiqa kora.

⁸ Mintuvaro viraqaahairo *enseli* 7navuqihairo *nampa 2* vano nai *aanumaara/noma* vuaqa kovaro nora aiqina voqaara vau haikava iha ite vaura nora namariqi vara aqukora.

Nora namariqi vara aqukovaro vohaa mantaraini namarivano vaiinti naareqama vuvaro taara mantaraini namarivano qaqi vaura.

⁹ Vohaa mantaraini namariqi vau haikava qutu vuvaro taara mantaraini namariqi vau haikava qaqi vaura.

Vohaa mantaraini namariqaa ni vau *sipinavura* vehi autu kovaro taara mantaraini namariqaa ni vau *sipinavuva* qaqi vaura.

¹⁰ Mintuvaro viraqaahairo *enseli* 7navuqihairo *nampa* 3 vano nai *aanumaara/noma* vuaga kovaro viraqaahairo vaahoqura noravano ova qumpi kaivarо itaintema kero iteharo naaruvaihairo hiqiriro tuviro muntu vohaa mantaraini taatika namari, voqi voqive, ruvu namari voqive hiqiriro, taara mantaraini qaqi kora.

¹¹ Vi vaahoqurara autu Hunkavirave. Viva vohaa mantaraini vo namari vo namariqi hiqiruvaro namarivano hunkavuvaro taara mantaraini vau namariva qaqi vaura. Ekaa vaiinti nahenti hunkavu namarira ne vauka qutu vurave.

¹² Mintuvaro viraqaahairo *enseli* 7navuqihairo *nampa* 4 vano nai *aanumaara/noma* vuaga kovaro kuarivanove, toravanove, opu makauvanove, iteharo taara mantaraini qaqi ite vauvaro vohaa mantaraini qimpa viro kia itora. Aatitoraqaa kuarivano vohaa mantaraini itaqiro viro taara mantaraini kia itaraitiro, qimpaviro vaura. Vira voqaara entaqi tora makau opuvanovata vohaa mantaraini itaqiro viro taara mantaraini kia itaraitiro, qimpaviro vaura.

¹³ Mintumanta te virini vuruvi tavaavauraro memora vovano virikanta ata varero niharo naveraitiro, Oho, oho, oho, *enseli* taaramonavu kiama nái *aanumaara/noma* vuaga kaavo. Oho, vinavuka nai *aanumaara/noma* vuaga kaimanta vataini variaka anomake goraiqama vivarave, tura.

9

Nampa 5 vano nai aanumaara/noma vuaqa kora

¹ Memoravano minti tuvaro viraqaahairo *enseli* 7navuqihairo *nampa* 5vano nai *aanumaara/noma* vuaga komanta te vaiha tavaavauraro opu vovano vataini hiqiriro vauva vauvaro *ki* vo vira amura. Vi kiva nai vevantogama kero vau *Ruvura/Mpumpira* quantuaraaina kiva vaura.

² Ki vira amuvaro opu viva *ki* viraqohairo *Ruvu/Mpumpi* qenti qantua kovaro iha muravano viraqihairo noraiqakero oru vi vaura. Nora ihavano ite vaivaro muravano uri vaintema kero, viraqihairo muravano uri vaharo kuarivata naaruvavata mantaqa kovaro ³ iha mura ururajihai kaintaaqa airitahaq qovaramavi vataini otu vaura.

Kaintaaqa airitahaq qovaramavi vauvaro mpora noravano nai aaraiqohairo nkaqain-temake, kaintaaqa vika raqonta kaate tiro, kempuka vika nimiro tiharо, ⁴ Ne oru viha ukauve katarive vo haika vo haika qampiqe vairave kia vi haikara vi haikara qoraiqama nimitaraiti, ne tavaimanta Kotiva vaiinti nahenti tiriqaa kia viraqama kero qara ntuva tairauka vaivera, ne vikaqaima raqontaqi vuate.

⁵ Ne vi vaiinti nahentika kia ekaara aru karaiti, kauquru torara vika qaqi raqontaqi vuate, tuvaro kaintaaqa vika oru viha nái vekaqohai vaiinti nahenti raqontaqi vi vaumanta vaiinti nahenti voqamake keke tiha variqi vi vaura.

⁶ Vi entara vaiinti nahenti voqamake antura ntuvaqi viha, vika qutuataa iramanta qutu virare tihavata, kia ho qutu viraiti, qaqi antura ntuvaqi vivarave.

⁷ Kaintaaqa vika vaireka, iqoka raqireka nai *ohinavu* geramake vataantemake vaura. Vika qjataqaa avuhainaaka *kori* tovaqa voqaara vauvaro vika virivano vaireva, vaiinti viri voqaara vaura.

⁸ Mintimake vauvaro vika qiata kaukivano vaireva, nahenti vukai kauki voqaara vauvaro, vika aaraivano vaireva, *raioni* aarai voqaara vauvaro ⁹ mimiraini *aini* ori naavuma tora voqaara vaura.

Vika arokavano qakaa qakaa i vaharo, airi *ohinavu* kanteha nái iqoka kaarinavu rara u vare iqoka raqireka vi variavaro noraiqakero auva ntavaqi vintemake, auva ntavaqi vi vaura.

¹⁰ Vika vekavano vaireva, kaakaakarira veka voqaara vauvaro veka vitini aaraivano vauvaro viraqohairo kauquru torara vaharo vaiinti nahenti raqonta nimitaqliro vuari-rava vaura.

¹¹ Kaintaaqa vika mintimake vauvaro vika avuhainaava vaireva, nai vevantogama kero vau *Ruvuraqi/Mpumpiraqi* raqiki vau *enseliva* vaura. Vira autu Hiparu uvaqihai *Abadonive* tura. Maa uvaraqhahai *Vaiinti Vehi Autuke Vaivave* tura.

¹² Ho iriate. Kaintaaqavano vataini variaka qoraiqama nimitaqi vi vai maarava taiqairaro vataini vaika qoraiqama nimitaqi vuaina maarava taaraqanta qaqlima vari-anaro. Virara tirera.

Nampa 6 vano nai aanumaara/noma vuqa kora

¹³ Te vaiha tavaavauraro *enseli* 7navuqihairo *nampa* 6 vano nai *aanumaara/noma vuqa komanta te viragaahai iriavauraro ofaa tainta kori oriqhohai aututova* Kotira avuqaa vauvaro vira hini hini vitiqihairo uvavano tura.

¹⁴ Viraqihairo uvavano *enseli nampa* 6 iara mintima tiro: *Enseli* 4navu rumpa taamanta Iufaretisi Namari taatika namariqi variaka, are vinavuka kuvantu kaane, tuvaro vinavuka kuvantu kora.

¹⁵ Vinavuka vaiha vi ihihare vi torarave vi entarave, tenavu vi entara veka variariraro tinavu kuvantu kairae vi kaiqaraqai varaqi virarave tivake, qeramate vauvaro vinavuka kuvantu komanta vinavuka vataini vau vaiinti nahentika taara mantaraini qaqlima ke, vohaa mantaraini variaka aru taiqa kareka vura.

¹⁶ Vinavuka iqoka vaiintitara airitaha 200 milion iqoka vaiinti *ohi tauvaqaaqaa variavo tumanta iriavaunara.*

¹⁷ Te vaiha taira tavamaaqi viha vi vaiintikavata vika *ohivata tavaavaunarama*. Vi vaiintika mimiraini naavumato haikava iha auru voqaara naare parunkaiqiro vauvaro, hini mimiraini naavumato *kalaava* vaireva, *blu* vauvaro, hini mimiraini *yelo* vaura. Mintimake vauvaro vika *ohi* qiatavano vaireva *raioni* qita voqaara vauvaro vika *ohi noqihairo ihavanovata, muravanovata, hunkavi vau haikava salfa** aihovanovata, aitara tara in vaura.

¹⁸⁻¹⁹ Ihavanovata, muravanovata, hunkavi vau haikavavata, vika *ohi noqihairo aitare-haro* vaiinti nahenti vohaa mantaraini vauka aruqiro viharo aru taiqa kero taara mantaraini vauka qaqlima kora. Vika *ohivano* nái noqihai vaiinti nahenti aruqiqi viha, vika nái vekaqohaivata vaiinti nahenti aruqiqi vi vaura. Vika *ohi* vekavano vaireva, *uqahi/quaiha* voqaara vauvaro viraqaa qiatavata vauvaro viraqohairo vaiinti nahenti nkaqa nimite vaura.

²⁰ Ho hini vaiinti nahenti kia arukoka, vika kia nái qora kaiqa vare vaura qaqlira karaiti, nái kauquqohai aututo haikauka qaqliqai quahama nimitaqi vi vaura. Vika *kori* orive, *silvaa* orive, *baraasi* orive, qaqliqai orive, katarive, vi haikara varake aututo haikauka kia ho tarraitii, kia ho iriraiti, kia ho nái ni vau haikauka vaumanta, vika vi haikarara tinavu variqave tivakeha, vi haikara quahama nimiteha, vaanavata quahama nimitaqi vi vaura.

²¹ Vika mintiaqi vi vaiha vo vaiintinavu arukorara kia noraiqaake iriraiti, vaana kaiqa vare vau okararave, hampi qaramaqi ni vau okararave, muara kaiqa varaqi vi vau okararavata kia qaqlira karaiti, vi kaiqara vi kaiqara qaqliqai varaqi vi vaura.

10

Inaara vuku uruquruma torara tura

¹ Vika mintiaqi vi vaumanta te vaiha tavaavauraro *enseli* vo, mpeqavano naaruvalihairo tuvi vaura. Tonavuvano vira vaata naavuma tovaro vira qiataini ontantavano ututero vaura. Vira virivano vaireva, kuari avu voqaara ite vauvaro vira aiqutanta vaireva, naavu kaaratanta aaratora ihavano ite vauntema kero, ite vaura.

² *Enseli* vira vaatavano mintiro vauvaro viva nai kauquqi inaara vuku rairakero tuata varero tuviro, nai aiq tanara nora namariqaa ntava tero, nai aiq kaanaqaqtaaqa ntava tero, ³viraqaaahairo viva *raionivano* uva taanaara noraiqaakero uva tuvaro naaruvalihairo 7 tataa karara tura.

⁴ Naaruvalihairo minti tumanta te naaruvalihairo tu uvvara vukuq qara ntirare tiavauraro, naaruvalihairo uva vovano aqao tiro, Naaruvalihairo 7 tataa ti uvvara kia qara ntuvu taraitira, evaara kukeqa taane, tiro.

⁵ Minta tumanta te vaiha tavaavauraro *enseli* viva nai hini aiq nora namariqaa ntava tero, nai hini aiq vataqaa ntava tova, viva nai kauqu naaruvalihairo tuahera kero ⁶tiharo, Kotiva ekka enta qaqlira variqiro vi vaivave. Viva naaruvalihairo, ekka naaruvalihairo vauvaro viraqaaahairo viva *raionivano* uva taanaara noraiqaakero uva tuvaro naaruvalihairo 7 tataa karara tura.

* ^{9:17:} *Salfa* orivano ite vaivaro voqamakero hunkavi vai aihova qovaraiqi vaira.

⁷ *Enseli 7navuqihairo nampa 7 viva nai aanumaara/noma vuqa kairaro Kotiva nai evaara uva tivakero kukeqataiva ekaara vuru taiqa vuanarove. Viva vi uvvara nai kaiqa vaiinti, paropeti vaiintinavu haaru tiva nimurave, tiro.*

⁸ *Viva minti tuvaro naaruvalihairo vaaka iriavaura uvava qaiqaa tiriara tiharo, Enselivano namariqaavata vataqaavata himpite vaira, are oru vira kauquqihaira inaara vuku raira taira varaane tumanta ⁹ te enseli viva vaunaini orunte vi vukurara iraavaauraro viva tiriara tiharo, Maa vukura varakeraa naane. Are vi vukura noqi ne vairaro hanivanoo hiakaa intema kero, hiakaa irarovata, vi vukuva ai vaantavoraqi hunkama ianarove, tiro.*

¹⁰ *Minti tumanta te vira kauquqihai vi vukura varake naavaunara. Te noqi neha tavaavaauraro vi vukuva hanivanoo hiakaa untema kero hiakaa umanta, te vira nampiqamake tavaavaauraro vi vukuva ti vaantavoraqi hunka vura.*

¹¹ *Te vi vukura nama kaavaauramanta vika tiriara tiha, Are ekaa naato vatanaakave, vo vataini vo vataini variakave, vo uva vo uva ti variakave, avuhainaa vaiintinavuve, ekaa vika vika Kotira uva qoqaiqamake tiva nimiane, tura.*

11

Kotira uva tiva nimi vai vaiintitantara tura

¹ *Minti tuvaro vovano kairiqa vo ti timiro tiharo, Himpira kairiqaqohairu oru Kotira Naavuvata, ofaa taintavata avatama kera tavera, vaiinti nahenti Kotira Naavu vainaini vaiha vira autu tuahere variaka vika kaara ntuva kera tavaane. ² Are Kotira Naavu avatama kera tavera, kiama naavu naanteqaraini vai vatukara avataane. Vi vatukara qaqi kaira naantiara qumina vatanaaka, kia Kotira uva iri variaka vi vatukara qoraiqama kevarave. Vika taaramo ihi 6 toranavuara variqi viha Kotira vatuka koqera rahitamaqi vi vaivarave.*

³ *Kotira nai uva tiva nimiati tiro, taara vaiinti nititama kaira, vitanta kovaara utavaaqa nonkute, Kotira vakaaka vi entara 1,260 entanavuara variqi viha tivaqiqi vivarave.*

⁴ *Kotira uva tiva nimiqi vi vai vaiintitanta vaireka, orivi kataritanta voqaarave, ova qumpitaara taaraqanta voqaarave, vitanta vaivarave. Vi vaiintitanta Noravano Kotira maa vataraqaa raqiki vaira avugaa himpite vaivarave.*

⁵ *Vovano vitanta qoraiqama nimitareva autirera, vitanta noqihairo ihavano vihiviro vira tatoqa taiqa kaanarove. Mintima kema vitanta qoraiqama nimite vaika qutu vivarave.*

⁶ *Vitanta Kotira uva tiva nimiqi vi vai entara Kotira vo kempuka vitanta nimira vitanta homa naaruva tinta taivaro kia aagu ruanarove. Vitanta vi kempukaraqohai homa ruvu namari, vo namari vo namari kuqu kaivaro naareqama vuanarove. Vitanta vaivaro Kotira qaiqaa vo kempuka nimira vitanta homa vataini vaika ruqutuqi vi vaimanta vo rovara vo rovara varevarave.*

⁷ *Vitanta Kotira uva tiva qovaramaqi vivi taiqa kaivaro, viraqahaqihairo nai vevantogama kero vai Ruvuraqihairo/Mpumpiraqihairo qaakau aantau vovano viraqihairo qovaraiqama viro oru vi vaiintitanta hampata raquqiro viro, vitanta naatara kero arukaanarove.*

⁸ *Viva vitanta arukairaro vitanta vaatavano nora vatuka aaraqaama qaqi varianarove. Vi vatukaragi haaru vitanta Nora Vaiinti katariqaa aruke hirito vatukarave. Vi vatukara vira autu nteha Sodomive, Isipive, ti variarave.*

⁹ *Viva vitanta arukairaro vitanta vaatavano aaraqaa qaqi vaira ekaa naato vatanaaka, konkirkavata eqaravata, vo vataini vo vataini vaikavata, ekaa naato vo uva vo uva ti vaikavata, vitanta vaata aitutumake taveha, qiqama teha tiha, Vitanta vaata qaqi kaivaro variarire. Kiama vitanta vaata quntama taate, tivaro vitanta vaatavano taaramo enta hini entavata qaqi aaraqaa varianarove.*

¹⁰ *Vi entara vitanta vaatavano aaraqaa qaqi vaira vataini vaika mintima tivara: Vitanta arukairara tenavuvata quahema vauro.*

Vitanta qaqi variqi vi vau entara nora maara tinavuqaa vate variamanta qoraiqamavi variqi vi vaunarave, tivarave. Vataini vaika minti tivakeha quaheha ihi tivaqiqi viha karave vo haikave nai ami nai amimaqi vivarave, tiro.

¹¹ *Naaruvalihairo uvavano tiriara mintima kero naantiaraini qovaraiqiaina uvvara tiva timumanta te Ionika vaiha taira tavaavaauraro, vi vaiintitanta vaatavano taaramo enta hini entavata, aaraqaa qaqi vauvaro, viraqahaqihairo Kotiraqihairo qaqi variqiro vi vai aihova vi vaiintitantaqii oriqetomanta vitanta naitanta aiquqaa qaqi himpi vaumanta vaiinti nahenti vitanta tave voqamake aatu itomanta qete vaura.*

¹² Vika qete vaiha iruvaro naaruvaihairo uvavano vitantara naveraitiro tiharo, Maini uruate, tumanta vitanta navutaaka qaqi tave vaumanta vitanta tonavuqi vaiha naaruvaini vura.

¹³ Vitanta naaruvaini vuvaro vaakama naturavano noraiqama kero utiharo vi vatukara 10 mantaraihairo 9 mantaraini qaqi kero, vohaa mantaraini vehi autukora. Vehi autukeharo 7, 000 vaiinti nahenti aru taiqa komanta qaqi vau vaiinti nahentika voqamake virara aatu itomanta qeteha tiha, Oho, Variqavano naaruvaini vaiva kempukavanoma vaivo, ti vaura. „Ho te taira voqara vaiha vi haikara vi haikara tavaavaunara. Ekaa vi haikava vi haikava naantiara mintiakero qovaraqianaro.„

¹⁴ Naantiara vatainai vaika voqamake qoraiqamavi vai maarava taaraqanta taiqa viraro, viraqaahairo *nampa* 3 maaravano vaakama qovaraqianaro.

Enseli nampa 7 vano nai aanumaara/noma vuaqa kora

¹⁵ Te taira tavaavauraro *nampa 7 enselivano nai aanumaara/noma* vuaqa kovaro naaruvaihai vo uva vo uvavano noraiqaake naveraitiha, Maa entaraqaahairo „maa vataraqaa raqiki vaiva Sataaniva qaqini viniramanta, tinavu Noravanovata viva atitai vaiintiva *Mesaiavaanovata* uri aatarake maa vataraqaa raqikiq vivarave, ti. ¹⁶ Minti tumanta nora vaiinti 24navu Kotira avuqaa nai tainta nai taintaqa oquivi vauka, vi uvava iri, viraqaahai vika vatakanta hiqirivi nai viri vatainai ke, Kotira quahama amiteha tiha,

¹⁷ Noravaavo, are ekaa kempuka vataavave. Vate are qaqi variqira vi variaravave. Haaruvata are qaqi variqira vi vauravave. Are nena kempukaqohairai vaiinti nahentika raqikireva auti varianarara ti, tenavu ariara koqeve ti vauro.

¹⁸ Vo vatanaa vo vatanaaka arara ite vau entava taiqa vivaro ari arara itaina entavama qovarama vivo. Are qutuvika ko tiva nimiteni entavama aniraivo. Ai kaiqa vaiinti paropeti vaiintinavuvata, ekaa ai vaiinti nahentivata, nora vaiintive, inaara vaiintive, ariara noraiqaake iriqi vi varia vaiinti nahentika variavara are vika quahama nimitehara vika nai koqaa nimina entavama aniraivo. Are maa vatara qoraiqamake variaka vehi autu kena entavama aniraivo, tura.

¹⁹ Vika minti tuvaro Kotira Naavu naaruvaini vaura qentivano qantuara vumanta te tavaavauraro Kotiva uva tivakero taatauto *vokiseva* vi naavuraqi vaura. Viraqi vauvaro viraqaahairo aauquaavano utu aqu utu aqu i vauvaro naaruvavano karara karara ti vauvaro vaturavano uti vauvaro *taaru/kaampura* aauquvanovata nti vaura.

12

Nahentiaravata dragoniaravata tura

¹ Mintiaqi vi vaumanta te Ionika vaiha tavaavauraro naaruvaini aahuva haikavano qovarama viro vaura. Nahenti vovano mini vauvaro vira utavaaqavano vaireva, kuari avu vauvaro, vira aiqu ataini toravano vauvaro, vira qiataqaa opu 12navu avuhainaara tovaqa voqara aqutero vaura.

² Vi nahentiva vainti taiqama viro, vainti vatareva iharo ke ke tivaqiro vi vaura. ³ Vi nahentiva naaruvaini vauvaro nai aahuva haika vo haikavano naaruvaini qovarama viro vaura. Vi haikava vaireva noraqora naare *dragonivano* vauvaro vira vaatavano evari vaata voqaara vauvaro vira qiaa 7navu vauvaro, *okepaa/pomu* 10navuvata vira vaataqaa vauvaro vira qiatanavuqaa avuhainaara tovaqa 7navu aqute vaura.

⁴ *Dragonii* viva naaruvaini vaharo nai vekaqohairo opu makau hininavu vohaa mantaraini vaura raupikero vatainai aqukero, opu makau taara mantaraini vaura qaqi kora. *Dragonii* viva oru nahenti avuni himpitero vaharo, viva vainti vatataireqae ravaaqavuke naare tivakero vaura.

⁵ Vauvaro nahenti viva qorainti vainti vatatovaro vi vaintiva vaireva, noruqaaviro *aini* kauru tuataqiro viharo ekaa naato vatanaakaqaa raqikiirava vauvaro, *dragonivano* vainti vira ravaaqavuke naare tumanta *enseli*, vika vaaka ani vi vaintira raqia vare vuru Kotiva nai avuhainaara taintaqa oquiviro vaunaini kora.

⁶ Raqia vare vuru kovaro vi nahentivaqai aiqu aututero qumina vatainai, Kotiva nai virara iriharо qerama amito vataraqaa oru vaharo 1,260 entanavu variqi vumanta viraqaata koqemake raqikiq vi vauvaro vaura.

⁷ Vi nahentiva mini vauvaro naaruvaini nora iqokavano qovarama vura. Qovarama vuvoro *enseli* noravano, Maikeriva iqoka raqireva umanta *enseli* vonavu vira kahaqamake raqireka vuvoro *dragonii* viva iqoka raqireva umanta *enseli* vonavu vira kahaqamake nora iqoka raquqi vura.

⁸ Raquqi vuvoro Maikeriva nai *enselinavu* vataakero kempukaiqama kero *dragonivata*, vira *enselinavuvata* naatara kora. Vika naatara kero *dragoniara* tiharo, Are nena *enselinavu* vataakera naaruvaini kiama ho vaivarave, tiro.

⁹ Minti tivakero *dragoni* vira nai norauha naaruvaihairo vara vaavi vataini aqukora. *Dragonii* viva haaruva memaruvano vauvaro vira autu Navutaarave Sataanirave tura. Sataaniva ekaa maa vataraqaa variaka vika una tiva nimite vaivama vairo. Viravata, *enseli* vonavu vira aiquqaa avataqi vukavata, naaruvaihairo vataini vara vaavi aqukora. ¹⁰ Vataini vara vaavi aqukomanta te vaiha iriavauraro naaruvaihairo uvavano mintima tiro:

Vate Kotiva vaiinti nahenti kuvantu nimitaaina entavama aniraivo. Kotiva mpe-
qaiqama kero vaiinti nahentiqaa raqikiqiro vuanarove. Kotiva atitai vaiintiva, vivavata
vate noraiqamama vivo. Sataaniva Kotira avuqaa vaiharo vo enta vo enta entaqivata
aatitairaqaavata tinavu qata vakauqaa uva vate vaura, enseli vika vira naaruvaihai
vara vaavi vatainima aqukorave.

¹¹ Sipisipi Naati viva nai naare raukeharo ,vika qora kaiqa vare vau uvara nunka
komanta, tinavu qata vakauka kia qetaraiti, vi uvara vaiinti nahenti tiva nimiqi vi
vaurara ti, vika Sataanira aatara kora. Vika kia nai qaqi maa vataraqaa variqi virara
noraiqaake iriraiti, tinavu arukareka ivera, tenavu kia qetararave, ti vaura.

¹² Vika mintima keha Sataanira aatara korara ti, naaruvavauvo, arevata naaruvaini
variakavata ne quaheha variate. Te maa vataravata nora namariaravata oho tiva
nimitauro. Sataaniva ne varianaini vaiharo kankomakero irivaro viva nai taiqaarira
entava aumanto vaivarora tiro, vira kaara vira voqamakero arara ite vaivarovaivo,
tiro.

¹³ Naaruvaihairo uvavano minti tumanta te tavaavauraro *dragoni* vira aato kenko
tuvaro iri vuvaro tiharo, Ike, ti vara vaavi aqukaamanta vatainima vauro tivakero, viva
himpiro qorainti vainti vatato nahentira vira avataqiro vi vaura.

¹⁴ *Dragonivano* vira avataqiro vi vaumanta nahenti vira kahaqireka memora aroka
taaraqanta vira amura. Nahenti viva ata varero nai qerama amito vataro qumina kanta
oru taaramo ihi hini ihira vairaro *dragonivano* vira kia aruarire ti, aroka taaraqanta
vira amura.

¹⁵ Vira amuvaro *dragoni* viva nai noqihairo namari vihi kovaro huvura namari
voquaara vi nahentira avataqiro viharo raaqu varaarire tuvaro ¹⁶ vatavano nahenti vira
kahaqiharo nai no aqaavu kero *dragonivano* nai noqihairo vihiko namarira ekaa nama
taiqa kora.

¹⁷ Namari nama taiqa kovaro *dragonivano* nahentira arara itovaro viva vira vaintaira
hini kuka hampata iqoka raqireva viro, oru Kotiva tivato uvaravata, Karaitiva tiva nimi
vau uvaravata iri vauka hampata iqoka raqireva vura.

¹⁸ *Dragonii* viva raqireva vuva oru nora namari auvahini himpitero vaura.

13

Qaakau aantau vovano nora namariqihairo qovarama vura

¹ Te vaiha taira tavaavauraro nora namariqihairo qaakau aantau vovano qovarama
vura.

Vi haikava vaireva, *okepaa/pomu* 10navu vira vaataqaa vauvaro vira qjata 7navu
vauvaro, vo *pomu* vo *pomuqaa* avuhainaara tovaqa vauvaro, vo qjata vo qjataqaa
Kotirara qora uva tivato autura, vo autu vo autu qara ntuva tovaro vaura.

² Te tavaavauraro vi haikara vaatavano vaireva, *lepati* vaata voquaara vauvaro, vira aiqu
bea aiqu voquaara vauvaro, vira no *raioni* no voquaara vaura. Vi haikava mintiro vauvaro
dragonivano nai voqaantemake variarire tiro, vira noraiqama kero nai kempuka amiro
nai raqiku kaiqaravata vira amura.

³ *Dragonivano* nai kempuka qaakau aantau vira amumanta te tavaavauraro vi haikara
qjata vo teqa kovaro vi qjatava qutuvi ruhiqau viro, qajqaa qaqi tavanta viro ho
vaura. Vira qjata vovano minturara ti, vataini vauka virara raukuvi vi haikarara
kempukavanove tivakeha, vira avataqi vi vaura. ⁴ *Dragonii* viva nai kempuka qaakau
aantau vira amurara ti, vataini vau vaiinti nahentika qaakau aantau vira autu tuahera
keha tiha, Qaakau aantau mpeqavano uritarakero vaura. Kia vovano raquqiro viharo
vira ho aatara kaanarove, ti vaura.

⁵ Vi entara Kotiva qaakau aantau vira qaqi kovaro viva noraiqama viro vaharo 42
torara variqiro viharo Kotirara vaagu uva tiva amitaqiro vi vaura. ⁶ Viva nai no aqaavu
keri Kotirarave, vira vatukarave, ekaa naaruvaini vaukarave, qora uva tiva nimitaqiro
vi vaura.

⁷ Kotiva vira qaqi kovaro viva Kotira vaiinti nahenti hampata iqoka raquqiro vi vaharo
vika naatara kora. Qaakau aantau viva vika naatara kero noraiqama viro ekaa naato

vatanaaka, egarave, konkirave, vo vataini vo vataini vaukave, vo uva vo uva ti vaukave, viva ekaa vikaqaa raqiki vaura.

⁸ Te tairakaa vi haikava naantiara qovaraiqainara tavaavaunara. Naantiara ekaa vataini vaika, vo vatanaa vo vatanaaka qaakau aantau vira quahama amitaqi viha vira autu tuahera kevara. Haaru maa vataria kia autuko entara Kotiva vaiinti nahenti autu vukugi qara ntuva toka, vikaqaima qaakau aantau vira autu kia tuaheraqi vivara. Vi vukuva qaqi variqi vika autu qara ntuvato vukuva vaivaro tota Sipisipi Naati arukova, vivama vi vukuragaqaa raqiki vairo.

⁹ Ni aatovano vairera, vi uvara iriata.

¹⁰ Vira ravaaqavuke rumpe vaiintiva vairamanta vika vira ravaaqavuke rumpama tevarare. Vira iqoka paipeqohai aruke vaiintiva vairamanta vika vira iqoka paipeqohai aruma kevarave. Vika mintiaqi vi vaimanta ne Kotira vaiinti nahenti kia popoharaiti, Kotirara kempukaiqamake iriqi vuate.

Qaakau aantau vovano vataqihairo qovarama vura

¹¹ Te vaiha taira tavaavauraro, qaakau aantau vovano vataqihairo qovarama vura. Vi haikara *okepaa/pomu* taaraqanta vaura. Vi haikara *pomu* vaireva, sipisipi naati *pomu* voqara vauvaro vira uvavano *dragoni* uva taanaara ti vaura.

¹² Viva mintima vauvaro qaakau aantau viva noraiqama viro hogare qovarama vu aantauraqai kaiqa vara amitareva iharo vira autuqaa ekaa vataini vaukaqaa raqikiqiro viharo hogare qovarama vu aantaura vira qjata vo teqa kovaro tavanta vuvaro qaqi vau aantaura, virara vaiinti nahentiara tiharо, Ne vira autuqai tuaheraqi vuate, tura.

¹³ Viva nora kaiqa, vo kaiqa vo kaiqa varaqiro viharo vaiinti nahenti nivuqaa vaharo tuvaro naaruvaihairo ihavano vataini tuvumanta vaiinti nahenti tave vaura.

¹⁴ Viva hogare qovarama vu aantaura kahaqama amiteharo nora kaiqa varaqiro vi vaharo vaiinti nahenti vataini vauka unaqaraqama komanta vika vira quahama amiteha hogare qovarama vu aantaura, vira iqoka paipeqohai qjata teqa kovaro tavantavu aantaura, vira autu virini qiarire ti, vira maraqurahaave varahaave autu amitora.

¹⁵ Vaiinti nahenti hogare qovarama vu aantaura, vira maraqurahaautuke vatovaro Kotiva qaqi kovaro naantiara qovarama vu qaakau aantauva nai aiho vuaqa kovaro maraqurahaavano qakiharo ho uva tiarirava vaura. Vaiinti nahenti vokika vira autu kia tuahera kareka ivaro maraqurahaavano vika ho arukaariravama vaura.

¹⁶ Vira naantiara qovarama viro vau qaakau aantauva vaharo ekaa vaiinti nahenti, nora vaiintive, inaara vaiintive, airi airaira vatokev, vehi vaiintive, rumpato vaiintikave, qaqi vau vaiintikave, viva ekaa vika vikara kempukaiqaa kero tiharо, Ne vase te qara vo ni kauqu tanarainie ni tiriqaae ruva vataare, tivakero vika kauqu tanarainie tiriqaae qara ruva nimitora.

¹⁷ Qaakau aantau vira qara kia varo vaiintika viva qioqama tomanta vika kia ho koqaa autuke airaira vararaiti, kia ho nai airaira voka nimiha monu vare vaura.

¹⁸ Koqe avu aato vataa vaiintivano homa qaakau aantau vira qara okarara kankoma kero irianarove. Vi qarara okaravano vaireva, vaiinti *nampaama* vairo.

Vi *nampaava* vaireva 666.

14

Saioni ainqinaqaa ruvaaqumavi vaurara tura

¹ Te vaiha tavaavauraro Sipisipi Naati viva Saioni Aiqinaqaa himpite vaumanta vira hampata 144,000 vaiinti nahenti vauvaro vika tiriqaa Sipisipi Naati autuvata vira Qora autuvata qara ntuva tomanta vaura.

² Vika mini vaumanta te vaiha iriavauraro naaruvaihairo uvavano namari noravano aintaakaqaa aquvi aquvi iharo uva tuntema kero, ti vaura. Vi uvava naaruvavano karara karara tuntema kero, ti vaura. Vi uvava airi vaiinti *kitaa* ruquti vauntema kero, uva ti vaura. ³ Uvavano minti ti vaumanta vaiinti nahenti 144,000navu Kotira avuhainaa tainta avuqaa himpite vaiha, vika qaqi variqi vi vauka 4navuvata, vika nora vaiinti 24navuvata vika nivuqaa vaiha, qaraaka ihi tivaqi vi vaura. Sipisipi Naati viva vika vataihairo kuvantu nimitorara ti, 144,000 vaiinti nahenti vikaqai vi ihira ho tivaqi vi vaura. Vikaqai vi ihira ho irumanta vokuka kia ho vi ihira irura.

⁴ Vi vaiintika kia nahenti hampata niraiti, vika Kotiraragai iriqi viha, Sipisipi Naati viva nai tainie vireva unaini vikavata vira avataqi vi vaura. Vataini vau vaiinti nahentikaqai-hairo vika naane kuvantu kero ntita varero vuru Kotiravata Sipisipi Naativata nimura.

⁵ Vika kia una uva tuvaro kia vo uvavanovata vikaqaa vaura.

Enseli taaramonavu tavorara tura

⁶ Te „Ionika taira tave vaiha,“ vuruvi tavaavauraro *enseli* vovano virikanta ata varero ni vaura. Kotiva vira atitama kero vo vataini vo vataini vaukave, vo vatanaa vo vatanaaka egarave, konkirave, ekaa vo uva vo uva ti variakave, ekaa vikara koqe vakaaka vaiinti nahenti ekaa enta qaqi variqi vi vai vakaakara tiva nimiane tivakero vira atitovaro viva virikanta niharo ⁷ noraiqaakero naveraitiharo, Kotiva vaiinti nahenti *ko* tiarira entava aniraimantara ti, ne Kotirara geteha vira autu tuahera kaate. Vivama naaruuvavata, vatavata, nora namarivata, ruvu namarivata, autu kero vataivave. Viraqai quahama amiteha tinavu Variqavano vaivo tiate, tiro.

⁸ Minti tuvaro vira naantiaraini *enseli* vovano vira avataqiro viharo mintima tiro: Oho, Babironi vatukavano taiqa viro vehiqama vivo. Vi vatukava vaaqu kaiqaqai varaqiro viharo ekaa vo vatanaa vo vatanaakara ti *uaini* naate tumanta vika vira neha vikavata hampi qaramaqi ni vaurave, tiro.

⁹ Minti tuvaro vitanta naantiaraini *enseli* vovano vitanta avataqiro viharo noraiqaakero naveraitiharo, Oho, vaiinti vovano qaakau aantauvata vira maraqurahaa aututaa haikaravata quahama amiteharo virara ti variqave tivakero vira qaravata nai tiriqaae, nai kauqu tanarainie, varairera, ¹⁰ Kotiva vi vaiintirara voqamakero arara itairaro virara ti *uaini* neharo ti arara ite vaina okarara tavaanarove tianarove. Kotiva kiama qilhaaqama kero vi vaiintira ruqutiraitiro, voqamakero vira ruqutuanarove. Kotiva vi vaiintira ruqutu kairaro viva takuqi vai *enselika* nivuquaavata, Sipisipi Naati vira avuquaavata vaharo, *salfa* * orivano iha ite vainaraqi vaharo noraiqaakero qantura rihamo varianarove.

¹¹ Mintima variqiro viraro vi ihava kia qimparaitiro qaqi itaqiro viraro, vira muravanovata ekaa enta qaqqiqai oru vuanarove. Vaiinti nahenti qaakau aantauvata vira maraqurahaaavata quahama nimiteha tinavu variqave tivakeha vira qaravata vareka, vika aatitainaraqaavata entaqipata nora iha itainaraqi vaiha kia auraaravata vairaiti, ekaa enta antura ruvaqi vivarave, tura.

¹² Vi uvara irihama te Ionika niara tiha, Ne Kotira vaiinti nahenti Kotira uva avataqi vuaterama, turo. Ne Ihurara kempukaiqamake iriqi vuaterama, turo.

¹³ Ho *enseli* viva minti tumanta te vaiha iriavauraro naaruvalihairo uvavano tiriara mintima tiro: Maa uvara qara ntuva taane. Maa entaraqaahai vaiinti nahenti Kotira kaiqa vara amitaqi vi vuru qutuvika, vika vaivaro Kotiva vika koqema nimitaanarove, tiro.

Enseli viva minti tuvaro Kotira Maraqravano tiharo, Ququaama tiarao. Vi vaiinti nahentika vukaari utuqi vi, oru auraara vaivarave. Vika vare kaiqava koqe kaiqa vairara ti, vika homa oru auraara vaivarave, tiro.

Vataihairo kara qantu varaainarara tura

¹⁴ Minti tumanta te vaiha tavaavauraro uromuravano vauvaro viraqaata vovano oquiviro vaura. Vira virivano vaireva, te Vataini Vatatai Vaiintika vauro tu vaiintira viri voqaa vauvaro vira qiatqaqa *kori* oriqohai avuhainaara tovaqa aututova vauvaro viva nai kauquqi kara qantuina paipera voqamakero vahora tuatero vaura.

¹⁵ Mintuvaro viraqaahairo Kotira Naavuqihairo *enseli* vovano vevarero oru tonavuqaa oquiviro vau vaiintirara noraiqaakero naveraitiro tiharo, Kara qantuina entava aniraivo. Nena paipeqohaira kara qantu varera uruane. Vataini karavano mpeqaiqama vivo, tiro.

¹⁶ Minti tuvaro tonavuqaa oquiviro vau vaiintiva nai paipe aqukeharo vataini vau karara teqakero qantu varero uriro.

¹⁷ Viva mintumanta te vaiha tavaavauraro Kotira Naavuqihairo *enseli* vovano vevarero vivavata nai kauquqi kara qantuina paipera voqamakero vahora tuate vaura.

¹⁸ Viva vevarovaro *enseli* vovanovata ihaqaa raqiki vauva, viva *ofaa* taintqaahairo anirero *enseli* vovano paipe vahora tuatorara noraiqaakero naveraitiro tiharo, Vataini otuntera nena paipeqohaira *uaini* tava ekaa teqa varera uruane. *Uaini* tavavano mpeqaiqama vivo, tiro.

¹⁹ Minti tuvaro *enseli* vovano vataini nai paipe aqukeharo *uaini* tava naaquntaqaahairo teqakero varero Kotiva nora rahiti keharo tatiaina tanuraqi vuru aqukora. Vi tanuva vaireva, Kotira arara voqamakero itaarira tanuva vauvaro ²⁰ viraqiqi aqukovaro *uaini* tava vira rahiti kero tati vaura. Vi tanuva nora vauvaka aqiqaini vauvaro viraqihairo tatito namariva naarevano otu viharo huvura namarivano vaiinti vaata ekaa nampiqama kero qiatqaqi qoqaa vaintemakero, otu viharo nai niaraini 300 kilomita muntu taiqora.

* **14:10:** *Salfa* orivano ite vaivaro voqamakero hunkavi vai aihoa qovaraiqi vaira.

15

Ekaanaini vaiinti nahenti qoraiqama nimitare i haikarara tura

¹ Te Ionika vailha naaruvaini tavaavauraro nora haika aahuha haika vovano qovarama viro vaumanta te vira tave, kauqu runkinkiriha variavaunara. *Enseli* 7navu mini vailha vaiinti nahenti qoraiqama nimitaaaina haikara 7navu tuate vaura. Vi haikara *enseli* vinavuka vaiinti nahenti ekaara nimivaro Kotiva vaiinti nahentiaara arara itaarirava taiqa vuanaro.

² Vinavuka vi haikara tuate vaumanta te tavaavauraro *karaasi* varuva namarivano vauvaro viraqi voqi voqi iha ite vaumanta vaiinti nahenti airitahaa qaakau aantau aatara koka *karaasi* namari auvahianta vaura. Vika qaakau aantauvata, vira maraqurahaavata, vi haikarara iriha *nampaa* autu qara ntuvatoravata, aatara koka oru mini vailha, nái kauquqi Kotiva nai nímu *kitaura* voqaara tuateha vaura.

³ Vika mini vailha Kotira kaiqa vaiinti Mosira ihivata, Sipisipi Naati ihivata, tivaqi viha mintima ti:

Noravaauvo, are ekaa kempuka vataavave. Ai kaiqavano nora kaiqa vaimanta ti, tenavu vira taveha kauqu runkinkiri i vauro. Are ekaa naato vatanaaka Avuhainaavama variarao. Ai kaiqa okaravano vaireva, avuqavu okara ququa okaraqaima vaivo.

⁴ Noravaauvo, tavave kia ai aatu qetaraitiro varianarove? Ekaama ai aatu qeteha vaivarave. Tavave ai autu kia tuahera kaanarove? Ekaama ai autu tuahera kevarave.

Ariqi kia qora okaravanovata vairaitiro, koqe okaravanoqai vaivo. Are avuqavuqua kera vare variana kaiqava qoqaa vairara ti, ekaa naato vatanaaka ai kaiqa taveha, vika oru ai avuqaa vailha, ai quahama amiteha ai autu tuahera kevarave, tura.

⁵ Vika minti tivake ihi tiva taiqa komanta te tavaavauraro naaruvaini Kotira Naavu gentivano quantua vivaro Kotira turuaravano qoqaa vaura.

⁶ Mintumanta *enseli* 7navu vaiinti nahenti qoraiqama nimitare u haikara, qora haika 7navu tuatoka, vinavuka Kotira Naavuqihai vevarora. Vinavuka utavaaqavano vaireva, takuqi vau utavaaqava vauvaro vinavuka mimiraini *kori* origohai aututo hoqukara ruvutova vaura.

⁷ Mintima vauvaro qaqi variqi vi vauka 4navuqihairo vovano tanu 7navu varakero *enseli* 7navu nimura. Tanu vinavura *kori* origohai aututova 7navu vauvaro vi naavuraqi ekaa enta qaqi variqiro vi vaiva Kotiva arara ite vaiva mpiqaviro vaura.

⁸ Tanu vinavura *enseli* vika nimuvaro Kotira mpeqa okaravano takuqi vauraqaaahairo muravano oru viharo Kotira Naavuqi mpiqa vura. *Enseli* 7navu vaiinti nahenti qoraiqama nimitare u haikara raurukeva qaqi vaurara tiro, vovano vi naavuraqi origetaarirava kia ho vaura.

16

Tanu 7navuvara tura

¹ Mintumanta te iriavauraro Kotira Naavuqihairo uvavano noraiqaakero naveraitiharo *enseli* 7navuvara mintima tiro: Kotira arara ite vai tanura 7navu, nenavu vare muntu vatainai rauru kaate, tura.

² Minto tuvaro avuni vau *enseliva* nai tanu varero muntu vatainai rauru kora. Rauru komanta vaiinti nahenti qaakau aantau vira qara vare vira maraquraha quahama amiteha tinavu variqave ti vauka, vika vauvaro vika vaataqaa qora numuaravano qovarama viro ite vaura.

³ Mintuvaro *enseli nampa* 2 vano muntu nai tanu nora namariqaa rauru kovaro qutuvu vaiintira naare voqaara nora namarivano naare namariqama vumanta viraqi ekaa qaqi vau haikauka qutu vura.

⁴ Mintuvaro *enseli nampa* 3 vano taatika namariqaavata ruvu namariqaavata muntu nai tanu rauru kovaro vi namarivavata naareqama vura.

⁵ Mintumanta te iriavauraro ekaa namariqaa raqiki vau *enseliva* Kotirara tiharo,

Ariqi kia qora okaravanovata vairaitiro, koqe okaravanoqai vaivo. Are qaqi variqira vi variaravave. Haaruvata are qaqi variqira vi vauravave. Are vaiinti nahenti ko tiva taiqakera, are avuqavuqama kera vi haikaraqohira vika ruqutihara nái koqaa nimi variarao.

⁶ Vika ai vaiinti nahentivata, ai uva qoqaiqamake vau vaiintikavata, arukovaro vika naarevano nteharo taiqa vurave. Vira kaara are vika nái ruqutihara naare niimiaromanta vika namakaarara, te huvigorave turo, tiro.

⁷ *Enseli* viva Kotirara minti tumanta te iriavauraro *ofaa* taintaqihairo uva vovano tiharo,

Noravaavo, are ekaa kempuka vataava vaiharama, are avuqavuqama kera quqaiqama kera ko ti variaravama variara, tiro.

⁸ Minti tuvaro *enseli nampa* 4 vano vuru nai tanu kuari avuqaa rauru kovaro Kotiva kuari vira kempukaiqama kovaro kuarivano voqamakero iteharo vataini vau vaiinti nahentika tatoqake vaura.

⁹ Kuarivano vaiinti nahenti tatoqe vaumanta vika tiha, Oho, Kotiva vaaqugama vuarire. Vivama *enseli* vika nitite vaimanta vika nái tanu rauruke variavaro qora haika, vo haika vo haikavano qovaraiqi viavo, tivakeha vika nái qora kaiqa varora qaqirake Kotira autu tuahera kaataara vaumanta kia mintura.

¹⁰ Vika mintuvaro *enseli nampa* 5 vano nai tanu muntu qaakau aantauvano avuhainaa taintaqaan oquiviro vauraqaa rauru tovaro qaakau aantauvano raqiki vau vataraqaa konkira aruqiro vi vaura. Konkira aruqiro vi vaumanta vaiinti nahenti voqamake antura ri vaha nái maaqiri nkaqe vaura.

¹¹ Mintiaqi viha vika nái antura ri vaura kaaravata, nái numuara itora kaaravata, Kotirara vaaqugama vuarire tivakeha, vika kia nái qora kaiqa vare vaura qaqira karaiti, qaqiqai vi kaiqara varaqi vi vaura.

¹² Vika mintuvaro *enseli nampa* 6 vano nai tanu taatika namari, Iufaretisi Namariqaa rauru kovaro vi namariva aaharauqama viro avuhainaa vaiintinavu kuari avu urinai-hainauka aara querama nimitora.

¹³ Mintumanta te tavaavauramanta vaana taaramonavu eqavoka voqaara *dragoni* noqihairovata, qaakau aantau noqihairovata, una paropeti vaiinti noqihairovata, qovaramavi vaura.

¹⁴ Vi vaanauka Sataanira vaananavu nora kaiqa vare vauka qovaramavi, oru ekaa naato vataini avuhainaa vaiinti vaukara tiha, Varaiqenavu ruvaaqumavi Kotira vataake iqoka raquare, tura. Te Ionika taira taveha naantiara qovaraiqiaina haikara tavaavu-nara..

Kotiva ekaa kempuka vataiva *ko* tiaina entava aumanto vaira vaana taaramo vinavuka ekaa vataini vaika avuhainaa vaiinti vika nái iqoka vaiinti vataake ruvaaqumavi Kotira vataake iqoka raqireka autivarave.

¹⁵ Karaitiva nai orurantero tuvuaina entarara mintima tiro: „Ho iriate, te muara vaiinti aanantamake evaara tuvirerave. Vaiintivano kia vaitaraitiro, avu viti viri iharo nai utavaaqaqaa koqema kero raqiki vairava, viva quaheharo varianarove. Vi vaiintiva vi entaraqaaqaa vaiinti nahenti nivuqaa kia toka niraitiro, kiama kaurira haikavata varaanarove, tura.

¹⁶ Te tavaavauramanta vaana taaramonavu oru uqitakanta, Hiparu uvaqihai *Amagedonne* tu vataraqaa, mini oru vaiha, ekaa avuhainaa vaiintinavu ruvaaqumake iqoka raqireka auti vaura.

¹⁷ Mintuvaro *enseli nampa* 7 ekaara vitihainaava nai tanu viri kanta rauru kovaro Kotira Naavuqi avuhainaa taintaqhairo uvavano noraiqaakero tiharo, Ho taiqama vivo, ¹⁸ tuvaro viraqaaahairo aauquaavano vatete uti vauvaro naaruvavanovata vatete karara karara ti vauvaro vaturavanovata nai noraiqaakero uti vaura. Maa vatara autuko entaraqaahai vaiinti nahenti variqi viha kia minti vaturava qovaraiqura favorave. Vi entara vaturavano utiharo nai anoma kero qoraiqama kero uti vaurarama turo.

¹⁹ Vaturavano utiharo nora vatuva vauva raputamavi vehiqama vura.

Mintiaqi vuvaro Kotiva kia Babironi vatukaravata tauru karaitiro, viva voqamakero arara itovaro vi vatuvarara tiharo, Arevata ti arara ite vaina *uainira* naane, tivakeri vi vatuvaravata vehi autukora.

²⁰ Mintuvaro ekaa namari avutaqi inaara vatanavu vauka *tuqaakamavi/uqaaramavi* kia vauvaro, ekaa aiqinavata *tuqaakamavi/uqaaramavi* kia vaura.

²¹ Mintuvaro naaruvaihairo *taaru/kaampura* vira maaranavo 50 kilo vauva nti vaharo vaiintiqaqaa hiqinti hiqinti i vaura. Minti vaumanta vika Kotirara qora uva tiva amite tiha, Oho, viva voqamakero tinavu ruqutiharo qoraiqama timite vaivo. Viva vaaqugama vuarire, ti vaura.

² Ekaa naato vataini variaka avuhainaa vaiintinavu, vika vi nahentira vataake hampi ni variarave. Vi nahentiva hampi nuvaqiro viharo nai *uaini* ekaa vataini varia vaiinti nahentika nimimanta vikavata vi namarira neha vueraiqama vi variarave, tiro.

³ Minti tuvaro Kotira Maraquravano kempukaiqaakero ti vataakero vauvaro *enseli* viva ti tivita varero qumina vataini vuru komanta te mini valha tavaavaauraro nahenti vovano qaakau aantau vo vira tauvaqaqaa oquviro vaura. Vi aantauva, naare aantauvano vauvaro viraqaata vaaku autu, vo autu vo autu qara ntuva tovaro vaura. Vi aantauva vaireva, qjata 7navu vauvaro vira *komu* kauqurutanta vaura.

⁴ Qaakau aantauvano mintima kero vauvaro nahenti viva naare tavunavata ihiqa (*blu*) tavunavata nonkutero vaiharo nora monu aquo orira, *korive* vo ori vo orive, *viraqohairo* nai vaata *vahehema/vaataiqama* tero vaiharo nai kauquqi *kori* oriqohai aututo *kaapura* tuatero vaura. Vi *kaapuraq* nai hampi qaramaqi ni vauraqihairo qora haika, vo haika vo haikavano mpiqa viro vaura.

⁵ Kaapu vira tuatovaro vira tiriqaat autu vo, qara ntuva tovaro vaura. Vi autura okaravano kukeqatova mintimama vairo:

Maa Babironi nora vatukave.

Ekaa hampi qaramaqi ni variakave,
ekaa qora okara auti variakave,
vika variavaro maa nahentiva
vika novama yaivo.

⁶ Vi uvava mintima vaumanta te tavaavauraro vi nahentiva airi vaiinti nahenti naare nama kerora tiro, viva vueraiqaaaviro vaura. Kotira vaiinti nahenti naareve, Ihura uva iriqi vi vaura kaara aruko vaiinti nahentika naareve, vi naarerera vi naarerera vi nahentiva nama kero vueraiqaaaviro vaura.

Vi nahentiva vaumanta te vira taveha, voqamake kauqu runkinkiri i variavauraro
enseli viva tiriara tiharo, Nantiharae vi nahentirara nena kauqu runkinkiri i variarao? Are iri vairage te vi nahentira okara kukeqa taaravata, nahenti viva vi aantaura tauvaqaqa oquiviro vaira, vira qiata 7navuvata, pomu 10navuvata vai aantaura vira okaravata, ai tiva amiare.

⁸ Are tavaana aantauva, viva haaru qaqi variqiro vi vaurave. Vate viva kia qaqi variqiro vi vairave. Naantiara viva nora *Ruvuqihairo/Mpumpiqihairo* ururero nai vehiqama vuainanaini vuanarove. Qaakau aantau viva qovarama viramanta vataini vaika hininavu vi aantaura taveha nai kauqu runkinkiri i vaivarave.

Haaru kia maa vatara autukero vato entara Kotiva vaiinti nahenti hininavuara vika tinta vaiinti nahenti vaiha ekaa enta qaqi variqi vuate tivakero, vika autu vuku voqi qara ntuva tora. Vaiinti nahentika vika nutuvano kia vi vukuraqi vaika, vikama qaakau aantau vira taveha, nái kauqu runkinkiri i vaivarave. Vi aantava haaru variqiro virurave. Maa entara viva kia qaqi variqiro vi vairave. Naantiara viva qaigaqo govarama viramanta vi vaiinti nahentika virarave nái kauqu runkinkiri i vaivarave.

⁹ Koqe avu aato vataava vivaqaima maa uvvara okarara ho irianarove. Qaakau aantau qiata 7navu okara vaireva, ainqina 7navu vaivaro nahenti viva ainqina vinavuraqaa oquiviro vairave. Qaakau aantau qiata 7navu okara vovata vaireva, avuhainaa valinti 7navu variarave.

¹⁰ Vi vaintinavuka 7navuqihai vokuka 5navu arukovaro vohaiqavano kia qutu viraitiro qaqi vaivar, vovano qovaraiqiarivara qaqlima vaivo. Naantiara viva qovarama viro inaaraqqaqai vaharo raqikiqiro vuunarove.

¹¹ Qaakau aantau viva haaru qaqi variqiro vi vaurave. Vate kia qaqi variqiro vi vairave. Naantiara vivama avuhainaa vaiinti *nampa* 8 qama vuunarove. Viva avuhainaa vaiinti 7navu vohaa ankuvanoma varianarove. Viva qaiqaa qovarama viro nai vehiqama vuainanaini vuunarove.

¹² Okeapa/Komu 10navu tavaana okarava vaireve, avuhainaa vaiinti 10navu variarave. Maa entara vi vaiintinavuka kia noraiqamavi vo vata vo vataqaa raqikiqi viraiti, qaqi variarave. Naantiara vinavuka noraiqamavi vohaa kuari avuaraqai qaakau aantau vataake raqikiqi vivarave.

¹³ Avuhainaa vaiinti 10 vinavuka variqi viha, vohaa avu aatoqaa irikeha, qaakau aantau vira kahaqireka iha nái kempuka vira amivarave.

¹⁴ Vinavuka Sipisipi Naati hampata iqoka raqivarave. Sipisipi Naati viva Noravano vaiharo ekaa nora vaiintiqaave, ekaa avuhainaa vaiintiqaave, raqiki vaivara tiro, viva vinavuka kempuka taiqa keharo naatara kaanarove. Vi entara Sipisipi Naati viva iqoka raquqi vi vairamanta viva naarama kero kaama tai vaiinti nahentika, virara kempukaiqaake iriqi vi vaika, vikavata vira kahaqama amitela vinavuka naatara kevarave, tiro.

¹⁵ *Enseli* viva tiriara minti tivakero qaiqaa tiharo, Hampi qaramaqiro ni vai nahentiva oquiviro vai namarira, taatika namari vo namari vo namari okara vaireva, ekaa naato vatanaaka, egarave konkirave, vo uva vo uva ti variakave, variarave.

¹⁶ Qaakau aantauvata *pomu* 10navuvata tavaarauka, vika vaiha hampi qaramaqiro ni vai nahentirara vogamake iri qoraiqama amitevarare. Vika vira navutaiqama amiteha vira vehiqamake vira qaqi kaivar tokama varianarove. Vika vira vehiqama amiteha vira vaata mati namake, ihaqohai vira tatoqa aqukevarave.

¹⁷ Kotiva vikara tinta hantuqavano vaina kaiqara varatare tiro, vika qaqi kairamanta vohaa avu aatoqaa irikeha vika nái kempuka qaakau aantau vira vuru amivaro viva raqikiqiro viraro Kotira uvavano vivauma varianarove.

¹⁸ Vi nahentira tavaana okarava vaireva, viva vatuka noravanoma vaivo. Vi vatukava ekaa naato vatanaaka avuhainaa vaiintiqa raqikiqi vi vai vatukavama vaivo, tiro.

18

Babironi vatukavano vehiqama vuainarara tura

¹ Te vi haikara vi haikara tave, qaiqaa tavaavauraro *enseli* vovano naaruvalhairo tuvi vauvaro vira noraiqama kero kempuka amuvaro viva vahehemato haikava vogamakero takuqiharo ekaa vata maata ataamake vaura.

² Viva noraiqaakero naveraitiharo, Vi vatukava vehiqama vivo. Babironi vatuka nora vatukavano vehiqama vivo. Vate vi vatukaraqi vaananavuqai variqi vi variamanta qora uvirivanovata vi vatukaraqi variqi vi variavo.

³ Haaru vi vatukava nai *uaini* ekaa naato vatanaaka nimumanta vika vira hampata hampi qaramaqi ni vaurave. Ekaa naato avuhainaa vaiinti vikavata vira vataake hampi qaramaqi ni vaurave. Vi vatukava hampi qaramaqiro ni vau okararaqaahai, monu kaiqa vare vauka, airi monu vare vaurave, tiro.

⁴ *Enseli* viva minti tumanta te vaiha iriavauraro naaruvalhairo uva vovano mintima tiro:

Ti vaiinti nahentitaario, vi vatukaraqihai qaqirake aniate. Ne vira vataake vaiha qora kaiqa varevorave. Ne vi vatukaraqi vaiqe hauri te vira ruqutihia nivata ruqutuarorave.

⁵ Vi vatukava qora kaiqavano uritara kero virikanta oru mpiqa vivaro Kotiva vira qora kaiqa kia tauru karaitiro, qaqiqai iritaivo.

⁶ Vi vatukava ni qoraiqama nimaintemake, nevata nai vira qoraiqama amitaate. Viva vohaa tataa ni nimirara iriha ne vira nái taara tataama amiate. Viva qora namari gerama kero ni nimirara irihama, ne vira nái qora namari vogavatama amiate.

⁷ Viva nai autu viriniqamake vairave, viva nariara quaheharo koqe haika vaheheqaina haikara vatairave, virara irihama, ne vira autu vatainiquake aihavira haika vogavata vira amiate. Viva nariara tiharo, Tema avuhainaa nahentivanovo vauvo. Kiama te tentoqa nahenti vauvo. Maaravano kia tiqaa vairage iqí ratararave, ti vairave.

⁸ Vi nahentiva minti ti vairara tiro, vohaa entaqaa qora haika, vo haika vo haikavano viraqaa qovaraiqianarove.

Aihavuina haikavave, muntuka qoraiqiaina haikavave, karara nararaiqiariravave, vi haikava vi haikava vi nahentiraqaa qovaraiqiraro ihavano vira tatoqa aqukaanarove. Viraqaa uva vataarirava vaireva, viva Noravano Kotiva kempukavano vaivo.

⁹ Ekaa naato vatanaaka avuhainaa vaiinti vi nahentira vataake hampi qaramaqi ni vaha qora kaiqa vare vaika, vika vaiha tavaivaro vi vatukava iha ite vaharo mura oru vi vaira tavehama iqí ratevarare.

¹⁰ Vika niara kanta vaha vi nahentiva vogamakero aihavira haika varaainara taveha geteha vaivarare. Vika tiha,

Oho, oho, Babironi vatuka maavao, Are nora vatuka kempuka vatukavano variararo vate vohaa kuari avuara ai vehiqama kaivara taiqa vuaro, tivarave.

¹¹ Maa vataraqaa monu kaiqa vare vaika ike mpo tivagi viha tiha, Oho, vi vatukaraqihairo kia vogavanovata tinavu airaira qaiqaavata koqaamake varevarare tivakeha virara iqí ratevarare, tivarave.

¹² Vika airairavano vaireva, *kori* orive, *silvaa* orive, koqe ori vo ori vo orive, kauvukaarive, koqe tavuna vo tavuna vo tavunave, naare tavunave, ihiqa (*blu*) tavunave, koqe untavi katarirave, *elefan* aaraiqohai autute haikarave, koqe katariqohai autute haikarave, *baraasi* orive, *aini* orive, egarorive, vi orira vi oriraqohai autute haikarave, ¹³ karaqaa aatake ne haikarave, iha quaraivaro koqe unta iaina haikarave, koqe untavi haikara vo haika vo haikave, *uainive*, *orivi* vahaverave, *uiti* auruvata hantavatave, purumakauve, sipisipive, *ohivata* iqoka *kaarivatave*, kaiqa vaiinti varareka monu

aqukeha ntite vairave, ekaa vi haikara vi haikara vi vatukava kia qaiqaavata koqaa iva varianarove.

¹⁴ Monu kaiqa vareka vi vatukarara maantima tivara: Oho, ai muntukavano vai airairara are kia qaiqaavata vi haikara varenarave. Are vaheheqi variana haikavave, are airi airairara vataara haikavavata taiqavivo. Kiama qaiqaavata qovaraiqianarove, tivarave.

¹⁵ Vi entara vi vatukaraqi vahia vo airaira vo airaira nimiha nora monu vare vai vaiintika, vika niaraini vahia vi vatukara qoraiqama kaainara taveha, voqamake qeteha iqi ratevarave. Vi entara vika qutuvi vaiintirara iqi ratentemake iqi ratevarave.

¹⁶ Vika mintima tivarave:

Ohoh, oho, nora vatukavaauvo, are koqe utavaaqa naare utavaaqave, ihiqa (*blu*) utavaaqave, nonkutaararo are vaheheqi variana haikava *kori orive*, vo orive, kauvukaarive, takuqi vaivara variararo ¹⁷ ai vohaa kuari avuara ruqutiharoma ekaa vi haikara vi haikara raumpirima kaivo, tivarave.

Sipiqa raqiki vaikavata, ekaa *sipi* ni vaikavata, ekaa *sipi* kaiqa vare vaikavata, vika niara kanta vahia ¹⁸ tavaivaro vi vatukava iha iteharo mura oru vi vaira mura vira tavehama tiha, Maa vatukava nai nora vatukavano vaivaro kia vo vatukavano vira aatara kaarirava vaivaro vehiqama vivo, tivarave.

¹⁹ Minti tivake vika nái qiatqaan hanta aqute iqi rateha tiha,

Tenavu vi vatukarara mpo ike, tiva amitauro. Vi vatukava airi airaira varaqiro vi vuamanta vo *sipi* vo *sipi* qokavara vira airaira vara vuru keha nora monu viraqihai vare vaurave.

Vi vatukava nora vatuka vaivaro vate vohaa kuari avuara vira ruqutu taiqa kaivaro vehiqama vivo, tivarave, tiro.

²⁰ Naaruvaihairo uvavano tiriara vi uvara vi uvara naantiara qovaraiqianara tiva timi taiqakero vo uvavata mintima tiro: „

Vi vatukava vehiqama viro taiqa virara ne naaruvaini vaika quaheha variate.

Kotira vaiinti nahentivata, Ihuva noraiqamakai vaiintikavata, Kotira paropeti vaiintitava, ne ekaa quaheha variate.

Vi vatukava ni qoraiqama nimite vaira kaara Kotiva nai vira koqaa amivo, tiro.

²¹ Uvavano naaruvaihairo minti tumanta *enseli* noravano nai ori nora utu varero nora namariq vara vaavi aqukero tiharo,

Maantima kero Kotiva Babironi vatuka kempukaiqama kero aqu kairamanta vira kia qaiqaavata tavevarave.

²² Babironi vatukavaauvo, ihi tiha *kitaa ruquti* vairavata, *aanumaara/noma* vuage vairavata, ariqihai kia vi uvara qaiqaavata irivarave.

Kaiqa vaiinti vo kaiqa vo kaiqa okara tave vaika kiama qaiqaavata ariqi kaiqa varevarave.

Nora orihaavano *uiti* auru rakaviharo uva ti vainara, vi uvaravata kia ariqihai qaiqa irivarave.

²³ Ova qumpike vataivaro itaainara kia ariqihai qaiqa tavevarave.

Naata vaati nai vare nai vare i vai uvara, kia ariqihai qaiqaavata irivarave.

Ariqihai monu kaiqa vare vau vaiintikara, vataini variaka vikara nora vaiintima variavo ti vaurave.

Are hepi kaiqave, qantoka kaiqave, quaha kaiqave vareharama ekaa vataini variaka unaqarama kehara qora aaraqaa ntita vare vi varianarave.

²⁴ Kotiva tavaivaro nai vaiinti nahentive, nai paropetinavuve, ekaa naato vataini variakave, vika arukaa naareva ariqi vairara tiro, Kotiva ai Babironi vatuka vehiqama kaivo, tiro.

Babironi vatukavano taiqa vuainarara naaruvaini noraiqamake quahevara

19

¹ *Enseli* noravano minti tumanta te iriavauramanta naaruvaini vau vaiinti nahentika airitahaa naveraitiha,

Kaiqenavu tinavu Variqa autu tuahera kaare.

Viva tinavu kuvantukero tivitaiva vaivaro vira mpeqa okaravano takuqi vaivaro vira kempukavanovata uritara kero vairave.

² Viva ko tiharo avuqavuqama kero, quqaiqama kero ko ti vaivave.

Babironi vatuka nora vatukavano hampi qaramaqiro ni vai nahentira voqaara vaau kaiqa vare vuamanta ekaa naato vatanaaka vira hampata hampi nuvaqi vi vahia qoraiqama vi vaura kaara Kotiva vi vatukaraqaa uva vateharo vira ruqutu kaivo.

Vi vatukava Kotira kaiqa vaiinti airitahaa arukora kaara Kotiva vi vatukara nai koqaa amiharo vira ruqutu kairave, ti.

³ Vika minti tivake qaiqaa naveraitiha,
Kaiqe tenavu Kotira autu tuahera kaare.

Vi vatukaraqi iha ite vairaro vira muravano kia taiqa viraitiro, ekaa entama virini oru vuuanrove, tura.

⁴ Vika vi uvara minti tumanta nora vaiinti 24navuvata, qaqi variqi vi vauka 4navuvata, vika vatakanta higirivi vauvaro Kotiva nai avuhainaa taintaqa oquiviro vaumanta vika vira quahama amiteha tiha,

Ququaave. Kaiqe tenavuvata Kotira autu tuahera kaare, ti.

⁵ Vika minti tuvaro Kotira avuhainaa taintaqihairo uva vovano mintima tiro:

Ne Kotira kaiqa vara amite varia vaiinti nahentikave, ne Kotira aatu qete varia vaiinti nahentika nora vaiintive inaara vaiintive, ne ekaa Kotira autu tuahera kaate, tiro.

Sipisipi Naativano nahenti varairamanta nora kara nerara tura

⁶ Uvavano minti tumanta te vailha iri variavauraro airi vaiinti nahenti uki vailha uva tuntemakeve, nora namarivano aintaakaqaahairo aquvi aquviharo uva tuntema kerove, naaruvavano karara karara tuntema kerove, uva vovano tiharo,

Kaiqe tenavu Kotira autu tuahera kaare.

Tinavu Variqa noravano ekaa kempuka vataava, viva ekaa haikaqaa raqiki vairave.

⁷ Kaiqe tenavu vira autu noraiqama keha quaheha variqi vuare.

Sipisipi Naativano nahenti varaarira entava aniraivarо vira varaarira nahentiva gerama tero vaivo.

⁸ Vi nahentira koqe utavaaqa, hanta utavaaqa takuqi vaira, nonkutero variarire tiro, vira amirave, tiro.

Vi nahentiva vaireva, ekaa Kotira vaiinti nahentima variarave. Koqe utavaaqa, hanta utavaaqa okara vaireva, Kotira vaiinti nahenti koqe kaiqa vare variavama vairo.

⁹ Vi uvava minti tuvaro *enseli* viva tiriara tiharo, Maa uvara qara ntuva taane: Sipisipi Naativano nahenti varaaaina ovataraqaa naarama taarirauka, vi vaiinti nahentika quahehama vaivarave, tivakero viva vo uvavata tiharo, Vi uvara Kotira uva, quqaa uvama vaivo, tiro.

¹⁰ *Enseli* viva minti tumanta te vira aiquidara higirivi vailha, vira quahama amiteha vira autu tuahera kaare tiavauraro viva aqao tiro, Kia mintiane. Te ai kena kaiqa vaiinti vailha, te aiyata ai qata vakaukavata aanaante Ihura uva tiva nimiqi vi vauraukama vauro. Are Kotiraraqai ti Variqave tivakehara vira quahama amitaane.

Haaru Kotira Maraquravano paropeti vaiintinavu kahaqama nimite vaumanta vika Kotira uva tiva qoqaiqamake vaurave. Vira voqaantema kero, Kotira Maraquravano tinavuvata kahaqama timite vaimanta tenavu Ihura uva tiva nimiqi vi vaunarave, tiro.

Hanta ohi tauvaqaqaa oquvi variainarara tura

¹¹ *Enseli* viva minti tumanta te vailha tavaavauraro naaruvavano qantuara viro vauvaro hanta *ohivano* qovarama viro vaura. Vira tauvaqaqaa vaiinti vovano vauvaro virara Kotirara Kempukaiqama Kero Iri Vai Vaiintirave, Quqaa Vaiintive, ti vaura. Vi vaiintiva avuqavuqama keharo *ko* tivakehara iqoka raquqiro vuarirava vaura.

¹² Vi vaiintiva vauvaro vira avuvano iha voqaara ite vauvaro vira qiatataqaa avuhainaaara tovaqa, airitahaa vaura. Vi vaiintiraqaa autu vo qara ntuva tova vauvaro naiqai vi autura okara kankoma kero irura.

¹³ Vi vaiintiva naareqi quntamato tavunara nonkutova vauvaro vira autuvano vaireva, Kotira Uvave, tura.

¹⁴ Viva vi vaumanta naaruvaihai iqoka raqi vauka ekaa vikavata vira avataqi viha nai hanta *ohi* tauvaqaqaa oquvi vailha koqe utavaaqa, hanta utavaaqa, takuqi vau utavaaqara nonkutoka vaura.

¹⁵ Vi vaiintira noqihairo iqoka paipe vahova vihiviro vauvaro vi paiperaqohairo ekaa naato watanaka ntaihama kero naatara kaarirava vaura. Vi vaiintiva *aini* kauruqohairo vikaqaa raqiqiqiro vuano. Viva vikaqaa raqiqiqiro viharo *uaini* tava tanu noraqi rahitikero tatinantema kero, Kotiva ekaa kempuka vataiva arara itaaina vaiinti nahentika ruqutuqiro vuariravama vaura.

¹⁶ Vukai tavuna nai ayuntaraini nonkutoraqaa uva vo qara ntuva tova mintima tiro:

Ekaa avuhainaa vaiinti vika Avuhainaaarave.

Ekaa nora vaiinti vika Nora Vaiintive, tiro.

¹⁷ Ho te tavaavauraro *enseli* vovano kuari avuqaa himpitero vaharo noraiqakero uva tiharo ekaa ata vare vi ani vau uvirika naarero tiharo, Kotiva nora ovata naainanaini ne ani ruvaaqumavi vailha mati naate.

¹⁸ Avuhainaakave, iqoka vaiintiqaa raqiki variakave, nora vaiinti vonavuve, *ohivata* vika tauvaqaqaa oquivi variakave, ekaa naato vatanaakave, rumpataa vaiintikave, qaqi varia vaiinti nahentikave, autu vataa vaiinti nahentive, qumina vaiinti nahentive, ne ekaa vika vika vaataye mative ani naate, tiro.

¹⁹ *Enseli* viva minti tumanta te tavaavauramanta qaakau aantau vivavata, avuhainaavaiintinavu vataini variakavata, vika iqoka vaiintivata, vika avitumavi vohaarraqi ruvaaqumavi vaha, *ohi* tauvaqaqaa oquivi vau vaiintiravata, vira iqoka vaiintinavutamake raqireka auti vaura.

²⁰ Iqoka raquqi vi vauvaro *ohi* tauvaqaqaa oquivi vau vaiintivita vika naatarakero, qaakau aantau viravata, una paropeti vaiinti viravata rumpatora. Una paropeti vaiinti viva tota qaakau aantau vira kahaqiharo aahuva kaiqa, nora kaiqa vare vaura. Vaiinti nahenti qaakau aantau qara varoka vira maraquraahaara ti variqave tivakeha, vika una paropeti vaiinti vira kaiqa taveha virara quqaama viva Kotira uva ti vaivave tura. Una paropeti vaiintivata qaakau aantauvata kia vitanta arukaraitiro, *salfa** orivano nora iha ite vauraqiqi qaqi vitanta aqukora.

²¹ Vitanta nora iha itoraqiqi aqukero *ohi* tauvaqaqaa oquiviro vau vaiintivita iqoka raquqiro viharo nai noqihairo vihivu paiperaqohairo, vitanta iqoka vaiinti ekaa aru taiqa komanta ekaa uviri ani vika vaata mati ne vauvaro anomakero auha mpiqora.

20

Sataanira 1,000 ihiara rumpa taainarara tura

¹ Mintumanta te vaiha tavaavauraro *enseli* vovano naaruvalihairo nora *Ruvu/Mpumpi* qenti quantuaraaina *kira* nai kauquqi tuata varero *seni* maara ntoravata tuata varerotuvuntero ² *dragoni* vira ravaaqavu kora.

Vi *dragoniva* haaru vau memaruvu vaura. Viva Sataaniva Kotira navutaava vauvaro vira ravaaqavuke rumpa taariraro 1,000 ihiara karapuhiqi variarire tivakero *seniqohairo* vira rumpa tora.

³ Vira rumpa kero nora *Ruvuqi/Mpumpiqi* vara vaavi aqukero, kia qaiqaavata vevarero naato vatanaaka una uva tiva nimiarire tiro, vi qentira tintatero *roki* arutero *roki* viraqaa iva taatautora.

Naantiara Sataanira rumpa tairaro viva 1,000 ihiara karapuhiqi variqiro viro vuru taiqa kaaina entaraqaahairo Sataanirara viva vo entanavuara qaqini vevarero nuarire tiro, vira kuvantu kaanaro.

⁴ Te tavaavauraro avuhainaa taintanavu, vo tainta vo taintavano vaumanta viraqaata noraiqamavu vaiintinavuka oquivi vaura. Vi vaiintinavuka *ko* tiate tiro, noraiqama koka vaumanta te vika taveha vaiinti nahenti maraqura airitahaavata tavaavaunara. Vi vaiinti nahentika vataini vau entara Ihura uva tiva nimi vaura kaara vika aunta teqa aqukora.

Vi vaiinti nahentika qaakau aantauvata vira maraquraahaavata kia quahama nimitaraiti, nai tiriqaavata nai kauquqaavata kia vira qara varora. Vi vaiinti nahentika qaiqaa qaqi himpi vaha Karaitira vataake maa vataraqaa 1,000 ihiara variqiqi viha raqikiqi vi vaura.

⁵ (Vi vaiinti nahentika naane qaiqaa qaqi himpi variqiqi vikama vaivara. Hini vaiinti nahenti qutu vika kia vika hampata qaqi himpiraiti, vauvaro 1,000 ihi aitaraira vira naantiara vikavata qaiqaa qaqi himpivar.)

⁶ Kotiva vika avuniqama kero qaiqaa qaqi vara himpima kaika, vika quaheha vauvaro Kotiva vika koqemama nimitaanaro. Vika ho vauvaro qutira haikavano kia ho qaiqaa vika ravaaqavu kaanarove. Vika Karaitira vataake 1,000 ihiara raqikiqi viha Kotiravata Karaitiravata vitanta kaiqa vira nimitaqiqi vivara.

Sataanira ekaara aatara kaainarara tura

⁷ Naantiara Sataaniva 1,000 ihiara rumpateva variqiro viro vuru taiqa kairamanta vira kuvantu kaivarо⁸ viva qaiqaa vevarero vaharo oru naato vatanaaka una uva tiva nimi vaira vika vira una uvvara quqaavema tivara. Vi entara vataini vaika hininavu Goku vatanaaka vaimanta hininavu Magoku vatanaaka vaivara. Vika Sataanira uvvara ququa uvave tivaro Sataaniva iqoka raqireva iharo vi vatanaaka ruvaaquma kaira vika nora namari auvhahini vai nuqara voqaara airi vaiintima vaivara.

⁹ Te tavaavauramanta vi vatanaaka Kotira vaiinti nahenti hampata iqoka raqireka auti vaha ekaa vataini kapa variqiqi viha oru Kotira vaiinti nahenti vaunaini ututumate, Kotira muntuka vau vatukaravata ututumate vaura. Vika mintimate vauvaro naaruvalihairo ihavano tuvuntero vika ekaa tatoqa aqukora.

* **19:20:** *Salfa* orivano ite vauvaro voqamakero aiqintuna hunkavi vaira.

¹⁰ Vika tatoqa kovaro Sataaniva vika unaqaraiqama kova vauvaro viravata raraukero *salfa* orivano nora iha ite vauraqi vara vaavi aqukora. Tota qaakau aantauvata una paropetivata aqukoraqi viraqi Sataaniravata aqukora. Naantiara vinavuka vi ihava ite vainaraqi variqi viha aatitairaqaavata entaqivata ekaa enta antura ruvaqi vivara.

Ekaara entaqaa ko tiainarara tura

¹¹ Te tairakaa tavaavauraro avuhainaa tainta, hanta tainta nora vo vauvaro viraqaata vovano oquiviro vaura. Viva vi taintaraqaa oquiviro vauvaro naaruvavanovata vatavanovata vira avuqaa kia ho vairarave, tivake ruqemake vinuvaro kia vovanovata vitanta qaiqaa tavora.

¹² Mintumanta te tavaavauramanta vaiinti nahenti qutuvuka nora autu vataukave, inaara autu vataukave, vi taintara avuqaa himpite vauvaro taintaqaa oquiviro vauva vo vuku vo vuku rairatero vaiharo vuku vo, viraqima ekaa enta qaqi variqi vi vaiinti nahentika autu vau vukura, rairatero *ko* tivaqiro vi vaura.

Qutu vuka vataini qaqi vau entara vo kaiqa vo kaiqa vare vau uvvara vi vukuraqi vi vukuraqi qara ntuva tova vauvaro taintaqaa oquiviro vauva vukuqi qara ntuvato uvarara iriharо *ko* tivaqiro vi vaura.

¹³ Viva *ko* tivaqiro vi vaumanta nora namariqi raqutuvu vaiinti nahentika namariqihai qovaramavi oru vi taintara avuqaa vaumanta, qutu vuaka vaunaihaiavata vaiinti nahenti qovaramavi oru vi taintara avuqaa vauvaro taintaqaa oquiviro vauva vika nái qaqi vau entara vare vau kaiqarara iriharо *ko* tivaqiro vi vaura.

¹⁴ Viva *ko* tivaqiro viro vuru taiqa kero viraqaahairo qutira okaravata, qutira vatukavata, nora iha itoraqi vitanta vara vaavi aqukora. (Nora iha ite vai vatukava vaireva, kia qaiqaavata qaqi himpi vairaiti, ekaara qutuvi vai vatukavama vairo.)

¹⁵ Avuhainaa taintaqaa oquiviro vauva vaiharo ekaa enta qaqi variqi vi vaiinti nahentika nutu qara ntuvato vukuraqi tavovaro tau vaiinti nahentikae vika nutuvano kia vi vukuraqi vauvaro viva vika nora iha itoraqi vara vaavi aqukora.

Qaraaka naaruvavata qaraaka vatavata qovarama vuainarara tura

21

¹ Mintumanta te tairakaa tavaavauraro qaraaka naaruvavanovata qaraaka vatavanovata vaura. Haarua naaruvavata haarua vatavata tuqaakama vuvaro nora namarivanovata tuqaakama vuvaro kia vaura.

² Mintumanta te tavaavauraro Kotiva vainaihairo naaruvaihairo koqe vatuka, kia viraqi qora haikavanovata vau vatukava, qaraaka Ieruharemi vatukavano tuvi vaura. Nahentivanoo qorainti varareva iharо nai vaata ruqitero qerama taintema kero, vi vatukava tuvi vaumanta ³te iriavauraro avuhainaa taintaqihairo uvavano mintima tiro: Maa entaraqaahairo Kotiva vaiinti nahenti hampata variqiro vuanarove. Viva vika hampata variqiro vi vaira vika vira vaiinti nahenti vairavarave. Kotiva naivano vika hampata variqiro vi vaira vika virara tinavu Variqavema tivarave.

⁴ Viva vika avuqihairo auquru nunka nimitaira vairavarave. Haarua okaravano taiqa virara ti, vika kia qaiqaavata qutiraiti, kia iqи rataraiti, kia muntuka qoraiqira vairaiti, kia aihavira haika vararaiti, koqemake variqi vairavarave, tiro.

⁵ Uvavano minti tuvaro avuhainaa taintaqaa oquiviro vauva tiharo, Te vate ekaa haika qaraakaiqama karerave, tivakero tiriara tiharo, Maa uvava quqaa uva vaivaro vovano homa virara kempukaiqama kero iriqiro vuainarara tira, are vi uvvara qara ntuva taane, tiro.

⁶ Minta tivakero viva qaiqaa tiharo, Ho te vi kaiqara taiqama kauro. Tema hoqare avuni variavauraukama vauro. Tema naantiara ekanainivata variariraukama vauro. Vaiinti vovano namari naataa irera, te ruvu namari qaqi variqiro vi vaina namarira vira amihama kia koqaavata naariraiti, qaqi amiariraro nero viva qaqi variqiro vuanarove.

⁷ Vaiintivano qora kaiqa vataakero iqoka raquqiro viharo ho aatara kairava, vivama te iaina haikara ho varaanarove. Te vira Variqavano variariraro viva ti maaque ti raavurae varianarove.

⁸ Vo vaiinti nahenti ti aatu geteha ti aara qaqla kekave, kia tiriara quqaave ti vaikave, vaaku kaiqa vare vaikave, vo vaiinti arukekave, hampi qaramaqi ni vaikave, uhi kaiqave hepi kaiqave vare vaikave, qumina una haikara ti variqave tivakeha quahama nimite vaikave, ekaa una uva ti vaikave, ekaa vi kaiqara vi kaiqara vare vaika *salfa* orivano nora iha ite vainaraqi vairavarave. Vika mini otu vaiha, Oho, ekaarama qutu vuro tivarave, tiro.

Qaraaka Ieruharemi vatukara tura

⁹ Mintuvaro *enseli* 7navu vaiinti nahenti ekaara qoraiqama nimitare u haikara tanu 7navu mpiqake tuatokaqihairo vovano te unanaini anirero tiriara tiharo, Aniqe te Sipisipi Naativano varaaaina nahentira ai umiqhaarirara tavaane, tiro.

¹⁰ Minti tuvaro Kotira Maraquravano ti vataakero vaumanta te variavauraro *enseli* viva ti tivita varero nora ainqina vo nai veraini vauraqaa vuru kero, ti humiqomanta te tavaavauraro Kotira vatumaka lerusarem i vatuvaro Kotiva vainaihairo naaruvaihairo tuvi vaura.

¹¹ Vi vatumaka tuvi vauvaro Kotira mpeqa okaravano vi vatukaraqihairo takuvi vauvaro tuvi vaura. Vi vatukaraqaa ataa i vaiva vaireva, nora monu aquko orira *iasipaa* orive tura voqaara takuqihairo *karaasi* hini mantaraihairo hinivata ho taveri voqaara vaura.

¹² Vi vatukara hohaaavano vaireva, uritara kero vukai vauvaro, viraqi qenti 12navuvata vaura. *Enseli* 12navu ekaa vi qentiraqaa raqiki vauvaro vi qentiraqaa Isareru anku 12navu autu qara ntuva tora.

¹³ Hohaa ariqaini taaramo qenti vauvaro kaavaini taaramo qenti vauvaro hini hini vehaini taaramo qenti vaura. ¹⁴ Nora ori 12navu varake ataini vuqike vi hohaa aututora. Vi orinavuraqaa Sipisipi Naativano noraiqamako vaiintinavuka 12navu nutu qara ntuva tova vaura.

¹⁵ Mintuvaro ti uva tiva timu *enseliva* avatamake tave kairiqara *kori* origohai aututora nai kauquqi tuatero vi vatukaravata, vi qentiravata, vi hohaaaravata, avatama kero tavareva auti vaura.

¹⁶ Vi vatukara kaataranavu vaireva, vohaa vaura. Mintima vauvaro *enseli* viva vi vatukara avatama kero tavovaro hini mantaraini 2,200 *kilomita* vauvaro hini mantaraini-vohaa qaramake vaura. Vi vatukara virini miani avatama kero tavovaro vivavata vohaa qarama kero 2,200 *kilomita* vaura.

¹⁷ Mintuvaro *enseli* viva hohaa vira vaata avatama kero tavovaro 144 *mita* vaura. Vaiintivano avatama kero tavaintema kero, *enseli* vivavata vi vatukara avatama kero tavora.

¹⁸ Hohaa vira *iasipaa* origohairo autukero vatero, vatuka vira *kori* origohairo autukero vatova *karaasi* voqaara takuqihairo vaura.

¹⁹ Mintuvaro hohaa ataini vuqito orira, nora monu aquko orira, vo *kalaa* vo *kalaa* vai orira vahehema tovaro vaura.

Avuni vuqito oriva, *iasipaa* ori vauvaro vira naantiara vuqitova *sapaia* ori vauvaro hini orinavu vuqitova vaireva:

eqarori voqaara *ageti* orive,
katari mare ori *emeraali* orive,
²⁰ naarevata hantavata vau orira *sadonikisi* orive,
naare ori *koniliani* orive,
yelo ori *karisolaiti* orive,
vuhanaa ori *berili* orive,
yelo ori *topaasti* orive,
blu grin ori *karisoparesi* orive,
orens ori *haiasini* orive,
naare ori *ametisi* orive vaura.

²¹ Ori 12navu mintima vauvaro qenti 12navu kinaa vuhaariqohai aututova vaura. Kia inaara kinaa airinavu vara kero autiraitro, nora kinaa vaira vohaiqa vohaiqa varakero viraqohairo ekaa qenti 12navu autukora. Vi vatukaraqii vau aarava vaireva, *kori* ori varake ntavato aarava vauvaro viraqi *karaasi* voqaara levantovata taveva ho vaura.

²² Mintumanta te tavaavauraro vi vatukaraqii Kotira Naavuvanovata kia vaura.

Noravano Kotiva ekaa kempuka vataiva vivavata, Sipisipi Naativanovata, vitanta naitanta vi naavura vaura.

²³ Kotira mpeqa okaravano vi vatukaraqii takuqihairo ataa i vauvaro Sipisipi Naativanovata ova voqaara ite vauvarora tiro, qumina kuarivanovata toravanovata itevorave, tura.

²⁴ Naantiara vi vatukaraqii ataa i vaira ekaa naato vatanaaka viraqi nivarave. Vika viraqi ni vaimanta avuhainaa vaiintinavu vatainai vaika nai koqe airairava vareha vi vatukaraqii vuru kevarave.

²⁵ Mini enta iarirava kia variainarara tiro, vi vatukara hohaaqii qentinavu kia tintaraiti, qaqi qantua taivarо varianaro.

²⁶ Ekaa naato vatanaaka nai koqe haika vaterave, nai koqe airairave, vareha vuru vi vatukaraqii vatevarave.

²⁷ Qora haika vo haika vo haikavano kiama ho vi vatukaraqi oriqetaanaro. Kaurira kaiqa vare vaikave, una uva ti vaikave, vika vika kiama vi vatukaraqi ho oriqeteverave. Sipisipi Naati vukuqi ekaa enta qaqi variqi vi vai vaiinti nahentika nutu qara ntua teka, vikaqaima vi vatukaraqi ho oriqeteverave.

22

Qaqi variqi vi namariraravata qaqi variqi vi katariraravata tura

¹ *Enseli* viva vi vatukara ti humiqero, namari vovata ti humiqomanta tavaavaunara. Vi namariva, qaqi variqi vi vai namariva koqema kero takuqiharo Kotiravata Sipisipi Naativata avuhainaa taintavano vairamanta, Kotira kaiqa vaiinti nahenti vika Kotirara tinavu Variqave tivakeha vira quahama amitevara.

Vi katariva vohaa ihiara vo tora vo tora 12 tataa tava iraqiro vi vaura. Vira marevano ekaa naato vatanaaka koqema nimite vaira vika koqemake qaqi variqi vivara.

³ Kotiva vokikara vaaquqama vivarave ti vaika kiama vi vatukaraqi vaivara.

Vi vatukaraqi Kotiravata Sipisipi Naativata vitanta avuhainaa taintavano vairamanta, Kotira kaiqa vaiinti nahenti vika Kotirara tinavu Variqave tivakeha vira quahama amitevara.

⁴ Vika vira viri tave vaivaro Kotira autu vika tiriqaa qara ntua teva varianaro.

⁵ Enta irava kiama mini varianaro. Noravano Kotiva, naima vika ataama nimitaqiro vuainarara tiro, kuarivanove ovavanove qumina itevorave. Kotiva vika ataama nimitaqiro vi vaira vika avuhainaa vaiinti nahenti vaiha ekaa enta raqikiqi vivara.

Ihuva orurantero tuvuainarara tura

⁶ *Enseli* viva qaiqaa tirira tiharo, Maa uvava quqaa uva vaivaro vovano homa virara kempukaiqama kero iriqiro vuanarove. Noravano Kotiva nai Maraqura paropeti vaiinti nimuvaro viva vika kahaqi vaumanta vika Kotira uva qoqaiqamake vaurave. Vira voqaaantemba kero, Kotira inaaraqiq varikero qovaraiqia inara nai kaiqa vaiinti nahentiara ho iriate tiro, *enseli* vo atitorave, tura.

⁷ Ihuva mintima tiro: Te vaaka orurante tuvirerave, tura. Maa vukuraqi naantiara qovaraiqia ina uvara qara ntua taunara iriqi vi vaika vaivaro Kotiva vika koqema nimitaanarove, tura.

⁸ Te Ionika tairakaa vi haikara iri, vi haikara tavaavaunarave. Viraqaahai ti humiqo *enselira* vira aqutaraini hiqirivi vaiha, vira autu tuahera karera auti vauraro ⁹ viva aqao tiro, Kia ti hutu tuaheraane. Te ai aanante Kotira kaiqa vaiintiqaima vauro. Ai qata vakukave, paropeti vaiintinavuve, maa vukuraqi qara ntua tena uvara iri vaiinti nahentikave, te vika aanante Kotira kaiqa vaiintiqaima vauro. Are Kotirara ti Variqave tivakehara viraqaima quahama amitaane, tiro.

¹⁰ Minti tivakero viva qaiqaa tiharo, Maa uvara naantiara qovaraiqia inara qoqaiqama kaurara are qara ntua taanara kia kukeqa taane. Ekaa vi uvara vi uvara tiva terava qovaraiqia ina entava aumantoma vaivo.

¹¹ Qora kaiqa varaa ina vaiintira vira qaqi kairaro qora kaiqa voqavata varaqiro vuarire. Hampi nuaina vaiintira qaqi kairaro hampi nuaina kaiqara voqavata varaqiro vuarire.

Koqe kaiqa varaa ina vaiintira qaqi kairaro koqe kaiqa voqavata varaqiro vuarire. Kotira kaiqaqai varaa ina vaiintira qaqi kairaro Kotira kaiqaqai varaqiro vuarire, tura.

¹² Ihuva mintima tiro: Iriate, te vaaka orurante tuvirerave. Vi entara te vaiinti nahenti nimiaina haikara vare, vika nai vare kaiqarara iriha vira qia vika nai koqaa vohaiqa vohaiqa nimirerave.

¹³ Tema hogare avuni variavauraukama vauro. Tema naantiara ekaanaini variari raukama vauru. *Teqaima okarainivata amutuni/turunivata vauraukama vauro.*

¹⁴ Vaiinti nahenti nai utavaaqa koqemake hiqama teka, vika quaheha vaivare. Ekaa enta qaqi variqi vi katari tavara vi vaiinti nahentika homa hiqike vareva varianarove. Vi vaiinti nahentika Kotira vatukaqi vi vai gentiana oriqeteva homa varianarove.

¹⁵ Vokika aaqaini vaika, vi vatukaraqi viva kia ho varianarove. Uhi kaiqavata hepi kaiqavata vare vaikave, hampi qaramaqi ni vaikave, vaiinti aruke vaikave, una haikara ti variqave tivakeha quahama nimite vaikave, una uvavata una kaiqavata vare vaikave, vi kaiqara vi kaiqara vare vaika kiama ho Kotira vatukaqi vivarave.

¹⁶ Te Ihuka Kotira vaiinti nahenti voqi voqi variaka vi uvara iriate ti, te *enseli* vo atitauraro viva ai tiva amivara irianarave. Tema Devitira anku vohaa ankuvano vauro. Aatitare ivaro noraiqama kero ite vai Uhaira te vikave, tura.

¹⁷ Kotira Maraquravanovata Sipisipi Naati vira vaiririqama amitaavavata virara tuvuane, ti variara. Ne maa uvara iri vaikavata Ihurara tuvuane tiata. Tavave namari

naataa ivara vairave? Ani ekaa enta qaqi variqi vi namarira kia koqaavata autiraitira, qaqi naane.

Ekaara uva tura

¹⁸ Te Ionika naantiara qovaraiqaina uvara qara ruva taunara, ne vi uvara iri variakara te kempukaiqamake niara mintima ti: Vaiinti vovano te tiva tauna uvaraqaa vo uva tomaqa kaantorave. Viva mintirera, maa vukuraqi qora haikavano qovaraiqaina haikarara tunara, Kotiva ekaa vi haikara vi haikara vi vaiintiraqaama vataanarove.

¹⁹ Naantiara qovaraiqaina uvara qara ruva taunaraqaahairo vaiinti vovano vi uvara hini qaqini vara kaantorave. Viva mintirera, Kotiva kiama vi vaiintirara ekaa enta qaqi variqi vi katari tavara naane tianarove. Viva kiama ti koqe vatukaqvata vuanarove, tianarove.

Te vi katariraravata, vi vatukararavata, maa vukuraqi tivake qara ruva taunararave.

²⁰ Vi uvara vi uvara tiva qoqaiqama kai vaiintiva, Ihuva, nai' kauqu ainqiqaa aqukero tiharo, Te quqaama turo. Te vaaka orurante tuvirerave, tiro.

Ihuva minti tivera te tiha, Eo, quqaave. Noravauvu, Ihuo, tuvuane, turo.

²¹ Ne vaivaro tinavu Noravano Ihuva ni aaqurihamu nimiteharo koqema nimitaqiro vuarire. Quqaave.

Vo uva vira okara

Fiki *Fiki* katari vira tava vaiinti naarama. Vira tava qakaaka tava voqaara vaivaro noqi naivarao kaqa voqaara hiakaama i vaira. *Fiki* tava hiqike hini vaaka ne, hini aurumake naantiaa ne variara.

Iutaa Haaru Isareriva vira vo autu Iekopiva qorainti vainti 12navu vatatoraqihairo vovano Iutaava vaura. Iutaara ankuvano Iutaa vataini variqi vumanta vikara Iutaa vaiinti nahentive ti vaura. Romeni vatanaaka Iutaa vataqaa raqiki vau entara vika Iutaa vatarara Iutiave ti vaura.

Maa entara Eparahaamira anku ekaa vikara Iutaa vaiinti nahentive, Isarerivaiinti nahentive, ti variara.

Iutaa maara naavu (synagogue) Ihuva vataini vau entara Iutia vataini vo vatuka vo vatukaqii Iutaa maara naavu vo vaura. Vika 7 entaqaa ruvaaqumavi Kotira uva kaara nti, vira uva okara vaiinti nahenti tiva nimi, Kotira aareha vira autu tuaherake vaura. Vi entara vi naavuva kia Iutia vatainiqai vaura. Iutaa vaiinti nahenti katu vare vi anunaini vi naavuva voqi voqi vaura. Mintima vauvaro Poruva airi enta vi naavuraqii vi aniharo Iutaa vika naane Karaitira uva tiva nimi vaura. (Kaiqa Varora 14:1)

Maa entaravata Iutaa maara naavu vo vataini vo vataini vairo.

Kaupititira (Matiu 13:33, 16:12; 1 Korinti 5:6-8; Karesia 5:9) Kaupititira viraqohai mpereti autuarama. Qamaa kaupititira voqaara *porihi/voruhi* vataakero tuqantaakero vataivaro *porihi/voruhi* ntereharo noqa viro. Noqa vivaro vira varakero unta kaivaroitaviro koqemaviro vairo.

Kaupititira inaaraiqaqai vatairaro homa *porihi/voruhi* airitaha noqa vuanaro.

Virara iriharo Ihuva uva tuqantaakero tiharo, Parisi vaiintinavuvata Satiusi vaiintinavuvata vika kaupititira voqaara variavo. Nenavu vikara rauriha variate, tura. (Matiu 16:5-12)

Kotira Naavu (Temple) Kotira Naavuvano Ieruharemini vaura. Vi naavuva vaunaini Iutaa vika vo ovata vo ovata neha vo *ofaa* vo *ofaa* Kotira iha quara amite vaura.

Iutaa vatanaakaqaima vi naavuva vaunaini ho oru vauva vaumanta vika vo vatanaaka qioqama tomanta vika vi naavura niaraihai ani ruvaaqumavi vaura.

Ihuva vataini vau entara Herotiva kaqato naavuva Kotira Naavuvano vaura.

Naavu vira avutraqi Kotira turuarave tunaini vauvaro Kotira kaiqa vara amito vaiintiva qiaa vaa vivaqaima vo ihi vo ihi vohaa tataaqaima viraqioriqetora.

Vi naavuraqii tavuna nora hiritova vauvaro kaankuka voqaara vi *rumura rairakero* vaura. Ihuva qutu vuvaro vi tavunava virihairo nai qunahiqi tuviro muani ekaa muntuvi taiqa kora. (Matiu 27:51; Maaki 15:38; Ruki 23:45)

Vira qunahi vuva tinavu humiqero tiharo, Vaiinti nahenti Ihurara quqaave tika Kotira aqamoto vi aarara Kotiva quantua keroma vataivo, tiro.

Maara enta Kotiva kauquru hini kauquni vohaiqa enta kaiqa varaqiro viharo ekaa haika autu vuru taiqa kero. Vuru taiqa kerora tiro, vira qararaa 7 entaqaa kia kaiqa vararaitiro, nora auraara vaurave, tura. (Okara 2:2)

Qaiqaa Kotira vukuqi tiharo,

Vo uiki vo uiki *nampa* 7 entara Kotira entave tiate. Ne kauquru hini kauquni vohaiqa entaqaa vahia nenta kaiqa varaqi viha nenta kaiqa taiqake *nampa* 7 entaqaa te Noravano ni Variqavano variainarara irihama auraara variate, tura. (Katu Varora 20:8-10)

Kotiva minti turara ti, Iutaa nora vaiinti vika vi entara irihama vika nai irike airi uva voqavata tiva vatora. Vovano vika uva raqakovaro vika arara voqamakero itomanta vaura.

Vika okara mintima vauvaro Ihuva anirero Maara Entaqaa aiha vuka vo vaiinti vo vaiinti koqema kora. (Maaki 1:21-27, 29-31, 3:1-6; Ruki 13:10-17, 14:1-6; Ioni 5:1-9, 9:1-14)

Ihuva tiharo, Ti Vataini Vatatai Vaiintika ti noraiqama kaimanta te Maara Entaqaa raqiki vauraukara ti, te homa vi entaraqaa tenta varaataaina kaiqara vararerave, tura. (Maaki 2:28)

Maara okara tu vaiintika

Maara okara tu vaiintika vika Kotiva Mosira amu uvvara Iutaa vaiinti nahenti tiva nimi vaura. Vi entara kia vuku ruqutuaina *maasiniva* vau entara vi vaiintinavuka Kotira vukuqi taveha qaraaka vuku kauquqohai autuke vaura.

Maara okara tu vaiintika airitahaa unaqaraiqama keha Kotira kaiqa vare vaurara tiro, Ihuva vikaqaa uva vatora. (Matiu 23)

Manaa (Ioni 6:31,49; Hiparu 9:4; Qoqaiqama Kora 2:17) Haaru Isareri vatanaaka Isipiqihai ruqemake 40 ihiara qumina vata kia karavata vaunaini ni vaura. Vi entara Kotiva vika kara nimura. Vi karara vira autu *manaave* tura. Vi karava naaruvalhairo ekaa enta vataqaa hiqintiro Maara Entaqaaqai kia hiqinti vaura. *Mana* avano vataqaa hiqintumanta vaiinti nahenti vira oru nuntu keha ne vaura. (Katu Varora 16:13-36)

Naavu

Iutia vatanaaka naavu vaireva, kia tinavu naavu voqaara vaura. Mini kia nora aaqu ntunaini vika naavu kaqake naavu qiata tanuqamake autuke vatora. Naavu qiata mintima vaumantara ti, vika homa naavuqaa vaarinteha vaura.

(Maaiki 2:4; Kaiqa Varora 10:9)

Parasi vaiinti

Parasi vaiinti vika Iutaa avutaqiqi vaumanta qaqi vaiinti nahenti vikara nora vaiintive ti vaura. Vika maara okara ti vau vaiintika vohaa vaiha kaiqa varora. Vika kankomake Kotiva Mosirara tivato uvvara iri vauka vaiinti nahenti tiva nimihia vi uvvara iriqi vuate ti vaura. Miti tiva nimihavata, vika nái irike vato uvaravata vaiinti nahenti tiva nimi vaura. Vikaqihai airitahaa nái mahuta tivakeha tenavuqai koqe vaiintima vauro ti vaura. Vika unaqaraiqamake tenavu Kotira uva iri vauraukave tivakeha, vaiinti nahenti nivuqaa koqemake niha vika tauvaqaini qoraiqama nimiteraraqai iri vaura.

(Matiu 23:13-19; Ruki 7:39, 11:42-43, 18:9)

Vi vaiintika Ihura aruke aarara rantaqai vi vaura. (Maaiki 3:6)

Sameria Iutia vata vauvaro Sameria vata vira tataaqa vaura. Sameria vatanaaka vika kia Iutaa taraukama vaura. Vika vo vatanaa nahenti oru vare ani vare iha hampi vaukama vaura. Mintima vaumanta Iutaa tarauka Sameria vatanaaka qoririma nimitora.

Sataaniva

Sataaniva vaana avuhainaavama vairo. Viva Kotira naavutaavama vairo.

Ihuva Sataanirara ti navutaavave tiro (Matiu 13:39)

Viva vaiinti aruke vaivave (Ioni 8:44)

Viva una uvaqai ti vaivave (Ioni 8:44)

Viva vaiinti taiqa kareva auti vairo (1 Pitaa 5:8)

Ne Sataanira vataake kempukaiqamake raquqi vivaro viva ni mini kero aiqu aututero kantama vuanaro. (Iemi 4:7)

Satiusi vaiinti Satiusi vaiinti vika Iutaa avutaqiqi vaumanta vaiinti nahenti vikara nora vaiintive ti vaura. Vika airi monu vate vauka vaiha vika airitahaa Iutaa Kanasoruqi vaura. Vika vatainai vau haikarara noraiqaake iriha kia Kotirara noraiqaake iri vaura. Vika tiha, Vaiintivano qutu viro kia qaiqaa ho himpuanarove, ti vaura. (Maaiki 12:18) Vika vo vaka vo vaka Parasi hampata tiriroriha vaura. (Kaiqa Varora 23:6-7)

Takisi vare vau vaiintika

Takisi vare vau vaiintika vika Iutaa vaiinti vaiha oru Romeni vatanaaka kaiqa vara nimite vauka vaura. Vi entara Romeni vika Iutaa vatanaaka naatarake vikaqaa raqiki vaumanta takisi vare vau vaiintika Romeni vika kaiqa vara nimite vaumantara ti, Iutaa vika vikara tiha, Ne tinavu navutaaka kaiqa vare variakama variavo, tivake vika qoririma nimite vaura.

Takisi vare vau vaiintika airitahaa tiha, Voqavata monu timiate, tivakeha qumina voka monu vare vaura. Vika takisi varakeha hini Kamaanira ami hini vika nái varora. (Ruki 19:1-9)

Uaini tava Iutaa vika nái naahoqi *uaini* uti vaura. Vika *uaini* naaqunta ututovaro qampiqeharo kairiqaa uri viharo tava ire vaura. Koqemakero tava iraarire ti, kopi kaara higaantemake, vira kaaravata hiqe vaura. Vira tava hiqike tatike nora viraqohai *uaini* namari auti vaura.

Vaata toqaara

Iutaa vika okara mintimama vairo: Qorainti vainti vo vataairaro 8 enta aitarairaro vira vaata toqama amitaanarove. Kotiva Eparahaamirara minti turara ti, Iutaa vika vi uvvara iriqi vi vaura. (Okara 17:9-14)

Mintimake toqakaaina vaiintira viraraqai vika Iutaa vaiintive ti vaura. Vo vatanaaka Iutaa vikara tiha, Vika vaata toqakaakave, ti vaura.

Poruva Karesia vatanaakara tiharo, Vaata toqake vai okaravave, kia vaata toqake vai okaravave, vi okarava qumina haikaqaima vairo. Tinavu avu aato muntukavano

Uva okara Vaata toqaara

1032

Uva okara Vaata toqaara

qaraakaiqama vuaina okarava, vi okaravama nora haikama vaivo, tura. (Karesia
6:15)